

BIBLE

BAIBULI KACIL

Kumam Language

Kumam - All Bible

Old Testament			
		Nakum	1.475
Ageini	3	Abakuk	1.479
Yai	98	Sepania	1.483
Jolebi	176	Agai	1.487
Wel	230	Sakaria	1.490
Iswilia	302	Malaki	1.505
Yosua	368	New Testament	
Jongolkop	413	Matayo	1.510
Lusi	457	Marako	1.578
1 Samuel	463	Luka	1.621
2 Samuel	521	Yokana	1.694
1 Abakai	570	Tice	1.747
2 Abakai	627	Joroma	1.813
1 Iyutun	681	1 Jokorinti	1.841
2 Iyutun	738	2 Jokorinti	1.868
Esera	801	Jogalatia	1.886
Nekemia	819	Joepeso	1.896
Esita	846	Jopilipi	1.906
Yobu	860	Jokolosai	1.913
Sabuli	915	1 Jotesalonika	1.919
Agole	1.045	2 Jotesalonika	1.925
Ngarab kop	1.091	1 Temeseo	1.929
Wer amit	1.105	2 Temeseo	1.937
Isaya	1.113	Tito	1.942
Yeremia	1.205	Epirimoni	1.946
Koko ka Yeremia	1.305	Iburanian	1.948
Esekeri	1.314	Yakobo	1.969
Danieri	1.403	1 Petero	1.976
Kosea	1.430	2 Petero	1.984
Yoweri	1.444	1 Yokana	1.989
Amosi	1.450	2 Yokana	1.996
Obadia	1.461	3 Yokana	1.997
Yona	1.463	Yuda	1.999
Mika	1.467	Gianyut	2.001



Kumam - All Bible

(Baibuli I Leb Kumam)

Ageini

Ageini 1

Epone kame Kocweo kede Piny

- ¹I agege kakame Rubanga ocweo kede malo kede lobo,
- ²lobo oudo onyobere atatai abongo gimoro iye, doko colo oudo oumo pii atut, di yamo kame buko wok kibus Rubanga oudo beo ki wi pii.
- ³Di Rubanga oko waco be, “Poore lero bed tie” ; di lero oko bedo tie.
- ⁴Di Rubanga oko neno be lero oudo ber; di en eko poko lero kede colo.
- ⁵Rubanga oko lwongo lero be “Iceng” di eko lwongo colo be “Iwor.” Piny oko yuto, odiko oko tuno, manono oko bedo ceng me agege.
- ⁶Rubanga oko waco be, “Gi koyarere miero bed tie i diere me pii, di eko poko pii kede pii.”
- ⁷Aso, Rubanga oko cweno gi koyarere di eko poko pii atie piny me gi koyarere nono kede pii kame tie malo mere. Eko timere kamanono.
- ⁸Rubanga oko lwongo gi koyarere nono be “Edou.” Piny oko yuto, odiko oko tuno, manono oko bedo ceng me are.
- ⁹Rubanga oko waco be poore pii atie piny me edou cokere karacel di lobo kakotuo ko neno. Eko timere kamanono.
- ¹⁰Rubanga oko lwongo kakotuo be “Lobo” di eko lwongo pii kocokere karacel be “Name.” Rubanga oko neno be oudo eber.
- ¹¹Rubanga oko waco be, “Lobo poore tui yen kede lum: giapita kame nyako nyige kede kame nyako anyakini me epone dedede kame nyige tie iye.” Eko timere kamanono.
- ¹²Yen oko tui i lobo, giapita me epone dedede kede yen kame nyako anyakini kame tie kede nyige. Di Rubanga oko neno be manono oudo ber.
- ¹³Piny oko yuto, odiko oko tuno, manono oko bedo ceng me adek.
- ¹⁴Di Rubanga oko waco be, “Poore gimogo arieny bed tie i edou koyarere pi poko iceng kede iwor; doko miero kibed gianena kame nyuto kare kede ceng kede mwakini,
- ¹⁵doko miero gin kibed lero kame tie i edou koyarere pi mino lero i lobo.” Eko timere kamanono.



¹⁶Rubanga oko timo gikame rieny are adongodongo; en eko keto gikame rieny adwong kalamo pi pugo iceng, kede gikame rieny momot mere pi pugo iwor; eko timo acerin da.

¹⁷Rubanga oko keto gi i edou koyarere pi mino lero i lobo;

¹⁸pi pugo iceng kede iwor, kede pi poko lero kede colo. Rubanga oko neno be oudo eber.

¹⁹Piny oko yuto, odiko oko tuno, manono oko bedo ceng me ongwon.

²⁰Di Rubanga oko waco be, “Pii miero bed tie kede gi atat akuo, kede da winy kame por i malo bed tie i wi lobo.”

²¹Aso, Rubanga oko cweno leini adongodongo kame bedo i name, kede giakuo me egere dedede kame twero ot, kame oko pong i yi pii, kede winy me egere dedede kame tie kede bwom gi. Rubanga oko neno be manono oudo ber.

²²Rubanga oko lamo negi winyo di ewaco be, “Nywalunu ikounu nyai ipongunu pie me name, kede winy da nyai i wi lobo.”

²³Piny oko yuto, odiko oko tuno, manono oko bedo ceng me kany.

²⁴Rubanga oko waco be, “Lobo miero bed tie kede gikame kuo me egere dedede: dok kede gikame liao alia, kede leini me obar me egere dedede kame tie i wi lobo.” Eko timere kamanono.

²⁵Rubanga oko cweno leini me obar me egere dedede kame tie i wi lobo, kede dok me egere dedede, kede gi dedede me egere apapat kame liao alia i piny. Rubanga oko neno be manono oudo ber.

²⁶Di Rubanga oko waco be, “Otimunu dano i cal wa; doko miero gin kired kede loc i kom deksam, kede i kom winy me wi yamo, kede i kom doke, kede i kom leini me obar dedede kame tie i wi lobo, kede jame me egere dedede kame liao alia i piny.”

²⁷ Aso, Rubanga oko cweno dano, ecweo gi i cal mere ka Rubanga; ecweo gi icuo kede dako.

²⁸Rubanga oko lamo negi winyo, di eko waco negi be, “Nywalunu ikounu nyai, di ikounu pongo lobo, ipugenu da; bedunu kede loc i kom deksam kede i kom winy me wi yamo, kede i kom giakuo dedede kame twero ot i wi lobo.

²⁹Ango atieko mino wu giapita dedede kame nyako nyige kame tie i wi lobo, kede yen dedede kame tie kede nyige i anyakini gi; ibinunu camo gi.

³⁰Do leini dedede kame tie i wi lobo, kede winy dedede kame tie i wi yamo, kede jamini dedede kame liao alia i wi lobo, kede gi dedede kame tie kede wei me kuo, atieko mino gi egere me pote dedede me acama gi.” Eko timere kamanono.

³¹Rubanga oko neno gi dedede kame oudo etieko timo, i ateni oudo kibeco twatwal. Piny oko yuto odiko oko tuno, manono oko bedo ceng me kanyape.



Ageini 2

¹Epone noni en kame bin kotieko cweno kede malo kede lobo, kede twon jamini dedede kame tie i yi gi.

² Di ceng me kanyaare otuno, Rubanga oudo otieko do tic mere, en eko wei i ceng me kanyaare ki tice kame oudo ebedo timo.

³Aso, Rubanga oko mino ceng me kanyaare winyo, eko mine ebedo ceng acil, piento en ewei i ceng nono ki tice kame oudo en ebedo timo me cwec.

⁴Manoni en epone kame malo kede lobo ocakere kede i kare kame kocweo gi kede.

Poto kame tie Eden

Kakame Rwot Rubanga ocweo kede lobo kede malo,

⁵yen me obar oudo pwodi likame tie i wi lobo, doko oudo likame tie kodi moro kotieko tui, pien Rwot Rubanga oudo pwodi likame omio kot ocwei i wi lobo, doko dano kame puro lobo da oudo pwodi li,

⁶do pii oudo wok ki piny di eko bido wi lobo dedede.

⁷ Di do Rubanga oko kwanyo apua me lobo eko cweno kede dano, eko kuto i ume wei kame mio kuo, di dano oko doko gikame kuo.

⁸Di Rwot Rubanga oko keto poto i Eden, i bad tetu kide, di eko keto iye dano kame en ecweo.

⁹ Rubanga oko mino yen dedede kame neno beco, kede kame ber me acama otui i lobo; i dier poto oudo tie iye yat kame mio kuo, kede yat kame mio ngec me gikame ber kede gikame rac.

¹⁰Ecilet oudo mol ki Eden kame bido poto nono; ki kanono en epokere eko doko icileta ongwon.

¹¹Me agege nyinge Pison, en emol eluko lobo me Kabila lung, kakame saabu tie iye;

¹²saabu me lobo nono ber; odok angwe kur kame kolwongo be deliam kede kide me wel amalo kame kolwongo be onik da tie iye.

¹³Ecilet me are nyinge Gikon, en emol eluko lobo me Kus lung.

¹⁴Ecilet me adek nyinge Tigiris, en kame emol eoto i bad tetu kide me Asiria. Ecilet me ongwon mere nyinge Eupurate.

¹⁵Rwot Rubanga oko keto dano i poto me Eden pi pure kede pi gwoke.

¹⁶Rwot Rubanga oko ciko dano be, “In itwero camo anyakini dedede me yen kame tie i poto;

¹⁷do likame ibino camo anyakini me yat kame mio ngec me gikame ber kede gikame rac, pien ceng kame ibino came kede in ibino to.”



¹⁸Di Rwot Rubanga oko waco be, “Likame eber ne dano bedo kene; abino timo ne ngakonye kame poore ne.”

¹⁹Rwot Rubanga oko kwanyo lobo eko timo kede leini dedede me obar kede winy dedede me wi yamo, di en eko kelo gi but dano pi neno epone me cako negi nying gi; nying kame dano oko mino gikame kuo acelacel oko doko nyinge.

²⁰Dano oko mino leini me paco dedede nying gi, kede winy me wi yamo, kede leini dedede me obar; do dano oudo likame tie kede ngakonye kopooore ne.

²¹Aso, Rwot Rubanga oko mino dano onino kitek, di eko kwanyo esep mere acel, eko mwono kare kede ringokom.

²²Esep kame oudo Rwot Rubanga okwanyo ki kom dano nono eko timo kede dako di eko kele but dano.

²³Di dano oko waco be, “Nan do man en cogo me cogere na, kede ringo me ringokoma; kobino lwonge be dako, pien kokwanye ki kom icuo.”

²⁴Pi mano, icuo weko papa mere kede toto mere eko moko i kom dako mere, di gin kiko doko kom acel.

²⁵Icuo kede dako oudo bedo nono, do likame lewic oudo mako gi.

Ageini 3

Dub ka Dano

¹Twol oudo riek kalamo leini me obar dedede kame Rwot Rubanga oudo otimo. En eko penyo dako be, “Ateteni Rubanga owaco ni be kur icami anyakini me yat moro kame tie i pototo?”

²Dako oko dwoko ne twol be, “Wan otwero camo anyakini dedede kame tie i pototo noni;

³do Rubanga owaco be kur ocami anyakini me yat kame tie i dier pototo, akadi mule da; ka otimo kamanono, obino to.”

⁴Do twol oko dwoko ne dako be, “Wun likame ibinunu to;

⁵pien Rubanga ngeo be ka wun icamunu anyakini me yat no, wangu bino yabere, di ikounu doko cal bala Rubanga, ikounu bino ngeno poko gikame ber kede gikame rac.”

⁶Aso, kakame dako oneno kede be anyakini me yat nono oudo ber me acama, doko oudo ecil ki wange, kede da be yat nono oudo mio dano doko riek, en eko ngwedo anyakini mere eko camo, eko mino cware da mogo di eda eko camo.

⁷Di do wang gin dedede oko yabere kiko ngeno be oudo kitie nono; kiko kuno pote me yat epigi kiko rwano i pier gi.

⁸Otieno me ceng nono di piny okwei, gin kiko winyo di Rwot Rubanga oudo tie ot ki pototo, di gin kiko pwono ne Rubanga i dier yen me pototo.



⁹Do Rwot Rubanga oko lwongo icuo di eko penye be, “In itie tuai?”

¹⁰En eko waco be, “Ango awinyo mor me tieni i poto di lworu oko maka, pien oudo atie nono, omio ako pwono.”

¹¹Rubanga oko penye be, “Ngai owaco ni be itie nono? Mam in icamo anyakini me yat kame ango aciki be kur icami?”

¹²Icuo oko dwoko be, “Dako kame in imia pi bedo keda en komia anyakini me yat nono, di ako camo.”

¹³Di Rwot Rubanga oko waco ne dako be, “Nyo ine kame in itimo ni?” Dako oko dwoko be, “Twol en kongala di ako camo.”

Rubanga Ongolo Kop

¹⁴Di Rwot Rubanga oko waco ne twol be, “Pi kite kame itimo kede man, in kolami i kom leini dedede kede i kom giakuo dedede me obar; in ibino donyo liao kede kori, doko ibino camo apua i kare me kuo ni lung.

¹⁵Abino mino ading bedo tie i diere nin kede dako, kede i diere me ikwae nin kede mege; gin kibino nyonyoto wii, ida ibino totongo atitinyo gi.”

¹⁶Di eko waco ne dako be, “Abino medo ni aramo i kare me nywal; ibino nywalo idwe kede twon aramo. Bed bala kamanono da, in pwodi cunyi bino mito cwari, doko en ebino pugi.”

¹⁷Eko waco ne icuo be, “Pi kite kame in iwinyo kede dwan dako nin di iko camo anyakini me yat kame oudo ango agengo ni camo, kolamo lobo pi in; ibino camo gikame wok kiye ka itimo tic kede kwok i kare me kuo ni lung.

¹⁸Okuto kede doi bino tui iye; doko ibino camo giapura me poti.

¹⁹Kwok ni en kame bino mini iudo cam paka tuno in dok i lobo, pien kokwanyi kiye; in ibedo apua doko ibino dok i apua.”

²⁰Icuo oko cako ne dako mere nyinge be Keba, piento en ebedo toto me jo dedede.

²¹Rwot oko timo egoe me lau ne Adamu kede dako mere, eko ngapo negi.

Rubanga Oriamo Adamu kede Keba ki Poto

²²Di Rwot Rubanga oko waco be, “Neningo, dano otieko doko cal bala wan, engeo gikame ber kede gikame rac; nan doko eromo ngwedo anyakini me yat kame mio kuo di eko camo, di eko bino bedo kuo nakanaka.”

²³Pi mano, Rwot Rubanga oko riame tenge ki poto me Eden, pi ot puro lobo, en gikame kokwanye kiye.

²⁴En eriamo dano tenge di eko keto cerubim kede epima kame liel mac di ewire pi daro yongayo kame donyo kakame yat kame mio kuo oudo tie iye.

Ageini 4



Kain Oneko Abel

- ¹Kikano Adamu oko yac ne dako mere Keba. Keba oko nywalo Kain di eko waco be, “Rwot okonya emia audo atin awobi.”
- ²Alubo mere en eko nywalo omin mere Abel. Abel oko bedo ngagwok romini, do Kain oko bedo ngapur.
- ³Ingei kare moro Kain oko kelo ne Rwot giayala me cam kame oudo epuro,
- ⁴ do Abel oko neko romini kame oudo obedo idwe kao, di eko mino Rwot giayala me kakamio. Cuny Rwot oko bedo yom kede Abel kede giayala mere,
- ⁵do eko dagi Kain kede giayala mere. Aso, cuny Kain oko wang di cal me nyime oko lokere.
- ⁶Rwot oko penyo Kain be, “Cunyi owang pinyo, doko pinyo komio cal me nyimi olokere?”
- ⁷Ka in itimo kiber, mam ango abino gami? Do ka likame itimo kiber, dub tie buto i dog ekeko nin, cunye keto liklik i komi, do miero ibwone.”
- ⁸ Di Kain oko waco ne omin mere Abel be, “Ber kong ooti i potu.” Kakame oudo kitie do kede i potu, Kain oko cako bungo omin mere di eko neko.
- ⁹Di Rwot oko penyo Kain be, “Omini Abel tie tuai?” En eko dwoko be, “Ango likame angeo; benyo, oudo ango adoko ngat kame gwoko omina?”
- ¹⁰ Di Rwot oko waco be, “Nyo kame in itimo? Neningo, remo ka omini tie kok buta ki lobo!”
- ¹¹Nan do kotieko lami, likame bobo ibino karuno puro lobo; lobo nono en kongamo doge pi gamo remo ka omini kakame in ineke kede.
- ¹²Ka in ipuro lobo likame bobo ebino nyako ni cam, in ibino bedo dano koringo kop di irimo piny arima i wi lobo.”
- ¹³Kain oko waco ne Rwot be, “Alola na noni dwong likame atwero kanyakino!”
- ¹⁴Tin in itieko riama tenge ki lobo noni, likame bobo abino neeno i wangi; abino bedo dano koringo kop di arimo piny arima i wi lobo; ngat kame riamo keda bino twero neka.”
- ¹⁵Rwot oko waco ne be, “Li! Ka ngatamoro oneko Kain, ango abino culo kwor mere tien kanyaare.” Di Rwot oko keto alama i kome tetekenye ngat kame ude kur neke.
- ¹⁶Di do Kain oko yai tenge kibun Rwot eko ot bedo i lobo me Nod, tetu kide me Eden.

Ikwaee ka Kain

- ¹⁷Kain kede dako mere oko nywalo awobi di kiko cako nyinge Enoka. Kain oko gero bomba eko cako ne bomba nono nying wode Enoka.



¹⁸Enoka oko nywalo Irad, Irad oko nywalo Mekujael, Mekujael oko nywalo Metusael, Metusael oko nywalo Lamek.

¹⁹Lamek oko nyomo mon are, Ada kede Sila.

²⁰Ada oko nywalo Jabal; Jabal bin oko bedo kwaru me jo dedede kame oudo bedo i eema di kitie kede dok kede diegi kede romini.

²¹Omin mere oudo nyinge Yubal; en oudo ebedo kwaru me jo kame oudo goo arigirigi kede kame kuto bilo.

²²Sila oko nywalo Tubal Kain, ngat oko donyo teto egere me jamini dedede kame kotimo kede nyonyo ayon kede buronsi. Amin me Tubal Kain oudo obedo Naama.

²³Lamek oko waco ne mon mege be, “Ada kede Sila, winyunu dwana; wun mon ka Lamek, winyunu kop kame atie waco: ango atieko neko awobi moro, aneke pien oudo ewana.

²⁴ Kame koculo kwor ka Kain tien kanyaare, ateteni kobino culo kwor ka Lamek tien ot kanyaare kiwie kanyaare.”

²⁵Adamu oko bobo yac ne dako mere; dako mere oko nywalo atin awobi di eko cako nyinge Set, piento dako nono oudo owaco be, “Rubanga omia bobo atin ace kawang Abel, pien Kain oneke.”

²⁶Set da oko nywalo atin awobi di eko cako nyinge Enosi. I kare nono jo oko cako pako nying Rwot.

Ageini 5

Ikwae ka Adamu

(1 lyutun 1.1-4)

¹ Man en iwandik kame nyuto nying ikwae ka Adamu. Kakame bin Rubanga ocweo kede jo, en bin ecweo gi i cal mere.

² En bin ecweo gi icuo kede dako eko mino gi winyo, di eko lwongo gi be “Jo” i ceng kame en ecweo gi kede.

³Kakame Adamu oromo kede mwakini tol acel kede ot adek (130), en eko nywalo atin awobi kame oudo cal kede en; eko cako nyinge Set.

⁴Ingei nywalo Set, Adamu oko bobo bedo kuo pi mwakini tol kanyauni (800). En eko bobo nywalo idwe ace awobe kede anyira.

⁵Pi mano, Adamu bin obedo kuo pi mwakini tol kanyangon kede ot adek (930) di do eko to.

⁶Kakame Set oromo kede mwakini tol acel kede kany (105), en eko nywalo wode Enosi.

⁷Ingei nywalo Enosi, Set bobo oko medo bedo kuo pi mwakini tol kanyauni kede kanyaare (807), di eko bobo nywalo idwe ace awobe kede anyira.



- ⁸Pi mano, Set obedo kuo pi mwakini tol kanyangon kede tomon kiwie are (912) di do eko to.
- ⁹Kakame Enosi oromo kede mwakini ot kanyangon (90), en eko nywalo wode Kenan.
- ¹⁰Ingei nywalo Kenan, Enosi oko bobo bedo kuo pi mwakini tol kanyauni kede tomon kiwie kany (815), di eko bobo nywalo idwe ace awobe kede anyira.
- ¹¹Pi mano, Enosi obedo kuo pi mwakini tol kanyangon kede kany (905) di eko to.
- ¹²Kakame Kenan oromo kede mwakini ot kanyaare (70), en eko nywalo wode Makalalel.
- ¹³Ingei nywalo Makalalel, Kenan oko bobo bedo kuo pi mwakini tol kanyauni kede ot ongwon (840), di eko bobo nywalo idwe ace awobe kede anyira.
- ¹⁴Pi mano, Kenan obedo kuo pi mwakini tol kanyangon kede tomon (910) di eko to.
- ¹⁵Kakame Makalalel oromo kede mwakini ot kanyape kiwie kany (65), en eko nywalo wode Yared.
- ¹⁶Ingei nywalo Yared, Makalalel oko bobo bedo kuo pi mwakini tol kanyauni kede ot adek (830), di eko nywalo idwe ace awobe kede anyira.
- ¹⁷Pi mano, Makalalel obedo kuo pi mwakini tol kanyauni kede ot kanyangon kiwie kany (895) di eko to.
- ¹⁸Kakame Yared oromo kede mwakini tol acel kede ot kanyape kiwie are (162) en eko nywalo wode Enoka.
- ¹⁹Ingei nywalo Enoka, Yared oko bobo bedo kuo pi mwakini tol kanyauni (800), di eko nywalo idwe ace awobe kede anyira.
- ²⁰Pi mano Yared obedo kuo pi mwakini tol kanyangon kede ot kanyape kiwie are (962) di eko to.
- ²¹Kakame Enoka oromo kede mwakini ot kanyape kiwie kany (65), en eko nywalo wode Metusela.
- ²²Ingei nywalo Metusela, Enoka oko nywak kede Rubanga pi mwakini tol adek (300), di eko nywalo idwe ace awobe kede anyira.
- ²³Pi mano, Enoka obedo kuo pi mwakini tol adek kede ot kanyape kiwie kany (365).
- ²⁴Enoka oudo obedo nywak kede Rubanga i kare me kuo mere lung, di do eko rwenyo, pien Rubanga oudo otieko tere.
- ²⁵Kakame Metusela oromo kede mwakini tol acel kede ot kanyauni kiwie kanyaare (187), en eko nywalo wode Lamek.
- ²⁶Ingei nywalo Lamek, Metusela oko bobo bedo kuo pi mwakini tol kanyaare kede ot kanyauni kiwie are (782), di eko nywalo idwe ace awobe kede anyira.



²⁷Pi mano, Metusela obedo kuo pi mwakini tol kanyangon kede ot kanyape kiwie kanyangon (969) di eko to.

²⁸Kakame Lamek oromo kede mwakini tol acel kede ot kanyauni kiwie are (182), en eko nywalo wode;

²⁹eko cako nyinge Nua, di ewaco be, “Ki lobo kame Rubanga olamo, atin noni bino kelo ne wa wei i tice wa atek dedede.”

³⁰Ingei nywalo Nua, Lamek oko bobo bedo kuo pi mwakini tol kany kede ot kanyangon kiwie kany (595), di eko nywalo idwe ace awobe kede anyira.

³¹Pi mano, Lamek obedo kuo pi mwakini tol kanyaare kede ot kanyaare kiwie kanyaare (777) di eko to.

³²I kare kame Nua oromo kede mwakini tol kany (500), en oudo enywalo awobe adek, Sem, Kam kede Yapesi.

Ageini 6

Dub ka Dano

¹ Kakame jo onyai kede i lobo di kiko nywalo anyira,

²awobe ka Rubanga oko neno be kicil, di kiko yero kame cuny gi omito oko doko mon gi.

³Di Rwot oko waco be, “Tipo na kame mio kuo likame bino bedo i kom jo nakanaka, pien gin kibedo kom akoma; likame kibino kuo kalamo mwakini tol acel kede ot are (120).”

⁴I kare nono, kede i kare kolubo, itucio me jo oudo tie i wi lobo; bin konywalo gi kakame awobe ka Rubanga oribere kede anyira kobedo anywali me jo di kiko nywalo negi idwe. Magonogi bin obedo jo me aura doko kame nying gi iruo me kare kasek.

⁵Rwot oko neno be dub ka dano oudo dwong twatwal i wi lobo, doko da cuny gi oudo tie kede tam areco i kare dedede.

⁶Rwot oko paro be koto oudo likame ecweo dano i wi lobo, manoni oko wango cunye twatwal.

⁷Aso, Rwot oko waco be, “Abino wearo tenge ki wi lobo jo kame ango acweo, jo karacel kede leini kede gikame liao alia kede winy me wi yamo, pien likame cunya obedo yom pi cweno gi.”

⁸Do Rwot cunye oko bedo yom kede Nua.

Nua Oyomo Cuny Rubanga

⁹Man en itatam i kom Nua. Nua oudo obedo dano kopooore, kame oudo likame tie kede raco moro i kare mere; Nua oudo nywako kede Rubanga.

¹⁰Nua oudo tie kede awobe adek, Sem, Kam kede Yapesi.



- ¹¹Do jo dedede oudo obedo jo areco i nyim Rubanga, doko lobo oudo opong kede tim me gero.
- ¹²Rubanga oko neno wi lobo eko udo be oudo epong kede raco, pien jo dedede oudo tie kede tim areco i wi lobo.
- ¹³Rubanga oko waco ne Nua be, “Ango atieko moko tam na pi muducaro jo dedede, pien gin kimio lobo opong kede tim me gero; nan do ango ayaro muducaro gi karacel kede lobo.
- ¹⁴Gur yee amaki me ebao aber; ngongolo isengena iye di iko puco yie kede ngee kede emina.
- ¹⁵Ipoore cwene kaman: boro mere poore bedo puti tol ongwon kede ot kany (450), laco mere puti ot kanyaare kiwie kany (75), kede boro mere malo puti ot ongwon kiwie kany (45).
- ¹⁶Gur wi yee nono di iko weko kakatwolo me puti acel kede dul yai ki wi apama mere; ket ekeko i ngete; gere di etie goropa adek malo.
- ¹⁷Pien ango ayaro kelo alele me pii i wi lobo pi muducaro jame dedede akuo; gi dedede kame tie i wi lobo bino to.
- ¹⁸Do ango abino timo isikan na kede in, di wun ikounu bino donyo i yi yee, in, awobe ni, dako ni kede mon me awobe ni.
- ¹⁹Aso, ki jamini dedede akuo, ki gi dedede kame tie kede ringokom gi, ibino kwanyo are are, icuo kede dako, iko keto gi i yi yee.
- ²⁰Ibino kwanyo iko tero i yi yee icuo kede dako me winy me egere acelacel, kede me leini me egere acelacel, kede me egere acelacel me gi dedede kame liao alia, pi mino gi dong kuo.
- ²¹Doko da teri egere me cam acelacel iko kano gi, tetekeny kiko bino bedo giacama ne in kede ne gin.”
- ²²Nua oko timo kamanoni; etimo gi dedede kame Rubanga ociko ne timo.

Ageini 7

Alele Adwong

- ¹Di Rwot oko waco ne Nua be, “Donyi i yi yee, in karacel kede jo me odi dedede, pien ango atieko neno be in keni en kame ipoore i nyima kikom lwak me kare kanataman.
- ²Ter karacel kedi leini kanyaare acuo, kede kanyaare amon me egere acelacel kalikame obedo leini me kwere, kede leini kobedo me kwere iteri icuo kede dako me egere acelacel.
- ³Ter da winy me wi yamo acuo kanyaare kede amon da kanyaare me egere acelacel, pi mino egere gi dong di kuo i wi lobo lung.



- ⁴Pien ingei ceng kanyaare ango abino cwano kot i wi lobo pi iceng ot ongwon kede iwor da ot ongwon, di ako bino wearo ki wi lobo jamini akuo dedede kame acweo.”
- ⁵Di Nua oko timo gi dedede kame Rwot oudo ociko ne pi timo.
- ⁶Mwakini me dongo ka Nua oudo tie 600 i kare kame alele oumo kede wi lobo.
- ⁷Di Nua kede awobe mege kede dako mere kede mon me awobe mege oko donyo i yi yee pi bwot ki alele.
- ⁸Kikom leini kalikame obedo me kwer kede leini kobedo me kwer, kede winy kede gi dedede kame liao alia i piny,
- ⁹are are, icuo kede dako en odonyo i yi yee kede Nua, bala kame Rubanga oudo ociko kede Nua.
- ¹⁰Kikano ingei ceng kanyaare alele oko bino i wi lobo.
- ¹¹I mwaka me tol kanyape (600) me kuo ka Nua, i duwe me are, i ceng me tomon kiwie kanyaare (17) me duwe, i ceng nono wang pie kame tie i lobo oko tutucun, di oko yabo dirisan me malo.
- ¹²Kot oko cwei i wi lobo pi iceng kede iwor ot ongwon (40).
- ¹³I ceng nono Nua kede awobe mege, Sem kede Kam kede Yapesi kede dako ka Nua, kede mon adek me awobe mege oko donyo i yi yee.
- ¹⁴Gin kidonyo karacel kede leini me obar me egere dedede, kede leini me paco me egere dedede, kede gi dedede kame liao alia i piny, kede winy dedede me egere apapat, gi dedede kame tie kede bwom gi.
- ¹⁵Gi dedede kame tie kede ringokom di kikuo oko donyo are are i yi yee karacel kede Nua.
- ¹⁶Cuo kede mon me gi dedede kame odonyo i yi yee oko donyo bala kame oudo Rubanga ociko kede Nua; di do Rwot oko cego gi i yi yee.
- ¹⁷Alele oko meede i lobo pi ceng ot ongwon (40), di pii oko meede, di eko tingo yee malo kakabor kede wi lobo.
- ¹⁸Pii oko cere eko meede pong i wi lobo, di yee oko donyo lemo alema i wi pii.
- ¹⁹Pii oko pong adikinicel paka mwonyo mori dedede abocoboco i wi lobo;
- ²⁰en emedo ameda pong paka kalamo wi mori kede mita kanyaare.
- ²¹Gi dedede kame tie kede ringokom gi di kioto i wi lobo oko to: winy, leini me paco, leini me obar, kede gimogo kame bwote di kinyidinyidi i wi lobo, kede jo dedede;
- ²²gi dedede kame wei di kitie i wi lobo kakatek oko to.
- ²³En ewearo gikame kuo dedede kame oudo tie i wi lobo, jo kede leini kede gikame liao alia, kede winy me wi yamo, en ewearo gin dedede ki wi lobo. Nua kenekene en oko dong, kede jo kame oudo tie kede en i yi yee.



²⁴Pii oko pong i wi lobo pi ceng tol acel kede ot kany (150).

Ageini 8

Ajikini me Alele

¹Do Rubanga oko bedo kede iyutun i kom Nua karacel kede leini me obar kede leini me paco kame en oudo etie kede gi i yi yee. Rubanga oko mino yamo obuko i wi lobo di pii oko dwono.

²Di oko cecego wen pie kame tie piny i lobo kede dirisan kame cwei kot ki malo. Kot oko cok,

³di pii oko donyo matere donyo piny momot pi ceng 150.

⁴I ceng me tomon kiwie kanyaare me duwe me kanyaare mere, yee oko galakin i wi moru me Ararat.

⁵Pii oko meede ameda matere donyo piny, di i ceng me agege me duwe me tomon mere, wi mori oko cako neno.

⁶Ingei ceng ot ongwon (40) Nua oko yabo dirisa me yee kame oudo eguro,

⁷di eko cwano agak. Likame agak oko dwogo, do eko dong por di ewire awira paka tuno pii odwono paka tiek ki wi lobo.

⁸Di en eko cwano awele pi neno kame pii oudo otieko dwono ki wi lobo,

⁹do pi kite kame pii oudo pwodi opongo kede wi lobo omio awele likame oko sobolo udo kakame etwero cibo iye tiene, omio eko por edok. Aso, Nua oko cwano cinge di eko make eko rwake i yi yee.

¹⁰En eko daro pi ceng kanyaare eko bobo cwano awele.

¹¹Awele oko dwogo otieno kede pote apwodi numu me olibeti i doge. Aso, Nua oko ngeno be oudo pii otieko dwono.

¹²En eko bobo daro pi ceng kanyaare eko cwano awele, do awele likame oko dwogo bute atwal.

¹³Kakame Nua oromo kede mwakini 601, i ceng me agege me duwe me acel, oudo pii do otieko dwono ki wi lobo; Nua oko tako wi yee di eko neno be oudo pii do tie tuo ki wi lobo.

¹⁴I duwe me are, i ceng me ot are kiwie kanyaare me duwe, wi lobo oudo otieko tuo.

¹⁵Di Rubanga oko waco ne Nua be,

¹⁶” Wok piny ki yee, in kede dako ni, karacel kede awobe ni kede mon me awobe ni.

¹⁷Wot piny gi akuo me egere dedede kame tie kedi, winy kede leini kede gi dedede kame liao alia i wi lobo, tetekeny kinywal di kiko pongi wi lobo.”



¹⁸Aso, Nua oko wok piny ki yee, en karacel kede awobe mege kede dako mere kede mon me awobe mege.

¹⁹Di do leini dedede, gi dedede kame liao alia, winy dedede, kede gi dedede kame twero ot oko wok piny ki yee di lubere kede egere gi.

Nua Omio Giayala

²⁰Nua oko gero ne Rwot alutari, eko kwanyo egere dedede me leini kede winy kalikame obedo me kwer, di eko wango gi i wi alutari pi bedo giayala awanga.

²¹Kakame Rwot ongweo kede ngwece me giayala oko yomo cunye, en eko waco be, “Likame bobo abino lamo lobo pi tim me dano, pien tam kame tie i cunye dano reco cako di pwodi etitidi; doko likame abino muducaro gi akuo bala kame atieko timo.

²²Tek di piny pwodi tie meede bedo tie, kare bino bedo tie nakanaka me cuno kodi kede me kac. Kare bino bedo tie me ngico kede me lieto, me oro kede me iporo, iceng kede iwor.”

Ageini 9

Isikan kame Rubanga Otimo kede Nua

¹ Rubanga oko mino Nua kede awobe mege winyo di ewaco be, “Nywalunu ikounu nyai, di ikounu pongo lobo.

²Leini dedede me wi lobo kede winy kame por i malo bino lworu wu kede mielkom, karacel kede gikame liao alia i piny, kede aporogo atie i nam; kotieko mino gi i akarunikin wu.

³Gi dedede kame kuo di kioto bino bedo cam wu; doko bala kame oudo amio wu kede egere dedede me gi atui pi bedo me acama, nan da amio wu gi dedede.

⁴ Kenekene likame ipoorenu camo ringo kame tie kede remo iye, pien remo obedo kuo.

⁵Ka ngatamoro oonyo remo wu ango abino culo. Abino culo ka le moro kede ka dano moro oonyo remo wu. Ango abino timo cul i kom dano kame kwanyo kuo me dano ocelu.

⁶ “Ngat kame onyo remo me dano wad gi, eda dano bino onyo remo mere; pien Rubanga ocweo dano i cal mere.

⁷ Do wun, nywalunu ikounu nyai, pongunu wi lobo ikounu rome dedede.”

⁸Di Rubanga oko waco ne Nua karacel kede awobe mege be,

⁹” Ango atie timo isikan na karacel kede wu, karacel kede ikwae wu,

¹⁰karacel kede gikame kuo dedede kame tie kede wu, winy, leini me paco, kede leini dedede me wi lobo kame tie kede wu, gi dedede kowok ki yee karacel kede wu.



¹¹Ango atie timo isikan na kede wu be, likame bobo abino wearo gikame kuo dedede di atio kede alele, doko da likame alele bobo bino bedo tie kabino dudubo wi lobo.”

¹²Rubanga oko waco be, “Man en gianena me isikan kame anga atie timo kede wu, karacel kede gikame kuo dedede kame tie kede wu, pi ikwae dedede me kare me anyim:

¹³anga atieko keto etauloka na i edou pi bedo gianena me isikan nango kede lobo.

¹⁴Kame akelo idoun i wi lobo di etauloka oko neeno i idoun,

¹⁵anga abino yutuno isikan na kede wu, karacel kede gikame kuo dedede kame tie kede ringokom gi; di likame pii bobo kobino timo alele kame muducaro gikame kuo dedede.

¹⁶Kame etauloka onyutere i idoun, anga abino nene ako yutuno isikan kame bedo nakanaka i diere nango kede gi dedede kame kuo i wi lobo, gikame tie kede ringokom gi.

¹⁷Manono en gianena me isikan kame anga atie timo kede gi dedede kame kuo i wi lobo, gikame tie kede ringokom gi.”

Nua kede Awobe Mege

¹⁸Awobe ka Nua kame bin owok ki yee oudo obedo, Sem, Kam kede Yapesi. Kam oudo obedo papa me Kanan.

¹⁹Gin adek nogi oudo kibedo awobe ka Nua; jo dedede me wi lobo oko wok kibun gin nogi.

²⁰Nua ngat kame bin obedo ngapur oko bedo dano me agege pi puro poto me olok.

²¹En eko mato bwini eko mer di eko donyo buto nono i eema mere.

²²Di Kam, papa me Kanan, oko neno di papa mere tie buto nono, di eko ot waco ne imiegu mege are kame oudo tie ooko.

²³Di Sem kede Yapesi oko kwanyo egoe di kiko liero i epepet gi, di kiko donyo dok aulo di kiko umo papa gi ngat kame oudo tie nono. Oudo kiloko wang gi tenge omio likame kiko neno papa gi di oudo etie nono.

²⁴Kakame Nua ocei kede di bwini otiek ki wie, di eko ngeno gikame wode atidi otimo ne,

²⁵en eko waco be, “Ilam mak Kanan; en ebino bedo epasoit apiny atwal atwala but imiegu mege.

²⁶Rwot Rubanga na, mi Sem winyo; emi Kanan bed epasoit mere.

²⁷Akwao Rubanga nyai ne Yapesi kabedo, di eko mine ebidi i eema ka Sem; doko poore Kanan bed epasoit mere.”

²⁸Ingei alele Nua oko bedo pi mwakini 350



²⁹di eko to di etie kede mwakini 950.

Ageini 10

Ikwae me Awobe ka Nua

(1 lyutun 1.5-23)

¹Mage en idwe me awobe ka Nua, Sem, Kam kede Yapesi. Gin bin kiko nywalo idwe di alele otiek.

²Awobe ka Yapesi gin en: Gomer, Magog, Madai, Yaban, Tubal, Mesek kede Tiras.

³Awobe ka Gomer gin en: Asukenas, Ripat kede Togarama.

⁴Idwe ka Yaban gin en: Elisak, Tarusi, Kitim kede Rodanim.

⁵Gin nogo en kame jo abedo i nget nam opokere ki kom gi. Doko gin en ikwae ka Yapesi kame oko pokere bedo i lobere apapat, ngat acelacel kede leb mere, jo me ode, kede atekerin mege.

⁶Awobe ka Kam gin en: Kus, Misiri, Put kede Kanan.

⁷Awobe ka Kus gin en: Seba, Kabila, Sabuta, Rama kede Sabuteka. Awobe ka Rama gin en: Seba kede Dedan.

⁸Kus bin oko nywalo Nimurod ngat kame oko cako bedo twon dano atek me wi lobo.

⁹En bin ebedo ngadwar atek i nyim Rwot. En omio jo maro waco be, “Bed cal bala Nimurod kame bin obedo ngadwar atek i nyim Rwot.”

¹⁰En bin ecako ajakanut mere ki Babel, Ere kede Akad, kame dedede oudo tie i lobo me Sinar.

¹¹En bin eko yai ki piny no di eko ot Asiria eko gero bomban me Ninebe, Rekobot Ir, Kala

¹²kede Resen kame tie i dierediere me Ninebe kede bomba adwong me Kala.

¹³Misiri bin oko nywalo jo me Ludim, Anamim, Lekabim, Naputukim,

¹⁴Paturosime, Kasulukim kede Kaputorim, kakame jo me Pilistia owok kiye.

¹⁵Kanan bin oko nywalo Sidon, atin kao mere, di do Ket lubo.

¹⁶Gin en kame oko wok kibut gi jo Yebu, jo Amor, jo Girigas,

¹⁷jo Kibi, jo Araki, jo Sini,

¹⁸jo Aribadi, jo Semar kede jo Kamat. I cen mere jo me Kanan oko sarakin.

¹⁹Manono oko mino ikor gi onyai yai ki Sidon ot tetu Gerar, kiton tuno Gasa, kede bobo ot tetu Sodoma, Gomora, Adama kede Seboim, kiton tuno Lasa.

²⁰Jo nogi en kobedo ikwae ka Kam, di lubere kede ot ki ot, leb gi, lobere gi kede atekerin gi.



- ²¹Sem da, omin me Yapesi adwong bin oko nywalo idwe awobe. En bin ebedo kwaru me idwe ka Eber dedede.
- ²²Awobe ka Sem gin ige: Elam, Asur, Arupakasad, Lud kede Aram.
- ²³Awobe ka Aram gin ige: Us, Kul, Geter kede Mas.
- ²⁴Arupakasad oko nywalo Sela; Sela oko nywalo Eber.
- ²⁵Eber oko nywalo idwe awobe are. Nying ngat acel bin oko cako be Peleg, pien bin jo me piny opopokun i kare meren. Omin mere bin en Yokutan.
- ²⁶Yokutan bin oko nywalo Alumodad, Selep, Kasarumabet, Jera
- ²⁷kede Kadoram, Usal, Dikula
- ²⁸kede Obal, Abimael, Seba
- ²⁹kede Opir, Kabila kede Yobab. Gin dedede kibedo awobe ka Yokutan.
- ³⁰Lobo kame gin bin kibedo iye cakere ki Mesa di eko ot kiton tuno Separ, adul kame obedo mori mori, kame bin tie tetu kide.
- ³¹Magonogi gin en ikwae ka Sem, di lubere kede ude gi, leb gi, lobere gi kede atekerin gi.
- ³²Magonogi en ude me awobe ka Nua, di lubere kede joakwari gi, atekerin gi; kibun gin da en kame atekerin me lobo onyai kiye di bin alele otiek.

Ageini 11

Gedo Abor me Babilon

- ¹Bin sek jo me wi lobo lung oudo yamo leb acel di kitio kede kope acacal.
- ²I kare kame gin bin kidak kede yai ki tetu kide, gin bin kiko tuno i elet i lobo me Sinar di kiko bedo iye.
- ³Gin bin kiko yamo ken gi ken gi be, “Bianu otimunu matapalin di okounu wango gi kiber.” Di do gin kiko bedo tie kede matapalin akaka kide, kede emina akaka elupe me mwon.
- ⁴Gin kiko do waco be, “Bianu ogerunu bomba kame mako wa, kede gedo abor malo di wie tuno i edou, me wek nying wa bed iruo; ka likame otimunu kamanono, oyarunu asasarun i wi lobo lung.”
- ⁵Rwot oko bino piny pi neno bomba kede gedo abor malo kame jo oudo ogero.
- ⁶Di Rwot oko waco be, “Neningo, gin kibedo jo acel, doko gin dedede kiyamo leb acel; man pwodi obedo acakini me gikame gin kibino timo; likame tie gimoro kame gin kibino mito timo kame bino bwono gi.”
- ⁷Manono oko mino Rwot owaco be, “Bianu ootunu piny di okounu totolo leb gi tetekeyn kur kikaruno niang yamo me jo icegun.”



⁸Aso, Rwot oko sasaro gi ki kuno di kiko sarakin i wi lobo lung di kiko weko gero bomba.

⁹Pi mano, oko do bin lwongo bomba nono be Babilon, pien kuno en kame bin Rwot ototolo kiye leb jo me piny lung, doko kunono en kame bin Rwot oko sarakino kiye jo i wi lobo lung.

Ikwae ka Sem

(1 lyutun 1.24-27)

¹⁰Magi en ikwae ka Sem. Kakame Sem oromo kede mwakini tol acel (100), di do alele oudo otiek odoko mwakini are cen, en eko nywalo Arupakasad.

¹¹Ingei nywalo Arupakasad, Sem oko bedo etieko mwakini tol kany (500); di eko bobo nywalo idwe ace awobe kede anyira.

¹²Kakame Arupakasad odoko kede mwakini ot adek kiwie kany (35), en di eko nywalo Sela.

¹³Ingei nywalo Sela, Arupakasad oko bedo etieko mwakini tol ongwon kede adek (403), di eko bobo nywalo idwe ace awobe kede anyira.

¹⁴Kakame Sela oromo kede mwakini ot adek (30), en eko nywalo Eber,

¹⁵di Sela oko bedo etieko mwakini tol ongwon kede adek (403) ingei en nywalo Eber, di eko bobo nywalo idwe ace awobe kede anyira.

¹⁶Kakame Eber oromo kede mwakini ot adek kiwie ongwon (34), en eko nywalo Peleg;

¹⁷di Eber oko bedo etieko mwakini tol ongwon kede ot adek (430) ingei en nywalo Peleg, di eko bobo nywalo idwe ace awobe kede anyira.

¹⁸Kakame bin Peleg oromo kede mwakini ot adek (30), en eko nywalo Reu;

¹⁹di Peleg oko bedo etieko mwakini tol are kede kanyangon (209) ingei en nywalo Reu, di eko bobo nywalo idwe ace awobe kede anyira.

²⁰Kakame Reu oromo kede mwakini ot adek kiwie are (32), en di eko nywalo Serug.

²¹Reu oko bedo etieko mwakini tol are kede kanyaare (207) ingei en nywalo Serug, di eko bobo nywalo idwe ace awobe kede anyira.

²²Kakame Serug oromo kede mwakini ot adek (30), en di eko nywalo Nakor.

²³Serug oko bedo etieko mwakini tol are (200) ingei en nywalo Nakor, di eko bobo nywalo idwe ace awobe kede anyira.

²⁴Kakame Nakor oromo kede mwakini ot are kiwie kanyangon (29), en eko nywalo Tera.

²⁵Nakor oko bedo etieko mwakini tol acel kede tomon kiwie kanyangon (119) ingei en nywalo Tera, di eko bobo nywalo idwe ace awobe kede anyira.



²⁶Kakame Tera oromo kede mwakini ot kanyaare (70), en eko nywalo Aburam, Nakor kede Aran.

Ikwae ka Tera

²⁷Mage en ikwae ka Tera. Tera bin en Papa me Aburam, Nakor kede Aran; Aran oko nywalo Lot.

²⁸Aran bin oko to i kabedo kame kolwongo be Ur, kame tie i piny me Babilon. En eto di Tera papa mere pwodi tie kuo.

²⁹Aburam kede Nakor bin oko nyomo mon. Nying dako ka Aburam oudo Sarai, do nying dako ka Nakor oudo obedo Milika nyar ka Aran, ngat kame oudo da obedo papa me Isika.

³⁰Sarai bin obedo Adonge; en oudo likame enywalo atin moro.

³¹Tera bin oko tero wode Aburam kede akware Lot wot ka Aran, kede Sarai dako ka wode Aburam. Gin bin kiko yai karacel ki kabedo kame kolwongo be Ur kame oudo tie i piny me Babilon, pi ot i piny me Kanan. Do kakame gin bin kiko tuno kede kabedo kame kolwongo be Aran, kiko donyo bedo kuno.

³²Tera bin oko bedo kuo pi mwakini tol are kede kany (205), di do eko to Aran.

Ageini 12

Rubanga Olwongo Aburam

¹ Rwot di oko waco ne Aburam be, “Yai iwek pinyu kiton joawade ni kede ot ka papa ni da, di iko ot i piny kame ango abino nyuto ni.

²Ango abino mino ateker adwong wok kibuti, doko ango abino mini winyo di ako mino nyingi bedo iruo, tetekeny in ibino bedo ngat kame kelo ne jo winyo.

³ Jo kame lamo ni winyo ango abino mino gi winyo, kede ngat kame lami kirac ango da abino lame kirac; doko atekerin dedede me wi lobo kobino mino winyo pi in.”

⁴Aburam oko yai bala kame Rwot oudo owaco ne; di Lot oko ot karacel kede en. Mwakini me dongo ka Aburam oudo tie ot kanyaare kiwie kany (75) i kare kame en bin eyai kede ki Aran.

⁵Aburam bin oko tero dako mere Sarai kede Lot wot ka omin mere, kede jamini dedede kame gin bin kitie kede, karacel kede jo kame gin bin kibedo kede Aran; di gin kiko yai pi ot i piny me Kanan. Kakame gin bin kituno kede i piny me Kanan,

⁶Aburam oko beo i lobo nono di eko kato akata paka Sekem, tuno i ejinga me More. I kare nono jo me Kanan oudo pwodi tie bedo i lobo nono.

⁷Di do Rwot oko nyutere but Aburam, di eko waco ne be, “Ango abino mino lobo noni but ikwae ni.” Aburam bin oko gero alutari kunono, me woro Rwot ngat kame oudo onyutere bute.



⁸Di en eko yai ki kuno eko meede kede ot kiton tuno i piny kame obedo mori mori, kame oudo tie tetu kide me Betel. En bin eko guro eema mere kanono, i dierediere me Betel kame oudo tie tetu tim, kede Ai kame oudo tie tetu kide. Kanono da en kame bin en eko gero iye alutari me woro Rwot di en eko wore.

⁹Aburam di oko meede kede ot tetu Negeb di ekokobo akokob ki kadedere.

Aburam i Misiri

¹⁰I kare nono kec oudo oko poto i piny me Kanan. Manono oko bin mino Aburam oko yai eoto Misiri bedo iye bala ngakumbor, pien kec nono oudo bin ger adikinichel.

¹¹Kakame bin en eyapuno donyo kede Misiri, eko waco ne dako mere Sarai be, “Ango angeo be in ibedo dako acil adikinichel;

¹²kame jo me Misiri oneni, gin kibino waco be, ‘Man dako mere’ ; di do gin kiko bino neka, do gin kibino weki likame kineki.

¹³Pi mano, wace gi be in ibedo amina, tetekeny kitera kiber pi in, doko kibino weko kuo na pi in.”

¹⁴Kakame bin Aburam odonyo kede Misiri, jo me Misiri ateteni oko neno be dako mere oudo cil twatwal.

¹⁵Kakame bin jotic adongo ka Parao onene kede, gin kiko surao en but Parao, di oko tere i ot ka Parao.

¹⁶Parao bin oko tero Aburam kiber pire; emie romini, dok, punda, ipasoi amon kede acuo, kede aguraguran.

¹⁷Do Rwot oko tidilo Parao karacel kede jo me ode; en ecwao negi aumpuli arac twatwal pi Sarai dako ka Aburam.

¹⁸Manono oko mino Parao oko lwongo Aburam di eko waco ne be, “Nyo ine kame in itimo na? Pinyo komio in likame iko waco na be en ebedo dako nin?”

¹⁹Pinyo komio in bin iwaco be, ‘En ebedo amina, ‘omio ango ako tere bedo dako na? Aso, dako ni ino, tere iyai iotunu.”

²⁰Parao di oko mino jotic mege cik, di gin kiko nyamaro Aburam i yongayo, en karacel kede dako mere kede jamini dedede kame bin en etie kede.

Ageini 13

Aburam Opokere kede Lot

¹Aburam oko yai ki Misiri di eko dok Negeb, en kede dako mere, karacel kede Lot kede jamini dedede kame en bin etie kede.

²Aburam oudo obaro twatwal kede dok, siliba kede saabu.

³En eko ot di ekokobo akokob, yai ki Negeb kiton tuno Betel kakame en oudo bin esipo iye eema i agege. Kanono oudo tie i dierediere me Betel kede Ai,



- ⁴kakame en bin egero iye alutari i agege. Aburam di oko woro Rwot i kanono.
- ⁵Lot da ngat kame bin tie ot karacel kede Aburam, oudo tie kede romini, diegi, dok kede jo kame bin bedo kede en.
- ⁶Pi mano, lobo me kwat oudo likame karuno romo gi ka gin dedede kibedo karacel; pien leini kame bin kitie kede oudo tot twatwal, oko mino likame kikaruno bedo karacel.
- ⁷Manono omio oudo lok maro bedo tie i dierediere me jokwat ka Aburam kede jokwat ka Lot. I kare nono oudo jo me Kanan kede jo Perisi tie bedo i lobo nono.
- ⁸Aburam di oko waco ne Lot be, “Mito lok kur bed tie i dierediere nango kedi, akadi da i dierediere me jokwat nin kede mega; pien wan wade.
- ⁹Mam lobo lung tie i nyimi? Pokere kibuta. Ka in iyero ot i bad tetu ngodal, ango abino ot tetu cam; arabo ka in ioto i bad tetu cam, ango abino ot tetu ngodal.”
- ¹⁰ Lot oko tingo wange malo di eko neno aputon me Yorodan, dok tetu Soar; pii oudo tie iye kiber kabedo dedede bala potu ka Rwot, arabo bala lobo me Misiri. Man bin otimere di pwodi Rwot likame omuducaro Sodoma kede Gomora.
- ¹¹Lot di oko yero aputon me Yorodan en gire kene, di eko yai ot tetu kide. Epone no en kame gin kiko pokere kede.
- ¹²Aburam oko donyo bedo i lobo me Kanan, do Lot oko ot bedo i bomban kame bin tie i Aputon, di eko sipo eema mere i nget bomba me Sodoma.
- ¹³Jo me Sodoma bin obedo jo areco, jo kame otimo dub atos i nyim Rwot.

Aburam Odak Keburon

- ¹⁴Di do bin Lot otieko pokere kede Aburam, Rwot oko waco ne Aburam be, “Ting wangi malo di iko neno ki kakame itie iye no, tetu malo kede tetu piny, tetu kide kede tetu tim;
- ¹⁵ pien lobo dedede kame in ineno nono, ango abino mino buti kede but ikwae ni atwal.
- ¹⁶Abino mino ikwae ni bedo tot bala asinge me lobo; tetekeny ka ngatamoro karuno maro wel me asinge me lobo, udo ikwae ni da kokaruno maro wel gi.
- ¹⁷Yai, bei i lobo nono di iko wapo boro kede laco mere, pien abino mine buti.”
- ¹⁸Aburam di oko dak ekobo eema mere eoto bedo i nget ejinga me Mamure, kame tie Keburon; di eko gero alutari kuno me woro Rwot.

Ageini 14

Aburam Olako Lot

- ¹I kare ka Abaka Amurapel me Sinar kede Abaka Ariok me Elasa, Abaka Kedolaomer me Elam, kede Abaka Tidal me Goim,



- ²Abakai nogi bin oko ribere di kiko yi kede Abaka Bera me Sodoma kede Abaka Birusa me Gomora, kede Abaka Sinab me Adama, kede Abaka Semeber me Seboim, kede Abaka me Bela (arabo Soar).
- ³Abakai nogi bin oko ribere pi yi i aditot me Sidim kame nataman kolwongo be Nam Oto.
- ⁴Gin oudo kibedo tic ne Kedolaomer pi mwakini tomon kiwie are, do i mwaka me tomon kiwie adek mere, gin kiko jemo ne.
- ⁵I mwaka me tomon kiwie ongwon mere, Kedolaomer karacel kede abakai kame bin en eribere kede oko bino pi yi di kiko bwono jo Repaim i Asiterot Karanaim, kede jo Susim i Kam, kede jo Emim i Sabe Kiriataim,
- ⁶kede jo me Kori i Seir piny me mori, di kiko donyo wapo gi kiton tuno Elparan kame tie i apokini kede wi tim.
- ⁷Di do gin kiko lokere kidok cen di kiko tuno Enmisupat (en Kades), di kiko yi kibwono piny me jo Amalek kede me jo Amor da, kame oudo bedo Kasason Tamar.
- ⁸Di do abaka me Sodoma, kede Abaka me Gomora, kede abakai me Adama kede me Seboim, kede abaka me Bela (en Soar) oko yai kioto di kiko yi i aditot me Sidim
- ⁹kede Abakai Kedolaomer me Elam, Tidal me Goim, Amurapel me Sinar, kede Ariok me Elasa; gin abakai ongwon nogo kiko yi kede abakai kany.
- ¹⁰Oudo bure kame kokunyo kiye emina opong i aditot me Sidim; manono oko mino kakame abakai me Sodoma kede Gomora oudo tie ringo kede tenge, gin kiko popoto i bure nogo, do jo ace kame bin oko dong, oko ringo i piny me mori.
- ¹¹Jokwor oko yako jamini dedede me Sodoma kede Gomora, kiton cam gi dedede di kiko girgi ot;
- ¹²kitero kiton Lot wot ka omin me Aburam, kame oudo bedo Sodoma; kiyako jamini mege di kiko yai kioto.
- ¹³Di do ngat acel kame bin oko lwi ki cing gi, oko bino di eko waco ne Aburam, ngat koudo obedo Ngaeburania, kame bin tie bedo i nget ejinga ka Mamure Ngamor, omin me Esikol kede Aner. Jo nogi oudo obedo jo kame konyo Aburam.
- ¹⁴Kakame Aburam owinyo kede be komako wot ka omin mere di oko tero, en eko telo jo mege kame bin konywalo i ode, jo kame oudo opwonyere kiber i yi, jo tol adek kede tomon kiwie kanyauni (318), di en eko ot wapo gi kiton tuno Dan.
- ¹⁵En eko pokopoko jo yi mege iwor pi ot suro gi, en kede jotic mege, di gin kiko bwono gi, kiko riamo gi kiton tuno Koba, kabedo kame tie tetu malo me Damasiko.
- ¹⁶En di do eko dwoko jamini dedede, kiton Lot wot ka omin mere da edwoko kede jamini mege, karacel kede mon kede jo icegun.

Melkisedeki Olamo ne Aburam Winyo



¹⁷Kakame bin Aburam odwogo kede, ingei en bwono Kedolaomer karacel kede abakai kame bin konye yi, abaka me Sodoma oko yai ot riamo kede i Aditot me Sabe (en Aditot me Abaka).

¹⁸Di Melkisedeki ngat koudo obedo abaka me Salem oko kelo mugati kede bwini; en oudo ebodo ngasaseredoti ka Rubanga Ngamalo Twal.

¹⁹En bin eko lamo ne winyo di ewaco be, “Rubanga Ngamalo Twal, ngat kocweo malo kede lobo mi Aburam winyo;

²⁰doko pwoc bed but Rubanga Ngamalo Twal, ngat kame komio jokwor ni i cingi!” Aburam bin oko mine acel me tomon me jame dedede kame en bin edwoko kibut jokwor.

²¹Di do abaka me Sodoma oko waco ne Aburam be, “Miango jo kame in imao do in iter jame.”

²²Do Aburam oko waco ne abaka me Sodoma be, “Ango atieko kwongere but Rwot Rubanga Ngamalo Twal, ngat kocweo malo kede lobo,

²³be likame ango abino tero akadi ausi arabo del me tweno amuka amoto gimoroni kame obedo meri, tetekeny kur in iwac be, ‘Ango en amio Aburam obaro.’

²⁴Ango likame abino tero gimoro pira, kwanyo kenekene gikame awobe na otieko camo, kede iner me jo kame oudo oko ot keda i yi: Aner, Esikol kede Mamure. Wek gin kiter iner gi.”

Ageini 15

Isikan ka Rubanga kede Aburam

¹Di mago otiek, Rubanga oko yamo kede Aburam i gianyuta be, “Kur ibed kede lwooro, Aburam, ango en ebuku ni kame galao in; giamia ni bino bedo dwong twatwal.”

²Do Aburam oko waco be, “Okwe Rwot Rubanga, nyo inonono kame in iyaro mina? Pien ango ayaro to abongo atin, doko musika me oda en Elieser me Damasiko.”

³Di Aburam oko waco be, “Neningo, in likame imia atin moro, pi mano, epasoit kame konywalo i oda en kame bino bedo musika na.”

⁴Do Rwot oko bobo waco ne be, “Icuo no likame bino bedo musika nin; likame tie dano moro ace kwanyo wodi kame in kikomi inywalo en kame bino bedo musika ni.”

⁵Rwot oko tero Aburam ooko di eko waco ne be, “Nen malo di iko maro wel me acer, ka itwero maro wel gi.” Di do eko waco ne Aburam be, “Ikwae ni bino bedo tot rom kano.”

⁶Aburam oko keto gen mere i kom Rwot; di Rwot oko tero manono bala poore mere.

⁷Di do Rwot oko waco ne be, “Ango en Rwot kame okeli ki Ur i piny me Babilon, pi mini lobo noni dok meri.”



⁸Do Aburam oko penye be, “Okwe Rwot Rubanga, ango abino ngeno benyo be ebino doko mera?”

⁹Rwot oko waco ne be, “Kel na atakit me mwakini adek, diel adako me mwakini adek, emerekek me mwakini adek, amam kede eluke kame pwodi titidi.”

¹⁰Aburam oko kelo ne Rwot gi nogi dedede di eko ngongolo gi; ebaro le acelacel i diere, di eko peto adulion gi piny tuni tuni di kiporere, do likame eko babaro winy ki diere.

¹¹Acut oko bino popoto i kom gi oto nogo do Aburam oko riamo gi tenge.

¹²Otieno di do ceng tie donyo, nino atek oko mako Aburam, di colpiny acucucuc kame kelo lwooro oko ume.

¹³Di Rwot oko waco ne Aburam be, “Miero in ingei ateteni be ikwae ni bino bedo jokumbor i lobo kalikame mergi, doko kibino bedo ipasoi kuno, di oko bino tidilo gi pi mwakini tol ongwon.

¹⁴Do ango abino ngolo kop i kom ateker nono kame bino mino gin kibedo ipasoi, di i cen mere gin kiko bino yai kede lim atot.

¹⁵Do in giri ibino bedo di iko ti kiber, ibino to kede mulem di oko yiki.

¹⁶Gin kibino dwogo kane i kare me lwak me ongwon; pien dub me jo Amor pwodi likame oyitiro.”

¹⁷Di do ceng oudo otieko donyo, piny oko doko col, gulu kame yiro duny kiye kede mac aliel oko beo ki diere me adulion me leini nogo.

¹⁸Cenge nono en kame Rwot oko sikano iye kede Aburam di ewaco be, “Ango amio but ikwae nin lobo noni, yai kiye ecilet me Misiri kiton tuno iye ecilet adwong me Eupurate,

¹⁹ribo kiton lobo me jo Ken, jo Kenisi, jo Kadumon

²⁰kede jo Kiti, jo Perisi, jo Repaim,

²¹kede me jo Amor, jo Kanan, jo Girigas kede jo Yebu.”

Ageini 16

Agar kede Isimael

¹Sarai dako ka Aburam oudo likame onywalo ne atin moro. Do oudo en etie kede atin nyako apasoit mere, kame bin nyinge Agar, kame oudo obedo dano me Misiri.

²Sarai bin oko waco ne Aburam be, “Neningo, ango Rwot otieko twona nywal; but kede apasoit na me wek amoto aud atin kibute.” Aburam di oko winyo kop ka Sarai.

³Di Sarai dako ka Aburam oko mino Agar, kame oudo obedo dano me Misiri, nyako kame bin tie apasoit mere, but cware Aburam pi doko dako mere. Manoni bin otimere di Aburam oudo otieko mwakini tomon i Kanan.



⁴Aburam bin oko buto kede Agar di Agar oko udo yie. Kakame Agar oko neno kede be en etieko udo yie, eko donyo neno Sarai kede acae.

⁵Di do Sarai oko bin waco ne Aburam be, “Rac kame kotimo na bed i wii! Ango en kame bin amio apasoit na buti, do nan kakame en eneno kede be yie tie, eko donyo nena kede acae. Rwot en kame do ngol kop i dierediere nango kedi!”

⁶Di Aburam oko waco ne Sarai be, “Neningo, apasoit nin tie i twer nin; tim ne bala kame in imito.” Di do Sarai oko donyo tere kirac, omio en eko ringo tenge kibute.

⁷Malaika ka Rwot oko ude i nget atan me pii kame bin tie i wi tim, atan kame bin tie i yongayo aoto Sur.

⁸Di eko penye be, “Agar, apasoit ka Sarai, in iwok ki tuai, doko itie ot tuai?” En di eko dwoko ne be, “Ango atie ringo Sarai dako kame angou odo abedo i cinge.”

⁹Malaika ka Rwot oko waco ne be, “Dok bute di iko yei ne pugi.”

¹⁰Eko bobo waco ne be, “Abino mino ikwae ni nyai nyai kalikame kokaruno maro kede wel gi.

¹¹Neningo, nan in itieko udo yi, in ibino nywalo atin awobi di iko bino cako nyinge Isimael, pien Rwot otieko winyo koko ni me can.

¹²En ebino bedo bala punda me obar; ebino suro jo dedede, doko jo dedede da bino sure; doko likame en ebino bedo kiber kede joawade mege dedede.”

¹³Agar oko penyere be, “Kom ateteni angou aneno Rubanga di ako dong kuo i cen me nene?” Manono oko mino en di do eko cako nying Rwot kame bin oyamo kede be, “In en El Roi.” ¹⁴Manono en omio oko cako nying atan nono be Beerlakairoi; en etie i dierediere me Kades kede Bered.

¹⁵ Agar bin oko nywalo ne Aburam atin awobi di Aburam oko cako nyinge Isimael.

¹⁶Mwakini me dongo ka Aburam odo tie ot kanyauni kiwie kanyape i kare kame Agar onywalo kede Isimael.

Ageini 17

Akepo en Gianena me Isikan

¹Kakame do Aburam oromo kede mwakini ot kanyangon kiwie kanyangon (99), Rwot bin oko nyutere bute di oko waco ne be, “Ango en Rubanga Won Twer; bed i nyima abongo raco moro.

²Di angou ako bino timo isikan na kedi, doko ako bino mino ikwae ni bedo tot twatwal.”

³Di do Aburam oko rieberere piny, di Rubanga oko waco ne be,

⁴” Neni, man en isikan kame angou atie timo kedi: in ibino bedo kwaru me atekerin kame tot twatwal.



- ⁵ Nyingi likame doko bino bedo Aburam, do ebino bedo Aburaam: pien ango atieko mini ibedo kwaru me atekerin atos.
- ⁶ Abino mino ikwae ni nyai twatwal di ako bino mino gi kidoko atekerin, doko abakai bino wok kibut gi.
- ⁷ Ango abino timo isikan na kame bedo nakanaka kedi, karacel kede ikwae ni me kare me anyim, naparo lwak gin lung, pi ango bedo Rubanga ni kede me ikwae ni me kare me anyim.
- ⁸ Doko lobo kame nataman in ibedo iye bala ngakumbor no, lobo me Kanan lung, ango abino mino buti, in karacel kede ikwae ni me kare me anyim, me bedo mergi nakanaka; doko ango abino bedo Rubanga gin.”
- ⁹ Rubanga bobo oko waco ne Aburaam be, “Aso, ida miero ilub kop me isikan na kedi, in karacel kede ikwae ni me kare me anyim, naparo lwak gi lung.
- ¹⁰ Isikan nango kame ibinunu lubo, kame tie i dierediere nango kedi, karacel kede ikwae ni en ine: cuo dedede kame tie i komu kobino kepo.
- ¹¹ Ibinunu kepo delkomu me cuo, di eko bino bedo gianena me isikan na kede wu.
- ¹² Pi kare lung cako nataman, in karacel kede ikwae ni ibinunu kepo idwe awobe dedede kame tie i komu ka kiromo ceng kanyauni, kiton ipasoi kame konywalo i miere wu kede kame iwilunu kede sente kibut jokumbor.
- ¹³ Miero kep ipasoi kame konywalo imiere wu kede kame iwilunu kede sente. Manono bino bedo gianyuto i delkomu be isikan na kede wu en isikan kame bedo nakanaka.
- ¹⁴ Icuo kalikame kokepo delkome me cuo kobino poke tenge kikom jo mege, piento udo en etieko turo isikan na.”
- ¹⁵ Rubanga bobo oko waco ne Aburaam be, “I kom kop kame mako dako ni Sarai, likame in bobo ibino lwonge be Sarai, do nyinge bino bedo do Sara.
- ¹⁶ Ango abino mine winyo, doko medo i wi manono ango abino mini inywalo atin awobi kede en. Abino mine winyo di en eko bino doko toto me atekerin; abakai me atekerin bino wok kibute.”
- ¹⁷ Di do Aburaam bobo oko riebere piny di eko nyero, eko penyere kene be, “Icuo me mwakini tol acel da karuno pwodi nywalo atin? Sara da ngat kame tie nataman kede mwakini ot kanyangon pwodi karuno nywalo atin?”
- ¹⁸ Di Aburaam oko waco ne Rubanga be, “Ango akwao be Isimael bed kuo i nyimi!”
- ¹⁹ Rubanga oko dwoko be, “Likame kamano, do Sara dako nin en kame bino nywalo ni atin awobi, di in iko bino cako nyinge Isaka. Ango abino timo isikan na kede en tetekeny ebed isikan kame bedo nakanaka but ikwae mege me kare me anyim.
- ²⁰ I kom kop kame mako Isimael, ango atieko winyo kwac ni; ango abino mine winyo doko abino mine enywal di ikwae mege ko bedo tot twatwal; ebino nywalo jopug tomon kiwie are, doko ango abino mino ateker adwong wok kibute.



²¹Do ango abino timo isikan na kede Isaka, ngat kame Sara bino nywalo nin i kare kame cal bala nataman i mwaka kame bino no.”

²²Kakame do Rubanga otieko yamo kede Aburaam, Rubanga oko ot oweke.

²³Di do ceng nono Aburaam oko tero wode Isimael karacel kede ipasoi dedede kame oudo konywalo i ode, kiton kame oudo ewilo awila kede sente mere, etero cuo dedede kame oudo tie i ode, di en eko kepo delkom gi me cuo bala kame oudo Rubanga owaco ne.

²⁴Aburaam oudo do oromo mwakini ot kanyangon kiwie kanyangon (99) i kare kame bin kokepo kede delkome me cuo.

²⁵Wode Isimael da oudo oromo mwakini tomon kiwie adek i kare kame bin kokepo kede delkome me cuo.

²⁶Bin oko kepo Aburaam kede wode Isimael i ceng nono,

²⁷karacel kede cuo dedede kame oudo tie i ode, ipasoi kame oudo konywalo i ode kede kame oudo kowilo awila kede sente kibut ngakumbor, gida bin oko kepo gi karacel kede en.

Ageini 18

Rubanga Ocikere pi Mino Aburaam Atin Awobi

¹Rwot oko nyutere but Aburaam i nget ejinga me Mamure, di oudo en etie bedo i ekeko me eema mere i dier i ceng.

² Aburaam oko tingo wange malo di eko neno cuo adek di tie cungo iyapiyapi kede. Kakame en eneno gi kede, en eko yai ringo ki dog ekeko me eema pi ot riamo kede gi, di eko riebere piny i nyim gi,

³di eko waco be, “Adwong na, ka in imito timo na bero moro, kur ikat akata ngatic ni.

⁴Wek kong kel ne wu pii moro anonok ilwokunu kede tienu, di ber ikounu wei i dud yat.

⁵Bala kame nan itiekunu bino kede but ngatic wu, ango abino kelo ne wu mugati moro atitidi tetekeny iudunu kede teko, i cen mere di do ikounu meede kede ot.” Gin di kiko gamo be, “Tim bala kame in itieko waco.”

⁶Di Aburaam oko onyaro i eema but Sara eko waco ne be, “Juk alos kame pwot adikinichel gipim adek awakawaka di iko nyonge ited kede mugati.”

⁷Aburaam oko ringo i awi di eko kwanyo atin twon, etobait kame ringo mere pwodi yom di ber, eko mino but ngatic mere kame oko neke di eko iiko ne wele cam awakawaka.

⁸Di do en eko tero cak orurano kede cak alepan karacel kede ringo me etobait kame oudo kotieko tedo eko keto i nyim gi; di en eko dong cungo i nget gi i dud yat kanono pi daro gin di kicamo.



⁹Gin di kiko penye be, “Ani Sara, dako nin?” Di en eko gamo be, “En etie i yi eema kuno.”

¹⁰Di do ngat acel kikom gi oko waco be, “Ango ateteni abino dwogo butu tetu kare noni, di ako udo dako nin Sara tie kede atin awobi.” Sara oudo tie cen ngei Aburaam i dog ekeko me eema etie winyo kop gin.

¹¹I kare nono Aburaam kede Sara oudo otieko do ti, mwakini gi oudo okato; Sara oudo likame bobo do ture tuwo me duwe bala kame timere ne kede mon.

¹²Manono oko mino Sara oduwo nyero kene kene di ewaco be, “Kom di ango atieko ti rom kane, doko cwara da oti, benyo benyo kame ango bobo pwodi akaruno bedo kede mit me icuo?”

¹³Rwot oko penyero Aburaam be, “Pinyo komio Sara onyero di ewaco be, ‘Be kom ateteni ada pwodi akaruno nywalo atin di atieko ti rom kan?’

¹⁴Benyo, tie gimoro kame bwono Rwot? Ango abino dwogo butu i kare kame ango atieko ciko, tetu kare noni, di ako udo Sara tie kede atin awobi.”

¹⁵Do pien Sara oudo lwooro omako, omio en eko daga di ewaco be, “Ango gira likame anyero.” Rwot oko waco be, “Ebo, me nyero in giri inyero.”

Aburaam Ongangao Rubanga pi Sodoma

¹⁶Di do cuo nogo oko yai ki kuno, di kiko tuno kakame kiharuno neno kiye Sodoma; Aburaam bin oko nyamaro gi i yongayo.

¹⁷Rwot oko penyere i cunye kene be, “Benyo, abino mungo ne Aburaam gikame ango ayaro timo?”

¹⁸Aso di en Aburaam ebino doko kwaru me ateker adwong di tek, doko kobino mino atekerin dedede me wi lobo winyo pi en.

¹⁹Li, pien ango atieko yere pi coro idwe mege karacel kede ikwae mege me kare me anyim, pi gin bedo jo kame lubo yongayo ka Rwot di kitimo gi kopooore kede me ateni; tetekeny Rwot cob timo gikame en ecikere iye but Aburaam.”

²⁰Di do Rwot oko waco ne Aburaam be, “Koko kame tie i kom Sodoma kede Gomora tin dwong benyo, doko dub gi tin rac raco kokato kare tin benyo!”

²¹Miero kong ango aot alor piny i bomban nogo di ako neno ka koko noni kame ango atieko winyo i kom gin tie timere ateteni; ka li, ango abino ngeno.”

²²Di do cuo nogo oko yai kioto Sodoma, kiwoko Aburaam odong cungo i nyim Rwot.

²³Di Aburaam oko nyiko but Rwot di eko waco ne be, “Benyo, in ateteni iyaro muducaro jo kopooore karacel kede jo areco?”

²⁴Ka koto jo ot kany kopooore tie i bomba; benyo, likame ibino sasiro en pi jo ot kany kopooore atie iye nogo, iko muducaro en?



²⁵Ateteni in likame ibino timo gikame cal kamano, me neko jo kopoore karacel kede jo areco, tetekeny jo kopoore da bed rom aroma kede jo areco! Likame ibino timo! Mam Ngangolkop me lobo lung miero ngol kop i yore me ateni?"

²⁶Rwot oko waco be, "Ka ango audio jo ot kany kopoore tie i bomba me Sodoma, ango abino sasiro bomba nono lung likame amuducaro en pirgi."

²⁷Aburaam oko bobo waco be, "Sasiro ango pi loli kede yamo, Okwe Rwot, ango ngat kame abedo apua kede buru.

²⁸Do ka jo kany oko rem kikom jo ot kany kopoore nogo. Benyo, ibino muducaro bomba lung pi jo kany korem nogo?" Rwot oko dwoko be, "Ango likame abino muducaro en ka audio jo ot ongwon kiwie kany kopoore kuno."

²⁹Aburaam bobo oko waco ne Rwot be, "Do ka jo ot ongwon en kame oko udere kuno kono?" Rwot bobo oko waco be, "Pi jo ot ongwon nogo, ango likame abino muducaro en."

³⁰Di do Aburaam bobo oko waco be, "Okwe Rwot, kur iud wangcuny ka amedo yamo. Do ka jo ot adek en kame oko udere kuno?" Rwot oko waco be, "Ango likame abino muducaro en ka audio jo ot adek kopoore kuno."

³¹Aburaam oko bobo waco be, "Sasiro ango pi loli kede yamo, Okwe Rwot. Do ka jo ot are en kame oko udere kuno kono?" Rwot bobo oko waco be, "Pi jo ot are nogo, ango likame abino muducaro en."

³²Di do Aburaam oko waco be, "Okwe Rwot, kur ibed kede wangcuny ka amedo yamo tien acel kenekene do. Do ka jo tomon en kame oko udere kuno?" Rwot oko waco be, "Pi jo tomon kopoore nogo, ango likame abino muducaro en."

³³Kakame etieko do yamo kede Aburaam, Rwot oko yai eoto, di Aburaam da oko dok kabedo mere.

Ageini 19

Dub me Sodoma

¹Imalaikan are nogo oko tuno Sodoma otieno, di gin kiko udo Lot tie bedo i erute me bomba. Kakame Lot oneno gi kede, en eko yai eoto riamo kede gi, di eko riebere piny.

²En eko waco be, "Jodongo na, ango akwao wu ibinunu i oda, ango ngatic wu, di ikounu lwoko tienu di ikounu buto; di do odiko ikounu dilo yai di ikounu meede kede ot wu." Gin kiko waco be, "Li; wan oyaro buto kacokere me bomba."

³Do Lot oko dino gi tetek omio gin di do kiko yei kop mere di kiko ot i ode. En eko tede negi cam aber kede mugati kame arup li iye, di gin kiko camo.

⁴Do di pwodi gin likame kibuto, cuo me bomba oko bwote, awobe kede cuo adongo, cuo dedede, gin kiko luko ot;



⁵ di kiko lwongo Lot di kipenye be, “Cuo kame oudo obino buti otieno noni tie tuai? Kel gi ooko but wan kan, me wek wan obut kede gi.”

⁶Lot oko donyo ooko but gi di eko lokere eko cego ekeko.

⁷En eko waco negi be, “Imiegu na, ango akwao wu be kur itimunu gikarac kame rom kamano.

⁸Nenunu, ango atie kede anyira are kalikame pwodi ongeo icuo; wekunu ango akel gi ooko kan butu, di wun ikounu timo negi bala kame imitunu; kenekene kur itimunu gimoro i kom cuo gi, pien gin kitieko donyo i oda pi gwokere.”

⁹Do gin kiko waco ne be, “Orwa tenge! Kom in ibino kan bala ngakumbor, nan do imito be idok ngangolkop wan! Nan do wan oyaro timo nin gikarac kalamo gikame wan omito timo ne gin.” Di do gin kiko remoro Lot cen kitek di kiko nyiko i ekeko pi mito ture.

¹⁰Do cuo kame oudo tie i ot oko cwano cing gi di kiko wano Lot i ot but gi, di kiko cego ekeko.

¹¹Di gin kiko mino wang cuo kame oudo tie i ekeko oko to, awobe karacel kede cuo adongo, omio likame kiko karuno udo ekeko.

Lot Oyai ki Sodoma

¹²Di do cuo are nogo oko penyo Lot be, “In itie kede dano ni moro ace kan? Idwe awobe ni amoto idwe anyira, cuog anyira ni arabo ngatamoro ace kame in itie kede i bomba kan; yai kede gi tenge ki kabedo noni.

¹³Pien wan oyapuno muducaro kabedo noni, pi koko kame tie i kom jo mege dwong twatwal i nyim Rwot; en komio en ecwao wan pi muducaro en.”

¹⁴Di do Lot oko ot but awobe kame oudo oyaro nyomo anyira mege di eko waco negi be, “Yaunu awakawaka, ootunu tenge ki kan; pien Rwot oyapuno muducaro bomba noni.” Do gin kiko tero kop mere tukotuko.

¹⁵Kakame piny oru kede, imalaikan oko burakino Lot di kiwaco ne be, “Yai awakawaka, ter dako ni kede anyira ni are kame tie kan, tetekeny kur muducaro ida kede bomba noni.”

¹⁶Do Lot oko mono gal, Rwot kisa oko make kede, omio imalaikan oko mako cinge, cing dako mere kede me anyira mege are nogo, di kiko tero gi oko me bomba.

¹⁷Kakame gin kitieko kelo gi kede oko me bomba, ngat acel oko waco negi be, “Ringunu tetekeny ilakunu kuo wu; kur ngatamoro ngoloro cen arabo ecungi i elet. Ringunu i mori tetekeny kur muducaro wu.”

¹⁸Do Lot oko waco negi be, “Okwe, jodongo na, likame kamano.

¹⁹In itieko timo bero ne ngatic ni, doko in itieko nyuto nango mwolo adwong ilako kuo na; do ango likame akaruno ringo tuno i mori, pien lwooro bino mino peko nono maka i yongayo di ako to.



²⁰Neningo, bomba ca tie kakame iyapiyapi nango me ringo iye, doko en etitidi da. Wek ang'o aring kuno; bomba nono da gire titidi, ebino mino kuo na bwot."

²¹En eko gamo be, "Mano ber, ang'o ayei kwac ni nono. Likame abino tuturo bomba kame in iwaco nono.

²²Susunyo, ring kuno, pien ang'o likame akaruno timo gimoro tuno di in itieko tuno kuno." Pi mano, oko do lwongo bomba nono be Soar.

Komuducaro Sodoma kede Gomora

²³Kakame Lot otuno kede Soar, ceng oudo otieko wok.

²⁴Di do Rwot oko mino salupa kede mac kame wok ki malo bute oko cwei Sodoma kede Gomora;

²⁵eko wango bomban nogo karacel kede elet, kede jo dedede kame oudo bedo i bomban nogo, kiton gi atui dedede kame oudo tie dongo kuno.

²⁶Do dako ka Lot, ngat kame oudo tie lube ki cen, oko ngoloro cen di eko lokere edoko epir me munyo.

²⁷Odiko sek oru mere, Aburaam oko ot kakame bin en oudo ecungo iye i nyim Rwot.

²⁸En di eko ngoloro piny tetu Sodoma kede Gomora, kede bad dedede me elet di eko neno yiro me lobo nono duny malo bala yiro kame duny i epipa me cwako nyonyo.

²⁹Manono en gikame oko timere i kare kame Rubanga omuducaro kede bomban kame oudo tie i elet, en bin eyutuno Aburaam di eko mino Lot obwot i kare nono kame en bin emuducaro kede bomban kame Lot oudo bedo iye.

Epone kame Jo me Moab kede Amon Owok kede

³⁰Lot bin oko yai ki Soar, en karacel kede anyira mege are di eko ot bedo i abo i wi moru pien oudo elworo bedo Soar.

³¹Di nyako kao oko waco ne nyako atidi be, "Papa wa tie ti, aso di likame tie icuo moro i wi lobo kan kame bino buto kede wa di lubere kede itok me wi lobo.

³²Bia omi papa wa mat bwini di wan oko buto kede, tetekeyny onywal idwe kede papa wa."

³³Aso, iwor nono gin di kiko mino papa gi oko mato bwini di nyako kao oko buto kede papa mere. Papa mere bin likame oko ngeno gi kotimere.

³⁴Oru mere nyako kao oko waco ne nyako atidi be, "Neningo, ang'o oki abuto kede papa na iwor. Mito nat bobo omie emat bwini iwor, di ida iko ot buto kede, tetekeyny onywal idwe kede papa wa."

³⁵Aso, di gin kiko mino papa gi omato bwini bobo iwor nono, di nyako atidi da oko buto kede papa mere. Papa mere bin likame oko ngeno gikame oudo otimere.

³⁶Iepone nono, anyira ka Lot bin oko yac kede papa gi.



³⁷Nyako kao bin oko nywalo atin awobi di eko cako nyinge be Moab; en nono kame ebedo kwaru me jo Moab kiton tuno tin.

³⁸Nyako atidi da bin oko nywalo atin awobi di eko cako nyinge be Benami; en nono kame ebedo kwaru me jo Amon kiton tuno tin.

Ageini 20

Aburaam kede Abimelek

¹Aburaam oko yai ki Mamure di eko ot tetu Negeb eko donyo bedo i dierediere me Kades kede Sur. Di bin en etie bedo Gerar bala ngakumbor,

² Aburaam oko waco ne jo kop i kom dako mere Sara be, “En ebedo amina.” Di do Abaka Abimelek me Gerar oko cwano jo pi omo Sara kelo ne.

³Do i dier iwor Rubanga oko bino but Abimelek i lek di eko waco ne be, “Neningo, in itieko giri to, pien dako kame in itero no cware tie.”

⁴Akadi bed kamanono da, Abimelek oudo pwodi likame oribere kede Sara, omio en eko waco be, “Rwot, benyo, ibino muducaro kiton jo kalikame tie kede raco moro da?”

⁵Mam en kame ewaco na be, ‘En ebedo amina’ ? Doko eda kikome eko waco be, ‘En ebedo omina.’ Ango atimo gini kede ngec me cuny aber doko cinga li kede raco moro.”

⁶Di Rubanga oko waco ne i lek be, “Ebo, ango angeo be in itimo gi noni kede ngec me cuny aber. Medo i wi manono, ango en kame agengi timo dub buta, en komio in likame iko mule.

⁷Nan do dwok dako no but cware. En ebedo enabi, doko en ebino lego piri di in iko bedo kuo. Do ka in likame iko dwoke ne cware, mito in ingei be ateteni in ibino to, in karacel kede jo ni dedede.”

⁸Manono oko mino Abimelek odilo yai odiko sek di eko lwongo jotic mege dedede eko waco negi kope nogi dedede. Lworo atek oko mako gi.

⁹Di do Abimelek oko lwongo Aburaam di eko waco ne be, “Nyo ine kame in itimo ne wan? Rac nyo kame ango atimo ni en komio in ikelo dub kame dwong rom kano i wia karacel kede ajakanut na? In itieko timo nango gi kalikame kopooore timo.”

¹⁰Di Abimelek oko penyo Aburaam be, “Nyo kame oudo tie i tam ni en komio in iko timo gini?”

¹¹Aburaam oko gamo be, “Ango atimo kamano pien oudo aparo be likame tie ngatamoro kan akadi acel kame lworo Rubanga, doko kibino neka pi dako na.

¹²Medo i wi manono, en ateteni ebedo amina; ango kede en papa wa acel, do toti wa papat, doko en eko doko dako na.



¹³Aso, i kare kame bin Rubanga omia ayai kede tenge ki ot ka papa na, ango ako waco ne be, ‘Bero kame miero in inyut nango en ine: kabedo dedede kame wan obino tuno iye, in miero iwac ne jo be ango abedo omini.’ “

¹⁴Abimelek di oko tero romini kede doke, jotic amon kede acuo eko mino Aburaam, di eko dwoko ne Aburaam dako mere Sara.

¹⁵Abimelek di oko waco be, “Neningo, lobo nango ine lung, bed karamoro kenekene kame wangi opwoyo.”

¹⁶Di eko waco ne Sara da be, “Neningo ango atie mino omini siliba tutumia acel pi nyuto ne jo dedede be in ili kede raco moro. Manono bino konyi pi mino jo ngeno be in likame itimo gimoro arac.”

¹⁷Di do Aburaam oko kwano Rubanga di Rubanga oko cango Abimelek kede dako mere, karacel kede apaso mege, di do kiko donyo nywalo idwe;

¹⁸pien Rwot oudo ocego nywal ne mon dedede me i ot ka Abimelek pi Sara dako ka Aburaam.

Ageini 21

Nywalo Isaka

¹Rwot bin oko timo ne Sara gikame oudo etieko cikere iye.

²Sara oko yac di eko nywalo ne Aburaam atin awobi i wi tio mere i kare kame bin Rubanga oudo owaco.

³Aburaam oko cako nying atin awobi kame Sara bin onywalo ne be Isaka.

⁴Di bin Isaka oromo ceng kanyauni, Aburaam oko kepe bala kame oudo Rubanga ociko ne.

⁵Mwaka me dongo ka Aburaam oudo oromo do tol acel i kare kame bin konywalo kede Isaka.

⁶Sara di oko waco be, “Rubanga omia do anyero. Jo dedede kame bino winyo kop noni bino nyero keda.”

⁷Di bobo Sara oko waco be, “Ngai kame koto oudo okaruno waco ne Aburaam be Sara ceng moro bino doto atin? Aso di ango atieko nywalo ne atin awobi i wi tio mere.”

⁸Atin nono oko dongo; di Aburaam oko tedo ebaga adwong i ceng kame oko twone kede dot.

Koriamo Agar kede Isimael

⁹Ceng moro acel Sara oko neno di wot ka Aburaam ocelu, kame enywalo kede Agar me Misiri, di tie tuko kede wode Isaka,



¹⁰ en di eko waco ne Aburaam be, “Riam dako apasoit ni no ot kede wode tenge; pien wot ka apasoit noni likame bino sikao jamini nin karacel kede woda Isaka.”

¹¹ Kop noni oko ramo cuny Aburaam twatwal pi wode.

¹² Do Rubanga oko waco ne Aburaam be, “Kur ibed kede aramacuny pi wodi, akadi pi apasoit ni; in tim bala kame Sara waco ni, pien in ibino udo ikwae di wok kibut Isaka.

¹³ Do ango abino mino wot ka apasoit nono da doko ateker adwong, pien eda wodi.”

¹⁴ Aburaam di oko dilo odiko sek, eko kwanyo giacama kede pii kame kopiko i isau me lau di eko mino Agar. En eko keto ne atin i ngee di eko tware. Agar oko yai eko ot wiratoi i wi tim me Beereseba.

¹⁵ Kakame pii ca do oko tiek negi kede, en eko keto atin i dud yen mogo.

¹⁶ Di do en eko ot eko bedo piny kakame romo bala mita tol acel, di en eko bedo epimere kede. En eko yamo i cunye be, “Ango likame akaruno kanyakino neno to me atin na.” En eko cako koko di oudo etie bedo kuno.

¹⁷ Rubanga oko winyo atin di tie koko, di malaika ka Rubanga oko lwongo Agar ki malo di penye be, “Agar, peko nyo kame tie ni? Kur ibed kede lworu, pien Rubanga otieko winyo koko me atin i kakame etie iye.

¹⁸ Yai malo, ot itinge di iko make kiber, pien ango abino mino ateker adwong wok kibute.”

¹⁹ Rubanga oko yabo wang Agar di eko neno kulo. En eko ot di eko twomo pii pong isau me lau di eko mino atin omato.

²⁰ Rubanga oko bedo kede atin nono di eko dongo. En bin eko bedo i wi tim di eko doko ngat kipirana i gweno emal.

²¹ En bin ebedo i wi tim me Paran. Toto mere bin oko mono ne dako ki piny me Misiri.

Aburaam Otimo Isikan kede Abimelek

²² I kare nono Abimelek kede Pikol ngatel me isirikalen mege oko waco ne Aburaam be, “Rubanga tie kedi i gi dedede kame in itimo.

²³ Pi mano, ango amito in nataman ikwongere buta i nying Rubanga be in likame ibino timo na tim me angalo arabo ne idwe na amoto ikwae na. Aso, bala kame ango atieko timo nin kede bero, ida ibino timo nango kamanono karacel kede jo me piny noni kame in ibedo iye bala ngakumbor.”

²⁴ Aburaam di oko gamo be, “Ango akwongo kamanono.”

²⁵ Aburaam oko bedo kede ingungur but Abimelek pi kop me kulo kame jotit ka Abimelek oudo omao.



- ²⁶Abimelek di oko waco be, “Ango likame angeo ngat kotimo gini; in likame iko waco na, doko ango likame oudo ako winyo kop noni kiton tuno tin.”
- ²⁷Aburaam di do oko mino Abimelek romini kede dok, di kiko timo Isikan.
- ²⁸Aburaam oko poko tenge akalen me romini kanyaare kikom romini mege.
- ²⁹Abimelek di oko penye be, “Pinyo komio in ipoko akalen me romini kanyaare gi kargi ken gi?”
- ³⁰Aburaam oko dwoko be, “Kame in igamo akalen me romini kanyaare nogi, manono bino nyuto be ango en kame akunyo kulo noni.”
- ³¹Pi mano, oko do lwongo kabedo nono be Beereseba,
- ³²Kakame gin kitieko timo kede isikan i Beereseba, Abimelek kede Pikol ngatel isirikalen mege oko yai di kiko dok Pilistia.
- ³³Aburaam oko pito yat kame kolwongo be tamarik i adul me Beereseba, di eko woro Rwot ki kanono, en Rubanga kame bedo nakanaka.
- ³⁴Aburaam di oko bedo Pilistia bala ngakumbor pi kare alac.

Ageini 22

Rubanga Ociko Aburaam pi Ngolo Isaka bala Giayala

- ¹Di do mago otieko timere, Rubanga oko tamo Aburaam. En elwonge be, “Aburaam!” Di Aburaam oko gamo be, “Ango ine.”
- ²Rubanga oko waco ne be, “Ter wodi Isaka, en wodi acel kenekene kame in imaro twatwal. Ot kede i lobo me Moria kakame in ibino mine iye bala giayala awanga i wi moru kame ango abino nyuto ni.”
- ³Odiko sek oru mere, Aburaam oko yai di eko belo yen me amoka pi giayala awanga. En eko tweno yec i ngei punda di eko yai kede jotic mege are karacel kede wode Isaka. En eyai eko ot kede gin kakame Rubanga oudo onyuto ne.
- ⁴I ceng me Adek mere Aburaam oko tingo wange malo di eko neno kabedo nono i kakabor.
- ⁵Aburaam di oko waco ne jotic mege be, “Wun bedunu kane kede punda. Ango abino ot kede awobi kuno di oko woro Rubanga, di do oko dwogo butu.”
- ⁶Aburaam oko kwanyo yen me moko mac di eko mino Isaka yeno di en eko mako mac kede pala. Kakame oudo kitie ot kede di kiupere,
- ⁷Isaka oko waco ne papa mere be, “Papa!” Di Aburaam oko gamo be, “Ango ine woda.” Isaka oko penye be, “Wan otie kede mac kede yen, do oromo kame oyaro wango me yalo Rubanga tie tuai?”
- ⁸Aburaam oko gamo be, “Woda, Rubanga kikome en kame bino mino wan oromo kame obino wango me yale.” Gin di do kiko meede kede ot karacel.



⁹ Kakame do gin kiko tuno kede kabedo kame Rubanga oudo onyuto ne, Aburaam oko gero Alutari di eko napo yen iye. Di do eko tweno Isaka wode di eko piele i wi yen kame en oudo enapo i alutari.

¹⁰ Aburaam di do oko kwanyo pala pi ngolo wode.

¹¹ Do malaika ka Rwot oko lwonge ki malo be, “Aburaam, Aburaam!” En di eko gamo be, “Ango ine.”

¹² Malaika oko waco ne be, “Kur iket cingi i kom atin ni arabo timo ne gimoro arac; pien ango nataman do atieko ngeno be in ilworo Rubanga, pien in likame icere na kede wodi, en wodi acel kenekene.”

¹³ Aburaam oko tingo wange malo di eko neno oromo di tunge omoko i jange me yat. Aburaam oko ot di eko kwanyo oromo nono eko kelo di eko mino but Rubanga bala giayala awanga akaka wode.

¹⁴ Aburaam di do oko cako nying kabedo nono be, “Rwot bino mino” , bala kame koyamo kede tuno tin be, “Rwot mio ki wi moru mere.”

¹⁵ Malaika ka Rwot bobo oko lwongo Aburaam ki i malo tien me are mere

¹⁶ di eko waco ne be, “Rwot owaco be, ‘Ango atieko kwongere kede nyinga kena be: pi gikame in itimo noni, me weko cere na kede wodi, en wodi acel kenekene,

¹⁷ ango ateteni abino mini winyo. Abino mino ikwae ni bedo tot bala acer me malo kede asinge me dog nam. Gin kibino bwono jokwor gi di kiko mano bomban gi.

¹⁸ Atekerin dedede me lobo kobino mino winyo pi ikwae nin, pien in ilubo kop na.’ “

¹⁹ Aburaam di do oko dok but jotic mege, di en eko yai kede gin karacel, kiko ot Beereseba, kakame Aburaam oko donyo bedo iye.

Ikwae ka Nakor

²⁰ Di do mago otieko timere, oko waco ne Aburaam be, “Milika da otieko nywalo idwe ne omini Nakor:

²¹ Us en atin kao mere. Imiegu mege obedo Bus, Kemuel papa me Aram,

²² Kesed, Kaso, Pilidas, Jidilap kede Betuel.”

²³ Betuel oko nywalo Rebeka. Milika bin onywalo ne Nakor omin me Aburaam idwe kanyauni nogi.

²⁴ Nakor oudo bobo tie kede dako ace kame nyinge bin Reuma. Reuma da bin oko nywalo Teba, Gakam, Takas kede Maka.

Ageini 23

Sara Oto di Aburaam oko Wilo Lobo me Bedo Limbo

¹ Sara bin oko bedo i wi lobo pi mwakini tol acel kede ot are kiwie kanyaare (127).



²En di eko to i Kiriya Araba, manono en Keburon kame tie i lobo me Kanan. Aburaam di oko bedo kede iturur di eko pi to ka Sara.

³Eko yai ki nget liel di eko ot eko waco ne jo Kiti be,

⁴“Ango atie ngakumbor kame tie bedo i diere wu, mianu lobo i diere wu kan kame bino doko mera me yiko jo, tetekeny ayik iye dako na.”

⁵Gin di kiko gamo be,

⁶” Adwong, winy kop wa. In ibedo ngatel kame pire tek i diere wa. Ot i yik dako ni i ates kame ber kalamo apat dedede. Likame tie ngatamoro kikom wan kame bino cere nin kede ates moro me yiko dako ni.”

⁷Aburaam di oko yai malo eko gungo piny i nyim jo Kiti wegi lobo nono.

⁸En eko waco negi be, “Ka wun iyeunu be ango ayik dako na kan, winyunu kop na di ikounu kwano na Epuron wot ka Sokar,

⁹me wek en eyei mina abo mere kame tie Makepela, i wi pototo mere. Mito en emia i nyimu, i wel kame kocate kede kikokome, tetekeny edok kabedo nango me yiko jo.”

¹⁰Epuron da oudo tie bedo kanono kede jo Kiti wad gi. En di eko gamo dog Aburaam di jo Kiti icegun tie winyo, karacel kede jo dedede kame oudo tie i erute me bomba be,

¹¹” Adwong, likame kamano, winy kop na; ango atie mini pototo kede abo da kame tie iye. Ango atie mini i nyim jo na; oti i yik iye dako ni.”

¹²Di do Aburaam bobo oko gungo piny i nyim jo me lobo nono.

¹³Eko waco ne Epuron di jo me lobo nono dedede winyo be, “Ka koto in eyei winyo kop na! Ango abino culi wel sente me pototo nono. Yei gamo sente, tetekeny ango akaruno yiko dako na kunono.”

¹⁴Epuron oko gamo be,

¹⁵Adwong na, winy kop na; lobo kame romo siliba tol ongwon kenekene ni obedo nyo i dierediere nango kedi? Ot i yik dako ni iye.

¹⁶Aburaam oko yei kop ka Epuron di eko pimo ne siliba kame en oudo ewaco i nyim jo, siliba tol ongwon (400), di epimo kede misani kame jocat me kuno bin tio kede.

¹⁷Manono en epone kame pototo ka Epuron kame bin tie Makepela, tetu kide me Mamure oko lokere odoko kede me ka Aburaam. Pototo nono lung kede abo kame bin tie iye, kiton yen dedede kame bin tie i pototo oko doko

¹⁸me ka Aburaam i nyim jo Kiti kede jo dedede kame bin tie kacokere i erute me bomba.

¹⁹Di do manono otiek, Aburaam oko do yiko dako mere Sara i abo kame bin tie i pototo me Makepela kame opimere kede Mamure, kanono en Keburon, kame tie i lobo me Kanan.



²⁰Poto nono kede abo kame bin tie iye oko kobo ki cing jo Kiti di eko doko me ka Aburaam me yiko jo.

Ageini 24

Nyom ka Isaka

¹Aburaam oudo otieko do ti, mwakini me dongo mere da oudo okato twatwal. Rubanga bin omie winyo i jamini dedede kame en ebedo timo.

²Aburaam bin oko waco ne ngatic mere adwong, kame lo jamini kame en oudo etie kede dedede be, “Ango akwai irwak cingi i dierediere me amuros na, ³di iko lairo i nying Rwot, Rubanga me malo kede piny, be likame ibino nyomo ne woda dako kikom anyira me Kanan, jo kame anga atie bedo i diere gi.

⁴Do in ibino ot i piny kame anga awok kiye, but joawade na di iko yero dako ne woda Isaka.”

⁵Ngatic nono oko penye be, “Do ka nyako kame anga ayero likame oko yei upere keda pi bino kane, benyo, anga miero do ater wodi adwoke i piny kame in bin iwok kiye?”

⁶Aburaam oko gamo be, “Miero inen be likame itero woda kuno.

⁷Rwot Rubanga me malo, ngat kame bin okwanya ki ot ka papa na, i piny kame oudo onywala iye, doko en eko yamo keda di ekwongere buta be, ‘Anga abino mino lobo noni but ikwae ni, ‘en ebino cwano malaika mere telo nin yongayo di in iko bino yero ne woda dako ki kuno.

⁸Do ka nyako nono likame bino yei upere kedi, in ibino gonyere ki kwongere noni; kenekene in miero kur iter woda kuno.”

⁹Di ngatic nono oko do rwako cinge i dierediere me amuros ka Aburaam ngadwong mere di eko kwongere bute i kom kop noni.

¹⁰Di do ngatic nono oko yai kede aguraguran tomon me ngadwong mere, etero gi kede giamia me epone dedede kikut ngadwong mere. En eko ot Mesopotamia i bomba kame Nakor oudo bedo iye.

¹¹Kakame bin en etuno kede kuno, en eko mino aguraguran oriondiko piny i nget atan kame bin tie ooko me bomba. Oudo esawa me otieno, kame mon omo kede pii ki atan inonono.

¹²En di eko ilega be, “Okwe Rwot, Rubanga ka ngadwong na Aburaam, anga akwai imi gi dedede cobere na kiber i ceng atin di iko nyuto amara nin kalikame lokere but ngadwong na Aburaam.

¹³Neni, anga ayaro cungo kan i nget atan me pii di anyira me jo me bomba bino twomo pii.



¹⁴Mi nyako kame ango abino waco ne be, ‘Akwai imia amat pii ki agulu ni, ‘di en eko bino waco na be, ‘Mati, doko ango abino mino aguraguran ni da pii’, mi manono bed ngat kame in iyero ne Isaka ngatic nin. Manono bino mino ango angeo be in itieko nyuto but ngadwong na amara ni kalikame lokere.’”

¹⁵Di pwodi en oudo likame etieko yamo mere, Rebeka di tuno kede agulu mere di eyeo i epepet. En oudo ebedo nyar ka Betuel wot ka Milika dako ka Nakor, kame oudo obedo omin me Aburaam.

¹⁶Nyako nono oudo cil twatwal, doko oudo pwodi likame engeo icuo moro. En eko donyo i atan, di eko twomo pii pong agulu mere di eko wok kede ooko.

¹⁷Di do ngatic ka Aburaam oko ringo bute pi riamo kede di eko waco ne be, “Akwai imia amat pii anonok kiye agulu ni.”

¹⁸Nyako nono di oko gamo be, “Mati, ngadwong na,” awakawaka di eko tingo agulu pii mere ki epepet di eko gagao kede cinge di en emato.

¹⁹Kakame Rebeka otieko mine emato kede pii, eko waco ne be, “Ango ayaro twomo ne aguraguran ni da pii, tuno gin dedede tieko mato.”

²⁰En di awakawaka ebwoto pii me agulu mere i yi atuba, di bobo eringo i atan twomo ace. En eko twomo pii ne aguraguran dedede.

²¹Ngatic nono oko bedo ngine eliling pi mito niang ka Rwot oudo otieko mino sapali mere ocobere kiber.

²²Kakame aguraguran bin otieko mato kede pii, ngatic nono oko kwanyo mwola me saabu, kame koketo i um, kame tie guram kany, kede alung are me ngut cing, kame acelacel tie guram tol acel,

²³di eko waco ne be, “Waca, in nyar ka ngai? Benyo, agola twero udere i ot ka papa ni kame wan otwero buto iye?”

²⁴En eko gamo be, “Ango nyar ka Betuel ngat kame obedo wot ka Milika me enywalo kede Nakor.”

²⁵Eko medo be, “Wan opong kede gibuto kede cam me aguraguran, doko agola me buto wuda tie.”

²⁶Ngatic ka Aburaam oko kudo wie piny di eko woro Rwot.

²⁷En ewaco be, “Pwoc bed but Rwot, Rubanga ka ngadwong na Aburaam, ngat kame oko bedo kede amara kalikame lokere kede genere but ngadwong na. Rwot otieko tela tuno i ot ka wad gi ngadwong na.”

²⁸Di do nyako nono oko ringo eoto tatamo ne jo kame oudo tie i ot ka toto mere gi dedede kotimere.

²⁹Rebeka bin tie kede omin mere kame nyinge Laban. Laban oko ringo i atan but ngatic nono.



³⁰Kakame Laban bin oko neno kede mwola kame kongapo i um, kede alung i ngut cing amin mere, kede eko winyo kop kame amin mere otatamo di ewaco be icuo nono en kowaco ne, en eko ot but ngatic nono di eko ude etie cungo i nget aguraguran mege i atan.

³¹En eko waco ne be, “Bia ibed kede wa, Okwe in ngat kame Rwot otieko mini winyo. Pinyo kame mio in itie cungo ooko kan di ango atieko iiko ni ot kiton kabedo me aguraguran ni?”

³²Di do ngatic ka Aburaam nono oko ot paco kede Laban. Laban oko gonyo yec ki ngei aguraguran di eko mino gi cam kede eko tero gi kabuto. Di eko kelo pii ne Ngatic ka Aburaam me en lwoko tiene karacel kede jo mege.

³³Kakame oko kelo ne kede cam, en eko waco be, “Ango likame ayaro cam tuno di ango atieko tatamo kop kokela.” Laban oko waco ne be, “Wac kop nono.”

³⁴Di do en eko waco be, “Ango abedo ngatic ka Aburaam.

³⁵Rwot otieko mino ngadwong nango winyo adwong twatwal, doko etieko baro. Rwot otieko mine romini, diegi kede doke, siliba kede saabu, ipaso amon kede acuo, aguraguran kede pundan.

³⁶Doko Sara dako ka ngadwong na i wi tio mere oko nywalo ne ngadwong na atin awobi. En etieko mine jamini dedede kame en etie kede.

³⁷Ngadwong na oko mina akwongere di ewaco na be, ‘In likame ibino mono ne woda dako kikom anyira me Kanan, jo kame ango atie bedo i lobo gi.’

³⁸Do in ibino ot i ot ka papa na, but joawade na, di iko yero ne woda dako kibut gi.’

³⁹Ango di ako penyere be, ‘Do ka nyako nono oko dagi upere keda kono?’

⁴⁰Do en eko waco na be, ‘Rwot kame ango abedo lubo kop mere bino cwano malaika mere upere kedi di eko mino gikame ioto timo cobere. In ibino mono ne woda dako kikom joawade na, ki ot ka papa na.

⁴¹Kwongere nin buta likame bino bedo i wii ka in ioto but joawade na di gin kiko dagi mini nyako; in ibino do gonyere ki kwongere nin buta.’

⁴²” I ceng atin noni di ango atuno i atan, ango ako lego be, ‘Okwe Rwot, Rubanga ka ngadwong na Aburaam, ango akwai imi gikame ango abino kan pi timo cobere.

⁴³Ango ine atie cungo kan i nget atan me pii; ka nyako moro obino pi twomo pii, ango abino kwane pi mina pii me amata ki agulu mere.

⁴⁴Ka en eko yei doko di eko twomo pii kiton ne aguraguran na da, ango akwai imie ebed dako kame Rwot otieko yero ne wot ka ngadwong na.’

⁴⁵” Di pwodi ango oudo likame atieko yamo kop i cunya, inonono di aneno Rebeka bino di eyeo agulu pii mere i epepet. En di eko donyo i atan, eko twomo pii. Ango ako waco ne be, ‘Akwai imia pii amati.’



- ⁴⁶Awakawaka di en etingo agulu mere piny ki epepet mere di eko waco na be, ‘Mati, doko ango abino mino aguraguran ni da pii.’ Aso, ango di ako mato pii, doko en eko mino aguraguran da pii.
- ⁴⁷Di do ango ako penye be, ‘In ibedo nyar ka ngai?’ En eko waco na be, ‘Ango nyar ka Betuel, wot ka Nakor me enywalo kede Milika.’ Ango di do ako keto mwola i ume kede alung i ngut cinge.
- ⁴⁸Ango di ako do kudo wia piny di ako woro Rwot, di ako pake, Rubanga ka ngadwong na Aburaam, ngat kame oudo otela kiber kiton ot udo nyar ka wad gi ngadwong na, me tero ne wode.
- ⁴⁹Nan do ka wun ibinunu timo ne ngadwong na bero kede ateni, wacanu; doko ka li da, wacanu, tetekeny ango angei gi me atima.”
- ⁵⁰Laban kede Betuel oko gamo be, “Bala kame kop noni owok kede kibun Rwot, wan oli kede kop moro iye.
- ⁵¹Neni, Rebeka ine i nyimi, in tere di en eko bedo dako ka wot ka ngadwong nin, bala kame Rwot otieko waco.”
- ⁵²Kakame ngatic ka Aburaam owinyo kede kamano, eko riebere piny di eko woro Rwot.
- ⁵³Di eko woto mwolere kame kotimo kede siliba kede saabu, kiton igoen di eko mino Rebeka; eko mino omin me Rebeka kede toto mere da giamia me wel amalo.
- ⁵⁴Di do ngatic ka Aburaam karacel kede cuo kame bin en eupere kede gi oko cam di kiko amata, di kiko buto kuno. Kakame kiyai kede odiko, en eko waco be, “Yeunu na dok but ngadwong na.”
- ⁵⁵Omin me Rebeka kede toto mere oko waco be, “Wek kong nyako no dong kan kede wan pi kare moro, akadi bala pi ceng tomon kenekene; i cen mere di do en eko karuno ot.”
- ⁵⁶Do en eko waco negi be, “Kur imianu agali, pien Rwot otieko mino sapali nango ocobere kakare; wekunu ango adok but ngadwong na.”
- ⁵⁷Gin di kiko gamo be, “Wan oyaro lwongo nyako di oko penye.”
- ⁵⁸Gin di kiko lwongo Rebeka di kiko penye be, “Benyo, in ibino ot kede icuo ni?” En di eko gamo be, “Ebo, ango ayaro ot.”
- ⁵⁹Gin di kiko mino amot me yai but Rebeka amin gi, kede dako kame bin gwoke, karacel kede ngatic ka Aburaam kede cuo kame bin upere kede.
- ⁶⁰Di gin kiko lamo ne Rebeka winyo di kiwaco be, “Amin wa, wan okwao ni idok toto me jo atutututu; okwao be ikwae ni bwon jokwor gi di kiko mano bomban gi.”
- ⁶¹Di do Rebeka kede anyira kame konye oko yai, kiko bedo ingei aguraguran di kiko upere kede ngatic ka Aburaam. Ngatic nono oko tero Rebeka edok kede.



- ⁶²I kare nono Isaka oudo oyai ki Beerlakairoi di eko donyo bedo Negeb.
- ⁶³Otieno moro acel en di eko ot ilat i itela, eko tingo wange malo di eko neno aguraguran tie bino.
- ⁶⁴Kakame Rebeka otingo kede wange malo di eko neno Isaka, en eko wok piny awakawaka ki ngei aguragura,
- ⁶⁵di eko penyo ngatic ka Aburaam be, “Icuo mene ino kame tie bino ki itela riamo kede wa?” Ngatic nono oko gamo be, “En ngadwong na.” Di do en eko kwanyo egoe mere me umo wic di eko umere kede.
- ⁶⁶Ngatic ka Aburaam oko tatamo ne Isaka gi dedede kame en bin eko timo.
- ⁶⁷Di do Isaka oko tero Rebeka i eema ka toto mere Sara. En etere di eko doko dako mere, doko oudo emare. Manono oko kweno cuny Isaka ingei to ka toto mere.

Ageini 25

Idwe kame Aburaam Onywalo kede Ketura

(1 lyutun 1.32-33)

- ¹Aburaam bin bobo oko nyomo dako ace kame nyinge oudo Ketura.
- ²Ketura bin oko nywalo ne Aburaam Simuran, Yokosan, Medan, Midian, Isibak kede Sua.
- ³Yokosan en obedo papa me Seba kede Dedan. Awobe ka Dedan bin gin en Asurim, Letusim kede Leumim.
- ⁴Awobe ka Midian bin gin en Epa, Eper, Kanok, Abida kede Eleda. Idwe nogi dedede bin obedo ikwae ka Ketura.
- ⁵Aburaam bin oko mino jamini mege dedede but Isaka.
- ⁶Do di bin pwodi Aburaam tie kuo, en bin eko mino giamia but awobe kame en oudo enywalo kede mon ace. Di do en eko cwano gi tenge kibun wode Isaka, kiko ot i piny kame bin tie tetu kide.

To kede Ayika ka Aburaam

- ⁷Aburaam bin obedo kuo i wi lobo pi mwakini tol acel kede ot kanyaare kiwie kany (175).
- ⁸Aburaam bin oko to di oudo etieko ti kiber; oudo etieko doko emojong doko mwakini mege me dongo oudo do tot twatwal. En bin oko yike karacel kede joawade mege kame oudo otieko to.
- ⁹Awobe mege, Isaka kede Isimael oko yike i abo me Makepela kame bin tie tetu kide me Mamure, i poto ka Epuron wot ka Sokar Ngakiti.
- ¹⁰Poto nono en kame bin Aburaam owilo kibun jo Kiti. Kanono en kame bin oko yiko iye Aburaam kede dako mere Sara.



¹¹Di do Aburaam bin otieko to, Rubanga oko mino wode Isaka winyo. Isaka bin oko donyo bedo i nget atan me Beerlakairoi.

Ikwae ka Isimael

(1 lyutun 1.28-31)

¹²Ikwae ka Isimael wot ka Aburaam kame bin enywalo kede Agar dano me Misiri, ngatic ka Sara,

¹³gin ige di lubere kede rom me dongo gi: Nebaiot en kao ka Isimael di do Kedar, Adebeel, Mibisam,

¹⁴Misima, Duma, Masa,

¹⁵Kadad, Tema, Yetur, Napis kede Kedema.

¹⁶Jo nogi en kobedo idwe ka Isimael, doko magonogi en obedo nying gi di lubere kede calere gi kede kabedere gi, jopug tomon kiwie are di lubere kede atekerin gi.

¹⁷Isimael bin oko bedo kuo i wi lobo pi mwakini tol acel kede ot adek kiwie kanyaare (137), eko to di oko yike karacel kede joawade mege kame oudo otieko to.

¹⁸Ikwae ka Isimael bin oko donyo bedo cako ki Kabila tuno Sur, kabedo kame pimere kede Misiri i bad me Asiria. Gin bin kiko pokere tenge kikom ikwae ka Aburaam icegun.

Nywalo Esau kede Yakobo

¹⁹Jogi en kobedo ikwae ka Isaka wot ka Aburaam: Aburaam bin onywalo Isaka.

²⁰I kare kame bin Isaka oromo kede mwakini ot ongwon (40), eko nyomo Rebeka nyar ka Betuel me Aram, kabedo kame tie Mesopotamia. Rebeka oudo obedo amin me Laban dano me Aram.

²¹Isaka bin oko kwano Rwot pi dako mere, piento en oudo ebedo adonge. Rwot oko gamo ilega mere di Rebeka oko udo yie.

²²Idwe bin oko donyo adidiun i yie. En di eko waco be, “Ka edoko do cal kamane, pinyo bo kame mio ango pwodi ameede bedo kuo?” Di do en eko ot penyo Rwot pi mito ngeno gikame oudo tie timere ne.

²³Rwot oko waco ne be, “Atekerin are tie i yi. In ibino nywalo jo are kame bino pokere. Ngat acel bino bedo tek lono ngat ocelu, awobi adwong bino timo tic ne awobi atidi.”

²⁴Kakame kare mere me nywal oko romo kede, en eko nywalo bangi.

²⁵Atin me agege bin oko wok di ekwar, di kome lung tie kede yer bala egoe ayeyer. Gin bin kiko cako nyinge Esau.

²⁶I cen mere di omin mere da oko wok di emako atitinyo ka Esau; manono oko mino oko cako nyinge Yakobo. Isaka bin oudo do mwakini me dongo mere oromo ot kanyape (60) i kare kame Rebeka onywalo kede idwe nogi.



Esau Ocato Twero mere me Atin Kao

²⁷Kakame awobe nogi oko dongo kede, Esau bin oko bedo ipirana i dwar, doko en oudo dano kame maro bedo obar. Do Yakobo oudo obedo dano kame ling alinga, doko en oudo emaro bedo i paco.

²⁸Isaka oudo maro Esau piento en oudo cunye maro camo ringo me leini me obar. Do Rebeka oudo maro Yakobo.

²⁹Cenge moro acel Yakobo oudo tie tede dek, di Esau oko dwogo ki obar di kec obwone.

³⁰Esau oko waco ne Yakobo be, “Okwe kec obwona, mia dek moro akwar no acami!” Kop nono oko mino oko lwonge be Edom.

³¹Yakobo oko gamo be, “Me agege in kong sesi nango twero nin me anywali.”

³²Esau oko waco ne be, “Neningo, ango ayapuno to; kony me twero me anywali en nyo kibuta?”

³³Yakobo oko gamo be, “Kwongere kong buta.” En di eko kwongere bute di eko mino twero mere me anywali but Yakobo.

³⁴Di do Yakobo oko mino Esau kwon kede dek, di eko cam eko amata, di eko yai eoto gire. Epone no en kame Esau ocao kede twero mere me anywali.

Ageini 26

Isaka Obedo Gerar

¹Kikano kec ace bobo oko potu i lobo nono, weko maca kame oudo obedo tie i kare ka Aburaam. Isaka oko ot Gerar, but Abimelek abaka me Pilistia.

²Rwot oko nyutere but Isaka di eko waco ne be, “Kur iot Misiri; bedi i lobo kame ango abino nyuto ni.

³Bedi i lobo nono bala ngakumbor, ango abino bedo tie kedi, doko abino mini winyo. Pien ango abino mini karacel kede ikwae ni lobere nogi dedede, doko abino cobo cikere kame bin atimo but papa ni Aburaam.

⁴Abino mino ikwae ni bedo tot bala acer kame tie malo, di ango ako bino mino gi lobo noni dedede. Atekerin dedede me wi lobo bino udo winyo pi ikwae ni,

⁵pien Aburaam owinyo dwana di eko gwoko cik kede iswilia na.”

⁶Aso, Isaka oko bedo Gerar.

⁷Kakame cuo me kuno openye kede kop i kom dako mere, en eko waco negi be, “En ebedo amina.” En oudo etie kede lworu pi waco be Rebeka obedo dako mere, pien oudo eparo be cuo me kuno bino neke di kiko tero dako mere, pien Rebeka oudo cil twatwal.



- ⁸Kakame Isaka otieko bedo kede kuno pi kare moro, Abaka Abimelek me Pilistia oko neno ki dirisa di Isaka tie gwagwako dako mere Rebeka.
- ⁹Abimelek oko lwongo Isaka di eko waco ne be, “Mere dako ni ino! Pinyo komio oudo iwaco be en ebedo amini?” Isaka oko waco ne be, “Pien ango oudo aparo be kobino neka pire ka awaco be en dako na.”
- ¹⁰Abimelek oko waco be, “Itimo ne wa kamano pinyo? Icuo moro oudo romo buto kede dako nin, di koto iko mino wan oduonyo i raco.”
- ¹¹Aso, Abimelek oko kwenyaro jo mege di ewaco negi be, “Ka ngatamoro otimo gimoro arac ne icuo ni arabo ne dako mere, kobino neke.”
- ¹²Isaka oko puro kodi i lobo nono, mwaka nono eko udo cam kame kalamo kodi kame oudo epuro tien tol acel. Rwot omie winyo,
- ¹³di en eko medo ameda baro; emedo lony ameda tuno di eko baro adikinicel.
- ¹⁴Oudo etie kede romini kede dok, kede jotic atot, omio jo me Pilistia oko bedo kede nyeko bute.
- ¹⁵Gin kiko cuculo ataneko kame bin jotic ka papa mere Aburaam okunyo di pwodi Aburaam oudo kuo.
- ¹⁶Abimelek oko waco ne Isaka be, “Yai tenge kikut wa; in do itieko doko tek kalamo wan.”
- ¹⁷Aso, Isaka oko yai, eko ot guro eema mere i aditot me Gerar, eko donyo bedo kuno.
- ¹⁸En eko bobo medo kukunyo ataneko kame bin kokunyo i kare ka papa mere Aburaam, pien jo me Pilistia oudo ocuculo gi ingei to ka Aburaam; en eko bobo cako negi nying kame papa mere bin ocako negi.
- ¹⁹Do kakame jotic ka Isaka okunyo kede aditot kanono di kiko udo atan amol,
- ²⁰jokwat me Gerar oko lok kede jokwat ka Isaka di kiwaco be, “Pii no obedo merwan.” Omio en eko cako ne atan nono nyinge be Esek, pien gin kilok kede en.
- ²¹Jotic ka Isaka oko bobo kunyo atan ace, di kiko bobo lok pi manono da; en eko lwongo atan nono be Sitina. ²²En eko dak ki kuno di eko bobo kunyo atan ace, lok likame oko bedo tie pi manono; en eko lwongo atan nono be Rekobot, pien ewaco be, “Nan do Rwot otieko mino wa kabedo, obino do nywal oko nyai i lobo noni.”
- ²³Isaka oko yai di eko ot Beereseba.
- ²⁴Iwor nono Rwot oko nyutere bute di oko waco ne be, “Kur ibed kede lworu; ango Rubanga ka papa ni Aburaam, ango atie kedi. Ango ayaro mini winyo di ako bino mini ikwae atot pi cikere na but ngatic na Aburaam.”
- ²⁵Isaka di oko gero alutari kanono di eko woro Rubanga, di eko guro eema kanono. Jotic ka Isaka oko bobo kunyo atan ace kanono.

Cikere kame Isaka Otimo kede Abimelek



²⁶ Abimelek oko yai ki Gerar, karacel kede Akusat ngat koudo mie tam, kede Pikol ngadwong me isirikalen mege, kiko bino but Isaka.

²⁷ Isaka oko penyo gi be, “Pinyo komio wun ibinunu buta, do di wun oudo idaganu, doko ikounu riama tenge kibutu?”

²⁸ Gin kiko waco be, wan oneno kakaler be Rwot tie kedi; omio wan oko waco be poore wan okwongere kede in, di oko timo isikan kedi,

²⁹ tetekeny kur in itim ne wa raco moro, bala kame wada likame otimo ni kede raco moro, do kenekene otimo ni bero di oko cwani tenge kede mulem. In nan itie do ngat kame Rwot otieko mino winyo.

³⁰ Isaka oko iiko negi cam, di kiko cam kede amata.

³¹ Gin kiko dilo yai odiko sek di kiko timo ikwong but ngati kede but ngat ca; Isaka oko peruno gi kede amot, di gin kiko yai kibute kede mulem.

³² Cenge nono jotie ka Isaka oko bino di kiko waco ne kop i kom atan kame gin oudo kikunyo; gin kiwaco ne be, “Wan otieko udo pii!”

³³ En eko lwongo atan nono be Siba; nying bomba me Beereseba owok ki nying atan nono.

Mon ka Esau kobedo Jokumbor

³⁴ Kakame Esau oromo kede mwakini ot ongwon (40), en eko nyomo mon are me jo Kiti, Yudis nyar ka Beeru, kede Basemat nyar ka Elon.

³⁵ Mon nogi oko mino Isaka kede Rebeka obedo kede kuo me cweruny.

Ageini 27

Isaka Omio Yakobo Winyo

¹ Kakame bin Isaka oti kede, di wange oko doko mwadamwada likame ekaruno neno piny, en eko lwongo Esau wode adwong di eko waco ne be, “Woda”, en eko dwoko be, “Ango ine.”

² Isaka oko waco be, “Neningo, ango atieko ti, likame angeo ceng me to na.

³ Nan kwany jamini me dwar, isau me imalia kede yat me gweno emal, di iko ot itela dwar di iko neko na le moro;

⁴ di iko iiko na cam imiela kame cunya maro, di iko kelo na acami, tetekeny alam ni winyo di likame pwodi ato.”

⁵ Aso, Rebeka oudo tie winyo di Isaka yamo kede wode Esau. Di do kakame Esau ooto kede itela pi dwaro le moro enek di eko kelo,

⁶ Rebeka oko waco ne wode Yakobo be, “Ango awinyo di papa ni waco ne wode Esau be,



7' Oti idwar iko neko le moro iko kelo ited na cam imiela acami, tetekeny ako lamo ni winyo i nyim Rwot di likame pwodi ato.'

8Pi mano, woda yei winyo kop kame atie waco ni.

9Oti i anak iko yero na diegi are ayapak, tetekeny anak gi di ako tedo ne papa ni cam imiela kame cunye maro;

10di in iko tero ne papa ni pi camo, tetekeny elam ni winyo di likame pwodi eto."

11Do Yakobo oko waco ne toto mere Rebeka be, "Neningo, Esau obedo dano kame yer oswapo i kome, do komango pwot.

12Cengemogo papa na romo rarapo ango di eko tero bala ango atie nyware, manoni bino mino audio ilam arac akaka winyo."

13Toto mere oko waco ne be, "Woda, ka en elami wek ilam nono dwog i wiango. Kenekene in winy kop nango, oti di iko kelo nango diegi nogo."

14Aso, Yakobo oko ot di eko kelo ne toto mere diegi nogo, di toto mere oko tedo ne papa gi cam kame cunye maro.

15Rebeka oko kwanyo igoen ka Esau abeco, kame oudo tie i ode, di eko ngapo ne Yakobo wode atidi.

16Di en eko tweno launi me diegi nogo i bad Yakobo kede i ngute kakame li kede yer.

17En eko mino wode Yakobo cam imiela kede mugati kame en oudo etedo, pi tero.

18Aso, Yakobo oko donyo but papa mere di eko waco be, "Papa" ; Isaka oko gamo be, "Woda, in ngai?"

19Yakobo oko waco ne papa mere be, "Ango Esau wodi kao. Atieko timo gikame oudo iwaco na. Nan yai do icami le kame aneko ni, me wek imia winyo."

20Do Isaka oko penyo wode be, "Woda, in isusunyo twero udo le nono benyo benyo?" En eko dwoko be, "Pien Rwot Rubanga ni en komia aude."

21Isaka oko waco ne Yakobo be, "Woda, bia i ngeta me wek ararapo in pi ngeno ka ateteni in ibedo woda Esau arabo li."

22Aso, Yakobo oko ot but papa mere Isaka di Isaka oko rarapo en di eko waco be, "Dwani winyere bala dwan Yakobo, do badi cal bala me Esau."

23Isaka likame oko twero ngene, pien bade oudo yer oswapo iye bala bad omin mere Esau; aso en eko yei lamo ne winyo.

24Isaka oko bobo penye be, "Ateteni in en woda Esau?" En eko dwoko be, "Ango inononi."

25Isaka oko waco be, "Kel cam nono buta me wek acam le kame in woda ineko na di ako lamo ni winyo." En eko mine cam di eko camo; eko kelo ne bwini da eko mato.



²⁶Di papa mere Isaka oko waco ne be, “Woda nyikini iyapiyapi di iko nota.”

²⁷ Aso, Yakobo oko nyiko bute di oko note. Isaka oko ngweno igoen ka Yakobo di eko mine winyo di ewaco be, “Ngwece me cilokom woda cal bala ngwece me potokame Rwot omio winyo.

²⁸Akwao Rubanga emii toyo kame wok ki malo, kede lobo amio, kede emii engano atot kede bwini.

²⁹ Akwao be poore jo bed jotic nin, kede atekerin bed jo kame luro i nyimi. Akwao be in ibed kede loc i kom imiegu ni, doko ikwae ka toto ni miero lur i nyimi. Ilam arac mak jo kame lami kirac, kede winyo bed ne jo kame lamo ni winyo!”

Esau obako Doge ne Isaka pi Mine Winyo

³⁰Cucuto di Isaka otieko mino Yakobo winyo, di pwodi Yakobo oyai ayaa kibun papa mere, omin mere Esau oko dwogo ki dwar mere.

³¹Eda eko tedo cam imiela di eko tero ne papa mere. En eko waco ne papa mere be, “Papa, yai malo icam le kame ango wodi aneko ni, tetekeny imia winyo.”

³²Isaka papa mere oko penye be, “In ngai?” En eko dwoko be, “Ango wodi kao Esau.”

³³Kom Isaka oko donyo miel teltel di eko waco be, “Do ngai ica kodwaro le di eko kelo nango ca? Ango ako came di pwodi likame in ibino, di do ango ako mine winyo, ebo winyo nono do tie mere atwal!”

³⁴Kakame Esau owinyo kede kop kame papa mere owaco, en eko kok kitek kede twon wangcun, di eko waco ne papa mere be, “Papa miada winyo!”

³⁵Do Isaka oko dwoko be, “Omini obino kan i yore me angalo di eko tero winyo nin.”

³⁶ Esau oko waco be, “Mam ebedo gi kopooore pi cako ne nyinge be Yakobo? Piento en etieko umere i nyinga nan odoko tien are. Oudo etero twero na me atin kao, nan doko etero winyo na da.” Di do eko penyo Isaka be, “Likame iweko nada winyo moro?”

³⁷Isaka oko dwoko ne be, “Ango atieko mine edoko ngaloc nin, doko atieko mine imiegu mege pi bedo jotic mege. Atieko mine engano kede bwini. Woda, nan do nyo bobo kame ango atwero timo ni?”

³⁸ Esau oko penyo papa mere be, “Papa, in itie kede winyo acel kenekene? Okwe papa miada winyo!” Esau oko donyo koko.

³⁹ Di papa mere Isaka oko dwoko ne be, “Neningo, paco nin bino bedo i lobo kalikame mio, kede kakame toyo me malo li kiye.

⁴⁰ Ibino kuo kede epima, doko ibino bedo ngatic ka omini, do kame ijemo ne, ibino turo ayoko kame eketo i nguti.”



⁴¹Esau oko dingere kede Yakobo pi winyo kame papa mere omio Yakobo. En eko waco kene be, “Ceng me koko papa na oyapuno tuno, di do ango ako bino neko Yakobo.”

⁴²Rebeka oko winyo kop kame Esau awobi kao oudo tie iiko. Aso, Rebeka oko lwongo Yakobo wode atidi di eko waco ne be, “Omini Esau tie kwekweo cunye kede iik kame etie timo me neki.

⁴³Nan do, woda, yei winyo kop kame atie waco ni. Buny ringo but ominango Laban i lobo me Aran,

⁴⁴di in iko bedo kede en pi kare moro, tuno di cuny omini okwei,

⁴⁵tuno di gero ka omini okwei di wie oko wil kede gikame in itimo ne. Di do ango ako bino cwano dano moro pi omi ki kuno. Pinyo miero ango akei awobe na are dedede i ceng acel?”

Isaka Ocwao Yakobo but Laban

⁴⁶Rebeka oko waco ne Isaka be, “Ango atieko ol kede mon ka Esau jo Kiti. Ka Yakobo da onyomo dako Ngakiti bala magonogi, dako kobedo anywali me lobo noni, kony nango me bedo kuo do udo li!”

Ageini 28

¹Isaka oko lwongo Yakobo di eko kwano ne yongayo aber, di ewaco ne be, “In likame ibino nyomo dako me Kanan.

²Ot Mesopotamia i paco ka Betuel, en papa me toto ni, di iko nyomo nyako acel kikom anyira ka neru ni Laban.

³Akwao Rubanga Won Twer emi winyo iko nywal iko nyai, tetekeny idokunu twon jo atot.

⁴Akwae emi gikame ecikere pi mino Aburaam, in karacel kede ikwae ni, tetekeny lobo kame nan in ibedo iye bala ngakumbor dok meru, en lobo kame bin Rubanga omio Aburaam.”

⁵Kikano Isaka oko cwano Yakobo, di Yakobo oko ot paka Mesopotamia but Laban wot ka Betuel, dano me Aram; Laban oudo obedo omin me toto me Yakobo kede Esau.

Esau bobo Onyomo Dako Ace

⁶Esau oko ngeno be Isaka omio Yakobo winyo di eko cwane ot mono dako i Mesopotamia. Oudo engeo da be kakame Isaka omio kede Yakobo winyo, en ewaco ne da be kur enyom dako me Kanan.

⁷En eko niang da be Yakobo oko yei winyo kop ka papa mere kede toto mere, eko yai eoto Mesopotamia.



⁸Aso, kakame Esau oneno kede be mon me Kanan likame oyomo cuny papa mere Isaka,

⁹en eko ot but Isimael wot ka Aburaam di eko nyomo nyare kame nyinge Makalat, amin me Nebaiot; Makalat oko doko dako mere medo i kom mon kame oudo etie kede sek.

Lek ka Yakobo i Betel

¹⁰Yakobo oko yai ki Beereseba eko ot tetu Aran.

¹¹En eko tuno kabedo moro di eko buto iye, pien ceng oudo odonyo. En ekwanyo kidi ki kanono eko buto piny eteno iye wie.

¹²En eko leko be oudo tie madala kame kosipo i wi lobo, kame wie oudo tuno malo, di imalaikan ka Rubanga oudo tie dere kiyito kede malo kede di kiwok kede piny.

¹³Rwot oko cungo i ngete di oko waco ne be, “Ango en Rubanga ka kwaru ni Aburaam kede Rubanga ka Isaka; lobo kame nataman itie buto iye noni ango abino mino buti karacel kede ikwae ni.

¹⁴Ikwae ni bino bedo tot bala asinge kame tie i wi lobo. Gin kibino nyai kiko sarakin dok tetu tim, tetu kide, tetu malo kede tetu piny; doko jo dedede me wi lobo bino udo winyo pi in kede pi ikwae ni.

¹⁵Ngei kiber be ango abino bedo tie kedi, doko abino gwoki i kabedo dedede kame in ioto iye, di ako bino dwoki i lobo noni. Ango likame abino weki tuno di atieko timo gikame acikere pi timo ni.”

¹⁶Yakobo oko cei ki wang nino di eko waco be, “Ateteni Rwot tie kane, ango oudo likame angeo!”

¹⁷Lworo oko make di eko waco be, “Kan tin obedo kabedo me lworo benyo! Manoni en ot ka Rubanga, doko en erute me malo.”

¹⁸Odiko sek di piny oru, Yakobo oko yai eko kwanyo kidi kame oudo eteno iye wie di eko sipe malo, di eko onyo mo i wie.

¹⁹En eko lwongo kabedo nono be Betel; do i agege nying bomba kame oudo tie kanono en Lus.

²⁰Di Yakobo oko kwongere but Rubanga be, “Ka ibedo tie keda, di iko gwoka i sapali kame nataman atie ot iye, di iko mina mugati me acama kede egoe me angapa,

²¹tetekeney ako dok tuno i ot ka papa na kede mulem, abino mini ibedo Rubanga na.

²²Kidi me iyutun kame ango atieko sipo bino bedo kakame kowori kiye; doko ateteni abino mini acel me tomon me gi dedede kame imia.”

Ageini 29

Yakobo Otuno Paco ka Laban



- ¹Di Yakobo oko meede kede sapali mere, di eko tuno i lobo kame tie tetu kide.
- ²En eko ngoole i atan moro i wi itela di esipan adek me romini tie buto i ngete, pien romini oudo mato atan nono. Kidi kame tie i wen atan nono oudo dwong.
- ³Ka romini dedede oudo ocokere kanono, jokwat oudo loro kidi nono tenge ki wen pii, di kiko mino romini mato pii, di gin kiko dwoko kidi nono kakare i wen pii.
- ⁴Yakobo oko waco negi be, “Imiegu na, wun iwokunu ki tuai?” Gin kiko dwoko be, “Wan owok ki Aran.”
- ⁵En eko penyo gi be, “Ingeunu Laban wot ka Nakor?” Gin kiko dwoko be, “Wan ongee.”
- ⁶En eko penyo gi be, “Kome yot?” Gin kiko dwoko ne be, “Kome yot, nyare, Lakeri da ine tie bino kede romini mege.”
- ⁷En eko waco negi be, “Nenunu, piny pwodi i dier iceng; esawa pwodi likame oromo me koko romini karacel. Miunu romini mat pii di ikounu tero gi kioti kicam lum.”
- ⁸Do gin kiko dwoko be, “Wan likame otwero timo manono tuno di romini dedede otieko cokere karacel, di oko loro kidi tenge ki wen pii di do oko mino romini mato pii.”
- ⁹Kakame oudo pwodi Yakobo tie yamo kede gi, Lakeri oko tuno kede romini ka papa mere; piento en kame oudo etie kwano gi.
- ¹⁰Kakame Yakobo oneno kede Lakeri nyar ka neru mere Laban kede romini ka papa mere, Yakobo oko ot di eko loro kidi tenge ki wen atan, di eko mino romini ka neru mere Laban omato pii.
- ¹¹Yakobo oko noto Lakeri di eko kok kitek.
- ¹²Yakobo oko waco ne Lakeri be en wad kede papa mere; be en ebedo wot ka Rebeka. Lakeri oko ringo eoto yamo ne papa mere.
- ¹³Kakame Laban owinyo kede kop i kom Yakobo wot ka amin mere, en eko ringo bute pi riamo kede, di eko gwake eko donyo note, di do eko tere i ode. Yakobo oko tatamo ne gi dedede kotimere,
- ¹⁴di Laban oko waco ne be, “Ateteni in kede ango obedo kom kede remo acel.” Yakobo oko bedo kede pi duwe acel.

Yakobo Otimo Tic pi Nyomo Anyira ka Laban

- ¹⁵Laban oko waco ne Yakobo be, “In likame ipoore timo nango tic nono, be pien in wad kede ango. Waca, imito be aculi nyo?”
- ¹⁶Laban oudo tie kede anyira are, nyako adwong oudo nyinge Lea, do nyako atidi oudo nyinge Lakeri.
- ¹⁷Lea oudo neno wange ber, do Lakeri oudo idengelel di ecil.



- ¹⁸Yakobo oudo cunye mito Lakeri, omio eko waco be, “Abino timo ni tic pi mwakini kanyaare pi nyomo nyari atidi Lakeri.”
- ¹⁹Laban oko waco be, “Eber ka ango amie buti akaka ango mine but icuo moro ace; bed keda.”
- ²⁰Aso, Yakobo oko tic pi mwakini kanyaare pi nyomo Lakeri, do mwakini nogo obedo ne bala ceng anonok pi amara kame oudo etie kede but Lakeri.
- ²¹Yakobo oko waco ne Laban be, “Mia do dako na aribere kede, pien mwakini kanyaare otiek.”
- ²²Aso, Laban oko koko jo dedede me adul nono di eko tedo ebaga.
- ²³Do otieno Laban oko tero ne Yakobo Lea akaka Lakeri, en eko buto kede.
- ²⁴(Laban oko mino Silipa, nyako ngatic mere but nyare Lea pi bedo ngakonye.)
- ²⁵Odiko kakame piny oru kede, Yakobo oko poi eudo be Lea inonono. Yakobo oko waco ne Laban be, “Nyo ine kame in itimo nango? Mam oudo ango atimo ni tic pi nyomo Lakeri? Do pinyo komio iko ngala?”
- ²⁶Laban oko dwoko be, “Mano obedo gi kalikame kotimo i piny wa ni, me mino nyako atidi cako nyomere ne nyako adwong.
- ²⁷Tiek ber sabiti me ebaga me nyomo man, di wan oko bino mini maca da ka in iyei bobo tic pi mwakini kanyaare.”
- ²⁸Yakobo oko yei, di eko tieko sabiti me ebaga me nyomo Lea; di Laban oko bobo mine nyare Lakeri pi bedo dako mere.
- ²⁹(Laban oko mino Bilka, nyako ngatic mere but nyare Lakeri pi bedo ngakonye.)
- ³⁰Aso, Yakobo oko buto kede Lakeri da, doko oudo en emaro Lakeri kalamo Lea. En eko timo ne Laban tic pi mwakini kanyaare ace bobo.
- ³¹Di bin Rwot oneno be Yakobo oudo maro Lakeri kalamo Lea, en eko mino Lea nywal, do eko mino Lakeri obedo adonge.
- ³²Lea oko yac di eko nywalo atin awobi, di eko cako nyinge Ruben; piento en ewaco be, “Pien Rwot otieko neno can na, ateteni cwara nan do bino mara.”
- ³³En eko yac bobo eko nywalo awobi, en eko waco be, “Rwot omia atin awobi ni da piento en etieko winyo be likame komara” ; en eko cako nyinge Simeon.
- ³⁴En bobo eko yac di eko nywalo atin awobi, en eko waco be, “Nan do cwara bino moko i koma, pien atieko nywalo ne awobe adek” ; en eko cako nyinge Lebi.
- ³⁵En bobo eko yac di eko nywalo atin awobi, di eko waco be, “Nan abino do pako Rwot” ; en eko cako nyinge Yuda. En eko do ber weko nywal.

Ageini 30



- ¹Kakame Lakeri oneno kede be en likame enywalo ne Yakobo atin moro, nyeko oko make kede amin mere, di eko waco ne Yakobo be, “Miada aud idwe, aso ka li ango ayaro to.”
- ²Yakobo oko doko ger ne Lakeri di eko waco ne be, “Iparo be ango do adoko Rubanga, ngat kotwoni nywal?”
- ³Lakeri oko waco be, “Bilka, nyako ngakonya ine, but kede me wek enywal nada idwe.”
- ⁴Aso, en eko mino Yakobo Bilka nyako ngatic mere pi bedo dako mere; Yakobo oko buto kede Bilka.
- ⁵Bilka oko yac di eko nywalo ne Yakobo atin awobi.
- ⁶Di Lakeri oko waco be, “Rubanga otieko ngolo na kop kiber, doko da etieko winyo dwana eko mina atin awobi” ; en eko cako nyinge Dan.
- ⁷Bilka doko oko yac di eko nywalo ne Yakobo atin awobi me are.
- ⁸Di Lakeri oko waco be, “Aute auta atek kede amina di ako bwone” ; omio en eko cako ne nyinge be Naputali.
- ⁹Kakame Lea oneno kede be ejiko nywal, en eko kwanyo Silipa nyako ngatic mere di eko mine but Yakobo pi doko dako mere.
- ¹⁰Di Silipa nyako ngatic ka Lea oko nywalo ne Yakobo atin awobi.
- ¹¹Lea oko waco be, “Atie kede winyo aber!” En eko cako nyinge Gad.
- ¹²Silipa ngatic ka Lea oko bobo nywalo ne Yakobo atin awobi me are.
- ¹³Lea oko waco be, “Atie kede yomcuny! Pien mon bino waco be ango atie kede yomcuny” ; omio en eko cako nyinge Aser.
- ¹⁴I kare me nyaro engano, Ruben oko ot i pototo eko udo yat kame mio mon yac i pototo kuno, en eko kelo yat nono ne toto mere Lea. Lakeri oko waco ne Lea be, “Okwe miada yat ka wodi kame mio mon yac.”
- ¹⁵Lea oko dwoko be, “Iparo be ebedo gi atitidi me in mano cwara? Imito doko da tero yat ka woda kame mio mon yac?” Lakeri oko waco be, “Ka imia yat ka wodi kame mio mon yac, ibino buto kede Yakobo iwor atin.”
- ¹⁶Kakame Yakobo odwogo kede ki pototo otieno, Lea oko ot pi siramo en, di eko waco ne be, “Miero ibut keda; pien atieko wili kede yat ka woda kame mio mon yac.” Aso, Yakobo oko buto kede iwor nono.
- ¹⁷Rubanga oko winyo koko ka Lea, en eko yac di eko nywalo ne Yakobo awobi me kany.
- ¹⁸Lea oko waco be, “Rubanga otieko cula, pien ango amio cwara nyako ngatic na” ; omio en eko cako nyinge Isakar.



- ¹⁹Lea oko yac bobo di eko nywalo ne Yakobo awobi me kanyape.
- ²⁰Lea oko waco be, “Rubanga otieko mina giamia aber; nan do cwara bino wora pien anga atieko nywalo ne awobe kanyape” ; omio en eko cako nyinge Sebulun.
- ²¹Ingei manono en eko nywalo atin nyako di eko cako nyinge Dina.
- ²²Rubanga oko yutuno Lakeri, di Rubanga oko mine nywal.
- ²³En eko yac di eko nywalo atin awobi, eko waco be, “Rubanga okwanyo lewic na.
- ²⁴Akwae emia bobo awobi ace” ; omio en eko cako nyinge Yosepu.

Yakobo Obaro i Wi Laban

- ²⁵Kakame Lakeri onywalo kede Yosepu, Yakobo oko waco ne Laban be, “Weka do aoti, tetekeny adok turwa i piny wa.
- ²⁶Miango idwe kede mon na di iko weka aoti, pien anga atieko timo nin tic pi gin bedo mega. In ingeo kiber tic kame anga abedo timo ni.”
- ²⁷Laban oko waco be, “Yei na waco be: anga atieko niang di lubere kede tic me tucop me anyim kede komungere be, Rubanga omiango winyo pi in.
- ²⁸Waca cul kame in imito di anga ako bino culi.”
- ²⁹Yakobo oko dwoko ne be, “In kikomi ingeo epone kame anga atimo ni kede tic, kede epone kame leini ni onyai kede i cinga.
- ³⁰Pien oudo in itie kede leini anonok di pwodi likame anga abino kan, do nan do kitieko doko tot twatwal; doko Rwot obedo mini winyo i kabedo dedede kame anga abeo iye. Do awene do kame anga abino gwoko kede jo tura da?”
- ³¹Laban oko penye be, “Imito be ami nyo?” Yakobo oko dwoko be, “Anga likame amito cul moro; anga abino meede gwoko leini nin ka in iyei timo kaman:
- ³²yei nango bebeo i diere me leini nin dedede tin, di ako kwakwanyo romini dedede enyanga kede esisi, kede idwe romini acuo acol dedede, kede da diegi enyanga kede esisi; magonogo en kame bino bedo cul nango.
- ³³I kare me anyim in ibino neno ateni nango, ka in ibino pi neno cul kame in imia. Ka in iuda kede diegi kalikame obedo enyanga kede esisi, kede idwe romini acuo kalikame col, magonogo udo akwalo akwala.”
- ³⁴Laban oko waco be, “Mano ber! Wek etimere bala kame in iwaco.”
- ³⁵Do i ceng nono Laban oko kwanyo ikoroi ekomol kede esisi, kede diegi amon dedede anyanga kede asisi, kede apat dedede kame tie kede kakatar, kede idwe romini acuo acol dedede di eko keto gi i cing awobe mege pi daro gi.
- ³⁶En eko yai eoto tenge kakabor kibus Yakobo, kakame romo sapali me ceng adek. Yakobo oko dong kwano leini ka Laban ace apat.



- ³⁷Yakobo oko jako ajange me egere me yen adek, eko kikiso kagamogo ki ngei gi tetekeny kibed tie kede kakacol kede kakatar.
- ³⁸En eko keto yen kame ekikiso nogo i nyim leini i atuba kame kimato kiye pii. En oudo eketo gi kanono pien leini kwarere kame kibino mato pii.
- ³⁹Aso, kame leini oudo okwarere i nyim yen nogo, gin oudo kiko nywalo idwe esisi, enyanga kede ekomol.
- ⁴⁰Yakobo oko leko tenge romini kikom diegi di eko pimo nyim gi i kom me ka Laban kobedo esisi kede acol; di en eko poko leini mege kargi ken gi, likame enyalo gi kede me ka Laban.
- ⁴¹Tek kame leini akingir oudo tie kwarere, Yakobo oudo pielo jang yen kame ekikiso nogo i atuba me mato pii i nyim gi tetekeny kiyac di yen nogo tie i nyim gi kanono.
- ⁴²Do oudo likame eketo jang yen nogo i nyim leini agodogodo. Manono oko mino Laban obedo tie kede leini agodogodo di Yakobo oko bedo tie kede leini akom gi yot.
- ⁴³Manoni oko mino Yakobo obaro twatwal di eko bedo tie kede leini atot, ipasoi kede apasoi, kede aguraguran kede pundan.

Ageini 31

Yakobo Olwi kibut Laban

- ¹Yakobo oko winyo be awobe ka Laban oudo tie waco be, “Yakobo otieko tero abar ka papa wa; en etieko lony kede jamini ka papa wa.”
- ²Doko Yakobo oko neno da be Laban oudo likame tie bedo kede kiber bala lem sek.
- ³Di Rwot oko waco ne Yakobo be, “Doki i lobo ka joakwari ni kede but joawade ni, ango abino bedo tie kedi.”
- ⁴Aso, Yakobo oko cwano kop di oko lwongo Lakeri kede Lea pi bino kakame oudo en etie kwano iye romini.
- ⁵En eko waco negi be, “Ango nan atie neno be likame bobo papa wu bedo keda kiber bala lem sek. Do Rubanga ka papa na obedo tie keda.
- ⁶Wun ingeunu be ango abedo timo ne papa wu tic kede teko na dedede.
- ⁷Aso di en ebedo sera; edwodwoko musala na tien kede tien. Do Rubanga likame oko yei ne timo na gimoro arac.
- ⁸Ka oudo Laban owaco be, ‘Abino culi kede idwe diegi akomol, ‘diegi dedede oudo ko nywalo idwe akomol; doko ka oudo ewaco be, ‘Abino culi kede idwe diegi esisi, ‘diegi dedede oudo ko nywalo idwe esisi.
- ⁹Iepone noni, Rubanga otieko kwanyo ki cing papa wu leini kame oudo etie pito di eko mino gi buta.



¹⁰” I kare kame diegi kwarere kede, ango ako lek di ako neno di ikoroi ekomol kede esisi kede enyanga en kame tie kwaro diegi.

¹¹Di malaika ka Rubanga oko yamo keda i wang lek di elwonga be, ‘Yakobo, ‘ango ako dwoko ne be, ‘Ango ine! ‘

¹²En eko waco be, ‘Kong ting wangi iko neno, ikoroi dedede kame tie kwaro diegi obedo ikoroi ekomol kede esisi kede enyanga; pien ango atieko neno gi dedede kame Laban tie timo nin.

¹³Ango en Rubanga kame bin onyutere buti i Betel, kakame bin ionyo kiye mo i wi kidi di iko kwongere buta. Nan do yai ki lobo noni di iko dok kakame bin konywali iye.’ “

¹⁴Lakeri kede Lea oko dwoko ne Yakobo be, “Benyo, tie iner moro kame koweko ne wada i ot ka papa wa?

¹⁵En etie tero wa bala jokumbor. Piento en etieko cato wa, di eko donyo tic kede sente kame kowilo wa kede.

¹⁶Abar dedede kame Rubanga okwanyo kibun papa wa obedo merwa kede me idwe wa; nan do in tim gi dedede kame Rubanga owaco ni.”

¹⁷Aso, Yakobo oko yai di eko keto idwe kede mon mege i ngei aguraguran;

¹⁸Yakobo oko kolo leini mege dedede, kede eko coko jame dedede kame oudo eudo ki Mesopotamia, di eko cako dok but papa mere Isaka i lobo me Kanan.

¹⁹Aso, kakame Laban oudo ooto kede nyaro yer me romini, Lakeri oko kwalo rubangan ka papa mere ki ot.

²⁰Yakobo oko ngalo Laban likame etuco ne be en oudo etie yai ot.

²¹Aso, en eko ringo kede jamini dedede kame oudo etie kede; eako kong ngolo nam me Eupurate, di do eko tiro nyime tetu piny kobedo imukuran imukuran me Gilead.

Laban Owapo Yakobo

²²Ingei ceng adek Laban oko winyo be Yakobo olwi.

²³En eko kwanyo joe mege di eko cako wapo Yakobo pi ceng kanyaare, tuno eko make i piny kobedo imukuran imukuran me Gilead.

²⁴Do Rubanga oko bino but Laban dano me Aram iwor di oko yamo kede i lek be, “Gwokere kara kur iwace Yakobo kop moro akadi aber amoto arac.”

²⁵Aso, Yakobo oko guro eema mere i wi moru, di Laban kede joe mege oko guro eema gi i piny kobedo imukuran imukuran me Gilead.

²⁶Laban oko waco ne Yakobo be, “Nyo kame in itieko timo? In itieko ngala di iko tero anyira na bala jo kame komako ki yi.



- 27**Pinyo komio in ingala idagi waco na iko lwi alwia? Ka koto oudo iwaco na, koto oudo aperuno in kede kilel kede were, di kogoo bul kede arigirigi.
- 28**Pinyo komio likame imia anoto ikwae kede anyira na pi moto gi amot me pokere? In itimo tim me mingo.
- 29**Ango atie kede twer me timo ni can; do Rubanga ka papa ni oyamo keda iwor aoki di ewaco na be, ‘Gwokere kara kur iwace Yakobo kop moro akadi aber amoto arac.’
- 30**Akadi bed bala oudo in iyai pien paco ka papa ni oudo omui, do pinyo komio iko kwalo rubangan nango?”
- 31**Yakobo oko dwoko ne Laban be, “Ango ayai iepone nono pien oudo atie kede lworu be cengemogo in ibino mano anyira ni kibuta tetek.
- 32**Do ka in iudo ngatamoro kikut wan kan kame tie kede rubangan nin, ngat nono likame bino kuo. I nyim joe nango kan, nyut giri moro kame tie buta, di iko kwanye itere.” Aso, Yakobo oudo likame ngeo be Lakeri oudo okwalo rubangan nogo.
- 33**Aso, Laban oko ot eko donyo more i eema ka Yakobo; eko ot more i eema ka Lea, kede eko more i eema me apaso are, do likame eko udo gimoro. Di do en eko ot i eema ka Lakeri.
- 34**Bin Lakeri oudo okwanyo rubangan nogo di eko keto gi i lau kame kobedo kede i ngei aguragura di eko bedo i wi gi. Laban omumulo gi dedede kame oudo tie i ot, do likame eko udo gi.
- 35**Lakeri oko waco ne papa mere be, “Adwong kur ilil keda; ango likame atwero cungo i nyimi, pien atie kede tuo me mon.” Aso, Laban oko medo more, do likame eko udo rubangan mege.
- 36**Di do Yakobo oko ngoi, eko donyo ronkino Laban. Yakobo oko penyo Laban be, “Atimo ni raco nyo? Atimo dub nyo, komio iwapa teko teko?”
- 37**Bed bala in itieko mono jame nango dedede, jamini mege me odi en kame itieko udo? Ket gi kane i nyim joe na kede i nyim joe ni, tetekeny gin kingol kop i diere wan kedi jo are.
- 38**Likame tie oromo arabo diel ni moro kame yie owok, doko likame acamo emerekek moro kikom romini ni.
- 39**Tek kame leini ager oudo oneko oromo moro, ango en kame oudo abedo kede kei. Likame oudo akele buti pi nyuto be manono likame obedo raco na. In oudo imia culo gimoro kame kokwalo iceng amoto iwor.
- 40**Tien atot ango akanyakino lieto me i dier iceng kede ngico me iwor. Likame oudo atwero nino.
- 41**Oudo ebedo kamanono pi mwakini ot are kame oudo atie kedi. Ango atio mwakini tomon kiwie ongwon pi nyomo anyira ni, doko ako tic pi mwakini kanyape pi udo doke kibuti. Bed bala kamanono da, in iko bedo dwodwoko musala na tien kede tien.



⁴²Ka koto Rubanga ka joapapi na, Rubanga ka Aburaam kede me Isaka, likame oudo tie keda, oudo koto nan icwa adok kede cinga nono. Do Rubanga otieko neno peko na kede tic kame atimo, di eko ngolo raco i wii iwor aoki.”

Yakobo Otimo Isikan kede Laban

⁴³Di Laban oko waco ne Yakobo be, “Anyira obedo mega, idwe obedo mega, doke obedo mega; gi dedede kame itie neno obedo mega. Likame bobo tie gimoro kame tin ango atwero timo i kom kop me anyira nogi kede idwe gi.

⁴⁴Wek nan do otim kedi isikan, di eko bino bedo bala ijura i diere nango kedi.”

⁴⁵Aso, Yakobo oko kwanyo kidi di eko sipe.

⁴⁶Yakobo oko waco ne joe mege be, “Cokunu kide,” di gin kiko koko kide kiko kumemo gi; gin kiko cam i nget kide kame kikumemo nogo.

⁴⁷Laban oko cako nying kanono be Jegar Sakaduta, do Yakobo oko cako ne be Galeed.

⁴⁸Laban oko waco ne Yakobo be, “Atukit me kide gi bino bedo gi me iyutun but ango kede in.” Manono en komio kolwongo kabedo nono be Galeed.

⁴⁹Doko da Laban oko lwongo kabedo nono be Misipa, pien ewaco be, “Poore Rwot cib wange i kom wa kame opokere kedi.

⁵⁰Ka in idonyo tero anyira na kirac, arabo ka in bobo imedo mon ace i kom anyira na, bed bala likame tie ngatamoro kame bino waco nango, do yutuno be Rubanga tie mujura i diere nin kede ango.”

⁵¹Di Laban oko waco ne Yakobo be, “Neni atukit me kide go kede kidi kosipere kame ango atieko keto i diere nin kede ango.

⁵²Atukit me kide go, kede kidi kosipere mere tie mujura be, likame ango abino ngolo atukit noni tuno buti, doko da likame ida ibino ngolo atukit noni kede kidi kosipere noni tuno buta pi timo asura.

⁵³Rubanga ka Aburaam kede Rubanga ka Nakor bino ngolo kop i diere wa.” Aso, Yakobo oko lairo pi gwoko cikere noni, di elairo i nying Rubanga kame papa mere Isaka bin woro.

⁵⁴Yakobo oko mino giayala ki wi moru, eko lwongo joe mege pi bino camo. Ingei gin cam, gin kiko dong bedo i wi moru iwor kiakia.

⁵⁵Odiko sek di piny oru, Laban oko moto ikwae mege kede anyira mege kede amot me notere di eko kwano negi winyo, eko pokere kede gi edok paco.

Ageini 32

Yakobo Oikere pi Riamo kede Esau

¹Yakobo oko mako yongayo mere, di imalaikan ka Rwot oko riamo kede en.



²Kakame eneno gi kede, en eko waco be, “Magi en isirikalen ka Rubanga!” Aso, en eko cako nying kanono be Makanaim. ³Yakobo oko oro jo telo nen anyim ot but omin mere Esau i kabedo kame kolwongo be Seir, i piny me Edom.

⁴En ewaco negi pi waco ne Esau be, “Ngatic ni Yakobo owaco be, ‘Ango atieko bedo kede Laban bala ngakumbor tuno nan.

⁵Nan atie kede twonin, pundan, romini, ipasoi kede apasoi. Nan ango atie cwano nin kop, adwong na, kede gen me in bedo kede cuny aber buta.’ “

⁶Kakame jo kame ooro odwogo kede but Yakobo, gin kiko waco ne be, “Wan ooto but omini Esau, nan en etie bino pi riamo kedi, etie upere kede cuo tol ongwon.”

⁷Lworo oko mako Yakobo di kome oko to. En eko poko jo kame oudo etie kede, romini, kede dok kede aguraguran i ikodeta are,

⁸di oudo eparo be, “Ka Esau obino di eko nekaro ekodet acel, ekodet ocelu bino bwot.”

⁹Yakobo oko lego be, “Okwe Rubanga ka kwaru na Aburaam kede Rubanga ka papa na Isaka; Okwe in Rwot ngat kame iwaco na be, ‘Doki i piny ni kede but joawade ni, di ango ako bino timo ni bero, ‘

¹⁰ango likame apoore pi udo amara kalikame lokere kede genere dedede kame inyuto ne ngatic ni. Bin ango angolo ecilet me Yorodan kede ebela kenekene, do nan adwogo kede ikodeta are gi.

¹¹Okwe laka ki cing omina, ki cing Esau, pien ango atie kede lworo bute; etwero bino di eko neko wan dedede, mon kede idwe.

¹²Do di in oudo iwaco be, ‘Ateteni abino timo ni bero, di ako mino ikwae ni doko tot bala asinge me dog nam, kalikame twero marere pi tot gi.’ “

¹³En eko tieko iwor nono dedede kuno, di eko kwanyo giamia kikom gikame oudo etie kede di eko tero ne omin mere Esau:

¹⁴ekwanyo diegi amon tol are (200) kede ikoroi ot are (20); romini amon tol are (200) kede imerekekin ot are (20);

¹⁵aguraguran adoto idwe ot adek (30) kede idwe gi; dok amon ot ongwon (40) kede twonin tomon (10); pundan amon ot are (20) kede acuo tomon (10).

¹⁶Magi dedede en eketo i cing jotic mege, ekodet acelacel i cing ngatic acel. En ewaco negi be, “Wun telanu yongayo, do wekunu kakatwolo i dierediere me ekodet acelacel.”

¹⁷En eko waco ne ngatic kotelo anyim be, “Ka omina Esau oriamo kedi di eko penyi be, ‘Ngadwong ni en ngai? Itie ot tuai? Leini kame tie i nyimi go obedo me ka ngai?’

¹⁸in poore idwoke be, ‘Gin kibedo me ka ngatic nin Yakobo; gin kibedo mic kame en ecwao ne ngadwong mere Esau, doko da en etie cen ngei wa.’ “



¹⁹En eko waco kop acel nono ne ngatic me are, kede me adek kede apat mege dedede kame oudo kolo leini be, “Wun ipoorenu waco kop acel nono ne Esau ka iriamunu kede en.

²⁰Wacenu be, ‘Ebo, ngatic ni Yakobo tie cen ngei wa.’ “ Piento en oudo ebedo paro be, “Giamia kame ango acwao ne bino yomo cunye, di ango ako sobolo bino riamo kede, cengemogo eko bino gama.”

²¹Aso, en eko cwano giamia otelo nen anyim, do en eko dong cen ebuto i eema.

Yakobo Oute kede Dano i Peniel

²²Iwor nono Yakobo oko yai eko kwanyo mon mege are, apaso mege are, kede idwe mege tomon kiwie acel di eko ngolo ecilet me Jabok.

²³En etero gin eko mino gi kingolo pii, di eko cwano jame mege kame oudo etie kede da loka tuca.

²⁴ Yakobo oko dong en kene; icuo moro oko bino di oko ute kede tuno odiko.

²⁵Kakame icuo nono oneno kede be likame eko sobolo bwono Yakobo, en eko dongo etul ka Yakobo; etul ka Yakobo oko gwete kakame oudo etie ute kede lonono.

²⁶Icuo nono oko waco be, “Ber ango aoti, pien piny tie ru.” Do Yakobo oko waco be, “Likame ango abino yei ni ot, paka tuno di ilamo na winyo.”

²⁷Icuo nono oko penye be, “Nyingi ngai?” En eko dwoko be, “Nyinga Yakobo.”

²⁸ Icuo nono oko waco ne be, “Likame bobo kobino lwongi be Yakobo, do kobino lwongi be Isirael, pien in itieko ute kede Rubanga kede jo di iko bwono gi.”

²⁹ Di Yakobo oko kwane be, “Okwe yama nyingi.” Do en eko waco be, “Pinyo komio itie penyo nyinga?” Di do eko lamo ne Yakobo winyo ki kanono.

³⁰Aso, Yakobo oko waco be, “Ango atieko neno Rubanga wang i wang, do di ako dong kuo,” omio eko cako nying kanono be Peniel.

³¹Di ceng oko wok kakame Yakobo oudo tie yai kede ki Peniel, di ekomo pi etul mere.

³²Pi manono, tuno tin jo me Isirael likame camo ringo me etul, pien bin kodongo ringo me etul ka Yakobo.

Ageini 33

Yakobo Oriamo kede Esau

¹Aso, Yakobo oko tingo wange di eko neno di Esau tie bino kede cuo tol ongwon (400). Di do en eko popoko idwe mege ne Lea kede Lakeri kede ne ipaso are.

²En eko cibo apaso kede idwe gi anyim, di Lea kede idwe mege oko lubo, di do Lakeri kede Yosepu oko bedo ki cen.



³Yakobo kikome oko kato anyim di eko ot paka tuno but omin mere; eluro wie piny tien kanyaare kakame oudo etie ot kede bute.

⁴Do Esau oko ringo bute di oko gwako ngute di kiko donyo koko.

⁵Kakame Esau otingo kede wange eko neno mon kede idwe, en eko penyo Yakobo be, “Alu ige atie kedi gi?” Yakobo oko dwoko be, “Gin kibedo idwe kame Rubanga omio ngatic ni pi kisa mere.”

⁶Di do apasoi oko nyiko kunono, gin kede idwe gi, di kiko luro wi gi piny.

⁷Lea kede idwe mege da oko nyiko kunono, gida kiko luro wi gi piny; me ajikini Yosepu kede Lakeri da oko nyiko kunono, gida kiko luro wi gi piny.

⁸Esau oko waco be, “Do twon esirit me leini kame ango ariamo kede gi dedede menyo?” Yakobo oko dwoko be, “Me yomo cuny adwong na di eko bino timo na bero.”

⁹Do Esau oko waco be, “Omina, ango atie kede jamini aroma, in wek gigo dong megì.”

¹⁰Yakobo oko waco be, “Li, okwe; ka in itieko yei pi timo nango bero poore iyei giamia me cinga, pien ateteni neno wangi rom aroma bala neno wang Rubanga, pien in igama iepone aber twatwal.

¹¹Okwe gam giamia na kame akelo buti, pien Rubanga otimo na tim me kisa, doko da ango atie kede gi dedede kame amito.” Aso, en eko ngangao omin mere tuno en yei gamo gi.

¹²Esau oko waco be, “Oyai omak yongayo, ango abino ot karacel kede in.”

¹³Do Yakobo oko waco ne be, “Adwong na, in ingeo be idwe pwodi nep, doko miero apar pi romini kede dok kame doto idwe; ka akolo gi tetek pi ceng acel gin dedede kibino totoun.

¹⁴Pi mano, adwong na, in tel ne ngatic nin yongayo, di ango ako bino donyo lubi momot di lubere kede kite kame dok kame tie i nyima kede idwe twero ot kede, paka tuno di ango ako bino udi Seir.”

¹⁵Esau oko waco be, “Kong awek ni jo mogo kame tie keda.” Do Yakobo oko dwoko be, “Adwong na, kara itie lole pinyo?”

¹⁶Aso, cenge nono Esau oko mako yongayo cako dok Seir.

¹⁷Do Yakobo oko ot Sukot eko gero ot kuno kede awi ne doke mege, pi mano kolwongo kanono be Sukot.

¹⁸Kakame oudo etie dwogo kede ki Mesopotamia, Yakobo oko tuno kede mulem i bomba me Sekem i lobo me Kanan, di en eko guro eema mere i nyim bomba.

¹⁹En eko wilo lobo kame oudo egero iye eema nono pi silingi me siliba tol acel kibut ikwae ka Kamor, en papa me Sekem.



²⁰En eko gero alutari kuno di eko cako nyinge be El, Rubanga me Isirael.

Ageini 34

Kobuto kede Dina Tetek

¹Ceng acel Dina nyar ka Lea kame enywalo kede Yakobo oko ot pi welao mon mogo me adul nono.

²Kakame Sekem ngat koudo obedo ngapug me kabedo nono onene kede, en wot ka Kamor dano me Kibi, en eko make di eko buto kede tetek.

³Cunye oko wane i kom Dina nyar ka Yakobo; ebedo kede amara bute di eko donyo yamo kede i yore me mwolo.

⁴Aso, Sekem oko waco ne papa mere Kamor be, “Nyoma nyako no.”

⁵Yakobo oko winyo be Sekem otimo emuna i kom nyare; do pi kite kame awobe mege oudo ooto kede i kwat, en kong eko dire tuno gin dwogo.

⁶Kamor papa me Sekem oko ot but Yakobo pi yamo kede,

⁷esawa nono en kame awobe ka Yakobo oudo tie dwogo kede ki itela. Kakame kiwinyo kede kop noni, cuny gi oko wang kede twon gero, pien Sekem oudo otimo raco adwong twatwal i Isirael pi ot buto kede nyar ka Yakobo; akodi tim nono likame poore atima.

⁸Do Kamor oko waco negi be, “Cuny woda tie i kom nyaru, okwe mienu nyako no enyomi.

⁹Wek obedunu joaoc; miunu wa onyom anyira wu di wuda ikounu nyomo anyira wa.

¹⁰Wun ibinunu bedo karacel kede wa; ibinunu bedo karamoro dedede kame cunyu mito, ibinunu bedo iye di itimunu tic me cato wil, doko da ikounu udo jamini amako wu kiye.”

¹¹Sekem da oko waco ne papa me Dina kede imiegu mege be, “Timanu ber, gi dedede kame ibinunu penya ango abino mino wu.

¹²Penyunu giamia kede cul me nyom di tot bala kame cunyu mito, di ango ako bino mino wu gi dedede kame ipenyanu; kenekene wun mianu nyako no dok dako na.”

¹³Awobe ka Yakobo oko dwoko ne Sekem kede papa mere Kamor kop kame umo wang gi auma, pien Sekem oudo otieko munao amin gi Dina.

¹⁴Gin kiwaco negi be, “Wan likame otwero yei ne amin wa nyomere kede ngat kalikame kokepo, pien manono bino kelo ne wa lewic.

¹⁵Kenekene wan obino yei kop wu ka wun iyeunu doko cal bala wan, di ikounu kepo cuo dedede kame tie i diere wu.

¹⁶Di do wan oko bino mino wu anyira wa pi nyomo, di wada oko bino nyomo anyira wu, di wan oko bino bedo i diere wu okounu doko jo acel.



¹⁷Do ka wun idagunu kop wan likame ikounu kepere, wan obino kwanyo nyar wa di oko girwa ot.”

¹⁸Kop kame kiwaco oko yomo cuny Kamor kede wode Sekem.

¹⁹Awobi noni likame oko gal kede timo gikame oudo kowaco ne, pien nyar ka Yakobo oudo oyomo cunye twatwal. Sekem oudo obedo dano apire tek twatwal i diakal gi.

²⁰Aso, Kamor kede Sekem oko ot i erute me bomba gi di kiko waco ne jo me bomba be,

²¹” Jogi obedo jo abeco kede wa; owekunu gi kibed i lobo wa, kitim iye tic me cato wil, pien lobo wa ni gire lac romo gi; onyomunu anyira gi, doko wada omiunu gi anyira wa kinyomi.

²²Gin kiyaro yei pi bedo i diere wa, pi doko jo acel kede wan, kwanyo kenekene ka kokepo cuo wan bala mergi.

²³Mam doke gi, jamini gi, kede leini gi dedede bino doko merwa? Kenekene wan oyeunu kede tam gi, di gin kiko bino bedo i diere wa.”

²⁴Jo dedede kowok ooko i erute me bomba oko yei kop kame Kamor kede wode Sekem owaco, di oko kepo cuo dedede, jo dedede kowok ooko i erute me bomba.

Imiegu ka Dina Onyango Amin gi

²⁵I ceng me adek, di oudo pwodi jo tie kede aramo me akepo, awobe ka Yakobo are, Simeon kede Lebi, gin imiegu ka Dina, oko kwanyo ipimai gi di kiko ot ngeso yi i bomba, di kiko neko cuo dedede.

²⁶Gin kineko kiton Kamor kede wode Sekem kede epima, di kiko kwanyo amin gi Dina ki ot ka Sekem di kiko giri ot.

²⁷Awobe apat ka Yakobo oko bino kakame kotimo iye nek, di kiko yako bomba nono, pien oudo komunao amin gi.

²⁸Gin kitero romini kede doke gi, pundan gi kede gi dedede kame oudo tie i bomba kede i calo.

²⁹Gin kiyako abar gi dedede kede gi dedede kame oudo tie i ude gi, di kiko mako idwe kede mon gi kitero.

³⁰Yakobo oko waco ne Simeon kede Lebi be, “Wun itiekunu kelo nango peko pien itiekunu kelo na ading kede jo me Kanan kede jo me Perisi, gin jo me lobo noni. Ango jo na nonok; ka gin kicokere di kiko sura, gin kibino neko wa dedede, ango karacel kede jo me oda.”

³¹Do gin kiko waco be, “Benyo, mam do en ebut kede amin wan iepone nono, ineno bala edoko malaya?”

Ageini 35



Rubanga Omio Yakobo Winyo i Betel

- ¹ Rubanga oko waco ne Yakobo be, “Yai di iko ot paka Betel di iko donyo bedo kuno. Geri alutari kuno ne Rubanga konyutere buti i kare kame iringo kede kibut omini Esau.”
- ² Yakobo oko waco ne jo me ode karacel kede jo dedede kame oudo tie kede be, “Ucunu tenge rubangan mogo me kumbor kame nan tie i diere wu, ikounu lonyere di ikounu loko igoen wu.
- ³ Di do okounu yai ot Betel, kakame ango abino gero iye alutari ne Rubanga kame bin ogamo koko na i kare kame oudo atie kede i peko, doko ebedo tie keda i kabedo dedede kame ango abedo ot iye.”
- ⁴ Aso, gin kiko mino Yakobo rubangan dedede me kumbor, kede mwolere kame oudo tie i yit gi; Yakobo oko kano gi i dud ejinga kame oudo iyapi kede Sekem.
- ⁵ Kakame oudo gin kitie ot kede, Rubanga oko mino jo me bomban dedede kame iyapi kede gi lworu, omio likame ngatamoro oko wapo gi.
- ⁶ Yakobo kede jo dedede kame oudo tie kede en oko tuno Lus, kakame nataman kolwongo be Betel i lobo me Kanan.
- ⁷ En eko gero alutari kuno di eko lwongo kanono be El Betel, pien kanono en kame oudo Rubanga onyutere ne kiye i kare kame eringo kede kibut omin mere.
- ⁸ Di Debora, ngat kame bin gwoko Rebeka, oko to di oko yike i dud ejinga kame tie i aditot piny me Betel, oko lwongo yat nono be, Allon Bacut.
- ⁹ Rubanga bobo oko nyutere but Yakobo kakame ebino kede ki Mesopotamia, di eko mine winyo.
- ¹⁰ Rubanga owaco ne be, “Nyingin Yakobo; likame bobo kobino lwongi be Yakobo, do kobino lwongi be Isirael.” Nyinge oko do doko Isirael.
- ¹¹ Rubanga owaco ne be, “Ango Rubanga Won Twer, nywali iko nyai; ateker kede atekerin bino wok kibuti, kede abakai bino wok kibuti.
- ¹² Abino mini lobo kame oudo amio Aburaam kede Isaka, doko abino mino lobo nono but ikwae ni.”
- ¹³ Di Rubanga oko yai oweko Yakobo kakame eyamo kede kiye.
- ¹⁴ Yakobo oko sipo kidi kakame Rubanga oyamo kede kiye; eko onyo iye bwini bala giayala kede mo.
- ¹⁵ Aso, Yakobo oko lwongo kabedo kame Rubanga oyamo kede kiye nono be Betel.

To ka Lakeri

- ¹⁶ Yakobo kede jo me paco mere oko yai ki Betel. Kakame oudo pwodi kitie kede kakabor kede Epurat, kare me nywal ka Lakeri oko tuno; nywal mere oko bedo tek.



¹⁷Kakame oudo aramo me nywal ocere ne kede, ngat kame oudo tie cole oko waco ne be, “Lakeri, kur ibed kede lworu, iudo bobo atin awobi.”

¹⁸Kakame oudo cunye tie cot kede (pien eko to), en eko cako nying atin nono be Benoni, do papa mere oko cako ne be Benjamin.

¹⁹Aso, Lakeri oko to, di oko yike i nget yongayo me Epurat (en Betelem),

²⁰di Yakobo oko sipo kidi i wi ates mere. Kidi me ates ka Lakeri nono tie cungo tuno tin.

²¹Isirael oko meede kede ot mere di eko guro eema mere i ngei gedo abor me Eder.

Awobe ka Yakobo

(1 lyutun 2.1-2)

²² Kakame Yakobo oudo tie bedo kede i lobo nono, Ruben oko buto kede Bilka, kame oudo obedo ngat acel kikom mon ka papa mere; Yakobo oko winyo kop nono. Yakobo oudo tie kede awobe tomon kiwie are.

²³Awobe ka Lea gin ige: Ruben (kao ka Yakobo), Simeon, Lebi, Yuda, Isakar kede Sebulun.

²⁴Awobe ka Lakeri gin ige: Yosepu kede Benjamin.

²⁵Awobe ka Bilka, ngat koudo obedo apasoit ka Lakeri gin ige: Dan kede Naputali.

²⁶Awobe ka Silipa, ngat koudo obedo apasoit ka Lea gin ige: Gad kede Aser. Magi oudo obedo awobe ka Yakobo kame enywalo di etie Mesopotamia.

To ka Isaka

²⁷ Yakobo oko dok but papa mere Isaka kakame kolwongo be Mamure, i nget Keburon. Kanoni en kame Aburaam kede Isaka oudo obedo iye bala jokumbor.

²⁸Isaka oko bedo paka mwaka me dongo mere romo tol acel kede ot kanyauni (180)

²⁹di eko to di oudo eti twatwal; awobe mege, Esau kede Yakobo oko yike.

Ageini 36

Ikwae ka Esau

(1 lyutun 1.34-37)

¹Jogi en kame obedo ikwae ka Esau, ngat kame kolwongo da be Edom.

² Esau bin onyomo mon mege kikom anyira me Kanan, gin ige: Ada nyar ka Elon Ngakiti, Okolibama nyar ka Ana wot ka Sibeon Ngakibi,

³kede Basemat nyar ka Isimael, en amin me Nebaiot.

⁴Ada bin oko nywalo ne Esau Elipasi; Basemat bin oko nywalo Reuel;

⁵Okolibama bin oko nywalo Yeus, Yalam kede Kora. Jogo nogi en kame obedo awobe ka Esau, kame bin en eko nywalo i lobo me Kanan.



⁶Di do Esau bin oko yai kede mon mege, awobe mege, anyira mege kede jo dedede me i ode, doke mege kede leini mege dedede, kiton jamini dedede kame bin en eko udo di etie i lobo me Kanan. Di en eko ot kabedo ace kame bin bor kede omin mere Yakobo.

⁷Pien lobo kame gin oudo kitie bedo iye oudo odoko do diding negi, pien jamini kame gin bin kitie kede oudo tot twatwal, manoni oko mino likame oudo kikaruno dong bedo karacel.

⁸Pi mano, Esau, kame nyinge da Edom, oko do bin donyo bedo i piny me Seir, piny me mori.

⁹Jogi en kame obedo ikwae ka Esau, kwaru me jo Edom, kame bedo Seir i piny me mori.

¹⁰Nying awobe ka Esau ige: Elipasi, awobi kame en bin enywalo kede Ada dako mere; Reuel, awobi kame en bin enywalo kede Basemat dako mere da.

¹¹Awobe ka Elipasi bin gin en Teman, Omar, Sepo, Gatam kede Kenas.

¹²Elipasi wot ka Esau bin oko nyomo dako ace kame bin nyinge Timina, ngat oko nywalo ne Amalek. Jogo en kame obedo awobe ka Esau kame enywalo kede Ada dako mere.

¹³Awobe ka Reuel bin gin ige: Nakat, Seera, Sama kede Misa. Jo nogo en kame bin obedo awobe ka Esau kame bin enywalo kede Basemat.

¹⁴Awobe ka Okolibama, dako ka Esau, nyar ka Ana wot ka Sibeon gin ige: en bin eko nywalo ne Esau Yeus, Yalam kede Kora.

¹⁵Magi en ikekon me awobe ka Esau. Awobe ka Elipasi kao ka Esau bin obedo kwaru me jo me ikekon gi: Teman, Omar, Sepo, Kenas,

¹⁶Kora, Gatam kede Amalek. Magonogo en ikekon ka Elipasi, kame bin bedo i lobo me Edom. Jo nogi en kame obedo ikwae ka Ada.

¹⁷Ikekon kame bin owok kibus Reuel wot ka Esau gin en: Nakat, Seera, Sama, kede Misa. Jogi dedede bin obedo ikwae ka Basemat dako ka Esau.

¹⁸Ikekon kame bin owok kibus dako ka Esau Okolibama, nyar ka Ana gin en: Yeus, Yalam, kede Kora.

¹⁹Ikekon nogi dedede bin owok kibus Esau.

Ikwae ka Seir

(1 lyutun 1.38-42)

²⁰Jogi en kame obedo awobe ka Seir Ngakorit, kame bin ogeo bedo i lobo nono sek: Lotan, Sobal, Sibeon, Ana,

²¹Dison, Eser, kede Disan; awobe ka Seir nogi da en kame obedo ikekon me jo Korit, kame bin bedo i lobo me Edom.



- ²²Ikekon kame bin owok kibut Lotan gin en Kori kede Keman. Timina en kame bin obedo amin me Lotan.
- ²³Awobe ka Sobal gin bin ige: Aluban, Manakat, Ebal, Sepo kede Onam.
- ²⁴Awobe ka Sibeon bin gin en: Aya kede Ana. Ana nono en kame bin oko ngoole i kom atan kame lelepo pii aliet i wi itela, di oudo en etie kwano pundan ka papa mere Sibeon.
- ²⁵Idwe ka Ana bin gin en: Dison kede Okolibama.
- ²⁶Awobe ka Dison bin gin en: Kemudan, Esiban, Itiran kede Keran.
- ²⁷Awobe ka Eser bin gin en: Bilkan, Saaban kede Akan.
- ²⁸Awobe ka Disan bin gin en: Us kede Aran.
- ²⁹Nying ikekon me jo Korit bin ige: Lotan, Sobal, Sibeon, Ana,
- ³⁰Dison, Eser kede Disan. Magonogo en kame obedo ikekon me jo Korit i lobo me Seir.

Abakai me Edom

(1 lyutun 1.43-54)

- ³¹Abakai kame bin opugo lobo me Edom di bin pwodi likame abaka moro opugo jo me Isirael gin ige:
- ³²Bela wot ka Beor bin opugo Edom. Nying bomba mere bin Dinkaba.
- ³³Kakame Bela bin oko to kede, Yobab wot ka Seera me Bosira oko lunyo wange bala abaka.
- ³⁴Yobab bin oko to di Kusam dano me adul me Teman oko lunyo wange bala abaka.
- ³⁵Kakame Kusam oko to kede, Kadad wot ka Bedad, ngat kame bin oko bwono jo me Midian i piny me Moab, oko lunyo wange bala abaka. Nying bomba mere bin Abit.
- ³⁶Kadad bin oko to di Samila me Masereka oko lunyo wange bala abaka.
- ³⁷Kakame Samila oko to kede, Saul me bomba me Rekobot kame bin tie i nget ecilet me Eupurate, oko bin lunyo wange bala abaka.
- ³⁸Saul bin oko to di Baal Aanan wot ka Acibor oko lunyo wange bala abaka.
- ³⁹Kakame Baal Aanan wot ka Acibor oko to kede, Kadar bin oko lunyo wange bala abaka. Nying bomba mere bin Pau; nying dako mere bin Meketabel, nyar ka Matured, nyar ka Mesakab.
- ⁴⁰Ikekon me jo kowok kibut Esau di lubere kede ude gi kede kadedere gi nying gi ige: Timina, Aluba, Yetet,
- ⁴¹Okolibama, Ela, Pinon,
- ⁴²Kenas, Teman, Mibisar,



⁴³Magadiel kede Iram. Magonogi en kame obedo ikekon me jo Edom di lubere kede kabedere gi i lobo kame bin gin kiko donyo bedo iye. Esau en kame obedo kwaru me jo Edom.

Ageini 37

Yosepu kede Imiegu mege

¹Yakobo bin oko donyo bedo i lobo me Kanan, kakame bin papa mere obedo iye bala ngakumbor.

²Man en itatam amako jo me ot ka Yakobo. Yosepu di bin oromo mwakini tomon kiwie kanyaare, eko donyo kwano romini kede diegi, en karacel kede imiegu mege awobe ka Bilka kede Silipa, mon ka papa mere. Yosepu bin kelo ne papa gi kope areco kame bin imiegu mege timo.

³Yakobo bin maro Yosepu kalamo awobe mege apat dedede, piento en bin enywale i wi tio. En bin eko kuno ne ekanso abor kame bade boco.

⁴Do kakame bin imiegu mege oneno kede be papa gi oudo maro Yosepu kalamo gin dedede, gin kiko dage, doko oudo likame kiyamo kede kiber.

⁵Ceng moro acel Yosepu oko lek. Kakame en bin eko tatamo ne kede imiegu mege lek mere nono, gin kiko medo dage kitek.

⁶En oudo ewaco negi be, “Winyunu lek kame ango aleko.

⁷Oudo wanunu dedede otieniu i poto twetweo engano i arita. Oyotoyot di arita nango oko yai eko cungo. Di do aritan wun oko cokere luke diere, di kiko gungo piny mino arita nango wor.”

⁸Imiegu mege oko waco ne be, “Iparo be in iyaro bedo abaka di iko bino pugo wan? Mam in imito pugo wan?” Di do gin kiko medo dage kitek pi lek mere kede pi kope kame en ewaco negi.

⁹Yosepu bin bobo oko leko lek ace di eko waco ne imiegu mege be, “Nenunu, ango bobo aleko lek ace. Aleko be oudo aneno ceng, duwe, kede acerin tomon kiwie acel di kitie luro piny buta.”

¹⁰Do kakame en etatamo ne kede papa mere kede imiegu mege lek nono, papa mere oko coke di waco ne be, “Epone me lek nyo ino kame in ileko no? Ateteni in iparo be ango kede toto ni, kede imiegu ni oyaro bino di oko luro piny i nyimi?”

¹¹Di do nyeko bin oko mako imiegu mege i kome, do papa mere bin oko kano kop noni i cunye.

Kocato Yosepu di oko Tere Misiri

¹²Ceng moro acel imiegu ka Yosepu bin oko ot Sekem kwano leini ka papa gi kuno.

¹³Yakobo bin oko waco ne Yosepu be, “Mam imiegu ni tie kwano leini Sekem? Bia acwai but gi.” Yosepu oko gamo be, “Ango ine.”



- 14**Papa mere oko waco ne be, “Oti inen ka imiegu ni tie kiber kede leini; di iko dwoko na kop.” Aso, en bin eko cwane eyai ot ki aditot me Keburon. Kakame bin en eko tuno kede Sekem,
- 15**icuo moro bin oko ude di etie awiratoi i obar; icuo nono oko penye be, “Nyo kame in itie mono?”
- 16**En di eko gamo be, “Ango atie mono imiegu na. Okwe, waca kakame gin kitie kwano iye leini.”
- 17**Icuo nono oko waco ne be, “Gin kitieko yai ki kan, pien ango awinyo di gin kiyamo be, ‘Ootunu Dotan.’ “ Di do Yosepu oko wapo imiegu mege di eko udo gi Dotan.
- 18**Gin bin kiko nene di pwodi etie kakabor, di gin kiko cako poro kop me neke di en pwodi likame etuno but gi.
- 19**Gin kiko donyo yamo ken gi ken gi be, “Ngailek ca ine tie bino.
- 20**Bianu onekenu di okounu uce i bur moro; di okounu ot waco be le moro me obar ocame, di okounu neno gikame bino timere ne lek mere.”
- 21**Do kakame Ruben owinyo kede kamano, en bin eko tamo lake ki cing gi. En ewaco negi be, “Kur onekenu.”
- 22**Ruben bin owaco negi be, “Kur ionyunu remo mere; ucenu i bur ni i wi tim kan, do kur imienu awanon moro.” En ewaco kamano piento en oudo etie mono epone me lake ki cing gi di eko dwoke but papa mere.
- 23**Kikano, kakame Yosepu bin oko tuno kede but imiegu mege, gin kiko gonyo ekanso mere, ekanso abade boco kame bin en engapo.
- 24**Di do gin kiko tere kiko uce i bur. Bur nono oudo gimoro li kiye; pii oudo li kiye.
- 25**Gin bin kiko bedo piny cam; kakame kitingo kede wang gi malo, kiko neno ekodet me jocat me jo Isimael di bino kiwok ki Gilead kede aguraguran kame yeo odok, kede mo angwe kur me yen; oudo kitie tero gi Misiri.
- 26**Yuda bin oko penyo imiegu mege be, “Nyo kame wan obinunu udo ka onekunu omin wa di okounu mungo?”
- 27**Bianu ocatenu but jo Isimael, do weko wan keto can moro i kome, piento en ebedo omin wa, merwa me remo.” Imiegu mege oko yei kede kop mere.
- 28** Kakame jocat me Midian mogo oko beo kede kuno, imiegu ka Yosepu oko wote ki bur di kiko cate but jo Isimael pi siliba ot are. Jo nogo oko tero Yosepu Misiri.
- 29**Kakame bin Ruben oko dwogo kede i bur di eko udo Yosepu li kiye, en eko nyinyilo igoen mege pi cwercury.
- 30**Eko dok but imiegu mege di eko waco negi be, “Awobi ca li ki bur; ango abino timo nadi?”



³¹Di do gin kiko kwanyo ekanso ka Yosepu, kiko ngolo ekoroi di kiko luto ekanso mere i remo.

³²Gin kiko tero ekanso nono but papa gi di kiko waco ne be, “Wan oudo ekanso noni; kong nene ka en me ka wodi arabo li.”

³³En eko ngeno ekanso nono di eko waco be, “Kom en ekanso ka woda! Le me obar otieko came; ateteni le otieko nyinyilo Yosepu.”

³⁴Di do Yakobo oko nyinyilo igoen mege pi cwercury di eko rwano igoen me iturur i piere, eko koko wode pi ceng atot.

³⁵Awobe mege kede anyira mege dedede bin oko bino pi tamo kweno cunye, do en eko dagi winyo kop gi, di eko waco negi be, “Li ba, ango abino ot kabedo me jo oto but woda di pwodi atie koke kamanono.” Di do papa mere oko meede koke kamanono.

³⁶Di mano bin tie timere, jo me Midian bin oko cato Yosepu i Misiri but Potipa, ngadwong me tic ka Parao, ngat kame bin obedo ngatel isirikalen kame gwoko paco ka Parao.

Ageini 38

Yuda kede Tamar

¹I kare nono Yuda bin oko yai kibus imiegu mege di eko dak bedo kede icuo moro me Adulam kame bin nyinge Kira.

²Ki kuno Yuda bin oko neno nyako moro me Kanan kame oudo nying papa mere Sua. En bin eko nyome

³di eko mine eudo yie, eko nywalo atin awobi di eko cako nyinge Er.

⁴Bobo eko yac di eko nywalo atin awobi, eko cako nyinge Onan.

⁵En bobo eko medo nywalo atin awobi, di eko cako nyinge Sela. En enywalo atin noni di oudo Yuda tie Kesib.

⁶Yuda oko nyomo ne Er, en atin kao mere, dako kame nyinge Tamar.

⁷Do Er, kao ka Yuda, oudo ekite mere rac i nyim Rwot. Manono oko mino Rwot okwanyo kuo mere.

⁸Di do Yuda oko waco ne Onan be, “In but kede dako ka omini di iko timo ne gi dedede bala kame mitere kibus omin me cware; inywal idwe ne omini.”

⁹Do pien Onan oudo ngeo be idwe kame en enywalo kede dako nono likame bino bedo mege, en di do eko donyo onyo kwir mere me icuo piny i kare dedede kame en ebuto kede apuserut dako ka omin mere, me wek kur inywal idwe ne omin mere.

¹⁰Gikame en etimo nono oko bedo rac i nyim Rwot, omio Rwot oko neko eda.



¹¹Di do Yuda oko waco ne ci wode Tamar be, “Dok i ot ka papa ni, iko dong di itie apuserut tuno di woda Sela odongo.” En ewaco kamano pien oudo etie kede Iworo be Sela da bino to bala imiegu mege. Di Tamar oko dok bedo turgi.

¹²Ingei kare moro, dako ka Yuda, nyar ka Sua, bin oko to. Kakame kare ka Yuda me iturur otiek kede, en bin eko ot Timina but jo kame nyaro yer me romini mege, en karacel kede ngawote Kira me Adulam.

¹³Kakame bin oko waco ne kede Tamar be, “Papa me cwari tie ot Timina nyaro romini,”

¹⁴Tamar bin oko gonyo igoen mege me apuserut, di eko umo nyime, eko rwano egoe, di eko bedo piny i erute me Enaim, bomba kame tie i yongayo kame oto Timina. En oudo engeo be Sela do otieko dongo, do di likame oko mine bute pi en nyomere kede.

¹⁵Kakame Yuda bin onene kede, en eko paro be en oudo malaya, pien oudo eumo nyime.

¹⁶Yuda oko ot bute i nget yongayo kuno di eko waco ne be, “Bia, ango amito buto kedi.” Yuda owaco kamano pien oudo likame engeo be dako nono oudo bedo ci wode. Tamar di oko penye be, “Nyo kame in ibino mina ka ango ayei buto kedi?”

¹⁷Yuda oko gamo be, “Ango abino cwano ni atin diel kikom leini na.” En di eko waco be, “Ango abino yei kenekene ka in isingao na gimoro tuno in cwano atin diel nono.”

¹⁸Yuda oko penye be, “Nyo kame in imito be amii?” En di eko gamo be, “Miango gi me alama ni kame in iliero i nguti kede ausi mere, kede ebela kame in imako i cingino.” Di en eko mine gi nogo. En eko buto kede, di Tamar oko udo yie.

¹⁹Tamar bin oko yai di eko ot gire, eko kwanyo egoe me umo nyime tenge, di eko ngapo igoen mege me apuserut.

²⁰Kakame Yuda oko oro kede ngawote Kira kede atin diel, pi ot omo jamini kame bin esingao but dako nono, en likame bin eko karuno udo dako nono.

²¹En bin epenyo jo me kabedo nono be, “Malaya kame oudo bedo i nget yongayo kame oto Enaim nataman do tie tuai?” Do gin kiko gamo be, “Cako sek likame tie malaya moro kan.”

²²En di eko dok but Yuda di eko waco ne be, “Ango likame aude; medo i wi manono jo me kuno waco be cako sek likame tie malaya moro kuno.”

²³Yuda oko waco be, “Wek en eter jamini nogo. Wan likame omito be jo nyer wa. Neni, ango acwao ne atin diel noni, do in likame iko karuno ude.”

²⁴Di do kare okato oromo bala dwete adek, bin oko waco ne Yuda be, “Ci wodi Tamar otieko timo tic me malaya, doko etieko yac pi tim mere me malaya nono.” Di Yuda oko waco be, “Terenu ikounu wange paka to.”



²⁵Di bin do oudo kotie tere ot wange, en eko cwano kop ne papa me cware be, “Won jamini gi en koyac nango. Akwai inen gi kiber, di iko ngeno won jamini nogi: gi me alama kede ausi mere, kede ebela.”

²⁶Yuda bin oko ngeno gi nogo be mege, di eko waco be, “En etimo gi kopoore kalamo ango, pien ango likame amie but woda Sela.” Di Yuda likame bobo oko buto kede.

²⁷Kakame do kare mere me nywal bin oko romo kede, oko ngere be bangi oudo tie i yie.

²⁸Di bin en oudo etie do ramere me nywal, atin acel oko rwako bade oko; dako kame bin tie cole oko mako bad atin nono di eko tweno iye ausi akwar di ewaco be, “Man en koge wok.”

²⁹Do en eko dwoko bade i yi toto mere, di do omin mere en oko geno wok. Manono oko mino ngat koudo cole oko waco be, “Mere epone nono en kame in iyabo kede yongayo ni tetek!” Pi mano, bin oko do cako nyinge be Peresi.

³⁰I cen mere di do oko nywalo omin mere di ausi tie i ngut cinge, di oko cako nyinge Seera.

Ageini 39

Yosepu kede Dako ka Potipa

¹Bin jo Isimael oko tero Yosepu Misiri, di kiko cate but Potipa, ngadwong me jotic ka Parao, kame bin telo isirikalen kame oudo gwoko paco ka Parao.

²Rwot bin oko bedo tie kede Yosepu di eko mine ebedo ngawinyo. En bin eko donyo bedo i ot me ngadwong mere me Misiri.

³Ngadwong ka Yosepu bin oko neno be Rwot oudo tie kede Yosepu doko oudo emio gi dedede kame en etimo cobere kiber.

⁴Cuny Potipa oko bedo yom kede Yosepu di eko mine ebedo ngatic mere. En emie ebedo ngat kame lo ode lung kiton jamini dedede kame en bin etie kede.

⁵Cako i kare kame en emie ebedo kede ngat kame lo ode kede jamini dedede kame en oudo etie kede, Rwot oko mino winyo i ot me icuo me Misiri nono pi Yosepu. Rwot omio winyo i kom gi dedede kame bin en etie kede i ot kede kiton i kom leini kede i poti mege.

⁶Omio Potipa di do oko weko gi dedede kame en bin etie kede i cing Yosepu. I kare kame bin Yosepu bedo kede en, oudo likame en bin eparo gimoro akadi acel, kwanyo kenekene cam kame oudo epoore camo. Yosepu oudo obedo icuo acil doko di ibus.

⁷Ingei kare moro, dako ka ngadwong mere cunye oko wane i kom Yosepu di eko waco ne be, “But keda.”



⁸Do en eko dagi di eko waco ne dako ka ngadwong mere be, “Neningo, di ango atie kan, ngadwong na likame tie kede par moro i kom gimoro kame mako i ot, doko da en etieko keto gi dedede kame en etie kede i cinga.

⁹En likame edwong i ot noni kalamo ango, doko likame tie gimoro kame en etwona kwanyo kenekene in, piento in ibedo dako mere. Benyo benyo kame bobo ango akaruno timo kede gikame rac rom kano, di ako timo dub but Rubanga?”

¹⁰Bed bala en ebedo penyoy Yosepu buli ceng pi buto kede, do Yosepu likame oko yei buto kede akadi maro bedo kede.

¹¹Ceng moro acel, kakame bin Yosepu ooto kede i ot pi timo tic mere, di oudo ngatamoro ace li i ot kanono,

¹²dako nono oko mako egoe ka Yosepu di ewaco ne be, “But keda!” Do Yosepu oko ringo ooko eweko egoe mere i cinge.

¹³Kakame en eneno kede be Yosepu otieko weko egoe mere i cinge di eko ringo ooko,

¹⁴en eko lwongo jotic me ode di eko waco negi be, “Nenunu, cwara otieko kelo i diere wa Ngaeburania ni pi nywaro wa! Oudo kom ebino buta pi mito maka tetek buto keda, do ango ako dwilao kitek.

¹⁵Kakame en ewinyo ango adwilao kede, eko ringo ooko eweko egoe mere i ngeta.”

¹⁶Di do eko kano egoe nono tuno ngadwong ka Yosepu dwogo paco.

¹⁷Di en eko tatamo ne kop acel nono di ewaco ne be, “Ngatic kame obedo Ngaeburania no, kame in ikelo i diere wa, oudo obino i ot buta pi nywara.

¹⁸Do kakame ango ako dwilao kede, en eko ringo ooko eweko egoe mere i ngeta.”

¹⁹Kakame ngadwong ka Yosepu oko winyo kede di dako mere owaco ne be, “Man en epone kame ngatic nin otera kede,” cunye oko wang.

²⁰Di eko mino kotero Yosepu di oko rwake i otkol, kakame bin kotweo iye mabus me abaka, di eko bedo kuno.

²¹Do Rwot oudo tie kede Yosepu di eko nyuto ne amara mere kalikame lokere; en eko mino ngadwong me otkol obedo kede amara bute.

²²Ngadwong me otkol oko keto mabus dedede kame bin tie i otkol i cing Yosepu, doko eko mine akarunikin i kom gi dedede kame bin kotimo i otkol kuno.

²³Ngadwong me otkol bin likame do tie kede par moro i kom gikame oudo etieko keto i cing Yosepu, pien Rwot oudo tie kede, doko gi dedede kame bin Yosepu timo oudo Rwot mio cobere kiber.

Ageini 40

Yosepu Ogonyo Dwong me Lek me Mabus Are



- ¹Ceng moro acel, ngaik bwini me abaka me Misiri kede ngated mugati mere oko wango cuny abaka.
- ²Parao bin cunye oko wang kede jotic mege are nogi,
- ³di eko keto gi i otkol kame tie i ot me ngatel me isirikalen jodar paco me Parao, kakame oudo kotweo Yosepu iye.
- ⁴Ngatel me isirikalen bin oko mino Yosepu tic me gwoko gi, di gin kiko bedo i otkol tieko kare moro.
- ⁵Iwor moro acel, gin cuo are nogo, ngaik bwini kede ngated mugati me abaka me Misiri oko lek. Lek me ngat acelacel oudo pat, doko dwong gi da pat.
- ⁶Kakame Yosepu bin oko bino kede but gi odiko, en eko neno be gin oudo kitie kede par.
- ⁷Di en eko penyo jodongo me jotic ka Parao nogo, jo kame bin kotweo karacel kede en i ot me ngadwong mere be, “Pinyo bo komio wun tin itieniu iturur kamano?”
- ⁸Gin di kiko gamo be, “Wan tin oleko, do likame tie ngatamoro kame romo gonyo ne wa dwong me lek nogo.” Yosepu oko waco negi be, “Mam Rubanga en kame mio jo twer me gonyo dwong me lek? Tatamunu nango lek nogo.”
- ⁹Di ngaik bwini me abaka oko tatamo ne Yosepu lek mere. En ewaco be, “Ango aleko be oudo olok tie i nyima;
- ¹⁰olok nono oudo tie kede jange adek. Di pwodi en elibo aliba, oyotoyot di ature mege wok, di anyakini mege da cek.
- ¹¹Ango oudo amako ikopo ka Parao i cinga; di ako kwanyo anyakini me olok ako bino gi i ikopo ka Parao nono, di ako keto ikopo nono i cing Parao.”
- ¹²Yosepu oko waco ne be, “Dwong mere ine: ajange adek en ceng adek;
- ¹³Ingei ceng adek Parao bino woti ki otkol di eko dwoki i tic ni, di in iko bino keto i kopo ka Parao i cinge, bala kame lem in itimo di in oudo ibedo ngaik bwini mere.
- ¹⁴Do iyutuno ango da i kare kame itie kede kiber. Akwai itim na bero, iwac peko na but Parao, di iko konya awok ki kan.
- ¹⁵Pien i ateni ango bin kokwala akwala i lobo me Iburanian, doko ki kan da likame tie gimoro kame ango atimo kame mio koto kopoo keta i otkol.”
- ¹⁶Kakame bin ngated mugati me abaka oneno kede be dwong me lek me ngaik bwini me abaka oudo ber, en eko waco ne Yosepu be, “Ango da aleko be oudo atie yeno aditai adek me mugati.
- ¹⁷Adita me malo oudo tie iye mugati me epone dedede kame koiko ne Parao, do winy oudo tie camo gi ki adita kame oudo tie i wia.”
- ¹⁸Di Yosepu oko gamo be, “Dwong mere ine: aditai adek gin en ceng adek;



¹⁹Ingei ceng adek Parao bino woti ki otkol di eko mino kongolo wi tenge di oko liero komi i epir di winy ko bino camo ringo komi.”

²⁰Ceng me adek mere oudo obedo ceng kame konywalo iye Parao. En eko tedo ebaga ne jotic mege dedede, di eko woto ngaik bwini mere kede ngated mugati mere ki otkol, di eko kelo gi i nyim jotic mege.

²¹En eko dwoko ngaik bwini mere i wang tic mere, di en eko keto i kopo i cing Parao.

²²Do ngated mugati mere en eko mino koliero i epir bala kame Yosepu oudo owaco.

²³Do ngaik bwini me abaka likame bin oko yutuno Yosepu, wie oko wil i kome atwal.

Ageini 41

Yosepu Ogonyo Dwong me Lek ka Parao

¹Ingei mwakini are, Parao oko lek be oudo etie cungo i nget ecilet me Nail,

²di doke kanyaare kocwe di kom gi meny oko wok kiye, di kiko donyo camo lum.

³Doke kanyaare ace, arecoreco di ojony, oko wok ki ecilet me Nail ingei makonoka. Gin kibino kiko cungo i nget makonoka i dog ecilet.

⁴Doke arecoreco di ojony oko camo doke kanyaare kocwe di kom gi meny. Parao oko cei.

⁵Eko bobo nino di eko lek tien me are; eneno wit kal kanyaare abeco di onyigo, di kitie dongo i kor kal acel.

⁶Di wit kal kanyaare, arecoreco di yamo me tetu kide onero gi, oko gida suro ingei magonogo.

⁷Wit kal arecoreco nogo oko mwonyo wit kal abeco di onyigo. Parao oko cei di eko niang be oudo etie lek.

⁸Odiko di piny oru, kop nono oko lolo tam mere twatwal, omio eko cwano kop me lwongo wegi tangu kede jo ariek dedede atie Misiri. En eko tatamo negi lek mege, do likame tie dano oko twero gonyo ne dwong gi.

⁹Di do ngat koudo telo tic me iiko bwini oko waco ne Parao be, “Ango tin aneno raco na.

¹⁰Tie kare kame in oudo cunyi owang keda karacel kede ngadwong me joted mugati, di iko rwako wa bala mabus i ot me ngadwong me isirikalen jodar.

¹¹Ango kede en oko lek iwor acel, lek me buli dano oudo tie kede dwong mere.

¹²Awobi Ngaeburania moro oudo tie kuno kede wa, en oudo ebedo ngatic me ngadwong me isirikalen. Wan oko tatamo ne lek wa, di en eko gonyo ne wa buli dano dwong me lek mere.

¹³Gi dedede kame en oudo ewaco oko cobere; in iko dwoka i tic na do iko neko ngated mugati.”



- 14**Parao oko cwano kop me lwongo Yosepu, cucuto di oko wote ki otkol. Kakame en etieko lielere kede di eko loko igoen, en eko ot i nyim Parao.
- 15**Parao oko waco ne Yosepu be, “Ango oudo aleko do likame tie ngatamoro kame sobolo gonyo dwong me lek nono. Ango koyamo na kop i komi be in itwero gonyo dwong me lek.”
- 16**Yosepu oko dwoko ne Parao be, “Likame ango; do Rubanga bino mini dwong kop aber me lek ni.”
- 17**Di Parao oko waco ne Yosepu be, “Ango aleko be oudo atie cungo i dog ecilet me Nail,
- 18**di doke kanyaare kocwe di kom gi meny oko wok ki Nail di kiko donyo camo lum.
- 19**Ingei manono di doke kanyaare ace arecoreco di ojony da oko wok. Oudo lem pwodi likame ango aneno doke arecoreco amagonogo i lobo me Misiri.
- 20**Doke ojony di recoreco oko camo doke me agege kanyaare kocwe noka.
- 21**Do kakame gin kitieko camo gi kede, likame oudo tie ngatamoro kame sobolo ngeno be kitieko camo gi, pien oudo pwodi kidong di kirecoreco bala lem sek. Di do ango ako cei.
- 22**Ako bobo nino tien me are, di ako leko be oudo atie neno wit kal kanyaare, onyigo di kibeco, di kitie dongo i kor kal acel,
- 23**di wit kal kanyaare arecoreco di yamo me tetu kide onero gi da oko suro ingei magonogo.
- 24**Wit kal kanyaare arecoreco di oner oko mwonyo wit kal kanyaare onyigo di beco. Do kakame atatamo ne kede wegi tangu lek nogi, likame tie ngatamoro oko twero gonyo na dwong gi.”
- 25**Yosepu oko waco ne Parao be, “Lek ni are go cal acala doko kicungo pi gi acel; Rubanga otieko nyuto nin gikame eyapuno timo.
- 26**Doke kanyaare abeco cungo pi mwakini kanyaare, kede wit kal kanyaare abeco da cungo pi mwakini kanyaare; lek go tie acel.
- 27**Doke kanyaare arecoreco di ojony koudo obino ingei magonogo, kede wit kal kanyaare arecoreco di oner cungo pi mwakini kanyaare me kec.
- 28**Etie bala kite kame ango atieko waco ni kede, Rubanga otieko nyuto nin gikame ebino timo.
- 29**Amio bino bedo i lobo me Misiri dedede pi mwakini kanyaare.
- 30**Ingei manono, kec bino bedo tie pi mwakini kanyaare, di wi jo kobino wil kede mwakini me amio; kec nono bino dudubo piny me Misiri.
- 31**Jo me lobo nono likame bobo bino yutuno amio kame oudo kitie kede pi kec kame bino lubo, pien kec nono bino bedo ger adikinicel.



³²Kite kame lek nono otimere kede tien are nyuto be manono Rubanga en oiko, doko ebino mino manono timere i kare kiyapiyapi.

³³” Nan do poore in iyer ngatamoro ariek, dano awie tio, di iko kete telo lobo me Misiri.

³⁴Doko poore iyer jotel ace atino i lobo me Misiri, di gin kiko bino gamo acel i kom kany me cam dedede acek i lobo me Misiri i mwakini kanyaare me amio.

³⁵Wace gi kicok cam dedede i mwakini me amio kame tie bino, di iko ciko gi pi kano gi i bomban di kiko donyo daro gi.

³⁶Cam nono bino bedo mono kame bino konyo jo i kare me kec kame bino poto i lobo me Misiri pi mwakini kanyaare, tetekenyo kur jo toi pi kec.”

Yosepu Odoko Ngapug i Misiri

³⁷Tam kame Yosepu omio nono oko yomo cuny Parao kede jotic mege.

³⁸Parao oko waco ne jo mege be, “Likame bobo wan obinunu udo ngatamoro kame ber kalamo Yosepu, dano kame tie kede tipo ka Rubanga.”

³⁹Aso, Parao oko waco ne Yosepu be, “Bala kame Rubanga otieko nyuto nin kede gigi dedede, likame bobo tie ngatamoro kame riek di wie tio bala in.

⁴⁰ In ibino bedo ngaloc me oda, doko jo na bino lubo kop dedede kame in iciko negi. Kenekene ango abino kalamo in kede dwongo pien ango atie Parao.”

⁴¹Parao oko waco ne Yosepu be, “Neni, ango atieko mini idoko ngatel me Misiri dedede.”

⁴² Parao oko woto mwola mere me abaka ki lwete di eko rwake i lwet Yosepu. En eko ngapo ne Yosepu ege amenyo, di eko ngapo ne eriko kame kotimo kede saabu i ngute.

⁴³En eko mino Yosepu cabala me ngat kame lubo tien abaka pi tere; isirikalen mege jodar oko telo anyim di kilelemo be, “Nyaunu yongayo!” Aso, en eko mino Yosepu odoko ngatel me lobo me Misiri dedede.

⁴⁴Doko da Parao oko waco ne Yosepu be, “Ango abedo Parao, do likame tie ngatamoro i lobo me Misiri lung kame bino tingo lwete amoto tiene timo gimoro abongo in yei ne.”

⁴⁵Parao oko cako ne Yosepu nyinge be Sapenat Panea; eko mine Asenat nyar ka Potipera, ngasaserdoti me On, pi bedo dako mere. Manono oko mino Yosepu obedo kede akarunikin me pugo lobo me Misiri.

⁴⁶Yosepu oudo tie kede mwakini ot adek (30) me dongo kakame egeo timo ne kede Parao abaka me Misiri tic. En eko yai kibus Parao di eko mamano lobo me Misiri dedede.

⁴⁷I kare me mwakini kanyaare me amio, lobo oko nyako cam atot.



⁴⁸Yosepu oko koko cam dedede me mwakini kanyaare me kare me amio i Misiri, di eko kano gi i bomban; ecoke i buli bomba acelacel cam me poti me ngete ngete.

⁴⁹Aso, Yosepu bin oko koko cam atat adikinicel; ecoke cam kame oudo tot bala asinge me dog nam, manono oko mino jo oko jiko pimo gi, pien oudo likame kitwero pimere.

⁵⁰Di oudo pwodi mwakini me kec likame otuno, Yosepu oudo tie kede awobe are kame Asenat, nyar ka Potipera ngasaseredoti me On oudo onywalo ne.

⁵¹Yosepu oko cako nying atin kao mere Manase, piento en ewaco be, “Rubanga otieko mino wia owil kede peko na dedede kede jo dedede me ot ka papa na.”

⁵²Eko cako nying atin me are Epuraimu, piento en ewaco be, “Rubanga omia anywal i lobo kame aneno iye can.”

⁵³Mwakini kanyaare me amio i lobo me Misiri oko jik,

⁵⁴ di mwakini kanyaare me kec oko cakere, bala kame Yosepu oudo owaco. Kec oudo tie i pinye dedede, do cam oudo tie i lobo me Misiri lung.

⁵⁵ Kakame kec ogeo jwato kede lobo dedede me Misiri, jo oko kok but parao pi mino gi cam. Parao oko waco ne jo dedede me Misiri be, “Otunu but Yosepu di ikounu timo gikame en ewaco ne wu.”

⁵⁶Kite kame kec oudo oromo kede kadedere dedede me Misiri, Yosepu oko yabo dere dedede kame oudo kokano iye cam di eko donyo cato ne jo me Misiri cam, pien kec kopoto Misiri oudo ger twatwal.

⁵⁷Jo oko donyo bino Misiri ki wi lobo lung pi wilo cam kikut Yosepu, pien kec oudo otany i wi lobo lung.

Ageini 42

Imiegu ka Yosepu Ooto Misiri pi Wilo Cam

¹Kakame Yakobo ongeko kede be cam oudo tie Misiri, en eko waco ne awobe mege be, “Pinyo komio itienunenerenena kenu kenu?”

²Ango awinyo be cam tie Misiri, otunu kuno iwilunu cam pirwa, tetekeny kur otounu kec.”

³Aso, imiegu ka Yosepu tomon oko ot pi wilo cam Misiri.

⁴Do Yakobo likame oko cwano omin me Yosepu anyinge Benjamin kede imiegu mege, pien oudo etie kede lwooro be gimoro arac twero pi timere ne.

⁵Awobe ka Yakobo oko upere kede jo apat da pi ot wilo cam, pien kec nono oudo otuno i lobo me Kanan da.

⁶Bala ngapug me lobo me Misiri, Yosepu en kame oudo tie cato cam ne jo me lobo nono. Imiegu ka Yosepu oko bino di kiko riebere piny i nyime.



⁷Kakame Yosepu oneno kede imiegu mege, en eko ngeno gi, do en eko tero gi bala jokumbor di eyamo kede gi dwan agwai. En epenyo gi be, “Wun iwokunu ki tuai?” Gin kiko dwoko be, “Wan owok ki lobo me Kanan, obino pi wilo cam.”

⁸Bed bala Yosepu oko ngeno imiegu mege, do gin likame kiko ngene.

⁹Yosepu doko da oko yutuno lek kame eleko i kom gi. En eko waco negi be, “Wun ibedunu ibegai; wun ibinunu pi neno goro me lobo wa!”

¹⁰Gin kiko dwoko ne be, “Adwong, li; jotic ni obino pi wilo cam.

¹¹Wan dedede obedo awobe me icuo acel; wan obedo jo kame yamo kop me ateni; cako pwodi likame jotic ni obedo ibegai.”

¹²Do Yosepu oko waco negi be, “Li, wun ibinunu pi neno goro me lobo wan!”

¹³Gin kiko waco be, “Wan jotic ni otie imiegu tomon kiwie are, obedo awobe me icuo moro me lobo me Kanan; awobi atidi odong kede papa wa, do omin wa acel oto.”

¹⁴Do Yosepu oko waco negi be, “Etie bala kame ango atieko waco ne wu; wun ibedunu ibegai!

¹⁵Epone kame kobino ngingico wu kede ine: tek di Parao tie kuo, likame ibinunu yai ki kan tuno di ominu atidi obino!

¹⁶Poore dano acel oti di eko kelo ominu, di jo apat kikomu ber kong odong i otkol, tetekey bin ngei ateni me kope wu; aso ka li, tek di Parao tie kuo, ateteni wun ibedunu ibegai.”

¹⁷En eko keto gin dedede i otkol pi ceng adek.

¹⁸I ceng me adek, Yosepu oko waco negi be, timunu kaman di ikounu bino kuo, pien ango alworo Rubanga:

¹⁹ka wun ibedunu jo kame yamo kop me ateni, wekunu ominu acel dong kan i otkol. Do jo apat dok ter cam ne jo kame kec odio i miere wu.

²⁰Di gin kiko bino kelo ominu atidi buta. Manono bino moko kope wu, di likame oko bino neko wu. Di gida kiko yei pi timo kamanono.

²¹Kiko donyo yamo ken gi ken gi be, “Okwe, kotie tidilo wa pi raco kame wan otimo ne omin wa. Wan oudo oneno can kame etie iye kakame ebako ne wa kede doge, do wan oko dagi winye. Manoni en komio can noni nataman opoto i kom wa.”

²²Di Ruben oko dwoko negi be, “Mam oudo ango awaco ne wu be kur itimunu ne awobi ca raco moro? Do wun ikounu dagi. Nan do wan otienu culo kwor me remo mere.”

²³Gin oudo likame kingeo be Yosepu tie niang gikame kitie yamo, piento en oudo ebeto yamo kede gi di ngat apat en agonyo kop.

²⁴Yosepu oko yai tenge kikut gi di eko donyo koko, di eko dwogo eko yamo kede gi. En eko kwanyo Simeon eko mino kotwee i nyim gi kanono.



Imiegu ka Yosepu Odok Kanan

²⁵Yosepu oko mino cik be pong ipukoi gi kede cam, kede dwok sente me ngat acelacel i epuko mere, doko da be, mi gi cam me acama i yongayo. Oko timo negi kamanono.

²⁶Gin kiko keto ipukoi me cam gi ingei pundan gi di kiko yai.

²⁷Kakame ngat acel kikom gi ogonyo kede epuko mere pi mino punda mere cam i kakame oudo kibuto iye, en eko udo sente mere i dog epuko.

²⁸En eko waco ne imiegu mege be, “Kodwoko na sente na, en ine etie i epuko na!” Gi nono oko neko kom gi di kiko donyo penyere ken gi ken gi kede mielkom be, “Nyo ine kame Rubanga otieko timo ne wa?”

²⁹Kakame kituno kede i lobo me Kanan, gin kiko tatamo ne papa gi Yakobo gi dedede kotimere negi be,

³⁰” Icuo kame obedo ngapug me Misiri oyamo kede wa kede dwan agwai, di eko tero be wan ooto kuno begao kop me lobo nono.

³¹Do wan oko waco ne be, ‘Wan obedo cuo kame li kede angalo, wan likame obedo ibegai.

³²Wan obedo imiegu tomon kiwie are kame papa wa onywalo; ngat acel oto, do awobi atidi odong kede papa wa i lobo me Kanan.’

³³Di icuo nono, ngapug me lobo nono, oko waco ne wa be, ‘Ango abino ngeno be wun iliunu kede angalo ka itimunu kaman: wekunu ominu acel kede ango, di jo apat kikomu ko tero cam ne jo me miere wu kame kec odio.

³⁴Kelunu ominu atidi buta, di ango ako bino ngeno be wun likame ibedunu ibegai, do ibedunu jo kame yamo kop me ateni. Di ango ako bino gonyo ominu, di ikounu twero bedo kan di itimunu tic me cato wil.’ “

³⁵Kakame oudo kitie yabo kede ipukoi gi, ngat acelacel kikom gi oko udo ikapu mere me sente i dog epuko mere. Kakame kineno kede abunge me sente gi, lworu oko mako gi karacel kede papa gi Yakobo.

³⁶Papa gi Yakobo oko waco negi be, “Wun itienu minango akei idwe na: atieko kei Yosepu, doko atieko kei Simeon da, nan doko imitunu tero Benjamin da. Can nogi dedede opoto i komango!”

³⁷Ruben oko waco ne papa mere be, “Ka likame ango adwoko Benjamin, in nek awobe nango are. In kete i cinga, di ango ako bino dwoke buti.”

³⁸Do Yakobo oko waco be, “Likame woda bino ot kede wu, pien omin mere otieko to, nan en edong kene. Ka gimoro arac otimere ne i yongayo, ango atieko ti, ibinunu mino par neka.”

Ageini 43



Imiegu ka Yosepu Odok Misiri kede Benjamin

- ¹Kec oko meede ameda i lobo me Kanan.
- ²Kakame kitieko kede cam kame kikelo ki Misiri, papa gi oko waco negi be, “Dokunu ikounu bobo wilo cam moro atitidi.”
- ³Do Yuda oko waco ne be, “Loca okwenyaro wa kede dwan atek di ewaco be, ‘Likame ibinunu neno wanga, tuno di ikelunu ominu.’”
- ⁴Ka in icwao omin wa karacel kede wan, wan obino ot di oko wilo ni cam;
- ⁵do ka likame in icwae kede wan, likame wan obino ot kuno, pien loca owaco ne wan be, ‘Likame ibinunu neno wanga, tuno di ikelunu ominu.’ “
- ⁶Yakobo oko waco be, “Pinyo komio iteranu iepone arac kamano pi yei waco ne icuo nono be itienu bobo kede ominu ace?”
- ⁷Gin kiko dwoko ne be, “Loca opepenyo wa kede rieke i kom kop amako wa, kede i kom joawade wa, di epenyere be, ‘Papa wu pwodi kuo? Itienu kede ominu ace?’ Kope kame wan owaco ne oudo tie pi dwoko peny nogi. Benyo benyo kame wan oudo otwero ngeno kede be en oudo ebino waco ne wa be, ‘Ot ikelunu ominu kan’ ?”
- ⁸Yuda oko waco ne papa mere Yakobo be, “Cwai awobi no upere kede ango me wek wan ocak ot, tetekeny kur otounu kec, in kede wan karacel kede idwe wa.
- ⁹Ango kikoma ayaro gwoke, ka gimoro otimere ne, kop mere bino mako ango. Ka likame ango adwoke buti di ako cibe i nyimi, miero raco nono bed i wiango i kar dedede.
- ¹⁰Ka koto likame oudo ogal, koto nataman otieko dok tien are.”
- ¹¹Di papa gi oko waco negi be, “Ka miero ebed kamano, poore itimunu kaman: kwanyunu gimogo abeco me lobo wa owoto ikounu keto gi i ipukoi wu, di ikounu tero gi ne ngapug nono bala giamia, terunu mokic atitidi, odok, mo me kor yen angwe kur kede ilem mogo.
- ¹²Terunu sente akalamo tien are, pien miero idwokunu sente kame oudo kodwoko i wi ipukoi wu; cengemogo manono oudo obedo awilawic.
- ¹³Terunu ominu da; yaunu nan icakunu ot but icuo ngapug nono.
- ¹⁴Akwao Rubanga Won Twer emi icuo nono bed kede kisa i komu, tetekeny edwok ominu ca kede Benjamin da. Do ki tetu buta, ka ango ayaro kei idwe na, wek akei gi.”
- ¹⁵Aso, awobe mege nogo oko tero giamia, kede sente akalamo tien are, karacel kede Benjamin da. Di gin kiko mako yongayo kioto Misiri, di kiko ot i nyim Yosepu.
- ¹⁶Kakame Yosepu oneno gi kede Benjamin, en eko waco ne ngatic kame gwoko ode be, “Kel cuo go i ot, di iko ngolo le moro iko tedo, pien cuo nogo miero nywak keda cam me i dier iceng.”
- ¹⁷Icuo nono oko timo bala kame Yosepu owaco ne, eko tero jo nogo i ot ka Yosepu.



- 18**Jo nogo oko doko lwor pi kite kame koteru gi kede i ot ka Yosepu, di kiko waco be, “Kokelo wa i ot pi kop me sente kame oudo kodwoko i ipukoi wa i kare kame ogeo bino kede kan, tetekenye eud kare me dino wa kede kop di eko loko wa odok ipasoi mege, di eko tero pundan wa.”
- 19**Gin kiko ot paka but ngatic adaro ot ka Yosepu di kiko yamo kede i ekeko me ot nono.
- 20**Gin kiwaco be, “Okwe adwong, wan oudo kong ber ogeo bino kan tien me agege pi wilo cam.
- 21**Do kakame otuno kede kabedo kame obuto iye i yongayo, wan oko gonyo dog ipukoi wa, di ngat acelacel oko udo sente mere i dog epuko mere, sente wa dedede. Aso nan wan odwoko sente nogo.
- 22**Doko da omedo kelo sente ace me wilo cam i wi magonogo. Wan likame ongeo ngat koketo sente wa i ipukoi wa.”
- 23**En eko dwoko negi be, “Bedunu mot, kur lworu maku. Poore di Rubanga wu, Rubanga ka papa wu en koketo ne wu sente i ipukoi. Ango bin audo sente wu.” En eko woto Simeon ooko but gi.
- 24**Ngatic kame gwoko ot ka Yosepu nono oko tero jo nogo i ot. En eko mino gi pii di kiko lwoko tien gi, doko eko mino pundan gi cam.
- 25**Gin kiko iiko giamia gi pi mino Yosepu ka etuno i dier iceng, pien oudo kowaco negi be gin kiyaro nywako kede en cam.
- 26**Kakame Yosepu otuno kede paco, gin kiko tero ne giamia i ot, di kiko riebere piny i nyime.
- 27**En eko pepenyo gi kop i kom yot kom gi, doko eko penyo gi be, “Kom papa wu yot, adwong kame wun oudo iwacunu na kop i kome? Benyo, pwodi ekuo?”
- 28**Gin kiko waco ne be, “Ngatic ni papa wa tie kome yot; en pwodi ekuo.” Gin kiko riondiko di kiko luro i nyime.
- 29**Yosepu oko tingo wange eko neno Benjamin, omin mere me toto acel, di eko penyere be, “Ominu atidi kame iwacunu na kop i kome ine? Kisa ka Rubanga bed kedi, in woda!”
- 30**Yosepu oko yai cucuto, pien yomcuny kame oudo etie kede pi amara but omin mere oudo obwone, omio oudo eyapuno cako koko. Aso, en eko ot i agola mere di eko donyo koko ki kuno.
- 31**En eko lwoko wange di eko wok ooko, eko dino cunye di eko waco be, “Tok cam.”
- 32**Oko toko nen cam mere kene, oko toko ne imiegu mege da cam ken gi. Jo me Misiri kame oudo tie kuno da oko cam ken gi, pien oudo etie gi me kwere pi gin cam kede Iburanian.



³³Kakame imiegu ka Yosepu otieko bedo kede i nyime, cako kibus ngat adwong tuno kede but ngat atidi di lubere kede mwakini me dongo gi, gin kiko donyo ngicere ken gi ken gi kede ur.

³⁴Di oko donyo poko negi cam ki emesa ka Yosepu, do cam kame kopoko ne Benjamin oudo tot kalamo me jo apat tien kany. Aso, gin kiko cam kede amata kede Yosepu tuno gin mer.

Ageini 44

Ikopo Korwenyo

¹Yosepu oko waco ne ngatic kame gwoko ode be, “Pongi ipukoi ka jogo kede cam bala kame gin kitwero yeno, di iko keto sente ka ngat acelacel i epuko mere.

²Ket ikopo nango, ikopo kame kotimo kede nyonyo siliba, i epuko me ngat atitidi kalamo, kete karacel kede sente mere me wilo cam da.” En eko timo bala kame Yosepu owaco ne.

³Odiko di piny oru, oko peruno jo nogo kioto kede pundan gi.

⁴Kakame kioto kede kakacecek pwodi yai ki bomba, Yosepu oko waco ne ngagwok ode be, “Wap jogo, kame imako gi, wace gi be, ‘Pinyo komio iculunu bero kede raco?’

⁵Pinyo komio ikwalunu ikopo ka ngadwong na, ikopo kame kotimo kede nyonyo siliba? Mam en emato kede ikopo nono? Mam etimo kede en tic me tucoko me anyim kede komungere? Itimunu gikarac twatwal.’ “

⁶Kakame en etuno kede but gi, en eko nyogao negi kope nogi.

⁷Gin kiko waco ne be, “Adwong pinyo komio in iwaco kope acal kamagi? Tim kacal kamano bor kibus wan jotic nin!

⁸Neningo kong, sente kame wan oudo i ipukoi wa wan oko dwoko buti yai ki lobo me Kanan; pinyo do kame mio wan oko kwalo siliba amoto saabu ki ot ka ngadwong ni?

⁹Ka koudo ngatamoro kikom wa kede ikopo nono, poore neke, di wan jo apat oko doko ipasoi ni.”

¹⁰En eko waco be, “Ebo ango ayei, do kenekene ngat kame koudo kede ikopo en kame bino doko epasoi na, do jo apat kikom wu bino ot.”

¹¹Di do ngat acelacel kikom gi oko cibo epuko mere piny awakawaka di egonyo doge.

¹²En eko cako more, egeo kede epuko me ngat adwong di eko tieko kede epuko me ngat atitidi; eko udo ikopo i epuko ka Benjamin.

¹³Manoni oko mino gi kinyinyilo igoen i kom gi pi wangcuny. Ngat acelacel kikom gi oko keto yec mere ingei punda mere di kiko dok i bomba.

¹⁴Yuda kede imiegu mege oko dok i ot ka Yosepu di kiko ude pwodi etie. Gin kiko riebere i nyime,



¹⁵di Yosepu oko waco negi be, “Nyo ine kame wun itimunu ni? Oudo likame ingeunu be dano acal bala ango twero timo tic me tucó gikomungere?”

¹⁶Yuda oko dwoko be, “Owaci nyo? Oyam kedi benyo? Epone mene en kame wan oromo lwoko kede nying wa? Rubanga otieko udo raco wan jotic ni; nan wan ige odoko ipasoí ni, wan dedede karacel kede ngat kame koudo ikopo bute.”

¹⁷Yosepu oko waco be, “Likame abino timo mano akadi acel! Ngat kame koudo ikopo bute en oyaro doko epasoit nango; do wun jo apat, otunu but papa wu kede mulem.”

Yuda Obako Doge pi Benjamin

¹⁸Yuda oko nyiko but Yosepu di eko waco ne be, “Okwe adwong na, yei na yamo kedi di likame iko doko ger keda; pien in irom aroma kede Parao.

¹⁹Adwong na, in ipenya be, ‘Itienu kede papa wu arabo ominu?’

²⁰Wan oko dwoko ni be, ‘Wan otie kede papa wa, en eti, doko otie kede omin wa atidi, atin kame en enywalo i wi tio. Omin mere me toto gi kede acel oto, en kene kame edong; papa mere mare.’

²¹Di in iko waco ne wa be, ‘Kelenu buta, tetekeny ada anene.’

²²Wan oko waco ni be, ‘Awobi ca likame twero weko papa mere, ka etimo kamanono, papa mere bino to.’

²³Di in iko waco ne wan be, ‘Likame ibinunu bobo neno wanga tuno di ikelunu ominu.’

²⁴Kakame wan odok kede but papa wa, wan oko waco ne kop nin.

²⁵En eko waco ne wa be, ‘Dokunu ikounu bobo wilo cam moro atitidi.’

²⁶Wan oko waco ne be, ‘Wan likame obino ot, kwanyo ka omin wa ooto kede wa. Pien likame wan obino twero neno wang icuo ca tuno di ooto kede omin wa atidi.’

²⁷Di papa wan oko waco ne wa be, ‘Wun ingeunu be dako nango onywalo na idwe awobe are;

²⁸acel kikom gi oweka di ango ako waco be, ateteni miero bed di kotieko nyinyilo en; cako cenge nono likame bobo ango ako nene.

²⁹Ka iterunu man da kibuta, di gimoro arac oko timere ne, ango atieko ti, ibinunu mino par neka.’

³⁰⁻³¹Pi mano, ka nan ango adok but papa na abongo awobi noni, en ebino to, pien kuo mere kede kuo me awobi no tie acel. Ka en eneno be awobi no likame tie kede wa, wan obino mino par neke, piento en etieko ti.

³²Medo i wi mano, ango oudo ayei i nyim papa na pi gwoke di awaco be, ‘Ka likame ango adwoke buti, raco nono bino bedo i wiango i nyimi i kare dedede me kuo nango.’



³³Pi mano, nan wek ango adong kan bala epasoit nin akaka awobi no, di iko yei ne en dok kede imiegu mege.

³⁴Pien epone mene kame ango atwero dok kede but papa na abongo awobi no? Ango lworu maka neno can kame papa na oyaro beo iye.”

Ageini 45

Yosepu Onyutere but Imiegu mege

¹ Di do Yosepu likame oko twero dino cunye i nyim jo dedede kame oudo tie cungo i ngete, en eko lelemo be, “Jotic dedede poore yai tenge.” Aso, likame ngatamoro oko dong but Yosepu kakame en enyutere kede but imiegu mege.

²En eko kok kede dwan amalo twatwal, omio jo me Misiri kame oudo tie i ngete kanono oko winyo, di kop nono oko tuno but jo me paco ka Parao da.

³Yosepu oko waco ne imiegu mege be, “Ango Yosepu. Benyo, papa na pwodi kuo?” Do imiegu mege likame oko twero dwoko ne kop moro, pien lworu oudo omako gi i nyime.

⁴Di Yosepu oko waco ne imiegu mege be, “Bianu i ngeta.” Gin kiko nyiko bute. En eko waco be, “Ango abedo ominu Yosepu kame bin wun icatunu i lobo me Misiri.

⁵Nan do kur ibedunu kede cweracuny amoto awangacuny pi kite kame icatanu kede kan; pien Rubanga en ocako cwanango kan di pwodi wun, pi lako kuo me jo.

⁶Pien kec nan otieko mwakini are i piny noni, do pur amoto kac pwodi likame oyaro bedo tie pi mwakini kany anyim.

⁷Rubanga oudo ogeo cwanango di pwodi wun pi mino ikwae wu dong tie i wi lobo, kede pi mino jo atot kibutu bwot.

⁸Aso, likame wun en kame icwaanu kan, do Rubanga en kocwaa; en etieko mina adoko ngat kame mio Parao tam kede ngat kame lo ode, bobo da ango apugo lobo me Misiri lung.

⁹ “Nan bunyunu ot but papa na ikounu waco ne be wode kame kolwongo be Yosepu owaco be, ‘Rubanga otieko mina adoko ngapug me Misiri lung, bia buta, kur igali.

¹⁰In ibino bedo i lobo me Gosen, doko ibino kio keda, in, idwe ni, ikwae ni karacel kede romini kede diegi, dok kede jame dedede kame itie kede.

¹¹Ango abino mino wu cam kame mitere ne wu ki kuno, tetekeny kur ibedunu abongo cam, in kede jo me paco ni, karacel kede leini ni. Pien pwodi odong mwakini kany me kec.’ “

¹²Yosepu oko meede be, “Nan wun, karacel kede in Benjamin, itiekunu neno be ango inononi Yosepu kame atie yamo kede wu.

¹³Poore iwacenu papa na dwongo kame ango atie kede i Misiri, kede da gi dedede kame wun itiekunu neno. Sunyunu ot ikelenu kan.”



- ¹⁴En eko gwako ngut omin mere Benjamin di eko donyo koko; Benjamin da oko donyo koko di gwake.
- ¹⁵Eko donyo gwagwako imiegu mege dedede di enoto gi di ekok. Ingei manono imiegu mege oko donyo yamo kede.
- ¹⁶Kakame kop otuno kede i ot ka Parao be imiegu ka Yosepu oudo obino, Parao kede jotic mege cuny gi oko bedo yom.
- ¹⁷Parao oko waco ne Yosepu be, “Wace imiegu ni ket yec i ngei pundan gi di kiko dok Kanan.
- ¹⁸Kioti kiko kelo papa gi kede jo me miere gi kane. Ango abino mino gi lobo aber kalamo i Misiri, kibino camo anyakini abeco me lobo noni.
- ¹⁹Wace gi da kiter cabalan ki Misiri ne idwe kede mon gi, di kiko kelo papa gi.
- ²⁰Kur kibed kede par pi weko jame gi, pien jamini abeco me Misiri dedede bino doko mergi.”
- ²¹Awobe ka Yakobo oko timo bala kame kowaco negi. Yosepu oko mino gi cabalan bala kame Parao oudo owaco, di eko mino gi cam me acama i yongayo.
- ²²En emio ngat acelacel kikom gi egoe anyen; do eko mino Benjamin igoen anyen kany kede sente akaya me siliba 300.
- ²³Eko cwano ne papa mere gigi: pundan tomon kame yeo jamini abeco me Misiri, pundan amon tomon kame yeo cam, kede cam kame papa mere bino camo i yongayo.
- ²⁴Yosepu oko cwano imiegu mege; kakame oudo kitie yai kede en eko waco negi be, “Kur ilokunu i yongayo.”
- ²⁵Aso, gin kiko yai ki Misiri di kiko dok but papa gi Yakobo Kanan.
- ²⁶Gin kiko waco ne papa gi be, “Yosepu pwodi tie kuo! Doko da en etie ngapug me Misiri dedede.” Wi Yakobo oko dubere; likame oudo etwero yei kop gi.
- ²⁷Do kakame gin kitatamo ne kede kope dedede kame Yosepu oudo owaco negi, doko da di eko neno cabalan kame Yosepu ocwao ne pi tere kuno, cunye oko dwogo.
- ²⁸Yakobo oko waco be, “Ayei do be woda Yosepu pwodi kuo. Miero aoti anene di pwodi akuo.”

Ageini 46

Yakobo kede Jo me Ode Ooto Misiri

- ¹Yakobo bin oko coko jame mege dedede di eko yai ot tuno Beerebeba, kakame en eko mino kiye giayala but Rubanga ka papa mere Isaka.
- ²Rubanga bin oko yamo kede i dier iwor i gianyuta, di elwongere be, “Yakobo, Yakobo.” En di eko gamo be, “Ango ine.”



- ³Rubanga di oko waco ne be, “Ango Rubanga, Rubanga ka papa ni; kur ilwor ot Misiri, pien ango abino mini idoko ateker adwong kuno.
- ⁴Ango kikoma abino upere kedi ot Misiri, di bobo ako bino dwoki ki kuno. Cing Yosepu en kame bino umo wangi i esawa me to ni.”
- ⁵Yakobo di oko yai, cako ki Beereseba. Awobe mege oko kete i cabala kame oudo Parao ocwao me biele, en kede idwe gi atitino, kede mon gi.
- ⁶Gin bin kiko tero da leini kede jamini kame gin bin kiudo i lobo me Kanan, di kiko ot Misiri. Yakobo bin oko ot kede kodi me jo kowok kibute dedede:
- ⁷awobe mege, anyira mege kede ikwae mege.
- ⁸Nying jo me Isirael kame bin oko ot Misiri kede Yakobo gin ige: Ruben, kao ka Yakobo
- ⁹kede idwe mege. Idwe ka Ruben ige, Kanok, Palu, Keseroni, kede Karami.
- ¹⁰Simeon kede idwe mege. Idwe ka Simeon ige, Jemuel, Yamin, Okad, Yakin, Sokar kede Saul wot ka dako kame obedo dano me Kanan.
- ¹¹Lebi kede idwe mege. Idwe ka Lebi ige, Gereson, Kokat kede Merari.
- ¹²Yuda kede idwe mege. Idwe ka Yuda ige, Er, Onan, Sela, Peresi kede Seera; Er kede Onan oudo oto sek i Kanan. Idwe ka Peresi gin en, Keseroni kede Kamul.
- ¹³Isakar kede idwe mege. Idwe ka Isakari gin ige, Tola, Puwa, Yasub kede Simiron.
- ¹⁴Sebulun kede idwe mege. Idwe ka Sebulun gin ige, Sered, Elon kede Yakalel.
- ¹⁵Mago en awobe kame bin Lea onywalo ne Yakobo i Mesopotamia, karacel kede nyare Dina. Wel me idwe awobe kede anyira kame bin obedo me ka Yakobo kede Lea oudo tie ot adek kiwie adek (33).
- ¹⁶Gad kede idwe mege. Idwe ka Gad ige, Sipion, Kagi, Suni, Esibon, Eri, Arodi kede Areli.
- ¹⁷Aser kede idwe mege. Idwe ka Aser ige, Imina, Isiba, Isibi, Beria kede amin gi Sera. Idwe ka Beria gin en, Keber kede Malakiel.
- ¹⁸Idwe tomon kiwie kanyape nogo en kame obedo me ka Yakobo kede Silipa, apasoit kame bin Laban omio but nyare Lea.
- ¹⁹Lakeri kede idwe mege. Idwe ka Lakeri ige, Yosepu kede Benjamin.
- ²⁰Yosepu bin oko nywalo awobe are i Misiri; gin en Manase kede Epuraimu, kame Asenat nyar ka Potipera, ngasaseredoti me On onywalo ne.
- ²¹Idwe ka Benjamin gin en, Bela, Beker, Asabel, Gera, Naman, Eki, Ros, Mupim, Kupim kede Arad.
- ²²Jo tomon kiwie ongwon nogi en kobedo idwe kame Yakobo onywalo kede Lakeri.



²³Dan kede wode Kusim.

²⁴Naputali kede awobe mege. Awobe ka Naputali ige, Yakasil, Guni, Yeser kede Silem.

²⁵Mago en jo kanyaare kame Yakobo onywalo kede Bilka, apasoit kame Laban bin omio but nyare Lakeri.

²⁶Jo ka Yakobo dedede kame bin oko ot Misiri, idwe kede ikwae, oudo tie ot kanyape kiwie kanyape (66), di likame komaro iye mon.

²⁷Idwe ka Yosepu kame en enywalo i Misiri oudo tie are; gin nogo en kame kiko mino wel me jo ka Yakobo kame bin oko ot Misiri oko romo ot kanyaare (70).

Yakobo kede Jo me Ode i Misiri

²⁸Yakobo oko ooro Yuda ooto anyim pi kwano Yosepu pi bino riamo kede en i Gosen. Kakame gin bin kiko tuno kede,

²⁹Yosepu bin oko mino koiko ne cabala di eko yai ot Gosen pi riamo kede papa mere Yakobo. Kakame eko tuno kede i nyim papa mere, en eko gwako ngute di eko donyo koko tieko esawa alac.

³⁰Yakobo oko waco ne Yosepu be, “Nan do akaruno to pien atieko neni kede wanga; atieko ngeno be in pwodi itie ikuo.”

³¹Di Yosepu oko waco ne imiegu mege karacel kede jo me ot ka papa mere be, “Ango abino ot di ako waco ne Parao be, ‘Imiegu na kede jo me ot ka papa na, kame oudo tie i lobo me Kanan, otieko bino buta.

³²Gin kibedo jokwat, pien gin kitie jo kame gwoko leini; doko da kitieko kelo romini kede diegi gi, doke kede jamini dedede kame gin kitie kede.’

³³Ka Parao olwongo wu, di eko penyo wu tic kame wun itimunu,

³⁴wun ibinunu waco ne be wun ibedunu jokwat cako di pwodi ititinunu kiton tuno tin, bala kame joakwari wu oudo timo. Ka iwacunu ne kamano, en ebino yei ne wu bedo i adul me Gosen, pien jokwat obedo bala gi me kwere ne jo me Misiri.”

Ageini 47

¹Di do Yosepu oko ot eko waco ne Parao be, “Papa nango kede imiegu na otieko bino ki Kanan; kibino kede romini kede diegi gi, kede doke kede jamini dedede kame gin kitie kede. Gin nataman kitie i adul me Gosen.”

²En oudo eupere kede imiegu mege kany, di do eko nyuto gi but Parao.

³Parao oko penyo imiegu mege nogo be, “Tic nyo kame wun itimunu?” Gin di kiko gamo be, “Adwong, wan obedo jokwat bala bin joakwari wa.

⁴Wan obino i piny noni pi bedo iye bala jokumbor, pien kec ager twatwal tie i lobo me Kanan, kame oko mino lum odoko li ne leini wa. Wan nataman okwai iyei ne wa bedo i adul me Gosen.”



⁵Di do Parao oko waco ne Yosepu be, “Bala kame papa ni kede imiegu ni otieko bino kede buti,

⁶lobo me Misiri tie i cingi; ket papa ni kede imiegu ni kakame ber kalamo; mi gi kibed i lobo me Gosen. Doko ka in ingeo cuo kame ikukurana kikom gi, ket gi kibed jodongo kame lo leini na.”

⁷Di Yosepu oko kelo Papa mere Yakobo di eko nyute but Parao. Yakobo oko lamo ne Parao winyo.

⁸Parao oko penyo Yakobo be, “Mwakini nin me dongo nataman romo adi?”

⁹Yakobo oko gamo be, “Mwakini kame ango abedo irim kede i piny kan bala ngakumbor tie tol acel kede ot adek. Mwakini nango pwodi nonok, do kibedo mwakini me kuo atek; likame kirom kede mwakini kame joakwari na otieko di kirimo piny bala jokumbor.”

¹⁰Di do Yakobo bobo oko lamo ne Parao winyo di eko yai eoto.

¹¹Yosepu oko mino papa mere kede imiegu mege kabedo i Misiri. En emio gi lobo kakame ber kalamo i adul me Rameses, bala kame oudo Parao otieko waco.

¹²Di eko donyo mino cam but papa mere, imiegu mege kede jo me ot ka papa mere dedede, di lubere kede wel me jo kame kitie kede.

Kec Opoto Misiri

¹³Kec ager bin oko poto i piny, di cam oko doko li i lobere dedede. Jo me Misiri kede me Kanan oko doko goro twatwal pi kec nono.

¹⁴Yosepu oko coko sente dedede i lobo me Misiri kede Kanan, kame oudo jo wilo kede cam di eko tero paco ka Parao.

¹⁵Kakame do sente oko tiek kede ki cing jo me Misiri kede me Kanan, jo me Misiri dedede bin oko bino but Yosepu di kiko waco ne be, “Mi wan cam! Mam in imito be wan otoi di in ineno wa anena. Wan sente wa otiek.”

¹⁶Yosepu oko gamo be, “Kelanu leini wu; ango abino mino wu cam di aseso kede leini wu ka sente wu otiek.”

¹⁷Di gin kiko kelo leini gi but Yosepu; en eko mino gin cam eseso kede asigiran gi, romini, diegi, doke kede pundan. Mwaka nono en eko bedo mino gi cam di eseso kede leini gi dedede.

¹⁸Kakame mwaka nono oko tiek kede, mwaka kame lubo mere gin kiko bobo bino bute di kiko waco ne be, “Adwong, wan likame okaruno mungo ni gimoro akadi acel; wan sente wa otiek pitipit doko leini wa da otieko doko meggi. Likame tie gimoro kodong amoto kame okaruno mini, kwanyo kenekene kom wa kede lobere wa.

¹⁹Benyo, mam in imito be wan otoi di in ineno wa anena, di oko weko lobere wa? Mi wan cam do in iter wan karacel kede lobere wa, di wan oko bino doko ipaso ka Parao



kede lobo wa da di ko bino doko mere. In kenekene mi wan kodi, tetekeny kur otoi, do obed kuo, di lobere wa likame ko bino dong nono.”

²⁰Manono bin oko mino Yosepu owilo ne Parao lobo me Misiri lung. Jo me Misiri dedede bin oko cato lobere gi pien kec oudo ger negi twatwal, di lobo lung oko doko me ka Parao.

²¹Do en eko mino jo odoko ipasoi, cako ki tetucel me Misiri tuno tetu ocelu.

²²Lobo me josaseredoti kenekene en kame en bin likame eko wilo. Josaseredoti likame bin oko cato lobo gi pien bin tie sente kame Parao oudo mio gin. Manono en kame gin bin kiko kuo kede, en komio likame kiko cato lobo gi.

²³Yosepu bin oko waco ne jo be, “Nenunu, ango tin do atieko wilo wu karacel kede lobere wu ne Parao, kodi ine, gamunu icuunu i poti.

²⁴Di i kare me kac ikounu bino mino but Parao acel i kom kany me cam kame iudunu, do apat lung bino bedo megu pi kodi me acua i poti kede me acama wu, wun karacel kede jo me ude wu kede idwe wu.”

²⁵Gin di kiko gamo be, “In itieko lako kuo wan; in itimo ne wan bero, wan obino bedo ipasoi ka Parao.”

²⁶Di do Yosepu oko mino kop nono odoko iswil i lobo me Misiri, be acel i kom kany me cam kawok ki poti obedo me ka Parao. Iswil noni pwodi kotie tic kede kiton tin. Lobo me josaseredoti kenekene en kalikame bin oko doko me ka Parao.

Kwac ka Yakobo me Ajikini

²⁷Jo me Isirael bin oko donyo bedo i lobo me Misiri, i adul me Gosen. Gin bin kiko udo abar i kanono, doko kiko nywal kiko doko tot twatwal.

²⁸Yakobo bin oko bedo Misiri pi mwakini tomon kiwie kanyaare. Manono oko mino mwakini kame Yakobo obedo kuo kede i wi lobo oromo tol acel kede ot ongwon kiwie kanyaare.

²⁹ Kakame kare mere me to oudo onoko kede, en bin eko lwongo wode Yosepu di eko waco ne be, “Ka ateteni in imara, rwak cingi i dierediere me amuros na di iko kwongere be ibino bedo kede genere kede ateni buta likame iko bino yika Misiri.

³⁰Ka ango ato, tinganu ikounu tera ooko me Misiri di ikounu yika kakame koyiko iye joakwari na.” Yosepu oko gamo be, “Ango abino timo bala kame in itieko iwaco.”

³¹Yakobo bobo oko waco be, “Kwongere buta.” Di Yosepu oko kwongere bute. Di do Yakobo oko kudo wie piny i wi kabuto mere pi pwone.

Ageini 48

Yakobo Olamo ne Awobe ka Yosepu Winyo

¹Di mago otiek, bin oko waco ne Yosepu be papa mere oudo tuo. Di en eko tero awobe mege are Manase kede Epuraimu eoto kede gi nene.



- ²Kakame bin oko waco ne kede Yakobo be, “Wodi Yosepu otieko bino pi neni,” en eko timo teko di eko yai ebedo i wi kabuto.
- ³Di Yakobo oko waco ne Yosepu be, “Rubanga Won Twer bin onyutere buta i Lus i lobo me Kanan di eko mina winyo,
- ⁴di ewaco be, ‘Ango abino mini inywalo idwe atot di iko nyai. Abino mino ekodet me jo wok kibuti, doko abino mino lobo noni but ikwae ni me kare me anyim, me bedo mergi atwal.’
- ⁵Pi mano, awobe nin are go, kame in inywalo i lobo me Misiri di pwodi ango oudo likame abino buti kan, nan do odoko mega; Epuraimu kede Manase bino bedo mega, bala Ruben kede Simeon.
- ⁶Do idwe kame in ibino nywalo i cen ngei gin bino bedo meggi. Gin kobino maro gi i nying Epuraimu kede Manase i kom kop kame mako iner gi me lobo.
- ⁷Ango atie timo kaman pi toto ni Lakeri. Pien i kare kame bin ango atuno kede Padan, gi me iturur, Lakeri oko to i yongayo i lobo me Kanan, di oudo Epurat pwodi bobor. Ango bin ako yike i yongayo me Epurat kuno” (kanono en Betelem).
- ⁸Kakame bin Yakobo oneno kede awobe ka Yosepu, en eko penyere be, “Alu ige?”
- ⁹Yosepu di oko gamo dwan papa mere be, “Gin awobe na kame Rubanga omia i kan.” Yakobo di oko waco be, “Kel gi buta me wek alam negi winyo.”
- ¹⁰I kare nono wang Yakobo oudo do mwadamwada pi tio, omio likame oudo eneno piny kiber. Yosepu oko kelo awobe nogo bute di en eko gwako gi di enoto gi.
- ¹¹Di Yakobo oko waco ne Yosepu be, “Ango oudo likame atamo be bobo abino neno wangi. Do nan Rubanga otieko mina aneno kiton idwe ni da.”
- ¹²Di do Yosepu oko kwanyo gi ki tien Yakobo di eko rieberere piny i nyim papa mere.
- ¹³Yosepu di oko tero gin are nogo, Epuraimu i bade tetu cam kede Manase i bade tetu ngodal; di eko keto Epuraimu i bad Yakobo tetu ngodal kede Manase i bade tetu cam.
- ¹⁴Do Yakobo oko bin rieno bade elucakino tetu cam kede tetu ngodal, di eko dokakino bade tetu cam i wi Epuraimu, awobi atidi, do tetu ngodal edokakino i wi Manase, ngat kame bin obedo kao.
- ¹⁵Di eko lamo ne Yosepu winyo di ewaco be, “Akwao Rubanga kame joakwari na Aburaam kede Isaka bin otio ne, Rubanga kame obedo ngakwat nango pi kare me kuo nango lung tuno tin,
- ¹⁶malaika kame otieko laka ki gikareco dedede, mi awobe nogi winyo; di nyinga, kede nying joakwari na Aburaam kede Isaka ko bino meede kibut gin. Akwai imi gin kinyai kidok ekodet me jo i wi lobo.”



¹⁷Yosepu cunye likame oko bedo yom kakame eneno kede be papa mere oudo oketo cinge tetu cam i wi Epuraimu. Omio en eko mako cing papa mere pi koto kwanye ki wi Epuraimu di eko kobe i wi Manase.

¹⁸En ewaco ne papa mere be, “Likame kamano, papa. Man en awobi adwong, ket cingi tetu cam i wie.”

¹⁹Do papa mere oko dagi di ewaco be, “Woda, ango angeo gikame atie timo. Eda ikwae mege bino doko ateker, doko da ebino doko dano kame pire dwong. Do omin mere atidi bino bedo dwong kalamo en, doko ikwae mege bino doko ikodeta me atekerin.”

²⁰Di en eko lamo negi winyo cenge nono di ewaco be, “Jo me Isirael bino tic kede nyingu ka kitie lamo ne dano winyo. Gin kibino waco be, ‘Rubanga mi ibed bala Epuraimu kede Manase.’ “ Epone noni en kame Yakobo omio Epuraimu oko doko kede ngat kame geo di Manase ko lube.

²¹Di do Yakobo oko waco ne Yosepu be, “Ango ayapuno to, do Rubanga bino bedo kedi di eko bino teri edwoki bobo i lobo ka joakwari ni.

²²Nataman ango atie mini lobo kame kato me imiegu ni, en Sekem, adul kame bin ango amao kede epima kede emal kikut jo Amor.”

Ageini 49

Kope ka Yakobo me Atiekini but Awobe mege

¹Di do Yakobo oko lwongo awobe mege di eko waco negi be, “Cokerenu karacel buta me wek awac ne wu gikame bino timere butu i kare me anyim.

²” Cokerenu di ikounu winyo, wun awobe ka Yakobo. Winyunu kop ka papa wu Isirael.

³” Ruben, in en kao nango, in en teko na, doko in en anyakini me agege me teko na. In ikalamo jo apat dedede kede ruom kede teko.

⁴In icoore bala pii, likame bobo in ibino kalamo jo apat pien in i yito kabuto na di iko buto kede dako na; in imunao kabuto ka papa ni.

⁵” Simeon kede Lebi obedo imiegu. Gin kitio kede ipimai gi me timo tim me gero.

⁶Ango akwao be kur adony kaporo kop gi, akadi ribere kede gin, pien wangcuny gin bin oko mino kineko jo, doko kiko totongo tien twonin bala kame oudo cuny gi mito.

⁷Ilam bed i kom wangcuny gi nono, pien egwai, doko ebed i kom lilo gi da, pien eger. Abino popoko gi i diere me jo ka Yakobo, doko abino sarakino gi i lobo me Isirael.

⁸” Yuda, in imiegu ni bino paki. Cingi bino deno ngut jokwor ni. Imiegu ni bino riebere piny i nyimi.



- ⁹ Yuda woda, in ical bala engu, in itieko mwodo le ni di iko dok kabuto ni. In idoole piny di iko riere bala engu; bala engu adako, ngai kame karuno jalere loli?
- ¹⁰ Ebela me pug likame bino yai tenge kibus Yuda; ebela me ajakanut likame bino yai tenge ki dierediere me tiene, kiton tuno di kokelo ne esolo; di atekerin ko donyo mine wor.
- ¹¹ En etweo atin me punda mere i kor olok, en etweo atin punda icuo i kor olok kame ber kalamo apat. En elwoko igoen mege kede bwini, elwoko ekanso mere kede bwini akwar bala remo.
- ¹² Mato bwini omio wange obokere bubu, di cak oko mino lake odoko tar kiakia.
- ¹³ Sebulun bino bedo i nget nam; edoket mere bino doko kakame emeri cungo iye, doko apokini me lobo mere bino bedo Sidon.
- ¹⁴ Isakar cal bala punda atek, kame tie buto piny i dierediere me esipan me romini;
- ¹⁵ en eko neno be kawei nono oudo ber, doko lobo nono oudo yomo cunye; manono oko mino en eko yei gungo pi yeno yec, di eko doko epasoit kame kodio i tic tetek.
- ¹⁶ Dan bino pugo jo mege bala ateker acel kikom atekerin me Isirael.
- ¹⁷ Dan bino bedo bala twol ager i nget yongayo, ebino bedo bala emosoga kame tie i yongayo, emosoga kame tongo atitinyo me asigira, di eko mino ngat kame oudo tie ringo kede asigira poto ataru.
- ¹⁸ Ango akuri pi laka, Okwe Rwot.
- ¹⁹ Joyak bino yako Gad, do en ebino lokere riamere kede gi di eko eda yako gi.
- ²⁰ Aser bino puro cam amit. En ebino mino cam amit kame kotero ne abaka.
- ²¹ Naputali cal bala atil kame ringo kakame emito, en eyamo kope kame mit.
- ²² Yosepu cal bala yat kame onyak, yat kame onyak i nget atan; ajange mege ojanyo kiton i wi apama.
- ²³ Jokwor oudo osure kede gero atek; gin kigwe kede emal di kiko donyo wape.
- ²⁴ Do emal mere bin oko dong di kingiking, di cinge oko bedo mit yi pi teko me Won Twer ka Yakobo, ngat kame obedo Ngakwat kede Lela me Isirael.
- ²⁵ Rubanga ka papa ni bino konyi, Rubanga Won Twer bino mini winyo. Ebino mini winyo me kot kayai ki malo, kede winyo me pii awok ki piny kakatut, winyo me doke nywal kede mon nywal.
- ²⁶ Winyo kame komio papa ni dwong kalamo winyo kame wok ki moru kame bedo nakanaka, ekalamo jamini abeco kame wok ki wi emukura kame bedo nakanaka. Ango akwao be winyo nogi bed i kom Yosepu, kibed i tur nyim en ngat kame bin koyero kikom imiegu mege di oko poke.



²⁷ Benjamin cal bala epee ager, odiko en emwodo le mere, di otieno eko popoko jamini kame en emao.”

²⁸ Jogi dedede obedo jo me atekerin tomon kiwie are me Isirael, doko mago en kop kame papa gi bin oko yamo negi kakame bin en elamo negi kede winyo, di elubo kede bala kame poore ne kede ngat acelacel.

To ka Yakobo kede Ayika mere

²⁹ Di do en eko coro gi di ewaco negi be, “Koyapuno tera ot nywako kabedo kede jo na. Yikanu karacel kede joakwari na, i abo me poto ka Epuron Ngakiti,

³⁰ kame tie Makepela, i nget Mamure, i lobo me Kanan, i poto kame bin Aburaam owilo kibut Epuron Ngakiti pi bedo kakame eyiko iye jo.

³¹ Kunono en kame bin koyiko iye Aburaam kede dako mere Sara; kunono da en kame bin koyiko iye Isaka kede dako mere Rebeka; doko kunono da en kame ango bin ayiko iye Lea.

³² Poto nono karacel kede abo kame tie iye bin kowilo kibut jo Kiti.”

³³ Kakame Yakobo bin otieko coro kede awobe mege, eko dolo tiene edwoko i kabuto, eko omo wei me ajikini, di oko tere ot nywako kabedo kede joakwari mege.

Ageini 50

¹ Di do Yosepu oko gwako papa mere, eko donyo koko di eko note.

² Yosepu bin oko ciko imuroko jotic mege pi tuno kom papa mere di kiwire kede mo angwe kur. Gin di kiko timo kamanono bala kame oudo Yosepu owaco negi kede.

³ Kitero ceng ot ongwon (40) di kitie tic noni i kome, pien manono en kare kame mitere me tuno kom dano oto. Jo me Misiri bin oko koke pi ceng ot kanyaare (70).

⁴ Kakame kare me koke oko tiek kede, Yosepu bin oko waco ne jo me ot ka Parao be, “Ka wun imaranu, ango akwao wu iotunu di ikounu waco ne Parao kaman:

⁵ papa nango oudo omia akwongere; en ewaco na be, ‘Ango ayapuno to. In ibino yika i abo kame ango akunyo pira i lobo me Kanan.’ Pi mano, ango akwae eyei na ot, tetekeny akaruno yiko papa na; di do ango ako bino dwogo.”

⁶ Parao oko gamo be, “Oti, di iko yiko papa ni, bala kame oudo in ikwongere pi timo.”

⁷ Yosepu bin oko ot yiko papa mere. Jotic ka Parao dedede, joadongo me ot ka Parao, kede joadongo dedede me lobo me Misiri bin oko upere kede Yosepu,

⁸ karacel kede jo me ode, imiegu mege, kede jo me ot ka papa mere, gin dedede kiupere kede en. Bin gin kiweko idwe, romini, diegi kede doke gi kenekene en kodong Gosen.

⁹ Jo aoto kede cabalan kede jo kame ringo kede asigiran da bin oupere kede; oudo ebedo twon ekodet me jo.



¹⁰Kakame gin bin kiko tuno kede i laru me canyo me Atad, kabedo kame tie loka tuca me Yorodan, gin kiko koko kitek ki kuno di kitie kede iturur adwong; di Yosepu oko timo pwola me koko papa mere pi ceng kanyaare.

¹¹Kakame jo me Kanan, wegi lobo nono oneno kede koko kame oudo tie i laru me canyo me Atad, gin kiko waco be, “Man koko atek twatwal kame jo me Misiri tie timo.” Pi mano, oko do cako nying kabedo nono be Abel Misiraim; en etie loka tuca me Yorodan.

¹²Iepone noni, awobe ka Yakobo bin oko timo bala kame papa gi oudo ocoro gi kede.

¹³Gin bin kiko tero kome i lobo me Kanan di kiko yike i abo me Makepela, tetu kide me Mamure, i potu kame bin Aburaam owilo kibut Epuron Ngakiti, pi bedo kakame eyiko iye jo.

¹⁴Ingei Yosepu yiko papa mere, en eko dok Misiri kede imiegu mege kede jo dedede kame oudo oupere kede ot yiko papa mere.

Yosepu Osasiro Imiegu mege

¹⁵Kakame imiegu ka Yosepu oneno kede be papa gi otieko to, gin kiko waco be, “Amoto nat di Yosepu pwodi tie kede lilo but wa di eko mito culo kwor i kom wa pi rac kame wan bin otimo ne.”

¹⁶Di gin kiko cwano ne Yosepu kop di kiwaco be, “Di oudo pwodi likame papa ni oto, en oudo emio wan acora be,

¹⁷’ Wacenu Yosepu kaman: ango angangao in, sasiro imiegu ni ki gikarac gin kede ki dub kame gin bin kitimo nin.’ Pi mano, nan do wan okwai isasiro wa ki gikarac kame wan jotic ka Rubanga ka papa ni bin otimo ni.” Yosepu oko kok kakame bin en ewinyo kede kop kame gin kiwaco ne.

¹⁸Di imiegu mege da oko kok di kiko riebere piny i nyime di kiwaco ne be, “Wan ige ipasoi ni.”

¹⁹Do Yosepu oko waco negi be, “Kur ibedunu kede lworu! Iparunu be ango abedo Rubanga?”

²⁰Akadi bed bala wun bin ipelakinunu timo nango raco, do Rubanga oko loke pi kelo bero, tetekeney egwok kuo me jo atot, bala kame nataman etie timo.

²¹Pi mano, kur ibedunu kede lworu moro; ango kikoma abino gwoko wu karacel kede idwe wu.” Iepone noni en bin eko kweno cunyi gi, di eyamo kede mwolo but gi.

Yosepu Oto

²²Yosepu bin oko dong bedo Misiri, en karacel kede jo me ot ka papa mere. En bin eko bedo kuo i wi lobo pi mwakini tol acel kede tomon (110).

²³Yosepu bin oko bedo kuo tuno neno idwe ka Epuraimu, tuno i ikwae me adek. Makir wot ka Manase da bin onywalo idwe di Yosepu oko tingo gi di egamo gi pi bedo mege.



²⁴En bin eko waco ne imiegu mege be, “Ango ayapuno to, do Rubanga ateteni bino bino butu di eko kwanyo wu tenge ki lobo noni, eko tero wu i lobo kame en bin ekwongere pi mino Aburaam, Isaka kede Yakobo.”

²⁵Di do Yosepu oko mino awobe ka Yakobo okwongere di ewaco negi be, “Kame Rubanga obino butu, wun ibinunu yeno cogere na iterunu.”

²⁶Yosepu bin oko to i Misiri di oudo etie kede mwakini tol acel kede tomon (110); oko mino kome otuo di oko wire kede mo angwe kur di oko kete i sanduku.



Yai

Yai 1

Kotero Jo me Isirael kirac i Misiri

¹ Magi en nying awobe ka Yakobo kame bin oupere kede ot Misiri, ngat acelacel kede jo me ode:

²Ruben, Simeon, Lebi, Yuda,

³Isakar, Sebulun, Benjamin,

⁴Dan, Naputali, Gad kede Aser.

⁵Idwe kede ikwae ka Yakobo dedede bin tie ot kanyaare. Wode Yosepu oudo tie Misiri cuto.

⁶Ingei kare moro Yosepu kede imiegu mege, kede jo apat dedede me lwak gi oko totoun.

⁷Do ikwae gi, gin jo me Isirael, oudo nywal twatwal; gin kiko nyai di kiko doko tek, omio kiko pongo lobo me Misiri.

⁸Di do abaka ace koudo likame ngeo Yosepu oko doko ngapug me Misiri.

⁹En eko waco ne jo mege be, “Nenunu, jo me Isirael odoko tot twatwal, doko kitek kalamo wa.

¹⁰ Ka yi moro opoto, cengemogo kiromo konyo jokwor yi kede wa di do kiko yai kibwot ki lobo wa. Pi manono, poore ongolenu gi rieko moro.”

¹¹Aso, jo me Misiri oko keto negi jo kame kwao ipasoi pi tidilo gi kede tic atek. Gin kiko gero ne Parao bomban me Pitom kede Rameses pi bedo bomban me kano cam.

¹²Do bed bala oudo kotie tero gi kirac, jo me Isirael oko medo nywal ameda di kiko medo sarkin i lobo nono, manono oko mino jo me Misiri obedo kede lworo i kom gi.

¹³Jo me Misiri di oko do cako dino jo me Isirael tic kede gero,

¹⁴di kimio gi kuo atek kede tic atek me nyono lobo, gono matapali kede tice ace apat me poto. Gin oudo kidio gi timo tice dedede kede gero.

¹⁵Di Parao me Misiri oko waco ne mon acolo mon anywal me Iburanian, Sipira kede Pua be,

¹⁶” Kame itienu colo mon me Iburanian, nekunu idwe awobe, do idwe anyira iwekunu.”

¹⁷Do mon koudo colo jo nogo oudo lworo Rubanga, omio likame gin kiko yei lubo gikame Parao ociko negi, do gin kiko weko idwe awobe obedo kuo.

¹⁸Aso Parao oko lwongo mon koudo colo jo nogo di eko penyo gi be, “Pinyo komio itienu timo kamano? Pinyo komio itienu weko idwe awobe dong kuo?”



¹⁹Gin kiko dwoko ne be, “Mon me Iburanian likame cal bala mon me Misiri; gin kitek, manono mio gi kinywal di pwodi dano acolo gi likame otuno.”

²⁰Aso Rubanga oko tero mon nogo kiber, di jo me Isirael oko nyai di kiko doko tek.

²¹Kite kame mon koudo colo jo nogo oudo lwooro kede Rubanga, omio Rubanga oko mino gi miere.

²²I cen mere Parao di oko mino jo mege dedede cik be, “Ucunu i yi ecilet me Nail idwe awobe dedede kame Iburanian nywalo, do wekunu idwe anyira dong kuo.”

Yai 2

Nywalo Musa

¹I kare nono i cuo me ot ka Lebi oko nyomo dako Ngalebi,

²di dako nono oko nywalo atin. Di bin en eneno be enywalo atin awobi acil, en eko kane pi dwete adek.

³Kakame eneno kede be oudo likame bobo etwero meede kede kane, en eko kwanyo ebukit kame kotimo kede aladoi di eko puce kede emina tetekeny kur pii tuce. En eko cibo atin i yie di eko ot rwake i otol me dog ecilet.

⁴Amin me atin nono oko cungo i kakabor pi neno gikame oyaro timere ne.

⁵Nyar ka Parao oko ot pi bol i ecilet, di anyira akonye oko ber donyo latao di kiririo dog ecilet. En eko neno di ebukit tie i dier otol di eko cwano nyako ngakonye pi ot kwanye.

⁶Kakame en eyabe kede, en eko neno atin tie iye; atin oudo tie koko, di kisa oko mako nyar ka Parao i kome. En ewaco be, “Miero di man obedo atin me Ngaeburania.”

⁷Amin me atin nono oko penyo nyar ka Parao be, “Aoti akel ni dako Ngaeburania moro bin gwok ni atin noni?”

⁸En eko dwoko be, “Ebo.” Aso, nyako nono oko ot di eko kelo toto me atin nono kikokome.

⁹Nyar ka Parao oko waco ne dako nono be, “Teri atin noni ioti igwok na, ango abino culi.” Aso, dako nono oko tero atin di eko ot gwoke.

¹⁰Kakame atin odongo kede, en eko tere but nyar ka Parao di nyako nono oko game pi bedo bala wode. En eko cako nyinge Musa, piento en ewaco be, “Ango awote ki pii.”

Musa Olwi eko Ringo Midian

¹¹Ceng moro acel di Musa otieko dongo, en eko wok ki paco ka Parao eko ot roto jo mege, di eko neno epone kame oudo kotie dino gi kede timo tic atek. En eko neno di dano me Misiri tie bungo Ngaeburania moro, dano acel kikom jo mege.



- ¹²En eko ngongolo piny, kakame eneno kede be likame ngatamoro oudo tie nene, eko neko dano me Misiri nono di eko kano kome i asinge.
- ¹³Oru mere en doko eko dok kuno di eko neno Iburanian are di kitie yi; en eko waco ne ngat koudo rac kibun gi be, “Pinyo komio itie bungo Ngaeburania wadu?”
- ¹⁴Icuo nono oko dwoko ne be, “Ngai koketi bedo ngapug kede ngangolkop wa? Benyo, imito neka bala kame ineko kede dano me Misiri?” Lworo oko mako Musa di eko tamo kene be, “Ateteni kotieko ngeno kop noni.”
- ¹⁵Kakame Parao oko winyo kede kop nono, en eko tamakino pi neko Musa, do Musa oko lwi eringo ot bedo i lobo me Midian. Ceng moro acel Musa oudo tie bedo i dog atan,
- ¹⁶di anyira kanyaare ka ngasaseredoti me Midian oko bino pi koto twomo pii di kiweko i atuba, tetekeny diegi kede romini ka papa gi mat pii.
- ¹⁷Do jokwat mogo oko bino di kiko riamo gi tenge, do Musa oko yai di eko konyo gi di eko mino diegi kede romini omato pii.
- ¹⁸Kakame gin kidok kede but papa gi Yesero, en eko penyo gi be, “Pinyo komio tin wun isunyunu dwogo?”
- ¹⁹Gin kiko dwoko be, “Icuo moro me Misiri en okonyo wa ki cing jokwat; doko da en eko twomo pii di eko mino diegi kede romini wa omato.”
- ²⁰En eko penyo anyira mege be, “Icuo nono tie tuai? Pinyo komio iwekenu kuno? Otunu ilwongenu ebin enywak kede wa cam.”
- ²¹Aso, Musa oko yei ot bedo paco nono, di Yesero oko mino Musa nyare anyinge Sipora pi nyomere kede.
- ²²Sipora oko nywalo atin awobi, di Musa oko cako nyinge Geresom, piento en ewaco be, “Ango abedo ngakumbor i lobo noni.”
- ²³Ingei mwakini mogo, Parao me Misiri oko to. Jo me Isirael oudo pwodi tie meede cur kede peko kame oudo kitie iye bala mabus, di kikok pi kony. Di gin oudo kitie bala mabus kamanono, koko gi oko tuno but Rubanga.
- ²⁴Rubanga oko winyo cur gi di eko yutuno isikan kame oudo etimo kede Aburaam, Isaka kede Yakobo.
- ²⁵Rubanga oneno peko me jo me Isirael di eko paro pirgi.

Yai 3

Rubanga Olwongo Musa

¹Ceng moro acel Musa oudo tie kwano romini kede diegi ka ore Yesero, ngasaseredoti me Midian; en eko tero gi engolo kede gi wi tim paka tuno Koreb, en moru ka Rubanga.



- ² Malaika ka Rwot oko neeno ne ki kuno i cal me mac aliel i abum; en eko ngino di eko neno di abum birano do likame edopokin.
- ³ Musa oko yamo i cunye kene be, “Ber angu amito nyiko kuno anen gi me aura noni, gi komio abum tie birano do di likame edopokin.”
- ⁴ Kakame Rwot oneno kede be Musa onyiko pi neno gikame tie timere, Rwot oko lwonge i abum be, “Musa, Musa!” En eko gamo be, “Angu ine.”
- ⁵ Rubanga oko waco ne be, “Kur inok kan! Gonyi amuka ki tieni, pien kakame itie cungo iye obedo lobo kacil.
- ⁶ Angu en Rubanga ka papa ni, Rubanga ka Aburaam, Rubanga ka Isaka kede Rubanga ka Yakobo.” Musa oko umo wange, pien oudo elworo neno Rubanga.
- ⁷ Di Rwot oko waco be, “Angu atieko neno peko kame jo na tie iye i Misiri. Angu atieko winyo koko kame kitie kede pi jo kame kwao gi bala mabus, ateteni angu angeo can gi.
- ⁸ Nan angu abino piny pi lako gi ki cing jo me Misiri, kede pi kwanyo gi ki lobo nono di ako tero gi i lobo aber di lac, lobo amio, en lobo kame jo Kanan, jo Kiti, jo Amor, jo Perisi, jo Kibi kede jo Yebu nan bedo iye.
- ⁹ Koko me ateker me Isirael nan otieko tuno buta; angu atieko neno epone kame jo me Misiri tero gi kede kirac.
- ¹⁰ Aso, nan angu atie cwani but Parao me Misiri pi ot kwanyo jo na ki lobo me Misiri.”
- ¹¹ Do Musa oko waco ne Rubanga be, “Angu abedo ngai mio atwero ot but Parao di ako kwanyo jo me Isirael ki Misiri?”
- ¹² Rubanga oko dwoko ne be, “Angu abino bedo tie kedi; gianena kame bino nyuto be angu en kame acwai en ine: kame in itieko kwanyo jo ki Misiri, in ibino donyo wora i wi moru noni.”
- ¹³ Do Musa oko dwoko be, “Ka angu aoto but jo me Isirael di ako waco negi be, ‘Rubanga ka joakwari wu ocwaa butu, ‘di gin kiko penya be, ‘Nyinge ngai?’ Angu abino dwoko negi benyo?”
- ¹⁴ Rubanga oko waco be, “ANGU EN ANGO. Aso, in oti iwace jo me Isirael be, ‘ANGU ATIE ocwaa butu.’
- ¹⁵ Wace jo me Isirael be, ‘Rwot, Rubanga me joakwari wu, Rubanga ka Aburaam, Rubanga ka Isaka kede Rubanga ka Yakobo ocwaa butu.’ Manoni en nyinga i kare dedede; lwak me kare me anyim bino lwonga kamanoni.
- ¹⁶ Oti icok karacel joadongo me Isirael di iko waco negi be, Rwot, Rubanga me joakwari gi, Rubanga ka Aburaam, Rubanga ka Isaka kede Rubanga ka Yakobo onyutere buti. Wace gi be angu atieko neno gikame kotie timo negi i Misiri.



¹⁷Ango nan atieko moko be anga abino kwanyo gi ki can kame kitie iye i Misiri, di ako tero gi i lobo me jo Kanan, jo Kiti, jo Amor, jo Perisi, jo Kibi kede jo Yebu, en lobo amio.

¹⁸Gin kibino winyo dwani, di do in karacel kede joadongo me Isirael ikounu ot but Parao me Misiri di ikounu waco ne be, ‘Rwot, Rubanga me Iburanian onyutere but wa; nan okwai iyei ne wa ooti i wi tim, sapali kame boro mere bino tero ne wa ceng adek, tetekeny ooti omi Rwot Rubanga wa giayala.’

¹⁹Akadi da, anga angeo be Parao me Misiri likame bino yei ne wu ot tuno di kodie tetek.

²⁰Aso, anga abino tic kede twer na di ako bino mino Misiri alola dedede kobedo giaura na kame abino timo kuno, ingei manono en ebino yei ne wu yai.

²¹Abino mino cuny jo me Misiri bedo yom i komu, tetekeny kame iyaunu, likame ibinunu yai kede cingu nono.

²²Dako acelacel me Isirael bino kwano ngakio mere, kede dako moroni kenekene kame bedo i ot ka ngakio mere, jamini abeco kame kotimo kede siliba kede saabu, kede igoen. Jo me Isirael ko bino ngapo gi nogo ne anyira kede awobe gi, di kiko tero abar me jo Misiri.”

Yai 4

Rubanga Omio Musa Twer me Timo Giaura

¹Di Musa oko dwoko ne Rwot be, “Do ka jo me Isirael likame oyei winyo kop na, di kiko waco be likame Rwot oneeno buta, nyo kame anga abino timo?”

²Rwot oko penye be, “Nyo ino atie i cingi no?” En eko dwoko be, “Ebela.”

³Rwot oko waco ne be, “Uce piny.” Musa oko uco ebela nono piny di eko lokere edoko twol; Musa oko ringo tenge.

⁴Di Rwot oko waco ne Musa be, “Cwai cingi di iko make kede yibe.” Musa oko gungo di eko kwanye, di eko lokere i cinge edoko ebela bobo.

⁵Rwot oko waco ne be, “Oti itim kamanoni pi nyuto ne jo me Isirael be Rwot, Rubanga ka joakwari gi, Rubanga ka Aburaam, Rubanga ka Isaka kede Rubanga ka Yakobo, oneeno buti.”

⁶Rwot bobo oko waco ne Musa be, “Rwak cingi i yi ekanso ni.” Musa oko rwako cinge i yi ekanso mere, do kakame ewote kede, buge oudo otatapo i cinge, di do etar ineno bala akako.

⁷Di Rwot oko waco ne be, “Dwok cingi i yi ekanso ni.” En eko rwako cinge edwoko i yi ekanso mere, do kakame ewote kede, cinge oudo otieko doko ber cal acala kede adulion apat me kome.

⁸Rwot oko waco ne Musa be, “Ka likame gin kiyei kop ni ingei timo gianena me agege, gianena me are bino mino gi kiyei.



⁹Do ka gin kidagi yei gianena are nogi arabo winyo kop ni, in ibino twomo pii mogo ki ecilet me Nail iko onyo kakatek; pii nono bino lokere doko remo.”

¹⁰Do Musa oko dwoko ne Rwot be, “Okwe Rwot, sasiro ango; cako lem sek likame ango atwero yamo kiber, akadi tuno nan da di in itieko yamo keda noni. Ango awao yamo awaa doko leba momoko.”

¹¹Di Rwot oko penyo Musa be, “Ngai kame mio dano twero yamo? Ngai kame mio yite ding amoto lebe to? Ngai kame mie eneno piny amoto kamie ebedo emuduk? Mam ango Rwot inonono?”

¹²Nan oti, ango abino konyi yamo; abino mini kop kame ipoore waco.”

¹³Do Musa oko dwoko be, “Okwe Rwot, likame kamano, cwai dano moro ace.”

¹⁴Manono oko mino Rwot oudo wangcuny i kom Musa di eko waco be, “Do omini kono, Aaron Ngalebi? Ango angeo be en etwero yamo kiber, doko nan da en etie bino riamo kedi; cunye bino bedo yom pi neni.

¹⁵In ibino yamo kede en di iwaco ne kope kame epoore waco. Ango abino konyo wun dedede yamo, doko abino nyuto ne wu gikame ipoorenu timo.

¹⁶En ebino bedo ngat kame yamo kede jo akaka in, di do in iko bino bedo bala Rubanga, ngat kame yamo nen gikame epoore timo.

¹⁷Maki ebela noni i cingi, pien ibino tic kede en me timo gianena.”

Musa Odok Misiri

¹⁸Di Musa oko dok but Yesero papa me dako mere di eko waco ne be, “Okwe yei na dok but wade na atie Misiri pi neno ka pwodi kitie kikuo.” Yesero oko yei di eko kwano ne sapali aber.

¹⁹Kakame Musa oudo pwodi tie kede Midian, Rwot oko waco ne be, “Dok Misiri, pien jo kame oudo tie mito neki otieko totoun.”

²⁰Aso, Musa oko kwanyo dako mere kede awobe mege di eko mino gi kibedo ingei punda, di kiko yai dok Misiri; emako da ebela kame oudo Rubanga owaco ne be eteri.

²¹Rwot bobo oko waco ne Musa be, “Kame idok Misiri, miero inen be itimo i nyim Parao giaura dedede kame ango atieko mini twer me timo; do ango abino mine ebedo ngaepali tetekeny kur eyei ne jo yai.

²²Di in iko bino waco ne Parao be, ‘Rwot owaco be: Isirael obedo woda kao.

²³Ango oudo awaco ni pi weko woda yai, tetekeny ewora, do in iko dagi. Nan ango abino neko wodi kao.’ “

²⁴Di oudo kitie i yongayo, Rwot oko riamo kede Musa di eko tamo neke i kakame oudo kibuto iye kede jo me ode.

²⁵⁻²⁶Do Sipora oko kwanyo engaro abit di eko kepo kede kom wode me cuo, di eko damakino remo mere i tiene. Pi kwer me akepo kame en etimo, en eko waco ne Musa



be, “Ateteni in ibedo cwara me remo!” Di do Rwot oko weko tam me mito neko Musa.

²⁷Di manono oudo tie timere, Rwot oko waco ne Aaron be, “Poore ioti i wi tim pi riamo kede Musa.” Aaron oko ot di eko riamo kede Musa i moru kacil, di eko donyo note kakame eriamo kede en.

²⁸Musa oko waco ne Aaron kope dedede kame Rwot ocwae kede; doko da eko waco ne kop i kom gianena dedede kame Rubanga ocike be etimi.

²⁹Di Musa kede Aaron oko ot di kiko koko karacel joadongo dedede me Isirael.

³⁰Aaron oko waco kope dedede kame Rubanga owaco ne Musa, di eko timo gianena i wang jo kanono.

³¹Jo oko yei kope gi; di do kakame kiko winyo kede be Rwot oudo obino but gi di eko neno kite kame oudo kotie tero gi kede kirac, gin kiko luro wi gi piny di kiko woro Rwot.

Yai 5

Musa kede Aaron i Nyim Abaka me Misiri

¹I cen mere Musa kede Aaron oko ot but Parao di kiko waco ne be, “Rwot Rubanga me Isirael owaco be, ‘Wek jo na yai oti, tetekeny kioti kited ebaga me wora i wi tim.’”

²Parao oko dwoko be, “Rwot obedo ngai kamiango awinyo kop mere di ako weko jo me Isirael oti? Ango gira likame angeo Rwot, doko da likame abino weko jo me Isirael yai ot.”

³Musa kede Aaron oko dwoko be, “Rubanga me Iburanian onyutere but wa. Yei ne wan ot sapali me ceng adek i wi tim pi ot mino Rwot Rubanga wa giayala, aso ka li, en ebino neko wa kede tuwo arabo ebino mino koneko wa kede epima.”

⁴Do Parao oko dwoko ne Musa kede Aaron be, “Pinyo komio itienu mino jo weko timo tic. Ipasoi go poore doki kiot timo tic!”

⁵Gin kitioko doko tot kalamo jo me Misiri, do di doko nan wun itienu mito mino gi weko tic!”

⁶Cenge nono Parao oko ciko jo kame kwao ipasoi kede nyampalan me jo me Misiri be,

⁷” Jikunu do mino jo ocici me timo matapali, wekunu gin kikom gi en kame kicak do ot mono ocici.

⁸Do wel me matapali kame gin kitimo poore dong di rom aroma bala lem sek, kur idwokunu wel me matapali piny, pien gin kinyap en komio kibedo kok buta be, ‘Wek wa ooti omi Rubanga wa giayala.’



- ⁹Miunu gi tic atek kipumere kede, en ako mino gi kibed li kede kare me winyo kope atatai me abe.”
- ¹⁰Jo kame kwao ipasoi kede nyampalan me ateker me Isirael oko ot di kiko waco ne jo me Isirael be, “Parao owaco be likame bobo ebino meede mino wu ocici me timo matapali.
- ¹¹Ewaco be wun kikomu iotunu imounu ocici i kakame wun itwerunu udo gi iye, do likame kobino dwoko piny rom me tic kame ipoorenu timo.”
- ¹²Aso, jo me Isirael oko sarakin i Misiri lung mono ocici.
- ¹³Jo kame oudo kwao ipasoi oudo burakino gi tic di kiwaco be, “Cobunu timo tic arom aroma kede tic kame oudo itimunu buli ceng i kare kame oudo kogabo wu agaba kede ocici.”
- ¹⁴Jo kame Parao oketo kwano ipasoi oko donyo bungo nyampalan me jo me Isirael kame gin kiyero di kipenyo gi be, “Pinyo komio jo wu likame tie timo matapali kame wel gi rom aroma kede kame oudo ngoce kitimo buli ceng?”
- ¹⁵Di nyampalan me jo me Isirael oko ot but Parao di kiko penye be, “Adwong me awora, pinyo komio itie tero jotic ni kirac kamano?”
- ¹⁶Likame kotie mino wa ocici do di kotie cwako wa be, ‘Timunu matapali! ‘Nen ber kite kame kotie bungo kede jotic ni! Do jo nin en atie kede raco.”
- ¹⁷Parao oko dwoko be, “Wun inyapunu en komio itienyu penya be aweku iotunu imiunu Rwot giayala.
- ¹⁸Nan dokunu iotunu timo tic; likame kobino mino wu ocici akadi acel, do buli ceng miero itimunu matapali kame wel gi rom aroma kede me lem sek.”
- ¹⁹Nyampalan me jo me Isirael oko ngeno be oudo kitie do i peko kakame kowaco negi kede be, “Likame miero idwokunu piny wel me matapali kame ipoorenu timo buli ceng.”
- ²⁰Aso, gin kiko yai kibus Parao di kiko riamo kede Musa kede Aaron, jo are nogi oudo tie daro gi.
- ²¹Gin kiko waco ne Musa kede Aaron be, “Poore Rwot nen gikame itimunu di eko ngolo ne wu iye kop! Wun icumakinunu wan kede Parao karacel kede jotic mege. Itiekunu mino gi kacungo me neko wa do.”
- ²²Di Musa oko lokere but Rwot di eko waco ne be, “Rwot pinyo komio itie tero jo ni kirac? Pinyo komio icwaa kan?”
- ²³Cako ango bino kan di ako ot yamo ne Parao kope nin, en eko donyo tero jo me Isirael kirac. Aso, ida likame iko timo gimoro pi lako gi!”

Yai 6



¹Rwot oko waco ne Musa be, “Nan ibino neno gikame abino timo ne Parao, abino tic kede twer na di en eko weko jo na yai, kom ebino riamo gi ariama pi yai ki lobo mere.”

Rubanga Olwongo Musa

²Rubanga oko waco ne Musa be, “Ango en Rwot.

³Ango aneeno but Aburaam, Isaka kede Yakobo bala Rubanga Won Twer, do likame anga ako mino gi kingea kede nyinga kacil be Rwot.

⁴Doko da anga ako timo kede gi isikan, di acikere pi mino gi lobo me Kanan, lobo kame nan kibedo iye bala jokumbor.

⁵Doko da anga atieko winyo cur me jo me Isirael, jo kame jo me Misiri omio obedo ipasoi, di do nan anga ako yutuno isikan na.

⁶Pi manono, oti iwace jo me Isirael be, ‘Ango en Rwot, abino gonyo wu ki tice atek kame jo me Misiri dio wu timo, di ako lako wu ki bedo ipasoi gi. Abino lako wu kede twer na adwong kame bino timo tice me aura pi mino gi alola.

⁷Abino mino wu ibedunu jo na di anga ako bino bedo Rubanga wu. Ibinunu ngeno be anga en Rwot Rubanga wu, ngat kogonyo wu ki tice atek kame jo me Misiri dio wu timo.

⁸Abino tero wu i lobo kame bin anga akwongere pi mino Aburaam, Isaka kede Yakobo, di ako bino mino wu lobo nono pi doko meru. Ango en Rwot.’ “

⁹Musa oko waco ne jo me Isirael kope nogi, do gin kiko daga winyo kope mege pien cuny gi oudo odubere pi tic atek kame kotie dino gi timo, pien gin kibedo ipasoi.

¹⁰Di Rwot oko waco ne Musa be,

¹¹” Oti iwace Parao me Misiri pi weko jo me Isirael yai tenge ki lobo mere.”

¹²Do Musa oko waco ne Rwot be, “Ka ber jo me Isirael da odagi winyo kop na, benyo benyo kame Parao bino yei winyo kede kop na, anga ngat kalikame atwero yamo kiber?”

¹³Rwot oko yamo kede Musa kede Aaron di eciko gi i kom kop amako jo me Isirael kede Parao me Misiri; en eciko gi pi kwanyo jo me Isirael ki Misiri.

Ekeko me Anywali ka Musa kede Aaron

¹⁴Ruben, awobi kao ka Yakobo oudo tie kede awobe ongwon: Kanok, Palu, Keseroni kede Karami, gin kibedo joakwari me ikekon kame kocako kede nying gi.

¹⁵Simeon oudo tie kede awobe kanyape: Jemuel, Yamin, Okad, Yakin, Sokar kede Saul, en wot ka dako me Kanan. Gin oudo kibedo joakwari me ikekon kame bin kocako kede nying gi.

¹⁶Lebi oudo tie kede awobe adek: Gereson, Kokat kede Merari. Lebi bin oko bedo kuo pi mwakini tol acel kede ot adek kiwie kanyaare.



- ¹⁷Geresom oko nywalo awobe are: Libini kede Sime; gida kiko bedo kede ikwae atot.
- ¹⁸Awobe ka Kokat gin ige: Amuram, Isikar, Keburon kede Usiel. Kokat bin oko bedo kuo pi mwakini tol acel kede ot adek kiwie adek.
- ¹⁹Merari oko nywalo awobe are: Makali kede Musi. Magonogi en bin obedo ikekon me jo Lebi kede ikwae gi.
- ²⁰Amuram bin oko nyomo Yokebed amin me papa mere, di kiko nywalo Aaron kede Musa. Amuram bin oko bedo kuo pi mwakini tol acel kede ot adek kiwie kanyaare.
- ²¹Isikar oko nywalo awobe adek: Kora, Nepeg kede Sikiri.
- ²²Usiel da oudo oko nywalo awobe adek: Misael, Elisapan kede Sitiri.
- ²³Aaron bin oko nyomo Eliseba nyar ka Aminadab, en oudo ebedo amin me Nakason. Gin kiko nywalo Nadab, Abiku, Eleasar, kede Itamar.
- ²⁴Kora bin oko nywalo awobe adek: Asir, Elikana kede Abiasap. Gin bin kiko bedo joakwari me ikekon kopopokun ki ateker ka Kora.
- ²⁵Eleasar, wot ka Aaron oko nyomo nyako acel kikom anyira ka Putiel, di kiko nywalo Pinekasi. Magonogi oudo obedo jotel me ude kede ikekon me ateker me jo Lebi.
- ²⁶Aaron kede Musa gin nogi en kame Rwot oudo owaco negi be, “Otunu iwotunu jo me Isirael ki Misiri.”
- ²⁷Gin kibedo jo koudo ooto waco ne Parao me Misiri pi gonyo jo me Isirael.

Gikame Rwot Ociko ne Musa kede Aaron

- ²⁸Kakame Rwot oyamo kede Musa i lobo me Misiri,
- ²⁹en ewaco ne be, “Ango en Rwot; wac ne Parao me Misiri gi dedede kame ango awaco ni.”
- ³⁰Do Musa oko dwoko be, “Ango ngat kalikame atwero yamo kiber, benyo benyo kame Parao twero winyo kede kop na?”

Yai 7

- ¹Rwot oko waco ne Musa be, “Neningo, ango abino mini idoko bala Rubanga i but Parao, do omini Aaron ko bino bedo bala enabi nin.
- ²In ibino waco ne Aaron gi dedede kame ango aciki iye, di en eko bino waco ne Parao pi weko jo me Isirael yai tenge ki lobo mere.
- ³⁻⁴ Do ango abino mino Parao bedo ngaekanya, di eko dagi winyo kope wu, akadi di ango atim gianena kede giaura atot i lobo me Misiri. Ingei manono ango ako bino kelo alola alit twatwal i kom jo me Misiri di ako telo jo na wok ki Misiri, jo me ekeko acelacel me anywali me Isirael di lubere aluba.



⁵Jo me Misiri ko bino ngeno be, ango en Rwot, kakame ango abino tic kede twer na pi kelo can i kom jo me Misiri di ako kwanyo jo me Isirael ki lobo gi.”

⁶Musa kede Aaron oko timo gikame Rwot ociko negi.

⁷I kare kame kiyamo kede Parao, Musa oudo tie kede mwakini me dongo ot kanyauni, do Aaron oudo tie kede mwakini ot kanyauni kiwie adek.

Ebela ka Aaron

⁸Rwot oko waco ne Musa kede Aaron be,

⁹” Ka Parao owaco be, ‘Timunu giaura, ‘in Musa ibino waco ne Aaron be, ‘Kwany ebela ni di iko uce piny i nyim Parao, di eko bino lokere edoko twol.’ “

¹⁰Aso, Musa kede Aaron oko ot but Parao di kiko timo bala kame Rwot oudo ociko negi; Aaron ouco ebela mere piny i nyim Parao kede jotic mege adongo, di eko lokere edoko twol.

¹¹Parao oko lwongo jo mege angengeo piny kede imuroko; di jo atimo tangu nogi da oko timo kamanono kede diru gi.

¹²Ngat acelacel kibus gi ouco ebela mere piny di kiko lokere kidoko twole; do ebela ka Aaron oko mwonyo mergi.

¹³Do Parao pwodi oko meede kanyo kop, eko dagi yei winyo kop gi, bala kame oudo Rwot otieko waco.

Can me Agege: Pii Odoko Remo

¹⁴Di Rwot oko waco ne Musa be, “Parao ngaepali; en edagi weko jo oti.

¹⁵Aso, otunu pi riamo kede en diki odiko, esawa kame en etie ot kede i ecilet me Nail; wun otunu ikounu cungo i dog ecilet kure di imako i cingi ebela kame oudo olokere odoko twol ca.

¹⁶Di in iko bino waco ne be, ‘Rwot, Rubanga me Iburanian ocwaa buti pi waco ni be poore iwek jo mege yai oti, tetekeny kioti iwore i wi tim. Do tuno esawa noni in pwodi idagi yei.

¹⁷ Pi mano, Rwot owaco be gikame en eyaro timo bino mini ingeo be ateteni en ebedo Rwot. Neningo, ango abino juto pii me ecilet me Nail kede ebela kame tie i cinga ni, di pii ko bino lokere doko remo.

¹⁸Aporogon kame tie i ecilet noni bino totoun, pii da bino doko ngwe, di jo me Misiri likame ko twero bino mato pii me ecilet noni.’ “

¹⁹Rwot oko waco ne Musa be, “Wace Aaron mak ebela mere di eko riengo bade i wi pie dedede me Misiri: i wi icileta, isamai kede ataparin mege, tetekeny pie nogo lokere dok remo; di remo ko bino romo lobo me Misiri dedede, kiton i yi yen kame kopao amoto ingaroi kame koroko me koko pii.”



²⁰Di Musa kede Aaron oko timo bala kame Rwot ociko negi. I nyim Parao kede jotic mege adongo, Aaron oko tingo ebela mere malo di eko juto wi pii me ecilet, di pii dedede me ecilet oko lokere odoko remo.

²¹Aporogon kame oudo tie i pii oko totoun di pii oko doko ngwe rac, omio jo me Misiri oudo likame twero mate. Remo oudo oromo lobo me Misiri dedede.

²²Do jotim tangu me Misiri oko gida timo jwok gi di gida kiko timo gi acel nono. Aso, Parao oko dong adonga kanyo kop kamanono, bala kame Rwot oudo otieko waco.

²³Parao gire oko lokere eoto i ode, likame eko keto tam mere i kom gikame oudo otimere.

²⁴Jo me Misiri oko donyo kukunyo dog ecilet me Nail pi mono pii me amata, pien oudo likame kitwero mato pii me ecilet.

²⁵Ceng kanyaare oko kato ingei Rwot juto wi pii me ecilet me Nail.

Yai 8

Can me Are: Igwalogwalon

¹Di Rwot oko waco ne Musa be, “Ot but Parao iko waco ne be Rwot owaco be, ‘Wek jo na yai tetekeny kiko wora.

²Do ka in idagi negi yai, ayaro mino igwalogwalon pongo lobo nin dedede bala alola.

³Igwalogwalon bino pongo ecilet me Nail di kiko alamar kioto kiton i paco nin me Parao, i agola nin me buto, kiton i dud itanda nin, kede i ude me jotic nin adongo, kede i ude ka jo ni, kede i kenere ni kede i bakulin nin me nyongo alos me timo mugati.

⁴Igwalogwalon bino sosomo i komi, kede i kom jo ni, kede i kom jotic ni.’ “

⁵Rwot oko waco ne Musa be, “Wace Aaron mak ebela mere di eko rienu bade i wi ecilet, kede isamai, kede i wi ataparin di eko mino igwalogwalon wok kakatek i wi lobo me Misiri.”

⁶Aso, Aaron oko rienu bade i wi pie me Misiri, di igwalogwalon oko bwote ooko i lobo me Misiri.

⁷Do jotim tangu me Misiri oko gida timo jwok gi di gida kiko timo gi acel nono, kimio igwalogwalon obwote i lobo me Misiri.

⁸Di Parao oko lwongo Musa kede Aaron, di eko waco negi be, “Legunu but Rwot ekwany tenge igwalogwalon gi kibuta kede kibut jo na, di ango ako bino yei ne jo yai ot mino Rwot giayala.”

⁹Musa oko waco ne Parao be, “Mano ber, ango ami wor me ciko esawa kame ango abino lego ni kede, kede jotic ni adongo, karacel kede jo ni, me tetekeny kwany igwalogwalon kibutu kede ki ude wu, di kiko dong i ecilet me Nail kenekene.”



¹⁰Parao oko waco be, “Leg na diki.” Musa oko waco be, “Ango abino timo bala kame in iwaco, di in iko bino ngeno be likame bobo tie rubanga moro ace kame cal bala Rwot Rubanga wan.

¹¹Igwalogwalon bino weki, kede ude ni, kede jotic ni adongo, karacel kede jo ni da; kibino dong i ecilet me Nail kenekene.”

¹²Di Musa kede Aaron oko yai oweko Parao, di Musa oko lego but Rubanga pi kwanyo igwalogwalon kame oudo ecwao ne Parao.

¹³Rwot oko timo bala kame Musa okwao. Igwalogwalon oko totoun i yi ude, idiakale kede i poti.

¹⁴Gin kiko koko gi i atukito di ngwece gi oko romo lobo nono.

¹⁵Do kakame Parao oneno kede be piny mere odoko beber pien igwalogwalon otieko totoun, en bobo eko doko ngaepali di eko dagi winyo kop gi, bala kame oudo Rwot otieko waco.

Can me Adek: Omelu

¹⁶Di Rwot oko waco ne Musa be, “Wac ne Aaron riei bade di eko juto piny kede ebela mere, tetekeny apua lokere dok omelu i lobo me Misiri lung.”

¹⁷Gin kiko timo kamanono; Aaron otingo bade di eko juto piny kede ebela mere, di apua oko lokere odoko omelu i kadedere dedede me Misiri, di kiko nur i kom jo kede i kom leini.

¹⁸Jotim tangu da oko gida timo jwok gi pi koto kelo omelu, do likame kiko twero. Omelu oudo oromo kom jo kede leini dedede.

¹⁹ Aso, jotim tangu oko waco ne Parao be, “Man obedo twer ka Rubanga!” Do Parao oudo odoko ngaepali, omio likame eko yei winyo kop ka Musa kede Aaron, bala kame oudo Rubanga otieko waco.

Can me Ongwon: Lwangini

²⁰Rwot oko waco ne Musa be, “Yai diki odiko di iko ot pi riamo kede Parao esawa kame en etie ot kede i ecilet odiko, di iko waco ne be Rwot owaco be, ‘Wek jo na yai tetekeny kioti kiwora.

²¹Ka in idagi ne jo na yai, ango abino cwano ekodet me lwangini i komi, kede i kom jotic ni adongo kede i kom jo ni. Lwangini bino nur anura i ude me jo me Misiri, doko kibino umo pukupuk kadedere dedede me lobo gi da.

²²Do i ceng nono ango abino koono adul me Gosen, kakame jo na bedo iye, di ekodet me lwangini likame ko bino ot kuno, tetekeny in iko bino ngeno be ango Rwot atie tic i lobo noni.

²³Abino nyuto apokapoka i diere me jo nango kede jo nin. Gianena noni bino timere diki.’ “



- ²⁴Rwot oko timo kamanono, di lwangini oko bwote i ot ka Parao kede i ude me jotic mege; lwangini oko dudubo lobo me Misiri dedede.
- ²⁵Parao oko lwongo Musa kede Aaron di eko waco negi be, “Otunu imiunu Rubanga wu giayala, do timunu kamanono i lobo me Misiri kan.”
- ²⁶Musa oko dwoko be, “Timo kamanono likame obedo gikame poore; pien giayala kame wan omio but Rwot Rubanga wa obedo gikame neno rac i wang jo me Misiri. Ka jo me Misiri oneno wan di otie mino giayala kobedo gikarac kibun gin, mam kibino didipo wa kede kide?”
- ²⁷Wan miero ooti sapali me ceng adek i wi tim di oko ot mino Rwot Rubanga wa giayala bala kame en etieko ciko ne wa.”
- ²⁸Aso, Parao oko waco be, “Ango abino weko wu iotunu mino Rwot Rubanga wu giayala i wi tim kwanyo ka likame ibinunu ot kakabor. Leganu.”
- ²⁹Musa oko dwoko be, “Cucuto di ango ayai kibuti abino kwano Rwot pi mino lwangini weki kede jotic ni, kede jo ni dedede; kur bobo ingal wa angala di iko gengo jo ot mino Rwot giayala.”
- ³⁰Aso, Musa oko yai kibut Parao di eko lego but Rwot.
- ³¹Rwot oko timo gikame Musa okwae; en ekwanyo tenge ekodet me lwangini kibut Parao kede jotic mege, kede kibut jo mege dedede, likame tie lwangini acel moro oko dong.
- ³²Do Parao oko bobo medere kede epali mere, eko dagi ne jo yai.

Yai 9

Can me Kany: To me Leini

- ¹Di Rwot oko waco ne Musa be, “Oti but Parao di iko waco ne be Rwot Rubanga me Iburanian owaco be, ‘Wek jo na yai kioti kiwora.
- ²Aso, ka in idagi negi yai,
- ³abino mini alola i yore me cwano ni tuwo arac me leini: asigiran, pundan, aguraguran, doke, romini kede diegi.
- ⁴Do abino nyuto apokapoka i dierediere me leini me jo me Isirael kede me jo me Misiri, tetekeny kur le moro kikom leini me jo me Isirael toi.
- ⁵Ango Rwot atieko moko ceng me diki pi bedo ceng kame ango abino timo kede gi noni i lobo noni.’ “
- ⁶Ceng alubo mere Rwot oko timo bala kame oudo etieko waco; leini dedede me jo me Misiri ototoun, do leini me jo me Isirael likame oto akadi acel moro.
- ⁷Parao oko pepenyo di eko udo be, likame le moro oto akadi acel kikom leini me jo me Isirael. Do Parao oko meede ameda kede epali mere di likame eko yei ne jo yai.



Can me Kanyape: Giakwoti

⁸Di Rwot oko waco ne Musa kede Aaron be, “Jobunu buru i cingu pong di Musa ko kiro gi i yamo i nyim Parao.

⁹En ebino doko apua di eko duny i wi lobo me Misiri dedede, di eko bino kelo giakwoti i kom jo kede i kom leini i lobo me Misiri dedede.”

¹⁰ Aso, gin kiko jobo buru mogo ki keno di kiko ot cingu i nyim Parao, di Musa oko kiro buru i yamo di manono oko kelo buge me giakwoti i kom jo kede i kom leini.

¹¹Jotim tangu likame oko twero cingu i nyim Musa, pien giakwoti oudo otatapo kom gi bala jo icegun dedede me Misiri.

¹²Do Rwot oko mino Parao obedo ngaepali, omio likame eko yei kop gi, bala kame oudo Rwot otieko waco ne Musa.

Can me Kanyaare: Akako

¹³Di Rwot oko waco ne Musa be, “Yai diki odiko sek di iko ot but Parao di iko waco ne be, Rwot Rubanga me Iburanian owaco be, ‘Wek jo na yai kioti, tetekeny kiko wora.

¹⁴Pien nataman ango abino cwano can alit kalamo i komi kede i kom jotic ni kede i kom jo ni, tetekeny in iko bino ngeno be likame tie ngatamoro acal bala ango i wi lobo lung.

¹⁵Pien ka koto oudo ango akelo aumpuli i komi kede i kom jo ni, koto nan likame tie dano moro kodong kuo i wi lobo.

¹⁶Ango aweki ibedo kuo pi nyuto ni twer na kede pi mino nyinga bed iruo i wi lobo lung.

¹⁷Do in pwodi itie wakere ne jo na idagi weko gi kiyai.

¹⁸Diki i esawa noni ango abino mino akako me aura cwei kanoni, kame epone mere lem pwodi likame otimere Misiri cako i ageini mere.

¹⁹Nan do cwai kop dwok leini ni kede jame ace apat dedede atie obar tetekeny kiud kagwok; jo kede leini dedede kame tie obar abongo kagwok bino totoun kame akako ocwei i kom gi.’ “

²⁰Mogo kikom jotic ka Parao kame oudo oko bedo kede lwooro i kom kop kame Rwot owaco oko susunyo tero ipaso i kede leini gi kagwok.

²¹Jo ace apat kalikame oketo tam gi i kom ikwenyar kame Rwot omio oko weko ipaso i kede leini gi obar.

²²Di Rwot oko waco ne Musa be, “Riei badi malo tetekeny akako cwei i lobo me Misiri lung, i kom jo kede leini kede yen dedede me obar kame tie Misiri.”

²³Musa oko tingo ebela mere malo, di Rwot oko cwano akako kede kot kame meny di mwoc. Rwot ocwao



- ²⁴ kot agwai me akako kame meny di mwoc. Oudo ebedo kot kede yamo arac kalikame lem pwodi ocwei Misiri cako i ageini mere.
- ²⁵ Akako oko jwato tuno rereto gi dedede kame oudo tie obar i lobo me Misiri lung, jo karacel kede leini; enyoto cam kame tie i poti di eko tuturo yen me obar.
- ²⁶ Adul me Gosen, kakame jo me Isirael oudo tie iye en oko bwot.
- ²⁷ Parao oko lwongo Musa kede Aaron di eko waco negi be, “Ayei be ango adubo i manoni, Rwot li kede kop moro, do ango kede jo na en kame otie kede raco.
- ²⁸ Legunu but Rwot! Akako otieko cwei ne wa cwei akalamo! Ango abino mino wu iyaunu; likame doko ipoorenu meede bedo kan.”
- ²⁹ Musa oko waco ne be, “Cucuto di ango awok ooko me bomba, abino rienu cinga di ako lego but Rwot di kot ko bino cok, di akako da ko jiko cwei, tetekeny in ingei be wi lobo obedo me ka Rwot.
- ³⁰ Do ango angeo be in kede jotic ni likame pwodi itienu kede lwooro but Rwot Rubanga.”
- ³¹ I kare nono akako oko dudubo pulak kede mawele, pien mawele oudo ocek i poti kede pulak da oudo tie tuuro.
- ³² Do likame tie egere moro me engano kame oko dubere pien gin kibedo i poti likame kisunyo cek.
- ³³ Aso, Musa oko yai kibus Parao eko donyo ooko me bomba di eko tingo cinge lego but Rwot, di kot amwocumwocun kede akako oko cok.
- ³⁴ Do kakame Parao oneno kede be kot amwocumwocun kede akako otieko cok, en doko eko medo timo dub. En kede jotic mege kiko meede bedo joepali.
- ³⁵ Aso, Parao oko timo epali, eko dagi ne jo me Isirael yai, bala kame oudo Rwot otieko waco ne Musa.

Yai 10

Can me Kanyauni: Obonyo

- ¹ Di Rwot oko waco ne Musa be, “Ot but Parao. Ango atieko mine ebedo ngaepali, en karacel kede jotic mege, me wek ango atim giaura i diere gi,
- ² tetekeny itwerunu bino waco ne idwe kede ikwae wu epone kame ango amio kede jo me Misiri odoko kede gituko na, kede giaura kame ango atimo i diere gi. Manono bino mino gi kingeo be ango en Rwot.”
- ³ Aso, Musa kede Aaron oko ot but Parao di kiko waco ne be, “Rwot, Rubanga me Iburanian owaco be, ‘Ibino tero kare arom kamene di pwodi likame iturere i nyima? Wek jo na yai, tetekeny kioti kiwora.
- ⁴ Pien ka in idagi weko jo na yai, diki ango abino cwano obonyo i lobo kame in ipugo.



- ⁵Gin kibino umo lobo pukupuk. Kibino camo gi dedede kobwot likame akako odudubo, akadi kiton yen kame tie obar da.
- ⁶Gin kibino pong i yi ude ni kede me jotic ni, kede i yi ude me jo dedede me Misiri. Manoni bino bedo gikame jonywal wu kede joakwari likame oneno cako gin bedo kuo i wi lobo.’ “Musa oko lokere di eko yai tenge kibut Parao.
- ⁷Jotic ka Parao oko penye be, “Lono bino bedo mino wan peko paka tuno awene? Wek jo me Isirael yai oti, tetekeny kioti kiwor Rwot Rubanga gi; benyo, pwodi likame iniang be lono otieko kelo peko i lobo me Misiri?”
- ⁸Oko dwoko Musa kede Aaron but Parao di Parao oko waco negi be, “Otunu iworunu Rwot Rubanga wu! Do alu kikokome en kame bino ot?”
- ⁹Musa oko waco be, “Wan dedede obino ot, joatino kede joadongo; wan obino ot kede awobe wa kede anyira wa kede leini wa, piento miero wan ooti otim ebaga me woro Rwot.”
- ¹⁰Parao oko waco negi be, “Ka ango aweko wu iotunu kede mon kede idwe wu, udo ateteni Rwot tie kede wu. Etie kakaler be wun itienu kede iik moro arac i tamu.
- ¹¹Mano likame timere! Cuo kenekene en aoti woro Rwot ka manono en gikame wun itienu mito.” En eko riamo gi tenge ki nyime.
- ¹²Rwot oko waco ne Musa be, “Riei badi di imako ebela ni i wi lobo me Misiri, me wek obonyo bin iye di kiko camo giatui dedede kame oudo obwot likame akako odudubo.”
- ¹³Aso, Musa oko rieno bade i wi lobo me Misiri di ebela mere tie i cinge, di Rwot oko mino yamo me tetu kide obuko piny yuluyul kede iwor kiakia; kakame piny oko ru kede, yamo me tetu kide nono oudo obwoto obonyo.
- ¹⁴Obonyo obino di kiko raramun kabedere dedede me Misiri; twon ekodet me obonyo kalikame pwodi lem ngatamoro oneno, doko epone mere likame bino medo nenere.
- ¹⁵Kiumo wi lobo me Misiri dedede, omio lobo oko doko col acola; gin kiko camo pote kede anyakini dedede kame akako oudo oweko, likame tie pote, yat amoto giapita moro kame oko dong i Misiri.
- ¹⁶Parao oko lwongo Musa kede Aaron awakawaka di eko waco negi be, “Atieko dubo i nyim Rwot Rubanga wu kede but wuda.
- ¹⁷Sasirunu ango kicel bobo di ikounu kwano Rwot Rubanga wu ekwany tenge alola arac noni ki buta.”
- ¹⁸Musa oko yai kibut Parao di eko ot lego but Rwot.
- ¹⁹Rwot oko mino yamo owilun buko wok ki tetu tim, di yamo nono oko kolo obonyo paka i Nam Akwar; likame tie obonyo moro akadi acel oko dong i lobo me Misiri.
- ²⁰Do Rwot oko mino Parao obedo ngaepali, di eko dagi ne jo me Isirael yai.



Can me Kanyangon: Colo

- ²¹Rwot oko waco ne Musa be, “Ting cingi malo tetekeny colo bed tie i lobo me Misiri dedede, ebed colo acucucuc.”
- ²² Musa oko tingo cinge malo di colo acucucuc oko bedo tie i lobo me Misiri pi ceng adek.
- ²³Dano oudo likame twero neno dano ngawote, di likame tie ngatamoro oko twero nyiko karamoro i ceng nogo; do jo dedede me Isirael oudo tie kede lero kakame kibedo iye.
- ²⁴Parao oko lwongo Musa di eko waco ne be, “Otunu iworunu Rwot. Otunu akadi kede mon kede idwe wu da; do romini, diegi kede dok wu miero dong kan.”
- ²⁵Do Musa oko waco be, “Miero imi wada leini kame wan obino ot mino kede wango bala giayala awanga but Rwot Rubanga wa.
- ²⁶Wan miero oter leini wa, likame tie acel moro kame bino dong, pien miero wan oyer mogo abeco kikom gi kame obino tic kede me woro Rwot Rubanga wa. Doko da likame wan otwero ngeno leini mege en kame wan obino tic kede gi me woro Rwot Rubanga wa kwanyo di wan otieko tuno kunono.”
- ²⁷Rwot oko mino Parao obedo ngaepali, omio likame oudo etie yei ne jo me Isirael yai.
- ²⁸Parao oko waco ne Musa be, “Irwa tenge ki nyima! Kur iyei na neni doko i wanga, pien i ceng kame ango abino neni doko kede i wanga, ibino to.”
- ²⁹Musa oko dwoko be, “Iyamo kakare! Likame ango bobo abino neno wangi.”

Yai 11

Musa Okwenyaro pi To me Idwe Kao

- ¹Di Rwot oko waco ne Musa be, “Ango abino doko medo kelo can acel i kom Parao kede jo me Misiri; ingei manoni en ebino yei ne wu yai, ateteni en ebino riamo wun dedede yai ki kan.
- ²Nan wac ne jo me Isirael be icuo kede dako acelacel poore penyo ngakio mere pi mine jamini me wel kame kocweo kede saabu kede siliba.”
- ³Rwot oko mino cuny jo me Misiri obedo yom i kom jo me Isirael. Doko Musa oudo obedo dano apire tek me awora i nyim jotic adongo ka Parao kede i nyim jo me Misiri.
- ⁴Musa oko waco ne Parao be, “Rwot owaco be, ‘Tetu esawa me i dier iwor, ango abino bebeo i lobo me Misiri.
- ⁵Idwe awobe kao dedede kame tie i lobo me Misiri bino to, cako kibun awobi kao ka Parao, ngat kame poore lunyo kom mere me ajakanut, tuno kede but awobi kao ka apasoit kame tic mere en riego alos kede kidi. Idwe kao me leini me paco da bino to.



⁶Di koko atek ko bino bedo i lobo me Misiri dedede, kalikame lem pwodi otimere, doko likame ebino medo timere.

⁷Do akadi ogwok agwoka moro da likame bino gweo ne jo me Isirael arabo ne leini gi. Manono bino mini ingeo be, ango Rwot atieko nyuto apokapoka atie i dierediere me jo me Misiri kede jo me Isirael.’ “

⁸Musa oko jiko di ewaco be, “Jotic ni dedede bino bino buta di kiko riebere i nyima di kiwaco be, ‘Okwe, yai kede jo ni iwekunu wa.’ Ingei manono ango abino yai.” Musa oko yai kibut Parao di etie kede twon gero.

⁹Rwot oko waco ne Musa be, “Parao likame bino yei winyo kop nin, me wek ango ameede timo giaura ace Misiri.”

¹⁰Musa kede Aaron otimo giaura nogi i nyim Parao, do Rwot omio Parao obedo ngaepali di likame eko yei ne jo me Isirael yai weko lobo mere.

Yai 12

Ebaga me Kalamo

¹ Rwot oko waco ne Musa kede Aaron i lobo me Misiri be,

²” Duwe noni poore bedo ne wu duwe me agege me mwaka.

³Wacenu jo dedede me Isirael be, i ceng me tomon me duwe noni, won paco acelacel bino kwanyo atin romo pi jo me ode.

⁴Ka jo me ot moroni nonok likame kisobolo camo atin romo paka tieko, gin kipoore ribere kede ngakio gi di kiko ribo oromo acel, di oko popoko en di lubere kede wel me jo kame poore camo oromo nono.

⁵Jo twero kwanyo oromo amoto diel icuo, do miero di etie kede mwaka acel, doko di eli kede peko moro i kome.

⁶Ipoorenu gwoko gi paka i ceng me tomon kiwie ongwon me duwe noni, di do otieno me ceng nono di piny amumusit, jo dedede me Isirael ko bino neko gi.

⁷Jo poore suto remo i kom ipirin me ikekon kede i malo i wi ikekon me ude kame kocamo iye leini nogo.

⁸Gin kipoore camo ringo nogo iwor nono; kipoore bulo gi abula di kiko camo gi kede mugati kame arup li iye, karacel kede yen mogo apote gi kec.

⁹Kur icamunu ringo moro anumu amoto kame kocwako acwaka kede pii, do camunu ringo kame kobulo abula, ribo kiton wi gi kede tien gi kede jamini me yi gi da.

¹⁰Kur iwekunu ringo moro dong paka odiko; ka ringo moro odong paka odiko miero iwangenu awanga.

¹¹Ibinunu cam awakawaka di ngat acelacel otieko ngapere engape me yai, kede amuka mere i tiene kede di ebela mere tie i cinge cuto. Manono bino bedo Ebaga me Kalamo kame tie pi wora, ango Rwot.



12” Iwor nono ango abino bebeo i lobo me Misiri, di ako neneko idwe kao me jo kede me leini dedede, doko da abino tidilo rubangan me Misiri; ango en Rwot.

13Remo kame tie i kor ipirin me ikekon bino bedo gianena kame nyuto ude kame wun ibedunu iye. Kame ango aneno remo, abino kalamo ude wu di likame tie can moro kame ko bino potone wu i esawa kame ango abino mino kede jo me Misiri alola.

14 Miero wun idonyunu timo ebaga amako ceng noni pi yutuno gikame ango Rwot atimo. Timunu ebaga mere i kare dedede me anyim.”

Ebaga me Mugati kame Kotimo abongo Arup

15Rwot oko waco be, “Ibinunu camo mugati kame kotimo abongo arup pi ceng kanyaare; i ceng me agege ibinunu kwanyo tenge arup ki ude wu, pien ngat kame bino camo mugati kame kotimo kede arup cako i ceng me agege tuno i ceng me kanyaare, kobino riame tenge kikut jo me Isirael.

16I ceng me agege kede i ceng me kanyaare ibinunu riamakin karacel pi wora. Likame tie tic moro kame ipoorenu timo i ceng nogi, kwanyo kenekene iiko ne jo cam kame kipoore camo.

17Ipoorenu yutuno timo ebaga me mugati kame li kede arup, pien i ceng noni ango bin awoto ikodeta wu ki lobo me Misiri. Miero itimunu ebaga me yutuno ceng noni i kare dedede me anyim.

18I duwe me agege, cako otieno me ceng me tomon kiwie ongwon tuno otieno me ceng me ot are kiwie acel, ibinunu camo mugati kame arup li iye.

19Likame arup poore bedo tie i ude wu pi ceng kanyaare; pien ngat kame bino camo mugati kame arup tie iye, kobino riame tenge kikut jo me Isirael, bed bala en ebodo anywali me Isirael arabo ngakumbor.

20Likame ibinunu camo gimoro kame arup tie iye; i kabedo dedede kame wun ibinunu bedo iye ibinunu camo mugati kame arup li iye.”

Ebaga me Kalamo me Agege

21Musa oko lwongo jotel dedede me Isirael di eko waco negi be, “Otunu di ngat acelacel ko yero oromo amoto diel apwodi titidi di eko neko, di jo me miere wu ko tedo Ebaga me Kalamo.

22Jakunu emompir, di ikounu rwake i remo kame tie i awalo, di ikounu kikiro remo nono i kom ipirin me ikekon kede i wi ikekon malo. Likame ngatamoro poore wok ooko tuno piny ru.

23 Pien Rwot oyaro bebeo neneko jo me Misiri, do ka en eneno remo i kor ipirin me ekeko kede i wi ekeko malo, en ebino kalamo ekeko nono di likame eko yei ne Malaika me To donyo i ot nono pi timo nek.

24Miero wun kede idwe wu ilubunu kwere noni nakanaka bala iswil kame kotieko moko.



²⁵Ka itununu i lobo kame Rwot bino mino wu, bala kame en etieko cikere pi timo, miero ilubunu kwer noni.

²⁶Kame idwe wu oko penyo wu be, ‘Dwong me kwer noni en nyo?’

²⁷wun ibinunu dwoko negi be, ‘Man obedo giayala me Kalamo kame komio me woro Rwot, piento en ekalamo ude me jo me Isirael i Misiri; en eneko jo me Misiri do eko kalamo ude wa likame eneko wa.’ “ Jo me Isirael oko luro wi gi piny di kiko woro Rubanga.

²⁸Di do gin kiko yai kioto timo gikame Rwot owaco ne Musa kede Aaron.

To me Idwe Kao

²⁹ I dier iwor me ceng nono Rwot oko neko idwe kao dedede i Misiri, cako kibun awobi kao ka Parao tuno kede but awobi kao me lo kame oudo kotweo i otkol, kede idwe kao me leini dedede.

³⁰Parao oko cei i dier iwor, en karacel kede jotie mege adongo karacel kede jo dedede me Misiri; koko atek oko poto i lobo me Misiri lung, pien oudo likame tie paco moro kame to likame opoto iye.

³¹Iwor nono Parao oko lwongo Musa kede Aaron di eko waco negi be, “Yaunu tenge iwekunu jo na, wun karacel kede jo dedede me Isirael! Otunu iworunu Rwot bala kame oudo iwacunu.

³²Kwanyunu romini, diegi kede doke wu bala kame oudo iwacunu, di ikounu yai. Do kwaunu ne ada winyo.”

³³Jo me Misiri oko donyo bunyo jo me Isirael pi yai weko lobo gi, pien kiwaco be, “Ka likame iyaunu, wan dedede obino to.”

³⁴Aso, jo me Isirael oko kwanyo alos kame konyongo me timo mugati abongo keto iye arup, di kiko keto gi i bakulin me nyongo alos, kiko twetweo gi kede igoen di kiko riongo gi i epepet gi.

³⁵ Jo me Isirael oudo otimo gikame Musa owaco negi, gin oudo kipenyo jo me Misiri pi mino gi jamini me wel kame kocweo kede siliba kede saabu, kede igoen da.

³⁶Rwot oko mino jo me Misiri cuny gi obedo yom i kom jo me Isirael, di kiko mino jo me Isirael gikame kipenyo. Manono oko mino jo me Isirael otero abar me jo me Misiri.

Jo me Isirael Oyai ki Misiri

³⁷Jo me Isirael oko cako yai ki Rameses ot Sukot kede tien gi. Oudo kitie cuo aromo bala tutumia tol kanyape, di likame komaro iye mon kede idwe.

³⁸Ekodet me jo ace da me atekerin apat da oko upere kede gi, karacel kede romini, diegi kede dok atot.



³⁹Gin kiko tedo mugati kame arup li iye kede alos kame konyongo kame kikelo ki Misiri, pien i esawa kame koriamo gi kede ki Misiri, likame gin kiko udo esawa me nyongo alos me mugati kede arup, arabo esawa me iiko gimoro me acama i yongayo.

⁴⁰Jo me Isirael oudo obedo Misiri pi mwakini tol ongwon kede ot adek (430).

⁴¹I ceng me ajikini me mwakini tol ongwon kede ot adek, ikodeta me jo ka Rwot oko yai ki Misiri.

⁴²Manono en iwor kame Rwot omio wange obedo bit kede pi kwanyo jo me Isirael ki Misiri. Doko da buli mwaka acelacel jo me Isirael poore mino wang gi bed bit iwor nono pi nyuto wor but Rwot.

Iswilia Amako Ebaga me Kalamo

⁴³Rwot oko waco ne Musa kede Aaron be, “Magi en iswilia amako Ebaga me Kalamo: likame ngakumbor moro poore camo ebaga noni,

⁴⁴do epasoit kame kotieko wilo twero came ingei kepe;

⁴⁵likame welo moro arabo epakasit poore came.

⁴⁶Kopoore camo cam me ebaga dedede i ot kame kotede iye, likame kopooore tero ringo moro ooko, doko da likame ngatamoro poore turo cogo moro.

⁴⁷Jo dedede me Isirael poore camo ebaga noni.

⁴⁸Ka ngakumbor moro kame bedo kede wu mito camo Ebaga me Kalamo pi nyuto wor but Rwot, poore kep cuo dedede kame tie ture, di do oko tere bala anywali me Isirael, en kame mio en eko camo Ebaga me Kalamo.

⁴⁹Iswilia nogi ribo anywali me Isirael kiton jokumbor kame bedo i diere wu da.”

⁵⁰Jo me Isirael oko lubo kope dedede kame Rwot owaco ne Musa kede Aaron.

⁵¹I ceng nono Rwot oko kwanyo jo me Isirael ki Misiri ikodeta kede ikodeta di lubere kede ikekon gi.

Yai 13

Mino Rwot Idwe Kao

¹Rwot oko waco ne Musa be,

²“Mi idwe kao acuo dedede buta; idwe kao dedede me jo me Isirael, kede idwe kao dedede me leini bino bedo mega.”

Ebaga me Mugati kame Kotimo abongo Arup

³Musa oko waco ne jo be, “Poore iyutununu ceng noni kame iyaunu kede ki Misiri, kakame oudo itienu ipasoi iye. Ceng noni en kame Rwot oudo owoto wu kede ki kunono kede teko mere; likame kopooore camo mugati kame arup tie iye i ceng noni.

⁴I ceng me tin, i duwe me agege, en duwe me Abib, wun itienu yai ki Misiri.



⁵Rwot bin ocikere pi mino joakwari wu lobo kame tie iye jo Kanan, jo Kiti, jo Amor, jo Kibi, kede jo Yebu. Kame en etero wu di eko mino wu lobo amio nono, miero itimunu ebaga noni i duwe me agege me mwaka acelacel.

⁶Pi ceng kanyaare ibinunu camo mugati kame arup li iye, di i ceng me kanyaare mere ikounu camo ebaga me nyuto wor but Rwot.

⁷Ibinunu camo mugati kame kotimo abongo arup pi ceng kanyaare; likame arup amoto mugati kame kotimo kede arup poore bedo tie kabedo moroni kame wun itienu iye.

⁸I ceng nono, ibinunu waco ne idwe wu be, ‘Ango atie timo man pi gikame Rwot otimo na kakame awok kede ki lobo me Misiri.’

⁹Bala gikame dano ngapo i ngut cinge arabo i tur nyime, ebaga noni bino bedo ne wu gikame poo wi wu i kom gikame Rwot otimo ne wu kakame iwokunu kede ki lobo me Misiri, tetekeny pwony ka Rwot bed tie i dogu nakanaka, pien Rwot owoto wu ki Misiri kede teko mere.

¹⁰Ipoorenu camo ebaga noni i kare mere kopoore buli mwaka.

Idwe Kao

¹¹” Kame Rwot otieko tero wu paka i lobo me jo Kanan, kame en oudo ekwongere pi mino wu kede joakwari wu, ka etieko mino wu lobo nono,

¹² ngat acelacel bino kwanyo atin awobi kao emio Rwot. Idwe kao acuo dedede me leini wu da bino bedo me ka Rwot.

¹³Do ibinunu kwanyo atin romo pi lako kibute atin kao me punda; do ka likame dano mito lake, epoore turo ngute. Doko da ibinunu lako idwe awobe kao wu.

¹⁴Ka i kare me anyim atin ni openyi dwong me itok noni, in ibino waco ne be, ‘Rwot bin owoto wan ki lobo me Misiri kede teko mere, kuno kakame wan oudo otie iye ipasoi.

¹⁵Kakame Parao otimo kede epali di eko dagi weko wan yai, Rwot oko neko idwe kao dedede i lobo me Misiri, idwe me jo karacel kede me leini. Manono en komio wan oyalo ne Rwot idwe kao me leini wa, do idwe wa kao awobe wan olako kibute.

¹⁶Itok noni tie gikame poo wi wa, bala gikame ongapo i ngut cing wa arabo i tur nyim wa; epoo wi wa be Rwot owoto wa ki Misiri kede teko mere.’ “

Edou kede Mac Kosipere bala Epir

¹⁷Kakame Parao oyei ne kede jo me Isirael yai ki Misiri, Rubanga likame oko tero gi di kilubo yongayo abeo i dog nam ot Pilistia, bed bala manono oudo obedo yongayo acecek. Pien Rubanga oudo otamo be, “Ka yi moro opoto, cengemogo jo bino loko tam gi di kiko dok Misiri.”

¹⁸Aso, Rubanga oko telo jo kilubo yongayo kame beo i wi tim di eko manaro dok tetu Nam Akwar. Jo me Isirael oko yai ki Misiri di kitieko iikere pi yi.



¹⁹ Musa oko kwanyo cogere ka Yosepu etero, pien Yosepu oudo bin omio jo me Isirael okwongere timo kamanono. En oudo ewaco be, “Kame Rubanga olako wu, miero itingunu cogere na ki kan iotunu kede.”

²⁰ Jo me Isirael oko yai ki Sukot di kiko ot gero kimere gi Etam i acakini me wi tim.

²¹ Rwot oudo telo negi yongayo i ceng di etie i epir me edou, do iwor oudo etelo negi yongayo di etie i epir me mac, tetekeny kibed ot iwor kede i ceng.

²² Edou kosipere iceng kede mac kosipere iwor oudo tie i nyim jo nakanaka pi telo gi.

Yai 14

Ngolo Nam Akwar

¹ Rwot oko waco ne Musa be,

² ” Wace jo me Isirael lokere cen di kiko gero kimere gi i nyim bomba me Pikakiro, i dierediere me Migidol kede nam, i nget Baal Sepon.

³ Parao bino tamo be jo me Isirael tie wire awira atatai pien wi tim ocego gi kabeo li negi.

⁴ Abino mine ebedo ngaepali di eko cako wapo wu, tetekeny ango ako bino bwono Parao kede isirikalen mege di ako bino udo dwongo. Manono bino mino jo me Misiri ngego be ango abedo Rwot.” Jo me Isirael oko timo gikame kowaco negi.

⁵ Kakame kowaco ne kede Parao be jo me Isirael oudo otieko yai obwot, en karacel kede jotie mege adongo kiko loko tam kame oudo kitie kede i kom jo me Isirael di kiko waco be, “Nan do otiekunu timo nyo? Kom otiekunu weko jo me Isirael obwot di nan okounu dong abongo ipaso!”

⁶ Abaka oko iiko cabala mere me yi di eko tero isirikalen mege.

⁷ En eko tero cabalan tol kanyape kame koyero ayera, kede cabalan apat dedede me Misiri, di jodongo me isirikalen telo gi.

⁸ Rwot oko mino Parao, en abaka me Misiri, obedo ngaepali di eko cako wapo jo me Isirael, jo kame oudo oyai tie girgi ot abongo lworu. ⁹ Jo me Misiri oko donyo wapo gi, asigiran kede cabalan ka Parao dedede, kede jo kame ringo kede cabalan kede isirikalen mege. Gin kiko mako gi kakame oudo kigero iye kimere i dog nam, i nget Pikakiro, i nyim Baal Sepon.

¹⁰ Kakame jo me Isirael oneno kede di Parao kede jo mege me Misiri tie bino noko gi, lworu oko mako gi di kiko kok but Rwot.

¹¹ Gin kiko waco ne Musa be, “Benyo, iparo be atesin oudo li i Misiri en komio ikelo wa to i wi tim kan? Nyo kame nan in itimo ne wa, kom kwanyo wan ki Misiri?”

¹² Mam oudo wan owaco ni kop noni i Misiri be, ‘In wek wan otasuno i cing jo me Misiri’ ? Pien oudo koto ebedo ber ne wan tic ne jo me Misiri akaka wan bino to i wi tim kan.”



- 13**Musa oko dwoko ne jo be, “Kur ibedunu kede lworu, cungunu di itekunu, di ikounu bino neno epone kame Rwot bino lako wu kede tin; pien likame bobo ibinunu medo neno jo me Misiri kame wun tin itienuneno go.
- 14**Rwot bino yi piru, kenekene wun kweunu komu.”
- 15**Rwot oko waco ne Musa be, “Pinyo komio in itie kwano kony ki but ango? Wace jo me Isirael meede ot anyim.
- 16**Do in ting ebela ni malo di iko rienu badi i wi nam; pii bino pokere ki diere di jo me Isirael ko ngolo nam di kibeo i kakatek.
- 17**Ango abino mino jo me Misiri bedo joepali di kiko donyo i yi nam lubo jo me Isirael, di ango ako bino udo dwongo pi bwono Parao kede isirikalen mege, cabalan kede jo kame ringo kede cabalan mege.
- 18**Kame ango abwono gi, jo me Misiri ko bino ngenobe ango en Rwot.”
- 19**Malaika ka Rwot koudo tie telo ne isirikalen me Isirael yongayo oko dok cen ngeigi; edou kosipere kame oudo tie i nyim gi da oko dok cen,
- 20**i dierediere me jo me Misiri kede jo me Isirael. Edou nono oko kelo colo but jo me Misiri do eko mino lero but jo me Isirael. Iwor nono kiakia isirikalen me Misiri kede me Isirael likame oko nokere.
- 21**Musa oko tingo bade malo i wi pii. Rwot oko mino yamo atek kowok ki tetu kide obuko iwor kiakia, di eko jwango pii opokere i diere, di dier nam oko dong kakatek.
- 22**Jo me Isirael oko ngolo nam di kibeo i kakotuo, di apama me pii kojwangere tie i bad gi tetuni kede tetuca.
- 23**Jo me Misiri da oko donyo i dier nam tuparo gi, asigiran ka Parao dedede, cabalan kede jo kame ringo kede gi.
- 24**Tetu esawa me obai, Rwot oko uco wange piny i kom isirikalen me Misiri ki mac kede ki edou kosipere kame oudo en etie iye, di eko mino isirikalen me Misiri kom gi omiel kitek.
- 25**En eko mino tien cabalan gi omomoko di do kiko donyo wire momot pien oudo kinwang. Jo me Misiri oko waco be, “Oringunu tenge kibut jo me Isirael, pien Rwot tie yi kede wa pirgi!”
- 26**Rwot oko waco ne Musa be, “Ting badi tenge ki wi nam, di pii ko bino dwogo i kom jo me Misiri, kede i kom cabalan kede jo kame ringo kede gi.”
- 27**Aso, Musa oko tingo cinge tenge ki wi nam, di do odiko kakame piny oru kede, pii oko dwogo kakare. Jo me Misiri oko tamakino be koto bwot, do Rwot oko ucouco gi i nam.
- 28**Pii odwogo di eko mwonyo cabalan kede jo kame ringo kede gi, kede isirikalen dedede me Misiri kolubo jo me Isirael i yi nam, likame akadi acel kikom gi oko dong.



²⁹Do jo me Isirael oko ngolo nam di kibeo i kakotuo, di pii otimo apama i bad gi tetu cam kede tetu ngodal.

³⁰Manoni en epone kame riki Rwot olako kede jo me Isirael ki cing jo me Misiri, di jo me Isirael oko neno liele me jo me Misiri di buto i dog nam kakame pii ojwango gi iye.

³¹Jo me Isirael oko neno twon teko kame Rwot obwono kede jo me Misiri. Manono oko mino jo obedo kede lworu but Rwot, di kiko yei en karacel kede ngatic mere Musa.

Yai 15

Wer ka Musa

¹Di do Musa kede jo me Isirael oko wero ne Rwot wer ni be: “Abino wer ne Rwot, piento en etieko udo dwongo pi bwono jokwor mege; eonyo asigiran kede jo kame ringo kede gi i yi nam.

²Rwot mia teko kede twer; en kame elaka. En Rubanga na, abino pako nyinge; en Rubanga ka papa na, abino mine dwongo.

³Rwot obedo ngayi; nyinge obedo Rwot.

⁴” En eonyo cabalan ka Parao kede isirikalen mege i yi nam; elwinyo isirikalen mege kame kouro i yi Nam Akwar.

⁵Pii atat oumo gi; gin kilwiny i dud nam bala engaro.

⁶Cingi tetu cam, Okwe Rwot, tek adikinicel; cingi tetu cam onyinyito jokwor.

⁷In itieko udo twon dwongo pi bwono jokwor ni; in ijalakino gero ni oko wango gi bala yugi me arienge.

⁸Wei kame wok ki umi okuto pii oko cokere karacel; pii oko bedo ikumemei bala atukit; pii atat kame tie i dier nam oko cungo ineno bala erumakin.

⁹Jokwor owaco be, ‘Obino wapo gi di oko mako gi, obino popoko gikame oyako kibut gi bala kame cuny wa mito. Obino kwanyo ipimai wa di oko neneko gi.’

¹⁰Do wei nin oko kuto nam, di nam oko umo gi; gin kiko lwiny bala kidi apek i twon pii.

¹¹” Okwe Rwot, rubanga mene en acal bala in? Ngai kame cal bala in, ngat kacil me aura, ngat kame kolworo, kame timo giaura?

¹²In irieo badi tetu cam, di lobo oko mwonyo jokwor wa.

¹³Pi amara ni kalikame lokere, in iko telo jo ni kame ilako; in iko telo gi di igwoko gi kede teko ni tuno i kabedo ni kacil.

¹⁴Atekerin apat owinyo kop noni di kom gi oko donyo miel; lworu oko bwono jo me Pilistia.



¹⁵Lworo atek omako ijakai me Edom; jotel me Moab kom gi oko donyo miel amiela; jo dedede me Kanan kom gi oko to.

¹⁶Lworo kede inyonyong omako gi. Gin kineno teko ni, Okwe Rwot, di kiko cungo abongo yangere bala kidi naka tuno di jo nin dedede otieko kato, gin jo kame in igonyo ki bedo ipasoi.

¹⁷In itero gi di iko cibo gi i wi moru nin bala yat kame kopito, en kakame in imio odoko kabedo ni, tempulo kame in kikomi en igero.

¹⁸Rwot bino bedo pug ikar kede ikar.”

Wer ka Miriamu

¹⁹Jo me Isirael oko ngolo nam di kibeo i kakatek. Do kakame asigiran ka Parao kede cabalan mege kede jo kame ringo kede gi odonyo kede i yi nam, Rwot oko dwoko pii me nam omwonyo gi.

²⁰Anabi Miriamu, amin me Aaron oko mako ayekeyeke i cinge, di mon dedede ace da oko mako ayekeyeke i cing gi, di kiko donyo lube di kimielo.

²¹Miriamu oko cako negi wer be, “Werunu but Rwot, piento en etieko udo dwongo pi bwono yi; eonyo asigiran kede jo kame ringo kede gi i yi nam.”

Pii Akec

²²Musa oko mino jo oyai ki Nam Akwar di eko telo gi ot i wi tim me Sur. Gin kiko ot sapali me ceng adek i wi tim abongo udo pii.

²³Di do kiko tuno kakame kolwongo be Mara, do likame kiko sobolo mato pii me kanono pien oudo ekec. Manono en komio oudo kolwongo kanono be Mara. ²⁴Di jo oko bedo kede ingungur but Musa di kiwaco be, “Wan obino mato nyo?”

²⁵Musa oko kok but Rwot di Rwot oko nyuto ne yat moro, en eko uco yat nono i yi pii, di pii oko doko ber me amata. Rwot oko mino gi iswilia, di en eko tamo gi ki kuno.

²⁶En ewaco negi be, “Ka ibinunu winyo dwana, ango Rwot Rubanga wu, di ikounu timo gi kopoore i nyima, di ikounu lubo cik na kede iswilia na, likame abino mino tuwo moro mako wu bala tuwo kame oudo amio omako jo me Misiri. Ango en Rwot, ngat kame cango wu.”

²⁷Di do kiko tuno Elim, kakame oudo tie iye ataneko tomon kiwie are kede tugere ot kanyaare; gin kiko gero kimere gi kuno i nget pii.

Yai 16

Emana kede Aluru

¹Jo dedede me Isirael oko yai ki Elim; di do i ceng me tomon kiwie kany me duwe me are ingei yai ki Misiri, gin di kiko tuno i wi tim kame kolwongo be Sin, kame tie i dierediere me Elim kede Sinai.



- ²Jo dedede me Isirael oko bedo kede ingungur but Musa kede Aaron i wi tim
- ³di kiwaco negi be, “Oudo koto eber ka Rwot oudo oneko wa i lobo me Misiri. Pien ki kuno wan oudo girwa obedo piny di ringo twak i agune, doko dano oudo camo kwon paka rome. Do wun nan ikelunu wa i wi tim kan pi mino wa to kec.”
- ⁴Rwot oko waco ne Musa be, “Ango abino mino mugati cwei ne wu ki malo; ceng acelacel jo bino koko mugati kame kibino camo ceng nono paka tiek. Iepone nono ango abino tamo gi ka kibino lubo cik na amoto li.
- ⁵I ceng me kanyape mere, gin kibino koko emana di kiko tedo cam, kipoore koko emana kame tot tien are kalamo emana kame oudo kibedo koko i ceng apat.”
- ⁶Aso, Musa kede Aaron oko waco ne jo dedede me Isirael be, “Otieno me tin ibinunu ngeno be Rwot en kowoto wu ki lobo me Misiri.
- ⁷Diki odiko ibinunu neno deyo ka Rwot, piento en etieko winyo ingungur wu i kome. Kara wan obedo alu en kamio ibedunu kede ingungur i kom wa?”
- ⁸Musa oko waco be, “Rwot en kame bino mino wu ringo me acama otieno kede mugati kame romo wu odiko, piento en etieko winyo ingungur kame itienu kede i kome. Pien kame wun itienu kede ingungur moro i kom wan, udo itienu kede ingungur i kom Rwot.”
- ⁹Musa oko waco ne Aaron be, “Wace jo dedede me Isirael kibin kicungi i nyim Rwot, piento en etieko winyo ingungur gi.”
- ¹⁰Kakame Aaron ocoko kede jo dedede me Isirael di etie yamo kede gi, gin kiko neno bad me wi tim di kiko neno rieny me deyo ka Rwot di tie i edou.
- ¹¹Rwot oko waco ne Musa be,
- ¹²” Ango atieko winyo ingungur me jo me Isirael. Wace gi be otieno di ceng tie donyo kibino bedo tie kede ringo me acama, di kiko bedo tie kede mugati kame romo gi odiko. Di gin kiko bino ngeno be, ango en Rwot Rubanga gi.”
- ¹³Otieno di piny oyuto, aluru oko bwote di kiko umo kakame oudo gin kigero iye kimere gi; odiko di piny oru toyo oko mwono kanono.
- ¹⁴Do esawa kame toyo otieko tengere kede, gimoro ayoyom oko dong i wi lobo kanono, aperepere di etitino.
- ¹⁵ Kakame jo me Isirael oneno kede gi nono, gin kiko donyo penyere ken gi ken gi be, “Nyo inononi?” Pien likame oudo gin kingeo be nyo inonono. Musa oko waco negi be, “Mano en mugati kame Rwot omio wu me acama.
- ¹⁶Rwot ociko be ngat acelacel poore koko atot bala kame mitere ne; epoore koko awale are me emana ne buli dano di lubere kede wel me jo kame etie kede i ode.”
- ¹⁷Jo me Isirael oko timo kamanono, jo mogo oko koko akalamo, do jo mogo oko koko kalikame romo.



- 18** Do kakame kipimo gi kede awalo, jo kame oudo ocoko akalamo oudo likame tie kede gimoro akalamo, doko da jo koudo ocoko kalikame romo oudo li kede rem moro.
- 19** Musa oko waco negi be, “Kur ngatamoro wek moro dong tuno diki odiko.”
- 20** Do likame gin kiko yei winyo kop ka Musa, di jo mogo oko weko mogo odong paka odiko. Kakame piny oru kede magonogo oudo otieko top di kudiling odonyo iye. Musa oko doko ger negi.
- 21** Gin oudo kiko donyo coko gikame mitere negi buli odiko acelacel; do ka ceng oudo odoko kec, kodong i wi lobo oudo calar.
- 22** I ceng me kanyape oudo gin kicoko cam amako ceng are; awale ongwon pi dano acelacel. Jotel kame oudo tie me ekodet oko ot waco ne Musa kop nono,
- 23** do Musa oko dwoko negi be, “Rwot ociko be diki obedo ceng adwong kame jo wei iye, en ceng Sabato kacil ka Rwot. Bulunu gikame imitunu bulo, doko da tedunu gikame imitunu tedo, di ikounu kano gi dedede kodong tuno diki odiko.”
- 24** Aso, gin kiko kano gikame odong tuno odiko, bala kame Musa oudo owaco negi; di likame kudiling oko donyo iye amoto gin top.
- 25** Musa oko waco negi be, “Camunu manoni tin, pien tin obedo ceng Sabato, en ceng kame kojalo ne Rwot kame jo wei iye, tin likame ibinunu udo giacama moro kame ibinunu depo.
- 26** Wun ibinunu depo cam pi ceng kanyape, do i ceng me kanyaare mere, en ceng Sabato, likame cam moro bino bedo tie me adepa.”
- 27** I ceng me kanyaare, jo mogo oko ot be koto ot depo, do likame kiko udo gimoro.
- 28** Rwot oko waco ne Musa be, “Ibinunu dagi winyo cik na kede kop na tuno awene?”
- 29** Nenunu, ango Rwot atieko mino wu ceng Sabato me wei, pi manono, i ceng me kanyape ango abino donyo mino wu cam amako ceng are. Ngat acelacel poore dong bedo kakame etie iye i ceng me kanyaare, likame epoore yai ot tenge.”
- 30** Aso, jo oko donyo wei i ceng me kanyaare.
- 31** Jo me Isirael oko lwongo cam nono be emana; oudo ecal bala nyige atitino di tar, di ebilere emit bala kotime kede mokic.
- 32** Musa oko waco be, “Rwot owaco be, ‘Poore ikanunu awalo me emana moro ne ikwae wu me kare dedede, tetekeny gida kikaruno bino neno cam kame ango apito wu kede i wi tim, kakame akwanyo wu kede ki lobo me Misiri.’ “
- 33** Musa oko waco ne Aaron be, “Kwany gulu iko piko iye awale are me emana di iko cibe i nyim Rwot, tetekeny ebed me agwoka pi ikwae wu me kare dedede.”
- 34** Bala kame Musa owaco kede, Aaron oko kete i nyim isikan, pi gwoke i kanono.



³⁵ Jo me Isirael oko meede camo emana pi mwakini ot ongwon, tuno i kare kame kituno kede i lobo me Kanan, kakame kiko bedo iye.

³⁶ Gipim kame oudo kotio kede i kare nono, kame oudo kolwongo be omer, oudo tero pii me lita ot are.

Yai 17

Pii kowok ki Lela

(Wel 20.1-13)

¹ Jo dedede me Isirael oko yai ki wi tim me Sin, di kiko donyo ot di kikokobo akokob, bala kame oudo Rwot ociko negi. Gin bin kiko gero kimere gi Repidim, do pii me amata oko bwono gi i kanono.

² Jo oko donyo lok kede Musa di kiwaco ne be, “Mi wa pii me amata.” Musa oko waco negi be, “Itienu lok keda pinyo? Pinyo komio itienu tamo Rwot?”

³ Do orio oudo oneko jo twatwal omio kiko meede ngunguro but Musa di kiwaco ne be, “Pinyo komio ikwanyo wa ki Misiri di iko kelo wa kan to orio, wan karacel kede idwe wa kede leini wa?”

⁴ Musa oko kok but Rwot be, “Abino timo jogi nadi? Gin kitieko iikere pi didipo ango kede kide.”

⁵ Rwot oko waco ne Musa be, “Kwany joadongo mogo me Isirael iupere kede gi iko ot anyim me jo; mak ebela kame bin ijwato kede pii me ecilet me Nail da i teri.

⁶ Ango abino cungo i nyimi i moru me Sinai. Di in iko jwato lela di pii me amata ko bino wok kiye ne jo.” Musa oko timo kamanono i nyim joadongo me Isirael.

⁷ En eko cako nying kanono be Masa kede Meriba, pien jo me Isirael oudo ongunuro but Rwot di kitame kakame kiwaco kede be, “Benyo, Rwot tie kede wa arabo li?”

Yi kede Jo Amalek

⁸ Jo me Amalek oko ot suro jo me Isirael i Repidim.

⁹ Musa oko waco ne Yosua be, “Yer ne wa jo mogo ot yi kede jo Amalek diki. Ango abino cungo i wi moru di amako ebela ka Rubanga i cinga.”

¹⁰ Yosua oko timo bala kame Musa owaco ne di eko yi kede jo Amalek, di oudo Musa, Aaron kede Kur oyito malo i wi moru.

¹¹ Kame bad Musa oudo okiar malo, jo me Isirael oudo bwono jo Amalek; do ka oudo edwoko bade piny, jo Amalek oudo ko bwono jo me Isirael.

¹² Do bad Musa oko jony, omio gin kiko kelo ne kidi di eko bedo i wie. Aaron kede Kur oko donyo mako bade di kikiarao gi malo, ngat acel bade tetucel kede ngat ocelu da bade tetucel; manono oko mino bad Musa obedo di oriore paka tuno ceng donyo.

¹³ Manono bin oko mino Yosua obwono jo Amalek atwal atwala.



¹⁴Rwot oko waco ne Musa be, “Wandiko gikame otimere noni i itabu pi mino jo iyutun. Wac ne Yosua be ango abino wearo jo Amalek atwal atwala ki dud ceng.”

¹⁵Musa oko gero alutari di eko cako nyinge “Rwot en imendera na” .

¹⁶En ewaco be, “Cinga omako imendera ka Rwot; Rwot bino yi kede jo Amalek pi kare lung.”

Yai 18

Yesero Owelao Musa

¹Yesero, ngasaseredoti me Midian, ngat koudo obedo papa me dako ka Musa, oko winyo gi dedede kame Rubanga otimo ne Musa kede jo me Isirael, epone kame ewoto kede jo me Isirael ki Misiri.

²I kare kame Musa oudo odwoko kede Sipora dako mere turgi, Yesero oudo oko game paco,

³en karacel kede awobe mege are. Nying awobi acel oudo Geresom (pien Musa oudo owaco be, “Ango abedo ngakumbor i lobo me obukui”),

⁴kede awobi me are oudo nyinge Elieser (piento en ewaco be, “Rubanga ka papa na en okonya di eko laka likame Parao oneka”).

⁵Yesero, papa me dako ka Musa oko ot i moru kacil i wi tim, kakame Musa oudo ogero iye kimere; en etero ne Musa awobe mege kede dako mere.

⁶En oudo ecwao ne Musa kop awaco be, “Ango Yesero papa me dako ni, atie bino buti kelo ni dako ni kede awobe ni are.”

⁷Musa oko yai ot siramo ore; eluro i nyime di eko mote kede amot me notere. Ngat acelacel kibun gi oko pepenyo ngawote yot kome, di do kiko donyo i eema ka Musa.

⁸Musa oko tatamo ne Yesero gi dedede kame Rwot otimo ne Parao kede jo me Misiri pi lako jo me Isirael. Etatamo ne da peko dedede kame jo me Isirael oriamo kede i yongayo kede epone kame Rubanga oko lako gi kede.

⁹Yesero oko lelo pi bero dedede kame Rwot otimo ne jo me Isirael, iepone me lako gi ki Misiri.

¹⁰En ewaco be, “Pak bed but Rwot ngat kolako wu ki cing jo me Misiri kede ki cing Parao.

¹¹Nan ango angeo be Rwot tek kalamo rubangan dedede, piento en elako jo ki cing jo me Misiri kakame gin oudo kitie kede tim me acae i kom jo me Isirael.”

¹²Yesero oko kelo giayala awanga kede mic mogo ace pi mino Rubanga; Aaron kede joadongo me Isirael oko ot camo giayala karacel kede papa me dako ka Musa i nyim Rubanga.

Koyero Jongolkop

(Iswilia 1.9-18)



¹³Ceng alubo mere, Musa oko bedo winyo pido kede ngolo kop, di jo oko luke cako odiko tuno otieno.

¹⁴Kakame Yesero or Musa oneno kede gikame Musa tie timo ne jo, en eko penye be, “Nyo ino kame in itie timo ne jo? Pinyo komio in itimo tic no keni di jo apat tie cungo luki cako odiko tuno otieno?”

¹⁵Musa oko dwoko ne papa me dako mere be, “Pien jo bino buta pi udo niang kibut Rubanga.

¹⁶Kame gin kitie kede lok moro, gin kibino buta di ango ako ngolo kop i diere gi, di ako mino gi kingeo iswilia kede pwony ka Rubanga.”

¹⁷Yesero oko waco ne be, “Gikame in itie timo likame ber.

¹⁸In karacel kede jogi dedede itienu udo olo adwong. Tic no tek twatwal, likame in itwero time keni.

¹⁹Nan winy gikame ayaro waco ni, abino mini tam, di Rubanga ko bedo tie kedi. In ipoore cungo kawang jo i nyim Rubanga, doko da di itero pido gi i nyim Rubanga.

²⁰Poore imi gi iswilia kede pwony ka Rubanga, di iko mino gi kingei epone kame kipoore bedo kede, kede da gikame kipoore timo.

²¹Doko da poore iyer jo kame twero tic, jo kame lworu Rubanga kede kame genere, jo kame dagi ud me yore arac. Ket jo nogo bed jo kame telo jo tutumian, kede jo toli, kede jo ot kany, kede jo tomon.

²²Poore gin kired bala jo kame ngolo ne jo kop i kare dedede; gin kipoore kelo pido atek dedede butin, do pido atitino gin kikaruno ngolo kop iye. Manono bino mino tic ni doko yoyot, pien udo gin kitie konyo kori.

²³Ka in itimo kamanoni, bala kame Rubanga ociko ni kede, ibino meede timo tic abongo olo, doko da jo dedede bino dok i kabedo gi di kotieko dweko cuny gi.”

²⁴Aso, Musa oko yei winyo tam kame Yesero omie di eko timo gi dedede kame kowaco ne.

²⁵Musa oko yero jo kame twero tic kikom jo dedede me Isirael, di eko cibo gi bedo jotel me jo tutumian, jo toli, jo ot kany, kede jo tomon.

²⁶Di do gin kiko bedo winyo pido di kingolo kop pi kare dedede. Gin oudo kitero pido atek but Musa, do pido atitino gin oudo kingolo kop iye.

²⁷Musa oko peruno ore Yesero, di Yesero oko dok ture.

Yai 19

Jo me Isirael i Moru me Sinai

¹⁻²Kakame jo me Isirael oyai kede ki Repidim, gin kiko tuno i wi tim me Sinai i ceng me agege me duwe me adek cako gin yai ki Misiri. Gin kiko gero kimere gi kuno i dud moru me Sinai.



- ³Musa oko ot malo i wi moru pi riamo kede Rubanga. Rwot oko lwonge ki wi moru di oko waco ne pi ot yamo ne jo me Isirael, gin ikwae ka Yakobo be,
- ⁴” Wun itiekunu neno gikame ango atimo ne jo me Misiri, di ako tingo wu kelo wu kan buta, bala kame ekokom tingo kede idwe mege i bwome.
- ⁵ Pi manono, ka wun iyeunu winyo dwana di ikounu gwoko isikan na, wun ibinunu bedo jo na apirgi tek kalamo jo apat dedede. Ebo, lobo lung obedo mera,
- ⁶ do wun ibinunu bedo josaseredoti na, ateker kame kopoko di oko kwero pi bedo mera.”
- ⁷Aso, Musa oko dok piny di eko lwongo joadongo dedede me Isirael di eko waco negi gi dedede kame Rwot ociko ne timo.
- ⁸Jo dedede oko dwoko kede dwan acel be, “Wan obino timo gi dedede kame Rwot owaco.” Musa oko dwoko ne Rwot kope kame jo owaco.
- ⁹Rwot oko waco ne Musa be, “Ango ayaro bino buti di atie i edou apek, me wek jo winy di ango atie yamo kedi di gin kiko bino bedo kede gen buti atwal.” Kakame Musa owaco ne kede Rwot kop kame jo odwoko,
- ¹⁰Rwot oko waco ne be, “Oti imi jo lonyere tin kede diki. Mi gi kilwok igoen gi
- ¹¹di kiko atemunokin pi gikame bino timere i ceng me adek. Pien i ceng nono ango abino bino piny i wi moru me Sinai di jo dedede tie neno.
- ¹²Poore igir ikor kalikame jo poore ngolo rimaro moru, di iwaco ne jo pi gwokere kur ngatamoro yiti i wi moru arabo emul kore. Ngatamoro kame bino mulo moru kobino neke;
- ¹³kobino didipo en adidip kede kide arabo gwene kede emal, pien likame cing ngatamoro poore mule. Manoni ribo jo kiton leini; kopoore neko gi. Do kame kokuto agwara, jo bino yito malo i wi moru.”
- ¹⁴Aso, Musa oko wok piny ki wi moru but jo. En eko mino jo olonyere di kiko lwoko igoen gi.
- ¹⁵Musa oko waco ne jo be, “Tikerenu pi gikame bino timere i ceng me adek; kur ngatamoro but kede dako.”
- ¹⁶ Odiko me ceng me adek amwomwocun kede meny bala me kot oko bedo tie, di edou apek oko umo wi moru di agwara oko kok kitek. Jo dedede kame oudo tie i kimere kom gi oko donyo miel pi lworu.
- ¹⁷Musa oko tero jo yai ki kimere gi pi ot riamo kede Rubanga. Gin kiko cungo i bad moru piny.
- ¹⁸Yiro oko umo moru me Sinai pukupuk, pien Rwot oudo owok obino iye di etie i mac; yiro oko swiridido malo bala yiro me wango matapali, di moru oko yangere kitek.



¹⁹Dwan agwara oko meede ameda. Musa oko donyo yamo kede Rwot, do Rwot oudo dwoko ne kop kede mwoc acal bala me kot.

²⁰Kakame Rwot obino kede piny i wi moru me Sinai, en eko lwongo Musa pi ot malo i wi moru, di Musa oko ot kunono.

²¹En eko waco ne Musa be, “Ot piny ikwenyaro jo kur ngatamoro pumar ngolo ikor pi mito bino nena, ka kitimo kamanono jo atot kikom gi bino to.

²²Akadi kiton josaseredoti kame bino noka da poore lonyere, aso ka li, abino timo negi can.”

²³Musa oko waco ne Rwot be, “Likame jo twero bino i wi moru kan, pien in oudo ikwenyaro wa di iwaco be miero ogir ikor rimaro moru kalikame jo poore kalamo, pi mino moru bedo kakacil.”

²⁴Rwot oko waco ne Musa be, “Dok piny di iko kelo Aaron kan; do miero kur josaseredoti kede jo apat ngol ikor pi bino buta, ka li, abino timo negi can.”

²⁵Musa oko dok piny but jo di eko waco negi gikame Rwot owaco.

Yai 20

Cik Tomon (Iswilia 5.1-21)

¹Di Rubanga oko yamo be,

²” Ango en Rwot Rubanga wu, ngat kowoto wu ki lobo me Misiri, kakame oudo itienyu iye ipasoi.

³” Kur iwor rubanga moro ace kwanyo ango kenekene.

⁴ “Kur icwei piri cal me gimoro atie malo, amoto i wi lobo, amoto i yi pii, arabo i dud lobo piny.

⁵ Kur ilur wii i nyim gi amoto woro gi, pien ango Rwot Rubanga wu atie kede nyeko. Ango amio alola but jo kame daga pi dub gi, tuno but ikwae gi me adek kede me ongwon da.

⁶Do jo kame mara di kigwoko cik na, ango anyuto amara na kalikame lokere but gi kede but lwak me ikwae gi me tutumia kede tutumia.

⁷ “Kur itio kede nyinga, ango Rwot Rubanga ni, i yore arac, pien ango Rwot likame abino weko aweka dano kame tio kede nyinga i yore arac.

⁸ “Yutuno ceng Sabato, doko mie ebed ceng kacil.

⁹ Ibino timo tice ni pi ceng kanyape.

¹⁰Do ceng me kanyaare bino bedo mera, en ceng Sabato. Likame ipoore timo tic moro i ceng nono, akadi wodi, akadi nyari, akadi epasoit arabo apasoit ni, akadi leini ni, akadiagakumbor kame bedo i bomba wu.



11 Pien ango Rwot acweo malo kede lobo, kede nam kede gi dedede kame tie i yi gi pi ceng kanyape, di ako wei i ceng me kanyaare. Pi manono, ango Rwot atieko mino ceng Sabato winyo di ako mine ebedo cil.

12 “Wor papa ni kede toto ni, tetekeny ibed kuo pi kare alac i lobo kame ango Rwot Rubanga wu abino mino wu.

13 “Kur ineko.

14 “Kur itimo adote.

15 “Kur ikwalo.

16 “Kur imio ijura me abe i kom ngawoti.

17 “Kur ingobelo jame ka ngawoti; kur ingobelo dako ka ngawoti, amoto epasoit arabo apasoit mere, amoto doke arabo pundan mege, amoto gimoro dedede kame en etie kede.”

Lworo komako Jo

(Iswilia 5.22-33)

18 Di bin jo dedede owinyo mwoc acal bala me kot kede koko me agwara, di kiko neno meny bala me kot kede yiro kame duny ki wi moru, lworo oko mako gi di kom gi oko donyo miel di kiko cungo tenge kakabor.

19 Gin kiko waco ne Musa be, “In en iyam kede wa, wan obino winyo kop nin; do ka Rubanga oyamo kede wa, wan olwor be obino to.”

20 Musa oko waco ne jo be, “Kur ibedunu kede lworo; pien Rubanga obino kenekene pi tamo wu kede pi mino wu bedo di ilworenu, tetekeny kur idubunu.”

21 Di do jo oko cungo i kakabor, di Musa oko nyiko iyapiyapi kede edou acol cucucuc kame oudo Rubanga tie iye.

Iswilia amako Alutari

22 Rwot oko waco ne Musa pi ot waco ne jo me Isirael be, “Wun itiekunu neno kite kame ango Rwot ayamo kede wu ki malo.

23 Kur ilokerenu bobo timo cal me rubangan mogo kede siliba amoto kede saabu, di ikounu donyo wora di doko iworunu gida.

24 Timunu nango alutari me lobo di ikounu yalo iye romini kede dok bala giayala wu awanga kede giayala me nywak. I kabedo dedede kame ango abino yero ne wu pi wora kiye, abino bino butu di ako mino wu winyo.

25 Do ka iyarunu timo na alutari kede kide, kur itiunu kede kide kame kopao, pien ka gipac omule, udo epwokere likame epoore me timo tic na.

26 Doko da kur igerunu alutari kame koyito iye ayita, me wek kur komu me lewic neeno i esawa me yito.”

Yai 21



Iswil amako Bedo kede Ipasoi

(Iswilia 15.12-18)

- ¹Rwot oko waco ne Musa be, “Cib iswilia gi ne jo me Isirael:
- ² Kame iwilo Ngaeburania pi bedo epasoit, en ebino timo ni tic pi mwakini kanyape, do i mwaka me kanyaare miero igonye eoti abongo en culi gimoro.
- ³Ka ikele di likame enyomere, miero eyai da abongo dako; do ka ikele di oudo enyomere, miero eyai da kede dako mere.
- ⁴Ka ngadwong mere omie dako di dako nono oko nywalo ne idwe awobe amoto anyira, dako nono kede idwe mege bino dong me ka ngadwong me epasoit nono, di en eko yai eoto kene.
- ⁵Do ka epasoit nono owaco kakaler be, ‘Ango amaro ngadwong na, doko da amaro dako na kede idwe na, omio likame amito be gonya, ‘
- ⁶pi manono poore ngadwong mere tere kakame koworo kiye Rubanga. Ki kuno ngadwong mere bino mine egongere i kom ekeko arabo i kom ipirin me ekeko di en eko tuco yit epasoit mere nono pelepel kede lilim abit, di epasoit nono ko bino tic nen pi kare me kuo mere lung.
- ⁷” Ka dano ocatu nyare pi bedo apasoit, likame kobino weke iepone kame kogonyo kede epasoit icuo.
- ⁸Ka likame eyomo cuny ngadwong mere, en ngat koudo otere pi koto bedo dako mere, miero do en eyei ne papa mere lake; ngadwong mere likame tie kede twero me cate but ngakumbor piento en etieko tero apasoit mere nono kirac.
- ⁹Ka dano owilo apasoit pi mino wode, miero eter apasoit nono bala nyare.
- ¹⁰Ka en eko medo dako ace, miero en emeede gwoko dako mere noca di emie cam kede igoen bala lem sek, doko da di dako me agege nono dong kede twero mere amakere kede nyom di rom aroma.
- ¹¹Do ka en likame etimo ne dako nono jamini adek nogi, miero ewek dako nono yai oti abongo dako nono bedo kede banya moro arabo mino cul moro.

Iswilia amako Tim me Gero

- ¹² “Ngat kame juto dano paka neko poore eda neke.
- ¹³ Do ka etimo i akangas di oudo likame eikere pi neke, en ebino ringo kakame ango abino yero ne wu, di eko ot gwokere kuno.
- ¹⁴Do ka dano oudo tie kede cuny me mito neko dano ace, di eko sure di eko neke da, akadi ka eko ringo gwokere i alutari na, miero ome ki kuno di eda oko neke.
- ¹⁵” Ngat kame juto papa mere amoto toto mere miero neke.
- ¹⁶ “Ngat kame kwalo dano di eko kano, bed bala etieko cate amoto pwodi ngat nono tie bute, kopooore neke.



- 17 “Ngat kame lamo papa mere amoto toto mere, kopooore neke.
- 18” Ka jo ocalo lok, di ngat acel oko dipo ngawote kede kidi, arabo eko donge kede cinge, di do dano kame ewano nono likame oko to, do eko buto i apien,
- 19i cen mere eko cango di eko cako komo kede ebela, ngat kowane nono likame kobino mine alola, kenekene ebino culo kare ka dano nono kodubere me tic, kede muketo en.
- 20” Ka won epasoit arabo apasoit ojute kede lilim di eko to cucuto, kopooore mino won epasoit nono alola.
- 21Do ka epasoit nono oko tieko ceng acel amoto are di eko to, likame kobino mino wone alola; pien udo en etieko kei lim mere.
- 22” Kame jo tie yi di kiko wanakino dako oyac di yie oko wok, di likame awanon moro ace oko timere nen, ngat kotingo kop nono poore culo sente kame cwar dako nono bino ngolo ne, di lubere kede kite kame ngangolkop bino moko kede.
- 23Do ka awanon moro ace oko bedo i kom dako nono, kobino culo kuo kede kuo,
- 24 wang i wang, lak kede lak, cing kede cing, tien kede tien,
- 25kakame mac owango kede kakame mac owango, apore kede apore, ebela kede ebela.
- 26” Ka won epasoit arabo apasoit ojwato wange paka lono, miero do egony epasoit nono oti, manono tie bala cul me wange.
- 27Ka won epasoit arabo apasoit odongo lake paka muko, miero do egony epasoit nono oti, manono tie bala cul me lake.

Iswilia amako Wegi Jame

- 28” Ka twon ka ngatamoro ocobo icuo amoto dako moro kede tunge paka neko, kopooore didipo twon nono kede kide paka neko di likame oko camo ringo mere, do won twon nono likame kop nono mako.
- 29Do ka twon nono lem onare cocobo jo kede tunge, di jo oko bedo kwenyaro wone, do en likame eko twene, di do twon nono oko neko icuo amoto dako moro, kopooore didipo twon nono kede kide, doko da kopooore neko wone da.
- 30Do ka kongolo ne wone cul me lako kuo mere, miero emi cul dedede kame kongolo ne.
- 31Ka twon nono oneko wot ka ngatamoro amoto nyar ka ngatamoro, kobino tic kede iswil noni da i kom won twon nono.
- 32Ka twon nono oneko epasoit amoto apasoit, won twon nono poore culo won epasoit nono sekel me siliba ot adek, di oko didipo twon nono paka to.
- 33” Ka ngatamoro oweko bur di twolo arabo ekunyo bur di likame eko umo, di twon amoto punda ka ngatamoro oko poto iye,



³⁴won bur nono poore culo le nono. En epoore culo won le nono sente di le nono ko dong mere.

³⁵Ka twon ka ngatamoro owanakino twon me dano ace paka neko, gin kipoore cato twon akuo di kiko poko sente mere, di kiko poko ringo me twon oto nono da.

³⁶Do ka engere be twon nono oudo lem onare cocobo dok icegun, do wone likame oko twene, won twon nono poore mi won twon oto twon ace akuo, di en eko dong kede twon oto ca.

Yai 22

Iswil amako Cul

¹” Ka ngatamoro okwalo diang arabo oromo, di en eko ngole arabo ecate, ngakuwo nono bino culo doke kany pi diang acel, romini ongwon pi oromo acel. En miero ecul wang gi nono, do ka en likame ekaruno, poore cate pi kuwo kame en etimo nono.

²Ka omako le nono kede ngakuwo, diang arabo punda amoto oromo, di pwodi ekuo, ngakuwo nono bino culo leini are pi le acel.

³” Ka omako ngakuwo di etie turo ot iwor di oko bunge paka to, raco me remo mere likame dong i wi ngatamoro.

⁴Do ka oko neke di ceng otieko wok, raco me remo mere dong i wi ngat koneke.

⁵” Ka dano moro omio leini mege oyai ki poto mere di kiko ot camo poto ka ngat ocelu arabo olok mere, arabo egonyo le mere di eko ot camo poto ka ngat ocelu, en miero ecul gi nono kede mere kame ber kowok ki poto mere.

⁶” Ka dano moro ocwinyo mac i poto mere di mac ko kobo wango poto ka ngat ocelu di eko wango kal kame oudo kocoko i atukit amoto kame oudo pwodi likame kokao arabo poto lung, ngat kocwinyo mac miero cul won poto gikame mac owango.

⁷” Ka ngatamoro omio ngawote sente arabo jamini mogo pi kano ne, di oko kwalo gi nogo ki ot ka ngawote; ngakuwo nono ka oko make, en ebino culo gi nogo kede akalamo tien are.

⁸Do ka likame oko mako ngakuwo nono, kobino tero won ot i nyim Rubanga, pi mito ngeno ka likame en kame ekwalo jamini ka ngawote.

⁹” I kom kop kame mako marao jamini bala nat doke, pundan, romini, igoen, arabo gimoro kame oudo orwenyo, kame ngat acel waco be, ‘En mera, ‘ngat ocelu da be, ‘En mera, ‘kop ka jo nogo kobino tero i nyim Rubanga. Ngat kame Rubanga ronkino bino culo won gi nono kede kame kalamo tien are.

¹⁰” Ka ngatamoro oko joko ne ngat ocelu punda, diang, oromo, arabo le moro pi gwoko ne, di le nono ko to arabo eudo awanon amoto joyak oko yake, abongo ngatamoro neno,



¹¹ngat kame oudo ojoko ne le miero ot i nyim Rwot di eko kwongere be en likame ekwalo le ka ngawote. Won le bino yei kwongere mere nono, di do en likame eko bino culo gimoro.

¹²Do ka oudo okwalo le nono akwala, en ebino culo wange but wone.

¹³Ka oudo le me obar en koneke, mito ekel gikame nyuto; likame kobino culo gikame le me obar en koneko.

¹⁴” Ka ngatamoro okwao le kibun ngat ocelu di le nono oko udo awanon arabo eko to di wone li i kanono, miero dano nono cul wange.

¹⁵Do ka le nono oto di wone tie kanono, likame kobino cule. Ka oudo opange apanga, kobino culo sente kame oudo kopange kede kenekene.

Iswilia amako Iponeso kede Edini

¹⁶ “Ka icuo moro oko supo nyako kalikame pwodi ongeo icuo doko di pwodi likame enerere kede dano moro, di en eko buto kede, en ebino kwanyo jamini me nyome di nyako nono ko doko dako mere.

¹⁷Do ka papa me nyako nono oko dagi ne nyome, en ebino kwanyo ne papa me nyako nono jamini kame kopoore culo pi nyomo nyako kalikame pwodi ongeo icuo.

¹⁸ “Miero nek dako kame ngajwok.

¹⁹ “Miero nek ngat kame buto kede le bala dako.

²⁰ “Ngatamoroni kame mio giayala but rubanga moro ace apat kede Rwot, kobino ngolo ne kop me to.

²¹ “Kur iter ngakumbor kirac arabo tidilo en, pien wuda bin ibedunu jokumbor i lobo me Misiri.

²²Kur itidilo apuserut moro arabo atin kic.

²³Ka wun itidilunu gin, ango Rwot, abino winyo koko gi kame gin kikok pi kony kibuta;

²⁴abino lilo kede wu kitek di ako neko wu kede epima, di mon wu ko doko apuserun kede idwe wu da ko doko idwe kic.

²⁵ “Ka wun ikopunu sente but jo na kame jocan, likame ibinunu tero gi bala kame jo kame kopo jo sente timo kede; likame ibinunu penyo gi ameda.

²⁶ Ka imako egoe ka dano moro pi banya, miero idwok ne di pwodi ceng likame odonyo;

²⁷pien cengemogo egoe mere inonono acel kenekene kame en eum kede; nyo ace kame en ebino um kede? Kame en eko koko kony kibuta, ango abino winyo koko mere, pien ango angakisa.

²⁸ “Kur iyamo kirac i kom Rubanga, doko kur ilamo ngatel me jo ni.



29” Kur igal kelo na giamia kikom amio kame iudo, kede giamia me bwini kede mo me olibeti. “Ibinunu mina idwe wu awobe kao.

30Ibinunu timo kamanono da kede doke wu kede romini wu. Atin twon arabo atin me emerekek kame konywalo bino bedo kede toto mere pi ceng kanyaare, do i ceng me kanyauni kobino mine buta.

31 “Wun ibinunu bedo jo na kacil; pi mano, likame ibinunu camo ringo me le moro kame le me obar oneko; ibinunu uce ne igwogin.

Yai 23

Ngolo ne Jo dedede Kop i Ateni

1 “Kur itero kop me abe, doko kur iribere kede dano arac pi in mino ijura me angalo i kom dano moro.

2Kur idok i bad kame jo tot iye pi timo gikarac; kame itie mino ijura i pido moro, kur ilengere i bad kame jo tot iye pi mito totolo ngolo kop i ateni;

3 doko kur ibed kede apokapoka but ngacan kame kotie pide.

4 “Kame in ingole i kom diang me ngading ni arabo punda mere di etie rwenyo, in miero idwoke bute.

5Kame in iudo ngat kame dagi di punda mere opoto piny kede yec, in miero ikonye mino punda mere cungo bobo; kur inene anena di iko ot iweke.

6 “Kur igeng ngacan lono pido mere.

7Kur ikel pido me abe i kom ngatamoro, doko kur inek ngat kame li kede raco moro arabo kame ber, pien ango likame abino sasiro ngat kame timo rac kame cal kamanono.

8Kur iyei gamo cemusana, pien gikame cal kamanono umo wang jo, di eko mino gi kitotolo ngolo kop ne jo kame li kede raco moro.

9 “Kur itidilo ngakumbor; wun ingeunu kuo me ngakumbor, pien wun bin ibedunu jokumbor i lobo me Misiri.

Mwaka me Kanyaare kede Ceng me Kanyaare

10 “Ibino puro lobo ni pi mwakini kanyape di ikwanyo cam kiye.

11Do i mwaka me kanyaare mere in ibino weke ewei di eko ukaro. Gi dedede kame bino cek iye i mwaka nono jocan kame tie i diere me jo ni en kame bino camo; gikame gin kibino weko, leini me obar bino camo. In ibino timo kamanono kede potoni me olok kede potoni me olibeti da.

12 “Ibino timo tice ni pi ceng kanyape, do i ceng me kanyaare mere iko bino wei, tetekey twon ni kede punda ni karuno udo wei, kede atin me epasoit ni da kede ngakumbor kame bedo kedi, gida kiud bobo teko.



13” Miero inenunu be ilubunu gi dedede kame ango atieko waco ne wu. Kur ilegunu but rubangan mogo ace; doko kur nying gi winyere ki dogu.

Ibagai Adek Adongo

(Yai 34.18-26; Iswilia 16.1-17)

14” Ibinunu tedo ibagai adek buli mwaka pi wora.

15 Ibinunu camo Ebagame Mugati kame Arup li iye. Pi ceng kanyaare ibinunu camo mugati kame kotimo abongo arup bala kame oudo aciko ne wu. Ibinunu timo kamanono i kare kame kociko, i duwe me Abib, pien duwe nono en kame wun bin iyaunu kede ki Misiri. “Likame tie ngatamoro kame miero bin i nyima kede cinge nono.

16 “Ibinunu camo Ebagame Kac kede me anyakini me agege me kodere kame ipurunu i poti wu. Ibinunu da camo Ebagame Kimere i atiekini me mwaka, en kare kame icokunu kede ki poti cam dedede kame ipurunu.

17” Buli mwaka cuo dedede miero bin i nyima i kare me ibagai adek nogi, ango Rwot Rubanga.

18” Likame ibinunu mina giayala me leini karacel kede giamia me mugati kame arup tie iye. Mo me leini kame koyalo buta i kare me ibagai nogi miero kur buti.

19 “Kodere kame beco, kame geo cek ki poti wu, ibinunu kelo gi i ot ka Rwot Rubanga wu. “Likame ibinunu tedo ringo me atin diel kede cak ka toto mere.

Cikere kede Pwony

20” Neningo, ango abino cwano malaika telo ne wu yongayo, pi en gwoko wu i yongayo di eko tero wu i kabedo kame ango atieko iiko.

21 Winyenu doko lubunu kop mere; kur ijemunu ne, piento ango atieko mine twer; en likame ebino sasiro wu ka ijemunu ne.

22 Do ka wun iwinyenu di ikounu timo gi dedede kame ango awaco, ango abino dingere kede jokwor wu doko abino dagi jo kame dagi wu.

23 Malaika na bino telo ne wu yongayo di eko tero wu i lobo me jo Amor, jo Kiti, jo Perisi, jo Kanan, jo Kibi kede jo Yebu, di ango ako bino muducaro gi.

24 Likame ibinunu luro wi wu piny i nyim rubangan gi, akadi woro gi, amoto lubo itok gin, do ibinunu muducaro gi atwal atwala di ikounu bebelo kide adongodongo kame kosipo kakame gin kiworo iye rubangan gi.

25 Ibinunu wora, ango Rwot Rubanga wu, di ango ako bino mino winyo i kom cam wu kede pii wu; doko ako bino mino ibedunu abongo tuwo moro.

26 I lobo wu likame tie dako moro kame yie bino wok arabo kame bino bedo adonge; abino mino wu kare alac me kuo.

27 Abino mino jo bedo lwor i nyimu, di ako totolo wi jo dedede kame ibinunu riamo kede, doko abino mino jokwor wu dedede lokere ringo tenge kibutu.



²⁸Abino mino lwooro mako jo Kibi, jo Kanan kede jo Kiti di kiko ringo tenge ki nyimu.

²⁹Likame abino riamo gi tenge i mwaka acel, pien ka atimo kamanono, lobo bino dong nono di leini me obar ko doko tot tot kalikame wun itwerunu.

³⁰Ango abino riamo gi tenge mot mot, tuno wun nyai romo lobo nono.

³¹Ikor me lobo wu bino cakere ki Nam Akwar tuno i nam me jo Pilistia, kede ki wi tim tuno i ecilet me Eupurate; pien ango abino mino jo me piny nono i cingu, di wun ikounu bino riamo gin tenge.

³²Likame ibinunu timo isikan moro kede gin akadi kede rubangan gi.

³³Doko kur iwekunu gin kidong bedo i lobo wu; ka iwekunu gi, gin kibino mino wu itimunu dub buta. Pien ka idonyunu woro rubangan gi, manono ateteni bino bedo ne wu bala owic.”

Yai 24

Komoko Isikan

¹Rwot oko waco ne Musa be, “Bianu buta i wi moru, in kede Aaron, Nadab, Abiku, kede joadongo ot kanyaare me Isirael; di ikounu wora ki tenge.

²In keni en kame ibino noka; do jo icegun likame bino noka, doko jo apat dedede likame bino yito i wi moru kede in.”

³Musa oko ot but jo di eko waco negi gikame Rubanga ociko karacel kede iswilia dedede, di jo dedede oko gamo kede dwan acel be, “Gi dedede kame Rwot otieko waco wan obino timo.”

⁴Musa oko wandiko cik ka Rubanga dedede. En eko yai odiko sek di eko gero alutari i dud moru, di eko sipo kide tomon kiwie are, kidi acelacel cungo pi jo me ekeko acelacel me Isirael.

⁵En eko cwano awobe, di gin kiko mino giayala awanga kede kiko mino twonin but Rwot bala giayala me nywak.

⁶Musa oko poko remo me leini nogo dul di eko keto i kalayan, dul kame odong en eko kikiro i alutari.

⁷Di en eko kwanyo itabu me isikan kame oudo kowandiko iye cik ka Rwot di eko somo kede dwan amalalo di jo dedede winyo. Jo oko waco be, “Gi dedede kame Rwot otieko ciko wan obino timo, doko obino lubo gi.”

⁸ Musa di oko kwanyo remo kame oudo tie i kalayan di eko kikiro i kom jo di ewaco be, “Man en remo kame moko isikan kame Rwot otieko timo kede wu di emio wu cik nogi.”

⁹Di do Musa kede Aaron, Nadab kede Abiku, karacel kede joadongo me Isirael ot kanyaare oko yito i wi moru,



¹⁰di gin kiko neno Rubanga me jo me Isirael. I dud tiene piny oudo tie iye gikame cal bala kidi sapir kame kopeto, di epioropior bala malo.

¹¹Rubanga likame oko timo ne jodongo me Isirael nogi raco moro; gin kiko neno Rubanga, doko kiko cam kede amata.

Musa i wi Moru me Sinai

¹²Rwot oko waco ne Musa be, “Bia buta i wi moru, di iko bedo kura. Ango abino mini kide abatal kame tie kede iswilia kede cik kame ango atieko wandiko me pwonyo jo na.”

¹³Aso, Musa oko yai kede Yosua ngakonye, di Musa oko yito i wi moru kacil.

¹⁴En ewaco ne jodongo be, “Bed ikurunu wa ki kan, tuno wan dwogo but wu. Aaron kede Kur tie kede wu, pi mano, ngat kame tie kede kop moro miero eter but gi.”

¹⁵Musa oko ot i wi moru, di edou oko umo wi moru.

¹⁶Rieny me tie ka Rwot oko bino i wi Moru me Sinai, di edou oko umo wi moru pi ceng kanyape. I ceng me kanyaare mere Rwot oko lwongo Musa ki edou.

¹⁷Kibut jo me Isirael, rieny me tie ka Rwot oudo cal bala mac kame tie wango wi moru.

¹⁸ Musa oko ot malo i wi moru di eko donyo i edou nono. En eko bedo kuno pi ceng ot ongwon.

Yai 25

Giamia pi Taberenakol

(Yai 35.4-9)

¹Rwot oko waco ne Musa be,

²” Wace jo me Isirael pi mina giamia. Gam giamia dedede kame ngat acelacel bino kwanyo bala kame cunye tele kede.

³Mage en giamia kame in ibino gamo kibut gi: saabu, siliba, kede nyonyo buronsi;

⁴igoen ebululu ebululu, akwakwar, kede akwar kame kotimo kede yer me romini; igoen apwot kame meny, igoen kame kotimo kede yer me diegi,

⁵launi kame konyongo me romini kede imukulen ace; ibaon me yen kame kolwongo be akasia;

⁶mo me italan; jamini kame ngwece gi mit me nyalo mo me wir, kede odok adunya kame ngwe kur;

⁷kide me wel kame kolwongo be onik kede kide apat me wel kame kobino keto i kom epod kede i kom isau me kor.

⁸Jo poore timo nango Kabedo Kacil, tetekeny abed i diere gi.

⁹Timenu karacel kede jamini me yie dedede bala kame ango abino nyuto ne wu.”



Sanduku me Isikan

(Yai 37.1-9)

- ¹⁰Rwot oko waco be, “Wace gi kitim sanduku kede ebao me yat akasia; boro mere bino bedo puti ongwon, laco mere puti are kede boro mere malo puti are.
- ¹¹In ibino puno yie kede ngee kede saabu kame kojililo, doko iko toko ngee kede saabu rimaro.
- ¹²Ibino timo alung ongwon me saabu di iko cibo gi i tiene ongwon, alung are tetucel kede are da tetucel.
- ¹³Ibino timo ibaon me yat akasia me yene, di iko puno gi kede saabu,
- ¹⁴iko rwako ibaon nogo i wang alung nogo i nget sanduku tuni tuni, me yene.
- ¹⁵Miero wek ibaon nogo bedi i alung nogo; kur wot gi tenge.
- ¹⁶Ibino keto i yie kide are abatal kame ango abino mini, kame kowandiko iye cik.
- ¹⁷“Tim kom me kisa mere kede saabu kame kojililo; boro mere miero bed puti ongwon kede laco mere puti are.
- ¹⁸Tim cerubim are kede saabu; tet gi kede enyondo,
- ¹⁹acel i ajikini me kom me kisa tetucel, acel da tetuca mere. Tim gi di kitie kicel kede kom me kisa.
- ²⁰Ibino mino cerubim nogo yararo bwom gi kiko umo kom me kisa. Gin kibino nenere di nyim gi oluro neno kom me kisa.
- ²¹In ibino cibo kide abatal are kame ango abino mini i yi sanduku nono di iko cibo kom me kisa i wie.
- ²²Ango abino riamo kedi kanono, i wi kom me kisa nono, i dierediere me cerubim are kame tie i wie, di ako bino mini cik na dedede pi mino jo me Isirael.

Emesa me Keto Mugati kobedo Giamia but Rubanga

(Yai 37.10-16)

- ²³” Ibino timo emesa kede ebao me yat akasia; boro mere poore bed puti adek, kede laco mere puti acel kede dul, kede boro mere malo poore bed puti are.
- ²⁴Ibino puno kome dedede kede saabu kame kojililo di iko toko ngete kede saabu rimaro.
- ²⁵Tim ne ebao kame gwako tiene rimaro, di laco mere rom kede yi cing dano, kede iko toko ebao nono kede saabu rimaro en.
- ²⁶Tim alung ongwon me saabu di iko keketo gi i isondana ongwon dedede, buli acel i tiene acel.
- ²⁷Alung kame korwako iye ibaon me yeno emesa kobino keto di iyapiyapi kede ebao kame rimaro tiene.



²⁸Ibino timo atekai me yat akasia di iko puno gi kede saabu, di oko tic kede gi me yeno emesa nono.

²⁹Ibino timo kede saabu suanin kede bakulin mege me dunyo odok angwe kur, kede da cupan kede ikopon mege me giayala amata.

³⁰Di iko bino keto mugati kame koyalo buta i wi emesa, di eko bedo tie iye nakanaka.

Gicibo Etala

(Yai 37.17-24)

³¹” Ibino timo gicibo etala kede saabu kame kojililo. Ibino teto dude piny kede epir mere kede enyondo; ikopon mege kame gwako ature kede ature mege ibino teto ribere i kome.

³²Ebino bedo tie kede jange kanyape kame yai i ngete, adek tetucel doko adek tetu ocelu.

³³Ajange acelacel kikom jange kanyape nogo miero bed kede ikopon adek kame kotimo bala ature kede pote kame gwako ature kede ature iye.

³⁴I kor epir me gicibo etala bino bedo iye ikopon ongwon kame kotimo bala ature.

³⁵Kikom jange kanyape nogo, i dierediere me tien buli jange are, miero bed tie iye pote kame gwako ature acel i kor epir me gicibo etala.

³⁶Gicibo etala, karacel kede ajange mege kiton ature miero tet kede enyondo kikom saabu kame kojililo di kitie kicel.

³⁷Ibino timo ne italan kanyaare di iko keto gi di gin dedede kiliel kicaro anyim.

³⁸Makasi me kwanyo mac kede sinia mere kobino timo kede saabu kame kojililo.

³⁹Gicibo etala kede jamini mege nogi dedede bino mito saabu kame kojililo kame peko mere romo kilo ot adek kiwie kany.

⁴⁰ Miero inen be itimo gi bala kame oudo anyuto ni i wi moru.”

Yai 26

Taberenakol

(Yai 36.8-38)

¹Rwot oko waco ne Musa be, “Ger yi taberenakol kede isukan acil me poko agolai, isukan ameny tomon. Isukan nogo miero kotim kede ausin me erangi ebululu ebululu, akwakwar kede akwar; kobino kuno cal me cerubim i kom isukan nogo.

²Boro me esuka acelacel bino bedo mita tomon kiwie are kede laco mere bino bedo mita are; isukan dedede bino bedo rorom.

³Kui isukan kany iribakino gi karacel, di bobo iko timo kamanono da kede icegun kany kame odong.

⁴Dodolo egoe kame erangi mere ebululu ebululu iko kune ilak esuka me ooko me abunge acelacel.



- ⁵I lak abunge me agege, dodolo egoe nono tien ot kany, di bobo iko dodolo egoe me lak abunge me are da tien ot kany, di kipimere kede me abunge me agege.
- ⁶Ibino timo agoc ot kany me saabu di iko tic kede gi me ribakino abungeta me isukan nogo karacel, tetekeny taberenakol bed acel alutu.
- ⁷” Ibino da timo isukan tomon kiwie acel kame kotimo kede yer me diegi, me umo taberenakol.
- ⁸Tim gi di kirorom, boro me esuka acelacel miero bed mita tomon kiwie adek kede laco mere miero bed mita are.
- ⁹Ibino kuno isukan kany iribakino gi karacel i abunge acel, di iko kuno kanyape kame odong da i abunge acel. Esuka me kanyape mere ibino bane eko dokere i nyim taberenakol.
- ¹⁰Kui egoe kame kodolo tien ot kany i lak esuka me ooko me abunge acelacel.
- ¹¹Tim agoc ot kany kame kotimo kede nyonyo buronsi di iko kokodo gi kakame kododolo me esuka pi ribakino abungeta me isukan nogo tetekeny kibed di kitie kicel.
- ¹²Dul me wi esuka kame dong i yi eema, ibino liere ledi i ngei taberenakol.
- ¹³Isukan me eema laco gi bino kalamo kede dul mita; dul mita kame dong nogo bino ledi i nget taberenakol pi ume.
- ¹⁴” Ibino bobo da timo ne eema nono aum ace are, acel kame kotimo kede lau me oromo kame konyongo, kede kame ume ki ooko kame kotimo kede emukule apwot.
- ¹⁵” Ibino timo ne taberenakol ibaon me yat akasia kame kosipo me timo ipirin mege.
- ¹⁶Boro me ebaa acelacel me epir miero bed puti tomon kiwie kany, kede laco mere poore bed bala puti are.
- ¹⁷Ebaa acelacel poore bedo kede tiene are me ribakino gi karacel; ibino timo kamanono ne ibaon dedede me purem me taberenakol.
- ¹⁸Ibino timo ipirin me taberenakol kaman: ipirin ot are kame kocibo i ngete kame tie i bad tetu piny mere,
- ¹⁹kede ibino da timo kede nyonyo siliba agangeta ot ongwon kame koketo i dud ibaon ot are nogo, agangeta are i dud buli ebaa acelacel me gango tiene are.
- ²⁰I nget taberenakol tetu ocelu da kame dok i bad tetu malo, tim ibaon me ipirin ot are,
- ²¹kede agangeta ot ongwon kame kotimo kede nyonyo siliba. Ket agangeta are i dud buli ebaa acelacel.
- ²²I ngei taberenakol tetu kame dok i bad tetu tim ibino timo ipirin kanyape,
- ²³kede ipirin are me isondana me ngee kuno.



²⁴Ipirin me isondana nogi bino pokere i tetu piny, do kibino ribere i wi gi malo, i alung me agege. Ipirin are me isondana nogo kobino timo gin kamanono.

²⁵Manono bino mino ipirin me ngee bedo kanyauni, di dud epir acelacel tie kede agangeta are are kame kotimo kede siliba.

²⁶” Ibino timo ari tomon kiwie kany me ebao me yat akasia, ari kany pi ipirin me tetucel me taberenakol,

²⁷kede da bobo ari kany pi ipirin me tetu ocelu, kede bobo kany me ipirin me ngee, tetu kame dok i bad tetu tim.

²⁸Ari me diere, kame beo ikor ibaon me ipirin, bino rire yai ki lak taberenakol tetucel naka tuno tetu ocelu.

²⁹Ibino puno ibaon me ipirin kede saabu di iko keto negi alung kame kotimo kede saabu, me rwako ari. Ari nogo da miero kopui kede saabu.

³⁰Sip taberenakol di ilubo kite kame oudo konyuto ni i wi moru.

³¹” Ibino timo egoe kame poko agola kede egoe kame meny, kame kotimo kede ausin me erangi ebululu ebululu, akwakwar, kede akwar. Kobino kuno iye cal me cerubim kede diru.

³²Ibino liere i kom ipirin ongwon me yat akasia kame kopuo kede saabu, ipirin kame tie kede akod kame kotimo kede saabu di kicungo i kom agangeta kame kotimo kede siliba.

³³Ibino liero egoe me isenge nono piny me akodeta kame ledi ki wi taberenakol, di iko keto Sanduku me Isikan i yi isenge nono. Egoe me isenge nono bino poko Kabedo Kacil kede Kabedo Kacil Kalamo.

³⁴Ibino keto kom me kisa i wi Sanduku me Isikan.

³⁵Ibino keto emesa kame kocibo iye mugati kame koyalo but Rwot ooko me isenge, di iko keto gicibo etala i bad kame dok tetu piny, di epimere kede emesa. Ibino keto emesa i bad kame dok tetu malo.

³⁶” Ibino timo egoe me galao ekeko me Eema; time kede ausin me erangi ebululu ebululu, akwakwar, kede kame kwar di oko tubuso en kede egoe ameny kame korurujo di okuwo ausin iye kede piso.

³⁷Ibino timo ne egoe me galao ekeko nono ipirin kany me yat akasia, di iko puno gi kede saabu, kede iko keto negi akod kame kotimo kede saabu; ibino da timo ne ipirin nogo agangeta kame kotimo kede nyonyo buronsi.”

Yai 27

Alutari me Giayala Awanga

(Yai 38.1-7)



¹Rwot oko waco ne Musa be, “Ibino timo alutari kede ebao me yat akasia, boro kede laco mere miero bed di rorom; boro mere poore bed puti kanyaare kede dul, laco mere da kamanono, kede boro mere malo poore bed puti ongwon kede dul.

²Ibino timo ne iswonge i isondana mege ongwon dedede, di iswonge nogo tie kicel kede en, doko ibino pune kede nyonyo buronsi.

³Ibino timo agune me gano buru mege, doko iko timo gi me kikiso alutari kede kalayan kede ilumai kede itatany me kwanyo buru aliet. Jamini nogi dedede miero kotim kede nyonyo buronsi.

⁴Tim kekei me nyonyo buronsi di iko keto alung me nyonyo buronsi i isondana mege.

⁵Ibino keto kekei nono pipiny i kor alutari; ibino mine edonyo i yi alutari di eko jik dierediere.

⁶Ibino timo atekai me yat akasia me yeno alutari di iko puno gi kede nyonyo buronsi;

⁷kobino rwako atekai nogo i wang mwolere kame tie i nget alutari tuni tuni kame kotie yene.

⁸Ibino timo alutari nono kede ibaon di iko weko yie di twolo. Ibino timo gi i ekite kame oudo anyuto ni i wi moru.

Diakal me Eema Kacil

(Yai 38.9-20)

⁹ Ibino timo cel me diakal me taberenakol kede isukan ameny. I bad tetu piny mere, boro me isukan mege miero bed puti tol acel kede ot kany,

¹⁰doko tim ipirin ot are me nyonyo buronsi me liero gi kede agangeta gi da ot are kame kotimo kede nyonyo buronsi. Do akodeta, ipirin kede atwec kobino timo kede siliba.

¹¹Ibino timo kamanono da i bad tetu malo.

¹²I bad kame dok tetu tim kobino keto isukan kame boro gi tie puti ot kanyaare kiwie kany, kede ipirin tomon kede agangeta da tomon.

¹³I bad kame dok tetu kide, kakame erute tie iye, laco me cel miero bed da puti ot kanyaare kiwie kany.

¹⁴Esuka me puti ot are kiwie are kede dul kobino keto i bad erute tetucel i kom ipirin adek kede agangeta gi da adek.

¹⁵I erute tetu ocelu da kobino timo kamanono.

¹⁶Do erute kikokome, kobino galao kede esuka kame boro mere tie puti ot adek di otime kede ausin me erangi ebululu ebululu, akwakwar, kede akwar, doko di kotubuso en kede egoe ameny kame korurujo di okuwo ausin iye kede piso; ebino bedo kede ipirin ongwon kede agangeta gi da ongwon.



¹⁷Ipirin dedede koluko diakal kobino tweno atad me siliba beo i wi gi; kobino timo akod gi kede siliba, kede agangeta gin kobino timo kede nyonyo buronsi.

¹⁸Boro me diakal bino bedo puti tol acel kede ot kany, do laco mere bino bedo puti ot kanyaare kiwie kany, kede boro mere malo bino bedo puti kanyaare kede dul. Kobino cele kede isukan ameny di oko keto ne agangeta kame kotimo kede nyonyo buronsi.

¹⁹Jamini kame kobino tic kede i taberenakol karacel kede loc mege, kede da loc me cel mere kobino timo kede nyonyo buronsi.

Gwoko Etala

(Jolebi 24.1-4)

²⁰” Ibino ciko jo me Isirael pi kelo ni mo acil me olibeti kame koyoko ayoka, mo me etala, tetekeny kotemuno etala kame bino liel ceng dedede.

²¹Aaron kede awobe mege bino bedo iiko etala i yi Eema kacil, i ooko me isenge, i nyim Sanduku me Isikan. Etala nono bino liel i nyima cako otieno tuno odiko. Cik noni jo me Isirael kede ikwae gi bino gwoko pi kare dedede.”

Yai 28

Igoen me Josaseredoti

(Yai 39.1-7)

¹Rwot oko waco ne Musa be, “Lwong omini Aaron buti, en karacel kede awobe mege, Nadab, Abiku, Eleasar kede Itamar. Pok gi kikom jo me Isirael, tetekeny gin kitim na tic bala josaseredoti.

²Ibino timo ne omini Aaron igoen me angapa acil kame kotubuso.

³Ibino waco ne jo dedede kame karuno, jo kame ango amio diru, be gin miero kitim ne Aaron igoen me angapa pi kwere bedo ngasaseredoti kame timo tic nango.

⁴Igoen me angapa kame gin kibino timo gin ige: egoe me kor, epod, ekanso, esati abor kame kotubuso kome kede ausin, egoe kame kodwadwalo i wic, kede ausi me tweno pier. Magonogo en igoen kacil kame gin kibino timo ne omini Aaron kede awobe mege tetekeny gin kikaruno timo nango tic bala josaseredoti.

⁵Jo kame tie kede diru nogo bino timo igoen nogo kede ausi me saabu, ausin ebululu ebululu, akwakwar kede kame kwar mere, kede igoen ameny.

⁶” Gin kibino timo epod kede ausi me saabu, ausin ebululu ebululu, akwakwar kede kame kwar mere, di kotubuso kome kede ausin kede diru atek.

⁷Ebino bedo kede ausin are me epepet i ngete tuni tuni, kame kotwee kede.

⁸Rakoba kame kotubuso, kame tie iye, kobino timo iepone acel kede egoe me ausi me saabu, ausin ebululu ebululu, akwakwar kede kame kwar mere, kede egoe kame pwot.

⁹Ibino kwanyo kide are kame kolwongo be onik di iko goro nying awobe tomon kiwie are ka Yakobo i kom gi,



¹⁰nying awobe kanyape i kom kidi acel kede kanyape kame odong da i kom kidi ocelu, di lubere kede nywalo gi.

¹¹Gor nying awobe ka Yakobo i kom kide are nogo bala kame ngatet ngolo kede inyukutan i kom lilim, di iko keto gi i kom purem me iwayai me saabu kame kotado.

¹²Ibino dupo kide are nogo i kom ausin me epepet me epod, pi bedo kide me yutuno awobe ka Yakobo. Aaron bino tingo nying gi i epepet mere are pi bedo gi me iyutun.

¹³Tim purem me iwayai me saabu kame kotado,

¹⁴doko iko timo irikoi are me saabu kame kojililo di omino gi bala auno, di iko keto irikoi nogo i kom purem nono.

Egoe me Kor

(Yai 39.8-21)

¹⁵” Ibino timo egoe me kor ne Ngatel me Josaseredoti kame en ebino tic kede pi ngeno gikame Rubanga mito; ibino time kede diru kede jamini kame kotimo kede epod di iko tubuso en kamanono da.

¹⁶Laco kede boro mere poore bedo rorom, boro inci kanyangon kede laco da inci kanyangon, di edokere.

¹⁷Ibino keto iye irotin ongwon me kide me wel. I eroto me agege ibino keto iye kide gi: karenelia, kirisolit kede emeradi;

¹⁸i eroto me are iko bino keto turukuse, sapir kede dayamon;

¹⁹i eroto me adek ibino keto jasinti, agate kede ametis;

²⁰kede do i eroto me ongwon mere iko keto, beril, onik kede jasipa; ibino mwono gi i kom mwola me saabu.

²¹Kikom kide tomon kiwie are nogi, kidi acelacel cungo pi ekeko acel me Isirael di ogoro nying awobe ka Yakobo i kom gi.

²²Ibino timo ne egoe me kor nono irikoi kame kotimo kede saabu kame kojililo di omino gi bala auno.

²³Ibino timo alung are me saabu di iko keto gi i isondana me egoe me kor, tetu wie malo,

²⁴di iko rwako irikoi are me saabu, kame komino bala auno i yi alung are nogo.

²⁵Ibino tweno wi irikoi nogo tetu odong i kom purem are me saabu noka, di manono ko bino mino kotweo egoe me kor nono i kom ausin me epod i anyim.

²⁶Ibino bobo timo alung are me saabu di iko keto gi i isondana me egoe me kor nono, tetu piny mere, i lake me yie kame kio kede epod.

²⁷Ibino da bobo timo alung are ace me saabu di iko keto gi tetu piny me ausin are nogo me epepet me epod, i tetu nyime kakame ausin riamo iye kede epod, malo me rakoba kame kotubuso me epod.



28Kobino tweno alung me egoe me kor koribo i kom alung me epod kede ausi ebululu ebululu, tetekeny egoe me kor di ko buto i wi rakoba me epod di likame eko ledo ki kom epod.

29” Aso, i kare dedede kame Aaron donyo kede i Kabedo Kacil, en ebino ngapo egoe me kor kame nying awobe ka Yakobo tie iye, ebino ngape egongere kede cunye, pi bedo gi me iyutun.

30 Ibino keto Urim kede Tumim i yi egoe me kor di gin kiko bedo i cuny Aaron i kare kame en edonyo kede i nyima; iepone nono Aaron bino tic kede gi pi ngeno gikame ango amito ne jo me Isirael nakanaka.

Igoen Ace me Ngasaseredoti

(Yai 39.22-31)

31” Ekanso kame kongapo kede epod miero erangi mere bed ebululu ebululu.

32Miero kotuc ngute bed diere pi kakame korwako iye wic, di oko toko kuno ngute nono kede ausi tetekeny kur eyeci.

33-34I lake piny ibino kuno cal me anyakini me yat kame kolwongo be pomagurunet kede ausin me erangi ebululu ebululu, akwakwar kede kame kwar mere, rimaro lak ekanso nono dedede, di acwirin kame kotimo kede saabu culere i diere gi rimaro lak ekanso.

35Aaron bino ngapo ekanso noni ka etie timo tic bala ngasaseredoti. Kame en ebino i nyima i Kabedo Kacil arabo kame en eyai i nyima, jo bino winyo koko me acwir, tetekeny kur etoi.

36” Ibino timo saabu ibatalal di cil di iko goro inyukutan me kop noni iye be, ‘Komie but Rwot.’

37Ibino twene kede ausi ebululu ebululu i kom egoe kame kodwadwalo i wic; en ebino bedo i tetu nyime.

38Aaron bino ngape i tur nyime, di en eko bino yeno raco kame udere i kom giamia kacil kame jo me Isirael mio buta; pado me saabu nono bino bedo i tur nyime nakanaka tetekeny ango ayei gamo giamia gi.

39” Ibino timo esati abor kame kotubuso kome kede egoe ameny, kede iko timo egoe kame kodwadwalo i wic da kede egoe ameny, kede ausi me pier kame kotubuso.

40” Ibino timo ne awobe ka Aaron isatin abocoboco, ausin me tweno pier kede igoen kame kododolo i wic. Manono bino mino gi kibedo kede engape me angosibib.

41In ibino ngapo ne omini Aaron igoen nogi, en kede awobe mege, di iko wiwo gi, iko kwero gi, di iko poko gi pi timo tic na, tetekeny kitim na tic bala josaseredoti.

42Ibino timo negi ipalen kame kingapo me yie, kame yai i pier gi jik i amuros, tetekeny kur kom gi me cuo neeno.



⁴³Aaron kede awobe mege bino ngapo gi kame kioto i Eema kacil, arabo kame kioto i alutari pi timo tic bala josaseredoti i Kabedo Kacil; ka likame kitimo kamanono, kibino kelo raco i wi gi di kiko to. Manono en cik kame tie pi Aaron kede ikwae mege, cik kame bedo nakanaka.

Yai 29

Epone me Kwero Aaron kede Awobe mege pi bedo Josaseredoti

(Jolebi 8.1-36)

¹ Man en gikame in ipoore timo ne Aaron kede awobe mege, tetekeny gin kitim na tic bala josaseredoti. Ibino kwanyo etobait me twon kede imerekekin are, kalikame tie kede peko moro i kom gi.

² Tim mugati kame arup li iye, kede mugati kame arup li iye kame kotedo kede mo, kede mugati aperepere kame kosuto kede mo. In ibino timo gi kede engano kame konungo.

³ Ibino keto gi i adita acel di iko mino gi buta karacel kede twon kede romini are nogo.

⁴ Ibino kelo Aaron kede awobe mege i ekeko me Eema na di iko mino gi kibol.

⁵ Di in iko kwanyo igoen me angapa me ngasaseredoti iko ngapo ne Aaron; esati abor, ekanso kame kodokakino iye epod, egoe me kor kede rakoba.

⁶ Dwadwalo ne egoe i wie di iko tweno iye gianena kacil kame kogoro i kom saabu atitidi di ibatalal.

⁷ Ibino kwanyo mo me wir di iko onyo i wie di iko wire.

⁸ Di do iko bino kelo awobe mege di iko ngapo negi isatin kame bocoboco;

⁹ iko tweno da ausin i pier gi kede iko tweno igoen i wi gi. Manono en epone kame in ibino kwero kede Aaron kede awobe mege di gin kede ikwae gi kiko bino timo na tic nakanaka bala josaseredoti.

¹⁰ Ibino kelo twon nono i nyim Eema na di iko waco ne Aaron kede awobe mege pi gin keto cing gi i wie,

¹¹ di in iko bino ngole i nyima, i ekeko kame donyo i Eema.

¹² Ibino gwelo remo mogo me twon nono kede lweti di iko keto i iswonge me alutari, do remo lung kame odong in iko bino onyo piny i dud alutari.

¹³ Ibino waro mo lung kame umo amontena, lak emany kede engalur are dedede kede mo kame tie i kom gi, di iko wango gi i wi alutari tetekeny yiro gi duny buta.

¹⁴ Do ibino wango ringo me twon, lau mere, kede amontena mege tenge me kimere. Manono bino bedo giamia kame kwanyo tenge dub me josaseredoti.

¹⁵ Di do in iko bino kwanyo emerekek acel di iko waco ne Aaron kede awobe mege pi gin keto cing gi i wie,



- 16**di in iko bino ngolo oromo nono di iko kwanyo remo mere iko kikiro i nget alutari dedede.
- 17**Di in iko bino ngongolo oromo nono i adulion, di iko lwoko amontena kede tiene, di iko dokakino gi i kom adulion nogo kede wie.
- 18** Wang oromo nono lung i wi alutari; en etie giamia awanga but Rwot; giamia kame kowango kede mac, giamia kame ngwe kur but Rwot.
- 19**” Ibino kwanyo emerekek me are mere di Aaron kede awobe mege ko bino keto cing gi i wie.
- 20**In ibino ngolo oromo nono di iko kwanyo remo mere mogo di iko susuto i yit Aaron tetu cam kede me awobe mege, kede i lwet gi adongo me cing gi kede me tien gi tetu cam. Remo kame dong mere ibino kikiro i nget alutari dedede.
- 21**Di iko bino kwanyo remo mogo kame tie i wi alutari, kede mo mogo me wir, di iko kikiro i kom Aaron kede i kom igoen mege, kede i kom awobe mege kede i igoen me awobe mege; di do en kede igoen mege kiko bedo cil, karacel kede awobe mege kede igoen gi.
- 22**Ibino waro da mo me emerekek nono, mo me yibe, mo kame umo jamini me yie, lak emany, engalur are dedede kede mo i kom gi, kede amuro tetu cam (pien manono en oromo me timo akwera).
- 23**Ibino kwanyo da ki adita me mugati kame komio buta, mugati acel kame kotimo abongo arup, mugati acel kame kotedo kede mo, kede mugati acel arerep kame kosuto kede mo.
- 24**In ibino keto cam nogi dedede i cing Aaron kede awobe mege, di in iko mino gin kikiarao gi malo pi mino gi buta.
- 25**Di do in iko bino gamo gi ki cing gi, di iko wango gi i wi alutari medo i kom giayala awanga kame ngwe kur buta.
- 26**” Ibino kwanyo kapumito me oromo kame kokwero kede Aaron di iko kiarao en malo pi bedo giayala buta; manono bino bedo iner nin.
- 27**” Ibino poko tenge pi bedo gikacil, adulion me oromo me timo akwera, kame ibeikina but Aaron kede awobe mege. Magonogo gin en kapumito kede amuro kame oudo kokiarao malo buta di otie kwero gi.
- 28**Ebino bedo cik but jo me Isirael pi kare dedede, pi gin mino Aaron kede awobe mege adulion nogi; manoni en iner kame jo me Isirael poore mino josaseredoti i kare kame gin kimio kede giayala gi me nywak. Gin kibedo giamia gi buta.
- 29**” Igoen ka Aaron me ngasaseredoti kobino mino but awobe mege ka en eto; gin kibino ngapo gi i kare kame kokwero gi kede.



³⁰Wot ka Aaron kame lunyo wange bala ngasaseredoti bino ngapo igoen nogo pi ceng kanyaare, i kare kame en edonyo kede i Eema me riamo keda pi timo tic i Kabedo Kacil.

³¹” Ibino kwanyo ringo me oromo kame kokwero kede Aaron kede awobe mege di iko tedo ringo nono i Kabedo Kacil.

³²Aaron kede awobe mege bino camo ringo me oromo nono kede mugati kame tie i adita, i ekeko me Eema me riamo keda.

³³Gin kikom gi kibino camo gikame oudo kotio kede me kwanyo dub i kare kame kokwero gi kede, do likame tie dano moro ace kame bino camo gi, pien gin kibedo gikacil.

³⁴Ka ringo moro arabo mugati moro oko dong tuno odiko, in ibino wange; likame kobino came pien ebedo gikacil.

³⁵” Ibino timo kamanono ne Aaron kede awobe mege bala kame atieko ciko ni; ibino timo tic me kwero gi pi ceng kanyaare.

³⁶Ceng acelacel in ibino mino giayala me twon pi kwanyo dub. Ibino da mino giayala me kwanyo dub kame tie i alutari, di iko wire kede mo pi mine bedo gikacil.

³⁷Ibino timo tic me kwanyo dub kame tie i alutari pi ceng kanyaare, di iko lonye, di alutari ko bedo gikacil adikinicel; gimoroni kenekene kame bino mulo alutari nono bino udo peko pi twer kame etie kede.

Giamia me Yalo Rubanga Ceng dedede

(Wel 28.1-8)

³⁸” Ceng dedede in ibino ngolo romini me mwaka acel gin are, di iko yalo gi i wi alutari.

³⁹Ibino mino giayala me oromo acel odiko kede ocelu mere iko bino mino otieno.

⁴⁰Ibino mino da karacel kede oromo me agege, kilo acel me engano kame konungo kiber di oko rube kede mo me olibeti acil. Doko da iko onyo lita acel me bwini bala giayala amata.

⁴¹Oromo ocelu mere in ibino ngolo di iko yalo otieno, ibino mine karacel kede engano, mo me olibeti, kede bwini di rom aroma kede me giayala me odiko. Manoni en giayala awanga kame ngwe kur buta.

⁴²Giayala awanga noni kobino mino i nyima, i ekeko me Eema me riamo keda nakanaka pi kare lung. Kanono en kame ango abino riamo kede wu iye pi yamo kede wu.

⁴³Ango abino riamo kede jo me Isirael kanono, di deyo na ko bino lonyo kanono doko kabedo kacil.

⁴⁴Ango abino lonyo Eema me riamo keda kede alutari; doko abino kwero Aaron da kede awobe mege pi gin timo na tic bala josaseredoti.



⁴⁵Ango abino bedo i diere me jo me Isirael, di ako bedo Rubanga gi.

⁴⁶Di gin kiko bino ngeno be ango en Rwot Rubanga gin, ngat kame bin akwanyo gi ki lobo me Misiri tetekeny ango abed i diere gin. Ango en Rwot Rubanga gin.

Yai 30

Alutari me Wango Odok Angwe Kur

(Yai 37.25-28)

¹ Ibino timo alutari kede ebaos me yat akasia, kame ibino wango iye odak angwe kur.

² Ibino time di ngete dedede rorom, boro mere puti acel kede dul kede laco mere da kamanono, kede boro mere malo ko bino bedo puti adek. Iswonge kame tie i isondana mege bino ribere di kitie kicel kede kome.

³ Ibino puco wie malo, ngete ongwon dedede, kede iswonge mege kede saabu kame kojililo, di iko toko ngete rimaro kede saabu.

⁴ Tim ne alung are me saabu, di iko keto gi piny me kakame kotoko i nget alutari tuni tuni di kipimere. Gin kibino bedo me rwako atekai me yene.

⁵ Ibino timo atekai nogo kede ebaos me yat akasia, di iko puno kom gi kede saabu.

⁶ Ket alutari noni i nyim egoe me isenge kame liero i nyim Sanduku me Isikan; kanono en kame ango abino riamo kede wu iye.

⁷ Odiko acelacel kame Aaron oko ot pi iiko italan, en poore ewang odak angwe kur i wi alutari nono.

⁸ Otieno da kame en eoto pi cwinyo italan, en poore etim bobo kamanono.

⁹ In likame ibino yalo i wi alutari noni odak angwe kur kalikame cil, arabo giayala awanga moro, amoto giayala me alos; doko likame ibino onyo giayala amata moro i wie.

¹⁰ Mwaka acelacel tien acel, Aaron bino timo pwola me lonyo alutari di esuto i iswonge ongwon dedede remo me leini kame kongolo pi bedo giayala me kwanyo dub. Kobino timo kamanoni buli mwaka, pi kare dedede. Alutari noni bino bedo gikacil adikinicel kame komio buta.”

Esolo kame Kokwanyo pi Eema ka Rwot

¹¹ Rwot oko waco ne Musa be,

¹²” Kame in iyaro maro wel me jo me Isirael, dano acelacel poore lako kuo mere kibuta, tetekeny kur can moro pot i kom gi di otie maro wel gi.

¹³ Dano acelacel kame kobino wandiko bino culo sente kame komito, di lubere kede wel kame komito i Kabedo Kacil. Jo dedede poore cul sente nono bala giamia buta.

¹⁴ Jo dedede kame kobino maro wel gi, cuo kame mwakini me dongo gi tie ot are kede kalamo, miero cula sente nono.



¹⁵Jo kame obaro likame bino culo kame kalamo, doko jocan da likame bino culo kame nonok, i kare kame gin kimio kede giayala noni buta pi kuo gi.

¹⁶In ibino gamo sente noni kikut jo me Isirael di iko tic kede pi konyo tice kame makere kede Eema me riamo keda. Esolo nono bino bedo i nyima bala gi me yutuno jo me Isirael, gikame gin kiculo pi lako kuo gi.”

Kalaya kame Kotimo kede Nyonyo Buronsi

¹⁷Rwot oko waco ne Musa be,

¹⁸“Ibino timo kalaya me nyonyo buronsi karacel kede dude kame en ecungo kede da me nyonyo buronsi. Ibino cibe i dierediere me Eema me riamo keda kede alutari, di iko keto pii iye.

¹⁹Aaron kede awobe mege bino tic kede pii nono me lwoko cing gi kede tien gi.

²⁰I kare kame gin kidonyo kede i yi Eema me riamo keda, arabo kame gin kioto kede i alutari pi timo tic me mino giayala awanga buta, gin kong kibino lwokere kede pii nono, tetekeny kur kitoi.

²¹Gin miero kong kilwok cing gi kede tien gi, tetekeny kur kitoi. Manoni en cik kame gin kede ikwae gi poore kilubi pi kare dedede.”

Mo me Wir

²² Rwot oko waco ne Musa be,

²³” Kwany jamini kame ngwe kur gi: kilo kanyape me mura aliu, kilo adek me sinamon angwe mit, kede kilo adek me balsam,

²⁴kede kilo kanyape me kasia (gin dedede miero kopim gi bala kame mitere i kabedo kacil). Med iye lita ongwon me mo me olibeti,

²⁵di iko timo kede gi mo kacil me wir, bala kame kotimo kede mo angwe kur; en ebino bedo mo kacil me wir.

²⁶Ti kede me wiro Eema me riamo keda, Sanduku me Isikan,

²⁷emesa kede jame mege dedede, gicibo etala kede jame mege dedede, alutari me wango odok angwe kur,

²⁸alutari kame koyalo iye giamia awanga karacel kede jame mege dedede, kede kalaya karacel kede gikame kocibe iye.

²⁹In ibino kwero gi buta iepone noni, tetekeny gin kibed gikacil adikinicel; gimoroni dedede kame mulo gi bino udo peko pi twer kame kitie kede.

³⁰Di do in iko bino wiro Aaron kede awobe mege, di iko kwero gi pi gin bedo josaserdoti kame timo nango tic.

³¹In ibino waco ne jo me Isirael be, ‘Mo noni en kame bino bedo mo nango kacil me wir pi kare dedede.



³²Likame kobino tic kede me wiro jo atatai, doko likame kopoore timo moro ace kame konyalo bala en; en ebedo gikacil, doko miero ebed gikacil kibutu.

³³Ngatamoroni kame bino nyalo mo moro bala en, arabo ngatamoroni kame bino kete i kom dano moro kalikame obedo ngasaseredoti, kobino riame tenge kibut jo na.’ “

Odok Angwe Kur

³⁴Rwot oko waco ne Musa be, “Kwany jamini kame ngwece gi mit gi: sitakite, onika, galbanum, kede odok angwe kur acil; kwany gi di kirorom.

³⁵Ti kede gi me timo odok angwe kur bala kame kotimo kede moe angwe kur. Ket iye munyo, ebed gikacil.

³⁶Pok mogo di iko yoko dok purupuru, di iko poko mogo kikom kame iyoko nono iko tero di iko keto i nyim Sanduku me Isikan, i yi Eema me riamo keda, kakame ango abino riamo kedi iye. Odok angwe kur noni miero bed gikacil adikinichel kibutu.

³⁷Kur inyal iepone noni odok moro angwe kur piru. Odok angwe kur nono miero bed gikacil kame imio buta.

³⁸Ngatamoroni kame bino nyalo odok angwe kur moro kame cal bala en, pi en tic kede bala mo angwe kur, kobino riame tenge kibut jo na.”

Yai 31

Jo kame Poore Timo Eema ka Rwot

(Yai 35.30—36.1)

¹Rwot oko waco ne Musa be,

²” Neningo, ango atieko yero Basalel wot ka Uri, akwar Kur, dano me ekeko ka Yuda.

³Ango atieko mino twer na opong i kuo mere, doko amie apiranut, rieko kede ngec me timo jamini dedede kede diru,

⁴pi en pwakuno timo jamini mogo kede saabu, siliba kede nyonyo buronsi;

⁵kede pi en luro kide acil kame komwono me tubuso gimogo, kede pano ebao kede diru me epone dedede.

⁶Ango atieko yero da bobo Okoliab wot ka Akisamak, dano me ekeko ka Dan, pi nywako timo tic kede en. Ango atieko mino apiranut but jo dedede kame timo tic kede diru, tetekeny gin kitim jamini dedede kame ango atieko ciko ni gi:

⁷Eema me riamo keda, Sanduku me Isikan kede kom me timo kisa kame bedo i wie, kede jamini dedede me yi Eema,

⁸emesa kede jamini mege, gicibo etala kame kotimo kede saabu kame kojililo kede jamini mege dedede, alutari me wango odok angwe kur,

⁹alutari me giayala awanga kede jamini mege dedede, kalaya me lwokere kede gi me cibe,



¹⁰kede igoen kame kotimo kiber, igoen kacil me ngasaseredoti, kame kotimo ne Aaron kede awobe mege, pi gin ngapo kame kitie timo tic me josaseredoti,

¹¹mo me wir, kede odok angwe kur kame kodunyo i Kabedo Kacil. Gin kibino timo gi nogi bala kame ango atieko ciko ni.”

Sabato en Ceng me Wei

¹²Rwot oko waco ne Musa be

¹³en kikome poore ewace jo me Isirael be, “Wun ibinunu gwoko ceng Sabato na, pien ebedo gianena kame bino bedo tie i dierediere nango kede wu pi kare dedede, pi nyuto be ango atieko yero wun pi bedo jo na.

¹⁴Wun ibinunu gwoko ceng Sabato, pien ebedo ceng kacil kibutu; ngatamoroni kalikame bino gwoke di eko timo tic i ceng nono, kobino neke.

¹⁵Ibinunu timo tice wu pi ceng kanyape, do ceng me kanyaare obedo ceng me wei kenekene, ceng kacil ka Rwot. Ngatamoroni kame bino timo tic i ceng nono, kobino neke.

¹⁶Jo me Isirael miero gwok ceng Sabato pi kare dedede, bala isikan kame bedo nakanaka.

¹⁷En ebedo gianena kame bino bedo nakanaka i dierediere na kede jo me Isirael, pien ango acweo malo kede piny pi ceng kanyape, di i ceng me kanyaare mere ako jiko tic di ako wei.”

¹⁸Kakame Rubanga otieko yamo kede Musa i wi moru me Sinai, eko mine kide abatal are, kame oudo Rubanga kikome owandiko iye cik.

Yai 32

Cal me Atin Twon kame Kotimo kede Saabu

(Iswilia 9.6-29)

¹Kakame jo oneno kede be Musa oudo ogal i wi moru, gin kiko cokere but Aaron di kiko waco ne be, “Wan likame ongeogikame otieko timere ne Musa ngat kokwanyo wa ki lobo me Misiri, in tim ne wan rubanga kame bino telo wa.”

²Aaron oko waco negi be, “Kwakwanyunu mwolere kame kotimo kede saabu, kame mon wu, awobe wu, kede anyira wu tie ngapo i yit gi, di ikounu kelo gi buta.”

³Di jo dedede oko kwakwanyo mwolere kame kotimo kede saabu, kame oudo gin kitie ngapo i yit gi, di kiko tero but Aaron.

⁴Aaron oko gamo mwolere me yit nogo, di eko twako gi, eko lulungo gi, eko timo kede cal me atin twon. Jo oko waco be, “Okweunu wan jo me Isirael, rubanga wa ine, ngat kokwanyo wa ki Misiri!”

⁵Kakame Aaron oneno kede gikame oudo tie timere, en eko gero alutari i nyim cal me atin twon nono di eko waco be, “Diki obinunu tedo ebaga me woro Rwot.”



- ⁶ Oru mere gin kiko yai odiko sek, di kiko kelo leini mogo me mino giayala awanga kede mogo kiko neko pi gin camo bala giamia me nywak. Di jo oko bedo piny cam kede amata, kiko bilor i miel kede timo caro.
- ⁷ Rwot oko waco ne Musa be, “Dok piny awakawaka! Jo ni kame in ikwanyo ki lobo me Misiri, otieko dubere.
- ⁸ Gin ajoto kitieko weko yongayo kame ango oudo aciko gi be kilubi; gin kitieko timo cal me atin twon di kiko wore kede kiko mine giayala di kiwaco be manono en rubanga gi, ngat kokwanyo gi ki lobo me Misiri!”
- ⁹ Rwot oko waco ne Musa be, “Ango atieko neno epali ka jogi.
- ¹⁰ Nataman in wek ango kede gin, tetekeny lilo na bed i kom gi di ako muducaro gi. Di ango ako bino mino in idoko ateker adwong.”
- ¹¹ Do Musa oko ngangao Rwot Rubanga mere di ewaco be, “Okwe Rwot, pinyo bo kame mio cunyi wang i kom jo ni kame in ikwanyo ki lobo me Misiri kede twon teko kede twer?”
- ¹² Pinyo bo kame mio in imio jo me Misiri kare me waco be in ikwanyo jo ni ki Misiri tetekeny inek gi i mori, di iko muducaro gi atwal atwala? Jik lilo; lok tam ni di likame iko kelo can moro i kom jo ni.
- ¹³ Yutuno jotic ni Aburaam, Isaka kede Yakobo. Yutuno cikere kame bin in itimo kede gin di ikwongere in kikomi be ibino mino gi ikwae kame tot bala acer kame tie i edou, kede be ibino mino ikwae gi lobo nono dedede kame in bin icikere be bino doko mergi atwal.”
- ¹⁴ Di do Rwot oko loko tam mere di likame eko kelo can kame en oudo eiko pi kelo i kom jo mege.
- ¹⁵ Musa oko wok piny ki wi moru, di emako kide are abatal kame kowandiko cik i kom gi tuni tuni.
- ¹⁶ Rubanga en kame oudo otimo kide nogo, doko iwandik kame oudo tie i kom gi da en kame ewandiko, egoro gi i kom kide nogo.
- ¹⁷ Yosua oko winyo woo me dwan jo di kitie ilelem, di eko waco ne Musa be, “Ango atie winyo woo me yi i kimere.”
- ¹⁸ Do Musa oko waco be, “Woo nono likame winyere bala dwan jo koloo yi, arabo bala dwan jo kame kobwono i yi; en ebedo dwan jo kame tie wer.”
- ¹⁹ Kakame Musa oko noko kede kimere di eko neno atin twon, kede eko neno jo di kitie miel, cunye oko wang, di eko lwomo kide abatal kame oudo emako di eko tuturo gi i dud moru.
- ²⁰ En eko kwanyo atin twon kame gin oudo kitimo, eko calaro en kede mac, eko riege edoko purupuru, di eko rube i pii. Di do eko mino jo me Isirael oko mate.



- 21**Musa oko penyo Aaron be, “Nyo kame jogi otimo nin en komio in imio gin kitimo twon dub kame dwong rom kano?”
- 22**Aaron oko dwoko be, “Adwong na, kur ilil keda; in ingeo kite kame jogi tam gi tie kede i timo gikarac.
- 23**Gin kiwaco na be, ‘Wan likame ongeo gikame otieko timere ne Musa ngat kokwanyo wa ki lobo me Misiri, in tim ne wan rubanga kame bino telo wa.’
- 24**Aso, ango ako waco ne gin kelo na saabu kame ngat acelacel oudo tie kede; di jo kame oudo tie kede oko kwanyo mwolere me yit gi di kiko mina, di ango ako lwomo gi i mac, di atin twon noni oko wok kiye.”
- 25**Musa oko neno be Aaron oudo oko jalo jo obilorikin di kiko doko gi me nyero but jokwor gi.
- 26**Manono oko mino en eko cungo i erute me kakame jo oudo ogero iye kimere di eko lelemo be, “Jo dedede kame mito Rwot kibin buta kan!” Di Jolebi dedede oko cokere bute.
- 27**En eko waco negi be, “Rwot Rubanga me Isirael ciko ngat acelacel kikom wu pi ngapo epima mere i piere di ikounu donyo mamano kimere, cako i erute tetuni tuno tetuca, di inekunu imiegu wu, adiereson wu, kede jokio wu.”
- 28**Jolebi oko timo bala kame Musa oudo ociko negi, di ceng nono kiko neko jo kame romo tutumia adek.
- 29**Musa oko waco negi be, “Ceng atin wun itiekunu kwerere kenu pi bedo jo kame timo tic ka Rwot, pien dano acelacel kikomu oneko wode arabo omin mere, manono oko mino Rwot omio wu winyo mere.”
- 30**Ceng alubo mere Musa oko waco ne jo be, “Wun itiekunu timo dub arac twatwal. Do nataman ango bobo ayaro dok i wi moru but Rwot; cengemogo akaruno kwane di eko sasiro wu.”
- 31**Aso, Musa oko dok but Rwot di eko waco be, “Jogi otieko timo dub adwong twatwal; gin kitieko timo rubanga gin kede saabu.
- 32** Nataman ango akwai pi sasiro dub gin, do ka likame in iyaro sasiro gin, ango akwai iwei nyinga tenge ki itabu kame in iwandiko iye nying jo nin.”
- 33**Rwot oko waco ne Musa be, “Ngat kotimo dub buta en kame ango abino weno nyinge ki itabu na.
- 34**Nataman in oti di iko telo jo ot kabedo kame ango atieko waco ni; neningo, malaika na bino telo ni yongayo. Do ka ceng me mino gin alola otuno, ango abino mino gin alola pi dub gin.”
- 35**Di Rwot oko cwano ne jo aumpuli pien gin oudo kimio Aaron otimo cal me atin twon.



Yai 33

Rwot Owaco ne Jo me Isirael pi Yai weko Moru me Sinai

¹Rwot oko waco ne Musa be, “Yai iwek kabedo noni, in karacel kede jo kame in ikelo ki lobo me Misiri, di ikounu ot i lobo kame bin ango akwongere pire but Aburaam, Isaka, kede Yakobo, di awaco be, ‘Ango abino mino lobo noni but ikwae wu.’

²Ango abino cwano malaika telo wu, di ango ako bino riamo tenge jo Kanan, jo Amor, jo Kiti, jo Perisi, jo Kibi, kede jo Yebu.

³Wun itienu ot i lobo kame lac doko di emio; do ango likame abino ot kede wu pien wun ijounu epali, doko manono cengemogo mio ako muducaro wu i yongayo.”

⁴Kakame jo owinyo kede kope me gero nogi, gin kiko donyo koko di kiko weko ngapo mwolere me tubuso kom.

⁵Pien Rwot oudo ociko Musa pi waco negi be, “Wun ijounu epali. Ka koto di ango aupere kede wu akadi pi kare katitidi, koto amuducaro wu. Aso, nataman kwanyunu tenge mwolere me tubuso kom, di ango ako neno gikame abino timo ne wu.”

⁶Pi mano, jo me Isirael oko kwanyo tenge mwolere me tubuso kom, di do likame kiko ngapo gi cako i kare kame kiyai kede ki moru me Sinai.

Eema me Ariamakin kede Rwot

⁷Kame jo me Isirael oudo gero kimere gi, Musa oudo tero Eema kacil di eko sipe kakame bobor kede kakame jo ogedo iye. En oudo eko lwonge be Eema me ariamakin kede Rwot. Jo dedede kame oudo mito kop kame wok kibut Rwot oudo kioto i eema me riamo kunono.

⁸I kare dedede kame Musa oudo oto kede i eema nono, jo dedede oudo yai di kiko cungo, ngat acelacel i nyim ekeko me kima mere, di kiko donyo ngino Musa pake en tieko donyo i Eema nono.

⁹Kame Musa oudo otieko donyo i Eema nono, edou kame cal bala epir oudo bino di eko cungo i nyim ekeko me Eema nono, di Rwot ko donyo yamo kede Musa.

¹⁰I kare dedede ka jo oudo oneno edou kame cal bala epir di ocungo i nyim ekeko me Eema nono, jo dedede oudo yai cungo i nyim ikekon me kimere gi, di kiko luro wi gi piny.

¹¹Iepone nono Rwot oudo yamo kede Musa wang i wang, bala kame dano yamo kede ngawote. Di do Musa bin bobo ko dok kakame jo oudo ogero iye kimere. Do eponga kame oudo konye, Yosua wot ka Nun, oudo dong bedo i yi Eema nono.

Rwot Ocikere pi Bedo kede Jo mege

¹²Musa oko waco ne Rwot be, “Neningo, in en kame iwaco na be akwany jogi, do in likame iko mina angeo ngat kame in itie oora kede. Aso di in itieko waco be ingea kiber, doko cunyi yom i koma.



- ¹³Pi mano, ka cunyi yom i koma, mia angei iik nin, tetekeny ango aniang i komi kiber di ako meede kede yomo cunyi. Ngei kiber be ateker noni obedo jo ni.”
- ¹⁴Rwot oko waco be, “Ango abino upere kedi, di ako mini iudo anapakin.”
- ¹⁵Musa oko gamo be, “Ka in likame iyaro upere kede wa, kur imi wan oyai ki kan.
- ¹⁶Pien jo bino ngeno benyo be in cunyi yom i koma, karacel kede jo ni, ka likame iupere kede wa? Upere nin kede wa bino mino wan obedo pat kede jo dedede me wi lobo.”
- ¹⁷Rwot oko waco ne Musa be, “Ango abino timo bala kame in ikwao, pien ango angei kiber doko ango cunya yom i komi.”
- ¹⁸Musa di oko waco be, “Ango akwai imia anen rieny me deyo ni.”
- ¹⁹ Rwot oko gamo be, “Ango abino beo i nyimi kede angosibib na dedede, di ako bino waco i nyimi nyinga kacil; ango en Rwot, abino timo kisa kede mwolo but ngat kame cunya oyero.
- ²⁰Do ango likame abino mini ineno wanga; pien likame tie dano moro kame nena di eko dong kuo.
- ²¹Neningo, kabedo tie i ngeta, kakame in ibino cungo iye i wi kidi;
- ²²tetekeny kame ango atie beo kede deyo na, ango abino keti kakopokere me moru, di ako umi kede cinga paka ango tieko kato.
- ²³Di do ango ako bino kwanyo cinga tenge, di in iko neno ngea do likame nyima.”

Yai 34

Kotimo Bobo Kide Ace Are Abatal

(Isiwilia 10.1-5)

- ¹Rwot oko waco ne Musa be, “Tieng bobo kide are kame cal bala maka me agege ka, di ango ako bino wandiko i kom gi kope kame oudo tie i kom maka kame in oudo ibebelo.
- ²Iikere, di diki odiko iko yito i wi moru me Sinai pi riamo keda i wie kunono.
- ³Likame tie ngatamoro kame bino yito malo kedi; kur ngatamoro tun karamoro me moru; doko kur romini arabo doke ot cam i dud moru.”
- ⁴Aso, Musa oko tiengo kide are abatal kame cal bala me agege; di eko dilo yai odiko eko yito i wi moru me Sinai bala kame Rwot oudo ociko ne.
- ⁵Rwot oko bino kede edou di eko cungo karacel kede Musa i wi moru kunono, di eko waco nyinge kacil be, “Rwot.”
- ⁶ Rwot oko beo i nyime di eko waco be, “Ango en Rwot, abedo Rubanga kame mwol, doko angakisa, likame cunya susunyo wang, adwong kede amara kalikame lokere doko agenere.



⁷Ango anyuto amara na kalikame lokere but lwak me ikwae me tutumian kede tutumian, doko asasiro jo kame timo gikareco, jo kame turo iswil kede jo kame dubo; do likame aweko ngat arac aweka, ango amio alola but idwe kede but lwak me ikwae me adek tuno i me ongwon, pi dub me jonywal gi.”

⁸Musa oko susunyo luro wie piny eko woro Rubanga.

⁹En ewaco be, “Okwe Rwot, ka ateteni in cunyi yom i koma, ango akwai iupere kede wa. Akadi bed bala jogi jongut gi, do in sasiro gikareco wa kede dub wa, di iko gamo wan obed jo ni.”

Konyogao Timo Isikan

(Yai 23.14-19; Iswilia 7.1-5; 16.1-17)

¹⁰Rwot oko waco ne Musa be, “Nataman ango atie timo isikan kede jo me Isirael. Ango abino timo jamini me aura i nyim gi, jamini me aura kame lem pwodi likame kotimo i wi lobo lung arabo i piny moroni. Jo dedede kame wun ibedunu i diere gi bino neno gikame Rwot oyaro timo; pien ango ayaro timo ne wun jamini me aura akelo lworo.

¹¹Wun poore igwokunu gikame tin ango amito ciko ne wu pi timo. Neningo ango ayaro riamo tenge ki nyimu jo Amor, jo Kanan, jo Kiti, jo Perisi, jo Kibi, kede jo Yebu.

¹²Gwokerenu kur itimunu isikan moro kede jo me piny kame itienu ot iye, pien ekaruno doko ne wu bala owic me ciko wu.

¹³Do wun ibinunu rereto alutarin gin, mumuko ipirin kame gin kiworo kiye rubangan gi, di ikounu totongo cal me rubangan gi.

¹⁴” Likame ibinunu woro rubanga moro ace, pien ango Rwot, nyinga Nyeko, abedo Rubanga kame nganyeko.

¹⁵Likame ibinunu timo isikan kede jo me piny nono, pien kame gin kibino woro rubangan gi, di kimio giayala but gi, gin kibino lwongo wu pi nywako kede gi, di wuda ikounu camo giayala gi.

¹⁶Doko cengemogo wuda ikounu bino nyomo ne awobe wu mon kikom anyira gin, di anyira gin ko bino mino awobe wu weko wora di kiko donyo woro rubangan gin.

¹⁷ “Likame ibinunu timo kede nyonyo kame kotwako cal moro me rubanga piru.

¹⁸ “Ibinunu tedo ebaga me Mugati kame Arup li iye. Ibinunu camo mugati kame arup li iye pi ceng kanyaare, i duwe me Abib bala kame ango aciko ne wu, pien duwe nono en kame wun bin iyaunu kede ki Misiri.

¹⁹ “Idwe kao dedede obedo mega, idwe awobe kede idwe acuo me leini dedede kame kopito i paco.

²⁰ Do ibinunu kwanyo atin romo pi lako kao me punda. Ka likame itimunu cul me lake, ibinunu turo ngute. Ibinunu da timo cul pi lako idwe awobe wu kao. “Likame tie ngatamoro kame poore bino i nyima kede cinge nono.



- 21 “Ibinunu timo tice wu pi ceng kanyape, do ikounu wei i ceng me kanyaare mere; akadi i kare me pur arabo i kare me kac.
- 22 “Ibinunu tedo Ebagame Kac i kare kame ibinunu cako kede kano engano ki poti, kede ibinunu da tedo Ebagame kimere i atiekini me mwaka i kare me ngwedo anyakini.
- 23” Jo wu dedede kame tie cuo miero bin i nyima tien adek buli mwaka pi wora, ango Rwot Rubanga me Isirael.
- 24Ango abino riamo atekerin tenge ki nyimu di ako nyano ikor me lobo wu; likame tie ngatamoro kame bino ngobelo lobo wu i kare kame wun ibinunu kede i nyima tien adek pi wora, ango Rwot Rubanga wu.
- 25 “Likame ibinunu mino giayala me mugati kame kotimo kede arup ka itienu mina giayala angola, doko likame ibinunu mino ringo moro me le kame kongolo me camo Ebagame Kalamo buto tuno odiko me ceng alubo.
- 26 “Kodere kame beco kame geo cek ki poti wu, ibinunu kelo gi i ot ka Rwot Rubanga wu. “Likame ibinunu tedo ringo me atin oromo arabo me atin diel kede cak ka toto mere.”
- 27Rwot oko waco ne Musa be, “Wandiko kope nogi, pien ango atie timo isikan kedi karacel kede jo me Isirael di lubere kede kope nogi.”
- 28Musa oko bedo i wi moru kunono kede Rwot pi ceng ot ongwon, di likame etie camo gimoro akadi mato pii. Musa oko wandiko kope me isikan nono i kide abatal, cik tomon nogo.

Musa Owok Piny ki wi Moru me Sinai

- 29 Kakame Musa oko wok kede piny ki wi moru me Sinai, di emako kide are kame oudo kowandiko iye cik, tur nyime oudo tie meny piento en oudo ebedo yamo kede Rwot; do en oudo likame engeo.
- 30Aaron karacel kede jo me Isirael dedede oko ngoloro Musa di kiko neno tur me nyime oudo tie meny, di lworoko mako gi noke.
- 31Do Musa oko lwongo gi; di Aaron karacel kede jotel dedede me ekodet oko dok bute, di Musa oko yamo kede gi.
- 32I cen mere di do jo dedede me Isirael oko noke, di Musa oko waco negi cik dedede kame oudo Rwot omie i wi moru me Sinai.
- 33Kakame Musa otieko yamo kede gin, eko umo nyime kede egoe.
- 34Do i kare dedede kame Musa oto kede i nyim Rwot pi yamo kede, en oudo ekwanyo egoe kame eumo kede nyime tenge. Di do kame bin en eko donyo ooko, en oudo eko waco ne jo me Isirael gi dedede kame oudo Rwot ociko.
- 35Jo me Isirael bobo bin ko neno be nyim Musa oudo tie rieny; di Musa bobo ko umo nyime kede egoe, paka tuno i kare kame en bobo bin edok yamo kede Rwot.



Yai 35

Iswilia kame Mako Sabato

¹Musa oko coko jo me Isirael dedede karacel di eko waco negi be, “Magi en gikame Rwot otieko ciko wu pi timo.

²Ibinunu timo tice wu pi ceng kanyape, do ceng me kanyaare obedo ceng kacil, ceng ka Rwot, ceng me wei kenekene. Ngatamoroni kame bino timo tic i ceng nono, kobino neke.

³Likame ibinunu cwinyo akadi mac i miere wu i ceng Sabato.”

Giamia pi Eema Kacil

(Yai 25.1-9)

⁴Musa oko bobo waco ne jo me Isirael dedede be, “Man en gikame Rwot ociko.

⁵Kwanyunu gikame itienu kede di ikounu mino Rwot giamia. Ngat kame cunye ler, wek ekel ne Rwot giamia me saabu, siliba, nyonyo buronsi;

⁶igoen ebululu ebululu, akwakwar, kede akwar kame kotimo kede yer me romini; igoen acil kame meny, igoen kame kotimo kede yer me diegi,

⁷launi kame konyongo me romini, kede imukulen ace; ibaon me yen kame kolwongo be akasia;

⁸mo me italan; jamini kame ngwece gi mit me nyalo mo me wir kede giadunya kame ngwe kur;

⁹kide me wel kame kolwongo be onik kede kide apat me wel kame kobino keto i kom epod kede i isau me kor ngasaseredoti.

Jamini me Timo Eema Kacil

(Yai 39.32-43)

¹⁰” Jo dedede kikom wu kame tie kede apiranut i tice poore bin di kiko timo jamini dedede kame Rwot ociko.

¹¹Eema kede aum mere, akod mege kede ibaon me purem mere, ari mege, ipirin mege, kede agangeta mege;

¹²Sanduku me Isikan, atekai mege, kom me timo kisa, kede esuka me isenge me galao en;

¹³emesa, atekai mege, kede jamini dedede kame make; mugati kame koyalo but Rubanga;

¹⁴gicibo etala kame kobino cwinyo, kede jamini mege; italan kede mo me piko i yi gi;

¹⁵alutari me wango odok kame ngwe kur, kede atekai mege; mo me wir; odok kame ngwe kur; esuka me galao ekeko me taberenakol;

¹⁶alutari me giayala awanga, kede kekei mere kame kotimo kede nyonyo buronsi, atekai mege, kede jamini mege kame kotio kede; kalaya me lwokere kede gi me cibe;



¹⁷isukan me celo diakal, ipirin mege kede agangeta gi; esuka me galao erute me diakal;

¹⁸loce kede aanoi me tweno taberenakol kede me tweno cel me diakal;

¹⁹igoen kame kotimo kiber kame josaseredoti ngapo pi timo tic i Kabedo Kacil, magonogo gin igoen kacil kame kotimo ne Aaron ngasaseredoti kede ne awobe mege.”

Jo Otero Giamia gi

²⁰Di do jo me Isirael dedede oko yai ki nyim Musa.

²¹Di gin kiko dwogo but Musa, ngat acelacel kame oudo owinyo i cunye, kede kame cunye oudo mito, kiko kelo ne Rwot giamia me timo Eema me ariamakin kede en, kede me timo tice mege dedede, kiton me timo igoen kacil me josaseredoti.

²²Aso, jo oko bino, cuo kede mon; jo dedede kame oudo cuny gi mito oko kelo akodeta me saabu, mwolere kame kongapo i yit, ipetai kame kongapo i lwet, irikoi kame kongapo i ngut, kede epone me jamini dedede kame kotimo kede saabu kame kongapo pi itubus, di gin kiko mino gi but Rwot.

²³Jo dedede kame oudo tie kede igoen apwot di kimeny oko ot kelo gi; igoen ebululu ebululu, akwakwar, kede akwar kame kotimo kede yer me romini; igoen kame kotimo kede yer me diegi, launi me romini, kame konyongo kiber, arabo imukulen ace kame konyongo kiber.

²⁴Jo dedede kame oudo karuno kwanyo siliba arabo nyonyo buronsi oko kelo gida giamia gi but Rwot. Jo dedede kame oudo tie kede ibaon me yat akasia, kame oudo kokaruno timo kede tic moroni kenekene, oko gida kelo giamia gi but Rwot.

²⁵Mon dedede kame oudo ipirana oko timo kede cing gi ausin me timo egoe, di kiko kelo ausin ebululu ebululu, akwakwar, kede akwar kame kotimo kede yer me romini kede igoen apwot kame meny.

²⁶Mon dedede kame oudo owinyo i cuny gi oko tic kede apiranut gi me timo ausin me cweno egoe kede yer me diegi.

²⁷Di jotel oko kelo kide me wel kame kolwongo be onik kede kide apat me wel, pi keto i kom epod kede i isau me kor,

²⁸kede mo me piko i italan, jamini kame ngwece gi mit pi nyalo kede mo me wir kede odok kame ngwe kur.

²⁹Jo dedede me Isirael, cuo kede mon kame oudo cuny gi mito kelo gimoro me timo tic kame oudo Rwot ociko Musa iye be jo timi, oko kelo jamini nogo but Rwot abongo adiadia moro.

Jotic kame Oyero pi Timo Taberenakol

(Yai 31.1-11)

³⁰Musa oko waco ne jo me Isirael be, “Nenunu, Rwot otieko yero Basalel, wot ka Uri, akwar Kur, en dano me ekeko ka Yuda.



³¹Rubanga otieko mino twer mere opong i kuo mere; doko emie apiranut, rieko, kede ngec me timo epone me jamini dedede kede cinge,

³²pi en pwakuno timo jamini mogo kede saabu, siliba kede nyonyo buronsi;

³³kede pi en luro kide me amwona me tubuso gimogo, kede pano ebao, kede pi en timo tice apat me epone dedede, kame kotimo kede cing.

³⁴Rwot otieko mine karacel kede Okoliab wot ka Akisamak, dano me ekeko ka Dan, cuny me pwonyo jo icegun.

³⁵En etieko mino gin apiranut me timo tic cing me epone dedede, arabo me pwakuno timo jame, amoto me timo igoen ebululu ebululu, akwakwar, kede kame kwar mere, kede me timo igoen apwot di kimeny.

Yai 36

¹” Basalel, Okoliab, kede jotic apat dedede kame Rwot otieko mino apiranut kede niang i kom epone me timo jamini dedede kame mitere pi gero kabedo kacil, bino timo gi dedede bala kame Rwot otieko ciko.”

Jo Otero Giamia Atot

²Musa di do oko lwongo Basalel, Okoliab kede jotic apat dedede kame Rwot oudo omio apiranut, jo dedede kame oudo owinyo i cuny gi pi bino timo tic;

³Musa di oko mino gin giamia dedede kame oudo jo me Isirael otero bute me timo tic me Eema kacil. Jo me Isirael oko meede kede tero giamia gi but Musa buli odiko.

⁴Manono oko mino jo dedede kame oudo tie timo tice me epone dedede me Eema kacil oko ot kuno, dano acelacel oweko tic mere,

⁵di gin kiko waco ne Musa be, “Jo tie kelo jamini kame tot kalamo kame mitere pi timo tic kame Rwot ociko ne wa timo.”

⁶Aso, Musa oko mino cik kame oko sarakino i kimere dedede be, “Likame poore ngatamoro bobo kelo gimoro bala giamia me gero Eema kacil.” Di oko do gengo jo kelo giamia gi;

⁷pien jamini kame oudo jo otieko kelo oudo tot kalamo kame oudo mitere pi tieko tic.

Gero Taberenakol

(Yai 26.1-37)

⁸Jo kame oudo ipirana kalamo jo icegun kikom jo kame oudo tie timo tic, en kame oko timo taberenakol. Gin kitime kede isukan tomon kame kotimo kede ausin ebululu ebululu, akwakwar kede kame kwar mere, di kotubuso kom gi kede cal me cerubim.

⁹Boro me esuka acelacel oudo tie mita tomon kiwie are, kede laco mere oudo tie mita are.

¹⁰Gin kiko kuno isukan kany kiribakino gi karacel, di bobo kiko timo kamanono da kede icegun kany kame oudo odong.



- ¹¹Gin kiko dodolo egoe kame erangi mere ebululu ebululu di kiko kune ilak esuka me ooko me abunge acelacel.
- ¹²I lak abunge me agege, gin kiko dodolo egoe nono tien ot kany, di bobo kiko dodolo egoe me lak abunge me are da tien ot kany di kipimere kede me abunge me agege.
- ¹³Gin kiko timo akod ot kany me saabu di kiko tic kede gi me ribakino abungeta me isukan nogo karacel; manono oko mino taberenakol oko bedo di etie kicel.
- ¹⁴Di gin kiko timo isukan tomon kiwie acel kame kotimo kede yer me diegi, me umo taberenakol.
- ¹⁵Gin kiko timo gi di kirorom, boro me esuka acelacel oudo tie mita tomon kiwie adek, kede laco gi oudo tie mita are.
- ¹⁶Gin kiko kuno isukan kany iribakino gi karacel i abunge acel, kanyape kame oudo odong da gin kiko kuno kiribakino i abunge acel.
- ¹⁷Di kiko kuno egoe kame kododolo tien ot kany i lak esuka me ooko i abunge acelacel.
- ¹⁸Gin kiko timo akodeta ot kany me nyonyo buronsi pi ribakino abungeta are nogo, tetekeny kibed aum acel.
- ¹⁹Gin bobo kiko timo ne Eema nono aum ace are, acel kame kotimo kede lau me oromo kame konyongo kede kame ume ki ooko kame kotimo kede emukule ace apwot.
- ²⁰Di do kiko timo ne Taberenakol ibaon me yat akasia kame kiko sisipo me timo purem mere.
- ²¹Boro me ebao acelacel me purem oudo tie puti tomon kiwie kany kede laco gi oudo romo puti are.
- ²²Ebao acelacel oudo tie kede tiene are me ribakino gi karacel; gin kiko timo kamanono kede ibaon dedede me purem me Taberenakol.
- ²³Gin kiko timo ibaon me purem me taberenakol kaman: ibaon ot are kame kocibo i ngete kame dok i bad tetu piny;
- ²⁴kede kiko timo da kede nyonyo siliba agangeta ot ongwon kame koketo i dud ibaon ot are nogo, agangeta are are i dud ebao acelacel me gango tiene are.
- ²⁵Gin kiko timo ibaon ot are me purem pi keto i nget taberenakol tetu ocelu kame dok i bad tetu malo,
- ²⁶kede agangeta ot ongwon kame kotimo kede nyonyo siliba. Kiko keto agangeta are are i dud ebao acelacel.
- ²⁷Gin kiko timo ibaon kanyape pi keto i ngei taberenakol kame dok i bad tetu tim,
- ²⁸kede kiko timo da bobo ibaon are me isondana me ngee.



²⁹Ibaon me isondana nogi gin kiko mino opokere i tetu piny, do kiko ribere i wi gi malo, i alung me agege. Ibaon are me isondana nogo bin oko timo kamanoni.

³⁰Manoni bin oko mino ibaon me purem me ngee oko bedo kanyauni, di dud ebao acelacel oudo tie kede agangeta are are kame kotimo kede siliba.

³¹Gin kiko timo ari tomon kiwie kany me ebao me yat akasia, ari kany pi ibaon me purem me tetucel me taberenakol,

³²kede da bobo ari kany pi ibaon me purem tetu ocelu, kede bobo kany me purem me ngee, bad kame dok tetu tim.

³³Ari me diere, kame beo i kor ibaon me purem, oudo rire yai ki lak taberenakol tetucel tuno tetu ocelu.

³⁴Gin kiko puno ibaon me purem kede saabu di kiko keto negi alung kame kotimo kede saabu, me rwako ari. Ari nogo da oudo kopuo kede saabu.

³⁵Gin kiko timo isenge kede egoe kame meny, kame oudo kotimo kede ausin me erangi ebululu ebululu, akwakwar, kede kame kwar, di kiko kuno iye cal me cerubim kede apiranut.

³⁶Kiko timo ipirin ongwon me yat akasia pi tweno egoe me isenge, kiko puno gi kede saabu, di kiko guro akod kame kotimo kede saabu i kom gi. Di do kiko timo negi agangeta ongwon kame kotimo kede siliba.

³⁷Gin kiko timo egoe kame pwot di emeny, me galao ekeko me Eema; kitime kede ausin me erangi ebululu ebululu, akwakwar, kede kame kwar di kiko tubuso en, kikue kede piso me cing.

³⁸Kiko timo ne egoe me galao ekeko nono ipirin kany kame koguro akod i kom gi. Di gin kiko puno wi ipirin nogo kede saabu karacel kede atad gi da, kede kiko timo ne ipirin nogo agangeta kame kotimo kede nyonyo buronsi.

Yai 37

Timo Sanduku me Isikan

(Yai 25.10-22)

¹Basalel oko timo Sanduku me Isikan kede ebao me yat akasia; boro mere oudo tie puti ongwon, laco mere puti are kede boro mere malo puti are.

²En eko puno yie kede ngee kede saabu kame kojililo, doko eko toko ngee kede saabu rimaro.

³En eko timo alung ongwon me saabu di eko keto gi i tiene ongwon, alung are tetucel kede are da tetucel.

⁴Di eko timo ibaon me yat akasia me yene, di eko puno gi kede saabu,

⁵di eko rwako ibaon nogo i wang alung nogo i nget sanduku tuni tuni, me yene.



⁶En eko timo kom me timo kisa kede saabu kame kojililo; boro mere oudo tie puti ongwon kede laco mere puti are.

⁷En eko timo cerubim are kede saabu; eteto gi kede enyondo,

⁸acel etimo i ajikini me kom me timo kisa tetucel, acel da eko timo tetuca mere. En etimo gi di kitie kicel kede kom me timo kisa.

⁹Cerubim nogo oudo nenere di nyim gi oluro neno kom me timo kisa, doko oudo kiyararo bwom gi oume.

Timo Emesa me Keto Mugati kame Koyalo but Rubanga

(Yai 25.23-30)

¹⁰En eko timo da emesa kede ebao me yat akasia; boro mere oudo tie puti adek kede laco mere puti acel kede dul, kede boro mere malo oudo tie puti are.

¹¹En eko puno kome dedede kede saabu kame kojililo, di eko toko lak ngete kede saabu rimaro.

¹²Di eko timo ne ebao kame gwako tiene rimaro, di laco mere rom kede yi cing dano, di eko toke kede saabu.

¹³En eko timo ne emesa nono alung ongwon me saabu di eko keto gi i isondana ongwon dedede, acelacel i tiene acel.

¹⁴Alung me rwako ibaon me yeno emesa en eko keto di iyapiyapi kede ebao kame oudo gwako tiene rimaro.

¹⁵En eko timo atekai me yat akasia pi yeno emesa, di eko puno gi kede saabu.

¹⁶En eko timo kede saabu kame kojililo, jamini kame oudo opoore keto i wi emesa: suanin kede bakulin mege me dunyo odok angwe kur, kede da jagin kede cupan mege me onyo giayala amata.

Timo Gicibo Etala

(Yai 25.31-40)

¹⁷En eko timo da gicibo etala kede saabu kame kojililo. Eteto dude piny kede epir mere kede enyondo; ikopon mege kede ature me tubuso en, eko teto oribere i kome.

¹⁸Gicibo etala nono oudo tie kede jange kanyape kame yai i ngete, adek tetucel kede adek tetu ocelu.

¹⁹Ajange acelacel kikom ajange kanyape nogo oudo tie kede ikopon adek kame kotimo bala ature kede pote mege.

²⁰Ikopen ongwon kame kotimo bala ature kede pote mege oudo tie i kor epir me gicibo etala.

²¹Kikom ajange kanyape nogo, i dierediere me tien ajange are are oudo tie iye buli ikopo kame kotimo bala ature kede pote mege i kor epir me gicibo etala.



²²Gicibo etala, karacel kede ajange mere, kiton ature mere oudo obedo saabu kame kojililo kame koteto kede enyondo di kiribere kitie kicel.

²³En eko timo ne gicibo etala nono italan kanyaare karacel kede makasi mere kede sinian mege kame kotimo kede saabu kame kojililo.

²⁴En eko tic kede saabu kame kojililo, kame romo kilo 35 pi timo gicibo etala nono kede jamini mege dedede.

Timo Alutari me Wango Odok Angwe Kur

(Yai 30.1-5)

²⁵En eko timo alutari me wango odak angwe kur kede ebao me yat akasia. Etime di ngete dedede rorom, boro mere puti acel kede dul, kede laco mere da kamanono, kede boro mere malo oudo tie puti adek. Iswonge kame tie i isondana mege oudo oribere i kome di kitie kicel kede en.

²⁶En eko puno wie malo, ngete ongwon dedede, karacel kede iswonge kede saabu kame kojililo, di eko toko ngete kede saabu rimaro en.

²⁷Di eko timo ne alung are me saabu, di eko keto gi piny me kakame kotoko i nget alutari tuni tuni di kipimere, pi gin bedo me rwako atekai me yene.

²⁸Di eko timo atekai nogo kede ebao me yat akasia, di eko puno kom gi dedede kede saabu.

Timo Mo me Wir kede Timo Odok Angwe Kur

(Yai 30.22-38)

²⁹En eko timo mo kacil me wir da, kede odak angwe kur da kacil, kame kotimo bala kame konyalo kede mo angwe mit.

Yai 38

Timo Alutari me Wango Giayala

(Yai 27.1-8)

¹Basalel oko timo alutari me wango giayala kede ebao me yat akasia; boro kede laco mere oudo rorom; boro mere oudo tie puti kanyaare kede dul, laco mere da kamanono, kede boro mere malo oudo tie puti ongwon kede dul.

²Eko timo ne iswonge i isondana mege ongwon dedede, di iswonge nogo tie kicel kede alutari, di eko puno alutari lung kede nyonyo buronsi.

³En etimo da jamini dedede kame kotimo kede tic me alutari, agune, gi me kikiso wi alutari, kalayan, ilumai, kede itatany. En eko timo jamini nogi dedede kede nyonyo buronsi.

⁴Eko timo kekei me alutari kede nyonyo buronsi di eko kete i alutari i dierediere me wie malo kede dude piny.

⁵Di eko timo alung ongwon eko keto gi i isondana ongwon me kekei nono pi bedo me rwako atekai;



⁶En eko timo atekai me yat akasia, di eko puno gi kede nyonyo buronsi.

⁷Di en eko rwako gi i wang alung kame tie i nget alutari pi bedo me yene. Alutari nono oudo kotime kede ibaon di yie twolo.

Timo Kalaya me Nyonyo Buronsi

(Yai 30.18)

⁸En eko timo kalaya me nyonyo buronsi karacel kede gicibe; etime kede ilaburan me nyonyo buronsi me mon kame oudo timo tic i dog ekeko me Eema me ariamakin kede Rwot.

Timo Cel me Diakal me Taberenakol

(Yai 27.9-19)

⁹En eko timo cel me diakal me Taberenakol kede isukan ameny. I bad tetu piny boro me isukan oudo tie puti tol acel kede ot kany;

¹⁰Ipirin gi me nyonyo buronsi oudo tie ot are kede agangeta gi da ot are me nyonyo buronsi. Do akodeta kame oudo tie i kom ipirin, kede atad gi oudo kotimo kede nyonyo siliba.

¹¹En eko timo cel nono i bad me tetu malo da kamanono.

¹²I bad tetu tim boro me isukan oudo tie puti ot kanyaare kiwie kany; ipirin oudo tie iye tomon kede agangeta tomon; akodeta kame oudo tie i kom ipirin kede atad gi oudo kotimo kede nyonyo siliba.

¹³I bad tetu kide, kakame oudo erute tie iye, laco me cel oudo tie puti ot kanyaare kiwie kany.

¹⁴⁻¹⁵I nget erute tuni tuni oudo tie iye isukan kame tie puti ot are kiwie are kede dul, ipirin adek kede agangeta adek.

¹⁶Cel dedede oudo kotimo kede isukan me egoe ameny.

¹⁷Agangeta me ipirin oudo kotimo kede nyonyo buronsi, do akodeta, atad, kede aum me wi ipirin oudo kotimo kede nyonyo siliba. Ipirin dedede me cel oudo kotweo kede atad me nyonyo siliba.

¹⁸Esuka me galao dog erute me diakal oudo kotimo kede egoe ameny kame kotubuso kede ausin ebululu ebululu, akwakwar kede kame kwar mere. Boro mere aria oudo tie puti ot adek kede boro mere malo oudo tie puti kanyaare kede dul, bala isukan me cel.

¹⁹Ipirin kame oliere iye oudo tie ongwon kede agangeta gi da ongwon kame kotimo kede nyonyo buronsi. Do akodeta me ipirin nogo, aum me wi gi, kede atad gi oudo kotimo kede nyonyo siliba.

²⁰Loce me tweno Eema kede me cel dedede oudo kotimo kede nyonyo buronsi.

Jamini kame Kotio kede me Timo Taberenakol



²¹Magi en jamini kame oko timo kede taberenakol, kakame oudo koketo iye kide abatal are kame oudo kowandiko cik tomon i kom gi. Musa en oudo ociko be wandiko gi di Jolebi en oko timo, di Itamar wot ka Aaron ngasaseredoti en kame telo gi.

²²Basalel wot ka Uri, akwar Kur, dano me ekeko ka Yuda, oko timo jamini dedede kame oudo Rwot ociko ne Musa.

²³En oudo etimo tic karacel kede Okoliab wot ka Akisamak, me ekeko ka Dan, dano kame oudo tie kede apiranut me goro kidi, pwakuno timo jamini, kede timo igoen ameny kede tubuso gi kede ausin ebululu ebululu, akwakwar, kede kame kwar mere.

²⁴Saabu dedede kame jo oudo omio but Rwot, kame oko timo kede tic me gero Kabedo Kacil, oudo tie kilo tutumia acel, di kopime kede gipim me Kabedo Kacil.

²⁵Siliba kame jo kame oudo Komaro wel gi okwanyo oudo tie kilo tutumia adek kede tol ongwon ki ot adek (3,430) di kopime kede gipim me kabedo kacil.

²⁶Manono en rom me siliba kame jo dedede kame oudo komaro wel gi oculo, di dano acelacel oudo culo wel kame komito, di lubere kede gipim me Kabedo Kacil. Jo kame oudo komaro wel gi oudo tie tutumia tol kanyape kede adek, kede tol kany kede ot kany (603,550), magonogi oudo obedo cuo me mwakini ot are ot malo.

²⁷Siliba kilo tutumia adek kede tol ongwon (3,400) en kame oudo kotimo kede agangeta tol acel me Kabedo Kacil kede me isenge. Agang acelacel oudo kotimo kede kilo ot adek kiwie ongwon me siliba.

²⁸Basalel oko tic kede kilo ot adek odong me timo atad, akodeta me ipirin, kede aum me wi gi.

²⁹Nyonyo buronsi kame oudo jo omio but Rwot oudo tie kilo tutumia are kede tol ongwon kede ot are kiwie kany (2,425).

³⁰Basalel oko tic kede me timo agangeta me erute me Eema me ariamakin kede Rwot, alutari me nyonyo buronsi karacel kede kekei mere me buronsi, jamini dedede kame kotio kede i alutari,

³¹agangeta me cel kede me erute me diakal, loce dedede me tweno Eema kede me tweno cel me diakal.

Yai 39

Timo Igoen me Josaseredoti

(Yai 28.1-14)

¹Basalel kede jodiru ace oko timo igoen acil kede ausin ebululu ebululu, akwakwar, kede akwar mere, kame oudo josaseredoti poore ngapo kame kioto timo tic i Kabedo Kacil; kiko timo ne Aaron igoen me ngasaseredoti bala kame oudo Rwot ociko ne Musa.

²Gin kiko timo epod kede ausi me saabu, ausin ebululu ebululu, akwakwar kede kame kwar mere, kede egoe kame cil di epwot.



- ³Kidao apien me saabu kede enyondo tuno en doko perepere di kiko ngolongolo en i ausin katitino kame oko tubuso kede egoe aliamaliam, ausin ebululu ebululu, akwakwar, kede akwar me cweno egoe.
- ⁴Gin kiko timo da ausin are abatal me epepet di kiko ribakino gi i nget epod tuni tuni me twene.
- ⁵Rakoba kame kotubuso, kame oudo tie iye, oudo kotimo iepone acel nono da, kede saabu, ausin ebululu ebululu, akwakwar kede kame kwar mere, kede egoe ameny, bala kame oudo Rwot ociko ne Musa.
- ⁶Di oko iiko kide me wel kame kolwongo be onik di oko keketo gi i kom iwayai me saabu kame kotado, di oko goro nying awobe tomon kiwie are ka Yakobo i kom gi kede apiranut.
- ⁷En eko dupo kide are nogo i ausin me liero epod i epepet, pi bedo kide me yutuno ikekon me awobe tomon kiwie are ka Yakobo, bala kame oudo Rwot ociko ne Musa.
- ⁸En eko timo egoe me kor kede apiranut bala kame oudo kotimo kede epod di eko tubuso en kamanono da.
- ⁹Laco kede boro mere oudo rorom, boro inci kanyangon kede laco da inci kanyangon, di odole oko doke.
- ¹⁰Gin kiko keto iye irotin ongwon me kide me wel. I eroto me agege kiketo kidi karenelia, kirisolit kede emeradi;
- ¹¹i eroto me are kiko keto kidi turukuse, sapir kede dayamon;
- ¹²i eroto me adek gin kiko keto kidi jasinti, agate kede ametis;
- ¹³kede do i eroto me ongwon kiko keto kidi, beril, onik kede jasipa; oudo kokeketo gi i kom iwayai me saabu kame kotado.
- ¹⁴Kikom kide tomon kiwie are nogi, kidi acelacel oudo cungo pi ekeko acel me Isirael di ogoro i kom kidi acelacel nying awobi acelacel ka Yakobo.
- ¹⁵Gin kiko timo ne egoe me kor nono irikoi are kame kotimo kede saabu kame kojililo di oko mimino gi bala aunoi;
- ¹⁶di kiko timo iwayai kame kotado are me saabu kede alung are da me saabu, di kiko keto alung nogo i isondana me egoe me kor, tetu malo mere.
- ¹⁷Gin kiko kokodo irikoi are me saabu kame komino bala aunoi nogo i alung are nogo,
- ¹⁸di kiko kokodo wi irikoi nogo tetu odong i kom iwayai kame kotado me saabu noka; manono oko mino kiribakino gi i kom ausin me epod i anyim.
- ¹⁹Di do gin bobo kiko timo alung are me saabu di kiko keto gi i isondana me egoe me kor nono, tetu piny mere, i lake me yie kame kio kede epod.



²⁰Gin bobo kiko timo alung are ace me saabu di kiko keto gi tetu piny me ausin are me liero epod i epepet, i tetu nyime kakame ausin riamo iye kede epod, malo me rakoba kame kotubuso me epod.

²¹Gin kiko tweno alung me egoe me kor i kom alung me epod kede ausi ebululu ebululu, tetekeny egoe me kor but i wi rakoba di likame eko ledote tenge ki epod, bala kame oudo Rwot ociko ne Musa.

Timo Igoen Ace me Josaseredoti

(Yai 28.31-43)

²²Ekanso kame kongapo kede epod oudo kotimo kede ausi me erangi ebululu ebululu;

²³oudo kotuco kakame twolo diere, me rwako wic, di oko toko kuno ngute rimaro tetekeny kur enyili.

²⁴I lak ekanso nono piny mere rimaro, gin kiko kuno iye cal me anyakini me yat kame kolwongo be pomagurunet kede ausin me erangi ebululu ebululu, akwakwar kede kame kwar mere, kede da egoe ameny.

²⁵Gin kiko timo da acwirin kede saabu kame kojililo di kiko keketo gi i dierediere me pomagurunet, rimaro lak ekanso.

²⁶Gin kiko teero acwirin kede cal me pomagurunet di kiculere rimaro lak ekanso nono me timo tic, bala kame oudo Rwot ociko ne Musa.

²⁷Gin kiko kuno ne Aaron kede awobe mege isatin abocoboco me egoe ameny,

²⁸igoen me wic, kede ipalen acegocego me egoe ameny,

²⁹kede ausi ibatalal me tweno pier kame kotimo kede egoe ameny di oko tubuso kuno kede ausin ebululu ebululu, akwakwar, kede akwar, me tweno pier, bala kame oudo Rwot ociko ne Musa.

³⁰Gin kiko timo saabu ibatalal di cil, en gianena kacil, di kiko giro iye iwandik kame waco be, "Komio but Rwot."

³¹Gin kiko twene kede ausi ebululu ebululu i kom egoe kame kodwadwalo i wic i tetu nyime, bala kame oudo Rwot ociko ne Musa.

Tieko Timo Tic

(Yai 35.10-19)

³²Aso, iepone noni gin bin kiko tieko timo tic me taberenakol, Eema me ariamakin kede Rwot. Jo me Isirael oudo oko timo gi dedede bala kame oudo Rwot ociko ne Musa.

³³Di do gin kiko tero taberenakol but Musa; kitero Eema kede jamini me time dedede: akodeta mege, ibaon me purem mere, atekai mege, ipirin mege, kede agangeta mege;

³⁴aum me lau kame konyongo me oromo kede aum me emukule ace kame konyongo kiber, kede esuka me ngolo isenge;

³⁵Sanduku me Isikan kede atekai mege karacel kede kom me timo kisa;



- ³⁶emesa kede jamini me tic mere dedede, kede mugati kame koyalo but Rwot;
- ³⁷gicibo etala kame oudo kotimo kede saabu kame kojililo, italan mege, kede jamini mege dedede, kede mo me italan nogo;
- ³⁸alutari kame oudo kotimo kede saabu; mo me wir; odok angwe kur; esuka me galao ekeko me eema;
- ³⁹alutari kame oudo kotimo kede nyonyo buronsi, kede kekei mere da me buronsi, atekai mege, kede jamini me timo tice mege dedede; kalaya kede gi me cibe;
- ⁴⁰isukan me celo diakal, ipirin mege kede agangeta gi, kede esuka me galao erute me diakal, aunoi kede loce me tweno Eema; kede jamini dedede me timo tice me taberenakol;
- ⁴¹igoen kame oudo kotimo kiber me timo tic i Kabedo Kacil, igoen kacil kame ngasaseredoti Aaron poore ngapo, kede igoen kame awoobe mege poore ngapo me timo tic bala josaseredoti.
- ⁴²Jo me Isirael oudo oko tieko timo tice dedede bala kame oudo Rwot ociko ne Musa.
- ⁴³Kakame Musa oko ngingico kede gikame gin oudo kitimo, en eko neno be gin oudo kitieko timo tic dedede bala kame oudo Rwot ociko, di eko kwano negi winyo.

Yai 40

Gero Taberenakol kede Mine but Rwot

- ¹Rwot oko waco ne Musa be,
- ²” I ceng me agege i duwe kame geo, in ibino gero taberenakol, Eema me ariamakin keda.
- ³Ibino keto iye Sanduku me Isikan, di iko galao Sanduku me Isikan nono kede esuka me isenge.
- ⁴Ibino kelo emesa di iko napo jamini mege; doko iko bino kelo gicibo etala di iko keto italan mege iye.
- ⁵In ibino keto alutari kame kotimo kede saabu, alutari me wango odok angwe kur, i nyim Sanduku me Isikan, di iko liero esuka kame kogalao kede ekeko me taberenakol.
- ⁶Ibino keto alutari me wango giayala i nyim ekeko me taberenakol, Eema me ariamakin keda,
- ⁷di iko keto kalaya i dierediere me Eema nono kede alutari, iko keto pii iye.
- ⁸Ibino timo cel rimaro diakal, di iko liero esuka me galao erute me diakal.
- ⁹Di do in iko bino kwanyo mo me wir, di iko wiro kede taberenakol karacel kede jamini dedede kame tie iye, iko kwere kede jamini mege dedede, tetekeny edok gikacil.



- ¹⁰Ibino bobo da wiro alutari me wango giayala karacel kede jamini me timo tic iye dedede, di iko kwero alutari nono, tetekeny ebed gikacil twatwal.
- ¹¹Di bobo iko bino wiro kalaya kede gi me cibe, di iko kwere.
- ¹²” In ibino kelo Aaron kede awobe mege i nyim ekeko me Eema me ariamakin keda, di iko lwoko gi kede pii,
- ¹³di iko ngapo ne Aaron igoen me ngasaseredoti, iko bino wire di iko kwere, tetekeny ekaruno timo nango tic bala ngasaseredoti.
- ¹⁴Ibino kelo awobe mege di iko ngapo negi isatin abocoboco,
- ¹⁵di iko wiro gi bala papa gi, tetekeny kikaruno timo nango tic bala josaseredoti. Awira noni bino mino gin karacel kede ikwae gi kibedo josaseredoti i kare dedede me anyim.”
- ¹⁶Musa oko timo gi dedede bala kame oudo Rwot ociko ne.
- ¹⁷I mwaka me are cako i kare kame gin bin kiko yai kede ki Misiri, i ceng me agege i duwe kame geo, gin kiko gero taberenakol.
- ¹⁸Musa oko mino kogero taberenakol; en emio koketo agangeta mege, di oko sisipo ibaon me purem mere, kede oko keketo ari mege, di oko sisipo ipirin mege.
- ¹⁹En eko mino kopeto gi me umo wi taberenakol, di oko dokakino bobo aum ace i wi manono, bala kame oudo Rwot ociko ne Musa.
- ²⁰Di do Musa oko tero kide are kame oudo kowandiko iye cik tomon di eko keto gi i yi Sanduku me Isikan. Eko rwako atekai i yi alung me sanduku nono, di eko cibo kom me timo kisa i wie.
- ²¹En eko keto Sanduku me Isikan i taberenakol, di eko liero esuka me isenge oko galao en, bala kame oudo Rwot ociko ne.
- ²²Musa oko keto emesa i yi taberenakol, i bad tetu malo mere, do ooko me isenge,
- ²³di eko keto mugati kame koyalo but Rwot i wie, bala kame oudo Rwot ociko ne.
- ²⁴En eko keto gicibo etala i yi taberenakol, i bad tetu piny mere, di epimere kede emesa,
- ²⁵di eko cwicwinyo italan i nyim Rwot, bala kame oudo Rwot ociko ne.
- ²⁶En eko keto alutari kame kotimo kede saabu i yi taberenakol, i nyim esuka me isenge,
- ²⁷di eko wango odok angwe kur i wie, bala kame oudo Rwot ociko ne.
- ²⁸En eko bobo liero esuka kame galao ekeko me taberenakol,
- ²⁹di eko keto alutari me wango giayala i nyim ekeko mere. Eko mino giayala awanga kede giayala me alos i wi alutari nono, bala kame oudo Rwot ociko ne.



³⁰Di eko keto kalaya me lwokere i dierediere me Eema me ariamakin kede Rwot kede alutari nono, di eko keto iye pii me lwokere.

³¹Musa, Aaron, kede awobe mege oudo lwoko cing gi kede tien gi kanono

³²i kare dedede kame gin oudo kidonyo kede i Eema, kede kame gin kioto i alutari, bala kame oudo Rwot ociko.

³³Musa oko timo cel me diakal rimaro taberenakol karacel kede alutari, di eko liero esuka kame galao erute me diakal. Aso, Musa bin oko tieko timo tice dedede.

Edou Oumo Eema me Ariamakin kede Rwot

(Wel 9.15-23)

³⁴Di do edou oko umo Eema, di rieny me deyo ka Rwot oko romo yi taberenakol.

³⁵Manono oko mino Musa likame oko karuno donyo i yi Eema.

³⁶Nakanaka ka oudo kokwanyo edou ki taberenakol, jo me Isirael oudo ko yai kimeede kede ot;

³⁷do ka oudo edou pwodi likame kokwanyo, gida likame oudo kiyai.

³⁸I kare me irim gin lung, gin oudo kineno edou ka Rwot tie i wi taberenakol i isawan me i ceng, do iwor gin oudo kiko neno mac en kame liel i edou nono.



Jolebi

Jolebi 1

Giayala kame Kowango Dedede

- ¹Rwot oko lwongo Musa di eko yamo kede i Eema me ariamakin kede en Rwot, di eko mine
- ²iswilia kame jo me Isirael poore lubo ka kitie mino giayala kaman: Ka ngatamoro kibutu okelo le mere me giayala, poore ekel diang arabo oromo amoto diel.
- ³Ka dano tie mino giayala awanga me diang, miero ebed twon kame li kede peko moro i kome. Poore en etere i ekeko me Eema me ariamakin kede Rwot, tetekeny Rwot gam giayala nono kawang dano nono.
- ⁴Ngat nono poore cibo cinge i wi giayala awanga mere di Rwot ko bino gamo giayala nono pi kwanyo dub ka wone.
- ⁵En ebino ngolo twon nono kanono i nyim Rwot, di awobe ka Aaron, kobedo josaseredoti, ko kikiro remo mere i kom alutari i bad dedede, alutari kame tie i ekeko me Eema me ariamakin kede Rwot.
- ⁶Di do en eko yango le me giayala awanga nono di eko ngongolo en i adulion,
- ⁷di josaseredoti awobe ka Aaron ko napo yen i alutari di kiko moko mac.
- ⁸Di kiko napo i mac me alutari nono adulion me ringo nogo, ribo kiton wie kede kakamio mere da;
- ⁹do miero lwok amontena kede tiene. Di ngasaseredoti atie telo tic ko wango kom giayala nono dedede i wi alutari di yiro mere ko duny. Ngwece me giayala awanga nono yomo cuny Rwot.
- ¹⁰Ka dano tie mino giayala me oromo amoto diel, giayala nono poore bed ekoro kame li kede peko moro i kome.
- ¹¹En epoore ngole i bad tetu malo me alutari i nyim Rwot, di josaseredoti awobe ka Aaron ko kikiro remo mere i kom alutari i bad dedede.
- ¹²En eko bino ngongolo ringo nono i adulion, di ngasaseredoti atie telo tic ko napo ringo nono i mac me alutari, ribo kiton wie kede kakamio.
- ¹³Do miero lwok amontena kede tiene. Di ngasaseredoti atie telo tic ko wango kom giayala nono dedede i wi alutari di yiro mere ko duny. Ngwece me giayala awanga nono yomo cuny Rwot.
- ¹⁴Ka dano tie mino giayala awanga me winyo, miero winyo nono bed amam amoto eluke.
- ¹⁵Ngasaseredoti ko tere i alutari, eko mojoro ngute di eko wango wie i mac me alutari, di do eko biino remo mere cwer i nget alutari.



¹⁶En ebino kwanyo icukuliro me winyo nono kede gikame tie iye di eko uce i bad tetu kide me alutari, kakame oonyo iye buru.

¹⁷En ebino mako bwome di eko nyile epedere apeda do di likame eko mine ecot; di ngasaseredoti ko wango kom giayala nono i wi alutari di yiro mere ko duny. Ngwece me giayala awanga nono yomo cuny Rwot.

Jolebi 2

Yalo Rwot kede Giamia me Alos

¹Ka ngatamoro mito yalo Rwot kede alos, miero kong eriege eko doko alos kame konungo. Di do en eko onyo iye mo me olibeti, di eko keto iye odok angwe kur,

²di eko tere but josaseredoti awobe ka Aaron. Ngasaseredoti atie timo tic bino juko alos pong cinge di mo kede odok angwe kur tie iye, di en eko wange i wi alutari di yiro mere ko duny. Dul atitidi nono nyuto be akadi kodong da kotieko yalo but Rwot. Ngwece me giayala awanga nono yomo cuny Rwot.

³Alos ace kodong bino bedo me ka Aaron kede awobe mege, gin josaseredoti; manono obedo dul kacil twatwal pien kokwanye ki kom giayala awanga but Rwot.

⁴Ka dano moro tie mino giayala me mugati kame kotedo, miero time abongo arup. Kitwero bedo mugati apek kame kotimo kede alos kame konyalo kede mo me olibeti, arabo kitwero bedo perepere di kowiro mo i kom gi.

⁵Ka giayala kame dano tie mino obedo mugati kame kotedo kede itatany, miero time kede alos kame konungo di oko nyale kede mo, abongo arup iye.

⁶Poore enyonyoto en di eko onyo iye mo ka etie tere bala giayala.

⁷Ka giayala obedo mugati kame kotedo kede sepula, miero time kede alos kame konyongo kede mo.

⁸Dano bino tero manoni bala giayala but Rwot di eko mine but ngasaseredoti, di ngasaseredoti ko tere i alutari.

⁹Ngasaseredoti bino kwanyo dul atitidi me giayala nono, di en eko wange i alutari di yiro mere ko duny. Dul atitidi nono nyuto be akadi kodong da kotieko yalo but Rwot. Ngwece me giayala awanga nono yomo cuny Rwot.

¹⁰Dul kodong me giayala bino bedo me ka Aaron kede awobe mege, gin josaseredoti; manono obedo dul kacil twatwal pien kokwanye ki kom giayala awanga but Rwot.

¹¹Giayala dedede me alos kame kotie tero i nyim Rwot poore bedo abongo arup; pien likame ipoore keto arup amoto mokic i kom giayala awanga but Rwot.

¹²Itwero da mino gi but Rwot bala giamia me kodi ageo cek, do likame ipoore wango gi i wi alutari pi mino ngwece gi yomo cuny Rwot.

¹³Miero iket munyo i kom giayala ni dedede me alos, pien munyo cungo pi isikan wu kede Rubanga; miero iket munyo i giayala ni dedede.



¹⁴Ka itie mino giayala me alos bala kodi ogeo cek i potu, miero iteri alos kame kocelo i mac di oko riege di egwai.

¹⁵Ipoore onyo iye mo me olibeti di iko keto iye odok angwe kur; manono obedo giayala me alos.

¹⁶Ngasaseredoti bino kwanyo dul atitidi me alos kame koriego di gwai nono, karacel kede mo kede odok angwe kur, di eko wange di yiro mere ko duny. Manono obedo giayala awanga but Rwot.

Jolebi 3

Giayala me Nywak

¹Ka dano tie mino giayala me nywak, miero ebed diang kame li kede peko moro i kome.

²En ebino cibo cinge i wi diang nono di eko ngole i dog ekeko me Eema me ariamakin kede Rwot, di do awobe ka Aaron josaseredoti ko kikiro remo i kom alutari i bad dedede.

³Di do ngat nono ko mino giayala awanga me gigi but Rwot: mo kame umo amontena,

⁴engalur are kede mo kame umo gi, kede lak emany.

⁵Di awobe ka Aaron josaseredoti ko wango gi nogi i alutari karacel kede giayala awanga ace, di yiro gi ko duny. Ngwece me giayala awanga nono yomo cuny Rwot.

⁶Ka dano tie mino oromo amoto diel bala giayala me nywak, ekaruno bedo ekoro amoto diel adako, do miero ebed abongo peko moro i kome.

⁷Ka dano tie mino oromo bala giayala mere, miero etere but Rwot

⁸di eko cibo cinge i wie, di eko ngole i nyim Eema me ariamakin kede Rwot. Di do awobe ka Aaron josaseredoti ko kikiro remo mere i kom alutari i bad dedede.

⁹Di do ngat nono ko mino giayala awanga me nywak but Rwot; ebino mino gigi: kakamio me giayala nono, yibe lung di kongole iyapi kede egura mere, mo kame umo amontena,

¹⁰engalur are kede mo kame umo gi, kede lak emany.

¹¹Di ngasaseredoti atie i wang tic ko wango gi nogi dedede i wi alutari bala giayala awanga but Rwot di yiro gi ko duny.

¹²Ka dano tie mino diel bala giayala mere, miero etere but Rwot

¹³di eko cibo cinge i wie, di eko ngole i nyim Eema me ariamakin kede Rwot. Di do awobe ka Aaron josaseredoti ko kikiro remo mere i kom alutari i bad dedede.

¹⁴Di do ngat nono ko mino giayala awanga me nywak but Rwot; ebino mino gigi: mo kame umo amontena,



¹⁵engalur are kede mo kame umo gi, kede lak emany.

¹⁶Di ngasaseredoti ko wango gi nogi i wi alutari bala giayala awanga but Rwot, di ngwece mere ko yomo cuny Rwot. Kakamio dedede bedo me ka Rwot.

¹⁷Ebino bedo iswil kame bedo nakanaka i kabedo dedede but ikwae kede ikwae be: likame jo me Isirael poore camo kakamio amoto remo.

Jolebi 4

Giayala pi Dub kalikame Dano Otimo Akaa

¹Di Rwot oko waco ne Musa

²pi ot yamo ne jo me Isirael be, ngat kame turo cik ka Rwot di eko dubo, do di udo likame etimo akaa, en ebino timo gi acel kikom magi:

³Ka Ngatel me Josaseredoti en odubo di eko kelo raco i wi jo, en ebino kwanyo twon kame li kede peko moro i kome, di eko yale but Rwot pi dub mere.

⁴En ebino tero twon i nyim Rwot, i ekeko me Eema me ariamakin kede Rwot, di en eko cibo cinge i wi twon nono, di eko ngole i nyim Rwot.

⁵Ngatel me Josaseredoti bino kwanyo remo me twon nono di eko tere i yi Eema me ariamakin kede Rwot.

⁶En eko bino gwelo remo nono di eko kikiro en tien kanyaare i nyim Rwot, i nyim esuka apoko Kabedo Kacil.

⁷En eko bino keto remo mogo i iswonge me isondana me alutari me wango odok angwe kur, kame tie kanono i yi Eema me ariamakin kede Rwot. Remo apat mere en ebino onyo piny i dud alutari me wango giayala, kame tie i nget ekeko me Eema me ariamakin kede Rwot.

⁸En ebino waro kakamio dedede ki kom twon me giayala me kwanyo dub, kede mo dedede kame tie i amontena mere,

⁹kede engalur are kede mo kame umo gi, kede lak emany,

¹⁰di cal acala bala kame kotimo i kom le kame koneko bala giayala me nywak.

¹¹Do en ebino mino kotero lau mere, ringo mere, wie, tiene, amontena mere kede we mere,

¹²jamini ace dedede me kom twon nono en ebino mino kotero kabedo kalikame opwokere kame tie ooko me kimere, i oduru me buru, di en eko wango gi kunono kede mac kame komoko.

¹³Ka jo dedede me Isirael en odubo i yore me turo cik ka Rwot abongo ngatamoro niang iye, di kiko bedo tie kede raco, do di oudo likame kitimo akaa;

¹⁴cucuto ka dub nono ongere, jo dedede poore kwanyo twon pi bedo giayala me kwanyo dub di kiko tere i nyim Eema me ariamakin kede Rwot.



- ¹⁵Joadongo me ekodet ko cibo cing gi i wi twon nono i nyim Rwot, di oko ngolo twon nono kanono i nyim Rwot.
- ¹⁶Ngatel me Josaseredoti ko tero remo mogo me twon nono i Eema me ariamakin kede Rwot.
- ¹⁷En eko bino gwelo remo nono di eko kikiro en tien kanyaare i nyim Rwot, i nyim esuka apoko Kabedo Kacil.
- ¹⁸En eko bino keto remo mogo i iswonge me isondana me alutari me wango odok angwe kur, kame tie kanono i yi Eema me ariamakin kede Rwot. Remo apat mere en ebino onyo piny i dud alutari me wango giayala, kame tie i nget ekeko me Eema me riamo kede Rwot.
- ¹⁹Di do eko waro kakamio mere dedede di eko wange eduny yiro i wi alutari.
- ²⁰Ebino timo i kom twon nono gikame cal acala bala kame kotimo i kom twon kobedo giayala me kwanyo dub. Iepone noni, ngasaseredoti mio giayala me kwanyo dub kame jo otimo, di Rubanga ko sasiro gi ki dub gi.
- ²¹Di do en eko bino tero twon nono tenge me kimere di eko wange, bala kame ewango kede twon kame en eyalo pi dub mere; manono obedo giayala pi dub me jo.
- ²²Ka ngatel en odubo, i yore me turo cik moro kikom cik ka Rwot di eko bedo kede raco, do di likame etimo manono akaa,
- ²³cucuto ka en eko niang i dub mere nono, en ebino tero giayala me ekoro ali kede peko moro i kome.
- ²⁴En ebino cibo cinge i wi ekoro nono di eko ngole i kakame kongolo iye giayala awanga i nyim Rwot. Manoni obedo giayala me kwanyo dub.
- ²⁵Ngasaseredoti bino gwelo remo me ekoro nono di eko kikiro en i iswonge me isondana me alutari, di eko onyo remo ace kodong piny i dud alutari me giayala awanga.
- ²⁶Di do en eko waro kakamio mere dedede di eko wange eduny yiro i wi alutari, bala kame kowango kede kakamio me giayala me nywak. I yore noni, ngasaseredoti bino mino giayala me kwanyo dub me ngapug nono, di Rubanga ko sasiro en.
- ²⁷ Ka dano adana moro en odubo, i yore me turo cik moro kikom cik ka Rwot di eko bedo kede raco, do di likame etimo manono akaa,
- ²⁸cucuto ka en eko niang dub mere nono, en ebino tero giayala me diel adako ali kede peko moro i kome.
- ²⁹En ebino cibo cinge i wi diel adako nono di eko ngole i kakame kongolo iye giayala awanga. Manoni en giayala me kwanyo dub.
- ³⁰Ngasaseredoti ko bino gwelo remo me diel nono di eko kikiro en i iswonge me isondana me alutari, di eko onyo remo ace kodong piny i dud alutari.



³¹Di do en eko waro kakamio mere dedede, bala kame kokwanyo kede kakamio me giayala me nywak, di ngasaseredoti ko wange eduny yiro i wi alutari, di ngwece mere ko yomo cuny Rwot. I yore noni, ngasaseredoti bino mino giayala me kwanyo dub me dano nono, di Rubanga ko sasiro en.

³²Ka dano otero oromo pi bedo giayala akwanyo dub, poore ebed oromo adako kame li kede peko moro i kome.

³³En eko bino cibo cinge i wie i kakame kongolo iye giayala awanga.

³⁴Ngasaseredoti ko bino gwelo remo me giayala me kwanyo dub nono di eko kikiro en i iswonge me isondana me alutari me wango giayala, di eko onyo remo ace kodong piny i dud alutari.

³⁵Di do en eko waro kakamio mere dedede, bala kame kokwanyo kede kakamio me oromo kobedo giayala me nywak, di ngasaseredoti ko wange eduny yiro i wi alutari, di ngwece mere ko yomo cuny Rwot. Iepone noni, ngasaseredoti bino mino giayala me kwanyo dub me dano nono, di Rubanga ko sasiro en.

Jolebi 5

Tim atao Mino Giayala Akwanyo Dub

¹Tim atao mino giayala akwanyo dub ige: Ka kolwongo ngatamoro i ekiko pi mino ijura, di do en eko gire dagi tucio gikotimere, bed bala en oudo eneno doko engeo gikame otimere, dano nono poore udo alola.

²Arabo ka dano omulo gimoro me kwer, bala kom le me obar oto, amoto le moro oto me paco, amoto kom gimogo abwote nyidinyidi di kiko to, do di likame oudo emulo akaa, udo dano nono otieko pwokere, doko udo etie kede raco.

³Ka dano omulo gimoro me kom dano, gi me kwer apwoko dano, do di oudo likame emulo akaa, cucuto ka en eko niang iye, udo en etie kede raco.

⁴Ka dano moro ocore lairo atatai di likame etamo pire, bed bala ilair nono tie pi gikame rac amoto gikame ber, en ebedo tie kede raco cucuto ka en eniang i tim mere nono.

⁵Ka dano ongeo be etie kede raco moro i kom magonogo, poore etuc dub kame etimo i nyim jo.

⁶Di do pi kwanyo dub kame en etimo, en eko tero but Rwot diel amoto oromo adako bala giayala me kwanyo dub. Di ngasaseredoti ko mino giayala me kwanyo dub ka dano nono.

⁷Do ka dano nono ngacan likame etwero kwanyo oromo amoto diel, en ebino tero ne Rwot pi kwanyo dub mere amam are arabu ilukei are. Acel pi bedo giayala me kwanyo dub kede acel pi bedo giayala awanga.

⁸En ebino tero gi but ngasaseredoti, di ngasaseredoti ko mino winyo acel me agege bala giayala me kwanyo dub. En ebino mooro ngute di likame eko coto wie.



⁹Ebino kikiro remo mogo me giayala me kwanyo dub i kom alutari. Do remo apat en ebino biino piny i dud alutari. Manono obedo giayala me kwanyo dub.

¹⁰Winyo me are mere en ebino mino bala giayala awanga di elubo iswil bala kame mitere. Iepone noni, ngasaseredoti mio giayala me kwanyo dub kame dano otimo, di Rubanga ko sasiro en.

¹¹Do ka dano ngacan likame esobolo kwanyo amam are amoto ilukei are, en ebino tero kilo acel me alos kame konungo kiber bala giayala mere me kwanyo dub. Likame ebino keto iye mo me olibeti amoto odok angwe kur, pien manono obedo giayala me kwanyo dub.

¹²En ebino tere but ngasaseredoti, di ngasaseredoti ko juko alos nono i cinge pong, di eko wange i wi alutari di yiro mere ko duny. Dul atitidi nono nyuto be akadi kodong da kotieko yalo but Rwot. Manoni obedo giayala me kwanyo dub.

¹³Iepone noni, ngasaseredoti bino mino giayala me kwanyo dub kame dano nono otimo, di Rubanga ko sasiro en. Bala kame kotimo kede i giayala me alos, alos ace kodong bedo me ka ngasaseredoti.

Giayala me Timo Cul

¹⁴Rwot oko waco ne Musa iswilia gi:

¹⁵Ka ngatamoro odubo, i yore me dagi culo but Rwot gikame poore mine, do di likame etimo akaa, dano nono poore tero ne Rwot bala cul, emerekek amoto ekoro kame li kede peko moro i kome. Rom mere kobino poro kede wel kame kotieko moko. Manoni obedo giayala me timo cul.

¹⁶Doko da en eko mino cul kame oudo en ebedo kede ajajalun timo, di doko eko medo i wi cul nono acel i kom kany mere, di eko mino ngasaseredoti. Ngasaseredoti ko bino mino le nono bala giayala me kwanyo raco, pi kwanyo dub kame dano nono otimo, di Rubanga ko sasiro en.

¹⁷Ka dano moro odubo i yore me timo gikame cik ka Rubanga likame yei, do di likame etimo akaa, udo etieko timo raco, doko poore eud alola.

¹⁸En epoore tero but ngasaseredoti emerekek amoto ekoro kame li kede peko moro i kome bala giayala me timo cul. Ngasaseredoti ko bino mino giayala pi kwanyo dub kame dano nono otimo do di likame etimo akaa, di Rubanga ko sasiro en.

¹⁹Manoni obedo giayala me timo cul pi dub kame en etimo but Rwot.

Jolebi 6

¹ Rwot oko yamo kede Musa di eketo iswilia gi:

²Dano poore mino giayala ka etimo dub but Rwot i yore me dagi dwoko ne dano ngawote alibon kame komie, arabo gikame osingao ne, arabo ka ekwalo gimoro kibute amoto ka esere,



³arabo ka eyamo kop me abe i kom gimoro korwenyo di en eko udo, di elairo ilair me abe i kom dub acal kamagonogi kame en etimo.

⁴⁻⁵Ka dano odubo i yore nogi, di en eko ngeno dub mere, poore ecul gikame oudo en eudo i yore arac nono, arabo gikame en elairo ilair me abe i kome nono; miero en ecul gi nono di doko eko medo acel i kom kany me gi nono i wi cul nono. Epoore mino cul nono but won gi nono.

⁶Ingei cul, di do en eko tero but ngasaseredoti oromo arabo ekoroi kame li kede peko moro i kome pi bedo giayala me cul.

⁷Ngasaseredoti ko bino mino giayala me kwanyo dub kame dano nono otimo, di Rubanga ko sasiro en.

Giayala kame Kowango Dedede

⁸Rwot oko yamo kede Musa di ecike

⁹pi mino Aaron kede awobe mege iswilia amako giayala awanga kaman: Giayala awanga poore buto i wi alutari iwor kiakia, di mac tie liel abongo to.

¹⁰Di do ngasaseredoti ko ngapo epale acek aliamaliam me yie kede ekanso aliamaliam di eko jobo buru me giayala kowang i wi alutari nono, di eko kete piny i nget alutari.

¹¹Di do en eko loko igoen ace di eko tero buru nono kakalikame opwokere tenge me kimere.

¹²Mac me alutari poore dong di liel nakanaka. Odiko acelacel ngasaseredoti medo isikin i mac nono, di eko napo kiber i wi mac nono giayala kame kotie wango, di eko wango kakamio me giayala me nywak.

¹³Kopoore mino mac bed liel nakanaka i alutari abongo to.

Giayala me Alos

¹⁴Magi en iswilia amako giayala me alos: Awobe ka Aaron ngasaseredoti bino mino alos but Rwot i nyim alutari.

¹⁵Ngasaseredoti bino juko pong cinge alos kame konungo kiber nono kede mo, karacel kede odok angwe kur dedede atie iye, di en eko wange i wi alutari. Dul atitidi nono nyuto be akadi kodong da kotieko yalo but Rwot. Ngwece me giayala awanga nono yomo cuny Rwot.

¹⁶⁻¹⁷Di do josaseredoti ko tero alos kodong me acama gi. Gin kibino timo mugati kede alos nono abongo arup iye, di kiko came i kabedo kacil, en diakal me Eema me ariamakin kede Rwot. En ebedo gikacil twatwal, erom aroma kede giayala me kwanyo dub kede giayala me timo cul.

¹⁸I kare dedede me anyim cuo kobedo ikwae ka Aaron bino camo cam noni, bala iner gi me kare dedede me giayala me cam awanga but Rwot. Ngatamoro kame bino mulo giayala me cam awanga nono bino udo peko, piento en ecil.

¹⁹Rwot oko yamo kede Musa di eko mine iswilia



²⁰amako wiro dano me ekeko ka Aaron pi doko ngasaseredoti kaman: i ceng me wire doko ngasaseredoti, en ebino mino giayala me kilo acel me alos but Rwot (kame rom aroma kede giayala me alos kame koyalo ceng dedede), ebino yalo dul mere odiko di bobo eko yalo dul mere otieno.

²¹En ebino nyonge kede mo di eko tede kede itatany di eko ngingido en, di do eko wange pi yalo kede Rwot; ngwece mere yomo cunye.

²²I kare dedede me anyim buli akwar Aaron kame kowiro pi doko ngasaseredoti poore mino giayala noni. Giayala noni kopooore wango dedede pi yalo kede Rwot.

²³Giayala me alos kame ngasaseredoti mio kopooore wango dedede, likame kopooore poko kiye moro me acama.

Giayala me Kwanyo Dub

²⁴Rwot oko ciko Musa

²⁵pi mino Aaron kede awobe mege iswilia amako giayala me kwanyo dub kaman: Le kobedo giayala me kwanyo dub kobino ngolo i nyim Rwot kakame kongolo iye giayala awanga. En ebido giayala kacil twatwal.

²⁶Ngasaseredoti komio giayala nono bino came i kabedo kacil, en diakal me Eema me ariamakin kede Rwot.

²⁷Ngatamoro arabo gimoro kame bino mulo giayala me cam nono kame komio but Rwot bino udo peko, piento en ecil; doko da ka remo mere okire i kom egoe amoto i kom gimoro, kopooore ot lwoke i kabedo kacil.

²⁸Agulu kame kotedo kede ringo nono kopooore neko, do ka kotede kede sepula, kopooore kikiso sepula nono di oko lwoke kiber kede pii.

²⁹Cuo ace kobedo anywali me ude me josaseredoti da bino camo ringo nono; en ebido gikacil twatwal.

³⁰Do ka kotero remo me le nono i yi Eema me ariamakin kede Rwot pi timo pwola me kwanyo dub, likame kopooore camo ringo mere; kobino wange awanga kede mac.

Jolebi 7

Giayala me Timo Cul

¹Magi en iswilia amako giayala me timo cul; manono obedo gikacil twatwal:

²Le me giayala me timo cul kopooore ngolo i kakame kongolo iye giayala awanga, di oko kikiro remo mere i kom alutari i bad dedede.

³Kopooore yalo kakamio mere dedede, yibe kede mo mere dedede, mo kame umo amontena,

⁴engalur are kede mo kame umo gi, kede lak emany.



⁵Ngasaseredoti bino wango gi kiduny yiro i wi alutari bala giayala awanga but Rwot; manoni obedo giayala me timo cul.

⁶Cuo ace kobedo anywali me ude me josaseredoti da bino camo ringo nono; en ebeto gikacil twatwal.

⁷Giayala me timo cul cal acala bala giayala me kwanyo dub; gin kitie kede iswil acacal, pien josaseredoti ayalo gin dedede tero ringo me le kame koyalo.

⁸Doko da lau me le kame koyalo bala giayala awanga dong ne ngasaseredoti.

⁹Giayala me alos kame konyongo di oko tolo i keno oko doko mugati, arabo kame kotedo kede sepula amoto itatany, poore dong ne ngasaseredoti kotimo yalo nono but Rwot kawang wone.

¹⁰Do giayala me alos ace kalikame kotedo, bed bala konyonge kede mo amoto li, josaseredoti dedede awobe ka Aaron bino popoko en di rorom.

Giayala me Nywak

¹¹Iswilia kame mako giayala me nywak kame dano yalo but Rwot tie kaman:

¹²Ka dano tie mino giayala mere bala giayala me pwoc but Rwot, en epoore tero le kame eyaro yalo karacel kede mugati kame kotimo abongo arup, mugati apek kame kotimo kede alos kame konyongo kede mo me olibeti, mugati aperepere kame kosuto mo i kome, kede mugati apepek kame kotimo kede alos apwot di onyonge kede mo atot.

¹³Medo i wi magonogo, en epoore da tero mugati kame kotimo kede arup.

¹⁴En eko bino kwanyo mugati acel ki buli egere apapat me cwec me mugati nogi, pi bedo giamia but Rwot; ngasaseredoti akikiro remo me giayala me nywak i kom alutari en kame tero magonogi.

¹⁵Ringo me le kame koyalo bala giayala me pwoc nono kopoore camo ceng kame koyale kede nono, likame dul moro poore buto paka odiko.

¹⁶Ka dano otero giayala me nywak pi cobo isikan mere, arabo bala giayala kame en ekwanyo i mit mere kene, kobino came i ceng kame koyale kede, do donge mere oko bino camo oru mere.

¹⁷Do ringo ace kame bino dong paka i ceng me adek kobino wango.

¹⁸Ka ocamo ringo me giayala nono i ceng me adek, Rubanga likame bino gamo giayala ka dano nono, doko da likame kobino tero be en emio gimoro; do manono bino bedo bala gi me kwer, ngat kame came bino bedo kede raco.

¹⁹Ringo koriamo kede kom gimoro me kwer likame kopoore camo, do miero wange. Jo kame li kede pwokere kede gi me kwer twero camo ringo apat mere.

²⁰Do ka dano kopwokere kede gi me kwer ocamo ringo me giayala me nywak, kobino riame tenge kikut jo me Isirael.



²¹Doko da ka ngatamoro omulo gimoro me kwer atie i kom dano, amoto le moro me kwer, arabo giacwea moro me kwer, di eko camo ringo me giayala me nywak but Rwot, eda kobino riame tenge kibus jo me Isirael.

²²Rwot doko oko mino Musa iswilia

²³kame jo me Isirael poore lubo kaman: Likame ibinunu camo kakamio me dok, diegi kede romini.

²⁴Kakamio me le moro oto atoa arabo kame le me obar oneko likame ipoorenu camo, do itwerunu timo kede gimoro ace.

²⁵Ka dano moro kibusu ocamo kakamio me le kame kotwero mino but Rwot bala giayala awanga, likame kobino riame tenge kibus jo me Isirael.

²⁶Likame ibinunu camo remo me gimoroni dedede, me winyo amoto me le, i kabedo dedede kame ibinunu bedo iye.

²⁷Ngatamoro kibusu kame bino camo remo kobino riame tenge kibus jo me Isirael.

²⁸Rwot doko oko mino Musa iswilia

²⁹kame jo me Isirael poore lubo kaman: Ngatamoro kame mio giayala me nywak but Rwot poore en kikome eter but Rwot dul moro me giayala mere nono;

³⁰en kikome en kame cinge poore mako gi nono tero but Rwot bala giayala awanga. En ebino tero kakamio kede kapumito di eko mino but Rwot, di eko kiarao en i nyim Rwot.

³¹Ngasaseredoti atie tic bino wango kakamio nono i wi alutari, do kapumito dong ne Aaron kede awobe mege, gin josaseredoti.

³²Amuro me bad tetu cam me le me giayala me nywak kopooore mino bala giamia

³³but ngasaseredoti koyalo remo kede kakamio me giayala nono me nywak.

³⁴Pien kapumito kame koyalo but Rwot di kokiarao en, kede amuro me bad tetu cam, obedo giamia kame Rwot gamo kibus jo me Isirael, ki giayala gi me nywak, di en eko mino Aaron kede awobe mege, gin josaseredoti. Magonogi poore bedo iner gin kame jo me Isirael poore mino gi i kare dedede.

³⁵Manoni obedo iner kame kopooore mino Aaron kede awobe mege ki giayala awanga but Rwot, tek kame kotieko wiro gi kidoko josaseredoti kame tio ne Rwot.

³⁶Bin di Rwot owiro gi, en eko ciko be poore mino gi iner noni. Jo me Isirael poore lubo iswil noni i kare dedede me anyim.

³⁷Magonogi en obedo iswilia amako giayala awanga, giayala me alos, giayala me kwanyo dub, giayala me timo cul, giayala me wiro ngasaseredoti, kede giayala me nywak.

³⁸Rwot bin omio Musa iswilia nogi i moru me Sinai i ceng kame bin ewaco ne kede jo me Isirael pi tero giayala gi bute, di oudo kitie i wi tim me Sinai.



Jolebi 8

Kwero Aaron kede Awobe mege doko Josaseredoti

(Yai 29.1-37)

¹Rwot oko waco ne Musa be,

²” Teri Aaron kede awobe mege i ekeko me Eema me ariamakin keda. Ter gi kede igoen me josaseredoti, mo me wir, twon kame poore bedo giayala me kwanyo dub, romini are acuo, kede ebukit kopong me mugati kame kotimo abongo arup.

³Di do iko lwongo jo dedede cokere kunono.”

⁴Musa oko timo gikame Rwot ociko ne. Kakame jo dedede otieko cokere kede i ekeko me Eema me ariamakin kede Rwot,

⁵Musa oko waco ne jo kocokere be, “Gikame nataman ango abino timo en gikame Rwot ociko be timi.”

⁶Musa oko mino Aaron kede awobe mege ooto anyim, di eko mino gi kibol.

⁷En eko ngapo ne Aaron esati kede ekanso di eko tweno piere kede ausi kibatalal. Di eko keto epod i kome di eko lide i piere kede rakoba atie iye kame kokedo kiber.

⁸En eko ngapo ne isau me kor di eko keto iye Urim kede Tumim.

⁹Eko dodolo egoe i wi Aaron di eko dupo i kom egoe nono i tetu nyime gimoro ameny kame kotimo kede saabu, manono en gianyuta be en etieko mire but Rwot, di elubo kite kame Rwot ocike kede.

¹⁰Di Musa oko kwanyo mo me wir di eko kikiro en i wi taberenakol kede gi dedede kame oudo tie iye, iepone noni en ekwero gi but Rwot.

¹¹Eko kwanyo mo mogo di eko kikiro en tien kanyaare i kom alutari kede jame me tic kame oudo tie iye, kede i kom kalaya kede gicibe, pi kwero gi but Rwot.

¹²Di eko onyo mo me wir i wi Aaron pi kwere doko ngasaseredoti.

¹³Alubo mere, Musa oko mino awobe ka Aaron ooto anyim di eko ngapo negi isatin kede ausin abatal i pier gi, kede igoen kame kododolo i wic, bala kame oudo Rwot ociko ne.

¹⁴Di Musa oko kelo twon kobedo giayala me kwanyo dub, di Aaron kede awobe mege oko cibo cing gi i wie.

¹⁵Oko neke di Musa oko kwanyo remo mogo, eko rwako iye lwete di eko kikiro en i iswonge me isondana me alutari, pi kwere but Rwot. Di do eko onyo remo apat kodong piny i dud alutari pi kwere but Rwot kede pi lonye.

¹⁶En eko waro kakamio me amontena dedede, lak emany, kede engalur are kede mo koumo gi, di eko wango gin dedede i wi alutari.

¹⁷Di eko kwanyo kakodong me twon, kame ribo lau mere, ringo kede we mere, di eko ot wango gi tenge me kimere, bala kame Rwot oudo ociko.



- 18**Alubo mere Musa oko kelo emerekek me giayala awanga, di Aaron kede awobe mege oko cibo cing gi i wie.
- 19**Oko neke di Musa oko kikiro remo mere i kom alutari i bad ongwon dedede.
- 20-21**Di en eko ngongolo oromo nono i adulion, eko lwoko amontena mere kede tiene di do eko wango kom oromo nono dedede i wi alutari, bala kame oudo Rwot ociko.
- 22**Di bobo Musa oko kelo emerekek me are, en oromo me kwero josaseredoti. Aaron kede awobe mege oko cibo cing gi i wi oromo nono,
- 23**di oko neke. Musa oko kwanyo remo mere di eko keto i yit Aaron me bad tetu cam, kede i lwete adwong me cinge tetu cam, kede i lwete adwong me tiene tetu cam.
- 24**Kakame awobe ka Aaron otieko ot kede anyim, Musa oko keto remo mogo i yit gi tetu cam, kede i lwet gi adongo me cing gi tetu cam, kede i lwet gi adongo me tien gi tetu cam. Di do Musa oko kikiro remo kodong i kom alutari i bad dedede.
- 25**En eko kwanyo kakamio, yibe kobedo mo ibatalal, kakamio dedede me amontena, lak emany, kede engalur are kede mo i kom gi, kede amuro tetu cam.
- 26**Di eko kwanyo ki ebukit me mugati kame kotedo abongo arup gigi: mugati acel kame kotimo kede mo, kede mugati acel aperepere di eko keto gi i kom kakamio kede i kom amuro me tetu cam.
- 27**En eko keto magonogi dedede i cing Aaron kede awobe mege di ekiarao gi but Rwot.
- 28**Musa oko kwanyo gi nogo ki cing gi di eko wango gi i wi alutari bala giayala awanga but Rwot. Manoni oudo obedo giayala me kwero josaseredoti, giayala awanga kame ngwece mere yomo cuny Rwot.
- 29**Musa oko kwanyo kapumito di eko kiarao en pi mine but Rwot; manoni oudo obedo iner ka Musa i kom oromo me kwero josaseredoti, bala kame oudo Rwot ociko ne.
- 30**Di do Musa oko kwanyo mo moro me awira kede remo kame oudo tie i alutari di eko kikiro gi i kom Aaron kede i kom igoen mege, kede da i kom awobe mege kede i kom igoen gi. Iepone noni en ekwero but Rwot Aaron kede igoen mege, kede awobe mege da kede igoen gi.
- 31**Musa oko waco ne Aaron kede awobe mege be, “Terunu ringo no i ekeko me Eema me ariamakin kede Rwot, di ikounu tede ki kuno, ikounu came kede mugati atie i ebukit me giayala me kwero josaseredoti, bala kame Rwot otieko ciko.
- 32**Ipoorenu wango ringo kede mugati dedede kame icamunu oko dong.
- 33**Likame ibinunu yai tenge ki ekeko me Eema me ariamakin kede Rwot pi ceng kanyaare, tuno di pwola me kwero wu pi bedo josaseredoti otiek, pien ebino tero ceng kanyaare pi kwero wu.
- 34**Rwot ociko be poore timo gikame wan tin otimo noni pi kwanyo dub wu.



³⁵Ibinunu dong bedo i ekeko me Eema me riamo iwor kede iceng pi ceng kanyaare, di itimunu gikame Rwot ociko, ka li ibinunu to; manoni en gikame Rwot ociko na.”

³⁶Aaron kede awobe mege oko timo gi dedede kame Rwot ociko di ewaco kibun Musa.

Jolebi 9

Aaron Omio Giayala

¹I ceng me kanyauni, Musa oko lwongo Aaron kede awobe mege kede joadongo me Isirael.

²En eko waco ne Aaron be, “Kwany twon etobait kede emerekek kame li kede peko moro i kom gi; twon etobait bino bedo giayala me kwanyo dub, do emerekek bino bedo giayala awanga.

³Di iko waco ne jo me Isirael pi kwanyo ekoro pi bedo giayala me kwanyo dub, kede roya me mwaka acel kede atin romo me mwaka acel kame li kede peko moro i kom gi pi bedo giayala awanga.

⁴Kikwany da twon kede emerekek pi bedo giayala me nywak. Gin kipoore yalo gi karacel kede giayala me alos kame konyongo kede mo, pien Rwot bino neeno but gi i ceng me tin.”

⁵Gin kiko tero gi dedede kame Musa ociko negi i nyim Eema me ariamakin kede Rwot, di jo dedede oko cokere i nyim Rwot pi wore.

⁶Musa oko waco be, “Manoni en gikame Rwot ociko be itimunu, tetekeny rieny me deyo ka Rwot ko bino nyutere ne wu.”

⁷Di eko waco ne Aaron be, “Nyiki i alutari di iko mino giayala ni me kwanyo dub kede giayala ni awanga pi kwanyo dub ni kede me jo; yal giayala kame jo okwanyo di iko kwanyo dub gi, bala kame Rwot ociko.”

⁸Aaron oko noko alutari di eko ngolo twon etobait kobedo giayala meren me kwanyo dub.

⁹Awobe ka Aaron oko mine remo, di en eko gwelo remo nono kede lwete di eko kikiro en i iswonge me alutari, di eko onyo remo apat piny i dud alutari.

¹⁰Do kakamio, engalur, kede lak emany me giayala me kwanyo dub en eko wango gi i wi alutari, bala kame Rwot oudo owaco ne Musa.

¹¹Do ringo kodong kede lau en eko ot wango gi tenge me kimere.

¹²Di do eko ngolo giayala awanga. Awobe ka Aaron oko tero ne remo di en eko kikiro remo nono i kom alutari i bad dedede.

¹³Di do gin kiko mine wie kede adulion apat di en eko wango gi i wi alutari.

¹⁴Eko da lwoko amontena mege kede tiene di eko dokakino gi i kom giayala awanga ace i wi alutari.



¹⁵Ingei manono, en eko mino giayala kame jo omio. En ekwanyo diel koudo obedo giayala me jo me kwanyo dub, eko ngole di eko yale iepone kame en emio kede giayala mere me kwanyo dub.

¹⁶Doko da eko mino giayala awanga di elubo kite kame iswil mito be time kede.

¹⁷Eko bobo da mino giayala me alos, di eko juko alos pong cinge di eko wange i wi alutari, manoni oudo tie medo i wi maca kame kowango ceng dedede odiko.

¹⁸En eko ngolo twon kede emerekek bala giayala me nywak ka jo. Awobe ka Aaron oko mine remo di en eko kikiro en i kom alutari i bad dedede.

¹⁹En eko kwanyo kakamio me twon kede me oromo, yibe ibatalal, mo me amontena, kede engalur kede mo kame umo gi, kede lak emany,

²⁰di eko ber keto gi i kom kapumito di eko tero gi i wi alutari. En eko wango kakamio i wi alutari,

²¹do kapumito kede amuro me bad tetu cam en eko kiarao gi i nyim Rwot bala kame Musa oudo ociko.

²²Kakame en etieko mino kede giayala nogi dedede, Aaron oko tingo cinge malo tetu kakame jo tie iye di eko mino gi winyo, di do eko wok piny.

²³Musa kede Aaron oko donyo i Eema me ariamakin kede Rwot di kiko wok, di kiko mino jo winyo, di do rieny me deyo ka Rwot oko neeno ne jo dedede.

²⁴Mac oko wok kikut Rwot di eko wango giayala awanga dedede karacel kede kakamio kame oudo tie i wi alutari. Kakame jo oneno kede manono, gin kiko icelakin di kiko riebere piny.

Jolebi 10

Dub ka Nadab kede Abiku

¹Nadab kede Abiku, awobe ka Aaron, ngat acelacel oko kwanyo tago mere me wango odok angwe kur, kiko keto itonge me mac i yi gi kede odok angwe kur; gin kiko dunyo gi but Rwot do di likame Rwot ociko gi be kitim kamanono.

²Rwot oko cwano mac di oko wango gi, di kiko to i nyim Rwot.

³Di Musa oko waco ne Aaron be, “Manoni en dwong me gikame Rwot oudo owaco kakame ewaco kede be, ‘Jo kame timo na tic poore bedo kede wor buta bala ngat kacil; jo dedede bino mina deyo.’ “ Do Aaron oko ling alinga.

⁴Musa oko lwongo Misael kede Elisapan, gin awobe ka Usiel, omin me papa me Aaron di eko waco negi be, “Bianu kan itingunu kom imiegu wu tenge ki nyim kabedo kacil di ikounu tero gi tenge me kimere kuno.”

⁵Gin kiko ot, di kiko diedielo gi kede isatin kame oudo kingapo kitero gi tenge me kimere, bala kame oudo Musa owaco negi.



⁶Musa oko waco ne Aaron kede awobe mege ace kodong, Eleasar kede Itamar be, “Kur idagunu kuro wi wu, doko da kur iyeyecunu igoen wu pi nyuto iturur, ka itimunu kamanono ibinunu to, doko da lilo ka Rwot bino poto i kom jo dedede. Do jo apat me Isirael twero koko jo are nogi kame Rwot ocwao mac oko wango.

⁷Kur iyaunu tenge ki ekeko me Eema kacil, ka itimunu kamanono ibinunu to, pien mo me wir ka Rwot tie i komu.” Gin kiko timo gikame Musa owaco negi.

Iswilia amako Josaseredoti

⁸Rwot oko waco ne Aaron be,

⁹” In kede awobe ni likame ipoorenu donyo i yi Eema me ariamakin keda ingei mato bwini arabo kongo moro ace; ka itimunu kamanono, ibinunu to. Iswil noni mako kiton ikwae ni me kare lung me anyim.

¹⁰Miero ingeunu poko gikacil me ka Rubanga kede gikame jo tio kede, gi me kwer kede gi kalikame kwer.

¹¹Miero ipwonyunu jo me Isirael iswilia dedede kame ango amio wu kibun Musa.”

¹² Musa oko waco ne Aaron kede awobe mege are kodong, Eleasar kede Itamar be, “Kwanyunu giayala me alos kodong kikom giayala awanga but Rwot, ikounu came i nget alutari abongo keto iye arup, piento en ebedo gikacil twatwal.

¹³Ibinunu came i kabedo kacil, piento en ebedo iner ni kede awobe ni ki kom giayala awanga but Rwot. Manoni en gikame Rwot ociko na.

¹⁴ Do wun karacel kede awobe kiton anyira wu itwerunu camo i kabedo kalikame opwokere giamia me kapumito kede amuro kame kokiarao, pien komoko magonogi pi bedo iner wun kede idwe wu ki kom giayala me nywak kame jo me Isirael yalo.

¹⁵Gin kibino kelo amuro kede kapumito i esawa kame kotie wango kede kakamio bala giayala but Rwot, di oko kiarao gi i nyim Rwot bala giamia; magonogi bino bedo iner wun karacel kede idwe wu i kare dedede, bala kame Rwot otieko ciko.”

¹⁶Di Musa oko penyo pi diel koudo poore bedo giayala me kwanyo dub, en eko udo be oudo kotieko wange. Manoni oko mine edoko ger ne Eleasar kede Itamar, awobe ka Aaron kodong mege, di eko penyo gi be,

¹⁷ “Pinyo komio likame icamunu giayala me kwanyo dub i kabedo kacil? En ebedo gikacil twatwal, kame Rwot omio butu pi kwanyo raco me jo, pi culo dub kawang gi i nyim Rwot.

¹⁸Pi kite kalikame koteri kede remo mere i yi kabedo kacil, oudo koto wun icamunu giayala nono i kuno, bala kame ango aciko ne wu.”

¹⁹Aaron oko dwoko ne Musa be, “Neningo, i ceng me tin jo okelo giayala gi me kwanyo dub but Rwot, do di jamini areco oko timere nango! Iparo be cuny Rwot oudo oyaro bedo yom i koma ka koto oudo ango acamo giayala me kwanyo dub?”

²⁰Musa oko yeng kede kop kame Aaron owaco.



Jolebi 11

Leini kame Kotwero Camo

(Iswilia 14.3-21)

- ¹Rwot oko mino Musa kede Aaron iswilia
- ²amako jo me Isirael kaman: Kikom leini dedede abedo i wi lobo, ibinunu camo
- ³leini kame tie kede abelekek i tien gi di abelekek nono opokere, kede di engoko cam eko medo nyamo.
- ⁴⁻⁶Do kikom leini kame ngoko cam di kiko medo nyamo, likame ibinunu camo magi: aguragura, eles kede apuo. Gin kibedo leini me kwer, pien akadi bed bala kingoko cam di kiko medo nyamo, do likame gin kitie kede abelekek kopokere i tien gi.
- ⁷Likame ibinunu camo epege da, pien akadi bed bala etie kede abelekek kopokere i tiene, likame en engoko cam di eko bobo medo nyamo; en ebedo ne wu le me kwer.
- ⁸Likame ibinunu camo ringo gi, doko da likame ibinunu mulo kom gi kame kito; gin kibedo ne wu gi me kwer.
- ⁹Kikom giakuo abedo i yi pii, itwerunu camo magi: gi dedede kame tie kede abokoya kede isigigir i kom gi, di kibedo i yi name kede i yi isamai.
- ¹⁰Do kikom gi dedede kame bedo i yi name kede i yi isamai, likame ibinunu camo gi anyidinyidi kede giakuo apat mege kame li kede abokoya kede isigigir i kom gi.
- ¹¹Giakuo nogo obedo ne wu gi me kwer, likame ipoorenu camo ringo gi, akadi mulo kom gi kame kito.
- ¹²Gi dedede kame bedo i yi pii di kili kede isigigir kede abokoya obedo gi me kwer butu.
- ¹³⁻¹⁹Kikom winy, likame ibinunu camo magi, pien kibedo ne wu gi me kwer: ekokom me egere apapat, acut kede winy ace kame cal kede, ebum, etori, agak, ekululu, ekeng me epone apapat, abong, etukiri me epone apapat, atudoi me nam, etolut kede winy ace kame cal kede, kede olikolik.
- ²⁰Gimogo atitino apor kede bwom gi di kitie kede tien gi atot obedo gi me kwer butu,
- ²¹kwanyo kenekene atie kede tien gi kororopun di kitwero sosomo.
- ²²Itwerunu camo obonyo kede apat kame cal kede gi, ojir kede apat kame cal kede gi, otwongo kede apat kame cal kede gi.
- ²³Do gi atitino ace apat atie kede bwom gi di kiliao alia obedo gi me kwer butu.
- ²⁴Ngat kame bino mako kom le me kwer oto bino bedo dano kopwokere tuno piny yuto.
- ²⁵Doko da ngat kame bino yeno ringo gi poore lwoko igoen mege di eko dong di en dano kopwokere tuno piny yuto.



²⁶Leini nogo gin ige: leini dedede kame tie kede abelekek i tien gi do di likame ekakarun, arabo likame engoko cam di eko medo nyamo obedo gi me kwer butu; ngat kame mulo gi bedo dano kopwokere.

²⁷Leini dedede kame tie kede tien gi ongwon do di kitie kede lwet gi, obedo gi me kwer butu; ngat kame mulo kom gi ka kito bedo dano kopwokere tuno piny yuto,

²⁸doko ngat kame yeo kom gi ka kito poore lwoko igoen mege, di eko dong di en dano kopwokere tuno piny yuto.

²⁹⁻³⁰Inunuk, iyoono me epone apapat, igwegwe me epone apapat, nyang kede agogou obedo gi me kwer butu.

³¹Ngat kame mulo gi, arabo kame mulo kom gi ka kito bedo dano kopwokere tuno piny yuto.

³²Kame kito di kom gi oko potu i gimoro, gi nono doko gi kopwokere. Magonogi ribo jamini kame kopao ki kom yat, igoen, launi, ipukoi, arabo gimoro dedede kame kotio kede iepone moroni; kopooore rwako gi nono i yi pii, do di eko dong di pwodi epwokere tuno piny yuto.

³³Kame moro kikom gi oko potu i yi agulu kame kocweo kede lobo, gi dedede kame tie i yi agulu nono doko gi kopwokere, doko miero nek agulu nono.

³⁴Kame pii me akodi agulu nono oony i kom cam moro kame oudo poore acama, cam nono bino doko gi kopwokere; doko da kame gimoro kame poore amata oduonyo i yi agulu nono, giamata nono da doko gi kopwokere.

³⁵Ka kom gi oto nono opoto i gimoroni, akadi i keno amoto i tutuk me tedo, gi nono doko gi kopwokere; kopooore babaro en.

³⁶Do atan arabo akong kame pii tie iye bedo gi kame li kede pwokere, bed bala gi atie iye koudo oriamakin kede kom gi koto dong di tie gi kopwokere.

³⁷Kame kiko to di kom gi arabo dul kom gi oko potu i kom kodi kame oudo kopoko me acua, kodi nono likame bedo gi kopwokere;

³⁸do ka kiko to di kom gi arabo dul kom gi oko potu i kom kodi kame kobido kede pii, kodi nono doko gi kopwokere.

³⁹Ka le moro kame itwerunu camo oto, ngat kame mulo kom le oto nono doko dano kopwokere tuno piny yuto.

⁴⁰Ka ngatamoro oko camo ringo me le nono, poore elwok igoen mege di eko dong di en dano kopwokere tuno piny yuto; doko da jo kame yeo kom le oto nono poore lwoko igoen gi di kiko dong di gin jo kopwokere tuno piny yuto.

⁴¹Gimogo anyidinyidi piny i wi lobo tie gi me kwer butu, likame ipoorenu camo gi,

⁴²akadi bed bala kiliao aliaa kede kor gi, amoto kioto kede tien gi ongwon, arabo kitie kede tien gi atot atota.



⁴³Kur icamunu gimoro kikom gi nogi di ikounu doko jo kopwokere.

⁴⁴Ango en Rwot Rubanga wu; lonyerenu ikounu bedo jokacil, pien ango ngat kacil.

⁴⁵Ango en Rwot ngat kowoto wu ki Misiri tetekeny abed Rubanga wu; miero ibedunu jokacil piento ango da acil.

⁴⁶Magonogi obedo iswilia amakere kede leini, kede winy, kede giakuo dedede abedo i yi pii, kede gikame nyidinyidi piny i wi lobo.

⁴⁷Ipoorenu ngeno poko gikame kotero be opwokere kede kalikame opwokere, giakuo kame itwerunu camo kede kobedo me kwer.

Jolebi 12

Lonyo Mon i ngei Nywal

¹Rwot oko mino Musa iswilia

²amako jo me Isirael kaman: Ka dako oyac di eko nywalo atin awobi, dako nono bino bedo dano kopwokere pi ceng kanyaare bala i kare kame etie kede tuwo me mon.

³I ceng me kanyauni di oko bino kepo kom atin me cuo.

⁴Di do en eko bino tieko ceng ot adek kiwie adek di etie lonyere pi remo kame eonyo; i kare nono likame en epoore mulo gimoro kobedo gikacil, akadi donyo i Eema kacil, tuno di ceng mege me lonyere otiek.

⁵Ka enywalo atin nyako, dako nono bino bedo dano kopwokere pi sabitin are, bala i kare kame etie kede tuwo me mon. Ceng mege me lonyere mere pi remo kame eonyo ko bino bedo ceng ot kanyape kiwie kanyape.

⁶Kame kare mere me lonyere otiek ingei nywalo atin awobi amoto nyako, en ebino tero ne ngasaseredoti i ekeko me Eema kacil atin romo me mwaka acel pi bedo giayala awanga, kede eluke amoto amam pi bedo giayala me kwanyo dub.

⁷Ngasaseredoti bino mino giayala ka dako nono but Rwot, di eko timo pwola me kwanyo pwokere mere, di eko doko dano kolonyere. Manoni en gikame dako poore timo kame enywal.

⁸Ka en ebedo ngacan likame etwero kwanyo oromo, poore ekwany amam are amoto ilukei are; acel bino bedo giayala awanga kede acel bino bedo giayala me kwanyo dub; di ngasaseredoti ko timo pwola me kwanyo pwokere mere di en eko bino doko dano kolonyere.

Jolebi 13

Iswilia amako Tuwo me Delkom

¹Rwot oko mino Musa kede Aaron iswilia gi:



²Ka ngatamoro tie kede gimoro koluro i kome, arabo giakwoti, arabo karamoro akokolo, di gi nono twero nyai di eko doko tuwo arac me delkom, poore tere but ngasaseredoti moro kikom Aaron kede awobe mege.

³Ngasaseredoti bino ngico tuwo kame tie i kome nono; ka eko udo be yer me kakame tuwo nono omako odoko tar, doko di ecamo delkome paka donyo i yie, en ebino ngeno be manono obedo tuwo arac me delkom; ingei ngingico en, ngasaseredoti bino tucu kakaler be dano nono obedo dano kopwokere.

⁴Do ka buge nogo tar do di likame kingodo delkome, doko da di yer me kanono likame odoko tar, ngasaseredoti bino kong cego dano nono i ot pi ceng kanyaare.

⁵Di ngasaseredoti ko bino ngingico en i ceng me kanyaare; ka en eko neno be tuwo nono pwodi tie kede cal mere nono, di likame enyai, ngasaseredoti bino medo bobo cege i ot pi ceng kanyaare.

⁶Di ngasaseredoti ko bino bobo ngingico en i ceng me kanyaare; ka en eko udo be tuwo nono odok cen likame enyai i delkome, en ebino tucu kakaler be dano nono obedo dano kame li kede pwokere, pien udo manono obedo tuwo me buge kenekene. Di do dano nono ko bino lwoko igoen mege di eko bedo dano kame li kede pwokere.

⁷Do ka tuwo nono oko bobo cere i cen ngei ngasaseredoti waco kakaler be dano nono obedo ngat kame li kede pwokere, en miero bobo edok but ngasaseredoti ot ngingico en.

⁸Ngasaseredoti bino ngingico en; ka en eko udo be tuwo nono onyai i delkome, ngasaseredoti bino waco kakaler be dano nono obedo ngat kopwokere; manono udo obedo tuwo arac me delkom.

⁹Ka dano moro tie kede tuwo arac i delkome, kopooore tere but ngasaseredoti,

¹⁰di en eko ngingico en. Ka buge atatar di wang gi lit tie i kome, di kiloko yer me kakame kitie iye odoko tar,

¹¹manono udo obedo tuwo arac me delkom. Ngasaseredoti bino tucu kakaler be dano nono obedo ngat kopwokere; likame ngasaseredoti bino cege i ot, piento en ebido dano kopwokere.

¹²Do ka tuwo nono osarakin i kome dedede yai ki tiene tuno i wie,

¹³ngasaseredoti bino ngingico en bobo. Ka en eko udo be tuwo nono oromo kome lung, en ebino tucu kakaler be dano nono likame opwokere, pien udo kome lung odoko tar pi roc.

¹⁴Do ka buge atie i kome wang gi obalacar, dano nono bino bedo ngat kopwokere.

¹⁵Ngasaseredoti bino ngingico en; ka en eko udo buge mege wang gi obalacar, en ebino waco kakaler be dano nono obedo ngat kopwokere. Buge awang gi obalacar obedo tuwo arac me delkom; ngat atie kede gi udo en ebido dano kopwokere.

¹⁶Do ka wang buge odoko tar, en ebino dok but ngasaseredoti,



¹⁷di en eko bino ngingico en. Ka en eko udo be wang buge nogo odoko tar kitie cango, ngasaseredoti bino waco kakaler be dano nono obedo ngat kame li kede pwokere.

¹⁸Ka dano moro tie kede karamoro i kome me giakwoti kocango,

¹⁹di bobo gimoro atar oko luro kanono, arabo gimoro akwakwar di tatar oko lukere kanono, dano nono bino ot but ngasaseredoti.

²⁰Ngasaseredoti bino ngingico en; ka eko udo be kanono ongodaun, doko yer mege odoko tar, ngasaseredoti bino tuco kakaler be dano nono obedo ngat kopwokere; manono obedo tuwo arac me delkom kocakare kede giakwoti.

²¹Do ka ngasaseredoti ongingico en di eko udo yer me kanono likame odoko tar, doko da likame engodaun do etie tuo, ngasaseredoti bino cege i ot pi ceng kanyaare.

²²Ka kanono oko medo camere, ngasaseredoti bino tuco kakaler be dano nono obedo ngat kopwokere; manono obedo tuwo arac me delkom.

²³Do ka kanono likame oko medo camere, di eko dong adonga di etie apore kocango me giakwoti, ngasaseredoti bino waco kakaler be dano nono obedo ngat kame li kede pwokere.

²⁴Ka mac owango dano moro, bur me mac nono oko doko tar arabo kwakwar di etatar,

²⁵ngasaseredoti bino ngingico dano nono. Ka yer me kanono odoko tar di kanono ongodaun, manono udo tuwo me delkom en ocakere kanono; ngasaseredoti bino tuco kakaler be dano nono obedo ngat kopwokere.

²⁶Do ka ngasaseredoti ongingico kanono di eko udo be yer mege likame odoko tar, doko da likame engodaun do etie cango, ngasaseredoti bino cege i ot pi ceng kanyaare.

²⁷Ngasaseredoti ko bino ngingico en i ceng me kanyaare; ka eko udo kanono tie medo nyai, en ebino tuco kakaler be dano nono obedo dano kopwokere. Manono udo obedo tuwo arac me delkom.

²⁸Do ka apore nono odong kamanono likame enyai, doko da di wange tie cango, manono udo obedo gi okokolo pi mac; ngasaseredoti bino tuco kakaler be dano nono obedo ngat kame li kede pwokere, pien manono mac en omio okokolo.

²⁹Ka icuo amoto dako moro tie kede buge i wie amoto i tike,

³⁰ngasaseredoti bino ngingico buge nogo. Ka buge nogo ongodaun di yer me kakame kitie iye tie bisali bisali di kiner, manono udo obedo tuwo arac me delkom; ngasaseredoti bino tuco kakaler be dano nono obedo ngat kopwokere.

³¹Ka ngasaseredoti ongingico buge nogo di eko udo be kakame kitie iye likame ongodaun, do kenekene yer me kanono likame kom gi yot, en ebino cege i ot pi ceng kanyaare.



³²I ceng me kanyaare ngasaseredoti bino ngingico kakame buge nogo tie iye; ka eko udo buge nogo likame onyai, doko di kanono li kede yer abisali bisali, kede da di likame engodaun,

³³dano nono bino lielo wie dedede kwanyo kenekene kakame buge nogo tie iye. Di ngasaseredoti ko bino bobo cege i ot pi ceng kanyaare.

³⁴I ceng me kanyaare, ngasaseredoti bino ngingico kanono; ka eko udo buge nogo likame onyai, doko da kanono likame ongodaun, ngasaseredoti bino tuco kakaler be dano nono obedo ngat kame li kede pwokere. En ebino lwoko igoen mege di eko bedo dano kacil.

³⁵Do ka buge nogo oko nyai i cen mere ingei tuco kakaler be en dano kame li kede pwokere,

³⁶ngasaseredoti bino bobo medo ngingico en; ka eudo buge nogo bobo onyai, likame bobo en ebino paro ngino ka kanono tie kede yer abisali bisali; dano nono do udo tie dano kopwokere.

³⁷Do ka en eneno di eko udo be buge nogo likame onyai, doko yer me kanono kom gi yot, udo buge nogo ocango, ngasaseredoti bino tuco kakaler be dano nono obedo ngat kame li kede pwokere.

³⁸Ka icuo amoto dako moro tie kede gimogo kolukulukun di tar i kome,

³⁹ngasaseredoti bino ngingico en; ka eudo kagonogo tie kede tar acocol, manono udo gwenyu en komake; dano nono udo likame opwokere.

⁴⁰⁻⁴¹Ka icuo moro yer odore ki toke amoto ki nyime, udo bono en omake do likame udo epwokere.

⁴²Do ka buge mogo owok i bono nono akwakwar di tatar, manono udo obedo tuwo arac me delkom.

⁴³Ngasaseredoti bino ngingico en; ka buge atie i bono mere nono kwakwar di kitatar, di cal acala bala tuwo arac me delkom,

⁴⁴ngasaseredoti bino tuco kakaler be en ebedo dano kopwokere, pien udo etie kede tuwo arac me delkom i wie.

⁴⁵Dano atie kede tuwo arac me delkom poore ngapo igoen konyinyilun di eko weko wie di likame ekuro; doko da nakanaka epoore umo doge di elelemo be, “Ango apwokere, ango apwokere!”

⁴⁶En ebino dong di epwokere nakanaka tek di pwodi en etie kede tuwo nono, doko da epoore bedo tenge me kimere, epoore bedo kene.

Iswilia amako Gikopurao

⁴⁷Ka egoe opurao, bed bala en ebedo egoe kame kotimo kede yer me oromo arabo egoe moro aliamaliam;



⁴⁸ka dul moro opurao me egoe aliamaliam, amoto me egoe kame kotimo kede yer me oromo, amoto ka etimere i kom emukule arabo gimoro kenekene kame kotimo kede emukule,

⁴⁹ka eko doko lulum arabo kwakwar, manono udo obedo gikarac apurao, miero nyute but ngasaseredoti.

⁵⁰Ngasaseredoti bino ngingico gi nono di eko ber kane pi ceng kanyaare.

⁵¹I ceng me kanyaare en ebino doko medo ngingico en; ka eko udo kakopurao nono omedo nyai, udo egoe arabo gi nono otieko doko gikame opwokere.

⁵²Ngasaseredoti bino wange, pien udo etie kede gikarac atie nyai, kame poore wang kede mac.

⁵³Ka ngasaseredoti ongingico di eko udo be gikopurao nono likame omedo nyai i kom egoe arabo i kom gi nono,

⁵⁴en ebino mino kolwoke di oko ber doko kane pi ceng kanyaare.

⁵⁵I ceng me kanyaare en ebino doko ngingico en; ka eko udo be gikopurao nono likame oloko cal mere, akadi di likame emedo nyai, udo gi nono otieko doko gikame opwokere, kopore wange i mac, bed bala gikopurao nono tie i yie amoto i ooko mere.

⁵⁶Do ka ngasaseredoti ongingico en bobo di eko udo be gikopurao i kom gi nono otieko kwanyere, en ebino nyilo tenge kakame oudo opurao nono.

⁵⁷Ka gikopurao nono oko bobo dwogo di eko cako nyai, won gi nono poore wange i mac.

⁵⁸Ka en elwoko gi nono di kanono oko rwenyo, en epoore lwoke bobo di eko bino bedo gimoro kame li kede pwokere.

⁵⁹Manoni en iswil amako gikame purao i kom egoe, bed bala ebedo egoe kame kotimo kede yer me oromo arabo egoe moro aliamaliam; ka dul moro opurao me egoe aliamaliam, amoto me egoe kame kotimo kede yer me oromo, arabo i kom gikame kotimo kede emukule moro ace; manoni en epone me moko ka edoko gikame opwokere amoto li.

Jolebi 14

Lonyere ingei Bedo kede Tuwo me Delkom

¹Rwot oko mino Musa

²iswilia amako pwola me lonyere me dano kame tuwo mere me delkom ocango kaman: Kobino tere but ngasaseredoti,

³di ngasaseredoti ko tere tenge me kimere di eko ngingico en. Ka tuwo me delkom kame dano nono oudo tie kede ocango,



⁴ngasaseredoti bino mino kokelo pir ngat kame kotie lonyo nono winy akuo are kalikame obedo winy me kwer, kede yat seda, kede ausi akwar, kede emompir.

⁵Ngasaseredoti ko bino mino kongolo winyo acel i wi pii atie i agulu, pii kame kotwomo i atan amol.

⁶Di do eko bino tero winyo akuo kodong, kede yat seda, kede ausi akwar, kede emompir, di eko rwako gi i remo me winyo kame kongolo i wi pii atie i agulu.

⁷Di eko kikiro remo nono tien kanyaare i kom ngat kame kotie lonyo ki tuwo arac me delkom, di do eko bino tuco kakaler be dano nono likame opwokere, di eko jalakino winyo akuo nono por eoto obar.

⁸Di dano nono ko lwoko igoen mege, di eko lielo wie, di eko bol; di do en eko bino doko ngat kame li kede pwokere. Ingei manono en ebino dok kakame kimere tie iye, do ebino tieko ceng kanyaare di likame edonyo i eema mere.

⁹I ceng me kanyaare en ebino bobo lielo wie, tike, abukewange; en ebino lielo yer dedede atie i kome. Di en eko bino lwoko igoen mege di eko bol, di do eko doko dano kame li kede pwokere.

¹⁰I ceng me kanyauni en eko bino kelo romini are acuo, kalikame tie kede peko moro i kom gi, kede oromo akaale me mwaka acel kalikame tie kede peko moro i kome, kilo adek me alos kame konyongo kede mo me olibeti, kede mo me olibeti anoko dul lita.

¹¹Ngasaseredoti atie timo pwola me lonyere bino cibo dano atie lonyere nono kede giayala nogi i ekeko me Eema me ariamakin kede Rwot.

¹²Di do ngasaseredoti ko bino kwanyo emerekek acel karacel kede mo anoko dul lita di eko yalo gi bala giayala me timo cul. En ebino kiarao gi malo i nyim Rwot.

¹³Ebino ngolo oromo nono kakame kongolo iye leini me giayala me kwanyo dub kede giayala awanga i kabedo kacil; pien giayala me timo cul, bala giayala me kwanyo dub da, dong ne ngasaseredoti; en ebedo gikacil twatwal.

¹⁴Ngasaseredoti bino kwanyo remo mogo me oromo nono di eko keto i yit dano kame kotie lonyo nono me bad tetu cam, kede i lwete adwong me cinge tetu cam, kede i lwete adwong me tiene tetu cam.

¹⁵Ngasaseredoti ko onyo mo mogo i yi cingen ngasaseredoti me tetu ngodal,

¹⁶di eko rwako iye lwete me cinge tetu cam, di eko kikiro mo mogo i nyim Rwot kanono tien kanyaare.

¹⁷Di eko bino kwanyo mo mogo kodong i yi cinge tetu ngodal, di eko keto i yit dano nono me bad tetu cam, kede i lwete adwong me cinge tetu cam, kede i lwete adwong me tiene tetu cam, kakame oudo koketo iye remo me giayala me timo cul.

¹⁸Mo apat kodong i yi cing ngasaseredoti en ebino keto i wi dano kame kotie lonyo nono. Epone noni en kame ngasaseredoti bino timo kede pwola me lonyere.



¹⁹Di do ngasaseredoti ko mino giayala me kwanyo dub pi ngat kame kotie lonyo ki pwokere mere nono. Ingei manono en ebino ngolo oromo me giayala awanga

²⁰di eko yale karacel kede giayala me alos i wi alutari. Iepone noni, ngasaseredoti bino timo pwola me lonyo dano kopwokere di en eko doko dano kolonyere.

²¹Do ka en ebedo ngacan likame etwero kwanyo gigo dedede, en ebino kelo emerekek acel bala giayala me timo cul kame kobino kiarao, kilo acel kenekene me alos kame konyongo kede mo me olibeti pi bedo giayala me alos, kede mo anoko dul lita.

²²Ebino kelo da amam are amoto ilukei are, di lubere kede kite kame en etwero kede; acel bino bedo giayala me kwanyo dub kede acel ko bedo giayala awanga.

²³I ceng me kanyauni me lonyere mere en ebino tero gi but ngasaseredoti i ekeko me Eema me ariamakin kede Rwot, i nyim Rwot.

²⁴Ngasaseredoti bino kwanyo oromo kede mo me olibeti di eko kiarao gi i nyim Rwot.

²⁵Ngasaseredoti ko bino ngolo oromo me giayala me timo cul, di eko kwanyo remo mogo me giayala nono di eko keto i yit dano kame tie lonyere nono me tetu cam, i lwete adwong me cinge tetu cam, kede i lwete adwong me tiene tetu cam.

²⁶Ngasaseredoti ko onyo mo mogo i yi cinge en ngasaseredoti me tetu ngodal,

²⁷di eko rwako iye lwete me cinge tetu cam, di eko kikiro mo mogo i nyim Rwot kanono tien kanyaare.

²⁸Di eko bino kwanyo mo mogo kodong i yi cinge tetu ngodal, di eko kete i yit dano nono me bad tetu cam, kede i lwete adwong me cinge tetu cam, kede i lwete adwong me tiene tetu cam, kakame oudo kokeketo iye remo me giayala me timo cul.

²⁹Mo apat kodong i yi cing ngasaseredoti en ebino keto i wi dano kame kotie lonyo nono. Epone noni en kame ngasaseredoti bino timo kede pwola me lonyo dano kopwokere.

³⁰Di do ngasaseredoti ko bino yalo amam arabo eluke acel, di lubere kede kite kame etwero kede,

³¹bala giayala me kwanyo dub, kede ocelu mere eko yalo bala giayala awanga karacel kede giayala me alos. Iepone noni, ngasaseredoti bino timo pwola me lonyo dano kopwokere.

³²Manoni en pwola amako dano atie kede tuwo arac me delkom do di likame etwero kwanyo giayala kame mitere me lonyere.

Gikame Purao i Ude

³³Rwot oko waco ne Musa kede Aaron kaman:

³⁴Kame itununu i lobo me Kanan, en lobo kame ango amio wu pi doko meru, di ango ako keto gikame purao i ot ka ngatamoro,



- ³⁵won ot nono bino ot but ngasaseredoti di eko waco ne kop i kom gi nono.
- ³⁶Ngasaseredoti ko bino mino kokwanyo jame dedede atie i ot nono ooko, aso ka li, jamini nogo dedede kobino waco be opwokere. En eko bino donyo i yi ot
- ³⁷di eko ngingico gikopuraa nono. Ka eko udo kakalulum amoto akwakwar, di eneeno bala etieko roko apama,
- ³⁸ngasaseredoti bino wok ooko di eko gono ot nono pi ceng kanyaare.
- ³⁹Di en eko bino bobo dwogo i ceng me kanyaare di eko medo ngingico en. Ka eko udo gi nono omedo nyai i apama me ot,
- ⁴⁰en ebino mino cik di oko tako ingaroi me apama kakopuraa nono di oko ot uco gi kakopwokere ooko me bomba.
- ⁴¹Ingei manono en ebino mino kokiso apama me ot dedede kiber ki yie, di oko ot onyo gikame kokiso nogo kakopwokere tenge me bomba.
- ⁴²Di oko bino lunyo keto engaro apat kawang kame kokwanyo noka, doko di oko medo puco ot kiber.
- ⁴³Ka ot bobo oko cako purao ingei en tako ingaroi kede kikiso apama kede doko medo puce,
- ⁴⁴ngasaseredoti bino ot di eko ngingico en; ka eko udo kakopuraa onyai i ot, udo ot nono otieko pwokere.
- ⁴⁵En ebino mino koreto ot nono, di oko tako ingaroi, ibaon kede apama mere dedede, di oko tero gi tenge me bomba kakopwokere.
- ⁴⁶Ngatamoro kame bino donyo i ot kame kogengo pien epuraa, ngat nono bino doko dano kopwokere tuno piny yuto;
- ⁴⁷doko da jo dedede kame bino buto arabo cam i ot nono poore lwoko igoen gi.
- ⁴⁸Ka ngasaseredoti obino di eko ngingico di eko udo be kakopuraa likame bobo omedo neeno ingei puco ot nono, en ebino tuco kakaler be ot nono likame opwokere, gikopuraa otieko kwanyere.
- ⁴⁹Di do pi lonyo ot nono en ebino kwanyo winy are, yat seda, ausi akwar kede emompir.
- ⁵⁰En ebino ngolo winyo acel i yi agulu kame tie kede pii kame kotwomo ki atan amol,
- ⁵¹di eko kwanyo yat seda kede emompir kede ausi akwar karacel kede winyo akuo mere, di en eko rwako gi i remo me winyo kame kongolo i wi pii ca. Di eko kikiro remo nono tien kanyaare i kom ot kame kotie lonyo nono.
- ⁵²Epone noni en kame kobino lonyo kede ot kopwokere kede remo me winyo, kede pii me atan amol, kede winyo akuo, kede yat seda, kede emompir kede ausi akwar.



⁵³En eko bino jalakino winyo akuo nono por eoto obar tenge me bomba. Iepone noni, ngasaseredoti bino timo pwola me lonyo ot kopwokere di en eko doko ot kolonyere.

⁵⁴Magonogi en pwola amako tuwo arac me delkom;

⁵⁵⁻⁵⁶buge, giakwoti, gikame kokolo; kede gikame purao i kom igoen kede i ude.

⁵⁷Iswilia nogi moko ka gimoro obedo gikame opwokere arabo li.

Jolebi 15

Gikame Cwer ki Kom Danu kame mie Epwokere

¹Rwot oko mino Musa kede Aaron iswilia

²amako jo me Isirael kaman: Ka icuo moro tut cwer ki kome me cuo, udo en edoko danu kopwokere,

³bed bala tut nono tie meede mol amoto ejiko mol.

⁴Kabuto dedede kame danu nono buto iye kede gi dedede kame en ebedo iye doko gikopwokere.

⁵Ngat kame mulo kabuto ka danu nono,

⁶arabo kame bedo i gikame en ebedo iye poore lwoko igoen mege di eko bol, di eko bino dong di en danu kopwokere tuno piny yuto.

⁷Ngat kame mulo danu kame tut mol ki kome poore lwoko igoen mege di eko bol, di eko bino dong di en danu kopwokere tuno piny yuto.

⁸Ka danu kame tut mol ki kome nono ongule i kom danu moro kame li kede pwokere, danu kame kongulo lau i kome nono poore lwoko igoen mege di eko bol, di eko bino dong di en danu kopwokere tuno piny yuto.

⁹Abeno kame danu atie kede tut amol obedo iye tie gikopwokere.

¹⁰Danu kame mulo gikame en ebedo iye bedo danu kopwokere tuno piny yuto, doko da danu kame yeo akodi gi nono poore lwoko igoen mege di eko bol, di eko bino dong di en danu kopwokere tuno piny yuto.

¹¹Jo dedede kame danu kame tut mol ki kome omulo di likame elwoko cinge poore lwoko igoen gi, di kiko bol, di kiko bino dong di gin jo kopwokere tuno piny yuto.

¹²Agulu kame danu kame tut mol ki kome omulo kopooe neko; do ka emulo gimoro kobedo yat kame kopao, kopooe lwoko gi nono.

¹³Ka icuo kame tut mol ki kome oko cango, en epooe maro ceng kanyaare pi lonyere mere, di eko lwoko igoen mege di eko bol kede pii me atan amol, di en eko bino doko danu kotieko lonyere.

¹⁴I ceng me kanyauni en ebino tero amam are arabo ilukei are but ngasaseredoti i ekeko me Eema me ariamakin kede Rwot.



- 15**Ngasaseredoti bino yalo gi; acel bino bedo giayala me kwanyo dub kede ocelu ko bedo giayala awanga. Epone noni en kame ngasaseredoti bino timo kede pwola me lonyo icuo kame tut mol ne.
- 16**Ka kwir me icuo oony, epoore lwoko kome dedede di eko dong di en dano kopwokere tuno piny yuto.
- 17**Gi dedede kame kocweo kede egoe amoto lau me le, di kwir me icuo oko ony iye, kopooore lwoke kede pii di gi nono ko dong di etie gikopwokere tuno piny yuto.
- 18**Ka icuo obuto kede dako di icuo oko onyo ne kwir, gin dedede kipoore bol di kiko dong jo kopwokere tuno piny yuto.
- 19**Ka dako tie onyo remo me tuwo duwe, en ebino bedo dano kopwokere pi ceng kanyaare, doko da dano kame mule bino bedo ngat kopwokere tuno piny yuto.
- 20**Gi dedede kame en ebuto iye amoto ebedo iye i kare kame en etie kede tuwo duwe bino bedo gikopwokere.
- 21**Ngat kame mulo kabuto mere poore lwoko igoen mege di eko bol, di eko dong di en dano kopwokere tuno piny yuto.
- 22-23**Ngat kame mulo kabuto ka dako nono, arabo gimoroni kame en ebedo iye poore lwoko igoen mege, di eko bol, di eko dong di en dano kopwokere tuno piny yuto.
- 24**Ka icuo moro oko buto kede dako nono i kare kame etie kede tuwo duwe, icuo nono bino doko dano kopwokere di eko dong di epwokere kamanono pi ceng kanyaare.
- 25**Ka dako obedo tie kede ony me remo do weko i kare me tuwo duwe, arabo ka remo omeede ony ne kalamo ceng mege me tuwo duwe, en ebino dong di en dano kopwokere i ceng dedede kame remo tie ony ne kede, bala kame etie kede i kare mere me tuwo duwe.
- 26**Kabuto moroni kame dako nono bino buto iye, arabo gimoroni kame en ebino bedo iye bino bedo gikopwokere, bala kame etie kede i kare mere me tuwo duwe.
- 27**Ngat kame bino mulo gi nogo bino doko dano kopwokere; en epoore lwoko igoen mege di eko bol, di eko bino dong di en dano kopwokere tuno piny yuto.
- 28**Ka ony me remo mere ocungo, en epoore kuro pi ceng kanyaare, di do en eko doko dano kame li kede pwokere.
- 29**I ceng me kanyauni dako nono bino tero amam are arabo ilukei are but ngasaseredoti i ekeko me Eema me ariamakin kede Rwot.
- 30**Ngasaseredoti bino yalo gi; acel bino bedo giayala me kwanyo dub kede ocelu ko bedo giayala awanga. Epone noni en kame ngasaseredoti bino timo kede pwola me lonyo dako kame tie kede pwokere pi ony me remo.
- 31**Rwot oko waco ne Musa kede Aaron pi kwenyaro jo me Isirael pi kwanyo tenge pwokere kame kitie kede, tetekeney kur kimunao Eema me ariamakin kede en, kame tie i diere gi. Aso ka gin kiko munao en, kobino neko gi.



³²Magonogi obedo pwola kame mako icuo kame tut mol ki kome me cuo, arabo kame kwir mere me cuo oony,

³³dako kame tie kede tuwo duwe, arabo icuo kame buto kede dako kopwokere.

Jolebi 16

Ceng me Kwanyo Dub

¹Kakame awobe ka Aaron are oko to kede pi oudo gin kioto noko Rwot,

²Rwot oko waco ne Musa be, “Wace omini Aaron kur ebed dodonyo kabedo kacil esawa moroni kenekene, i yi isenge i nyim kom me kisa kame tie i wi Sanduku me Isikan, piento kanono en kame ango aneeno iye i edou. Aso ka li, ebino to.

³En ebino donyo i kabedo kacil ka ekelo twon etobait bala giayala me kwanyo dub, kede emerekek pi bedo giayala awanga.

⁴” Di pwodi likame en eoto kabedo kacil, en kong ebino bol, di do eko ngapo igoen me ngasaserdoti: esati abor aliamaliam, ipalen me yie, ausi ibatalal me pier kede egoe kame odwadwalo i wic.

⁵” En ebino gamo kikut jo me Isirael ikoroi are pi bedo giayala me kwanyo dub, kede emerekek acel pi bedo giayala awanga.

⁶Aaron bino mino giayala me twon pi kwanyo dub mege kede dub me jo me ode.

⁷Di do en eko bino tero diegi are nogo di eko keto gi i nyim Rwot, i nyim ekeko me Eema me Ariamakin kede Rwot.

⁸Di en eko bino uco alulu pi diegi are nogo, kidi me alulu acel bino cungo pi diel kame bino bedo me ka Rwot, do ocelu mere bino cungo pi diel kame bino bedo me ka Asasel. ⁹Aaron bino tero diel kame alulu omako pi bedo me ka Rwot di eko mine bala giayala me kwanyo dub;

¹⁰do diel kame alulu oko mako pi bedo me ka Asasel kobino mine di ekuo but Rwot di oko riame eoto i wi tim but Asasel, tetekeny eter tenge dub me jo.

¹¹” Ka Aaron ongolo twon bala giayala me kwanyo dub mege kede dub me jo me ode,

¹²en ebino kwanyo ki alutari tago me dunyo odok angwe kur, kame itonge me mac opong iye, eko juko odok angwe kur kame kodonyo cing are, di eko tero gi i yi isenge.

¹³En eko bino keto odok angwe kur nono i mac i nyim Rwot, di yiro mere ko umo kom me kisa kame tie i wi Sanduku me Isikan, tetekeny kur en enen kom nono di eko to.

¹⁴En ebino tero remo mogo me twon nono di eko kikiro en kede lwete i nyim kom me kisa di bobo eko kikiro remo ace tien kanyaare i nyim Sanduku me Isikan.



¹⁵ Di do en eko bino ngolo diel kame tie giayala me kwanyo dub me jo, eko tero remo mere Kabedo Kacil Kalamo, di eko kikiro remo nono i nyim kom me kisa kede i nyim Sanduku me Isikan, bala kame oudo etimo kede remo me twon.

¹⁶ Iepone noni en ebino lonyo Kabedo Kacil Kalamo ki pwokere me jo me Isirael kede ki dub gin dedede. En miero etim kamanono ne Eema me ariamakin kede Rwot, piento en etie i diere me kimere gin, kabedo kame gin kipwoko.

¹⁷ Likame tie ngatamoro kame bino bedo tie i Eema cako esawa kame Aaron donyo kede iye pi lonyo Kabedo Kacil Kalamo tuno en wok ooko. Kame en etieko timo pwola me lonyere mere, kede me jo me ode, kede me jo dedede me Isirael,

¹⁸ en ebino do donyo ooko i alutari me wango giayala di eko lonye. En ebino tero remo mogo me twon kede me diel di eko keto i iswongen dedede me alutari.

¹⁹ En ebino kikiro remo mogo kede lwete tien kanyaare i wi alutari nono, di eko lonye ki dub me jo me Isirael di eko doko gikacil.

Diel kame Yeo Dub me Jo

²⁰” Kame Aaron otieko lonyo Kabedo Kacil Kalamo, kede kabedo apat me Eema me ariamakin kede Rwot dedede, kede alutari, en eko bino do kelo diel akuo i nyim Rwot, diel kame alulu oyero ne Asasel.

²¹ En ebino dokakino cinge are dedede i wi diel akuo nono, di eko tuco gikareco dedede me jo me Isirael, jemo gi, kede dub gi; en ebino keto gi i wi diel nono di eko cwane eoto tenge i wi tim di dano kame koyero en kame tere.

²² Diel nono bino yeno dub gin dedede etero tenge kabedo kame jo li iye; di dano nono ko bino weko diel nono i wi tim kunono.

²³ “Di do Aaron ko bino donyo bobo i Eema, di eko gonyo igoen me ngasaseredoti kame oudo en engapo di eoto Kabedo Kacil Kalamo; en eko bino weko gi kunono.

²⁴ En ebino bol kede pii i kabedo kacil, di eko ngapo igoen mege amake; di do eko donyo ooko eko mino giayala awanga meren kede giayala awanga me jo, pi kwanyo dub mege kede dub me jo.

²⁵ En ebino wango i wi alutari kakamio me le kame komio bala giayala me kwanyo dub.

²⁶ Icuo kame oudo oko tero diel ne Asasel i wi tim bino lwoko igoen mege di eko bol kede pii, en amio eko dok but jo i kimere.

²⁷ Twon kede diel kame oudo kotimo kede pwola me kwanyo dub, kame remo gi oudo kotero Kabedo Kacil Kalamo pi kwanyo dub, kobino tero gi tenge me kimere di oko wango gi; lau me kom gi, ringo gi kiton amontena kobino wango dedede.

²⁸ Ngat kame wango gi bino lwoko igoen me kome di eko bol kede pii, en amio eko dok but jo i kimere.

Gwoko Ceng me Kwanyo Dub



²⁹ “Man en iswil kame ibinunu lubo pi kare lung: i ceng me tomon i duwe me kanyaare, ibinunu kanyo kec, doko likame ibinunu timo tic moro i ceng nono, wun jo me Isirael kiton jokumbor kame bedo kede wu.

³⁰ Pien ceng noni en kame kobino lonyo wu kede ki dub wu dedede, tetekeny ibedunu jo kolonyere i nyim Rwot.

³¹ En ebodo ceng me wei atwal atwala bala ceng Sabato, doko wun miero ikanyunu kec iye. Manoni en iswil kame poore ilubunu pi kare lung me anyim.

³² Ngatel me Josaseredoti kame kowiro di oko kwero pi lunyo wang papa mere poore tim pwola me kwanyo dub. En ebino ngapo igoen me ngasaseredoti

³³ di eko lonyo Kabedo Kacil Kalamo, kede adulion apat me Eema, alutari, josaseredoti, kede jo dedede.

³⁴ Manoni en iswil kame wun ibinunu lubo pi kare lung me anyim. Ibinunu timo pwola noni tien acel buli mwaka pi lonyo jo me Isirael ki dub gi dedede.” Aso, Musa oko timo bala kame oudo Rwot ociko ne.

Jolebi 17

Iswilia amako Remo

¹ Rwot oko waco ne Musa pi

² waco ne Aaron kede awobe mege karacel kede jo me Isirael dedede kaman: Man en gikame Rwot otieko ciko.

³ Ka dano moro me Isirael ongolo diang arabo oromo amoto diel bala giamia but Rwot i tenge me kimere,

⁴ akaka kele i ekeko me Eema me ariamakin kede Rwot pi mine bala giayala i nyim taberenakol ka Rwot, icuo nono bino bedo kede raco me onyo remo; udo en etieko onyo remo doko miero riame tenge kibus jo me Isirael.

⁵ Iswil noni tie tetekeny jo me Isirael kel ne Rwot giayala me leini gi kame lem gin kiyalo i obar. Gin nataman do kibino kelo gi i nyim ekeko me Eema, but ngasaseredoti, di kiko neko gi bala giayala me nywak.

⁶ Ngasaseredoti bino kikiro remo i kom alutari kame tie i nyim ekeko me Eema, di eko wango kakamio kame dunyo ngwece amit but Rwot.

⁷ Jo me Isirael likame miero bobo mi giayala gi moro but jwogi acal bala diegi, kame oudo omio gi kibedo jo kalikame genere buta. Manoni en iswil kame gin poore kilubi pi kare lung me anyim.

⁸ Dano moroni me Isirael arabo ngakumbor moro kame bedo kede gin, kame mio giayala awanga arabo giayala moroni,

⁹ di likame en eko kele i ekeko me Eema pi yale buta, kobino riame tenge kibus jo me Isirael.



- ¹⁰ Ka dano moro me Isirael arabo ngakumbor moro kame bedo kede gin oko camo remo, ango abino dagi dano nono di ako riame tenge kibun jo mege.
- ¹¹ Pien kuo me giakuo tie i remo; doko ango atieko mino wun remo pi wun timo kede pwola i wi alutari me kwanyo dub wu; remo en kame kwanyo dub piento en ebedo kuo.
- ¹² Pi mano, ango atieko waco ne jo me Isirael be likame tie ngatamoro kikom gin kame bino camo remo, akadi ngakumbor kame bedo kede gi.
- ¹³ Ka dano moro me Isirael arabo ngakumbor kame bedo kede gin oko ot dwaro le arabo winyo moro kame ocamo, en ebino onyo remo mere piny di eko ume kede lobo,
- ¹⁴ pien kuo me gi akuo dedede tie i remo. Manono en komio ango awaco ne jo me Isirael be gin likame kibino camo remo me giakuo moroni; ngat kame bino camo remo, kobino riame tenge kibun jo.
- ¹⁵ Ngatamoroni, dano me Isirael arabo ngakumbor, kame camo ringo me le oto amoto ringo me le kame leini me obar oneko, en ebino lwoko igoen mege di eko bol kede pii, di eko dong kuro tuno otieno en amio eko doko cil.
- ¹⁶ Do ka en likame eko lwoko igoen mege kede eko bol, raco mere bino bedo i wie.

Jolebi 18

Tim kalikame Iswil Yei amakere kede Buto

- ¹ Rwot oko waco ne Musa pi
- ² waco ne jo me Isirael be, “Ango en Rwot Rubanga wu.
- ³ Wun likame ibinunu lubo tim me jo me Misiri, piny kame oudo wun ibedunu iye, doko likame ibinunu lubo tim me jo me lobo me Kanan, lobo kame ango atie tero wu iye. Wun likame ibinunu lubo itok gin.
- ⁴ Wun miero ilubunu iswilia nango di ikounu timo gikame ango aciko ne wu. Ango en Rwot Rubanga wu.
- ⁵ Miero ilubunu cik kede iswilia nango; ngat kame lubo gi bino kuo. Ango en Rwot.
- ⁶ Likame ngatamoro kikomu poore ot but dano kame obedo wad gi kiyapiyapi pi buto kede bala dako kede icuo. Ango en Rwot.
- ⁷ Kur ibut kede toto ni di iko kelo ne papa ni lewic. En ebedo toto ni; in likame ibino buto kede.
- ⁸ Kur ibut kede dako ka papa ni. Manono kelo ne papa ni lewic.
- ⁹ Kur ibut kede amini; amini kame papa wu acel arabo amini kame toto wu acel, kame onywalo i paco acel kedi arabo konywale tenge.
- ¹⁰ Likame ipoore buto kede nyar ka wodi arabo nyar ka nyari; manono kelo ni lewic.



- ¹¹Likame ipoore buto kede amini kame toto ni kede mere obedo mon nyek; eda ebedo amini.
- ¹²Likame ipoore buto kede awa ni, amin me papa ni; en wad kiyapiyapi kede papa ni.
- ¹³Likame ipoore buto kede awa ni, amin me toto ni; en ebedo wad kiyapiyapi kede toto ni.
- ¹⁴Likame ipoore buto kede dako ka omin me papa ni; eda ebedo toto ni.
- ¹⁵ Likame ibino buto kede dako ka wodi; en ebedo dako ka wodi; in likame ibino buto kede.
- ¹⁶ In likame ibino buto kede dako ka omini; manono kelo ne omini lewic.
- ¹⁷Likame ibino buto kede nyar dako kame in itieko buto kede, arabo nyar ka wode, arabo nyar ka nyare; gin kibedo joawade mege. Manono obedo gikarac twatwal.
- ¹⁸Likame ibino nyomo amin me dako ni di pwodi dako ni tie kuo.
- ¹⁹ “Likame ipoore buto kede dako di etie kede tuwo me duwe, pien udo etie kede pwokere.
- ²⁰ Likame ipoore buto kede dako ka dano apat; manono bino mino imunaun.
- ²¹ Likame ibino mino atin ni moro pi bedo giayala but rubanga Molek, pien manono bino kelo acae i nyinga ango Rubanga wu. Ango en Rwot.
- ²² Likame ibino buto kede icuo wadu bala dako. Manono obedo gikame rac twatwal.
- ²³ Likame ibino buto kede le moro di iko munaun kede, akadi dako moro da likame bino mino le moro buto kede; manono obedo tim arac twatwal.
- ²⁴” Kur imunaununu kede tim nogo, pien tim nogo en kame atekerin kame ango atie riamo tenge ki lobo kame wun itieniu ot iye oudo omunaun kede.
- ²⁵Tim gin nogo oudo oko munao lobo; ango ako mino lobo alola pi dub gin, di ango ako riamo gi ki lobo nono.
- ²⁶Do wun ibinunu lubo iswilia kede cik na di likame ikounu timo tim areco kame cal kamagonogo, wun jo me Isirael arabo jokumbor kame bedo kede wu,
- ²⁷pien jo kame oudo bedo i lobo nono di pwodi wun likame idonyunu iye bin otimo tim areco nogo dedede di gin kiko mino lobo omunaun.
- ²⁸Ka wun itimunu tim kame munao lobo nono, ango abino riamo wu tenge ki lobo nono bala kame oudo ariamo kede jo kame oudo bedo i lobo nono di pwodi wun.
- ²⁹Ngatamoroni kame bino timo tim moro kikom tim areco nogi, kobino riame kibut jo me Isirael.
- ³⁰” Aso, poore igwokunu gikame ango aciko ne wu di likame ikounu timo tim areco nogi, kame oudo jo kame bedo i lobo nono di pwodi wun otimo, doko kur imunaununu kede tim nogo. Ango en Rwot Rubanga wu.”



Jolebi 19

Iswilia amako Bedo kede Tim Kopoore

- ¹Rwot oko waco ne Musa
- ²pi waco ne jo me Isirael be, “Bedunu jokacil, pien ango Rwot Rubanga wu, ango ngat kacil.
- ³Ngat acelacel miero mi toto mere kede papa mere wor, doko miero igwokunu ceng Sabato na. Ango en Rwot Rubanga wu.
- ⁴“Kur ilokerenu woro caljwogi arabo itimunu cal mogo kede nyonyo di ikounu woro gi. Ango en Rwot Rubanga wu.
- ⁵” Kame ingolunu le bala giayala me nywak, lubunu iswilia kame ango atieko mino wu tetekeny ango agam giayala nono.
- ⁶Ringo nono miero kocame i ceng kame koneko iye le nono, arabo i ceng kame lubo mere. Ringo moro kame bino dong tuno i ceng me adek miero kowange.
- ⁷Ka oko camo ringo moro kikom manono i ceng me adek, udo etie gi me kwere, ango likame abino gamo giayala nono.
- ⁸Ngatamoroni kame came bino udo alola, piento en udo likame enyuto wor i kom gikame komio but Rwot; ngat kame timo kamanono kobino riame tenge kibut jo me Isirael.
- ⁹“Kame itienu kwanyo cam ki poti wu, kur ikwanyunu cam kame tie ilak poti, doko kur idokunu nyogao depo cam kodong i poti.
- ¹⁰Likame ibinunu ngwedo olok wu pitipit ki poti, arabo medo dok i pototo me olok pi nyogao depo olok kame oudo opopoto; ibinunu weko gi ne jocan kede jokumbor. Ango en Rwot Rubanga wu.
- ¹¹“Kur ikwalunu gimoro ; kur iserunu jo; doko kur ingalerenu kenu kenu.
- ¹² Kur ilairunu kede nyinga i kope kalikame tie me ateni, pien manono mio ipwokunu nyinga. Ango en Rwot.
- ¹³“Kur iterunu jamini me jo wadu i yore arac arabo iyakunu gi. Kur idagunu culo jo kame imiunu tic; kur ibutunu kede cul gi tuno odiko.
- ¹⁴Kur ilamunu edingo arabo iriunu isiki i nyim emuduk pi getaro en. Ipoorenu lwora; ango en Rwot.
- ¹⁵“Likame ipoorenu ngolo kop kalikame tie kakare; likame ibinunu bedo kede apokapoka but jocan arabo lworo joabar, do ibinunu ngolo ne jo kop kakare.
- ¹⁶Likame ipoorenu sarakino kope me abe i kom ngatamoro, doko kur imiunu ijura me abe i kom kop kame kelo ne dano to. Ango en Rwot.



- 17 “Kur idingerenu kede wade wu, do wacenu gi raco gi i nyim gi, ka li, wuda ibinunu bedo kede raco.
- 18 Likame ibinunu timo onyanga arabo mako ading kede dano wu moro, do ibinunu maro dano wadu bala kame imarerenu kede kenu. Ango en Rwot.
- 19 “Ibinunu gwoko cik nango. Likame ibinunu mino leini me epone apapat kwarere; likame ibinunu cuno kodere me epone are apapat i pota acel. Doko likame ibinunu ngapo igoen kame konyanyalo timo kede ausin me epone are.
- 20” Ka icuo moro obuto kede nyako apasoit kame oudo kotieko cikere pi mino but icuo apat, akadi bed bala icuo apat nono oudo pwodi likame otimo cul me lake, nyako apasoit nono kede icuo kobuto kede poore mii gin dedede alola. Gin likame kobino neko gi pien oudo pwodi likame kogonyo apasoit nono;
- 21do icuo bino kelo emerekek i ekeko me Eema me ariamakin kede Rwot pi bedo giayala me cul.
- 22Di ngasaseredoti ko bino timo pwola kede oromo nono pi kwanyo dub kame icuo nono oudo otimo; di Rubanga ko bino sasiro en ki dub nono.
- 23” Kame wun ikounu tuno i lobo me Kanan di ikounu pito yen kame kocamo anyakini gi, ibinunu tero anyakini nogo bala gikame kokwero ne wu. Likame ibinunu camo gi tieko mwakini adek kame geo.
- 24I mwaka me ongwon mere anyakini dedede kobino mino buta bala giayala kame nyuto pwoc wu buta, anga Rwot.
- 25Do i mwaka me kany mere wun do ikounu karuno camo anyakini me yen nogo. Ka itimunu kamanu, yen wu bino nyak twatwal. Ango en Rwot Rubanga wu.
- 26 “Likame ibinunu camo ringo moro kame remo pwodi tie iye. Likame ibinunu timo tim me jwok.
- 27 Likame ibinunu kebo yer me wi wu arabo lielo tiku.
- 28Likame ibinunu teteo komu arabo cwicwinyo komu pi timo alama moro me koko jo oto.
- 29 “Kur ikelunu acae i kom anyira wu i yore me mino gi bedo imalayan me tempulo; ka ikounu timo kamanono, ibinunu lokere woro rubangan apat di tim areco ko bino nyai i lobo nono.
- 30 Ibinunu gwoko Sabato na, di ikounu mino kabedo na kacil wor. Ango en Rwot.
- 31 “Kur ilokerenu ot mono tam kikut imuroko lango arabo jojwogi, pien gin kibino munao wu. Ango en Rwot Rubanga wu.
- 32” Nyutunu wor but jo oti, winyunu kop gi; doko ibinunu lwora. Ango en Rwot.
- 33 “Likame ibinunu tero kirac jokumbor kame bedo kede wu i lobo wu.



³⁴Ibinunu tero gi bala jo wadu me Isirael. Ibinunu maro gi bala kame imarerenu kede kenu kenu, pien wuda oudo ibedunu jokumbor i lobo me Misiri. Ango en Rwot Rubanga wu.

³⁵ “Kur itimunu gi kalikame tie kakare, i yore me pimo boro me jamini kirac, pimo peko me jamini kirac, amoto pimo rom me jamini kirac.

³⁶Ibinunu tic kede misanin kame tie kakare, kide me ateni me pimo peko me jamini, ikopon kame tie kakare me pimo kal, kede jamini me pimo mo kame tie kakare. Ango en Rwot Rubanga wu, ngat kame okwanyo wu ki lobo me Misiri.

³⁷Ibinunu gwoko iswilia kede cik nango dedede, doko miero ilubunu gi. Ango en Rwot.”

Jolebi 20

Alola pi Dagi Lubo Kop

¹Rwot oko waco ne Musa

²pi waco ne jo me Isirael be, “Ngatamoroni kikom wu arabo ngakumbor moro kame bedo kede wu, kame bino mino atin mere moro but rubanga Molek kobino neke. Jo dedede poore didipo en kede kide tuno en to.

³Ango kikoma abino lokere dage, di ako riame tenge kibus jo na, piento en eko mino atin mere but rubanga Molek, di eko munao kabedo na kacil, doko eko pwoko nyinga kacil.

⁴Do ka jo likame oko paro gimoro i kom gikame dano nono oko timo, di likame kiko neke,

⁵ango kikoma abino lokere dage kede jo me ode dedede, karacel kede jo kame lubo tim mere nono me weka di kiko lokere woro rubanga Molek. Ango abino riame tenge kibus jo na.

⁶” Ka ngatamoro oko lokere ot penyoo tam kibus imuroko lango kede jojwogi, di eko weka, ango abino lokere dage di ako riame kibus jo na.

⁷Pi mano, kwererenu ikounu bedo jokacil, pien ango en Rwot Rubanga wu.

⁸Gwokunu iswilia na di ikounu lubo gi. Ango en Rwot ngat kame mio ibedunu jokacil.

⁹ “Ngatamoroni kame lamo papa mere arabo toto mere kobino neke; remo mere dong i wie.

¹⁰ “Ka icuo moro oko timo adote kede dako ka ngat apat, icuo nono kede dako nono kobino neko gin dedede.

¹¹ Icuo kame buto kede dako ka papa mere kelo ne papa mere lewic; gin jo are nogo kobino neko gi; remo gi dong i wi gi.



- 12** Ka icuo moro obuto kede dako ka wode, gin jo are nogo kobino neko gi, pien udo gin kitimo gikarac kalamo; remo gi dong i wi gi.
- 13** Ka icuo obuto kede icuo wad gi bala dako, udo gin jo are nogo kitimo gikarac twatwal; kobino neko gin jo are nogo; remo gi dong i wi gi.
- 14** Ka icuo moro onyomo dako moro ribo kede toto me dako nono, gin jo adek nogo kobino wango gi pako to pi gi me lewic kame gin kiko timo, tetekeny gi me lewic kacal kamanono kur bed tie i diere wu.
- 15** Ka dano oko buto kede le, kobino neke karacel kede le nono.
- 16** Ka dako moro oko ot but le moro pi buto kede, ibinunu neko dako nono karacel kede le nono da; remo gi dong i wi gi.
- 17** “Ka icuo moro oko nyomo amin mere kame papa gi acel arabo toto gi acel di eko buto kede, manono tie gi me lewic. Kobino riamo gi tenge kikom jo. En etieko buto kede amin mere, poore mie alola.
- 18** Ka icuo moro obuto kede dako di dako nono tie kede tuwo duwe, gin jo are nogo kobino riamo gi tenge kikut jo, pien udo gin kituro iswil di kiko doko jo kopwokere.
- 19** “Ka icuo moroni obuto kede waa mere, manono udo ebuto kede wad gi kiyapiyapi; gin jo are nogo miero kiud alola pi dub gi.
- 20** Ka icuo moro oko buto kede dako ka omin me papa mere, manono udo en ekelo ne omin me papa mere lewic; kobino mino gin alola pi dub gi; gin kibino kei idwe.
- 21** Ka icuo moro oko nyomo dako ka omin mere, manono obedo tim me emuna, doko udo emio omin mere lewic; gin kibino kei idwe.
- 22**” Wun ibinunu gwoko iswilia na kede cik na dedede, di ikounu lubo gi, tetekeny kur ango ariamu tenge ki lobo kame atie tero wu iye.
- 23** Likame ibinunu lubo gikame jo abedo kunono timo, jo kame ango atie riamo tenge tetekeny wun idonyunu i lobo nono. Pien tim gin nogo en omio cunya oko dagi gi.
- 24** Do ango atieko waco ne wu be lobo gin bino doko meru, ango abino mine butu, lobo alac di mio. Ango en Rwot Rubanga wu; ango atieko poko wu kikut jo me atekerin apat.
- 25** Pi mano, wun ibinunu poko leini me kwer kede leini kalikame obedo me kwer, winy me kwer kede kalikame obedo me kwer; likame ibinunu pwokere kede camo leini arabo winy, amoto gimoro aliao alia i piny, kame ango atieko poko ne wu pi bedo gi me kwer.
- 26** Wun ibinunu bedo mega, jokacil, pien ango Rwot abedo ngat kacil. Ango atieko poko wu kikut atekerin apat pi wun bedo mega.
- 27**” Icuo arabo dako kobedo emuron arabo amuron lango amoto ngajwok kobino neke; kobino didipo en kede kide paka to, remo mere dong i wie.”



Jolebi 21

Josaseredoti Poore bedo Jokacil

- ¹Rwot oko waco ne Musa pi waco ne josaseredoti, awobe ka Aaron be, “Likame tie ngatamoro kikom josaseredoti kame miero mul kom wad gi moro oto di eko munaun,
- ²kwanyo ka dano nono obedo toto mere, papa mere, wode, nyare, omin mere,
- ³arabo amin mere kalikame onyomo, kame en egwoko.
- ⁴Likame ebino munao kome ka ore moro oko to.
- ⁵ “Josaseredoti likame bino lielo kakamogo i wi gi di ko dong ler, arabo ngolo yer me tik gi, amoto teteo kom gi pi nyuto iturur.
- ⁶Gin kibino bedo jokacil but ango Rubanga gi, doko likame kibino kelo acae i nyinga. Pien gin kimio giayala awanga me cam buta, gin poore kibed jokacil.
- ⁷Gin likame kibino nyomo mon kame otieko timo malaya arabo kame kotieko buto kede gi, amoto kame cwog gi oriamo gi, pien gin kibedo jokacil but Rubanga gi.
- ⁸Jo poore ter gi bala jokacil, pien gin kimio giayala me cam but ango Rubanga wu. Ango Rwot abedo ngat kacil, doko alonyo jo na kibedo cil.
- ⁹Ka nyar ngasaseredoti moro oko doko malaya, en ekelo ne papa mere acae; kobino wange paka to.
- ¹⁰” Ngasaseredoti kame oko tingo ne dwongo kikom jowote, en ngat kame kowiro kede mo, di oko kwere pi ngapo igoen me ngasaseredoti, likame ebino weko yer wie bedo di likame ekuro, akadi nyinyilo igoen me kome bala dano kame tie koko ngat oto.
- ¹¹En likame ebino ot kakame dano oto tie iye; en likame ebino munao kome akadi di ngat oto nono obedo papa mere arabo toto mere.
- ¹²En likame ebino yai ki Kabedo Kacil di eko ot kakame dano oto tie iye, pien manono bino mino ekelo acae Kabedo na Kacil; piento en kotieko kwere buta di owire kede mo na. Ango en Rwot.
- ¹³En ebino nyomo dako kame icuo moro pwodi likame obuto kede.
- ¹⁴En likame ebino nyomo apuserut, dako kame cware oriame, arabo dako kame kotieko buto kede, amoto malaya. En ebino nyomo nyako me ekeko kame en ewok kiye,
- ¹⁵tetekeny kur emi idwe mege bed jo kopwokere kikom jo mege; pien ango en Rwot ngat kame alonye.”
- ¹⁶Rwot oko waco ne Musa
- ¹⁷be ewace Aaron be, “Likame tie akwari moro kame tie kede angwal moro, kame bino noka pi mina giayala awanga me cam. Manoni tie pi kare lung me anyim.



¹⁸Likame tie dano moro kame tie kede angwal moro kame bino noka pi mina giayala: emuduk arabo engwalas, icuo kame tuo odudubo nyime, arabo kame tie kede peko moro i kome;

¹⁹icuo kame cinge arabo tiene ongwalo;

²⁰arabo dano kame ngee oguraun, amoto dano acecek twatwal, arabo icuo kame tie kede tuwo me wang amoto kame buge arabo gwenyu omako kome, arabo icuo moro kame ilem me mane odudubun.

²¹Likame tie akwar Aaron ngasaseredoti moro, kame tie kede angwal moro, kame bino noka pi mina giayala awanga; piento en etie kede angwal, en likame ebino noka pi mino ango Rubanga mere giayala me cam.

²²En ekaruno camo cam dedede kame komio but ango Rubanga mere, cam kacil kede kacil kalamo.

²³Do piento en etie kede angwal, en likame ebino noko egoe me isenge akadi alutari, tetekeny kur epwok kabedo na kacil; ango en Rwot ngat kame alonyo gin.”

²⁴Aso, Musa oko yamo kope nogo ne Aaron kede awobe mege kede but jo me Isirael dedede.

Jolebi 22

Giayala but Rubanga Poore bed Gikacil

¹Rwot oko waco ne Musa pi

²waco ne Aaron kede awobe mege be, “Wun poore igwokerenu i kom giamia kacil kame jo me Isirael mio buta, tetekeny kur ikelunu lewic i nyinga kacil. Ango en Rwot.

³Ka icuo moro kikom ikwae wu oko noko giamia kacil kame jo me Isirael omio buta, di en epwokere, dano nono likame bobo miero bin tic i alutari na. Manoni tie pi kare lung me anyim. Ango en Rwot.

⁴” Likame tie akwar Aaron moro kame tie kede tuwo arac me delkom arabo kame tie kede tuwo kame mio kome me cuo cwer, kame bino camo giayala kacil moro tuno di en edoko cil. Ngasaseredoti moro kame bino mulo gimoro kame kom dano oto opwoko, arabo ka en eonyo kwir me icuo,

⁵arabo ka emulo le moro arabo dano moro kalikame cil,

⁶ngasaseredoti kame mulo gikame cal kamanono bino dong di epwokere tuno otieno, doko en likame ebino camo giayala kacil nogo kwanyo di etieko bol.

⁷Kame ceng otieko donyo en ebino doko cil; di do en eko karuno camo giayala kacil, pien gin kibedo cam mege.

⁸En likame ebino camo ringo me le moro kame oto atoa arabo kame le me obar oneko, pien manono bino mine epwokere. Ango en Rwot.



- 9**” Josaseredoti bino lubo gikame ango awaco ne gin, tetekeny gin kur kibed kede raco moro di kiko to i kabedo kacil pi kelo acae iye. Ango en Rwot, ngat kame lonyo gin.
- 10**” Dano moro apat likame bino camo giayala kacil kame jo omio buta, akadi welo kobino but ngasaseredoti, amoto jotic mege kame en epango apanga.
- 11**Do ka ngasaseredoti oko wilo epasoit, arabo ka oko nywalo epasoit ture, epasoit nono karuno camo giayala kacil kame jo omio.
- 12**Ka nyar ka ngasaseredoti oko nyomere kede dano apat, nyako nono likame bino camo giayala kacil kame jo omio.
- 13**Do ka nyar ka ngasaseredoti oko doko apuserut, arabo ka cware oko riame, doko di en eli kede idwe, di do en eko dok bedo kede papa mere bala bin i kare me aponga mere, en ekaruno camo cam ka papa mere. Likame tie dano moro apat kame bino camo giayala kacil kame jo omio.
- 14**” Ka icuo moro oko camo giayala kacil kame jo omio, di en likame etimo me akaa, en ebino culo wang gikame en ecamo nono di emedo iye acel i kom kany me gi nono, di eko mino but ngasaseredoti.
- 15**Josaseredoti likame bino bedo abongo wor i kom jamini kacil kame jo omio buta;
- 16**kur gin kimi ngatamoro bed kede raco pi camo jamini kacil nogo, di eko poore mino giayala me timo cul. Ango en Rwot ngat kame lonyo gin.”
- 17**Rwot oko waco ne Musa pi
- 18**mino Aaron kede awobe mege karacel kede jo me Isirael dedede iswilia gi: Kame dano moro me Isirael arabo ngakumbor kame bedo kede gin omio giayala, akadi pi cobo kwongere kame oudo en etimo arabo bala giayala me bercuny,
- 19**ango abino game ka ebedo twon, emerekek arabo ekoroi, kame li kede peko moro i kome.
- 20**Likame ibinunu mino giayala me le moro kame tie kede peko moro i kome, pien likame kobino game.
- 21**Ka ngatamoro oko mino giayala me nywak buta, pi cobo kwongere kame en oudo etimo arabo bala giayala me bercuny, ango abino game ka likame etie kede peko moro i kome.
- 22**Likame ibinunu mino giayala kame cal bala mage but ango Rwot: le kame wange oto, le kame oturo tiene arabo kame aporeso tie i kome, amoto kame tut mol ki kome, arabo kame gwenyu omako, amoto kame tuwo opapaco kome. Likame ibinunu mino moro kikom gin i wi alutari bala giayala awanga.
- 23**Twon arabo oromo moro kame tiene bocoboco twatwal, arabo kame tiene cegocego twatwal wun ikarununu mino gi bala giayala me bercuny; do ka pi cobo kwongere, ango Rwot likame abino game.



²⁴Likame ibinunu yala kede le moro kame kogelemo arabo kame nyige mane oloi amoto owanakin. Likame ibinunu timo gikame cal kamanono i lobo wu.

²⁵Doko likame ibinunu gamo le kame cal kamanono kibun ngakumbor pi mine bala giayala but ango Rubanga wu, pien gin kongongolo kom gi; manono omio gin kitie kede peko i kom gi. Ango likame abino gamo gi.

²⁶⁻²⁷Ka oko nywalo atin twon arabo atin oromo amoto atin diel, en ebino bedo kede toto mere pi ceng kanyaare, do cako i ceng me kanyauni kokaruno mine bala giayala awanga buta.

²⁸Do likame ibinunu ngolo le moro kede atin mere i ceng acel.

²⁹Ka imiunu giayala me pwoc buta, ibinunu lubo iswilia kame mitere tetekeny ango ako game.

³⁰Ibinunu came i ceng nono; likame ibinunu weko moro buto. Ango en Rwot.

³¹Pi mano, wun ipoorenu gwoko cik na di ikounu lubo gi. Ango en Rwot.

³²Likame ibinunu kelo lewic i nyinga kacil, tetekeny jo me Isirael ngei be ango en ngat kacil. Ango en Rwot ngat kame lonyo wu;

³³doko ango en kame bin akwanyo wu ki lobo me Misiri pi doko Rubanga wu. Ango en Rwot.

Jolebi 23

Ibagai me Edini

¹Rwot oko mino Musa

²iswilia amako ibagai me edini, i kare kame jo me Isirael bino kede i cokere kacil kaman:

³Wun ibinunu timo tice wu pi ceng kanyape; do ceng me kanyaare obedo ceng Sabato, ceng me wei, doko en ceng me cokere kacil. Likame ibinunu timo tic moro iye; en ebedo Sabato ka Rwot i kakame wun ibedunu iye dedede.

⁴Magi en kare me ibagai nogo kame ango atieko moko, kare me cokere kacil, kame wun ibinunu tede ibagai iye ka kituno.

Ebaga me Kalamo kede me Mugati kame Arup li iye

(Wel 28.16-25)

⁵I duwe me agege i ceng me tomon kiwie ongwon, otieno di piny amumus, ibinunu camo Ebaga me Kalamo.

⁶I ceng me tomon kiwie kany me duwe nono, ibinunu cako camo Ebaga me Mugati kame Arup li iye; ibinunu camo mugati kame arup li iye pi ceng kanyaare.

⁷I ceng me agege mere ibinunu bedo i cokere kacil; likame ibinunu timo tice wu.



⁸Ibinunu mino giayala awanga but Rwot pi ceng kanyaare. I ceng me kanyaare mere ibinunu bedo i cokere kacil; likame ibinunu timo tice wu.

⁹⁻¹⁰Kame itununu i lobo kame ango atie mino wu di ikounu koko cam ki poti, ibinunu tero arita me cam kame geo cek i poti wu but ngasaseredoti.

¹¹Ngasaseredoti bino kiarao arita nono i nyima tetekenyo ango ayei gamo wu. En ebino timo manono i ceng kame lubo ceng Sabato.

¹²I ceng kame kokiarao kede arita i nyima, ibinunu mino giayala awanga me oromo me mwaka acel, kalikame tie kede peko moro i kome.

¹³Ibinunu mino giayala me oromo nono karacel kede kilo are me alos kame konungo di oko rube kede mo, en giayala awanga kame ngwe kur buta. Ibinunu mine karacel kede bwini atie lita acel.

¹⁴Likame ibinunu camo kwon anyen, akadi alos anyige kame kocelo arabo anumu, tuno di itiekunu mino giayala noni buta. Manoni en iswil kame ibinunu lubo pi kare lung i kadedere dedede kame ibinunu bedo iye.

Ebaga me Kac

(Wel 28.26-31)

¹⁵Ibinunu maro sabitin kanyaare ingei ceng Sabato, cako i ceng kame wun ikelunu kede aritai pi mino buta.

¹⁶Ibinunu maro ceng tuno Sabato kanyaare tiek, di do i ceng kame lubo, ceng me ot kany mere, ikounu bino mina giayala me alos anyen.

¹⁷Jo me paco acelacel bino kelo mugati are bala giayala kame kokiarao i nyima. Mugati acelacel kobino timo kede alos kame konungo kilo are, di oketo iye arup, di oko bino mine buta bala anyakini kame geo cek.

¹⁸Ibinunu kelo karacel kede mugati nogo, idwe romini kanyaare me mwaka acelacel kame li kede peko moro i kom gi, twon etobait kede romini are acuo; kobino mino gi but ango Rwot bala giayala awanga, karacel kede giayala me alos kede me amata. Gin en giayala awanga kame ngwe kur buta ango Rwot.

¹⁹Ibinunu da bobo mino ekoro acel bala giayala me kwanyo dub, kede imerekekin are me mwaka acelacel pi bedo giayala me nywak.

²⁰Ngasaseredoti bino kiarao romini nogo buta karacel kede mugati me anyakini kame geo cek, pi gin bedo giamia buta. Gin kitie gikacil kame komio buta pi josaseredoti.

²¹I ceng nono wun ibinunu bedo i cokere kacil; likame ibinunu timo tice wu. Manoni en iswil kame ibinunu lubo pi kare dedede i kadedere dedede kame ibedunu iye.

²²Kame icokunu cam wu ki poti, likame ibinunu kwanyo kiton cam me lak poti, arabo dok nyogao kwanyo cam kame oudo odong i poti. Ibinunu weko gi ne jocan kede jokumbor. Ango en Rwot Rubanga wu.

Ebaga me Mwaka Anyen

(Wel 29.1-6)



²³⁻²⁴Ceng me agege i duwe me kanyaare bino bedo ceng me wei, ceng me cokere kacil kame kobino kuto iye agwara.

²⁵Likame ibinunu timo tice wu; ibinunu mino giayala awanga buta.

Ceng me Kwanyo Dub

(Wel 29.7-11)

²⁶⁻²⁷Ceng me tomon i duwe me kanyaare bino bedo ceng me kwanyo dub; ebino bedo ceng wu kacil me cokere. Ibinunu kanyo kec di ikounu mino giayala awanga buta. ²⁸Likame ibinunu timo tic moro i ceng nono lung, pien etie ceng me kwanyo dub wu.

²⁹Ngat kalikame bino kanyo kec tieko ceng nono lung, kobino riame tenge kibus jo me Isirael.

³⁰Doko ngat kame bino timo tic moro i ceng nono, ango abino neke.

³¹Likame ibinunu timo tic moro. Manoni en iswil kame ipoorenu lubo i kare dedede i kabedere dedede kame ibinunu bedo iye.

³²En ebino bedo ceng wu me wei, doko ibinunu kanyo kec iye, cako otieno me ceng me kanyangon tuno oru mere otieno bobo; wun ibinunu gwoko ceng nono bala Sabato wu.

Ebaga me Kimere

(Wel 29.12-40)

³³⁻³⁴Ebaga me Kimere bino cakere i ceng me tomon kiwie kany me duwe me kanyaare di eko tieko ceng kanyaare.

³⁵I ceng me agege mere, ibinunu bedo i cokere kacil; likame ibinunu timo tice wu.

³⁶Ibinunu bedo mino giayala awanga but Rwot pi ceng kanyaare. I ceng me kanyauni mere ibinunu bedo i cokere kacil di ikounu mino giayala awanga but Rwot. Manono en ceng me woro Rubanga; likame ibinunu timo tice wu.

³⁷(Mage en ibagai kame Rwot ociko, kame wun ibinunu tedo bala kare me cokere kacil, kame ibinunu mino iye Rwot giayala awanga, leini awanga, giayala me alos, giayala angola kede me amata, bala kame mitere buli ceng.)

³⁸Ibaga nogi ibinunu tedo medo i kom ebaga me ceng Sabato kame wun itedunu buli sabiti, doko giayala nogi da ibinunu mino medo i kom giamia kame wun imiunu nakanaka but Rwot, giamia wu me cobo kwongere, kede giayala wu me bercuny.)

³⁹Kame do wun itiekunu koko cam ki poti wu, tedunu ebaga noni pi ceng kanyaare, cako i ceng me tomon kiwie kany me duwe me kanyaare. Ceng me agege kede ceng me kanyauni bino bedo ceng me wei.

⁴⁰I ceng me agege ibinunu ngwedo anyakini abeco ki yen wu, jange me otit kede jange me yen kame boke tot i kom gi, kede jange me yen kame turo i nget ecilet, di ikounu bedo kilel i nyim Rwot pi ceng kanyaare.



⁴¹Ibinunu tede bala ebage me wora, pi ceng kanyaare i duwe me kanyaare buli mwaka. Ibinunu gwoko iswil noni pi kare lung me anyim.

⁴²Jo dedede me Isirael bino bedo i kimere pi ceng kanyaare,

⁴³tetekeyi ikwae wu karuno ngeno be ango bin amio jo me Isirael obedo i kimere i kare kame akwanyo gi kede ki lobo me Misiri. Ango en Rwot Rubanga wu.

⁴⁴Musa oko waco ne jo me Isirael ibagai kame Rwot ociko kamanoni.

Jolebi 24

Gwoko Italan

(Yai 27.20-21)

¹Rwot oko waco ne Musa pi

²mino jo me Isirael cik kaman: Kelunu mo kame kojililo me olibeti me piko i italan, tetekeyi kibed liel i kare kame mitere.

³Aaron bino cwinyo gi buli otieno di eko weko gi kiliel tuno odiko. En ebino cwinyo gi i Eema me ariamakin kede ango Rwot, ooko me egoe me isenge kame tie i nyim Sanduku me Isikan. Manoni bino bedo iswil kame kobino lubo pi kare lung.

⁴Aaron bino gwoko italan kame tie i gicibo italan kame kotimo kede saabu kame kojililo, doko en miero enen be gin kibedo liel i nyima kare i kare.

Mugati kame Koyalo but Rubanga

⁵Ibino juko kilo tomon kiwie are me alos kame konungo di iko tedo mugati tomon kiwie are.

⁶Ibino cibo mugati nogo i irotin are i wi emesa kame kotimo kede saabu kame kojililo, mugati kanyape i buli eroto acel.

⁷Ibino keto i eroto acelacel odok acil kame kodunyo ngwe kur, pi bedo bala anen me giayala awanga kame komio buta, kawang mugati.

⁸Aaron bino keto gi kiber i nyima buli ceng Sabato. Manoni en gikame jo me Isirael bino timo pi kare lung.

⁹Mugati bino bedo iner ka Aaron kede ikwae mege pi kare dedede; gin kibino camo gi i kabedo kacil, pien mugati nogo obedo dul me giayala awanga kacil kalamo, kame komio buta pi josaseredoti.

Anyut me Alola kame Poore

¹⁰⁻¹¹Oudo tie icuo moro kame papa mere obedo dano me Misiri do toto mere oudo obedo dano me Isirael kame nyinge Selomit, nyar ka Dibiri dano me ekeko ka Dan. Icuo nono oko cako yi kede dano me Isirael i kimere kunono. I kare kame oudo gin kitie yi kede, wot ka dako me Isirael nono oko donyo yeyeto nying Rubanga di elame. Manono oko mino oko make di oko tere but Musa,

¹²di oko donyo dare di okuro kede kop kame Rwot bino waco be tim ne.



¹³Rwot oko waco ne Musa be,

¹⁴” Ter icuo koyeyeto ango no tenge me kimere di iko mino jo dedede kame oudo oko winyo lamere mere nono ket cing gi i wie, di jo dedede me Isirael ko didipo en kede kide tuno neke.

¹⁵Di iko waco ne jo me Isirael be ngatamoroni kame lamo Rubanga dub bino bedo i wie.

¹⁶Ngat kame yeto nyinga kobino neke; jo dedede bino didipo en kede kide. Ngakumbor arabo anywali me Isirael kame yeto nyinga kobino neke.

¹⁷ “Ngatamoroni kame neko dano, kobino neke.

¹⁸Ngatamoroni kame neko le me dano ocelu miero ecul wange. Kuo koculo kede kuo.

¹⁹” Ka ngatamoro oko mino awanon i kom ngat ocelu, eda kobino mine awanon kame cal kamanono.

²⁰ Ka en eturo ngawote, eda kobino ture; ka en elo wang dano ocelu, eda kobino lono wange; ka en eturo lak dano ocelu, eda kobino turo lake; awanon kame en emio ngat ocelu en kame kobino mino eda.

²¹Ngat kame neko le en ebino culo wange; do ngat kame neko dano kobino neke.

²² Iswil bino bedo acel pi jokumbor karacel kede jo me Isirael; pien ango en Rwot Rubanga wu.”

²³Kakame Musa otieko waco ne kede jo me Isirael kope nogi, gin kiko timo bala kame oudo Rwot ociko ne. Kitero icuo nono koyeyeto Rubanga tenge me kimere, di kiko didipo en tuno to.

Jolebi 25

Mwaka me Kanyaare

(Iswilia 15.1-11)

¹ Rwot oko yamo kede Musa i wi moru me Sinai di eko ciko ne

²pi mino jo me Isirael iswilia gi: Kame wun idonyunu i lobo kame ango atie mino wu, wun ibinunu weko lobo wei likame ipurenu pi mwaka acel lung buli mwaka me kanyaare.

³Ibinunu cuno kodere i poti wu, lwero jange me olok wu pi mino gi nyak, di ikounu coko cam ki poti wu pi mwakini kanyape.

⁴Do mwaka me kanyaare mere bino bedo Sabato ka Rwot; ibinunu weko lobo wei i mwaka nono. Likame ibinunu cuno kodere i poti wu arabo lwero jange me olok wu.

⁵Likame ibinunu coko cam kame tui ken gi di kiko cek ingei wun coko cam ki poti, doko likame ibinunu ngwedo olok ki yen wu me olok kalikame ilwerunu.



⁶Wun ikarununu camo cam kame bino cek i mwaka nono, wun karacel kede ipasoi wu, jotic wu kame ipanguu apanga kede jokumbor kame bedo kede wu,

⁷leini wu, kiton leini me obar. Cam dedede kame lobo bino ceko i mwaka nono kokaruno camo.

Mwaka me Gonyo kede me Dwoko Jamini

⁸Ibinunu maro mwakini kanyaare tien kanyaare, manono bino mino wu mwakini ot ongwon kiwie kanyangon.

⁹Di i ceng me tomon mere i duwe me kanyaare, Ceng me Kwanyo Dub, ikounu kuto agwara i lobo wu lung.

¹⁰Di ikounu bino kwero mwaka me ot kany bedo mwaka kacil di ikounu rabo kop me gonyo ipasoi but jo kame bedo i piny wu dedede. En ebino bedo mwaka me dwoko jamini but wegi kede dwoko ipasoi da but joe gi.

¹¹Likame ibinunu cuno kodere, arabo coko cam kame tui ken gi ingei wun coko cam ki poti, amoto ngwedo olok me poti wu kalikame ilwerunu yen gi.

¹²Mwaka nono bino bedo mwaka kacil butu; ibinunu camo cam kame tui di kiko dongo i poti ken gi kenekene.

¹³I mwaka nono kobino dwoko jamini dedede but wegi kikokome.

¹⁴Aso, kame in icato lobo ne dano me Isirael wadu, arabo iwilo lobo kibute, kur isererenu.

¹⁵Ngat kame tie cato lobo mere bino mino ngawil timo cul di lubere kede mwakini me pur kame pwodi odong di do mwaka me dwoko jamini tuno.

¹⁶Ka mwakini kame pwodi odong tot, wel me lobo nono da bedo malo, do ka mwakini odong nonok, wel mere da bedo piny, pien udo kotie cato nin kare me kac kame cam bino cek iye.

¹⁷Kur isererenu kenu kenu, do bedunu kede lworu buta; pien ango en Rwot Rubanga wu.

Peko me Mwaka me Kanyaare

¹⁸Ibinunu lubo iswilia na di ikounu timo gi dedede kame ango aciko, tetekeny ibedunu i lobo nono abongo peko moro.

¹⁹Lobo bino ceko cam, di wun ikounu bedo tie kede cam dedede kame imitunu di ikounu bedo iye abongo peko moro.

²⁰Do ngatamoro romo penyere be, “Nyo kame wan obino camo i mwaka me kanyaare mere ka wan likame oko puro cam, arabo likame oko coko cam wa ki poti?”

²¹Ango abino mino winyo na i lobo nono i mwaka me kanyape mere, tetekeny lobo cek cam kame jo romo camo pi mwakini are.



²²I kare kame wun ipurunu kede kodere i poti wu i mwaka me kanyauni mere, udo pwodi itienu camo cam kame oudo ikounu koko i mwaka me kanyape, doko ibinunu bedo tie kede cam kame romo wu paka tuno i kare kame icokunu kede cam anyen kame ipurunu.

Dwoko Jamini but Wegi

²³Lobo likame kobino cato me atera atwal, pien lobo obedo mera; pien wun icalunu bala jokumbor kame ango amio kong lobo nono but gi pi gin tic kede pi kare moro.

²⁴Lobo lung kame wun ibinunu bedo iye, ibinunu mino won lobo twero me lako lobo mere.

²⁵Ka ngat acel kikom wu oko doko ngacan di eko cato lobo mere, wad gi moro kiyapiyapi twatwal miero wil lobo nono dwoki.

²⁶Do ka dano li kede wad gi moro kame romo lako lobo mere, di i cen mere eko lony di eko udo sente kame romo lako lobo mere,

²⁷kobino maro mwakini me lobo mere nono cako i kare kame oudo ocate kede. Mwakini kame bino dong pi koto tuno i mwaka kame lubo me dwoko jamini, won lobo bino culo ngat kame oudo owilo lobo mere nono pi kare kodong nono.

²⁸Do ka won lobo likame tie kede sente kame eromo lako kede lobo mere, lobo nono bino dong i cing ngat kowile tuno i mwaka me dwoko jamini kame lubo. I mwaka nono kobino dwoko lobo nono ne wone.

²⁹Ka ngatamoro ocato ode kame tie i bomba kame kocelo kede apama, en etie kede twero me lake di pwodi likame mwaka acel otiek cako i ceng kame kocate kede.

³⁰Do ka en likame eko lake di pwodi mwaka likame otiek, en ekei ot nono, di ot nono ko doko me ka ngat kame oudo owile, en edoko mere atwal karacel kede ikwae mege; likame kobino dwoko ot nono but wone i mwaka me dwoko jamini.

³¹Do ude me calere kalikame kocelo kobino tero rom aroma kede poti; wegi tie kede twero me lako gi, doko miero dwok gi but wegi i mwaka me dwoko jamini.

³²Akadi kamanono da, Jolebi tie kede twero me lako ude gi kame tie i bomba esawa moro kenekene.

³³Ka Ngalebi moro oko cato ot kame tie i bomba di likame eko lako ot nono, miero kodwok ne ot nono i mwaka me dwoko jamini, pien ude kame Jolebi tie kede i bomba gi, obedo mergi atwal i diere me jo me Isirael wad gi.

³⁴Do lobo atwolo koluko bomba gi likame kobino cato; pien ebedo mergi atwal.

Lim kame Kokopo but Jocan

³⁵ Ka dano wadu moro me Isirael oko doko ngacan di do likame en ekaruno kuo kene, in ibino konye; en ebino bedo kedi bala ngakumbor kame bedo kedi.

³⁶Likame ibino gamo magoba moro kibute, do bed kede lworu but Rubanga di iko weke ebed kedi.



³⁷ Likame ibino mine eculo magoba moro i kom sente kame in ikope, arabo mine eculo sente kame kalamo pi cam kame in imie.

³⁸ Yutununu be ango en Rwot Rubanga wu, ngat kame akwanyo wu ki lobo me Misiri tetekeyn ami wu lobo me Kanan di ango ako bedo Rubanga wu.

Gonyo Ipasoi

³⁹ Ka dano wadu moro me Isirael oko doko ngacan kitek di en eko catere kene buti, in likame ibino mine etimo tic bala epasoit.

⁴⁰ Do en ebino bedo kedi bala epakasit di eko timo ni tic tuno i mwaka me gonyo ipasoi.

⁴¹ I kare nono en kede idwe mege kibino yai ki akarunikin ni di gin kiko dok i paco gi, i lobo ka joakwari mege.

⁴² Pien jo me Isirael obedo ipasoi nango kame akwanyo ki lobo me Misiri; likame kobino cato gi bala ipasoi.

⁴³ Likame ibino pugo gi kede gero, do ibino bedo kede lworu but Rubanga ni.

⁴⁴ Ka in imito ipasoi, itwero wilo gi kibut atekerin kame oluko wu.

⁴⁵ Itwero da wilo gi kibut jokumbor kame bedo kede wu, akadi idwe kame konywalo i lobo wu wun ikarununu wilo kibut joe gi kame bedo kede wu; gin kiromo doko bala jamini wu.

⁴⁶ Wun ikarununu daro gi di ikounu weko gi ne idwe wu pi lunyo gi bala jamini. Jogo en kame wun ibinunu tero bala ipasoi, do jo me Isirael wadu likame ibinunu pugo kede gero.

⁴⁷ Ka ngakumbor moro kame tie bedo kede wu oko baro, di dano moro me Isirael oko doko ngacan, eko catere kene but ngakumbor nono arabo but dano moro me diakal mere,

⁴⁸ akadi di en etieko catere, en pwodi etie kede twero mere me lakere; ngat acel kikom imiegu mege romo lake,

⁴⁹ arabo omin me papa mere amoto omin mere kame papi gi imiegu, arabo wad gi moro kiyapiyapi romo lake; arabo ka en kikome eko baro, en eromo lakere kene.

⁵⁰ En kede ngat kowile kibino maro wel me mwakini cako ki mwaka kame en ecatere kede tuno i mwaka me gonyo ipasoi kame lubo mere; wel me lake bino lubere kede kare kodong me tuno i mwaka me gonyo ipasoi. Kare kame en etieko but ngat kowile kobino maro bala kame komaro kede cul me epakasit.

⁵¹⁻⁵² En miero ecul sente me alako mere di lubere kede wel me mwakini kame pwodi odong pi tuno i mwaka me gonyo ipasoi.

⁵³ En ebino bedo i akarunikin me ngakumbor kowile bala epakasit kame koculo buli mwaka. Do ngakumbor nono likame bino puge kede gero.



⁵⁴Ka likame oko lake iepone kame kowaco go, en kede idwe mege miero kogony gi i mwaka me gonyo ipasoi kame lubo mere.

⁵⁵Pien dano me Isirael likame karuno bedo epasoit atwal, pien gin kitie ipasoi nango kame akwanyo ki Misiri. Ango en Rwot Rubanga wu.

Jolebi 26

Winyo kame Dano Udo pi Lubo Kop ka Rubanga

(Iswilia 7.12-24; 28.1-14)

¹ Rwot owaco be, “Likame ibinunu timo rubanga moro akony mere li, arabo cweno cal me gimoro, amoto sipo kidi moro i lobo wu arabo pano kidi moro me awora; pien ango en Rwot Rubanga wu.

²Ibinunu gwoko Sabato na, di ikounu mino kabedo na kacil wor. Ango en Rwot.

³ “Ka ilubunu iswilia na di ikounu gwoko cik na di ilubunu gi,

⁴ango abino mino wu kot i kare kame poore, di lobo ko bino ceko cam, kede yen da ko bino nyak.

⁵Ibinunu bedo kede amio, di ikounu bino bedo kede canyo tuno i kare me ngwedo olok, doko ibinunu ngwedo olok tuno i kare me cuno kodi. Ibinunu bedo tie kede cam dedede kame imitunu, di ikounu bedo abongo peko moro.

⁶” Abino mino anapakin bedo tie i lobo wu; ibinunu ot buto abongo gimoro kame ilworunu. Ango abino kwanyo tenge ki lobo wu leini ager, doko yi moro likame bino bedo tie.

⁷Ibinunu bwono jokwor wu di ikounu neneko gi.

⁸Jo kany kenekene kikom wun bino riamo jokwor tol acel, doko jo wu tol acel bino riamo jokwor tutumia tomon; ibinunu neko jokwor wu i yi.

⁹Ango abino timo ne wu bero di ako mino wu inywalunu idwe atot di ikounu nyai; doko abino cobo cikere na butu.

¹⁰Ibinunu tieko kare kalac di icamunu cam kame oudo icokunu i kare kokato, doko ibinunu kwanyo tenge cam me kare kokato nogo pi weko kabedo ne cam anyen.

¹¹Ango abino bedo i diere wu, likame abino weko wu.

¹² Ango abino bedo kede wu, di ako bedo Rubanga wu, di wuda ikounu bedo jo na.

¹³Ango en Rwot Rubanga wu, doko ango en kame akwanyo wu ki lobo me Misiri tetekeny kur bobo ibedunu ipasoi gin; ango atieko gonyo wu ki ipasun di ako mino wu ibedunu abongo adiadia.”

Alola pi Dagi Lubo Kop ka Rubanga

(Iswilia 28.15-68)

¹⁴Rwot bobo oko waco be, “Ka idagunu lubo kop na di likame ikounu lubo cik nogi dedede,



- 15** kede ka idagunu lubo iswilia na di ikounu turo isikan na kede wu,
- 16** angu abino timo ne wu kaman: abino kelo peko i komu; abino kelo ne wu tuwo kalikame cango kede kame dubo wang dano, di emio dano jony tuno to. Ibinunu cuno kodi do likame kibino konyo wu, pien jokwor wu en kame bino camo gikame wun ipurunu.
- 17** Angu abino lokere dagi wu, di jokwor wu ko bwono wu; jokwor wu bino pugo wu, doko ibinunu bedo kede lwooro atek kame bino mino iringunu tenge abongo ngatamoro kame tie riamo wu.
- 18**” Ka ingei manono wun pwodi ikounu dagi lubo kop na, angu abino meede kede mino wu alola kame kalamo pi dub wu.
- 19** Angu abino tieko ewaka wu adwong no; abino mino kot bedo li i malo di lobo wu ko tuo eko doko tek bala nyonyo.
- 20** Ibinunu tieko teko wu nono, pien lobo wu likame bino ceko cam doko yen da likame bino nyak.
- 21**” Ka imeedenu jemo na di idagunu lubo kop na, angu bobo abino medo mino wu alola kame kalamo.
- 22** Angu abino cwano ne wu leini ager, di gin kiko bino neneko idwe wu, muducaro leini wu, di kiko mino idongunu jo anonok kame bino mino yote wu dong nono abongo jo kame lubo gi.
- 23**” Ka ingei alola nogi dedede wun pwodi idagunu lubo kop na, do ikounu meede kede jemo na,
- 24** angu abino do lokere ne wu di ako mino wu alola kame kalamo kokato.
- 25** Abino mino wu alola me yi pi turo isikan na kede wu, doko ka ikounu ringo ot gwokere i bomban wu, abino cwano ne wu aumpuli, di manono ko bino mino irieunu cingu but jokwor.
- 26** Abino cwano ne wu kec ager kame bino mino keno acel kenekene romo mon tomon pi gin tedo mugati gin dedede. Gin kibino pimo ne wu mugati apima, do akadi icamunu gi dedede, likame ibinunu yeng.
- 27**” Do ka ingei alola noni wun pwodi ikounu meede jemo na,
- 28** angu abino do lokere ne wu kede lilo atek di ako mino wu alola kame kalamo kokato.
- 29** Kec bino bedo gwai ne wu, gwai kame bino mino icamunu idwe wu.
- 30** Abino dudubo kadedere kame iworunu iye rubangan i wi imukuran, di ako totongo alutarin wu me wango odok angwe kur; abino dodoko liele wu i kom cal me rubangan wu kame korereto piny. Cunya bino dagi wu kitek.



- ³¹Abino mino bomban wu doko amejeko, kadedere wu kacil bino dong nono, doko cunya bino dagi ngwece me giayala wu.
- ³²Ango abino dudubo lobo wu adikinicel; manono bino mino jokwor wu kame bino bedo iye neno di kom gi ko to.
- ³³Abino kelo jokwor yi kede wu di ako sasaro wu i lobere me kumbor. Lobo wu bino dong nono, di bomban wu ko doko amejeko.
- ³⁴Di lobo ko bino dong nono di eko ukaro, di udo wun itienu i lobo me jokwor wu bala mabus.
- ³⁵En ebino udo wei kame wun oudo likame imienu i kare kame oudo ibedunu kede iye, pien udo nan edong nono.
- ³⁶” Aso, jo kame bino dong kuo, ango abino keto lworu i cuny gi di kitie i lobo me jokwor wu; lworu nono bino mino koko me boke kame yamo yayango mio gi kiringo bala jo kame tie ringo tenge ki yi, di kiko popoto abongo ngatamoro kame tie wapo gi.
- ³⁷Kibino twomere ken gi ken gi di kigetar bala jo atie ringo ki yi, bed bala likame tie ngatamoro kame tie wapo gi. Likame ibinunu bedo kede teko me yi kede jokwor wu.
- ³⁸Ibinunu to i lobo kalikame meru di ikounu tiek kunono.
- ³⁹Jo kame bino dong kuo kom gi bino dubere pi dub gi kede pi dub me joakwari gi.
- ⁴⁰” Do ka ikwae wu bino tucu dub gi kede me ka joakwari gi kame bin odagi lubo kop na di kiko jemo na,
- ⁴¹di kiko mino ada alokere dagi gi di ako tero gi i lobo me jokwor gi; ka ikwae wu bino jiko epali gi, di kiko mwolere kede kiko yei alola pi dub gi,
- ⁴² ango abino yutuno isikan na kede Yakobo, Isaka kede Aburaam, di ako bino cobo cikere na me mino jo na lobo.
- ⁴³Do jo kame tie i lobo nono kong bino yai kiweko lobo nono, tetekeny eud wei, doko gin miero kiud alola kame romo pien gin oudo kiko dagi lubo iswilia kede cik na.
- ⁴⁴Do akadi kamanono da, di gin pwodi kitie i lobo me jokwor gi, ango likame abino dagi gin be tetekeny amuducaro gi atwal atwala di ako turo isikan na kede gi; pien ango en Rwot Rubanga gi.
- ⁴⁵Pirgi ango likame wia bino wil kede isikan kame bin atimo kede joakwari gi, jo kame bin ango akwanyo ki Misiri di atekerin dedede neno; ango oudo akwanyo gin tetekeny ango Rwot abed Rubanga gin.”
- ⁴⁶Magonogi dedede en iswilia kede cik kame bin Rwot oko mino Musa i wi moru me Sinai pi mino jo me Isirael.

Jolebi 27

Iswilia amako Giamia but Rwot



- ¹Rwot oko waco ne Musa be,
- ²” Wace jo me Isirael be ka dano moro okwongere pi mino dano but Rwot di eko mito mino sente akaka dano nono, kobino timo cul kaman:
- ³cuo me mwaka ot are tuno i ot kanyape kobino culo sekel ot kany me siliba pirgi, di lubere kede gipim me kabedo kacil;
- ⁴mon kobino culo sekel ot adek me siliba pirgi;
- ⁵joatino me mwaka kany tuno i ot are, kobino culo sekel ot are me siliba pi awobe, kede sekel tomon me siliba pi anyira;
- ⁶idwe me duwe acel tuno i mwaka kany kobino culo sekel kany me siliba pi idwe awobe, kede sekel adek me siliba pi idwe anyira;
- ⁷jo me mwaka ot kanyape kede kalamo kobino culo sekel tomon kiwie kany me siliba pi cuo, kede sekel tomon pi mon.
- ⁸” Ka dano moro kame oudo okwongere but Rwot can odio omio likame ekaruno culo wel nogi, en ebino tero i nyim ngasaseredoti dano nono kame oudo en ekwongere pi mino, di ngasaseredoti ko bino ngolo ne wel kame tie pipiny di lubere kede gikame en ekaruno culo.
- ⁹” Ka kwongere nono oudo kotimo i kom le kame kokaruno mino bala giayala but Rwot, giamia nono kame kotieko mino but Rwot udo tie gikacil.
- ¹⁰Likame kobino sese arabo lunyo wange iepone moroni dedede, akadi kede le kame ber kalamo kame oudo komio. Ka oko lunyo wang le moro kede ace, leini nogo are dedede bino doko me ka Rwot.
- ¹¹Do ka kwongere nono oudo mako le kame iswil gengo likame kokaruno mino but Rwot bala giayala, kobino tero le nono but ngasaseredoti.
- ¹²Ngasaseredoti bino ngolo wel mere di lubere kede bero arabo raco mere, di manono en kame ko bino bedo wel mere.
- ¹³Ka komito lake, ngat nono miero cul wel kame ngasaseredoti oudo ongolo, di bobo eko medo iye acel i kom kany me wel nono.
- ¹⁴” Ka ngatamoro omio ode but Rwot, ngasaseredoti bino ngolo wel me ot nono di lubere kede bero mere arabo rarac mere, di manono en kame ko bino bedo wel mere.
- ¹⁵Ka ngat nono komio ode but Rwot mito lake, en miero ecul wel kame kongolo nono di bobo eko medo iye acel i kom kany me wel mere.
- ¹⁶” Ka ngatamoro oko mino but Rwot poto kame en elunyo alunya kibun jonywal mege, kobino ngolo wel mere di lubere kede rom me kodi kame poto nono tero; siliba tomon pi kilo ot are me mawele.
- ¹⁷Ka ngat nono oko mino poto mere but Rwot i mwaka me dwoko jamini, wel mere bino bedo bala kame kotieko ngolo.



- ¹⁸Do ka oko mino poto nono di mwaka me dwoko jamini otieko kato, ngasaseredoti bino maro wel me poto nono di lubere kede wel me mwakini kodong pi tuno i mwaka me dwoko jamini bobo, di en eko bino dwodwoko wel mere.
- ¹⁹Ka ngat komio poto nono but Rwot mito lake, en miero ecul wel mere bala kame ngasaseredoti oudo ongolo di eko medo iye acel i kom kany me wel nono.
- ²⁰Do ka ngat komio poto nono but Rwot likame oko lake, arabo ka en eko bobo cato poto nono but dano ace, en do ekei twero mere me lako poto nono.
- ²¹Do ka mwaka me dwoko jamini oko tuno, poto nono bino doko gikacil kame komio but Rwot; en ebino doko me josaseredoti.
- ²²” Ka ngatamoro oko mino poto mere kame en ewilo awila but Rwot, poto kalikame en elunyo alunya kibut jonywal mege,
- ²³ngasaseredoti bino maro wel mere di lubere kede wel me mwakini kame pwodi odong pi tuno i mwaka me dwoko jamini, di ngat nono ko bino culo sente mere i ceng nono; sente nono obedo gikacil kame komio but Rwot.
- ²⁴I mwaka me dwoko jamini poto nono kobino dwoke but wone me agege, kame oudo kowile kibute, arabo but ikwae mege.
- ²⁵” Wel dedede kobino ngolo di lubere kede gipim me kabedo kacil.
- ²⁶” Akadi kamanono da, atin me agege kame le nywalo tie cuto me ka Rwot, likame ngatamoro karuno mine bute bala giamia me bercuny; akadi roya, atin oromo, arabo atin diel.
- ²⁷Ka ebedo le kame iswil gengo bedo giayala but Rwot, wone karuno lake di eculo wel me sente kame kotieko ngolo, kede emedo iye acel i kom kany me wel nono. Ka likame oko lake, kobino cate but dano ace i wel kame kotieko ngolo nono.
- ²⁸ “Do likame tie gikame dano ojalo but Rwot kikom jamini mege, akadi dano, le arabo lobo, kame kokaruno cato arabo lako; gikame kotieko jalo but Rwot obedo mere atwal.
- ²⁹Likame tie dano moro kame kotieko jalo but Rwot kame kokaruno lako; en miero koneke.
- ³⁰ “Acel i kom tomon me cam dedede kame kokwanyo ki lobo obedo gikacil, cam anyige arabo anyakini, obedo me ka Rwot.
- ³¹Ka dano moro mito lako acel me tomon me cam mere, en miero ecul wel me sente kame kotieko ngolo di eko medo iye acel i kom kany me wel nono.
- ³²Acel i kom tomon me leini dedede, dok, diegi kede romini, obedo me ka Rwot. Kame kitie sirito di omaro wel gi, acel me tomon me leini kame ngolo nyim ngat kame tie maro gi obedo me ka Rwot.



³³Won leini likame poore lokoloko gi be tetekeny arecoreco en kame bedi acel me tomon, doko likame ebino seso moro; ka en eko seso le moro, leini nogo are dedede bino doko me ka Rwot, doko likame oko karuno lako gi.”

³⁴Magonogi en cik kame Rwot oudo omio Musa ki wi moru me Sinai pi en mino jo me Isirael.



Wel

Wel 1

Maro Wel me Jo tien me Agege i Isirael

¹ I ceng me agege i duwe me are i mwaka me are ingei jo me Isirael yai ki Misiri, Rwot oko yamo kede Musa i eema mere me riamo i wi tim me Sinai. En ewaco ne be,

²” In kede Aaron marunu wel me jo me Isirael, di ilubunu kede ikekon ka joakwari gi kede diakal acelacel. Wandikunu nying cuo dedede

³kame tie cako ki mwakini ot are ot malo, jo kame twero ot i yi. Marunu gi i ume i ume.

⁴Dano acel kobedo ngadwong ki buli ekeko acelacel me ateker bino konyo wu.”

⁵⁻¹⁶Magi en nying jo kame oko yero ki buli ekeko acelacel pi timo tic noni: Ki ekeko ka Ruben, Elisur wot ka Sedeur. Ki ekeko ka Simeon, Selumiel wot ka Surisadai. Ki ekeko ka Yuda, Nakason wot ka Aminadab. Ki ekeko ka Isakar, Netanel wot ka Suar. Ki ekeko ka Sebulun, Eliab wot ka Kelon. Ki ekeko ka Epuraimu, Elisama wot ka Amikud. Ki ekeko ka Manase, Gamaliel wot ka Pedasur. Ki ekeko ka Benjamin, Abidan wot ka Egidioni. Ki ekeko ka Dan, Akieser wot ka Amisadai. Ki ekeko ka Aser, Pagiell wot ka Akeran. Ki ekeko ka Gad, Eliasap wot ka Dewel. Ki ekeko ka Naputali, Akira wot ka Enan.

¹⁷Kede kony me cuo tomon kiwie are nogi, Musa kede Aaron

¹⁸oko lwongo jo dedede me Isirael karacel i ceng me agege me duwe me are. Gin kiko wandiko jo di lubere kede ikekon me diakale kede ude gi. Kiwandiko nying cuo dedede me cako ki mwakini ot are ot malo, di kiko maro gi,

¹⁹bala kame Rwot oudo ociko ne Musa. Aso Musa bin oko wandiko nying jo i wi tim me Sinai.

²⁰⁻⁴⁶Oko wandiko nying cuo kame cakere ki mwakini ot are ot malo, gin jo kame oudo twero ot i yi. Kiwandiko wel me jo di lubere kede ikekon me diakale kede ude gi, di ocako kede ekeko ka Ruben. Wel gi oko bedo kaman: jo tutumia ot ongwon kiwie kanyape kede tol kany (46,500) ki ekeko ka Ruben, jo tutumia ot kany kiwie kanyangon kede tol adek (59,300) ki ekeko ka Simeon, jo tutumia ot ongwon kiwie kany kede tol kanyape ki ot kany (45,650) ki ekeko ka Gad, jo tutumia ot kanyaare kiwie ongwon kede tol kanyape (74,600) ki ekeko ka Yuda, jo tutumia ot kany kiwie ongwon kede tol ongwon (54,400) ki ekeko ka Isakar, jo tutumia ot kany kiwie kanyaare kede tol ongwon (57,400) ki ekeko ka Sebulun, jo tutumia ot ongwon kede tol kany (40,500) ki ekeko ka Epuraimu, jo tutumia ot adek kiwie are kede tol are (32,200) ki ekeko ka Manase, jo tutumia ot adek kiwie kany kede tol ongwon (35,400) ki ekeko ka Benjamin, jo tutumia ot kanyape kiwie are kede tol kanyaare (62,700) ki ekeko ka Dan, jo tutumia ot ongwon kiwie acel kede tol kany (41,500) ki



ekeko ka Aser, jo tutumia ot kany kiwie adek kede tol ongwon (53,400) ki ekeko ka Naputali. Wel me jo dedede kame oudo kowandiko oudo tie tutumia tol kanyape kede adek, kede tol kany ki ot kany (603,550).

⁴⁷Do oudo likame komaro Jolebi i kom jo me ikekon apat.

⁴⁸Pien Rwot oudo owaco ne Musa be,

⁴⁹” Ka itie wandiko nying jo me Isirael, kur irib kiton jo me ekeko ka Lebi.

⁵⁰Do poore iket Jolebi bed jo kame lo Eema nango kede jamini dedede kame tie iye. Gin kibino bedo jo kame yeo Eema nono; kibino tic iye, doko da kibino gero kimere gi luke.

⁵¹Kame itienu dak, Jolebi bino tako Eema nono di kiko bobo ot sipe i kabedo anyen me kimere. Dano moro apat kame bino noko Eema nono kobino neke.

⁵²Jo ace me Isirael bino gero kimere gi di lubere kede ikodeta gi, ekodet acelacel kede imendera mere.

⁵³Do Jolebi bino gero kimere gi luko Eema na, tetekeny kur ngatamoro noke di eko mina abedo kede lilo i kom jo me Isirael; gin kibino bedo jo kame daro Eema nono.”

⁵⁴Jo me Isirael oko timo gi dedede bala kame Rwot oudo ociko ne Musa.

Wel 2

Epone kame Kocibo kede Jo i Kimere

¹Rwot oko yamo ne Musa kede Aaron kaman:

²Jo me Isirael bino gero kimere gi ngat acelacel i ekodet gi, di lubere kede imendera gi. Gin kibino gero kimere gi di nyim gi neno Eema me ariamakin keda ki bad dedede.

³⁻⁴¹ bad tetu kide, bad kame ceng wok kiye, jo dedede koriribun i imendera me jo me ekeko ka Yuda bino gero kimere gi di lubere kede ikodeta gi. Nakason wot ka Aminadab en kame bino telo jo tutumia ot kanyaare kiwie ongwon kede tol kanyape (74,600), gin jo me ekeko ka Yuda.

⁵⁻⁶¹o kame bino bedo i bad gi tetucel en jo me ekeko ka Isakar. Netanel wot ka Suar en kame bino telo jo tutumia ot kany kiwie ongwon kede tol ongwon (54,400) me ekeko noni.

⁷⁻⁸¹ bad gi tetu ocelu jo me ekeko ka Sebulun bino bedo iye. Eliab wot ka Kelon en kame bino telo jo tutumia ot kany kiwie kanyaare kede tol ongwon (57,400) me ekeko noni.

⁹Isirikalen tutumia tol acel kede ot kanyauni kiwie kanyape kede tol ongwon (186,400) nogi en kame bino cako sirito ot i yi.



10-11I bad gi tetu piny, jo dedede koriribun i imendera me jo me ekeko ka Ruben bino gero kimere gi di lubere kede ikodeta gi. Elisur wot ka Sedeur en kame bino telo jo tutumia ot ongwon kiwie kanyape kede tol kany (46,500), gin jo me ekeko ka Ruben.

12Jo kame bino bedo i bad gi tetucel en jo me ekeko ka Simeon. Selumiel wot ka Surisadai en kame bino telo gi,

13gin jo tutumia ot kany kiwie kanyangon kede tol adek (59,300), gin jo me ekeko noni.

14-15I bad gi tetu ocelu bino bedo iye jo me ekeko ka Gad. Eliasap wot ka Reuel en kame bino telo jo tutumia ot ongwon kiwie kany kede tol kanyape ki ot kany (45,650) me ekeko noni.

16Isirikalen me ikodeta dedede kame bino bedo i imendera me jo me ekeko ka Ruben noni bino bedo tutumia tol acel kede ot kany kiwie acel kede tol ongwon ki ot kany (151,450). Gin kibino bedo esirit me are.

17Di do i dierediere me ikodeta are me agege kede are me ajikini bino bedo iye ekodet me jo me ekeko ka Lebi. Gin kibino yeno Eema me ariamakin keda. Dule apapat me ekodet noni bino sirito di kilubere aluba, acelacel di mako imendera mere.

18-19I bad tetu tim, jo dedede koriribun i imendera me jo me ekeko ka Epuraimu bino gero kimere gi di lubere kede ikodeta gi. Elisama wot ka Amikud en kame bino telo jo tutumia ot ongwon kede tol kany (40,500), gin jo me ekeko ka Epuraimu.

20-21Jo kame bino bedo i bad gi tetucel en jo me ekeko ka Manase. Gamaliel wot ka Pedasur en kame bino telo jo tutumia ot adek kiwie are kede tol are (32,200), gin jo me ekeko noni.

22-23I bad gi tetu ocelu bino bedo iye jo me ekeko ka Benjamin. Abidan wot ka Egidioni en kame bino telo jo tutumia ot adek kiwie kany kede tol ongwon (35,400), gin jo me ekeko noni.

24Isirikalen me ikodeta dedede kame bino bedo i imendera me jo me ekeko ka Epuraimu noni bino bedo tutumia tol acel ki kanyauni kede tol acel (108,100). Gin kibino bedo esirit me adek.

25-26I bad tetu malo, jo dedede koriribun i imendera me jo me ekeko ka Dan bino gero kimere gi di lubere kede ikodeta gi. Akieser wot ka Amisadai en kame bino telo jo tutumia ot kanyape kiwie are kede tol kanyaare (62,700), gin jo me ekeko ka Dan.

27-28Jo kame bino bedo i bad gi tetucel en jo me ekeko ka Aser. Pagiél wot ka Akeran en kame bino telo jo tutumia ot ongwon kiwie acel kede tol kany (41,500), gin jo me ekeko noni.

29-30I bad gi tetu ocelu bino bedo iye jo me ekeko ka Naputali. Akira wot ka Enan en kame bino telo jo tutumia ot kany kiwie adek kede tol ongwon (53,400), gin jo me ekeko noni.



³¹Isirikalen me ikodeta dedede kame bino bedo i imendera me jo me ekeko ka Dan noni bino bedo tutumia tol acel kede ot kany kiwie kanyaare kede tol kanyape (157,600). Gin kibino bedo esirit me ajikini.

³²Jo dedede me Isirael kame oko wandiko i ikodeta nogi di lubere kede ude me joakwari gi oudo oko bedo jo tutumia tol kanyape kede adek, kede tol kany i ot kany (603,550).

³³Bala kame Rwot oudo ociko ne Musa, likame bin oko maro Jolebi i kom jo icegun me Isirael.

³⁴Jo me Isirael bin oko timo gikame Rwot ociko negi: gin kigero kimere gi ekodet acelacel kede imendera mere, di kiko sirito da iepone acel nono, di lubere kede ude ka joakwari gi.

Wel 3

Awobe ka Aron

¹I kare kame Rwot oyamo kede Musa i moru me Sinai, magi en oudo idwe ka Aaron kede Musa.

²Aaron oudo tie kede awobe ongwon: Nadab awobi kao, Abiku, Eleasar, kede Itamar.

³En bin ewiro gi pi bedo josaseredoti.

⁴Do Rwot bin oko neko Abiku kede Nadab kakame gin bin kitio kede mac kalikame oudo kociko negi me mino giayala i wi tim me Sinai. Gin oudo likame kitie kede idwe, omio Eleasar kede Itamar kenekene en oko tic bala josaseredoti i kare me kuo ka Aaron.

Koyero Jolebi pi Tic ne Josaseredoti

⁵Rwot oko waco ne Musa be,

⁶” Kel jo me ekeko ka Lebi kan, di iko cibo gi bedo jotic kame bino donyo konyo ngasaseredoti Aaron.

⁷Gin kibino donyo timo nen kede ne jo dedede tic i Eema me ariamakin keda.

⁸Jame dedede kame tie i Eema nono bino bedo i cing gin, doko da kibino donyo timo ne jo dedede me Isirael tic.

⁹Tic kame komio gin Jolebi en konyo Aaron kede ikwae mege.

¹⁰Do in ibino cibo Aaron kede awobe mege bedo josaseredoti; ngat apat kame bino tamo timo tic nono kobino neke.”

¹¹Di Rwot oko bobo waco ne Musa be,

¹²⁻¹³ “I kare kame bin ango aneko kede idwe kao dedede i lobo me Misiri, ango bin ako kwero idwe kao dedede me jo kede me leini i Isirael pi bedo mega amaka. Ango



nan agamo Jolebi kikom jo me Isirael pi bedo aluny me idwe kao dedede kame kobedo mino buta i Isirael. Gin kibino bedo mega amaka. Ango en Rwot.”

Maro Wel me Jolebi

- ¹⁴Rwot oko ciko Musa i wi tim me Sinai
- ¹⁵pi wandiko Jolebi dedede di lubere kede ude ka joakwari gi kede miere gi, cako kibus atin awobi me duwe acel ot malo.
- ¹⁶Musa oko wandiko nying gi bala kame Rwot oudo ociko ne.
- ¹⁷Awobe ka Lebi gin ige: Gereson, Kokat kede Merari.
- ¹⁸Awobe ka Gereson gin ige: Libini kede Sime.
- ¹⁹Awobe ka Kokat gin ige: Amuram, Isikar, Keburon, kede Usiel.
- ²⁰Awobe ka Merari gin ige: Makali kede Musi. Magonogi en ikekon me Jolebi di lubere kede joakwari gi.
- ²¹Ekeko ka Gereson oudo tie iye jo me ot ka Libini kede jo me ot ka Sime.
- ²²Cuo dedede kame oko wandiko i diere gin cako ki atin awobi me duwe acel oko bedo tutumia kanyaare kede tol kany (7,500).
- ²³Jo ka Gereson nogi oudo poore gero kimere gi i bad tetu tim cen ngei Eema,
- ²⁴di Eliasap wot ka Lael en kame tie ngatel gi.
- ²⁵Jo ka Gereson nogi tic gin i Eema me ariamakin kede Rwot oudo obedo gwoko aum me eema i yie kede aum mere me ooko, egoe agalao ekeko me donyo iye,
- ²⁶isukan agalao diakal mere karacel kede egoe agalao kadonyo i diakal mere kede aunoi mege. Tice dedede amakere kede gi nogi oudo tie i cing gin.
- ²⁷Ekeko ka Kokat oudo tie iye jo me ot ka Amuram, Isikar, Keburon kede jo me ot ka Usiel.
- ²⁸Cuo dedede kame oko wandiko i diere gin cako ki atin awobi me duwe acel oko bedo tutumia kanyauni kede tol kanyape (8,600).
- ²⁹Jo ka Kokat nogi oudo poore gero kimere gi i bad tetu piny me Eema,
- ³⁰di Elisapan wot ka Usiel en kame tie ngatel gi.
- ³¹Jo ka Kokat nogi tic gin oudo obedo gwoko Sanduku me Isikan, emesa, gicibo etala, alutarin, jamini kame josaseredoti tio kede i Kabedo Kacil, kede esuka kame galao kadonyo i Kabedo Kacil Kalamo. Tice dedede amakere kede gi nogi oudo tie i cing gin.
- ³²Eleasar wot ka Aaron ngasaseredoti oudo obedo ngadwong me jotel me Jolebi. En oudo tic mere neno jo kame timo tic i Kabedo Kacil.
- ³³Ekeko ka Merari oudo tie iye jo me ot ka Makali kede Musi.



³⁴Cuo dedede kame oko wandiko i diere gin cako ki atin awobi me duwe acel oko bedo tutumia kanyape kede tol are (6,200).

³⁵Suriel wot ka Abikail en kame oudo poore telo jo ka Merari nogi; gin oudo kipoore gero kimere gi i bad tetu malo me Eema.

³⁶Gin bin oko mino gi tic me gwoko atekai me Eema, ariin mege, ipirin mege, agangeta kede kadudupo gi. Tice dedede amakere kede gi nogi oudo tie i cing gin.

³⁷Doko da oudo koketo i cing gi kop amako ipirin, agangeta, loce kede aunoi me gero diakal aluko Eema.

³⁸Jo kame oudo poore gero kimere gi i nyim Eema i bad tetu kide oudo obedo Musa, Aaron kede awobe ka Aaron. Tice dedede kame oudo kotimo i Kabedo Kacil pi jo me Isirael oudo tie i cing gin. Dano ace apat kame oudo cako donyo timo tice amako gin nogo oudo kopoore neke.

³⁹Cuo dedede kikom Jolebi kame Musa kede Aaron oko wandiko cako kibus idwe awobe me duwe acel ingei Rwot ciko negi pi timo kamanono, oko bedo tutumia ot are kiwie are (22,000).

Jolebi Olunyo Wang Idwe Awobe Kao

⁴⁰Rwot oko waco ne Musa be, “Wandiko nying cuo kobedo kao cako kibus idwe me duwe acel dok malo, di iko maro gi.

⁴¹Gin kibedo mega, do ango abino gamo Jolebi kawang gi pi bedo mega amaka, doko da abino gamo leini ka Jolebi kawang leini kobedo nywal me kao kikom leini me jo me Isirael.”

⁴²Aso Musa oko wandiko nying cuo kobedo kao dedede me Isirael bala kame Rwot oudo ociko ne,

⁴³di wel gi cako kibus idwe me duwe acel oko tuno tutumia ot are kiwie are kede tol are kede ot kanyaare kiwie adek (22,273).

⁴⁴Di Rwot oko waco ne Musa be,

⁴⁵” Nan wek Jolebi luny wang cuo kao me Isirael di gin kiko doko mega, di leini gi da ko lunyo wang leini kobedo nywal kao me jo me Isirael. Ango en Rwot.

⁴⁶Bala kame wel me cuo me Isirael kobedo nywal kao kalamo wel me Jolebi kede tol are kede ot kanyaare kiwie adek (273), kopoore lako magonogo alaka kibuta.

⁴⁷Buli acelacel kikom gi kobino culo siliba akaya kany, di koporo kede gipim me Kabedo Kacil,

⁴⁸di iko bino mino Aaron kede awobe mege sente nogo.”

⁴⁹Aso Musa oko coko sente kame kolako kede jo kobedo nywal kao me Isirael tol are kede ot kanyaare kiwie adek nogo, jo koudo orem likame Jolebi olunyo kawang gi,



⁵⁰di wel me sente nono oko tuno siliba akaya tutumia acel kede tol adek kede ot kanyape kiwie kany (1,365).

⁵¹Di Musa oko mino sente nono but Aaron kede awobe mege bala kame oudo Rwot ociko ne kede.

Wel 4

Tice me Jolebi me Ekeko ka Kokat

¹Rwot oko waco ne Musa kede Aaron be,

²” Marunu jo me ekeko ka Kokat, di lubere kede joakwari gi kede miere gi,

³cako kibun jo me mwakini ot adek me dongo tuno i mwakini ot kany, gin en jo kame twero timo tic amakere kede Eema me ariamakin keda.

⁴Tic me jo ka Kokat i Eema me ariamakin keda makere kede jamini kacil.

⁵” Kame kare otuno me dako kimere, Aaron kede awobe mege bino gonyo esuka kame galao kakame Sanduku me Isikan tie iye, di gin kiko umo Sanduku kede egoe nono.

⁶Di do kiko bino medo ume kede del apwot, di kiko ume kede egoe ebululu ebululu, di kiko rwako ne atekai me yene.

⁷” Gin kibino peto egoe ebululu ebululu i wi emesa kame koketo iye mugati kame koyalo ne Rwot, di kiko keto iye suanin, itatany me dunyo odok angwe kur, kalayan, jagin me giayala amata, kede do mugati me nakanaka.

⁸Di do gin kiko bino umo gi kede egoe akwar, di kiko medo ume kede del apwot di kiko rwako ne atekai me yene.

⁹” Gin kibino kwanyo egoe ebululu ebululu di kiko umo kede gicibo etala, kede italan mege, kede gime kepo wi ausin mege, itatany mege, kede kakame kopiko iye mo.

¹⁰Gin kiko bino medo bono gi kede del apwot di kiko cibe i kom yen kame koguro me yeno gi.

¹¹” Alubo mere gin kibino yaro egoe ebululu ebululu i wi alutari kame kotimo kede saabu, di kiko medo ume kede del apwot, di kiko rwako ne atekai me yene.

¹²Gin kibino kwanyo jamini dedede kame kotio kede gi i Kabedo Kacil di kiko bono gi kede egoe ebululu ebululu, di kiko medo umo gi kede del apwot di kiko keto gi i kom yen kame koguro me yeno gi.

¹³Gin kibino kwanyo buru ki wi alutari, di kiko ume kede egoe akwakwar.

¹⁴Di kiko bino keto iye jamini dedede kame kotimo kede tic i wi alutari, kame ribo itatany me kwanyo buru aliet, ilumai, gi me kikiso wi alutari, kede kalayan. Di do kiko bino medo ume kede del apwot di kiko rwako atekai me yene.



¹⁵Kame kare me dako kimere otuno, jo me ekeko ka Kokat bino yeno jamini kame kotio kede gi me wora ingei Aaron kede awobe mege tieko bono gi kiber. Jo ka Kokat nogo likame poore mulo jamini kame kotio kede gi me wora, aso ka li kibino to. “Magonogi en obedo tice me jo me ekeko ka Kokat i kabedere dedede kame kobino kobo iye Eema.

¹⁶” Eleasar wot ka Aaron bino bedo ngat kame lo Eema dedede kede mo me italan, kede odok angwe kur, kede giamia me alos, mo me wir kede jamini dedede kame tie i Eema kame kotieko kwero buta.”

¹⁷⁻²⁰Rwot oko meede kede yamo but Musa kede Aaron be, “Jo me ekeko ka Kokat likame poore noko akadi neno jamini kame kotio kede gi me wora, tuno di Aaron kede awobe mege kong ber oumo jamini nogo. Aso ka li, gin kibino to dedede kikom Jolebi. Pi manono, Aaron kede awobe mege en kame bino donyo kede gin i yi Eema di kiko waco negi gikame ngat acelacel kikom gi poore timo.”

Tic ka Jolebi me Ekeko ka Gereson

²¹Rwot oko waco ne Musa be,

²²” Mar wel jo me ekeko ka Gereson, di lubere kede joakwari gi kede miere gi,

²³cako kibun jo me mwakini ot adek me dongo tuno i mwakini ot kany, gin en jo kame twero timo tic amakere kede Eema me ariamakin keda.

²⁴Tic gin bino bedo yeno gigi:

²⁵gin kibino donyo yeno isukan kame poko yi Eema, aum mere me ooko, kede aum me del apwot kame kodokakino i kom manono, kede egoe me galao ekeko mere,

²⁶kede isukan aluko diakal mere, kede egoe agalao kadonyo i diakal mere, kede jamini dedede me twetweo kede dudupo gi nogi. Gin kibino timo tice dedede amakere kede gi nogi.

²⁷Aaron kede awobe mege bino neno be tice nogi dedede jo ka Gereson otimo, doko kiko lubo gi dedede kame gin kibino waco negi.

²⁸Magonogi en obedo tic me jo me ekeko ka Gereson amakere kede Eema me ariamakin keda; Itamar wot ka Aaron ngasaseredoti en kame bino bedo neno be jo otimo tice nogi.”

Tic ka Jolebi me Ekeko ka Merari

²⁹Rwot oko waco ne Musa be, “Mar wel jo me ekeko ka Merari, di lubere kede joakwari gi kede miere gi,

³⁰cako kibun jo me mwakini ot adek me dongo tuno i mwakini ot kany, gin en jo kame twero timo tic amakere kede Eema me ariamakin keda.

³¹Tic gin bino bedo yeno ibaon, atekai, ipirin kede agangeta me Eema,



³²kede yeno ipirin, agangeta, loce, aunoï kede jamini dedede amakere kede gero diakal aluko Eema.

³³Magonogi en obedo tic me jo me ekeko ka Merari amakere kede Eema me ariamakin keda; Itamar wot ka Aaron ngasaseredoti en kame bino bedo neno be jo otimo tice nogi.”

Maro Wel me Jolebi

³⁴Aso Musa kede Aaron kede jotel me Isirael oko maro wel me jo ka Kokat, di lubere kede joakwari gi kede miere gi,

³⁵cako kibun jo me mwakini ot adek me dongo tuno i mwakini ot kany, jo dedede kame twero timo tic amakere kede Eema me ariamakin kede Rwot.

³⁶Di wel gin dedede di lubere kede ikekon ka joakwari gi oko tuno tutumia are kede tol kanyaare kede ot kany (2,750).

³⁷Manoni en obedo wel me jo me ekeko ka Kokat di lubere kede ikekon ka joakwari gi, jo kame oudo poore tic i Eema ka Rwot, gin jo kame Musa kede Aaron oudo owandiko di lubere kede cik ka Rwot.

³⁸Jo me ekeko ka Gerson, di lubere kede joakwari gi kede miere gi,

³⁹cako kibun jo me mwakini ot adek me dongo tuno i mwakini ot kany, jo dedede kame twero timo tic amakere kede Eema me ariamakin kede Rwot,

⁴⁰wel gin dedede di lubere kede ikekon ka joakwari gi oko tuno tutumia are kede tol kanyape kede ot adek (2,630).

⁴¹Manoni en obedo wel me jo me ekeko ka Gerson di lubere kede ikekon ka joakwari gi, jo kame oudo poore tic i Eema ka Rwot, gin jo kame Musa kede Aaron oudo owandiko di lubere kede cik ka Rwot.

⁴²Jo me ekeko ka Merari, di lubere kede joakwari gi kede miere gi,

⁴³cako kibun jo me mwakini ot adek me dongo tuno i mwakini ot kany, jo dedede kame twero timo tic amakere kede Eema me ariamakin kede Rwot,

⁴⁴wel gin dedede di lubere kede ikekon ka joakwari gi oko tuno tutumia adek kede tol are (3,200).

⁴⁵Manoni en obedo wel me jo me ekeko ka Merari di lubere kede ikekon ka joakwari gi, gin jo kame Musa kede Aaron oudo owandiko di lubere kede cik ka Rwot.

⁴⁶Jo dedede kame Musa kede Aaron kede jotel me Isirael oko wandiko, di lubere kede joakwari gi kede miere gi,

⁴⁷cako kibun jo me mwakini ot adek me dongo tuno i mwakini ot kany, jo dedede kame twero timo tic amoto yeno jamini amakere kede Eema me ariamakin kede Rwot,

⁴⁸wel gi oko tuno tutumia kanyauni kede tol kany kede ot kanyauni (8,580).



⁴⁹Musa bin oko maro wel gin dedede di lubere kede cik ka Rwot, di eko popoko negi epone me timo tic i Eema amoto me yeno jamini amakere kede.

Wel 5

Jo Kopwokere

¹Rwot oko waco ne Musa be,

²” Cik jo me Isirael pi poko tenge ki kimere gi jo dedede kame tie kede tuwo me delkom, arabo kame tie kede pige kame cwer ki kom gi, arabo jo komulo kom gi oto.

³Poore riamo jonogi dedede ki kimere, cuo kede mon, tetekeny kur kipwok kimere, en kakame ango abedo iye i diere me jo na.”

⁴Jo me Isirael oko timo kamanono bala kame oudo Rwot ociko ne Musa.

Tuco Dub kede Culo Jamini

⁵ Rwot oko waco ne Musa pi

⁶yamo ne jo me Isirael be, “Ka ngatamoro likame obedo kede genere but Rwot, di eko timo ne dano ace gikarac, dano nono bedo kede raco;

⁷en epoore tuco dub mere, di eko timo cul dedede but ngat kame en etimo ne gikarac nono, di bobo eko medo cule etango me acel i kom kany me cul nono.

⁸Do ka dano kame kopooore culo nono otieko to, doko da wad gi moro kiyapiyapi kede en kame kopooore mino cul bute likame tie, cul me gikarac nono bino ot but Rwot pi mino josaseredoti. Cul noni tie medo i wi emerekek kame en ekwanyo me ayala pi lwoko dub mere, en ngat kame etie kede raco.

⁹Giamia dedede kame jo me Isirael mio Rwot bino bedo me ka ngasaseredoti kame komio gi nono i cinge.

¹⁰Ngasaseredoti acelacel bino tero giamia kame jo tero but Rwot.”

Icuo kame Cunye Popoto i kom Dako mere

¹¹Rwot oko waco ne Musa pi

¹²yamo ne jo me Isirael be, “Ka dako ka ngatamoro opacar di likame eko dong di etie dako agenere but cware,

¹³⁻¹⁴ka ebuto kede icuo moro me ooko di cware likame oko niang iye kiber, pien likame komake iye, doko mujura da li; arabo ka icuo moro cunye opoto i kom dako mere, do di i ateni likame dako nono obedo kede mit moro ooko;

¹⁵i kom kope are nogi dedede, icuo poore tero dako mere nono but ngasaseredoti. En epoore da tero giayala me kilo acel me alos me mawele, do likame ebino nyalo iye mo me olibeti arabo odok adunya angwe kur, piento en ebedo giayala kowok kibus icuo atie kede potocuny i kom dako mere; kotime pi nyuto gi dedede kakaler.

¹⁶” Ngasaseredoti ko bino mino dako nono cungo i nyim alutari ka Rwot,



¹⁷di ngasaseredoti ko bino onyo pi kacil i itatany kame kotimo kede elupe, di eko jobo apua mogo ki dier ot me Eema ka Rwot di eko rubo i kom pii atie i itatany nono pi mine doko kec.

¹⁸Ngasaseredoti ko bino sanyakako yer wi dako nono, di eko keto giayala me alos i cing dako nono. Di do en ngasaseredoti eko mako i cinge itatany atie kede pii akec, en pii kame kelo ilam.

¹⁹Di ngasaseredoti ko mino kwongere i kom dako nono be, ‘Ka likame icuo moro obuto kedi, ka likame in iweko cwari di iko ot pwokere tenge, kur pii akec kame kelo ilam noni tim ni gimoro.

²⁰Do ka in oudo ipacar tenge kibus cwari, ka in oudo ioto buto kede icuo apat di iko munaun,

²¹poore Rubanga mi nyingi bed gi me ilam i diere me jo ni. Poore emi auris ni jungi di yii ko pong.

²²Poore pii kame kelo ilam noni nan donyi i yii di eko mino auris ni jungi, di yi ko pong.’ Dako nono ko bino dwoko be, ‘Ango ayei, poore Rwot tim kamanono.’

²³” Di do ngasaseredoti ko bino wandiko kope me ilam noni, di en eko lwoko iwandik nono i itatany kame pii akec kame kelo ilam tie iye,

²⁴tetekeny ka dako nono omato pii akec nono, ilam nono bino donyo i kome di ko donyo rame.

²⁵Ngasaseredoti ko bino gamo giayala me alos me mawele ki cing dako nono di eko kiarao en i nyim Rwot di eko cibe i wi alutari.

²⁶Di ngasaseredoti ko juko alos nono i cinge pong, di eko wange i wi alutari di yiro mere ko duny; dul atitidi nono nyuto be akadi kodong da kotieko yalo but Rwot. Ingei manono en eko do mino dako nono mato pii noca.

²⁷Ka dako nono oudo ateteni likame obedo kede genere but cware di eko buto kede icuo apat, pii nono bino donyo ramo yie kitek, di auris mere ko jung di yie ko pong; nyinge bino doko gi me ilam i diere me jo mege.

²⁸Do ka dako nono oudo likame otimo tim moro atwero munao en i yore me buto kede icuo apat, likame tie gimoro arac kame bino timere ne, doko da en edong di etwero nywal.

²⁹Manoni en iswil amako nyeko kame icuo bedo kede ka dako mere opacar di eko pwokere i yore me mito icuo apat,

³⁰arabo ka icuo obedo kede potocuny i kom dako mere be amoto etie timo adote. Kobino mino dako nono cungo i nyim alutari di ngasaseredoti ko timo pwola noni dedede i kome.

³¹Cware likame bino bedo kede raco moro, do ka dako tie kede raco, en ebino udo can pi manono.”



Wel 6

Iswilia amako Jo kame Kokwero but Rwot

- ¹Rwot oko waco ne Musa
- ²Pi waco ne jo me Isirael be, “Kame cuo amoto mon tie timo ikwong me doko jo kokwerere but Rwot,
- ³ gin kibino weko mato bwini kede kongo ace akec. Likame gin kibino mato pige me olok, amoto camo anyakini me olok anumu amoto otuo.
- ⁴I kare me kuo gin lung bala jo kame kokwero but Rwot, likame gin kibino camo gimoro kowok ki kom anyakini me olok, akadi nyige mege amoto apoke me ngee.
- ⁵” I kare me kuo gin lung bala jo kokwongere pi kwerere but Rwot, likame gin kibino lielo wi gi. Gin kipoore lubo ikwong gi pi kare lung kame gin kitie kede bala jo kokwerere but Rwot; gin kibino weko yer wi gi likame kilielo.
- ⁶” Pi kare lung kame gin kikwerere kede but Rwot, likame gin kibino noko kom dano oto.
- ⁷Akadi bed bala papa gi, amoto toto gi, amoto omin gi, amoto amin gi moro en oto, likame gin kipoore munaun iepone nono. Yer wi gin tie gianyuto be gin kikwerere but Rwot.
- ⁸Pi kare lung me kwerere gi gin kibino bedo jo komire but Rwot.
- ⁹” Ka ngatamoro ongoole to i nget gin, manono mio yer wi gin kame kikwero but Rwot munaun; pi manono gin kibino daro pi ceng kayaare di kiko lielo wi gi, manono en ceng me lonyere gin.
- ¹⁰I ceng me kanyauni mere gin kibino tero amam are amoto ilukei are ne ngasaseredoti i ekeko me donyo i Eema ka Rwot,
- ¹¹di ngasaseredoti ko bino yalo acel bala giayala me kwanyo dub kede ocelu bala giayala awanga, di en eko timo pwola me lonyo gi, pien udo gin kitieko doko jo atie kede raco pi mulo kom dano oto. I ceng nono gin doko kiko bino medo kwero yer me wi gi but Rwot,
- ¹²di kiko bobo mire bute bala jo kokwerere bute. Kare me kwerere gi kokato cen likame kobino maro, pien yer wi gin oudo oko munaun. Gin kiko bino kwanyo atin oromo me mwaka acel bala giamia me timo cul.
- ¹³ “Man en iswil amako jo kokwerere but Rwot kame kare me kwerere gi otiek. Gin kibino ot i ekeko me Eema ka Rwot
- ¹⁴di kiko mino Rwot giamia me romini adek kalikame tie kede peko moro i kom gi: atin oromo icuo me mwaka acel me giayala awanga, atin oromo adako me mwaka acel me giayala me kwanyo dub, kede emerekek me giayala me nywak.



¹⁵Kibino da yalo ebukit acel me mugati kame kotimo abongo arup: gin en mugati apek kame kotimo kede alos kame konungo di oko nyalo kede mo, kede mugati aperepere kame kosuto mo i kom gi, karacel kede giayala gi me alos kede giayala amata.

¹⁶” Ngasaseredoti ko bino mino giamia nogo but Rwot, di eko mino giayala me kwanyo dub kede giayala awanga.

¹⁷En ebino yalo emerekek but Rwot bala giayala me nywak, ebino yale karacel kede ebukit me mugati kame kotimo abongo arup; en ebino mino da giayala me alos kede giayala me giamata.

¹⁸Di do dano kokwerere but Rwot nono ko lielo yer wie i dogola me Eema ka Rwot, di eko kwanyo yer nogo di eko keto gi i mac kame kotie wango kede giayala me nywak.

¹⁹” Ngasaseredoti ko bino kwanyo epepet me emerekek kame kocwako, kede mugati apek acel kede acel aperepere mere ki ebukit, di eko keto gi i dier cing dano kokwerere but Rwot nono ingei lielo wie.

²⁰Di do ngasaseredoti ko bino kiarao gi i nyim Rwot pi bedo giamia bute. Gin kibedo giamia kacil kame ngasaseredoti tero, karacel kede kapumito kame kokiarao i nyim Rwot kede amuro kame koyalo. Ingei manono dano kokwerere nono twero do mato bwini.

²¹” Magonogi en iswilia amako dano kokwerere but Rwot kede ikwong. Do ka dano moro kokwerere but Rwot osikano pi mino gimoro akalamo gikame kwongere amakere kede kwerere gi mito, miero en ecob gikame esikano iye.”

Winyo kame Josaseredoti Mio

²²Rwot oko waco ne Musa

²³pi waco ne Aaron kede awobe mege pi mino winyo but jo me Isirael kaman:

²⁴Akwao Rwot emi wu winyo di eko gwoko wu;

²⁵Akwao Rwot ebed kede mwolo kede kisa butu;

²⁶Akwao Rwot etim ne wu bero eko mino wu mulem.

²⁷Rwot oko waco be, “Ka gin kitio kede nyinga pi mino jo me Isirael winyo, ango abino mino gi winyo.”

Wel 7

Giamia me Jotel

¹I ceng kame Musa otieko kede gero Eema ka Rwot, en eko kwere but Rwot kede jamini dedede atie iye, karacel kede alutari kede jamini amake dedede.

²Di do jotel me Isirael, jo kobedo jotel me jo me ikekon apapat me Isirael, gin jo kame oudo lo kop me maro jo,



³oko tero giamia gi but Rwot. Gin kitero agadigadin kanyape kede twonin tomon kiwie are, buli agadigadi acel pi jotel are, kede buli twon acel pi ngatel acel. Gin kiko keto gi i nyim Eema.

⁴Rwot oko waco ne Musa be,

⁵” Gam giamia nogi pi timo kede gi tice amakere kede Eema. Popoko gi but Jolebi di lubere kede tice gi.”

⁶Aso, Musa oko tero agadigadin kede twonin di eko mino gi but Jolebi.

⁷Emio jo ka Gereson agadigadin are kede twonin ongwon, di lubere kede tic gi;

⁸di eko mino agadigadin ongwon kede twonin kanyauni but jo ka Merari di lubere kede tic gi, di Itamar wot ka Aaron ngasaseredoti en atelo gi.

⁹Do en likame eko mino jo ka Kokat gimoro, pien oudo komio gin timo tic me gwoko jamini amakere kede woro Rwot, jamini kame kitwero riongo i epepet gi.

¹⁰Jotel nogo oko doko da mino giamia gi amakere kede kwero alutari but Rwot. Kakame oudo gin kitieko do iikere kede pi mino giamia gi nogo i alutari,

¹¹Rwot oko waco ne Musa be, “Wac negi be, ngatel acel kenekene en kame bino mino giamia mere me kwero alutari i ceng acel, tuno gin dedede lubere paka tiek.”

¹²⁻⁸³Aso, buli ngatel acelacel oko tero giamia kaman: Itatany kame kotimo kede nyonyo siliba kame peko mere tie kilo acel kede dul, kede kalaya da kame kotimo kede nyonyo siliba kame peko mere tie guram tol kanyauni, manono di lubere kede gipim me Kabedo Kacil, gin dedede di kopongo gi kede alos kame konungo di konyonge kede mo pi bedo giayala me alos. Buli dano doko otero bakuli kame kotimo kede saabu kame peko mere romo guram tol acel kede tomon, di koponge kede odok angwe kur me adunya; kede twon etobait acel, emerekek acel, atin oromo icuo acel me mwaka acel, magonogi kitero pi bedo giayala awanga. Doko da buli dano oko tero diel acel pi bedo giayala me kwanyo dub, kede twonin are, imerekekin kany, diegi kany, kede idwe romini me mwaka acel, gin kany pi bedo giayala me nywak. Gin kiko mino giamia gi di lubere kaman: i ceng me agege Nakason wot ka Aminadab, dano me ekeko ka Yuda, i ceng me are Netanel wot ka Suar, ngatel me jo me ekeko ka Isakar, i ceng me adek Eliab wot ka Kelon, ngatel me jo me ekeko ka Sebulun, i ceng me ongwon Elisur wot ka Sedeur, ngatel me jo me ekeko ka Ruben, i ceng me kany Selumiel wot ka Surisadai, ngatel me jo me ekeko ka Simeon, i ceng me kanyape Eliasap wot ka Dewel, ngatel me jo me ekeko ka Gad, i ceng me kanyaare Elisama wot ka Amikud, ngatel me jo me ekeko ka Epuraimu, i ceng me kanyauni Gamaliel wot ka Pedasur, ngatel me jo me ekeko ka Manase, i ceng me kanyangon Abidan wot ka Egidioni, ngatel me jo me ekeko ka Benjamin, i ceng me tomon Akieser wot ka Amisadai, ngatel me jo me ekeko ka Dan, i ceng me tomon kiwie acel Pagiél wot ka Akeran, ngatel me jo me ekeko ka Aser, i ceng me tomon kiwie are Akira wot ka Enan, ngatel me jo me ekeko ka Naputali.



84-88 Wel me jame dedede kame jotel tomon kiwie are nogo oko tero me kwero kede gi alutari oko bedo kaman:

— itatany tomon kiwie are kame kotimo kede nyonyo siliba, kede da kalayan tomon kiwie are kame kotimo kede nyonyo siliba, gin dedede peko gi oko romo kilo ot are kiwie kanyape kede guram tol kanyape di lubere kede gipim me Kabedo Kacil;

— bakulin tomon kiwie are kame kotimo kede saabu, di kopongo gi kede odok adunya angwe kur, gin dedede peko gi oko romo kilo acel kede guram tol adek kede ot are;

— twonin tomon kiwie are, imerekekin tomon kiwie are, kede idwe romini acuo me mwaka acel tomon kiwie are, karacel kede giayala me alos kame upere kede gi, magonogi pi bedo giayala awanga;

— diegi tomon kiwie are pi bedo giayala me kwanyo dub;

— twonin ot are kiwie ongwon, imerekekin ot kanyape, diegi ot kanyape, idwe romini acuo me mwaka acel ot kanyape, magonogi pi bedo giayala me nywak.

89 Tek kame Musa oudo ooto i Eema ka Rwot pi yamo kede, en oudo ewinyo dwan Rwot di tie yamo kede ki wi kom me kisa kame oudo tie i wi Sanduku me Isikan, i dierediere me cerubim are.

Wel 8

Cibo Italan

1 Rwot oko waco ne Musa be,

2” Wac ne Aaron be, kame etie cibo italan kanyaare, poore ecib gi di kirienny kicaro tetu anyim.”

3 Aaron da oko timo kamanono, en ecibo italan di kirienny kicaro tetu anyim me gicibo italan, bala kame oudo Rwot ociko ne Musa.

4 Bin gicibo italan nogo oudo kocweo kaman: yai ki dude piny tuno i ature mege oudo obedo saabu kame koteto ateta kede enyondo, di lubere kede epone kame Rwot oudo onyuto ne kede Musa.

Kwero Jolebi kede Tic gi

5 Rwot oko waco ne Musa be,

6” Pok Jolebi tenge kikom jo me Isirael di iko lonyo gi

7 kaman: kikiro i kom gi pii me lonyere, di iko mino gi kiliel yer dedede kikom gi kede liedi, di kiko lwoko igoen gi, di do kiko doko jo kotieko lonyere.

8 Di do iko mino gi kikwany twon etobait kede giamia me alos kame konungo di konyonge kede mo; doko iko kwanyo twon etobait ace pi bedo giayala me kwanyo dub.

9 Ibino coko jo dedede me Isirael di iko kelo Jolebi i nyim Eema me ariamakin keda,



- ¹⁰di jo dedede me Isirael ko cibo cing gi i wi Jolebi.
- ¹¹Aaron bino mino Jolebi buta bala giamia kowok kibus jo me Isirael, tetekeny gin kidony timo tic na.
- ¹²Jolebi ko bino cibo cing gi i wi twonin. Twon acel bino bedo giayala me kwanyo dub, kede ocelu ko bedo giayala awanga, pi timo pwola me lonyo Jolebi.
- ¹³” Di do in iko bino mino Jolebi cungo i nyim Aaron kede awobe mege, di iko mino gi buta bala giamia.
- ¹⁴” Epone noni en kame in ibino poko kede Jolebi kikom jo me Isirael, di gin kiko bedo mega.
- ¹⁵Ingei in lonyo Jolebi kede mino gi buta bala giamia, gin kibino ot cako timo tic i Eema na.
- ¹⁶Pien ango atieko gamo gin kidoko mega, jo kame lunyo kawang awobe kao me jo me Isirael.
- ¹⁷ Idwe kao dedede me jo kede me leini i lobo me Isirael obedo mega, pien i ceng kame ango aneko kede idwe cuo kao i Misiri, ango ako kwero gin pi bedo mega.
- ¹⁸Do ango nan atieko tero Jolebi kawang idwe cuo kao dedede me Isirael,
- ¹⁹di ako mino gi bala giamia kikom jo me Isirael but Aaron kede awobe mege, pi timo ne jo me Isirael tic i Eema na, kede pi timo pwola i kom jo me Isirael kame bino noko Kabedo Kacil, tetekeny kur can moro pot negi.”
- ²⁰Aso, Musa kede Aaron kede jo dedede me Isirael oko kwero Jolebi but Rwot bala kame oudo Rwot ociko ne Musa.
- ²¹Jolebi olonyere ki dub gi di kiko lwoko igoen gi, di do Aaron oko kwero gi but Rwot bala giayala kame kokiarao.
- ²²Jo oko timo gi dedede kame Rwot oudo ociko ne Musa amakere kede Jolebi. Di do Jolebi oko cako timo tic i Eema ka Rwot, di Aaron kede awobe mege en kame loo gi.
- ²³Rwot oko waco ne Musa be,
- ²⁴” Jolebi dedede me cako ki mwaka ot are kiwie kany ot malo bino donyo timo tic i Eema me ariamakin keda,
- ²⁵di do dano ko bino weko tic ka mwaka mere me dongo oromo mwakini ot kany.
- ²⁶Ingei weko tic, gin kitwero konyo Jolebi imiegu gi timo tice gi i Eema, do likame gin kibino timo tic moro gin ken gi. Epone noni en kame ibino mino kede Jolebi tic.”

Wel 9

Ebaga me Kalamo me Are

- ¹ Rwot oko yamo kede Musa i wi tim me Sinai, i duwe me agege i mwaka me are ingei gin yai ki lobo me Misiri. En ewaco ne Musa be,



²⁻³ I ceng me tomon kiwie ongwon me duwe noni, cako esawa kame ceng donyo kede, jo me Isirael poore kwero Ebagame Kalamo, di kilubo iswilia amake.”

⁴ Aso, Musa oko waco ne jo me Isirael pi tedo Ebagame Kalamo.

⁵ Otieno me ceng me tomon kiwie ongwon me duwe me agege, gin kiko kwero Ebagame Kalamo i wi tim me Sinai. Jo otimo gi dedede bala kame Rwot oudo ociko ne Musa.

⁶ Do i ceng nono oudo tie jo mogo komunaun pien oudo kimulo kom dano oto, aso omio gin likame kiko twero kwero Ebagame Kalamo. Gin kioto but Musa kede Aaron

⁷ di kiko waco negi be, “Bed bala wan omunaun pien omulo kom dano oto, do pinyo komio kogengo wan mino giamia but Rwot karacel kede jo apat me Isirael i kare me ebagame noni?”

⁸ Musa oko dwoko negi be, “Kong darunu paka ango winyo kop kame Rwot bino dwoko iye.”

⁹ Rwot oko waco ne Musa

¹⁰ pi waco ne jo me Isirael be, “Ngatamoro kikomu amoto kikom ikwae wu kame mulo kom dano oto di eko doko ngat komunaun, arabo dano kame tie tenge i sapali twero kwero Ebagame Kalamo.

¹¹ Gin kibino kwere i ceng me tomon kiwie ongwon me duwe me are di ceng odonyo. Kibino camo ebagame nono kede mugati kame arup li iye kede yen akec.

¹² Likame kibino weko cam moro buto paka odiko, akadi turo cogo moro me leini kame kotedo kede ebagame nono. Gin kipoore lubo iswilia amakere kede Ebagame Kalamo.

¹³ Do dano kalikame omunaun, doko da di likame etie i sapali moro, do di eko daga kwero Ebagame Kalamo, kobino riame tenge ki ekodet me jo me Isirael pi kite kame edagi kede mino giamia buta i kare kame komoko. Ngat nono bino udo alola pi dub mere.

¹⁴” Ngakumbor kame bedo i diere wu di cunye ko mito kwero Ebagame Kalamo en ebino kwero ebagame nono, do epoore lubo iswilia amake, likame kobino popoko iswilia amako jokumbor kede jo me Isirael.”

Edou kacal kede Mac

(Yai 40.34-38)

¹⁵ I ceng kame kogero kede Eema ka Rwot, edou oko ume, do iwor tuno odiko en oudo eko lokere edoko cal bala mac,

¹⁶ di edou nono oko bedo timere kamanono nakanaka.

¹⁷ Tek kame edou oudo oyai tenge ki wi Eema ka Rwot, jo me Isirael oudo ko yai, di kiko ot gero kimere gi kakame edou nono ocungo iye bobo.



¹⁸Kame Rwot oudo owaco ne jo pi yai, gin oudo kiyai, doko da kame en oudo ewaco negi pi gero kimere, gin oudo kiko gedo. Tek kame edou oudo osipakin cungo i wi Eema ka Rwot, gin oudo kidong bedo i kimere gi kanono.

¹⁹Kame edou oudo oko dong cungo i wi Eema ka Rwot pi ceng atot, gin oudo kilubo gikame Rwot otieko ciko negi, di likame kiko yai ki kanono.

²⁰Ceng mogo edou oudo dong cungo i wi Eema ka Rwot pi ceng anonok kenekene, gida oudo kiko dong i kimere gi di lubere kede cik ka Rwot.

²¹Ceng mogo edou oudo dong cungo i wi Eema ka Rwot cako me wang otieno tuno odiko kenekene, di do ka Edou oko yai odiko, gida oudo kiko yai. Tek kame edou oudo oyai, gida oudo kiko yai.

²²Akadi kame edou oudo ocungo i wi Eema pi ceng are amoto duwe acel, arabo pi kare abor kalamo kano, jo me Isirael oudo dong bedo kanono, do ka eko kwanyere, gin oudo kiko yai.

²³Kame Rwot oudo owaco ne Musa pi ciko ne jo pi yai, gin oudo kiyai, doko da kame en oudo eciko negi pi gero kimere, gin oudo kiko gedo.

Wel 10

Agwarai kame Kotimo kede Nyonyo Siliba

¹Rwot oko waco ne Musa be,

²” Tim agwarai are me nyonyo siliba; ibino teto gi ateta kede enyondo. Tic gi bino bedo me lwongo jo i cokere kede me mino jo tako kimere di kiko cako ot.

³Kame kokuto agwarai are nogo dedede, jo dedede bino cokere buti i ekeko me Eema me ariamakin keda.

⁴Do ka kokuto acel kenekene, jotel me jo me ikekon apapat me ateker me Isirael bino cokere i nyimi.

⁵Kame kokuto agwara acel kenekene kede dwan me yi, jo me kimere me bad tetu kide bino yai cako ot;

⁶kame oko kuto agwara tien me are kede dwan me yi, jo me kimere me bad tetu piny bino yai cako ot.

⁷Do ka jo poore cokere, kobino kuto agwara, do likame kede dwan me yi.

⁸Awobe ka Aaron kobedo josaseredoti en kame bino kuto agwarai; cik me kuto agwarai bino bedo cik kame mako kiton ikwae wu me kare dedede.

⁹” Ka itienu ot yi i lobo wu kede jokwor adio wu, ibinunu kuto agwarai kede dwan me yi di ango Rwot Rubanga wu ako bino yutuno wu, di ako lako wu kikut jokwor wu.

¹⁰Doko da i ceng kame itienu kede kilel, i ceng kame komoko me kwero ibagai wu i agege me por duwe, ibinunu kuto agwarai i wi giayala awanga kede i wi giayala me nywak, manono bino mina ayutuno wu, ango en Rwot Rubanga wu.”



Jo me Isirael Oyai ki Sinai

- ¹¹I ceng me ot are me duwe me are me mwaka me are, edou oko yai ki wi Eema ka Rwot.
- ¹²Di jo me Isirael oko cako ot lubo edou di kikokobo akokob yai ki wi tim me Sinai, di edou oko ot cungo i wi tim me Paran.
- ¹³Manoni en oudo tien me agege me Musa mino jo cik ka Rwot di kiko yai.
- ¹⁴Jo dedede koudo tie i imendera me jo me ekeko ka Yuda en oko cako yai, ikodeta kede ikodeta di kilubere aluba. Nakason wot ka Aminadab en koudo telo gi.
- ¹⁵Netanel wot ka Suar en oko telo ekodet me jo me ekeko ka Isakar,
- ¹⁶kede Eliab wot ka Kelon en oko telo ekodet me jo me ekeko ka Sebulun.
- ¹⁷Di oko tako Eema ka Rwot piny di jo me ekeko ka Gereson kede jo me ot ka Merari oko yene di kiko cako ot.
- ¹⁸Alubo mere, jo dedede koudo tie i imendera me jo me ekeko ka Ruben en oko yai, ikodeta kede ikodeta di kilubere aluba. Elisur wot ka Sedeur en koudo telo gi.
- ¹⁹Selumiel wot ka Surisadai en oko telo ekodet me jo me ekeko ka Simeon,
- ²⁰kede Eliasap wot ka Dewel en oko telo ekodet me jo me ekeko ka Gad.
- ²¹Di Jolebi me ot ka Kokat kame oudo tic gi yeno jamini me woro Rwot oko gida yai. Bin oko gero Eema ka Rwot i kabedo me kimere anyen di pwodi likame gin kituno kunono.
- ²²Alubo mere, jo dedede koudo tie i imendera me jo me ekeko ka Epuraimu en oko yai, ikodeta kede ikodeta di kilubere aluba. Elisama wot ka Amikud en koudo telo gi.
- ²³Gamaliel wot ka Pedasur en oko telo ekodet me jo me ekeko ka Manase,
- ²⁴kede Abidan wot ka Egidioni en oko telo ekodet me jo me ekeko ka Benjamin.
- ²⁵Alubo mere, jo dedede koudo tie i imendera me jo me ekeko ka Dan en oko lubo kicen, ikodeta kede ikodeta di kilubere aluba. Gin oudo kigwoko jo ki asura kame twero wok kicen ngei gi. Akieser wot ka Amisadai en koudo telo gi.
- ²⁶Pagiel wot ka Akeran en oko telo ekodet me jo me ot ka Aser,
- ²⁷kede Akira wot ka Enan en oko telo ekodet me jo me ekeko ka Naputali.
- ²⁸Manoni en epone kame bin jo me Isirael osirito kede, ikodeta kede ikodeta, i kare kame kiyai kede.
- ²⁹Musa owaco ne Kobab dano me Midian, en papa me dako mere be, “Wan otie yai ot i kabedo kame Rwot oudo owaco be, ‘Abino mine butu.’ Upere kede wa, wan likame obino teri kirac; pien Rwot ocikere timo gikaber ne jo me Isirael.”



³⁰Do Kobab oko dwoko ne Musa be, “Ango likame abino upere kede wu, do ango abino dok i lobo na amaka but joe na.”

³¹Musa doko oko waco ne be, “Kur iwek wa, pien in ingeo kakame wan opoore gero iye kimere i wi tim, manono mio ibino bedo bala ngat kame nyuto ne wa yongayo.

³²Doko medo i wi manono da, ka in iupere kede wa, gi dedede aber kame Rwot bino timo ne wa wada obino timo nin.”

Jo Oyai Ot

³³Aso, jo me Isirael oko yai ki moru ka Rwot. Gin kiko ot sapali me ceng adek, di Jolebi kame oudo yeo Sanduku me Isikan ka Rwot en oudo telo negi yongayo, pi mono kakame kipoore wei iye.

³⁴Kame gin oudo kitie kobo, edou ka Rwot oudo bedo i wi gi i esawa me iceng.

³⁵Tek kame oudo kocako yeno Sanduku me Isikan pi kobo, Musa oudo waco be, “Rwot, yai iko bwono jokwor ni di iko mino gi kiringi kisasarun.”

³⁶Doko da kame jo oudo otuno kakame kipoore gero iye kimere pi wei, en oudo ewaco be, “Rwot, dwog but jo tutumian kede tutumian me Isirael.”

Wel 11

Jo Ongunguro

¹Jo bin oko cako ngunguro but Rwot pi peko kame oudo kitie kede. Kakame Rwot oko winyo kede ingungur gi, en eko doko ger di eko mino mac owango kimere duc i bad tetucel.

²Do jo oko kok but Musa; Musa oko lego but Rwot di mac oko to.

³Omio oko lwongo kabedo nono be Tebera, pien mac ka Rwot oliel oko wango kanono.

Jo Ongunguro pi Kec

⁴Jokumbor mogo da oudo tie upere kede jo me Isirael; gin oudo kitie kede twon kiru me ringo, doko da kiton jo me Isirael oko cako ngunguro pi ringo di kiwaco be, “Okwe koto di otie kede ringo me acama!

⁵Wan oyutuno i kare kame oudo otie kede Misiri, oudo ocamo aporogo me nono, kede ikwekwer, kede esuju apii pii, kede atungulu me egere apapat.

⁶Do nan teko wa tie tiek. Likame tie gimoro kame otie camo kwanyo kenekene emana buli ceng.”

⁷Emana oudo cal bala nyige mogo atitino di tar.

⁸Jo oudo wire mono gi di kicoko gi, di kiko riego gi arabo kiko yoko gi kede apany pi doko alos, di kiko tedo gi kidoko mugati aperepere. Oudo emit ineno bala mugati kame kotedo kede mo.



⁹En oudo ebino iwor kede toyo.

¹⁰Musa oko winyo di jo ngunguro i kom kop nono, di kicungo i dog ikekon me kimere gi. Di cuny Rwot oko wang adikinicel, di Musa likame oko bedo kede yomcuny.

¹¹Musa oko waco ne Rwot be, “Pinyo komio itie tero ngatic ni kirac kamano? Pinyo komio ili kede yomcuny i koma? Neningo nan itieko jalo na peko ka jogi dedede i wia.

¹²Benyo, ango en kame bin ayaco gi di ako nywalo gi, en komio in iwaco na pi tingo gi i kora bala ngapidi, di ako tero gi paka tuno i lobo kame in icikere iye pi mino joakwari gi?

¹³Ango abino udo ringo kituai kame abino mino twon jogi dedede? Pien gin kitieko bino buta di kiwaco be ami gi ringo kicami.

¹⁴Ango kena likame atwero gwoko jogi dedede, ebwono teko na!

¹⁵Ka epone noni en kame in itie tero ango kede, mi kisa maki keda iko neka kicel atwal, tetekeny abwot ki can kame atie iye.”

Koyero Jotel Ot Kanyaare

¹⁶Rwot oko waco ne Musa be, “Cok na joadongo ot kanyaare me Isirael, jo kame in ingeo be obedo joadongo kame koworo, di iko tero gi i Eema me ariamakin keda, di iko mino gi kicung kunono kedi.

¹⁷Ango abino bino piny kunono di ako yamo kedi; di ako bino kwanyo twer mogo kame in itie kede di ako mino gin, di do gin kiko bino donyo konyi gwoko jo, tetekeny kur in iute kede gi in keni.

¹⁸Nan wac ne jo be, ‘Lonyerenu pi ceng me diki; diki ibinunu bedo kede ringo me acama. Rwot otieko winyo koko wu di iparerenu be koto di oudo itienu kede ringo, be kuo oudo ber ne wu di oudo itienu Misiri. Pi manono, Rwot bino mino wu ringo di ikounu camo.

¹⁹Likame ibinunu came pi ceng acel, arabo ceng are, arabo pi ceng kany, arabo pi ceng tomon amoto pi ceng ot are kenekene,

²⁰do pi duwe acel, paka tuno en wok ki umu di eko doko rac ne wu, pien wun itiekunu dagi Rwot ngat kame tie i diere wu di ikounu ngunguro bute di iwacunu be oudo koto eber ka likame iyaunu ki Misiri.’ “

²¹Do Musa oko waco be, “Ango atie telo jo aramo bala tutumia tol kanyape (600,000) atwero ot kede tien gi; benyo benyo kame in itwero waco kede be, ‘Abino mino gi ringo kame kibino camo pi duwe acel?’

²²Akadi bed bala onek romini kede doke wa dedede, arabo omak aporogo dedede atie i nam, do pwodi likame obino sobolo pito gin dedede.”



²³Rwot oko dwoko be, “Iparo be twer nango tie kede ajikini mere? Nan in ibino neno ka kop nango bino cobere kakare amoto li.”

²⁴Aso, Musa oko donyo ooko di eko waco ne jo kop kame Rwot owaco; en eko coko jotel ot kanyaare di eko teero gi luko Eema ka Rwot.

²⁵Di Rwot oko bino piny kede edou di eko yamo kede Musa, di eko kwanyo twer mogo kikom Musa di eko keto gi i kom joadongo ot kanyaare nogo. Kakame twer nono odonyo kede i kom gi, gin kiko cako murao kop bala inabin, do likame kiko bobo medo timo kamanono.

²⁶Cuo are kikom joadongo, Eledad kede Medad, oudo oko dong i kimere gi. Twer ka Rwot di oko ot donyo i kom gida i kimere kunono, di gida kiko cako ilelem bala inabin.

²⁷Awobi moro oko ringo ot waco ne Musa be, “Eledad kede Medad tie imurai bala inabin i kimere.”

²⁸Di Yosua wot ka Nun, ngat koudo obedo konyo Musa cako di en pwodi awobi oko waco be, “Ejakait, oti iko gengo gi!”

²⁹Do Musa oko waco ne be, “Benyo, nyeko tie maki keda? Oudo ango amito be koto Rwot omio twer mere but jo dedede tetekenyo jo dedede dok inabin!”

³⁰Di do Musa kede joadongo ot kanyaare nogo oko dok i kimere.

Rwot Ocwao Aluru

³¹Yamo oko buko wok ki but Rwot, di eko kelo aluru ki nam di eko mino gi kipopoto kiraramun i nget kimere me jo me Isirael. Oudo kikumemo malo bala mita acel, di kiko umo kakame tie mairo atot atota i bad dedede.

³²Aso, jo oko bedo timo tic me coko aluru cenge nono paka yuto piny, di doko kiko meede iwor kiakia kede oru mere, likame tie dano moro kame mere likame oko tuno kilo tutumia acel. Gin kiko mono gi pi tuo lukaro kimere dedede.

³³Do di pwodi oudo kitie kede ringo atot me acama, Rwot oko ngoi kede jo, di eko cwano negi aumpuli ager oko dwenyo gi.

³⁴Omio oko donyo lwongo kanono be Kibirot Kataba (kame dwong mere be “Atesin me Jokiru”), pien bin koyiko jo kame oudo tie kede kiru me ringo kanono.

³⁵Jo oko yai ki Kibirot Kataba di kiko ot gero kimere Kaserot.

Wel 12

Komio Miriamu Alola

¹Kakame oudo kitie kede Kaserot, Miriamu kede Aaron oko yamo kirac i kom Musa, pien Musa oudo onyomo nyako me jo Kus.

²Gin kiwaco be, “Benyo, Rwot oyamo kibut Musa kenekene? Mam eyamo kibut wada?” Rwot oko winyo kop gi nono.



³Aso, icuo anyinge Musa oudo obedo dano amwol adikinichel, en oudo emwol kalamo jo dedede me wi lobo.

⁴Rwot oko ngole waco ne Musa, Aaron kede Miriamu be, “Wun jo adek go wokunu ikounu bino i Eema na me ariamakin.” Aso, jo adek nogo oko ot kunono.

⁵Rwot oko bino piny i cal me epir me edou, di eko cungo i ekeko me Eema, di eko lwongo Aaron kede Miriamu di gin kiko ot anyim.

⁶Rwot oko waco negi be, “Winyunu kop na. Kame inabin tie i diere wu, ango anyutere but gi i gianyuta, doko ayamo kede gi i lek.

⁷Do likame etie kamanono kede Musa; ango atieko cibe pi bedo ngat kame lo jo na me Isirael.

⁸Ango ayamo kede en wang i wang, di kope dedede tie kakaler likame i agole. Doko da en etieko neno cal nango! Do kara pinyo komio wun likame ikounu bedo kede lwooro me yamo kop arac i kom Musa?”

⁹Rwot oko ngoi kede gi di eko yai.

¹⁰Kakame edou oyai kede ki wi Eema, tuo me delkom oudo otieko mako Miriamu, di kome oko doko tar bala akako. Aaron oko lokere di eko neno Miriamu di tuwo me delkom omako kome dedede.

¹¹Aaron oko waco ne Musa be, “Okwe, adwong na kur imi wa alola pi dub kame otimo mingomingo.

¹²Kur imie ebed bala atin kame konywalo di oto, di ringo kome tetucel otieko top kakame ewok kede ki yi toto mere.”

¹³Di Musa oko kok but Rwot be, “Okwe Rwot cang Miriamu.”

¹⁴Do Rwot oko dwoko be, “Ka koto papa mere oudo ongulo lau i wange, iparo be koto oudo likame ekanyakino lewic nono pi ceng kanyaare? Poore cege ooko me kimere pi ceng kanyaare, di ingei manono oko bino karuno dwoke bobo.”

¹⁵Oko cego Miriamu ooko me kimere pi ceng kanyaare, di jo likame oko yai cako sapali tuno kakame Miriamu odwogo kede.

¹⁶Di jo oko yai ki Kaserot di kiko ot gero kimere i wi tim me Paran.

Wel 13

Kocwao Ibegai Kanan

(Iswilia 1.19-33)

¹Rwot oko waco ne Musa be,

²” Cwai cuo mogo ot begao lobo me Kanan, en lobo kame ango abino mino jo me Isirael; kwany ngatel acel ki buli jo me ekeko acelacel me ateker me Isirael di iko cwano gi.”



³Aso Musa oko cwano jotel me jo me Isirael nogo yai ki wi tim me Paran di lubere kede kite kame Rwot ocike kede.

⁴⁻¹⁵Nying jo nogo gin ige: Samua wot ka Sakur me ekeko ka Ruben, Sapat wot ka Kori me ekeko ka Simeon, Kaleb wot ka Jepune me ekeko ka Yuda, Igal wot ka Yosepu me ekeko ka Isakar, Kosea wot ka Nun me ekeko ka Epuraimu, Palati wot ka Rapu me ekeko ka Benjamin, Gadiel wot ka Sodi me ekeko ka Sebulun, Gadi wot ka Susi me ekeko ka Manase, Amiel wot ka Gemali me ekeko ka Dan, Setur wot ka Emikairi me ekeko ka Aser, Nakabi wot ka Boposi me ekeko ka Naputali, Geuel wot ka Maki me ekeko ka Gad.

¹⁶Magonogi en nying jo kame Musa oko cwano ot begao lobo me Kanan. Musa oko loko nying Kosea wot ka Nun odoko Yosua.

¹⁷Kakame Musa ocwao gi kede ot begao lobo me Kanan, en ewaco negi be, “Otunu paka tuno Negeb, di ikounu kato paka i piny kobedo imukuran.

¹⁸Ngingicunu epone kame piny nono cal kede, rom me jo kame bedo kunono, kede teko gi.

¹⁹Ngingicunu da ka lobo gi nono ber amoto erac, kede ka bomban kame gin kibedo iye kocelo kede apamai atek amoto li,

²⁰kede da ka lobo gi nono mio amoto li, kede kame yen tie iye amoto li. Bedunu kede nwangcuny di ikounu kelo anyakini mogo ki kunono.” Manono oudo obedo kare me olok cako cek.

²¹Aso, gin kiko ot di kiko begao lobo nono cako ki wi tim me Sin tuno Rekob, i nget Lebo Kamat.

²²Gin kong kioto paka Negeb, di kiko tuno Keburon, kakame Akiman, Sesai, kede Talamai oudo bedo iye, gin ikwae me jo kame kolwongo be Anakim. (Keburon bin kogero mwakini kanyaare cen di pwodi likame kogero Soan i Misiri.)

²³Di kiko tuno i aditot me Esikol, di kiko tongo ki kanono ajange me olok kame anyakini onur iye, di kiko kode i yat kame jo are oudo diedielo. Kiko tero da anyakini mogo me pomagurunet kede me epigi.

²⁴Bin oko donyo lwongo kabedo nono be aditot me Esikol pi abunge me olok kame jo me Isirael otongo ki kanono.

Kop kame Ibegai Odwoko

²⁵Ingei ceng ot ongwon, ibegai oko dwogo ki ngingico lobo me Kanan.

²⁶Gin kioto but Musa kede Aaron kede but jo dedede me Isirael i Kades i wi tim me Paran. Gin kikelo negi kop amako lobo nono kede da kiko nyuto negi anyakini mogo me kunono.

²⁷Gin kiko waco ne Musa be, “Wan ooto i lobo kame in icwao wa iye; en ebedo lobo amio adikinicel, anyakini mogo kame okelo kiye ige.



²⁸Do jo kame bedo i lobo nono tek adikinichel, doko da bomban gi lac twatwal di kocelo gi kede apamai atek. Do arac do kalamo, oneno ikwae me jo abocoboco kame kolwongo be Anakim da kunono.

²⁹Medo i wi manono jo Amalek bedo Negeb; jo Kiti, jo Yebu, kede jo Amor bedo i piny kobedo imukuran; kede jo Kanan da bedo i dog nam me Mediterania kede i dog ecilet me Yorodan.”

³⁰Kaleb oko mino jo kame oudo tie kede ingungur but Musa oling, di eko waco negi be, “Wan ootunu osurunu lobo nono di okounu donyo bedo iye, wan otwerunu mano lobo nono.”

³¹Di do cuo kame bin oupere kede oko waco be, “Wan likame otwerunu ot yi kede joka, gin kitek kibwono wa.”

³²Aso, gin kiko donyo sarakino kope me abe amakere kede lobo nono di kiwaco be, “Lobo kame wan ooto ngingico bala ibegai nono likame ceko cam atwero pito jo mege, doko da jo kame wan oneno kunono bocoboco twatwal.

³³Wan oneno jo abocoboco kunono, gin ikwae me jo Anak. Wan do oko bedo titino kibut gi ineno bala otwongo, manono en epone kame gin oudo kineno wan kede.”

Wel 14

Jo Ongunguro

¹Jo dedede oko kok kitek iwor kiakia.

²Jo dedede me Isirael oudo tie kede ingungur but Musa kede Aaron; jo owaco negi be, “Oudo koto eber ka oudo wan oto Misiri arabo i wi tim kan!

³Pinyo komio Rwot tie tero wan i lobo no? Kobino neko wan i yi di oko bino mamako mon wa kede idwe wa. Mam oudo koto eber ka odokunu Misiri?”

⁴Aso, gin kiko donyo yamo ken gi ken gi be, “Oyerunu ngatel wa di wan okounu dok Misiri.”

⁵Di Musa kede Aaron oko riebere piny i nyim ekodet me jo me Isirael.

⁶Di Yosua wot ka Nun kede Kaleb wot ka Jepune, koudo obedo jo are kikom jo kame oudo ooto begao lobo nono oko nyinyilo igoen gi pi cweruny,

⁷di kiko waco ne ekodet dedede me jo me Isirael be, “Lobo kame wan oudo ooto begao obedo lobo aber adikinichel.

⁸Ka Rwot cunye yom i kom wa, en ebino tero wa di eko mino wa lobo amio nono.

⁹Kenekene kur ijemunu ne Rwot, doko da kur ilworunu jo me lobo nono, pien kibut wa gin kitie bala pii apia. Rwot tie keda wan, doko en etieko bwono rubangan kame gwoko gin; kur ilworunu gi.”

¹⁰Jo oudo tie do mito didipo Musa kede Aaron kede kide paka neko gi, do deyo ka Rwot oko neeno ne jo dedede me Isirael i Eema ka Rwot.



- 11**Rwot oko waco ne Musa be, “Jogi bino meede bedo kede acae i koma tuno awene? Doko da kibino meede dagi bedo kede gen buta tuno awene, bed bala ango atieko timo gianena atot i diere gi?”
- 12**Ango abino cwano negi aumpuli di ako wearo gi, di ango ako bino mini idoko papa me ateker alac di tek kalamo gin.”
- 13** Do Musa oko waco ne Rwot be, “In en ikelo jogi yai ki Misiri kede twer nin. Kame jo me Misiri owinyo gikame in itimo ne jo ni,
- 14**gin kibino waco ne jo kame bedo i lobo noni kop nono. Jo me lobo noni otieko winyo be in Rwot itie i diere wan, doko da be wan otieko neni wang i wang. Gin kitieko winyo kite kame in ibedo telo kede jo ni kede epir me edou iceng, kede epir me mac iwor.
- 15**Do ka nan in ineko jo ni wange acel, atekerin apat koudo owinyo kop i komi bino waco be,
- 16**’ Rwot oneko jo mege i wi tim pien oudo likame etwero tero gi tuno i lobo kame oudo ecikere pi mino gi.’
- 17**Aso, Rwot nan ango akwai i nyut ne wa teko ni di iko timo ne wa gikame oudo icikere iye di iwaco be,
- 18** ‘Ango Rwot likame asunyo doko ger, ango apong kede amara kalikame lokere; ango asasiro dub me jo kede gikareco gi, do likame aweko mino alola but idwe kede ikwae me lwak me agege tuno but ikwae kobedo lwak me adek kede me ongwon pi dub ka jonywal gi.’
- 19**Rwot, nataman ango akwai isasiro dub ka jogi di lubere kede dwong me amara ni kalikame lokere, bala kite kame oudo ibedo sasiro gi kede cako gin yai ki Misiri.”
- 20**Di Rwot oko waco be, “Ango abino sasiro gi bala kame in ikwao,
- 21**do akwongere kitek be,
- 22**likame tie ngatamoro kikom jogi kame bino donyo i lobo nono. Jo nogi oneno deyo nango kede gianena kame ango atimo i Misiri kede i wi tim, do gin kibedo tama tien kede tien di kiko dagi lubo kop na.
- 23**Gin likame kibino donyo i lobo kame ango bin acikere pi mino joakwari gi. Likame tie ngatamoro kikom jo kame obedo kede acae buta kame bino neno lobo nono.
- 24** Do pi kite kame ngatic na Kaleb tie kede cuny apat, doko da ebedo lubo kop na kede cunye dedede, ango abino tere tuno i lobo kame bin en eoto begao nono, di ikwae mege ko bino donyo bedo iye edoko mergi.
- 25**Aso, nan pi kite kame jo Amalek kede jo Kanan bedo kede i aditoto me Kanan, diki lokerenu idokunu i wi tim di ilubunu yongayo aoto i Nam Akwar.”

Rwot Omio jo Alola pi Ingungur gi



²⁶Rwot oko waco ne Musa kede Aaron be,

²⁷” Jo areco gi bino meede bedo kede ingungur buta tuno awene? Winyo ingungur gi i koma do otieko roma!

²⁸Wace gi be, ‘Ango akwongere kitek be abino timo ne wu gikame awinyo di iwacunu:

²⁹ liele wu bino more i wi tim noni. Pi kite kame ingungurunu kede i koma, likame tie ngatamoro kikomu me mwakini ot are ot malo

³⁰kame bino donyo i lobo kame ango oudo akwongere pi mino wu bedo iye, kwanyo kenekene Kaleb wot ka Jepune kede Yosua wot ka Nun.

³¹Do idwe wu, kame wun oudo iwacunu be kobino mamako, abino mino gi kidonyo i lobo kame wun itiekunu dagi nono.

³²Do wun liele wu bino more i wi tim kane.

³³ Idwe wu bino neno can wire kwat i wi tim kan pi mwakini ot ongwon pi dub wun, tuno di dano me ajikini kikomu otieko to.

³⁴Ibinunu neno can pi dub wu pi mwakini ot ongwon, mwaka acel pi buli ceng acel kikom ceng ot ongwon kame wun itiekunu mamano kede lobo noni di ibegaunu en, di do ikounu bino ngeno be ateteni ango likame cunya yom.

³⁵Ango Rwot atieko waco; ateteni abino timo manoni ne ekodet me jo areco kocokere i koma noni. Wun dedede ibinunu to i wi tim kanoni.’ “

³⁶⁻³⁷Rwot oko mino aumpuli opeto cuo kame Musa oudo ocwao ot begao lobo me Kanan, di bin gin kiko dwoko kop me abe di kiko mino jo ocako bedo kede ingungur bute.

³⁸Do Yosua wot ka Nun kede Kaleb wot ka Jepune kenekene en oko dong kuo kikom cuo koudo ooto begao lobo me Kanan.

Tien me Agege me Tamo Suro Kanan

(Iswilia 1.41-46)

³⁹Kakame Musa oko waco ne kede jo kope kame Rwot oudo owaco, jo oko bedo kede iturur atek.

⁴⁰Oru mere odiko sek, gin kiko yai di do kiko cako yai ot i wi imukuran me Kanan, di kiwaco be, “Wan ige; wan obino ot paka kakame Rwot oudo omio wa cikere pire; wan onge be odubo.”

⁴¹Do Musa oko waco negi be, “Pinyo komio itien meede bedo kede abwone but Rwot. Iik wu nono likame bino cobere.

⁴²Kur iotunu malo kuno, pien Rwot likame tie kede wu, jokwor wu bino bwono wu.

⁴³Pien jo Amalek kede jo Kanan bino yi kede wu di kiko bwono wu; likame Rwot bino bedo tie kede wu, pien wun itiekunu dagi winyo kop mere.”



⁴⁴Do gin kiko kanyo kop kioto i piny me imukuran, bed bala Sanduku me Isikan kede Musa da oudo odong kakame kimere oudo tie iye.

⁴⁵Di do jo Amalek kede jo Kanan kame bedo i piny me imukuran nono oko wok piny di kiko yi kede jo me Isirael paka bwono gi, di do kiko donyo wapo gi paka tuno Koroma.

Wel 15

Iswilia Amako Giayala

¹Rwot oko waco ne Musa pi

²mino jo me Isirael iswilia me aluba amakere kede giayala ka gin kituno i lobo kame en oudo ebino mino gi di kiko donyo bedo iye. En ewaco be,

³” Ibinunu donyo mina giayala me twonin, imerekekin, romini kede diegi bala giayala awanga, arabo bala giayala me cobo isikan, arabo bala giayala me bercuny, arabo bala giayala me ceng adongo me edini; ngwece me giayala awanga nogi bino yomo cunya.

⁴⁻⁵” Ngat kame bino mina giayala nogi bino mina gin karacel kede giayala me alos; buli giayala awanga acelacel me atin oromo kobino yalo karacel kede kilo acel me alos kame konungo di konyonge kede mo me olibeti lita acel, karacel kede lita acel me bwini.

⁶⁻⁷” Kame kotie mina giayala me emerekek, kobino yale karacel kede kilo are me alos kame konungo di konyonge kede mo me olibeti lita acel kede dul. Kobino da onyo i wi alutari lita acel kede dul me bwini bala giayala amata. Ngwece me giayala awanga noni bino yomo cunya.

⁸” Kame koyalo twon buta bala giayala awanga, arabo bala giayala me cobo isikan, arabo bala giayala me nywak,

⁹kobino yale karacel kede giayala me alos kame konungo me kilo adek di konyonge kede lita are me mo me olibeti.

¹⁰Kobino da onyo i wi alutari lita are me bwini bala giayala amata. Ngwece me giayala awanga noni bino yomo cunya.

¹¹” Manoni en gikame kobino yalo karacel kede buli twon, amoto emerekek, amoto atin oromo, amoto diel kobedo giayala buta.

¹²Kame wel me leini kame kotie yalo tot, gi nogi da bino medere di lubere iepone acel nono.

¹³Anywali dedede me Isirael poore timo gi nogi i yore noni kame kitie mino giayala awanga; ngwece me giayala awanga nono ko bino yomo cunya.

¹⁴Ngakumbor moro kame tie bedo i diere wu me atwal, di cunye oko mito mino giayala awanga, eda ebino timo bala kame wun itimunu kede, di ngwece me giayala awanga nono ko bino yomo cunya.



15-16 Iswilia nogi bino mako wu pi kare lung me anyim, wun karacel kede jokumbor kame bedo i diere wu; pien wun kede gin iromunu aroma i wanga.”

17 Rwot bobo oko waco ne Musa pi

18 mino jo me Isirael iswilia me aluba ka gin kituno i lobo kame en oudo ebino mino gi di kiko donyo bedo iye. En ewaco be,

19” Kame itienu camo cam moro kowok ki lobo kame ango atie mino wu, ibinunu poko moro imiunu buta.

20 Kame itienu tedo mugati kede alos acako cek i poti, mugati me agege ibinunu mino buta bala kame imiunu kede alos buta i diakal me canyo.

21 Lwak wu me kare dedede bino mina giamia me mugati kame icakunu tedo noni.”

22-23 Rwot oko doko waco ne Musa gikame jo poore pi timo kame kituro iswilia kame en emio nogo, do di likame kituro me akaa. En ewaco be,

24” Ka ekodet lung oturo iswil do di likame kitimo me akaa, jo dedede karacel bino mino giayala me etobait pi bedo giayala awanga; giayala nono ngwece mere bino yomo cunya. Kibino yale karacel kede giayala me alos kede giayala amata, di lubere kede iswil kame ango atieko moko, karacel kede ekoro i acel pi bedo giayala me kwanyo dub.

25 Ngasaseredoti bino timo pwola me lonyo jo dedede me Isirael di ango ako bino sasiro gi. Pi kite kame gin likame kitimo kede gikarac nono akaa, doko kiko kelo na giayala gi, giayala gi awanga kede giayala gi me kwanyo dub pi gikarac kame gin kitimo,

26 ango abino sasiro jo dedede me Isirael, ribo kiton jokumbor kame bedo i diere gi; pien gikarac nono mako jo dedede.

27 “Ka dano moro acel otimo dub do di likame akaa, en ebino kwanyo diel adako me mwaka acel bala giayala me kwanyo dub.

28 Di ngasaseredoti ko bino timo pwola me lonyere i nyim Rwot pi ngat kotimo dub nono di ango ako bino sasiro en.

29 Iswil acel nono mako jo dedede kotimo dub, do di likame kitimo me akaa, bed bala kibedo jo me Isirael amoto jokumbor abedo i diere me jo me Isirael.

30” Do ka dano moro otimo dub me akaa, bed bala en ebedo dano me Isirael amoto ngakumbor, udo en ecao Rwot, kobino kwanye tenge atwal atwala ki diere me jo,

31 pien udo en etieko dagi winyo kop ka Rwot di eko gire turo cik mere akaa. Akodi dano nono kobino kwanye tenge atwal atwala ki diere me jo di raco mere ko dong i wie.”

Ngat kame Turo Iswil me Ceng Sabato



³²I kare kame jo me Isirael oudo tie kede i wi tim, bin gin kiko udo icuo moro di mwodo yen ceng Sabato.

³³Jo koude di oudo etie mwodo yen oko tere but Musa kede Aaron kede i nyim ekodet lung.

³⁴Gin ber kiko donyo dare pien oudo likame kingeo gikame kopooore timo ne.

³⁵Do Rwot oko waco ne Musa be, “Kopooore neko icuo no; jo dedede poore ot didipo en kede kide paka to tenge me kimere.”

³⁶Jo dedede oko tere tenge me kimere di kiko didipo en kede kide tuno to, bala kame Rwot oudo ociko ne Musa.

Iswilia amako Eula me Lak Igoen

³⁷Rwot oko waco ne Musa

³⁸pi waco ne jo me Isirael be, “Kuunu eula i lak igoen wu di ikounu keto ausi ebululu ebululu i kom eula acelacel. Cik noni mako wu kiton ikwae wu me waru.

³⁹Eula nogi bino bedo gikame poo wi wu i kom cik nango di ikounu lubo gi, di ikounu bino weko lubo mit areco atie i cunyu.

⁴⁰Pi manono, wun ibinunu yutuno cik nango dedede di ikounu lubo gi, di ikounu bino bedo jo na atwal atwala.

⁴¹Ango en Rwot Rubanga wu ngat kokwanyo wu ki lobo me Misiri pi bedo Rubanga wu. Ango en Rwot Rubanga wu.”

Wel 16

Jemo ka Kora, Datan, kede Abiram

¹⁻² Kora wot ka Isikar, kobedo Ngalebi me ekeko ka Kokat oko bedo kede jemo i kom tel ka Musa. Jo adek da me ekeko ka Ruben oko ribere i kome, gin en Datan kede Abiram, koudo obedo awobe ka Eliab, kede On wot ka Pelet. Gin bin kiko tero jo tol are kede ot kany me Isirael, gin jotel me ekodet kame jo oudo oyoero, di kiko ot but Musa kede dwan agwai.

³Gin kiko cokere but Musa kede Aaron di kiko waco negi be, “Wun do ikangasarunu! Jo dedede me ekodet noni obedo jo ka Rwot, doko da Rwot tie kede wan dedede. Do kara pinyo komio wun itingerenu bedo kede ruom amalo rom kano kalamo ekodet me jo ka Rwot?”

⁴Kakame Musa owinyo kede kop noni, en eko poto eriebere piny.

⁵Di eko waco ne Kora kede jo dedede kame oudo eupere kede be, “Diki odiko Rwot bino nyuto ne wa ngai en kobedo mere; en ebino yei ne ngat kobedo mere, ngat kame en ebino yero, pi ot bute i alutari.

⁶⁻⁷In nan tim kaman: diki odiko in kede jo ni kwanyunu itatany mogo me dunyo odok angwe kur di ikounu pongoyi gi kede itonge me mac kede odok angwe kur, di ikounu



cibo gi i alutari i nyim Rwot; ngat kame Rwot bino yero en kame bino bedo mere. Wun Jolebi wun en ikangasarunu.”

⁸Di Musa oko waco ne Kora be, “Kong winyunu, wun Jolebi!

⁹Wun iterunu be ebedo gimoro atitidi me Rubanga me Isirael poko wun kikom jo me Isirael, di eko yei ne wu tuno bute tetekeny itimunu tic i Eema mere, kede icungunu i nyim ekodet di ikounu tic pirgi?

¹⁰En eyei ni tuno bute, karacel kede imiegu ni Jolebi ace apat dedede, do pwodi doko itie mito tic me ngasaseredoti da!

¹¹Nan wun icokerenu karacel pi jemo ne Rwot, do likame ne Aaron.”

¹²Musa oko cwano kop pi lwongo Datan kede Abiram, gin awobe ka Eliab, do gin kiko dwoko be, “Wan likame oyaro bino.

¹³Iparo be ebedo gimoro atitidi me in kwanyo wan ki lobo amio di iko kelo wa neko wa i wi tim kan? Miero mam doko ipug wa?

¹⁴Etie kakaler be in likame ikelo wa i lobo amio, doko da likame imio wa poti kede olok. Benyo, nan bobo imito ngalo jogi? Wan likame oyaro bino.”

¹⁵Cuny Musa oko wang twatwal di eko waco ne Rwot be, “Kur iyei gamo giayala gi. Likame ango agamo punda moro kibut gi, doko da likame tie raco moro kame ango atimo ne ngatamoro kikom gi.”

¹⁶Musa oko waco ne Kora be, “Diki in karacel kede jo ni poore iotunu i nyim Rwot, in kede gin karacel kede Aaron.

¹⁷Poore ngat acelacel kibutu ter itatany mere di eko ponge kede odok angwe kur, di ngat acelacel ko tero mere i nyim Rwot i alutari, wun jo tol are kede ot kany. Aaron da bino tero mere.”

¹⁸Aso, buli dano oko kwanyo itatany mere di eko keto iye itonge me mac, di eko keto odok angwe kur iye. Gin kiko cungo i ekeko adonyo i Eema ka Rwot karacel kede Musa kede Aaron.

¹⁹Kora oko koko jo dedede kiko donyo cungo ngino Musa kede Aaron i dog ekeko me Eema ka Rwot. Deyo ka Rwot oko nyutere ne jo lung koudo ocokere kunono.

²⁰Di Rwot oko waco ne Musa kede Aaron be,

²¹” Yaunu tenge kibut jogo tetekeny anak gi abongo gal.”

²²Do Musa kede Aaron oko riebere piny kwano Rwot di kiwaco ne be, “Okwe Rubanga, in en Rubanga kame mio kuo, benyo, in ibino doko ger ne ekodet dedede pi dub me dano acel kenekene?”

²³Rwot oko waco ne Musa

²⁴pi waco ne ekodet be, “Yaunu tenge ki kimere ka Kora, me ka Datan kede me ka Abiram.”



²⁵Di do Musa oko yai ot but Datan kede Abiram, di joadongo me Isirael oko lube kunono.

²⁶En eko waco ne jo be, “Yaunu tenge ki kimere me cuo areco nogi, doko da kur imulunu jamini gi, aso ka li kobino neko wuda pi dub gin dedede.”

²⁷Di jo oko yai tenge kiweko kimere ka Kora, me ka Datan, kede me ka Abiram. Di Datan kede Abiram oko wok cungo i dog ikekon me kimere gi.

²⁸Di Musa oko waco be, “Man en epone kame wun ibinunu ngeno kede be Rwot en ocwa timo tice nogi dedede, do likame ango atie timo gi kede wia kena:

²⁹Ka jogi oto to abino kene, arabo ka can moro abino kene en opoto negi, udo likame Rwot en ocwa.

³⁰Do ka Rwot otimo gimoro anyen, ka lobo oyabere di eko mwonyo gi karacel kede jamini gi, di kiko ot i kabedo me jo oto di kikuo, manono bino mino wun ingeunu be cuo nogi ateteni oudo ocao Rwot.”

³¹Cucuto di Musa otieko waco kope nogi, lobo oko ngamere ki kakame jo nogo oudo tie iye.

³²Lobo ongamo doge di oko mwonyo gi, gin karacel kede jamini gi kede joe gi, karacel kede jo ka Kora kede jamini gi dedede.

³³Aso, gin kede jamini gi kiko ot i kabedo me jo oto di kikuo; lobo oko micakin i kom gi di kiko to.

³⁴Kakame gin kikok kede, jo dedede me Isirael koudo tie kanono oko dipo ringo di kiwaco be, “Oringunu, cengemogo lobo bino mwonyo wada!”

³⁵Di mac oko bino piny kibus Rwot di eko wangaro jo tol are kede ot kany koudo tie dunyo odok angwe kur.

Itatany me dunyo Odok Angwe Kur

³⁶Rwot oko waco ne Musa be,

³⁷” Wac ne Eleasar wot ka Aaron ngasaseredoti pi kwanyo itatany me dunyo odok angwe kur ki mac atie liel di eko wewelo mac atie i yi gi tenge kakabor.

³⁸Pien itatany ka jo nogo me dunyo odok angwe kur otieko doko gikacil pi to gin. Tet gi kidok gi me umo wi alutari, pien jo nogo oudo omio gi buta di kiko doko gikacil. Gin kibino bedo anen but jo me Isirael.”

³⁹Aso Eleasar ngasaseredoti oko kwanyo itatany kame kotimo kede nyonyo buronsi, itatany kame oudo jo kame mac owango oudo omio Rwot nogo, di oko teto gi kidoko gime umo wi alutari.

⁴⁰Manoni oko bedo bala ikwenyar but jo me Isirael be, likame tie ngatamoro kalikame obedo akwar Aaron, kame poore ot i alutari pi mino Rwot giayala me odok angwe kur, tetekeny kur gi kotimere ne Kora kede jo mege timere ne gida.



Aaron Olako Jo

⁴¹Oru mere jo dedede me Isirael oko donyo cocobo Musa kede Aaron kede kop di kiwaco be, “Wun inekunu jo ka Rwot.”

⁴²Kakame jo oudo ocokere kilukaro gi kede, Musa kede Aaron oko loko nyim gi tetu Eema ka Rwot; edou oudo ume di deyo ka Rwot oko rieny kiye.

⁴³Di Musa kede Aaron oko ot di kiko cungo i nyim Eema ka Rwot,

⁴⁴di Rwot oko waco ne Musa be,

⁴⁵” Wun yaunu tenge kibus jogo, tetekeny ango anak gi abongo gal.” Gin jo are nogo kiko riebere piny.

⁴⁶Musa oko waco ne Aaron be, “Kwany itatany ni me dunyo odok angwe kur di iko kwanyo mac ki alutari iket iye, di iko keto iye odok angwe kur iko ot awakawaka itim ne jo pwola me lonyere. Pien lilo ka Rwot otieko neeno; aumpuli otieko cakere.”

⁴⁷Aso, Aaron oko timo gikame Musa owaco ne, di eko ringo tuno i diere me jo kocokere, kakame aumpuli oudo ocakere iye ne jo. En eko keto odok angwe kur i mac me itatany mere di eko timo pwola me lonyo jo.

⁴⁸En eko cungo i dierediere me jo koudo oto kede jo koudo pwodi kuo di aumpuli nono oko jik.

⁴⁹Wel me jo oto oudo oromo tutumia tomon kiwie ongwon kede tol kanyaare (14,700), di likame komaro iye jo oto pi kop me jemo ka Kora.

⁵⁰Kakame aumpuli oko jik kede, Aaron oko dok but Musa i ekeko me Eema ka Rwot.

Wel 17

Ebela ka Aaron

¹Rwot oko waco ne Musa be,

²” Wace jo me Isirael kimii ibelai tomon kiwie are, ebela acel kibus ngatel me ekeko acelacel. Wandiko nying ngatel acelacel i kom ebela mere,

³di iko wandiko nying Aaron i kom ebela kame cungo pi ekeko ka Lebi. Ngatel me ekeko acelacel bino bedo kede ebela acel.

⁴Ter ibelai nogo i Eema na di iko keto gi i nyim Sanduku me Isikan, kakame ango ariamo kede wu iye.

⁵Di do ebela me ngat kame ango abino yero pi bedo ngasaserdoti na ko bino libo. Iepone noni ango abino jiko ingungur kame jo me Isirael tie kede i komi nakanaka.”

⁶Aso, Musa oko yamo kede jo me Isirael, di ngat acelacel kikom jotel gi oko mine ebela; ebela acel pi ekeko acel, gin dedede ibelai tomon kiwie are. Oko keto ebela ka Aaron da karacel kede mergi.

⁷Di Musa oko keto ibelai nogo dedede i Eema i nyim Sanduku me Isikan ka Rwot.



⁸ Oru mere, kakame Musa ooto kede i Eema, eko udo ebela ka Aaron, kame oudo cungo pi ekeko ka Lebi, olibo. Etimo ature di eko nyak eko cek.

⁹ Musa oko kwanyo ibelai nogo dedede di eko nyuto ne jo me Isirael dedede. Gin kiko ngino gi, di dano acelacel oko kwanyo ebela mere.

¹⁰ Di Rwot oko waco ne Musa be, “Dwok ebela ka Aaron i nyim Sanduku me Isikan. En miero gwoke bala gi me ikwenyar but jo me Isirael kame jojemo be, kibino to kwanyo di gin kijiko ingungur i koma.”

¹¹ Musa oko timo bala kame oudo Rwot ociko ne.

¹² Jo me Isirael oko waco ne Musa be, “Wan do otieko to girwa; wan dedede otiek!

¹³ Ka ngatamoroni kame noko nget Eema miero toi, dwong mere be wan dedede ocal bala jo otieko do to!”

Wel 18

Tic me Josaseredoti kede Jolebi

¹ Rwot oko waco ne Aaron be, “In kede awobe ni, kede Jolebi ibinunu yeno peko me gikarac kame kotimo amakere kede kabedo kacil; do in kede awobe ni kenekene en kame ibinunu yeno peko me gikarac kame otimo amakere kede tic me josaseredoti.

² Aso, poore ikel imiegu ni da me ekeko ka Lebi, pi konyo wu kame in kede awobe ni itienu timo tic i Eema.

³ Gin kibino timo tic me konyo wun, kede timo tic me Eema lung. Do gin miero kur kinok jamini kame kotio kede i kabedo kacil, akadi noko alutari. Ka gin kilango kop noni, gin karacel kede wun ibinunu to.

⁴ Gin koketo gi pi tic kede wun, pi gin timo tice gi dedede me Eema me riamo, dano moro apat likame bino timo tic kede wun.

⁵ In kede awobe ni kenekene en kame miero itimunu tic me Kabedo Kacil kede me alutari, tetekeny lilo na bobo kur bin i kom jo me Isirael.

⁶ Ango en kame atieko yero imiegu ni Jolebi kikom jo me Isirael bala giamia buti kame komio buta, tetekeny gin kikaruno timo tic gi me Eema me riamo.

⁷ Do in kede awobe ni kenekene en kame ibinunu timo tic wu me josaseredoti kame mako alutari kede Kabedo Kacil Kalamo. Tic wu bala josaseredoti obedo giamia na butu; dano moro apat kame bino noko jamini kacil, kobino neke.”

Iner ka Josaseredoti

⁸ Rwot oko waco ne Aaron be, “Ango atieko mini akarunikin i kom giayala dedede kame jo me Isirael mio buta. Ango atieko mino gi buti kede awobe ni bala iner me josaseredoti kame kobino mino butu nakanaka.



⁹Kikom jamini kalikame kowango, kacil kalamo, magi bino bedo megu: giayala me alos, giayala me kwanyo dub, kede giayala me timo cul. Gi dedede kame kokelo buta bala giayala kacil obedo meri kede awobe ni.

¹⁰Bala kame gin kibedo kede gikacil kalamo, wun miero icamunu gi i kabedo kacil, doko cuo kenekene en kame romo camo gi.

¹¹” Medo i wi manono, gi dedede kame kopoko kikom giamia kame jo me Isirael kiarao i nyima bino bedo meru. Ango atieko mino gi buti, but awobe ni kede anyira ni, pi kare lung. Dano moroni kalikame opwokere me diakal ni, romo camo gi.

¹²” Ango atieko mino wu gi dedede kame beco kalamo kikom jamini apura kame geo cek, kame jo me Isirael mia buli mwaka: mo me olibeti, bwini, kede alos.

¹³Anyakini me giapura dedede kageo cek, kame jo kelo buta, bino bedo megu. Jo dedede kalikame opwokere me diakal ni romo camo gi.

¹⁴ “Gi dedede kame tie i Isirael, kame kotieko jalo buta bino bedo megu.

¹⁵” Idwe kao dedede me jo kede me leini kame jo me Isirael mio buta obedo megu. Do miero iyei gamo sente kame koculo pi lako idwe kao, doko miero iyei gamo sente kame koculo pi lako kao me le kalikame cil.

¹⁶Kobino lako idwe kame kitieko romo duwe acel me dongo. Kobino lako gi i wel kame kotieko moko me siliba akaya kany, di lubere kede gipim me kabedo kacil.

¹⁷Do idwe kao me dok, romini, kede diegi likame kobino lako; gin kibedo gikacil. Ibinunu kikiro remo gi i kom alutari di ikounu wango kakamio gi bala giayala awanga kame ngwe kur buta.

¹⁸Ringo gin bino bedo megu, bala kame icamunu kede kapumito kede amuro me tetu cam kame kokiarao buta.

¹⁹” Ango atieko mino buti, but awobe ni, karacel kede anyira ni, giayala kacil dedede kame jo me Isirael kelo buta, bala gikame komio butu nakanaka. Manono obedo isikan kame anga atieko timo kede in kede ikwae ni, isikan kalikame koturo.”

²⁰Rwot oko waco ne Aaron be, “In likame kobino poko ni lobo moro ki lobo me Isirael, doko in likame ibino bedo kede iner moro i diere gi. Ango en abedo iner nin kede gi dedede kame in imito.”

Iner ka Jolebi

²¹ Rwot oko waco be, “Ango atieko mino but Jolebi acel me tomon me gi dedede kame jo me Isirael mio buta. Manoni tie pi culo gi pi tic kame gin kitimo me gwoko Eema me riamo.

²²Cako nataman ot anyim jo me Isirael icegun likame bobo bino noko Eema me riamo, ka gin kilango kop noni raco bino bedo i wi gi di kiko to.



²³Do Jolebi kenekene en kame bino timo tic me Eema me riamo. Ka dub moro otimeere iye, manono bedo i wi gin. Manoni en iswil kalikame lokere pi kare me lwak wu dedede. Jolebi likame kobino poko negi lobo i Isirael,

²⁴piento ango atieko mino gin, pi bedo mergi, acel me tomon me gi dedede kame jo me Isirael mio buta bala giayala. Manono en komio ango awaco negi be, gin likame kobino poko negi lobo i Isirael.”

Acel i kom Tomon kame Jolebi mio

²⁵Rwot oko ciko Musa

²⁶pi waco ne Jolebi be, “Ka wun ikounu gamo kikut jo me Isirael acel me tomon kame Rwot mio wu pi bedo megu, poore imiunu acel me tomon mere but Rwot bala giayala.

²⁷Kobino maro manono bala giamia wun, kame rom aroma kede giayala me alos kede bwini anyen kame ngapur mio.

²⁸Iepone noni wuda ibinunu poko giayala kame imiunu but Rwot ki i acel me tomon kame igamunu kikut jo me Isirael. Kikom jamini nogo ibinunu kwanyo kiye giayala ka Rwot di ikounu mino gi but Aaron ngasaseredoti.

²⁹Ibinunu kwanyo giayala noni kikom jamini dedede abeco kalamo, kame jo me Isirael mio butu.

³⁰Ka itiekunu mino jamini abeco adikinichel kame ipokunu, apat kodong mege do bedo megu, bala kame ngapur mio kede giayala mere me alos amoto bwini di apat kodong ko bedo mere.

³¹Wun kede jo me diakale wu iromunu camo gi i karamoro kenekene, pien ebedo cul wu pi tic kame itimunu i Eema me riamo.

³²Likame ibinunu bedo kede raco moro ka icamenu, kwanyo di wun itiekunu mino but Rwot dul kame ber kalamo. Do likame ibinunu pwoko giamia kacil me jo me Isirael i yore me camo moro di pwodi likame imiunu dul kame ber kalamo bala giayala. Ka itimunu kamano, kobino neko wu.”

Wel 19

Buru me Atakit Akwar

¹Rwot oko ciko Musa kede Aaron

²pi mino jo me Isirael iswilia kame lubo nogi. Jo me Isirael miero kel atakit akwar but Musa kede Aaron, atakit kalikame tie kede peko moro i kome, doko di likame pwodi koketo ayoko moro i ngute.

³Aaron kede Musa bino mino atakit nono but Eleasar ngasaseredoti, di do oko tere ooko me kimere oko ngole di Eleasar neno.

⁴Eleasar bino gwelo remo moro kede lwete di eko kikiro remo nono tien kanyaare i bad kame dok tetu nyim Eema me riamo.



⁵Di do oko wango atakit nono lung di Eleasar neno; kobino wango kiton lau mere, ringo, remo, kede jamini me yie.

⁶Ngasaseredoti bino kwanyo yat seda, emompir, kede ausi akwar di eko uco gi i mac kame kotie wango atakit nono iye.

⁷Di do ngasaseredoti ko bino lwoko igoen mege di eko bol, en kamio eko dok i kimere. Do ber kong ebino dong di en dano kopwokere tuno ceng donyo.

⁸Ngat kowango atakit nono da bino lwoko igoen mege di eko bol; eda ebino dong di en dano kopwokere tuno ceng donyo.

⁹Di do ngat kalikame opwokere, ko bino ot jobo buru me atakit nono di eko keto gi kabedo kacil ooko me kimere. Kobino gwoko buru nono ooko me kimere pi jo me Isirael tic kede me iiko pii me lonyere. Manono obedo pwola kame kotimo pi kwanyo dub.

¹⁰Ngat kojobo buru nono miero lwok igoen mege, do en ebino dong di epwokere tuno ceng donyo. Manoni bino bedo iswil kame jo me Isirael bino lubo pi kare lung, kiton jokumbor kame tie bedo i diere gi.

Ngat Komulo Kom Dano Oto

¹¹Ngat komulo kom dano oto bino bedo dano kopwokere pi ceng kanyaare.

¹²En miero elonyere i ceng me adek kede i ceng me kanyaare kede pii me lonyere, di en eko doko cil. Do ka en likame elonyere i ceng me adek kede me kanyaare, en ebino dong di epwokere.

¹³Jo dedede kame mulo kom dano oto di likame kiko lonyere dong di kipwokere, pien udo pii me lonyere likame kokikiro i kom gi. Gin kimunao Eema ka Rwot; jo kame cal kamagonogo kobino poko gi tenge kibut jo me Isirael.

¹⁴Ka ngatamoro oto i eema, ngat kame oudo tie i yi eema iesawa me to mere, kede jo dedede kame donyo i yi eema nono, bino bedo jo kopwokere pi ceng kanyaare.

¹⁵Agune da dedede kalikame koumo wi gi bino doko jamini kopwokere.

¹⁶Ka ngatamoro omulo kom ngat kame koneko arabo kom ngat oto tuwo, amoto cogo me dano arabo ates, ngat nono doko dano kopwokere pi ceng kanyaare.

¹⁷Pi kwanyo pwokere tenge, kobino juko buru mogo me atakit akwar kame oudo owango pi timo pwola me lonyere. Kobino keto buru nono i agulu, di oko oonyo pii me atan amol iye di oko rubo gi.

¹⁸Di do dano kalikame opwokere ko bino kwanyo emompir di eko rwako i pii nono, di eko kikiro en i kom eema, i kom jamini me i yi eema, i kom jo kame oudo tie i yie, kede i kom ngat kame oudo omulo cogo me dano, kom ngat kame koneko, kom ngat oto tuwo arabo ates.



¹⁹Dano kalikame opwokere bino kikiro pii nono i kom jo kopwokere, i ceng me adek kede i ceng me kanyaare. Iepone noni en ebino lonyo gi i ceng me kanyaare, di do gin kiko lwoko igoen gi di kiko bol, otieno di ceng odonyo gin kiko doko jo acil.

²⁰Jo dedede kame pwokere di likame kiko lonyere dong di kipwokere, gin kobino poko gi tenge kibus jo me Isirael, pien gin kitwero munao Eema kacil ka Rwot. Etimere kamanono pien udo pii me lonyere likame kokikiro i kom gi.

²¹Wun ibinunu gwoko iswil noni pi kare me anyim lung. Ngat kame kikiro pii me lonyere nono bino lwoko igoen mege, doko ngatamoroni kame mulo pii me lonyere bino dong di epwokere tuno ceng donyo.

²²Gimoroni kenekene kame ngat kopwokere mulo bino pwokere, doko ngatamoroni kame mulo dano nono bino bedo di epwokere tuno ceng donyo.

Wel 20

Gikame bin Otimere Kades

(Yai 17.1-7)

¹duwe me agege jo me Isirael lung bin oko tuno i wi tim me Sin di kiko gero kimere gi Kades. Miriamu bin oko to di oko yike kunono.

²Pii oko bedo li i kakame bin gin kigero iye kimere gi nono; aso, jo dedede bin oko cokere karacel ne Musa kede Aaron.

³Di kiko lok kede Musa di kiwaco ne be, “Oudo koto ebedo ber ka wan oudo oko to i nyim Eema ka Rwot karacel kede jo me Isirael icegun.

⁴Pinyo komio in ikelo wa i wi tim noni pi wan to iye karacel kede leini wa?

⁵Pinyo komio in ikwanyo wa ki Misiri di iko kelo wa i kabedo arac noni? Alos akadi epigi likame tie iye, akadi olok arabo pomagurunet; doko pii me amata da li iye.”

⁶Di do Musa kede Aaron oko yai tenge kibus jo di kiko ot i nyim ekeko me Eema me riamo. Gin kiko rieberere piny, di Rwot oko nyutere but gi i deyo mere.

⁷Rwot oko waco ne Musa be,

⁸” Kwany ebela me cing kame tie i nyim Sanduku me Isikan, di in kede Aaron omini ikounu koko jo lung me Isirael karacel. Di in iko ciko lela di gin kineno, pi woto pii mere. Iepone noni in ibino mino pii mol ki lela ne jo, di gin kede leini gi kiko mato.”

⁹Aso, Musa bin oko ot di eko kwanyo ebela nono bala kame oudo Rwot ociko ne.

¹⁰Musa kede Aaron oko bin koko jo lung karacel i nyim lela, di en eko waco negi be, “Winyunu, wun jojemo! Benyo, imitunu be wan omi pii wok di eko mol ne wu ki lela noni?”

¹¹Di do Musa oko kiarao ebela malo di eko juto kede lela tien are, di pii oko bwote, di jo karacel kede leini gi oko mato.



¹²Do Rwot oko waco ne Musa kede Aaron be, “Pien wun likame ikounu keto gen wu buta, omio likame ikounu nyuta i wang jo me Isirael be ango ngat kacil. Pi mano, wun likame ibinunu telo gi tuno i lobo kame ango atieko cikere pi mino gi.”

¹³Manoni bin otimere i Meriba, kakame bin jo me Isirael olok kiye kede Rwot, doko en kakame bin en enyuto negi kiye be en ngat kacil.

Kodagi ne Jo me Isirael Beo ki Edom

¹⁴Musa bin oko ooro jo ki Kades pi ot but abaka me Edom di kiko waco ne be, “In ingeo peko dedede kame wan oboe iye:

¹⁵epone kame joakwari wa bin ooto kede Misiri, di wan oko bedo kunono pi kare kalac. Jo me Misiri bin oko tero wa kirac karacel kede joakwari wa,

¹⁶di wan bin oko kok but Rwot pi konyo wa. Rwot bin oko winyo koko wa di eko cwano malaika kwanyo wa ki Misiri. Nataman wan ige otie Kades, bomba kame tie i nget ikor me piny kame in ipugo.

¹⁷Nataman wan okwai iyei ne wa ngolo ki lobo ni. Wan obino lubo yongayo kenekene; likame obino beo i potu moro akadi me olok, doko likame obino mato pii me kulo wu moro. Wan obino lubo yongayo adwong kenekene abongo parao karamoro tuno wan kato adul ni.”

¹⁸Do abaka me Edom oko waco be, “Wun likame ibinunu beo i piny wa! Ka itamunu beo, wan oyaro bino di oko suro wu.”

¹⁹Jo me Isirael oko waco ne be, “Wan obino lubo yongayo adwong kenekene, doko ka wan amoto leini wa omato pii wu, wan obino culo. Gikame wan omito en in yei ne wan beo abea kenekene.”

²⁰Do abaka oko medo waco be, “Wun likame ibinunu beo i lobo wa.” Di jo Edom oko cwano twon ekodet me isirikalen kame tek pi yi kede jo me Isirael.

²¹Iepone nono jo Edom bin oko dagi ne jo me Isirael beo ki piny gi. Manono oko mino jo me Isirael oko lokere di kiko lubo tetu apat.

To ka Aaron

²²Jo me Isirael lung oko yai ki Kades di kiko ot naka tuno i moru me Kor,

²³kame bin tie i ikor me Edom. Di Rwot oko waco ne Musa kede Aaron ki kunono be,

²⁴” Aaron likame oyaro donyo i lobo kame ango bin acikere pi mino jo me Isirael, piento in kede en ikounu jemo i Meriba di ikounu dagi timo gikame ango oudo aciko.

²⁵Kwany Aaron kede Eleasar wode di iko tero gi malo i wi moru me Kor,

²⁶di in iko gonyo igoen ka Aaron me ngasaseredoti, di iko ngapo ne Eleasar. Do Aaron bino to kunono.”

²⁷Musa oko timo bala kame Rwot oudo ociko; gin kiko yito malo i wi moru me Kor di ekodet lung neno.



²⁸ Musa oko gonyo igoen ka Aaron me ngasaseredoti di eko ngapo ne Eleasar wode; Aaron oko to i wi moru kunono di Musa kede Eleasar oko dok piny.

²⁹ Kakame ekodet lung oko niang kede be Aaron oudo otieko to, jo me Isirael dedede oko koko Aaron pi ceng ot adek.

Wel 21

Jo me Isirael Obwono Jo Kanan

¹ Kakame abaka me Arad, kame bin bedo i bad tetu piny me Kanan oko winyo kede be jo me Isirael oudo tie bino di kilubo yongayo me Atarim, en eko ot suro gi di eko mako mogo kikom gi etero.

² Di jo me Isirael oko kwongere but Rwot be, “Kan in imio jo nogi i cing wa, wan obino muducaro bomban gi atwal atwala.”

³ Rwot oko winyo kwac gi di eko mino gi kibwono jo Kanan. Aso, jo me Isirael di oko muducaro gi kede bomban gi atwal atwala, di kiko lwongo kabedo nono be Koroma.

Twol kame Kotimo kede Nyonyo Buronsi

⁴ Jo me Isirael oko yai ki moru me Kor di kiko lubo yongayo kame oto i Nam Akwar, tetekeny kimanaro lobo me Edom. Di gin bin kitie ot, jo likame oko karuno dire.

⁵ Gin kiko yamo kirac i kom Rubanga kede Musa di kiwaco be, “Pinyo komio ikwanyunu wa ki Misiri di ikounu kelo wa to i wi tim kan kakame cam akadi pii da li iye? Wan likame otwero meede kanyakino camo cam arac noni.”

⁶ Di Rwot oko cwano twole ager i dier jo me Isirael, di kiko tongotongo jo atot di kiko neko.

⁷ Jo oko ot but Musa di kiko waco ne be, “Wan otieko dubo pi yamo kirac i kom Rwot kede i komi, nataman wan okwai ileg but Rwot wek ekwany twole nogi tenge.” Aso, Musa oko kwano Rwot pi jo.

⁸ Di Rwot oko waco ne Musa be, “Tim cal me twol ager di iko cibe i wi epir, tetekeny ngatamoroni kame twol tongo bino ngine di eko bedo kuo.”

⁹ Aso, Musa oko timo twol kede nyonyo buronsi, di eko cibe i wi epir. Ka twol oudo otongo ngatamoro, ngat nono oudo ngio twol kame kotimo kede nyonyo buronsi nono di eko kuo.

Sapali me Ot Moab

¹⁰ Jo me Isirael oko meede kede ot gi di kiko gero kimere gi Obot.

¹¹ Ingei yai ki Obot, gin kiko ot di kiko gero kimere gi kabedo kame kolwongo be Iye Abarim, i wi tim kame oudo tie i bad tetu kide me piny me jo Moab.

¹² Kiko yai kikano di kiko ot gero kimere gi i aditot me Sered.



¹³Gin bobo kiko yai ki Sered di kiko gero kimere gi loka tetuca me ecilet me Arunon, i wi tim kame donyo i piny me jo Amor. (Arunon en kame bin obedo ikor me jo Moab kede jo Amor.)

¹⁴Manono en komio kowaco i *Itabu me Yi ka Rwotbe*, “Bomba me Wakeb i adul me Supa, kede aditoto; ecilet me Arunon,

¹⁵kede i bad aditoto kame oto naka i bomba me Ar kede tetu ikor me Moab.”

¹⁶Kiko yai ki Arunon di kiko ot kabedo kame kolwongo be Beer. Kanono en kulo kame bin Rwot owaco ne Musa kiye be, “Cok jo karacel di ango ako bino mino gi pii.”

¹⁷Jo me Isirael bin oko wero wer noni be, “Atan lelepo pii, Okwe atan! Werunu ne wer!

¹⁸Atan kame bin jotel okunyo, jodongo me jo en kokunye, kikunye kede ebela gi me pug kede ibelai me cing.” Gin bin kiko yai ki wi tim di kiko ot Matana,

¹⁹kiko yai ki Matana di kiko ot Nakaliel, kiko yai kikanu di kiko ot Bamot.

²⁰Ki Bamot di kiko ot i aditot kame tie i piny me Moab, i dud moru me Pisiga, kakame neeno kede wi tim.

Kobwono Abaka Sikon kede Og

(Isiwilia 2.26—3.11)

²¹Di do jo me Isirael oko ooro jo but Abaka Sikon me jo Amor pi ot waco ne be,

²²” Wan okwai iyei ne wa ngolo ki lobo ni. Wan likame obino beo i potu moro akadi me olok, doko likame obino mato pii me atan wu moro. Wan obino lubo yongayo adwong kenekene tuno wan kato adul ni.”

²³Do Sikon likame oko yei ne jo me Isirael ngolo ki piny mere. En eko coko isirikalen mege karacel di eko ot ne jo me Isirael i wi tim; etuno Jas di eko suro jo me Isirael.

²⁴Do jo me Isirael oko neko jo atot kikom gi, di kiko donyo bedo i lobo gi cako ki ecilet me Arunon i bad tetu piny tuno i ecilet me Jabok i bad tetu malo, tuno i ikor kede jo Amon; pien oudo kodaro ikor me jo Amon kitek.

²⁵Aso, jo me Isirael bin oko mano bomban dedede me jo Amor, kiton Kesibon kede bomban koluke dedede di gin kiko donyo bedo i yi gi.

²⁶Kesibon en bin bomba adwong me Abaka Sikon me jo Amor, en ngat kame bin oko yi kede abaka kasek me jo Moab di eko mano lobo mere lung naka tuno i ecilet me Arunon.

²⁷Manono en komio jo awero waco be, “Bia Kesibon, i bomba me Abaka Sikon! Mito kogere bobo di oko dwoke kakare.

²⁸Isirikalen ka Sikon bin oko yai ki bomba me Kesibon bala mac kame liel; di kiko muducaro bomba me Ar i Moab kede da imukuran me tetu malo me Arunon.



²⁹Itienu ican tin benyo, wun jo me Moab! Kotieko muducaro wu, Okwe wun jo ka rubanga Kemos! Wun rubanga wu otieko mino cuo odoko joring ayela, di oko mako mon odoko mabus ka Abaka Sikon me jo Amor.

³⁰Do nataman do ikwae gi kotieko muducaro, cako ki Kesibon tuno Dibon; wan otieko muducaro gi cako ki Nasim tuno Nopa, i nget Medeba.”

³¹Aso, jo me Isirael bin oko donyo bedo i lobo me jo Amor.

³²Musa bin oko cwano jo pi ot begao bomba me Yaser. Jo me Isirael bin oko mako bomba nono kede calere mege koluke, di kiko riamo tenge jo Amor kame bin tie kunono.

³³Di do jo me Isirael oko lokere di kiko lubo yongayo aoto Basan. Abaka Og me Basan oko bin sirito kede isirikalen mege pi ot suro gi i Ederei.

³⁴Rwot bin oko waco ne Musa be, “Kur ilwore. Ango atieko mine i cingi, en kede jo mege dedede, kede lobo mere da lung. Ibino timo ne gikame oudo itimo ne Abaka Sikon me jo Amor, ngat kame oudo pugo Kesibon.”

³⁵Aso, jo me Isirael bin oko neko Abaka Og, awobe mege, kede jo mege dedede, abongo weko ngatamoro acel dong di ekuo; di do gin kiko donyo bedo i lobo mere.

Wel 22

Abaka me Moab Olwongo Balaam

¹Jo me Isirael oko yai ki kunono di kiko ot gero kimere gi i ebar me Moab i bad tetu kide me Yorodan, kakame pimere kede Jeriko.

²Kakame abaka me Moab, Balak wot ka Sipor, oko winyo kede gikame jo me Isirael oudo otieko timo ne jo Amor, kede kite kame jo me Isirael oudo tot kede,

³Iworo atek oko make, en karacel kede jo mege dedede.

⁴Jo Moab bin oko waco ne jotel me Midian be, “Twon ekodet me jo no bino muducaro gi dedede kame tie kan, bala twon kame camo lum i obar.” I kare nono Balak wot ka Sipor en kame oudo tie abaka me Moab.

⁵En bin eko oro jo ot lwongo Balaam wot ka Beor, ngat kame oudo tie Petor i nget ecilet me Eupurate i lobo me joawade mege. En eoro gi be kiwace Balak be, “Ateker lung otieko bino ki Misiri; gin kitieko sarakin kiromo lobo lung, doko kitieko donyo bedo i nget adul na.

⁶Gin kitek kibwono wa. Aso, ango akwai, bia ilam na gi amotoko atwer bwono gi di ako riamo gi tenge. Ango angeo be ka in ilamo ne dano winyo, ngat nono udo winyo, doko ka in ilamo dano kirac, ngat nono bedo dano kame kolamo.”

⁷Aso, jotel me Moab kede me Midian oko yai ot but Balaam; gin kitero ne sente me cule pi tic mere, di kiko mine kop kame Balak oudo ooro gi kede.



⁸Balaam oko waco negi be, “Butunu kan, di diki ango ako bino waco ne wu kop kame Rwot odwoko.” Aso, jotel me Moab oko dong bedo kede Balaam.

⁹Rubanga oko bino but Balaam di eko penye be, “Cuo mege ige kame tie kedi?”

¹⁰Balaam oko waco ne Rubanga be, “Abaka Balak me Moab ooro gi buta pi waco na

¹¹be ateker moro otieko bino ki Misiri di kiko sarakin kiromo lobo lung. En emitto be ango aot alam gi, tetekeny amoto etwer yi kede gi di eko riamo gi tenge.”

¹²Rubanga oko waco ne Balaam be, “Kur iot kede gi, doko kur ilam jo nogo, pien ango atieko mino gi winyo.”

¹³Aso, Balaam oko yai odiko di eko waco ne jo kame Balak oudo ooro be, “Dokunu paco; Rwot otieko dagi nango ot kede wu.”

¹⁴Jo nogo bin oko dok but Balak di kiko waco ne be, “Balaam odagi bino kede wa.”

¹⁵Di Balak bobo oko cwano jotel atot, jo kame pir gi tek kalamo me agege.

¹⁶Gin bin kiko ot but Balaam di kiko mine kop kame Balak ooro gi kede be, “Ango akwai, kur imi gimoro gengi bino buta;

¹⁷pien ateteni ango abino mini wor adwong, doko gimoroni kenekene kame in ibino waco, ango abino timo. In kenekene bia ilam jo nogi.”

¹⁸Do Balaam oko waco ne jo kame Balak oudo ooro be, “Akadi koto di Balak ko mina siliba kede saabu dedede kame tie i paco mere, likame ango atwero dagi lubo cik ka Rwot Rubanga na akadi i kop katitidi benyo.

¹⁹Wun iromunu dong kan bala kame jo icegun oudo otimo. Ango abino mito udo niang kibus Rwot i kom kop moro ace kame emitto waco na i kom kop noni.”

²⁰Iwor nono Rubanga oko bino but Balaam di eko waco ne be, “Ka cuo nogi obino pi kwani be iot kede gi, iikere di iko ot kede gi, do tim gikame ango awaco ni kenekene.”

²¹Aso, Balaam oko yai odiko di eko bedo i ngei punda mere di eko ot kede jotel me Moab.

Balaam kede Punda mere

²²Balaam oudo tie wanano punda mere di etie i yongayo me ot Moab, doko jotic mege are oudo tie kede. Cuny Rubanga oko wang pi Balaam oudo tie ot, omio malaika ka Rubanga oko rire i yongayo pi genge.

²³Kakame punda oneno kede malaika ka Rwot di tie cungo i yongayo, di emako epima di tie i cinge, en eko weko yongayo di eko parao i poto. Balaam oko jwato punda pi dwoke i yongayo.

²⁴Di do malaika oko cungo kakame yongayo oudo diding kiye, i dierediere me poti are me olok, kame oudo tie kede apama tuni tuni.



²⁵Kakame punda bobo oneno kede malaika nono, eko ride i nget apama, omio eko girisaro tien Balaam i apama. Balaam bobo oko jwato punda.

²⁶Malaika bobo oko medo ot anyim di eko cungo kakadiding, kalikame oudo epiding moro me beo tie iye i bad tetu dedede.

²⁷Kakame punda oneno kede malaika, eko buto piny. Cuny Balaam oko wang di eko donyo bungo punda kede ebela mere.

²⁸Di Rwot oko mino punda otwero yamo, di eko penyo Balaam be, “Nyo kame ango atimo ni, en komio in iko jwata tien adek nogi?”

²⁹Balaam oko gamo doge be, “Piento in iloka adoko ngamingo ni! Koto di oudo amako epima i cinga, koto aneki nan!”

³⁰Do punda oko dwoko ne be, “Benyo, likame ango en punda ni kame in ibedo ot kede pi kare me kuo ni lung tuno tin? Benyo, tie ceng moro acel kame ango atieko timi kede iepone noni?” En eko gamo be, “Li.”

³¹Di do Rwot oko yabo wang Balaam, di eko neno malaika ka Rwot di tie cungo i yongayo kede epima i cinge; di Balaam oko riebere piny pi mine wor.

³²Malaika oko penye be, “Pinyo komio in iko jwato punda ni tien adek kamano? Ango atieko bino pi suri, pien sapali ni nono ipagel i nyima.

³³Punda ni oudo obedo nena en komio ebedo parao tenge tien adek nogo. Ka koto oudo likame elengere tenge kibuta, ateteni nan anana koto oudo ango atieko neki di ako weko en edong kuo.”

³⁴Balaam oko waco ne Malaika be, “Ango atieko dubo. Ango likame oudo angeo be in itie cungo i yongayo pi genga. Pi mano, ka ot na noni likame poore, ango abino dok paco.”

³⁵Do malaika oko waco ne be, “In ot kede gin, do yam kop kame ango abino waco ni kenekene.” Aso, Balaam oko ot kede jotel kame oudo Balak ooro.

Balak ogamo Balaam

³⁶Kakame Balak owinyo kede be Balaam oudo tie bino, en eko ot pi riamo kede i bomba me Ar Moab, kame bin tie i nget ecilet me Arunon, tetu ajikini me ikor me piny mere.

³⁷Balak oko waco ne Balaam be, “Benyo, likame ango oudo aoro jo buti pi lwongi? Pinyo komio likame iko bino buta? Iparo be ango likame atwero mini giamia me pwoc kame romo?”

³⁸Balaam oko waco ne Balak be, “Ango nataman atieko bino buti, do benyo, iparo be ango atie kede twer me waco kop moro kenekene? Kop kame Rubanga keto i doga en kame miero ango awaci.”

³⁹Di do Balaam oko ot kede Balak Kiriat Kusot.



⁴⁰Balak oko mino giayala angola me dok kede romini, di eko cwano mogo ne Balaam kede jotel kame oudo tie kede.

Imurai ka Balaam tien me Agege

⁴¹Oru mere odiko Balak oko tero Balaam kabedo kame kolwongo be Bamot Baal, kakame Balaam oko twero neno kiye jo mogo me Isirael.

Wel 23

¹Di do Balaam oko waco ne Balak be, “Ger nango alutarin kanyaare kan, di iko iiko na twonin kanyaare kede imerekekin da kanyaare.”

²Balak oko timo bala kame oudo owaco ne, di en kede Balaam kiko mino giayala me twon kede emerekek i wi alutari acelacel.

³Di do Balaam oko waco ne Balak be, “Dong kan i nget giayala awanga ni di ango ber aoto tenge. Cengemogo Rwot twero bino pi riamo keda. Gimoroni kenekene kame en enyuto na, ango abino waco ni.” Di en eko ot malo i wi emukura kakaler,

⁴di Rubanga oko riamo kede. Balaam oko waco ne Rubanga be, “Ango atieko iiko alutarin kanyaare, doko atieko mino giayala me twon kede emerekek i wi alutari acelacel.”

⁵Rwot oko waco ne Balaam kop kame miero ewaci, di eko dwoke but Balak pi waco ne kop nono.

⁶Aso, en eko dok di eko udo Balak pwodi tie cungo i nget giayala awanga mere nono, en karacel kede jotel dedede me Moab.

⁷Balaam oko waco agole mere kaman: “Balak otieko kela ki Aram, abaka me Moab okela ki mori me bad tetu kide. ‘Bia ilam na ikwae ka Yakobo. Bia ironkino jo me Isirael.’”

⁸Benyo benyo kame ango alamo kede jo kalikame Rubanga olamo? Arabo benyo benyo kame ango aronkino kede jo kalikame Rwot oronkino?

⁹Ango atie neno gi ki wi lela, ango angio gi ki wi imukuran. Gin kibedo ateker kame bedo ken gi; gin likame kineno ateker gi bala ateker acel kikom atekerin.

¹⁰Ngai kame twero maro wel me jo me Isirael, arabo maro dul acel i kom ongwon me wel me jo me Isirael? Mito ajikini na bed bala me dano kopooore, doko mito ango gira atoi bala en.”

¹¹Di do Balak oko waco ne Balaam be, “Nyo ine kame in itimo nango? Ango oudo akeli pi lamo jokwor na, do in likame tie gimoro kame iko timo kwanyo lamo ne gin winyo.”

¹²En eko gamo be, “Benyo, mam in iparo be ango miero kur agwokere di ako waco gikame Rwot waco na kenekene?”

Imurai me Are ka Balaam



¹³Di do Balak oko waco ne Balaam be, “Bia oot bobo kabedo ace, kakame in iromo neno gi kiye; ibino neno jo mogo anonok kenekene kikom gi, do likame gin dedede; di do in iko lamo nango gin ki kunono.”

¹⁴Aso, en eko tere i potu me Sopim, i wi moru me Pisiga. Di eko bobo gero alutarin kanyaare, di eko mino giayala me twon kede emerekek i wi alutari acelacel.

¹⁵Balaam oko waco ne Balak be, “Cung kan i nget giayala awanga ni, di ango ber aoto riamo kede Rwot kuca.”

¹⁶Rwot oko riamo kede Balaam di eko waco ne gikame poore eyami, di eko dwoke but Balak pi waco ne kop mere.

¹⁷Kakame en etuno kede but Balak, eude pwodi etie cungo i nget giayala awanga mere, en karacel kede jotel me Moab. Balak oko penye gikame Rwot oudo owaco.

¹⁸Di do Balaam oko murao kaman: “Yai Balak, di iko winyo; winy kop na, Okwe wot ka Sipor.

¹⁹Rubanga likame obedo dano, tetekeny eromo ngalo, en likame ebedo anywali me dano tetekeny eromo loko tam mere. Gi dedede kame en ecikere iye, en etimo; en eyamo kop di eko cobo timo da.

²⁰Neningo, ango kotieko mina cik pi lamo winyo; en etieko mino winyo, doko ango likame akaruno loko.

²¹Likame tie gimoro arac kame en eneno i kom ikwae ka Yakobo; likame eneno peko moro i kom jo me Isirael. Rwot Rubanga gi tie kede gi, gin kiwaco be en ebedo abaka gi.

²²Rubanga ngat kokelo gi ki Misiri, tek bala jobi kame yi pirgi.

²³Ateteni likame tie tiet moro kame koromo timo i kom ikwae ka Yakobo; likame tie jwok moro kame koromo timo i kom jo me Isirael. Nataman do jo bino waco kop i kom jo me Isirael be, ‘Nenunu gikame Rubanga otieko timo!’

²⁴Nenunu, jo me Isirael tie yai malo bala engu adako, kitingere bala engu! Likame ebuto piny tuno di etieko mwodo le kame emako di eko mato remo me le kame eneko.”

²⁵Di do Balak oko waco ne Balaam be, “Kur do ilam gi, doko kur ilam negi winyo da.”

²⁶Do Balaam oko waco ne Balak be, “Benyo, likame oudo awaco ni be, ‘Gikame Rwot waco en kame miero ango atimi’?”

Imurai ka Balaam me Adek

²⁷Aso, Balak oko waco ne Balaam be, “Nan do bia, ango amito teri kabedo ace; cengemogo cuny Rubanga bino bedo yom di eko yei ne in lamo gin nango ki kunono.”



²⁸Di Balak oko tero Balaam i wi moru me Peor, kame neeno kede wi tim.

²⁹Balaam oko waco ne Balak be, “Ger nango alutarin kanyaare kan, di iko iiko na twonin kanyaare kede imerekekin da kanyaare.”

³⁰Aso, Balak oko timo bala kame Balaam oudo owaco ne, di eko mino giayala me twon kede emerekek i wi alutari acelacel.

Wel 24

¹Balaam oudo otieko ngeno be Rwot mito mino jo me Isirael winyo. Aso, en likame eko ot mono gianena anyuto winyo aber amoto arac, bala kame oudo ebedo timo kede, do en eko loko nyime oneno tetu wi tim.

²Balaam oko tingo wange malo di eko neno kimere me jo me Isirael di kicokere ekeko kede ekeko. Tipo ka Rubanga oko bino i kome,

³di eko murao kaman: “Kop ka Balaam wot ka Beor, kop me dano kame wange neno piny kiber,

⁴dano kame twero winyo kop kame Rubanga waco, dano kame neno gianyuta kame Won Twer mio, di etie wirawira.

⁵Iemai wu tin cil benyo, Okwe ikwae ka Yakobo, kabedo kame igerunu iye kimere wu, Okwe wun jo me Isirael!

⁶Kipete kugo kugo bala tugere, arabo poti kame tie i nget ecilet; kical bala yen aloe kame Rwot opito arabo yen seda kame tie i nget pii.

⁷Kot bino bedo tot ne wu, di kodere wu ko bino bedo kede pii atos kame romo gi. Abaka wu bino bedo dwong ekalamo Agag, doko ajakanut mere bino nyai.

⁸Rubanga ngat kokelo wu ki Misiri, tek bala jobi. Wun ibinunu muducaro atekerin kobedo jokwor wu, di ikounu tuturo cogere gi. Ibinunu cocobo gi kede imalia wu.

⁹Wun idolenu buto piny bala engu, icalunu bala engu adako; ngai kame yei ot twaruno wu? Jo dedede kame lamo ne wu winyo gida kiudo winyo, doko jo dedede kame lamo wu kirac gida kolamo gi kirac.”

¹⁰Di do Balak cunye oko wang i kom Balaam di eko rono cinge pi wangcuny, di eko waco ne be, “Ango oudo alwongi pi lamo jokwor na, do akaka timo kamanono nataman in itieko lamo negi winyo tien adek.

¹¹Nataman do yai idok paco! Ango oudo awaco ni be abino mini giamia aber me pwoni, do Rwot otieko gengi udo giamia nono.”

¹²Balaam oko waco ne Balak be, “Mam angu oudo awaco ne joor kame in ioro buta be,



13' Akadi Balak di ko mina ode kame eketo iye siliba kede saabu culucul, ango likame aromo lango kop ka Rwot di ako timo gimoro aber amoto arac i mit na; gikame Rwot yamo, manono en kame ango abino waco.' "

Imurai ka Balaam me Ajikini

14Balaam oko waco ne Balak be, "Aso, nataman ango atie dok but jo na, do di pwodi likame aoto, ango amito kwenyaro in i kom gikame jo me Isirael bino timo ne jo ni i kare me anyim."

15Di do en eko murao kaman: "Kop ka Balaam wot ka Beor, kop me dano kame wange neno piny kiber,

16kop me dano kame twero winyo kop kame Rubanga waco, dano kame tie kede ngec kame wok kibus Ngamalo Twal, dano kame neno gianyuta kame Won Twer mio, di etie wirawira.

17Ango aneno kare me anyim; aneno abaka moro kame bino wok kibus ikwae ka Yakobo bala acer, en ebino wok kibus jo me Isirael bala ebela me pug. En ebino dudubo Moab, kede adul kame jo Set bedo iye.

18En ebino mano lobo me Edom doko mere, Seir, lobo me jokwor mere, en ebino mano; di jo me Isirael ko meede ameda doko tek.

19Ngapug bino wok kibus ikwae ka Yakobo di eko neko jo kobwot ki bomba."

20Di do Balaam oko neno jo Amalek i gianyuta kame oudo en eneno, di eko murao kaman: "Amalek en kame oudo obedo ateker me agege kikom atekerin, do i ajikini en ebino rwenyo atwal."

21En eko neno jo Ken i gianyuta kame eneno, di eko murao kaman: "Likame tie peko kame romo tuno kabedo kame wun itienyu iye, ecal bala ot me winyo kame tie i wi lela;

22do di wun jo Ken kobino muducaro wu i kare kame jo Asur bino mako wu kede di kiko tero wu bala mabus."

23Balaam bobo oko murao be, "Okwe, ngai kame bino dong kuo i kare kame Rubanga timo kede gi noni?"

24Jo asura bino kwango imerin di kiwok ki Kitim, gin kibino bwono jo Asur kede jo Eber, do gida kicen mere kobino muducaro gi atwal."

25Di do Balaam oko yai di eko dok paco, di Balak da oko ot elubo yongayo mere kene.

Wel 25

Jo me Isirael i Peor



- ¹I kare kame jo me Isirael bin tie bedo kede i aditot me Akasia, cuo me Isirael oko donyo buto kede mon me Moab.
- ²Mon nogi oudo lwongo gin camo ibagai me mino giayala but rubangan me Moab. Jo me Isirael oudo camo di kiko donyo woro rubanga
- ³Baal me Peor. Manono oko mino cuny Rwot owang i kom gi
- ⁴di eko waco ne Musa be, “Kwany jotel dedede me Isirael di iko neko na gin i dier iceng di jo dedede neno, tetekeny ango ako bino kwanyo gero na tenge kibut jo me Isirael.”
- ⁵Di Musa oko waco ne jongolkop me Isirael be, “Ngat acelacel kikom wu miero nek jo me ekeko mere kotieko donyo woro Baal me Peor.”
- ⁶Inonono inonono di icuo moro acel me Isirael bino kede dako moro me Midian etero ture, di Musa kede jo dedede neno. Esawa nono oudo jo tie koko i ekeko me Eema me riamo.
- ⁷Kakame Pinekasi, wot ka Eleasar, akwar Aaron ngasaseredoti, oko neno kede kamano, en eko yai eweko jo kacokere. En eko kwanyo tong,
- ⁸di eko lubo icuo nono i ode, di eko cobo gin jo are nogo pelepel. Epone no en kame oko jiko kede aumpuli kame oudo tie neko jo me Isirael.
- ⁹Akadi kamanono da jo kame aumpuli oudo otieko neko oudo romo tutumia ot are kiwie ongwon (24,000).
- ¹⁰Rwot oko waco ne Musa be,
- ¹¹” Pinekasi wot ka Eleasar, akwar Aaron ngasaseredoti, otieko loko gero na tenge kibut jo me Isirael; piento en ebedo kede nyeko atek pira di manono oko mina likame amuducaro gi.
- ¹²Pi manono, wace be, ‘Ango ayaro timo kede en isikan na me mulem.
- ¹³En kede ikwae mege kibino bedo josaseredoti nakanaka, piento en oudo nyeko omake kitek pi Rubanga mere, di eko timo gikame oko kwanyo dub me jo me Isirael.’
- “
- ¹⁴Nying icuo me Isirael kame koneko karacel kede dako me Midian oudo Simiri wot ka Salu, ngatel me diakal moro me ekeko ka Simeon.
- ¹⁵Nying dako nono kame koneko oudo Kosibi, nyar ka Suur, ngatel me diakal acel me Midian.
- ¹⁶Rwot oko waco ne Musa be,
- ¹⁷” Oti iko suro jo Midian di iko bwono gi,
- ¹⁸pi gikarac kame gin kitimo butu kakame kingalo wu kede i Peor, kede pi kop kame mako amin gi Kosibi, nyar ka ngatel gi acel anyinge Sur; en bin koneke i Peor, i kare me aumpuli.”



Wel 26

Maro Wel me Jo me Tien me Are

- ¹ Di do aumpuli oudo otiek, Rwot oko waco ne Musa kede Eleasar wot ka Aaron ngasaseredoti be,
- ²” Marunu wel me jo me Isirael lung, cako kibut jo kame mwakini gi me dongo tie ot are ot malo. Marunu wel me jo dedede kame romo ot i yi di lubere kede diakale ka joakwari gi.”
- ³⁻⁴Musa kede Eleasar oko lubo gikame Rwot oudo owaco, di gin kiko lwongo karacel cuo dedede me lwak nono. Gin kiko cokere i ebar me Moab loka tetuca me ecilet me Yorodan, kakame pimere kede bomba me Jeriko. Jo me Isirael kame bin owok ki piny me Misiri gin ige:
- ⁵Jo me ekeko ka Ruben (Ruben oudo en kao ka Yakobo) gin en: jo me diakale ka Kanok, Palu,
- ⁶Keseroni, kede Karami.
- ⁷Cuo me diakale nogi oudo wel gi tie tutumia ot ongwon kiwie adek, kede tol kanyaare ki ot adek (43,730).
- ⁸Palu oudo en papa me Eliab.
- ⁹Idwe ka Eliab gin en, Nemuel, Datan, kede Abiram. Jo nogi, Datan kede Abiram en jotel kame bin jo me Isirael oyeru, do gin kiko ribere kede Kora i kom Musa kede Aaron, di kiko jemo ne Rwot.
- ¹⁰Lobo bin oko ngamere di eko mwonyo gin karacel kede Kora, kede jo kame bin lube i kare kame mac bin omuducaro kede jo tol are kede ot kany (250). Gin kiko doko bala gi me ikwenyar but jo me Isirael icegun.
- ¹¹Do awobe ka Kora bin likame oko to i kare nono.
- ¹²Ikwaee ka Simeon di lubere kede diakale gi bin gin en Nemuel, Yamin, Yakin,
- ¹³Seera, kede Saul.
- ¹⁴Jo me diakale nogi oudo wel gi tie tutumia ot are kiwie are kede tol are (22,200).
- ¹⁵Idwe ka Gad di lubere kede diakale gi bin gin en Sepon, Kagi, Suni,
- ¹⁶Osini, Eri,
- ¹⁷Arod, kede Areli.
- ¹⁸Jo me diakale nogi oudo wel gi tie tutumia ot ongwon kede tol kany (40,500).
- ¹⁹Awobe ka Yuda oudo gin en Er kede Onan; gin bin kiko to i lobo me Kanan.
- ²⁰Ikwaee ka Yuda di lubere kede diakale gi gin bin en Sela, Peresi, Seera.
- ²¹Idwe ka Peresi bin gin en Keseroni kede Kamul.



- ²²Jo me diakale nogi bin wel gi tie tutumia ot kanyaare kiwie kanyape kede tol kany (76,500).
- ²³Ikwae ka Isakar di lubere kede diakale gi bin gin en Tola, Puwa,
- ²⁴Yasub, kede Simiron.
- ²⁵Jo me ikekon nogi bin tie tutumia ot kanyape kiwie ongwon kede tol adek (64,300).
- ²⁶Ikwae ka Sebulun di lubere kede diakale gi bin gin en Sered, Elon, kede Yakalel.
- ²⁷Jo me diakale nogi bin tie tutumia ot kanyape kede tol kany (60,500).
- ²⁸Awobe ka Yosepu di lubere kede diakale gi bin gin en Manase kede Epuraimu.
- ²⁹Ikwae ka Manase bin gin en jo me diakal ka Makir kede me ka Gilead. Makir bin en papa me Gilead.
- ³⁰Ikwae ka Gilead bin gin en jo me diakal ka Iyeser, Kelek,
- ³¹Asiriel, Sekem,
- ³²Semida, kede Keper.
- ³³Selopekad wot ka Keper bin li kede idwe awobe; en bin enywalo anyira kenekene. Anyira nogo nying gi bin Makala, Nua, Kagela, Milika, kede Tirisa.
- ³⁴Jo me diakale nogi kame bin kowandiko oudo wel gi tie jo tutumia ot kany kiwie are kede tol kanyaare (52,700).
- ³⁵Ikwae ka Epuraimu di lubere kede diakale gi bin gin en Sutela, Beker, kede Takan.
- ³⁶Jo me diakal ka Eran bin owok ki diakal ka Sutela.
- ³⁷Jo me diakale nogi kame bin kowandiko oudo wel gi tie tutumia ot adek kiwie are kede tol kany (32,500). Diakale nogi en kame bin obedo me ekeko ka Yosepu.
- ³⁸Ikwae ka Benjamin di lubere kede diakale gi bin gin en Bela, Asabel, Akiram,
- ³⁹Sepupam, kede Kupam.
- ⁴⁰Jo me diakale ka Arad kede Naman bin owok ki diakal ka Bela.
- ⁴¹Jo me diakale nogi kame bin kowandiko oudo wel gi tie tutumia ot ongwon kiwie kany kede tol kanyape (45,600).
- ⁴²Ikwae me ekeko ka Dan gin bin en jo me diakal ka Sukam.
- ⁴³Jo dedede me diakal ka Sukam kame bin oko maro wel gi oudo tie tutumia ot kanyape kiwie ongwon kede tol ongwon (64,400).
- ⁴⁴Ikwae ka Aser di lubere kede diakale gi bin gin en Imina, Isibi, kede Beria.
- ⁴⁵Jo me diakale ka Keber kede Malakiel bin owok ki diakal ka Beria.
- ⁴⁶Aser bin tie kede nyare kame nyinge Sera.



- ⁴⁷Diakale nogi en oudo me ekeko ka Aser. Wel me jo mege kame bin kowandiko oudo tie tutumia ot kany kiwie adek kede tol ongwon (53,400).
- ⁴⁸Ikwae ka Naputali di lubere kede diakale gi bin gin en Yakasil, Guni,
- ⁴⁹Yeser, kede Silem.
- ⁵⁰Jo me diakale nogi kame bin kowandiko oudo wel gi tie tutumia ot ongwon kiwie kany kede tol ongwon (45,400).
- ⁵¹Wel me cuo me Isirael kame bin kowandiko dedede oudo tie tutumia tol kanyape kede acel kede tol kanyaare kede ot adek (601,730).
- ⁵² Rwot oko waco ne Musa be,
- ⁵³” Popoko lobo me Kanan ne jo me ikekon nogi di lubere kede wel me jo kame tie i ekeko acelacel.
- ⁵⁴Ekeko kame jo mege tot in ibino mino gi lobo alac, do ekeko kame jo mege nonok in ibino mino lobo atitidi; ekeko acelacel in ibino mino gi lobo di lubere kede wel me jo mege kame kowandiko.
- ⁵⁵Do lobo nono in ibino popoko en kede alulu, di gin kiko donyo iye pi doko mergi di lubere kede nying kwaru me ekeko acelacel.
- ⁵⁶Iner me lobo acelacel kobino popoko kede alulu i dierediere me ikodeta adongodongo kede atitino.”
- ⁵⁷Diakale me ekeko ka Lebi bin gin en Gereson, Kokat, kede Merari.
- ⁵⁸Ikwae gi bin ribo kiton jo me diakale ka jogi: Libini, Keburon, Makali, Musi, kede Kora. Kokat bin en papa me Amuram.
- ⁵⁹Nying dako ka Amuram bin en Yokebed nyar ka Lebi kame enywalo i Misiri. Yokebed bin oko nywalo ne Amuram idwe adek, gin en Aaron, Musa kede amin gi Miriamu.
- ⁶⁰ Aaron bin onywalo awobe ongwon, gin en Nadab, Abiku, Eleasar, kede Itamar.
- ⁶¹ Do Nadab kede Abiku bin oko to kakame gin bin kimio kede giayala awanga but Rwot, gi kalikame iswil oudo mito.
- ⁶²Jolebi acuo kame bin mwakini gi me dongo oromo duwe acel kede ot malo, kame komaro wel gi bin tie tutumia ot are kiwie adek (23,000). Gin bin kopoko gi tenge kibus jo me Isirael icegun di oko maro wel gi ken gi pien gin oudo likame kopoko ne gi iner moro me lobo.
- ⁶³Jo me diakale nogi dedede en kame bin Musa kede Eleasar oko wandiko, i kare kame gin bin kiko maro kede wel me jo me Isirael i ebar me Moab, kabedo kame pimere kede Jeriko i loka tetuca me ecilet me Yorodan.



⁶⁴Kikom gi, likame oudo tie dano moro akadi acel, kame oudo pwodi kuo kikom jo kame bin Musa kede Aaron owandiko i kare kame bin gin kimaro kede wel me jo me Isirael i wi tim me Sinai.

⁶⁵Rwot oudo otieko waco kop i kom gi be, “Gin kibino to i wi tim.” Likame tie ngatamoro kikom gi kame bin oko dong kuo kwanyo kenekene Kaleb wot ka Jepune kede Yosua wot ka Nun.

Wel 27

Anyira ka Selopekad

¹Makala, Nua, Kagela, Milika, kede Tirisa gin bin en anyira ka Selopekad wot ka Keper, Keper bin en wot ka Gilead, Gilead bin en wot ka Makir, Makir bin en wot ka Manase, Manase en bin wot ka Yosepu.

²Anyira nogi bin oko ot di kiko cungo i nyim Musa, Eleasar ngasaseredoti, jotel, kede jo dedede i nyim ekeko me Eema me riamo di gin kiko waco be,

³” Papa wan bin oto i wi tim abongo weko atin awobi moro. En bin eli i kom jo kame oudo lubo Kora ngat kame bin ojemo ne Rwot, do en bin eto pi dub mere kene.

⁴Pinyo bo kame mio poore nying papa wan rwenyi ki diakal mere be pien oudo likame enywalo atin awobi? Mi wada lobo moro i diere me imiegu mege.”

⁵Musa bin oko keto kwac gi but Rwot.

⁶Rwot oko waco ne Musa be,

⁷” Kwac me anyira ka Selopekad poore; mi gida lobo i diere me imiegu ka papa gi. Poore mi gi lobo kame koto oudo komio papa gi.

⁸In ibino waco da ne jo me Isirael be, ‘Ka icuo moro oko to di eli kede atin awobi, nyare bino sikao jame mege.

⁹Ka en eli kede nyare, imiegu mege bino sikao jame mege.

¹⁰Ka en eli kede imiegu mege, imiegu ka papa mere bino sikao jame mege.

¹¹Ka papa mere li kede imiegu mege, wad gi kiyapiyapi me diakal gi bino sikao jame mege. Jo me Isirael poore lub kop noni bala iswil kame ango Rwot atieko ciko.’ “

Koyero Yosua pi Lunyo Wang Musa

(Iswilialia 31.1-8)

¹²Rwot oko waco ne Musa be, “Yiti i wi moru me Abarim di iko neno lobo kame ango abino mino jo me Isirael.

¹³Ka itieko nene, ida ibino to bala omini Aaron,

¹⁴pien wun bin ikounu jemo i wi tim me Sin di ikounu dagi lubo cik na. Kakame bin jo lung ongunuro kede i koma i Meriba, wun bin ikounu dagi nyuto negi twer na kacil.” (Meriba en atan kame tie Kades i wi tim me Sin.)



¹⁵Musa oko lego be,

¹⁶” Akwai Rwot Rubanga ngat kame ngeo cuny jo dedede, iket dano moro kame bino telo jo me Isirael.

¹⁷ Dano kame bino telo jo ot i yi doko di eko telo gi edwoko gi paco, dano kame bino bedo ngatel gi tetekeny kur jo ni dok cal bala romini kame li kede ngat kame kwao gi.”

¹⁸ Rwot oko waco ne Musa be, “Kwany Yosua wot ka Nun, icuo kame tie kede cuny me tel, di in iko dokakino cingi i wie.

¹⁹Mie ecung i nyim Eleasar ngasaseredoti kede i nyim jo dedede, di in iko mine tic i nyim gi bala ngat kame lunyo wangi.

²⁰In ibino mine twer nin mogo, tetekeny jo me Isirael lung bino winye.

²¹ Do Yosua bino donyo cungo i nyim Eleasar ngasaseredoti, ngat kame bino tic kede Urim me penya pire. Kop kame Eleasar waco, en kame en kede jo dedede me Isirael bino lubo.”

²²Musa oko timo bala kame oudo Rwot ociko ne. En etero Yosua di eko mine ecungo i nyim Eleasar ngasaseredoti kede i nyim jo dedede,

²³ di do en eko dokakino cinge i wie di eko mine tic i nyim gi bala ngaluny wange, bala kame oudo Rwot ociko ne.

Wel 28

Giayala me Buli Ceng

(Yai 29.38-46)

¹Rwot oko ciko Musa

²pi waco ne jo me Isirael be miero kigwokere di kiko mino Rubanga giayala me cam kame yomo cunye i kare kame kociko.

³Magonogi en giayala me cam kame poore mi but Rwot: giayala awanga me buli ceng, idwe romini are me mwaka acelacel, kame li kede peko moro i kom gi.

⁴Atin oromo acel kobino mino esawa me odiko, kede me are mere di oko bino mino otieno di piny amumusit.

⁵Giayala acelacel kobino yalo karacel kede kilo acel me alos kinunga, kame konyalo kede lita acel me mo me olibeti kame ber adikinicel.

⁶Manoni en giayala awanga me buli ceng, kame bin komio tien me agege i wi moru me Sinai, bala giayala me cam kame kowango lung, giayala kame ngwe kur but Rwot.

⁷Giayala amata lita acelacel me bwini en kame bino upere kede giayala me idwe romini nogo; kobino onyo giayala amata me bwini akec but Rwot i kabedo kacil.



⁸Oromo ocelu kobino yalo otieno di piny amumusit, iepone acel nono kame koyalo kede me odiko. Eda etie giayala me cam, kame ngwece mere yomo cuny Rwot.

Giayala kame komio Ceng Sabato

⁹Ceng Sabato kobino mino giayala me idwe romini acuo are kalikame tie kede peko moro i kom gi, alos kilo are kame konyongo kede mo me olibeti, pi bedo giayala me alos kede giayala amata.

¹⁰Giayala awanga noni kopooore yalo buli ceng Sabato, medo i wi giayala me buli ceng kede giayala amata mere.

Giayala kame Komio i Ceng kame Geo Duwe

¹¹I agege me duwe acelacel, ibinunu mino giayala awanga but Rwot kaman: itobai are, emerekek acel, idwe romini kanyaare me mwaka acelacel, gin dedede di likame kitie kede peko moro i kom gi.

¹²Kilo adek me alos kame konungo miero nyonge kede mo me olibeti di oko yale karacel kede etobait acelacel bala giayala me alos. Emerekek nono kobino yalo karacel kede kilo are me alos kame konyongo kede mo;

¹³doko kilo acel me alos kobino nyongo kede mo di oko yale karacel kede atin oromo acelacel. Giayala awanga nogi en giayala me cam kame ngwece mere yomo cuny Rwot.

¹⁴Giayala amata kame poore kede etobait acelacel en lita are me bwini, lita acel kede dul pi emerekek, kede lita acel pi atin oromo acelacel. Manoni en iswil kame mako giayala awanga kame koyalo i ceng kame geo duwe acelacel tieko mwaka lung.

¹⁵Medo i wi giayala awanga me buli ceng kede giayala mere me bwini, ibinunu yalo ekoroi bala giayala me kwanyo dub.

Giayala me kare me Ebaga me Mugati kame Arup li iye

(Jolebi 23.5-14)

¹⁶I ceng me tomon kiwie ongwon me duwe me acel ibinunu tedo Ebaga me Kalamo pi mino wor but Rwot.

¹⁷I ceng me tomon kiwie kany mere ibinunu tedo ebaga kame kocamo pi ceng kanyaare, di kocamo mugati kame arup li iye kenekene.

¹⁸Ceng me agege me ebaga nono obedo ceng me cokere kacil. Likame ibinunu timo tice wu.

¹⁹Ibinunu mino giayala awanga bala giayala me cam kame komio but Rwot: itobai are, emerekek acel, kede idwe romini acuo kanyaare me mwaka acelacel, gin dedede di kili kede peko moro i kom gi.

²⁰Ibinunu mino giayala me alos kame konungo kiber di oko nyonge kede mo me olibeti: kilo adek me alos nono kobino yalo karacel kede twon acelacel, kilo are mere kobino yalo karacel kede emerekek,



²¹di kilo acel ikounu bino yalo karacel kede atin oromo acelacel.

²²Ibinunu da mino giayala me ekoroi acel bala giayala me kwanyo dub. Manono en pwola me lonyo jo ki dub gi.

²³Ibinunu mino giayala nogi medo i wi giayala awanga kame komio buli ceng odiko.

²⁴Iepone acel nono, ibinunu mino giayala awanga me cam but Rwot pi ceng kanyaare, giayala kame ngwe kur bute. Ibinunu mino giayala noni medo i wi giayala awanga kame komio buli ceng karacel kede giayala me amata.

²⁵Di do ceng me kanyaare mere ko bino bedo ceng me cokere kacil; likame ibinunu timo tice wu.

Giayala me Ebagame Kac

(Jolebi 23.15-22)

²⁶I ceng me agege me Ebagame Kac, kakame jo mio kede giayala me alos anyen but Rwot, ibinunu bedo i cokere kacil; likame ibinunu timo tice wu.

²⁷Ibinunu mino giayala awanga kame ngwe kur but Rwot: itobai are, emerekek acel, kede idwe romini acuo kanyaare me mwaka acelacel; gin dedede likame miero kibed kede peko moro i kom gi.

²⁸Ibinunu mino giayala me alos kame konungo kiber di oko nyonge kede mo me olibeti: kilo adek me alos nono kobino yalo karacel kede twon acelacel, kilo are mere kobino yalo karacel kede emerekek,

²⁹di kilo acel oko bino yalo karacel kede atin oromo acelacel.

³⁰Ibinunu da mino giayala me ekoroi acel bala giayala me kwanyo dub. Manono en pwola me lonyo jo ki dub gi.

³¹Ibinunu mino giayala me leini nogi ali kede peko moro i kom gi, karacel kede giayala amata, medo i wi giayala awanga me buli ceng kede giayala me alos.

Wel 29

Giayala me Ebagame Mwaka Kanyen

(Jolebi 23.23-25)

¹I ceng me agege me duwe me kanyaare ibinunu bedo i cokere kacil; likame ibinunu timo tice wu. Ceng nono kobino kuto iye agwara.

²Jo bino mino giayala awanga kame ngwe kur but Rwot: etobait acel, emerekek acel, kede idwe romini acuo kanyaare me mwaka acelacel; gin dedede miero di kili kede peko moro i kom gi.

³Ibinunu mino giayala me alos kame konungo kiber di oko nyonge kede mo me olibeti: kilo adek me alos nono kobino yalo karacel kede twon acelacel, kilo are mere kobino yalo karacel kede emerekek,

⁴di kilo acel oko bino yalo karacel kede atin oromo acelacel.



⁵Ibinunu da mino giayala me ekoroi acel bala giayala me kwanyo dub. Manono en pwola me lonyo jo kidub gi.

⁶Ibinunu mino giayala nogi medo i wi giayala awanga me duwe anyen kede giayala mere me alos, kede giayala me buli ceng kede giayala mere me alos, karacel kede giayala amata gi. Giayala me cam nogi yomo cuny Rwot.

Giayala me Ceng me Lonyere ki Dub

(Jolebi 23.26-32)

⁷I buto duwe tomon me duwe me kanyaare cokere kacil bino bedo tie; likame jo bino camo gimoro akadi timo tic moro.

⁸Kobino mino giayala awanga kame ngwe kur but Rwot: etobait acel, emerekek acel, idwe romini acuo kanyaare me mwaka acelacel. Gin miero di kili kede peko moro i kom gi.

⁹Ibinunu mino giayala me alos kame konungo kiber di oko nyonge kede mo me olibeti: kilo adek me alos nono kobino yalo karacel kede twon acelacel, kilo are mere kobino yalo karacel kede emerekek,

¹⁰di kilo acel oko bino yalo karacel kede atin oromo acelacel.

¹¹Kobino da mino giayala me ekoroi acel bala giayala me kwanyo dub, medo i wi maca kame oudo komio bala giayala me kwanyo dub me jo, kede giayala awanga me buli ceng karacel kede giayala mere me alos kede me amata.

Giayala i kare me Ebagame Kimere

(Jolebi 23.33-44)

¹²I buto duwe tomon kiwie kany me duwe me kanyaare, cokere kacil bino bedo tie; jo likame bino timo tice gi. Kobino tedo ebagame kimere pi ceng kanyaare pi mino wor but Rwot.

¹³I ceng me agege mere kobino mino but Rwot giayala me cam kame ngwe kur: itobai tomon kiwie adek, imerekekin are, kede idwe romini acuo tomon kiwie ongwon me mwaka acelacel, gin dedede di kili kede peko moro i kom gi.

¹⁴Ibinunu mino giayala me alos kame konungo kiber di oko nyonge kede mo me olibeti: kilo adek me alos nono kobino yalo karacel kede twon acelacel, kilo are mere kobino yalo karacel kede emerekek,

¹⁵di kilo acel oko bino yalo kede atin oromo acelacel, karacel kede giayala amata bala kame mitere.

¹⁶Ibinunu da mino giayala me ekoroi acel bala giayala me kwanyo dub. Kobino mino giayala nogi medo i wi giayala me buli ceng kede giayala mere me alos kede me amata.

¹⁷I ceng me are kobino mino giayala me itobai tomon kiwie are, imerekekin are, kede idwe romini acuo tomon kiwie ongwon me mwaka acelacel, gin dedede miero di kili kede peko moro i kom gi.



18-19 Kobino mino giayala nogi karacel kede giayala apat dedede bala kame kotimo i ceng me agege.

20 I ceng me adek kobino mino giayala me itobai tomon kiwie acel, imerekekin are, kede idwe romini acuo tomon kiwie ongwon me mwaka acelacel, gin dedede miero di kili kede peko moro i kom gi.

21-22 Kobino mino giayala nogi karacel kede giayala apat dedede bala kame kotimo i ceng me agege.

23 I ceng me ongwon ibinunu mino giayala me itobai tomon, imerekekin are, kede idwe romini acuo tomon kiwie ongwon me mwaka acelacel, gin dedede miero di kili kede peko moro i kom gi.

24-25 Ibinunu mino giayala nogi karacel kede giayala apat dedede bala kame kotimo i ceng me agege.

26 I ceng me kany kobino mino giayala me itobai kanyangon, imerekekin are, kede idwe romini acuo tomon kiwie ongwon, gin dedede miero di kili kede peko moro i kom gi.

27-28 Ibinunu mino giayala nogi karacel kede giayala apat dedede bala kame kotimo i ceng me agege.

29 I ceng me kanyape kobino mino giayala me itobai kanyauni, imerekekin are, kede idwe romini acuo tomon kiwie ongwon me mwaka acelacel, gin dedede miero di kili kede peko moro i kom gi.

30-31 Ibinunu mino giayala nogi karacel kede giayala apat dedede bala kame kotimo i ceng me agege.

32 I ceng me kanyaare kobino mino giayala me itobai kanyaare, imerekekin are, kede idwe romini tomon kiwie ongwon me mwaka acelacel, gin dedede miero di kili kede peko moro i kom gi.

33-34 Kobino mino giayala nogi karacel kede giayala apat dedede bala kame kotimo i ceng me agege.

35 I ceng me kanyauni ibinunu bedo i cokere kacil, likame jo bino timo tice iye.

36 Ibinunu mino giayala awanga bala giayala me cam kame ngwe kur but Rwot: etobait acel, emerekek acel, kede idwe romini acuo kanyaare me mwaka acelacel, gin dedede di kili kede peko moro i kom gi.

37-38 Ibinunu mino gi bala giayala karacel kede giayala apat dedede bala kame kotimo i ceng me agege.

39 Magonogi en iswilia kame mako giayala awanga, giayala me alos, giayala amata, kede giayala me nywak kame ibinunu mino buta i kare me ibagai kame kotieko moko. Kobino mino giayala nogi medo i wi giayala kame imiunu pi cobo kwongere wu arabo me bercuny.



⁴⁰Aso, Musa bin oko waco ne jo me Isirael kope dedede bala kame oudo Rwot ocikone.

Wel 30

Iswilia kame mako Kwongere

¹Di do Musa bin oko waco ne jotel me ikekon me Isirael kaman: Gikame Rwot otieko ciko ine.

²Kame icuo moro okwongere but Rwot, arabo elairo pi timo ne Rwot gimoro, en likame ebino turo cikere mere; en ebino timo gi dedede kame en ewaco kede doge.

³Kame aponga kame pwodi bedo i ot ka papa mere okwongere but Rwot, arabo etwere kene di ecikere pi timo ne Rwot gimoro,

⁴di papa mere oko winyo kop me kwongere mere nono arabo cikere mere kame en etwere kede kene, di likame eko waco kop moro iye; en ebino timo gi dedede kame en ekwongere iye, kede cikere mere da kame en etwere kede kene en ebino cobo.

⁵Do ka papa mere oko dagi kop mere nono i kare kame en ewinyo kede kop nono, likame tie kwongere mere moro, arabo cikere mere kame en etwere kede kene, kame en ebino timo; doko Rwot da bino sasiro en, piento papa mere likame oko yei kede kop mere nono.

⁶Ka dako kalikame oudo konyomo okwongere, arabo oudo ewaco kop moro di likame eketo tam mere iye, kop kame oko mino en etwere kene, ka en eko nyomere,

⁷di cware oko winyo kop me kwongere mere nono di likame eko waco ne kop moro i kare kame en ewinyo kede kop nono, en ebino timo gikame oudo ekwongere iye, doko cikere mere kame oudo en etwere kede kene, en ebino cobo.

⁸Do ka cware oko dagi ne i kare kame en ewinyo kede kop me kwongere mere nono, en likame ebino gwoko kwongere nono, arabo cikere kame oudo en ewaco kede doge di likame eketo tam mere iye, cikere kame oudo en etwere kede kene; doko Rwot bino sasiro en.

⁹Apuserut arabo dako kopokere kede cware miero gwok kwongere mege dedede kede gikame en ecikere iye pi timo ne Rwot.

¹⁰Ka dako kame konyomo okwongere arabo etwere kene di elairo pi timo ne Rwot gimoro,

¹¹di cware oko winyo kop me kwongere mere nono di likame eko waco ne kop moro iye, doko likame eko dagi ne i esawa kame en ewinyo kede kop nono, dako nono bino timo gikame ekwongere iye dedede, kede da cikere kame en oudo etwere kede kene.

¹²Do ka cware oko dagi ne timo gikame en oudo ekwongere iye nono i kare kame ewinyo kede kop me kwongere mere nono, en likame ebino gwoko kwongere mere nono, arabo gikame en oudo etwere kede kene di ecikere iye pi timo ne Rwot. Cware udo otieko genge, doko Rwot da bino sasiro en.



¹³Cware tie kede twero me moko arabo gengo kwongere arabo cikere moro kame en oudo etimo.

¹⁴Do ka cware owinyo kop me kwongere kame en oudo etimo, di eko ling likame ewaco kop moro iye tuno i ceng me are, kobino tero be en eyei kop me kwongere ka dako mere nono, arabo cikere kame dako mere oudo otimo, cikere kame poore ecobi; en udo etieko yei kop me kwongere nogo, piento en likame eko waco ne dako mere kop moro i esawa kame oudo ewinyo kede kope nogo.

¹⁵Do ka en ewinyo kope nogo di eko tieko kare moro, i cen mere di en eko gengo dako mere timo gi nogo, en kikome kame miero raco me dagi timo gi nogo bed i wie.

¹⁶Magonogi en iswilia kame bin Rwot omio Musa i kom kop kame mako icuo kede dako mere, papa kede nyare kobedo aponga apwodi bedo kede en i paco.

Wel 31

Yi Kacil kede Jo Midian

¹Rwot oko waco ne Musa be,

²” Nyang gikame jo Midian otimo ne jo me Isirael; icen mere di do in iko bino to.”

³Aso, Musa bin oko waco ne jo be, “Miunu jo wu mogo iikere pi yi, tetekeny kiot yi kede jo Midian, di kiko culo kwor ka Rwot i kom gi.

⁴Ibinunu kwanyo jo tutumia acel tutumia acel ki buli ekeko me jo me Isirael di ikounu cwano gi ot yi.”

⁵Aso, bin oko yero jo tutumia acel tutumia acel ki buli ekeko me jo me Isirael, di do wel gi dedede oko bedo jo tutumia tomon kiwie are koikere pi ot yi.

⁶Musa di oko cwano gi ot yi di Pinekasi wot ka Eleasar ngasaseredoti en koudo telo gi. En oudo emako jamini me kabedo kacil kede agwara kame kokuto pi kwenyaro jo.

⁷Gin kiko suro jo Midian, bala kame oudo Rwot ociko ne Musa, di kiko neko cuo dedede,

⁸kiton abakai kany me Midian: Ebi, Rekem, Suur, Kur, kede Reba. Gin kiko neko da Balaam wot ka Beor.

⁹Jo me Isirael bin oko mako mon me Midian kede idwe gi di kiko tero; doko kiko tero da doke gi, romini kede diegi, kede kiko yako jamini gi dedede.

¹⁰Kiwango da bomban gi kede kimere gi dedede.

¹¹Gin di kiko tero jamini kame gin oudo kiyako, jo kede leini dedede

¹²but Musa kede Eleasar, kede but jo me Isirael kame bin tie i kimere kame oudo kogero i ebar me Moab loka tetuca me Yorodan, kakame oudo pimere kede Jeriko.

Isirikalen Odwogo ki Yi

¹³Musa, Eleasar, kede jotel apat dedede oko yai ki kimere pi ot siramo isirikalen.



¹⁴Musa bin oko doko ger ne jodongo me isirikalen, kede ne jotel me ikodeta apapat me isirikalen kame oudo odwogo ki yi.

¹⁵En epenyo gi be, “Pinyo komio wun iwekunu mon odong kuo?”

¹⁶Yutununu be mon en kame bin olubo pwoony ka Balaam di kiko mino jo likame oko bedo kede genere but Rwot i Peor. Manono en kame bin oko kelo aumpuli i kom jo ka Rwot.

¹⁷Pi mano, nataman nenekunu awobe dedede kede mon dedede kame otieko buto kede cuo,

¹⁸do wekunu piru anyira dedede kede mon kalikame pwodi ongeuo cuo.

¹⁹Aso, wun dedede jo kame itiekunu neko jo arabo ko tieko mulo kom dano oto, miero idongunu ooko me kimere pi ceng kanyaare. I ceng me adek kede i ceng me kanyaare ibinunu lonyere karacel kede mon kame imakunu i yi.

²⁰Miero ilwokunu da igoen dedede kede jamini dedede kame kotimo kede launi, yer me diegi, arabo ebao.”

²¹Eleasar ngasaseredoti oko waco ne isirikalen kame oudo odwogo ki yi be, “Magonogi en iswilia kame Rwot otieko mino but Musa.

²²⁻²³Jamini dedede kalikame wang, bala nat saabu, siliba, nyonyo buronsi, nyonyo ayon, ideben, kede lilime apat kobino mino beo i mac pi lonyo gi. Jamini apat dedede kame romo wang kobino mino beo i pii pi lonyo gi.

²⁴I ceng me kanyaare miero ilwokunu igoen wu, di do ikounu bino doko jo kalikame opwokere bala kame iswil mito; i cen mere di do ikounu romo dok i kimere.”

Poko Jamini kame Koyako

²⁵Rwot oko waco ne Musa be,

²⁶” In kede Eleasar, karacel kede jotel me diakale, poore imarunu rom me jamini dedede kame komao ki yi, kiton jo kame komako kede leini kame koyako.

²⁷Pokunu jamini kame koyako nogo kabedere are di rorom. Dul acel kobino mino isirikalen, di dul ocelu oko bino mino jo apat dedede.

²⁸Kikom dul kame komio but isirikalen, pok tenge ne Rwot gi acel kikom tol kany me jamini dedede, doke, pundan, romini, diegi kiton jo kame komako bala mabus.

²⁹Mi gi but Eleasar ngasaseredoti bala giamia but Rwot.

³⁰Do kikom dul kame komio but jo me Isirael icegun, ibino kwanyo gi acel kikom ot kany me jamini dedede, doke, pundan, romini, diegi, kiton jo kame komako bala mabus, di in iko bino mino gi but Jolebi kame gwoko Eema ka Rwot.”

³¹Musa kede Eleasar oko timo gikame Rwot oudo ociko.



- ³²Jamini kame isirikalen oudo oyako, kame oko dong di gin kiko tero, wel gi dedede oudo tie kaman: romini ribo kede diegi oudo tie tutumia tol kanyape kede ot kanyaare kiwie kany (675,000),
- ³³doke tutumia ot kanyaare kiwie are (72,000),
- ³⁴pundan tutumia ot kanyape kiwie acel (61,000),
- ³⁵kede mon kame oudo pwodi likame ongeo cuo, tutumia ot adek kiwie are (32,000).
- ³⁶Iner me isirikalen bin oko bedo diegi kede romini tutumia tol adek kede ot adek kiwie kanyaare kede tol kany (337,500),
- ³⁷di me ka Rwot kame oko kwanyo kiye oko bedo romini kede diegi tol kanyape kede ot kanyaare kiwie kany (675).
- ³⁸Iner me doke kame oko mino isirikalen oudo tie doke tutumia ot adek kiwie kanyape (36,000), di me ka Rwot kame oko kwanyo kiye oko bedo doke ot kanyaare kiwie are (72).
- ³⁹Iner gin me pundan oudo tie pundan tutumia ot adek kede tol kany (30,500), di oko kwanyo kiye pundan ot kanyape kiwie acel pi bedo me ka Rwot.
- ⁴⁰Mon kalikame pwodi ongeo cuo, kame bin oko mino isirikalen oudo tie tutumia tomon kiwie kanyape (16,000), di oko kwanyo kikom gi mon ot adek kiwie are pi bedo me ka Rwot.
- ⁴¹Musa bin oko mino Eleasar ngasaseredoti gikame oudo komio but Rwot, bala kame oudo Rwot ociko.
- ⁴²⁻⁴⁶Iner kame bin oko mino but jo me Isirael icegun oudo rom aroma kede kame komio but isirikalen: romini kede diegi tutumia tol adek kede ot adek kiwie kanyaare kede tol kany (337,500), doke tutumia ot adek kiwie kanyape (36,000), pundan tutumia ot adek kede tol kany (30,500), kede mon kalikame pwodi ongeo cuo tutumia tomon kiwie kanyape (16,000).
- ⁴⁷Musa bin oko kwanyo ki iner noni acel kikom ot kany me leini kede jo kame oudo komako bala mabus, di en eko mino gi but Jolebi kame oudo gwoko Eema ka Rwot, bala kame Rwot oudo ociko.
- ⁴⁸Di do jodongo me isirikalen kame bin otelo isirikalen ot yi oko ot but Musa
- ⁴⁹di gin kiko waco ne be, “Adwong, wan otieko maro wel me isirikalen kame wan oudo otelo di oko udo be gin dedede kitie.
- ⁵⁰Aso, wan okelo gikame ngat acelacel oudo, jamini kame kotimo kede saabu, mwolere me bad kede me ngut cing, ipetai, mwola me yit kede me ngut. Wan omio gi but Rwot bala gi me cul pi kuo wa, piento en egwoko wa.”
- ⁵¹Musa kede Eleasar oko gamo saabu nogo kibut gi. Saabu nogo lung oudo obedo jamini me tubuso kom.



⁵²Saabu lung kame jodongo me isirikalen nogo oko mino but Rwot oudo peko gi buco romo kilo tol are.

⁵³Manoni oudo likame ribo kiton jamini kame isirikalen apat otero.

⁵⁴Aso, Musa kede Eleasar di oko tero saabu nogo i Eema me riamo pi bedo ne jo me Isirael bala gi me iyutun i nyim Rwot.

Wel 32

Jo me Isirael Kodong i Bad tetu Kide me Yorodan

(Iswilia 3.12-22)

¹Jo me ekeko ka Ruben kede me ka Gad bin tie kede doke atot twatwal. Gin bin kiko neno be lobo me Yaser kede me Gilead oudo ber me pito doke.

²Manono oko mino gin bin kiko ot but Musa, Eleasar, kede jotel apat me Isirael di kiko waco negi be,

³⁻⁴ Lobo kame Rwot okonyo wa mano kame ribo bomban me Atarot, Dibon, Yaser, Nimura, Kesibon, Eleale, Sebam, Nebo, kede Beon, ber twatwal me pito doke. Wan jotic ni otie kede doke atot twatwal.

⁵Wan okwai imi wa lobo noni bed merwa, di likame iko mino wan ongol ecilet me Yorodan.”

⁶Musa bin oko waco negi be, “Benyo, wun itienu mito dong bedo kan di jo me Isirael icegun tie ot yi?

⁷Pinyo kame mio wun imitunu dubo cuny jo me Isirael di kiko weko ot ngolo loka tetuca i lobo kame Rwot otieko mino gi?

⁸Joakwari wu da bin otimo gi noni i kare kame ango bin acwao gi kede yai ki Kades Barenea pi ot mamano lobo nono.

⁹Gin bin kiko ot naka tuno i aditot me Esikol di kiko neno lobo nono. Do kakame gin bin kiko dwogo kede, gin kiko dubo cuny jo me Isirael; kimio gi kiko dagi ot donyo i lobo kame Rwot oudo otieko mino gi.

¹⁰ I ceng nono cuny Rwot bin oko wang di eko kwongere be,

¹¹ Ateteni likame tie ngatamoro kikom jo nogi kame oyai ki Misiri, cako kibut jo me mwakini ot are ot malo, kame bino neno lobo kame bin ango akwongere iye pi mino Aburaam, Isaka, kede Yakobo, pien gin likame kibedo luba kede cuny gi lung.

¹²Likame tie ngatamoro kikom gi kame bino donyo i lobo nono kwanyo kenekene Kaleb wot ka Jepune dano me Ken kede Yosua wot ka Nun, pien gin kibedo lubo kop na kede cuny gi lung.’

¹³Rwot bin oko lilo ne jo me Isirael di eko mino gi kibedo wiratoi i wi tim tieko mwakini ot ongwon, tuno kakame jo dedede me lwak kame oudo otimo gikarac i nyim Rwot otieko to kede.



- 14**Doko nataman wuda itiekunu lunyo wang joakwari wu, lwak anyen me jodubo, imitunu medo gero ka Rwot i kom jo me Isirael.
- 15**Ka wun ilokerenu tenge di ikounu weko lube, en ebino bobo jalo jo nogi dedede i wi tim; di to ka jo nogi dedede oko bino maro i wi wu.”
- 16**Gin kiko ot but Musa di kiko waco ne be, “Wan obino gero anak kane ne romini wa, kede bomban ne mon wa kede idwe wa.
- 17**Di do wan oko bino kwanyo jamini wa me yi di oko telo jo me Isirael icegun ot yi tuno wan keto gi i lobo kame bino bedo mergi. Manono wan obino timo di do ber mon wa kede idwe wa tie bedo i bomban kame kocelo pi gwokere kibut jo kame bedo i lobo noni.
- 18**Wan likame obino dwogo i miere wa tuno di jo me Isirael icegun dedede otieko bedo i lobere kame mako gi.
- 19**Wan likame obino gamo lobo moro i loka tetuca me Yorodan pien wan otieko gamo iner wa me lobo i loka tetuni, i bad tetu kide me Yorodan.”
- 20**Aso, Musa bin oko waco negi be, “Ka wun ikounu timo kamanono, di i nyim Rwot ikounu iikere pi ot yi,
- 21**di jo wu dedede komako jamini me yi oko ngolo ecilet me Yorodan, di gin kiko dong kede jo me Isirael icegun tuno Rwot tieko riamo jokwor mege tenge ki lobo nono
- 22**di en eko mane, wun iromunu dwogo di ikounu bedo, pien udo itiekunu cobo gikame miero itimunu ne Rwot kede ne jo me Isirael icegun. I nyim Rwot lobo noni bino bedo meru.
- 23**Do ka wun likame ikounu timo kamanono, udo itimunu dub i nyim Rwot; doko ateteni ibinunu udo alola pi dub kame itimunu nono.
- 24**Aso, gerunu bomban ne mon wu kede idwe wu, kede anak ne romini wu; do poore itimunu gikame icikerenu iye.”
- 25**Di do cuo me ekeko ka Gad kede me ka Ruben oko waco ne Musa be, “Wan jotic ni obino timo bala kame in iciko.
- 26**Mon wa, idwe wa, romini wa, kede doke wa bino dong kan i bomban me Gilead.
- 27**Do wan jotic ni dedede kotieko iikere pi yi obino ngolo loka tetuca di oko yi pi Rwot bala kame in iciko.”
- 28** Aso, Musa oko mino cik but Eleasar, Yosua kede jotel apat me Isirael be,
- 29**” Ka jo me ekeko ka Gad kede me ka Ruben oko iikere pi yi ka Rwot, di kiko ngolo ecilet me Yorodan karacel kede wu di ikounu mano lobo nono, wun ibinunu mino gin lobo me Gilead doko mergi.



³⁰Do ka gin likame kiko ngolo ecilet me Yorodan pi ot yi karacel kede wun, gin kibino udo iner me lobo gi karacel kede wun i lobo me Kanan.”

³¹Jo me ekeko ka Gad kede me ka Ruben oko waco be, “Wan obino timo kamanono bala kame Rwot otieko waco ne jotic mege.

³²Wan obino ngolo ecilet me Yorodan di oko ot yi pi Rwot i lobo me Kanan. Do lobo kame bino doko merwan bino bedo loka tetuni.”

³³Aso, Musa bin oko mino jo me ikekon ka Gad kede me ka Ruben karacel kede dul me jo me ekeko ka Manase wot ka Yosepu, adulion dedede kame Abaka Sikon me jo Amor kede Abaka Og me Basan oudo pugo, ribo kiton bomban kede adulion koluko gi.

³⁴Jo me ekeko ka Gad bin oko gero bobo bomban me Dibon, Atarot, Aroer,

³⁵Atirot Sopan, Yaser, Yagubeka,

³⁶Bet Nimura, kede Bet Karan. Bomban nogi dedede gin bin kiko celo kede apama atek, kede kiko gero anak me romini da.

³⁷Jo me ekeko ka Ruben bin oko medo gero bomban me Kesibon, Eleale, Kiriataim,

³⁸Nebo, Baal Meon kede Sibima. Gin bin kiko cako nying anyen ne bomban kame gin bobo kiko gero nogi.

³⁹Ikwae ka Makir wot ka Manase bin oko ot suro lobo me Gilead, kiko mane di kiko riamo tenge jo Amor kame bin bedo kunono.

⁴⁰Aso, Musa bin oko mino lobo me Gilead but jo ka Makir di gin kiko donyo bedo iye.

⁴¹Yair, akwar Manase bin oko ot di eko mano calere mogo di en eko cako negi nying anyen be “Kabot Yair.” ⁴²Noba bin oko ot di en eko mano bomba me Kenat kede calere mege, di eko cako nying bomba nono Noba, manono oudo obedo nyinge.

Wel 33

Sapali me Jo me Isirael Yai ki Misiri tuno Moab

¹Manoni en kite kame jo me Isirael riki obedo kokobo kede ot i kare kame gin bin kiyai kede i lobo me Misiri kede isirikalen gi di Musa kede Aaron en kame telo gi.

²Musa riki obedo wandiko nying kabedere kame gin kiyai kiye di kimeede kede ot gi bala kame Rwot oudo ciko negi. Manoni en kite kame gin bin kibedo meede kede ot gi di lubere kede kabedere dedede kame gin kiko gero iye kimere.

³Gin bin kiyai ki Rameses i buto duwe tomon kiwie kany me duwe me agege, i ceng me Ebagame Kalamo. Ceng nono gin kiko yai abongo lworomoro di jo dedede me Misiri tie neno gi.



- ⁴Jo me Misiri oudo tie yiko idwe kao gi kame Rwot oudo oneneko. Rwot bin otimo manono pi nyuto be en ebwono rubangan gin.
- ⁵Aso, jo me Isirael bin oko yai ki Rameses di kiko ot gero kimere Sukot.
- ⁶Kiko yai ki Sukot di kiko ot gero kimere Etam, kabedo kame bin tie i nget wi tim.
- ⁷Gin kiko yai ki kanono di kiko lokere dok cen kabedo kame kolwongo be Pi Kakirot, kame oudo tie i bad tetu kide me Baal Sepon, di gin kiko gero kimere gi i nget Migidol.
- ⁸Kiko yai ki Pi Kakirot di kiko ngolo nam adwong di kiko ot i wi tim. Gin kiko bedo ot ki wi tim me Etam pi ceng adek, di do kiko gero kimere gi Mara.
- ⁹Kiko yai ki Mara di kiko ot tuno Elim kakame kiko gero iye kimere gi, kabedo kame ataneko tomon kiwie are kede tugere ot kanyaare bin tie iye.
- ¹⁰Gin bin kiko yai ki Elim di kiko gero kimere gi i nget Nam Akwar.
- ¹¹Kiko yai ki Nam Akwar di gin kiko ot gero kimere gi i wi tim me Sin.
- ¹²Kiko yai ki wi tim me Sin di kiko ot gero kimere gi Dopuka.
- ¹³Di bobo kiko yai ki kano di kiko ot gero kimere Alus.
- ¹⁴Ki Alus gin kiko yai di kiko ot gero kimere Repidim, kakame oudo pii kame kiromo mato li iye.
- ¹⁵Gin bin kiko yai ki Repidim di kiko ot gero kimere i wi tim me Sinai.
- ¹⁶Kiko yai ki wi tim me Sinai di kiko ot gero kimere Kiborot Kataba.
- ¹⁷Kiko yai ki kano di gin kiko ot gero kimere Kaserot.
- ¹⁸Kiko yai ki Kaserot di gin kiko ot gero kimere Ritima.
- ¹⁹Gin kiko yai ki Ritima di kiko ot gero kimere Rimon Peresi.
- ²⁰Kiko yai bobo ki kano di gin kiko gero kimere Libina.
- ²¹Kiko yai ki Libina di gin kiko gero kimere Risa.
- ²²Di gin kiko yai ki Risa di kiko ot gero kimere Kekelata.
- ²³Kiko yai ki Kekelata di gin kiko ot gero kimere i moru me Seper.
- ²⁴Gin kiko yai ki moru nono di kiko ot gero kimere Karada.
- ²⁵Kiko yai ki Karada di gin kiko ot gero kimere Makelot.
- ²⁶Kiko yai ki Makelot di gin kiko ot gero kimere Takat.
- ²⁷Di gin bobo kiko yai ki Takat di kiko ot gero kimere Tera.
- ²⁸Kiko yai ki Tera di gin kiko ot gero kimere Mitika.



- ²⁹Kiko yai ki kano di gin kiko ot gero kimere Kasimona.
- ³⁰Gin kiko yai ki kano di kiko ot gero kimere Moserot.
- ³¹Kiko yai ki Moserot di gin kiko ot gero kimere Bene Jakan.
- ³²Kiko yai ki Bene Jakan di gin kiko ot gero kimere Kor Kagidigad.
- ³³Gin bin kiko yai ki Kor Kagidigad di kiko gero kimere.
- ³⁴Kiko yai ki Yotobata di gin kiko gero kimere Aburona.
- ³⁵Kiko yai ki Aburona di gin kiko ot gero kimere Esion Geber.
- ³⁶Gin bin kiko yai ki kano di kiko ot gero kimere i wi tim me Siin (manono en Kades).
- ³⁷Gin bin bobo kiko yai ki Kades di kiko ot gero kimere i moru me Kor, i nget lobo me Edom.
- ³⁸Rwot bin oko ciko Aaron ngasaseredoti pi en ot yito i wi moru me Kor. Aaron bin oko to i wi moru kunono i ceng me agege me duwe me kany i mwaka me ot ongwon cako i kare kame jo me Isirael oyai kede ki Misiri.
- ³⁹I kare kame bin Aaron oto kede i wi moru me Kor, mwaka me dongo mere oudo oromo tol acel kede ot are kiwie adek (123).
- ⁴⁰Dano me Kanan, abaka me Arad, kame bin bedo i bad tetu piny i wi tim me Kanan, oko winyo be jo me Isirael oudo tie bino.
- ⁴¹Jo me Isirael oudo oyai ki moru me Kor di gin kiko ot gero kimere gi Salamona.
- ⁴²Gin di kiko yai ki Salamona di kiko gero kimere Punon.
- ⁴³Kiko bobo yai ki Punon di gin kiko ot gero kimere Obot.
- ⁴⁴Kiko yai ki Obot di gin kiko ot gero kimere kabedo kame oudo tie i adul me Moab kame kolwongo be Iye Abarim.
- ⁴⁵Kiko yai ki kano di gin kiko ot gero kimere Dibon Gad.
- ⁴⁶Kiko yai ki Dibon Gad di gin kiko ot gero kimere Alumon Dibilataim.
- ⁴⁷Gin kiko yai ki Alumon Dibilataim di kiko ot gero kimere i moru me Abarim, i nyim Nebo.
- ⁴⁸Kiko yai kikano di gin kiko ot gero kimere i ebar me Moab i nget ecilet me Yorodan kakame oudo pimere kede Jeriko.
- ⁴⁹Gin bin kigero kimere gi i nget ecilet me Yorodan cako ki Bet Jesimot ape tuno Abel Sitim kame oudo tie i ebar me Moab.

Cik kame Rwot Omio di pwodi likame Kingolo Yorodan



⁵⁰I ebar me Moab kunono, i nget ecilet me Yorodan kakame bin pimere kede Jeriko, Rwot oko waco ne Musa

⁵¹pi waco ne jo me Isirael be, “Ka wun ikounu ngolo ecilet me Yorodan di ikounu donyo i lobo me Kanan,

⁵²wun miero iriamunu tenge jo kame tie bedo i lobo nono. Miero imuducarunu da caljwogi gin kame kotimo kede kide kede nyonyo, kede kabedere kame gin kiworo kiye rubangan gin.

⁵³Wun ibinunu gamo lobo nono di ikounu donyo bedo iye, pien ango atieko mino wu lobo nono pi en doko meru.

⁵⁴Wun ibinunu popoko lobo nono kede alulu, di lubere kede rom me jo me ekeko acelacel. Ekeko kame jo tot iye ibinunu mino gin lobo alac, do ekeko kame jo mege nonok ibinunu mino gida lobo katitidi.

⁵⁵Do ka wun likame ikounu riamo tenge jo kame oudo tie bedo i lobo nono, jo kame wun ibinunu weko dong nogo bino bedo lolo wu bala gimoro kopoto i wang wu kede bala okuto kame cocobo nget wu. Gin kibino bedo lolo wu i lobo kame itienu ot bedo iye.

⁵⁶Doko ango abino timo i komu gikame ango oudo amito timo i kom gin.”

Wel 34

Ikor me Lobo

¹Rwot bin oko waco ne Musa

²be ecik jo me Isirael be, “Ka wun ikounu donyo Kanan, i lobo kame ango atie mino wu pi doko meru, ikor wu bino bedo kaman:

³Ikor wu ki bad tetu piny bino cakere ki wi tim me Siin i ikor me Edom. Ebino cakere ki bad tetu kide i tetu ajikini me Nam Oto.

⁴Di eko manaro tetu piny eko ot tetu emukura me Akurabim di eko ot ebeo Siin ape tuno Kades Barenea i bad tetu piny. Kikano di eko ot etuno Kasar Adar di eko ngolo ot Asamon.

⁵Ikor nono bino lokere ki Asamon di eko ot tuno i aditot atie i ikor me Misiri, di eko ot jik i nam me Mediterania.

⁶” I bad tetu tim ikor wu bino bedo nam me Mediterania.

⁷” I bad tetu malo ikor wu bino cakere ki nam me Mediterania, di eko ot i bad tetu kide tuno i moru me Kor.

⁸Ki kuno eko ot tuno Lebo Kamat di eko meede paka ot jik Sedad.

⁹Ki Sedad, ikor wu bino ot i bad tetu kide eko tuno Sipiron, di eko ot jik Kasar Enan.

¹⁰” I bad tetu kide, i kor wu bino cakere ki Kasar Enan di eko ot tuno Sepam,



¹¹di eko meede kikano eko ot tuno Ribula i bad tetu kide me Ain, di eko lor piny eko ot tuno i imukuran kame tie i bad tetu kide me nam me Galilaya.

¹²Ikor nono ko dok i bad tetu piny di eko ririo ecilet me Yorodan eko ot tuno i Nam Oto. “Magonogi en kame bino bedo ikor me lobo wu.”

¹³Musa bin oko waco ne jo me Isirael be, “Manoni en lobo kame ibinunu gamo doko meru di iucunu alulu, lobo kame Rwot otieko ciko be mi but jo me ikekon kanyangon kede dul.

¹⁴Jo me ikekon ka Ruben kede me ka Gad kotieko mino gi lobere gi, kede da dul me jo me ekeko ka Manase.

¹⁵Gin kotieko mino gi lobere gi i bad tetu kide me ecilet me Yorodan, kakame pimere kede Jeriko.”

Jotel kame bino Popoko Lobo

¹⁶Rwot oko waco ne Musa be,

¹⁷” Magi en jo kame bino popoko lobo ne jo me Isirael: Eleasar ngasaseredoti kede Yosua wot ka Nun.

¹⁸Ibino da kwanyo ngatel acel ki ekeko acelacel pi konyo gin popoko lobo.”

¹⁹Nying jotel kame Rwot oko yero ige: I ekeko ka Yuda ibino kwanyo Kaleb wot ka Jepune.

²⁰I ekeko ka Simeon ibino kwanyo Samuel wot ka Amikud.

²¹I ekeko ka Benjamin ibino kwanyo Elidad wot ka Kisilon.

²²I ekeko ka Dan ibino kwanyo Buki wot ka Yogili.

²³I ikekon me awobe ka Yosepu ibino kwanyo Kaniel wot ka Epod i ekeko ka Manase,

²⁴kede Kemuel wot ka Sipitan i ekeko ka Epuraimu.

²⁵I ekeko ka Sebulun ibino kwanyo Elisapan wot ka Paranak.

²⁶I ekeko ka Isakar ibino kwanyo Palatiel wot ka Asan.

²⁷I ekeko ka Aser ibino kwanyo Akikud wot ka Selomi.

²⁸I ekeko ka Naputali ibino kwanyo Pedakel wot ka Amikud.

²⁹Magonogi en jo kame bin Rwot ociko be kony Eleasar kede Yosua poko lobo me Kanan ne jo me Isirael.

Wel 35

Bomban kame Komio Jolebi



- ¹ I ebar me Moab, loka tetuca me ecilet me Yorodan, kakame pimere kede Jeriko, Rwot bin owaco ne Musa be,
- ²” Cik jo me Isirael pi mino Jolebi bomban mogo ki lobere gin, kame kibino bedo iye, doko da kiko mino gi kakwat kame tie i nget bomban nogo.
- ³Bomban nogo bino doko me ka Jolebi di gin kiko bedo i yi gi. Kakwat bino bedo kakame gin kikwao iye doke gi kede leini gi dedede apat.
- ⁴Kakwat me bomban nogo kame ibinunu mino Jolebi, bino bedo mita tol ongwon kede ot kany (450) cako ki apama me bomba ot ooko, i bad dedede.
- ⁵Ibinunu pimo i ooko me bomba, mita tol kanyangon (900) i bad tetu dedede di rorom, do di bomba tie diere. Manoni en kame bino bedo kakwat me Jolebi.
- ⁶Bomban kame ibinunu mino Jolebi bino ribo bomban kanyape me ringo ot gwokere, kakame ibinunu yei ne ngat koneko dano ringo iye. Medo i kom magonogo ibinunu mino gi bomban ace ot ongwon kiwie are.
- ⁷Bomban kame ibinunu mino Jolebi wel gi dedede bino bedo ot ongwon kiwie kanyauni, kede kabedere me kwat gi.
- ⁸Wel me bomban kame ekeko acelacel me Isirael bino mino Jolebi bino lubere kede rom me lobo me ekeko acelacel. Ikekon kame lobere gi lac bino mino bomban atos, do alobere gi titino bino da mino bomban anonok.”

Bomban me Ringo Ot Gwokere

(Isiwilia 19.1-13; Yosua 20.1-9)

- ⁹Rwot oko bobo waco ne Musa
- ¹⁰pi waco ne jo me Isirael be, “Ka ingolunu ecilet me Yorodan di ikounu donyo i lobo me Kanan,
- ¹¹ibinunu yero bomban me ringo ot gwokere, tetekeny ka ngatamoro oneko dano ocelu i akangas en ebino ringo kunono.
- ¹²Bomban nogo bino bedo ne wu bomban me ringo ot gwokere kibun ngat kame mito culo kwor, tetekeny nganek likame koromo neko tuno di owinyo pido mere i nyim jo.
- ¹³Bomban kame ibinunu yero me ringo ot gwokere bino bedo kanyape.
- ¹⁴Adek kikom gi bino bedo loka tetu kide me Yorodan, kede adek da i lobo me Kanan.
- ¹⁵Bomban kanyape nogi bino bedo me ringo ot gwokere, ne jo me Isirael kede ne jokumbor kame tie bedo kede gin pi kare katitidi arabo atwal. Ngatamoroni kame neko dano i akangas karuno ringo i acel kikom gi.
- ¹⁶” Do ka ngatamoro oko juto dano ocelu kede nyonyo di eko to, ngat nono obedo nganek; nganek nono kobino neke.



- ¹⁷Arabo ka ngatamoro oko dipo ngat ocelu kede kidi kame oudo emako i cinge, kidi kame oudo romo neko dano, di dano nono oko to, ngat nono obedo nganek; nganek nono kobino neke.
- ¹⁸Amoto ka ngatamoro oko juto dano ocelu kede gi me yi kobedo ebela kame oudo en emako i cinge, ebela kame oudo romo neko dano, di ngat nono oko to, udo en ebedo nganek; nganek nono kobino neke.
- ¹⁹Ngacul kwor me remo kame koonyo en kame bino neko nganek nono. Ka en eriamo kede nganek nono, en ebino neke.
- ²⁰” Kamanono da, ka ngatamoro cunye dagi ngat ocelu di en eko remoro en eko potu arabo ekie di eko dipe kede gimoro eko to,
- ²¹amoto pi ading di en eko donge adonga kede cinge di eko to, ngat koneko dano nono kobino neke; en ebedo nganek. Ngat kame culo kwor me remo me ngat kame en eneko bino neke ka en eriamo kede.
- ²²” Do ka ngatamoro oko ngeso remoro dano ocelu abongo ading moro arabo edipe kede gimoro i akangas,
- ²³amoto di oudo en etie mako kidi moro kame romo neko dano, di en abongo neno eko lwomo kidi nono i kom dano ocelu di eko neke, do di gin oudo likame kidingere, doko en oudo likame eikere pi timo rac ne ngat nono,
- ²⁴jopiny en kame bino ngolo kop i dierediere me ngat koneko dano nono kede ngat kame mito culo kwor me remo kame koonyo, di lubere kede iswilia nogi.
- ²⁵Jopiny bino lako ngat koneko dano i akangas nono ki cing ngat kame mito culo kwor me remo kame koonyo. Di do gin kiko dwoke i bomba me ringo ot gwokere kame oudo en ebwot di eko ringo iye. Ngat koneko dano nono bino bedo kunono tuno to me ngatel me josaseredoti me kare nono.
- ²⁶Do ka ngat koneko dano i akangas nono oko donyo ooko me bomba kame en oudo eringo ot gwokere iye,
- ²⁷di ngat kame mito culo kwor me remo kame en eonyo oko ude ooko me bomba kunono di oko neke, raco me oonyo remo likame bedo i wi ngacul kwor.
- ²⁸Pien ngat koneko dano i akangas miero dong bedo i bomba kame en eringo ot gwokere iye tuno to me ngatel me josaseredoti; i cen mere en eko romo dok paco.
- ²⁹Magonogi en iswilia kame wun kede ikwae wu ibinunu lubo i kakame ibedunu iye.
- ³⁰ “Ka ngatamoro oneko dano ocelu, kobino neko nganek nono pi kop me ijurak. Do likame tie ngat kame kobino neko pi kop me mujura acel kenekene.
- ³¹Medo i wi manono, likame ibinunu gamo sente moro me egelit pi lako kuo me nganek kame kongolo ne kop me to. Nganek miero koneke.
- ³²Doko da likame ibinunu gamo sente moro pi ngat kotieko ringo i bomba me gwokere, be tetekenye edwog paco di pwodi ngatel me josaseredoti likame oto.



³³Likame ibinunu munao lobo kame ibedunu iye. Remo kame koonyo munao lobo, doko likame tie pwola moro me kwanyo dub kame koromo timo pi lobo, pi remo kame koonyo iye, kwanyo kenekene onyo remo me nganek nono.

³⁴Likame ibinunu munao lobo kame ibedunu iye, kakame ada abedo iye; pien ango Rwot abedo i diere me jo me Isirael.”

Wel 36

Iswilia amako Mon Konyomere i kom Kop me Lobo

¹Jotel me diakale me ot ka Gilead wot ka Makir, en akwar Manase wot ka Yosepu bin oko ot but Musa kede jotel icegun me diakale me joakwari me Isirael

²di gin kiko waco be, “Rwot bin ociki pi poko lobo ne jo me Isirael kede alulu; doko en eko ciki pi mino lobo ka omin wa Selopekad but anyira mege.

³Do poore ingei be ka gin kiko nyomere i ekeko apat me Isirael, lobo gin likame bobo bino bedo me ka kwaru wan, do ebino doko me ekeko kame konyomo gin iye. Aso, lobo nono kobino tero tenge kikom lobo kame kopoko ne wan.

⁴Kame mwaka me dwoko jamini me jo me Isirael otuno, lobo me anyira nogo kobino medo i kom lobo me ekeko kame konyomo gi iye di ekeko ka kwaru wan ko bino kei lobo gi.”

⁵Di do Musa oko mino jo me Isirael cik kame Rwot omio. En ewaco be, “Kop kame ikwae ka Yosepu tie waco tie kakare.

⁶Manoni en gikame Rwot tie waco i kom anyira ka Selopekad, ‘Gin kiromo nyomere kede ngat kame cuny gi mito, kwanyo di dano nono obedo me ot me ekeko ka papa gi,

⁷tetekeny likame okobo lobo moro me ekeko moro me Isirael ne ekeko ocelu. Pien jo me Isirael dedede bino dong kede lobo me ikekon ka joakwari gi.

⁸Buli nyako moro kame komio lobo i ekeko moro me Isirael bino nyomere kede icuo me ot me ekeko ka papa mere, tetekeny jo me Isirael dedede romo meede bedo kede lobo ka joakwari gi.

⁹Likame tie lobo moro kame kobino kobo ki ateker moro ne ateker ocelu. Buli ateker me Isirael bino dong kede lobo mere.’ “

¹⁰⁻¹¹Aso, anyira ka Selopekad, gin en Makala, Tirisa, Kagela, Milika, kede Nua, oko timo bala kame Rwot oudo ociko ne Musa, di gin kiko nyomere kede awobe me imiegu ka papa gi.

¹²Gin kinyomere i ude me ekeko ka Manase wot ka Yosepu, di lobo gi oko dong i ot me ekeko ka papa gi.

¹³Magonogi en cik kede iswilia kame Rwot bin omio Musa pi mino jo me Isirael i ebar me Moab, i loka tetuca me ecilet me Yorodan kakame pimere kede Jeriko.



Iswilia

Iswilia 1

Kop kame Nyuto

¹Itabu noni tie kede kope kame Musa bin owaco ne jo me Isirael i kare kame gin oudo kitie kede i wi tim i bad tetu kide me ecilet me Yorodan. Gin oudo kitie i aditot me Yorodan kakame kiyapiyapi kede Sup, i dierediere me bomba me Paran i tetucel kede bomban me Topel, Laban, Kaserot kede Disakab i tetu ocelu.

²(Yai ki moru me Sinai ot tuno Kades Barenea tero ceng tomon kiwie acel di dano olubo yongayo kame beo i piny me Edom kobedo mori mori.)

³I ceng me agege me duwe me tomon kiwie acel me mwaka me ot ongwon ingei gin yai ki Misiri, Musa oko waco ne jo me Isirael gi dedede kame oudo Rwot ocike be ewace gi.

⁴Musa owaco negi kope nogi di do oudo en etieko bwono Abaka Sikon me jo Amor, kame oudo pugo bomba me Kesibon, karacel kede Abaka Og me Basan kame oudo pugo bomban me Asitarot kede Ederei.

⁵Di jo pwodi oudo tie loka tetuca me ecilet me Yorodan i lobo me Moab, Musa oko cako gonyo ne jo iswilia ka Rubanga kamane:

⁶Rwot Rubanga wa bin oyamo kede wa i moru me Sinai di ewaco be, “Wun itiekunu bedo i dud moru ni pi kare kame lac.

⁷Cakunu bobo sapali wu, di ikounu ot donyo i piny kobedo mori mori me jo Amor karacel kede i adulion kame kio kede, gin en aditot me Yorodan, piny kobedo mori mori kede koditokin, Negeb, kede dog nam me Mediterania. Otunu idonyunu i lobo me Kanan paka tuno i moru me Lebanon, di ikounu ot paka tuno i ecilet adwong me Eupurate.

⁸Nenunu, ango atieko mino wu lobo nono i cingu; otunu ikounu mano lobo kame bin ango akwongere but joakwari wu, Aburaam, Isaka, kede Yakobo, be abino mino gin kede ikwae gi.”

Musa Oyero Jongolkop

(Yai 18.13-27)

⁹Musa oko waco ne jo be, “Di pwodi wan oudo otienu i moru me Sinai, ango oudo awaco ne wu be ango kena likame akaruno yeno peko me telo wu.

¹⁰Rwot Rubanga wu otieko mino wun inywalunu ikounu nyai idokunu tot bala acerin kame tie i edou.

¹¹Akwao Rwot, Rubanga ka joakwari wu, emi wel wu meede kalamo kanataman tien kede tien, kede emi wu winyo bala kame oudo en ecikere pi timo ne wu.

¹²Do benyo benyo kame ango akaruno kanyakino kede yeno peko me winyo pido wun ango kena?



¹³Yerunu i ekeko acelacel jo mogo kame riek, jo kame tie kede niang, doko di jo woro gi, di ango ako bino keto gin kibedo jotel wu.

¹⁴Wun bin ikounu dwoko na be, ‘Tam kame in ikelo ber.’

¹⁵Aso ango bin ako gamo jo ariek kame jo woro kame wun iyerunu i ikekon wu, di ako keto gin pi bedo jotel wu. Jo mogo kikom gi oudo telo jo tutumia acel, jo tol acel, jo ot kany, kede mogo jo tomon. Ango ako yero bobo jotel ace i ikekon dedede.

¹⁶” I kare nono ango bin ako waco ne jongolkop wu be, ‘Winyunu pido kame wok ki dierediere me imiegu wu di ikounu ngolo negi kop i yore me ateni, akadi di ngat nono obedo dano me Isirael arabo ngakumbor kame bedo kede wu.

¹⁷Kur ibedunu kede apokapoka ka ingolunu kop; winyunu kop me jo me ruom apiny kede jo me ruom amalodi rom aroma. Kur ilworunu ngatamoro, pien kop kame wun ingolunu wok kibut Rubanga. Kelunu buta kop kame ngolo obwono wu, di ango ako bino winye.’

¹⁸I kare nono ango bin awaco ne wu gi dedede kame wun ipoorenu timo.

Kocwao Bega ki Kades Barenea

(Wel 13.1-33)

¹⁹” Wan okounu timo bala kame oudo Rwot Rubanga wa owaco ne wa. Oyaunu ki moru me Sinai di okounu ot beo i twon wi tim kame kelo lworu, kame wun kikomu inenunu i yongayo. Kakame wan otununu kede Kades Barenea,

²⁰ango ako waco ne wu be, ‘Otiyekunu tuno i piny kobedo mori mori me jo Amor, piny kame Rwot Rubanga wa tie mino wa.

²¹Nenunu, Rwot Rubanga wa otieko mino wa lobo noni, otunu igamenu bala kame Rwot Rubanga ka joakwari wa otieko cikere kede butu; kur ibedunu kede lworu amoto potocuny.’

²²” Do wun dedede ikounu bino buta di ikounu waco be, ‘Mito kong ocwaunu jo mogo ot anyim kwale ot ngingico lobo nono, di gin kiko dwoko ne wa kop amako yongayo kame poore olubunu pi donyo i lobo nono kede cal me bomban kame tie kunono.’

²³” Ango ako neno bala tam nono oudo ber, omio ango ako yero cuo tomon kikom wu, ngat acel ki ekeko acelacel.

²⁴Gin kiko yai di kiko ot i lobo kobedo mori mori nono di kiko mamano en tuno i aditot me Esikol.

²⁵Gin kiko ngwedo anyakini mogo ki kuno kiko kelo ne wa, di kiko dwoko ne wa kop kame waco be lobo nono kame Rwot Rubanga wa tie mino wa mio twatwal.

²⁶” Do wun bin ikounu daga donyo i lobo nono. Ijemunu ikounu daga lubo cik ka Rwot Rubanga wu.



²⁷Wun bin ingungurunu i kimere wu di iwacunu be, ‘Rwot dagi wa en omio ekwanyo wa ki Misiri pi mino wa but jo Amor tetekeny kineneko wa.

²⁸Kara lobo acal nadi kame wan otienu ot iye? Imiegu wa otieko onyo koyo i kom wa di kidwoko ne wa kop be jo me kunono tek lo wa, doko kibocoboco kikalamo wa, kede be bomban gi lac di kocelo gi kede apama atek kame tuno i edou; doko da gin kineno itucio me jo kunono! ‘

²⁹” Do ango bin ako waco ne wu be, ‘Kur ibedunu kede lworu i kom jogo.

³⁰Rwot Rubanga wu, ngat kame telo wu, en kame bino yi piru bala kame bin etimo ne wu di wun inenunu i Misiri,

³¹ kede i wi tim, kakame wun bin inenunu iye kite kame en egwoko wu kede bala kame dano tingo kede atin; en ebodo timo kamanono i kabedere dedede kame wun bin ibeunu iye paka tuno kan.’

³² Do akadi bin di ango awaco ne wu kamano, wun likame pwodi ikounu geno Rwot Rubanga wu,

³³ngat kame bin obedo telo ne wu yongayo pi mono ne wu kabedo me gero kimere. En ebodo telo wu iwor i epir me mac kede i ceng i edou, pi nyuto ne wu yongayo kame ipoorenu lubo.

Rwot Omio Jo me Isirael Alola

(Wel 14.20-45)

³⁴ “Kakame Rwot bin owinyo kede kop kame wun iwacunu, eko lilo di eko kwongere be,

³⁵’ Likame tie ngatamoro kikom wun lwak arac me i kare noni kame bino neno lobo amio kame bin ango acikere pi mino joakwari wu,

³⁶kwanyo kenekene Kaleb wot ka Jepune. En ebino donyo iye doko abino mino lobo nono but ikwae mege, lobo kame oudo en kong egeo tuno iye pi mamano. Abino mine piento en ebodo kede genere buta.’

³⁷Rwot oko lilo akadi ne ango da pi gikame wun itimunu di eko waco be, ‘Ida likame ibino donyo i lobo nono.

³⁸Do Yosua wot ka Nun, ngakonyi, bino donyo i lobo nono; poore imie nwangcuny, piento en ebino telo jo me Isirael ot mako lobo nono.’

³⁹” Di Rwot oko waco ne wanunu dedede be, ‘Idwe wu kame wun oudo iwacunu be jokwor bino mako di kiko tero, idwe kalikame pwodi ngeo poko gikarac kede gikaber, en kame bino donyo i lobo nono. Ango abino mine but gi di gin kiko donyo bedo iye.

⁴⁰Do wun, lokerenu idokunu cen i wi tim, tetu Nam Akwar.’

⁴¹” Wun ikounu dwoko na be, ‘Wan otieko timo dub but Rwot. Do nataman wan otieko iikere me ot yi bala kame Rwot Rubanga wa oudo ociko wa pi timo.’ Di wun



dedede bin ikounu ngapere pi ot yi di oudo iparunu be ot suro piny kobedo mori mori nono yoyot.

⁴²” Do Rwot oudo oko waco nango be, ‘Wace gi kur kiot kunono doko kur kiyi, pien ango likame ayaro bedo tie kede gi; ka gin kidagi, jokwor gi bino bwono gi.’

⁴³Bed bala ango oudo ako waco ne wu kop kame Rwot owaco, do wun ikounu dagi winyo. Wun bin ijemunu di ikounu dagi lubo cik ka Rwot, di ikounu wakere be iotunu i piny kobedo mori mori nono.

⁴⁴Di jo Amor kame oudo bedo i piny nono bin oko bwote pi yi kede wu di gin kiko riamere kede wu bala kic. Gin kiriamere kede wu tuno Koroma di gin kiko bwono wu i Edom piny kobedo mori mori.

⁴⁵Kakame wun bin idwogunu kede di ikounu kok i nyim Rwot, en eko dagi winyo koko wu.

Mwakini kame Jo Otieko i Wi Tim

⁴⁶” Aso, ingei wan bedunu Kades tieko kare kalac,

Iswilia 2

¹ Wan bin okounu mako sapali dok i wi tim tetu Nam Akwar, bala kame Rwot oudo ociko na, di okounu bedo wire i nget piny kobedo mori mori me Seir tieko kare kalac.

²” Di Rwot oko waco nango be,

³ Wun ibedunu wire i nget piny kobedo mori mori noni pi kare kalac kame romo; cakunu do ot tetu malo.’

⁴ En eko waco na be ami wu cik kame waco be, ‘Wun iyapununu beo i lobo ka joawade wu, ikwae ka Esau kame bedo i piny me Seir. Gin kibino bedo kede lworu i komu, do mito wun igwokerenu

⁵kur isurunu gi, pien ango likame ayaro mino wu imaunu akadi kakatitidi me lobo gi, pien ango atieko mino piny kobedo mori mori me Seir nono but ikwae ka Esau pi bedo mergi.

⁶Wun itwerunu bino wilo cam kede pii kibun gin.’

⁷” Ateteni Rwot Rubanga wu otieko mino wu winyo i gi dedede kame wun ibedunu timo. En engeo gi dedede kotimere ne wu i kare kame oudo ibeunu kede i twon wi tim noni. En ebedo tie kede wu i mwakini ot ongwon nogi lung, di eko mino wun ibedunu tie kede gi dedede kame oudo imitunu.

⁸” Aso wan okounu kato owekunu joawade wa, ikwae ka Esau kame bedo Seir; owekunu yongayo me Araba, di oko kato bomban me Elat kede Esiongeber, di okounu lokere ot tetu wi tim me Moab.



- ⁹ Rwot oko waco nango be, ‘Kur ilolunu jo me Moab, ikwae ka Lot arabo yi kede gi. Ango atieko mino gin bomba me Ar pi bedo mergi, doko likame abino mino wun dul moro me lobo gi.’ “
- ¹⁰(Jo Emim en kame bin kong bedo i bomba nono, itucio me jo kame oudo tot nyidinyidi, doko di kibocoboco bala jo Anakim.
- ¹¹Jo Emim nogi oudo komaro gi i kom jo Repaim bala jo Anakim, do jo Moab oudo lwongo gi be jo Emim.
- ¹²Jo Kori da bin kong bedo Seir, do ikwae ka Esau oko riamo gi tenge, kimuducaro ateker gi di gin kiko lunyo kunono, bala kame jo me Isirael da i cen mere oko timo ne jo kame oudo bedo i lobo kame Rubanga omio gi pi doko mergi.)
- ¹³” Di wan okounu ngolo ecilet me Sered bala kame oudo Rwot owaco ne wa.
- ¹⁴ Cako wan yai ki Kades Barenea tuno ngolo ecilet me Sered oudo mwakini oromo do ot adek kiwie kanyauni. I kare nono oudo do jo yi me lwak nono otieko totoun bala kame oudo Rwot okwongere kede i kom gi.
- ¹⁵Ateteni Rwot obedo mino gi alola tuno en muducaro gin dedede.
- ¹⁶” Aso ingei gin dedede to,
- ¹⁷Rwot oko waco ne wa be,
- ¹⁸’ Tin wun iyarunu beo ingolunu i adul me Moab ki nget bomba me Ar.
- ¹⁹ Ka inokunu jo Amon, ikwae ka Lot, kur ilolunu gi arabo i yiunu kede gi, pien anga likame abino mino wun dul moro me lobo kame anga atieko mino gin.’ “
- ²⁰(Lobo noni da kolwongo be lobo me jo Repaim. Jo Repaim bin bedo kanono, do jo Amon lwongo gi be jo Samsimim.
- ²¹Gin oudo itucio me jo di kibocoboco bala jo Anakim doko di kitot nyidinyidi. Do Rwot oko muducaro gi en omio jo Amon oko lunyo lobo gi nono di kiko donyo bedo iye.
- ²²Rwot oudo otieko timo gi acel nono ne ikwae ka Esau kame bedo Seir. En emuducaro jo Kori tetekeny ikwae ka Esau lunyo lobo gi nono di kiko donyo bedo iye; gin kitie kunono tuno tin.
- ²³Gi acel nono da en kame bin oko timere ne jo Abim kame oudo bedo i lak nam me Mediterania ape tuno i bad tetu piny i bomba me Gasa. Jo kame bin owok ki cula me Kurete omuducaro jo Abim di gin kiko lunyo lobo gi lung.)
- ²⁴” Kakame wan bin otiekunu ngolo kede lobo me Moab, Rwot oko waco ne wa be, ‘Meedenu kede ot di ikounu ngolo ecilet me Arunon. Ango atie mino i cingu Sikon abaka me jo Amor, en abaka me bomba me Kesibon, karacel kede lobo mere. Surenu di ikounu cako mako lobo mere.



²⁵Cako ceng atin ango abino mino jo me pinye dedede bedo kede lworu i komu. Jo dedede bino bedo kede mielkom pi lworu ka gin kiwinyo rwonge wun.’

Jo me Isirael Obwono Abaka Sikon

(Wel 21.21-30)

²⁶” Di ango ako oro jo oyai ki wi tim me Kedemot pi ot but Abaka Sikon me Kesibon kede kop me kwano mulem kame waco be,

²⁷’ Wek wan obei ongol ki piny nin. Wan obino lubo yongayo kenekene abongo parao karamoro.

²⁸Cam kame wan obino camo kede pii kame obino mato in ibino mino wa owilo awila kede sente. Kenekene in yei ne wan beo ki lobo ni,

²⁹tuno wan ngolo ecilet me Yorodan di oko donyo i lobo kame Rwot Rubanga wa tie mino wa. In tim ne wa bala kame ikwae ka Esau kame bedo i lobo me Edom, kede jo Amor kame bedo i bomba me Ar otimo ne wa; gin kiyei ne wa beo ki adul gi.’

³⁰” Do Abaka Sikon likame oko yei ne wa beo ngolo ki piny mere, pien Rwot Rubanga wu oudo omie ebedo ngaepali kede ngajemo, tetekenye wan obwonenu di okounu mano piny mere, bala kame nataman en etieko timo.

³¹” Rwot oko waco nango be, ‘Neningo, ango atieko cako mino Sikon kede lobo mere butu. Nataman gamenu di ikounu donyo bedo iye.’

³²Sikon oko wok ki bomba en kede isirikalen mege dedede, pi yi kede wa i nget bomba me Yakas,

³³do Rwot Rubanga wa oko mine i cing wa, di wan okounu neke karacel kede awobe mege kede isirikalen mege dedede.

³⁴I kare nono da wan bin okounu mako bomban mege dedede di okounu neneko jo dedede kame bin bedo i bomban nogo; cuo, mon kede idwe. Likame tie ngatamoro kame owekunu oko dong di ekuo.

³⁵Kenekene doke, diegi kede romini en kame bin okounu weko pi wan tero, karacel kede jamini kame oudo oyakunu ki bomban kame bin omakunu nogo.

³⁶Rwot bin omio wa omaunu bomban dedede, cako ki bomba me Aroer kame tie i nget aditot me Arunon ribo kiton bomba kame tie i aditot kikokome, kiton tuno i adul me Gilead. Likame bin tie bomba moro kame kocelo kede apama atek kame turo oko bwono wa.

³⁷Do wan bin likame okounu noko adul me jo Amon, arabo ot i dog ecilet me Jabok amoto i bomban me piny kobedo mori mori, arabo karamoro ace kame Rwot Rubanga wa likame owaco ne wa.

Iswilia 3

Isirael Obwono Abaka Og

(Wel 21.31-35)



¹ Kakame wan bin okounu lokere kede ot tetu malo i yongayo kame oto Basan, Abaka Og me Basan oko bino kede isirikalen mege dedede pi yi kede wa i nget bomba me Ederei.

² Rwot oko waco nango be, ‘Kur ilwore, pien ango ayaro mine i cingi, karacel kede jo mege kede lobo mere. Tim ne bala kame bin itimo ne Abaka Sikon me jo Amor kame bin pugo Kesibon.’

³” Aso Rwot Rubanga wa bin da oko mino Abaka Og me Basan karacel kede jo mege dedede i cing wa, di wan okounu neneko gin dedede abongo weko akadi dano acel.

⁴ I kare nono wan bin okounu mano bomban mege dedede; likame tie bomba moro akadi acel kame wan bin likame okounu mano. Wan bin omaunu bomban ot kanyape, manono en adul me Arugob lung, piny kame bin Abaka Og me Basan pugo.

⁵ Bomban nogi dedede bin kocelo kede apama abor malo di kitie kede irutei kame cegere tien are di koridakino gi kede ari me lilime. Doko da bin calere tie tot atota kalikame kocelo.

⁶ Wan bin okounu muducaro gin dedede bala kame bin otimunu ne Abaka Sikon me Kesibon; i bomba acelacel bin onenekunu cuo dedede, mon, kede idwe.

⁷ Do doke, diegi, kede romini, karacel kede jamini kame bin oyakunu i bomban nogo wan bin okounu tero.

⁸” Aso i kare nono wan bin okounu gamo kibus abakai are nogo me jo Amor, lobo kame tie i bad tetu kide me ecilet me Yorodan, cako ki ecilet me Arunon tuno i moru me Kerimon.

⁹ (Jo Sidon lwongo moru me Kerimon be Sirion, do jo Amor lwonge be Senir.)

¹⁰ Wan bin omaunu adul kame Abaka Og me Basan pugo dedede: bomban kame bin tie i lobo kotingere malo di epetere bala emesa, adulion me Gilead kede me Basan, kiton tuno i bomban me Saleka kede Ederei i bad tetu kide.”

¹¹ (Abaka Og me Basan en kame do oudo pwodi odong kikom jo Repaim. Itanda mere oudo kotimo kede nyonyo; boro mere oudo tie mita ongwon, kede laco mere oudo noko mita are di opimo kede gipim kame komoko. Itanda nono pwodi kokaruno neno i bomba me Raba me jo Amon.)

Kopopoko Lobo atie tetu Kide me Yorodan

(Wel 32.1-42)

¹²” Kakame wan bin otiekunu mano kede lobo kame oudo tie i bad tetu kide me Yorodan, ango ako mino jo me ekeko ka Ruben kede jo me ekeko ka Gad adul kame bin tie i bad tetu malo me bomba me Aroer, kame tie i nget ecilet me Arunon, karacel kede dul tucel me Gilead, en piny kobedo mori mori, kiton bomban mege.

¹³ Ango di ako mino dul me jo me ekeko ka Manase lobo me Gilead kame bin odong, kede piny me Basan dedede, kakame oudo Abaka Og pugo, manono en adul me Arugob lung.”



(Adul me Basan nono dedede bin kolwongo be lobo me jo Repairim.

14Yair, dano me ekeko ka Manase oko bin tero adul me Arugob lung, manono en Basan, kiton tuno i apokini kede adul me Gesur kede adul me Maka. En eko cako ne calere nogo nyinge, omio kolwongo calere nogo tuno tin be calere ka Yair.)

15” Ango bin ako mino Gilead but jo ka Makir wot ka Manase.

16Jo me ekeko ka Ruben kede jo me ekeko ka Gad ango bin ako mino adul kame cakere ki Gilead kiton tuno i ecilet me Arunon. Cuny ecilet nono en kame bin obedo apokini gi i bad tetu piny, kede i bad tetu malo ecilet me Jabok en kame bin poko gi, en da kame bin ebedo ikor kede jo Amon.

17I bad tetu tim, adul me jo me ikekon adek nogi bin tuno i ecilet me Yorodan; cako ki nam me Galilaya i bad tetu malo tuno i Nam Oto kame tie i bad tetu piny, doko oudo etuno i dud moru me Pisiga i bad tetu kide.

18 “I kare nono bin ango ako waco ne cuo me ikekon ka Ruben, Gad, kede dul me jo me ekeko ka Manase be, ‘Bed bala Rwot Rubanga wu otieko mino wu lobo noni pi wun bedo iye, isirikalen wu dedede poore mak jamini me yi di gin kiko ngolo ecilet kitel anyim ne imiegu gi pi konyo gi mano lobo kame kibino bedo iye.

19Mon wu, idwe wu, kede leini (ango angeo be wun itienu kede leini atos) bino dong i bomban kame ango atieko mino wu.

20Wun miero ikonyunu jo me Isirael wadu tuno gin mano lobo kame Rwot tie mino gi i bad tetu tim me ecilet me Yorodan, tuno di Rwot omio gi kidonyo bedo kunono kede anapakin, bala kame etieko timo ne wun. I cen mere di do wun ikounu dwogo i lobo noni kame ango atieko mino wu.’

21” I kare nono da ango bin ako waco ne Yosua be, ‘In itieko neno kede wangi gi dedede kame Rwot Rubanga ni otieko timo ne abakai are nogo, Sikon kede Og; doko en ebino timo kamanono ne jo dedede kame wun ibinunu ngolo ecilet donyo i lobere gi.

22Kur ilworunu gi, pien Rwot Rubanga wu en kame yi piru.’

Rwot Otwono Musa Donyo i Lobo me Kanan

23 “I kare nono bin ango ako ngangao Rwot be,

24’ Okwe Rwot Rubanga, in pwodi icako acaka nyuto nango ngatic ni, teko kede twer kame in itie kede. Likame tie rubanga moro i malo arabo i piny kame karuno timo jamini me twer kame cal bala kame in itieko timo.

25Akwai imia angol ecilet me Yorodan loka tuca di ako neno lobo amio kame tie loka tetu nono, piny acil kobedo mori mori nono karacel kede mori me Lebanon.’

26” Do Rwot bin oko lilo keda pi wun di eko dagi winyo kwac na. En eko waco na be, ‘Winyo kope ni oroma! Kur imed waco na kop nono bobo!



²⁷Oti iko yito i wi moru me Pisiga di iko ngoloro bad tetu dedede, bad tetu malo kede bad tetu piny, bad tetu kide kede bad tetu tim. Ngic lobo nono kiber, pien in likame ibino ngolo ecilet me Yorodan.

²⁸Do mi Yosua cik. Mie nwangcuny kede teko, piento en ebino telo jo ngolo loka tetuca di eko mino gi kimao lobo kame in ibino neno nono.’

²⁹” Aso wan bin okounu dong i aditot kame pimere kede bomba me Betepeor.”

Iswilia 4

Musa Okwao Cuny Jo me Isirael pi Lubo Kop ka Rubanga

¹Di do Musa oko waco ne jo be, “Jo me Isirael, lubunu iswilia kede cik kame ango atie pwoyo wu pi gwoko, tetekeny ibedunu kuo di ikounu donyo i lobo kame Rwot Rubanga ka joakwari wu tie mino wu, di ikounu bedo iye.

² Kur imedunu kop moro i kom kop kame ango aciko ne wu, doko kur ikwanyunu kop moro tenge, do gwokunu cik ka Rwot Rubanga wu kame ango atieko mino wu.

³ Wun kikom wu itiekunu neno gikame Rwot bin otimo i moru me Peor; kite kame Rwot Rubanga wu oneneko kede jo dedede i diere wu, jo kame bin woro rubanga Baal,

⁴do wun jo kame bin ikounu meede kede geno Rwot Rubanga wu pwodi tin itie ikuunu dedede.

⁵” Nenunu, ango atieko pwoyo wu iswilia kede cik ka Rwot Rubanga na bala kame en oudo ecika kede. Lubunu gi i lobo kame itienu ot donyo iye pi doko meru.

⁶Gwokunu gi, doko ketunu cunyu lubo gi, pien manono en kame bino nyuto ne atekerin apat rieko kede niang atut kame wun itienu kede. Kame gin kiko winyo iswilia nogi dedede, gin kibino waco be, ‘Ateteni jo me ateker adwong noni riek doko kitie kede niang kame tut! ‘

⁷” Likame tie ateker moro ace, akadi di edwong benyo, kame rubanga gi iyapiyapi kede gi bala Rwot Rubanga wa i kare dedede kame wan okok kede bute.

⁸Doko likame tie ateker moro ace, akadi di edwong benyo, kame tie kede iswilia kopooe bala magonogi dedede kame tin ango atieko pwoyo wu.

⁹Do nenunu be igwokerenu twatwal, tetekeny kur imiunu wi wu wil kede gikame wun inenunu kede wangu, doko kur imiunu gi kiyai ki cunyu pi kare me kuo wu lung. Tatamunu gi but idwe wu kede but ikwae wu,

¹⁰kite kame wun bin icungunu kede i nyim Rwot Rubanga wu i moru me Sinai, kakame Rwot bin owaco nango kede be, ‘Cok na jo i nyima. Ango amito gin kiwiny kope kame ango ayaro waco, tetekeny gin kipwonyere bedo kede lworu buta tek di pwodi gin kitie i wi lobo, doko kiko bino pwoyo idwe gi da timo kamanono.’

¹¹ “Wun bin ikounu ot di ikounu cungo i dud moru di mac birano iye eoto malo i edou, di yiro kame pek di ecol cucucuc oume.



¹²Di Rwot bin oko yamo kede wun ki mac nono. Wun bin iwinyunu dwane do likame inenunu gimoro; iwinyunu kenekene dwan kame tie yamo.

¹³En bin eko waco ne wu kop me isikan mere, kame en eko ciko wu pi gwoko, manono en cik tomon kame en eko wandiko i kom kide are abatal.

¹⁴Di i kare nono Rwot oko cika pi pwonyo wu iswilia kede cik dedede kame wun poore ilubunu i lobo kame wun iyapununu donyo iye di ikounu mane edoko meru.

Ikwenyar i kom Woro Caljwogi

¹⁵” Bala kame wun bin likame ikounu neno kede Rwot i kare kame en bin eyamo kede wu ki mac i moru me Sinai, mito igwokerenu twatwal,

¹⁶tetekenye kur itimunu dub pi timo caljwogi moro piru atie i cal me dako arabo icuo;

¹⁷cal me le moro kame tie i piny amoto cal me winyo moro kame por i malo;

¹⁸cal me gimoro kame liao alia i piny arabo me dek nam moro.

¹⁹Kame ingolorunu malo di ikounu neno ceng, duwe, acerin kede gi dedede kame tie i edou, kur cunyu wai wu woro gi di ikounu donyo timo tic ne gin. Gin kibedo jamini kame Rwot Rubanga wu otieko mino but jo apat dedede pi gin woro.

²⁰Do Rwot bin okwanyo wun ki Misiri, kakame oudo itienyu iye i lieto bala agulu me cwako nyonyo, pi wun doko jo mege obe, bala kame nataman itienyu kede.

²¹Rwot bin oko lilo na pi wun, di eko kwongere be ango likame abino ngolo ecilet me Yorodan pi donyo i lobo amio kame en etie mino wun pi doko meru.

²²Ango abino to i lobo noni di likame angolo loka tetuca me Yorodan, do wun iyarunu ngolo loka tetuca ikounu ot mano lobo aber nono doko meru.

²³Aso, gwokerenu kur wi wu wil kede isikan kame Rwot Rubanga wu bin otimo kede wu, doko kur itimunu cal me gimoroni kame Rwot Rubanga wu otieko gengo wu iye.

²⁴Pien Rwot Rubanga wu ka elilo ecal bala mac; en enganyeko.

²⁵” Kame wun ibedunu i lobo nono odoko kare kalac di ikounu nywalo idwe di idwe wu da oko nywalo ikwae, ka ikounu dubere pi timo cal me gimoroni me awora, manono udo itimunu gikarac i nyim Rwot Rubanga wu di ikounu mine elilo kede wu.

²⁶Ka ikounu timo kamanono, ceng atin ango alwongo malo kede piny pi bedo ijurak i komu be likame ibinunu tieko kare kalac i lobo kame itienyu ngolo ecilet me Yorodan pi mane di eko doko meru. Kobino neneko wu kotieko wu pitipit.

²⁷Rwot bino sasaro wu but atekerin apat kakame jo anonok kenekene kikom wu en kame bino dong di kikuo.

²⁸Wun ibinunu donyo woro rubangan apat ki kuno, rubangan kame jo en kotimo; gin kibedo yen kede kide kame kopao, rubangan kalikame karuno neno piny arabo winyo kop, doko likame kikaruno cam amoto ngweno gimoro.



²⁹ Wun ibinunu mono Rwot Rubanga wu ki kuno di ikounu ude ka imoenu kede cunyu dedede kede kuo wu dedede.

³⁰ I kare me anyim ka itienu i peko, di gi nogi dedede oko timere ne wu, wun ibinunu lokere but Rwot Rubanga wu di ikounu lubo kop mere.

³¹ En ebedo Rubanga kame timo jo kisa. En likame ebino weko wu atatai arabo muducaro wu, doko en likame wie bino wil kede isikan kame en kikome bin etimo kede joakwari wu di ekwongere.

³²” Penyerenu kong kop i kom kare kokato cen, sek di pwodi likame konywalo wu, cako i kare kame Rubanga ocweo kede jo i piny. Pepenyunu jo cako ki piny tetucel tuno tetu ocelu. Benyo, tie gimoro kotieko timere kame dwong bala manoni, arabo tie ngatamoro kotieko winyo gimoro kame cal bala manoni?

³³ Benyo, tie jo mogo kotieko winyo rubanga moro di etie yamo kede gin ki mac bala wun di gin kiko dong di kikuo?

³⁴ Benyo, tie rubanga moro kotieko tamo ot di eko kwanyo jo mogo kibun ateker ace di en eko mino gin kidoko jo mege obe, bala kame Rwot Rubanga wu bin otimo ne wu i Misiri? En bin etimo manono di etio kede twer mere adwong kede teko mere pi kelo can, kede di etimo gianena kede giaura kede yi, doko di etimo gikame kelo lworu.

³⁵ Rwot onyuto ne wun gi nogi tetekey wun ingeunu be Rwot en Rubanga, doko likame tie rubanga moro ace.

³⁶ En bin emio wun i winyunu dwane di en eyamo kede wun ki malo tetekey epwony wu me wek iikunu ikiteso wu; doko i piny kan en eko mino wun inenunu mac mere aliel, di en eyamo kede wun kiye.

³⁷ En bin emaro joakwari wu en komio en eyero wun, di eko kwanyo wu ki Misiri kede twer mere adwong, en kikome,

³⁸ di eriamo tenge ki nyimu atekerin kame dongodongo di kitek kalamo wun, tetekey en eteru i lobo gin di eko mine butu pi en doko meru, bala kame etie kede tuno tin.

³⁹ Aso, mito ingeunu tin doko ketenu i cunyu be Rwot en kobedo Rubanga i malo kede i piny; likame tie rubanga moro ace.

⁴⁰ Poore imakunu iswilia kede cik mege kame tin ango atieko mino wu, tetekey wun kede ikwae wu kame bino lubo wu ki cen ibedunu kiber, di ikounu dong bedo atwal i lobo kame Rwot Rubanga wu tie mino wu pi doko meru.”

Bomban me Ringo Ot Gwokere

⁴¹ I cen mere di do Musa oko poko bomban adek i bad tetu kide me Yorodan,

⁴² tetekey ngat koneko dano i yore me akangas, dano kalikame oudo obedo ngakwor mere, karuno ot ringo gwokere i bomban nogo. Ngat koneko dano nono bin karuno lwi ot bedo i bomba moro acel kikom magonogo di eko bwot likame koneke.



⁴³Bomban nogo bin gin en: Beser kame bin tie i wi tim i lobo kotingere malo di epetere bala emesa, pi jo me ekeko ka Ruben; Ramot kame bin tie i adul me Gilead, pi jo me ekeko ka Gad; kede Golan kame bin tie i adul me Basan, pi jo me ekeko ka Manase.

Musa Ocako Yamo Kop i kom Iswilia ka Rubanga

⁴⁴Musa bin oko mino jo me Isirael iswilia kede pwony ka Rubanga.

⁴⁵⁻⁴⁶En bin etimo manono di gin kitieko weko Misiri di do oudo kitie i aditot kame bin tie i bad tetu kide me ecilet me Yorodan, kakame pimere kede bomba me Betepeor. Kanono oudo obedo adul kame Abaka Sikon me jo Amor pugo, en abaka kame bin pugo bomba me Kesibon. Musa kede jo me Isirael bin oudo obwone i kare kame bin kiwok kede ki Misiri.

⁴⁷Gin bin kiko donyo bedo i lobo mere karacel kede lobo me Abaka Og me Basan, en abaka ocelu me jo Amor, kame bin bedo i bad tetu kide me Yorodan.

⁴⁸Lobo nono bin cakere ki bomba me Aroer kame bin tie i nget ecilet me Arunon, di eko ot i bad tetu malo tuno i moru me Sirion, manono en moru me Kerimon.

⁴⁹Oudo bin eribo adul kame tie i bad tetu kide me ecilet me Yorodan dedede kiton tuno i bad tetu piny i Nam Oto kede tetu kide i dud moru me Pisiga.

Iswilia 5

Cik Tomon

(Yai 20.1-17)

¹Musa bin oko koko jo me Isirael dedede karacel di eko waco negi be, “Winyunu wun jo me Isirael, iswilia kede cik kame ango atie mino wu i ceng katin, wun ibinunu siyao gi di ikounu keto cunyu lubo gi.

²Rwot Rubanga wa bin otimo isikan kede wa i moru me Sinai.

³En likame bin etimo isikan kede jonywal wa kenekene, do kede wada jo dedede kame tin otienu kan.

⁴I moru kunono Rwot bin oko yamo kede wun wang i wang, i mac.

⁵I kare nono ango en bin kame acungo i dierediere wu kede Rwot pi waco ne wu kope mege; pien wun oudo bin ilworunu mac omio likame ikounu yito i wi moru. “Rwot bin owaco be,

⁶ ‘Ango en Rwot Rubanga wu, ngat kokwanyo wu ki lobo me Misiri, kakame bin ibedunu iye ipasoi.

⁷ ‘Likame ibinunu woro rubanga moro ace kwanyo ango.

⁸ “ ‘Kur itimunu cal me gimoroni piru me awora, akadi cal me gimoro kame tie malo, arabo kame tie i wi lobo, amoto kame tie i pii me dud lobo.



⁹ Kur ilurunu wi wu i nyim gi arabo iworunu gi; pien ango Rwot Rubanga wu abedo Rubanga kame nganyeko. Ango amio alola but jo kame daga kede but idwe gi tuno naka but ikwae me anyim me lwak me adek kede ongwon.

¹⁰Do ango anyuto amara na kalikame lokere but lwak me ikwae me tutumian kede tutumian me jo kame mara di kigwoko cik na.

¹¹ “ ‘Kur itiunu kede nyinga pi timo gikarac, pien ango Rwot Rubanga wu abino mino alola but ngat kame tio kede nyinga kirac.

¹² “ ‘Poore igwokunu ceng Sabato di ikounu mine ebed ceng kacil, bala kame ango Rwot Rubanga wu atieko ciko ne wu.

¹³ Ibinunu timo tice wu dedede pi ceng kanyape.

¹⁴Do ceng me kanyaare mere obedo ceng me wei, en ceng kame komio but ango Rubanga wu. Likame poore ngatamoro timo tic i ceng nono; akadi wun, idwe wu, ipasoi arabo apasoi wu, leini wu, arabo jokumbor kame tie bedo i piny wu. Ipasoi kede apasoi wu miero gida kiud wei bala wuda.

¹⁵Yutununu be wun bin ibedunu ipasoi i Misiri, di ango Rwot Rubanga wu ako kwanyo wu ki kuno kede twer adwong kede teko; pi mano, ango aciko wu pi gwoko ceng Sabato.

¹⁶ “ ‘Poore dano acelacel wor papa mere kede toto mere, bala kame ango Rwot Rubanga wu aciko ne wu, tetekeny gi dedede bed ne wu kiber di ikounu tieko kare kalac i lobo kame ango atie mino wu.

¹⁷ “ ‘Kur itimunu nek.

¹⁸ “ ‘Kur itimunu adote.

¹⁹ “ ‘Kur ikwalunu.

²⁰ “ ‘Kur imiunu ijura me abe i kom ngatamoro.

²¹ “ ‘Kur ingobelo dako ka ngatamoro; kur ingobelo ode, lobo mere, ipasoi arabo apasoi mege, doke mege, pundan mege, arabo gimoroni kame en etie kede.’

²² “I kare kame wun bin icokerenu kede i dud moru, Rwot bin oko yamo kede wu kede dwan amalo ki mac kede ki edou apek di ecol cucucuc. En bin eko mino wu cik nogi kenekene, di likame eko medo ace i kom gi. Di do en bin eko wandiko gi i kom kide are abatal di eko mino gi buta.

Lworo Omako Jo

(Yai 20.18-21)

²³” Kakame wun bin iwinyunu kede dwan kame wok ki yiro kame oudo col cucucuc di mac liel i moru, jotel me ikekon wu karacel kede joadongo wu oko bino buta

²⁴di kiko waco be, ‘Neningo, Rwot Rubanga wa otieko nyuto ne wa deyo mere kede twer mere kakame wan owinyo kede di en eyamo i mac. Ceng atin wan otieko neno be Rubanga karuno yamo kede dano di dano nono pwodi ko dong kuo.



²⁵Aso, pinyo do kamio wan opoore to? Twon mac nono bino muducaro wan. Wan obino to ka bobo omedo winyo dwan Rwot Rubanga wa.

²⁶Pien ngai kotieko winyo Rubanga akuo di etie yamo i mac, bala wan, di eko dong di ekuo?

²⁷Musa, in kikomi en ioti inok kuno di iko winyo gi dedede kame Rwot Rubanga wa waco, di iko dwogo waco ne wan gikame en ewaco ni. Wan obino winyo di oko timo bala kame en ewaco.’

²⁸” Rwot bin oko winyo kope kame wun iwacunu na, di en eko waco na be, ‘Ango atieko winyo kope kame jogo owaco nin; kope dedede kame gin kiwaco tie kakare.

²⁹Ka koto gin di kiko bedo kede tam kame cal kamanoni nakanaka, tam me bedo kede lwooro buta kede lubo cik na dedede, koto gi dedede obedo ne gin kiber nakanaka karacel kede ne ikwae gi.

³⁰Oti iwace gi kidoki i iemai gi.

³¹Do in Musa, dong buta kan, di ango ako bino mini cik kede iswilia dedede kame in ibino pwonyo gin, tetekeny gin kilub gi i lobo kame ango atie mino gin pi doko mergi.’

³²” Pi mano, wun miero igwokerenu di ikounu timo gikame Rwot Rubanga wu otieko ciko ne wu; likame poore iparaunu tenge kiye.

³³Wun miero ilubunu yongayo kame Rwot Rubanga wu otieko nyuto ne wu, tetekeny ibedunu kuo, di gi dedede ko bino bedo ne wu kiber, kede ikounu tieko kare kalac i lobo kame itienu ot mano di eko doko meru.

Iswilia 6

Cik kame Pire Tek

¹” Magi en cik kede iswilia kame Rwot Rubanga wu ocika pi pwonyo wu be ilubunu i lobo kame wun itienu ngolo ecilet me Yorodan pi mano di eko doko meru.

²I kare me kuo wu lung, wun, idwe wu kede ikwae wu, poore ibedunu kede lwooro but Rwot Rubanga wu, di ikounu gwoko cik kede iswilia mege kame ango atie mino wu, tetekeny ibedunu i lobo nono tieko kare kalac.

³Pi mano, winyunu wun jo me Isirael, di ikounu keto cunyu lubo gi, tetekeny gi dedede bed ne wu kiber di ikounu nywal di wel wu ko meede adikinichel i lobo amio di lac, bala kame bin Rwot Rubanga ka joakwari wa ocikere kede.

⁴ “Winyunu wun jo me Isirael! Rwot Rubanga wa en kene kame ebedo Rwot. ⁵ Poore imarunu Rwot Rubanga wu kede cunyu dedede, kede kuo wu lung, kede teko wu lung.

⁶ Makunu i cunyu cik nogi kame tin ango atie mino wu.



⁷Bedunu pwonyo idwe wu iye. Tatamunu negi kop i kom gi ka itienu i paco amoto tenge, ka itienu buto amoto ka iyaunu ki kabuto.

⁸Tweunu gi i ngut cingu kede i tur nyimu kibed gianena kame konyo wu yutuno gi,

⁹doko wandikunu gi i kom ipirin me ikekon wu kede i kom irutei me bomban wu.

Ikwenyar i kom Dagi Lubo Kop ka Rubanga

¹⁰ “Rwot Rubanga wu bin ocikere but joakwari wu, Aburaam, Isaka kede Yakobo, be ebino mino wu lobo kame nataman en etie tero wu iye. Lobo nono tie kede bomban kabeco di kidongodongo, bomban kalikame wun en igerunu;

¹¹kitie kede ude kopong kede jamini kabeco kalikame wun en iketunu i ude nogo; doko kitie kede ataneko kalikame wun en ikunyunu, kede poti me olok kede me olibeti kalikame wun en ipitunu. Ka Rwot oko tero wu i lobo nono, di ikounu bedo tie kede cam dedede kame imitunu,

¹²poore igwokerenu kur imiunu wi wu wil kede Rwot ngat kolako wu ki Misiri, kakame bin ibedunu iye ipasoi.

¹³ Poore ibedunu kede lworu but Rwot Rubanga wu; timunu tic ne en kene, doko kwongerenu kede nyinge kenekene.

¹⁴Kur iworunu rubangan mogo apat, rubangan me atekerin koluko wu,

¹⁵pien Rwot Rubanga wu ngat kame tie kede wu obedo Rubanga kame nganyeko. Cunye bino wang i komu di eko muducaro wu ki wi lobo.

¹⁶ “Kur itamunu Rwot Rubanga wu bala kame bin itimunu i Masa.

¹⁷Miero iketunu cunyu gwoko kiber cik kede iswilia kame Rwot Rubanga wu otieko mino wu.

¹⁸Timunu gikame poore kede kame ber i nyim Rwot, tetekeny gi dedede bed ne wu kiber di ikounu ot donyo i lobo aber kame bin Rwot okwongere pire but joakwari wu be ebino mino wu pi doko meru.

¹⁹En ebino riamo tenge jokwor wu ki nyimu bala kame en etieko cikere pi timo.

²⁰” Kame idwe wu waru bino penyo wu be, ‘Pinyo komio Rwot Rubanga wa ociko wa pi lubo cik kede iswilia nogi dedede?’

²¹Wun ibinunu dwoko ne gin be, ‘Wan bin obedo ipasoi ka Abaka me Misiri, do Rwot oko kwanyo wa ki kuno kede twer mere adwong.

²²Wan bin oneno kede wang wa di Rwot timo i kom jo me Misiri, i kom abaka gi kede jotie mege dedede, gianena adongodongo kame kelo lworu.

²³En bin ekwanyo wan ki kuno tetekeny ekel wa kan di eko mino wa lobo noni kame bin en ecikere iye but joakwari wa be ebino mino wa.



²⁴Di Rwot bin oko ciko wa pi lubo iswilia nogi dedede, di oko bedo kede lwooro but en Rwot Rubanga wa, tetekeny obed kiber nakanaka, di en eko gwoko wa obed kuo bala kame nataman otie kede noni.

²⁵Ka wan oketo cuny wa lubo cik nogi dedede i nyim Rwot Rubanga wa bala kame en eciko ne wa, udo otimo gi kopoore.’

Iswilia 7

Jo ka Rwot kame En Eyero

(Yai 34.11-16)

¹“Ka Rwot Rubanga wu oko tero wu i lobo kame nataman wun itienu ot iye pi mane eko doko meru, di en eko riamo atekerin atot tenge ki nyimu, jo Kiti, jo Girigas, jo Amor, jo Kanan, jo Perisi, jo Kibi, kede jo Yebu, gin dedede atekerin kanyaare kame tek doko di kitot kalamo wu,

²ka Rwot Rubanga wu oko mino gin i cingu di wun ikounu bwono gi, poore inenekunu gin tieko gi pitipit. Kur itimunu isikan moro kede gi doko kur ibedunu kede cuny me kisa i kom gi.

³Kur inyomerenu kede gi. Kur imiunu anyira kede awobe wu nyomere kede gi,

⁴pien manono bino mino idwe wu parao tenge kiweko woro Rwot di kiko donyo woro rubangan apat. Ka manono oko timere, Rwot cunye bino wang i komu di eko muducaro wu awakawaka.

⁵Do man en gikame wun ibinunu timo ne gin: reretunu alutari gin piny, mumukunu kide gin kame kisisipo me awora, tongunu piny yen kame kosisipo me woro rubanga Asera, di ikounu wango caljwogi kame gin kiworo.

⁶Pien wun ibedunu jo ka Rubanga wu. Rwot Rubanga wu otieko yero wu kikom jo me piny lung pi wun bedo jo mege, jo kame pirgi tek kibute.

⁷” Rwot omaro wun di eko yero wu, likame pi wun bin itotunu ikalamunu atekerin apat; wun oudo ibedunu ateker katitidi twatwal kalamo atekerin apat dedede.

⁸Do en oudo emaro wu doko oudo emito cobo kwongere kame en bin etimo but joakwari wu. Manono en komio en bin ekwanyo wu kede twer adwong di eko lako wu ki bedo ipasoi ka Parao abaka me Misiri.

⁹Pi mano, poore wun ingeunu be Rwot Rubanga wu en kene kame ebedo Rubanga doko egenre. En ecobo isikan mere doko enyuto amara mere kalikame lokere but lwak me ikwae me tutumian me jo kame mare di kilubo cik mere,

¹⁰do jo kame dage en eneneko gi; manono en epone kame en eculo gin kede; en likame egal kede mino gi alola.

¹¹Pi mano, ketunu cunyu lubo cik kede iswilia kame tin ango atieko mino wu.

Winyo kame Dano Udo pi Lubo Kop ka Rubanga

(Iswilia 28.1-14)



¹² “Ka wun ikounu winyo cik nogi di ikounu keto cunyu lubo gi, Rwot Rubanga wu bino meede kede cobo isikan mere karacel kede amara mere kalikame lokere, bala kame bin en ekwongere kede but joakwari wu.

¹³ En ebino maro wu di eko mino wu winyo di eko medo wel wu. En ebino mino idwe kame wun inywalunu winyo, doko ebino mino winyo i cam kame wun ipurunu, engano wu kede bwini kede mo me olibeti wu; en ebino mino wu winyo di doke wu ko nywal kidoko tot kede romini kede diegi wu da kamanono, i lobo kame en bin ekwongere pire but joakwari wu be ebino mino wun.

¹⁴ Wun ibinunu bedo jo kame komio winyo kalamo atekerin apat dedede. Likame tie ngatamoro kikom wu arabo kikom leini wu kame bino bedo abwocit arabo adonge amoto edonge.

¹⁵ Rwot bino gwoko wu ki tuo dedede doko en likame ebino mino tuo areco kame bin wun inenunu i Misiri mako wu, do en ebino mino gi kimako jo dedede kame dagi wu.

¹⁶ Poore imuducarunu atekerin dedede kame Rwot Rubanga wu mio i cingu, doko kur ibedunu kede cunyu me kisa i kom gi. Likame ibinunu woro rubangan gin, pien manono bino bedo ne wu bala owic me mako wu.

¹⁷” Kur iwacunu i cunyu be, ‘Jo me atekerin nogi tot kalamo wa; epone mene kame wan okaruno riamo gi kede tenge?’

¹⁸ Kur ilworunu gi; kenekene yutununu gikame bin Rwot Rubanga wu otimo ne Parao kede ne jo dedede me Misiri.

¹⁹ Wun bin inenunu kede wangu can kotimere, gianena kede giaura, twer kede teko kame Rwot okwanyo wu kede ki kuno. Rwot Rubanga wu bino timo kamanono ne atekerin dedede kame nataman wun itienu kede lworu i kom gi nogo.

²⁰ Bobo da Rwot Rubanga wu bino keto lworu i cunyu gi tuno di otieko neneko kiton jo kame oudo obwot di kiko ringo ot pwno.

²¹ Aso, kur ilworunu gin, pien Rwot Rubanga wu tie kede wu; en obedo Rubanga kame dwong doko epoore alwora.

²² Rwot Rubanga wu bino riamo atekerin nogi tenge ki nyimu momot momot; likame ibinunu karuno tieko gi awakawaka, pien ka itimunu kamanono, leini me obar bino doko tot twatwal di kiko donyo lolo wu.

²³ Do Rwot Rubanga wu bino mino atekerin nogo i cingu; en ebino keto lworu atek i cunyu gi tuno gin tiek.

²⁴ En ebino mino abakai gi i cingu di wun ikounu mino nying gi rwenyo ki wi lobo. Likame tie ngatamoro kame bino karuno yi kede wu; wun ibinunu muducaro gi.

²⁵ Poore iwangunu cal me rubangan gi. Kur ingobelunu siliba arabo saabu kame tie i kom rubangan nogo di ikounu tero gi pi doko megu, pien kikaruno bedo bala owic me ciko wu; pien Rwot Rubanga wu dagi tim nono.



²⁶Kur iterunu caljwogi moro i ude wu, pien ebino mino Rubanga muducaro wuda bala gin. Poore wun idagunu gi, pien gin kibedo jamini kame kopooore muducaro.

Iswilia 8

Lobo Aber kame bino doko me Jo me Isirael

¹” Cik dedede kame ango atie mino wu i ceng katin miero iketunu cunyu lubo gi, tetekeny ibedunu kuo di wel wu ko meede di ikounu ot gamo lobo kame Rwot bin ocikere di ekwongere be ebino mino joakwari wu.

²Yutununu kite kame Rwot Rubanga wu obedo telo wu kede i wi tim pi mwakini ot ongwon kame okato. En oudo emitu mino wun idokunu jo kame mwolere, en komio en ebedo cwano ne wu pekini pi tamo wu, tetekeny en engei gikame tie i cunyu, arabo ibinunu lubo cik mege amoto li.

³ Pi mino wun mwolere, en bin emio wu ikanyunu kec di eko pito wu kede emana, gikame wun arabo joakwari wu oudo likame ngeo. En bin etimo manono tetekeny wun iniangunu be jo likame kuo kede cam kenekene, do jo kuo kede kope dedede kame Rwot waco.

⁴Igoen wu likame oti, doko da tienu likame opopongun i kare me mwakini ot ongwon nogi dedede.

⁵Mito ingeunu be, bala kame nganywal bitaro kede atin pi riene, kamanono da Rwot Rubanga wu timo ne wu.

⁶Pi mano, lubunu cik ka Rwot Rubanga wu di ibedunu i kuo kame iswilia mege mito, doko poore ibedunu kede lworu bute.

⁷Pien Rwot Rubanga wu tie tero wu i lobo aber, lobo kame tie kede icileta, ataneko kede pie kame gugunya wok ki piny i aditot kede ki wi mori;

⁸lobo kame ceko engano kede mawele, anyakini me olok, epigi, pomagurunet kede olibeti, doko mokic da tie iye.

⁹En ebedo lobo kalikame kec bino mako wu iye, arabo bedo kede rem me gimoro. Kide mege tie kede nyonyo ayon doko ikarununu kunyo nyonyo kopa i imukuran mege.

¹⁰Ibinunu cam di ikounu yeng di ikounu pwono Rwot Rubanga wu pi lobo aber kame en emio wu.

Ikwenyar pi weko bedo kede Awilawic i kom Rwot

¹¹ “Mito igwokerenu kur wi wu wil kede Rwot Rubanga wu i yore me weko lubo cik kede iswilia mege kame tin ango atie mino wu.

¹²Kame do wun itiekunu bedo tie kede cam dedede kame imitunu, di ikounu gero ude abeco kame ibedunu iye,



¹³kede ka do doke wu, romini kede diegi wu oko nyai, kede siliba kede saabu wu da oko doko tot, karacel kede jamini dedede kame wun itienu kede oko meede,

¹⁴kur iwakerenu di wi wu ko wil kede Rwot Rubanga wu ngat kokwanyo wu ki lobo me Misiri, kakame oudo ibedunu iye ipasoi.

¹⁵En ngat kame bin etelo wu beo ki twon wi tim kame kelo lworu, kakame bin ekiliton kede twole ager tie iye; piny kotuo kalikame iudo iye pii, do en eko mino pii omol owok ne wun ki lela kakatek.

¹⁶I wi tim kunono en bin epito wu kede emana, cam kalikame joakwari wu bin ngeo. En bin ecwao ne wu pekini pi mino wun mwolere kede pi tamo wu, tetekeny i atiekini en emi wu winyo di ikounu udo jamini abeco.

¹⁷Pi mano, poore igwokerenu kur ngatamoro wac i cunye be, ‘Twer na kede teko na en komio ango abaro.’

¹⁸Do poore iyutununu be Rwot Rubanga wu en kame mio wun twer me udo abar, tetekeny en ecob isikan mere kame bin en ekwongere kede but joakwari wu, bala kame pwodi etie timo kede tuno tin.

¹⁹Ka wun wi wu oko wil kede Rwot Rubanga wu di ikounu donyo lubo rubangan apat pi timo tic negi di iworunu gi, ango akwenyaro wu tin be ateteni Rwot bino muducaro wu.

²⁰Ka wun idagunu lubo kop kame Rwot Rubanga wu waco, en ebino muducaro wu bala atekerin kame en eyaro muducaro ki nyimu.

Iswilia 9

Jo Odagi Lubo Kop ka Rubanga

(Yai 32.1-35)

¹ Winyunu wun jo me Isirael! Ceng atin wun iyapununu ngolo ecilet me Yorodan pi ot mano lobo me atekerin adongodongo di kitek kalamo wun. Bomban me atekerin nogo dongodongo di kocelo gi kede apama kame tuno i edou.

²Jo me atekerin nogo da kikom gi bocoboco di kitek, ikwae me itucio me jo kame kolwongo be Anakim, kame wun ingeunu. Wun itiekunu winyo di kowaco kop i kom gi be likame tie ngat kame karuno bwono gi.

³Pi mano, poore tin wun ingeunu be Rwot Rubanga wu en kame bino ngolo ecilet etelo ne wu yongayo bala mac kame wango piny. En ebino tieko teko gi di eko bwono gi ki nyimu, tetekeny wun iriamunu gi tenge di ikounu muducaro gi awakawaka, bala kame bin en ecikere kede butu.

⁴” Kame Rwot Rubanga wu otieko riamo gin tenge ki nyimu, kur iwacunu kenu kenu be, ‘Rwot okelo wa gamo lobo noni di eko doko merwa pien wan obedunu jo kopooe.’ Li ba, Rwot oyaro riamo atekerin nogo tenge ki nyimu pien gin kitimo gikareco.



- ⁵Likame pien wun ipoorenu arabo ibedunu jo abeco en komio itienu ot gamo lobo gin di eko doko meru; do pien gin kitimo gikareco en komio Rwot Rubanga wu oyaro riamo gin tenge ki nyimu, kede pien Rwot Rubanga wu mito cobo cikere kame en bin etimo di ekwongere but joakwari wu, Aburaam, Isaka, kede Yakobo.
- ⁶Pi mano, poore wun ingeunu be Rwot Rubanga wu likame tie mino wun lobo aber noni pien wun ibedunu jo kopooore. Li ba, wun ibedunu joepali.
- ⁷” Yutununu, doko poore wi wu kur wil kede kite kame bin imiunu Rwot olilo kede i wi tim. Wun ibedunu jemo ne Rwot cako ki ceng kame bin iyaunu kede ki Misiri paka wun tuno kan.
- ⁸Akadi i moru me Sinai wun bin imiunu Rwot cunye owang; imiunu Rwot cunye owang kede wu di eko mito muducaro wu.
- ⁹ I kare kame bin ango ayito kede i wi moru pi gamo kide abatal kame kowandiko i kom gi kope me isikan kame bin Rwot otimo kede wu, ango bin ako dong i wi moru kunono pi ceng ot ongwon; likame bin acamo arabo amato gimoro.
- ¹⁰Di Rwot oko bin mina kide are nogo kame en kikome ewandiko i kom gi kope dedede kame bin en ewaco ne wu ki dier mac i ceng kame bin wun icokerenu kede i moru.
- ¹¹I atiekini me ceng ot ongwon nogo Rwot bin oko mina kide abatal are nogo kame bin en ewandiko iye kope me isikan mere.
- ¹²” Di do Rwot oko waco na be, ‘Yai malo, ot piny awakawaka, pien jo ni kame in ikwanyo ki Misiri otieko dubere, doko kitieko timo gikarac. Gin ajoto kitieko parao tenge ki gikame ango aciko gi be kitimi, di kiko timo cal pi gin woro.’
- ¹³” Rwot oko medo waco na be, ‘Ango atieko ngeno be jogi ateteni obedo joepali.
- ¹⁴Wek ango kede gin tetekeny amuducaro gi di ako mino nying gi rweny ki wi lobo; di ango ako bino mino in kede ikwae ni idokunu ateker atek doko di edwong kalamo gin.’
- ¹⁵” Aso, ango ako yai malo di ako wok piny di mac oudo tie liel i wi moru; oudo ango amako i cinga tuni tuni kide abatal are kame oudo owandiko i kom gi kope me isikan.
- ¹⁶Di ango ako neno be wun oudo ajoto itiekunu parao tenge iwekunu timo gikame Rwot Rubanga wu oudo ociko ne wu, di ateteni ikounu timo dub bute di timunu cal me roya kede nyonyo pi wun woro.
- ¹⁷Aso, ango bin ako uco kide abatal are nogo piny di ako ngingido gi i nyimu kanono.
- ¹⁸Di ango bobo ako riebero piny i nyim Rwot, pi ceng ot ongwon; likame acamo arabo amato gimoro. Ango atimo manono pi dub kame wun oudo itimunu di ikounu mino Rwot cunye owang.



- ¹⁹ Ango bin abedo kede lworu i kom lilo kame oudo Rwot tie kede i komu. Rwot oudo cunye owang kede wu kitek omio oudo emitu muducaro wu; do en bobo eko winyo kop na.
- ²⁰ Rwot oudo cunye owang i kom Aaron kitek; oudo eromo neke, do ango ako kwano Rwot pire i kare nono da.
- ²¹ Di do ango bin ako kwanyo gikame wun oudo itimunu nono, roya me nyonyo, kame bin okelo ne wun dub, di ako wange kede mac. Di do ako nyonyoto en di ako riege edoko dupudupu, ako uce i pii kame mol wok ki wi moru.
- ²² “Wun bobo da bin imiunu Rwot cunye owang i komu i kare kame bin itienu kede Tabera, Masa, kede Kibirot Kataba.
- ²³ Kakame bin Rwot oko cwano wu kede ki Kades Barenea be iotunu imakunu lobo nono kame en oudo etie mino wu, wun bin ikounu jemo ne; likame bin iketunu gen wu bute arabo lubo kop mere.
- ²⁴ Wun ibedunu jemo ne Rwot cako i kare kame ango angeo wu kede.
- ²⁵” Ango bin ako buto piny ariebacuny i nyim Rwot pi ceng ot ongwon, pien oudo Rwot otieko iikere pi muducaro wu.
- ²⁶ Ango ako kwano Rwot di awaco be, ‘Okwe Rwot Rubanga, kur imuducaro jo ni, jo kame in bin ilako ki Misiri kede teko kede twer ni adwong.
- ²⁷ Yutuno genere me jotic ni, Aburaam, Isaka kede Yakobo; kur ipar pi epali ka jogi, gikareco gi kede dub gi.
- ²⁸ Aso ka li, jo me lobo kame bin ikwanyo wa kiye bino waco be in oudo likame ikaruno tero jo ni i lobo kame bin in icikere iye be ibino mino gi, kede pien cunyi oudo dagi gi, en komio in itero gi ioto neneko gi i wi tim.
- ²⁹ Do gin kibedo jo nin obe kame in iyero pi bedo meg, jo kame bin in ikwanyo ki Misiri kede twer ni adwong kede teko.’

Iswilia 10

Musa bobo Ogamo Cik

(Yai 34.1-10)

- ¹” I kare nono Rwot oko waco nango be, ‘Pai kide abatal are bala me agege ka di iko timo sanduku me ebao me keto gi, di in iko yito malo i wi moru buta kan.
- ² Ango abino wandiko i kom kide nogo kope kame bin awandiko i kom maka kame in iko ngingido nogo, di do in iko bino keto gi i sanduku nono.’
- ³” Aso, ango ako timo sanduku kede ebao me yat akasia, di ako pano kide are kame cal bala bin me agege, di ako mako gi aoto kede gi malo i wi moru.



⁴Di Rwot oko wandiko i kom kide nogo kope kame bin en ewandiko me agege noka, gin en cik tomon kame bin en emio wu i kare kame en eyamo kede wun ki dier mac i ceng kame wun icokerenu kede i dud moru. Rwot bin oko mina kide nogo

⁵di ango ako dwogo piny ako keto gi i sanduku kame bin ango atimo, bala kame oudo Rwot ociko; gin pwodi kitie kunono.”

⁶ (Jo me Isirael bin oko yai ki kulo me jo Jakan di kiko ot Mosera. Aaron bin oko to kunono di oko yike kunono da; Eleasar wode en kame bin oko lunyo wange bala ngasaseredoti.

⁷Gin kiko yai ki kunono di kiko ot Gudugoda, doko kiko yai ki Gudugoda di kiko ot Yotobata, lobo kame bin tot kede pie kame mol.

⁸ I kare nono Rwot bin oko yero jo me ekeko ka Lebi pi gin bedo jo kame tingo Sanduku me Isikan, pi gin timo tic mere bala josaseredoti, kede pi gin lamo ne jo winyo i nyinge. Magonogo en kobedo tice gin tuno tin.

⁹Manono en komio jo me ekeko ka Lebi likame bin kopoko negi lobo bala jo me ikekon apat; gikame bin komio gin en winyo me bedo josaseredoti ka Rwot bala kame Rwot Rubanga wu bin ocikere kede but gi.)

¹⁰ “Ango bin ako bedo i wi moru tieko ceng ot ongwon bala kame bin atimo i kare me agege. Rwot bobo oko winyo kwac na di eko yei weko muducaro wu.

¹¹Rwot oko waco na be, ‘Yai do imeedenu kede ot di in en kame itelo ne jo yongayo, tetekeny kioti di gin kiko mano lobo kame bin ango akwongere pire but joakwari gi be abino mino gi.’

Gikame Rubanga Mito

¹²” Aso, wun jo me Isirael, nyo kara kame Rwot Rubanga wu mito ne wu timo? Rwot mito ne wu bedo kede lworu bute, timo gi dedede kame en emito, mare, timo ne tic kede cunyu dedede kede kuo wu lung,

¹³kede lubo cik kede iswilia mege kame tin ango atie mino wu, tetekeny ibedunu kiber.

¹⁴Nenunu, malo dedede obedo me ka Rwot; piny da kede gi dedede kame tie iye obedo mere.

¹⁵Do cuny Rwot bin oko bedo i kom joakwari wu di en eko maro gin kenekene, eko yero wun ikwae gi kikom jo dedede me wi lobo, bala kame tin pwodi etie kede.

¹⁶Pi mano, cako nataman ot anyim poore ilubunu kop ka Rwot di ikounu jiko epali.

¹⁷ Pien Rwot Rubanga wu dwong kalamo rubangan apat dedede, doko etie kede twer kame kalamo me rwode dedede. En Rubanga kame dwong, etie kede twer doko epoore alwora. En likame etie kede apokapoka doko likame Egamo cemusana.

¹⁸Nakanaka en eneno be jo ogwoko twero me idwe kic kede apuserun; en emaro jokumbor, doko emio gi cam kede igoen.



- ¹⁹Wuda poore imarunu jokumbor, pien wuda bin ibedunu jokumbor i lobo me Misiri.
- ²⁰Poore ibedunu kede lworu but Rwot Rubanga wu di iworenu en kene; mokunu i kome doko kwongerenu kede nyinge kenekene.
- ²¹Poore ipakenu; en ebedo Rubanga wu, ngat kotimo ne wu jamini adongodongo kame kelo lworu, kame wun inenunu kede wangu.
- ²²Joakwari wu riki ooto Misiri di gin jo ot kanyaare kenekene, do nataman Rwot Rubanga wu otieko mino wun idokunu tot bala acer kame tie i edou.

Iswilia 11

Dwongo ka Rwot

- ¹” Poore imarunu Rwot Rubanga wu di ilubunu iswilia kede cik mege nakanaka.
- ²Mito wun tin kong iparunu kop i kom gikame Rwot otimo ne wu pi rieno wu, piento en bin erieo wun, do likame idwe wu. Wun en kame bin inenunu dwongo ka Rwot, twer mere kede teko mere,
- ³ kede jamini me aura kame en bin etimo but Parao, abaka me Misiri, kede ne piny mere dedede.
- ⁴ Wun bin inenunu gikame Rwot otimo ne isirikalen me Misiri, asigiran kede cabalan gi, kite kame en bin emio kede pii me Nam Akwar omwonyo gin kede atwal, di gin bin kitie wapo wun.
- ⁵Wun ingeunu gikame Rwot bin otimo ne wu i wi tim di pwodi likame itununu kan;
- ⁶kede gikame en bin etimo ne Datan kede Abiram, awobe ka Eliab dano me ekeko ka Ruben. Wun bin inenunu kite kame Rubanga omio lobo oyabere kede i dier jo me Isirael di eko mwonyo gin karacel kede jo me ude gi, iemai gi, jotie kede leini kame gin bin kitie kede dedede.
- ⁷Wun bin inenunu kede wangu jamini dedede adongodongo kame Rwot bin otimo.

Winyo kame Jo bino Udo i Lobo kame Kocikere Pire

- ⁸” Poore ilubunu cik dedede kame tin ango atie mino wu, tetekeny ibedunu kede teko me ot mano lobo kame itienu ngolo ecilet pi ot donyo iye di eko doko meru,
- ⁹kede tetekeny ibedunu pi kare kalac i lobo kalac di mio nono, lobo kame Rwot bin okwongere pire but joakwari wu be ebino mino but gin kede ikwae gi.
- ¹⁰Lobo kame nataman wun iyapununu donyo iye pi mane di eko doko meru likame cal bala lobo me Misiri kame wun iyaunu iye; kakame bin ipitunu iye kodere wu di ikounu timo teko onyo negi pii pi li me kot.
- ¹¹Do lobo kame wun itienu ngolo ecilet pi ot mano di eko doko meru obedo lobo kame tie kede mori kede aditoto kame kot cwei iye.



- 12**En lobo kame Rwot Rubanga wu gwoko, cako ki ageini me mwaka tuno i atiekini mere.
- 13** “Pi mano, lubunu cik kame tin ango atieko mino wu; marunu Rwot Rubanga wu di itimunu ne tic kede cunyu dedede kede kuo wu lung.
- 14**Ka itimunu kamanono, en ebino mino kot cwei i lobo wu i kare kame kot mitere iye, kot me agege kede kot me are, tetekeny ibedunu tie kede cam, bwini kede mo me olibeti,
- 15**kede lum ne doke, diegi kede romini wu. Ibinunu bedo tie kede cam dedede kame imitunu.
- 16**Miero igwokerenu kur mit me cunyu mi wu iparaunu tenge kikut Rwot di ikounu lokere timo tic ne rubangan apat di iworunu gi.
- 17**Ka itimunu kamano, cunyu Rwot bino wang i komu di eko gengo kot cwei, di lobo ko tuo likame ekaruno ceko cam; di do wun ikounu to awakawaka i lobo aber kame Rwot tie mino wu.
- 18**” Poore iketunu kope na nogi i cunyu kede i kuo wu. Tweunu gi i ngut cingu kede i tur nyimu pi bedo gianena kame poo wi wu.
- 19**Pwonyunu idwe wu i kom gi. Tatamunu kop i kom gi ka itienu i paco kede ka itienu tenge, ka itienu buto kede ka iyaunu ki kabuto.
- 20** Wandikunu gi i kom ipirin me ikekon wu kede i kom irutei wu.
- 21**Timunu kamanono tetekeny wun karacel kede idwe wu ibedunu atwal i lobo kame Rwot bin okwongere pire but joakwari wu be ebino mino gi pi bedo mergi pi kare lung.
- 22**Poore iketunu cunyu lubo cik nogi dedede kame tin ango atie mino wu; marunu Rwot Rubanga wu, timunu gi dedede kame en eciko ne wu, kede mokunu i kome,
- 23**di en eko bino riamo tenge atekerin nogo dedede ki nyimu, di wun ikounu mano lobo me atekerin adongodongo di kitek kalamo wun.
- 24**Kabedere dedede kame tienu bino nyono bino doko meru; Lobo wu bino cakere ki wi tim kame tie i bad tetu piny tuno tetu malo i mori me Lebanon, kede ki ecilet me Eupurate kame tie i bad tetu kide tuno i nam kame tie i bad tetu tim.
- 25**Kabedere dedede kame wun ibinunu tuno iye i lobo nono, Rwot Rubanga wu bino mino jo dedede bedo kede lwooro atek i komu bala kame en etieko cikere pi timo; likame tie ngatamoro kame bino karuno cungo i nyim wu pi yi kede wu.
- 26**” Nenunu, tin ango atie keto i nyim wu winyo kede ilam.
- 27**Ibinunu udo winyo ka ilubunu cik ka Rwot Rubanga wu kame tin ango atie mino wu;



²⁸ibinunu udo ilam ka likame ilubunu cik ka Rwot Rubanga wu, do ikounu lokere tenge ki yongayo kame tin ango atie ciko wu pi lubo, di ikounu donyo woro rubangan mogo kalikame oudo ingeunu.

²⁹ Kame Rwot Rubanga wu otieko tero wu i lobo kame itienu ot donyo iye pi bedo iye, wun ibinunu tatamo ki wi moru me Gerisim winyo kame Rubanga bino mino wu, do ilam kame ibinunu udo kibute ibinunu tatamo ki wi moru me Ebal.

³⁰(Bala kame wun ingeunu, mori nogi tie loka tetuca, i lobo me jo Kanan kame bedo i aditot me Yorodan. Gin kitie i bad tetu tim, kabedo kalikame bor kede ejinga me More, i nget bomba me Giligal.)

³¹Ka ingolunu ecilet me Yorodan pi ot mano lobo kame Rwot Rubanga wu tie mino wu, di do itiekunu mane ikounu donyo bedo iye,

³²miero iketunu cunyu lubo iswilia kede cik dedede kame tin ango atie mino wu.

Iswilia 12

Kabedo Acel me Woro Rubanga

¹” Magi en iswilia kede cik kame poore iketunu cunyu lubo i lobo kame Rwot Rubanga ka joakwari wu tie mino wu pi bedo iye pi kare lung kame ibinunu bedo kuo kede i wi lobo.

²I lobo kame itienu ot iye nono, poore imuducarunu kabedere kame atekerin kame wun itienu mano lobere gi oudo woro iye rubangan gi, malo i wi mori, i wi imukuran, kede i dud yen koduko.

³ Mumukunu alutarin gi, ngingidunu ipirin me kide kame gin kiworo, wangunu cal ka Asera rubanga gi, di ikounu tongotongo iretunu piny cal me rubangan gi, tetekeny imiunu nying gi rwenyi ki kabedere gi.

⁴” Likame ibinunu woro Rwot Rubanga wu iepone kame jo nogo woro kede rubangan gin.

⁵Do wun ibinunu ot woro Rwot Rubanga wu i kabedo acel kame en ebino yero pi jo ot wore iye, kikom adulion kame jo me ikekon wu bedo iye. Kunono en kame wun ibinunu ot iye

⁶pi mino giayala awanga kede giayala angola wu, acel me tomon wu kede giamia wu apat, giamia wu kame icikerenu pi mino but Rwot, giamia kame imiunu pi mit me cunyu, kede giamia me idwe kao me doke, diegi kede romini.

⁷Kunono i nyim Rwot Rubanga wu en kame wun karacel kede jo me ude wu ibinunu cam di ikounu bedo kede kilel pi winyo kame Rwot Rubanga wu omio wu i gi dedede kame itimunu.

⁸” Kame kare nono otuno, kur itimunu bala kame nan ibedunu timo. Tuno nataman wan obedunu woro Rubanga bala kame cunyu wa mito,



⁹pien wun pwodi likame itununu i lobo kame Rwot Rubanga wu tie mino wu, kakame ibinunu bedo iye kede mulem.

¹⁰Kame wun ingolunu ecilet me Yorodan di ikounu donyo bedo i lobo kame Rwot Rubanga wu bino mino wu pi doko meru, kede ka en emio wu iweunu ki cing jokwor kame oluko wu di do inapakinunu,

¹¹wun ibinunu tero gi dedede kame ango aciko ne wu, kabedo kame Rwot oyeru me wore. Ibinunu tero giayala awanga kede giayala angola wu, acel me tomon wu kede giamia wu apat, kede giamia wu kame icikerenu pi mino but Rwot.

¹²Di ikounu kilel i nyim Rwot Rubanga wu, wun karacel kede idwe wu awobe kede anyira wu, ipasoi kede apasoi wu, kede Jolebi kame bedo i bomban wu; pien Jolebi likame kobino poko negi lobo kame mako gin.

¹³Gwokerenu kur imiunu giayala awanga wu i kabedo moro kenekene kame ibinunu yero.

¹⁴Do kenekene ibinunu yalo gi i kabedo acel kame Rwot bino yero ki adulion me jo me ikekon wu. Kunono kenekene en kame ibinunu mino iye giayala awanga wu, doko kunono en kame ibinunu timo iye gi dedede kame ango aciko ne wu.

¹⁵” Do wun ikarununu ngolo di ikounu camo leini wu i karamoroni kenekene kame wun ibedunu iye. Wun iromunu camo leini atot bala kame imitunu di lubere kede kite kame Rwot omio wu kede. Jo dedede romo camo gi, jo kopwokere kede jo kalikame opwokere, bala kame icamunu kede atil arabo amiem.

¹⁶ Do miero kur icamunu remo; poore ionyenu piny bala pii.

¹⁷Miero kur icamunu i miero wu acel me tomon me kal wu, bwini kede mo me olibeti, idwe kao me doke, diegi kede romini wu, arabo gimoro kame icikerenu pi mino but Rwot, amoto giamia kame wun imiunu pi mit me cunyu, arabo giamia ace apat.

¹⁸Poore icamunu magonogi i nyim Rwot Rubanga wu i kabedo kame en eyero me wore, wun karacel kede idwe awobe wu kede idwe anyira wu, ipasoi kede apasoi wu, kede Jolebi kame bedo i bomban wu, di itienu kede kilel i nyim Rwot Rubanga wu pi gi dedede kame itimunu.

¹⁹Miero inenunu be igwokerenu likame ijalu Jolebi, pi kare dedede kame ibedunu kede i lobo wu.

²⁰” Ka Rwot Rubanga wu onyao adul kame wun ibedunu iye, bala kame en ecikere pi timo, di dano moro ko mito camo ringo, en eromo camo ringo esawa moroni kenekene bala kame cunye mito.

²¹Ka kabedo kame Rwot Rubanga wu oyeru me wore bor twatwal, dano romo ngolo diang mere, diel mere arabo oromo mere moro kame Rwot omie, di eko camo ringo mere i paco, bala kame ango atieko ciko ne wu.

²²Ngatamoroni, kame opwokere arabo kalikame opwokere romo camo ringo nono bala kame etwero camo kede atil arabo amiem.



²³ Kenekene kur icamunu ringo di pwodi remo tie iye, pien kuo tie i remo; pi mano, miero kur icamunu kuo karacel kede ringo.

²⁴ Kur icamenu; poore ionyenu piny bala pii.

²⁵ Poore kur icamenu tetekeny gi dedede bed ne wu kiber kiton ne ikwae wu, pien wun itimunu gikame poore i nyim Rwot.

²⁶ Do poore iterunu giayala wu kede giamia wu kame icikerenu pi mino but Rwot i kabedo kame Rwot oyero.

²⁷ Ibinunu mino giayala awanga wu, ringo karacel kede remo, i wi alutari ka Rwot Rubanga wu; remo me giayala wu apat mege ibinunu onyo i nget alutari ka Rwot Rubanga wu, do ringo gi itwerunu camo.

²⁸ Gwokerenu i kope nogi dedede kame ango aciko ne wu tin, tetekeny wun karacel kede ikwae wu ibedunu kiber nakanaka, pien udo itienu timo gikame ber kede kopooore i nyim Rwot Rubanga wu.

Ikwenyar i kom Woro Caljwogi

²⁹” Rwot Rubanga wu bino muducaro atekerin atie i nyimu i kare kame wun itienu suro kede lobo gi, di wun ikounu mano lobo gin ikounu donyo bedo iye.

³⁰ Do i ngei Rwot muducaro atekerin nogo, poore igwokerenu kur cunyu wai wu timo gikame gin kitimo; kur ipenyunu kop moro i kom rubangan gin be, ‘Atekerin nogi oudo woro rubangan gin benyo? Wada omito timo kamanono.’

³¹ Kur iworunu Rwot Rubanga wu iepone kame gin kiworo kede mergi, pien gin kiworo rubangan gin kede tim areco kame Rwot dagi. Gin kiwango kiton idwe gi da me yalo rubangan gi.

³² Wun miero iketunu cunyu lubo gi dedede kame ango aciko ne wu; kur imedunu gimoro iye arabo ikwanyunu gimoro tenge kiye.”

Iswilia 13

¹” Inabin arabo jo kame gonyo dwong me lek romo bino di gin kiko cikere butu pi timo ne wu gianena moro arabo gi me isuur,

² pi mito parao wu donyo woro kede timo tic ne rubangan apat kalikame wun ingeunu. Akadi di gianena kede me isuur kame gin oudo kicikere iye pi timo nogo di ko timere ateteni,

³ kur igamunu kop gi. Pien Rwot Rubanga wu udo tie tic kede gin pi tamo wu; en emitu ngeno ka wun ateteni imarenu kede cunyu dedede kede kuo wu lung.

⁴ Poore ilubunu Rwot Rubanga wu doko bedunu kede lworu bute en kene. Lubunu cik mere kede gikame en ewaco; worenu doko mokunu i kome.

⁵ Do poore inekunu inabin nogo arabo jo nogo kame gonyo dwong me lek, pien gin kiwaco ne wu be ijemunu ne Rwot Rubanga wu, ngat kokwanyo wu ki Misiri kakame



bin ibedunu iye ipasoi. Gin kimito mino wu iparaunu tenge ki kuo kame Rwot Rubanga wu ociko wu be ibedunu iye. Wun miero inekunu dano nono tetekeny ikwanyunu gikarac nono tenge kibutu.

⁶” Akadi ka omini kikokome, arabo wodi amoto nyari, arabo dako ni kame imaro amoto adieruni kiyapiyapi kedi, oko waco ni i mung be iotunu woro rubangan apat, rubangan kame wun akadi joakwari wu da likame oudo ngeo,

⁷rubangan mogo me atekerin koluko wu, akadi di gin kitie iyapiyapi kede wu arabo kitie kakame bor kede wu,

⁸kur iyeunu kop ka dano nono. Kur ibedunu kede cuny me kisa bute arabo itimunu ne mwolo, doko kur imungenu.

⁹Poore inekenu! In kikomi ibino cako dipe kede kidi, di do jo apat dedede ko didipoen.

¹⁰Didipunu en tuno neke piento en etamo mito loko wu tenge kikut Rwot Rubanga wu, ngat kame bin okwanyo wu ki lobo me Misiri, kakame bin ibedunu iye ipasoi.

¹¹Ka jo me Isirael dedede owinyo gi kotimere nono, gin kibino bedo kede lwordi di likame tie dano moro bobo kame ko bino timo gikarac kacal kamanono.

¹²” Kame wun itienudo bedo i bomban kame Rwot Rubanga wu tie mino wu, cengemogo iromunu winyo

¹³be jo mogo kame kony gi li i ateker wu otieko mino jo me bomba gi oparao tenge woro rubangan kalikame wun ingeunu;

¹⁴ka iwinyunu kop moro kame cal kamanono, wapunu yore kiber. Ka ikounu udo be gikarac kacal kamanono kotieko timo i diere wu,

¹⁵ibinunu neneko jo me bomba nono dedede; poore imuducarunu bomba nono atwal atwala karacel kede gi dedede kame tie iye, kiton leini apita dedede.

¹⁶Jamini dedede me jo kame bedo i bomba nono wun ibinunu coko karacel kakaler me dier bomba. Di do ikounu wango bomba nono kede jamini kame tie iye dedede, bala giayala kame kowango dedede but Rwot Rubanga wu. En ebino dong di etie ameje nakanaka, likame bobo kobino gere.

¹⁷Kur iwekunu gimoro kame kopooore dudubo dong ne wu, tetekeny lilo ka Rwot kwei di eko timo ne wu kisa. En ebino timo wu mwol di eko mino wel wu meede bala kame bin en ecikere kede but joakwari wu.

¹⁸Rwot bino timo ne wu kamanono ka wun ilubunu cik mege dedede kame tin ango amio wu, di itimunu gikame en emitu.”

Iswilia 14

Ogengo Jo me Isirael Koko Jo Oto lepone kame Atekerin Timo kede



¹ Musa oko waco ne jo me Isirael be, “Wun ibedunu idwe ka Rwot Rubanga wu. Pi mano, kame ikokunu joe wu oto, kur ingongolunu komu arabo ikebunu nyimu bala kame jo apat timo.

² Pien wun ibedunu jo ka Rwot Rubanga wu; en etieko yero wun kikom jo me wi lobo lung pi bedo jo mege kikokome.

Leini me Kwer kede kalikame Kwer

(Jolebi 11.1-47)

³ Kur icamunu gimoro me kwer.

⁴Leini kame wun iromunu camo en gin ige, diang, oromo, diel,

⁵atil, amiem, emalet, kede amor.

⁶Leini dedede kame abelekek gi okakarun di kinyogao nyamo gikame oudo kitieko mwonyo wun ikarununu camo.

⁷Do kikom leini kame nyogao nyamo gikame oudo kitieko mwonyo arabo kame abelekek gi okakarun, likame ibinunu camo magi: aguragura, apuo kede enyuru. Bed bala gin kinyogao nyamo cam kame oudo kitieko mwonyo do abelekek gi likame okakarun; kibutu gin kibedo leini kopwokere.

⁸Kur icamunu epege da, pien bed bala en abelekek mere okakarun, do en likame enyogao nyamo cam; kibutu en ebedo le kopwokere. Kur icamunu leini nogi arabo imulunu gi ka kito.

⁹” Kikom giakuo dedede kame bedo i pii, ibinunu camo kame tie kede isigigir kede abokoya,

¹⁰do gi dedede kame bedo i pii di likame kitie kede isigigir kede abokoya likame ibinunu camo; kibutu gin kipwokere.

¹¹” Wun iromunu camo winy dedede kalikame opwokere.

¹²⁻¹⁸Do likame ipoorenu camo magi: ekokom me egere dedede, acut kede winy ace kame cal kede, ebum, etori, agak, ekululu, ekeng me epone apapat, abong, etukiri me epone apapat, atudo me nam, etolut kede winy ace kame cal kede en, kede olikolik.

¹⁹” Giakuo dedede atitino kame kitie kede bwom gi, kibutu gin kibedo gi kopwokere; kur icamunu gi.

²⁰Ikarununu camo giakuo atitino kame tie kede bwom gi do di likame kipwokere.

²¹ “Kur icamunu le moro oto atoa. Iromunu mine but jokumbor kame bedo kede wu di gin kiko came, arabo iromunu cate but jokumbor kobedo wele. Pien wun ibedunu jo ka Rwot Rubanga wu. “Kur itedo ringo me atin diel kede cak ka toto mere.

Iswilia kame mako Kwanyo Acel i kom Tomon

²² “Poore ipokunu tenge acel me tomon me cam kame icokunu ki poti wu buli mwaka.



²³Di ikounu ot kabedo kame Rwot Rubanga wu bino yero pi wun wore iye, ikounu camo ki kunono acel me tomon me kal wu, bwini wu, mo me olibeti wu, karacel kede idwe kao me doke, diegi kede romini wu. Poore itimunu kamanono tetekey ipwonyerenu bedo kede lworu but Rwot Rubanga wu nakanaka.

²⁴Do ka kabedo nono bor twatwal di in likame ikaruno yeno acel me tomon me cam kame Rwot Rubanga ni omii pi tero kunono,

²⁵in iromo cate di iko tero sente kunono.

²⁶Wil jamini kame in imito kede sente nono. Iromo wilo dok, romini, bwini, kongo akec arabo gimoroni kame in imito. Di in kede jo me odi ikounu cam i nyim Rwot Rubanga wu di ilelunu.

²⁷” Kur ijalu Jolebi kame bedo i bomban wu, pien gin kili kede lobo kame opoko negi arabo jamini kame mako gi.

²⁸I atiekini me buli mwaka me adek ibinunu tero acel me tomon me cam kame icokunu i mwaka nono di ikounu kete i dero me bomba wu.

²⁹Cam nono Jolebi en kame bino camo pi gin kili kede lobo arabo jamini kame mako gi, karacel kede jokumbor, idwe kic, kede apuserun kame bedo i bomban wu. Gin kikaruno bino di kiko kwanyo cam kame romo gi. Timunu kamanono di Rwot Rubanga wu ko bino mino wu winyo i gi dedede kame wun itimunu.

Iswilia 15

Mwaka me Kanyaare

(Jolebi 25.1-7)

¹ I atiekini me buli mwaka me kanyaare ibinunu jalo ne jo banyi kame kitie kede.

²Ibinunu timo kaman: ngat acelacel kokopo sente but dano me Isirael wad gi poore jal banya nono; miero kur eburao sente nono, pien Rwot kikome otieko waco be banyi kopoore jalo.

³Iromunu burao banyi wu kame tie but jokumbor, do miero kur iburaunu banyi wu kame tie but jo me Isirael wadu.

⁴” Rwot Rubanga wu bino mino wu winyo i lobo kame en etie mino wu nono. Likame tie ngatamoro kikomu kame bino bedo kede rem me gimoro

⁵ka wun ilubunu kop mere di ikounu keto cunyu gwoko cik mege dedede kame tin ango atie mino wu.

⁶Ka Rwot Rubanga wu otieko mino wu winyo bala kame bin en ecikere pi timo, wun ibinunu kopo sente but atekerin atos, do wun likame ibinunu ot kware but ateker moro; wun ibinunu pugo atekerin atos, do gin likame kibino pugo wu.

⁷ “Ka i bomba wu moro i lobo kame Rwot Rubanga wu tie mino wu, tie iye dano wadu moro me Isirael kame tie kede rem me gimoro, kur ibedunu kede woro di ikounu dagi konye.



⁸Do poore ibedunu kede cuny aber di ikounu mine sente kame romo konye udo gi korem ne.

⁹Poore igwokerenu kur ibedunu kede cuny me woro di ikounu neno dano me Isirael wadu kede wang arac ikounu dagi mine gimoro, be pien mwaka me kanyaare kame kojalo ne kede jo banyi onoko. Ka idagunu kope, en ebino kok i komu but Rwot, di wun ikounu bino bedo kede raco i nyim Rwot.

¹⁰Ka imio omini gimoro, poore imie kede cunyi lung, doko abongo ingungur, pien manono bino mino Rwot Rubanga wu mi winyo i gi dedede kame itimo.

¹¹Bala kame jo kame tie kede rem likame bino tiek kede ki wi lobo, ango aciko wu pi bedo kede cuny aber but jo me Isirael wadu kame jocan kede kame rem tie negi.

Iswil amako Ipasoi

(Yai 21.1-11)

¹²“Ka in iwilo Ngaeburania moro bala epasoit arabo apasoit di eko timo ni tic pi mwakini kanyape, i mwaka me kanyaare mere in ibino gonye di eko ot abongo en mino cul moro.

¹³Kame in igonye, kur iweke eoti kede cinge nono abongo gimoro.

¹⁴Poore imie jamini kede cunyi lung kikom jamini kame Rwot omii: diegi, romini, engano kede bwini.

¹⁵Yutununu be wuda bin ibedunu ipasoi i lobo me Misiri, di Rwot Rubanga wu oko lako wu; manono en komio ango tin atie mino wu cik noni.

¹⁶” Do ka en eko waco ni be, ‘Ango likame abino weki, ‘piento en emari karacel kede jo me odi, pi kite kame iterenu kede kiber,

¹⁷in ibino mine ecungo i nget ekeko me odi di in iko tuco del me yite, di en eko doko epasoit nin atwal. In ibino timo kamanono da kede apasoit ni.

¹⁸Kur iterunu be etie peko butu ka igonyunu ipasoi wu, pien gin kibedo timo ne wu tic pi mwakini kanyape i wel me cul kame tie dul me sente kame koculo kede epakasit. Timunu kamanono di Rwot Rubanga wu ko bino mino wu winyo i gi dedede kame itimunu.

Idwe Kao me Diegi, Dok, kede Romini

¹⁹ “Pokunu tenge ne Rwot Rubanga wu idwe kao me doke, diegi kede romini wu; kur itimunu tic moro kede doke nogo akadi romini da kur inyarunu yer gi.

²⁰Wun kede jo me ude wu ibinunu camo gi i nyim Rwot Rubanga wu i kabedo kame Rwot oyeru me jo wore iye.

²¹Do ka tie gimoro arac kede le nono, ka engwalo arabo wange oto amoto etie kede peko moro adwong i kome, likame ibinunu yale but Rwot Rubanga wu.

²²Wun iromunu camo le kame cal kamanono i paco. Jo dedede romo came, arabo kipwokere amoto li, bala kame icamunu kede atil arabo amiem.



²³ Do kur icamunu remo gi, poore ionyunu gi piny bala pii.

Iswilia 16

Ebaga me Kalamo

(Yai 12.1-20)

¹ “Tedunu Ebaga me Kalamo i duwe me Abib pi mino Rwot Rubanga wu wor, pien i duwe nono en kame Rwot Rubanga wu okwanyo wu kede iwor ki Misiri.

²Ibinunu ot kabedo kame Rwot Rubanga wu oyeru me wore di ikounu ngolo oromo, diel arabo diang wu bala giayala but Rwot Rubanga wu.

³Miero kur icamenu kede mugati moro kame arup tie iye. Ibinunu camo mugati kame kotimo abongo arup pi ceng kanyaare, mugati kame kolwongo be mugati me neno can, pien bin wun iyaunu ki Misiri awakawaka. Ibinunu timo kamanono tetekeny pi kare me kuo wu lung ibedunu di iyutununu ceng kame bin iyaunu kede ki lobo me Misiri.

⁴Arup moro kur bed tie i lobo wu dedede pi ceng kanyaare; doko kur ringo moro me le kame ingolunu otieno me ceng me agege but tuno odiko.

⁵” Miero kur ingolunu giayala moro me Ebaga me Kalamo i kabedo moro me bomban wu kame Rwot Rubanga wu tie mino wu.

⁶Do poore ingolenu i kabedo kame Rwot Rubanga wu bino yero me wore. Kanono kenekene en kame poore ingolunu iye giayala me Ebaga me Kalamo, otieno di ceng tie donyo, manono en esawa kame bin wun iyaunu kede ki Misiri.

⁷Tedenu di ikounu came i kabedo kame Rwot Rubanga wu bino yero; oru mere di ikounu dok i miere wu.

⁸Ibinunu camo mugati kame kotedo abongo arup pi ceng kanyape, di i ceng me kanyaare mere ikounu cokere pi woro Rwot Rubanga wu, doko kur itimunu tic moro i ceng nono.

Ebaga me Kac

(Yai 34.22; Jolebi 23.15-21)

⁹ “Ibinunu maro sabitin kanyaare cako i ceng kame igeunu kede kac,

¹⁰di ikounu tedo Ebaga me Kac pi mino wor but Rwot Rubanga wu. Ibinunu kelo but Rwot giamia bala kame cunyu mito di lubere kede winyo kame en etieko mino wu.

¹¹Bedunu kede kilel i nyim Rwot Rubanga wu, wun karacel kede idwe wu, ipasoi kede apasoi wu, Jolebi kame bedo i bomban wu, jokumbor, idwe kic kede apuserun kame bedo kede wu. Timunu manoni i kabedo kame Rwot Rubanga bino yero me wore.

¹²Yutununu be wuda bin ibedunu ipasoi i Misiri, aso miero iketunu cunyu lubo cik nogi.

Ebaga me Kimere

(Jolebi 23.33-43)



¹³ “Poore itedunu Ebagame Kimere pi ceng kanyaare i kare kame itiekunu koko kede cam wu ki poti, kede ka itiekunu biino olok wu.

¹⁴ Bedunu kede kilel i ebagame nono, wun karacel kede idwe wu, ipasoi kede apasoi wu, Jolebi, jokumbor, idwe kic, kede apuserun kame bedo i bomban wu.

¹⁵ Tedunu ebagame noni pi ceng kanyaare pi mino wor but Rwot Rubanga wu, i kabedo kame en ebino yero. Poore ibedunu kede kilel pien Rwot Rubanga wu bino mino wu winyo i cam dedede kame ipurunu kede i gi dedede kame wun itimunu.

¹⁶” Cuo dedede kame tie i diere wu poore ot tien adek buli mwaka, pi woro Rwot i kabedo kame en ebino yero. Poore kiote i kare magi: i kare me Ebagame Kalamo, i kare me Ebagame Kac, kede i kare me Ebagame Kimere. Likame kibino ot i nyim Rwot kede cing gi nono;

¹⁷ ngat acelacel bino tero giamia mere bala kame en ekaruno, di lubere kede winyo kame Rwot otieko mine.

Apugan Kopooore

¹⁸” Poore iyerunu jotel kede jotic kame konyo gi kikom jo me ikekon wu dedede, i bomban dedede kame Rwot Rubanga wu tie mino wu. Gin poore kingol kope ne jo kakare.

¹⁹ Gin miero kur kitotolo ngolo kop kakare, arabo kinyut apokapoka but jo; doko miero kur kiyei gamo cemusana, pien cemusana umo wang jo, kiton wang jo ariek di eko mino gi likame kingolo kop kakare ne jo kame li kede raco moro.

²⁰ Timunu ne jo gi dedede i yore kopooore, tetekeny igamunu lobo kame Rwot Rubanga wu tie mino wu di ikounu dong bedo iye.

²¹ “Kame itimunu alutari ne Rwot Rubanga wu, kur isipunu epi moro me yat me woro rubanga Asera i ngete.

²² Doko kur isipunu kidi moro me awora, pien Rwot Rubanga wu dagi gi.

Iswilia 17

¹” Miero kur iyalunu but Rwot Rubanga wu twon arabo oromo kame tie kede peko moro i kome, pien manono Rwot Rubanga wu dagi.

²” Ka cengemoro ibinunu udo dano moro i diere wu, dako arabo icuo, kame tie i bomba wu moro kame Rwot Rubanga wu tie mino wu, kame timo gikarac i nyim Rwot Rubanga wu, doko di eturo isikan mere

³ di eoto timo tic ne rubangan apat doko eworo gi arabo eworo ceng, duwe amoto acerin, gikame cik ka Rwot gengo,

⁴ ka iwinyunu kop kame cal kamanono, ngingicunu en kiber. Ka etie kop me ateni be gikarac noni tie timere i Isirael,



- ⁵ibinunu tero dano kotimo gikarac nono ooko i erute di ikounu didipo en kede kide tuno neke.
- ⁶ Kobino neko dano nono ka ijurak are arabo adek omio ijura i kome; miero kur konek dano moro pi kop me mujura acel kenekene.
- ⁷ Ijurak en kame bino cako lwomo kidi me dipo dano nono, di do jo apat dedede ko lubo; kite nono en kame ibinunu kwanyo kede gikarac noni ki diere wu.
- ⁸” Ka okelo i ekiko wu kope me pido mogo atek, kalikame ngangolkop me bomba wu karuno ngolo, bala kope kame mako nek kame kopelauno timo kede nek me akangas, kope kame mako poko jamini arabo kope me asurasura, poore iterunu gi kabedo kame Rwot Rubanga wu bino yero me wore.
- ⁹Terunu kope nogo but josaseredoti, gin Jolebi kede but ngangolkop kame tie i wang tic i kare nono, di gin kiko ngolo ne wu kop nono.
- ¹⁰Miero wun itimunu gi dedede kame gin kibino waco ne wu.
- ¹¹Miero itimunu gikame gin kiwaco di lubere kede kite kame gin kigonyo ne wu kede iswil, arabo iyeunu kop kame gin kingolo; kur iparaunu tenge kiye.
- ¹²Ngatamoro kame mito timo epali me dagi lubo kop me ngangolkop arabo kop me ngasaseredoti kame tie i wang tic ka Rwot Rubanga wu, miero neke. Ibinunu kwanyo rac noni i Isirael iepone noni.
- ¹³Jo dedede bino winyo gikame kotimo nono di kiko bedo kede lworu, doko likame tie ngatamoro kame ko bino bobo timo epali kacal kamanono.

Kope amakere kede Abaka

- ¹⁴ “Kame wun do itiekunu tuno i lobo kame Rwot Rubanga wu tie mino wu, di itiekunu mane ikounu donyo bedo iye, di do ikounu mito bedo kede abaka bala atekerin apat koluko wu,
- ¹⁵miero inenunu be abaka kame ibinunu keto pi pugo wu obedo dano kame Rwot Rubanga wu en koyero. Ngat kame ibinunu keto nono miero bed dano wu kikokome; kur iketunu ngakumbor pi bedo abaka wu.
- ¹⁶ Akadi kamanono da, abaka miero kur bed kede asigiran amake kame tot, arabo edwok jo Misiri pi ot wilo asigiran; pien Rwot otieko waco be jo mege likame bobo bino dok kunono.
- ¹⁷ Abaka miero kur dur mon atot, pien manono romo loko cunye tenge kibun Rwot; doko da miero kur ebar twatwal.
- ¹⁸Kame en do etieko bedo i wi kom mere me ajakanut, en miero ebed tie kede itabu me iswilia ka Rubanga, kame kowandiko ne di cal kede gikame tie i itabu me iswilia kame josaseredoti Jolebi en kame gwoko.



¹⁹En ebino bedo kede itabu nono di esome pi kare me kuo mere lung, tetekeny epwonyere lworo Rwot Rubanga mere, di eketo cunye lubo kope dedede me iswilia kede cik nogo.

²⁰Manoni bino mino likame etingere bala en eber kalamo jo icegun me Isirael, doko likame eko bino parao tenge ki lubo cik ka Rwot. Di en kede ikwae mege kiko bino pugo Isirael pi kare alac.

Iswilia 18

Iner Amako Josaseredoti

¹” Josaseredoti Jolebi, Jolebi dedede likame bino bedo kede iner moro me lobo me Isirael. Gin kibino kuo kede giamia kede giayala kame komio Rwot.

² Gin likame kibino bedo kede lobo kobedo mergi amako gi bala jo me ikekon apat; girgi amako gi en bedo josaseredoti ka Rwot, bala kame Rwot otieko cikere kede.

³” Kame kotie mino giayala me diang amoto oromo, kopooore mino josaseredoti ekwakwa, itinyo kede jamini me yie bala iner gi.

⁴Doko da kopooore mino gi engano acako cek i poti, dul me agege me bwini, me mo me olibeti, kede yer me romini kame konyaro me agege.

⁵Pien Rwot Rubanga wu oyeru Jolebi kikom jo me ikekon apat dedede pi bedo jo kame timo nen tic bala josaseredoti pi kare lung.

⁶” Ka Ngalebi moro oyai ki bomba wu moro me Isirael, di eko ot karamoro kame Rwot oyeru ne, kakame cunye omito,

⁷en etwero timo tic mere ki kanono bala ngasaseredoti ka Rwot, bala Jolebi apat kame timo tic gi kanono.

⁸Eda ebino udo cam arom aroma kede josaseredoti apat, do etwero gire kano gikame jo me ture cwao ne.

Ikwenyar i kom Lubo Tim me Atekerin Apat

⁹” Kame itununu i lobo kame Rwot Rubanga wu bino mino wu, likame ipoorenu lubo tim ingorijij me atekerin atie kunono.

¹⁰ Likame ngatamoro kibusu poore wango wode amoto nyare kede mac bala giayala, arabo tic kede teko me yamere pi tuco kope me anyim, arabo lamo gagi, arabo ngingico jamini mogo di eko tuco ne jo winyo aber amoto arac kame kitie kede, arabo timo tim me jwok,

¹¹ arabo uco ilwitia i kom jo, penyo yamere amoto jwogi, arabo penyo tipere me jo oto.

¹²Ngat kame timo akodi gi nogi cuny Rwot likame mito neno; tim ingorijij nogo en komio Rwot Rubanga wu tie riamo atekerin apat ki kakame wun itienu ot iye.

¹³ Poore ibedunu jo kame winyo dwan Rwot Rubanga wu atwal atwala.”



Cikere me Cwano Enabi

¹⁴Musa oko waco be, “Atekerin kame wun iyapununu lunyo lobo gi pi bedo meru lubo kop me jo kame tio kede teko me yamere pi tuco kope me anyim, kede kope me jo angingico jamini mogo di kiko tuco ne jo winyo aber amoto arac kame kitie kede, do Rwot Rubanga wu likame yei ne wu timo gi nogi.

¹⁵Do en ebino cwano ne wu enabi kacal bala ango, kowok ki diere me jo wun; wun ipoorenu winyo kop mere.

¹⁶” I ceng kame oudo icokerenu kede i moru me Sinai, wun bin ikounu kwano be likame bobo imitunu medo winyo dwan Rwot Rubanga wu, akadi neno mac me tie mere, pien oudo itienu kede lworu be manono bino mino itounu.

¹⁷Aso, Rwot oko waco nango be, ‘Gikame gin kipenyo tie kakare.

¹⁸Ango abino cwano negi enabi kame cal bala in, kame bino wok ki diere me jo gin; ango abino keto kope na i dog enabi nono, di en eko bino yamo ne jo gi dedede kame ango acike iye.

¹⁹En ebino yamo i nyinga, do ngat kalikame bino winyo kop mere, ango abino mine alola.

²⁰Do enabi moro kame bino yamo i nying rubangan apat, arabo kame bino cuko waco kop moro i nyinga do di udo likame ango acike iye, enabi nono bino to.’

²¹” Cengemogo wun ibinunu penyere be, ‘Benyo benyo kame wan osobolo ngeno kede kope kalikame Rwot en kowaco?’

²²Wun ibinunu ngeno gi kaman: ka enabi moro owaco kop moro i nying Rwot, do di kop nono likame oko cobere, manono udo likame obedo kop kame Rwot en owaco, enabi nono udo opwakuno kop nono kede wie kene, kur ibedunu kede lworu iye.

Iswilia 19

Bomban kame Jo Ringo Ot Gwokere iye

(Wel 35.9-34; Yosua 20.1-9)

¹ Kame Rwot Rubanga wu otieko muducaro atekerin kame en ebino mino wu lobo gi, di do wun ikounu lunyo bedo i bomban kede i ude gi,

² ibinunu poko bomban adek i lobo kame Rwot Rubanga wu bino mino wu pi doko meru.

³ Ibinunu maro tien me lobo nono di ikounu poke i adulion adek, di dul acelacel ko bedo tie kede bomba moro kiyapiyapi kede jo mege, tetekeny ngatamoro koneko dano twero ringo ot gwokere iye.

⁴ Ka ngatamoro oneko dano kalikame lem edingere kede i akangas, en etwero ringo ot gwokere i bomba acel kikom magonogo.



⁵Opor be, ka jo are ooto tongo yen i abum, di ngat acel oko wiro le pi koto tongo yat, di wi le oko pute ki pur mere di eko dipo dano ocelu di eko to; nganek nono twero ringo i bomba acel kikom magonogo pi laro kuo mere.

⁶Do ka bomba tie acel kenekene atie kakabor, manono bino mino ngacul kwor me dano kame koneko nono bino wapo nganek kede twon gero, di cengemogo eko make i yongayo di eko neke. Aso di dano nono likame poore aneka, piento lem en likame edingere kede dano kame eneko nono, manono gire obedo akangas.

⁷Pi manono, ango aciko wu be, pokunu bomban adek pi kop nono.

⁸” Ka Rwot onyao lobo wu, bala kame bin ecikere kede but joakwari wu be ebino timo, di eko mino wu lobo lung kame bin en ecikere but joakwari wu be ebino mino wu,

⁹ibinunu doko medo yero bomban adek. En ebino mino wu lobo nono ka wun ilubunu kiber cik dedede kame tin ango atie mino wu, kede ka wun imarunu Rwot Rubanga wu di itimunu gikame en emitu.

¹⁰Ibinunu medo bomban nogo tetekeny kur konek jo kalikame tie kede raco moro i lobo kame Rwot Rubanga wu bino mino wu pi doko meru, pien manono bino mino ibedunu tie kede raco me timo nek.

¹¹” Do ka dano dingere kede ngatamoro, di eko ot pwono kure di eko sure paka neke, di eko ringo ot gwokere i bomba acel kikom magonogo,

¹²joadongo me bomba me nganek nono lem bedo iye bino mino ooto ome di oko mine i cing jo kame poore culo kwor me dano kame en eneko, tetekeny konek eda.

¹³Kur inyutenu cuny me kisa; ipoorenu kwanyo raco ki lobo me Isirael, raco me onyo remo me dano kalikame tie kede kop moro, tetekeny gi dedede bed ne wu kiber.

Ikor Kasek

¹⁴ “I lobo kame Rwot Rubanga wu bino mino wu, likame ipoorenu nyiko kide kame joakwari otieko cibo me poko ikor me lobo me dano acelacel kede ngakio mere.

Iswilia amako Mino Ijura

¹⁵ “Mujura acel kenekene likame twero mino kowaco be ateteni dano otimo gimoro arac; miero ijurak are arabo adek en amok kop nono.

¹⁶Ka dano moro acunye rac omio pido me abe i kom ngawote,

¹⁷gin jo are nogo dedede atie kede piem kibino ot i nyim Rwot, i nyim josaseredoti kede jongolkop atie i wang tic i kare nono.

¹⁸Jongolkop bino ngingico kop nono odocon; ka kiko udo be dano nono otero pido me abe i kom dano me Isirael ngawote,

¹⁹kopoore mino dano ngapido me abe nono alola kame oudo koto kopoore mino dano kame en epido, ka koto kop oloe. Epone nono en kame ibinunu kwanyo kede raco nono i diere wu.



²⁰Jo apat bino winyo di lworu ko mako gi, di likame bobo ngatamoro kikomu ko bino timo gi kacal kamanoni.

²¹Kur inyutenu cuny me kisa: kuo koculo kede kuo, wang koculo kede wang, lak koculo kede lak, tien koculo kede tien.

Iswilia 20

Iswilia amako Yi

¹” Ka iotunu pi yi kede jokwor wu, di ikounu neno asigiran kede cabalan me yi, kede isirikalen atos kalamo megu, kur ibedunu kede lworu i kom gi; pien Rwot Rubanga wu tie kede wu, ngat kame bin owoto wu ki lobo me Misiri.

²Di pwodi likame icakunu yi, ngasaseredoti bino ot anyim di eko ber yamo kede isirikalen.

³En ebino waco negi be, ‘Winyunu wun jo me Isirael! Tin wun iyarunu yi kede jokwor wu. Kur cunyu poti, doko da kur ibedunu kede lworu amoto mielkom pirgi.

⁴Pien Rwot Rubanga wu tie upere kede wu; en ebino yi kede jokwor wu piru di eko mino wu ibwonunu gi.’

⁵” Di jodongo me isirikalen ko waco negi be, ‘Benyo, tie ngatamoro apwodi ogero ode nyen? Poore edok paco mere pien cengemogo etwero to i yi di dano apat en kame ko bino timo itok me kwero ode nono.

⁶Benyo, tie ngatamoro kopuro olok do pwodi likame ebilo camo anyakini mere? Poore edok paco mere pien cengemogo etwero to i yi di dano apat en kame ko lunyo cako camo anyakini me olok mere.

⁷Benyo, tie ngatamoro konero dako do pwodi likame enyomo? Poore edok paco mere, pien cengemogo etwero to i yi di dano apat en ako bino nyomo dako nono.’

⁸” Jodongo nogo doko da bino meede waco ne isirikalen be, ‘Benyo tie ngatamoro alwor arabo kame kome otieko to? Poore edok i paco mere, pien cengemogo ebino mino kom jowote da to bala mere.’

⁹Kame jodongo me isirikalen otieko yamo kede isirikalen, jotel me ikodeta atitino me isirikalen bino cako tic gi.

¹⁰” Ka iotunu pi yi i bomba moro di ikounu noke, ber kong cakunu cwano negi kop amako gin rieno cing gi abongo yi moro timere.

¹¹Ka gin kiko yei kop me anapakin kame wun icwaunu negi, di kiko rieno cing gi, jo dedede me bomba nono bino doko mabus butu di ikounu donyo dino gi tetek timo ne wu tic.

¹²Do ka gin kidagi jalere butu i yore me mulem, di kiko cako yi kede wu, wun ibinunu lukaro bomba nono di ikounu sure.

¹³Ka Rwot oko mino bomba nono i cingu, ibinunu neko cuo dedede atie iye.



¹⁴Do itwerunu tero mon kame imakunu, idwe, doke kede jamini apat dedede kame iyakunu. Ibinunu yomo cunyu kede jamini kame iyakunu kibut jokwor wu, jamini kame Rwot Rubanga wu omio wu.

¹⁵Gi noni en kame ibinunu timo i kom bomban atie kakabor kede lobo kame wun itienu ot bedo iye.

¹⁶” Do ka imaunu bomba moro i lobo kame Rwot Rubanga wu tie mino wu pi bedo meru, ipoorenu neko gi dedede awei.

¹⁷Ipoorenu neko pitipit jo dedede kame tie i bomban nogo bala kame Rwot Rubanga wu otieko ciko: jo Kiti, jo Amor, jo Kanan kede jo Perisi, jo Kibi kede jo Yebu.

¹⁸Timunu kamanoni tetekeny gin kur kipwonyu timo gikame neno rac kame gin kitimo i esawa me woro rubanga gi, di manono ko mino itimunu dub but Rwot Rubanga wu.

¹⁹” Ka ilukarunu bomba moro, di itienu yi pi mito mane, kur itotongunu yen anyako anyakini, akadi bed bala yi nono otero kare alac. Wun camunu anyakini gi do kur itotongunu gi, pien yen likame obedo jo me tetekeny ilukarunu gida.

²⁰Itwerunu gire dudubo yen kalikame kocamo anyakini gi; itwerunu totongo gi me gero madala me yito kalamo apama pi donyo mako bomba kame tie yi kede wu, tuno wun mane.

Iswilia 21

Kop i kom Nek kame Ngat Kotimo likame Ngere

¹” Ka oko udo dano moro kame koneko i lobo kame ango abino mino wu, do di likame ingeunu dano koneke,

²joadongo wu kede jongolkop bino ot di kiko pimo boro me piny yai ki kakame nek otimere iye ot i buli bomba kiyapiyapi kanono.

³Di do joadongo me bomba kiyapiyapi kede kanono kalamo bomban apat ko kwanyo roya atakit kalikame pwodi kotweo i ayoko,

⁴di kiko tere osamai amol di likame edwono, kabedo kalikame pwodi kopuro amoto pito iye gimoro, di gin kiko bino turo ngut atakit nono i dog osamai kunono.

⁵Di do josaseredoti Jolebi ko ot kunono gida, pien Rwot Rubanga wu oyero gin pi timo nen tic kede pi kwano ne jo mulem; kope dedede me piem kede asura gin en kame kitieko.

⁶Di joadongo dedede me bomba kiyapi kede kakame nek otimere iye nono ko bino lwoko cing gi i kom atakit kame koturo ngute osamai nono,

⁷di kiwaco be, ‘Likame wan en kame oneko dano noni, doko da likame oneno di kotie neke.



⁸Okwe Rwot, sasiro jo ni me Isirael, jo kame bin ilako ki Misiri; kur iwek i wi wa raco me onyo remo me dano ali kede raco moro.’

⁹Aso, ka itimunu gikame Rwot mito, likame kobino maro remo me nek nono i wi wu.

Kop i kom Mon kame Komako ki Yi

¹⁰” Ka wun iotunu i yi kede jokwor wu di Rwot oko mino gi i cingu, di ikounu mamako gi,

¹¹di in icuo moro iko neno i kom mabus nogo dako moro acil kame cunyi wai nyomo,

¹²in ibino tero dako nono turi, di dako nono ko lielo wie, eko kulo lwete,

¹³kede eko loko igoen kame komake kede. En ebino bedo turi di eko koko papa mere kede toto mere pi duwe acel; ingei manono in ikaruno do mine edoko dako ni.

¹⁴Do ka i cen mere cunyi oko kwanyere ki kome, in ibino jale eoto abongo in gamo cul moro. Likame ipoore tere bala apasoit, pien in idwoko dwongo mere piny.

Twero me Atin Kao

¹⁵” Ka icuo tie kede mon are, do di acel en kame emaro kibun gi, di gin dedede kiko nywalo idwe awobe, do di awobi kao oko bedo me dako kalikame komaro,

¹⁶ka ceng oko tuno me en popoko jame mege but awobe mege, en miero kur elengere but awobi me dako kame en emaro di eko mine iner me jame kame atin kao poore tero, en wot ka dako kalikame cunye maro.

¹⁷Miero en eyei be wot ka dako kalikame cunye maro en obedo awobi kao; epoore mine iner adwong kalamo, bala kame awobi kao poore udo, piento en ebedo kao mere, twero me atin kao obedo mere.

Kop amako Awobi kalikame Wor

¹⁸” Ka ngatamoro tie kede wode angaepali kede angajemo, awobi kalikame winyo jonywal mege akadi di kimie alola,

¹⁹jonywal mege bino make di kiko tere i bomba kame en ebedo iye, di kiko pide i nyim joadongo me bomba nono i ekiko abedo i erute me bomba.

²⁰Gin kibino waco ne joadongo me bomba nono be, ‘Wod wa ni ngaepali doko engajemo; etieko dagi winyo kop wan. En etieko doko ngacam doko en engamera.’

²¹Di do jo dedede me bomba ko bino didipo en kede kide tuno to. Manono bino mino ikwanyunu tenge raco noni ki diere wu; jo dedede me Isirael kame bino winyo bino bedo kede lworu.

Iswilia Ace

²²” Ka komako ngatamoro pi tim arac kamio kopoore neke, di oko neke, di ikounu liero kome i kor yat,



²³ likame liel mere poore dong iwor kiakia i kor yat nono; ipoorenu yike cenge nono, pien dano oto kame liero i kor yat kelo ilam ka Rubanga. Kur imunaununu lobo kame Rwot Rubanga wu tie mino wu pi bedo meru.

Iswilia 22

¹ “Ka ineno diang amoto oromo me dano wadu me Isirael di orwenyo etie ot atatai, kur iweke aweka, make iko tero ne wone.

² Do ka wone bedo kakabor kedi, arabo ka likame ingeo wone, in ibino tere turi di iko kure tuno wone udere di iko dwoko ne.

³ Ibino timo kamanono da ka iudo punda, amoto egoe, amoto gimoro dedede kame dano wadu me Isirael orwenyo; kur idagi timo kony.

⁴” Ka diang amoto punda ka dano wadu me Isirael opoto piny, kur inene anena, kony wone kiarao en.

⁵” Mon likame poore ngapo igoen me cuo, doko da likame cuo poore ngapo igoen me mon, Rubanga cunye dagi jo acal kamanono.

⁶” Ka iudo ot me winyo i wi yat arabo piny i lobo, di winyo tie rukumo idwe mege arabo di etie buto i abeon mege, kur imak winyo nono karacel kede idwe mege.

⁷ Itwero tero idwe winy, do kur iter toto gi, weke eoti tetekeny gi dedede bed ni kiber di iko bedo kuo pi kalac.

⁸” Ka igero ot anyen, ger apama agalao wi ot kat malo; manono bino mino ka ngatamoro opoto ki wi odi di eko to, likame kop me to mere bino maki.

⁹ “Likame ibino puro olok karacel kede kodi ace apat i pototo acel; ka in itimo kamanono ibino jalo olok karacel kede kodi nono dedede.

¹⁰” Likame ibino tweno twon karacel kede punda i ayoko acel pi pur kede gi.

¹¹” Likame ipoore ngapo egoe kame kotimo kede ausin are apat, ausi acel kobedo yer me oromo kede apat kobedo ausi me egoe aliamaliam.

¹² “Ipoore kuno eula i isondana ongwon me ekanso ni.

Iswilia amako Buto me Icuo kede Dako

¹³” Ka icuo onyomo dako di i cen mere eko lokere dage ingei en buto kede dako nono,

¹⁴ di eko donyo dubo nyinge kede pido me abe di ewaco be, ‘Ango anyomo dako noni, do kakame abuto kede, likame ako udo gikame nyuto be en ebedo nyako kalikame pwodi ongeo icuo.’

¹⁵ Ka manoni otimere, papa me nyako nono kede toto mere bino tero esuka me nyom kame remo opwoko but joadongo me bomba, i ekiko abedo i erute me bomba; manono bino bedo gikame nyuto be nyako nono oudo likame pwodi ongeo icuo kakame enyomere kede.



16Papa me nyako nono bino waco ne joadongo be, ‘Ango amio icuo ni nyara eko nyomo, do nan elokere dagi nyako noni.

17En etieko kelo pido me abe i kom nyako noni di ewaco be nyako noni oudo otieko cako buto kede icuo kakame en enyome kede. Do tie gikame nyuto be nyako ni oudo pwodi likame obuto kede icuo; wuda nenunu remo atie i esuka me nyom! ‘

18Joadongo me bomba nono ko bino tero icuo nono di kiko dane.

19Gin kiko bino tange sekel tol acel me siliba, di eko culo but papa me nyako nono, pien udo en edubo nying nyako me Isirael konyomere di pwodi likame ebilo buto kede icuo moro. Nyako nono bino dong dako mere; likame kobino yei ne pokere kede nyako nono i kare me kuo mere lung.

20” Do ka pido mere nono obedo kop me ateni, di likame tie gimoro atwero nyuto be nyako nono oudo pwodi likame ongeo icuo kakame konyome kede,

21gin kibino tero nyako nono i ekeko me ot ka papa mere di cuo me bomba ko didipo en kede kide tuno to, pien udo en etimo gi me lewic i Isirael i yore me en buto kede icuo di likame pwodi konyome. Manoni en epone kame ibinunu kwanyo kede gikarac noni ki diere wu.

22” Ka komako icuo di etie buto kede dako me icuo ace, kopooore neko gin dedede. Manoni en epone kame ibinunu kwanyo kede gikarac noni ki Isirael.

23” Ka kotieko nero nyako moro pi nyomo, di icuo moro oko riamo kede i bomba di oko buto kede, ka komako gi,

24ibinunu tero gin dedede i erute me bomba di ikounu didipo gi kede kide tuno to; kobino didipo dako piento en edagi gono duru; kobino didipo icuo piento en ebuto kede dako kame kotieko nero pi nyomo. Manoni en epone kame ibinunu kwanyo kede gikarac noni ki diere wu.

25” Do ka icuo oriamo kede dako kame konero pi nyomo obar kakoling, di do en eko make di eko buto kede tetek, mano bino mino koneko icuo kenekene.

26Likame ibinunu timo ne nyako nono gimoro, pien likame etimo gimoro apoore mino koneke; pido noni cal bala me ngat kosuro dano ace di eko neko.

27Kite kame ebuto kede nyako nono tetek i itela kakame jo li iye, akadi di nyako nono oudo ogo duru, likame tie dano kame oudo twero konye.

28 “Ka icuo oriamo kede nyako apwodi lem likame ongeo icuo di eko make tetek di eko buto kede, kame oko mako gi

29icuo kobuto kede nono bino culo papa me nyako nono sekel ot kany me siliba, di eko tero nyako nono doko dako mere. Etie kamanono piento en ebuto kede nyako nono tetek. Likame iswil yei ne pokere kede dako mere nono tuno to.

30 “Likame icuo moro poore buto kede dako ka papa mere di eko kelo ne papa mere lewic.”



Iswilia 23

Jo kalikame Poore Amara i kom Jo ka Rwot

- ¹Musa oko meede kede mino iswilia be, “Likame tie icuo moro kame nyige mane oloi arabo kame mane ongol kame kopooore maro i ekodet me jo ka Rwot.
- ²” Dano kame konywalo di papa mere kede toto mere likame onyomere iepone kame komito, likame kobino maro i ekodet me jo ka Rwot, akadi kiton ikwae kede ikwae gi tuno i kom ikwae me tomon da.
- ³ “Likame tie dano moro me Amon amoto me Moab kame kobino maro i kom ekodet me jo ka Rwot, akadi kiton ikwae kede ikwae gi tuno i kom ikwae me tomon da,
- ⁴ pien bin gin kidagi mino wu cam kede pii i kare kame bin iyaunu kede ki Misiri di itienu ot; doko da medo i wi manono, gin kiko pango Balaam wot ka Beor, dano me Petor, en bomba atie Mesopotamia, pi lamo wu.
- ⁵ Do Rwot Rubanga wu oko dagi winyo kop ka Balaam; Rwot Rubanga wu oko lokere mino wu winyo akaka lamo wu, pien Rwot oudo maro wun.
- ⁶Kur itimunu gimoro kame bino konyo arabo mino atekerin nogi mulem.
- ⁷” Kur idagunu jo me Edom, pien gin kibedo joawade wu; doko da kur idagunu jo me Misiri, pien bin wun ibedunu i lobo gi di wun jokumbor.
- ⁸Kotwero maro i kom ekodet me jo ka Rwot ikwae gi cako ki kom ikwae me lwak me adek.

Gwoko Kabedo me Isirikalen di Cil i Nyim Rwot

- ⁹” Ka iotunu pi yi kede jokwor wu, miero inenunu be kakame igerunu iye kimere wu obedo di li kede pwokere moro i nyim Rwot.
- ¹⁰Ka icuo moro oleko iwor di eko onyo kwir mere me icuo, di do eko doko dano kopwokere, miero eyai di eko ot tenge me kakame kimere tie iye. Likame epoore dwogo kakame kimere tie iye.
- ¹¹Kame piny oyuto, en eko bino bol di do eko dok kakame kimere tie iye ka ceng odonyo.
- ¹²” Ipoorenu bedo kede karamoro tenge me kimere kame itwerunu ot konyere iye.
- ¹³Isirikalen bino mako esululu bala gi acel kikom jamini kame gin kiupere kede i kom gi. Kame dano mito ot obar, en ebino kunyo piny kede esululu di eko umu bur nono kame etieko ot obar.
- ¹⁴Gwokunu kakame kimere wu tie iye bed di cil i nyim Rwot, pien Rwot Rubanga wu tie kede wu i kimere wu pi gwoko wu kede pi mino wu bwono jokwor wu. Kur itimunu gimoro kalikame poore kame bino mino Rwot lokere tenge kibutu.

Iswilia Ace



15” Ka epasoit moro olwi kibun ngadwong mere i piny me kumbor di eko bino gwokere butu, kur idwokenu but ngadwong mere.

16Gin kikaruno bedo i bomba moro kenekene kame cuny gi oyeri i diere wu; likame ipoorenu tero gi kirac.

17 “Likame ngatamoro kibutu, icuo amoto dako, poore doko malaya kame buto kede jo i tempulo.

18Sente kame koculo but dako malaya pi buto kede, arabo kame koculo but icuo pi buto kede, likame kopooore tero i ot ka Rwot Rubanga wu pi cobo cikere kame dano oudo omio.

19 “Ka ikopo sente amoto cam arabo gimoro ace but dano me Isirael wadu, kur imie ecul gi nono kede bobo magoba i wie.

20Ka ikopo gimoro but ngakumbor, itwero mine eculo gi nono kede magoba i wie, do ka ikopo but dano me Isirael wadu, likame ipoore mine culo gi nono kede bobo magoba i wie. Ka ilubunu cik noni, Rwot Rubanga wu bino mino winyo i gi dedede kame itimunu i lobo kame ibinunu donyo di ikounu bedo iye bala meru.

21 “Ka isikano pi mino amoto timo ne Rwot Rubanga ni gimoro, kur imed kare me cobo cikere ni, pien Rwot Rubanga ni ateteni mito be icobe; ka likame iko cobe udo itimo dub.

22Do ka likame itimo cikere moro but Rwot, udo likame tie raco moro kame iyaro bedo tie kede.

23Gi dedede kame dogi yamo abongo adiadia moro miero icob gi.

24” Ka idonyo i potu me olok ka ngatamoro, in itwero camo anyakini me olok tuno romi, do likame ipoore rwako mogo i isau pi tero.

25Ka idonyo i potu me bel ka ngatamoro, itwero gigitu wite kede cingi pi nginyo nyige mege me amwoda, do likame ipoore ngolo wi bel moro kede pala.”

Iswilia 24

Gonyo Nyom kede Medo Nyomere

1 Musa oko Meede kede mino iswilia kaman. “Ka dano moro onyomo dako di do i cen mere dako nono likame oko yomo cunye, pien tie gimoro arac kame en eudo i kom dako nono; aso di do en eko wandiko ne baluwa me riame, di eko mine baluwa nono i cinge, di do eko riame ki ture,

2ka dako nono oko ot di eko nyomere kede icuo ace,

3di icuo nono da bobo cunye oko daga dako nono, di en eko wandiko ne baluwa me riame, di eko mine baluwa nono i cinge, di do eko riame ki ture; arabo oter be cware me are oko to.



⁴Akodi dako nono cware me agege ca likame doko sobolo dwoke pi doko dako mere, pien udo dako nono otieko pwokere; manono obedo gikame Rwot dagi. Likame ipoorenu munao lobo kame Rwot Rubanga wu bino mino wu kede dub kacal kamanono.

Iswilia Ace

⁵” Ka icuo pwodi onyomere anyoma, likame kopooore cwane tenge ot i yi, arabo ot timo tic moro ace me abumentu. Miero kong weke ebed paco pi mwaka acel pi yomo cuny dako mere.

⁶” Ka ikopao giri moro but dano moro, kur imie esingao kidi mere me riego alos, pien manono udo icego ne yongayo kame epooore kuo kede.

⁷ “Ka komako ngatamoro di okwalo dano wad gi me Isirael di eko tere ot bedo epasoit, arabo di eko cate bala epasoit, ngat nono kopooore neko. Epone noni en kame ibinunu kwanyo kede gikarac acal kamanono ki diere wu.

⁸ “Ka ngatamoro tie kede tuwo arac me delkom, miero enen be etimo gi dedede kame ngasaseredoti Ngalebi bino waco ne, bala kame ango atieko ciko negi.

⁹ Yutununu gikame Rwot Rubanga wu bin otimo ne Miriamu kakame iyaunu kede ki Misiri di itienu ot.

¹⁰ “Ka ikopao giri moro but dano ace, likame ipoore ot donyo i ode pi gamo gikame epooore singao.

¹¹In ibino kuro ki ooko di dano kame in ikopao giri nono donyo i ot omo ni gikame epooore singao ni.

¹²Ka dano nono ngacan, kur ibut kede egoe kame en esingao nin;

¹³miero idwoke esuka mere di likame pwodi ceng odonyo, tetekeny ekaruno um kede di en eko bino kwano ni winyo. Manono bino mino cuny Rubanga bedo yom i komi.

¹⁴ “Likame ipoore dagi culo epakasit moro angacan amoto kame piny oloo, akadi di en ebedo dano me Isirael amoto ngakumbor moro abedo i bomba me lobo wu.

¹⁵Miero inen be iculo gi buli ceng di pwodi likame ceng odonyo, pien gin kijocan, doko cul nono en kame kipoore kuo kede; aso ka li gin kibino bedo kede koko i komi but Rwot, di do in iko bino bedo kede raco.

¹⁶ “Likame kopooore neko jonywal pi dub me idwe gi, doko da likame kopooore neko idwe pi dub me jonywal gi; kobino neko dano pi dub mere kame en kikome etimo.

¹⁷ “Kur iterunu jokumbor kame bedo kede wu arabo idwe kic i yore kalikame poore; kur iter egoe me apuserut pi bedo gikame en esingao pi banya.

¹⁸Yutununu be oudo wun ibedunu ipasoi i Misiri di Rwot Rubanga wu oko lako wu ki kuno; manono en komio ango amio wu cik noni.



¹⁹ “Ka in ioto i potu nyaro engano di wi oko wil kede abunge moro kame itieko nyaro, likame ipoore dok i potu ot ome; manono bino dong ne jokumbor, idwe kic kede apuserun, tetekeny Rwot Rubanga ni mi winyo i gi dedede kame in itimo.

²⁰ Ka ioto i potu ngwedo anyakini me olibeti tien me agege, kur bobo i dok i potu ngwedo anyakini kodong; magonogo poore dong ne jokumbor, idwe kic kede ne apuserun.

²¹ Ka ioto i potu ngwedo olok ni tien me agege, kur bobo i dok i potu tien me are pi ngwedo anyakini kodong; magonogo poore dong ne jokumbor, idwe kic kede ne apuserun.

²² Yutununu be oudo wun ibedunu ipasoi i Misiri; manono en komio ango amio wu cik noni.

Iswilia 25

¹” Ka jo are tie kede twomere moro i diere gi di kiko tero pido gi i ekiko, di ngangolkop ko ngolo kop ne ngat acel be etie kede raco, kede ne ngat ocelu be eli kede raco moro.

² Ka kopoore dano ngat kame kop olo, ngangolkop bino mino dano nono buto piny di oko dane i nyime kanono wel me ibelai kame poore kede gikarac kame en etimo.

³ Kotwero dane ibelai ot ongwon dwogo piny; kame ekalamo ot ongwon manono udo imiunu kony mere odoko li i nyim jo.

⁴ “Kur itweo dog twon kame itie tic kede pi canyo.

Mako Dako Acware Oto

⁵ “Ka imiegu are bedo karacel di ngat acel kikom gi oko to abongo nywalo atin awobi, dako kame cware oto nono likame icuo me ot apat en kame bino mako. Omin me cware en kame bino make di ko loke edoko dako mere, di eko cobo timo ne gi dedede kame icuo poore timo.

⁶ Atin awobi kame gin kibino cako nywalo bino bedo me omin mere oto ca, tetekeny ode kur toi i Isirael.

⁷ Do ka omin me ngat oto nono likame mito bedo kede dako kame omin mere oto oweko, apuserut nono bino ot but joadongo i erute me bomba di eko waco negi be, ‘Omin me cwara otieko dagi mino nying omin mere dong tie i Isirael; en edagi cobo gikame epoore timo na bala omin me cwara.’

⁸ Di do joadongo me bomba nono ko bino lwongo icuo nono di kiko yamo kede. Ka en eko cerededo di ewaco be en cunye likame mito bedo kede dako nono,

⁹ dako nono bino yai di eko ot bute i nyim joadongo, di eko boloco amuka ki tien icuo nono, di eko ngulo lau i wange di eko waco be, ‘Manoni en gikame kotimo ne icuo kame dagi nywalo ne omin mere idwe.’



¹⁰Kobino lwongo jo me ode i Isirael lung be ‘jo me ot me icuo kame koboloco amuka ki tiene.’

Iswilia Ace

¹¹” Ka cuo are ocako yi, di dako me icuo acel oko ot pi konyo cware di eko potu i kom icuo ocelu di eko kapakino kome me cuo,

¹²poore ingolunu cinge, kur ibedunu kede kisa bute.

¹³” Likame ipoorenu bedo kede kide are me misani; acel adwong atie me ateni, kede atitidi mere me timo kuo.

¹⁴Likame ipoorenu bedo kede gipim are; acel adwong atie me ateni, kede atitidi mere me timo kuo.

¹⁵Ipoorenu tic kede kide me misani kede gipim me ateni, tetekeny ibedunu kuo pi kare alac i lobo kame Rwot Rubanga wu bino mino wu.

¹⁶Pien Rwot Rubanga wu cunye daga jo kame timo akodi gi nogo, jo kame sero jo.

Cik me Neko Jo Amalek

¹⁷ “Yutununu gikame bin jo Amalek otimo ne wu kakame iyaunu kede ki Misiri di itienu ot.

¹⁸Gin likame kibedo kede lwooro i kom Rubanga, kiko suro di kiko neko jo dedede kame oudo kolanyo cen, di oudo iolunu teko wu otiek.

¹⁹Aso, ka Rwot Rubanga wu otieko mino wu wei ki peko me jokwor dedede kame oluko wu i lobo kame en ebino mino wu pi doko meru, yutununu pi neko jo Amalek pitipit, tetekeny kur doko ngatamoro bin yutuno gi i wi lobo kan. Kur wi wu wil i kom kop noni!

Iswilia 26

Giayala me Cam Acako Cek i Poti

¹” Ka itununu i lobo kame Rwot Rubanga wu bino mino wu pi doko meru, di ikounu bedo iye,

² ngat acelacel bino kwanyo dul moro me cam acako cek i potu mere, eko keto i ebukit di eko tero kakame Rwot bino yero pi jo wore kiye.

³In ibino ot but ngasaseredoti atie i wang tic i esawa nono, di iko waco ne be, ‘Tin ango atuco i nyim Rwot Rubanga na be, ango atieko donyo i lobo kame bin en ecikere but joakwari wa be ebino mino wa.’

⁴” Ngasaseredoti bino gamo ebukit ki cingi di eko cibe i nyim alutari ka Rwot Rubanga ni.

⁵Di do in iko bino waco kope gi be: ‘Kwaru na oudo obedo dano me Aram kame oudo kokobo akokob kede bedo; bin en eoto Misiri kede jo me ode di kiko bedo kuno bala



jokumbor. Oudo wel gi nonok twatwal kakame kioto kede kuno, do gin kiko doko ateker adwong di tek.

⁶Kakame jo me Misiri oko donyo tero wa kede kirac di kitidilo wa i yore me mino wa timo tic atek,

⁷wan oko kok but Rwot, en Rubanga ka joakwari wa; Rwot oko winyo koko wa di eko neno can, peko kede adiadia kame oudo otie iye.

⁸Rwot oko woto wa ki Misiri kede twer kede teko mere. En etimo gianena kede giaura di eko mino jamini kame kelo lworu otimere.

⁹En eko kelo wa tuno kan di eko mino wa lobo alac di mio noni.

¹⁰Nan ango akelo ne Rwot gikame emia ki lobo noni, en cam kocako cek i potu na.’
“Di do in iko cibo ebukit nono i nyim Rwot Rubanga ni di iko wore.

¹¹Di do in karacel kede Jolebi kede jokumbor abedo kede wu ikounu camo ebagu me amio kame Rubanga omio odi.

¹²“Ingei buli mwakini adek ipoore mino acel me tomon me cam kame ipuro but Jolebi, jokumbor, idwe kic kede apuserun, tetekeny gida kikaruno bedo tie kede cam aromo gi i ikodeta wu dedede kame gin kitie iye.

¹³Di do in iko bino waco ne Rwot Rubanga ni be, ‘Likame tie dul moro me acel me tomon me gikame obedo meri kotieko dong i oda; ango atieko mine but Jolebi, jokumbor, idwe kic kede apuserun, bala kame in itieko ciko na kede be atimi. Ango likame adagi lubo cik ni moro amako kop i kom kwanyo acel me tomon me gikame apuro, doko da likame wia owil kede moro kikom gi.

¹⁴Ango likame acamo moro kiye i kare kame atie koko kede dano moro oto, likame akwanyo moro kiye ki oda di oudo atie kede pwokere, doko da likame ayalo moro kiye but jo oto. Ango atieko lubo kop nin Rubanga na di atimo gi dedede kame in iciko na pi timo.

¹⁵Ngoloro piny i kabedo ni kacil, ki malo, di iko mino jo ni me Isirael winyo; mi da winyo i kom lobo alac di mio kame imio wa, bala kame oudo icikere kede but joakwari wa.’

Jo ka Rwot Kamake

¹⁶” I ceng me tin Rwot Rubanga wu ciko ne wu pi lubo cik kede iswilia mege dedede; aso lubunu gi kiber kede cunyu kede kuo wu lung.

¹⁷⁻¹⁸Tin wun itucunu di iyeunu be Rwot bino bedo Rubanga wu. Wun icikerenu be ibinunu lubo yote mege, di igwokunu iswilia mege kede di itimunu gi dedede kame en eciko ne wu. Pi manono, Rwot da oko yei be wun ibinunu bedo jo mege kamake.

¹⁹En ebino mino ibedunu ateker kame kopako, kame ngere kede kame koworo kalamo atekerin apat dedede kame en ecweo. Ibinunu bedo jo ka Rwot Rubanga wu, bala kame en etieko ciko.”



Iswilia 27

Kowandiko Iswilia ka Rubanga i kom Kide

¹Di Musa oko cungo karacel kede joadongo me Isirael di eko waco ne jo me Isirael be, “Gwokunu cik dedede kame ango atie mino wu tin.

²⁻⁴Nan wun iyapununu ngolo ecilet me Yorodan di ikounu donyo i lobo alac di mio kame Rwot Rubanga wu ocikere pi mino wu. En ebedo Rubanga kame joakwari wu bin woro. Cucuto ka itiekunu donyo i lobo nono, otunu i moru me Ebal di ikounu cibo kide are kunono, di ikounu puco kom gi kede emina atar. Di do ikounu wandiko i kom gi iswilia kede pwoony nogi dedede.

⁵Ibinunu gero alutari me yalo Rwot Rubanga wu kanono. Ibinunu gere kede ingaroi kalikame leb nyonyo moro me ayon obilo pano.

⁶Ipoorenu gero ne Rwot Rubanga wu alutari kede kide kalikame kopao, di ikounu bino wango i wie giayala but Rwot Rubanga wu;

⁷doko da ibinunu mino giayala me nywak di ikounu camo ringo nono di ilelunu i nyim Rwot Rubanga wu.

⁸Miero inenunu be iwandikunu kope me iswilia nogi i kide nogo di kisomere kiber.”

⁹Di Musa, oko cungo karacel kede josaseredoti Jolebi, di eko waco ne jo be, “Cikunu yitu, wun jo me Isirael. Tin wun itiekunu doko jo ka Rwot Rubanga wu.

¹⁰Pi manono, ipoorenu winyo Rwot Rubanga wu, di ilubunu cik kede iswilia mege kame ango atie mino wu tin.”

Ilam i Wi Jo kalikame bino Lubo Iswilia

¹¹I ceng nono Musa oko waco ne jo me Isirael be,

¹²“Kame itiekunu ngolo ecilet me Yorodan, jo me ikekon ka Simeon, Lebi, Yuda, Isakar, Yosepu, kede Benjamin bino ot cungo i wi moru me Gerisim pi winyo kope amako udo winyo.

¹³Di jo me ikekon ka Ruben, Gad, Aser, Sebulun, Dan kede ekeko ka Naputali ko ot cungo i wi moru me Ebal pi winyo kope amako ilam.

¹⁴Di Jolebi ko bino yamo kede dwan amalo kaman:

¹⁵“ ‘Ilam ka Rubanga mak dano kame bino pano kidi, yat amoto twako nyonyo moro pi cweno caljwogi, di eko donyo wore i mung; pien Rwot cunye dagi caljwogi.’ “Jo dedede ko bino dwoko be, ‘Amen!’ ‘

¹⁶“ ‘Ilam ka Rubanga mak dano kalikame tie kede wor but papa mere amoto toto mere.’ “Jo dedede ko bino dwoko be, ‘Amen!’ ‘

¹⁷“ ‘Ilam ka Rubanga mak dano kame nyiko wang ikor me lobo ka ngakio mere.’ “Jo dedede ko bino dwoko be, ‘Amen!’ ‘



- 18 “ ‘Ilam ka Rubanga mak dano kame ngalo emuduk lubo yongayo arwenye.’ “Jo dedede ko bino dwoko be, ‘Amen!’ ‘
- 19 “ ‘Ilam ka Rubanga mak dano kame tie kede tim kalikame poore but jokumbor, idwe kic, kede apuserun.’ “Jo dedede ko bino dwoko be, ‘Amen!’ ‘
- 20 “ ‘Ilam ka Rubanga mak dano kame buto kede dako ka papa mere di eko mino papa mere lewic.’ “Jo dedede ko bino dwoko be, ‘Amen!’ ‘
- 21 “ ‘Ilam ka Rubanga mak dano kame buto kede le moro.’ “Jo dedede ko bino dwoko be, ‘Amen!’ ‘
- 22 “ ‘Ilam ka Rubanga mak dano kame buto kede amin mere me papa gi kede acel amoto me toto gi kede acel.’ “Jo dedede ko bino dwoko be, ‘Amen!’ ‘
- 23 “ ‘Ilam ka Rubanga mak dano kame buto kede toto me dako mere.’ “Jo dedede ko bino dwoko be, ‘Amen!’ ‘
- 24” ‘Ilam ka Rubanga mak dano kame neko ngawote i mung.’ “Jo dedede ko bino dwoko be, ‘Amen!’ ‘
- 25” ‘Ilam ka Rubanga mak dano kame gamo cul pi neko ngatamoro ali kede kop.’ “Jo dedede ko bino dwoko be, ‘Amen!’ ‘
- 26 “ ‘Ilam ka Rubanga mak dano kalikame bino lubo iswilia kede pwony ka Rubanga.’ “Jo dedede ko bino dwoko be, ‘Amen!’ ‘

Iswilia 28

Winyo kame Jo bino Udo pi Lubo Kop ka Rubanga (Jolebi 26.3-13; Iswilia 7.12-24)

- ¹ “Ka wun ibinunu lubo kop ka Rwot Rubanga wu, di igwokunu kiber cik mege kame ango atie mino wu tin, en ebino mino wu dwongo kalamo atekerin dedede me wi lobo.
- ² Lubunu kop ka Rwot Rubanga wu di ikounu bino udo winyo gi:
- ³” Rwot bino mino winyo i bomban wu kede i poti wu.
- ⁴” Rwot bino mino wu winyo me nywalo idwe atot, me udo amio, kede me nyai me doke kede romini wu.
- ⁵” Rwot bino mino winyo i aditai wu me alos kede i awale wu me nyongo alos me mugati.
- ⁶” Rwot bino mino wu winyo i gi dedede kame itimunu.
- ⁷” Rwot bino mino ibwonunu jokwor wu ka kisuro wu. Gin kibino wok ki bad acel ka kitie suro wu, do kibino ringo tenge kibutu di kisarakin i bad dedede.
- ⁸” Rwot bino mino wu winyo i lobo kame en ebino mino wu. Ebino mino wu winyo i gi dedede kame itimunu, doko da dere wu bino bedo di opong kede cam.



⁹” Ka wun igwokunu cik ka Rwot Rubanga wu di ikounu lubo yote mege, en ebino mino wu idokunu jo mege amake bala kame en etieko cikere kede butu.

¹⁰Jo dedede me wi lobo bino neno di kolwongo wu be jo ka Rwot, di lworu ko bino mako gi.

¹¹Rwot bino mino wu idwe atot, ebino mino leini wu nyai, ebino mino wu amio i lobo kame en bin ecikere but joakwari wu pi mino wu.

¹²Rwot bino yayabo ude kopong kede pie i malo di eko cwano kot i lobo wu i kare kame mitere, di eko mino winyo i gi dedede kame i timunu. Wun ibinunu kopao jame wu but atekerin apat, do likame wun ibinunu kopao kibut ateker moro.

¹³Ka wun ilubunu cik ka Rwot kame tin ango atie mino wu, di igwokunu gi kiber, en ebino mino wun itelunu wi jo i kare dedede do weko koko i dud gi; ibinunu meede ameda kede dongo do weko dwogo piny.

¹⁴Manoni bino timere ka likame iparaunu tenge ki kope kame tin ango atie ciko wu pi lubo, amoto donyo woro rubangan ace.

Can kame Dagi Lubo Cik bino Kelo

(Jolebi 26.14-46)

¹⁵” Do ka likame ilubunu kope ka Rwot Rubanga wu, i yore me wun dagi lubo cik kede iswilia mege kame tin ango atie mino wu, can kame bino poto i komu bino bedo kaman:

¹⁶” Rwot bino lamo bomban wu kede poti wu.

¹⁷” Rwot bino lamo aditai wu me mako alos kede awale wu me nyongo alos me mugati.

¹⁸” Rwot bino lamo wu likame inywalunu idwe atot, lobo wu likame bino ceko cam kiber, kede doke kede diegi wu da likame bino nyai.

¹⁹” Ilam bino bedo i kom gi dedede kame wun itimunu.

²⁰” Ka wun itimunu gikarac di ikounu dagi Rwot, en ebino cwano ne wu can alit, mielkom kede atotolun i gi dedede kame ibinunu timo, di jokwor wu ko bino neko wu pitipit ingei kare acecek.

²¹En ebino cwano ne wu tuwo di lubere aluba, kame bino guro i komu tuno neko jo dedede ki lobo kame itienu ot donyo iye pi doko meru.

²²En ebino cwano ne wu tuwo ajwio komu, musuja, tuwo adopo komu bala mac; ebino cwano yamo aliet kede ceng arieny cutucutu, kede tuwo atopo cam i poti; gin kibino guro ne wu tuno wun to.

²³Likame kot bino cwei, di piny ko bino doko tek bala nyonyo ayon.

²⁴Akaka cwano kot, Rwot bino mino apua kede asinge en acwei ki malo i komu, tuno neko wu.



- 25” Rwot bino mino jokwor wu bwono wu; ibinunu beo ki tucel me ot suro gi, do ibinunu ringo tenge kibun gi i bad dedede. Di jo me atekerin dedede me wi lobo ko bino bedo kede lworu ka kineno gikame otimere ne wu.
- 26Liele wu bino doko giacama ne winy kede leini me wi lobo, doko da likame tie ngatamoro kame bino riamo gi tenge kiye.
- 27Rwot bino cwano ne wu giakwoti bala kame bin etimo ne jo me Misiri; ebino coro buge i komu, nyac kede gwenyu kalikame bino cango.
- 28Rwot bino mino idonyunu poi, wangu da bino totoun, kede wi wu da bino babangun.
- 29Ibinunu rarapo yongayo i dier iceng bala imuduka, jo kame piny col negi nakanaka, do likame ibinunu twero udo yongayo; jo bino donyo yeyeto wu di kiyako wu, do likame tie ngatamoro kame bino konyo wu.
- 30” Icuo bino nero nyako me anyoma, do icuo apat en abino buto kede. Ibino gero ot, do likame ibino bedo iye. Ibino puro potu me olok, do likame ibino bilo anyakini mere.
- 31Kobino ngolo twon ni i nyimi, do likame ibino bilo ringo mere. Kobino peno punda ni di ida ineno, di likame oko dwoko ni. Kobino mino romini ni but jokwor, do likame tie ngatamoro kame bino konyi.
- 32Kobino mino awobe kede anyira wu but jokumbor bala ipasoi, di wuda itienuneno; ceng dedede ibinunu ciko wangu i yongayo daro dwogo gi, do likame tie gimoro kame ibinunu twero timo.
- 33Jo kalikame ingeunu en kame bino tero cam dedede kame wun icanenu puro; gin kibino tero wu kirac kede gero.
- 34Kame inenunu can nogi dedede, wi wu bino dubere.
- 35Rwot bino coro giakwoti alit kalikame cango i tienu; giakwoti bino mwono tienu tuno i wi wu.
- 36” Rwot bino tero wu karacel kede abaka wu i lobo me kumbor, kakame wun akadi bin joakwari wu likame ngeo; ki kunono ibinunu donyo woro rubangan kobedo yen kede ingaroi kame kopao.
- 37Ibinunu doko gikame kelo ne jo lworu, gi me apor kede me ayama i diere me atekerin kame Rwot bino sarakino wu iye.
- 38” Ibinunu cuno kodi atot i poti wu, do ibinunu udo kac atitidi, pien obonyo bino camo gi.
- 39Ibinunu puro poti me olok di ikounu gwoko gi kiber da, do likame ibinunu ngwedo anyakini gi akadi bilo bwini kame wok kiye, pien kudiling bino camo gi.
- 40Ibinunu bedo kede yen olibeti i kabedo dedede me lobo wu, do likame ibinunu sut kede mo me olibeti, pien anyakini gi bino ony piny.



- ⁴¹Ibinunu bedo tie kede idwe awobe kede anyira, do likame gin kibino dong meru, pien jokwor bino mako gi di kiko tero gi bala mabus.
- ⁴²Obonyo bino camo cam wu atie i poti kede yen dedede.
- ⁴³” Jokumbor atie i diere wu bino dongo, do wun ibinunu meede ameda dok piny.
- ⁴⁴Gin kibino bedo kede jame kame kitwero kopao wu, do wun likame ibinunu bedo kede gimoro kame itwerunu kopao gi; gin en kame kibino telo wu di wun ikounu dong cen i dud gi.
- ⁴⁵” Can nogi dedede bino poto i komu di kiko guro i komu tuno wun dedede to, pien udo likame ilubunu kop ka Rwot Rubanga wu, i yore me gwoko cik kede iswilia mege kame en eciko ne wu.
- ⁴⁶Gin kibino bedo bala anyut kede ikwenyar butu kede but ikwae wu pi kare dedede.
- ⁴⁷Rwot omio wu jamini atot twatwal, do likame wun ikounu tic nen kede yomcuny kede kilel,
- ⁴⁸pi manono, nataman ibinunu tic ne jokwor kame Rwot bino cwano i komu. Kec kede orio bino neko wu, doko ibinunu ot nono, ibinunu bedo li kede gi dedede. En ebino tero wu kirac kede gero tuno wun dedede to.
- ⁴⁹Rwot bino kelo ateker moro ki kakabor, ki ajikini me wi lobo di gin kiko core i komu; manono bino bedo ateker kalikame wun ingeunu leb mere.
- ⁵⁰Gin kibino bedo jo ali kede kisa, jo kalikame bino nyuto wor but ngatamoro, joatino amoto joadongo.
- ⁵¹Gin kibino tero doke wu kede cam kame ipurunu, di wun ikounu bino to kec. Likame kibino weko ne wu engano moro, amoto bwini, amoto mo me olibeti; akadi kiton doke kede romini; manono ko bino mino itounu.
- ⁵²Gin kibino suro wu i bomban dedede atie i lobo kame Rwot Rubanga wu bino mino wu, di apama aboco me cel kame wun iketunu iye gen wu ko bino kayamakin.
- ⁵³” Kame jokwor wu olukaro bomban wu, gen wu bino kwanyere di ikounu donyo camo kiton idwe wu kame Rwot Rubanga wu omio wu.
- ⁵⁴Akadi icuo amwol kame oudo kobedo gwoko kiber tuno en dongo bino cocolo wange pi cam but omin mere kikokome, dako mere me amara kede but idwe mege apwodi odong.
- ⁵⁵En ebino twono gi ringo me atin mere kame en etie camo, piento en engeo be likame gimoro bobo bino dong nen, bala kame udo do etieko rwenyo kede gen pi kite kame jokwor oluko kede bomban wu.
- ⁵⁶Akadi dako amwol kame oudo kobedo gwoko kiber tuno en dongo, dako kalikame pwodi tiene obilo nyono piny abongo amuka, bino cocolo wange pi cam but cware me amara, but wode kede but nyare.



⁵⁷En ebino twono gi ringo me atin mere mukeru kede biero mere me nywal ka etie camo gi, bala kame udo do etieko rwenyo kede gen pi kite kame jokwor oluko kede bomban wu. En ebino camo gi i mung pien udo gi ace acamere do li.

⁵⁸” Ka wun likame ilubunu kiber kope dedede me iswilia kame kowandiko i itabu noni, kede ka likame ibedunu kede wor i kom nying Rwot Rubanga wu, en nying atie kede dwongo kede kame poore alwora,

⁵⁹en ebino cwano i komu kede i kom ikwae wu can alit kalikame gengere, kede tuwo kalikame cango.

⁶⁰En ebino cwano ne wu bobo tuwo areco kame bin omako wu i Misiri, di tuwo nogo ko bino guro i komu.

⁶¹En ebino da cwano ne wu can kede tuwo apat kalikame kowandiko i itabu noni me iswilia, tuno wun to.

⁶²Bed bala itotunu bala acer me malo, do jo anonok kenekene en kame bino dong, pien udo likame ilubunu kop ka Rwot Rubanga wu.

⁶³Bala kame cuny Rwot obedo yom kede pi mino wu mulem kede mino wu nyai, kamanono da cuny Rwot bino bedo yom dudubo kede muducaro wu; en ebino puto wu tenge ki lobo kame itienu donyo ot bedo iye bala meru.

⁶⁴” En ebino sasaro wu i diere me atekerin apat, cako ki ajikini me wi lobo tetucel tuno tetu ocelu; ki kunono ibinunu donyo tic ne rubangan kobedo yen kede ingaroi kame kopao, rubangan kame wun kiton joakwari wu likame ingeunu.

⁶⁵Likame ibinunu bedo kede anapakin i diere me atekerin nogo, likame ibinunu bedo kede kabedo kibecokina bedo meru; Rwot bino mino wu ibedunu jo kame tie kede par, jo kame kony gi li, kede jo kame li kede gen.

⁶⁶Kuo wu bino bedo di otagalakin atagalakin; iwor kede iceng ibinunu bedo kede twon lworu, di likame itienu kede gen moro i kom kuo wu.

⁶⁷Odiko acelacel ibinunu paro be koto piny obunyo yuto; doko da otieno acelacel ibinunu paro be koto piny obunyo ru. Manoni bino timere pi lworu atie i cunyu kede pi gikame wangu bino neno.

⁶⁸Rwot bino dwoko wu Misiri kede emeri, sapali kame oudo en ecikere be likame doko ibinunu rucakino. Ki kuno dano bino jalere catere but jokwor bala epasoit amoto apasoit, do likame tie ngat kame bino wilo wu.”

Iswilia 29

Isikan ka Rwot kede Jo me Isirael i Lobo me Moab

¹Magi en gikame mitere pi gwoko isikan kame Rwot ociko ne Musa pi timo kede jo me Isirael i lobo me Moab, medo i wi isikan kame oudo en egeo timo kede gi i moru me Sinai.



- ²Musa oko lwongo jo dedede me Isirael di eko waco negi be, “Wun inenunu kede wangu gi dedede kame Rwot otimo i lobo me Misiri, ne Parao kede jotic mege kede ne lobo nono dedede.
- ³Wun inenunu can adongodongo, gianena kede giaura kame Rwot otimo.
- ⁴Do tuno tin Rwot likame omio wu iniangunu i kuo kame ibeunu iye.
- ⁵Rwot obedo telo wu i wi tim nan oromo mwakini ot ongwon, do igoen wu likame oti, doko amukai wu da likame dud gi ocamere.
- ⁶Wun oudo iliunu kede mugati me acama, akadi bwini amoto kongo me amata, do Rwot oko pito wu tetekeny ingeunu be en ebedo Rwot Rubanga wu.
- ⁷ Aso kakame wan otununu kede kan, Abaka Sikon me Kesibon kede Abaka Og me Basan oko wokun pi yi kede wa, do wanunu okounu bwono gi.
- ⁸ Wan okounu mano lobo gi di oko popoko ne jo me ekeko ka Ruben, Gad kede dul me jo me ekeko ka Manase.
- ⁹Pi manono, poore ilubunu kiber kope me isikan noni, tetekeny gi dedede kame itimunu twer cobere kiber.
- ¹⁰” Tin wun dedede itienu cungo i nyim Rwot Rubanga wu, jotel kede joadongo wu, cuo dedede me Isirael,
- ¹¹idwe wu, mon wu kede jokumbor kame bedo i diere wu di kitimo ne wu tic me mwodo yen kede weko pii.
- ¹²Tin wun itienu kan pi donyo i isikan kame Rwot Rubanga wu tie timo kede wu kede pi yei timo gikame isikan nono mito,
- ¹³tetekeny Rwot mok wu pi bedo jo mege, di en eko bedo Rubanga wu, bala kame bin ecikere kede but joakwari wu, Aburaam, Isaka kede Yakobo.
- ¹⁴Likame Rwot tie timo isikan noni kede gikame mitere iye kede wan kenekene, wan jo kame tin otienu cungo kan i nyime,
- ¹⁵do etie time kede wanunu dedede karacel kede ikwae wa me kare me anyim da.
- ¹⁶” Wun iyutununu ekite me kuo kame wan oudo otienu iye i Misiri, kede epone kame obinunu kede di ongolunu diere me atekerin apat.
- ¹⁷Wun inenunu jamini gin kame neno rac, gin caljwogi kobedo yen kede ingaroi kame kopao, arabo siliba amoto saabu kame kotwako.
- ¹⁸ Miero inenunu be likame tie icuo moro, dako moro, arabo jo me paco moro kame tin tie cungo kan, kame bino lokere tenge kibus Rwot Rubanga wa di eko donyo woro rubangan me atekerin apat. Akodi ngat nono cal bala alias kame aloti mere tie kede kwir arac di ekec.
- ¹⁹Nenunu be likame tie ngatamoro kan tin kame winyo kwongere me isikan noni, di en eko lokere waco kene be gi dedede bino bedo nen kiber, akadi di en ebed kede



epali di eko donyo timo gikame cunye mito. Manono bino kelo can i kom jo dedede, jo abeco kede jo areco di rom aroma.

²⁰Rwot likame bino sasiro dano kacal kamanono, do en ebino riamo kede gero agwai ka Rwot, di can kame kowandiko i itabu noni ko bino poto i kome tuno di Rwot otieko muducaro en atwal atwala.

²¹Rwot bino yeke tenge kikom jo me ikekon dedede me Isirael, di eko keto can i kome, di lubere kede ilam dedede kame kowandiko i itabu me iswil noni.

²²” Lwak me kare me anyim, idwe kame bino lubo cen ngei wu, karacel kede jokumbor kame wok ki pinye aboco, bino neno kite kame Rwot odudubo kede lobo wu kede can kame eketo iye.

²³ Poti mege bino bedo kede lobo kame kony mere li, lobo kame salupa kede munyo otieko umo; likame tie gimoro kame kobino pito iye, likame tie gimoro kame bino tui iye, akadi lum da likame bino dongo iye. Lobo wu nono bino bedo bala bomban me Sodoma kede Gomora, bala Adama kede Seboim, kame bin Rwot odudubo kakame ebodo kede gero agwai.

²⁴Di do wi lobo lung ko bino penyere be, ‘Pinyo komio Rwot otimo ne lobo no gikame cal kamano? Nyo komio enyuto twon gero kacal kamano?’

²⁵Adwokini me peny nono ko bino bedo be, ‘Etimere kamanoni pien jo ka Rwot oturo isikan kame Rwot Rubanga ka joakwari gi otimo kede gi kakame ewoto gi kede ki lobo me Misiri.

²⁶Gin kilokere donyo woro rubangan mogo kalikame lem gin kingeo, rubangan kame Rwot likame onyuto negi pi woro.

²⁷Manono oko mino Rwot obedo kede wangcuny i kom lobo nono di eko mino can dedede kame kowandiko i itabu noni opoto iye.

²⁸Rwot oko bedo kede twon lilo kede gero di eko puputo gi ki lobo gi, di eko uco gi i lobo me kumbor, kakame nan kitie iye.’

²⁹” Tie gimogo kame Rwot Rubanga wa omungo; do en enyuto Iswilia mege but wan kede ikwae wa, pi lubo kope mege i kare lung.”

Iswilia 30

Gikame Mitere pi Dok i Kuo Kasek kede Udo Winyo

¹Musa oko waco ne jo me Isirael be, “Nan ango atie mino wu yero jamini are: winyo kame Rwot bino mino wu arabo can kame en ebino keto i komu ka idagenu. Kame gikame ango awaco ne wu nogi dedede otimere ne wu, i kare kame itienu bedo kede kumbor kakame Rwot bino riamo wu iye, ibinunu yutuno gikame ango amio wu yero.

²Ka di do wun kede idwe wu ikounu dok but Rwot Rubanga wu, di ikounu lubo kede cunyu lung cik mege kame tin ango atie mino wu,



- ³Rwot kisa bino make i komu di eko dwoko ne wu kuo aber kame oudo itienu kede; en ebino koko wu ki diere me atekerin apat di eko dwoko wu.
- ⁴Akadi bed bala oudo kosarakino wu tuno i ajikini me lobo, Rwot bino koko wu ki kuno di eko dwoko wu.
- ⁵Rwot bino dwoko wu i lobo kame bin obedo me ka joakwari wu di lobo nono ko bino doko meru; en ebino mino wu twon mulem di ikounu bino nyai kalamo bin joakwari wu.
- ⁶En ebino mino cunyu kede cunyu ikwae wu bedo kede wor bute, tetekeny wun ikounu bino mare kede cunyu lung, kede kuo wu lung, di ikounu bino kuo.
- ⁷Rwot Rubanga wu bino lokere keto can nogo i kom jokwor wu kede joading wu kame tidilo wu.
- ⁸Di do wun bobo ikounu bino yei winyo kop mere, di ilubunu cik mege kame tin ango atie mino wu.
- ⁹Di Rwot Rubanga wu ko bino timo ne wu bero i gi dedede kame wun itimunu; ibinunu nywalo idwe atos, leini wu bino nyai, doko da poti wu bino ceko cam atos. Cunye bino bedo yom mino wu mulem bala kame bin cunye obedo yom kede pi mino joakwari wu mulem.
- ¹⁰Do miero wun kong iwinyunu dwane di ilubunu cik mege kame kowandiko i itabu me iswil. Ipoorenu lokere bute kede cunyu lung.
- ¹¹” Cik kame tin ango atie mino wu likame tek teko kame mio lube bwono wu. Doko niang i kom gi da yoyot.
- ¹² Likame etie malo amio koto ipenyere nu be, ‘Ngai kame bino ot malo ome ne wa, tetekeny owinye di oko lube?’
- ¹³Doko da likame etie loka nam en amio koto ipenyere nu be, ‘Ngai kame bino ngolo nam ot ome ne wa tetekeny owinye di oko lube?’
- ¹⁴Li, en kom etie iyapiyapi kede wu; etie i dogu kede i cunyu. Aso, lubenu.
- ¹⁵” Nenunu, tin ango acibo i nyimu kuo kede mulem; to kede can, tetekeny wun iyerunu gi acel.
- ¹⁶Ka wun ilubunu cik ka Rwot Rubanga wu kame ango atie mino wu tin, i yore me wun mare, lubo yote mege kede iswilia mege, ibinunu kuo di ikounu nyai idokunu tot, di Rwot ko bino mino wu winyo i lobo kame itienu ot donyo di ikounu bedo iye bala meru.
- ¹⁷Do ka idagunu winyo kop mere di ikounu parao donyo woro rubangan ace kede tic negi,
- ¹⁸atuco ne wu kakaler tin be kobino neko wu; likame ibinunu tero kare alac i lobo kame itienu ngolo ecilet me Yorodan di ikounu ot bedo iye bala meru.



¹⁹Atie lwongo malo kede lobo pi bedo ijurak be, tin ango acibo i nyimu kuo kede to, winyo kede ilam ka Rubanga. Yerunu kuo tetekeny wun kede idwe wu ibedunu kuo.

²⁰Marunu Rwot Rubanga wu, lubunu kope mege, bedunu jo agenere bute, di wun karacel kede ikwae wu ikounu bino bedo kuo pi kare alac i lobo kame bin Rwot ocikere pi mino joakwari wu: Aburaam, Isaka kede Yakobo.”

Iswilia 31

Yosua Olunyo Kawang Musa

(Wel 27.12-23)

¹kakame Musa otieko yamo kede kope nogi ne jo me Isirael,

²en eko waco negi be, “Nan mwaka me dongo nango otieko tuno tol acel kede ot are. Nataman ango ali do kede teko me lole bobo. Doko medo i wi manono, Rwot otieko waco na be likame ango abino ngolo ecilet me Yorodan.

³Rwot Rubanga wu kikome en kame bino telo ne wu anyim ngolo Yorodan loka tuca di eko muducaro atekerin atie kunono, tetekeny wun ilunyunu bedo i lobo gi. Yosua bino bedo ngatel wu bala kame Rwot otieko waco.

⁴Rwot bino muducaro jo nogo bala kame oudo ebwono kede Sikon kede Og, gin abakai me jo Amor, di eko dudubo lobo gi.

⁵Rwot bino mino gi i cingu, di wun ikounu bino timo negi gikame mitere di ilubunu cik dedede kame ango atieko mino wu.

⁶Miero icungunu di itekunu di itienu kede nwangcuny. Kur ibedunu kede lworu but gi, pien Rwot Rubanga wu tie upere kede wu; likame en ebino ngalo wu amoto weko wu.”

⁷Musa oko lwongo Yosua di eko waco ne i nyim jo dedede me Isirael be, “Cung di itek di itie kede nwangcuny, pien in en kame ibino tero jogi ot bedo i lobo kame Rwot bin ociko pi mino joakwari gi.

⁸Rwot en kame bino telo ne wu anyim. En ebino bedo tie kede wu, likame ebino ngalo wu amoto weko wu. Aso, kur cunyi poti amoto ibed kede lworu.”

Kopoore Somo Iswil Ingei Buli Mwakini Kanyaare

⁹Musa oko wandiko iswilia nogi di eko mino gi but josaseredoti Jolebi, gin jo kame oudo gwoko Sanduku me Isikan ka Rwot, karacel kede but joadongo me Isirael.

¹⁰En eko ciko gi di ewaco be, “Ingei buli mwakini kanyaare, i ajikini me mwaka kame koweko ne kede jo banyi, i kare me Ebagame Kimere,

¹¹di jo dedede ocokere woro Rwot Rubanga wu i kakame en ebino yero ne wu, ibinunu somo iswilia nogi dedede ne jo me Isirael di gin kiwinyo.

¹²Ibinunu koko cuo, mon kede idwe dedede, ribo kiton jokumbor kame bedo i bomban wu, tetekeny ngat acelacel winy iswilia nogi di eko pwonyere bedo kede wor but Rwot Rubanga wu, kede di eko lubo kiber kope me iswilia nogi.



¹³Manoni bino mino ikwae wu me kare dedede kalikame ngeo iswilia ka Rwot bino winyo gi di kiko pwonyere bedo kede wor but Rwot Rubanga wu, i kare dedede kame wun ibedunu kede i lobo kame nataman ibinunu ngolo ecilet me Yorodan pi ot bedo iye di eko doko meru.”

Kop me Ajikini kame Rwot Omio Musa

¹⁴Rwot oko waco ne Musa be, “Kare me to nin otieko doko iyapiyapi. Lwong Yosua ikounu ot kede i Eema me ariamakin keda, tetekeny acibe i wang tic.” Aso, Musa kede Yosua oko ot di kiko cungo i Eema me ariamakin kede Rwot,

¹⁵di Rwot oko neeno but gi i nget ekeko me Eema i cal me edou kocungo bala epir.

¹⁶Rwot oko waco ne Musa be, “In iyapuno to, do ingei to nin jo bino weka di kiko donyo woro rubangan mogo apat, rubangan me lobo kame gin kitie ot iye; gin kibino weka di kiko turo isikan kame ango oudo atimo kede gi.

¹⁷Ka manono otimere, gero bino maka i kom gi di ako weko gi di likame bobo kiko twero neno wanga; abino muducaro gi pi gero na. Peko atot bino poto negi di kiko bino waco be, ‘Mam peko gi tie poto ne wa pien likame Rubanga wa doko tie kede wa?’

¹⁸I kare nono ateteni ango abino jalo gi pi gikarac kame gin kitimo me lokere donyo woro rubangan ace.

¹⁹” Pi manono, nan wandiko wer kame ango atie mino wu, di in Musa iko pwonyo jo me Isirael iye tuno gin make kede wi gi, tetekeny ebed bala ijura na i kom kop amako gi.

²⁰Pien kame ango atieko tero gi i lobo alac di mio, kame bin ango acikere di akwongere pi mino joakwari gi, gin kibino daga di kiko turo isikan na kede gi.

²¹Pi tim gi nono, ka peko adongodongo oko poto negi, wer noni bino bedo bala ijura apido gi, pien wi ikwae gi likame bino wil iye. Pien ango nan angeo cuto gikame tam gi bino lengere timo, akadi di pwodi likame atero gi i lobo kame bin ango acikere di akwongere pi mino gi.”

²²Cenge nono Musa oko wandiko wer nono di eko pwonyo jo me Isirael iye.

²³ Di Rwot oko cibo Yosua wot ka Nun i wang tic di ewaco be, “Cung di itek kede nwangcuny, pien ibino telo jo me Isirael donyo i lobo kame ango acikere pi mino gi; ango abino bedo tie kedi.”

²⁴Musa oko wandiko Iswilia ka Rubanga dedede i itabu abongo weko gimoro ooko.

²⁵Di do eko waco ne josaseredoti Jolebi kame bin yeo Sanduku me Isikan ka Rwot be,

²⁶” Terunu itabu me Iswil noni di ikounu kete i nget Sanduku me Isikan ka Rwot Rubanga wu; poore edong kunono bala ijura kame pido wun jo mege.



²⁷Pien ango angeo be wun jo me Isirael ibedunu joepali kede jojemo. Pien ka ber wun ijemunu ne Rwot di pwodi ango atie akuo, do ka ato ibinunu do jemo kalamo kano tien adi!

²⁸Cokunu joadongo me buli ekeko kede jotel dedede i nyima, tetekeny ango awac kope nogi di gin kiwinyo, di ako bino lwongo malo kede lobo pi bedo ijurak apido gi.

²⁹Pien ango angeo be ingei ango to, wun ibinunu bilor di ikounu weko timo gikame ango aciko ne wu pi timo. Di do i cen mere peko ko bino poto ne wu, pien udo iwanganu cuny Rwot i yore me wun timo gikame rac i wange.”

Wer ka Musa

³⁰Di do Musa oko waco kope atie i wer cako i agege mere tuno i ajikini mere. Kope mege tie kaman:

Iswilia 32

¹” Okwe malo cik yiti, ango ayaro yamo; piny ida cik yiti i winy kope kame wok ki dogo.

²Pwony na bino bedo cal bala kot awo, ebino bedo bala toyo abido wi lobo; kope na bino bedo bala kot awo i kom amel, kibino bedo bala kot abwongo yen apwodi titino.

³Ango abino pako nying Rwot, abino mino Rubanga wa dwongo!

⁴” Rwot en ngagwok wu atek bala lela, en etimo gi dedede kiber kede i yore kopooore; en ebedo Rubanga kame genere, doko eli kede tim moro arac, en etimo gi kopooore kede me ateni.

⁵Do wun likame ibedunu jo kame genere bute, likame pwodi itien idwe mege, wun ibedunu lwak kotieko dubere kede kalikame tie kede tim me ateni.

⁶Benyo, kom epone nono en kame wun iterunu kede Rwot, wun jo aming kame wi wu likame tio? Mam en ebedo papa wu, ngat kocweo wu, ngat komio wu idokunu ateker?

⁷” Yutununu kare kasek, kare ariki; penyunu papi wu di gin kiko waco ne wu gi kotimere, penyunu jo oti di gin kiko bino waco ne wu kope me kare kokato.

⁸Ngamalo Twal bin omio buli ateker acelacel lobo mere amake; en bin epopoko jo di eko cibo ikor ne atekerin; bin eko mino ateker acelacel rubanga mere,

⁹do eko yero ikwae ka Yakobo pi bedo jo mege.

¹⁰” En eudo gi di kitie irim i wi tim, kabedo koling kame yamo buko iye kitek. En eko donyo gwoko gi, bala kame en koto egwoko kede tong wange.

¹¹Rwot cal bala ekokom atie gwoko ode, ekokom kame por wire i malo i wi idwe mege; en eyararo bwome di eko mako gi kiber; kamanono da Rwot ogwoko jo mege me Isirael likame kipoto.



- 12**Rwot otelo jo mege en kene abongo rubanga moro me kumbor konye.
- 13**” En oudo emio gi pugo kabedere atie bala imukuran, di kiko camo gikame oceki i poti; kiudo mokic i lela, doko olibeti oko dongo negi kabedo atie engaro engaro.
- 14**Rwot opito gi kede cak me doke kede me diegi; oudo kitie kede romini, diegi kede doke kocwe; emio gi engano apwot kede bwini aber kalamo.
- 15**” Wun jo ka Rubanga itiekunu udo mulem di ikounu jemo ne; icweunu, idokunu jo isikit di komu meny pien icamunu kitek; wun itiekunu weko Rubanga ngat kocweo wu, itiekunu dagi ngalak wu atek.
- 16**Imiunu nyeko omako Rubanga pien idonyunu woro rubangan me atekerin apat; imiunu cunye owang pi caljwogi kame neno rac.
- 17** Imiunu giayala but jwogi do likame but Rubanga, rubangan mogo kame joakwari wu likame bin ngeo, rubangan apwodi obino abina kalikame bin joakwari wu oworo.
- 18**Wi wu otieko wil i kom ngalak katek kobedo toto wu, likame iyutununu Rubanga ngat kobedo papa wu.
- 19**” Kakame Rwot oneno kede manoni, cunye oko wang, di eko dagi idwe mege awobe kede anyira.
- 20**En eko waco be, ‘Ango abino jalo gi, di ako bino neno gikame bino timere negi; pien gin kibedo lwak kotieko bilor, idwe kalikame genere.
- 21** Gin kimio nyeko omaka pi gin woro rubangan me abe akony gi li, kimio cunya owang pi gin woro caljwogi. Pi manono, ango abino mino nyeko mako gi i kom ateker akony mere li, abino cwano negi ateker me jomingo pi wango cuny gi.
- 22**Gero na bino bedo cal bala mac aliel, ebino wango jame dedede atie i wi lobo; ebino tuno piny i kabedo me jo oto, di eko wango kiton agangeta me acakini me dud mori.
- 23**” ‘Abino cwano negi can apapat di lubere aluba, abino gwegweo tongini na me emal pitipit i kom gi.
- 24**Kibino totoun pi kec kede lieto me piny; kibino totoun pi tuwo areco. Abino cwano leini ager suro gi, kede twole atie kede kwir ager kakao gi.
- 25**Kame kitie ooko, kobino neneko gi kede epima; kame kitie i ude gi, lworu en abino neneko gi. Awobe kede anyira gi bino totoun, idwe adot kede jo oti kame lwar tie i wi gi da likame bino bwot.
- 26**Oudo aparo be koto amuducaro gi atwal atwala, di ako mino nying gi rweny atwal ki diere me jo.
- 27**Do ako bedo kede lworu be jokwor gi bino wango cunya; cengemogo kibino wakere di kiwaco be gin en kame kibwono jo me Isirael, do likame ango.’



- 28” Isirael obedo ateker kame jo mege likame wi gi tio; gin kili kede niang atwal atwala.
- 29Ka koto oudo kitie kede niang, oudo koto kiniang gikomio jokwor gi obwono gi; oudo koto kigeo ngeno sek gikame oudo bino timere i kom gi.
- 30Ngakwor acel kenekene obwono jo tutumia acel me Isirael, kom jokwor are kenekene obwono gin jo tutumia tomon. Manoni oudo twero timere benyo benyo, ka ngalak gi atek bala lela oudo likame ocatu gi, ka Rwot oudo likame ojalo gi?
- 31Pien rubangan ka jokwor gi likame tek bala Rubanga gin, akadi jokwor gi da ngeo manoni.
- 32Gin kireco bala jo me Sodoma kede Gomora, kical bala olok kame pige me nyige mere kec,
- 33bwini mere kec bala kwir me twol, eriaria bala kwir me ipom.
- 34” Rwot yamo be, ‘Gikame ango atieko iiko pi timo ne jo me Isirael kede jokwor gi ango akano i cunya; atie gwoke kiber bala gi me wel.
- 35 Pien ceng kame ango abino timo kede onyanga di ako mino gi alola iyapi tuno! Tien gi bino getar, di can me epone dedede ko potu negi.’
- 36 Pien Rwot kisa bino make i kom jo mege, di eko ngolo kop be kili kede raco moro, ka eneno be teko gi otiek, di do likame tie ngatamoro kodong kuo, epasoit arabo dano kalikame epasoit.
- 37Di en eko bino penyo jo mege be, ‘Rubangan gi kara tie tuai, gin rubangan atek kame gin kiringo ot gwokere but gi?
- 38Wun imiunu gi giayala me kakamio, kede ikounu mino gi bwini me amata. Ber gin kibin kikonyu; ber gin kigwoku.
- 39” ‘Miero ingeunu be ango kena en abedo Rubanga; likame tie rubanga moro acal bala ango. Ango atwero neko, doko amio kuo; ango awanakino dano doko da atwero cange; doko likame tie ngatamoro atwero lako dano ki cinga.
- 40Ango atingo cinga malo di ako kwongere be: Bala kame ateteni ango akuo kede nakanaka,
- 41ka apeno leb epima na di meny di cinga oko make pi timo kop kame ango angolo, abino timo onyanga i kom jokwor na; abino culo jo adaga kede alola.
- 42Imalia na bino pwokere kede remo me jokwor na, remo me jokwor kame aneko kede kame amako. Epima na bino neneko gin dedede, jo kame yer wi gi odongo di bocoboco.’



⁴³ “Pakunu jo mege wun atekerin dedede, piento en ebino culo kwor me jotie mege kame koneko; en ebino timo onyanga i kom jokwor mege, di eko bino lonyo lobo ka jo mege ki dub kame gin kitimo.”

⁴⁴ Musa kede Yosua wot ka Nun oko waco ne jo kope katie i wer noni tetekey kiwinyi.

Kope me Ajikini kame Musa Omio

⁴⁵ Kakame Musa otieko waco kede kope nogi ne jo dedede me Isirael,

⁴⁶ en eko waco negi be, “Ketunu i cunyu kope kame tin aciko ne wu; miunu gi but idwe wu bala cik tetekey gin kikaruno bino lubo kiber pwoy ka Rubanga.

⁴⁷ Pien manoni likame obedo kop me tukotuko, do ebeto kop amako kuo wu kikokome. Ka ilubunu gi ibinunu kuo pi kare alac i lobo kame itienu ngolo ecilet me Yorodan di ikounu ot bedo iye pi doko meru.”

⁴⁸ I ceng nono Rwot oko waco ne Musa be,

⁴⁹” Oti i moru me Abarim i lobo ka Moab, kame pimere kede bomba me Jeriko; iko yito i wi moru me Nebo di iko neno lobo me Kanan, lobo kame ango ayaro mino jo me Isirael pi bedo mergi.

⁵⁰ In ibino to i wi moru kunono, bala kite kame omini Aaron oto kede i wi moru me Kor.

⁵¹ Pien in kede Aaron likame ilubunu cik na i nyim jo me Isirael. Kakame oudo itienu kede i pii me Meriba, i nget bomba me Kades, kame tie i wi tim me Sin, wun likame ibedunu kede wor buta i nyim jo na.

⁵² In ibino neno lobo nono ki kakabor, do likame ibino donyo iye, en lobo kame ango atie mino jo me Isirael.”

Iswilia 33

Musa Omio Jo me Isirael Winyo

¹ Magi en winyo kame Musa, ngat kobedo dano ka Rubanga, okwao ne jo me Isirael di pwodi likame eto.

² Rwot obino ki moru me Sinai; en ewok bala ceng di eko rieny ki Seir i kom jo mege; rieny mere owok ki moru me Paran. Imalaikan tutumia tomon oudo tie kede, i bade tetu cam oudo tie iye mac aliel.

³ Rwot maro jo mege, jo mege tie i cinge. Aso, gin kiriebere i tiene, di kilubo gikame en eciko negi.

⁴ Ango amio wu Iswil ka Rubanga, en ebeto gikame pire dwong twatwal kame ateker me Isirael tie kede.



- ⁵Rwot oko doko abaka me jo mege me Isirael, kakame jo me ikekon dedede me Isirael kede jotel gi ocokere kede karacel.
- ⁶Musa oko waco kop i kom jo me ekeko ka Ruben be, “Akwaokur jo me ekeko ka Ruben tiek atwal atwala, do kidong di kinonok nakanaka.”
- ⁷I kom jo me ekeko ka Yuda en eko waco be, “Rwot, okwe winy koko gi; dwok gi di iko ribo gi kede jo me ikekon apat. Rwot, mi gi kibed tek, kony gi yi kede jokwor gi.”
- ⁸I kom jo me ekeko ka Lebi en eko waco be, “Rwot, nyut mit nin kibut jotic ni agenere, gin Jolebi, ka gin kitio kede Urim kede Tumim. In bin itamo gi i Masa, bin icerededo kede gi i dog pii me Meriba.
- ⁹Gin kiko nyuto wor adwong buti, kalamo wor kame gin kimio but jonywal gi, imiegu gi kede but idwe gi. Gin kilubo cik nin, doko da kigwoko isikan kame in itimo kede jo me Isirael.
- ¹⁰Gin kibino pwonyo ikwae ka Yakobo cik nin; kibino pwonyo jo me Isirael Iswilia nin. Gin kibino dunyo odok angwe kur i nyimi; kibino wango giayala buti i wi alutari nin.
- ¹¹Rwot, okwe mi winyo i kom jamini gi, yei gamo tice gi. Bwon jokwor gi kede jo kame dagi gi atwal atwala, tetekeny kur kicatuno bobo.”
- ¹²I kom jo me ekeko ka Benjamin en eko waco be, “Man en jo me ekeko kame Rwot maro, gin kibedo abongo peko moro i nget Rwot; Rwot gwoko gi i kare dedede, doko en ebedo i diere gi.”
- ¹³I kom jo me ekeko ka Yosepu en eko waco be, “Akwaokur emi winyo i kom lobo me jo me ekeko ka Yosepu; emi toyo kame wok ki malo bwonge, kede eko mino pii atie piny i dud lobo tutucun iye.
- ¹⁴Emi lobo nono winyo me bedo tie kede anyakini mogo kame ceng ceko, kede da kodere mogo kame cek duwe kede duwe.
- ¹⁵Akwaokur be mori gi kobedo tie cako anakacia bed tie kede anyakini abeco; imukuran gi abeco nakanaka bed tie kede anyakini atot.
- ¹⁶Akwaokur lobo gi pong kede gi dedede abeco kame lobo woto, ebed tie kede bero me ngat kame bin oneeno i abum atie liel. Akwaokur winyo noni bed i wi jo me ekeko ka Yosepu, piento en oudo ebedo ngatel kikom imiegu mege.
- ¹⁷Dwongo kame Yosepu tie kede cal bala me twon kobedo nywal kao. Teko mere rom bala me tung jobi. Pi teko mere nono en ebino riamo atekerin apat tuno i ajikini me lobo; jo kobedo teko mere nono en jo tutumian me Manase kede jo tutumian kede tutumian me Epuraimu.”



¹⁸I kom jo me ekeko ka Sebulun kede me Isakar en eko waco be, “Akwaio be jo me ekeko ka Sebulun ud abar i tic gi me ot cato wil i name; doko da abar me jo me ekeko ka Isakar ko nyai i miere gi.

¹⁹Gin kibino lwongo jo apat pi bino i wi moru; di kiko mino giayala atie kakare ki kuno. Gin kiudo abar gi ki nam kede ki asinge me dog nam.”

²⁰I kom jo me ekeko ka Gad en eko waco be, “Pakunu Rwot, en ngat kame bino nyano adul kame itienye! Gad bedo kuno bala engu atie kuro gimoro, pi puto bade amoto pakaro cogo me wie.

²¹Kakame jotel me jo me ikekon apapat me Isirael ocokere kede karacel, gin kiko mine lobo aber kalamo; manono oudo obedo iner me ngatel. En etimo gi kopooore kame Rwot mito, elubo iswilia kame Rwot omio jo me Isirael.”

²²I kom jo me ekeko ka Dan en eko waco be, “Dan cal bala atin me engu; en ebino donyo yai ki kapwono mere Basan di eoto suro jokwor mege.”

²³I kom jo me ekeko ka Naputali en eko waco be, “Rwot otimo ne Naputali bero adwong, en epong kede winyo ka Rwot; lobo gi yai ki nam me Galilaya dok tetu piny.”

²⁴I kom jo me ekeko ka Aser, en eko waco be, “Jo me ekeko ka Aser tie kede winyo kalamo jo me ikekon apat; akwaio be Rubanga maru kalamo jo me ikekon apat, doko da akwaio be lobo wu nyak ne wu olibeti di tot tetekenye ibedunu kede mo atot twatwal.

²⁵Bomban wu ibinunu cego erute gi kede lilim me nyonyo ayon kede buronsi pi gwoko gi; doko ibinunu bedo abongo peko moro pi kare me kuo wu lung.”

²⁶Okwe wun jo ka Rubanga, likame tie rubanga moro kame cal bala meru; en eringini piny kede idoun pi konyo wu bala ngat aringo kede asigira ot yi.

²⁷Rubanga ngat kame bedo nakanaka en ngagwok wu cinge tie ne wu bala agang. En eriamo jokwor kame oudo tie i nyimu eko yabo ne wu yongayo, di eko waco ne wu pi neneko gin dedede.

²⁸Aso, jo me Isirael nan tie kede anapakin, ikwae ka Yakobo nan bedo abongo gimoro alolo gi i lobo kame engano kede bwini tot iye, kakame toyo kame poto ki malo bwongo lobo mere.

²⁹Okwe, Isirael in itie kede winyo! Likame tie ngatamoro kame cal bala in, ateker kame Rwot en kolako. Rwot obedo ebuku kede epima nin, pi gwoki kede pi mini bwono yi. Jokwor ni bino bino buti kwano kisa, di in iko bino nyonyono ngei gi.

Iswilia 34

To ka Musa



- ¹Musa bin oko yai ki ebar me Moab di eko yito i wi moru me Nebo, di eko kato i okwidu mere kakame kolwongo be Moru me Pisiga, kakame pimere kede Jeriko. Rwot oko nyuto ne lobo lung, cako ki Gilead tuno Dan;
- ²lobo me Naputali lung; lobo me Epuraimu kede Manase; lobo dedede me Yuda tuno i nam adwong atie tetu tim;
- ³Negeb kede elet kobedo aditot me Jeriko, en bomba me tugo, paka tuno Soar.
- ⁴Rwot oko waco ne Musa be, “Man en lobo kame bin ango acikere but Aburaam, Isaka kede Yakobo be abino mino ikwae gi. Ango atieko mini inene kede wangi, do likame in ibino ngolo loka nono.”
- ⁵Aso, Musa ngat koudo obedo ngatic ka Rwot oko to kunono i lobo me Moab, bala kame Rwot oudo otieko ciko.
- ⁶Oko bin yike i aditot kame tie i lobo me Moab, kakame pimere kede Betepeor, do tuno tin likame tie ngat kame ngeo kakame koyike iye kikokome.
- ⁷Musa oto di etie kede mwakini me dongo tol acel kede ot are. Wange oudo pwodi likame odoko col, doko oudo pwodi etie kede teko.
- ⁸Jo me Isirael oko koko Musa i elet me Moab pi ceng ot adek, di do kiko jiko koke.
- ⁹Yosua wot ka Nun oko pong kede rieke pien Musa oudo oketo cinge i wie. Di jo me Isirael oko donyo lubo kop mere di kitimo gikame Rwot oudo ociko ne Musa.
- ¹⁰Cako i kare nono, likame pwodi enabi moro obedo tie i Isirael kame cal bala Musa, ngat kame Rwot oudo ngeo wang i wang.
- ¹¹Ka itamo pi gianena kede giaura kame Rwot oudo ocwao Musa timo i lobo me Misiri, ne Parao kede jotie mege dedede kede lobo mere dedede, likame tie ngatamoro kame twero porere kede en.
- ¹²Likame pwodi tie ngatamoro kotieko timo tice me twer kede tice akelo lworu, bala kame bin Musa otimo i nyim jo me Isirael.



Yosua

Yosua 1

Rubanga Ociko ne Yosua Mano Kanan

- ¹Ingei to ka Musa ngatic ka Rwot, bin Rwot oko yamo kede ngakony Musa, en Yosua wot ka Nun.
- ²Rwot owaco ne be, “Ngatic na Musa otieko to, nan iikere, in karacel kede jo dedede me Isirael, pi ngolo ecilet me Yorodan donyo i lobo kame ango atie mino wu.
- ³Ango atieko mino wu kabedo dedede kame tienu bino nyono, bala kame ango acikere kede but Musa.
- ⁴Ango abino mino wu lobo acakere ki wi tim atie i bad tetu piny, tuno i mori me Lebanon atie i bad tetu malo; doko da ebino cakere ki ecilet adwong me Eupurate atie i bad tetu kide, beo i lobo me jo Kiti, tuno i nam adwong me Mediterania kame tie i bad tetu tim.
- ⁵Yosua, likame tie dano moro kame bino sobolo bwoni i kare me kuo ni lung. Ango abino bedo tie kedi bala kame oudo abedo tie kede Musa; ango abino bedo tie kedi, likame abino jali.
- ⁶Bed ngat atek di itie kede nwangcuny, pien in ibino telo jo nogi ot mano di eko doko mergi lobo kame bin ango acikere but joakwari gi be abino mino gi.
- ⁷Kenekene bed dano atek di itie kede nwangcuny adwong, di igwokere lubo iswilia dedede kame ngatic na Musa omio wu. Kur iparao tenge kiye, di gi dedede ko bino cobere ni kiber i kabedo dedede kame in ioto iye.
- ⁸Miero inen be isomo ne jo itabu me Iswil i kare dedede kame gin kitie wora kede; bed tamo kope mege iceng kede iwor, tetekeny ikaruno bedo di igwokere pi lubo gi dedede kame kowandiko iye. Manono bino mino ibedo kede mulem, doko gi dedede ko bino cobere ni kiber.
- ⁹Nan ango aciki be, bed dano atek di itie kede nwangcuny; kur ibed kede lworu amoto potocuny, pien ango Rwot Rubanga wu atie kedi i kabedo dedede kame ioto iye.”

Yosua Omio Jo Cik me Mano Kanan

- ¹⁰Yosua oko mino jotel cik pi
- ¹¹ririmo kimere dedede di kiwaco ne jo be, “Ingei ceng adek ibinunu ngolo ecilet me Yorodan pi donyo i lobo kame Rwot Rubanga wu tie mino wu, di ikounu game edoko meru; pi manono, iikunu cam cuto me sapali nono.”
- ¹²Yosua oko waco ne jo me ekeko ka Ruben, jo me ekeko ka Gad, kede dul me jo me ekeko ka Manase be,
- ¹³” Yutununu kop kame Musa ngatic ka Rwot ociko wu iye di ewaco be, ‘Rwot Rubanga wu bino mino wu lobo noni pi bedo kakame ibinunu udo kiye wei.’



¹⁴Mon wu, idwe wu, leini wu bino dong kanoni, en lobo kame Musa omio wu, do isirikalen wu dedede bino ngolo ecilet me Yorodan loka tetuca di kimako jamini me yi. Gin kibino telo ne imiegu gi yongayo di kiko bino konyo gi yi

¹⁵tuno gin mano lobo kame tie i bad tetu tim me ecilet me Yorodan, en lobo kame Rwot Rubanga wu tie mino gi, di gida kiko bino udo wei bala wun. Di do wun ikounu bino dwogo bedo kan i lobo wu amako wu, i bad tetu kide me ecilet me Yorodan, en lobo kame Musa ngatic ka Rwot omio wu.”

¹⁶Gin kiko dwoko ne Yosua be, “Wan obino timo gi dedede kame Rwot owaco ne wa, doko da obino ot karamoroni kenekene kame icwao wa iye.

¹⁷Wan obino lubo kop nin bala kame oudo obedo lubo kede kop ka Musa. Kenekene wan okwao be, koto Rwot Rubanga ni obedo tie kedi bala kame oudo ebedo tie kede Musa!

¹⁸Ngatamoroni kame bino dagi lubo gikame in iciko, amoto lubo kop kame in iwaco kobino neke. Kenekene in bed dano atek di itie kede nwangcuny.”

Yosua 2

Yosua Ocwao Bega Ngingico Bomba me Jeriko

¹Yosua wot ka Nun oko cwano cuo are i mung bala ibegai yai ki Sitim di ewaco negi be, “Otunu ingingicunu lobo nono, do singo twatwal Jeriko.” Aso, gin kiko ot di kiko donyo i ot me malaya moro anyinge Rakab di kiko buto kanono.

²Abaka me Jeriko oko winyo be jo mogo me Isirael oudo obino iwor nono bala ibegai pi ngingico lobo nono.

³En eko cwano ne Rakab kop be, “Cuo kobino buti, kame nan tie i odi, obino kan bala ibegai, pi ngingico lobo noni dedede. Nan kel gi kan!”

⁴Do Rakab oko kano cuo are nogo di do eko waco be, “Etie kop me ateni, cuo nogo oudo obino buta, do ango gira oudo likame angeo kakame kiwok kiye.

⁵Aso, kakame piny odoko amumusit kede, gin di kiko yai kioto di pwodi oudo likame kocego erute me bomba. Kakame kioto iye ango likame angeo. Do ka iwapunu gi awakawaka, ibinunu udo gi.”

⁶(Rakab oudo otero jo nogo i wi ot di eko umo gi kede pulak kame oudo emo i wi ot pi tuo.)

⁷Aso, isirikalen ka Abaka oko wapo gi lubo yongayo aoto Yorodan tuno kakame yongayo ngolo kede ecilet. Cucuto kakame jowap nogo oudo oduonyo kede ooko me bomba, oko cego erute me bomba.

⁸Di pwodi oudo ibegai nogo likame obuto, Rakab oko yito but gi i wi ot

⁹di eko waco negi be, “Ango angeo be Rwot otieko mino wu lobo noni. Wan dedede kom wa tie miel pi wun; jo dedede kame bedo kanoni tie kede lwooro atek i komu.



- 10** Pien wan otieko winyo kite kame Rwot omio kede pii me Nam Akwar otuo kede i nyimu, kakame iyaunu kede ki Misiri; kede kite kame inekunu kede Sikon kede Og, gin abakai me jo Amor, jo kame oudo bedo i bad tetu kide me Yorodan.
- 11** Kakame wan owinyo kede kop nono, cuny wa oko nyote, di do likame tie ngatamoro oko dong di etie kede nwangcuny; manoni kom otimere pi wun. Rwot Rubanga wu ateteni obedo Rubanga apugo malo kede wi lobo kan.
- 12** Aso, bala kame ada nan atimo ne wu kede bero, kwongerenu buta i nyim Rwot be wuda ibinunu timo ne jo me ot ka papa na bero. Mianu gianena moro kame bino mina abedo kede gen butu be,
- 13** likame ibinunu timo gimoro arac ne papa na, kede toto na; ne imiegu na kede amiegu na, kede jo dedede me ude gin. Konyunu wa kur nek wa!”
- 14** Cuo nogo oko waco ne Rakab be, “Ka gimoro arac otimere ne wu, okwao be Rubanga kwany kuo wada! Ka likame in iwaco ne ngatamoro gikame wan obedo timo, wan ocikere buti be kame Rwot omio wa lobo noni, wada obino timo ni bero kede cuny me genere.”
- 15** En eko yololo gi piny ki dirisa kede auno, pien ode oudo tie i dierediere me apama me yie kede apama me ooko kame celo bomba.
- 16** En ewaco negi be, “Otunu idokunu tetu piny kobedo imukuran, tetekeny jo kame tie wapo wu kur twer udo wu. Pwonunu kunono pi ceng adek, tuno di jo kame tie wapo wu otieko dwogo; di do ingei gin dwogo wun ikounu giru dok kabedo wu.”
- 17** Cuo nogo oko waco ne Rakab be, “Likame wan obino turo cikere kame in itieko mino wan otimo buti noni.
- 18** Gikame in ibino timo ine: kame wan osuro lobo noni oko donyo iye, in ibino tweno ausi akwar noni i wang dirisa kame in iyololo wan piny kiye. Doko da iko koko i odi papa ni kede toto ni, imiegu ni kede jo dedede me ot ka papa ni.
- 19** Ka ngatamoro kibusu oko wok ooko ki ot di eko ot i dier gudo me bomba, udo en emo to mere kene, manono likame bino mako wa; do ka wan owanakino ngatamoronni di oudo etie kedi i ot, kop me to mere mako wan.
- 20** Do ka in ioto waco ne jo gikame wan oudo obino kan timo, wan likame obino gwoko cikere wa buti.”
- 21** Rakab oko dwoko be, “Ango ayei kop kame wun iwacunu.” En eko peruno gi kioto. Di do eko tweno ausi akwar i dirisa nono.
- 22** Ibegai nogo oko ot i piny me imukuran di kiko pwono iye. Jo kame oudo tie wapo gi oko more pi ceng adek, do likame kiko twero udo cuo are nogo, di do kiko dok Jeriko.
- 23** Di do ibegai are nogo oko wok ki wi imukuran, kiko ngolo ecilet di kiko dok but Yosua wot ka Nun. Gin kiko waco ne Yosua gi dedede kotimere negi.



²⁴Gin kiwaco ne Yosua be, “Ateteni Rwot otieko mino lobo nono dedede i cing wa. Jo dedede atie kuno tie kede Iworu atek i kom wa.”

Yosua 3

Jo me Isirael Ongolo Ecilet me Yorodan

¹Oru mere odiko sek, Yosua karacel kede jo dedede me Isirael oko yai ki Sitim, di kiko ot tuno Yorodan. Gin kiko ber gero kimere gi kanono di pwodi likame kingolo ecilet.

²Ingei ceng adek jotel oko rimaro kimere dedede

³di kiciko jo be, “Kame inenunu di josaseredoti Jolebi tie riongo Sanduku me Isikan ka Rwot Rubanga wu, wuda ipoorenu yai lubo gi.

⁴Wun lem pwodi likame itununu kan, pi manono gin en kame kibino telo ne wu yongayo. Do likame ibinunu noko Sanduku me Isikan; ibinunu dong cen mere kakame boro mere romo kilomita acel.”

⁵Yosua oko waco ne jo be, “Lonyerenu, pien diki Rwot bino timo ne wu gi me aura.”

⁶Di do eko waco ne josaseredoti pi riongo Sanduku me Isikan di kiko telo ne jo anyim. Gin kiko timo bala kame en ewaco.

⁷Rwot oko waco ne Yosua be, “Tin ango abino mini icako bedo kede dwongo i nyim jo me Isirael, tetekeny gin kingei be ango abino bedo tie kedi bala kame oudo abedo tie kede Musa.

⁸Wac ne josaseredoti atie riongo Sanduku me Isikan be, ‘Kame itununu i ecilet me Yorodan, poore icungunu karacel.’ “

⁹Yosua oko waco ne jo be, “Bianu kan di ikounu winyo gikame Rwot Rubanga wu waco.”

¹⁰⁻¹³Di eko waco negi be, “Sanduku me Isikan ka Rwot ngat kame pugo wi lobo lung en kame bino telo ne wu anyim ngolo ecilet me Yorodan. Kame josaseredoti atie riongo Sanduku me Isikan tien gi onyono pii me Yorodan, pii me ecilet nono bino cungo likame emol, di pii kame tie mol ko bino cokere ikumemei karacel. Manono bino mino ingeunu be Rubanga akuo tie i diere wu. En ateteni ebino riamo tenge ki nyimu jo Kanan, jo Kiti, jo Kibi, jo Perisi, jo Girigas, jo Amor kede jo Yebu. Rwot doko da owaco be en emito be iyerunu cuo tomon kiwie are ngat acelacel ki buli ekeko me anywali me Isirael.”

¹⁴⁻¹⁵Manono oudo obedo kare me kac, ecilet oudo otimo ariram. Kakame jo oyai kede ki kabedo kame oudo kigero iye kimere, pi ngolo ecilet me Yorodan, josaseredoti en oko telo negi yongayo di kiriongo Sanduku me Isikan. Cucuto kakame josaseredoti onyono kede pii,



¹⁶pii oko weko mol di eko cokere karacel malo kuno i nget bomba me Adamu, kame kio kede Saretan. Mol me pii ot donyo i Nam Oto oko ngol tel, di do jo oko ngolo ecilet i kakame pimere kede Jeriko.

¹⁷Kakame jo dedede me Isirael oudo tie beno kede i kakatek pi ngolo ecilet, josaseredoti koudo tie riongo Sanduku me Isikan ka Rwot oko cungo i dier ecilet kakotuo, tuno jo dedede ngolo loka.

Yosua 4

Kosipo Kide Tomon kiwie Are Giligal

¹Kakame jo dedede me ateker me Isirael otieko ngolo kede Yorodan, Rwot oko waco ne Yosua be,

²” Yer cuo tomon kiwie are, ngat acelacel ki buli ekeko me anywali me ateker me Isirael,

³di iko ciko negi pi kwanyo kide tomon kiwie are ki dier ecilet me Yorodan, ki kakame josaseredoti oudo ocungo iye. Wac negi pi tero kide nogo kakame kibino gero iye kimere iwor atin.”

⁴Yosua oko yero cuo tomon kiwie are ki buli ekeko me anywali me ateker me Isirael di eko lwongo gi karacel.

⁵En eko waco negi be, “Otunu anyim me Sanduku me Isikan ka Rwot Rubanga wu tuno i dier ecilet me Yorodan, di buli ngat acelacel ko kwanyo kidi eriong i epepet mere, kidi acelacel pi buli ekeko me anywali me ateker me Isirael.

⁶Kide nogi bino yutuno ne wu i kom gikame otimere i ecilet me Yorodan. Ka i kare me anyim idwe wu openyo wu i kom dwong me kide nogi,

⁷wun ibinunu waco negi be, ‘Bin pii ojiko mol kakame oudo kotie riongo kede Sanduku me Isikan ka Rwot ngolo kede ecilet me Yorodan. Aso, kide nogi tie pi yutuno ne jo me Isirael i kare dedede i kom gikame otimere.’ “

⁸Cuo nogo oko timo gikame Yosua ociko negi timo; gin kikwanyo kide tomon kiwie are ki dier ecilet me Yorodan di lubere kede wel me ikekon me anywali me ateker me Isirael, bala kame Rwot oudo owaco ne Yosua, di kiko tero gi kakame oudo jo ogero iye kimere, di kiko cicibo gi kunono.

⁹(Yosua da oko cicibo kide tomon kiwie are i dier ecilet me Yorodan, kakame tien josaseredoti kame oudo riongo Sanduku me Isikan ka Rwot oudo ocungo iye; kide nogo pwodi tie kunono tuno tin.)

¹⁰Josaseredoti koudo riongo Sanduku me Isikan oko dong cungo i dier ecilet me Yorodan tuno di oudo kotieko timo gi dedede kame Rwot oudo ociko ne Yosua pi waco ne jo timo. Manoni en gikame Musa oudo ociko ne Yosua. Jo oko ngolo ecilet awakawaka.



¹¹Cucuto di jo oudo otieko ngolo loka tetuca, josaseredoti kame oudo riongo Sanduku me Isikan ka Rwot oko kato kitelo ne jo anyim.

¹²Jo me ekeko ka Ruben, jo me ekeko ka Gad, kede dul me jo me ekeko ka Manase oko ngolo loka kikato i nyim jo me Isirael di kitieko iikere pi yi, bala kame Musa oudo ociko negi.

¹³Cuo aromo bala tutumia ot ongwon me ikekon me anywali nogi oko ngolo loka tuno i elet me nget Jeriko di kitieko iikere pi yi, di Rwot oudo tie kede gi.

¹⁴I ceng nono, Rwot oko mino Yosua obedo kede dwongo i nyim jo dedede me Isirael; gin kiko bedo kede wor bute i kare me kuo mere lung, bala kame oudo kibedo kede wor but Musa.

¹⁵Rwot oko waco ne Yosua be,

¹⁶” Mi josaseredoti atie riongo Sanduku me Isikan cik pi wok ooko ki ecilet me Yorodan.”

¹⁷Yosua oko ciko ne josaseredoti nogo pi wok ooko ki ecilet me Yorodan.

¹⁸Kakame josaseredoti koudo yeo Sanduku me Isikan ka Rwot otieko wok kede ooko ki dier ecilet me Yorodan, di tien gi oko nyono ooko kakatek, pii me ecilet me Yorodan oko dok kakare, di eko donyo mol ariram i ngete kago bala kame oudo etie kede sek.

¹⁹Jo bin ongolo ecilet me Yorodan i ceng me tomon me duwe me agege, di kiko ot gero kimere gi Giligal, i bad tetu kide me Jeriko.

²⁰Kide tomon kiwie are kame gin kikwanyo ki ecilet me Yorodan, bin Yosua oko sipo gi Giligal,

²¹di ewaco ne jo me Isirael be, “Kame i kare me anyim idwe wu openyo jonywal gi dwong me kide nogi,

²²wun ibinunu waco negi be, ‘Jo me Isirael bin ongolo ecilet me Yorodan tuno kan di kibeo i kakatek.’

²³Pien Rwot Rubanga wu omio pii me Yorodan otuo ne wu tuno wun ngolo loka, bala kame bin emio kede Nam Akwar otuo ne wa tuno wan ngole.

²⁴Pi manoni, jo dedede me wi lobo bino ngeno twer kame Rwot tie kede, di wun ikounu bino bedo kede wor but Rwot Rubanga wu pi kare lung.”

Yosua 5

¹Kakame abakai me jo Amor kame tie i bad tetu tim me ecilet me Yorodan, kede abakai dedede me jo Kanan kame tie i dog nam adwong me Mediterania owinyo kede be Rwot omio ecilet me Yorodan otuo, paka tuno di jo me Isirael oudo otieko ngolo loka, cuny gi oko nyote, di kom gi oko to pi jo me Isirael.

Akepo Kotimere Giligal



²I kare nono Rwot oko waco ne Yosua be, “Tet pale me nyonyo atek di iko bobo kepo jo me Isirael.”

³Aso, Yosua oko teto pale me nyonyo atek di eko kepo jo me Isirael i kabedo kame kolwongo be Emukura me Akepo.

⁴⁻⁶ Kakame jo me Isirael oyai kede ki Misiri, oudo cuo dedede otieko kepere. Do pi kare me mwakini ot ongwon kame jo oudo tie ngolo kede wi tim, bin likame oko kepo atin awobi moro. Doko da i atiekini me kare nono, cuo dedede kame oudo obedo jo yi kakame kiyai kede ki Misiri oudo otieko totoun, pien oudo likame kilubo kop ka Rwot. Rwot oudo okwongere be jo nogo likame bino neno lobo alac di emio, kame bin en ecikere pi mino joakwari gi.

⁷Aso, idwe gin kame Rubanga oketo pi lunyo wang gi en kame Yosua oko kepo, pien oudo likame kokepo gi i kare kame oudo kitie ot kede ki wi tim.

⁸Kakame oudo kotieko kepo kede jo, ateker me Isirael dedede oko dong bedo kakame oudo gin kigero iye kimere gi tuno gin cango.

⁹Rwot oudo oko waco ne Yosua be, “Tin ango akwanyo kibutu lewic me bedo ipasoi i lobo me Misiri.” Manono en komio kolwongo kanono be Giligal tuno tin.

¹⁰ Kakame jo me Isirael ogero kede kimere gi Giligal, i ebar kame iyapi kede Jeriko, gin oudo kiko lubo itok amako Ebaga me Kalamo, di kiko camo ebaga nono cako otieno kame ru i ceng me tomon kiwie ongwon me duwe.

¹¹Ceng kolubo mere gin di kiko camo cam kame oudo kopuro i lobo me Kanan. Kicamo engano kame kocelo i mac kede mugati kame kotimo abongo arup.

¹² Iceng nono emana oko jiko cwei negi di likame doko kiko bedo tie kede emana; gin kiko donyo do camo cam kame kopuro apura i lobo me Kanan.

Yosua kede Icuo Amako Epima

¹³Kakame Yosua onoko kede Jeriko, en eko neno icuo kowoto epima etie mako i cinge. Yosua oko ot bute di oko penye be, “In dano wa arabo ngat acel kikom jokwor wa?”

¹⁴Icuo nono oko dwoko be, “Li, do ango nan abino kan bala ngadwong me isirikalen ka Rwot.” Yosua oko riebere piny i lobo pi mine wor, di eko waco ne be, “Adwong, ango ngatic ni, nyo kame itie ciko na pi timo?”

¹⁵Ngadwong me isirikalen ka Rwot oko waco ne be, “Gony amuka ki tieni, pien itie cungo kabedo kacil.” Yosua oko timo kamanono.

Yosua 6

Jo me Isirael Omao Jeriko

¹Ceng dedede oudo kocego erute me bomba me Jeriko di oko donyo dare adara pi jokwor me Isirael. Likame tie ngatamoro kame oudo donyo iye arabo wok ooko kiye.



²Rwot oko waco ne Yosua be, “Ango abino mino i cingu bomba me Jeriko karacel kede abaka mere, kede isirikalen atek yi atie iye.

³In karacel kede isirikalen ni ibinunu jwiao manaro bomba nono tien acel buli ceng pi ceng kanyape.

⁴Josaseredoti kanyaare bino ot i anyim me Sanduku me Isikan; ngat acelacel kikom gi bino mako agwara me tung emerekek. I ceng me kanyaare in kede isirikalen ni ibinunu jwiao mamano bomba nono tien kanyaare di josaseredoti kuto agwara.

⁵Gin di kiko bino kuto agwara dwan acel awao koko cutucutu, di do jo dedede ko bino woo kitek, di apama koluko bomba ko bino rwacere piny. Di do isirikalen dedede ko bino donyo i bomba.”

⁶Aso, Yosua wot ka Nun oko lwongo josaseredoti di eko waco negi be, “Tingunu Sanduku me Isikan di jo kanyaare kibutu ko ot i anyim mere, di ngat acelacel mako agwara me tung emerekek.”

⁷Di en eko mino jo cik pi cako jwiao manaro bomba nono, di isirikalen kame yabo yongayo en atelo anyim ne Sanduku me Isikan.

^{8-9B}ala kame Yosua oudo ociko ne kede jo, isirikalen kame yabo yongayo en oko telo anyim; di josaseredoti kame oudo kuto agwara en oko lubo gi; di josaseredoti koudo riongo Sanduku me Isikan oko lubo; di do isirikalen ace oko lubo gi ki cen. I esawa nono agwara oko bedo kok akoka nakanaka.

¹⁰Do Yosua oudo ociko ne jo be kur kiwoi akadi waco kop moro tuno i ceng kame en ebino ciko negi kede pi timo kamanono.

¹¹Aso, jo oko riongo Sanduku me Isikan ka Rwot di kiko manaro kede bomba tien acel, di kiko dok ot buto kakame oudo kigero iye kimere gi.

¹²Oru mere odiko sek, Yosua oko yai di josaseredoti oko kwanyo Sanduku me Isikan.

¹³Gin dedede kiko donyo jwiao manaro bomba. Me agege isirikalen ayabo yongayo en otelo anyim, di josaseredoti koudo kuto agwara nakanaka di jo jwiao oko lubo gi; di josaseredoti koudo riongo Sanduku me Isikan oko lubo; di do isirikalen aoto ki cen oko lubo.

¹⁴I ceng me are noni gin kiko jwiao rimaro bomba tien acel, di kiko dok kakame kimere gi oudo tie iye. Gin kiko bedo timo kamanoni pi ceng kanyape.

¹⁵I ceng me kanyaare gin kiko dilo yai obai di kiko donyo jwiao rimaro bomba iepone acel nono tien kanyaare. Ceng nono kenekene en kame gin kirimaro kede bomba tien kanyaare.

¹⁶Kakame oudo kitie manaro kede bomba tien me kanyaare, di do josaseredoti oudo oyapuno kuto agwara, Yosua oko waco ne jo be, “Wounu! Pien Rwot otieko mino wu bomba noni.



¹⁷Bomba kede gi dedede atie iye obedo giamia but Rwot, kopoore dudubo gi. Kenekene ibinunu weko malaya Rakab kede jo kame tie i ode, piento en oudo ekano ibegai wa kame wan ocwao.

¹⁸Do wun miero kur iterunu gimoro kame kopoore dudubo, kur cunyu wai wu tero gimoro kikom gi; pien ka itimunu kamanono ibinunu kelo peko i kimere me jo me Isirael di oko bino dudubo gi.

¹⁹Gi dedede kame kocweo kede siliba, saabu, kede buronsi kede ayon kobino poko gi kibedo gikame komio but Rwot, kobino keto gi i isau me kano lim ka Rwot.”

²⁰ Aso, josaseredoti oko kuto agwara. Cucuto di jo owinyo koko me agwara, jo oko woo kitek di apama koluko bomba oko potu ritirit, di do isirikalen oko pikere i bomba di kiko mane.

²¹Di do gin kiko mino jame dedede but Rwot bala gikame kopoore dudubo; kineneko jo dedede koudo tie i bomba kede epima: cuo, mon, jo atino kede jo adongo. Kineneko da dok romini kede pundan.

²²Yosua oko waco ne cuo are koudo ooto begao bomba nono be, “Wun otunu i ot me malaya noca di ikounu wote ooko, en karacel kede jo mege dedede, bala kame oudo ikwongerenu kede bute.”

²³Aso, cuo nogo koudo obedo ibegai oko donyo i ot ka Rakab di kiko wote ooko, en karacel kede papa mere, toto mere, imiegu mege, kede jo dedede koudo bedo kede en, kede joawade mege, di kiko tero gi i nget kimere me jo me Isirael.

²⁴Di do isirikalen me Isirael oko wango bomba nono dopodop karacel kede gi dedede koudo tie iye. Kenekene kiko weko siliba, saabu, kede jamini kame kocweo kede buronsi kede ayon, di kiko tero gi kiketo gi i isau me kano lim i ot ka Rwot.

²⁵ Do Yosua oko weko malaya Rakab kede jo mege dedede, piento en oudo ekano ibegai koudo Yosua ocwao pi ot ngingico bomba me Jeriko. (Ikwaie mege tie Isirael tuno tin.)

²⁶ Yosua oko mino ikwenyar atek di ekwongere be, “Rwot bino lamo dano moro kame bino bobo medo gero bomba me Jeriko. Ngat kame bino cibo acakini me apama mere bino kei wode kao, ngat kame bino gero irutei mege bino kei ngorit mere.”

²⁷Aso, Rwot oko bedo tie kede Yosua, di nyinge oko doko iruo i piny nono dedede.

Yosua 7

Dub kame Akan Otimo

¹Jo me Isirael likame oko lubo cik kame oudo Rwot omio gi amakere kede dudubo jamini dedede. Akan likame olubo cik nono, omio Rwot oko doko ger ne jo me Isirael. Akan oudo obedo wot ka Karami, akwar Sabadi; en oudo ebeto akwar me ot ka Seera, dul moro me jo me ekeko ka Yuda.



- ²Yosua oko cwano cuo mogo yai ki Jeriko ot Ai, kame tie i nget Bet Aben i bad tetu kide me Betel, pi ot begao lobo nono. Cuo nogo oko ot di kiko mamano Ai.
- ³Gin kiko dok but Yosua di kiko waco ne be, “Likame jo dedede poore ot kuno, jo tutumia are amoto adek en kame poore ot suro bomba me Ai. Pien likame en ebedo bomba adwong, kur icwai isirikalen dedede lole ot kuno.”
- ⁴Aso, isirikalen aromo bala tutumia adek me Isirael oko ot pi suro kunono, do jo me Ai oko riamo gi.
- ⁵Jo me Ai oriamere kede gi cako ki erute me bomba lor piny paka tuno Sebarim, di jo me Ai oko neko gi bala jo aromo ot adek kiwie kanyape i yongayo alor piny ki wi emukura nono. Jo me Isirael oko bedo kede lworu di cuny gi oko kwanyere.
- ⁶Yosua kede jotel me Isirael oko nyinyilo igoen gi pi cweruncy, di kiko roburobun piny i nyim Sanduku me Isikan ka Rwot, di kiko donyo buto kanono tuno otieno, di oudo kijuk kede apua tie i wi gi pi cweruncy.
- ⁷Yosua oko waco be, “Okwe Rwot pinyo komio ikelo wa ngolo ecilet me Yorodan tuno kan? Mam ikelo wa pi mino wa i cing jo Amor tetekeny kinek wa? Pinyo komio wan likame koto odong girwa loka tetuca me Yorodan?”
- ⁸Okwe Rwot nan do awac benyo, bala kame nan jo me Isirael otieko ringino dwogo kede kibut jokwor?
- ⁹Jo me Kanan kede jo dedede abedo i lobo noni bino winyo kop noni di kiko lukaro wa di kiko neneko wa dedede. Di do nyo kame in ibino timo pi gengo jo waco kop arac i nyingi adwong?”
- ¹⁰Rwot oko waco ne Yosua be, “Yai malo! Pinyo komio itie riebere piny kamano?”
- ¹¹Jo me Isirael odubo, gin kituro isikan kame ango aciko negi pi lubo. Gin kitero jamini mogo kame oudo kipoore dudubo. Gin kikwalo gi di kiko ribo gi i kom jamini gi di kiko waco kop me abe.
- ¹²Manono en komio jo me Isirael likame twero yi kede jokwor gi. Gin kiringino kibut jokwor gi pien gin en kame nan do miero muducaro gi. Ango likame bobo abino meede bedo tie kede wu tuno di idudubunu jamini kame oudo kopoore dudubo.
- ¹³Oti ilony jo di iko waco negi pi iikere pi bino i nyima diki. Wace gi be ango Rwot Rubanga me Isirael awaco be, ‘Okweunu jo me Isirael, wun itienu kede jamini mogo kame oudo ango aciko ne wu pi dudubo! Likame ibinunu twero yi kede jokwor wu tuno di ikwanyunu jamini nogo tenge ki diere wu.’
- ¹⁴Aso, wace gi be diki odiko buli ateker acelacel me Isirael bino bino anyim, di ateker kame ango abino yeko, jo mege ko bino anyim buli ekeko me anywali acelacel. Diakal kame ango abino yeko, jo mege ko bino anyim buli dano acelacel.
- ¹⁵Di do ngat kame ango abino yeko en kame udo tie kede jamini kame kopoore dudubo; ngat nono kobino wange kede mac, en karacel kede gi dedede kame etie kede, piento en etimo twon gikarac arom kano i Isirael di eko turo isikan na.”



¹⁶Odiko sek me ceng kolubo, Yosua oko mino buli ateker acelacel me Isirael ooto anyim, oko yeko ateker ka Yuda.

¹⁷En eko mino ateker ka Yuda ooto anyim, di oko yeko ikwae ka Seera. En eko mino ikwae ka Seera ooto anyim buli diakal acelacel, di oko yeko diakal ka Sabadi.

¹⁸En eko mino jo me diakal ka Sabadi ooto anyim buli dano acelacel, di oko yeko Akan wot ka Karami, Karami oudo obedo wot ka Sabadi, Sabadi oudo obedo wot ka Seera, gin jo me ateker ka Yuda.

¹⁹Yosua oko waco ne Akan be, “Dano na, wac kop me ateni i nyim Rwot Rubanga me Isirael, di iko tucu gi dedede. Nan wac na gikame in itimo, kur imungi.”

²⁰Akan oko dwoko be, “Etie kop me ateni, ango en kame adubo i nyim Rwot Rubanga me Isirael. Gikame ango atimo ine:

²¹kikom jamini kame wan oudo omao, ango ako neno ekanso acil me Babilon, kede siliba aromo bala kilo are, kede saabu aromo bala dul kilo; cunya oko wana i kom gi di ako tero gi. Nan gin kitie ayiko gi piny i eema na, di aketo siliba i dud gi piny.”

²²Yosua oko cwano jo mogo di gin kiko ringo aringa ot i eema ka Akan, di kiko udo be ateni oudo koyiko jamini kame kopore dudubo kunono, di koketo siliba piny i dud gi.

²³Gin kiko golo jamini nogo ki eema di kiko tero gi ne Yosua kede jo dedede me Isirael, di do kiko cibo gi i nyim Rwot.

²⁴Di Yosua karacel kede jo dedede me Isirael oko tero Akan wot ka Seera, karacel kede siliba, ekanso, saabu, awobe kede anyira mege, twonin mege, pundan mege, romini mege, eema mere kede gi dedede kame oudo etie kede; di oko tero gi i aditot me Akor.

²⁵Yosua oko waco be, “Pinyo komio ikelo peko i kom wa? Tin Rwot tie kelo peko i komi.” Di jo dedede me Isirael oko didipo en karacel kede jo mege tuno to, di kiko wango jamini mege da.

²⁶Gin kiko coko atukit me kide i kome, atukit me kide nogo tie tuno tin. Manono en komio kolwongo kanono be Akor. Rwot oko do jiko gero mere.

Yosua 8

Mako kede Dudubo Bomba me Ai

¹Rwot oko waco ne Yosua be, “Kur ibed kede lworu amoto potocuny; kwany isirikalen dedede iko ot tuno i bomba me Ai. Neningo ango abino mino i cingu abaka me Ai kede jo mege, bomba mere kede lobo mere dedede.

²Ibinunu timo ne Ai kede abaka mere gikame itimunu ne bomba me Jeriko kede abaka mere; do ibinunu tero jamini kame iyakunu kede leini pi bedo megu. Iikerenu ikounu ngeso sure ki cen ngee.”



- ³Aso, Yosua kede isirikalen dedede oko yai ot suro bomba me Ai. En eyero jo yi tutumia ot adek (30,000) eko cwano gi iwor
- ⁴di ewaco negi be, “Wun ibinunu ot di ikounu buto kiire cen ngei bomba, do kur ikatunu kakabor twatwal, doko miero ibedunu di ikapakina pi sure.
- ⁵Ango kede jo na wan obino beo ki anyim ot iye. Kame gin kiko wok suro wa, wan obino ringo tenge kibus gi bala ngoce bobo.
- ⁶Gin kibino wapo wa tuno wan tero gi kakabor kede bomba, pien gin kibino paro be wan otie ringo gi bala ngoce bobo. Kakame wan otie ringo kede,
- ⁷wun ibinunu motun di ikounu mako bomba. Rwot Rubanga wu bino mine i cing wu.
- ⁸Kame itiekunu mano bomba nono, wangenu bala kame Rwot ociko; nenunu, manoni en cik kame ango atieko mino wu.”
- ⁹Aso, Yosua oko cwano gin kioto di kiko buto kipwono, di kiko donyo kuro ki kunono, i bad tetu tim me Ai, dierediere me Betel kede Ai. Do iwor nono Yosua oko dong kakame kimere gi oudo tie iye.
- ¹⁰Yosua oko dilo yai odiko sek di eko lwongo isirikalen dedede karacel, di en karacel kede jotel me Isirael kiko telo isirikalen ot Ai.
- ¹¹En karacel kede isirikalen kiko ot kidok i bad tetu erute adwong me bomba, di kiko sipo kimere gi i bad tetu malo, di aditot en kame poko kakame gin kitie iye kede bomba me Ai.
- ¹²En eko cibo isirikalen aromo bala tutumia kany opwono kiire dierediere me Betel kede Ai, i bad tetu tim me bomba.
- ¹³Aso, bin gin kiko cibo isirikalen atos mege i bad tetu malo me bomba, kede anak mege oko bedo i cen ngee i bad tetu tim. Do Yosua oko bedo i aditot iwor nono dedede.
- ¹⁴Kakame abaka me Ai oneno kede kamanono, en karacel kede jo me bomba kiko dilo wok ki bomba awakawaka di kiko ot tetu aditot me Yorodan pi yi kede jo me Isirael, kabedo kame oudo ber kicako riamo iye sek. En oudo likame engeo be isirikalen mogo oudo opwono cen ngei bomba pi sure.
- ¹⁵Yosua kede jo mege oko cuko ringo tenge bala kobwono gi, di kiko dok tetu wi tim.
- ¹⁶Gin oudo kilwongo jo dedede me bomba ocokere di kiko donyo wapo jo me Isirael. Kakame oudo gin kitie wapo gi kede, kiko lanyo bomba kakabor.
- ¹⁷Jo dedede me bomba me Ai kede Betel oudo owo kioto wapo jo me Isirael, di kiko weko bomba odong twolo abongo ngatamoro adare.
- ¹⁸Rwot oko waco ne Yosua be, “Cim epima kame tie i cingi tetu bomba me Ai, pien ango ayaro mine i cingu.” Yosua oko cimo epima kame oudo tie i cinge tetu bomba me Ai.



¹⁹Cucuto di en erieo cinge di eko cimo epima tetu bomba, isirikalen kame oudo opwono ingei bomba oko yai awakawaka ki kapwono gi, di kiko ringo i bomba di kiko make. Cucuto gin kiko wango bomba nono.

²⁰Aso kakame jo me bomba me Ai ongoloro kede cen, gin kiko neno di yiro swiridido malo. Likame oudo kitie kede karingo, pien jo me Isirael koudo ongalo ringo i wi tim da oko lokere dwogo suro gi.

²¹Kakame Yosua kede jo mege oneno kede be isirikalen koudo opwono ingei bomba otieko mako kede bomba, doko oudo etie wang, gin kiko lokere dwogo cen di kiko donyo neko jo me Ai.

²²Jo ace me Isirael koudo tie wango bomba da oko wok ne jo me Ai, di do jo dedede me Isirael oko luko jo me Ai di kiko neko gin dedede,

²³kwanyo kenekene abaka me Ai, kame gin kiko mako di kiko tere but Yosua.

²⁴Kakame jo me Isirael otieko neko kede jo me Ai i wi tim kakame oudo jo nogo owapo gi iye, gin kiko dok i bomba me Ai di kiko neko jo dedede koudo tie kunono.

²⁵Wel me jo me Ai kame oko neko cenge nono, cuo karacel kede mon, oudo tie tutumia tomon kiwie are.

²⁶Yosua oudo odong adonga cimo epima mere tetu bomba me Ai kamanono tuno kede di oudo kotieko neko jo dedede me kunono.

²⁷Kenekene gikame jo me Isirael oko tero pi doko mergi en oudo leini kede jamini kame oudo kiyako, bala kame oudo Rwot owaco ne Yosua.

²⁸Aso, bin Yosua oko wango bomba me Ai di eko weke di epopoto, bala kame etie kede tuno tin.

²⁹Gin bin kiko neko abaka me Ai di kiko liero kome i kor yat tuno otieno. Esawa kame ceng oudo tie donyo kede, Yosua oko mino cik be kwany kome piny; jo oko kwanyo kome di kiko uce i erute me bomba, di kiko ume kede twon atukit me kide, kame pwodi tie tuno tin.

Kosomo Iswilia ka Rwot i Moru me Ebal

³⁰ Yosua oko gero ne Rwot Rubanga me Isirael alutari i wi moru me Ebal.

³¹ En etime di lubere kede cik kame Musa ngatic ka Rwot oudo omio jo me Isirael, bala kame kowandiko i iswil ka Musa be, “alutari kame kotimo kede kide kalikame kopao, kide kalikame gipac me nyonyo ayon omulo.” Gin kiko donyo mino kiye giayala awanga kede giayala me nywak.

³²Yosua oko wandiko i kom kide nogo iswilia ka Musa, di jo dedede tie neno.

³³ Jo me Isirael kede jotel gi, kede jodongo gi, jongolkop, karacel kede jokumbor kame oudo bedo i diere gi oko cungo i bad tetuni kede i bad tetuca me Sanduku me Isikan ka Rwot, di kiloko nyim gi kakame Jolebi josaserdoti kame oudo tie yene tie iye. Dul me jo oko cungo oloko ngei gi ne moru me Gerisim, kede dul ace oko cungo



kiloko ngei gi ne moru me Ebal. Musa ngatic ka Rwot oudo ociko negi pi timo kamanono kame kare otuno me mino gi winyo.

³⁴Yosua oko somo iswilia dedede, ribo kiton winyo kede ilam, bala kame kowandiko gi kede i itabu me Iswil.

³⁵Yosua osomo cik ka Musa dedede ne ekodet me jo koudo ocokere, kame ribo kiton mon kede idwe kede jokumbor kame oudo bedo i diere me jo me Isirael.

Yosua 9

Jo me Gibeon Ongalo Yosua

¹Kop kame jo me Isirael oudo tie bwono kede jokwor gi oko tuno i yit abakai kame oudo tie i bad tetu tim me ecilet me Yorodan, i piny kobedo imukuran imukuran, kede piny i bad imukuran, kede i elet me dog nam adwong me Mediterania, tuno paka Lebanon i bad tetu malo. Gin abakai me jo Kiti, jo Amor, jo Kanan, jo Perisi, jo Kibi, kede jo Yebu;

²gin kiko koko cing gi karacel pi yi kede Yosua kede jo me Isirael.

³Do kakame jo me Gibeon, gin jo Kibi, owinyo kede gikame Yosua otimo ne bomban me Jeriko kede Ai,

⁴gin kiko ngolo ne rieko. Gin kiko mako cam mogo, di kiko tweno i ngei pundan gi ipukoi oti, kede isaun me launi kame kodadapo me mako bwini.

⁵Di kiko ngapo igoen konyinyilun kede amukai oti. Mugati kame kimako oudo otuo di kipurao.

⁶Gin kiko ot but Yosua kakame oudo kigero iye kimere Giligal, di kiko waco ne karacel kede jo me Isirael be, “Wan owok ki piny abor, nan wan omito be itimunu isikan keda wa.”

⁷Do jo me Isirael oko waco ne jo Kibi nogo be, “Wan likame otwero timo kede wu isikan, pien cengemogo wun ibedunu kakame iyapi kede wa.”

⁸Gin kiko waco ne Yosua be, “Wan jotic wun.” Yosua oko penyo gi be, “Wun alu? Iwokunu ki tuai?”

⁹Gin kiko waco ne Yosua be, “Wan jotic wu owok ki piny abor, pien wan owinyo kop i kom Rwot Rubanga wu. Wan owinyo gi dedede kame en etieko timo i lobo me Misiri,

¹⁰ kede gikame en etimo ne abakai are me jo Amor atie i bad tetu kide me Yorodan, gin Abaka Sikon me Kesibon kede Abaka Og me Basan, ngat kame oudo bedo Asitarot.

¹¹Aso jotel wa kede jo dedede me lobo wa oko waco ne wa be oik cam moro me sapali di oko bino riamo kede wu. Kiwaco ne wa be wan odok jotic wu di ikounu timo kede wa isikan.



- ¹²Neningo mugati wa. Kakame oyai kede ki paco pi bino riamo kede wu, oudo pwodi kiliet. Neningo, kitieko tuo doko kipurao.
- ¹³Kakame opiko kede bwini i yi isaun me lau nogi, oudo pwodi kinyen, do nan kitieko mwomwocun. Igoen wa kede amukai wa da otieko ti i yongayo.”
- ¹⁴Jo me Isirael oko gamo cam kibut gi abongo penyo tam kibut Rwot.
- ¹⁵Yosua oko timo kede gi isikan me awotin di eko cikere pi gwoko kuo gi, di do jotel me Isirael oko kwongere pi gwoko isikan nono.
- ¹⁶Do di ceng adek okato ingei gin timo isikan, jo me Isirael oko winyo be jo nogo oudo obedo jokio gi.
- ¹⁷Jo me Isirael oko yai ot di kiko tuno i bomban kame jo nogo bedo iye ingei ceng adek, gin en bomban me Gibeon, Kepira, Berot, kede Kiriati Yearim.
- ¹⁸Do jo me Isirael likame oko suro gi, pien jotel me Isirael oudo okwongere but gi i nying Rwot Rubanga me Isirael. Jo dedede me Isirael oko bedo kede ingungur but jotel gi pi kop noni,
- ¹⁹do gin kiko dwoko be, “Wan otieko kwongere but gi i nying Rwot, Rubanga me Isirael, pi manono nataman likame otwerunu timo negi gimoro arac.
- ²⁰Nan wan miero owekunu gi kibedi pi kite kame wan otieko kwongere kede but gi, aso ka li, lilo ka Rubanga bino potu i kom wa.
- ²¹Wekunu gi kibedi, do gin kibino donyo mwodo ne wa yen kede weko ne wa pii.” Manoni en gikame jotel oko waco ne jo i kom kop amako jo nogo.
- ²²Yosua oko lwongo jo me Gibeon bute di eko penyo gi be, “Pinyo komio ingalunu wa di iwacunu be wun ibedunu kakabor kede wa, do di i ateteni itienu kom bedo karacel kede wa?”
- ²³Pi manono, nan wun Rubanga otieko lamo wu; pi kare dedede ibinunu bedo ipasoi, jomwod yen kede jowek pii me tempulo ka Rubanga me Isirael.”
- ²⁴Gin kiko dwoko ne Yosua be, “Adwong, wan otimo kamanoni pien wan oniang kiber be Rwot Rubanga owaco ne ngatic mere Musa be wun ipoorenu neko jo dedede kame bedo kanoni, di ikounu mano lobo noni doko meru; aso, manono en omio wan obedo kede lwooro pi kuo wa.
- ²⁵Do nataman wan otie i cingi, in tim ne wa gikame in ineno be ber kibuti.”
- ²⁶Aso gikame Yosua oko timo negi ine: en eko gwoko gi likame eyei ne jo me Isirael neko gi.
- ²⁷Do i tetucel, en eko mino gi kidoko ipasoi, jomwod yen kede jowek pii ne jo me Isirael kede me alutari ka Rwot. Tuno tin gin kibedo timo tic noni i kakame Rwot oyoero be wore kiye.

Yosua 10



Kobwono Jo Amor

- ¹Abaka Adonisedek me Yerusalem oko winyo be Yosua oudo omako bomba me Ai di eko dudubo en atwal atwala, di eko neko kiton abaka mere da, bala kame oudo etimo i bomba me Jeriko kede ne abaka mere. Doko da ewinyo be jo me Gibeon oudo otimo isikan me anapakin kede jo me Isirael, omio oudo kitie bedo karacel kede gi.
- ²Jo me Yerusalem oko bedo kede lworu adwong, pien Gibeon oudo obedo bomba adwong rom aroma kede bomban apat kame tie kede abakai; en oudo edwong kalamo bomba me Ai, doko jo mege oudo obedo jo yi atek.
- ³Aso, Abaka Adonisedek me Yerusalem oko cwano kop but Abaka Kokam me Keburon, but Abaka Piram me Yaramut, but Abaka Yapia me Lakis kede but abaka Debir me Egilon, di ewaco negi be,
- ⁴” Bianu ikonyanu di okounu suro Gibeon, piento en etieko timo isikan me anapakin kede Yosua kede jo me Isirael.”
- ⁵Di abakai kany me jo Amor nogo, gin en abaka me Yerusalem, me Keburon, me Yaramut, me Lakis kede me Egilon, oko ribo isirikalen gi karacel di kiko luko Gibeon di kiko sure.
- ⁶Jo me Gibeon oko cwano ne Yosua kop Giligal kakame oudo kimere me jo me Isirael tie iye, di kiwaco ne be, “Kur ijal wan jotic ni; suny bino ikony wa; pien abakai dedede me jo Amor kame bedo i piny me imukuran otieko cokere obino pi suro wa!”
- ⁷Aso, Yosua oko yai ki Giligal kede jo yi dedede, ribo kiton isirikalen atek me aura.
- ⁸Rwot oko waco ne Yosua be, “Kur ilworunu gi, ateteni ango abino mino gi i cingu; likame tie ngatamoro akadi acel kikut gi kame bino twero yi kede wu.”
- ⁹Yosua oko ot kede isirikalen mege iwor kiakia yai ki Giligal di kiko tuno i kom jo Amor nogo, di kiko ngeso suro gi.
- ¹⁰Rwot oko mino jo Amor nogo obedo kede lworu atek i kom jo me Isirael. Jo me Isirael oko neko gi i Gibeon, di kiko donyo riamere kede gi lubo yongayo ayito malo beo dierediere me mori kame tie Bet Koron, di kiko bedo neko gi aneka i yongayo kamanono tuno Aseka kede Makeda.
- ¹¹Kakame oudo kitie ringo kede tenge kikut jo me Isirael, esawa kame oudo do kitie ringo lor kede piny me mori atie Bet Koron, Rwot oko mino akako adongodongo ocwei i kom gi ape ape paka tuno Aseka. Jo kame akako oko neko oko bedo tot kalamo jo kame jo me Isirael oneko.
- ¹²I ceng kame Rwot omio kede jo Amor i cing jo me Isirael, Yosua oko yamo kede Rwot. En eyamo di jo dedede me Isirael winyo be, “Ceng cing tir i wi Gibeon duwe, jiki i wi Aditot me Aijalon.”
- ¹³Ceng oko cungo tir, di likame duwe da oko nyiko paka tuno di jo me Isirael oudo otieko bwono jokwor gi. Kowandiko kop noni i itabu ka Yasar. Ceng oudo oko cungo tir malo i edou pi ceng acel alutu di likame edonyo.



¹⁴Cako sek di pwodi likame manono otimere, doko da cako i kare nono tuno tin, likame pwodi tie ceng moro kobedo cal kede manono, ceng kame Rubanga olubo kede gikame dano ociko ne. Rwot okonyo jo me Isirael yi.

¹⁵Ingei manoni, Yosua kede isirikalen mege oko dok i kimere gi Giligal.

Yosua Omake Abakai Kany me Jo Amor

¹⁶Kakame manono oudo tie timere kede, abakai kany nogo me jo Amor oudo oko ringo di kiko ot pwono i abo kame tie Makeda.

¹⁷Di oko waco ne Yosua be koudo abakai kany nogo di kitie pwono i abo me Makeda.

¹⁸Yosua oko waco be, “Lorunu kide adongodongo igasakinunu i dog abo nono di ikounu keto jo mogo daro kanono,

¹⁹do wun kur ibedunu kunono. Wun meedenu ameda wapo jokwor di isurunu gi ki cen ngei gi; kur iyeunu negi donyo i bomban gi, pien Rwot Rubanga wu otieko mino gi i cingu.”

²⁰Yosua kede jo mege me Isirael oko neko gi nek arac, do mogo kikom gi oko bwot ododonyo i bomban gi kame koluko kede apama atek.

²¹Jo ka Yosua dedede oko dok bute i kimere gi atie Makeda abongo awanon moro. Likame tie ngatamoro i lobo nono oko jalere ngamo doge waco kop moro arac i kom jo me Isirael.

²²Yosua oko waco be, “Yabunu dog abo di ikounu woto abakai kany nogo ikelunu gi buta kan.”

²³Gin kiko timo kamanono; kiwoto abakai kany nogo ki abo, gin en abaka me Yerusalem, abaka me Keburon, abaka me Yaramut, abaka me Lakis kede abaka me Egilon.

²⁴Kakame kotuno kede gi but Yosua, Yosua oko lwongo jo dedede me Isirael bute di eko waco ne jodongo me isirikalen koudo ooto kede en, pi bino di kiko nyono ngut abakai nogo. Gin iko timo kamanono.

²⁵Yosua oko waco be, “Kur ibedunu kede lworu, doko da kur cunyu dubere. Bedunu jo atek atie kede nwangcuny, pie manoni en gikame Rwot bino timo ne jokwor wu dedede.”

²⁶Yosua oko neko abakai kany nogo di eko liero kom gi i kor yen kany, kakame kiko bedo iye tuno otieno.

²⁷Otieno di ceng oudo tie donyo, Yosua oko mino cik di oko kwanyo kom gi tenge ki kor yen di oko ot uco gi i abo kame oudo gin kipwono iye. Gin kiko gasakino kide adongodongo i dog abo nono, kame tie tuno tin.

Yosua Omake Adulion Ace me Jo Amor



²⁸Yosua oko suro tuno mako bomba me Makeda kede abaka mere cenge nono. En eko neko jo dedede me bomba nono, likame eweko ngatamoro odong kuo. En eko timo ne abaka me Makeda gikame etimo ne abaka me Jeriko.

²⁹Ingei manono Yosua kede jo me Isirael dedede oko kato Libina di kiko sure.

³⁰Rwot oko mino bomba nono da kede abaka mere i cing jo me Isirael. Gin kiko neko jo dedede koudo tie iye, likame kiweko ngatamoro odong kuo. Gin kiko timo ne abaka me bomba nono da gikame kitimo ne abaka me Jeriko.

³¹Alubo mere Yosua kede isirikalen oko yai ki Libina di kiko kato Lakis, kiko luko bomba nono di kiko sure.

³²Rwot oko mino Lakis da i cing jo me Isirael di kiko make i ceng me are me yi. Gin kiko neko jo dedede atie iye, bala kame oudo kitimo i bomba me Libina.

³³Abaka Koram me Geser oko ot pi konyo bomba me Lakis, do Yosua oko bwone karacel kede isirikalen mege di likame eko weko ngatamoro kibun gi di kuo.

³⁴Ingei manono Yosua kede isirikalen mege oko yai ki Lakis di kiko ot Egilon. Gin kiko lukaro bomba nono di kiko sure.

³⁵Gin kiko mako bomba nono i ceng nono, di kiko neko jo dedede atie iye, bala kame oudo kitimo i bomba me Lakis.

³⁶Di Yosua oko ot kede isirikalen mege yai ki Egilon ot Keburon. Gin kiko sure,

³⁷di kiko make. Gin kiko neko abaka mere kede jo dedede koudo tie iye, ribo kiton jo me bomban atino kame oudo kio kede, bala kame oudo kitimo Egilon. Yosua omio kodudubo bomba nono atwal atwala. Likame kiweko ngatamoro odong kuo.

³⁸Yosua kede isirikalen mege oko lokere kioto i bomba me Debir di kiko sure,

³⁹en eko make karacel kede abaka mere kede bomban ace kame kio kede, di gin kiko neko jo dedede kame oudo tie kuno, likame tie ngatamoro kame kiko weko di kuo. Yosua oko timo ne Debir gikame etimo ne Keburon kede ne Libina kede abaka mere.

⁴⁰Yosua oko mano lobo nono dedede; gin kibwono abakai me piny me imukuran, kede me lobo me bad imukuran atie i bad tetu kide, kede me lobo me bad imukuran atie i bad tetu tim, kede me lobo kotuo atie i bad tetu piny. Likame tie ngatamoro kame gin kiko weko di kuo, gin kineko jo dedede. Manoni en gikame Rwot Rubanga me Isirael oudo ociko negi.

⁴¹Yosua oko bedo yi di ebwono jokwor cako ki Kades Barenea tuno Gasa, ribo kiton adul me Gosen tuno Gibeon i bad tetu malo.

⁴²Yosua oko bwono abakai nogi kede mano lobere gi i wang yi acel nono, pien Rwot Rubanga me Isirael oudo tie yi pir jo me Isirael.

⁴³Ingei manoni Yosua kede isirikalen mege oko dok i kimere gi Giligal.

Yosua 11



Yosua Obwono Jabin kede Jo Konye

- ¹Kakame Abaka Jabin me Kasor owinyo kede kite kame Isirael oudo tie bwono kede yi, en eko cwano kop lwongo Abaka Yobab me Madon, abaka me Simiron, abaka me Akisap,
- ²kede abakai me piny me imukuran atie i bad tetu malo, kede me Aditot me Yorodan i bad tetu piny me nam me Galilaya, kede me lobo atie i bad imukuran, kede me dog nam adwong i nget Dor.
- ³Ecwao kop da lwongo jo me Kanan atie i bad tetu kide kede i bad tetu tim me ecilet me Yorodan, jo Amor, jo Kiti, jo Perisi, jo Yebu atie i piny me imukuran, karacel kede jo Kibi kame bedo i dud moru me Kerimon i lobo me Misipa.
- ⁴Gin kiko ot kede isirikalen gi dedede, di kiko riribun kidoko tot bala asinge me dog nam adwong. Oudo da kitie kede asigiran kede cabalan atos.
- ⁵Abakai nogi dedede oko ot kede isirikalen gi di kiko gero kimere gi i dog atapar me Merom, pi yi kede jo me Isirael.
- ⁶Rwot oko waco ne Yosua be, “Kur ibed kede lwooro i kom gi, pien diki tetu esawa noni udo ango atieko neko gi ne wu. Ibinunu totongo amorito me tien asigiran gi di ikounu wango cabalan gi.”
- ⁷Aso Yosua kede isirikalen mege oko ngeso suro gi i dog atapar me Merom.
- ⁸Rwot oko mino jo me Isirael obwono gi; jo me Isirael osuro gi di oko donyo wapo gi dok i bad tetu malo paka tuno Misirepot Maim kede Sidon, kede da dok i bad tetu kide paka tuno i aditot me Misipa. Jo me Isirael oko bedo neko gi aneka kamanono tuno tieko gi pitipit.
- ⁹Yosua oko timo negi gikame Rwot oudo ociko ne; en etotongo amorito me tien asigiran gi di eko wango cabalan gi.
- ¹⁰Yosua oko lokere odok cen di eko mako bomba me Kasor di eko neko abaka mere. (I kare nono Kasor oudo obedo ajakanut atek kalamo ajakanuto nogo dedede.)
- ¹¹Gin kiko neko jo me kunono dedede, likame tie ngatamoro oko dong kuo, doko da kiko wango bomba nono.
- ¹²Yosua oko mamako bomban nogo dedede, karacel kede abakai gi da, di eko neko jo dedede bala kame Musa ngatic ka Rwot oudo ociko negi.
- ¹³Do bed bala kamanono da, Yosua likame oko wango bomban kame oudo kogero i wi atukito me amejeko me kare kasek, kwanyo kenekene Kasor en kame Yosua oko wango.
- ¹⁴Jo me Isirael oko yako jamini abeco me bomban nogi kede leini di kiko tero, do kineko jo dedede, likame tie ngatamoro kame kiweko kuo.
- ¹⁵Rwot oudo omio cik mege but ngatic mere Musa, di Musa oko mino gi but Yosua, di Yosua oko lubo gi. Yosua otimo gi dedede kame Rwot oudo ociko ne Musa.



Adul kame Yosua Omao

¹⁶Yosua omao lobo nono dedede: piny me imukuran kede lobo atie piny i dud imukuran dedede atie i bad tetu malo kede i bad tetu piny, adul dedede me Gosen, kede lobo kotuo atie i bad tetu piny mere, karacel kiton aditot me Yorodan da.

¹⁷⁻¹⁸Adul nono riere yai ki moru me Kalak atie i bad tetu piny i nget Edom, di eko ot ape ape paka Balagad i bad tetu malo, i aditot me Lebanon i bad tetu piny me moru me Kerimon. Yosua obedo yi kede abakai me adul noni pi kare alac, do en eko mako gin dedede di eko neko gi.

¹⁹Bomba acel kenekene kotimo isikan me anapakin kede jo me Isirael en oudo bomba me Gibeon, kakame jo Kibi mogo bedo iye. Bomban ace apat dedede jo me Isirael oyi kede gi di jo me Isirael oko bwono gi.

²⁰Manono oudo obedo iik ka Rwot pi mino cuny gi bedo tek yi kede jo me Isirael, tetekey dudubo gi atwal atwala di oko neko jo gi pitipit, bala kame Rwot oudo ociko ne Musa.

²¹I kare nono, Yosua oko ot di eko muducaro itucio me jo kame kolwongo be Anakim, kame oudo bedo i piny me imukuran; manono ribo Keburon, Debir, Anab, kede kabedo dedede me imukuran atie Yuda kede Isirael. Yosua omuducaro gi atwal atwala karacel kede bomban gi.

²²Likame tie ngatamoro kikom jo Anakim moro oko dong i lobo me Isirael; do konye mogo anonok oko dong Gasa, Gat kede Asidod.

²³Yosua oko mano lobo nono dedede, bala kame Rwot oudo ociko ne Musa. En eko mino lobo nono but jo me Isirael pi bedo mergi amako gi, di lubere kede kite kame kopoko ne kede jo me buli ekeko me anywali me Isirael. Jo di do oko wei kede kop me yi.

Yosua 12

Abakai kame Musa Obwono

¹Jo me Isirael oudo kong sek otieko bwono abakai are di gin kiko donyo bedo i lobo gi. Manono en bad tetu kide me Yorodan, cako ki Aditot me Arunon paka tuno i Aditot me Yorodan, kede da dok i bad tetu malo tuno i moru me Kerimon.

²Acel kikom gi oudo obedo Abaka Sikon me jo Amor, kame oudo pugo ki bomba me Kesibon. Lobo kame en oudo epugo oudo obedo dul me lobo me Gilead, manono cakere ki Aroer (kame tie i lak aditot me Arunon) kede bomba kame tie i dier aditot nono, di eko ot ape ape paka tuno i ecilet me Jabok, kame obedo ikor me Amon;

³oudo eribo Aditot me Yorodan cako ki nam me Galilaya dok i bad tetu piny tuno Bet Jesimot (kame tie i bad tetu kide me Nam Oto), di eko kato tuno i dud moru me Pisiga.

⁴Kibwono da Abaka Og me Basan, dano me ajikini me jo Repairim, kame oudo bedo Asitarot kede Ederei.



⁵Lobo kame oudo epugo oudo ribo moru me Kerimon kede Saleka, kede Basan dedede kiton tuno i ikor me Gesur kede Maka, kiton ribo da dul me Gilead kiton tuno i adul ka Abaka Sikon me Kesibon.

⁶Musa kede jo me Isirael obwono abakai are nogi. Musa, ngatic ka Rwot, oko mino lobo gi but jo me ekeko ka Ruben kede Gad kede dul me jo me ekeko ka Manase, pi doko mergi.

Abakai kame Yosua Obwono

⁷Yosua kede jo me Isirael obwono abakai dedede kame oudo tie i lobo atie i bad tetu tim me Yorodan, cako ki Balagad i aditot me Lebanon tuno i moru me Kalak i bad tetu piny i nget Edom. Yosua opopoko lobo noni ne jo me ikekon me anywali me Isirael pi bedo mergi me atwal.

⁸Lobo noni oudo ribo piny me imukuran, lobo katie i bad imukuran me bad tetu tim, Aditot me Yorodan kede bad imukuran mege, lobo katie i bad imukuran me bad tetu kide, kede lobo kotuo atie i bad tetu piny. Lobo noni oudo jo kame bedo iye ige: jo Kiti, jo Amor, jo Kanan, jo Perisi, jo Kibi, kede jo Yebu.

⁹Jo me Isirael obwono abakai me bomban gi ta: Jeriko, Ai (i nget Betel),

¹⁰Yerusalem, Keburon,

¹¹abaka me Yaramut, abaka me Lakis,

¹²abaka me Egilon, abaka me Geser,

¹³abaka me Debir, abaka me Geder,

¹⁴abaka me Koroma, abaka me Arad,

¹⁵abaka me Libina, abaka me Adulam,

¹⁶abaka me Makeda, abaka me Betel,

¹⁷abaka me Tapua, abaka me Keper,

¹⁸abaka me Apek, abaka me Lasaron,

¹⁹abaka me Madon, abaka me Kasor,

²⁰abaka me Simiron Meron, abaka me Akisap,

²¹abaka me Tanak, abaka me Megido,

²²abaka me Kedes, abaka me Yokineam (atie Kamel),

²³abaka me Dor (i dog nam), abaka me Goim (atie Galilaya),

²⁴kede abaka me Tirisa, gin dedede abakai ot adek kiwie acel.

Yosua 13

Lobo kame Pwodi Kopoore Mano



¹Nan Yosua do oudo otieko ti twatwal. Rwot oko waco ne be, “In nan itieko ti, kare ni okato, do di pwodi lobo kodong kame kopooore mano tie dwong.

²Lobo kame pwodi odong ine: lobo lung me jo Pilistia kede Gesur,

³ribo kiton lobo me jo Abim atie i bad tetu piny. (Lobo kame cakere ki osamai me Sikor, kame tie i ikor me Misiri, di eko ot ape ape i bad tetu malo paka tuno i ikor me Ekuron, kame oudo kotero be obedo lobo me jo Kanan; abakai me jo Pilistia oudo bedo Gasa, Asidod, Asikelon, Gat kede Ekuron.)

⁴I bad tetu piny, tie iye pwodi lobo lung me jo Kanan, kede Meara (kame obedo lobo me jo Sidon), tuno Apek, kame tie i ikor kede jo Amor;

⁵lobo me bomba me Gebal; lobo me Lebanon lung dok tetu kide, cako ki Balagad kame tie i bad tetu piny me moru me Kerimon tuno Kamat, en yongayo atie i dierediere me mori.

⁶Manoni riribo lobo lung me jo Sidon, kame bedo i lobo me imukuran, dierediere me mori me Lebanon kede Misirepot Maim. Ango kikoma abino riamo jo nogi di jo me Isirael nyiko anyim mot mot. Kenekene poore ipopoko lobo ne jo me Isirael bala kame ango atieko ciko ni.

⁷Aso, nan in do popoko lobo noni ne jo me ikekon kanyangon me Isirael kede dul jo me ekeko ka Manase pi bedo mergi.”

Popoko Lobo atie i bad tetu Kide me Yorodan

⁸Jo me ekeko ka Ruben kede me ka Gad, kede dul me jo me ekeko ka Manase oudo otieko udo lobo kame Musa, ngatic ka Rwot oudo omio gi; lobo nono oudo tie i bad tetu kide me ecilet me Yorodan.

⁹Lobo gi nono oudo cakere ki Aroer (i dog Aditot me Arunon) kede bomba kame oudo tie i cuny aditot nono di eko ribo lobo okiar di opetere cako ki Medeba tuno Dibon.

¹⁰Oudo eoto paka tuno i ikor kame poko Amon, di eko ribo kiton bomban dedede kame Abaka Sikon me jo Amor bin opugo, bin en epugo gi di ebedo Kesibon.

¹¹Oudo eribo Gilead, adulion me Gesur kede Maka, moru me Kerimon dedede kede Basan dedede tuno Saleka.

¹²Oudo eribo lobo kame Abaka Og opugo, en dano me ajikini me jo Repaim, kame bin opugo di ebedo Asitarot kede Ederai. Musa oudo obwono jo nogi di eko riamo gi tenge,

¹³kwanyo kenekene jo me Gesur kede Maka, gin pwodi kitie bedo i diere me jo me Isirael.

¹⁴Musa oudo likame omio jo me ekeko ka Lebi lobo moro pi doko mergi. Bala kame oudo Rwot otieko waco ne Musa, gikobedo mergi en iner me giayala kame kowango i wi alutari ka Rwot Rubanga me Isirael.



Lobo kame Komio Jo me Ekeko ka Ruben

- ¹⁵Musa oudo omio dul moro me lobo but jo me diakal acelacel me jo me Ekeko ka Ruben pi bedo mergi.
- ¹⁶Lobo gin oudo cakere ki Aroer (kame gongere kede Aditot me Arunon) kede bomba kame oudo tie i cuny aditot, di eko ribo lobo kokiar di opetere dedede rimaro Medeba.
- ¹⁷Oudo eribo kiton Kesibon kede bomban dedede kame tie i lobo okiar di opetere, bomban nogo gin en: Dibon, Bamot, Baal, Bet Balameon,
- ¹⁸Yakas, Kedemot, Mepat,
- ¹⁹Kiriataim, Sibima, Seret Sakar kame tie i wi emukura me aditot,
- ²⁰Betepeor, bad moru me Pisiga, kede Bet Jesimot.
- ²¹Oudo eribo bomban dedede me lobo kokiar di opetere kede lobo dedede kame Abaka Sikon me jo Amor oudo pugo, kame oudo pugo di ebedo Kesibon. Musa obwone, ribo kiton jopug me Midian, gin en: Ebi, Rekem, Suur, Kur, kede Reba. Gin dedede oudo kibedo jo kame pugo ne Sikon lobo nono.
- ²²Kikom jo kame jo me Isirael oudo oneko oudo obedo Balaam ngat kame tuco ne jo kope komungere, en oudo ebedo wot ka Beor.
- ²³Yorodan en oudo obedo ikor kame poko jo me ekeko ka Ruben i bad tetu tim. Magonogi en oudo obedo bomban kede calere kame komio jo me ekeko ka Ruben, di lubere kede jo me diakal acelacel.

Lobo kame Komio Jo me Ekeko ka Gad

- ²⁴Musa oudo omio da dul moro me lobo but jo me ekeko ka Gad pi bedo mergi, di lubere kede diakale gi.
- ²⁵Lobo gi oudo ribo Yaser kede bomban dedede me Gilead, dul me lobo me Amon kato paka Aroer, kame tie i bad tetu kide me Raba.
- ²⁶Lobo gi oudo riere yai ki Kesibon tuno Ramat Misipe kede Betonim; doko da oudo eriere yai ki Makanaim tuno i ikor apoko Lodebar.
- ²⁷I aditot me Yorodan oudo eribo Bet Karam, Betenimura, Sukot, kede Sapon, kede kabedo ace apat kame Abaka Sikon me Kesibon oudo pugo. Ikor gi i bad tetu tim oudo obedo ecilet me Yorodan eko riere dok i bad tetu malo tuno i nam me Galilaya.
- ²⁸Magonogi en oudo obedo bomban kede calere kame oko mino jo me ekeko ka Gad pi bedo mergi di lubere kede diakale gi.

Lobo kame Komio Dul me Jo me Ekeko ka Manase

- ²⁹Musa oudo omio adul moro me lobo but dul me jo me ekeko ka Manase pi bedo mergi di lubere kede diakale gi.



³⁰Lobo gin oudo riere cako ki Makanaim di eko ribo Basan dedede, kame tie iye lobo lung kame Abaka Og me Basan pugo, karacel kede calere ot kanyape me Yair i lobo me Basan.

³¹Oudo eribo kiton dul me Gilead, kiton Asitarot kede Ederei, gin bomban adongo i lobo kame Og oudo pugo, gin oudo kitie Basan. Manoni dedede oudo komio dul me diakale me jo kobedo ikwae ka Makir wot ka Manase.

³²Manoni en epone kame bin Musa opopoko kede lobo atie i bad tetu kide me Jeriko kede Yorodan i kare kame oudo etie kede i ebar me Moab.

³³Do Musa likame oko mino lobo moro but jo me ekeko ka Lebi. En ewaco negi be gikame obedo mergi en iner me giamia but Rwot Rubanga me Isirael.

Yosua 14

Poko Lobo atie i Bad tetu Tim me Yorodan

¹Kop kame lubo noni mako kite kame bin kopoko ne kede jo me Isirael lobo me Kanan kame oudo tie i bad tetu tim me Yorodan. Eleasar ngasaseredoti, Yosua wot ka Nun, kede jotel me miere me ikekon me Isirael en kopopoko lobo nono negi.

²Gin kiuco alulu me poko lobo nono ne jo me ikekon me Isirael kanyangon kede dul, bala kame oudo Rwot ociko ne Musa.

³Musa oudo otieko mino lobo me bad tetu kide me Yorodan but jo me ikekon are kede dul;

⁴Jo me ot ka Yosepu oudo opokere i ikekon are, ekeko ka Manase kede me ka Epuraimu. Musa oudo likame opoko ne Jolebi lobo moro pi bedo mergi, kwanyo kenekene bomban kame komio gi pi bedo iye, kede kabedere me kwano doke gi, romini kede diegi.

⁵Jo me Isirael oko popoko lobo me Kanan bala kame oudo Rwot ociko ne Musa.

Komio Kaleb Bomba me Keburon

⁶Ceng moro acel di jo me Isirael oudo pwodi tie Giligal, jo mogo me ekeko ka Yuda oko ot but Yosua. Ngat acel kikom gi kame oudo nyinge Kaleb wot ka Jepune me ot ka Kenisi oko waco ne Yosua be, “In ingeo kop kame Rwot owaco ne Musa dano ka Rubanga i Kades Barenea i komi kede ango.

⁷I kare kame Musa ngatic ka Rubanga bin ocwa kede yai ki Kades Barenea pi bino ngingico lobo noni, mwaka nango me dongo oudo oromo ot ongwon. Ango bin ako dwoko bute kop me ateni me gikame oudo wan aneno.

⁸Jo kame bin ango aupere kede gi pi ot ngingico lobo nono oko dubo cuny jo kede lwor; do ango ako lubo kop ka Rwot Rubanga na kede cunya lung.

⁹Pi mano, Musa oko kwongere buta cenge nono di ewaco be, ‘Ateteni lobo kame tieni onyono nono bino doko meri kede idwe ni atwal, pien itieko lubo kop ka Rwot Rubanga na kede cunyi lung.’



¹⁰Aso, neningo nataman Rwot otieko gwoka atie akuo bala kame en oudo ewaco. Cako i kare kame Rwot bin owaco kede kop noni but Musa di jo me Isirael tie beo i wi tim, nan do mwakini oromo ot ongwon kiwie kany. Ango ine do nan mwakini na me dongo otieko romo ot kanyauni kiwie kany.

¹¹Ango tin pwodi atie atek bala kite kame oudo atie kede i kare kame bin Musa ocwa kede. Ango pwodi atek akaruno ot i yi arabo timo gimoroni kenekene.

¹²Aso, in mia lobo kobedo mori mori noni kame bin Rwot ocikere iye buta i ceng kame wan odwoko kede kop. Ida cenge nono iwinyo di wan oudo owaco be jo Anak tie kunono, doko bomban gi dongodongo di kocelo gi kede apama atek. Cengemogo Rwot bino konya di ango ako riamo gin tenge bala kame en oudo ewaco.”

¹³Di do Yosua oko lamo ne Kaleb wot ka Jepune winyo di eko mine bomba me Keburon pi doko mere.

¹⁴Aso, Keburon oko doko me ka Kaleb wot ka Jepune dano me ot ka Kenisi atwal, piento en oudo elubo kop ka Rwot Rubanga me jo me Isirael kede cunye lung.

¹⁵Sek ber oudo kolwongo Keburon be bomba me Kiriya Araba. (Araba oudo obedo nying icuo kame oudo tek kalamo kikom jo Anakim.) Di do anapakin oko bedo tie i lobo nono.

Yosua 15

Lobo kame Kopoko ne Jo me Ekeko ka Yuda

¹Jo me ekeko ka Yuda bin komio lobo kame tuno i bad tetu piny i ikor kede Edom, kame tie i ajikini me bad tetu piny me wi tim me Sin.

²Ikor gi me bad tetu piny noni oudo cakere ki ajikini me bad tetu piny me Nam Oto;

³eko dok i bad tetu piny i wi emukura me Akurabim, di eko beo i wi tim me Sin; eko ot beo i bad tetu piny me bomba me Kades Barenea. Di do eko lanyo Kesiron eko tuno Adar, di eko lokere dok tetu Karaka,

⁴eko ot tuno Asamon, di eko ririo osamai me ikor me Misiri, di eko ot jik i nam me Mediterania. Manono en oudo ikor me Yuda i bad tetu piny.

⁵I bad tetu kide, Nam Oto en oudo obedo ikor, di eko ot paka tuno kakame ecilet me Yorodan donyo kede i Nam Oto. I bad tetu malo, ikor gi oudo cakere ki kanono

⁶di eko beo Bet Kagela, eko ririo bad tetu malo me Bet Araba; ikor nono ko ot tuno i Kidi ka Bokan, en wot ka Ruben,

⁷di eko yai ki aditot me Akor eko ot tuno Debir, di eko ot tetu malo eko manaro ot tetu Giligal, kabedo kopimere kede kakame yito Adumim, en kabedo kame tie i bad tetu piny me aditot. Ikor nono ko beo i atan me Enesemes di eko ot jik Enerogel.

⁸Di do ikor nono ko ririo aditot ka wot ka Kinom i bad tetu piny me bad emukura kame bomba me jo Yebu oudo tie iye (manono en Yerusalem); di ikor nono oudo ko



ot tuno malo i wi moru kame neeno kede aditot me Kinom, i bad tetu tim, eko tuno i ajikini me aditot me Repaim i bad tetu malo.

⁹Ki wi moru kunono, ikor nono oudo yai di eko ot tuno i Atan me Neputoa, di eko ot tuno i bomban me nget moru me Epuron. Ki kuno di eko manaro ot Baala (manono en Kiriati Yearim).

¹⁰Di do ikor nono ko manaro i bad tetu tim me Baala, di eko ot tuno i moru me Edom, eko beo i bad moru me Yearim (manono en Kesalon) i bad tetu malo mere, di eko lor piny tuno Bet Semes, eko ririo Timina.

¹¹Ikor nono oudo ko ot tuno i bad emukura kame tie i bad tetu malo me Ekuron, di eko manaro ot Sikeron, eko ot ape ape tuno i moru me Baala, di eko ot tuno Jabunel. Di do ikor nono oudo ko ot jik i nam me Mediterania.

¹²I bad tetu tim, dog nam me Mediterania en kame oudo obedo ikor gi. Manoni en ikor me diakale me jo me ekeko ka Yuda i bad tetu dedede.

Kaleb Omao Bomban me Keburon kede Debir

(Jongolkop 1.11-15)

¹³Kaleb wot ka Jepune bin komio iner me lobo me jo me ekeko ka Yuda, bala kame oudo Rwot ociko ne Yosua. Komie Kiriati Araba, manono en bomba me Keburon (Araba oudo en papa me Anak).

¹⁴Kaleb bin oko riamo tenge ki bomba nono diakale adek me ikwae ka Anak: Sesai, Akiman kede Talamai.

¹⁵Di eko yai ki kunono di eko ot yi kede jo kame bin tie bedo Debir. (Bomba noni oudo sek ber kolwonge be Kiriati Seper.)

¹⁶Kaleb oko waco be, “Ngat kame bino suro Kiriati Seper di eko mane, ango abino mine enyomo nyara Akisa.”

¹⁷Otiniel wot ka Kenas, omin me Kaleb en oko mano bomba nono, di Kaleb oko mine enyomo Akisa nyare.

¹⁸Ceng kame Akisa oko ot kede but Otiniel, en eko dino cware be ekwai papa mere Kaleb poto. Di do Akesa oudo tie wok ki ngei punda mere, Kaleb oko penye be, “Nyo kame cunyi tie mito?”

¹⁹En eko dwoko ne be, “Ango amito imia giamia; bala kame in itieko keta kede i lobo kotuo, mia ataneko me pii da.” Aso, Kaleb oko mine ataneko me malo kede me piny.

Bomban me Yuda

²⁰Manoni en lobo kame jo me ekeko ka Yuda oko udo me doko mergi di lubere kede diakale gi.

²¹Bomban me ekeko me jo me Yuda i bad tetu piny atwal, tetu adok i ikor me Edom bin gin en, Kabusel, Eder, Yagur,

²²Kina, Dimona, Adada,



- ²³Kedes, Kasor, Itinan,
- ²⁴Sip, Telem, Bealot,
- ²⁵Kasor Kadata, Keriot Kesiron (manono en Kasor),
- ²⁶Amam, Sema, Molada,
- ²⁷Kasar Gada, Kesimon, Betepelet,
- ²⁸Kasar Sual, Beereseba, Bisiotia,
- ²⁹Baala, Iim, Esem,
- ³⁰Elitolad, Kesil, Koroma,
- ³¹Sikilag, Mademana, Sanasana,
- ³²Lebaot, Silikim, Ain, kede Rimon. Gin dedede oudo kitie bomban ot are kiwie kanyangon kede calere gi.
- ³³Bomban kame bin tie i dud mori gin en, Esitaol, Sora, Asina,
- ³⁴Sanoa, Enganim, Tapua, Enam,
- ³⁵Yaramut, Adulam, Soko, Aseka,
- ³⁶Saraim, Aditaim, Gedera, kede Gederotaim. Magi oudo tie bomban tomon kiwie ongwon kede calere gi.
- ³⁷Bomban ace da oudo gin en, Senan, Kadasa, Magidalagad,
- ³⁸Dilean, Misipa, Yokitel,
- ³⁹Lakis, Bosikat, Egilon,
- ⁴⁰Kabon, Lakamam, Kitilis,
- ⁴¹Gederot, Bet Dagon, Naama, kede Makeda: gin bomban tomon kiwie kanyape kede calere gi.
- ⁴²Bomban ace da oudo gin en, Libina, Eter, Asan,
- ⁴³Iputa, Asina, Nesib,
- ⁴⁴Keila, Akisib, kede Maresa: gin bomban kanyangon kede calere gi.
- ⁴⁵Bomban ace kame bin tie gin en Ekuron kede calere mege kede bomban mege atitino,
- ⁴⁶kede bomban dedede kiton atitino kame bin iyapiyapi kede Asidod, cako ki Ekuron tuno i nam me Mediterania.
- ⁴⁷Manono oudo ribo kiton bomban me Asidod kede Gasa, kede calere gi kede bomban gi atitino, ape tuno i ecilet kame tie i ikor kede Misiri, kede tuno i lak nam me Mediterania.



- ⁴⁸Bomban kame bin tie i piny kobedo mori mori gin en Samir, Yatir, Soko,
⁴⁹Dana, Kiriati Seper (arabo Debir),
⁵⁰Anab, Esitemoa, Anim,
⁵¹Gosen, Kolon, kede Gilo: gin bomban tomon kiwie acel kede calere gi.
⁵²Bomban ace oudo gin en Arab, Duma, Esan,
⁵³Yanim, Bet Tapua, Apeka,
⁵⁴Kumita, Keburon, kede Sior: gin bomban kanyangon kede calere gi.
⁵⁵Bomban ace oudo gin en Maon, Kamel, Sip, Yuta,
⁵⁶Jeserel, Yokodeam, Sanoa,
⁵⁷Kain, Gibeia, kede Timina: gin bomban tomon kede calere gi.
⁵⁸Bomban ace oudo gin en Kalul, Betesur, Gedor,
⁵⁹Marat, Betanot, kede Elitekon: gin bomban kanyape kede calere gi.
⁶⁰Bomban me Kiriati Baal (manono en Kiriati Yearim) kede Raba da oudo tie iye: gin bomban are kede calere gi.
⁶¹Bomban kame bin tie i wi tim gin en, Bet Araba, Midin, Sekaka,
⁶²Nibisan, bomba me Munyo, kede Engedi: bomban kanyape kede calere gi.
⁶³Do jo me Yuda bin likame oko karuno riamo tenge jo Yebu, jo kame bin bedo Yerusalem; manono oko mino jo Yebu odong bedo Yerusalem kede jo me Yuda.

Yosua 16

Lobo kame Komio Jo me Ekeko ka Epuraimu kede Manase

- ¹Ikor me lobo kame bin kopoko ne ikwae ka Yosepu oudo cakere ki bad tetu kide me ataneko me Jeriko, i nget ecilet me Yorodan, di eko ot tetu malo ebeo i wi tim eko donyo i piny kobedo mori mori ape tuno Betel.
²Ikor nono oudo yai ki Betel di eko ot Lus, eko beo eoto Atarot, adul kame jo me Araki oudo bedo iye.
³Di do eko lor piny i bad tetu tim tuno i adul kame jo Yapulet bedo iye, eko ot ape tuno i adul kame tie pipiny me Bet Koron. Eko yai ki kano di eko ot Geser eko ot jik i nam me Mediterania.
⁴Ikwae ka Yosepu, en gin jo me ekeko ka Epuraimu kede me ka Manase, bin oko gamo lobo noni oko doko mergi.

Lobo kame Komio Jo me Ekeko ka Epuraimu



⁵Lobo kame bin kopoko ne jo me ekeko ka Epuraimu di lubere kede diakale gi oudo tie kaman: ikor me lobo kame bin kopoko negi oudo yai ki Atarot Ada di eko ot i bad tetu kide eko tuno Bet Koron Kimukurur,

⁶di eko yai ki kunono eko ot tuno i nam me Mediterania. Mikimetat oudo tie i bad tetu malo gin. Ikor nono bin manaro ki kunono di eko ot tetu Tanat Silo, eko kato akata i bad tetu kide tuno Yanoa.

⁷Di do eko lor ki Yanoa tuno Atarot kede Nara, di eko gongere kede Jeriko, eko ot jik i ecilet me Yorodan.

⁸Cako ki Tapua, ikor bin beo i bad tetu tim di eko ot tuno osamai me Kana, di eko ot jik i nam me Mediterania. Manoni en kame bin obedo lobo kame komio jo me ekeko ka Epuraimu di lubere kede diakale gi,

⁹ribo kiton bomban kede calere mogo kame oudo tie i lobo me jo me ekeko ka Manase, do di komio gi but jo me ekeko ka Epuraimu.

¹⁰Do jo me ekeko ka Epuraimu bin likame oko riamo tenge jo me Kanan kame bin bedo Geser. Manono oko mino jo Kanan oko dong bedo i diere me jo Epuraimu tuno tin, do oko bedo dino gi timo tic tetek bala ipasoi.

Yosua 17

Lobo kame Komio Jo me Ekeko ka Manase i Bad tetu Tim

¹Bin oko mino dul moro me lobo but jo me ekeko ka Manase, piento en oudo obedo kao ka Yosepu. Makir, papa me Gilead, en kame oudo obedo kao ka Manase, doko en oudo ngat atek i yi twatwal, pi mano, oko bin poko ne en Gilead kede Basan, adulion kame oudo tie i bad tetu kide me Yorodan.

²Yosua oko popoko lobo kame oudo tie i bad tetu tim me ecilet me Yorodan but jo ace me ekeko ka Manase, di lubere kede diakale gi kaman: Abieser, Kelek, Asiriel, Sekem, Keper, kede Semida. Jo nogi en oudo obedo ikwae ka Manase wot ka Yosepu acuo mege; gin oudo kibedo jotel me diakale gin.

³Selopekad, wot ka Keper, wot ka Gilead, wot ka Makir, wot ka Manase, oudo li kede atin awobi moro, do en oudo etie kede idwe anyira kenekene. Nying anyira nogo oudo ige: Makala, Nua, Kagela, Milika, kede Tirisa.

⁴Gin bin kiko ot but Eleasar ngasaseredoti kede but Yosua wot ka Nun kede but jotel di kiko waco be, “Rwot bin ociko Musa pi mino wada lobo me bedo merwa bala joawade wa acuo.” Aso, bala kame Rwot oudo ociko, bin oko mino gida lobo karacel kede joawade gi acuo.

⁵Kite nono en kame bin Manase oudo kede iner tomon me lobo, medo i wi lobo me Gilead kede Basan, kame tie loka tetu kide me Yorodan,

⁶piento ikwae ka Manase amon da bin komio lobo bala acuo mege. Lobo me Gilead bin komio but ikwae ace apat ka Manase dedede.



⁷Lobo ka Manase oudo cakere ki Aser tuno Mikimetat, bomba kame bin tie i bad tetu kide me Sekem. Ikor mere di ko ot i bad tetu piny tuno but jo me Enetapua.

⁸Lobo me Tapua oudo obedo me ka Manase, do bomba me Tapua, kame oudo tie i ikor me Manase oudo obedo me jo ka Epuraimu.

⁹Ikor me jo ka Manase bin di do ko lor piny tuno i osamai me Kana. Bomban kame bin tie i bad tetu piny me esamai nono oudo obedo me ka Epuraimu, bed bala gin oudo kitie i adul me jo ka Manase. Ikor ka Manase bin ko ot eririo esamai ki bad tetu malo mere di eko ot jik i nam me Mediterania.

¹⁰Lobo me jo Epuraimu bin tie i bad tetu piny, do me jo ka Manase oudo tie i bad tetu malo, di nam me Mediterania en kame oudo obedo ikor gi i bad tetu tim. Jo ka Aser oudo tie i bad tetu malo me jo ka Manase, do jo ka Isakar oudo tie i bad gi tetu kide.

¹¹I adul kame jo ka Isakar kede jo ka Aser oudo bedo iye, bomban kede calere me nget gi kame oudo obedo me jo ka Manase gin en Bet San, Ibileam, Dor (kame oudo tie i nget nam), Enedor, Tanak, kede Megido.

¹²Do jo ka Manase likame bin oko twero riamo tenge jo me Kanan kame oudo tie bedo i bomban nogo; pi manono, jo me Kanan oko meede kede bedo i bomban nogo.

¹³I kare kame bin jo me Isirael odoko tek kede, gin likame kiko riamo jo me Kanan tenge, do kiko donyo dino gi timo negi tic tetek.

Jo me Ekeko ka Yosepu Ongunguro

¹⁴Ceng moro acel jo me ekeko ka Yosepu oko penyo Yosua be, “Pinyo bo komio in iko mino wan adul acel kenekene me lobo pi bedo merwa do di jo wan tot? Rwot obedo mino wan winyo cako sek omio wan otot twatwal.”

¹⁵Yosua oko waco negi be, “Ka piny kobedo mori mori me Epuraimu diding likame eromo wu pien itotunu, ot itongunu abum di ikounu nyano lobo piru i lobo me jo Perisi kede me jo Repaim.”

¹⁶Jo ka Yosepu oko dwoko ne be, “Piny kobedo mori mori noni likame romo wa; doko da jo me Kanan kame bedo i ebar tie kede cabalan kame kotimo kede nyonyo ayon, gin jo kame bedo i bomba me Bet San kede calere mege, karacel kede jo kame bedo i aditot me Jeserel.”

¹⁷Yosua oko waco ne jo me ikekon ka Epuraimu kede me ka Manase me tetu tim be, “Wun ateteni itotunu, doko itekunu twatwal. Wun likame ibinunu bedo kede iner acel kenekene.

¹⁸Piny kobedo mori mori nono bino bedo meru. Bed bala en etie abum, wun ibinunu tonge di eko doko meru cako ki tetucel tuno tetucel. Wun ibinunu riamo jo me Kanan tenge, bed bala gin kitie kede cabalan me nyonyo ayon doko di gin jo atek.”

Yosua 18

Kopopoko Lobo koudo pwodi Odong



- ¹Di do jo dedede me Isirael oko cokere Silo, di gin kiko sipo Eema me riamo kede Rwot kunono, pien oudo kitieko bwono jo me lobo nono.
- ²I kare nono oudo pwodi ikekon kanyaare me Isirael odong likame kopoko negi inergi me lobo.
- ³Manono oko mino Yosua owaco ne jo me Isirael be, “Wun ibinunu bedo kede ajajalun me ot gamo lobo kame Rwot, Rubanga me joakwari wu otieko mino wu tuno awene?”
- ⁴Mianu cuo adek ki buli ekeko acelacel, di ango ako bino cwano gi ot mamano lobo nono di gin kiwandiko cal mere pi nyuto adul kame gin kimito be bed mergi. Di gin kiko bino dwogo buta.
- ⁵Kobino popoko lobo nono i adulion kanyaare; jo me ekeko ka Yuda bino meede bedo i adul gi kame tie i bad tetu piny, kede jo me ot ka Yosepu da bino dong bedo i adul gi kame tie i bad tetu malo.
- ⁶Gin kibino wandiko cal me adulion kanyaare nogo di kiko kelo buta, di ango ako bino uco ne wu alulu i nyim Rwot Rubanga wa pi popoko en.
- ⁷Jolebi likame bino udo iner moro me lobo i diere wu, pien iner gin en timo tic bala josaserdoti ka Rwot. Doko da jo me ikekon ka Gad, Ruben, kede dul me jo me ekeko ka Manase otieko udo lobere gi loka i bad tetu kide me ecilet me Yorodan, kame Musa ngatic ka Rwot bin omio gi.”
- ⁸Jo kame bin koyero oko yai ooto, di Yosua oko ciko gi pi wandiko kite kame lobo nono cal kede. En ewaco negi be, “Mamanunu lobo nono lung di ikounu wandiko kite kame ecal kede, ikounu dwogo buta. Ango abino uco ne wu alulu i nyim Rwot kan i Silo.”
- ⁹Aso, cuo nogo oko ot di gin kiko mamano lobo nono di kiko wandiko kite kame ecal kede i itabu. Gin kiwandiko kop i kom bomba acelacel me adulion kanyaare nogo; di do gin kiko dok but Yosua i kimere kame bin tie Silo.
- ¹⁰Yosua oko uco negi alulu i nyim Rwot i Silo, di eko popoko lobo ne jo me ikekon me Isirael kame oudo odong; ekeko acelacel oudo adul acel.

Lobo kame Kopoko ne Jo me Ekeko ka Benjamin

- ¹¹Alulu me diakale me ekeko ka Benjamin en kame oko cako kwanyo. Lobo kame alulu omako negi oudo tie i dierediere me jo me ekeko ka Yuda kede jo me ekeko ka Yosepu.
- ¹²I bad tetu malo, ikor gi oudo cakere ki ecilet me Yorodan di eko ot tuno i aserengete me Jeriko i bad tetu malo, di eko yito malo eko beo i piny kobedo mori mori eko ot i bad tetu tim, di eko jik i wi tim me Bet Aben.
- ¹³Ikor nono ko yai ki kuno di eko ot i bad tetu piny eko tuno i aserengete me Lus (manono en Betel), di eko lor piny tuno Atarot Ada, i moru kame tie i bad tetu piny me Bet Koron Kiditokina.



¹⁴Di do ikor nono bobo ko lokere i bad ace. En elokere ki bad tetu tim di eko dok i bad tetu piny me moru nono di eko ot jik Kiriati Baal (manono en Kiriati Yearim), bomba me jo me ekeko ka Yuda. Manono en oudo ikor me jo me ekeko ka Benjamin i bad tetu tim.

¹⁵Ikor gi i bad tetu piny oudo cakere ki ajikini me bomba me Kiriati Yearim di eko ot tuno i atan me Neputoa.

¹⁶Di do eko lor ki kuno tuno i dud moru kame neeno kede Aditot me Kinom, i ajikini me aditot me Repaim tetu malo mere. Di eko lor piny beo i aditot me Kinom, i bad tetu piny me bad emukura me jo Yebu, eko lor piny tuno Enerogel.

¹⁷Di do eko gonoro tetu bad malo eko tuno Enesemes, ki kuno di eko ot Gelilot, bomba kame pimere kede kakame yito Adumim. Ikor nono oudo ko lor piny tuno i Kidi ka Bokan wot ka Ruben.

¹⁸Ki kuno ikor nono oudo ko ot i bad tetu malo me emukura kame neeno kede Aditot me Yorodan, di eko lor piny tuno i aditot nono.

¹⁹Di eko ot tuno i bad tetu malo me bad moru me Bet Kagela, eko ot jik kakame ecilet me Yorodan donyo kiye i Nam Oto, manoni en oudo obedo ikor me jo me ekeko ka Benjamin i bad tetu piny.

²⁰Ecilet me Yorodan en kame bin obedo ikor gin i bad tetu kide. Magonogo en bin ikor me lobo kame jo me ekeko ka Benjamin oko udo pi doko mergi.

²¹Bomban me jo me ekeko ka Benjamin di lubere kede diakale gi bin gin ige: Jeriko, Bet Kagela, Emek Kesis,

²²Bet Araba, Semaraim, Betel,

²³Abim, Para, Opura,

²⁴Keparamoni, Opuni, kede Geba: gin bomban tomon kiwie are kede calere gi.

²⁵Bomban ace bin gin en Gibeon, Rama, Berot,

²⁶Misipe, Kepira, Mosa,

²⁷Rekem, Iripel, Tarala,

²⁸Sela, Kaelep, Yebu (arabo Yerusalem), Gibea kede Kiriati Yearim: gin bomban tomon kiwie ongwon kede calere gi. Manono en lobo kame jo me diakale me ekeko ka Benjamin oko udo pi doko mergi.

Yosua 19

Lobo kame Kopoko ne Jo ka Simeon

¹Alulu me are oko ot but diakale me jo me ekeko ka Simeon. Lobo kame alulu bin omako pirgi oudo tie i lobo me jo me ekeko ka Yuda.

²Bomban kame gin bin kiko udo pi bedo mergi gin ige: Beereseba, Seba, Molada,



³Kasar Sual, Bala, Esem,

⁴Elitolad, Betul, Koroma,

⁵Sikilag, Bet Marakabot, Kasar Susa,

⁶Bet Lebaot, kede Saruken: gin bomban tomon kiwie adek kede calere gi.

⁷Bomban gi ace da bin gin en Ain, Rimon, Eter, kede Asan: gin bomban ongwon kede calere gi.

⁸Adul kame gin kiudo nono bin ribo kiton calere me bomban nogi paka tuno Balat Ber (arabo Rama) i bad tetu piny. Manoni en lobo kame bin jo me diakale me ekeko ka Simeon oko udo.

⁹Lobo nono kame jo me ekeko ka Simeon oko udo bin obedo adul me lobo me jo me ekeko ka Yuda. Do pien lobo nono bin lac kalamo kame mitere negi, manono oko mino kopoko ne jo me ekeko ka Simeon lobo ki mergi nono.

Lobo kame Kopoko ne Jo me Ekeko ka Sebulun

¹⁰Alulu me adek oko mako diakale me jo me ekeko ka Sebulun. Lobo gi oudo tuno Sarid.

¹¹Ki kuno ikor nono bin ko ot Mareal i bad tetu tim di eko tuno Dabeset kede i esamai kame tie i bad tetu kide me Jokoneam.

¹²I bad tetu ocelu me Sarid, ikor me lobo gi nono bin oto i bad tetu kide di eko timo i ikor kede adul me Kisilot Tabor; ki kuno di eko ot tuno Daberat, di do eko kato tuno Yapia.

¹³Ki Yapia di eko meede ot i bad tetu kide eko tuno Gat Keper kede Etakasin, di eko manaro dok tetu Nea di eko kato paka Rimon.

¹⁴I bad tetu malo, ikor nono oudo manaro eko ot Kanaton, di eko jik i Aditot me Ipitakel.

¹⁵Lobo gi nono bin ribo kiton Katat, Nakalal, Simiron, Idala, kede Betelem: gin bomban tomon kiwie are kede calere gi.

¹⁶Manono en lobo kame bin diakale me ekeko ka Sebulun oko udo pi bedo mergi.

Lobo kame Kopoko ne Jo me Ekeko ka Isakar

¹⁷Alulu me ongwon oko mako diakale me jo me ekeko ka Isakar.

¹⁸Lobo gi oudo ribo bomban me Jeserel, Kesulot, Sunem,

¹⁹Kaparaim, Sioni, Anakarar,

²⁰Rabit, Kision, Ebes,

²¹Remet, Enganim, Enkada kede Bet Pases.



²²Ikor nono bin tuno da Tabor, Sakasuma, kede Bet Semes, di eko ot jik i ecilet me Yorodan. Lobo nono bin tie kede bomban tomon kiwie kanyape kede calere gi.

²³Bomban nogi kede calere gi bin tie i lobo kame diakale me jo me ekeko ka Isakar oko udo me bedo mergi.

Lobo kame Kopoko ne Jo me Ekeko ka Aser

²⁴Alulu me kany oko mako diakale me jo me ekeko ka Aser.

²⁵Ikor me lobo gi oudo ribo bomban me, Kelekat, Kali, Beten, Akisap,

²⁶Alam Melek, Amad, kede Misal. I bad tetu tim, ikor nono bin tuno Kamel kede Sikor Libinat,

²⁷di eko manaro i bad tetu kide eko ot Bet Dagon, di eko tuno Sebulun kede i Aditot me Ipitakel di eoto Bet Emek kede Neyel i bad tetu malo. Ikor nono bin meede ot i bad tetu malo di eko tuno Kabul,

²⁸Eburon, Rekob, Kamon, kede Kana, ape paka Sidon Adwong.

²⁹Di do ikor nono bin ko manaro ot Rama, di eko tuno Taya, bomba kame bin kocelo kitek; ki kuno di eko manaro ot Kosa, di eko ot jik i nam me Mediterania. Lobo nono bin ribo bomban me Makalab, Akisib,

³⁰Uma, Apek kede Rekob: gin bomban ot are kiwie are kede calere gi.

³¹Bomban nogi kede calere nogi bin tie i lobo kame diakale me jo me ekeko ka Aser oko udo pi bedo mergi.

Lobo kame Kopoko ne Jo me Ekeko ka Naputali

³²Alulu me kanyape oko mako diakale me jo me ekeko ka Naputali.

³³Ikor me lobo gi i bad tetu malo oudo yai ki Kelep, ki yat oak me Sananim, di eko beo Adaminekeb kede Jabunel, ape tuno Lakum, di eko ot jik i ecilet me Yorodan.

³⁴Ki kuno ikor oudo ko manaro i bad tetu tim eko ot beo Asinot Tabor, di eko yai ki kuno ot Kukok, eko ot tuno Sebulun i bad tetu piny, kede Aser i bad tetu tim, kede Yuda i ecilet me Yorodan i bad tetu kide.

³⁵Bomban kame oudo kocelo gin en Sidim, Ser, Kamat, Rakat, Kineret,

³⁶Adama, Rama, Kasor,

³⁷Kedes, Ederei, Enakasor,

³⁸Yiron, Migidalel, Korem, Bet Anat, kede Bet Semes: gin bomban tomon kiwie kanyangon kede calere gi.

³⁹Manoni en lobo kede bomban mege kede calere gi, kame jo me diakale me ekeko ka Naputali bin oudo pi bedo mergi.

Lobo kame Kopoko ne Jo me Ekeko ka Dan



⁴⁰Alulu me kanyaare oko mako diakale me ekeko ka Dan.

⁴¹Adul kame komio gi oudo ribo Sora, Esitaol, Irisemes,

⁴²Salabim, Aijalon, Itila,

⁴³Elon, Timina, Ekuron,

⁴⁴Eliteke, Gibeton, Balat,

⁴⁵Yekud, Beneberak, Gatirimon,

⁴⁶Mejarikon, kede Rakon, kiton adul kopimere kede Jopa.

⁴⁷I kare kame jo ka Dan bin oko kei kede lobo gi, gin kiko ot suro bomba me Lais. Gin kimaie kiko neneko jo mege, di kiko donyo bedo iye. Gin bin kiko loko nyinge be Dan, en nying kwaru gi.

⁴⁸Manoni en lobo kede bomban mege kede calere gi, kame bin jo me diakale me ekeko ka Dan oko udo pi bedo mergi.

Lobo kame Kopoko me Atiekini

⁴⁹Kakame jo me Isirael do otieko popoko kede lobo i dule apapat me bedo megigi, gin kiko mino Yosua wot ka Nun da lobo kame make i diere gi.

⁵⁰Gin kilubo cik ka Rwot di kiko mine bomba kame en oudo ekwao be mie. Bomba nono en Timunat Sera, kame oudo tie i piny kobedo mori mori me Epuraimu. En bin eko gero bomba nono di eko donyo bedo iye.

⁵¹Magonogi en lobere kame Eleasar ngasaseredoti kede Yosua wot ka Nun kede jotel me diakale me jo me ikekon me Isirael oko popoko kede alulu i Silo i nyim Rwot, i ekeko me Eema me Riamo. Aso, gin bin kiko tieko poko lobo kamano.

Yosua 20

Bomban me Ringo ot Gwokere

(Wel 35.9-34)

¹Di do Rwot oko waco ne Yosua

²pi waco ne jo me Isirael be, “Yerunu bomban me ringo ot gwokere, bomban kame oudo ango aciko ne Musa pi waco ne wu kop i kom gi,

³tetekeny ngatamoroni kame neko dano i akangas romo ringo kunono di eko bwot kibut ngat kame mito culo kwor.

⁴Ngat koneko dano bino ringo i bomba acel kikom bomban nogo, di eko ot cungo i erute me bomba kakame otimo iye ekiko, di eko tatamo but jodongo me bomba gi kotimere. Di do gin kiko bino tere i bomba kiko mine kabedo, di en eko dong bedo kede gi.

⁵Ka ngat kame mito culo kwor nono oko wapo dano nono kunono, gin miero kur kimi nganek nono i cinge, piento en eneko dano nono i akangas, likame oudo gin kidingere.



⁶Ngat koneko dano nono bino dong bedo i bomba nono tuno ka koketo kop mere i ekiko i nyim jo. Ka gin kiko udo be en etie kede raco me nek, gin kibino mine i ceng ngat kame mito nyango kwor nono. Do ka gin kiudo be en oudo eneko dano i akangas, miero weke edong bedo i bomba me gwokere nono tuno to me Ngatel me Josaseredoti me i kare nono. Di do en eko romo dok paco i bomba me turgi, kakame en oudo eneko dano iye.”

⁷Aso, i bad tetu tim me Yorodan gin kiko yero bomban gi: Kades kame oudo tie Galilaya, i piny kobedo mori mori me Naputali; Sekem i piny kobedo mori mori me Epuraimu, kede Kiriya Araba (arabo Keburon) i piny kobedo mori mori me Yuda.

⁸I loka tetu kide me Yorodan, i bad tetu kide me Jeriko, i lobo me jo me ekeko ka Ruben, gin kiko yero Beser, bomba kame oudo tie i wi tim i lobo kotingere malo di epetere; kede Ramot kame oudo tie Gilead i lobo me jo me ekeko ka Gad; kede Golan kame oudo tie Basan, i lobo me jo me ekeko ka Manase.

⁹Magonogi bin gin en bomban me ringo ot gwokere kame oko yero pi jo me Isirael dedede, kede pi jokumbor kame oudo bedo i diere gi, tetekenya ka dano moro oudo oko neko dano ocelu i akangas, en eromo ringo ot gwokere kunono. Manono oudo mio dano nono bwot kibun ngat kame oudo mito culo kwor, tuno ka oudo koketo kop me nek nono i ekiko i nyim jo.

Yosua 21

Bomban me Jolebi

¹Di do jotel me diakale me Jolebi oko bino but Eleasar ngasaseredoti, Yosua wot ka Nun kede jotel dedede me diakale me jo me ikekon me Isirael,

² di kiko waco negi i Silo i lobo me Kanan be, “Rwot bin omio cik kibut Musa be poore mi wan bomban kame obino bedo iye kede da kakame obino kwano iye doke wa.”

³Aso, jo me Isirael oko lubo cik ka Rwot di gin kiko mino Jolebi bomban mogo kede kabedo me kwano doke gi ki adulion gin.

⁴Alulu kame bin kocako kwanyo oko mako ikwae ka Kokat. Aso, Jolebi kame oudo obedo ikwae ka Aaron ngasaseredoti bin kopoko negi bomban tomon kiwie adek kibut jo me ekeko ka Yuda, Simeon, kede Benjamin.

⁵Ikwae ka Kokat kame oudo odong mege di oko poko ne gida bomban tomon ki adul me jo ka Epuraimu, Dan, kede Manase kame oudo tie i bad tetu tim.

⁶Ikwae ka Gerson bin oko poko negi bomban tomon kiwie adek kibut jo me ekeko ka Isakar, Aser, Naputali, kede kibut jo me ekeko ka Manase kame oudo tie i bad tetu kide.

⁷Diakale me ikwae ka Merari bin oko poko negi bomban tomon kiwie are ki adul me jo me ekeko ka Ruben, Gad, kede Sebulun.



- ⁸Bomban nogi kede kadedere me kwat gi bin jo me Isirael oko mino Jolebi di oudo kouco alulu, bala kame oudo Rwot ociko kibut Musa.
- ⁹Kibut jo me ikekon ka Yuda kede Simeon gin bin kiko poko bomban kame komaro nying gi nogi
- ¹⁰but ikwae ka Kokat ngat kobedo akwar Aaron, pien alulu me agege oudo omako gin.
- ¹¹Komio gi bomba me Kiriya Araba (Araba en oudo obedo papa me Anak), manono en oudo Keburon, kame oudo tie i piny kobedo mori mori me Yuda, karacel kede kakwat kame oudo oluke.
- ¹²Do ebar aluko bomba kede calere kame oudo oluke oudo kotieko mino Kaleb wot ka Jepune pi bedo mere.
- ¹³Medo i wi Keburon, en bomba me ringo ot gwokere, bin oko mino ikwae ka Aaron ngasaseredoti bomban gi: Libina,
- ¹⁴Yatir, Esitemoa,
- ¹⁵Kolon, Debir,
- ¹⁶Ain, Yuta, kede Bet Semes, kede lobere gi me kwat: gin bomban kanyangon kame komio gi kibut jo me ikekon ka Yuda kede Simeon.
- ¹⁷Kibut jo me ekeko ka Benjamin bin komio gi bomban ongwon gi: Gibeon, Geba,
- ¹⁸Anatot, kede Alumon, kede lobere gi me kwat.
- ¹⁹Bomban dedede me josaseredoti, ikwae ka Aaron oudo tie tomon kiwie adek, kede da lobere gi me kwat.
- ²⁰Jo apat odong mege kobedo ikwae ka Kokat, jo me ekeko ka Lebi, bin komio bomban mogo kibut jo me ekeko ka Epuraimu.
- ²¹Gin bin komio gi bomban ongwon: Sekem kede lobo mere me kwat, i piny kobedo mori mori me Epuraimu (acel kikom bomban me ringo ot gwokere), Geser,
- ²²Kibisaim, kede Bet Koron, kede lobere gi me kwat.
- ²³Kibut jo me ekeko ka Dan, bin komio gi bomban ongwon: Eliteke, Gibeton,
- ²⁴Aijalon, kede Gatirimon, kede lobere gi me kwat.
- ²⁵Kibut jo me ekeko ka Manase kame bin tie i bad tetu tim, bin komio gi bomban are: Tanak kede Gatirimon, kede lobere gi me kwat.
- ²⁶Diakale oudo kodong nogi me ikwae ka Kokat bin oko mino bomban tomon nogi dedede, kede lobere gi me kwat.
- ²⁷Ekodet ace me Jolebi, ikwae ka Gerson, bin oko mino bomban are kibut jo me ekeko ka Manase kame bin tie i bad tetu kide. Gin en, Golan kame oudo tie Basan



kede lobo mere me kwat (acel kikom bomban me ringo ot gwokere), kede Besetera kede lobo mere me kwat.

²⁸Kibut jo me ekeko ka Isakar, bin komio gi bomban ongwon: Kision, Daberat,

²⁹Yaramut, kede Enganim, kede lobere gi me kwat.

³⁰Kibut jo me ekeko ka Aser, bin oko mino gi bomban ongwon: Misal, Abidon,

³¹Kelekat, kede Rekob, kede lobere gi me kwat.

³²Kibut jo me ekeko ka Naputali, bin komio gi bomban adek: Kedes i Galilaya, kede lobo mere me kwat (acel kikom bomban me ringo ot gwokere), Kamot Dor, kede Karutan, kede lobere gi me kwat.

³³Bomban kame bin komio but diakale ikwae ka Gereson, dedede oudo tie bomban tomon kiwie adek.

³⁴Jolebi kodong mege, ikwae ka Merari, bin komio bomban ongwon kibut jo me ekeko ka Sebulun. Bomban nogo gin en, Yokineam, Karata,

³⁵Dimina, kede Nakalal, kede lobere gi me kwat.

³⁶Kibut jo me ekeko ka Ruben, bin komio gi bomban ongwon: Beser, Yakas,

³⁷Kedemot, kede Mepat, kede lobere gi me kwat.

³⁸Kibut jo me ekeko ka Gad da, bin komio gi bomban ongwon: Ramot i Gilead kede lobo mere me kwat (acel kikom bomban me ringo ot gwokere), Makanaim,

³⁹Kesibon, kede Yaser, kede lobere gi me kwat.

⁴⁰Aso, bomban kame bin komio but ikwae ka Merari, diakale me Jolebi kame oudo odong, oudo dedede tie tomon kiwie are.

⁴¹Bomban me Jolebi i adul kame bin jo me Isirael omako oudo dedede tie ot ongwon kiwie kanyauni, karacel kede lobere gi me kwat.

⁴²Bomba acelacel oudo tie kede lobo mere koluke me kwat.

Jo me Isirael Osipakin i Lobo gi

⁴³Aso, Rwot bin oko mino jo me Isirael lobo dedede kame en oudo ekwongere iye but joakwari gi be ebino mino gi. Kakame gin do oudo kitieko game kede eko doko mergi, gin kiko donyo bedo iye.

⁴⁴Rwot oko mino anapakin obedo tie negi i lobo gi nono lung, bala kame en oudo ecikere kede but joakwari gi. Likame bin tie ngakwor gi moro acel kame oko yi kede gi di eko bwono gi, pien Rwot oudo otieko mino jokwor gi i cing gi.

⁴⁵Rwot bin oko cobo cikere mege dedede kame oudo en etimo but jo me Isirael.

Yosua 22

Jo me Ikekon me Bad tetu Kide Odok i Lobo gi



- ¹Di do Yosua oko coko jo me ikekon ka Ruben, Gad kede dul me jo me ekeko ka Manase kame oudo tie i bad tetu kide.
- ²En eko waco negi be, “Wun itiekunu timo gi dedede kame Musa ngatic ka Rwot oudo ociko ne wu, doko wun ikounu lubo cik na dedede.
- ³Tuno tin, wun likame ikounu weko imiegu wu me Isirael akadi tien acel, pi kare noni dedede. Wun ibedunu gwokere kitek lubo cik ka Rwot Rubanga wu.
- ⁴Aso, nataman Rwot Rubanga wu otieko mino imiegu wu anapakin, bala kame en bin ecikere kede. Pi mano, dokunu paco i lobo kame bin wun imaunu, lobo kame Musa ngatic ka Rwot bin omio wu i loka tetu kide me ecilet me Yorodan.
- ⁵Poore igwokerenu kitek lubo cik kede iswil kame Musa ngatic ka Rwot oudo ociko ne wu: marunu Rwot Rubanga wu, timunu gikame en emito, lubunu cik mege, mokunu i kome, di ikounu timo ne tic kede cunyu dedede kede kuo wu lung.”
- ⁶Di do Yosua oko lamo negi winyo di eko peruno gi, di gin kiko ot i miere gi.
- ⁷Musa oudo omio dul me jo me ekeko ka Manase me lobo Basan pi bedo mergi; do dul ocelu Yosua oudo oko mino lobo i nget me jo me Isirael wad gi i bad tetu tim me Yorodan. Kakame Yosua bin oko dwoko gi kede paco, en elamo negi winyo
- ⁸di ewaco be, “Dokunu i miere wu kede abar adwong, dokunu kede doke atot, siliba, saabu, buronsi, ayon, kede igoen atot twatwal. Nywakunu kede imiegu wu jamini kame iyakunu kikut jokwor.” Di do gin kiko yai dok paco.
- ⁹Aso, jo me ikekon ka Ruben, Gad, kede me ka Manase kame oudo tie i bad tetu kide oko dok paco. Gin kiweko jo icegun me Isirael odong Silo, kame tie i lobo me Kanan, di gin kiko ot Gilead, i lobo gi kame oudo gin kimao oko doko mergi bala kame oudo Rwot ociko negi kede kikut Musa.

Alutari kame Kogero i nget Ecilet me Yorodan

- ¹⁰Kakame jo me ikekon ka Ruben, Gad, kede dul me jo me ekeko ka Manase me bad tetu kide otuno kede Gelilot, kame oudo tie i nget ecilet me Yorodan i lobo me Kanan, gin kiko gero alutari ati kunono, di pwodi likame kingolo ecilet.
- ¹¹Kakame jo icegun me Isirael oko winyo kede be gin oudo kigero alutari Gelilot i ikor me lobo me Kanan, i nget ecilet me Yorodan i bad me jo me Isirael,
- ¹²jo dedede me Isirael oko cokere Silo pi ot yi kede gi.
- ¹³Di do jo me Isirael oko cwano Pinekasi wot ka Eleasar but jo ka Ruben kede Gad kede dul me jo me ekeko ka Manase, i lobo me Gilead.
- ¹⁴Gin kicwae kede cuo tomon kame oudo koworo. Buli ekeko acelacel me ateker me Isirael kame oudo tie i bad tetu tim oko cwano buli dano kame oudo obedo ngatel me diakal kikom me jo me Isirael.
- ¹⁵Gin kiko ot i lobo me Gilead, but jo ka Ruben, Gad, kede Manase me bad tetu kide, di gin kiko waco negi



16 dwan kame jo dedede me Isirael ocwao gi kede be, “Pinyo komio itimunu gikarac karom kan but Rubanga me Isirael? Gero alutari piru nyuto be wun itiekunu jemo ne Rwot! Itiekunu lokere tenge iwekunu lube!

17 Benyo, dub kame bin otimunu i Peor pwodi likame oroma wa? Yutununu alola me aumpuli kame bin Rwot oko mino jo mege. Tuno tin wan pwodi otienuneno can pi dub nono.

18 Benyo, nataman do wun itiekunu dagi lubo Rwot? Ka tin wun ijemunu ne Rwot, diki en eyaro lilo ne jo dedede me Isirael.

19 Ka wun iparunu be lobo wu omunaun likame epoore me woro Rubanga, ngolunu loka tetuca i lobo ka Rwot, kakame taberenakol mere tie iye, di ikounu gamo lobo moro kibut wan. Kenekene kur ijemunu ne Rwot arabo imiunu wada odok jojemo pi tim wu me gero alutari piru kenu, alutari kame pat kede alutari ka Rwot Rubanga wa.

20 Yutununu gikame bin Rwot otimo i kare kame bin Akan wot ka Seera odagi lubo kede cik kame mako jamini kame kopooore dudubo atwal atwala; jo me Isirael dedede bin oudo alola pi tim mere nono; likame Akan kene en kame bin oto pi dub mere.”

21 Di do jo me ekeko ka Ruben, Gad, kede dul me ekeko ka Manase oko dwoko ne jotel me diakale kame oudo kocwao but gi be,

22” Won Twer en Rubanga! En ebedo Rwot! Won Twer en Rubanga! En ebedo Rwot! En engeo kop komio wan otimo gi noni, doko wan omito jo me Isirael da ngei! Ka wan oudo otimo kamanono pi jemo arabo pi turo isikan wa but Rwot, kur iwekunu wa omeede bedo kuo.

23 Ka wan odagi lubo Rwot di oko gero alutari wa amako wa me wango giayala arabo me mino giayala me alos amoto me nywak, wan okwao Rwot en kikome emi wa alola.

24 Do wan otimo kamanono pien oudo otie kede lworu be i kare me anyim ikwae wu cengemogo bino waco ne idwe wa be, ‘Likame itienuneno kede gimoro amakere kede Rwot, Rubanga me Isirael!’

25 Rwot otieko keto ecilet me Yorodan obedo ikor wa kede wu, wun jo ka Ruben kede Gad. Likame itienuneno kede gimoro amakere kede Rwot.’ Di do ikwae wu cengemogo ko bino mino ikwae wan weko woro Rubanga.

26 Kop no en komio wan ogero alutari, do likame ogere me wango giayala arabo mino giayala moro.

27 Wan ogere pi bedo gianena but jo wa kede wuda, kede but lwak kame bino lubo ngei wa, be wan ateteni oworo Rwot i Eema mere kacil di okelo bute giayala awanga wa kede giamia kede giayala me nywak. Manoni wan otimo pi gengo ikwae wu i kare me anyim waco ne ikwae wan be gin likame kitie kede gimoro amakere kede Rwot.

28 Wan oudo obedo tamo be, ka gikame cal kamanono oko timere ne wan arabo ne ikwae wa i kare me anyim, wan oromo waco be, ‘Nenunu alutari noni kame bin



joakwari wan otimo; en ecal kede me ka Rwot. Gin bin kitime likame pi wango giayala arabo me mino giayala apat, do me bedo ijura but wan kede wun.’

²⁹Wan likame obino jemo ne Rwot arabo weko lube i yore me gero alutari me giayala awanga, giayala me alos, arabo giamia moro. Wan likame oromo gero alutari moro ace apat kede alutari ka Rwot Rubanga wa kame cungo i nyim taberenakol mere.”

³⁰Pinekasi ngasaseredoti kede jo tomon kame bin tie kede en, jo kame bin koworo, jotel me diakale me Isirael, owinyo kop kame jo me ikekon ka Ruben, Gad, kede Manase me bad tetu kide oko waco di gin kiko yeng kede kop gi nono.

³¹Pinekasi, wot ka Eleasar ngasaseredoti oko waco negi be, “Tin wan otiekunu ngeno be Rwot tie kede wa, pien wun likame oudo ijemunu ne Rwot i yore me tim noni. Pi mano, wun itiekunu lako jo me Isirael ki alola ka Rwot.”

³²Di do Pinekasi kede jotel kame bin tie kede oko weko jo ka Ruben kede me ka Gad i lobo me Gilead di gin kiko dok Kanan, but jo me Isirael, di gin kiko waco negi kop kame gin kiko udo.

³³Kop kame gin kitero ne jo me Isirael oyomo cuny gi di gin kiko pako Rubanga. Di likame bobo do kiko donyo yamo kop amako yi kede dudubo lobo kame jo ka Ruben kede me ka Gad oudo tie bedo iye.

³⁴Jo ka Ruben kede me ka Gad oko waco be, “Alutari noni en kobedo mujura but wanunu dedede be Rwot en Rubanga.” Di gin kiko cako nyinge “Mujura” .

Yosua 23

Yamo ka Yosua me Ajikini but Jo me Isirael

¹Di do oudo kare kalac otieko kato, di Rwot oudo otieko mino jo me Isirael anapakin, di likame jokwor gi kame oudo oluko gi bobo do lolo gi, doko di Yosua da oudo otieko ti twatwal,

²Yosua oko lwongo jo me Isirael dedede, joadongo, jotel, jongolkop, kede jodongo me tice, di en eko waco negi be, “Ango nataman do atieko ti twatwal.

³Wun itiekunu neno gi dedede kame Rwot Rubanga wu otieko timo but atekerin nogi dedede piru. Rwot Rubanga wu en kobedo yi piru.

⁴Ango atieko popoko ne ikekon wu lobere me atekerin kame pwodi odong, karacel kede me atekerin kame ango atieko bwono, cako ki ecilet me Yorodan i bad tetu kide tuno i nam me Mediterania i bad tetu tim.

⁵Rwot Rubanga wu bino mino gin kidok cen kibus wu, di en eko riamo gi ki nyim wu. Wun ibinunu gamo lobo gi doko meru bala kame Rwot Rubanga wu otieko cikere kede butu.

⁶Pi mano, poore igwokerenu di ikounu lubo kede timo gi dedede kame kowandiko i itabu me Iswil ka Musa abongo weko moro.



- ⁷Manono bino mino likame inyalerenu kede atekerin nogi kame odong i diere wu, arabo yamo nying rubangan gi, amoto kwongere kede nying gi, arabo timo negi tic, amoto gungo i nyim gi pi woro gi.
- ⁸Do wun poore imokunu baba i kom Rwot Rubanga wu, bala kame ibedunu timo tuno tin.
- ⁹Rwot otieko riamo tenge i nyim wu atekerin adongodongo di kitek; likame tie ngatamoro kame pwodi okaruno bwono wu tuno tin.
- ¹⁰Ngat acel kenekene kikom wun mio jo tutumia acel ringo tenge, pien Rwot Rubanga wu en kame yi piru, bala kame en oudo ecikere kede but wu.
- ¹¹Pi mano, poore igwokerenu ikounu maro Rwot Rubanga wu.
- ¹²Ka ilokerenu tenge, di ikounu ribere kede atekerin kame pwodi odong i diere wu, ikounu nyomere kede gi,
- ¹³miero ingeunu ateteni be Rwot Rubanga wu likame bino meede kede riamo atekerin nogi tenge ki nyimu; do gin kibino bedo bala owic kede obek me mako wu, del me daano ngei wu arabo okuti me cocobo wangu, tuno wun to tiek ki lobo aber noni kame Rwot Rubanga wu otieko mino wu.
- ¹⁴” Nataman kare nango me to otieko tuno. Wun dedede ingeunu i cuny wu kede i kuo wu be Rwot Rubanga wu otieko mino wun jamini dedede abeco kame en oudo ecikere iye butu; gi dedede otieko cobere ne wu, likame tie cikere mere moro kopoto.
- ¹⁵Do bala kame en emio kede cikere mege dedede kame oudo etimo but wu ocobere, kamanono da en ebino mino can dedede kame en ewaco poto i komu tuno en muducaro wu atwal atwala i lobo aber kame en emio wu noni.
- ¹⁶Ka wun likame igwokunu isikan kame Rwot Rubanga wu ociko wu pi gwoko, kede ka wun ikounu timo tic ne rubangan apat di ilurunu piny i nyim gi pi woro gi, en ebino lilo ne wu di eko mino wu alola, di wun ikounu bino to ikounu tiek awakawaka i lobo aber kame en etieko mino wu.”

Yosua 24

Yosua Oyamo kede Jo i Sekem

- ¹Di do Yosua oko koko jo me Isirael dedede Sekem. En eko lwongo joadongo, jotel, kede jongolkop, kede jodongo me tice me Isirael, di gin kiko ot i nyim Rubanga.
- ²Yosua oko waco ne jo dedede be, “Rwot Rubanga me Isirael waco be, ‘Riki sek joakwari wu bin obedo loka tetuca me ecilet me Eupurate di kiworo rubangan apat. Ngat acel kikom gi bin en Tera, papa me Aburaam kede Nakor.
- ³Di ango ako kwanyo kwaru wu Aburaam ki loka kunono, di ako tere beo i lobo me Kanan lung. Ango ako mine ikwae katot. Amie Isaka,
- ⁴di ako mino Isaka Yakobo kede Esau. Ako mino Esau piny kobedo mori mori me Edom pi bedo mere, do kwaru wun Yakobo kede idwe mege oko ot Misiri.



- ⁵ I cen mere ango ako ooro Musa kede Aaron, di ako mino peko adwong obedo Misiri. Do ango bin ako kwanyo wun ki kuno.
- ⁶ I kare kame bin ango akwanyo kede joakwari wu ki Misiri, jo me Misiri bin oko wapo gi kede cabalan kede asigiran me yi. Do kakame joakwari wu oko tuno kede i Nam Akwar,
- ⁷ gin kiko kok buta pi mito be ango akony gi, di ango ako mino colpiny obedo tie i dierediere gin kede jo me Misiri. Ango ako mino pii me nam odipere i kom jo me Misiri di gin kiko mwony i nam. Wun ingeunu gikame ango bin atimo ne jo me Misiri. “ ‘Di do wun bin ikounu bedo i wi tim tieko kare kalac.
- ⁸ Ango bin ako kelo wu i lobo me jo Amor, jo kame oudo bedo loka tetu kide me Yorodan. Gin bin kiko yi kede wu do ango ako mino wun ibwonunu gi. Wun bin imuducarunu gi di ikounu mano lobo gi odoko meru.
- ⁹ Abaka me jo Moab, Balak wot ka Sipor, bin oko iikere pi bino yi kede wu. En kong ecwao kop di oko lwongo ne Balaam wot ka Beor. En eko kwane be elam wu.
- ¹⁰ Do ango ako dagi winyo kop ka Balaam; pi mano, en eko lamo ne wun winyo. Manono en kite kame ango alako wu kede ki cing Balak.
- ¹¹ Wun bin ikounu ngolo ecilet me Yorodan di ikounu tuno Jeriko. Jo me Jeriko bin oko yi kede wu, doko jo Amor da oko yi kede wu, akadi jo Perisi, jo Kanan, jo Kiti, jo Girigas, jo Kibi kede jo Yebu. Do ango bin amio wun ibwonunu gi.
- ¹² Ango bin amio mielkom atek omako gi, di ako riamo tenge ki nyim wun abakai are me jo Amor; likame ipimai arabo imalia wu en koriamo gi.
- ¹³ Ango bin amio wu lobo kalikame wun en oudo itimunu teko me puro, kede bomban kalikame wun en oudo igerunu. Wun nataman itienu bedo i yi gi di icamunu anyakini me olok kede me olibeti kalikame wun en ipitunu.’
- ¹⁴” Pi mano, poore iworunu Rwot di ikounu timo ne tic kede ateni kede genere. Ucunu tenge rubangan kame bin joakwari wu woro ki loka tetuca me ecilet kede i Misiri, di ikounu timo tic ne Rwot en kene.
- ¹⁵ Ka wun likame imitunu timo tic ne Rwot, tin yerunu ngat kame wun ibinunu timo ne tic, arabo rubangan kame joakwari wu bin woro i Mesopotamia, arabo rubangan me jo Amor kame wun itienu bedo i lobo gi. Do ango kede jo me diakal na, wan obino timo ne Rwot tic.”
- ¹⁶ Jo oko gamo be, “Wan likame obino weko Rwot di oko ot timo tic ne rubangan apat!
- ¹⁷ Rwot Rubanga wa en kame bin okwanyo joakwari wa kede wada ki Misiri kakame bin otie ipasun iye, doko wan bin oneno kede wang wa gianena adongodongo kame en etimo. En ebedo gwoko wa i kadedere dedede, kede kibut atekerin dedede kame wan bin obeo i diere gi.



¹⁸Di wan bin otie donyo i lobo noni, Rwot oko riamo tenge jo Amor dedede kame oudo tie bedo kanoni. Pi mano, wada obino timo tic ne Rwot; en ebodo Rubanga wa.”

¹⁹Yosua oko waco ne jo be, “Do wun cengemogo likame ibinunu karuno timo tic ne Rwot piento en ebodo Rubanga kacil. En Rubanga kame nganyeko; en likame ebino sasiro wu pi turo iswil arabo pi dub wu.

²⁰Ka wun iwekunu Rwot di ikounu donyo timo tic ne rubangan me kumbor, en ebino lokere dagi wu di eko mino wu alola. En ebino muducaro wu, bed bala oudo lem etimo ne wu bero.”

²¹Di jo oko waco ne Yosua be, “Li ba! Wan obino timo tic ne Rwot.”

²²Yosua oko waco ne jo be, “Wun en ibedunu ijurak i komu kenu be wun itiekunu yero Rwot, pi wun timo ne tic.” Gin kiko waco be, “Eebo, wan en ijurak.”

²³Di Yosua oko waco negi be, “Aso ucunu tenge rubangan me kumbor kame itienu kede, di ikounu loko cuny wu but Rwot, Rubanga me Isirael.”

²⁴Jo oko waco ne Yosua be, “Wan obino timo tic ne Rwot Rubanga wa, doko wan obino lubo cik mege.”

²⁵Aso, Yosua oko timo ne jo isikan kede Rubanga cenge nono, di eko mino gi iswilia kede cik i Sekem.

²⁶Yosua oko wandiko cik nogi i itabu me Iswil ka Rubanga. Di en eko kwanyo kidi ati di eko sipe i dud yat oak i kabedo kacil ka Rwot.

²⁷En eko waco ne jo be, “Nenunu, kidi noni en kame bino bedo mujura kame pido wa. En etieko winyo kope dedede kame Rwot owaco ne wa. Pi mano, en ebino bedo mujura i komu ka wun likame ibedunu kede ateni but Rubanga wu.”

²⁸Di do Yosua oko peruno jo di gin kiko dok i adulion gi.

Yosua kede Eleasar Oto

²⁹Ingei timo gi nogo, ngatic ka Rwot, Yosua wot ka Nun oko to di mwakini mege me dongo oudo oromo tol acel kede tomon.

³⁰ Gin kiko yike i lobo mere amake i Timunat Sera, kame oudo tie i piny kobedo mori mori me Epuraimu, i bad tetu malo me moru me Gas.

³¹Jo me Isirael bin oko timo tic ne Rwot pi kare me kuo ka Yosua lung kede me joadongo kame bin oko dong bedo kuo kalamo Yosua, jo kame bin ngeo gi dedede kame Rwot oudo otimo ne Isirael.

³² Cogere ka Yosepu kame jo me Isirael oudo okelo ki Misiri, bin oko yiko Sekem, i lobo kame bin Yakobo owilo kibus awobe ka Kamor, papa me Sekem, pi wel me sente siliba tol acel. Lobo nono oko doko me ikwae ka Yosepu.

³³Eleasar wot ka Aaron oko to di oko yike Gibe, bomba kame bin tie i piny kobedo mori mori me Epuraimu, kame bin komio wode Pinekasi.





Jongolkop

Jongolkop 1

Jo me Ikekon ka Yuda kede me ka Simeon Omake Adonibesek

¹Di do Yosua otieko to, jo me Isirael oko penyo Rwot be, “Ekeko mene kikom ikekon wan en kame poore cako ot suro jo me Kanan, pi yi kede gi?”

²Rwot oko waco negi be, “Jo me ekeko ka Yuda bino cako ot. Ango atie mino lobo nono i cing gi.”

³Jo me Yuda oko waco ne imiegu gi me ekeko ka Simeon be, “Bia iuperenu kede wa ootunu i adul kame kopoko ne wan, tetekeny ogalarunu jo me Kanan. I cen mere di do wada oko bino upere kede wu ot i adul kame kopoko ne wu.” Aso, jo me ekeko ka Simeon oko upere kede gi.

⁴Di do jo me Yuda bin oko ot yi, di Rwot oko mino jo me Kanan kede jo Perisi i cing gi, di gin bin kiko bwono isirikalen tutumia tomon (10,000) i Besek.

⁵Gin bin kiriamo kede Adonibesek Besek kunono, di kiko yi kede, kiko bwono jo Kanan kede jo Perisi.

⁶Adonibesek bin oko ringo, do gin kiko wape di kiko make, kiko ngolongolo tenge lwete adongo me tiene kede me cinge.

⁷Adonibesek oko waco be, “Abakai ot kanyaare kame kongolongolo lwet gi adongo me cing gi kede me tien gi oudo obedo depo angidingidin me cam i dud emesa na. Rubanga otieko timo nango gikame angu oudo atimo ne gin.” Gin kiko tere Yerusalem, di eko to kunono.

Jo me Ekeko ka Yuda Omake Yerusalem kede Keburon

⁸Jo me Yuda bin oko suro Yerusalem di kiko mane. Gin bin kineko jo mege dedede di kiko wango bomba kede mac.

⁹I cen mere jo me Yuda oko ot yi kede jo me Kanan kame oudo bedo i piny kobedo mori mori, i dud mori, kede i piny kotuo me bad tetu piny.

¹⁰Gin kiko ot yi kede jo me Kanan kame bin bedo i bomba me Keburon (Keburon sek ber oudo kolwongo be Kiriya Araba); di gin kiko bwono isirikalen ka Sesai, Akiman kede Talamai.

Otinie Omake Bomba me Debir

(Yosua 15.13-19)

¹¹Jo me Yuda oko yai kikuno di kiko ot suro bomba me Debir (sek ber oudo kolwongo bomba me Debir be Kiriya Seper).

¹²Ngat acel kikom gi, kame oudo kolwongo be Kaleb, oko waco be, “Ngat kame bino suro Kirat Seper di eko mane, angu abino mine enyomo nyara Akisa.”



¹³Otiniel wot ka Kenas, omin me Kaleb atidi en oko mano bomba nono; di Kaleb oko mine enyomo Akisa nyare.

¹⁴Ceng kame Akisa oko ot kede but Otiniel, en eko dino cware be ekwai papa mere Kaleb poto. Di do Akesa oudo tie wok ki ngei punda mere, Kaleb oko penye be, “Nyo kame cunyi tie mito?”

¹⁵En eko dwoko ne be, “Ango amito imia giamia; bala kame in itieko keta kede i lobo kotuo, mia ataneko me pii da.” Aso, Kaleb oko mine ataneko me malo kede me piny.

Kabedere kame Jo ka Yuda kede Jo ka Benjamin Omao

¹⁶Kakame jo me ekeko ka Yuda oyai kede ki Jeriko, bomba me tugo, jo Ken kame oudo obedo ikwae ka papa me dako ka Musa, oko upere kede gi ot i wi tim me Yuda kame oudo tie i bad tetu piny me Arad. Gin bin kiko donyo bedo kede jo Amelek.

¹⁷Jo me Yuda bin oko ot karacel kede imiegu gi me ekeko ka Simeon, di gin kiko bwono jo Kanan kame bin bedo i bomba me Sepat di kiko muducaro bomba nono atwal. Manono oko mino oculo nying bomba nono be Koroma.

¹⁸Jo me Yuda oko mano bomban me Gasa, Asikelon kede Ekuron, karacel kede adulion koluko gi.

¹⁹Rwot oudo tie kede jo me Yuda, omio kiko mano piny kobedo mori mori nono, do gin bin likame kiko karuno riamo tenge jo kame bin bedo i ebar, pien jo nogo oudo tie kede cabalan me nyonyo ayon.

²⁰Bomba me Keburon bin oko mino but Kaleb bala kame oudo Musa owaco. Kaleb bin oko riamo tenge kiye jo me awobe adek ka Anak.

²¹Do jo ka Benjamin bin likame oko riamo tenge jo Yebu kame oudo bedo Yerusalem. Manono en komio jo Yebu odong bedo Yerusalem kede jo ka Benjamin tuno tin.

Jo me Ekeko ka Epuraimu kede me ka Manase Omao Betel

²²Jo me ot ka Yosepu da bin oko ot suro bomba me Betel, kame oudo kolwongo be Lus; di Rwot oko konyo gi.

²³Gin kong kicwao bega ot ngingico bomba me Betel.

²⁴Kakame bega nogo oneno kede icuo moro di wok ki bomba, gin kiko waco ne be, “Nyut ne wan yongayo me donyo i bomba, di wan oko bino timo nin mwolo.”

²⁵Aso, en eko nyuto negi yongayo me donyo i bomba, di gin kiko neko jo me bomba nono dedede, kwanyo kenekene icuo nono kede jo me ode.

²⁶Icuo nono oko yai eoto i lobo me jo Kiti kakame eko gero iye bomba. En bin eko cako nying bomba nono be Lus; manono en nyinge tuno tin.

Jo kalikame Jo me Isirael Oriamo Tenge



²⁷ Jo me ekeko ka Manase bin likame oko riamo tenge jo kame bin bedo i bomban me Bet San, Tanak, Dor, Ibleam, Megido, karacel kede calere gi; jo Kanan bin oko meede kede bedo kunono.

²⁸ I kare kame jo me Isirael oko doko tek kede, gin bin kiko dino jo Kanan timo negi tice bala ipasoi, do likame kiko riamo gi tenge.

²⁹ Jo me ekeko ka Epuraimu da bin likame oko riamo tenge jo Kanan kame bin bedo i bomba me Geser, di manono oko mino jo Kanan oko donyo bedo Geser kede gi.

³⁰ Jo me ekeko ka Sebulun da bin likame oko riamo tenge jo kame bin bedo i bomban me Kitiron kede Nakalol, di manono oko mino jo Kanan oko meede bedo kunono kede gi. Do gin bin kiko dino gi timo negi tice bala ipasoi.

³¹ Jo me ekeko ka Aser da bin likame oko riamo tenge jo kame bin bedo i bomban me Ako, Sidon, Akalab, Akisib, Keleba, Apik, kede Rekob,

³² di manono oko mino jo me ekeko ka Aser bin oko donyo bedo i diere me jo Kanan.

³³ Jo me ekeko ka Naputali da bin likame oko riamo tenge jo kame bin bedo i bomban me Bet Semes kede Bet Anat. Do gin bin kiko donyo bedo i diere me jo Kanan kame bin bedo i lobo nono. Akadi kamanono da, gin bin kiko mino jo me bomban nogo odonyo timo negi tice bala ipasoi.

³⁴ Jo Amor bin oko jwango jo me ekeko ka Dan kidwoko gi cen i piny kobedo mori mori di likame kiko yei negi wok piny i ebar.

³⁵ Jo Amor bin oko cere di kiko meede kede bedo i moru me Keres, i Aijalon, kede i Salabim, do jo me ikekon ka Epuraimu kede me ka Manase bin oko pugo gi di kiko mino gi timo negi tice bala ipasoi.

³⁶ Ikor me jo Amor bin yai ki kakame yito Akurabim, kede ki Sela di eko yito malo.

Jongolkop 2

Malaika ka Rwot i Bokim

¹ Malaika ka Rwot oko yai ki Giligal di eko ot Bokim di eko waco ne jo me Isirael be, “Ango bin akwanyo wu ki Misiri di ako kelo wu i lobo kame bin ango acikere iye but joakwari wu. Ango bin awaco negi be, ‘Ango likame abino turo isikan kame atieko timo kede wu.

² Wuda miero kur itimunu isikan moro kede jo kame bedo i lobo noni. Miero ireretunu alutarin gi piny.’ Do wun likame ikounu lubo gikame ango awaco ne wu. Pinyo komio wun ikounu timo kamano?

³ Aso, nataman ango atie waco ne wu be likame abino riamo jo nogi tenge ki nyim wu. Do gin kibino doko jokwor wu, doko woro rubangan gin bino bedo bala owic me ciko wu.”

⁴ Kakame malaika ka Rwot owaco ne kede jo me Isirael kop noni, gin dedede kiko dipo koko.



⁵Manono en omio gin bin kiko lwongo kabedo nono be Bokim. Gin bin kiko mino giayala but Rwot ki kunono.

To ka Yosua

⁶Yosua bin oko peruno jo di jo me Isirael dedede oko yai ot gamo lobere kame mako gi kame oudo kotieko popoko negi.

⁷Di jo me Isirael bin oko bedo woro Rubanga pi kare dedede kame Yosua oudo kuo kede, kede pi kare dedede kame joadongo kame bin oko dong kuo ingei Yosua to, oudo pwodi tie kuo, jo kame bin oneno kede wang gi jamini adongodongo kame bin Rwot otimo ne jo me Isirael.

⁸Ngatic ka Rwot, Yosua wot ka Nun, bin oko to di mwaka mere me dongo oudo tie tol acel kede tomon (110).

⁹En bin oko yike i lobo mere kame make, i Timunat Sera i piny kobedo mori mori me Epuraimu, i bad tetu malo me moru me Gas.

¹⁰Jo me lwak nono da dedede bin oko to, di lwak ace me cen ngei gi oko obino, lwak kalikame oudo ngeo Rwot arabo gikame bin en etimo ne jo me Isirael.

Jo me Isirael Oweko Woro Rwot

¹¹Di do jo me Isirael bin oko timo gikarac i nyim Rwot; gin bin kidonyo woro Baal,

¹²di kiko weko Rwot, Rubanga ka joakwari gi, ngat kame bin okwanyo gi ki lobo me Misiri. Gin bin kidonyo lubo rubangan apat, rubangan me jo kame bin oluko gi. Gin bin kidonyo luro wi gi piny woro gi, omio kiko wango cuny Rwot.

¹³Gin kiweko Rwot di kiko donyo woro Baal kede Asitate.

¹⁴Manono oko mino cuny Rwot oko wang i kom jo me Isirael, di en eko jalo gi i cing joyak kame oko yako gi. En bin emio jokwor obedo tie negi i bad tetu dedede, tetekeny gin likame kikaruno yi kede gi.

¹⁵I kare dedede kame gin bin kioto kede i yi, Rwot oudo lokere timo ne gin raco, bala kame bin en etieko kwenyaro gin kede di ekwongere. Jo oudo tie do kede par atek.

¹⁶Rwot bin oko mino jo me Isirael jotel kame oko lako gi ki cing jo kame bin yako gi.

¹⁷Do jo me Isirael likame bin oko winyo kop akadi me jotel gi. Gin cuny gi bin obedo mito rubangan apat di kiluro wi gi piny woro gi. Gin kilokere tenge oyotoyot ki yongayo kame bin joakwari gi obedo lubo. Joakwari gi bin obedo lubo cik ka Rwot, do gin likame kiko timo kamanono.

¹⁸I kare dedede kame bin Rwot mio kede jo me Isirael ngatel, Rwot bin bedo tie kede ngatel nono di en eko lako jo ki cing jokwor gi pi kare me ngatel nono dedede. Kisa oudo mako Rwot i kom gi pi cur kame oudo kitie iye pi itidil kede adiadia kame oudo oketo i kom gi.

¹⁹Do i kare dedede ka ngatel bin oko to, gin bin kilokere dok i kuo kasek di kiko donyo timo gikame rac kalamo me joakwari gi. Gin bin kidonyo lubo rubangan apat



di kiluro wi gi piny woro gi. Gin likame bin kiyei weko tim gi areco nogo kede tim gi me epali.

²⁰Manono bin oko mino cuny Rwot owang i kom jo me Isirael di eko waco be, “Pien jogi otieko turo isikan na kame bin ango aciko joakwari gi pi gwoko, doko da likame kilubo kop kame ango awaco,

²¹likame bobo ango abino riamo tenge ateker moro kame bin Yosua oto oweko pwodi tie i lobo nono.

²²Ango abino tic kede gi me tamo cuny jo me Isirael, pi neno ka gin kibino lubo yongayo na bala bin joakwari gi arabo li.”

²³Aso, Rwot bin oko weko atekerin nogo odong i lobo nono. En bin likame emio Yosua obwono gi, akadi ingei to ka Yosua en likame bin eko riamo gi tenge awakawaka.

Jongolkop 3

Atekerin kame bin Odong kede Jo me Isirael

¹Magi en atekerin kame bin Rwot oko weko odong i lobo nono pi en tic kede gi me tamo jo dedede me Isirael kalikame bin obeo i yi moro i Kanan.

²En etimo manono tetekeny epwony lwak acelacel me Isirael i kom yi, twatwal mere jo kalikame pwodi obilo yi moro.

³Jo kame bin koweko oko dong i lobo nono gin en jopug kany me Pilistia kede jo kame gin kipugo, jo Kanan dedede, jo Sidon, kede jo Kibi kame bedo i piny kobedo mori mori me Lebanon, cako ki moru me Baal Kerimon ape tuno Lebo Kamat.

⁴Gin bin koweko gi pi tic kede gi me tamo jo me Isirael, tetekeny nen ka jo me Isirael bino lubo cik ka Rwot, kame bin en emio Musa pi mino joakwari gi.

⁵Aso, jo me Isirael bin oko donyo bedo i diere me jo Kanan, jo Kiti, jo Amor, jo Perisi, jo Kibi, kede jo Yebu.

⁶Gin bin kiko nyomere kede gi di kiko donyo woro rubangan gi.

Otiniel

⁷Jo me Isirael bin oko timo gikarac i nyim Rwot. Gin bin wi gi oko wil kede Rwot Rubanga gi di kiko donyo woro cal me Baal kede Asera.

⁸Manono oko mino cuny Rwot owang i kom gi, di eko mino gi i cing Abaka Kusan Risataim me Mesopotamia. Abaka nono oko pugo gi pi mwakini kanyauni.

⁹Di do jo me Isirael oko kok but Rwot pi konyo gi, di en eko mino gi dano kame oko lako gi. Dano nono nyinge oudo Otiniel, wot ka Kenas omin me Kaleb atidi.

¹⁰Tipo ka Rwot bin obino i kome, di en eko doko ngatel me jo me Isirael. Otiniel bin oko ot yi kede Abaka Kusan Risataim me Mesopotamia, di Rwot oko mino abaka nono i cinge.



¹¹Manono bin oko mino anapakin oko bedo i lobo nono pi mwakini ot ongwon. Di do Otiniel oko to.

Ekud

¹²Jo me Isirael bobo oko timo gikarac i nyim Rwot. Pi manono, Rwot bin oko mino Abaka Egilon me Moab odoko tek eko bwono jo me Isirael.

¹³Egilon bin oko ribere kede jo Amon kede jo Amalek, di gin kiko ot yi kede jo me Isirael di kiko bwono gi, kiko mano bomba me Jeriko, en bomba me tugo.

¹⁴Di jo me Isirael oko bedo i apugan me Abaka Egilon me Moab pi mwakini tomon kiwie kanyauni.

¹⁵Do kakame jo me Isirael oko kok kede but Rwot, en eko cwano negi dano pi lako gi. Dano nono bin en Ekud wot ka Gera, kame oudo yai ki ekeko ka Benjamin. En oudo ebedo engodal. Jo me Isirael bin oko cwane kede giamia pi tero ne Abaka Egilon me Moab.

¹⁶Ekud bin oko timo epima mere kame bit tuni tuni di boro mere oudo buco romo dul mita. En bin eko twene i amuro mere tetu cam di eko ume kede igoen kame bin engapo.

¹⁷Di do eko tero giamia nono but Abaka Egilon me Moab. Egilon oudo ocwe twatwal.

¹⁸Kakame Ekud otieko mino kede abaka giamia nono, eko waco ne jo kame bin oyeo jamini kame koculo kede esolo nono be kidok paco.

¹⁹Do en kikome kakame bin etuno kede i kide kame kopao me Giligal, eko dok cen but Abaka Egilon di eko waco ne be, “Okwe abaka, ango atie kede kop me mung kame amito waco ni.” Di abaka oko waco ne jotic mege be, “Lingunu!” En eko cwano gin dedede kidonyo ooko.

²⁰Ekud oko ot but abaka di oudo en etie bedo kene i wi ot i agola mere angic, di eko waco ne abaka be, “Ango atie kede kop nin kowok kibut Rubanga.” Abaka oko yai malo.

²¹Ekud oko cwano cinge tetu ngodal di eko woto epima ki i amuro mere tetu cam di eko cobo kede abaka i yie.

²²Epima lung oko lwiny i yi abaka, di kakamio oko ume. Ekud oko weko epima nono odong i yie, di eko wok ki dude.

²³Di do Ekud oko donyo ooko, ecego ikekon di eko gono gi.

²⁴Kakame Ekud otieko kato kede, jotic me abaka oko bino. Gin bin kineno ikekon me agola ogoore, omio kiko tamo be abaka oudo miero di tie konyere i agola angic nono.

²⁵Aso gin bin kiko bedo kure kwekwe. Kakame gin kidare kede tieko isawan alac di likame eyabo ikekon me agola me wi ot, gin do kiko kwanyo agony di kiko yabo ekeko. Gin bin kiko udo ngadwong gi tie buto i dier ot di eto.



²⁶Ekud bin oko lwi kakame gin pwodi kitie gal kede, di eko ot elanyo kide kame opao eko ot Seira.

²⁷Kakame bin en eko tuno kede i piny kobedo mori mori me Epuraimu, eko kuto agwara me lwongo jo me Isirael ot i yi; di en eko telo gi yai ki piny kobedo mori mori nono.

²⁸En bin ewaco negi be, “Lubanu; pien Rwot otieko mino jokwor wu, jo Moab, i cing wu.” Aso, gin bin kiko lubo Ekud, di kiko ot mako kabedo kame jo Moab koto ngolo ecilet me Yorodan kiye; likame bin kiko yei ne ngatamoro ngolo ecilet.

²⁹Cenge nono gin bin kiko suro jo Moab di kiko neko isirikalen gi tutumia tomon (10,000) kame bin tek i yi; likame tie ngatamoro kobwot.

³⁰Aso, cenge nono jo me Isirael bin oko bwono jo Moab, di anapakin oko bedo i lobo nono pi mwakini ot kanyauni.

Samagar

³¹Ngatel kame bin oko lubo ngei Ekud en Samagar wot ka Anat. En bin eneko jo Pilistia tol kanyape (600) kede ebela me kolo twonin. Eda bin elako jo me Isirael.

Jongolkop 4

Debora kede Barak

¹Ingei to Ekud, jo me Isirael bobo oko timo gikarac i nyim Rwot.

²Rwot bin oko mino gi i cing Abaka Jabin me Kanan, ngat kame bin pugo bomba me Kasor. Ngatel me isirikalen mege bin en Sisera, kame bin bedo Karoset Goim.

³Jabin oudo tie kede cabalan tol kanyangon (900) kame kotimo kede nyonyo, di en bin eko pugo jo me Isirael kede gero atek pi mwakini ot are. Di do jo me Isirael bin oko kok but Rwot pi konyo gi.

⁴I kare nono Debora, anabi, dako ka Lapidot, en kame oudo obedo ngangolkop me jo me Isirael.

⁵En bin enare bedo i dud tugo ka Debora, kame bin tie dierediere me Rama kede Betel i piny kobedo mori mori me Epuraimu, di jo me Isirael oudo oto bute pi en ngolo kope gin.

⁶Ceng moro acel en bin eko cwano jo ooto lwongo Barak wot ka Abinoam ki bomba me Kedes kame bin tie i lobo me Naputali, di en eko waco ne be, “Rwot, Rubanga me jo me Isirael ciki be, ‘Kwany cuo tutumia tomon (10,000) ki ikekon ka Naputali kede Sebulun di iko telo gi ot i moru me Tabor.

⁷Ango abino mino Sisera, ngatel me isirikalen ka Jabin riamo kede wu i nget ecilet me Kison. En eyaro bino kede cabalan kede isirikalen mege, do ango abino mine i cingi.’
“



⁸Barak oko waco ne Debora be, “Ka in iyaro upere keda, ango abino ot; do ka li, ango likame abino ot.”

⁹Debora oko gamo be, “Ango bo ateteni abino upere kedi; bed bala kamanono da, likame in ibino udo wor pi lono yi nono, pien Rwot bino mino Sisera i cing dako.” Aso, Debora oko yai di eko upere kede Barak ot Kedes.

¹⁰Barak bin oko lwongo jo me ikekon ka Sebulun kede Naputali ooto Kades, di jo yi tutumia tomon (10,000) oko lube. Debora da oko upere kede.

¹¹I kare nono Keber dano me Ken bin osipo kima mere iyapiyapi kede Kedes, i nget yat oak me Sananim. En bin epokere ki kom jo Ken icegun, ikwae ka Kobab, omin me dako ka Musa, di eko ot kunono.

¹²Kakame bin oko waco ne kede Sisera be Barak wot ka Abinoam oudo otieko ot i moru me Tabor,

¹³En bin eko lwongo isirikalen mege dedede karacel, kede cabalan tol kanyangon dedede, di eko cwano gi kiyai ot cako ki Karoset Goim tuno i ecilet me Kison.

¹⁴Di do Debora oko waco ne Barak be, “Yai do ioti! Ceng atin Rwot otieko mino Sisera i cingi. Ateteni Rwot tie telo ni yongayo.” Aso, Barak oko yai ki moru me Tabor kede jo yi tutumia tomon (10,000).

¹⁵Kakame Barak oko suro kede Sisera, Rwot bin oko mino mielkom atek omako Sisera kede cabalan mege dedede kede jo yi mege dedede. Sisera bin oko wok piny ki wi cabala mere di eko ringo tenge kede tiene.

¹⁶Barak bin oko diebo kede cabalan kede isirikalen ka Sisera tuno Karoset Goim, di eko neko gin dedede. Likame bin tie dano moro akadi acel kame bin oko dong.

¹⁷Sisera bin oko ringo kede tiene paka i eema ka Yayeri, dako ka Keber dano me Ken, pien anapakin oudo tie i dierediere me Abaka Jabin me Kasor kede jo me ot ka Keber.

¹⁸Yayeri oko donyo ooko pi riamo kede Sisera di eko waco ne be, “Adwong, donyi, donyi i eema na; kur ibed kede lworu moro.” Aso, en eko donyo i eema ka Yayeri, di Yayeri oko ume kede idukun.

¹⁹Sisera oko waco ne be, “Akwai imia pii anonok amati; orio oneka.” Aso, en eko mine cak di eko mato, di bobo eko ume.

²⁰Sisera oko waco ne be, “Cungi i dogola me eema, di ka dano moro oko bino di eko penyi ka ngatamoro tie kan, in wace be li.”

²¹Do kakame Sisera oko nino kede pien oudo eol, Yayeri oko kwanyo loc me guro kima, kede enyondo, di eko cede ot tuno bute, di eko guro loc i nget yite pelepel tuno i lobo, di eko neke.

²²Kakame Barak oko tuno kede di emo Sisera, Yayeri oko donyo ooko pi riamo kede, di eko waco ne be, “Bia kan, ango abino nyuto nin dano kame in itie mono.” Aso, en



eko donyo i eema ka Yayeri di eko udo Sisera tie buto piny di etieko to, di loc opelao wie.

²³Cenge nono Rubanga oko mino jo me Isirael obwono Abaka Jabin me jo Kanan.

²⁴Di do jo me Isirael oko meede doko tek yi kede Abaka Jabin me Kanan, tuno gin muducaro en.

Jongolkop 5

Wer ka Debora kede Barak

¹Cenge nono Debora kede Barak wot ka Abinoam oko wer be,

²” Pakunu Rwot! Jo me Isirael oweko yer wi gi odongo, di jo oko miire gin ken gi kede yomcuny ot i yi.

³Winyunu, wun abakai! Cikunu yit wu, wun jopug! Ango abino wer but Rwot, Rubanga me jo me Isirael.

⁴Rwot, kakame in bin iyai kede ki mori me Seir, kakame in bin iwok kede ki adul me Edom, piny bin oko yangere, di kot oko cwei ki edou. Ateteni idoun bin oko oonyo pii.

⁵ Mori bin oyangere i nyim Rwot, akadi moru me Sinai da bin oyangere, i nyim Rwot, Rubanga me jo me Isirael.

⁶” I kare ka Samagar wot ka Anat, i kare ka Yayeri, jo bin oweko lubo gudi, di jo kame bin oto sapalin oko donyo lubo yote atino.

⁷Jo bin odak kiweko bomban me Isirael; bomban bin odong nono tuno in Debora bino; in bin iko bino bala toto me jo me Isirael.

⁸I kare kame jo me Isirael bin oyero kede rubangan apat anyen, yi bin oko bedo tie negi. Benyo, bin oko neno ebuku moro arabo tong moro but jo tutumia ot ongwon (40,000) me Isirael?

⁹Cunya tie i kom jotel me isirikalen me Isirael, jo kame bin oko miire ken gi kede yomcuny ot i yi. Pakunu Rwot!

¹⁰Tamunu kong pi kop nono, wun jo kame iwananunu pundan atar, wun jo kame ibedunu i ikekai me wel, kede wuda jo kame iotunu i yote kede tien wu.

¹¹Winyunu dwan jo atie wok ki kakame kotwomo kiye pii, gin kitie tatamo kite kame Rwot oko bwono kede jokwor, ekite kame jo me Isirael obwono kede jokwor! “Di do jo ka Rwot bin oko siritto ot i irutei gi.

¹²Debora we, cei, cei do! Cei, cei icak wer! Yai malo Barak, di iko telo yongayo ne jo kame in imako bala mabus, Okwe in wot ka Abinoam!

¹³Di do donge me jo kame bin koworo twatwal oko siritto wok piny; jo ka Rwot oko bino piny bute di kitieko iikere pi ot yi.



- 14**Gin bin kiyai ki Epuraimu di kiko bino i aditot lubi, in Benjamin kede jo ni. Jotel yi bin osirito wok piny ki Makir, kede ki Sebulun jodongo me isirikalen oko bino.
- 15**Jotel me ekeko ka Isakar bin obino kede Debora, kede jo me ekeko ka Isakar kame bin geno Barak; gin bin kiko onyaro kilube i aditot. Do jo me ekeko ka Ruben bin opokere; gin bin cuny gi oko bedo kede gung.
- 16**Pinyo bo komio wun bin ikounu dong i anak me romini? Benyo, bin idongunu winyo bilo kame jokwat kuto pi lwongo romini? Jo me ekeko ka Ruben bin opokere; gin bin cuny gi oko bedo kede gung.
- 17**Jo me ekeko ka Gilead bin odong loka tetuca me Yorodan. Pinyo bo komio bin jo me ekeko ka Dan odong i emeri, di jo me ekeko ka Aser bin oko dong bedo mot i dog nam, di kiko donyo bedo i idoketa?
- 18**Jo me ekeko ka Sebulun obedo jo kocao to; jo me ekeko ka Naputali da kamanono, gin bin kicao kuo gi i ebar yi.
- 19**” I Tanak, i nget ecilet me Megido, abakai bin obino di kiko yi; abakai me Kanan bin oko yi, do gin bin likame kiko yako siliba moro.
- 20**Acerin bin oko yi i malo i edou; gin bin kiyi kede Sisera di kioto i malo i edou,
- 21**Alele me Kison bin omolo gi tenge, pii aringo me ecilet me Kison. Ango abino meede kede ot, abino meede ot kede teko!
- 22**Di do Asigiran oko bino di kitakaro, di tien gi mio piny mor.
- 23**” Malaika ka Rwot waco be ‘Lam Meros, lam kitek jo kame bedo kunono, pien gin bin likame kiko bino konyo Rwot, likame gin kiko bino yi pi Rwot.’
- 24**” Dako kame tie kede winyo kalamo mon apat en Yayeri, dako ka Keber dano me ekeko ka Ken, en kame etie kede winyo kalamo mon dedede kame bedo i iemai.
- 25**Sisera bin okwae pii, do en eko mine cak; en bin okelo ne mo me wi cak kede bakuli acil.
- 26**Yayeri bin omako loc me guro eema i cinge tetucel, di eko mako enyondo i cinge tetu cam; en bin eko tucyo wi Sisera di eko bebelo cogo mere; en bin etuco wie i nget yite pelepel.
- 27**Sisera bin oko keto nyonyok piny, epoto piny di eko buto eling ti katien Yayeri. en enyongakin katiene di eko poto; epoto piny di eko to kanono.
- 28**” Toto me Sisera bin oko ngoloro ki dirisa; en eciko wange ngino ki dirisa, di eko penyere be, ‘Pinyo komio cabala mere ogal dwogo? Pinyo komio asigiran mege likame susunyo bino?’
- 29**Mon ariek kalamo kikom mon kame bin gwoke oko gamo doge, di en eko bedo nyogao yamo kene kene be,



30' Gin kitie udo jamini me ayaka di kipokopoko, sirikale acelacel tero nyako arabo anyira are, igoen acil kame kotubuso komio but Sisera, igoen are acil kame kongwangwaco kokelo nango me aruwa i nguta.'

31" Okwe Rwot, koto jokwor ni oto kamanono, do jo kame mari bed cal bala ceng kame wok kede teko mere!" Di anapakin bin oko bedo i lobo pi mwakini ot ongwon.

Jongolkop 6

Egidioni

1Jo me Isirael bin bobo oko timo gikarac i nyim Rwot, di Rwot oko mino gi i cing jo Midian pi mwakini kanyaare.

2Cing jo Midian bin oko bwono jo me Isirael; manono oko bin mino gin kiko iiko kapwono gi kakobarere me mori, i abo kede kabedo mogo atek me gwokere.

3I kare dedede kame bin jo me Isirael cuwo kede kodere gi, jo Midian bin bino kede jo Amelek kede jo me tetu kide di kiko suro gi.

4Gin bin kibino di kiko gero kimere gi i adul me jo me Isirael di kiko muducaro cam kame jo me Isirael opuro ape pako tuno i adul kame kio kede Gasa. Gin bin likame kiweco gimoro kame jo me Isirael romo camo, akadi romini, doke arabo pundan.

5Pien gin bin kibino kede doke gi kede iemai gi di kiumo piny bala obonyo. Gin akadi aguraguran gi da likame wel gi marere. Gin bin kibino di kiko dudubo lobo.

6Jo me Isirael bin oko doko jocan twatwal pi jo me Midian. Gin bin kiko kok but Rwot pi konyo gi.

7Kakame bin jo me Isirael okok kede but Rwot pi konyo gi ki cing jo Midian,

8Rwot oko cwano negi enabi. Enabi nono bin oko waco negi be, "Rwot Rubanga me jo me Isirael waco be, 'Ango bin akwanyo wu ki Misiri, ki ipasun,

9di ako lako wu ki cing jo Misiri, kede ki cing jo dedede kame bin tero wu kirac, di ako riamo gin tenge ki nyim wu, di ako mino wun lobo gin.

10Ango bin awaco ne wun be ango en Rwot Rubanga wun, likame ibinunu woro rubangan me jo Amor, jo kame itienu bedo i lobo gi. Do wun likame ikounu winyo kop na.' "

11Di do malaika ka Rwot oko ot di eko bedo i dud yat oak kame bin tie i calo me Opura. Calo nono bin obedo me ka Yowasi, dano me ot ka Abieser. Egidioni wode oudo tie canyo engano kakame bin kobio iye bwini tetekeny kur jo Midian nene.

12Malaika ka Rwot bin oko neeno but Egidioni kunono di oko waco ne be, "Rwot tie kedi, in dano atek i yi!"

13Egidioni bin oko waco ne be, "Do adwong, ka Rwot tie kede wan, pinyo komio gigi dedede tie timere ne wan? Doko jamini adongodongo kame joakwari wan obedo tatamo ne wa be en bin etimo, nan do tie tuai? Gin kibedo tatamo ne wa be Rwot en



kame bin okwanyo wa ki Misiri. Do nan do Rwot otieko uco wa tenge, doko etieko jalo wa i cing jo Midian.”

14Di do Rwot bin oko waco ne be, “Ot kede teko nin adwong no di iko lako jo me Isirael ki cing jo Midian. Ango kikoma atie cwani.”

15Egidioni bin oko gamo be, “Do Rwot, epone mene kame anga akaruno lako kede jo me Isirael? Ot kame anga ayai kiye en kame jo mege goro kalamo ki ekeko ka Manase, doko anga en kame pira likame tek kalamo jo dedede me ot wa.”

16Rwot oko bin waco ne be, “Anga abino bedo tie kedi, di in iko bino neko jo Midian kede yoto di ineno bala gin oudo kibedo dano acel kenekene.”

17Di Egidioni oko dwoko ne be, “Ka cunyi yom keda, in mia gianena moro kame nyuto be in Rwot en kame itie yamo keda.

18Tim ber kur iyai ki kane tuno anga dwogo buti kede giamia na, di ako keto i nyimi.” Rwot oko gamo be, “Anga abino dong bedo kanoni tuno in dwogo.”

19Aso, Egidioni bin oko ot i ode di eko ngolo diel abwong eko tedo, di eko tedo da mugati kame arup li iye, kame kotimo kede engano kame romo kilo tomon. En bin eko keto ringo i adita, di eko keto cwe i tabo, eko kelo gi but malaika ka Rwot i dud yat oak, di eko mine.

20Malaika ka Rubanga oko waco ne be, “Kwany ringo kede mugati di iko keto gi i wi lela noni, di iko onyo cwe i kom gi.” Egidioni bin oko timo kamanono.

21Malaika ka Rwot oko cwano ebela mere kame oudo etie mako, di ebela nono oko mulo ringo kede mugati nono. Mac bin oko yai ki lela nono di eko wango ringo kede mugati nono. Di do malaika ka Rwot oko rwenyo ki nyime.

22Egidioni bin oko do niang be manono oudo obedo malaika ka Rwot. Di en eko waco kede lworu atek be, “Okwe Rwot Rubanga, konya! Kom anga aneno malaika nin wang i wang!”

23Do Rwot bin oko waco ne be, “Mulem bed buti. Kur ibed kede lworu. In likame ibino to.”

24Di do Egidioni bin oko gero alutari kunono me yutuno Rwot, di eko cako nyinge be, “Rwot en mulem.” Tunu tin alutari nono pwodi tie cungo Opura kunono, i calo me jo me ot ka Abieser.

25Iwor nono Rwot bin oko waco ne Egidioni be, “Kwany twon ka papa ni kede twon ace me mwaka kanyaare, di iko reto alutari kame papa ni yalo Baal kiye, kede iko tongo piny epir kame obedo gianena me rubanga Asera, kame tie i ngete.

26Di in iko gero alutari ne Rwot Rubanga ni kiber, i wi kateko ka Baal kanono. Di iko kwanyo twon me are iko wange lung bala giayala, di itio kede epir kobedo gianena ka Asera kame in itieko tongo piny nono me moko mac.”



²⁷Aso, Egidioni bin oko kwanyo jotic mege tomon, di eko timo bala kame Rwot oudo owaco ne. Do piento en bin eko bedo kede lworu atek but jo me ot ka papa mere kede jo me bomba, manono oko mino en etime iwor.

²⁸Kakame jo me bomba bin oko wok kede odiko, gin kiko udo be oudo kotieko tuturo alutari ka Baal, doko da epir kobedo gianena me rubanga Asera, kame bin tie i ngete kanono, oudo kotieko tongo piny, kede be twon me are da oudo kotieko mino bala giayala i wi alutari kame oudo kogero kanono.

²⁹Gin bin kiko donyo penyere ken gi ken gi be, “Ngai en kotimo gini?” Gin kiko donyo mono di kipepenyo, di kiko udo be Egidioni wot ka Yowasi en kame bin otimo gi nono.

³⁰Di do jo me bomba oko waco ne Yowasi be, “Kel wodi ooko kan, wan oneke, piento en etieko reto piny alutari ka Baal, doko eko tongo piny epir kobedo gianena me rubanga Asera kame oudo tie i ngete.”

³¹Do Yowasi bin oko waco ne jo dedede kame bin dadangun ne be, “Benyo, wun en icungunu ne Baal? Arabo, wun en kame iyiunu pire? Dano moroni kame cungo pi Baal, tuno odiko udo kotieko neke. Ka Baal obedo rubanga, wekunu en eyi pire, piento alutari mere en kame koreto.”

³²Cako cenge nono oko do donyo lwongo Egidioni be Yerubaal, pien Yowasi oudo owaco be, “Wekunu Baal yi pire kene; alutari mere en kame koreto piny.”

³³Di do jo Midian dedede, jo Amelek, karacel kede jo me bad tetu kide oko cokere kiko ngolo ecilet me Yorodan, di gin kiko gero kimere gi i aditot me Jeserel.

³⁴Tipo ka Rwot bin oko bino i kom Egidioni, di en eko kuto agwara pi lwongo jo me ot Abieser pi lube.

³⁵En doko eko oro jo ooto i adulion are dedede me ekeko ka Manase pi lwongo gin bino lube. Eko da cwano jo but jo me ekeko ka Aser, Sebulun, kede Naputali. Gida bin kiko ot donyo bute.

³⁶Egidioni bin oko waco ne Rubanga be, “Pi mino ango ngeno be in ibino tic keda pi lako jo me Isirael, bala kame in itieko waco,

³⁷ango ayaro keto yer mogo me oromo i diakal me canyo, ka toyo oko bedo tie i kom yer nogo kenekene, do di lobo lung otuo, manono bino mino ango angeo be in ibino tic keda pi lako jo me Isirael, bala kame in itieko waco.”

³⁸Di eko bin timere kamanono. Kakame en bin eyai kede oru mere odiko sek di eko biino yer nogo, pii me toyo bin oko mol kikom gi kame romo pongo bakuli.

³⁹Egidioni bobo oko waco ne Rubanga be, “Kur cunyi wangi i koma, wek bobo ayam kong tien acel. Ango akwai iyei na bobo kong atam timo kamanono kede yer me oromo nono tien acel. Nataman do wek yer me oromo dong di etuo, do toyo bed tie i lobo.”



⁴⁰Iwor nono Rubanga oko timo kamanono. Oru mere odiko en eko udo yer odong di etuo do toyo oudo odiako lobo.

Jongolkop 7

Egidioni Obwono Jo Midian

¹Di do Egidioni kede isirikalen dedede kame bin tie bute oko dilo odiko sek di kiko gero kimere gi i nget atan me Karod. Jo Midian oudo ogero gida kimere gi i aditot kame bin tie i bad tetu malo, i nget emukura me More.

²Rwot bin oko waco ne Egidioni be, “Isirikalen kame tie buti tot twatwal, likame ango ayei mino jo Midian i cing gi. Gin cengemogo kiko romo paro be gin kibwono jo Midian gin ken gi, di kiko donyo wakere iye.

³ Aso, nataman in wac kop noni di isirikalen dedede winyo be, ‘Ngatamoroni kame lwor, ngat kame kome tie miel, poore edok paco.’ “ Iepone nono Egidioni bin oko yeko gi. Jo tutumia ot are kiwie are (22,000) bin oko dok paco, di jo tutumia tomon (10,000) en kame bin oko dong.

⁴Rwot bin oko waco ne Egidioni be, “Isirikalen pwodi tot twatwal. Ter gi i pii, di ango ako bino yeko gi ne in i kunono. Ka ango awaco ni be, ‘Dano ni bino ot kedi, ‘en ebino ot kedi. Doko ka ango awaco be, ‘Dano ni likame bino ot kedi, ‘en likame ebino ot.’”

⁵Egidioni bin oko tero isirikalen i pii, di Rwot oko waco ne be, “In ibino poko i bad tetucel jo dedede kame jakjako pii kede leb gi bala ogwok, di iko poko i bad tetu ocelu da jo dedede kame bino riondiko piny pi mato pii.”

⁶Jo tol adek en kame bin oko jakjako pii kede leb gi; do isirikalen apat dedede bin oko riondiko piny pi mato pii.

⁷Rwot bin oko waco ne Egidioni be, “Ango abino tic kede isirikalen tol adek kame oudo ojakjako pii kede leb gi di ako lako wu, ako bino mino jo Midian i cing wu. Wace jo apat dedede dok paco.”

⁸Egidioni bin oko gamo jagin kede agwara kibus gi; di eko cwano gin dedede kidok i miere gi, kwanyo kenekene isirikalen tol adek nogo en kame bin oko dong. Kimere me jo Midian bin tie pipiny gin i aditot.

⁹Iwor me ceng nono Rwot oko waco ne Egidioni be, “Yai iko ot suro jo Midian i kimere gi; pien ango atieko mino gin i cingi.

¹⁰Do ka itie kede lwooro me suro gi, ot kong i kimere gin kunono kede ngatic ni Pura.

¹¹In ibino winyo gikame gin kitie waco, di do in iko bino bedo kede nwangcuny me suro gi.” Egidioni bin oko ot kede ngatic mere Pura i kimere me isirikalen me jo Midian.



12Jo Midian, jo Amelek, kede jo dedede kame bin owok ki tetu kide oudo oraramun i aditot bala obonyo; doko aguraguran gin oudo likame marere bala asinge me dog nam.

13Kakame Egidioni bin otuno kede, eko winyo icuo acel di tie tatamo ne ngawote gikame oudo eleko. En oudo etie waco ne ngawote be, “Ango tin aleko be mugati kame kotimo kede mawele olor ebino i kimere wa di eko dipo kima paka loko ataru.”

14Ngawote bin oko gamo be, “Manono kom obedo epima me dano me Isirael, Egidioni wot ka Yowasi! Likame gimoro apat! Rubanga otieko mino wan jo me Midian kede isirikalen dedede i cinge!”

15Kakame Egidioni otieko winyo kede itatam amako lek me icuo nono kede dwong me lek nono, en eko woro Rwot. Di do eko dok i kimere me jo me Isirael di eko waco negi be, “Yaunu! Rwot otieko mino isirikalen me Midian i cing wu!”

16Egidioni bin oko popoko isirikalen mege tol adek (300) nogo i ikodeta adek di eko mino dano acelacel agwara kede jagi kame koketo mac aliel i yie.

17En bin ewaco negi be, “Ka ango atuno i nget kimere gin, nenunu gikame ango atimo, di wuda ikounu timo kamanono.

18Ka ango kede jo me ekodet na okuto agwara, wuda kutunu megu rimaro kimere gin di ikounu lelemo be, ‘Pi Rwot kede Egidioni! ’ ”

19Aso, Egidioni kede jo tol acel kame bin tie kede en oko ot paka tuno i nget kimere me jo Midian i dier iwor, iesawa kame oudo pwodi oloko kede isirikalen jodar aloka. Di gin kiko kuto agwara di kiko neneko jagi kame oudo kimako i cing gi,

20di ikodeta are icegun ka da oko timo kamanono. Gin dedede kiko mako mac aliel i cing gi tetu ngodal, kede agwarai i cing gi tetu cam, di kiko lelemo be, “Epima pi Rwot kede Egidioni!”

21Dano acelacel di oko cungo kare rimaro kimere me jo Midian, di isirikalen dedede me jo Midian oko ringo tenge di kidwilao kede koko.

22Kakame jo ka Egidioni bin tie kuto kede agwara, Rwot oko mino jo Midian olokere cocobo jowot gi ken gi ken gi kede ipimai gi. Isirikalen gin bin oko ringo tetu Saretan paka tuno Bet Sita, ape tuno i ikor me bomba me Abel-mekola, i nget Tabat.

23Di do bin oko lwongo jo me Isirael ki ikekon ka Naputali, Aser, kede me ka Manase are dedede, di gin kiko wapo jo Midian.

24Egidioni bin oko cwano jo i piny kobedo mori mori me Epuraimu pi waco ne jo me kunono be, “Wokunu piny yi kede jo Midian. Makunu ecilet me Yorodan kede icileta dedede paka tuno Bet Bara.”

25Gin bin kiko mako jotel are me Midian, Oreb kede Seeb; gin kiko neko Oreb i lela me Oreb, kede Seeb kiko neko kabedo me biino olok ka Seeb. Magonogo gin bin kitimo di kitie wapo jo Midian. Gin bin kiko tero wi Oreb kede me ka Seeb but Egidioni loka tetuca me ecilet me Yorodan.



Jongolkop 8

Kobwono Jo Midian me Atwal

- ¹Di do jo me Epuraimu oko waco ne Egidioni be, “Nyo ine kame in iko timo ne wan? Neningo, in likame ilwongo wa i kare kame in oudo ioto yi kede jo Midian!” Di gin kiko lok i kop nono kitek.
- ²Do en eko waco negi be, “Gikame ango ako timo likame kokaruno poro kede gikame wun itiekunu timo. Iparunu be raro olok kame jo Epuraimu otimo likame ber kalamo ngwedo olok kame jo Abieser otimo?”
- ³Rubanga oko mino i cing wun jotel me Midian, Oreb kede Seeb; nyo kame ango atieko timo kame koromo poro kede meru?” Kakame en bin eko waco kede kamano, di do cuny gi oko kwei.
- ⁴Di do Egidioni bin oko tuno i ecilet me Yorodan di eko ngolo loka tetuca, en karacel kede jo tol adek kame bin tie kede en. Gin oudo kiol twatwal, do oudo pwodi kitie wapo jokwor.
- ⁵Kakame gin bin kiko tuno kede i bomba me Sukot, en eko waco ne jo me bomba nono be, “Ango akwao wu imiunu jo na mugati mogo. Gin kiol twatwal, doko ango pwodi atie wapo Seba kede Salamuna, abakai me jo Midian.”
- ⁶Do jotel me Sukot oko gamo be, “Benyo, mam in itieko mako Seba kede Salamuna en kame mio poore wan omi isirikalen nin mugati?”
- ⁷Egidioni oko gamo be, “Manono ber! Ka Rwot otieko mino Seba kede Salamuna i cinga, abino popoo komu kede okuto me wi tim!”
- ⁸Egidioni bin oko yai di eko ot Penuel, di en eko kwano jo me kunono da kamanono, do jo me Penuel da oko dwoko ne kop acel nono kame jo me Sukot oudo owaco ne.
- ⁹Aso, en bin eko waco ne jo me Penuel be, “I ceng kame ango abino dwogo kede kan i mulem, ango abino tuturo gedo wu abor malo noni.”
- ¹⁰I kare nono Seba kede Salamuna oudo tie Karakor kede isirikalen gi, kame wel gi romo tutumia tomon kiwie kany (15,000). Gin en isirikalen kame bin odong kikom isirikalen dedede me jo me tetu kide; pien oudo koneko isirikalen gin tutumia tol acel kede ot are (120,000).
- ¹¹Egidioni bin oko ot di eko lubo yongayo kame ririo lak wi tim, i bad tetu kide me Noba kede Yogobeka, di eko ngeso suro isirikalen nogo.
- ¹²Seba kede Salamuna bin oko ringo, do en eko riamere kede gi paka mako gi, di manono oko mielo kom isirikalen lung.
- ¹³Kakame bin Egidioni wot ka Yowasi tie dwogo kede ki yi di ebeo ki kakame yito Keres,



14En bin eko mako atin awobi me Sukot di eko pepenyo en. Atin awobi nono bin oko wandiko ne Egidioni nying cuo ot kanyaare kiwie kanyaare kobedo jotic adongo kede joadongo me Sukot.

15Di do Egidioni oko ot but jo me Sukot di eko penyo gi be, “Benyo, iyutununu kare kame bin wun idagunu konya kede? Wun bin iwacunu na be likame ikarununu mino cam but isirikalen na kame oudo ool, pien oudo pwodi angu likame amako Seba kede Salamuna. Aso, nataman gin ige!”

16En bin eko kwanyo okuto me wi tim di eko donyo tojo kede jotel me Sukot.

17En bin eko da tuturo gedo abor malo me Penuel, di eko neko jo me bomba nono.

18Di do Egidioni oko penyo Seba kede Salamuna be, “Do jo kame bin inekunu i Tabor kono?” Gin kiko gamo be, “Gin dedede oudo kical bala in; oudo kical bala awobe ka abaka.”

19Egidioni bin oko waco negi be, “Gin oudo imiegu nango, idwe ka toto na. Angu akwongere be ka koto wun bin likame inekunu gin, angu da koto likame aneko wu.”

20Di en eko waco ne Yeter, kao mere be, “Oti inek gi!” Do lwooro oko mako Yeter omio likame eko woto epima mere, piento en pwodi oudo etie atin awobi.

21Di do Seba kede Salamuna oko waco ne Egidioni be, “In bia inek wan in kikomi; pien icuo en kame karuno timo tic me icuo.” Aso, Egidioni bin oko neko gi di eko tero alung kame oudo tie i ngut aguraguran gi.

22Ingei manono jo me Isirael oko waco ne Egidioni be, “In bed ngapug wan, in kede wodi kede ikwae ni da; pien in itieko lako wan ki cing jo Midian.”

23Egidioni oko gamo be, “Angu likame abino bedo ngapug wun, akadi woda da. Rwot en kame bino pugo wun.”

24Di eko meede waco negi be, “Wekunu kong akwai wu gi acel; wun dedede mianu mwolere me yit kame iyakunu.” (Jo Midian oudo bin ngapo mwolere kame kotimo kede saabu, pien gida oudo kibedo jo ka Isimael.)

25Jo oko gamo be, “Wan obino mino gin buti kede yomcuny.” Gin bin kiko peto egoe piny, di jo dedede oko keto iye mwolere kame oudo gin kiyako.

26Mwolere me saabu kame Egidioni bin oko gamo oudo peko gi romo kilo ot are, di likame iribo iye jamini me tubuso kom kede irikoi me ngut, kede igoen akwakwar kame abakai me jo Midian bin ngapo, kede rakoban kame bin kotweo i ngut aguraguran.

27Egidioni bin oko timo epod kede saabu nogo di eko kete Opura, bomba me turgi. Jo dedede me Isirael bin oko donyo ot woro caljwogi nono kunono. Gi nono bin oko doko bala owic but Egidioni kede jo me ode.

28Aso, jo me Isirael bin oko bwono jo Midian, di likame bobo jo Midian oko woto wi gi atwal. Anapakin bin oko bedo i lobo pi mwakini ot ongwon i kare ka Egidioni.



To ka Egidioni

- ²⁹Egidioni bin oko dok bedo paco mere.
- ³⁰En bin etie kede awobe ot kanyaare, pien oudo etie kede mon atot.
- ³¹En bin etie kede da dako kalikame enyomo kame oudo en ebedo kede Sekem. Dako nono bin oko nywalo ne atin awobi, di en eko cako nyinge be Abimelek.
- ³²Egidioni wot ka Yowasi bin oko to di oudo etieko ti kiber, di oko yike Opura, bomba me jo Abieser, i ates ka papa mere Yowasi.
- ³³Oyotoyot di Egidioni otieko to, jo me Isirael oko bobo dok cen i kuo me woro Baal. Gin bin kiko mino Baal kame gin oudo kitimo isikan kede oko doko rubanga gin.
- ³⁴Jo me Isirael likame oko bin yutuno Rwot Rubanga gin, ngat kame bin olako gin ki cing jokwor gi kame oudo oluko gi ki bad dedede.
- ³⁵Gin likame bin kiko nyuto cuny moro me pwoc but jo me ot ka Yerubaal (manono en Egidioni), pi bero dedede kame en oudo etimo ne jo me Isirael.

Jongolkop 9

Abimelek

- ¹I kare nono Abimelek wot ka Egidioni bin oko ot i bomba me Sekem kakame joawade ka toto mere dedede oudo bedo iye, di en eko waco negi be
- ²kio ti kiko penyo jo me Sekem dedede be, “Mene en kame ber ne wun? Wun bedo i apugan me awobe ka Egidioni ot kanyaare dedede arabo bedo i apugan me ngat acel? Do poore iyutununu be Abimelek kara obedo remo wu.”
- ³Aso, joawade ka toto mere bin oko waco kope nogi dedede but jo me Sekem akaka en, di cuny jo Sekem oko yei lubo Abimelek piento en oudo ebedo wad kede gin.
- ⁴Gin bin kiko kwanyo sekel ot kanyaare me siliba ki tempulo ka Baal kame bin gin kisikano kede di kiko mine. Abimelek bin oko pango jo kame kony gi li doko di kitie atatai, di gin kiko donyo lube.
- ⁵Abimelek bin oko ot Opura i ot ka papa mere, di eko neko imiegu mege awobe ka Egidioni; eneko gin cuo ot kanyaare i wi kidi acel. Do Yotam, awobi ka Egidioni atidi mere, bin oko bwot pien bin en oudo epwono.
- ⁶Di do jo dedede me Sekem kede me Bet Milo bin oko cokere karacel, di gin kiko ot i yat oak adwong kame bin oketo iye kidi me awora, di gin kiko mino Abimelek odoko abaka.
- ⁷Kakame bin oko waco ne kede Yotam kop noni, en eko ot di eko cungo i wi moru me Gerisim, di eko lelemo di ewaco negi be, “Winyunu kop na, wun jo me Sekem, tetekeny Rubanga winy wu!”
- ⁸I ceng moro acel yen bin oko ot i cokere me yero abaka kame bino pugo gi. Gin bin kiko waco ne yat olibeti be, ‘In bed abaka wa.’



- ⁹Yat olibeti bin oko gamo dog gi be, ‘Benyo, wun iparunu be ango abino weko timo mo na kame kotio kede me mino wor but rubangan kede jo, di ango ako donyo pugo wun?’
- ¹⁰Di do yen oko waco ne yat epigi be, ‘In bia ibed abaka wa.’
- ¹¹Do yat epigi oko gamo dog gi be, ‘Benyo, iparunu be ango abino weko timo anyakini na awinyiwinyi, di ango ako donyo pugo wun?’
- ¹²Aso, yen bin do oko waco ne olok be, ‘In bia ipug wan.’
- ¹³Do olok bin oko waco negi be, ‘Benyo, iparunu be ango abino weko timo bwini na kame mio rubangan kede jo bedo kede yomcuny, di ango ako donyo pugo wun?’
- ¹⁴Aso, yen dedede bin do oko waco ne etirir be, ‘In bia ipug wan.’
- ¹⁵Etirir bin oko waco ne yen be, ‘Ka ateteni wun imitunu wira pi bedo abaka wu, bia igwokunu i tipo na kan; do ka li, mac bino liel ki okuti na di eko muducaro yen seda me Lebanon.’ “
- ¹⁶Yotam bin oko meede be, “Pi mano, ango apenyo ka ateteni wun ikounu timo gi me ateni, doko kame poore, kakame imiunu kede Abimelek obedo abaka. Benyo, iparunu be bin wun itimunu ne Egidioni kede jo me ode gikame ber, bala kame poore kede gikame bin en eko timo?”
- ¹⁷Yutununu be papa na bin oyi piru, doko bin ejalo kuo mere, di eko lako wu ki cing jo Midian.
- ¹⁸Do ceng atin wun ikounu lokere dagi jo me ot ka papa na. Wun ikounu neko awobe mege, ot kanyaare i wi kidi acel, be pi Abimelek obedo wadu, en wode kame enywalo kede dako apasoit, wun ikounu mine edoko abaka me Sekem.
- ¹⁹Aso, ka gikame wun tin itimunu ne Egidioni kede jo me ode oudo obedo gi me ateni kede kame poore, wun lelunu pi Abimelek, doko poore eda elel piru.
- ²⁰Do ka li, mito mac woki kikut Abimelek di eko muducaro jo me Sekem kede me Bet Milo; doko mito mac wok kikut jo Sekem kede jo me Bet Milo di eko muducaro Abimelek.”
- ²¹Di do Yotam bin oko ringo eoto bedo Beer, pien oudo elworo omin mere Abimelek.
- ²²Abimelek bin oko pugo jo me Isirael pi mwakini adek.
- ²³Di do Rubanga bin oko cwano tipo arac i dierediere me Abimelek kede jo me Sekem, di gin kiko donyo timo ne gikame dupuro en.
- ²⁴Manoni bin otimere tetekeny nyang tim me gero kame bin kotimo ne awobe ka Egidioni ot kanyaare, di remo gi ko bino bedo i wi omin gi Abimelek ngat koneko gi, kede jo me Sekem komie teko me neko imiegu mege.



25Aso, pien gin bin kidage, jo me Sekem bin oko keto jo mogo opwono i wi moru pi dare i yongayo. Jo nogo bin oko bedo yako jo dedede kame bin beo i yongayo nono; di bin oko waco ne Abimelek kop nono.

26Kakame Gaal wot ka Ebed bin oko dak kede joawade mege Sekem, jo me Sekem bin oko keto gen gi i kome.

27Gin bin kiko ot i poti me olok gi di kiko ngwedo olok, kiko biino bwini, di kiko tedo ebaga. Gin bin kioto i tempulo me rubanga gi, di kiko cam kede amata, di kiko donyo yamo kede acae i kom Abimelek.

28Gaal wot ka Ebed oko waco be, “Kara Abimelek en ngai? Wanunu jo me Sekem ocalunu nadi, en kame mio wan otimunu tic ne en? Benyo, mam en wot ka Egidioni? Doko mam Sebul obedo ngatic mere? Timunu tic ne jo ka Kamor, en papa me jo me Sekem! Pinyo kamio poore wan otimunu ne en tic?”

29Ka koto ango en kame oudo atie telo jogi, koto akwanyo Abimelek tenge! Koto awaco ne be, ‘Med isirikalen ni, di iko bino yi keda.’ “

30Sebul, ngat kame bin pugo bomba, bin cunye oko wang kakame en ewinyo kede kop kame Gaal owaco.

31En bin eko cwano jo but Abimelek pi waco ne be, “Neningo, Gaal wot ka Ebed kede joawade mege otieko bino Sekem, doko kitie rubo wi jo me bomba pi dagi.

32Pi mano, poore in kede isirikalen kame tie kedi iyaunu iwor, di ikounu ot buto i ebar daro gin.

33Odiko sek kakame ceng wok kede, di wun ikounu ngeso suro bomba. Ka Gaal kede isirikalen kame tie kede oko bino pi yi kede wu, wun timunu ne gin gikame wun itwerunu.”

34Aso, Abimelek kede isirikalen dedede kame bin tie kede en oko yai iwor, di gin kiko pokere i ikodeta ongwon kiko ot buto daro jo me Sekem.

35Kakame Abimelek kede isirikalen mege bin oko neno kede Gaal di tie cungo i dog erute me bomba, gin bin kiko yai ki kakame oudo kitie pwono iye.

36Gaal bin oneno gi di eko waco ne Sebul be, “Neningo, jo mogo ika tie wok ki wi moru!” Di Sebul oko gamo doge be, “In itie neno tipo me wi moru be jo.”

37Gaal bobo oko waco be, “Neningo, jo tie wok ki awita me moru; ekodet acel tie bino di kilubo yongayo kame yai ki yat oak me imuroko!”

38Di do Sebul oko waco ne be, “Nan do yamo ni me ewaka nono ojik tuai? In en kame oudo iyamo di ipenyere be, ‘Kara Abimelek en ngai kame mio wan poore timo nen tic?’ Mam isirikalen kame in oudo iyamo i kom gi anywar anywar igonogo? Aso, ot nan do yi kede gi.”

39Gaal bin oko telo jo me Sekem ot yi kede Abimelek.



- ⁴⁰Gaal bin oko ringo, di Abimelek oko riamere kede. Bin oko wawano jo atot kiton tuno i erute me bomba.
- ⁴¹Abimelek bin odong bedo Aruma; di Sebul oko riamo Gaal kede joawade mege tenge ki Sekem, omio likame bin kiko karuno bedo kunono.
- ⁴²I ceng kame lubo mere jo me Sekem bin oko iikere pi ot i ebar. Kakame oko waco ne kede Abimelek,
- ⁴³en eko tero isirikalen mege di eko popoko gi i ikodeta adek, di gin kiko pwono i ebar daro jo me Sekem. Kakame en eko neno kede gin di kitie wok ki bomba, en eko yai ki kapwono pi ot neko gi.
- ⁴⁴Abimelek kede ekodet me isirikalen kame bin tie kede oko onyaro di kiko cungo i erute me bomba, di ikodeta are icegun oko onyaro i kom jo dedede kame bin tie i ebar di kiko neko gin dedede.
- ⁴⁵Abimelek kede isirikalen mege bin oko yi kede jo me bomba piny yuluyul. Gin bin kiko mano bomba di kiko neko jo kame oudo tie iye dedede, di kiko rereto bomba piny, kiko onyo munyo iye.
- ⁴⁶Kakame bin jo kame bedo i gedo abor malo me Sekem owinyo kede kop noni, gin kiko donyo kakame kocelo di tek me tempulo ka Baal me isikan.
- ⁴⁷Di bin oko waco ne Abimelek be gin oudo kicokere kunono.
- ⁴⁸Abimelek bin oko yai kede isirikalen kame bin tie kede en, di eko ot paka tuno i moru me Salamon. En bin eko kwanyo le di eko tongo ajange me yat eko riongo i epepet mere. Di do en eko waco ne isirikalen mege da pi timo kamanono awakawaka.
- ⁴⁹Aso, isirikalen dedede oko totongo jange me yen di gin kiko lubo Abimelek, kiko tero jange nogo kicoko i kom kakame kocelo di etek nono. Gin bin kiko wango kabedo nono kede jo dedede kame bin tie iye. Jo dedede kame bin tie kanono oko to; cuo kede mon kame romo tutumia acel.
- ⁵⁰Di do Abimelek bin oko yai eko ot i bomba me Tebes, di eko luke, eko mane.
- ⁵¹Do gedo atek abor malo riki tie i bomba nono, di cuo kede mon dedede oko ringo iye. Gin bin kiko cegere iye di kiko yito i wi ot.
- ⁵²Kakame Abimelek bin oko bino kede pi suro gedo abor malo nono, en bin eko ot i ekeko me gedo abor malo nono pi cwinye kede mac.
- ⁵³Do dako moro oko uco nyar kidi me riego ki wi ot kunono, di eko dipo wi Abimelek paka belo cogo me wie.
- ⁵⁴Abimelek oyotoyot bin oko lwongo eponga kame oudo mako jamini mege me yi di eko mine cik be, “Wot epima ni di iko coba ineka, tetekeny kur jo yam i koma be, ‘Kom dako adaka en koneke.’ “ Aso, eponga nono bin oko cobe pelepel, di eko to.
- ⁵⁵Kakame jo me Isirael bin oneno kede be Abimelek oto, gin kiko dok paco.



⁵⁶Epone nono en kame bin Rubanga oko culo kede rac kame Abimelek otimo ne papa mere i yore me neko imiegu mege ot kanyaare.

⁵⁷Rubanga bin oko da mino rac me jo me Sekem odok i wi gi, bala kame Yotam wot ka Egidioni oudo owaco di elamo gi.

Jongolkop 10

Tola

¹Ingei to ka Abimelek, Tola wot ka Pua, en akwar Dodo, oko wokun pi lako jo me Isirael. En oudo ebedo dano me anywali me ekeko ka Isakar kame oudo bedo Samir i piny kobedo imukuran me Epuraimu.

²En oudo ebedo ngangolkop me Isirael pi mwakini ot are kiwie adek. Bin en eko to di oko yike Samir.

Yair

³Ingei tel ka Tola, Yair dano me Gilead en oko lunyo wange. En eko telo Isirael pi mwakini ot are kiwie are.

⁴En oudo etie kede awobe ot adek, kame oudo ringo kede pundan ot adek; gin oudo kitie kede bomban ot adek i lobo me Gilead, kame kolwongo be Kabot Yair tuno tin.

⁵Yair bin oko to di oko yike Kamon.

Yeputa

⁶Jo me Isirael oko bobo timo gikarac i nyim Rwot; gin kidonyo woro Baal kede Asitate, karacel kede rubangan me Siria, me Sidon, me Moab, me Amon kede me Pilistia. Gin kiweko Rwot di kiko jiko wore.

⁷Aso, Rwot cunye oko wang kede jo me Isirael di eko mino jo me Pilistia kede Amon oyi kede gi di oko bwono gi,

⁸di jo nogo oko pupuno jo me Isirael di kitidilo gi i mwaka nono. Pi mwakini tomon kiwie kanyauni gin kiko bedo tero kirac jo me Isirael kame oudo bedo i piny me jo Amor, i bad tetu kide me ecilet me Yorodan, i lobo me Gilead.

⁹Jo Amon da oko ngolo ecilet me Yorodan pi ot yi kede jo me ikekon ka Yuda, Benjamin kede Epuraimu. Jo me Isirael oudo tie kede twon peko.

¹⁰Aso, jo me Isirael oko kok but Rwot di kiwaco be, “Wan odubo buti, pien wan oweki in Rubanga wa, di oko donyo woro Baal.”

¹¹Rwot oko dwoko negi be, “Jo me Misiri, jo Amor, jo Amon, jo Pilistia,

¹²jo Sidon, jo Amalek kede jo Maon bin otero wu kirac di wun ikounu kok buta; mam bin ango ako lako wu ki cing gi?

¹³Do akadi bed bala kamanono da, wun ikounu weka di ikounu donyo woro rubangan apat; pi manono ango likame bobo abino medo lako wu.



¹⁴Otunu ikokunu but rubangan kame wun itiekunu yero woro. Ber gin kikonyu kede peko wu.”

¹⁵Do jo me Isirael oko waco ne Rwot be, “Wan odubo. In tim ne wa gikame ber kibuti, do okwai ber ilak wa tin!”

¹⁶Aso, gin kiko weko rubangan me kumbor di kiko donyo woro Rwot; di Rwot likame oko yei kanyakino neno di jo me Isirael neno can.

¹⁷Di isirikalen me jo Amon oko iikere pi yi, di kiko cokere kigero kimere gi Gilead. Jo me Isirael da oko cokere kiko gero kimere gi Misipa i Gilead.

¹⁸Di jotel me isirikalen me Isirael oko donyo penyere ken gi ken gi be, “Ngai kame bino cako copo yi i kom jo Amon? Ngat nono en kame bino doko ngatel me jo dedede atie Gilead.”

Jongolkop 11

¹Yeputa dano me Gilead, kame toto mere oudo obedo malaya, oudo obedo ngayi atek. Papa mere Gilead

²oudo doko oko nywalo awobe ace kede dako mere. Kakame awobe kame enywalo kede dako mere odongo kede, gin kiko riamo Yeputa tenge ki paco di kiwaco ne be, “Likame tie gimoro me ot ka papa wa kame in ibino sikao, pien in ibedo wot ka dako kapat.”

³Yeputa oko ringo tenge kibus imiegu mege di eko ot bedo i lobo me Tob. Jo mogo koudo tie kede iponeso areco oko ribere kede en di kiko donyo yako jo.

⁴Ingei kare moro, jo Amon oko ot yi kede jo me Isirael.

⁵Kakame manoni otimere kede, joadongo me Gilead oko ot pi dwoko Yeputa ki lobo me Tob.

⁶Gin kiwaco ne Yeputa be, “Bia itel wa tetekeny otwer yi kede jo Amon.”

⁷Do Yeputa oko dwoko ne joadongo kowok ki Gilead nogo be, “Mam wun nogi en kame bin idaganu di ikounu riamu tenge ki ot ka papa na? Pinyo komio doko nan ibinunu buta iesawa kame itienu kede i peko?”

⁸Gin kiko waco ne Yeputa be, “Akadi bed bala mago otimere da, nan wan otieko dwogo buti, tetekeny iupere kede wa pi ot yi kede jo Amon, di in iko bino doko ngatel me jo dedede me Gilead.”

⁹Yeputa oko waco negi be, “Ka wun idwokanu pi ot yi kede jo Amon, di Rwot oko mina abwono gi, ango abino doko ngatel wu.”

¹⁰Gin kiko dwoko ne Yeputa be, “Wan oyei. Rwot en mujura wa.”

¹¹Aso, Yeputa oko upere ot kede joadongo kowok ki Gilead nogo, di jo oko mine edoko ngapug gi kede ngatel gi. Yeputa oko waco kope mege dedede i nyim Rwot i Misipa.



- 12**Yeputa oko cwano jo but abaka me jo Amon di epenye be, “Nyo arac i dierediere nin kede wan, komio itieko bino pi yi kede lobo wan?”
- 13**Abaka me jo Amon oko dwoko ne jo kame Yeputa oudo ocwao be, “Kakame jo me Isirael bin oyai kede ki Misiri, gin kiko tero lobo na cako ki ecilet me Arunon tuno i ecilet me Jabok kede ecilet me Yorodan. Nan miero idwoke buta kede mulem.”
- 14**Yeputa oko bobo cwano jo odok but abaka me jo Amon
- 15**kede kop be, “Likame jo me Isirael otero lobo me Moab amoto me Amon.
- 16**Do kakame jo me Isirael oyai kede ki Misiri, gin bin kiko ngolo wi tim di kiko tuno i Nam Akwar, di kiko tuno Kades.
- 17** Jo me Isirael oko cwano jo but abaka me Edom pi penyoy akarunikin kibute me gin beo ki lobo mere. Do abaka me Edom oko daga winyo kop gi. Gin bobo kiko cwano jo but abaka me Moab da, do eda eko daga winyo kop gi. Aso, jo me Isirael bin oko dong bedo Kades.
- 18** Bin gin di do kiko beo ki wi tim, di kiko manaro lobo me Edom kede me Moab, di kiko tuno i bad tetu kide me lobo me Moab, di kiko gero kimere gi loka tetuca me ecilet me Arunon. Bin likame gin kiko ngolo ecilet me Arunon, pienton oudo ebedo ikor kede lobo me Moab.
- 19** Jo me Isirael bin oko cwano jo but Abaka Sikon me jo Amor kame bin bedo Kesibon, di kiko kwano akarunikin kibute me gin beo ki lobo mere di gin kioto i lobo gi amako gi.
- 20**Do Abaka Sikon likame oko bedo kede gen but jo me Isirael pi beo ki lobo mere. En eko coko isirikalen mege dedede karacel di kiko gero kimere gi Yakas, di kiko suro jo me Isirael.
- 21**Di Rwot Rubanga me Isirael oko mino Sikon kede jo mege dedede i cing jo me Isirael, di jo me Isirael oko bwono gi; aso jo me Isirael oko gamo adul dedede kame jo Amor oudo bedo iye oko doko mergi.
- 22**Gin kiko donyo bedo i adul dedede me jo Amor cako ki Arunon i bad tetu pinyo tuno Jabok i bad tetu malo, kede cako ki wi tim atie i bad tetu kide tuno Yorodan i bad tetu tim.
- 23**Aso, Rwot Rubanga en oudo oriamo jo Amor pir jo mege me Isirael.
- 24**Benyo, nan in imito gamo lobo nono kibut wa? Mam wuda iterunu doko meru gimoroni kame rubanga wu Kemos mio wu? Benyo, likame wan do opoore tero di eko doko merwa gikame Rwot Rubanga wa oyi oko mano pirwa?
- 25** Benyo, iparo be in ilo Abaka Balak wot ka Sipor me Moab? Iparo be bin en engoi kede jo me Isirael, arabo eyi kede gi?



²⁶Pi mwakini tol adek, jo me Isirael otieko bedo Kesibon kede Aroer, kede i bomban ace atino kame luko gi, kede i bomban kame tie i dog ecilet me Arunon. Pinyo komio likame ikounu dwoko gi i kare noni dedede?

²⁷Likame ango atimo ni raco moro, do in en kame itie timo nango raco i yore me cako yi keda. Wek Rwot en ngangolkop tin engol kop i dierediere me jo me Isirael kede jo Amon.”

²⁸Do abaka me jo Amon likame oko yei winyo kop kame Yeputa ocwao ne.

²⁹Di tipo ka Rwot oko bino i kom Yeputa. Yeputa oko beo pelao Gilead kede Manase, di eko tuno Misipa atie Gilead, di eko kato paka Amon.

³⁰Yeputa oudo okwongere but Rwot di ewaco be, “Ka in imio jo Amon i cinga,

³¹ango abino wango bala giayala buti dano me agege kame bino wok ki oda pi riamo keda kakame ango adwogo kede ki kabwono yi.”

³²Aso, Yeputa oko ngolo ecilet pi ot yi kede jo Amon, di Rwot oko mine ebwono gi.

³³En eko bwono gi adikinicel cako ki Aroer tuno paka i adul kame gongere kede Minit, manono ribo bomban ot are, ape ape paka Abel Keramim. Jo me Isirael oko bwono jo Amon di kiko neko gi nek kalikame wacere.

Nyar ka Yeputa

³⁴Kakame Yeputa oko dok kede paco mere Misipa, nyare oko ot siramo en di eyango ayekeyeke di emielo. Manono en oudo obedo atin mere acel kenekene, likame doko oudo etie kede atin moro ace.

³⁵ Kakame eko neno kede nyare, en eko nyinyilo igoen mege pi cwercury di ewaco be, “Okwe nyara! Itieko mino cunya onyote. Nan itieko mina abedo kede twon peko. Pien ango atieko kwongere but Rwot, nan likame doko atwero loko kwongere na!”

³⁶Nyako nono oko waco ne be, “Papa na, ka in itieko kwongere but Rwot, in tim nango gikame in itieko cikere pi timo, pien Rwot otieko mini iculo kwor i kom jokwor ni, gin jo Amon.”

³⁷Di en eko meede di ewaco ne papa mere be, “Do kong tim na kaman: weka ber pi dwete are aot kede jowota i wi moru di ako donyo wire kunono di akok pi kite kame ayaro to kede di ango pwodi nyako kalikame ongeo icuo.”

³⁸En eko cwane eoto pi dwete are. Nyako nono oko upere kede jowote kioto i wi moru di kiko donyo koko ki kuno, piento en oudo eyaro to di pwodi en nyako kalikame ongeo icuo.

³⁹Ingei dwete are, en eko dok but papa mere. Papa mere oko timo ne gikame oudo ecikere iye but Rwot; en eko to di pwodi likame ebuto kede icuo moro. Manoni en oko bedo acakini me itok me jo me Isirael

⁴⁰kame tie be, anyira ber poore ot tenge pi ceng ongwon buli mwaka pi koko nyar ka Yeputa me Gilead.



Jongolkop 12

Yeputa kede Jo Epuraimu

- ¹Cuo me Epuraimu oko iikere pi yi di kiko ngolo ecilet me Yorodan tuno Sapon di kiko waco ne Yeputa be, “Pinyo komio ingolo ikor iko ot yi kede jo Amon abongo lwongo wan upere kedi? Wan obino wangi i ot!”
- ²Yeputa oko dwoko negi be, “Ango kede jo na oudo ongoi kitek kede jo Amon. Ango ako lwongo wu do likame wun ikounu laka ki cing gi.
- ³Kakame ango ako neno kede be wun likame ibinunu laka, ango ako yei jalo kuo na di ako ot yi kede jo Amon, di Rwot oko mina abwono gi. Aso, pinyo komio nan wun ibinunu pi yi keda?”
- ⁴Di Yeputa oko koko cuo dedede me Gilead di kiko yi kede jo Epuraimu, di jo me Gilead oko bwono jo Epuraimu. (Jo Epuraimu oudo owaco be, “Wun jo Gilead kame bedo i dier Epuraimu kede Manase, wun ibedunu jo kopokere weko jo Epuraimu.”)
- ⁵Di do jo me Gilead oko mamako kabedere kame jo Epuraimu oudo poore ngolo kede ecilet me Yorodan. Tek ka dano moro me Epuraimu kame oudo tie lwi openyo akarunikin me ngolo ecilet, jo me Gilead oudo ko penye be, “Benyo, in ibedo dano me Epuraimu?” Kame en eko waco be, “Li,”
- ⁶gin oudo kiko waco ne pi waco be, “Sibolet” . Do kite kame en likame oudo ekaruno tucokede kop nono kiber, en eko do waco be, “Cibolet” . Di do gin oudo kiko make di kiko neke kanono kakame kongolo kede ecilet me Yorodan. I kare nono gin kiko neko jo Epuraimu tutumia ot ongwon kiwie are (42,000).
- ⁷Yeputa oko telo jo me Isirael pi mwakini kanyape, di do en eko to di oko yike i bomba me tur gi i Gilead.

Ibisan, Elon kede Abidon

- ⁸Ingei tel ka Yeputa, Ibisan me Betelem en oko doko ngatel me Isirael.
- ⁹En oudo enywalo awobe ot adek kede anyira da ot adek. En eko mino anyira mege ot adek onyomere ooko me dogola me ekeko gi me anywali, doko da eko kelo mon ot adek ki ooko me dogola me ekeko gi me anywali pi nyomere kede awobe mege. En eko bedo ngangolkop i Isirael pi mwakini kanyaare.
- ¹⁰Ibisan oko to di oko yike Betelem.
- ¹¹Ingei tel ka Ibisan, Elon me Sebulun en oko telo Isirael pi mwakini tomon.
- ¹²Elon oko to di oko yike Aijalon i lobo me Sebulun.
- ¹³Ingei tel ka Elon, Abidon wot ka Kilel me Piraton en oko telo Isirael.
- ¹⁴En oudo etie kede awobe ot ongwon, kede awobe kobedo ikwae mege ot adek, gin dedede oudo kiringo kede pundan ot kanyaare. En eko bedo ngangolkop i Isirael pi mwakini kanyauni.



¹⁵En eko to di oko yike Piraton i adul me Epuraimu i piny kobedo imukuran me jo Amalek.

Jongolkop 13

Nywalo Samuson

¹Jo me Isirael oko bobo dubo but Rwot, di Rwot oko jalo gi i cing jo me Pilistia pi mwakini ot ongwon.

²Tie oudo icuo moro me Sora, dano me ekeko ka Dan, kame nyinge oudo Manoa. Dako mere oudo obedo adonge, likame enywalo atin moro.

³Malaika ka Rwot oko neeno but dako nono di oko waco ne be, “Bed bala in adonge likame inywalo atin moro, in ibino yac di iko nywalo atin awobi.

⁴Nan miero igwokere kur imat bwini amoto kongo moro akec, arabo camo gimoro me kwer.

⁵Ingei in nywalo wodi nono, likame ipoore lielo yer wie, pien cako i ceng me nywale en kobino mine but Rwot bala ngat kame kokwero bute. En ebino cako tic me lako jo me Isirael ki cing jo me Pilistia.”

⁶Dako nono oko ot di eko waco ne cware be, “Dano ka Rubanga obino buta, oudo nene kelo lworobala neno malaika ka Rwot; likame ango apenye kakame ewok kiye, doko eda likame ewaco na nyinge.

⁷Do en ewaco na be ango abino yac ako nywalo atin awobi. En ewaco na be kur amat bwini moro amoto kongo moro, akadi camo gimoro me kwer, pien atin nono kobino kwere but Rubanga cako ceng me nywale tuno ceng me to mere.”

⁸Di Manoa oko lego but Rwot be, “Okwe Rwot, akwao be, koto dano ka Rubanga kame in oudo icwao odwogo bobo but wa di eko waco ne wa gikame opoore timo kede awobi kame obino nywalo.”

⁹Rubanga oko yei winyo kop ka Manoa, di malaika ka Rubanga oko bobo dwogo but dako nono kakame oudo etie bedo kede i potu; do Manoa cware oudo likame tie karacel kede en.

¹⁰Dako nono oko ringo but cware oyotoyot di eko waco ne be, “Icuo kame oudo obino buta cenge ca bobo omedo neeno na.”

¹¹Manoa oko yai di eko lubo dako mere. En eko ot but icuo nono di eko penye be, “In en icuo koudo tie yamo kede dako noni?” Icuo nono oko dwoko be, “Ebo, ango inononi.”

¹²Di Manoa oko waco be, “Nan kame kop nin oko cobere, awobi nono bino lubo ekite kuo acal nadi? Nyo kame ebino timo?”

¹³Malaika ka Rwot oko dwoko be, “Dako ni poore timo gi dedede kame ango awaco ne.



¹⁴Likame epoore camo gimoro kame wok ki kom olok; likame epoore mato bwini arabo kongo moro ace, doko da likame epoore camo gi me kwer. En epoore lubo gi dedede kame ango atieko waco ne.”

¹⁵Manoa oko dwoko ne be, “Kong dar wa onek diel moro apwodi bwong oko tedo ni.”

¹⁶Malaika ka Rwot oko waco ne Manoa be, “Akadi ka in icere keda, ango likame abino camo cam nin. Do ka in imito iiko giayala awanga, in yale but Rwot.” Manoa oudo likame ngebe malaika ka Rwot inonono.

¹⁷Manoa oko dwoko ne be, “Wac ne wa nyingi, tetekeny ka kop kame iwaco ocobere wan okaruno bedo kede wor buti.”

¹⁸Do malaika ka Rwot oko penye be, “Pinyo komio imito ngeno nyinga? En ebedo nying me aura.”

¹⁹Aso, Manoa oko tero diel abwong kede giayala me alos di eko yalo gi ki wi lela but Rwot, en ngat kame etimo giaura.

²⁰Kakame leb mac tie liel kede ot malo ki alutari, Manoa kede dako mere oko neno di malaika ka Rwot tie ot malo kede leb mac nono, di gin kiko rieberere kiumo wang gi piny.

²¹Likame malaika ka Rwot oko bobo medo nyutere but Manoa kede dako mere. Di do Manoa oko ngeno be manono oudo obedo malaika ka Rwot.

²²Di Manoa oko waco ne dako mere be, “Ateteni wan obino to, pien wan otieko neno Rubanga!”

²³Do dako mere oko dwoko be, “Koto di Rwot oudo mito neko wa, oudo koto likame egamo giayala wa, doko da oudo koto likame enyuto ne wa gi nogi dedede, akadi koto nan waco ne wa kope nogi dedede.”

²⁴Dako nono oko nywalo atin awobi di eko cako nyinge Samuson. Atin nono oko dongo di Rwot oko mine winyo.

²⁵Di twer ka Rwot oko cako mine teko kakame oudo etie kede i Makane Dan, kame tie dierediere me Sora kede Esitaol.

Jongolkop 14

Samuson kede Nyako me Timina

¹Ceng moro acel Samuson oko ot elor Timina, di eko neno nyako moro me Pilistia.

²En eko dok paco di eko waco ne papa mere kede toto mere be, “Ango aneno nyako moro me Pilistia Timina, omenu ne ango edok dako na.”

³Do papa mere kede toto mere oko waco ne be, “Benyo, likame tie nyako moro i kom joawade nin, arabo i kom jo wa, en komio ioto mono dako kikom jo Pilistia, jo



kalikame kokepo?” Do Samuson oko waco ne papa mere be, “Wun kelenu nango, en eyomo cunya.”

⁴Papa mere kede toto mere oudo likame ngeo be Rwot en oudo otelo Samuson timo kamanono, pien Rwot oudo tie mono yongayo me suro jo me Pilistia. I kare nono jo me Pilistia oudo tie pugo jo me Isirael.

⁵Di do Samuson oko upere kede papa mere kede toto mere kilor Timina. Kakame kituno kede i poti me olok kame oudo tie kunono, en eko winyo di engu dorano.

⁶Twer ka Rwot oko donyo i kome, di en eko nyinyilo engu nono kede cinge acinga, ineno bala atin diel. Do en likame eko waco ne papa mere amoto toto mere gikame etimo.

⁷En eko ot di eko yamo kede nyako nono, di nyako nono oko yomo cunye.

⁸Ingei kare moro acecek, Samuson oko dok kunono pi nyomo nyako nono, di en kong eko parao pi neno engu kame oudo eneko. En eko udo kic onur i kom engu nono, doko da mokic oudo tie iye.

⁹En eko wado mokic nono i cinge di eko donyo camo di eoto. Di eko tero mokic mogo da ne papa mere kede toto mere eko mino gi, gida kiko camo. Do en likame eko waco negi be en oudo ewado mokic nono ki kom engu oto.

¹⁰Papa mere oko ot paka but nyako nono, di Samuson oko timo ebaga kanono bala kame awobe oudo onao timo.

¹¹Kakame jo me Pilistia onene kede, gin kiko cwano awobe ot adek pi ot tagalo wange.

¹²Samuson oko waco negi be, “Ber kong amito penyo wu agole moro. Ka ikounu twero tucu na dwong mere di pwodi ceng kanyaare me ebaga likame otiek, abino mino wu igoen ameny ot adek, kede da igoen ot adek kame kongapo i ceng adongo.

¹³Do ka wun likame ikounu twero tucu na dwong mere, wun ibinunu mina igoen ameny ot adek, kede da igoen ot adek kame kongapo i ceng adongo.” Gin kiko waco ne be, “Peny wa agole ni nono; wan omito winye.”

¹⁴En eko waco negi be, “Ki kom ngacam jo, owok kiye gi me acama; ki kom ngateko, owok kiye gikame winyiwinyi.” Do ceng adek oko kato di pwodi likame kitwero gonyo dwong me peny me agole nono.

¹⁵I ceng me ongwon gin kiko waco ne dako ka Samuson be, “Bitao cuny cwari egony ne wa dwong me peny me agole noni. Aso ka li, wan oyaro cwinyi kede mac i ot ka papa ni. Mam wun ilwongunu wa kan pi yako wa?”

¹⁶Dako ka Samuson oko donyo koko i nyime kitek di ewaco be, “Likame in imara! In cunyi daga. In ipenyo jo nango agole do likame iko gonyo nango dwong mere.” Samuson oko waco ne be, “Neningo, ango likame agonyo dwong mere ne papa na akadi ne toto na da, do pinyo mio ango apoore gonyo nin dwong mere?”



¹⁷Nyako nono oko bedo koko kamanono pi ceng kanyaare me camo ebagu nono dedede. Do i ceng me kanyaare, en eko do tuco ne dwong me peny me agole nono, pien dako mere oudo do ocobuno en. Di do nyako nono oko tatamo ne jo mege dwong me agole nono.

¹⁸Aso, i ceng me kanyaare di pwodi likame ceng oduyo, jo me bomba oko waco ne be, “Nyo amit kalamo mokic? Nyo atek kalamo engu?” Samuson oko dwoko negi be, “Koto oudo likame ipurunu kede diang na, koto oudo likame itwerunu ngeno dwong me agole na.”

¹⁹Di twer ka Rwot oko donyo i kome, di eko ot elor piny tuno Asikelon. En eko neko cuo ot adek me bomba nono, di eko gonyo igoen gi, di eko mino igoen kame jo ngapo i ceng adongo but jo kogonyo dwong me agole mere. En eko dok i ot ka papa mere kede twon gero.

²⁰Di oko mino nyako kame Samuson oudo onyomo nono but ngawote koudo olwoke.

Jongolkop 15

¹Ingei kare moro, Samuson oko ot pi koto welao dako mere i kare me nyaro engano; oudo emako diel abwong etero ne. En eko waco ne papa me dako mere be, “Ango amito donyo i agola ka dako na.” Do papa me dako mere oko dagi ne donyo.

²Papa me dako mere oko waco ne be, “Ango oudo angeo kiber be in itieko dagi dako noni, aso ango ako mine but adieru ni. Do amin mere atidi cil kalamo en, nan in do ikaruno tero manono.”

³Samuson oko waco be, “Ka ango atimo gimoro arac ne jo me Pilistia, kur wac be ango arac.”

⁴Aso, Samuson oko ot di eko mako ikween tol adek di eko twetweo yib gi are are, di eko twetweo rau kakame etwetweo me yib gi nogo.

⁵Di do eko cwicwinyo mac i rau nogo di eko jalakino gi kiringo i poti me engano me jo Pilistia. Iepone noni en eko wango engano kame kotieko nyaro kede kalikame pwodi konyaro, ribo kiton poti me olok kede me olibeti.

⁶Kakame jo me Pilistia opepenyo kede kop i kom ngat kotimo gi noni, gin kiko niang be Samuson en oudo otimo tim noni, pien oudo papa me dako mere, icuo me Timina olokere mino dako ka Samuson but ngawot Samuson. Aso jo me Pilistia oko ot di kiko wango nyako nono kede papa mere.

⁷Samuson oko waco negi be, “Aso, mam mane en gikame itimunu? Akwongere be likame abino weko kop noni tuno di atieko culo kwor i komu.”

⁸En eko suro gi asur arac di eko neko jo atot di eko ot bedo kakobarere me lela me Etam.

Samuson Obwono Jo me Pilistia

⁹Jo me Pilistia oko ot di kiko gero kimere gi Yuda, di kiko suro bomba me Leki.



¹⁰Jo me Yuda oko waco be, “Pinyo komio ibinunu suro wa?” Gin kiko dwoko be, “Wan obino pi mako Samuson, pi timo ne gikame eda etimo ne wa.”

¹¹Aso jo tutumia adek me Yuda oko ot i abo atie kakobarere me lela me Etam, di kiko waco ne Samuson be, “Benyo, likame ingeo be jo me Pilistia en apugo wa? Nyo kame in itieko timo ne wa?” En eko dwoko negi be, “Ada atimo negi gikame gida kitimo na.”

¹²Gin kiko waco ne be, “Wan obino kan pi maki di oko tweni, tetekeny omi i cing jo Pilistia.” Samuson oko waco be, “Kong kwongerenu buta be wun kikomu likame ibinunu neka.”

¹³Gin kiko dwoko be, “Li, wan oyaro kenekene tweni di oko mini i cing gin; wan likame obino neki.” Aso gin kiko twene kede aunoi are anyen di kiko kele kidwoke ki lela.

¹⁴Kakame etuno kede Leki, jo me Pilistia oko ringo bute di kiwoo kitek. Twer ka Rwot oko donyo i kome, di aunoi kame oudo tie i ngut cinge oko doko cal bala ausi kowang, di kiko cocotun.

¹⁵En eko udo cogo me itinyo me punda koudo pwodi oto inonono inonono, en eko kwanye di eko neko kede jo tutumia acel.

¹⁶Samuson oko waco be, “Kom aneko jo tutumia acel kede cogo me itinyo me punda; kom cogo me itinyo me punda omio akumemo gi atukit kede atukit.”

¹⁷Kakame etieko waco kede kop noni, en eko uco cogo me itinyo nono. Oko donyo lwongo kakame gi noni otimere iye be Ramat Leki.

¹⁸Di do orio oko neko Samuson adikinichel, di eko lwongo Rwot di ewaco be, “Itieko mina abwono yi bwon kalikame wacere; do nan benyo, mam atoi orio di ako potu i cing jo me Pilistia, jo kalikame kokepo?”

¹⁹Rwot oko mino lobo obarere i Leki kunono di pii oko wok kiye. Samuson oko mato pii di eko udo teko. Omio kolwongo atan nono be Kakore; pwodi etie Leki tuno tin.

²⁰Samuson oko telo jo me Isirael pi mwakini ot are di oudo jo me Pilistia en apugo lobo nono.

Jongolkop 16

Samuson i Gasa

¹Ceng moro acel Samuson ooto i bomba me Gasa, kakame eko neno iye malaya moro di eko buto kede.

²Jo me Gasa oko niang be Samuson oudo tie i bomba kanono, gin kiko buto kiluko bomba di kiko donyo dare i erute me bomba iwor kiakia. Gin kibedo ling alinga iwor kiakia di kiparo be, “Omito kure tuno ceng wok di oko neke.”



³Do Samuson oko buto jik i dier iwor kenekene. En eko yai di eko ot mako ekeko me erute me bomba kede ipirin mege are, kede ari me cege, kede gi dedede atie iye, di eko riongo gi i ngute di eko tero gi i wi emukura kame neeno kede Keburon.

Samuson kede Delila

⁴Ingei manoni, Samuson oko mitere kede dako moro kame nyinge Delila, kame oudo bedo i Aditot me Sorek.

⁵Abakai me jo Pilistia oko ot but dako nono di kiko waco ne be, “Bitao cuny Samuson ewac ni gikame omio en etek kamano, kede ewac ni epone kame wan otwero bwone kede, tetekeny wan omake oko twene di oko aruno en; buli ngat acelacel kibut wa bino mini siliba tutumia acel kede tol acel.”

⁶Aso, Delila oko waco ne Samuson be, “Okwe, wac na gikame omio in itek twatwal. Ka dano moro mito tweni di eko tieko teko ni, nyo kame epoore timo?”

⁷Samuson oko dwoko be, “Ka kotwea kede toli kanyaare kalikame otuo, abino doko goro bala jo apat.”

⁸Di abakai me jo Pilistia oko tero ne toli kanyaare kalikame otuo, di en eko tweno Samuson kede toli nogo.

⁹Oudo jo mogo tie i agola ace kitie kuro gikame dako nono tie timo. En eko waco ne Samuson be, “Samuson! Jo me Pilistia tie bino ni!” Do Samuson eko coto toli nogo bala kame ausi cot kede kame mac omule. Aso, gin likame kiko twero ngenon mung me teko ka Samuson.

¹⁰Delila oko waco ne Samuson be, “In kom inywara anywara iko waco na kop me abe. Okwe, wac na epone kame kotwero tweni kede.”

¹¹Samuson oko dwoko be, “Ka kotwea kede aunoi kalikame pwodi kotio kede gi, abino doko goro bala jo apat.”

¹²Aso, Delila oko kelo aunoi anyen di eko tweno kede Samuson. En eko lelemo be, “Samuson! Jo me Pilistia tie bino ni.” Oudo jo mogo tie i agola ace kitie kuro. Do Samuson oko cocoto aunoi ki ngut cinge bala coto ausi.

¹³Di Delila oko waco ne Samuson be, “Tuno nan in pwodi itie nywara anywara di ingala. Wac na epone kame miero twei kede.” Samuson oko waco ne be, “Yer wiango tie abunge kanyaare, ka in ikedo gi i lilim kame kokudo me cweno ausin doko egoe, di iko ridakino gi kede yat, ango abino doko goro bala jo apat.”

¹⁴Delila oko ngangalo en paka nino, di eko kwanyo abunge kanyaare me yer wi Samuson di eko kedo gi i lilim kame kokudo me cweno ausin doko egoe, di eko ridakino gi kede yat. Di en eko waco ne Samuson be, “Samuson! Jo me Pilistia otuno ni.” Do en eko cei ki wang nino mere di eko peno yer wie ki lilim kame kokudo me cweno ausin doko egoe.



¹⁵Delila oko waco ne Samuson be, “Benyo benyo kame in itwero waco kede be imara, do di cunyi likame tie i koma? Itieko nan nywara odoko tien adek, di iko dagi waco na gikame omio in itek twatwal.”

¹⁶En eko bedo bitao cuny Samuson kamanono buli ceng di eburao en kop nono. Samuson oko do ol kede kop mere

¹⁷di eko waco ne mung mere be, “Ango likame pwodi abilo lielo yer wia; pien ango abedo dano kame kokwero but Rubanga cako di pwodi oudo atie i yi toto na. Ka kolielo wia, teko nango bino yai; abino doko goro bala jo apat.”

¹⁸Kakame Delila oko ngeno kede be Samuson oudo otieko tuco kop me ateni, en eko cwano kop me lwongo abakai me jo Pilistia di ewaco negi be, “Nan do bianu, piento en etieko tuco na mung mere.” Di abakai me Pilistia oko bino di kimako sente da kikelo.

¹⁹Delila oko ngangalo Samuson onino i tiene, di eko lwongo icuo moro obino lielo abunge kanyaare me yer wi Samuson, di do Samuson oko cako doko goro, pien teko mere oudo otieko yai.

²⁰Delila oko lelemo be, “Samuson! Jo me Pilistia otuno ni.” Kakame Samuson oko cei kede ki wang nino, en eko tamo be, “Ango abino pikiro di ako donyo ooko bala i ceng apat kokato.” Do oudo likame en engeo be Rwot otieko weke.

²¹Aso, jo me Pilistia oko make di kiko golo wange. Gin kiko tere Gasa di kiko twene kede eriko kame kotimo kede nyonyo buronsi, di oko mine edonyo timo tic me riego i otkol.

²²Do yer me wie oko doko cako lot ingei liele.

To ka Samuson

²³Abakai me jo Pilistia oko ariamakin karacel pi tedo ebaga kede pi mino giayala adwong but rubanga gi Dagon. Gin kiko donyo wer be, “Ebo, rubanga wa otieko mino ngakwor wa Samuson i cing wa.”

²⁴⁻²⁵Gin oudo kitie kede yomcuny, omio kiko waco be, “Kelunu Samuson ber ebin eyom cuny wa!” Kakame kiwoto kede Samuson ki otkol, gin kiko mine edonyo yomo cuny gi, di ecungo i dierediere me ipirin. Gin kiko donyo pako rubanga gi di kiwaco be, “Ebo, rubanga wa otieko mino ngakwor wa i cing wa, ngat kodudubo piny wa, ngat koneko jo wa atot.”

²⁶Samuson oko waco ne awobi koudo mako cinge di pee be, “Wek ber kong ararapo ipirin kame gango ot, amito cato kede gi.”

²⁷Jo oudo opongo ot nono culucul, cuo kede mon. Abakai dedede me jo Pilistia oudo tie kanono, doko da oudo cuo kede mon aromo tutumia adek tie i wi ot malo ngino kite kame Samuson oudo tie yomo kede cuny gi.



²⁸Di Samuson oko lego but Rwot di ewaco be, “Rwot Rubanga, okwe yutuno ango di iko medo mina teko kicel bobo, tetekeny gi acel kame abino timo noni mia akaruno culo kwor i kom jo me Pilistia pi wanga are kame gin kigolo.”

²⁹Aso Samuson oko cato kede ipirin are me cuny ot, cinge tetu cam i acel kede cinge tetu ngodal da i acel, di en eko cwalo gi.

³⁰En eko lelemo be, “Wek atoi kede jo me Pilistia.” En eko cwalo gi kede teko mere dedede, di do ot oko kayamakin i kom abakai kede jo dedede kame oudo tie iye. Aso, jo kame Samuson oko neko i esawa me to mere oko bedo tot kalamo jo kame oudo eneko i kare me kuo mere.

³¹Di do imiegu mege kede jo ace me pacu gi oko ot kwanyo kome di kiko ot yike dierediere me Sora kede Esitaol, i ates kame papa mere Manoa oudo okunyo. En oudo ebedo ngangolkop kotelo Isirael pi mwakini ot are.

Jongolkop 17

Caljwogi ka Mikaa

¹Bin tie icuo moro kame nyinge Mikaa kame oudo bedo i piny me imukuran me Epuraimu.

²En bin eko waco ne toto mere be, “Siliba tutumia acel kede tol acel kame oudo kokwalo kibuti, di in iko lamere di ango atie winyo, siliba nogo tie butango; ango en oudo akwanyo gi, do nan abino dwoko gi.” Toto mere oko waco be, “Woda, akwao Rubanga mi winyo!”

³En eko dwoko ne toto mere sente nogo di toto mere oko waco be, “Ango abino kwero siliba nogi but Rwot, pi gengo ilam i kom woda. Kobino tic kede gi me timo caljwogi me yat di kopuo kome kede siliba. Aso, nan ango atie dwoko siliba nogi buti.”

⁴Aso di bin en edwoko ne toto mere sente nogo, toto mere oko kwanyo siliba tol are di eko mino ngatet, di ngatet nono oko pano yat di eko puno kome kede siliba nogo. Oko keto caljwogi nono i ot ka Mikaa.

⁵Icuo anyinge Mikaa noni oudo tie kede iroro, di en eko timo caljwogi mogo kede epod, di eko keto wode acel pi bedo ngasaseredoti mere.

⁶I kare nono Isirael oudo likame tie kede abaka moro; dano acelacel oudo timo gikame cunye mito.

⁷I kare nono da oudo tie awobi moro Ngalebi kame oudo bedo i bomba me Betelem i lobo me Yuda.

⁸En eko yai ki Betelem pi ot mono karamoro ace di eko donyo bedo iye. Kakame oudo etie ot kede, en eko tuno i ot ka Mikaa i piny me imukuran me Epuraimu.

⁹Mikaa oko penye be, “In iwok ki tuai?” En eko dwoko be, “Ango abedo Ngalebi, awok ki bomba me Betelem i lobo me Yuda. Atie mono karamoro adony bedo iye.”



¹⁰Mikaa oko waco ne be, “Dony bedo keda, di iko doko ngat amia tam, kede ngasaseredoti, di ango ako donyo bino culi siliba tomon buli mwaka, igoen mogo kede gi me acama.”

¹¹Awobi Ngalebi nono oko yei bedo kede Mikaa, di eko doko bala wot ka Mikaa.

¹²Mikaa oko mine edoko ngasaseredoti mere, di en eko donyo bedo i paco ka Mikaa.

¹³Mikaa oko waco be, “Bala kame nan do atie kede ngasaseredoti na kobedo Ngalebi, angeo be Rwot bino mina mulem.”

Jongolkop 18

Mikaa kede Jo me Ekeko ka Dan

¹I kare nono oudo Isirael likame tie kede abaka moro. Doko da i kare nono jo me ekeko ka Dan oudo tie mono adul moro kame twero doko mergi di kiko donyo bedo iye; pien kikom jo me ikekon me Isirael, gin oudo pwodi likame kitie kede lobo moro kame komio gi amako gi.

²Aso, jo me ekeko ka Dan oko yero cuo kany kikwiri kikom jo dedede me ekeko gin, di kiko cwano gi yai ki bomban gi me Sora kede Esitaol, pi ot begao lobo kede ngingico en. Gin kiwaco ne cuo nogo be, “Otunu ingingicunu lobo nono.” Kakame kituno kede i piny kobedo imukuran me Epuraimu, gin kiko donyo bedo i ot ka Mikaa.

³Kakame oudo gin kitie kede i paco ka Mikaa, gin kiko winyo yamo me awobi Ngalebi di kiko twero pi ngeno leb mere; aso, gin kiko ot bute di kiko penye be, “Ngai kokeli kan? Nyo kame in itie timo kan?”

⁴En eko waco negi be, “Wan owinyere kede Mikaa di ango ako doko ngasaseredoti mere kame en eculo.”

⁵Gin kiko waco ne be, “Peny Rubanga ka sapali kame wan otie ot iye noni bino cobere ne wa kiber.”

⁶Ngasaseredoti nono oko dwoko be, “Otunu kede mulem. Rwot tie gwoko wu i sapali wu noni.”

⁷Cuo kany nogo oko meede kede ot; kakame kiko tuno kede Lais, gin kiko neno be jo me kuno oudo tie bedo abongo lworu moro, di cal acala bala jo me Sidon. Oudo gin kitie kede anapakin doko di kipalaro. Likame tie gimoro i wi lobo kan kame oudo kili kede, gin oudo kibaro twatwal. Doko da gin oudo kibedo kakabor twatwal kede jo me Sidon, doko da oudo likame kitie kede nywak me epone moroni kede jo apat.

⁸Kakame cuo kany nogo oko dok kede Sora kede Esitaol but wade gi, jo oko penyo gi gikame kiudo kunono.

⁹Gin kiko dwoko negi be, “Yaunu ootunu osurunu Lais. Wan oneno lobo nono, en eber twatwal. Iyarunu dong adonga kan abongo timo gimoro? Kur igalunu! Otunu isurenu ikounu mane!



¹⁰Ka itununu kunono, ibinunu udo be jo me kuno opalaro. En ebedo lobo adwong; gi dedede kame dano mito i wi lobo tie iye, doko da Rubanga otieko mine i cingu.”

¹¹Cuo tol kanyape me jo me ekeko ka Dan oko yai ki Sora kede Esitaol di kitieko mako jamini me yi.

¹²Gin kiko ot di kiko gero kimere gi i bad tetu tim me Kiriati Yearim i Yuda. Manono en komio kolwongo kanono tuno tin be Makane Dan. ¹³Gin kiko yai kikuno di kiko kato paka tuno i piny me imukuran me Epuraimu, di do kiko tuno paco ka Mikaa.

¹⁴Di cuo kany koudo ogeo ot ngingico lobo me Lais oko waco ne jowot gi be, “Benyo, ingeunu be i ude nogi tie iye caljwogi kame kopuco kome kede siliba? Doko tie iye epod kede caljwogi ace apat. Nan do nenunu gikame itwerunu timo.”

¹⁵Aso, gin kiko donyo i ot kame awobi Ngalebi bedo iye i paco ka Mikaa, di kiko mote.

¹⁶Esawa nono cuo tol kanyape me jo me ekeko ka Dan komako jamini me yi oudo tie cungo i erute,

¹⁷di cuo kany koudo ooto pi ngingico lobo nono oko kato akata paka donyo i ot di kiko kwanyo caljwogi kame kopuco kede siliba, epod kede caljwogi ace apat mege. Ngasaseredoti oudo tie cungo i erute karacel kede cuo tol kanyape koudo mako jamini me yi.

¹⁸Kakame cuo nogo oduyo kede i ot ka Mikaa di kiko kwanyo caljwogi kame kopuco kede siliba, epod, kede caljwogi ace apat mege, ngasaseredoti oko penyo gi be, “Wun itienu timo nyo?”

¹⁹Gin kiko dwoko ne be, “Lingi! Um dogi, di iko upere kede wa, di iko doko ngat kame mio wan tam kede ngasaseredoti wa. Benyo, eber ne in bedo ngasaseredoti me paco me dano acel, arabo bedo ngasaseredoti me jo me ekeko alutu me Isirael?”

²⁰Di do ngasaseredoti oko yei kop gi. En eko kwanyo caljwogi kame kopuco kede siliba, epod, kede caljwogi ace apat mege, di eko upere kede jo.

²¹Aso, gin kiko meede kede sapali gi, di kimio idwe, leini kede jamini gi ace apat otelo negi anyim.

²²Kakame kitieko lanyo kede paco ka Mikaa kakabor, Mikaa oko lwongo cuo kame ude gi oudo kio kede mere, di gin kiko wapo jo me ekeko ka Dan di kiko mako gi i yongayo.

²³Gin kiko lelemo ne jo me ekeko ka Dan, jo nogo oko lokere di kiko penyo Mikaa be, “Nyo arac komio in ibino kede twon jogo dedede?”

²⁴En eko dwoko be, “Wun ikwanyunu caljwogi na kame ango atimo, kede da ngasaseredoti di ikounu yai ot kede gi; nan ango adong do kede nyo? Benyo benyo kame wun itwerunu doko penya kede be, ‘Nyo arac? ’ ”



²⁵Jo me ekeko ka Dan oko waco ne be, “Oudo koto eber ka iling alinga likame iwaco ne wa kop moro, pien manoni twero mino jo gi cuny gi wang di kiko suri, di kiko neki kede jo me turi dedede.”

²⁶Di do jo me ekeko ka Dan oko girgi meede kede ot. Mikaa oko neno be jo nogo oudo tek likame esobolo yi kede gi, en eko lokere edok paco.

²⁷⁻²⁸Ingei cuo me Dan tero ngasaseredoti kede gikame Mikaa oudo ocweo, gin kiko ot di kiko suro Lais, en bomba me jo atie kede anapakin di kipalaro, kame tie i aditot me Bet Rekob. Gin kiko neko jo kame oudo bedo iye di kiko wango bomba nono. Likame tie ngat kame oudo twero konyo jo nogo, pien Lais oudo bor kede Sidon, doko da jo me bomba nono oudo likame tie kede nywak me epone moroni kede jo apat. Jo me Dan oko temuno bobo gero bomba nono di kiko donyo bedo iye.

²⁹Gin kiko cako nying bomba nono Dan, en nying kwaru gi koudo obedo wot ka Yakobo; do nying bomba nono oudo Lais.

³⁰Di do jo me ekeko ka Dan oko sipo caljwogi me awora, di Jonasan wot ka Geresom akwar Musa oko donyo tic bala ngasaseredoti gi, doko da ikwae mege oko meede tic bala josaseredoti gi tuno i kare kame komako kede jo di oko tero gi obukui tetek.

³¹Caljwogi ka Mikaa oko dong kanono pi kare dedede kame Eema kame koworo iye Rubanga oudo tie Silo.

Jongolkop 19

Ngalebi kede Dako mere me nono

¹I kare nono, di pwodi Isirael oudo likame tie kede abaka, oudo tie Ngalebi moro koudo bedo kakopwono i piny me imukuran me Epuraimu. En eko tero dako moro ki bomba me Betelem atie i piny me Yuda pi bedo dako mere me nono.

²Do dako mere nono oko ngoi kede, di eko dok turgi but papa mere i bomba me Betelem, di eko bedo kuno pi dwete ongwon.

³Cware di oko wape pi ngangao cunye tetekeny dako nono dok kede en. En oudo eupere kede ngatic mere kede pundan are. Kakame etuno kede i ot ka papa me dako mere nono, papa me dako nono oko nene di oko ot siramo en kede yomcuny.

⁴Papa me dako mere nono oko mine edong kong bedo bute kanono, di en eko tieko ceng adek i paco nono. I ceng nogo dedede en eko bedo cam kede amata di ebuto kanono.

⁵I ceng me ongwon gin kiko dilo cei odiko di kiko donyo iikere me yai ot. Do papa me dako mere oko waco ne be, “Kong camunu gimoro iudunu kede teko, di do ikounu ot.”

⁶Aso, cuo are nogo oko bedo di kiko donyo cam kede amata karacel; di papa me dako oko waco ne be, “Kong but kan tin bobo tetekeny iyom cunyi.”



⁷Icuo Ngalebi nono oko yai koto pi ot, do ore oko dine pi buto bobo, aso en eko bobo buto kanono.

⁸Odiko sek me ceng me kany en bobo eko cako mito yai, do papa me dako mere oko waco ne be, “Camunu kong gimoro iudunu kede teko.” Aso, gin kiko bedo miemiena tuno piny yuto, di gin jo are nogo kiko cam kede amata.

⁹Kakame icuo nono kede dako mere kede ngatic mere oko yai pi ot kede, ore oko waco ne be, “Neningo, piny otieko yuto, butunu kan, pien piny tie doko col. Diki ibinunu dilo yai odiko di ikounu dok paco.”

¹⁰⁻¹¹Do icuo nono oko dagi buto kuno; en eko yai di eko ot karacel kede dako mere, kede ngatic mere, kede pundan mege are kame kotweo gibedo i ngei gi. Esawa kame kinoko kede Yebu (manono en Yerusalem), esawa oudo okato do. Aso, ngatic oko waco ne ngadwong mere be, “Oparaunu ootunu obutunu i bomba me jo Yebu ni.”

¹²⁻¹³Do ngadwong mere oko waco be, “Wan likame obinunu parao i bomba kame jo mege likame obedo jo me Isirael. Do wan obinunu meede ot atitidi di okounu ot buto Gibeaa amoto Rama.”

¹⁴Aso, gin kiko ot kikalamo Yebu di kiko meede kede ot, di ceng oko donyo negi Gibeaa, kame tie i adul me jo me ekeko ka Benjamin.

¹⁵Gin kiko parao pi ot buto i bomba nono. Di kiko donyo i bomba di kiko donyo bedo kakaler, do likame ngatamoro oko tero gi ot buto ture.

¹⁶Di do icuo moro oti oko bino oko udo gi kanono di ewok ki timo tic i potu mere. En oudo ebedo dano me Epuraimu kame oudo tie bedo i Gibeaa. (Jo apat kame oudo bedo kanono oudo obedo jo me ekeko ka Benjamin.)

¹⁷Kakame adwong nono oko kiarao kede wange di eko neno ngasapali nono di etie bedo kakaler i dier bomba, en eko penye be, “In iwok ki tuai? Itie ot tuai?”

¹⁸Ngalebi nono oko dwoko be, “Wan owok ki Betelem i piny me Yuda, otie ot i dier piny me imukuran me Epuraimu, en turwa. Likame tie ngatamoro kowaco ne wa pi ot buto ture,

¹⁹bed bala wan otie kede cam me pundan wa, kede da mugati kede bwini aromo wa, ango kede dako na kede ngatic na. Wan otie kede gi dedede kame omito.”

²⁰Adwong nono oko waco be, “Ango agamo wu tura! Ango abino gwoko wu; likame ipoorenu buto ooko i dier bomba.”

²¹Aso, en eko tero gi ture di eko pito pundan gi. Wele mege oko lwoko tien gi di kiko cam.

²² Kakame gin oudo kitie yomo kede cuny gi, jo mogo me bomba, jo awi gi otieko bilor i tim me caro, oko lukaro ot di kiko cako tojo ekeko. Kiwaco ne adwong nono, en won ot nono be, “Wot ne wan icuo kodonyo i odi no, wan omito buto kede.”



²³Do adwong won ot nono oko donyo ooko but gi di oko waco negi be, “Imiegu na, likame kamano, kur itimunu gikarac kacal kamano. Bala kame icuo ni obedo kede welo nango, kur itimunu gikame cal kamano.

²⁴Nenunu, dako mere me nono tie kan, kede nyara kalikame pwodi ongeo icuo da tie; ango abino woto gi ooko butu, di wun ikounu pere kede gi di ikounu timo negi gikame cunyu mito. Do kur itimunu gikarac arom kano ne icuo ni.”

²⁵Do cuo nogo oko dagi winyo kop mere. Aso, Ngalebi ca oko mako dako mere di eko cwane ooko but gi. Gin kiko buto kede tetek di kiko piede i kome iwor kiakia paka piny ru. Kakame piny owalar kede, gin kiko weke eoto.

²⁶Odiko do kakame piny oru kede, dako nono oko dwogo di eko poto i ekeko me ot me adwong nono, kakame cware oudo tie iye. Ceng owok di oudo pwodi etie kanono.

²⁷Odiko cware oko yai di eko yabo ekeko pi koto donyo ooko di eko ot, eko udo dako mere tie buto di erieo bade i ekeko.

²⁸En eko waco ne dako mere nono be, “Yai malo ooti.” Do likame tie kop moro oko yamere kibute. Aso en eko tingo dako nono di eko rine i ngei punda di eko yai ot ture.

²⁹ Kakame etuno kede paco, en eko donyo i ot di eko kwanyo pala eko ngongolo kom dako mere nono i adulion tomon kiwie are, di eko cwano buli adul acelacel but buli jo me ekeko acelacel me ateker me Isirael.

³⁰Jo dedede koneno oko waco be, “Wan lem pwodi likame oneno gikame cal kaman, doko da lem pwodi likame gikame cal kamanoni otimere cako jo me Isirael yai ki Misiri; miero kong otamunu kop noni, oporunu kop iye di okounu yamo kop moro iye.”

Jongolkop 20

Jo me Isirael Oikere pi Yi

¹Jo dedede me Isirael cako ki Dan i bad tetu malo tuno Beereseba i bad tetu piny, ribo kiton jo atie i lobo me Gilead oko cokere i ekodet acel i Misipa i nyim Rwot.

²Jotel me jo me ikekon dedede me ateker me Isirael oudo tie i cokere nono me jo ka Rubanga; oudo tie iye isirikalen tutumia tol ongwon (400,000) aoto kede tien di kimako jame me yi.

³Jo ka Benjamin oko winyo be jo ace me Isirael oudo ocokere Misipa. Jo me Isirael oko penyere be, “Wac ne wa, gikarac noni otuno timere benyo?”

⁴Ngalebi kame oudo koneko dako mere oko waco be, “Ango kede dako na oudo ooto Gibeaa i lobo ka Benjamin pi buto iye.

⁵Cuo me Gibeaa oko ot sura iwor di kiko luko ot. Gin oudo kimito neka, do kiko buto kede dako na tetek tuno en to.

⁶Ango ako kwanyo kome di ako ngongolo en i adulion, di ako cwacwao adulion nogo i lobo lung me Isirael; pien gin kitimo gikarac me aura i Isirael.



- ⁷Aso, wun jo me Isirael nan nyamunu kop noni di ikounu kati kede tam moro.”
- ⁸Jo dedede oko lepun malo kicel di kiwaco be, “Likame tie ngatamoro kikom wa kame bino dok i eema mere amoto ture.
- ⁹Do nan gikame wan obino timo ne Gibeaa ine: wan obino uco alulu di oko yero jo kame bino ot yi kede.
- ¹⁰Wan obino kwanyo cuo tomon kikom cuo tol acel, kede cuo tol acel kikom cuo tutumia acel, kede cuo tutumia acel kikom cuo tutumia tomon pi tero cam ne isirikalen kame bino ot culo kwor i kom jo me Gibeaa i lobo me Benjamin, pi tim arac me lewic kame gin kitimo i Isirael.”
- ¹¹Aso jo dedede me Isirael oko cokere kede tam acel me ot suro Gibeaa.
- ¹²Jo me ikekon apapat me Isirael oko cwano cuo mogo ririmo jo dedede me ekeko ka Benjamin di kiwaco negi be, “Raco nyo ine kame wun itiekunu timo noni?”
- ¹³Nan miunu i cing wan jo areco atie Gibeaa nogo, tetekeny wan onek gi di oko kwanyo tenge raco noni ki i Isirael.” Do jo ka Benjamin oko dagi winyo kop me jo me Isirael wad gi.
- ¹⁴Gin kiko bino ki bomban dedede atie i lobo me Benjamin kiko cokere Gibeaa pi yi kede jo me Isirael.
- ¹⁵I ceng nono jo me ekeko ka Benjamin oko coko ki bomban gi isirikalen tutumia ot are kiwie kanyape (26,000) komako jame me yi, medo i kom jo kame bedo Gibeaa.
- ¹⁶Kikom isirikalen nogi, oudo tie iye cuo tol kanyaare (700) kame koyero ayera, kame oudo obedo ingodala; ngat acelacel kikom gi oudo twero pimao yer acel kede engaro me aporocet di likame eko bwot dipe.
- ¹⁷Jo me ikekon apat me Isirael oko coko isirikalen tutumia tol ongwon (400,000) komako jame me yi, gin dedede jo yi atek.

Yi kede Jo me Ekeko ka Benjamin

- ¹⁸Jo me Isirael oko ot Betel kakame oudo koworo kiye Rubanga di kiko penyo Rubanga be, “Jo me ekeko mene en kame poore ot cako suro jo me ekeko ka Benjamin?” Rwot oko dwoko be, “Jo me ekeko ka Yuda en abino cako ot.”
- ¹⁹Oru mere, jo me Isirael oko yai odiko di kiko ot gero kimere gi i nget bomba me Gibeaa.
- ²⁰Jo me Isirael oko ot pi cako yi kede jo me ekeko ka Benjamin, di kiko mino isirikalen oteere i dog bomba pi yabo yi.
- ²¹Jo ka Benjamin oko wok ki bomba me Gibeaa, di i ceng nono kiko neko jo me Isirael tutumia ot are kiwie are.
- ²²⁻²³Jo me Isirael oko ot di kiko donyo koko i nyim Rwot tuno piny yuto, di kiko penyo Rwot be, “Benyo, odok bobo medo yi kede imiegu wa jo me ekeko ka



Benjamin?” Rwot oko dwoko be, “Otunu iyiunu kede gi.” Aso, Isirikalen me Isirael oko udo nwangcuny, di kiko bobo tere kakame oudo kitere iye i ceng me agege.

²⁴Aso, jo me Isirael oko nyiko pi cako yi kede jo ka Benjamin tien me are.

²⁵Jo ka Benjamin oko wok ki bomba me Gibeia tien me are, di kiko neko isirikalen me Isirael tutumia tomon kiwie kanyauni (18,000) koudo mako jamini me yi.

²⁶Di jo me Isirael, isirikalen dedede oko dok Betel di kiko donyo koko; gin kiko donyo bedo i nyim Rwot kunono di kiko kanyo kec tuno piny yuto. Di do kiko yalo giayala awanga kede giayala me nywak i nyim Rwot.

²⁷⁻²⁸I kare nono Sanduku me Isikan ka Rubanga oudo tie Betel kanono, di Pinekasi wot ka Eleasar, akwar Aaron en koudo gwoke. Di jo oko penyoy Rwot be, “Benyo, odok bobo medo yi kede imiegu wa jo me ekeko ka Benjamin, arabo oweki?” Rwot oko dwoko be, “Otunu, pien diki ango abino mino gi i cingu.”

²⁹Aso, jo me Isirael oko mino isirikalen mogo opwono luko Gibeia.

³⁰Di do i ceng me adek jo me Isirael oko ot pi suro jo me Gibeia di kiko tere pi yi kede jo me Gibeia bala kame oudo kibedo timo sek.

³¹Kakame jo ka Benjamin owok kede pi yi kede isirikalen me Isirael, gin kiko ware kilanyo bomba pi wapo jo me Isirael. Bala lem sek, gin kiko cako neko jo me Isirael obar kuno i yongayo adwong aoto Betel kede Gibeia. Gin kiko neko Isirikalen ot adek me Isirael.

³²Jo ka Benjamin oko waco be, “Tin bobo oaruno gi bala ngoce.”

³³Isirikalen me Isirael atos koudo otere pi yi oko dok cen di kiko ot tere Baal Tamar, di isirikalen apat koudo opwono oluko bomba oko bwangere wok ki kapwono gi ki bad tetu tim me Geba.

³⁴Cuo tutumia tomon kame koyero ayera i Isirael oko suro Gibeia, di yi oko bedo gwai. Do jo ka Benjamin likame oudo ngeo be peko otieko poto negi.

³⁵Rwot oko mino jo me Isirael obwono jo ka Benjamin cenge nono, di kiko neko jo ka Benjamin tutumia ot are kiwie kany kede tol acel (25,100), gin dedede jo kame oudo tie kede jame me yi.

³⁶Jo ka Benjamin oko niang be ateteni oudo kobwono gi.

Epone kame Jo me Isirael Obwono kede Yi

Isirikalen me Isirael atos mege oudo oko dok cen kibun jo ka Benjamin pien gin oudo kitie geno jo koudo opwono luko Gibeia.

³⁷Cuo koudo opwono nogo oko bwangere ringo Gibeia oyotoyot, di kiko neko jo dedede koudo tie i bomba.



³⁸Ekodet adwong mere me isirikalen me Isirael kede apat koudo opwono luko Gibea oudo owinyere be, kame isirikalen koudo opwono owango bomba di yiro oko neeno di swiridido ki bomba,

³⁹ekodet adwong me isirikalen poore lokere aulo dwogo yi. Do i esawa noni, jo ka Benjamin oudo ajoto otieko neko isirikalen ot adek me Isirael, aso omio kiko waco be, “Ateteni tin bobo obwono gi bala i yi angoce me agege.”

⁴⁰Do kakame yiro ocasto swiridido kede malo ki bomba, jo ka Benjamin oko ngoloro cen ngei gi, kom gi oko to neno di bomba lung tie liel di yiro mere tie swiridido malo i edou.

⁴¹Ekodet adwong mere me Isirikalen me Isirael oko wilun, di jo ka Benjamin kom gi oko donyo miel, pien oudo kitieko niang kiber be peko oudo opoto negi.

⁴²Gin di do kiko lokere tenge kibus jo me Isirael di kiko ringo tetu wi tim, do likame kiko lanyo jo kowok ki bomba karacel kede isirikalen.

⁴³Jo me Isirael oko luko jo ka Benjamin, di kiko bedo wapo gi kamanono cako ki Noka di kineko gi tuno karamoro kuno i bad tetu kide me Gibea.

⁴⁴Di kiko neko isirikalen atek yi me jo ka Benjamin tutumia tomon kiwie kanyauni (18,000).

⁴⁵Mogo kikom gi oudo oko wilun di kiko ringo i wi tim tetu lela me Rimon, do oko neko kiye tutumia kany (5,000) i yote adongo ape ape. Jo me Isirael oko bedo wapo jo ace apat ape ape tuno Gidom, di bobo kiko neko jo tutumia are (2,000).

⁴⁶Aso, jo ka Benjamin kame koneko cenge nono oudo dedede tie tutumia ot are kiwie kany (25,000), gin dedede isirikalen atek yi.

⁴⁷Do jo tol kanyape oko bwot kiringo tetu wi tim i lela me Rimon, di kiko dong bedo kuno pi dwete ongwon.

⁴⁸Di jo me Isirael oko lokere dok ne jo ka Benjamin ace apat di kiko neko gin dedede, cuo, mon, idwe kede leini da. Di kiko wango bomban ace apat koudo odong da.

Jongolkop 21

Mon pi Cuo me Ekeko ka Benjamin

¹Kakame jo me Isirael ocokere kede Misipa, oudo gin kikwongere but Rwot di kiwaco be, “Likame ngatamoro kibus wa bino mino nyare nyomere kede icuo me ekeko ka Benjamin.”

²Aso jo me Isirael oko ot Betel di kiko donyo bedo kuno i nyim Rwot tuno otieno. Gin oudo kitie koko kitek kede dwan amalo di kiwaco be,

³” Okwe Rwot Rubanga me Isirael, nyo komio manoni otimere? Pinyo komio jo me ekeko acel tie tiek i Isirael?”



- ⁴Ceng alubo mere jo oko dilo yai odiko sek di kiko gero alutari kanono, di kiko mino giayala awanga kede giayala me nywak.
- ⁵Jo me Isirael oko penyere be, “Jo me ekeko mene me Isirael en kalikame obino i cokere Misipa i nyim Rwot?” Pien gin oudo kikwongere be ngat kalikame ooto i cokere me Misipa kobino neke.
- ⁶Jo me Isirael oudo kisa omako gi kede imiegu gi kobedo jo me ekeko ka Benjamin, omio kiko waco be, “Tin Isirael okei jo mege me ekeko acel.
- ⁷Nan obinunu timo benyo pi udo ne jo ka Benjamin kodong mon? Pien wan otiekunu kwongere but Rwot be wan likame obinunu mino gi kinyomo nyar wa moro.”
- ⁸Kakame gin kiko pepenyo kede ka oudo tie jo me ekeko moro me Isirael kalikame ooto i cokere Misipa, gin kiko udo be jo me Jabes Gilead oudo likame tie kuno;
- ⁹kakame oudo kotie lwongo kede nying isirikalen, likame tie dano moro me Jabes Gilead koudo tie kunono.
- ¹⁰Aso, jo koudo ocokere oko cwano isirikalen tutumia tomon kiwie are (12,000) kunono kede cik kame waco be, “Otunu ikounu neko jo me Jabes Gilead, mon ribo kiton idwe.
- ¹¹Nekunu cuo dedede kede mon dedede kotieko bilo buto kede cuo.”
- ¹²Gin kiko udo i Jabes Gilead anyira tol ongwon kalikame pwodi ongeo cuo di kiko tero gi Silo, kame tie i lobo me Kanan.
- ¹³Di jo dedede koudo ocokere oko cwano kop but jo ka Benjamin koudo tie i lela me Rimon di kiwaco negi kop me jiko yi.
- ¹⁴Jo ka Benjamin oko dwogo, di jo me Isirael oko mino gi anyira me Jabes Gilead kame oudo kiweko likame kineko; do anyira nogo likame oko romo gi.
- ¹⁵Jo oko bedo kede kisa i kom jo ka Benjamin, pien Rwot oudo otieko turo aribakin me jo me ikekon apapat me Isirael.
- ¹⁶Aso, joadongo koudo tie i cokere oko penyere be, “Nan obinunu timo benyo pi udo ne jo ka Benjamin kodong mon, pien likame tie dako moro kikom jo me ekeko ka Benjamin kodong kuo?”
- ¹⁷Likame opoorenu kei jo me ekeko moro me Isirael, pi manono miero jo ka Benjamin kodong kuo bed kede ikwae kame bino lunyo wang gi waru.
- ¹⁸Do likame wan otwero yei negi nyomo anyira wa, pien wan oudo otieko waco be ilam poore mak dano kame bino mino nyare nyomere kede icuo me ekeko ka Benjamin.”
- ¹⁹Aso, gin kiko waco ken gi ken gi be, “Nenunu, ebaga ka Rwot kame kocamo buli mwaka oyapuno timere Silo.” (Silo tie i bad tetu malo me Betel, i bad tetu piny me Lebona, kede i bad tetu kide me yongayo adwong kame yai ki Betel ot Sekem.)



- ²⁰Aso, kiko waco ne jo ka Benjamin be, “Otunu ikounu pwopwono i poti me olok
- ²¹ikounu donyo kiire. Kame anyira me Silo oko bino pi miel i kare me ebage, wun wokunu ki poti me olok di ngat acelacel ko mako tetek nyako me Silo di eko tere pi doko dako mere, di do ikounu dok i lobo me Benjamin.
- ²²Di do kame papi gi arabo imiegu gi obino kede koko butu, wun ibinunu waco negi be, ‘Timunu wa ber, yeunu ne wa bedo kede gi; pien likame wan omako gi ki yi pi bedo mon wa. Doko da likame wun ibinunu bedo kede raco moro me turo kwongere wu, piento likame wun imiunu gin but wa.’ “
- ²³Jo ka Benjamin oko timo kamanono; buli ngat acelacel kibun gi otero nyako acel pi doko dako mere kikom anyira jomiel kame kimako. Di do gin kiko yai kidok i adul gi, kiko bobo medo gero bomban gi.
- ²⁴Aso, jo ace me Isirael oko yai dok, ngat acelacel odok ture, i adul me jo me ekeko mere me anywali.
- ²⁵I kare nono abakai oudo likame tie i Isirael; jo dedede oudo timo gikame cuny gi mito.



Lusi

Lusi 1

Elimelek kede Jo me Ture Ooto Moab

¹I kare kame jongolkop en kame oudo pugo kede Isirael, kec adwong oko poto i lobo nono, di icuo moro me bomba me Betelem i lobo me Yuda oko ot bedo i piny me Moab, en karacel kede dako mere kede awobe mege are.

²Nying icuo nono oudo Elimelek, dako mere oudo nyinge Naomi; awobe mege are nogo nying gi oudo Makilon kede Kilion. Gin oudo kibedo jo Epurat kame oudo bedo Betelem i lobo me Yuda. Gin kiko ot i lobo me Moab di kiko dong bedo kunono.

³Do Elimelek cwar Naomi oko to, di Naomi oko dong kede awobe mege are.

⁴Awobe nogo oko nyomo mon me Moab, Oropa kede Lusi. Kakame kitieko bedo kede kunono pi mwakini aromo bala tomon,

⁵Makilon kede Kilion oko gida to, di do Naomi oko dong abongo icuo kede da abongo awobe.

Naomi kede Lusi Odok Betelem

⁶Ingei kare moro Naomi oko winyo be Rwot oudo omio jo mege winyo kiko udo cam atot; di do en eko iikere me yai ki Moab kede mon me awobe mege.

⁷Gin kiko yai karacel pi dok Yuda, do kakame oudo kitie kede i yongayo,

⁸Naomi oko waco ne mon me awobe mege be, “Ngat acelacel kibutu dok i ot ka toto mere. Akwao Rwot ebed ber kede wu bala kame wuda oudo ibedunu ber kede buta kede but jo otieko to.

⁹Doko akwao be Rwot mi wu itwerunu nyomere bobo, ikounu udo miere.” Naomi oko noto lem gi pi moto gi amot me pokere. Do gin kiko cako koko

¹⁰di kiwaco ne be, “Li, wan obino dok kedi but jo ni.”

¹¹Do Naomi oko dwoko be, “Anyira na, wun dokunu, pinyo komio imitunu ot keda? Benyo, iparunu be ango pwodi abino nywalo awobe kame bino bedo kede wu?”

¹²Anyira na, wun dokunu, pien ango atieko ti likame doko atwero nyomere. Do akadi bed bala oudo atie kede gen me nywal, di ango ako nyomere tin di ako nywalo awobe,

¹³benyo, koto wun idarunu gi tuno gin dongo? Benyo, koto idagunu nyomere kede jo apat pi daro gi? Likame kamano, anyira na, wun ingeunu be manono likame twerere. Cing Rwot odaa, manono obedo lit nango kalamo ne wun.”

¹⁴Di do gin kiko donyo koko bobo. Oropa oko noto lem toto me cware di emote pi pokere, do Lusi oko moko amoka i kom da mere Naomi.

¹⁵Aso Naomi oko waco be, “Neningo, nyeki otieko dok but jo mege kede but rubangan kame eworo; ida upere kede en idok turu.”



¹⁶Lusi oko dwoko be, “Kur idia weki! Weka aupere kedi. Kakame in ioto iye ada abino ot iye; kakame in ibedo iye ada abino bedo iye. Jo nin bino bedo jo nada, doko da Rubanga ni bino bedo Rubanga nada.

¹⁷Kakame in ibino to iye ada abino to iye; kanono en kame kobino yiko ada iye. Akwao Rwot mia twon alola ka ango apokere kedi, weko di to en kopoko wa!”

¹⁸Kakame Naomi oneno kede be Lusi oudo otieko moko i tam mere me ot kede, en eko ling likame doko eko waco kop moro.

¹⁹Gin kiko ot di kiko tuno Betelem. Kakame kituno kede kuno, jo dedede me bomba wi gi oko dubere pi yomcuny, di mon oko donyo penyere ken gi ken gi be, “Kom ateteni Naomi inononi?”

²⁰Do Naomi oko waco negi be, “Kur bobo ilwonganu be Naomi, do lwonganu be Mara, pien Rubanga Won Twer omio kuo na obedo bala yat akec.

²¹Kakame ayai kede ki kan, oudo atie kede gi dedede, do nan Rwot oko dwoka kede cinga nono. Pinyo mio ilwonganu be Naomi do di Rwot otieko tera kirac rom kano?”

²²Manoni en epone kame Naomi odwogo kede i Moab, en karacel kede Lusi ci wode, en dano me Moab. Gin kituno Betelem i kare kame kocako nyaro kede mawele.

Lusi 2

Lusi Odonyo Tic i Poto ka Boasi

¹Naomi bin tie kede wad gi cware kame nyinge Boasi; en oudo ebedo icuo kobaro kame koworo, en dano me ot ka Elimelek.

²Ceng moro acel Lusi oko waco ne Naomi be, “Yei na aoti i poto di ako donyo depo wit mawele kicen ngei ngatic moro kame kisa bino make keda.” Naomi oko dwoko be, “Nyara, ot gire.”

³Aso, Lusi oko ot di eko donyo depo wit mawele kicen ngei jo koudo tie nyaro mawele. Do iwinyo aber, en oudo eoto i poto ka Boasi, en dano me ot ka Elimelek.

⁴Inonono inonono Boasi oko bino ki Betelem di eko moto jotic mege be, “Rwot bed kede wu.” Gin kiko dwoko ne be, “Rwot mi winyo.”

⁵Boasi oko penyo ngat kame oudo lo jotic mege be, “Dako nyako nyako no en ngai?”

⁶Ngatic nono oko dwoko ne be, “En ebedo dako me Moab kodwogo kede Naomi.

⁷En oudo ekwa be ayei ne depo wit mawele kicen ngei jo kame tie kac. Aso, en eko bedo tic cako me odiko tuno nan abongo wei.”

⁸Di Boasi oko waco ne Lusi be, “Winyingo, nyara, kur doko ioti depo wit mawele i poto apat; kur iwek poto noni, do donyi i kom mon atio kanoni.



- ⁹Cik wangi i potu kakame kotie nyaro kiye mawele, di ida iko donyo lubo gi kicen. Ango atieko ciko cuo jotic na be kur kiloli. Ka orio oneki, oti imat pii kame gin kiweko i agune.”
- ¹⁰Di do Lusi oko riebere piny di eko waco ne Boasi be, “Pinyo komio iketo tam ni i koma di iko bedo kede cuny aber buta, do di angu abedo ngakumbor?”
- ¹¹Do Boasi oko dwoko ne be, “Angu atieko winyo kop i kom gikame in itimo ne toto me cwari cako i kare me to ka cwari, kede da epone kame in iweko kede papa ni kede toto ni kede lobo kame konywali iye, di iko bino bedo kede jo kame in oudo likame ingeo.
- ¹²Akwao Rwot culi pi tice ni. Akwao be Rwot Rubanga me jo me Isirael, ngat kame in iringini gwokere bute mi cul koromo.”
- ¹³Lusi oko waco be, “Ibedo kede cuny aber buta, adwong na, pien ikweo cunya di iyamo keda kede dwan me mwolo, bed bala likame angu abedo ngatic ni.”
- ¹⁴Iesawa me cam Boasi oko waco ne Lusi be, “Bia igam mugati iko damo kede bwini awac.” Aso, Lusi oko bedo karacel kede jotic di Boasi oko cwano ne mawele kame korereo i keno. En eko cam tuno yeng di cam mogo oko dong ne.
- ¹⁵Kakame Lusi oko yai kede pi ot depo mawele, Boasi oko ciko awobe jotic mege be, “Wekenu erar mawele kiton i kakame ijolong me mawele pwodi tie iye, kur igengenu.
- ¹⁶Doko medo i wi manono da, donyunu wowoto wit mawele mogo ki kom ijolong di iwekunu nen pi depo, kur icocokunu en.”
- ¹⁷Aso Lusi oko bedo raro wit mawele tuno piny yuto. En eko canyo mawele kame eraro di eko wok bala kilo tomon.
- ¹⁸En eko tero mawele nono i bomba di eko nyuto ne toto me cware rom me mawele kame eraro. Doko da eko mine cam kame en oudo ecamo oko dong.
- ¹⁹Naomi oko penye be, “In tin idepo mawele gi dedede ki tuai? Oudo itie tic i potu kangai? Akwao Rubanga emi icuo kotamo piri winyo!” Aso, Lusi oko waco ne Naomi be en oudo etio i potu me icuo anyinge Boasi.
- ²⁰Naomi oko waco ne Lusi be, “Akwao Rwot, ngat kame nakanaka gwoko cikere mere but jo akuo kede oto, emi Boasi winyo.” Di eko doko meede kede yamo be, “Icuo nono obedo wad kiyapiyapi kede wa, en ebedo ngat acel kame poore gwoko wa.”
- ²¹Di Lusi oko waco be, “Doko ewaco na be ameede bedo iyapiyapi but jotic mege di adepo mawele tuno gin tieko tic.”
- ²²Naomi oko waco ne Lusi be, “Nyara, eber ka in ioto tic kede mon atio i potu ka Boasi, pien ka ioto i potu apat cuo bino donyo loli.”
- ²³Aso Lusi oko donyo depo mawele kede mon nogo i potu ka Boasi tuno i kare kame kotieko nyaro kede mawele kede engano. En eko meede bedo kede toto me cware.



Lusi 3

Lusi Oudo Icuo

- ¹Ingei kare moro Naomi oko waco ne Lusi be, “Nyara, ango amito be iud icuo tetekeny ida ibed kede paco.
- ²Aso, ngei kiber be icuo anyinge Boasi no, kame in ibedo tic kede mon ace i potu mere, obedo wad me paco wa noni. Neningo, otieno me tin en ebino ot pieto maweale i diakal me canyo.
- ³Aso in bol di iko sut kede mo, di iko ngapo igoen ni abeco kalamo di iko ot i diakal me canyo kunono. Do kur imie engei be in itie kunono tuno di en etieko cam kede amata.
- ⁴Miero inen be ineno kakame en ebino ot buto iye, di do ka en etieko nino, in oti iko yabo esuka mere di iko buto katiene. En ebino waco ni gikame ipoore timo.”
- ⁵Lusi oko dwoko be, “Ango abino timo gi dedede kame in iwaco.”
- ⁶Aso, Lusi oko ot i diakal me canyo di eko timo gi dedede bala kame toto me cware owaco ne.
- ⁷Kakame Boasi otieko cam kede amata, oudo etie do kede yomcuny, di do eko ot buto i atukit me maweale. Di Lusi oko cede di eko yabo esuka ki tien Boasi di eda eko buto.
- ⁸Iesawa me i dier iwor Boasi oko lepun eko lokere di eko udo dako tie buto katiene.
- ⁹En eko penyere be, “In ngai?” En eko dwoko be, “Ango Lusi. In ibedo wad kiyapiyapi kede cwara, poore inyoma.”
- ¹⁰Boasi oko dwoko be, “Nyara, akwao Rwot mi winyo; wor kame inyuto na noni kalamo kame icako nyuto ne toto me cwari; likame in iyei ot mono awobi moro ace, angacan amoto kobaro.
- ¹¹Aso, nyara, nan kur ibed kede lworu, ango abino timo ni gi dedede kame in ipenyo, pien jo nango dedede ngeo be in ibedo dako aber.
- ¹²Bed bala ango abedo wad kiyapiyapi kede cwari, do tie icuo kobedo wad kiyapiyapi kede en kalamo ango.
- ¹³In do ber dong kan paka piny ru, di do diki odiko wan oko bino udo tam mere; ka eyei gwoki mano ber, do ka edagi gwoki ango alairo i nying Rwot kakuo be ango abino gwoki. Nan do in buti tuno piny ru.”
- ¹⁴Aso, Lusi oko buto katiene Boasi tuno piny ru, do eko dilo yai di pwodi piny likame owalar tetekeny kur ngatamoro twer ngene, pien Boasi oudo likame mito be jo ngei be Lusi oudo obino kanono.
- ¹⁵Boasi oko waco ne be, “Gony egoe kame itie ngapo no iko yararo en.” En eko yararo en, di Boasi oko pimo ne kilo tomon me maweale di eko konyo Lusi rionge i epepet. Di do Lusi oko dok i bomba.



¹⁶Kakame Lusi otuno kede paco, da mere Naomi oko penye be, “Nyara, kop obedo ni benyo?” Di Lusi oko tatamo ne gi dedede kame Boasi otimo ne.

¹⁷Di eko meede be, “En ewaco na be likame apoore dwogo buti kede cinga nono, aso, en eko mina mawele noni dedede.”

¹⁸Naomi oko waco ne be, “Nyara, dari iko bino neno gikame bino timere. Tin Boasi likame bino wei tuno di etieko cobo kop nono.”

Lusi 4

Boasi Onyomo Lusi

¹Boasi oko ot i kacokere atie i erute me bomba di eko bedo piny. Cucuto nono di icuo kobedo wad kiyapiyapi twatwal kede Elimelek oko tuno, en icuo kame Boasi oudo owaco ne Lusi kop i kome. Boasi oko lwonge be, “Ngawota, kong bia kan iko bedo.” Aso Icuo nono oko ot di eko bedo.

²Di Boasi oko raro cuo tomon kikom joadongo me bomba di eko waco negi pi bedo piny kanono. Kakame gin oudo kitieko bedo kede,

³Boasi oko waco ne icuo kobedo wad kede en nono be, “Bala kame nan Naomi otieko dwogo kede ki Moab, en etie cato poto ka wad wa Elimelek,

⁴aso ango ako paro be apoore waco ne ida kop noni. Aso ka in itie mito poto nono, poore iwile i nyim jo kame nataman tie bedo kan. Do ka likame imite, tuc ne wa; pien twero me wilo lobo nono twatwal mere tie i cingi, kede alubo mere etie i cing ada.” Icuo nono oko waco be, “Abino lake.”

⁵Boasi oko waco be, “Ceng kame in ibino gamo kede poto nono kibun Naomi, en ceng nono da kame ibino gamo kede Lusi dako me Moab, apuserut ka ngato, tetekeny poto nono dongi i diakal me ngato.”

⁶Icuo kobedo wad kiyapi nono oko dwoko be, “Ka etie kamano ango do ajalo kop me wilo poto nono, pien manono nyuto be poto nono likame bino doko me ka idwe nango. In do wile; ango likame atwero.”

⁷I kare nono, itok me jo me Isirael amakere kede wilo amoto seso jame oudo tie be: ngacat oudo gonyo amuka mere di eko mino ngawil. Manoni oudo cungo pi nyuto be kotieko kop nono.

⁸Aso kakame icuo nono owaco kede ne Boasi be, “In wile,” en eko gonyo amuka ki tiene di eko mino Boasi.

⁹Di Boasi oko waco ne joadongo kede jo dedede koudo tie kuno be, “Tin wun ibedunu ijurak na be ango agamo kibun Naomi gi dedede kobedo me ka Elimelek kede me ka awobe mege Kilion kede Makilon.

¹⁰Medo i wi manono, Lusi dako me Moab, kobedo bin dako ka Malon otieko nan do doko dako na. Manoni bino mino jamini me ngato dongi i diakal mere, doko da nyinge



bino meede i diere me jo mege kede i bomba kame oudo ebedo iye. Tin wun ibedunu ijurak me kop noni.”

11 Di joadongo kede jo apat dedede koudo ocokere i erute me bomba oko waco be, “Wan obedo ijurak. Okwao Rwot emi dako ni nono dok bala bin Lakeri kede Lea, mon kame bin onywalo ne Yakobo idwe atot. Okwao be in ibed dano kobaro kibun jo me ekeko ka Epurat, doko di nyingi ko doko iruo i Betelem.

12 Doko da okwao be idwe kame Rwot bino mini kede nyako noni mi turi dok cal bala bin paco ka Peresi, en wot ka Yuda kede Tamar.”

Boasi kede Ikwae mege

13 Aso, Boasi oko tero Lusi odoko dako mere. Rwot oko mino Lusi winyo di eko udo yie eko nywalo atin awobi.

14 Mon oko waco ne Naomi be, “Pak bed but Rwot, ngat kame tin omi iudo akwari! Okwao be nying atin nono bed iruo i Isirael!

15 Ci wodi amari, en ngat kame etieko timo ni gikame ber kalamo gikame awobe kanyaare twero timo, onywalo ni atin akwari. Atin nono bino mini ibedo kede kuo anyen, doko ebino gwoki i kare me tio ni.”

16 Naomi oko tingo atin i kore di eko doko ngagwoke.

17 Mon me kio oko cako nying atin nono Obed. Di kiko tero ne jo ace kop be, “Kara konywalo ne Naomi akware atin awobi!” Obed oko nywalo Yese, di Yese oko nywalo Daudi.

18 Magi en ikwae ka Peresi: Peresi onywalo Keseroni,

19 Keseroni oko nywalo Ram, Ram oko nywalo Aminadab,

20 Aminadab oko nywalo Nakason, Nakason oko nywalo Salamon,

21 Salamon oko nywalo Boasi, Boasi oko nywalo Obed,

22 Obed oko nywalo Yese, di Yese oko nywalo Daudi.



1 Samuel

1 Samuel 1

Elikana kede Jo me Ture i Silo

¹Bin oudo tie icuo moro anyinge Elikana, dano me ekeko ka Epuraimu. En oudo ebeto i bomba me Rama i piny kobedo mori mori me Epuraimu. Papa mere oudo nyinge Yerokam; oudo en ebeto akwar Eliku, dano me ot ka Toku, dano me ekeko ka Sup.

²Elikana oudo tie kede mon are; nying acel oudo Aana kede ocelu nyinge oudo Penina. Penina oudo tie kede idwe, do Aana oudo li kede idwe.

³Mwaka acelacel Elikana oudo yai ki Rama di eko ot woro Rwot me jo yi kede mine giayala i Silo, kakame Kopuni kede Pinekasi, awobe ka Eli oudo tie iye bala josaseredoti ka Rwot.

⁴Kare acelacel kame Elikana oudo mio kede giayala, en oudo emio iner acel me ringo but Penina, kede awobe kede anyira mege dedede da eko mino gi iner acelacel buli dano;

⁵do en oudo emio Aana iner adwong kalamo jo apat, pien oudo emare, bed bala Rwot oudo otwone nywal.

⁶Nyeke oudo maro wango cunye twatwal di ecae, pien Rwot oudo otwone nywal.

⁷Man obedo timere mwakini kede mwakini; tek kame gin oudo kioto i ot ka Rwot, Penina oudo wango cunye Aana. Manono oudo mio Aana donyo koko di eko daga cam.

⁸Elikana cware oudo ko donyo pepenyo en be, “Aana, itie koko pinyo? Pinyo komio idaga cam? Pinyo komio itie kede wangcunye? Iparo be kibuti ango likame atwero kalamo awobe tomon?”

Aana kede Eli

⁹Ceng acel di oudo kitieko cam kede mato giamata i Silo, Aana oko yai malo. Eli ngasaseredoti oudo tie bedo i nget ekeko me tempulo ka Rwot.

¹⁰En oudo etie kede cwercunye adwong twatwal, di eko donyo koko kitek.

¹¹En eko kwongere be, “Okwe Rwot me jo yi, koto ineno can kame ango ngatic ni atie iye, di iko yutuno ango, di likame wi ko wil kede ango ngatic ni, do iko mina atin awobi. Koto ango ako bino mine buti pi kare me kuo mere lung. En likame ebino mato bwini amoto mato gi ace amero jo, doko da likame ebino lielo wie.”

¹²Aana oko meede lego but Rwot pi esawa alac, di Eli oudo tie ngino doge.

¹³Aana oudo tie ilega eliling; doge oudo timere nyumenyume, do likame oudo tie yamo moro awinyere; manono oko mino Eli otamo be oudo emer.

¹⁴Aso, Eli oko waco ne be, “Iyaro meede nyuto amera ni paka awene? Mi bwini tiek ki wii.”



¹⁵Aana oko dwoko ne be, “Adwong, ango likame amer, ango abedo dako atie kede twon peko; likame ango atieko mato bwini amoto kongo moro ace, do ango atie lego di amio peko na but Rwot.

¹⁶Kur iter ngatic ni bala dako akony mere li. Ango abedo ilega kaman pi par kede wangcuny kame atie kede.”

¹⁷Eli oko waco be, “Ot kede mulem; akwao Rubanga me Isirael mi gikame ikwae.”

¹⁸Aana oko dwoko be, “Akwao ibed kede cuny me mwolo buta nakanaka.” Di do eko ot di eko cam kede amata kede cware, likame bobo eko bedo kede cwercuny.

Konywalo Samuel di oko Mine but Rubanga

¹⁹Ceng alubo mere Elikana kede jo me ture oko yai odiko sek di kiko woro Rubanga, di kiko dok paco gi i bomba me Rama. Elikana oko buto kede dako mere Aana, di Rwot oko gamo kwac ka Aana.

²⁰Aso, Aana oko yac di eko nywalo atin awobi. En eko cako nyinge Samuel, pien ewaco be, “Ango akwae kibut Rwot.”

²¹Kare bobo oko tuno di Elikana kede jo me ture oko ot Silo pi mino Rwot giayala kame bin kimio buli mwaka, kede pi cobo gikame oudo ekwongere iye.

²²Do Aana likame oko ot kede gi. En ewaco ne cware be, “Cucuto kame ango atieko twono atin noni dot, ango abino tere i ot ka Rwot, di en eko bino dong kuno atwal.”

²³Elikana oko dwoko be, “In tim gikame ineno be ber nin; kur kong paka tuno ka itieko twono atin dot. Kenekene akwao Rwot mi gikame icikere iye cobere.” Aso, Aana oko dong paco doto atin mere.

²⁴Kakame etieko twono kede atin dot, en eko tere Silo; etere karacel kede twon me mwakini adek, kilo tomon me alos, kede bwini atie i isau kame kotimo kede lau. En etere Silo i ot ka Rubanga kede titidi mere nono.

²⁵Gin kiko ngolo twon di kiko tero atin but Eli.

²⁶Aana oko waco be, “Adwong, ateteni ango en dako angoce ocungo kan i nyimi di alego but Rwot.

²⁷Ango alego pi udo atin noni, di Rwot oko mina gikame akwae.

²⁸Nan ango amie but Rwot. En eyaro bedo me ka Rwot i kare me kuo mere lung.” Gin kiko woro Rwot ki kuno.

1 Samuel 2

Ilega ka Aana

¹ Aana oko lego be, “Cunya yom twatwal i kom Rwot; Rubanga omia teko. Ango anyero jokwor na, pien ango alelo pi kite kame ilaka kede.



²” Likame tie Ngat Kacil bala Rwot, likame tie ngat acal kede, likame tie ngagwok moro acal kede Rubanga wa.

³Jikunu yamo me ewaka, kur doko kope me ewaka wok ki dogu; pien Rwot obedo Rubanga atie kede ngec, doko en engolo kop i kom tice dedede kame jo timo.

⁴En etuturo imalia me jo atek yi, do emio jo agoro doko tek.

⁵Jo koudo camo di kiko yeng kiber nan olokere ot pakaso cam, do jo kame lem kec neko tie kede cam kame bwono gi. Dako alem obedo adonge onywalo idwe kanyaare, do dako koudo tie kede idwe atot odong nono.

⁶Rwot neko, doko da edwoko kuo; en ecwao jo i kabedo me jo oto, doko da edwoko gi ki kuno.

⁷Rwot mio jo doko jocan, doko da en emio jo baro; en edwoko dano i ruom ka piny, doko da en etingo dano i ruom ka malo.

⁸En ekwanyo jocan ki can gi, kede jo apiny olo ki peko gi. Emio gi kidonyo bedo kede jopug; keto gi i kabedo me wor. Pien ipirin kame lobo cungo iye obedo me ka Rwot; en etieko cibo piny ocungo i wi gi.

⁹” En egwoko jo agenere, do jo areco en emio gi kito kakacol; pien dano likame lo kede teko mere kene.

¹⁰Rwot bino muducaro jokwor mege; Ngamalo Twal bino mwoc i malo i kom gi bala kot. Rwot bino ngolo kop ne lobo lung, en ebino mino abaka mere teko, ebino mino abaka mere me kowiro twer.”

¹¹Elikana di do oko dok paco mere i bomba me Rama, do wode Samuel oko dong Silo i loc ka ngasaseredoti Eli pi tic ne Rwot.

Awobe ka Eli

¹²Aso, awobe ka Eli oudo obedo jo areco. Gin oudo likame kiparo pi Rwot

¹³arabo pi tice kame josaseredoti poore timo but jo. Ka ngatamoro oudo omio giayala, ngatic me ngasaseredoti oudo bino kede ijiko alake okakarun kidek di ringo pwodi tie i keno,

¹⁴di en eko cobe i yi sepula arabo i agulu me tedo. Ringo dedede me ijiko woto, ngasaseredoti oudo tero bedo mege. Manoni en gikame gin oudo kibedo timo i Silo ne jo dedede me Isirael koudo bino kuno.

¹⁵Medo i wi mano da, di pwodi likame kowango kakamio me ringo, ngatic me ngasaseredoti oudo bino di eko waco ne ngat koudo tie mino giayala be, “Mia ringo moro me abula ne ngasaseredoti; likame en ebino yei gamo ringo me kotedo kibutu, do kenekene ringo anumu.”



¹⁶Ka dano no oko dwoko be, “Ber kong ogeunu wango kakamio bala kame mitere, di do in iko tero gikame cunyi mito,” en oudo eko dwoko ne be, “Li akadi acel, in miango nan, aso ka li, ayaro kwanyo tetek.”

¹⁷Manoni oko mino dub me awobe ka Eli obedo dwong twatwal i nyim Rwot, pien likame gin kibedo kede wor i kom giamia but Rwot.

Bedo ka Samuel Silo

¹⁸I kare nono Samuel oko donyo tic ne Rwot di en atin awobi kame rwao esuka.

¹⁹Toto mere oudo kuo ne ekanso atitidi mwaka acelacel di eko tero ne kame eupere kede cware pi ot mino giayala me buli mwaka.

²⁰Eli oudo ko lamo ne Elikana kede dako mere winyo di ewaco ne Elikana be, “Akwao Rwot emi inywal idwe ace kede dako noni pi lunyo giamia kame en emio Rwot.” Ingei manono, gin oudo kiko dok paco.

²¹Di Rwot oko mino Aana winyo, di en eko bobo nywalo awobe adek kede anyira are. Di Samuel oko dongo di etimo tic ka Rwot.

Eli kede Awobe mege

²²I kare nono, Eli oudo otieko ti twatwal. En oudo ebedo winyo gi dedede kame awobe mege oudo tie timo ne jo me Isirael, kede epone kame oudo kidonyo buto kede mon kame oudo tio i ekeko me eema kame Rwot tie iye.

²³En eko waco negi be, “Pinyo komio itimunu gikame cal kamago? Pien jo dedede tie waco na kop i kom tice wu areco.

²⁴Idwe na, manono rac; kop kame ango abedo winyo jo ka Rwot tie yamo i komu likame ber.

²⁵Ka dano moro odubo but dano ace, Rubanga twero bedo ngat arucakino gi; do ka dano moro odubo but Rwot, likame tie ngat kame karuno konye.” Do gin likame kiko yei winyo dwan papa gi, pien Rwot oudo otieko moko tam mere pi neko gi.

²⁶Awobi Samuel oko meede dongo i kome, di Rwot karacel kede jo di mare.

Ikwenyar me Enabi Owaco i kom Jo me Ot ka Eli

²⁷Enabi oko ot but Eli di eko waco ne be, “Rwot owaco be, ‘Ango bin anyutere but kwaru ni Aaron kede jo me ode di oudo kitie ipaso ka Parao, en abaka me Misiri.

²⁸Ango bin ayere kikom atekerin tomon kiwie are me Isirael pi bedo ngasaseredoti na, pi ot i alutari na, pi wango odok angwe kur, kede pi tingo epod i nyima. Doko ako mino jo me ot ka kwaru wu iner i kom giamia awanga dedede kame wok kibus jo me Isirael.

²⁹Pinyo do komio itienu kede ingobel i kom giayala kede giamia kame ango aciko be poore jo mia, di do in iko lokere bedo kede wor but awobe ni kalamo ango, di imio gi kicwe kede adulion kinyus me ringo me jo na me Isirael yala kede?”



³⁰Pi mano Rwot Rubanga me Isirael waco be, ‘Ango oudo acikere be jo me odi kede jo me ot ka kwaru ni bino tic na bala josaseredoti nakanaka’ ; do nan Rwot waco be, ‘Likame abino timo kamanono; do angu abino mino wor but jo kame mia wor, kede abino mino lewic mako jo kame tie kede acae buta.

³¹Neningo, kare tie bino kame angu abino mino koneko kede awobe me odi kede me ot ka kwaru ni, tetekeny kur ngatamoro me odi bed kuo tuno i tio.

³²Di do i can ni, in iko bino neno kede ingobel mulem dedede kame kobino mino jo me Isirael, do likame tie ngatamoro me odi kame bino bedo kuo tuno i tio.

³³Akwari acel kame abino weko dong kuo pi timo tic i alutari na wange bino to, doko ebino bedo kede cwercury. Do ikwae ni apat bino totoun to me lito.

³⁴ Ka awobe ni are, Kopuni kede Pinekasi, orote to ceng acel, manoni bino nyuto ni be gi dedede kame angu awaco bino cobere.

³⁵Angu abino yero ngasaseredoti na agenere buta, kame bino timo gi dedede kame cunya kede tam nango mito. Angu abino mino diakal mere cungo di tek, di ikwae mege tio i nyim abaka na kame ayero.

³⁶Akwari moro odong di kuo bino ot kwano sente amoto cam but ngasaseredoti nono, di ebako doge be mie tic me konyo ngasaseredoti, tetekeny eud gimoro me acama.’ “

1 Samuel 3

Rwot Oneeno ne Samuel

¹I kare nono awobi Samuel oudo timo tic ka Rwot di etie i loc ka Eli. Kop ka Rwot oudo likame singo winyere i kare nono, doko da gianyuta oudo nonok.

²Iwor moro acel Eli, ngat kame wange oudo tie do mito to, oudo tie buto i agola mere;

³Samuel oudo tie buto i kabedo kacil ka Rwot kakame Sanduku me Isikan oudo tie iye, doko etala ka Rubanga da oudo pwodi tie liel.

⁴Di Rwot oko lwongere be, “Samuel! Samuel!” En eko gamo be, “Atie, adwong!”

⁵Di eko ringo but Eli di eko waco ne be, “Angu ine, oudo ilwonga.” Do Eli oko dwoko ne be, “Angu likame alwongi, doki ioti ibuti.” Aso, Samuel oko dok buto.

⁶Rwot bobo oko lwongo Samuel. Samuel oko bobo yai di eko ot but Eli di eko waco ne be, “Angu ine, oudo ilwonga.” Do Eli oko waco ne be, “Woda, angu likame alwongi, doki ioti ibuti.”

⁷I kare nono Samuel oudo pwodi likame obilo riamakin kede Rubanga i kuo mere, pien oudo pwodi likame Rubanga oyamo kede.

⁸Rwot bobo oko lwongo Samuel tien me adek; en eko yai eko ot but Eli di eko waco ne be, “Angu ine, oudo ilwonga.” Eli di do oko niang be Rwot en koudo tie lwongo Samuel.



⁹Pi manono, Eli oko waco ne Samuel be, “Dok ioti ibuti, do ka elwongi bobo, in wace be, ‘Yami, Rwot, ngatic ni tie winyo.’ “ Aso, Samuel oko dok buto.

¹⁰Rwot oko bino di eko cungo kunono di eko lwongere bala kite kame oudo elwongere kede sek be, “Samuel! Samuel!” Samuel oko gamo be, “Yami, ngatic ni tie winyo.”

¹¹Di Rwot oko waco ne Samuel be, “Neningo, ango ayapuno timo gimoro ne jo me Isirael, kame bino mino jo dedede kame bino winyo kom gi to.

¹²I ceng nono ango abino cobo timo can dedede kame oudo ango awaco be bino potu i ot ka Eli, cako ki agege tuno i ajikini mere.

¹³Pien ango atieko waco ne be, ango ayapuno mino alola kame bedo nakanaka i ode, pi gikarac kame en engeo; pien awobe mege otimo na gikarac do en likame eko gengo gi.

¹⁴Pi mano, ango akwongere but jo me ot ka Eli be, likame tie giayala arabo giamia moro kame bino twero weno tenge gikarac noni.”

¹⁵Samuel oko buto paka piny ru; odiko en eko yabo ekeko me ot ka Rwot. En oudo etie kede lworu me waco ne Eli kop me gianyuta nono.

¹⁶Do Eli oko lwongo Samuel di eko waco ne be, “Samuel, woda!” Samuel oko dwoko be, “Atie.”

¹⁷Eli oko penye be, “Kop nyo kame Rwot owaco ni? Kur imung na. Rubanga bino mini alola ka likame in iwaco na gi dedede kame en ewaco.”

¹⁸Aso, Samuel oko waco ne kop dedede; likame emungo ne gimoro. Eli oko waco be, “En ebodo Rwot, en etim gikame ber kibute.”

¹⁹Samuel oko dongo, Rwot oudo tie kede en, di eko mino gi dedede kame Samuel owaco ocobere kakare.

²⁰Di jo dedede me Isirael, cako ki Dan tuno Beereseba oko ngeno be Samuel oudo obedo enabi agenere ka Rwot.

²¹Rwot oko meede nyutere i Silo, kakame en oudo enyutere ne Samuel kiye di eko yamo kede. Samuel oko donyo yamo kede jo me Isirael dedede.

1 Samuel 4

Komao Sanduku me Isikan

¹I kare nono jo me Pilistia oko cokere pi ot yi kede jo me Isirael, di jo me Isirael da oko yai pi ot yi kede gi. Jo me Isirael oko gero kimere gi Ebenesa, do jo me Pilistia oko gero mergi Apek.

²Jo me Pilistia oko teere cako yi kede jo me Isirael; kakame yi do oko dop kede, jo me Pilistia oko bwono jo me Isirael, di kiko neko cuo aromo bala tutumia ongwon (4,000) i ebar me yi.



³Kakame isirikalen kobwot mege odwogo kede kabedo kame kigero iye kimere, joadongo me Isirael oko waco be, “Pinyo komio tin Rwot ojalo jo me Pilistia obwono wa? Ootunu okelunu kan Sanduku me Isikan ka Rwot ki Silo, tetekeny Rwot bed tie i diere wa di eko lako wa ki cing jokwor wa.”

⁴Aso, gin kiko cwano jo Silo, di gin kiko kelo ki kuno Sanduku me Isikan ka Rwot me jo yi, ngat kame kocibo kom mere me ajakanut i wi cerubim. Awobe ka Eli are, Kopuni kede Pinekasi, oko bino karacel kede Sanduku me Isikan ka Rwot.

⁵Kakame Sanduku me Isikan ka Rwot otuno kede kakame kimere gi oudo tie iye, jo me Isirael oko woo kitek paka piny yangere.

⁶Kakame jo me Pilistia owinyo kede woo atek, gin kiko penyere be, “Woo adwong atie i kimere me Iburanian no obedo menyo?” Kakame kiko niang kede be Sanduku me Isikan ka Rwot oudo otuno i kimere me Iburanian,

⁷Iworo oko mako gi di kiko waco be, “Rubanga moro otieko bino i kimere gi. Wan otiekunu nyono can! Lem likame pwodi gimoro otimere ne wan kacal kaman!

⁸Otiekunu nyono can! Ngai kame sobolo lako wa ki cing rubangan atek nogo? Magonogo en rubangan kame bin ojwato jo me Misiri kede can me epone dedede i wi tim.

⁹Okweunu jo me Pilistia, diunu cunyu ikounu yi cuo cuo, me wek kur odokunu ipasoi but Iburanian, bala kame gin oudo kibedo kede ipasoi but wa; yiunu cuo cuo.”

¹⁰Aso, jo me Pilistia oko yi kitek di kiko bwono jo me Isirael, di ngat acelacel oko ringo odok ture. Bin oko neko jo atot twatwal i yi nono, pien koneko isirikalen me Isirael aoto kede tien gi tutumia ot adek (30,000).

¹¹Di oko mano Sanduku me Isikan, doko da oko neko awobe ka Eli are, Kopuni kede Pinekasi.

To ka Eli

¹²Icuo moro me ekeko ka Benjamin oko ringo ki kakame yi oudo tie iye paka tuno Silo i ceng nono. En oudo enyinyilo igoen mege di lobo me ejuk kede tie i wie, pi nyuto cweracuny.

¹³Kakame etuno kede, Eli oudo tie bedo i nget yongayo di wange tie i yongayo, pien cunye oudo opoto pi Sanduku me Isikan ka Rubanga. Kakame icuo nono otuno kede i bomba di eko tatamo gikame otimere, jo dedede me bomba oko woo kede koko.

¹⁴Kakame Eli owinyo kede dwan jo akok, en eko penyere be, “Woo no menyo?” Di icuo nono oko bino awakawaka pi waco ne Eli gikame otimere.

¹⁵I kare nono Eli oudo mwaka me dongo mere oromo ot kanyangon kiwie kanyauni, doko wange da oudo odoko mwadamwada.

¹⁶Icuo nono oko waco ne Eli be, “Ango awokun ki yi tin, aringino aringin ki yi.” Eli oko penyere be, “Woda, nyo otimere?”



¹⁷Aor nono oko dwoko be, “Isirikalen me Isirael oringo tenge kibus isirikalen me Pilistia; koneko isirikalen atos me Isirael ribo kiton awobe ni are da, Kopuni kede Pinekasi, doko da komao Sanduku me Isikan ka Rubanga.”

¹⁸Kakame en ewaco kede nying Sanduku me Isikan ka Rubanga, Eli oko potu ataru ki kom kame oudo etie bedo iye i nget erute; kite kame oudo etieko ti kede di doko oudo ecwe, ngute oko tur di eko to. En oudo ebedo ngatel i Isirael pi mwakini ot ongwon.

To ka Apuserut ka Pinekasi

¹⁹Ci wot ka Eli, dako ka Pinekasi, oudo oyac doko kare oudo onoko me en nywal. Kakame en ewinyo kede be komao Sanduku me Isikan ka Rubanga, kede doko da be papa me cware kede cware da otieko to, en eko riondiko di eko nywal, pien aramo me nywal oudo obwone.

²⁰Kakame oudo eyapuno to kede, mon kame oudo tie cole oko waco ne be, “Kur ibed kede lworo, inywalu atin awobi.” Do likame en edwoko kop moro amoto keto iye tam mere da.

²¹En eko cako nying atin nono Ikabod, kame dwong mere be, “Deyo ka Rubanga otieko weko Isirael,” pien oudo kotieko mano Sanduku me Isikan ka Rubanga, kede doko da pi to ka papa me cware karacel kede me ka cware.

²²En ewaco be, “Deyo ka Rubanga otieko weko Isirael, pien kotieko mano Sanduku me Isikan ka Rubanga.”

1 Samuel 5

Sanduku me Isikan i Diere me Jo Pilistia

¹Kakame jo me Pilistia omao kede Sanduku me Isikan ka Rubanga, gin kiko yene yai ki Ebenesa tuno i bomba me Asidod.

²Di do kiko tere i abila ka rubanga gi kame nyinge Dagon, di kiko cibe i nget cal acwea ka Dagon.

³Kakame jo me Asidod oyai kede odiko oru mere, kiko udo di cal acwea ka Dagon opoto piny ariebacuny i nyim Sanduku me Isikan ka Rwot. Gin kiko tinge di kiko dwoke kakare.

⁴Odiko sek oru mere, gin kiko udo di cal acwea ka Dagon opoto bobo ariebacuny i nyim Sanduku me Isikan ka Rwot, di bade kede wie otuturun tie buto kargi ken gi i dog ekeko, kome kenekene en oudo odong.

⁵Manono en komio josaseredoti ka Dagon kede jo dedede kame donyo i abila mere i Asidod kalamo dog ekeko tuno tin.

⁶Rwot oko mino alola atek but jo me bomba me Asidod kede adulon me kio kede. En emio buge ocore i kom jo di jo dedede oko bedo kede lworo.



⁷Kakame jo me Asidod oneno kede gikame oudo tie timere, gin kiko waco be, “Sanduku me Isikan ka Rubanga me Isirael likame poore bedo i diere wa; piento en etie mino wa alola karacel kede rubanga wa Dagon.”

⁸Gin kiko oro jo pi lwongo jopug kany me Pilistia pi cokere karacel, di kiko waco negi be, “Otimunu nyo kede Sanduku me Isikan ka Rubanga me Isirael?” Jo me bomba me Gat oko waco be, “Poore tero Sanduku me Isikan ka Rubanga Gat.” Di do gin kiko tero sanduku nono kuno.

⁹Do kakame gin kitieko tere kede kuno, Rwot oko mino jo me bomba nono da alola, manono oko mino gi lworu adwong. En emio buge ocore i kom jo dedede, joatino kede joadongo rom aroma.

¹⁰Manono oko bin mino gi kicwao Sanduku me Isikan ka Rubanga Ekuron, en bomba ace me Pilistia. Do kakame Sanduku me Isikan ka Rubanga otuno kede Ekuron, jo me Ekuron oko kok be, “Pinyo komio kikelo Sanduku me Isikan ka Rubanga me Isirael kan pi bino neko wan dedede?”

¹¹Gin kiko oro jo pi lwongo jopug me Pilistia pi cokere karacel, di kiko waco negi be, “Terunu Sanduku me Isikan ka Rubanga me Isirael tenge; dwokenu kabedo mere, me tetekeny kur enek wan karacel kede joe wa.” Pien Rwot oudo okelo lworu adwong i bomba nono lung. En emio jo me kuno alola adwong;

¹²jo kalikame oko to, buge oko kwokwotun i kom gi, di jo me bomba oko koko but rubangan gi pi konyo gi.

1 Samuel 6

Kodwoko Sanduku me Isikan Isirael

¹Sanduku me Isikan ka Rwot oko bedo Pilistia pi dwete kanyaare.

²Di do jo me Pilistia oko lwongo josaseredoti gi karacel kede jo kame tucyo gi komungere, di kiko penyoy gi be, “Otim nyo kede Sanduku me Isikan ka Rwot? Wacenu wa gikame opoore dwoke kede i kabedo mere.”

³Gin kiko waco negi be, “Ka iyarunu dwoko Sanduku me Isikan ka Rwot kabedo mere, kur idwokenu abongo gimoro, do dwokenu kede giamia me kwanyo dub. Manoni bino mino icangunu di ikounu ngenyo gikame omio en ebedo mino wu alola.”

⁴Jo oko penyere be, “Ocwai ne giamia nyo?” Gin kiko dwoko be, “Cwaunu cal kany me giakwoti kame kotimo kede saabu, kede da cal me iyoono kany kame kotimo kede saabu da, di lubere kede wel me jopug me Pilistia. Pien tuwo nono omako wu karacel kede jopug wu da.

⁵Aso, poore wun itimunu cal me giakwoti wu kede me iyoono kame tie dudubo lobo wu, di ikounu mino Rubanga me Isirael deyo; cengemogo ebino weko mino wu alola, wun karacel kede rubangan wu kede lobo wu.



⁶Pinyo komio imitunu bedo kede epali bala kame bin jo me Misiri kede Parao otimo kede? I kare kame Rubanga otimo negi kede anywar, mam kiko yei ne jo me Isirael pi yai?

⁷Aso, udunu cabala anyen di ikounu iiko doke amon are kalikame pwodi kotweo i ayoko; tweunu negi ayoko di ikounu kodo negi cabala, do ikounu dwoko roce gi paco kur upere kede gi.

⁸Di do ikounu kwanyo Sanduku me Isikan ka Rwot di ikounu kete i cabala, di ikounu keto sanduku ace i nget manono kame tie iye cal kame kotimo kede saabu, en giamia kame itienu cwano me kwanyo dub wu. Ikounu kolo doke nogo kicak wano cabala di ikounu weko gi kiot ken gi.

⁹Di do wun ikounu neno kakame kiyaro tere iye; ka kitere tetu bomba me Bet Semes, udo dwong mere be Rubanga me jo me Isirael en kocwao ne wa peko noni; do ka li, wan obino ngeno be likame Rubanga nono en kocwao ne wa peko noni, do engole angola bino kene.”

¹⁰Jo oko timo kamanono; gin kitweo ne dok amon are ayoko di kiko kodo negi cabala, di kiko cego roce gi i awi.

¹¹Di do kiko keto Sanduku me Isikan ka Rwot i cabala, karacel kede sanduku kame cal me giakwoti kede cal me iyoono kame kotimo kede saabu tie iye.

¹²Doke nogo oko tiro atira yongayo ot tetu Bet Semes di kilubo yongayo acel adwong abongo parao. Gin oudo kikok di kioto. Jopug kany me Pilistia oko lubo gi paka tuno i ikor me Bet Semes.

¹³Aso, jo me Bet Semes oudo tie nyaro engano gi i aditot. Kakame kitingo kede wang gi malo di kiko neno Sanduku me Isikan, gin kiko ot pi riamo kede di kilelo.

¹⁴Doke oko wano cabala paka i potu me icuo moro anyinge Yosua, kame oudo tie Bet Semes, di kiko cungo i nget kidi ati. Gin kiko bebelo ibaon kame oudo kotimo kede cabala di kiko wango kede doke nogo bala giayala awanga but Rwot.

¹⁵Jolebi oko tingo Sanduku me Isikan ka Rwot kede sanduku kame oudo tie iye cal kame kotimo kede saabu, di kiko keto gi i wi kidi ati. Di do jo me Bet Semes oko mino giayala awanga kede giayala ace apat but Rwot.

¹⁶Jopug kany me Pilistia oneno gi di kitimo kamanono di kiko dok Ekuron cenge nono.

¹⁷Jo me Pilistia ocwao cal me giakwoti kany me kotimo kede saabu but Rwot bala giamia pi culo dub gi; acel pi bomba me Asidod, acel pi bomba me Gasa, acel pi bomba me Asikelon, acel pi bomba me Gat, kede acel pi bomba me Ekuron.

¹⁸Doko da kicwao cal me iyoono kany me kotimo kede saabu, di lubere kede wel me bomban kany me Pilistia kame jopug kany pugo, bomban kame kocelo kede apama ribo kede calere kalikame kocelo. Kidi ati kame oudo tie i potu ka Yosua i Bet Semes,



kame gin kiketo Sanduku me Isikan ka Rwot i ngete, pwodi tie cungo tuno tin bala mujura me gikame otimere.

¹⁹Rwot oko neko cuo ot kanyaare me Bet Semes pien gin kingio yi Sanduku me Isikan ka Rwot. Jo oko bedo kede iturur pien Rwot oneko jo atos kikom gi.

Sanduku me Isikan i Kiriati Yearim

²⁰Di jo me Bet Semes oko waco be, “Ngai kame sobolo cungo i nyim Rwot, Rubanga kacil noni? Tuai kame eoti iye tetekeny ewek wan odong ken wa?”

²¹Aso, gin kiko oro jo but jo me Kiriati Yearim pi waco negi be, “Jo me Pilistia otieko dwoko Sanduku me Isikan ka Rwot. Bia iomenu.”

1 Samuel 7

¹Jo me Kiriati Yearim oko omo Sanduku me Isikan ka Rwot di kiko tere i ot ka Abinadab i wi emukura. Gin kiko kwero wode kame nyinge Eleasar pi bedo ngat kame gwoko Sanduku nono.

Samuel Opugo Isirael

²Sanduku me Isikan ka Rwot oko bedo Kiriati Yearim pi kare alac, aromo bala mwakini ot are, di jo dedede me Isirael oko donyo paro Rwot.

³Samuel oko waco ne jo me Isirael be, “Ka imitunu dok but Rwot kede cunyu dedede, poore iwekunu rubangan mogo me kumbor, kede cal me rubanga adako anyinge Asitate. Ketunu cunyu i kom Rwot, di ikounu tic nen kenekene, di en eko bino lako wu ki cing jo me Pilistia.”

⁴Aso, jo me Isirael oko weko caljwogi ka Baal kede me Asitate, di kiko donyo tic ne Rwot kenekene.

⁵Di Samuel oko waco be, “Cokunu jo dedede me Isirael Misipa, ango abino lego but Rwot piru i kuno.”

⁶Aso, jo oko cokere Misipa, di kiko twomo pii di kiko onye i nyim Rwot bala giamia, kiko kanyo kec cenge nono yuluyul. Gin kiwaco be, “Wan odubo i nyim Rwot.” Samuel bin oko doko ngat kame kope dedede me Isirael tie i cinge i Misipa.

⁷Kakame jo me Pilistia owinyo kede be jo me Isirael bin ocokere Misipa, jopug kany me Pilistia oko yai kede isirikalen gi pi ot suro gi. Jo me Isirael oko winyo kop noni di lworu oko mako gi,

⁸di kiko waco ne Samuel be, “Meede koko nakanaka but Rwot Rubanga wa pirwa; legi amoto elak wa ki cing jo me Pilistia.”

⁹Aso, Samuel oko kwanyo atin emerekek apwodi dot di eko wange alutu bala giayala awanga but Rwot. Samuel oko kok but Rwot pi konyo jo me Isirael, Rwot oko gamo koko mere.



¹⁰Kakame Samuel oudo tie mino kede giayala awanga, jo me Pilistia oko do nyiko iyapiyapi pi suro jo me Isirael; do i ceng nono dwan Rwot oko mwoc ne jo me Pilistia di eko mino wi gi ototolun, di gin kiko ringo tenge kikut jo me Isirael.

¹¹Di do cuo me Isirael oko yai ki Misipa kiko donyo wapo jo me Pilistia, di kiko donyo neneko gi i yongayo paka tuno Betekar.

¹²Di do Samuel oko kwanyo kidi di eko sipe i dierediere me Misipa kede Yesana, di eko cako nying kanono be Ebenesa, piento en ewaco be, “Rwot obedo konyo wa paka kan.”

¹³Aso, di oko bwono jo me Pilistia di likame bobo kiko donyo i lobo me jo me Isirael; Rwot oko bedo tic kede twer mere pi bwono jo me Pilistia i kare lung me kuo ka Samuel.

¹⁴Rwot oko dwoko ne jo me Isirael bomban dedede kame jo me Pilistia oudo omao cako ki Ekuron tuno Gat, doko jo me Isirael oko dwoko lobo gi kikut jo me Pilistia. Anapakin da oudo tie i dierediere me jo me Isirael kede jo Amor.

¹⁵Samuel oko pugo Isirael pi kare me kuo mere lung.

¹⁶Mwaka acelacel en oudo erimaro Betel, Giligal, kede Misipa, di eko ngolo kop i diere me jo apido.

¹⁷Ingei timo kamanono en bin eko dok ture i bomba me Rama, kakame bin en eko timo iye da tic me ngolo kop i diere me jo atie kede pido. En bin eko gero alutari me yalo Rubanga Rama.

1 Samuel 8

Jo Openyo be Kimito Abaka

¹Kakame bin Samuel oti kede, en eko mino awobe mege obedo jongolkop i Isirael.

²Awobi kao mere oudo nyinge Yoweri, kede me are mere oudo nyinge Abija; gin oudo kibedo jongolkop i Beereseba.

³Do awobe mege likame oko lubo ekite me kuo meren, do kiko lokere tenge bedo jo kame mito ud, omio kiko donyo gamo cemusana, doko di likame kingolo ne jo kop kakare.

⁴Ceng moro acel joadongo me Isirael oko cokere karacel di kiko ot Rama but Samuel,

⁵ di kiko waco ne be, “Neningo, in itieko ti do awobe ni likame tie lubo ekite me kuo nin; pi mano, yer ne wan abaka kame bino pugo wa bala atekerin apat.”

⁶Do Samuel likame cunye oko bedo yom kakame gin kiwaco kede be, “Yer ne wa abaka kame bino pugo wa.” Samuel oko lego but Rwot,

⁷di Rwot oko waco ne be, “Yei kope dedede kame jo tie waco ni; pien likame gin kidagin, do gin kitieko daga bala abaka gi.



⁸Bala kame gin kibedo timo nango kede cako i ceng kame ango awoto gi kede ki Misiri tuno tin, di kiweka kiko lokere woro rubangan ace, nan kitie timo ne ida kamanono.

⁹Nan in do yei kop gi; kenekene in kwenyaro gi kite kame abaka bino tero gi kede.”

¹⁰Aso, Samuel oko waco kope ka Rwot dedede ne jo kame oudo tie penye pi mino gi abaka.

¹¹En ewaco negi be, “Abaka kame bino pugo wu bino tero wu kaman: en ebino kwanyo awobe wu di eko mino gi kidoko isirikalen; mogo bino tic kede cabalan me yi, apat mege bino bedo jo kame ringo kede asigiran mege me yi, kede apat mege bino bedo jo kame oto kede tien gi di kidaro cabalan me yi.

¹²En ebino mino mogo kikom gi doko jodongo me isirikalen tutumia, apat mege jodongo me isirikalen ot kany. Awobe wu bino puro poto mere, kede koko cam mege kipoto mere. Ace bino bedo jocwei jamini mege me yi kede me kom cabalan mege.

¹³En ebino tero anyira wu kidoko jo kame nyalo nen mo angwe kur kede kame tedo nen cam kede kame tedo nen mugati.

¹⁴En ebino gamo poti wu abeco me olok kede me olibeti di eko mino jotic mege adongo.

¹⁵En ebino tero acel me tomon me engano wu kede me anyakini me olok wu di eko mino but jotic mege adongo.

¹⁶En ebino tero ipasoi kede apasoi wu, kede doke kede pundan wu abeco di eko mino gi kidonyo timo nen tic.

¹⁷En ebino tero acel me tomon me leini wu, di eko mino wun idokunu ipasoi mege.

¹⁸I kare nono wun ibinunu bedo kede koko i kom abaka wu kame wun kikomu iyerunu, do Rwot likame bino gamo koko wu.”

¹⁹Do jo oko dagi winyo kop ka Samuel; gin kiwaco be, “Li ba! Wan otieko moko be omi abaka apugo wa,

²⁰tetekenya wada odok cal bala atekerin apat, di abaka wa pugo wa kede di etelo wa ot yi, doko di eyi pirwa.”

²¹Samuel owinyo kope dedede kame jo owaco di eko waco gi ne Rwot.

²²Rwot oko waco ne Samuel be, “In yei gikame gin kiwaco di iko mino gi abaka kame pugo gi.” Samuel oko waco ne jo me Isirael be, “Ngat acelacel dok ture.”

1 Samuel 9

Saulo Oriamo kede Samuel

¹Oudo tie icuo moro kobaro kame nyinge Kis, kame oudo obedo dano me ekeko ka Benjamin. En oudo ebeto wot ka Abiel, kobedo wot ka Seror, kobedo wot ka Bekorat, kobedo wot ka Apia.



²En oudo etie kede wode anyinge Saulo, awobi acil twatwal. Oudo likame tie icuo moro kikom cuo me Isirael kame cil kalamo en. Ka oudo en ecungo, wie oudo kalamo wi jo dedede me Isirael kede boro.

³Ceng moro acel pundan ka Kis papa me Saulo oko rwenyo. Kis oko waco ne wode Saulo be, “Kwanyi awobi acel iupere kede iotunu imounu pundan.”

⁴Gin kiko beo i piny kobedo imukuran imukuran me Epuraimu kede i lobo me Salisa, do likame kiko udo gi. Doko kiko beo i lobo me Salim, do likame kiko udo gi. Di kiko beo i lobo ka Benjamin, do likame kiko udo gi.

⁵Kakame kituno kede i lobo me Sup, Saulo oko waco ne awobi kame oudo upere kede be, “Odok do paco, cengemogo papa na bino weko paro punda di eko lokere paro wan.”

⁶Do awobi nono oko waco ne be, “Tie icuo moro kobedo dano ka Rubanga i bomba noni, en ebedo dano kame jo woro. Gi dedede kame en ewaco nakanaka cobere kakare. Ber kong ooti bute, cengemogo etwero waco ne wa kakame otwero udo iye pundan nogo.”

⁷Di Saulo oko dwoko ne awobi nono be, “Do ka ooto bute, nyo kame obino mine? Pien likame tie mugati moro odong i ikapun wa, doko da likame otie kede giamia moro kame otwero mino dano ka Rubanga. Nyo kame otie kede?”

⁸Awobi nono oko dwoko ne Saulo be, “Ango atie kede ogap moro me siliba, ango abino mine manoni di en eko waco ne wa kakame oyaro udo iye pundan.”

⁹(I kare kasek i Isirael, ka ngatamoro oudo mito ot penyo kop moro kibus Rubanga, oudo ewaco be, “Bia ooti but nganeno” ; pien ngat kame nan kolwongo be enabi oudo bin kolwongo be nganeno.)

¹⁰Saulo oko dwoko ne awobi nono be mano ber, bia ooti. Aso, gin kiko ot i bomba kakame dano ka Rubanga oudo tie iye.

¹¹Kakame oudo kitie yito kede i wi emukura ot i bomba, gin kiko riamo kede anyira mogo di kitie wok twomo pii, di kiko penyo anyira nogo be, “Nganeno tie?”

¹²Gin kiko dwoko be, “Etie, en ica i nyimu. Bunyunu ot; en pwodi nan etuno atuna i bomba, pien tie jo oyaro tero giayala gi pi yalo i abila.

¹³Cucuto ka idonyunu i bomba, ibinunu ude di pwodi likame eoto cam i abila. Pien jo likame bino cako cam di pwodi likame en etuno, pien miero en kong emi giayala winyo di do jo kame kolwongo ko cam. Nan wun otunu, iyarunu bunyo riamo kede en.”

¹⁴Aso, gin kiko ot i bomba. Kakame gin oudo kitie donyo kede i bomba, gin kiko neno Samuel di etie bino tetu but gi di oudo etie ot i abila.

¹⁵Aso, ceng acel cen di pwodi Saulo likame obino, Rwot oudo owaco ne Samuel kaman:



¹⁶” Diki tetu esawa noni ango abino cwano ni icuo moro me lobo ka Benjamin, di in iko bino wire kede mo pi bedo ngapug me jo na me Isirael. En ebino lako jo na ki cing jo me Pilistia. Pien ango atieko neno can kame jo na tie neno di ako yei winyo koko gi.”

¹⁷Kakame Samuel oneno kede Saulo, Rwot oko waco ne be, “Icuo nono ine kame oudo ango awaco ni kop i kome. En kame ebino pugo jo na.”

¹⁸Di Saulo oko ot but Samuel i nget erute di eko waco ne be, “Okwe waca, ot ka nganeno tie tuai?”

¹⁹Samuel oko dwoko be, “Ango en nganeno; tel na yongayo kong ooti i abila, pien tin in ibino cam kede ango, do diki odiko ango ako bino weki ioto di atieko dwoko peny ni dedede.

²⁰I kom kop amako pundan ni korwenyo ceng adek cen, kur doko imeede paro gi, pien kotieko udo gi. Do ngai en kame jo me Isirael dedede oketo mit gi i kome? In inonono, in karacel kede jo me ot ka papa ni.”

²¹Saulo oko dwoko be, “Ango abedo dano me ekeko ka Benjamin, en ateker atitidi kalamo i Isirael, doko ot wan kony akonya i ateker ka Benjamin. Pinyo do komio in iwaco na kop acal kamano?”

²²Di Samuel oko tero Saulo kede awobi ngatic mere i agola alac di eko mino gi kabedo me wor i emesa, kakame oudo wele apat aromo 30 kame kolwongo tie bedo iye.

²³Samuel oko waco ne ngatedo be, “Kel ringo kame oudo ango ami ca, kame oudo ango awaco ni be ipok tenge.”

²⁴Ngatedo oko kelo ringo me amuro kede ace apat di eko keto i nyim Saulo. Samuel oko waco be, “Neningo, ringo kame oudo kokano nin ine. Came; kokele i nyimi i esawa noni tetekeny icame kede wele kame kolwongo.” Aso, Saulo oko cam kede Samuel cenge nono.

²⁵Kakame kiyai kede ki abila dok i bomba, oko peto ne Saulo kabuto i wi ot malo, en eko buto di eko nino.

Samuel Owiro Saulo Odoko Ngapug

²⁶Di do piny otuno obai, Samuel oko lwongo Saulo ki wi ot be, “Yai tetekeny anyamaro in ioti.” Saulo oko yai di eko upere kede Samuel kioto i gudo.

²⁷Kakame oudo kituno kede i ajikini me bomba, Samuel oko waco ne Saulo be, “Wace awobi no kat anyim. Ka en etieko kato in kong iko cungo pi esawa atitidi, tetekeny awaci gikame Rubanga owaco.”

1 Samuel 10

¹Di Samuel oko kwanyo opoko me mo me olibeti di eko onyo i wi Saulo eko note, di eko waco ne be, “Rwot otieko wiri idoko ngapug me jo mege me Isirael. In ibino



pugo jo mege di iko gwoko gi kibus jokwor gi dedede. Gikame nyuto be Rwot otieko yeri pi bedo ngapug me jo mege ine:

²kame in tin itieko yai kibuta, ibino riamo kede jo are i nget ates ka Lakeri kame tie Selesa i adul ka Benjamin. Gin kibino waco ni be pundan kame in oudo itie mono otieko udere, nan do papa ni likame tie paro gi do elokere do paro wun di ewaco be, ‘Abino timo nadi pi woda?’

³Di in iko bino meede ot paka tuno i yat oak me Tabor. Cuo adek kame tie ot Betel woro Rubanga bino riamo kedi kuno, acel peo idwe diegi adek, ace mako mugati adek, kede ocelu mako isau me lau kame bwini tie iye.

⁴Gin kibino moti di kiko mini mugati are, kame poore in igami.

⁵Ingei manono in iko bino ot i Moru ka Rubanga kame tie Gibeaa, kakame isirikalen me Pilistia ogero iye kimere gi. Di do ka itie donyo i bomba, ibino riamo kede ekodet me inabin di kitie lor wok ki abila kame tie i wi moru, di kotie gono adungu, ayekeyeke, arigirigi kede di kokuto bilo i nyim gi; ibino riamo kede gi di kitapaun yamo kop ka Rubanga kede twon yomcuny.

⁶Di do tipo ka Rwot ko bino donyo i komi di ida iko atapaun cako tuco kop ka Rubanga kede twon yomcuny karacel kede gin, di iko lokere idoko dano apat.

⁷Kame gianena nogi otimere ni, tim gi dedede kame ibino neno poore ni me atima, pien Rubanga bino bedo tie kedi.

⁸In ibino cako ot nango Giligal di ango ako bino udi kuno pi mino giayala awanga kede pi mino giayala me nywak. In ibino kura pi ceng kanyaare paka ango tuno di ako waco ni gi kame ipoore timo.”

⁹Kakame Saulo oloko kede ngee yai, Rubanga oko mino Saulo cuny anyen, di gi dedede kame Samuel owaco ne cenge nono oko cobere.

¹⁰Kakame gin kiyai kede ki kuno di kitie ot Gibeaa, en eko riamo kede ekodet me inabin, di tipo ka Rubanga oko donyo i kome; di eda eko tapaun cako tuco kop ka Rubanga kede yomcuny karacel kede gin.

¹¹Kakame jo dedede koudo ngee sek oneno kede kite kame eyamo kede kop ka Rubanga bala enabi karacel kede inabin ace apat, jo oko donyo penyere ken gi ken gi be, “Nyo kotieko timere ne wot ka Kis? Benyo, Saulo da otieko doko enabi?”

¹²Icuo moro kame oudo bedo kanono oko dwoko be, “Do ngatel me inabin go obedo ngai?” Manoni en oko nywalo yamo kame waco be, “Benyo, Saulo da otieko doko enabi?”

¹³Kakame Saulo otieko atapaun yamo kede kop ka Rubanga di emielo kede yomcuny, en eko dok paco.

¹⁴Omin me papa me Saulo oko penye karacel kede awobi ngatic kame oudo eupere kede be, “Oudo wun iotunu tuai?” Saulo oko dwoko be, “Wan oudo ooto mono pundan, do kakame likame oko twero udo gi kede, wan oko ot but Samuel.”



¹⁵Omin me papa me Saulo oko waco ne be, “Wacanu gikame Samuel owaco ne wu.”

¹⁶Saulo oko dwoko ne be, “En ewaco ne wa be kotieko udo pundan nogo.” Do Saulo likame oko waco ne kop kame Samuel oudo owaco ne amakere kede en doko abaka.

Koyero Saulo pi doko Abaka

¹⁷Samuel oko lwongo jo pi cokere Misipa pi riamo kede Rwot

¹⁸di eko waco negi be, “Rwot Rubanga me Isirael owaco be, ‘Ango awoto wun jo me Isirael ki Misiri, di ako lako wu ki cing jo me Misiri kede ki cing ajakanuto dedede kame oudo tie tero wu kirac.’

¹⁹Do wun tin itiekunu dagi Rubanga wu, ngat kalako wu ki peko kede ki can dedede, di ikounu waco be, ‘Li! Do ket ne wan abaka apugo wa.’ Nan do cungunu i nyim Rubanga di lubere kede atekerin kede ikekon wu.”

²⁰Di Samuel oko mino ateker acelacel me Isirael onyikino anyim, di alulu oko nyuto ateker ka Benjamin.

²¹Di en eko mino jo me ikekon dedede me ateker ka Benjamin onyikino anyim di alulu oko nyuto ekeko ka Maturi. Me ajikini en eko mino jo me ekeko ka Maturi obino anyim acelacel, di alulu oko nyuto Saulo wot ka Kis. Gin kiko donyo mone do likame kiko ude.

²²Di do gin kiko bobo penyo Rwot be, “Icuo nono da oudo obino kan?” Rwot oko dwoko be, “Saulo ica tie pwono i dier jame.”

²³Gin kiko ringo ot ome ki kuno. Kakame ecungo kede i dier jo, wie kede epepet mege oudo bor kalamo me jo dedede.

²⁴Di Samuel oko waco ne jo dedede be, “Man en dano kame Rwot oyeru! Likame tie ngatamoro ace bobo kame cal bala en.” Di jo dedede oko lelemo be, “Abaka bed kuo pi kare kalac!”

²⁵Samuel oko tatamo ne jo twero kede tice me abaka; eko wandiko gi i itabu di eko cibo itabu nono i nyim Rwot. Di do Samuel oko peruno jo dedede odok i miere gi.

²⁶Saulo da oko dok paco mere Gibea. Cuo mogo atek yi kame Rubanga oudo odonyo i cuny gi da oko upere kede en.

²⁷Do jo mogo akony gi li oko penyere be, “Kom ateteni icuo ni twero lako wan?” Gin kicae di kiko dagi mine giamia. Do en eko gire kweno kome.

1 Samuel 11

Saulo Obwono Jo Amon

¹Di kare okato bala duwe acel, Abaka Nakas me Amon oko telo isirikalen mege ot yi di kiko lukaro bomba me Jabes kame tie Gilead. Cuo dedede me Jabes oko waco ne Nakas be, “Tim kede wa isikan, di wan oko donyo tic nin.”



²Do Nakas dano me Amon oko waco negi be, “Abino yei timo kede wu isikan kwanyo kenekene ka iyeunu be agol wang ngat acelacel me tetu cam, manono ko bino mino lewic mako jo dedede me Isirael.”

³Jotel me Jabes oko waco ne be, “Wek wa ber kong pi ceng kanyaare, me wek kong ocwai jo kadedere dedede me Isirael. Ka ngatamoro asobolo konyo wa likame oko udere, di do wan oko bino jalere i twer nin.”

⁴Kakame jo kame kocwao otuno kede Gibeaa kakame Saulo bedo iye, gin kiko waco kop nono di jo dedede tie winyo; jo dedede oko koko kede dwan amaloo.

⁵Esawa nono Saulo oudo tie dwogo kede twonin ki potoo, di en eko penyere be, “Nyo arac? Pinyo komio jo dedede tie koko?” Gin kiko waco ne kop kame jo me Jabes ocwao.

⁶Kakame Saulo owinyo kede manoni, tipo ka Rubanga oko donyoo i kuo mere, di eko doko ger.

⁷En eko kwanyo twonin are di eko ngongolo gi i adulion atitino di eko cwano jo oyeo adulion nogo rimaro kede gi kadedere dedede me Isirael, kede ikwenyar kame waco be, “Ngat odagi lubo Saulo kede Samuel ot i yi, kobino timo ne twonin mege da kamanoni!” Jo me Isirael oko bedo kede lworoo pi gikame Rwot oudo twero timo, di do jo dedede oko cokere kede cunyi acel abongo ngatamoro dong.

⁸Saulo oko cokoo gin dedede Besek; jo kowok ki Isirael oudo tie tutumia tol adek (300,000), kede jo kowok ki Yuda oudo tie tutumia ot adek (30,000).

⁹Gin kiko waco ne jo kame kocwao ki Jabes be, “Otonu iwacunu ne jo me Jabes be, tuno esawa me i dier iceng diki udo kotieko lako wu.” Kakame jo kame oudo kocwao obino di kiko waco ne kede jo me Jabes kop nono, gin kiko leloo.

¹⁰Di do jo me Jabes oko waco ne Nakas be, “Diki wan obino jalere i cingi di do in iko timo ne wa gikame cunyi mito.”

¹¹Iwor nono Saulo oko popoko jo mege i ikodeta adek. Obai gin kiko ot i kimere me isirikalen me jo Amon di kiko suro gi, di kiko donyoo ngolongolo ngut gi paka tuno esawa kanyape. Jo kobwot oko ringo ngat acelacel yore kene.

¹²Jo oko waco ne Samuel be, “Alu oudo en kowaco be Saulo likame twero pugo wan? Kelunu gi but wa tetekenyo onek gi!”

¹³Do Saulo oko dwoko be, “Likame tie ngatamoro kame kobino neko tin, pien tin en ceng kame Rwot olako kede jo me Isirael.”

¹⁴Samuel oko waco ne jo be, “Bianu ootunu Giligal pi medo moko abaka wa odocon.”

¹⁵Aso, jo dedede oko ot Giligal di kiko moko Saulo i nyim Rwot pi bedo abaka. Gin kiko mino giayala me nywak i nyim Rwot ki kuno, di Saulo kede jo dedede me Isirael oko kilel twatwal.

1 Samuel 12



Kop kame Samuel Owaco ne Jo

- ¹Samuel oko waco ne jo dedede me Isirael be, “Ango atieko yei kope dedede kame iwacunu na, di nan ako keto ne wu abaka kame pugo wu.
- ²Nenunu, abaka en kame nan do telo wu; ango atieko ti, doko lwar omako wia; do awobe na tie kede wu. Ango abedo telo wu cako di pwodi ango atin awobi tuno tin.
- ³Ango nan ine kan; wacanu i nyim Rwot kede i nyim abaka mere kame en eyero, gimoro arac kame ango atimo. Ngai kame ango atieko tero twon mere? Ngai kame ango atieko tero punda mere? Arabo ngai kame ango atieko kwalo, arabo kame atieko tero kirac? Arabo ngai kame ango atieko gamo cemusana kibute pi umo wanga? Ka ango atieko timo gi nogi, tucanu di ango ako bino culo wu.”
- ⁴Jo oko dwoko be, “In likame ikwalo wa amoto tero wa kirac, akadi tero gimoro kibut ngatamoro.”
- ⁵Samuel oko waco be, “Rwot karacel kede abaka kame en eyero tie ijurak na be, i ceng atin likame tie gimoro arac kame iudunu buta.” Jo oko dwoko be, “Ebo, Rwot en mujura wa.”
- ⁶Samuel oko meede kede yamo be, “Rwot en mujura wa, en ngat kame bin eyero Musa kede Aaron di eko woto joakwari wu ki lobo me Misiri.
- ⁷Pi mano, nan do cungunu ikounu winyo, di ango apido wu i nyim Rwot; di atuco ne wu tice dedede me alako kame Rwot otimo ne wu kede ne joakwari wu.
- ⁸Di bin Yakobo kede jo me ture ooto Misiri di jo me Misiri oko donyo tero gi kirac, joakwari wu bin oko kok but Rwot di Rwot oko cwano negi Musa kede Aaron, jo kame oko woto joakwari wu ki Misiri di kiko kelo gi di kiko mino gi bedo i lobo noni.
- ⁹Do wi jo oko wil kede Rwot Rubanga gi, di en eko jalo gi i cing Sisera, en ngadwong me isirikalen ka Abaka Jabin me Asor, kede i cing jo me Pilistia, kede i cing abaka me Moab; jo nogi oko yi kede joakwari wu paka bwono gi.
- ¹⁰Joakwari wu oko kok but Rwot di kiwaco be, ‘Wan otieko dubo, pien wan oweki Rwot di oko donyo woro rubangan Baal kede Asitate; do nan lak wa ki cing jokwor wa di wan oko donyo bino wori! ‘
- ¹¹Di Rwot oko cwano Jerubal, Barak, Yeputa kede ango, di wan oko lako wu ki cing jokwor wu, di ikounu bedo kede mulem.
- ¹²Do kakame inenunu kede be Abaka Nakas me Amon oudo mito suro wu, wun ikounu waco na be, ‘Li ba, wan omito abaka kame bino pugo wa, ‘bed bala Rwot Rubanga wu en oudo obedo abaka wu.
- ¹³” Nenunu, abaka kame wun iyerunu ine; wun en ipenyunu be mi wu, nan Rwot otieko keto ne wu abaka noni pi pugo wu.



¹⁴Gi dedede bino bedo ne wu kiber ka ibinunu lworu Rwot di ikounu tic ne en, kede ka iwinyunu dwane di likame ikounu weko lubo cik mege, ka wun dedede karacel kede abaka kame pugo wu olubo kop mere.

¹⁵Do ka wun ibinunu dagi winyo dwan Rwot, di ikounu bino dagi lubo cik mege, Rwot bino tojo wu, wun karacel kede abaka wu.

¹⁶Pi mano, nan do cungunu kanoni di ikounu neno gi adwong kame Rwot oyaro timo i nyimu.

¹⁷Mam kare me oro ine kame jo nyaro iye engano? Aso, ango ayaro lwongo Rwot di en eko cwano kot acwei di emwomwocun; manono bino mino ingeunu raco wu adwong kame itimunu i nyim Rwot, en raco me penyobu mi wu abaka kame pugo wu.”

¹⁸Aso, Samuel oko lego but Rwot, di Rwot oko cwano kot kame cwei di emwomwocun i ceng nono.

¹⁹Jo dedede oko waco ne Samuel be, “Leg but Rwot Rubanga ni pi jotic ni, tetekey kur otoi; pien wan otieko medo i kom dub wa raco me penyobu mi wa abaka kame pugo wa.”

²⁰Samuel oko dwoko be, “Kur ibedunu kede lworu; wun itiekunu timo raco noni, do kur iwekunu lubo Rwot, do tiunu ne kede cunyu lung.

²¹Kur ilokerenu lubo caljwogi, gimogo kame kony gi li, gi kalikame kelo ne wu bero moro arabo lako wu, pien kony gi li.

²²Pien Rwot likame bino uco jo mege, likame ebino timo manoni pi gwoko nyinge adwong, pien etieko yomo cunyu Rwot pi mino wun doko jo mege.

²³Do kitetu buta, likame ango amito timo dub but Rwot i yore me jiko lego ne wun, do ango abino pwonyo wu gikame ber kede kopoore kame ipoorenu timo.

²⁴Kenekene lworunu Rwot, di ikounu timo ne tic kede genere kede cunyu lung; kong yutununu gi adongodongo kame en etimo ne wu.

²⁵Do ka imeedenu kede dub, kobino wearo wun dedede karacel kede abaka wu.”

1 Samuel 13

Saulo Oyi kede Jo me Pilistia

^{1 2}Saulo oko yero cuo tutumia adek (3,000) me Isirael; cuo tutumia are (2,000) oko dong kede en Mikimas kede i lobo kobedo mori mori me Betel, di eko cwano cuo tutumia acel (1,000) Gibeabede wode Jonasan, i adul ka Benjamin; jo apat en eko cwano odok i miere gi.

³Jonasan oko neko ngadwong me isirikalen me Pilistia i Geba di jo me Pilistia oko winyo kop nono. Saulo oko cwano jo pi kuto agwara i lobo me Isirael dedede pi lwongo Iburanian ot yi.



- ⁴Jo dedede me Isirael oko winyo be Saulo oneko ngadwong me isirikalen me Pilistia, kede da be jo me Isirael otieko doko bala gi angwece mere rac but jo me Pilistia. Jo oko yei lwongo me ot konyo Saulo i Giligal.
- ⁵Jo me Pilistia oko cokere pi ot yi kede jo me Isirael; oudo kitie kede cabalan tutumia ot adek (30,000), kede jo yi kame ringo kede asigiran tutumia kanyape (6,000), kede isirikalen kame tot bala asinge me dog nam. Gin kiko ot di kiko gero kimere gi Mikimas, tetu kide me Bet Aben.
- ⁶Kakame jo me Isirael oneno kede be jokwor oudo tie dino isirikalen gi, gin kiko ot pwopwono i abo, kede i buge, kede i dier kide me mori, kede i atesin kame koroko i lela, kede i bure mogo kame jo kunyo me koko pii.
- ⁷Iburanian mogo oko ngolo ecilet me Yorodan ot i lobo me Gad kede Gilead. Saulo oudo pwodi tie Giligal, di jo dedede kame oudo tie kede en kom gi oko donyo miel amiela pi lworo.
- ⁸Saulo oko kuro pi ceng kanyaare bala kame Samuel oudo owaco ne, do likame Samuel oko bino Giligal, di do isirikalen oko cako yai weko Saulo.
- ⁹Aso, Saulo oko waco be, “Kelanu giayala awanga kede giayala me nywak.” Di en eko mino giayala awanga.
- ¹⁰Cucuto di en etieko mino giayala awanga, Samuel oko tuno; en eko ot bute pi riamo kede di eko game.
- ¹¹Samuel oko penye be, “Nyo kame in itimo?” Saulo oko dwoko be, “Kakame ango aneno kede be isirikalen oudo tie yai weka, do di in oudo likame iko bino i kare me ceng kanyaare kame oudo ocikere kedi iye, doko di medo i wi mano isirikalen me Pilistia oudo tie cokere Mikimas,
- ¹²ango do ako waco kena be, ‘Jo me Pilistia nan tie bino sura i Giligal, do di likame ango pwodi akwao winyo kibut Rwot’ ; manoni oko dina tetek pi mino giayala awanga.”
- ¹³Samuel oko waco ne Saulo be, “In itieko timo tim me mingo; in likame ilubo cik ka Rwot Rubanga ni kame eciko ni. Rwot oudo oyaro mino ajakanut nin cungo i Isirael pi ikar kede ikar.
- ¹⁴Do nataman ajakanut nin likame bino meede; Rwot bino udo dano kame cunye mito di eko mine edoko ngat kame pugo jo mege, pien likame itieko lubo gikame Rwot ociko ni pi timo.”
- ¹⁵Samuel oko yai ki Giligal di eko mako yongayo mere. Jo ace apat oko lubo Saulo ot but isirikalen, yai ki Giligal tuno Gibeaa, en adul ka Benjamin.
- ¹⁶Saulo, wode Jonasan, kede jo kame oudo tie kede gi oko bedo Geba kakobedo adul ka Benjamin; do isirikalen me Pilistia oko gero kimere gi Mikimas.
- ¹⁷Isirikalen oko wokun ki kimere me jo me Pilistia i ikodeta adek pi cako yi; ekodet acel odok tetu Opura i lobo me Sual,



¹⁸Ekodet ace oko dok tetu Bet Koron, kede ekodet ocelu oko dok tetu ikor kame neeno kede aditot me Seboim kede wi tim.

¹⁹Aso, jotet oudo likame tie i lobo me Isirael dedede, pien jo me Pilistia oudo owaco be, “Iburanian likame poore teto ipimai kede tongini pirgi” ,

²⁰manono oudo omio jo me Isirael dedede obedo ot but jo me Pilistia pi peno leb kwei gi me ecuka, adimai, lee kede pale gi me kac gi.

²¹Wel me peno leb kwei me dok kede kwei me cing oudo tie ogap are, do wel me peno lee kede dupo ebela me kolo ecuka oudo tie ogap acel.

²²Aso, i ceng me yi likame tie sirikale moro me Isirael kame oudo tie kede epima amoto tong, kwanyo kenekene Saulo kede wode Jonasan.

²³Ekodet me isirikalen me Pilistia oko ot paka i aditot kakame yongayo beo iye i Mikimas.

1 Samuel 14

Jonasan Osure Jo me Pilistia

¹Ceng moro acel Jonasan wot ka Saulo oko waco ne awobi kame oudo mako jame mege me yi be, “Bia ongol aditot ooti i kimere me jo Pilistia loka tetuca.” Do likame eko waco ne papa mere Saulo.

²Saulo oudo osipo kima mere i dud yat kame kolwongo be pomagurunet kame oudo tie Migiron, i nget Gibeaa. En oudo etie kede isirikalen aramo bala tol kanyape (600),

³karacel kede Akija wot ka Akitub, omin me Ikabod, wot ka Pinekasi, wot ka Eli, ngat koudo obedo ngasaseredoti ka Rwot i Silo. Akija oudo mako epod. Jo oudo likame ngeo be Jonasan oyai ooto.

⁴I aditot kame yongayo ading oudo beo iye, yongayo kame Jonasan oudo obeo kiye pi ngolo tuno i kimere me jo Pilistia, moru oudo ocego nget yongayo tetuni kede nget yongayo tetuca. Nying moru acel oudo Boses kede ocelu nyinge oudo Sene.

⁵Acel oudo tie tetu malo me yongayo nono kame neeno kede Mikimas, kede ocelu oudo tie tetu piny me yongayo nono kame neeno kede Geba.

⁶Jonasan oko waco ne awobi kame oudo mako jame mege me yi be, “Bia ongol loka ooti i kimere me jo kalikame kokepo ka; cengemogo Rwot bino konyo wa. Pien likame tie gikame twero gengo Rwot kelo alako di etio kede jo atos amoto kede jo anonok.”

⁷Awobi nono oko dwoko be, “In tim gi dedede kame tie i tam ni. Ango atie kedi; tam nango oyaro bedo acel kede meri.”

⁸Jonasan oko dwoko be, “Mano ber, nan wan obino ngolo aditot tuca but cuo go di wan oko yei negi neno wa.



⁹Ka gin kiko waco ne wa pi daro gi bino but wa, wan obino cungo abongo yangere di likame oko ot but gi.

¹⁰Do ka gin kiwaco be ooti but gi, wan obino ot, pien manono nyuto ne wa be, udo Rwot otieko mino gi i cing wa.”

¹¹Aso, gin kiko nyuto kom gi ne isirikalen me Pilistia di isirikalen nogo oko waco be, “Nenunu, Iburanian tie wok ki bure kame oudo kipwono iye.”

¹²Di kiko lwongo Jonasan kede awobi kame oudo mako jame mege me yi be, “Bianu kan, omito nyuto ne wu gimoro!” Jonasan oko waco ne awobi amako jame mege me yi be, “Luba ooti; pien Rwot otieko mino gi i cing jo me Isirael.”

¹³Jonasan oko kwekweda kede conge kede cinge eko yito malo me aditot, di awobi kame mako jame mege me yi lube. Jonasan oko rereto isirikalen me Pilistia piny, di awobi kame mako jame mege me yi, kame oudo tie lube ki cen oko neneko gi.

¹⁴I nek me agege nono, Jonasan kede awobi kame oudo upere kede oko neko jo aromo bala ot are i adul moro atitidi atie bala dul eka.

¹⁵Manono oko kelo lworu i kimere me jo me Pilistia, i calere gi, kede but jo dedede, kede paka but isirikalen gi kede joyak da; piny oko yangere; manono oudo obedo lworu adwong adikinicel.

Kobwono Jo me Pilistia

¹⁶Jo ka Saulo kame oudo kio piny i Gibeaa, en kabedo kame tie i adul ka Benjamin, oko neno di jo tie ringo atatai i kimere me jo me Pilistia.

¹⁷Saulo oko waco ne isirikalen kame oudo tie kede be, “Marunu jo di ikounu neno ngat kame li kibut wa.” Kakame gin kitieko maro kede jo, kiko udo be Jonasan kede ngat kame mako jame mege me yi oudo li.

¹⁸Saulo oko waco ne Akija be, “Kel Sanduku me Isikan ka Rubanga kan.” Pien i kare nono jo me Isirael oudo upere kede Sanduku me Isikan ka Rubanga.

¹⁹Kakame Saulo oudo pwodi tie yamo kede ngasaseredoti, atotolun oko meede ameda i kimere me isirikalen me Pilistia, di Saulo oko waco ne ngasaseredoti be, “Kare me timo mano do li!”

²⁰Di do Saulo kede jo dedede kame oudo tie kede oko siritu ot yi kede jo me Pilistia. Esawa nono isirikalen me Pilistia oudo obedo kede atotolun kiko donyo yi ken gi ken gi.

²¹Di do Iburanian kame oudo oupere kede jo me Pilistia ot i kimere gi oko lokere cako konyo jo me Isirael kame oudo tie kede Saulo kede Jonasan.

²²Jo ace me Isirael da kame oudo ooto pwono i piny kobedo mori mori me Epuraimu oko winyo be jo me Pilistia oudo tie ringo, gida kiko donyo riamere kede gi,



²³di kiko yi paka kalamo Bet Aben. Cenge nono Rwot oko mino jo me Isirael obwono yi. Yi oko nyai paka tuno i piny kobedo mori mori me Epuraimu. Isirikalen kame Saulo oudo tie kede oudo romo bala tutumia tomon (10,000).

Gikame Otimere ingei Yi

²⁴Aso, i ceng nono Saulo oudo otimo ikwong me awakawaka but isirikalen di ewaco be, “Ilam mak ngat kame bino camo cam di pwodi likame piny oyuto, di pwodi likame ango atieko culo kwor i kom jokwor na.” Manono oko mino likame sirikale moro oko bilo cam i ceng nono.

²⁵Isirikalen oko ngole i abum kame mokic tie iye.

²⁶Kakame gin kiudo kede kic i abum, mokic oudo tie totonun piny, do likame ngatamoro oko camo pien oudo kitie lworu ikwong kame kotimo.

²⁷Do Jonasan oudo likame owinyo di papa mere waco be ilam mak ngat koudo oyaro camo gimoro i ceng nono; aso en eko rwako ebela kame oudo tie i cinge i akuru me kic di eko camo mokic, di do eko udo teko.

²⁸Sirikale acel oko waco ne be, “Papa ni oudo ociko wa di ekwongere be, ‘Ilam mak ngat koyaro camo cam tin.’ Aso, isirikalen dedede nan kec obwono.”

²⁹Di Jonasan oko waco be, “Papa na omio jo peko. Neningo ango nan atieko udo teko pien abilo mokic moro atitidi.

³⁰Oudo koto ebedo ber kalamo ka isirikalen oudo ocamo gikame kimao kibus jo me Pilistia, pien oudo koto kitwero neko isirikalen me Pilistia akalamo.”

³¹Ingei jo me Isirael bedo neko jo me Pilistia i ceng nono cako ki Mikimas tuno Aijalon, isirikalen oko nure pi kec;

³²manono oko mino gi kibwangere i kom gikame kimao kibus jokwor, di kiko mamako romini, twonin kede roce di kiko ngongolo gi, di kiko camo gi di pwodi remo tie i kom gi.

³³Di oko waco ne Saulo be, “Neningo, isirikalen tie timo dub i nyim Rwot, pien kitie camo ringo kame remo tie iye.” Saulo oko dwoko be, “Wun iturunu cik; nan lorunu kidi adwong i nyima kan.”

³⁴Saulo oko mino cik ace be, “Otunu but jo di ikounu waco negi be, ‘Poore jo dedede kel doke kede romini gi, di kiko ngongolo gi kan di kiko camo gi; do kur kitim dub but Rwot me camo ringo kame remo tie iye.’ “ Aso, iwor nono isirikalen dedede oko kelo twonin gi di kiko ngongolo gi kanono.

³⁵Saulo oko gero alutari ne Rwot; manono oudo obedo alutari me agege kame Saulo ogero ne Rwot.

³⁶Di Saulo oko waco ne jo mege be, “Ootunu piny okounu suro jo me Pilistia iwor di okounu yako gi paka piny ru; kur owekunu ngatamoro kibus gi di ekuo.” Jo oko



dwoko be, “In tim gikame in ineno be ber.” Do ngasaseredoti oko waco be, “Ber kong openyunu tam ka Rubanga ki kan.”

³⁷Aso, Saulo oko penyo Rubanga be, “Aoti asur jo me Pilistia? Benyo, ibino mino gi i cing jo me Isirael?” Do likame Rubanga oko dwoko peny mere i ceng nono.

³⁸Saulo oko waco ne jo kame oudo telo jo be, “Bianu kan omounu dub kame kotimo tin noni.

³⁹Pien ango alairo i nying Rwot kakuo, ngat kame lako Isirael be, kobino neko ngat kotimo gi nono, akadi bed bala en ebedo woda Jonasan.” Do likame ngatamoro oko dwoko ne kop moro.

⁴⁰Di Saulo oko waco negi be, “Wun ibinunu bedo i bad tetucel, di ango kede woda Jonasan wada oko bedo i bad tetucel.” Jo oko waco ne Saulo be, “In tim gikame ineno be ber.”

⁴¹Di Saulo oko waco be, “Okwe Rwot Rubanga me Isirael, pinyo komio tin likame idwoko dog ngatic ni? Ka dub noni tie but ango kede woda Jonasan, Okwe Rwot Rubanga me Isirael, nyut kede Urim; do ka raco noni tie but jo me Isirael nyut kede Tumim.” Di alulu oko nyuto Jonasan kede Saulo papa mere, do jo apat oko bwot.

⁴²Di Saulo oko waco be, “Ucunu alulu i dierediere nango kede Jonasan.” Alulu oko nyuto Jonasan.

⁴³Saulo oko penyo Jonasan be, “Nyo kame in itimo?” Jonasan oko dwoko be, “Ango awado kic moro atitidi kede wi ebela kame oudo tie i cinga di ako camo; ango ine, ayei to.”

⁴⁴Saulo oko waco be, “Poore Rubanga neka ka likame koneki; Jonasan, ateteni in iyaro to.”

⁴⁵Di jo oko waco ne Saulo be, “Benyo, kom ateteni koyaro neko Jonasan ngat kobwono yi adwong i Isirael? Likame twerere! Wan olairo i nying Rwot kakuo be, likame akadi yer wie acel bino poto piny; pien i ceng atin tic kame en etimo oudo etimo kede kony kame wok kibus Rubanga.” Aso jo oko lako kuo ka Jonasan likame oko neke.

⁴⁶Ingei manono Saulo oko do jiko wapo jo me Pilistia, di jo me Pilistia oko dok i lobo gi.

Apugan ka Saulo

⁴⁷Kakame bin Saulo odoko kede abaka me Isirael, en eko yi kede jokwor mege i bad dedede; eyi kede jo me Moab, Amon, kede Edom, abakai me Soba, kede jo me Pilistia; en ebwono gi i yi dedede.

⁴⁸En eyi kede teko di eko bwono jo Amalek di eko lako jo me Isirael kibus jo kame bin oyako gi.



⁴⁹Awobe ka Saulo gin oudo Jonasan, Isibi kede Malikisua; en oudo etie kede anyira are, nyako adwong nyinge oudo Merab, kede nyako atidi nyinge oudo Mikal.

⁵⁰Dako ka Saulo nyinge oudo Akinoam nyar ka Akimas. Nying ngadwong me isirikalen mege oudo Abuneri wot ka Ner, kame oudo obedo omin me papa me Saulo.

⁵¹Kis papa me Saulo kede Ner papa me Abuneri oudo obedo awobe ka Abiel.

⁵²I kare me pug ka Saulo lung en ebedo kede yi atek i kom jo me Pilistia; doko ka en oudo eneno awobi moro ikukurana i yi, en oudo erwake i kom isirikalen mege.

1 Samuel 15

Yi Kotimere kede Jo Amalek

¹Samuel oko waco ne Saulo be, “Rwot en kame bin ocwaa pi wiri doko abaka me jo me Isirael, pi mano, nan winy kop ka Rwot.

²Rwot me jo yi waco be, ‘Abino mino jo Amalek alola pi gikame kitimo, pien joakwari gi bin osurere kede jo me Isirael i kare kame kiwok kede ki Misiri.

³Nan oti isur jo Amalek di iko dudubo atwal atwala gi dedede kame kitie kede. Kur iwekunu gimoro dong kuo, do nekunu cuo kede mon, idwe adito kede imukerun, twonin kede romini, asigiran kede aguraguran.’ “

⁴Aso, Saulo oko lwongo isirikalen mege dedede karacel di eko maro gi i Telem. Isirikalen me tien me Isirael oudo tie tutumia tol are (200,000), kede me Yuda tutumia tomon (10,000).

⁵Saulo oko ot i bomba me jo Amalek di eko pwono i aditot kino gi.

⁶Saulo oko waco ne jo Keni be, “Yaunu tenge! Yaunu tenge kibus jo Amalek, aso ka li ango abino muducaro wu karacel kede gin; pien bin wun inyutunu cuny me kisa but jo dedede me Isirael i kare kame kiwok kede ki Misiri.” Aso, jo Keni oko yai tenge kibus jo Amalek.

⁷Saulo oko yi kede jo Amalek cako ki Kabila tuno Sur, kame tie tetu kide me Misiri, di eko bwono gi.

⁸En eko mako Abaka Agag me jo Amalek di eko tere di ekuo, do eko neko jo apat dedede kede epima bala kame oudo mitere.

⁹Do Saulo kede jo mege oko weko Agag likame kineko, doko da kiweko romini abeco, kede doke abeco, kede leini kocwe, kede idwe romini, kede jame dedede apat abeco, likame gin kiko muducaro gi; do gin kiko muducaro jame ace apat kame kony gi li kame gin kidagi, bala kame oudo mitere kede.

Rubanga Odagi Saulo bala Abaka

¹⁰Rwot oko waco ne Samuel be,



- 11” Likame cunya yom pi mino Saulo doko abaka, piento en etieko lokere tenge kibuta di eko weko lubo cik na.” Cuny Samuel oko wang di eko donyo koko but Rwot iwor kiakia.
- 12Samuel oko dilo yai odiko sek oru mere pi ot riamo kede Saulo, do oko waco ne be Saulo oudo ooto i bomba me Kamel, kakame egero iye kidi moro me yutuno en, di do eko yai ki kuno eko beno Giligal.
- 13Kakame Samuel otuno kede but Saulo, Saulo oko waco ne be, “Akwao Rwot emi winyo; ang'o atieko timo gikame Rwot ociko na timo.”
- 14Do Samuel oko penye be, “Do romini kede doke kame tie koko go kono?”
- 15Saulo oko dwoko be, “Isirikalen na okelo gi kibut jo Amalek. Gin kiweko romini kede doke abeco pi yalo ne Rwot Rubanga ni; do apat mege wan oneneko.”
- 16Di Samuel oko waco ne Saulo be, “Lingi! Ayaro waco ni gikame Rwot owaco na iwor aoki.” Saulo oko dwoko be, “Wac na.”
- 17Samuel oko waco be, “Bed bala in itamo be kony ni li, do mam in ibedo ngat kame telo jo me ikekon dedede me Isirael? Rwot owiri pi bedo abaka me Isirael,
- 18di en eko cwani i tic di ewaco ni be, ‘Oti iko neko jodubo me Amalek dedede; yi kede gi tuno in neko gin dedede.’
- 19Pinyo do komio in iko dagi winyo dwan Rwot? Pinyo komio iko mwomere i kom jame kame iyakunu di do iko timo gikarac i nyim Rwot?”
- 20Saulo oko dwoko ne Samuel be, “Ango gira atieko lubo gikame Rwot owaco na, aoto ako timo tic kame Rwot oora timo, akelo Agag abaka me jo Amalek di ako neko jo Amalek apat dedede bala kame oudo mitere.
- 21Do jo na oko yero romini kede doke abeco kiweko akaka neko gi, di kiko kelo gi Giligal pi yalo kede Rwot Rubanga ni.”
- 22Samuel oko waco be, “Mene kame yomo cuny Rwot, mino giamia awanga kede giayala arabo lubo kop mere? Ateteni lubo kop mere ber kalamo giayala; lubo kop mere ber kalamo kakamio me imerekekin.
- 23Pien jemo ne Rwot rac rom aroma bala tim me jwok, doko da tim me epali rac rom aroma bala woro caljwogi. Pi kite kame in itieko dagi kede kop ka Rwot, eda etieko dagi pi bedo abaka.”
- 24Saulo oko dwoko be, “Ango adubo; pien likame ango alubo cik ka Rwot karacel kede kope ni da, pien ango oudo abedo kede lwooro but jo di ako lubo gikame gin kiwaco.
- 25Pi mano, nan do ango atie kwani isasiro ango di iko dok keda, me wek aoti awor Rwot.”
- 26Samuel oko dwoko be, “Ango likame abino dok kedi; pien in itieko dagi lubo kop ka Rwot, omio Rwot da otieko dagi pi bedo abaka me Isirael.”



- ²⁷ Kakame Samuel oudo tie lokere kede pi yai, Saulo oko mako lak ekanso mere, di eko nyil.
- ²⁸ Samuel oko waco ne be, “I ceng atin Rwot otieko kwanyo ajakanut me Isirael kibuti, di eko mine but ngat apat kame ber kalamo in.
- ²⁹ Doko Rubanga adwong me Isirael likame bino loko tam mere; likame en eloko tam mere pien likame en ebedo dano.”
- ³⁰ Saulo oko waco be, “Ango atieko dubo, do mia wor i nyim joadongo kame telo jo na kede i nyim jo me Isirael dedede. Dok keda tetekeny aoti awor Rwot Rubanga ni.”
- ³¹ Aso, Samuel oko upere odok kede Saulo di Saulo oko woro Rwot.
- ³² Samuel oko waco be, “Kel Abaka Agag me jo Amalek buta kan.” Agag oko bino bute di kome miel amiela, di ewaco be, “To tin lit benyo!”
- ³³ Do Samuel oko waco be, “Bala kame epima nin omio kede mon odong abongo idwe, nan toto ni da bino dong abongo atin.” En eko tongotongo Agag i adulion atitino i nyim alutari kame tie Giligal.
- ³⁴ Samuel oko ot Rama, di Abaka Saulo oko ot paco mere Gibea.
- ³⁵ Samuel likame bobo oko neno abaka atwal tuno en to; do en eko parere twatwal pi Saulo. Rwot oudo likame cunye yom pi mino Saulo doko abaka.

1 Samuel 16

Kowiwo Daudi pi doko Abaka

- ¹ Rwot oko waco ne Samuel be, “In iyaro parere pi Saulo pi kare arom amene? Ango atieko dage pi bedo abaka me Isirael. Ket mo me olibeti i tung diang di iko yai ot Betelem, but icuo moro anyinge Yese, pien ango atieko yero wode acel pi doko abaka.”
- ² Samuel oko waco be, “Ango atwero ot benyo benyo? Ka Saulo owinyo kop no ebino neka!” Rwot oko waco be, “In ter atakit me diang di iko waco be itie ot mino giayala.
- ³ Lwong Yese da kakame iyaro mino kiye giayala, di ango ako bino nyuto ni gikame ipoore timo; in iko bino wiro nango ngat kame ango abino nyuto ni pi doko abaka.”
- ⁴ Samuel oko timo gikame Rwot owaco ne di eko ot Betelem. Joadongo me bomba oko ot pi siramo en di kom gi miel di kipenye be, “Bino ni noni tie me mulem?”
- ⁵ En eko dwoko be, “Ebo, etie me mulem. Ango abino kan pi mino Rwot giayala; lonyerenu ikounu upere keda ot mino giayala.” En eko lonyo Yese kede awobe mege di eko lwongo gi pi ot kede mino giayala.
- ⁶ Kakame gin kituno kede, Samuel oko neno Eliab wot ka Yese di eko waco kene be, “Ateteni icuo kame nan tie cungo i nyim Rwot noni en obedo dano kame en eyero.”



⁷Do Rwot oko waco ne Samuel be, “Kur inen kite kame ecil kede arabo boro mere, pien ango atieko dage; pien likame ango aneno bala kame jo neno kede, gin kineno kom dano ooko, do ango aneno cunye.”

⁸Di Yese oko lwongo Abinadab di eko mine ebeo i nyim Samuel. Samuel oko waco be, “Manoni da likame Rwot oyeru.”

⁹Yese oko kelo Sama. Samuel oko waco be, “Manoni da likame Rwot oyeru.”

¹⁰Yese oko mino awobe kanyaare oboe acelacel i nyim Samuel iepone noni, do Samuel oko waco ne Yese be, “Likame tie moro kame Rwot oyeru kikom magi.”

¹¹Samuel oko penyo Yese be, “Awobe ni dedede tie kan?” En eko dwoko be, “Odong pwodi awobi atidi, do en etie kwano romini.” Samuel oko waco ne be, “Cwai dano ot ome, pien likame wan obino mino giayala tuno di en etieko bino.”

¹²Aso, Yese oko cwano kolwonge. En oudo ebedo awobi acil di kome yot, wange oudo milimili. Rwot oko waco ne Samuel be, “Yai iwire, piento en inononi.”

¹³Di Samuel oko kwanyo tung diang kame mo me olibeti oudo tie iye, di eko wiwo Daudi i nyim imiegu mege; tipo ka Rwot kede twer mere oko donyo i kom Daudi cako ceng nono ot anyim. Samuel oko yai eoto Rama.

Daudi Odoko Ngatic ka Saulo

¹⁴Kikano, tipo ka Rwot oko yai kibur Saulo, di tipo arac kame Rwot ocwao oko donyo lole.

¹⁵Di jotic ka Saulo oko waco ne be, “Neningo, nan tipo arac kame Rubanga ocwao tie loli.

¹⁶Adwong, nan wac ne wan jotic ni kame gwoki omoi ngatamoro kame ngeo gono arigirigi kiber; di do ka tipo arac kame Rubanga ocwao obino i komi, en ebino gono arigirigi di in iko doko ber.”

¹⁷Aso, Saulo oko waco ne jotic mege be, “Mounu na ngatamoro kame ngeo goc kiber di ikounu kele buta.”

¹⁸Ngatic acel oko waco be, “Ango atieko neno awobi wot ka Yese me Betelem, kame ngeo goc twatwal. En ebedo dano kame okuko, ngayi, etie kede diru me yamo, doko ecil; Rwot tie kede.”

¹⁹Aso, Saulo oko cwano jo but Yese di ewaco ne be, “Cwai nango Daudi, wodi kame kwao romini.”

²⁰Yese oko cwano Daudi but Saulo kede atin diel, kede punda kame yeo mugati, kede isau me lau kame bwini opong iye.

²¹Daudi oko bino but Saulo di eko doko ngatic mere. Saulo oudo mare twatwal, di Daudi oko doko dano kame mako jame mege me yi.



²²Saulo oko cwano ne Yese kop be, “Wek Daudi dong bedo ngatic nango, pien cunya omare twatwal.”

²³Cako i kare nono, tek kame tipo arac kame Rubanga ocwao oudo obino ne Saulo, Daudi oudo kwanyo arigirigi mere di eko donyo gono, di Saulo ko doko ber, di tipo arac nono ko weke.

1 Samuel 17

Daudi kede Goliat

¹Isirikalen me Pilistia oko cokere pi yi; gin oudo kicokere Soko, bomba kame tie Yuda. Gin kiko gero kimere gi i kabedo kame kolwongo be Epes Damim, kame tie dierediere me Soko kede Aseka.

²Saulo kede jo me Isirael oko cokere di kiko gero kimere gi i aditot me Ela, di kiko teere pi yi kede jo me Pilistia.

³Jo me Pilistia oko cungo i wi moru tetucel, kede jo me Isirael da oko cungo i wi moru ace tetucel, di aditot oudo opoko diere gi.

⁴Di do twon dano me alwora kame nyinge Goliat, me bomba me Gat, oko wokun ki bad me jo Pilistia; oudo edongo boro mere kalamo puti kanyangon.

⁵Oudo engapo ocoro kame gwoko wie, kame kotimo kede nyonyo buronsi, kede di engapo ekoti kame kotimo kede nyonyo buronsi kame peko mere wao bala kilo ot kanyape.

⁶Iloton mege oudo engapo iye nyonyo buronsi pi gwoko gi, di ekodo tong kame kotimo kede buronsi tie ledi i epepet mere.

⁷Tir me tong mere oudo ibimirir bala lilim kame jo kudo me kokodo ausi me cweno egoe, doko leb tong mere oudo kotimo kede nyonyo ayon di epek ewao bala kilo kanyaare. Oudo dano kame mako ebuku mere telo ne anyim.

⁸Goliat oko cungo di eko lelemo ne isirikalen koteere me Isirael be, “Pinyo komio ibinunu ikounu teere pi yi? Mam ango abedo dano me Pilistia? Mam wun ibedunu jotic ka Saulo? Yerunu icuo acel kibutu di eko bino piny kan yi keda.

⁹Ka en eko twero yi keda di eko neka, wan obino doko ipasoi wu; do ka ango abwone di ako neke, wun ibinunu doko ipasoi wan di ikounu donyo tic ne wan.”

¹⁰Icuo me Pilistia nono oko meede kede yamo be, “Tin ango acao isirikalen me Isirael! Kong mianu icuo acel ebin wan oyi kede.”

¹¹Kakame Saulo kede jo mege owinyo kede kope nogi, lworu oko mako gi adikinicel.

Daudi Ooto kakame Isirikalen ka Saulo Ogero iye Kimere

¹²Daudi oudo obedo wot ka Yese, ngat koudo obedo dano me Epurata, kame bedo i bomba me Betelem i piny me Yuda. Yese oudo tie kede awobe kanyauni; i kare kame Saulo oudo tie kede abaka en oudo do etieko ti.



- ¹³Awobe ka Yese adek adongo mege oudo oupere kede Saulo ot yi. Nying awobe nogo oudo obedo Eliab awobi adwong, Abinadab ngalube, kede Sama ngat kobedo nywal me adek.
- ¹⁴Daudi oudo obedo ngorit. Awobe adongo adek oudo odong karacel kede Saulo,
- ¹⁵do Daudi oudo bedo wire awira dok Betelem pi kwano romini ka papa mere.
- ¹⁶Goliat dano me Pilistia oko bedo wire bino cungo i nyim jo me Isirael di elwongo gi pi yi odiko acelacel kede otieno pi ceng ot ongwon.
- ¹⁷Ceng acel Yese oko waco ne Daudi be, “Kwanyi edebe me engano kame kocelo ni karacel kede mugati tomon di iko susunyo tero ne imiegu ni i kimere me isirikalen kuca.
- ¹⁸Ter da cak komakakin tomon ne ngadwong gi me isirikalen. Nen kame kitie kiber di iko kelo gimoro kibun gi kame nyuto.
- ¹⁹Abaka Saulo, imiegu ni, kede jo me Isirael apat dedede tie i aditot me Ela yi kede jo me Pilistia.”
- ²⁰Oru mere Daudi oko dilo yai odiko eko weko romini kede ngadaro gi, eko kwanyo cam etero bala kame Yese oudo owaco ne. En eko tuno i kimere me isirikalen esawa kame isirikalen oudo tie ot riere kede pi cako yi, di kitie celakino kede dwan me yi.
- ²¹Jo me Isirael kede me Pilistia oko teere pi cako yi, di nyim gi opimere.
- ²²Daudi oko weko jame kame etero kede ngagwok jamini me isirikalen, di eko ringo kakame isirikalen oteere iye pi yi, di eko moto imiegu mege.
- ²³Kakame oudo etie yamo kede imiegu mege, twon dano me alwora me Pilistia, kowok ki bomba me Gat, kame nyinge Goliat, oko wokun kikom isirikalen me Pilistia kotieko teere. En eko nyogao waco kope kame lem ebedo waco sek, di Daudi oko winyo di etie yamo.
- ²⁴Kakame jo me Isirael oneno kede Goliat, gin dedede kiko bwangere ringo tenge kede twon lworu.
- ²⁵Jo me Isirael oko donyo waco be, “Mam inenunu icuo kobino no? Ateteni en ebino pi kelo acae i wi jo me Isirael. Abaka otieko cikere pi mino ngat kame bino neke twon giamia adwong; doko da ebino mino ngat nono nyare pi bedo dako mere, kede eko weko jo turgi dano nono likame donyo culo esolo.”
- ²⁶Daudi oko penyo jo kame oudo tie cungo i ngete be, “Nyo kame kobino timo ne ngat kame bino neko dano me Pilistia no, di eko kwanyo lewic ki wi jo me Isirael? Dano me Pilistia kalikame kokepo noni obedo ngai komio en ecao isirikalen ka Rubanga akuo?”
- ²⁷Jo oko waco ne gikame kobino mino ngat kame bino neko Goliat.
- ²⁸Eliab, omin me Daudi adwong, oko winyo di Daudi tie yamo kede jo. Eliab oko doko ger ne Daudi di ewaco ne be, “Nyo komio in ibino kan? Ngai kame in iweko



daru romini anonok ka i wi tim? Ango angeo woo nin, in kom ibino kan pi neno kite kame jo tie yi kede.”

²⁹Daudi oko waco be, “Do nan ango atimo nyo? Ada oudo apenyo apenya.”

³⁰Daudi doko oko lokere tenge eoto yamo kede dano ace di epenyo kop acel aoki nono. Jo dedede kame en epenyo oudo dwoko ne kop acel nono.

³¹Jo mogo oudo owinyo kop kame Daudi owaco, di kiko ot waco ne Saulo; Saulo oko mino kolwongo Daudi bute.

³²Daudi oko waco ne Saulo be, “Adwong, kur cuny ngatamoro poti pi dano me Pilistia no! Ango ngatic ni ayaro ot yi kede.”

³³Saulo oko waco ne Daudi be, “In likame itwero ot yi kede lono; pien in pwodi ibedo atin awobi, do en ebedo yi cako di pwodi en eponga.”

³⁴Do Daudi oko waco ne Saulo be, “Ango oudo abedo kwano romini ka papa na, do tek ka engu arabo edubu oudo obino di eko mako atin oromo i diere me romini,

³⁵ango oudo alube ako sure ako lako atin oromo nono. Do ka en oudo eko lokere nango, ango oudo amako itinyo mere di ako jujuto en paka to.

³⁶Ango atieko neko inguon kede idubun; abino neko dano me Pilistia kalikame kokepo noni da kamanono, piento en etieko bedo kede acae i kom isirikalen ka Rubanga akuo.”

³⁷Daudi oko waco be, “Rwot ngat kolaka ki lak engu kede ki lak edubu, bino laka da ki cing icuo me Pilistia noni.” Aso, Saulo oko waco ne Daudi be, “Oti, akwao Rwot bed tie kedi.”

³⁸Saulo oko mino Daudi ongapo jamini mege me yi, ocoro aumo wic kame kotimo kede buronsi, kede ekoti me lilime kame okokodun.

³⁹Daudi oko tweno epima ka Saulo i piere, i kom angapito mere me yi, do ot kede gi oko bwone, pien oudo pwodi lem likame enao ngapo gi. Daudi oko waco ne Saulo be, “Likame atwero ot kede gi nogi, pien lem likame anao ngapo gi.” Aso, Daudi oko gonyo gi.

⁴⁰Di do en eko mako ebela mere i cinge, di eko depo ingaroi kany apwot ki dud pii me ecilet, di eko keto gi i yi ikapu mere me kwat. En eko ot enoko Goliat di apocet mere tie i cinge cuto.

Daudi Obwono Goliat

⁴¹Di icuo me Pilistia nono oko cako nyiko but Daudi, di ngat kame mako ebuku mere telo ne anyim.

⁴²Kakame dano me Pilistia nono oneno kede Daudi, en eko bedo kede acae i kome, pien Daudi oudo obedo atin atina moro acil.



⁴³Ngapilistia nono oko penyo Daudi be, “Iparo be ango abedo ogwok en amio ibino na kede ibelai?” Di eko lwongo ilam i kom Daudi kibut rubangan mege.

⁴⁴Di eko waco ne Daudi be, “Ka itek bia paka buta; abino nyinyilo in di ako mino winy me wi yamo kede leini me obar ringo me komi pi gin camo.”

⁴⁵Daudi oko dwoko ne be, “In itie bino buta kede epima kede tong kede macar, do ango atie bino buti i nying Rwot me jo yi, Rubanga me isirikalen me Isirael, en ngat kame in itieko bedo kede acae bute.

⁴⁶I ceng atin noni Rwot bino mini i cinga; abino reti piny di ako ngolo wii, di ako bino mino kom isirikalen oto me Pilistia but winy me wi yamo kede but leini me obar. Manoni bino mino jo dedede me wi lobo ngeo be Rubanga tie i Isirael,

⁴⁷doko jo dedede kame tie kan ko bino ngeno be Rwot likame lako jo kede epima kede tong. Rwot bino bwono yi noni, en ebino mino wu i cing wan.”

⁴⁸Kakame Goliat oudo tie bino kede pi riamo kede Daudi, Daudi oko ringo awakawaka tetu kakame isirikalen me Pilistia oudo oriye iye pi en ot yi kede Goliat.

⁴⁹Daudi oko rwako cinge i yi ikapu mere, eko kwanyo engaro di eko pworoso en kede aporocet, di eko dipo Goliat i nyime; engaro nono oko lwiny i nyime di eko pototo piny ariebacuny.

⁵⁰Aso, Daudi oko bwono Goliat kede aporocet kede engaro kenekene; en edipe paka pototo piny di eko neke; Daudi oudo likame tie kede epima moro i cinge.

⁵¹Daudi oko ringo bute di oko cungo i kome, di eko mako epima ka Goliat eko wote ki akularu mere, di eko ngolo kede wi Goliat tenge eko neke. Kakame jo me Pilistia oneno kede be dano gi kame kouro otieko to, gin kiko ringo tenge.

⁵²Cuo me Isirael kede me Yuda oko bwangere kede ilelem cako riamo jo me Pilistia paka tuno Gat kede i erute me Ekuron. Jo me Pilistia kame kowawano oko popoto i yongayo me Saraim, kipopoto paka tuno Gat kede Ekuron.

⁵³Jo me Isirael oko dwogo ki riamere kede jo me Pilistia di kiko yako jame kame oudo tie i kimere gi.

⁵⁴Daudi oko tero wi Goliat Yerusalem, do jame ka Goliat me yi en eko weko odong i eema meren.

Kotero Daudi i Nyim Saulo

⁵⁵Kakame Saulo oudo oneno kede di Daudi tie ot yi kede Goliat, en oudo eko penyo Abuneri, ngadwong me isirikalen mege be, “Abuneri, awobi no obedo wot ka ngai?” Abuneri oko dwoko ne be, “I ateni likame angeo, Okwe abaka.”

⁵⁶Abaka oko waco ne be, “Oti ipepenyo pi ngeno wot ka ngai inonono.”

⁵⁷Kakame Daudi odwogo kede ki kaneko Goliat, Abuneri oko tere i nyim Saulo, di wi Goliat oudo tie i cinge.



⁵⁸Saulo oko penye be, “Awobi, in ibedo wot ka ngai?” Daudi oko dwoko ne be, “Ango abedo wot ka ngatic ni Yese, dano me Betelem.”

1 Samuel 18

Jonasan Otimo Isikan kede Daudi

¹Kakame Daudi otieko yamo kede Saulo, cuny Jonasan oko tingere i kom Daudi, di eko maro Daudi bala kame emarere kede kene.

²Ceng nono Saulo oko tero Daudi di likame eko yei ne dok turgi but papa mere.

³Jonasan oko timo isikan me bedo awotino kede Daudi, piento en oudo emaro Daudi bala kame emarere kede kene.

⁴Jonasan oko gonyo ekanso mere kame oudo etie ngapo di eko mino Daudi, karacel kede engape mere me yi, kede epima mere, kede emal mere, kede rakoba mere.

⁵Saulo oko donyo cwano Daudi i yi apapat, do en eko bedo bwono jokwor i yi dedede kame Saulo ocwae iye; manono oko mino Saulo oko mine edoko ngadwong me isirikalen. Jo dedede, kiton jotic ka Saulo da, oko moko kop nono.

Nyeko Omako Saulo i kom Daudi

⁶Kakame Daudi otieko neko kede Goliat di do isirikalen oudo tie dwogo, mon oko wokun ki bomban dedede me Isirael pi riamo kede Saulo. Gin oudo kitie wer kede yomcuny di kimielo, di kiyango ayekeyeke kede di kigoo adungu.

⁷Gin oudo kilelo di kiwero ken gi ken gi be, “Saulo oneko mege jo tutumia, do Daudi oneko mege jo tutumian kede tutumian.”

⁸Kop noni likame oko yomo cuny Saulo, omio eko doko ger. En ewaco be, “Kom kotie waco be Daudi oneko tutumian kede tutumian, do be ango aneko tutumia kenekene; nan nyo bobo kodong ne, mam do doko abaka?”

⁹Cako ceng nono cuny Saulo oko cako popoto i kom Daudi.

¹⁰Ceng alubo mere, tipo arac kowok kibus Rubanga oko sutakino Saulo di en eko poi edonyo lelemo i ode. Daudi oudo tie gono arigirigi bala kame etimo ceng dedede, di Saulo oudo tie kede tong i cinge.

¹¹Saulo oko waco kene be, “Ayaro cobo Daudi paka tong moko dingiding i kor apama.” En eko lato Daudi tien are, do Daudi oko pango.

¹²Saulo oudo tie kede lworu i kom Daudi pien Rwot oudo tie kede Daudi, do en Rwot oudo otieko weke.

¹³Manono oko mino Saulo okwanye ki nyime, di eko cwane tenge telo wi isirikalen tutumia acel. Daudi oko bedo telo jo mege ot yi

¹⁴di eko bedo lono yi dedede me eoto iye, pien Rwot oudo tie kede.



¹⁵Kakame Saulo oneno kede be Daudi oudo tie bwono yi dedede, en eko bedo kede lworu bute.

¹⁶Do jo dedede me Isirael kede me Yuda oudo maro Daudi, piento en oudo ebedo telo gi ot yi.

Daudi Onyomo Nyar ka Saulo

¹⁷Saulo oko waco ne Daudi be, “Nyara adwong Merab ine; angu abino mine buti bala dako ni, kenekene in tim na tic kede teko di iko yi yi ka Rwot.” Pien Saulo oudo otamo be iepone nono jo me Pilistia bino neko Daudi abongo cingen tuno iye.

¹⁸Daudi oko dwoko ne Saulo be, “Angu abedo ngai, doko joawade na kede jo me ot ka papa na obedo alu i Isirael, miango atwero bedo or ka abaka?”

¹⁹Do i kare kame oudo kopoore mino kede Daudi Merab nyar ka abaka, oko lokere mine but icuo moro anyinge Adiriel me Mekola.

²⁰Aso, Mikal nyar ka Saulo ace oko mitere kede Daudi. Kakame Saulo owinyo kede kop nono, manono oko yomo cunye.

²¹Saulo oudo owaco kene be, “Abino mino Mikal but Daudi tetekeny ebed ne bala gi me cike me wek jo me Pilistia neke.” Pi manono, Saulo oko waco ne Daudi tien me are be, “Nan in do ibino bedo ora.”

²²Saulo oko waco ne jotic mege pi yamo kede Daudi i mung be, “Neningo, abaka cunye yom kedi, doko da jotic mege dedede mari; nan in do nyom nyare.”

²³Aso, jotic ka Saulo oko waco ne Daudi kop noni i mung. Daudi oko waco be, “Wun iparunu be ebedo gi ayoyot me nyomo nyar ka abaka, doko di inenunu be angu angacan, doko pira likame tek?”

²⁴Jotic ka Saulo oko waco ne gikame Daudi owaco.

²⁵Saulo oko waco be, “Kenekene gikame abaka mito kibuti bala cul me nyom en kelo kibut jo me Pilistia del me kom gi me cuo tol acel, bala onyanga i kom jokwor mege.” Saulo oudo tie timo iik me mito be jo me Pilistia nek Daudi.

²⁶Kakame jotic mege owaco ne kede Daudi kope nogi, cunye Daudi oko bedo yom pi bedo or ka abaka. Di pwodi kare likame okato,

²⁷Daudi oko yai di eko ot kede jo mege di kiko neko cuo tol are me Pilistia, di Daudi oko kelo kibut gi del me kom gi me cuo, di eko mino gi but abaka abongo moro rem, me wek enyom nyare. Saulo oko mino nyare Mikal but Daudi pi doko dako mere.

²⁸Saulo oko niang kiber be Rwot oudo tie kede Daudi, kede da be nyare Mikal oudo maro Daudi.

²⁹Manono oko mino Saulo omedo bedo kede lworu i kom Daudi, di do eko doko ngakwor ka Daudi cako i kare nono.



³⁰Di do isirikalen me Pilistia oko donyo bino yi kede jo me Isirael, do Daudi en kame oudo bwono gi kalamo jotic ka abaka ace. Manono oko mino nying Daudi oko doko iruo kalamo.

1 Samuel 19

Saulo Otamo Neko Daudi

¹Saulo oko yamo kede wode Jonasan karacel kede jotic mege kop amako neko Daudi. Do Jonasan wot ka Saulo oudo maro Daudi twatwal.

²Jonasan oko waco ne Daudi be, “Papa na Saulo tie mito neki, pi mano, bed di igwokere diki odiko iko pwono karamoro.

³Ango abino ot cungo i nget papa na i lum kakame in itie pwono iye di ako yamo kede kop i komi, ka aniang kop moro ace ango abino waco ni.”

⁴Jonasan oko waco ne papa mere kope abeco i kom Daudi di ewaco be, “Adwong, kur itim ne Daudi gimoro arac, pien likame tie gimoro arac kame en etimo ni, doko da gikame en ebedo timo obedo kony adwong buti.

⁵Piento en ejalo kuo mere eko yi kede Goliat paka neko, di Rwot oko mino jo me Isirael obwono yi. In ineno manono kede wangi, di iko lelo da; pinyo kara bobo komio imito neko Daudi abongo tien kop, en dano ali kede raco moro?”

⁶Saulo oko yei winyo kop ka Jonasan, di eko kwongere i nying Rwot be likame ebino neko Daudi.

⁷Jonasan oko lwongo Daudi di eko waco ne kope nogi dedede; di do eko tero Daudi but Saulo, di Daudi oko meede timo ne abaka tic bala lem sek.

⁸Yi kede jo me Pilistia doko oko poto, di Daudi oko ot pi yi kede gi; en eko suro gi di eko yi kede gi kitek paka gin ringo.

⁹Ceng acel tipo arac kowok kibus Rubanga oko donyo ne Saulo. En oudo etie bedo i ode di emako tong mere i cinge, di Daudi oudo tie gono arigirigi mere.

¹⁰Saulo oko tamo cobo Daudi dingiding i kor apama kede tong, do Daudi oko pange omio eko cobo apama. Iwor nono Daudi oko ringo tenge eko bwot.

¹¹Saulo oko cwano cuo mogo i ot ka Daudi pi kine, di oudo kitie kede iik me neke odiko. Mikal dako ka Daudi oko waco ne be, “Ka likame imarao kuo ni iwor atin, diki kobino neki.”

¹²Aso, Mikal oko rwako Daudi ki dirisa di Daudi oko ringo obwot.

¹³Mikal oko kwanyo caljwogi di eko piele i kabuto, eko keto yer me diegi kame kocweo i wie di eko ume kede egoe.

¹⁴Kakame Saulo ocwao kede jo pi tero Daudi, Mikal oko waco be kome lit.

¹⁵Saulo doko oko cwano jo mege pi gin neno Daudi kede wang gi. En ewaco negi be, “Tingenu kede itanda ikelenu kan, me wek aneke.”



¹⁶Kakame jo kame eoro otuno kede, gin kiko udo caljwogi en atie i kabuto di yer me diegi kame kocweo tie i wie.

¹⁷Saulo oko penyo Mikal be, “Pinyo komio ingala kamano di iko mino ngakwor na obwot?” Mikal oko dwoko ne be, “En ewaco na be, ‘Wek aoti, aso ka li abino neki.’”

¹⁸Daudi oko bwot eko ringo Rama but Samuel. En eko tatamo ne Samuel gi dedede kame Saulo otimo ne. Di do en karacel kede Samuel kiko ot Nayot kiko donyo bedo kuno.

¹⁹Jo oko waco ne Saulo be, “Daudi tie Nayot i Rama.”

²⁰Saulo oko cwano jo pi ot omo Daudi. Kakame gin kineno kede ekodet me inabin kame oudo otapaun tie miel di kilelemo, di Samuel en kame oudo telo gi, tipo ka Rubanga oko donyo ne jo kame Saulo oudo ooro nogo da, di gida kiko donyo i tim me inabin nogo.

²¹Kakame kowaco ne kede Saulo kop nono, en bobo eko cwano jo ace. Magonogo da oko donyo i tim acel nono. Saulo doko oko cwano jo tien me adek, magonogo da oko donyo i tim me inabin nogo. Di do Saulo kikome oko ot Rama.

²²En eko tuno i atan adwong me Seku di eko penyo be, “Samuel kede Daudi tie tuai?” Ngatamoro oko dwoko ne be, “Gin kitie Nayot i Rama.”

²³En eko cako ot Nayot i Rama. Kakame oudo etie ot kede kuno, tipo ka Rubanga oko donyo ne eda, eko cako timere bala enabi paka en ot tuno Nayot i Rama.

²⁴En eko gonyo igoen mege di eko cako miel di elelemo bala enabi i nyim Samuel. Di eko buto piny nono abongo igoen i kome i ceng kede iwor nono lung. Manono en oko mino jo openyere be, “Benyo, Saulo da odoko enabi?”

1 Samuel 20

Awotin ka Daudi kede Jonasan

¹Daudi oko ringo eyai ki Nayot adul katie i bomba me Rama. En eko ot but Jonasan di eko penye be, “Nyo kara kame ango atimo? Raco na nyo? Doko dub nyo kame ango atimo but papa ni komio emitto neka?”

²Jonasan oko waco ne be, “Mano likame bino timere! In likame ibino to. Likame tie gimoro adwong amoto atitidi kame papa nango timo abongo en waco na; nyo amio eromo mungo nango kop noni? Mano kop me abe!”

³Do Daudi oko gamo be, “Papa nin ngeo kiber epone kame in imita kede; manono mie likame eko yei ne in ngeno kop no, pien engeo be ebino dubo cunyi. Do ateteni ango akwongere buti i nying Rwot be, odong kakatitidi di ango ato.”

⁴Di Jonasan oko waco ne Daudi be, “Ango abino timo ni gimoroni kenekene kame in iwaco.”



- ⁵ Daudi oko waco ne Jonasan be, “Diki kobino tedo Ebagá me Por Duwe, ango miero acam kede abaka; do in yei nango ot pwono obar tuno otieno me ceng alubo diki.
- ⁶ Ka papa ni oneno di ali i kacam di eko penyere, in wace be ango oudo angangao in pi yei na ot Betelem bomba me turwa, pi ot nywako kede jo me ot wa mino giayala awanga kame kotimo buli mwaka, pien kare mere inononi.
- ⁷ Ka en ewaco be, ‘Mano ber, ‘cunya bino kwei; do ka kop nono oko wango cunye, in do ibino ngeno be en etieko keto cunye pi mito timo na gikarac.
- ⁸ Pi mano, ango akwai itera kiber, pien in itieko timo keda isikan me awotin i nyim Rwot. Do ka oudo atimo raco moro, neka in kikomi; pinyo amio itera but papa ni?”
- ⁹ Jonasan oko waco ne be, “Kur iparo kop kacal kamano! Ka koto di oudo ango angeo be papa na otieko moko tam mere pi mito timo ne in raco, iparo be koto ango likame awaco ni?”
- ¹⁰ Di Daudi oko penyó Jonasan be, “Ngai kame bino mina angeo ka papa ni ogamo dogi kede gero?”
- ¹¹ Jonasan oko waco ne be, “Bia ooti i poto kuca.” Aso, gin kiko yai di kiko ot.
- ¹² Di Jonasan oko waco ne Daudi be, “Rwot Rubanga me Isirael bed mujura wa! Diki i esawa noni, arabo i ceng kame lubo mere udo ango atieko penyó tam kame papa na tie kede i komi, ka etie kede tam kabere i komi, ango abino cwano nin kop.
- ¹³ Do ka aniang be en emito timo ne in raco, di likame ango ako mini ingeo, doko likame ako cwani ioto tenge kede mulem, ango akwao be Rwot miango alola. Akwao be Rwot bed kedi bala kame lem en ebedo kede papa na.
- ¹⁴ Ka ango pwodi akuo, akwai inyut na amara kalikame lokere bala me ka Rubanga; do ka ato,
- ¹⁵ kur ijik nyuto but jo me oda amara ni kalikame lokere, akadi Rwot muducaro jokwor ni dedede ki wi lobo.”
- ¹⁶ Epone no en kame Jonasan oko timo kede isikan kede jo me ot ka Daudi, di ewaco be, “Akwao Rwot emi alola but ikwae ka Daudi ka gin kituro isikan noni.”
- ¹⁷ Jonasan bobo oko mino Daudi okwongere pi mare; piento en oudo emaro Daudi bala kame emaro kede kuo mere kene.
- ¹⁸ Jonasan oko waco ne be, “Diki obedo ceng me Ebagá me Por Duwe; kobino ngeno be in ili pi kabedo nin bino dong twolo.
- ¹⁹ Aso, i ceng kame lubo diki, in ibino ot piny kuno; ot kakame ngoce ipwono iye ca, di iko pwono ingei atukit me ingaroi atie kuno.
- ²⁰ Ango abino gweno tongini me emal adek i ngete, di ineno bala atie gweno gimoro.
- ²¹ Di ango ako bino cwano atin awobi, di awaco ne be, ‘Oti imoi tongini me emal go.’ Ka ango awaco ne atin awobi nono be, ‘Neningo, tongini me emal nogo tie i ngeti



tetuni, kwany gi, ‘di do in iko bino pien udo kop moro li. Ango akwongere i nying Rwot kakuo be udo likame tie gimoro arac kame bino timere ni.

²²Do ka ango awaco ne atin awobi nono be, ‘Neningo, tongini me emal nogo tie i nyimi kuca, ‘in do oti; pien udo Rwot do otieko cwani be iot tenge.

²³Do i kom kop kame wan otieko yamo, Rwot en mujura kame tie i diere wa nakanaka.”

²⁴Aso, Daudi bin oko pwono obar. Kakame Ebaga me Por Duwe oko tuno kede, abaka oko bino pi cam

²⁵di eko bedo kabedo mere bala lem sek, eloko ngee i apama. Abuneri oko bedo i ngete, di Jonasan oko cungo acunga; do kabedo ka Daudi oudo twolo.

²⁶Saulo likame oko yamo kop moro i cenge nono; pien oudo eparo i cunye be, “Gimoro otieko timere ne Daudi; en likame ecil bala kame iswil mito, ateteni en likame ecil.”

²⁷Do i ceng me are mere, en ceng kame lubo ceng me Ebaga me Por Duwe, kabedo ka Daudi oudo pwodi odong twolo. Di Saulo oko penyo wode Jonasan be, “Pinyo komio Daudi wot ka Yese likame obino i ebaga, nyoro kede tin da?”

²⁸Jonasan oko dwoko be, “Daudi ongangao ango pi yei ne ot Betelem.

²⁹En ekwa be, ‘Okwe yei na ot; pien jo me paco wa oyaro mino giayala but Rubanga i bomba me turwa, doko omina otieko cika be miero abed tie kuno. Aso ka cunyi yom keda, wek aoti di ako neno imiegu na.’ Manono en gi komie likame ebino cam karacel kedi.”

³⁰Di do cuny Saulo oko wang kitek i kom Jonasan di eko waco ne be, “In wot ka dako acar, kame ngajemo! Iparo be ango likame angeo be in itieko yero wot ka Yese pi kelo ni lewic karacel kede toto ni?

³¹Pien tek di pwodi wot ka Yese tie kuo i wi lobo, in likame ibino bedo abaka me piny noni. Cwai dano ot kele buta, piento en miero etoi.”

³²Jonasan oko penyo papa mere Saulo be, “Pinyo kamio poore neke? Nyo kame en etimo?”

³³Saulo oko late kede tong pi koto cobe; manono oko mino Jonasan oko ngeno be papa mere oudo otieko moko tam mere pi neko Daudi.

³⁴Jonasan oko yai ki emesa kede wangcuny atek di likame eko camo gimoro i ceng me are me ebaga nono. Pien par oudo dwong i cunye pi Daudi, kede pi kite kame papa mere oudo omie kede lewic.

³⁵Oru mere odiko, Jonasan oko ot obar pi riamo kede Daudi, bala kame oudo gin kitieko cikere kede; eupere kede atin awobi.



³⁶En eko waco ne atin awobi nono be, “Ring iot ikwany tong me emal kame ango ayaro gweno.” Di awobi nono oudo tie ringo en eko gweno tong me emal oko ot pototo anyim mere.

³⁷Kakame atin awobi nono oko tuno kede kakame tong me emal ka Jonasan oudo opoto iye, Jonasan oko lwonge di eko waco ne be, “Tong me emal opoto anyim kuno.

³⁸Susunyo, kur igali.” Aso, awobi nono oko kwanyo tong me emal di eko dok but ngadwong mere.

³⁹Do awobi nono likame oko ngeno gimoro; kenekene Jonasan kede Daudi en kame oudo ngeo iik nono.

⁴⁰Jonasan oko mino jamini mege me yi but awobi nono di eko waco ne be, “Dwok gi i bomba.”

⁴¹Oyotoyot di atin awobi nono oudo otieko kato, Daudi oko yai ki nget atukit me engaro di eko riondiko i nyim Jonasan, di eko kudo wie piny tien adek. Gin dedede kiko donyo koko di kinotere; Daudi oko kok kalamo.

⁴²Di do Jonasan oko waco ne Daudi be, “Ot kede mulem, pien wan jo are nogi otieko kwongere i nying Rwot di owaco be, ‘Rwot bino bedo i diere nango kedi, kede i diere me ikwae na kede megi, ikar kede ikar.’ “ Daudi oko yai di eko ot; di Jonasan oko dok i bomba.

1 Samuel 21

Daudi Oringo pi Lworo Saulo

¹ Daudi oko bin tuno Nob but Akimelek ngasaseredoti. Akimelek oko bino pi riamo kede Daudi di kome oudo miel amiela, di eko penye be, “Pinyo komio in ibino kane keni, abongo ngatamoro kame iupere kede?”

²Daudi oko waco ne Akimelek Ngasaseredoti be, “Abaka otieko mina kop di ecika be kur ami ngatamoro ngei gikame en ecwa timo. Ango atieko cikere kede isirikalen na pi gin riamo keda karamoro.

³Aso, nataman nyo kame in itie kede? Mia mugati kany arabo gimoroni kame in itie kede.”

⁴Ngasaseredoti di oko gamo dog Daudi be, “Ango nataman ali kede mugati kame jo singo camo ceng dedede, kwanyo kenekene mugati kacil. Ango atwero mini ka awobe ni likame oudo obuto kede mon i kare kiyapiyapi.”

⁵Daudi di oko gamo dog ngasaseredoti be, “Ateteni kotwono wan mon bala lem sek ka wan ooto i sapali; kom awobe na bedo cil akadi koto di sapali me ceng dedede; do miero kom gi bed cil benyo i sapali me tin noni!”

⁶ Pi mano, ngasaseredoti oko mine mugati kacil, pien oudo mugati apat li, kwanyo kenekene mugati kame oudo obedo giayala but Rubanga, kame oudo kotieko kwanyo tenge ki wi emesa kacil di oko keto ace aliet kawang gi.



⁷Aso, icuo moro anyinge Doeg, anywali me Edom oudo cenge nono tie kunono pien iswil oudo mito ne cobo lonyere; en oudo ebeto ngatel me jokwat ka Saulo.

⁸Daudi oko penyo Akimelek be, “Itie kede tong moro arabo epima kan? Ango likame oudo abino kede epima arabo jamini me yi na, pien oudo miero atim awakawaka gikame abaka owaco.”

⁹ Akimelek oko gamo be, “Epima ka Goliat dano me Pilistia angoce in ineko i aditot me Ela en atie kane, koboe i egoe etie ingei epod. Ka in imite, tere, pien likame bobo tie apat, kwanyo en kenekene.” Daudi oko waco ne be, “Mia manono; likame tie epima moro aber kalamo en!”

¹⁰Daudi oko yai cenge nono di eko ringo tenge pi lworu Saulo; eko ot but Abaka Akis me Gat.

¹¹ Jotic ka Akis oko waco ne be, “Mam Daudi ngat kobedo abaka i piny mere ine? Mam en kame jo oudo mielo di kiwero be, ‘Saulo otieko neko tutumia, do Daudi oneko tutumian kede tutumian’ ?”

¹² Kope kame kiwaco oko donyo i cuny Daudi, omio eko bedo kede lworu but Abaka Akis me Gat.

¹³ Di do eko loko ikiteso mege; ka oudo etie kede gi, oudo ecuko poi, di eko donyo gigiro ikekon me erute me bomba, doko oudo eweko lau mol ki doge di loto kiton i yer me tike.

¹⁴Akis oko waco ne jotic mege be, “Nenunu! Icuo no tie amang! Pinyo komio ikelenu buta?”

¹⁵Mam ango ali kede jomang en komio ikelenu dano noni timo mingo mere i nyima? Kur ikelenu i oda.”

1 Samuel 22

Saulo Omio Koneko Josaseredoti

¹ Daudi oko yai ki bomba me Gat, di eko lwi ot bedo i abo kiyapiyapi kede bomba katitidi kame kolwongo be Adulam. Kakame imiegu mege kede jo me ot ka papa mere dedede oko winyo kede be en oudo etie kunono, gin kiko ot bute.

²Jo dedede kame oudo tie i peko, jo dedede kame oudo tie kede banyi, karacel kede jo kame oudo winyo rem i kuo gi, oko cokere bute. Cuo kame oudo romo jo tol ongwon; di en eko doko ngatel gi.

³Daudi oko yai ki kuno di eko ot Misipe me Moab. En eko waco ne abaka me Moab be, “Ango akwai iyei ne papa na kede toto na bino bedo kedi, tuno kame ango angeo gikame Rubanga bino timo na.”

⁴Aso, en eko weko jonywal mege but abaka me Moab, di gin kiko bedo kede pi kare lung kame Daudi oudo bedo kede i kapwono mere.



- ⁵Di do Enabi Gad oko bino but Daudi di eko waco ne be, “Kur idong bedo kan; yai iko ot i lobo me Yuda.” Aso, Daudi oko yai di eko ot i abum me Keret.
- ⁶Ceng moro acel, Saulo oudo tie bedo i dud cwaya i wi emukura i Gibeaa, di emako tong mere i cinge, jotic mege di cungo rimaro en. Oko waco ne be oudo kotieko ngeno kakame Daudi karacel kede jo mege oudo tie iye.
- ⁷Saulo oko waco ne jotic mege be, “Nataman winyunu, wun jo me ekeko ka Benjamin; iparunu be Daudi bino mino wun dedede poti me apura kede poti me olok? Iparunu be en ebino mino wu ibedunu jotel me isirikalen mege?”
- ⁸Benyo, kop nono en komio wun iribunu kop i koma? Likame tie ngatamoro kikomu oko tucu na be woda oudo oribere kede Daudi i koma. Likame tie ngatamoro aparo pira arabo kame tucu na be woda otieko supo ngatic na i koma, pi kina, bala kame nataman etie timo.”
- ⁹Doeg dano me Edom, kame oudo tie cungo karacel kede jotic ka Saulo oko waco be, “Ango aneno Daudi kakame oudo eoto kede Nob but Akimelek wot ka Akitub.
- ¹⁰Akimelek bin oko penyo Rwot pire, di eko mine cam kede epima ka Goliat dano me Pilistia.”
- ¹¹Manono oko mino abaka ocwao dano ot lwongo ngasaseredoti Akimelek wot ka Akitub kede jo me ot ka papa mere dedede, gin josaseredoti kame bin tie Nob; di gin dedede kiko bino but abaka.
- ¹²Saulo oko waco ne Akimelek be, “Nataman winyi, wot ka Akitub.” En di eko gamo be, “Ango ine, adwong na.”
- ¹³Saulo oko penye be, “Pinyo komio in kede Daudi iribunu kop i koma? Pinyo komio in imie cam kede epima, di doko iko penyo Rubanga pire? Pinyo komio in isupe i koma pi en donyo kina bala kame nataman etie timo?”
- ¹⁴Di Akimelek oko gamo dog abaka be, “Ngai kikom isirikalen nin dedede kame genere bala Daudi? En cwar nyari, doko ebeto ngatel me isirikalen agwoki; en dano me awora i odi.
- ¹⁵Iparo be manono en tien me agege me ango penyo Rubanga pire? Li gire! Kur abaka bed kede tam moro i koma arabo i kom ngatamoro me ot ka papa na pi kop nono, pien ango gira likame angeo gimoro akadi atitidi iye.”
- ¹⁶Abaka oko waco be, “Akimelek, in ateteni ibino to, in karacel kede jo me ot ka papa ni.”
- ¹⁷Abaka oko waco ne isirikalen adare kame oudo tie cungo i ngete be, “Nekunu josaseredoti ka Rwot, pien gin kiribere kede Daudi. Pien gin oudo kingeo be Daudi olwi oringo di likame kiko waco na.” Do isirikalen adaro abaka oko daga neko josaseredoti ka Rwot.



¹⁸Di do abaka oko waco ne Doeg be, “In ot inek gi.” Deog dano me Edom oko ot di eko neneko josaseredoti. Cenge nono eko neko josaseredoti 85, gin dedede oudo kingapo igoen gi me tic kame kolwongo be epod.

¹⁹Saulo oko mino koneko jo dedede kame bin bedo Nob, bomba me josaseredoti; cuo kede mon, idwe kede imukerun, dok, pundan, kede romini, gin dedede koneko gi kede epima.

²⁰Do awobi acel kikom awobe ka Akimelek wot ka Akitub, kame nyinge oudo Abiata, oko bwot di eko ringo but Daudi.

²¹Abiata oko tatamo ne Daudi epone kame oudo Saulo oneko kede josaseredoti ka Rwot.

²²Daudi oko waco ne be, “Cenge nono kakame ango bin aneno kede Doeg dano me Edom kuno, ango oudo angeo be en eyaro waco ne Saulo. Ango en kame akelo ne jo me ot ka papa ni dedede to.

²³Bed kan keda, doko kur ibed kede lworu moro, pien ngat amito neki, mito kong egei neka; in ibino bedo buta kan abongo peko moro.”

1 Samuel 23

Daudi Olako Bomba me Keila

¹Ceng moro acel jo mogo oko waco ne Daudi be, “Jo me Pilistia tie yi kede jo me bomba me Keila, doko kitie yako engano kame komoo i diakale me canyo.”

²Daudi oko penyo Rwot be, “Benyo, aot di ako suro jo me Pilistia nogi?” Rwot oko waco ne Daudi be, “Oti di iko suro gi tetekeny ilak bomba me Keila.”

³Do jo ka Daudi oko waco ne be, “Neningo, wan olworunu i Yuda kan; do ka ootunu Keila yi kede isirikalen me Pilistia, obinunu bedo lwor benyo?”

⁴Di Daudi bobo oko penyo Rwot. Rwot oko dwoko ne be, “Ebo, ot isur bomba me Keila; pien ango ayaro mino jo me Pilistia i cingi.”

⁵Aso, Daudi kede jo mege oko ot i bomba me Keila di kiko yi kede jo me Pilistia; kineneke jo atat kikom gi di kiko tero doke gi. Epone no en kame Daudi bin olako kede jo me Keila.

⁶I kare kame bin Abiata wot ka Akimelek olwi kede di eko ringo but Daudi i Keila, oudo emako epod eoto kede.

⁷Oko bin waco ne Saulo be Daudi oudo ooto Keila. Saulo oko waco be, “Rubanga otieko mine i cinga; piento en edonyo i bomba kame kocelo doko di etie kede irutei kame kocego, manono otieko mine egolorokin kene.”

⁸Saulo oko lwongo isirikalen mege dedede pi ot Keila yi, pi gin lukaro Daudi kede jo mege.



⁹Kakame Daudi oko winyo kede be Saulo oudo tie iikere pi sure, en eko waco ne Abiata ngasaseredoti be, “Kel epod kan.”

¹⁰Di do Daudi oko waco be, “Okwe Rwot Rubanga me Isirael, ango atieko winyo be Saulo tie iikere pi bino Keila di eko tuturo en pi ango ngatic ni.

¹¹Benyo, Saulo oyaro bino bala kame ango atieko winyo? Okwe Rwot Rubanga me Isirael, ango akwai iyama, ango ngatic ni.” Rwot oko waco ne be, “En eyaro bino.”

¹²Di Daudi bobo oko penye be, “Benyo, jopiny me Keila bino mino ango kede jo na i cing Saulo?” Rwot oko dwoko ne be, “Gin kibino mino wu i cinge.”

¹³Aso, Daudi kede jo mege kame oudo romo bala 600 oko yai di kiko weko bomba me Keila; gin kiko bedo ot aota. Kakame Saulo oko winyo kede be Daudi oudo otieko lwi ki Keila, en eko do weko ot kunono.

Daudi i Piny kobedo Mori Mori

¹⁴Daudi oko dong bedo kakopwono mere i piny kobedo mori mori, i wi tim kiyapiyapi kede bomba me Sip. Saulo oko bedo mone ceng dedede, do Rwot likame oko mine i cinge.

¹⁵Di Daudi oudo tie Kores i wi tim kiyapiyapi kede Sip, en eko ngeno be Saulo oudo obino tie mito neke.

¹⁶Jonasan, wot ka Saulo oko yai di eko ot Kores but Daudi; en eko mine nwangcuny di ewaco ne be Rwot bino gwoke.

¹⁷En ewaco ne be, “Kur ibed kede lworu; pien Saulo papa nango likame bino muli; in ibino bedo abaka me Isirael, di ango ako bino bedo ngat alubo tieni; papa nango Saulo ngeo be manoni en gikame bino timere.”

¹⁸Di do gin jo are nogi kiko timo isikan i nyim Rwot; Daudi oko dong bedo Kores, di Jonasan oko dok paco.

¹⁹Di jo mogo me Sip oko ot Gibeia but Saulo di kiko waco ne be, “Daudi tie pwono i adul wa i kakopwono mere i Kores, i moru me Kakila, kame tie tetu piny me Jesimon.

²⁰Nataman, Okwe abaka, esawa moroni kenekene kame in imito bino kede, in bia; di wan oko bino make oko mine i cingi.”

²¹Saulo oko waco be, “Akwao Rwot emi wu winyo pi tim me kisa kame inyutunu na!

²²Otunu kong bobo imedunu niang kiber; udunu kakame en etie iye kikokome, kede ngai kotieko nene kunono; pien kotieko waco na be en eriek twatwal.

²³Morenu di ikounu ngeno kabedo dedede kame en epwono iye, di ikounu dwoko na kop me ateni. Di do ango ako bino ot karacel kede wu; di ka en pwodi etie i adul nono, ango abino mone i kabedere dedede me Yuda.”

²⁴Di do jo me Sip nogo oko yai di kiko dok Sip kiweko Saulo cen. I kare nono Daudi kede jo mege oudo tie i wi tim me Maon, i aditot kame tie tetu piny me Jesimon.



²⁵Saulo kede jo mege oko ot mone. Kakame oko waco ne kede Daudi, en eko ot i lela kame bin tie i wi tim me Maon di eko donyo bedo iye. Kakame Saulo oko winyo kede be Daudi oudo tie kunono, en eko wape i wi tim me Maon kunono.

²⁶Saulo kede jo mege oko ot i nget lela tetucel, di Daudi kede jo mege oudo tie tetu ocelu me lela. Daudi kede jo mege oudo tie susunyo ot tenge wek kirweny kibut Saulo kede jo mege kame oudo tie noko gi pi mako gi.

²⁷Di do ngaor oko bino but Saulo di ewaco ne be, “Susunyo dok, pien jo Pilistia otieko suro piny wa.”

²⁸Saulo oko weko do wapo Daudi di eko dok yi kede jo Pilistia. Manono en komio oko do lwongo kabedo nono be Lela me Bwot.

²⁹Daudi oko do yai ki kunono di eko donyo pwono i adul me Engedi.

1 Samuel 24

Daudi Odagi Neko Saulo

¹Kakame Saulo odwogo kede i wapo jo Pilistia, oko waco ne be Daudi oudo tie i wi tim me Engedi.

²Di Saulo oko tero isirikalen 3,000 kame koyero ayera, di eko ot kede gi tetu lela kame kolwongo be Lela me Diegi me Obar pi mono Daudi kede jo mege.

³En eko tuno i abo kame bin kio kede anak me romini kame oudo tie i nget yongayo; di en eko donyo iye pi konyere. Aso, Daudi kede jo mege oudo tie pwono i tielo me abo nono.

⁴Jo ka Daudi oko waco ne be, “Tin en ceng kame Rwot oudo owaco ni be, ‘Abino mino ngakwor ni i cingi, di in iko bino timo ne bala kame imito.’ “ Di do Daudi oko yai di eko cede eko ngolo lak ekanso ka Saulo.

⁵I cen mere Daudi oko bedo kede cweracuny piento en oudo engolo lak ekanso ka Saulo.

⁶En eko waco ne jo mege be, “Ango akwao Rwot kur emia atim ne ngadwong na gikame cal kamano, me ango tingo cinga pi timo raco ne dano mere kame kowiro; piento en etie dano kame Rwot oyeru.”

⁷Aso, Daudi oko dagi kede tam ka jo mege di likame eko yei negi suro Saulo. Di do Saulo oko yai malo eko donyo ooko me abo, di eko meede kede ot mere.

⁸I cen mere Daudi da oko yai di eko donyo ooko me abo nono di eko lwongo Saulo be, “Abaka ngadwong na!” Saulo oko lokere di eko neno cen, Daudi oko luro wie piny pi mine wor.

⁹Daudi oko waco ne Saulo be, “Pinyo komio in iwinyo kop me jo awaco be ango amito timo nin raco?”



¹⁰Neningo, tin noni in itieko neno kede wangi epone kame Rwot omi kede i cinga i abo; jo mogo oudo osupa be aneki, do ango ako weki. Ango awaco i cunya be, ‘Ango likame abino tingo cinga keto i kom ngadwong na; piento en etie dano kame kowiro me ka Rwot.’

¹¹Nen kong, papa na, nen lak ekanso ni ine i cinga; pien kite kame ateteni ango angolo kede lak ekanso nin di likame ako neki, in iromo do ngeno be ateteni ango ali kede raco moro arabo mit me jemo nin. Ango oudo likame atimo dub moro buti bed bala in itie dwara pi mito kwanyo kuo na.

¹²Ango akwao Rwot epok i diere nango kedi ngat kame tie kede raco! Akwae eniang gikame in itimo na; do ango likame abino keto cinga i komi.

¹³Bala kame agole kariki sek waco kede be, ‘Jo areco en kame timo tim areco’ ; do ango likame abino keto cinga i komi.

¹⁴Ngai kame abaka me Isirael obino pi mono? Ngai kame in itie wapo? Ogwok oto? Abulolo acel?

¹⁵Pi mano, ango akwao Rwot engol kop i diere nango kedi. Ango akwae enen kop nono, di eko pido pira, di eko laka ki cingi.”

¹⁶Kakame Daudi bin otieko yamo ne kede Saulo kope nogi, Saulo oko penye be, “Mam dwani ine, atin na Daudi?” Saulo oko donyo boroboro koko.

¹⁷Di do eko waco ne Daudi be, “In itimo gi kopooore kalamo ango; pien in itimo nango bero, aso di ango atimo ni raco.

¹⁸Ceng atin in itieko nyuto nango epone kame in itieko timo na kede bero, pien in likame iko neka kakame Rwot omia kede i cingi.

¹⁹Pien ngai kame ngakwor mere otieko potu i cinge di eko weke likame etimo ne can? Ango akwao Rwot etim ni bero pi gikame in itimo nango i ceng atin.

²⁰Nataman ango angeo do ateteni be in ibino bedo abaka, doko in en ibino mino ajakanut me Isirael cungo.

²¹Pi mano, ango amito in ikwongere i nying Rwot be in likame ibino neneko ikwae na, kede be in likame ibino mino nyinga rwenyo i ot ka papa na.”

²²Aso, Daudi oko kwongere but Saulo. Di do Saulo oko ot pacu; do Daudi kede jo mege oko dok kapwono gi.

1 Samuel 25

To ka Samuel

¹Samuel bin oko to di jo dedede me Isirael oko cokere karacel pi koke. Gin bin kiko yike Rama i pacu mere.

Daudi kede Dako ka Nabal

I cen mere Daudi oko yai di eko ot i wi tim me Paran.



- ²Oudo tie icuo moro Maon, kame jamini mege oudo tie i bomba me Kamel. En oudo ebaro twatwal; oudo etie kede romini tutumia adek kede diegi tutumia acel. I Kare nono en oudo etie Kamel nyaro yer me romini.
- ³Nying icuo nono oudo Nabal, kede nying dako mere oudo Abigail. Dako nono oudo riek doko ecil, do icuo oudo cunye kec doko engaworo; en oudo dano me ot ka Kaleb.
- ⁴Daudi oko winyo i wi tim kuno be Nabal oudo tie nyaro yer me romini mege.
- ⁵Aso, Daudi oko cwano awobe tomon pi gin ot Kamel but Nabal pi tero ne amot mere.
- ⁶En ewaco negi be kimote be, “Mulem bed buti, but jo me odi kede i kom gi dedede kame in itie kede.
- ⁷Ango awinyo be jo ni tie nyaro romini; aso jokwai romini nin oudo tie kede wan, di wan likame oko timo negi raco moro, doko i kare dedede kame gin oudo kitie kede i Kamel, likame tie gimoro kame gin kiko rwenyo.
- ⁸In peny gin, kibino yamo ni. Pi mano, ango akwai ibed kede cuny aber but awobe na, pien wan tin otie i ceng me ebaga. Ango akwai imi gimoro kenekene kame in itie kede but jotic ni kede but wodi Daudi.”
- ⁹Kakame jo ka Daudi oko tuno kede but Nabal, gin kiko waco ne kop noni dedede i nying Daudi; di gin kiko bedo daro.
- ¹⁰Do Nabal oko gamo dog jotic ka Daudi be, “Daudi en ngai? Wot ka Yese nono en ngai? I kare noni tie ipaso atot kame tie ringo tenge kibut jodongo gi.
- ¹¹Benyo, ango akwany mugati na kede pii na kede ringo me leini kame angolo ne jonyar yer me romini na, di ako mino but jo kalikame ango angeo kakame kiwok kiye?”
- ¹²Jo ka Daudi oko dok di kiko tatamo ne kop kame Nabal owaco.
- ¹³Daudi oko waco ne jo mege be, “Ngat acelacel kwany epima mere!” Di ngat acelacel oko rwako epima mere i piere; Daudi da oko ngapo mere; di jo aromo tol ongwon oko lubo Daudi, do jo tol are en oko dong daro jame.
- ¹⁴Ngat acel kikom jotic ka Nabal oko waco ne Abigail dako ka Nabal be, “Daudi oudo ooro jo obino i wi tim pi kelo amot but ngadwong wa, do en eko yeyeto gi.
- ¹⁵Aso di gin oudo kitimo wan ber twatwal, di wan likame oko udo peko moro, doko likame oko rwenyo gimoro i kare dedede kame wan obedo kede gin obar.
- ¹⁶Gin oudo kibedo gwoko wan iwor kede i ceng, i kare dedede kame wan oudo obedo kede gin di okwao romini wa.
- ¹⁷Nataman mito in ingei di iko neno gikame ipoore timo; pien kotieko iikere pi timo can ne ngadwong wa kede jo me ode dedede; en ikiteso mege reco, omio likame tie dano kame karuno yamo kede.”



¹⁸Di do awakawaka Abigail oko kwanyo mugati tol are, isaun are me lau kopong kede bwini, ringo me romini kany kame kotieko iiko, ideben kany me mawele kame kocelo, abungeta tol acel me olok kotuo, kede anyakini tol are kotuo me epigi kame kolulungo. En eko tweno gi ingei pundan

¹⁹di eko waco ne jotie mege be, “Wun telunu nango yongayo; ango atie lubo wu.” Do en likame eko waco ne cware Nabal.

²⁰Di bin en ebedo ingei punda mere etie ot di eko tuno kakame moru ogalao, en eko riamo kede Daudi kede jo mege di oudo kitie bino.

²¹Daudi oudo pwodi inonono inonono owaco be, “Ateteni ango oudo kom abedo gwoko jamini me dano ni i wi tim me nono nono, di likame tie gire moro oko rwenyo; do en eko cula kede raco pi bero kame ango atimo ne.

²²Ango akwao Rubanga emia alola ka odiko otuno di pwodi ango aweko icuo acel kikom jo mege likame aneko.”

²³Kakame Abigail oneno kede Daudi, awakawaka di en ewok piny ki ngei punda, eko riebere piny i nyim Daudi.

²⁴En eriebere piny katiene di eko waco ne be, “Adwong na, wek raco nono bed i wi ango kena, akwai iyeyi na yamo kedi, di iko winyo kope me ngatic ni.

²⁵Ngadwong na, ango akwai be kur iket cunyi i kom Nabal, dano kame ikiteso mege reco nono; pien bala kame nyinge nyuto, en cal mere inonono; nyinge dwong mere en ngamingo, doko tim me mingo tie ne; do ngadwong, ango ngatic nin, likame oudo aneno awobe kame in icwao.

²⁶” Ngadwong na, nataman do bala kame Rwot otieko gengi kede ki onyo remo kede ki timo onyanga i kom jokwor ni, ango alairo buti i nying Rwot kakuo be jokwor ni kede jo amito timo nin raco bino udo alola bala Nabal.

²⁷Aso, ango akwai iyeyi gamo giamia kame ngatic nin okelo ni, tetekeny imi awobe nin kame tie upere kedi.

²⁸Ango akwai isasiro raco kame ango ngatic ni atimo; pien ateteni Rwot bino mino ajakanut bedo i ekeko ni nakanaka, pien in itie yi ne Rwot; doko in likame ibino timo gimoro arac i kare me kuo ni. ²⁹Ka ngatamoro oko suri di emito kwanyo kuo ni, Rwot Rubanga ni bino gwoko kuo ni; do kuo me jokwor nin en ebino lwomo tenge bala kame dano lwomo kede engaro kede aporocet.

³⁰Kame do Rwot otieko timo nin gi dedede abeco kame en etieko yamo i komi, di eko keti bedo ngapug me Isirael,

³¹likame tie gimoro bobo kame bino mini ibedo kede iturur, arabo kame bino ramo cunyi, pien udo likame ionyo remo moro abongo tien kop, arabo itimo onyanga. Kame Rwot otieko timo ne in bero, akwai iyutuno ada.”

³²Daudi oko waco ne Abigail be, “Pak bed but Rwot, Rubanga me Isirael, ngat kocwai pi bino riamo kede ango i ceng atin!



³³Pwoc bed but Rubanga pi rieke kame in inyuto, doko apwoyo ida ngat kame tin igenga ki timo raco me onyo remo kede ki timo onyanga ango kikoma!

³⁴Pien ango alairo i nying Rwot Rubanga akuo me Isirael ngat kogenga timo ne wu raco be, ka koto oudo in likame isusunyo bino riamo keda, ateteni tuno diki odiko oudo koto likame Nabal odong kede akadi icuo acel.”

³⁵Di do Daudi oko gamo gikame en oudo ekelo ne, di eko waco ne be, “Dok paco ni kede mulem; neni, ango atieko winyo dwani, doko atieko yei timo gikame ikwao.”

³⁶Kakame Abigail oko tuno kede but Nabal, eko ude etie i ot i ebaga kame cal bala me abaka. Cuny Nabal oudo yom twatwal, pien oudo etieko mer kitek; en likame eko yamo ne kop moro tuno odiko di ceng owok.

³⁷Odiko di do bwini otiek ki wi Nabal, dako mere oko tatamo ne gi dedede kotimere; cunye oko poto di kome lung oko to.

³⁸Ingei ceng aromo bala tomon Rwot oko kwanyo kuo ka Nabal.

³⁹Kakame Daudi oko winyo kede be Nabal oto, en eko waco be, “Pak bed but Rwot ngat kongolo kop i wi Nabal pi ayet kame eyeta kede, doko da en etieko genga ango ngatic mere ki timo gikarac; Rwot otieko dwoko ne Nabal raco mere i wie kene.” Di do Daudi oko cwano kop ne Abigail me supe doko dako mere.

⁴⁰Kakame jotic ka Daudi oko tuno kede but Abigail i Kamel, gin kiko waco ne be, “Daudi ocwao wan be oteri ot bedo dako mere.”

⁴¹Abigail oko yai di eko kudo wie piny eko waco be, “Ango apasoit mere kame bino lwoko tien jotic me ngadwong na.”

⁴²En eko yai awakawaka di eko yito ingei punda di eko ot; anyira jotic mege kany oko nyamaro en. En bin eko lubo jo kame Daudi oudo ooro di eko doko dako mere.

⁴³Daudi oudo otieko nyomo Akinoam me Jeserel, nataman di Abigail da oko doko dako mere.

⁴⁴Do Saulo oudo otieko mino nyare kame nyinge Mikal, kame oudo obedo dako ka Daudi, but Palati wot ka Lais, kame oudo wok ki bomba me Galim.

1 Samuel 26

Daudi Odagi Neko Saulo Bobo

¹Jo mogo me Sip bobo oko bino Gibeia but Saulo di kiko waco ne be, “Daudi tie pwono i wi moru me Kakila, kame pimere kede Jesimon.”

²Di Saulo oko yai eko ot i wi tim me Sip kede cuo 3,000 kame koyero i Isirael, pi mono Daudi.

³Saulo kede jo mege oko gero kimere gi i nget yongayo, i wi moru me Kakila, kame pimere kede Jesimon. Do Daudi oudo pwodi tie i wi tim. Kakame en eko niang kede be Saulo oudo otieko bino mone i wi tim,



- ⁴en eko cwano jo pi begao, di oko mine engeo be ateteni Saulo oudo otieko tuno.
- ⁵Di do Daudi oko yai ot di eko tuno kakame Saulo oudo tie iye; di eko neno kakame Saulo oudo tie buto iye kede Abuneri wot ka Ner, ngatel me isirikalen. Saulo oudo tie buto i diere me isirikalen, di isirikalen oluke.
- ⁶Di Daudi oko waco ne Akimelek dano me Kiti, kede ne Abisai omin me Joab (toto gin oudo Seruya) be, “Ngai kikom wun kame bino ot keda kakame Saulo tie iye kede jo mege?” Abisai oko gamo be, “Ango abino ot kedi.”
- ⁷Aso, iwor nono Daudi kede Abisai oko ot kakame isirikalen ka Saulo oudo tie iye, di kiko udo Saulo tie nino i diere me isirikalen di esipo tong mere kawie; doko oudo Abuneri kede isirikalen obuto kiluke diere.
- ⁸Abisai oko waco ne Daudi be, “Tin do Rubanga otieko mino ngakwor ni i cingi; nataman do wek ango acobe kede tong tien acel kiton tong pelao moko piny; likame abino cobe tien are akadi acel.”
- ⁹Do Daudi oko waco ne Abisai be, “Kur ineke; pien ngai kame karuno tingo cinge timo ne dano kame Rwot owiro raco, di en eko bedo abongo raco?”
- ¹⁰Daudi oko waco be, “Alairo i nying Rwot kakuo be, Rwot bino neko Saulo; arabo ceng mere bino tuno di eko to; amoto ebino ot i yi di eko to iye.
- ¹¹Rwot likame yei be ating cinga pi timo raco ne dano mere kame kowiro; in kwany tong mere kame tie kawie, kede opoko me pii mere, di wan oko ot.”
- ¹²Aso, Daudi oko kwanyo tong kame oudo tie kawic ka Saulo kede opoko me pii, di gin girgi kiko yai kioto. Likame bin tie ngatamoro oko neno, arabo ngeno gi kotimere arabo akadi cei da; jo dedede oudo onino pien Rwot oudo omio nino atek omako gi.
- ¹³Di do Daudi oko ngolo aditot tetuca eko ot cungo i wi emukura kame oudo tie kakabor; dierediere me kakame en oudo etie iye kede kakame Saulo gini oudo tie iye oudo lac twatwal.
- ¹⁴Daudi di oko lelemo but isirikalen ka Saulo kede Abuneri wot ka Ner, di elwongere be, “Abuneri! Benyo, likame iyaro gamo dogo?” Di do Abuneri oko gamo be, “Ngai ino kame tie lolo abaka di etie nino?”
- ¹⁵Daudi oko penyo Abuneri be, “Mam in icuo? Ngai kacal bala in i Isirael? Pinyo bo komio in likame iko gwoko ngadwong ni abaka? Pien ngatamoro oudo odonyo kakame wun itienyu iye pi neko ngadwong ni abaka.
- ¹⁶Gikame in itimo noni likame ber. Alairo i nying Rwot kakuo, in ipoore to, pien in likame iko gwoko ngadwong ni, dano kame Rwot owiro. Neningo do nan, tong ka abaka tie tuai, arabo opoko me pii kame oudo tie kawie?”
- ¹⁷Saulo oko ngeno dwan Daudi, di eko penyere be, “Daudi woda, mam dwani ine?” Daudi oko gamo be, “Ebo, dwanango inonono, ngadwong na abaka.”



¹⁸Di eko medo be, “Pinyo kara komio in adwong na itie wapa? Nyo kame atimo? Raco na nyo?”

¹⁹Nataman do adwong na abaka miero iwiny kop na, ango ngatic ni. Ka Rwot en kosupi i koma, akwae eyei gamo giayala; do ka jo en kotimo, akwao ilam ka Rwot mak gi, pien gin kitieko riamango tenge ki iner na me lobo ka Rwot di kiwaco na be aot awor rubangan apat.

²⁰Aso nataman kur imi remo na ony pinyo kakame Rwot li kiye; pien abaka me Isirael otieko bino pi mono abulolo acel, bala dano adwaro etakura i wi mori.”

²¹Di do Saulo oko waco be, “Ango atimo rac; dwog do okwe, Daudi woda, pien ango likame bobo abino timo ni rac, pi kuo nango tin oudo obedo gikame pire tek kibuti. Ango abedo timo gi me mingo, doko atimo gikarac twatwal.”

²²Daudi oko dwoko be, “Tong ine, Okwe abaka! Cwai ngat acel kikom awobe ni bin gami.

²³Rwot timo bero but jo dedede pi gi kopooore kame kitimo, kede pi genere gi; pien Rwot oudo omi i cinga i ceng katin, do ango likame ako tingo cinga pi timo can i kom dano ka Rwot kame ewiro.

²⁴Bala kame tin kuo nin obedo kede gikame pire tek kibuta, ango akwao be kuo nango da bed kamanono but Rwot, doko akwae elaka ki peko dedede.”

²⁵Di do Saulo oko waco ne Daudi be, “Rubanga mi winyo, Daudi woda! In ibino timo jamini atos doko gi dedede kame in itimo bino cobere.” Aso, Daudi gire oko ot, di Saulo da oko dok paco.

1 Samuel 27

Daudi bobo Oringo Gwokere but Jo Pilistia

¹Daudi oko waco i cunye be, “Ceng moro acel Saulo bino neka; likame tie gimoro ace aber kalamo ango lwi ot i pinyo me jo Pilistia; di do cunye Saulo ko bino kwanyere tenge ki mona i Isirael, di ango ako bino bwot ki cinge.”

²Aso, Daudi oko yai kede jo tol kanyape kame oudo en etie kede di eko ot but Abaka Akis wot ka Maok me Gat.

³Daudi oko bedo Gat kede Akis, en kede isirikalen mege, dano acelacel kede jo me ode. Daudi oudo tie kuno kede mon mege are, Akinoam me Jeserel kede Abigail me Kamel, apuserut ka Nabal.

⁴Kakame oko waco ne kede Saulo be Daudi oudo otieko ringo Gat, en do eko weko mone.

⁵Di do Daudi oko waco ne Akis be, “Ka cunyi yom keda, mia bomba katitidi abed iye; pien pinyo kamio ango ngatic nin anywako bedo kedi i bomba me abaka?”

⁶Aso, cenge nono Akis oko mine Sikilag; manono en komio bomba me Sikilag oko bedo me ka abakai me Yuda tuno tin.



- ⁷Daudi bin oko tieko mwaka acel kede dwete ongwon i piny me Pilistia.
- ⁸I kare nono Daudi kede jo mege oko donyo ot suro jo me Gesur, Girisi kede Amalek; pien kadedere nogo en kame oudo jo bedo i yi gi, cako ki Telam i yongayo aoto Sur tuno i piny me Misiri.
- ⁹Daudi oudo suro kadedere nogo di eko neko cuo kede mon dedede, do romini, doke, pundan, aguraguran kede igoen en oudo etero edok kede gi but Akis.
- ¹⁰Kame Akis oko penye be, “Alu kame in oudo ioto suro i ceng atin?” Daudi oudo waco ne be, “Ango oudo aoto Yuda, i bad tetu piny mere,” arabo be, “Ango oudo aoto ne jo Jaramel,” amoto be, “Ango oudo aoto ne jo Ken.”
- ¹¹Daudi oudo likame weko ngatamoro dong kuo, dako akadi icuo, kame koto oudo komako di oko tero Gat, piento en oudo eparo be, “Cengemogo kiko bino waco be, ‘Daudi otimo gikacal kaman.’ “ Manono en gikame en ebedo timo pi kare dedede kame en ebedo kede i piny me jo Pilistia.
- ¹²Akis oudo oketo gen mere i kom Daudi di eparo be, “En etieko mino cuny jo mege me Isirael otieko dage kitek; pi mano, en do ebino bedo ngatic na nakanaka.”

1 Samuel 28

- ¹I kare nono jo me Pilistia oudo oko coko isirikalen gi pi ot yi kede jo me Isirael. Akis oko waco ne Daudi be, “In ingeo kiber be, in karacel kede jo ni iyarunu upere keda ot yi.”
- ²Daudi oko waco ne Akis be, “Mano ber twatwal, pi mano, in ibino ngeno gikame anga akaruno timo.” Akis oko waco ne Daudi be, “Mano ber twatwal, anga abino mini ibedo ngagwoka pi kare me kuo na lung.”

Saulo Openyo Emuron

- ³Kakame Samuel oto kede, jo me Isirael dedede oko koke di kiko yike Rama, bomba me turgi. Saulo oudo otieko riamo imuroko kede jojwogi dedede i Isirael.
- ⁴Isirikalen me Pilistia bin oko cokere, di kiko gero kimere gi Sunem. Saulo da oko coko jo me Isirael dedede, di kiko gero kimere gi Gilboa.
- ⁵Kakame Saulo oko neno kede isirikalen me Pilistia, lworu oko make di cunye oko miel kitek.
- ⁶Saulo oko penyoy Rwot gi me atima, do Rwot likame oko dwoko ne kop moro, akadi i lek arabo Urim amoto kibut inabin.
- ⁷Di do Saulo oko waco ne jotic mege be, “Mounu nango amuron moro, tetekeyny aot bute di ako penye.” Jotic mege oko waco ne be, “Amuron acel tie Enedor.”
- ⁸Aso, Saulo oko ngapo igoen apat tetekeyny kur jo twer ngene, en eko ot kuno kede cuo ace are. Gin bin kiko ot but dako nono iwor. Di eko waco ne be, “Ango akwai ipeny na tipoy moro, doko lwong na tipoy me ngat kame anga ayaro waco ni.”



- ⁹Dako nono oko waco ne be, “Ateteni in ingeo gikame Saulo otieko timo, epone kame en eriamo kede imuroko kede jojwogi i Isirael. Pinyo do komio in itie ciko na owic kame bino kelo na to?”
- ¹⁰Do Saulo oko kwongere bute i nying Rwot be, “Alairo i nying Rwot kakuo, likame tie alola kame kobino mini pi timo gini.”
- ¹¹Di do dako nono oko penye be, “Ngai kame in imito be ango alwong ni?” En eko dwoko ne be, “Lwong nango tipo ka Samuel.”
- ¹²Kakame dako nono oko neno kede Samuel, en eko dwilao kitek di eko penyo Saulo be, “Pinyo bo komio ingala? Kom in Saulo!”
- ¹³Abaka oko waco ne be, “Kur ibed kede lworu; nyo kame itie ineno?” Dako nono oko dwoko ne Saulo be, “Atie neno tipo moro tie wok ki piny.”
- ¹⁴En eko penye be, “Ecal benyo?” Dako nono oko waco ne be, “Icuo oti inonono atie wok malo; en engapo ekanso.” Di do Saulo oko niang be Samuel oudo inonono, di en eko riebere piny pi mine wor.
- ¹⁵Samuel oko Penyo Saulo be, “Pinyo kara komio in ilola kede lwonga wok ooko?” Saulo oko gamo be, “Ango atie i peko adwong twatwal, pien jo Pilistia otieko bino pi yi keda, doko Rubanga otieko weka. En likame bobo edwoko kop na moro akadi acel, akadi kibut inabin arabo i lek; en komio ango alwongi pi waco na gikame apoore timo.”
- ¹⁶Samuel oko penye be, “Pinyo komio ipenya di Rwot otieko weki eko doko ngakwor ni?”
- ¹⁷Rwot otieko timo ni gikame oudo emia awaco ni; pien Rwot otieko kwanyo ajakanut ki cingi, di eko mino Daudi.
- ¹⁸Pien in bin likame itimo gikame oudo Rwot owaco, piento likame iko mino lilo mere atek oko cobere i kom jo Amalek. Kop nono en komio Rwot tin otieko timo nin gi noni.
- ¹⁹Medo i wi manono, Rwot bino mino jo me Isirael karacel kede in i cing jo me Pilistia; doko diki in kede idwe ni awobe iyarunu bino nywako keda bedo kan; Rwot bino da mino isirikalen me Isirael i cing jo Pilistia.”
- ²⁰Oyotoyot di Saulo latakin piny kede lworu atek pi kope kame Samuel owaco; doko teko oudo otiek i kome pien cenge nono oudo en ebedo piny yuluyul kede iwor da kiakia abongo camo gimoro.
- ²¹Dako nono oko ot but Saulo, kakame en eko neno kede be oudo lworu atek omake, en eko waco ne be, “Neningo, ango awinyo kop nin; ango oudo ajalo kuo na di ako timo gikame in oudo iwaco na.
- ²²Pi mano, nataman mito ida iwiny kop me ngatic ni; wek kong akel ni cam moro atitidi. Cami, tetekeny iud teko me ot.”



²³Saulo oko dagi di ewaco be, “Ango likame ayaro cam.” Do jotic mege karacel kede dako nono oko dine; di en eko winyo kop gi. Di eko yai ki piny eko bedo i kabuto.

²⁴Oudo dako nono tie kede roya kocwe i ot. Awakawaka di en eko ngole, eko juko moko alos, eko nyongo, di eko tedo mugati kame arup li kiye.

²⁵En eko keto gi i nyim Saulo kede jotic mege, di gin kiko camo. Di do gin kiko yai di kiko ot iwor nono.

1 Samuel 29

Jo me Pilistia Odagi Daudi

¹Jo me Pilistia oko coko isirikalen gi dedede i bomba me Apek, do jo me Isirael oudo oko gero kimere gi i nget atan kame oudo tie Jeserel.

²Di bin abakai me Pilistia tie sirito kede isirikalen gin kame oudo tie i ikodeta me toli kede me tutumian, di Daudi da kede jo mege oudo tie sirito ki cen kede Akis,

³jotel me isirikalen me Pilistia oko penyere be, “Nyo kame jo me Eburania gi tie timo kan?” Akis oko waco ne jotel me isirikalen me Pilistia be, “Daudi inononi, ngat kame oudo obedo ngatic ka Abaka Saulo me Isirael, kame nataman otieko bedo keda odoko kare alac. Cako en lwi bino buta kan, ango tuno tin likame pwodi audo raco moro bute.”

⁴Do jotel me isirikalen me Pilistia oko doko ger ne Akis di kiko waco ne be, “Dwok icuo no cen, me wek edok kabedo kame in itieko mine; en likame ebino upere kede wan ot i yi. Pien cengemogo esawa me yi en eromo lokere di eko doko ngakwor wa. Pien epone mene kame loni romo dok kede i nywak kede ngadwong mere? Mam ka elokere ne wa di eko ngongolo wi wa?”

⁵Mam Daudi inononi, kame bin gin kimielo di kiwero wer i kome be, ‘Saulo otieko neko mege tutumia, do Daudi oneko mege tutumian kede tutumian’ ?”

⁶Di do Akis oko lwongo Daudi di eko waco ne be, “Ango alairo i nying Rwot kakuo me Isirael be, in dano agenere, doko kibuta oudo poore in ot keda i yi di oko dwogo karacel; pien cako i ceng kame in ibino kede buta tuno tin, ango likame audo raco moro i komi. Do akadi kamanono da, abakai icegun likame yei nin upere kede wa.

⁷Pi mano, in dok cen; doko ot kede anapakin; kur itim gimoro kame wango cung abakai me Pilistia.”

⁸Di Daudi oko penyo Akis be, “Kara nyo arac kame ango atimo? Nyo arac kame in iudo but ngatic ni cako i ceng kame ango ageo tic kede buti tuno tin, amio ango likame apoore ot yi kede jokwor me abaka ngadwong na?”

⁹Akis oko dwoko ne Daudi be, “Ango angeo be in iber i nyima bala malaika ka Rubanga; do jotel me isirikalen me Pilistia otieko waco be in likame ibino upere kede wa ot i yi.



¹⁰Nataman do in yai odiko sek, in karacel kede jotic me adwong ni kobino kedi, di ikounu ot kabedo kame ango amio wu. Kur imak kop arac kame owaco no i cunyi, piento in lem ibedo kede ango kiber. Yaunu odiko sek di ikounu cako ot di pwodi ceng wok awoka.”

¹¹Aso, odiko sek di Daudi oko yai kede jo mege pi dok Pilistia. Do jo me Pilistia oko ot kiton Jeserel.

1 Samuel 30

Daudi Oyi kede Jo Amalek

¹Nataman do kakame Daudi kede jo mege oko tuno kede Sikilag i ceng me adek mere, kiko udo jo Amalek otieko yako adul kame oudo tie tetu piny me Yuda kede Sikilag. Oudo kitieko suro Sikilag di kiko wange dopodop,

²doko kiko mako mon kede jo dedede kame oudo tie i bomba kitero, jo me ruom apiny kede jo me ruom amal; gin likame kineko gi, do kitero gi kioto kede gi.

³Kakame Daudi kede jo mege oko tuno kede i bomba, kiko udo kowange dopodop, doko oudo kotieko mako mon gi, idwe awobe gi, kede anyira gi koteru.

⁴Di do Daudi kede jo kame oudo en etie kede oko cako koko tuno teko gi me koko oko tiek.

⁵ Mon ka Daudi are da oudo komako oko tero, Akinoam me Jeserel, kede Abigail apuserut ka Nabal me Kamel.

⁶Daudi oudo tie i peko adwong twatwal; pien jo dedede oudo cunyi gi owang pi kei idwe awobe kede anyira gi, omio oudo kitie waco kop me didipo en kede kide. Do Rwot Rubanga mere oko mine nwangcunyi.

⁷Daudi oko waco ne Abiata ngasaseredoti wot ka Akimelek be, “Kel na epod.” Abiata di oko tero ne Daudi epod.

⁸Daudi di oko penyo Rwot be, “Benyo, awap joyak gi? Abino mako gi i yongayo?” Rwot oko dwoko ne be, “Wap gi; pien ateteni in ibino mako gi i yongayo di iko lako jo kame gin kimako.”

⁹Aso, Daudi oko yai, en kede cuo tol kanyape (600) kame oudo tie kede. Gin bin kiko tuno i atapar me Besor, kakame kiko weko jo mogo odong iye.

¹⁰Do Daudi oko meede kede iwapan, en kede cuo tol ongwon (400); cuo icegun tol are oudo oko dong cen, pien gin oudo kiol twatwal likame kikaruno ngolo atapar me Besor.

¹¹Cuo kame oudo tie upere kede Daudi oko udo dano moro me Misiri i ebar, di gin kiko kele but Daudi. Gin kiko mine cam di eko camo, doko kiko mine pii da di eko mato;



¹²gin bobo da kiko mine anyakini kotuo me epigi, kame kolulungo kede abungeta are me olok kotuo. Kakame en eko tieko kede cam, di do eko udo teko; piento en oudo etieko ceng adek di likame ecamo gimoro akadi mato pii.

¹³Daudi oko penye be, “Ngadwong nin en ngai, doko in iwok ki tuai?” En di eko dwoko be, “Ango awobi me Misiri, abedo ngatic me dano me Amalek. Ngadwong na oweka cen nataman otieko ceng adek, pien oudo tuwo omaka.

¹⁴Wan oudo ooto yak i adul me jo Keret kede i adul kame tie i bad tetu piny me Yuda kede i adul me jo me ekeko ka Kaleb, doko da oko wango Sikilag dopodop.”

¹⁵Daudi oko penye be, “Benyo, ikaruno tera kakame joyak nogo tie iye?” En eko waco ne be, “Kwongere buta i nying Rubanga be likame ibino neka, arabo mina i cing ngadwong na, di ango ako bino teri but gi.”

¹⁶Kakame en eko tero kede Daudi, joyak nogo oudo osasarun kuno atatai di kitie cam kede amata kede miel, pien jamini kame gin oudo kiyako ki lobo me Pilistia kede Yuda oudo tot twatwal.

¹⁷Daudi oko yi kede gi cako obai tuno otieno. Likame tie dano moro kame oko bwot kikom gi, kwanyo kenekene awobe tol ongwon (400), kame oudo oko yito ingei asigiran di kiko ringo.

¹⁸Daudi oko dwoko jo dedede kede jamini da dedede kame oudo jo Amalek otero, kiton mon mege are da.

¹⁹Likame tie gimoro kame oudo oko rwenyo akadi acel, jo me ruom amalo amoto ruom apiny, idwe awobe arabo anyira, jamini dedede kame oudo koyako; Daudi bin oko dwoko gi dedede kiton leini gi da.

²⁰Daudi bin oko mano da romini kede doke kame jo Amalek oudo tie kede, di oko poko magonogi tenge kikom leini apat. Jo dedede bin oko waco be magonogo bino bedo cul ka Daudi.

²¹Di do Daudi oko dok but cuo tol are (200) kame bin ool twatwal di likame kiko karuno meede ot kede en, di bin oko weko gi i atapar me Besor. Cuo nogo bin oko ot siramo Daudi kede jo kame bin tie upere kede. Kakame Daudi oko noko gi kede, en eko moto gi kede yomcuny.

²²Di do cuo acuny gi reco doko di kony gi li kikom cuo kame oudo ooto kede Daudi oko waco be, “Piento gin oudo likame kiko ot kede wa, wan likame oyaro mino gi gimoro kikom jamini kame wan odwoko, kwanyo kenekene ngat acelacel bino tero dako mere kede idwe mege di eko ot.”

²³Do Daudi oko waco be, “Imiegu na, likame iyarunu timo kamano kede gikame Rwot omio wa; en egwoko wa di eko mino joyak kame oudo osuro wa i cing wa.

²⁴Likame tie ngat kame twero yei kop wu no. Pien iner me dano kame oto i yi miero bed rom aroma kede me dano kame dong cen daro jamini; gin kipoore nywako di rorom.”



²⁵Cako cenge nono en eko mino kop nono odoko iswil kame kolubo i Isirael; pwodi etie kamanono tuno tin.

²⁶Kakame Daudi oko tuno kede Sikilag, en eko poko jamini mogo kame oudo gin kima di eko cwano ne adiereson mege, gin en joadongo me Yuda, di ewaco negi be, “Magi en giamia kame ango acwao ne wu, kame kopoko kikom jamini kame koyako kibus jokwor ka Rwot.”

²⁷En bin ecwao giamia nogo but jotel kame bin tie i bomba me Betel, i bomba me Rama kame oudo tie tetu piny me Yuda, i bomba me Yatir,

²⁸i bomba me Aroer, i bomba me Sipimot, i bomba me Esitemoa,

²⁹kede Rakal, i bomba me jo Yeramel, i bomba me jo Ken

³⁰kede da but jotel kame oudo tie i bomban me Koroma, Borasan, Atak,

³¹kede Keburon. En bin eko cwano giamia kabedere dedede kame en kede jo mege oudo kibedo bebeo iye.

1 Samuel 31

To ka Saulo kede Awobe mege

(1 lyutun 10.1-12)

¹kare nono jo me Pilistia oudo oko yi kede jo me Isirael i wi moru me Gilboa; di jo me Isirael oko dipo ringo i nyim jo Pilistia, di oko neko atot kikom gi.

²Jo me Pilistia oko riamere kede Saulo kede awobe mege di kiko mako gi i yongayo; di jo me Pilistia oko neko awobe ka Saulo, Jonasan, Abinadab kede Malikisua.

³Yi bin oko bedo pek i kakame Saulo oudo tie iye; jo ayi kede emal bin oko ude, di kiko mine awanon arac twatwal.

⁴Di do Saulo oko waco ne awobi kame bin mako ne jamini me yi be, “Wot epima ni di iko coba kede pelepel, tetekeny jo kalikame kokepo nogi kur bin di kiko mina adok gi me tuko gi, di kiko neka.” Do awobi nono oudo lworu omako, omio likame eko yei. Aso, Saulo di oko kwanyo epima mere en won kikome di eko poto iye.

⁵Kakame awobi nono oko neno kede be Saulo oudo oto, eda eko poto i epima mere di eko to karacel kede Saulo.

⁶Aso, Saulo kede awobe mege adek, kede awobi kame bin mako ne jamini me yi, karacel kede jo mege dedede bin oko to i ceng acel.

⁷Kakame jo me Isirael kame oudo tie tetuca me aditot me Jeserel, kede kame oudo tie loka tetuca me ecilet me Yorodan oko ngeno kede be jo me Isirael oudo oringo ki yi, kede da be oudo koneko Saulo kede awobe mege, gin kiko ringo tenge kiweko bomban gi; di jo me Pilistia oko bino di kiko donyo bedo i yi gi.



⁸I ceng kame lubo mere di do yi oudo otiek, jo me Pilistia oko ot pi yako jamini ki kom jo kame oudo kineko, di gin kiko udo liele ka Saulo kede me awobe mege adek tie buto i wi moru me Gilboa.

⁹Gin kiko tongo wie tenge, di kiko yako jamini mege me yi, di kiko cwano jo kede gi i lobo me Pilistia lung pi gin ot tatamo rwonge aber nono but rubangan gi kede but jo gi.

¹⁰Gin bin kiko keto jamini ka Saulo me yi i tempulo ka Asitate, rubanga adako, do kome gin kiko guro i apama me bomba me Bet San.

¹¹Do kakame jo me bomba me Jabes kame bin tie i adul me Gilead oko winyo kede gikame jo Pilistia oudo otimo ne Saulo,

¹²cuo dedede kame bin tek yi oko yai di kiko ot iwor kiakia paka tuno Bet San, di kiko kwanyo kom Saulo kede me awobe mege ki apama me Bet San. Gin di kiko dok Jabes di kiko wango gi kuno.

¹³Di do kiko tero cogere gi di kiko yiko gi i dud cwaya i Jabes kunono, di kiko kanyo kec pi ceng kanyaare.



2 Samuel

2 Samuel 1

Daudi Owinyo Kop me To ka Saulo

¹Di do Saulo oudo otieko to, Daudi bin oko dwogo ki yi kame en oudo ebwono kiye jo Amalek di eko dong bedo Sikilag pi ceng are.

²I ceng me adek mere, icuo moro kowok kibus isirikalen ka Saulo oko bino di enyinyilo igoen me kome doko di emio apua omako wie pi nyuto cweruncyue. Kakame eko tuno kede but Daudi, en eko riebere piny i nyime pi mine wor.

³Daudi oko penye be, “In iwok ki tuai?” En eko waco ne be, “Ango awok kibus isirikalen me Isirael. Kuo na obwot abwota.”

⁴Daudi oko waco ne be, “Tatamo na, yi oko bedo benyo?” En eko dwoko ne be, “Isirikalen oko ringo ki yi, doko da koneko isirikalen atot. Koneko Saulo kede wode Jonasan da.”

⁵Di do Daudi oko penyo awobi nono kame bin okelo ne rwonge be, “In iko ngeno benyo be Saulo kede wode Jonasan oto?”

⁶Awobi nono oko waco ne be, “Ango oudo atie i wi moru me Gilboa, ako neno Saulo di egongere i kom tong mere, di cabalan kede jo aringo kede gi oudo tie noke.

⁷Kakame en eko ngoloro kede cen ngee, en eko nena di eko lwonga. Ango ako gamo be, ‘Ango ine, adwong.’

⁸En eko penya be, ‘In ngai?’ Ango ako waco ne be, ‘Ango abedo dano me Amalek.’

⁹Di do en eko waco na be, ‘Bia kan di iko dopa; pien atie i lito atek do di cunya pwodi likame mito cot.’

¹⁰Aso, angu di ako ot bute di ako dope, pien angu oudo angeo be en likame bobo oudo ekaruno yai bedo kuo ingei en potu piny. Angu ako kwanyo ocuro mere me ajakanut kame oudo tie i wie kede eriko kame oudo engapo i bade, di ako kelo gi kan buti adwong na.”

¹¹Di do Daudi oko nyinyilo igoen me kome pi cweruncyue; di jo dedede kame bin tie kede da oko timo kamanono.

¹²Gin kiko tururo di kiko koko, doko kiko kanyo kec tuno otieno pi Saulo kede wode Jonasan, kede pi isirikalen ka Rwot kede pi jo me Isirael, pien oudo koneko gi i yi.

¹³Daudi di oko penyo awobi kame bin okelo ne rwonge nono be, “Turu tie tuai?” En eko dwoko be, “Ango abedo wot ka dano me Amalek, kame obedo ngakumbor i piny wu.”

¹⁴Daudi oko penye be, “Pinyo bo komio in likame iko bedo lwor tingu cingi pi neko dano ka Rwot kame ewiro.”



¹⁵Di do Daudi oko lwongo ngat acel kikom isirikalen mege di eko waco ne be, “Neke!” En eko cobe paka to.

¹⁶Daudi oko waco ne dano me Amalek nono be, “Remo ni dong i wii; pien kop me dogi en kongolo ni kop di iwaco be, ‘Ango aneko dano ka Rwot kame ewiro.’ “

Daudi Okoko Saulo kede Jonasan

¹⁷Daudi bin oko wero wer me koko pi Saulo kede wode Jonasan.

¹⁸En eko mino cik be pwony jo me Yuda Wer me Emal noni. (Kowandiko wer noni i itabu ka Yasar.) Wer nono eoto kaman:

¹⁹Okwe Isirael, kotieko neko jo ni me aura kitie buto i wi mori! Jo atek yi otieko to!

²⁰Miero kur itatamo kop noni i Gat, arabo i gudi me bomba me Asikelon. Aso, ka likame kamano, anyira me jo Pilistia bino kilel, anyira me jo kalikame kokepo bino bedo kede yomcuny.

²¹Wun mori me Gilboa, miero kur toyo arabo kot moro bed tie i wi wu, akadi poti amio kame ceko cam. Pien kunono en kame komio ebuku me jo atek yi opoto iye piny kede lewic, ebuku ka Saulo likame bobo kobino suto kede mo.

²²Emal ka Jonasan oudo ger twatwal, epima ka Saulo oudo likame dok nono, oudo likame kidok abongo remo i kom gi, arabo abongo mo me kom jo atek yi.

²³Saulo kede Jonasan, jo oudo maro gi doko oudo kiyomo cuny jo! I kare me kuo kede i kare me to gin likame kipokere; gin oudo kom gi mit kalamo ekokom, oudo kitek kalamo inguon.

²⁴Okwe wun mon me Isirael, kokunu Saulo, ngat kame oudo omio wu ingapunu igoen acil di kwar, ngat komio wu mwole me saabu me angapa.

²⁵Jo atek yi otieko totoun, koneko gi i yi! Jonasan otieko to etie buto i wi mori wu.

²⁶Omina Jonasan, anga atururo piri; oudo anga amari twatwal; kite kame oudo in imara kede obedo me aura, ekalamo amara kame mon maro kede cuog gi.

²⁷Jo atek yi otieko to, doko jamini gi me yi da kony gi otieko doko li!

2 Samuel 2

Daudi Odoko Abaka me Yuda

¹Kikano di mano otiek, Daudi oko penyo Rwot be, “Benyo, aoti ako donyo i bomba moro me Yuda?” Rwot oko dwoko ne be, “Ebo, oti.” Daudi oko penye be, “Abin aoti i mene?” En eko dwoko be, “Keburon.”

² Aso, Daudi oko ot Keburon, etero mon mege are, Akinoam me Jeserel, kede Abigail apuserut ka Nabal me Kamel.

³Etero da cuo kame bin en etie kede, dano acelacel kede jo me ode; di gin kiko donyo bedo i bomban me nget Keburon.



⁴ Di do jo me Yuda oko bino, di gin kiko wiro Daudi ki kuno pi bedo abaka me Yuda. Kakame gin kiko waco ne kede Daudi be jo me Jabes Gilead en oudo oyiko Saulo,

⁵ Daudi oko ooro jo but jo me Jabes Gilead di ewaco negi be, “Akwao Rwot emi wu winyo, pien wun ikounu nyuto genere wu but Saulo ngadwong wu, di ikounu yike.

⁶ Nataman ango akwao Rwot enyut ne wu amara mere kalikame lokere kede genere mere! Ango da i koma abino tero wu kiber pi gikame itimunu.

⁷ Bedunu tek, doko bedunu kede nwangcuny; pien ngadwong wu Saulo otieko to, doko jo me Yuda otieko wira pi bedo abaka gi.”

Isiboset Odoko Abaka me Isirael

⁸ Ngatel me isirikalen ka Saulo, Abuneri wot ka Ner, oudo ongolo kede Isiboset wot ka Saulo ecilet me Yorodan kiko ot Makanaim.

⁹ Abuneri oko kete ebedo abaka kame pugo adulion me Gilead, Aser, Jeserel, Epuraimu, Benjamin, kede Isirael lung.

¹⁰ Isiboset, wot ka Saulo, oudo mwakini me dongo mere oromo ot ongwon (40) i kare kame en edoko kede abaka me Isirael, di eko pug pi mwakini are. Do jo me ekeko ka Yuda oko bedo jo kame lubo kop ka Daudi.

¹¹ Kare kame Daudi oko tieko di etie abaka kame pugo Yuda di ebedo Keburon oudo romo mwakini kanyaare kede dwete kanyape.

Isirael Oyi kede Yuda i Gibeon

¹² Abuneri wot ka Ner, kede jotic ka Isiboset wot ka Saulo, oko yai ki Makanaim di kiko ot Gibeon.

¹³ Joab wot ka Seruya, kede jotic ka Daudi, oko ot di kiko riamo kede gi i nget atapar me Gibeon. Ekodet acel oko bedo i nget atapar tetucel, di ekodet ocelu da oko bedo i tetuca.

¹⁴ Abuneri di oko waco ne Joab be, “Cwai awobe mogo, di ada ako cwano awobe mogo, di gin kiko yi i nyim wa.” Joab oko gamo be, “Cwai gi kibin anyim.”

¹⁵ Aso, awobe di oko yai ot anyim. Gin oudo kibeo di komaro wel gi, jo tomon kiwie are kame cungo pi Isiboset wot ka Saulo kede ot ka Benjamin, kede jo tomon kiwie are kikom isirikalen ka Daudi.

¹⁶ Ngat acelacel oko mako wi ngakwor mere, di eko cobe i ngete kede epima; gin dedede jo ot are kiwie ongwon kiko popoto piny kiko to. Pi mano, oko cako nying kabedo nono i Gibeon be “Poto me Ipimai” .

¹⁷ Cenge nono yi oko bedo gwai; di isirikalen ka Daudi oko bwono Abuneri kede jo me Isirael.

¹⁸ Awobe ka Seruya adek oudo tie kuno, Joab, Abisai kede Asakel. Asakel oudo dwir bala atil.



- ¹⁹En di eko cako diebo kede Abuneri, emoko amoka i dude kamanono abongo lengere tetu moro.
- ²⁰Abuneri oko ngoloro cen di eko penyere be, “Mam in ino, Asakel?” En di eko gamo be, “Ango cabo inononi.”
- ²¹Abuneri oko waco ne be, “Wek riama, lokere tetu moro iko mako awobi acel di iko mano jamini mege.” Do Asakel oko meede diebo kede en kamanono.
- ²²Abuneri bobo oko waco ne Asakel be, “Wek riama, parao tenge; pinyo komio imito be aneki? Abino timo benyo ka ariamo kede omini Joab?”
- ²³Do Asakel oko dagi lokere tenge. Di Abuneri oko cobe i yie kede dud tong pelepel. Eko poto piny kanono, di eko to kakame epoto iye nono. Jo dedede kame bin oko tuno kabedo kame Asakel bin opoto iye di eko to oko cungo kanono.
- ²⁴Do Joab kede Abisai oko cako wapo Abuneri. Di do ceng oudo tie mito donyo, gin bin kiko tuno i emukura me Ama, kame oudo tie tetu kide me Gia, i yongayo kame oudo oto i wi tim me Gibeon.
- ²⁵Jo me ekeko ka Benjamin oko cokere karacel but Abuneri di kiko ribere i ekodet acel; gin bin kiko cungo i wi moru.
- ²⁶Di Abuneri oko redo lwongo Joab di ewaco ne be, “Benyo, oyaro bedo nekere nakanaka? In likame ingeo be ajikini mere bino bedo rac? Iyaro tero kare kame rom amene di likame iwaco ne jo ni weko wapo imiegu gi?”
- ²⁷Joab oko waco be, “Alairo i nying Rubanga akuo be, ka koto oudo in likame iko yamo, jo na oudo koto omeede wapo imiegu gi kamanono tuno odiko.”
- ²⁸Joab oko kuto agwara di jo mege dedede oko cungo; gin likame bobo kiko meede wapo jo me Isirael arabo yi kede gi.
- ²⁹Abuneri kede jo mege oko ot iwor kiakia di kibeo i aditot me Yorodan; gin di kiko ngolo ecilet me Yorodan, kiko bedo ot aota cako odiko tuno i dier iceng kiton Makanaim.
- ³⁰Joab oko dwogo ki wapo Abuneri; kakame en eko tieko coko kede jo karacel, eko udo be jo ka Daudi tomon kiwie kanyangon oudo li, di likame kimaro iye Asakel.
- ³¹Do jo ka Daudi oudo oneko jo ka Abuneri, jo me ekeko ka Benjamin tol adek kede ot kanyape (360).
- ³²Joab kede jo mege oko tero kom Asakel di kiko yike i ates ka papa mere, kame oudo tie Betelem. Di do Joab kede jo mege oko bedo ot iwor kiakia, di piny oko ru negi Keburon.

2 Samuel 3



¹Yi bin oko bedo tie i dierediere me jo me ot ka Saulo kede ot ka Daudi tieko kare alac; Daudi bin oko meede ameda doko tek, di jo me ot ka Saulo meede ameda doko goro.

Awobe ka Daudi

²Daudi bin oko nywalo idwe awobe i Keburon: Wode kao oudo obedo Aminon, kame Akinoam me Jeserel onywalo ne;

³wode me are oudo nyinge Kileab, kame Abigail apuserut ka Nabal me Kamel onywalo; me adek obedo Abisolom wot ka Maka, nyar ka Abaka Talamai me Gesur;

⁴me ongwon obedo Adoniya wot ka Kagit; me kany obedo Sepatia wot ka Abital;

⁵me kanyape oko bedo Itiream, kame toto mere oudo nyinge Egela. Awobe nogi dedede Daudi onywalo i Keburon.

Abuneri Olokere but Daudi

⁶I kare kame oudo yi tie kede i dierediere me jo me ot ka Saulo kede jo me ot ka Daudi, Abuneri oudo oko doko dano kame pire tek kikom jo me ot ka Saulo.

⁷Bin Saulo tie kede dako atidi kame nyinge Risipa, nyar ka Aya. Di Isiboset oko penyo Abuneri be, “Pinyo komio in ibuto kede dako kame oudo papa na bedo kede?”

⁸Peny ka Isiboset oko wango cuny Abuneri twatwal; di eko waco ne be, “Iparo be ango abedo ogwok kame lubo jo me ot ka Yuda? Ceng me tin noni ango abedo nyuto genere na but jo me ot ka papa ni Saulo, but imiegu mege, kede but adiereson mege, doko ango likame amii i cing Daudi; do in nataman itie kelo kop i koma pi dako noni.

⁹Ango akwao Rubanga emia alola, ka ango likame ako mino gikame en ekwongere iye but Daudi ocobere.

¹⁰Ango abino kwanyo ajakanut ki ot ka Saulo di ako mino Daudi doko abaka me Isirael kede Yuda, cako ki Dan tuno Beereseba.”

¹¹Di Isiboset likame bobo oko karuno waco ne Abuneri kop moro akadi acel, pien oudo elwore.

¹²Abuneri oko ooro jo Keburon but Daudi, di epenye be, “Ngai kame bino pugo lobo noni? Tim isikan keda di ango ako bino konyi kelo jo me Isirael dedede buti.”

¹³Daudi oko dwoko be, “Mano ber; ango ayaro timo isikan kedi. Do gi acel kame ango amito be in itimi en ine be, in likame ibino tuno i nyima kwanyo di ikelo Mikal nyar ka Saulo i kare kame in ibino kede pi nena.”

¹⁴Di do Daudi oko cwano jo but Isiboset wot ka Saulo di ewaco ne be, “Mia dako na Mikal, kame bin ango anyomo kede del me wi kom cuo me Pilistia tol acel.”

¹⁵Isiboset oko cwano jo di oko kwanyo Mikal kikut cware Palatiel wot ka Lais.

¹⁶Do Paliti oko upere kede Mikal; en elube ki cen di ekok kiton tuno Bakurim. Di do Abuneri oko waco ne be, “Dok paco!” Di en eko dok paco.



¹⁷Abuneri oko ot but joadongo me Isirael di en eko waco negi be, “Cako sek wun ibedunu mito be Daudi bed abaka wu.

¹⁸Nataman do timunu kamanono; pien Rwot otieko cikere but Daudi be, ‘Abino mino ngatic na Daudi en kame lako jo na me Isirael ki cing jo me Pilistia, kede kibun jokwor gi dedede.’ “

¹⁹Abuneri oko yamo da kede jo me ot ka Benjamin, di eko ot Keburon pi waco ne Daudi gikame jo me Isirael kede jo dedede me ot ka Benjamin oudo otieko iikere pi timo.

²⁰Kakame Abuneri otuno kede but Daudi i Keburon, en kede jo ot are kame oudo eupere kede, Daudi oko tedo negi ebaga.

²¹Abuneri oko waco ne Daudi be, “Wek ango kong aoti di ako loko tam me jo dedede me Isirael buti, in adwong na me awora, tetekeny gin kitim isikan kedi, di in iko bino bedo abaka me lobo noni lung bala kame cunyi mito.” Aso, Daudi oko peruno Abuneri di Abuneri oko ot kede mulem.

Joab Oneko Abuneri

²²Inonono inonono di Abuneri oudo otieko yai, jotic ka Daudi kede Joab, kame oudo ooto yak di tuno, kede jamini atot twatwal kame oudo kiyako. Do Abuneri do oudo otieko yai kibun Daudi i Keburon, pien Daudi oudo otieko peruno en, di eko yai eoto kede mulem.

²³Kakame Joab kede isirikalen kame bin tie kede en oko tuno kede, ngatamoro oko waco ne Joab be, “Abuneri wot ka Ner oudo obino but abaka, di abaka oko peruno en eoto kede mulem.”

²⁴Di Joab oko ot but abaka di eko penye be, “Nyo kame in itimo? Abuneri oudo obino buti; pinyo komio in iko weke eoto?”

²⁵In ingeo be Abuneri wot ka Ner oudo obino buti pi ngali, kede pi ngeno gi dedede kame in itie timo.”

²⁶Kakame Joab oko wok kede kibun Daudi, eko cwano jo ooto wapo Abuneri, di gin kiko ude etuno i kulo me Sira di kiko dwoke; do Daudi oudo likame ngego gimoro iye.

²⁷Kakame Abuneri oko tuno kede Keburon, Joab oko tere tenge i nget erute di ineno bala oudo en emitto yamo kede i mung, eko cobe i yie i kuno. Aso, bin Joab oko neko Abuneri pi culo kwor ka omin mere Asakel.

²⁸Kakame Daudi oko winyo kede kop me nek nono, en eko waco be, “Ango kede jo atie i apugan na likame obino bedo kede raco moro i nyim Rwot pi kare lung, pi remo ka Abuneri wot ka Ner.

²⁹Ango akwao be remo ka Abuneri bed i wi Joab, kede jo me ot ka papa mere dedede; doko akwao be jo me ot ka Joab kur bed abongo ngatamoro kame tie kede ecalo, arabo kame tie kede dobo, amoto kame obedo abwocit, arabo kame koneko kede epima, amoto kame ngakec!”



³⁰Aso, Joab kede omin mere Abisai bin oko neko Abuneri piento en oudo eneko omin gi Asakel i yi kame oudo obedo Gibeon.

³¹Di Daudi oko waco ne Joab kede jo dedede kame bin etie kede be, “Nyinyilunu igoen wu ikounu ngapo igoen me iturur di ikounu koko Abuneri.” Abaka Daudi oko lubo kom liel ki cen di otie ot yike.

³²Gin di kiko yiko Abuneri Keburon. Abaka di oko koko kede dwan amalo i kayiko Abuneri, di jo dedede da oko donyo koko.

³³Abaka oko wero wer me koko Abuneri be, “Pinyo komio Abuneri oko to bala ngamingo?”

³⁴Cingi oudo likame kotweo, doko tieni da oudo likame kotweo kede eriko; in iko to bala dano kame jonek oneko.” Jo di bobo oko donyo koke.

³⁵Di do jo dedede oko bino pi tamo ngangao Daudi be amotoko ecam gimoro di pwodi piny ler; do Daudi oko kwongere di ewaco be, “Ango akwao Rubanga, emia alola ka ango ako bilo kwon arabo gimoro ace di pwodi ceng likame odonyo!”

³⁶Jo dedede oko winyo kop nono di cuny gi oko doko yom. Ateteni cuny jo oko bedo yom pi gi dedede kame abaka oko timo.

³⁷Aso, jo ka Daudi dedede kede jo me Isirael oko niang cenge nono be abaka oudo li i kop me neko Abuneri wot ka Ner.

³⁸Abaka di oko waco ne jotie mege be, “Benyo, wun likame ingeunu be tin ngatel kame pire tek i Isirael otieko to?”

³⁹Ango tin ali kede teko, akadi di ango atie abaka kame kowiro; cuo gi, awobe ka Seruya, ger gero kalikame ango atwero. Ango akwao Rwot ecul dano kotimo gikarac noni bala kame poore kede ne!”

2 Samuel 4

Koneko Isiboset

¹Kakame Isiboset wot ka Saulo oko winyo kede be oudo koneko Abuneri i Keburon, teko oko tiek ki kome, di lworu atek oko mako jo me Isirael dedede.

²Isiboset oudo bin tie kede jotel are me isirikalen kame oudo tic gi en telo ikodeta kame oto yak; nying ngat acel oudo Bana, kede nying ngat ocelu oudo obedo Rekab. Gin oudo awobe ka Rimon dano me ekeko ka Benjamin kowok i adul me Berot. (Berot oudo komaro be obedo adul me jo me ekeko ka Benjamin.)

³Jo kame bin ogeo bedo kunono oudo oringo i bomba me Gitaim, kakame gin kiko donyo bedo iye bala jokumbor cako i kare nono.)

⁴Jonasan wot ka Saulo bin tie kede atin awobi anyinge Mepiboset. En oudo tiene dedede ongwalo di pwodi etitidi. I kare kame bin koneko kede Saulo kede Jonasan, mwakini mege me dongo oudo oromo kany. Kakame bin kokelo kede rwonge me to



gin ki bomba me Jeserel, ngapidi mere oko tinge di eko ringo kede; do pi ringo me awakawaka kede mielkom, en eko poto piny di eko udo angwal.

⁵Rekab kede Bana, awobe ka Rimon dano me Berot, oko yai ot paco ka Isiboset, di kiko tuno i dier i ceng kiko ude etie buto wei me i ceng.

⁶Dako kame bin daro ekeko oudo tie bedo i ekeko di eyero engano, di nino oko make eko nino; Rekab kede Bana oko lwidar donyo i ot.

⁷Kakame oudo kitie kede i ot, kiko udo Isiboset oudo tie buto i apien mere i agola mere me buto; gin kiko neke, di kiko ngolo wie tenge. Di do gin kiko kwanyo wie kitero, kiko ot iwor kiakia di kibeo i aditot me Yorodan.

⁸Gin kiko tero wi Isiboset Keburon but Daudi di kiko waco ne abaka be, “Wi Isiboset wot ka Saulo ngakwor ni kame oudo mito neki ine; tin Rwot otieko timo onyanga i kom Saulo kede i kom ikwae mege, adwong wa me awora.”

⁹Daudi oko waco ne Rekab kede omin mere Bana be, “Ango alairo i nying Rwot kakuo, en ngat kame oudo elako kuo na ki peko dedede, ango abino waco ne wu kop me ateni.

¹⁰ Kakame dano moro owaco na kede i Sikilag be, ‘Neningo, Saulo oto, ‘di en oudo eparo be etie kelo na rwonge aber, ango bin ako make di ako neke. Manono en oudo giamia me pwone pi rwonge mere aber kame ekelo.

¹¹Ebino do bedo rac kalamo benyo ne jo areco kame otieko neko dano kopoore di etie buto i ode! Nataman iparunu be kur ango atim onyanga i komu pi neke, di ako kisaro wu ki wi lobo kan?”

¹²Daudi oko mino jo mege cik di gin kiko neko Rekab kede Bana; gin kingongolo cing gi kede tien gi, di kiko liero kom gi i nget atapar me Keburon. Do wi Isiboset gin kiko tero di kiko yike i limbo ka Abuneri kame bin tie Keburon.

2 Samuel 5

Daudi Odoko Abaka me Isirael Lung

(1 lyutun 11.1-9; 14.1-7)

¹Jo me ikekon dedede me Isirael oko bino Keburon but Daudi, di kiko waco ne be, “Neningo, wan obedo jo acel kedi.

²I kare moro kokato, di pwodi Saulo en oudo obedo abaka wa, in en kame oudo ibedo telo jo me Isirael ot yi. Rwot bin oko waco ni be, ‘In ibino bedo ngakwat me jo na me Isirael, doko in ibino pugo gi.’ “

³Aso, kop nono en oko mino joadongo me Isirael oko bino Keburon but abaka; di Abaka Daudi oko timo kede gi isikan i nyim Rwot i Keburon, di gin kiko wirowo Daudi pi bedo abaka me Isirael.

⁴Mwakini me dongo ka Daudi oudo oromo ot adek i kare kame en edoko kede abaka, di eko pug pi mwakini ot ongwon.



⁵En bin epugo Yuda i Keburon pi mwakini kanyaare kede duwete kanyape; di eko pugo Isirael lung kiton Yuda i Yerusalem pi mwakini ot adek kiwie adek.

⁶Abaka Daudi bin oko yai kede jo mege pi ot suro Yerusalem. Jo Yebu kame bin bedo i adul nono oudo paro be Daudi likame karuno bwono gi, omio gin di kiko waco ne be, “In likame iyaro donyo kan; akadi imuduka kede ingwalasa da karuno bwoni.”

⁷Akadi kamanono da, Daudi bin oko mano Sion kakame oudo kocelo di tek, kame nataman kolwongo be Bomba ka Daudi.

⁸Cenge nono Daudi oudo oko waco ne jo mege be, “Ngatamoroni kikom wu koyaro neko jo Yebu, miero en elub puleju me pii di eko ot suro ingwalasa kede imuduka, jo kame cunya dagi.” Manono en komio jo waco be, “Imuduka kede ingwalasa likame bino donyo i ot ka Rwot.”

⁹Daudi bin oko donyo bedo i kabedo kame oudo kocelo di tek nono, di en eko cako nyinge be Bomba ka Daudi. En bin eko meede gero bomba rimaro en, cako ki kakame kotoro kame oudo tie tetu kide mere.

¹⁰Di Daudi oko meede ameda doko dano kame tek, pien Rwot Rubanga me jo yi oudo tie kede.

¹¹Abaka Kiram me Taya bin oko cwano jo but Daudi; en ecwao gi kitero ne yen seda kede jogedo pi ot gero ne abaka ot.

¹²Di do Daudi oko niang be Rwot oudo otieko kete bedo abaka me Isirael, doko da Rwot en kame oudo omio ajakanut mere odongo pi jo mege me Isirael.

¹³Di bin en etieko dak ki Keburon eoto Yerusalem, Daudi bobo oko kelo mon ace kame oudo en ebedo kede gi abeda kede kame enyomo, di eko nywalo kede gi idwe awoke kede idwe anyira ace.

¹⁴Nying idwe kame bin en enywalo di oudo etie Yerusalem ige: Samua, Sobab, Natan, Sulumani,

¹⁵Ibar, Elisua, Nepeg, Yapia,

¹⁶Elisama, Eliada, kede Elipelet.

Daudi Obwono Jo Pilistia

(1 lyutun 14.8-17)

¹⁷Kakame jo Pilistia oko winyo kede be oudo kowiro Daudi pi bedo abaka me Isirael, isirikalen me Pilistia dedede oko ot mono Daudi pi make; do Daudi oko winyo di en eko ot kakame oudo kocelo di tek.

¹⁸Isirikalen me Pilistia oudo obino di kiko sarakin i aditot me Repairim.

¹⁹Daudi oko penyo Rwot be, “Benyo, aot di ako suro jo Pilistia? Ibino mino gi i cinga?” Rwot oko waco ne Daudi be, “Oti; pien ateteni ango abino mino jo Pilistia i cingi.”



²⁰Aso, Daudi oko ot Baal Perasim, di eko bwono gi ki kuno. En ewaco be, “Rwot otieko nyano diere me jokwor na bala alele kame dipere.” Pi mano, oko do lwongo kabedo nono be Baal Perasim. ²¹Jo Pilistia oko ringo kiweko cal jwogi gi kunono, di Daudi kede jo mege oko tero gi.

²²Di bobo jo Pilistia oko dok di kiko asarakin i aditot me Repairim.

²³Daudi bobo oko penyo Rwot di Rwot oko waco ne be, “Kur iot suro gi i nyim gi; do manaro cen ngei gi, di iko suro gi ki kuno, tetu nget yen kame kolwongo be balsam.

²⁴Ka iwinyunu tien jo aoto mor di winyere i wi yen balsam, bedunu do di ikapakina, pien udo ango atieko telo ne wu yongayo me bwono isirikalen me Pilistia.”

²⁵Daudi bin oko timo bala kame Rwot oudo ociko ne; di eko bwono jo Pilistia cako ki Geba tuno Geser.

2 Samuel 6

Kotero Sanduku me Isikan Yerusalem

(1 lyutun 13.1-14; 15.25—16.6, 43)

¹Daudi bobo oko koko isirikalen me Isirael tutumia ot adek (30,000), kame koyero ayera.

²Daudi kede isirikalen dedede kame oudo en etie kede oko yai di kiko ot Baale kame oudo tie Yuda, pi omo Sanduku me Isikan ka Rubanga, sanduku kame kolwongo kede nying Rwot me jo yi, ngat kame bedo i ngei cerubim.

³Gin kiko kwanye ki ot ka Abinadab, kame oudo tie i wi emukura, di kiko kete i cabala anyen. Usa kede Akio, awobe ka Abinadab, en kame oudo kolo cabala anyen nono.

⁴Akio oudo oto i anyim di cabala lube ki cen kede Sanduku me Isikan.

⁵Daudi kede jo dedede me Isirael oko wer di kimielo i nyim Rwot kede teko gi dedede, di kigoo arigirigin kede adungun kede bule, ayekeyeken kede suanin abatal me goc.

⁶Kakame gin bin kiko tuno kede i laru me canyo ka Nakon, twonin oudo oko riangar, Usa oko cwano cinge di eko mako Sanduku me Isikan ka Rubanga.

⁷Gikame Usa otimo nono oko wango cuny Rwot, di Rubanga oko neke i nget Sanduku me Isikan kanono.

⁸Cuny Daudi oko wang pien Rwot oudo oko neko Usa pi wangcuny; manono oko mino oko lwongo kabedo nono be Peresi Usa tuno tin.

⁹Cenge nono Daudi oko bedo kede lworu i kom Rwot; en ewaco be, “Benyo, benyo kame ango akaruno doko kede ngat kame gwoko Sanduku me Isikan ka Rwot?”

¹⁰Aso, Daudi likame oko yei tero Sanduku me Isikan ka Rwot i bomba mere, pi en koto gwoke i kuno; do en eko lokere tere i ot ka Obed Edom dano me bomba me Gat.



- ¹¹Sanduku nono oko bedo kuno pi dwete adek; di Rwot oko mino Obed Edom winyo, karacel kede jo me ode dedede.
- ¹²Bin oko waco ne Abaka Daudi be, “Rwot otieko mino winyo but jo me ot ka Obed Edom kede jamini mege dedede pi Sanduku me Isikan ka Rubanga.” Manono oko mino Daudi oko ot di eko omo Sanduku me Isikan ka Rubanga ki ot ka Obed Edom di eko tere i bomba mere kede kilel kadwong.
- ¹³Kakame bin jo kame oudo oko yeno sanduku ka Rwot oko cako kede ot, di pwodi oudo kilato tien gi tien kanyape kenekene, Daudi oko mino gin kicungo di en eko mino giayala me twon kede roya kocwe but Rwot.
- ¹⁴Daudi oko miel i nyim Rwot kede teko mere lung; en oudo engapo epod kame kotimo kede egoe acil kame meny i piere.
- ¹⁵Epone no en kame Daudi karacel kede jo me Isirael dedede oko tero kede Sanduku me Isikan ka Rwot Yerusalem kede ilelem me kilel, kede di okuto agwara.
- ¹⁶Di do oudo kotie donyo kede Sanduku me Isikan ka Rwot i Bomba ka Daudi, Mikal nyar ka Saulo oko ngoloro ki dirisa, di eko neno Abaka Daudi di tie sosomo di emielo i nyim Rwot; di eko bedo kede acae i kom Daudi.
- ¹⁷Gin kiko tero Sanduku me Isikan ka Rwot di kiko kete kabedo mere, i yi eema kame Daudi oudo ogero ne; di Daudi oko mino Rwot giayala awanga kede giamia me nywak.
- ¹⁸Kakame Daudi oko tieko kede mino giayala awanga kede giamia me nywak, en eko lamo ne jo winyo i nying Rwot me jo yi,
- ¹⁹ di eko poko ne gin dedede cam. En epoko cam ne jo dedede me Isirael, cuo kede mon, di emio ngat acelacel mugati, angol me ringo, kede olok kotuo. Di do jo dedede oko dok i miere gi.
- ²⁰Kakame Daudi oko dok kede paco pi moto jo me ode, Mikal nyar ka Saulo oko wok ooko pi riamo kede. Mikal oko waco ne be, “Abaka me Isirael tin oko mino kome kene dwongo ba! Tin en egonyo igoen ki kome i nyim mon atio ne jotic mege, bala kame ngamingo moroni kenekene karuno timo abongo lewic!”
- ²¹Daudi oko waco ne Mikal be, “Ango oudo atie miel i nyim Rwot, ngat koyera kawang papa ni kede jo me ode dedede, pi bedo ngatel me jo mege me Isirael. Ango abino meede miel i nyim Rwot.
- ²²Ango abino dwoko dwongo na piny kalamo kano, doko abino bedo dano kame kony mere li kibus in; do kibus mon kame in iwaco nogo, ango abino bedo dano me awora.”
- ²³Mikal nyar ka Saulo likame bin oko nywalo atin moro tuno en to.

2 Samuel 7

Kop kame Rwot Owaco ne Daudi

(1 lyutun 17.1-15)



- ¹Di bin Abaka Daudi oduyo bedo i paco mere me abaka, di do oudo Rwot otieko mine wei ki cing jokwor mege dedede kame oudo oluke,
- ²abaka oko waco ne enabi Natan be, “Neni, nataman ango atie bedo i ot kame kogero kede yen seda, do Sanduku me Isikan ka Rubanga tie bedo i eema!”
- ³Natan oko waco ne abaka be, “In tim gikame cunyi winyo timo; pien Rwot tie kedi.”
- ⁴Do iwor nono Rwot oko waco ne Natan be,
- ⁵” Ot di iko waco ne ngatic na Daudi be ango awaco be, ‘In en kalikame iyaro gero nango ot kame abino bedo iye.
- ⁶Ango pwodi likame abedo i ot cako i kare kame alako kede jo me Isirael ki Misiri tuno tin, do abedo ot di abedo i eema kede i taberenakol.
- ⁷I kabedere dedede kame ango abedo ot iye kede jo me Isirael, likame tie ceng moro acel kame ango atieko penyoko kede jotel kame ango bin aciko pi gwoko jo na me Isirael, di apenyoko gi pinyo komio gin likame kiko gero na ot me ebao me seda.’
- ⁸” Aso, nataman in ibino waco ne ngatic na Daudi be Rwot me jo yi owaco be, ‘Ango en kame bin akwanyo ki kakwat, ki kuo me lubo romini di ako keti bedo ngatel me jo na me Isirael.
- ⁹Ango abedo tie kedi i kabedere dedede kame in oudo ioto iye, di ako muducaro jokwor ni dedede i nyimi. Ango abino mino nyingi bedo iruo, bala nyingi jo kame pirgi tek ki wi lobo.
- ¹⁰Ango abino yero kabedo ne jo na me Isirael di ako cibo gi iye, tetekeny kibed kabedo kame mako gi, di likame bobo tie ngatamoro kame lolo gi iye. Jo areco likame bobo bino tidilo gi, bala bin i kare kasek.
- ¹¹Cako i kare kame ango bin aketo kede jongolkop pi telo jo na me Isirael, jo areco oko bedo tidilo gi, do nataman abino mino gi kiwei ki cing jokwor gi. Medo i wi manono, Rwot owaco ni be en kikome ebino mini ikwae.
- ¹² Kame kare me kuo nin otiek di oko yiki karacel kede joakwari ni, ango abino keto atin ni kame in inywalo eko lunyo wangi, di ango ako bino mino ajakanut mere cungo di tek.
- ¹³En ebino gero nango ot, di ango ako bino mino ajakanut mere bedo nakanaka.
- ¹⁴ Ango abino bedo papa mere, di en eko bino bedo woda. Ka en etimo dub, ango abino mine alola me adao kede ebela bala kame jo timo, abino bunge bala kame jo timo.
- ¹⁵Do likame abino kwanyo amara na kalikame lokere kibute, bala kame bin akwanyo kede kibut Saulo, ngat kame bin ango akwanyo tenge tetekeny in idok abaka.
- ¹⁶ Ibino bedo tie kede ikwae nakanaka doko ajakanut ni bino bedo ikar kede ikar.’ “



¹⁷Natan oko waco ne Daudi kope nogi dedede bala kame oudo Rubanga onyuto ne kede.

Ilega ka Daudi me Mino Pwoc

(1 lyutun 17.16-27)

¹⁸Di do Abaka Daudi oko donyo i yi eema di eko bedo i nyim Rwot, eko lego be, “Okwe Rwot Rubanga, ango en ngai, doko jo me ekeko na da obedo alu kibuti, en komio in imia akodi kuo kame nataman atie iye noni?”

¹⁹Aso di i wangi manoni oudo obedo gi katitidi, Okwe Rwot. Medo i wi manono, in itieko da cikere i kom kop amako ekeko me ngatic ni i kare me anyim. Benyo, manoni en gikame in itimo ne jo, Okwe Rwot Rubanga?

²⁰Nyo bobo kame ango akaruno waco ni? Pien in ingeo ngatic ni, Okwe Rwot Rubanga!

²¹Pi cikere nin, kede pi mit me cunyi, in itieko timo gi apire tek noni di iko nyuto ne ngatic nin.

²²Ateteni in idwong, Okwe Rwot Rubanga; pien likame tie ngatamoro kame cal bala in, doko likame tie Rubanga ace kwanyo in, bala kame wan otieko winyo kede yit wa.

²³Ateker mene en kame cal bala jo ni me Isirael? Benyo, tie ateker moro ace i wi lobo kame in Rubanga iko ot lako pi bedo jo ni? In bin imio nyingi oko bedo iruo pi jamini adongodongo me aura, kame in bin itimo ne jo ni di iriamo tenge atekerin karacel kede rubangan gi.

²⁴In itieko mino jo ni me Isirael odoko megii atwal; doko in Rwot itieko doko Rubanga gin.

²⁵Nataman do, Okwe Rwot Rubanga, in mok atwal kop kame in iwaco i kom ngatic ni, kede i kom jo me ekeko mere; tim gikame in icikere iye.

²⁶Manono bino mino jo pako nyingi nakanaka di kiwaco be, ‘Rwot me jo yi en Rubanga kame pugo Isirael’ ; di jo me ekeko ka Daudi ngatic ni ko bino bedo pug nakanaka.

²⁷Pien in, Okwe Rwot me jo yi, Rubanga me Isirael, imio ngatic ni ongeo kop noni di iwaco ne be, ‘Ango abino mino jo me ekeko ni ajakanut’ ; en komio ngatic ni oudo nwangcuny me lego buti kamanoni.

²⁸Aso, nataman Okwe Rwot Rubanga, in ibedo Rubanga, doko kope nin obedo me ateni, in itieko cikere pi timo ne ngatic ni gikame ber noni;

²⁹pi mano, ango akwai imi winyo but jo me ekeko me ngatic ni, tetekeny ajakanut gi meede i nyimi nakanaka; pien in, Okwe Rwot Rubanga, itieko yamo, doko pi winyo kame in ibino mino, jo me ekeko me ngatic ni bino bedo kede winyo nakanaka.”

2 Samuel 8

Daudi Olo Yi Atot



(1 lyutun 18.1-17)

- ¹kikano di do kare oudo okakato, Daudi bin oko suro jo Pilistia eko bwono gi. En emao gin Meteg Ama.
- ²En eko bobo bwono jo Moab, di eko mino jo kame oudo en eko mako obuto piny. En di eko neko are i kom adek me jo nogo. Jo Moab kame oko dong oko doko jotic ka Daudi di kiko donyo culo esolo bute.
- ³Daudi bobo oko yi di eko bwono Abaka Kadadese wot ka Rekob me Soba, di oudo Kadadese tie ot pi dwoko adul me tetu malo me ecilet me Eupurate i loc mere.
- ⁴Daudi bin oko mako isirikalen ka Kadadese tutumia acel kede tol kanyaare (1,700) kame oudo ringo kede asigiran, kede tutumia ot are (20,000) oudo aoto kede tien. Daudi bin oko tongotongo tien asigiran nogo di eko weko asigiran kame twero wano cabalan tol acel.
- ⁵Kakame bin jo Siria kame oudo bedo i piny me Damasiko oko bino kede pi konyo Abaka Kadadese me Soba, Daudi oko neko jo tutumia ot are kiwie are (22,000) kikom gi.
- ⁶Di do en eko keto isirikalen Damasiko kuno, di jo Siria kame bin bedo Damasiko oko doko jo kame bin Daudi pugo, doko kiko donyo culo esolo bute. Rwot bin oko mino Daudi obwono jo dedede kame en oudo eko yi kede gi.
- ⁷Daudi bin oko mano ibukui kame kotimo kede saabu kame oudo jotic ka Kadadese mako, di eko tero gi Yerusalem.
- ⁸En eko da bobo mano nyonyo buronsi atos twatwal ki Beta kede Berotai, bomban ka Kadadese.
- ⁹Kakame bin Abaka Toi me Kamat oko winyo kede be Daudi oudo otieko bwono isirikalen ka Kadadese dedede,
- ¹⁰en eko cwano wode Yoram but abaka Daudi pi mote kede pwone piento en oudo eyi kede Kadadese di eko bwone. Toi oudo obedo yi kede Kadadese tien atos. Yoram otero ne Daudi giamia me siliba, saabu kede buronsi.
- ¹¹Abaka Daudi oko mino jamini nogo dedede but Rwot, karacel kede siliba kede saabu kame oudo emao kibus atekerin kame bin en eko bwono;
- ¹²atekerin nogo en, Edom, Moab, Amon, Pilistia kede Amalek. Doko da en eko mino Rwot dul me jamini kame bin en eyako kibus Abaka Kadadese wot ka Rekob me Soba.
- ¹³Nying Daudi bin oko doko iruo twatwal i kare kame bin en edwogo kede ki neko jo Edom tutumia tomon kiwie kanyauni (18,000) i Aditot me Munyo.
- ¹⁴En bin eko keto isirikalen kadedere dedede i Edom, di jo me Edom lung oko doko jo kame Daudi oudo pugo. Rwot bin oko mino Daudi obwono jo dedede kame en oudo eyi kede gi.



¹⁵Daudi bin oko pugo Isirael lung di engolo kop i ateni doko di etero jo mege dedede kiber.

¹⁶Joab kame nying toto mere oudo Seruya en kame oudo obedo ngatel me isirikalen; Yekosapat wot ka Akilud en kame bin wandiko kope dedede kame timere;

¹⁷Sadoki wot ka Akitub kede Akimelek wot ka Abiata en koudo obedo josaseredoti; Seraya en oudo obedo kalani;

¹⁸Benaya wot ka Yekoyada en kame oudo obedo ngatel me isirikalen kame bin gwoko Daudi; awobe ka Daudi oudo obedo josaseredoti.

2 Samuel 9

Daudi kede Mepiboset

¹Ceng moro acel Daudi oko penyere be, “Benyo, tie dano moro kame odong ki ot ka Saulo kame ango akaruno timo ne mwolo pir Jonasan?”

²Oudo tie ngatic me ot ka Saulo anyinge Siba, di bin oko lwonge pi bino but Daudi. Abaka di oko penye be, “Mam in Siba?” En di eko gamo be, “Ebo, ango ngatic ni!”

³Abaka oko penye be, “Benyo, tie dano moro kame odong ki ot ka Saulo kame ango akaruno nyuto mwolo ka Rubanga bute?” Siba oko waco ne abaka be, “Wot ka Jonasan tie odong; en tiene dedede ongwalo.”

⁴Abaka oko penye be, “En etie tuai?” Siba oko waco ne abaka be, “En etie i paco ka Makir wot ka Amiel, i bomba me Lodebar.”

⁵Di do Abaka Daudi oko cwano dano ot ome.

⁶Kakame Mepiboset wot ka Jonasan, akwar Saulo oko tuno kede but Daudi, en eko riebere piny di eko mine wor. Daudi oko lwonge be, “Mepiboset!” En di eko gamo be, “Ango ngatic ni ine.”

⁷Daudi oko waco ne be, “Kur ibed kede lworu, pien ango abino timo ni mwolo pi papa ni Jonasan; ango ayaro dwoko ni lobo ka kwaru ni Saulo dedede, doko in ibino cam keda i emesa acel ceng dedede.”

⁸Mepiboset bobo oko riebere piny mine wor di eko waco be, “Kara ango abedo nyo en kamio in iparo pira, ango ngat kame arom aroma kede ogwok oto?”

⁹Di do abaka bobo oko lwongo Siba ngatic ka Saulo, di eko waco ne be, “Jamini dedede kame oudo obedo me ka Saulo kede me jo me ode ango atieko mino but akware.

¹⁰In kede awobe ni karacel kede jotit ni ibinunu puro lobo nono ne en, di ikounu bino kelo ne cam kame cek kiye, tetekeny jo me ot ka ngadwong ni bed tie kede giacama; do Mepiboset, akwar ngadwong ni bino bedo cam keda i emesa acel ceng dedede.” Siba oudo tie kede awobe tomon kiwie kany kede jotit ot are.



¹¹Di Siba oko gamo dog abaka be, “Gi dedede kame in abaka rwot na iciko, ango ngatic ni abino timo kamanono.” Mepiboset bin oko donyo cam kede Daudi i emesa acel ineno bala eda oudo ebedo wot ka Abaka.

¹²Mepiboset oudo tie kede atin awobi katitidi anyinge Mikaa. Jo dedede kame bin bedo i ot ka Siba oko doko jotic ka Mepiboset.

¹³Aso, Mepiboset ngat kame oudo tiene dedede ongwalo, bin oko donyo bedo Yerusalem di ecamo i emesa me abaka.

2 Samuel 10

Daudi Obwono Jo Amon kede Jo Siria

(1 lyutun 19.1-19)

¹kikano di do oudo kare okakato, abaka me jo Amon oko to, di wode Kanun oko lunyo wange.

²Abaka Daudi oko waco be, “Abino bedo kede genere but Kanun wot ka Nakas, bala kame bin papa mere ogena kede.” Aso, Daudi bin oko ooro jo bute pi kweno cunye pi to ka papa mere. Kakame jo kame bin Daudi ooro oko tuno kede i lobo me jo Amon,

³jotel me jo Amon oko waco ne Kanun rwot gi be, “Ateteni in iparo be Daudi tie mino papa ni wor be piento en etieko oro jo pi kelo ni kope me kweicuny? Mam Daudi otieko oro jo buti pi gin bino ngingico bomba pi mito mane?”

⁴Manono oko mino Kanun oko mako jo kame oudo Daudi ooro, di eko lielo dul me yer me tik ngat acelacel, eko ngongolo pier igoen kame oudo kingapo di eko riamo gi tenge.

⁵Kakame Daudi oko winyo kede kop noni, en eko cwano negi kop, pien cuo nogo oudo lewic omako twatwal. Abaka owaco negi be, “Kong dongunu Jeriko tuno di yer me tik wu otieko dongo, en amio ikounu do dwogo.”

⁶Kakame jo Amon oko neno kede be oudo kitieko doko jokwor ka Daudi, gin kiko cwano jo oko ot pango jo Siria kame oudo bedo Beterekob kede Soba, isirikalen tutumia ot are (20,000) kame oto kede tien, abaka me Maka kede jo mege tutumia acel (1,000), kede cuo me Tob tutumia tomon kiwie are (12,000).

⁷Kakame Daudi oko winyo kede kop noni, en eko cwano Joab kede isirikalen karacel kede jo yi apat pi ot yi kede gi.

⁸Jo Amon di oko donyo oko me bomba di kiko teere i erute pi yi; do jo Siria kame bin bedo Soba kede Rekob, karacel kede jo me Tob kede Maka, oudo tie ken gi i ebar.

⁹Kakame Joab oko neno kede be jokwor oudo tie i nyime kede i ngee, en eko yero isirikalen mogo abeco kikom isirikalen me Isirael, di eko keto gi kiteere pi yi kede jo me Siria;

¹⁰isirikalen odong mege en eko mino Abisai omin mere telo gi, di Abisai oko mino gi kiteere pi yi kede jo Amon.



¹¹En ewaco ne omin mere be, “Ka ineno be jo Siria tie bwona, bia ikonya; do ka jo Amon teko gi tie mito bwoni, ango abino ringini konyi.

¹²Bed tek, doko mito obed kede nwangcuny pir jo wa, kede pir bomban ka Rubanga wa. Ango akwao Rwot pi timo gikame en eneno be ber ne.”

¹³Di Joab kede jo mege oko ot pi cako yi kede jo me Siria, di jo me Siria oko ringo tenge.

¹⁴Kakame jo Amon oko neno kede be jo Siria oringo, gida kiko ringo ki nyim Abisai di kiko dok i bomba. Di do Joab otieko yi kede jo Amon, en eko dok cen Yerusalem.

¹⁵Do kakame jo Siria oko neno kede be jo me Isirael oudo obwono gi, gin kiko koko isirikalen gi dedede karacel.

¹⁶Abaka Kadadese oko cwano jo di kiko kelo jo Siria kame oudo bedo loka tetuca me ecilet me Eupurate. Gin bin kiko bino Kelam di Sobak ngatel me isirikalen ka Kadadese en kame telo gi.

¹⁷Kakame Daudi oko winyo kede kop nono, en eko koko isirikalen dedede me Isirael karacel, di kiko ngolo ecilet me Yorodan, di kiko ot Kelam. Jo me Siria oko teere di kiko yi kede Daudi.

¹⁸Jo me Siria oko ringo tenge ki nyim jo me Isirael. Di Daudi oko neko jo Siria tol kanyaare (700) kame bin riamo cabalan kede jo tutumia ot ongwon (40,000) kame bin ringo kede asigiran, doko kiko wano Sobak ngat koudo obedo ngatel me isirikalen di en eko to kanono.

¹⁹Kakame abakai dedede kame bin tio ne Kadadese oko do neno kede be jo me Isirael oudo otieko bwono gi, gin do kiko kwano gi pi weko gin kibed kede mulem, di kiko doko jo kame tio negi. Di do jo Siria oko lworu konyo jo Amon atwal.

2 Samuel 11

Daudi kede Bateseba

¹ Kikano, di bin kare kame abakai singo ot kede i yi otuno, Daudi oko cwano Joab kede isirikalen mege adongo dongo karacel kede isirikalen dedede me Isirael. Gin bin kiko bwono jo Amon, di kiko lukaro bomba me Raba. Do Daudi bin oko dong Yerusalem.

²Ceng moro acel, otieno di ceng oudo oyapuno donyo, Daudi bin oko yai ki kawei mere di eko ot i wi ot mere me abaka. Kakame bin en etie cucungo kede i wi ot, en eko neno dako moro di tie bol. Dako nono oudo cil twatwal.

³Daudi bin oko cwano dano moro pi pepenyo kop i kom dako nono, di oko niange be dako nono oudo obedo Bateseba, nyar ka Eliam; en oudo dako ka Uria dano me Kiti.

⁴Di Daudi oko cwano jo pi ome, en eko bino bute, di Daudi oko buto kede. (Dako nono oudo tie lonyere ingei tuwo duwe mere.) Di do Bateseba oko dok i ode.



⁵I cen mere Bateseba oko ngeno be en oudo etie kede yie, di eko cwano kop but Daudi pi waco ne.

⁶Di do Daudi oko cwano kop but Joab be, “Cwai Uria dano me Kiti buta kan.” Di Joab oko cwano Uria but Daudi.

⁷Kakame Uria oko tuno kede bute, Daudi oko penye ekite kame Joab kede isirikalen tie kede, kede da epone kame yi tie ot kede.

⁸Di Daudi oko waco ne Uria be, “Oti i odi di iko ber udo wei moro.” Uria bin oko yai ki ot me abaka, di abaka oko cwano ne giamia olube kede.

⁹Do Uria likame oko ot i ode; akaka ot paco en gire eko buto i erute me paco me abaka karacel kede isirikalen adaro abaka.

¹⁰Kakame oko waco ne kede Daudi be Uria oudo likame oko ot paco, en eko penye be, “In pwodi idwogo adwoga ki sapali, pinyo bo komio likame iko ot i odi?”

¹¹Uria oko dwoko ne Daudi be, “Jo me Isirael kede Yuda tie bedo i kimere, doko Sanduku me Isikan da tie but gi; ngadwong na Joab karacel kede jotie mege tie bedo obar i kimere; benyo benyo kame ango atwero ot kede i oda cam kede amata, kede buto kede dako na? Ango alairo be likame ango abino timo gikame cal kamano.”

¹²Di do Daudi oko waco ne Uria be, “Dong kan tin bobo, di diki ango ako bino cwani iko dok.” Di Uria oko dong Yerusalem cenge nono. I ceng alubo mere,

¹³Daudi oko lwonge bute ot cam kede amata, di eko mine emer. Do Uria likame bobo oko ot ture iwor nono; akaka ot i ode, en eko bobo ot buto i gibuto mere kede isirikalen adaro abaka.

¹⁴Odiko Daudi oko wandiko baluwa but Joab di eko cwano Uria kede.

¹⁵En oudo ewandiko baluwa be, “Ket Uria anyim kakame yi tek iye, di wun ikounu dok cen, tetekeny iwekunu neke.”

¹⁶Aso, di bin Joab oudo tie lukaro bomba, en eko cwano Uria kakame oudo en engeo be jokwor atek tie iye.

¹⁷Isirikalen me bomba nono oko donyo oko di kiko yi kede Joab; di kiko neko jo mogo kikom jotie me isirikalen ka Daudi kiton Uria da.

¹⁸Di do Joab oko cwano dano but Daudi pi ot tatamo ne kop kame mako yi nono;

¹⁹en ewaco ne ngaor nono be, “Kame in itieko tatamo ne abaka kop dedede kame mako yi,

²⁰di do ka cuny abaka oko wang di eko penyi be, ‘Pinyo komio wun ikounu ot yi kakame iyapiyapi kede bomba? Likame wun oudo ingeunu be gin kibino gweno wu ki wi apama?’

²¹Benyo, wun likame iyutununu epone kame bin koneko kede Abimelek wot ka Egidioni? Mam dako moro bin ouco nyar kidi ki wi apama di oko poto i kome oko



neke i Tebes? Pinyo komio wun oudo ikounu noko apama twatwal?' Ka en eko penyi kamano, in di do iko waco ne be, 'Uria ngatic ni da kotieko neko.' "

²²Aso, ngaor nono oko ot di eko tuno but Daudi eko tatamo ne kop dedede kame Joab oudo ocwae be ewace.

²³En ewaco ne Daudi be, "Jokwor wa oudo tek loo wa, di kiko wok ooko yi kede wa i elet; do wan oko riamo gi kiton tuno i erute gi.

²⁴Di do gin kiko gwegweo imalia i kom wan ki wi apama; jo mogo kikom isirikalen nin, abaka, kotieko neko; doko Uria da ngat acel kikom jotel me isirikalen nin, kotieko neko."

²⁵Daudi oko waco ne ngaor nono be, "Oti iko waco ne Joab kur emi gi kotimere nono lol tam mere, pien likame tie ngat akaruno ngenon ngat kame bino to i yi; wace emeede suro bomba nono kitek di eko mane. Doko sup cunye."

²⁶Kakame dako ka Uria oko winyo kede be cware oudo oto, en eko koke.

²⁷Kakame kare me koko oko tiek kede, Daudi oko cwano jo ome di oko kele i ot ka Daudi; en eko doko dako mere di eko nywalo ne atin awobi. Do cuny Rwot likame oko bedo yom kede gikame Daudi oudo otimo.

2 Samuel 12

Kop ka Natan kede Iswilar ka Daudi

¹Rwot bin oko cwano Natan but Daudi. Natan oko ot bute di eko waco ne be, "Bin tie cuo are i bomba moro, ngat acel kikom gi oudo obaro do ngat acel oudo obedo ngacan.

²Icuo kobaro nono oudo tie kede romini kede doke atos;

³do icuo kame oudo obedo ngacan ca oudo li kede gimoro kwanyo kenekene akaale me oromo acel atitidi, kame oudo ewilo awila. En oudo ewile di eko dongo i cinge karacel kede idwe mege; oudo en epite kede cam mere atitidi nono, doko oudo emie emato pii i ikopo mere, di etinge i tiene. Akaale me oromo nono oudo cal ne do bala nyare.

⁴Ceng moro acel welo oko bino but ngabar nono, di en cunye likame oko mito kwanyo oromo arabo diang mere me aneka pi tedo kede welo kame oudo obino bute, do en eko lunyo kwanyo akaale me oromo me ngacan ca, di eko ngolo eko tedo ne welo kame oudo obino bute."

⁵Cuny Daudi oko wang i kom ngabar nono eko waco ne Natan be, "Ango alairo i nying Rwot kakuo be, icuo kotimo gi noni poore to!

⁶Pi kite kame en etimo kede gikame cal kamano, doko likame eko bedo kede cuny me kisa, miero en ecul akaale me oromo kame en etero nono kede romini ongwon."

⁷Natan oko waco ne Daudi be, "In en icuo nono. Doko Rwot Rubanga me Isirael waco be, 'Ango aketi pi bedo abaka me Isirael, di ako laki ki cing Saulo;



⁸Ango oudo ami ot ka ngadwong ni Saulo kede mon mege, doko ako mini ibedo abaka me Isirael kede me Yuda; ka koto oudo mago likame oromi, koto oudo ango bobo amedi atos kame kalamo magonogo.

⁹Pinyo do komio in iko cano cik na di iko timo gikame rac i wanga? In imio koneko Uria; in imio jo Amon oneke di in iko tero dako mere oko doko meri.

¹⁰Pi mano, kobino bedo neko jo me odi nakanaka, pien in ibedo kede acae buta di iko tero dako ka Uria oko doko meri.

¹¹Ango abino mino dano moro me odi en kame kelo ni peko, doko abino kwanyo mon ni di ako mino but icuo apat di in ineno, di en eko buto kede gi i kakaler i dier iceng.

¹²In oudo itimo i mung, do ango abino timo gi noni kakaler i dier iceng i nyim jo lung me Isirael.’ “

¹³Daudi oko waco ne Natan be, “Ango atieko timo dub but Rwot.” Natan oko waco ne Daudi be, “Rwot otieko sasiro dub nin; in likame ibino to.

¹⁴Akadi kamanono da, pi kite kame in inyuto kede acae but Rubanga pi gikame itimo noni, atin kame konywalo ni nono bino to.”

¹⁵Di do Natan oko dok ture.

Atin ka Bateseba Oto

Rwot oko mino tuwo atek omako atin kame dako ka Uria oudo onywalo ne Daudi.

¹⁶Daudi bin oko bedo bako doge but Rubanga pi atin; ebedo kanyo kec, doko iwor oudo en edonyo i agola mere di eko buto piny i dier ot iwor kiakia.

¹⁷Jotic mege adongo oudo oto bute di kiko ngangao en be eyai malo; do en likame eko yei, doko oudo likame eko yei akadi cam kede gin.

¹⁸I ceng me kanyaare mere atin oko to. Jotic ka Daudi adongo oko bedo kede lwo pi yamo ne be atin oudo oto. Pien gin oudo kiwaco be, “Ber kong di atin oudo pwodi tie kuo, wan oudo okounu yamo kede do en likame eko yei winyo kop wa; benyo benyo kame wan nataman okarununu yamo ne kede be atin oto? Cengemogo eromo awanakin kene.”

¹⁹Do kakame Daudi oko neno kede be jotic mege oudo tie iwewei ken gi ken gi, en eko niang be atin oudo oto. Di en eko penyo jotic mege be, “Mam atin oto?” Gin kiko gamo be, “Ebo en etieko to.”

²⁰Di do Daudi oko yai malo, eko bol, esut kede mo di eko loko igoen. En eko ot i ot ka Rwot mino wor. Kakame en eko dok kede i ode, eko penyo cam di oko kelo ne eko camo.

²¹Jotic mege oko penye be, “Nyo ine kame in itimo? In oudo iko kanyo kec doko oudo ikoko atin di pwodi oudo ekuo; do kakame atin oko to kede, in iko yai di iko cam.”



²²Daudi oko dwoko negi be, “Di pwodi oudo atin kuo, ango oudo akanyo kec di akok, pien oudo aparo i cunya be cengemogo Rwot twero bedo kede kisa buta di eko mino atin bedo kuo.

²³Do nataman en etieko to; pinyo bobo amio ango akanyo kec? Iparo be ango akaruno bobo dwoke? Ango abino ot bute, do en likame ebino dwogo bobo buta.”

Konywalo Sulumani

²⁴Di do Daudi oko kweno cuny dako mere Bateseba. En eko buto kede, di eko nywalo atin awobi eko cako nyinge Sulumani. Rwot oudo oko maro atin awobi nono,

²⁵di eko cwano enabi Natan pi ot cako nying atin awobi nono Jedidia, pi Rwot oudo mare.

Daudi Omao Bomba me Raba

(1 lyutun 20.1-3)

²⁶I kare nono Joab oudo tie yi kede jo me bomba me Raba, en bomba adwong me jo Amon, doko oudo eyapuno mane.

²⁷Joab oko cwano jo but Daudi pi waco ne be, “Ango atieko suro bomba me Raba; bobo atieko da mano adul kame pii me bomba wok kiye.

²⁸Nataman do in cok isirikalen odong dedede karacel, iko bino luko bomba di iko mane; ka likame itimo kamanono, ango ayaro mano bomba noni di oko bino lwonge kede nyinga.”

²⁹Aso, Daudi oko coko isirikalen mege di eko ot Raba, eko yi di eko mane.

³⁰En eko kwanyo ocoro me ajakanut kame kotimo kede saabu ki wi Milikom, en rubanga me jo Amon; peko me ocoro nono oudo kalamo kilo ot adek, doko oudo kide me wel tie iye; en eko kwanyo kide me wel nogo di eko keto i ocoro mere me ajakanut. Daudi bobo da oko tero jamini atat twatwal kame eyako ki bomba nono.

³¹Eko tero jo me bomba nono di eko mino gi tic kede musumeno, isululun kede lee, doko da kitimo tic me gono matapalin. En bin eko timo kamanono ne bomban dedede me jo Amon. Di do Daudi kede jo dedede oko dok Yerusalem.

2 Samuel 13

Aminon kede Tamar

¹Kikano, Abisolom wot ka Daudi bin tie kede amin mere acil, kame nyinge oudo Tamar; di Aminon wot ka Daudi da bobo oko lokere mite.

²Mit kame Aminon oudo tie kede i kom amin mere oko lolo tam mere kitek, omio en eko ngono kome be tuwo omake. En oudo eneno bala likame tie gikame en ekaruno timo ne Tamar pien Tamar oudo pwodi likame obuto kede icuo moro.

³Do Aminon bin tie kede adieru mere kame nyinge oudo Yonadab, wot ka Simea omin me Daudi. Yonadab oudo obedo dano angeo ngolo rieko.



⁴En eko waco ne Aminon be, “In ibedo wot ka abaka, pinyo komio buli ceng in ibedo itururo aturur? Nyo arac?” Aminon oko waco ne be, “Ango cunya maro Tamar, amin me omina Abisolom.”

⁵Yonadab oko waco ne be, “But i apien ni, di iko cuko tuwo. Kame papa ni oko bino pi neni, wace be, ‘Ango akwai icwai amina Tamar ebin emia gimoro acami. Ango amito en ebin eko iiko cam ki kan di angu aneno, di en kikome eko toko nango cam eko mina.’ “

⁶Aso, Aminon oko buto di eko cuko be kome oudo lit. Kakame abaka oko bino kede pi nene, en eko waco ne abaka be, “Ango akwai icwai amina Tamar ebin di eko tedo na mugati mogo di angu aneno, di en kikome eko mina.”

⁷Di do Daudi oko cwano kop paco but Tamar di ewaco ne be, “In oti i ot ka omini Aminon di iko iiko ne cam.”

⁸Aso, Tamar oko ot i ot ka omin mere Aminon, kakame en oudo etie buto iye. En eko kwanyo alos kame konyalo di eko donyo nyongo, eko timo mugati di Aminon neno eko donyo tedo.

⁹Di do eko toko eko tero ne i nyime, do Aminon oko daga camo. Aminon oko waco be, “Cwai jo dedede dony ooko.” Di jo dedede oko donyo ooko.

¹⁰Di do Aminon oko waco ne Tamar be, “Kel cam nono i agola kane, di in iko toko nango in kikomi.” Aso, Tamar oko kwanyo mugati kame oudo etedo, di eko tero i agola but omin mere Aminon.

¹¹Do kakame en oudo etie mine kede, Aminon oko make, di eko waco ne be, “Amina, bia ibut keda!”

¹²Tamar oko waco ne be, “Omina, likame kamano, kur imaka tetek; pien gikame cal kamanono likame timere i Isirael; kur itim gikame rac rom kano!

¹³Ango abino beno tuai kede lewic kame dwong rom kano? Akadi ida kikomi ibino bedo bala dano akony mere li i Isirael. Pi mano, nataman angu akwai iyam kede abaka; piento en likame ebino twoni angu.”

¹⁴Do Aminon likame oko yei winyo kop mere; doko pi kite kame en oudo etek kede ebwone, Aminon oko make tetek di eko buto kede.

¹⁵Di do cuny Aminon oko dage kitek; ateteni cunye oudo oko dage dag kame kalamo kite kame oudo kong emare kede i agege. Aminon oko waco ne be, “Dony ooko!”

¹⁶Do en eko dwoko ne be, “Omina, likame kamano; pien riama tenge kamanoni rac kalamo gikame itieko timo na.” Do Aminon likame oko yei winyo kop mere.

¹⁷Aminon oko lwongo ngatic mere di eko waco ne be, “Kwany dako noni tenge ki nyima, di iko ridakino ekeko.”



¹⁸Ngatic nono oko tere ooko di eko ridakino ekeko. Tamar oudo tie ngapo egoe abor kame bade tie; manono en kame oudo obedo epone kame anyira ka abaka kapwodi likame ongego cuo ngapere kede.

¹⁹Tamar bin oko suto buru i wie, di eko nyinyilo egoe abor kame oudo etie ngapo; en eko yeno cinge i wie, eko ot tenge di ekok kitek.

²⁰Omin mere Abisolom oko penye be, “Mam omini Aminon obuto kedi? Amina, ling do ber in; en ebedo omini; kur imak kop no i cunyi.” Aso, Tamar oko dong bedo i ot ka omin mere Abisolom en kene, di etie kede cweracuny atek.

²¹Kakame Abaka Daudi oko winyo kede gikame Aminon oudo otimo ne Tamar, cunye oko wang twatwal, do en oudo likame eromo mino wode alola, pien oudo emare, piento en oudo ebedo atin kao mere.

²²Do Abisolom oudo likame oko waco kop moro i kom Aminon, arac amoto aber, pien cunye oudo oko dage pi kop kame emako kede amin mere Tamar tetek di eko buto kede.

Abisolom Onyango Amin mere

²³Di mwakini are okato, Abisolom oudo oko tedo ebaga me nyaro yer me romini mege i Baal Kasor, kabedo kiyapiyapi kede Epuraimu, di en eko lwongo awobe ka abaka dedede.

²⁴Abisolom oko ot but abaka di eko waco ne be, “Adwong, kotie nyaro yer me romini nango, mam koto in kede jotic ni ibino nywako keda ebaga?”

²⁵Do abaka oko waco ne Abisolom be, “Woda, likame kamano, mito kur wan dedede ootunu pien cengemogo eko doko pek ni.” Abisolom oko tamo dine be eoti, do en likame eko yei ot do en eko mine pwoc mere.

²⁶Di do Abisolom oko waco be, “Ka likame wun iyarunu ot, ango akwai iyeyi ne omina Aminon ot kede wa.” Abaka oko penye be, “Pinyo amio en poore eot kede wu?”

²⁷Do Abisolom oko bedo dine kamanono paka en yei ne Aminon kede awobe ka abaka dedede ot i ebaga. Abisolom oko tedo ebaga kame poore ne abaka.

²⁸Di Abisolom oko ciko jotic mege be, “Kiunu esawa kame Aminon geo mer kede, di do kame ango ako waco ne wu be, ‘Nekenu, ‘di do wun ikounu neke. Kur ibedunu kede lworu moro, ango en kame aciko wu. Bedunu kede nwangcuny doko abongo lworu moro.’”

²⁹Aso, jotic ka Abisolom oko timo ne Aminon bala kame Abisolom oudo ociko negi. Di do awobe ka abaka icegun oko yai, di dano acelacel oko somo ingei asigira mere di eko ringo.

³⁰Di gin oudo pwodi kitie i yongayo, kop oko tuno but Daudi be Abisolom oudo otieko neko awobe ka abaka dedede, doko likame oudo tie kodong akadi acel.



- ³¹Abaka oko yai malo, eko nyinyilo igoen me kome pi cwercury, di eko robere piny. Jotic mege kame oudo tie cungo kanono oko gida nyinyilo igoen me kom gi.
- ³²Do Yonadab wot ka Simea omin me Daudi oko waco be, “Adwong na, kur iter be kotieko neko awobe ni dedede; Aminon kenekene en oto. Abisolom oudo oiko nek noni cako i ceng kame Aminon obuto kede amin mere Tamar tetek.
- ³³Pi mano, adwong na, kur iyei gamo kop kame waco be awobe ni dedede oto; Aminon kenekene en oto.”
- ³⁴Do Abisolom oko ringo. Kakame sirikale kame oudo tie daro bomba oko tingo kede wange malo, en eko neno ekodet me jo di kitie wok ki nget moru di kilubo yongayo awok ki Koronaim.
- ³⁵Yonadab oko waco ne abaka be, “Neni, awobe ni tie bino bala kame ango oudo awaco.”
- ³⁶Kakame en etieko kede yamo atieka kaman, di awobe ka Daudi donyo, di kiko donyo koko; Daudi kede jotie mege da oko donyo koko kitek.
- ³⁷Do Abisolom oko ringo, di eko ot but Talamai wot ka Amikud, abaka me Gesur. Daudi oko donyo koko wode Aminon buli ceng.
- ³⁸Abisolom oko bedo Gesur tieko mwakini adek.
- ³⁹Kakame cuny abaka oudo otieko do kwei kede ingei to ka Aminon, en eko donyo do paro neno wode Abisolom.

2 Samuel 14

Joab Otimo iik me Dwogo ka Abisolom

- ¹Joab wot ka Seruya bin oko neno be abaka oudo tie paro Abisolom.
- ²Di Joab oko cwano dano Tekoa, di eko ot kelo dako moro ki kuno kame oudo riek. En eko waco ne dako nono be, “Cuk iturur; ngap igoen me iturur, doko kur isut kede mo, do bed bala dako kame otieko ceng atot di etie iturur pi dano mere oto.
- ³Di do iko ot i cal ni nono but abaka di iko waco ne kop kame atie waco ni.” Joab di oko waco ne kop kame epoore ot waco.
- ⁴Kakame dako me Tekoa nono oko ot kede but abaka, en eko riebere piny i nyime di eko mine wor, di eko waco ne be, “Okwe abaka, konya!”
- ⁵Abaka oko penye be, “Peko nyo kame tie ni?” En eko dwoko be, “Adwong, ango apuserut, cwara oto.
- ⁶Ango oudo atie kede awobe are, do ceng moro acel gin kiko yi i obar; ngat kame oudo dwek gi li, di ngat acel oko juto ngat ocelu eko neke.
- ⁷Nataman joawade na lung otieko loko wi gi i koma. Gin kitie mito be ango ami gin awobi koneko omin mere, tetekeny gin kineke pi neko omin mere. Manono bino mino



oneko kiton musika. Ka kineke, udo do kikwanyo gen na acel kenekene kodong, di kiko weko cwara abongo atin moro kame mio nyinge dong i wi lobo.”

⁸Di abaka oko waco ne dako nono be, “Dok paco, ango ayaro tieko kop ni no.”

⁹En eko waco ne abaka be, “Adwong abaka, raco bed i wia kede but jo me ot ka papa na; poore abaka kede jo me ode bed abongo raco moro.”

¹⁰Abaka oko waco ne be, “Ka ngatamoro owaco ni kop moro arac, kele buta, di likame bobo eko bino muli.”

¹¹Di do en eko waco be, “Adwong, ango akwai ileg Rwot Rubanga ni, tetekeny ngacul kwor me remo ka woda kur tim nek, di likame eko neko woda ocelu.” Abaka oko waco be, “Ango acikere i nying Rwot kakuo be, likame tie gimoro akadi katitidi kame bino timere ne wodi.”

¹²Dako nono bobo oko waco be, “Adwong na, ango akwai iyei na waco ni kop moro acel bobo.” Abaka oko waco ne be, “Aso waci.”

¹³Dako nono oko waco be, “Pinyo bo do komio in iko timo gikame cal kamanono but jo ka Rubanga? Pien kop kame in iwaco no mio in ingolo kop i komi keni ka in likame iyei dwoko ngat koringo tenge ki paco.

¹⁴Wan dedede obinunu to; wan ocalunu bala pii kame olepar piny, kalikame bobo okaruno jobo. Akadi Rubanga da likame kwanyo kuo; do en emo epone me dwoko dano, tetekeny ngat koringo tenge ki nyime kur dong bedo tenge atwal.

¹⁵Adwong na abaka, ango nataman abino pi waco ni kop noni pien jo oudo omia lworo; ango oudo aparo i cunya be, ‘Ango abino yamo kede abaka, cengemogo ebino timo na gikame akwae.

¹⁶Ango oudo angeo be in ibino winyo kop na di iko laka ki cing ngat kame mito kwanya karacel kede woda tenge ki lobo kame Rubanga omio jo mege.’

¹⁷Ango oudo aparo i cunya be, ‘Kop kame adwong na abaka waco bino mina audo anapakin’ ; pien adwong na abaka cal bala malaika ka Rubanga, engeo poko gikaber kede gikarac. Rwot Rubanga ni bed kedi!”

¹⁸Di abaka oko dwoko ne be, “Ango ayaro penyi, do kur imung na gimoro.” Dako nono oko waco be, “Adwong na abaka, penya.”

¹⁹Abaka oko penye be, “Benyo, Joab oribere kedi i kop noni?” Dako nono oko dwoko be, “Adwong na abaka, ango alairo ateteni, likame dano karuno pango dwoko kop moro kame in ipenyo. Ateteni ngatic ni Joab en ocwaa; en da kame eko waco na kope no go dedede.

²⁰Ngatic ni Joab otimo gi noni tetekeny ekel alokaloka i kom gi kotimere. Do adwong in itie kede rieko kame cal bala me malaika ka Rubanga; in ingeo gi dedede kame timere i wi lobo.”



21I cen mere abaka oko waco ne Joab be, “Manono ber, ango atieko yei timo gikame in imito; ot idwoki awobi Abisolom.”

22Joab oko riebere piny i nyim abaka di eko mine wor, eko kwano ne abaka winyo. Joab oko waco be, “Adwong na abaka, tin ango atieko ngeno be in cunyi yom keda pien in iyei winyo kwac na.”

23Di do Joab oko yai, eko ot Gesur di eko dwoko Abisolom Yerusalem.

24Do abaka oko waco be, “Poore Abisolom ot i ot amake; miero kur ebin i nyima.” Aso, Abisolom oko ot i ode amake, di likame eko ot i nyim abaka.

Daudi Onywako bobo kede Abisolom

25I Isirael lung oudo likame tie ngatamoro kame kosurao cilo mere bala me ka Abisolom; oudo likame tie karamoro arac i kome cako ki lwete me tiene kiton i yer wie.

26En oudo elielo wie i atiekini me mwaka acelacel kame edongo di eko doko pek ne. Kame en oudo elielo wie, epimo rom me yer wie kalamo kilo are i gipim me abaka.

27Abisolom oudo onywalo idwe awobe adek, kede atin nyako acel kame oudo nyinge Tamar. En oudo ebedo dako acil twatwal.

28Abisolom bin oko tieko mwakini are Yerusalem di likame eneno abaka.

29Di do en eko cwano dano lwongo Joab pi bino bute me wek eore but abaka; do Joab oko dagi bino bute. En eko bobo cwano dano tien me are, do Joab bobo oko dagi bino.

30Di do Abisolom oko waco ne jotic mege be, “Nenunu, poto ka Joab tie i nget mera, doko mawele tie iye; otunu di ikounu cwinye.” Aso, jotic ka Abisolom oko wango poto nono kede mac.

31Di Joab oko yai eko lubo Abisolom i ode, di eko penye be, “Pinyo komio jotic ni owango poto na?”

32Abisolom oko dwoko ne Joab be, “Neningo, ango acwao kop buti be ibin kan tetekeny acwai but abaka i ot ipenye be, ‘Pinyo komio ango ayai ki Gesur di ako bino kan? Oudo koto pwodi eber nango dong bedo kuno.’ Nataman ango amito imia aot i nyim abaka; ka ango atie kede raco moro, wek eneka!”

33Di do Joab oko ot but abaka di eko waco ne kop ka Abisolom; di abaka oko lwongo Abisolom. En eko bino but abaka di eko riebere piny i nyime; di abaka oko moto Abisolom di enote.

2 Samuel 15

Abisolom Otimo lik me Mano Apugan

1Ingei manoni, Abisolom oko udo cabala kede asigira kame make, kede isirikalen ot kany kame telo nen yongayo.



- ²Abisolom oko donyo yai odiko sek di eko ot cungo i nget gudo i erute me bomba. Tek ka ngatamoro oudo ooto kuno pi tero pido mere i nyim abaka, Abisolom oudo lwonge di eko penye bomba kame ewok kiye. Ka dano nono oko waco ne ekeko me anywali mere,
- ³Abisolom oudo ko waco ne be, “Neningo, koko nin tie kakare, do likame tie dano moro kame abaka oketo kame twero winyo pido ni.”
- ⁴Abisolom doko ko meede kede yamo be, “Okwe koto oudo abedo ngangolkop i Isirael! Koto oudo jo kame tie kede pido gi bino buta di ango ako ngolo kop gi kakare.”
- ⁵Ka dano oudo oko bino pi riebere piny i nyime, en oudo ecwao cinge di eko make di eko note.
- ⁶Abisolom oko timo kamanono ne jo dedede kame oudo kelo pido gi but abaka, manono oko mino eloko cuny jo me Isirael bute.
- ⁷Ingei mwakini ongwon Abisolom oko waco ne abaka be, “Okwe yei na aoti Keburon pi cobo cikere na kame atieko timo but Rwot.
- ⁸Pien ango oudo akwongere but Rwot i kare kame abedo kede Gesur i Aram be, ‘Ka ateteni Rwot odwoka Yerusalem, ango abino donyo wore i Keburon.’ “
- ⁹Abaka oko waco ne be, “Ot kede mulem.” En eko yai di eko ot Keburon.
- ¹⁰Do Abisolom oko cwano jo mogo i mung but atekerin dedede me Isirael pi waco negi be, “Tek kame iwinyunu koko me agwara, lelemunu be, ‘Abisolom otieko doko abaka i Keburon.’ “
- ¹¹Cuo tol are me Yerusalem oko ot kede Abisolom; gin oudo kibedo wele kame kolwongo, omio kioto abongo ngeno nyo kame oudo tie timere.
- ¹²Kakame oudo Abisolom tie mino kede giayala, en eko cwano aor i bomba me Gilo pi lwongo Akitopel, ngat acel kikom jo kame oudo mio Daudi tam. Iik nono me mano apugan oko meede ameda doko tek, doko da wel me jo kame oudo tie gango tam ka Abisolom oko meede.

Daudi Oringo Tenge ki Yerusalem

- ¹³Dano moro oko tero ne Daudi kop be, “Cuny jo me Isirael tie do i kom Abisolom.”
- ¹⁴Daudi oko waco ne jotic mege dedede kame oudo tie kede en i Yerusalem be, “Yaunu oringunu, aso ka li likame tie ngatamoro kikom wa kame bino bwot ki cing Abisolom. Bunyunu, ka li en ebino mako wa eko timo ne wa can, di eko neneko jo kame tie i bomba kede epima.”
- ¹⁵Jotic ka abaka oko dwoko ne be, “Adwong, jotic ni otieko iikere pi timo gi dedede kame tam nin omoko.”



- 16** Aso abaka oko yai, di eupere kede jo me ode kede jotic mege, kwanyo kenekene mon tomon kame oudo ebedo kede gi bala mege, kame oudo eweko odong pi daro paco mere.
- 17** Abaka oko yai, di jo apat dedede oko lube, gin kong kiko cungo i dog ot me ajikini.
- 18** Jotic mege dedede oko beo i nyime; jo Keret, jo Pelet, kede jo tol kanyape (600) dedede kame oudo bin olube wok ki Gat, gin dedede kiko kato ne abaka anyim.
- 19** Abaka oko waco ne Itai dano me Gat be, “Ida itie upere kede wa pinyo? In doki ioti ibed kede abaka anyen. In ibedo ngakumbor, doko da in iringino kan ki turu pi gwokere.
- 20** In kom pwodi ibino kan nyoronyoro ni, pinyo amio ango ako cako rimo kedi piny, di ber ada likame angeo kakame atie ot iye? Kwany joe ni idok kede gi; akwao Rubanga enyut ni amara mere kalikame lokere kede genere mere.”
- 21** Do Itai oko dwoko ne abaka be, “Adwong, alairo i nying Rwot kede i nyingi be, ango abino bedo tie kedi kabedo dedede kame in ioto iye, akadi i to amoto i kuo.”
- 22** Daudi oko waco ne Itai be, “Mano ber, aso cak ot!” Aso, Itai oko ot karacel kede jo mege, kede jo dedede kame oudo kuo i cing gi.
- 23** Jo dedede me piny nono oko mwoco koko i kare kame jo ka Daudi tie ot kede. Abaka karacel kede jo mege oko ngolo atapar me Kideron, di jo dedede oko dok tetu wi tim.
- 24** Abiata kede Sadoki oudo tie kuno, karacel kede Jolebi, di kiyeo Sanduku me Isikan ka Rubanga. Gin kiko cibo Sanduku me isikan ka Rwot piny paka tuno di jo dedede otieko wok ki bomba.
- 25** Di abaka oko waco ne Sadoki be, “Dwok Sanduku me Isikan i bomba. Ka Rwot cunye mita, cengemoro ebino mina adwogo di ako neno Sanduku me Isikan noni kede kakame etie iye.
- 26** Do ka likame cunye yom i koma, ango ine, wek en etim nango gikame en eneno be ber kibute.”
- 27** Abaka doko da oko waco ne ngasaseredoti Sadoki be, “Neningo, in doki i bomba kede mulem, in karacel kede Abiata; dokunu kede awobe wu are, Akimas wodi kede Jonasan wot ka Abiata.
- 28** Neningo, ango abino ot bedo kakame jo ngolo kiye nam i yongayo kame oto i wi tim di ako daro kop kame wok kibutu.”
- 29** Aso Sadoki kede Abiata oko tingo Sanduku me Isikan kidwoko Yerusalem, di gin kiko dong kuno.
- 30** Do Daudi oko ot i wi moru me Olibeti di ekok; oudo etie kede tiene nono di eumo wie bala gianyuta me iturur. Jo dedede kame oudo tie kede da oko umo wi gi di kiko donyo koko di kitie yito malo i wi moru.



³¹Kakame kowaco ne kede Daudi be Akitopel da oudo obedo ngat acel kame tie i iik ka Abisolom me reto apugan, Daudi oko lego be, “Okwe Rwot, akwai imi tam kame Akitopel mio bed tam me mingo.”

³²Kakame Daudi otuno kede i wi moru kabedo kame oudo jo woro kiye Rubanga, Kusai Ngaraki, oko bino pi riamo kede Daudi, di enyinyilo ekoti mere kede di ejuk kede lobo i wie.

³³Daudi oko waco ne be, “Ka in iupere keda, ibino medo na peko,

³⁴do ka idok i bomba di iko waco ne Abisolom be, ‘Okwe abaka, ango abino bedo ngatic ni bala kame oudo abedo tic ne kede papa ni i kare kokato, ‘manono bino mini kare me bwono tam kame Akitopel mio Abisolom.

³⁵Josaseredoti Sadoki kede Abiata bino bedo tie kedi kuno; in bed waco negi kop dedede kame in iwinyo ki paco ka abaka.

³⁶Gin kitie kede awobe gi kuno, Akimas kede Jonasan, in itwero cwano gi buta kede kop moroni dedede kame in iwinyo.”

³⁷Aso Kusai, ngawot Daudi, oko dok i bomba i kare kame Abisolom oudo tie donyo kede iye.

2 Samuel 16

Daudi kede Siba

¹ Kakame Daudi okalamo kede okwidi me wi moru momot, en eko riamo kede Siba, ngatic ka Mepiboset, di etie kede pundan are kame yeo mugati tol are, abungeta tol are me olok kotuo, anyakini kame kongwedo tol acel, kede isau me lau kame bwini tie iye.

²Abaka oko penyo Siba be, “Ikelo gigo dedede menyo?” Siba oko dwoko be, “Akelo pundan ne abaka kede jo me ode pi bedo gikame gin kioto kede; mugati kede anyakini kame kongwedo akelo me acama ne awobe; kede bwini akelo ne jo kame bino nure i wi tim.”

³ Abaka oko dwoko be, “Do Mepiboset, akwar ngadwong ni tie tuai?” Siba oko dwoko be, “En edong Yerusalem, pien etie tamo be i ceng atin jo me Isirael bino dwoko i cingen ajakanut ka kwaru mere Saulo.”

⁴Abaka oko waco ne Siba be, “Gi dedede kame Mepiboset tie kede nan otieko doko meg.” Siba oko dwoko be, “Ango abedo ngatic ni; akwai imeede bedo kede cuny aber buta, in rwot na abaka.”

Daudi kede Simei

⁵Kakame Abaka Daudi otuno kede Bakurim, icuo acel wad kede Saulo oko bino pi riamo kede Daudi, nyinge oudo Simei wot ka Gera; en oudo ebino di elamo Daudi.

⁶Simei oko cako lwomolwomo ingaroi i kom Daudi karacel kede jotie mege, bed bala jo ka Daudi kede isirikalen adare oudo olukaro en ki bad dedede.



- ⁷Simei oko donyo lame di eredo be, “Irwa tenge! Irwa tenge! Nganek! Dano arac!
- ⁸In imao apugan ka Saulo, nan Rwot tie timo onyanga i komi pi jo me ot ka Saulo kame in ineko. Rwot nan otieko mino ajakanut i cing wodi Abisolom; nen nan can otieko poto i komi, in nganek!”
- ⁹Di Abisai wot ka Seruya oko waco ne abaka be, “Pinyo amio ogwok agwoka ni lami? Wek ango aoti angol ngute tel!”
- ¹⁰Do abaka oko dwoko ne awobe ka Seruya be, “Man likame obedo kop amako wu. Ka en etie lama pien Rwot en kocwae pi timo kamanono, ngai kame twero penye gi komio etimo kamanono?”
- ¹¹Di Daudi oko waco ne Abisai kede ne jotic mege dedede be, “Ka ber woda kikoma tie mito neka, do do dano me ekeko ka Benjamin noni bino kalamo en tien adi! Wun wekenu, wekenu emeede lama pien Rwot en omie timo kamanono.
- ¹²Cengemogo Rwot bino neno can na di eko mina winyo kawang ilam kame en tin etie lama kede.”
- ¹³Aso, Daudi kede jo mege oko meede ot di kilubo gudo. Simei oko meede ot kede gi di eririo ki bad moru, di elamere kede di elwomolwomo ingaroi i kom gi, doko di ekiro apua i kom gi.
- ¹⁴Abaka kede jo mege oudo ool kakame kituno kede Yorodan, di do gin kong kiko wei kunono.

Abisolom i Yerusalem

- ¹⁵Di Abisolom kede jo me Isirael dedede kame oudo tie kede en oko donyo Yerusalem, Akitopel da oudo tie karacel kede gi.
- ¹⁶Kakame Kusai Ngaraki, ngawot Daudi otuno kede but Abisolom, en eko lelemo be, “Abaka bed nakanaka! Abaka bed nakanaka!”
- ¹⁷Abisolom oko penyo Kusai be, “Manoni en obedo wor kame in itie kede but ngawoti Daudi? Nyo kogengi upere kede?”
- ¹⁸Kusai oko dwoko be, “Likame kamanono. Ango atie merin ngat kame Rubanga, kede jogi dedede, karacel kede jo dedede me Isirael oyeru, ango abino dong meri.
- ¹⁹Doko da iparo be ango apoore tic ne ngai? Mam apoore tic ne wode? Bala kame ango oudo abedo tic ne kede papa ni, nan ango abino tic nin.”
- ²⁰Di Abisolom oko penyo Akitopel be, “Mi wa tam, nyo kame opoore timo?”
- ²¹Akitopel oko dwoko be, “Oti ibut kede mon kame papa ni oudo bedo kede gi bala mege, mon kame nan eweko daro ode; manono bino mino jo dedede me Isirael kame winyo kop nono ngeo be ateteni in itieko dingere kede papa ni, di do jo kame gangi ko bino bedo kede cuny atek.”



²² Aso oko gero ne Abisolom eema i wi ot ka abaka, di do en eko buto kede mon ka papa mere di jo dedede me Isirael neno.

²³ Tam dedede kame Akitopel oudo mio i kare nono oudo jo gamo agama ineno bala kibedo me ka Rubanga; Daudi kede Abisolom oudo yei gamo tam mere.

2 Samuel 17

Kusai Omio Abisolom Tam kame Rwenye

¹ Ingei manono, Akitopel oko waco ne Abisolom be, “Wek ayer cuo tutumia tomon kiwie are (12,000) di ango ako yai wapo Daudi iwor katin.

² Ango abino tuno i kome i esawa kame eol kede doko di cunye odubere. Lworo atek bino make di jo mege dedede ko bino ringo tenge. Ango abino neko abaka kenekene,

³ di ako dwoko jo mege dedede buti bala ateran atie bino paco but cware. In ibino neko dano acel kenekene, do jo apat dedede girgi likame bino riamo kede peko moro.”

⁴ Tam noni oko yomo cuny Abisolom kede joadongo me Isirael dedede.

⁵ Abisolom oko waco be, “Lwongunu Kusai Ngaraki da owiny tam mere.”

⁶ Kakame Kusai otuno kede, Abisolom oko waco ne be, “Man en tam kame Akitopel omio wa, benyo, olube? Aso ka li, wace wa gikame opoore pi timo.”

⁷ Kusai oko dwoko be, “Manoni likame obedo tam aber kame Akitopel tin omio wu noni.

⁸ In ingeo be papa ni Daudi kede jo mege obedo jo yi, doko da nan kitieko doko ger bala edubu kame komao idwe mege. Medo i wi manono, papa ni tie kede diru me yi; likame eyaro yei buto karacel kede isirikalen.

⁹ Akadi nan da, cengemogo en etie pwono i bur moro, arabo karamoro apat. Doko nen ba, ka en eneko isirikalen nin i asura me agege, ngat kame winyo bino waco kakaler be kobwono isirikalen nin.

¹⁰ Manono ko bino mino lworo mako akadi isirikalen kame tek i yi da, kame lworo li i cuny gi bala inguon, cuny gi bino pirisar atwal pien jo dedede me Isirael ngeo be papa nin obedo ngayi, doko jo mege obedo jo yi atek.

¹¹ Do tam kame ango atie mino en ine be, mi jo dedede me Isirael cokere karacel buti, cako ki Dan tuno Beereseba, di kiko bedo tot bala asinge me dog nam, di in kikomi iko telo gi ot yi.

¹² Manono bino mino wa oudo Daudi ki karamoro kenekene kame en epwono iye, di wan oko coore i kome bala toyo aony piny. Manono bino mino likame esobolo bwot, akadi kiton jo mege kame etie kede gi da.

¹³ Ka edok eko donyo i bomba, jo dedede me Isirael bino kelo aunoi di kiko wano kede bomba paka piny i aditot. Likame kidi moro kame kogere kede bino dong kunono.”



¹⁴Abisolom kede jo dedede me Isirael oko waco be, “Tam kame Kusai Ngaraki omio ber kalamo tam kame Akitopel omio.” Pien Rwot oudo otieko moko tam mere be kur jo lub tam aber kame Akitopel mio, me wek en ekaruno timo ne Abisolom can.

Kusai Okwenyaro Daudi pi Lwi

¹⁵Di Kusai oko waco ne josaseredoti Sadoki kede Abiata tam kame en emio Abisolom kede jotel me Isirael, kede tam kame Akitopel da omio gi.

¹⁶Kusai oko waco negi be, “Pi mano, cwaunu dano awakawaka but Daudi ot wace be, ‘Kur ibut tin i wi tim kakame kongolo kiye nam, do miero itam kede teko dedede ngolo loka tetuca, aso ka li, kobino maki karacel kede jo ni di oko neneko wu.’ “

¹⁷Jonasan kede Akimas oudo obedo tie cungo i atan me Enerogel kuro kop, pien gin oudo kitie kede lworu be miero kur nen gi di kitie donyo i bomba. Atin nyako apasoit moro tie kame oudo tero ne gin kop, di gida kiko ot waco ne Abaka Daudi.

¹⁸Do awobi moro oko neno gi di eko ot waco ne Abisolom. Manono oko mino gi kiyai ki kanono awakawaka di kiko ot Bakurim i ot me icuo moro kame oudo tie kede atan i diakal mere, di do gin kiko donyo i atan nono.

¹⁹Dako me icuo nono oko kwanyo ikeka eko peto i wi bur me atan nono, di eko mono iye engano, omio likame tie ngat kame oudo twero neno di eko ngeno.

²⁰Jotic ka Abisolom oko bino i ot nono di kiko penyo dako nono be, “Akimas kede Jonasan tie tuai?” Dako ca oko dwoko negi be, “Kingolo pii loka tetuca.” Do kakame kimo gi kede di likame kiko udo gi, gin kiko dok Yerusalem.

²¹Ingei jotie nogo yai dok, Akimas kede Jonasan oko wok ki bur me atan, di kiko ot tatamo ne Abaka Daudi gi dedede. Gin kitatamo ne iik arac kame Akitopel otimo i kome, di kiko waco ne be, “Bubunyo ngolo nam loka tetuca.”

²²Kikano Daudi kede jo mege dedede kame oudo tie kede oko yai kiko ngolo ecilet me Yorodan; kakame piny oru kede oudo gin dedede kitieko ngolo loka tetuca.

²³Kakame Akitopel oneno kede be likame kolubo tam kame en emio, en eko tweno gi me bedo ingei punda mere di eko yito iye edok ture i bomba me turgi. En eko mino kope amako epone kame ode poore dong kede di eko dere. Bin oko yike i ates ka papa mere.

²⁴Kakame Abisolom kede jo me Isirael ongolo kede ecilet me Yorodan, Daudi oudo otieko tuno i bomba me Makanaim.

²⁵Abisolom oudo oketo Amasa pi bedo ngadwong me isirikalen kawang Joab. Amasa oudo obedo wot ka Jeta Ngaisimael; toto mere oudo obedo Abigail nyar ka Nakas kede amin me Seruya toto me Joab.

²⁶Abisolom kede jo mege oko gero kimere gi i lobo me Gilead.



²⁷Kakame Daudi otuno kede Makanaim, en eko udo Sobi wot ka Nakas, dano me bomba me Raba kame tie Amon, kede Macir wot ka Amiel dano me Lodebar, kede Barisilai dano me bomba me Rogelim kame tie Gilead.

²⁸Gin kiko kelo kabutere, kalayan, ikopen kede agune me lobo, engano, mawele, alos, nyige me engano kame kocelo kede mac, muranga kede ngor,

²⁹mokic kede cak komakakin, romini kede cak me diang korurano; gin oudo kikelo gi nogi ne Daudi kede jo mege, pien kiwaco be, “Kec kede orio oneko isirikalen, doko da kiol i wi tim.”

2 Samuel 18

Kobwono Abisolom di oko Neke

¹Di Daudi oko koko jo kame oudo tie kede karacel di eko popoko gi i ikodeta me jo tutumia tutumia, kede me jo tol acel tol acel, di eko keto jodongo kame telo gi.

²En eko poko isirikalen i ikodeta adek adongo di rorom, ekodet acel eketo i cing Joab, acel i cing Abisai wot ka Seruya, omin me Joab, kede ekodet acel i cing Itai dano me Gat. Abaka oko waco ne isirikalen nogo be, “Ada kikoma abino ot kede wu.”

³Do isirikalen oko dwoko ne be, “Koto kur ioto kede wa. Pien ka wan oringo amoto ka gin kineko dul me jo wa, manono gin likame kibino paro. Do in irom kede jo tutumia tomon i diere wa. Ebino bedo ber ka in idong i bomba kan di iko donyo cwano ne wan kony.”

⁴Abaka oko waco negi be, “Ango abino timo gikame wun inenunu be ber.” Aso abaka oko cungo i nget erute di isirikalen siritto wok ooko i ikodeta me tol acel tol acel kede me tutumia tutumia.

⁵Abaka oko mino cik but Joab kede Abisai kede Itai be, “Timanu ber kur itimunu gimoro arac ne awobi na Abisolom.” Isirikalen dedede oko winyo di Daudi mio jodongo kame telo gi cik nono.

⁶Aso isirikalen ka Daudi oko ot itela kiko yi kede jo me Isirael i abum me Epuraimu.

⁷Jotic ka Daudi oko bwono isirikalen me Isirael ki kanono; kibwono gi atwal atwala di kiko neko jo tutumia ot are (20,000) ceng nono.

⁸Yi oko nyai oromo piny nono dedede; jo kame yen me abum en koneko oko bedo tot kalamo jo kame koneko kede epima.

⁹Abisolom oko riamo kede jotic ka Daudi. En oudo etie bedo ingei asigira mere etie ringo kede, do kakame ebeo kede i dud yat oak kojanyo, wi Abisolom oko moko i ajange me yat. Asigira oko ringo okato do en eko dong di etie ledi i wi yamo.

¹⁰Dano ka Daudi acel oko nene di eko ot waco ne Joab be, “Aneno Abisolom di etie ledi i ajange me yat oak.”

¹¹Joab oko dwoko be, “Benyo? Inene? Nyo ogengi jute paka to di eko poto piny? Oudo koto ango ami Siliba akaya tomon kede rakoba.”



¹²Do icuo nono oko dwoko ne be, “Akadi bed bala oudo koto imia siliba tutumia acel, do koto ango likame atingo cinga neko wot ka abaka; pien abaka ociki kede Abisai kede Itai di wan owinyo be, “Timanu ber kur itimunu gimoro arac ne awobi na Abisolom!”

¹³Ka koto oudo ango aneko Abisolom, koto abaka owinyo kop nono pien likame tie kop moro kame kanere kibute, in kikomi koto iko giri tengere.”

¹⁴Joab oko waco be, “Ango likame ayaro dubo kare kamanoni yamo kedi.” En eko kwanyo tongini adek di eko lato gi i cuny Abisolom di oudo pwodi en ekuo etie liero i ajange me yat oak.

¹⁵Di awobe tomon kame mako jame ka Joab me yi oko lukaro Abisolom di kiko dope.

¹⁶Joab oko kuto agwara me jiko yi, di isirikalen oko dwogo ki kawapo jo me Isirael.

¹⁷Gin kiko kwanyo Abisolom kiko ot uce i bur atat kame oudo tie i abum, di kiko kumemo atukit adwong me engaro i kome. Do jo me Isirael dedede oko ringo odok i miere gi.

¹⁸I kare kame oudo ekuo kede, Abisolom oudo osipo epir me kidi me yutuno en i Aditot me Abaka, piento en ewaco be, “Likame ango atie kede woda moro kame kobino yutuno ango kede.” En eko cako ne epir me kidi nono nyinge be Abisolom, omio tuno tin kolwonge be Kidi me yutuno Abisolom.

Daudi Owinyo To ka Abisolom

¹⁹Di Akimas wot ka Sadoki oko waco be, “Ber ango aringi ater rwonge aber ne abaka be Rwot otieko lake ki cing jokwor mege.”

²⁰Joab oko waco be, “Likame ipoore tero Rwonge aber tin, in itwero tero rwonge no ceng apat do likame tin, pien wot ka abaka otieko to.”

²¹Di Joab oko waco ne ngatic mere me Kus be, “Oti iko waco ne abaka gikame ineno.” Icuo nono oko luro i nyim Joab di eko ringo.

²²Akimas wot ka Sadoki bobo oko waco ne Joab be, “Wek gikame mito timere etimere; do yei ne ada aringi alub loca tero kop.” Joab oko dwoko ne be, “Woda, pinyo komio ida itie mito ot tero kop do di likame tie giamia moro kame ibino udo iye?”

²³Akimas oko bobo waco be, “Wek gikame mito timere etimere, do ango ayaro ot.” Joab oko waco ne be, “Aso ringi.” Akimas oko ringo elubo yongayo kame beo i elet di eko lor i aditot me Yorodan, di eko mako dano me Kus ca i yongayo di eko lanye.

²⁴Daudi oudo tie bedo i dierediere me erute me yie kede erute me ooko me bomba. Ngat kame kio piny oko yito malo i wi gedo me erute, eko tingo wange malo di eko neno dano moro di etie ringini en kene.



²⁵Ngat kame kio piny nono oko ilelem waco ne abaka gikame eneno. Abaka oko waco be, “Ka en etie kene, dwong mere be etie kelo rwonge aber.” Ngat kame oudo tie ringini nono oko meede ameda noko gi.

²⁶Di ngat kame kio piny bobo oko neno dano ace di tie ringini, en eko lwongo ngat kame daro erute di eko waco ne be, “Neningo, dano ace bobo ica etie ringini en kene.” Abaka oko waco be, “Eda etie kelo rwonge aber.”

²⁷Ngat kame kio piny oko waco be, “Dano kotelo yongayo ringo bala Akimas wot ka Sadoki.” Abaka oko dwoko be, “En ebedo dano aber, etie kelo rwonge aber.”

²⁸Akimas oko lelemo moto abaka di eko rieberere piny i nyime di eko waco be, “Pak Rwot Rubanga ni, ngat kame omi in abaka na ibwono jo kojemo ni.”

²⁹Abaka oko penye be, “Do awobi na Abisolom kono, etie kiber?” Akimas oko dwoko be, “Kakame Joab oora kede buti, ango ngatic ni, ako winyo jo ocelakino, do likame ako niang gi kotimere.”

³⁰Abaka oko waco ne be, “Cung kano.” En eko ot cungo kanono.

³¹Dano me Kus da oko tuno di eko waco be, “Akelo ni rwonge aber, in adwong na abaka! Rwot tin otieko laki ki cing jo kame oudo ojemo ni.”

³²Abaka oko penye be, “Do awobi na Abisolom kono, etie kiber?” En eko dwoko ne abaka be, “Koto gikame otimere i kom awobi nono otimere i kom jokwor ni, kede i kom jo dedede kame jemo ni.”

³³Kop nono oko cobo cuny abaka adikinichel. En eko yito i agola me malo me gedo me erute di eko donyo koko i kuno be, “Okwe woda Abisolom, kom woda, woda Abisolom! Koto oudo ango en ato kawangi da, Okwe Abisolom, kom woda, kom woda!”

2 Samuel 19

Joab Obunano Daudi

¹Joab oko winyo be Abaka Daudi oudo tie koko Abisolom.

²Manono oko mino kilel kame isirikalen dedede oudo tie kede pi bwono yi oko lokere negi odoko koko, pien gin kiwinyo be abaka oudo tie koko wode.

³I ceng nono isirikalen oko kwalere donyo i bomba ineno bala isirikalen kame lewic omako pien kiringo ki yi kitie kwalere dwogo.

⁴Abaka oko umo wange di eko kok kede dwane amalo be, “Okwe woda Abisolom, Okwe Abisolom, kom woda, kom woda!”

⁵Di Joab oko donyo i ot but abaka di eko waco ne be, “Tin in imio lewic omako jotie ni dedede, jo kolako kuo ni, kede kuo me awobe kede anyira ni, kede kuo me mon ni kede me mon kame ibedo kede abeda kalikame inyomo.



⁶In itie kede amara but jo kame dagi, do idagi jo kame mari. Tin in itieko nyuto kakaler be jodongo me isirikalen kede isirikalen dedede kony gi li kibuti; pien ango atieko neno be koto Abisolom oudo nan kuo di wan dedede otieko to, koto nan cunyi yom adikinicel.

⁷Aso miero nan in ioti idwok cuny jotic ni kede kope me mwolo. Alairo ni i nying Rwot be, ka likame itimo kamanono, iwor atin noni gin dedede kiyaro yai kiweki. Manono bino bedo ni can arac kalamo can dedede kame in itieko riamo kede i kuo ni tuno tin.”

⁸Abaka oko yai di eko ot bedo i nget erute me bomba. Isirikalen oko winyo be abaka oudo tie bedo kuno di gin dedede kiko ot cokere bute.

Daudi Oyai pi Dok Yerusalem

Jo me Isirael oudo oringo ngat acelacel odok ture.

⁹Jo dedede me ateker me Isirael oudo do odonyo lok di kiwaco be, “Abaka bin olako wan ki cing jokwor wa kede ki cing jo Pilistia. Aso nan en eko ringo tenge ki lobo wa pi ringo Abisolom.

¹⁰Do Abisolom ngat kame wan oudo owirunu pi pugo wa nan kotieko neko i yi. Pi mano, pinyo ngatamoro likame tamo ot dwoko abaka?”

¹¹Kop kame jo me Isirael oudo tie waco oko tuno ne abaka, omio en eko cwano kop but josaseredoti Sadoki kede Abiata be, “Wacenu joadongo me Yuda be, ‘Pinyo komio wun idongunu cen likame imitunu timo gimoro me dwoko abaka i paco mere.

¹²Wun ibedunu wade na, doko wanunu obedunu anywali me remo acel; pinyo komio wun imitunu bedo jo me ajikini me dwoko abaka?”

¹³Doko da wacenu Amasa be, ‘Benyo, mam wan obedo wade? Cako nan ango atie keti bedo ngadwong me isirikalen kawanng Joab; Rubanga cwai epie gwea ka atie ngalo.’ “

¹⁴Kop kame Daudi owaco oko wano cuny jo dedede me Yuda i kome, di gin kiko cwano ne abaka kop pi dwogo, en karacel kede jotic mege.

¹⁵Manono oko mino abaka oyai di eko cako dwogo. En eko riamo kede jo me Yuda i ecilet me Yorodan; gin oudo kibino paka Giligal pi konye ngolo ecilet.

¹⁶Simej wot ka Gera, dano me ekeko ka Benjamin kowok ki Bakurim, oko ot awakawaka kede jo me Yuda pi riamo kede Daudi.

¹⁷En oudo etie upere kede jo tutumia acel me ekeko ka Benjamin. Siba da, ngatic me jo me ot ka Saulo oko bino kede awobe mege tomon kiwie kany kede jotic ot are, gin kionyaroy di kiko geo tuno ne abaka i ecilet me Yorodan.

¹⁸Gin kiko ngolo ecilet pi omo abaka kede jo mege, kede pi timo gi dedede kame cuny abaka oudo mito.

Daudi Onyuto Kisa ne Simej



Kakame abaka oudo tie iikere kede me ngolo ecilet, Simei wot ka Gera oko riebere piny i nyime,

¹⁹di eko waco ne abaka be, “Adwong na, akwai isasiro ango kur imak i cunyi gikarac kame ango atimo i ceng kame in iyai kede ki Yerusalem. Akwai kur iket tam ni iye.

²⁰Pien ango angeo be adubo; neningo, manono en komio tin ango abedo dano me agege me ekeko ka Yosepu koyai pi bino riamo kedi, in abaka na.”

²¹Abisai wot ka Seruya oko dwoko be, “Kopoo neko Simei, piento en oudo elamo dano kame Rwot oyero pi bedo abaka.”

²²Do Daudi oko waco be, “Wun awobe ka Seruya, nyo atie mino imorunu wangu i koma, komio tin idokunu bala jokwor na? Iparunu be kopoo neko dano moro i Isirael i ceng atin? Mam ango angeo be tin ango atie abaka me Isirael?”

²³Abaka oko waco ne Simei di ekwongere be, “Likame kobino neki.”

Daudi Onyuto Kisa ne Mepiboset

²⁴Mepiboset akwar Saulo oko ot i ecilet me Yorodan pi riamo kede Daudi. En oudo eweko tiene omodo, doko da eko dagi lielo tike amoto lwoko igoen mege cako i ceng kame abaka oyai kede ki Yerusalem tuno i ceng kame en edwogo kede i mulem.

²⁵Kakame en ewok kede ki Yerusalem pi riamo kede abaka, abaka oko penye be, “Mepiboset, pinyo komio likame iko bin upere keda?”

²⁶En eko dwoko be, “Adwong na abaka, bala kame in ingeo kede, ango angwalo. Do ango oudo awaco ne ngatic na be etwei na kom me bedo ingei punda, me wek abed iye di ako wanano en koto ako upere kede abaka, do en eko gire ngala.

²⁷En ewaco kop me angalo i koma i nyimi, in adwong na abaka. Do in ical bala malaika ka Rwot, pi manono, in tim gikame ineno ber ni.

²⁸Oudo jo dedede me ot ka papa nango in ipoore neko, do in iko minango abedo ngat acel kikom jo kame camo kedi i emesa acel. Adwong na abaka, pi mano, twero nyo ace kame ango bobo atie kede me kwani gimoro ace?”

²⁹Abaka oko waco ne be, “Kara in pwodi itie meede yamo kope amaki pinyo? Ango atieko moko be in kede Siba ibinunu poko lobo ka Saulo.”

³⁰Mepiboset oko waco be, “Wek Siba tere dedede, pien gikame pire dwong kibuta en ine be, in itieko dwogo paco iko tuno kede mulem.”

Daudi Onyuto Kisa ne Basilai

³¹Barisilai dano me Gilead da oudo obino ki Rogelim, di eupere kede abaka pi ot konye ngolo ecilet me Yorodan.

³²Barisilai oudo obedo icuo oti twatwal me mwakini ot kanyauni. En oudo ebedo konyo abaka kede cam i kare kame abaka oudo tie kede Makanaim, piento en oudo ebedo i cuo kobaro twatwal.



³³Abaka oko waco ne Barisilai be, “Upere keda Yerusalem, di ango ako donyo gwoki ki kuno di itie iyapi keda.”

³⁴Do Barisilai oko dwoko ne abaka be, “Iparo be ango pwodi doko adong kede mwakini adi me kuo, mio doko aot kede abaka Yerusalem?”

³⁵Ango atie kede mwakini ot kanyauni me dongo na; likame doko tie gimoro kame pwodi yomo cunyango. Leba bobo likame twero bilo gikame acamo amoto kame amato. Dwan jo awero da likame ango atwero winyo. Nyo kara doko atera kuno ot mini peko, in adwong na abaka?

³⁶Ango abino nyamaro in kalamo ecilet me Yorodan momot. Likame ango apoore pi udo giamia moro me pwoc acal kamanono kibuti.

³⁷Akwai iyei na adoki, me wek atoi i bomba me turwa, i nget atesin ka papa na kede me ka toto na. Kimkam ngatic nango ine, wek en eupere kedi di in iko timo nen gi dedede kame in ineno be poore.”

³⁸Abaka oko dwoko be, “Kimkam bino upere keda, doko ango abino timo ne gi dedede kame in ineno be ber; doko da ango abino timo ni gi dedede kame in imito be atim ni.”

³⁹Di do Daudi kede jo mege dedede oko ngolo Yorodan. En eko moto Barisilai di enote, eko mine winyo, di Barisilai oko dok ture.

Jo me Yuda kede Jo me Isirael Obedo kede Piem

⁴⁰Jo dedede me Yuda kede dul jo me Isirael oko tero abaka paka kiko tuno Giligal. Kimkam da oupere kede.

⁴¹Di jo dedede me Isirael oko ot but abaka di kiko waco ne be, “Adwong, pinyo komio imiegu wa me Yuda omai kibut wa, di kiko keli ngolo kedi ecilet me Yorodan, karacel kede jo ni?”

⁴²Jo dedede me Yuda oko dwoko ne jo me Isirael be, “Pien wan obedo wad kiyapiyapi kede abaka. Pinyo komio kop noni tie wango cunyu? Iparunu be abaka en kobedo wilo ne wan cam? Arabo iparunu be tie giamia moro kame etieko mino wa?”

⁴³Jo me Isirael oko dwoko ne jo me Yuda be, “Wan otie kede iner tomon i kom abaka, akadi i kom Daudi da wan pwodi okato wu. Pinyo do komio itienu kede acae i kom wa? Mam wan en kame obedo jo me agege me cako poro kop me dwoko abaka wa?” Do kope kame jo me Yuda owaco oko bedo gwai kalamo kope me jo me Isirael.

2 Samuel 20

Seba Otimo tim me Jemo

¹I kanono oudo tie iye icuo moro kame ekite mege reco, kame nyinge Seba, wot ka Bikiri, en dano me ekeko ka Benjamin. En eko kuto agwara di ewaco be, “Wan oliunu kede iner moro i kom Daudi, oliunu kede gimoro amako wa kibut wot ka Yese, ngat acelacel doki i eema mere, wun jo me Isirael!”



- ²Manono oko mino jo dedede me Isirael oweko Daudi di kiko cako lubo Seba wot ka Bikiri. Do jo me Yuda oko lubo abaka gi di cuny gi omoko i kome cako ki Yorodan tuno Yerusalem.
- ³ Aso Daudi oko tuno i paco mere me abaka kame tie Yerusalem. En eko kwanyo mon mege tomon kame oudo bin ebedo kede gi abeda, kame oudo eweko daro ode, di eko keto gi i ot di eko mino isirikalen odonyo daro gi. En eko donyo gwoko gi do likame bobo eko buto kede gi. En ecego gi kuno tuno i kare me to gi; oudo gin kitie bedo i kuo acal bala me apuserun.
- ⁴Abaka oko waco ne Amasa be, “Lwong jo me Yuda cokere buta di pwodi ceng adek likame okato, do ida iko bedo tie kanoni.”
- ⁵Amasa oko ot lwongo jo me Yuda do eko gal ekalamo ceng kame abaka oudo ociko ne.
- ⁶Daudi oko waco ne Abisai be, “Seba wot ka Bikiri bino timo ne wa raco akalamo me ka Abisolom. Pi mano kwany isirikalen na ikounu wape, aso ka li, ebino ot donyo i bomba kame kocelo kede apama di eko bwot.”
- ⁷Di Joab kede jo mege, kede jo Keret, kede jo Pelet, kede isirikalen ace apat oko yai ki Yerusalem pi ot wapo Seba wot ka Bikiri.
- ⁸Kakame kituno kede i kidi adwong me Gibeon, Amasa oko riamo kede gi. Joab oudo tie ngapo igoen me sirikale di ekodo epima kame tie i akularu mere i kom rakoba kame etweo i pier. Kakame oudo etie meede ot kede anyim, epima oko poto ne piny.
- ⁹Joab oko penyo Amasa be, “Omina kuo tie teri benyo?” Di eko mako yer me tik Amasa kede cinge tetu cam pi noto leme.
- ¹⁰Do Amasa likame oko neno epima kame oudo tie i cing Joab. Aso Joab oko cobo Amasa i yie kede epima nono paka jame me yie bwote piny, di eko to. Likame bobo eko medo cobe tien me are. Di Joab kede omin mere Abisai oko meede ot anyim ot wapo Seba wot ka Bikiri.
- ¹¹Dano ka Joab acel oko cungo i nget Amasa di eko waco be, “Ngat kame tie pi Joab kede Daudi, poore elub Joab!”
- ¹²Amasa oko buto i dier gudo di epwokere kede remo. Dano ka Joab nono oko neno be jo dedede oudo tie bino di kicungo kanono, omio en eko wano kom Amasa tenge ki gudo di eko tere i poto, eko uco egoe i kome.
- ¹³Kakame otieko kwanyo kede kom Amasa tenge ki gudo, jo dedede oko lubo Joab pi ot wapo Seba wot ka Bikiri.
- ¹⁴Seba oko bebeo but jo dedede me ateker me Isirael di eko tuno i bomba me Abel Bet Maka, di jo dedede me ekeko ka Bikiri oko cokere odonyo kede i bomba.
- ¹⁵Isirikalen ka Joab oko bino di oko lukaro Seba i bomba me Abel Bet Maka. Gin kiko donyo kumemo lobo kede yugi i kor apama, di kikunyo dud apama piny pi mito rete piny.



¹⁶Di dako moro ariek oko lwongere ki bomba be, “Winyunu! Winyunu! Wacenu Joab bin kan, ango amito yamo kede.”

¹⁷Joab oko ot kuno di dako nono oko penye be, “In en Joab?” Joab oko dwoko be, “Ebo, ango inononi.” Dako nono oko waco ne be, “Winy ber kop na.” Joab oko dwoko be, “Ango atie winyo.”

¹⁸Dako nono oko waco ne be, “Jo bin maro waco be, ‘Ber kiot penyo i bomba me Abel’ ; manono bin mio gi kiporo kop di kop ko tiek kiber.

¹⁹Bomba wa ni obedo bomba kame mulem tie iye, doko egenerere i Isirael; in itie mito dudubo bomba kame tie bala toto i lobo me Isirael. Pinyo komio imito dudubo gikame obedo me ka Rwot.”

²⁰Joab oko dwoko be, “Manono likame bino timere, likame ango gira abino dudubo bomba wu!

²¹Likame etie kamanono! Do icuo me piny kobedo mori mori me Epuraimu, kame nyinge Seba wot ka Bikiri, en kobedo kede tim me jemo but Abaka Daudi; mienu i cinga, di ango ako gira yai aweko bomba noni.” Dako nono oko waco be, “Wan obino uco ne wu wie ki malo me apama.”

²²Di dako nono oko ot bebeo but jo dedede kede tam mere me rieko nono. Gin kiko ngolo wi Seba wot ka Bikiri di kiko uce ki wi apama ooko ne Joab. Joab oko kuto agwara pi kwenyaro jo mege pi yai, di jo dedede oko yai odok i miere gi. Joab oko dok Yerusalem but abaka.

Jotic ka Daudi Adongo

²³Joab en koudo telo wi isirikalen me Isirael; Benaya wot ka Yekoyada oudo telo wi isirikalen adaro Daudi;

²⁴Adoram oudo telo jo adio jo timo tic moroni tetek; Yekosapat wot ka Akilud oudo obedo ngat atelo tic me koko kope;

²⁵Seba oudo obedo kalani; Sadoki kede Abiata oudo obedo josaseredoti;

²⁶kede Ira dano me bomba me Yair oudo obedo ngat acel kikom josaseredoti ka Daudi.

2 Samuel 21

Koculo Kwor i kom Ikwaee ka Saulo

¹I kare me apugan ka Daudi, kec oko poto pi mwakini adek di lubere aluba. Daudi oko penyo Rwot pi kop nono, di Rwot oko waco ne be, “Remo me nek tie i wi Saulo kede jo me ode, piento en bin eneko jo Gibeon.”

²Abaka oko lwongo jo me Gibeon di eko yamo kede gi. (Jo Gibeon oudo likame obedo ateker me Isirael, do oudo gin kibedo donge me jo Amor mogo anonok; bed bala jo me Isirael oudo okwongere pi gwoko gi, do Saulo oko tamakino wearo gi pi mit mere adwong i kom jo me Isirael kede Yuda.)



³Daudi oko waco ne jo Gibeon be, “Imitunu be atim ne wu nyo? Epone mene en kame ango akaruno kwanyo kede dub kame oudo kotimo ne wu, me wek imiunu jo ka Rwot winyo?”

⁴Jo Gibeon oko waco be, “Kop kame tie i diere wan kede Saulo amoto kede jo me ode likame kotwero tieko kede siliba amoto kede saabu, doko da likame wan omito neko dano moro me Isirael.” Daudi oko penyo gi be, “Do nan wun iwacunu be ango atim ne wu nyo?”

⁵Gin kiko dwoko ne abaka be, “Saulo oudo oikere pi neko wa di eko tieko wa, tetekey kur ngatamoro acel kibus wa dongi i lobo lung me Isirael.

⁶Nan mi wa awobe kanyaare kobedo ikwae mege, di wan oko ot lieliero gi i nyim Rwot i Gibeon, en bomba ka Saulo, abaka kame Rwot oyeru.” Abaka oko dwoko be, “Abino mino gi i cing wu.”

⁷Do abaka oko weko akwar Saulo acel odong, en Mepiboset wot ka Jonasan, piento en oudo emio cikere but Jonasan wot ka Saulo i nying Rwot.

⁸Abaka oko kwanyo Aramoni kede Mepiboset, gin awobe ka Risipa nyar ka Aya, kame oudo enywalo kede Saulo; kede awobe kany ka Merab nyar ka Saulo, kame oudo enywalo kede icuo anyinge Adiriel wot ka Barisilai dano me Mekola.

⁹Daudi oko mino gi i cing jo Gibeon, di gin kiko liero gi i nyim Rwot i wi moru. Gin jo kanyaare kiko to wange acel. Koneko gi i kare kame jo geo kede kac, i kare me cako nyaro mawe.

¹⁰Di Risipa nyar ka Aya oko kwanyo epuko di eko tagalo kede kima mere i wi moru kakame koneko gi iye. En eko donyo bedo kuno cako i kare me kac tuno i kare kame kot opoto kede i kom liele nogo. I ceng en oudo tic mere riamo winy tenge kame mito camo kom liele nogo, doko iwor da en oudo egwoko gi kikom leini me obar kame mito camo gi.

¹¹Kakame kowaco ne kede Daudi gikame Risipa nyar ka Aya otimo, en dako ka Saulo kame oudo ebedo kede abeda,

¹²Daudi oko ot omo cogere ka Saulo kede me ka wode Jonasan kibus jo me Jabes i adul me Gilead. Jo nogo oudo okwalo gi ki kacokere adwong me Bet San, en kakame jo me Pilistia oudo oliero gi iye malo i ceng kame jo me Pilistia oneko kede Saulo i wi moru me Gilboa.

¹³Daudi oko kelo cogere ka Saulo kede me ka wode Jonasan, di eko coko cogere me jo kanyaare kame oudo koliero malo da.

¹⁴Gin kiko yiko cogere ka Saulo kede me ka wode Jonasan i ates ka Kis papa me Saulo, i bomba me Sela i adul me lobo ka Benjamin; gin kitimo gi dedede kame abaka owaco negi. Ingei manono Rubanga oko winyo kwac gi pi lobo gi.

Yi kede Itucio me Jo me Pilistia

(1 lyutun 20.4-8)



¹⁵Yi bobo oko poto i dierediere me jo me Pilistia kede jo me Isirael, di Daudi oko upere kede isirikalen mege eoto i yi nono. Gin kiko bungo yi kede jo me Pilistia omio Daudi oko ool twatwal.

¹⁶Isbibenob, ngat koudo obedo akwar me itucio me jo, kame oudo tie mako tong me nyonyo buronsi kame lebe wao bala kilo adek kede dul, di oudo etie ngapo epima anyen, oko paro be oudo etwero neko Daudi.

¹⁷Do Abisai wot ka Seruya oko ot konyo Daudi, eko yi kede icuo nono paka neke. Di do isirikalen ka Daudi oko kwongere ne be, “In likame bobo ibino meede ot kede wan i yi, pien likame wan omito be in ngat kame nataman itie bala etala me Isirael itoi.”

¹⁸Ingei manono, yi ace bobo oko poto kede jo me Pilistia kakame kolwongo be Gob. Di Sibekai dano me Kusa oko neko Sap ngat koudo obedo akwar me itucio me jo.

¹⁹Yi ace bobo oko poto kede jo me Pilistia i kabedo kame kolwongo be Gob, di Elikanan wot ka Yair dano me Betelem oko neko Goliat dano me Gat. Tir me tong mere oudo dwong bala yat kame jo kudo me kuno ausin me egoe.

²⁰Yi ace bobo oko poto Gat, kame oudo tie iye dano adwong dwong me aura, kame cinge acelacel oudo tie kede anyira lwete kanyape, kede tiene acelacel da oudo tie kede anyira lwete me tiene kanyape, manono omio lwete dedede oudo tie ot are kiwie ongwon.

²¹Lonono oko donyo nywaro jo me Isirael, di Jonasan, wot ka omin me Daudi kame nyinge Simeï, oko neke.

²²Jo ongwon nogi oudo obedo anywali me itucio me jo me Gat; Daudi kede jo mege oko neko gin dedede.

2 Samuel 22

Wer ka Daudi me Bwono Jokwor

(Sabuli 18)

¹Man en wer kame Daudi owero ne Rwot i ceng kame Rwot olake kede ki cing jokwor mege dedede kede ki cing Saulo.

²En ewaco be: Rwot en lela na, en apama atek kame gwoka, doko en ngalak na,

³en ebedo Rubanga na, lela na kame ango aringo ot gwokere iye. En ebedo ebuku na, doko en ngateko kame laka, en ebedo kateko kede karingo na. En ngalak na, en elaka ki tim me gero.

⁴Ango alwongere but Rwot ngat kame poore apaka, di eko laka ki cing jokwor na.

⁵Bwoi me to oudo oluka, ebuka kame neko oudo iyapi mwonya.

⁶Oudo amoko i bwoi me kabedo me jo oto, oudo ariamo kede owic me to.

⁷I can na ako lwongere but Rwot; akok but Rubanga na pi konya. En eko winyo dwana i tempulo mere, di koko na oko tuno i yite.



- ⁸Di do piny oko yangere, eko tagere; di do dud ipirin kame malo cungo iye oko yangere di tagere, pien Rubanga oudo olilo.
- ⁹Yiro di oko bwote ki ume, mac ager kede itonge kobokere bubu oko liel ki doge.
- ¹⁰En eko yabo edou di eko bino piny; edou acol cucucuc oudo tie i dud tiene.
- ¹¹En eko bedo ingei cerubim di eko por; eko neeno di yamo tie kute ringini kede.
- ¹²En oudo eburere kede colpiny, edou apek di col kame pii opong iye oudo oluke,
- ¹³itonge me mac oko wokun ki lero kame oudo tie i nyime.
- ¹⁴Rwot oko yamo ki malo bala mwoc me kot, di dwan Ngamalo Twal oko winyere.
- ¹⁵En di eko gweno imalia mege eko sasaro jokwor mege; ecaro gi kede amenyumenyun me kot di eko mino gi kiringo.
- ¹⁶Wen pii me nam oko neno, di acakini me lobo oko dong kakaler, kakame Rwot odorano kede gero, kakame wei kame wok ki ume omwoc kede.
- ¹⁷Rwot oko cwano cinge ki malo di eko maka; en eko wota ki pii atat.
- ¹⁸Bin elaka ki cing ngakwor na atek; elaka kibut jo kame oudo daga; pien gin oudo kitek kibwona.
- ¹⁹I kare kame angoo oudo atie kede i peko, gin kiko sura, do Rwot oko konya.
- ²⁰En ekonya ki peko kame oudo odia; en elaka pien cunye oudo yom i koma.
- ²¹Rwot oko timo na bero di lubere kede poore na; en eko mina winyo pien angoo ali kede raco moro.
- ²²Pien angoo abedo lubo iswilia ka Rwot, doko likame ayai tenge kibut Rubanga na.
- ²³Pien iswilia mege dedede oudo tie i nyima, doko likame angoo adagi timo gikame en oudo eciko.
- ²⁴Angoo oudo ali kede raco moro i nyime, oudo angoo agwokere likame atimo raco moro.
- ²⁵Pi mano, Rwot otieko timo nango bero di lubere kede poore na, pientoo en enena ali kede raco moro i nyime.
- ²⁶Rwot in igenere but jo ageni; but jo kame li kede raco moro in ili kede raco moro but gi.
- ²⁷But jo kame cuny gi cil, in itimo negi bero, do but jo kame ngolo rieko, in inyuto negi rieko nin.
- ²⁸In ilako jo kame mwolere, do idwoko piny jo kame tingere.
- ²⁹Rwot, in en kame imiangoo lero, Rwot menyoo nango colo kame atie iye.



- 30 Pien in itie keda, ango akaruno suro jokwor na, doko pien Rubanga na tie keda, ango akaruno somo malo kalamo apama kame koluko kede bomba.
- 31 Rubanga noni yongayo mere tie kakare, cikere kame Rwot mio genere; en ecal bala ebuku ne jo dedede kame ringo ot gwokere bute.
- 32 Pien ngai en kobedo Rubanga kwanyo Rwot? Doko ngai en kame cal bala lela, kwanyo Rubanga wa?
- 33 En Rubanga kame miango teko, doko emio yongayo kame ango alubo bedo ber.
- 34 En emiango abedo dwir bala amiem, doko emia abedo malo kakabor di likame peko moro ko tuno i koma.
- 35 En epwonya epone me yi, tetekeny akaruno kudo tir me emal kame otimo kede nyonyo buronsi.
- 36 In itieko mina ebuku nin kame lako kuo na, kony kame imia otieko mina abedo dano kame pire dwong.
- 37 In imia alabo tiena lab, doko tiena likame oko cer.
- 38 Awapo jokwor na di ako neko gi; likame ako dok cen tuno di oudo atieko neko gi.
- 39 Ajujuto gi arereto gi piny di likame kiko karuno yai; gin kipopoto katiena.
- 40 Pien in en kame imiango teko me yi; in imia abwono jo kame oudo osura.
- 41 In imio jokwor na omuko ringo ki nyima; aneko jo kame oudo daga.
- 42 Gin kiko mono kony, do likame tie ngatamoro kame oko konyo gi; kikok but Rwot do likame eko gamo koko gi.
- 43 Ango apudao gi di kiko doko bala apua, anyonyono gi bala cwoto me yongayo.
- 44 In itieko laka ki lok me jo, iketa pugo atekerin; jo kame oudo ango akwia oko doko jotie na.
- 45 Jokumbor obino di kiko riebere piny i nyima; cucuto di gin kiwinyo kop i koma, gin kiko mina wor.
- 46 Jokumbor cuny gi oko kwanyere, di kiko wokun ki kateko gi kede mielkom.
- 47 Rwot kuo! Pak bed but lela na, tingunu malo nying Rwot ngalak nango.
- 48 En Rubanga kame culo kwor nango; eketo jo me atekerin apat i twer nango.
- 49 En elaka ki cing jokwor na; Rwot in itinga malo kalamo jokwor na; in ilaka ki cing jogero.
- 50 Pi manoni, Okwe Rwot, ango abino paki i diere me atekerin, abino wero wer me paki.



⁵¹Rubanga mio abaka mere loo kitek, en enyuto amara kalikame lokere but ngat kame en eyero, enyuto but Daudi kede ikwae mege ikar kede ikar.

2 Samuel 23

Kope ka Daudi me Ajikini

¹Daudi wot ka Yese oudo obedo icuo kame Rubanga omio dwongo, ngat kame Rubanga ka Yakobo oyero pi bedo abaka, ngatet were amit i Isirael. Magi en kope mege me ajikini:

²Tipo ka Rwot yamo kibuta, kop mere tie i leba.

³Rubanga me Isirael otieko yamo; ngat kame obedo Lela me Isirael owaco na be, “Abaka kame pugo jo mege i yore aber, kame pugo di etie kede wor i kom Rubanga,

⁴en ecal bala lero me piny aru, ecal bala ceng kame wok odiko di piny wiliwil, ecal bala ceng kame mio lum meny kame kot ocwei.”

⁵Manono en gikame Rubanga bino timo ne oda, piento en etieko timo isikan kame bedo nakanaka keda, cikere atie odocon kalikame kobino turo. Rubanga bino mino manoni timere, en ebino konya; manoni en gikame cunya mito.

⁶Do jo kalikame paro pi Rubanga cal bala okuto kame kouco; pien likame tie dano kame twero kwanyo gi kede cinge.

⁷Pi kwanyo gi miero iti kede lilim abor arabo tir me tong; gin kobino wango gi i mac dopodop.

Isirikalen ka Daudi Atek Yi

(1 lyutun 11.10-41)

⁸Magi en nying isirikalen kame Daudi oudo tie kede: Yoseb Basebet dano me Takemon; en oudo ebedo ngatet me “Jo Adek” ; en bin eyi kede tong mere di eko neko jo tol kanyauni (800) i yi acel.

⁹Ngat kame oudo lube kikom jo yi adek nogo oudo obedo Eleasar wot ka Dodo, wot ka Akoki. Ceng moro acel en kede Daudi kicungo wi jo me Pilistia kame oudo ocokere pi yi. Jo apat me Isirael olokere odok cen,

¹⁰do en eko guro di eko yi kede jo me Pilistia paka cinge oko sokoko likame bobo etwero gweno emal, bed bala cinge oudo olido emal. I ceng nono Rwot oko mino kobwono jo me Pilistia adikinicel. Di do jo me Isirael oko dok kakame Eleasar oudo tie iye di kiko donyo tako jame me yi ki kom jo kame koneko.

¹¹Dano me adek mere en oudo Sama wot ka Age, dano me Karar. Jo me Pilistia oudo bin ocokere Leki kakame pototo me ngor oudo tie iye, di isirikalen me Isirael oko ringo jo me Pilistia.

¹²Do Sama oko cungo i dier pototo di eko yi pi riamo jo kiye, di eko neko jo me Pilistia. Rwot oko mine ebwono jo me Pilistia atwal atwala.



- 13**Di bin kare me kac oyapuno tuno, jo adek kikom ijakai “Ot Adek” oko yai pi ot but Daudi i abo me Adulam, di ekodet me jo me Pilistia oudo ogero kimere gi i aditot me Repaim.
- 14**Daudi oudo tie kagwokere mere atek, do isirikalen me Pilistia oudo tie Betelem.
- 15**Daudi oudo tie kede imue adwong i cunye, omio eko waco be, “Okwe koto ngatamoro okelo na pii me amata ki atan kame tie i nget erute me Betelem!”
- 16**Di jo yi adek nogo oko belo ki kimere me isirikalen me Pilistia, kiko ot twomo pii ki atan kame oudo tie i nget erute me Betelem, di kiko tero ne Daudi. Do Daudi likame oko mato pii nono da, do en eko onye piny bala giamia but Rwot.
- 17**Piento en ewaco be, “Rwot likame yei nango mato pii noni! Pien erom aroma bala mato remo me cuo koudo ojalo kuo gi nogi.” En eko dagi mato pii nono. Jo yi adek nogo otimo gi nogi.
- 18**Abisai wot ka Seruya, omin me Joab, oudo obedo ngadwong me “Jo Ot Adek” . En eyi kede jo tol adek kede tong mere di eko neko gi, di nyinge oko doko iruo kikom “Jo Ot Adek” .
- 19**En eko doko dano angere kalamo kikom “Jo Ot Adek” di eko doko ngatel gi, do oudo likame engere twatwal bala “Jo Adek” .
- 20**Benaya wot ka Yekoyada dano me Kabusel oudo obedo ngayi kame nyinge ngere; en etimo gikame dongodongo. En eneko awobe are ka Ariel me Moab. I ceng moro da bin eoto di eko neko engu i bur, i ceng kame akako ocwei kede.
- 21**Doko da eneko dano me Misiri, icuo acil adikinicel. Icuo nono oudo tie kede tong i cinge, do Benaya oko mako ebela eko ot yi kede. En eko wariso tong ki cing icuo me Misiri nono, di eko lokere neke kede tong mere nono.
- 22**Magonogi en gikame Benaya wot ka Yekoyada otimo, eda ngat acel kikom “Jo Ot Adek” .
- 23**Eda oudo engere twatwal i diere gi, do likame oudo nyinge iruo bala Jo Adek. Daudi oko mine ebedo ngadwong me isirikalen adare.
- 24**Kikom “Jo Ot Adek” oudo tie iye Asakel omin me Joab; Elikanan wot ka Dodo me Betelem;
- 25**Sama me Karod; Elika me Karod;
- 26**Keles me Pelet; Ira wot ka Ikes me Tekoa;
- 27**Abieser me Anatot; Mebunai me Kusa;
- 28**Salmon me Ako; Makarai me Netopa;
- 29**Keleb wot ka Bana me Netopa; Itai wot ka Ribai me Gibeia i lobo ka jo Benjamin;
- 30**Benaya me Piraton; Kidai me aditot kame tie i nget Gas;



- ³¹Abialbon me Araba; Asimabet me Bakurim;
- ³²Eliaba me Salabon; awobe ka Yasen, Jonasan wot ka
- ³³Sama me Karar; Akiam wot ka Sarar me Karar;
- ³⁴Elipelet wot ka Akasabai me Maca; Eliam wot ka Akitopel me Gilo;
- ³⁵Kesiro me Kamel; Parai me Araba;
- ³⁶Igal wot ka Natan me Soba; Bani me Gad;
- ³⁷Selek me Amon; Nakarai me Berot, en ngat koudo mako jamini me yi ka Joab wot ka Seruya;
- ³⁸Ira kede Gareb jo me Yatir;
- ³⁹Uria Ngakiti. Gin dedede oudo kitie isirikalen ot adek kiwie kanyaare kame nying gi iruo.

2 Samuel 24

Daudi Omaro Wel me Jo

(1 lyutun 21.1-27)

- ¹Cuny Rwot bobo oko wang kede jo me Isirael, di eko supo Daudi i kom gi di ewaco be, “Oti imar wel me jo me Isirael kede me Yuda.”
- ²Aso abaka oko waco ne Joab kede jodongo apat me isirikalen kame oudo tie kede be, “Otunu ibebeunu but jo me atekerin dedede me Isirael, cako ki Dan tuno Beereseba, di imarunu wel me jo, tetekeny ango abin angei wel me jo atie.”
- ³Do Joab oko waco be, “Adwong, akwao Rwot Rubanga ni emi wel me jo ni me Isirael meede tien tol acel kalamo rom gi nan, di eko mini inen manono kede wangi di pwodi ikuo. Adwong, do pinyo komio in itie mito maro jo?”
- ⁴Do abaka oko dino Joab kede jodongo mege me isirikalen pi timo gikame en emitto. Aso Joab kede jodongo mege me isirikalen oko yai ki wang abaka di kiko ot maro wel me jo me Isirael.
- ⁵Gin kiko ngolo ecilet me Yorodan, di kiko cako tic i Aroer kede ki bomba kame tie i dier aditot, di kiko dok tetu Gad kato tetu Yaser.
- ⁶Di do kiko tuno Gilead kede Kades i lobo me jo Kiti; di kiko tuno Dan, kiko yai ki Dan di kiko manaro tuno Sidon.
- ⁷Di do kiko dok tetu piny, tuno i bomba me Taya kame koluko kede apama, di kiko kato paka i bomban me jo Kibi kede jo Kanan, di do me ajikini kiko ot Negeb, bomba kame tie Beereseba tetu piny me Yuda.
- ⁸Aso ingei mamano lobo nono lung pi dwete kanyangon kede ceng ot are, gin kiko dok Yerusalem.



⁹Joab oko ot waco ne abaka wel me jo kame kimaro. I lobo me Isirael oudo tie iye cuo tutumia tol kanyauni (800,000) kame twero yi, do i Yuda oudo tie iye cuo tutumia tol kany (500,000) kame twero yi.

¹⁰Do ingei Daudi tieko maro jo, cunye oko cako poto, di eko waco ne Rwot be, “Atieko timo dub adwong twatwal pi maro wel me jo! Do nan akwai, Okwe Rwot, sasiro ango, pien atimo tim me mingo.”

¹¹⁻¹²Rwot oko waco ne Gad, en enabi ka Daudi be, “Oti iwace Daudi be ango atie mine kope adek me ayera. En eyer kop acel di ango ako bino timo ne gi nono.” Odiko di Daudi ocei,

¹³Gad oko ot bute di oko waco ne gikame Rwot owaco; Gad oko penye be, “In iyero mene kikom magi: mwakini adek me kec, arabo dwete adek me ringo tenge kibut jokwor ni, amoto ceng adek me aumpuli i lobo kame in ipugo? Nan in kong par kope go di iko mina kop kame abino dwoko ne ngat oora.”

¹⁴Daudi oko waco ne Gad be, “Ango nan atie i lieto! Do likame amito be dano en kame mia alola, do poore Rwot en kame mia alola, piento en etie kede cuny me kisa.”

¹⁵Aso Rwot oko cwano aumpuli i lobo me Isirael cako odiko nono tuni i ceng kame oudo en eciko. Jo tutumia ot kanyaare (70,000) oko to cako ki Dan tuno Beereseba.

¹⁶Do kakame malaika oudo mito cako timo kede nek i Yerusalem, Rwot oko loko tam mere me mino jo alola, di eko waco ne malaika kame oudo tie neko jo be, “Mano do romo; wek do.” Malaika oudo do tie i nget laru me canyo ka Arauna dano me Yebu.

¹⁷Kakame Daudi oneno kede malaika kame oudo tie neko jo, en eko waco ne Rwot be, “Ango kena en kame adubo, ango kena en kame atimo gikarac; do jogo kame cal acala bala romini na, gin kitimo nyo? Ango atie kwani be, ango en kame ipoore mina alola kede jo me oda.”

¹⁸I ceng acel nono Gad oko ot but Daudi di eko waco ne be, “Oti malo kuca iko gero ne Rwot alutari i diakal me canyo ka Arauna dano me Yebu.”

¹⁹Daudi oko yei winyo dwan Rwot di eko ot bala kame Gad oudo owaco ne.

²⁰Arauna oko ngoloro piny di eko neno abaka kede jotic mege di kitie ot malo tetu bute; en eko ot siramo gi di eko riebere piny i nyim abaka,

²¹di eko penye be, “Adwong, pinyo komio ibino buta.” Daudi oko dwoko be, “Abino pi wilo diakal me canyo kibuti di ako gero iye alutari ne Rwot, tetekeny aumpuli jiki.”

²²Arauna oko dwoko be, “Adwong na, in tere di iko yalo gikame cunyi mito. Twonin da ige me giayala awanga, doko ikongio me canyo kede ayokoi me twonin da ige me moko mac.”

²³Arauna omio magonogi dedede but abaka di eko waco ne be, “Akwao Rwot Rubanga ni egami kede yomcuny.”



²⁴Do abaka oko waco ne Arauna be, “Likame kamano, do ango abino wilo gi kibuti awila; ango likame abino mino giayala awanga kalikame aculo iye gimoro but Rwot Rubanga na.” Aso Daudi oko wilo diakal me canyo kede twonin pi sente akaya ot kany me siliba.

²⁵Daudi oko gero ne Rwot alutari kuno, di eko mino giayala awanga kede giayala me nywak. Rwot oko gamo kwac mere pi lobo me Isirael di aumpuli kame oudo tie kuno oko jik.



1 Abakai

1 Abakai 1

Abaka Daudi i kare me Tio mere

¹Abaka Daudi oudo oti do twatwal, doko akadi oudo koume kede igoen, likame oudo ewinyo lieto moro.

²Aso, jotic mege oko waco ne be, “Adwong abaka, wek wan omoi atin nyako moro kalikame pwodi ongeo icuo di en eko donyo bedo kedi di egwoki. En ebino buto i ngeti di eobo komi.”

³Gin kiko donyo mono adul me Isirael dedede pi mito udo nyako acil; kiko udo Abisagi dano me Sunem, di kiko kele but abaka.

⁴Nyako nono oudo cil twatwal. En bin eko donyo gwoko abaka di etimo ne tice, do abaka likame oko loke edoko dako mere.

Adoniya Otingere kene Bedo Abaka

⁵Aso, Adoniya wot ka Daudi kame enywalo kede Kagit oko tingere kene di ewaco be, “Ango abino bedo abaka” ; en bin eko iiko pire cabalan kede jo kame ringo kede asigiran, kede cuo ot kany kame telo ne yongayo.

⁶Papa mere oudo likame ocoke pi kop moro cako dongo mere. En bobo da oudo ebedo icuo acil twatwal, doko en kame oudo onywale elubo Abisolom.

⁷En bin eko winyere kede Joab wot ka Seruya, karacel kede Abiata ngasaseredoti di gin kiko yei gange.

⁸Do Sadoki ngasaseredoti, kede Benaya wot ka Yekoyada, kede enabi Natan, Simej, Rei, kede isirikalen kame bin daro Daudi oko dagi gango Adoniya.

⁹Ceng moro acel Adoniya oko mino giayala angola me romini, twonin, kede doke kocwe i wi lela me Sokelet, kame bin tie i nget atan me Enerogel. En bin eko lwongo imiegu mege dedede, awobe ka abaka, kede ijakai me Yuda dedede,

¹⁰do en likame eko lwongo omin mere Sulumani arabo enabi Natan amoto Benaya akadi isirikalen kame bin daro abaka.

¹¹Di do Natan oko penyo Bateseba, toto me Sulumani be, “Benyo, in likame iwinyo be Adoniya wot ka Kagit otieko doko abaka do di likame adwong wa abaka Daudi ngeog gimoro iye?”

¹²Aso, nataman in bia, wek angoo amii tam, tetekeny itwer lako kuo ni kede me ka wodi Sulumani.

¹³Ot in awakawaka but Abaka Daudi, di iko waco ne be, ‘Adwong na abaka, benyo, likame in oudo ikwongere but ngatic ni di iwaco be wodi Sulumani en kame bino lunyo wangi bala abaka? Pinyo bo komio Adoniya nataman odoko abaka?’



- 14**Di do pwodi in itie kunono yamo kede Abaka, ango da abino donyo but wu kunono di ako moko kop kame in iwaco.”
- 15**Aso, Bateseba oko ot but abaka i agola mere me buto. Abaka oudo oti twatwal; Abisagi dako me Sunem oudo tie gwoke.
- 16**Bateseba oko kudo wie piny di eko mino wor but abaka, di abaka oko penye be, “Nyo kame cunyi tie mito?”
- 17**Bateseba oko gamo be, “Adwong na, in oudo ikwongere but ngatic ni i nying Rwot Rubanga ni di iwaco be wodi Sulumani bino lunyo wangi bala abaka.
- 18**Do nataman ajoto Adoniya otieko doko abaka, bed bala in adwong na likame ingeo gimoro iye.
- 19**En etieko mino giayala angola atot me twonin, doke kocwe, kede romini, di eko lwongo awobe ni dedede, ngasaseredoti Abiata, kede Joab ngatel me isirikalen, do Sulumani ngatic ni en likame elwongo.
- 20**Do in adwong na abaka, jo dedede me Isirael tie neni pi waco negi ngai en kame bino lunyo wangi bala abaka.
- 21**Ka in likame itimo kamanono, oyotoyot ingei in adwong na abaka to di iko ot wei kede joakwari ni, ango kede woda Sulumani kobino tero wa bala jokolo.”
- 22**Di pwodi oudo en etie yamo kede abaka, enabi Natan di tuno.
- 23**Bin oko waco ne abaka be enabi Natan oudo tie kunono. Kakame en eko donyo kede but abaka, en eko mino abaka wor di ekudo wie piny.
- 24**Natan oko waco be, “Adwong na abaka, benyo, in itieko waco be Adoniya en kame bino lunyo wangi bala abaka?”
- 25**Pien tin en etieko ot di eko mino giayala atot me twonin, doke kocwe, kede romini, doko etieko lwongo awobe nin dedede, Joab ngatel me isirikalen kede ngasaseredoti Abiata. Gin nataman kitie cam kede amata kede en, di kiwaco be, ‘Abaka Adoniya bed kuo pi kare kalac! ‘
- 26**Do en likame eko lwonga, ango ngatic ni, kede ngasaseredoti Sadoki, arabo Benaya amoto ngatic ni Sulumani.
- 27**Benyo, in adwong na abaka en kame itimo gi noni di likame iko mino ngatic ni onge ngat kame bino lunyo wangi?”
- 28**Abaka Daudi oko waco be, “Lwong Bateseba buta kan.” Bateseba oko bino but abaka di eko cungo i nyime.
- 29**Abaka oko kwongere di ewaco be, “Akwongere i nying Rwot kakuo, en ngat kame etieko lako kuo na ki peko dedede,
- 30**bala kame oudo akwongere kede buti i nying Rwot, Rubanga me Isirael be wodi Sulumani bino lunyo wanga bala abaka, tin ango do acobo kwongere nono.”



- 31**Bateseba oko luro wie piny di eko mino abaka wor, di eko waco be, “Ango akwao be adwong na Abaka Daudi bed kuo nakanaka!”
- 32**Abaka Daudi oko waco be, “Lwongunu na ngasaseredoti Sadoki, enabi Natan, kede Benaya wot ka Yekoyada.” Kakame gin kiko bino kede but abaka,
- 33**en eko waco negi be, “Otunu kede jotic na, di ikounu mino woda Sulumani wanano asigira nango amaka, di ikounu tere i atan me Gikon.
- 34**Kame itununu kunono, ngasaseredoti Sadoki kede enabi Natan bino wiwo Sulumani pi bedo abaka me Isirael. Di do ikounu kuto agwara, di jo dedede ko lelemo be, ‘Abaka Sulumani bed kuo pi kare kalac! ‘
- 35**Wun ibinunu dwogo di ilubenu di en eko bino bedo i wi kom na me ajakanut. En ebino bedo abaka kame lunyo wanga, pien ango atieko yere pi bedo ngapug me Isirael kede Yuda.”
- 36**Benaya wot ka Yekoyada oko gamo dog abaka be, “Amen! Ango akwao Rwot, Rubanga ka adwong na abaka emie ebed kamanono.
- 37**Bala kame Rwot obedo tie kede in adwong na abaka, kamanono da akwae ebed kede Sulumani, di eko mino apugan mere kalamo meri.”
- 38**Aso, ngasaseredoti Sadoki, enabi Natan, kede Benaya wot ka Yekoyada, kede jo Keret kede jo Pelet, oko mino Sulumani owanano asigira ka Daudi, di gin kiko tere i atan me Gikon.
- 39**Kakame gin kituno kede kunono, ngasaseredoti Sadoki oko kwanyo tung le kame oudo mo me olibeti tie iye, mo kame en oudo ekwanyo ki Eema ka Rwot, di en eko wiwo kede Sulumani. Di do oko kuto agwara, di jo dedede oko lelemo be, “Abaka Sulumani bed kuo pi kare kalac!”
- 40**Di jo dedede oko dok di kilube, di kikuto bilo atot di kidwong kede kilel. Woo me dwan gi oko mino piny oyangere.
- 41**Adoniya kede wele mege dedede oudo tie do tieko camo ebagu, di gin kiko winyo woo me dwan jo. Kakame Joab owinyo kede koko me agwara, en eko penyere be, “Pinyo komio woo tie i bomba?”
- 42**Di pwodi oudo en etie yamo, Jonasan wot ka ngasaseredoti Abiata di tuno. Adoniya oko waco ne be, “Donyi i ot, pien in dano aber doko ateteni in itie kelo rwonge aber.”
- 43**Jonasan oko gamo dog Adoniya be, “Li gire, pien adwong wa Abaka Daudi otieko keto Sulumani pi bedo abaka.
- 44**Abaka otieko mino ngasaseredoti Sadoki, enabi Natan, kede Benaya wot ka Yekoyada, karacel kede jo Keret kede jo Pelet onyamaro en i atan me Gikon. Gin kimie ewanano asigira ka abaka,



⁴⁵di Sadoki kede Natan oko wire pi bedo abaka. Di do gin kiko yai dwogo kikuno kede kilel adwong. Manono en komio woo nataman tie i bomba. Woo kame iwinyunu nono obedo mergi.

⁴⁶Sulumani do nataman bedo i wi kom me abaka.

⁴⁷Medo i wi manono, jotic me abaka oko ot pwono adwong wa Abaka Daudi di kiwaco be, ‘Okwao Rubanga emi nying Sulumani bed iruo kalamo meri, doko emi apugan mere kalamo meri.’ Di Abaka Daudi oko luro wie piny i wi itanda mere pi woro Rubanga

⁴⁸di eko lego be, ‘Pak bed but Rwot, Rubanga me Isirael, en ngat kame tin emio atina acel kikom idwe na obedo i wi kom na me ajakanut, doko emio ada abedo kuo di ako neno manoni kede wanga.’ “

⁴⁹Di do wele ka Adoniya oko tengere yai kede mielkom di kiko sarakin.

⁵⁰Adoniya, pi lworu Sulumani, oko yai di eko ot mako iswongen me alutari.

⁵¹Sulumani bin oko winyo be Adoniya oudo tie lwore, kede be oudo etie mako iswongen me alutari di ewaco be, “Mito kong Abaka Sulumani kwongere buta be en likame ebino neka.”

⁵²Sulumani oko dwoko be, “Ka en enyuto be en dano aber, akadi yer wie acel likame kobino mulo; do ka en etie kede cuny arac, ebino to.”

⁵³Abaka Sulumani oko cwano dano omo Adoniya ki alutari kunono. Adoniya oko bino di eko mino Abaka Sulumani wor, di abaka oko waco ne be, “In ot paco ni.”

1 Abakai 2

Kope ka Daudi me Ajikini but Sulumani

¹Kakame Daudi oudo oyapuno to kede, en eko ciko wode Sulumani di ewaco ne be,

²” Ango ayapuno to. Bed tek, doko bed kede nwangcuny,

³di iko timo gikame Rwot Rubanga ni ciko ni. Lub yote mege di igwoko iswilia mege, cik mege, pwony mege kede gikame en emito, bala kame kowandiko kede i iswil ka Musa, tetekeny gi dedede kame in itimo bed ni kiber i kabedere dedede.

⁴Di do Rwot ko bino mino kop mere cobere, kop kame bin en ewaco i koma be, ‘Ka jo kame lunyo wangi ogwoko yote me kuo gi, di gin kiko bedo jo kame genere i nyima kede cuny gi dedede kede kuo gi dedede, likame in ibino bedo abongo ngat kame lunyo wangi bala abaka me Isirael.’

⁵ “Bobo da in ingeo gikame Joab wot ka Seruya otimo nango, epone kame en eneko kede jotel are me isirikalen me Isirael, Abuneri wot ka Ner, kede Amasa wot ka Yeter. In iyutuno kite kame en elokere neko gi kede i kare me anapakin, pi nyango remo kame oudo oonyo i kare me yi. Gikame en etimo nono otieko mino raco me onyo remo tie i wie.



⁶Pi mano, in ti kede rieko ni, do kur iweke ebed tuno ti di eko to i mulem.

⁷ “Do tim mwolo but awobe ka Barisilai dano me Gilead, di iko mino gi kibed i kom jo kame camo i wi emesa nin; pien gin bin kitimo nango mwolo i kare kame kiriamo keda di atie ringo tenge kibut omini Abisolom.

⁸ “Ngat acel da bobo tie, en Simei wot ka Gera, dano kame yai i bomba me Bakurim i adul me jo Benjamin. En bin elama kirac twatwal i ceng kame ango oudo aoto kede Makanaim, do kakame en eko bino kede pi riamo keda i ecilet me Yorodan, ango ako kwongere bute i nying Rwot be likame abino neke.

⁹Pi mano, kur iweke be eli kede raco moro. In dano ariek; in ibino ngeno gikame itimo ne di iko neke edony kede wie atar lwar nono kabedo me jo oto.”

To ka Daudi

¹⁰Di do Daudi oko to di oko yike i Bomba ka Daudi.

¹¹ Daudi oudo opugo jo me Isirael pi mwakini ot ongwon. Epugo ki bomba me Keburon pi mwakini kanyaare, kede i Yerusalem pi mwakini ot adek kiwie adek.

¹²Sulumani bin oko lunyo wang papa mere Daudi bala abaka, di ajakanut mere oko sipakin di eko doko tek.

To ka Adoniya

¹³Di do Adoniya wot ka Kagit oko ot but Bateseba toto me Sulumani. Di Bateseba oko penye be, “Bino ni noni me mulem arabo benyo?” En eko gamo be, “Me mulem.”

¹⁴Di eko medo be, “Ango akwai iyei na yamo kedi.” Bateseba oko gamo be, “Waca kop nono.”

¹⁵En eko waco be, “In ingeo be ajakanut oudo mera, doko jo dedede me Isirael oudo ngeo kamanono. Do nataman ajakanut otieko lokere di eko doko me ka omina, pien manono oudo en mit ka Rwot.

¹⁶Aso, nataman ango atie kede kwac acel buti; akwai kur idagi na.” Bateseba oko waco ne be, “Waca kwac ni nono.”

¹⁷ En eko waco be, “Ango akwai ipeny na Abaka Sulumani wek emia Abisagi dako me Sunem bala dako na, ango angeo be likame en ebino dagi nin.”

¹⁸Bateseba oko waco be, “Manono ber, ango abino yamo kede abaka piri.”

¹⁹Aso, Bateseba oko ot but abaka Sulumani pi yamo kede pir Adoniya. Abaka oko yai malo pi ot riamo kede, di abaka oko kudo wie piny pi mine wor. Di do eko dok bedo i kom mere me ajakanut, di eko mino kokelo ne toto mere da kom ace me ajakanut, di toto mere oko bedo i bade tetu cam.

²⁰Bateseba oko waco be, “Ango atie kede kwac atitidi buti; akwai kur idagi na.” Di abaka oko waco ne be, “Toto, wac gikame itie kwano nono, pien ango likame abino dagi ni.”



- ²¹En eko waco be, “Wek komi omini Adoniya Abisagi bala dako mere.”
- ²²Abaka Sulumani oko gamo dog toto mere be, “Pinyo komio in ikwao be ango ami Adoniya Abisagi? Kwai ne kiton ajakanut da do, me wek amie! Bobo da en ebedo omina adwong; kur ikwai pire kenekene, kwai da pi ngasaseredoti Abiata kede pi Joab wot ka Seruya!”
- ²³Di do Abaka Sulumani oko kwongere i nying Rwot be, “Akwao Rubanga emia alola atek ka ango likame aneko Adoniya pi kwac mere noni!
- ²⁴Pi mano, ango nan akwongere i nying Rwot kakuo, en ngat kame emoka di eko keta i kom me ajakanut ka papa na Daudi, doko en etieko gwoko cikere mere di eko mino ajakanut buta kede ikwae na, ceng atin Adoniya bino to.”
- ²⁵Aso, Abaka Sulumani oko mino cik but Benaya wot ka Yekoyada di en eko ot eko neko Adoniya.

Dwoko Abiata Turgi kede to ka Joab

- ²⁶ Abaka Sulumani oko waco ne ngasaseredoti Abiata be, “Doki Anatot turu. In oudo ipoore to, do ango nataman likame abino neki, pien in oudo en kame igwoko Sanduku me Isikan ka Rwot i kare ka papa na Daudi, doko in inywako kede en can dedede kame en ebeo iye.”
- ²⁷ Aso, Sulumani bin oko riamo Abiata i tic me ngasaseredoti ka Rwot, di en eko mino kop kame Rwot bin owaco i kom jo me ot ka Eli i Silo ocobere.
- ²⁸Kakame Joab oko winyo kede gi kotimere, eko ringo i Eema ka Rwot di eko mako iswongen me alutari. (Joab oudo ogango Adoniya, do likame Abisolom.)
- ²⁹Kakame oko waco ne kede Abaka Sulumani be Joab oudo otieko ringo i Eema ka Rwot doko oudo etie i alutari, en eko cwano Benaya wot ka Yekoyada neko Joab.
- ³⁰Aso, Benaya oko ot i Eema ka Rwot di eko waco ne Joab be, “Rwot ciki be iwok ooko!” Do en eko waco be, “Li ba, ango abino to kan.” Di do Benaya bobo oko dok but abaka di eko waco ne kop kame Joab oudo owaco.
- ³¹Abaka oko gamo doge be, “Tim bala kame en etieko waco, neke di iko yike. Manono bino kwanyo kibuta kede kibun jo me ot ka papa na raco me onyo remo me jo kame Joab oneko abongo tien kop moro.
- ³²Rwot bino dwoko i wie raco me remo kame en eonyo; pien abongo papa na Daudi ngeno, en eoto suro di eko neko kede epima jo are abeco doko kopooore kalamo en, Abuneri wot ka Ner, ngatel me isirikalen me Isirael, kede Amasa wot ka Yeter, ngatel me isirikalen me Yuda.
- ³³Raco me onyo remo gi bino dok i wi Joab kede ikwae mege nakanaka. Do Rwot bino mino mulem bedo tie nakanaka but ikwae ka Daudi kede jo me ode kede i ajakanut mere.”



³⁴Di do Benaya wot ka Yekoyada oko ot di eko neko Joab, di oko yike i paco mere i nget wi tim.

³⁵Abaka bin oko mino Benaya odoko ngatel me isirikalen kawang Joab, doko eko keto ngasaseredoti Sadoki kawang Abiata.

To ka Simei

³⁶Di do abaka oko cwano dano ot lwongo Simei di en eko waco ne be, “Ger odi Yerusalem kan di iko donyo bedo iye, doko kur iyai iye pi ot karamoroni akadi pi kop kame rom nadi.

³⁷Pien ceng kame in iyai kede me ot, di iko ngolo esamai me Kideron, mito in ingei ateteni be in ibino to; raco me to ni bino dong i wii.”

³⁸Simei oko waco ne abaka be, “Gikame in iwaco ber; bala kame in adwong na abaka itieko waco, ango abino timo kamanono.” Aso, Simei oko bedo Yerusalem pi kare kalac.

³⁹Do ingei mwakini adek, ipasoi are ka Simei oko ringo but Abaka Akis wot ka Maka me Gat. Kakame oko waco ne kede Simei be ipasoi mege oudo tie Gat,

⁴⁰en eko yai di eko bedo i ngei punda mere di eko ot Gat but Abaka Akis, pi mono ipasoi mege. En bin eko udo gin di eko dwoko gi Yerusalem.

⁴¹Kakame oko waco ne kede Sulumani be Simei oudo oyai ki Yerusalem di eko ot Gat eko dwogo,

⁴²abaka oko cwano dano lwongo Simei di eko penye be, “Benyo, likame ango oudo ami ikwongere i nying Rwot be likame ibino yai donyo ooko me Yerusalem? Benyo, likame oudo ango akwenyaro in be i ceng kame in ibino yai kede di iko ot karamoroni kenekene, in ibino to, di in iko waco na be gikame oudo ango awaco nono ber, in ibino timo kamanono?”

⁴³Pinyo komio in likame igwoko cikere ni but Rwot, doko da iko dagi lubo timo gikame ango oudo aciko ni?”

⁴⁴Abaka oko waco da ne Simei be, “In ingeo i cunyi keni gikareco dedede kame in bin itimo ne papa na Daudi. Rwot bino dwoko i wii raco nin.

⁴⁵Do ebino mino ango winyo, doko ebino mino ajakanut ka Daudi cungo di etek nakanaka.”

⁴⁶Di do abaka oko mino cik but Benaya, di en eko ot di eko neko Simei. Sulumani bin oko mino ajakanut mere oko cungo di etek.

1 Abakai 3

Sulumani Olego be mie Rieko

(2 lyutun 1.3-12)



¹Sulumani bin oko nyomo nyar ka Parao abaka me Misiri di manono oko mino gin kiribakin. En eko tero nyar ka Parao nono i Bomba ka Daudi tuno en tieko gero paco mere me abaka kede ot ka Rwot kede apama me cel me Yerusalem.

²I kare nono oudo jo pwodi mio giayala gi i kabedere atot apapat me woro Rwot, pien likame oudo pwodi kogero ne Rwot ot.

³Sulumani oudo maro Rwot, doko oudo elubo gikame papa mere Daudi owaco ne, do kenekene eda oudo emio giayala angola kede me odok angwe kur i kabedere atot apapat.

⁴Ceng moro acel abaka oko ot Gibeon pi mino giayala mere kunono, pien kanono oudo en kabedo adwong kame komio iye giayala. Sulumani oudo obedo mino giayala awanga kame romo tutumia i wi alutari nono.

⁵Iwor nono Rwot oko neeno but Sulumani i lek i Gibeon kunono di eko waco ne be, “Penya gikame apoore mini.”

⁶Di Sulumani oko waco be, “In itieko nyuto amara adwong kalikame lokere but papa na Daudi, ngatic ni, piento en ebedo lubi di etie kede genere, kuo kopooore, kede cuny aber. Doko in itieko meede kede nyuto ne amara adwong noni kalikame lokere, di iko mino wode nataman obedo i kom mere me ajakanut.

⁷Okwe Rwot Rubanga na, in itieko mino ango ngatic ni adoko abaka kawang papa na Daudi, bed bala ango pwodi atie dano atitidi kalikame ngeo epone me telo jo.

⁸Ango ngatic ni atie do i diere me jo kame in iyero, twon jo kame tot tot kalikame marere.

⁹Pi mano, ango ngatic ni akwai imia abed kede rieke me pugo jo ni, tetekeny angei poko gikaber kede gikarac; pien ngai kame karuno pugo twon jo ni nogi?”

¹⁰Cuny Rwot oko bedo yom pien Sulumani openyo gi noni.

¹¹Rubanga oko waco ne be, “Pien in ipenyo gi noni, di likame iko kwano kuo me kare alac arabo abar piri, amoto to me jokwor ni, do in ikwao piri niang, pi ngeno poko gikaber,

¹²ango nataman abino timo bala kame in iwaco. Ateteni ango abino mini rieke kede niang; likame tie ngatamoro kame cal bala in, kotieko bedo tie i kare kokato arabo kame bino bedo tie i kare me anyim.

¹³Ango bobo da abino mini gi kalikame in ikwao, gin en abar kede wor pi kare me kuo ni lung; likame tie abaka moro kame kobino poro kedi.

¹⁴Ka in ibino lubo yote na, di igwoko iswilia na kede cik na, bala kame bin papa ni Daudi otimo, ango abino medo kare me kuo ni.”

¹⁵Di do Sulumani oko cei; eko niang be oudo eleko. En bin eko ot Yerusalem di eko ot cungo i nyim Sanduku me Isikan ka Rwot. En eko mino giayala awanga kede giayala me nywak, di eko tedo ebaga ne jotie mege dedede.



Sulumani Ongolo kop Atek

¹⁶Ceng moro acel mon are kame oudo obedo imalayan oko bino but abaka di gin kiko cungo i nyime.

¹⁷Dako acel oko waco be, “Adwong na, ango kede dako ni wan obedo i ot acel; ango ako nywalo atin di eda etie i ot kanono.

¹⁸Di do i ceng me adek ingei ango nywal, eda eko nywalo atin. Wan dedede oudo otie karacel; likame oudo dano moro ace tie kede wan i ot kunono, wan nogi jo are kenekene en kame oudo otie i ot.

¹⁹Di do iwor acel dako noni oko buto i kom atin awobi mere di eko neke.

²⁰En eko yai i dier iwor di eko kwanyo atin nango i ngeta di ango ngatic ni anino. En eko pielo atin nango i ngete, di en eko pielo mere oto i ngeta.

²¹Kakame ango ayai kede odiko pi doto atin na, ako neno be oudo etieko to; do kakame ango ako nene kede kiber odiko, ako neno kakaler be en likame atin kame oudo ango anywalo.”

²²Do dako ocelu ca oko waco be, “Li gire, atin akuo ni obedo mera, do oto en meri.” Dako me agege oko gamo be, “Li gire, atin oto en meri, do akuo en mera.” Aso, di gin kiko donyo piem i nyim abaka.

²³Di do abaka oko waco be, “Wun ngat acelacel tie waco be atin akuo en mere, do me ka ngat ocelu en oto.”

²⁴Aso, abaka oko waco be, “Kelunu na epima,” di oko kelo ne epima.

²⁵Abaka oko waco be, “Pokunu atin akuo no i diere, di ikounu mino dako acelacel dul mere.”

²⁶Do dako kame atin mere oudo kuo oko waco ne abaka be, “Li gire, ango akwai adwong na, mi atin akuo no but dako no; ateteni kur ineke!” En ewaco kamano pien oudo ewinyo lito atek i cunye pi wode. Do dako ocelu ca oko waco be, “Pok in atin nono di do wan dedede oko kei.”

²⁷Di do abaka oko waco be, “Kur inek atin no! Mie but dako me agege. En ebedo toto me atin nono.”

²⁸Jo me Isirael dedede oko winyo kite kame abaka oudo ongolo kede kop nono di gin kiko bedo kede wor adwong bute, pien gin kiniang be Rubanga oudo otieko mine rieko me ngolo kop kakare.

1 Abakai 4

Jodongo me Apugan ka Sulumani

¹Abaka Sulumani bin oko bedo abaka me Isirael lung.

²Jodongo me apugan mere bin ige: Asaria wot ka Sadoki en oudo ngasaseredoti;



- ³Elikorep kede Akija, awobe ka Sisa en oudo ikalanin; Yekosapat wot ka Akilud en kame oudo wandiko kope dedede kame timere;
- ⁴Benaya wot ka Yekoyada en kame oudo tie ngadwong me isirikalen; Sadoki kede Abiata en oudo obedo josaseredoti;
- ⁵Asaria wot ka Natan en oudo obedo ngatel me jodongo me apugan; Sabud wot ka Natan en oudo obedo ngasaseredoti, doko en oudo ngawot abaka;
- ⁶Akisar en oudo ngadwong me paco me abaka; Adoniram wot ka Abuda en kame oudo tie ngadwong me jo kame kodio timo tic tetek.
- ⁷Sulumani bin tie kede jopug tomon kiwie are me apugan mere i Isirael lung. Ngat acelacel kikom gi oudo tero cam ne abaka kede jo me ode, pi duwe acel lung, buli mwaka.
- ⁸Nying jopug nogo kede adulion kame oudo gin kipugo ige: Ben Kur oudo pugo piny kobedo mori mori me Epuraimu;
- ⁹Ben Deker oudo pugo bomban me Makas, Salabim, Bet Semes, Elon kede Bet Kanan;
- ¹⁰Ben Kesed oudo pugo bomban me Arubot kede Soko kede adul me Keper dedede;
- ¹¹Benabinadab oudo pugo Napat Dor. En bin enyomo Tapat nyar ka Sulumani;
- ¹²Bana wot ka Akilud, oudo pugo bomban me Tanak, Megido, kede adul dedede me Bet San, i nget bomba me Saretan, pipiny me Jeserel, kede cako ki Bet San tuno Abelmekola, ape ot tuno i bad tetuca me bomba me Yokomeam;
- ¹³Ben Geber oudo pugo bomba me Ramot Gilead kede calere ka Yair, dano me ekeko ka Manase, kame oudo tie Gilead. Ben Geber en kame bin pugo da adul me Arugob kame oudo tie Basan, kame oudo tie kede bomban adongo ot kanyape kame kocelo doko irutei gi oudo kocego kede alorito me nyonyo buronsi;
- ¹⁴Akinadab wot ka Ido oudo pugo Makanaim;
- ¹⁵Akimas oudo pugo adul me Naputali; en oudo enyomo Basemat nyar ka Sulumani;
- ¹⁶Bana wot ka Kusai oudo pugo adul me Aser kede bomba me Bealot;
- ¹⁷Yekosapat wot ka Parua oudo pugo adul me Isakar;
- ¹⁸Simei wot ka Ela oudo pugo adul me Benjamin;
- ¹⁹Geber wot ka Uri oudo pugo adul me Gilead, piny me Abaka Sikon me jo Amor kede Abaka Og me Basan. Ngapug acel oudo tie i lobo me Yuda.

Lonyo i kare me Apugan ka Sulumani

- ²⁰Jo me Yuda kede Isirael oudo tot bala asinge me dog nam; gin bin kiko cam kede amata di kiko bedo kede yomcuny.



- ²¹ Sulumani bin oko pugo ajakanuto dedede cako ki ecilet me Eupurate tuno i lobo me jo Pilistia, ape tuno i ikor me Misiri. Gin bin kibedo culo esolo bute di kitimo ne tic pi kare me kuo mere lung.
- ²² Giacama kame oudo mitere ne Sulumani pi ceng acelacel oudo tie ipukoi ot adek me alos kame konungo kiber kede ipukoi ot kanyape me alos kalikame konungo;
- ²³ twonin tomon kame kopito oko cwe, doke ot are kame oudo kokwao akwa, romini tol acel, atil, amiem, imaleta, kede gwen kocwe.
- ²⁴ Sulumani oudo pugo lobo dedede me bad tetu tim me ecilet me Eupurate, cako ki Tipisa ape tuno Gasa. En oudo epugo abakai dedede me bad tetu tim me ecilet me Eupurate, doko oudo etie kede anapakin kede pinye me kio dedede.
- ²⁵ I kare me kuo ka Sulumani lung, Yuda kede Isirael oudo tie kede anapakin, cako ki Dan tuno Beereseba. Jo me diakal acelacel oudo tie kiber di kitie kede olok kede yen me epigi.
- ²⁶ Sulumani bobo da oudo tie kede ude tutumia ot ongwon (40,000) me asigiran kame wao cabalan mege, kede cuo tutumia tomon kiwie are (12,000) kame ringo kede asigiran.
- ²⁷ Jopug tomon kiwie are nogo en kame bin tero giacama ne Abaka Sulumani kede jo kame bin camo ki paco mere. Ngapug acelacel oudo tero gi nogo i duwe kame kopoko ne; likame tie gimoro kame oudo gin kimio rem.
- ²⁸ Ngapug acelacel da oudo tero mawele kede lum ne asigiran kakame oudo kimitere iye bala kame oudo kociko negi.
- ²⁹ Rubanga oudo omio Sulumani rieke adwong twatwal, ngec kede niang atut tut kalikame wacere.
- ³⁰ Manono oko mino rieke ka Sulumani oudo kato me jo dedede me bad tetu kide, kiton me jo me Misiri.
- ³¹ En oudo eriek elo jo dedede; oudo eriek elo Etan dano me ot ka Esera, kede Keman, Kalikol, kede Darada, awobe ka Makol. Nyinge bin oko bedo iruo i pinye me kio dedede.
- ³² En bin ecweo kope me agole tutumia adek (3,000), kede were tutumia acel kede kany (1,005).
- ³³ En ewaco kop i kom yen, cako ki yen seda kame tie Lebanon tuno i emompir kame dongo i wi apama. En ewaco kop i kom leini kede winy, leini kame liao alia kede aporogon dedede me nam.
- ³⁴ Abakai dedede me wi lobo kame bin owinyo kop i kom rieke ka Sulumani, bin oko cwano jo pi ot winyo kope me rieke mere nono.

1 Abakai 5

Sulumani Oikere pi Gero Tempulo



(2 lyutun 2.1-18)

¹Kakame bin Abaka Kiram me Taya owinyo kede be oudo kotieko wiro Sulumani pi lunyo wang papa mere bala abaka, en eko cwano jotic mege bute, piento en bin ebedo adieru me Daudi.

²Sulumani oko cwano kop but Kiram be,

³” In ingeo be papa na Daudi oudo likame oko karuno gero ot ne Rwot Rubanga mere pi yi atos atota kame oudo tie ne kede jokwor mege kame oudo oluke, tuno kakame Rwot omie ebwono gi kede.

⁴Do nataman Rwot Rubanga na otieko mina anapakin i bad dedede; likame tie ngakwor moro arabo gimoro arac.

⁵Pi mano, ango nataman atie kede tam me mito gero ot ne Rwot Rubanga na bala kame oudo Rwot owaco ne papa na Daudi be, ‘Wodi kame ango abino keto lunyo wangi bala abaka, bino gero nango ot.’

⁶Aso, mi cik but jotic ni wek kiot Lebanon di kiko tongo nango yen seda. Jotic nango bino timo tic karacel kede jotic nin, di ango ako bino culo gi gimoroni kenekene kame in ibino waco; pien in ingeo be likame tie ngatamoro kikom wan kame ngeo tongo yen bala jo me Sidon.”

⁷Kakame Kiram owinyo kede kop kame Sulumani owaco, en eko lelo twatwal, di eko waco be, “Pak bed but Rwot tin, en ngat kame etieko mino Daudi awobi ariek pi bedo abaka me twon jo kame rom kano.”

⁸Kiram oko cwano ne Sulumani kop be, “Ango atieko udo kop kame in icwao buta; mit ni amako ebao me yen seda kede saipuras, ango abino cobo dedede.

⁹Jotic nango bino kelo gi yai ki Lebanon tuno i nam; gin kibino twetweo gi karacel di kiko mino nam molo gi kakame in inyuto. Ango abino mino kogonyo gi i kunono pi in tero gi. Gikame in ibino timo nango en in mino cam but jo me oda.”

¹⁰Aso, Kiram oko mino Sulumani ibaon me yen seda kede saipuras kame oudo en emit dedede.

¹¹Sulumani da oko mino Kiram engano kame romo ipukoi tutumia ot are (20,000) pi jo me ode camo, kede pipan tutumia are (2,000) me mo kame kojililo kiber. Sulumani obedo mino gi nogi but Kiram buli mwaka.

¹²Aso Rwot bin oko mino Sulumani rieke bala kame oudo etieko cikere kede. Anapakin oudo tie i dierediere ka Kiram kede Sulumani, di gin bin kiko timo isikan.

¹³Abaka Sulumani bin oko rwako jo tutumia ot adek (30,000) i Isirael lung pi bedo jo kame komio timo tic tetek.

¹⁴En eko popoko gi i ikodeta me tutumia tomon tutumia tomon kame lere alea i timo tic, di eko cwano gi Lebanon. Ekodet acel bin bedo Lebanon pi duwe acel di eko dok bedo paco pi duwete are. Adoniram en kame bin en eketo pi bedo ngadwong gi.



¹⁵Sulumani oudo bobo da tie kede jomuk kide tutumia ot kanyauni (80,000) i piny kobedo mori mori, kede jo tutumia ot kanyaare (70,000) kame yeo gi;

¹⁶medo i kom jo nogo, oudo bobo tie jo tutumia adek kede tol adek (3,300) kame kwao jo kame bin timo tic nono.

¹⁷Abaka bin oko ciko gi pi muko kide adongo abeco me keto i acakini me ot.

¹⁸Jotic ka Sulumani kede me ka Kiram kede jo me bomba me Gebal oko iiko kide kede ibaon me gero ot ka Rwot.

1 Abakai 6

Sulumani Ogero Tempulo

¹Sulumani bin oko cako gero ot ka Rwot i duwe me Sib, manono en duwe me are, i mwaka me tol ongwon kede ot kanyauni, ingei jo me Isirael yai ki Misiri. I kare nono oudo Sulumani otieko bedo i apugan pi mwakini ongwon.

²Ot kame Sulumani bin ogero ne Rwot oudo boro mere tie mita ot are kiwie kanyaare, laco mere mita kanyangon, kede boro mere malo oudo tie mita tomon kiwie adek kede dul.

³Agola me kadonyo i ot oudo boro mere tie mita ongwon kede dul, kede laco mere mita kanyangon bala me ot nono.

⁴En bin etimo ne ot nono dirisan kame oudo diding i ooko do kilac ki yie.

⁵En bobo eko mino kogero gedo moro i kom apama me ot nono rimaro en i ooko; di en eko popoko agolai iye.

⁶Dier ot me agola acelacel me piny oudo laco mere tie mita are kede dul moro atitidi, agola me goropa me diere oudo laco mere noko mita adek, di do me goropa me adek mere oudo laco mere tie mita adek kede dul moro atitidi. Rom me laco me apama me ot i agola kodokakin i wi ocelu oudo titidi lo kame en edokakin i wie, tetekeny dier ot me agolai nogo oudo buto i wi apama di likame atekai kame gango gi donyo i apama me ot.

⁷Ot nono bin kogero kede kide kame oudo koiko i kabedo kame kokunyo gi iye, tetekeny mor moro me enyondo, le arabo lilim likame oudo tie i tempulo i kare kame bin kogere kede.

⁸Ekeko kame donyo i goropa me diere oudo tie i bad tetu piny me ot. Dano oudo yito malo di elubo kayito kame oto i goropa me diere, di eko kobo ki goropa me diere eko ot i me adek.

⁹Aso, Abaka Sulumani bin oko tieko gero ot ka Rwot; en eko galao wi ot i yie kede atekai kede ibaon abatal me seda.

¹⁰En bin eko gero agolai rimaro ot nono lung, agola acelacel oudo boro mere malo kalamo mita are momot, di oriamakino en i kom ot ka Rwot kede ibaon me yen seda.



¹¹Rwot oko waco ne Sulumani be,

¹²” I kom kop kame mako ot kame in itie gero noni, ka in ilubo iswilia na di itimo gikame ango awaco, doko di igwoko cik na i yore me lubo gi, ango abino moko cikere na kedi, cikere kame bin ango atimo but papa ni Daudi.

¹³Ango abino bedo i diere me jo na me Isirael, doko likame abino weko gi.”

¹⁴Aso, Sulumani bin oko tieko gero ot ka Rubanga.

Jamini kame Koketo i yi Tempulo

(2 lyutun 3.8-14)

¹⁵Apama me ot nono i yie oudo komwono kede ibaon abatal me seda, cako ki piny tuno malo i wi ot, di oko mwono dier ot kede ibaon abatal me saipuras.

¹⁶ Agola me yie, kame oudo kolwongo be Kabedo Kacil Kalamo bin oko gero i tielo me ot kede ibaon abatal me yen seda, cako ki piny tuno malo i wi ot. Boro mere oudo tie mita kanyangon.

¹⁷Agola adwong mere kame bin tie i nyim Kabedo Kacil Kalamo oudo boro mere tie mita tomon kiwie kanyauni.

¹⁸Ibaon me seda me yi ot bin kotubuso kede cal me opokini kede ature; apama me yi ot lung oudo komwono kede ebao seda, omio kide kame kogero kede apama oudo likame neeno.

¹⁹I tielo me ot nono bin oko gero iye agola me keto Sanduku me Isikan.

²⁰Agola me yie noni oudo boro mere tie mita kanyangon, laco mere mita kanyangon, kede boro mere malo da mita kanyangon, di omwone dedede kede saabu kame kojililo kiber. Alutari oudo komwono kede ibaon abatal me seda.

²¹Yi ot oudo komwono kede saabu kame kojililo kiber, di oko rino eriko me saabu kakame kodonyo kede i agola me yie, kame oudo komwono da kede saabu.

²² Ii ot lung oudo komwono kede saabu tetekeny ebed di eber, kiton alutari kame oudo tie i Kabedo Kacil Kalamo.

²³ I Kabedo Kacil Kalamo kunono bin oko timo iye cerubim are kede ebao me yat olibeti, acelacel kikom gi oudo boro mere malo buco romo mita ongwon kede dul.

²⁴⁻²⁶Gin are nogo oudo kirorom doko kicacal. Acelacel oudo tie kede bwome are, bwom gi acelacel oudo kalamo mita are momot, tetekeny yai ki amidi me bwom cerubim acel tuno i amidi me bwom cerubim ocelu oudo buco romo mita ongwon kede dul.

²⁷Sulumani bin oko keto cerubim nogo i Kabedo Kacil Kalamo; oudo koyararo bwom gi tetekeny bwom cerubim acel oudo tuno i apama me tetucel, di bwom cerubim ocelu da ko tuno i apama me tetu ocelu; bwom gi icegun kame orieo tetu cuny ot oudo riamo.

²⁸Cerubim nogo da bin komwono kom gi kede saabu.



- ²⁹Apama me agola adwong kede me agola me yie oudo kotubuso gin dedede kede cal me cerubim, tugo, kede ature.
- ³⁰Dier ot dedede da oudo komwono kede saabu.
- ³¹Ikekon kame donyo Kabedo Kacil Kalamo oudo tie are kame kotimo kede ibaon me yat olibeti; ebao me ari me wi ekeko malo kede ipirin mege oudo nget gi tie kany.
- ³²Ikekon nogo oudo kotubuso kede cal me cerubim, tugo kede ature, di oko mwono gi kede saabu.
- ³³Ekeko kame donyo i agola adwong da ipirin mege oudo kotimo kede ebao me olibeti; epi acelacel oudo ngete tie ongwon.
- ³⁴Ikekon are nogo oudo kotimo kede ebao me yat saipuras di koromo dolo gi;
- ³⁵doko oudo kotubuso gi kede cal me cerubim, tugo, kede ature, di oko mwono gi kiber kede saabu.
- ³⁶Diakal me tempulo bin oko gero kede apama kame konapo kide mege irotin adek i buli wi eroto acel me ebao me yat seda.
- ³⁷Acakini me tempulo bin kocako gero i duwe me are, en duwe me Sib, i mwaka me ongwon me apugan ka Sulumani.
- ³⁸I duwe me kanyauni, en duwe me Bul, i mwaka me tomon kiwie acel me apugan ka Sulumani, en kame kotieko gero kede tempulo atwal atwala bala kame oudo koiko kede. Gere otero ne Sulumani mwakini kanyaare.

1 Abakai 7

Paco ka Abaka Sulumani

- ¹Sulumani bin oko da gero paco mere me abaka, kame tieko gero otero ne mwakini tomon kiwie adek.
- ²⁻³**E**n bin egero ot acel adwong, kame kolwongo be Abum me Lebanon. Boro mere oudo tie mita ot ongwon kiwie ongwon, laco mere oudo tie mita ot are kiwie are, kede boro mere malo oudo tie mita tomon kiwie adek kede dul. Ipirin me ot nono oudo tie i irotin ongwon me yen seda. Eroto acelacel oudo tie kede ipirin tomon kiwie kany me yen seda, kame atekai ot ongwon kiwie kany buto i wi gi, di opeto ebao me seda i wi atekai nogo.
- ⁴Dirisan oudo tie i irotin adek i apama tuni tuni di kipimere.
- ⁵Ikekon dedede kede ipirin me ikekon oudo nget gi tie ongwon ongwon, di kipimere i irotin adek nogo.
- ⁶En bin eko mino kogero ot kame kolwongo be Ot me Ipirin, boro mere oudo tie mita ot are kiwie are, kede laco mere oudo tie mita tomon kiwie adek kede dul. I ekeko kame donyo i ot i tetu anyim oudo tie iye ot atitidi kame tie kede ipirin kame gango wie.



⁷Sulumani bin oko gero ot ace kame kom mere me ajakanut bedo iye, kame oudo kolwongo be Ot Ngolo Kop, kakame en oudo engolo iye kope. Ot nono bin komwono kede ebao seda, cako ki piny tuno malo i wi ot.

⁸Ot ka Sulumani amake, kame bin en ebedo iye, oudo tie i diakal apat, ingei Ot Ngolo Kop. En bin kogere bala ude icegun. En doko da bin eko gero ot ace kame cal kamanono ne dako mere, nyar ka Parao.

⁹Ude nogi lung kede diakal adwong, cako ki acakini piny me apama tuno i wi gi bin kogero kede kide me wel, kame kopao bala kame mitere, di oko temuno nget gi tetu dedede kiber kede musumeno.

¹⁰Acakini me ude nogo bin kogero kede kide adongodongo me wel; ace kikom gi oudo boco gi romo mita adek kede dul, mogo mita ongwon.

¹¹I wi kide me acakini nogo bin konapo iye kide me wel, kame kopao bala kame mitere, kede ibaon me yen seda.

¹²Diakal me paco me abaka bin kogero kede kide kame konapo irotin adek me kide i wi buli eroto acel me ibaon me seda, rimaro en lung. Diakal me ot ka Rwot da bin kogero kamanono, kiton agola kame kodonyo kede i ot nono.

Tic kame Komio Kuram

¹³Abaka Sulumani bin oko lwongo Kuram dano me Taya pi bino bute.

¹⁴En oudo ebedo wot ka apuserut kame yai ki ekeko ka Naputali, do papa mere oudo obedo dano me Taya. Papa mere da di pwodi likame eto, oudo obedo ngatet kame tio kede nyonyo buronsi. Kuram oudo obedo dano kame adam mere riek, doko oudo etie kede ngec me tic kede nyonyo buronsi. En bin eko bino but Abaka Sulumani di eko timo ne tice mege dedede.

Ipirin Are me nyonyo Buronsi

(2 lyutun 3.15-17)

¹⁵Kuram bin oko timo ipirin are me nyonyo buronsi, acelacel boro mere malo oudo tie mita kanyauni, do kore rimaro oudo buco romo mita kany kede dul.

¹⁶En eko ropo wi gi kede nyonyo buronsi kame kotwako; arop acelacel oudo boro mere malo kalamo mita are momot.

¹⁷Arop acelacel oudo kotubuso kome kede irotin kanyaare me cal me irikoi,

¹⁸kede da irotin are me cal me pomagurunet.

¹⁹Arop kame bin tie i wi ipirin me kadonyo i ot oudo kotimo i cal me ature me korom, kame boro gi malo oudo buco romo mita are;

²⁰bin koketo gi kakame kilulunga me ipirin nogo, kame oudo tie malo me kakame kogoro iye cal me irikoi. I arop me wi epir acelacel rimaro, oudo kogoro iye cal me pomagurunet tol are (200).



²¹Kuram bin oko sipo ipirin are nogo i nyim ekeko kame kodonyo kede i tempulo; acel esipo i bad tetu piny di eko cako ne nyinge be Yakin, di eko sipo epir ocelu i bad tetu malo di eko cako nyinge be Boasi. ²²I wi ipirin nogo bin kocibo iye arap kame kotimo iye cal me ature me korom. Di do bin tic me timo ipirin nogo oko tiek kamanano.

Epipa me Nyonyo Buronsi

(2 lyutun 4.2-5)

²³Kuram bin oko timo epipa kilukumum, kame oudo kolwongo be Nam adwong kame kotwako atwaka. En oudo etut ekalamo mita are momot, laco mere oudo tie mita ongwon kede dul, kede lake rimaro oudo tie mita tomon kiwie adek kede dul.

²⁴Irotin are me opokini kame kotimo kede nyonyo buronsi bin tie i lak epipa nono rimaro i ooko mere. Opokini nogo bin kotimo i kom epipa nono i kare kame bin kotete kede.

²⁵Epipa nono oudo cungo i ngei cal me twonin tomon kiwie are kame kotimo kede nyonyo buronsi, adek bin cungo di kineno bad tetu malo, adek neno bad tetu tim, adek bad tetu piny, kede adek neno bad tetu kide.

²⁶Bimirir me nget epipa nono oudo rom kede yi cing dano; lake oudo cal bala lak i kopo, di eyarere ooko bala ature. En oudo etero pii kame romo lita tutumia ot ongwon (40,000).

Icegeren me Nyonyo Buronsi

²⁷Kuram bin oko timo da icegeren tomon kede nyonyo buronsi; acelacel oudo boro mere buco romo mita are, laco mere da kamanono, kede boro malo oudo buco romo mita acel kede dul.

²⁸Icegeren nogo oudo kogero kaman: oudo kitie kede nyonyo abatal kame korio i nget gi.

²⁹I kom nyonyo abatal nogo oudo tie iye cal me inguon, twonin, kede cerubim. I kom purem me cegere, malo kede piny me cal me inguon kede twonin, oudo tie iye cal me ature kame kodwadwalo.

³⁰Cegere acelacel oudo tie kede namisigan ongwon kede ari kame kotimo kede nyonyo buronsi. I isondana mege dedede ongwon oudo tie iye gikame kocibo iye kalayan. Gicibo kalayan nogo oudo kotubuso nget gi kede cal kame kodwadwalo.

³¹Wi gicibo kalayan nogo oudo dog gi tie aluka. Gin oudo kibocoboco malo kikalamo wi cegere kede sentimita ot ongwon kiwie kany, do boro gi dok piny i kom cegere oudo tie sentimita tomon kiwie kanyauni. Cal oudo tie i dog kalaya acelacel, kame kotimo me tubuso en; nyonyo apadal me ngete oudo tie kede isondana ongwon.

³²Namisigan ongwon nogo oudo tie piny i dud nyonyo me ngete; ari me namisigan nogo oudo tie i kom cegere; boro me namisiga acelacel malo oudo tie sentimita ot kanyape kiwie kanyape.



³³Namisigan nogo oudo cal bala me cabala; ariin gi, namisigan kikom gi, ipirin, kede iwuan, bin dedede kotimo kede nyonyo buronsi.

³⁴Agangeta bin tie i isondana ongwon dedede me cegere acelacel; agangeta nogo bin kotimo di kitie kicel kede kom cegeren.

³⁵I wi cegere acelacel bin tie iye gi kibatalal di etie aluka, kame laco mere romo sentimita ot are kiwie are; agangeta mege kede en bin kiribakin i kom cegere.

³⁶I kom agangeta mege kede i kom eda, Kiram bin ogoro cal me cerubim, inguon, kede tugo, karamoroni kenekene kame oudo kabedo me cal udere iye, karacel kede ature kame kodwadwalo, en bin egoro gi rimaro.

³⁷Epone noni en kame bin en eko timo kede cegeren tomon nogo; en etimo gin dedede di kicacal, di kirorom doko di kitie iepone acel.

³⁸Kuram bin otimo da kalayan tomon me nyonyo buronsi, acelacel pi cegere acel. Kalaya acelacel oudo laco mere buco romo mita are, doko oudo emako pii kame romo lita tol kanyauni (800).

³⁹En bin eko keto cegeren kany i bad tetu piny me tempulo, kany icegun eko keto i bad tetu malo; epipa en bin eko keto i esonda me ot i dierediere me bad tetu piny kede bad tetu kide.

Jamini kame bin Kuram Otimo pi Keto i Tempulo

(2 lyutun 4.11—5.1)

⁴⁰Kuram bin oko timo da agune, jamini me kikiso wi alutari, kede kalayan. En bin eko tieko timo tice dedede kame oudo en etie timo ne Abaka Sulumani, kame mako tempulo ka Rwot. Magonogi en jamini kame bin en eko timo:

⁴¹ipirin are, arop are kame oudo tie i wi ipirin nogo, cal are me irikoi kame oudo tie i kom arop nogo;

⁴²cal me pomagurunet tol ongwon, kame kotimo i irotin are are i wi arop me epir acelacel;

⁴³cegeren tomon, kalayan tomon kame koketo i wi cegeren nogo;

⁴⁴epipa acel, kede cal me twonin tomon kiwie are kame epipa nono cungo i ngei gi;

⁴⁵agune, jamini me kikiso alutari kede kalayan. Jamini nogi dedede Kuram bin otimo ne Abaka Sulumani kede nyonyo buronsi, pi en keto gi i ot ka Rwot.

⁴⁶Abaka bin oko mino koteto jamini nogi i kabedo kame elupe oudo tie iye, i dierediere me Sukot kede Saretan, i aditot me Yorodan.

⁴⁷Sulumani bin likame oko mino kopimo peko me jamini nogi dedede, pien oudo kitot twatwal, di manono oko mino rom me nyonyo buronsi kame kotio kede likame oko ngere.



⁴⁸ Aso, Sulumani bin oko mino kotimo jamini dedede kame oudo tie i ot ka Rwot: alutari kame kotimo kede saabu, emesa me saabu kame bin koketo iye mugati kame koyalo but Rwot,

⁴⁹ gicibo italan kame kotimo kede saabu kame kojililo kiber, kame bin cungo i nyim Kabedo Kacil Kalamo, kany i bad tetu piny kede kany da i bad tetu malo; ature, italan, kede ilumai;

⁵⁰ ikopon, gi iiko ausin me italan, kalayan, bakulin me dunyo odok angwe kur, kede itatany me kwanyo buru aliet, ipatai me ikekon me Kabedo Kacil Kalamo kede me ekeko adonyo i tempulo. Jamini nogi dedede bin kotimo kede saabu.

⁵¹ Epone no en kame bin tic kame Abaka Sulumani otimo me gero ot ka Rwot oko tiek kede. En bin eko tero jamini dedede kame oudo papa mere Daudi omio but Rwot di eko keto gi i agolai me kano jamini i tempulo. Jamini nogo bin ribo siliba, saabu kede ace apat.

1 Abakai 8

Kotero Sanduku me Isikan i Tempulo

(2 lyutun 5.2—6.2)

¹ Di do Abaka Sulumani bin oko lwongo joadongo me Isirael kede jotel me ikekon, jotel me ude me joakwari me Isirael, pi gin bino bute Yerusalem tetekeny kikwany Sanduku me Isikan ka Rwot ki Sion, Bomba ka Daudi, di kiko tere i tempulo.

² Jo dedede me Isirael bin oko cokere but Abaka Sulumani i kare me Ebagga me Kimere i duwe me Etanim, en duwe me kanyaare.

³ Kakame joadongo me Isirael otieko cokere kede, josaseredoti oko tingo Sanduku me Isikan

⁴ di kiko tere i tempulo. Jolebi kede josaseredoti bin oko da kobo i tempulo Eema me riamo kede jamini mege kacil dedede.

⁵ Abaka Sulumani kede jo dedede me Isirael kame oudo ocokere bute oko cungo i nyim Sanduku me Isikan, di gin kiko mino giayala angola me romini kede twonin atot tot kalikame marere.

⁶ Di do josaseredoti oko tingo Sanduku me Isikan kiko tere kabedo mere, i Kabedo Kacil Kalamo, i dud bwom cerubim.

⁷ Pien oudo cerubim nogo oyaro bwom gi i kabedo me Sanduku me Isikan, tetekeny bwom gi nogo oudo umo wi Sanduku me Isikan kede atekai me tinge da.

⁸ Atekai nogo oudo bocoboco twatwal, kame ka dano moro oudo ocungo i nyim Kabedo Kacil Kalamo, en ekaruno neno wi gi; do likame oudo kokaruno neno gi i ooko mere. Atekai nogo pwodi tie kunono tuno tin.

⁹ Gimoro ace oudo likame tie i yi Sanduku nono kwanyo kenekene kide abatal are nogo kame bin oketo iye i moru me Sinai, i kare kame bin Rwot otimo kede isikan kede jo me Isirael, di gin bin kiyai ki Misiri.



¹⁰ Kakame josaseredoti oudo tie donyo kede ooko me kabedo kacil, edou oko umo yi tempulo pukupuk,

¹¹ omio josaseredoti likame oko karuno timo tic gi; pien meny me deyo ka Rwot oudo oromo yi tempulo dedede.

¹² Di do Sulumani oko lego be, “Rwot in itieko waco be in ibino bedo i edou acol cucucuc.

¹³ Ango atieko gero nin ot me deyo, kakame in ibino bedo iye pi kare lung.”

Yamo ka Sulumani but Jo

(2 lyutun 6.3-11)

¹⁴ Di do abaka oko lokere but jo di eko lamo winyo ne jo dedede kocokere me Isirael, di gin dedede kitie cungo.

¹⁵ En ewaco be, “Pak bed but Rwot, Rubanga me Isirael, en ngat kame kede teko mere etieko cobo timo gikame bin en ecikere iye di ewaco kede doge but papa na Daudi be,

¹⁶ ‘Cako i kare kame anga bin akwanyo kede jo na me Isirael ki Misiri, anga pwodi likame ayero bomba moro me ekeko me Isirael kame poore ger iye ot, kakame kobino wora iye. Do anga ayero Daudi pi bedo ngapug me jo na.’

¹⁷ “Papa na Daudi oudo tie kede tam me gero ot me woro Rwot, Rubanga me Isirael.

¹⁸ Do Rwot bin oko waco ne be, ‘In itimo ber pi bedo kede tam me mito gero nango ot me wora,

¹⁹ akadi kamanono da, in en kalikame ibino gero ot nono, do wodi kame in ibino nywalo en kame bino gero nango tempulo.’

²⁰” Aso, Rwot nataman otieko cobo cikere mere, pien anga nataman atieko lunyo wang papa na Daudi bala abaka me Isirael, doko atieko gero ot me woro Rwot, Rubanga me Isirael.

²¹ Anga atieko timo i ot ka Rwot kunono kabedo me Sanduku me Isikan kame kide abatal me isikan ka Rwot tie iye, isikan kame bin en etimo kede joakwari wa i kare kame gin kiyai kede ki lobo me Misiri.”

Ilega ka Sulumani

(2 lyutun 6.12-42)

²² Di do Sulumani oko ot di en eko cungo i nyim alutari i nyim jo dedede me Isirael, di en eko tango cinge malo.

²³ En eko lego be, “Okwe Rwot, Rubanga me Isirael, likame tie Rubanga moro kame cal bala in, i malo arabo piny i dud lobo! In igwoko isikan ni doko in inyuto amara ni kalikame lokere but jotie ni kame lubo kop ni kede cuny gi lung.

²⁴ In itieko gwoko isikan ni kame bin imio but ngatic ni papa na Daudi; in bin icikere di iwaco kede dogi, di tin in iko mine ecobere kede teko ni.



25 Pi manono, Okwe Rwot, Rubanga me Isirael, ango akwai igwok cikere ni but ngatic ni papa na Daudi, cikere kame bin in iwaco iye be, ‘In likame ibino bedo abongo ngat kame lunyo wangi bala abaka me Isirael, kenekene ikwae ni poore gwok yote me kuo gi, di gin kiko luba bala kame in itimo.’

26 Pi manono, Okwe Rubanga me Isirael, mi kop kame in bin icikere iye but ngatic ni papa na Daudi cobere.

27 “Do in, Okwe Rubanga, kom ateteni ibino bedo i lobo kan? Akadi malo lung likame romi, kara do benyo benyo kame ot noni kame ango atieko gero bino romi kede?

28 Ango akwai, Okwe Rwot Rubanga na, tim ber iwiny kwac na kede ingangai na, ango ngatic ni; ango abako doga buti iwiny kwac na kame akelo buti tin.

29 Gwok ot noni iceng kede iwor, kabedo noni kame in itieko yamo i kome be, ‘Kobino wora i kanono.’ Ango akwai iwiny kwac na ka ango aloko nyima tetu ot noni di ako ilega.

30 Winy ingangai na kede me jo ni me Isirael ka gin kiloko nyim gi tetu kabedo noni di kiko ilega. Okwe winy wa i malo kabedo ni; winy kwac wa di iko sasiro wa.

31” Ka dano moro otimo dub but dano ocelu di oko mine be elairo, di oko kele lairo i alutari nin i ot noni,

32 Okwe Rwot winy i malo di iko ngolo kop i dierediere me jotic ni. Mi alola but ngat kame tie kede raco di iko dwoko ne rac mere i wie, do mi ngat kame li kede raco moro bed kiber bala kame poore ne.

33” Ka jokwor oko bwono jo ni me Isirael pien gin kitimo dub buti, di do gin kiko bobo lokere buti, di kilwongo nyingi, kede di kikwai di kibako dog gi buti i ot noni,

34 winy kwac gi i malo. Sasiro dub ka jo ni me Isirael, di iko bobo dwoko gi i lobo kame bin in imio joakwari gi.

35” Ka malo oko cegere di kot oko bedo li pien gin kitimo dub buti omio in iko mino gin alola, di do gin kiko swilaro ki dub gi di kiko loko nyim gi tetu kabedo noni di kiko ilega di kilwongo nyingi,

36 tim ber iwiny kwac gi i malo. Sasiro dub ka jotic ni, jo me Isirael. Pwony gi yongayo me kuo aber kame poore kilubi, di iko mino kot cwei i lobo noni kame in itieko mino jo ni pi doko mergi.

37” Ka kec opoto i piny arabo aumpuli, amoto ceng owango cam i poti, arabo obonyo amoto ekutele, arabo ka jokwor ka jo ni oluko gi i bomba gi moro, arabo ka aumpuli moro amoto tuo moroni omako gi,

38 tim ber iwiny kwac gi. Ka ngatamoroni kenekene kikom jo ni me Isirael, arabo jo ni dedede me Isirael, kame tie kede cweracuny, oko lego di kirieo cing gi tetu ot noni,



³⁹tim ber iwiny kwac gi i malo kabedo ni. Sasiro gi di iko konyo gi. Tim negi gikame poore kede yote me kuo gi, gikame in ingeo kame tie i cuny gi, pien in keni en kame ingeo gikame tie i cuny dano acelacel.

⁴⁰Manono bino mino gin kilwori pi kare dedede kame gin kibedo kede i lobo nono, lobo kame in bin imio joakwari wa.

⁴¹⁻⁴²” Iepone acel nono, ka ngakumbor moro, kalikame obedo dano ni me Isirael, oko bino ki piny abor pien ewinyo iruo me nyingi, twer ni kede teko ni, di en eko bino lego buti i ot noni,

⁴³tim ber iwiny kwac mere i malo kabedo ni. Tim ne gikame en ekwai pire, tetekeny jo dedede me wi lobo ngei di gin kiko bedo kede lwooro buti, bala jo ni me Isirael. Di do gin kiko bino ngeno be ot noni kame ango atieko gero obedo meri.

⁴⁴” Ka jo ni bino ot yi kede jokwor gi, karamoroni kenekene kame in ibino cwano gi iye, di gin kiko lego buti di kiloko nyim gi tetu bomba noni kame in itieko yero, kede tetu ot noni kame ango atieko gero nin,

⁴⁵tim ber iwiny ilega kede ingangai gi i malo, di iko mino gi kibwon jokwor gi.

⁴⁶” Ka gin kiko timo dub buti, pien likame tie dano moro kalikame timo dub, di in cunyi oko wang negi di iko mino gi i cing jokwor gi, tetekeny koter gi tenge bala mabus i lobo me jokwor gi, kakabor amoto kiyapiyapi;

⁴⁷ka i lobo kame kotero gi iye kunono bala mabus, di wi gi oko yabere di kiko swilaro, di kiko bako dog gi buti di kiwaco be, ‘Wan otieko dubo, doko otimo gi kalikame poore; wan otimo gikarac’ , tim ber iwiny kwac gi.

⁴⁸Ka gin kiko swilaro kede cuny gi dedede kede kuo gi lung i lobo me jokwor gi kunono, jo koudo otero gi bala mabus, di gin kiko lego buti di kiloko nyim gi tetu lobo noni kame bin in imio but joakwari gi, kede bomba noni kame in itieko yero, kede ot noni kame ango atieko gero nin,

⁴⁹tim ber iwiny kwac gi kede ingangai gi i malo kabedo ni, di iko mino gi gikame kikwao.

⁵⁰Sasiro jo ni ki dub gi kame kitimo buti kede ki turo cik gi dedede; di iko mino jokwor gi bed kede mwolo but gi, tetekeny kur kiter gi kirac

⁵¹pien gin kibedo jo ni amaki, jo kame in bin ikwanyo ki Misiri, ki peko aliet bala mac me calaro nyonyo.

⁵²” Okwe Rwot Rubanga, cik yiti iwiny ingangai na kede me jo ni me Isirael, winy kwac gi i kabedo moroni kenekene kame gin kikwai iye.

⁵³Pien in itieko poko gin kikom jo dedede me wi lobo, pi gin bedo jo ni amaki, bala kame in bin icikere kede kibun ngatic ni Musa, i kare kame bin in ikwanyo kede joakwari wa ki Misiri.”

Ilega ka Sulumani me Ajikini



⁵⁴Aso, kakame Sulumani bin oko tieko kede mino ilega kede ingangai noni dedede but Rwot, en eko yai di eko cungo i nyim alutari kakame oudo eriondiko iye di etango cinge malo;

⁵⁵en ecungo di eko lamo winyo ne jo dedede me Isirael kame bin ocokere kunono. En ewaco kede dwan amalo be,

⁵⁶“Pak bed but Rwot, en ngat kame etieko mino jo mege me Isirael oudo wei di lubere kede gi dedede kame en bin ecikere iye. Gi dedede kame en bin ecikere iye likame tie moro akadi acel kalikame oko cobere i ekite kame en bin ewaco ne ngatic mere Musa.

⁵⁷Ango akwao Rwot Rubanga wa ebed kede wa, bala kame en bin ebedo tie kede joakwari wa; ango akwae kur ewek wa arabo ejal wa,

⁵⁸do emi cuny wa bed i kome, pi lubo yote mege dedede, kede pi gwoko cik mege, iswilia mege kede pwony mege, kame en bin eciko ne joakwari wa.

⁵⁹Ango akwao be iceng kede iwor Rwot Rubanga wa bed yutuno kope na nogi kame ango abako kede dogo bute. Doko akwae ekony jo mege me Isirael kede abaka gi, di lubere kede mit gi me ceng acelacel.

⁶⁰Manono bino mino jo dedede me wi lobo ngeo be Rwot en Rubanga, doko likame tie moro apat.

⁶¹Pi manono, wun poore igenunu Rwot Rubanga wa kede cunyu lung, di ilubunu iswilia kede cik mege, bala kame tin itienu timo.”

Kwero Tempulo

(2 lyutun 7.4-10)

⁶²Di do Abaka Sulumani kede jo dedede kame bin tie kede en, oko mino giayala but Rwot.

⁶³Sulumani oko mino bala giayala me nywak but Rwot doke tutumia ot are kiwie are (22,000), kede romini tutumia tol acel kede ot are (120,000). Aso, abaka kede jo dedede me Isirael oko bin kwero ot ka Rwot kamano.

⁶⁴Cenge nono da abaka oko kwero cuny diakal kame oudo tie i nyim ot ka Rwot. En emio giayala awanga kede giayala me alos kede kakamio me giayala me nywak kanono. En etimo kamanono pien alutari me nyonyo buronsi kame oudo tie i nyim Rwot oudo titidi twatwal likame eromo giayala nogi dedede.

⁶⁵Aso, Sulumani kede jo me Isirael dedede oko tedo ebaga pi ceng kanyaare. Twon ekodet me jo en kame bin tie kunono, jo kame bin owok cako ki Lebo Kamat tuno i esamai me ikor me Misiri.

⁶⁶I ceng me kanyauni mere Sulumani oko peruno jo, di jo oko dok i miere gi. Gin dedede bin kiko pwono abaka, di kiko dok i miere gi di kilelo, doko cuny gi di yom twatwal pi bero dedede kame Rwot otimo ne ngatic mere Daudi kede jo mege me Isirael.



1 Abakai 9

Rubanga bobo Oneeno but Sulumani

(2 lyutun 7.11-22)

- ¹Di do bin Sulumani otieko gero ot ka Rwot kede paco me abaka di eko cobo timo gi dedede kame oudo eiko,
- ²Rwot bobo oko neeno bute me tien me are, bala kame oudo etimo kede i Gibeon.
- ³Rwot oko waco ne be, “Ango atieko winyo ilega kede ingangai ni kame ikelo buta; ango atieko lonyo ot kame in igero noni di ako mine edoko mera atwal; ango abino gwoke, doko cunya bino bedo tie iye pi kare lung.
- ⁴Aso, ka in ibino timo tic na kede genere kede kuo kopooore, bala kame Daudi papa ni bin otimo, di itimo gi dedede kame ango aciko ni, di ilubo pwoony kede iswilia na,
- ⁵ango abino sipakino ajakanut ni i Isirael, bala kame bin ango acikere kede but papa ni Daudi di awaco ne be, ‘Likame in ibino bedo abongo ngat kame lunyo wangi bala abaka me Isirael.’
- ⁶Do ka in iko lokere tenge di iko weko luba, in arabo idwe ni, di likame ikounu gwoko cik kede iswilia na kame ango atieko mino wu, do di ikounu donyo timo tic ne rubangan apat di iworunu gi,
- ⁷ango abino kwanyo jo me Isirael tenge ki lobo kame ango atieko mino gi. Ot kame ango atieko lonyo pi bedo mera no da abino weko atatai; di jo me Isirael ko bino doko jo me anyera kede kame kocao i diere me atekerin dedede.
- ⁸Ot noni bino doko atukit me ameye; jo dedede kame beo i ngete bino uro twatwal di kijwire. Gin kibino waco be, ‘Pinyo bo komio Rwot otimo gikame cal kamanono ne lobo noni kede ot noni?’
- ⁹Di do gin kiko bino waco be, ‘Pien gin kiweko Rwot Rubanga gi, ngat kame bin okwanyo joakwari gi ki lobo me Misiri, di gin kiko dak but rubangan mogo icegun, di kiko donyo woro gi, doko di kitimo negi tic. Pi manono, Rwot otieko kelo can noni i kom gi.’ “

Sulumani Omoko Winyere gi kede Kiram

(2 lyutun 8.1-2)

- ¹⁰Gero ot ka Rwot kede me ka abaka bin otero ne Sulumani mwakini ot are.
- ¹¹Abaka Kiram me Taya en kame bin obedo cwano ne Sulumani ibaon me seda kede saipuras karacel kede saabu dedede kame cunye oudo mito me tic. Abaka Sulumani bin oko mino Kiram bomban ot are i lobo me Galilaya.
- ¹²Do kakame Kiram oko yai kede ki Taya pi bino neno bomban kame Sulumani oudo omie, gin likame kiko yomo cunye.
- ¹³Pi manono, en eko penyo Sulumani be, “Bomban kame cal kamege inogonogi kame in imia, Okwe omina?” Manono oko mino bin oko lwongo bomban nogo be Kabul tuno tin.



¹⁴Do Kiram oudo ocwao ne Abaka Sulumani kilo me saabu kame buco romo tutumia kany (5,000).

Tice Abeco Ace kame Sulumani Otimo

(2 lyutun 8.3-18)

¹⁵Abaka Sulumani bin otio kede jo kame bin kodio i tic tetek, pi gero ot ka Rwot kede paco mere amake, toro nget bomba i bad tetu kide, kede pi gero apama me bomba. En bin etio kede jo nogo da pi gero bomban me Kasor, Megido, kede Geser.

¹⁶(Parao abaka me Misiri oudo bin osuro bomba me Geser di eko mane eko wange dopodop. En bin eko neko da jo Kanan kame bin bedo i bomba nono, di eko mino bomba nono bala giamia me nyom but nyare kobedo dako ka Sulumani.

¹⁷Aso, Sulumani bin oko medo gero Geser.) En bin etio kede jo kame omako timo tic tetek nogo da pi medo gero Bet Koron Apiny,

¹⁸Balat, Tamar kame bin tie i wi tim me Yuda i lobo nono

¹⁹kede bomban dedede kame oudo en egwoko iye jame, bomban kame bin kogwoko iye cabalan mege, bomban kame jo aringo kede asigiran bin bedo iye. Sulumani bin oko cobo iik mere me gedo i Yerusalem, Lebanon, kede i lobere dedede kame en oudo epugo.

²⁰⁻²¹Jo kame Sulumani bin obedo mako tetek pi timo tice mege me gedo gin en jo kame bin jo me Isirael likame oko neko kikom jo Amor, jo Kiti, jo Perisi, jo Kibi, kede jo Yebu. Tuno tin pwodi ikwae gin tie ipasoi kamanono.

²²Do Sulumani bin likame omio dano moro me Isirael obedo epasoit; gin bin kibedo isirikalen, jodongo me tice mege, jotel me isirikalen mege, jotel me cabalan me yi kede jo kame ringo kede asigiran mege.

²³Jodongo kame bin lo tice me gedo ka Sulumani oudo tie tol kany kede ot kany (550), gin en nyampalan kame bin pugo jotic.

²⁴Sulumani bin otero nget bomba i bad tetu kide, ingei dako mere nyar ka Parao yai ki Bomba ka Daudi eko ot i ode kame Sulumani oudo ogero ne.

²⁵ Sulumani bin oko bedo mino giayala but Rwot tien adek i mwaka acel. En oudo emio giayala awanga kede giayala me nywak i wi alutari kame en bin egero ne Rwot. En bin ewango da odok angwe kur but Rwot. Manono en ekite kame en bin eko tieko kede tic me gero ot ka Rwot.

²⁶Abaka Sulumani bin oko cweno imerin atot atota Esion Geber, kame bin tie i nget Elot i dog Nam Akwar, i lobo me Edom.

²⁷Kiram bin oko cwano jotic mege kame oudo ipirana i kwang, pi ot timo tic i imerin nogo karacel kede jotic ka Sulumani.

²⁸Gin bin kiko ot i lobo me Opir, di gin kiko kelo ki kunono saabu kame buco romo kilo tutumia tomon kiwie kanyape (16,000), kame gin kiko mino Sulumani.



1 Abakai 10

Ot Weno ka Abaka Adako me Seba

(2 lyutun 9.1-12)

¹ Kakame abaka adako me Seba owinyo kede iruo me nying Sulumani, en eko ot bute Yerusalem pi tame kede peny mogo atek.

² En bin eko bino kede twon ekodet me jo kame bin gwoke, karacel kede aguraguran kame yeo jamini angwe kur, saabu kede kide me wel. Kakame en bin eko tuno kede but Sulumani, en eko pepenyo en peny dedede kame oudo tie i tam mere.

³ Sulumani bin oko dwoko peny mege dedede; likame bin tie peny moro akadi acel kame dwoko oko bwono abaka.

⁴⁻⁵ Wi abaka adako me Seba bin oko cungo kakame bin en etieko neno kede riekoka Sulumani dedede, ot kame bin egero, cam kame oudo otoko i wi emesa mere, kite kame jodongo me apugan mere oudo bedo kede, kite kame jotic mege gwoke kede, igoen kame gin bin kingapo, jotic kame oudo gwoke di etie camo ebaga, kede giayala awanga kame bin en emio i ot ka Rwot.

⁶ En eko waco ne abaka be, “Kop kame oudo ango awinyo i komi i lobo na, kop i kom riekoka ni kede jamini kame in itieko timo, obedo kop me ateni.

⁷ Do ango oudo likame ako yei kede kop nono tuno ango bino kan di ako neno kede wanga. Kop kame oudo owaco nango likame kong romo akadi dul mere da; riekoka kede lonyo nin kalamo gikame oudo otatamo nango.

⁸ Jo ni tin tie kede winyo benyo! Jotic ni tin tie kede winyo benyo, gin jo kame kitio buti nakanaka di kiwinyo kope ni me riekoka!

⁹ Pak bed but Rwot Rubanga ni, en ngat kame cunye obedo yom i komi di eko keti ibedo abaka me Isirael! Pien Rwot otieko maro jo me Isirael atwal, en etieko mini ibedo abaka pi timo gi me ateni kede kopooe.”

¹⁰ Di do en eko mino abaka saabu kame buco romo kilo tutumia kany (5,000), twon jamini angwe kur, kede kide me wel; likame bobo tie kare moro kame bin otero ne kede abaka Sulumani jamini angwe kur kame koromo poro kede kame abaka adako me Seba omie.

¹¹ Medo i wi manono, imerin ka Kiram kame bin yeo saabu kikelo ki Opir, bin oko kelo da ibaon me yat alemug kede kide me wel.

¹² Sulumani bin oko tic kede ibaon nogo me ipirin me ot ka Rwot, kede me ot ka abaka, kede da me timo adungun kede arigirigin ne jogoi were; likame bobo ibaon me yat alemug kame cal kede magonogo oko neeno tuno tin.

¹³ Abaka Sulumani bin oko mino abaka adako me Seba jamini dedede kame en bin enyuto be cunye oudo mito, medo i kom giamia kame en emie kikom abar mere bala abaka. Di do abaka adako nono kede jotic mege oko dok i lobo mere.

Abar ka Sulumani



(2 lyutun 9.13-29)

- ¹⁴Buli mwaka bin kokelo ne Abaka Sulumani saabu kame kalamo kilo tutumia ot are kiwie kany (25,000),
- ¹⁵di likame oribo iye saabu kame bin jocat wil kelo, kede kame bin wok kibun abakai me Arabia kede kibun jopug me lobo me Isirael.
- ¹⁶Sulumani bin oko timo ibukui alac tol are (200) kede saabu; ebuku acelacel bin otero saabu kame buco romo kilo kanyaare.
- ¹⁷En bin eko timo da ibukui atitino tol adek (300); ebuku acelacel bin otero saabu kame buco romo kilo are. Abaka bin oko mino koketo ibukui nogo i Ot me Abum me Lebanon.
- ¹⁸Abaka bin oko timo da kede lak liec kom adwong me ajakanut di eko puno kome kede saabu kame kojililo kiber.
- ¹⁹Kom me ajakanut nono bin tie kede kayito kanyape kame konyono pi yito i wie. Wi kom nono oudo oguraun i cen ngee, di etie kede bade kakame kogongo iye cing i ngete tuni tuni, doko i nget bade acelacel oudo cal me engu cungo iye;
- ²⁰doko da i nget kayito kanyape kame konyono pi yito i wi kom nono bin cal me inguon tomon kiwie are tie iye; engu acelacel i nget kayito acelacel tuni tuni. Likame pwodi tie kom moro kame kotimo i ajakanut moro kame cal bala manono.
- ²¹Ikopon ka Abaka Sulumani dedede bin kotimo kede saabu, kiton jamini kame bin kotio kede gi i Ot me Abum me Lebanon oudo kotimo kede saabu kame kojililo kiber; likame bin tie moro kame kotimo kede siliba, pien i kare ka Sulumani siliba oudo likame koterobala gi me wel.
- ²²Abaka bin tie kede imerin kame oto Tarusi karacel kede me ka Kiram. Ingei buli mwakini adek imerin ka Abaka bin dwogo di kikelo saabu, siliba, lak liece, icomio, kede alwaleko.
- ²³Abaka Sulumani oudo obaro doko di eriek kalamo abakai dedede me wi lobo.
- ²⁴Jo me wi lobo lung oudo cuny gi bin paro pi ot but Sulumani pi winyo kope mege me rieko kame Rubanga omie.
- ²⁵Jo dedede kame bin oko ot bute oudo tero ne giamia. Gin oudo kitero jamini apapat bala nat siliba kede saabu, igoen, jamini me yi, jamini angwe kur, asigiran, kede pundan. Manoni oudo timere buli mwaka.
- ²⁶Sulumani bin ocoko cabalan me yi tutumia acel kede tol ongwon (1,400) kede asigiran tutumia tomon kiwie are (12,000), kame bin en eko cibo i bomban apapat kede ace en bin eko dong kede gi i Yerusalem.
- ²⁷I kare me apugan mere, Abaka Sulumani bin oko mino siliba odure Yerusalem bala kide, kede ebao me yat seda en eko mino obedo tot atatai bala cukamori me dud mori me Yuda.



²⁸ Asigiran ka Sulumani bin kokelo ki Misiri kede ki Kue; jocat wil ka abaka bin wilo gi awila ki Kue.

²⁹ Cabala bin koromo kelo ki Misiri i wel me siliba akaya tol kanyape, do asigira acel bin kokelo i wel me siliba tol acel kede ot kany. Jocat wil ka abaka da ko bin cato gi but abakai dedede me jo Kiti kede but abakai me Siria.

1 Abakai 11

Sulumani Olokere Tenge kikut Rubanga

¹ Abaka Sulumani bin oko bedo maro mon atos me obukui ribo kede nyar ka Parao. En bin eko nyomo mon kikut jo Moab, Amon, Edom, Sidon kede Kiti,

² gin atekerin kame bin Rwot owaco ne jo me Isirael kop i kom gi be, “Likame ibinunu nyomere kede gin; pien ateteni gin kibino loko cunyu lubo rubangan gin” ; en magonogi kame Sulumani oko keto cunye maro.

³ Sulumani bin oko nyomo mon tol kanyaare koudo obedo anyira me abakai, kede da oudo en etie kede mon tol adek kame en ebedo kede gi abeda. Mon nogi bin oko loko cunye tenge kikut Rubanga,

⁴ pien tuno i kare kame do en bin eti kede, gin oudo kitieko loko cunye woro rubangan me obukui. En oudo do likame egenerere but Rwot Rubanga mere kede cunye lung bala kame bin papa mere Daudi oudo oketo kede cunye i kom Rubanga.

⁵ Sulumani bin obedo woro Asitate rubanga adako me jo Sidon, kede Milikom rubanga aneno rac me jo Amon.

⁶ Aso, Sulumani bin oko bedo timo gikarac i wang Rwot, di en likame eko lubo Rwot kede cunye lung, bala kame papa mere Daudi bin obedo timo.

⁷ En bin egero kabedo me woro Kemos, en rubanga aneno rac me Moab, kede kabedo me woro Molek, en rubanga aneno rac me Amon, i wi moru i bad tetu kide me Yerusalem.

⁸ En bin eko da timo kamanono ne mon mege dedede me obukui, en egero negi kabedere me mino giayala me odok angwe kur kede giayala angola but rubangan gin.

⁹⁻¹⁰ Akadi bed bala Rwot Rubanga me Isirael bin oneeno but Sulumani tien are di cike be kur ewor rubangan me obukui, Sulumani bin likame oko lubo kop ka Rwot, do en eko lokere tenge kikut. Manono oko mino Rwot olilo ne Sulumani

¹¹ di eko waco ne be, “Pien manoni obedo gikame oudo tie i tam nin di in likame iko gwoko isikan na kede iswilia na kame bin aciko ni, ango ateteni abino kwanyo ajakanut ki buti di ako mino but ngatic ni.

¹² Do pir papa ni Daudi, ango likame abino timo manoni i kare me kuo nin, do i kare me apugan ka wodi.



13Akadi kamanono da, ango likame abino kwanyo ajakanut lung ki cinge. Ango abino weko ne jo me ekeko acel pir ngatic na Daudi kede pir Yerusalem, bomba kame ango atieko yero.”

Jokwor ka Sulumani

14Di do Rwot bin oko mino Kadad, en dano kame bin yai ki paco me abaka me Edom, oko doko ngakwor ka Sulumani.

15Pien bin kakame Daudi omao kede Edom, di Joab ngatel me isirikalen mege bin oko ot kunono pi yiko jo kame bin koneko i yi, en bin eko neko cuo dedede i Edom.

16Joab kede jo me Isirael lung bin oko dong bedo Edom tieko duwete kanyape, tuno gin tieko neko cuo dedede.

17Do Kadad bin oko lwi di eko ringo Misiri kede jo Edom mogo kame bin obedo jotie ka papa mere. I kare nono oudo en pwodi etie atin awobi.

18Gin bin kiyai ki Midian di kiko ot paka tuno Paran; gin kiko yai ki Paran kede jo ace di kiko ot paka tuno Misiri but Parao abaka me Misiri. Parao bin oko mino Kadad ot, lobo kede cam.

19Parao bin oko bedo kede cuny me amara atek but Kadad, tetekeny en eko mino Kadad amin me dako mere, amin me Takepenes abaka adako, pi doko dako mere.

20Amin me Takepenes bin oko nywalo ne Kadad atin awobi kame nyinge Genubat, kame Takepenes bin oko pito i ot me abaka. Genubat bin oko dongo i ot ka Parao karacel kede idwe ka Parao.

21Kakame Kadad oko winyo kede i Misiri be Daudi oudo otieko to, kede be Joab ngatel me isirikalen mege da oudo otieko to, en bin eko waco ne Parao be, “Wek ango adok i piny wa.”

22Do Parao oko penye be, “Nyo kalikame ango ami en kame mio in imito dok i piny me tur wu?” Kadad oko gamo doge be, “In kenekene yei na aoti.”

23Rubanga bobo oko mino Reson wot ka Eliada da odoko ngakwor ka Sulumani. Reson bin oringo tenge kibus ngadwong mere, Abaka Kadadeser me Soba.

24En bin eko koko jo mogo bute di en eko doko ngatel me joyak. (Manoni bin otimere ingei Daudi bwono Kadadeser di eko neneko isirikalen mege.) Reson bin oko ot Damasiko kede ekodet mere di gin kiko donyo bedo kunono. Jo mege nogo bin oko mine edoko abaka me Siria.

25En bin eko bedo ngakwor me Isirael pi kare me kuo ka Sulumani lung, di ekelo negi peko bala kame Kadad da obedo timo; en bin ebedo kede acae i kom jo me Isirael di epugo Siria.

Cikere ka Rubanga but Yeroboam



26Yeroboam wot ka Nebat, dano me ekeko ka Epuraimu awok ki Sereda, ngatic ka Sulumani, kame toto mere oudo obedo apuserut kame nyinge Serua, bin oko jemo ne abaka.

27Man en itatam amako kop me jemo mere nono. Sulumani bin tie toro nget bomba i bad tetu kide me Yerusalem kede temuno apama me bomba.

28Yeroboam oudo obedo eponga atek i tic. Kakame Sulumani bin oneno kede be en oudo etek i tic, en eko kete telo tic kame bin omako iye jo tetek i adul me jo me ot ka Yosepu.

29I kare nono bin di Yeroboam tie yai ki Yerusalem, enabi Akija dano me Silo oko ude i yongayo. Akija oudo ongapo egoe anyen. Gin oudo kitie i yongayo ken gi jo are.

30Akija bin oko gonyo ekanso anyen kame oudo engapo di eko nyinyilo en i adulion tomon kiwie are.

31Di eko waco ne Yeroboam be, “Ter in adulion tomon, pien Rwot Rubanga me Isirael waco be, ‘Neningo, ango ayapuno kwanyo ajakanut ki cing Sulumani, di ako bino mino in pugo jo me ikekon tomon.

32Sulumani bino dong kede jo me ekeko acel pir ngatic na Daudi kede pir Yerusalem, bomba kame ango atieko yero kikom bomban me ikekon me Isirael lung.

33Ango abino timo manoni piento Sulumani otieko daga di eko lunyo woro Asitate rubanga adako me jo Sidon, Kemos rubanga me Moab, kede Milikom rubanga me jo Amon. En likame ebedo lubo yote na, doko likame ebedo timo gikame poore i wanga, kede da en likame egwoko pwoy na kede iswilia na, bala kame bin papa mere Daudi obedo timo.

34Akadi kamanono da, ango likame abino kwanyo ajakanut lung ki cinge, do ango abino mine ebedo ngapug pi kare me kuo mere lung, pir ngatic na Daudi kame bin ango ayero di en eko bedo gwoko cik na kede iswilia na.

35Ango abino kwanyo ajakanut kibus wode di ako mino in Yeroboam ibedo ngapug me ikekon tomon.

36Do ango abino mino wot ka Sulumani pugo ekeko acel, tetekeny ngatic na Daudi bed tie kede akware kame pugo i nyima i Yerusalem, bomba kame ango ayero pi bedo mera.

37Ango abino mino in Yeroboam ibedo abaka me Isirael, di iko bino pugo adulion dedede kame cunyi mito.

38Ka in ibino lubo gi dedede kame ango aciko ni, di iko lubo yote na, kede iko bedo timo gikame poore i wanga pi gwoko iswilia na kede cik na, bala kame bin Daudi ngatic na obedo timo, ango abino bedo tie kedi, di ako bino mini ibedo abaka me Isirael, kede ako neno be ikwae ni en kame lunyo wangi, bala kame atieko timo ne Daudi.



³⁹Ango abino mino ikwae ka Daudi alola pi dub ka Sulumani, do likame pi kare dedede.’ “

⁴⁰Aso, Sulumani bin oko tamo mito neko Yeroboam, do Yeroboam oko lwi eringo Misiri but abaka Sisak, di en eko dong bedo kunono tuno Sulumani to.

To ka Sulumani

(2 lyutun 9.29-31)

⁴¹Gi dedede kame bin Sulumani otimo, tice mege, kede rieke mere, gin dedede kowandiko gi i *Itabu amako Tice ka Sulumani*.

⁴²En bin epugo Isirael lung i Yerusalem pi mwakini ot ongwon.

⁴³Sulumani bin oko to di oko yike i nget joakwari mege i Bomba ka Daudi, di wode Rekoboam oko lunyo wange bala abaka.

1 Abakai 12

Jo me Isirael atie i Bad tetu Malo Ojemo

(2 lyutun 10.1-19)

¹Rekoboam oko ot Sekem, pien jo dedede me Isirael oudo ocokere kunono pi cibe doko abaka.

²Kakame Yeroboam wot ka Nebat owinyo kede kop noni di oudo etie Misiri kakame oudo eringo iye kibus abaka Sulumani, en eko dong bedo Misiri.

³Jo me bad tetu malo me Isirael oko lwonge, di Yeroboam kede ekodet me jo me Isirael oko ot but Rekoboam di kiko waco ne be,

⁴” Papa ni Sulumani bin otero wa kirac, emio wa yeno twon peko. Nan in jajaro peko kame en emio wa yeno nono, di wan oko bino tic nin.”

⁵En eko waco negi be, “Tiekunu ceng adek di ikounu dwogo buta.” Aso jo oko yai kioto.

⁶Di abaka Rekoboam oko pepenyo tam kibus joadongo kame oudo mio papa mere Sulumani tam i kare kame oudo ekuo kede be, “Tam nyo kame imianu pi dwoko ne jogi?”

⁷Gin kiko dwoko ne be, “Ka in imito timo ne jogi tic kiber, dwok negi kop aber i kom gikame kikwai iye, di gin kiko bino tic nin nakanaka kede wor.”

⁸Do en eko dagi lubo tam kame joadongo omie, di eko ot penyo tam kibus awobe kame en edongo kede gi di nan kiko doko jo kame mie tam.

⁹En epenyo gi be, “Tam nyo kame imianu pi dwoko ne jo kokwaa pi jajaro negi peko kame nan kitie yeno?”

¹⁰Gin kiko waco ne be, “Oti iwac ne jo kopenyi nogo be, ‘Lweta atidi dwong kalamo pier papa na.



¹¹Papa na omio wu yeno peko, do ango abino mino wu yeno peko adwong kalamo. En edao wu kede pobo, do ango abino bungo wu kede ebela me lilim.’ “

¹²Aso, Yeroboam kede jo apat dedede oko dok but Rekoboam ingei ceng adek, bala kame en oudo ewaco negi.

¹³Abaka oko yamo kede jo kede dwan ager; en edagi tic kede tam kame joadongo oudo omie,

¹⁴di eko lokere yamo negi kop kame lubere kede tam kame awobe omie. En ewaco negi be, “Papa na oudo omio wu yeno peko, do ango abino mino wu yeno peko adwong kalamo. En edao wu kede pobo, do ango abino bungo wu kede ebela me lilim.”

¹⁵Abaka bin likame oko winyo kwac me jo pien manono oudo obedo alokaloka kame Rwot oudo tie kelo pi cobo kop mere kame oudo ewaco ne Yeroboam wot ka Nebat ki dog Akija me Silo.

¹⁶ Kakame jo dedede me Isirael oneno kede be abaka odagi winyo kwac gi, gin kiko dwoko ne abaka be, “Wan oli kede iner moro i ot ka Daudi; likame tie gimoro kame wan otwero lunyo amakere kede wot ka Yese. Jo me Isirael, odokunu i miere wa! Rekoboam do pug jo mege me ot ka Daudi.” Aso, jo me Isirael oko dok i iemai gi.

¹⁷Di Rekoboam oko donyo pugo jo kame bedo i bomban me Yuda kenekene.

¹⁸Abaka Rekoboam oko cwano Adoniram, en ngat kame oudo daro jo kame kodio timo tic tetek, but jo me Isirael, do gin kiko didipo en kede kide tuno to. Abaka Rekoboam oko susunyo yito i cabala mere di eko ringo Yerusalem.

¹⁹Cako i kare nono tuno tin jo me Isirael oko bedo jemo ne apugan me ot ka Daudi.

²⁰Kakame jo me Isirael owinyo kede be Yeroboam oudo odwogo ki Misiri, gin kiko lwonge i cokere di kiko cibe edoko abaka me Isirael. Likame tie ngatamoro oko doko yei apugan me ot ka Daudi kwanyo kenekene jo me ekeko ka Yuda.

Kop kame Semaya Omurao

(2 lyutun 11.1-4)

²¹Kakame Rekoboam otuno kede Yerusalem, en eko koko jo dedede me ekeko ka Yuda kede me ka Benjamin, gin dedede isirikalen abeco tutumia tol acel kede ot kanyauni (180,000). En oudo emito ot yi kede atekerin atie i bad tetu malo pi dwoko loc mere.

²²Do Rubanga oko waco ne enabi Semaya

²³pi ot waco ne Abaka Rekoboam me Yuda, en wot ka Sulumani, kede ne jo dedede me ikekon ka Yuda kede me ka Benjamin, kede ne jo apat dedede be Rwot owaco be,

²⁴” Kur isurunu joawade wu, gin jo me Isirael; wun dedede dokunu i miere wu, pien gi kotimere obedo iik nango.” Aso, gin kiko yei winyo kop ka Rwot di kiko dok i miere gi.



Yeroboam Olokere Tenge kibut Rubanga

²⁵Abaka Yeroboam me Isirael oko celo bomba me Sekem i piny me imukuran me Epuraimu di eko donyo bedo iye. Di eko yai ki kanono di bobo eko ot celo bomba me Penuel.

²⁶Di Yeroboam oko waco kene be, “Ajakanut noni cengemogo romo lokere dok i ot ka Daudi.

²⁷Ka jo omeede ot nakanaka Yerusalem pi mino Rwot giayala i tempulo, gin cengemogo bobo kibino dok i cing ngadwong gi, en Abaka Rekoboam me Yuda, di kiko bino neka.”

²⁸Aso, abaka oko tamo i kom kop nono di eko cweno roce are kede saabu. En eko waco ne jo be, “Itiekunu bedo wire ot Yerusalem pi kare koromo. Wun jo me Isirael nan rubangan wu do ige kokwanyo wu ki lobo me Misiri!”

²⁹En eko cibo acel Betel kede ocelu eko cibo Dan.

³⁰Manoni oko doko dub, pien jo oko donyo ot woro caljwogi nogi i Betel kede i Dan.

³¹En bobo eko gero ude me woro rubangan i wi imukuran, di eko yero josaseredoti kikom jo me ikekon apat, do weko kikom Jolebi.

³²Yeroboam oko cibo ceng me kwero ebaga i buto duwe tomon kiwie kany me duwe me kanyauni, di eporere kede ebaga kame oudo kokwero i Yuda. En eko mino giayala i wi alutari i Betel but roce kame oudo ecweo. Eko cibo josaseredoti i kabedere kame en oudo egero i wi imukuran me woro rubangan.

³³En eko ot i alutari kame oudo etimo Betel, eko mino giayala i buto duwe tomon kiwie kany me duwe me kanyauni, en ceng kame en emoko kede wie kene pi jo me Isirael kwero iye ebaga.

1 Abakai 13

¹Kakame Yeroboam oudo tie cungo kede i nget alutari pi dunyo odok angwe kur, Rwot oko ciko enabi oko yai ki Yuda di eko ot Betel kunono,

²di eko waco kop i kom alutari nono be, “Okwe alutari, alutari, Rwot owaco kop i komi kaman: kobino nywalo i ot ka Daudi atin kame nyinge Yosia. En ebino ngongolo i wii kanoni josaseredoti kame timo tic i ude kame koworo kiye rubangan atie i wi imukuran, gin jo kame dunyo odok angwe kur i wii, di oko bino wango cogere me jo i wii kanoni.”

³Enabi nono oko mino gianyuta amoko kop mere ceng nono be, “Man en gikame bino nyuto be Rwot en kowaco kop noni kibuta: alutari noni bino tyaikin piny di buru kame tie iye ko bino welere.”

⁴Kakame Abaka Yeroboam owinyo kede kop kame enabi owaco, en eko cimo enabi nono di elelemo be, “Makenu!” Do bade koudo erieo me cimo enabi nono oko mito, omio likame oudo doko etwero dole.



⁵Alutari da oko tyaikin piny di buru oko welere, bala kame enabi oudo owaco i nying Rwot.

⁶Abaka Yeroboam oko waco ne enabi nono be, “Leg but Rwot Rubanga ni pira, tetekey bada dok ber!” Enabi nono oko lego but Rwot, di bad abaka oko doko ber.

⁷Di abaka oko waco ne enabi nono be, “Oupere oot tura oko cam; angu abino mini giamia moro.”

⁸Do enabi nono oko dwoko be, “Akadi di imia dul me ajakanut ni, likame angu abino upere kedi, akadi camo gimoro amoto mato pii i kabedo noni.

⁹Pien Rwot ocika be kur acam gimoro akadi mato pii da, doko da be kur adok paco di alubo yongayo kame oudo awak kiye.”

¹⁰Aso, en eko dok di elubo yongayo apat.

Enabi Oti me Betel

¹¹I kare nono oudo tie enabi oti koudo bedo Betel. Awobe mege oko ot waco ne gikame enabi kowok ki Yuda otimo i ceng nono, kede gikame ewaco ne Abaka Yeroboam.

¹²Papa gi oko penyo gi be, “Elubo yongayo mene?” Gin kiko nyuto ne yongayo kame enabi kowok ki Yuda olubo me dok.

¹³En eko waco ne awobe mege be, “Tweunu na abeno ingei punda.” Aso, gin kiko tweno ne abeno ingei punda di eko yito iye eko cako ringo kede.

¹⁴En eko cako wapo enabi nono di eko ude di etie bedo i dud yat oak. En eko penye be, “In en enabi kowok ki Yuda?” En eko dwoko be, “Ebo, angu inononi.”

¹⁵Enabi oti nono oko waco ne enabi me Yuda be, “Upere keda oot paco oko cam.”

¹⁶Do enabi kowok ki Yuda oko dwoko be, “Likame angu akaruno dok kedi, akadi camo gimoro amoto mato pii i kabedo noni,

¹⁷pien Rwot ocika be kur acam gimoro, akadi mato pii i kabedo noni, doko da be kur adok di alubo yongayo kame awak kiye.”

¹⁸Di enabi oti me Betel oko waco ne be, “Ada abedo enabi bala in; doko da Rwot ocwao malaika waco na be apoore dwoki tura di iko cam kede iko mato pii.” Do en oudo etie ngale.

¹⁹Aso, enabi kowok ki Yuda oko dok kede en, di eko cam kede mato pii i ode.

²⁰Kakame oudo kitie cam kede, Rwot oko yamo ki dog enabi me Betel

²¹but enabi kowok ki Yuda be, “Rwot owaco be in idagi lubo kop mere, pien in dagi timo gikame en eciko ni.



²²Do akaka manono, in iko lokere dwogo di iko cam kede mato pii i kabedo kame en eciki be kur icam kiye, akadi mato kiye pii. Pi manono, kobino neki di likame oko bino yiko komi i ates me turu.”

²³Ingei en tieko cam kede mato pii, enabi me Betel oko tweno abeno ingei punda ne enabi me Yuda.

²⁴Kakame oudo en etie ot kede, en eko riamo kede engu i yongayo di engu oko neke. Kome oudo tie buto i yongayo kanono, di punda kede engu cungo i ngete.

²⁵Jo mogo oko beo kunono di kiko neno kome di tie buto i yongayo di engu tie cungo i ngete. Gin kiko tero kop nono i bomba me Betel.

²⁶Kakame enabi koudo odwoke cen owinyo kede kop nono, en eko waco be, “Manono en enabi kodagi winyo kop ka Rwot; manono en komio Rwot omie but engu, di engu oko nyinyilo en tuno neke bala kame oudo Rwot owaco ne.”

²⁷Di eko waco ne awobe mege be, “Ketunu na abeno ingei punda.” Gin kiko timo kamanono,

²⁸di en eko ringo kede punda di eko udo di kom enabi tie buto i yongayo, di punda kede engu tie cungo kanono. Engu oudo likame ocamo kome akadi suro punda mere da.

²⁹Enabi oti nono oko kwanyo kom enabi me Yuda, eko kete i wi punda mere eko dwoke i bomba pi koke kede pi yike.

³⁰En eko yiko kome i ates mere amake, di gin kiko donyo koko be, “Okwe can, kom omin wa!”

³¹Ingei en tieko yike, eko waco ne awobe mege be, “Kame ango ato, yikanu i ates kame koyiko iye enabi noni; pielunu cogere na buti i nget mege.

³²Pien kope ka Rwot kame en ewaco i kom alutari me Betel, kede i kom ude me woro rubangan atie i bomba me Samaria ateteni bino cobere.”

Dub Adwong kame Yeroboam Otimo

³³Akadi ingei gi noni timere da, Yeroboam pwodi likame oko yei lokere tenge ki yongayo mere arac, do en eko meede yero jo ace kikom jo di ecibo gi doko josaseredoti atimo tic i abilan kame en egero. En eko bedo kwero pi doko ngasaseredoti ngatamoroni kenekene kame oudo tie kede mit me doko ngasaseredoti.

³⁴Tim noni oko doko dub i ot ka Yeroboam, omio Rwot oko muducaro ture atwal atwala ki wi lobo.

1 Abakai 14

To ka Wot ka Yeroboam

¹I kare nono tuo oko mako Abija wot ka Yeroboam.



²Yeroboam oko waco ne dako mere be, “Jujulo komi tetekeny kur ngatamoro ngei, di iko ot Silo kakame enabi Akija bedo iye, en ngat kame oudo ewaco be ango apoore doko abaka me Isirael.

³Ter ne mugati tomon, kede kek mogo kede cupa me mokic; en ebino waco ni gikame bino timere ne atin wa.”

⁴Dako ka Yeroboam oko timo kamanono, en eoto Silo i paco ka Akija. Akija oudo do likame neno piny pien tio oudo omio wange odoko mwadamwada.

⁵Do Rwot oko waco ne Akija be, “Dako ka Yeroboam tie bino buti penyo kop i kom atin mere, pien atin nono tuwo.” Di Rwot oko waco ne Akija kop kame epoore dwoko ne. Kakame dako ka Yeroboam otuno kede, en eko mire bala ebedo dano apat.

⁶Do kakame Akija owinyo kede twomere me tiene kakame oudo etie donyo kede i ekeko, en eko waco ne be, “Woki, dako ka Yeroboam; pinyo komio itie mire be in dano apat? Ango atie kede kop kalikame ber piri.

⁷Oti iwac ne Yeroboam be Rwot Rubanga me Isirael owaco be, ‘Ango ayeri kikom jo di ako kiarao in idoko ngatel me jo na me Isirael.

⁸Ango akwanyo ajakanut ki cing ikwae ka Daudi di ako mini. Do likame in ibedo cal kede ngatic na Daudi, ngat kogwoko cik na eko lubo kop na kede cunye dedede, di etimo gikame ber kenekene i wanga.

⁹Do in itimo gikarac kalamo jopug ace apat kame in ilubo; in itieko daga di iko wango cunya i yore me timo piri cal me rubangan me awora.

¹⁰Pi manono, ango abino mino gikarac timere i odi. Ango abino neneko ikwae ni acuo dedede, kobedo ipaso amoto kalikame obedo ipaso. Abino wearo jo me odi bala kame dano wango kede woyo tuno en tiek pitipit.

¹¹Jo ni kame bino to i bomba igwogin en kame bino camo; kede jo ni kame bino to i calere winy en kame bino camo. Ango Rwot atieko waco.’ “

¹²Akija oko waco ne dako ka Yeroboam be, “Pi manono yai iot turi, cucuto di in idonyo i bomba wodi bino to.

¹³Jo dedede me Isirael bino koke di kiko yike. Piento en kene kikom jo me ot ka Yeroboam en kame kobino yiko, piento en kene kikom jo me ot ka Yeroboam en kame cuny Rwot Rubanga me Isirael yom i kome.

¹⁴Rwot bino cibo abaka me Isirael oyotoyot, kame bino jiko ot ka Yeroboam.

¹⁵Rwot bino tidilo Isirael, di kom gi ko donyo miel bala otol kame pure i pii. En ebino puto jo me Isirael ki lobo aber noni kame bin en emio joakwari gi, di eko bino sarakino gi kalamo ecilet me Eupurate, pien gin kiwango cunye i yore me cweno cal me rubanga adako anyinge Asera.

¹⁶En ebino jalo Isirael pi dub ka Yeroboam kame en etimo, kede kame emio jo me Isirael otimo.”



¹⁷Di dako ka Yeroboam oko yai edok Tirisa. Cucuto di etuno i paco, atin oko to.

¹⁸Jo dedede me Isirael oko koke bala kame Rwot oudo owaco ki dog ngatic mere enabi Akija.

To ka Yeroboam

¹⁹Gi dedede kame Abaka Yeroboam otimo, epone kame eyi kede, kiton epone kame epugo kede, kowandiko gi i *Itatam amako Abakai me Isirael*.²⁰Yeroboam bin opugo bala abaka pi mwakini ot are kiwie are, eko to di oko yike, di wode Nadab oko lunyo wange.

Abaka Rekoboam me Yuda

(2 lyutun 11.5—12.15)

²¹Rekoboam wot ka Sulumani oudo tie kede mwakini ot ongwon kiwie acel i kare kame edoko kede ngapug me Yuda, di eko pug pi mwakini tomon kiwie kanyaare di etie Yerusalem, en bomba kame Rwot oudo oyoero ki adulion dedede me Isirael pi jo wore kiye. Toto me Rekoboam oudo nyinge Naama, dako me Amon.

²²Jo me Yuda otimo gikarac i nyim Rwot; gin kiwango cunye pi dub kame gin kitimo, dub akalamo kame joakwari gi oudo otimo.

²³Pien gin kigero abilan me woro rubangan i wi imukuran kede i dud yen koduko, di kiko sisipo ipirin me kide kede cal ka Asera me awora.

²⁴Doko oudo kitie kede cuo kede mon kame jo buto kede gi i abilan kame kigero nogo. Jo me Yuda oudo timo jamini areco dedede kame jo me lobo nono oudo timo, jo kame Rwot oriamo ki kanono i kare kame jo me Isirael obino kede.

²⁵I mwaka me kany me apugan ka Rekoboam, Abaka Sisak me Misiri oko suro Yerusalem.

²⁶En eko tero abar dedede me tempulo kede me paco ka abaka. Doko da eko tero ibukui dedede kame Sulumani oudo otimo kede Saabu.

²⁷Aso, Abaka Rekoboam oko timo ibukui me nyonyo buronsi, di eko mino gi i cing jo kame daro ekeko me ot ka abaka.

²⁸Tien acelacel kame Rekoboam oudo tie ot kede i tempulo, jodar oudo mako ibukui nogo i cing gi, do ingei manono oudo kiko dwoko gi i agola me gwoko jame.

²⁹Gi dedede ace kame Abaka Rekoboam otimo kowandiko gi i *Itatam amako Abakai me Yuda*.³⁰I kare noni dedede Rekoboam kede Yeroboam oko bedo yi nakanaka.

³¹Rekoboam oko to di oko yike i nget joakwari mege i Bomba ka Daudi. Nying toto mere oudo Naama dako me Amon. Wode anyinge Abijam en oko lunyo wange bala abaka.

1 Abakai 15

Abaka Abija me Yuda

(2 lyutun 13.1—14.1)



- ¹mwaka me tomon kiwie kanyauni me apugan ka Abaka Yeroboam wot ka Nebat me Isirael, Abija oko doko abaka me Yuda,
- ²di eko pug ki Yerusalem pi mwakini adek. Toto mere oudo nyinge Maka nyar ka Abisolom.
- ³En etimo dub dedede kame papa mere oudo otimo, doko cunye oudo likame tie kede ateni me lubo kop ka Rwot Rubanga mere bala bin kwaru mere Daudi.
- ⁴Do pi Daudi, Rwot Rubanga mere oko mine awobi kame lunyo wange pugo Yerusalem kede pi mine cungo di etek.
- ⁵Pien Daudi oudo obedo timo gikame poore i nyim Rwot, di likame eko weko timo gimoro kame en eciko ne pi timo i kare me kuo mere lung, kwanyo kenekene i kop ka Uria Ngakiti.
- ⁶Yi kame oudo ocakere i dierediere ka Rekoboam kede Yeroboam oko meede i kare me kuo ka Abija dedede.
- ⁷Gi dedede ace kame Abija otimo kowandiko gi i *Itabu me Itatam amako Abakai me Yuda*. Yi oko bedo tie i dierediere ka Abija kede Yeroboam.
- ⁸Abija oko to di oko yike i nget joakwari mege i Bomba ka Daudi, di wode Asa oko lunyo wange bala abaka.

Abaka Asa me Yuda

(2 lyutun 15.16—16.6, 11-13)

- ⁹Asa bin oko doko abaka me Yuda i mwaka me ot are me apugan ka Yeroboam bala abaka me Isirael,
- ¹⁰di eko pug ki Yerusalem pi mwakini ot ongwon kiwie acel. Da mere nganywal papa mere oudo obedo Maka nyar ka Abisolom.
- ¹¹Asa bin oko timo gikame oudo ber i nyim Rwot bala bin kwaru mere Daudi.
- ¹²En eriamo tenge cuo kede mon kame oudo jo buto kede gi i kabedo kame oudo koworo kiye rubangan, di eko kwanyo tenge caljwogi dedede kame joakwari mege oudo otimo.
- ¹³En doko da eko kwanyo tenge da mere Maka ki ruom mere me toto me abaka, piento en oudo etimo cal aneno rac me rubanga adako anyinge Asera; Asa bin oko totongo cal nono piny di eko wange i Aditot me Kideron.
- ¹⁴Do en likame eko dudubo abilan me woro rubangan. Bed bala kamanono da, cunye oudo tie kede ateni me lubo kop ka Rwot i kare me kuo mere dedede.
- ¹⁵En eko tero i tempulo jamini kame en kede papa mere oudo kikwero but Rwot; etero jamini kame kocweo kede saabu kede siliba.
- ¹⁶Abaka Asa me Yuda kede Abaka Basa me Isirael oko bedo yi pi kare lung kame oudo gin kibedo kede jopug.



¹⁷Abaka Basa me Isirael oko suro Yuda, di eko cako celo bomba me Rama kede apama atek, pi gengo jo donyo Yuda but Abaka Asa, kede wok kiye.

¹⁸Di Asa oko kwanyo saabu kede siliba dedede kame oudo odong i tempulo kede i ot ka abaka, di eko mino gi i cing jotic mege. En eko cwano gi but Abaka Benekadad wot ka Tabarimon, wot ka Kesion me Aram, kame oudo bedo Damasiko pi waco ne be,

¹⁹” Poore wan okodere kedi, bala kame bin papa na kede papa ni otimo. Nan ango acwao ni siliba kede saabu noni bala giamia buti. Oti itur kodere ni kede Abaka Basa me Isirael, tetekeny ekaruno kwanyo isirikalen mege ki adul na.”

²⁰Benekadad oko winyo kop ka Abaka Asa, di eko cwano isirikalen mege suro bomban me Isirael. En eko mako bomban me Iyon, Dan, Abel Bet Maka, adul kame tie i nget nam me Galilaya, kede adul me Naputali dedede.

²¹Kakame Basa owinyo kede kop nono, en eko jiko gero bomba me Rama di eko donyo bedo Tirisa.

²²Di Abaka Asa oko mino kop i Yuda dedede kame ciko jo dedede abongo weko ngatamoro, pi kwanyo ki Rama kide dedede kede ibaon kame Basa oudo tie tic kede me gedo. Abaka Asa oko tic kede gi me gero Misipa, kede Geba atie i adul ka Benjamin.

²³Gi dedede ace kame Asa otimo, teko mere me yi, kede bomban kame egero kowandiko gi i *Itabu me Itatam amako Abakai me Yuda*. Do i kare kame eti kede, tuwo oko mako tiene.

²⁴Asa oko to di oko yike i nget joakwari mege i Bomba ka Daudi, di wode Yekosapat oko lunyo wange bala abaka.

Abaka Nadab me Isirael

²⁵I mwaka me are me apugan ka Abaka Asa me Yuda, Nadab wot ka Abaka Yeroboam oko doko abaka me Isirael di eko pug pi mwakini are.

²⁶Eda eko timo gikame rac i nyim Rwot, en elubo ekite ka papa mere di eko mino jo me Isirael odubo.

²⁷Basa wot ka Akija, dano me ekeko ka Isakar, oko bedo kede iik arac i kom Nadab. Kakame Nadab kede isirikalen mege oudo ooto suro kede bomba me Gibeton i Pilistia, Basa oko neko Nadab kunono.

²⁸Manoni bin otimere i mwaka me adek me apugan ka Asa bala abaka me Yuda. Di do Basa oko lunyo wang Nadab bala abaka me Yuda.

²⁹Cucuto di bin en edoko abaka, en eko neneko jo dedede me ot ka Yeroboam. Di lubere kede kop kame Rwot oudo owaco ki dog ngatic mere Akija me Silo, bin oko neneko jo dedede me ot ka Yeroboam.



³⁰Manoni otimere pi dub ka Yeroboam kame en etimo, kede kame emio jo me Isirael otimo, di manono oko wango cuny Rwot Rubanga me Isirael.

³¹Gi dedede ace kame Nadab otimo kowandiko gi i *Itabu me Itatam amako Abakai me Yuda*.³²Abaka Asa me Yuda kede Abaka Basa me Isirael oko bedo yi nakanaka i kare dedede kame oudo kitie kede i apugan.

Abaka Basa me Isirael

³³I mwaka me adek me apugan ka Abaka Asa me Yuda, Basa wot ka Akija oko doko ngapug me Isirael, di eko pug di ebedo Tirisa pi mwakini ot are kiwie ongwon.

³⁴Eda eko timo gikame rac i nyim Rwot, en elubo ekite ka Yeroboam di eko mino jo me Isirael odubo.

1 Abakai 16

¹Rwot oko waco ne enabi Yeku wot ka Kanani kop i kom Basa be,

²” In oudo kony ni li, do ango ako tingi malo ako mini ibedo ngatel ka jo na me Isirael. Do nan ida idubo bala Yeroboam iko mino jo na da otimo dub. Dub gi nono owango cunya;

³pi manono, abino muducaro in kede jo me odi dedede bala kame atimo ne Yeroboam wot ka Nebat.

⁴Dano ni moro kame bino to i bomba igwogin en kame bino camo; do dano ni moro kame bino to tenge i calo winy en kame bino camo.”

⁵Gi dedede ace kame Basa otimo, kede teko mere me yi, kowandiko gi *iItabu me Itatam amako Abakai me Isirael*.⁶Basa oko to di oko yike i nget joakwari mege i Tirisa, di wode Ela oko lunyo wange bala abaka.

⁷Kop kame Rwot owaco i kom Basa kede jo me ode ki dog enabi Yeku oudo ewaco pi dub kame Basa otimo i nyime. En oudo ewango cuny Rwot, likame pi raco kame en etimo bala bin Yeroboam, do da piento en eneneko jo me ot ka Yeroboam.

Abaka Ela me Isirael

⁸I mwaka me ot are kiwie kanyape me apugan ka Abaka Asa me Yuda, Ela wot ka Basa oko doko abaka me Isirael di eko pug ki Tirisa pi mwakini are.

⁹Do ngatic mere Simiri, ngadwong me isirikalen koudo lo dul me cabalan me abaka, oko bedo kede iik arac i kome. Ceng moro acel i Tirisa, Ela oudo tie amera i ot ka Arasa, en ngat koudo lo paco me abaka i Tirisa.

¹⁰Simiri oko donyo i ot kanono di eko neko Ela, di do en eko lunyo wange bala ngapug. Manoni otimere i mwaka me ot are kiwie kanyaare me apugan ka Asa me Yuda.

¹¹Cucuto di Simiri obedo i kom me pug bala abaka, en eko neneko jo dedede me ot ka Basa; likame eweko akadi icuo acel kobedo wad mere amoto adieru mere.



¹²Aso, di lubere kede kop kame Rwot oudo owaco i kom Basa i dog enabi Yeku, Simiri oko neneko jo dedede me ot ka Basa.

¹³Pien tim gi me woro caljwogi, kede kite kame oudo kimio kede jo me Isirael otimo dub, Basa kede wode Ela oudo oko wango cuny Rwot Rubanga me Isirael.

¹⁴Gi dedede ace kame Ela otimo kowandiko gi i *Itabu me Itatam amako Abakai me Isirael*.

Abaka Simiri me Isirael

¹⁵I mwaka me ot are kiwie kanyaare me apugan ka Abaka Asa me Yuda, Simiri oko doko abaka me Isirael di eko pug pi ceng kanyaare di ebedo Tirisa. Isirikalen me Isirael oko gero kimere gi luko bomba me Gibeton i Pilistia.

¹⁶Kakame gin kiko winyo kede be Simiri oudo otimo iik di eko neko Abaka Ela, gin di do kiko cibo Omiri ngat koudo obedo ngadwong gi me isirikalen odoko abaka me Isirael esawa nono ki kanono.

¹⁷Aso, Omiri oko yai ki Gibeton karacel kede isirikalen me Isirael di gin kiko ot luko bomba me Tirisa.

¹⁸Kakame Simiri oneno kede be oudo kotieko mano bomba, en eko ot i apama atek me yie kame celo paco me abaka di eko cwinyo paco me abaka karacel kede eda, di eko to.

¹⁹Manoni otimere pi dub mege i nyim Rwot. En etimo gikarac i nyim Rwot; elubo ekite ka Yeroboam di eko mino jo me Isirael odubo.

²⁰Gi dedede ace kame Simiri otimo, karacel kede iik arac kame en etimo, kowandiko gi i *Itabu me Itatam amako Abakai me Isirael*.

Abaka Omiri me Isirael

²¹Di do jo me Isirael oko pokere tien are; dul me jo oudo mito be Tibini wot ka Ginat bed abaka, kede dul me jo oudo mito Omiri.

²²Do jo kame oudo mito Omiri oko bwono jo kame oudo mito Tibini wot ka Ginat; Tibini oko to di Omiri oko doko abaka.

²³I mwaka me ot adek kiwie acel me apugan ka Abaka Asa me Yuda, Omiri oko cako pugo Isirael di eko pug pi mwakini tomon kiwie are. Mwakini kanyape me agege en epugo di ebedo Tirisa,

²⁴di eko wilo emukura me Samaria kede sente me siliba akaya tol kanyape kibun icuo anyinge Semer, en oudo won emukura nono.

²⁵Omiri oko timo gikame rac i nyim Rwot; en etimo gikame rac kalamo abakai apat kame en elubo.

²⁶Bala bin Yeroboam, en ewango cuny Rwot Rubanga me Isirael i yore me en timo dub, kede da en mino jo me Isirael timo dub kede donyo woro caljwogi.



²⁷Gi dedede ace kame Omiri otimo, kede teko me yi kame en enyuto, kowandiko gi i *Itabu me Itatam amako Abakai me Isirael*.²⁸Omiri oko to di oko yike Samaria, di wode Akab oko lunyo wange bala abaka.

Abaka Akab me Isirael

²⁹I mwaka me ot adek kiwie kanyauni me apugan ka Abaka Asa me Yuda, Akab wot ka Omiri oko doko abaka me Isirael, di en eko pug i Samaria pi mwakini ot are kiwie are.

³⁰Akab oko timo gikarac i nyim Rwot kalamo abakai ace apat kame en elubo.

³¹En elubo ekite ka Yeroboam wot ka Nebat; do arac kalamo en eko nyomo Jesebel nyar ka Abaka Etebaal me Sidon, di do eko donyo woro Baal.

³²En eko gero ne Baal tempulo i Samaria, di eko gero ne iye alutari.

³³En doko eko sipo da epir me kidi me woro rubanga adako anyinge Asera. Akab otimo gikame wango cuny Rwot Rubanga me Isirael kalamo abakai me Isirael ace apat dedede kame en elubo.

³⁴I kare kame Akab oudo tie pug kede, Kiel me Betel oko medo gero Jeriko. Bala kame Rwot oudo waco ki dog Yosua wot ka Nun, i kare kame Kiel ocibo kede acakini me apama me Jeriko, wode kao Abiram oko to pi manono, di wode atidi anyinge Segub da oko to kakame ecako gero kede erute me Jeriko.

1 Abakai 17

Elia kede Li me Kot

¹Enabi anyinge Elia dano me Tisibe i lobo me Gilead oko waco ne Akab be, “Akwongo i nying Rwot Rubanga akuo me Isirael ngat kame ango atio ne be, kot amoto toyo likame bino bedo tie i mwakini nogi, tuno di ango awaco be kibed tie.”

²Di Rwot oko waco ne Elia be,

³”Yai ki kan di iko ot pwono i bad tetu kide i nget Osamai me Kerit, i bad tetu kide me ecilet me Yorodan.

⁴In ibino mato pii ki osamai nono, doko da ango atieko mino agak cik pi kelo nin cam kunono.”

⁵Elia oko ot bala kame Rwot owaco ne; en eoto di eko donyo bedo i nget Osamai me Kerit, i bad tetu kide me ecilet me Yorodan.

⁶Agak oko donyo tero ne mugati kede ringo odiko kede otieno me ceng acelacel, di emato pii ki osamai nono.

⁷Do ingei kare moro acecek osamai nono oko tuo pien kot oudo oweko cwei.

Elia kede Apuserut me Sarepat

⁸Di Rwot oko waco ne Elia be,



- ⁹ “Nan oti Sarepat i nget Sidon iko donyo bedo kuno, pien ango atieko mino apuserut moro me kunono cik pi donyo piti.”
- ¹⁰ Elia oko yai di eko ot Sarepat. Kakame etuno kede i erute me bomba, apuserut moro oudo tie kunono koko rido me yen; en eko waco ne dako nono be, “Okwe mia pii moro amati.”
- ¹¹ Kakame dako nono oudo tie ot kede omo ne pii, en doko eko lwonge di eko waco ne be, “Okwe kel na kede mugati moro da.”
- ¹² Apuserut nono oko dwoko ne be, “Alairo i nying Rwot Rubanga ni akuo be, likame ango atie kede mugati moro. Ango atie kede alos aromo pongo cinga acel kenekene i awalo, kede mo moro atitidi me olibeti i cupa. Ango nan atie koko rido mogo ki kan tetekeny aoti atede pira kede pi woda. Manono bino bedo cam wa me ajikini di do oko daro to kec.”
- ¹³ Elia oko waco ne be, “Kur ibed kede lworu; in oti itim bala kame iwaco, do ber kong ted nango mugati moro atitidi kiye iko kelo na, di ingei manono iko tedo ace piri kede pi wodi.
- ¹⁴ Pien Rwot Rubanga me Isirael owaco be, ‘Likame ibino lungaro awalo me alos, arabo lungaro cupa me mo di pwodi ceng kame ango Rwot abino cwano kede kot i wi lobo likame otuno.’ “
- ¹⁵ Apuserut nono oko ot timo gikame Elia owaco ne, di do en kede wode kede Elia kiko bedo kede cam aromo gi pi ceng atot.
- ¹⁶ Bala kame oudo Rwot omio kede cikere mere i dog Elia, likame alos oko tiek i awalo mere, akadi mo tiek i cupa mere.
- ¹⁷ I cen mere tuwo oko mako wot ka dako nono, en won ot, di tuwo nono oko cere tuno neke.
- ¹⁸ Di dako nono oko waco ne Elia be, “Dano ka Rubanga, pinyo komio itimo na kaman? In ibino kan pi pono wi Rubanga i kom dub na, kede pi kelo ne woda to.”
- ¹⁹ Elia oko waco ne be, “Kel awobi nono buta.” En eko gamo awobi nono ki kor toto mere di eko tere i agola me malo kakame en oudo ebuto iye di eko piele i apien kame en oudo ebuto iye.
- ²⁰ Elia oko lego but Rwot kede dwan amalo be, “Okwe Rwot Rubanga na, pinyo komio ikelo can arom kan i kom apuserut noni? En ebedo gwoka di doko nan in iko neko wode!”
- ²¹ Di Elia oko riebie i kom atin nono tien adek, di elego kede dwan amalo but Rwot be, “Okwe Rwot Rubanga na, dwok ne atin noni kuo mere bobo.”
- ²² Rwot oko winyo dwan Elia; kuo me atin nono oko bobo dwogo di eko bedo kuo.
- ²³ Elia oko kwanyo atin nono ki agola me malo di eko kele i ot me piny di eko mine i cing toto mere di ewaco ne be, “Neningo, wodi ine kuo.”



²⁴Dako nono oko dwoko ne be, “Nan atieko ngeno be in ibedo dano ka Rubanga, doko da kop kame Rwot waco i dogi obedo kop me ateni.”

1 Abakai 18

Elia kede Inabin ka Baal

¹Ingei kare moro, i mwaka me adek me kot obedo li kede, Rwot oko waco ne Elia be, “Ot inyut komi but Akab; ango abino cwano kot i wi lobo.”

²Aso, Elia oko ot nyuto kome but Akab. Kec oudo odop twatwal Samaria,

³aso, Akab oko lwongo Obadia, en ngat kame oudo lo paco me abaka. (Obadia oudo woro Rwot twatwal,

⁴doko da i kare kame Jesebel oudo tie neko kede inabin ka Rwot, Obadia bin oko kwanyo inabin tol acel kikom gi di eko ot kano gi i abo i ikodeta are me ot kany ot kany, di eko donyo mino gi cam kede pii.)

⁵Akab oko waco ne Obadia be, “Omamano ataneko kede isamai atie i lobo noni dedede, cengemogo obino udo lum kame karuno gwoko asigiran kede pundan wa di kiko bino bedo kuo, tetekeny kur okei leini wa mogo.”

⁶Aso, gin kiko pokere ot moc; Akab odok i bad tetucel, kede Obadia da oko dok i bad tetucel.

⁷Kakame Obadia oudo tie kede i yongayo mere, en eko riamo kede Elia. En eko ngeno Elia di eko luro piny i nyime di eko penye be, “Adwong na Elia, kom ateteni in inononi?”

⁸Elia oko dwoko be, “Ebo, ango inononi; oti iwac ne adwong ni abaka be ango atie kan.”

⁹Obadia di oko dwoko be, “Dub nyo kame ango atimo en komio imito mina i cing Akab pi neka?”

¹⁰Alairo i nying Rwot Rubanga ni akuo be, likame tie ateker amoto ajakanut moro i wi lobo kame abaka likame ocwao dano iye ot moni. Tek kame abaka me ajakanut moroni owaco be in ili i lobo mere, Akab oudo mio abaka me ajakanut arabo ateker nono lairo be ateteni gin likame kineni kunono.

¹¹Do nan in itie waco na be, ‘Oti iwac ne adwong ni be Elia tie kan.’

¹²Do benyo ka ango ayai ot di tipo ka Rwot ko teri kakame ango akwia? Di do kame ango ako waco ne Akab be in itie kan di en eko bino di likame eko udi, en ebino neka, bed bala ango abedo dano aworo Rwot cako di pwodi ango atin awobi.

¹³Benyo, pwodi likame iwinyo be i kare kame Jesebel oudo tie neneko kede inabin ka Rwot, ango bin ako kano tol acel kikom gi i abo i ikodeta me ot kany ot kany, di ako donyo mino gi cam kede pii?

¹⁴Do di in nan itie waco be aoti awac ne abaka be in itie kan, ateteni en ebino neka.”



- ¹⁵Elia oko waco be, “Alairo i nying Rwot kakuo me jo yi, ngat kame ango atio ne, be ateteni tin ango abino nyuto koma but abaka.”
- ¹⁶Aso, Obadia oko ot waco ne Akab, di Akab oko cako yai pi ot riamo kede Elia.
- ¹⁷Kakame Akab oneno kede Elia, en eko waco be, “Mam in inononi, ngakel peko adwong twatwal i Isirael?”
- ¹⁸Elia oko dwoko be, “Likame ango abedo ngakel peko i Isirael, do in kede ot ka papa ni en ikelunu peko, pien wun iwekunu lubo cik ka Rwot di ikounu donyo woro Baal.
- ¹⁹Aso, nan mi jo dedede me Isirael cokere i moru me Kamel, karacel kede inabin tol ongwon kede ot kany ka Baal, kede inabin tol ongwon ka Asera, kame camo i emesa ka Jesebel.”
- ²⁰Aso, Akab oko lwongo jo me Isirael karacel kede inabin i moru me Kamel.
- ²¹Elia oko nyiko i nget jo di eko penyo gi be, “Kara wun ibinunu bedo kede tam kokakarun tuno awene? Ka Rwot en Rubanga, worenu; do ka Baal en Rubanga worenu.” Do jo likame oko dwoko ne akadi kop acel.
- ²²Di Elia oko waco ne jo be, “Ango kena en enabi ka Rwot kodong, do inabin ka Baal tie tol ongwon kede ot kany.
- ²³Miunu wa twonin are; di inabin ka Baal ko neko twon acel di kiko ngongolo en i adulion di kiko kete i wi yen kame konapo, do di likame kiko moko mac. Ada abino timo kamanono kede twon ocelu di likame ako moko mac.
- ²⁴Di do ikounu lego but rubanga wu, di ada ako lego but Rwot; acel kikom gi kame bino dwoko ilega di ecwao mac udo ateteni en ebedo Rubanga.” Jo dedede oko waco be, “Iyamo kiber.”
- ²⁵Di Elia oko waco ne inabin ka Baal be, “Wun cakunu yero twon acel di ikounu temuno en bala kame mitere pien wun itotunu; di do ikounu lego but rubanga wu, do kur icwinyunu iye mac.”
- ²⁶Aso, gin kiko kwanyo twon gi acel di kiko temuno en bala kame oudo mitere, di do kiko donyo lego but Baal cako me odiko tuno i dier iceng, di kiwaco be, “Okwe Baal, gam kwac wa!” Oudo kitie sosomo ririmo alutari kame oudo kigero, do likame ngatamoro oko gamo dog gi.
- ²⁷I esawa kanyape, Elia oko cako nywaro gi di ewaco negi be, “Legunu kede dwan amalo; ateteni en ebedo rubanga; cengemogo pwodi etie paro kop, arabo etie konyere, amoto elatao karamoro! Aso ka li cengemogo enino emito acea.”
- ²⁸Di do inabin nogo oko meede lego kede dwan amalo, di do kiko donyo ngongolo kom gi kede ipimai paka remo donyo cwer, bala kame itok gi tie kede.
- ²⁹Gin kimeede ameda kede redo kitek tuno esawa me i dier iceng kato, do likame dwan moro owinyere, likame ngatamoro odwoko dog gi.



³⁰Di Elia oko waco ne jo be, “Nyikinonu buta kan” ; di jo oko nyiko bute. Di ber en eko cako kede temuno alutari ka Rwot kame oudo kotieko reto piny.

³¹Di eko kwanyo kide tomon kiwie are, di lubere kede wel me ikekon me awobe ka Yakobo, en ngat kame oudo Rwot owaco ne be, “Nyingi bino bedo Isirael.”

³²En eko tic kede kidere nogo me gero alutari me woro Rwot. Di eko kunyo puleju rimaro alutari nono koudo twero tero pii lita tomon kiwie ongwon.

³³Di do eko napo yen kiber di eko ngongolo twon i adulion di eko napo gi i wi yen. En eko waco ne jo be, “Twomunu pii pong agune wu di ikounu dipo pii nogo i kom giayala awanga noni kede i kom yen.”

³⁴Di eko waco be, “Medunu doko timo kamanono tien me are” ; gin kiko timo kamanono tien me are. Bobo eko waco be, “Medunu doko timo kamanono tien me adek” ; gin kiko timo kamanono tien me adek.

³⁵Pii oko mol rimaro alutari di eko pongo kiton puleju.

³⁶I esawa me mino giayala me otieno, enabi Elia oko noko alutari di eko lego be, “Okwe Rwot, Rubanga ka Aburaam, ka Isaka kede me ka Yakobo, nyut i ceng atin be in en Rubanga me Isirael, kede be ango ngatic ni atimo manoni di alubo cik nin.

³⁷Gam dogo, Okwe Rwot, gam dogo, tetekeny jogi ngei be in Rwot ibedo Rubanga, kede be in itie dwoko gi buti.”

³⁸Di mac ka Rwot oko bino di eko wango giayala nono dopodop, kede yen, kede kide, kede lobo da oko dop paka pii koudo tie i puleju tuo.

³⁹Kakame jo dedede oneno kede gi kotimere, gin kiko rieberere piny di kiko waco be, “Ateteni Rwot en Rubanga; ateteni Rwot en Rubanga!”

⁴⁰Di Elia oko waco negi be, “Makunu inabin ka Baal; kur iwekunu acel moro bwoti.” Jo oko mamako gin dedede, di Elia oko tero gi i osamai me Kison di eko neneko gi kunono.

Ajikini me Li me Kot

⁴¹Elia oko waco ne Akab be, “Oti icam kede imat gimoro. Nan atie winyo rurumo me bino me kot.”

⁴² Kakame Akab ooto kede cam, Elia oko yito i wi moru me Kamel, di eko luro piny i lobo di wie tie i dierediere me conge.

⁴³Eko waco ne ngatic mere be, “Oti inen bad tetu nam adwong.” En eko ot di eko neno di eko waco be, “Likame tie gimoro.” Di Elia oko bedo waco ne pi ot neno kamanono tien kanyaare.

⁴⁴I tien me kanyaare mere en eko waco be, “Aneno edou moro atitidi bala wi dano di etie bino ki bad tetu nam.” Elia oko waco ne ngatic mere be, “Oti iwac ne Akab edony i cabala mere eko susunyo dok paco di pwodi likame kot ongoole.”



⁴⁵Ingei esawa atitidi idoun oko umo malo odoko col; yamo oko cako buko di kot oko poto. Akab oko yito i cabala mere eringo Jeserel.

⁴⁶Twer ka Rwot oudo tie kede Elia, omio en eko dolo igoen mege i piere di eko ringo lanyo Akab tuno i erute me bomba me Jeserel.

1 Abakai 19

Elia i Moru me Sinai

¹Akab oko waco ne Jesebel gi dedede kame Elia otimo, kede epone kame eneko kede inabin ka Baal dedede.

²Jesebel oko cwano ngaor but Elia pi waco ne be, “Akwao be miero rubangan tim nango gikarac kalamo manono, ka tuno diki esawa noni oudo pwodi likame ango aneki bala kame ida ineko kede inabin ka Baal.”

³Lworo oko mako Elia di eko ringo kede ngatic mere Beereseba i adul me Yuda. En eko weko ngatic mere kunono

⁴ di eko ot i wi tim Sapali me ceng acel. Di do eko bedo piny i dud yat moro atie kare kene di eko paro be koto oudo eto. En elego be, “Rwot, eroma do, kwany do kuo na, pien nan ango da arom aroma kede joakwari na kotieko to.”

⁵Elia oko buto piny i dud yat nono di eko nino. Cucuto malaika ka Rwot oko mule di waco ne be, “Yai malo icami.”

⁶En eko ngongolo piny di eko neno mugati kede cupa me pii di tie kawie. En eko cam di eko mato pii di doko eko buto.

⁷Malaika ka Rwot oko bobo dwogo tien me are di oko mule di waco ne be, “Yai malo icami, aso ka li sapali nono bino oli twatwal.”

⁸Elia oko yai malo di eko cam, kede eko mato pii, di eko udo teko me ot pi ceng ot ongwon tuno i moru me Sinai, en moru ka Rubanga.

⁹Di bin etuno kunono, en eko donyo i abo moro eko buto iye. Di Rwot oko waco ne Elia be, “Nyo kame itie timo i kan?”

¹⁰ Elia oko dwoko be, “Rwot Rubanga me jo yi, ango abedo keto cunya i komi; do jo me Isirael otieko turo isikan gi kedi, kirereto alutarin ni di kiko neneko inabin ni. Ango kena en adong, nan kitie da mito neka.”

¹¹Rwot oko waco ne be, “Oti icungi i wi moru i nyima, pien ango ayapuno beo kunono.” Di yamo atek oko buko, di eko bebelo moru kede lela ongingidun, do likame oudo Rwot tie i yamo nono. Ingei yamo buko piny oko yangere, do likame oudo Rwot tie i yangere me piny nono.

¹²Di ingei yangere me piny mac oko bino, do likame oudo Rwot tie i mac nono. Ingei to me mac, dwan me iwewei atitidi oko winyere.



¹³Kakame Elia owinyo kede dwan nono, en eko umo wange kede egoe mere di eko ot cungo i ekeko me abo. Di dwan moro oko waco ne be, “Elia, nyo kame itie timo kan?”

¹⁴En eko dwoko be, “Rwot Rubanga me jo yi, ango abedo keto cunya i komi; do jo me Isirael otieko turo isikan gi kedi, kirereto alutarin ni di kiko neneko inabin ni. Ango kena en adong, nan kitie da mito neka.”

¹⁵Di Rwot oko waco ne be, “Doki i wi tim me Damasiko; ka ituno kunono, wir Kasael edok abaka me Siria.

¹⁶Doko da iwir Yeku wot ka Nimisi pi doko abaka me Isirael; iko wiro Elisa wot ka Sapat me Abel-mekola pi bedo enabi kame bino lunyo wangi.

¹⁷Ngat kame bino bwot likame Kasael neko, Yeku en kame bino neke; ngat kame bino bwot likame Yeku neko, Elisa en kame bino neke.

¹⁸Do abino weko jo tutumia kanyaare (7,000) me Isirael dong, gin jo kalikame kiriondiko woro Baal, kede jo kame dog gi likame obilo noto lem cal mere.”

Kolwongo Elisa

¹⁹Elia oko yai ki kuno di eko ot, di eko udo Elisa wot ka Sapat di etie pur kede ecuka. Oudo kwei me icukai tie tomon kiwie are, di en oudo etie pur kede ecuka me ajikini. Elia oko beo i ngete di eko gonyo egoe mere me adoka di eko keto i kom Elisa.

²⁰Elisa oko weko twonin, di eko ringo but Elia di eko waco ne be, “Ber kong aoti anot lem papa na kede toto na pi moto gi be asounu do, di do ango ako bino di ako lubi.” Elia oko dwoko be, “In oti, do yutuno gikame atieko timo ni.”

²¹Elisa oko dok eko ngongolo twonin mege, di eko moko mac kede ayokoi kame oudo etweo gi kede, di eko tedo gi. En eko mino jo kame oudo en epuro kede gi ringo di kiko camo. Di do en eko ot edonyo lubo Elia, di eko doko ngakonye.

1 Abakai 20

Akab Oyi kede Lobo me Siria

¹Abaka Benekadad me Siria oko koko isirikalen mege karacel; abakai ot adek kiwie are oudo tie gange, di kitie kede asigiran gi kede cabalan gi. En eko ot luko bomba me Samaria di eko sure.

²Di eko cwano ne Abaka Akab me Isirael kop i bomba be, “Benekadad tie waco kaman:

³Siliba kede saabu nin obedo mega; mon ni abeco kede idwe ni da obedo mega.”

⁴Abaka me Isirael oko waco be, “Adwong na abaka, bala kame iwaco kede, ango atieko doko meri ribo kede gi dedede kame atie kede.”



⁵I cen mere Benekadad oko bobo cwano jo but Akab kede kop kame waco be, “Ango oudo acwao ni kop be icwai na siliba kede saabu nin, karacel kede mon ni kede idwe ni.

⁶Do nan ango abino do cwano jotic na diki tetu esawa noni, di gin kiko bino mono odi kede ude ka jotic ni, di kiko bino kwanyo gimoroni dedede kame yomo cuny gin di kiko tero.”

⁷Abaka Akab oko lwongo joadongo dedede me lobo mere di eko waco negi be, “Nan nenunu epone kame icuo ni tie mito kelo kede peko; piento en ecwao kop be emitu siliba kede saabu na, karacel kede mon na kede idwe na, do ango likame ako dagi mine.”

⁸Di joadongo kede jo dedede oko dwoko be, “Kur iwiny kop mere, doko da kur iyei.”

⁹Aso, Akab oko waco ne jo kame Benekadad oudo ooro be, “Wacenu adwong na abaka be ango oudo ayei kop mere me agege, do kop me are ango adagi.” Jo kame oudo kooro nogo oko dok di kiko bobo dwogo kede kop

¹⁰kame Benekadad owaco be, “Akwao rubangan tim na can akalamo, ka buli sirikale na bino udo apua kame pongo cinge ingei dudubo bomba noni me Samaria.”

¹¹Abaka Akab oko dwoko be, “Otunu iwacenu kaman: dano likame wakere ka pwodi likame kocopo yi; do kame yi otiek en kamio dano wakere.”

¹²Kop noni oko tuno but Benekadad i esawa kame oudo etie amata kede i kimere, karacel kede abakai ace kame en oudo ekodere kede gi. Di do en eko ciko isirikalen mege pi iikere me suro Samaria, di do kiko ot teere.

¹³Di enabi moro oko bino waco ne Abaka Akab me Isirael be, “Rwot owaco be, ‘Mam ineno twon jo kame Benekadad tie kede? Ango abino mino gin i cingi tin, di in iko bino ngeno be ango en Rwot.’ “

¹⁴Akab oko penye be, “Alu en kame bino yi kede gi?” En eko dwoko be, “Rwot owaco be isirikalen kame tie i loc me ngaloc me adul acelacel en kame bino yi.” Di Akab oko doko penye be, “Do ngai kame bino telo isirikalen abino cako yi?” Enabi oko dwoko ne be, “In.”

¹⁵Di Akab oko coko awobe dedede kame oudo tie i loc me ngatel me adul acelacel, gin dedede awobe tol are kede ot adek kiwie are (232). Di eko coko isirikalen me Isirael da tutumia kanyaare (7,000).

¹⁶Gin kiko yai tetu esawa kanyape, di oudo Benekadad tie amera i kimere, en karacel kede abakai ot adek kiwie are kame oudo en ekodere kede gi.

¹⁷Awobe kame oudo tie i loc me ngatel me buli adul acelacel en oko telo anyim. Jo kame Benekadad oudo ocwao kino piny oko dwoko ne kop be ekodet me isirikalen oudo tie wok ki Samaria.



¹⁸En eko dwoko be, “Makunu gi di kikuo, akadi ka kibino pi kwano kop me mulem amoto yi.”

¹⁹Isirikalen awobe koudo tie i loc me ngatel me buli adul acelacel en oko telo asura, di isirikalen me Isirael oko lubo gi.

²⁰Ngat acelacel kibus gi oko neko dano kame oudo etie yi kede. Isirikalen me Siria oko ringo di isirikalen me Isirael oko donyo wapo gi, do Benekadad oko bwot eringo kede asigira, karacel kede isirikalen ace kame yi ki ngei asigiran.

²¹Abaka Akab oko ot i yi di eko suro jo kame oudo tio kede asigiran kede cabalan me yi, di eko bwono jo me Siria atwal atwala.

²²Di enabi oko bobo dok but abaka me Isirael di eko waco ne be, “Doki imed pwoyo isirikalen ni bed di kitek, di iko timo iik atek me yi, pien abaka me Siria bino bobo suri cucuto ingei kare me ngico atie bino.”

Siria Otimo Asura me Are

²³Jotic ka Benekadad oko waco ne be, “Rubangan me jo me Isirael obedo rubangan me wi mori, manono en komio jo me Isirael obwono wa ki wi mori; do ateteni wan obino bwono gi ka oyi kede gi i kakame mori li kiye.

²⁴Doko da tim kaman: kwany abakai ot adek kiwie are ki tic gi me telo isirikalen, di iko lunyo wang gi kede jodongo me isirikalen.

²⁵Di iko coko isirikalen di tot rom bala kame bin ikei, di kitie kede asigiran kede cabalan arom aroma kede kame oudo bin in itie kede. Wan obino yi kede jo me Isirael i kakame mori li kiye, di ateteni oko bino bwono gi, pien wan obino bedo tek kalamo gi.”

²⁶Cucuto di kare me ngico okato, Benekadad oko coko isirikalen me Siria di kiko ot i bomba me Apek pi suro jo me Isirael.

²⁷Ingei coko isirikalen me Isirael di oko mino gi jamini me yi, gin kiko ot di kiko gero kimere kadedere are kame pimaun kede kakame isirikalen me Siria oudo ocokere iye. Isirikalen me Siria oudo oraramun kunono dedede, do isirikalen me Isirael oudo ineno do bala ikodeta atitino are me diegi.

²⁸Enabi oko ot but abaka me Isirael di eko waco ne be, “Rwot owaco kaman: pi kite kame jo me Siria owaco kede be, ‘Rwot obedo rubanga me wi mori do likame rubanga me aditot, ‘pi manono ango abino mino twon jo nogi dedede i cingi, di in iko bino ngeno be ango en Rwot.”

²⁹Isirikalen me Siria kede me Isirael oko bedo i kimere gi koudo pimaun pi ceng kanyaare. Di do yi oko cakere i ceng me kanyaare, di jo me Isirael oko neko isirikalen me Siria aoto kede tien, gin tutumia tol acel (100,000) i ceng acel.

³⁰Jo apat mege kobwot oko ringo odok i bomba me Apek, di apama kame kocelo kede bomba oko poto i kom gi paka neko jo tutumia ot are kiwie kanyaare (27,000). Benekadad da oko ringo di eko donyo i bomba di eko pwono i ot.



³¹Jotic mege oko waco ne be, “Wan owinyo be abakai me Isirael tie kede kisa; wek wan ongapunu ipukoi i pier wa di otweunu aunoi i ngut wa, cengemogo etwero weko wa likame eneko wa.”

³²Aso gin kiko twetweo ipukoi i pier gi, di kiko twetweo aunoi i ngut gi di kiko ot but abaka me Isirael di kiko waco ne be, “Ngatic ni Benekadad kwao be iwek kuo mere kur ineke.” Akab oko dwoko be, “Benyo, pwodi etie ekuo? Mano ber! En etie bala omina.”

³³Jotic ka Benekadad oudo tie momoo winyo adwokini aber, aso omio kakame Akab owaco kede be “omina” , gin kiko do koporo kop nono di kiko waco be, “Ateteni Benekadad obedo omini!” Di Akab oko waco be, “Otunu ikelenu buta.” Kakame Benekadad otuno kede, Akab oko lwonge i yi cabala.

³⁴Benekadad oko waco ne be, “Ango abino dwoko ni bomban kame bin papa na omao kikut papa ni. Doko da in itwero yabo dukini ni Damasiko bala kame papa nada otimo i Samaria.” Akab oko dwoko be, “Ango abino weki ioto pi cikere nogi.” Aso, gin kiko timo isikan di eko weko Benekadad ooto.

Enabi Obunano Akab

³⁵Rwot oko ciko enabi acel kikom ekodet me inabin pi waco ne enabi ace ngawote pi donge. Do enabi ca oko dagi donge.

³⁶Di eko waco ne enabi nono be, “Pien in idagi winyo dwan Rwot, cucuto kame in ipokere keda engu bino neki.” Aso kakame enabi kodagi donge nono oyai kede, en eko riamo kede engu di engu oko neke.

³⁷Enabi nono oko ot but icuo ace di eko waco ne be, “Donga!” Icuo nono oko donge; odonge kitek paka wanakino en.

³⁸Di enabi nono oko pokere kede, di eko ot daro abaka i yongayo, di etweo wange tetekeny kur twer ngene.

³⁹Kakame abaka oudo tie beo kede kanono, enabi nono oko lelemo ne abaka be, “Adwong, ango oudo aoto kakame yi oudo odop iye, di sirikale moro oko kelo na ngakwor kame emako di eko waco na be, ‘Kur loni; ka iweke ebwot ibino kei kuo ni, arabo ibino mino cul me sente akaya me siliba tutumia adek (3,000).’

⁴⁰Do kakame ango ako donyo wire kede, en eko lwi eoto.” Di abaka me Isirael oko dwoko ne be, “Poore ebed kamanono, in itieko ngolo kop ni keni.”

⁴¹Enabi nono oko nyilo egoe koudo eboo kede wange, di abaka oko ngene be en ebedo ngat acel kikom inabin.

⁴²Di eko waco ne abaka be, “Rwot owaco be, ‘Pien in ijalo dano koudo ango aciko be poore aneka ooto, pi manono, in ibino to kawange, kede jo ni da bino to kawang jo mege.’ “

⁴³Abaka oko yai dok Samaria di cunye owang, doko da di ening.



1 Abakai 21

Poto me Olok ka Nabot

- ¹Nabot oudo tie kede poto olok mere Jeserel i nget paco me abaka, kakame Abaka Akab oudo bedo iye.
- ²Ceng moro acel Akab oko waco ne Nabot be, “Miango poto ni me olok, angu amito mine ebed poto me puro dek; en etie i nget oda. Angu abino mini poto me olok aber kalamo en kawange, aso ka li abino culi sente iye.”
- ³Do Nabot oko dwoko ne Akab be, “Rwot dagi be angu amii lobo kame audo kibun joakwari na.”
- ⁴Akab oko dok paco di cunye owang kede di ening pi gikame Nabot dano me Jeserel owaco ne. En eko ot buto i apien mere di eloko nyime tetu apama, di eko dagi kikon cam da.
- ⁵Dako mere Jesebel oko ot bute di oko penye be, “Nyo komio tin iling alinga kamanu, doko di idagi kikon cam da?”
- ⁶En eko dwoko be, “Pien angu oudo awaco ne Nabot be, ‘Miango awil poto ni me olok, aso ka li angu abino mini poto ace me olok kawange ka in imito kamanono’ ; do en eko dwoko be, ‘Angu likame abino mini poto na me olok.’ “
- ⁷Dako mere Jesebel oko penye be, “Mam in en ipugo Isirael? Aso, yai malo iko cam, doko da bed kede yomcuny; angu abino mini poto ka Nabot.”
- ⁸Aso, Jesebel oko wandiko baluwan kede nying Akab di eko dongo iye tikum ka Akab di eko cwacwao baluwan nogo but joadongo kede jo kame koworo koudo bedo kede Nabot i bomba.
- ⁹Baluwan nogo oudo waco be, “Cikunu ceng me kanyo kec di ikounu lwongo jo karacel, di ikounu mino Nabot kabedo me anyim.
- ¹⁰Mounu jo are atie kede ikiteso areco ikounu mino gi kibed anyim di kipimere kede en, di jo nogo ko pide be, ‘In ilamo Rubanga kede abaka.’ Di do wun ikounu tere tenge ikounu didipo en kede kide tuno to.”
- ¹¹Jo me bomba mere, joadongo kede jo kame koworo oko timo bala kame Jesebel owaco. Bala kame oudo tie kede i baluwa kame en ecwao negi,
- ¹²gin kilwongo ceng me kanyo kec di kiko mino Nabot obedo anyim me jo kocokere.
- ¹³Jo are kame ikiteso gi reco oko ot bedo i nyime di kipimaun kede en, di kiko pido Nabot i nyim jo di kiwaco be, “Nabot olamo Rubanga kede abaka.” Aso, jo oko make otere ooko me bomba di kiko didipo en kede kide tuno to.
- ¹⁴Di do oko cwano ne Jesebel kop be, “Kodidipo Nabot kede kide; etieko to.”



¹⁵Cucuto kakame Jesebel owinyo kede be oudo kotieko didipo Nabot paka to, en eko waco ne Akab be, “Nan in ot do igam pototo ka Nabot kame en oudo edagi cato ni, piento en etieko to.”

¹⁶Cucuto di Akab owinyo be Nabot oudo otieko to, en eko yai eko ot piny i pototo me olok ka Nabot pi game doko mere.

¹⁷Di Rwot oko waco ne Elia enabi me Tisibe be,

¹⁸” Ot piny i pototo me olok ka Nabot but Abaka Akab me Samaria; nataman en etie kunono emito tero pototo nono doko mere.

¹⁹ Oti iwace be ango Rwot atie waco be, ‘Mam itieko neke di bobo iko mito tero pototo mere da?’ Wace be ango awaco be, ‘Kakame igwogin onango kiye remo ka Nabot kikokome en kame kibino nango kiye remo nida.’ “

²⁰Kakame Akab oneno kede Elia, en eko waco ne Elia be, “Ngakwor na mam tin iuda?” Elia oko dwoko be, “Ebo, ango audi. Pi kite kame in itieko miire kede atwal atwala timo gikame rac i nyim Rwot,

²¹omio Rwot nan waco ni be, ‘Ango abino kelo can i komi. Abino rwenyo kuo ni kede me cuo dedede me diakal ni, kobedo ipasoi kede kalikame ipasoi.

²²Abino mino diakal ni doko bala diakal ka Yeroboam wot ka Nebat, kede bala diakal ka Basa wot ka Akija, pien in iwango cunya i yore me telo Isirael timo dub.’

²³ Doko da i kom Jesebel Rwot tie waco be, ‘Igwogin bino camo kom Jesebel i bomba me Jeserel.’

²⁴Dano ni moro kame bino to i bomba igwogin en kame bino came; kede dano ni moro kame bino to i calo winy en kame bino came.”

²⁵(Ateteni likame oudo tie dano moro ace kotieko miire atwal atwala timo gikame rac i nyim Rwot bala Akab, ngat kame bin dako mere Jesebel oruruko en.

²⁶En etimo tim me emuna me donyo woro caljwogi, bala bin jo Amor kame Rwot oriamo ki lobo nono i kare kame jo me Isirael oudo tie donyo kede iye.)

²⁷Kakame Akab owinyo kede kope nogi, en eko nyinyilo igoen ki kome di eko ngapo epuko. En eko kanyo kec di eko donyo buto i epuko nono, di eoto di ening aninga.

²⁸Di Rwot oko waco ne Elia be,

²⁹” Mam ineno ekite kame Akab omwolere kede i nyima? Pi kite kame emwolere kede i nyima, likame ango abino kelo can i kome i kare mere, do abino kelo can i ode i kare ka wode.”

1 Abakai 22

Enabi Mikaya Okwenyaro Akab

(2 lyutun 18.2-27)

¹Siria kede Isirael oko bedo mulem abongo yi moro pi mwakini adek kolubo.



- ²Do i mwaka me adek mere abaka Yekosapat me Yuda oko ot but Abaka me Isirael.
- ³Abaka me Isirael oko waco ne jotie mege be, “Benyo, ingeunu be Ramot Gilead obedo merwa, do di likame tie gimoro kame wan otie timo pi game ki cing abaka me Siria?”
- ⁴Akab oko penyo Yekosapat be, “Ibino ot keda suro Ramot?” Yekosapat oko dwoko be, “Ango kede in wan jo acel; isirikalen nango obedo megie, doko da asigiran nango obedo megie.
- ⁵Do ber kong peny tam ka Rwot.”
- ⁶Di abaka me Isirael oko koko inabin aromo bala tol ongwon karacel, di eko penyo gi be, “Aoti asur Ramot arabo aweki?” Gin kiko dwoko ne be, “Oti isure, pien Rwot bino mine i cingi.”
- ⁷Do Yekosapat oko penye be, “Benyo, likame doko tie enabi moro ace kame otwero penyo tam ka Rwot kibute?”
- ⁸Akab oko dwoko be, “Tie pwodi acel kodong kame otwero penyo tam ka Rwot kibute, en Mikaya wot ka Imila; do cunya dage, piento en emurao nango kope areco kenekene.” Yekosapat oko dwoko be, “Abaka, likame ipoore yamo kamano.”
- ⁹Akab oko lwongo ngatic acel di eko waco ne be, “Oti iom Mikaya wot ka Imila awakawaka.”
- ¹⁰Abaka Akab kede Abaka Yekosapat me Yuda oudo tie bedo i komini gi me pug di kingapo ikanson gi me ajakanut; oudo kitie i laru me canyo atie i nget erute me Samaria. Inabin oudo tie waco negi gikame Rwot owaco.
- ¹¹Esedekia wot ka Kenana oko timo cal me tung le me nyonyo ayon, di eko waco be, “Rwot owaco be, ‘Ibino suro jo me Siria di iko muducaro gi bala le atie kede tunge kacal kamagonogi.’ “
- ¹²Inabin apat dedede oudo tie yamo kop acel nono be, “Oti isur Ramot, ibino bwono yi; Rwot bino mine i cingi.”
- ¹³Ngaor koudo ooto lwongo Mikaya oko waco ne be, “Neningo, inabin dedede tie yamo kiber i kom abaka be ebino bwono yi, ida oti iyam kop acal bala mergi.”
- ¹⁴Do Mikaya oko waco be, “Alairo i nying Rwot kakuo be ango abino waco gikame Rwot oyamo na.”
- ¹⁵Kakame en etuno kede but abaka Akab, en eko penye be, “Mikaya, benyo, oot suro Ramot arabo oweki?” Mikaya oko dwoko be, “Otunu isurenu, ibinunu bwono yi; Rwot bino mine i cingu.”
- ¹⁶Do Akab oko dwoko be, “Ka itie yamo keda i nying Rwot miero iwac kop me ateni; apoore waco ni manoni tien adi?”



¹⁷ Di Mikaya oko waco be, “Aneno di isirikalen me Isirael osasarun i wi moru, bala romini kame ngakwat gi li; di Rwot oko waco be, ‘Jogi li kede ngadwong gi, poore ngat acelacel ot ture kede mulem.’ “

¹⁸ Akab oko waco ne Yekosapat be, “Mam oudo ango awaco ni be en likame ewaco nango kope abeco, do kwanyo kenekene kope me can?”

¹⁹ Di Mikaya oko meede be, “Nan winy gikame Rwot tie waco! Ango aneno di Rwot tie bedo i kom mere me ajakanut i malo, di imalaikan tie cungo i ngete tuni kede tuca.

²⁰ Di Rwot oko waco be, ‘Ngai kame bino ngalao Akab tetekeny eot Ramot di oko neke iye?’ Di imalaikan oko donyo yamo, man yamo kop ni, maca da yamo kop ca,

²¹ tuno di tipo moro oko ot anyim but Rwot di eko waco be, ‘Ango abino ngale.’

²²” Rwot oko penye be, ‘Ibino ngale benyo?’ “En eko dwoko be, ‘Ango abino ot di ako mino inabin ka Akab ngale.’ “Di Rwot oko waco be, ‘Oti ingale; manono bino twerere.’ “

²³ Mikaya oko jiko be, “Aso neningo, Rwot otieko keto tipo me angalo i dog inabin ni nogi dedede; en etieko iiko pi mino can poto i komi.”

²⁴ Di enabi Esedekia oko ot but Mikaya di eko bape i wange di epenye be, “Awene en kame tipo ka Rwot owekango kede di eko cako yamo kede in?”

²⁵ Mikaya oko dwoko be, “In ibino ngeno awene inonono i ceng kame in ibino ot pwono kede i agola me tielo.”

²⁶ Di Abaka Akab oko mino cik but ngatic mere acel be, “Mak Mikaya iko dwoke but Amon ngaloc me bomba, kede but Yowasi wot ka abaka,

²⁷ di iko waco negi pi rwake i otkol di oko donyo mine mugati kede pii kenekene tuno di ango adwogo kede mulem.”

²⁸ Mikaya oko waco be, “Ka in iko dwogo kede mulem, udo likame Rwot oyamo kibuta.” Di eko waco be, “Wun jo dedede winyunu gikame ango atieko waco!”

To ka Akab i Ramot

(2 lyutun 18.28-34)

²⁹ Aso, Abaka Akab me Isirael kede Abaka Yekosapat me Yuda oko ot suro Ramot.

³⁰ Di Akab oko waco ne Yekosapat be, “Ango abino bono wanga di ako ot yi, do in ngap ekanso ni me ajakanut.” Aso, abaka me Isirael oko bono wange di eko ot yi.

³¹ Abaka me Siria oudo omio cik but isirikalen ot adek kiwie are, gin en jodongo me cabalan me yi be, “Kur i yiunu kede dano moro ace atitidi amoto adwong, do kenekene kwanyo abaka me Isirael.”

³² Aso kakame gin kiko neno kede Yekosapat, gin kiko waco be, “Ateteni abaka me Isirael inononi.” Gin kiko lokere cako yi kede en. Do kakame en eko kok kede,



³³gin kiko ngeno be manono oudo likame obedo abaka me Isirael, di kiko jiko yi kede en.

³⁴Do sirikale moro me Siria oko gweno emal mere atatai, di winyo winyo eko ot cobo Akab i dierediere me nyonyo kame gagao kore kede nyonyo kame gagao kome, kame cal bala abokoya me aporogo. En eko koko but ngat kame riamo cabala mere be, “Lokere odok cen, pien kowana!”

³⁵Yi oko meede dop kitek i ceng nono, di Abaka Akab ogongere i cabala di nyime opimaun kede isirikalen me Siria. Remo mere oko mol ocokere piny i dud cabala, di do eko to otieno.

³⁶Tetu esawa kame ceng donyo kede, ngatamoro oko lelemo kikom isirikalen me Isirael be, “Ngat acelacel poore dok i bomba me turgi; ngat acelacel dok i piny gi!”

³⁷Aso Abaka Akab bin oko to iepone nono. Oko bin tero kome Samaria di oko yike.

³⁸Bin oko lwoko cabala mere i atapar me Samaria, kakame igwogin oko nango kiye remo mere, kede imalayan oko lwokere iye, bala kame oudo Rwot owaco be bino timere.

³⁹Kope dedede ace amako gikame Akab otimo, kede ot kame egero kede lak liec, kede bomban dedede kame en egero, kowandiko gi i *Itabu me Itatam amako Abakai me Isirael*.⁴⁰Aso kakame Akab oto kede, wode Akasia oko lunyo wange.

Abaka Yekosapat me Yuda

(2 lyutun 20.31—21.1)

⁴¹Yekosapat wot ka Asa bin ocako pugo Yuda i mwaka me ongwon me apugan ka Akab me Isirael.

⁴²Oudo en etie kede mwakini ot adek kiwie kany i kare kame ecako kede pug, di eko pug pi mwakini ot are kiwie kany di ebedo Yerusalem. Nying toto mere oudo Asuba nyar ka Siliki.

⁴³En eko lubo ekite ka papa mere Asa di likame eparao tenge kiye; oudo ebedo timo gi opoore i nyim Rwot. Do abilan me woro rubangan likame oudo kotuturo, doko da jo oko meede ot mino giayala kede dunyo odok angwe kur i abilan nogo.

⁴⁴Yekosapat doko da oko kelo mulem i dierediere mere kede abaka me Isirael.

⁴⁵Gi ace kame Yekosapat otimo, teko mere me yi kame enyuto, kede epone kame eyi kede kowandiko gi i *Itabu me Itatam amako Abakai me Yuda*.⁴⁶Cuo mogo koudo obedo imalayan me tempulo koudo odong anonok mege i kare me apugan ka papa mere Asa, en eko mino gi kidoko li.

⁴⁷Lobo me Edom oudo li kede abaka; ngat kame lubo tien abaka me Yuda en koudo puge.

⁴⁸Abaka Yekosapat oko timo imerin kacal bala me Tarusi pi ot Opir omo saabu, do kiko atuturun Esiongeber likame kitwero ot.



⁴⁹Di Abaka Akasia wot ka Akab oko waco ne Yekosapat be, “Wek jotic nango kwang emeri kede jotic nin,” do Yekosapat oko dagi.

⁵⁰Yekosapat oko to di oko yike i nget joakwari mege i bomba ka kwaru mere Daudi. Wode Yekoram en oko lunyo wange.

Abaka Akasia me Isirael

⁵¹Akasia wot ka Akab oko cako pugo Isirael ki Samaria i mwaka me tomon kiwie kanyaare me apugan ka Abaka Yekosapat me Yuda, di eko pugo Isirael pi mwakini are.

⁵²En eko timo gikame rac i nyim Rwot; elubo ikiteso ka papa mere kede toto mere, kede ikiteso ka Yeroboam wot ka Nebat, ngat kame bin omio Isirael odubo.

⁵³En edonyo woro Baal di etio ne, manono oko wango cuny Rwot Rubanga me Isirael, bala kame papa mere ngat kame en elunyo wange da oudo owango kede cuny Rwot.



2 Abakai

2 Abakai 1

Elia kede Abaka Akasia

- ¹Ingei to ka Akab, lobo me Moab oko jemo ne Isirael.
- ²Abaka Akasia oudo opoto piny ki dirisa me goropa mere i Samaria di eko wanakin kirac. Aso en eko cwano jo mogo be, “Otunu kong ipenyunu Baalsebub, rubanga me bomba me Ekuron i Pilistia, ka abino sobolo cango ki awanon noni.”
- ³Do malaika ka Rwot oko waco ne Elia enabi me Tisibe pi yai ot riamo kede jo kame abaka me Samaria ooro di eko waco negi be, “Mam pien Rubanga likame tie i Isirael en komio itienu ot penyo Baalsebub, rubanga me Ekuron?”
- ⁴Pi manono, nan otunu iwacenu abaka be Rwot owaco be, ‘Likame ibino yai ki apien, do ateteni ibino to.’ “ Elia oko ot timo kamanono.
- ⁵Jo kame abaka oudo ooro nogo oko dok bute, en eko penyo gi be, “Idwogunu pinyo?”
- ⁶Gin kiko dwoko ne be, “Icuo moro oriamo kede wa di eko waco ne wa be odwog buti di oko waco ni be Rwot tie waco ni be, ‘Mam pien Rubanga likame tie Isirael en komio in icwao jo ot penyo Baalsebub, rubanga me Ekuron? Pi manono, likame ibino yai ki apien kanataman itie iye, do ateteni ibino to.’ “
- ⁷Abaka oko penyo gi be, “Icuo nono cal nadi?”
- ⁸ Gin kiko dwoko be, “Oudo engapo egoe ayeyer di etweo piere kede rakoba me del.” En eko waco be, “Elia dano me Tisibe inonono.”
- ⁹Abaka oko cwano ngadwong me isirikalen kede isirikalen ot kany but Elia. Gin kiko ot di kiko udo Elia di etie bedo i wi bie, di eko waco ne be, “Dano ka Rubanga, abaka owaco be iwok piny.”
- ¹⁰ Elia oko dwoko ne ngadwong me isirikalen nono be, “Ka ango dano ka Rubanga, akwao be mac wok ki malo di eko wangi karacel kede jo ni ot kany.” Di mac oko wok ki malo di eko wango ngadwong me isirikalen nono kede isirikalen mege ot kany.
- ¹¹Abaka oko bobo cwano ngadwong ace me isirikalen kede isirikalen ot kany but Elia. En eko waco ne be, “Dano ka Rubanga, abaka owaco be bubunyo wok piny!”
- ¹²Do Elia oko dwoko negi be, “Ka ango dano ka Rubanga, akwao be mac wok ki malo di eko wangi karacel kede jo ni ot kany.” Di mac oko wok ki malo di eko wango ngadwong me isirikalen nono kede isirikalen mege ot kany.
- ¹³Abaka bobo oko cwano ngadwong me isirikalen me adek mere kede isirikalen ot kany but Elia. En eko ot di eko riondiko i nyim Elia di eko kwane be, “Dano ka Rubanga, akwai ibed kede kisa buta kede but jotit ni ot kany gi; wek kuo wa.



¹⁴Neningo mac owok ki malo di eko neko jodongo are me isirikalen kocako bino nango kan, gin karacel kede ikodeta me isirikalen gi me ot kany ot kany. Do nan akwai bed kede kisa buta di iko weko kuo na.”

¹⁵Di malaika ka Rwot oko waco ne Elia be, “Upere iotunu kede en, kur ibed kede lworo bute.” Aso, Elia oko yai di eko upere kede en ot but Abaka.

¹⁶Kakame Elia otuno kede, en eko waco ne Abaka Akasia be Rwot owaco be, “Pi kite kame in icwao kede jo ot penyo kop kibus Baalsebub, rubanga me Ekuron, ineno bala Rubanga kame in itwero penyo kop kibus likame tie i Isirael, pi manono, likame ibino yai ki apien kanataman itie iye nono, do ateteni ibino to.”

¹⁷Aso, Akasia oko to, bala kame Rwot oudo owaco kede i dog Elia. Pi kite kame en oudo eli kede wode, omin mere Yoram oko lunyo kawange bala abaka i mwaka me are me apugan ka Abaka Yekoram wot ka Yekosapat me Yuda.

¹⁸Tice ace apat kame Akasia otimo kowandiko gi i *Itabu me Itatam amako Abakai me Isirael*.

2 Abakai 2

Kotero Elia Malo

¹Di do bin kare otuno me Rwot tero Elia malo kede apipiru, eko timere kaman: ceng acel di Elia kede Elisa oudo oyai ki Giligal kitie ot,

²Elia oko waco ne Elisa be, “In dong kan; Rwot ocwa be aot Betel.” Do Elisa oko waco be, “Alairo i nying Rwot kakuo be likame ango abino pokere kedi.” Aso, gin dedede kiko ot tuno Betel.

³Ekodet me inabin koudo tie Betel oko ot but Elisa di kiko penye be, “Ingeo be tin Rwot bino kwanyo tenge ngadwong ni kibuti?” Elisa oko dwoko be, “Ebo ango angeo, do owekunu yamo iye.”

⁴Elia oko waco ne Elisa be, “Elisa, in dong kan, pien Rwot ocwa Jeriko.” Do Elisa oko dwoko be, “Alairo i nying Rwot kakuo be likame ango abino pokere kedi.” Aso, gin dedede kiko ot tuno Jeriko.

⁵Ekodet me inabin koudo tie Jeriko oko ot but Elisa di kiko penye be, “Ingeo be tin Rwot bino kwanyo tenge ngadwong ni kibuti?” Elisa oko dwoko be, “Ebo ango angeo, do owekunu yamo iye.”

⁶Elia oko waco ne Elisa be, “Elisa, in dong kan, pien Rwot ocwa Yorodan.” Do Elisa oko dwoko be, “Alairo i nying Rwot kakuo be likame ango abino pokere kedi.” Aso, gin dedede kiko ot kiupere,

⁷di inabin ot kany da oko lubo gi pi ot Yorodan. Elia kede Elisa oko cungo i dog ecilet, di ekodet me inabin ot kany oko cungo tenge kakabobor.

⁸Di Elia oko gonyo egoe mere me ooko eko dodolo en eko jwato kede pii, di pii oko pokere ki diere di Elia kede Elisa oko ngolo ecilet di kibeo i kakatek.



⁹ Kakame kitieko ngolo kede ecilet, Elia oko waco ne Elisa be, “Waca gikame apoore timo ni di pwodi likame kotera tenge kibuti?” Elisa oko dwoko be, “Mia twer kame in itie kede adwong kalamo.”

¹⁰ Elia oko dwoko be, “Ikwao gikame tek. Do ka inena di kotie tera tenge kibuti, kobino mini; do ka likame inena di kotie tera tenge kibuti, likame kobino mini.”

¹¹ Kakame gin oudo kitie meede kede ot di kiyamo, cucuto cabala kame liel mac di asigiran aliel mac en atie wane oko neeno di oko poko gi ki diere, di apipiru oko tero Elia malo.

¹² Elisa oko donyo ngine di elelemo be, “Papa, papa! Oudo in ical bala cabalan me Isirael kede jo kame yi i wi asigiran!” Do kakame en eko do rwenyo kede ki wange, en eko nyinyilo igoen ki kome pi cwercury.

¹³ Elisa oko kwanyo ekanso ka Elia koudo opoto kibute eko dok di eko donyo cungo i dog ecilet me Yorodan.

¹⁴ En eko jwato pii kede ekanso nono di ewaco be, “Rwot Rubanga ka Elia tie tuai?” Cucuto pii oko pokere ki diere, di Elisa oko ngolo ecilet ki kakatek.

¹⁵ Inabin ot kany kowok ki Jeriko onene ki kakabor di kiko waco be, “Elisa nan tie kede twer kame Elia oudo tie kede.” Gin kiko ot pi riamo kede en di kiko luro piny i nyime

¹⁶ di kiko waco ne be, “Neningo, wan nan otie cuo atek ot kany. Wek wan ooti omoi ngadwong ni, cengemogo tipo ka Rwot otere di oko weke i wi moru moro amoto i aditot moro.” Elisa oko dwoko be, “Li, kur iotunu.”

¹⁷ Do gin kiko meede ameda dine kede tam tuno lewic make di eko waco negi be, “Aso otunu.” Gin kiko yai jo ot kany di kiko mono Elia pi ceng adek, do likame kiko twero ude.

¹⁸ Kakame kidwogo kede but Elisa, piento en oudo edong Jeriko, en eko waco negi be, “Mam oudo ango awaco ne wu be kur iotunu?”

Giaura kame Elisa Otimo

¹⁹ Jo mogo me bomba me Jeriko oko ot but Elisa di kiko waco ne be, “Adwong, kakame bomba noni tie iye ber, do pii mere en arac, egengo ne wa nyai me kodi.”

²⁰ Elisa oko waco be, “Kelanu bakuli anyen, di ikounu keto iye munyo.” Gin kiko tero ne gi nogo.

²¹ En eko ot i atan me pii di eko uco munyo i pii, di eko waco be, “Rwot owaco be, ‘Ango atieko mino pii noni odoko ber, likame bobo ebino kelo to amoto wok yic.’ “

²² Pii nono oko doko ber cako cenge nono tuno tin, bala kame Elisa oudo owaco.

²³ Elisa oko yai ki Jeriko pi ot Betel. Kakame oudo etie kede i yongayo, awobe mogo oko wok ki bomba di kiko donyo jwire ne di kiwaco ne be, “Won bono, irwa tenge! Won bono, irwa tenge!”



²⁴En eko lokere di eko donyo ngino gi di eko lamo gi i nying Rwot. Di idubun amon are oko wok ki abum di kiko nyinyilo awobe ot ongwon kiwie are kikom gi.

²⁵Elisa oko meede ot tuno i moru me Kamel, di eko lokere eoto Samaria.

2 Abakai 3

Yi i dierediere me Isirael kede Moab

¹I mwaka me tomon kiwie kanyauni me apugan ka Yekosapat me Yuda, Yoram wot ka Akab oko doko abaka me Isirael, di eko pug di ebedo Samaria pi mwakini tomon kiwie kanyauni.

²En eko timo gikame rac i nyim Rwot, do likame en eko bedo rac kalamo papa mere kede toto mere, piento en ereto piny cal ka Baal kame papa mere oudo otimo.

³Do akadi bed bala kamanono da, eda eko timo dub kame Yeroboam wot ka Nebat oudo otimo, i yore me mino Isirael donyo i dub; likame en epokere kede tim nono.

⁴Abaka Mesa me Moab oudo opito romini. Buli mwaka en oudo emio cul but abaka me Isirael me idwe romini tutumia tol acel (100,000), kede yer kame konyaro kikom romini tutumia tol acel (100,000).

⁵Do kakame Akab oko to kede, abaka me Moab oko jemo ne abaka me Isirael.

⁶Aso, Abaka Yoram oko yai ki Samaria di eko koko isirikalen me Isirael karacel.

⁷En eko cwano kop but Abaka Yekosapat me Yuda be, “Abaka me Moab ojemo na, benyo, ibino yei upere keda ot sure?” Abaka Yekosapat oko dwoko be, “Ebo abino ot; angu abedo meri, jo nango obedo jo nin, doko da asigiran nango obedo megii.

⁸Obino lubo yongayo mene me ot suro kunono?” Yoram oko dwoko be, “Obino lubo yongayo me wi tim me Edom.”

⁹Aso, abaka me Isirael kede abaka me Yuda kede abaka me Edom oko yai; kakame kitieko ot kede pi ceng kanyaare, pii kame kimato kede kame leini gi mato oko tiek.

¹⁰Di abaka me Isirael oko waco be, “Okwe, kom Rwot olwongo wan abakai adek pi bino mino wa i cing abaka me Moab!”

¹¹Do Yekosapat oko waco be, “Benyo, likame tie enabi moro ka Rwot kan, kame wan otwero penyo cuny Rwot kibute?” Di ngatic acel ka abaka me Isirael oko dwoko be, “Elisa wot ka Sapat, en ngat koudo obedo konyo Elia tie kan.”

¹²Yekosapat oko waco be, “En etwero waco ne wa kop kowok kibut Rwot.” Aso, abakai adek nogo oko ot but Elisa.

¹³Elisa oko waco ne abaka me Isirael be, “Nyo kame itie mono kibuta? Ot but inabin ka papa ni kede me ka toto ni.” Do abaka Yoram oko dwoko be, “Li, Rwot en kolwongo wan abakai adek, tetekeny abaka me Moab mak wa.”



¹⁴Elisa oko dwoko be, “Alairo i nying Rwot kakuo, en Rwot me jo yi kame ango atio ne be, oudo likame ayaro ngoloro wu da, ka koto oudo likame atie kede wor but ngat kame ikoderenu kede, en abaka Yekosapat me Yuda.

¹⁵Do nan kelanu ngawer.” Kakame ngawer oudo tie gono kede adungu mere, twer ka Rwot oko bino i kom Elisa

¹⁶di eko waco be, “Rwot owaco be, ‘Abino mino ataparin me pii pong i osamai noni.

¹⁷Likame ibinunu neno kot moro akadi yamo abuko, do pii bino pong i osamai noni, tetekeny wun kede leini wu ikounu bino udo pii me amata.’ “

¹⁸Elisa oko meede be, “Man obedo gikame titidi kibus Rwot; bobo en ebino mino Moab da i cingu.

¹⁹Ibinunu mano bomban gi dedede kame kocelo, kede bomban ace apirgi tek; ibinunu totongo yen gi anyako anyakini piny, ikounu cego wang ataneko gi, di ikounu dudubo poti gi alobo gi mio i yore me lwolwomo iye kide.”

²⁰Oru mere odiko, i esawa kame komio kede giayala me odiko, pii oko mol wok ki bad tetu Edom di eko umo kabedo dedede.

²¹Kakame jo me Moab oko winyo kede be abakai adek oudo obino pi yi kede gi, gin kiko coko cuo dedede kame oudo twero ngapo jame me yi, cako kibus jo adongo tuno but idwe, di kiko ot teere i ikor pi yi.

²²Kakame gin kiko yai kede odiko, asara me ceng oko caro pii di gin kiko neno di pii kame oudo tie i nyim gi di olokere odoko remo.

²³Gin kiko waco be, “Man obedo remo, isirikalen me abakai adek nogo miero bed di odipo yi di kiko nekere ken gi ken gi. Nan ootunu oyakunu kimere gi!”

²⁴Do kakame gin kiko tuno kede kabedo me kimere oudo tie iye, isirikalen me Isirael oko yai di oko suro gi, di jo me Moab nogo oko ringo. Isirikalen me Isirael oko riamere kede gi di kisuro gi tuno Moab.

²⁵Jo me Isirael oko dudubo bomban me Moab, di kiko lwolwomo kide i poti amio tuno umo gi pukupuk. Kiumo wen ataneko dedede di kiko totongo piny yen abeco dedede kame nyako anyakini. I ajikini mere, bomba me Kir Keres en kame kide me apama kame kocele kede en oko dong cungo, di do jo kame yi kede aporocet oko luke di kiko sure.

²⁶Kakame abaka me Moab oko neno kede be yi do oudo tie bwone, en eko kwanyo jo tol kanyaare kame yi kede epima pi koto yabo ne yongayo me bwot i bad tetu kakame isirikalen me Edom oudo tie iye, do likame kiko twero.

²⁷Di do en eko kwanyo wode kao kame oudo poore lunyo wange bala abaka, di eko yale bala giayala awanga i wi apama. Jo me Isirael oko bedo kede gero atek, di kiko lokere dok cen i lobo gi.

2 Abakai 4



Elisa Okonyo Apuserut Ngacan

¹Ceng moro acel dako me enabi moro kikom ekodet me inabin oko lelemo but Elisa be, “Adwong, cwara ngatic ni oto! Bala kame ida ingeo kede, en oudo ebedo dano alworo Rwot, do nan icuo moro kame en oudo etie kede banya mere obino emitto mako idwe na are bala ipasoi pi banya nono.”

²Elisa oko waco ne be, “Nan atim ni nyo? Wac na gikame in itie kede i paco.” Dako nono oko dwoko be, “Likame tie gimoro kame ango atie kede, kwanyo kenekene cupa me mo me olibeti.”

³Elisa oko waco ne be, “Ot but jokio ni iko kwakwao galanin atot atota kame yi gi tie nono.

⁴Di do in kede idwe ni ikounu donyo i ot di ikounu cego ekeko, di ikounu cako piko mo i galanin nogo; tek kame galani moroni opong, kwanye ikete tenge.”

⁵Aso dako nono oko donyo i ode kede idwe mege di eko cego ekeko; di gin kiko donyo tero nen galanin di epiko iye mo.

⁶Kame galani moroni oudo opong, en oudo eko waco ne acel kikom awobe mege be, “Kel bobo ace.” Di do mo me olibeti oko jiko ony ki cupa kame oudo en etie onye kiye.

⁷En eko dok but enabi Elisa di Elisa oko waco ne be, “Oti icat mo nogo icul kede banya, di in kede idwe ni ikounu konyere kede sente odong mere.”

Elisa kede Dako Obaro me Sunem

⁸Ceng acel Elisa oudo tie beo ki Sunem, kakame dako obaro oudo bedo iye. Dako nono oko lwonge cam. Aso, Elisa oko donyo beo cam kanono i kare dedede kame en oudo eoto kede Sunem.

⁹Dako nono oko waco ne cware be, “Neningo, ango angeo kiber be icuo aruruco bino but wa kan obedo dano ka Rubanga.

¹⁰Wek oger ne agola moro kakoyarere i wi ot, di oko keto ne iye kabuto, emesa, kom kede etala, tetekeny en ekaruno bedo kunono kame ebino but wa.”

¹¹Ceng moro acel Elisa oko ot kunono di eko ot buto i agola nono.

¹²Elisa oko waco ne ngatic mere Gekasi pi ot lwongo ne dako won ot nono. Kakame en elwongo kede dako nono di eko bino,

¹³Elisa oko waco ne Gekasi be, “Penye gikame en emitto be atim ne pi kite kame ebedo lole kede pirwa. Cengemogo etie kede kop mere moro kame emitto be ater i nyim abaka arabo but ngadwong me isirikalen.” Dako nono oko dwoko be, “Ango atie bedo i diere me jo na, atie kede gi dedede.”

¹⁴Elisa oko penyoo Gekasi be, “Nan atim ne do nyo?” Gekasi oko dwoko be, “En eli kede wode, doko cware da otieko ti.”



- ¹⁵Elisa oko waco ne be, “Aso lwong bobo dako nono kan.” Dako nono oko bino di eko cungo i ekeko,
- ¹⁶di Elisa oko waco ne be, “Mwaka atie bino i dwete nogi, in ibino tingo atin awobi.” En eko dwoko be, “Otukwi! Adwong, li akadi acel, kur ingala, Okwe in dano ka Rubanga.”
- ¹⁷Bala kame Elisa oudo owaco, dako nono oko yac di eko nywalo atin awobi mwaka kolubo i kare nono.
- ¹⁸Kakame atin odoko dit kede, ceng acel en eko ot but papa mere i potu kakame jo oudo tie kac iye.
- ¹⁹Cucuto en eko cako koko but papa mere be wie oudo ti bare kitek.
- ²⁰Papa mere oko waco ne ngatic acel be, “Tinge itere but toto mere.” Ngatic nono oko tinge di oko tere but toto mere, di toto mere oko donyo tinge tuno esawa kanyape, di do eko to.
- ²¹Toto mere oko tere di eko piele i kabuto ka Elisa di eko cego ekeko di eko ot.
- ²²En eko lwongo cware di eko waco ne be, “Cwai ngatic acel kede punda; ango amito ot kede oyotoyot but dano ka Rubanga di ako susunyo dwogo.”
- ²³Cware oko penye be, “Pinyo komio itie ot bute tin? Tin likame obedo ceng me Ebaga me Por Duwe amoto ceng Sabato.” Do en eko dwoko ne be, “Kur ipari.”
- ²⁴En eko keto abeno ingei punda di eko waco ne ngatic be, “Mie ering kitek; kur ididio en tuno di ango en awaco ni.”
- ²⁵En eko ot tuno i moru me Kamel kakame Elisa oudo tie iye. Kakame Elisa onene kede di etie bino, Elisa oko waco ne Gekasi be, “Neningo dako me Sunem ca tie bino.
- ²⁶Bubunyo ringo ot siramo en di iko penye ka kitie kiber, en kede jo ture dedede.” Dako nono oko waco ne Gekasi be likame oudo tie gimoro arac,
- ²⁷do kakame etuno kede but Elisa, en eko mako tien Elisa. Gekasi oko ot pi koto remoro en tenge, do Elisa oko waco be, “Weke, en etie kede cweruny adwong; do Rwot omungo na pinyo mere.”
- ²⁸Di dako nono oko waco be, “Adwong, benyo, oudo bin ango apenyi pi mina atin? Mam oudo ango awaco ni be iwek ngangalo ango?”
- ²⁹Elisa oko waco ne Gekasi be, “Iikere iko mako ebela na i cingi iko ot. Ka iriamo kede ngatamoro kur imote, doko ka ngatamoro omoti kur igami. Kame ituno kunono rii ebela nono i nyim awobi nono.”
- ³⁰Do toto me awobi nono oko waco be, “Alairo i nying Rwot kakuo be ango likame abino yai weki.” Aso, Elisa oko yai di eko upere kede en.



³¹Gekasi oko telo anyim di eko ot rino ebela nono i nyim atin awobi ca, do yamo arabo gimoro ace anyuto kuo likame oko timere. Aso, en eko dok cen ot riamo kede Elisa di eko waco ne be, “Atin ca likame ocei.”

³²Kakame Elisa oko tuno kede i ot, en eko neno atin di buto i kabuto mere di eto.

³³En eko cego ekeko di eko lego but Rwot.

³⁴En eko buto eriebere i kom awobi nono, di doge, wange kede bade otwomere i kom me awobi nono. Kakame en ekude eriebere kede i kome, kom awobi nono oko cako udo lieto.

³⁵Elisa oko yai di eko donyo ririmo yi ot di eko bobo dok eko riebere i kom atin nono; atin nono oko giro tien kanyaare di eko yabo wange.

³⁶Elisa oko lwongo Gekasi di eko waco ne pi lwongo toto me atin nono. Kakame dako nono oko bino kede, Elisa oko waco ne be, “Ter wodi ine.”

³⁷En eko riebere piny i tien Elisa, di eko kwanyo wode etero.

Giaura Are Ace

³⁸Kakame Elisa oko dok kede Giligal, kec adwong oudo tie i lobo nono. Ceng acel kakame ekodet me inabin oudo tie i ariamakin kede Elisa, en eko waco ne ngatic mere pi teno agulu ati i keno di eko tedo negi dek.

³⁹Ngat acel kikom gi oko ot obar pi mono amalakwang mogo. En eko udo neru me olok di eko ngwedo anyakini mege bala kame oudo etwero mako. En eko tero gi di eko ngongolo gi i agulu me dek di likame engeo be nyo igonogo.

⁴⁰Oko bin toko ne jo dek, do kakame kibile kede, gin kiko lelemo ne Elisa be, “Elisa, man to ine!” Likame oudo kitwero came.

⁴¹Elisa oko mino kotero ne alos moro, en eko pworro alos nono i gulu me dek di eko waco be, “Tok ne jo dek kicami.” Di dek oko doko ber.

⁴²Ceng moro acel, icuo moro oko wok ki Baal Salisa ekelo ne Elisa mugati ot are kame kotimo kede maweke kocako cek i potu, kede da epuko me wit engano mogo apwodi kokao akaa ki potu. Elisa oko waco ne be, “Mi gi but jo tetekeny kicami.”

⁴³Do ngatic mere oko dwoko be, “Benyo benyo kame ango atwero mino kede jo tol acel gi atitidi noni?” Do Elisa oko medo waco be, “In mi gi but jo tetekeny kicami, pien Rwot owaco be, ‘Gin kibino cam di mogo ko dong.’”

⁴⁴En eko toko negi mugati di kiko cam, di mogo oko dong bala kame oudo Rwot owaco.

2 Abakai 5

Kocango Naman



- ¹ Naman oudo obedo ngadwong me isirikalen me Siria. Abaka oudo mare adikinichel piento Rwot oudo otio kede en me mino Siria bwono yi. Bed bala en oudo ebedo ngayi atek, do oudo etie kede tuwo arac me delkom.
- ² I kare moro acel di isirikalen me Siria oudo ooto yi kede Isirael, gin kiko mako atin nyako acel me Isirael di kiko tere edoko ngatic ka dako ka Naman.
- ³ Ceng acel nyako nono oko waco ne min ot be, “Ka kato adwong oudo ooto but enabi moro me Samaria, koto oudo kocango tuwo mere me delkom.”
- ⁴ Naman oko winyo kop nono di eko ot waco ne abaka gikame nyako me Isirael nono oudo owaco.
- ⁵ Abaka me Siria oko waco be, “Ot gire, ango abino cwani kede baluwa but abaka me Isirael.”
- ⁶ Naman oko yai ot, eko tero siliba akaya tutumia ot adek (30,000), saabu akaya tutumia kanyape (6,000) kede igoen tomon.
- ⁷ Kakame abaka me Isirael osomo kede baluwa nono, en eko nyinyilo igoen ki kome di ewaco be, “Benyo, ango adoko Rubanga mio atie kede twer me poko ne dano kuo amoto to, komio icuo ni ocwao na dano atie kede tuwo me delkom? Nenunu kite kame etie mono kede lok kibuta.”
- ⁸ Kakame enabi Elisa owinyo kede be abaka me Isirael oudo onyinyilo igoen ki kome, en eko cwano ne kop di ewaco ne be, “Pinyo komio inyinyilo igoen ni? Cwai icuo nono bin buta tetekeny eko bino ngeno be enabi tie i Isirael.”
- ⁹ Aso, Naman oko ot kede asigiran kede cabalan mege di eko ot cungo i dog ekeko me ot ka Elisa.
- ¹⁰ Elisa oko cwano aor bute pi waco ne be, “Oti ilwok komi i ecilet me Yorodan tien kanyaare, di delkomi ko bino cango.”
- ¹¹ Do Naman oko doko ger di eko ot tenge di ewaco be, “Ango oudo atamo be en ebino wok cungo i nyima di eko lego but Rwot Rubanga mere di erieo cinge i koma, di ango ako cango!
- ¹² Doko medo i wi mano, icileta me Abana kede Parapar atie Damasiko mam beco kalamo pie dedede me Isirael? Mam oudo ango atwero lwokere i icileta nogo di ako cango!”
- ¹³ Do jotic mege oko ot bute di kiko waco ne be, “Adwong, ka koto enabi oudo ociki timo gimoro atek, benyo, koto likame itimo? Nan do nyo agengi lwokere bala kame en ewaco, di iko bino cango?”
- ¹⁴ Aso, Naman oko ot Yorodan di eko lwinyo kome i yi pii tien kanyaare bala kame Elisa oudo owaco ne, di delkome oko doko nyen bala delkom atin awobi, di eko cango.



¹⁵En eko dok but Elisa karacel kede jo mege dedede di eko waco ne be, “Nan ango atieko ngeno be likame doko tie rubanga moro apat i wi lobo, kwanyo kenekene Rubanga me Isirael; nan akwai iyei gamo giamia kibuta.”

¹⁶Do Elisa oko dwoko be, “Alairo i nying Rubanga akuo ngat kame ango atio ne be, likame ango abino gamo gimoro kibuti.” Naman oko ngangao en pi gamo giamia mere, do en eko dagi.

¹⁷Di Naman oko waco be, “Ka in idagi gamo giamia na, akwai iyei na tero paco lobo kame asigiran are twero wano; pien cako nan ango likame bobo abino mino giamia arabo giayala awanga but rubanga moro ace apat, kwanyo kenekene but Rwot.

¹⁸Do akwao be Rwot sasiro ango kame aoto i tempulo ka rubanga Rimon di ako luro piny kede abaka me Siria pi wore.”

¹⁹Elisa oko waco ne be, “Ot kede mulem.” Do kakame Naman oyai kede kibute di pwodi eoto kakacecek,

²⁰Gekasi oko yamo i cunye be, “Adwong na kom oweko Naman ooto kamano abongo gamo cul moro kibute. Ango akwongere i nying Rwot kakuo be, ango abino ringo ot wape di ako gamo gimoro kibute.”

²¹Aso, Gekasi oko cako wapo Naman. Kakame Naman oneno kede di dano tie ringino i dude, en eko somo piny ki wi cabala mere pi ot riamo kede, di eko penye be, “Nyo arac?”

²²Gekasi oko dwoko be, “Likame tie gimoro arac, do kenekene adwong na ocwaa pi waco ni be inabin are kikom ekodet me inabin atie i piny kobedo imukuran me Epuraimu obino nan nan; nan Elisa mito be imi gi siliba akaya tutumia adek kede igoen mogo, kede igoen aupere kabedo are.”

²³Naman oko waco be, “Okwe gam siliba akaya tutumia kanyape.” Naman oko bedo tek kamanono, di eko bono siliba akaya i ikapun are di eko mino gi but jotic mege are, di eko cwano gin kitelo ne Gekasi yongayo.

²⁴Kakame kituno kede i wi emukura kakame Elisa oudo bedo iye, Gekasi oko gamo ikapun kibut jotic nogo, di eko tero gi i ot, di eko moto gi pi peruno gi; di do jo nogo oko dok.

²⁵En eko ot i ot but Elisa, di Elisa oko penye be, “Gekasi, oudo in itie tuai?” En eko dwoko be, “Ango likame oudo aoto karamoro.”

²⁶Do Elisa oko waco ne be, “Iparo be tipo nango oudo likame tie kunono i esawa kame dano moro owok kede ki wi cabala mere pi riamo kedi? Iparo be manoni obedo kare me gamo sente kede igoen, kede poti me olibeti kede me olok, kede romini kede twonin, kede ipasoi kede apasoi?”

²⁷Pi manono, tuwo me delkom Naman bino kobo nin kede ne ikwae ni pi kare dedede.” Aso, Gekasi oko yai ki kanono di tuwo me delkom otieko make, di do kome odoko tar bala akako.



2 Abakai 6

Koudo Le Korwenyo

- ¹Ceng acel inabin oko waco ne Elisa be, “Neningo, kakame wan obedo iye diding.
- ²Wek wan ooti Yorodan di ngat acelacel ko tongo epir acel di oko bino gero kede gi kakame obino bedo iye.” Elisa oko dwoko be, “Mano ber.”
- ³Ngat acel kibun gi oko kwano be Elisa upere kede gi, en eko yei.
- ⁴Aso, Elisa oko upere kede gi. Kakame kituno kede Yorodan, gin kiko donyo tongo yen.
- ⁵Do kakame ngat acel kibun gi oudo tie tongo kede epir, wi le mere oko pute di eko pototo i yi pii; en eko kok be, “Okwe adwong, abino timo nadi? Le noni oudo akwao akwaa.”
- ⁶Di Elisa oko penye be, “Epoto tuai?” Icuo nono oko nyuto ne kakame wi le oudo opoto iye. Elisa oko tongo ebela di eko uce i yi pii di eko mino wi le nono olemo.
- ⁷Di eko waco ne icuo nono be, “Kwanye,” en eko cwano cinge di eko kwanye.

Kobwono Isirikalen me Siria

- ⁸Abaka me Siria oko cako yi kede Isirael. En eko pepenyo tam kibun jodongo jotic mege di eko yero kakame epoore gero iye kimere gi.
- ⁹Do Elisa oko cwano kop but abaka me Isirael pi kwenyaro en kur ebei kunono, pien isirikalen me Siria oudo opwono kitie kuro gi.
- ¹⁰Abaka me Isirael oko kwenyaro tien atot atota jo kame bedo kanono pi bedo di kigwokere.
- ¹¹Abaka me Siria cunye oko wang twatwal pi kop noni; en eko lwongo jodongo me isirikalen mege di eko penyo gi be, “Ngai kikomu en kame tie ribere kede abaka me Isirael?”
- ¹²Di ngat acel kibun gi oko dwoko be, “Adwong abaka, likame tie ngatamoro. Kom Elisa enabi me Isirael en kame waco ne abaka me Isirael gikame in iyamo akadi i agola ni me buto.”
- ¹³Abaka oko waco ne be, “Mounu kakame etie iye; ango abino cwano jo kioto make.” Kakame oko waco ne kede Elisa oudo tie Dotan,
- ¹⁴en eko cwano twon isirikalen kuno kede asigiran kede cabalan; gin kioto kunono iwor di kiko luko bomba.
- ¹⁵Kakame ngatic ka Elisa oyai kede odiko sek di eko donyo ooko, en eko udo isirikalen atie kede asigiran kede cabalan di oluko bomba. En eko dok but Elisa di eko lelemo be, “Okwe adwong, wan otie i can! Obino timo benyo?”



¹⁶Elisa oko dwoko be, “Kur ibed kede lworo; pien wan otie kede isirikalen atot kalamo kame gin kitie kede.”

¹⁷Di Elisa oko lego be, “Okwe Rwot, yab wange tetekeny etwer neno piny.” Aso, Rwot oko yabo wang ngatic nono di eko twero neno piny; en eko neno di asigiran kede cabalan aliel mac oumo bad moru luko Elisa.

¹⁸Kakame jo Siria oko bino kede piny pi sure, Elisa oko lego but Rwot be, “Okwe Rwot yut wang gi.” Aso, Rwot oko yuto wang jo nogo bala kame Elisa oudo okwao.

¹⁹Elisa oko waco negi be, “Wun irwenyunu yongayo, doko da irwenyunu bomba; lubanu ater wu but icuo kame itienun mono.” En eko telo gi etero gi Samaria.

²⁰Elisa oko lego be, “Okwe Rwot yab wang jogi tetekeny kikaruno neno piny.” Rwot oko yabo wang gi di kiko neno be oudo kitie Samaria.

²¹Kakame abaka me Isirael oneno gi kede, en eko penyio Elisa be, “Adwong, anek gi? Benyo, anek gi?”

²²Elisa oko dwoko be, “Li! Benyo, oudo in en i yi kede gi di iko mako gi en komio imito neko gi? Kenekene mi gi cam kede pii di iko weko gi kidok but ngadwong gi.”

²³Aso, abaka me Isirael oko iiko negi cam me aura. Ingei gin cam, en eko cwano gi kidok but ngadwong gi. Cako i kare nono isirikalen me Siria oko jiko ot suro lobo me Isirael.

Komako Samaria

²⁴Ingei kare moro, Abaka Benekadad me Siria oko lwongo isirikalen mege dedede, kiko siritto ot suro Samaria di kiko luke.

²⁵Pi kite kame oudo kiluko kede bomba, kec oko cere i bomba nono, omio oko donyo cato wi punda pi siliba akaya ot kanyauni, kede guram tol are me cet awele oudo kotwero cato pi siliba akaya kany.

²⁶Ceng acel kakame abaka me Isirael oudo tie dero kede wi apama kocelo bomba, dako moro oko lelemo ne be, “Okwe adwong abaka konya!”

²⁷Abaka oko dwoko be, “Wek Rwot en akonyi! Ango atwero konyi benyo? Iparo be ango atie kede engano amoto bwini?”

²⁸Di abaka oko penye be, “Peko ni nyo?” En eko dwoko be, “Dako no oudo owaco nango be onek atin nango di oko camo, di oko camo mere da ceng alubo.

²⁹Aso, wan oko tedo atin awobi nango di oko camo. Ceng kolubo mere anga ako waco ne be ocam atin awobi mere da, do en eko kano mere.”

³⁰Kakame abaka owinyo kede kop ka dako nono, en eko nyinyilo egoe ki kome pi cweracuny. Kite kame oudo etie kede i wi apama, jo oko neno epuko kame oudo engapo bala egoe me yie.



³¹Di do eko waco be, “Akwao be Rubanga neka ka tin piny oyuto di likame kongolo ngut Elisa!”

³²En eko cwano aor pi ot omo Elisa. Iesawa nono Elisa oudo tie bedo ture karacel kede joadongo mogo. Di pwodi aor nono likame otuno, Elisa oko waco ne joadongo nogo be, “Ingeunu be nganek ca ocwao aor bino ngolo wia? Kame aor nono otuno wun nenunu be icegunu ekeko di ikounu dine kitek. Abaka da kikome tie lube kicen.”

³³Di pwodi oudo likame etieko yamo, abaka oko tuno di eko waco be, “Peko noni owok kibus Rwot! Pinyo kamio ango pwodi ameede kede keto gen na bute?”

2 Abakai 7

¹Do Elisa oko dwoko be, “Winy kop kame Rwot tie waco! Rwot waco be: tuno diki esawa noni udo ibino twero wilo i Samaria kilo adek me engano apwot kede kilo kanyape me mawele pi siliba akaya acel kenekene.”

²Di sirikale kame oudo gwoko abaka oko waco be, “Bed bala Rwot cwai kot, do manono likame twero timere.” Do Elisa oko waco be, “In ibino neno kede wangi, do likame ibino bilo kiye gimoro.”

Isirikalen me Siria Oyai

³Cuo ongwon kame oudo tie kede tuwo arac me delkom oudo tie ooko me erute me bomba me Samaria, gin kiko donyo yamo ken gi ken gi be, “Pinyo kamio wan odongunu bedo kan kuro to akura?”

⁴Ka owacunu be odonyunu i bomba, kec tie i bomba obinunu to kec; do ka odongunu kan da, pwodi obinunu to kamanono. Pi manono, wan ojalere nu ot i kimere me jo Siria, ka kimito neko wa wek kinek wa, do ka kimito weko wa obino dong kuo.”

⁵Aso, gin kiko yai amumusit pi ot i kimere me jo Siria, do kakame kituno kede kunono, likame kiko udo ngatamoro kuno akadi acel.

⁶Pien Rwot oudo omio isirikalen me Siria owinyo mor me tien cabalan me yi, kede me asigiran, bala bino me twon ekodet me isirikalen, di kiko donyo yamo ken gi ken gi be, “Abaka me Isirael opango abakai me jo Kiti kede me Misiri pi bino yi kede wa.”

⁷Aso, otieno nono isirikalen me Siria oko yai amumusit di kiko weko iemai gi, asigiran gi, kede pundan gi, di kimere gi oko dong nono, di kiko ringo pi laro kuo gi.

⁸Kakame cuo ongwon atie kede tuwo arac me delkom nogo oko tuno kede i dog kimere, gin kiko donyo i eema acel di kiko cam kede amata, di kiko kwanyo siliba, saabu kede igoen, kiko ot kano gi. Gin kiko bobo dok kanono di kiko donyo i eema ace kiko kwanyo kiye jame di kiko ot kano gi.

⁹Gin kiko donyo yamo ken gi ken gi be, “Gikame wan otienu timo obedo gikame rac. Tin wan otienu kede rwonge aber. Ka wan olingunu alinga kede kop noni tuno diki odiko, kobino tero be wan obedunu jo areco. Pi manono, ootunu oterunu kop noni i paco ka Abaka.”



¹⁰Aso gin kiko ot di kiko lwongo jo kame oudo daro erute me bomba me Samaria di kiko waco negi be, “Wan oudo ooto i kimere me isirikalen me Siria, do likame oko udo ngatamoro akadi winyo dwan moro; asigiran kede pundan tie likame kogonyo gi, di iemai tie ken gi nono.”

¹¹Aso, jo kame oudo daro erute me bomba oko lwongere di oko tero kop nono i paco me abaka.

¹²Abaka oko yai iwor nono di eko waco ne jotic mege be, “Amito waco ne wu iik kame isirikalen me Siria tie kede i kom wa. Gin kingeo be kec odio wan; aso gin nan kiweco kimere gi di kiko ot pwono obar di kigeno be, wan obino wok ki bomba pi ot mono cam di gin kiko bino mamako wa akuo ki kiko mano bomba.”

¹³Ngat acel kikom jotic mege oko waco be, “Jo kanataman odong i bomba kan bino gida lubo tien jo me Isirael ace kotieko to. Pi manono ber wan ocwaunu cuo mogo kede asigiran kany kikom apwodi odong kuo, tetekeny gin kioti kinen gi kotimere.”

¹⁴Gin kiko yero cuo mogo di abaka oko cwano gi kede cabalan are pi ot neno gi kotimere ne isirikalen me Siria.

¹⁵Cuo nogo oko wapo isirikalen me Siria paka tuno Yorodan. Gin kibedo udo igoen kede jamini ace apat kame isirikalen me Siria oudo obedo uco i yongayo iesawa kame oudo kitie ringo kede. Gin kiko dok di kiko tatamo ne abaka.

¹⁶Di do jo me Samaria oko wok ki bomba di kiko ot yako kimere me isirikalen me Siria. Aso, bala kame oudo Rwot owaco, kilo adek me engano apwot kede kilo kanyape me mawele oudo oko donyo cato pi siliba akaya acel kenekene.

¹⁷Oudo abaka oketo sirikale ngadare pi daro erute cenge nono; jo oko nyonyo en tuno to i erute me bomba pi gin marao wok ooko, bala kame Elisa oudo owaco ne kede kakame abaka ooto kede bute.

¹⁸Pien kakame Elisa oudo owaco ne kede abaka be, “Tuno diki esawa noni udo ibino twero wilo i Samaria kilo adek me engano apwot kede kilo kanyape me mawele pi siliba akaya acel kenekene,”

¹⁹sirikale nono oudo oko dwoko ne Elisa be, “Bed bala Rwot cwai kot, do manono likame twero timere.” Di Elisa oudo oko dwoko ne be, “In ibino neno kede wangi, do likame ibino bilo kiye gimoro.”

²⁰Ateteni eko timere kamanono; jo oko nyonyono en tuno to i erute me bomba.

2 Abakai 8

Dako me Sunem Odok

¹ Elisa oudo owaco ne dako me Sunem koudo en eyaruno wode be, “Yai kede jo me odi ikounu ot bedo karamoroni, pien Rwot tie cwano kec i lobo noni pi mwakini kanyaare.”



²Aso, dako nono oko bin yai bala kame Elisa oudo owaco ne; en bin eko ot bedo i lobo me Pilistia pi mwakini kanyaare.

³I ajikini me mwakini kanyaare, en eko dwogo i Isirael di eko ot but abaka pi penye pi dwoko ne ode kede lobo mere.

⁴En eko udo di abaka tie yamo kede Gekasi, en ngakony Elisa; abaka oudo mito ngeno kop i kom giaura kame Elisa timo.

⁵Kakame Gekasi oudo tie tatamo ne kede abaka epone kame Elisa oyaruno kede dano oto, dako kame oudo koyaruno wode nono di oko waco koko mere ne abaka. Gekasi oko waco ne abaka be, “Adwong, dako nono ine, doko wode kame Elisa oyaruno da ine!”

⁶Abaka oko penyo dako nono kop kame Gekasi owaco ne, di dako nono oko yei be oudo etimere kamanono. Di do abaka oko lwongo ngatic mere acel di eko waco ne pi mino dako nono gi dedede koudo obedo mege, ribo kiton cul kame poore pi poti mege pi mwakini kanyaare kame en etieko tenge.

Elisa kede Abaka Benekadad me Siria

⁷Elisa oko ot Damasiko i kare kame abaka me Siria oudo tuwo kede. Kakame oko waco ne kede abaka be Elisa oudo tie kunono,

⁸en eko waco ne Kasael be, “Ter ne enabi giamia di iko kwane pi penyo Rwot pi ngeno ka ango abino cango ki tuwo noni.”

⁹Aso, Kasael oko ot pi riamo kede Elisa di etero giamia kobedo egere me jamini dedede me Damasiko, aguraguran ot ongwon atie kede mugugu i ngei gi. Kakame Kasael oko tuno kede but Elisa, en eko waco ne Elisa be, “Wodi Benekadad me Siria ocwaa buti pi penyo ka ebino cango ki tuwo mere.”

¹⁰Elisa oko dwoko ne be, “Rwot otieko nyuto nango be ateteni ebino to, do ot iwac ne be ebino cango.”

¹¹Elisa oko pedo wange ngino Kasael tuno lewic mako Kasael, di Elisa oko donyo koko.

¹²Kasael oko penyo Elisa be, “Adwong, itie koko pinyo?” Elisa oko dwoko be, “Pien ango angeo jamini areco kame in ibino timo ne jo me Isirael. Ibino wango apamai kame kocelo kede bomban gi, ibino neneko awobe gi, ibino nyinyilo idwe gi, kede ibino cocobo yi mon gi oyac di iko buluno gi.”

¹³Kasael oko dwoko be, “Kom ango ogwok agwoka ni atwero timo gikame dwong rom kano benyo?” Elisa oko dwoko be, “Rwot onyuto na be in ibino doko abaka me Siria.”

¹⁴Di do Kasael oko yai edok but ngadwong mere Benekadad, di en eko penye be, “Elisa owaco ni benyo?” En eko dwoko ne Benekadad be, “En ewaco na be ateteni ibino cango.”



¹⁵Do ceng oko lubo mere, Kasael oko kwanyo esuka di eko rwake i yi pii di eko bono nyim abaka di eko genge wei tuno en to; Kasael oko lunyo kawange bala abaka.

Abaka Yekoram me Yuda

(2 lyutun 21.1-20)

¹⁶I mwaka me kany me apugan ka Abaka Yoram wot ka Akab bala abaka me Isirael, Yekoram wot ka Yekosapat oko doko abaka me Yuda.

¹⁷Mwaka me dongo mere oudo tie ot adek kiwie are i kare kame edoko kede abaka, di eko pug pi mwakini kanyauni ki Yerusalem.

¹⁸Dako mere oudo obedo nyar ka Akab, omio en eko lubo ikiteso areco me jo me diakal ka Akab kede me abakai ace me Isirael; en etimo gikame rac i nyim Rwot.

¹⁹Do Rwot oudo likame oikere pi muducaro Yuda, piento en oudo ecikere but ngatic mere Daudi be ikwae mege bino dong pug nakanaka.

²⁰I kare me apugan ka Yekoram, Edom oko jemo ne Yuda di gida kiko yero abaka gi amako gi.

²¹Di Yekoram oko ngolo ooto Sair kede cabalan mege me yi. En eoto iwor pi suro jo me Edom, di jo nogo oko lukaro en karacel kede jodongo me isirikalen ayi kede cabalan. En kede jodongo mege me isirikalen kiko pikiro kiringo di isirikalen mege oko sasarun i miere gi.

²²Cako i kare nono tuno tin Edom oko bedo jemo ne apugan me Yuda. Bomba me Libina da oko jemo i kare acel nono.

²³Gi ace dedede kame Yekoram otimo kowandiko gi i *Itabu me Itatam amako Abakai me Yuda*.²⁴Aso, Yekoram oko to di oko yike i Bomba ka Daudi, di wode Akasia oko lunyo wange.

Abaka Akasia me Yuda

(2 lyutun 22.1-6)

²⁵I mwaka me tomon kiwie are me apugan ka Yoram wot ka Akab bala abaka me Isirael, Akasia wot ka Yekoram oko doko abaka me Yuda,

²⁶di oudo mwakini me dongo mere tie ot are kiwie are, di eko pugo Yerusalem pi mwaka acel. Toto mere oudo obedo Atalia, nyar ka Akab, akwar Abaka Omiri me Isirael.

²⁷Eda bin eko lubo ikiteso me diakal ka Akab, di eko donyo timo gikame rac i nyim Rwot bala jo me diakal nono, piento en oudo ebedo or me diakal ka Akab.

²⁸Abaka Akasia oko ribere kede Abaka Yoram me Isirael di kiko copo yi kede Abaka Kasael me Siria. Isirikalen oko riamo yi Ramot i Gilead di oko wanakino Yoram.

²⁹En bin eko dok i bomba me Jeserel pi udo cango, di Abaka Akasia oko ot kunono pi nene.

2 Abakai 9



Kowiwo Yeku pi doko Abaka me Isirael

- ¹Di enabi Elisa oko lwongo ngat acel kikom ekodet me inabin di eko waco ne be, “Iikere iko ot Ramot i Gilead. Mak cupa me mo me olibeti,
- ²di ka ituno kunono iko mono Yeku wot ka Yekosapat, wot ka Nimisi, di iko kwanye kibus jo icegun iko tere i agola moro atie kene.
- ³Di do iko kwanyo cupa me mo iko onyo mo i wie di iwaco ne be, ‘Rwot owaco be en ewiri pi doko abaka me Isirael.’ Di do in iko bino yabo ekeko iko ringo, kur idong wiwira.”
- ⁴Aso, awobi enabi nono oko ot Ramot i Gilead.
- ⁵En eko tuno kunono di jodongo me isirikalen oudo tie i cokere di eko waco be, “Adwong, ango akelo ni kop.” Yeku oko penye be, “Ne ngai kikom wa?” En eko dwoko be, “Ne in.”
- ⁶Di gin jo are nogo kiko ot i agola di awobi enabi nono oko onyo mo i wi Yeku di ewaco ne be, “Rwot Rubanga me Isirael waco be, ‘Ango awiri pi doko abaka ka jo na me Isirael.
- ⁷Ibino wearo jo me ot ka ngadwong ni Akab, tetekeny ango atim onyanga i kom Jesebel pi onyo remo me inabin jotit na, kede me jotit na ace apat.
- ⁸Jo dedede me ot ka Akab miero koneki; cuo kede awobe dedede me ot ka Akab, ipasoi kede jo kalikame obedo ipasoi, gin dedede miero rweny tenge i Isirael.
- ⁹Ango abino mino ot ka Akab doko cal bala ot ka Yeroboam wot ka Nebat, kede bala ot ka Basa wot ka Akija.
- ¹⁰Igwogin en kame bino camo Jesebel i adul me Jeserel, likame ngatamoro bino yike.’ “Ingei yamo manono, awobi enabi nono oko yabo ekeko di eko ringo.
- ¹¹Kakame Yeku oko dok kede but isirikalen jodongo icegun, gin kiko penye be, “Tie gimoro arac? Apoi no oudo obino buti pinyo?” En eko dwoko be, “Wun ingeunu wie kede yamo mere da.”
- ¹²Gin kiko dwoko ne be, “In itie ngalo! In wac ne wa gikame ewaco ni!” En eko waco negi be, “En ewaco na be Rwot owaco be, ‘Ango awiri pi doko abaka me Isirael.’ “
- ¹³Cucuto gin kiko gonyo igoen gi di kiko peto gi i kayito malo i ot; di kiko donyo kuto agwara di kiwaco be, “Yeku en abaka.”

Koneko Abaka Yoram me Isirael

- ¹⁴⁻¹⁵Di Yeku oko bedo kede iik arac i kom Abaka Yoram. Abaka Yoram oudo tie Jeserel kakame oudo eoto cango kiye pi awanon kame eudo i Ramot i kare kame oudo etie yi kede Abaka Kasael me Siria. Aso Yeku oko waco ne jodongo me isirikalen jowote be, “Ka wun iganganu, nenunu be likame ngatamoro olwidar ki bomba kan eko tero rwonge noni Jeserel.”



¹⁶Di do Yeku oko yito i cabala mere di eko ot Jeserel. Yoram oudo pwodi likame ocango, doko da Abaka Akasia me Yuda oudo tie kunono eoto pi nene.

¹⁷Ngat kame kio piny koudo tie i wi gedo abor malo i Jeserel oko neno Yeku kede jo mege di kitie bino. En eko lwongere be, “Atie neno jo mogo tie bino.” Yoram oko waco be, “Cwai dano kede asigira pi penyo gi ka bino gi obedo me mulem.”

¹⁸Aso dano acel oko ringo kede asigira ot riamo kede gi, di eko waco negi be, “Abaka mito ngeno ka bino wu noni obedo me mulem arabo li.” Yeku oko dwoko be, “Kop amako mulem likame maki! Dwog cen ngea.” Ngat koudo kio piny koudo tie i wi gedo abor malo oko lwongere di ewaco be, “Ngat kame ooro otuno kunono, do likame etie dwogo.”

¹⁹Di oko bobo cwano dano ace, di en eko tuno but gi di eko waco negi be, “Abaka mito ngeno ka bino wu noni obedo me mulem arabo li.” Yeku oko dwoko be, “Kop amako mulem likame maki! Dwog cen ngea.”

²⁰Ngat koudo kio piny oko bobo lwongere di ewaco be, “Ngat kame ooro otuno but gi, do eda likame etie dwogo. Ngatel me ekodet nono ineno bala Yeku wot ka Nimisi, pien etie ringo kede cabala bala ngat opoi.”

²¹Yoram oko waco be, “Iikunu cabala na.” Di oko iiko ne cabala. Di do Abaka Yoram me Isirael kede Abaka Akasia me Yuda oko yai ot pi riamo kede Yeku, ngat acelacel i wi cabala mere. Gin kiko riamo kede en i potu koudo obedo me ka Nabot me Jeserel.

²²Kakame Yoram oneno kede Yeku, en eko penye be, “Manoni obedo bino me mulem?” Yeku oko dwoko be, “Mulem karuno bedo tie benyo di pwodi tim me woro caljwogi kede me jwok kame toto ni Jesebel oudo ocaoko pwodi tie meede?”

²³Di do Yoram oko lelemo ne Akasia be, “Man obedo iik me mano loc,” di eko wiro wi cabala mere eko cako ringo.

²⁴Yeku oko telo tol me emal mere kede teko dedede di eko gweno emal ocobo Yoram i dier ngee pelepel wok ki dog cunye. Yoram oko potu eko to i cabala mere.

²⁵Yeku oko waco ne ngakonye anyinge Bidikar be, “Ting kome di iko uce i potu koudo obedo me ka Nabot me Jeserel. Yutuno be i kare kame ango kede in oudo otie ringo kede asigiran karacel i cen ngei Akab papa me Yoram, bin Rwot oko waco kope nogi be,

²⁶‘Nyoro ango aneno di koneko Nabot kede awobe mege. Ango akwongere be ida kobino neki i potu acel noni.’ Pi manono nan kwany kome di iko uce i potu ka Nabot di lubere kede kop kame Rwot oudo owaco.”

Koneko Abaka Akasia me Yuda

²⁷Kakame Abaka Akasia oneno kede gi kotimere, en bin eko ringo edok i bad tetu bomba me Bet Kagan, do Yeku oko riamere kede en paka make di eko redo ne jo mege be, “Gweunu eda!” Gin kiko gwene di oudo etie i wi emukura ayito Gur, i nget



bomba me Ibileam. Do en eko catakino ot paka tuno i bomba me Megido, kakame eko to iye.

²⁸Jodongo me isirikalen mege oko keto kome i cabala di kiko dwoke Yerusalem di oko yike i nget joakwari mege i Bomba ka Daudi.

²⁹Akasia bin odoko abaka me Yuda i mwaka me tomon kiwie acel me apugan ka Yoram wot ka Akab bala abaka me Isirael.

Koneko Jesebel

³⁰Yeku bin oko tuno Jeserel. Kite kame Jesebel oudo otieko winyo kede gi kotimere, en bin eko cilo abukewange di eko iiko yer wie di eko donyo ngino piny i dier bomba ki dirisa malo i paco me abaka.

³¹Kakame Yeku oudo tie donyo kede ki erute, en eko lelemo ne be, “In ngat kame ibedo nganek bala Simiri, in ngat kame ineko ngadwong ni, ibino kan timo nyo?”

³²Yeku oko ngino malo i dirisa di eko lelemo be, “Ngai kame tie i bad na? Ngai?” Cuo aromo bala are amoto adek kobedo jotic me paco ka abaka oko rwako wi gi ki dirisa ngine.

³³Di Yeku oko waco be, “Ucunu dako no piny.” Cuo nogo oko mako Jesebel di kiko uce piny, di remo mere oko kikirun i apama kede i kom asigiran. Yeku oko beo kede asigiran mege kede cabalan mege i kome,

³⁴di eko donyo i paco me abaka di eko cam. Ingei manono en eko waco be, “Terunu kom dako kame kolamo no ikounu ot yike, piento en ebedo nyar ka abaka.”

³⁵Do cuo koudo ooto pi yike oko udo cogo me wie kede tiene kede cinge kenekene.

³⁶ Kakame gin kiko waco ne kede Yeku kop nono, en eko waco be, “Manoni en gikame Rwot oudo owaco i dog ngatic mere Elia dano me Tisibe be, ‘Igwogin bino camo kom Jesebel i Jeserel;

³⁷kom Jesebel bino wewelun kunono bala woyo, di likame ngatamoro ko bino karuno ngeno be Jesebel inonono.’ “

2 Abakai 10

Koneko Ikwae ka Akab

¹Akab oudo tie kede awobe ot kanyaare Samaria. Aso, Yeku oko wandiko baluwan di eko cwano gi but jotel me bomba, but joadongo, kede but jo kame oudo gwoko awobe ka Akab di ewaco negi be,

²” Ango angeo be ikwae ka Abaka Akab tie bedo kano kede wun. Doko da bomba wun kocelo kede apama atek di kodare kede jamini me yi kede asigiran kede cabalan.

³Aso, nan yerunu wot ka Akab moro katwero tic kiber di ikounu kete eluny wang papa mere bala abaka, di do wun ikounu yi pi gwoke.”



⁴Do jopug me Samaria oko doko lwor di kiwaco be, “Nenunu, abakai are likame otwero yi kede en, do wan obinunu twero benyo benyo?”

⁵Aso, ngadwong kame lo paco ka abaka kede ngadwong kame lo bomba, karacel kede joadongo kede jo koudo daro idwe ka Akab oko cwano ne Yeku kop be, “Wan obedo jotic nin, wan obino timo gi dedede kame in iwaco ne wa. Wan likame obino cibo ngatamoro doko abaka; in tim gikame in ingeo be ber.”

⁶Di Yeku oko wandiko baluwa me are but gi be, “Ka wun iganganu, doko da di itiekunu iikere pi lubo kop na, kelunu wi awobe ka Akab buta Jeserel diki tetu esawa noni.” Awobe ot kanyaare ka Akab nogo oudo tie i cing jotel me Samaria, en jo kame oudo gwoko gi.

⁷Kakame baluwa nono otuno kede but gi, gin kiko lwongo awobe ka Akab ot kanyaare di kiko neneko gi. Gin kiko keto wi gi i yi ibukito di kiko cwano ne Yeku Jeserel.

⁸Kakame aor ooto di eko waco ne kede Yeku be oudo kokelo wi awobe ka Akab, en eko waco be kumemo gi i atukito are i erute me bomba tuno odiko.

⁹Odiko di piny oru, Yeku oko ot i erute eko cungo kunono di eko waco ne jo koudo tie kunono be, “Ango en kame atimo iik me neko Abaka Yoram, wun iliunu kede kop moro. Do alu koneko jogi dedede?”

¹⁰Man nyuto be gi dedede kame Rwot owaco i kom ikwae ka Akab bino cobere. Rwot otimo gikame en ekwongere iye i dog ngatic mere Elia.”

¹¹Di Yeku oko neneko wade ka Akab ace apat koudo tie i bomba me Jeserel, kede jotic mege adongo dedede, kede adiereson mege, kede josaseredoti; likame moro kikom gi oko dong kuo.

Koneko Joawade ka Akasia

¹²⁻¹³Yeku oko yai ki Jeserel pi ot Samaria. Kakame oudo etie kede i yongayo, en eko riamo kede wade ka Abaka Akasia i kabedo kame kolwongo be “Kimere me Jokwat”, di eko penyo gi be, “Wun alu?” Gin kiko dwoko ne be, “Wan obedo wade ka Akasia, wan obino pi neno jo me ture.”

¹⁴Yeku oko waco ne isirikalen mege be, “Makunu gi akuo!” Gin kiko mamako gi di kiko ngongolo gi i bur kame oudo tie kanono; gin dedede jo ot ongwon kiwie are, likame tie moro oko bwot.

Koneko Wade ka Akab ace Kodong

¹⁵Yeku oko bobo yai ki kuno di eko riamo kede Yekonadab wot ka Rekab di oudo etie bino bute. Yeku oko mote di eko penye be, “Cunyi tie i koma bala kame ada mera tie kede i komi?” Yekonadab oko dwoko be, “Twatwal.” Yeku oko waco be, “Aso cwai cingi kan.” Yekonadab oko cwano cinge di Yeku oko mako cinge di eko konye yito i cabala.



¹⁶En ewaco ne Yekonadab be, “Upere keda iko bino neno epone kame ango aketo kede cunya i kom Rwot.” Di do gin kiko ringo kede cabala karacel ot Samaria.

¹⁷Kakame kituno kede kunono, Yeku oko neneko wade ka Akab dedede, likame acel moro oko dong; manoni oudo obedo gikame Rwot owaco ne Elia be bino timere.

Koneneko Jo kame Woro Baal

¹⁸Di Yeku oko koko jo dedede karacel di eko waco negi be, “Abaka Akab oudo obedo woro Baal i yore atitidi, do ang'o abino wore i yore akalamo manono.

¹⁹Aso nan lwongunu na inabin ka Baal dedede, jo dedede kame wore kede josaseredoti mege dedede; likame ngatamoro poore keng pien ango atie mino Baal giayala me aura. Ngat kalikame oyaro bino kobino neke.” (Manoni oudo obedo rieko ka Yeku me mito neneko jo kame woro Baal.)

²⁰Yeku oko mino cik be, “Cikunu ceng me woro Baal.” Di oko ciko ceng,

²¹di Yeku oko cwano kop i lobo me Isirael dedede. Jo dedede kame oudo woro Baal oko bino bekebek, likame tie moro oko dong. Gin kiko donyo i tempulo ka Baal, di tempulo nono oko pong culucul.

²²Di Yeku oko waco ne ngasaseredoti kame oudo daro sanduku me igoen pi kwanyo ikanson di eko mino jo kame woro Baal. Aso en eko tero negi igoen.

²³Di Yeku oko donyo i tempulo ka Baal kede Yekonadab wot ka Rekab; en eko waco ne jo aworo Baal be, “Ngingicunu ikounu neno be likame tie dano moro aworo Rwot kan i diere wu, kwanyo kenekene jo kame woro Baal.”

²⁴Di do en kede Yekonadab kiko cako tic me mino Baal giamia kede giayala awanga. Yeku oudo otieko cibo cuo ot kanyauni ooko me tempulo di eciko gi be, “Poore inekunu jogo dedede, ngat kame bino weko dano moro bwot ebino kei kuo mere.”

²⁵Cucuto di en etieko mino giayala awanga, Yeku oko waco ne jodar kede isirikalen be, “Bianu inekunu gi, kur iwekunu moro bwoti.” Aso gin kiko neko jo dedede, di iko donyo ware kede kom gi ooko. Gin kiko dok i tempulo kiko donyo i agola atek me yie

²⁶di kiko kelo cal ka Baal di kiko wange.

²⁷Aso, bin gin kiko nyinyito cal ka Baal di iko rereto tempulo mere di kiko loke edoko coloni tuno tin.

²⁸Manoni en epone kame Yeku ojiko kede woro Baal i Isirael.

²⁹Do eda likame eko jiko dub kame Yeroboam oudo ocaoko, me mino jo me Isirael woro cal me roce kame oudo kosipo Betel kede Dan.

³⁰Rwot oko waco ne Yeku be, “In itimo gikame tie kakare i yore me muducaro jo me ot ka Akab dedede bala kame oudo cunyang'o mito. Pi manono, ango acikere be ikwae nin, paka tuno i ikwae me ongwon bino bedo abakai i Isirael.”



³¹Do likame Yeku oko gwokere lubo iswilia ka Rwot Rubanga me Isirael kede cunye dedede; eda elubo dub kame Yeroboam oudo otimo, dub kame emio jo me Isirael otimo.

To ka Yeku

³²I kare nono, Rwot oko cako ngwero lobo me Isirael. Abaka Kasael me Siria oko mano lobo me Isirael dedede

³³atie i bad tetu kide me Yorodan dok i bad tetu piny tuno i bomba me Aroer i ecilet me Arunon; manoni riribo adul me Gilead kede Basan, kakame jo me ekeko ka Ruben, Gad kede dul me jo me ekeko ka Manase oudo bedo iye.

³⁴Gi dedede ace apat kame Yeku otimo, kede tice anyuto twer mere kowandiko gi i *Itabu me Itatam amako Abakai me Isirael*.³⁵Yeku oko to di oko yike Samaria, di wode Yekoyakas oko lunyo wange bala abaka.

³⁶Yeku oudo opugo Isirael di ebedo Samaria pi mwakini ot are kiwie kanyauni.

2 Abakai 11

Abaka Adako me Yuda Anyinge Atalia

(2 lyutun 22.10—23.15)

¹kakame toto me Abaka Akasia owinyo kede be koneko wode, en eko cako neneko jo dedede kobedo wade ka abaka.

²Yowasi wot ka Akasia kenekene en oko bwot. En oudo koyapuno neke kede imiegu mege ace, do waa mere Yekoseba en oko lake. Yekoseba oudo obedo nyar ka Abaka Yekoram, amin me Akasia me toti gi kede obedo mon nyek. En ekwale di eko kane kede ngapidi i agola me buto atie i tempulo ka Rwot, tetekeny Atalia kur tim ne gimoro.

³Yekoseba oko bedo kano atin nono i tempulo pi mwakini kanyape, di Atalia tie pug bala Abaka adako.

⁴Do i mwaka me kanyaare ngasaseredoti Yekoyada oko lwongo jodongo me isirikalen kame daro abaka kede kame daro paco me abaka. Gin kiko ot bute i tempulo, kakame gin kiko yei kiye gikame en oudo eikere pi timo di kikwongere. En eko nyuto negi Yowasi wot ka Abaka Akasia,

⁵di eko mino gi cik kame waco be, “Kame ibinunu i tic ceng Sabato, acel i kom adek me isirikalen bino daro paco me abaka;

⁶doko acel i kom adek ko daro Erute me Sur; kede acel i kom adek kodong ko daro erute kame tie cen ngei isirikalen jodar apat.

⁷Ikodeta are me isirikalen jodar kame poore wei ceng Sabato poore ot daro tempulo pi gwoko abaka.

⁸Gin kipoore daro abaka i kabedo dedede kame en eoto iye, di kimako ipimai cuto i cing gi. Gin kipoore neko ngatamoroni kame bino noko abaka.”



⁹Jodongo me isirikalen oko woro kop kame Yekoyada owaco; gin kiko tero but Yekoyada isirikalen kame oudo poore wei ceng Sabato kede kame oudo poore bedo i wang tic.

¹⁰Di Yekoyada oko mino jodongo me isirikalen tongini kede ibukui koudo bin obedo me ka Abaka Daudi, kame oudo tie i tempulo,

¹¹di eko cibo isirikalen koudo mako ipimai i cing gi cuto rimaro tempulo kede alutari, pi gwoko abaka.

¹²Di do eko woto wot ka abaka ooko, di eko ngapo ne ocoro me ajakanut di eko mine iwandik kobedo iswilia amako bedo abaka. Di do oko wiro Yowasi kede mo di oko moke bedo abaka. Jo oko bapo cing gi di kilelemo be, “Abaka bed kuo nakanaka.”

¹³Kakame Atalia oko winyo kede icelakin me jo kede me isirikalen jodar, en eko ot i tempulo but jo,

¹⁴ di eko neno abaka anyen di tie cungo i nget epir kame kosipo i dog ekeko me tempulo, bala kame abaka oudo timo i kare nono. Oudo jodongo me isirikalen oluke, kede jo akuto agwara, doko da di jo ace me piny nono tie kilel di kikuto agwara. Atalia oko nyilo egoe ki kome di ewaco be, “Iik arac i kom apugan na! Iik arac i kom apugan na!”

¹⁵Di ngasaseredoti Yekoyada oko mino cik but jodongo me isirikalen be, “Terenu ooko i diere me isirikalen jodar; nekunu ngatamoroni kame bino lube kunono.” Yekoyada otimo kamanono pien oudo likame emito be nek Atalia i tempulo.

¹⁶Isirikalen oko make di kiko pere kede tere i erute kame asigiran donyo kede i paco me abaka di kiko neke kanono.

Kope Anyen kame Yekoyada Okelo

(2 lyutun 23.16-21)

¹⁷Ngasaseredoti Yekoyada omio Abaka Yowasi kede jo osikano but Rwot be gin kibino bedo jo kagenere bute, doko da eko mino abaka ki tetucel, kede jo me piny da ki tetucel, otimo isikan pi bedo jo kame genere ken gi ken gi.

¹⁸Di do jo oko ot i tempulo ka Baal di kiko rete piny; kinyinyito alutarin kede caljwogi kame oudo tie iye, di kiko neko Matan i nyim alutarin, en oudo ngasaseredoti ka Baal. Ingei Yekoyada keto isirikalen pi daro tempulo ka Rwot,

¹⁹di do en, karacel kede isirikalen kame daro abaka, kede isirikalen kame daro paco me abaka kede jo dedede kiko nyamaro abaka kwanye ki tempulo tere i paco mere me abaka. Yowasi oko donyo ki Erute me Jodar di eko bedo i kom mere me ajakanut.

²⁰Jo dedede oko bedo kede kilel di do bomba oko kwei ingei neko Atalia i paco me abaka.

²¹Yowasi bin odoko abaka me Yuda di mwakini mege me dongo oudo tie kanyaare.

2 Abakai 12



Abaka Yowasi me Yuda

(2 lyutun 24.1-16)

- ¹mwaka me kanyaare me apugan ka Abaka Yeku bala abaka me Isirael, Yowasi oko doko abaka me Yuda di eko pug di ebedo Yerusalem pi mwakini ot ongwon. Toto mere oudo obedo Sibia, en dako me bomba me Beereseba.
- ²Yowasi oko bedo timo gikame ber i nyim Rwot i kare me kuo mere dedede, pien Yekoyada ngasaseredoti oudo ocore.
- ³Do akadi bed kamanono da, Yowasi likame oko rereto abilan me woro rubangan; jo oko meede mino giamia kede giayala i abilan nogo.
- ⁴Yowasi oko waco ne josaseredoti pi koko sente kame jo oudo culo i tempulo amakere kede giayala kede giamia ace kame dano kwanyo i mit mere kene.
- ⁵Ngasaseredoti acelacel oudo poore koko sente kibut jo mege kame en elo, di do sente nogo oko bino tic kede gi me iiko tempulo, ka emitto aika.
- ⁶Do paka tuno i mwaka me ot are kiwie adek me apugan ka Yowasi, josaseredoti oudo pwodi likame oiko tempulo.
- ⁷Aso, Abaka Yowasi oko lwongo ngasaseredoti Yekoyada kede josaseredoti ace apat di eko penyo gi be, “Pinyo komio wun likame itienu iiko ot ka Rwot? Cako nan wun likame bobo ibinunu mako sente kame jo culo, do poore kel gi me iiko tempulo.”
- ⁸Josaseredoti oko yei be gin doko likame kibino donyo gamo sente kibut jo, kede da be gin do likame kibino iiko tempulo.
- ⁹Di Yekoyada oko kwanyo sanduku, eko tuc karamoro atitidi i wie, di eko keto sanduku nono i nget alutari, i bad tetu cam kame dano tie donyo i tempulo. Ngasaseredoti koudo tie i wang tic oudo poore tero i sanduku nono sente dedede kame jo ooto i tempulo otero.
- ¹⁰Tek kame sente oudo odoko tot i sanduku, kalani ka abaka kede Ngatel me Josaseredoti oudo kioto maro sente nogo di kiko twetweo gi i isaun.
- ¹¹Di do ingei maro wel gi, gin kiko mino gi but jo kame tic gi makere kede gwoko tempulo, di jo nogo ko culo kede jogedo kame poore iiko tempulo, jo atimo tic me ibaon,
- ¹²jo agero apama kede jo apao kide; kede da kitio kede gi me wilo ibaon kede kide kame kotio kede gi me iiko tempulo, kede me culo garama dedede amakere kede iiko ot nono.
- ¹³Do likame tie sente moro kame oudo kotio kede me wilo kalayan kame kotimo kede siliba, jamini me temuno italan, bakulin, agwarai, arabo jamini ace apat kame kotimo kede saabu arabo siliba, gin jamini kame kopoore tic kede gi i tempulo.
- ¹⁴Sente dedede oudo kotio kede me culo jogedo kede me wilo jamini me gedo.



- ¹⁵ Jo kame oudo lo tic oudo genere twatwal, omio oudo likame emitere pi penyo gi nyuto epone kame kitio kede sente.
- ¹⁶ Sente koudo wok ki giamia me timo cul kede ki giamia me kwanyo dub oudo likame koketo i sanduku nono, magonogo oudo josaseredoti en katero.
- ¹⁷ I kare nono Abaka Kasael me Siria oko suro bomba me Gat di eko mane, di do eko lokere ot pi ot suro Yerusalem.
- ¹⁸ Abaka Yowasi me Yuda oko kwanyo giamia dedede kame Yekosapat, Yekoram, kede Akasia oudo omio but Rwot, gin abakai me Yuda kobedo joakwari mege. Ekwanyo giamia gin di eko ribo kede mege da di eko cwano gi ne Abaka Kasael, di Kasael oko do weko tam me mito suro Yerusalem. Giamia nogo ribo saabu dedede kame oudo tie i dero me kano lim me tempulo, kede koudo tie i ot me abaka.
- ¹⁹ Gi dedede ace kame Abaka Yowasi otimo kowandiko gi i *Itabu me Itatam amako Abakai me Yuda*.
- ²⁰⁻²¹ I kare mere me ajikini, jotic mege are oko bedo kede iik arac i kome. Magonogo oudo obedo Yosakar wot ka Simeat kede Yekosabab wot ka Somer. Gin bin kiko neko Yowasi i Millo, i yongayo aoto Silla. Bin oko yiko Yowasi Yerusalem i nget joakwari mege; di wode Amasia oko lunyo wange bala abaka.

2 Abakai 13

Abaka Yekoyakas me Isirael

- ¹ I mwaka me ot are kiwie adek me apugan ka Abaka Yowasi wot ka Akasia me Yuda, Yekoyakas wot ka Yeku oko cako pugo Isirael di ebedo Samaria. En eko pug pi mwakini tomon kiwie kanyaare.
- ² En bin eko timo dub i nyim Rwot bala bin Yeroboam wot ka Nebat, di eko mino jo me Isirael otimo dub. En likame eko weko tim areco nogo.
- ³ Aso, cuny Rwot oko wang ne Isirael di eko ruruco jalo jo me Isirael i cing Abaka Kasael me Siria kede i cing wode Benekadad.
- ⁴ Do Yekoyakas oko kwano Rwot di Rwot oko winyo kwac mere, piento en oudo eneno epone karac kame abaka me Siria oudo tie tero kede jo me Isirael.
- ⁵ Pi manono, Rwot oko mino jo me Isirael ngat kame lako gi tetekeny kibwot ki cing jo me Siria; aso, jo me Isirael oko bedo kede anapakin bala bin sek.
- ⁶ Bed bala kamanono da, do jo me Isirael likame oko weko dub kame Abaka Yeroboam oudo omio gi kidonyo iye, do gin kimeede ameda iye kamanono; doko da epir kame oudo kosipo akaka rubanga Asera oko dong cungo Samaria.
- ⁷ Yekoyakas oko dong kede isirikalen aribo jo ot kany aringo kede asigiran, cabalan tomon kede isirikalen me tien tutumia tomon (10,000) kenekene; pien abaka me Siria oudo omuducaro gi di eko pudao gi bala asinge kame kodudupo i diakal me canyo.



⁸Gi ace dedede kame Yekoyakas otimo, ribo kiton teko mere me yi kowandiko gi i *Itabu me Itatam amako Abakai me Isirael*.⁹Aso, Yekoyakas bin oko to di oko yike Samaria, di wode Yekoyasi oko lunyo wange bala abaka.

Abaka Yekoyasi me Isirael

¹⁰I mwaka me ot adek kiwie kanyaare me apugan ka Yowasi bala abaka me Yuda, Yekoyasi wot ka Yekoyakas oko cako pugo Isirael di ebedo Samaria; en bin eko pug pi mwakini tomon kiwie kanyape.

¹¹Eda bin eko timo gikame rac i nyim Rwot; likame eweko tim ka Yeroboam wot ka Nebat kame bin emio jo me Isirael odonyo kede i dub.

¹²Gi dedede ace kame Abaka Yekoyasi otimo, ribo kiton teko mere i kare kame eyi kede Abaka Amasia me Yuda kowandiko gi i *Itabu me Itatam amako Abakai me Isirael*.¹³Yekoyasi oko to di oko yike Samaria i nget abakai ace me Isirael, di wode Yeroboam me are en oko lunyo wange bala abaka.

To ka Elisa

¹⁴Tuwo atek oko mako enabi Elisa. I kare kame oudo etie kede i apien etie kuro to, Abaka Yekoyasi me Isirael oko ot pi nene, di Yekoyasi oko donyo koko i nyime di ewaco be, “Papa na, papa na! In lem ical bala cabalan kede isirikalen aringo kede asigiran agwoko Isirael.”

¹⁵Elisa oko waco ne be, “Kwany imalia ni kede gi me gweno gi.” Aso, Yekoyasi oko kwanyo imalia kede gi me gweno gi.

¹⁶Elisa oko waco ne Yekoyasi pi telo tol me emal pi gwene, di en eko timo kamanono, di Elisa oko keto cinge i wi me ka Yekoyasi.

¹⁷Elisa oko waco ne be, “Aso yab dirisa me bad tetu kide” ; en eko yabo. Elisa oko waco be, “Aso, gwei emal” ; en eko gweno. Elisa oko waco be, “In en emal ka Rwot kame ebino bwono kede jo me Siria. In ibino yi kede jo me Siria i Apek di iko bino bwono gi.”

¹⁸Di Elisa oko meede be, “Kwany imalia” ; en eko kwanyo gi. Di eko waco ne abaka me Isirael be, “Gwegweo gi piny i lobo” ; en eko gwegweo gi ecobo piny tien adek di eko weko.

¹⁹Manono oko wango cuny Elisa di eko waco ne be, “Oudo ipoore cocobo piny tien kany amoto tien kanyape; manono koto oudo omio ibwono Siria atwal atwala, do nan ibino bwono gi tien adek kenekene.”

²⁰Aso, Elisa oko to di oko yike. I kare nono ekodet me joyak me Moab oudo maro ot suro lobo me Isirael.

²¹Ceng acel di oudo kotie yiko icuo moro koudo oto, jo oko neno ekodet moro me joyak nogo, di kiko uco kom icuo nono i ates ka Elisa di kiko ringo tenge. Cucuto di kom icuo nono oriamo kede cogere ka Elisa, icuo nono oko yaruno di eko cungo malo.



Yi i dierediere me Isirael kede Siria

²²Abaka Kasael me Siria oudo obedo tero jo me Isirael kirac i kare me apugan ka Yekoyakas.

²³Do Rwot oudo oko bedo kede kisa i kom gi di eko konyo gi pi isikan mere kame oudo etimo kede Aburaam, Isaka kede Yakobo, di likame eko weko komuducaro gi. En likame pwodi eweko gi akadi tuno tin.

²⁴Abaka Kasael me Siria oko to di wode Benekadad oko lunyo wange bala abaka.

²⁵Di Abaka Yekoyasi me Isirael oko bwono Benekadad tien adek di eko mano bomban kame Benekadad oudo omao i kare me apugan ka Yekoyakas, papa me Yekoyasi.

2 Abakai 14

Abaka Amasia me Yuda

(2 lyutun 25.1-24)

¹mwaka me are me apugan ka Yekoyasi wot ka Yekoyakas bala abaka me Isirael, en kame Abaka Amasia wot ka Yowasi me Yuda ocako pugo kede Yuda.

²Mwakini me dongo mere oudo tie ot are kiwie kany i kare kame bin en ecako kede pug. En bin eko pug i Yerusalem pi mwakini ot are kiwie kanyangon. Nying toto mere bin Yekoadin, dano me Yerusalem.

³En bin eko timo gikame poore i nyim Rwot, cite likame bala kame kwaru mere Daudi bin otimo; do en etimo gi dedede bala kame papa mere Yowasi oudo otimo.

⁴En likame erereto kabedere kame bin koworo iye caljwogi; jo bin oko meede kede ngolo giayala kede dunyo odok angwe kur i kabedere nogo.

⁵Oyotoyot di do en etieko sipakin i apugan, en eko neneko jotik kame bin oneko papa mere, abaka.

⁶Do en likame eko neneko idwe gi; en elubo kop kame bin kowandiko i itabu me iswilia ka Musa, kakame Rwot omio iye cik be, “Likame kobino neko joapapi pi dub me idwe gi, arabo neko idwe pi dub me jonywal gi; do kobino neko ngat acelacel pi dub mere en kikome.”

⁷Amasia bin oko neko jo Edom tutumia tomon (10,000) i Aditot me Munyo di eko mano bomba me Sela. En bin eko cako ne bomba nono nyinge be Yokitel, kame pwodi kolwonge kede tuno tin.

⁸Di do Amasia oko ooro jo but Abaka Yekoyasi, abaka me Isirael, en wot ka Yekoyakas, akwar Yeku, kede kop kame waco be, “Bia oriami wang i wang.”

⁹Do Abaka Yekoyasi oko dwoko ne kop kame waco be, “Yat me okuto moro kame oudo tie i abum me Lebanon bin ocwao kop but yat seda me abum me Lebanon di ewaco ne be, ‘Mia nyari anyom ne woda’ ; do le moro me obar me Lebanon oko beo di eko nyonyono yat me okuto nono.



¹⁰Ateteni in itieko bwono jo Edom, di manono oko mini idoko ngaewaka. Mi dwongo kame komi romi, di iko dong bedo paco ni. Pinyo kame mio in imito mono peko di iko kelo can i komi kede i kom jo me Yuda?”

¹¹Do Amasia oko dagi winyo kop mere. Aso, Abaka Yekoyasi me Isirael oko ot ne, di gin kiko riamo wang i wang i yi kame bin oko bedo Bet Semes i Yuda.

¹²Jo me Isirael bin oko bwono jo Yuda, di ngat acelacel oko ringo ture.

¹³Abaka Yekoyasi me Isirael bin oko mako Abaka Amasia me Yuda bala mabus. En eko ot Yerusalem, di eko reto apama me Yerusalem piny, cako ki Erute me Epuraimu tuno i Erute me Agora, kakame boro mere buco romo mita tol are.

¹⁴En eko yako saabu kede siliba dedede, karacel kede jamini dedede kame oudo tie i ot ka Rwot kede kakame kokano iye jamini i ot me abaka. Emako jo da di eko tero bala mabus kame kopooore lako alaka; di do en eko dok Samaria.

¹⁵Gi dedede apat kame Yekoyasi bin otimo, teko mere, kede kite kame en bin eko yi kede Abaka Amasia me Yuda, gin lung kowandiko gi i *Itabu me Itatam amako Abakai me Isirael*.

¹⁶Yekoyasi bin oko to di oko yike Samaria i nget abakai me Isirael. Di do wode Yeroboam me are en oko lunyo wange bala abaka.

To ka Abaka Amasia me Yuda

(2 lyutun 25.25-28)

¹⁷Abaka Amasia me Yuda bin oko meede bedo kuo pi mwakini tomon kiwie kany ingei Abaka Yekoyasi me Isirael to.

¹⁸Gi dedede apat kame Amasia bin otimo kowandiko i *Itabu me Itatam amako Abakai me Yuda*.

¹⁹Jo mogo bin oko poro kop i kom Amasia i Yerusalem pi mito neke, di en bin eko ringo Lakis. Do gin bin kiko wape kunono di kiko neke.

²⁰Liel mere bin oko mino asigira oyeo odwoko Yerusalem, di oko yike kabedo kame bin oyiko iye abakai i Bomba ka Daudi.

²¹Jo me Yuda bin oko keto Usia wode obedo abaka kame lunyo wange, di mwakini me dongo mere oudo tie tomon kiwie kanyape.

²²Usia bin oko dwoko Elat odok Yuda, di en eko medo gere ingei to ka Amasia papa mere.

Abaka Yeroboam me Are me Isirael

²³I mwaka me tomon kiwie kany me apugan ka Amasia wot ka Yowasi bala abaka me Yuda, Yeroboam wot ka Yekoyasi oko doko abaka me Isirael, di en eko pug i Samaria pi mwakini ot ongwon kiwie acel.

²⁴En bin eko timo gikame neno rac i nyim Rwot; en ebedo timo dub dedede kame Yeroboam wot ka Nebat oudo otimo, di eko mino jo me Isirael odubo.



²⁵En bin eko dwoko ikor me Isirael cako ki Lebo Kamat tuno i nam me Araba, di lubere kede kop kame Rwot Rubanga me Isirael owaco ki dog ngatic mere Yona wot ka Amitai, enabi kame bin yai ki Gat Keper.

²⁶Rwot bin oneno kite kame jo me Isirael oudo tie kede i twon can, jo koudo obedo ipasoi kede kalikame obedo ipasoi; likame tie dano moro kame oudo romo konyo gi.

²⁷Do Rwot oudo likame owaco be ebino weno nying me Isirael i wi lobo, omio en eko tic kede Yeroboam me are pi lako gi.

²⁸Gi dedede apat kame Yeroboam me are bin otimo, teko mere, kite kame en bin eyi kede, kede kite kame en bin edwoko ne kede Isirael Damasiko kede Kamat, bomban kame oudo obedo me Yuda, gin dedede kowandiko gi i *Itabu me Itatam amako Abakai me Isirael*.

²⁹Yeroboam bin oko to di oko yike i nget joakwari mege, abakai me Isirael; wode Sakaria en kame bin oko lunyo wange bala abaka.

2 Abakai 15

Abaka Usia me Yuda

(2 lyutun 26.1-23)

¹I mwaka me ot are kiwie kanyaare me apugan ka Yeroboam me are me Isirael, Usia wot ka Amasia bin oko doko abaka me Yuda.

²Mwakini me dongo mere oudo tie tomon kiwie kanyape i kare kame en ecako kede pug. En bin eko pug i Yerusalem pi mwakini ot kany kiwie are. Nying toto mere bin Yekolia, dano me Yerusalem.

³En bin eko bedo timo gikame poore i nyim Rwot, bala kame papa mere Amasia bin otimo.

⁴Akadi bed kamanono da, kabedere me woro caljwogi likame bin oko kwakwanyo tenge; jo pwodi oko bedo mino giayala angola kede giayala me odok angwe kur i kabedere nogo.

⁵Rwot bin oko mino tuwo arac me del kom omako abaka. En bin eko bedo kede tuwo nono di opoko ne ode kene, tuno i kare me to mere. Wode Yotam en kame do bin oko bedo telo paco me abaka, kede jo me lobo nono da.

⁶Gi dedede apat kame Usia bin otimo kowandiko i *Itabu me Itatam amako Abakai me Yuda*.

⁷Usia bin oko to di oko yike i nget joakwari mege i Bomba ka Daudi. Wode Yotam en kame bin oko lunyo wange bala abaka.

Abaka Sakaria me Isirael

⁸I mwaka me ot adek kiwie kanyauni me apugan ka Abaka Usia me Yuda, Sakaria wot ka Yeroboam me are oko doko abaka me Isirael. En bin eko pugo Isirael i Samaria pi duwete kanyape.



⁹En eko timo gikarac i nyim Rwot, bala kame bin joakwari mege otimo. Eda ebedo timo dub kame bin Yeroboam wot ka Nebat obedo timo, kame bin oko mino jo me Isirael odubo.

¹⁰Salum wot ka Yabesi bin oko bedo kede iik arac i kome, di eko cobe i nyim jo eneke, di en eko lunyo wange bala abaka.

¹¹Gi dedede apat kame Sakaria bin otimo, kowandiko gi i *Itabu me Itatam amako Abakai me Isirael*.

¹²Manoni en gikame Rwot bin ocikere iye but Abaka Yeku di ewaco ne be, “Ikwaē ni bino bedo abakai me Isirael tuno i ikwaē me ongwon.” Di bin eko da timere kamanono.

Abaka Salum me Isirael

¹³I mwaka me ot adek kiwie kanyangon me apugan ka Abaka Usia me Yuda, Salum wot ka Yebes bin oko doko abaka me Isirael. En bin eko pug i Samaria pi duwe acel.

¹⁴Menakem wot ka Gadi bin oko wok ki Tirisa ebino Samaria; en eko neko Salum wot ka Yabesi, di en eko lunyo wange bala abaka.

¹⁵Gi dedede ace kame Salum bin otimo, kiton iik arac kame ebedo tie kede, gin dedede kowandiko gi i *Itabu me Itatam amako Abakai me Isirael*.¹⁶I kare nono Manakem bin oko muducaro bomba me Tipisa, jo dedede kame bin bedo iye, kede adulion koluke cako ki Tirisa ot kede anyim, pien gin bin likame kirieo cing gi bute. En bin ebabaro kiton yi mon koyac kame bin tie kunono.

Abaka Menakem me Isirael

¹⁷I mwaka me ot adek kiwie kanyangon me apugan ka Usia me Yuda, Menakem wot ka Gadi bin oko cako pug bala abaka me Isirael; en bin eko pug i Samaria pi mwakini tomon.

¹⁸En bin eko timo gikarac i nyim Rwot; en pi kare me kuo mere lung, ebedo timo dub kame bin Yeroboam wot ka Nebat obedo timo, kame bin oko mino jo me Isirael opoto i dub.

¹⁹Abaka Tigilat Pileser me Asiria bin oko bino suro Isirael, di Menakem oko mine kilo tutumia ot adek kiwie kanyauni (38,000) me siliba, tetekeny en ekonye edok tek i ajakanut mere bala abaka.

²⁰Menakem bin oraro sente nono kibus jo dedede kobaro me Isirael, ngat acelacel en emio okwanyo siliba akaya ot kany di en eko mino sente nono but abaka me Asiria. Aso, abaka me Asiria bin oko dok i piny mere.

²¹Gi dedede ace kame bin Menakem otimo, kowandiko gin dedede i *Itabu me Itatam amako Abakai me Isirael*.²²Menakem bin oko to di oko yike i nget joakwari mege, di wode Pekakia oko lunyo wange bala abaka.

Abaka Pekakia me Isirael



²³I mwaka me ot kany me apugan ka Abaka Usia me Yuda, Pekakia wot ka Menakem bin oko doko abaka me Isirael, di en eko pug pi mwakini are i Samaria.

²⁴En bin eko timo gikame rac i nyim Rwot; en ebedo timo dub kame bin Yeroboam wot ka Nebat obedo timo, kame bin oko mino jo me Isirael opoto i dub.

²⁵Peka wot ka Remalia, ngatel me isirikalen mege, oko bin bedo kede iik arac i kome kede cuo ot kany me Gilead, di gin kiko suro Pekakia di kiko neke i Samaria, di oudo en etie kabedo kame kocelo kede apama atek i paco me abaka. En eneke karacel kede Aragob kede Ariek di en eko lunyo wange bala abaka.

²⁶Gi dedede ace kame bin Pekakia otimo, kowandiko gin dedede i *Itabu me Itatam amako Abakai me Isirael*.

Abaka Peka me Isirael

²⁷I mwaka me ot kany kiwie are me apugan ka Abaka Usia me Yuda, Peka wot ka Remalia bin oko doko abaka me Isirael, di eko pug i Samaria pi mwakini ot are.

²⁸En bin eko timo gikame rac i nyim Rwot; en ebedo timo dub kame bin Yeroboam wot ka Nebat obedo timo, kame bin oko mino jo me Isirael opoto i dub.

²⁹I kare kame bin Peka tie kede abaka me Isirael, en kame Abaka Tigilat Pileser me Asiria oko mano kede bomban me Iyon, Abel Bet Maka, Yanoa, Kedes, Kasor, Gilead, Galilaya, kede lobo me Naputali dedede, di eko mako jo bala mabus di eko tero gi Asiria.

³⁰I mwaka me ot are me apugan ka Yotam wot ka Usia bala abaka me Yuda, Kosea wot ka Ela oko bedo kede iik arac i kom Abaka Peka, di eko neke, di en eko lunyo wange bala abaka.

³¹Gi dedede ace kame bin Peka otimo, owandiko gin dedede i *Itabu me Itatam amako Abakai me Isirael*.

Abaka Yotam me Yuda

(2 lyutun 27.1-9)

³²I mwaka me are me apugan ka Abaka Peka wot ka Remalia bala abaka me Isirael, Yotam wot ka Usia bin oko doko abaka me Yuda.

³³Mwakini me dongo mere oudo tie ot are kiwie kany i kare kame ecako kede pug, di en bin eko pug i Yerusalem pi mwakini tomon kiwie kanyape. Nying toto mere bin Yerusa nyar ka Sadoki.

³⁴En bin eko bedo timo gikame poore i nyim Rwot, bala kame bin papa mere Usia obedo timo.

³⁵Akadi kamanono da, likame bin oko kwanyo kabedere me woro caljwogi; jo bin pwodi oko meede kede mino giayala angola kede giayala me odok angwe kur i kabedere nogo. Yotam en kame bin ogero erute me tetu malo me ot ka Rwot.



³⁶Gi dedede ace kame bin Yotam otimo, owandiko gin dedede i *Itabu me Itatam amako Abakai me Yuda*.³⁷I kare me apugan mere en kame bin Rwot ocako cwano kede Abaka Resin me Siria kede Peka wot ka Remalia suro Yuda.

³⁸Yotam bin oko to di oko yike i nget joakwari mege i Bomba ka Daudi, kwaru mere. Wode Akas en kame bin oko lunyo wange bala abaka.

2 Abakai 16

Abaka Akas me Yuda

(2 lyutun 28.1-27)

¹I mwaka me tomon kiwie kanyaare me apugan ka Peka wot ka Remalia bala abaka me Isirael, Akas wot ka Yotam bin oko doko abaka me Yuda.

²Mwakini me dongo ka Akas bin tie ot are i kare kame ecako kede pug. En bin eko pug i Yerusalem pi mwakini tomon kiwie kanyape. En likame eko bedo timo gikame poore i nyim Rwot Rubanga mere, bala kame bin kwaru mere Daudi obedo timo,

³do en eko lubo timo gikame abakai me Isirael obedo timo. En bin emio kiton wode kikokome bala giayala awanga but caljwogi, di elubo tim me kwer arac me jo kame bin Rwot oriamo tenge i lobo nono i kare kame bin jo me Isirael donyo kede iye.

⁴Abaka Akas bin obedo mino giayala angola kede giayala me odok angwe kur i kabedere me woro caljwogi, i wi mori, kede i dud yen oduko dedede.

⁵Abaka Resin me Siria kede Abaka Peka me Isirael bin oko ot suro Yerusalem; gin bin kiko luke do likame kiko twero bwono Akas.

⁶I kare nono bin abaka me Edom oko dwoko bomba me Elat i cing jo Edom, di eko riamo tenge jo me Yuda kame bin bedo kunono. Jo Edom oko bino Elat di kiko donyo bedo iye tuno tin.

⁷Akas bin oko ooro jo but Abaka Tigilat Pileser me Asiria di ewaco ne be, “Ango atie ngatic ni doko ango wodi. Bia ilaka ki cing abaka me Siria kede ki cing abaka me Isirael, jo kame tie sura.”

⁸Akas oko kwanyo da siliba kede saabu kame oudo tie i ot ka Rwot kede i kabedo kame bin kokano iye jamini i ot me abaka, di eko cwano ne abaka me Asiria bala giamia.

⁹Abaka me Asiria bin oko winyo kop mere, di eko yai ot suro Damasiko, eko mane di eko neko Abaka Resin, doko eko mako jo mege etero gi Kir bala mabus.

¹⁰Kakame bin Abaka Akas oko ot kede Damasiko pi riamo kede Abaka Tigilat Pileser me Asiria, en eko neno alutari kame oudo tie Damasiko. Abaka Akas oko cwano ne ngasaseredoti Uria cal me alutari nono, kede kite kame oudo otime kede i yore i yore.

¹¹Uria oko gero alutari nono i cal kame Abaka Akas oudo ocwao ki Damasiko. En egere paka tieke di pwodi Akas likame odwogo ki Damasiko.



¹²Kakame bin abaka odwogo kede ki Damasiko, en eko neno alutari nono, di eko ot iye,

¹³en eko mino giayala awanga mere kede giayala me alos, kede eko onyo giayala amata, di eko kikiro remo me giayala mere me nywak i kom alutari nono.

¹⁴ Akas bin oko kwanyo ki nyim tempulo alutari me nyonyo buronsi kame oudo tie i nyim Rwot, ki kabedo kame oudo tie i dierediere me alutari meren kede tempulo, di en eko tere eoto kete i bad tetu malo me alutari meren.

¹⁵Di do en eko ciko ngasaseredoti Uria be, “Ibino tic kede alutari adwong noni me mino giayala awanga me odiko kede giayala me alos kame koyalo otieno, giayala me awanga ka abaka kede giayala mere me alos, karacel kede giayala awanga me jo dedede, giayala gi me alos kede me amata. Ibino kikiro i kome remo me giayala awanga dedede kede remo me giayala angola dedede; do alutari me nyonyo buronsi bino bedo mera me penyo kiye kop kibut Rwot.”

¹⁶Ngasaseredoti Uria bin oko timo gi dedede kame Abaka Akas ociko ne.

¹⁷ Abaka Akas bin oko totongo purem me icegeren, di eko kwanyo kalayan gi tenge. En bin eko kwanyo da tenge epipa me pii kame oudo cungo i ngei twonin kame kotimo kede nyonyo buronsi, di eko kete i kom acakini kame obedo kidi.

¹⁸Di do pi yomo cuny abaka me Asiria, Akas bin oko kwanyo tenge eema kame oudo kogero i paco me abaka di otio kede i ceng Sabato, doko eko cego yongayo kame bin abaka donyo kede i ot ka Rwot.

¹⁹Gi dedede ace kame bin Abaka Akas otimo kowandiko gi i *Itabu me Itatam amako Abakai me Yuda*.

²⁰ Akas bin oko to di oko yike i nget joakwari mege i Bomba ka Daudi; wode Esekia bin oko lunyo wange bala abaka.

2 Abakai 17

Abaka Kosea me Isirael

¹I mwaka me tomon kiwie are me apugan ka Abaka Akas me Yuda, Kosea wot ka Ela bin oko doko abaka me Isirael, di eko pugo Isirael i Samaria pi mwakini kanyangon.

²En bin eko bedo timo gikarac i nyim Rwot, cite kalikame rom kede kame abakai me Isirael kogeo pug nen obedo timo.

³Abaka Salamaneser me Asiria bin oko bino yi kede Kosea. Kosea bin oko doko dano kame Salamaneser pugo, di en eko donyo culo esolo bute.

⁴Do abaka me Asiria bin oko udo be Kosea obedo dano kame kelo arubaruba; piento Kosea oudo ooro jo but Abaka So me Misiri pi bino konye kede abaka me Asiria, di eko jiko kwanyo esolo me buli mwaka but abaka me Asiria. Manono oko mino abaka me Asiria omake di oko twene i otkol.

Samaria Oposto



- ⁵Di do abaka me Asiria bin oko suro lobo nono dedede di eko ot Samaria eko luke pi mwakini adek.
- ⁶I mwaka me kanyangon me apugan ka Kosea, abaka me Asiria bin oko mano Samaria, di eko tero jo me Isirael Asiria bala mabus. En bin eko keto mogo kikom gi i bomba me Kala, jo ace eketo i nget ecilet kame kolwongo be Kabor i adul me Gosan, kede mogo eko keto i bomban me Mede.
- ⁷Manoni bin otimere pien jo me Isirael oudo otimo dub but Rwot Rubanga gi, ngat kame bin okwanyo gi ki lobo me Misiri ki cing Parao abaka me Misiri. Gin bin kiko bedo woro rubangan apat
- ⁸di kiko donyo lubo itok me atekerin kame bin Rwot oriamo tenge ki nyim gin ki lobo nono kede itok kame bin abakai me Isirael okelo.
- ⁹Jo me Isirael bin oko timo gi kalikame poore but Rubanga gi. Gin kigero kadedere kame gin kiworo iye caljwogi i bomban gin dedede, cako ki bomban atitino tuno i bomban adongo kame kocelo kede apama atek.
- ¹⁰ Gin kicibo ipirin me kide kede cal me rubanga Asera i wi imukuran dedede kede i dud yen koduko dedede, pi gin woro.
- ¹¹Di gin kiko mino giayala me odok angwe kur i kadedere me woro caljwogi nogo dedede, bala kame atekerin kame bin Rwot oriamo tenge ki nyim gin i lobo nono oudo timo. Gin bin kiko timo gikareco, di kiko wango cuny Rwot.
- ¹²Gin kibedo timo tic ne caljwogi, gikame Rwot bin ociko gi iye be kur kitimi.
- ¹³Rwot bin obedo kwenyaro jo me Isirael kede jo Yuda di emio enabi acelacel kede nganeno acelacel waco negi be, “Lokerenu tenge ki yote areco me kuo wu, di ikounu donyo gwoko cik kede pwony na kame tie i iswil kame bin ango amio joakwari wu, kede kame bin amio inabin jotic na okelo ne wu.”
- ¹⁴Do gin bin likame kiko lubo; gin oudo kibedo joepali bala bin joakwari gi, jo kame bin likame oyei kop ka Rwot Rubanga gi.
- ¹⁵Gin kiko dagi lubo pwony mere, kede isikan mere kame bin en etimo kede joakwari gi, doko gin likame kiko paro gimoro i kom ikwenyar kame en ebedo mino gi. Gin kibedo woro caljwogi gikame kony mere li di gida kikom gi kony gi oko doko li. Gin kibedo lubo ikiteso me atekerin kame bin oluko gi, jo kame bin Rwot ociko gi be kur kilub gikame gin kitimo.
- ¹⁶ Gin kiweko lubo cik dedede ka Rwot Rubanga gi, di kiko teto cal are me roce pir gin ken gi. Gin kiko timo da cal me rubanga adako kame nyinge Asera, di gin kiko donyo woro gi dedede kame tie i malo, di kitimo tic ne rubanga Baal.
- ¹⁷ Gin bin kimio idwe gi awobe kede anyira bala giayala awanga; gin oudo kipenyo yamere kede kilamo gagi; oudo kiketo cuny gi timo gikarac i nyim Rwot di kiko wango cunye.



¹⁸Pi mano, Rwot bin cunye oko wang kitek ne jo me Isirael di eko riamo gi tenge ki nyime; likame tie ngatamoro kame bin oko dong kwanyo kenekene jo me ekeko ka Yuda.

¹⁹Jo me ekeko ka Yuda da bin likame oko gwoko cik ka Rwot Rubanga gi, do kiko donyo lubo itok kame jo me Isirael okelo.

²⁰Rwot bin oko dagi ikwae dedede me Isirael; en eko mino gin alola di eko mino gi i cing joyak, tuno en tieko riamo gin dedede tenge ki nyime.

²¹Di do bin Rwot otieko poko jo me Isirael tenge kibus jo me Yuda, jo me Isirael bin oko keto Yeroboam wot ka Nebat obedo abaka gin. Yeroboam oko mino jo me Isirael oweko lubo Rwot di en eko mino gin kitimo dub adwong twatwal.

²²Jo me Isirael bin oko meede kede timo dub kame Yeroboam oudo obedo timo; gin likame kiweko timo gi

²³tuno Rwot riamo gin tenge ki nyime, bala kame oudo ewaco kede sek kibus inabin jotic mege. Aso, bin oko kwanyo jo me Isirael ki lobo gi amako gi di oko tero gi Asiria bala joring ayela, kakame kiko donyo bedo iye tuno tin.

Jo Asiria Odonyo Bedo Isirael

²⁴Abaka me Asiria bin oko kelo jo ki bomban me Babilon, Kuta, Aba, Kamat, kede Separabaim, di en eko keto gi i bomban me Samaria kawang jo me Isirael; gin bin kiko gamo bomban nogo di kiko donyo bedo i yi gi.

²⁵I kare kame bin gin kicako bedo kede kunono, gin oudo likame kiworo Rwot; pi manono, Rwot bin oko cwano negi inguon di oko donyo neko gi.

²⁶Bin oko waco ne abaka me Asiria be jo kame oudo en eketo pi bedo i bomban me Samaria likame ngeo iswil me rubanga me lobo nono, pi mano, rubanga nono otieko cwano negi inguon kame oudo tie neneko gi.

²⁷Di do abaka me Asiria bin oko mino cik be miero dwok ngasaseredoti acel kunono, kikom josaseredoti kame bin kokwanyo ki kunono, tetekeny en edok bedo kunono di eko pwonyo jo iswil ka rubanga me lobo nono.

²⁸Aso, ngasaseredoti acel kikom kame gin oudo kitero ki Samaria oko bin dok di eko donyo bedo Betel; en eko donyo pwonyo gi epone kame poore kiwor kede Rwot.

²⁹Do ateker acelacel kame bin oko donyo bedo Samaria pwodi oko bedo timo rubangan gin amako gi di kiko keto gi i abilan me kabedere kame jo Samaria bin otimo me woro caljwogi, ateker acelacel otimo rubanga mere i bomba kame oudo gin kitie bedo iye;

³⁰jo me Babilon otimo cal me rubanga kame kolwongo be Sukot Benot, jo me Kut oko timo cal me rubanga Neregal, jo me Kamat otimo cal me rubanga Asima;



³¹jo me Iba otimo cal me rubanga Nibas kede Taratak; jo me Separabaim oko bedo wango idwe gi i mac bala giayala but rubanga Adaramelek kede Anamelek, rubangan me bomba me Separabaim.

³²Gin oudo da kiworo Rwot, doko da kiko yero jo me epone apapat kikom gin ken gi pi bedo josaseredoti me kadedere me woro caljwogi nogo, jo kame bin mio giayala angola gin i abilan me kadedere nogo.

³³Aso, gin bin kiko bedo woro Rwot, di doko kitimo tic ne rubangan gin amako gi, di kilubo ikiteso me atekerin me kadedere kame bin kokwanyo gi kiye.

³⁴Tuno tin gin pwodi kitimo itok gi me kare kasek nogo. Gin likame kiworo Rwot doko likame kilubo iswil arabo pwony amoto cik kame en bin emio ikwae ka Yakobo, ngat kame en bin eko cako ne nyinge be Isirael.

³⁵Rwot bin otimo kede gin isikan di eko ciko gi be, “Wun likame ibinunu woro rubangan apat arabo kudo wi wu piny but gi, akadi timo ne gin tic, amoto ngolo giayala but gi.

³⁶Wun ibinunu wora anga ngat kame bin akwanyo wu ki lobo me Misiri kede twer atek kede twon teko; wun ibinunu kudo wi wu piny buta, doko ibinunu mina giayala angola wu.

³⁷I kare dedede wun ibinunu gwokere di ikounu lubo pwony, iswil kede cik kame anga bin awandiko ne wu. Wun likame ibinunu woro rubangan apat,

³⁸doko wi wu kur wil kede isikan kame anga atieko timo kede wu. Wun likame ibinunu woro rubangan apat,

³⁹do ibinunu wora, anga Rwot Rubanga wu, di anga ako bino lako wu ki cing jokwor wu.”

⁴⁰Do gin bin kiko daga winyo, di kiko meede kede lubo itok gin kasek nono.

⁴¹Aso, atekerin nogo bin oko bedo woro Rwot, do di doko kitimo tice ne caljwogi gi da; tuno tin ikwae gi pwodi meede timo kamanono.

2 Abakai 18

Abaka Esekia me Yuda

(2 Iyutun 29.1-2; 31.1)

¹mwaka me adek me apugan ka Kosea wot ka Ela bala abaka me Isirael, Esekia wot ka Akas bin oko doko abaka me Yuda.

²Mwakini me dongo mere oudo tie ot are kiwie kany i kare kame bin en ecako kede pug. En bin eko pug i Yerusalem pi mwakini ot are kiwie kanyangon. Nying toto mere bin Abi nyar ka Sakaria.

³En bin eko timo gikame poore i nyim Rwot bala kame bin kwaru mere Daudi otimo.



⁴ En ekwanyo kabedere kame oudo koworo iye rubangan, emumuko ipirin me kide, di eko tongo ereto piny cal me rubanga adako kame oudo kolwongo be Asera. En bin eko tuturo cal me twol kame bin Musa otimo kede nyonyo buronsi, kame bin kocako ne nyinge be Nekusutan. Pien tuno i kare nono jo me Isirael oudo obedo mino giayala me odok angwe kur but twol nono.

⁵Esekia bin oketo gen mere i kom Rwot Rubanga me Isirael. Likame tie abaka moro me Yuda kame oudo cal bala en, akadi kikom abakai kame en elunyo cen ngei gi amoto kolunyo cen ngei en.

⁶En bin emoko i kom Rwot kitek; likame eweko lube do ebedo gwoko cik kame bin Rwot omio Musa.

⁷Rwot oudo tie kede en, omio kabedere dedede kame en bin eoto iye gi dedede bedo ne kiber. En bin eko jemo edagi timo tic ne abaka me Asiria.

⁸En bin eko suro jo Pilistia ape paka tuno Gasa kede adulion koluke, cako ki calo katitidi tuno i bomba kame kocelo kede apama.

⁹I mwaka me ongwon me apugan ka Esekia, en kame oudo mwaka me kanyaare me apugan ka Kosea wot ka Ela bala abaka me Isirael, Abaka Salamaneser me Asiria bin oko suro Samaria di eko luke.

¹⁰I atiekini me mwaka me adek mere, en eko mano Samaria. Manono otimere i mwaka me kanyape me apugan ka Esekia, doko en oudo ebedo mwaka me kanyangon me apugan ka Kosea me Isirael.

¹¹Abaka me Asiria oko tero jo me Isirael Asiria bala mabus di eko keto gi bedo i bomba me Kala, i nget ecilet me Kabor i adul me Gosan, kede i bomban me Mede.

¹²Jo me Samaria bin komako di oko tero bala mabus pien gin likame kilubo kop ka Rwot Rubanga gi, do gin kituro isikan mere kede gi. Gin kidagi lubo iswilia dedede kame Musa ngatic ka Rwot bin ociko; kidagi winyo iswilia nogo akadi lubo gi.

Jo Asiria Osuro Yerusalem

(2 Iyutun 32.1-19; Isaya 36.1-22)

¹³I mwaka me tomon kiwie ongwon me apugan ka Abaka Esekia, Abaka Senakerib me Asiria oko ot suro bomban dedede me Yuda kame bin kocelo kede apama atek di eko mano gi.

¹⁴Abaka Esekia oko cwano kop but Senakerib, di Senakerib oudo tie Lakis be, “Ango adubo; weka di iko dok cen; ango ayei timo gimoroni kenekene kame in iwaco na.” Abaka me Asiria oko ngolo ne Esekia pi culo kilo tutumia tomon me siliba (10,000), kede kilo tutumia acel me saabu (1,000),

¹⁵Esekia oko mine siliba dedede kame bin tie i ot ka Rwot kiton kame bin tie kakame bin kokano iye jamini i ot ka abaka.



16I kare nono Esekia bin oko da kikiso saabu ki ikekon me tempulo, kiton saabu kame bin tie i kom ibaon me nget ikekon kame en kikome oudo epuo iye. En ekikiso gi di eko cwano ne abaka me Asiria.

17Abaka me Asiria oko cwano jodongo adek me isirikalen kede twon ekodet me isirikalen pi ot suro abaka Esekia i Yerusalem. Kakame gin bin kituno kede Yerusalem, gin kiko cungo i puleju kame bin kelo pii ki atapar me malo, i yongayo adwong aoto i dukini me jo tim igoen.

18Kakame gin bin kiko lwongo kede abaka pi bino riamo kede gi, Eliakim wot ka Kilikia, ngat kame bin telo kope kame mako paco me abaka, kede Sebena kalani, kede Yoa wot ka Asap, ngat kame bin gwoko kope kame kowandiko dedede, en kame oko lunyo bino but gi.

19Ngat acel kikom jodongo me isirikalen me Asiria oko waco negi be, “Wacenu Esekia be abaka adwong, en abaka me Asiria penye be, ‘Gen kame in itie kede no kara cungo i kom nyo?’

20Benyo, in iparo be kop me dog kenekene rom aroma kede rieke kede teko me yi? Ngai do kame in itie keto gen ni i kome, en komio in ijemo na?

21Neningo, in itie geno Misiri kame rom aroma kede mako magada akaka ebela me cing; magada kame tur eko cobo cingi ka icatakino kede. Parao abaka me Misiri cal kamanono but jo dedede kame keto gen gi i kome.’

22Do ka in iwaco nango be, ‘Wan ogeno Rwot Rubanga wa, ‘benyo, likame kabedere kame kowore iye kede alutarin mege en kame Esekia orereto di ewaco ne jo me Yuda kede Yerusalem be, ‘Wun ibinunu woro Rubanga i nyim alutari me Yerusalem kenekene’ ?

23Nataman bia italere kede adwong na abaka me Asiria. Ango abino mini asigiran tutumia are (2,000), ka in ikaruno udo jo kame twero ringo kede gi.

24Benyo benyo kame in itwero bwono kede akadi ngatel acel me isirikalen me ruom apiny twatwal kikom jotic me ngadwong na, ka in pwodi igeno Misiri pi cwano ni cabalan kede jo kame ringo kede asigiran?

25Medo i wi manono, benyo, in iparo be ango abino pi muducaro kabedo noni abongo Rwot konya? Rwot en kowaco nango be asur lobo noni di ako muducaro en.”

26Di do Eliakim, Sebena, kede Yoa oko waco ne ngadwong me isirikalen nono be, “Wan okwai iyam kede wan jotic ni kede leb Aramaik, pien wan owinyo leb nono. Kur iyam kede wa kede leb me jo Yuda, pien jo dedede kame tie i wi apama tie winyo.”

27Ngadwong me isirikalen nono oko waco negi be, “Benyo, iparunu be wun kede ngadwong wu kenekene en kame ngadwong na ocwa pi bino waco ne wu kope nogi dedede, do likame but jogo kame tie beda i wi apama, gin jo kame kibino camo cet gi di iko mato lac gi, bala wuda?”



²⁸Di do ngadwong me isirikalen nono oko cungo di eko lelemo kede leb jo Yuda be, “Winyunu kop kame abaka adwong tie waco, en abaka me Asiria!

²⁹Abaka kwenyaro wu be kur imiunu Esekia ngalu, piento en likame etwero lako wu ki cinga.

³⁰Kur igamunu kop ka Esekia me mino wu keto gen wu i kom Rwot, be Rwot ateteni bino lako wu, doko bomba wu likame bino poto i cing abaka me Asiria.

³¹Kur iwinyunu kop ka Esekia. Abaka me Asiria tie waco be wokunu ooko bute di ikounu iiko kop me mulem kede en; di do wun dedede ikounu bino camo anyakini me olok wu kede anyakini me epigi wu, di imatunu pii me ataneko wu,

³²tuno ango bino di ako tero wu i lobo kame cal bala meru, lobo kame ceko cam doko bwini dwong iye, lobo kame mugati kede olok odure iye, lobo kame mo me olibeti kede mokic dwong iye, tetekeny kur itounu do ibedunu kuo. Kur iwinyunu kop ka Esekia be Rwot bino lako wu.

³³Benyo, tie rubanga me ateker moro kotieko lako piny mere ki cing abaka me Asiria?

³⁴Kara rubangan me bomban me Kamat, Arapad Separabaim, Kena, kede Iba tie tuai? Benyo, gin bin kiko lako Samaria ki cinga?

³⁵Rubanga mene kikom rubangan dedede me pinye nogi en kame bin oko lako piny gi ki cinga, en kame mio iparunu be Rwot twero lako Yerusalem ki cinga?”

³⁶Jo oko ling titi likame kigamo doge akadi acel, pien Abaka Esekia oudo ociko gi be kur kigam doge.

³⁷Di do Eliakim, Sebena, kede Yoa oko nyinyilo igoen me kom gi pi cwercury di kiko ot tatamo ne Esekia kope kame ngadwong me isirikalen me Asiria owaco.

2 Abakai 19

Esekia Openyo Tam kibun Isaya

(Isaya 37.1-7)

¹kakame Esekia owinyo kede kop kame gin kitero ne, en eko nyinyilo igoen me kome, eko um kede epuko pi iturur, di eko ot i ot ka Rwot.

²En eko ooro Eliakim, ngadwong me paco me abaka, kede Sebena kalani, kede josaserdoti adongo, but enabi Isaya wot ka Amos, gida oudo kitie ngapo ipukoi.

³Gin kiko waco ne Isaya be, “Esekia waco kaman: ceng atin obedo ceng me cwercury, me cocoko wa, kede me mino wa lewic. Wan ocalunu bala mon kame esawa me nywal gi otuno, do kili kede teko me dinyo idwe.

⁴Cengemogo Rwot Rubanga ni owinyo kope dedede kame ngadwong me isirikalen me Asiria owaco, en ngat kame ngadwong mere abaka me Asiria ocwae pi bino nywaro Rubanga akuo. Akwao Rwot Rubanga nin eket can i kom gi pi kope dedede kame en etieko winyo. Pi mano, leg pi jo odong kuo.”



⁵Kakame jotic me Abaka Esekia otieko waco ne kede Isaya kop kame abaka oudo ooro gi kede,

⁶Isaya oko waco negi be, “Oti iwacenu ngadwong wu be, ‘Rwot waco kaman: kur lworo maki pi kope me acae kame itieko winyo di ngatic me abaka me Asiria waco i koma.

⁷Ango kikoma abino mine cuny moro, tetekeny en ebino winyo rwonge moro, di eko dok i lobo mere. Ango abino mino koneke kede epima i lobo mere kunono.’ “

Jo Asiria Omedo Ngato bobo

(Isaya 37.8-20)

⁸Ngadwong me isirikalen me Asiria oko winyo be abaka gi oudo otieko yai ki Lakis etie do yi i bomba me Libina. Aso, en eko ot bute kunono.

⁹Abaka me Asiria bin oko winyo be Abaka Tiraka me Abisinia oudo tie telo isirikalen me Misiri pi bino yi kede gi. Kakame en bin ewinyo kede kop nono, en bobo eko ooro jo but Esekia pi waco ne be,

¹⁰” Kur imi Rubanga ni kame in itie keto gen ni i kome nono ngali be Yerusalem likame bino poto i cinga.

¹¹In itieko winyo gikame abaka me Asiria otieko timo ne lobere dedede, di emuducaro gi atwal atwala. Benyo, iparo be wun ikarununu bwot?

¹²Abakai me Asiria kame ango alunyo cen ngei gi bin omuducaro bomban me Gosan, Aran, kede Resep, kede jo me Eden kame oudo tie Telesar, cabo likame tie moro kikom gi kame rubanga mere oko lake.

¹³Abakai me bomban me Kamat, Arapad, Separabaim, Kena kede Iba tie tuai?”

¹⁴Abaka Esekia oko gamo baluwa ki cing jo kame oudo ooro di eko somo. Di do en eko ot i ot ka Rwot di eko keto baluwa nono i nyim Rwot.

¹⁵Esekia oko lego but Rwot di ewaco be, “Okwe Rubanga me jo me Isirael, in ngat kame ibedo i kom ni me ajakanut i wi cerubim, in keni en Rubanga, kame pugo ajakanuto dedede me wi lobo. In icweo lobo kede malo.

¹⁶Cik yiti, Okwe Rwot di iko winyo wa. Yab wangi, Okwe Rwot, di iko neno gikame tie timere. Winy kope dedede kame Senakerib ocwao me yeti, in Rubanga akuo.

¹⁷Okwe Rwot, ateteni wan onge be abakai me Asiria otieko muducaro atekerin dedede kede lobere gi,

¹⁸di kiko kwikwito rubangan gi i mac, bed bala gin oudo likame rubangan, do kibedo gikame jo otimo kede cing gi; gin oudo kibedo cal kame kotimo kede yen kede kide. Omio gin kiko muducaro gi.

¹⁹Aso nataman, Okwe Rwot Rubanga wa, lak wa ki cinge, tetekeny atekerin dedede me wi lobo ngei be in keni en ibedo Rwot Rubanga.”

Kop kame Isaya Owaco ne Abaka



(Isaya 37.21-38)

- ²⁰Di do Isaya wot ka Amos oko cwano kop but Esekia di ewaco ne be Rwot Rubanga me jo me Isirael otieko winyo ilega mere kame mako abaka Senakerib,
- ²¹di Rwot oko dwoko kop be, “Jo me bomba me Yerusalem nyeri, doko kicai in Senakerib.
- ²²Iparo be ngai en kame in oudo itie yeyeto di icao? Ngai en kame in oudo itie lelemo i wie? Ngai kame in oudo ineno kede ewaka kame cal kamano? In oudo itimo magonogo i koma ango Ngat Kacil me Isirael!
- ²³In icwao joor ni nyera, doko in itieko waco be in itieko yito i wi mori kede cabalan ni atat atota nogo, ituno paka i ajikini me Lebanon di iko tongo yen seda kame bocoboco, kede yen saipuras kame beco kalamo. In iwakere be ituno i cuny abum mege kakokodo adikinicel.
- ²⁴In iwakere doko be in ikunyo ataneko di iko mato pii i lobere me kumbor, kede be tieni onyono icileta me Misiri paka tuo.
- ²⁵” Benyo, in likame iwinyo be ango oudo aiko kamanono riki sek? Ango oudo atieko iiko riki sek gikame nataman ango amio ocobere, en be in ibino rereto bomban kame kocelo kede apama atek di gin kiko doko amejeko.
- ²⁶In itimo manoni di jo me bomban nogo do li kede teko; oudo kitie kede inonong atek, doko oudo kibedo di wi gi ototolun. Gin oudo kical bala amel arabo bala lum kame tie dongo i wi ot, lum kame yamo aliet me oro nero di pwodi likame kitieko dongo.
- ²⁷” Ango angeo kope dedede kame maki, gi dedede kame in itimo kede kabedere kame in ioto iye. Ango angeo gero kame itie kede i koma.
- ²⁸Do pien in itie kede gero i koma, doko atieko winyo kite kame in iwakere kede, ango abino kodo umi kede golu na di ako rwako lilim i dogi di ako wiri i dok cen ilubo yongayo kame oudo iwok kiye.”
- ²⁹Di do Isaya oko waco ne Abaka Esekia be, “Manoni en gianena kame bino nyuto ni gikame bino timere. Mwaka noni wun ibinunu camo kodere kame bwangun tui ken gi, di i mwaka me are ikounu bino camo kodere kame bwangun tui ken gi kakame oudo ikwanyunu kiye cam me mwaka okato. Do i mwaka me adek wun ibinunu cuno kodere wu di ikounu kano gi, ibinunu puro olok di ikounu camo anyakini gi.
- ³⁰Donge me jo me ot ka Yuda kame bino bwot di kiko dong kuo bino bobo bedo cal bala yat kame riego aliasin mege i lobo kakatut di eko nyak.
- ³¹Pien donge me jo bino bedo tie Yerusalem kede i wi moru me Sion. Manoni bino timere pien Rwot me jo yi otieko keto cunye pi timo manoni.
- ³²” Pi mano, Rwot waco kop i kom abaka me Asiria be, ‘En likame ebino donyo i bomba noni arabo gweno akadi tong me emal acel iye. Likame tie sirikale moro kame



mako ebuku, kame bino tuno i nget bomba noni, arabo kame bino mukuro lobo rimaro apama mere pi sure.

³³Yongayo kame en oudo elubo me bino, yongayo nono en kame ebino lubo me dok; likame ebino donyo i bomba noni; ango Rwot en awaco.

³⁴Ango abino yi pi bomba noni di ako gwoke pira kede pir ngatic na Daudi.’ “

³⁵Di do malaika ka Rwot oko ot i kimere me isirikalen me Asiria di eko neko isirikalen tutumia tol acel kede ot kanyauni kiwie kany (185,000). Oru mere odiko sek kakame piny oru kede, kom jo oto oudo orade piny.

³⁶Di do Abaka Senakerib me Asiria oko yai edok paco, di eko donyo bedo Ninebe.

³⁷Ceng moro acel di en oudo etie lego i tempulo ka rubanga mere Nisirok, awobe mege are Adaramelek kede Sareser oko neke kede epima, di gin girgi kiko lwi kioto i lobo me Ararat. Esarakadon, wode ace, oko lunyo wange bala abaka.

2 Abakai 20

Tuwo ka Abaka Esekia kede Cango mere

(Isaya 38.1-8, 21-22; 2 Iyutun 32.24-26)

¹kare nogo tuwo oko mako Esekia kame oudo otuno do neke. Enabi Isaya wot ka Amos oko ot bute di eko waco ne be, “Rwot waco be in likame ibino cango, in iyaro to. Pi manono, poore itemuno epone kame ibino weko kede jo me odi.”

²Esekia oko loko nyime oneno apama di eko lego but Rwot kaman:

³” Okwe Rwot, ango akwai iyutuno epone kame ango abedo timo kede tic nin kede cunya lung kede genere, doko abedo timo gikame poore i wangi.” Esekia oko kok adikinicel.

⁴Isaya oko yai kibus abaka, do di pwodi likame en ekalamo diakal me diere, Rwot oko waco ne be,

⁵” Dok cen di iko waco ne Esekia ngapug ka jo na be, ango Rwot Rubanga ka kwaru ni Daudi atieko winyo ilega ni doko atieko neno pigewangi; ango ateteni abino cangi; i ceng me adek in ibino ot i oda.

⁶Ango abino medi mwakini tomon kiwie kany me bedo kuo. Ango abino laki karacel kede bomba noni ki cing abaka me Asiria, di ango ako bino donyo gwoko bomba noni pira kede pir ngatic na Daudi.”

⁷Isaya oko waco ne Esekia pi kwanyo epigi kame konyonyoto di eko keto i akwoti mere di eko bino cango.

⁸Di do Abaka Esekia oko penyo Isaya be, “Gianena nyo kame bino nyuto be Rwot bino canga di ako bino karuno ot i ot ka Rwot i ceng me adek?”

⁹Isaya oko gamo be, “Man en gianena kame Rwot bino mini, kame bino nyuto nin be en ebino timo gi noni kame en etieko cikere iye pi timo. Benyo, nataman imito be mi tipo kame tie i wi kayito ot anyim tien tomon arabo edok cen tien tomon?”



¹⁰Esekia oko gamo be, “Etie gire gikame yoyot ne tipo ot anyim tien tomon; ango amito mie edok cen tien tomon.”

¹¹Enabi Isaya oko lego but Rwot, di Rwot oko mino tipo onyiko cen tien tomon i wi kayito kame Abaka Akas oudo otimo.

Joor kowok ki Babilon

(Isaya 39.1-8)

¹²I kare nono abaka me Babilon, Abaka Merodak Baladan wot ka Baladan oko winyo be Abaka Esekia oudo kome obedo lit do oudo etieko do cango. Aso, en eko oro jo bute pi tero ne baluwa kede giamia moro.

¹³Esekia oko gamo joor nogo di en eko nyuto negi abar mege dedede. En enyuto negi siliba, saabu, jamini angwe kur, moe me sut, kede jamini mege dedede me yi. Likame tie gimoro me ode arabo kame oudo tie karamoro i adul kame en epugo kame en likame eko nyuto negi.

¹⁴Di do enabi Isaya oko ot but Abaka Esekia di eko penye be, “Cuo nogi owok ki tuai, doko kop nyo kame gin kiwaco ni?” Esekia oko gamo be, “Gin kiyai ki piny abor, kiwok ki Babilon.”

¹⁵Isaya bobo oko penye be, “Nyo kame gin kineno i odi?” Esekia oko gamo be, “Gin kitieko neno gi dedede kame tie i oda; likame tie gimoro i oda kalikame ango anyuto negi.”

¹⁶Di do Isaya oko waco ne Esekia be, “Winy kop kame Rwot tie waco. En ewaco be,

¹⁷ ‘Kare tie bino kame jamini dedede me odi kede jamini kame joakwari ni obedo kano tuno tin, kobino tero Babilon. Likame tie gimoro kame kobino weko dong.

¹⁸ Ikwae ni da, ace kikom gi kobino tero di oko mino gi kidoko abwocin kame timo tice me paco me abaka me Babilon.’ “

¹⁹Di do Esekia oko waco ne Isaya be, “Kop ka Rwot kame in itieko waco na nono ber.” En ewaco kamanono pien oudo eparo be mulem kede anapakin bino bedo tie i kare me kuo mere.

Ajikini me Apugan ka Esekia

(2 lyutun 32.32, 33)

²⁰Gi dedede apat kame Esekia bin otimo, teko mere, epone kame en bin etimo kede atapar kede puleju di eko tero pii i bomba, gin dedede kowandiko gi i *Itabu me Itatam amako Abakai me Yuda*.

²¹Esekia bin oko to di wode Manase en kame oko lunyo wange bala abaka.

2 Abakai 21

Abaka Manase me Yuda

(2 lyutun 33.1-20)



- ¹Mwakini me dongo ka Manase oudo tie tomon kiwie are i kare kame en bin ecako kede pug. En bin eko pug i Yerusalem pi mwakini ot kany kiwie kany. Nying toto mere bin Kepesiba.
- ²Manase bin oko timo gikarac i nyim Rwot. En eoto lubo tim me kwere me atekerin kame bin Rwot oriamo tenge ki nyim jo me Isirael.
- ³En emedo gero kabedere me woro caljwogi kame bin papa mere Esekia orereto; etimo alutarin me woro Baal, etimo da cal me rubanga Asera, bala kame Abaka Akab oudo otimo. Manase obedo woro jamini apapat kame tie i malo, di etio negi.
- ⁴En etimo alutarin me woro caljwogi apapat i ot ka Rwot, kabedo kame bin Rwot owaco kop i kome be, “Kobino wora i Yerusalem.”
- ⁵En etimo da alutarin i diakale are dedede me ot ka Rwot pi woro jamini apapat dedede kame tie i malo.
- ⁶En bin emio wode bala giayala awanga; etimo da tic me tiet kede lamo gagi, oudo etio kede imuroko kame penyo tipere kede etio da kede jojwogi. En ebedo timo gikareco atot atota i nyim Rwot, di eko wango cuny Rwot.
- ⁷En ecibo i ot ka Rwot cal apa me rubanga Asera kame en etimo, kabedo kame bin Rwot owaco i kome but Daudi kede but wode Sulumani be, “Ot noni kede Yerusalem kanoni, en kabedo kame ango atieko yero kikom adulion dedede me ikekon tomon kiwie are me jo me Isirael, pi bedo kakame kowora iye nakanaka.
- ⁸Ango likame bobo abino mino jo me Isirael yai tenge ki lobo kame bin ango amio joakwari gi di kiko donyo rimo piny, tek di gin kigwokere di kiko bedo lubo gi dedede kame ango aciko negi, kede kiko lubo iswilia dedede kame bin ango amio Musa.”
- ⁹Do gin jo me Yuda bin likame kiko lubo; Manase omio gin kiko timo gikareco atot kalamo me atekerin kame Rwot omuducaro i nyim jo me Isirael.
- ¹⁰Rwot di ebeo i dog inabin jotie mege bin oko waco be,
- ¹¹” Pien Abaka Manase me Yuda otieko timo gi me kwere nogi, gikareco kalamo kame jo Amor obedo timo, di en eko mino jo me Yuda otimo dub kede caljwogi mege.
- ¹²Pi mano, ango Rwot me Isirael abino kelo i kom Yerusalem kede Yuda can kame dano winyo kop mere di kome ko to.
- ¹³Ango abino mino Yerusalem alola bala kame bin atimo ne Samaria, kede bala kame bin atimo ne Abaka Akab me Isirael kede jo me ode. Ango abino weno jo i Yerusalem bala kame dano weo kede pii i suani di eko riebe.
- ¹⁴Ango abino jalo jo na odong mege, di ako bino mino gi i cing jokwor gi, jo kame bino bwono gi di kiko yako gi.
- ¹⁵Ango abino timo manoni but jo na pien gin kitimo gikarac i nyima di kiko wango cunya, cako i kare kame joakwari gi oyai kede ki Misiri tuno tin.”



¹⁶Medo i kom manono, Manase obedo onyo remo me jo ali kede raco moro tuno remo gi mol romo Yerusalem lung, cako ki bad tetucel tuno tetu ocelu. En etimo manoni medo i wi dub kame en emio kede jo Yuda otimo gikarac i nyim Rwot.

¹⁷Gi dedede apat kame bin Manase otimo, kiton dub mege, gin dedede kowandiko gi i *Itabu me Itatam amako Abakai me Yuda*.

¹⁸Manase bin oko to di oko yike i paco mere me abaka i poto ka Usa. Wode Amon en kame bin oko lunyo wange bala abaka.

Abaka Amon me Yuda

(2 lyutun 33.21-25)

¹⁹Mwakini me dongo ka Amon oudo tie ot are kiwie are i kare kame en bin ecako kede pug; en bin eko pug i Yerusalem pi mwakini are. Nying toto mere bin Mesulemet, nyar ka Karus me Yotoba.

²⁰En eko timo gikarac i nyim Rwot, bala papa mere Manase.

²¹En elubo gikame papa mere bin otimo dedede. En ebedo timo tic ne caljwogi bala bin papa mere, doko di eworo gi.

²²En eweko Rwot Rubanga ka joakwari mege, di eko dagi lubo yongayo mere.

²³Jotic ka Amon bin oko bedo kede iik arac i kome i mung, di gin kiko neke i ode.

²⁴Do jo me lobo nono oko bin neneko jo dedede kame oudo obedo kede iik arac i kom Abaka Amon, di gin kiko cibo wode Yosia obedo abaka kawange.

²⁵Aso, gi dedede kame bin Amon otimo kowandiko i *Itabu me Itatam amako Abakai me Yuda*.

²⁶Amon bin oko to di oko yike i ates i poto ka Usa; di do wode Yosia oko lunyo wange bala abaka.

2 Abakai 22

Abaka Yosia me Yuda

(2 lyutun 34.1-2)

¹ Mwakini me dongo ka Yosia oudo tie kanyauni i kare kame bin en ecako kede pug; en bin eko pug i Yerusalem pi mwakini ot adek kiwie acel. Nying toto mere bin Yedida nyar ka Adaya me Bosokat.

²En bin eko timo gikame poore i nyim Rwot; en ebedo timo gi dedede bala bin kwaru mere Daudi, abongo parao tenge.

Koudo Itabu me Iswil

(2 lyutun 34.8-28)

³ mwaka me tomon kiwie kanyauni me apugan mere, Abaka Yosia bin oko cwano kalani Sapan, wot ka Asalia, en akwar Mesulam, i ot ka Rwot di ecike be,

⁴” Ot but Kilikia ngatel me Josaserdoti di iko waco ne emar sente dedede kame kotieko kelo i ot ka Rwot, sente kame jodar dogola otieko coko kibut jo.



⁵Wace emi sente nogo i cing jotic kame telo tic me ot ka Rwot; me wek gin kimi sente nogo but jotic kame tie iiko ot,

⁶gin en, jopac, jogedo, kede jonap matapali, tetekeny gin kiwil kede ibaon kede kide me iiko ot.

⁷Jotel tic nogo obedo jo kame genere, pi mano, kony li me penyo gi epone kame kitio kede sente kame komio i cing gi.”

⁸Kilikia Ngatel me josaseredoti bin oko waco ne kalani Sapan be, “Ango atieko udo itabu me iswil i ot ka Rwot.” Kilikia oko mino itabu nono but Sapan di en eko some.

⁹Di do Sapan oko dok but abaka di eko waco ne be, “Jotic ni otieko tero sente dedede kame oudo tie i ot ka Rwot, di gin kiko mino i cing jo kame tie telo tic me ot ka Rwot.”

¹⁰Di bobo eko waco ne abaka be, “Kilikia ngasaseredoti omia itabu moro tie kan.” Di en oko somo itabu nono ne abaka kede dwan amalalo.

¹¹Kakame abaka owinyo kede kope kame kosomo ne i itabu me iswil, en eko nyinyilo igoen me kome pi cwercury.

¹²Di abaka oko mino cik but Kilikia ngasaseredoti, Akikam wot ka Sapan, Acibor wot ka Mikaya, kalani Sapan, kede but Asaya ngatic mere di ewaco negi be,

¹³” Otunu di ikounu penyo Rwot pira kede pir jo me Yuda dedede, i kom kope me itabu kame kotieko udo noni. Rwot otieko lilo kede wan kitek pien joakwari wa likame oko lubo kope me itabu noni. Likame gin kitimo gikame itabu noni waco kame mako wan.”

¹⁴Aso, Kilikia ngasaseredoti, Akikam, Acibor, Sapan, kede Asaya oko ot penyo anabi Kuluda dako ka Salum wot ka Tikiba, akwar Karakas; Salum oudo obedo ngat kame bin gwoko igoen me ot ka Rwot. Kuluda oudo tie bedo Yerusalem i adul anyen, kakame gin kioto penye iye.

¹⁵En bin eko waco negi be poore kidok di kiko waco ne ngat kooro gi be

¹⁶Rwot Rubanga me Isirael waco be, “Ango ateteni abino kelo can i kom kabedo noni kede i kom jo kame bedo iye, bala kame kowandiko kede i itabu kame abaka otieko somo nono.

¹⁷Ango abino timo manono pien gin kitieko weka di kiko lokere mino giayala but rubangan apat. Gin kitieko wango cunya kede gi dedede kame gin kibedo timo, pi manono, gin kitieko mina alilo kede kabedo noni, doko lilo na nono likame bino kwei.

¹⁸Do abaka, ngat kooro wu pi bino penya, wun ibinunu waco ne be Rwot Rubanga me Isirael waco kaman: In iwinyo kope kame kowandiko i yi itabu,

¹⁹di iko swilaro, doko iko mwolere i nyima, di iko inyinyilo igoen me komi di ikok, kakame in iwinyo kede di ango ayamo irac i kom kabedo noni kede i kom jo kame



bedo iye. Ango abino mino kabedo noni dong nono kede ebino doko gikame jo tio kede me lamo jo icegun. Do ango atieko winyo ilega nin.

²⁰Pi mano, in likame ibino neno can kame ango abino kelo i kom kabedo noni. Ango abino kelo can noni ingei in to di oko yiki kede mulem.” Cuo nogo bin oko dok tero kop noni but abaka.

2 Abakai 23

Yosia Ojiko Woro Caljwogi

(2 lyutun 34.3-7, 29-33)

- ¹Abaka Yosia bin oko lwongo joadongo me Yuda kede me Yerusalem dedede bute.
- ²Di en eko yai kede gin dedede di kiko ot i ot ka Rwot, karacel kede josaseredoti, inabin kede jo dedede, jocan kede joabar. Di do abaka oko somo di jo dedede winyo, kope dedede me itabu me isikan kame bin koudo i ot ka Rwot.
- ³Abaka oko cungo i nget epir di eko timo isikan i nyim Rwot be en ebino lubo Rwot, ebino gwoko cik, iswilia kede pwoony mege, kede cunye lung kede kuo mere dedede, doko ebino timo gi dedede amako isikan nono bala kame kowandiko i itabu kame bin koudo nono. Di jo dedede da oko cikere pi gwoko isikan nono.
- ⁴ Abaka oko ciko Ngatel me josaseredoti Kilikia, josaseredoti kame lubo tiene, kede jo kame daro dogola me ot ka Rwot, pi kwanyo ooko ki tempulo ka Rwot jamini dedede kame oudo kotimo me woro Baal, rubanga Asera, kede gi dedede kame tie i malo. En eko wango gin ki tenge me Yerusalem, i nget aditot me Kideron di eko mino koteroburu gi Betel.
- ⁵Di en eko riamo ki tic josaseredoti kame abakai me Yuda oudo okwero pi mino giayala i kabedere me woro caljwogi i bomban me Yuda kede i kabedere me nget Yerusalem, gin josaseredoti dedede kame bin mio giayala but Baal, ceng, duwe, acerin, kede gi dedede kame tie i malo.
- ⁶En eko kwanyo ooko ki ot ka Rwot cal me rubanga Asera, eko tere tenge me Yerusalem. En etere i aditot me Kideron di eko wange kunono, eko yoke edoko purupuru, di eko kikiro apua mere i limbo kame bin koyiko iye jo me ruom apiny.
- ⁷En eko tuturo ude kakame imalayan acuo me tempulo oudo bedo iye i ot ka Rwot, doko kanono da en kame bin mon timo kiye igoen me woro rubanga Asera.
- ⁸En eko da omo josaseredoti dedede ki bomban me Yuda di eko coko gi Yerusalem, di en eko munao kabedere kame gin bin kimio iye giayala but caljwogi, cako ki Geba tuno Beereseba. Di en eko rereto kabedere kame oudo koworo iye caljwogi i erute ka Yosua, ngapug me bomba nono, kabedere kame bin tie i bad tetu ngodal me erute me bomba.
- ⁹Josaseredoti me kabedere kame bin koworo iye caljwogi nogo bin likame oko yei negi timo tic i alutari ka Rwot i Yerusalem, do bin koyei ne gin camo mugati kame arup li iye bala josaseredoti icegun.



- 10** Abaka Yosia bin oko munao da kabedo kame kolwongo be Topet, kakame bin koworo kiye caljwogi i aditot me Kinom, tetekeney kur dano moro mi wode arabo nyare moro bala giayala but rubanga Molek.
- 11** En bin eko kwanyo da tenge asigiran kame abakai me Yuda bin ojalo pi bedo me woro ceng, di en eko wango da cabalan kobedo me ka ceng. Asigiran nogo bin kogwoko i kabedo kame kodonyo kede i ot ka Rwot, i nget diakal me ngatic adwong kame nyinge Natan Melek.
- 12** Alutarin kame bin abakai me Yuda otimo i wi ot, malo me wi agola ka Abaka Akas, Abaka Yosia bin orereto gi piny karacel kede alutarin kame Manase oudo otimo i diakale are me ot ka Rwot; Yosia ongingido gi di eko uco gi i aditot me Kideron.
- 13** Abaka bin oko munao da kabedo me woro caljwogi kame bin Abaka Sulumani ogero i bad tetu kide me Yerusalem, i bad tetu piny me Moru me Amuducar, kakame bin koworo iye Asitate rubanga aneno rac me jo Sidon, Kemos rubanga aneno rac me jo Moab, kede Milikom rubanga aneno rac me jo Amon.
- 14** Abaka Yosia omumuko di eko ngingido ipirin me kide kame oudo koworo kede caljwogi, etongo di eko reto piny atekai kame oudo koworo kede rubanga Asera, di eko lunyo pongo cogere me jo kargi.
- 15** Medo i wi manono, Yosia bin oko reto piny da alutari kede kabedo me woro caljwogi kame Abaka Yeroboam wot ka Nebat oudo ogero Betel, en ngat kame bin emio jo me Isirael opoto i dub. En eko wango kabedo me woro caljwogi nono, di eko ngingido en edoko purupuru; en eko wango da cal me rubanga Asera.
- 16** Yosia oko lokere di eko neno atesin i wi emukura kunono; en eko mino kokwanyo cogere ki atesin nogo, di en eko wango gi i wi alutari. Iepone nono en bin eko munao alutari nono di lubere kede kop ka Rwot kame enabi bin owaco sek i kare me ebaga kakame Yeroboam bin ocungo kede i nget alutari. Abaka Yosia oko lokere di eko neno ates me enabi koudo omurao kope nogi.
- 17** Di do Yosia oko penyere be, “Ates ka angai ino kame ango atie neno no?” Jo me bomba nono oko gamo be, “Manono obedo ates me enabi kame bin owok ki Yuda di eko murao gikame nataman in imio ocobere i kom alutari noni.”
- 18** En eko waco be, “Wekenu ebedi; kur ngatamoro lol cogere mege.” Aso, gin kiko weko cogere mege likame kilolo, karacel kede cogere me enabi kame bin owok ki Samaria.
- 19** I bomban dedede me Samaria, Abaka Yosia bin oko kwanyo tenge abilan kede kabedere me woro caljwogi, kame abakai me Yuda oudo ogero, di kiko mino cuny Rwot owang. Yosia oko timo negi gikame oudo etimo i Betel.
- 20** En engongolo josaserdoti me kabedere me woro caljwogi i wi alutarin, di eko wango cogere gi i wi alutarin nogo. Di do en eko dok Yerusalem.

Yosia Otedo Ebaga me Kalamo

(2 lyutun 35.1-19)



²¹Abaka Yosia oko mino cik pi jo dedede tedo Ebagame Kalamo pi woro Rwot Rubanga gi, bala kame kowandiko kede i itabu me Isikan.

²²Likame tie akodi Ebagame Kalamo moro kame oudo kotedo bala manoni cako i kare kame jongolkop oudo telo kede Isirael, arabo i kare moro me abaka moro me Isirael amoto me Yuda.

²³Nataman do i mwaka me tomon kiwie kanyauni me apugan ka Yosia, oko tedo ebagame noni i Yerusalem pi woro Rwot.

Alokaloka Ace kame bin Yosia otimo

²⁴Abaka Yosia bin oko kwanyo tenge ki Yerusalem kede lobo me Yuda dedede jopeny tipere, jojwogi, rubangan me ude, caljwogi, kede gi me kwer dedede, tetekeyen emok kope me iswil kame oudo kowandiko i itabu kame ngasaseredoti Kilikia oudo i ot ka Rwot.

²⁵Likame oudo tie abaka moro kogeopug nen kame oudo cal bala en, ngat kame bin oko lokere but Rwot kede cunye lung, kede kuo mere lung, kede teko mere lung, di elubo iswil ka Musa dedede; doko likame tie abaka moro kame cal bala en kobedo tie i cen ngei en.

²⁶Akadi kamanono da, Rwot likame oko dok cen i kom lilo mere agwai kame en oudo etie kede i kom jo me Yuda, pi gikame Abaka Manase oudo otimo kame oko wango cunye.

²⁷Rwot oko waco be, “Abino kwanyo jo me Yuda tenge ki nyima bala kame atieko timo kede ne jo me Isirael; doko abino dagi Yerusalem, bomba kame ango atieko yero, kede ot kame ango oudo awaco i kome be en kabedo kame kobino wora iye.”

Ajikini me Apugan ka Yosia

(2 lyutun 35.20—36.1)

²⁸Gi dedede apat kame Yosia bin otimo kowandiko i *Itabu me Itatam amako Abakai me Yuda*.

²⁹I kare me apugan mere en kame Parao Neko, abaka me Misiri, bin oko ot kede paka tuno i ecilet me Eupurate pi konyo abaka me Asiria. Abaka Yosia bin oko ot pi yi kede; do Parao Neko oko riamakin kede en Megido di oko neke.

³⁰Jotic mege oko keto kome i cabala di kiko dwoke Yerusalem, di kiko yike i ates mere. Jo me Yuda oko kwanyo wode Yekoyasi, di kiko wire, di kiko kete ebedo abaka kame lunyo wang papa mere.

Abaka Yekoyasi me Yuda

(2 lyutun 36.2-4)

³¹Mwakini me dongo ka Yekoyasi oudo tie ot are kiwie adek i kare kame bin en ecako kede pug. En bin eko pug pi duwete adek i Yerusalem. Nying toto mere bin Kamutal, nyar ka Yeremia me Libina.

³²En eko timo gikarac i nyim Rwot bala kame joakwari mege bin otimo.



³³Parao Neko bin oko twene Ribula i lobo me Kamat, tetekeny kur en ebed pug i Yerusalem, doko eko dino jo me Yuda oko donyo culo bute siliba kilo tutumia adek kede tol ongwon (3,400) kede saabu kilo ot adek kiwie ongwon (34).

³⁴Parao Neko oko keto Eliakim wot ka Yosia obedo abaka kawang papa mere Yosia, di en eko loko nyinge be Yekoyakim. Neko oko tero Yekoyasi Misiri, di eko to kunono.

Abaka Yekoyakim me Yuda

(2 lyutun 36.5-8)

³⁵Yekoyakim oko bedo mino Parao siliba kede saabu kame oudo en engolo. En bedo raro esolo kibus jo me lobo mere pi cobo mit ka Parao me sente. En emio jo dedede okwanyo siliba kede saabu di lubere kede rom kame ongolo negi, pi en mino but Parao Neko.

³⁶Mwakini me dongo ka Yekoyakim oudo tie ot are kiwie kany i kare kame en bin ecako kede pug. En bin eko pug i Yerusalem pi mwakini tomon kiwie acel. Nying toto mere bin Sebida, nyar ka Pedaya me Ruma.

³⁷En eko timo gikarac i nyim Rwot bala kame bin joakwari mege otimo.

2 Abakai 24

¹I kare me apugan ka Yekoyakim en kame Abaka Nebukadunesa me Babilon oko ot suro kede Yuda; Yekoyakim di oko doko ngatic mere pi mwakini adek. I cen mere di do Yekoyakim oko lokere jemo ne.

²Rwot oko cwano ikodeta me joyak pi ot Babilon; jo Siria, jo Moab, kede jo Amon pi ot suro Yekoyakim di kiko dudubo Yuda bala kame Rwot oudo owaco i dog inabin jotic mege.

³Ateteni manoni bin otimere i kom Yuda pi Rwot en oudo ociko kamanono, tetekeny ekwanyo gi ki nyime pi dub kame Abaka Manase oudo otimo,

⁴kede pi remo me jo kame li kede raco moro kame oudo en eko oonyo; piento en bin eonyo remo me jo atos i Yerusalem, jo kalikame tie kede raco moro. Rwot oudo likame romo sasiro en iye.

⁵Gi dedede kame Yekoyakim bin otimo kowandiko i *Itabu me Itatam amako Abakai me Yuda*.

⁶Yekoyakim bin oko to di wode Yekoyakin oko lunyo wange bala abaka.

⁷Abaka me Misiri bin likame bobo oko medo yai ot ooko ki lobo mere, pien abaka me Babilon oudo otieko gamo adulion dedede kame abaka me Misiri oudo pugo, cako ki Osamai me Misiri tuno i ecilet me Eupurate.

Abaka Yekoyakin me Yuda

(2 lyutun 36.9-10)



⁸Mwakini me dongo ka Yekoyakin oudo tie tomon kiwie kanyauni i kare kame ecako kede pug. En bin eko pug i Yerusalem pi duwete adek. Nying toto mere bin Nekusuta nyar ka Elinatan me Yerusalem.

⁹En eko timo gikarac i nyim Rwot bala kame bin joakwari mege otimo.

¹⁰I kare nono isirikalen ka Abaka Nebukadunesa me Babilon oko bino paka tuno Yerusalem di gin kiko luko bomba.

¹¹Abaka Nebukadunesa bin oko bino paka tuno i bomba me Yerusalem i kare kame isirikalen mege oudo oluke kede.

¹² Abaka Yekoyakin me Yuda bin oko rieno cinge but abaka me Babilon, en kede toto mere, jotic mege, jodongo me isirikalen mege, kede jotic mege adongo. I mwaka me kanyauni me apugan me abaka Nebukadunesa en kame bin oko tero kede Yekoyakin bedo mabus.

¹³Nebukadunesa bin oko tero jamini dedede me ot ka Rwot kede me ot ka abaka. En etotongo i adulion atitino jamini dedede me saabu kame oudo kotio kede i tempulo ka Rwot, jamini kame bin Abaka Sulumani me Isirael otimo. En etimo manoni bala kame Rwot oudo owaco sek.

¹⁴En eko tero jo dedede me Yerusalem bala mabus; jotic adongo dedede kede jo yi dedede, gin dedede jo tutumia tomon (10,000). En bin etero da jodiru me tic cing kede jotet; likame bin tie dano moro oko dong, kwanyo kenekene jo kame can oudo odio do twatwal.

¹⁵ Nebukadunesa bin oko tero Yekoyakin Babilon bala mabus, karacel kede toto mere, dako mere, jotic mege adongo, kede jotel kame pirgi tek i Yuda.

¹⁶Abaka me Babilon omako di eko tero Babilon cuo atek dedede, gin dedede jo tutumia kanyaare (7,000), kede jo ipirana i tic cing kede jotet, gida jo tutumia acel (1,000), gin dedede jo atek kame poore bedo isirikalen.

¹⁷ Abaka me Babilon di oko keto Matania, neru me Yekoyakin odoko abaka kawang Yekoyakin, di eko loko nyinge odoko Esedekia.

Abaka Esedekia me Yuda

(2 lyutun 36.11, 12; Yeremia 52.1-3a)

¹⁸ Mwakini me dongo ka Esedekia oudo tie ot are kiwie acel i kare kame bin en ecako kede pug; en eko pug pi mwakini tomon kiwie acel i Yerusalem. Nying toto mere bin Kamutal, nyar ka Yeremia me Libina.

¹⁹Esedekia oko timo gikarac i nyim Rwot bala kame Yekoyakim oudo otimo.

²⁰ Jo me Yerusalem kede Yuda bin oko wango cuny Rwot kitek omio Rwot oko riamo gi tenge ki nyime.

2 Abakai 25

Yerusalem Opoto

(2 lyutun 36.13-21; Yeremia 52.3b-11)



- ¹ Abaka Esedekia bin oko jemo ne Abaka Nebukadunesa me Babilon, di manono oko mino Nebukadunesa obino ne kede isirikalen mege dedede di gin kiko suro Yerusalem i buto duwe tomon me duwe me tomon me mwaka me kanyangon me apugan ka Esedekia. Gin bin kiko luko bomba di kimukuro lobo rimaro apama mere,
- ² di do gin kiko bedo kine paka tuno i mwaka me tomon kiwie acel me apugan ka Abaka Esedekia.
- ³ I buto duwe kanyangon me duwe me ongwon kec oko do cere ne jo kame oudo tie i bomba pien cam oudo otiek.
- ⁴ Di do jo oko muko apama me cel me bomba; abaka oko lwi iwor kede isirikalen dedede, kiringo kilubo yongayo me potu me abaka, di kiko donyo ki erute kame oudo tie i dierediere me apamai are, bed bala oudo jo Babilon oudo oluko bomba rimaro. Gin kiko ringo kioto tetu Aditot me Yorodan.
- ⁵ Do isirikalen me Babilon oko bin wapo Abaka Esedekia di kiko make i ebar me Jeriko. Isirikalen ka Esedekia dedede bin oko sarakin, kiringo kiweke.
- ⁶ Isirikalen me Babilon bin oko mako Esedekia di kiko tere Ribula but Abaka me Babilon, ngat kame oko ngolo ne kop.
- ⁷ Gin bin kiko neneko awobe ka Esedekia i nyime di eneno, di kiko golo wang Esedekia; kiko twene kede irikoi di kiko tere Babilon.

Tuturo Tempulo
(Yeremia 52.12-23)

- ⁸ I buto duwe kanyaare me duwe me kany me mwaka me tomon kiwie kanyangon me apugan ka Abaka Nebukadunesa me Babilon, Nebusaradan, ngat kame oudo mio abaka tam doko di en oudo ngadwong me isirikalen, oko donyo Yerusalem.
- ⁹ En eko wango ot ka Rwot, paco me abaka, kede ude me Yerusalem dedede; en ewango ude me jo adongodongo dedede.
- ¹⁰ Isirikalen dedede me Babilon kame oudo tie kede Nebusaradan oko rereto apama me cel me bomba me Yerusalem dedede piny.
- ¹¹ Nebusaradan oko tero Babilon jo dedede kame oudo oko dong i bomba, kede jo kame bin oko rieno cing gi but abaka me Babilon; egwaro jo dedede.
- ¹² Do Nebusaradan oko weko jocan mogo odong Yuda pi timo tic i poti me olok kede puro poti.
- ¹³ Jo me Babilon oko tuturo ipirin me nyonyo buronsi, icegeren me cibo kalayan kame oudo tie i tempulo, karacel kede epipa adwong me pii, di gin kiko tero nyonyo buronsi dedede Babilon.
- ¹⁴ Gin kitero da agune, gi me kikiso alutari, jamini me kepo wi ausin me italan, bakulin me dunyo odok angwe kur, kede jamini apat dedede me nyonyo buronsi kame oudo kotio kede i tempulo.



¹⁵Kitero da itatany me mac kede kalayan. Gin kitero jamini dedede kame kotimo kede saabu arabo siliba, kiton bakulin atino kede atubai me mako itonge me mac.

¹⁶Jamini me nyonyo buronsi kame oudo Abaka Sulumani otimo pi tempulo oudo pek twatwal likame kotwero pimo gi; gin en ipirin are, icegeren kede epipa alac me pii.

¹⁷Ipirin are nogo acelacel oudo boro mere malo tie puti ot are kiwie kanyaare di oropo wi gi kede nyonyo buronsi kame boro gi malo tie puti ongwon kede dul, di kotubuso gi kede cal me anyakini me pomagurunet me nyonyo buronsi rimaro.

Kotero Jo me Yuda Babilon

(Yeremia 52.24-27)

¹⁸Nebusaradan, ngadwong me isirikalen oko tero da bala mabus Seraya Ngatel me Josaseredoti, Sepania ngasaseredoti kame oudo lubo tiene, kede jo adek kame oudo obedo jodar ekeko me tempulo.

¹⁹En eko tero bobo da ki bomba ngatic adwong kame oudo telo kop kame mako isirikalen, kede jo kany me kansulo ka abaka kame oudo pwodi tie i bomba, kalani adwong me isirikalen, en ngat kame bin koko jo piny pi ot yi, kede cuo apat ot kanyape kame oudo obedo anywali me Yuda, kame gin kiudo tie i bomba.

²⁰Nebusaradan oko tero gi i bomba me Ribula but abaka me Babilon.

²¹Abaka me Babilon oko mino koneko gi i Ribula kunono, i lobo me Kamat. Aso, bin oko tero jo me Yuda ot bedo bala mabus i lobo apat.

Gedalia odoko Ngapug me Yuda

(Yeremia 40.7-9; 41.1-3)

²²Abaka Nebukadunesa me Babilon bin oko keto Gedalia wot ka Akikam, en akwar Sapan, bala ngapug me jo kame en oudo eweko odong i lobo me Yuda.

²³Kakame jotel dedede me isirikalen me Yuda, jo kalikame bin orieo cing gi, oko winyo kede be abaka me Babilon oudo otieko keto Gedalia bala ngapug, gin kiko ot kede isirikalen gi Misipa but Gedalia. Jotel me isirikalen nogo gin bin en, Isimael wot ka Netania, Yokanan wot ka Karea, Seraya wot ka Tanekumet dano me Netopa, kede Yasania wot ka dano me Makat.

²⁴Gedalia oko kwongere but gi di ewaco be, “Kur ibedunu kede lworu moro pi jotie me Babilon. Bedunu i lobo noni, timunu tic ne abaka me Babilon, di gi dedede ko bino bedo ne wu kiber.”

²⁵Do mwaka nono i duwe me kanyaare, Isimael wot ka Netania, en akwar Elisama, dano me paco ka abaka, oko ot kede cuo tomon, di gin kiko neko Gedalia. Gin kineke karacel kede jo me Yuda kede jo Babilon kame oudo tie kede en.

²⁶Di do jo dedede me Isirael, jo kobaro kede jocan, karacel kede jotel me isirikalen, oko yai di gin kiko ot Misiri, pien gin oudo kitie lworu jo Babilon.

Kogonyo Yekoyakin ki Otkol

(Yeremia 52.31-34)



²⁷I mwaka me ot adek kiwie kanyaare me kare kame oudo Abaka Yekoyakin me Yuda otieko obukui bala mabus, i buto duwe ot are kiwie kanyaare me duwe me tomon kiwie are me mwaka nono, Abaka Ebilimerodak me Babilon oko bedo kede cuny me kisa but Yekoyakin di eko gonye ki otkol, manono en mwaka kame en egeo kede pug bala abaka.

²⁸Ebilimerodak oko tere kiber, di eko mine ruom me wor kame kalamo me abakai apat dedede kame bin tie kede en Babilon bala mabus.

²⁹Pi manono, Yekoyakin oko gonyo igoen me mabus di eko ngapo apat, eko donyo cam i emesa me abaka ceng dedede pi kare me kuo mere lung.

³⁰Buli ceng, di en pwodi oudo etie ekuo, abaka me Babilon oudo mie sente me wilo gikame mitere ne.



1 Iyutun

1 Iyutun 1

Cako kibut Adamu tuno but Aburaam

(Ageini 5.1-32; 10.1-32; 11.10-26)

- ¹Adamu oudo obedo papa me Set, Set oudo obedo papa me Enosi, Enosi oudo obedo papa me Kenan,
- ²Kenan oudo obedo papa me Makalalel, Makalalel oudo obedo papa me Yared.
- ³Yared oudo obedo papa me Enoka, koudo obedo papa me Metusela; Metusela oudo obedo papa me Lamek,
- ⁴koudo obedo papa me Nua. Nua oudo tie kede awobe adek: Sem, Kam kede Yapesi.
- ⁵Awobe ka Yapesi gin en: Gomer, Magog, Madai, Yaban, Tubal, Mesek kede Tiras.
- ⁶Ikwaee ka Gomer gin en: Asukenas, Ripat kede Togarama.
- ⁷Ikwaee ka Yaban gin en: Elisak, Tarusi, Kitim kede Rodanim.
- ⁸Awobe ka Kam gin en: Kus, Misiri, Put, kede Kanan.
- ⁹Awobe ka Kus gin en: Seba, Kabila, Sabuta, Rama, kede Sabuteka. Ikwaee ka Rama gin en Seba kede Dedan.
- ¹⁰Kus bin oko nywalo Nimurod, ngat oko cako bedo twon dano atek i wi lobo lung.
- ¹¹Misiri bin oko nywalo Ludim, Anamim, Lekabim, Naputukim,
- ¹²Paturosime, Kasulukim, kede Kaputorim (kame jo me Pilistia owok kibute).
- ¹³Awobe ka Kanan gin bin en: Sidon, en atin kao mere, kede Ket.
- ¹⁴Gin en kame jo Yebu, jo Amor, jo Girigas,
- ¹⁵jo Kibi, jo Araki, jo Sini,
- ¹⁶jo Aribadi, jo Semar, kede jo Kamat oko wok kibut gi.
- ¹⁷Awobe ka Sem gin en: Elam, Asur, Arupakasad, Lud, Aram, Us, Kul, Geter kede Mesek. ¹⁸Arupakasad oko nywalo Sela, di Sela oko nywalo Eber.
- ¹⁹Eber oko nywalo awobe are: nying ngat acel bin oko cako be Peleg, pien bin jo me piny opopokun i kare mere; omin mere oudo nyinge Yokutan.
- ²⁰Yokutan bin oko nywalo Alumodad, Selep, Kasarumabet, Jera,
- ²¹Kadoram, Usal, Dikula,
- ²²Ebal, Abimael, Seba,
- ²³Opir, Kabila, kede Yobab.



²⁴Nying joakwari cako kibut Sem tuno but Aburaam lubere kaman: Sem, Arupakasad, Sela,

²⁵Eber, Peleg, Reu,

²⁶Serug, Nakor, Tera,

²⁷di do Aburam, manono en Aburaam.

Ikwae ka Isimael

(Ageini 25.12-16)

²⁸Aburaam bin oko nywalo awobe are, Isaka kede Isimael.

²⁹Nebaiot en bin atin kao ka Isimael, di apat oko lubo gin en Kedar, Adebeel, Mibisam,

³⁰Misima, Duma, Masa, Kadad, Tema,

³¹Yetur, Napis, kede Kedema.

³²Aburaam bin da obedo kede Ketura bala dako mere di idwe kame kiko nywalo ige: Simuran, Yokosan, Medan, Midian, Isibak, kede Sua. Awobe ka Yokosan bin gin en Seba kede Dedan.

³³Awobe ka Midian bin gin en: Epa, Eper, Kanok, Abida, kede Eleda. Magonogi dedede bin obedo ikwae ka Ketura.

Ikwae ka Esau

(Ageini 36.1-19)

³⁴Isaka wot ka Aburaam bin tie kede awobe are: Esau kede Isirael (Yakobo).

³⁵Awobe ka Esau bin gin en: Elipasi, Reuel, Yeus, Yalam, Kora.

³⁶Awobe ka Elipasi bin gin en: Teman, Omar, Sepi, Gatam, Kenas, Timina, kede Amalek.

³⁷Awobe ka Reuel bin gin en: Nakat, Seera, Sama kede Misa.

Jo me Agege kocako Bedo Edom

(Ageini 36.20-30)

³⁸Jo me agege me bedo Edom onyai kikom awobe ka Seir, gin en: Lotan, Sobal, Sibeon, Ana, Dison, Eser, kede Disan.

³⁹Awobe ka Lotan bin gin en: Kori kede Komam. Timina en kame bin obedo amin me Lotan.

⁴⁰Awobe ka Sobal bin gin ige: Aliban, Manakat, Ebal, Sepi, kede Onam. Awobe ka Sibeon bin gin en: Aya kede Ana.

⁴¹Ana bin en papa ka Dison. Awobe ka Dison bin gin en: Kamaran, Esiban, Itiran kede Keran.



⁴²Awobe ka Eser bin gin en: Bilkan, Saaban kede Jakan. Awobe ka Disan bin gin en: Us kede Aran.

Abakai me Edom

(Ageini 36.31-43)

⁴³Abakai kame bin opugo lobo me Edom di pwodi likame abaka moro opugo jo me Isirael gin ige: Bela wot ka Beor; nying bomba mere bin Dinkaba.

⁴⁴Kakame Bela bin oko to kede, Yobab wot ka Seera me Bosira oko lunyo wange bala abaka.

⁴⁵Yobab bin oko to di Kusam dano me adul me Teman oko lunyo wange bala abaka.

⁴⁶Kakame Kusam oko to kede, Kadad wot ka Bedad, ngat kame bin oko bwono jo me Midian i piny me Moab, oko lunyo wange bala abaka. Nying bomba mere bin Abit.

⁴⁷Kadad bin oko to di Samila me Masereka oko lunyo wange bala abaka.

⁴⁸Kakame Samila oko to kede, Saul me bomba me Rekobot kame bin tie i nget ecilet me Eupurate, oko bin lunyo wange bala abaka.

⁴⁹Saul bin oko to di Baal Aanan wot ka Acibor oko lunyo wange bala abaka.

⁵⁰Kakame Baal Aanan wot ka Acibor oko to kede, Kadad bin oko lunyo wange bala abaka. Nying bomba mere bin Pau; nying dako mere bin Meketabel, nyar ka Matured, nyar ka Mesakab.

⁵¹Kadad bin oko to. Ikekon me jo me Edom bin opopokun kaman: Timina, Aluba, Yetet,

⁵²Okolibama, Ela, Pinon,

⁵³Kenas, Teman, Mibisar,

⁵⁴Magadiel kede Iram. Magonogi en ikekon ka jo Edom.

1 Iyutun 2

Ikwae ka Yuda

¹Yakobo bin tie kede awobe tomon kiwie are: Ruben, Simeon, Lebi, Yuda, Isakar, Sebulun,

²Dan, Yosepu, Benjamin, Naputali, Gad, kede Aser.

³Yuda bin tie kede awobe kany. Oudo enywalo kede Batasua, en dako me Kanan, awobe adek: Er, Onan, kede Sela. Er ngat koudo obedo wode kao oudo rac adikinicel omio Rwot oko neke.

⁴Yuda doko oko nywalo kede ci wode anyinge Tamar awobe are: Peresi kede Seera.

⁵Awobe ka Peresi bin gin ige: Keseroni kede Kamul.

⁶Awobe ka Seera bin gin ige: Simiri, Etan, Keman, Kalikol, kede Darada.



⁷ Akan wot ka Karami, ngat acel kikom ikwae ka Seera oko bin kelo peko i kom jo me Isirael kakame en ekano kede jamini kame bin kiyako, kame oudo kopooore mino dedede but Rubanga.

⁸Etan oudo tie kede awobi acel anyinge Asaria.

Nying Joakwari me Ot ka Abaka Daudi

⁹Keseroni oudo tie kede awobe adek: Yeramel, Ram kede Kaleb.

¹⁰Nying joakwari cako kibus Ram tuno but Yese oudo tie kaman: Ram, Aminadab, Nakason (ngat koudo ngere twatwal kikom jo me ekeko ka Yuda),

¹¹Salamon, Boasi,

¹²Obed, kede Yese.

¹³Yese oudo tie kede awobe kanyaare: di lubere kede dongo gi nying gi oudo ige: Eliab, Abinadab, Sama,

¹⁴Netanel, Radai,

¹⁵Osem, kede Daudi.

¹⁶Oudo etie da kede anyira are: Seruya kede Abigail. Seyuya nyar ka Yese bin tie kede awobe adek: Abisai, Joab, kede Asakel.

¹⁷Nyare ocelu anyinge Abigail bin oko nyomere kede Yeter, akwar Isimael, di kiko nywalo awobi anyinge Amasa.

Ikwae ka Keseroni

¹⁸Kaleb wot ka Keseroni bin oko nyomo Asuba di kiko nywalo nyako kame nyinge Jeriot. Jeriot bin oko nywalo awobe adek: Yeser, Sobab, kede Aradon.

¹⁹Ingei to ka Asuba, Kaleb bin oko nyomo Epurat di kiko nywalo awobi kame nyinge Kur.

²⁰Wot ka Kur oudo nyinge Uri; Besalel en oudo obedo akware.

²¹Kakame Keseroni otuno kede mwakini ot kanyape, en eko nyomo nyar ka Makir, amin me Gilead. Gin kiko nywalo atin awobi anyinge Segub.

²²Segub bin oko nywalo wode Yair. Yair bin oko pugo bomban ot are kiwie adek i lobo ka Gilead.

²³Do ajakanuto me Gesur kede Aram oko yi tuno mano bomban ot kanyape ki kunono, ribo kiton calere ka Yair, kede bomba me Kenat kede calere atie i ngete. Jo dedede kame oudo bedo kunono oudo obedo ikwae ka Makir, papa me Gilead.

²⁴Ingei Keseroni to, wode anyinge Kaleb oko mako dako mere anyinge Epurat, di kiko nywalo atin awobi di kiko cako nyinge Asikur, en kame eko cako bomba me Tekoa.

Ikwae ka Yeramel



- ²⁵Yeramel, awobi kao ka Keseroni oudo tie kede awobe kany: Ram awobi kao, Buna, Oren, Osem kede Akija.
- ²⁶Jaramel oudo doko tie kede dako ace anyinge Atara, di eko nywalo kede awobi anyinge Onam.
- ²⁷Ram, awobi kao ka Jaramel, oudo tie kede awobe adek: Maas, Yamin, kede Eker.
- ²⁸Onam oudo tie kede awobe are: Samai kede Jada. Samai da oudo tie kede awobe are: Nadab kede Abisur.
- ²⁹Abisur oko nyomo dako anyinge Abikail, di kiko nywalo awobe are: Akaban kede Molid.
- ³⁰Nadab omin me Abisur oudo tie kede awobe are: Seled kede Apaim.
- ³¹Apaim oko nywalo Isi, di Isi oko nywalo Sesan, di Sesan oko nywalo Akelai.
- ³²Jada, omin me Samai oudo tie kede awobe are: Yeter kede Jonasan, do Yeter oko to abongo nywalo atin moro.
- ³³Jonasan oudo tie kede awobe are: Pelet kede Sasa. Magonogi dedede oudo obedo ikwae ka Yeramel.
- ³⁴Sesan bin oko nywalo idwe anyira kenekene. Oudo etie kede ngatic mere kobedo dano me Misiri anyinge Yareka,
- ³⁵kame en eko mino onyomo nyare acel. Gin kiko nywalo awobi di kiko cako nyinge Atai.
- ³⁶Nying joakwari cako kibus Atai tuno but Elisama gin ige: Atai, Natan, Sabad,
- ³⁷Epalal, Obed,
- ³⁸Yeku, Asaria,
- ³⁹Keles, Eleasa,
- ⁴⁰Sisimai, Salum,
- ⁴¹Yekamia kede Elisama.

Ikwae ace ka Kaleb

- ⁴²Awobi kao ka Kaleb omin me Jaramel, nyinge oudo Mesa. Mesa oko nywalo Sip, di Sip oko nywalo Maresa, di Maresa oko nywalo Keburon.
- ⁴³Keburon oudo tie kede awobe ongwon: Kora, Tapua, Rekem, kede Sema.
- ⁴⁴Sema bin en papa me Rakam, kwaru me Yorekeam; Rekem, omin me Sema, oudo obedo papa me Samai,
- ⁴⁵di Samai oko nywalo Maon, di Maon oko nywalo Betesur.



⁴⁶Kaleb oudo tie kede dako kalikame enyomo anyige Epa, en eko nywalo kede dako nono awobe adek: Aran, Mosa, kede Gases.

⁴⁷(Icuo anyinge Yadaï oudo tie kede awobe kanyape: Regem, Yotam, Gesan, Pelet, Epa, kede Sap.)

⁴⁸Kaleb oudo doko tie kede dako ace kalikame enyomo anyinge Maka; en eko nywalo kede dako nono awobe are: Seber kede Tirikana.

⁴⁹Icen mere dako nono bobo oko medo nywalo awobe are: Sap, ngat kame bin ocako bomba me Mademana; kede Seba, ngat kame bin ocako bomban me Makebena kede Gibeä. Medo i wi magonogo Kaleb bin onywalo nyako anyinge Akisa.

⁵⁰Ikwae ka Kaleb bin nying gi ige: Kur oudo obedo awobi kao ka Kaleb kame enywalo kede dako mere Epurat. Wot ka Kur anyinge Sobal oko nywalo Kiriät Yearim;

⁵¹Salama wode me are en oudo papa me Betelem; kede Kerep wode me adek en oudo papa me Betegader.

⁵²Sobal papa me Kiriät Yearim oudo da obedo kwaru me jo Karoe, kede me dul me jo me Menukot.

⁵³Jo kowok kibut Kiriät Yearim gin ige: jo Iteri, jo Puti, jo Sumati, kede jo Miserai. Kikom jonogi oko wok kiye jo Sora kede jo Esitaol.

⁵⁴Awobe ka Salama gin ige: Betelem, jo Netopa, jo Atirot Bet Joab, kede dul me jo Manaketi kede jo Sora.

⁵⁵(Jo kame oudo tie kede apiranut me wandiko kede loko kope atie i itabun oudo da bedo Jabes. Gin oudo kiribo jo Tiratim, jo Simeatim, jo Sukatim. Gin oudo kibedo jo Ken kowok kibut Kamat, kwaru me jo me ot ka Rekab.)

1 Iyutun 3

Idwe ka Abaka Daudi

¹Magi en oudo idwe ka Daudi kame enywalo di etie Keburon: Aminon oudo obedo kao mere kame enywalo kede Akinoam me Jeserel; Danieri oudo obedo awobi me are kame enywalo kede Abigail me Kamel;

²Abisolom oudo obedo wode kame enywalo kede Maka, nyar ka Abaka Talamai me Gesur; Adoniya oudo obedo wode kame enywalo kede Kagit;

³Sepatia oudo obedo wode kame enywalo kede Abital; Itiream oudo obedo wode kame enywalo kede Egela.

⁴Idwe kanyape nogi dedede bin enywalo gi i Keburon i kare me mwakini kanyaare kede dul kame en epugo kede kunono. En bin eko pug i Yerusalem pi mwakini ot adek kiwie adek,



⁵ di eko nywalo awobe atot ki kunono. Dako mere Bateseba, nyar ka Amiel onywalo ne awobe ongwon: Simea, Sobab, Natan, kede Sulumani.

⁶Oudo doko etie kede awobe ace kanyangon: Ibar, Elisua, Elipelet,

⁷Noga, Nepeg, Yapia,

⁸Elisama, Eliada, kede Elipelet.

⁹Medo i wi magonogi, Daudi oudo bobo tie kede idwe kame bin enywalo kede mon kalikame bin enyomo; oudo da etie kede nyare anyinge Tamar.

Ikwae ka Abaka Sulumani

¹⁰Magi en ikwae ka Sulumani di kotero nying gi iepone kame kilubere kede: Rekoboam wode, di Abija, di Asa, di Yekosapat,

¹¹di Yoram, di Akasia, di Yowasi,

¹²di Amasia, di Asaria, di Yotam,

¹³di Akas, di Esekia, di Manase,

¹⁴di Amon, di Yosia.

¹⁵Yosia oudo tie kede awobe ongwon: Yokanan, Yekoyakim, Esedekia, kede Yoakas.

¹⁶Yekoyakim oudo tie kede awobe are: Yekoyakin kede Esedekia.

Ikwae ka Abaka Yekoyakin

¹⁷Magi en ikwae ka Abaka Yekoyakin, ngat kame bin komako di oko tero Babilon bala mabus me yi. Yekoyakin oudo tie kede awobe kanyaare: Selatiel,

¹⁸Malkiram, Pedaya, Senasar, Yekamia, Kosama kede Nedabia.

¹⁹Pedaya oudo tie kede awobe are: Serubabel kede Simei. Serubabel oudo tie kede awobe are: Mesulam kede Kanania, kede nyako acel, en Selomit.

²⁰Oudo doko etie kede awobe ace kany: Kasuba, Okel, Berekia, Kasadia, kede Yusab Kesed.

²¹Kanania oudo tie kede awobe are: Pelatia kede Yesaya. Yesaya oko nywalo Repaya, di Repaya oko nywalo Arenan, di Arenan oko nywalo Obadia, di Obadia oko nywalo Sekania.

²²Sekania oudo tie kede awobi acel, en Semaya. Awobe ka Semaya gin en: Katus, Igal, Baria, Nearia, kede Sapat.

²³Nearia oudo tie kede awobe adek: Elioenai, Kisikia, kede Asirikam.

²⁴Elioenai oudo tie kede awobe kanyaare: Kodabia, Eliasib, Pelaya, Akub, Yokanan, Delaya, kede Anani.

1 Iyutun 4



Ikwae ka Yuda

- ¹Magi en ikwae ka Yuda: Peresi, Karami, Kur, Sobal.
- ²Sobal en oudo papa me Reaya, di Reaya oko bedo papa me Yakat, di Yakat oko bedo papa me Akumai kede Lakad, gin joakwari ka jo kame bin bedo Sora.
- ³⁻⁴Kur en oudo obedo awobi adwong i yi toto gi Epurat, dako ka Kaleb. Ikwae mege en kame bin ocaoko bomba me Betelem. Kur oudo tie kede awobe adek: Etam, Penuel, kede Eser. Awobe ka Etam bin gin ige: Jeserel, Isima, Idibas; amin gi oudo nyinge Kaselelponi. Penuel en kabin ocaoko bomba me Gedor, kede Eser oko cako bomba me Kusa.
- ⁵Asikur ngat kabin ocaoko bomba me Tekoa oudo tie kede mon are: Kela kede Nara.
- ⁶En bin eko nywalo kede Nara awobe ongwon: Akusam, Keper, Temeni, kede Kakastari.
- ⁷Asur oko nywalo kede Kela awobe adek: Seret, Isikar, kede Etenan.
- ⁸Kos en oudo obedo papa me Anub kede Sobeba; en oudo ebedo kwaru me jo me ude koyai kikom Akarkel wot ka Karum.
- ⁹Oudo tie icuo moro anyinge Yabes; en oudo kowore i tur gi kalamo imiegu mege. Toto mere oudo ocaoko ne nying nono be Yabes pien nywale oudo obedo nywal me lito.
- ¹⁰Do Yabes oko lego but Rubanga me Isirael be, “Okwe Rubanga, mia winyo di iko nyano ikor na. Bed tie keda di iko gwoka ki gikareco dedede kame twero kelo na lito.” Di Rubanga oko mine gikame ekwao.

Nying jo me Ude Ace

- ¹¹Kaleb, omin me Suka oko nywalo wode anyinge Mekir. Mekir en oudo papa me Esiton.
- ¹²Esiton oko nywalo awobe adek: Beterapa, Pasea, kede Tekina. Tekina en bin oko cako bomba me Nakas. Ikwae ka jonogi bin bedo Reka.
- ¹³Kenas oudo tie kede awobe are: Otiniel kede Seraya. Otiniel da oudo tie kede awobe are: Katat kede Meonotai.
- ¹⁴Meonotai oko nywalo Opura. Seraya en oudo papa me Joab, ngat kocako Gekarasim.
- ¹⁵Kaleb wot ka Jepune oudo tie kede awobe adek: Iru, Ela, kede Naam. Ela en oudo obedo papa me Kenas.
- ¹⁶Yekalelel oudo tie kede awobe ongwon: Sip, Sipika, Tiria, kede Asarel.
- ¹⁷⁻¹⁸Esera oudo tie kede awobe ongwon: Yeter, Mered, Eper, kede Yalon. Mered bin oko nyomo Bitia, nyar ka abaka me Misiri, di kiko nywalo nyako anyinge Miriamu, kede awobe are: Samai kede Isiba. Isiba en kabin oko cako bomba me Esitemoa.



Mered da bin oko nyomo dako me ekeko ka Yuda, di kiko nywalo awobe adek: Yered, ngat kocako bomba me Gedor; Keber, ngat kocako bomba me Soko; kede Yekutiel, ngat kocako bomba me Sanoa.

¹⁹Kodia bin onyomo amin me Nakam. Ikwae gi en kame bin oko bedo acakini me jo Garam kame bin bedo i bomba me Keila, kede jo Makati kame bin bedo i bomba me Esitemoa.

²⁰Simon bin tie kede awobe ongwon: Aminon, Rina, Benkanan, kede Tilon. Isi oudo tie kede awobe are: Soket kede Bensoket.

Ikwae ka Sela

²¹Sela oudo obedo ngat acel kikom awobe ka Yuda. Ikwae mege oudo ige: Er, ngat kocako bomba me Leka; Lada, ngat kocako bomba me Maresa; ude me jo kame bin kuo igoen atar liamaliam, gin jo kame bin bedo i bomba me Bet Asibea;

²²Yokim kede jo kame bin bedo i bomba me Koseba; kede Yowasi kede Sarap, jo kame bin onyomo mon me Moab di kiko donyo bedo Betelem. (Magonogi obedo kope kasek.)

²³Gin oudo kibedo jocwei agune kame tio ne abaka, oudo kibedo i bomban me Netaim kede Gedera.

Ikwae ka Simeon

²⁴Simeon oudo tie kede awobe kany: Nemuel, Yamin, Yarib, Seera, kede Saul.

²⁵Salum en oudo obedo wot ka Saul, Mibisam en oudo wot ka Salum, kede Misima en oudo obedo wot ka Mibisam.

²⁶Cako kikut Misima nywal oko lubere kaman: Kamuel, di Sakur, di Simeoi.

²⁷Simeoi oudo tie kede awobe tomon kiwie kanyape kede anyira kanyape, do joawade mege oudo tie kede idwe anonok, omio jo me ekeko ka Simeon likame oko nyai bala jo me ekeko ka Yuda.

²⁸ Gin oudo kibedo i bomban me Beereseba, Molada, Kasar Sual,

²⁹Bilika, Esem, Tolad,

³⁰Betuel, Koroma, Sikilag,

³¹Bet Markabot, Kasarsusim, Betbiri, kede Saraim.

³²Oudo kibedo da i bomban me Etam, Ain, Rimon, Token, kede Asan,

³³kede i calere koluko gi, paka tuno i bomba me Baal. Magonogi en oudo kabedo gi. Gin oudo kiko bedo gwoko wapere me nying joakwari.

³⁴Magi en nying jo kame oudo obedo jotel me ude apapat i diere gin: Mesobab, Yamlek, Yosa wot ka Amasia,

³⁵Yoweri, Yeku wot ka Yosibia, en wot ka Seraya, en wot ka Asiel,



- ³⁶Elioenai, Yaakoba, Yesokaya, Asaya, Adiel, Yesimiel, Benaya,
- ³⁷Siisa wot ka Sipi, wot ka Alon, wot ka Yedaya, wot ka Simiri, wot ka Semaya.
- ³⁸Jo me ude nogi bin oko nyai
- ³⁹di kiko sarkin paka noko Gedor, di kiko donyo kwano romini gi i bad tetu kide me aditot kame bomba nono tie iye.
- ⁴⁰Gin kiudo lum alibaliba kunono, doko lobo nono oudo lac, eling di etie kede anapakin. Jo koudo ocako bedo kunono oudo obedo jo ka Kam.
- ⁴¹I kare ka Abaka Esekia me Yuda, jo kame nying gi tie malo go oko ot Gedor di kiko dudubo iemai kede kimere me jo koudo bedo kunono. Gin kiko riamo jo nogo tenge di kiko donyo bedo kanono atwal, pien lum me kwano gi oudo tie kunono.
- ⁴²Jo ace tol kany (500) me ekeko ka Simeon oko ot Edom, di Pelatia, Nearia, Repaya, kede Usiel, gin awobe ka Isi, en koudo telo gi.
- ⁴³Ki kunono gin kiko neneko donge me jo Amalek koudo obwot, di gin kiko donyo bedo kunono tuno tin.

1 Iyutun 5

Ikwae ka Ruben

- ¹ Magi en nying ikwae ka Ruben, awobi kao ka Yakobo. (Pi kite kame bin en ebuto kede dako acel kikom mon kame papa mere oudo bedo kede gi abongo nyomo, en bin eko kei twero mere me atin awobi kao, di bin oko mino twero nono but Yosepu,
- ² bed bala jo me ekeko ka Yuda en oko doko tek kalamo, doko da ngatel me jo me ikekon dedede oko wok kibut gin.)
- ³Ruben awobi kao ka Yakobo bin tie kede awobe ongwon: Kanok, Palu, Keseroni, kede Karami.
- ⁴Ikwae ka Yoweri bin gin en: Semaya, Gog, Simei,
- ⁵Mikaa, Reaya, Baal,
- ⁶kede Beera, ngat kame Tigilat Pilesar abaka me Asiria bin omako di eko tere obukui bala mabus; en oudo ebedo ngatel me jo me ekeko nono.
- ⁷Magi en oudo obedo jotel me ude me jo me ekeko ka Ruben: Yeyel, Sakaria,
- ⁸Bela wot ka Asas, wot ka Sema, wot ka Yoweri. Jo nogi bin bedo Aroer dok i bad tetu malo tuno Nebo kede Baal Meon.
- ⁹Oudo kitie kede doke atos i lobo me Gilead, omio kiko donyo bedo i lobo adok i bad tetu kide tuno i wi tim kopetere paka i ecilet me Eupurate.
- ¹⁰I kare ka Abaka Saulo, jo me ekeko ka Ruben bin oko yi kede jo Kagiri, gin kiko neko gi di kiko donyo bedo i lobo gi i bad tetu kide me Gilead.



Ikwae ka Gad

- 11**Jo me ekeko ka Gad bin oko bedo i bad tetu malo me kakame jo ka Ruben oudo tie iye, i lobo me Basan ape paka tuno Saleka.
- 12**Yoweri en kame oudo obedo adwong kame telo ot kame bin lo ude dedede i Basan, di Sapam en koudo telo ot kame bin lubo, di Yanai kede Sapat.
- 13**Jo ace me ekeko nono oudo obedo jo me ude ka jogi: Emikairi, Mesulam, Seba, Yorai, Yakan, Sia, kede Eber.
- 14**Gin oudo kibedo ikwae ka Abikail wot ka Kuri, wot ka Yaroa, wot ka Gilead, wot ka Emikairi, wot ka Yesisai, wot ka Yado, wot ka Bus.
- 15**Aki wot ka Abidiel, akwar Guni en koudo telo jo me ude nogi.
- 16**Gin oudo kibedo i adulion me Basan kede Gilead, i bomban kame tie kugonogo, kede i ebar dedede me kwat atie Saron.
- 17**(Wapere me nying joakwari nogi oudo kowandiko i kare ka Abaka Yotam me Yuda kede Abaka Yeroboam me are me Isirael.)

Isirikalen me Jo me Ikekon atie I bad tetu Kide

- 18**Jo me ikekon ka Ruben, Gad, kede jo me ekeko ka Manase atie i bad tetu kide oudo tie kede isirikalen atek yi tutumia ot ongwon kiwie ongwon kede tol kanyaare ki ot kanyape (44,760), oudo kopwonyo gi kiber i yi me ibukui, ipimai kede imalia.
- 19**Gin bin kiko ot yi kede jo Kagerim me ikekon ka Yetur, Napis, kede Nodab.
- 20**Gin kiko keto gen gi i kom Rubanga di kiko lego bute pi konyo gi, di Rubanga oko dwoko ilega gi di eko mino gi kibwono jo Kagerim kede jo akonyo gi.
- 21**Kiko mano kikut jokwor aguraguran tutumia ot kany (50,000), romini tutumia tol are kede ot kany (250,000), pundan tutumia are (2,000), kede kiko mako isirikalen tutumia tol acel (100,000) kitero bala mabus me yi.
- 22**Kineko jokwor atot pien yi nono oudo obedo me ka Rubanga. Gin kiko dong bedo i adul nono tuno i kare kame komako gi kede oko tero gi obukui bala mabus.

Jo me Ekeko ka Manase atie i bad tetu Kide

- 23**Jo me ekeko ka Manase me bad tetu kide bin oko donyo bedo i adul me Basan dok i bad tetu malo paka tuno Baal Kerimon, Senir, kede i moru me Kerimon; gin bin kiko nyai twatwal.
- 24**Jotel me ude gi bin gin ige: Eper, Isi, Eliel, Asiriel, Yeremia, Kodabia, kede Yadiel. Gin dedede oudo kibedo jo atek yi kede jotel angere me ude gi.

Komako Jo me Ikekon atie tetu Kide oko Tero gi Obukui

- 25**Do jo likame oko bedo jo agenere but Rubanga ka joakwari gi, di do gin kiko donyo woro rubangan me atekerin kame Rubanga oudo oriamo ki lobo nono.



²⁶ Aso, Rubanga oko mino Abaka Pul me Asiria (kolwonge da be Tigilat Pileser) osuro lobo gi. En eko mamako di eko tero jo me ikekon ka Ruben, Gad, kede dul me jo me ekeko ka Manase atie tetu kide, di eko tero gi bedo Kala, Kabor, Kara, kede i dog ecilet me Gosan tuno tin.

1 Iyutun 6

Wapere me Joakwari ka Jotel me Josaseredoti

- ¹Lebi oudo tie kede awobe adek: Gerson, Kokat, kede Merari.
- ²Kokat oudo tie kede awobe ongwon: Amuram, Isikar, Keburon, kede Usiel.
- ³Amuram oudo tie kede awobe are: Aaron kede Musa, kede amin gi Miriamu. Aaron oudo tie kede awobe ongwon: Nadab, Abiku, Eleasar, kede Itamar.
- ⁴Man en oudo epone kame ikwae kede ikwae ka Eleasar olubere kede: Pinekasi, Abisua,
- ⁵Buki, Usi,
- ⁶Serakia, Merayot,
- ⁷Amaria, Akitub,
- ⁸Sadoki, Akimas,
- ⁹Asaria, Yokanan,
- ¹⁰Asaria (en ngat kame bin etio bala ngasaseredoti i tempulo kame Abaka Sulumani ogero Yerusalem),
- ¹¹Amaria, Akitub,
- ¹²Sadoki, Salum,
- ¹³Kilikia, Asaria,
- ¹⁴Seraya, Yekosadoki.
- ¹⁵Rwot bin oko tic kikut Nebukadunesa di eko mako Yekosadoki karacel kede jo ace me Yuda kede me Yerusalem, di eko tero gi obukui bala mabus.

Ikwae ace ka Lebi

- ¹⁶Lebi bin tie kede awobe adek: Gerson, Kokat, kede Merari.
- ¹⁷Buli ngat acelacel kikut gi oudo tie kede awobe. Awobe ka Gerson gin ige: Libini kede Sime.
- ¹⁸Awobe ka Kokat gin ige: Amuram, Isikar, Keburon, kede Usiel;
- ¹⁹Merari en oudo obedo papa me Makali kede Musi.
- ²⁰Man en epone kame ikwae kede ikwae ka Gerson olubere kede: Libini, Yakat, Sima,



- ²¹Yoa, Ido, Seera, Yeaterai.
- ²²Man en epone kame ikwae kede ikwae ka Kokat olubere kede: Aminadab, Kora, Asir,
- ²³Elikana, Ebiasap, Asir,
- ²⁴Takat, Uriel, Usia, Saul.
- ²⁵Elikana oudo tie kede awobe are: Amasai kede Akimot.
- ²⁶Man en epone kame ikwae kede ikwae ka Akimot olubere kede: Elikana, Sopai, Nakat,
- ²⁷Eliab, Yerokam, Elikana.
- ²⁸Samuel oudo tie kede awobe are: Yoweri awobi adwong, kede Abija awobi atidi.
- ²⁹Man en epone kame ikwae kede ikwae ka Merari olubere kede: Makali, Libini, Simei, Usa,
- ³⁰Simea, Kagiya, Asaya.

Jower me Tempulo

- ³¹Magi en bin jo kame Abaka Daudi ocibo pi telo kop amako wer i tempulo ka Rwot, ingei tero Sanduku me Isikan iye.
- ³²Gin oudo kilere wer i Eema ka Rwot i kare kame Abaka Sulumani oudo pwodi likame ogero kede tempulo i Yerusalem.
- ³³Nying ude kame jonogi oudo wok kiye oudo wapere kaman: Ot ka Kokat: Keman wot ka Yoweri en oudo obedo ngat koudo telo jower me agege. Nying joakwari mege wapere tuno i kom Yakobo kaman: Keman, Yoweri, Samuel,
- ³⁴Elikana, Yerokam, Eliel, Toa,
- ³⁵Sup, Elikana, Makat, Amasai,
- ³⁶Elikana, Yoweri, Asaria, Sepania,
- ³⁷Takat, Asir, Ebiasap, Kora,
- ³⁸Isikar, Kokat, Lebi, Yakobo.
- ³⁹Asap en koudo telo ekodet me are me jower. Joakwari mege wapere paka tuno i kom Lebi kaman: Asap, Berekia, Simea,
- ⁴⁰Emikairi, Baseya, Malikija,
- ⁴¹Etini, Seera, Adaya,
- ⁴²Etan, Sima, Simei,
- ⁴³Yakat, Gereson, Lebi.



⁴⁴Etan dano me ot ka Merari en oudo obedo ngatel me ekodet me adek me jower. Joakwari mege wapere paka tuno i kom Lebi kaman: Etan, Kisi, Abidi, Maluk,

⁴⁵Kasabia, Amasia, Kilikia,

⁴⁶Amisi, Bani, Semer,

⁴⁷Makali, Musi, Merari, Lebi.

⁴⁸Jolebi ace apat oudo kopoko negi tice ace apat dedede kame kotimo i ot me woro Rubanga.

Ikwae ka Aaron

⁴⁹Aaron kede ikwae mege oudo tic gi en mino giayala me odok angwe kur kede giayala kame kowango i wi alutari. Gin oudo kitimo tice dedede me Kabedo Kacil Kalamo, kede tic amako giayala me kwanyo dub me jo me Isirael. Gin oudo kitimo manoni di lubere kede cik kame Musa ngatic ka Rubanga omio gi.

⁵⁰Nying ikwae ka Aaron lubere kaman: Eleasar, Pinekasi, Abisua,

⁵¹Buki, Usi, Serakia,

⁵²Merayot, Amaria, Akitub,

⁵³Sadoki, Akimas.

Kakame Jolebi Bedo Iye

⁵⁴Man en adul kame bin komio ikwae ka Aaron me ot ka Kokat. Gin bin en kiudo iner me agege me lobo kame komio Jolebi.

⁵⁵Manono ribo Keburon i lobo me Yuda kede ebar mere me kwat koluke;

⁵⁶do poti me bomba nono kede calere mege bin komio Kaleb wot ka Jepune.

⁵⁷Bomban kame nying gi tie piny gi bin komio but ikwae ka Aaron pi bedo karingo ot gwokere iye ka dano moro oneko dano ocelu: Keburon, Libina kede ebar mere me kwat, Yatir, Esitemoa kede ebar mere me kwat,

⁵⁸Kilen kede ebar mere me kwat, Debir kede ebar mere me kwat,

⁵⁹Asan kede ebar mere me kwat, kede Bet Semes kede ebar mere me kwat.

⁶⁰Ki lobo me jo me ekeko ka Benjamin bin komio gi bomban kede ebar gi me kwat kaman: Geba, Alemet, kede Anatot. Aso, ka koriribo, bomban dedede kame bin komio gi pi jo me miere gi dedede bedo iye, gin dedede oudo kitie tomon kiwie adek.

⁶¹Bin oko uco alulu di oko mino jo ace me ot ka Kokat bomban tomon ki lobo me jo me ekeko ka Manase me bad tetu tim, di lubere paco kede paco.

⁶²Bin oko mino jo me ot ka Gereson, paco kede paco, bomban tomon kiwie adek i adulion me jo me ikekon ka Isakar, Aser, Naputali, kede Manase me Basan.



⁶³Oko da mino jo me ot ka Merari, paco kede paco, bomban tomon kiwie are i adulion me jo me ikekon ka Ruben, Gad, kede Sebulun.

⁶⁴Epone noni en kame jo me Isirael bin omio kede Jolebi bomban kede ebar me kwat koluko gi.

⁶⁵Oudo kopoko negi da i yore me uco alulu bomban kame komaro nying gi go, atie i adulion me jo me ikekon ka Yuda, Simeon, kede Benjamin.

⁶⁶Bin oko mino miere mogo me awobe ka Kokat bomban kede kakwat i adul me jo me ekeko ka Epuraimu.

⁶⁷Bomban kame komio gi me ringo ot gwokere nogo ige: Sekem kede ebar mere me kwat i piny kobedo imukuran me Epuraimu, Geser kede ebar mere me kwat,

⁶⁸Yokomeam kede ebar mere me kwat, Bet Koron kede ebar mere me kwat,

⁶⁹Aijalon kede ebar mere me kwat, kede Gat Rimon kede ebar mere me kwat.

⁷⁰Ki adul ka jo me ekeko ka Manase me bad tetu tim, bin oko mino gi bomban me Aner kede Bileam kede ebar me kwat koluko gi.

⁷¹Bomban kame bin oko mino jo me ot ka Gereson kede ebar me kwat koluko gi gin ige: I dul ka jo me ekeko ka Manase me bad tetu kide, komio gi bomba me Golan atie Basan, kede Asitarot.

⁷²I adul ka jo me ekeko ka Isakar: Kedes, Daberat,

⁷³Ramot, kede Anem.

⁷⁴I adul ka jo me ekeko ka Aser: Masal, Abidon,

⁷⁵Kukok, kede Rekob.

⁷⁶I adul ka jo me ekeko ka Naputali: Kedes katie Galilaya, Kamon, kede Kiriataim.

⁷⁷Bomban kame bin oko mino jo ace me ot ka Merari kodong mege, kede ebar me kwat koluko gi gin ige: I adul ka jo me ekeko ka Sebulun: Rimono kede Tabor.

⁷⁸I adul ka jo me ekeko ka Ruben, i bad tetu kide me ecilet me Yorodan, di ikalamo Jeriko: Beser atie i wi lobo kopetere bala emesa, Yasa,

⁷⁹Kedemot, kede Mepat.

⁸⁰I adul ka jo me ekeko ka Gad: Ramot atie Gilead, Makanaim,

⁸¹Kesibon, kede Yaser.

1 Iyutun 7

Ikwaē ka Isakar

¹Isakar bin tie kede awobe ongwon: Tola, Pua, Yasub, kede Simiron.



²Tola oudo tie kede awobe kanyape: Usi, Repaya, Jeriel, Yamai, Ibisam, kede Samuel. Gin oudo kibedo jotel me miere me ikwae ka Tola, doko da gin oudo kibedo isirikalen atek yi twatwal i kare gin. I kare ka Abaka Daudi wel me ikwae gi oudo tie tutumia ot are kiwie are kede tol kanyape (22,600).

³Usi oudo tie kede awobi acel, manono en Isirakia. Isirakia oudo tie kede awobe ongwon: Emikairi, Obadia, Yoweri, Isia; gin dedede jo kany oudo kibedo jotel me miere.

⁴Oudo gin kitie kede mon atos twatwal kede idwe, omio ikwae gi oko twero cweno ekodet me isirikalen aromo tutumia ot adek kiwie kanyape (36,000).

⁵Ka kolubo nying joakwari, jo dedede kowok ki miere me jo me ekeko ka Isakar oudo tie iye cuo atwero yi tutumia ot kanyauni kiwie kanyaare (87,000).

Ikwae ka Benjamin kede Dan

⁶Benjamin oudo tie kede awobe adek: Bela, Beker, kede Yediael.

⁷Bela oudo tie kede awobe kany: Esibon, Usi, Usiel, Yerimot, kede Iri. Gin dedede jo kany oudo kibedo jotel me miere, doko da oudo kibedo jo yi atek. Ikwae gin oudo tie iye cuo atwero yi tutumia ot are kiwie are kede ot adek kiwie ongwon (22,034).

⁸Beker oudo tie kede awobe kanyangon: Semira, Yowasi, Elieser, Elioenai, Omiri, Yeremot, Abija, Anatot, kede Alemet.

⁹Wel gin ikwae me ot nono, jo kame oudo obedo jotel me miere doko di kitwero ot yi, oudo tie tutumia ot are kede tol are (20,200).

¹⁰Yediael oudo tie kede awobi acel, en Bilkan. Bilkan oudo tie kede awobe kanyaare: Yeus, Benjamin, Ekud, Kenana, Setan, Tarusi, kede Akisakar.

¹¹Gin dedede oudo kibedo jotel me miere, doko da oudo kibedo jo yi atek. Ikwae gi oudo tie iye jo tutumia tomon kiwie kanyaare kede tol are (17,200) atwero yi.

¹²Supim kede Kupim oudo obedo awobe ka Ir, Kusim oudo obedo wot ka Aker.

Ikwae ka Naputali

¹³Naputali oudo tie kede awobe ongwon: Yakasiel, Guni, Yeser, kede Salum, gin ikwae ka Bilika.

Ikwae ka Manase

¹⁴Manase bin onywalo awobe are kede dako me Aram kalikame oudo enyomo, gin en Asiriel kede Makir. Makir en oudo obedo papa me Gilead.

¹⁵Makir bin oko udo ne Kupim dako, kede ne Supim da. Nying amin mere oudo Maka. Nying wot ka Makir me are oudo obedo Selopekad, en oudo enywalo anyira kenekene.

¹⁶Maka, dako ka Makir, bin oko nywalo awobe are: Peres kede Seresi. Peres oudo tie kede awobe are: Ulam kede Rakem,



¹⁷Ulam oudo tie kede awobi anyinge Bedan. Magonogi en bin obedo awobe ka Gilead wot ka Makir, wot ka Manase.

¹⁸Amin me Gilead anyinge Kamoleket oudo tie kede awobe adek: Isod, Abieser, Makala.

¹⁹(Semida oudo tie kede awobe ongwon: Akian, Sekem, Likiki, kede Aniam.)

Ikwae ka Epuraimu

²⁰Magi en ikwae ka Epuraimu cako kikut wode ot anyim kede epone kame kilubere kede: Sutela, Bered, Takat, Eleada, Takat,

²¹Sabad, Sutela. Epuraimu oudo tie kede awobe ace are medo i kom Sutela, gin en Eser kede Elead, gin bin koko neko gi i kabedo kame kioto iye kwalo dok kikut jo kobedo anywali me Gat.

²²Papa gi Epuraimu oko bin koko gi pi ceng atot, di joawade mege oko ot dino cunye.

²³Epuraimu bobo oko buto kede dako mere, di eko yac di eko nywalo atin awobi. Gin kiko cako nyinge Beria, pi peko koudo opoto i paco gi.

²⁴Epuraimu oudo tie kede nyare kame nyinge Seera. Nyare nono oko gero bomban me Bet Koron Amalo kede Apiny, kede Usen Seera.

²⁵Epuraimu doko oudo tie kede awobi anyinge Repa. Ikwae ka Repa gin ige: Resep wode, di Tela, di Takan,

²⁶di Ladan, di Amikud, di Elisama,

²⁷di Nun, di Yosua.

²⁸Adul me lobo kame gin kitero di kiko donyo bedo iye oudo ribo Betel kede bomban me ngete, ape ape tuno Naran i bad tetu kide, kede i bad tetu tim oudo etuno Geser kede bomban me ngete. Oudo eribo da bomban me Sekem kede Aya, kede bomban me nget gi.

²⁹Ikwae ka Manase oudo lo bomban me Bet San, Tanak, Megido, kede Dor, kede bomban me nget gi. Magonogi dedede en kabedere kakame ikwae ka Yosepu wot ka Yakobo bin bedo iye.

Ikwae ka Aser

³⁰Aser bin tie kede awobe ongwon: Imina, Isiba, Isibi, kede Beria; oudo etie da kede nyako acel anyinge Sera.

³¹Beria oudo tie kede awobe are: Keber kede Malakiel. (Malakiel en kocako bomba me Birisait.)

³²Keber oudo tie kede awobe adek: Yapulet, Somer, kede Kotam; kede nyako acel anyinge Sua.

³³Yapulet da oudo tie kede awobe adek: Pasak, Bimikal, kede Asibat.



³⁴Omin mere kanyinge Somer oudo tie kede awobe adek: Rokega, Yekuba, kede Aram.

³⁵Omin mere kanyinge Kotam oudo tie kede awobe ongwon: Sopa, Imina, Seles, kede Amal.

³⁶Ikwae ka Sopa gin oudo Sua, Kareneper, Sual, Beri, Imira,

³⁷Beser, Kod, Sama, Silisa, Itiran, kede Beera.

³⁸Ikwae ka Yeter gin en Jepune, Pisipa, kede Ara;

³⁹ikwae ka Ula gin oudo Arak, Kaniel, kede Risia.

⁴⁰Magonogi dedede oudo obedo ikwae ka Aser. Gin oudo kibedo jotel me ude apapat, doko da oudo kibedo jo yi atek. Ikwae ka Aser oudo tie iye cuo tutumia ot are kiwie kanyape (26,000) kame twero ot i yi.

1 Iyutun 8

Ikwae ka Benjamin

¹Benjamin oudo tie kede awobe kany; cako kibun kao tuno but ngorit nying gi oudo lubere kaman: Bela, Asabel, Akara,

²Nokak, kede Rapa.

³Ikwae ka Bela gin oudo ige: Adar, Gera, Abikud,

⁴Abisua, Naman, Akoak,

⁵Gera, Sepupan, kede Kuram.

⁶⁻⁷Ikwae ka Ekud gin oudo ige: Naman, Akija, kede Gera. Gin oudo kibedo jotel me jo me ude apapat koudo bedo Geba, do icen mere bin oko riamo ki kioto bedo i bomba me Manakat, di Gera en kame bin telo negi yongayo. Gera oudo tie kede awobe are: Usa kede Akikud.

⁸⁻¹¹Sakaraim kede dako mere Kusim bin onywalo awobe are: Abitub kede Elipaal. Do en bin eko riamo dako nono kede bobo dako mere ace anyinge Baara. Bin en di do eko ot bedo i piny me Moab di eko nyomo dako anyinge Kodes, di kiko nywalo awobe kanyaare: Yobab, Sibia, Mesa, Malakam, Yeusi, Sakia, kede Mirima. Awobe mege dedede bin oko doko jotel me miere apapat me ikwae mege.

¹²Elipaal oudo tie kede awobe adek: Eber, Misam, kede Semed. Semed en kame bin oko gero bomban me Ono kede Lod kede calere koluko gi.

Ikwae ka Benjamin i Gat kede Aijalon

¹³Beria kede Sema oudo obedo jotel me miere kame bin odonyo bedo i bomba me Aijalon di kiko riamo tenge jo kame oudo bedo i bomba me Gat.

¹⁴Ikwae ka Beria gin ige: Akio, Sasak, Yeremot,



¹⁵Sebadia, Arad, Eder,

¹⁶Emikairi, Isipa, kede Yoka.

Ikwae ka Benjamin koudo Bedo Yerusalem

¹⁷Ikwae ka Elipaal oudo ribo Sebadia, Mesulam, Kisiki, Keber,

¹⁸Isimerai, Isilia, kede Yobab.

¹⁹Ikwae ka Simei oudo ribo Yakim, Sikiri, Sabadi,

²⁰Elienai, Siletai, Eliel,

²¹Adaya, Beraya, kede Simirat.

²²Ikwae ka Sasak gin oudo ige: Isipan, Eber, Eliel,

²³Abidon, Sikiri, Aanan,

²⁴Kanania, Elam, Anatotija,

²⁵Iptideya, kede Penuel.

²⁶Ikwae ka Yerokam oudo ribo Samuserai, Siekaria, Atalia,

²⁷Yaaresia, Elia, kede Sikiri.

²⁸Magonogi oudo obedo jotel me miere apapat kede ikwae gi kame bin bedo Yerusalem.

Ikwae ka Benjamin i Gibeon kede i Yerusalem

²⁹Yeyel en kame bin ocalo bomba me Gibeon di eko donyo bedo kunono. Dako mere oudo nyinge Maka;

³⁰wode kao oudo nyinge Abidon. Awobe mege ace oudo obedo Suur, Kis, Baal, Ner, Nadab,

³¹Gedor, Akio, Seker,

³²kede Mikilot papa me Simea. Jo mogo kikom gi bin oko ot bedo Yerusalem i nget joawade gi.

Ikwae ka Abaka Saulo

³³Ner en koudo obedo papa me Kis; Kis en koudo obedo papa me abaka Saulo. Saulo oudo tie kede awobe ongwon: Jonasan, Malikisua, Abinadab, kede Esibaal.

³⁴Jonasan en oudo obedo papa me Meribaal, papa me Mikaa.

³⁵Mikaa oudo tie kede awobe ongwon: Piton, Malek, Tarea, kede Akas.

³⁶Akas en koudo obedo papa me Yekoda. Yekoda oudo tie kede awobe adek: Alemet, Asimabet, kede Simiri. Simiri en koudo obedo papa me Mosa,



³⁷Mosa en koudo papa me Binea, Binea en koudo papa me Rapa, Rapa en koudo papa me Eleasa, Eleasa en koudo papa me Asel.

³⁸Asel koudo tie kede awobe kanyape: Asirikam, Bokeru, Isimael, Searia, Obadia, kede Anan.

³⁹Omin me Asel anyinge Esek oudo tie kede awobe adek: Ulam, Yeus, kede Elipelet.

⁴⁰Awobe ka Ulam oudo obedo jo yi acuny gi nwang, di kitie kede apiranut me yi kede emal. En oudo etie kede jo tol acel kede ot kany (150) kobedo awobe mege kede awobe kobedo ikwae mege. Jo dedede kame nying gi tie malo go oudo obedo ikwae ka Benjamin.

1 Iyutun 9

Jo kame Komako di kiko Dwogo ki Babilon

¹Jo dedede me Isirael bin kowandiko nying gi di lubere kede joakwari gi, di oko rwako ngeg i kom gi i *Itabu me Itatam kamako Abakai me Isirael*. Bin oko mako jo me Yuda di oko tero gi Babilon bala mabus, pien oudo likame kibedo jo agenere but Rubanga.

²Jo me agege oko cako dwogo bedo i bomban atie i lobo gi amako gi oudo ribo jo me Isirael, josaseredoti, Jolebi, kede jotie me tempulo.

³Jo me ikekon ka Yuda, Benjamin, Epuraimu, kede Manase oko ot bedo Yerusalem.

⁴⁻⁶Jo me ekeko ka Yuda kame oudo bedo Yerusalem oudo tie miere tol kanyape kede ot kanyangon (690). Ikwae ka wot ka Yuda anyinge Peresi oudo Utai en kame telo. Utai oudo obedo wot ka Amikud, akwar Omiri. Omiri oudo obedo wot ka Imiri, wot ka Bani. Ikwae ka Sela wot ka Yuda oudo Asaya en kame telo, en oudo da ebedo ngatel me diakal mere. Ikwae ka Seera wot ka Yuda oudo Yekuel en kame telo.

⁷Jo me ekeko ka Benjamin kame oudo bedo Yerusalem gin ige: Salu wot ka Mesulam, wot ka Kodabia, wot ka Kasenua.

⁸Ibenia wot ka Yerokam; Ela wot ka Usi, wot ka Mikiri; kede Mesulam wot ka Sepatia, wot ka Reuel, wot ka Ibinija.

⁹Oudo tie miere tol kanyangon kede ot kany kiwie kanyape (956) me jo me ekeko noni kame bedo kunono. Jo dedede kame nying gi tie malo go oudo obedo jotel me miere.

Josaseredoti koudo Bedo Yerusalem

¹⁰Josaseredoti kame oudo bedo Yerusalem gin ige: Yedaya, Yekoyarib, Yakin,

¹¹kede Asaria wot ka Kilikia, wot ka Mesulam, wot ka Sadoki, wot ka Merayot, wot ka Akitub; Asaria nono en kame oudo obedo ngat kame lo tempulo.



¹²Ace oudo obedo: Adaya wot ka Yerokam, wot ka Pasikur, wot ka Malikija, wot ka Maasai, wot ka Adiel, wot ka Yakesera, wot ka Mesulam, wot ka Mesilemit, wot ka Imer.

¹³Josaseredoti kame oudo telo miere oudo tie tutumia acel kede tol kanyaare kede ot kanyape (1,760). Gin oudo kitie jo kipirana i kom tice dedede kame kotimo i tempulo.

Jolebi Koudo Bedo Yerusalem

¹⁴Jolebi koudo bedo Yerusalem gin ige: Semaya wot ka Kasub, wot ka Asirikam, wot ka Kasabia, wot ka Merari;

¹⁵kede Bakabakar, Keres, Galal, kede Matania wot ka Mika, wot ka Sikiri, wot ka Asap;

¹⁶kede Obadia wot ka Semaya, wot ka Galal, wot ka Yedutun; kede Berekia wot ka Asa, wot ka Elikana, kame oudo bedo i calo me Netopa.

Jodar me Tempulo koudo Bedo Yerusalem

¹⁷Jo kame oudo daro erute di kibedo Yerusalem gin ige: Salum, Akub, Talemon, kede Akiman. Salum en kame oudo telo gi.

¹⁸Pi kare alac gin oudo kibedo jodar me Erute me Abaka koudo tie i bad tetu kide. Do i kare acen joakwari gi en koudo obedo jodar me erute adonyo i kimere me Jolebi.

¹⁹Salum wot ka Kore, wot ka Kora, karacel kede jo ace me ot ka Kora, oudo tic gi en daro ekeko adonyo i Eema ka Rwot, bala kame joakwari gi oudo lo kede kabedo me kimere ka Rwot.

²⁰Pinekasi wot ka Eleasar en kame oudo lo gi i kare me agege; Rwot oudo tie kede en.

²¹Sakaria wot ka Meselemia oudo da obedo ngadar me ekeko adonyo i Eema ka Rwot.

²²Jo dedede kame oudo koyero pi daro ikekon kede irutei oudo tie tol are kede tomon kiwie are (212). Oudo kowandiko nying gi di kowapo joakwari kede calo kame ngat acelacel owok kiye. Abaka Daudi kede enabi Samuel en koudo oketo joakwari gi i wang tice nogi.

²³Gin kede ikwae gi kiko meede daro irutei me tempulo.

²⁴Jodongo me jodar oudo tie i irutei me bad dedede, i bad tetu malo, piny, kide, kede tim.

²⁵Jodar nogo oudo joawade gi kame bedo i calere en kame konyo gi, di kileere alea ingei ceng kanyaare me dar.

²⁶Jo ongwon koudo obedo jodongo me jodar irutei oudo obedo Jolebi; gin oudo da kitie joloc me agolai me tempulo kede jamini dedede kame tie i tempulo.

²⁷Gin oudo kibedo i nget tempulo, pien tic gin oudo obedo dare kede yabo irutei mege buli odiko.



Jolebi Ace

- ²⁸Jolebi ace oudo tie joloc me jamini kame kotio kede gi i esawa me woro Rubanga. Gin oudo tic gi obedo maro jamini nogo i esawa me kelo gi kede me dwoko gi.
- ²⁹Apat mege oudo lo komini kede imesai, kede jamini kacil, kede da alos, bwini, mo me olibeti, odok angwe kur, kede abisalin apapat amio cam ngwe kur.
- ³⁰Do twer me nyanyalo abisalin nogo oudo tie i cing josaseredoti.
- ³¹Ngalebi kanyinge Matitia, awobi kao ka Salum, dano me ot ka Kora, en kame oudo lo tic me tedo mugati me giayala.
- ³²Jo me ot ka Kokat en koudo tic gi obedo tedo mugati kacil me tempulo buli ceng Sabato.
- ³³Miere mogo me Jolebi oudo joe gi obedo jower me tempulo. Jotel me miere nogo oudo bedo i gedo mogo me tempulo, doko da oudo likame kopoko negi tic moro ace apat, pien gin oudo kitio iceng kede iwor.
- ³⁴Jo kame nying gi tie malo go oudo obedo jotel me miere me Jolebi, di lubere kede ude ka joakwari gi; jotel nogi bin bedo Yerusalem.

Joakwari kede Ikwae ka Abaka Saulo

(8.29-38)

- ³⁵Yeyel en kame bin ocako bomba me Gibeon di eko donyo bedo iye. Nying dako mere oudo Maka.
- ³⁶Awobi mere kao oudo nyinge Abidon; awobe mege ace oudo obedo Suur, Kis, Baal, Ner, Nadab,
- ³⁷Gedor, Akio, Sakaria, kede Mikilot,
- ³⁸en papa me Simea. Ikwae gin bin bedo Yerusalem i nget jo ace kobedo joawade gi me ot nono.
- ³⁹Ner en oudo obedo papa me Kis, di Kis en oko bedo papa me Saulo. Saulo oudo tie kede awobe ongwon: Jonasan, Malikisua, Abinadab, kede Esibaal.
- ⁴⁰Jonasan en oudo obedo papa me Meribaal, papa me Mikaa.
- ⁴¹Mikaa oudo tie kede awobe ongwon: Piton, Melek, Tarea kede Akas.
- ⁴²Akas oudo obedo papa me Yara, di Yara oko nywalo awobe adek: Alemet, Asimabet, kede Simiri. Simiri en oudo obedo papa me Mosa,
- ⁴³Mosa en oudo obedo papa me Binea, Binea oudo obedo papa me Repaya, Repaya oudo obedo papa me Eleasa, Eleasa en oudo obedo papa me Asel.
- ⁴⁴Asel oudo tie kede awobe kanyape: Asirikam, Bokeru, Isimael, Searia, Obadia, kede Anan.

1 Iyutun 10



To ka Abaka Saulo

(1 Samuel 31.1-13)

- ¹ Kare nono jo me Pilistia oudo oko yi kede jo me Isirael i wi moru me Gilboa; di jo me Isirael oko dipo ringo i nyim jo Pilistia, di oko neko atot kikom gi.
- ² Jo me Pilistia oko riamere kede Saulo kede awobe mege di kiko mako gi i yongayo; di jo me Pilistia oko neko awobe ka Saulo, Jonasan, Abinadab kede Malikisua.
- ³ Yi bin oko bedo pek i kakame Saulo oudo tie iye; jo ayi kede emal bin oko ude, di kiko mine awanon arac twatwal.
- ⁴ Di do Saulo oko waco ne awobi kame bin mako ne jamini me yi be, “Wot epima ni di iko coba kede pelepel, tetekenyo jo kalikame kokepo nogi kur bin di kiko mina adok gi me tuko gi, di kiko neka.” Do awobi nono lworu oudo omako, omio likame eko yei. Aso, Saulo di oko kwanyo epima mere en won kikome di eko poto iye.
- ⁵ Kakame awobi nono oko neno kede be Saulo oudo oto, eda eko poto i epima mere di eko to karacel kede Saulo.
- ⁶ Aso, Saulo kede awobe mege adek, gin dedede jo me ot acel bin kiko to i ceng acel.
- ⁷ Kakame jo me Isirael kame oudo tie tetuca me aditot me Jeserel oko ngeno kede be jo me Isirael oudo oringo ki yi, kede da be oudo koneko Saulo kede awobe mege, gin kiko ringo tenge kiweko bomban gi; di jo me Pilistia oko bino di kiko donyo bedo i yi gi.
- ⁸ I ceng kame lubo mere di do yi oudo otiek, jo me Pilistia oko ot pi yako jamini ki kom jo kame oudo kineko, di gin kiko udo liele ka Saulo kede me awobe mege adek tie buto i wi moru me Gilboa.
- ⁹ Gin kiko tongo wie tenge, di kiko yako jamini mege me yi, di kiko cwano jo i lobo me Pilistia lung pi gin ot tatamo rwonge aber nono but rubangan gi kede but joe gi.
- ¹⁰ Gin bin kiko keto jamini ka Saulo me yi i tempulo ka rubangan gi, do kiko tweno wie i tempulo ka rubanga gi anyinge Dagon.
- ¹¹ Do kakame jo me bomba me Jabes kame bin tie i adul me Gilead oko winyo kede gikame jo Pilistia oudo otimo ne Saulo,
- ¹² Cuo dedede kame bin tek yi oko yai di kiko ot kwanyo kom Saulo kede kom awobe mege di kiko tero gi Jabes. Di do kiko yiko cogere gi i dud yat kame kolwongo be oak i Jabes kunono, di kiko kanyo kec pi ceng kanyaare.
- ¹³ Aso, Saulo bin oto pien likame oudo ebedo dano agenere but Rwot; en bin edagi lubo cik ka Rwot, doko da en eko lokere penyo tipere pi mine tam
- ¹⁴ akaka penyo tam kibus Rwot. Pi manono, Rwot oko neke di eko mino ajakanut i cing Daudi wot ka Yese.

1 Iyutun 11

Daudi Odoko Abaka me Isirael kede Yuda



(2 Samuel 5.1-10)

- ¹Jo me ikekon dedede me Isirael oko bino Keburon but Daudi, di kiko waco ne be, “Neningo, wan obedo jo acel kedi.
- ²I kare moro cen, di pwodi Saulo en oudo obedo abaka wa, in en kame oudo ibedo telo jo me Isirael ot i yi. Rwot bin oko waco ni be, ‘In ibino bedo ngakwat me jo na me Isirael, doko in ibino pugo gi.’ “
- ³Aso, kop nono en oko mino joadongo me Isirael oko bino Keburon but abaka; di Abaka Daudi oko timo kede gi isikan i nyim Rwot i Keburon, di gin kiko wiro Daudi pi bedo abaka me Isirael, bala kame Rwot oudo ocikere kede kibut Samuel.
- ⁴ Abaka Daudi bin oko yai kede jo dedede me Isirael pi ot suro Yerusalem, manono en Yebu, kakame jo Yebu oudo bedo iye, gin jo kame kicako bedo i lobo nono.
- ⁵Jo kame bin bedo Yebu oko waco ne Daudi be, “Likame ibino donyo kan.” Akadi kamanono da, Daudi bin oko mano Sion kakame oudo kocelo di tek, kame nataman kolwongo be Bomba ka Daudi.
- ⁶Daudi oko waco be, “Ngat kame bino cako suro jo Yebu bino doko ngadwong me isirikalen.” Di Joab wot ka Seruya en oko cako ot, di do en eko doko ngadwong me isirikalen.
- ⁷Daudi bin oko donyo bedo i kabedo kame oudo kocelo di tek nono, di oko donyo lwonge be “Bomba ka Daudi” .
- ⁸En bin eko gero bomba rimaro, cako ki kakame kotoro kame oudo tie tetu kide mere, di Joab oko temuno iiko kabedo apat me bomba.
- ⁹Di Daudi oko meede ameda doko dano kame tek, pien Rwot Rubanga me jo yi oudo tie kede.

Isirikalen ka Daudi Atek Yi

(2 Samuel 23.8-39)

- ¹⁰Magi en nying isirikalen ka Daudi koudo ngere twatwal. Gin karacel kede jo ace me Isirael bin kikonye eko doko abaka, bala kame Rwot oudo ocikere kede, doko da kiko mino ajakanut mere ocungo di tek.
- ¹¹Me agege oudo obedo Yasobeam, dano me ot ka Kakimoni, en oudo ebedo ngatel me “Jo Adek” . En bin eyi kede jo tol adek kede tong mere di eko neko gin dedede i wang yi acel.
- ¹²Ngat koudo lube kikom “Jo Adek” angere nogo en Eleasar wot ka Dodo, dano me ot ka Akoki.
- ¹³En bin oudo etie kede Daudi i yi me Pas Damim kakame jo me Pilistia oudo ocokere kede kunono. En oudo etie i potome mawele kakame jo me Isirael ocako kede ringo,
- ¹⁴do en kede Daudi kiko cungo kiguro i dier potome nono, di kiko yi kede jo Pilistia. Rwot oko mino gi kibwono yi nono.



- ¹⁵Ceng moro acel jo adek kikom jodongo me isirikalen ot adek oko ot i lela kakame Daudi oudo tie iye, i abo me Adulam, di isirikalen me Pilistia oudo osipo kimere gi i aditot me Repaim.
- ¹⁶I esawa nono Daudi oudo tie i wi emukura kakame tuno iye tek; kede da ekodet me jo Pilistia mogo oudo tie Betelem.
- ¹⁷Daudi oko donyo parere di ewaco be, “Okwe koto ngatamoro okelo na pii me amata ki atan atie i erute me Betelem!”
- ¹⁸Di jo adek nogo oko mwomere donyo ki kimere me jo Pilistia, di kiko twomo pii ki atan kame oudo tie i erute me Betelem di kiko tero ne Daudi. Do Daudi likame oko mato pii nono, do en eko onye piny bala giamia but Rwot,
- ¹⁹di eko waco be, “Rubanga likame yei be atim kamanoni. Pien man rom aroma bala mato remo me cuo koudo ojalo kuo gi nogi.” Aso en eko dagi mato pii nono. Jo yi adek nogo otimo manoni.
- ²⁰Abisai omin me Joab en oudo obedo ngaloc me “Jo Ot Adek” angere. En bin eyi kede jo tol adek (300) kede tong mere di eko neko gin dedede, di en eko doko dano angere twatwal kikom “Jo Ot Adek” .
- ²¹En eko doko dano angere twatwal kikom “Jo Ot Adek” di eko doko ngatel gi, do likame oudo engere kalamo “Jo Adek” .
- ²²Benaya wot ka Yekoyada dano me Kabusel oudo obedo ngayi kame nyinge iruo; en etimo gikame dongodongo. Eneko awobe ka Ariel me Moab are. I ceng moro da bin eoto di eko neko engu i bur i ceng kame akako ocwei kede.
- ²³Doko da eneko dano me Misiri, icuo acil adikinicel di ecwe di edongo malo mita are. Icuo nono oudo tie kede twon tong i cinge, do Benaya oko mako ebela eko ot yi kede. En eko wariso tong ki cing icuo me Misiri nono di eko lokere neke kede tong mere nono.
- ²⁴Magonogi en gikame Benaya wot ka Yekoyada otimo, eda ngat acel kikom “Jo Ot Adek” .
- ²⁵Eda oudo engere twatwal i diere gi do likame oudo nyinge iruo bala “Jo Adek” . Daudi oko mine ebedo ngadwong me isirikalen adare.
- ²⁶Magi en nying isirikalen koudo ngere twatwal: Asakel omin me Joab; Elikanan wot ka Dodo me Betelem;
- ²⁷Samot me Karod; Keles me Pelet;
- ²⁸Ira wot ka Ikes me Tekoa;
- ²⁹Sibekai me Kusa, Ilai Ngakoki,
- ³⁰Makarai me Netopa, Keled wot ka Bana me Netopa,
- ³¹Itai wot ka Ribai me Gibeai i lobo ka jo Benjamin, Benaya me Piraton,



- ³²Kurai me aditot atie i nget Gas, Abiel me Araba,
³³Asimabet me Bakarum, Eliaba me Salabon,
³⁴Kasem me Gison, Jonasan wot ka Sage me Karar,
³⁵Akiam wot ka Sakar me Karar, Elipal wot ka Ur,
³⁶Keper me Mekera, Akija me Pelon,
³⁷Kesiro me Kamel, Naarai wot ka Esibai,
³⁸Yoweri omin me Natan, Mibikar wot ka Kagiri,
³⁹Selek me Amon, Nakarai me Berot, en ngat koudo mako jamini me yi ka Joab wot ka Seruya,
⁴⁰Ira kede Gareb jo me Yatir,
⁴¹Uria Ngakiti, Sabad wot ka Akelai,
⁴²Adina wot ka Sisaa dano me ekeko ka Ruben (en oudo etie kede ekodet me isirikalen mege amake ot adek),
⁴³Aanan wot ka Maka, Yosapat me Mitan,
⁴⁴Usia me Asitera, Sama kede Yeyel awobe ka Kotam me Aroer,
⁴⁵Yediael wot ka Simiri, kede omin mere Yoka me Tis,
⁴⁶Eliel me Makabit, Yeribai kede Yosabia awobe ka Elinam, kede Itima me Moab,
⁴⁷Eliel, Ebed, kede Yasiel me Soba.

1 Iyutun 12

Jo me Ekeko ka Benjamin Kogeo Lubo Daudi

- ¹Magi en jo kame bin oko ot Sikilag but Daudi, i kare kame en likame oudo ekaruno ot kede karamoro akadi acel pi Iworo Saulo wot ka Kis. Gin en jo ace kikom jo kame oudo tek i yi twatwal kame oko konyo Daudi yi.
- ²Gin oudo kibedo jo me ekeko ka Benjamin, doko Saulo da oudo obedo dano me ekeko nono. Gin oudo kikaruno gweno emal akadi lwomo aporocet me engaro kede cing gi moro ni kenekene, tetu ngodal amoto tetu cam.
- ³⁻⁷Jotel gin bin en Akieser kede Yowasi, awobe ka Sema me Gibeaa. Nying jo kame gin bin kitelo ige: Yesiel kede Pelet, awobe ka Asimabet Beraka kede Yeku, jo me Anatot Isamaya dano me Gibeon, en sirikale kame oudo nyinge iruo twatwal doko en oudo ngatel me isirikalen Ot Adek kame bin tek i yi twatwal, Yeremia, Yakasiel, Yokanan, kede Yosabad me Gedera Elusai, Yerimot, Bealia, Semaria, kede Sepatia me Karip Elikana, Isia, Asarel, Yoeser, kede Yasobeam me diakal ka Kora Yoela kede Sebadia, awobe ka Yerokam me Gedor



Jo kame bin Olubo Daudi ki Ekeko ka Gad

⁸Magi en nying isirikalen me ekeko ka Gad kame oudo ipirana i yi, gin jo kame bin oko donyo but Daudi i kare kame oudo etie kede i wi tim, kakame en oudo eguro iye. Gin oudo ipirana i yi me ibukui kede tongini; oudo kiger bala inguon di kidwir bala atil me wi mori.

⁹⁻¹³Gin oudo kilubere i ruom gi kaman: Eser en oudo ngatel, di Obadia lube, di Eliab, Misimana, Yeremia, Atai, Eliel, Yokanan, Elisabad, Yeremia, kede Makabanai.

¹⁴Cuo me ekeko ka Gad nogi oudo obedo jodongo me isirikalen. Kikom gi, ngat kame oudo telo isirikalen atot twatwal oudo isirikalen mege tie tutumia cel, di ngat kame mege nonok twatwal ko telo isirikalen tol acel.

¹⁵Cuo nogi en kame bin oko ngolo ecilet me Yorodan i duwe me agege, i kare kame ecilet me Yorodan pong kede di eko lamar ooko. Gin bin kiko mino jo kame oudo bedo i aditot i bad tetu kide kede tetu tim me ecilet oko ringo.

Jo me Ikekon ka Benjamin kede Yuda kolubo Daudi

¹⁶Jo mogo me ekeko ka Benjamin kede me ka Yuda bin oko ot but Daudi, kabedo koudo obedo kateko mere.

¹⁷Daudi oko ot riamo kede gi di en eko waco negi be, “Ka wun ibinunu bala jowota pi konya, ango agamo wu kede cuny aber. Do ka wun ibinunu pi duporo ango but jokwor na, bed bala ango likame atimo ne wu rac moro, akwao Rubanga ka joakwari wa nen manono di eko mino wu alola.”

¹⁸Tipo ka Rubanga oko donyo i kom Amasai, ngatel me isirikalen ot adek kame ngeo yi twatwal nogo, di eko waco be, “Okwe Daudi wot ka Yese, wan obedo megil! Mulem bed buti kede but jo kame konyi! Pien Rubanga nin en kame konyi!” Di do Daudi oko gamo gi di eko mino gi kibedo jodongo me isirikalen mege.

Jo kame bin Olubo Daudi ki Ekeko ka Manase

¹⁹Jo mogo kikom isirikalen me ekeko ka Manase oko ngolo but Daudi i kare kame en eoto kede jo Pilistia pi yi kede Abaka Saulo. Do i ateteni en likame bin eko konyo jo Pilistia, pien abakai me Pilistia oudo tie kede lworu be cengemogo eromo ngolo but Saulo ngadwong mere di eko lokere yi kede gin. Manono oko mino gin kidwoke Sikilag.

²⁰Magi en nying isirikalen me ekeko ka Manase kame bin oko ngolo but Daudi i kare kame oudo etie dok kede Sikilag: Adana, Yosabad, Yediael, Emikairi, Yosabad, Eliku, kede Siletai. Gin dedede oudo kibedo jotel me isirikalen tutumian i ekeko ka Manase.

²¹Gin bin kiko konyo Daudi yi kede joyak, pien gin dedede oudo kibedo jo atek i yi, kede kibedo da jotel me isirikalen.

²²Jo bin obedo donyo but Daudi buli ceng, pi konye, tuno en udo twon ekodet me isirikalen kame cal bala ekodet me isirikalen ka Rubanga.



Wel me Isirikalen ka Daudi

23-37 Magi en wel me isirikalen i ikodeta gi, kame bin omako jamini me yi di gin kiko ot donyo but Daudi i Keburon pi konye loko apugan ka Saulo i cinge, di lubere kede kop kame Rubanga owaco: Ekeko ka Yuda: isirikalen tutumia kanyape kede tol kanyauni (6,800), jo kame omako ibukui kede tongini; Ekeko ka Simeon: isirikalen tutumia kanyaare kede tol acel (7,100), gin jo yi atek; Ekeko ka Lebi: isirikalen tutumia ongwon kede tol kanyape (4,600); Jo kame bin lubo Yekoyada ngatel me ot ka Aaron: isirikalen tutumia adek kede tol kanyaare (3,700) Joawade ka Sadoki, ngayi atek kame pwodi dongo adonga: jodongo ot are kiwie are me isirikalen; Ekeko ka Benjamin (ekeko kame Saulo wok kiye): isirikalen tutumia adek (3,000), jo atos kikom jo me ekeko noni oudo oko dong bedo jo kame genere but Saulo; Ekeko ka Epuraimu: isirikalen tutumia ot are kede tol kanyauni (20,800), jo kame oudo tek i yi, doko nying gi oudo iruo twatwal i ekeko noni; Dul me ekeko ka Manase kame bin oko dong i bad tetu tim: isirikalen tutumia tomon kiwie kanyauni (18,000), gin cuo kame koyero pi ot keto Daudi bedo Abaka; Ekeko ka Isakar: jodongo me isirikalen tol are (200), karacel kede isirikalen kame gin oudo kitelo (jodongo nogi bin ngeo gikame jo Isirael poore timo kede kare aber me time); Ekeko ka Sebulun: isirikalen tutumia ot kany (50,000), isirikalen kame cuny gi nwang i yi, di kimako jamini me yi me epone dedede, di kimoko tam acel me konyo Daudi; Ekeko ka Naputali: jodongo me isirikalen tutumia acel (1,000), karacel kede isirikalen tutumia ot adek kiwie kanyaare (37,000) kame gin oudo kitelo, cuo kame oudo mako ibukui kede tongini; Ekeko ka Dan: isirikalen tutumia ot are kiwie kanyauni kede tol kanyape (28,600), koikere pi yi; Ekeko ka Aser: isirikalen tutumia ot ongwon (40,000), kopwonyere kiber doko kiikere pi yi; Jo me ekeko ka Ruben kede me ka Gad, kede dul me ekeko ka Manase kame bin oko wok i loka tetu kide me Yorodan oudo tie isirikalen tutumia tol acel kede ot are (120,000), cuo kame oudo mako jamini me yi me epone dedede.

38 Isirikalen nogi dedede, cuo kame oudo oikere pi yi, bin oko ot Keburon kede tam acel me cibo Daudi bedo abaka me Isirael lung. Jo icegun dedede me Isirael da oudo otieko moko tam acel nono.

39 Gin bin kiko bedo kunono kede Daudi pi ceng adek di kicamo kede kimato gikame jo Isirael wad gi oudo oiko negi.

40 Doko jo kame bin iyapiyapi kede gi, jo me ekeko ka Isakar, Sebulun kede Naputali, oko tero negi cam di kiyeo kede pundan, aguraguran, asigiran, kede twonin. Gin kiko tero cam atos twatwal, alos, anyakini kotuo me epigi kame kolulungo, abungeta me olok kotuo, bwini, kede mo. Gin kikelo da twonin kede romini kame koneko me acama. Manoni kotimo pi nyuto ilel kame jo dedede oudo tie kede i Isirael.

1 Iyutun 13

Kokwanyo Sanduku me Isikan ki Kiriati Yearim

(2 Samuel 6.1-11)



- ¹Abaka Daudi bin oko penyo tam kibut jodongo me isirikalen mege dedede, jodongo kame telo isirikalen tutumia acel tutumia acel kede kame telo isirikalen tol acel tol acel.
- ²Di eko waco ne jo dedede me Isirael kame oudo ocokere be, “Ka wun iyeunu, kede ka manoni obedo mit ka Rwot Rubanga wa, wek ocwaunu jo but jo wa apat dedede kame odong i lobo me Isirael, kiton josaseredoti kede Jolebi i bomban gi kame tie kede kakwat, tetekeny wac ne gida kibin but wa kan.
- ³Di do wan okounu ot kelo Sanduku me Isikan ka Rubanga wa but wa kan, gikame wan oudo likame oparunu pire i kare me apugan ka Saulo.”
- ⁴Jo dedede oko yei kede tam mere nono, pien tam nono oudo yomo cuny gi.
- ⁵ Aso, Daudi oko coko jo dedede me Isirael cako ki ikor me Misiri i bad tetu piny ape tuno Lebo Kamat i bad tetu malo. En ecoko gin dedede karacel pi omo Sanduku me Isikan ka Rubanga ki Kiriath Yearim di kiko tere Yerusalem.
- ⁶ Di Daudi kede jo dedede me Isirael oko ot i bomba me Baala, manono en Kiriath Yearim, kame tie i adul me Yuda, pi omo Sanduku me Isikan ka Rubanga, sanduku kame kolwongo kede nying Rwot kame bedo malo i wi cerubim.
- ⁷Gin kiko kwanyo Sanduku me Isikan ka Rubanga ki ot ka Abinadab di kiko cibe i gadigadi anyen. Usa kede Akio en kame oudo kolo twonin kame wao gadigadi nono.
- ⁸Daudi kede jo dedede me Isirael oudo tie miel kede teko gi lung pi mino wor but Rubanga, di kiwero kede kigoo arigirigin, adungun, bule, suanin abatal, kede di kikuto agwarai.
- ⁹Kakame gin kituno kede i laru me canyo ka Kidon, twonin oko gete, di Usa oko cwano cinge pi mako Sanduku me Isikan kur epoti.
- ¹⁰Manono oko mino cuny Rwot owang i kom Usa di eko neke pi kite kame ecwao kede cinge di eko mulo Sanduku me Isikan. Usa oko to kanono i nyim Rubanga.
- ¹¹Cuny Daudi oko wang pien Rwot oudo oko neko Usa di elilo. Manono oko mino oko donyo lwongo kabedo nono be Peres Usa tuno tin.
- ¹²Cenge nono Daudi oko bedo kede lwooro atek but Rubanga di eko waco be, “Benyo benyo kame ango akaruno doko kede ngat kame gwoko Sanduku me Isikan ka Rubanga?”
- ¹³Aso, Daudi likame oko yei tero Sanduku me Isikan ka Rwot i bomba mere, pi en koto gwoke i kuno; do en eko lokere tere i ot ka Obed Edom dano me bomba me Gat.
- ¹⁴ Sanduku nono oko bedo kunono pi dwete adek; di Rwot oko mino jo me ot ka Obed Edom winyo karacel kede jamini mege dedede.

1 Iyutun 14

Tice kame Daudi Otimo i Yerusalem

(2 Samuel 5.11-16)



¹Abaka Kiram me Taya bin oko cwano jo but Daudi; en ecwao gi kitero ne yen seda kede jogedo pi ot gero ne abaka ot.

²Di do Daudi oko niang be Rwot oudo otieko kete bedo abaka me Isirael, doko da be Rwot en kame oudo omio ajakanut mere odongo twatwal pi jo mege me Isirael.

³Daudi bin oko nyomo mon ace i Yerusalem, di eko nywalo idwe ace awobe kede anyira.

⁴Nying idwe kame bin en enywalo di oudo etie Yerusalem ige: Samua, Sobab, Natan, Sulumani,

⁵Ibar, Elisua, Elepelet,

⁶Noga, Nepeg, Yapia,

⁷Elisama, Beliada, kede Elipelet.

Kobwono Jo Pilistia

(2 Samuel 5.17-25)

⁸Kakame jo Pilistia oko winyo kede be oudo kowiro Daudi pi bedo abaka me Isirael dedede, isirikalen me Pilistia dedede oko ot mono Daudi pi make; do Daudi oko winyo di en eko ot yi kede gi.

⁹Isirikalen me Pilistia oudo obino di kiko timo yak i aditot me Repaim.

¹⁰Daudi oko penyo Rubanga be, “Benyo, aot di ako suro jo Pilistia? Ibino mino gi i cinga?” Rwot oko waco ne Daudi be, “Oti, di ango ako bino mino gi i cingi.”

¹¹Aso, Daudi oko ot Baal Perasim, di eko bwono gi ki kuno. En ewaco be, “Rwot otieko tic keda pi nyano diere me jokwor na bala alele kame dipere.” Pi mano, oko do lwongo kabedo nono be Baal Perasim. ¹²Jo Pilistia oko ringo kiweko rubangan gi kunono, di Daudi oko mino cik di oko wango gi.

¹³Jo Pilistia bobo oko dok yak i aditot me Repaim.

¹⁴Daudi bobo oko penyo Rubanga di Rubanga oko waco ne be, “Kur iot suro gi i nyim gi; do manaro cen ngei gi, di iko suro gi ki kuno, tetu nget yen kame kolwongo be balsam.

¹⁵Ka iwinyunu tien jo aoto mor di winyere i wi yen balsam, otunu do yi, pien udo ango atieko telo ne wu yongayo me bwono isirikalen me Pilistia.”

¹⁶Daudi bin oko timo bala kame Rwot oudo ociko ne; di eko bwono isirikalen me Pilistia cako ki Gibeon tuno Geser.

¹⁷Iruo me nying Daudi oko sarakin i lobere dedede, di Rwot oko mino atekerin dedede obedo kede lwooro bute.

1 Iyutun 15

likere pi Kobo Sanduku me Isikan



- ¹Daudi bin oko gero ude mege amake i Bomba ka Daudi, di eko iiko kabedo ne Sanduku me Isikan ka Rubanga, eko gero ne eema.
- ²Di Daudi oko mino cik be Jolebi kenekene en kame poore yeno Sanduku me Isikan ka Rubanga, pien gin en kame Rwot oudo otieko yero gi pi yene, kede pi timo ne en tic nakanaka.
- ³Daudi oko koko jo me Isirael dedede Yerusalem pi tero Sanduku me Isikan ka Rwot kabedo mere kame oudo koiko ne.
- ⁴Di do En eko koko karacel ikwae ka Aaron kede Jolebi.
- ⁵Ki ekeko ka Kokat, Uriel otelo jo tol are kede ot are (220);
- ⁶ki ekeko ka Merari, Asaya otelo jo tol are kede ot are (120);
- ⁷ki ekeko ka Gereson, Yoweri otelo jo tol acel kede ot adek (130);
- ⁸ki ekeko ka Elisapan, Semaya otelo jo tol are (200);
- ⁹ki ekeko ka Keburon, Eliel otelo jo ot kanyauni (80);
- ¹⁰kede ki ekeko ka Usiel, Aminadab oko telo jo tol acel kede tomon kiwie are (112).
- ¹¹Daudi oko lwongo josaseredoti Sadoki kede Abiata, karacel kede Jolebi Uriel, Asaya, Yoweri, Semaya, Eliel, kede Aminadab.
- ¹²En eko waco negi be, “Wun en jotel me diakale me Jolebi; poore ilonyerenu, wun kede Jolebi wadu, tetekeny itwerunu tero Sanduku me Isikan ka Rwot Rubanga me Isirael, i kabedo kame ango atieko iiko pire.
- ¹³Pien i kare me agege kame wan otamo keke kede Yerusalem, Rwot Rubanga wa bin cunye oko wang i kom wa, pien wun oudo ibedunu li pi koto tinge bala kame oudo mitere.”
- ¹⁴Di do josaseredoti kede Jolebi oko lonyere tetekeny kiter Sanduku me Isikan ka Rwot Rubanga me Isirael kabedo mere.
- ¹⁵Jolebi oko diedielo Sanduku me Isikan ka Rubanga kede atekai kame kiriongo i epepet, bala kame bin Rwot ociko kede kibus Musa.
- ¹⁶Daudi oko ciko jotel me Jolebi pi poko ne Jolebi wad gi tic me wer kede me gono jamini apapat me agoa, tetekeny gin kigoi were mogo amit me yomcuny kede adungu, arigirigi kede suanin abatal.
- ¹⁷⁻²¹Cuo kame gin kiko yero pi gono suanin abatal gin en, Keman wot ka Yoweri, Asap wot ka Berekia, en wad gi, kede Etan wot ka Kusaya, dano me ekeko ka Merari. Kiko yero da Jolebi ace pi konyo gi, jo kame goo adungun atino, gin bin en: Sakaria, Yasiel, Semiramot, Yekiel, Uni, Eliab, Maseya, kede Benaya. Jo kame bin gin kiko yero pi gono adungun adongo gin en: Matitia, Elipeleku, Mikeneya, Asasia, kede jodar erute me tempulo Obed Edom kede Yeyel.



²²Bin oko yero Kenania pi bedo ngatel me wer me Jolebi, piento en oudo etie kede diru me wer.

²³Berekia kede Elikana bin oko mino tic me daro erute kame donyo kabedo kame oudo koketo iye Sanduku me Isikan ka Rubanga.

²⁴Josaseredoti Sebania, Yosapat, Netanel, Amasai, Sakaria, Benaya, kede Elieser, bin oko mino gi tic me kuto agwara i nyim Sanduku me Isikan ka Rubanga. Obed Edom kede Yekia da bin komio tic me daro erute kame donyo kabedo kame oudo koketo iye Sanduku me Isikan.

Kotero Sanduku me Isikan Yerusalem

(2 Samuel 6.12-22)

²⁵Aso, Daudi kede jotel me Isirael, kede jodongo me isirikalen oko ot omo Sanduku me Isikan ka Rwot ki ot ka Obed Edom di kitie kede ilel adwong.

²⁶Rubanga oko konyo Jolebi kame bin oko yeno Sanduku me Isikan mere, pi mano, gin kiko mino giayala angola me twonin kanyaare kede romini kanyaare.

²⁷Daudi oudo ongapo ekanso aber di epwot, doko Jolebi kame oudo tie diedielo Sanduku me Isikan da oudo ongapere kamanono, kiton jower, kede Kenania ngatel gi da. Daudi oudo ongapo da epod kame kotimo kede egoe apwot di emeny.

²⁸Aso, jo Isirael dedede oko tero Sanduku me Isikan ka Rwot Yerusalem di kilelemo kede kilel, di kikuto esos me tung leini, agwarai, kede kigoo suanin abatal, kede adungun kede arigirigin kede dwan amalo.

²⁹Di oudo kotie donyo kede Sanduku me isikan ka Rwot i Bomba ka Daudi, Mikal nyar ka Saulo oko ngoloro ooko ki dirisa, di eko neno Daudi tie miel di esosomo pi kilel, di en eko bedo kede acae i kome i cunye.

1 Iyutun 16

¹Gin kiko tero Sanduku me Isikan ka Rwot di kiko kete i yi eema kame Daudi oudo ogero ne; di gin kiko mino Rubanga giayala awanga kede giayala me nywak.

²Kakame Daudi otieko kede mino giayala awanga kede giayala me nywak, en eko lamo ne jo winyo i nying Rwot,

³di en eko poko ne gin dedede cam. En epoko cam ne jo dedede me Isirael, cuo kede mon di rorom, di emio ngat acelacel mugati acel, angol me ringo, kede olok kotuo.

⁴Daudi oko yero Jolebi mogo pi timo tic i nyim Sanduku me Isikan ka Rwot, pi ngangao, kede pi mino pwoc kede pak but Rwot Rubanga me Isirael.

⁵Asap en oudo ngatel me jower, di Sakaria lubo tiene. Yeyel, Semiramot, Yekiel, Matitia, Eliab, Benaya, Obed Edom, kede Yeyel en kame oudo komio gono adungun kede arigirigin. Asap en kame oudo omio gono suanin abatal,

⁶kede josaseredoti Benaya kede Yakasiel en kame oudo komio tic me kuto agwara kare i kare i nyim Sanduku me Isikan ka Rubanga.



⁷Cenge nono en me agege me Daudi waco ne Asap kede joawade mege pi gin wero were me pak but Rwot.

Wer me Pak

(Sabuli 105.1-15; 96.1-13; 106.1, 47-48)

⁸Okwe, miunu pwoc but Rwot, lwongunu nyinge, miunu tice mege ngere but atekerin.

⁹Werunu ne were, werunu ne were me pak; tatamunu tice mege me aura.

¹⁰Lelunu pi nyinge kacil; jo kame mo Rwot poore kileli.

¹¹Mounu Rwot karacel kede teko mere; mounu wange nakanaka.

¹²Yutununu gi me aura kame en etieko timo, gi me isuur mege, kede kop kame etieko ngolo,

¹³Okwe wun ikwae ka Isirael ngatic mere, idwe ka Yakobo, jo kame en eyero.

¹⁴En Rwot Rubanga wa; en engolo kop i wi lobo lung.

¹⁵Bedunu yutuno isikan mere nakanaka, kop kame en eciko but lwak me kare lung,

¹⁶ en isikan kame bin en etimo kede Aburaam, kede cikere mere kame ekwongere kede but Isaka.

¹⁷ En bin emoko isikan noni but Yakobo bala cik, kede but jo me Isirael bala isikan kame bedo nakanaka.

¹⁸En ewaco be, “Ango abino mino wu lobo me Kanan pi bedo iner kame mako wu.”

¹⁹Kakame gin oudo kinonok kede, gin jo anak anoka kame tie bala jokumbor i lobo nono,

²⁰jo kame oudo obedo rimo piny arima yai ki piny acel tuno i piny ace, yai ki ajakanut acel tuno but ateker apat,

²¹ Rubanga likame oko yei ne ngatamoro tero gi kirac; en ebunano abakai pirgi.

²²Ewaco be, “Kur imulunu jo na kame ayero, kur itimunu gimoro arac ne inabin na.”

²³Werunu but Rwot, wun jo dedede me wi lobo! Tatamunu ceng dedede be en elako wa.

²⁴Tatamunu kop me deyo mere but atekerin, kede tice mege me aura but jo dedede!

²⁵Pien Rwot dwong, doko miero pake twatwal; en kame miero mie wor kalamo rubangan dedede.

²⁶Pien rubangan dedede me atekerin apat obedo caljwogi; do Rwot en ocweo malo.

²⁷Wor kede dwongo bed bute; teko kede kilel tie i kabedo mere.

²⁸Okwe wun jo dedede me wi lobo pakunu Rwot, pakunu deyo kede teko ka Rwot.



- ²⁹Miunu Rwot deyo kame poore kede nyinge; kelunu ne giayala, di ikounu ot i nyime. Worunu Rwot di ingapunu engape kacil;
- ³⁰bedunu kede mielkom i nyime, wun jo me lobo lung! Kotieko keto lobo kakare, likame tie gikame karuno yayango en.
- ³¹Bed kede yomcuny in malo, doko ida lobo leli; Wacunu ne atekerin be, “Rwot en abaka!”
- ³²Miero nam mori, kiton gi dedede kame tie iye; wek poti da leli, kiton gi dedede kame tie i yi gi.
- ³³Di do yen dedede ko bino wer pi kilel i nyim Rwot, piento en etie bino ngolo kop ne lobo.
- ³⁴Okwe miunu Rwot pwoc piento en eber; pien amara mere kalikame lokere bedo nakanaka.
- ³⁵Wacenu be “Lak wa, Okwe Rubanga Ngalak wa; cok wa, di iko lako wa ki diere me atekerin apat, me wek opwoi di oko pako nyingi kacil kede kilel.”
- ³⁶Pak bed but Rwot Rubanga me Isirael, ikar kede ikar! Di jo dedede oko waco be, “Amen”, di gin kiko pako Rwot.

Woro Rubanga i Yerusalem kede i Gibeon

- ³⁷Daudi bin oko weko Asap kede joawade mege kunono i nyim Sanduku me Isikan ka Rwot pi gin bedo timo tic kame mitere buli ceng.
- ³⁸Obed Edom wot ka Yedutun kede cuo ot kanyape kiwie kanyauni me ekeko kame en eyai kiye en kame oudo konyo gi. Kosa kede Obed Edom en koudo daro irutei.
- ³⁹Daudi oko yero da ngasaseredoti Sadoki kede joawade mege kame oudo obedo da josaseredoti, pi gin timo tic i eema me woro Rwot kame bin tie Gibeon.
- ⁴⁰Buli odiko kede otieno gin oudo miero kiwang ne Rwot giayala i wi alutari di lubere kede gikame oudo kowandiko i Iswil kame bin Rwot omio jo Isirael.
- ⁴¹Keman kede Yedutun oudo tie kede gi, kede jo ace da kame oudo koyero pi mino pwoc but Rwot, pien amara mere kalikame lokere bedo nakanaka.
- ⁴²Keman kede Yedutun en kame oudo komio i cing gi tic me kuto agwarai kede gono suanin abatal me wer, kede jamini ace me wero were kacil. Awobe ka Yedutun bin komio tic me daro irutei.
- ⁴³Di do jo dedede oko yai kioto i miere gi, di Daudi da oko ot ture pi mino winyo but jo me ode.

1 Iyutun 17

Kop kame Natan Owaco ne Daudi

(2 Samuel 7.1-17)



¹Di bin Abaka Daudi oduonyo bedo i paco mere me abaka, en eko waco ne enabi Natan be, “Neningo, nataman ango atie bedo i ot kame kogero kede yen seda, do Sanduku me Isikan ka Rwot tie bedo i eema!”

²Natan oko waco ne abaka be, “In tim gikame tie i cunyi; pien Rwot tie kedi.”

³Do iwor nono Rwot oko waco ne Natan be,

⁴” Ot di iko waco ne ngatic na Daudi be ango awaco be, ‘In en kalikame iyaro gero nango ot kame ango abino bedo iye.

⁵Pien ango pwodi likame abedo i ot cako i kare kame alako kede jo me Isirael ki Misiri tuno tin, do abedo kokobo di abedo i eema.

⁶I kadedere dedede kame ango abedo ot iye kede jo me Isirael, likame tie ceng moro acel kame ango atieko penyoo kede jotel kame ango bin aciko pi gwoko jo na me Isirael be pinyo komio gin likame kiko gero na ot kede ebaoo me seda.’

⁷” Aso, nataman in ibino waco ne ngatic na Daudi be Rwot me jo yi owaco be, ‘Ango en kame bin akwanyoo ki kakwat, ki kuo me lubo romini di ako keti bedo ngatel ka jo na me Isirael.

⁸Ango abedo tie kedi i kadedere dedede kame in oudo ioto iye, di ako muducaro jokwor ni dedede i nyimi. Ango abino mino nyingi bedo iruo, bala nying jo kame pirgi tek ki wi lobo.

⁹Ango abino yero kabedo ne jo na me Isirael di ako cibo gi iye, tetekeny kibed kabedo kame mako gi, di likame bobo tie ngatamoro kame lolo gi iye. Jo areco likame bobo bino olo gi, bala bin i kare kasek.

¹⁰Cako i kare kame ango bin aketo kede jongolkop pi telo jo na me Isirael, jo areco oko bedo suro gi, do nataman ango abino bwono jokwor ni dedede, doko da abino mini ikwae.

¹¹Ka kare me kuo nin otiek di oko yiki i nget joakwari ni, ango abino keto atin ni acel kame in inywalo, di en eko lunyo wangi bala abaka, di ango ako bino mino ajakanut mere cungo di tek.

¹²En ebino gero nango ot, di ango ako bino mino ajakanut mere bedo nakanaka.

¹³Ango abino bedo papa mere, di en eko bino bedo woda. Do likame abino kwanyoo amara na kalikame lokere kibute, bala kame bin akwanyoo kede kibut Saulo, ngat kame bin ango akwanyoo tenge tetekeny in idok abaka.

¹⁴Ango abino mine ebledo ngapug me jo na kede me ajakanut na nakanaka, doko apugan mere bino bedo ikar kede ikar.’ “

¹⁵Natan oko waco ne Daudi kope nogi dedede bala kame oudo Rubanga onyuto ne kede.

Ilega ka Daudi me Pwoc

(2 Samuel 7.18-29)



¹⁶Di do Abaka Daudi oko donyo i yi eema di eko bedo i nyim Rwot, eko lego be, “Okwe Rwot Rubanga, ango en ngai, doko jo me ekeko na da obedo alu kibuti, en komio in imia akodi kuo kame nataman atie iye noni?”

¹⁷Aso do di i wangin manoni oudo obedo gi katitidi, Okwe Rwot. Medo i wi manono, in itieko da cikere i kom kop amako ekeko me ngatic ni i kare me anyim. In itera bala dano me ruom amalo, Okwe Rwot Rubanga!

¹⁸Nyo bobo kame ango akaruno waco ni pi wor kame in imia ango ngatic ni? Pien in ingea ango ngatic ni kiber, Okwe Rwot Rubanga!

¹⁹Pir ango ngatic ni, Okwe Rwot, kede pi mit me cunyi, in itieko timo jamini apirgi tek nogi, di iko nyuto ne ngatic nin jamini adongodongo nogi dedede.

²⁰Okwe Rwot Rubanga, likame tie ngatamoro kame cal bala in, doko likame tie Rubanga ace kwanyo in, bala kame wan otieko winyo kede yit wa.

²¹Ateker mene en kame cal bala jo ni me Isirael? Benyo, tie ateker moro ace i wi lobo kame in Rubanga iko ot lako pi bedo jo ni? In bin imio nyingi oko bedo iruo pi jamini adongodongo kede me aura, kame in bin itimo ne jo ni di iriamo tenge atekerin ki nyim jo ni kame ilako ki Misiri.

²²In itieko mino jo ni me Isirael odoko meggi atwal; doko in Rwot itieko doko Rubanga gin.

²³” Nataman do, Okwe Rwot Rubanga, in mok atwal kop kame in iwaco i kom ango ngatic ni, kede i kom jo me ekeko na; tim gikame in icikere iye.

²⁴Manono bino mino jo pako nyingi nakanaka di kiwaco be, ‘Rwot me jo yi en Rubanga kame pugo Isirael’ ; di jo me ekeko nango ngatic ni ko bino bedo pug nakanaka.

²⁵Pien in, Okwe Rubanga na, imio ango ngatic ni angeo be ibino mino ikwae na bedo abakai; manoni en komio ango ngatic ni audo nwangcuny me lego buti kamanoni.

²⁶Aso, nataman Okwe Rwot, in ibedo Rubanga, doko in itieko cikere pi timo nango ngatic ni gikame ber noni;

²⁷pi mano, ango akwai imi winyo but jo me ekeko na, tetekeny ajakanut gi meede i nyimi nakanaka. Pien in, Okwe Rwot, itieko mino gin winyo, doko winyo kame in imio, bino bedo i kom gin nakanaka.”

1 Iyutun 18

Yi kame Daudi Obwono

(2 Samuel 8.1-18)

¹Kikano di do kare oudo okakato, Daudi bin oko suro jo Pilistia eko bwono gi. En emao gin bomba me Gat kede calere mege.

²En eko bobo da bwono jo Moab, di eko mino jo Moab kame oko dong oko doko jo kame tie i loc mere di kiko donyo culo esolo bute.



- ³Daudi bobo oko yi di eko bwono Abaka Kadadese me Soba, i nget adul me Kamat di oudo Kadadese tie ot pi dwoko adul me tetu malo me ecilet me Eupurate i loc mere.
- ⁴Daudi bin oko mako cabalan me yi ka Kadadese tutumia acel (1,000), isirikalen tutumia kanyaare (7,000) kame oudo ringo kede asigiran, kede isirikalen tutumia ot are (20,000) koudo oto kede tien. Daudi oko tongotongo tien asigiran nogo dedede di eko weko asigiran tol acel kenekene en kodong.
- ⁵Kakame bin jo Siria kame oudo bedo i piny me Damasiko oko bino kede pi konyo Abaka Kadadese me Soba, Daudi oko neko jo tutumia ot are kiwie are (22,000) kikom gi.
- ⁶Di do en eko keto isirikalen Damasiko kunono, di jo Siria kame bin bedo Damasiko oko doko jo kame bin Daudi pugo, doko kiko donyo culo esolo bute. Rwot bin oko mino Daudi obwono jo dedede kame en oudo eko yi kede gi.
- ⁷Daudi bin oko mano ibukui kame kotimo kede saabu kame oudo jotic ka Kadadese mako, di eko tero gi Yerusalem.
- ⁸En eko bobo da mano nyonyo buronsi atot twatwal ki Tibat kede Kun, bomban ka Kadadese. Nyonyo buronsi nogo en kame bin Sulumani oko timo kede epipa adwong me pii, ipirin kede jamini me timo tic me tempulo.
- ⁹Kakame bin Abaka Toi me Kamat oko winyo kede be Daudi oudo otieko bwono isirikalen ka Kadadese dedede,
- ¹⁰en eko cwano wode Yoram but abaka Daudi pi mote kede pwone piento Daudi oudo oyi kede Kadadese di eko bwone. Toi oudo obedo yi kede Kadadese tien atot. Yoram bin oko tero ne Daudi giamia me jamini kame kocweo kede siliba, saabu kede buronsi.
- ¹¹Abaka Daudi oko mino jamini nogo dedede but Rwot, karacel kede siliba kede saabu kame oudo emao kibus atekerin kame bin en eko bwono, gin en jo Edom, jo Moab, jo Amon, jo Pilistia, kede jo Amalek.
- ¹²Abisai wot ka dako kame nyinge Seruya, bin oko bwono jo Edom i Aditot me Munyo di eko neko jo me Edom tutumia tomon kiwie kanyauni (18,000).
- ¹³En eko keto isirikalen kabedere dedede i Edom, di jo me Edom lung oko doko jo kame Daudi oudo pugo. Rwot bin oko mino Daudi obwono jo dedede kame en oudo eyi kede gi.
- ¹⁴Daudi bin oko pugo Isirael lung di engolo kop i ateni doko di etero jo mege dedede kiber.
- ¹⁵Joab kame nying toto mere oudo Seruya en kame oudo obedo ngatel me isirikalen; Yekosapat wot ka Akilud en kame bin wandiko kope dedede kame timere;
- ¹⁶Sadoki wot ka Akitub kede Akimelek wot ka Abiata en koudo obedo josaseredoti; Seraya en oudo obedo kalani;



¹⁷Benaya wot ka Yekoyada en kame oudo obedo ngatel me isirikalen kame bin gwoko Daudi; doko awobe ka Daudi en oudo obedo jodongo me tic mere.

1 Iyutun 19

Daudi Obwono Jo Amon kede Jo Siria

(2 Samuel 10.1-19)

¹kikano di do oudo kare okakato, Abaka Nakas me jo Amon oko to, di wode Kanun oko lunyo wange bala abaka.

²Abaka Daudi oko waco be, “Abino bedo kede genere but Kanun wot ka Nakas, bala kame bin papa mere ogena kede.” Aso, Daudi bin oko ooro jo bute pi kweno cunye pi to ka papa mere. Kakame jo kame bin Daudi ooro oko tuno kede i lobo me jo Amon di kiko donyo but Abaka Kanun,

³jotel me jo Amon oko waco ne Kanun be, “Ateteni in iparo be Daudi tie mino papa ni wor be piento en etieko oro jo pi kelo ni kope me kweicuny? Daudi otieko oro jo buti pi gin bino ngingico lobo tetekeny en ebin emai.”

⁴Manono oko mino Kanun oko mako jo kame oudo Daudi ooro, di eko lielo yer me tik ngat acelacel, eko ngongolo pier igoen kame oudo kingapo di eko riamo gi tenge;

⁵di gin kiko yai kioto. Kakame Daudi oko winyo kede kop noni, en eko cwano negi kop, pien cuo nogo oudo lewic omako twatwal. Abaka owaco negi be, “Kong dongunu Jeriko tuno di yer me tiku otieko dongo, en amio ikounu do dwogo.”

⁶Kakame jo Amon oko neno kede be oudo kitieko doko jokwor ka Daudi, gin kiko kwanyo kilo tutumia ot adek kiwie ongwon (34,000) me siliba di kiko cwano Mesopotamia, kede i adul me Maka kede Soba, pi pango cabalan kede jo kame ringo kede gi.

⁷Gin kiko pango cabalan tutumia ot adek kiwie are (32,000), di abaka me Maka oko bino kede isirikalen mege di kiko gero kimere gi Medeba. Jo Amon da oko wok ki bomban gi di kiko bino pi yi.

⁸Kakame Daudi oko winyo kede kop noni, en eko cwano Joab kede isirikalen dedede pi ot yi kede gi.

⁹Jo Amon di oko donyo oko me bomba di kiko teere i erute me bomba pi yi, di abakai kame oudo obino pi konyo yi tie ken gi kiteere i ebar.

¹⁰Kakame Joab oneno kede be jokwor oudo tie i nyime kede i ngee, en eko yero isirikalen mogo atek yi kikom isirikalen me Isirael, di eko keto gi kiteere pi yi kede jo me Siria;

¹¹isirikalen odong mege en eko mino omin mere Abisai telo gi, di Abisai oko mino gi kiteere pi yi kede jo Amon.

¹²En ewaco ne be, “Ka ineno be jo Siria tie bwona, bia ikonya; do ka jo Amon teko gi tie mito bwoni, ango abino ringini konyi.



¹³Bed tek, doko mito obed kede nwangcuny pir jo wa, kede pir bomban ka Rubanga wa. Ango akwao Rwot pi timo gikame en eneno be ber ne.”

¹⁴Di Joab kede jo mege oko ot pi cako yi kede jo me Siria, di jo me Siria oko ringo tenge.

¹⁵Kakame jo Amon oneno kede be jo Siria oringo, gida kiko ringo ki nyim Abisai di kiko dok i bomba. Di do Joab oko dok cen Yerusalem.

¹⁶Do kakame jo Siria oko neno kede be jo me Isirael oudo obwono gi, gin kiko cwano jo oko ot omo isirikalen gi kame oudo tie loka tetuca me ecilet me Eupurate. Gin kiko bino di Sopak ngatel me Isirikalen ka Kadadese en kame telo gi.

¹⁷Kakame Daudi oko winyo kede kop nono, en eko coko isirikalen dedede me Isirael karacel, di kiko ngolo ecilet me Yorodan, di eko teero gi nyim gi oneno jo me Siria. Jo me Siria oko yi kede gi.

¹⁸Jo me Siria oko ringo tenge ki nyim jo me Isirael. Di Daudi oko neko jo Siria tutumia kanyaare (7,000) kame bin ringo kede cabalan, kede jo tutumia ot ongwon (40,000) kame bin oto kede tien, doko kiko neko Sobak ngat koudo obedo ngatel me isirikalen me Siria.

¹⁹Kakame abakai kame bin tio ne Kadadese oko do neno kede be jo me Isirael oudo otieko bwono gi, gin do kiko kwano Daudi pi weko gin kibed kede mulem; di do gin kiko doko jo kame en epugo. Di do jo me Siria oko dagi konyo jo Amon atwal.

1 Iyutun 20

Daudi Omao Raba

(2 Samuel 12.26-31)

¹Ingei kare me ngico, en kare kame abakai maro ot kede i yi, Joab bin oko telo isirikalen di kiko ot suro piny me Amon. Do Abaka Daudi oudo odong Yerusalem. Gin kiko luko bomba me Raba, kiko sure, di kiko mane.

²Daudi oko kwanyo ocoro me ajakanut kame kotimo kede saabu ki wi Milikom, en rubanga me jo Amon; peko me ocoro nono oudo romo kilo ot adek kiwie ongwon, doko oudo kide me wel tie iye; en eko kwanyo kide me wel nogo di eko keto i ocoro mere me ajakanut. Daudi bobo da oko tero jamini atot twatwal kame koyako ki bomba nono.

³Eko tero jo me bomba nono di eko mino gi tic kede musumeno, isululun kede lee, doko da kiko donyo timo tic me timo matapalin. En bin eko timo kamanono ne bomban dedede me jo Amon. Di do Daudi kede jo dedede oko dok Yerusalem.

Yi kede Itucio me Pilistia

(2 Samuel 21.15-22)

⁴cen mere yi bobo oko poto i dierediere me jo me Pilistia kede jo me Isirael i Geser. Manoni bin otimere kakame Sibekai dano me Kusa oneko kede Sapai akwar me itucio me jo, di oko bwono jo Pilistia.



⁵ Yi ace bobo oko poto kede jo me Pilistia, di Elikanan wot ka Yair oko neko Lakami omin me Goliat dano me Gat. Tir me tong mere oudo dwong bala yat kame jo kudo me kuno ausin me egoe.

⁶ Yi ace bobo oko poto Gat, kame oudo tie iye dano adwong dwong me aura, kame cinge acelacel oudo tie kede anyira lwete kanyape, kede tiene acelacel da oudo tie kede anyira lwete me tiene kanyape; eda oudo ebedo akwar me itucio.

⁷ Lonono oko donyo nywaro jo me Isirael, di Jonasan, wot ka omin me Daudi kame nyinge Simea, oko neke.

⁸ Jo adek nogi oudo obedo anywali me itucio me jo me Gat; Daudi kede jo mege oko neneko gin dedede.

1 Iyutun 21

Daudi Omaro Wel me Jo

(2 Samuel 24.1-25)

¹ Sitani bin oko mito kelo can i kom jo Isirael, di en eko supo Daudi be emar wel me jo Isirael.

² Aso, Daudi oko waco ne Joab kede jodongo apat me isirikalen kame oudo tie kede be, “Otunu imarunu wel me jo dedede me Isirael, cako ki Beereseba tuno Dan, di ikounu dwoko na kop, tetekeny ango abin angei wel me jo atie.”

³ Do Joab oko waco be, “Ango akwao Rwot emi wel me jo mege me Isirael meede tien tol acel kalamo rom gi nan. Adwong, gin dedede kibedo jotic ni. Pinyo komio in itie mito maro jo di iko mino ateker lung bedo kede raco me dub?”

⁴ Do abaka oko dino Joab timo gikame en emitto. Aso Joab oko yai di eko ot maro wel me jo me Isirael dedede, di eko dok Yerusalem.

⁵ Joab oko ot waco ne Daudi wel me jo kame en emaro. I lobo me Isirael oudo tie iye cuo milion acel kede tutumia tol acel (1,100,000) kame twero yi, do i Yuda oudo tie iye cuo tutumia tol ongwon kede ot kanyaare (470,000) kame twero yi.

⁶ Do Joab bin likame oko maro wel me Jolebi kede jo me ekeko ka Benjamin, pien cunye oudo dagi cik kame abaka omie nono.

⁷ Do gikame oudo otimo nono likame oko yomo cuny Rubanga, omio en eko mino jo Isirael alola.

⁸ Daudi oko waco ne Rubanga be, “Ango atieko timo dub adwong twatwal pi timo gi noni! Do nan ango akwai, sasiro ango, pien atimo tim me mingo.”

⁹ Rwot oko waco ne Gad, en enabi ka Daudi be,

¹⁰” Oti iwace Daudi be ango atie mine kope adek me ayera. En eyer kop acel di ango ako bino timo ne gi nono.”



- 11**Gad oko ot but Daudi di oko waco ne gikame Rwot owaco; Gad oko waco ne be, “Yer kop acel kikom magi:
- 12**Mwakini adek me kec, arabo dwete adek me ringo tenge kibus jokwor ni, amoto ceng adek me Rwot suri kede epima mere i yore me kelo aumpuli i lobo kame in ipugo, di etio kede malaika mere pi kelo to i lobo me Isirael. Nan in kong par kope go di iko mina kop kame abino dwoko ne ngat kooru.”
- 13**Daudi oko waco ne Gad be, “Ango nan atie i lieto! Do likame amito be dano en kame mia alola, do poore Rwot en kame mia alola, piento en etie kede cuny me kisa.”
- 14**Aso Rwot oko cwano aumpuli i lobo me Isirael, di jo tutumia ot kanyaare (70,000) oko to.
- 15**Di Rubanga oko cwano malaika pi ot muducaro Yerusalem, do kakame malaika oudo mito cako timo kede nek i Yerusalem, Rwot oko loko tam mere i kom can kame oudo emito timo, di eko waco ne malaika me nek nono be, “Mano do romo; wek do.” Malaika oudo do tie cungo i nget laru me canyo ka Arauna Ngajebus.
- 16**Daudi oko ngoloro malo di eko neno malaika ka Rwot tie cungo malo i yamo, di emako epima i cinge, etieko iikere me timo nek Yerusalem. Di do Daudi kede jotel me jo, gin dedede di kingapo ipukoi, oko riebere piny.
- 17**Daudi oko lego be, “Okwe Rubanga, ango en kame adubo, pien ango en kame amio cik me maro jo; do jogo kame cal bala romini na kame ango akwao, nyo kame gin kitimo? Ango akwao in Rwot Rubanga na, be ango en kame ipoore mina alola kede jo me oda, do wek jo ni kur iket can i kom gi.”
- 18**Malaika ka Rwot oko ciko Gad pi waco ne Daudi be poore eot di eko gero ne Rwot alutari i diakal me canyo ka Arauna Ngajebus.
- 19**Daudi oko yei winyo dwan Rwot di eko ot timo bala kame Gad oudo owaco ne kede.
- 20**Esawa nono Arauna kede awobe mege ongwon oudo tie canyo engano. Kakame gin kiko neno kede malaika, awobe oko ringo di kiko pwono, do Arauna oko gire meede kede canyo engano.
- 21**Kakame Arauna oneno kede Abaka Daudi di etie ot bute, en eko yai ki laru me canyo di eko ot riebere piny i nyime.
- 22**Daudi oko waco ne Arauna be, “Cat na laru ni me canyo, tetekeny ager iye alutari ne Rwot, tetekeny aumpuli jiki. Ango abino culi wel kame in ingolo dedede.”
- 23**Arauna oko waco ne Daudi be, “Adwong na, in tere di iko timo gikame cunyi mito. Twonin da ige me giayala awanga, doko ikongio me canyo da ige me moko mac, kede engano me giayala me alos. Ango amio gin dedede buti.”
- 24**Do abaka oko waco ne Arauna be, “Likame kamano, do ango abino wilo gi kibuti awila i wel kame in ingolo; ango likame abino mino but Rwot gikame obedo meri, akadi mino giayala awanga kalikame aculo iye gimoro.”



²⁵Aso Daudi oko culo Arauna sente akaya tol kanyape (600) me saabu pi laru me canyo nono.

²⁶Daudi oko gero ne Rwot alutari kuno, di eko mino giayala awanga kede giayala me nywak. En eko lego di Rwot oko gamo kwac mere di eko cwano mac wango giayala kame oudo tie i wi alutari.

²⁷Rwot oko ciko malaika pi dwoko epima mere i ekularu mere, di malaika oko timo kamanono.

²⁸Manoni oko mino Daudi ongego be Rwot ogamo ilega mere, di en eko mino giayala angola i wi alutari atie i laru me canyo ka Arauna.

²⁹Eema me ariamakin kede Rwot kame Musa bin otimo i wi tim, kede alutari kame oudo owango giayala angola i wie, i kare nono oudo pwodi tie Gibeon;

³⁰do Daudi oudo likame karuno ot woro Rubanga kunono, pien oudo elworo epima ka malaika ka Rwot.

1 Iyutun 22

¹Di Daudi oko waco be, “Tempulo ka Rwot bino bedo kanoni, doko alutari noni en kame jo Isirael bino mino iye giayala awanga.”

likere me Gero Tempulo

²Abaka Daudi oko mino cik me coko karacel jokumbor dedede kame oudo tie bedo i lobo me Isirael, di en eko mino gi tic. Jo ace kikom gi en emio gi tic me pano kide me gero tempulo.

³Daudi oko da mino nyonyo ayon atos me timo sumalin kede ipatai me ikekon me irutei, kede eko mino twon nyonyo buronsi kalikame kokaruno pimo peko mere.

⁴En eko mino da jo me Taya kede Sidon okelo ne ibaon me yen seda kame tot twatwal.

⁵Pien Daudi oudo obedo kede tam kame waco be, “Woda Sulumani pwodi titidi doko pwodi likame engego jamini atos, do di ot kame kobino gero ne Rwot miero bed ibus twatwal, di nyinge iruo i wi lobo lung. Pi mano, ango poore atim iik kame make.” Aso, Daudi oko iiko jamini atos twatwal kame mako gedo me ot nono, di pwodi likame eto.

⁶En eko lwongo wode Sulumani di eko cike pi gero tempulo ne Rwot, Rubanga me Isirael.

⁷Daudi owaco ne wode be, “Woda, ango oudo abedo kede iik me gero ot kame koworo iye Rwot Rubanga na.

⁸Do Rwot oko waco na be ango oudo atieko neko jo atos doko abedo i yi atos twatwal. Pi mano, en likame eromo yei nango gero ne ot kame kobino wore iye, pien ango atieko onyo remo me jo atos i nyime.



⁹En eko cikere buta be, ‘Neningo, in ibino nywalo atin awobi kame bino pug kede mulem, pien ango abino mine eudo anapakin kede jokwor mege dedede. Nyinge bino bedo Sulumani, pien i kare me apugan mere ango abino mino jo Isirael mulem kede anapakin.

¹⁰En ebino gero nango tempulo, doko ebino bedo bala woda, di ada ako bino bedo bala papa mere. Jo me ode bino pugo Isirael nakanaka.’ “

¹¹Daudi oko meede di ewaco be, “Pi mano, in woda, ango akwao Rwot Rubanga ni ebed kedi, tetekeny in ikaruno gero ot ka Rubanga ni, bala kame en etieko waco.

¹²Doko akwae emii niang atut kede rieko, tetekeny in ipug Isirael di ilubo Iswil ka Rwot Rubanga ni.

¹³ Ka in ilubo iswilia dedede kame Rwot bin omio Musa pi mino jo Isirael, gi dedede bino bedo ni kiber. Bed di itek, doko bed kede nwangcuny. Kur ibed kede lwooro moro arabo potocuny.

¹⁴Ango atieko cane di ako koko jamini me gero ot ka Rwot. Atieko iiko saabu kame kalamo kilo milion adek kede tutumia tol ongwon (3,400,000), kede siliba kame kalamo kilo milion ot adek kiwie ongwon (34,000,000). Medo i kom magonogo, atieko iiko nyonyo buronsi kede ayon kalikame kokaruno pimo peko gi. Ibaon kede kide da tie cuto, do poore imed mogo.

¹⁵In itie kede jotic atot twatwal. Itie kede jo apao kide, jo agero apama, jo kame timo tic me ibaon, kede jo atot atota kame timo tice me cing me epone apapat, jo kame tie kede diru me tic

¹⁶kede saabu, siliba, buronsi, kede ayon. Aso, nataman cak do timo tic. Ango akwao Rwot ebed kedi.”

¹⁷Daudi oko ciko jotel dedede me Isirael pi konyo Sulumani.

¹⁸En ewaco be, “Rwot Rubanga wu obedo tie kede wu di eko mino wu anapakin i bad tetu dedede. Piento en emia abwono jo dedede kame oudo tie bedo i lobo noni. Gin nataman kitieko doko jo kame tie i apugan wun kede i apugan ka Rwot.

¹⁹Aso, nataman ketunu tam wu kede cunyu i timo tic ka Rwot Rubanga wu. Cakunu gero kabedo mere kacil tetekeny kel iye Sanduku me Isikan mere kede jamini mege kacil kame kotio kede me wore.”

1 Iyutun 23

¹ I kare kame Daudi oudo otieko do ti kede twatwal, en eko mino wode Sulumani odoko abaka me Isirael.

Tice me Jolebi

²Abaka Daudi oko koko karacel jotel dedede me Isirael kede josaseredoti kede Jolebi.

³En eko mino komaro wel me Jolebi acuo cako ki mwaka ot adek me dongo ot kede malo. Wel gi koko udo tie tutumia ot adek kiwie kanyauni (38,000).



- ⁴Abaka oko keto Jolebi tutumia ot are kiwie ongwon (24,000) pi timo tic me tempulo, Jolebi tutumia kanyape (6,000) pi bedo jodongo me tempulo kede jongolkop,
- ⁵Jolebi tutumia ongwon (4,000) pi bedo jodar irutei, kede Jolebi tutumia ongwon (4,000) pi bedo jogoc me were me pako Rwot kede jamini me wer kame abaka oudo oiko pi tic nono.
- ⁶Daudi oko popoko Jolebi i ikodeta adek, di lubere kede ikekon ka joakwari gi: Gereson, Kokat, kede Merari.
- ⁷Gereson bin tie kede awobe are: Ladan kede Simei.
- ⁸Ladan oudo tie kede awobe adek: Yekiel, Setam, kede Yoweri.
- ⁹Gin dedede oudo kibedo jotel me ikekon kowok kibus Ladan. Simei bin en konywalo Selomot, Kasiel, kede Aran.
- ¹⁰⁻¹¹Simei bin tie kede awobe ongwon ace: Yakat en oudo awobi adwong, Sina di lube, di do Yeus, kede Beria. Yeus kede Beria bin li kede awobe atot, omio oko maro gi bala jo me ekeko acel.
- ¹²Kokat oudo tie kede awobe ongwon: Amuram, Isikar, Keburon, kede Usiel.
- ¹³ Amuram, wode adwong en koudo obedo papa me Aaron kede Musa. Aaron kede ikwae mege bin oko poko kikom jo icegun pi gin bedo jo kame gwoko nakanaka jamini kacil, kede pi mino giayala i nyim Rwot, timo tic mere, kede lamo ne jo winyo i nyinge.
- ¹⁴Do awobe ka Musa, dano ka Rubanga, bin oko ribo i kom Jolebi.
- ¹⁵Musa oudo tie kede awobe are, gin en Geresom kede Elieser.
- ¹⁶Ngatel me awobe ka Geresom bin en Sebucl.
- ¹⁷Elieser bin tie kede awobi acel kenekene, en Rekabia, do Rekabia bin oko nywalo awobe atot atota.
- ¹⁸Wot ka Kokat me are, Isikar, bin tie kede wode kame nyinge Selomit. En oudo ebedo ngatel me ekeko gi.
- ¹⁹Wot ka Kokat me adek, Keburon, bin tie kede awobe ongwon: Yeria, Amaria, Yakasiel, kede Yekameam.
- ²⁰Wot ka Kokat me ongwon, Usiel, bin tie kede awobe are, gin en Mikaa kede Isia.
- ²¹Merari bin tie kede awobe are, gin en Makali kede Musi. Makali da oko nywalo awobe are, gin en Eleasar kede Kis.
- ²²Do Eleasar bin oko to abongo nywalo atin awobi moro, do en oudo enywalo anyira kenekene. Anyira mege nogo oko bin nyomere kede joawade gi, awobe ka Kis.
- ²³Wot ka Merari me are, Musi, bin oko nywalo awobe adek, gin en Makali, Eder, kede Yeremot.



- ²⁴Jo nogi en kame bin obedo ikwae ka Lebi, di lubere kede ikekon gi kede diakale gi, di kowandiko ngat acelacel kede nyinge. Ikwae gi kame mwakini me dongo gi bin tie ot are kede ot malo oudo kopoko negi tic me tempulo.
- ²⁵Daudi oko waco be, “Rwot Rubanga me Isirael otieko mino jo mege anapakin, doko eda kikome ebino donyo bedo Yerusalem nakanaka.
- ²⁶Pi mano, likame bobo do Jolebi bino meede kede yeno Eema me riamo kede Rwot arabo jamini dedede kame kotio kede gi i eema nono.
- ²⁷Di lubere kede yamo ka Daudi me ajikini, bin oko wandiko Jolebi dedede cako kikut jo me mwaka ot are ot kede malo,
- ²⁸di oko mino gi konyo josaseredoti ikwae ka Aaron, timo tic me Tempulo, gwoko diakal mere kede agolai mege, kede neno be jamini kacil dedede likame komunao.
- ²⁹Gin en kame oudo tic gi da mako mugati kame koyalo but Rubanga, mokalos kame komio bala giayala, mugati aperepere kame kotimo abongo arup, kede mugati kame kotedo me mino giayala, kede mokalos kame korubo kede mo me olibeti. Gin en kame da oudo tic gi me pimo giayala kame koteri i tempulo,
- ³⁰kede me mino pwoc kede pak but Rwot buli odiko kede otieno.
- ³¹Gin oudo da miero kimi pwoc kede pak but Rwot i kare dedede kame komio kede giayala awanga but Rwot, i ceng Sabato, i kare me Ibagai me Por Duwe, kede i kare me ibagai apat. I kare dedede Jolebi kame romo miero bed tie i wang tic i tempulo, pi timo tic ka Rwot bala kame mitere.
- ³²Aso, bin oko mino Jolebi tic me gwoko Eema me ariamakin kede Rwot, kede tempulo, kede konyo josaseredoti joawade gi ikwae ka Aaron timo tic amakere kede woro Rwot i tempulo.”

1 Iyutun 24

Tic kame Kopoko ne Josaseredoti

- ¹Magonogi en ikodeta me ikwae ka Aaron. Aaron bin tie kede awobe ongwon, gin en Nadab, Abiku, Eleasar, kede Itamar.
- ²Nadab kede Abiku en kame bin oko to sek di pwodi papa gi kuo, abongo weko idwe. Manono en omio imiegu gi Eleasar kede Itamar oko doko josaseredoti.
- ³Abaka Daudi bin oko keto ikwae ka Aaron i ikodeta di lubere kede tice kame kopoko negi. Sadoki akwar Eleasar, kede Akimelek akwar Itamar en kame bin okonye timo manoni.
- ⁴Ikwae ka Eleasar bin koketo i ikodeta tomon kiwie kanyape, do ikwae ka Itamar koketo i ikodeta kanyauni; kotimo manoni pien cuo kame oudo obedo jotel me diakale tot i kom ikwae ka Eleasar kalamo me ka Itamar.
- ⁵Do pien jodongo me tempulo kede jotel me tic ka Rubanga oudo tie i kom ikwae ka Eleasar kede da i kom ikwae ka Itamar, omio oko donyo poko negi tic kede uco alulu.



⁶Semaya wot ka Netanel, kalani me Jolebi, en kame oudo wandiko nying jo. En oudo ewandiko nying jo di jo nogi tie: abaka kede jodongo me tic mere, ngasaseredoti Sadoki, Akimelek wot ka Abiata, kede jotel me diakale me josaseredoti kede me Jolebi. Ikwae ka Eleasar kede me ka Itamar oudo kwanyo alulu di kilere alea; oudo koyero ot acel kikom me ka Eleasa di oko yero ot acel da kikom me ka Itamar.

⁷Alulu bin oko mako ikodeta me diakale ot are kiwie ongwon nogi kaman: alulu me agege omako Yekoyarib, me are omako Yedaya,

⁸me adek omako Karim, me ongwon omako Seorim,

⁹me kany omako Malikija, me kanyape omako Mijamin,

¹⁰me kanyaare omako Kakos, me kanyauni omako Abija,

¹¹me kanyangon omako Yesua, me tomon omako Sekania,

¹²me tomon kiwie acel omako Eliasib, me tomon kiwie are omako Yakim,

¹³me tomon kiwie adek omako Kupa, me tomon kiwie ongwon omako Yesebeab,

¹⁴me tomon kiwie kany omako Biliga, me tomon kiwie kanyape omako Imer,

¹⁵me tomon kiwie kanyaare omako Kesir, me tomon kiwie kanyauni omako Kapises,

¹⁶me tomon kiwie kanyangon omako Petakia, me ot are omako Yekesekel,

¹⁷me ot are kiwie acel omako Yakin, me ot are kiwie are omako Gamul,

¹⁸me ot are kiwie adek omako Delaya, di me ot are kiwie ongwon oko mako Masia.

¹⁹Cuo nogi bin oko poko negi tice gi i tempulo di lubere kede cik kame bin Rwot Rubanga me Isirael omio kwaru gi Aaron.

Nying Jolebi

²⁰Magonogi en nying jotel me diakale ace me Jolebi: Kikom ikwae ka Amuram, ngatel en oudo Subael; kikom ikwae ka Sebucl, ngatel en oudo Yekedeya.

²¹Kibut ikwae ka Rekabia, ngatel en oudo Isia.

²²Kibut ikwae ka Isikar, ngatel en oudo Selomit; kibut ikwae ka Selomit, ngatel en oudo Yakat.

²³Kibut ikwae ka Keburon, Yeria en oudo ngatel, di Amaria lube, di Yekasiel, kede Yekameam.

²⁴Kibut ikwae ka Usiel, ngatel en oudo Mikaa; kibut ikwae ka Mikaa, ngatel en oudo Samir.

²⁵Omin me Mika oudo en Isia; kibut ikwae ka Isia, ngatel oudo en Sakaria.

²⁶Kibut ikwae ka Merari, jotel oudo gin en Makali kede Musi; kibut ikwae ka Yasia, ngatel oudo en Beno.



²⁷Kibut ikwae ka Merari kowok kibut Yasia, jotel oudo gin en Beno, Sokam, Sakur, kede Ibiri.

²⁸Kibut ikwae ka Makali, ngatel oudo en Eleasar, bed bala en oudo eli kede wode moro.

²⁹Kibut ikwae ka Kis, ngatel oudo en Yeramel.

³⁰Kibut ikwae ka Musi, jotel oudo gin en Makali, Eder, kede Yeremot. Magonogi gin en diakale me Jolebi.

³¹Gida bin kopopoko negi tice kede uco alulu bala kame oudo kotimo kede ne ikwae ka Aaron, i nyim Abaka Daudi, Sadoki, Akimelek, kede jotel me diakale me josaserodoti kede me Jolebi, abongo apokapoka moro.

1 Iyutun 25

Jo Awero i Tempulo

¹Daudi kede jotel me isirikalen bin oko yero ikwae ka Asap, ikwae ka Keman, kede me ka Yedutun pi bedo jo kame telo kop me wer. Gin oudo kipoore pako Rwot di kigoo arigirigin, adungun, kede suanin abatal. Nying jo kame bin oko yero i tic nono kede ipelun gi ige:

²Awobe ongwon ka Asap: Sakur, Yosepu, Netania, kede Asarela, papa gi en koudo telo gi i tic gi; gin oudo kituco kop ka Rubanga kede were tek kame abaka omio gi cik me timo kamanono.

³Awobe kanyape ka Yedutun: Gedalia, Seri, Yesaya, Simei, Kasabia, kede Matitia oudo timo tic di papa gi en kame telo gi. Gin bin kitatamo kop ka Rubanga, di kigoo kede adungu were me mino pwoc kede me pak but Rwot.

⁴Awobe ka Keman oudo tie tomon kiwie ongwon: Bukia, Matania, Usiel, Sebuel, Yerimot, Kanania, Kanani, Eliata, Gidaliti, Romamiti Eser, Yosibekasa, Maloti, Kotir, kede Makasiot.

⁵Rubanga bin omio Keman, enabi ka abaka, awobe tomon kiwie ongwon nogi dedede kede anyira da adek, bala kame oudo ecikere kede, tetekeny emie dwongo.

⁶Gin dedede papa gi en koudo telo gi di gin kigoo were i ot ka Rwot kede suanin abatal, adungun, kede arigirigin i esawa me woro Rubanga i tempulo. Asap, Yedutun, kede Keman bin timo tice gi di kilubo gikame abaka ciko negi.

⁷Gin kede Jolebi joawade gi, jo kame oudo kopwonyo pi wer but Rwot, gin dedede oudo ipirana i wer. Gin dedede oudo kitie cuo tol are kede ot kanyauni kiwie kanyauni (288).

⁸Gin oudo kiuco alulu pi popoko tic, abongo apokapoka moro.

⁹Alulu me agege bin oko mako Yosepu dano me ekeko ka Asap; alulu me are oko mako Gedalia kede awobe mege kede imiegu mege, gin jo tomon kiwie are;



- ¹⁰alulu me adek oko mako Sakur kede awobe mege kede imiegu mege, gin jo tomon kiwie are;
- ¹¹alulu me ongwon oko mako Seri kede awobe mege kede imiegu mege, gin jo tomon kiwie are;
- ¹²alulu me kany oko mako Netania kede awobe mege kede imiegu mege, gin jo tomon kiwie are;
- ¹³alulu me kanyape oko mako Bukia kede awobe mege kede imiegu mege, gin jo tomon kiwie are;
- ¹⁴alulu me kanyaare oko mako Asarela kede awobe mege kede imiegu mege, gin jo tomon kiwie are;
- ¹⁵alulu me kanyauni oko mako Yesaya kede awobe mege kede imiegu mege, gin jo tomon kiwie are;
- ¹⁶alulu me kanyangon oko mako Matania kede awobe mege kede imiegu mege, gin jo tomon kiwie are;
- ¹⁷alulu me tomon oko mako Simei kede awobe mege kede imiegu mege, gin jo tomon kiwie are;
- ¹⁸alulu me tomon kiwie acel oko mako Asarel kede awobe mege kede imiegu mege, gin jo tomon kiwie are;
- ¹⁹alulu me tomon kiwie are oko mako Kasabia kede awobe mege kede imiegu mege, gin jo tomon kiwie are;
- ²⁰alulu me tomon kiwie adek oko mako Subael kede awobe mege kede imiegu mege, gin jo tomon kiwie are;
- ²¹alulu me tomon kiwie ongwon oko mako Matitia kede awobe mege kede imiegu mege, gin jo tomon kiwie are;
- ²²alulu me tomon kiwie kany oko mako Yeremot kede awobe mege kede imiegu mege, gin jo tomon kiwie are;
- ²³alulu me tomon kiwie kanyape oko mako Kanania kede awobe mege kede imiegu mege, gin jo tomon kiwie are;
- ²⁴alulu me tomon kiwie kanyaare oko mako Yosibekasa kede awobe mege kede imiegu mege, gin jo tomon kiwie are;
- ²⁵alulu me tomon kiwie kanyauni oko mako Kanani kede awobe mege kede imiegu mege, gin jo tomon kiwie are;
- ²⁶alulu me tomon kiwie kanyangon oko mako Maloti kede awobe mege kede imiegu mege, gin jo tomon kiwie are;
- ²⁷alulu me ot are oko mako Eliata kede awobe mege kede imiegu mege, gin jo tomon kiwie are;



²⁸alulu me ot are kiwie acel oko mako Kotir kede awobe mege kede imiegu mege, gin jo tomon kiwie are;

²⁹Alulu me ot are kiwie are oko mako Gidaliti kede awobe mege kede imiegu mege, gin jo tomon kiwie are;

³⁰alulu me ot are kiwie adek oko mako Makasiot kede awobe mege kede imiegu mege, gin jo tomon kiwie are;

³¹di me ot are kiwie ongwon mere oko mako Romamiti Eser kede awobe mege kede imiegu mege, gin jo tomon kiwie are;

1 Iyutun 26

Jodar Tempulo

¹Manoni en kite kame bin oko popoko kede tic ne Jolebi koudo daro tempulo. Ki ekeko ka Kora bin koyero Meselemia wot ka Kore, dano me diakal ka Asap.

²Meselemia bin tie kede awobe kanyaare kame mwakini me dongo gi lubere kaman: Sakaria en oudo awobi adwong, di Yediael lube, di Sebadia, di Yatiniel,

³di Elam, di Yekokanan, kede di Eliekoenai.

⁴Bin tie icuo moro da kame nyinge Obed Edom. En Rubanga oudo omie winyo di eko nywalo awobe kanyauni di nywalo gi lubere kaman: Semaya, di Yekosabad, di Yoa, di Sakar, di Netanel,

⁵di Amiel, di Isakar, kede di Peuletai.

⁶Wode Semaya da bin oko nywalo awobe kame pirgi bin tek twatwal i ekeko gi, pien gin oudo jo atek twatwal.

⁷Awobe ka Semaya nogo gin bin en Otini, Repael, Obed, Elisabad, Eliku kede Semakia. Eliku kede Semakia oudo obedo jodiru twatwal.

⁸Jo koyai ki ot Obed Edom bin tie jo ot kanyape kiwie are. Gin dedede jo kame bin opwonyere kiber i tic noni.

⁹Jo me ot ka Meselemia bin oko gida cwano cuo tomon kiwie kanyauni kame oudo opwonyere kiber i tic noni.

¹⁰Ki ekeko ka Merari oudo tie icuo kame nyinge Kosa; en oudo etie kede awobe ongwon: Simiri en oudo ngatel gi (papa mere bin omie ebedo ngatel, bed bala en oudo likame kao),

¹¹Kilikia, Tebalia, kede Sakaria. Jo dedede me ot ka Kosa kame bin oko yero pi bedo jodar tempulo oudo tie jo tomon kiwie adek.

¹²Jodar tempulo nogi bin kopopoko i ikodeta, di lubere kede ikekon gi, di oko mino gi tic i tempulo, bala kame oudo otimo kede ne Jolebi icegun.



- ¹³Jo me ekeko acelacel bin oko uco alulu pi mito ngeno erute kame gin kipoore daro. Manono bin kotimo abongo paro pi wel me jo atie i ekeko acelacel.
- ¹⁴Alulu me daro erute me bad tetu kide bin oko mako Selemia, di alulu me daro erute me bad tetu malo oko mako wode Sakaria, icuo kame nakanaka oudo mio tam aber.
- ¹⁵Alulu me daro erute me bad tetu piny oko mako Obed Edom, di oko mino awobe mege daro agolai kame bin kogwoko kiye jamini.
- ¹⁶Alulu me daro erute me bad tetu tim kede me Saleket kame oudo tie i yongayo ayito malo oko mako Supim kede Kosa.
- ¹⁷I bad tetu kide, jodar kanyape en kame bin bedo i wang tic buli ceng, i bad tetu malo jodar ongwon, kede i bad tetu piny jodar ongwon. Jodar ongwon en kame bin koketo pi daro agolai me kano jamini, jodar are pi agola acelacel.
- ¹⁸I bad tetu tim bin koketo jodar kanyape, ongwon i yongayo adonyo i tempulo, kede are i diakal.
- ¹⁹Manoni en kite kame bin kopopoko kede tic me daro irutei but jo me ekeko ka Kora kede me ka Merari.

Tice Apat me Tempulo

- ²⁰Kikom Jolebi icegun, Akija en kame bin koketo pi gwoko lim me ot ka Rubanga kede agolai kame bin kokano iye jamini kame komio but Rubanga.
- ²¹Ladan, ngat acel kikom awobe ka Gereson, en bin kobedo kwaru me jo me ikekon atot apapat, ribo kiton jo me ot ka wode Yekiel.
- ²²Awobe are ka Yekiel, Setam kede Yoweri en kame bin obedo jodongo kame gwoko lim me tempulo kede agolai me kano jamini.
- ²³Bin oko popoko tice ne jo me ikekon gi: Amuram, Isikar, Keburon, kede Usiel.
- ²⁴Sebuel, dano me ekeko ka Geresom wot ka Musa, en kame bin obedo ngadwong kame lo kop kamako lim me tempulo.
- ²⁵Sebuel oudo obedo wad kede Selomit kikut Elieser omin me Geresom. Elieser en oudo obedo papa me Rekabia, papa me Yesaya, papa me Yoram, papa me Sikiri papa me Selomit.
- ²⁶Selomit noni kede imiegu mege en kame bin lo kop kamako jamini dedede kame bin Abaka Daudi, kede jotel me diakale, jodongo kame telo isirikalen tutumia tutumia kede kame telo isirikalen toli, kede jotel apat me isirikalen, omio but Rubanga.
- ²⁷Gin bin kiko tero jamini ace kame koyako ki yi di kiko mino but Rubanga pi bedo me timo tic me tempulo.
- ²⁸Selomit kede imiegu mege nogo en kame bin gwoko jamini dedede kame komio but Rubanga pi bedo me timo tic i tempulo, kiton giamia kame enabi Samuel okelo,



giamia kame Abaka Saulo okelo, giamia kame Abuneri wot ka Ner okelo, kede giamia kame Joab wot ka Seruya okelo.

Tice me Jolebi Apat

²⁹Kikom jo me ekeko ka Isikar, Kenania kede awobe mege en kame bin oko mino tic kame mako apugan. Gin en oudo kibedo jopug kede jongolkop.

³⁰Kikom jo me ekeko ka Keburon, Kasabia kede joawade mege tutumia acel kede tol kanyaare (1,700), gin dedede jo atwero tic, bin oko keto gi pi bedo jo kame ngingico tice me jo Isirael i bad tetu tim me ecilet me Yorodan, i kom kop amakere kede tic ka Rwot kede me ka abaka.

³¹Yeria en kame bin ngatel me jo me ekeko ka Keburon. I mwaka me ot ongwon me apugan ka Daudi, bin oko ngingico kop i kom jo kame wok ki ekeko ka Keburon, di oko udo be isirikalen me ekeko noni atek i yi bin tie bedo Yaser i adul me Gilead.

³²Abaka Daudi bin oko yero cuo atwero tic tutumia are kede tol kanyaare (2,700) kikom jotel me diakale me joawade ka Yeria, di en eko keto gi pi bedo jo kame ngingico tice me jo me ikekon ka Ruben, Gad, kede dul me ekeko ka Manase, i kom kop amako Rubanga kede amako abaka.

1 Iyutun 27

Isirikalen kede Jopiny

¹Buli duwe acelacel ekodet me jo tutumia ot are kiwie ongwon (24,000) oudo bedo i wang tic bala Isirikalen me Isirael. Jo nogi oudo ribo jotel me diakale, jotel me isirikalen kede jotic ka abaka.

²⁻¹⁵Magi en nying jo kame oudo telo gi duwe acelacel: Duwe me agege: Yasobeam wot ka Sabidiel, dano me ot ka Peresi Duwe me are: Dodai akwar Akoki; Mikilot en kame bin lubo tiene Duwe me adek: Benaya wot ka Yekoyada ngasaseredoti; en kame bin ebedo ngatel me “Jo Ot Adek” (wode Amisabad en kame bin oko lunyo wange bala ngatel me isirikalen me ekodet noni) Duwe me ongwon: Asakel omin me Joab (wode Sebadia en kame bin oko lunyo wange) Duwe me kany: Samukut, akwar Isikar Duwe me kanyape: Ira wot ka Ikes dano me Tekoa Duwe me kanyaare: Keles dano me ekeko ka Epuraimu, en bin eyai ki adul me Pelon Duwe me kanyauni: Sibekai dano me Kusa (en oudo ebedo dano me ekeko ka Seera, me ateker ka Yuda) Duwe me kanyangon: Abieser dano me Anatot kame tie i adul me jo me ekeko ka Benjamin Duwe me tomon: Makarai dano me Netopa (en oudo ebedo dano me ekeko ka Sera) Duwe me tomon kiwie acel: Benaya dano me Piraton kame tie i adul me jo me ekeko ka Epuraimu Duwe me tomon kiwie are: Keledai dano me Netopa (en oudo akwar Otiniel)

Pugo Jo me Ikekon me Isirael

¹⁶⁻²²Magi en nying jopug me ikekon me Isirael:



Ki ekeko ka Ruben:	Elieser wot ka Sikiri
Ki ekeko ka Simeon:	Sepatia wot ka Maka
Ki ekeko ka Lebi:	Kasabia wot ka Kemuel
Ki ekeko ka Aaron:	Sadoki
Ki ekeko ka Yuda:	Eliku, ngat acel kikom imiegu ka Abaka Daudi
Ki ekeko ka Isakar:	Omiri wot ka Emikairi
Ki ekeko ka Sebulun:	Isamaya wot ka Obadia
Ki ekeko ka Naputali:	Yeremot wot ka Asiriel
Ki ekeko ka Epuraimu:	Kosea wot ka Asasia
Ki ekeko ka Manase me bad tetu tim:	Yoweri wot ka Pedaya
Ki ekeko ka Manase me bad tetu kide:	Ido wot ka Sakaria
Ki ekeko ka Benjamin:	Yasiel wot ka Abuneri
Ki ekeko ka Dan:	Asarel wot ka Yerokam

²³ Abaka Daudi bin likame oko maro wel me jo kame mwakini gi me dongo oudo tie piny me mwaka ot are, pien Rwot oudo ocikere pi mino jo Isirael nyai di kiko doko tot bala acerin kame tie malo i edou.

²⁴ Joab wot ka Seruya bin oko cako maro wel me jo, do likame eko tieko, pien Rubanga oko mino jo Isirael alola pi maro wel me jo noni. Manono bin omio likame oko wandiko wel me jo kame oudo komaro i itabu me itatam kamako Abaka Daudi.

Jo kame Lo Kop amako Jamini ka Abaka

²⁵ Magi en nying jo kame bin lo jamini ka abaka: Asimabet wot ka Adiel en kame bin lo agolai kame kokano iye lim ka abaka. Jonasan wot ka Usia en kame bin lo agolai apat me ka abaka, kame bin kokano iye lim i bomban dedede, i calere kede i kadedere kame kocelo kede apama atek i Isirael.

²⁶ Esiri wot ka Kelub en kame bin lo jopur ka abaka.

²⁷ Simei dano me Rama en kame bin lo poti me olok ka abaka. Sabadi dano me Sepam en kame bin lo kop amako olok me timo bwini.

²⁸ Baal Anan dano me Geder en kame bin lo kop amako yen me olibeti kede cukamori kame bin tie i dud mori. Yowasi en kame bin lo agolai me kano mo.

²⁹ Sitarai dano me Saron en kame bin lo kop amako doke kame kokwao i ebar me Saron. Sapat wot ka Adelai en kame bin lo kop amako doke kame kokwao i aditot.



³⁰Obil dano ka Isimael en kame bin lo kop amako aguraguran. Yekedeya dano me Meronot en kame bin lo kop amako pundan. Yasisi dano Ngakagar en kame oudo lo kop amako romini kede diegi.

³¹Jo nogi dedede en kame bin gwoko jamini ka Abaka Daudi.

Jo kame Mio Daudi Tam

³²Jonasan, neru me Daudi, oudo obedo ngat kame tie kede diru i mino tam, doko oudo esomo twatwal. En kede Yekiel wot ka Kakimoni en kame bin kilo kop amako isoma me awobe ka abaka.

³³Akitopel en bin ngamino tam but abaka, kede Kusai Ngaraki en oudo obedo adieru me abaka.

³⁴Ingei to ka Akitopel, Abiata kede Yekoyada wot ka Benaya en oko doko jo mi tam. Joab en kame bin obedo ngatel me isirikalen ka abaka.

1 Iyutun 28

Cik kame Daudi Omio pi Tempulo

¹Daudi bin oko mino cik but jotic dedede me Isirael pi gin cokere Yerusalem. Aso, jotic me ikekon dedede, jodongo me ikodeta dedede kame bin timo tic ka abaka, jotel me isirikalen tutumia tutumia, jotel me isirikalen toli toli, jogwok jamini kede doke ka abaka kede awobe mege, karacel kede jotic me paco ka abaka, jo yi atek mege, kede jo yi dedede, oko cokere Yerusalem.

² Abaka Daudi bin oko yai malo, eko cungo di eko waco be, “Winyunu, wun imiegu na kede jo na. Ango oudo abedo kede tam me gero ne Sanduku me Isikan ka Rwot kabedo kame Rwot Rubanga wa teno tiene iye. Ango oudo atieko timo iik me gero ot nono.

³Do Rubanga oko waco na be, ‘In likame ibino gero nango ot, pien in ibedo ngayi doko itieko onyo remo me jo atat.’

⁴Aso di Rwot Rubanga me Isirael otieko yera kikom jo me ot ka kwaru na pi bedo abaka me Isirael nakanaka. En eyero ekeko ka Yuda pi bedo ekeko kame jotel yai kiye, di ki ekeko ka Yuda, en eko yero ot ka papa na. Kikom awobe ka papa na, en cunye oko bedo yom pi keta bedo abaka me Isirael lung.

⁵En emia awobe atat, di kikom gi en eko yero Sulumani pi bedo i kom me ajakanut mere me Isirael, pi pugo jo Isirael.

⁶” Rwot owaco na be, ‘Wodi Sulumani en kame bino gero oda kede diakal mere, pien ango atieko yere pi bedo bala woda, di ango ako bino bedo papa mere.

⁷Ango abino mino ajakanut mere bedo nakanaka ka en emeede keto cunye gwoko iswilia kede cik na bala kame nataman etie timo.’

⁸” Pi mano, wun jo na, ango nataman aciko wu i nyim Rubanga wa kede i nyim ekodet me jo Isirael kocokere lung, gin jo ka Rubanga, pi keto cunye wu lubo gi



dedede kame Rwot Rubanga wa ociko ne wa, tetekeny imeedenu bedo wegi lobo aber noni di ikounu weke ne idwe wu kame bino lunyo cen ngei wu, pi bedo mergi nakanaka.”

⁹” Aso in woda Sulumani, poore in ingei Rubanga ka papa ni, di iko timo ne tic kede cunyi lung kede tam aber. Pien Rwot ngeo tam me jo dedede doko engeo iik gi kede par gi dedede. Ka in imoe, ibino ude; do ka in ilokere tenge ki bute, en ebino jali atwal.

¹⁰In poore ingei be Rwot otieko yeri pi gero tempulo mere kacil. Poore in ibed tek di iko timo tic nono.”

¹¹Di do Daudi oko mino Sulumani iik dedede kame oudo kotieko timo amako gedo me tempulo, kiton agolai me kano jamini kede agolai me malo, kede Kabedo Kacil Kalamo kame kom me kisa tie iye.

¹²En eko da mino Sulumani iik dedede kame en oudo etie kede i tam mere pi diakal ka Rwot kede agolai koluke, kede pi agolai me kano lim me tempulo kede jamini kame komio but Rwot.

¹³Daudi bin oko mine da iik amako epone me poko tic ne josaseredoti kede Jolebi, en emie kite kame gin miero kitim kede tic me tempulo, kede kite me gwoko jamini kame kitio kede i tempulo.

¹⁴En enyuto ne rom me siliba kede saabu kame miero kocwei kede jamini dedede me tic i tempulo;

¹⁵enyuto ne rom me saabu me timo etala acelacel kede gicibe,

¹⁶enyuto ne rom me siliba me timo imesai, kede rom me saabu me timo emesa acelacel me cibo mugati kame koyalo but Rwot.

¹⁷En enyuto ne da rom me saabu kame kojililo kiber kame miero koti kede me timo ilumai, kalayan, kede ikopon, kede rom me siliba kede saabu kame miero kotim kede bakuli acelacel;

¹⁸kede rom me saabu kame kojililo kiber kame miero kotim kede alutari me wango odok angwe kur, kede me timo cabala ne cerubim koyararo bwom gi i wi Sanduku me Isikan ka Rwot.

¹⁹Abaka Daudi oko waco be, “Magonogi dedede tie i iik kame kowandiko di lubere kede cik ka Rwot kame en emia pi timo.”

²⁰Abaka Daudi oko waco ne wode Sulumani be, “Bed tek, doko bed kede nwangcunyi di iko timo tic. Kur ibed kede lworu, doko kur cunyi poti; pien Rwot Rubanga na tie kedi. En likame ebino jali arabo weki, do ebino bedo kedi tuno in tieko tice dedede me tempulo mere.

²¹Kotieko popoko ne josaseredoti kede Jolebi tice dedede kame gin kibino timo i ot ka Rwot. Jo kame tie kede diru me timo tice me epone dedede bino mire gin ken gi pi konyi; bobo da jotel karacel kede jo dedede bino timo gikame in iwaco negi.”



1 Iyutun 29

Giamia me Gero Tempulo

- ¹ Abaka Daudi oko waco ne ekodet lung kocokere be, “Woda Sulumani ngat kame Rubanga otieko yero, pwodi titidi doko pwodi likame engeo jamini atot. Aso di tic kame miero en etim dwong twatwal; pien tempulo noni en likame ebino gero pi jo do pi Rwot Rubanga.
- ² Ango atieko timo teko di ako iiko jamini me gero ot ka Rubanga na. Atieko iiko saabu, siliba, buronsi, ayon, ibaon, kide me wel, kide ace atitino me amwona i kom saabu, kede kide ace me wel me erangi apapat kede kidi mabol atot adikinicel.
- ³ Medo i kom jamini nogo kame ango atieko coko me gedo, ango atieko mino da siliba kede saabu na amaka. Ango atimo manoni pi kite kame cunya tie kede i kom ot ka Rubanga.
- ⁴ Ango atieko mino saabu kame kojililo kiber kame kalamo kilo tutumia tol acel (100,000), kede siliba kame kojililo kiber kame buco romo kilo tutumia tol are kede ot ongwon (240,000), pi tubuso kede apama me tempulo
- ⁵ kede me timo jamini dedede kame jo katie kede diru i tic me cing bino timo. Aso, ngai da kame ceng atin mito mino giamia but Rwot, di emio kede cunye lung?”
- ⁶ Di do jotel me diakale, jotel me ikekon, jotel me isirikalen, kede jotel me tic ka abaka oko mino jamini bala kame cuny gi owinyo.
- ⁷ Gin kimio jamini kame lubo nogi pi gero ot ka Rubanga: saabu kame kalamo kilo tutumia tol acel kede ot kanyaare (170,000), siliba kame kalamo kilo tutumia tol adek kede ot ongwon (340,000), nyonyo buronsi kame romo kilo tutumia tol kanyape kede ot are (620,000), kede nyonyo ayon kame kalamo kilo milion adek kede tutumia tol ongwon (3,400,000).
- ⁸ Jo kame bin tie kede kide me wel oko mino gi but kabedo kame bin kokano iye lim me ot ka Rwot, i cing Yekiel akwar Gereson.
- ⁹ Jo oko kilel pien gin oudo kimio jamini gi abongo adiadia moro; oudo kimio jamini gi but Rwot bala kame cuny gi owinyo, doko kede cuny gi lung. Abaka Daudi da oko lelo twatwal.

Daudi Opako Rubanga

- ¹⁰ Di do Daudi oko pako Rwot i nyim ekodet lung kame oudo ocokere. En ewaco be, “Pak bed buti nakanaka, Okwe Rwot, Rubanga ka kwaru wa Isirael.
- ¹¹ Dwongo, twer, deyo, bwono yi, kede wor obedo meri; pien jamini dedede kame tie i malo kede i wi lobo obedo meg, doko in en abaka kame i lo jamini dedede.
- ¹² Abar kede wor wok ki buti, doko in ipugo jamini dedede. Twer kede teko tie i cingi, doko in en imio dwongo kede teko but jo dedede.
- ¹³ Aso, Rubanga wa, nataman wan omi pwoc di opako nyingi me deyo.



14” Do ango en ngai, doko jo na da obedo alu kibuti, en komio wan otwero mini giamia nogi bala kame cuny wa mito? Pien jamini dedede wok kibuti, doko wan omi jamini kame obedo megi cuto.

15Okwe Rwot in ingeo be i nyimi, wan ocal bala jokumbor kede jo kame beo abea i kuo noni, bala bin joakwari wa dedede; kare me kuo wa i wi lobo cal bala tipo kame rwenyo oyotoyot, gen me bedo nakanaka likame tie.

16Okwe Rwot Rubanga wa, twon jamini magi dedede kame wan okelo me gero ni ot me woro nyingi kacil owok ki buti, doko gin dedede megi.

17Ango angeo, Okwe Rubanga na, be in ingeo cuny jo dedede, doko in cunyi yom pi jo kame ekite gi opoore. Ango pi mit me cunya atieko mini jamini nogi dedede kede cuny me ateni, doko nataman atieko neno di jo ni kame tie kan, mio jamini gi buti kede kilel abongo gung moro.

18Okwe Rwot, Rubanga ka joakwari wa Aburaam, Isaka, kede Yakobo, mi jo ni bed kede akodi cuny kede tam noni nakanaka, doko mi cuny gi bed buti.

19Mi woda Sulumani bed kede mit me lubo cik kede iswilia ni kede cunye lung, kede eko gero tempulo noni kame ango atieko timo iik mere.”

20Di do Daudi oko waco ne ekodet lung kocokere be, “Pakunu Rwot Rubanga wu!” Di ekodet lung kocokere oko donyo pako Rwot Rubanga ka joakwari gi, di kiko riebere piny i nyim Rwot kede i nyim abaka da.

21I ceng alubo mere gin kiko mino giayala angola kede giayala awanga but Rwot. Gin kimio but Rwot giayala me twonin tutumia acel (1,000), imerekekin tutumia acel (1,000), idwe romini tutumia acel (1,000), kede giayala amata kame upere kede gi, kede giayala apat atot atota pir jo Isirael.

22Cenge nono gin kiko cam kede amata i nyim Rwot kede ilel adwong. Gin kiko keto Sulumani wot ka Daudi tien me are pi bedo abaka. Gin kiwire bala ngapug gi i nying Rwot di kiko wirow Sadoki bala ngasaseredoti.

23 Aso, Sulumani oko bedo i kom me ajakanut kame Rwot oudo ocibo, di eko lunyo wang papa mere Daudi bala abaka. En eko timo tic kiber di jo Isirael dedede oko donyo lubo kop mere.

24Jotel dedede kede jo atek i yi, karacel kede awobe ka Abaka Daudi dedede, oko cikere pi mino wor but Abaka Sulumani.

25Rwot oko mino Sulumani dwongo i nyim jo Isirael dedede, di eko mine dwongo me ajakanut kame kalamo me abakai lung kogeopugo Isirael.

Wie Wie me Apugan ka Daudi

26Daudi wot ka Yese bin opugo Isirael lung

27 pi mwakini ot ongwon. En epugo ki bomba me Keburon pi mwakini kanyaare kede ki Yerusalem pi mwakini ot adek kiwie adek.



²⁸Daudi oudo obaro doko jo oudo mie wor twatwal. En bin eko to di etieko ti kiber, di wode Sulumani en oko lunyo wange bala abaka.

²⁹Jamini kame Abaka Daudi bin otimo, cako ki me agege tuno kede i me ajikini, tie i kop kame inabin, Samuel, Nasan, kede Gad owandiko.

³⁰Kope kame kowandiko nogo nyuto kite kame en bin epugo kede, teko mere, kede gi dedede kame bin oko timere i kome, i kom jo Isirael kede ajakanuto kame bin oluko gi.



2 Iyutun

2 Iyutun 1

Abaka Sulumani Okwao be Mie Rieko

(1 Abakai 3.1-15)

¹Sulumani wot ka Daudi bin oko sipakin i ajakanut mere me Isirael; Rwot Rubanga mere oudo tie kede en, di eko mine emeede ameda doko tek.

²Sulumani bin oko lwongo jo dedede me Isirael, jotel me ikodeta me isirikalen atie tutumia acel tutumia acel, kede atie tol acel tol acel, jongolkop, jotel me Isirael, jotel me miere, kede jo dedede.

³Di Sulumani kede jo dedede oko ot Gibeon kakame koworo kiye Rwot, pien Eema ka Rwot oudo tie kunono, eema kame bin Musa ngatic ka Rwot otimo i wi tim.

⁴(Do Sanduku me Isikan oudo tie Yerusalem i eema kame Daudi oudo ogero kunono kakame edwoke kede ki Kiriath Yearim.)

⁵Alutari me nyonyo buronsi kame Basalel wot ka Uri, akwar Kur oudo otimo oudo da tie i nyim Eema ka Rwot. Abaka Sulumani kede jo dedede oko woro Rwot ki kanono.

⁶Sulumani oko ot i alutari me nyonyo buronsi nono koudo tie i nyim Rwot i Eema, en eko mino giayala awanga me leini tutumia acel (1,000) i wie.

⁷Iwor nono Rubanga oko neeno but Sulumani di oko waco ne be, “Penya gikame apoore mini.”

⁸Sulumani oko waco ne Rubanga be, “In itieko nyuto amara adwong kalikame lokere but papa na Daudi, di iko mina alunyo wange bala abaka.

⁹Okwe Rwot Rubanga, ango akwai imi cikere ni but papa na Daudi nan cobere, pien in iketa bedo abaka me jo atot bala asinge.

¹⁰Aso, nan mia rieko kede ngec me pugo jo nogi, pien ngai kame twero pugo twon jo ni nogi?”

¹¹Rubanga oko dwoko ne Sulumani be, “Pien manoni obedo gikame tie i cunyi, di likame iko kwano jame, abar, wor kibut jo, to me jo kame in idagi; doko da likame iko kwano pi kuo ni bedo pi kare alac, do in iko kwano pi bedo tie kede rieko kede ngec tetekeny ikaruno pugo jo kame ango aketi bedo abaka gi,

¹²nataman ango abino mini rieko kede ngec. Doko da abino mini abar, jamini, kede wor kalikame abaka moro lem otieko bedo tie kede i kare kokato, arabo kame abaka moro me kare me anyim bino bedo tie kede.”

Abar kede Teko ka Abaka Sulumani

(1 Abakai 10.26-29)

¹³Sulumani bin oko yai ki kabedo me woro Rubanga i Gibeon, ki Eema ka Rwot, di eko dok Yerusalem. En eko donyo pugo Isirael.



¹⁴ Sulumani bin ocoko cabalan me yi tutumia acel kede tol ongwon (1,400), kede asigiran tutumia tomon kiwie are (12,000), kame bin en eko cibo i bomban apapat, kede ace en bin eko dong kede gi i Yerusalem.

¹⁵ I kare me apugan mere, Abaka Sulumani bin oko mino siliba odure Yerusalem bala kide, kede eba me yat seda en eko mino obedo tot atatai bala cukamori me dud mori.

¹⁶ Asigiran ka Sulumani bin kokelo ki Misiri kede ki Kue; jocat wil ka abaka bin wilo gi awila ki Kue.

¹⁷ Cabala bin kotwero kelo ki Misiri i wel me siliba akaya tol kanyape (600), do asigira acel bin kokelo i wel me siliba tol acel kede ot kany (150). Jocat wil me abaka da ko bin cato gi but abakai dedede me jo Kiti kede but abakai me Siria.

2 Iyutun 2

likere me Gero Tempulo

(1 Abakai 5.1-18)

¹ Abaka Sulumani bin cunye oko mito gero ne Rwot tempulo, kede da pi gero paco mere me abaka.

² Sulumani bin oko rwako jo i tic tetek; jo tutumia ot kanyaare (70,000) kame yeo jame me gedo, kede jo tutumia ot kanyauni (80,000) kame pao kide. Jo kame daro jotic oudo tie tutumia adek kede tol kanyape (3,600).

³ Sulumani bin oko cwano kop but Abaka Kiram me Taya be, “In bin iwinyere kede papa na Daudi di iko bedo cwano ne yen seda me en gero kede gi ot kame en oudo emito bedo iye.

⁴ Nan ango amito gero ne Rwot Rubanga na tempulo, di ako bino kwere bute. En ebino bedo kakame komie iye giayala me odok angwe kur, kede kame koyalo ne iye nakanaka mugati kacil, kede kame komie iye giayala awanga odiko kede otieno acelacel, kede i ceng Sabato kede i Ebagame Por Duwe, kede i ceng adongo ace me woro Rwot Rubanga wa. En eciko ne jo me Isirael pi timo kamanoni nakanaka.

⁵ Ot kame ango abino gero bino bedo dwong, pien Rubanga wan dwong kalamo rubangan apat.

⁶ Do ngai kame twero gero ne ot, pien akadi malo da, akadi malo kakawiriwir da likame rome? Ango do abedo ngai kamio atwero gero ne ot, kwanyo kenekene kakame komie iye giayala?

⁷ Aso, nan cwai na ngatic cing atie kede diru me tic kede nyonyo saabu, siliba, buronsi, kede ayon; kede da di etie kede diru me cweno igoen ebululu ebululu, akwakwar kede akwar, doko da di epwonyere i tic me goro cal i kom jamini. En ebino nywako tic kede jodiru kame tie keda i Yuda kede Yerusalem, jo kame bin papa na Daudi oyeru.

⁸ Cwai na da ibaon me yen seda, saipuras, kede alegum, pien ango angeo be jotic nin tie kede diru i tic me ibaon me Lebanon. Jotic nango bino tic karacel kede jotic nin



⁹Pi iiko nango ibaon di tot adikinicel, pien ot kame ango atie gero obedo ot adwong twatwal, doko da en ebedo ot me aura.

¹⁰Ango abino mino jo ni ayango ibaon ipukoi tutumia ot are (20,000) me engano kame koriego, kede mawele da arom kamanono, kede bwini lita tutumia tol ongwon (400,000), kede mo me olibeti da karom kamanono.”

¹¹Abaka Kiram me Taya oko dwoko ne Sulumani kop kede baluwa kame waco be, “Pi kite kame Rwot maro kede jo mege omio eko keti ibedo abaka me jo mege.

¹²Pak bed but Rwot Rubanga me Isirael, ngat kocweo malo kede piny, en ngat kame emio Daudi awobi ariek, kopong kede diru kede niang, en ngat kame nan emito gero ne Rwot tempulo, kede da gero paco meren me abaka.

¹³Nan ango atie cwano ni ngatic cing ariek di etie kede diru, nyinge Kuram Abi.

¹⁴Toto mere oudo obedo dako me ekeko ka Dan, do papa mere oudo obedo anywali me Taya. En epwonyere timo jamini kede nyonyo saabu, siliba, buronsi, ayon, kede da kide, kede ibaon. Doko da engeo tic kede igoen akwakwar, ebululu ebululu, akwar, kede aliamaliam. En etwero goro cal me gimoroni dedede di elubo ekite kame koporo ne kede. Mie etim tic karacel kede jodiru jotit nin, kede jodiru kame bin otimo tic ne papa ni, Abaka Daudi.

¹⁵Aso nan cwai ne wan engano, mawele, bwini, kede mo me olibeti kame oudo icikere pi cwano.

¹⁶Wan obino yango nin ibaon dedede kame imito ki Lebanon, di oko twetweo gi di oko mino nam molo gi paka Jopa; di do in iko bino kobo gi Yerusalem.”

Kocako Gero Tempulo

(1 Abakai 6.1-38)

¹⁷Abaka Sulumani oko maro jokumbor dedede koudo bedo i lobo me Isirael, bala kame papa mere Daudi da bin otimo. Jokumbor dedede oko romo tutumia tol acel kede ot kany kiwie adek ki tol kanyape (153,600).

¹⁸En bin eko mino jo tutumia ot kanyaare (70,000) kikom gi tic me weko jame me gedo, kede jo tutumia ot kanyauni (80,000) tic me pano kide ki mori, kede jo tutumia adek kede tol kanyape (3,600) oko bedo jo kame daro jotit.

2 Iyutun 3

¹ Sulumani oko cako gero ne Rwot tempulo i Yerusalem i wi moru me Moria, kakame Rwot oudo oneeno ne papa mere Daudi kiye, en laru me pieto ka Arauna Ngajebus.

²En ecako gedo i ceng me are me duwe me are me mwaka me ongwon me apugan mere.

³Tempulo kame Sulumani bin tie gero oudo rom mere tie kaman: boro mere oudo tie mita ot are kiwie kanyaare, kede laco mere oudo tie mita kanyangon.



⁴Agola me nyime me donyo iye oudo laco mere rom aroma kede me tempulo, mita kanyangon, do boro mere malo oudo tie mita ot kany kiwie ongwon. Agola nono yie oudo kopuco kede saabu kame kojililo.

⁵Agola adwong mere oudo konamo iye ibaon me yat saipuras, di oko puce kede saabu kame kojililo, kame oko goro iye cal me tugere kede irikoi.

⁶Abaka oko tubuso tempulo kede kide kacil kede saabu kame kokelo ki lobo me Parabaim.

⁷En etio kede saabu me puco apama me tempulo, ipirin mege, piny i nyim ikekon mege, karacel kede ikekon mege. Oudo kogoro cal me cerubim i apamai mege.

⁸Agola me yie, en Kabedo Kacil Kalamo, laco mere oudo tie mita kanyangon, manono en oudo laco me tempulo lung, kede boro mere da mita kanyangon. Bin kotio kede saabu aromo bala kilo tutumia ot are (20,000) me mwono apama me agola nono.

⁹Bin kotio kede saabu guram tol kany kede ot kanyaare (570) me timo sumalin. Agolai me malo da bin kopuco yi gi kede saabu.

¹⁰ Bin oko gurauno cweno cal are me cerubim di oko puco kom gi kede saabu, di oko cibo gi i Kabedo Kacil Kalamo,

¹¹⁻¹³ kakame oudo kicungo iye acel tetucel kede ocelu da tetucel di kineno ekeko. Buli acel oudo tie kede bwome are, buli bwome boro mere oudo tie mita are kede sentimita ot are. Oudo koyararo bwom gi tetekeny bwom cerubim acel oudo tuno i apama me tetucel, di bwom cerubim ocelu da ko tuno i apama me tetu ocelu; bwom gi icegun kame orieo tetu cuny agola oudo riamo. Aso bwom gi bin oyarere oko bedo mita kanyangon, manono en laco me agola nono.

¹⁴ Esuka me isenge me Kabedo Kacil Kalamo oudo kotimo kede egoe aliamaliam di kocile kede erangi ebululu, akwakwar kede akwar, di etie kede cal me cerubim iye.

Ipirin Are me Nyonyo Buronsi

(1 Abakai 7.15-22)

¹⁵Abaka oko mino kotimo ipirin are, buli acel oudo boro mere tie mita tomon kiwie kany kede dul, di eko cibo gi i nyim tempulo. Acelacel oudo tie kede arop i wie kame boro mere malo tie mita are kede sentimita ot are.

¹⁶Arop acelacel oudo kotubuso wie kede cal me irikoi kame kokedo, di oko timo cal me anyakini me pomagurunet tol acel kede nyonyo buronsi di oko keketo gi i kom irikoi nogo.

¹⁷En eko cibo ipirin nogo i nyim tempulo, acel i bad tetucel kede acel da i bad tetu ocelu. Acel me bad tetu cam en eko cako nyinge be Yakin, acel me bad tetu ngodal eko cako nyinge Boasi.

2 Iyutun 4

Jamini me yi Tempulo



(1 Abakai 7.23-51)

- ¹ Abaka Sulumani bin oko mino kotimo alutari me nyonyo buronsi, kame laco mere oudo tie mita kanyangon, boro mere da kamanono, kede boro mere malo oudo tie mita ongwon kede dul.
- ² Bin eko da timo epipa kame kolwongo be nam adwong, tut mere oudo tie mita are kede sentimita ot are, laco me dude piny oudo tie mita ongwon kede sentimita ot ongwon, kede doge rimaro oudo tie mita tomon kiwie adek kede sentimita ot are.
- ³ Irotin are me cal me twonin kame kotimo kede nyonyo buronsi bin tie i lak epipa nono rimaro i ooko mere. Cal me twonin nogo bin kotimo i kom epipa nono i kare kame bin kotete kede.
- ⁴ Epipa nono bin cungo i ngei cal me twonin tomon kiwie are kame kotimo kede nyonyo buronsi, kame nyim gi oudo neno ooko; adek bin cungo di kineno bad tetu malo, adek neno bad tetu tim, adek bad tetu piny, kede adek neno bad tetu kide.
- ⁵ Bimirir me lak epipa nono oudo tie milimita ot kanyaare kiwie kany; lake oudo cal bala lak i kopo, di eyarere ooko bala ature. En oudo etero pii kame romo lita tutumia ot kanyape (60,000).
- ⁶ En eko da timo kalayan tomon me lwokere, di oko keto kany i bad tetu cam kede kany i bad tetu ngodal. Oudo kotio kede gin me lalao jamini kame kotio kede gi i kom giayala awanga. Pii me epipa josaseredoti en kame oudo lwokere kede.
- ⁷ Bin eko da timo icegeren tomon kede saabu, me cibo italan iepone kame oudo komito kede, di eko cibo gi i tempulo, kany i bad tetu piny, kede kany i bad tetu malo.
- ⁸ Doko da oko timo imesai tomon di oko cibo gi i tempulo, kany i bad tetu cam kede kany i bad tetu ngodal. Di oko da timo kalayan tol acel me saabu.
- ⁹ Bin oko timo diakal me Josaseredoti, kede da diakal me ooko, kede ikekon adonyo i diakal nono. Ikekon kame oudo tie i dierediere me diakal nogo oudo konamakino kede nyonyo buronsi.
- ¹⁰ Bin oko sipo epipa i bad tetu piny me bad kide me yi tempulo.
- ¹¹ Kuram bin oko timo da agune, jamini me kikiso wi alutari, kede kalayan. En bin eko tieko timo tice dedede kame oudo en etie timo ne Abaka Sulumani, kame mako tempulo ka Rwot. Magonogi en jamini kame bin en eko timo:
- ¹² Ipirin are, arop are kame oudo tie i wi ipirin nogo, cal are me irikoi kame oudo tie i kom arop nogo;
- ¹³ Cal me pomagurunet tol ongwon, kame kotimo i irotin are i wi arop me epir acelacel;
- ¹⁴ Cegeren, kede kalayan tomon kame koketo i wi cegeren nogo;
- ¹⁵ Epipa acel, kede cal me twonin tomon kiwie are kame epipa nono cungo i ngei gi;



- ¹⁶agune, jamini me kikiso alutari kede kalayan. Jamini nogi dedede Kuram bin otimo ne Abaka Sulumani kede nyonyo buronsi aber kalamo, pi en keto gi i ot ka Rwot.
- ¹⁷Abaka bin oko mino koteto jamini nogi i kabedo kame elupe oudo tie iye, i dierediere me Sukot kede Sereda, i aditot me Yorodan.
- ¹⁸Sulumani bin oko mino kotimo jamini nogi di tot twatwal, di manono oko mino rom me nyonyo buronsi kame kotio kede likame oko ngere.
- ¹⁹Sulumani bin oko mino kotimo jamini dedede kame oudo tie i ot ka Rwot: alutari kame kotimo kede saabu, emesa me saabu kame bin koketo iye mugati kame koyalo but Rwot,
- ²⁰gicibo italan kede italan gi kame kotimo kede saabu kame kojililo kiber, gin bin kicungo i nyim Kabedo Kacil Kalamo bala kite kame oudo koiko kede;
- ²¹cal me ature, italan, kede ilumai me kwanyo mac,
- ²²gi iiko ausin me italan, kalayan, bakulin me dunyo odok angwe kur, kede itatany me kwanyo mac; gin dedede kotimo gi kede saabu kame kojililo. Ikekon me donyo i tempulo kede ikekon me yie adonyo i Kabedo Kacil Kalamo oudo komwono kede saabu.

2 Iyutun 5

¹Epone no en kame bin tic kame Abaka Sulumani otimo me gero ot ka Rwot oko tiek kede. En bin eko tero jamini dedede kame oudo papa mere Daudi omio but Rwot di eko keto gi i agolai me kano jamini i tempulo. Jamini nogo bin ribo siliba, saabu kede ace apat.

Kotero Sanduku me Isikan i Tempulo

(1 Abakai 8.1-9)

- ²Di do Abaka Sulumani bin oko lwongo joadongo me Isirael kede jotel me ikekon, jotel me ude me joakwari me Isirael, pi gin bino bute Yerusalem tetekeny kikwany Sanduku me Isikan ka Rwot ki Sion, Bomba ka Daudi, di kiko tere i tempulo.
- ³Jo dedede me Isirael bin oko cokere but Abaka Sulumani i kare me Ebagga me Kimere i duwe me kanyaare.
- ⁴Kakame joadongo me Isirael otieko cokere kede, Jolebi oko tingo Sanduku me Isikan
- ⁵di kiko tere i tempulo. Jolebi kede josaseredoti bin oko da kobo i tempulo Eema me riamo kede jamini mege kacil dedede.
- ⁶Abaka Sulumani kede jo dedede me Isirael kame oudo ocokere bute oko cungo i nyim Sanduku me Isikan, di gin kiko mino giayala angola me romini kede twonin atos tot kalikame marere.
- ⁷Di do josaseredoti oko tingo Sanduku me Isikan kiko tere kabedo mere, i Kabedo Kacil Kalamo, i dud bwom cerubim.



⁸Pien oudo cerubim nogo oyaro bwom gi i kabedo me Sanduku me Isikan, tetekeny bwom gi nogo oudo umo wi Sanduku me Isikan kede atekai me tinge da.

⁹Atekai nogo oudo bocoboco twatwal, ka dano moro oudo ocungo i nyim Kabedo Kacil Kalamo, en oudo ekaruno neno wi gi; do likame oudo kokaruno neno gi ki ooko. Atekai nogo pwodi tie kunono tuno tin.

¹⁰Gimoro ace oudo likame tie i yi Sanduku nono kwanyo kenekene kide abatal are nogo kame bin Musa oketo iye i moru me Sinai, i kare kame bin Rwot otimo kede isikan kede jo me Isirael, di gin bin kiyai ki Misiri.

Deyo ka Rwot

¹¹⁻¹⁴ Josaseredoti dedede koudo tie kanono oko lonyere abongo popoko ikodeta gi. Jolebi kobedo jower dedede, gin en Asap, Keman, kede Yedutun, kede jo me ude kame gin kiwok kiye, oudo tie ngapo igoen aliamaliam. Jolebi oko cungo i bad tetu kide me alutari, di kitie kede bule kede adungu, di josaseredoti tol acel kede ot are (120) tie kuto agwarai. Jo oudo tie wer di okuto agwarai di ogo bule kede jamini ace me goc, di dwan gi upere kede wer. Oudo kitie pako Rwot di kiwero be, “Opakunu Rwot, piento en eber, doko amara mere bedo nakanaka.” Kakame josaseredoti oudo tie donyo kede ooko me tempulo, edou oko umo yi tempulo pukupuk, omio josaseredoti likame oko karuno timo tic gi, pien rieny me deyo ka Rwot oudo oromo yi tempulo dedede.

2 Iyutun 6

Yamo ka Sulumani but Jo

(1 Abakai 8.12-21)

¹Di Abaka Sulumani oko lego be, “Rwot in itieko waco be in ibino bedo i edou acol cucucuc.

²Ango atieko gero nin ot me deyo, kakame in ibino bedo iye pi kare lung.”

³Di do abaka oko lokere but jo di eko lamo winyo ne jo dedede kocokere me Isirael, di gin dedede kitie cungo.

⁴En ewaco be, “Pak bed but Rwot, Rubanga me Isirael, en ngat kame kede teko mere etieko cobo timo gikame bin en ecikere iye di ewaco kede doge but papa na Daudi be,

⁵ Cako i kare kame ango bin akwanyo kede jo na me Isirael ki Misiri, ango pwodi likame ayero bomba moro me ekeko moro me jo me Isirael kame poore ger iye ot, kakame kobino wora iye; doko da ango likame ayero ngatamoro pi bedo ngatel me jo na me Isirael.

⁶Do nataman ango ayero Yerusalem pi bedo kakame kobino wora kiye, doko da atieko yero Daudi pi bedo ngapug me jo na me Isirael.’ “

⁷Sulumani oko meede be, “Papa na Daudi oudo tie kede tam me gero ot me woro Rwot, Rubanga me Isirael.



⁸Do Rwot bin oko waco ne be, ‘In itimo ber pi bedo kede tam me mito gero nango ot me wora,

⁹akadi kamanono da, in en kalikame ibino gero ot nono, do wodi kame in ibino nywalo en kame bino gero nango tempulo.’

¹⁰” Aso, Rwot nataman otieko cobo cikere mere, pien ango nataman atieko lunyo wang papa na Daudi bala abaka me Isirael, doko atieko gero ot me woro Rwot, Rubanga me Isirael.

¹¹Ango atieko cibo i tempulo Sanduku me Isikan, kame kide abatal me isikan ka Rwot tie iye, isikan kame bin en etimo kede jo me Isirael.”

Ilega ka Sulumani

(1 Abakai 8.22-53)

¹²Di do Sulumani oko ot di en eko cungo i nyim alutari i nyim jo dedede me Isirael, di en eko tango cinge malo.

¹³(Sulumani bin oudo otimo kede nyonyo buronsi kakame koyito iye pi yamo kede jo. Oudo laco mere tie mita are kede sentimita ot are, kede boro mere da kamanono; boro mere malo oudo tie mita acel kede sentimita ot adek. En bin eko kete i diakal. En eko yito kanono di eko riondiko kakame jo dedede twero nene kiye di eko kiarao bade malo.)

¹⁴En eko lego be, “Okwe Rwot, Rubanga me Isirael, likame tie Rubanga moro kame cal bala in, i malo arabo piny i dud lobo! In igwoko isikan ni doko in inyuto amara ni kalikame lokere but jotic ni kame lubo kop ni kede cuny gi lung.

¹⁵In itieko gwoko isikan ni kame bin imio but ngatic ni papa na Daudi; in bin icikere di iwaco kede dogi, di tin in iko mine ecobere kede teko ni.

¹⁶Pi manono, Okwe Rwot, Rubanga me Isirael, ango akwai igwok cikere ni but ngatic ni papa na Daudi, cikere kame bin in iwaco iye be, ‘In likame ibino bedo abongo ngat kame lunyo wangi bala abaka me Isirael, kenekene ikwae ni poore gwok yote me kuo gi, di gin kiko lubo iswilia na bala kame in itimo.’

¹⁷Pi manono, Okwe Rubanga me Isirael, mi kop kame in bin icikere iye but ngatic ni papa na Daudi cobere.

¹⁸ “Do in, Okwe Rubanga, kom ateteni ibino donyo bedo i lobo kan kede jo? Akadi malo lung likame romi, kara do benyo benyo kame ot noni kame ango atieko gero bino romi kede?

¹⁹Ango akwai, Okwe Rwot Rubanga na, tim ber iwiny kwac na kede ingangai na, ango ngatic ni; ango abako dogi buti iwiny kwac na kame akelo buti tin.

²⁰ Gwok ot noni iceng kede iwor, kabedo noni kame in itieko yamo i kome be kobino wori kiye. Aso ango akwai iwiny kwac na ka ango aloko nyima tetu ot noni di ako ilega.



- 21**Winy ingangai na kede me jo ni me Isirael ka gin kiloko nyim gi tetu kabedo noni di kiko ilega. Okwe winy wa i malo kabedo ni; winy kwac wa di iko sasiro wa.
- 22**” Ka dano moro otimo dub but dano ocelu di oko mine be elairo, di oko kele lairo i alutari nin i ot noni,
- 23**Okwe Rwot winy i malo di iko ngolo kop i dierediere me jotic ni. Mi alola but ngat kame tie kede raco di iko dwoko ne rac mere i wie, do mi ngat kame li kede raco moro bed kiber bala kame poore ne.
- 24**” Ka jokwor oko bwono jo ni me Isirael pien gin kitimo dub buti, di do gin kiko bobo lokere buti, di kilwongo nyingi, kede di kikwai di kibako dog gi buti i ot noni,
- 25**winy kwac gi i malo. Sasiro dub ka jo ni me Isirael, di iko bobo dwoko gi i lobo kame bin in imio gi kede joakwari gi.
- 26**” Ka malo oko cegere di kot oko bedo li, pien gin kitimo dub buti omio in iko mino gin alola, di do gin kiko swilaro ki dub gi di kiko loko nyim gi tetu kabedo noni di kiko ilega di kilwongo nyingi,
- 27**tim ber iwiny kwac gi i malo. Sasiro dub ka jotic ni, jo me Isirael. Pwony gi yongayo me kuo aber kame poore kilubi, di iko mino kot cwei i lobo noni kame in itieko mino jo ni pi doko mergi.
- 28**” Ka kec opoto i piny arabo aumpuli, amoto ceng owango cam i poti, arabo obonyo amoto ekutele, arabo ka jokwor ka jo ni oluko gi i bomba gi moro, arabo ka aumpuli moro amoto tuo moroni omako gi,
- 29**tim ber iwiny kwac gi. Ka ngatamoroni kenekene kikom jo ni me Isirael, arabo jo ni dedede me Isirael atie kede cweruncy, oko lego di kirieo cing gi tetu ot noni,
- 30**tim ber iwiny kwac gi i malo kabedo ni. Sasiro gi di iko konyo gi. Tim negi gikame poore kede yote me kuo gi, gikame in ingeo kame tie i cuny gi, pien in keni en kame ingeo gikame tie i cuny dano acelacel.
- 31**Manono bino mino gin kilwori pi kare dedede kame gin kibedo kede i lobo nono, lobo kame in bin imio joakwari wa.
- 32**” Iepone acel nono, ka jokumbor, jo kalikame obedo jo ni me Isirael, oko bino ki piny abor pien kiwinyo iruo me nyingi, twer ni kede teko ni, di gin kiko bino lego buti i ot noni,
- 33**tim ber iwiny kwac gi i malo kabedo ni. Tim negi gikame kikwai pire, tetekeny jo dedede me wi lobo ngei di gin kiko bedo kede lworu buti, bala jo ni me Isirael. Di do gin kiko bino ngeno be ot noni kame ango atieko gero obedo meri.
- 34**” Ka jo ni bino ot yi kede jokwor gi, karamoroni kenekene kame in ibino cwano gi iye, di gin kiko lego buti di kiloko nyim gi tetu bomba noni kame in itieko yero, kede tetu ot noni kame ango atieko gero nin,
- 35**tim ber iwiny ilega kede ingangai gi i malo, di iko mino gi kibwon jokwor gi.



³⁶” Ka gin kiko timo dub buti, pien likame tie dano moro kalikame timo dub, di in cunyi oko wang negi di iko mino gi i cing jokwor gi, tetekeny koter gi tenge bala mabus i lobo me jokwor gi, kakabor amoto kiyapiyapi;

³⁷ka i lobo kame kotero gi iye kunono bala mabus, di wi gi oko yabere di kiko swilaro, di kiko bako dog gi buti di kiwaco be, ‘Wan otieko dubo, doko otimo gi kalikame poore, wan otimo gikarac’ ;

³⁸ka gin kiko swilaro kede cunyi gi dedede kede kuo gi lung i lobo ka jokwor gi kunono, jo koudo otero gi bala mabus, di gin kiko lego buti di kiloko nyim gi tetu lobo noni kame bin in imio but joakwari gi, kede bomba noni kame in itieko yero, kede ot noni kame ango atieko gero nin,

³⁹tim ber iwiny kwac gi kede ingangai gi i malo kabedo ni, di iko sasiro jo ni kotimo dub buti.

⁴⁰” Nan do, Okwe Rwot Rubanga na, yab wangi di iko ciko yiti i kom ilega kame jo bino timo ki kanoni.

⁴¹ Rwot Rubanga, nan yai malo di iko donyo i kabedo me wei ni, in karacel kede Sanduku me Isikan ni, en gianena me twer nin. Mi josaseredoti ni winyo i gi dedede kame kitimo, di iko mino jo ni bed kede yomcunyi pi bero ni but gi.

⁴²Okwe Rwot Rubanga, kur ilokere dagi abaka kame in itieko wiro. Yutuno amara ni kalikame lokere kame oudo itie kede but ngatic ni Daudi.”

2 Iyutun 7

Kwero Tempulo

(1 Abakai 8.62-66)

¹ Kakame Abaka Sulumani otieko kede ilega mere, mac oko bino wok ki malo di eko wango giayala kame oudo komio, di rieny me deyo ka Rubanga oko romo yi tempulo dedede.

²Josaseredoti likame oko twero donyo i yi tempulo pien oudo epong kede rieny me deyo ka Rwot.

³Kakame jo me Isirael oneno kede mac di wok ki malo, kede doko di rieny me deyo ka Rwot di oromo yi tempulo, gin kiko luro wi gi piny i diakal, di kiko woro Rubanga di kimie pwoc di kiwaco be, “En eber, pien amara mere kalikame lokere bedo nakanaka.”

⁴Di do Abaka Sulumani kede jo dedede kame bin tie kede en, oko mino giayala but Rwot.

⁵Sulumani oko mino bala giayala me nywak but Rwot doke tutumia ot are kiwie are (22,000), kede romini tutumia tol acel kede ot are (120,000). Aso, abaka kede jo dedede me Isirael oko bin kwero ot ka Rubanga kamano.



⁶Josaseredoti oudo ocungo i kabedo kame komio gi; Jolebi da oko cungo kargi, di kitie pako Rwot Rubanga kede jamini me goc kame bin Abaka Daudi otimo me pako Rwot, di kiwero be, “Amara mere bedo nakanaka!” I bad tetucel kakame pimere kede gi, josaseredoti oudo tie kuto agwarai di jo dedede me Isirael tie cungo.

⁷Cenge nono da abaka oko kwero cuny diakal kame oudo tie i nyim ot ka Rwot. En emio giayala awanga kede giayala me alos kede kakamio me giayala me nywak kanono. En etimo kamanono pien alutari me nyonyo buronsi kame oudo tie i nyim Rwot oudo titidi twatwal likame eromo giayala nogi dedede.

⁸Aso, Sulumani kede jo me Isirael dedede oko tedo ebaga pi ceng kanyaare. Twon ekodet me jo en kame bin tie kunono, jo kame bin owok cako ki Lebo Kamat tuno i esamai me ikor me Misiri.

⁹Gin bin kitieko ceng kanyaare kwero alutari, kede doko ceng kanyaare kwero Ebaga me Kimere. I ceng me ajikini gin kiko bedo i cokere kacil,

¹⁰di do i ceng kolubo mere, en ceng me ot are kiwie adek me duwe me kanyaare, Sulumani oko peruno jo odok i miere gi di kilelo, doko di cuny gi yom twatwal pi bero dedede kame Rwot otimo ne Daudi kede ne Sulumani, kede ne jo mege me Isirael.

Rubanga bobo Oneeno but Sulumani

(1 Abakai 9.1-9)

¹¹Di do bin Sulumani otieko gero ot ka Rwot kede paco me abaka di eko cobo timo gi dedede kame oudo eiko,

¹²Rwot bobo oko neeno bute iwor di oko waco ne be, “Ango atieko winyo ilega ni, doko atieko gamo tempulo noni pi bedo kakame komia kiye giayala.

¹³Ka ango acego malo di ako gengo kot cwei, amoto ka acwao obonyo obino dudubo lobo noni, arabo ka acwao aumpuli i kom jo na,

¹⁴ka gin kiko turere i cuny gi, di kiko mona, di kiko lokere tenge ki gikareco gi, ango abino winyo kwac gi i malo di ako sasiro gi, di ako cango peko atie i lobo gi.

¹⁵Aso, nan ango abino yabo wanga, doko abino ciko yita i kom ilega kame kotimo i kabedo noni.

¹⁶Ango ayero ot noni, doko atieko lonye pi bedo kakame kowora kiye nakanaka; wanga kede cunya bino bedo iye pi kare dedede.

¹⁷Aso, ka in ibino timo tic na kede genere, bala kame Daudi papa ni bin otimo, di itimo gi dedede kame ango aciko ni, di ilubo pwoy kede iswilia na,

¹⁸ ango abino sipakino ajakanut ni i Isirael, bala kame bin ango acikere kede but papa ni Daudi di awaco ne be, ‘Likame in ibino bedo abongo ngat kame lunyo wangi bala abaka me Isirael.’

¹⁹Do ka wun ikounu lokere tenge, di ikounu weko gwoko cik kede iswilia na kame ango atieko mino wu, do di ikounu donyo timo tic ne rubangan apat di iworunu gi,



²⁰ango abino kwanyo wu tenge ki lobo kame amio wu, di ot kame ango atieko lonyo pi bedo mera noni ako bino weko, eko bino doko gikame atekerin apat golao di kicao.

²¹” Bed bala tempulo noni nan jo uro kitek, jo dedede kame beo i ngete kom gi bino to di kipenyere be, ‘Pinyo bo komio Rwot otimo gikame cal kamanono ne lobo noni kede ot noni?’

²²Di do gin kiko bino waco be, ‘Pien gin kiweko Rwot Rubanga gi, ngat kame bin okwanyo joakwari gi ki lobo me Misiri, di gin kiko dak but rubangan mogo icegun, di kiko donyo woro gi, doko di kitimo negi tic. Pi manono, Rwot otieko kelo can noni i kom gi.’ “

2 Iyutun 8

Tice Abeco Ace kame Sulumani Otimo

(1 Abakai 9.10-28)

¹Gero ot ka Rwot kede ode me ka abaka bin otero ne Sulumani mwakini ot are.

²En bin eko medo gero bomban kame Abaka Kiram bin omie, di eko cwano jo me Isirael ot bedo i yi gi.

³Bin en eko mano adul me Kamat Soba,

⁴di eko gero bomba me Tadamor i wi tim, kede eko gero bomban ace me gwoko jamini i adul me Kamat.

⁵Sulumani bin oko da medo gero bomban me Bet Koron Amalo kede Bet Koron Apiny (bomban kame kocelo kede apama atek, di kitie kede irutei kame kocego),

⁶bomba me Balat, kede bomban dedede kame oudo en egwoko iye jame, bomban kame bin kogwoko iye cabalan mege kede asigiran. Sulumani bin oko cobo iik mere me gedo i Yerusalem, Lebanon, kede i lobere dedede kame en oudo epugo.

⁷⁻⁸Jo kame Sulumani bin obedo mako tetek pi timo tice mege me gedo gin en jo kame bin jo me Isirael likame oko neko kikom jo Kiti, jo Amor, jo Perisi, jo Kibi, kede jo Yebu. Tuno tin pwodi ikwae gin tie ipasoi kamanono.

⁹Do Sulumani bin likame omio dano moro me Isirael obedo epasoit; gin bin kibedo isirikalen, jodongo me tice mege, jotel me isirikalen mege, jotel me cabalan me yi kede jo kame ringo kede asigiran mege.

¹⁰Jodongo kame bin lo tice me gedo ka Sulumani oudo tie tol are kede ot kany, gin en nyampalan kame bin pugo jotic.

¹¹Sulumani bin oko kwanyo dako mere nyar ka abaka me Misiri ki Bomba ka Daudi di eko kobe i ot kame en oudo egero ne. En oudo ewaco be, “Dako nango likame bino bedo i ot ka Abaka Daudi me Isirael, pien kakame Sanduku me Isikan obedo iye udo odoko kabedo kacil.”

¹²Di Sulumani oko donyo mino giayala awanga i wi alutari kame en oudo egero i nyim tempulo.



¹³ En oudo emio giayala di lubere kede cik me Iswil ka Musa amako ceng adongo: ceng Sabato, Ebaga me Por Duwe, kede ibagai adek me buli mwaka, magonogo en Ebaga me Mugati ali kede Arup, Ebaga me Kac, kede Ebaga me Kimere.

¹⁴Di bin elubo iswilia kame papa mere Daudi oudo otieko keto piny, en bin eko popoko tice me ceng acelacel ne josaseredoti, kede ne Jolebi kame bin konyo josaseredoti kede wer kede timo tice gi. En doko da eko popoko jodar kame pore daro irutei buli ceng acelacel, di elubo cik kame Daudi dano ka Rubanga oudo omio.

¹⁵Kope dedede kame Daudi oudo omio josaseredoti kede Jolebi amakere kede gi dedede, kiton agolai me gwoko jame, oudo kolubo gi odocon.

¹⁶Tuno i kare noni iik ka Sulumani me gedo oudo do otieko cobere. Cako ki cibo kide me dud apama tuno i tiek me tempulo lung oudo do tic mere otiek.

¹⁷Di Sulumani bin oko ot i idoketa me Esiongeber kede Elat i dog nam adwong, i lobo me Edom.

¹⁸Abaka Kiram bin oko cwano ne imerin di jotic mege en kame telo gi, doko di joudo ipirana en kame kwango gi. Gin bin kiko ot i lobo me Opir karacel kede jotic ka Sulumani, di gin kiko kelo ki kunono saabu kame kalamo kilo tutumia tomon kiwie kany (15,000), kame gin kiko mino Sulumani.

2 Iyutun 9

Ot Weno ka Abaka Adako me Seba

(1 Abakai 10.1-13)

¹ Kakame abaka adako me Seba owinyo kede iruo me nying Sulumani, en eko bino bute Yerusalem pi tame kede peny mogo atek. En bin eko bino kede twon ekodet me jo kame bin gwoke, karacel kede aguraguran kame yeo jamini angwe kur, saabu kede kide me wel. Kakame en bin eko tuno kede but Sulumani, en eko pepenyo en peny dedede kame oudo tie i tam mere.

²Sulumani bin oko dwoko peny mege dedede; likame bin tie peny moro akadi acel kame dwoko oko bwono abaka.

³Kakame abaka adako me Seba bin oneno kede rieke ka Sulumani dedede, ot kame bin egero,

⁴cam kame oudo otoko i wi emesa mere, kite kame jodongo me apugan mere oudo bedo kede, kite kame jotic mege gwoke kede, igoen kame gin bin kingapo, jotic kame oudo gwoke di etie camo ebaga, kede giayala awanga kame bin en emio i ot ka Rwot, manono oko mino wie ocungo.

⁵En eko waco ne abaka be, “Kop kame oudo ango awinyo i komi i lobo na, kop i kom rieke ni kede jamini kame in itieko timo, obedo kop me ateni.

⁶Do ango oudo likame ako yei kede kop nono tuno ango bino kan di ako neno kede wanga. Kop kame oudo owaco nango likame kong romo akadi dul me rieke nin da; rieke kede lonyo nin kalamo gikame oudo kotatamo nango.



⁷Jo ni tin tie kede winyo benyo! Jotic ni tin tie kede winyo benyo, gin jo kame kitio buti nakanaka di kiwinyo kope ni me rieko!

⁸Pak bed but Rwot Rubanga ni, en ngat kame cunye obedo yom i komi di eko keti ibedo abaka me Isirael! Pien Rwot otieko maro jo me Isirael atwal, en etieko mini ibedo abaka pi timo gi me ateni kede kopooe.”

⁹Di do en eko mino abaka saabu kame kalamo kilo tutumia ongwon (4,000), twon jamini angwe kur, kede kide me wel; likame bobo tie kare moro kame bin otero ne kede abaka Sulumani jamini angwe kur kame koromo poro kede kame abaka adako me Seba omie.

¹⁰Medo i wi manono, imerin ka Kiram kame bin yeo saabu kikelo ki Opir, bin oko kelo da ibaon me yat alemug kede kide me wel.

¹¹Sulumani bin oko tic kede ibaon nogo me timo kayito me ot ka Rwot kede me ot ka abaka, kede da me timo adungun kede arigirigin ne jogoi were; likame bobo ibaon me yat alemug kame cal kede magonogo oko neeno i Yuda tuno tin.

¹²Abaka Sulumani bin oko mino abaka adako me Seba jamini dedede kame en oudo enyuto be cunye mito, jamini kame kalamo giamia kame abaka dako nono oudo okelo ne. Di do abaka adako nono kede jotie mege oko dok i lobo mere.

Abar ka Sulumani

(1 Abakai 10.14-25)

¹³Buli mwaka bin kokelo ne Abaka Sulumani saabu kame buco romo kilo tutumia ot are kiwie adek (23,000),

¹⁴di likame oribo iye saabu kame bin jocat wil kelo. Abakai dedede me Arabia kede jopug me lobo me Isirael bin da tero ne saabu kede siliba.

¹⁵Sulumani bin oko timo ibukui alac tol are (200) kede saabu; ebuku acelacel bin otero saabu kame buco romo kilo kanyaare.

¹⁶En bin eko timo da ibukui atitino tol adek (300); ebuku acelacel bin otero saabu kame buco romo kilo adek. Abaka bin oko mino koketo ibukui nogo i Ot me Abum me Lebanon.

¹⁷Abaka bin oko timo da kede lak liec kom adwong me ajakanut di eko puno kome kede saabu kame kojililo kiber.

¹⁸Kom me ajakanut nono bin tie kede ariin kanyape kame konyono pi yito i wie. Wi kom nono oudo oguraun i cen ngee, di etie kede bade ka gongo cing i ngete tuni tuni, doko i nget bade acelacel oudo cal me engu cungo iye.

¹⁹Doko da i nget ariin kanyape kame konyono pi yito i wi kom nono bin cal me inguon tomon kiwie are tie iye; engu acelacel i nget ari acelacel tuni tuni. Likame pwodi tie kom moro kame kotimo i ajakanut moro kame cal bala manono.

²⁰Ikopon ka Abaka Sulumani dedede bin kotimo kede saabu, kiton jamini kame bin kotio kede gi i Ot me Abum me Lebanon oudo kotimo kede saabu kame kojililo kiber;



likame bin tie moro kame kotimo kede siliba, pien i kare ka Sulumani siliba oudo likame kotero bala gi me wel.

²¹Abaka bin tie kede imerin kame oto Tarusi karacel kede me ka Kiram. Ingei buli mwakini adek imerin ka Abaka bin dwogo di kikelo saabu, siliba, lak liece, icomio, kede alwaleko.

²²Abaka Sulumani oudo obaro doko di eriek kalamo abakai dedede me wi lobo.

²³Abakai me wi lobo lung oudo cuny gi bin paro pi ot but Sulumani pi winyo kope mege me rieko kame Rubanga omie.

²⁴Ngat acelacel kikom gi oudo tero ne giamia. Gin oudo kitero jamini apapat bala nat siliba kede saabu, igoen, jamini me yi, jamini angwe kur, asigiran, kede pundan. Manoni oudo timere buli mwaka.

²⁵ Sulumani bin tie kede agolai tutumia ongwon (4,000) me gwoko cabalan kede asigiran, kede asigiran tutumia tomon kiwie are (12,000), kame bin en eko cibo i bomban apapat kede ace en bin eko dong kede gi i Yerusalem.

²⁶ En bin epugo abakai dedede cako ki ecilet me Eupurate tuno i lobo me Pilistia, ape paka tuno i ikor me Misiri.

²⁷I kare me apugan mere, Abaka Sulumani bin oko mino siliba odure Yerusalem bala kide, kede ebao me yat seda en eko mino obedo tot atatai bala cukamori me dud mori me Yuda.

²⁸ Asigiran ka Sulumani bin kokelo ki Misiri kede ki lobere apat.

Kope Acegocego amako Apugan ka Sulumani

(1 Abakai 11.41-43)

²⁹Gi dedede kame bin Sulumani otimo, tice mege, kede rieko mere, gin dedede kowandiko gi i *Itabu me Itatam i kom Enabi Natan*, kede i *Imurai ka Akija me Silo*, kede i *Gianyuta but Enabi Ido*, kame da tatamo kop i kom Yeroboam wot ka Nebat.

³⁰Sulumani bin opugo Isirael lung i Yerusalem pi mwakini ot ongwon.

³¹Sulumani bin oko to di oko yike i nget joakwari mege i Bomba ka Daudi, di wode Rekoboam oko lunyo wange bala abaka.

2 Iyutun 10

Jo me Isirael atie i Bad tetu Malo Ojemo

(1 Abakai 12.1-20)

¹Rekoboam oko ot Sekem, pien jo dedede me Isirael oudo ocokere kunono pi cibe doko abaka.

²Kakame Yeroboam wot ka Nebat owinyo kede kop noni di oudo etie Misiri kakame oudo eringo iye kikut abaka Sulumani, en eko dwogo ki Misiri.

³Jo me bad tetu malo me Isirael oko lwonge, di Yeroboam kede ekodet me jo me Isirael oko ot but Rekoboam di kiko waco ne be,



⁴” Papa ni Sulumani bin otero wa kirac, emio wa yeno twon peko. Nan in jajaro peko kame en emio wa yeno nono, di wan oko bino tic nin.”

⁵En eko waco negi be, “Tiekunu ceng adek di ikounu dwogo buta.” Aso jo oko yai kioto.

⁶Di Abaka Rekoboam oko pepenyo tam kibus joadongo kame oudo mio papa mere Sulumani tam i kare kame oudo ekuo kede be, “Tam nyo kame imianu pi dwoko ne jogi?”

⁷Gin kiko dwoko ne be, “Ka in ibedo kede mwolo but jogi di iko yomo cuny gi, di iyamo negi kope abeco, gin kibino bedo jotic ni nakanaka.”

⁸Do en eko dagi lubo tam kame joadongo omie, di eko ot penyo tam kibus awobe kame en edongo kede gi di nan kiko doko jo kame mie tam.

⁹En epenyo gi be, “Tam nyo kame imianu pi dwoko ne jo kokwaa pi jajaro negi peko kame nan kitie yeno?”

¹⁰Gin kiko waco ne be, “Oti iwac ne jo kopenyi nogo be, ‘Lweta atidi dwong kalamo pier papa na.

¹¹Papa na omio wu yeno peko, do ango abino mino wu yeno peko adwong kalamo. En edao wu kede pobo, do ango abino bungo wu kede ebela me lilim.’ “

¹²Aso, Yeroboam kede jo apat dedede oko dok but Rekoboam ingei ceng adek, bala kame en oudo ewaco negi.

¹³Abaka oko yamo kede jo kede dwan ager; en edagi tic kede tam kame joadongo oudo omie,

¹⁴di eko lokere yamo negi kop kame lubere kede tam kame awobe omie. En ewaco negi be, “Papa na oudo omio wu yeno peko, do ango abino mino wu yeno peko adwong kalamo. En edao wu kede pobo, do ango abino bungo wu kede ebela me lilim.”

¹⁵Abaka bin likame oko winyo kwac me jo, pien manono oudo obedo alokaloka kame Rwot oudo tie kelo pi cobo kop mere kame oudo ewaco ne Yeroboam wot ka Nebat ki dog Akija me Silo.

¹⁶ Kakame jo dedede me Isirael oneno kede be abaka odagi winyo kwac gi, gin kiko dwoko ne abaka be, “Wan oli kede iner moro i ot ka Daudi; likame tie gimoro kame wan otwero lunyo amakere kede wot ka Yese. Jo me Isirael, odokunu i miere wa! Rekoboam do pug jo mege me ot ka Daudi.” Aso, jo me Isirael oko dok i iemai gi.

¹⁷Di Rekoboam oko donyo pugo jo kame bedo i bomban me Yuda kenekene.

¹⁸Abaka Rekoboam oko cwano Adoniram, en ngat kame oudo daro jo kame kodio timo tic tetek, but jo me Isirael, do gin kiko didipo en kede kide tuno to. Abaka Rekoboam oko susunyo yito i cabala mere di eko ringo Yerusalem.

¹⁹Cako i kare nono tuno tin jo me Isirael oko bedo jemo ne apugan me ot ka Daudi.



2 Iyutun 11

Kop kame Semaya Omurao

(1 Abakai 12.21-24)

¹Kakame Rekoboam otuno kede Yerusalem, en eko koko jo dedede me ekeko ka Yuda kede me ka Benjamin, gin dedede isirikalen atek tutumia tol acel kede ot kanyauni (180,000). En oudo emito ot yi kede atekerin atie i bad tetu malo pi dwoko gi i loc mere.

²Do Rubanga oko waco ne enabi Semaya

³pi ot waco ne Abaka Rekoboam me Yuda, en wot ka Sulumani, kede ne jo dedede me ikekon ka Yuda kede me ka Benjamin be Rwot owaco be,

⁴” Kur isurunu joawade wu, gin jo me Isirael; wun dedede dokunu i miere wu, pien gi kotimere obedo iik nango.” Aso, gin kiko yei winyo kop ka Rwot di kiko dok i miere gi.

Rekoboam Ocelo Bomban kede Apama Atek

⁵Rekoboam oko dong bedo Yerusalem, di eko gero bomban kame kocelo kede apama atek i Yuda pi gwoko mulem.

⁶En egero bomban me Betelem, Etam, Tekoa,

⁷Betesur, Soko, Adulam,

⁸Gat, Maresa, Sip,

⁹Adoraim, Lakis, Aseka,

¹⁰Sora, Aijalon, kede Keburon.

¹¹En eko celo gi kede apama atek, di eko keto ngadwong me isirikalen i buli bomba acelacel, kede cam, kede mo me olibeti, kede bwini,

¹²kede da ibukui adongodongo kede tongini, di eko mino gi kibedo di kitek. Iepone noni adulion me Yuda kede Benjamin bin oko dong i loc mere.

Josaseredoti kede Jolebi Obino Yuda

¹³Ki adulion dedede me Isirael, josaseredoti kede Jolebi oko bino Yuda but Rekoboam.

¹⁴Jolebi oweko lobo gi amako gi di kiko bino Yuda kede Yerusalem, pien Abaka Yeroboam me Isirael kede abakai ace kolunyo wange oudo likame oyei ne Jolebi timo tic gi bala josaseredoti ka Rwot.

¹⁵Yeroboam bin oyero josaseredoti mege amake di eko mino gi tic i abilan, kede woro jwogi acal bala diegi, kede caljwogi koudo obedo idwe twonin kame en oudo ecweo.



¹⁶Jo dedede me ikekon apapat me Isirael kame cuny gi oudo tie i woro Rwot Rubanga me Isirael oko gida wapo gi Yerusalem kunono, tetekeny kimi giayala but Rwot, en Rubanga ka joakwari gi.

¹⁷Manoni bin oko mino ajakanut me Yuda odoko tek. Pi mwakini adek gin bin kiko mino Rekoboam wot ka Sulumani obedo di ilajara, pien gin oudo kibedo kede wor bute bala kame oudo kibedo kede wor but Abaka Daudi kede Sulumani.

Jo me Ot ka Rekoboam

¹⁸Rekoboam bin oko nyomo Makalat, en nyar ka Yerimot wot ka Daudi; toto me dako mere nono en oudo Abikail nyar ka Eliab wot ka Yese.

¹⁹Gin bin kiko nywalo awobe adek: Yeus, Semaria, kede Sakam.

²⁰Kicen mere en bin eko nyomo Maka, nyar ka Abisolom, di kiko nywalo idwe awobe ongwon: Abija, Atai, Siisa, kede Selomit.

²¹Ka koriribo dedede, Rekoboam oudo tie kede mon tomon kiwie kanyauni kame enyomo, kede ot kanyape kame ebedo kede gi nono. Oudo eko nywalo awobe ot are kiwie kanyauni kede anyira ot kanyape. Kikom mon mege nogo dedede, oudo emaro Maka kalamo icegun.

²²Rekoboam bin oko cibo Abija wot ka Maka bedo ngat alo imiegu mege, pien tam meren oudo mito be Abija dok abaka.

²³En bin eko bedo kede rieko di eko popoko awobe mege i adulion atitino dedede me Yuda kede Benjamin, i bomban dedede kame oudo kocelo kede apama. En bin eko mino gi jamini atot, di eko nyomo negi da mon atot.

2 Iyutun 12

Misiri Osuero Yuda

(1 Abakai 14.25-28)

¹kakame apugan ka Rekoboam otieko sipakin kede, di en eko doko tek, en karacel kede jo dedede me Isirael kiko weko lubo Iswil ka Rwot.

²I mwaka me kany me apugan ka Rekoboam, bin kiko udo alola pi kite kalikame kibedo kede genere but Rwot. Abaka Sisak me Misiri bin oko suro Yerusalem

³di oudo eoto kede cabalan tutumia acel kede tol are (1,200), kede isirikalen aringo kede asigiran tutumia ot kanyape (60,000). Isirikalen kalikame marere me Libiya, Sukot, kede Abisinia oupere bino kede en.

⁴En eko mano bomban me Yuda kame kocelo kede apama, di do eko tiro nyime ot Yerusalem.

⁵Enabi Semaya oko ot but Abaka Rekoboam kede jotel me Yuda koudo ocokere Yerusalem pi lworu Sisak; pien Sisak oudo owaco negi be, “Rwot tie waco ne wu be, ‘Wun iwekanu, nan ada atieko weko wu i cing Sisak.’”



⁶Di do jotel kede abaka oko mwolere di kiko waco be, “Rwot tie timo gikame tie kakare.”

⁷Kakame Rwot oneno kede be oudo kimwolere, en eko waco ne Semaya be, “Gin kitieko mwolere; likame abino muducaro gi, abino mino gi kibwot winyo winyo; likame abino jalakino lilo na i kom Yerusalem ki cing Sisak,

⁸do Sisak bino bwono gi, di gin kiko bino ngeno apokapoka atie i dierediere me tic pira kede tic ne abakai me wi lobo.”

⁹ Abaka Sisak oko ot Yerusalem di eko tero jamini abeco dedede kame oudo tie i tempulo kede i paco me abaka. En etero jamini dedede ribo kiton ibukui me nyonyo saabu kame Sulumani oudo otimo.

¹⁰Pi lunyo wang gi, Rekoboam oko timo ibukui me nyonyo buronsi di eko keto i cing jodar koudo daro irutei me paco mere me abaka.

¹¹Tek kame abaka oudo tie ot i tempulo, jodar oudo mako ibukui nogo i cing gi, ingei manono kiko dwoko gi i agola me dar.

¹²Pi kite kame bin en eko mwolere kede but Rwot, lilo ka Rwot likame bin oko potu i kome pi muducaro en atwal atwala; doko da kuo i Yuda oudo likame rac.

Kope Acegocego amako Apugan ka Rekoboam

¹³Aso, Abaka Rekoboam oko sipakin Yerusalem di eko pug. I kare kame ecako kede pug mwakini me dongo mere oudo tie ot ongwon kiwie acel; en eko pug pi mwakini tomon kiwie kanyaare di etie Yerusalem, en bomba kame Rwot oudo oyoero ki lobo me Isirael dedede pi jo wore kiye. Toto me Rekoboam oudo nyinge Naama, dako me lobo me Amon.

¹⁴En bin eko timo gikame rac, piento likame etamo pi mono gikame Rwot oudo mito.

¹⁵Tice ka Rekoboam, cako ki agege tuno i ajikini, ribo kiton itatam amako wapere me wok me diakal mere, gin dedede kitie i *Itatam ka Enabi Semayakede* i *Itatam ka Enabi Ido*. Rekoboam kede Yeroboam bin oko bedo yi nakanaka.

¹⁶Rekoboam oko to di oko yike i nget joakwari mege i Yerusalem, di wode anyinge Abija oko lunyo wange bala abaka.

2 Iyutun 13

Yi ka Abija kede Yeroboam

(1 Abakai 15.1-8)

¹mwaka me tomon kiwie kanyauni me apugan ka Abaka Yeroboam wot ka Nebat me Isirael, Abija oko doko abaka me Yuda,

²di eko pug ki Yerusalem pi mwakini adek. Toto mere oudo nyinge Mikaya nyar ka Uriel, me bomba me Gibe. Yi bin oko cakere i dierediere ka Abija kede Yeroboam.

³Abija oko coko isirikalen aromo tutumia tol ongwon (400,000), di Yeroboam oko ot pi riamo kede en kede isirikalen mege atek yi tutumia tol kanyauni (800,000).



- ⁴Abaka Abija oko ot i wi moru me Semaraim i piny me imukuran me Epuraimu, di eko waco be, “Winyanu, in Yeroboam kede jo dedede me Isirael!
- ⁵Benyo, likame ingeunu be Rwot Rubanga me Isirael otimo isikan kalikame tur kede Daudi pi mine, en kede ikwae mege, pugo Isirael nakanaka?
- ⁶Do in Yeroboam wot ka Nebat, in oudo ibedo ngatic ka Sulumani, do iko jemo ne.
- ⁷Kicen mere di Rekoboam odoko abaka, in iko koko jo atie kede iponeso areco di kony gi li pi gangi, di ikounu ot titiso Rekoboam, di en oudo pwodi etitidi likame engeo epone me gengo wu.
- ⁸Nan in itie mito yi kede apugan kame Rwot omio ikwae ka Daudi, be pien in itie kede twon ekodet me isirikalen kede idwe twonin kame Yeroboam otimo ne wu pi bedo rubangan wu.
- ⁹Ber kong itieko da riamo tenge josaseredoti ka Rwot, gin ikwae ka Aaron, kede Jolebi, di in iko yero josaseredoti nin pi lunyo wang gi bala kame atekerin apat timo. Ngatamoroni kenekene kame oudo bino kede twon amoto imerekekin kanyaare oudo kokwere edoko ngasaseredoti me gi kalikame obedo rubangan.
- ¹⁰” Do wan Rwot en kobedo Rubanga wa, doko da wan likame otieko weke. Josaseredoti kobedo ikwae ka Aaron en kame timo ne Rwot tic, di Jolebi en kame konyo gi.
- ¹¹Gin kiyalo ne Rwot odiko acelacel kede otieno acelacel giayala me odok angwe kur kede giayala awanga me leini. Kimio Rwot giayala me mugati i wi emesa kame kolonyo, di buli otieno acelacel kiko cwicwinyo italan atie i icegeren kame kotimo kede saabu. Wan nakanaka olubo gikame Rwot Rubanga wa mito ne wa timo, do wun itiekunu weke.
- ¹²Rubanga kikome en obedo ngatel wan, doko da josaseredoti mege tie cuto kede agwarai me akuta pi lwongo wa cako yi kede wu. Wun jo me Isirael, kur iyunu kede Rwot, Rubanga ka joakwari wu! Likame ibinunu twero bwono yi!”
- ¹³I esawa nono Yeroboam oudo ocwao isirikalen mege ooto luko isirikalen me Yuda ki cen ngei gi, di apat mege odong i nyim gi.
- ¹⁴Jo me Yuda oko lokere di kiko neno di isirikalen mogo tie cen ngei gi, kede doko di apat mege da tie i nyim gi. Gin kiko kok but Rwot di josaseredoti oko kuto agwarai.
- ¹⁵Di jo me Yuda oko woo kitek woo me yi, di Abija en koudo telo gi. Gin kiko yi di Rubanga oko mino gi kibwono Yeroboam kede isirikalen me Isirael.
- ¹⁶Jo me Isirael oko cako ringo tenge kibun jo me Yuda, di Rubanga oko mino gi i cing jo me Yuda.
- ¹⁷Abija kede isirikalen mege oko bwono gi bwon arac; oko neko kikom gi isirikalen tutumia tol kany (500,000) atek yi.



¹⁸Aso, jo me Yuda bin oko bwono jo me Isirael, pien gin oudo kigengere i kom Rwot, Rubanga ka joakwari gi.

¹⁹Abija oko donyo wapo Yeroboam di eko mane bomban me Betel, Yesana, Epuron, karacel kede calere atie i nget bomban nogo dedede.

²⁰Yeroboam likame doko oko catuno doko tek i kare ka Abija. I ajikini Rwot oko rete piny di eko to.

²¹Do Abija oko meede doko tek; en oudo etie kede mon tomon kiwie ongwon, eko nywalo awobe ot are kiwie are kede anyira tomon kiwie kanyape.

²²Kope ace amako Abija, iponeso mege kede gikame etimo, gin dedede kowandiko gi i *Itatam ka Enabi Ido*.

2 Iyutun 14

Abaka Asa Obwono Jo me Abisinia

¹Abija bin oko to di oko yike i nget joakwari mege i Bomba ka Daudi. Wode anyinge Asa oko lunyo wange bala abaka. I kare mere me pug lobo nono ber oko bedo kede anapakin pi mwakini tomon.

²Asa bin oko timo gikame ber kede kopoore i nyim Rwot Rubanga mere.

³En bin ekwanyo tenge alutarin me kumbor kede kabedo kame koworo kiye rubangan, di eko tuturo ipirin me kide kame koworo, kede gikame cungo pi rubanga adako anyinge Asera.

⁴En eko mino jo me Yuda cik pi timo gikame Rwot mito, en Rubanga ka joakwari gi, kede pi gwoko iswilia mege kede cik mege.

⁵En bin eko da kwanyo tenge ki bomban dedede me Yuda kabedere me woro rubangan kede alutarin me dunyo odok angwe kur, di ajakanut nono oko bedo kede anapakin i kare me apugan mere.

⁶En bin eko luko bomban me Yuda kede apama katek i kare me anapakin nono, di yi oko bedo li i mwakini nogo, pien Rwot oudo omie anapakin.

⁷En ewaco ne jo me Yuda be, “Ogerunu apamai atek luko bomban, kede gedo aboco malo me kino piny, di okounu keto negi irutei kame kocego kede alorito me lilime. Lobo noni pwodi tie merwan, pien wan omounu Rwot Rubanga wa; wan omoenu di nan eko mino wa anapakin ki bad dedede.” Aso, gin kiko gedo di kiko bedo kede mulem.

⁸Abaka Asa oudo tie kede isirikalen tutumia tol adek (300,000) kobedo cuo me ekeko ka Yuda, gin dedede di kitie kede tongini kede ibukui, kede isirikalen amako ibukui kede imalia tutumia tol are kede ot kanyauni (280,000) kobedo cuo me ekeko ka Benjamin. Gin dedede oudo kibedo jo kame tek yi.



⁹Dano moro me Abisinia anyinge Seera oko bin ot suro Yuda kede isirikalen milion acel (1,000,000), kede cabalan tutumia tol adek (300,000), di kiko ot paka tuno Maresa.

¹⁰Asa oko ot pi yi kede en, di gin dedede kiko teere pi copo yi i Aditot me Sepata i nget Maresa.

¹¹Asa oko lego but Rwot Rubanga mere be, “Okwe Rwot, in itwero konyo isirikalen agoro, di eyot ni ayota bala konyo isirikalen atek. Okwe Rwot Rubanga wa, kony wa nan, pien in en kame wan otie geni, doko da wan obino kan i nyingin pi yi kede twon isirikalen nogi. Rwot, in en Rubanga wa; kur iyei ne dano adana bwoni.”

¹²Aso, Rwot oko bwono isirikalen me Abisinia kakame Asa kede isirikalen me Yuda osuro gi kede. Gin kiko ringo,

¹³di Asa kede isirikalen mege oko bedo wapo gi paka tuno Gerar. Oko neko isirikalen me Abisinia atot adikinicel omio likame doko kiko twero catuno yi. Rwot kede isirikalen mege obwono gi di oko yako gi jamini atot twatwal.

¹⁴Di do gin kiko twero dudubo bomban atie i nget Gerar pien jo me kunono oudo lworo otieko mako gi i kom Rwot. Isirikalen oko yako bomban nogo dedede pien oudo kitie kede jamini atot me ayaka.

¹⁵Gin bin kiko da suro kimere me jo koudo tie kede leini, di kiko tero romini kede diegi atot, kede aguraguran. Di do bin kiko dok Yerusalem.

2 Iyutun 15

Alokaloka kame Asa Otimo

¹Bin tipo ka Rubanga oko bino i kom Asaria wot ka Oded,

²di en eko ot pi riamo kede Abaka Asa. En eko waco ne be, “Abaka Asa, winy gikame atie waco, karacel kede wun dedede jo me ekeko ka Yuda kede me ka Benjamin! Rwot bedo tie kede wu ka wuda itienu kede en. Ka imoenu ibinunu ude, do ka iwekenu eda ebino weko wu.

³Pi kare kalac Isirael oudo obedo abongo Rubanga me ateni, abongo josaseredoti kame pwonyo gi, kede abongo iswil.

⁴Do i kare kame peko opoto negi kede, gin kiko lokere but Rwot, Rubanga me Isirael. Gin kimoe di kiko ude.

⁵I kare nogo likame dano oudo twero ot karamoroni abongo udo peko, pien lobere dedede oudo tie kede ayela.

⁶Ajakanut acel oudo tie yi kede ocelu, kede bomba acel da oudo tie yi kede ocelu, pien Rubanga oudo otieko kelo negi peko kede can alit me egere dedede.

⁷Do in bed di itek di likame cunyi ko kwanyere. Kobino mini giamia me pwoc pi tic kame itimo.”



⁸Kakame Asa owinyo kede kop kame Asaria wot ka Oded omurao, en eko udo nwangcuny. En eko kwanyo tenge caljwogi dedede ki lobo me Yuda kede Benjamin, kede ki bomban dedede kame en oudo emao ki piny kobedo imukuran me Epuraimu. En bin eko da iiko alutari ka Rwot kame oudo tie i diakal me tempulo.

⁹Jo atot bin oko ngolo odok but Asa, jo me ekeko ka Epuraimu, Manase, kede Simeon, di gin kiko donyo bedo i ajakanut mere, pien gin oudo kineno be Rwot oudo tie kede en. Asa bin oko lwongo gin dedede karacel kede jo me ekeko ka Yuda kede me ka Benjamin.

¹⁰Gin kiko cokere Yerusalem i duwe me adek me mwaka me tomon kiwie kany me apugan ka Asa.

¹¹I ceng nono gin kiko mino giayala but Rwot kikom jamini kame gin oudo kiyako di kiko kelo: dok tol kanyaare (700) kede romini tutumia kanyaare (7,000).

¹²Gin kiko timo isikan kame kiko yei iye woro Rwot Rubanga ka joakwari gi, kede cuny gi kede kuo gi lung.

¹³Ngatamoroni kalikame oudo bino woro Rwot oudo kopooore neke, akadi di en atin amoto dano kocato, icuo amoto dako.

¹⁴Gin kiko kwongere but Rwot kede dwan amalo, di kiwoo, di kikuto agwarai kede tung leini.

¹⁵Jo dedede me Yuda oko lelo pi ikwong gi nono, pien oudo kikwongere kede cuny gi dedede. Doko da gin oudo kimoe kede mit gi dedede, di kiko ude, di Rwot oko mino gi anapakin ki bad dedede.

¹⁶Abaka Asa doko da bin oko kwanyo toto mere Maka ki ruom mere me toto me abaka, piento en oudo etimo cal arac me rubanga adako anyinge Asera. Asa bin ototongo cal nono di eko bebelo en di eko wango angidingidin mege i Aditot me Kideron.

¹⁷Do en likame eko tuturo kabedo me woro rubangan i Isirael. Akadi bed bala kamanono da, Asa oudo obedo dano kame cunye ateteni tie i kom Rwot i kare me kuo mere lung.

¹⁸En bin eko keto i tempulo jamini dedede kame papa mere bin omio but Rubanga, ribo kiton jamini kame kotimo kede saabu kede siliba kame eda oudo emio but Rubanga.

¹⁹Yi doko likame oko bedo paka tuno i mwaka me ot adek kiwie kany me apugan ka Asa.

2 Iyutun 16

Peko kede Lobo me Isirael

(1 Abakai 15.17-22)



¹I mwaka me ot adek kiwie kanyape me apugan ka Abaka Asa me Yuda, Abaka Basa me Isirael oko suro Yuda, di eko cako luko bomba me Rama kede apama atek, pi gengo jo donyo Yuda but Abaka Asa, kede wok kiye.

²Di Asa oko kwanyo siliba kede saabu dedede ki tempulo kede ki ot ka abaka, di eko cwano gi but Abaka Benekadad me Siria, kame oudo bedo Damasiko, kede kop kame waco be,

³” Poore wan okodere kedi, bala kame bin papa na kede papa ni otimo. Nan ango acwao ni siliba kede saabu noni bala giamia buti. Oti itur kodere ni kede Abaka Basa me Isirael, tetekeny ekaruno kwanyo isirikalen mege ki adul na.”

⁴Benekadad oko winyo kop ka Abaka Asa, di eko cwano isirikalen mege suro bomban me Isirael. En eko mako bomban me Iyon, Dan, Abel Bet Maka, kede bomban dedede me Naputali kakame oudo kogwoko iye jamini.

⁵Kakame Basa owinyo kede kop nono, en eko jiko gero bomba me Rama di tic nono oko cungo.

⁶Di Abaka Asa oko coko jo me Yuda dedede di eko mino gi kwanyo ki Rama kide dedede kede ibaon kame Basa oudo tie tic kede me gedo. Abaka Asa oko tic kede gi me gero bomban me Geba kede Misipa.

Enabi Kanani

⁷I kare nono enabi Kanani oko ot but Abaka Asa di eko waco ne be, “Pi kite kame in iketo kede gen ni i kom abaka me Siria akaka keto gen ni i kom Rwot Rubanga ni, manono omio Isirikalen me Isirael obwot kibuti.

⁸Benyo, mam Abisinia kede Libiya oudo tie kede twon isirikalen kede cabalan kede isirikalen me tien? Do pi kite kame in oudo iko geno kede Rwot, en eko mini gin dedede i cingi.

⁹Wang Rwot ngio wi lobo lung, pi mino teko but jo kame cuny gi ateteni tie i kome. In itieko timo tim me mingo, doko cako nataman ot anyim in ibino bedo yi nakanaka.”

¹⁰Di Asa oko doko ger ne enabi nono di eko mino kotwee kede eriko i otkol. Cako i kare nono Asa di do oko cako bedo kede tim me gero but jo.

Ajikini me Apugan ka Asa

(1 Abakai 15.23-24)

¹¹Gi dedede ace kame Asa otimo, cako ki agege tuno i ajikini, kowandiko gi i *Itabu me Itatam amako Abakai me Yuda kede Isirael*. ¹²I mwaka me ot adek kiwie kanyangon me apugan mere, tuwo bin oko mako tien Asa di tuwo nono oko cere ne; do akadi i kare me tuwo mere nono da, en likame eko lokere but Rwot, do eko lokere ot but imuroko.

¹³Asa di do oko to i mwaka me ot ongwon kiwie acel me apugan mere.



¹⁴Bin oko yike i ates mere kame oudo ekunyo i lela i Bomba ka Daudi. Bin oko tic kede moe kede jamini angwe kur me temuno kome pi ayika, di oko moko twon mac me koke.

2 Iyutun 17

Yekosapat Odoko Abaka

- ¹Yekosapat oko lubo tien papa mere Asa bala abaka di eko guro tiene ne jo Isirael.
- ²En eko cibo isirikalen i bomban kame kocelo kede apama atek me Yuda, kede i calere mege, kede i bomban me Epuraimu kame Asa oudo omao.
- ³Rwot oko bedo tie kede Yekosapat piento en oudo elubo ikiteso kame papa mere obedo tie kede i kare mere me agege di likame eko woro Baal.
- ⁴En etio ne Rubanga ka papa mere, di eko lubo cik mege, di likame eko bedo kede tim me jo me Isirael.
- ⁵Pi manono, Rwot oko mino apugan mere ocungo di tek i ajakanut me Yuda. Jo dedede me Yuda oko donyo tero ne giamia, di en eko doko dano kobaro twatwal kede kame koworo.
- ⁶Cunye oudo tie i lubo yote ka Rwot; medo i wi manono en bin eko dudubo kadedere me woro rubangan i Yuda, kede ipirin kame cungo pi rubanga adako anyinge Asera.
- ⁷I mwaka me adek me apugan mere, en bin eko cwano jotic mege adongo pi ot pwony i bomban me Yuda; magonogo oudo obedo Benekail, Obadia, Sakaria, Netanel, kede Mikaya.
- ⁸Bin Jolebi kanyangon kede josaseredoti are oko upere kede gi. Jolebi nogo gin en Semaya, Netania, Sebadia, Asakel, Semiramot, Yekonatan, Adoniya, Tobija, Tobadoniya; josaseredoti oudo obedo Elisama kede Yekoram.
- ⁹Gin kiko tero *Itabu me Iswil ka Rwot* di kiko ririmo bomban dedede me Yuda, di kipwonyo kop mere but jo.

Dwongo ka Yekosapat

- ¹⁰Ajakanuto dedede me lobere koluko Yuda likame oko copo yi kede Yekosapat pien oudo kitie kede lworo i kom Rwot.
- ¹¹Jo mogo me Pilistia oko tero ne Yekosapat siliba atot kede giamia ace apat, kede imuarabun mogo oko tero ne imerekekin tutumia kanyaare kede tol kanyaare (7,700) kede ikoroi da tutumia kanyaare kede tol kanyaare (7,700).
- ¹²Yekosapat oko meede ameda doko tek. En eko celo bomban kede apamai atek kede eko gero bomban i Yuda kakame oudo kogwoko iye jamini atot.
- ¹³En eko timo tice adongodongo i bomban me Yuda. Bin eko cibo i Yerusalem isirikalen atek yi.



¹⁴Di lubere kede ude ka joakwari gi gin oudo ige: Adana oudo obedo ngadwong me isirikalen kowok ki miere me ekeko ka Yuda. En oudo elo isirikalen tutumia tol adek (300,000).

¹⁵Ngat koudo lubo tiene en Yekokanan, en oudo elo isirikalen tutumia tol are kede ot kanyauni (280,000),

¹⁶di do dano me adek i dude en oudo Amasia wot ka Sikiri, en oudo ejalere kene pi timo tic ka Rwot; en oudo elo isirikalen tutumia tol are (200,000).

¹⁷Eliada en oudo obedo ngadwong me isirikalen kobedo jo me miere me ekeko ka Benjamin, en oudo ebedo ngayi atek; oudo elo isirikalen tutumia tol are (200,000) amako ibukui kede imalia.

¹⁸Ngat koudo lubo tiene en Yekosabad; en oudo elo isirikalen tutumia tol acel kede ot kanyauni (180,000) kotieko iikere pi yi.

¹⁹Isirikalen nogi oudo timo ne abaka tic i Yerusalem; medo i wi magonogi en doko bin eko cibo isirikalen ace i bomban ace me Yuda kame kocelo kede apama atek.

2 Iyutun 18

Enabi Mikaya Okwenyaro Akab

(1 Abakai 22.1-28)

¹Abaka Yekosapat bin oko baro adikinicel, doko da bin jo oudo wore. En bin eko timo iik me nyom i dierediere me dano me ode kede me ot ka Abaka Akab.

²Ingei mwakini mogo Yekosapat oko bin ot Samaria pi welao Akab. Akab bin oko neko ne karacel kede jo kame oudo eupere kede twon romini kede twonin. Akab oko supo cunye pi kodere kede en ot suro bomba me Ramot atie Gilead.

³Akab oko penyo Yekosapat be, “Ibino ot keda suro Ramot?” Yekosapat oko dwoko be, “Ango kede in wan acel; isirikalen nango obedo megii. Wan obino upere kedi ot yi.

⁴Do ber kong peny tam ka Rwot.”

⁵Di abaka me Isirael oko koko inabin aromo bala tol ongwon karacel, di eko penyo gi be, “Aoti asur Ramot arabo aweki?” Gin kiko dwoko ne be, “Oti isure, pien Rubanga bino mine i cingi.”

⁶Do Yekosapat oko penyo be, “Benyo, likame doko tie enabi moro ace kame otwero peny tam ka Rwot kibute?”

⁷Akab oko dwoko be, “Tie pwodi acel kodong kame otwero peny tam ka Rwot kibute, en Mikaya wot ka Imila; do cunya dage, piento en emurao nango kope areco kenekene.” Yekosapat oko dwoko be, “Abaka, likame ipoore yamo kamano.”

⁸Akab oko lwongo ngatic acel di eko waco ne be, “Oti ikel Mikaya wot ka Imila awakawaka.”



- ⁹Abaka Akab kede Abaka Yekosapat me Yuda oudo tie bedo i komini me pug di kingapo ikanson gi me ajakanut; oudo kitie i laru me canyo atie i nget erute me Samaria. Inabin oudo tie waco negi gikame Rwot owaco.
- ¹⁰Esedekia wot ka Kenana oko timo cal me tung le me nyonyo ayon, di eko waco be, “Rwot owaco be, ‘Ibino suro jo me Siria di iko muducaro gi bala le atie kede tunge kacal kamagonogi.’ “
- ¹¹Inabin apat dedede oudo tie yamo kop acel nono be, “Oti isur Ramot, ibino bwono yi; Rwot bino mine i cingi.”
- ¹²Ngaor koudo ooto lwongo Mikaya oko waco ne be, “Neningo, inabin dedede tie yamo kiber i kom abaka be ebino bwono yi, ida oti iyam kop acal bala mergi.”
- ¹³Do Mikaya oko waco be, “Alairo i nying Rwot kakuo be ango abino waco gikame Rwot oyamo na.”
- ¹⁴Kakame en etuno kede but abaka Akab, en eko penye be, “Mikaya, benyo, oot suro Ramot arabo oweki?” Mikaya oko dwoko be, “Otunu isurenu, ibinunu bwono yi; Rwot bino mine i cingu.”
- ¹⁵Do Akab oko dwoko be, “Ka itie yamo keda i nying Rwot miero iwac kop me ateni; apoore waco ni manoni tien adi?”
- ¹⁶Di Mikaya oko waco be, “Aneno di isirikalen me Isirael osasarun i wi moru, bala romini kame ngakwat gi li; di Rwot oko waco be, ‘Jogi li kede ngadwong gi, poore ngat acelacel ot ture kede mulem.’ “
- ¹⁷Akab oko waco ne Yekosapat be, “Mam oudo ango awaco ni be en likame ewaco nango kope abeco, do kwanyo kenekene kope me can?”
- ¹⁸Di Mikaya oko meede be, “Nan winy gikame Rwot tie waco! Ango aneno di Rwot tie bedo i kom mere me ajakanut i malo, di imalaikan tie cungo i ngete tuni kede tuca.
- ¹⁹Di Rwot oko waco be, ‘Ngai kame bino ngalao Akab tetekeny eot Ramot di oko neke iye?’ Di imalaikan oko donyo yamo, man yamo kop ni, maca da yamo kop ca,
- ²⁰tuno di tipo moro oko ot anyim but Rwot di eko waco be, ‘Ango abino ngale.’ Rwot oko penye be, ‘Ibino ngale benyo?’
- ²¹En eko dwoko be, ‘Ango abino ot di ako mino inabin ka Akab ngale.’ Di Rwot oko waco be, ‘Oti ingale; manono bino twerere.’ “
- ²²Mikaya oko jiko be, “Aso neningo, Rwot oketo tipo me angalo i dog inabin ni nogi dedede; en etieko iiko pi mino can poto i komi!”
- ²³Di enabi Esedekia oko ot but Mikaya di eko bape i wange di epenye be, “Awene en kame tipo ka Rwot oweka kede di eko cako yamo kede in?”
- ²⁴Mikaya oko dwoko be, “In ibino ngeno awene inonono i ceng kame in ibino ot pwono kede i agola me tielo.”



²⁵Di Abaka Akab oko mino cik but ngatic mere acel be, “Mak Mikaya iko dwoke but Amon ngaloc me bomba, kede but Yowasi wot ka abaka,

²⁶di iko waco negi pi rwake i otkol di oko donyo mine mugati kede pii kenekene tuno di ango adwogo kede mulem.”

²⁷Mikaya oko waco be, “Ka in iko dwogo kede mulem, udo likame Rwot oyamo kibuta.” Di eko waco be, “Wun jo dedede winyunu gikame ango atieko waco!”

To ka Akab

(1 Abakai 22.29-35)

²⁸Aso, Abaka Akab me Isirael kede Abaka Yekosapat me Yuda oko ot suro Ramot i Gilead.

²⁹Di Akab oko waco ne Yekosapat be, “Ango abino jujulo koma di ako ot yi, do in ngap ekanso ni me ajakanut.” Aso, abaka me Isirael oko bono wange di eko ot yi.

³⁰Abaka me Siria oudo omio cik but isirikalen ot adek kiwie are, gin en jodongo me cabalan me yi be, “Kur i yiunu kede dano moro ace atitidi amoto adwong, do kenekene kwanyo abaka me Isirael.”

³¹Aso kakame gin kiko neno kede Yekosapat, gin kiko waco be, “Ateteni abaka me Isirael inononi.” Gin kiko lokere cako yi kede en. Do Yekosapat oko kok di Rubanga oko konye di eko mino joka olokere tenge kibute.

³²Jodongo me cabalan me yi oneno be manono oudo likame obedo abaka me Isirael di gin kiko jiko wape.

³³Do sirikale moro me Siria oko gweno emal mere atatai, di winyo winyo eko ot cobo Akab i dierediere me nyonyo kame gagao kore kede nyonyo kame gagao kome, kame cal bala abokoya me aporogo. En eko koko but ngat kame riamo cabala mere be, “Lokere odok cen, pien kowana!”

³⁴Yi oko meede dop kitek i ceng nono, di Abaka Akab oudo ogongere i cabala etie neno isirikalen me Siria. Di do eko to otieno di ceng tie donyo.

2 Iyutun 19

Enabi Obunano Yekosapat

¹Abaka Yekosapat me Yuda oko dok ture i Yerusalem kede mulem.

²Enabi Yeku wot ka Kanani oko ot pi riamo kede abaka Yekosapat di eko waco ne be, “Benyo, eber konyo jo areco kede maro jo adagi Rwot? Pi tim noni omio lilo ka Rwot otieko bino i komi.

³Do akadi bed bala kamanono da, in itie kede bero moro. In idudubo ipirin kame oudo cungo pi rubanga adako anyinge Asera i lobo noni, doko da itamo cibo cunyi timo gikame Rubanga mito.”

Alokaloka Abeco kame Yekosapat Otimo



⁴Bed bala Yekosapat oudo bedo Yerusalem, en oudo esingo maro ot but jo mege, cako ki Bereseba i bad tetu piny paka tuno i ajikini me piny me imukuran me Epuraimu i bad tetu malo, pi waco ne jo dok but Rwot, en Rubanga ka joakwari gi.

⁵En bin eko yero jongolkop i buli bomba acelacel me Yuda kame kocelo kede apama atek

⁶di eko waco negi be, “Gwokerenu kame itienu ngolo kop, pien likame wun ingolunu kop kawang dano moro, do wun ingolunu kop kawang Rwot; en etie kede wu kame itienu ngolo kop.

⁷Nan bedunu kede lworu but Rwot di ikounu gwokere i gi dedede kame itienu timo, pien Rwot Rubanga wa likame tie kede tim me totolo ngolo kop i ateni, akadi bedo kede apokapoka but jo, akadi gamo cemusana.”

⁸I Yerusalem Yekosapat oko yero Jolebi, josaseredoti, kede jotel me miere me Isirael, pi ngolo kope amakere kede turo Iswil ka Rwot, kede ace amakere kede atwomutwomun i diere me jo.

⁹En bin eko ciko gi di ewaco negi be, “Man en epone kame ibinunu tic kede: ibinunu timo tic wu di itienu kede lworu but Rwot, kede di ibedunu jo agenere bute; doko da ibinunu time kede cunyu lung.

¹⁰Kame joe wu me bomba moroni kenekene okelo ne wu pido amakere kede nek, amoto turo iswil amoto cik, wun ipoorenu pwoyo gi kiber iponeso kame kipoore bedo tie kede i esawa me pido, tetekeny kur kided kede raco me timo dub but Rwot, me wek kur lilo ka Rwot bin i komu karacel kede gin. Poore itimunu kamanono di likame ikounu bedo kede raco moro.

¹¹Amaria Ngatel me Josaseredoti en kame bino telo wu i pido amakere kede kop i kom Rwot; Sebadia wot ka Isimael ngapug me jo me ekeko ka Yuda en kame bino telo wu i pido amakere kede iswilia ka abaka; Jolebi bino neno be oketo i tic kop kame kongolo. Timunu kamanoni kede nwangcuny, akwao Rwot bed tie i bad me jo kame timo gi kopoore!”

2 Iyutun 20

Yi kede Edom

¹Ingei kare moro isirikalen me Moab kede me Amon, karacel kede jo Meunim oko ot pi yi kede Yekosapat.

²Joter kop mogo oko ot waco ne Yekosapat be, “Twon isirikalen me Edom owok ki loka tetuca me Nam Oto kibino pi suri; nan kitieko tuno Kasason Tamar.” (Manoni en nying ace me Engedi.)

³Lworu oko mako Yekosapat, di eko mono kony kibus Rwot. En eko ciko ceng me kanyo kec i Yuda lung.

⁴Jo oko wok ki bomban dedede me Yuda di kiko cokere pi kwano kony kibus Rwot.



⁵Gin karacel kede jo me Yerusalem kiko cokere i diakal anyen me tempulo. Abaka Yekosapat oko ot cungo i nyim gi

⁶di eko lego be, “Okwe Rwot, Rubanga ka joakwari wa, in Rubanga kame tie malo, in ipugo ajakanuto me atekerin dedede. In itie kede teko kede twer kame ngatamoro likame sobolo aruno.

⁷ In Rwot Rubanga wa, mam bin in iriamo jo kame oudo bedo i lobo noni kakame jo ni me Isirael oudo tie donyo kede iye, di iko mine but ikwae ka Aburaam, en ngawoti, pi bedo mergi me atwal?

⁸Gin nan kitie bedo i lobo noni, doko da kitieko gero iye tempulo me wori, di kiwaco be,

⁹ Ka can moro opoto ne wa, karuno bedo di alola me yi, aumpuli, arabo kec, wan obino ot cungo i nyim tempulo noni, kede i nyimi, pien kolwongo ot noni kede nyingi, di wan oko bino kok buti, di in iko winyo koko wa di iko lako wa.’

¹⁰ “Nan jo me Amon, Moab kede Edom osuro wa. Kakame joakwari wa bin owok kede ki Misiri, in likame iko yei negi suro lobere nogo, aso gin kiko naco gi kiko weko gi likame kidudubo gi.

¹¹Nan gin kitie culo wa pi manono i yore me gin bino riamo wa ki lobo kame in imio wa.

¹²Okwe in Rubanga wa, benyo, likame ibino ngolo negi kop iko mino gi alola? Pien wan girwa oli kede teko i nyim twon jo atos kobino pi suro wa nogi. Wan likame ongeo gikame opoore timo, do wang wan tie i komi.”

¹³Cuo dedede me Yuda, kede mon gi, kede idwe gi, oudo tie cungo kanono i nyim Rwot.

¹⁴Di tipo ka Rwot oko ot i kom Ngalebi moro koudo tie i diere me jo. Nyinge oudo Yakasiel wot ka Sakaria, wot ka Benaya, wot ka Yeyel, wot ka Matania; en oudo ebedo Ngalebi me ot ka Asap.

¹⁵ En ewaco be, “Winyunu wun dedede jo me Yuda kede jo kame bedo Yerusalem, karacel kede abaka Yekosapat. Rwot tie waco ne wu be kur cunyu nyote, doko da kur lworu maku pi twon ekodet me isirikalen jokwor wu; yi nono likame obedo meru do ebedo me ka Rwot.

¹⁶Diki iotunu isurunu gi kakame gin kitie bino wok kede ki yongayo adiding kame kiar wok ki Sis. Ibinunu udo gi i ajikini me aditot, di pwodi likame ituno i wi tim me Yeruel.

¹⁷ Likame wun ibinunu yi. Kenekene wun teereni di ikounu cungo mot, di ikounu bino neno di Rwot mio wu ibwonunu yi. Okwe wun jo me Yuda kede Yerusalem, kur ibedunu kede gungcuny, doko da kur imiunu cunyu nyote; diki otunu isurunu gi, Rwot bino bedo tie kede wu!”



¹⁸Di Yekosapat oko luro nyime piny, di jo dedede me Yuda kede Yerusalem oko riebere piny i nyim Rwot, di kiko wore.

¹⁹Di Jolebi me ekeko ka Kokat kede Kora oko cungo malo di kiko donyo pako Rwot Rubanga me Isirael.

²⁰Odiko sek me ceng kolubo mere jo oko yai di kiko ot i wi tim me Tekoa. Kakame gin oudo kitie yai ot kede, Yekosapat oko cungo malo di eko waco be, “Winyanu, wun jo me Yuda kede jo kame bedo Yerusalem; yeunu Rwot Rubanga wu di en eko bino sipakino wu; yeunu gikame inabin mege waco ne wu.”

²¹Ingei en poro kop kede jo, abaka oko yero jo kame poore wer ne Rwot di kipake di kingapo angapito kacil ameny, di gin kitelo ne isirikalen yongayo di kiwero be, “Opakunu Rwot! Amara mere bedo nakanaka!”

²²Kakame gin kicako kede wer di kipako Rwot, Rwot oko suro jokwor koudo obino pi suro Yuda, gin jo me Amon, Moab, kede jo me moru me Seir, di oko bwono gi.

²³Pien jo me Amon kede Moab oko lokere suro jo me moru me Seir, di kiko neneko gi pitipit; kakame kitieko neneko kede jo me moru me Seir, gin kiko lokere nekere ken gi ken gi.

²⁴Kakame jo me Yuda otuno kede i gedo abor malo me kino piny koudo tie i wi tim, kiko udo di liele tie buto piny, likame tie ngatamoro kobwot.

²⁵Yekosapat kede isirikalen mege oko ot pi yako jame gi, di kiko udo dok, jamini, igoen, kede jamini ace me wel. Gin kiko tieko ceng adek di kitie koko jamini, do jamini oko bedo tot twatwal omio likame kiko twero tero gin dedede.

²⁶I ceng me ongwon gin kiko cokere i Aditot me Bereka di kiko pako Rwot pi gikame oudo etimo.

²⁷Yekosapat oko telo isirikalen mege dok Yerusalem di cuny gi yom, pien Rwot oudo omio gi kilelo i wi jokwor gi.

²⁸Gin kiko donyo Yerusalem di kiko kato akata paka i tempulo ka Rwot di kigoo adungu, kede di kikuto bilo kede agwarai.

²⁹Lworo oko mako jo me ajakanuto me pinye apat kakame kiwinyo kede be Rwot oudo oyi kede jokwor me Isirael di eko bwono gi.

³⁰Di ajakanut ka Yekosapat oko bedo kede anapakin, pien Rubanga mere oudo omie wei ki bad dedede.

Ajikini me Apugan ka Yekosapat

(1 Abakai 22.41-45)

³¹Aso Yekosapat oko pugo Yuda. En bin eako pug di mwakini me dongo mere tie ot adek kiwie kany, di eko pug pi mwakini ot are kiwie kany ki Yerusalem. Toto mere oudo nyinge Asuba nyar ka Siliki.



³²En eko lubo ekite ka papa mere Asa di likame eparao tenge kiye; oudo ebedo timo gi opoore i nyim Rwot.

³³Do abilan me woro rubangan likame oudo kotuturo; jo oudo pwodi likame osipakino cuny gi i kom Rubanga ka joakwari gi.

³⁴Gi ace dedede kame bin Yekosapat otimo, cako ki agege tuno i ajikini kowandiko gi i *Itabu me Itatam ka Yeku Wot ka Kanani* kame obedo dul me *Itatam amako Abakai me Isirael*.

³⁵I kare moro Abaka Yekosapat bin oko kodere kede Abaka Akasia me Isirael, ngat koudo otimo jamini areco atos.

³⁶Gin kiko ribere gero imerin i edoket me Esiongeber, imerin kame oudo poore ot Tarusi.

³⁷Do Elieser wot ka Dodabaku me Maresa oko kwenyaro Yekosapat be, “Pi kite kame in ikodere kede Akasia, Rwot bino dudubo gikame igerunu.” Di imerin nogo oko tuturun likame kiko twero ot Tarusi.

2 Iyutun 21

¹Yekosapat bin oko to di oko yike i nget joakwari mege i Bomba ka Daudi, di wode Yekoram oko lunyo wange bala abaka.

Abaka Yekoram me Yuda

(2 Abakai 8.17-24)

²Yekoram wot ka Abaka Yekosapat bin tie kede imiegu mege kanyape: Asaria, Yekiel, Sakaria, Asariaku, Emikairi, kede Sepatia.

³Papa gi bin omio gi giamia atos, me siliba, saabu, kede jamini abeco me wel, kede bomban kame kocelo kitek i Yuda. Do eko mino ajakanut but Yekoram pien oudo ebedo atin kao.

⁴I kare kame Yekoram do otieko bedo kede i kom me ajakanut ka papa mere di apugan mere otieko sipakin, en eko neneko imiegu mege dedede, kede jotic mogo da me Isirael.

⁵Mwaka me dongo ka Yekoram oudo tie ot adek kiwie are i kare kame bin en ecako kede pug. En bin eko pug i Yerusalem pi mwakini kanyauni.

⁶Dako mere oudo obedo nyar ka Akab, omio en eko lubo ikiteso areco me jo me diakal ka Akab kede me abakai ace me Isirael; en eko timo gikame rac i nyim Rwot.

⁷Do Rwot oko dagi muducaro jo me ot ka Daudi pi isikan kame en oudo etieko timo kede Daudi, di ecikere be ikwae mege bino bedo pug nakanaka.

⁸I kare me apugan ka Yekoram, Edom oko jemo ne Yuda di gida kiko yero abaka gi amako gi.



⁹Di Yekoram oko ngolo eoto Edom kede jotel me isirikalen mege kede cabalan mege dedede me yi. En eoto iwor di eko suro jo me Edom kame oudo olukaro en karacel kede jodongo me isirikalen mege ayi kede cabalan.

¹⁰Cako i kare nono tuno tin Edom oko bedo jemo ne apugan me Yuda. Bomba me Libina da oko jemo i kare acel nono, pien Yekoram oudo oweko Rwot, Rubanga ka joakwari mege.

¹¹Medo i wi manono, Yekoram bin ogero kabedere me woro caljwogi i wi imukuran me Yuda, di eko mino jo me Yuda kede Yerusalem oweko bedo kede genere but Rwot kiko parao tenge.

¹²Enabi Elia bin oko wandiko ne Yekoram baluwa kaman: “Rwot Rubanga ka kwaruni Daudi waco be in likame iko lubo yongayo me kuo ka papa ni Yekosapat, arabo yongayo me kuo ka Abaka Asa me Yuda.

¹³Akaka manono, in iko lubo yongayo me kuo me abakai me Isirael, di iko mino jo me Yuda kede me Yerusalem oweko bedo kede genere but Rwot, bala kame jo me ot ka Akab bin otimo, ida ineneko imiegu ni kikokome, jo kame oudo beco loi.

¹⁴Aso, nataman Rwot bino mino can atek poto i kom jo ni, idwe ni, mon ni, kede jamini ni dedede.

¹⁵Ida kikomi tuo alit me amontena bino maki, di eko bedo meede ameda buli ceng tuno amontena ni bwote ooko.”

¹⁶Rwot oko supo cuny jo Pilistia kede cuny imuarabun kame oudo tie bedo i nget jo Abisinia mogo, pi gin ot yi kede Yekoram.

¹⁷Gin kiko ot suro Yuda, di kiko yako jamini dedede kame gin kiko udo i ot ka abaka, kiton awobe mege kede mon mege. Akasia wode atidi kenekene en kame bin oko dong.

¹⁸Di do magonogi dedede otieko timere, Rwot oko mino tuo kalikame cango me amontena omako abaka.

¹⁹En eko bedo ture, di tuo meede ameda. Tetu atiekini me mwaka me are me ture mere, di do amontena mege bwote ooko, di en eko to di ewinyo lito atek twatwal. Jo mege likame oko moko mac moro me mine wor i to mere, bala kame bin kotimo ne kede joakwari mege.

²⁰Yekoram bin odoko abaka di mwakini me dongo mere oudo tie ot adek kiwie are. En bin eko pug pi mwakini kanyauni i Yerusalem. I kare kame en eko to kede, likame tie ngatamoro oko pare. Gin kiko yike i Bomba ka Daudi, do likame i atesin me abakai.

2 Iyutun 22

Abaka Akasia me Yuda

(2 Abakai 8.25-29; 9.21-28)



¹Jo me Yerusalem bin oko keto Akasia wot ka Yekoram atidi pi lunyo wang papa mere bala abaka. Gin kitimo kamanono pien joyak koudo obino kede imuarabun bin oko neko awobe mege adongo dedede. Aso, Akasia wot ka Yekoram bin oko doko abaka me Yuda.

²Mwakini me dongo ka Akasia oudo tie ot ongwon kiwie are i kare kame bin en eako kede pug. En eko pug i Yerusalem pi mwaka acel. Nying toto mere oudo Atalia, akwar Omiri.

³Eda bin eko lubo ikiteso me jo me ot ka Akab, pien toto mere en kame bin obedo mine tam me timo gikareco.

⁴En eko timo gikarac i nyim Rwot, bala kame jo me ot ka Akab bin otimo, pien ingei to ka papa mere, jo me ot ka Akab en oko doko jo kame mie tam, di gin kiko dubo tic mere.

⁵En eko lubo tam kame gin kimie, di eko ot kede Yekoram wot ka Abaka Akab me Isirael pi yi kede Abaka Kasael me Siria i Ramot Gilead. Jo me Siria oko mino Yoram awanon,

⁶di en eko dok i bomba me Jeserel pi udo cango me aporeso mege. Di Akasia wot ka abaka Yekoram me Yuda oko ot bute kunono pi nene.

⁷Do Rubanga oudo otieko iiko be to ka Akasia poore wok i yore me en ot welao Yoram. Pien kakame en etuno kede kunono, en eko upere kede Yoram pi ot riamo kede Yeku wot ka Nimisi, ngat kame Rwot oudo otieko yero pi muducaro jo me ot ka Akab.

⁸I kare kame Yeku oudo tie cobo kede kop kame Rubanga ongolo i kom jo me ot ka Akab, en eko riamo kede jotel me Yuda kede awobe me imiegu ka Akasia, kame bin timo tic ne Akasia, di en eko neko gi.

⁹Jo ka Yeku oko mono Akasia, di gin kiko ude etie pwono Samaria. Gin kiko tere but Yeku di kiko neke. Gin kiko yike, pien gin kiwaco be, “En ebedo akwar Yekosapat, ngat kame bin obedo timo gikame Rwot mito kede cunye lung.” Likame oudo tie ngatamoro kikom jo me diakal ka Akasia kodong kame oudo karuno pug bala abaka.

Atalia Abaka Adako me Yuda

(2 Abakai 11.1-3)

¹⁰Kakame toto me Abaka Akasia owinyo kede be koneko wode, en eko cako neneko jo dedede me diakal ka abaka me Yuda.

¹¹Yowasi wot ka Akasia kenekene en oko bwot. En oudo koyapuno neke kede imiegu mege ace, do waa mere Yekoseba en oko kwale kikom idwe ka abaka. Yekoseba oudo obedo nyar ka Abaka Yekoram, amin me Akasia atoti gi kede obedo mon nyek, doko en oudo ebedo dako me ngasaserdoti. En ekwalo Yowasi di eko kane kede ngapidi mere i agola me buto koudo tie i tempulo ka Rwot, tetekeny Atalia kur tim ne gimoro.

¹²Yekoseba oko bedo kano atin nono i tempulo pi mwakini kanyape, di Atalia tie pug bala Abaka adako.



2 Iyutun 23

Jo Ojemo ne Atalia

(2 Abakai 11.4-16)

- ¹ mwaka me kanyaare me apugan ka Atalia, ngasaseredoti Yekoyada oko udo nwangcuny, di en eko winyere kede jodongo me isirikalen: Asaria wot ka Yerokam, Isimael wot ka Yekokanan, Asaria wot ka Obed, Maseya wot ka Adaya, kede Elisapat wot ka Sikiri.
- ² Gin bin kiko ot i bomban dedede me Yuda di kiko koko Jolebi, kede jotel me ikekon me Isirael di kiko tero gi Yerusalem.
- ³ Di do jo kocokere dedede oko timo isikan kede Yowasi, wot ka abaka i tempulo. Yekoyada owaco negi be, “Wot ka abaka ine! En poore ebed abaka, bala kame Rwot bin ocikere kede i kom awobe ka Daudi.
- ⁴ Gikame ibinunu timo en ine: ka josaseredoti kede Jolebi bino ot i tic i ceng Sabato, acel i kom adek gin bino daro irutei me tempulo,
- ⁵ acel i kom adek ace bino daro paco me abaka, di acel i kom adek kodong mere ko daro Erute me Acakini me Apama. Jo apat dedede bino cokere i diakal me tempulo.
- ⁶ Kur iyeunu ne ngatamoro donyo i tempulo kwanyo kenekene josaseredoti kede Jolebi kame tie i wang tic. Gin kiromo donyo, pien gin kibedo jokacil, do jo apat dedede miero lub kop kame Rwot owaco di gin kiko dong ooko.
- ⁷ Jolebi bino cungo di kiluko abaka diere, di ngat acelacel omako jamini mege me yi. Gin kibino upere kede abaka kabedere dedede kame en eoto iye. Dano moroni kame bino donyo i tempulo kobino neke.”
- ⁸ Jolebi kede jo dedede me Yuda oko timo gi dedede bala kame ngasaseredoti Yekoyada oudo ociko. Likame bin oko yei ne isirikalen kame yai ki dog tic dok i miere gi, manono oko mino ngatel acelacel me isirikalen obedo tie kede isirikalen kame koto poore yai ki dog tic kede kame poore lunyo wang gi i dog tic. Etimere kamanono pien ngasaseredoti Yekoyada likame bin oyei ne ngatamoro dok paco ingei en tieko tic mere.
- ⁹ Yekoyada oko mino jotel me isirikalen tongini kede ibukui adongo kede atitino kame riki obedo me ka Abaka Daudi, kame oudo kobedo gwoko i tempulo.
- ¹⁰ En eko keto jo kame gwoko abaka; emio ngat acelacel ocungo di emako gi me yi mere i cinge, cako ki bad tetu piny me tempulo tuno i bad tetu malo mere, kede rimaro alutari.
- ¹¹ Di Yekoyada oko kelo Yowasi eko ngapo ne ocoro me ajakanut, kede eko mine itabu me iswilia ka Rubanga. Di do oko kete edoko abaka. Ngasaseredoti Yekoyada kede awobe mege oko wiro Yowasi kede mo, di jo dedede oko lelemo be, “Abaka bed kuo nakanaka!”



¹²Kakame Atalia owinyo kede woo me jo kame oudo ringo di kipako abaka, en eko onyaro i tempulo kakame jo oudo ocokere iye.

¹³En eko neno abaka anyen di tie cungo kadonyo me tempulo, i nget epir kakame koweke pi abakai, di jotel me isirikalen kede jokut agwarai oluke. Jo dedede oudo tie lelemo kede kilel di kikuto agwarai, di jower me tempulo en kame telo gi kede jamini gi me wer. Atalia oko nyinyilo igoen me kome pi cwercury di eko lelemo be, “Manono iik me mano apugan! Manoni iik me mano apugan!”

¹⁴Yekoyada oudo likame mito be nek Atalia i tempulo. Aso, en eko waco ne jotel me isirikalen be, “Terenu ooko me tempulo di ibeunu kede i diere me isirikalen koteere; nekunu ngatamoroni kenekene kame bino tamo lube pi lake.”

¹⁵Jotel me isirikalen nogo oko mako Atalia, di gin kiko tere paco me abaka, di kiko neke kunono i Erute me Asigiran.

Alokaloka kame Yekoyada Otimo

(2 Abakai 11.17-20)

¹⁶Yekoyada kede Abaka Yowasi kede jo dedede oko timo isikan be gin kibino bedo jo ka Rwot.

¹⁷Di do jo oko ot i tempulo ka Baal di kiko rete piny; kingingido alutarin kede caljwogi kame oudo tie iye, di kiko neko Matan i nyim alutarin, en oudo ngasaseredoti ka Baal.

¹⁸Yekoyada oko keto Josaseredoti kede Jolebi pi timo tic me tempulo. Gin oudo kipoore timo tic kame bin Abaka Daudi opoko negi, tic me mino giayala awanga but Rwot, bala kame kowandiko i Iswil ka Musa, di kiwero kede yomcuny bala kame Daudi oudo ociko.

¹⁹En eko keto jodar irutei me tempulo, tetekeny kur ngatamoroni kopwokere dony iye.

²⁰Di en karacel kede jotel me isirikalen, jopug, kede jopiny dedede, kiko nyamaro abaka kwanye ki tempulo tere i paco mere me abaka. Gin kibeo kede ki erute adwong di kiko tere kikete i kom mere me ajakanut.

²¹Jo dedede oko bedo kede kilel di do bomba oko kwei ingei neko Atalia.

2 Iyutun 24

Abaka Yowasi me Yuda

(2 Abakai 12.1-16)

¹Mwaka me dongo ka Yowasi oudo tie kanyaare i kare kame bin en ecako kede pug. En bin eko pug i Yerusalem pi mwakini ot ongwon. Toto mere oudo en Sibia, dako me bomba me Beereseba.

²Yowasi oko bedo timo gikame ber i nyim Rwot i kare dedede me kuo ka Yekoyada ngasaseredoti.



- ³Yekoyada oko yero mon are ne Abaka Yowasi, di en eko nywalo kede gi idwe awobe kede idwe anyira.
- ⁴Di bin en etieko bedo abaka pi kare moro, cuny Yowasi oko paro pi iiko tempulo.
- ⁵En eko koko josaseredoti kede Jolebi karacel di eko waco ne gi be, “Otunu i bomban me Yuda dedede di ikounu raro sente kibut jo Isirael dedede, me iiko ot ka Rubanga wu buli mwaka; nenunu be itimunu manono awakawaka.” Do Jolebi oko gal.
- ⁶ Aso, abaka oko lwongo ngatel me Josaseredoti Yekoyada di eko penye be, “Pinyo komio in likame iko mino Jolebi oraro sente kibut jo atie Yuda kede Yerusalem bala kame bin Musa ngatic ka Rwot ociko be miero rar kibut jo Isirael, pi konyo tic me Eema ka Rwot?”
- ⁷Jo kame bin lubo Atalia, dako arac nono, oko turo tempulo, di gin kiko loko jamini kacil me tempulo odoko me woro Baal.
- ⁸Abaka Yowasi oko mino cik be tim sanduku moro me koko sente di oko kete i erute me tempulo.
- ⁹Bin oko rabo kop i Yuda kede Yerusalem lung pi jo dedede kelo but Rwot sente kame bin Musa, ngatic ka Rubanga, ocaoko kop me raro kibut jo Isirael i wi tim.
- ¹⁰Manono oko yomo cuny jotel kede jo dedede di gin kiko kelo sente gi, di kiko keto i sanduku paka pong.
- ¹¹I kare dedede kame Jolebi bin tero kede sanduku nono but jodongo me tic ka abaka, ka gin kiko neno be sente tot iye, kalani ka abaka kede ngatic me Ngatel me Josaseredoti oudo ko ot di kiko kwanyo sente nogo dedede tenge di kiko dwoko sanduku kare. Gin oudo kibedo timo kamanono buli ceng, di kiko koko sente atot twatwal.
- ¹²Abaka kede Yekoyada bin ko mino sente nogo but jo kame lo tic amakere kede iiko tempulo, di jo nogo ko culo kede jo anapo matapalin, jo atimo tic me ibaon, kede jo atimo tic me lilime, gin jo kame kipoore iiko tempulo.
- ¹³Aso, jo kame bin timo tic nono oko timo tic kede teko, di gin kiko iiko tempulo di etek bala kite kariki etie kede.
- ¹⁴Kakame gin bin kitieko kede tic me iiko tempulo, gin kiko dwoko sente kodong but abaka kede Yekoyada, di oko tic kede me timo jamini kame kotio kede i tempulo, jamini me wango giayala, ijikon, kede jamini ace kame kotimo kede saabu kede siliba.

Koloko lik ka Yekoyada

Gin kiko bedo mino giayala awanga i tempulo dikidiki pi kare me kuo ka Yekoyada lung.

- ¹⁵Yekoyada bin obedo kuo paka en ti twatwal, di eko to di mwakini me dongo mere tie tol acel kede ot adek.



¹⁶Di oko bin yike kabedo kame koyiko iye abakai i Bomba ka Daudi, piento en bin eko timo tic aber pi jo Isirael, kede pi Rubanga kede tempulo.

¹⁷Aso, ingei to ka Yekoyada, jotel me Yuda oko bino di kiko mino wor but abaka, di gin kiko kwano cuny abaka pi lubo tam gin.

¹⁸Gin kiko weko tempulo ka Rwot Rubanga ka joakwari gi, di kiko donyo woro caljwogi ka rubanga kame nyinge Asera. Dub gi noni oko kelo lilo ka Rwot i kom Yuda kede Yerusalem.

¹⁹Rwot oko bin cwano negi inabin pi kwenyaro gi me wek kidok bute, do jo oko dagi winyo kop me inabin nogo.

²⁰Di tipo ka Rubanga oko bino i kom Sakaria wot ka ngasaseredoti Yekoyada. En eko yai malo di eko cungo i nyim jo eko waco negi be, “Rwot Rubanga tie penyo pinyo komio wun iturunu cik mere, di manono oko nan gengo wu bedo kede mulem. Wun itiekunu weko Rwot, di eda nataman eko jalo wu!”

²¹Gin kiko poro kop arac i kome, di Abaka Yowasi oko mino gi cik be kididipo en; di gin kiko didipo en kede kide paka neke i diakal me tempulo.

²²Abaka Yowasi bin wie owil kede tim me kisa kame bin Yekoyada, papa me Sakaria otimo ne, di en eko neko Sakaria. Di Sakaria bin tie to, en eko waco be, “Akwao Rwot enen gi kotimere di eko nyango!”

Ajikini me Apugan ka Yowasi

²³I atiekini me mwaka nono isirikalen me Siria oko bino pi yi kede Yowasi. Gin kiko suro Yuda kede Yerusalem, di kiko neko jotel dedede. Di do gin kiko cwano jamini kame kiyako dedede but abaka me Damasiko.

²⁴Bed bala isirikalen me Siria oudo nonok, do Rwot oko mino kibwono twon isirikalen me Yuda, pien jo me Yuda oudo oweke, en Rwot, Rubanga ka joakwari gi. Manono en kite kame Rwot bin oko ngolo kede kop i kom Yowasi.

²⁵Jo Siria bin oko dok cen, di kiweko Yowasi kede awanon atek. Jotic mege oko poro kop me neke pi kite kame en oudo eneko kede wot ka ngasaseredoti Yekoyada. Gin kiko neke i apien mere. Di oko yike i Bomba ka Daudi, do likame i kabedo kame bin koyiko iye abakai.

²⁶Jo kame bin oko poro kop me neke, gin en Sabad wot ka Simeat dano me Amon, kede Yekosabad wot ka Simirit dano me Moab.

²⁷Kope dedede amako awobe ka Yowasi, kope areco me imurai kame kowaco i kome, kede kite kame en bin eko iiko kede tempulo, gin dedede kowandiko gi i *Itabu kame Gonyo Kope me Itabu me Abakai*. Kakame Yowasi bin oto kede, Amasia wode en oko lunyo wange bala abaka.

2 Iyutun 25

Abaka Amasia me Yuda (2 Abakai 14.2-6)



¹Mwakini me dongo ka Amasia oudo tie ot are kiwie kany i kare kame bin en ecako kede pug. En bin eko pug i Yerusalem pi mwakini ot are kiwie kanyangon. Nying toto mere bin Yekoyadan, dano me Yerusalem.

²En bin eko timo gikame poore i nyim Rwot, cite likame kede cunye lung.

³Oyotoyot di do en etieko sipakin i apugan, en eko neneko jotie kame bin oneko papa mere, abaka.

⁴Do en likame eko neneko idwe gi; en elubo kop kame bin kowandiko i itabu me iswilia ka Musa, kakame Rwot omio iye cik be, “Likame kobino neko jonywal pi dub me idwe gi, arabo neko idwe pi dub me jonywal gi; do kobino neko ngat acelacel pi dub mere en kikome.”

Yi kede Jo Edom

(2 Abakai 14.7)

⁵Abaka Amasia bin oko keto cuo me ikekon ka Yuda kede Benjamin i ikodeta me isirikalen, di lubere kede diakale gi, di eko keto jodongo kame telo isirikalen tutumia tutumia, kede kame telo isirikalen tol acel tol acel. En ecoko cuo kame mwakini gi me dongo oudo tie ot are ot malo. En eko maro wel gin dedede di eko udo be kitie tutumia tol adek (300,000), cuo kame koyero, kame romo mako tong kede ebuku di kiko ot i yi.

⁶En bin bobo da eko pango isirikalen tutumia tol acel (100,000) ki Isirael, kame tek i yi. En epango gi i wel me kilo me siliba tutumia adek kede tol ongwon (3,400).

⁷Do enabi bin oko ot bute di eko waco ne be, “Okwe abaka, kur iyei ne isirikalen me Isirael upere kedi, pien Rwot likame tie kede jo Isirael, gin jo Epuraimu nogi dedede.

⁸In cengemogo itamo be gin kibino medo ni teko me yi, do Rubanga en kame tie kede twer me mino dano bwono yi arabo mino kobwone i yi, doko en ebino mino jokwor ni bwoni.”

⁹Amasia oko penyo enabi nono be, “Do nyo kame wan obino timo i kom siliba kame ango atieko culo pi isirikalen me Isirael?” Enabi oko dwoko ne be, “Rwot karuno mino wun kame kalamo manono.”

¹⁰Aso, Amasia bin oko mino isirikalen kame oudo obino ki Epuraimu odok paco. Do gin cuny gi oko wang i kom jo Yuda, di kiko dok di kililo kitek.

¹¹Amasia bin oko udo nwangcuny di eko telo jo mege kioto i Aditot me Munyo. Gin kiko yi i kunono di kiko neko isirikalen tutumia tomon (10,000) me Edom,

¹²kede kiko mako akuo mege da tutumia tomon (10,000). Gin kiko tero gi malo i wi moru me Sela di kiko remoro gi kipopoto piny paka nyinyitun.

¹³Do isirikalen me Isirael kame Amasia oudo oko dagi negi ot i yi, di eko dwoko gi paco, oko ot suro bomban me Yuda cako ki Samaria tuno Bet Koron. Gin kiko neko jo tutumia adek (3,000), kede kiko tero jamini atos kame kiyako.



¹⁴Kakame Amasia otieko bwono kede jo Edom, en eko dok Yerusalem; en etero rubangan me jo Edom di eko keto gi bala rubangan mege, di eko donyo woro gi di edunyo negi giayala me odok angwe kur.

¹⁵Manoni oko mino cuny Rwot owang ne Amasia di eko cwano enabi bute. Enabi nono oko penyo Amasia be, “Pinyo komio in iko lokere woro rubangan me kumbor, kalikame oko karuno lako joe gi ki cingi?”

¹⁶Do di enabi nono pwodi tie yamo, abaka oko waco ne be, “Benyo, mam wan otieko keti pi bedo ngamino abaka tam? Lingi! Pinyo kamio imito be neki?” Aso, enabi nono oko ling, do di pwodi likame eling en oudo ewaco be, “Ango angeo be Rubanga otieko moko tam mere pi muducaro in, piento in itieko timo gi noni di iko dagi winyo tam kame angami.”

Yuda Oyi kede Isirael

(2 Abakai 14.8-20)

¹⁷Di do Abaka Amasia me Yuda oko yamo kede jo kame bin mie tam di en eko ooro jo but Abaka Yekoyasi me Isirael, wot ka Yekoyakas, akwar Yeku, kede kop kame waco be, “Bia oriami wang i wang.”

¹⁸Do Abaka Yekoyasi oko dwoko ne kop kame waco be, “Yat me okuto moro kame oudo tie i abum me Lebanon bin ocwao kop but yat seda me abum me Lebanon di ewaco ne be, ‘Mia nyari anyom ne woda’ ; do le moro me obar me Lebanon oko beo di eko nyonyono yat me okuto nono.

¹⁹In iwaco be, ‘Neni, anga atieko bwono jo Edom, ‘di manono oko mini idoko ngaewaka. Aso, dong bedo paco ni. Pinyo kame mio in imito mono peko di iko kelo can i komi kede i kom jo me Yuda?’”

²⁰Do Amasia oko dagi winyo kop mere. Manono oudo obedo iik ka Rubanga, tetekey emi bwon gi, pien gin oudo kidonyo woro rubangan me jo me Edom.

²¹Aso, Abaka Yekoyasi me Isirael oko yai ot yi kede Abaka Amasia me Yuda. Gin bin kiko riamo Bet Semes i Yuda.

²²Isirael oko bwono Yuda di isirikalen mege dedede oko ringo kidok i miere gi.

²³Abaka Yekoyasi me Isirael bin oko mako Abaka Amasia me Yuda bala mabus. En eko tere Yerusalem, di eko reto apama me Yerusalem piny, cako ki Erute me Epuraimu tuno i Erute me Kona, kakame boro mere buco romo mita tol are (200).

²⁴En eko yako saabu kede siliba dedede, karacel kede jamini kame bin ikwae ka Obed Edom gwoko, kiton jamini me ot ka abaka kame bin kokano. Emako jo da di eko tero bala mabus kame kopore lako alaka, di en eko dok Samaria.

²⁵Abaka Amasia me Yuda, oko medo bedo kuo pi mwakini tomon kiwie kany ingei to ka Abaka Yekoyasi me Isirael.



²⁶Gi dedede kame Amasia bin oko timo, cako ki agege tuno i atiekini me apugan mere, gin dedede kowandiko gi i *Itabu me Itatam amako Abakai me Yuda kede Isirael*.

²⁷Cako i kare kame bin en eko lokere kede tenge kibut Rwot, jo oko cako poro kop i kome i Yerusalem. En bin eko ringo Lakis, do jokwor mege oko lube kunono di gin kiko neke.

²⁸Gin kiko mino asigira oyeo liel mere di kiko dwoke Yerusalem, di oko yike kabedo kame bin koyiko iye abakai i Bomba ka Daudi.

2 Iyutun 26

Abaka Usia me Yuda

(2 Abakai 14.21-22; 15.1-7)

¹Jo me Yuda bin oko keto Usia obedo abaka kame lunyo wang papa mere Amasia, di mwakini me dongo mere oudo tie tomon kiwie kanyape.

²Usia bin oko dwoko bomba me Elat odok Yuda, di en eko medo gere ingei to ka Amasia papa mere.

³Mwakini me dongo ka Usia oudo tie tomon kiwie kanyape i kare kame en ecako kede pug. En bin eko pug i Yerusalem pi mwakini ot kany kiwie are. Nying toto mere bin Yekolia, dano me Yerusalem.

⁴En bin eko bedo timo gikame poore i nyim Rwot, bala kame papa mere Amasia bin otimo.

⁵En bin ebedo timo gikame Rubanga mito i kare me kuo ka Sakaria, ngat kame bin mie tam me bedo kede wor but Rubanga. Di i kare nono lung Rubanga oko mine winyo.

⁶Usia bin oko ot pi yi kede jo Pilistia, di eko rereto apama me bomban me Gat, Yabune, kede Asidod. En eko gero bomban i adul me Asidod kede kabedere ace i Pilistia.

⁷Rubanga bin oko konye di eko bwono jo Pilistia, imuarabun kame bin bedo Gurubaal, kede jo Meunim.

⁸Jo Amon bin obedo culo esolo but Usia, di en eko doko tek, di nyinge oko doko iruo kiton i Misiri.

⁹Usia bin ogero gedo mogo aboco Yerusalem i Erute me Kona, i Erute me Aditot, kede i isondana me apama.

¹⁰En bin egero da gedo aboco i wi tim kede eko kunyo ataparin atot, pien oudo etie kede doke kede romini atot, i dud mori me bad tetu tim kede i ebar. En oudo emaro pur, pi manono en bin eko keto jopur kede jo kame gwoko olok i piny kobedo mori mori nono, kede i lobere dedede amio.



¹¹En bin etie kede isirikalen kame bedo di kiikere pi yi. Yeyel kede Maseya en kame bin obedo ikalanin kame tic gi en oudo ngeno wel me isirikalen, di Kanania, en ngat acel kikom jotic ka abaka kame telo gi.

¹²Jotel me diakale tutumia are kede tol kanyape (2,600), jo kame bin tek i yi, en kame bin telo ikodeta me isirikalen nogi.

¹³Gin bin kitelo isirikalen tutumia tol adek kede kanyaare, kede tol kany (307,500), kame oudo karuno yi kitek pi konyo abaka ki cing jokwor mege.

¹⁴Usia bin omio isirikalen mege dedede ibukui, tongini, icoron atek, ikotin me lilime, imalia, kede kide me aporocet.

¹⁵En eko mino jodiru oteto icumai me gweno imalia kede me lwomo kide adongo, di eko cibo i wi gedo aboco kede i ikonai me apama me bomba. Iruo me nyinge oko sarakin kabedere dedede, pien Rwot oudo obedo konye tuno en doko tek.

Komio Usia Alola pi Ewaka mere

¹⁶Do i kare kame Abaka Usia bin oko doko tek kede, en eko doko ngaewaka, di manono oko kelo ne peko. Pien etimo gi kalikame nyuto genere but Rwot Rubanga mere, i yore me en kikome donyo i tempulo pi wango adok angwe kur i wi alutari.

¹⁷Do ngasaseredoti Asaria, kede josaseredoti ot kanyauni icegun, jo atek kalikame tie kede lworu moro, oko lubo abaka

¹⁸ pi genge. Gin kiwaco ne be, “Usia! In ili kede twer me wango odok angwe kur but Rwot. Josaseredoti, ikwae ka Aaron kenekene en kame kotieko kwero pi timo tic noni. Donyo ooko iwek kabedo kacil. In itieko timo dub, doko likame ibino udo winyo moro kibut Rwot Rubanga.”

¹⁹Usia oko doko ger. Esawa nono oudo en etie cungo i tempulo i nget alutari me wango odok angwe kur, di emako gi me wango odok angwe kur i cinge pi mino giayala. Di do kakame en eko doko ger kede ne josaseredoti, tuwo arac me delkom oko mako tur nyime esawa nono i nyim josaseredoti kanono.

²⁰Kakame ngatel me josaseredoti Asaria, kede josaseredoti icegun dedede oneno kede tuwo arac me delkom i nyim Asaria, gin kiko waco ne pi yai weko tempulo awakawaka. Eda kikome eko donyo ooko awakawaka, pien Rwot oudo otieko mine alola.

²¹Abaka Usia oko bedo kede tuo arac me delkom nono tuno to mere. En bin oko poke bedo i ode kene, di likame oudo oyei ne bobo donyo i tempulo. Wode Yotam en kame oko doko ngatel me paco me abaka, di epugo da jo me piny nono.

²²Aso, enabi Isaya wot ka Amos en kame bin oko wandiko gi dedede kame Usia bin otimo i kare me apugan mere.

²³ Usia bin oko to di oko yike i nget joakwari mege, do pien oudo etie kede tuwo arac me delkom, omio likame oko yike i atesin me abakai, do oko yike i limbo koudo obedo me abakai. Wode Yotam en kame bin oko lunyo wange bala abaka.



2 Iyutun 27

Abaka Yotam me Yuda

(2 Abakai 15.32-38)

- ¹Mwakini me dongo ka Yotam oudo tie ot are kiwie kany i kare kame ecako kede pug, di en bin eko pug i Yerusalem pi mwakini tomon kiwie kanyape. Nying toto mere bin Yerusa nyar ka Sadoki.
- ²En bin eko bedo timo gikame poore i nyim Rwot, bala kame bin papa mere Usia obedo timo. En likame bin eko donyo i tempulo pi wango odok angwe kur i wi alutari. Do jo pwodi oko meede kede timo dub.
- ³Yotam en kame bin ogero Erute me Bad tetu Malo me tempulo, di eko timo tic atek me gero apama me bomba i adul kame kolwongo be Opel.
- ⁴Medo i kom manono, en bin egero da bomban i piny kobedo mori mori me Yuda, kede eko gero cel mogo atek kede da gedo mogo aboco malo i wi imukuran kame abum bin tie iye.
- ⁵En bin eko yi kede abaka me jo Amon di eko bwono gi. Di en eko dino jo Amon pi bedo raro ne kilo tutumia adek kede tol ongwon me siliba (3,400), kilo milion acel (1,000,000) me engano, kede kilo milion acel (1,000,000) me mawe. Manoni gin kibedo timo buli mwaka pi mwakini adek.
- ⁶Yotam bin oko doko tek piento en ebedo lubo Rwot Rubanga mere kede genere.
- ⁷Gi dedede apat kame Yotam bin oko timo i kare me apugan mere, yi mege, iik mege me tic, gin dedede kowandiko gi i *Itabu me Itatam amako Abakai me Isirael kede Yuda*.
- ⁸Mwakini me dongo ka Yotam oudo tie ot are kiwie kany i kare kame bin en ecako kede pug. En bin eko pug pi mwakini tomon kiwie kanyape i Yerusalem.
- ⁹Yotam bin oko to di oko yike i Bomba ka Daudi di wode Akas en oko lunyo wange bala abaka.

2 Iyutun 28

Abaka Akas me Yuda

(2 Abakai 16.1-4)

- ¹Mwakini me dongo ka Akas bin tie ot are i kare kame ecako kede pug. En bin eko pug i Yerusalem pi mwakini tomon kiwie kanyape. En likame eko bedo timo gikame poore i nyim Rwot Rubanga mere, bala kame bin kwaru mere Daudi obedo timo,
- ²do en eko lubo timo gikame abakai me Isirael obedo timo. En bin eteto da caljwogi ka rubanga Baal;
- ³doko ebedo mino giayala i aditot me Kinom. En bin emio kiton awobe mege kikokome bala giayala awanga but caljwogi, di elubo tim me kwer arac me atekerin kame bin Rwot oriamo tenge ki lobo nono i kare kame bin jo me Isirael donyo kede iye.



⁴Abaka Akas bin obedo mino giayala angola kede giayala me odok angwe kur i kabedere me woro caljwogi, i wi mori, kede i dud yen oduko dedede.

Yi kede Siria kede Isirael

(2 Abakai 16.5)

⁵Pi kite kame Akas bin odubo kede, manono bin oko mino Rwot Rubanga mere omie i cing abaka me Siria. Abaka nono bin oko bwone di eko mako jo atot eko tero Damasiko bala mabus. I cen me manono, Rwot bin bobo da oko mino Akas i cing abaka me Isirael, di abaka nono oko bwone di eko neko jo atot.

⁶I ceng acel kenekene, abaka me Isirael, Peka wot ka Remalia, bin obwono Akas di eko neko isirikalen me Yuda tutumia tol acel kede ot are (120,000), kame bin tek i yi. Manoni bin otimere pien gin oudo kiweko lubo Rwot, Rubanga ka joakwari gi.

⁷Di Sikiri, sirikale me Epuraimu kame bin tek i yi, oko neko Maseya wot ka Abaka Akas, Asirikam ngat kame bin lo paco ka abaka, kede Elikana ngat kame bin lubo tien abaka.

⁸Isirikalen me Isirael oko mako jo Yuda tutumia tol are (200,000) bala mabus, mon kede cuo di gin kiko dok kede gi Samaria i bomba gi adwong. Gin kitero gi karacel kede jamini atot kame kiyako. Manoni gin bin kitimo bed bala jo Yuda oudo obedo joawade gi.

Enabi Oded

⁹Enabi ka Rwot bin tie Samaria kunono kame nyinge Oded. Kakame bin isirikalen me Isirael tie dok kede paco, en eko yai pi ot riamo kede gi di eko waco negi be, “Rwot, Rubanga ka joakwari wu oudo olilo ne jo Yuda, di en eko mino wun ibwonunu gin, do nataman en etieko winyo kite kame wun ikounu neko gin kede abongo kisa.

¹⁰Di nataman wun ikounu mito mino gin jo me Yuda kede me Yerusalem, cuo kede mon kidok ipasoi. Benyo, wun likame ingeunu be wuda itiekunu timo dub atot atota but Rwot Rubanga wu?

¹¹Aso nataman winyunu kop na, di ikounu dwoko jo kame wun imakunu nogo, pien gin kibedo joawade wu. Poore idwokunu gi, pien Rwot otieko lilo ne wu kitek.”

¹²Jotel ongwon mogo me jo Epuraimu, Asaria wot ka Yokanan, Berekia wot ka Mesilemot, Yekisikia wot ka Salum, kede Amasa wot ka Kadalai, oko gida dagi gikame jo kame bin tie dwogo ki yi otimo.

¹³Gin kiko waco negi be, “Wun likame ibinunu kelo jo kame imakunu nogo kan, pien wun imitunu tingo ne wan kop but Rwot medo i kom dub kede raco wa kame nataman otie kede cuto. Raco wan dwong cuto, doko Rwot otieko lilo ne wa kitek.”

¹⁴Aso, manono oko mino isirikalen oweko jo kame gin oudo kimako karacel kede jamini kame gin oudo kiyako, i nyim jotel kede jo koudo ocokere.

¹⁵Di cuo ongwon nogo kame oudo owaco nying gi oko yai di gin kiko kwanyo igoen kikom jamini kame oudo koyako, di gin kiko poko ne jo dedede kame oudo tie ot nono, kikom jo kame oudo komako. Gin kimio gi igoen kede amukai, cam kede



giamata, di kiko wiro mo me olibeti i aporeso gi. Jo kame oudo goro gin kiko keto i ngei asigiran, di kiko tero gi paka but joawade gi i Jeriko, bomba me tugere. Di jo Isirael oko dok Samaria.

Akas Okwao Asiria pi Konye

(2 Abakai 16.7-9)

¹⁶I kare nono Abaka Akas oko cwano kop but abaka me Asiria pi cwano ne konye.

¹⁷Pien jo Edom oudo bobo osuro Yuda di kiko bwone, kede kiko mako jo kitero.

¹⁸Doko i kare nono da jo Pilistia oudo oyako bomban kame oudo tie i dud mori me bad tetu tim kede kame bin tie i bad tetu piny me Yuda, di kiko mano bomban me Bet Semes, Aijalon, Gederot, Soko kede calere mege, Timina kede calere mege, kede Gimoso kede calere mege. Gin oudo kiko donyo bedo kunono.

¹⁹Rwot oudo okelo peko nogi dedede i kom Yuda pien Abaka Akas oudo odagi lubo kop mere, doko eko dagi da gengo jo Yuda timo dub.

²⁰Aso, Abaka Tigilat Pileser me Asiria akaka bino pi konyo Akas, en eko lokere bino yi kede en, di eko tidilo en.

²¹Akas oko kwanyo jamini me tempulo, jamini me paco ka abaka, kede me miere me jotel, di en eko mino gi but abaka me Asiria, do manono da likame oko konye.

Dub ka Akas

²²I kare kame bin Abaka Akas tie kede i peko en kame do eko timo kede dub kokato kare but Rwot.

²³En emio giayala but rubangan me jo me Damasiko, jo koudo obwone. En ewaco be, “Pien rubangan me abakai me Siria oko konyo gi, ango abino mino giayala but gi tetekeny amoto kikonya.” Do manoni oko lokere kelo ne peko, kede ne jo Isirael lung.

²⁴Abaka Akas oko coko jamini dedede kame bin kotio kede i tempulo di eko ngingido gi. En eko cego tempulo di eko timo alutarin kadedere dedede i Yerusalem.

²⁵I bomban dedede me Yuda en bin egero iye kadedere me woro rubangan apat, kadedere me yalo caljwogi. Di manono oko mino Rwot, Rubanga ka joakwari mege olilo.

²⁶Gi dedede apat kame en bin eko timo kede yote me kuo mere, cako ki agege tuno i atiekini me apugan mere, gin dedede kowandiko gi i *Itabu me Itatam amako Abakai me Yuda kede Isirael*.

²⁷Akas bin oko to, di oko yike i Yerusalem, do likame i kabedo kame bin koyiko iye abakai me Isirael. Wode Esekia en kame bin oko lunyo wange bala abaka.

2 Iyutun 29

Abaka Esekia me Yuda

(2 Abakai 18.1-3)



¹Mwakini me dongo ka Esekia oudo tie ot are kiwie kany i kare kame bin en ecako kede pug. En bin eko pug i Yerusalem pi mwakini ot are kiwie kanyangon. Nying toto mere bin Abija nyar ka Sakaria.

²En bin eko timo gikame poore i nyim Rwot bala kame bin kwaru mere Daudi otimo.

Lonyo Tempulo

³I mwaka me agege me apugan mere, i duwe me agege, Esekia oko yabo ikekon me tempulo di eko iiko gi.

⁴En eko koko josaseredoti kede Jolebi i diakal me tempulo, i bad tetu kide.

⁵En eko waco negi be, “Winyunu kop na, wun Jolebi! Poore wun ilonyerenu, kede ikounu lonyo tempulo ka Rwot, Rubanga ka joakwari wu. Kwanyunu tenge ki tempulo gi dedede kame munao en.

⁶Joakwari wa oudo obedo jo kalikame tie kede genere but Rwot Rubanga wa di gin kiko timo gikarac i nyime. Gin kiweke di kiko weko kabedo mere da; gin kiko lokere tenge kibute.

⁷Gin kicego ikekon me tempulo di kiko neko italan. Gin kiko weko mino giayala me odok angwe kur akadi mino giayala awanga i tempulo ka Rubanga me Isirael.

⁸Manoni en komio Rwot oko lilo ne Yuda kede Yerusalem, di en eko mino gin kidoko gikame jo neno di kiko bedo kede lworu, ur, kede acae, bala kame nataman wuda inenunu kede wangu.

⁹Kotieko neko joapapi wa i yi, doko awobe wa kede anyira wa kiton mon wa kotieko mako di oko tero bala mabus.

¹⁰” Nataman ango cunya mito timo isikan kede Rwot, Rubanga me Isirael, tetekeny amoto ekwany lilo mere tenge kibut wa.

¹¹Awobe na, kur ibedunu kede ajajalun, pien Rwot otieko yero wun pi bedo jotie mege kame cungo i nyime di kitimo tic mere, kede pi mino giayala bute.”

¹²⁻¹⁴Jolebi kame oko yai ot timo tic gin ige: Ki ekeko ka Kokat, Makat wot ka Amasai kede Yoweri wot ka Asaria Ki ekeko ka Merari, Kis wot ka Abidi kede Asaria wot ka Yekalelel Ki ekeko ka Gereson, Yoa wot ka Sima kede Eden wot ka Yoa Ki ekeko ka Elisapan, Simiri kede Yeyel Ki ekeko ka Asap, Sakaria kede Matania Ki ekeko ka Keman, Yekuel kede Simei Ki ekeko ka Yedutun, Semaya kede Usiel

¹⁵Jo nogi oko koko karacel Jolebi wad gi, di gin dedede kiko lonyere. Gin kiko donyo i tempulo bala kame abaka oudo ociko, pi kwanyo tenge gi dedede kame munao en, di lubere kede cik kame Rwot oudo omio.

¹⁶Josaseredoti oko donyo Kabedo Kacil me tempulo pi lonye, di gin kiko kwanyo ooko i diakal me tempulo gi dedede kopwokere, kame gin kiko udo i tempulo. Di Jolebi oko kwanyo jamini nogo di kiko tero gi i aditot me Kideron.



¹⁷Gin bin kicako tic noni me lonyo tempulo i buto duwe acel me duwe me acel, di i buto duwe kanyauni gin oudo kitieko do timo kamanoni kiton tuno i agola kame kodonyo kede i tempulo. Di do gin kiko bobo meede kede timo tic me lonyo yi tempulo pi ceng kanyauni ace. Aso, gi bin kiko tieko tic i buto duwe tomon kiwie kanyape me duwe me acel nono.

Kokwero Tempulo Bobo

¹⁸Jolebi oko ot but Abaka Esekia di gin kiko waco ne be, “Wan otieko lonyo tempulo lung, kiton alutari me wango giayala kede jamini dedede me tic mege, emesa me keto mugati i nyim Rwot kede jamini dedede me tic mege.

¹⁹Wan otieko dwoko da jamini dedede kame bin Abaka Akas okwanyo tenge ki tempulo i kare kame bin en likame eko bedo kede genere but Rwot i kare me apugan mere.”

²⁰Oru mere odiko sek, Abaka Esekia oko coko jodongo me bomba, di gin dedede kiko ot i tempulo.

²¹Gin kitero twonin kanyaare, imerekekin kanyaare, iduwe romini kanyaare kede ikoroi kanyaare pi bedo giayala me kwanyo dub me jo me diakal ka abaka kede me jo me Yuda. Abaka oko mino cik but josaseredoti, ikwae ka Aaron pi mino leini nogo bala giayala i wi alutari ka Rwot.

²²Aso, josaseredoti oko ngongolo twonin nogo, idwe romini, kede imerekekin, di gin kiko kikiro remo gi i wi alutari.

²³Di do kiko kwanyo ikoroi me giayala me kwanyo dub di kiko tero but abaka kede jo kocokere dedede; gin kiko dokakino cing gi i wi gi.

²⁴Di do josaseredoti oko ngongolo ikoroi nogo di gin kiko onyo remo gi i wi alutari bala giayala kame kwanyo dub me jo dedede me Isirael, pien abaka oudo omio cik be poore mi giayala awanga kede giayala me kwanyo dub pi jo Isirael lung.

²⁵Abaka Esekia oko keto Jolebi i tempulo di kimako suanin abatal me gono were, adungun, kede arigirigin. En elubo cik dedede kame Rwot bin omio Abaka Daudi di ebeo kikut Gad enabi ka abaka, kede enabi Natan.

²⁶Jolebi oko cungo di kimako jamini me gono were kame bin Abaka Daudi otio kede gi, di josaseredoti da oko cungo kunono di kimako agwarai.

²⁷Di Esekia oko mino cik be mi giayala awanga i wi alutari. Kakame bin oko cako mino kede giayala awanga, jo da oko cako wero were me pako Rwot, di okuto agwarai kede kogoo jamini me wer kame bin Abaka Daudi me Isirael otio kede.

²⁸Jo dedede koudo ocokere oko woro Rwot, di wer kede kuto agwarai meede anyim, tuno giayala dedede tieko wang.

²⁹Di do Abaka Esekia kede jo dedede oko riondiko piny di kiko woro Rubanga.



³⁰Abaka Esekia kede jotel oko mino cik but Jolebi pi gin cako pako Rwot kede were ka Daudi kede me enabi Asap. Gin kiko wero were me pak kede ilel adwong, di kiko luro wi gi piny kiko woro Rubanga.

³¹Di Esekia oko waco ne jo be, “Wun nataman itiekunu lonyere pi bedo jo ka Rwot, kelunu do giayala wu angola kede me pwoc but Rwot.” Jo oko kelo giayala angola kede me pwoc, kede jo kame bin cuny gi bin mito oko gida kelo giayala awanga.

³²Gin kiko kelo twonin ot kanyaare (70), imerekekin tol acel (100), kede idwe romini tol are (200) bala giayala awanga but Rwot.

³³Giayala kacil kame bin jo oko kelo oudo tie twonin tol kanyape (600) kede romini tutumia adek (3,000).

³⁴Do josaseredoti oudo nonok twatwal omio oudo likame kikaruno yango leini me giayala awanga dedede, pien jo atot kikom gi oudo pwodi likame olonyere. Aso, pien Jolebi dedede oudo otieko lonyere, gin do kiko konyo josaseredoti yango leini nogo tuno tieko gi.

³⁵Medo i wi mino giayala awanga, tic me josaseredoti doko en oudo wango kakamio me giayala me nywak, kede mino giayala amata kame bin komio karacel kede giayala awanga. Epone no en kame bin oko dwoko kede woro Rwot i tempulo.

³⁶Di Esekia kede jo dedede oko lelo pi gikame Rubanga oudo oko timo ne jo mege; pien Rubanga oudo okonyo gi omio kiko tieko timo gi dedede awakawaka.

2 Iyutun 30

likere me Tedo Ebaga me Kalamo

¹Abaka Esekia bin oko cwano kop but jo Isirael kede jo Yuda dedede, di eko wandiko baluwan da but jo Epuraimu kede jo Manase, pi lwongo gi bino i tempulo i Yerusalem, pi tedo Ebaga me Kalamo pi woro Rwot, Rubanga me Isirael.

²Abaka kede jotel kede jo dedede me Yerusalem oudo otieko moko tam gi pi tedo Ebaga me Kalamo i duwe me are,

³pien gin bin likame kiko karuno tedo ebaga nono i kare mere pien josaseredoti kotieko lonyere oudo pwodi nonok, doko jo da oudo pwodi likame ocokere Yerusalem.

⁴Abaka kede jo dedede kame oudo ocokere oko neno be iik nono oudo poore.

⁵Aso gin kiko moko be poore rab kop nono i Isirael lung, cako ki Beereseba tuno Dan, be jo dedede poore bin di kiko tedo Ebaga me Kalamo pi woro Rwot, Rubanga me Isirael, i Yerusalem; pien gin oudo pwodi likame kitedo ebaga nono di jo tot iye bala kame iswil mito.

⁶Joor oko ot ririmo Isirael kede Yuda lung di kitero baluwan koyai kibus abaka kede jotel, bala kame abaka oudo ociko. Baluwa nono oudo waco be, “Okwe wun jo Isirael,



dwogunu but Rwot, Rubanga ka Aburam, Isaka, kede Yakobo, tetekeny amoto edwog bobo but wanunu jo anonok nogi kobwot ki cing abakai me Asiria.

⁷Kur ibedunu cal bala joakwari wu kede jo Isirael wadu kame bin likame oko bedo kede genere but Rwot, Rubanga ka joakwari gi, di manono oko mine emio lobo gi odong nono abongo jo, bala kame nataman inenunu.

⁸Kur ibedunu kede epali bala bin joakwari wu, do lubunu kop ka Rwot. Bianu i tempulo mere kame en etieko lonyo atwal, di ikounu woro Rwot Rubanga wu, tetekeny ewek bedo ger ne wu.

⁹Pien ka wun idwogunu but Rwot, jo komako joawade wu kede idwe wu di kiko tero bala mabus bino bedo kede cuny me kisa i kom gi di gin kiko weko gi kidwogo i lobo noni. Rwot Rubanga wu mwol doko en etie kede cuny me kisa, en ebino gamo wu ka wun idwogunu bute.”

¹⁰Joor oko ot ririmo bomban dedede kame bin tie i piny me Epuraimu kede Manase, ape tuno Sebulun. Do jo oko bedo nyero gi anyera di kicao gi.

¹¹Jo anonok kenekene ki ekeko ka Aser, Manase, kede Sebulun en oko mwolere di kiko yei ot Yerusalem.

¹²Rubanga oudo tie tic kede jo Yuda pi mino gi bedo kede cuny acel me lubo kop mere kame abaka kede jotel oudo ociko negi.

Kotedo Ebagame Kalamo

¹³Jo atat twatwal bin oko cokere Yerusalem i duwe me are pi tede ebagame mugati kame arup li iye.

¹⁴Gin kiko cako tic di kiko kwanyo alutarin apat dedede kede alutarin kame oudo koyalo iye odok angwe kur kame oudo tie Yerusalem, di kiko ot uco gi i Aditot me Kideron.

¹⁵Di i buto duwe tomon kiwie ongwon me duwe me are gin kiko ngongolo romini me Ebagame Kalamo. Lewic oko mako josaseredoti kede Jolebi kalikame oudo olonyere mak atek, di do gida kiko lonyere di kiko tero giayala awanga i tempulo.

¹⁶Gin kiko donyo timo tic gi i tempulo di kilubo iswil ka Musa, dano ka Rubanga. Jolebi oko tero remo me giayala but josaseredoti, di gin kiko kikiro en i wi alutari.

¹⁷Pien oudo jo atat kame tie kacokere likame olonyere, Jolebi en kame oko do ngongolo romini me Ebagame Kalamo ne jo dedede kalikame oudo olonyere, pi mino gi bedo gikacil but Rwot.

¹⁸Jo atat kame oudo obino ki Epuraimu, Manase, Isakar, kede Sebulun oudo likame olonyere, manono oko mino gin oudo kicamo Ebagame Kalamo i yore kalikame poore. Abaka Esekia oko lego pirgi kaman: “Okwe in Rwot aber, sasiro jo dedede

¹⁹kame keto cuny gi moni, in Rwot Rubanga ka joakwari wa, bed bala gin likame kilubo cik me kabedo kacil, cik amako lonyere.”



²⁰Rwot oko gamo ilega ka Esekia; en eko sasiro jo di likame eko timo negi peko moro.

²¹Jo Isirael kame oudo tie Yerusalem oko tedo ebaga me mugati kame arup li iye pi ceng kanyaare kede kilel adwong; di Jolebi kede josaseredoti oko bedo pako Rwot buli ceng, di kigoo jamini me wer ne Rwot kede teko gi dedede.

²²Esekia oko pwono Jolebi dedede pi apiranut kame gin oudo kiko nyuto i tic ka Rwot.

Ebaga me Are

Aso, jo oko camo ebaga pi ceng kanyaare, di kimio giayala me nywak kede kimio pwoc but Rwot, Rubanga ka joakwari gi.

²³Di jo dedede kocokere oko bobo yei pi meede kede tedo ebaga pi ceng kanyaare ace; aso, gin bobo kiko tedo ebaga kede kilel pi ceng kanyaare.

²⁴Abaka Esekia me Yuda oudo omio jo twonin tutumia acel (1,000) kede romini tutumia kanyaare (7,000) pi bedo giayala, di jotel oko gida kwanyo twonin tutumia acel (1,000) kede romini tutumia tomon (10,000). Josaseredoti atos twatwal oko lonyere.

²⁵Jo dedede kocokere oko bedo kede kilel, jo Yuda, josaseredoti kede Jolebi, jo dedede koyai ki Isirael, jokumbor koyai ki Isirael, kede jokumbor kame oudo tie bedo Yuda.

²⁶Ilel adwong oko bedo Yerusalem, pien cako i kare ka Sulumani wot ka Abaka Daudi me Isirael likame oudo tie gimoro kacal kamanono kobedo Yerusalem.

²⁷Josaseredoti kede Jolebi oko yai malo di kiko cungo; gin kiko lamo ne jo winyo, di Rubanga oko winyo kwac gi i malo kabedo mere.

2 Iyutun 31

Esekia Okelo Alokaloka i Edini

¹Aso, kakame ebaga otiek kede, jo dedede me Isirael kame oudo tie kunono oko yai ot i bomban me Yuda dedede di gin kiko mumuko ipirin me kide kame oudo kosisipo me woro caljwogi, kitotongo da piny ipirin acungo pi rubanga Asera, di kiko dudubo alutarin kede kabedere me woro caljwogi i piny dedede me Yuda kede Benjamin, kede i piny me Epuraimu kede Manase. Di do jo dedede me Isirael oko dok i bomban gi, ngat acelacel odok ture.

²Abaka Esekia oko popoko josaseredoti kede Jolebi i ikodeta, di lubere kede tice gi. Tice kame en emio josaseredoti kede Jolebi gin en, mino giayala awanga kede giayala me nywak, woro Rubanga i tempulo kede mino pwoc kede pak i irutei me tempulo.

³ Abaka oko kwanyo leini mege amake pi bedo giayala awanga kame komio but Rwot odiko kede otieno, kede giayala awanga kame komio i ceng Sabato, i Ebaga me Por Duwe, kede i ibagai apat kame iswil ka Rwot ociko be poore tedi.



- ⁴ Abaka oko mino cik but jo kame bin bedo Yerusalem pi gin kelo giayala kame obedo iner me josaseredoti kede Jolebi, tetekeny gin kijal kare gi lung timo gikame Iswil ka Rwot mito.
- ⁵ Oyotoyot di kop nono otuno but jo, jo Isirael oko mino jamini atos twatwal: gin kimio engano kame geo cek, bwini, mo me olibeti, mokic, kede jamini apat dedede kame kopuro apura; kede kiko tero da acel me tomon me gi dedede kame gin oudo kitie kede.
- ⁶ Jo Isirael kede Yuda kame bin bedo i bomban me Yuda oko gida tero acel me tomon me doke, romini, kede acel me tomon me jamini dedede kame gin oudo kikwero but Rwot Rubanga gi, di gin kiko keto gi i atukito.
- ⁷ Gin bin kicako koko giamia gi nogi i duwe me adek, di kiko tieko i duwe me kanyaare.
- ⁸ Kakame Esekia kede jotel oko bino kede di gin kiko neno atukito nogo, gin kiko pako Rwot kede kiko pwono jo mege me Isirael.
- ⁹ Esekia oko penyo josaseredoti kede Jolebi kop i kom giamia nogo.
- ¹⁰ Ngatel me josaseredoti Asaria, akwar Sadoki oko waco ne be, “Cako i kare kame jo ocako kelo kede giamia gi i tempulo, wan obedo tie kede cam kame romo wa di cam atos da oko dong. Manoni otimere pien Rwot omio jo mege winyo.”
- ¹¹ Di Esekia oko mino gi cik be miero kiik agolai me kano jame i tempulo; di gin kiko timo kamanono.
- ¹² Di do gin kiko bedo kede genere di kiko tero giamia nogo dedede kede acel me tomon i tempulo. Gin kiko keto Ngalebi kame nyinge Konania pi bedo ngadwong kame loo jamini nogo, di omin mere Simei oko bedo ngat kame konye i tic nono.
- ¹³ Abaka Esekia kede ngatel me josaseredoti Asaria bin oko keto Jolebi tomon pi bedo jo kame konyo Konania kede omin mere Simei. Jolebi nogo bin gin en, Yekiel, Asasia, Nakat, Asakel, Yerimot, Yosabad, Eliel, Isimakia, Makat, kede Benaya.
- ¹⁴ Kore wot ka Imina, Ngalebi kame bin obedo ngadar Erute me Bad tetu Kide me tempulo, en kame bin obedo ngadwong me gamo giamia me bercuny kame jo oudo mio but Rubanga, doko en nono kame oudo epopoko gi ne josaseredoti kede Jolebi.
- ¹⁵ Jo agenere kame bin konye gin en, Eden, Miniamin, Yesua, Semaya, Amaria, kede Sekania. Jo nogi bin popoko giamia nogo i miere me josaseredoti, i bomban kame kitie iye, di lubere kede tic kame oudo opoko negi. Gin bin kipoko giamia nogo but joatino kede joadongo di rorom.
- ¹⁶ Gin oudo likame kilubo ikekon me joakwari. Gin bin kiko poko giamia nogo but cuo dedede, cako kibut jo me mwakini ot adek ot malo, dano kame oudo tie kede tic kame en etimo buli ceng i tempulo i ekodet gi.



¹⁷Bin kowandiko josaseredoti i tic di kolubo kede ude me joakwari gi, do Jolebi cako ki mwakini me dongo ot are ot kede malo, bin kowandiko gi i tic di kolubo kede ikodeta gi.

¹⁸Josaseredoti bin kowandiko karacel kede idwe gi, mon gi, kede jo ace akuo i cing gi; pien gin oudo miero kibed di kiikere pi timo tic ka Rwot esawa moroni kenekene.

¹⁹Aso, i kom kop amako josaseredoti, ikwae ka Aaron, kame oudo tie bedo i calere me nget bomban me Yuda, tie cuo kame bin koyero ayera pi tero ne gin jame, kede ne Jolebi kame oudo kowandiko nying gi.

²⁰Abaka Esekia oko bedo timo kamanono i Yuda lung. En bin eko timo gikame ber, kame opoore, doko en oudo ebedo kede genere but Rwot Rubanga mere.

²¹Tice dedede kame bin en eko timo amako tempulo, arabo amako lubo Iswil kede cik ka Rubanga, en etimo gi kede cunye lung; manono en komio gi dedede oko bedo ne kiber.

2 Iyutun 32

Jo Asiria Ongato ne Yerusalem

(2 Abakai 18.13-37; 19.14-19, 35-37; Isaya 36.1-22; 37.8-38)

¹Ingei Abaka Esekia timo gi nogi dedede kede genere but Rwot, Abaka Senakerib me Asiria oko ot suro Yuda. En eluko bomban kame kocelo di oudo eparo pi mano gi.

²Kakame Esekia oneno kede be Senakerib oudo otieko bino pi yi kede Yerusalem,

^{3-4e}n eko iiko tam kede jodongo me tic mere kede isirikalen pi toro ataneke kame oudo tie ooko me bomba tetekeny jo Asiria kur bed tie kede pii moro ka gin kibino suro Yerusalem. Jodongo nogo oko donyo ooko kede jo atot di gin kiko toro ataneke kede isamai dedede kame oudo tie i nget Yerusalem.

⁵Esekia oko cako timo tic kede teko di eko bobo gero apama lung kame oudo oreto piny, di eko gero da gedo mogo abocoboco malo iye, kede eko gero apama ace i ooko mere. Medo i wi manono en eko temuno da nget bomba i bad tetu kide me Yerusalem kakame bin otero. En bin eko mino otimo da tongini kede ibukui atot twatwal.

⁶En eko keto jo kame bino telo jo ot yi, di en eko coko gi karacel i diakal me erute me bomba. En eko waco negi be,

⁷” Bedunu tek doko di itienu kede nwangcuny. Kur ibedunu kede lwooro moro arabo poto cuny i nyim abaka me Asiria kede isirikalen dedede kame en etie kede; pien ngat kame tie kede wan tek kalamo ngat kame tie kede en.

⁸En etie kede teko me dano, do wan Rwot Rubanga wa tie but wa pi konyo wa kede pi yi pirwa.” Kope nogi kame Abaka Esekia me Yuda owaco, oko mino jo oudo nwangcuny.

⁹I cen mere, di bin Abaka Senakerib me Asiria tie Lakis kede isirikalen mege, en eko cwano jotie mege Yerusalem pi waco ne Abaka Esekia me Yuda karacel kede jo Yuda dedede kame oudo tie Yerusalem be,



- 10**” Ango Senakerib, abaka me Asiria, apenyo wu be, nyo kame wun itienu keto gen wu iye en amio wun pwodi itienu bedo Yerusalem di otieko luko wu?
- 11**Esekia waco ne wu be Rwot Rubanga wu bino lako wu ki cinga ango abaka me Asiria. Iparunu be en likame etie ngalo wu di eko bino mino wu itounu kec kede orio?
- 12**Benyo, mam Esekia nono en kame bin orereto kabedere me woro Rwot kede alutarin mege, di eko ciko jo me Yuda kede Yerusalem pi woro Rubanga di kidunyo ne odok angwe kur i wi alutari acel kenekene?
- 13**Benyo, mam wun likame ingeunu gikame ango kede joakwari na otieko timo ne jo me atekerin apat? Benyo, tie rubanga me ateker moro kotieko lako piny mere ki cing abaka me Asiria?
- 14**Awene kame Rubanga moro kikom rubangan me pinye nogi dedede oko lako kede piny gi ki cing abakai me Asiria, en komio iparunu be Rubanga wu twero lako wu ki cinga?
- 15**Pi mano, kur iyeunu Esekia ngalu arabo erweny wu kamano. Kur igamunu kop mere! Pien likame tie rubanga me ateker moro kotieko lako jo mege ki cinga arabo ki cing joakwari na. Ateteni rubanga wu noni likame karuno lako wu ki cinga!”
- 16**Jotic me Asiria oko meede waco kope areco i kom Rwot Rubanga kede i kom Esekia, ngatic ka Rwot.
- 17**Senakerib bin oko da wandiko baluwa kame cao Rwot Rubanga me Isirael. Baluwa nono oudo waco be, “Rubangan me atekerin me pinye apat bin likame oko twero lako joe gi ki cinga, kamanono da Rubanga ka Esekia likame bino lako jo mege ki cinga.”
- 18**Jotic me Asiria nogo oko lelemo kop noni kede dwan amalo kede leb Eburania, but jo me Yerusalem kame oudo tie bedo i wi apama, pi mino gi kidok lwor, tetekeny gin kimai bomba.
- 19**Gin kiko bedo waco kop i kom Rubanga me Yerusalem, ineno bala eda ecal bala rubangan me atekerin apat kame jo en kotimo.
- 20**Di Abaka Esekia kede enabi Isaya wot ka Amos oko lego pi kop noni di kikok but Rubanga pi konyo gi.
- 21**Rwot oko cwano malaika di en eko neneko isirikalen kede jotel me isirikalen kede jodongo apat me Asiria. Manono oko mino abaka me Asiria odok cen i piny mere kede lewic. Ceng moro acel di en oudo etie i tempulo me rubanga mere, awobe mege mogo i kom idwe mege oko neke kede ipimai gi.
- 22**Epone noni en kame Rwot bin oko lako kede Esekia kede jo me Yerusalem ki cing Abaka Senakerib me Asiria, kede ki cing jokwor gi apat dedede. En eko mino gi kibedo kede anapakin kede pinye me kio gi dedede.
- 23**Jo atos bin oko ot Yerusalem pi tero giayala gi but Rwot, kede pi tero giamia me jamini abeco but Abaka Esekia me Yuda, di do cako i kare nono atekerin dedede oko donyo bedo kede wor but Esekia.



Tuwo ka Esekia kede Ewaka mere

(2 Abakai 20.1-3, 12-19; Isaya 38.1-3; 39.1-8)

²⁴I kare nogo tuwo oko mako Esekia kame oudo otuno do neke. En eko kwano Rwot, di Rwot oko gamo doge di oko mine gianena kame nyuto ne be ebino cango.

²⁵Do Esekia oko timo gi kalikame lubere kede bero kame oudo Rwot otimo ne, pien cunye oko bedo kede ewaka. Manono bin oko kelo lilo ka Rwot i kome kede i kom Yuda kede Yerusalem.

²⁶Di do Esekia oko mwolere eweko ewaka kame oudo etie kede, en kede jo me Yerusalem, manono oko mino Rwot likame omio jo alola i kare ka Esekia.

Abar kede Angosibib ka Esekia

²⁷Abaka Esekia oudo obaro twatwal, doko jo dedede oudo mie wor. En bin eko gero agolai me kano siliba, saabu, kide me wel, jamini angwe kur, ibukui, kede jamini dedede apat me wel.

²⁸Medo i kom magonogo en eko gero da ude me gwoko engano, bwini, mo me olibeti; kede ude me gwoko doke, kede kagwoko romini.

²⁹Rubanga oudo omio Esekia obaro twatwal; en oudo etie kede romini kede doke, omio en eko gero bomban atot.

³⁰Abaka Esekia en kame bin otimo puleju kame kwanyo pii ki atan me Gikon di eko tero i bad tetu tim me yi bomba me Yerusalem. Esekia bin tie kede winyo i gi dedede kame en oudo etimo.

³¹Akadi i kom kop amako joor kame bin jotel me Babilon ocwao pi ot penyo kop i kom gianena kame oudo Rubanga omie, Rubanga oweke timo gi dedede en kene, tetekeny etame di eko ngeno gi dedede kame oudo tie i cunye.

Ajikini me Apugan ka Esekia

(2 Abakai 20.20-21)

³²Aso, gi dedede apat kame Esekia bin otimo, tice mege abeco, gin dedede kowandiko gi i *Gianyuta kame Rubanga Omio Enabi Isaya Wot ka Amos kede i Itabu me Itatam amako Abakai me Yuda kede Isirael*.

³³Esekia bin oko to di oko yike kabedo kame bin koyiko iye abakai kame bin koworo twatwal; di jo me Yuda kede me Yerusalem dedede oko mine wor i to mere. Wode Manase en kame bin oko lunyo wange bala abaka.

2 Iyutun 33

Abaka Manase me Yuda

(2 Abakai 21.1-9)

¹Mwakini me dongo ka Manase oudo tie tomon kiwie are i kare kame en bin ecako kede pug. En bin eko pug i Yerusalem pi mwakini ot kany kiwie kany.

²Manase bin oko timo gikarac i nyim Rwot. En eoto lubo tim areco me atekerin kame bin Rwot oriamo tenge ki nyim jo me Isirael.



³En emedo gero kabedere me woro caljwogi kame bin papa mere Esekia orereto, etimo alutarin me woro Baal, etimo da cal me rubanga Asera, kede eko bedo woro jamini apapat kame tie i malo, di etio negi.

⁴En etimo alutarin me woro caljwogi apapat i ot ka Rwot, kabedo kame bin Rwot owaco kop i kome be, “Kobino bedo wora i Yerusalem nakanaka.”

⁵En etimo da alutarin i diakale are dedede me tempulo pi woro jamini apapat dedede kame tie i malo.

⁶En bin emio wode bala giayala awanga i Aditot me Kinom; etimo da tic me lamo gagi, oudo etio kede imuroko kame penyo tipere kede etio da kede jojwogi. En ebedo timo gikareco atot atota i nyim Rwot, di eko wango cuny Rwot.

⁷En ecibo i ot ka Rwot caljwogi kame en etimo, kabedo kame bin Rwot owaco kop i kome but Daudi kede but wode Sulumani be, “Ot noni kede Yerusalem kanoni, en kabedo kame ango atieko yero kikom adulion dedede me ikekon tomon kiwie are me jo me Isirael, pi bedo kakame kowora iye nakanaka.

⁸Ango likame bobo abino mino jo Isirael yai tenge ki lobo kame bin ango amio joakwari gi, tek di gin kigwokere di kiko bedo lubo gi dedede kame ango aciko negi, kede kiko lubo iswilia dedede kame bin ango amio Musa.”

⁹Manase bin omio gin jo Yuda kede jo me Yerusalem kitimo gikareco atot kalamo me atekerin kame Rwot omuducaro i nyim jo me Isirael.

Manase Oswilaro

¹⁰Rwot bin otamo kwenyaro Manase kede jo mege i kom dub gi do gin kiko dagi winyo kop mere.

¹¹Pi mano, Rwot bin oko cwano jotel me isirikalen me Asiria ot suro Yuda. Gin kiko mako Manase di kiko twene kede epingo kede irikoi, di kiko tere Babilon.

¹²I kare kame en oudo etie neno kede can, en eko mwolere twatwal i nyim Rubanga ka joakwari mege, di eko lokere but Rwot Rubanga mere eko ngangao en pi konye.

¹³Rubanga oko gamo kwac ka Manase di eko mine edok Yerusalem i ajakanut mere bobo. Manoni bin oko mino Manase ongego be Rwot ateteni en Rubanga.

¹⁴I cen mere Manase oko medo gero wi apama me ooko me Yerusalem i bad tetu kide di eko mine edoko bor malo. En eropo wi apama nono cako ki aditot, i nget atan me Gikon kame tie i bad tetu malo me Erute me Aporogo kede adul me bomba kame kolwongo be Opel. En bin eko keto da jotel kame lo isirikalen kame bin tie i bomban kame kocelo dedede me Yuda.

¹⁵En ekwanyo tenge ki tempulo rubangan me kumbor kede caljwogi kame en oudo eketo iye, kede alutarin dedede me woro caljwogi kame en oudo egero i wi moru kame tempulo tie iye kede i kabedere apat me Yerusalem. En etero gi nogi dedede ooko me bomba di eko uco gi tenge.



¹⁶En eko temuno alutari ka Rwot di eko mino iye giayala me nywak kede me mino pwoc. En eko mino cik but jo dedede me Yuda pi gin woro Rwot, Rubanga me Isirael.

¹⁷Jo pwodi oko meede kede mino giayala i kabedere ace apapat, do kenekene gin oudo kimio gi do but Rwot Rubanga gi.

Ajikini me Apugan ka Manase

(2 Abakai 21.17-18)

¹⁸Gi dedede apat kame bin Manase otimo, ilega mere but Rubanga mere, kede kope me inabin kabin owaco ne kop i nying Rwot, Rubanga me Isirael, gin dedede kowandiko gi i *Itabu me Itatam amako Abakai me Yuda*.

¹⁹Ilega mere kede kop kame Rubanga odwoko ne, dub mege dedede kede bedo mere abongo genere but Rwot, kabedere kame en bin egero me woro caljwogi kede cal me rubanga Asera kame en bin eko timo, kiton caljwogi kame en bin eworo, gin dedede kowandiko gi i *Itabu me Itatam amako Inabin*.

²⁰Manase bin oko to di oko yike i paco mere me abaka, di wode Amon en kame bin oko lunyo wange bala abaka.

Abaka Amon me Yuda

(2 Abakai 21.19-26)

²¹Mwakini me dongo ka Amon oudo tie ot are kiwie are i kare kame en bin ecako kede pug; en bin eko pug i Yerusalem pi mwakini are.

²²En eko timo gikarac i nyim Rwot, bala papa mere Manase. Amon obedo mino giayala but caljwogi dedede kame bin papa mere woro.

²³En bin likame eko mwolere i nyim Rwot bala kame papa mere bin oko timo, do eko meede kede timo dub kalamo me ka papa mere.

²⁴Jotic ka Amon bin oko bedo kede iik arac i kome i mung, di gin kiko neke i ode.

²⁵Do jo me lobo nono oko bin neneko jo dedede kame oudo obedo kede iik arac i kom Abaka Amon, di gin kiko cibo wode Yosia obedo abaka kawange.

2 Iyutun 34

Abaka Yosia me Yuda

(2 Abakai 22.1-2)

¹ Mwakini me dongo ka Yosia oudo tie kanyauni i kare kame bin en ecako kede pug; en bin eko pug i Yerusalem pi mwakini ot adek kiwie acel.

²En bin eko timo gikame poore i nyim Rwot; en ebedo timo gi dedede bala bin kwaru mere Daudi, abongo parao tenge.

Yosia Osure Kabedere me Woro Caljwogi

³I mwaka me kanyauni me apugan ka Yosia, di pwodi oudo en atin awobi, en eko cako woro Rubanga ka kwaru mere Daudi. Di i mwaka me tomon kiwie are me



apugan mere, en eko cako muducaro kabedere me woro caljwogi, cal me rubanga Asera, kede caljwogi apat dedede i Yuda kede i Yerusalem.

⁴ En emio jo omumuko alutarin ka Baal, kede alutarin me wango odok angwe kur kame bin iyapiyapi kede gi. Gin kimumuko cal me rubanga Asera, kede caljwogi kame kopao kede me nyonyo kame kotwako; gin kingingido gi di kiko kikiro gi i wi atesin me jo kame bin obedo mino giayala but gi.

⁵ En eko wango cogere me josaseredoti aworo caljwogi i wi alutarin gi nogo. Epone noni en kame bin Yosia oko lonyo kede Yuda kede Yerusalem.

⁶ En etimo gi acel noni da i bomban kede i adulion dedede kame bin kodudubo me Manase, Epuraimu, kede Simeon, kede kiton tuno Naputali.

⁷ I adulion dedede kame abaka me Isirael bin pugo, Yosia orereto alutarin kede cal me rubanga Asera di eko ngingido gi kidoko purupuru, kede eko tuturo alutarin me wango odok angwe kur dedede. Di do en eko dok Yerusalem.

Koudo Itabu me Iswil

(2 Abakai 22.3-20)

⁸ mwaka me tomon kiwie kanyauni me apugan mere, di do bin en etieko lonyo lobo kede tempulo, Abaka Yosia oko cwano Sapan wot ka Asalia, Maseya ngapug me bomba, kede Yoa wot ka Yekoyasi, en kalani, pi gin ot iiko tempulo ka Rwot Rubanga.

⁹ Cuo adek nogi oko ot but Ngatel me Josaseredoti Kilikia di gin kiko mine sente kame oudo Jolebi kame bin daro irutei me tempulo ocoko. Jolebi nogo oudo ocoko sente nogo kibut jo Epuraimu kede Manase, kibut donge me jo Isirael kede jo Yuda dedede, kibut jo Benjamin kede jo me Yerusalem.

¹⁰ Sente nogi bin oko mino i cing jotic kame telo tic me ot ka Rwot; me wek gin kimi sente nogo but jotic kame tie iiko ot,

¹¹ gin en, jopac kede jogedo, tetekeny gin kiwil kede ibaon kede kide me iiko ude kame abakai me Yuda oudo oweko odubere.

¹² Jotel tic nogo bin oko bedo jo kame genere twatwal. Jolebi kame bin oko keto pi neno tic gi noni gin en, Yakat kede Obadia, ikwae ka Merari, karacel kede Sakaria kede Mesulam, ikwae ka Kokat. Jolebi apat, gin dedede jo kame bin tie kede diru me gono jamini me wer,

¹³ bin koketo gi neno tic me jo ayeo jamini, kede da gin nogo en kame bin kinyuto ne jo koudo timo tice apat dedede gi me atima. Jolebi apat bin obedo joigigir, jodongo me tice, kede jodar irutei.

¹⁴ Kakame gin oudo kitie kwanyo kede sente kame jo oudo okelo i ot ka Rwot, pi tero ooko, ngasaseredoti Kilikia oko udo itabu me Iswil kame bin Rwot omio Musa.

¹⁵ Kilikia Ngatel me josaseredoti oko waco ne kalani Sapan be, “Ango atieko udo itabu me Iswil i ot ka Rwot.” Kilikia oko mino itabu nono but Sapan.



¹⁶Sapan oko tero itabu nono but abaka, di eko waco ne da be, “Wan otie timo gi dedede bala kame in oudo iciko.

¹⁷Wan otieko tero sente kame oudo okano i ot ka Rwot di oko mino gi i cing jotie kede nyampalan gi.”

¹⁸Di bobo eko waco ne abaka be, “Kilikia ngasaseredoti omia itabu moro tie kan.” Di en oko somo itabu nono ne abaka kede dwan amal.

¹⁹Kakame abaka owinyo kede kope kame kosomo ne ki itabu me Iswil, en eko nyinyilo igoen me kome pi cweruncy.

²⁰Di abaka oko mino cik but Kilikia ngasaseredoti, Akikam wot ka Sapan, Abidon wot ka Mikaya, kalani Sapan, kede but Asaya ngatic mere di ewaco negi be,

²¹” Otunu di ikounu penyo Rwot pira kede pir jo me Yuda dedede kede jo kame pwodi odong i Isirael, i kom kope me itabu kame kotieko udo noni. Rwot otieko lilo kede wan kitek pien joakwari wa likame oko lubo kope mege. Likame gin kitimo gikame itabu noni waco.”

²²Aso, Kilikia ngasaseredoti, Akikam, Acibor, Sapan, kede Asaya oko ot penyo anabi Kuluda dako ka Salum wot ka Tokat, akwar Kasara; Salum oudo obedo ngat kame bin gwoko igoen me ot ka Rwot. Kuluda oudo tie bedo Yerusalem i adul anyen, kakame gin kioto tatamo ne iye gikame oudo otimere.

²³En bin eko waco negi be poore kidok di kiko waco ne ngat koro gi be

²⁴Rwot Rubanga me Isirael waco be, “Ango ateteni abino kelo can i kom kabedo noni kede i kom jo kame bedo iye, can dedede kame kowandiko i itabu kame kotieko somo ne abaka me Yuda.

²⁵Ango abino timo manono pien gin kitieko weka di kiko lokere mino giayala but rubangan apat. Gin kitieko wango cunya kede gi dedede kame gin kibedo timo, pi manono, gin kitieko mina alilo kede kabedo noni, doko lilo na noni likame bino kwei.

²⁶Do abaka, ngat koro wu pi bino penya, wun ibinunu waco ne be Rwot Rubanga me Isirael waco kaman: In iwinyo kope kame kowandiko i yi itabu,

²⁷di iko swilaro, doko iko mwolere i nyima, di iko inyinyilo igoen me komi di ikok, kakame in iwinyo kede di ango ayamo irac i kom kabedo noni kede i kom jo kame bedo iye. Ango atieko gamo ilega nin.

²⁸Pi mano, in likame ibino neno can kame ango abino kelo i kom kabedo noni. Ango abino kelo can noni ingei in to di oko yiki kede mulem.” Cuo nogo bin oko dok tero kop noni but abaka.

Yosia Otimu Isikan pi Bedo kede Wor but Rwot

(2 Abakai 23.1-20)

²⁹Di do Abaka Yosia oko lwongo joadongo me Yuda kede me Yerusalem dedede bute.



³⁰Di en eko yai kede gin dedede di kiko ot i ot ka Rwot, karacel kede josaseredoti, Jolebi kede jo dedede, jocan kede joabar. Di do abaka oko somo di jo dedede winyo, kope dedede me itabu me isikan kame bin koudo i ot ka Rwot.

³¹Abaka oko cungo kabedo mere di eko timo isikan i nyim Rwot be en ebino lubo Rwot, ebino gwoko cik, iswilia kede pwony mege, kede cunye lung kede kuo mere dedede, kede da be en ebino timo gi dedede amako isikan nono bala kame kowandiko i itabu kame koudo nono.

³²Di do en eko mino jo Benjamin kede jo dedede kame oudo tie Yerusalem ocikere pi gida gwoko isikan nono. Aso, jo me Yerusalem oko bedo lubo kope me isikan kame gin oudo kitimo kede Rubanga ka joakwari gi.

³³Abaka Yosia bin oko kwanyo tenge caljwogi dedede kame oudo tie i adul me jo Isirael, di eko mino jo dedede kame oudo tie i Isirael oduonyo woro Rwot Rubanga gi. Pi kare me kuo mere lung, jo likame oweko woro Rwot, Rubanga ka joakwari gi.

2 Iyutun 35

Yosia Otedo Ebaga me Kalamo

(2 Abakai 23.21-23)

¹Abaka Yosia oko tedo Ebaga me Kalamo i Yerusalem pi mino Rwot wor. Gin kingongolo romini me tedo ebaga nono i buto duwe tomon kiwie ongwon me duwe me acel.

²En epoko ne josaseredoti tice kame gin kipoore timo i tempulo di eko supo cuny gi pi timo tic me tempulo.

³En eko waco ne Jolebi, gin jopwonye me Isirael, jo kame kokwero but Rwot be, “Ketunu Sanduku me Isikan kacil i tempulo kame Abaka Sulumani wot ka Daudi ogero. Wun likame bobo poore imeedenu kede yene, do poore idonyunu timo tic ne Rwot Rubanga wu kede ne jo Isirael, gin jo mege.

⁴Iikerenu di lubere kede ikodeta me ikekon me joakwari wu pi timo tic, di lubere kede gikame kowandiko kame Abaka Daudi me Isirael kede wode Sulumani bin ociko.

⁵Cungunu kabedo kacil kame kopoko ne wu di lubere kede ikekon ka joakwari me Isirael, di jo me buli ekeko acelacel me joakwari ko bedo tie kede Jolebi kame bino konyo gi.

⁶Ngongolunu romini me Ebaga me kalamo, lonyerenu, iikunu jamini kame mitere pi imiegu wu. Lubunu kope dedede kame Rwot bin omio Musa.”

⁷Di do Abaka Yosia oko mino giayala me Ebaga me Kalamo, pi jo dedede kame oudo tie kunono. En ekwanyo romini kede diegi apwodi dongo adonga tutumia ot adek (30,000), kede twonin tutumia adek (3,000).

⁸Jodongo me tic mege da pi mit me cuny gi oko gida kwanyo ne jo giayala, di kiko mino but josaseredoti kede Jolebi. Kilikia, Sakaria, kede Yekiel, gin jotel me tempulo,



oko mino josaseredoti romini kede diegi apwodi dongo adonga tutumia are kede tol kanyape (2,600), kede twonin tol adek (300), pi bedo giayala me Ebaga me Kalamo.

⁹Konania da, kede imiegu mege Semaya kede Netanel, Kasabia, Yeyel kede Yosabad, gin jotel me Jolebi, oko gida kwanyo romini kede diegi apwodi dongo adonga tutumia kany (5,000), kede twonin tol kany (500), di kiko mino Jolebi pi bedo giayala me Ebaga me Kalamo.

¹⁰Kakame bin kotieko iiko kede gi dedede me tedo Ebaga me Kalamo, josaseredoti kede Jolebi oko ot cungo kadedere gi bala kame abaka oudo ociko.

¹¹Jolebi oko ngongolo romini kede diegi nogo di gin kiko yango gi, di josaseredoti oko kikiro remo i kom alutari.

¹²Jolebi oko poko tenge giayala awanga pi popoko ne jo, di lubere kede ikodeta me ikekon me joakwari gi, tetekeney kikaruno mino giayala nogo but Rwot bala kame kowandiko i itabu ka Musa. Gin kiko timo kamanono da kede twonin.

¹³Gin kiko bulo romini me Ebaga me Kalamo bala kame iswil waco, di kiko tedo giayala kacil kede agune, sepulan adongo kede ayapak, di kiko popoko ne jo awakawaka.

¹⁴I cen mere Jolebi oko gida iiko cam gi kede me josaseredoti ikwae ka Aaron, pien josaseredoti oudo obedo timo tic me mino giayala awanga kede me kakamio tuno iwor. Manono en omio Jolebi oko iiko cam pirgi kede josaseredoti ikwae ka Aaron.

¹⁵I kare kame jo oudo tie camo kede Ebaga me Kalamo, jower ikwae ka Asap bin odong bedo kadedere kame bin kopoko negi, di lubere kede cik kame bin Daudi omio; gin bin en: Asap, kede Keman, kede Yedutun enabi ka abaka. Jodar irutei da oko dong daro irutei. Gin likame kiweko kadedere gi me tic, pien Jolebi icegun oudo oiko cam di kiko tero negi.

¹⁶Aso, bala kame Abaka Yosia oudo ociko, cenge nono oko tieko timo gi dedede amakere kede woro Rwot, gwoko Ebaga me Kalamo, kede mino giayala awanga i wi alutari.

¹⁷Jo dedede me Isirael kame bin tie Yerusalem i kare nono oko tedo Ebaga me Kalamo kede Ebaga me Mugati kame li kede Arup, pi ceng kanyaare.

¹⁸Likame tie akodi Ebaga me Kalamo moro kame koudo kotedo bala manoni cako i kare ka enabi Samuel; likame tie abaka moro me Isirael kame bin otedo Ebaga me Kalamo bala kame Abaka Yosia oko tedo, en kede josaseredoti, Jolebi, kede jo me Yuda, jo Isirael, kede jo me Yerusalem.

¹⁹Ebaga me Kalamo noni bin kotedo i mwaka me tomon kiwie kanyauni me apugan ka Yosia.

Ajikini me Apugan ka Yosia

(2 Abakai 23.28-30)



²⁰I ngei magonogi dedede, di do Yosia otieko iiko ot ka Rwot, Abaka Neko me Misiri oko ot kede isirikalen mege pi yi Karekemis i nget ecilet me Eupurate. Yosia kede isirikalen mege oko ot kunono pi yi kede en.

²¹Do Neko oko cwano joor bute pi waco ne be, “Nyo kame in itie mono kibuta, in abaka me Yuda? Ango tin likame abino pi yi kedi, do ango abino pi yi kede jo kame tie yi keda, doko Rubanga otieko cika pi timo kamanono awakawaka. Wek piem kede Rubanga, ngat kame tie keda, ka li, en ebino muducaro in.”

²²Do Yosia oko dagi winyo kop ka Neko, ngat kame oudo Rubanga oyamo kede ateteni, di eko ngapo angapito kamio jo kwie di eko ot yi kede en. En eko meede kede ot di eko yi kede Neko i ebar me Megido.

²³Kakame oudo kitie yi kede, isirikalen oko gweno Abaka Yosia kede emal; en eko waco ne jotic mege be, “Kwanyanu iteranu tenge, pien kowana kirac.”

²⁴Aso, jotic mege oko kwanye ki cabala mere di oko kete i cabala ace kame en oudo etie kede kunono, di gin kiko dwoke Yerusalem, kakame eko to iye. En bin oko yike i limbo me joakwari mege. Jo dedede me Yuda kede Yerusalem oko koko Yosia.

²⁵Enabi Yeremia bin oko teto wer me koko Abaka Yosia; tuno tin cuo kede mon kame wero pwodi wero wer noni ka kitie yutuno Yosia. Manono oko doko itok i Isirael. Wer noni kowandiko en i kom were me koko.

²⁶Gi dedede apat kame Yosia bin otimo, genere mere i lubo gikame kowandiko i Iswil ka Rwot,

²⁷gikame en bin eko timo, cako ki agege tuno i atiekini, kowandiko i *Itabu me Itatam amako Abakai me Isirael kede Yuda*.

2 Iyutun 36

Abaka Yekoyasi me Yuda

(2 Abakai 23.30-35)

¹Jo me Yuda oko kwanyo Yekoyasi wot ka Yosia, di kiko kete ebedo abaka kame lunyo wang papa mere i Yerusalem.

²Mwakini me dongo ka Yekoyasi oudo tie ot are kiwie adek i kare kame bin en ecao kede pug. En bin eko pug pi duwete adek i Yerusalem.

³Abaka Neko me Misiri bin oko riame tenge ki Yerusalem, di eko mino jo me Yuda oko donyo culo bute siliba kilo tutumia adek kede tol ongwon (3,400) kede saabu kilo ot adek kiwie ongwon (34).

⁴Abaka Neko oko keto Eliakim, omin me Yekoyasi odoko abaka me Yuda kede Yerusalem, di en eko loko nyinge be Yekoyakim. Neko oko tero Yekoyasi Misiri.

Abaka Yekoyakim me Yuda

(2 Abakai 23.36—24.7)



⁵ Mwakini me dongo ka Yekoyakim oudo tie ot are kiwie kany i kare kame en bin ecako kede pug. En bin eko pug i Yerusalem pi mwakini tomon kiwie acel. En eko timo gikarac i nyim Rwot Rubanga mere.

⁶ Abaka Nebukadunesa me Babilon oko bino sure, di eko make eko twene kede irikoi, di eko tere Babilon.

⁷ Nebukadunesa oko tero da jamini mogo kame bin kotimo kede tice me tempulo di en eko keto gi i paco mere me abaka i Babilon.

⁸ Gi dedede kame Yekoyakim bin otimo, kiton jamini areco, kede kope ace areco kame bin koudo amake, kowandiko gi i *Itabu me Itatam amako Abakai me Isirael kede Yuda*. Wode Yekoyakin en kame bin oko lunyo wange bala abaka me Yuda.

Abaka Yekoyakin me Yuda

(2 Abakai 24.8-17)

⁹ Mwakini me dongo ka Yekoyakin oudo tie tomon kiwie kanyauni i kare kame ecako kede pug. En bin eko pug i Yerusalem pi duwete adek kede ceng tomon. En eko timo gikarac i nyim Rwot.

¹⁰ I kare me kot dwogo kede me mwaka nono Abaka Nebukadunesa oko cwano jo di oko tero Yekoyakin Babilon bala mabus, karacel kede jamini abeco me tempulo. Di Nebukadunesa oko keto Esedekia, omin me Yekoyakin, odoko abaka me Yuda kede Yerusalem.

Apugan ka Esedekia

¹¹ Mwakini me dongo ka Esedekia oudo tie ot are kiwie acel i kare kame bin en ecako kede pug; en bin eko pug pi mwakini tomon kiwie acel i Yerusalem.

¹² En bin eko timo gikarac i nyim Rwot Rubanga mere. En likame emwolere i nyim enabi Yeremia, ngat kobedo waco ne kop ka Rwot.

Yerusalem Opoto

(2 Abakai 25.1-21; Yeremia 52.3b-11)

¹³ Esedekia oko jemo ne Abaka Nebukadunesa, ngat kame bin omie ekwongere i nying Rubanga be ebino bedo ngat kame genere bute. En ebedo kede epali di eko dagi swilaro pi koto dok but Rwot, Rubanga me Isirael.

¹⁴ Josaseredoti adongo dedede kede jo da bin likame oko bedo kede genere but Rwot atwal atwala. Gin kibedo lubo gikareco me atekerin apat, di kiko pwoko tempulo kame Rwot kikome en kolonyo i Yerusalem.

¹⁵ Rwot, Rubanga ka joakwari gi bin obedo cwano negi inabin, pien oudo kisa omake kede jo mege kede kabedo mere.

¹⁶ Do gin kiko bedo tuko kede joor ka Rubanga, di kicao kope gi, doko di kinyero inabin mege, tuno mino Rwot lilo negi lilo kalikame gengere.

¹⁷ Pi mano, Rwot bin oko kelo abaka me Babilon pi suro gi. Abaka nono oko neneko ipongai me Yuda kiton i tempulo. En likame bin ebedo kede kisa i kom ngatamoro



kame pwodi titidi amoto kotieko ti, icuo arabo dako. Rubanga omio gin dedede i cinge.

¹⁸Abaka me Babilon oko yako jamini dedede kame bin kotio kede i tempulo, jamini adongodongo kede atitino, lim me tempulo, kede abar me abaka kede me jodongo me tice mege, di en eko tero gi dedede Babilon.

¹⁹Isirikalen ka Nebukadunesa oko wango tempulo kede bomba, kiton miere me abaka, kede kiko dudubo jamini mege abeco dedede, di kiko reto apama me Yerusalem piny.

²⁰Nebukadunesa oko tero Babilon jo dedede kame oudo oko dong kuo, di gin kiko doko ipaso kame timo tic ne en kede ikwae mege tuno i kare me apugan me jo Pasia.

²¹Manono bin oko mino kop kame Rwot bin owaco kibun enabi Yeremia ocobere. Rwot oudo owaco be, “Lobo bino dong nono pi mwakini ot kanyaare, pi culo kare me wei me Sabato kalikame jo obedo gwoko.”

Sairas Omio Cik but lyudayan pi Dok (Esera 1.1-4)

²²I mwaka me agege me apugan ka Sairas bala abaka me Pasia, Rwot oko mino kop kame en oudo emio enabi Yeremia owaco ocobere. En emio Sairas owoto cik di eko wandiko en, eko cwane be some i piny mere lung.

²³Cik nono oudo waco kaman: “Manoni en cik ka Sairas, abaka me Pasia. Rwot Rubanga me i malo otieko keta pi bedo ngapug me wi lobo lung di eko mina tic me gero ne tempulo i Yerusalem, kabedo kame tie Yuda. Aso, nataman wun dedede kame ibedunu jo ka Rubanga, otunu kunono. Ango akwao Rwot Rubanga wu, ebed kede wu.”



Esera

Esera 1

Sairas Ogolo Cik ne lyudayan pi Dwogo

- ¹ I mwaka me agege me apugan ka Abaka Sairas me Pasia, Rwot oko mino gikame oudo ewaco ki dog enabi Yeremia ocobere. Rwot oko supo cuny Abaka Sairas me Pasia pi wandiko cik di eko cwano i ajakanut mere lung; cik nono waco kaman:
- ² “Ango Abaka Sairas me Pasia atie waco kaman: Rwot Rubanga me Malo otieko mina ajakanuto dedede me wi lobo, doko da etieko mina tic me gero ne tempulo i Yerusalem, i lobo me Yuda.
- ³ Akwao Rubanga bed tie kede wun dedede jo kobedo jo mege. Nan koyei ne wu ot Yerusalem di ikounu temuno gero tempulo ka Rwot, Rubanga me Isirael, en Rubanga kame koworo i Yerusalem.
- ⁴ Jo mege kodong kadedere dedede, jo me kadedere nogo poore konyo gi kede siliba, saabu, jamini ace, kede leini, kede da giamia me bercuny kame gin kibino tero i tempulo ka Rubanga i Yerusalem.”
- ⁵ Jotel me miere me jo me ekeko ka Yuda kede me ka Benjamin, kede da josaserdoti kede Jolebi kede jo dedede kame Rubanga oudo omulo cuny gi, gin dedede kiko iikere pi ot temuno gero tempulo ka Rubanga i Yerusalem.
- ⁶ Jokio gi oko konyo gi kede jamini kame kotimo kede siliba, saabu, kede jamini ace apat, kede leini, kede da jamini ace me wel amalo, ribo i kom jamini kame oudo kipoore mino bala giayala me bercuny i tempulo.
- ⁷ Abaka Sairas kikome oko kwanyo bakulin kede ikopon kame Abaka Nebukadunesa oudo okwanyo ki tempulo i Yerusalem di eko lokere keto gi i abilan me rubangan mege.
- ⁸ En eko mino gi but Miteredat, ngakan jamini, di Miteredat oko maro gi ne Sesibasa, ngapug me Yuda
- ⁹ kaman: Kalayan me saabu me mino giamia, gin ot adek; kalayan me siliba, gin tutumia acel (1,000); pale, gin ot are kiwie kanyangon;
- ¹⁰ kalayan atino me saabu, gin ot adek; kalayan atino me siliba, gin tol ongwon kede tomon (410); jamini ace apat, gin tutumia acel (1,000).
- ¹¹ Jamini dedede oudo tie tutumia kany kede tol ongwon (5,400), magonogi ribo jamini kame kotimo kede saabu kede siliba, kede jamini ace kame Sesibasa bin otero kakame en kede jo ace koudo tie bala mabus obukui oyai kede ki Babilon kiko dok Yerusalem.

Esera 2

Nying Jo Kodwogo ki Obukui kakame oudo kitie iye Mabus

(Nekemia 7.4-73)



- ¹Jo atos kame oudo tie bala mabus obukui oko bin yai ki adul me Babilon, di kiko dok Yerusalem i Yuda, ngat acelacel i bomba me turgi. Gin bin oudo kitie bedo bala mabus obukui, i Babilon, cako i kare kame Abaka Nebukadunesa omako gi kede di oko tero gi bala mabus.
- ²Gin bin kiko dwogo kede jotel gi, gin en Serubabel, Yesua, Nekemia, Seraya, Relaya, Modekai, Bilisan, Misipar Bigibai, Rekum, kede Bana. Magi en wel me jo me Isirael:
- ³Ikwae ka Paros, gin jo tutumia are kede tol acel kede ot kanyaare kiwie are (2,172);
- ⁴me ka Sepatia, gin jo tol adek kede ot kanyaare kiwie are (372);
- ⁵me ka Arak, gin jo tol kanyaare kede ot kanyaare kiwie kany (775);
- ⁶me ka Pakat Moab (magonogo en ikwae ka Yesua kede Joab), gin jo tutumia are kede tol kanyauni ki tomon kiwie are (2,812);
- ⁷me ka Elam, gin jo tutumia acel kede tol are kede ot kany kiwie ongwon (1,254);
- ⁸me ka Satu, gin jo tol kanyangon kede ot ongwon kiwie kany (945);
- ⁹me ka Sakai, gin jo tol kanyaare kede ot kanyape (760);
- ¹⁰me ka Bani, gin jo tol kanyape kede ot ongwon kiwie are (642);
- ¹¹me ka Bebai, gin jo tol kanyape kede ot are kiwie adek (623);
- ¹²me ka Asagad, gin jo tutumia acel kede tol are kede ot are kiwie are (1,222);
- ¹³me ka Adonikam, gin jo tol kanyape kede ot kanyape kiwie kanyape (666);
- ¹⁴me ka Bigibai, gin jo tutumia are kede ot kany kiwie kanyape (2,056);
- ¹⁵me ka Adin, gin jo tol ongwon kede ot kany kiwie ongwon (454);
- ¹⁶me ka Ater (kolwonge da be Esekia), gin jo ot kanyangon kiwie kanyauni (98);
- ¹⁷me ka Besai, gin jo tol adek kede ot are kiwie adek (323);
- ¹⁸me ka Yora, gin jo tol acel kede tomon kiwie are (112);
- ¹⁹me ka Kasum, gin jo tol are kede ot are kiwie adek (223);
- ²⁰me ka Gibar, gin jo ot kanyangon kiwie kany (95).
- ²¹Magi en wel me jo oko dwogo di kolubo kede nying bomban kame bin joakwari gi obedo iye: ki Betelem, jo tol acel kede ot are kiwie adek (123);
- ²²ki Netopa, jo ot kany kiwie kanyape (56);
- ²³ki Anatot, jo tol acel kede ot are kiwie kanyauni (128);
- ²⁴ki Asimabet, jo ot ongwon kiwie are (42);
- ²⁵ki Kiriatarim, Kepira, kede Berot, jo tol kanyaare kede ot ongwon kiwie adek (743);



- ²⁶ki Rama kede Geba, jo tol kanyape kede ot are kiwie acel (621);
- ²⁷ki Mikimas, jo tol acel kede ot are kiwie are (122);
- ²⁸ki Betel kede Ai, jo tol are kede ot are kiwie adek (223);
- ²⁹ki Nebo, jo ot kany kiwie are (52);
- ³⁰ki Magabis, jo tol acel kede ot kany kiwie kanyape (156);
- ³¹ki Elam ocelu, jo tutumia acel kede tol are ki ot kany kiwie ongwon (1,254);
- ³²ki Karim, jo tol adek kede ot are (320);
- ³³ki Lod, Kadid, kede Ono, jo tol kanyaare kede ot are kiwie kany (725);
- ³⁴ki Jeriko, jo tol adek kede ot ongwon kiwie kany (345);
- ³⁵ki Sena, jo tutumia adek kede tol kanyape ki ot adek (3,630)
- ³⁶Magi en wel me jo oko dwogo ki ude acelacel me josaseredoti: me ka Yedaya (ikwae ka Yesua), jo tol kanyangon kede ot kanyaare kiwie adek (973);
- ³⁷me ka Imer, jo tutumia acel kede ot kany kiwie are (1,052);
- ³⁸me ka Pasikur, jo tutumia acel kede tol are kede ot ongwon kiwie kanyaare (1,247);
- ³⁹me ka Karim, jo tutumia acel kede tomon kiwie kanyaare (1,017).
- ⁴⁰Magi en wel me jo oko dwogo ki buli ot me Jolebi: me ka Yesua kede Kadamiel (ikwae ka Kodabia), gin jo ot kanyaare kiwie ongwon (74).
- ⁴¹Jower: ikwae ka Asap, gi jo tol acel kede ot are kiwie kanyauni (128).
- ⁴²Jodar irutei me tempulo: ikwae ka Salum, me ka Ater, me ka Talemon, me ka Akub, me ka Katita, kede me ka Sobai, gin dedede jo tol acel kede ot adek kiwie kanyangon (139).
- ⁴³Magi en nying ude me jo kame timo tic i tempulo, kame bin ikwae gi oko dwogo: Sika, Kasupa, Tabaot,
- ⁴⁴Keros, Siaka, Padon,
- ⁴⁵Lebana, Kagaba, Akub,
- ⁴⁶Kagab, Samulai, Aanan,
- ⁴⁷Gidel, Gekar, Reaya,
- ⁴⁸Resin, Nekoda, Gasam,
- ⁴⁹Usa, Pasea, Besai,
- ⁵⁰Asina, Meunim, Nepisim,
- ⁵¹Bakabuk, Kakupa, Karakur,



- ⁵²Baselut, Mekida, Karasa,
- ⁵³Barakos, Sisera, Tema,
- ⁵⁴Nesia, kede Katipa.
- ⁵⁵Magi en nying ude me jotic ka Sulumani kame bin oko dwogo ki obukui: Sotai, Kasoperet, Peruda,
- ⁵⁶Yala, Darakon, Gidel,
- ⁵⁷Sepatia, Katil, Pokeret Kasebaim, kede Ami.
- ⁵⁸Wel dedede me ikwae ka jotic me tempulo kede me ka jotic ka Sulumani kame oko dwogo ki obukui oudo tie tol adek kede ot kanyangon kiwie are (392).
- ⁵⁹⁻⁶⁰Oudo tie jo tol kanyape kede ot kany kiwie are (652) koudo odwogo da ki obukui, gin jo me ikekon ka Delaya, Tobia, kede Nekoda, do oudo likame tie gikame gin kitwero nyuto kede be gin kibedo jo me Isirael. Gin bin kidwogo ki bomban me Tel Mela, Tel Karasa, Kerub, Adan, kede Imer.
- ⁶¹⁻⁶²Doko da ude mogo me josaseredoti likame oko twero udo iwandik kame nyuto wapere me joakwari gi; ude nogo ige: Kabaya, Kakos, Barisilai. (Kwaru me josaseredoti me ot ka Barisilai oudo bin onyomo dako me ot ka Barisilai me Gilead, di do en bin eko tero nying ot kame ore oudo owok kiye nono.) Pi kite kame gin likame kiko twero nyuto kede wapere me joakwari gi, omio likame oko gamo gi pi bedo josaseredoti.
- ⁶³Ngapug oko waco negi be likame kipoore camo cam kame koyalo ne Rubanga tuno di kotieko tic kede Urim kede Tumim pi udo niang i kom kop nono.
- ⁶⁴Wel me jo dedede kodwogo ki obukui oudo tie tutumia ot ongwon kiwie are kede tol adek ki ot kanyape (42,360),
- ⁶⁵medo i wi jotic acuo kede amon tutumia kanyaare kede tol adek ki ot adek kiwie kanyaare (7,337), kede jower tol are (200) kobedo cuo kede mon.
- ⁶⁶Oudo kitie kede asigiran tol kanyaare kede ot adek kiwie kanyape (736),
- ⁶⁷leini acal bala pundan tol are kede ot ongwon kiwie kany (245), aguraguran tol ongwon kede ot adek kiwie kany (435), kede pundan tutumia kanyape kede tol kanyaare ki ot are (6,720).
- ⁶⁸Cucuto di gin bin kituno i tempulo i Yerusalem, jotel mogo me ude oko mino giamia me bercuny pi konyo tic me temuno gero tempulo kakame oudo bin ecungo iye sek.
- ⁶⁹Gin bin kimio saabu kame romo kilo tol kany (500) ka koriribo gi dedede, kede kilo tutumia are kede tol kanyauni (2,800) me siliba, kede ikanson tol acel (100) me josaseredoti.



⁷⁰ Josaseredoti, Jolebi, kede jo mogomogo ace oko donyo bedo Yerusalem kede i calere kame kio kede; di jower, jodar irutei, kede jotic me tempulo, karacel kede jo ace me Isirael oko dok bedo i bomban kame joakwari gi bin bedo iye.

Esera 3

Jo Ocake Bobo Woro Rubanga

¹Di bin duwe me kanyaare otuno, jo dedede me Isirael oudo do otieko sipakin i bomban gi. Gin dedede bin kiko cokere Yerusalem,

²di Yosua wot ka Yekosadoki, karacel kede josaseredoti ace jowote, kede da Serubabel wot ka Selatiel karacel kede wade mege, oko temuno gero alutari ka Rubanga me Isirael, tetekeny kiwang giayala i wie di lubere kede cik kame kowandiko i Iswil ka Musa, en dano ka Rubanga.

³ Gin bin kiko gero alutari kawange kasek, bed bala oudo kitie kede lworu i kom jo kame oudo tie cuto bedo i lobo nono. Gin bobo kiko cako wango giayala me ceng dedede kame kowango odiko kede otieno but Rwot.

⁴ Gin kiko timo Ebagu me Kimere di kilubo iswilia mege; buli ceng gin oudo kiyalo giayala amitere pi ceng nono.

⁵ Medo i wi manono, gin oudo kiko donyo mino giayala me nakanaka kame kowango dedede, kede giayala me Ebagu me Por Duwe, kede giayala kame komio i ceng adongo ace kame jo woro iye Rwot, kede da giayala kame jo dedede mio i mit gi ken gi but Rwot.

⁶Bed bala oudo jo pwodi likame ocake temuno gero tempulo, gin oudo kiko cako mino giayala awanga but Rwot i ceng me agege me duwe me kanyaare.

Temuno Gero Tempulo

⁷Jo bin oko kwanyo sente me culo jo kame gero apama kede jo kame guro ibaon; doko da kiko kwanyo cam, giamata, mo me olibeti pi cwano i bomban me Taya kede Sidon, pi seso kede yen seda me Lebanon, kame oudo kopooe mino mol beo i nam adwong tuno Jopa. Oudo kitimo manoni di lubere kede akarunikin kame Sairas, abaka me Pasia omio.

⁸I duwe me are me mwaka me are di gin kitieko dwogo kitie kakame tempulo bin oudo cungo iye i Yerusalem, Serubabel wot ka Selatiel, kede Yosua wot ka Yekosadoki, kede josaseredoti, Jolebi, kede jo dedede koudo odwogo oko cako tic me gero tempulo. Jolebi dedede me mwakini me dongo gi oudo tie ot are ot malo en kame oko mino gi telo tic me gedo.

⁹Ngalebi anyinge Yosua kede awobe mege kede wade mege, kede Kadamiel kede awobe mege (gin jo me ot ka Kodabia) oko ribere telo tic me gedo me tempulo. (Jolebi me ot ka Kenadad en oudo konyo gi.)

¹⁰ Kakame jogedo ocake kede napo kide me acakini me apama me tempulo, josaseredoti oko ngapo ikanson gi di kiko ot kargi di kiko donyo kuto agwarai pi pako



Rwot, di Jolebi kobedo ikwae ka Asap tie cungo di kigoo suanin abatal me goc. Gin oudo kitie pako Rwot di lubere kede cik kame Abaka Daudi bin omio.

¹¹ Gin oudo kitie wero wer me pako Rwot kede me mine pwoc be, “Rwot ber, amara mere kalikame lokere but jo me Isirael bedo nakanaka.” Jo dedede oko donyo wer di kilelemo kitek di kipako Rwot, pien oudo kocako napo kide me dud apama me tempulo.

¹² Jo atos i kom josaseredoti kede Jolebi kede jotel me miere, idongia koudo bin oneno tempulo me agege koudo tie kanono, oko kok twatwal kakame kineno kede di kotie cibo acakini me apama me tempulo anyen noni, bed bala jo atos apat oudo tie ilelem pi yomcuny.

¹³ Likame ngatamoro oudo twero mino apokapoka i dierediere me ilelem me koko kede ilelem me yomcuny, pien jo oudo tie ilelem kitek, ilelem gi oudo winyere ki kakabor.

Esera 4

Jo kame oko Dagi lik me Temuno Gero Tempulo

¹ Kakame jokwor me Yuda kede Benjamin owinyo kede be jo kodwogo ki obukui oudo tie gero ne Rwot tempulo, en Rubanga me Isirael,

² gin kiko ot but Serubabel kede jotel me miere apapat di kiko waco negi be, “Yeunu ne wada ribere kede wu pi gero tempulo, pien wada oworo Rubanga acel kame wuda iworunu nono, doko da wan lem obedo mine giayala cako i kare kame Esarakadon abaka me Asiria okelo wa kede bedo kanoni.”

³ Do Serubabel, Yosua, kede jo ace apat kobedo jotel me miere i Isirael oko waco negi be, “Wan likame obino yei ne wu konyo wa gero ne Rubanga wa tempulo; do wan kikom wa en kame obino gero ne Rwot Rubanga me Isirael ot, bala kame Abaka Sairas me Pasia otieko ciko ne wa.”

⁴ Di do jo koudo bedo i lobo nono oko tamo dubo cuny Iyudayan di kimio gi lworu tetekeny kiwek gedo.

⁵ Doko da kiko donyo wilo jotel me apugan me Pasia pi totolo kop me gedo nono. Kibedo timo kamanoni pi kare lung kame Sairas oudo tie kede i apugan, paka tuno i kare me apugan ka Darias da.

Jo kame oko Dagi lik me Temuno Gero Yerusalem

⁶ I agege me apugan ka Sereses bala abaka, jokwor ka jo me Yuda kede Yerusalem oko wandiko kop kame pido gi.

⁷ Bobo i kare me apugan ka Aretasereses bala abaka me Pasia, Bisilam, Miteredat, Tabel, kede jowot gi ace oko wandiko baluwa but abaka. Oudo kowandiko baluwa nono i leb Aramaik, pi manono oudo kopooe tako dwong mere ka kotie some.



⁸Doko da Rekum, ngat kame lubo tien abaka, kede Simisai kalani me adul oko wandiko ne Aretasereses baluwa kame waco kaman:

⁹” Baluwa kowok kibus Rekum ngapug me adul, kede Simisai ngat kobedo kalani, kibus jo kame mio gi tam, kede jongolkop; kede kibus jotel ace apat dedede, gin jo me Ereka, Babilon, kede Susa i lobo me Elam;

¹⁰karacel kede jo ace apat kame Asurbanipal, en abaka adwong di tek, bin okwanyo gi ki miere gi di oko tero gi ot bedo i bomba me Samaria kede i kabedere ace kame tie i bad tetu tim me ecilet me Eupurate.”

¹¹Kop kame tie i baluwa nono waco be, “Baluwa but Abaka Aretasereses, baluwa kowok kibus jotik mege, jo me bad tetu tim me ecilet me Eupurate.

¹²” Adwong wan omi to ingei be Iyudayan kobino kan ki adulion ace kame in ipugo nan oduyo bedo Yerusalem, doko da kitie medo gero bomba arac angajemo nono. Nan kitieko cako gero apamai mege kiyapuno tieko, kede da kitie temuno gero acakini me apamai mege.

¹³Abaka me awora, kame kotieko medo gero bomba noni di oko iiko apamai mege, jo bino jiko culo esolo me egere dedede buti, di do sente kame in iudo ki cul me esolo ko bino dok piny.

¹⁴Aso, bala kame wan obedo jo kame poore timo gikame in imi to, likame wan omi to neno di manoni tie timere. Pi manono nan wan otie kede tam be

¹⁵koto in ber kong imio komoo iwandik kasek kame bin joakwari ni obedo gwoko. Ka in itimo kamanono ibino udo be bomba noni oudo ngajemo, oudo etie peko but abakai kede but jopug me adulion. En ebedo bomba kame jemo tie iye cako i kare kasek. Manono en komio bin oko dudubo en.

¹⁶Wan otie mini in abaka ngeno be, kame komedo gero bomba noni di oko temuno apamai mege, adwong, likame in doko ibino twero pugo adul kame tie i bad tetu tim me ecilet me Eupurate.”

¹⁷Abaka oko dwoko kop kaman: “Baluwa but Rekum, ngapug me adul, kede but Simisai, en kalani me adul, kede but jo ace kame mio wu tam kame bedo Samaria kede i kabedere ace kame tie i bad tetu tim me ecilet me Eupurate, amoto wun dedede.

¹⁸” Baluwa kame icwaunu buta kotieko loko leb mere di oko somo na.

¹⁹Ango ako mino cik be ngingico kop nono kame ebedo kop me ateni, ateteni oko udo be cako sek Yerusalem obedo jemo ne abakai, doko da en ebedo kabedo kame jemo tie iye, kede da yamo me supo jo i kom apugan.

²⁰Abakai atek otieko pugo kunono di kiko pugo adul kame tie i bad tetu tim me ecilet me Eupurate, di kiraro esolo me egere dedede.

²¹Pi manono, miunu cik but jo nogo kijik gero bomba tuno di ango amio gi akarunikin.



²²Timunu kamanono oyotoyot tetekeny kur kimeede kede kelo atotolun i mit na.”

²³Cucuto kakame kosomo kede baluwa kowok kibus Aretasereses but Rekum, Simisai kede jo kame mio gi tam, gin kiko onyaro ot Yerusalem di kiko mino Iyudayan ojiko tic me gero bomba.

Kocako bobo Tic me Gedo me Tempulo

²⁴Cako i kare nono bin oko jiko tic me gedo me tempulo paka tuno i mwaka me are me apugan ka Darias bala abaka me Pasia.

Esera 5

¹Inabin Kagai kede Sakaria wot ka Ido oko murao ne Iyudayan koudo tie Yuda kede Yerusalem i nying Rubanga me Isirael ngat koudo tie kanono.

²Di do Serubabel wot ka Selatiel kede Yosua wot ka Yekosadoki oko cako tic me temuno gero tempulo i Yerusalem, di inabin are nogo da oko donyo konyo gi.

³Cucuto nono di Tatenai, en ngapug me bad tetu tim me ecilet me Eupurate, kede Setar Bosenai, karacel kede jowot gi ace oko ot Yerusalem but gi di kiko penyo gi be, “Ngai komio wu akarunikin me temuno gero tempulo noni?”

⁴Doko kiko penyo pi mito ngeno nying jo koudo tie konyo tic me temuno gero tempulo.

⁵Do Rubanga oudo tie gwoko jotel me Iyudayan; aso jo nogo likame oko gengo gi tic paka tuno gin dwoko kop but Abaka Darias di abaka oko dwoko negi kop kede baluwa.

⁶Baluwa kame gin oudo kiwandiko but Darias somere kaman:

⁷” But Abaka Darias, wan okwao ni mulem.

⁸” Wan otie mini ngeno be, wan oko ot i adul me Yuda di oko udo be kotie temuno gero tempulo ka Rubanga adwong me Isirael. Kotie gere kede kide adongo kame kopao, kede di kosipo ipirin atek me yen i apama mere. Kotie timo tic me gere kede teko, doko da tic nono tie ot anyim oyotoyot.

⁹” Wan oko yamo kede joadongo nogo di openyo gi ngat komio gi akarunikin me temuno gero tempulo nono.

¹⁰Wan doko da oko penyo gi nying gi tetekeny wan otwer mini ngeno nying jotel me tic nono.

¹¹” Gin kiko dwoko ne wa be, ‘Wan en jotic ka Rubanga me Malo kede Piny; wan otie temuno gero tempulo kame bin sek abaka adwong me Isirael ogero paka tieko tic mere.

¹² Do pi kite kame oudo joakwari wan owango kede cuny Rubanga me Malo, en eko mino gi i cing Abaka Nebukadunesa me Babilon, en abaka me jo Kaludea.



Bin Nebukadunesa oko dudubo tempulo nono di eko mamako jo etero gi Babilon bala mabus.

¹³ Di do i mwaka me agege me apugan ka Sairas bala abaka me Babilon, Sairas oko mino cik be kopooore temuno gero tempulo nono.

¹⁴ En eko dwoko jamini me tempulo kame kocweo kede saabu kede siliba, gin jamini kame Nebukadunesa oudo okwanyo ki tempulo i Yerusalem di eko tero gi i tempulo ka rubanga mere i Babilon. Sairas bin oko mino jamini nogi i cing icuo anyinge Sesibasa, kame en oudo ecibo pi bedo ngapug me Yuda.

¹⁵ Abaka bin owaco ne pi dwoko jamini nogo di eko cibo gi i tempulo i Yerusalem, di eko mino kotemuno gero tempulo kawange kasek nono.

¹⁶ Aso, Sesibasa oko ot di eko cibo kide me dud apama me tempulo nono; tic me gedo nono oko bedo ot anyim cako i kare nono tuno tin, do pwodi tempulo likame otiek.’

¹⁷” Aso, Adwong me Awora, ka twerere, mi ber komoi iwandik kasek amakere kede abakai me Babilon, pi mito ngeno ka ateteni abaka Sairas oudo omio cik be temuno gero tempulo noni i Yerusalem, di do in iko mino wa tam kame in itie kede iye.”

Esera 6

Koudo Cik kame Abaka Sairas oudo Omio

¹ Di Abaka Darias oko mino cik be moi iwandik kasek amako abakai, kame oudo kobedo gwoko i Babilon.

² Do bomba me Ekabatana en kame oko udo iye iwandik kame waco be,

³” I mwaka me agege me apugan mere, Abaka Sairas oko mino cik be kopooore temuno gero tempulo i Yerusalem, pi en bedo kakame jo mio kede wango kiye giayala. Tempulo nono boro mere malo poore bedo mita ot are kiwie kanyaare, kede laco mere da mita ot are kiwie kanyaare.

⁴ Apama mere kopooore gero buli eroto acel me ebao i wi irotin adek me kide. Sente dedede amitere me gedo kobino kwanyo ki dero kano lim me abaka.

⁵ Doko da jamini kame kocweo kede saabu kede siliba kame Abaka Nebukadunesa oudo okelo Babilon ki tempulo me Yerusalem kopooore dwoko gi kargi i tempulo me Yerusalem.”

Darias Omio cik be Tic me Gedo Poore Meede

⁶ Darias oko dwoko baluwa kame waco be, “But Tatenai, ngapug me bad tetu tim me Eupurate, kede Setar Bosenai, kede jotic wadu me bad tetu tim me Eupurate. “Irwaunu tenge ki kakame kotie gero iye tempulo

⁷ doko da kur itotolunu tic mere. Poore ngapug me Yuda kede jotel me Iyudayan temuno gero tempulo ka Rubanga i wange kame oudo bin ecungo iye sek.



⁸Medo i wi manono, nan ango amio wu cik be poore imiunu joadongo me Iyudayan kony me lim amitere me gero tempulo; kopooore culo gi garama me gedo nono dedede abongo gal, di sente nono kopooore kwanyo ki dero kano lim me abaka i bad tetu tim me Eupurate, tetekenye gedo nono kur doko cungi.

⁹Gi dedede kame mitere buli ceng ne josaseredoti i Yerusalem ipoorenu mino gi abongo koso: itobai, imerekekin, idwe romini kame koyalo bala giayala awanga but Rubanga me Malo, engano, munyo, bwini, kede mo me olibeti.

¹⁰Ango amito negi mino giayala kame Rubanga me Malo twero gamo, di kiko lego nango kede ne awobe na winyo.

¹¹Doko medo i wi manono, ango atie mino cik kaman: ka ngatamoro odagi lubo gikame ango awaco, kobino puto epir me yat ki ode, di oko wiwito tetucel, di oko cobo kede kome pelepel. Di oko bino loko ode doko atukit me yugi.

¹²Ango akwao Rubanga ngat koyero Yerusalem pi bedo kakame kowore kiye pi reto abaka moroni arabo ajakanut moroni kame bino loko gikame ango awaco, arabo kame bino mito dudubo tempulo atie Yerusalem nono. Ango Darias amio cik noni, kopooore lube odocon.”

Kokwero Tempulo but Rubanga

¹³Di lubere kede baluwa kame Abaka Darias oudo ocwao, Tatenai ngapug me adul atie loka me ecilet me Eupurate, kede Setar Bosenai, karacel kede jowot gi oko tic kede teko gi dedede pi neno be gikame Abaka Darias owaco otimere.

¹⁴Aso, joadongo me Iyudayan oko meede kede gedo, di tic oko ot anyim kiber, di inabin Kagai kede Sakaria en asupo cuny gi kede imurai. Gin kiko tieko gero tempulo di lubere kede cik kame Rubanga me Isirael omio gi, kede cik kame Sairas, Darias, kede Abaka Aretasereses me Pasia oudo omio.

¹⁵Di do kiko tieko gedo me tempulo i duwe me Adarme mwaka me kanyape me apugan ka Darias bala abaka.

¹⁶Di do jo dedede me Isirael, josaseredoti kede Jolebi, kede jo apat koudo odwogo ki obukui, oko kwero ot noni but Rwot kede twon kilel.

¹⁷Pi kwero ot noni but Rwot, gin kiko yalo twonin tol acel (100), imerekekin tol are (200), romini apwodi bwong tol ongwon (400), kede ikoroi tomon kiwie are pi bedo giayala me kwanyo dub, buli ekoro pi jo me buli ekeko me ateker me Isirael.

¹⁸Di do oko mino josaseredoti kede Jolebi tice gi amako gi i tempulo i Yerusalem, di lubere kede iswilia kame Musa oudo owandiko.

Ebaga me Kalamo

¹⁹I ceng me tomon kiwie ongwon me duwe me agege me mwaka kolubo, jo kodwogo ki obukui oko tedo Ebaga me Kalamo.



²⁰Josaseredoti kede Jolebi dedede oudo olonyere di kiko doko cil. Di do mogo kikom gi oko neneko leini kobedo giayala me Ebagame Kalamo, pi jo dedede koudo odwogo ki obukui, kede pi josaseredoti jowot gi, kede pirgi.

²¹Jo kame oko camo giayala nogo obedo jo Isirael koudo odwogo ki obukui, kede jo dedede koudo oweko lubo itok me idinin me atekerin ace di gin kiko donyo woro Rwot Rubanga me Isirael.

²²Gin kiko camo Ebagame Mugati ali kede Arup pi ceng kanyaare di kipong kede yomcuny. Cuny gi oudo yom piento Rwot oudo oloko cuny abakame Asiria but gi, omio eko konyo gi kede tic me nyogao gero tempulo ka Rubanga me Isirael.

Esera 7

Esera Otuno Yerusalem

¹⁻⁶Ingei mwakini atot atota, di Aretasereses en oudo abakame Pasia, Esera oko bino Yerusalem di ewok ki Babilon. Joakwari ka Esera oudo lubere kaman: Esera oudo obedo wot ka Seraya, wot ka Asaria, wot ka Kilikia, wot ka Salum, wot ka Sadoki, wot ka Akitub, wot ka Amaria, wot ka Asaria, wot ka Merayot, wot ka Serakia, wot ka Usi, wot ka Buki, wot ka Abisua, wot ka Penekasi, wot ka Eleasar, wot ka Aaron. Esera oudo obedo dano atie kede ngec atut i kom iswilia kame Rwot Rubanga me Isirael bin omio Musa; aso abaka bin oko mino Esera gi dedede kame en epenyo, pien Rwot oudo tie konye.

⁷Jo ace da me Isirael, kame ribo josaseredoti, Jolebi, jower, kede jodar me irutei me tempulo, kede jotic me tempulo oko upere kede Esera ot Yerusalem i mwaka me kanyaare me apugan ka Aretasereses.

⁸⁻⁹En eyai ki Babilon i ceng me agege me duwe me agege, di do pi kony ka Rubanga eko tuno Yerusalem i ceng me agege me duwe me kany.

¹⁰Esera bin ocibo cunye siyao Iswil ka Rwot, timo gikame iswil nono mito, kede pwoyo jo me Isirael kop kame tie iye.

Baluwa kame Aretasereses Omio but Esera

¹¹Abaka Aretasereses oko mino Esera baluwa; Esera oudo obedo ngasaseredoti kede ngat kosiyao odocon iswil ka Rwot kede cik mege but jo me Isirael. Baluwa nono waco kaman:

¹²” Baluwa kowok kibus Aretasereses, abakame abakai, but Esera, ngat kosiyao odocon iswil ka Rubanga me Malo.

¹³” Ango atie mino cik be, jo dedede me Isirael, amoto josaseredoti gi arabo Jolebi kame tie i ajakanut na di cuny gi winyo pi dok Yerusalem karuno upere kede in.

¹⁴Ango kede kansulo na otie cwani Yuda kede Yerusalem pi neno ka jo tie gwoko Iswil ka Rubanga wu, Iswil kame nataman koketo i cingi.



¹⁵Doko da ipoore tero siliba kede saabu kame ango kede kansulo na cuny wa owinyo pi mino but Rubanga me Isirael, ngat kame tempulo mere tie Yerusalem.

¹⁶Ipoore da tero siliba kede saabu kame ibino udo ki adul lung me Babilon, karacel kede giamia kame jo kede josaseredoti kwanyo kede mit me cuny gi ken gi pi tempulo atie Yerusalem, en tempulo ka Rubanga gi.

¹⁷” Ipoore tic kede lim nono kede rieke iko wilo twonin, imerekekin, romini apwodi bwong karacel kede alos kede giamata me bwini kame koyalo gi kede, di do iko bino yalo gi i wi alutari atie i tempulo i Yerusalem.

¹⁸Itwero bino tic kede siliba kede saabu kame bino dong pi wilo gikame in kede jo ni cuny mito, di lubere kede mit ka Rubanga wu.

¹⁹Ipoore mino Rubanga i Yerusalem jamini me tic dedede kame oudo komii me timo tic i tempulo.

²⁰Do ka tie gimoro ace kame komito kibuti me timo tic i tempulo, ibino gamo sente me wile ki dero kano lim ka abaka.

²¹” Ango atie mino cik but jo dedede kame tio i dero me kano lim me adul atie i bad tetu tim me ecilet me Eupurate kaman: gi dedede kame Esera ngasaseredoti penyo kibutu, en ngat kosiyao odocon Iswil ka Rubanga me Malo, poore itunu kede teko wu dedede pi neno be imienu.

²²Itwerunu mine siliba kalikame kalamo kilo tutumia adek kede tol ongwon (3,400), kede engano kalikame kalamo kilo tutumia tomon (10,000), kede bwini kame romo lita tutumia are (2,000), kede mo me olibeti da kame romo lita tutumia are (2,000), kede munyo atot bala kame mitere.

²³Miero iketunu cunyu pi neno be imiunu jamini dedede kame Rubanga me Malo mito pi tempulo mere, tetekeny kur lilo mere pot i koma kede i kom abakai ace kame bino lunyo wanga waru.

²⁴Doko da wan otie mino wu ngeno be likame ipoorenu raro esolo me epone dedede kibun josaseredoti, Jolebi, jower, jodar, jo kame timo tic i tempulo, arabo jo ace dedede kame timo tic amakere kede tempulo.

²⁵” In Esera, di itio kede rieke kame Rubanga omii, yer jopug kede jongolkop pi pugo jo me adul atie i bad tetu tim me ecilet me Eupurate. Kipoore bedo jo kame ngeo Iswil ka Rubanga di kiko donyo pwnyo Iswil nono but jo kame kwie.

²⁶Jo dedede kalikame bino lubo Iswil ka Rubanga wu arabo iswilia kame abaka oketo kobino mino gi alola kaman: kobino neko gi, arabo kobino riamo gi tenge ki piny gi, arabo kobino mako jamini gi, arabo kobino tweno gi i otkol.”

Esera Opako Rubanga

²⁷Esera oko waco be, “Pak bed but Rwot, en Rubanga ka joakwari wa. En emio abaka obedo kede cuny kacal kaman me mino tempulo katie Yerusalem dwongo.



²⁸Doko da en emio abaka kede kansulo mere lung karacel kede jotic mege atek obedo kede amara buta. Rwot Rubanga na okonya di eko mina abedo kede nwangcuny, di ako sobolo koko jotel me ude me Isirael di ako dwogo kede gi.”

Esera 8

Jo kame bin oko Dok Yerusalem kede Esera

¹Manoni en nying jotel me ikekon me Isirael kame bin oko yai kede Esera ki Babilon di kiko dok Yerusalem i kare me apugan ka Abaka Aretasereses:

²⁻¹⁴Geresom en kame bin telo jo me ot ka Penekasi Danieri en koudo telo jo me ot ka Itamar Katus wot ka Sekania, en koudo telo jo me ot ka Daudi Sakaria en koudo telo jo me ot ka Paros. En bin eyai kede cuo tol acel kede ot kany (150) me yi ot gi Eliekoenai wot ka Serakia en koudo telo jo me ot ka Pakat Moab. Cuo kame bin owandiko nying gi bute oudo tie tol are (200) Sekania wot ka Yakasiel en koudo telo cuo tol adek me yi ot ka Satu Ebed wot ka Jonasan en koudo telo cuo ot kany me ot ka Adin Yesaya wot ka Atalia en koudo telo cuo ot kanyaare me ot ka Elam Sebadia wot ka Emikairi en koudo telo cuo ot kanyauni me yi ot ka Sepatia Obadia wot ka Yekiel en koudo telo cuo tol are kede tomon kiwie kanyauni (218) me yi ot ka Joab Selomit wot ka Yosipia en koudo telo cuo tol acel kede ot kanyape (160) me yi ot ka Bani Sakaria wot ka Bebai en koudo telo cuo ot are kiwie kanyauni me ot ka Bebai Yokanan wot ka Kakatan en koudo telo cuo tol acel kede tomon (110) me yi ot ka Asagad Elipelet, Yekuel, kede Semaya en koudo telo cuo ot kanyape me ot ka Adonikam (gin bin kiko dwogo icen ingei kare moro) Utai kede Sakur en koudo telo cuo ot kanyaare me ot ka Bigibai.

Esera Oudo Jolebi pi Timo Tic me Tempulo

¹⁵Ango bin ako koko jo nogo lung i nget ecilet kame mol eoto i bomba me Akaba, di wan oko bedo kunono pi ceng adek. Ango ako udo be josaseredoti oudo tie i dier jo nogo do Jolebi li.

¹⁶Di ango ako cwano jo ot lwongo Elieser, Ariel, Semaya, Elinatan, Yarib, Elinatan, Natan, Sakaria, kede Mesulam; gin en oudo kibedo jotel, kede ako mino kolwongo da jopwony are nogi: Yoyarib kede Elinatan.

¹⁷Ango ako cwano gi but Ido, ngatel me jo kame bin tie Kasipia, pi kwane kede jowote, gin jotic me tempulo pi cwano ne wan jo kame timo tic ka Rubanga i tempulo.

¹⁸Pi kisa ka Rubanga wa, gin kiko cwano ne wan Serebia, en dano atwero tic, Ngalebi me ot ka Makali. En eko bino kede awobe mege kede imiegu mege, gin jo tomon kiwie kanyauni.

¹⁹Gin bin kiko cwano da Kasabia kede Yesaya, cuo kame bin yai ki ot ka Merari. Gin kiko bino karacel kede cuo ot are kame ribo imiegu gi kede awobe gi.



²⁰Medo i kom jo nogo, bin tie da cuo tol are kede ot are (220) kame timo tic me tempulo, cuo kame bin Daudi kede jotic mege opoko joakwari gi pi konyo Jolebi. Gin dedede bin kowandiko nying gi.

Esera Otelo Jo i Kanyo Kec kede i Lega

²¹I kare kame wan oudo otie kede i nget ecilet me Akaba, ango ako mino cik pi wan dedede bedo i kanyo kec di oko mwole i nyim Rubanga wa di oko kwane pi telo wa kede gwoko wa i sapali wa, wan kede idwe wa kede jamini kame oudo otie kede dedede.

²²Ango oudo lewic omaka penyo abaka pi mino wa isirikalen kame koto ogwoko wa kikut jokwor wa i kare me sapali wa, pien wan oudo otieko waco ne be Rubanga wa gwoko jo dedede kame wore, do elilo ne jo dedede kame lokere tenge ki bute.

²³Aso, wan oko bedo i kanyo kec di oko lego but Rubanga wa pi gwoko wa, di en eko gamo kwac wa.

Giamia pi Tempulo

²⁴Di do ango ako yero josaseredoti tomon kiwie are: Serebia, Kasabia, kede josaseredoti tomon apat.

²⁵Ango ako pimo negi siliba kede saabu, kede da jamini me tic kame abaka, jo amie tam kede jotic mege, kede jo Isirael dedede kame oudo tie kunono, bin omio be tim kede tic me tempulo.

²⁶⁻²⁷Jamini kame ango ako mino gin ige: kilo tutumia ot are kiwie are (22,000) me siliba jamini tol acel kame kotimo kede siliba, kame peko gi romo kilo ot kanyaare saabu kilo tutumia adek kede tol ongwon (3,400) bakulin ot are kame kotimo kede saabu, kame peko gi buco romo kilo kanyauni kede dul bakulin are kame kotimo kede buronsi kame kojililo kiber, kame wel gi rom aroma kede bakulin kame kotimo kede saabu

²⁸Ango ako waco negi be, “Wun ibedunu jo kacil i nyim Rwot, Rubanga ka joakwari wu, kede jamini nogi da tie jamini kacil. Siliba kede saabu kame jo okelo obedo giayala me bercuny but Rwot.

²⁹Gwokunu gi kiber paka wun tuno Yerusalem. Di wun ikounu pimo gi i agolai me tempulo, i nyim jotel me josaseredoti kede Jolebi, kede jotel me diakale me Isirael.”

³⁰Aso, josaseredoti kede Jolebi oko donyo gwoko siliba, saabu, kede jamini me tic kame oudo opimo, pi gin tero Yerusalem i ot ka Rubanga wa.

Dok Yerusalem

³¹Wan bin oko yai ki ecilet me Akaba pi ot Yerusalem, i buto duwe tomon kiwie are me duwe me acel. Rubanga wa oudo tie kede wa di en eko gwoko wa ki cing jokwor wa kede ki asura kame obeo iye i yongayo.

³²Kakame otuno kede Yerusalem, wan oko ber wei pi ceng adek.



³³I ceng me ongwon mere wan oko ot i tempulo, oko pimo siliba, saabu, kede jamini me tic, di oko mino gi i cing ngasaseredoti Meremot wot ka Uria. En oudo etie kede Eleasar wot ka Penekasi karacel kede Jolebi are, Yosabad wot ka Yesua kede Noadia wot ka Binui.

³⁴Omaro gin dedede di oko pimo gi, di oko wandiko rom me peko gi.

³⁵Di do jo kame bin odwogo ki obukui oko mino giayala awanga but Rubanga me Isirael. Gin kimio giayala me twonin tomon kiwie are pi jo Isirael lung, imerekekin ot kanyangon kiwie kanyape, kede idwe romini ot kanyaare kiwie kanyaare, kede ikoroi tomon kiwie are bala giayala me kwanyo dub. Leini nogi dedede oko mino bala giayala awanga but Rwot.

³⁶Gin kiko tero da kop kame oudo abaka owandiko di kiko mino but jopug kede jotie me adul me bad tetu tim me ecilet me Eupurate. Jo nogo oko bedo mino kony but jo kede i tempulo.

Esera 9

Esera Ongeo be Jo Isirael Onyomere kede Atekerin Apat

¹I ngei timo gi nogi dedede, jotel mogo me jo Isirael oko bino buta di kiko waco na be jo me Isirael, josaseredoti, kede Jolebi likame opokere kede jo me pinye apat kame tie bedo i lobo nono. Gin oudo kitieko donyo timo jamini me kwer me jo Kanan, jo Kiti, jo Perisi, jo Yebu, jo Amon, jo Moab, jo Misiri, kede jo Amor.

²Jo me Isirael oudo oduonyo nyomere kede jo nogo. Manono omio jo kacil ka Rubanga oudo onyalare kede jo me lobere nogo. Jotel kede jotie en kame bin ocako timo dub noni.

³Kakame ango awinyo kede kop noni, ako nyinyilo igoen me koma pi cweruncy, apuputo yer me wia kede me tika, di ako bedo piny di teko otiek i koma.

⁴Di do jo dedede kame bin tie kede lworopi kop kame Rubanga me Isirael oudo owaco i kom dub me jo kame oudo odwogo ki obukui, oko cokere buta di kiko bedo keda kanono tuno esawa me mino giayala me otieno.

⁵Kakame esawa me mino giayala me otieno oromo kede, ango ako yai ki kakame oudo atie tururo iye, di angapo igoen na konyinyilun nogo, di ako riondiko piny, ako tingo cinga malo but Rubanga na,

⁶di ako lego be, “Okwe Rubanga na, ango lewic omaka kitek omio likame aromo tingo wanga malo buti. Dub wan meede ameda, kimukurukin kalamo wi wa, kituno malo i edou.

⁷Cako i kare ka joakwari wa tuno tin wan obedo timo dub kamanono. Dub wa nono en komio wan jo Isirael kede abakai wa, kede josaseredoti wa, obedo poto i cing abakai me pinye apat, di oko neneko wa, omako wa di oko tero wa bala mabus, koyako wa, kede komio wa twon lewic, kiton tuno tin.



⁸Do nataman pi kare moro katitidi, Okwe Rwot Rubanga wa, in itimo wan kisa di iko mino mogo kikom wa obwot ki ipasun, di oko donyo bedo kabedo nin kacil noni. In ilako wan ki ipasun di iko mino wa kuo anyen.

⁹Wan oudo obedo ipasoi, do in Rubanga wa likame iko jalo wa i ipasun. In inyuto ne wan amara nin kalikame lokere di iko mino abakai me Pasia otimo ne wan bero; imio wan kuo anyen di oko gero tempulo nin kame oudo odoko ameje, kede iko gwoko wa i Yuda kanoni kede i Yerusalem.

¹⁰” Do nataman, Okwe Rubanga wa, kop nyo kame wan otwero waco ingei magonogi dedede timere? Wan bobo oturo cik nin

¹¹kame inabin jotic ni omio wa. Gin oudo kiwaco ne wa be lobo kame otie ot donyo iye pi doko merwa nono obedo lobo kopwokere pi tim me kwere me jo me piny nono. Jo kame bedo kanono lung omunaun kede tim areco.

¹² Gin oudo kiwaco ne wa be kur onyomere kede gi, kede be kur otim gimoro pi konyo gi udo mulem arabo lonyo, tetekenya wan obed tek di oko camo mulem me lobo nono, di oko weko ne ikwae wa lunye atwal.

¹³Ingei gi dedede kobedo timere ne wa pi dub wa kede raco wa, wan otieko ngeno be in, Rubanga wa, imio wa alola atitidi twatwal kalikame poore kede dub wa di iko mino jo mogo kikom wa odong kuo.

¹⁴Pinyo komio wan bobo oko lokere turo kede cik nin di oko donyo nyomere kede jo kame timo jamini me kwere kacal kamano? Manono koto twero mini ililo di iko muducaro wa pitipit.

¹⁵Okwe Rwot, Rubanga me Isirael, in ingolo kop kede ateni, do nataman in iko mino wan obwot oko dong kuo. Wan ocungo i nyimi kede raco wa, bed bala likame tie dano moro kame twero cungo i nyimi di etie iekite noni.”

Esera 10

lik me Jiko Nyom kede Atekerin Apat

¹I kare kame Esera oudo tie ilega kede i nyim tempulo di etuco dub nogo, di ekok akoka kede pigewange, kede di epopoto piny, twon ekodet me jo Isirael oko cokere bute, cuo, mon, kede idwe, di kikok kitek.

²Di Sekania wot ka Yekiel, akwar Elam, oko waco ne Esera be, “Wan otiekunu turo cik ka Rubanga wa i yore me nyomo mon me atekerin apat kame tie bedo i lobo noni, do akadi kamanono da gen pwodi tie pi jo Isirael.

³Aso, nataman wan miero otimunu isikan kede Rubanga wa, be wan obinunu riamo tenge mon nogi dedede kede idwe gi, di lubere kede tam kame in kede jo kame woro cik ka Rubanga mio wa. Wan obino timo gikame Iswil ka Rubanga mito.

⁴Cak in timo tic, pien manono obedo tic nin. Wan otieko iikere pi tic karacel kedi. Bed tek di iko time.”



⁵Aso, Esera oko yai eko cungo di eko mino jotel me josaseredoti, jotel me Jolebi, kede jotel dedede me Isirael okwongere be gin kibino timo bala kame Sekania owaco.

⁶Di Esera oko yai ki nyim tempulo di eko ot i agola ka Yekokanan wot ka Eliasib kakame eko runo piny iye. En likame bin ecamo gimoro akadi mato pii, pien oudo etie iturur pi kite kalikame jo kodwogo ki obukui obedo kede genere but Rwot.

⁷Gin bin kiko cwano kop Yuda kede Yerusalem lung, but jo kodwogo ki obukui pi gin dedede cokere Yerusalem.

⁸Manono en cik kame jotel me Isirael oudo omio. Ka ngatamoro oudo likame oko bino i kare me ceng adek kame bin komio, oudo miero mae jamini mege dedede, di oko riame tenge kikom jo kodwogo ki obukui.

⁹Di jo dedede me Yuda kede Benjamin oko cokere Yerusalem i ceng adek nogo. I buto duwe ot are me duwe me kanyangon en kame bin jo dedede oko cokere kede kakaler i nyim tempulo, di kom gi miel amiela pi kop noni, kede da pi kot oudo tie cwei kitek.

¹⁰Ngasaseredoti Esera oko yai di eko cungo eko waco negi be, “Wun itimunu dub pien inyomunu mon me atekerin apat, di manono oko medo raco me jo Isirael.

¹¹Aso, nataman tucunu dub wu but Rwot Rubanga ka joakwari wu, di ikounu timo gikame en emitu. Pokerenu tenge kikom jo me piny noni kede kikom mon nogi me atekerin apat.”

¹²Di ekodet kocokere lung oko lelemo be, “Manono tie kakare; wan miero otim bala kame in itieko waco.

¹³Do jo tot twatwal, doko kot tie cwei kitek; wan likame otwero cungo ooko kakaler kaman. Akadi tic noni da likame obedo tic me ceng acel arabo ceng are, pien jo atos kikom wa otieko timo dub noni.

¹⁴Wek jotel wan dong Yerusalem di gin kiko cungo pi ekodet lung i kop noni. Di oko bino ciko ne jo dedede me bomban wan konyomo mon me atekerin apat kare kame gin poore kibin iye, karacel kede joadongo kede jongolkop me bomban gin, tuno di lilo atek ka Rubanga wa pi kop noni otiek.”

¹⁵Likame bin tie dano moro ace kame oko piem kede tam noni kwanyo kenekene Jonasan wot ka Asakel kede Yakaseya wot ka Tikiba, di Mesulam kede Sabetai Ngalebi oko gango gi.

¹⁶Di jo kame bin odwogo ki obukui oko timo kamanono. Ngasaseredoti Esera oko yero cuo kikom jotel me ikekon di eko wandiko nying gi. I buto duwe acel me duwe me tomon gin bin kiko bedo piny pi ngingico kop nono.

¹⁷I buto duwe acel me duwe me acel me mwaka anyen en kame gin kiko tieko kede ngingico kop me cuo koudo onyomo mon me atekerin apat.

Cuo Konyomo Mon me Atekerin Apat



- ¹⁸Magi en nying josaseredoti kame bin onyomo mon me atekerin apat: Ki ot ka Yesua wot ka Yekosadoki kede imiegu mege: Maseya, Elieser, Yarib, kede Gedalia.
- ¹⁹Gin kiko cikere pi riamo mon gi, di kiko mino emerekek bala giayala but Rubanga pi dub gi.
- ²⁰Ki ot ka Imer: Kanani kede Sebadia
- ²¹Ki ot ka Karim: Maseya, Elia, Semaya, Yekiel, kede Usia
- ²²Ki ot ka Pasikur: Elioenai, Maseya, Isimael, Netanel, Yosabad, kede Elasa.
- ²³Kikom Jolebi, jo kame bin onyomo mon me atekerin apat gin en, Yosabad, Simeï, Kelaya (kame nyinge ace en Kelita), Petakia, Yuda, kede Elieser.
- ²⁴Kikom jower, Eliasib kene en koudo onyomo dako me ateker apat. Kikom jodar irutei, jo kame bin onyomo mon me atekerin apat gin en, Salum, Telem, kede Uri.
- ²⁵Jo apat me Isirael kame bin onyomo mon me atekerin apat: Ki ot ka Paros: Ramia, Isia, Malikija, Mijamin, Eleasar, Malikija, kede Benaya
- ²⁶Ki ot ka Elam: Matania, Sakaria, Yekiel, Abidi, Yeremot, kede Elia
- ²⁷Ki ot ka Satu: Elioenai, Eliasib, Matania, Yeremot, Sabad, kede Asisa
- ²⁸Ki ot ka Bebai: Yekokanan, Kanania, Sabai, kede Atalai
- ²⁹Ki ot ka Bani: Mesulam, Maluk, Adaya, Yasub, Seal, kede Yeremot
- ³⁰Ki ot ka Pakat Moab: Adana, Kelal, Benaya, Maseya, Matania, Besalel, Binui, kede Manase
- ³¹⁻³²Ki ot ka Karim: Elieser, Isija, Malikija, Semaya, Simeon, Benjamin, Maluk, kede Semaria
- ³³Ki ot ka Kasum: Matenai, Matata, Sabad, Elipelet, Yeremai, Manase, kede Simeï
- ³⁴⁻³⁷Ki ot ka Bani: Madai, Amuram, Uwel, Benaya, Bedeya, Keluki, Bania, Meremot, Eliasib, Matania, Matenai, kede Jasu
- ³⁸⁻⁴²Ki ot ka Binui: Simeï, Selemia, Natan, Adaya, Makanadebai, Sasai, Sarai, Asarel, Selemia, Semaria, Salum, Amaria, kede Yosepu
- ⁴³Ki ot ka Nebo: Yeyel, Matitia, Sabad, Sebina, Yadai, Yoweri, kede Benaya
- ⁴⁴Cuo nogi dedede bin onyomo mon me atekerin apat. Gin kiko riamo gi karacel kede idwe gi.



Nekemia

Nekemia 1

¹Man en itatam amako gikame Nekemia wot ka Kakalia otimo.

Nekemia Oparo pi Yerusalem

I duwe me Kisileb, i mwaka me ot are me Aretasereses bedo bala abaka me Pasia, ango Nekemia oudo atie Susa, i bomba adwong.

²Omina acel, kame nyinge Kanani oko tuno di ewok ki Yuda. En oudo eupere kede jo ace. Ango ako penyo gi kop i kom Iyudayan koudo odok ki Babilon kakame oudo komako gi di oko tero gi iye bala mabus, kede da kop i kom Yerusalem.

³Gin kiko waco na be jo koudo obwot ki obukui di kiko dok paco i lobo gi tie kede peko adwong twatwal, doko da jokumbor kame kio kede gi oudo tie neno gi kede acae. Kiwaco na da be apamai me Yerusalem oudo kotuturo, doko da be mac oudo odudubo irutei mege.

⁴Kakame ango awinyo kede kope nogi, ango ako bedo piny di ako donyo koko pi ceng mogo, di akanyo kec kede di alego but Rubanga atie i malo.

⁵Ango ako lego be, “Okwe Rwot Rubanga atie i malo, in idwong twatwal doko wan olwori. Kede genere in igwoko isikan ni but jo kame mari di kigwoko cik ni.

⁶Ngoloro ango di iko ciko yiti winyo kwac na kame ango akwao iceng kede iwor pi jotit ni, gin jo me Isirael. Ango atuco i nyimi be wan jo me Isirael odubo i nyimi. Ango kede jo me oda kede jo ace odubo i nyimi.

⁷Wan otimo ni raco adwong, likame wan otimo gikame in iciko ne wa. Likame wan ogwoko iswilia kame imio wa kikut Musa ngatic ni.

⁸Yutuno kop kame oudo iwaco ne ngatic ni Musa be, ‘Ka likame ibedunu jo agenere buta, abino sasaro wu i diere me atekerin apat.

⁹Do ka ilokerenu dwogo buta di ikounu gwoko cik na, ango abino dwoko wu i kabedo kame ango ayero pi jo wora kiye, akadi bed bala oudo isasarunu kakabor.’

¹⁰” Rwot, magonogi en jotit ni, jo ni amaki. In ilako gi kede twer ni adwong kede teko ni.

¹¹Okwe Rwot, nan do winy kwac na kede kwac ka jotit ni ace kame tie kede mit me bedo kede wor buti. Tin mi gi dedede cobere na kiber di iko mino abaka bed kede cuny me kisa buta.” I kare nono ango en kame oudo abedo ngat kame mio bwini kame abaka mato.

Nekemia 2

Nekemia Ooto Yerusalem



- ¹I ceng moro acel i duwe me Nisan, i mwaka me ot are me apugan ka Aretasereses, ango ako tero ne abaka bwini. Cako sek oudo pwodi likame ango abedo kede ning i nyim abaka bala i ceng nono.
- ²Aso, abaka oko penya be, “Pinyo komio itie ning aninga do di likame ituwo da? Miero bed di tie gimoro arac kowango cunyi.” Bed bala lworu oko maka,
- ³do ango ako waco ne be, “Adwong akwao ibed kuo nakanaka! Pinyo kamio likame aning do di bomba kobedo kakame atesin ka joakwari na tie iye otieko doko ameje, doko da mac odudubo irutei mege?”
- ⁴Abaka oko penya be, “Nyo kame itie mito?” Ango ako lego but Rwot atie i malo
- ⁵di ako dwoko ne abaka be, “Ka eyomo cunyi, doko da ka itie kede yomcuny buta, ango akwao be icwaa Yuda, i bomba kame bin koyiko iye joakwari na, tetekeny ango aot temuno gere bobo.”
- ⁶Abaka oko penya, di dako mere da oudo tie bedo i ngete be, “Ibino ot pi kare arom kamene, doko da ibino dwogo awene?” Aso abaka cunye oko bedo yom eko yei na ot di ango ako waco ne kare kame ango oudo apoore tieko kunono.
- ⁷Ango ako waco ne abaka be, “Adwong, ka etwero yomo cunyi, mia baluwan ater ne jopug me adulion atie loka tetuca me ecilet me Eupurate, pi kwenyaro gi pi yei na ngolo adulion gin paka tuno Yuda.
- ⁸Doko da akwao be imia baluwa ater ne Asap, en ngat kame gwoko abum me abaka, pi kwenyaro en pi mina ipirin me timo irutei me apama aluko tempulo, kede me gero apama me bomba, kede ot kame ango abino donyo bedo iye.” Abaka oko mina gi dedede kame oudo akwae, pien kisa ka Rubanga oudo tie keda.
- ⁹Ango ako ot but jopug me adulion atie loka tetuca me ecilet me Eupurate, di ako mino gi baluwan kowok kibus abaka. Abaka oudo ocwao jodongo me isirikalen mogo keda, karacel kede isirikalen aoto kede tien, gin kiupere keda.
- ¹⁰Kakame Sanabalat, dano me bomba me Bet Koron, kede Tobia, ngatic kowok ki adul me Amon, owinyo kede be dano moro oudo obino timo tic pi bero me jo me Isirael, gin cuny gi oko wang twatwal.
- ¹¹Ango ako ot paka tuno Yerusalem, di pi ceng adek
- ¹²ango likame ako waco ne ngatamoro gikame Rubanga oudo ocibo i cunya pi timo ne Yerusalem. Di do i dier iwor ango ako yai di ako donyo ooko di ako tero cuo mogo oupere keda. Le kame ango ako tero oudo obedo punda acel kenekene kame oudo ango atie wanano.
- ¹³Ango adonyo ooko iwor di ako donyo ki Erute me Aditot atie i bad tetu tim, di ako dok i bad tetu piny di abeo ki Atan me Twol Kiyilyili, di ako do tuno i Erute me Woyo. Kakame ango oudo atie ot kede, oudo atie ngingico apamai kotiatiaun me bomba kede irutei kame mac odudubo.



¹⁴Di ako kato i Erute me Atan kede i Atapar me Abaka; do kanono oko bedo diding ne punda kame oudo atie wanano pi meede ot anyim.

¹⁵Aso ango ako dok piny i Aditot me Kideron di ako donyo ririo en di angingico apama. Di ako lokere dok lubo yongayo kame oudo alubo me bino, di ako donyo i bomba di abeo ki Erute me Aditot.

¹⁶Jotel me kanono likame oudo ngeo kakame ango oudo aoto iye, arabo gikame oudo aoto timo; oudo ango pwodi likame awaco ne Iyudayan, josaseredoti, jo kame koworo, jotic adongo kede ne jo ace apat kame oudo poore timo tic.

¹⁷Di do ango ako waco negi be, “Nan nenunu peko kame wan otieny iye; Yerusalem otieko popoto, doko irutei mege da otieko wang. Oikunu gero apama me Yerusalem tetekeny okwanyunu lewic ki wi wa.”

¹⁸Di ako waco negi tim me kisa kame Rubanga obedo kede buta, kede da kope kame abaka oudo owaco na. Di gin kiko waco be, “Ocakunu gedo!” Aso gin kiko jalere pi cako tic pi bero me jo dedede.

¹⁹Do kakame Sanabalat dano me Bet Koron, kede Tobia dano me Amon, kede Muarabu anyinge Gesem owinyo kede kop nono, gin kiko nyero wa nyero me acae di kiwaco be, “Nyo ino kame wun itieny timo? Benyo, itieny mito bedo kede jemo but abaka?”

²⁰Ango ako dwoko be, “Rubanga atie i malo en kame bino mino wan ocobo tic. Wan jotic mege oyaro cako gedo. Do wun iliunu kede iner moro i kom jamini me Yerusalem kede i kom kope kobedo timere iye cako anakacia.”

Nekemia 3

Temuno Gero Apama me Yerusalem

¹Man en epone kame bin kotemuno gero kede apama me bomba. Eliasib Ngatel me Josaseredoti kede josaseredoti jowote en oiko gero Erute me Romini. Gin kiko kwere di kiko keto ikekon mege. Gin kiko kwere but Rwot paka tuno i Gedo abor malo me Tol Acel, ape ape paka tuno i Gedo abor malo me Kananel.

²Cuo me Jeriko oko gero dul kame lubo manono. Di Sakur wot ka Imiri oko gero dul kame lubo.

³Awobe ka Kasena en oko gero Erute me Aporogo; gin kisisipo ipirin mege di kiko keto ikekon mege, alorito kede agilun me cego gi.

⁴Meremot wot ka Uria, akwar Kakos en oko gero dul kame lubo mergi. Di Mesulam wot ka Berekia, akwar Mesesabel en oko gero dul kame lubo manono. Di Sadoki wot ka Bana en oko gero dul kame lubo manono.

⁵Cuo me Tekoa en oko gero dul kame lubo kanono, do jotel me bomba gi oko daga tic atek kame oudo kopoko negi.



⁶Yoyada wot ka Pasea kede Mesulam wot ka Besodeya oko temuno gero Erute Kacon; gin kisisipo ipirin mege di kiko keto ikekon mege, alorito kede agilu me cego gi.

⁷Melatia me Gibeon, Yadon me Meronot, kede cuo me Gibeon kede Misipa en oko temuno gero dul kame lubo, ape ape paka tuno kakame ngapug me adul me bad tetu tim me ecilet me Eupurate oudo buto iye.

⁸Kakame lubo mergi Usiel wot ka Karakaya, ngatet saabu, en oko gero. Kanania, ngat kame oudo cweo moe angwe kur, en oko gero dul kame lubo, ape ape paka tuno i Apama Alac.

⁹Repaya wot ka Kur, ngat koudo pugo dul me Yerusalem en oko gero dul kame lubo.

¹⁰Yedaya wot ka Karumap en oko gero dul kame lubo, kame oudo iyapi kede ode. Katus wot ka Kasabaneya en oko gero dul kame lubo.

¹¹Malikija wot ka Karim kede Kasub wot ka Pakat Moab en oko gero dul kame lubo kede Gedo abor malo me keno me tedo mugati.

¹²Salum wot ka Kalokesi, en ngapug me dul ocelu me Yerusalem, en oko gero kakame lubo. (Anyira mege okonye timo tic nono.)

¹³Kanun kede jo kame bedo i bomba me Sanoa en oko temuno gero Erute me Aditot. Gin kigere di kiko keto ikekon mege, alorito kede agilun me cego gi, di kiko temuno gero apama kakame boro mere romo mita tol ongwon kede ot ongwon (440), kame riere ape ape paka tuno i Erute me Yugi.

¹⁴Malikija wot ka Rekab, ngapug me adul me Bet Kakerem en oko temuno gero Erute me Yugi. En egere di eko keto ikekon mege, alorito kede agilun me cego erute nono.

¹⁵Salum wot ka Kolokose, ngapug me adul me Misipa en oko temuno gero Erute me Atan. En eumo kanono di eko gero erute di eko keketo alorito kede agilu me cege. Ki Atapar me Sela, en egero apama kame gongere kede poto me abaka, ape ape paka tuno kayito piny ki Bomba ka Daudi.

¹⁶Nekemia wot ka Asabuk, ngapug me dul me Betesur en oko gero kakame lubo, ape ape paka tuno i ates ka Daudi, i atapar kede i paco me isirikalen.

Jolebi kotimo Tic me Gero Apama

¹⁷Jolebi kotimo tic me gero apama gin en: Rekum wot ka Bani en oko gero kakame lubo; Kasabia ngapug me dul me Keila en oko gero kakame lubo di ecungo kawang adul kame en epugo;

¹⁸Babai wot ka Kenadad, ngapug me dul ocelu me Keila en oko gero dul kame lubo;

¹⁹Eser wot ka Yesua, en ngapug me Misipa en oko gero dul kame lubo, i nyim ot me kano jamini me yi, ape ape paka tuno kakame apama goo kiye kona;

²⁰Baruk wot ka Sabai en oko gero kakame lubo, ape ape paka tuno kakame donyo i ot ka Eliasib Ngatel me Josaseredoti;



²¹Meremot wot ka Uria, akwar Kakos en oko gero dul kame lubo paka tuno kakame ot ka Eliasib jik iye.

Josaseredoti kotimo Tic me Gero Apama

²²Magi en josaseredoti oko timo tic me gero apama: Josaseredoti me adulion koluko Yerusalem en oko gero kakame lubo;

²³Benjamin kede Kasub en oko gero kakame lubo, kame oudo tie i nyim ude gin; Asaria, wot ka Maseya, en akwar Anania, en oko gero kakame lubo, kame oudo tie i nyim ode;

²⁴Binui wot ka Kenadad en oko gero kakame lubo, cako ki ot ka Asaria tuno kakame apama goo kiye kona;

²⁵⁻²⁶Palal wot ka Usai en oko gero kakame lubo, cako ki esonda me apama kede gedo abor malo atie i paco ka abaka me kakokiar i nget diakal me jodar. Pedaya wot ka Paros en oko gero kakame lubo, paka tuno karamoro i bad tetu kide i nget Erute me Pii kede gedo abor malo me daro tempulo. (Manoni oudo tie i nget dul me bomba kakame kolwongo be Opel, kakame jotic me tempulo oudo bedo iye.)

Jogedo Ace

²⁷Jo me Tekoa en oko gero kakame lubo, cako ki karamoro apimere kede gedo abor malo di edwong, en gedo me daro tempulo, paka tuno i apama kame tie i nget Opel; manono en dul me are kame gin kigero.

²⁸Ekodet me josaseredoti en oko gero dul kame lubo, dok i bad tetu malo cako ki Erute me Asigira, di ngat acelacel gero dul kame tie i nyim ode.

²⁹Sadoki wot ka Imer en oko gero kakame lubo, kame oudo tie i nyim ode. Semaya wot ka Sekania, ngat kame oudo daro erute me bad tetu kide, en oko gero kakame lubo.

³⁰Kania wot ka Selemia kede Kanun, en awobi me kanyape ka Salap en oko gero kakame lubo, manono oudo obedo gedo gi me tien me are. Mesulam wot ka Berekia en oko gero kakame lubo, kanono oudo tie i nyim ode.

³¹Malikija, ngatet jame kede saabu, en oko gero kakame lubo, ape ape paka tuno i ot kame jotic me tempulo kede jocat wil tio kede, kame oudo pimere kede dog Erute me Mipikad, i nget agola atie malo i wi kakame apama goo kiye kona, i bad tetu malo me bad tetu kide.

³²Jo kame teto jame kede saabu kede jocat wil en oko gero dul me ajikini, cako ki agola kame tie i kakame apama go kiye kona paka tuno i Erute me Romini.

Nekemia 4

Nekemia Obwono lik Arac me Jiko Tic mere

¹Kakame Sanabalat owinyo kede be wan oudo otie temuno gero apama, cunye oko wang twatwal di eko donyo nywaro wan Iyudayan.



- ²En ewaco i nyim jowote kede i nyim isirikalen me Samaria be, “Nyo kame Iyudayan agoro nogi paro be kitie timo? Benyo, kimito temuno gero bomba noni bobo? Benyo, kiparo be kame kimio giayala kibino sobolo timo tic noni i ceng acel? Arabo kiparo be kitwero udo kide me gedo ki atukit me apama kame mac owango noni?”
- ³Tobia oudo tie cungo kanono i ngete, di eda eko medo be, “Apama kame gin kitie gero no akadi ekwee da twero yito iye di eko tyaikin piny!”
- ⁴Ango ako lego be, “Okwe Rubanga, winy kite kame kitie nywaro wa kede! Mi nyero kame kinyero wa kede dok i wi gin, di iko mino mamako gi di oko tero gi obukui bala mabus.
- ⁵Kur ium raco gi, doko da kur isasiro gi, pien gin kibedo nywaro wan jo kame otie gedo.”
- ⁶Aso, wan oko meede kede tic me gero apama, di apama oko dongo paka tuno kakame tie dul me boro mere ot malo; pien jo oudo tie kede cuny me tic.
- ⁷Do kakame Sanabalat, kede Tobia, kede Imuarabun, kede jo me Amon kede Asidod oko winyo kede be gedo me iiko apama me Yerusalem oudo tie nyiko anyim kiber, kede da be kabedere atwolo koudo odong i apama oudo kotie cuculo, cuny gi oko wang twatwal.
- ⁸Aso gin dedede kiko timo iik arac karacel pi bino suro Yerusalem di kiko kelo atotolun iye.
- ⁹Do wan oko lego but Rubanga di oko keto jodar pi kuro bino gin iceng kede iwor.
- ¹⁰Jo me Yuda oudo tie kede wer gi be, “Teko wa me yeno jame tie tiek; apama kongingidun kame opoore gwaro tero tenge dwong adikinicel. Epone mene kame wan obino tieko kede gero apama noni?”
- ¹¹Di jokwor wa nogo oko waco be, “Likame gin kibino ngeno, doko da likame gin kibino neno wa paka tuno wan tuno i kom gi di oko neko gi, di oko jiko tic gi.”
- ¹²Do Iyudayan kame oudo bedo iyapiyapi kede gin oko bino but wan kalamo tien tomon pi kwenyaro wan i kom iik arac kame jokwor wa oudo tie kede i kom wa.
- ¹³Aso ango ako mino jo tongini, ipimai kede imalia di ako cicibo gi di lubere kede ude gi me anywali, kabedere kame apama oudo pwodi cecek kiye.
- ¹⁴Ango ako neno be jo oudo do tie kede lworu, di ango ako waco ne jo kame koworo kede ne jotel kede jo dedede apat be, “Kur ibedunu kede lworu i kom gi. Yutununu be Rwot obedo ngat adwong kame kolworu, di ikounu yi pi joawade wu, awobe wu, anyira wu, mon wu, kede pi miere wu.”
- ¹⁵Jokwor wa oko winyo be wan oudo otieko ngeno iik gin, kede be Rubanga oudo otieko totolo iik gi nono. Di do wan dedede oko dok i tic me iiko gero apama.



¹⁶Cako i kare nono ot anyim, dul me jotic nango en oudo timo tic me gedo, di dul ocelu tie cungo daro jokwor di kingapo ibukui me gwoko kom gi, kede di kimako tongini, ibukui kede imalia i cing gi. Jotel wa oko bedo mino kony koromo but jo

¹⁷koudo tie temuno gero apama. Akadi jo kame oudo yeo jamini me gedo da oudo tio kede cing gi acel di cing gi ocelu tie mako gi me yi.

¹⁸Doko da buli dano koudo tie gedo oudo tio di erwako epima i piere. Dano koudo poore kuto agwara me cako yi oudo bedo karacel kede ango.

¹⁹Ango ako waco ne jo kame koworo nogo kede ne jotel kede jo ace apat be, “Wan otie timo tic i apama abor adikinicel, manono oko mino wa osasarun otie obocoboco.

²⁰Ka iwinyunu koko me agwara, poore icokerenu buta. Rubanga wa bino yi pirwa.”

²¹Aso, buli ceng cako obai tuno iwor di acerin owok, dul me jo kikom wa oudo timo tic me gero apama di dul ocelu tie cungo daro jokwor kede tongini i cing gi.

²²Doko da ango ako waco ne jotel me tic karacel kede jotic gi pi donyo buto Yerusalem iwor, tetekeny okaruno donyo daro bomba iwor di otio iceng.

²³Aso ango karacel kede imiegu na ace, kede jotic na, kede jodar koudo tie buta, wan oko donyo buto iwor abongo gonyo igoen. Doko da oudo obuto kede jamini me yi i cing wa.

Nekemia 5

Adiadia i kom Jocan

¹Koko oko wokun kikut jo, cuo karacel kede mon gi, i kom Iyudayan wad gi.

²Mogo kikom gi oudo tie waco be, “Wan otie kede jo atot, omito alos me acama tetekeny obed kuo.”

³Jo ace apat oudo waco be, “I kare me kec wan osingao poti wa, poti me olok, kede ude wa pi udo alos me acama.”

⁴Doko jo apat da oudo waco be, “Wan okopao sente me culo esolo kame abaka ongolo ne wa pi poti wa kede pi poti me olok.

⁵Wan obedo ateker acel kede gin. Mam idwe wada cal acala kede mergi? Do di wan otie cato idwe wa bala ipasoi. Anyira wa mogo kotieko tero tetek. Wan oli do kede teko moro, doko da poti wa kede poti wa me olok otieko doko me ka jo apat.”

⁶Cunya oko wang twatwal iesawa kame awinyo kede koko gi.

⁷Ango ako bedo tamo kop nono di ako bunano jotel kede jotic adongo di awaco ne gi be, “Wun itienu dino Iyudayan wadu!” Ango ako lwongo cokere adwong pi bunano gi,

⁸di ako waco negi be, “Wan otieko timo bala kame teko wa twero di oko culo cul me dwoko Iyudayan wad wa kame oudo kocato but atekerin apat; do nan wun bobo itienu



medo cato joawade wu, kame wan doko opoore wilo pi dwoko!” Jotel oko ling titi abongo yamo gimoro.

⁹Ango ako waco be, “Gikame wun itienu timo likame ber. Ipoorenu bedo kede lworobut Rubanga di ikounu donyo timo gikame opoore, tetekeny kur atekerin apat ud gikame kiromo nyero wa iye.

¹⁰Ango kede jowota kede jotic na obedo kopao jo sente kede alos. Ojikunu do penyocul kibun gi.

¹¹I ceng me tin dwokenu gi poti gi, poti me olok, poti gi me olibeti, kede ude gi, kede da magoba kame oudo gin kiculo wu i wi sente, alos, bwini, kede mo kame gin oudo kigamo kibutu.”

¹²Gin kiko waco be, “Wan obino dwoko negi jamini gi dedede abongo mito cul morokibun gi. Wan obino timo gikame in iwaco.” Ango ako lwongo josaseredoti ako minogi kikwongere pi timo gikame kicikere iye.

¹³Di ango ako lalako negi isau kobedo abiel me ekanso na di awaco negi be, “Akwao Rubanga lalako ngat acelacel ki ode kede kikom jamini mege dedede, ka likame egwoko cikere noni. Akwao be elalako gi kamanoni di kiko dong abongo gimoro.” Jo dedede kame oudo tie kanono oko waco be, “Amen,” di kiko donyo pako Rwot. Di jo oko cobo cikere gi.

Nekemia obedo Dano kalikame Ngaworo

¹⁴Doko da medo i wi manono, pi mwakini tomon kiwie are kame ango apugo kede adul me Yuda, cako i mwaka me ot are me apugan ka Aretasereses, tuno i mwaka me ot adek kiwie are me apugan mere, ango kede imiegu na likame ocamo cam kame oudo kopoore mino ngapug me adul.

¹⁵Jopug ace kocako nango pug oudo omio jo yeno yec apek; gin oudo kigamo cam kede bwini kibut jo medo i wi sente akaya me siliba ot ongwon. Akadi jotic gi da obedo dino jo. Do ango likame ako timo kamanono, pien ango atie kede wor but Rubanga.

¹⁶Ango aketo teko na dedede temuno gero apama di likame ako wilo gimoro amaka; jotic nango dedede oudo ocokere kunono timo tic.

¹⁷Jo kame oudo camo ki emesa nango oudo tie tol acel kede ot kany (150), gin Iyudayan kede jotel gi, medo i kom jo ace kame oudo wok ki atekerin apat kame kio kede wa.

¹⁸Buli ceng acelacel ango oudo aneko twon acel, romini kanyape abeco, kede gwen atot atota; doko da ingei buli ceng tomon ango oudo akelo bwini anyen. Do ango oudo angeo be manoni oudo twero bedo bala yec apek ne jo, aso omio likame ango ako penyopi gamo jamini kame ngapug me adul oudo poore udo.

¹⁹Okwe Rubanga, akwai iyutuno jamini dedede kame ango atimo ne jogi di iko timo na iye bero.



Nekemia 6

lik Arac i kom Nekemia

- ¹Sanabalat, Tobia, Gesem kede jokwor wa ace apat oko winyo be wan oudo otieko gero apama likame doko tie karamoro atwolo kodong iye, bed bala likame oudo pwodi odudupo ikekon me irutei.
- ²Aso, Sanabalat kede Gesem oko cwano kop lwonga di kiwaco be, “Bia di oko riamo kedi i calo acel me ebar me Ono.” Manoni oudo obedo rieko gi me mono epone me timo nango can.
- ³Ango ako cwano jo but gi pi waco negi be, “Ango atie timo tic apire tek, likame ango atwero bino kuno. Ango likame akaruno mino tic cungo pi ango bino butu.”
- ⁴Gin kiko bedo cwano lwongo nono buta tien ongwon, do ango ako bedo dwoko negi kop acel nono.
- ⁵Iepone acel nono Sanabalat oko cwano ngatic mere buta tien me kany kede baluwa kalikame komwono.
- ⁶Baluwa nono oudo somere kaman: “Rwonge osarakin i diere me atekerin be in kede Iyudayan ace itienu mito bedo kede tim me jemo, be manono en komio itienu gero apama; kiton Gesem da tie waco kop acel nono. Rwonge noni waco be in itie mito doko abaka,
- ⁷kede da be in itieko iiko inabin mogo pi ot tuco i Yerusalem be in en ibedo abaka me Yuda. Kop noni ateteni bino tuno but abaka, pi manono ango atie kede tam be oriamakin di oko nyamo kop noni.”
- ⁸Ango ako dwoko ne baluwa kame waco be, “Kope dedede kame in itie waco obedo kope me abe, kope go in iteto kede wii.”
- ⁹Gin oudo kitie mito mino wa lworu be tetekeny owek tic. Do ango ako lego be, “Do nan, Okwe Rubanga, mia abed tek.”
- ¹⁰Ceng acel ango ako ot welao Semaya wot ka Delaya, en akwar Meketabel. En oudo lworu omake likame etwero wok ki ode. En eko waco na be, “Ango kede in ooti i Kabedo Kacil me tempulo di oko gono ikekon, pien kitie bino mito neki; ateteni iwor atin kitie bino neki.”
- ¹¹Ango ako dwoko be, “Dano bala ango likame sobolo ringo ot gwokere i tempulo pi laro kuo mere. Ango likame abino ot!”
- ¹²Ango ako niang be Rubanga oudo kom likame owaco ne Semaya kop moro akadi acel, do Tobia kede Sanabalat en oudo owile pi minango ikwenyar nono.
- ¹³Gin oudo kiwile pi minango lworu di ako timo dub i yore nono, tetekeny gin kipwok nyinga di kiko mina lewic.



¹⁴Ango ako lego be, “Okwe Rubanga na, yutuno gikame Tobia kede Sanabalat otimo di iko mino gi alola; mi anabi Noadia kede inabin apat da alola, gin jo kame kitamo mina lworu.”

Ajikini me Tic

¹⁵Tic me gero apama oko tiek i ceng me ot are kiwie kany me duwe me Elul. Tic nono oudo otieko ceng ot kany kiwie are.

¹⁶Kakame jokwor wa me atekerin me kio oniang kede be tic oudo otiek, teko gi oko tiek, pien oudo kiniang be Rubanga en okonyo wan timo tic noni.

¹⁷I kare nono dedede jotel me Iyudayan oudo obedo cwano ne Tobia baluwan di edawoko negi.

¹⁸Jo atos me Yuda oudo gango tam mere piento en oudo enyomo nyar ka Sekania wot ka Arak. Medo i wi manono wode anyinge Yekokanan oudo onyomo nyar ka Mesulam wot ka Berekia.

¹⁹Jo oudo yamo akadi i nyima bero kame Tobia otimo, doko da oudo kitero ne Tobia kope dedede kame anga awaco. Aso, Tobia oko meede cwano na baluwan di etamakino pi mina lworu.

Nekemia 7

¹Kakame kotieko kede gero apama di oko sisipo ikekon me irutei mege, oko do yero jodar, jower, kede oko mino Jolebi ace da tice gi.

²Ango ako cibo jo are pi bedo joloc me bomba me Yerusalem: omina Kanani kede Kanania, ngat koudo telo isirikalen adaro apama me cel. Kanania oudo obedo dano agenere, doko da oudo etie kede wor but Rubanga kalamo jo ace atos.

³Ango ako waco negi be, “Likame kopooore yabo irutei me Yerusalem paka tuno di ceng otieko dongo malo; doko da kopooore cecego gi otieno di pwodi jodar da tie cungo kanono likame kiyai. Doko da yerunu jodar kikom jo kame bedo Yerusalem di ikounu cicibo gi daro kabedere mogo, di ace apat ko dong donyo mamano nget ude gi.”

Nying Jo Kodwogo ki Obukui kakame oudo Kotero gi iye

(Esera 2.1-70)

⁴Yerusalem oudo obedo bomba adwong twatwal, do jo kame oudo tie iye nonok, doko da oudo pwodi likame kogero iye ude atos.

⁵Rubanga oko minango tam me koko jotel kede jodongo me tice di ako donyo wapo nying joakwari gi. Ango ako udo iwandik kame wapere me nying joakwari me jo kame oudo ocasto dwogo ki obukui, kakame oudo komako gi di oko tero gi iye. Gikame audo iye ine:

⁶Jo atos koudo tie bala mabus obukui oko yai ki Babilon, di kiko dwogo Yerusalem kede Yuda, ngat acelacel i bomba me turgi. Jo me miere gin oudo bin tie bedo



Babilon bala mabus cako i kare kame Abaka Nebukadunesa omako gi kede di eko tero gi kunono.

- ⁷Jotel gin oudo obedo Serubabel, Yosua, Nekemia, Asaria, Ramia, Nakamani, Modekai, Bilisan, Misiperet, Bigibai, Nekum, kede Bana.
- ⁸Magi en nying jo me Isirael, kede wel me jo me ude apapat kodwogo ki obukui: Ikwae ka Paros, jo tutumia are kede tol acel kede ot kanyaare kiwie are (2,172);
- ⁹me ka Sepatia, jo tol adek kede ot kanyaare kiwie are (372);
- ¹⁰me ka Arak, jo tol kanyape kede ot kany kiwie are (652);
- ¹¹me ka Pakat Moab (magonogo en ikwae ka Yesua kede Joab), jo tutumia are kede tol kanyauni ki tomon kiwie kanyauni (2,818);
- ¹²me ka Elam, jo tutumia acel kede tol are kede ot kany kiwie ongwon (1,254);
- ¹³me ka Satu, jo tol kanyauni kede ot ongwon kiwie kany (845);
- ¹⁴me ka Sakai, jo tol kanyaare kede ot kanyape (760);
- ¹⁵me ka Binui, jo tol kanyape kede ot ongwon kiwie kanyauni (648);
- ¹⁶me ka Bebai, jo tol kanyape kede ot are kiwie kanyauni (628);
- ¹⁷me ka Asagad, jo tutumia are kede tol adek kede ot are kiwie are (2,322);
- ¹⁸me ka Adonikam, jo tol kanyape kede ot kanyape kiwie kanyaare (667);
- ¹⁹me ka Bigibai, jo tutumia are kede ot kanyape kiwie kanyaare (2,067);
- ²⁰me ka Adin, jo tol kanyape kede ot kany kiwie kany (655);
- ²¹me ka Ater (kolwonge da be Esekia), jo ot kanyangon kiwie kanyauni (98);
- ²²me ka Kasum, jo tol adek kede ot are kiwie kanyauni (328);
- ²³me ka Besai, jo tol adek kede ot are kiwie ongwon (324);
- ²⁴me ka Karip, jo tol acel kede tomon kiwie are (112);
- ²⁵me ka Gibeon, jo ot kanyangon kiwie kany (95).
- ²⁶Magi en wel me jo oko dwogo di kolubo kede nying bomban kame bin joakwari gi obedo iye: ki Betelem kede Netopa, jo tol acel kede ot kanyauni kiwie kanyauni (188);
- ²⁷ki Anatot, jo tol acel kede ot are kiwie kanyauni (128);
- ²⁸ki Bet Asimabet, jo ot ongwon kiwie are (42);
- ²⁹ki Kiriath Yearim, Kepira, kede Berot, jo tol kanyaare kede ot ongwon kiwie adek (743);
- ³⁰ki Rama kede Geba, jo tol kanyape kede ot are kiwie acel (621);



- ³¹ki Mikimas, jo tol acel kede ot are kiwie are (122);
- ³²ki Betel kede Ai, jo tol acel kede ot are kiwie adek (123);
- ³³ki Nebo, jo ot kany kiwie are (52);
- ³⁴ki Elam ocelu, jo tutumia acel kede tol are ki ot kany kiwie ongwon (1,254);
- ³⁵ki Karim, jo tol adek kede ot are (320);
- ³⁶ki Jeriko, jo tol adek kede ot ongwon kiwie kany (345);
- ³⁷ki Lod, Kadid, kede Ono, jo tol kanyaare kede ot are kiwie acel (721);
- ³⁸ki Sena, jo tutumia adek kede tol kanyangon ki ot adek (3,930).
- ³⁹Magi en wel me jo oko dwogo ki ude acelacel me josaseredoti: me ka Yedaya (ikwae ka Yesua), jo tol kanyangon kede ot kanyaare kiwie adek (973);
- ⁴⁰me ka Imer, jo tutumia acel kede ot kany kiwie are (1,052);
- ⁴¹me ka Pasikur, jo tutumia acel kede tol are kede ot ongwon kiwie kanyaare (1,247);
- ⁴²me ka Karim, jo tutumia acel kede tomon kiwie kanyaare (1,017).
- ⁴³Magi en wel me jo oko dwogo ki buli ot me Jolebi: me ka Yesua kede Kadamiel (ikwae ka Kodabia), jo ot kanyaare kiwie ongwon (74).
- ⁴⁴Jower: ikwae ka Asap, jo tol acel kede ot ongwon kiwie kanyauni (148).
- ⁴⁵Jodar irutei me tempulo: ikwae ka Salum, me ka Ater, me ka Talemon, me ka Akub, me ka Katita, kede me ka Sobai, gin dedede jo tol acel kede ot adek kiwie kanyauni (138).
- ⁴⁶Magi en nying ude me jo kame timo tic i tempulo, kame bin ikwae gi oko dwogo: Sika, Kasupa, Tabaot,
- ⁴⁷Keros, Sia, Padon,
- ⁴⁸Lebana, Kagaba, Salamai,
- ⁴⁹Aanan, Gidel, Gekar,
- ⁵⁰Reaya, Resin, Nekoda,
- ⁵¹Gasam, Usa, Pasea,
- ⁵²Besai, Meunim, Nepusesim,
- ⁵³Bakabuk, Kakupa, Karakur,
- ⁵⁴Baselit, Mekida, Karasa,
- ⁵⁵Barakos, Sisera, Tema,
- ⁵⁶Nesia, kede Katipa.



⁵⁷Magi en nying ude me jotic ka Sulumani kame bin oko dwogo ki obukui: Sotai, Soperet, Perida,

⁵⁸Yala, Darakon, Gidel,

⁵⁹Sepatia, Katil, Pokeret Kasebaim, kede Amon.

⁶⁰Wel dedede me ikwae ka jotic me tempulo kede me ka jotic ka Sulumani kame oko dwogo ki obukui oudo tie tol adek kede ot kanyangon kiwie are (392).

⁶¹⁻⁶²Oudo tie jo tol kanyape kede ot ongwon kiwie are (642) koudo odwogo da ki obukui, gin jo me ikekon ka Delaya, Tobia, kede Nekoda, do oudo likame tie gikame gin kitwero nyuto kede be gin kibedo jo me Isirael. Gin bin kidwogo ki bomban me Tel Mela, Tel Karasa, Kerub, Adon, kede Imer.

⁶³⁻⁶⁴Doko da ude mogo me josaseredoti likame oko twero udo iwandik kame nyuto wapere me joakwari gi; ude nogo ige: Kabaya, Kakos, Barisilai. (Kwaru me josaseredoti me ot ka Barisilai oudo bin onyomo dako me ot ka Barisilai me Gilead, di do en bin eko tero nying ot kame ore oudo owok kiye nono.) Pi kite kame gin likame kiko twero nyuto kede wapere me joakwari gi, omio likame oko gamo gi pi bedo josaseredoti.

⁶⁵Ngapug oko waco negi be likame kipoore camo cam kame koyalo ne Rubanga tuno di kotieko tic kede Urim kede Tumim pi udo niang i kom kop nono.

⁶⁶Wel me jo dedede kodwogo ki obukui oudo tie tutumia ot ongwon kiwie are kede tol adek ki ot kanyape (42,360),

⁶⁷medo i wi jotic acuo kede amon tutumia kanyaare kede tol adek ki ot adek kiwie kanyaare (7,337), kede jower tol are kede ot ongwon kiwie kany (245) kobedo cuo kede mon.

⁶⁸Oudo kitie kede asigiran tol kanyaare kede ot adek kiwie kanyape (736), kede leini acal bala punda tol are kede ot ongwon kiwie kany (245),

⁶⁹aguraguran tol ongwon kede ot adek kiwie kany (435), kede pundan tutumia kanyaare kede tol kanyaare ki ot are (6,720).

⁷⁰Jo atot kame bin telo ude apapat oko mino kony me temuno gero tempulo. Ngapug me adul bin oko mino kilo kanyauni me saabu, kalayan ot kany, kede ikanson tol kany kede ot adek (530) me josaseredoti.

⁷¹Jotel mogo me ude apapat bin oko mino kilo tol acel kede ot kanyape kiwie kanyauni (168) me saabu, kede kilo tutumia acel kede tol are kede ot kany (1,250) me siliba.

⁷²Jo ace apat oko mino kilo tol acel kede ot kanyape kiwie kanyauni (168) me saabu, kilo tol acel kede ot ongwon (140) me siliba, kede ikanson ot kanyape kiwie kanyauni me josaseredoti.



⁷³ Aso, josaseredoti, Jolebi, jodar irutei, jower, jo ace apat, jotic me tempulo, kede jo dedede me Isirael oko bin dok bedo i bomban kame bin joakwari gi bedo iye.

Nekemia 8

Esera Osomo ne Jo Itabu me Iswil

¹⁻²¹ buto duwe acel me duwe me kanyaare jo oko cokere kakaler koudo tie i nyim Erute me Pii. Gin kiko penyo Esera, en ngat koudo obedo ngasaseredoti kede dano kosiyo odocon Iswil kame bin Rwot omio jo me Isirael kibut Musa; kipenye pi somo negi itabu me Iswil nono. Esera oko kelo Itabu me Iswil nono di eko cungo i nyim ekodet me cuo, mon, kede iduwe adito koudo ocokere.

³Esera oko somo negi Iswil ka Musa i nyim Erute me Pii kanono cako odiko sek tuno esawa me i dier iceng.

⁴Esera oudo tie cungo malo i wi ibaon kame oudo kogero pi kop nono. Cuo koudo tie cungo i bade tetu cam gin ige: Matitia, Sema, Anaya, Uria, Kilikia, kede Maseya. Cuo koudo tie cungo i bade tetu ngodal gin ige: Pedaya, Misael, Malikija, Kasum, Kasabadana, Sakaria, kede Mesulam.

⁵Kakame Esera oudo tie cungo kede malo i wi ibaon kame kogero, jo dedede oko ciko wang gi i kome. Cucuto di en eyabo itabu, gin kiko cungo malo.

⁶Esera oko waco be, “Pak bed but Rwot, en Rubanga adwong!” Jo dedede oko dwoko be, “Amen! Amen!” Gin dedede kiko riondiko di kiluro wi gi piny pi woro Rwot.

⁷⁻⁸¹ngei manoni, jo oko dong kargi nono di Jolebi mogo oko donyo gonyo negi dwong me kope kame tie i Iswil kame oudo kosomo nono, Jolebi nogo gin ige: Yesua, Bani, Serebia, Yamin, Akub, Sabetai, Kodia, Maseya, Kelita, Asaria, Yosabad, Aanan, kede Pelaya.

⁹Di Nekemia, en ngat koudo obedo ngapug me adul, Esera, ngat oudo obedo ngasaseredoti kede ngapwony me Iswil, kede Jolebi kame oudo tie gonyo ne jo dwong me Iswil nono oko waco ne jo dedede be, “Ceng katin obedo ceng kacil i nyim Rwot Rubanga wu, aso kur itururunu amoto koko.” Pien jo dedede oudo tie koko kakame kiwinyo kede kope me Iswil.

¹⁰Nekemia oko waco negi be, “Dokunu i miere wu ikounu tedo ebaga kede cam abeco kede bwini amit, di ikounu poko mogo da imiunu jo kame li kede gimoro, pien ceng katin obedo ceng kacil i nyim Rwot. Doko da kur ibedunu kede cweracuny pien yomcuny kame Rwot mio wu bino mino wu teko.”

¹¹Jolebi oko donyo dino cuny jo di kiwaco negi be, “Kweunu cunyu, ceng katin obedo ceng kacil i nyim Rwot.”

¹²Aso jo dedede oko dok i miere gi di kiko cam kede mato bwini kede kilel, di kiko mino cam but jo kame oudo li kede gimoro da, pien gin oudo kiniang gikame kosomo negi.



Ebaga me Kimere

¹³I ceng me are me duwe me kanyaare, jotel me ude me joakwari, karacel kede josaseredoti kede Jolebi oko cokere but Esera ngapwony me Iswil, pi siyao kop me Iswil nono.

¹⁴Gin kiko udo kakame kowandiko i Iswil kame Rwot oudo omio Musa nono be, jo me Isirael poore bedo i kimere i kare me Ebaga me Kimere.

¹⁵Aso, gin kiko cwano kop i Yerusalem dedede kede i bomban ace apat be, “Otunu i wi imukuran di ikounu kelo ajange me olibeti, me maitol, me tugere, kede ajange me yen ace, ikounu bino timo kede gi kimere bala kame kowandiko i Iswil.”

¹⁶Aso jo oko ot obar di kiko kelo ajange me yen nogo di kiko gero kede gi kimere, ngat acelacel kakopetere me wi ode, kede da i diakale, kede i diakal me tempulo, kede kacokere kame tie i nyim Erute me Pii kede Erute ka Epuraimu.

¹⁷Di jo dedede koudo odwogo ki obukui kakame oudo kitie iye bala mabus oko gero kimere di kiko donyo bedo i yi gi. Cako i kare ka Yosua wot ka Nun tuno i ceng noni oudo jo likame obedo timo kamanono. Jo oko bedo kede kilel adwong adikinicel.

¹⁸Aso, Esera oko bedo somo ne jo Iswil ka Rubanga cako i ceng me agege me ebaga paka tuno i ceng me ajikini. Gin kiko tedo ebaga pi ceng kanyaare, di i ceng me kanyauni kiko bedo kede cokere kacil me cego ebaga, bala kame oudo Iswil mito.

Nekemia 9

Jo Otuco Dub gi

¹I buto duwe ot are kiwie ongwon me duwe nono, jo Isirael bin oko cokere pi bedo i kanyo kec. Gin oudo kingapo igoen me iturur, di kijuko wi gi kede apua pi nyuto cwercury gi pi dub gi.

²I kare nono gin oudo kitieko pokere kikom jokumbor. Gin bin kiko cungo di kiko tuco dub gi kede me ka joakwari gi.

³Gin kiko bedo cungo acunga pi isawan aromo adek di kotie somo negi Iswil ka Rwot Rubanga gi, di bobo pi isawan aromo adek gin kiko bedo tuco dub gi di kiko da woro Rwot Rubanga gi.

⁴Di do Yesua, Bani, Kadamiel, Sebania, Buni, Serebia, Bani, kede Kenani oko cungo kakimukurur kame koiko pi Jolebi, di gin kiko lego but Rwot Rubanga gi kede dwan amalo.

⁵Di Jolebi nogi: Yesua, Kadamiel, Bani, Kasabaneya, Serebia, Kodia, Sebania, kede Petakia oko waco ne jo be, “Yaunu icungunu malo di ikounu pako Rwot Rubanga wu, pakenu ikar kede ikar! Pakunu nyinge me deyo, bed bala en edwong likame tie pak moro kame rome.”

Ilega me Tuco Dub



- ⁶Esera oko lego kaman: “In keni en ibedo Rwot; in icweo malo kede acerin lung kame tie i edou. In icweo lobo kakotuo kede nam, kede jamini dedede kame tie i yi gi; in en imio kuwo but gin dedede. Gi dedede kame tie i malo wori.
- ⁷ Okwe Rwot Rubanga, in bin iyero Aburam di iko kwanye ki Ur kabedo kame bin tie Babilon; in bin iko loko nyinge be Aburaam.
- ⁸ In bin iko udo be en ebedo dano kame genere buti, di in iko timo kede en isikan. In icikere bute be ibino mino en kede ikwae mege lobo me jo Kanan, jo Kiti, jo Amor, jo Perisi, jo Yebu kede jo Girigas. In nataman icobo cikere ni, piento in igenere.
- ⁹ “In bin ineno kite kame joakwari wa oneno kede can i Misiri; in bin iwinyo koko gi i Nam Akwar.
- ¹⁰ In bin itimo gianena mogo kede jamini me aura i nyim Parao, kede i nyim jotie mege kede jo dedede me lobo mere, piento in oudo ingeo be gin kibedo tero joakwari wa kirac. Manono bin oko mino nyingi obedo iruo tuno tin.
- ¹¹ In bin imio pii opokere i dier nam pi yabo yongayo ne jo ni, tetekeny gin kibe ki kakotuo i dier nam. In imio jo kame bin tie wapo gi omwony i dier nam kakatut, bala kame kidi lwiny kede i nam.
- ¹² In bin i dier iceng itelo joakwari wa kede edou, di iwor iko menyone gi yongayo kede mac.
- ¹³ In bin iyai ki malo di iko bino piny i moru me Sinai; in iko yamo kede jo ni di iko mino gin iswilia me ateni, pwoony kede cik abeco.
- ¹⁴ In bin ipwoonyo gi gwoko Sabato ni kacil, di iko mino ngatic ni Musa omio gi cik, pwoony kede iswilia ni.
- ¹⁵ “I kare kame bin kec oneko gi kede, in imio gi cam koyai ki malo, kede i kare kame bin orio oneko gi kede, in imio pii owok negi ki lela. In bin iko waco negi be kioti di kiko gamo lobo kame in bin icikere pi mino gi.
- ¹⁶ Do joakwari wa bin oko bedo kede ewaka kede epali di gin likame kiko lubo cik ni.
- ¹⁷ Gin bin kiko dagi lubo cik nin; wi gi owil kede jamini me aura kame bin in itimo i diere gi. Gin kitimo epali di kiko yero ngatel pi dwoko gi ipasun Misiri. Do in ibedo Rubanga kame sasiro jo; in ingakisa doko itie kede amara, likame in isusunyo lilo. In idwong kede amara kalikame lokere; in bin likame iko jalo gi.
- ¹⁸ Akadi kakame gin bin kicweo kede cal me roya di kiko waco be manono en kame bin obedo rubanga kokwanyo gi ki Misiri, akadi di manono bin obedo twon dub kede anywar buti,
- ¹⁹ in pi kisa ni adwong likame iko jalo gi i wi tim. In bin likame ikwanyo tenge edou arabo mac kame bin nyuto ne gin yongayo iceng kede iwor.



- 20**In bin pi bero ni imeede kede pwonyo gi, di ipito gi kede emana kede imio gi pii me amata.
- 21**Pi mwakini ot ongwon kame gin kitieko i wi tim in ibedo mino gin gi dedede kame bin mitere negi; igoen gin bin likame oko ti, doko tien gi da likame bin oko popongun.
- 22** “In bin imio gi kibwono atekerin kede ajakanuto atos, di in iko popoko negi lobere gi. Gin bin kima lo bo ka Abaka Sikon me Kesibon, kede lo bo ka Abaka Og me Basan.
- 23** In bin imio ikwae gi onyai di kiko doko tot bala acerin kame tie malo i edou, di in iko tero gi i lo bo kame bin in icikere iye pi mino joakwari gi.
- 24** Gin bin kiko ot di kiko mano lo bo nono oko doko mergi; in ibwono jo kame bin tie bedo i lo bo nono. In bin iko mino jo me Kanan kede abakai gi i cing gi, pi gin timo negi gikame cuny gi mito.
- 25** Gin bin kiko mano bomban kame kocelo di tek, kede lo bo amio, ude kopong kede jamini abeco, ataparin kame kotieko kunyo, poti me olok, poti me olibeti kede yen atos me anyakini. Gin bin kiko cam di kiko yeng di do kiko cwe; cuny gi bin oko bedo yom pi twon jamini abeco kame in bin iko mino gi.
- 26** “Akadi kamanono da, gin bin kiko dagi lubo kop nin di kiko jemo ni, gin kiko loko ngei gi ne iswil ni. Gin kiko neneko inabin ni kame bin kwenyaro gi, be kilokere di kiko dwogo buti. Gin bin kiko timo anywar atek buti.
- 27**Manono oko mino in bin iko mino gi i cing jokwor gi, di jokwor gi oko mino gi kineno can. I kare kame do gin bin kitie kede i peko, gin kiko kok buti pi konyo gi in bin iko winyo koko gi ki malo kabedo ni. In pi kisa ni adwong iko mino gin jotel kame oko lako gi ki cing jokwor gi.
- 28**Do i kare kame gin kinapakin kede, gin bobo kiko timo dub i nyimi, in bobo iko jalo gi i cing jokwor gi, di gin kiko pugo gi. Akadi kamanono da, i kare kame gin kiko swilaro kede di kiko koko buti, in bin iwinyo koko gi ki malo di pi kisa ni iko bedo lako gi tien kede tien.
- 29** In bin iko kwenyaro gi pi dwoko gi lubo iswil ni, do gin kiko wakere di kiko dagi lubo cik nin, gin kibedo turo Iswil ni, aso di en ebeto yongayo kame tero jo i kuo. Gin kiko timo epali di kiko meede dagi lubo Iswil nin.
- 30** In bin ibedo dire di ikwenyaro gi pi mwakini atos. In ibedo mino inabin ni kop pi waco negi, do gin kiko dagi winyo, manono oko mino in imio gi i cing atekerin apat.
- 31**Akadi kamanono da, in pi kisa ni adwong, likame iko jalo gi arabo muducaro gi. In ibedo Rubanga kame ngakisa!



32 “Pi mano, Okwe Rubanga wa, in Rubanga kame dwong, in itek doko in iyiliyili! In igwoko isikan kede amara ni kalikame lokere. Kur imi can kame wan oboe iye bed bala gi kalikame pire tek kibuti! Cako i kare me abakai me Asiria tuno tin, wan kede abakai wa, jotel wa, josaseredoti kede inabin wa, joakwari wa, kede jo ni dedede, obedo neno can.

33In itimo gikame opoore pi mino wan alola, in idong di igenere, bed bala wan obedo timo gikareco.

34Joakwari wa, abakai wa, jotel wa, kede josaseredoti wa likame ogwoko Iswilia ni. Gin kidagi winyo cik kede ikwenyar kame in bin imio gi.

35Akadi i kare kame gin bin kitie kede i ajakanuto gi, gin likame kiko timo tic ni bed bala in ibedo nyuto negi bero ni adwong. In bin imio gi lobo alac di emio, do gin likame kiko weko dub gi, doko likame kiko timo tic ni.

36Aso, nataman wan ige otie ipasoi i lobo kame in bin imio joakwari wa, pi gin camo cam kame dongo iye kede pi gin bedo kede ilel pi jamini mege abeco.

37Nataman cam kame cek i lobo noni abakai en atero, gin jo kame in imio pugo wa pi dub wa. Gin kitie kede twer i kom wa kede i kom doke wa, gin kitimo ne wa gikame cuny gi mito, manono omio wan otie kede cweruncy adwong.”

Jo Oketo Cing gi i Kop me Winyere

38Pi gikame obedo timere nogo dedede, wan nataman ocikere kitek i iwandik, di jotel wa, Jolebi wa, kede josaseredoti wa ko bino keto cing gi i cikere noni.

Nekemia 10

1Ngat kame bin ogeo keto cinge i cikere nono en ngapug, Nekemia wot ka Kakalia, di do Esedekia da oko keto cinge. Jo kame nying gi lubo nogi da bin oko keto cing gi:

2-8*Josaseredoti:*

Seraya, Asaria, Yeremia, Pasikur, Amaria, Malikija, Katus, Sebania, Maluk, Karim, Meremot, Obadia, Danieri, Gineton, Baruk, Mesulam, Abija, Mijamin, Masia, Biligai, Semaya.

9-13*Jolebi:*

Yesua wot ka Asania, Binui dano me ekeko ka Kenadad, Kadamiel, Sebania, Kodia, Kelita, Pelaya, Anan, Mika, Rekob, Kasabia, Sakur, Serebia, Sebania, Kodia, Bani, kede Beninu.

14-27*Jotel me jo:*

Paros, Pakat Moab, Elam, Satu, Bani, Buni, Asigad, Bebai, Adoniya, Bigibai, Adin, Ater, Esekia, Asur, Kodia, Kasum, Besai, Karip, Anatot, Nebai, Magipiasi, Mesulam, Kesir, Mesesabel, Sadoki, Yadua, Pelatia, Anan, Anaya, Kosea,



Kanania, Kasub, Kalokesi, Pilika, Sobek, Rekum, Kasabana, Maseya, Akia, Aanan, Aanan, Maluk, Karim, kede Bana.

Cikere kame Kotimo

28Wan jo Isirael, josaseredoti, Jolebi, jodar irutei, jower, jotic me tempulo, kede jo apat dedede kame pi lubo Iswil ka Rubanga, otieko pokere kede jokumbor kame tie bedo i lobo wa, wan karacel kede mon wa, idwe wa dedede kodongo, kame do romo niang gikame wan otie timo,

29wan dedede okwongere karacel kede jotel wa, doko oyei be ilam miero mak wa ka oko ture. Wan okwongere be obino bedo i kuo kame Iswil ka Rubanga mito ne wa, Iswil kame Rubanga bin omio but Musa ngatic mere; wan obino lubo gi dedede kame Rwot, Rubanga wa ciko ne wa, doko obino gwoko iswilia mege kede pwony mege dedede.

30 Wan likame obino nyomere kede jokumbor kame tie bedo i lobo wa.

31 Ka ngakumbor moro oko kelo alos mere arabo gire moro pi cato ne wan i ceng Sabato arabo i ceng kacil moro, wan likame obino wilo jame gi. Buli mwaka me kanyaare wan likame obino puro poti wa, doko obino jalo banyi dedede likame koculo.

32 Buli mwaka wan ngat acelacel bino kwanyo guram kany me siliba pi konyo tic me ot ka Rubanga.

33Manoni bino konyo pi udo Mugati kame koyalo but Rwot, giayala me alos kede giayala awanga kame koyalo but Rwot buli ceng; giayala kame komio i ceng Sabato, giayala kame komio i kare me Ebaga me Por Duwe, kede i ibagai apat; kede giayala kacil apat, giayala me kwanyo dub me jo Isirael, kede jamini dedede apat kame mitere me timo tic me tempulo.

34Wan jo ace, kede josaseredoti, kede Jolebi, obino uco alulu buli mwaka, pi yero jo me ekeko kame bino mwodo yen me wango giayala kame komio but Rwot Rubanga wa, bala kame Iswil waco.

35 Wan omoko be obino tero i tempulo, buli mwaka, engano kame wan ogeo nyaro kede anyakini kame geo cek ki yen wa kame kopito.

36 Wan omoko da be obino mino idwe awobe kao wa but josaseredoti i tempulo, bala kame Iswil waco, di oko mino gi but Rubanga. Wan obino da mino but Rubanga roce kame doke wa cako nywalo, idwe romini kame kocako nywalo arabo idwe diegi kame kocako nywalo.

37 Wan obino tero but josaseredoti i tempulo buli mwaka, alos me engano kame kogeonyaro, kame konyongo me timo mugati, kede giayala apat me bwini, mo me olibeti, kede anyakini me epone dedede, kame kobino keto i agolai me kano jame i tempulo ka Rubanga wa. Doko da wan obino tero but Jolebi, acel me tomon me gi dedede kame wan opuro i poti wa, pien gin en kame kiraro acel me tomon ki bomban wa.



³⁸ Ngasaseredoti, akwar Aaron, miero bed tie i kare kame Jolebi gamo kede acel me tomon me jamini. Jolebi bino tero i agolai me kano jame i tempulo, acel me tomon me jamini dedede kame gin kiraro.

³⁹ Jo me Isirael kede Jolebi bino tero jamini kame gin kimio; engano, bwini, kede mo me olibeti, i agolai kame kogwoko iye jamini kame kotio kede i tempulo; kanono en kame josaseredoti kame tie i wang tic, jodar irutei me tempulo, kede jower me tempulo bedo iye. Wan likame obino ajajalun i kop amako ot ka Rubanga wa.

Nekemia 11

Jo kame bin Bedo Yerusalem

¹ Jotel me jo oudo do tie bedo Yerusalem. Jo apat dedede oko bin uco alulu pi yero jo me diakal acel i kom buli diakale tomon, kame bino ot bedo i bomba kacil me Yerusalem, di jo icegun dedede ko dong bedo i bomban apat.

² Di jo oko bedo kede pwoc but jo dedede kame bin oko kwanyere ken gi pi ot bedo Yerusalem.

³ I bomban apat, jo me Isirael, josaseredoti, Jolebi, jotic me tempulo, kede ikwae ka jotic ka Sulumani bin bedo i lobere gi amako gi i bomban gi. Nying kame lubo nogi en kobedo me jotel me adul me Yuda kame bin bedo Yerusalem:

⁴ *Jo me ekeko ka Yuda:*

Ataya wot ka Usia. Joakwari mege bin gin en, Sakaria, Amaria, Sepatia, kede Makalalel, gin ikwae ka Peresi wot ka Yuda.

⁵ Maseya wot ka Baruk. Joakwari mege bin gin en, Kolokose, Kasaya, Adaya, Yoyarib, kede Sakaria, gin ikwae ka Sela wot ka Yuda.

⁶ Ikwae ka Peresi dedede kame bin bedo Yerusalem oudo tie tol ongwon kede ot kanyape kiwie kanyauni (468), gin dedede jo atek i yi.

⁷ *Jo me ekeko ka Benjamin:*

Salu wot ka Mesulam. Joakwari mege bin gin en, Yoed, Pedaya, Kolaya, Maseya, Itiel, kede Yesaya.

⁸ Jo ace me ekeko ka Benjamin bin gin en: Gabai kede Salai, gin joawade ka Salu kiyapiyapi. Gin dedede jo tol kanyangon kede ot are kiwie kanyauni (928).

⁹ Yoweri wot ka Sikiri en kame bin ngatel gi, kede Yuda wot ka Kasenua en kame bin lubo tien ngat kame lo bomba.

¹⁰ *Josaseredoti:*

Ngasaseredoti me agege me bedo kunono en Yedaya wot ka Yoyarib, kede Yakin.

¹¹ Me are en Seraya wot ka Kilikia. Joakwari mege bin gin en, Mesulam, Sadoki, Merayot, kede Akitub ngat kame bin tie Ngatel me Josaseredoti.



¹²Jo me ekeko noni kame bin timo tic i tempulo, gin dedede oudo kitie jo tol kanyauni kede ot are kiwie are (822). Ngasaseredoti me adek bin en Adaya wot ka Yerokam. Joakwari mege bin en, Pelalia, Amisi, Sakaria, Pasikur, kede Malikija.

¹³Gin dedede jo me ekeko noni kame bin tie jotel me diakale oudo kitie jo tol are kede ot ongwon kiwie are (242). Ngasaseredoti me ongwon me donyo bedo kunono bin en Amasai wot ka Asarel. Joakwari mege bin gin en, Asai, Mesilemot, kede Imer.

¹⁴Jo tol acel kede ot are kiwie kanyauni (128) me ekeko noni bin obedo isirikalen atek i yi. Ngatel gi bin en Sabidiel wot ka Kagedolim.

¹⁵*Jolebi:*

Magi en Jolebi kame bin oko donyo bedo Yerusalem: Semaya wot ka Kasub. Joakwari mege bin gin en, Asirikam, Kasabia, kede Buni.

¹⁶Sabetai kede Yosabad, gin en jotel kame bin lo Jolebi kame timo tic i ooko me tempulo.

¹⁷Matania wot ka Mika. Joakwari mege bin gin en Sabadi kede Asap. Matania en kame bin telo jower me tempulo i kare me ilega me mino pwoc. Bakubukia en kame bin lubo tien Matania. Abuda wot ka Samua da bin tie kunono. Joakwari mege bin gin en, Galal kede Yedutun.

¹⁸Jolebi dedede kame bin bedo i bomba kacil me Yerusalem oudo tie jo tol are kede ot kanyauni kiwie ongwon (284).

¹⁹*Isirikalen me tempulo:*

Akub, Talemon, kede joawade gi, gin dedede jo tol acel kede ot kanyaare kiwie are (172).

²⁰Jo apat dedede me Isirael, kiton josaseredoti kede Jolebi kame bin odong, bin oko dong bedo i lobere gi amako gi i bomban icegun me Yuda.

²¹Jotic me tempulo bin bedo Yerusalem i adul kame kolwongo be Opel di Sika kede Gisipa en kame telo gi.

²²Usi wot ka Bani en kame bin telo Jolebi kame bedo Yerusalem. Joakwari mege bin obedo: Kasabia, Matania, kede Mika. En oudo ebedo dano me ekeko ka Asap, jo me ekeko kame bin kop amako wer i ot ka Rubanga tie i cing gi.

²³Cik bin tie kame abaka omio amako kop me wer i ot ka Rubanga, epone kame jo me ikekon apapat miero lei kede tic me telo wer i tempulo buli ceng.

²⁴Petakia wot ka Mesesabel, akwar Seera dano me ekeko ka Yuda, en kame bin cungo ne jo Isirael but abaka me Pasia i kope kame mako gi.

Jo kame bin Bedo i Bomban Icegun

²⁵Jo atot bin bedo i bomban kame iyapiyapi kede poti gi. Jo me ekeko ka Yuda oudo bedo Kiriya Araba, Didon, kede Yekabesal, kede i calere me nget bomban nogi.



- ²⁶Gin bin kibedo da i bomban me Yesua, Molada, Betepelet,
²⁷Kasarasual, Beereseba kede calere me ngete,
²⁸Sikilag, Mekona kede calere me ngete,
²⁹Enirimon, Sora, Yaramut,
³⁰Sanoa, Adulam, kede calere me nget gi. Kibedo da Lakis kede i poti me ngete, kede Aseka kede calere mege. Aso, jo Yuda bin oko bedo i adul kame cakere ki Beereseba i bad tetu piny ape ape tuno i aditot me Kinom i bad tetu malo.
³¹Jo me ekeko ka Benjamin da bin bedo Geba, Mikimas, Aija, Betel kede calere mege,
³²Anatot, Nob, Anania,
³³Kasor, Rama, Gitaim,
³⁴Kadid, Seboim, Nebalat,
³⁵Lod, kede Ono, kede i Aditot me Jo Tic Cing.
³⁶Ikodeta mogo me Jolebi kame oudo bedo Yuda bin oko cwano gi ot bedo kede jo Benjamin.

Nekemia 12

Nying Josaseredoti kede Jolebi

¹Magi en nying josaseredoti kede Jolebi kame bin odwogo ki Babilon karacel kede Serubabel wot ka Selatiel kede Yesua Ngatel me Josaseredoti:

²⁻⁷*Josaseredoti:*

Seraya, Yeremia, Esera, Amaria, Maluk, Katus, Sekania, Rekum, Meremot, Ido, Ginetoi, Abija, Mijamin, Maadia, Biliga, Semaya, Yoyarib, Yedaya, Salu, Amok, Kilikia, kede Yedaya. Jo nogi en kame bin obedo jotel me josaseredoti kede jo kame bin konyo gi i kare ka Yesua.

⁸*Jolebi:*

Magi en Jolebi kame bin telo were me pwoc i ot ka Rubanga: Yesua, Binui, Kadamiel, Serebia, Yuda, kede Matania.

⁹Bakubukia, Uno, kede Jolebi wad gi en kame bin cungo pimere kede gin pi gamo wer.

Ikwaë ka Yesua Ngatel me Josaseredoti

¹⁰Yosua en kame bin obedo papa me Yoyakim; Yoyakim oko nywalo Eliasib; Eliasib oko nywalo Yoyada;

¹¹Yoyada oko nywalo Jonasan; Jonasan oko nywalo Yadua.



Jotel me Ikekon me Josaseredoti

- ¹²I kare kame bin Yoyakim tie kede Ngatel me Josaseredoti, magi en josaseredoti kame oudo obedo jotel me ikekon gi: Meraya en oudo tie ngatel me ekeko ka Seraya, Kanania en oudo obedo ngatel me ekeko ka Yeremia,
- ¹³Mesulam ngatel me ekeko ka Esera, Yekokanan ngatel me ekeko ka Amaria,
- ¹⁴Jonasan ngatel me ekeko ka Maluki, Yosepu ngatel me ekeko ka Sebania,
- ¹⁵Adana ngatel me ekeko ka Karim, Kelakia ngatel me ekeko ka Merayot,
- ¹⁶Sakaria ngatel me ekeko ka Ido, Mesulam ngatel me ekeko ka Gineton,
- ¹⁷Sikiri ngatel me ekeko ka Abija, Pilitai ngatel me ekeko ka Moadia,
- ¹⁸Samua ngatel me ekeko ka Biliga, Yekonatan ngatel me ekeko ka Semaya,
- ¹⁹Matenai ngatel me ekeko ka Yoyarib, Usi ngatel me ekeko ka Yedaya,
- ²⁰Kalai ngatel me ekeko ka Salai, Eber ngatel me ekeko ka Amok,
- ²¹Kasabia ngatel me ekeko ka Kilikia, kede Netanel ngatel me ekeko ka Yedaya.

Diakale me Josaseredoti kede me Jolebi

- ²²Kop amako jotel me diakale me Jolebi kede me josaseredoti bin kobedo wandiko piny i kare me Jotel me Josaseredoti gi: Eliasib, Yoyada, Jonasan, kede Yadua. Iwandik noni bin oko tieko timo i kare me apugan ka Darias abaka me Pasia.
- ²³Bin kobedo wandiko nying Jolebi i itabu koudo mako kope me i kare nono; kobedo wandiko gi paka tuno i kare ka Jonasan, akwar Eliasib.

Poko Tic me Tempulo

- ²⁴Jotel me jolebi: Kasabia, Serebia, Yesua, Binui, Kadamiel kede jo kame bin lubo tien gi oko iiko ikodeta are me jower me Jolebi, pi bedo pako Rubanga bala kame Abaka Daudi oudo ociko, di kiwero were kame kileo alea.
- ²⁵Matania, Bakubukia, Obadia, Mesulam, Talemon, kede Akub en kame bin daro agolai kame okano iye jamini i nget irutei.
- ²⁶Jo nogi dedede bin otimo tic i kare ka Yoyakim wot ka Yesua, akwar Yekosadoki, kede i kare ka ngapug Nekemia, kede da i kare ka Esera, ngasaseredoti kosomo Iswil twatwal.

Nekemia Okwero but Rwot Apama me Bomba

- ²⁷I kare me kwero apama me bomba me Yerusalem, bin oko kelo Jolebi Yerusalem ki kabedere dedede kame gin bin kitie bedo iye, pi bino tedo ebaga me kwero apama nono kede kilel, di kigoo were me mino pwoc but Rubanga, kede suanin abatal, adungun, kede arigirigin.
- ²⁸Jolebi kame bin obedo jower oudo bedo i calere koluko Yerusalem. Gin bin kiko bino ki kabedere nogo kede ki bomban koluko Netopa,



- ²⁹kede ki Betigilgal, Geba, kede Asimabet.
- ³⁰Josaseredoti kede Jolebi oko timo pwola me gin lonyere, di kiko timo kamanono da ne jo, irutei, kede apama me bomba.
- ³¹Ango ako koko jotel me Yuda i wi apama di ako keto gi telo ikodeta are kame oudo oyaro ot siritto rimaro bomba di kilubo wi apama, di kiwero were me mino pwoc but Rubanga. Ekodet me agege oko lubo bad tetu cam kioto tetu Erute me Oduru.
- ³²Kosaya kede dul me jotel me Yuda oko lubo gi ki cen.
- ³³⁻³⁵Di Josaseredoti kame oko lubo gi di gin dedede kikuto agwarai gin ige: Asaria, Esera, Mesulam, Yuda, Benjamin, Semaya, kede Yeremia. Di josaseredoti mogo atino da lubo kede agwarai gi. Kikom gi oudo tie iye, Sakaria wot ka Jonasan akwar Semaya. Joakwari mege bin ribo kiton Matania, Mikaya, kede Sakur dano me ekeko ka Asap.
- ³⁶Joawade ace ka Sakaria kame bin oko lube gin en: Semaya, Asarel, Milalai, Gilalai, Maai, Netanel, Yuda, kede Kanani. Gin dedede oudo kimako jamini me wer acal bala kame bin Abaka Daudi dano ka Rubanga oudo goo. Esera ngat kosomo twatwal en kame bin telo ekodet noni di gin kisiritto.
- ³⁷Kakame gin bin kiko tuno kede i erute kame bin kolwongo be Erute me Atan, gin kiko lubo kayito kame oto i Bomba ka Daudi di kiko kalamo paco mere me abaka, kiko ot kidok i Erute me Pii, kame oudo tie i bad tetu kide me bomba.
- ³⁸Ekodet me are me jo kame bin wero were me mino pwoc oko lubo wi apama kidok i bad tetu ngodal, di ango ako lubo gi kede dul me ekodet me jo kame oudo tie i wi apama. Wan oko siritto okalamo gedo abor malo, kabedo kame kolwongo be Gedo abor me keno me tedo mugati, di oko ot paka tuno kabedo kame kolwongo be Apama Alac.
- ³⁹Ki kunono wan oko ot obeo i nget Erute me Epuraimu, Erute me Aporogo, Gedo Abor kame kolwongo be Kananel, kede kame kolwongo be Tol Acel, di oko tuno kabedo kame kolwongo be Erute me Romini. Wan bin oko jik i kabedo kame kolwongo be Erute me Jodar.
- ⁴⁰Ikodeta are nogo dedede kame oudo tie mino pwoc but Rubanga bin oko cungo i nyim tempulo. Medo i wi jotel kame oudo tie keda,
- ⁴¹ekodet nango oudo ribo josaseredoti gi: Eliakim, Maseya, Miniamin, Mikaya, Elioenai, Sakaria, kede Kanania,
- ⁴²Maseya, Semaya, Eleasa, Usi, Yekokanan, Malikija, Elam, kede Eser. Jower bin oko wer kede dwan amalo di Yesarakia en kame telo gi.
- ⁴³Cenge nono jo oko mino giayala atot but Rubanga, doko jo oko bedo kede ilel adwong, pien Rubanga oudo omio gi yomcuny adwong; mon kede idwe da bin oko bedo kede ilel adwong i ceng nono. Ilelem me ilel me jo me Yerusalem oudo winyere ki kakabor twatwal.



Mino Jamini me Woro Rubanga i Tempulo

⁴⁴Cenge nono oko yero jo kame lo agolai me kano jamini, kakame bin kogwoko iye jamini kame kotio kede i tempulo, ribo kiton acel me tomon kede cam kame geo cek ki poti. Jo nogo en kame bin raro cam ki poti kiyapiyapi kede bomban, iner me cam kame komio but josaseredoti kede Jolebi bala kame Iswil waco. Jo dedede me Yuda bin cuny gi oko bedo yom twatwal pi tic me josaseredoti kede me Jolebi,

⁴⁵pien gin oudo kiko timo pwola me lonyere kede pwola ace apat kame Rubanga bin ociko. Jower kede jodar irutei da bin oko timo tice gi di lubere kede cik kame bin Daudi kede wode Sulumani omio.

⁴⁶Cako bin sek i kare ka Daudi kede Asap, jower oudo tie kede ngat kame telo gi di kiwero were me pak kede me mino pwoc but Rubanga.

⁴⁷I kare ka Serubabel kede i kare nango, jo Isirael dedede bin mio iner me cam buli ceng but jower kede jodar irutei. Gin bin kimio Jolebi giamia kame mako gi, di Jolebi da ko poko ne josaseredoti gikame gin kipoore udo.

Nekemia 13

Pokere kede Jokumbor

¹Cenge nono di oudo kotie somo itabu ka Musa ne jo, gin kiko udo kakame kowandiko be likame tie dano moro kikom jo Amon arabo kikom jo Moab kame miero ribere i kom jo ka Rubanga.

²Kotimo kamanono pien gin bin kidagi mino jo Isirael cam kede pii i kare kame bin kitie kede i yongayo me wok ki Misiri. Akaka manono gin bin kiko lokere wilo Balaam pi lamo jo Isirael, do Rubanga wa bin oko loko ilam nono oko doko winyo but wa.

³Kakame jo Isirael bin owinyo kede iswil noni, gin kiko cako pokere kede jo dedede kame bin obedo ikwae me jokumbor kame oudo tie i kom gi.

Alokaloka Abeco kame Nekemia Otimo

⁴Di pwodi likame manoni otimere, ngasaseredoti Eliasib, ngat kame bin koketo pi telo kop amako agolai me kano jamini i ot ka Rubanga wa, pi kare alac en oudo ebedo kiber kede Tobia.

⁵En bin eko iiko agola alac di eko mino Tobia pi tic kede. Agola nono oudo sek ber kotio kede pi gwoko giayala me engano kede me odok angwe kur, jamini kame kotio kede i tempulo, acel me tomon me engano, bwini, kede mo me olibeti kame komio but Jolebi, jower kede jodar irutei, kede jamini kame komio but josaseredoti.

⁶I kare kame manoni bin tie timere kede, ango oudo ali i Yerusalem, pien i mwaka me ot adek kiwie are me apugan ka Aretaseres bala abaka me Babilon, ango ako dok bute pi dwoko ne kop. Ingei kare moro ango ako kwano akarunikin kibus abaka

⁷di ako dok Yerusalem. Ango bin ako ngeno gikarac kame Eliasib oudo otimo pir Tobia, kame en eoto iiko ne kede en agola i tempulo.



- ⁸Ango bin ako doko ger twatwal di ako lwolwomo jamini ka Tobia dedede ooko.
- ⁹Ango di ako mino cik be miero lony agolai nogo di oko dwoko iye jamini kame bin kotio kede i ot ka Rubanga, engano me giayala, kede odok angwe kur.
- ¹⁰Ango doko bin ako niang be likame oudo obedo mino Jolebi iner me jamini kame oudo kopooore mino gi; pi manono, gin kede jower kame bin telo tic me woro Rubanga, kiko girgi dok timo tice me poti gi.
- ¹¹Ango ako doko ger ne jotel pi kite kame gin kijalo kede ot ka Rubanga oko dong atatai. Di ango ako koko karacel Jolebi kede jower di ako dwoko gi i dog tic gi i tempulo.
- ¹²Di do jo me Yuda dedede bobo oko cako tero acel me tomon me engano, bwini, kede mo me olibeti i agolai me gwoko jamini i tempulo.
- ¹³Ango bin ako keto jogi pi bedo jo kame gwoko jamini i agolai nogo: ngasaseredoti Selemia, Sadoki ngat kosomo iswil twatwal, kede Ngalebi Pedaya. Di ako keto Kanan wot ka Sakur, akwar Matania pi bedo ngat kame konyo gi. Jo nogi bin oudo jo ngeo gi be kigenere. Tic gin oudo en me poko jamini ne Jolebi wad gi.
- ¹⁴Okwe Rubanga na, ango akwai iyutuno tice dedede abeco kame ango atieko timo pi odi kede pi jo kame wori iye.
- ¹⁵I kare nono ango bin ako neno i Yuda di jo bio olok i ceng Sabato. Jo ace oudo tweo engano, bwini, olok, anyakini me epigi, kede jamini apat i ngei pundan di kiko tero gi Yerusalem; ango ako kwenyaro gi pi weko cato jamini i ceng Sabato.
- ¹⁶Jo mogo da koyai ki bomba me Taya, kame bin tie bedo Yerusalem oudo kelo dek nam kede jamini ace apapat i bomba pi cato ne jo wa i ceng Sabato.
- ¹⁷Ango ako doko ger ne jotel me Yuda di ako waco negi be, “Nenunu kong gikarac kame wun itienu timo! Wun itienu munao ceng Sabato.
- ¹⁸Mam bin Rubanga wa okelo can nogi dedede i kom wa kede i kom bomba noni pien joakwari wa bin otimo tim acel noni? Nataman wun pwodi itienu mito medo kelo lilo ka Rubanga i kom jo Isirael pi munao ceng Sabato.”
- ¹⁹Aso, ango bin ako mino cik be cako cenge nono miero kodony cego irutei me Yerusalem esawa kame ceng Sabato cakere kede di likame oko yabe tuno Sabato tiek. Ango ako keto jotic na mogo daro irutei pi neno be likame tie gimoro me acata kame okelo i bomba i ceng Sabato.
- ²⁰Manono oko bin mino jocat jamini apapat oko buto ooko me Yerusalem pi iwor acel amoto are.
- ²¹Do ango ako kwenyaro gi di awaco negi be, “Pinyo komio wun ibutunu ooko i nget apama iwor? Ka imedunu timo kamanono bobo ango abino suro wu.” Cako cenge nono likame gin bobo kiko medo dwogo ceng Sabato.



- 22**Ango ako mino cik but Jolebi pi gin lonyere di kiko bino daro irutei, tetekeny kinen be jo ogwoko ceng Sabato obedo ceng kacil. Okwe Rubanga, ango akwai iyutuno ango pi manoni, di iko gwoka pi amara ni adwong kalikame lokere.
- 23** I kare nono da ango bin ako neno cuo me Iyudayan mogo kame oudo onyomo mon me Asidod, Amon, kede me Moab.
- 24**Dul me idwe gi oudo yamo leb jo me Asidod arabo leb ateker moro apat, do oudo likame kikaruno yamo leb wa.
- 25**Ango ako doko ger ne cuo nogo, alamo gi, abungo gi, di ako puputo yer wi gi. Di do ako mino gi kikwongere i nying Rubanga be likame bobo gin arabo idwe gi bino nyomere kede jokumbor.
- 26**Ango ako penyere be, “Benyo, mam akodi mon nogi en kame bin omio Abaka Sulumani otimo dub? Kikom atekerin dedede, likame oudo tie abaka moro kame cal bala en. Rubanga mere oudo mare, omio eko kete pi bedo abaka me Isirael lung. Akadi kamanono da mon me obukui bin oko mine etimo dub.
- 27**Benyo, wun imitunu be wan olub ekite wu di oko timo gikarac noni, di oko turo cik ka Rubanga wa pi nyomo mon me kumbor?”
- 28** Yekoyada, wot ka Eliasib Ngatel me Josaseredoti, oudo tie kede wode acel konyomo nyar ka Sanabalat me Koron. Ango ako riamo wode nono tenge.
- 29**Okwe Rubanga, ango akwai iyutuno kite kame jo nogo omunao kede tic me josaseredoti kede cikere kame in bin itimo kede josaseredoti kede Jolebi.
- 30**Manono en kite kame ango bin ako lonyo kede jo ki jamini dedede kobedo me jo kumbor, di ako moko tice me josaseredoti kede Jolebi tetekeny dano acelacel bedo di engeo tic mere.
- 31**Ango ako iiko da kite kame kokelo kede yen me wango giayala i kare kopoore, kede kite kame jo kelo kede anyakini kame geo cek. Okwe Rubanga na, yutuno ango pi gikabeco kame ango atimo nogi.



Esita

Esita 1

Basati Abaka Adako Odagi Winyo Kop ka Abaka Sereses

- 1-2** Di bin en etie i kom mere me ajakanut koudo tie Susa, en bomba adwong me Pasia, Abaka Sereses bin pugo adulion akalamo tol acel kede ot are kiwie kanyaare (127), cako ki India tuno Abisinia.
- 3** I mwaka me adek me apugan mere, en eko iiko ebaga ne jotic mege kede jotel me apugan. Isirikalen me Pasia kede Media, karacel kede jotel kede jopug me adulion da oudo tie kunono.
- 4** En oudo ebodo nyuto abar me ajakanut mere kede deyo kede dwongo mere pi dwete kanyape.
- 5** Ingei manono abaka oko iiko ebaga ne jo dedede koudo tie i bomba me Susa, jo obaro kede jogan di rom aroma. Ebaga nono oko tieko ceng kanyaare di oudo kotie came i diakal me paco ka abaka.
- 6** Oudo kotubuso diakal nono kede isukan ebululu ebululu kede atar kame kotimo kede epamba, di oko twetweo gi kede ausin akwakwar i kom mwolere me siliba kame oudo tie i kom ipirin kame kotimo kede kidi mabol. Komini me bedo kame kotimo kede saabu kede siliba oudo tie i diakal nono. Pi tubuso diakal nono oko namo iye kidi mabol atar, kede kidi ace arieny arieny, kede kide ace me erangi apapat.
- 7** Oudo kopoko ne jo giamata kede ikopon kame kotimo kede saabu, di kotimo buli acelacel di pat kede icegun. Abaka oudo li kede woro kede bwini.
- 8** Dano oudo mato bwini bala kame cunye mito, pien abaka oudo owaco ne jotic mege pi mino buli dano rom me bwini kame cunye mito.
- 9** Kakame manono oudo tie timere kede, Basati abaka adako oudo da tie mino mon camo ebaga i ot ka abaka.
- 10** I ceng me kanyaare me ebaga, Abaka Sereses oudo tie matere di etie kede yomcuny, di eko lwongo abwocin kanyaare koudo obedo jotic mege akonye, gin en Mekuman, Bisita, Karabona, Bigita, Abagata, Setar, kede Karakas.
- 11** En eko ciko gi pi ot omo Basati abaka adako di etie ngapo ocoro mere me ajakanut. Abaka nono oudo obedo dako acil adikinicel, omio Abaka Sereses oudo mito nyuto cilo mere ne jotic adongo kede wele dedede koudo ocokere.
- 12** Do kakame jotic nogo oko ot waco ne kede abaka adako Basati cik kame abaka Sereses oudo omio gi, Basati oko dagi ot kunono. Manoni oudo oko mino cuny Sereses owang twatwal.
- 13** Aso abaka oudo onare pepenyo tam kibus jo atie kede niang atut i kom kop amako iswilia kede itok.



¹⁴Jo kame en oudo enare pepenyo tam kibut gi gin ige: Karasena, Setar, Adamata, Tarusi, Meresi, Marasena, kede Memukan; gin oudo kibedo jotic adongo kanyaare me Pasia kede Media kame oudo tero tice adongo i ajakanut nono.

¹⁵En eko waco negi be, “Ango, Abaka Sereses acwao jotic na but abaka adako Basati di acike pi bino buta, en eko dagi winyo kop na. Nan iswil waco be nyo kame opoore timo ne dako noni?”

¹⁶Di Memukan oko waco ne abaka kede jotic mege adongo be, “Abaka adako Basati otieko bedo kede acae but abaka ribo kiton jotic mege adongo dedede, kede da kiton but cuo dedede me ajakanut noni.

¹⁷Buli dako acelacel me ajakanut noni bino cako bedo kede acae but cware tek kame ewinyo gikame abaka adako noni otimo. Gin kibino donyo waco be, ‘Abaka Sereses oudo omio abaka adako Basati cik pi ot bute, do en eko dagi.’

¹⁸Di pwodi ceng atin likame okato, mon me jotic adongo me Pasia kede Media kotieko winyo ikiteso ka abaka adako Basati bino cako bedo kede epali but joacwog gi, di manono ko bino mino cwog gi doko ger negi.

¹⁹Aso, adwong ka in iyei, wot cik be Basati likame doko bino tuno i nyimi, in abaka, di iko mino kowandiko cik nono piny i kom iswilia me Pasia kede Mede, tetekeny kur dikimaca doko koloke. Di do in iko mino kom mere me abaka adako but dako moro ace kame ber kalamo en.

²⁰Kame cik kame in iwoto nono oko winyere kabedo dedede me ajakanut alac noni, mon dedede bino bedo kede wor but cwog gi, bed bala kibaro amoto kijocan.”

²¹Abaka kede jotic mege adongo oko gamo tam nono, di abaka oko timo gikame Memukan oudo owaco.

²²En eko wandiko baluwan i adulion dedede kame abaka pugo, but jo dedede kede iwandik kede leb kame gin kitwero somo, di ewaco negi pi cuo dedede bedo kede akarunikin akalamo dedede i miere gi.

Esita 2

Esita Odoko Abaka Adako

¹Ingei manono, akadi ingei cuny Abaka Sereses kwei, do en pwodi eko dong di eyutuno gikame Basati otimo, kede da kop me cik kame en eko wandiko piny amakere kede en.

²Di jotic kame gwoko abaka oko waco be, “Adwong, wek komoi ni nyako moro kiyapakina kalikame pwodi ongeo icuo.

³Koto iyero jotic mogo ki adulion dedede me ajakanut ni, di iko mino gi kicok anyira dedede acil kalikame pwodi ongeo cuo di kiko kelo gi kakame in igwoko kiye mon ni i bomba adwong me Susa kan. Di do in iko bino keto gi i cing Kegai, en abwocit ngat kame lo kope amakere kede mon nin, di oko bino mino gi sut kede moe amio jo doko cil.



⁴Di do in iko bino kwanyo nyako acel kame yomo cunyi kalamo, di iko mine ebed abaka adako kawang Basati.” Kop noni oko yomo cunyi abaka di eda eko timo kamanono.

⁵Aso bin tie i bomba me Susa kunono Eyudayat kame nyinge Modekai wot ka Yair, wot ka Simeï, wot ka Kis, dano me ekeko ka Benjamin.

⁶Kakame Abaka Nebukadunesa me Babilon omako kede Abaka Yekoyakin di eko tere obukui bala mabus, karacel kede jo ace apat, Modekai da oudo obedo ngat acel kikom gi.

⁷En oudo etie kede acen mere anyinge Esita kame en oudo ebedo gwoko paka dongo, pien toto mere kede papa mere oudo otieko to. Esita oudo obedo nyako acil adikinicel.

⁸Kakame abaka omio kede cik pi mono anyira acil, bin oko tero anyira atot i paco me abaka i bomba me Susa, i cing Kegai ngat koudo telo kop amako mon me abaka; Esita da oudo obedo ngat acel kikom gi.

⁹Esita oko yomo cunyi Kegai kalamo di do en eko mine moe dedede amitere me medo mine doko cil, kede da oko donyo mine cam abeco. Oko yero ne agola aber kalamo di oko mine anyira kanyaare kame koyero ki paco ka abaka pi donyo gwoke.

¹⁰Modekai oudo oko coro Esita be kur ewac ne ngatamoro be en ebedo Ayudayat, Esita da oko lubo kop mere.

¹¹Buli ceng Modekai oudo cucungo i diakal me kakame mon oudo bedo iye kanono pi mito niang kite kame kuo ka Esita tie kede, kede gikame otimere ne.

¹²Oko bin bedo iiko kom anyira nogo pi mwaka acel; dwete kanyape me agege oudo kosuto gi kede mo me maya, di bobo oko bin meede suto gi kede moe angwe kur me mon pi dwete kanyape. Di do ingei manono buli nyako acelacel oko donyo ot but Abaka Sereses pi iwor acel.

¹³Nyako kame oudo tie yai ki kabedo me mon ot but abaka oudo penyo gimoroni dedede kame cunye tie mito ot kede kunono.

¹⁴Buli nyako oudo oto but abaka otieno di eko dwogo odiko, di eko donyo bedo kabedo ace me mon kame abwocit anyinge Sasagasi en oudo gwoko, en ngat kame oudo gwoko mon ka abaka kalikame enyomo. Nyako moroni oudo likame yai ki kanono dok but abaka, kwanyo ka en oudo eyomo cunyi abaka di abaka oko lwonge kede nyinge pi dok bute.

¹⁵Ceng oko tuno me Esita da ot but Abaka. Esita oudo obedo nyar ka Abikail neru me Modekai, en nyako kame Modekai oudo obedo gwoko bala nyare. Aso Esita likame oko ngapo gimoro ace kwanyo kenekene gikame abwocit Kegai, ngat koudo daro mon ka abaka owaco ne be engapi. Jo dedede koudo oneno Esita wang gi oudo pwoye.

¹⁶Aso i mwaka me kanyaare me apugan ka Sereses, i duwe me tomon, en duwe me Tebet, oko bin tero Esita i ot ka abaka but Sereses.



¹⁷Abaka bin cunye oko maro Esita kalamo anyira apat dedede; Esita oudo oyomo cuny abaka kalamo anyira icegun dedede, di do abaka oko bin ngapo ne ocoro me ajakanut i wie di oko mine edoko abaka adako kawang Basati.

¹⁸Di do abaka oko tedo “Ebagā ka Esita” di eko lwongo iye jotice mege adongo kede jopug, en oudo ebedo ebaga adwong twatwal. En eko mino ceng nono obedo ceng adwong di jo likame oko timo iye tic moro i ajakanut mere lung. Cenge nono da en eko mino jo giamia kame porere kede ruom mere me abaka.

Modekai Olako Kuo ka Abaka

¹⁹I kare nono kame oudo kotie mono kede anyira kalikame ongeō cuo, bin abaka oko yero Modekai di oko mine ruom me ngapug.

²⁰Do Esita oudo likame otuco ne jo ateker mere kede joawade mege, bala kame Modekai oudo owaco ne. En bin elubo kop kame Modekai owaco ne noni, bala kame oudo da ebedo lubo kede kop mere sek.

²¹I kare nono kame Modekai oudo obedo kede ngatic me paco ka abaka, Bigitana kede Teresi, abwocin are kame oudo daro ekeko kame donyo i agolai ka abaka oko bin doko ger di kiko iiko tam arac me neko Abaka Sereses.

²²Do Modekai oko ngeno kop gi nono, di en eko waco ne Esita abaka adako, di Esita oko waco ne abaka kop nono di ewaco ne be Modekai en kongeo iik gi nono.

²³Abaka bin oko mino kongingico kop nono; kakame koudo kede be kop nono tie me ateni, bin oko tweno ngut cuo nogo di oko liero gi paka to. Abaka bin oko mino kowandiko kop noni di en etie neno i itabu amako kope me ajakanut mere.

Esita 3

Kaman Otimō lik me Muducaro Iyudayan

¹Ingei kare moro, Abaka Sereses oko mino icuo anyinge Kaman wot ka Kamedata ruom amalo me bedo ngadwong me jotel me apugan. En oudo ebedo akwar Agag.

²Abaka oko mino cik be poore jotic mege dedede mi Kaman wor di kiriondiko piny kede di kiluro ne wi gi. Jo dedede oko donyo timo kamanono, kwanyo Modekai kenekene en oko dagi.

³Jotic ace me ka abaka oko penye pinyo komio en edagi lubo cik kame abaka omio;

⁴gin kiko bedo ngangao en buli ceng pi eda timo kamanono, do en eko dagi di ewaco negi be, “Ango abedo Eyudayat.” Gin kiko tero kop nono ne Kaman pi neno ka kop ka Modekai twero dong kamanono.

⁵Kakame Kaman oneno kede be Modekai oudo likame riondiko akadi luro i nyime pi mine wor, en eko doko ger adikinichel.

⁶Kakame en eniang kede be Modekai oudo obedo Eyudayat, en eko paro pi neko Modekai ribo kiton Iyudayan dedede. En eko timo iik me neko Iyudayan dedede i ajakanut ka Sereses lung.



⁷I mwaka me tomon kiwie are me apugan ka Sereses, i duwe me Nisan, en duwe me agege, Kaman oko mino kouco alulu (kolwonge be purim) pi mito udo ceng kopoore kede duwe kopoore me cobo iik nono. Alulu bin oko mako ceng me tomon kiwie adek me duwe me Adar, en duwe me tomon kiwie are.

⁸Kaman oko waco ne abaka be, “Tie jo me ateker moro kosarakin i ajakanut ni dedede, doko kitie i adulion dedede. Gin kitie kede itok kame pat kede itok me jo me atekerin apat, doko da gin likame kilubo iswilia ka abaka; aso likame eber nin kanyakino bedo kede gin.

⁹Aso kame etie gikame yomo cunyi, in abaka, adwong koto iwoto iswil me neko gi. Ka in itimo kamanono ango abino keto siliba akalamo kilo tutumia tol adek kede ot ongwon (340,000) i dero me kano lim me abaka pi tic kede gi i kop amakere kede apugan me ajakanut noni.”

¹⁰Abaka oko kwanyo mwola mere ki cinge, mwola kobedo alama meren me abaka, di eko mine but Kaman ngakwor me Iyudayan, en wot ka Kamedata, di ebedo akwar Agag.

¹¹Abaka oko waco ne be, “Jo kede sente gi obedo megi; in tim kede gi gikame in ineno be ber nin.”

¹²Aso, i ceng me tomon kiwie adek me duwe me agege, Kaman oko lwongo ikalanin di eko mino gi cik pi wandiko cik kame kowoto, i leb kede i egere me iwandik dedede kame kotio kede i ajakanut gi nono, di oko bino cwacwao gi but jopug, jotel, kede jotic adongo i adulion dedede. Baluwan nogo oudo kowandiko kede nying Abaka Sereses di oko dongo iye alama mere me abaka.

¹³Di do oko cwano jo tero baluwan nogo i adulion dedede me ajakanut. Baluwan nogo oudo mio cik me neneko kede me tieko Iyudayan dedede, adongo kede atino, mon kede idwe, i ceng acel, en ceng me tomon kiwie adek me duwe me tomon kiwie are, en duwe me Adar. Oudo kopoore ngongolo gi abongo cunyi me kisa, di oko tero jamini gi.

¹⁴Kope kame tie i yi baluwan nogo oudo kopoore mino jo dedede me adulion dedede ngeno, tetekeny kibed di kiikere pi ceng nono.

¹⁵Jo kame oudo tero baluwan oko lubo cik kame abaka omio di kiko ot awakawaka tero baluwan, di oko somo cik nono ne jo dedede me bomba me Susa. Di do abaka kede Kaman oko bedo piny kidonyo amata karacel, di do oudo wi jo me bomba otieko totolun.

Esita 4

Modekai Okwao Kony kibut Esita

¹Kakame Modekai oniang kede gi dedede kame kotimo, en eko nyinyilo igoen mege pi cweracuny, di eko ngapo epuko, kede eko puco buru i wie, di eko donyo ot i dier bomba di eboroboro koko.



²En eko ot paka i erute me paco ka abaka; en likame eko donyo i paco pien likame oudo koyei ne jo kame ngapo ipukoi donyo kunono.

³I adulion dedede kame oudo komio jo onge kiye cik kame abaka oudo owoto, Iyudayan oudo tie kede iturur adwong, di kikanyo kec kede di kikok kede di kiparere, di jo atos kikom gi oudo ngapo ipukoi kede di kibuto i buru.

⁴Kakame anyira koudo gwoko Esita kede abwocin oko ot waco ne kede gikame Modekai oudo tie timo, cunye oko dubere; en eko cwano ne Modekai igoen pi ngapo akaka ngapo epuko, do Modekai oko dagi igoen nogo.

⁵Di Esita oko lwongo Katak, ngat acel kikom abwocin ka abaka, kame oudo koyero ne pi konye, di eko cwane but Modekai pi neno nyo koudo tie timere kede pinyo.

⁶Katak oko ot ooko but Modekai kakaler me bomba i nget erute me paco ka abaka.

⁷Di Modekai oko waco nen gi dedede kotimere ne, kede wel sente kame Kaman ocikere pi keto i dero me kano lim ka abaka pi muducaro Iyudayan.

⁸Modekai doko da oko mine acel kikom baluwan kame oudo kocwao ki Susa, kame mio cik be poore muducaro Iyudayan. Modekai oko kwane pi tero ne Esita baluwa nono di eko tatamo ne kop nono, di eko kwano Esita pi ot but abaka pi kwane pi bedo kede kisa i kom Iyudayan.

⁹Katak oko timo kamanono,

¹⁰di Esita oko dwoke kede kop but Modekai be,

¹¹” Iswil tie amako donyo i diakal me yie pi neno abaka; jotie mege dedede kede jo mege ngeo iswil noni. Ngatamoroni kame donyo tetek ot neno abaka di likame kolwonge alwonga, ngat nono kopoo neko. Kwanyo kenekene ka abaka ocwao ebela mere me saabu di dano nono oko mako, manono en kamio dano nono bwot. Do ango nataman atieko duwe acel di pwodi likame abaka olwonga doko pi ot bute.”

¹²Kakame Modekai owinyo kede kop kame Esita ocwao,

¹³Modekai oko waco ne jo nogo pi dwoko ne Esita kop kame waco be, “Kur ipar be pi kite kame in itie kede i paco ka abaka, manono bino mini ibwot kikom Iyudayan ace apat.

¹⁴Ka in iling alinga i kare kacal bala man, Iyudayan bino udo alako kame wok ki karamoro ace, do in kede jo me ot ka papa ni ibinunu to. Ngai bo ngeo, cengemogo bin komii ruom me abaka adako pi timo gimoro i kare noni!”

¹⁵Di Esita oko dwoko ne Modekai kop be,

¹⁶” Oti icok Iyudayan dedede atie Susa karacel, di ikounu kanyo kec di ilegunu pira. Kur icamunu gimoro akadi mato gimoro pi ceng adek kede iwor da adek. Ango karacel kede anyira kame konya wada obino timo kamanono. Ingei manono ango abino ot but abaka tetek bed bala iswil likame yei; ka ango abino to pi timo kamanono, ango do ayei.”



¹⁷Modekai oko ot di eko timo gi dedede kame Esita oudo owaco ne.

Esita 5

Esita Olwongo Abaka kede Kaman i Ebaga

¹I ceng me adek Esita oko ngapo igoen mege me abaka adako di eko ot cungo i diakal me yie me paco ka abaka, di epimere kede agola alac kame kom ka abaka me ajakanut tie iye. Abaka oudo tie bedo i kom mere me ajakanut di epimere kede ekeko.

²Kakame abaka oneno kede Esita abaka adako di etie cungo i diakal, cunye oko bedo yom i kome, di eko mako ebela mere me saabu di eko cwano cinge pi en mulo, Esita oko yito malo kunono di eko mulo wi ebela nono.

³Abaka oko waco ne be, “Nyo inonono, Esita? Nyo kame itie mito? Wac nango gi nono, akadi di dul me ajakanut nango ango abino mini.”

⁴Esita oko dwoko ne be, “Adwong me awora, ka cunyi yom iye, ango akwao be in kede Kaman ibinunu i ebaga kame ango aiko piri iwor atin.”

⁵Abaka oko mino cik be ter Kaman bute awakawaka, tetekeny kioti i ebaga kame Esita oudo oiko. Aso abaka kede Kaman oko ot i ebaga ka Esita.

⁶Kakame oudo kitie do mato kede bwini, abaka oko penyo Esita be, “Wac na gikame in imito di ango ako bino mini. Ango abino mini gikame ipenyo, akadi bed bala ipenya pi mini dul me ajakanut na.”

⁷Esita oko dwoko be,

⁸” Ka ango ayomo cunyi in abaka, kede ka cunyi yom pi cobo gikame ango akwai, ango atie mito be in kede Kaman diki bobo ibedunu wele na i ebaga ace kame ango atie iiko ne wu, di do ango ako bino waco ni gikame ango amito.”

Kaman Otimo lik me Neko Modekai

⁹Kakame Kaman oyai kede ki ebaga cunye oudo yom di tam mere ber. Do kakame en eko neno Modekai di tie cungo i erute me paco ka abaka, di Modekai oko dagi cungo malo kede nyuto ne wor kakame en oudo etie beo kede, Kaman oko doko ger ne Modekai.

¹⁰Do en eko didio gero mere di eko ot paco. Kakame etuno kede paco en eko cwano kop kolwongo jowote di eko lwongo dako mere Seresi da but gi.

¹¹En eko donyo wakere negi pi twon abar mere, pi awobe atat kame oudo etie kede, pi kite kame abaka okobe kede i tic me ruom amalo, kede pi kite kame abaka omio pire obedo tek kede kalamo jotit icegun.

¹²En eko meede kede yamo be, “Do likame mano kenekene, ango kenekene en kame Esita abaka adako olwonga i ebaga mere pi bedo kede abaka. Doko elwongo wa pi dok i ebaga ace diki.



¹³Do magi dedede likame timo nango bero moro tek di pwodi ango atie neno Eyudayat Modekai tie bedo i erute me paco ka abaka.”

¹⁴Dako mere Seresi kede jowote oko waco ne be, “Mi ger gi me deno jo, di diki odiko iko waco ne abaka pi mino kodei Modekai iye; di do in iko bino upere kede abaka i ebaga di cunyi yom.” Kaman oko tamo be manono oudo obedo tam aber, aso en eko mino kogero gi me deno jo.

Esita 6

Abaka Omio Wor but Modekai

¹Iwor nono abaka likame oko karuno nino, omio eko mino cik be kel itabu kame kowandiko iye kop me itatam amako ajakanut mere di oko somo ne.

²I itabu nono bin oko udo kakame kowandiko iye epone kame Modekai otuco kede iik kame Bigitana kede Teresi oudo otimo pi koto neko abaka, gin abwocin me paco ka abaka kame bin daro agolai ka abaka.

³Abaka oko penyo jo be, “Wor nyo arabo ruom mene kame oko mino Modekai pi gikame en eko timo noni?” Jotic mege kame gwoke oko gamo be, “Likame tie gimoro kame kotimo ne.”

⁴Abaka oko penyere be, “Ngai kame tie i diakal?” Esawa nono Kaman oudo pwodi otuno atuna i diakal me ooko me paco ka abaka. En oudo etie ot pi yamo ne abaka kop me deno Modekai kakame en oudo etieko iiko ne.

⁵Aso, jotic ka abaka bin oko waco ne be, “Kaman ica tie cungo i diakal.” Abaka oko waco be, “Mie edonyi i ot.”

⁶Aso, Kaman bin oko donyo i ot di abaka oko penye be, “Nyo kame kobino timo ne dano kame cuny abaka mito mino wor?” Kaman oko waco i cunye kene be, “Ngai kame cuny abaka romo mito mino wor apat kede ango?”

⁷Aso Kaman oko waco ne abaka be, “Ka abaka cunye mito mino dano moro wor,

⁸mito kel ikanson me ajakanut, kame abaka kikome lem ngapo, kede asigira kame lem abaka ringo kede di ongapo ne i wie engape me ajakanut.

⁹Di oko bino mino ikanson nogo kede asigira nono but ngat acel kikom jopug ka abaka kame en emio dwongo kalamo jo icegun, di en eko ngapo ne ngat kame abaka cunye mito mino wor nono ikanson nogo, di en eko tele ebeo kede i dier kacokere me bomba di dano nono bedo i ngei asigira ka abaka. Ngat kame telo dano nono bino lelemo di gin kitie ot be, ‘Manoni en gikame kobino timo ne ngat kame abaka cunye mito mino wor.’ “

¹⁰Di do abaka oko waco ne Kaman be, “Tim awakawaka, kwany ikanson kede asigira bala kame in itieko waco, di iko timo kamanono ne Modekai Eyudayat kame bedo i erute me paco na. Kur iwek gimoro kikom gikame in iwaco.”



¹¹Aso, Kaman oko kwanyo ikanson kede asigira, di en eko ngapo ne Modekai ikanson di eko tele ebeo kede kacokere me bomba di elelemo be, “Manoni en gikame kobino timo ne ngat kame abaka cunye mito mino wor.”

¹²Di do Modekai oko dok i erute me paco ka abaka, do Kaman oko onyaro eoto ture kede twon lewic.

¹³Kaman oko waco ne dako mere Seresi kede adiereson mege dedede gikame oudo oko timere ne. Di dako mere kede jo kame bin mie tam oko waco ne be, “Ka Modekai obedo Eyudayat, manoni obedo acakini me peko kame in ibino udo, doko likame in ibino bwone, do ateteni ibino udo peko.”

Koneko Kaman

¹⁴Di pwodi gin oudo kitie yamo, abwocin me paco ka abaka di tuno di kiko tero Kaman awakawaka i ebaga kame Esita oudo oiko.

Esita 7

¹Aso, abaka kede Kaman bin oko ot camo ebaga kede Esita

²tien me are. Di gin bin kitie mato bwini, abaka bobo oko penyo Esita be, “Dako na Esita, nyo kame in imito be atim ni? Wac na di ango ako bino mini. Ango abino mini akadi kiton dul me ajakanut na.”

³Di dako mere Esita oko gamo be, “Okwe abaka, ka ango ayomo cunyi, kede ka in iyei, ango akwao be weka kur neka kede jo na da wek kur konek gi. Manono en kwac na.

⁴Pien ango kede jo na kotieko cato wa be miero komuducaro wa, konek wa di oko tieko wa pitipit. Ka koto oudo ocatu wa bala ipaso kenekene, ango koto oudo aling di likame ako loli; do likame tie ngakwor moro kame karuno culo wang kei noni but abaka.”

⁵Di Abaka Sereses oko penyo dako mere Esita be, “Ngai inonono, doko etie tuai, en ngat kame eparo be etwero timo akodi gi noni?”

⁶Esita oko gamo be, “Ngakwor wa, nganek wa, obedo Kaman icuo arac noni!” Lworo atek oko mako Kaman i nyim abaka kede dako mere.

⁷Abaka oko yai ki ebaga kede twon gero di eko ot i potu me paco mere, do Kaman oko dong ngangao Esita pi lako kuo mere, pientu en oudo eneno be abaka oudo otieko moko tam mere pi neke.

⁸Kakame abaka oko dwogo kede i ot me ebaga, eudo Kaman oudo inonono inonono opoto i kom kame Esita oudo tie bedo iye pi kwano kisa kibute. Di abaka oko waco be, “Benyo, kom en etwero suro akadi dako na i nyima, doko i oda?” Kakame abaka owaco kede kop noni, oyotoyot di jotie mege umo wi Kaman.

⁹Di Karabona, ngat acel kikom abwocin ka abaka oko waco be, “Neningo, gikame Kaman oudo oiko me deno Modekai ngat kolako kuo ka abaka ica cunyo i paco mere.



Boro mere malo tie mita ot are kiwie are!” Abaka oko waco be, “Otunu imiunu gi nono dee.”

¹⁰Aso, gin kiko liero Kaman di kiko dene i gikame en oudo eiko me deno Modekai. Di do gero ka abaka oko kwei.

Esita 8

Owaco ne Iyudayan Yi kede Jo Asuro gi

¹Cenge nono Abaka Sereses oko mino Esita jame ka Kaman, ngakwor me Iyudayan. Di Modekai oko ot but abaka, pien Esita oudo owaco ne abaka be Modekai obedo wad kede en.

²Di abaka oko woto epeta mere kame alama tie iye, kame en oudo egamo kibun Kaman, di eko mino Modekai. Esita oko keto Modekai obedo ngadwong kame lo jame ka Kaman.

³Di Esita bobo oko yamo kede abaka. En eriebere piny i tiene di ekok di engangao en pi gengo iik arac kame Kaman, akwar Agag oudo otimo me neko Iyudayan.

⁴Abaka oko rieno ebela mere me pug kame kotimo kede saabu but Esita,

⁵di Esita oko yai malo di eko cungo i nyim abaka. En eko waco ne be, “Ka manoni yomo cunyi abaka, kede ka imara, doko ka gi noni poore i nyimi, di in iyei kop na, ango akwai iwandiko cik kame turo kop me baluwan kame Kaman wot ka Kamedata akwar Agag oudo owandiko, di emio cik me neko Iyudayan kame tie i adulion kame in ipugo dedede.

⁶Pien benyo benyo kame ango akaruno dino kede cunya di atie neno can tie bino i kom jo na? Arabo benyo benyo kame ango akaruno dino kede cunya di aneno kotie muducaro joawade na?”

⁷Di abaka Sereses oko waco ne dako mere Esita kede Modekai Eyudayat be, “Neningo, ango atieko mino Esita jame ka Kaman, doko kotieko dene pien oudo etimo iik arac me neko Iyudayan.

⁸Aso, in wandiko kop kame cunyi mito di iko cwano ne Iyudayan i nying abaka. Wace gi gimoroni kenekene kame in imito, di iko dongo iye alama ka abaka. Do poore iyutuno be gimoroni kenekene kame kowandiko i nying abaka di oko dongo iye alama mere likame kokaruno loko.”

⁹Man bin otimere i buto duwe ot are kiwie adek me duwe me adek, en duwe me Sibani. Modekai oko lwongo ikalanin ka abaka di en eko bedo waco ne gin kop di gin kiwandiko i baluwan pi cwano ne Iyudayan, jopug, kede jotel me adulion dedede cako ki India tuno Abisinia, gin dedede adulion tol acel kede ot are kiwie kanyaare (127). Baluwan nogo bin kowandiko but adul acelacel kede leb kame koyamo i adul nono kede i epone kame jo wandiko kede i adul nono; but Iyudayan da gin kitimo kamanono.



¹⁰Modekai omio kowandiko baluwan i nying Abaka Sereses, di en eko dongo i kom gi alama ka abaka. En eko cwano baluwan nogo kede jo kame ringo kede asigiran adwir kame kokwanyo kikom me ka abaka.

¹¹Baluwan nogo oudo tie kede kop kame waco be abaka otieko yei ne Iyudayan kame tie i bomban dedede pi ribere di kiko yi pi gwoko kuo gi. Gin oudo koyei negi neko di kiko tieko pitipit jo me ateker moroni kenekene arabo jo me adul moro kame bino suro gi, idwe gi arabo mon gi, di kiko yako jamini gi.

¹²Cik noni oudo miero cakere i adulion dedede kame Abaka Sereses pugo, i buto duwe tomon kiwie adek i duwe me tomon kiwie are, en duwe me Adar.

¹³Baluwan me cik noni oudo miero cwai i adul acelacel pi bedo iswil kame ngere but jo dedede, tetekenye Iyudayan bed di kiikere i ceng nono pi timo onyanga i kom jokwor gi.

¹⁴Joor kame bin tero baluwan nogo oko yito ingei asigiran gi adwir kame kokwanyo kikom me abaka, di kiko ringo kede teko di kilubo cik ka abaka. Cik nono da bin oko mine ongere but jo i Susa, en bomba adwong.

¹⁵Modekai oko yai kibut abaka di engapo ikanson me ajakanut me erangi ebululu ebululu kede atar, ekoti akwakwar kame kotimo kede egoe ameny di epwot, kede twon ocoro me ajakanut kame kotimo kede saabu. Di jo me bomba me Susa oko kilel di kilelemo.

¹⁶Iyudayan oko bedo kede ilel, kweicuny, kede yomcuny, kede jo oko mino gi wor.

¹⁷I adulion kede i bomban dedede, kabedere dedede kame cik ka abaka oko tuno iye, Iyudayan obedo kede yomcuny kede ilel, di kiko tedo ebaga kede kiko bedo kede ceng me wei. Manoni oko mino jo atot me atekerin me piny nono oko donyo waco be gida kibedo Iyudayan, pien gin oudo do kitie kede lworu i kom Iyudayan.

Esita 9

Iyudayan Oneko Jokwor gi

¹Aso, i duwe me tomon kiwie are, en duwe me Adar, i buto duwe tomon kiwie adek, en oudo ebedo ceng kame oyaro cobo timo kede cik ka abaka. Ceng nono en kame jokwor me Iyudayan oudo tie kede gen me bedo kede twer i kom gi iye, do oudo kotieko loke edoko ceng kame Iyudayan bino bedo kede twer i kom jokwor gi.

²Cenge nono Iyudayan oko cokere i bomban kame oudo kitie iye in adulion dedede kame Abaka Sereses bin pugo, pi yi kede ngatamoroni kame bino mito suro gi. Do jo dedede oudo tie kede lworu i kom gi omio oudo likame tie ngatamoro kame oudo twero kanyakino ot yi kede gi.

³Jotel me adulion dedede, jopug kede jo kame bin cungo ne abaka oko gango Iyudayan pien gin oudo kilworu Modekai.

⁴Pien Modekai oudo odoko dano kame pire tek i paco ka abaka, doko nyinge oudo odoko iruo i adulion dedede di twer mere meede ameda.



- ⁵Aso, Iyudayan oko neneko jokwor gi kede epima, kingongolo gi, di kiko muducaro gi; gin oudo kiko timo ne jokwor gi bala kame cuny gi mito.
- ⁶I Susa, bomba adwong, Iyudayan bin oko neko jo tol kany (500).
- ⁷Gin bin kiko neko da Parasandata, Dalipon, Asapata,
- ⁸Porata, Adalia, Aridata,
- ⁹Paramasita, Arisai, Aridai, Baisata,
- ¹⁰gin awobe ka Kaman wot ka Kamedata, ngakwor me Iyudayan. Do gin bin likame kiko yako jame.
- ¹¹Wel me jo kame bin oko neko i Susa oko mino but abaka cenge nono.
- ¹²Abaka oko waco ne dako mere Esita be, “I Susa kenekene Iyudayan otieko neko jo tol kany, kiton awobe tomon ka Kaman. Nyo do kame nat kiko timo i adulion dedede kame ango apugo! Benyo, tie bobo gimoro ace kame in nataman imito? In wac nango di ango ako bino mini.”
- ¹³Esita oko gamo be, “Ka manoni yomo cunyi abaka, ango akwai iyei ne Iyudayan atie Susa diki bobo gin kitim gikame ceng atin in iko yei negi timo. Doko mi cik di oko kelo liele tomon me awobe ka Kaman di oko liero gi i gikame kodeo kode jo.”
- ¹⁴Abaka oko mino cik be miero tim kop noni. Cik noni bin oko mino i Susa, di oko liero liele tomon me awobe ka Kaman.
- ¹⁵Iyudayan kame bin tie Susa oko da cokere i buto duwe tomon kiwie ongwon me duwe me Adar, di gin kiko neko jo tol adek (300) i Susa; do gin likame bin kiko yako gimoro.
- ¹⁶Iyudayan kame bin tie i adulion apat da oko gida cokere pi yi pi gwoko kuo gi. Gin kiko lako kuo gi ki cing jokwor gi kede neko jo tutumia ot kanyaare kiwie kany (75,000) kame bin dagi gi. Do gin likame bin kiko yako gimoro.
- ¹⁷Manoni bin otimere i buto duwe tomon kiwie adek me duwe me Adar. I ceng alubo mere, i buto duwe tomon kiwie ongwon, gin kiko wei di kiko mino ceng nono obedo me tedo ebaga kede me ilel.
- ¹⁸I buto duwe tomon kiwie kany Iyudayan kame bin tie Susa oko wei di gin kiko tedo ebaga, ingei neko jokwor gi i buto duwe tomon kiwie adek kede i buto duwe tomon kiwie ongwon.
- ¹⁹Manoni en komio Iyudayan kame bedo i calere gwoko buto duwe tomon kiwie ongwon me duwe me Adar bala ceng me ilel, ceng me tedo ebaga kede me mino giamia me cam but jo icegun.

Ebaga me Purim



- ²⁰Modekai bin oko wandiko gi kotimere nogi, di eko cwano baluwan but Iyudayan dedede kame bin tie i adulion dedede kame Abaka Sereses pugo, adulion kiyapiyapi kiton me tenge,
- ²¹di ewaco negi pi gwoko buto duwe tomon kiwie ongwon kede tomon kiwie kany me duwe me Adar bala ceng me wei buli mwaka.
- ²²Ceng nogi en kame bin Iyudayan oudo kede wei ki cing jokwor gi. Duwe noni en kame bin oko loko iye cweruncy kede iturur me Iyudayan oko doko kare me ilel kede me yomcuny. Gin bin oko waco negi pi mino kare noni bedo me tedo ibagai kede mino giamia me cam but jo icegun kede but jocan.
- ²³Aso, Iyudayan bin oko lubo kop kame Modekai owaco di kiko donyo tedo ebaga nono buli mwaka bala itok.
- ²⁴Kaman wot ka Kamedata, akwar Agag doko en ngakwor me Iyudayan, bin ouco alulu pi moko ceng me neko Iyudayan; en oudo etimo iik me muducaro gi pi tieko gi pitipit.
- ²⁵Do Esita bin oko ot but abaka di eko kwane pi lako kuo me Iyudayan. Abaka bin oko wandiko cik be iik arac kame Kaman oudo oiko i kom Iyudayan miero kolokere timo i kom en, kede be Kaman kede awobe mege miero kolier gi i gikame kodeo kede jo.
- ²⁶Manono en komio kolwongo ceng me wei nogo be Purim, pien kiyai ki alulu kame bin kolwongo be Purim. Aso, pi baluwa ka Modekai kede pi gi dedede kame bin otimere negi,
- ²⁷Iyudayan bin oko mino manoni obedo bala iswil kame mako gin, ikwae gi, kede ngatamoroni kame bino lokere di eko doko Ngayudaya. Iswil nono waco be buli mwaka i kare kame kotieko moko, ceng are nogi gin kibino gwoko bala kame Modekai owaco.
- ²⁸Ceng are nogi kopoore yutuno di oko gwoko gi i kare me lwak dedede, i diakale dedede, i adulion kede i bomban dedede. Iyudayan likame miero wek gwoko ceng nogi me Purim, akadi ikwae gi da likame miero wek tedo ebaga me yutuno gi.
- ²⁹Abaka adako Esita, nyar ka Abikail, karacel kede Modekai, oko eda wandiko baluwa kame moko kitek kop me baluwa me are kame Modekai oudo owandiko amako Purim.
- ³⁰Baluwa noni bin oko cwano but Iyudayan dedede kame bin tie i adulion tol acel kede ot are kiwie kanyaare (127), kame bin abaka Sereses pugo. Baluwa noni bin kwao ne Iyudayan mulem kede bedo abongo elol moro,
- ³¹kede emio gi cik be gin kede ikwae gi miero kigwok ceng me Purim i kare kame kotieko moko, bala kame gin kitieko gamo kede iswil me kanyo kec kede me koko jo oto. Cik noni Modekai kede Esita en kame bin omio.



³²Cik kame Esita omio en kame bin omoko iswilia me Purim, di oko wandiko en piny i itabu.

Esita 10

Dwongo ka Sereses kede Modekai

¹Abaka Sereses bin oko mino jo kame bedo i piny mere dedede kiton jo kame bin tie bedo i dog name timo tic tetek.

²Gi dedede kame en bin eko timo pi twer kede teko mere, kede itatam dedede amako ruom amalo kame en bin eko mino Modekai, gin dedede kowandiko gi i itabun kame tatamo kop amako abakai me Media kede Pasia.

³Modekai ngat kame obedo Eyudayat en kame bin lubo tien Abaka Sereses. En oudo ebodo dano kame Iyudayan wad gi woro twatwal, doko oudo kimare adikinisel. En ebodo timo teko pi mono bero ne jo mege kede anapakin pi ikwae gi dedede.



Yobu

Yobu 1

Sitani Otamo Yobu

¹Bin tie icuo moro anyinge Yobu, kame oudo bedo i lobo me Us. En oudo ebedo dano kame li kede raco moro doko oudo epoore. Oudo elworo Rubanga doko di egwokere likame etimo gimoro arac.

²En bin eko nywalo awobe kanyaare kede anyira adek.

³Oudo etie kede romini tutumia kanyaare (7,000), aguraguran tutumia adek (3,000), twonin me tic tutumia acel (1,000), pundan tol kany (500), kede jotic atot twatwal. Manoni oko mino Yobu oudo obedo dano kobaro kalamo jo dedede me tetu kide me kunono.

⁴Awobe ka Yobu oudo maro tedo ibagai i ot me ngat acelacel kare i kare di kilere alea; nakanaka oudo kilwongo amiegu gi adek pi ot cam kede amata kede gi.

⁵Ingei ebaga acelacel, Yobu oudo lwongo idwe mege di eko timo pwola me lonyo gi. En oudo eyai odiko di eko mino giayala awanga di lubere kede wel gin dedede; pien oudo en ewaco be, “Cengemogo idwe nango odubo di kiko yamo kop moro arac i kom Rubanga i cuny gi.” Manoni oudo obedo gikame Yobu timo nakanaka.

⁶Ceng moro acel imalaikan oko ot i nyim Rwot, Sitani da oko ot karacel kede gi.

⁷Rwot oko penyo Sitani be, “In iwok ki tuai?” Sitani oko dwoko ne Rwot be, “Ango oudo abedo wire i wi lobo, di aririmo piny tuni tuni.”

⁸Rwot oko penye be, “Ibedo tie kede tam moro i kom ngatic na Yobu? Likame tie ngatamoro i wi lobo kame cal bala en, dano ali kede raco moro doko di epoore, dano alwora di egwokere likame etimo gimoro arac.”

⁹Di Sitani oko waco ne Rwot be, “In iparo be Yobu lworu me nono?”

¹⁰Mam in ibedo gwoke i bad dedede, en karacel kede jo me ode kede jamini dedede kame en etie kede? In imio winyo i kom tice me cinge, di leini mege oko nyai.

¹¹Do ka nan in icwao cingi di iko kwanyo gi dedede kame en etie kede, en ebino waco kope areco i komi i wangi.”

¹²Rwot oko waco ne Sitani be, “Mano ber, aso nan gi dedede kame en etie kede tie i twer ni, kenekene kur itim nen gimoro arac.” Aso, Sitani oko yai kibun Rwot eoto.

Yobu Okei Idwe kede Abar mege

¹³Ceng moro acel di idwe ka Yobu oudo tie camo ebaga i ot me awobi adwong,

¹⁴aor oko bino but Yobu di oko waco ne be, “Twonin oudo tie pur, di pundan camo i nget gi kanono,



¹⁵Jo Seba oko ngoole di kiko yako gin dedede, doko da kiko neneko jotic ni kede epima; ango kena en abwot ine abino waco ni.”

¹⁶Di pwodi oudo etie yamo, ngatic ace oko bobo bino eko waco be, “Mac ka Rubanga owok ki malo di eko wangaro romini kede jotic ni; ango kena en abwot ine abino waco ni.”

¹⁷Di pwodi oudo etie yamo, ngatic ace bobo oko bino di eko waco be, “Jo Kaldea opokere i ikodeta adek di kiko bino kiyako aguraguran kitero, di kiko neneko jotic kede epima; ango kena en abwot ine abino waco ni.”

¹⁸Di pwodi oudo etie yamo, ngatic ace bobo oko bino di eko waco be, “Idwe ni oudo tie camo ebaga i ot me awobi adwong,

¹⁹di yamo atek oko ngoole bino wok ki wi tim, di eko tuturo isondana ongwon dedede me ot, di ot oko poto i kom gi oneko gi; ango kena en abwot ine abino waco ni.”

²⁰Yobu oko yai malo di eko nyinyilo ekanso mere. En eko lielo wie di eko riebere piny eko woro Rubanga.

²¹En ewaco be, “Ango konywala abongo gimoro, doko da kuo na bino yai ki wi lobo abongo gimoro; Rwot en komia, doko da nataman en kame ekwanyo. Poore pak nyinge!”

²²Bed bala gi nogi dedede otimere ne Yobu, do en likame eko timo dub me bunano Rubanga.

Yobu 2

Sitani bobo Otamo Yobu

¹Ceng moro acel imalaikan oudo bobo tie bino cungo i nyim Rwot, Sitani da oko bino karacel kede gi cungo i nyim Rwot.

²Rwot oko penyo Sitani be, “In iwok ki tuai?” Sitani oko dwoko be, “Ango oudo abedo wire i wi lobo, di aririmo piny tuni tuni.”

³Rwot oko penye be, “Ibedo tie kede tam moro i kom ngatic na Yobu? Likame tie ngatamoro i wi lobo kame cal bala en, dano ali kede raco moro di epoore, dano alwora di egwokere likame etimo gimoro arac. Bed bala in oudo isupa i kome, pi kisaro en abongo tien kop moro, do Yobu pwodi oko dong lide alida bedo dano aber.”

⁴Sitani oko dwoko ne Rwot be, “Dano twero jalo gi dedede kame etie kede pi lako kuo mere.

⁵Do ka nan in icwao cingi di iko keto aramo i kome, en ebino waco kope areco i komi i wangi.”

⁶Rwot oko waco ne Sitani be, “Mano ber, aso en nan etie i twer nin, kenekene kur ikwany kuo mere.”



⁷Aso, Sitani oko yai kibut Rwot eoto, di eko coro buge areco i kom Yobu cako ki tiene tuno i wie.

⁸Yobu oko ot bedo i buru me oduru di eko donyo gwenyo kome kede abalatigo.

⁹Dako mere oko waco ne be, “Mam in pwodi itie lide alida be bedo dano aber? Wac kop arac i kom Rubanga iko to.”

¹⁰Do Yobu oko waco ne be, “In itie yamo bala dako angamingo. In iparo be wan opoore gamo bero kibut Rubanga di oko dagi gamo raco kibute?” Bed bala manoni otimere ne, do dog Yobu likame oko yamo kop moro me dub.

Jowot Yobu Obino Nene

¹¹Aso kakame jowot Yobu owinyo kede peko kame ebeo iye, gin kiko riamakin karacel pi ot dino cunye. Jo nogo oudo obedo Elipasi dano me bomba me Tema, Bildad dano me Sua, kede Sopar dano me lobo me Naama.

¹²Di bin gin kinene ki kakabobor, gin likame kiko karuno ngene; do kakame kingee kede, gin kiko donyo koko kitek. Gin kiko nyinyilo igoen gi di kikiro apua i yamo i wi gi malo.

¹³Di do kiko bedo piny karacel kede Yobu pi iceng kede iwor kanyaare abongo yamo ne kop moro, pien gin oudo kineno be can mere dwong twatwal.

Yobu 3

Ingungur ka Yobu but Rubanga

¹I cen mere, Yobu oko woto dwane di eko lamo ceng kame bin konywale iye.

²En ewaco be:

³” Ilam mak ceng kame konywala iye; doko da ilam mak iwor kame koyaca iye!

⁴Poore ceng nono dok colo! Akwao Rubanga atie malo kur eyutuno ceng nono, doko da kur lero bed tie iye.

⁵Poore colo acucucuc mukakino ceng nono; poore idoun ume, doko poore colo nono kel ne ceng nono lwor.

⁶Poore colo acucucuc um iwor nono! Kur mare i kom ceng me mwaka, doko da kur mare i kom ceng me duwe.

⁷Poore iwor nono bed adonge, kur yac atin moro iye, kur ilelem moro me kilel bed tie iwor nono.

⁸Joilam poore lam iwor nono, jo kame tie kede diru me twaruno Lebiatan.

⁹Poore acerin me obai kur wok iwor kame konywala iye; poore edar awalar me piny kwekwe; kom kur piny rui ne,

¹⁰piento en likame egengo toto na yaca, di koto eko genga neno peko.



- 11” Pinyo komio bin likame ato i esawa me nywala, arabo wok ki yi toto na di cunya ko cot?
- 12Pinyo bin kotinga i tien? Pinyo bin komia adoto tuno?
- 13Koto nan atie gira buto piny aling; koto nan atie gira nino; di koto ako wei
- 14karacel kede abakai kede jopug me wi lobo, gin jo konyogao gero amejeko me miere me abakai pirgi;
- 15arabo kede jopug kopong kede saabu, jo kame pongo nyonyo siliba i ude gi.
- 16Arabo pinyo komio bin likame koyika bala atin kame konywalo di otieko to, arabo bala atin kalikame obilo neno wang ceng?
- 17Jo areco jiko tim areco i ates kuno, doko da jo ool udo wei ki kuno.
- 18Ki kuno mabus bedo i mulem karacel, likame doko kiwinyo redo me ngadar mabus.
- 19Jo me ruom amalo kede me ruom apiny tie kuno, doko ipasoi da otieko gonyere ki cing jodongo gi.
- 20” Pinyo en kamio komio lero but ngat ali kede yomcuny, pinyo en kamio komio ngat atie kede cweracuny kuo?
- 21 En edaro to, do likame to bino, en emoe kalamo abar kame kokano.
- 22En elelo kitek, doko etie kede yomcuny kame edonyo i ates.
- 23Pinyo kamio komio ngat kame anyim mere col lero, ngat kame Rubanga otieko lukaro ki bad dedede?
- 24Pien iturur odoko bala cam na, doko acur nakanaka bala pii aony.
- 25Ateteni gikame ango alworo timere na, gikame ango alworo kalamo poto i koma.
- 26Ango ali kede mulem amoto wei, ali kede wei moro, do peko tie meede ameda.”

Yobu 4

Elipasi Owaco ne Yobu pi bedo kede Gen but Rubanga

- 1Di Elipasi dano me bomba me Tema oko waco ne Yobu be,
- 2” Benyo, cunyi bino wang ka ayamo ni kop moro? Likame ango atwero meede ling alinga.
- 3Neningo, in itieko pwonyo jo atot, doko da itieko mino jo atie kede goro oudo teko.
- 4Kope nin okonyo jo koudo gete, doko da iko mino cong agoro odoko tek.
- 5Do nan etuno wang meri da, di in likame iko twero dino cunyi; nan emuli da, di do in wii oko dubere.



- ⁶Mam Iworo kame in itie kede but Rubanga twero mini nwangcuny, doko mam bero nin da twero mini ibedo kede gen?
- ⁷Yutuno kong; ngai kalikame tie kede raco, kame in itieko neno di riamo kede to? Arabo ngai kopooore kame in itieko neno di kongolo kuo mere?
- ⁸Bala kame ango atieko neno kede, jo kame puro dub, kede jo kame cuo peko, gin kikao gi nogo da.
- ⁹Wei ka Rubanga neko gi, mwoc me gero mere muducaro gi.
- ¹⁰Gin kidorano di kingararo bala inguon ager. Do ka Rubanga otuturo lak gi,
- ¹¹gin kiko totoun pi kec, di idwe gi ko sasarun.
- ¹²” Ango atieko winyo kop kame ngatamoro okwalere waco na, eweweo kop nono di yita oko giparo.
- ¹³ Ako bedo kede par i kom gianena nono i dier iwor, esawa kame dano nino di eko alelejun kede,
- ¹⁴Iworo adwong oko maka di koma oko cako miel teltel, di cogere na dedede oko donyo yangere.
- ¹⁵Yamo moro oko kuto nyima, di yer me koma oko sangango pi Iworo.
- ¹⁶Gimoro oko cungo di likame eyangere, do ngeno cal mere oko bwona; oudo atie neno gi nono i wanga. Piny oudo oling titi, di ako winyo dwan kame waco be,
- ¹⁷ Iparo be dano adana twero bedo di epoore i nyim Rubanga? Iparo be jo twero bedo di kicil i nyim Ngacwec gi?
- ¹⁸Akadi ber da Rubanga likame keto gen mere i kom jotic mege me malo; imalaikan mege da en eudo raco i kom gi;
- ¹⁹do ebino udo raco akalamo mago tien adi i kom jo ajoa, gikame kocweo kede elupe, gi me apua kame kotwero nyinyito bala ajekel?
- ²⁰Odiko dano twero bedo kuo, do tuno otieno udo kotieko muducaro en; en eto abongo ngatamoro paro pire.
- ²¹Kotwero kwanyo gi dedede kame en etie kede, di en eko to abongo rieko.’ “

Yobu 5

- ¹Yobu, lwongere nan di iko neno ka ngatamoro oyaro gamo dogi. Malaika mene en kame in iyaro ot bute?
- ²Ateteni cuny me ngoi neko jomingo, nyeko da neko jo akwia piny.
- ³Ango atieko neno jomingo atie kiber, do cucuto ango ako lamo miere gi.



- ⁴Idwe gi likame bedo kede mulem; nakanaka kongolo kop lo gi i ekiko me erute me bomba, di likame ngatamoro ko konyo gi.
- ⁵Jo akec oneko camo cam kame jomingo opuro, gin kikwanyo kiton cam atie i dier okuto; joeranga da mwanao jame gi.
- ⁶Pien can likame wok ki lobo, arabo peko likame tui ki piny;
- ⁷Do konywalo jo anywala i peko, bala kame ateteni mac kire kede malo.
- ⁸” Koto di oudo ango inonono, koto amo kakame Rubanga tie iye, koto atero koko na bute.
- ⁹En nakanaka etimo jamini adongodongo kalikame niangere, en etimo jamini me aura kalikame marere.
- ¹⁰En nakanaka emio kot cwei i wi lobo, eko cwano pii i poti;
- ¹¹jo me ruom apiny en etingo gi i kabedo amalo, kede jo kame tururo en emio gi kuo aber.
- ¹²En etotolo iik me jongolrieko, tetekeny gikame kitimo kur cobere kakare.
- ¹³En emio jongolrieko moko i owic me rieko gi, doko da en esusunyo jiko iik gi.
- ¹⁴Gin piny doko col negi iceng, di kiko donyo tiamtiam i dier iceng ineno bala iwor.
- ¹⁵Do en elako jo kame piny oloo ki to, elako gi ki cing jo atek.
- ¹⁶Manono mio jocan bedo tie kede gen, di oko mino tim areco jik.
- ¹⁷“Etie kede yomcuny ngat kame Rubanga bitaro; pi manono, kame Won Twer obitaro in kur ibed kede acae iye.
- ¹⁸ Pien Rubanga mio dano apore, do en eko tweno apore nono; en ejuto dano, do cinge ko cange.
- ¹⁹Rubanga bino laki ki peko, en ebino laki tien kede tien ki peko ni.
- ²⁰I kare me kec en ebino gwoki likame ibino to kec, i kare me yi en ebino gwoki likame koneki.
- ²¹Rubanga bino laki ki kope areco me jo yamo i komi, doko likame ibino bedo kede lworu ka can moro ongoole.
- ²²In ibino nyero kame can moro amoto kec opoto, doko likame ibino lworu leini me obar.
- ²³Pien poto kame in ibino puro likame bino bedo tie kede kide, doko da leini ager me obar likame bino suri.
- ²⁴Di do in iko bino ngeno kiber be mulem tie i eema nin; kame ingingico romini ni, ibino udo be gin dedede kitie kiber.



²⁵Ibino bedo tie kede ikwae atot, jo konyai kibuti bino bedo tot bala lum.

²⁶Ibino to di itieko ti kiber, bala kame wit kal cek kede i poto di oko tere i diakal me pieto ka kare mere oromo.

²⁷Neningo, wan otieko mono ateni me kop noni; etie kop me ateteni; aso winye iko game.”

Yobu 6

Yobu obedo kede Koko pi Can mere

¹Yobu oko dwoko be,

²” Ka koto di oudo wangcunya twero pimere i misani, arabo ka koto di oudo can kame atie kede twero pimere,

³koto kipek kalamo asinge me nam; manono en oko mina acoro yamo kamano.

⁴Pien Won Twer ocoba kede imalia mege kimomoko i koma, kwir gi osarakin i koma. Rubanga otieko iikere pi sura kede gikame kelo na lworu.

⁵” Iparo be punda me obar kok kame etie camo lum? Arabo iparo be twon romo kok kame komie cam?

⁶Iparo be kotwero camo gi abot abongo keto munyo iye, arabo iparo be kakatar me abe twero bilere bedo mit?

⁷Ango ali kede imue me akodi cam nogo, doko gi dedede me ango acamo mia tuwo.

⁸” Okwe koto Rubanga omia gikame akwae, koto emia gikame cunya mito.

⁹Koto Rubanga cunye obedo yom kwanyo kuo na, koto erieo bade di eko coto cunya!

¹⁰Manoni koto okweo cunya; ango koto alelo akadi di atie kede lito arom nadi; pien likame ango atieko dagi kop ka Ngat Kacil.

¹¹Teko na tie tuai me meede bedo kuo? Ajikini me kuo na bino bedo nyo me wek adire kure?

¹²Iparo be teko na rom kede teko me engaro? Arabo iparo be koma obedo nyonyo buronsi?

¹³I ateteni likame ango atwero konyere kena, doko likame tie kakame atwero udo kiye kony.

¹⁴” Ngat kame dagi nyuto ne ngawote kisa udo edagi bedo kede lworu but Won Twer.

¹⁵Jowota tie kede angalo buta bala isamai, bala isamai apong di kiko tuo ka ceng orieny.

¹⁶Isamai nogi akako yuikino pii gi, pii gi doko col pi akako aloi.

¹⁷I kare me oro gin kidwono; kame lieto obino gin kirwenyo.



¹⁸Jo kame ringo kede asigiran weko yongayo gi di kiko parao wapo isamai nogo; gin kiko ot paka i wi tim di kiko totoun kuno.

¹⁹Jo kame ringo kede asigiran kowok ki Tema mo gi, jo kame wok ki Seba keto gen gi i kom gi,

²⁰i cen mere gin kibedo kede wangcuny pi gen gi nono, pien ka kituno kunono di likame kiko udo pii, wi gi ko cungo.

²¹Nan wun icalunu na bala isamai nogo; inenunu can na di ikounu doko lwor.

²²Benyo, oudo akwao wu be imianu giamia moro? Arabo oudo akwao wu be ikwanyunu abar wu iwilunu kede ngatamoro pi konya?

²³Benyo, oudo akwao wu be ilakanu ki cing jokwor na? Arabo be iculunu cul moro but jo kame tidilo ango pi gin weka?

²⁴” Aso pwonyanu, ango ayaro ciko yita, mianu aniangi gikarac kame atimo.

²⁵Kope me ateni donyo i cuny dano tin benyo! Do itienun ronkino ango pi kop nyo?

²⁶Iparunu be wun itwerunu riena, ineno bala kope nango kony gi li?

²⁷Wun itwerunu da uco alulu pi tero atin kic, doko da itwerunu ipatan pi cato ngawotu.

²⁸Nan do timunu ber inenunu wanga, ango likame abino waco ne wu kop moro me abe.

²⁹Lokunu tam wu do, akwao be kur bobo itimunu raco moro; nan do lokunu tam wu, ango gira ali kede raco moro.

³⁰Benyo, tie kop moro me abe kame leba owaco? Mam ada atwero ngeno poko bero kede can apoto ne dano?

Yobu 7

¹” Mam kuo ka dano i wi lobo rom aroma bala tic kame kodio iye sirikale, doko da mam ceng me kuo mere cal acala bala me epakasit?

²Kuo adano cal acala bala epasoit atie mono tipo angic, kede bala jotie atie daro cul gi;

³aso ango kotieko mina dwete me kuo akony mere li, doko kotieko mina iwor atos me cweruncy.

⁴Ka aoto buto, aparere be ayaro yai ki kabuto awene, doko likame piny ru na sek; ako donyo lokulokun i kabuto paka obai.

⁵Kudilinge kede cilo omwono koma; koma tuo di eko donyo yeyecun.

⁶Ceng acelacel me kuo na dwir twatwal, ceng acelacel kato abongo ango bedo kede gen moro me udo yoto.



- 7” Yutuno be kuo na cal bala wei awea; ango likame bobo abino neno bero moro.
- 8Nataman in itie nena, do likame bobo ibino nena; wangi bino ngico yora, do ango udo gira atieko doko li.
- 9Bala kame edou sarkin kede di eko rwenyo, kamanono da jo kaoto kabedo me jo oto likame dwogo;
- 10likame doko kidwogo i ude gi, doko da jo kame lem kibedo kede gi wi gi wil i kom gi.
- 11Pi mano, likame ango abino ling alinga! Abino yamo pien atie kede cwercury; abino woto ingungur na pien cunya owang.
- 12” Pinyo komio ibedo dara adara esawa dedede? Iparo be ango adoko twol kiyiliyili me nam?
- 13Ka ango awaco be, ‘Ka abuto i kabuto na, cunya ber bino kwei, ka ariere, abino ber udo alakanar moro, ‘
- 14do in iko lokere kelo na lek areco me lworu; ilokere kelo na gianyuta kame mia lworu;
- 15manono ko mino cunya paro be koto ngatamoro odea gira, cunya paro be koto ato gira akaka koma neno can iepone noni.
- 16Atieko dagi bedo kuo, likame doko amito bedo kuo nakanaka. In wekango gira, pien ceng me kuo nango cal acala bala wei.
- 17 “Dano adano obedo nyo komio in ibedo kede tam atek ateka i kome? Pinyo komio ibedo keto cunyi i kome?
- 18Pinyo komio ibedo mamano en buli odiko, di itame buli esawa?
- 19Benyo, likame ber itwero weko ngoloro ango pi esawa atitidi, di ber iko weka amwony lau?
- 20Ka pi dub, atimo ni nyo arac, in ngat kame iciko wangi i kom jo? Pinyo komio imia adoko giri me alata? Pinyo komio ango atie nin bala yec apek?
- 21Pinyo komio likame isasiro dub na di iko kwanyo tenge gikareco na? Aso ango ayapuno gira ot buto i ates; in ibino mona, do ango abino bedo li.”

Yobu 8

Kope me Agege kame Bildad Odwoko ne Yobu

- 1Bildad dano me Sua oko dwoko be,
- 2” Iyaro tero kare arom amene yamo kope nogi, kope ni acal bala yamo abuko kitek nogo?
- 3Mam Rubanga ngolo kop i ateni? Doko da mam Won Twer timo gikame tie kakare?



- ⁴Ka idwe ni oudo odubo bute, en do etieko mino gi alola di lubere kede gikareco gi.
- ⁵Do ka nan in ilokere but Rubanga di iko cwano kwac ni but Won Twer,
- ⁶ka in ibedo ngat acunye cil di ipoore, ateteni Rubanga bino konyi di eko bino dwoki i cal kame ngoce itie iye.
- ⁷Gikame ngoce itie kede oudo nonok ka koporo gi kede gikame ibino udo i anyim.
- ⁸” Ber kong pepenyo kop i kom lwak me kare kokato di iko bino udo gikame joakwari wa bin osiyao;
- ⁹prien wan obedo idwe me nyoronyoro ni, doko likame ongeogimoro; ceng me kuo wa i wi lobo cal bala tipo me yat.
- ¹⁰Gin kibino pwoyoni rieko kame gin kiudo; kibino waco ni kope me niang atut kame gin kitie kede.
- ¹¹Benyo, aladoi twero dongo kakame osamai li kiye? Arabo bilo twero dongo kakame pii li kiye?
- ¹²Ka pii li, gin kisunyo tuo kalamo yen dedede di udo pwodi kititino likame kiromo atonga.
- ¹³Magonogi en gikame timere ne jo kalikame paro pi Rubanga; gen me jo kalikame paro pi Rubanga bino doko li.
- ¹⁴Gen gi cal acala bala ausi ayoyom, gikame kiketo iye cuny gi pirisar bala bwoi me otiemotiem.
- ¹⁵Ka dano ogongere i bwoi me otiemotiem nono, en ecocotun; ka dano omake, likame doko edong di etie.
- ¹⁶” Jo areco cal bala giapita kame dongo libaliba di pwodi ceng li, di kiko lot kiumo poto.
- ¹⁷Aliasin gi ko dwadwalun i kom ingaroi, di kiko moko i kom kide.
- ¹⁸Ka koputo gi ki kargi, kargi nono bino kwina gi di ewaco be, ‘Ango pwodi gira likame aneno wu.’
- ¹⁹Manoni en akodi yomcuny me jo areco tie kede; jo areco ace pwodi bino di lunyo wang gi.
- ²⁰” Do neningo, likame Rubanga bino dagi dano ali kede raco moro, doko da likame ebino konyo jo areco.
- ²¹En ebino mini inyero bobo, di iko ilelem kede kilel.
- ²²Rubanga bino mino lewic mako jo adagi, di eko bino dudubo miere me jo areco.”

Yobu 9

Kop kame Yobu Odwoko



- ¹Yobu oko dwoko be,
- ²” Cite ango angeo be manono tie kop me ateni; do dano adana twero lono pido i nyim Rubanga benyo benyo?
- ³Ka dano mito piem kede, en etwero penyo ngat nono peny tutumia acel di likame eko twero dwoko akadi acel da.
- ⁴Rubanga riek twatwal doko etie kede twer; ngai kotieko timo ne epali di oko bwone?
- ⁵En ngat kame enyiko mori abongo gin ngeno, en etukumaro gi ka edoko ger.
- ⁶En eyayango lobo lung, di eko mino ipirin kame gango wi lobo kom gi miel.
- ⁷En etwero gengo ceng wok, doko da etwero mwono wang acerin di eko gengo gi rieny.
- ⁸En bin eyararo malo en kene di eko donyo pugo name.
- ⁹ En kame ecweo acerin kocokere me tetu malo, acerin kocokere apimere i wi wa malo, kede acerin kocokere me tetu piny.
- ¹⁰En nakanaka etimo jamini adongodongo kalikame niangere, en etimo jamini me aura kalikame marere.
- ¹¹” Neningo, Rubanga beo i ngeta do likame ako twero nene, eoto paka kato abongo ango ngeno.
- ¹²En ekwanyo gimoro abongo ngatamoro genge. Ngai kame twero penye be, ‘Itie timo nyo?’
- ¹³Rubanga likame kweo gero mere; en bin emio jo kame konyo Rakab oriebere piny i nyime.
- ¹⁴Nan ango atwero do dwoko doge benyo, arabo mono kope kame apoore dwoko ne?
- ¹⁵Akadi bed bala ango ali kede raco moro, likame ango atwero dwoko doge; ango miero akwai ngangolkop tima kisa.
- ¹⁶Akadi ka koto alwonge pi pido keda di eko yei, aparo be cengemogo likame eyaro yei winyo kop na.
- ¹⁷En etoja kede twon yamo abuko di ger, di eko pongo aporeso i koma abongo tien kop moro.
- ¹⁸En likame etwero mina kare me wei, do emia bedo kede wangcuny nakanaka.
- ¹⁹Ka pi kop amako teko, en etek ebwona! Ka awaco be apide, ngai katwero lwonge i pido?



²⁰Akadi bed bala ali kede raco moro, do kope awok ki dogo en kame koyaro ngolo na iye kop; akadi bed bala ang'o ali kede raco moro, do en pwodi eyaro twero nyuto raco na.

²¹Ango gira ali kede raco moro, do likame ang'o aparo. Likame kom cunya mito bala koto abed kuo da.

²²Ango awaco be, pwodi ecal acala; pien Rubanga muducaro jo ali kede raco moro karacel kede jo areco.

²³Ka can moro ongoole neko dano moro ali kede raco, Rubanga gire dong nyero anyera i kom peko me dano ali kede raco.

²⁴Rubanga omio lobo i cing jo areco; en eumo wang jongolkop dedede omio likame kingolo kop i ateni. Ka likame en inonono, ngai do en kotimo?

²⁵” Ceng me kuo na dwir kalamo ngaringo; gin kiringo kikato abongo neno bero moro.

²⁶Ceng me kuo na ringo bala yee adwir, kidwir bala ekokom atie ringini piny mako winyo me acama.

²⁷Ka awaco be, ‘Wia ber bino wil kede koko; abino ber weko ibutur di ako bedo kede yomcuny, ‘

²⁸do can kame atie iye pwodi dwogo ko dubo wia, pien ang'o angeo angea be Rubanga likame bino tero be ang'o ali kede raco moro.

²⁹Ango angeo angea be en eyaro ngolo na kop be arac; gikame miango doko acane bako dogo li.

³⁰Akadi alwokere kede pii acil benyo, akadi alwok cinga kede sabuni acal nadi,

³¹do en pwodi eyaro rwaka i bur me cwoto, di igoen na da ko ringa.

³²Pien likame en ebedo dano adana bala ang'o me wek adwok doge; me wek koto apid kede.

³³Likame tie ngatamoro kame twero ngolo kop i diere nango kede en, ngat kame koto tie kede akarunikin i kom wan are nogi dedede.

³⁴Ka koto en ekwanyo ebela mere tenge kibuta, di eko weko mina lworu,

³⁵koto ang'o ayamo abongo bedo kede lworu bute, pien likame ang'o atie kede raco bala kame en eparo kede.

Yobu 10

¹” Likame kom cunya mito bala koto abed kuo da; ang'o abino woto ingungur kame ang'o atie kede i kom Rubanga; abino yamo kede wangcuny.



- ²Abino waco ne Rubanga be, kur ingol na kop be arac; mia angei gikame itie pida iye.
- ³Benyo, in ineno eber nin kame itie tidilo ango, di icao gikame cingi en kocweo, di iko lokere bedo kede yomcuny i kom tice me jo areco?
- ⁴Benyo, ida wangi cal bala me dano? Ida ineno pinyo bala kame dano neno kede?
- ⁵Benyo, ceng me kuo ni rom kede me ka dano, arabo mwakini me kuo ni rom kede mege?
- ⁶Do pinyo komio in itie mono gikareco na, doko imito ngeno dub na,
- ⁷bed bala in ingeo be ango ali kede raco moro, doko da likame tie ngatamoro kame twero laka ki cingi?
- ⁸” Cingi en kocwea, do nan doko ilokere mito neka.
- ⁹Yutuno be in icweango bala cweno agulu kede elupe; benyo, nan doko imito dwoka adoko apua?
- ¹⁰Mam in en ionya i yi toto na bala cak di ako lulungun bala cak korurano?
- ¹¹In iko ngapa kede delkom kede ringokom, di iko dudupo na cogere kede amorito.
- ¹²In itieko minango kuo kede amara kalikame lokere, doko da ibedo gwoko kuo na.
- ¹³Bed bala kamano da, in ibedo mungo gikame iyaro timo na; ango angeo be in oudo itieko iiko be:
- ¹⁴wangi bino bedo bit i koma pi neno ka adubo, tetekeny iko dagi sasiro ango.
- ¹⁵Ka adubo, udo amo can i koma kena; ka atimo gikaber, ayaro bedo luruluru, pien lewic opong i wanga, doko da peko oromo koma.
- ¹⁶Ka ango atimo gimoro akelo na ewaka, in icako dwara bala engu; imedo ameda timo giaura me awanon i koma.
- ¹⁷In isura kare i kare; ibedo medo ameda gero ni i koma; nakanaka icwao na peko anyen bala isirikalen apwodi kokelo nyen.
- ¹⁸” Pinyo kara komio iwota ki yi toto na? Koto bin ato gira di pwodi ngatamoro likame onena.
- ¹⁹Koto bin ayai ki yi toto na di ako kato akata i ates, di ako dong bala ngat kalikame obedo tie.
- ²⁰Mam ceng me kuo na odong nonok? In wekango do ber, tetekeny abil ber wei moro atitidi
- ²¹di pwodi likame aoto i lobo kalikame bobo abino dwogo kiye, en lobo imumusit di ecucucuc;



²²en lobo komumuso, acucucuc di gi dedede ototolun iye, kakame lero mere cal acala bala colo.”

Yobu 11

Kop me Agege kame Sopar Odwoko ne Yobu

¹Di Sopar dano me Naama oko dwoko be,

²” Benyo, twon kop arom kano twero kato akata di likame koyamo iye gimoro? Doko da ka dano oduro kop adura, iparo be kotwero waco be eli kede raco moro?

³Iparo be reberebe me dogi poore mino jo apat lingi? Ka in iyamo anywar anywar, mam kur do ngatamoro mi lewic maki?

⁴Pien in isidiko be tam nin tie me ateni, doko ibedo dano acil i nyim Rubanga.

⁵Do koto Rubanga yei yamo, di eko yamo kedi,

⁶koto ewaco ni mung amakere kede rieko. Pien rieko kotwero neno i yote atot. Pi mano, miero ingei be Rubanga tie mini alola anonok kalamo kame oudo in ipoore udo.

⁷” Iparo be in itwero mono di iko udo gikame niang iye tek i kom Rubanga? Iparo be in itwero udo ajikini ka Won Twer?

⁸Ebor kalamo malo, nyo kame in itwero timo iye? Etut kalamo kabedo me jo oto, nyo kame in itwero ngeno iye?

⁹Epimere eko bedo bor kalamo wi lobo, doko elac kalamo nam adwong.

¹⁰Ka Rubanga obino di eko maki di eko pidi, ngai kame karuno genge?

¹¹Pien Rubanga ngeo jo kame kony gi li; ka en eneno gikarac, mam eketo tam mere iye?

¹²Do dano aming bino doko riek kame punda me obar onywalo dano.

¹³” Do in, Yobu, temuno cunyi, cwai ilega but Rubanga.

¹⁴Ka lem ibedo dubo, uce do kakabor, doko kur iyei ne tim moro arac bedo i odi.

¹⁵Di do iko bino tingo wi malo abongo lewic moro; iko bino udo tekcury di iko bedo abongo lworo.

¹⁶Di wii ko bino wil kede peko ni bala pii kotieko mol.

¹⁷Kuo ni ko bino rieny bala ceng arieny i dier iceng; colo mere bino bedo ler bala obai.

¹⁸Ibino giri bedo abongo lworo, pien udo itie kede gen; kobino gwoki di iko wei mot.

¹⁹In ibino ot buto di likame ngatamoro ko mini lworo; jo atot bino mito bero moro kibuti.



²⁰Do jo areco wang gi likame bino twero neno gikame ber, kibino rwenyo yote dedede me bwot, gen kame gin kidong kede kenekene en to.”

Yobu 12

Kop kame Yobu Odwoko

¹Yobu oko dwoko be,

²” Ateteni wun ibedunu dwan jo, ka itounu udo itounu kede rieko.

³Do ada atie kede ngec arom aroma kede meru; wun likame iloanu. Iparunu be tie ngatamoro akwia gikame wun iwacunu nogi?

⁴Ango do atieko doko gi me anyera but jowota; ango ngat kame bin alwongo Rubanga di en eko gamo dogo, ango ngat kopooore doko ali kede raco moro, adoko do gi me anyera.

⁵Jo ali kede peko cao jo atie i can, kimedo peko ne jo kame tie neno can cuto.

⁶Do miere me joyak tie i mulem, doko da jo awango cuny Rubanga bedo abongo lworu moro, gin jo kame rubanga gi obedo teko gi.

⁷” Do ber peny leini, di gin kiko bino pwonyo wu; peny winy me wi yamo, di gin kiko bino waco ne wu;

⁸peny yen me wi lobo, di gin kiko bino pwonyo wu; doko da peny aporogo me nam, di gin kiko bino tuco ne wu.

⁹Ngai kikom gin dedede kalikame ngeo be Rwot en kotimo manoni?

¹⁰Kuo me gi akuo dedede tie i cinge, doko da wei me dano tie i cinge.

¹¹Mam yit dano ngeo poko kope adonyo iye, bala kame leb dano da ngeo bilo kede cam?

¹²” Rieko lubere kede cato me dano, doko da niang lubere kede ceng me kuo ka dano.

¹³Rubanga tie kede rieko kede teko; en etie kede tam kede ngec atat.

¹⁴Ka en etuturo, likame tie ngatamoro atwero gero bobo; ka en ecego dano i ot, likame tie ngat atwero yabe.

¹⁵Ka en egengo kot, piny tuo; ka en ecwao kot, pii lamar i wi lobo.

¹⁶” Rubanga tie kede teko kede rieko; joangalo kede jo kame kingalo dedede tie i twer meren.

¹⁷En etero tenge jo kamio tam di etieko kwanyo rieko gi, di eko mino jopug doko bala jomingo.

¹⁸En egonyo ausi kame abakai ngapo pi nyuto twer gi, di eko lunyo rwano i pier gi igoen me ipasoi.



¹⁹En etero josaseredoti tenge di etieko kwanyo rieko gi, doko da eko mano twer me jopug atek.

²⁰En etwero tieko kop me ayama ki dog jo kame kogeno, di eko kwanyo rieko me poko bero kede raco kibun joadongo.

²¹En etwero kelo acae i kom jopug, doko ekwanyo teko me jo atek.

²²En enyuto mung kopwono kakacol, doko emio kakacol cucucuc doko kakaler.

²³En etwero mino atekerin doko tek, di eko muducaro gi; etwero mino atekerin nyai, di eko sasaro gi.

²⁴En etwero kwanyo rieko kibun jotel me wi lobo, di wi gi ko totolun bala jo atie mono yongayo i wi tim.

²⁵Gin kirarapo piny i kakacol cucucuc di kigete bala jo omer.

Yobu 13

¹” Neningo, wanga otieko neno mago dedede, yita otieko winyo mago dedede di ako niang iye da.

²Gikame wun ingeunu ango da angeo; likame iloanu.

³Do ango amito be ayam kede Won Twer do weko wun; ango amito be apid kede Rubanga.

⁴Do wun iumunu ateni kede kop me abe; wun dedede ibedunu imuroko akony gi li.

⁵Ka koto oudo ilingunu alinga, koto jo oneno wu bala jo ariek.

⁶” Winyunu kong pido na, cikunu yitu ber iwinyunu piem awok ki dog.

⁷Iparunu be itwerunu yamo kop me abe pi timo ne Rubanga bero? Iparunu be angalo wu twero kelo ne en bero?

⁸Mam iyarunu cungo ne en? Mam iyarunu pido pire?

⁹Ka koto Rubanga ongingico kuo wun kiber, iparunu be koto eudo wun ibecunu? Arabo iparunu be itwerunu ngale bala kame dano ngalo kede ngat ocelu?

¹⁰En eyaro bunano wu, akadi bed bala ikanunu apokapoka atie i cunyu.

¹¹Mam dwongo mere bino mino wu lwo, di komu ko donyo miel amiela?

¹²Agole wu kony gi li bala buru, piem wu cal acala bala ebuku kame kotimo kede elupe.

¹³Lingunu di ikounu mina kare me yamo, di do gikame mito timere na ko timere.

¹⁴Ango atieko yei jalo koma, ayei pi cano kuo na.

¹⁵Nenunu, en ebino neka; ango ali do kede gen moro; do ango ayaro pwodi pido pira kamanono.



- ¹⁶Nwangcuny na bino mina abwot, pien likame tie dano moro arac kame yei piem kede Rubanga.
- ¹⁷Cikunu yitu kiber iwinyunu kope na, miunu gikame atie waco dony i yitu.
- ¹⁸Ango atieko iiko pido na; ango angeo kiber be kobino wuda abongo raco moro.
- ¹⁹” Ngai kabino piem i kom pido na? Ka tie, ango ayei pi ling alinga, doko ayei to da.
- ²⁰Rubanga, likame ango abino pwono ki wangi ka in imia jamini are gi:
- ²¹wek mina neno can, doko da wek mina bedo kede lworu.
- ²²Di do in iko cako yamo, di ango ako dwoko, arabo ango en ayami, di in iko dwoko.
- ²³Tien adi en kame ango adubo kede? Mia angei gikareco na.
- ²⁴” Pinyo komio ikano na wangi, di iko donyo tera bala ngakwor ni?
- ²⁵Mam ibino mina lworu, ango ngat arom aroma kede boke kame yamo tero? Kom itie riamere kede cucung acucung.
- ²⁶Pien itieko wandiko twon kope areco i koma, itie culo kiton gikareco kame oudo atimo di pwodi atitidi.
- ²⁷ In itweo tiena kede eriko, itie ngina i kabedo dedede me abeo iye, doko da tic ni en ngino kakame tiena nyono.
- ²⁸Imia atieko doko cal acala bala yat otop, acal do bala ekoti me ajekel otieko tutuco.

Yobu 14

- ¹” Dano kame dako onywalo ceng me kuo mere nonok, doko peko mege tot.
- ²Kuo mere cal bala ature kame tuuro di eko ner; en likame ebedo pi kare alac, do ebunyo rwenyo bala tipo me yat.
- ³Rubanga, benyo, kom in iciko wangi i kom ngat acal kamanono? Arabo benyo, ibino pida di iko ngolo na kop?
- ⁴Ngai kame twero woto gimoro acil ki gi komunaun? Likame tie ngatamoro akadi acel.
- ⁵Bala kame itieko moko kede ceng me kuo ka dano, doko da in ingeo dwete mege me bedo kuo, kede da itieko giro ikor kame ngat acelacel likame bino ngolo,
- ⁶kong do lok wangi tenge kibute di eko udo wei moro, me wek eud yomcuny moro i atiekini me ceng acelacel bala epakasit.
- ⁷” Tikatika yat kame kotieko tongo da pwodi tie kede gen, kame kotonge, en ecako lot, pote mege meede lot ameda nakanaka.
- ⁸Bed bala aliasin mege twero ti, di isiki mere ko top i lobo,



- ⁹do tek ka kot omule, en elot bobo bala yat apwodi titidi.
- ¹⁰Do dano to di do teko mere rwenyo; cuny dano cot di do en eko beo tuai?
- ¹¹Bala kame pii dwono kede i nam, kede bala kame ecilet tuo kede,
- ¹²kamanono da, dano to di likame bobo eko yai; bala kame malo bedo kede nakanaka, kamanono da likame en ebino bobo cei, en likame bobo ebino cei ki wang nino mere.
- ¹³Cunya paro be koto oudo ikana i kabedo me jo oto; koto iuma tuno di gero ni otiek, koto iko moko kare kame apoore tieko kuno, di iko yutuno ango.
- ¹⁴Iparo be ka dano oto, ebino kuo bobo? Koto ango akanyakino kuro i kare me tic na, koto akuro paka tuno ceng kame kogonya kede.
- ¹⁵Koto in iko bino lwongere di ango ako gamo dogi, di iko bino paro pi nena, ango tic me cingi.
- ¹⁶Di do in iko bino donyo ngina i kabedo dedede kame ango aoto iye, do likame ibino donyo kina pi neno dub na.
- ¹⁷Di in iko bino kano dub na bala gikame kotweo i epuko, iko bino umo raco na.
- ¹⁸” Do mori tiatiaun di kiko tiek, kide da nyikere tenge ki kargi;
- ¹⁹pii amol goro lela, doko kot da molo lobo; epone nono en kame in ikwanyo kede gen ka dano.
- ²⁰In ibwone nakanaka tuno en to; imio to loko cal me nyime, di iko cwane tenge.
- ²¹Idwe mege twero doko jo kame koworo, do likame en eko ngeno; akadi kame komio gi lewic, likame en etwero ngeno.
- ²²En ebedo winyo lito me kome kenekene, di etururo parere pire kene.”

Yobu 15

Yamo ka Elipasi me Are

- ¹Di Elipasi dano me bomba me Tema oko dwoko be,
- ²” Benyo, dano ariek twero yamo atatai kamano, di eyamo kope adwong gi li?
- ³Benyo, epoore piem atatai, arabo yamo kope kalikame tie kede kony moro?
- ⁴Neningo, in itie mino jo weko bedo kede lwooro but Rubanga; itie gengo jo lego Rubanga i cuny gi.
- ⁵Pien kop awok ki dogi nyuto raco ni, in itie tic kede leb me dano angangalo jo.
- ⁶Kope nin en atie ngolo ni kop, do likame ango; kope ayai ki dogi en amio ijura i komi.



- 7” Benyo, in ibedo dano kame konywalo me agege? Benyo, oudo in itie di pwodi likame kocweo mori?
- 8Benyo, in itieko bilo winyo kop i kansulo ka Rubanga? Mam in igeno be in keni en iriek?
- 9Nyo kame in ingeo kame wan okwia? Nyo kame in iniang iye do di wan likame oniang iye?
- 10Ngat alwar omako wie kede dano oti tie i but wan, gin kiti kalamo kiton papa nin da.
- 11” Benyo, kweicuny ka Rubanga tie mini likame tie romi? Wan owaco ni kope mege kede mwolo.
- 12Pinyo komio cunyi tie miel, doko pinyo komio itie memelo ne wa wangi?
- 13Pinyo komio gero maki i kom Rubanga di iko mino kope acal kamago wok ki dogi?
- 14 “Dano obedo nyo kamio etwero bedo di ecil? Dano kame dako onywalo likame twero bedo di epoore.
- 15Rubanga likame geno kiton imalaikan mege da, doko da likame malo cil i nyime;
- 16do ebino timo kamanono tien adi i kom dano ngat komunaun bala gi me kwere, ngat kame timo gikarac bala mato pii!
- 17Winyingo, ango amito waco ni, ango abino mini ingeo gikame aneno,
- 18gikame jo ariek owaco, gi kalikame joakwari gi bin omungo.
- 19Gin nogo en kame bin komio gi lobo kame kocikere pire, di likame ngakumbor moro oko beo i diere gi.
- 20” Ngat arac dinyo kede aramo ceng me kuo mege lung, manoni meede pi mwakini dedede me ngagero kuo kede.
- 21Dwan akelo lworu dwilao i yite, joyak sure i esawa kame etie kede i mulem.
- 22En eli kede gen me bwot ki colo, pien kotieko iiko ne to me epima.
- 23En ebedo rimo pinyo mono cam di epenyere be, ‘Etie tuai?’ En engeo be to oyapuno potu i kome;
- 24par adwong mie lworu di ko bwone bala abaka koikere pi yi.
- 25Etie kamanono pientu en erieo cinge yi kede Rubanga, en ebedo suk i kom Won Twer,
- 26di eringo epali epali ot yi kede, di emako twon ebuku apek.
- 27En etimo kamanoni bed bala ecwe mo omwono nyime, pieru da omwonere kede mo.



- ²⁸En ebino bedo i bomban kame koweko, i ude kalikame ngatamoro poore bedo iye, i ude kame bino doko amejeko.
- ²⁹En likame ebino baro, doko abar mere likame bino bedo nakanaka, doko da jame kame etie kede likame bino nyai i lobo.
- ³⁰En likame ebino bwot ki to; ebino bedo bala yat kame mac owango pote mege, di wei ka Rubanga ko bino buke tenge.
- ³¹En kur egen buo ngor, pien kobino cule kede buo ngor.
- ³²Kobino mine cul mere dedede di pwodi kare mere likame otiek, ebino tuo bala ajange me yat di likame eko bobo lot.
- ³³En ebino bedo cal bala olok me anyakini mege ony di pwodi likame kicato; ebino bedo bala yat olibeti aonyo ature mege.
- ³⁴Pien jo kalikame paro pi Rubanga bino to abongo ikwae, doko da mac bino wango miere kame kigero kede sente me cemusana.
- ³⁵Gin jo kame kitie kede iik akelo peko di kitimo gikareco, doko da di cuny gi opong kede angalo.”

Yobu 16

Yobu Omedo Moko be Raco mere li

- ¹Yobu oko dwoko be,
- ²” Ango atieko winyo kope atot acal kamago; wun jokweicuny amedo ameda kelo peko.
- ³Benyo, kope ni kame iraco akony gi li nogo likame jik? Arabo nyo atie rami komio itie meede ameda yamo?
- ⁴Koto di komu inononi, koto di itienu i ekite kame ango atie kede, koto ayamo kope atot i komu. Koto ayayango ne wu wia kede kisa.
- ⁵Koto kope awok ki doga omio wu nwangcuny, koto kope na okwanyo aramo wu.
- ⁶Akadi ka ayamo, aramo na likame kwei, doko da akadi aling alinga, iparunu be aramo noni weka?
- ⁷Ateteni Rubanga otieko teko na, etieko joe na dedede.
- ⁸En etieko ridakino ango, manoni tie bala ijura anyuto raco na; emia ajony adong cogere kenekene, manoni da nyuto raco na.
- ⁹” Cunye daga; enyinyilo ango pi gero mere; emwodo lake i koma pi nyuto gero mere; epedo wange me adagadaga i koma.
- ¹⁰Jo junye na, kibabapo lema anywar anywar; kicokere cako yi i koma.
- ¹¹Rubanga ojala but jo kalikame paro pire, emia i cing jo areco.



- ¹²Ango gira oudo atie bedo i mulem, do Rubanga oko nyinyito ango; en emako nguta eko reta di ako ngingidun. Eloka adoko gi mere me alata di epwonyere lato tong;
- ¹³ebedo lato na tongini ki bad dedede. Ecobo engalur na paka belo di likame kisa oko make keda da; etuco epiu na oko ony piny.
- ¹⁴En eruruco wanakino ango; eringini i koma bala sirikale atie yi.
- ¹⁵” Akuo ipukoi atie ngapo di atururo, nan abedo i apua kop obwona atwal atwala.
- ¹⁶Nan akok do paka wanga bokere, di del wanga oko doko col,
- ¹⁷bed bala ango ali kede tim moro me gero, doko da ilega na cil.
- ¹⁸” Okwe lobo, kur imung remo kame ango aonyo; kur iwek koko na kei akea.
- ¹⁹ Akadi nan da, mujura na tie malo, ngat kame pido pira tie kuno.
- ²⁰Ngat kame cungo pira obedo ngawota; ango aonyo pigewanga but Rubanga.
- ²¹En ebino pido pira but Rubanga, bala kame dano timo ne kede ngawote.
- ²²Pien ango adong kede kare acecek, di ako bino yai lubo yongayo atera kakalikame bobo atwero dwogo kiye.

Yobu 17

- ¹” Cunya otieko kwanyere, ceng na otieko tuno, ates tie cuto kura.
- ²Ateteni jo atie nywara oluka aluka, wangango tie neno gero kame kitie kede i koma.
- ³In cung na imia awoki; kara ngai ace kame twero cungo na?
- ⁴Bala kame in itieko cego kede niang gi, kamanono da kur iyei negi kibwona.
- ⁵Ngat kame rupao jowote pi mito udo gimoro aber idwe mege wang gi bino to.
- ⁶” In imia adoko gi me ayama but jo, ango do en ngat me jo bino di kiko ngulo lau i wange.
- ⁷Par omio wanga odoko mwadamwada, doko bada kede tiena dedede ojony bala oweco.
- ⁸Jo kopoore ouro manoni, jo ali kede raco moro cuny gi owang i kom jo kalikame paro pi Rubanga.
- ⁹Do ngat kopoore meede ameda kede ekite mere, doko da ngat araco moro li i cinge medo doko tek ameda i cunye.
- ¹⁰Dokunu cen inyogaunu bobo gikame iwacunu, di likame ako bino udo dano awie tio i diere wu.
- ¹¹Ceng na otieko tuno, iik na me gikame cunya mito otieko potu.



¹²Do jowota loko iwor doko iceng; kiwaco be lero otieko noko colo kame ango atie iye.

¹³Ka ango ageno kabedo me jo oto pi bedo oda, ka ango apeto kabuto na i kabedo acol,

¹⁴ka ango awaco ne ates be, ‘In en papa na, ‘ arabo ka awaco ne kudilinge be, ‘Wun ibedunu toto na kede amiegu na, ‘

¹⁵gen na do udo tie tuai? Ngai twero neno gikame apoore geno?

¹⁶Benyo, gen nono bino ot kabedo me jo oto? Ebino upere keda donyo i apua?”

Yobu 18

Yamo ka Bildad me Are

¹Di Bildad dano me Sua oko dwoko be,

²” Yobu, iyaro meede yamo paka awene? Mi wada ber kare me yamo.

³Pinyo komio itero be wan ocal bala doke? Pinyo komio ineno wan bala jomingo?

⁴In ngat kame itie wanakino komi keni kede gero nin, iparo be jo poore yai wek lobo pirin, arabo Rubanga remoro mori tenge ki kabedo gi pi cobo mit nin?

⁵ Ateteni koneko etala me ngat arac, mac kame ecwinyo likame rieny.

⁶Ode bedo col pien mac li kiye, doko da koneko etala atie malo me ode i wie.

⁷Tien aboco me elato ka etie ot doko cegocego, di iik mege en ako lokere rete.

⁸Tiene tere ot moko i bwai, en eoto eko potu i bur.

⁹Obek mako atitinyo mere, en emoko i owic.

¹⁰Korieo ne arama piny i lobo, kociko obek i yongayo mere.

¹¹Lworo bino ne di wok ki bad dedede, di kiko donyo wapo yore di kiriamere kede.

¹²Teko mere tiek, doko da peko tie cuto kure pi rete piny.

¹³Tuwo dudubo del kome, tuwo arac camo bade kede tiene.

¹⁴Kobino wane ki ode kame egeno, di oko tere but abaka anyinge To.

¹⁵Likame tie gimoro kabino dong i ode, kobino onyo mac salupa i paco mere.

¹⁶En ecal bala yat kame aliasin mege otop, kede da di ajange mege otieko ner.

¹⁷Likame tie ngat kame bino yutuno en i wi lobo lung, wi jo bino wil kede nyinge.

¹⁸Kobino remoro en tenge ki kakaler di oko cwane kakacol, di oko riame ki lobo me jo akuo.



¹⁹Likame ebino bedo tie kede atin amoto akware moro i diere me jo mege, likame tie ngatamoro abino dong kuo i paco mere.

²⁰Gikame timere ne neko kom jo awok ki tetu tim, doko da emio lworu mako jo awok ki tetu kide.

²¹Ateteni manono en gikame timere i kabedo me ngat kalikame paro pi Rubanga, i paco me ngat akwia Rubanga.”

Yobu 19

Kop kame Yobu Odwoko

¹Yobu oko dwoko be,

²” Iyarunu tidilo ango pi kare arom amene, di icocobunu ango kede kope wu?

³Itiekunu yeyeto ango tien kede tien, doko da lewic likame mako wu timo na raco.

⁴Bed bala akadi ka ango atimo raco, raco nango dong keda.

⁵Wun itingerenu na twatwal, di iwacunu be can kame ango atie iye nyuto raco na.

⁶Ngeunu be Rubanga en otimo nango raco, di eko luka kede bwoi mere.

⁷Akadi ka akok be, ‘Kotie neka, ‘ likame ngatamoro gamo doge; alwongere kitek, do ngolo kop i ateni likame tie.

⁸Rubanga otieko cego yongayo na tetekeyi kur akati, en etieko mino yote kame apoore pi lubo odoko col cucucuc.

⁹En etieko kwanyo deyo na, eko kwanyo wor da kibuta.

¹⁰En etuturo ango ki bad dedede di do kop nango tiek; en etieko puto gen na bala yat.

¹¹En etieko calaro gero mere i koma, etera do bala ngakwor mere.

¹²Isirikalen mege ocokere karacel pi bino sura; kiroko yote pi tuno i koma, di kiko gero kimere gi oluko eema na.

¹³” Rubanga otieko mino joe na oweka, doko da jo alem onao keda otieko kwina;

¹⁴joawade kede joawotino na otieko rwenyo ki wanga.

¹⁵Jo koudo maro welao oda wi gi otieko wil keda; anyira jotie na nena bala kikwia, adoko do bala ngakumbor i wang gi.

¹⁶Ka alwongo awobi ngatic na, en eling alinga, akadi di abako ne doge benyo.

¹⁷Dako na likame twero kanyakino ngwece me wei na, imiegu na da likame twero noka.

¹⁸Akadi idwe da tie kede acae i koma; ka acatakino yai, gin kidonyo yamo kope areco i koma.



- ¹⁹Jo adiereson na dedede alem ageno otieko daga, doko da jo alem ango amaro kitek otieko lokere i koma.
- ²⁰Ringo koma kede del me koma otieko makakin i cogere na, gi atitidi en pwodi omaka ogenga to.
- ²¹” Wun jowota, Okwe bedunu kede kisa i koma, pien cing Rubanga otieko toja.
- ²²Pinyo komio wuda itienu wapo yora bala kame Rubanga tie timo? Benyo, alola kame imianu pwodi likame oromo wu?
- ²³” Okwe koto di oudo kowandiko kope na nogi! Okwe koto di oudo kowandiko gi i itabu da!
- ²⁴Okwe koto kogiro kope nogi kede lilim i kom kidi, tetekeny iwandik nogi mok iye atwal nakanaka!
- ²⁵Pien ango angeo be Ngakonya tie kuo, doko da i ajikini en ebino pido pira.
- ²⁶Akadi bed bala tuwo otieko dudubo del me koma, do ango abino neno Rubanga di pwodi koma noni tie.
- ²⁷Ango abino nene kede wanga, wanga bino nene en kikome, likame bobo ngat apat. “Cunya oudo okwanyere pien oudo iwacunu be,
- ²⁸’ Otidilunu en benyo?’ kede be, ‘En nono kame ekelo kop i kome kene.’
- ²⁹Do nan miero ilworunu epima, pien gero ka Rubanga mio can kame epima kelo poto, me wek ingeunu be ngolo kop tie.”

Yobu 20

Yamo ka Sopar me Are

- ¹Di Sopar dano me Naama oko waco be,
- ²” Likame atwero dire pi dwoko kop ni, pien gikame iwaco tie kukudo cunya.
- ³Abedo winyo kope awango cunya, do cunya waco nango gikame apoore dwoko ni.
- ⁴” Mam in ibedo ngeno be, cako sek, cako i kare kame koketo kede jo i wi lobo,
- ⁵be yomcuny me jo areco tie pi kare acecek, doko da kilel me jo kalikame paro pi Rubanga likame tero kare?
- ⁶Akadi di abar kede twer gi dongi ikumemei paka malo, di kituno i idoun,
- ⁷do jo nogo bino rwenyo atwal atwala, di jo kame oudo ngeo gi ko donyo penyere be, ‘Kitie tuai?’
- ⁸Kibino rwenyo bala lek di wi jo ko wil kede gi; kibino kato wir bala gianyuta kame dano neno.



- ⁹Jo koudo oneno gi likame bobo bino medo neno gi, doko da kibino rwenyo atwal ki kakame oudo kibedo iye.
- ¹⁰Idwe gi bino culo jocan; ikwae gi bino dwoko abar kame gin oudo kimaao.
- ¹¹Kom gi koudo nyen di yot bino buto piny kiko lokere kidoko apua.
- ¹²” Akadi bed bala timo gikarac mit i dog gi, akadi bed bala kikano mogo i dud leb gi pi winyiwinyi gi,
- ¹³akadi bed bala kidagi mwonyo gi, di kiko lokere kudo gi i dog gi,
- ¹⁴do cam gi nono bino lokere ka etieko donyo i yi gi, di eko doko kec bala kwir me twol ager.
- ¹⁵Jo areco ngoko abar kame kiudo i yore arac, Rubanga woto abar nono, akadi ki yi gi da.
- ¹⁶Gin kidoto kwir me twol ager; do kwir awok ki leb emosoga bino neko gi.
- ¹⁷Gin likame kibino bilo bero me icileta amol mo me olibeti, kede isamai amol cak kede mokic.
- ¹⁸Gin kibino dwoko gikame oudo kicane udo, likame kibino mwonyo gi i yi gi; likame kibino bilo bero moro ki gikame kiudo ki tic gi me cato wil,
- ¹⁹prien gin kitieko dino jocan di kiko jalo gi, kimaao ude kalikame gin en kigero.
- ²⁰Kitie kede eranga kalikame kwei; eranga gi mio gi likame kiyei weko gimoro kato.
- ²¹Likame tie ngatamoro abwot di likame kibedo kede adiadia i kome, pi manono mulem gi likame bino tero kare.
- ²²I kare kame gi dedede me kimito otieko romo gi kede, peko bino poto i kom gi; can bino poto i kom gi kede twer mere dedede.
- ²³Kakame gin kitieko pongo kede yi gi, Rubanga bino cwano twon gero mere i kom gi di gero mere ko bedo negi bala cam.
- ²⁴Gin kibino tamo ringo tenge ki epima kame kotimo kede nyonyo ayon, do imalia kame kotimo kede nyonyo buronsi bino cocobo gi pelepel.
- ²⁵Imalia bino cocobo gi paka pelao ki ngei gi; leb imalia kakabit di rieny arianya bino yeyeco epiu gi, di do twon lwooro kalikame wacere ko bino mako gi.
- ²⁶Kobino dudubo jamini dedede kame kidiato; mac kalikame ngatamoro okuto bino wango gi, jo dedede kodong i iemai gi kobino wango.
- ²⁷Malo bino nyuto raco gi, doko wi lobo da bino jurao be kireco.
- ²⁸Kobino tero gikame tie i ude gi, kobino ware kede gi i ceng me gero ka Rubanga.
- ²⁹Manoni en iner kame Rubanga opoko ne jo areco, gikame Rubanga otieko moko pi bedo mergi.”



Yobu 21

Yobu Owaco be Rubanga likame Mio Jo Areco Alola

- 1 Yobu oko dwoko be,
- 2” Cikunu yitu iwinyunu kope na, manono bino mino itwerunu dino cunya.
- 3 Direnu ber kong ayam kede wu; di do ikounu meede nywara i ngei angoyamo.
- 4 Do koko nango tie i kom Rubanga, manono en omio likame angoyatwero dire.
- 5 Kong nenanu, manono bino neko komu, di ikounu uro di iketunu cingu i dogu.
- 6 Ka aparo kop iye, emio lworomaka, di komamiel.
- 7” Pinyo ber kamio jo areco bedonakanaka, kibedopaka ti di lonyogi meede ameda?
- 8 Idwe gi sipakin di pwodigin kiuo, kiton ikwae gi da.
- 9 Lworo moro likame tie i miere gi, doko da likame tie alola morokame Rubangamio gi.
- 10 Twonin gi kwaro dok likame bwot yac, doko doke gi amon likame bwogonywal.
- 11 Idwe gi mol bala ekodet me romini, di kimamano kago di kituko.
- 12 Gin kiwero kame kotie gonogita kede arigirigi, doko kitaco kame kotie kuto bilo.
- 13 Gin kitie i lonyo i kare me kuo gi lung, doko da kito to me mulem di kiko ot i kabedo me jo oto.
- 14” Gin kiwaco ne Rubanga be, ‘Wek wa kur ilolo wa! Wan likame omito ngenogikame in imito ne jo lubo.
- 15 Won Twer kara obedo ngai kame mio wan owore? Bero nyo kame wan oudoka olegobute?’
- 16 Mam lonyogi tie i cing gi? Ango adagi tam me jo areco.
- 17” Tien adi kame itiekunu neno kede di jo areco ngole to? Tien adi kame itiekunu neno kede di canpoto i kom gi? Tien adi kame itiekunu neno kede di Rubangadoko ger di eko mino jo areco alola?
- 18 Tien adi kame yamo otieko buko gi kede bala gari me kal, arabotien adi kame apipiru otieko tero gi kede bala cucung?
- 19 Wun iwacunu be Rubanga culo racogi i wi idwe gi; likame kamano, miero cul raconono i kom gin, me wek kibil mitomere.
- 20 Poore wang gi nen can kame miero mi gi, poore kiriam kede gero ka Won Twer.
- 21 Pien gin kitwero bobobedo kede par nyo i kom idwe gi ingei gin to, ka kongolodwete me kuo gi?
- 22 Ngai kame twero pwonyo Rubanga, ngat kame ngolo kop ne kiton imalaikan?



- ²³Jo mogo bedo paka tuno i to gi di kom gi yot, gin kitie i mulem abongo lworogimoro.
- ²⁴Kicwe mo opong i kom gi, doko isum me cogere gi bedo di nyen.
- ²⁵Jo ace to kede cuny akec, abongo gin bilo bero moro.
- ²⁶Do gin nogo dedede kibuto piny i apua di kirom aroma, di kudilinge ko mwonokom gi.
- ²⁷”Nenunu ba, ango angeo tam wu, doko da angeo iik wu me timo nango raco.
- ²⁸Wun ipenyerenu be, ‘Ani bo ot ka ngadwong? Eema me ngat arac oudo bedo iye tie tuai?’
- ²⁹Benyo, likame ipenyunu jo aoto i yongayo? Benyo, likame iyeunu kope kame gin kiwaco ne wu be,
- ³⁰i kare me can likame tie gimoro amulo jo areco, doko da kolako gi i ceng me lilo ka Rubanga?
- ³¹Ngai twero waco ne jo areco raco gi i wang gi, arabo culo i kom gi raco kame kitimo?
- ³²Kame koyiko gi i ates, kobedo daro atesin gi adara.
- ³³Lobo kame oonyo i kom gi i ates kom ber negi abera; jo dedede sirito ot yiko gi, doko jo atelo negi anyim likame marere.
- ³⁴”Nan do benyo benyo kame itwerunu dino cunya kede kope akony gi li? Kope dedede kame itienu dwoko na obedo kope me abe kenekene.”

Yobu 22

Elipasi Owaco be Dub ka Yobu Tot Twatwal

- ¹Di do Elipasi dano me bomba me Teman oko gamo be,
- ²”Benyo, dano karuno timo ne Rubanga bero moro? Iparo be akadi dano ariek twatwal karuno timo ne Rubanga bero moro?
- ³Bero nyo kame poore nin kelo ne Rubanga, arabo nyo kame en eudo ka in ibedo abongo raco moro?
- ⁴Benyo, iparo be pien in ilworog Rubanga en komio en etie mini alola, di ekelo pido i komi?
- ⁵Mam dub nin tot twatwal? Dub nin ajikini mere li.
- ⁶Pien in itieko mako jamini ka imiegu ni pi banya, igonyo igoen i kom gi di iko weko gi kidong nono.
- ⁷In likame imio jo kame ool pii me amata, doko itwono jo akec oneko cam.



- ⁸In itio kede twer ni di iko mano lobo, iko mino but jo kame opwoyo kenekene.
- ⁹In itieko riamo apuserun ooto tenge kede cing gi nono, doko iko tero idwe kic kirac.
- ¹⁰Pi mano, owic nataman do otieko luki diere, doko ipong kede lworu atek.
- ¹¹Piny otieko doko col ni omio likame ikaruno neno gimoro, doko ariram omwonyi.
- ¹²” Mam Rubanga bedo i malo? Neningo acerin atie malo, ekite kame gin ibus kede!
- ¹³Do di in iwaco be, ‘Nyo kame Rubanga ngeo? Benyo benyo kame en ekaruno ngolo kede kop ne jo di edou acol cucucuc ogalao en?’
- ¹⁴Edou apek oume omio likame ekaruno neno piny, doko en eoto i wi edou koyarere me i malo.’
- ¹⁵” Benyo, pwodi in imito dong lubo yongayo acon, yongayo kame jo areco obedo lubo?
- ¹⁶Gin bin kokoporo gi di oko tero gi di pwodi kare gi likame oromo; alele omolo gi tenge bala ot.
- ¹⁷Gin bin kiwaco ne Rubanga be, ‘Wek wa kur ilolo wa, ‘ kede be, ‘Nyo nat kame Rubanga Won Twer karuno timo ne wan?’
- ¹⁸Do di en kame epongo ude gi kede jamini kabeco. Ango cunya dagi tam me jo areco.
- ¹⁹Jo kopoore neno kede yomcuny alola kame komio jo areco; jo kalikame tie kede raco moro nyero gi kede acae,
- ²⁰di kiwaco be, ‘Ateteni jokwor wa kotieko muducaro, doko gikame gin oudo kiweko, mac otieko wango.’
- ²¹” Winyere kede Rubanga, di iko udo anapakin; manono en kame bino kelo ni bero.
- ²²Ud pwonyere kibute, di iko kano kop mere i cunyi.
- ²³Ka in idok but Rubanga Won Twer, di iko jiko tim areco i odi, kobino dwoki i ekite angoce itie iye.
- ²⁴Ka in itero saabu bala apua, kede di kitero saabu kame kokunyo i Opir bala engaro me dud ecilet,
- ²⁵kede ka Rubanga Won Twer en kame tie bala saabu nin kede siliba nin me wel,
- ²⁶in ibino bedo kede yomcuny i kom Rubanga Won Twer, doko lewic likame bino maki i nyime.
- ²⁷In ibino kwane, di en eko bino winyo kwac nin, di in iko bino timo gikame ikwongere iye.
- ²⁸Gi dedede kame in ibino timo, bino cobere ni kiber, doko nyimi bino bedo ler.
- ²⁹Rubanga dwoko jo kame wakere piny; do jo amwolere en elako gi.



³⁰En ebino laki ka in ili kede raco moro, in ibino bwot pien in itimo gi kopooore.”

Yobu 23

Yobu bobo Omedo Yamo

¹Di Yobu oko gamo be,

²” Tin pwodi ango atie kede koko atek i kom Rubanga; akadi di ango atie cur, cinge pwodi tie toja.

³Okwe, koto di oudo ango angeo kakame akaruno ude iye, tetekeny koto akaruno tuno akadi kakame ebedo iye!

⁴Ango koto atero koko na i nyime, di ako mine pido na.

⁵Koto ako ngeno kop kame en ebino dwoko, doko ako niang gikame en koto ewaco na.

⁶Benyo, en koto epiemo keda di etio kede twer mere lung? Li, do en koto eciko yite winyo kop na.

⁷Dano kame ikiteso mege beco koto romo piem kede ki kuno, di ngangolkop nango koto oko mina alo pido atwal.

⁸” Ka ango aoto tetu kide, aude eli ki kuno; akadi ka adok tetu tim da, likame akaruno nene.

⁹Ango aoto mone tetu malo, di likame ako karuno nene; alokere tetu piny da, do pwodi likame akaruno nene.

¹⁰Do en engeo yongayo kame ango alubo; ka en etieko tama, ango abino wok di ameny bala saabu.

¹¹Tiena otieko moko baba i yongayo mere; ango abedo lubo yongayo mere di likame aparao tenge kiye.

¹²Ango likame aweko lubo cik kame en ewaco kede doge; ango akano i cunya kop kame doge owaco.

¹³Do en ka etieko mito timo gimoro, ngai kame karuno loko tam mere? Gikame cunye omoto, manono en kame en etimo.

¹⁴En ebino cobo timo gikame en eiko nango; doko iik atos kacal kamago tie i tam mere.

¹⁵Pi mano, ango lworu atek maka i nyime; kame ango atamo kop i kome, lworu atek maka.

¹⁶Rubanga otieko mino cunya lworu; Rubanga Won Twer otieko mino lworu atek omaka.

¹⁷Akadi kamanono da, colpiny likame oko karuno mina aling, bed bala colpiny acucucuc ouma.



Yobu 24

Yobu Omio Koko pi Gero Atie i Lobo

- 1” Pinyo bo komio Rubanga Won Twer likame cibo kare me ngolo kop, doko pinyo komio jo agene likame neno ceng nogo?
- 2” Jo areco nyiko apokini me ikor; kimao leini me jo icegun di kiko donyo kwano gi.
- 3Gin kitero punda me idwe kic, kimako twon me apuserut pi banya.
- 4Gin kiremoro jocan tenge ki yongayo; jocan dedede me wi lobo pwono negi apwona.
- 5Jocan bedo bala pundan me obar, kioto timo tice gi, kimoo ne idwe gi giacama ki wi tim.
- 6Gin kiraro cam ki poti kalikame obedo megigi, doko kidepo olok ki poti me jo areco.
- 7Gin kibuto nono iwor kiakia, abongo egoe, doko kili kede gi me um kame galao koyo.
- 8Kot angic awok ki wi mori nyongo kom gi, di gin kiko gwako moru pi mito kagwok.
- 9Tie jo kame mao atin kic ki kor toto mere, di kiko tero atin me ngacan bala giamaka me banya.
- 10Jocan bedo ot nono abongo igoen i kom gi; kiute yeno arita me engano akadi di kec oneko gi.
- 11Gin kibio mo ki olibeti kede bwini ki olok, do gin kikom gi kikanyo orio.
- 12Jo kame tie to ngururo ki bomba, doko jo kame kowano kok kimito be kony gi; do Rubanga likame paro pi winyo i lega gi.
- 13” Tie jo adagi lero, gin likame kingeo yote mege, akadi lubo gi.
- 14Nganek yai iwor, di eko ot neko ngacan kame li kede gimoro, doko iwor en etie bala ngakuwo.
- 15Ngadote da daro piny doko amumus; en ewaco be, ‘Likame tie ngatamoro kame bino nena’ ; di eko bono wange.
- 16Iwor gin kituro ude; do iceng gin kipwono likame kimito lero.
- 17Pien piny acol cucucuc cal bala odiko ne gin; gin kitieko nao kede lworu kame piny acol cucucuc kelo.
- 18” Gin kiwekeweke pii molo gi tenge awakawaka; Rubanga olamo lobo gin kirac; likame tie ngatamoro aoto timo tic i potu olok gi.



¹⁹Bala kame lieto me ceng mio kede akako loi di eko rwenyo, kamanono da jodubo rwenyo kioto i kabedo me jo oto.

²⁰Toti gi da likame doko yutuno gi; kudilinge acamo kom gi udo kom gi mit; wi jo wil kede gi atwal; epone nono en kame komuducaro kede jo areco bala yen kame kotongo.

²¹Etimere negi kamano pien gin kitero mon kalikame nywal kirac, doko likame tie gimoro aber kame gin kitimo ne apuserun.

²²Do Rubanga pi twer mere emedo ne wegi twer kare me kuo; ka Rubanga oyai negi malo, gin likame kigeno kuo gi.

²³En egwoko mulem gi, doko ekonyo gi; en eciko wange i gikame gin kitimo.

²⁴Gin kotingo gi malo pi kare moro atitidi di kiko rwenyo; kodwoko gi piny kiko ner di kiko rwenyo bala ature, kiner bala wi kal kame kokao.

²⁵Ka likame kamanono, ngai kame karuno nyuto be ango atie ngalo, di eko nyuto be kop kame ango ayamo tie me abe?"

Yobu 25

Bildad Owaco be Dano Likame twero Bedo di Epoore i Nyim Rubanga

¹Di Bildad dano me Sua oko dwoko be,

²" Loc obedo me ka Rubanga, doko en epoore alwora; en emio mulem bedo tie i malo.

³Benyo, tie ngat kame karuno maro wel me isirikalen mege? Tuai kalikame lero mere rieny iye?

⁴Dano karuno bedo di epoore i nyim Rubanga benyo benyo? Dano kame dako onywalo karuno bedo di cunye cil benyo benyo?

⁵Ka akadi duwe da rieny pwolpwol i nyime doko acer da likame tie kede lero aber,

⁶do dano adana do tie nyo i nyime, dano gi kobedo kudiling akudiling!"

Yobu 26

Yobu Owaco be Dwongo ka Rubanga likame Niangere

¹Di Yobu oko dwoko be,

²" Itieko mino kony adwong tin benyo but dano ateko mere li! Itieko lako dano agoro tin benyo!

³Itieko mino tam aber tin benyo but dano aming, di iko mine acora atot abeco!

⁴Ngai okonyi waco kope go, doko ngai omi cunye me yamo kamanono?



- ⁵Tipo me jo oto atie piny i dud lobo kom gi miel amiela, pii kede jamini kame tie iye tie kede lworu.
- ⁶Kabedo me jo oto tie ilererei i nyim Rubanga, doko likame tie gi koume.
- ⁷Rubanga opeto edou me tetu malo i wi yamo, doko en eliero lobo da i wi yamo.
- ⁸Nakanaka en ebo pii i edou mere apek, di pii nono likame ko belo edou.
- ⁹En epeto edou mere, di eko umo wang duwe.
- ¹⁰En etieko giro ikor i wi nam, pi poko ajikini me lero kede colpiny.
- ¹¹Ka en ecoko ipirin kame gango malo, kom gi to pi lworu.
- ¹²En bin eko mino nam okwei pi twer mere; doko rieke mere en komio bin koneko Rakab.
- ¹³Wei mere en komio malo odoko ler; doko en eko neko twol kame oudo mito bwot kede cinge.
- ¹⁴Ateteni magi obedo wie wie me twer mere; gikame wan owinyunu i kome tin nonok benyo! Do ngai kame karuno niang rom me twer mere?"

Yobu 27

Yobu Owaco be En ebino Meede bedo Dano Aber

- ¹Yobu di bobo oko meede kede yamo di ewaco be,
- ²" Tek di pwodi Rubanga tie kuo, en ngat kame etieko kwanyo twero nango, doko en Rubanga Won Twer ngat komio cunya obedo kec,
- ³tek di pwodi ango akuo, di uma tie kede wei kame Rubanga mio,
- ⁴doga likame bino yamo kop me abe, doko leba likame bino yamo kop me angalo.
- ⁵Ango likame abino yei be kop wu tie kakare; tuno to ango likame abino weko bedo dano aber.
- ⁶Ango amoko kitek i kom poore na, doko likame abino weke akadi acel; cunya likame pida i ceng moro acel me kuo na.
- ⁷" Ango akwao be mi ngakwor na nen can bala jo areco, doko akwao be mi ngat kame yi keda nen can bala jo kalikame opoore.
- ⁸Pien gen nyo kame dano akwia Rubanga tie kede kame kojiko kuo mere, kame Rubanga okwanyo kuo mere?
- ⁹Iparunu be Rubanga bino winyo koko mere ka peko opoto ne?
- ¹⁰Benyo, cunye bino bedo yom kede Rubanga Won Twer? Iparunu be ebino donyo kwano Rubanga i kare dedede?



¹¹Ango abino pwonyo wu i kom twer ka Rubanga; ango likame abino mungo iik kame Rubanga Won Twer tie kede.

¹²Wun dedede itiekunu neno kede wangu; aso pinyo kamio wun iyamunu kop akony gi li.”

Kop kame Sopar Odwoko

¹³” Man en iner kame Rubanga mio jo areco, doko en gikame jo katero jo kirac udo kibun Rubanga Won Twer.

¹⁴Ka idwe gin odoko tot, koneko gi kede epima; doko idwe gin likame bedo tie kede cam aromo gi.

¹⁵Jo gin abwot mege aumpuli neko, doko apuserun gin likame koko gi.

¹⁶Akadi gin kicok nyonyo siliba di tot bala asinge, di kiko koko igoen atukit bala lobo;

¹⁷gin bo kikaruno koko gi di kitot, do jo kopoore en abino ngapo gi, doko jo kalikame tie kede raco moro en kame bino popoko nyonyo siliba nogo.

¹⁸Gin kigero ude gi bala ude me winy, bala aduc kame jodar poto me olok gero.

¹⁹Gin kioto buto di kitie jo obaro, do likame bobo ebino meede bedo kamanono; gin kibino cei di kiko udo be abar otieko doko li.

²⁰Lworo ngoole mako gi bala ariram, apipiru koporo gi tenge iwor.

²¹Yamo kame buko wok ki tetu kide koporo gi di eko kato kede gi; en ekuto gi tenge ki kabedo gi.

²²En ebuko i kom gi abongo kisa; gin kitamakino ringo tenge kede teko gi dedede pi mito bwot.

²³Yamo mor i kom gi bala dano abapo cinge di eriamere kede gi; doko ewinyao negi bala dano i kabedo dedede.”

Yobu 28

Kakame Rieko Udere Kiye

¹” Ateteni bur kame kokunyo kiye siliba tie, doko kabedo kame kojililo kiye saabu da tie.

²Kokunyo kide me nyonyo ayon ki lobo, doko kocalaro nyonyo kopa ki kide.

³Jo akunyo kide me nyonyo tio kede etala i dud lobo kakacol cucucuc, di kiko mono kide tuno kakabor, kiko kunyo gi ki kakacol cucucuc kuno.

⁴Gin kikunyo bure me mono kide me nyonyo di bor kede kakame jo bedo iye, kikunyo gi kakame jo likame beo iye, gin kileedo kede aanoi i bure nogo.

⁵Cam wok ki lobo; do dud lobo pinyo ineno bala mac olokoloko kiye gi dedede.



- ⁶Kide mege tie kede sapir, doko apua mere tie kede saabu.
- ⁷Likame tie winyo moro acamo ringo angeo yongayo nono, doko likame tie wang acut moro kotieko nene.
- ⁸Leini awakere me obar da pwodi likame olubo yongayo nono; engu da pwodi likame obeo iye.
- ⁹” Dano kunyo lela atek, doko emuko kide adongo ki dud gi piny.
- ¹⁰Gin kiroko yote i lela, doko likame tie kidi moro me wel amalo kame kato wang gi.
- ¹¹Kikunyo kiton tuno kakame icileta cakere kiye; kiko kelo kakaler jamini kalikame oudo neeno.
- ¹²Do riekko kara kobino udo ki tuai? Doko niang kara tie tuai?
- ¹³” Jo likame ngeo yongayo aoto iye, doko likame eudere i lobo me jo akuo.
- ¹⁴Nam me dud lobo waco be, ‘Likame etie buta, ‘ doko nam me wi lobo da waco be, ‘Likame etie keda.’
- ¹⁵En likame kokaruno wile kede saabu, doko da likame kokaruno pimo siliba me wile.
- ¹⁶En likame kokaruno poro wel mere kede saabu me Opir, arabo kede kide me wel, onik amoto sapir.
- ¹⁷Wel me saabu kede gilasi likame rom kede, doko likame kokaruno sese kede mwolere kame kotimo kede saabu kame kojililo kiber.
- ¹⁸En wel mere likame kokaruno poro kede me kide me wel, karol arabo kidi amilimili bala akako; wel me riekko kalamo me bira me wel.
- ¹⁹Kidi topas kame udere Abisinia likame kokaruno poro kede riekko, akadi saabu acil odocon wel mere likame kokaruno poro kede.
- ²⁰” Kara riekko do wok ki tuai? Doko niang kara tie tuai?
- ²¹Kokane likame tie wang giakuo moro kame karuno nene, doko koume likame tie winyo moro apor i malo kame karuno nene.
- ²²Abadon kede to da waco be, ‘ Wan owinyo rwonge mere kede yit wa kenekene.’
- ²³” Rubanga kene en kame ngeo yongayo aoto iye, en engeo kakame riekko bedo iye.
- ²⁴Piento en wange neno ajikini me lobo, doko en eneno gi dedede kame tie i dud ceng.
- ²⁵Kakame en emio kede yamo teko, di eko moko rom me pii;
- ²⁶kakame en eketo kede iswil amako kot, di eko cibo yongayo kame mwoc me kot lubo;



²⁷en di do eko neno rieko, di eko udo bero mere; en engie odocon di eko moke.

²⁸“En di eko waco ne dano be, ‘ Ateteni lworu Rwot en rieko; doko pokere kede gikareco en niang.’ “

Yobu 29

Kop kame Yobu Owaco me Ajikini me Pido mere

¹Yobu bobo oko meede kede yamo mere be,

²” Okwe, koto oudo ango atie iepone angoce ca, bala i kare kame bin Rubanga gwoka kede ca;

³i kare kame etala mere bedo rieny kede i wia malo, di eko menyona yongayo kame beo kakacol.

⁴Manono en oudo kare kame ango pwodi atek kede, doko oudo Rubanga gwoko paco na.

⁵Rubanga Won Twer oudo tie keda, doko idwe na da oudo tie i ngeta.

⁶I kare nono yongayo kame ango oudo alubo obedo cak kenekene, doko mo oudo bwote na ki wi lela kakame kobiye kiye.

⁷Kame oudo ango aoto i erute me bomba, di ako bedo piny kacokere,

⁸awobe bin nena di kiko nyiko tenge, do joadongo yai malo pi mina wor;

⁹jo kame koworo jiko yamo gi di kiko ling titi di kiketo cing gi i dog gi;

¹⁰jopug oudo ling, di leb gi ko moko i dan gi.

¹¹” Jo kame bin winyo yamo na oudo pwoya, doko jo koudo neno gikame atimo, oudo yamo kiber i koma,

¹²pien ango bin alako jocan kame oudo kok, doko akonyo idwe kic kalikame oudo tie kede ngat akonyo gi.

¹³Jo kame bin oudo iyapi to oudo lamo nango winyo, doko ango oudo amio cuny apuserun obedo kede kilel.

¹⁴Ango oudo angapo poore bala egoe; ateni na oudo cal bala ekanso, kede bala egoe kame kododolo i wic.

¹⁵Kibut imuduka, ango oudo acal bala wang gi, doko kibut ingwalasa da ango oudo acal bala tien gi.

¹⁶Kibut jocan, ango oudo acal bala papa gi, doko oudo ango acungo ne jokumbor i kope amako gi.

¹⁷Ango oudo atieko teko me jo areco, di ako mino gi kijalakino jo kame oudo kimako.



- ¹⁸Ango oudo aparo i cunya be, ango abino bedo kuo pi kare alac, di ako bino to i oda.
- ¹⁹Ango oudo acal bala yat kame aliasin mege oliao kiton i pii, di ajange mege toyo bedo tie iye iwor kiakia.
- ²⁰Jo oudo mia dwongo nakanaka, doko teko na oudo likame dok cen.
- ²¹Jo oudo ling titi pi mito winyo tam kame ango amio, di kiko ciko yit gi daro.
- ²²Kame ango oudo atieko yamo, gin likame bobo oudo kiyamo. Kop nango oudo donyo negi bala kot kame donyo piny.
- ²³Gin oudo kidara bala jo kame daro dwogo me kot; gin oudo kigamo tam na bala kame jo gamo kede kot me iporo.
- ²⁴I kare kame gin oudo kidoko li kede gen, ango ako nyuto negi yomcuny; doko alakar me nyima oko mino gi teko.
- ²⁵Ango en kame bin abedo ejakait gi, ngat kame nyuto negi yongayo me aluba, ango oudo abedo bala abaka kame tie i diere me isirikalen mege, di ango ako kweno cuny gi bala dano akweo cuny jo akoko dano gi oto.

Yobu 30

- ¹” Do nataman joatino kibuta do nyera kede acae, jo kame ango oudo likame akaruno yei ne papi gi konyo igwogin na gwoko romini na.
- ²Teko gi oudo otiek dedede. Kony nyo kame oudo ango koto akaruno udo kibut gi?
- ³Can kede kec oudo odio gi, omio oudo kimwodo aliasin kotuo iwor, i itela kakoling.
- ⁴Gin oudo kingwedo pote me yen awac i amoniek pi camo, doko oudo kiputo aboce da me acama.
- ⁵Oudo koriamo gi tenge ki kakame jo bedo iye; jo oudo riamo gi di kilelemo i dud gi bala riamo jokuo.
- ⁶Gin kiko donyo bedo i bure me bad mori, i bure me piny kede i abo.
- ⁷Gin oudo kikok i amoniek bala le; kidole karacel i dud okuti.
- ⁸Gin oudo kibedo ekodet me jo amiming, jo akony gi li kalikame ngere! Jo oudo obungo gi di oko riamo gi tenge ki lobo wa.
- ⁹” Nan do idwe gi wero were me nywara; ango adoko gituko gi.
- ¹⁰Gin kiringa; likame kimito bedo i ngeta, doko likame kilworo ngulo lau i wanga.
- ¹¹Pien Rubanga otieko gonyo tol me emal na di eko mina adoko mwol, likame tie do gi agengo gi timo na gikame cuny gi mito.
- ¹²Gin kibino ekodet pi sura i kateko na; kimia aringo, doko kitimo iik me muducaro ango.



- ¹³Kicego na yote me bwot, gin kimeddo peko nango ameda; likame tie dano agengo gi.
- ¹⁴Gin kibwote na bala jo kotuco arora i apama, di kiko ony i koma.
- ¹⁵Lworo obwona; wor kame bin jo mia odoko li bala gikame yamo okutaro. Doko lonyo na da orwenyo wir bala edou.
- ¹⁶” Nan do kuo na tie yai; kare me neno can do otieko tuno na.
- ¹⁷Iwor cogere me koma mwoda, doko lito kame awinyo likame jik.
- ¹⁸Rubanga omako ngut ekanso na, emako egoe na kede gero.
- ¹⁹En etieko reta i cwoto, ango atieko doko cal bala apua kede buru.
- ²⁰Ango akok buti, Okwe Rubanga, do in likame igamo; ango alego buti, do in iko nena anena.
- ²¹In itieko doko ger nango; in itidilo ango kede twer ni.
- ²²In itinga malo i yamo di iko mino eringo keda; in imio yamo ager olokoloko ango.
- ²³Ango angeo be in ibino tera paka tuno i to, i ot kame kotieko iiko ne jo akuo dedede.
- ²⁴Ateteni dano likame lokere suro ngacan, ngat kame koko kony kame etie i peko.
- ²⁵Mam ango oudo akok pi jo koudo tie i kuo atek? Mam oudo cunya cwer pi jocan?
- ²⁶Do kakame ango oudo amo kede bero, raco bobo en alunyo bino; doko kame oudo atie kuro lero, colo en kame bino.
- ²⁷Tam na orubere doko likame ekwei; atieko riamo kede kare me neno can.
- ²⁸Ango atururo abongo dano moro kame mia kweicuny; ayai malo i kacokere di ako koko kony.
- ²⁹Koko omia adoko cal bala omin me ikween, kede ngaupa me ikululun.
- ³⁰Del me koma otieko yuikino, doko epacere di epoto tenge, doko da cogere na liel aliela bala mac.
- ³¹Nataman do arigirigi na olokere odoko me gono were me iturur, doko bilo na kok winyere bala dwan jo atie koko.

Yobu 31

- ¹” Ango atieko timo isikan kede wanga, pi weko neno nyako moro kede wang me mit.
- ²” Iner nyo kame ango abino udo kame wok ki malo but Rubanga? Doko nyo kame Rubanga Won Twer me i malo bino poko na pi doko mera?



- ³Mam peko poto ne jo kalikame opoore da? Doko winyo arac mam mako jo atimo tim areco?
- ⁴Mam Rubanga neno yote nango? Doko mam en kame emaro tien dedede kame ango alato?
- ⁵Ka abedo timo tim me angalo, arabo koma obedo mit waco ne jo kope me abe,
- ⁶wek Rubanga pima i misani atie kakare, di eko bino ngeno bero na.
- ⁷Ka tiena oparao tenge ki yongayo kopooore, di cunya oko lubo gikarac kame wanga oneno; doko ka cinga opwokere kede dub moro,
- ⁸wek ango acui kodi di ngat apat en ako camo, doko wek kopuputo kodere na kame apuro.
- ⁹” Ka dako moro otieko wano cunya, di ako ot kiire i ekeko me ngakio,
- ¹⁰mito dako na rieg alos ne icuo apat, doko wek cuo apat but kede.
- ¹¹Pien manono udo atimo gikarac twatwal; manono udo aturo iswil.
- ¹²Adote koto oudo owanga bala mac paka to, doko koto oudo ewango jamini na dedede.
- ¹³” Ka epasoit arabo apasoit na moro oudo okelo ingungur mere kame etie kede i koma, di koto ango ako dagi winyo kop mere,
- ¹⁴koto ango abino timo benyo i nyim Rubanga? Koto ango abino waco ne benyo kakame en ebino pepenyo ango kede?
- ¹⁵Mam Rubanga ngat kocweo ango i yi toto na en kocweo gida? Mam en ngat acel nono en kame elulungo wa i yi toti wa?
- ¹⁶” Ango pwodi likame atieko dagi mino ngacan gimoro kame cunye mito, arabo mino apuserun bedo abongo gen,
- ¹⁷amoto camo cam na atitidi moro kena, di likame ako mino idwe kic da ocamo.
- ¹⁸Pien cako di pwodi ango eponga abedo gwoko idwe kic bala papa gi, cako nywala ango abedo konyo apuserun.
- ¹⁹” Ka ango atieko neno dano moro di to pi li me giangapa, arabo ngacan kalikame tie kede egoe me umo kome,
- ²⁰di en likame eko pwona, pien likame amie egoe aliet kame kotimo kede yer me romini na,
- ²¹kede ka ango atieko tingo cinga cimo atin kic, di oudo angeo be abino lone i ekiko, pien oudo aneno be jo aganga tie i kacokere,
- ²²poore bada turi, doko poore cogo me epepet na pakar pot tenge.



- ²³Pien angou oudo abedo lworu peko kame Rubanga mio, doko pi dwongu mere omio likame angou oudo akaruno timo gikame cal kamano.
- ²⁴” Ka angou atieko keto gen na i kom saabu, arabo ka awaco ne saabu kame kojililo kiber be en ngagwok na;
- ²⁵ka angou atieko ilel pien abar na oudo dwong, arabo pien lonyo na onyai;
- ²⁶ka angou atieko neno ceng di erieny, arabo duwe di eoto kede deyo mere,
- ²⁷di cunya oko wana woro gi i mung, doko ako luro wia pi woro gi,
- ²⁸dub noni da oudo jongolkop poore ngingico di kiko mina alola iye, pien udo angalo Rubanga atie malo.
- ²⁹Angou likame atieko neno jo adaga di tie neno can ako kilel, arabo bedo kede yomcuny kame peko opoto negi;
- ³⁰angou likame ayei ne dogu timo dub me lamo kuo gi.
- ³¹Jo na da waco be, ‘ Jo dedede otieko bilo cam i ot ka Yobu?’
- ³²Angou atieko gamo jo aoto i yongayo i paco na, likame aweko ngakumbor obuto i gudo.
- ³³Angou likame abedo mungu dub na bala kame jo ace timo; likame abedo kano gi,
- ³⁴pi lworu kop kame jo bino yamo i koma. Angou likame bin abedo ling alinga, doko likame adonyo bedo i ot, be pi lworu acae me jo.
- ³⁵Okwe koto oudo atie kede dano kame karuno winyo kop na! Angou kikoma adio cinga! Akwao Rubanga Won Twer gam dogu! “Okwe koto di oudo ngakwor na owandiko awandik kop kame etie pida iye!
- ³⁶Ateteni koto oudo angou angapo gi i epepet na; doko koto oudo aketo gi i wia bala ocoro me ajakanut.
- ³⁷Koto atatamo ne Rubanga gi dedede kame angou oudo abedo timo; doko koto oudo aoto i nyime bala ngapug.
- ³⁸” Ka lobo na oudo obedo kede koko i koma, di bot mere da oudo kok karacel kede en i koma;
- ³⁹ka oudo angou abedo camo cam acek iye abongu culo gimoro, di ako mino jo koudo puro gi oto kec;
- ⁴⁰akwao do be poore okuto bwangun i lobo nono akaka engano, kede doi akaka mawe.” Kope ka Yobu ojik kan.

Yobu 32

Eliku Obunano Jowot Yobu



- ¹Di do cuo adek nogo oko weko dwoko yamo ka Yobu, piento en oudo eparo i tam mere kene be en likame etimo gimoro arac.
- ²Di cunye Eliku oko wang kede Yobu pien oudo etie ronkino Rubanga di ewaco be en gire likame etimo gimoro arac. Eliku bin obedo wot ka Barakel dano me ekeko ka Bus; en oudo ebedo dano me ot ka Ram.
- ³En bin bobo da cunye oudo owang kede jowot Yobu adek nogo, pien gin likame bin kiko karuno udo kop kame kidwoko ne Yobu, bed bala gin oudo kironkino en.
- ⁴Pien Eliku oudo titidi kibun gin, en kong eko daro jo dedede otieko yamo.
- ⁵Do kakame Eliku oneno kede be likame oudo tie kop moro kame cuo adek nogo tie dwoko ne Yobu, cunye oko wang.
- ⁶Eliku wot ka Barakel dano me Bus oko dwoko be, “Ango atitidi, do wun idongodongunu; pi mano, ango oudo abedo kede lworu me waco ne wu tam na.
- ⁷Ango oudo aparo i cunya be, ‘Wek jo kocato yami, jo amwakini gi odoko totot mi pwoony me rieko.’
- ⁸Do ateteni tipo kame tie i yi dano, wei kame Won Twer mio en kame mio jo niang.
- ⁹Likame tio en kame mio jo doko riek, arabo jo oti en kame ngeo gikame poore.
- ¹⁰Pi mano, ango awaco ne wu be, ‘Winyunu kop na; ber kong ada ami tam na.’
- ¹¹” Nenunu, ango abedo dire winyo kop kame wun oudo itienu waco, abedo ciko yita winyo kope wu me rieko di wun oudo imounu kop me ayama.
- ¹²Ango abedo ciko yita butu, do ateteni likame tie ngatamoro kame oko nyuto rac ka Yobu, likame tie ngatamoro kikomu kokaruno dwoko kope mege.
- ¹³Kur wun iwacunu be, ‘Wan otieko udo rieko; Rubanga en kame bino bwone, do weko dano.’
- ¹⁴Yobu likame oudo otika kede kop mege, doko ango likame abino dwoko ne kop iepone kame wun idwokunu ne kede.
- ¹⁵” Yobu, kom gi otieko to, kili kede kop me adwoka; kili kede kop me ayama akadi acel.
- ¹⁶Benyo, ango abed daro gin di likame kitie yamo, di gin kitie kicungo kano abongo kop moro me adwoka?
- ¹⁷Ada abino mino dwok na; ada abino waco tam na.
- ¹⁸Pien ango atot kede kope; cunya likame yei na ling.
- ¹⁹Ateteni cunya cal bala bwini akuao di koumo wie; ecal bala isau me lau me bwini kodeng mito mwoc.
- ²⁰Ango miero ayami, tetekeny cunya kwei; ango miero agam doge.



²¹Ango likame abino bedo kede apokapoka but ngatamoro; arabo yamo kop me eede i kom ngatamoro.

²²Pien angu likame angeo yamo kope me eede, koto Ngat kocwea oudo otieko mina adoko li.

Yobu 33

Eliku Obunano Yobu

¹” Nan do, Okwe Yobu, cik yiti iko winyo yamo nango, doko winyo kope dedede kame ayaro waco.

²Neningo, angu do atieko iikere ngamo dogu yamo; leba do ocalo yamo.

³Kope na nyuto lero me cunya, doko dogu yamo kop me ateni.

⁴Tipo ka Rubanga en kocwea, doko wei kame Rubanga Won Twer mio en kame mia kuo.

⁵” Gam dogu, ka ikaruno; iik kope ni i yore i yore; ud kacungo ni.

⁶Neningo, i nyim Rubanga angu acal bala in; angu da kikoma kocwea kede lobo.

⁷Kur komi miel pi lwora; angu likame abino dini.

⁸” Ateteni in itieko yamo di oudo angu atie awinyo, doko angu atieko winyo kope kame in iwaco.

⁹In iwaco be, ‘Angu acil, likame tie gikarac moro kame atimo; angu ali kede rac moro akadi atitidi, doko ali kede dub moro i kuo na.

¹⁰Neningo, Rubanga en kame momoo nango kop, en etera bala ngakwor mere;

¹¹ etweo tiena kede eriko, doko ebedo ngino yote na dedede.’

¹²” Do i kom kop kame in iwaco, Yobu, in ipoto. Angu ayaro dwoko dogi, Rubanga dwong kalamo jo dedede.

¹³Pinyo kamio in ipiemo kede, di iwaco be, ‘En likame edwoko kope kame angu apenyo’ ?

¹⁴Pien Rubanga yamo iepone acel, doko eko medo iepone ace, bed bala jo likame niang iye.

¹⁵ Iwor di nino omako jo kiber di kitie nino i kabutere gi, Rubanga yamo kede gi i lek kede i gianyuta.

¹⁶En eyabo yit gi, di eko mino gi ikwenyar kame kelo negi lworo,

¹⁷be tetekeny amoto elok gi tenge ki tim gi, di eko lako gi ki ewaka.

¹⁸Rubanga timo manono pi gwoko gi ki ates, en egengo gi ngolo ecilet me to.



- ¹⁹En ebitaro gi da kede mino gi aramo kame reto gi i apien, doko emio cogere gi mwodo gi nakanaka,
- ²⁰di cuny gi ko ringo cam, doko emio imue me cam kimiela doko li negi.
- ²¹Kijony paka ringo me kom gi di likame ko karuno neno; doko cogere gi kalikame lem neno, nan do ko guulo ooko.
- ²²Kidoko iyapiyapi kede ates, doko kuo gi udo onoko jonek.
- ²³Aso ka ngatamoro kikom gi tie kede malaika acungo ne, i dierediere mere kede Rubanga, acel kikom imalaikan tutumian, pi nyuto ne gikame epoore timo,
- ²⁴di en eko bedo kede kisa but dano nono, eko waco be, ‘Lake kur edony piny i ates; ango atieko udo gi me timo cul pi kuo mere;
- ²⁵mi kome dok nyen bala me eponga; mie edok tek bala i kare kame bin di en pwodi eponga, ‘
- ²⁶ka en eko kwano Rubanga, en ebino yei kwac mere; en ebino ot i nyim Rubanga kede ilel, di Rubanga ko dwoke i kuo mere me bedo ngat opoore.
- ²⁷Dano nono wero i nyim jo di ewaco be, ‘Ango adubo, doko aparao tenge ki gikame oudo poore, do Rubanga likame oko mina alola kame oudo apoore udo.
- ²⁸En etieko lako kuo na likame abino donyo i ates, do abino meede bedo kuo.’
- ²⁹”Rubanga ateteni timo gi nogi dedede ne jo; en etimo gi tien atot atota,
- ³⁰pi lako kuo gi ki ates, tetekeny kibed kede ilel me kuo.
- ³¹Yobu, cik yiti, winy kop na; lingi, di ango ako yamo.
- ³²Ka itie kede kop kame imito waco, waca; yami, pien ango abino yei be in ili kede raco moro.
- ³³Do ka li, lingi di iko winyo kop na, di ango ako bino pwonyi bedo kede rieko.”

Yobu 34

Eliku Owaco be Rubanga Timo Gikame tie Kakare

- ¹Eliku oko meede kede yamo mere be,
- ²”Winyunu kop na, wun cuo ariek, doko mianu yitu, wun jo kame itienu kede ngec;
- ³pien yit ngeo pokopoko kope bala kame leb bilo kede cam.
- ⁴Mito wan oyerunu gikame poore; mito wan en kame omokunu ken wa gikame ber.
- ⁵Pien Yobu otieko waco be, ‘Likame tie gimoro arac kame ango atimo, doko Rubanga otieko kwanyo twero nango;
- ⁶bed bala ango ayamo kop me ateni, pwodi kowaco be ango angalo; awanon kame komia likame cango, bed bala ango likame atimo gimoro arac.’



- ⁷Ngai kame cal bala Yobu, ngat kame bwoto kop me acae bala pii,
- ⁸ngat kame upere kede jo atimo gikareco doko emaro bedo kede jo areco?
- ⁹Piento en etieko waco be, ‘Likame tie gimoro aber kame dano udo kame ebedo kede kuo ayomo cuny Rubanga.’
- ¹⁰” Pi mano, winyunu kop na, wun jo kame itienu kede niang, Rubanga likame twero timo gikarac akadi atitidi, Rubanga Won Twer likame romo timo gimoro kalikame poore.
- ¹¹ Piento en ebino culo gi di lubere kede gikame gin kitimo, doko en ebino tero gi iepone kame poore negi kede.
- ¹²Ateteni Rubanga Won Twer likame romo timo gimoro arac, doko Rubanga Won Twer likame timo gi kalikame tie kakare.
- ¹³Ngai en kame bin omie twer me lono lobo, ngai en kame bin oketo piny lung i cinge?
- ¹⁴Ka koto Rubanga di oko kwanyo tipu mere di eko dwoko bute, di eko mino yamo mere kame jo wei kede ocokere bute,
- ¹⁵jo dedede koto oto kicel, di kiko dok i apua.
- ¹⁶” Ka in itie kede niang, winy kop noni; winy kop kame ango awaco.
- ¹⁷Iparo be ngat kame dagi tim me ateni karuno bedo ngapug? Benyo, in ibino waco ne Rubanga ngat kopooore kame tie kede twer be erac,
- ¹⁸ngat kame waco ne abaka be, ‘In kony ni li! ‘ kede ne jopug be, ‘Wun jo areco! ‘;
- ¹⁹ngat kalikame nyuto apokapoka but jopug, akadi paro pi joabar kalamo jocan, pien gin dedede kibedo tic me cinge?
- ²⁰Gin kito kitular atular esawa moro kenekene; i dier iwor cing Rubanga dipo jo di kiko to, en eneko wegi twer bala mato pii.
- ²¹Piento en eciko wange i kom gi dedede kame jo timo, doko eneno kabedere dedede kame gin kioto iye.
- ²²Likame tie karamoro kame col cucucuc kame jo atimo gikareco karuno pwono iye.
- ²³Pien Rubanga likame pwodi omoko kare ne dano moro ni pi ot i nyime me wek engol ne kop.
- ²⁴En ekwanyo wegi twer tenge abongo ngingico tien kop gi, di eko keto jo apat kargi.
- ²⁵Piento en engeo gikame gin kitimo, en ereto twer gi iwor di manono ko bedo ajikini gi.
- ²⁶En emio gi alola i nyim jo pi gikareco gi,



²⁷pien gin kitieko lokere tenge kiweko lube, doko likame kiparo pi lubo yongayo mere moro akadi acel.

²⁸Manono oko mino gin kimio koko me jocan otuno bute, di en eko winyo koko me jo kame oudo kotie mino neno can.

²⁹Ka Rubanga obedo gire mot, ngai kame karuno waco be etimo rac? Ka Rubanga okano wange, ngai kame karuno nene? Do en etie kede loc i kom ateker amoto dano moro di rom aroma,

³⁰tetekeny jo kalikame paro pi Rubanga kur bed jopug, arabo kicik ne jo owic.

³¹” Benyo, tie dano moro kotieko waco ne Rubanga be, ‘Ango atieko kanyakino alola, do likame bobo abino medo dubo;

³²nyut na dub na kalikame ango akaruno neno; ka oudo atimo dub moro, likame bobo abino medo time’ ?

³³In iparo be Rubanga bino timo ne in gikame in imito, be pien in idagi gikame en etimo?

³⁴” Jo atie kede niang, kede jo ariek kame winyo kop na bino waco be,

³⁵’ Yobu yamo atatai abongo ngec moro, kope kame en eyamo rieke li iye atwal.’

³⁶Kite kame oudo cunya mito kede be koto kotamo Yobu kiton i ajikini me teko mere, piento en edwoko kop bala ngatim tim areco.

³⁷En etie medo tim me jemo i wi dub mere; en etie nywaro Rubanga i nyim wa.”

Yobu 35

¹Eliku oko meede kede yamo mere be,

²” Yobu, in iparo be kop nin tie kakare? In iwaco be, ‘Ango ali kede raco moro i nyim Rubanga.’

³Ka in ipenyere be, ‘Bero nyo kame ango atie kede? Bero nyo kame ango atie kede kame kalamo ka koto oudo atimo dub?’

⁴Ango ayaro dwoko dogi karacel kede dog jowoti.

⁵Ngoloro kong malo; ngii idoun kame tie malo kalamo in.

⁶ Ka in itimo dub, nyo kame dub nin timo ne Rubanga? Doko ka dub nin meede ameda, nyo kame manono timo ne?

⁷Ka in ipoore, nyo kame udo in imie; arabo nyo kame udo en egamo kibuti?

⁸Gikareco nin mio jo icegun neno can, doko poore nin da konyo jo icegun.

⁹” Jo kok pi adiadia atek kame koketo i kom gi; gin kilwongere pi mito be kony gi ki cing wegi twer.



¹⁰Do likame tie ngat kame penyere be, ‘Rubanga Ngacwec na kara tie tuai, en ngat kame emio jo wero i kare me peko,

¹¹ngat kame pwonyo wa kalamo leini me wi lobo, doko emio wan obedo riek kalamo winy me wi yamo?’

¹²Gin kikok pi mito kony, do Rubanga likame gamo koko gi pi ewaka gin me jo kame timo gikareco.

¹³Ateteni koko me nono nono Rubanga likame winyo; Rubanga Won Twer likame paro pire.

¹⁴Do do merin bino kalamo mano tien adi, in ngat kame iwaco be in likame inene, be itie dare pien pido ni tie i nyime!

¹⁵Medo i wi mano, in iparo be ka Rubanga olilo likame emio jo alola, doko en likame eparo twatwal pi gikareco.

¹⁶Yobu, in ingamo dogi yamo atatai, iduro yamo abongo ngec moro.”

Yobu 36

Eliku Opako Bero ka Rubanga

¹Eliku oko meede kede kop mere di ewaco be,

²” Dire kong anonok di ango ako bino nyuto ni, pien ango pwodi atie kede gikame amito waco akaka Rubanga.

³Abino kelo ngec kame awok kede ki kakabor, di ako nyuto be Ngacwec na timo gikame tie kakare.

⁴Pien ateteni kope nango abe li iye; dano kame tie kede ngec koromo en ine atie kedi.

⁵” Ateteni Rubanga tie kede twer, doko en likame ecao ngatamoro; en etie kede teko adwong kede niang.

⁶En likame eweko jo areco meede bedo kuo, do emio jo kame kotidilo bedo kede twero gi.

⁷En likame ekwanyo wange tenge ki kom jo kopoore, do en eketo gin i komini me ajakanuto kede abakai, di eko mino komio gi wor ikar kede ikar.

⁸Do ka kotweo gi kede irikoi di kiko beo i can,

⁹Rubanga nyuto negi tice gi kede gikareco gi, be gin kibedo timo ewaka.

¹⁰En emio yit gi tuc pi winyo pwony mere, di eko ciko gi be kiwek timo gikareco.

¹¹Ka gin kiko winyo kop mere, di kiko donyo tic ne, gin kitieko kare me kuo gi di kitie kede kuo aber, kibedo kede kuo me yomcuny.

¹²Do ka gin kiko dagi winyo kop na, kibino to pi kwina piny, kobino neko gi kede epima.



13” Jo kalikame paro pi Rubanga mako lilo i cunyi gi; ka en etweo gi, gin likame kikok bute pi konyo gi.

14Gin kito di pwodi kititino, doko kuo gi jik kede lewic.

15Jo kame tie neno can Rubanga tio kede can gi nono me lako gi; en etio kede can opoto i kom gi nono me yabo wang gi.

16” En emito kwanyi ki peko di eko teri kakalac, kalikame tie gimoro kame dii kiye; en ebino pongo wi emesa ni kede cam abeco.

17Do nataman in itie udo alola kame poore kedi; kotieko ngolo ni kop kede ateni.

18Gwokere kur dano moro bitao in kede abar, doko kur iyeyi giamia kame komio i pipiny lok cunyi.

19Iparo be koko nin karuno konyi ki peko, arabo teko dedede kame in itie kede?

20Kur ibed paro tuno me iwor, en kare kame komuducaro kede atekerin.

21Gwokere kur ilokere timo dub; pien kotie tami kede can pi neno ka ibino dubo.

22” Neningo, twer ka Rubanga dwong; apwony mene kame cal bala en?

23Ngai kotieko nyuto ne gikame epoore timo, amoto ngai kame karuno waco be, ‘In itimo gikarac’ ?

24Yutuno pake pi tice mege, tice kame jo obedo wero were me pake pirgi.

25Jo dedede otieko neno gikame en etimo; do gin kineno ki tenge kakabor.

26Ateteni Rubanga dwong kalamo niang wan; wan likame okaruno maro mwakini mege.

27” Pien Rubanga mio pii duny eoto malo, di eko loke edoko kot;

28en emio idoun cwei kot, en ecwei di etot ne jo dedede.

29Iparo be tie dano moro kame karuno ngeno epone kame idoun petere kede i malo, amoto epone kame kot mwoc kede i malo kakame Rubanga bedo iye?

30Neningo, en esarakino meny mere rimaro en, di asara mere ko romo kiton dud nam.

31Manono en epone kame en epito kede jo; en emio cam bedo tot negi.

32En emako epie kede cinge di eko cike pi gweno kakame en emito kikokome.

33Mwoc me kot nyuto bino me yamo ager, akadi doke da ko ngeno be etie bino.

Yobu 37

1” Yamo abuko nono mio cunya poto, emio cunya dipere kitek.

2Winyunu kong kite kame dwan Rubanga mor kede, winyunu gato me kop awok ki doge.



- ³En emio meny me kot romo malo dedede, di eko caro wi lobo lung.
- ⁴Di do dwane ko dorano; en edorano kede dwane me dwongo mere, doko en likame egengo meny me kot esawa kame dwane dorano kede.
- ⁵Dwan Rubanga mor mor me aura; en etimo jamini adongodongo kalikame wan okarununu niang iye.
- ⁶Piento en etwero ciko akako be, ‘Cwei i lobo’ ; doko en etwero ciko kot da be, ‘Pot di itot i lobo.’
- ⁷En emio tice me jo dedede cungo tetekeny jo dedede kame en ecweo ngei tice mege.
- ⁸Di do leini ko ot kapwono gi, kiko dong kakame kibuto iye.
- ⁹Apipiru wokun ki tetu piny, doko yamo kawok ki tetu malo ko kelo ngico atek.
- ¹⁰Wei ka Rubanga mio pii makakin doko akako, di pii me nam ko arumakin.
- ¹¹En emio pii cokere i idoun di kiko doko pek; idoun nogo ko sarakino meny mere.
- ¹²Gin kiwire ot bala kame Rubanga mio gi, di kiko cobo gi dedede kame en eciko negi timo i wi lobo lung kakame jo bedo iye.
- ¹³En etimo manono pi mino jo alola, arabo pi timo bero ne lobo, amoto pi nyuto amara mere.
- ¹⁴” Winy kope nogi, Okwe in Yobu; mak ber asisa di iko paro kop i kom tice me aura kame Rubanga timo.
- ¹⁵Benyo, in ingeo epone kame Rubanga mio kede cik, di eko mino kot meny i edou mere?
- ¹⁶Benyo, in ingeo epone kame idoun ledo kede i malo, tice me aura me ngat katie kede ngec timo?
- ¹⁷In ngat kame igoen ni liet i kare kame yamo me tetu piny buko kede di eko mino piny ling titi,
- ¹⁸iparo be in ikaruno peto idoun bala en, di iko mino gi kidoko tek bala nyonyo kame kotwako?
- ¹⁹Pwony wan kong gikame obino waco ne; likame tie kop kame wan okaruno iiko me pido pien likame tie gikame wan ongeo.
- ²⁰Ango likame abino kwano kare me yamo kede Rubanga; benyo, tie ngatamoro kame cunye otieko mito be koto koneke?
- ²¹” Likame tie ngat kayei ciko wange neno wang ceng di etie rieny i malo, kame yamo otieko tero idoun tenge.
- ²²Meny acil bala saabu tie tetu malo; angosibib ka Rubanga kelo ne wa lworu.



²³Wan likame otwerunu tuno but Rubanga Won Twer; en etie kede twer adwong doko etimo jame dedede kakare, en etimo gi dedede kakare mio likame etero jo kirac.

²⁴Pi mano, jo lwore; en likame eparo pi jo kame terere ken gi be kiriek.”

Yobu 38

Rwot Odwoko Dog Yobu

¹Di do Rwot oko dwoko dog Yobu i apipiru di epenye be,

²” In ngai kame imito be igalao iik na kede kope nin me kwina piny?

³Aso cungi di itieko iikere, ango ayaro penyi di iko dwoko na.

⁴” I kare kame ango aketo kede acakini me lobo, oudo in itie tuai? Waca, ka ida cabo itie kede niang.

⁵Ngai en komoko rom mere, ka ateteni in ingeo? Ngai en korieo tol me pime?

⁶Ipirin agange cungo i kom nyo? Arabo ngai kame bin ocibo kide mege me esonda,

⁷di acerin me odiko wero karacel doko di imalaikan lelemo kede kilel?

⁸Ngai en kame bin ocego nam pi gengo pii i kare kame bin pii obelo kede bala opuyo?

⁹I kare nono ngai en kame bin ako mino idoun obedo bala igoen me ume, kede colpiny acucucuc oko bedo bala igoen me bone?

¹⁰Ango en kame bin agiro ne ikor, di ako cego ikekon mege kede lilime.

¹¹Ango en kame bin awaco ne be, ‘Ibino bino iko jik kan, do likame iko kalamo en, doko ebuka ni atingere kitek da bino cungo kanoni.’

¹²Benyo, cako nywali tie ceng moro acel kame in itieko ciko kede odiko pi en timo tic mere, doko iko mino obai ongeo kabedo mere?

¹³Benyo, in itieko ciko obai pi yabere romo lobo lung, di eko mino jo areco tengere ot pwono?

¹⁴Ru me piny mio imukuran kede aditoto atie i piny neno kakaler bala egoe korurujun, di kinyutere kiber bala agirat kame kotimo i kor agulu.

¹⁵Ru me piny twono jo areco lero gi, di oko tieko tim gi me gero.

¹⁶” Benyo, in itieko donyo i wen pii me nam, arabo itieko ot kede tieni i dud nam?

¹⁷Benyo, kotieko nyuto ni irutei me to, arabo itieko neno irutei acego kabedo me jo oto?

¹⁸Iparo be in ingeo rom me wi lobo lung? Tuc na ka in ingeo gi nogi dedede.

¹⁹” Benyo, in ingeo yongayo aoto kakame lero wok kiye, arabo colpiny wok ki tuai,



- 20 me wek iter gi katice gi, arabo itwer nyuto negi yote kame dwoko gi kabedere gi?
- 21 Ateteni in ingeo, pien oudo kotieko nywali i kare nono, doko mwakini me dongo ni tot twatwal.
- 22” Benyo, in itieko donyo i ude kame angu akano iye pii korurano, arabo itieko neno ot me kano akako?
- 23 Angu akano gin pi kuro kare me peko, pi kuro kare me yi.
- 24 Benyo, in ingeo yongayo aoto kakame meny me kot wok kiye, arabo kakame kosarakino kiye yamo me tetu kide i wi lobo?
- 25” Ngai en koyeco puleju kame kot bwote ki malo di lubo, kede yongayo kame mwoc me kot lubo?
- 26 Ngai kamio kot cwei kakame jo likame bedo iye, i wi tim kakame dano moro li kiye?
- 27 Ngai kamio kot cwei romo lobo kotuo agimoro li kiye tetekeny lum tui iye?
- 28 Benyo, papa me kot tie, arabo ngai en konywalo toyo?
- 29 Ngai en kobedo toto me akako, doko ngai en konywalo ekuna?
- 30 Pii lokere eko doko tek bala kidi, di wi nam ko arumakin.
- 31 “Iparo be in ikaruno tweno karacel acerin kocokere malo, arabo itwero gonyo tol kotweo karacel acerin kocokere me tetu malo?
- 32 Iparo be in itwero mino acerin neeno i kare kame miero gin kibed tie kede, arabo itwero nyuto ne acer adwong me tetu malo kede atitino mege yongayo gi?
- 33 Benyo, in ingeo iswilia kame kopugo kede malo? Iparo be itwero tic kede gi me pugo lobo da?
- 34” Benyo, in itwero lelemo di iko ciko idoun, me wek gin kibololo kot i komi?
- 35 Iparo be in itwero ciko kot pi meny, di en eko waco ni be, ‘Angu ine aikere pi timo ni tic’ ?
- 36 Ngai en kamio arumpiny riekko me ngeno dwogo me kot? Arabo ngai en kamio tongweno niang ru me piny?
- 37 Ngai atie kede riekko koromo, kame twero maro wel me idoun? Arabo ngai katwero lengo agune me malo di eko onyo kot piny,
- 38 di eko mino apua doko cwoto, doko eko makakin edoko tek?
- 39” Benyo, in itwero dwaro ne engu le me acama, arabo ikaruno mino idwe me engu yeng
- 40 di gin kitie kidole kabuto gi, amoto di kitie buto kapwono gi di kikio le me acama?



⁴¹Ngai kamio agak cam, ka idwe mege kok but Rubanga, di kiwiratoi pien cam li negi?

Yobu 39

¹” Benyo, in ingeo kare kame diegi abedo i wi mori nywal iye? Benyo, itieko neno atil di etie nywal?

²Iparo be in ingeo dwete kame gin kitieko di kiyac, kede kare me nywal gi?

³Iparo be in ingeo esawa kame gin kinywongo kede pi nywal, di kiko nywalo idwe gi?

⁴Idwe gin dongo i obar kuno di kom gi yot; kiyai kioto tenge di likame kiko bobo dwogo.

⁵” Ngai koweko punda me obar ot bala kame gin kimito? Ngai en kogonyo gi?

⁶Ango atieko mino gi wi tim pi bedo paco gi, atieko mino gi lobo kobedo munyo munyo pi doko kabedo gi.

⁷Gin kinyero woo katie i bomba; likame kiwinyo redo moro me ngat akolo gi.

⁸Gin kirimo wi mori mono lum me acama, doko kimoo gimoroni kenekene alulum.

⁹” Iparo be jobi karuno yei timo ne in tic? Iparo be eyei tieko iwor acel kakame in imio kiye leini ni cam?

¹⁰Iparo be itwero twene kede auno di iko mine puro ecuka? Arabo ikaruno mine wano kweru me loko bot di elubi?

¹¹Iparo be ibino keto gen ni i kome piento en etek twatwal, di iko jalo ne timo tic ni?

¹²Benyo, ibino bedo kede yei be en ebino dwogo, doko en ebino kelo kal ni i diakal?

¹³” Ekululu wawako bwome kitek, do likame ekaruno por pien yer li ki bwome.

¹⁴En enywal piny di eko weko abeon mege iye, lieto me lobo en aobo gi.

¹⁵En wie wil likame eparo be tien gimoro twero neko gi, doko da likame eparo be le moro me obar karuno nyonyono gi.

¹⁶En etero idwe mege kirac ineno bala likame kibedo mege; bed bala cane mere twer bedo me nono, do en likame eparo.

¹⁷Etie kamanono pien ango likame amie rieko, doko likame amie niang moro.

¹⁸Ka en eyai pi ringo, en enyero anyera asigira kede ngat katie ringo kede.

¹⁹” Benyo, in en imio asigira teko kame en etie kede? Mam in en imie yer me ngute?

²⁰Benyo, in en imie esosomo bala obonyo, di emio jo lworu kame ekuto ume kede ewaka?

²¹En ekukuro piny kede teko; emwomere amwoma i yi.



²²En enyero anyera kop i kom lwordo di likame eparo gimoro iye; epima likame mie edok cen ki yi.

²³Imalia me ngat aringo kede en kok ki i sau me mako gi, di tong kede macarin meny.

²⁴En eringo anyim kitek kede gero di kome miel amiela; kame kokuto agwara, likame ecungo mot.

²⁵Kame ewinyo koko me agwara, en eunyo; engweo yi ki kakabor, doko ewinyo redo me jotel yi ki tenge.

²⁶” Benyo, rieko nin en kame mio ekeng por, kame eyaro bwome por i bad tetu piny?

²⁷Iparo be in en imio acut cik me por i malo kakawiriwir, di eko gero ode malo i wi moru?

²⁸En ebedo i wi moru doko egero paco mere i awita me moru kakame gimoro likame lole kiye.

²⁹En engingico gimoro ki kuno pi camo ringo mere; wange nene ki kakabor.

³⁰ Idwe mege mato remo, doko kakame kom gi oto tie iye, kunono en kame acut da tie iye.”

Yobu 40

¹Di Rwot bobo oko waco ne Yobu be,

²” Iparo be ngat kame mo raco me jo karuno piem kede Rubanga Won Twere? Poore ngat apiemo kede Rubanga dwok peny noni.”

Kop kame Yobu Odwoko ne Rubanga

³Di do Yobu oko gamo dog Rwot be,

⁴” Neningo, ango kom kony na li; kop nyo kame ango abino dwoko ni? Ango aumo dog kede cinga di ako ling.

⁵Ango atieko yamo tien acel me atwal, likame doko abino gamo dogi; Atieko yamo tien kede tien, likame abino medo yamo.”

Kop kame Rubanga Owaco ne Yobu

⁶Di do Rwot oko gamo dog Yobu i apipiru be,

⁷” Cungi di itieko iikere; ango ayaro peny di iko dwoko na.

⁸Ateteni mam in itie waco be ango atimo rac? Mam in itie ngolo raco i wia tetekeny in inyut be in dano aber?

⁹Iparo be in itek bala ango? Iparo be in ikaruno redo kede dwan acal bala mera?

¹⁰Aso cabo walere kede angosibib kede wor ni; nyut deyo ni kede dwongo ni.



- ¹¹Bwot gero ni i kom jo dedede awakere, di iko mino gi kimwolere.
- ¹²Nen gi di iko dwoko wi gi piny; nyonyono jo areco i kakame kitie iye.
- ¹³Yik gin dedede karacel piny i lobo; twei gi i kabedo me jo oto.
- ¹⁴Di ada ako bino paki pien teko nin en komi ilo.
- ¹⁵” Nen kong emiria, gikame ango acweo bala kame acwei kede; en ecamo lum bala twon,
- ¹⁶do teko mere tie i pierie kede i ringo me yie.
- ¹⁷En eketakino yibe ko doko tek bala yat seda; amorito me amuros mege oribakin karacel.
- ¹⁸Cogere mege cal bala paipon me nyonyo buronsi, tiene cal bala atekai me nyonyo ayon.
- ¹⁹” En ebedo me agege kikom jamini adongodongo kame ango atimo; Ngacwene kenekene en kame karuno noke kede epima.
- ²⁰Ateteni cam mere dongo i wi mori, kakame leini dedede tuko iye.
- ²¹En ebuto i dud okuti, doko epwono i dud bilo kede aladoi me osamai.
- ²²Yen apat adongo i dog nam kede ayelo ume kede tipo gi.
- ²³Akadi di pii me ecilet gunyao kitek, en likame lworu make; ebedo mot akadi di pii me ecilet me Yorodan dipere beo i doge.
- ²⁴Iparo be tie dano moro kame romo kode kede golu, arabo cike di owic ko kwicakino ume?

Yobu 41

- ¹ “Iparo be in itwero wano Lebiatan kede golu, arabo itwero tweno lebe kede tol?
- ²Iparo be in itwero rwako auno iume, arabo itwero tuco itinyo mere kede golu?
- ³Iparo be en ebino ngangao in pi weke? Iparo be en ebino yamo kedi di emwolere?
- ⁴Iparo be en ebino timo kedi isikan pi in tere bala ngatic nin atwal?
- ⁵Iparo be in ibino tuko kede bala winyo, arabo ibino twene i tol bala gi me anena akelo ne anyira ni yomcuny?
- ⁶Iparo be jocik deksam bino patano i kome? Iparo be jocat deksam bino popoko en me acata?
- ⁷Benyo, in ikaruno tutuco del mere kede tong dobo, arabo itwero tuco wie kede macarin?
- ⁸Tam kong mule; wi likame bino wil kede yi nono, doko likame ibino rucakino.



- ⁹Gen me make likame tie; dano nene anena aman di teko ko tiek i kome di eko potopiny.
- ¹⁰Likame tie dano moro acunye nwang kame yei kanyakino twaruno en. Ngai karuno cungo i nyime?
- ¹¹Ngai karuno sure di eko bwot abongo udo peko? Ngai, i wi lobo lung?
- ¹²” Ango likame ayaro ling i kom kop amako tiene, arabo i kom kop amako dwongo me teko mere, amoto bero me epone kame kocwee kede.
- ¹³Ngai twero gonyo giangapa mere me ooko? Ngai twero tucoto ekoti mere kame edokakino pi gwoko kome?
- ¹⁴Ngai twero yabo doge? Lake mio jo lwor.
- ¹⁵Abokoya me ngee ineno bala ibukui kame konapo i irotin, kimakakin ineno bala komwono gi amwona.
- ¹⁶Kitie dicidici karacel, akadi yamo da likame twero bedo tie i diere gi.
- ¹⁷Gin kiriamakin, acel oriamakin kede ocelu; kikokodun doko likame kokaruno pokogi.
- ¹⁸Ka en egiro, lau awok ki doge rieny, doko wange rieny bala ceng apwodi tie wok awoka odiko.
- ¹⁹Leb mac liel wok ki doge; mac kire ooko ki doge.
- ²⁰Iiro duny wok ki ume, bala eura aduny ki agulu kodop me tedo.
- ²¹Eura me wei mere moko akuk; leb mac liel wok ki doge.
- ²²Ngute tek twatwal, mio jo dedede ariamo kede teko gi tiek pitipit pi lwor.
- ²³Kakododolun me kome oriamakin; kimakakin likame kiyangere.
- ²⁴Cunye tek bala engaro, etek bala kidi me riego.
- ²⁵Kame ekiar, akadi jo atek da doko lwor; kidok cen pi lwor.
- ²⁶Akadi epima cobe, likame epima timo ne gimoro, akadi tong, emal arabo macar.
- ²⁷Kibute, lilim cal bala arienge, doko nyonyo buronsi cal bala yat kotop.
- ²⁸En likame eringo emal; kibute, engaro kame koporosaro i kome cal bala cucung.
- ²⁹En eneno akuta bala arienge; en enyero macar kame kolate kede anyera.
- ³⁰Abokoya me yie cal bala abalatigo abitobito; etimo eos mere i cwoto ineno bala me eba me canyo.
- ³¹En emio pii me nam gugunyo bala pii kame kotie cwako kede agulu, emie egugunyo bala mo kame kotie cwako.



³²Eweko eos ameny kakame ebeo iye; emio nam kua buo atar bala lwar.

³³Likame tie gimoro karom kede i wi lobo, en ebedo giacwea kalikame tie kede lwor.

³⁴En eneno kede acae leini dedede kawakere; en ebedo abaka kame lo gi dedede kawakere.”

Yobu 42

Rubanga Odwoko ne Yobu Mulem mere

¹Di do Yobu oko dwoko dog Rwot be,

²” Ango angeo be in ikaruno timo gi dedede, doko da gikame in i iiko pi timo likame kotwero gengo.

³ In ipenyere be, ‘Ngai ine kame totolo iik na di eli kede ngec?’ Ateteni angoudo ayamo gi kalikame aniang iye, jamini me aura twatwal kibuta, gi kalikame oudo angeo.

⁴ Cik yiti iwinyi, angou ayaro yamo; ayaro penyi di in iko dwoko na.

⁵Angou oudo awinyo kop i komi awinya, do nataman atieko neni kede wanga.

⁶Manono omio lewic omaka, doko abedo i apua kede i buru pi nyuto swilaro na.”

Komio Jowot Yobu Lewic

⁷Ingei Rwot waco ne Yobu kope nogi, eko waco ne Elipasi dano me bomba me Tema be, “Ango alilo ne in kede jowoti are go, pien wun likame ikounu yamo kop apoore i koma bala kame ngatic na Yobu otimo.

⁸Pi mano, nataman kwanyunu twonin kanyaare kede romini kanyaare ikounu tero gi but ngatic na Yobu, di ikounu mino gi bala giayala awanga piru. Yobu bino lego piru di angou ako bino gamo kwac mere di likame ako timo ne wu bala kame mitere ne wu. Pien wun likame ikounu yamo kop apoore i koma bala kame ngatic na Yobu otimo.”

⁹Aso, Elipasi dano me Tema, kede Bildad dano me Sua kede Sopar me Naama oko ot di kiko timo gikame Rwot oudo owaco negi, di Rwot oko gamo ilega ka Yobu.

¹⁰ Di do kakame Yobu otieko lego ne kede jowote, Rwot oko dwoko ne lonyo mere. Rwot omie jamini adoko me agege tien are.

¹¹Di imiegu kede amiegu mege dedede oko bino karacel kede jo koudo ngee sek, kiko camo kede en ebaga i ode. Gin kiko nyuto ne cunye me kisa di kikweo cunye pi can dedede kame Rwot omio opoto ne. Ngat acelacel kikom gi oko mine sente moro kede epeta kame kotimo kede saabu.

¹²Rwot oko mino Yobu winyo i kare me atiekini me kuo mere kalamo i kare me agege. Yobu bin oko bedo tie kede romini tutumia tomon kiwie ongwon (14,000), aguraguran tutumia kanyape (6,000), twonin me pur tutumia are (2,000), kede pundan tutumia acel (1,000).



13En eko bobo nywalo awobe kanyaare kede anyira adek.

14Eko cako nying nyako me agege Jemima, me are Kesia, kede me adek Keren Kapuk.

15I wi lobo lung likame oudo tie mon acil bala anyira ka Yobu. Papa gi bin oko mino gi kinywako sikao jamini mege karacel kede imiegu gi.

16Ingei manoni, Yobu bin oko bedo kuo pi mwakini tol acel kede ot ongwon (140), di eko neno ikwae kede idwe me ikwae mege, kiton tuno i ikwae me ongwon.

17Yobu bin oko to di etieko ti kiber.



Sabuli

Sabuli 1

ITABU ME AGEGE

(Sabuli 1—41)
Yomcuny me Ateni

- ¹Kitie kede yomcuny jo kalikame gamo tam me jo areco, arabo kalikame lubo yongayo kame jodubo lubo, arabo kalikame bedo kede joacae;
- ²do kibedo kede yomcuny i lubo iswil ka Rwot, di kiparo kop mere i cuny gi i yore atut iceng kede iwor.
- ³ Gin kical bala yen kame kopito osamai, kame nyak i kare kikokome, doko pote gi likame ner. Gi dedede kame jo nogo timo ngetakin kiber.
- ⁴Do jo areco likame tie kamanono; gin kical bala cucung kame yamo buko tenge.
- ⁵Pi mano, likame jo areco bino bwot ki ngolo kop, doko da likame jodubo bino ribere i kom jo kopoore,
- ⁶pien Rwot gwoko jo opoore i yongayo gi, do yongayo kame jo areco lubo tero gi i to.

Sabuli 2

Abaka ka Rubanga kame Eyero

- ¹ Pinyo komio atekerin timo iik me jemo? Pinyo komio jo poro kop kame kony mere li?
- ²Abakai me wi lobo otieko cungo kiteere, jopug mege tie poro kop karacel i kom Rwot kede i kom dano mere kame en eyero, di kiwaco be,
- ³” Ogonyerenu ki twec gin kede okounu dagi apugan gi.”
- ⁴Ngat kame bedo i kom mere me ajakanut i malo tie nyero gi anyera; Rwot tie kede nyero me acae i kom gi.
- ⁵En ebino yamo kede gi kede lilo, eko mino gi lworopi gero mere, di ewaco be,
- ⁶” Ango atieko keto abaka na i Sion, i wi moru na kacil.”
- ⁷ Abaka waco be, “Abino waco kop kame Rwot omio. En ewaco na be, ‘In en woda; tin ango adoko papa ni.
- ⁸Kwaa di ako bino mino atekerin dedede i cingi, kede wi lobo lung ko bino doko meri.
- ⁹ In ibino nyonyoto gi kede ebela me lilim, di iko ngingido gi ngidingid bala agulu.’



¹⁰Nan do pi mano, wun abakai bedunu di iriekunu; wun jopug me wi lobo winyunu ikwenyar noni.

¹¹Tiunu ne Rwot kede lworu;

¹²Iurunu i nyime kede mielkom; aso ka li, ebino doko ger di ikounu to susunyo, pien udo lilo obunyo make. Kitie kede winyo jo dedede kame ringo ot gwokere bute.

Sabuli 3

Ilega me Kwano Kony

¹Okwe Rwot, jokwor na tin tot benyo! Jo atot tie bwangun i koma.

²Jo atot tie waco na be, “Rubanga likame bino konyi.”

³Do Rwot, in ibedo ebuku kame gwoko koma lung, in ikelo na deyo, in en ngat kame mio nwangcuny.

⁴Ango akok but Rwot kede dwan amalo, di en eko gamo kwac na ki wi moru mere kacil.

⁵Ango abuto ako nino, doko ako cei pien Rwot gwoka.

⁶Ango likame atie kede lworu i kom jo tutumia tomon, jo kame oluka pi yi keda.

⁷Yai, Okwe Rwot! Laka, Okwe Rubanga na! Pien in itwero bungo jokwor na; itwero kwanyo teko me jo areco.

⁸Rwot en kame mio jo bwot; emi jo mege winyo!

Sabuli 4

Ilega i kare me Peko

¹Gam kwac na kame akok buti, in Rubanga kame gwoko twero na! I kare kame oudo atie kede i peko, in imia alakanar. Bed kede kisa buta iko gamo ilega na.

²Wun ba, ibinunu mina lewic pi kare arom amene? Ibinunu maro kope me abe kede kope kame kony gi li pi kare arom amene?

³Do ngeunu be Rwot otieko yero jo kopoo pi bedo jo mege; Rwot gamo kwac na ka akok bute.

⁴Ka gero omaki, kur idonyi i dub; par kop nono eliling i kabuto.

⁵Miunu giayala kame poore, doko ketunu genu i kom Rwot.

⁶Tie jo atot kame waco be, “Okwe, koto oneno bero moro da! Rwot nen wa kede wangi me kisa.”

⁷In imia abedo kede yomcuny, kalamo jo kame okao kac kede koudo bwini atot.

⁸Ango abino buto di ako nino kede anapakin; pien in keni Rwot en kame igwoka kiber.



Sabuli 5

Ilega me Kwano Gwok

- ¹Winy kop na, Okwe Rwot; winy cur na.
- ²Winy koko na, in abaka kede Rubanga na, pien ango atie lego buti.
- ³Okwe Rwot, in iwinyo dwana odiko; odiko ango acwao koko na buti di ako donyo kuro.
- ⁴Pien likame in Rubanga kame cunye yom i kom tim areco; likame in inywako kede gikarac.
- ⁵Joewaka likame twero tuno i nyimi; in idagi jo kame timo tim areco.
- ⁶In imuducaro jo kame yamo kope me abe; Rwot cunye dagi jonek kede joangalo.
- ⁷Do pi amara ni adwong kalikame lokere, ango abino donyo i odi; abino luro i nyimi i tempulo ni kacil pi mini wor.
- ⁸Okwe Rwot, tela pien in ipoore, pien atie kede jokwor atot; mi yongayo nin kame atie lubo bed di oriere.
- ⁹Pien kop kame dog jokwor na waco likame tie me ateni; cuny gi opong kede kop me nek; dwan gi cal bala ates kame wie oyabere; leb gi yamo kope amit me abe.
- ¹⁰Okwe Rubanga, mi gi alola pi raco gi; mi iik gi en kame ret gi. Riam gi tenge pien dub gi tot, pien kijemo ne in.
- ¹¹Do mi jo kame ringini gwok buti kilel, wek kiwer wer me ilel nakanaka. Gwok jo kame mari tetekeny kibed kede ilel piri.
- ¹²Pien in imio jo kopoore winyo, Okwe Rwot; in iumo gi kede amara nin bala ebuku.

Sabuli 6

Ilega me Kwano Kony i Kare me Peko

- ¹ Okwe Rwot, kur ibunano ango pi gero ni, kur ibitaro ango pi lilo ni.
- ²Kisa maki i koma, Okwe Rwot, pien atieko doko goro; Okwe Rwot, canga, pien cogere na li do kede teko atwal.
- ³Peko otieko donyo i kuo na, do in, Okwe Rwot, ibino daro paka awene?
- ⁴Okwe Rwot, lokere buta iko lako kuo na; laka pi amara ni kalikame lokere.
- ⁵Pien likame koyutuno in i kabedo me jo oto; ngai kame paki i kabedo me jo oto?
- ⁶Cur otieko oola; iwor acelacel pigewanga nyongo kabuto; koko mio pigewanga nyongo kawic diabadiaba.
- ⁷Koko omio wanga opongupongun, kitie doko mwadamwada pien akok pi jokwor na.



⁸ Irwaunu tenge kibuta wun jo dedede kame timo gikareco, pien Rwot otieko winyo koko na.

⁹ Rwot otieko winyo kwac na; Rwot gamo ilega na.

¹⁰ Lewic bino mako jokwor na dedede di kiko bedo kede peko; gin kibino wilun dok di oko bino mino gi lewic susunyo.

Sabuli 7

Ilega me Kwano Ngolo Kop i Ateni

¹ Okwe Rwot Rubanga na, in en karingo na me gwok, laka kibut jokwor kame tie wapo yora iko mina abwoti,

² aso ka li, gin kibino nyinyilo ango bala engu; kibino wana tera tenge abongo ngatamoro kame romo konya.

³ Okwe Rwot Rubanga na, ka atimo gigi, ka cinga otimo ne ngatamoro raco,

⁴ ka aculo ngawota kede timo ne raco, arabo ka ayako ngakwor na abongo tien kop moro,

⁵ mi ngakwor na wapa paka maka; ereta piny di eko neka, di eko weka di abuto piny i lobo abongo kuo.

⁶ Okwe Rwot, yai kede gero, yai iko yi kede jokwor kobino na kede lieto. Yai do, Okwe Rubanga, pien in imito kop kame kongolo kakare.

⁷ Mi jo me atekerin dedede cokere luki, di in iko pugo gi di ibedo i kabedo me malo.

⁸ Rwot ngolo ne jo dedede kop; ngol na do kop kiber, Okwe Rwot pien ango apoore, doko da ali kede raco moro.

⁹ Mi raco me jo areco jiki, do mi jo kopoore dok tek, in Rubanga kopoore, in itwero poko ngeno tam me jo kede gikame tie i cuny gi.

¹⁰ Rubanga en ebuku kame gwoka, en elako jo kame cuny gi opoore.

¹¹ Rubanga en ngangolkop kame ngolo kop i ateni, en Rubanga kame tie kede gero i kom jo areco ceng dedede.

¹² Ka dano moro likame oswilaro, Rubanga bino peno epima mere doko bit, en etieko kudo yat me emal eko peno tol mere,

¹³ en etieko iiko jamini areco me yi, eketo gikame liel mac i leb imalia mege.

¹⁴ Neningo kite kame kitie iiko kede tam areco, cuny gi opong kede iik areco kede tim me angalo.

¹⁵ Gin kikunyo bur atut, do gin nogo ken gi kiko popoto i bur kame kikunyo.

¹⁶ Iik gi areco dwogo i wi gin nogo, doko da tim gi me gero dwogo i wi gin nogo.



¹⁷Ango gira abino pwono Rwot piento en epoore, doko abino pako nying Rwot, en Ngamalo Twal.

Sabuli 8

Deyo ka Rubanga kede Dwongo ka Dano

¹Okwe Rwot, Ngadwong wa, nyingi tin dwong benyo i wi lobo lung! Pak kame jo mii pi deyo ni tuno i malo,

²di ewok ki dog idwe kede imukerun. In itieko cibo kateko pi gengo jokwor ni, pi tieko kop me jokwor ni kede jo kame culo kwor i komi.

³Ka ango aneno malo, gikame obedo tic me cingi, duwe kede acer kame in icibo,

⁴dano obedo nyo kame mio in iparo pire; kom dano adana en kame in iparo pire?

⁵Akadi kamanono da, in imio dano kabedo kame noko merin kalamo giacwea dedede, di iko ngapo ne deyo kede wor.

⁶In imie pugo gi dedede kame obedo tic me cingi; in iketo gi dedede i loc mere:

⁷romini dedede kede dok, kede leini me obar da;

⁸winy me wi yamo kede deknam, kede jame dedede kame bedo i nam.

⁹Okwe Rwot Ngadwong wa, nyingi tin dwong benyo i wi lobo lung!

Sabuli 9

Pwono Rubanga pi Ngolo Kop i Ateni

¹Abino mino Rubanga pwoc kede cunya dedede; abino tatamo gi me aura dedede kame in itimo.

²Cunya bino bedo yom di ako lelo piri; abino wero wer me pako nyingi, Okwe Ngamalo Twal.

³Kame jokwor na owilun dok cen, gin kibino popoto piny i nyimi di kiko totoun.

⁴Pien in ingolo na kop kiber, in ibedo i kom ni me ajakanut di iko ngolo kop kakare.

⁵In itieko bunano atekerin apat, iko muducaro jodubo; itieko weno nying gi pi ikar kede ikar.

⁶Jokwor na otiek atwal, in itieko puputo bomban gi da; likame bobo kotwero yutuno gi akadi acel.

⁷Do Rwot bedo i kom mere me ajakanut ikar kede ikar; etieko cibo kom mere me ajakanut di tek pi ngolo kop.

⁸En engolo ne piny kop iepone kopooore; en engolo ne atekerin kop kede cuny acel.

⁹Rwot en kateko me jo kame kodio, en kateko i kare me peko.



- ¹⁰Jo kame ngei i cuny gi bedo kede gen i komi; pien, Rwot, in likame iweko jo kame moi.
- ¹¹Werunu were me pako Rwot, ngat kame bedo i Sion. Tucunu tice mege ngere but jo.
- ¹²Piento en ngat kame eculo kwor me jo kame koneko likame wie wil kede gi; likame wie wil kede koko me jo kame can opoto negi.
- ¹³Mi kisa maki i koma, Okwe Rwot! Nen can kame jo adaga tie mina aneno! Laka ki to,
- ¹⁴tetekeny atemuno tatamo kope dedede me paki i irutei me Yerusalem, di ako lelo pien ilaka.
- ¹⁵Atekerin apat otieko popoto i bur kame kikunyo. Owic kame kiciko olokere mako tien gin nogo.
- ¹⁶Rwot otieko mino jo ongee, pien engolo kop kakare. Jo areco lokere moko i owic kame cing gi en ociko.
- ¹⁷Jo areco bino ot i kabedo me jo oto, karacel kede atekerin apat dedede kame dagi Rubanga.
- ¹⁸Pien wi Rubanga likame bino wil kede jocan, doko da gen kame jocan tie kede likame bino kei nakanaka.
- ¹⁹Okwe Rwot, yai! Kur imi dano adana bwoni; cok atekerin dedede i nyimi di iko ngolo negi kop.
- ²⁰Mi lworu mak gi, Okwe Rwot; mi atekerin ngei be gin kibedo jo ajoa.

Sabuli 10

Ilega me Kwano Ngolo Kop i Ateni

- ¹Okwe Rwot, pinyo komio icungo kakabor abora? Pinyo komio ipwono apwona i kare me peko?
- ²Jo areco tie tidilo jocan kede twon ewaka, mi gi kimoki i owic kame gin kitieko ciko.
- ³Pien jo areco wakere pi mit gi me cuny gi, jo kame tie kede keu me ud i yore arac dagi Rubanga di kicae.
- ⁴Jo areco likame paro pi mono Rubanga, gin kiwakere di kitie kede tam kame waco be, “Rubanga gire li.”
- ⁵Gikame gin kitimo cobere kiber. Likame gin kiniang epone nin me ngolo kop, kom eli alia i tam gi; gin kisuk i nyim jokwor gi.
- ⁶Gin kitamo i cuny gi be, “Likame tie gikame bino yango wa; i kare lung likame wan obino riamo kede peko moro.”



- ⁷ Dog gi opong kede ilam, angalo, kede kope me adiadia, leb gi woto kope kame kelo peko kede me dub.
- ⁸Gin nakanaka kipwono kino jo i calere; kineko jo kame li kede kop moro i kapwono gi. Kingibuco wang gi neno jo kame piny oloo,
- ⁹gin kipwono i mung pi kino jo bala engu, gin kipwono me wek kimak jocan, kimako jocan kiko ware kede gi i bwoi gi.
- ¹⁰Gin kigungo, kigugumo, teko gi ko bwono jo kame piny oloo.
- ¹¹Gin kitamo i cuny gi be, “Wi Rubanga owil, eumo wange likame ebino neno tim wa.”
- ¹²Yai, Okwe Rwot; Okwe Rubanga, kiarao badi; kur wi wil kede jo kame kodio.
- ¹³Pinyo mio jo areco dagi Rubanga, di kiwaco i cuny gi be, “Likame ebino mino wa alola” ?
- ¹⁴Do ida itie neno! In ingico peko kede cweruncy kame jo tie kede, tetekeny isobolo mino kony. Jo kame kabeo olo jalo kuo gi i cingi; in ibedo ngakony me idwe kic.
- ¹⁵Tuturo cing jo areco kede jo kame timo tim areco; moi raco gi paka udo gin dedede abongo acel moro dong.
- ¹⁶Rwot obedo abaka me ikar kede ikar. Atekerin kame dage bino to ki lobo mere.
- ¹⁷Okwe Rwot, in ibino winyo kwac me jo amwol; ibino mino gi tekuncy.
- ¹⁸In ibino ciko yiti winyo koko me idwe kic kede me jo kame kotero kirac; ibino ngolo negi kop aber, tetekeny jo me lobo kan kur doko kel lworu.

Sabuli 11

Bedo kede Gen i Rwot

- ¹Ango aringo gwokere but Rwot. Benyo benyo kame in iwaco nango kede be, “Por bala winyo iko ot i mori,
- ²pien jo areco otieko kudo yat me emal gi pi tweno tol, gin kitieko ciko emal gi i tol, pi gweno i kakacol jo kame cuny gi ber.
- ³Ka acakini me gimoro odubere, nyo nat kame jo kopooore karuno timo?”
- ⁴Rwot tie i tempulo mere kacil; kom mere me ajakanut tie i malo. Wange neno jo dedede, en engico gikame gin kitimo.
- ⁵En engingico jo kopooore kede jo areco dedede; cunye dagi jo amaro tim me gero.
- ⁶En ebino onyo itonge me mac kede salupa kame liel i kom jo areco; en ebino wango gi kede yamo kame buko kakaliet.
- ⁷Pien Rwot opooore; en emaro tice kopooore; jo kame cuny gi ber bino neno wange.



Sabuli 12

Ilega me Kwano Kony

- ¹Kony wa Okwe Rwot, pien likame do tie ngatamoro kame woro Rubanga; jo kame geni otieko doko li i diere me jo.
- ²Gin dedede kingalere ken gi ken gi; kingalere kede kope amit me dog gi do di kope me cuny gi pat.
- ³Rwot, mi jo kame yamo kope me angalo lingi, jo kame wakere twatwal be,
- ⁴” Kope kame wan oyamo bino mino wa oudo gikame omito. Kope wan en megwa, ngai bo kame pugo wa?”
- ⁵Rwot waco be, “Pien kotero jocan kirac, doko jo kame koridakino tie dinyo, ango nataman ayaro bino mino gi gwok kame cuny gi mito.”
- ⁶Cikere kame Rwot mio genere; kitie me ateteni bala nyonyo siliba kame kojililo tien kanyaare.
- ⁷Okwe Rwot, in ibino gwoko wan; ibino gwoko wa nakanaka ki cing lwak me i kare noni.
- ⁸Jo areco tie ceede kabedo dedede, bala kame jo pwoyo kede tim areco i diere me jo.

Sabuli 13

Ilega me Kwano Kony

- ¹Okwe Rwot, tuno awene? Mam wi do oyaro wil keda atwal atwala? Iyaro loko na ngei tuno awene?
- ²Miero akany lito tuno awene, di atie kede cwercuny iwor kede iceng? Ngakwor na oyaro lelo i wia tuno awene?
- ³Okwe Rwot Rubanga na, winya di iko konya! Dwok teko na, ka li, ango ayaro to.
- ⁴Ngakwor na di ko bino waco be, “Atieko bwone” ; ngakwor na oyaro lelo pien kobwona.
- ⁵Do ango ageno amara nin kalikame lokere; abino bedo kede ilel pi in ilaka.
- ⁶Rwot ango abino wer ne in, piento in itimo nango bero adwong.

Sabuli 14

Tim Areco ka Dano

- ¹Jomingo waco i cuny gi be, “Rubanga li.” Gin kitie kede cuny arac, kitimo gikame neno rac; likame tie ngatamoro kame timo gikame ber.
- ²Rwot ngio jo ki malo pi neno ka tie ngatamoro ariek, ngat kame woro Rubanga.



³Gin dedede kitieko parao, gin dedede kidubere; likame tie ngatamoro kame timo gikame ber, likame tie akadi acel.

⁴Mam gin likame kitie kede ngec moro, gin jo kame timo gikareco, jo kame camo jo na bala kwon di likame kilego buta?

⁵Gin kibino bedo kede lworu adwong, pien Rubanga tie karacel kede jo kopoore.

⁶Wun inyerunu iik me jocan, do Rwot en ngat kame gin kiringo gwokere bute.

⁷Okwe koto alako me Isirael owok ki Sion! I kare kame Rwot dwoko kede winyo me jo mege, ikwae ka Yakobo bino ilel; jo me Isirael cuny gi bino bedo yom.

Sabuli 15

Gikame Rubanga Mito

¹Rwot, ngai en kame poore bedo i tempulo nin? Ngai en kame poore bedo i Sion, moru nin kacil?

²Gin en jo kame li kede raco moro i kuo gi, doko kitimo gikame poore, kiyamo kop me ateni kame tie i cuny gi;

³gin jo kalikame dubo nying jo, gin likame kitimo raco ne jowot gi, doko likame kitie kede acae but jokio gi.

⁴Gin kineno jo areco kede acae, do kimio wor but jo kame lworu Rwot. Gin likame kiloko tam gi ki gikame kitieko kwongere iye akadi di elit negi.

⁵Gin kikopo sente but jo abongo mito ameda moro iye, doko likame kiyei kowilo gi pi mino ijura me abe i kom dano kame li kede raco. Ngat kame timo gigo likame tie gikame bino yango kuo mere.

Sabuli 16

Ilega me Keto Gen i kom Rubanga

¹Okwe Rubanga, gwoka, pien in en kagwok na.

²Ango awaco ne Rwot be, "In en Rwot na; bero kame ango atie kede dedede wok kibuti."

³Do jokacil kame tie i lobo nono, gin en jo me awora. Cuny ango yom i kom gin adikinicel.

⁴Jo kame yero rubanga apat medo cweruncun gi ameda. Ango likame abino onyo negi remo bala giayala arabo lwongo nying gi.

⁵Rwot en obedo iner nango; in imia gikame mitere na; anyim nango tie i cingi.

⁶In imia gikame yomo cunya; in imia gikame ber.

⁷Apako Rwot ngat kame mia tam; iwor da cunya pwonya.



⁸Tam nango tie i kom Rwot nakanaka; piento en etie i bada tetu cam, likame tie gikame bino yango tam na.

⁹Pi mano, ango cunya yom doko alelo; atie da kede anapakin.

¹⁰Pien in likame ibino jala i kabedo me jo oto, arabo weko dano nin kame geni donyo i kabedo me jo oto.

¹¹In inyuto nango yongayo kame tero jo i kuo. I nyimi tie iye ilel adwong twatwal; i ngeti tetu cam tie iye yomcuny ikar kede ikar.

Sabuli 17

Ilega me Dano Ali kede Raco

¹Winy koko na Okwe Rwot, pien kop na tie me ateni; cik yiti iwiny ilega kame wok ki doga, ilega kame angalo li kiye.

²Mi lono kop na wok kibuti; wek wangi nen gikame poore.

³Ka ingingico cunya, ka iwelao ango iwor, ka itama, likame ibino udo tim areco i kuo na; doga likame yamo kope areco,

⁴bala kame jo apat timo; ango alubo kop kame in iyamo di likame ako yei lubo yote me jogero.

⁵Ango abedo lubo yote nin nakanaka; tiena likame ocetar tenge.

⁶Okwe Rubanga, ango alwongere buti pien in ibino dwoko kwac na; cik yiti di iko winyo kwac na.

⁷Nyut amara nin kalikame lokere iepone me aura, Okwe in ngalak me jo kame ringini gwok buti ki cing jokwor gi pi twer nin.

⁸Gwoka bala kite kame kogwoko kede tongwang; kana i tipo me bwomi,

⁹kibut jo areco kame mito muducaro ango, jokwor na kame mito neka, jonek koluka.

¹⁰Gin kili kede cuny me isasir; dog gi yamo kope me ewaka.

¹¹Kiwapa kabedo dedede; nataman da kitieko luka; kiciko wang gi i koma kimito reta piny.

¹²Gin kical bala engu kame tie kiire, engu owor kame mito nyinyilo ango.

¹³Yai, Okwe Rwot! Yi kede gi di iko bwono gi! Lak kuo na ki cing jo areco kede epima nin;

¹⁴Okwe Rwot, laka ki cing gi kede twer nin, laka ki cing gin jo kame iner gi i kare me kuo gi tie i piny kan. Mi yi gi pong kede gikame in itieko kano pirgi; mi idwe gi ud gikame kalamo; mi gi kiwek gimoro da dong ne ikwae gi.

¹⁵Do ango gira abino neni pien apoore; ka acei ki wang nino, tie ni keda bino yomo cunya.



Sabuli 18

Wer ka Daudi me Bwono Jokwor

- ¹Okwe Rwot, ango amari, in en teko na.
- ²Rwot en lela na, en apama atek kame gwoka, ngalak na, Rubanga na, lela na kame ango aringo gwokere bute, ebuku na, kede ngateko kame laka; en kateko na.
- ³Ango alwongere but Rwot ngat kame poore apaka, di eko laka ki cing jokwor na.
- ⁴Bwoi me to oudo oluka; ebuka kame neko oudo iyapi mwonya;
- ⁵oudo amoko i bwoi me kabedo me jo oto; oudo ariamo kede owic me to.
- ⁶I can na ako lwongere but Rwot; akok but Rubanga na pi konya. En eko winyo dwana ki tempulo mere, di koko na oko tuno i yite.
- ⁷Di do piny oko yangere, eko tagere; acakini me mori da oko yangere di kitagere, pien oudo Rubanga olilo.
- ⁸Yiro di oko duny ki ume, mac ager kede itonge kobokere bubu oko liel ki doge.
- ⁹En eko yabo edou di eko bino piny; edou acol cucucuc oudo tie i dud tiene.
- ¹⁰En eko bedo ingei Cerubim di eko por; yamo oko kute oringini kede.
- ¹¹En oudo eum kede colpiny, edou apek di col kame pii opong iye oudo oluke.
- ¹²Akako kede itonge me mac oko wokun ki lero kame oudo tie i nyime di kiko pelao idoun acol nogo.
- ¹³Rwot oko yamo ki malo bala mwoc me kot, di dwan Ngamalo Twal oko winyere.
- ¹⁴En di eko gweno imalia mege eko sasaro jokwor mege; ecaro gi kede amenyumenyun me kot di eko mino gi kiringo.
- ¹⁵Okwe Rwot, pii oko pokere i nam, wen pii oko neno; acakini me lobo oko dong kakaler, kakame in idorano kede gero, di ikuto wei ki umi.
- ¹⁶Rwot oko cwano cinge ki malo, di eko maka; eko wota ki pii atut.
- ¹⁷Bin elaka ki cing ngakwor na atek, kede kibut jo kame daga; pien gin oudo kitek, likame ango oudo atwero gi.
- ¹⁸I kare kame ango oudo atie kede i peko, gin kiko sura; do Rwot oko konya.
- ¹⁹En ekonya ki peko kame oudo odia; en elaka pien oudo cunye yom i koma.
- ²⁰Rwot oko timo na bero di lubere kede poore na; en emia winyo pien ango ali kede raco moro.
- ²¹Pien ango abedo lubo iswilia ka Rwot, doko likame ayai tenge kibut Rubanga na.



- ²²Pien iswilia mege dedede oudo tie i nyima, doko likame ango adagi timo gikame en oudo eciko.
- ²³Ango oudo ali kede raco moro i nyime; doko oudo ango agwokere likame atimo raco moro.
- ²⁴Pi mano, Rwot do otieko timo nango bero di lubere kede poore na, piento en enena ali kede raco moro i nyime.
- ²⁵Rwot in igenere but jo ageni; but jo kame li kede raco moro in ili kede raco moro but gi.
- ²⁶But jo kame cuny gi cil, in itimo negi bero, do but jo kame ngolo rieko, in inyuto negi rieko nin.
- ²⁷In ilako jo kame mwolere, do idwoko piny jo kame tingere.
- ²⁸Rwot in en kame imiango lero; Rwot, Rubanga na menyolo kame ango atie iye.
- ²⁹Pien in itie keda, ango akaruno suro ekodet me isirikalen, doko pien Rubanga na tie keda, ango akaruno somo malo kalamo apama kame kocelo kede bomba.
- ³⁰Rubanga noni yongayo mere tie kakare; cikere kame Rwot mio genere; en ecal bala ebuku ne jo dedede kame ringo ot gwokere bute.
- ³¹Pien ngai en kobedo Rubanga kwanyo Rwot? Doko ngai en kame cal bala lela, kwanyo Rubanga wa?
- ³²En Rubanga kame miango teko, doko emio yongayo kame ango alubo bedo ber.
- ³³En emiango abedo dwir bala amiem, di eko mina abedo malo kakabor di likame peko moro ko tuno i koma.
- ³⁴En epwonya epone me yi, tetekenyo akaruno kudo tir me emal kame kotimo kede nyonyo buronsi.
- ³⁵In itieko mina ebuku nin kame lako kuo na, in itieko ganga kede twer nin; kony kame in imia otieko mina abedo dano kame pire dwong.
- ³⁶In imia alabo tiena lab, doko tiena likame oko cer.
- ³⁷Awapo jokwor na di ako mako gi; doko likame ako dok cen tuno di oudo atieko gi.
- ³⁸Ajuto gi arereto gi piny di likame kiko karuno yai; gin kipopoto katiena.
- ³⁹Pien in en kame imiango teko me yi; in imia abwono jo kame oudo osura.
- ⁴⁰In imio jokwor na omuko ringo ki nyima, doko ako muducaro jo kame dingere keda.
- ⁴¹Gin kiko lwongere pi mito kony, do likame tie ngatamoro kame oko konyo gi; kikok but Rwot, do en likame eko gamo koko gi.
- ⁴²Ango apudao gi bala apua kame yamo kuto, anyonyono gi bala cwoto me yongayo.



⁴³In iko laka ki lok me jo; di iko keta pugo atekerin; jo kame oudo ango akwia oko doko jotie na.

⁴⁴Cucuto di gin kiwinyo kop i koma, kiko mina wor; jokumbor obino di kiko riebere piny i nyima.

⁴⁵Jokumbor cuny gi oko kwanyere, di kiko wokun ki kateko gi kede mielkom.

⁴⁶Rwot kuo! Pak bed but lela na, doko tingunu malo Rubanga ngalak nango.

⁴⁷En Rubanga kame culo kwor nango doko eketo jo itwer na.

⁴⁸En elaka ki cing jokwor na; Rwot, ateteni in itinga malo kalamo jokwor na; in ilaka ki cing jogero.

⁴⁹Pi manoni, Okwe Rwot, ango abino paki i diere me atekerin, abino wero wer me paki.

⁵⁰Rubanga mio abaka mere loo kitek, en enyuto amara kalikame lokere but ngat kame en eyero, enyuto but Daudi kede ikwae mege ikar kede ikar.

Sabuli 19

Deyo ka Rubanga Nyutere i Cwec mere

¹Malo nyuto deyo ka Rubanga; doko etatamo gikame en ecweo.

²Ceng acelacel tatamo ne ceng kame lubo, iwor acelacel da tatamo ne iwor kame lube.

³Gin likame kiyamo, doko kope kame kiyamo da li; dwan gi likame winyere;

⁴do di gikame gin kiwaco winyere i kadedere dedede, kope gi romo piny lung. Rubanga otimo ne ceng kima i malo;

⁵en ewok bala eteran koyai ki kanyom, di eko ringo lubo yongayo mere di elelo bala ngaringo me elagano.

⁶En ewok ki malo tetucel, di eko ot paka tetuca mere; likame tie gikame karuno pwono ne lieto mere.

Iswil ka Rwot

⁷Iswil ka Rwot tie kakare, edwoko cuny dano. Cik ka Rwot genere, emio rieke but jo kame li kede.

⁸Iswilia ka Rwot opoore, kikelo yomcuny. Cik ka Rwot tie me ateni, kikelo niang.

⁹Lworo Rwot ber; ebino meede nakanaka. Ngolo kop ka Rwot tie me ateni doko epoore.

¹⁰Ngolo kop ka Rwot ber lo saabu; elo akadi saabu acil benyo; emit elo mokic, akadi mokic kame cwer ki apien mere.



¹¹Bobo da gin ipwonyango epasoit nin; ango audo bero adwong pi lubo gi.

¹²Do ngai kame karuno neno abucar mere en kene? Okwe Rwot sasiro ango ki raco na kame akwia.

¹³Gwoka ki par kame kelo ewaka; kur iwek gi kipuga. Di do likame ango ako bino bedo kede raco moro, doko ako bino bedo abongo dub moro adwong.

¹⁴Ango akwao be iyei kop me doga kede par me cunya, Okwe Rwot, lela na kede ngalak na.

Sabuli 20

Ilega pi Lono Yi

¹Akwao Rwot konyi i kare me peko! Rubanga ka Yakobo gwoki!

²Akwae ecwai ni kony ki kabedo mere kacil, doko emii kony kame wok ki Sion.

³Akwae eyutuno giamia ni dedede doko cunye bed yom pi giayala ni me awanga.

⁴Akwae emii gikame cunyi mito, doko emi iik ni dedede cobere.

⁵Di do wan oko bino lelemo kede yomcunye pien in ilo yi, di oko kiarao imenderan wa malo i nying Rubanga wa. Akwao Rwot emii gi dedede kame ikwao.

⁶Nataman do ango angeo be Rwot bino konyo abaka kame en eyero; en ebino gamo kwac mere ki malo mere kacil di emie loc adwong pi twer mere.

⁷Jo mogo wakere pi cabalan, mogo pi asigiran, do wan owakere pi Rwot Rubanga wa.

⁸Gin kibino gete di kiko poto, do wan obino yai malo di oko cungo di otek.

⁹Okwe Rwot, kony abaka, mie eloi yi; winy wa kame olwongere buti.

Sabuli 21

Pako Rubanga pi Bwono Jokwor

¹Okwe Rwot, abaka lelo pi teko kame in imie; cunye yom nadi piento in imie kony!

²In itieko mine gikame cunye mito, doko likame idagi gamo kwac me doge.

³Pien in ibino bute kede twon winyo, iko ngapo ne ocoro me dwongo kame kotimo kede saabu.

⁴En ekwai pi mine kuo, in iko mine da; imie kuo kame bor nakanaka.

⁵Deyo mere dwong pi kony kame imie; in imie angosibib kede dwongo.

⁶In imie winyo kame bedo nakanaka, cunye yom pien in itie kede en.

⁷Pien abaka keto gen mere i kom Rwot; pi amara kalikame lokere kame Ngamalo Twal tie kede i kome, likame gimoro bino yange.



- ⁸Cingi bino mako jokwor ni dedede; cingi tetu cam bino mako jo adagi.
- ⁹Ibino loko gi kidoko bala keno kodop i kare kame ibino neeno kede. Gero ka Rwot bino muducaro gi, mac bino wango gi dopodop.
- ¹⁰In ibino muducaro ikwae gi dedede i wi lobo, karacel kede idwe gi i diere me jo.
- ¹¹Ka gin kitimo iik arac i komi, akadi ka kitimo iik me timo ni can, iik gi nono likame bino cobere.
- ¹²Pien in ibino mino gi kiringo; in ibino pimo nyim gi kede tong me emal ni.
- ¹³Rwot, wan opaki pi twon teko nin, wan obino wer di opako twer nin.

Sabuli 22

Koko me Cwercuny kede Wer me Pako Rubanga

- ¹Rubanga na, Rubanga na, pinyo komio ijala? Pinyo komio ibedo kakabor keda, omio likame itwero konya akadi winyo cur na?
- ²Okwe Rubanga na, akok iceng do likame iromo gamo dog; akok iwor da do likame aromo udo wei.
- ³Do di in ibedo Ngat Kacil, in ibedo i kom ni me ajakanut di jo me Isirael paki.
- ⁴Joakwari wa bin obedo kede gen buti, gin kibedo kede gen di in iko lako gi.
- ⁵Gin kikok buti di in iko lako gi; gin kiketo gen gi buti di likame oko mino gi lewic.
- ⁶Do ango acal bala kudiling do weko dano; jo tie kede acae buta, doko kidaga.
- ⁷Jo dedede kame nena nywara anywara; kijunyo na dog gi di kiyayango wi gi.
- ⁸Gin kiwaco be, “En egeno Rwot, wek Rwot konye; wek Rwot lak ngat kame yomo cunye.”
- ⁹Aso di in en kame iwota ki yi toto na, igwoka i kor toto na di pwodi adot.
- ¹⁰Cako nywala, ango ajalere buti, doko cako toto na nywala, in ibedo Rubanga na.
- ¹¹Kur ibed bor keda, pien peko onoka, doko likame tie ngatamoro kame bino konya.
- ¹²Jokwor atot oluka bala twonin, twonin atek me Basan oluka.
- ¹³Kingamo na dog gi di lac, bala engu ager pi kec di edorano.
- ¹⁴Teko na tie tiek bala pii kame kotie onyo. Cogere na otieko gwegwetun ki kariamo gi; cunya do cal bala odok kame ocalar i kora.
- ¹⁵Dwana otuo bala yat kotuo; leba omoko i dana. Ipiela i apua i kabedo me jo oto.
- ¹⁶Jo olukaro ango bala igwogin; ekodet me jo atimo tim areco oluka diere, ineno bala kimito nyinyilo cinga kede tiena.
- ¹⁷Atwero maro cogere dedede me koma; kipedo wang gi ngina di kilelo i wia.



- ¹⁸ Kipopoko igoen na i diere gi; kiuco alulu pi popoko giangapa na.
- ¹⁹ Do in, Rwot, kur ibed bor tenge! Okwe ngakony na, susunyo bino konya.
- ²⁰ Lak kuo na ki epima; lak kuo na acel kenekene ki twer me igwogin nogi.
- ²¹ Laka ki dog engu! In itieko laka ki tung twonin ager nogi.
- ²² Ango abino sarakino nyingi but imiegu kede amiegu na; abino paki i diere me jo kocokere wori.
- ²³ Wun jo kame tie kede wor but Rubanga, pakenu! Wun dedede ikwae ka Yakobo, mienu deyo; wun dedede ikwae me Isirael bedunu kede wor bute.
- ²⁴ Pien likame en edagi arabo ecao peko me jo kame tie neno can; likame en eloko wange tenge kikut gi, do en egamo koko gi.
- ²⁵ Abino paki i dier jo ocokere; abino cobo i nyim jo kame wori gikame alairo pi timo.
- ²⁶ Jocan bino cam di kiko yeng; jo kame mo Rwot bino pake. Akwao be ibedunu kede kuo aber nakanaka.
- ²⁷ Wi lobo lung bino yutuno Rwot di kiko lokere bute; jo me atekerin dedede bino wore.
- ²⁸ Pien twer me pug obedo me ka Rwot; en epugo atekerin dedede.
- ²⁹ Ateteni jo awakere dedede me wi lobo bino luro i nyime; jo dedede kotieko to oko dok i apua bino riebere i nyime, di ango ako bino kuo pire.
- ³⁰ Ikwae me anyim bino tic ne; kobino tuco nying Rwot ne lwak me kare me anyim.
- ³¹ Kobino waru waco ne jo kalikame nan pwodi konywalo be, “Rwot ocobo tic mere me lako jo mege.”

Sabuli 23

Rwot en Ngakwat na

- ¹ Rwot en Ngakwat na; likame abino rem kede gimoro.
- ² En emia abuto i lum alibaliba, di eko tela ot i pii kopiei.
- ³ En emio kuo na doko nyen bobo. En etela lubo yote kopoore pien nyinge ber.
- ⁴ Akadi bed bala atie beo ki aditot moro acol cucucuc, likame abino lworu gimoro arac, pien udo in itie keda. Akuta nin me kwat kede ebela ni dio cunya.
- ⁵ In itemuno emesa me cam i nyima, di jokwor na da tie kanono; in iwiro wia kede mo, di iko pongo ikopo na lubulub.
- ⁶ Ateteni bero kede mwolo nin bino bedo keda ceng dedede me kuo na, doko abino bedo i ot ka Rwot i kare me kuo na lung.



Sabuli 24

Abaka Adwong

- ¹ Lobo obedo me ka Rwot kede gi dedede kame tie iye; piny kede jo kame bedo iye obedo mere.
- ² En ecibo lobo i wi nam adwong, acakini mere cungo i icileta.
- ³ Ngai kame twero yito malo i wi moru ka Rwot? Doko ngai kame twero cungo i kabedo mere kacil?
- ⁴ Gin jo kame cing gi kede cuny gi cil, jo kalikame keto cuny gi i angalo, kede kalikame lairo i kop me abe.
- ⁵ Gin kibino udo winyo kibus Rwot, doko Rubanga ngat kame lako gi bino waco be kili kede raco.
- ⁶ Magonogo en jo kame moe, gin en jo kame mo wang Rubanga ka Yakobo.
- ⁷ Yabunu irutei, yabunu ikekon aseka da, tetekeny Abaka me deyo donyi.
- ⁸ Ngai en Abaka me deyo noni? En ebedo Rwot ngateko kede won twer, en Rwot kame lo yi.
- ⁹ Yabunu irutei, yabunu ikekon aseka da, tetekeny Abaka me deyo donyi.
- ¹⁰ Ngai en Abaka me deyo noni? En ebedo Rwot me jo yi, en Abaka me deyo.

Sabuli 25

Ilega me Kwano Kony kede Gwok ka Rubanga

- ¹ Amio kuo na butin Rwot.
- ² Okwe Rubanga na, ango aketo gen na buti, kur iwek jo mia lewic, kur iwek jokwor na leli i wia.
- ³ Kur imi lewic mak jo kame geni, Okwe Rwot; do mi lewic mak jo kame jemo ni nono nono.
- ⁴ Mia angei yote ni, Okwe Rwot; pwonya timo gikame in imito.
- ⁵ Tela alub ateni nin, di ipwonya; pien in en Rubanga kame laka; ango ageni nakanaka.
- ⁶ Yutuno mwolo ni, kede amara ni kalikame lokere, Okwe Rwot, pien in ibedo tie kede gi cako sek.
- ⁷ Kur iyutuno dub kame atimo i kare me tino na akadi raco kame atimo da; do yutuno ango, Okwe Rwot, pi bero nin, di lubere kede amara nin kalikame lokere.
- ⁸ Rwot ber, doko en epoore, manono en komio en epwonyo jodubo yongayo kame kipoore lubo.



- ⁹En etelo jo kame mwol timo gikame opoore, doko epwonyo gi yongayo mere.
- ¹⁰Yote ka Rwot dedede opong kede amara kalikame lokere kede gen, pi jo kame gwoko isikan kede cik mege.
- ¹¹Pi ber nyingi, Okwe Rwot, sasiro raco na pien edwong twatwal.
- ¹²Alu en kame tie kede wor but Rwot? En ebino pwonyo gi ngeno yongayo kame kipoore lubo.
- ¹³Gin kibino bedo kede kuo aber, di lobo ko bino doko me ikwae gi.
- ¹⁴Rwot mako adiereson kede jo kame tie kede wor bute, di eko mino gi kingeo isikan mere.
- ¹⁵Ango nakanaka aciko wanga i kom Rwot, piento en ebino gonyo tiena ka omoko i owic.
- ¹⁶Lokere buta iko bedo kede kisa i koma, pien ango atie do kena, doko can opoto i koma.
- ¹⁷Mia alakanar ki can kame tie i cunya, di iko wota tenge ki peko na dedede.
- ¹⁸Tam pi can kame atie neno kede peko na, di iko sasiro dub na.
- ¹⁹Tam pi wel me jokwor na, di iko neno twon adagadaga kame kitie kede buta.
- ²⁰Okwe, gwok kuo na, doko laka; kur ijal jo mia lewic, pien ango aringino gwok buti.
- ²¹Mi bero kede poore nin gwoka, pien ango aketo gen na buti.
- ²²Okwe Rubanga, lak Isirael ki peko mege.

Sabuli 26

Ilega me Dano Aber

- ¹Okwe Rwot, gonya abed abongo raco moro, pien ango abedo timo gikame ber, doko ageni nakanaka abongo riangere.
- ²Ngingico ango, Rwot, iko tama; tam cunya kede tam na da.
- ³Pien amara ni kalikame lokere likame bino rwenyo na, doko abino bedo kede gen buti.
- ⁴Likame ango abedo kede jo kame kony gi li, akadi ribere kede joecuke da.
- ⁵Ango adagi upere kede jo kame timo tim areco, doko da likame abino bedo karacel kede jo areco.
- ⁶Alwoko gira cinga pi nyuto be ango ali kede raco moro di ako donyo ririmo alutari ni pi wori, Okwe Rwot,



⁷di awero kede dwan amalo wer me pwoni, kede di awaco ne jo tice ni dedede me aura.

⁸Okwe Rwot, ango amaro ot kame in ibedo iye, kede da kakame deyo ni tie iye.

⁹Kur imuducaro ango karacel kede jodubo, doko da kur imuducaro kuo na karacel kede jonek,

¹⁰jo kame otieko iikere nakanaka pi timo tim areco, kede kame cing gi opong kede sente me cemusana.

¹¹Do ango gira atimo gikame ber; bed kede kisa buta iko laka.

¹²Tiena tie cungo piny kakoporere, abino pako Rwot i dier jo kocokere.

Sabuli 27

Ilega me Pak

¹Rwot en lero kede ngat kame laka; abino do lworu ngai? Rwot en kateko kame gwoko kuo na; abino lworu do ngai?

²Ka jo areco osura di kimito muducaro ango, gin jo kame kibedo jokwor kede joading na, gin kibino gete kiko popoto.

³Akadi di isirikalen olukaro ango, cunya likame bino bedo lwor; akadi di jo ocako yi keda, do ango abino geno Rwot.

⁴Tie gi acel kame ango akwao Rwot; gi acel nono en kame ango amo; en bedo i ot ka Rwot i kare lung me kuo na, pi bedo neno bero ka Rwot, di akwae i tempulo mere pi tela.

⁵Piento en ebino kana i ode i kare me peko; en ebino uma kede eema mere, di eko bino keta kakabor i wi moru.

⁶Nan ango alelo i wi jokwor na dedede kame olukaro ango, doko abino mino giayala but Rwot kede ilel i tempulo mere; abino wero wer amit me pako Rwot.

⁷Okwe Rwot, winy koko na kame akok kede buti; mi kisa maki i koma iko gamo dogo.

⁸Cunya waco na be, “Bia, moi wange.” Okwe Rwot, abino mono wangi,

⁹kur ilok wangi tenge kibuta! Kur iriama kede gero, ango ngatic nin, in en kame lem ibedo konya; kur iweka, kur ijala, Okwe Rubanga in ngat kame laka.

¹⁰Ka papa na kede toto na oweka, Rwot bino gama.

¹¹Pwonya lubo yongayo nin, Okwe Rwot, di iko tela lubo yongayo aber pien atie kede jokwor.

¹²Kur ijala i cing jokwor na, pien ijurak me angalo owokun kede kop me abe i koma, doko kitie waco na kope me gero.



¹³Ango ayei be abino neno bero ka Rwot, i lobo me jo akuo.

¹⁴Bed kede gen i kom Rwot, bed tek, wek cunyi bed nwang, bed kede gen i kom Rwot.

Sabuli 28

Ilega me Kwano Kony

¹Rwot, ango akok buti; in en lela na, kur idagi winyo kop na. Pien ka iling na alinga, abino bedo rom aroma kede jo kame donyo i bur me to.

²Winy kwac na kame abako kede doga buti pi konya, di atango cinga malo i kabedo ni kacil kalamo.

³Kur ingola kop karacel kede jo areco, jo kame timo tim areco, gin jo kame dog gi yamo kope abeco me awotin kede jokio gi, do di cunyi gi col adikinicel.

⁴Mi gi cul arom aroma kede tice gi, kame rom aroma kede tim gi areco; mi gi cul arom aroma kede tice me cing gi, cul kame poore kede gi.

⁵Pi kite kalikame gin kiparo kede tic kame Rwot otimo, akadi gikame cinge ocweo, manono bino mino etuturo gi di likame eko bobo gero gi kicungo malo.

⁶Pak bed but Rwot, piento en etieko winyo bako doga.

⁷Rwot en ngateko kede ebuku kame gwoka, cunya gene. En ekonya di cunya ko lelo; ango awero wer me pwone.

⁸Rwot en ngateko kame gwoko jo mege, en ebedo karingo ot gwok kame lako dano mere kame eyero.

⁹Okwe Rwot, lak jo ni, mi winyo but jo kame obedo megi; tim ber ibed ngakwat gi, doko gwok gi nakanaka.

Sabuli 29

Dwan Rwot Winyere i Buko me Yamo Atek

¹Wacunu kop kame mio Rwot gikame poore ne, wun gikame kuo i malo; wacunu be deyo kede teko obedo mere.

²Wacunu be deyo obedo me ka Rwot, en deyo kame tie i nyinge, worunu Rwot kede angosibib kacil.

³Dwan Rwot winyere i wi name; dwan Rwot me deyo winyere bala mwoc me kot, dwan Rwot winyere i wi name adongodongo.

⁴Dwan Rwot tie kede twer, dwan Rwot tie kede dwongo.

⁵Dwan Rwot tuturo seda, dwane tuturo kiton seda me Lebanon.



⁶En emio moru me Lebanon takaro bala roya, kede me Sirion ko takaro bala atin twon.

⁷Dwan Rwot caro asara kame liel bala leb mac.

⁸Dwan Rwot yayango wi tim; dwane yayango wi tim me Kades.

⁹Dwan Rwot yayango yen kame kolwongo be oak, dwane gwero abum piny; jo dedede waco i tempulo mere be, “Deyo bed but Rubanga.”

¹⁰Rwot en kame pugo twon pii me alele; en ebedo i kom mere me ajakanut ikar kede ikar.

¹¹Akwao Rwot mi jo mege teko! Akwao Rwot mi jo mege winyo me bedo kede anapakin.

Sabuli 30

Ilega me Mino Pwoc

¹Ango apaki Rwot pien in ilaka, di iko gengo jokwor na lelo i wia.

²Okwe Rwot Rubanga na, ango oudo akok buti pi konya, di iko canga.

³Okwe Rwot, in ilako kuo na ki kabedo me jo oto, idwoka i kuo kikom jo kame oudo tie donyo i bur atut me to.

⁴Werunu wer me pako Rwot wun jo mege agenere; pakenu piento en ebedo ngat kacil.

⁵Pien gero mere bedo pi kare acecek kenekene; do bero mere bedo pi kare lung me kuo. Aromo kok iwor, do odiko ako bino bedo kede yomcuny.

⁶I kare kame gi dedede oudo tie na kede kiber oudo awaco be, “Likame tie gikame bino yanga.”

⁷Rwot, pi bero ni, omio iko mina acungo di atek bala moru atek; do i kare kame ipwono na kede, lworoko maka.

⁸Ango oudo akok buti, Rwot, abako ni doga di akwao be:

⁹” Bero nyo kame in itwero udo ki to nango, ka ango adonyo piny i bur me to? Iparo be apua me lobo bino paki, arabo tatamo be in igenere?

¹⁰Rwot, winy koko na, iko mino kisa maki i koma. Okwe Rwot, bed ngakony na!”

¹¹In itieko loko iturur na odoko miel; in igonyo egoe na me iturur iko ngapa kede kilel,

¹²tetekenye abed paki i kuo na abongo ling. Okwe Rwot Rubanga na, abino mini pwoc nakanaka.

Sabuli 31



Ilega me Bedo kede Gen i kom Rubanga

- ¹Okwe Rwot, in en kame ango aringini buti pi gwoka; kur imi lewic maka; laka pien in ipoore.
- ²Cik yiti iwinya; laka awakawaka. Bed bala lela kame ango aringo ot gwokere iye, bed apama atek kame laka.
- ³Ateteni in itie bala lela nango kede apama na kame gwoka; tela di iko nyuto na gi me atima pi nyingi.
- ⁴Gwoka ki bwoi kame jokwor ocika kede, pien in en ngat kame ango aringo ot gwokere bute.
- ⁵Ango amio kuo na i cingi; Okwe Rwot, Rubanga kame genere, in itieko laka.
- ⁶In cunyi dagi jo kame woro caljwogi gikame kony gi li, do ango ageni.
- ⁷Ango abino bedo kede yomcuny kede ilel pi amara ni kalikame lokere, pien in itieko neno can na; in itieko ngeno peko na.
- ⁸In likame imia i cing jokwor; in imia alatao bala kame amito.
- ⁹Okwe Rwot, tima kisa, pien atie i peko; wanga opongupongun pi koko, teko na da otiek.
- ¹⁰Aol kede iturur, koko otieko mino kuo na odoko cecek; peko otieko teko na, akadi cogo na da odoko goro.
- ¹¹Ango adoko gi me nyero ne jokwor na, gikame neno rac ne jokio na, gikame kelo lworu ne jo onao keda; jo kame nena i yongayo ringo tenge.
- ¹²Wi jo otieko wil keda bala dano oto; atieko doko bala agulu oto.
- ¹³Pien awinyo iwewei me jo atot; lworu oluka i bad dedede. Gin kiporo kop i koma karacel, pi kwanyo kuo na.
- ¹⁴Do ango gira ageni, Okwe Rwot; awaco be, "In Rubanga na."
- ¹⁵Kuo nango tie i cingi; laka ki cing jokwor na, jo kame tidilo ango.
- ¹⁶Mi kisa maki kede ngatic ni; laka pi amara ni kalikame lokere.
- ¹⁷Okwe Rwot, kur imi lewic maka, pien ango akok buti; mi lewic mak jo areco; mi gi kiot eliling tuno i kabedo me jo oto.
- ¹⁸Mi dog joangalo lingi, dog kame yamo kop arac i kom jo kopoore kede ewaka kede acae.
- ¹⁹Okwe, bero kame in ikano ne jo kame wori tin dwong benyo, kame iko mino oko cobere i nyim jo dedede but jo kame ringini gwokere buti.
- ²⁰In ikano gi kakame in itie iye, ikano gi ki kope kame jo poro i kom gi; in ikano gi kiber i odi, ikano gi ki leb areco.



²¹Pak bed but Rwot, pieto en etieko nyuto nango amara mere kalikame lokere iepone me aura, i kare kame oudo koluka kede bala bomba kame jokwor oluko.

²²Pi Iworo, omio ako waco be, “Kotieko riama tenge kakabor kedi.” Do in iko winyo koko na i kare kame alwongere kede buti pi konya.

²³Marunu Rwot, wun jo mege kacil dedede. Rwot gwoko jo kame gene, do eculo ngat kame wakere bala kame poore ne.

²⁴Bedunu tek, doko miunu cunyu bed nwang, wun jo dedede kame geno Rwot.

Sabuli 32

Tuco Dub kede Isasir

¹Kitie kede yomcuny gin jo kame kosasiro tim gi areco, jo kame koumo dub gi.

²Kitie kede yomcuny gin jo kame Rwot likame maro rac moro i wi gi, kede kame tim me angalo likame tie i kuo gi.

³I kare kame oudo aling kede likame atuco dub na, koma oudo odoko goro pi koko piny yuluyul.

⁴Pien in oudo ibedo mina alola iwor kede iceng; teko na oko tiek bala pii kame tuo i kare me oro.

⁵Di do ango ako tuco dub na buti, doko likame ako kano tim na areco; ango oudo awaco be, “Ayaro tuco gikareco na but Rwot,” bin in iko sasiro ango ki raco na.

⁶Pi mano, mito jo kame wori leg buti i kare me peko; i kare kame peko bino kede bala ariram, likame ebino tuno but gi.

⁷In en kapwono nango; in igwoka ki peko; in iluka kede ilelem me jo kame lelo pi alako na.

⁸Rwot owaco be, “Ango ayaro nyuto ni doko ayaro pwoyi yongayo kame poore ilubi; abino mini tam doko likame abino kwanyo wanga ki komi.

⁹Kur ibed abongo niang bala asigira arabo punda, kame miero iket lilim doko itwei auno i doge pi mine timo gikame in imito.”

¹⁰Can kame jo areco neno tot, do jo kame geno Rwot tie i amara mere kalikame lokere.

¹¹Okwe wun jo kopoore, bedunu kede yomcuny doko lelunu pi gikame Rwot otimo, doko lelemunu pi yomcuny, wun jo kame cunyu opoore.

Sabuli 33

Wer me Pako Rubanga

¹Lelunu i Rwot, wun jo kopoore. Jo kame timo gikame Rubanga mito poore pake.



- ²Pakunu Rwot kede arigirigi; gounu ne wer amit kede adungu kame tie kede ausin tomon.
- ³Werenu wer anyen; gounu ne wer kede diru di ilelemunu kitek.
- ⁴Pien kop ka Rwot tie me ateni, doko gi dedede kame en etimo genere.
- ⁵En emaro poore kede ngolo kop i ateni; amara mere kalikame lokere dwong i piny.
- ⁶Rwot ocweo malo kede kop mere, doko ecweo gi dedede kame tie iye kede kop me doge.
- ⁷Eko koko pii me nam karacel bala piko pii i cupa; ecoko pi me nam bala gikame kocoko i dero.
- ⁸Lobo lung poore wor Rwot; mito jo dedede kame tie i piny bed kede wor bute.
- ⁹Piento en bin ewaco kop, di piny oko bedo tie; emio cik di piny oko cwere.
- ¹⁰Rwot mio gikame atekerin oiko pi timo likame cobere; en etotolo iik me jo.
- ¹¹Do iik ka Rwot cungo nakanaka, gikame cunye paro tie pi lwak me kare dedede.
- ¹²Etie kede yomcunye ateker kame Rubanga mere en Rwot, jo kame en etieko yero pi bedo mege.
- ¹³Rwot neno piny ki malo; en eneno jo dedede.
- ¹⁴Ki kabedo mere me pug, en engico jo dedede kame bedo i wi lobo.
- ¹⁵En ngat kame ecweo cunye gin dedede, engeo gikame gin kitimo dedede.
- ¹⁶Akadi di abaka tie kede isirikalen atot, likame gin kikaruno gwoke; ngat kame tek i yi likame lo yi pi teko mere.
- ¹⁷Ka pi lono yi, asigira me yi kony mere li, doko teko mere likame karuno gwoko ngat kame wanano en.
- ¹⁸Ateteni wang Rwot tie i kom jo kame wore, jo kame tie kede gen i amara mere kalikame lokere.
- ¹⁹En elako kuo gi ki to, doko egwoko gi kibedo kuo i kare me kec.
- ²⁰Wan ogeno Rwot kede kuo wa lung; en ngakony wa kede ebuku kame gwoko wa.
- ²¹Cunye wan yom pire, piento wan ogeno nyinge kacil.
- ²²Okwe Rwot, mi amara ni kalikame lokere bed but wa, bala kame wan oketo kede gen wa i komi.

Sabuli 34

Pako Bero ka Rubanga

- ¹Abino pako Rwot i kare dedede; doga bino pake nakanaka.



- ²Ango awakere pi gikame Rwot otieko timo; winyunu wun jo kame koridakino wu di ikounu ilel.
- ³Miunu Rwot dwongo, wun karacel keda, opakunu nyinge karacel.
- ⁴Ango ako lego but Rwot, di en eko gamo kwac na, en elaka ki gi dedede kame oudo kelo na lworu.
- ⁵Genenu, di ikounu ilel; en likame ebino mino wu lewic.
- ⁶Jo kame tie i peko okok but Rwot, di Rwot oko winyo koko gi, eko lako gi ki peko gi dedede.
- ⁷Malaika ka Rwot gwoko jo kame woro Rwot, doko elako gi ki peko.
- ⁸Okwe ber tami di iko bino neno bero ka Rwot; kitie kede winyo gin jo kame ringo gwokere bute.
- ⁹Okwe worunu Rwot, wun jo mege kacil, pien jo kame wore likame bedo kede rem moro.
- ¹⁰Akadi inguon atino da tie kede rem, doko kec neko gi, do jo kame mo Rwot bedo tie kede gi dedede abeco.
- ¹¹Bianu, wun idwe, winyunu; ango ayaro pwoonyo wu woro Rwot.
- ¹²Ngai kikom wu kame mito kuo, doko emito neno ceng atot me kuo aber?
- ¹³Gwok lebi ki gikarac, kede igwok dogi ki yamo kop me abe.
- ¹⁴Yai tenge ki timo gikarac, di iko donyo timo gikaber; moi gikame kelo mulem, di iko lubo yore.
- ¹⁵Wang Rwot tie i kom jo kopoore, doko ewinyo koko gi.
- ¹⁶Rwot dagi jo kame timo gikareco, en emio wi jo wil kede jo nogo kame kito.
- ¹⁷Kame jo kopoore kok pi mito kony, Rwot winyo koko gi, di eko lako gi ki peko gi dedede.
- ¹⁸Rwot tie iyapiyapi kede jo kame cuny gi odwono, doko elako jo kame gen gi do otiek.
- ¹⁹Can kame jo kopoore neno tot, do Rwot lako gi ki can nogo dedede.
- ²⁰En egwoko gi kiber; likame akadi cogo gi acel da tur.
- ²¹Gikarac kelo ne jo areco to, doko jo kame cuny gi kec i kom jo kopoore kobino ngolo kop lo gi.
- ²²Rwot lako kuo me jotic mege; likame tie ngatamoro kame ringo gwokere bute kame kobino ngolo kop lo.

Sabuli 35



Ilega me Kwano Kony

- ¹Okwe Rwot, ute kede jo kame ute keda; yi kede jo kame yi keda!
- ²Mak ebuku ni kede gi me gano komi pukupuk, di iko yai ikonya!
- ³Kwany tong kede macar ni pi yi kede jo atie wapa; mia ngeno ateteni be in ibino laka.
- ⁴Mi bwon jo kame mito neka di oko mino gi lewic. Mi koriam jo kame iiko tam arac i koma di kiko bedo kede atotolun.
- ⁵Mi gi kibed bala ocucung kame yamo tie kuto, di malaika ka Rwot tie riamere kede gi.
- ⁶Mi yongayo kame kilubo bed col di pwot pi cero gi, di malaika ka Rwot wapo gi.
- ⁷Gin kiciko na obek gi be amok iye abongo kop moro; doko kikunyo na bur be apot iye abongo kop moro.
- ⁸Mi gi kimuducar abongo gin ngeno. Doko mi obek kame gin kiciko mak gi; mi gi kipot i bur di kiko muducar.
- ⁹Di do ango ako bino ilel pi Rwot, alelo piento en elaka.
- ¹⁰Abino waco ne Rwot kede cunya dedede be, “Okwe Rwot, ngai kame cal bala in? In ilako jo agoro ki cing jo abwono gi, kede jogan ki cing jo ayako gi.”
- ¹¹Ijurak me abe cungo di kiko pepenyo ango kop i kom gikame ango akwia.
- ¹²Gin kitimo nango raco pi bero kame ango atimo; kimia kuo me par.
- ¹³Do i kare kame gin oudo kituwo kede, ango ako ngapo igoen me iturur; atidilo koma kede kanyo kec. Ango ako lego di akudo wia i kora,
- ¹⁴bala oudo atie iturur pi adieruna arabo omina; abedo bala dano atie koko toto mere, aluro piny di atururo.
- ¹⁵Do kakame ango apoto kede i peko, gin kiko cokere kede yomcuny, kicokere karacel sura; jogero kalikame ango oudo angeo oko donyo timo na raco nakanaka.
- ¹⁶Gin kinyera di kimeede ameda iye abongo wor, di kikakao lak gi pi nyuto gero gi i koma.
- ¹⁷Okwe Rwot, kara in iyaro tero kare arom amene di ineno gi anena? Laka ki asura gi, lak kuo na kibun inguon nogi!
- ¹⁸Di do ango ako bino pwoni i kacokere adwong me jo ni; ango abino paki i dier jo atot nogo.
- ¹⁹Kur iwek jokwor na, jo abe go, lel i wia, bobo da kur iwek jo kame daga abongo tien kop moro bed muremure pi peko na.



- ²⁰Gin likame kiyamo kop kame kelo mulem, do kicweo kope me abe i kom jo kame bedo mot.
- ²¹Gin kipida di kilelemo be, “Ee, Ee, wan otieko neno kede wang wa.”
- ²²Okwe Rwot, in itieko neno; kur ilingi! Okwe Rwot, kur ibed bor keda!
- ²³Cei, di iko konya, Yai ipid pira, Okwe Rubanga na kede Rwot na!
- ²⁴Okwe Rwot Rubanga na, gonya abed bongo raco moro, di lubere kede poore nin, doko kur iwek gi kided kede ilel i wia.
- ²⁵Kur iwek gi kiwac ken gi be, “Ee, wan otieko udo gikame oudo omito.” Kur iwek gi kiwac be, “Wan otieko muducaro en.”
- ²⁶Mi lewic kede atotolun mak jo dedede kame lelo pi can nango; mi lewic mak jo kame wakere nango di oko kwanyo wor kibun gi.
- ²⁷Mi jo kame mito nango lono pido lelemo pi ilel di kiko bedo kede yomcuny, di kiwaco nakanaka be, “Rwot dwong! En cunye yom kame ngatic mere tie i mulem.”
- ²⁸Di do ango ako bino tatamo kop me poore nin di apaki piny yuluyul.

Sabuli 36

Raco ka Dano

- ¹Jo areco winyo dwan me timo dub yamo i cuny gi; gin likame kilworo Rubanga i kuo gi.
- ²Pien gin kisuk ken gi, gin likame kiparo be kokaruno ngeno dub gi di oko waco be erac.
- ³Kope kame wok ki dog gi obedo kope areco kede me angalo; gin do kijiko timo gikame nyuto rieko kede kame ber.
- ⁴Gin kiiko tam me timo gikarac di kitie buto i apiene gi; gin kitie i yongayo kalikame ber; gin likame kidagi gikarac.

Bero ka Rubanga

- ⁵Rwot, amara nin kalikame lokere wapere tuno malo, genere nin tuno i idoun.
- ⁶Poore nin cal bala mori adongodongo, ngolo kop nin cal bala nam atat; Okwe Rwot, in igwoko jo kede leini di rom aroma.
- ⁷Amara nin kalikame lokere tin ber benyo, Okwe Rwot! Jo dedede karuno ringo ot gwokere i tipo me bwomi.
- ⁸Gin kicamo di kiko yeng kede cam atat kame tie i odi, doko in imio gi giamata kame wok ki ecilet me bero nin.
- ⁹Pien kuo wok kibuti; lero kame wok kibuti en kame mio wan lero.



¹⁰Okwe meede nyuto amara ni kalikame lokere but jo kame ngei, doko meede nyuto alako nin but jo kopooore.

¹¹Kur iwek joewaka nyonyono ango, doko da kur iwek cing jo areco mia aringi.

¹²Neningo jo kame timo gikareco otieko popoto piny ariebacuny; korwarwaco gi piny, likame kikaruno yai malo.

Sabuli 37

Kakame Kuo me Jo Abeco kede Jo Areco bino Jik iye

¹Kur cunyi poti pi jo areco; kur nyeko maki kede jo kame timo gikarac,

²pien gin kibino rwenyo wir awakawaka bala lum atuo, kibino ner bala pote me yen.

³Gen Rwot, doko tim gikame ber; manono bino mino ibedo i lobo kame komio wu, di itie kede anapakin.

⁴Bed kede yomcuny i Rwot, di en eko bino mini gikame cunyi mito.

⁵Mi kuo ni i cing Rwot; ket gen ni bute, di en eko bino konyi.

⁶En ebino mino poore nin rieny bala lero, kede ateni me gikame in itimo rieny bala i dier iceng.

⁷Bed mot i nyim Rwot, di iko dire kuro gikame en eyaro timo; cunyi kur poti pi jo kame udo abar pi tim gi, arabo pi jo kame cobo iik gi areco.

⁸Wek tim me gero, doko wek lilo. Kur cunyi poti, manono kelo nin raco kenekene.

⁹Pien kobino riamo jo areco tenge, do jo kame geno Rwot, lobo kame Rubanga ocikere pire bino doko mergi.

¹⁰Odong kare kacecek di jo areco rwenyo; akadi imoi kabedo gi benyo, likame ibino udo gi.

¹¹Do jo amwol, lobo nono bino doko mergi di kiko bedo kede yomcuny pi jamini atot abeco.

¹²Jo areco iiko tam i kom jo kopooore, di kikao lak gi pi nyuto gero i kom gi;

¹³do Rwot nyero jo areco anyera, piento en engeo be ceng gi tie bino.

¹⁴Jo areco woto epima kede kiciko imalia gi me neko jocan kede jo apiny olo, me neko jo atimo gi kopooore,

¹⁵do ipimai gi nogo en kame kobino cocobo kede cuny gi, di oko bino tuturo imalia gi.

¹⁶Gi atitidi kame dano kopooore tie kede ber lo abar me jo areco.

¹⁷Pien twer me jo areco kobino jiko, do Rwot gwoko jo kopooore.



- ¹⁸Rwot paro pi jo kalikame tie kede raco moro, doko gikame komio gi bino bedo mergi nakanaka;
- ¹⁹i kare arac likame komio lewic mako gi, i kare me kec gin kibedo tie kede cam atot.
- ²⁰Do jo areco bino to, jokwor ka Rwot cal bala deyo me lum; gin kibino rwenyo, kibino rwenyo wir bala yiro.
- ²¹Jo areco kopao jame do likame kiculo, do jo kopooore cuny gi ler, gin kimeede ameda kede mic.
- ²²Pien jo kame Rwot otieko mino winyo, lobo bino doko mergi, do jo kame en etieko lamo, kobino riamo tenge.
- ²³Rwot en kame telo wa i yongayo kame olubo, ka kuo wa yomo cunye;
- ²⁴akadi ogetar, likame obino poto adule, pien Rwot mako cing wa.
- ²⁵Cako di bin pwodi ango atin, tuno nan di atieko ti, likame pwodi aneno jo kopooore di Rwot oweko gi atatai, arabo neno di idwe gi kwao cam.
- ²⁶I kare dedede gin kibedo mino amia jo jame, doko jo kopao jame kibun gi; idwe gi tie winyo but gi.
- ²⁷Wek timo gikarac di iko donyo timo gikaber; iko bino bedo nakanaka i lobo kame Rubanga ocikere pire.
- ²⁸Pien Rwot maro gi me ateni; en likame ebino weko atatai jo mege kame gene.
- ²⁹Jo kopooore lobo nono bino doko mergi, di gin kiko bino bedo iye nakanaka.
- ³⁰Dog jo kopooore yamo kop me rieko, doko leb gi yamo kop me ateni.
- ³¹Iswil ka Rubanga gi tie i cuny gi; likame kicetar tenge kiye.
- ³²Jo areco ngico jo kopooore, di kimito neko gi;
- ³³do Rwot likame bino jalo jo kopooore i cing gi, arabo jalo kongolo kop lo gi ka kotie pido gi.
- ³⁴Gen Rwot, doko lub yongayo mere, di en eko bino tingi malo eko mino lobo nono doko meri; in ibino neno amuducar me jo areco.
- ³⁵Ango atieko neno ngat arac di etero jo kirac, do di emeede dongo bala yat seda me Lebanon.
- ³⁶I cen mere ango bobo ako beo kuno, do ako udo edoko li; ango ako mone do likame ako karuno ude.
- ³⁷Niangunu i kom jo kame li kede raco moro, nenunu jo kopooore; pien jo kame maro mulem bedo tie kede ikwae.
- ³⁸Do jotur iswil kobino muducaro gin dedede; ikwae me jo areco kobino tiekaro.



³⁹Alako me jo kopoore wok kibut Rwot; en etie karingo gi i kare me peko.

⁴⁰Rwot konyo gi di eko lako gi; en elako gi ki cing jo areco, pien gin kiringo ot gwokere bute.

Sabuli 38

I lega me Dano kame tie Neno Can

¹Okwe Rwot, kur ibunano ango kede gero, arabo ibitaro ango kede lilo.

²Pien itieko cocobo ango kede imalia ni, doko cingi otieko bapa.

³Ringo me koma li kede yotkom pi wangcuny nin; dub na omio cogere na li kede yoto.

⁴Dub na ikumemei kalamo ango; kipek bala yec kalikame akaruno yeno.

⁵Aporeso na odoko ngwe, doko kitie do top pi mingo na.

⁶Aloore do atwal atwala ariebere piny; ango atururo piny yuluyul.

⁷Pien piera mwoda twatwal, ali kede yotkom.

⁸Teko na otiek, doko atieko nyongere; ango acur pi kop ramo cunya.

⁹Okwe Rwot, in ingeo mit me cunya; likame in ikwia dinyo nango.

¹⁰Cunya keto pukpuk, teko na otiek; wanga da odoko do mwadamwada.

¹¹Jowota kede joaupa na likame noka pi buge me koma, akadi jokio na da cungo tenge kakabor.

¹²Jo kame mito neka ciko na owic gi; jo kame mito timo na raco yamo i rac i koma, doko kibedo iiko tam arac i koma piny yuluyul.

¹³Do ango abedo bala edingo, likame awinyo kop; abedo bala ngat kame lebe li, ngat kalikame karuno yamo.

¹⁴Ateteni, ango acal bala ngat kalikame winyo kop, ngat kalikame doge tie me dwoko kop.

¹⁵Do in en kame ango aketo gen na buti, Okwe Rwot; in ibino gamo ilega na, Okwe Rwot Rubanga na.

¹⁶Pien ango alego be, “Kur iwek jokwor na leli i wia, jo kame wakere i koma ka acetar.”

¹⁷Pien ango ayapuno poto, doko lito tie na nakanaka.

¹⁸Ango atuco gikareco na; ango aturere pi dub na.

¹⁹Jo kame obedo jokwor na abongo gimoro kame atimo negi tek twatwal, doko jo kame daga nono nono tot.



²⁰Jo kame timo na raco pi bero kame ango atimo negi obedo jokwor na pien ango alubo gikame ber.

²¹Okwe Rwot, kur iweka; Okwe Rubanga na, kur ibed bor keda;

²²susunyo konya, Okwe Rwot, ngalak na.

Sabuli 39

Tuco Dub me Dano kame Tie Neno Can

¹Ango bin awaco be, “Abino gwokere ki gi dedede kame atimo tetekeny kur leba mia atim dub; ango ayaro kuno dogo, tek kame jo areco tie iyapiyapi keda.”

²Ango ako ling titi; likame ako yamo akadi kop i kom gimoro aber. Do cwercunya oko meede ameda,

³di cunya likame oko bedo kede dire. Meede bedo kede par oudo medo cwercunya ameda; di do ango ako waco be:

⁴” Rwot, mia angei ajikini me kuo na, kara pwodi ango adong kede kare kame rom amene? Mia angei ceko me kuo na.”

⁵Neni, in itieko mino kare me kuo na obedo cecek, doko kare me kuo na tie bala gimoro li i wangi. Ateteni jo dedede cal acala bala yamo kame buko.

⁶Ateteni ngat acelacel rwenyo bala tipo me yat. Ateteni gin kicane nono; kidiato jame do likame kingeo jo kame bino tero jame gi nogo.

⁷Nan do nyo kame ango atie geno, Okwe Rwot? Gen nango tie buti.

⁸Laka ki dub na dedede. Kur imia adok gianyera me jomingo.

⁹Ango do aling; likame bobo abino ngamo dogo, pien in en kame itieko timo nango kamanoni.

¹⁰Jik do alola kame imia; abap me cingi otieko teko na.

¹¹In ibunano jo kame itie mino gi alola pi dub gi, bala ajekel, in idudubo gikame gin kimaro twatwal; ateteni jo dedede cal acala bala yamo kame dano wei kede.

¹²Okwe Rwot, winy ilega na, cik yiti iwiny koko na; kur ilingi alinga kame ango akok buti. Pien ango atie welo nin kame obeo abea pi kare acecek, ango ngakumbor bala bin joakwari na dedede.

¹³Wek do ngina, tetekeny abed bobo kede yomcuny, di pwodi likame ayai ki kuo me lobo kan, di ako doko li atwal.

Sabuli 40

Wer me Pak

¹Ango ako kuro kony ka Rwot kede dire adwong; en eko ciko yite ewinyo koko na.



- ²En eko wota ki bur koling, ewota ki cwoto, di eko ciba i wi lela, eko mina teko me ot.
- ³En eko pwonya wer anyen, wer me pako Rubanga wa. Jo atot bino neno di kiko bino bedo kede lworu, di kiko bino keto gen gi i kom Rwot.
- ⁴Kitie kede yomcuny gin jo kame geno Rwot, jo kalikame lokere but joewaka, but jo kame parao lubo rubangan me angalo.
- ⁵Okwe Rwot Rubanga na, in itieko medo ameda tice ni me aura kede iik nin pirwa; likame tie ngat kame karuno porere kedi. Ka koto oudo awaco be atatamo gi dedede, koto kibedo tot tot kalikame marere.
- ⁶In likame imito giayala kede giamia. In likame imito leini awanga kede giamia pi kwanyo dub; do in itieko yabo yita pi winyo kop.
- ⁷Di do ango ako waco be, “Ango ine, atie bino; bala kame kowandiko kede kop i koma i itabu me Iswil.
- ⁸Okwe Rwot Rubanga na, ango cunya yom pi timo mit nin; iswil nin tie i cunya.”
- ⁹Ango atieko tatamo kop aber amako alako nin i kacokere adwong me jo ni; Okwe Rwot, neni, ango likame ako ling, bala kame in ingeo.
- ¹⁰Ango likame amungo kop me alako nin, ango atieko tatamo kop i kom genere nin kede kite kame in ilako kede jo; ango likame amungo ne cokere adwong me jo ni amara nin kalikame lokere kede genere nin.
- ¹¹Okwe Rwot, kur ikwany cunyi me kisa ki koma; wek amara nin kalikame lokere kede genere nin gwoka kiber nakanaka.
- ¹²Pien peko kame tot tot kalikame marere otieko luka; dub na otieko bwona bwon kalikame bobo akaruno neno kede gimoro; kitot kalamo yer me wia, doko cunya otieko kwanyere.
- ¹³Okwe Rwot, mi cunyi bed yom laka; Okwe Rwot, susunyo bino konya.
- ¹⁴Mi lewic kede atotolun mak jo kame mito kwanyo kuo na; mi koriam jo kame mito timo na rac, kidok cen kede lewic.
- ¹⁵Mi cuny gi dubere pi lewic gi, gin jo kame nyera.
- ¹⁶Do mi jo dedede kame moi bed kede ilel kede yomcuny; mi jo kame maro alako nin wac nakanaka be, “Rwot dwong!”
- ¹⁷Do ango gira angacan, piny oloa, do Rwot paro pira. In en ngakony na kede ngalak na; Okwe Rubanga na, kur igali.

Sabuli 41

Ilega me Dano Atuwu



- ¹Kitie kede yomcuny jo kame paro pi jocan; Rwot bino konyo gi ka kitie i peko.
- ²Rwot gwoko gi, doko emio gi kibedo kuo; kobino tero be kitie kede yomcuny i lobo; Rwot likame bino weko gi i cing jokwor gi.
- ³Rwot konyo gi ka tuwo oreto gi piny i apien; en ebino cango gi ki tuwo dedede kame kitie kede.
- ⁴Do ango awaco gira be, “Okwe Rwot, ango adubo i nyimi; mi kisa maki i koma iko canga.”
- ⁵Jokwor na yamo kirac i koma, di kiuro be awene en kame ango abino to kede di nyinga ko rwenyo.
- ⁶Doko kame kibino nena, kiyamo kope kalikame tie ateni; cuny gi koko kope areco i koma; kame kiyai kioto, kiko do donyo sarakino gi.
- ⁷Jo dedede kame daga weweo kope karacel i koma; kibedo paro be koto jamini areco otimere na.
- ⁸Gin kiparo be tuwo arac kame bino neka otieko rona roc, be likame bobo abino twero yai ki apien.
- ⁹Akadi kiton adiera apire tek kame oudo ageno, ngat kame oudo acamo kede, otieko da loka adoko ngakwor.
- ¹⁰Do in, Okwe Rwot, mi kisa maki i koma iko mina ayai, tetekeny ada anyangi.
- ¹¹Ka jokwor na likame okuko i wia, abino ngeno be in cunyi yom i koma.
- ¹²Do in igagao ango pien ango atimo gikame ber, iko keta bedo i nyimi ikar kede ikar.
- ¹³Pak bed but Rwot, Rubanga me Isirael, ikar kede ikar. Amen! Amen!

Sabuli 42

ITABU ME ARE

(Sabuli 42—72)

Ilega me Dano Koringo Ot Bedo i Piny Apat

- ¹Bala kite kame atil mo kede esamai amol, kamanono da cunya paro neni, Okwe Rubanga.
- ²Atie kede mit adwong me neno Rubanga i kuo na, en Rubanga akuo. Kara awene en kame ango abino bino kede di ako neno wangi, Okwe Rubanga?
- ³Akok iceng kede iwor, pigewanga do tie bala cam na; jo do penya nakanaka be, “Kara Rubanga ni tie tuai?”



⁴Ango ayutuno gigi kede cweruncy: epone kame oudo aoto kede ekodet me jo, di atelo gi siritu donyo i ot ka Rubanga, di olelemo kede kilel kede di owero were me pwoc, pi kwero ebaga.

⁵Pinyo komio atie kede cweruncy? Pinyo komio aparere? Abino keto gen na but Rubanga; abino medo pake, en ngakony na, doko en Rubanga na.

⁶Atie kede cweruncy i kuo na; omio ango ayutuno in cako ki Yorodan kede Kerimon, cako ki wi moru me Misar.

⁷In icwao na cweruncy bala ebuka, kame mor bala pii atut kame lwongo pii atut, i mor me pii kame mol di poto piny ki emukura; cweruncy omwonya bala twon ebuka.

⁸Iceng Rwot nyuto na amara mere kalikame lokere; iwor ango ako wero ne wer, en ilega but Rubanga ngat kame mia abedo kuo.

⁹Awaco ne Rubanga, lela na be, “Pinyo komio wi owil keda? Pinyo kamio abedo kede iturur pi raco kame jokwor timo na?”

¹⁰Ayet me jokwor na rama ineno bala twon adola moro tie i koma, di kiwaco na nakanaka be, “Rubanga ni tie tuai?”

¹¹Pinyo komio atie kede cweruncy? Pinyo komio aparere? Abino keto gen na but Rubanga; abino medo pake, en ngakony na, doko en Rubanga na.

Sabuli 43

Ilega me Dano Koringo Ot Bedo i Piny Apat

¹Gonya abed abongo raco moro, Okwe Rubanga, di iko mina aloi pido i kom jo kalikame wori. Laka kikut joangalo kede jo areco.

²Pien in en Rubanga kame ango aringino gwok buti; pinyo komio iuca? Pinyo komio ango atie ot di atururo, pien jokwor na tie tera kirac?

³Okwe, cwai lero ni kede ateni ni; mi gi kitela; mi gi kitera i moru ni kacil kede i kabedo nin.

⁴Di do ango ako bino ot i alutari ka Rubanga, but Rubanga ngat kame yomo cunya kalamo; di ango ako bino paki di agoo adungu, Okwe Rubanga, Rubanga na.

⁵Pinyo komio atie kede cweruncy? Pinyo komio aparere? Abino keto gen na but Rubanga; abino medo pake, en ngakony na, doko en Rubanga na.

Sabuli 44

Ilega me Kwano Gwok

¹Wan otieko winyo kede yit wa, Okwe Rubanga, joakwari wa owaco ne wa tice kame in itimo i kare gin, i kare kasek.



- ²In bin iriamo atekerin apat kede twer nin, do iko mino jo nin osipakin i lobo gi; imio atekerin apat oneno can, do iko mino jo nin bero.
- ³Pien likame bin gin kimaio lobo nono kede epima gin, doko da likame kiloo kede twer gin, do pi twer kede teko nin, kede pi lero me tie nin kede gi; pien cunyi oudo yom i kom gi.
- ⁴In ibedo Abaka kede Rubanga na, bin in imio jo me Isirael olo yi.
- ⁵In en imio wa ojwango jokwor wa, nyingi en komio wan onyonyono jo kame yi kede wa.
- ⁶Pien likame ango aketo gen na i kom tir me emal, doko da likame epima karuno laka.
- ⁷Do in en kame ilako wa ki cing jokwor wa, iko mino jo kame dagi wa lewic.
- ⁸Wan owakere pi Rubanga nakanaka, doko obino pako nyingi ikar kede ikar.
- ⁹Do nan in itieko dagi wa iko mino wa lewic, doko likame ioto bobo kede isirikalen wa i yi.
- ¹⁰In iweko jokwor wa omio wa owilun, jokwor wa oko yako jamini wa.
- ¹¹In imio wa odoko cal bala romini me angola, iko sasaro wa i diere me atekerin apat.
- ¹²In icato jo ni pi gimoro akony akonya, kom likame ingolo wel amalo da.
- ¹³In imio wa odoko gi me ayet but jokio wa, odoko do gi me ayama kede me acae but jo kame oluko wa.
- ¹⁴Imio wa odoko do kop me ayama i diere me atekerin apat; gi me anyera me jo.
- ¹⁵Atie kede lewic ceng yuluyul, lewic opong i wanga
- ¹⁶pi kope kame jo ayeyeto ango kede jo kame caa waco, kede pi jokwor na kede jo kame mito timo onyanga i koma.
- ¹⁷Magi dedede otieko poto i kom wa, do likame wi wan owil kede in, doko da likame oturo isikan kame itimo kede wa.
- ¹⁸Wan likame okwanyo cunyi wa tenge kibuti; doko da likame oweko lubo yongayo nin,
- ¹⁹akadi bed bala in inyinyito wa i kabedo me ikween, iko umo wa kede colpiny acucucuc.
- ²⁰Ka koto di oudo wi wan owil kede Rubanga wa, arabo ka koto oudo otango cing wa woro rubanga moro ace,
- ²¹mam koto Rubanga onge? Piento en engeo mung me cunyi jo.
- ²² Kotie neko wa piny yuluyul piri, kotero wa bala romini kame koyaro ngongolo.



²³Cei do! Pinyo komio itie nino anina, Okwe Rwot? Cei, kur iuc wa tenge atwal.

²⁴Pinyo komio ikano ne wa wangi? Pinyo komio wi owil kede can kede raco kame kotie timo ne wa?

²⁵Pien korereto wa piny i apua; obuto piny lala.

²⁶Yai do, bia ikony wa. Lak wa pi amara ni kalikame lokere.

Sabuli 45

Wer me Avera i Nyom me Abaka

¹Kope abeco opong i cunya; wer na ni awero ne abaka; leba tie bala kalamu kame ngaiwandik otieko iikere pi iwandik kede.

²In ibedo icuo acil kalamo cuo dedede; kope me kisa wok ki dogi; pi mano, Rubanga otieko mini winyo kame bedo nakanaka.

³Twei epima ni i amuro ni, in twon dano atek; in dano kame tie kede deyo kede dwongo.

⁴Di lubere kede dwongo nin, wanano asigira ni ioti iko lono yi pi gwoko kop me ateni kede tim kopooore; mi cingi me teko nyut tice ni me aura.

⁵Tongini me emal nin bit, kicobo cuny jokwor nin; jo me atekerin dedede popoto piny i tieni.

⁶Ajakanut nin, Okwe Rubanga, bedo ikar kede ikar. Ebela nin me pug nyuto be in ipugo jo iepone kopooore;

⁷in imaro gikame opooore, do idagi gikame rac. Manono en komio Rubanga, kame obedo Rubanga nin, owiri, eko mini yomcuny kalamo jowoti dedede.

⁸Igoen nin kokiro iye moe angwe kur, kame obedo mura, aloe, kede casia; jower goo nin adungu pi yomo cunyi i paco nin kame kotubuso kede lak liec.

⁹Anyira me abakai da tie i kom mon kame koworo me turi, i badi tetu cam cungo iye dako nin, in abaka, di engapo mwolere kame kotimo kede saabu kame kojililo kiber.

¹⁰Ateran me abaka, winy kop kame atie waco mi wi wil kede joe ni kede ot ka papa ni.

¹¹Abaka bino miti pi cilo ni; bala kame en do etie kede bala ngadwong nin, miero do ibed kede wor bute.

¹²Jo me Taya bino kelo nin giamia, pi mino cunyi bedo yom kede gi; jo obaro me atekerin apapat bino kelo nin abar me epone dedede.

¹³Kotubuso dako kame abaka oyaro nyomo i ode; kotubuso en kede igoen kame kotimo kede saabu.



¹⁴Kotie tere but abaka di engapo igoen me erangi apapat; anyira kalikame pwodi ngeo cuo tie nyamaro en kilube ki cen.

¹⁵Kotie telo gi ot donyo i ot me abaka kede twon kilel kede yomcuny.

¹⁶Okwe abaka, awobe ni do bino bedo abakai kawang joakwari ni; in ibino mino gi kidoko jopug i wi lobo lung.

¹⁷Ango abino mino lwak me kare dedede yutuno nyingi, pi mano, atekerin bino pako nyingi ikar kede ikar.

Sabuli 46

Rubanga tie kede Wa

¹Rubanga en karingo wa me ot gwokere, doko en teko wa, en eikere cuto pi konyo wa ka otie kede peko.

²Pi mano, wan likame obino bedo lwor akadi di lobo oyangere, akadi di mori opopoto piny i dud name;

³akadi di pii me nam kuao di emor, di mori ko yangere pi dipere mere i kom gi.

⁴Tie ecilet moro kame mol mere kelo yomcuny i bomba ka Rubanga, i kabedo kacil ka Ngamalo Twal.

⁵Rubanga tie i dier bomba nono; likame kobino dudubo en, obai di piny tie ru en ebino konye.

⁶Atekerin dedede tie dorano pi lwor, ajakanuto tie tagere; ka en eyamo, dwane calaro lobo lung.

⁷Rwot me jo yi tie kede wa; Rubanga ka Yakobo en karingo wa me ot gwokere.

⁸Bia inenunu tice ka Rwot; bia inenunu gi me lwor kame Rwot otimo i wi lobo.

⁹En ejiko yi i wi lobo dedede, etuturo tire me emal, enyonyobo tongini di eko wango ibukui i mac.

¹⁰En ewaco be, “Bedunu mot, di ikounu ngeno be ango abedo Rubanga! Atekerin dedede miango dwongo, wi lobo lung miango dwongo.”

¹¹Rwot me jo yi tie kede wa; Rubanga ka Yakobo en karingo wa me ot gwokere.

Sabuli 47

Ngapug kame Kalamo

¹Bapunu cingu wun jo dedede; lelunu but Rubanga kede dwan amalo me were me yomcuny.

²Pien Rwot Ngamalo Twal poore alwora, en abaka adwong me wi lobo lung.

³En eketo jo dedede i loc wa, eko mino wa pugo atekerin apat.



⁴En eyero ne wa lobo kame nan obedo merwa, manoni obedo ewaka ka Yakobo ngat kame en emaro.

⁵Rubanga oyito i kom mere me ajakanut di jo lelemo kede yomcuny, en eyito di jo kuto agwara.

⁶Werunu were me pako Rubanga, werunu were me pak; werunu were me pako abaka wa, werunu were me pak.

⁷Pien Rubanga en abaka me wi lobo lung, werunu were me pake kede sabuli.

⁸Rubanga en abaka kame pugo atekerin dedede; Rubanga bedo i kom mere kacil me ajakanut.

⁹Jotel me atekerin apapat tie cokere karacel kede jo ka Rubanga, en Rubanga ka Aburaam. Pien joteko kame gwoko wi lobo obedo me ka Rubanga, en ngapug akalamo dedede.

Sabuli 48

Sion Bomba ka Rubanga

¹Rwot dwong, doko epoore me apaka twatwal i bomba ka Rubanga wa, en moru mere kacil.

²Sion moru ka Rubanga, bomba kame tie kakawiriwir tetu malo, cungo idelelei di ecil; en eyomo cuny jo me piny lung, en kabedo me abaka adwong.

³I yie kakame koluko kede apama atek, Rubanga otieko nyuto be en ebedo ngagwok atek.

⁴Abakai oudo ocokere, gin kicokere karacel pi suro bomba nono.

⁵Cucuto di kinene, kiko bedo kede ur, lworu oko mako gi kiko ringo.

⁶Kom gi ogeo miel ki kanono kede aramo acal bala me dako atie ramere me nywal,

⁷ineno bala yamo me tetu kide kame tie puno emeri me Tarusi.

⁸Kite kame oudo wan otieko winyo kede gikame Rubanga otimo, nan da otieko neno kede wang wa gi nono i bomba ka Rwot me jo yi, bomba kame Rubanga otieko cibo pi ikar kede ikar.

⁹Wan otamo kop i kom amara nin kalikame lokere, Okwe Rubanga, di otie i tempulo nin.

¹⁰Bala kame nyingi iruo kede i wi lobo lung, Okwe Rubanga, kamanono da jo paki i wi lobo lung. Twer nin opong kede alako;

¹¹miero jo me Sion bed kede yomcuny, miero jo kame tie i bomba me Yuda leli, pi kite kame in ingolo kede kop kakare.

¹²Mamanunu Sion, rimarunu en, marunu wel me gedo mege kame boco malo;



¹³ngingicunu kiber apama mege atek; bebeunu i kagwokere kame kogero iye, tetekeny isobolunu waco ne lwak me kare me anyim be,

¹⁴” Rubanga noni en Rubanga wa pi ikar kede ikar; ebino telo wa nakanaka.”

Sabuli 49

Mingo me Geno Abar

¹Winyunu, wun jo dedede, cikunu yitu, wun jo dedede kame bedo i piny,

²jo me ruom apiny kede me ruom amalalo, jo obaro kede jocan karacel.

³Doga bino yamo kope me rieko, cunya bino tamo kope me niang.

⁴Abino ciko yita winyo kope me agole; abino gonyo dwong gi i were kame agoo kede adungu.

⁵Kara abed kede lworu pinyo i kare me peko, ka jokwor na olukaro ango,

⁶gin jo kame geno abar gi, di kiwakere pi twon abar kame kipong kede?

⁷Ateteni likame tie ngatamoro kame twero culo cul me lako kuo mere; likame tie cul moro kame dano twero mino Rubanga pire.

⁸Pien cul me lako kuo wel mere dwong, doko likame eromo

⁹pi mino dano bedo kuo nakanaka di likame eko donyo i ates.

¹⁰Kame oneno jo ariek, gida kito bala jomingo kede jo kame wi gi likame tio, di kiko weko abar gi ne jo apat.

¹¹Atesin gi obedo miere gi pi kare lung, kakame kibino bedo iye ikar kede ikar, bed bala oudo kitie kede lobo kame odoko mergi.

¹²Dwongo ka dano likame romo genge to, en pwodi ebino to da bala leini.

¹³Manoni en gikame bino timere ne jo kame tie kede gen me mingo; en ebeto ajikini me jo kame cuny gi yom i kom abar gi.

¹⁴Kotieko iiko ne gin ot i kabedo me jo oto bala romini, to en kame bino bedo ngakwat gin; gin kitie ot donyo i ates; kom gi bino top; kabedo me jo oto bino bedo paco gi.

¹⁵Do Rubanga bino lako kuo nango ki twer me kabedo me jo oto, piento en ebino gama.

¹⁶Kur ibedunu kede lworu ka jo mogo odoko joabar, kame abar me ude gi onyai.

¹⁷Pien ka gin kito, likame tie gimoro kame kibino tero; abar gi likame bino lubo gi piny i lobo.

¹⁸Akadi bed bala i kare me kuo gi gin kitamo be kitie kede yomcuny, di jo pako gi pien gi dedede tie negi kiber,



¹⁹gin kibino ot nywako kabedo kede joakwari gi, di likame bobo kiko bino neno lero atwal.

²⁰Dwongo ka dano likame romo genge to, en pwodi ebino to da bala leini.

Sabuli 50

Woro Rubanga i Ateni

¹Rwot Rubanga Won Twer oyamo; en elwongo jo me wi lobo cako ki tetu wokceng tuno tetu potoceng.

²En erieny ki Sion, bomba kame cil adikinicel.

³Rubanga wa tie bino, likame ebino ling alinga; mac ager tie telo nyime, kede yamo kame buko mere gwai oluke diere.

⁴En elwongo malo kede lobo pi bino neno kite kame en engolo ne kede jo mege kop.

⁵En ewaco negi be, “Cokunu jo na kame genere buta, jo kame bin otimo keda isikan di kimio giayala.”

⁶Malo tuco kakaler be Rubanga opoore, piento Rubanga kikome obedo ngangolkop.

⁷” Winyunu, wun jo na, ango abino yamo, Okwe Isirael ango abino tuco raco ni, ango en Rubanga, Rubanga wu.

⁸Likame ango atie bunano wu pi giayala wu, kede pi giayala awanga kame wun ikelunu i nyima nakanaka.

⁹Ango likame abino gamo twon moro kame wok ki miere wu, akadi diel moro kame wok ki balasan wu.

¹⁰Pien leini dedede kame tie i abum obedo mega, akadi paka doke kame tie i wi mori tutumian kede tutumian.

¹¹Ango angeo winy dedede kame por i wi yamo, doko gi dedede kame kuo obedo mega.

¹²” Koto di kec oudo oneka koto likame awaco ne wu, pien piny kede gi dedede kame tie iye obedo mega.

¹³Iparunu be ango acamo ringo me twonin, arabo amato remo me diegi?

¹⁴Miunu Rubanga giayala me pwone, doko cobunu kwongere kame itimunu but Ngamalo Twal.

¹⁵Lwonganu i kare kame itienu kede i peko, ango abino lako wu di ikounu bino mina deyo.”

¹⁶Do Rubanga waco ne ngat arac be, “Twer mene kame in itie kede me nyogao wero cik na, amoto me yamo kop i kom isikan na?”

¹⁷Pien in idagi be pwonyi, doko iloko ngei ne kop nango.



¹⁸In imaro mako awotin kede ngakuwo ka ineno acel moro, doko jobedo nin obedo joadote.

¹⁹” In iyei ne dogi yamo kope areco, kede ne lebi teto kope me abe.

²⁰Nakanaka in ibedo piny yamo kope areco i kom imiegu ni; idubo nying atin ka toto ni.

²¹In ibedo timo gigi do ango abedo ling alinga; ibedo tamo be ango acal bala in. Do nan ango abunano in di atuco ni raco ni kakaler.

²²” Ketunu manoni i tam wu, wun jo kame wi wu wil kede Rubanga, aso ka li, abino nyinyilo wu abongo ngatamoro bino lako wu.

²³Ngat kame kelo na mic mere me pwoc bala giayala udo emia wor; ngat kame lubo yongayo kopooore, abino nyuto ne alako na.”

Sabuli 51

Ilega me Kwano Isasir

¹Mi kisa maki i koma, Okwe Rwot, pi amara ni kalikame lokere. Wei tenge gikareco na pi cuny nin me kisa adwong.

²Lwoka kiber ki gikareco na, iko lonya ki dub na.

³Pien ango angeo gikareco na, doko dub na tie i tam na nakanaka.

⁴Ango atieko dubo buti, butin kenekene, doko ako timo gikame rac i wangi. Man omio ka iwaco na raco udo kop nin tie kakare, doko da ili kede raco moro ka ingolo kop oloa.

⁵Ateteni konywala di atie kede raco, abedo ngadubo cako esawa kame toto na oyaca kede.

⁶In imito cuny kame tie kede ateni; pi mano, pwony cunya me diere i rieko.

⁷Lonya ki dub na di ako doko cil, lwoka di ako bedo tar kalamo akako.

⁸Mia awiny kope kame kelo na ilel kede yomcuny; mi cogere kame itieko tuturo leli.

⁹Lok wangi tenge kur inen dub na, di iko weno tenge gikareco na.

¹⁰Cwei na cuny acil, Okwe Rubanga, iko mina abed kede cuny anyen kopooore.

¹¹Kur iriama tenge ki nyimi, doko da kur ikwany tipo ni kacil kibuta.

¹²Dwok na ilel kame alako ni kelo, iko mina cuny me bedo kede wor buti.

¹³Ango di do ako bino pwonyo jo areco yote nin, di jodubo ko bino dwogo buti.

¹⁴Laka kur ony remo na, Okwe Rubanga, in Rubanga ngat kame laka, di leba ko bino wero kede dwan amalo kop i kom alako nin.

¹⁵Okwe Rwot, yab doge, di ako bino paki.



¹⁶Pien likame cunyi mito giayala; akadi di koto oudo ami giamia awanga, likame oudo atwero yomo cunyi.

¹⁷Giamia kame Rubanga gamo en cuny kame turere; Okwe Rubanga, in likame idagi cuny kame turere kede kame swilaro.

¹⁸Tim ne Sion bero pi bercunyi; ger bobo apama atek kame luko Yerusalem.

¹⁹Di do cunyi ko bino bedo yom pi giayala kopooore, kame obedo giamia awanga kede giamia kame kowango alutu; di oko bino yalo twonin i wi alutari nin.

Sabuli 52

Ngolo Kop kede Kisa ka Rubanga

¹Pinyo komio iwakere, Okwe in ngateko, pi raco kame itimo ne jo kame woro Rubanga? Piny yuluyul

²in itie timo iik me nek. Lebi cal bala liedi abit, in ngatet kope me abe i kom jo.

³In imaro gikarac kalamo gikame ber, doko imaro yamo kope me abe kalamo yamo kope me ateni.

⁴In imaro yamo kope kame dudubo, Okwe in leb kame yamo kope me abe!

⁵Do Rubanga bino turi piny atwal; ebino waraso in ki kima ni di eko nyinyilo in; ebino puti tenge ki lobo me jo akuo.

⁶Jo opooore bino neno di kiko bedo kede lworu; kibino nyero ngatim raco di kiwaco be,

⁷”Nenunu ngat kame oudo likame mito ot gwokere but Rubanga, do eko lunyo keto gen mere i kom twon abar mere, di eko mito gwokere i abar.”

⁸Do ango acal bala yat olibeti kame tie i ot ka Rubanga. Ango ageno amara kalikame lokere ka Rubanga ikar kede ikar.

⁹Ango abino pwoni nakanaka pi gikame itimo; abino tuco nyingi i nyim jo kame geni, pien eber.

Sabuli 53

Tim Areco ka Dano

¹Jomingo waco i cuny gi be, “Rubanga likame tie.” Gin dedede kitieko dubere, kitimo gi me kwere, likame tie ngatamoro kame timo gikaber.

²Rubanga ngio jo ki malo, pi neno ka tie ngatamoro kame riek, ngat kame mo Rubanga.

³Gin dedede kitieko parao, gin dedede kitieko dubere; likame tie ngatamoro kame timo gikame ber, likame tie akadi acel.



⁴Mam gin likame kitie kede ngec moro, gin jo kame timo gikareco, jo kame camo jo na bala kwon di likame kilego buta?

⁵Ki kuno gin kibino bedo kede lworu, twon lworu kalikame pwodi lem omako gi. Pien Rubanga bino sasaro cogere me jokwor ka jo mege; kobino mino lewic mako gi, pien Rubanga otieko dagi gi.

⁶Okwe koto alako me Isirael owok ki Sion! I kare kame Rwot dwoko kede winyo ne jo mege, ikwae ka Yakobo bino ilel; jo me Isirael cuny gi bino bedo yom.

Sabuli 54

Ilega me Kwano Gwok ki Cing Jokwor

¹Okwe Rubanga, laka pi nyingi; gonya abed abongo raco moro pi twer nin.

²Winyi ilega na, Okwe Rubanga; cik yiti iwiny kop kame wok ki dogo.

³Pien jo asuk obwangere i koma, jogero tie mito neka; gin likame kiparo pi Rubanga.

⁴Do ateteni Rubanga en ngakony nango; Rwot en ngat kame gwoko kuo na.

⁵En ebino timo onyanga i kom jokwor na pi raco kame gin kitimo. In muducaro gi pien in igenere.

⁶Abino mini giayala kame cunya owinyo pi kwanyo; abino mini pwoc, Okwe Rwot, piento in iber.

⁷Piento in itieko laka ki peko dedede, di wanga oko neno di abwono jokwor na.

Sabuli 55

Ilega me Dano kame Ngawote Orupao

¹Cik yiti iwinyi ilega na, Okwe Rubanga; kur ipwoni iko dagi winyo kwac na.

²Winy kop na di iko gamo dogo; atie kede cweruncy pi peko kame atie kede.

³Yia orubere pi woo me jokwor na, pi icelakin me jo areco. Pien gin kikelo na peko i kuo na; kiger keda, doko kidingere keda.

⁴Cunya tie kede lito, lworu me to omaka.

⁵Lworu kede mielkom omaka; koma oto.

⁶Omio atie do waco be, koto di atie kede bwoma bala awele, koto apor aoto tenge di ako gira wei.

⁷Ateteni koto aringo gira tenge kakabor; koto aoto bedo i tim.

⁸Koto asunyo ot mono kagwokere, ki buko me yamo ager kede ki yamo me kot.



- ⁹Okwe Rwot, totolo iik gi; pien atie neno tim me gero kede atwomutwomun en atie i bomba.
- ¹⁰Iceng kede iwor gin kimamano apama mere; tim areco kede peko tie iye.
- ¹¹Tim me nek tie iye; adiadia kede angalo likame rwenyo ki atale mere.
- ¹²Koto di jokwor na en kame tie yamo kop kame wango cunya, koto akanyo; koto di jo kame daga en kame tie kede acae i koma, koto apwono negi.
- ¹³Do kom in, dano kame rom aroma keda, ngaupa na, diera kame onao keda.
- ¹⁴Oudo obedo nywako kope amit me cuny wa kedi, di ooto ki ot ka Rubanga karacel.
- ¹⁵Akwao koto to oneko gi; kidonyi di kikuo i kabedo me jo oto; pien tim areco tie i miere gi kede i cuny gi.
- ¹⁶Do ango alwongo Rubanga, Rwot gire bino laka.
- ¹⁷Otieno kede odiko kede i dier iceng, ango acwao koko na bute di acur, en gire ebino winyo koko na.
- ¹⁸En ebino laka awok mulem ki yi kame atie iye; pien jo atot tie yi keda.
- ¹⁹Rubanga ngat kobedo i kom mere me ajakanut cakere sek kede sek, bino winyo koko na di eko dwoko wi gi kidoko mwol, pien gin kidagi lokere, doko likame kilworo Rubanga.
- ²⁰Ngaupa na orieo cinge yi kede ngawote, eko turo cikere kame oudo etimo keda.
- ²¹Kope me doge oudo pwot bala modiang, do di oudo etie kede cuny me yi; kope mege oudo kweo cuny dano bala mo, do i ateteni oudo kical bala epima.
- ²²Ket yec me peko ni i kom Rwot di en eko bino konyi; likame en ebino yei mino kobwono ngat kopooore.
- ²³Do in Rwot, ibino uco gi piny i bur atut wiriwir; jo kame onyo remo me jo kede joangalo likame bino tieko dul me kare me kuo gi. Do ango gira abino keto gen na i komi.

Sabuli 56

Ilega me Geno Rubanga

- ¹Bed kede kisa i koma, Okwe Rubanga, pien jo tie tidilo ango; jokwor na tie timo na raco kare dedede.
- ²Jokwor na tidilo ango piny yuluyul, pien jo atot tie yi keda.
- ³Ka ango atie kede lwor, Okwe Rubanga Ngamalo Twal, ango aketo gen na buti.
- ⁴Ango aketo gen na i kom Rubanga di likame ako bedo kede lwor; ango apake pi cikere mere; dano adana twero timo nango nyo?



- ⁵Gin kimoo epone me loko kope na piny yuluyul, tam dedede kame kitie kede i koma tie me timo na raco.
- ⁶Gin kicokere karacel di kidapidapitoi; gin kikia pi neno kabeo na, di kimito neka.
- ⁷Aso, mi gi alola pi tim gi areco, rereto jo nogi piny pi lilo ni, Okwe Rubanga.
- ⁸In ibedo maro wel me peko na; ket pigewanga i cupa nin. Mam in iwandiko gi i itabu nin?
- ⁹Manoni bino mino jokwor na wilun dok cen i ceng kame ango abino kok kede buti. Ango angeo be Rubanga tie i bad na,
- ¹⁰en Rubanga ngat kame ango apwoyo cikere mere, en Rwot ngat kame ango apwoyo cikere mere.
- ¹¹Ango aketo gen na but Rubanga; likame abino bedo kede lworu. Dano adana twero timo nango nyo?
- ¹²Miero anen be acobo kwongere na kame atimo buti, Okwe Rubanga. Abino mini giamia me pwoc.
- ¹³Pien in ilako kuo na ki to, kede igwoko tiena likame apoto, tetekeny aoti ki nyimi in Rubanga, ki lero kame mio kuo.

Sabuli 57

Ilega me Kwano Kony

- ¹Mi kisa maki i koma, Okwe Rubanga, mi kisa maki i koma, pien in en karingo me gwok na; abino ringini gwok i tipo me bwomi, paka tuno di yamo kame buko di ger otieko kato.
- ²Akok but Rubanga Ngamalo Twal, but Rubanga ngat kame cobo iik mere pira.
- ³En ebino cwano kony ki malo eko laka; en ebino mino lewic mako jo kame tie nyonyono ango. Rubanga bino nyuto na amara mere kalikame lokere kede genere mere.
- ⁴Ango atie buto piny i diere me inguon, inguon kowor icamo ringo me jo; lak gi cal bala leb tongini kede leb imalia, leb gi cal bala ipimai abit.
- ⁵Nyut dwongo nin i malo, Okwe Rubanga; mi deyo nin rom wi lobo lung.
- ⁶Gin kiciko bwoi pi mako tiena; cweruncy obwono kuo na. Kikunyo bur i yongayo na, do gin en kame kiko lokere popoto iye.
- ⁷Cunya omoko i komi, Okwe Rubanga, cunya otieko moko i komi. Abino wero ni wer kede dwan amit.
- ⁸Cei, in kuo na! Ceunu, wun adungu kede arigirigi na! Ango abino cei di pwodi piny obai.



⁹Abino mini pwoc, Okwe Rwot, i diere me jo apat; abino wero wer me paki i diere me atekerin.

¹⁰Pien amara ni kalikame lokere dwong tuno i malo; genere nin dwong tuno i idoun.

¹¹Nyut dwongo ni i malo, Okwe Rubanga, mi deyo ni rom wi lobo lung.

Sabuli 58

Ilega me Kwano Rubanga pi mino Jo Areco Alola

¹Wun jopug atek, benyo, itienu ngolo kop kakare? Benyo, ingolunu ne jo kop i yore me ateni?

²Li, cunyu tie kede iik areco; cingu timo tice kame nyuto gero i wi lobo.

³Jo areco parao cako ki yi toti gi; gin kicako timo raco geno i ceng me nywalo gi, di kiyamo kope me abe.

⁴Gin kitie kede kwir acal kede kwir me twol, kical bala emosoga koculo yite eko doko edingo,

⁵mio likame etwero winyo dwan ngat kame wero wer kame babango twole, arabo me ngatim tangu me twole i yore me rieko.

⁶Tuturo lak inguon atino nogi, Okwe Rubanga; puputo lak gi ki dog gi.

⁷Mi gi kirweny wir bala pii kame jwire mol tenge; mi gi kiner bala lum kame konyonyono.

⁸Mi gi kibed bala okamekame amol paka tiek kame etie liao; mi gi kibed bala atin kame konywalo di etieko to, di likame eko bilo neno wang ceng.

⁹Tiekaro gi awakawaka kalamo kite kame agune wu susunyo dop kede ka komoko negi mac kede okuto.

¹⁰Jo kopoore bino lelo ka kineno di kotimo onyanga i kom jo areco; gin kibino lwoko tien gi kede remo me jo areco.

¹¹Jo bino waco be, "Ateteni, jo kopoore udo giamia me pwoc; ateteni Rubanga kame ngolo kop tie i wi lobo."

Sabuli 59

Ilega me Kwano Gwok

¹Laka ki cing jokwor na, Okwe Rubanga na; gwoka kikut jo kame tie timo kolo i koma.

²Laka ki cing jo kame timo tim areco; laka ki cing jo kame cunyu gi kukudo gi pi onyo remo.

³Neni, gin nan kipwono kitie kura pi neka; jo atek tie cokere cako yi keda. Likame be pien aturo iswil arabo pi dub na moro, Okwe Rwot,



- ⁴doko da likame pi raco na moro en komio gin kitie ringo ot iikere pi sura.
- ⁵Yai ibin ikonya iko bino neno kede wangi, in Rwot Rubanga me jo yi, Rubanga me Isirael. Yai iko mino atekerin apat dedede alola; kur iwek ngatamoro kikom joerupe kame timo tim areco.
- ⁶Otieno acelacel gin kidwogo di kicelakino bala igwogin, kede di kiririmo bomba.
- ⁷Winyunu kong kope kame dog gi tie bwoto! Kope kame wok ki dog gi bit bala epima, pien gin kiwaco be, “Ngai kame twero winyo kope wa?”
- ⁸Do in giri inyero gi anyera, Okwe Rwot; in inyero atekerin dedede nyero me acae.
- ⁹In ibedo teko na, abino ciko wanga i komi; pien in, Okwe Rubanga, itie bala apama atek kame gwoka.
- ¹⁰Rubanga na bino bino buta pi amara mere kalikame lokere; en ebino mina aneno jokwor na di kotieko bwono gi.
- ¹¹Kur inek gi, pien wi jo na bino wil; do pi twer nin, mi gi kidok jo kame rimo piny atatai, iko dwoko gi piny, Okwe Rwot, ngagwok wa.
- ¹²Mi mak gi i ewaka gi, pien kope me dog gi obedo me dub, gimoro dedede kame gin kiwaco obedo me dub! Pi lamo jo kede pi yamo kope me abe,
- ¹³dok ger iko muducaro gi; muducaro gi atwal atwala. Di jo ko bino ngeno be, Rubanga pugo Isirael kede wi lobo lung.
- ¹⁴Otieno acelacel gin kidwogo di kicelakino bala igwogin, kede di kiririmo bomba.
- ¹⁵Gin kiko donyo ririmo bomba mono cam, do ka gin likame kiyeng kiko donyo ngururo.
- ¹⁶Do ango abino wer pi pako teko ni; odiko abino wer kede dwan amalo pi pako amara ni kalikame lokere. Pien in itie bala apama atek kame gwoka, kede karingo na i kare na me peko.
- ¹⁷Okwe, in ibedo teko na, abino wero wer me paki, pien in itie bala apama atek kame gwoka; in en Rubanga ngat kame nyuto na amara kalikame lokere.

Sabuli 60

Ilega me Kwano Alako

- ¹Okwe Rubanga in itieko dagi wa, itieko tuturo kateko wa; ibedo ger kede wa, do nan dwok wa do buti.
- ²In itieko mino lobo oyangere, imie ebabarun eko dong twolo; mwomwono do kakobabarun nogo, pien etie etagataga.
- ³In imio jo ni obeo i can atek; manono obedo ne wa bala bwini akec kame omato di oko donyo gete.



- ⁴In itieko sipo imendera pi kwenyaro jo kame wori, tetekeny kisobolo bwot ki leb emal.
- ⁵Riei cingi me teko iko mino wa oloi yi, doko gam kwac wa, tetekeny ilak jo kame in imaro.
- ⁶Rubanga ocikere i kabedo mere kacil be, “Abino popoko Sekem di atie kede ilel, abino da popoko aditot me Sukot.
- ⁷Gilead obedo mera, Manase da obedo mera; Epuraimu obedo ocoro atek kame gwoko wia, Yuda en ebela na me pug.
- ⁸Do abino tic kede Moab bala kalaya na me bol; abino uco amuka na i kom Edom pi bedo gikame nyuto be en mera; abino ikuk i wi Pilistia pi lone.”
- ⁹Okwe Rubanga, ngai kame bino tera i bomba kame kocelo kede apama atek? Ngai kame bino tela tera Edom?
- ¹⁰Ateteni mam in itieko dagi wa? In likame do iupere kede isirikalen wa ot yi.
- ¹¹Okwe kony wa i kom jokwor wa, pien kony kame dano mio kony mere li.
- ¹²Ka Rubanga tie kede wa, wan obino lono; en kame ebino nyono jokwor wa piny i tiene.

Sabuli 61

Ilega me Kwano Gwok

- ¹Okwe Rubanga, winy koko na; winy kwac na.
- ²Ango alwongere buti ki ajikini me lobo, i kare kame cunya odwono kede. Tela itera i wi lela kame bor kalamo ango;
- ³pien in en ngat kame ango aringo ot gwokere bute, gedo abor malo kame gwoka kibun jokwor na.
- ⁴Mia abed i tempulo ni nakanaka; mia agwokere i bwomi.
- ⁵Pien in, Okwe Rubanga, itieko winyo kwongere na; in itieko mina gikame in imio jo alworo nyingi.
- ⁶Med ne abaka kare me bedo kuo; mi mwakini mege meede nakanaka!
- ⁷Mie ebed i kom me ajakanut nakanaka i nyimi, Okwe Rubanga; mi amara nin kalikame lokere kede genere nin gwoke!
- ⁸Pi mano, ango abino wero were me pako nyingi nakanaka, di acobo kwongere na buli ceng.

Sabuli 62

Gen i kom Gwok ka Rubanga



- ¹Ango abedo mot di akuro Rubanga kene; alako nango wok kibute.
- ²En kene ebedo lela na kede ngat kame laka; en etie bala apama atek kame gwoka, likame tie gimoro kame bino yangaro ango.
- ³Ibinunu bedo suro dano pi kare kame rom kamene, mam wun dedede ibinunu bunge bala bungo apama kame mito poto, bala cel ayagayaga.
- ⁴Gin kenekene kitimo iik me reto dano ki ruom mere. Cuny gin yom i kom kop me angalo; kilamo ne jo winyo kede dog gi, do di i cuny gi kilamo gi kirac.
- ⁵Ango abedo mot di akuro Rubanga kene, pien gen nango tie bute.
- ⁶En kene ebedo lela na kede ngat kame laka; en etie bala apama atek kame gwoka, likame tie gimoro kame bino yangaro ango.
- ⁷Alako kede wor nango yai kikut Rubanga; en lela na atek, ango aringo ot gwokere but Rubanga.
- ⁸Genenu i kare dedede, Okwe wun jo na; wacenu kop me cunyu dedede; Rubanga en ngat kame wan oringo ot gwokere bute.
- ⁹Jo me ruom apiny cal bala yamo abuko, jo me ruom amalo da kony gi li; kame kopimo gin dedede karacel i misani, kiwelewele; kiwelewele kalamo yamo.
- ¹⁰Kur iket gen ni i amao, doko kur iket gen ni i tic me yak, pien likame tie gikame in iudo kiye; ka abar nin onyai, kur iket cunyi i kom gi.
- ¹¹Rubanga otieko yamo kicel be, twer obedo mere. doko en etieko yamo kalamo kano be,
- ¹² amara mere likame lokere. Pien in, Okwe Rwot, iculo jo dedede di lubere kede gikame gin kitimo.

Sabuli 63

Cuny kame Paro Rubanga

- ¹Okwe Rubanga, in en ibedo Rubanga na, ango amoi, apari kede kuo na lung; koma lung tie pari, bala kame lobo otuo di oti mito kede pii.
- ²Manono en komio ango abedo mito neni i kabedo kacil, me wek anen twer kede deyo nin.
- ³Piento amara nin kalikame lokere ber lo kuo, dogo bino paki.
- ⁴Pi mano, ango abino paki i kare me kuo na lung; abino tingo cinga malo di alwongo nyingi kame atie i lega.
- ⁵Kuo na bino bedo bala eyeng kede cam me ebaga, doko dogo bino paki kede ilel.
- ⁶Kame ango ayutuno in di atie i kabuto na, apari iwor kiakia;



- ⁷pien in en ibedo konya, doko ka atie i tipo me bwomi, abino wer pi ilel.
- ⁸Ango amoko i komi, di cingi me twer ko gwoka.
- ⁹Do jo kame mito neka bino donyo piny kakatut;
- ¹⁰kobino neko gi kede epima, kibino doko cam me ikween.
- ¹¹Do abaka bino ilel pi Rubanga; jo dedede da kame lairo kede nying Rubanga bino ilel, do kobino mino dog joangalo ling.

Sabuli 64

Ilega me Kwano Gwok

- ¹Winy dwana, Okwe Rubanga, bala kame atie kelo kede koko na buti; gwok kuo na ki cing gakwor kame kelo na lworu.
- ²Gwoka ki iik kame jo areco timo i koma i mung, kede ki cing ekodet me jo kame timo gikareco,
- ³jo kame peno leb gi bala ipimai, jo kame kope kame yai ki dog gi bit bala tong me emal,
- ⁴tong me emal kame gin kipwono di kiko gweno kede jo kame li kede raco moro; gin kingeso gweno gi abongo lworu.
- ⁵Gin kiketo cuny gi kitek i kom iik gi areco; kiporo kope me ciko owic i mung, di kiwaco be, “Ngai kame karuno neno wa?”
- ⁶Ngai kame karuno ngeno gikareco kame wan otimo? Wan otieko timo iik atek twatwal.” Pien gikame tie i cuny dano kede i tam mere omungere.
- ⁷Do Rubanga bino gweno gin kede emal mere; kobino ngeso gi di oko mino gi awanon.
- ⁸Kop kame yai ki dog gi bino mino emuducaro gi; jo dedede kame neno gi bino yayango wi gi ayayang.
- ⁹Di do jo dedede ko bino bedo kede lworu; gin kibino paro i cuny gi gikame Rubanga otimo di kiko tatamo tice mege.
- ¹⁰Jo kopore miero lel pi Rwot di gin kiko ringo ot gwokere bute. Jo dedede kame cuny gi ber miero pak Rubanga.

Sabuli 65

Pak kede Mino Pwoc

- ¹Pak poore bed buti i Sion, Okwe Rubanga; doko poore kocob buti kwongere kame kotimo,
- ²Okwe in ngat kame igamo ilega! Jo dedede bino bino buti.



- ³Kame tim areco obwono wa, in isasiro gikareco wa.
- ⁴Kitie kede yomcuny gin jo kame in iyero, di iko kelo gi bedo i diakal nin. Wan obino yeng kede bero kame oudo i odi, en tempulo ni kacil.
- ⁵In igamo kwac wa iko lako wa di itimo tice me aura, Okwe Rubanga ngalak wa; in en gen me piny dedede kede me jo kame tie i name kakabor.
- ⁶In iketo mori kede teko ni; in itie kede twer.
- ⁷In imio mor me name ling, mor me ebuka gi, kede woo me jo.
- ⁸Jo me wi lobo lung tie kede lworu pi gianena kame in itimo; gikame in itimo kelo ilel but jo, yai ki tetu wokceng tuno tetu potoceng.
- ⁹In iparu pi lobo, imio kot cwei iye, imio ebodo mio twatwal; pii opong i ecilet ka Rubanga; in imio jo kal, pien in itieko iiko kamanono.
- ¹⁰In ibwobwongo bot mere kede pii atot, di iko mine edopakini; in imio kot cwei iye eko doko yom, di iko mino winyo i kom gikame dongo iye.
- ¹¹Buli mwaka in imio jo amio pi bero nin; kakame in ibeo iye, jamini abeco pong iye di ko alamar.
- ¹²Lum me wi tim lot twatwal, imio imukuran lelo bala jo,
- ¹³romini umo elet, kal da umo aditoto. Gin dedede kilelemo di kiwero karacel pi ilel.

Sabuli 66

Wer me Pak kede me Pwoc

- ¹Wun jo dedede me lobo, wongunu kede ilel but Rubanga;
- ²werunu wer kame kelo deyo i nyinge; mienu pak me deyo.
- ³Wacunu ne Rubanga be, “Gikame in itimo tie me aura twatwal! Pien pi twer nin adwong, jokwor nin luro piny i nyimi.
- ⁴Jo me piny dedede wori; gin kiwero were me paki, kiwero di kipako nyingi.”
- ⁵Bia inenunu gikame Rubanga otieko timo, en etimo gi me aura twatwal i diere me jo.
- ⁶En bin eloko nam odoko kakotuo; jo oko ngolo ecilet kede tien gi. Wan oko lelo ki kuno pi en,
- ⁷en ngat kame epugo kede twer mere nakanaka, en ngat kame eciko wange i kom atekerin. Jo kame dagi wu miero kur wakere.
- ⁸Pakunu Rubanga wa, Okwe wun jo dedede, miunu wer me pake winyere,
- ⁹en ngat kame egwoko wa, emio wa pwodi okuo doko likame eweko tien wa ocer.



¹⁰Pien in itieko tamo wa, Okwe Rubanga; in itieko tamo wa bala kame kotamo kede nyonyo siliba kede mac.

¹¹In bin ikolo wa i bwoi; iko cibo yec apek i wi wa;

¹²iweko jo onyonyono wi wa kede asigiran; obeo i mac kede i pii; do in nataman itieko kelo wa i kabedo kame lac.

¹³Ango abino bino i odi kede giayala awanga; abino mini gikame acikere iye.

¹⁴Abino mini gikame dogo oudo owaco di ako cikere iye i kare kame oudo atie kede i peko.

¹⁵Abino mini giayala awanga kocwe, kede yiro kame duny yai ki kom romini kame owango i wi alutari; abino yali kede twonin kede diegi.

¹⁶Bia iwinyunu, wun jo dedede kame lworu Rubanga, di ango ako bino tatamo ne wu gikame en etieko timo nango.

¹⁷Ango oudo akok bute kitek, di leba oko pake kede were.

¹⁸Ka koto oudo ayei ne dub bedo i cunya, koto oudo Rwot likame owinyo koko na.

¹⁹Do ateteni Rubanga otieko winya; en etieko winyo ilega na.

²⁰Ango apako Rubanga, piento en likame edagi ilega na doko da likame ekwanyo amara mere kalikame lokere ki koma.

Sabuli 67

Wer me Mino Pwoc

¹Okwai Rubanga, tim ne wa kisa di iko mino wa winyo, doko nen wa kede wangi me mwolo,

²me wek mit nin ngere i wi lobo, kede twer me alako nin bin ngere but atekerin dedede.

³Miero jo dedede paki, Okwe Rubanga; miero jo dedede paki!

⁴Miero atekerin dedede bed kede yomcuny di kiko wer di kilelo, pien in ingolo ne jo kop i yore me ateni doko itelo atekerin dedede atie i wi lobo.

⁵Miero jo dedede paki, Okwe Rubanga; miero jo dedede paki!

⁶Lobo otieko mino jo amio mere; Rubanga kame obedo Rubanga wa otieko mino wa winyo.

⁷Okwao Rubanga pi meede mino wa winyo; miero jo kame tie i wi lobo dedede wore.

Sabuli 68

Wer me Ikuk Kame Piny moro Olo Yi



- ¹Rubanga, yai di jokwor ni ko sasaru; miero jo kame dagi bwangere ringo tenge ki nyimi.
- ²Bala kame yamo buko kede yiro duny eoto tenge, riam gi tenge iepone nono; bala kame odok calar kede i mac, miero jo areco muducar i nyim Rubanga iepone nono.
- ³Do jo kopooore miero leli; miero kilel i nyim Rubanga; miero kitaci kede kilel.
- ⁴Werunu ne Rubanga, werunu were me pako nyinge; iikunu yongayo ne en ngat kame eoto kede asigira i wi idoun, nyinge Rwot, lelunu i nyime.
- ⁵Rubanga kame bedo kabedo mere kacil en papa me idwe kic doko en egwoko apuserun.
- ⁶Rubanga mio ngacan kame tie kene paco kame ebedo iye; en ewoto mabus ki otkol di eko mino gi kibedo i mulem, do jo kame jemo nen bino bedo i lobo kotuo.
- ⁷Okwe Rubanga, i kare kame in bin itelo kede jo ni, kakame kibeo kede i wi tim,
- ⁸piny oko yangere, kot oko ony ki malo pi tie nin, in Rubanga kame bin oyamo i moru me Sinai, pi tie nin, in Rubanga me Isirael.
- ⁹Okwe Rubanga, in bin imio kot ocwei di tot; di iko temuno lobo nin kame oudo otieko ti;
- ¹⁰en eko doko kabedo me jo nin; Okwe Rubanga, pi bero nin omio iko konyo jocan.
- ¹¹Rwot bin omio cik, di mon atot oko tero rwonge be,
- ¹²” Abakai kede isirikalen gi tie ringo tenge, kitie ringo!” Mon kame odong imiere tie popoko jamini kame koyako,
- ¹³akadi jo kame odong i anak me romini da bino udo cal me awele kame nyonyo siliba oumo kome lung, di saabu acil meny ki bwome.
- ¹⁴Kakame Won Twer osasaro kede abakai i wi moru me Salmon, oudo ineno do bala akako tie cwei kuno.
- ¹⁵Okwe moru me twer, moru me Basan; Okwe moru kame wie tot atota, moru me Basan!
- ¹⁶Okwe moru kame wie tot atota, pinyo bo komio in ineno kede nyeko moru kame Rubanga oyeru pi bedo kabedo mere, kakame Rwot bino bedo iye nakanaka?
- ¹⁷Rwot wok ki Sinai ebino kabedo kacil, ebino kede cabalan tutumian kede tutumian.
- ¹⁸En eko ot malo i wi moru abor nono, di etero jo atot kame emako ki yi; en egamo giamia kibus jo, akadi kiton kibus jo kame dagi ne Rwot Rubanga bedo kuno.
- ¹⁹Opakunu Rwot, ngat kame yeo peko wa buli ceng; Rubanga en ngalak wa.
- ²⁰Rubanga wa en Rubanga kame lako wa, en Rubanga, Rwot wa, ngat kame mio wa obwot ki to.



²¹Do Rubanga bino nyonyoto wi jokwor mege, jo kame yer wi gi oduko, jo kame timo tim areco.

²²Rwot owaco be, “Ango abino dwoko gi ki Basan; abino dwoko gi ki dud nam atat,

²³tetekeyen wun iotunu di inyonunu remo gi, di igwogin wu da ko bino udo iner gi, en nango remo me jokwor wu.”

²⁴Okwe Rubanga, jo dedede otieko neno jwiao nin kede jo, jwiao ka Rubanga na kede jo, en abaka na, di eoto donyo i kabedo kacil.

²⁵Jo awero telo yongayo, jo agoo adungu di lubo gi ki cen, i dierediere gi tie iye anyira kame yeko ayekeyeke.

²⁶Gin oudo kilelemo be, “Pakunu Rubanga i kacokere adwong me jo mege, en Rwot, Okwe wun ikwae me Isirael!”

²⁷Benjamin kame oudo titidi kikom gin dedede en kame oudo telo gi, jotel me Yuda di lubo kede ekodet gi, di do jotel me Sebulun kede Naputali.

²⁸Nyut twer nin, Okwe Rubanga; nyut teko nin, Okwe Rubanga, bala kame oudo itieko timo ne wa kede sek,

²⁹i tempulo nin kame tie Yerusalem kakame abakai kelo nin iye giamia.

³⁰Bunano Misiri, en le kame bedo i aladoi, en ekodet me twonin kede roce me atekerin apat, tuno ka gin kiriebere piny i nyimi di kiko culo esolo gin kede nyonyo siliba. Sasaro jo kame cuny gi maro yi.

³¹Joor kame cungo ne pinye gi bino wok ki Misiri; jo me Abisinia bino tingo cing gi malo lego Rubanga.

³²Werunu ne Rubanga, Okwe wun abakai me lobo; werunu were me pako Rwot,

³³werunu ne en ngat kame eoto i malo, malo kasek; winyunu, en eredo kede dwan amalo.

³⁴Wacunu be twer obedo me ka Rubanga, ngat kame dwongo mere tie i kom Isirael, twer mere tie i idoun.

³⁵Etie gi me lworu pi neno Rubanga di wok ki kabedo mere kacil, Rubanga me Isirael; en emio twer kede teko but jo mege. Pak bed but Rubanga!

Sabuli 69

Koko me Kwano Kony

¹Okwe Rubanga, laka, pien pii do otieko tuno i nguta.

²Atie lwiny i cwoto atat, kakame kacungo li kiye; atieko tuno i pii atat, pii amol do dipere beo i wia.

³Aol kede koko; dwana otuo. Wanga da do odoko col pi kuro Rubanga na.



- ⁴ Jo kame daga nono nono abongo kop moro tot kalamo wel me yer wia; jo kame mito neka tot, gin jokwor na kame cuko na kop. Benyo, mam ango miero nan adwok gi kalikame akwalo?
- ⁵ Okwe Rubanga, in ingeo mingo nango; dub kame ango atimo, likame okanere kibuti.
- ⁶ Pi ango, kur imi lewic mak jo kame geni, Okwe Rwot Rubanga me jo yi; kur imi cai jo kame moi pi ango, Okwe Rubanga me Isirael!
- ⁷ Ango abedo kanyo ayet piri, lewic otieko pong i wia.
- ⁸ Atieko doko bala dano apat i diere me joawade na, ngakumbor i but idwe ka toto na.
- ⁹ Nyeko na me amara pi odi liel i cunya bala mac; ayet kame jo yeti kede opoto i koma.
- ¹⁰ Kakame bin amwolere kede di akanyo kec, jo oko yeyeto ango pi timo kamanono.
- ¹¹ Kakame angapo kede egoe me iturur, ako doko gi me ayama gi.
- ¹² Ango adoko gi me akwota kibut jo kame bedo i erute, doko joamera da teto were i koma.
- ¹³ Do ango gira akelo kwac na buti, Okwe Rwot. Okwe Rwot, pi amara nin adwong kalikame lokere, gam koko na i kare kame poore. Pi kony nin kame genere
- ¹⁴ laka kur alwiny i cwoto; laka ki cing jokwor na kede ki pii atut.
- ¹⁵ Kur iwek pii amol dipere bei iwia, arabo kakatut lwinya, amoto ates mwonya.
- ¹⁶ Gam kwac na, Okwe Rwot, pien amara nin kalikame lokere ber; lokere buta pi cuny me kisa nin adwong.
- ¹⁷ Kur ilok wangi tenge kibut ngatic nin, pien atie i can, susunyo gamo kwac na.
- ¹⁸ Nyikini di iyapiyapi keda, laka, laka ki cing jokwor na.
- ¹⁹ In ingeo kite kame koyeyeto ango kede, kede lewic kede acae kame audio; in ingeo jokwor nango dedede.
- ²⁰ Ayet otieko dubo cunya, omio do ali kede gen. Oudo amo ngatamoro be amoto koto kisa omake i koma do likame ako udo; doko amo ngat kame koto kwei cunya, do likame ako udo.
- ²¹ Akaka mina cam gin kimia poison, doko di orio oudo oneka, gin kimia bwini awac pi mato.
- ²² Mi ebaga gi lokere dok obek me mako gi, mie edok bala owic ne jo kame gango gi.
- ²³ Mi wang gi dok col tetekeny kur kikaruno neno piny, doko mi pier gi bed di ogom nakanaka.



- ²⁴Nyut gero ni i kom gi; pi gero nin aliet, riam gi paka mako gi.
- ²⁵Mi miere gi dong nono abongo jo; kur imi ngatamoro dong i kimere gi.
- ²⁶Pien gin kitidilo jo kame in itieko keto can i kom gi, doko pwodi kimeede suro jo kame in itieko mino awanon.
- ²⁷Meede ameda maro raco gi i wi raco; kur iwek gi aweka ki raco go.
- ²⁸Kwany nying gi tenge ki itabu me jo akuo; kur imi rwak nying gi i kom nying jo kopoore.
- ²⁹Do ango atie neno can doko atie kede lito; Okwe Rubanga, laka iko tinga malo.
- ³⁰Ango abino pako nying Rubanga kede wer; abino mine dwongo kede pwoc.
- ³¹Manoni bino yomo cuny Rwot kalamo mine etobait, kalamo akadi mine twon ati kame tie kede tunge kede abelekek.
- ³²Mi jo kame kotie tero kirac nen manono di cuny gi ko bedo yom; wun jo kame imounu Rubanga, miunu cunyu dwogi.
- ³³Pien Rwot winyo koko me jocan, doko likame ecao jo mege kame kotweo.
- ³⁴Wek malo kede piny pake, name kede gi dedede kame kuo kame tie i yi gi da pake.
- ³⁵Pien Rubanga bino lako Sion di eko bobo medo gero bomban me Yuda; di jo mege ko bino bedo kuno, di kanono ko doko mergi;
- ³⁶ebino doko me idwe ka jotic mege, doko jo kame mare bino bedo iye.

Sabuli 70

Ilega me Kwano Kony

- ¹Okwe Rubanga, mi cunyi bed yom pi laka. Okwe Rwot, susunyo bino konya!
- ²Mi lewic kede atotolun mak jo kame mito neka. Mi jo kame mito timo na raco wilun dok cen kede lewic.
- ³Mi jo kame nyera wilun dok cen pi lewic.
- ⁴Mi jo dedede kame moi leli doko kibed kede yomcuny. Mi jo kame maro alako nin wac nakanaka be, “Rubanga dwong!”
- ⁵Do ango gira abedo ngacan doko ali kede gimoro; susunyo bino buta, Okwe Rubanga! In en ngakony na kede ngalak na; Okwe Rwot, kur igali!

Sabuli 71

Ilega me Dano Oti

- ¹Ango aringini gwokere buti, Okwe Rwot; kur imi lewic maka.
- ²Laka doko marao ango pien in ipoore; cik yiti iwiny kwac na di iko laka.



- ³Bed lela na kame ango aringo ot gwokere iye, kede apama atek pi laka, pien in en lela nango kede apama atek kame gwoka.
- ⁴Okwe Rubanga na, laka ki cing jo areco, laka ki cing jo kame li kede ateni doko di kiger.
- ⁵Pien in en gen nango, Okwe Rwot, abedo geni cako di ango pwodi eponga.
- ⁶Cako nywala, ango agangere buti; in en kame bin iwota ki yi toto na. Ango abino paki nakanaka.
- ⁷Ango atieko bedo bala anen but jo atot, do in en kakatek kame ango aringo ot gwokere iye.
- ⁸Doga paki nakanaka, doko emi deyo piny yuluyul.
- ⁹Kur iuca tenge i kare me tio na; kur ijala i kare kame do teko na otiek kede.
- ¹⁰Pien jokwor na yamo kop i koma, doko jo kame mito kwanyo kuo na poro kop i koma karacel.
- ¹¹Gin kiwaco be, “Riamunu ikounu mako ngat kame Rubanga otieko weko no, pien ngat kame bino lake li.”
- ¹²Okwe Rubanga, kur ibed bor keda; Okwe Rubanga na, susunyo bino konya!
- ¹³Mi lewic mak jo kame waco na raco, doko muducaro gi; mi jo kame mito timo na raco ud acae kede lewic.
- ¹⁴Do ango abino meede ameda bedo kede gen buti, doko abino meede kede paki nakanaka.
- ¹⁵Doga bino tatamo tice nin kopoore, ebino tatamo piny yuluyul tice nin kame ilako kede jo, akadi bed bala kitot kikalamo ngec nango.
- ¹⁶Abino bino di atatamo tice me twer ka Rwot Rubanga, abino tatamo poore nin, meri kenekene.
- ¹⁷Okwe Rubanga, in ibedo pwonya cako di pwodi ango atie eponga, doko da ango pwodi atie tatamo tice me aura kame in itimo.
- ¹⁸Pi mano, akadi ati di do lwar omaka, Okwe Rubanga, kur ijala, tuno kede ka atieko tatamo twer nin but lwak dedede me kare me anyim.
- ¹⁹Poore nin, Okwe Rubanga, tuno malo kakawiriwir. In itieko timo jamini adongodongo, Okwe Rubanga, kara ngai kame cal bala in?
- ²⁰In ngat kame imia aneno peko kede can atot, ibino bobo dwoko na teko; ibino wota ki bur atut i lobo.
- ²¹In ibino medo dwongo na, di iko kweno cunya bobo.



²²Abino paki kede adungu pien in igenere, Okwe Rubanga na; abino wero were me paki di agoo adungu, Okwe in Ngat Kacil me Isirael.

²³Doga bino lelemo pi ilel kame atie wero were me paki; kuo na kame in itieko lako da bino paki.

²⁴Leba bino yamo kony kame in imia pi poore nin piny yuluyul, pien kotieko mino jo kame oudo mito timo na raco lewic kede acae.

Sabuli 72

Ilega pi Abaka

¹Okwe Rubanga, mi abaka ngolo kop i ateni bala in, doko da mi wot ka abaka bed di epoore bala in.

²Miero epug jo nin i yore kopooore, doko epug jocan i yore me ateni.

³Mi mori kede imukuran kel ne jo lonyo, pien gin kipoore.

⁴Poore abaka ngol kop ne jocan i yore me ateni, poore elak jo kame li kede gimoro, di eko bwono jo kame tero gi kirac.

⁵Mi ajakanut mere bed nakanaka bala ceng, ebed nakanaka bala duwe, ebed tie pi kare lung.

⁶Mi abaka bed cal bala kot kame cwei i lum kame kodao, ebed cal bala kot kame bido lobo.

⁷Mi kuo kopooore nyai i kare mere, doko mulem adwong bed tie nakanaka bala duwe.

⁸Mi ajakanut mere cakere ki nam adwong i tetucel me piny tuno kede i nam adwong kame tie tetu ocelu me piny, doko ecakere ki ecilet me Eupurate tuno i ajikini me lobo.

⁹Mi jokwor mege lur piny i nyime, doko jokwor mege riebere piny i apua i nyime.

¹⁰Mi abakai me Tarusi kede me jo abedo i cula cul esolo gi bute, doko abakai me Sieba kede Seba kel ne giamia.

¹¹Abakai dedede miero riebere piny i nyime, doko atekerin dedede miero tim ne tic.

¹²Piento en elako ngat kame mito kony kame elwongere bute, ekonyo ngacan kede ngat kame li kede ngakonye.

¹³En kisa make i kom jo agoro kede jocan, doko elako kuo me jocan.

¹⁴En elako kuo gi ki cing jo kame tero gi kirac, kede ki cing jogero; doko remo gi lit ki wange.

¹⁵Miero abaka bed kuo nakanaka! Miero mie saabu me Sieba. Poore jo bed lego pire nakanaka, di jo lamo ne winyo piny yuluyul.



¹⁶Mi cam bed tot i lobo; mi kodere dongi di kiko umo wi imukuran, di kiko nyak bala me Lebanon; doko mi jo pong i bomban bala lum me itela.

¹⁷Mi nying abaka bed tie nakanaka, iruo me nyinge meede ameda bedo nakanaka bala ceng. Mi atekerin dedede ud winyo pire; mi gi kilwonge be ngawinyo.

¹⁸Pak bed but Rwot, Rubanga me Isirael, ngat kame en kene etimo jamini me aura.

¹⁹Pak bed i nyinge me deyo nakanaka; deyo mere pong i lobo lung. Amen! Amen!

²⁰Ilega ka Daudi wot ka Yese jik kan.

Sabuli 73

ITABU ME ADEK

(Sabuli 73—89)

Rubanga Ngolo Kop i Ateni

¹Ateteni Rubanga ber but jo opoore, but jo kame cuny gi cil.

²Do ango tiena oudo obuco acetar; abuco cer,

³pien oudo nyeko maka kede joewaka, i kare kame aneno kede di gi dedede tie kiber ne jo areco.

⁴Pien likame gin kitie kede aramo moro; kom gi yot di pwot.

⁵Gin likame kitie i peko bala jo apat; gin likame kineno can bala jo apat.

⁶Manoni omio gin kingapo ewaka bala eriko me ngut; tim me gero oumo gi pukupuk bala egoe.

⁷Kicwe mo odedengo wang gi; tam areco opong i cuny gi.

⁸Gin kiyamo kope me acae kede kope areco i kom jo; kititimo jo di kiwakere kede kope me adiadia.

⁹Dog gi yamo kope areco i kom Rubanga kame tie i malo, doko leb gi da likame weko yamo kop i kom jo me wi lobo.

¹⁰Manono omio jo olokere pako gin, di likame kiudo raco moro i kom gi.

¹¹Gin kiwaco be, “Rubanga twero ngeno benyo benyo? Ngamalo Twal karuno bedo kede ngec nyo iye?”

¹²Manono en gikame jo areco waco; gin kitie i kuo ayoyot, doko abar meede negi ameda.

¹³Abedo gwoko cunya di cil me nono, di abedo abongo raco moro.

¹⁴Pien kobedo mina neno can piny yuluyul, doko komia alola buli odiko acelacel.



- ¹⁵Ka koto oudo awaco be, “Abino yamo bala gin,” koto oudo likame abedo kede ateni but jo ni.
- ¹⁶Do kakame atamo kede pi niang gi noni, ako udo be ebedo gikame niang tek na,
- ¹⁷tuno kede kakame ango ako ot kede i kabedo kacil ka Rubanga; di do ako niang gikame bino timere ne jo areco nogo.
- ¹⁸Ateteni in iketo gi kakapwot, manoni mio gi kipopoto.
- ¹⁹Gin komuducaro gi abongo gal, can kame kelo lworu wearo gi pitipit.
- ²⁰Gin kical bala lek arwenyo ka dano ocei ki nino; ka in iyai, Okwe Rwot, gin kirwenyo.
- ²¹Kakame cunya odoko kede kec, kakame abedo kede cweracuny
- ²²oudo amiming, doko oudo akwia piny; oudo acal bala le ager atie i nyimi.
- ²³Do akadi kamanono da, ango atie kede in nakanaka; in imako cinga tetu cam.
- ²⁴In imia tam kame tela, di i cen mere iko gama kede wor.
- ²⁵Ngai apat kame tie pira i malo kwanyo in? Doko da likame tie gimoro i lobo kan kame cunyango tie iye apat kede in.
- ²⁶Koma kede cunya twero doko goro, do Rubanga en kame mio cunya teko, en mera ikar kede ikar.
- ²⁷Ateteni jo kame bor kedi bino to; in ibino jiko kuo me jo kalikame tie kede ateni buti.
- ²⁸Do kibuta, eber na pi bedo iyapiyapi kede Rubanga, pi mino Rwot Rubanga doko karingo na, kede pi tatamo tice mege dedede.

Sabuli 74

Ilega me Kwano Rubanga pi Lako Isirael

- ¹Okwe Rubanga, pinyo komio iuco wa atwal atwala? Pinyo komio itie kede gero i kom romini kame itie kwano?
- ²Yutuno jo ni kame oudo iyero riki sek, jo kame oudo in ilako pi bedo jo ni obe. Yutuno moru me Sion, kakame in bin ibino bedo iye.
- ³Bia ber ineni kakame kodudubo atwal atwala; jokwor otieko dudubo gi dedede kame tie i kabedo kacil.
- ⁴Jokwor nin okuko i kabedo nin kacil; kisipo imenderan gi kuno bala gianyuta me bwono yi.
- ⁵Ineno gi bala jo kame tongo yen, jo kame tie tongo yen i abum kede le.
- ⁶Gin kibebelo ibaon kame kopao kiber kede enyondo kede le.



- ⁷Gin kitieko cwinyo kabedo nin kacil; kimunao kabedo kame kowori kiye.
- ⁸Gin oudo kiyamo ken gi ken gi be, “Otiekarunu gi atwal” ; gin kiko wango kabedere dedede kame koworo kiye Rubanga i piny wa.
- ⁹Wan likame otie neno gianyuta wa me imendera; enabi moro da likame bobo tie, doko likame tie ngatamoro i diere wa kame ngeo kare kame can nono bino tieko.
- ¹⁰Okwe Rubanga, jokwor bino bedo kede acae buti paka tuno awene? Benyo, jokwor bino meede yeyeto nyingi nakanaka?
- ¹¹Pinyo komio itie giri neno anena abongo timo gimoro; pinyo komio idolo giri badi adola?
- ¹²Do di in Rubanga ibedo Abaka na cako sek, ibedo timo tice me alako i wi lobo.
- ¹³In ipoko nam i diere pi twer nin; in iko nyinyito wi twole kiyilyili kame bedo i pii.
- ¹⁴In inyinyito wi Lebiatan; in imie but leini me wi tim pi came.
- ¹⁵In iyabo wen ataneko kede isamai; imio icileta kame oudo mol nakanaka odwono.
- ¹⁶Iceng obedo meri, iwor da obedo meri; iketo duwe kede ceng i kabedere gi.
- ¹⁷In itieko cibo apokini me lobo; icweo kare me ngico kede kare me oro.
- ¹⁸Yutuno, Okwe Rwot, epone kame jokwor tie kede acae buti, jomingo nogi yeyeto nyingi.
- ¹⁹Kur ijal kuo me jo ni i cing leini ager; kur imi wii wil kede jo ni kame can odio.
- ²⁰Yutuno isikan ni, pien tim me gero tie i kabedere acol dedede me piny wa.
- ²¹Kur imi lewic mak jo ni kame kotie tero kirac; mi jocan kede jo kame piny oloo pak nyingi.
- ²²Yai, Okwe Rubanga, iko mino pido ni; kur imi wii wil kede epone kame jomingo cai kede ceng dedede.
- ²³Kur wii wil kede redo me gero me jokwor ni, kede icelakin gi kame meede ameda.

Sabuli 75

Rubanga Ngangolkop

- ¹Wan opwoi, Okwe Rubanga, wan opwoi; in itie iyapiyapi. Jo tatamo tice nin me aura.
- ²Rubanga waco be, “I kare kopoore kame ango atieko moko abino ngolo kop kakare.
- ³Kame lobo otagere karacel kede jo dedede kame bedo iye, ango en kame amio ipirin mege cungo di tek.
- ⁴Ango atie waco ne jo awakere be kiwek ewaka; kede ne jo areco be kiwek suk.



⁵Kur isukunu, arabo yamo di ngutu opong.”

⁶Ngolo kop likame wok ki tetu kide arabo ki tetu tim, likame ki tetu malo arabo ki tetu piny;

⁷do Rubanga en kame ngolo kop, engolo ne jo mogo kop be kireco do mogo engolo negi kop kame gonyo gi.

⁸Pien ikopo me bwini akuao tie i cing Rwot, bwini kame konyalo di kec kame obedo gero mere; en ebino mino jo areco kame tie i lobo mate, tuno tieke pitipit.

⁹Do ango abino kilel nakanaka; abino wero wer me pako Rubanga ka Yakobo.

¹⁰En ebino tuturo teko me jo areco, di eko bino medo teko ne jo kopooore.

Sabuli 76

Rubanga Ngaloi Yi

¹Rubanga ngere i Yuda, nyinge dwong i Isirael.

²Eema kame en ebedo iye koguro Salem, kabedo mere tie Sion.

³Ki kuno en etuturo leb imalia ameny amenya, kede ibukui kede ipimai, kede jamini ace me yi me ngakwor.

⁴Deyo nin tie me aura, in idwong kalamo mori kame bedo nakanaka.

⁵Komao joe gi kame cuny gi nwang i yi jamini gi me yi kame oudo gida kiyako, nan do kinino nino me atwal; oudo likame tie ngatamoro kibun gi kame twero kiarao cinge da.

⁶I kare kame in icokere negi kede, Okwe Rubanga ka Yakobo, asigiran kede jo kame wanano gi oko popoto piny kiko to.

⁷Do in ipoore me alwora! Ngai kame karuno cungo i nyimi ka in idoko ger?

⁸In bin imio kop kame ingolo i malo oko ngere, jo kame tie i wi lobo oko doko lwor, di kiko ling titi

⁹kakame in iyai kede malo pi ngolo kop, pi lako jo dedede kame koteri kirac i wi lobo.

¹⁰Gero ka dano lokere doko gikame paki, jo kame obwot ki tice nin me gero bino cokere luki.

¹¹Kwongerenu but Rwot Rubanga wu, di ikounu timo gikame ikwongerenu iye; jo dedede kame tie i ngete miero kel giamia gi but ngat kame poore alwora;

¹²en ngat kame emio jopug doko mwol, doko emio lwor mako abakai me wi lobo.

Sabuli 77

Kweicuny i Kare me Peko



- ¹Ango akok kede dwan amalo but Rubanga, akok kede dwan amalo but Rubanga, me wek ewiny koko na.
- ²Ango amo Rwot i kare kame atie kede i peko; ango atango cinga bute iwor kiakia abongo jony; do likame tie gikame twero kweno cunya.
- ³Ango aparo kop i kom Rubanga di acur; aparere i kome di cunya ko kwanyere.
- ⁴In igenga nino; atie kede peko adwong kame mia likame atwero yamo.
- ⁵Aparo kop i kom kare kokato, ako yutuno mwakini ariki sek.
- ⁶Cunya tie kede par iwor kiakia; aparere di ako penyere i cunya be:
- ⁷” Benyo, Rwot bino dagi wa nakanaka? Likame kisa bino make i kom wa?
- ⁸Benyo, amara mere kalikame lokere ojik do atwal? Mam do cikere kame en ecikere kede but wa ojik atwal?
- ⁹Mam wi Rubanga owil timo wa kisa? Mam do elunyo bedo kede gero akaka mwolo?”
- ¹⁰Di ango ako waco be, “Gikame wango cunya twatwal en ine be, twer kame Ngamalo Twal oudo tie kede otieko lokere.”
- ¹¹Ango abino yutuno tice ka Rwot; abino yutuno giaura kame in itimo i kare kasek.
- ¹²Abino paro i cunya tice nin dedede, doko cunya bino paro tice nin me twer.
- ¹³Gi dedede kame in itimo, Okwe Rubanga, obedo gikacil; rubanga mene en kame dwong bala Rubanga wa?
- ¹⁴In en Rubanga kame timo giaura; in itieko nyuto twer nin i diere me atekerin.
- ¹⁵In ilako jo nin kede twer nin, jo kame obedo ikwae ka Yakobo kede me ka Yosepu.
- ¹⁶Kakame pii oneni kede, Okwe Rubanga, kakame pii oneni kede, lworoko mako gi, pii atut me nam oko cako tagere bala dano kame tie kede mielkom pi lworoko.
- ¹⁷Idoun onyo kot piny; malo obedo tie kede amwocumwocun bala me kot; meny bala me kot oko caro piny dedede.
- ¹⁸Mor me dwani bala amwocumwocun me kot oudo tie i apipiru; meny nin oko caro piny dedede; lobo oko ayayangun bala dano kame tie kede mielkom.
- ¹⁹Yongayo nin obeo ki dier nam adwong; in ingolo twon pii atot twatwal, do kakame tieni onyono likame onenere.
- ²⁰In itelo jo ni itero gi bala romini, di itio i cing Musa kede Aaron.

Sabuli 78

Rubanga kede Jo Mege

- ¹Wun jo na, winyunu pwony na, cikunu yitu i kom kope me dogo.



- ² Abino yamo i agole; abino gonyo dwong me kope mogo me mung me kare kasek,
³ gikame wan owinyunu, doko ongeunu gi, gikame joakwari wa owaco ne wa.
- ⁴ Wan likame obino mungo gi ne ikwae wa; obino waco ne lwak me kare me anyim kop me tice adongodongo kame Rwot otimo, karacel kede twer mere, kede giaura kame en etieko timo.
- ⁵ Riki en emio cik but ikwae ka Yakobo; emio iswilia but jo me Isirael. En eko ciko joakwari wa pi pwoyo idwe wa iswilia nogo,
- ⁶ tetekeny lwak me kare me anyim, idwe kalikame pwodi konywalo, karuno bino ngeno gi di gida kiko tatamo ne idwe gi.
- ⁷ Manoni bino mino gi kiketo gen gi i kom Rubanga; di likame wi gi ko bino wil kede tice mege, do kibino gwoko cik mege.
- ⁸ Likame gin kibino bedo bala joakwari gi, lwak kame joepali kede kame jojemo, lwak kalikame oudo cuny gi osipakin di tek geno Rubanga, jo kalikame oudo genere bute.
- ⁹ jo Epuraimu oudo omako imalia gi, gin kiko wilun ringo cen i ceng me yi.
- ¹⁰ Gin likame kigwoko isikan kame Rubanga otimo kede gi; kidagi lubo iswil mere.
- ¹¹ Wi gi owil kede gikame oudo etimo, kede giaura kame oudo enyuto negi.
- ¹² En bin etimo tice me aura i nyim joakwari gi i lobo me Misiri, i elet me Soan.
- ¹³ En emio nam opokere i diere di gin kiko ngolo, eko mino pii ocokere ikumemei bala atukit.
- ¹⁴ Etelo gi kede edou iceng, do eko telo gi kede asara me mac iwor kiakia.
- ¹⁵ En emio lela obarere i tim, eko mino gi pii atot kame wok ki kakatut.
- ¹⁶ Emio pii omol di wok ki lela, di eko mino pii omol piny bala icileta.
- ¹⁷ Do di gin kiko meede ameda dubo bute, gin kijemo ne Ngamalo Twal i tim.
- ¹⁸ Kitamo Rubanga i cuny gi, di kipenye cam kame cuny gi mito.
- ¹⁹ Gin kibedo kede yamo arac i kom Rubanga di kiwaco be, “Benyo, Rubanga twero mino wa cam i tim kan?”
- ²⁰ Akadi bed bala en ejwato lela di pii oko kukunya, di eko mol, benyo, etwero da mino mugati, arabo mino jo mege ringo?”
- ²¹ Aso, kakame Rwot owinyo kede kop noni, cunye oko wang, eko suro jo me Isirael kede mac, di wang cunye but gi oko meede ameda,
- ²² pien gin oudo likame kitie kede yei i kom Rubanga, doko oudo likame kigeno twer mere me lako jo.



- ²³Akadi bed kamanono da, en riki eyamo di eciko malo, eko yabo ikekon me malo;
- ²⁴ en bin emio emanu ocwei negi me acama; oudo emio gi engano kowok ki malo.
- ²⁵Jo ajoa ocamo mugati kame imalaikan camo, Rubanga ocwao negi cam di tot.
- ²⁶En bin emio yamo me tetu kide obuko ki malo, kede twer mere en bobo eko mino yamo me tetu piny obuko.
- ²⁷En bin emio ringo ocwei i kom gi bala apua; emio jo winy atot bala asinge me nam.
- ²⁸Emio winy nogo opopoto piny i dier kimere gi, i kabedo lung kame gin oudo kibedo iye.
- ²⁹Gin kiko cam di kiko yeng kiber, piento en emio gi gikame cuny gi oudo mito.
- ³⁰Do di pwodi likame kicobo mit gi me yengo, di oudo pwodi cam tie i dog gi,
- ³¹gero oko mako Rubanga i kom gi; eko neko jo atek i diere gi, awobe abeco me Isirael.
- ³²Akadi bed kamanoni da, gin pwodi kiko meede kede dub; gin likame kiyei tice mege me aura.
- ³³Aso en eko mino ceng me kuo gi obunyo tiek bala wei; mwakini me kuo gi ongoole tiek kede peko.
- ³⁴Tek kame en oudo eneko gi, gin oudo kiko donyo mone; gin oudo kiswilaro di kiko donyo mono Rubanga kede cuny gi lung.
- ³⁵Gin oudo kiyutuno be Rubanga en lela gi, Rubanga Ngamalo Twal oudo obedo ngalak gi.
- ³⁶Do dog gi oudo waco ne kope me abe, leb gi obedo cuko kop me abe i nyime.
- ³⁷Cuny gi oudo likame osipakin i kome; likame kigwoko cikere me isikan kame en etimo kede gi.
- ³⁸Do akadi da, pi kisa mere en eko sasiro dub gi, likame eko muducaro gi. I kare atot en ebedo didio gero mere, likame eko jalakino lilo mere dedede.
- ³⁹En bin eyutuno be kom gin kibedo jo ajoa, kical bala yamo kame buko eoto di likame bobo eko dwogo.
- ⁴⁰Gin bin kijemo ne Rubanga i tim tien atot, gin kiwango cunye i kuno.
- ⁴¹Gin kibedo tamo Rubanga tien kede tien, kiko wango cuny Ngat Kacil me Isirael.
- ⁴²Wi gi bin owil kede twer mere, akadi kiton ceng kame en elako gi kede kibut jokwor gi;
- ⁴³kakame en etimo kede gianena mege i Misiri, kede giaura mege i elet me Soan.
- ⁴⁴ En bin eloko icileta gi odoko remo, tetekeny kur kimat pii me isamai gi.



- 45 Ecwao negi alule me lwangini, kame oko donyo kakao gi. Doko da ecwao negi igwalogwalon, kame oko dudubo lobo gi.
- 46 Emio kudilinge odudubo cam me poti gi, obonyo da oko camaro gikame gin kilole puro.
- 47 Emio akako odudubo olok gi, kede ngico oko dudubo cukamori gi.
- 48 Ejalo doke gi akako oneko, kede epie da oko gwegweo romini gi.
- 49 Bin ejalakino twon gero mere kede can alit i kom gi, kame imalaikan kame dudubo okelo.
- 50 En likame edidio gero mere; likame emio gi kibwot ki to, do ejalo kuo gi ne aumpuli.
- 51 En eneko idwe kao dedede i Misiri, kame obedo anyakini me agege me teko gi i eema ka Kam.
- 52 Di eko telo jo mege wok ki kuno bala romini; eko donyo leko nyim gi i tim bala esipan me romini.
- 53 En etelo gi abongo peko moro, omio likame kiko bedo kede lworu; di pii me nam oko mwonyo jokwor gi.
- 54 En eko tero gi i moru mere kacil, moru kame en eyi eko mano kede teko mere.
- 55 En eriamo atekerin apat kame oudo tie i nyim gi, di eko popoko ne jo me Isirael lobo nono pi bedo mergi, eko mino ateker me Isirael obedo i miere me jokwor gi.
- 56 Do gin kiko tamo Rubanga Ngamalo Twal kiko jemo ne. Gin likame kilubo cik mege,
- 57 do kilokere tenge kiko bedo abongo yei bala bin joakwari gi, kibedo mienere amiena bala yat kogom me gweno emal.
- 58 Pien gin oudo kiwango cunye, omio en eko doko ger pi kite kame kigero kede abilan me woro caljwogi; kimio nyeko omake kede caljwogi kame gin oudo kitimo.
- 59 Kakame Rubanga ongeu kede, gero oko make twatwal, di eko dagi jo me Isirael atwal atwala.
- 60 Rubanga oko weko kabedo mere kame oudo tie Silo, eema kame en oudo ebedo iye i diere me jo,
- 61 eko jalo kotero Sanduku me Isikan, kame oudo nyuto twer mere, di eko jalo deyo mere i cing jokwor.
- 62 Ejalakino gero mere i kom jo mege, eko mino koneko gi kede epima.
- 63 Mac ocamaro awobe gi, manoni oko mino anyira gi oko bedo abongo jo kame nyomo gi.



- ⁶⁴Bin koneko josaseredoti gi kede epima, di likame apuserun gi oko koko gi da.
- ⁶⁵Di Rwot oko lepun, ineno bala ecei ki wang nino, ineno bala ngayi kame tie redo pien emer kede bwini.
- ⁶⁶En eko mino jokwor mege omako yongayo ringo, di eko mino gi twon lewic kalikame tiek.
- ⁶⁷En eko dagi ikwae me ot ka Yosepu, likame eyero jo me ekeko ka Epuraimu.
- ⁶⁸Do en eko yero jo me ekeko ka Yuda, kede moru me Sion kame oudo en emaro.
- ⁶⁹Di eko gero kabedo mere kacil kame ber bala malo, di ecungo kingiking bala acakini me lobo kame en etieko cibo pi kare lung.
- ⁷⁰En eyero ngatic mere Daudi, eko kwanye ki kakwano romini,
- ⁷¹ekwanye ki kwano kede gwoko romini eko kete bedo abaka me jo mege me Isirael, pi bedo ngakwai jo mege, gin ikwae ka Yakobo.
- ⁷²Daudi oko bedo ngakwat gi kede cuny kopoore, di eko telo gi kede diru.

Sabuli 79

Ilega me Kwano Rubanga pi Lako Isirael

- ¹ Okwe Rubanga, atekerin apat otieko donyo i lobo ni; kitieko munao tempulo nin kacil di kiko tuturo Yerusalem piny.
- ²Kimio liele me jotic nin but winy kame por i malo pi camo, kimio ringokom jo nin kacil but leini me obar kame tie i wi lobo pi camo.
- ³Kionyo remo gi bala pii i Yerusalem lung, doko oudo likame tie ngatamoro kame romo yiko gi.
- ⁴Wan do otieko doko gi me acae but jokio wa; jo koluko wa do tie kede nyero i kom wa.
- ⁵Okwe Rwot, pi kare arom amene? Benyo, ibino dong di iger atwal? Benyo, nyeko ni bino mino ibedo kede gero aliet bala mac?
- ⁶Bwot gero ni nono i kom atekerin kalikame ngei, kede i kom ajakanuto kalikame wori.
- ⁷Pien gin kitiekaro ikwae ka Yakobo di kiko mino kabedo gi odoko ameje.
- ⁸Kur iyutuno dub me joakwari wa di iko maro gi i wi wa; susunyo mino kisa maki kede wa, pien kotieko mino wa odoko goro.
- ⁹Kony wa, Okwe Rubanga ngalak wa, pi kelo deyo i nyingi; lak wa iko sasiro dub wa pi kelo bero i nyingi.



¹⁰Pinyo komio atekerin apat poore penyere be, “Rubanga gi tie tuai?” Tim onyanga i kom atekerin apat di wang wa neno, pi remo me jotit nin kame gin kionyo.

¹¹Winy cur me jo kame tie i otkol, di lubere kede twer nin adwong gwok jo kame kongolo kop me to i wi gi.

¹²Culi i kom jokwor wa tien kanyaare ayet kame gin kiyeti kede, Okwe Rwot.

¹³Di do wan jo ni, romini kame in itie kwano, oko bino pwoni nakanaka; kare dedede wan obino meede paki.

Sabuli 8o

Ilega me Kwano Rubanga Dwoko Bero me Isirael

¹ Winy koko wa, Okwe ngakwat me Isirael, in ngat kame itelo ikwae ka Yakobo bala romini. In ngat kame ibedo i kom ni me ajakanut i ngei cerubim,

²poore inyutere but atekerin ka Epuraimu, ka Benjamin kede me ka Manase. Nyut twer nin, di iko bino ilak wa!

³Mi wa odok cal bala ngoce, Okwe Rubanga; mi kisa maki i kom wa, tetekeny oud alako.

⁴Okwe Rwot Rubanga me jo yi, ibino bedo ger iko dagi winyo ilega me jo ni pi kare arom amene?

⁵In itieko mino wa ocamo pigewang wa bala kwon, doko itieko mino wa omato pigewang wa atot.

⁶In imio atekerin apat kame kio kede wa obedo kede acae i kom wa; jokwor wa do nyero wa ken gi ken gi.

⁷Mi wa odok cal bala ngoce, Okwe Rubanga me jo yi; mi kisa maki i kom wa, tetekeny oud alako.

⁸In riki ikelo jo ni ki Misiri bala olok; iriamo atekerin apat di iko pite.

⁹In iko iiko ne poto kiber; aliasin mege oko donyo kakatut eko nyai eromo lobo nono.

¹⁰Tipo mere oko umo mori, ajange mege oko walo twon yen adongodongo kame kolwongo be seda.

¹¹Eyaro ajange mege paka tuno i nam adwong, kede aliasin mege oko riere paka i ecilet.

¹²Do kara doko pinyo komio in iko reto apama kame koele kede, omio jo dedede kame beo i ngete ngwedo anyakini mege?

¹³Ipegei me itela nyonyono en, doko da leini dedede me obar came.



¹⁴Lokere bobo but wa, Okwe Rubanga me jo yi, ngoloro piny ki malo di iko neno; par pi olok noni,

¹⁵en yat olok kame cingi opito.

¹⁶Gin kitieko wange kede mac, kitonge piny; mi neeno ni me gero nekaro gi.

¹⁷Do ket cingi me gwok i kom jo kame in iyero, jo kame in imio obedo tek pirin.

¹⁸Di do wan likame oko bino lokere tenge kibuti; mi wa obed kuo, di wan oko bino pako nyingi.

¹⁹Mi wa odok cal bala ngoce, Okwe Rwot Rubanga me jo yi; mi kisa maki i kom wa, tetekeny oud alako.

Sabuli 81

Wer me Ebagu

¹Werunu kede dwan amalo but Rubanga ngat kame obedo teko wa; lelemunu kede kilel but Rubanga ka Yakobo.

²Cakunu wer, yangunu ayekeyeke, gounu wer amit kede adungun kede arigirigin.

³Kutunu agwara me ebagu me por duwe, kede me duwe kame otieko dongo, gin ceng me ibagai wa.

⁴Pien manoni en iswil me Isirael, cik ka Rubanga ka Yakobo.

⁵Iswil nono bin en emio Yosepu, i kare kame bin esuro kede piny me Misiri. Awinyo ngatamoro kalikame oudo ango angeo dwane di waco be,

⁶” Ango bin akwanyo yec apek tenge ki epepet ni; ango bin atako cingi ki ebukit kame yec tie iye.

⁷Kakame bin itie kede i peko, in bin iko lwongere buta di ango ako laki; ango bin adwoko kwac ni ki mwoc me kot, en kabedo na me mung; ango bin atami i pii me Meriba.

⁸Winyunu ikwenyar na, Okwe wun jo na; Okwe Isirael, ka koto iyei winyo kop na da!

⁹Miero kur rubanga ace apat bed tie i diere wu; likame ibinunu woro rubanga moro ace.

¹⁰Ango en Rwot Rubanga nin, ngat kame bin okwanyo ki piny me Misiri. Ngam dogi di ango ako bino piti.

¹¹” Do jo na likame bin oko winyo dwana; Isirael likame bin oko yei winyo dwana.

¹²Omio bin ango ako jalo gi lubo epali kame tie i cuny gi, pi timo gikame cuny gi oudo mito.



¹³Okwe koto jo na yei winyo kop na; cunya mito twatwal be koto jo me Isirael olubo yote na!

¹⁴Di do ango koto ako bwono jokwor gi awakawaka; di do ako lokere yi kede jokwor gi.

¹⁵Jo kame dagi Rwot ko bino riebere piny i nyime kede lworu, doko alola gi ko bino bedo nakanaka.

¹⁶Ango koto apiti kede engano kame konungo twatwal, di ako mini iyeng kede mokic kame kowado ki moru.”

Sabuli 82

Rubanga en Ngapug Adwong

¹Rubanga otieko bedo i kom i kansulo mere; en engolo kop i diere me rubangan be,

²”Ibinunu tieko kare kame rom kamene di likame ingolunu kop i ateni, kede di igangunu jo areco?

³Ngolunu kop me ateni pi jo agoro kede idwe kic; gwokunu twero me jocan kede me jo kame piny oloo.

⁴Lakunu jo agoro kede jo kame piny oloo; lakunu gi ki cing jo areco.”

⁵Gin likame kitie kede ngec akadi niang, kioto i colo; tim me ateni kame mio lobo cungo kiber oyangere.

⁶Ango awaco be, “Wun ibedunu rubangan, wun dedede ibedunu idwe ka Rubanga Ngamalo Twal;

⁷akadi kamanono da, wuda ibinunu to bala jo, doko kuo wu bino jik bala me jopug apat.”

⁸Yai, Okwe Rubanga, ingol kop ne lobo; pien atekerin dedede obedo megii.

Sabuli 83

Ilega pi Bwono Jokwor me Isirael

¹Okwe Rubanga, kur ilingi; kur ibed mot arabo ipalaro!

²Neningo, akadi nataman da jokwor nin tie celakino; jo kame dagi otieko kelo wi gi.

³Gin kitie kede iik me rieko i kom jo ni; kiporo kop karacel i kom jo kame in igwoko.

⁴Gin kiwaco be, “Bianu otiekunu ateker gi pitipit; tetekeny kur bobo yutuno nying Isirael atwal.”

⁵Gin kiwinyere i iik gi me mung kede cuny acel; kiribo kop i komi:

⁶gin jo me Edom kede Joisimael, jo me Moab kede jo Kagiri;

⁷jo me Gebal, Amon kede Amalek, jo me Pilistia kede jo kame bedo Taya.



- ⁸Jo me Asiria da otieko ribere kede gi, gin en jo kame konyo jo me Moab kede jo Amon yi, ikwae ka Lot.
- ⁹Tim negi bala kame bin itimo ne kede jo me Midian, kede bala kame itimo ne kede Sisera kede Jabin i nget ecilet me Kison,
- ¹⁰jo kame bin in imuducaro i Enedor, kame riki oko doko cal bala woyo kame tie piny.
- ¹¹Tim ne jodongo gi bala kame itimo kede ne Oreb kede Seeb, bwon jopug gi bala bin Seba kede Salamuna,
- ¹²jo kame bin owaco be, “Ogamunu elet me kwat ka Rubanga dok merwa.”
- ¹³Okwe Rubanga na, wewelo gi bala apua me apipiru, bala cucung kame yamo tie kuto.
- ¹⁴Bala kame mac wango kede abum, bala kame mac wango kede wi mori,
- ¹⁵kamanono ida riam gi kede yamo abuko kitek di iko mino yamo ager kel negi lwooro.
- ¹⁶Mi lewic mak gi, Okwe Rwot, tetekeny gin kilwong nyingi.
- ¹⁷Wek mi gi lewic, doko inonong mak gi nakanaka; mi gi kitoi to me lewic.
- ¹⁸Mi gi kingei be in keni, ngat kame nyingi obedo Rwot, en kame ibedo Ngamalo Twal kame lo wi lobo lung.

Sabuli 84

Wer me Dano kame tie Paro Ot ka Rubanga

- ¹Kakame in ibedo iye tin ber benyo, Okwe Rwot me jo yi!
- ²Cunya mito, ateteni eparo kitek pi bedo i diakal ka Rwot; ango awero kede cunya kede koma dedede but Rubanga kame kuo pien atie kede kilel.
- ³Kiton omobilo da tie kede ude, doko acilagwec da gero ude gi, kakame kinywalo iye idwe gi, i alutari nin, Okwe Rwot me jo yi, Abaka na kede Rubanga na.
- ⁴Kitie kede yomcuny gin jo kame kibedo i odi, di kibedo wero were me paki nakanaka.
- ⁵Kitie kede yomcuny gin jo kame kiudo teko gi kibuti, jo kame cuny gi mito ot wori i Sion.
- ⁶Ka gin kitie beo ki aditot me Baka, gin kimie edoko kabedo me ataneko; kot kame geo cwei da mio pii pong iye.
- ⁷Teko gi meede ameda kame gin kitie ot; gin kibino neno i Sion Rubanga kame kalamo rubangan dedede.
- ⁸Okwe Rubanga me jo yi, winy ilega na; cik yiti iwinyi, Okwe Rubanga ka Yakobo!



⁹Neningo, Okwe Rubanga in ngat kame ibedo ebuku wa; nen kede kisa dano nin kame itieko yero.

¹⁰Pien bedo i diakal nin ceng acel kenekene ber kalamo ceng tutumia acel kame dano bedo kede kabedo ace. Eber nango bedo ngadar ekeko me ot ka Rubanga kalamo ot bedo i miere me jo areco.

¹¹Pien Rwot Rubanga tie bala ceng kede ebuku wa; en etimo ne wa bero doko emio wa deyo. Likame tie gimoro aber kame Rwot twono jo kame timo gi kopooore.

¹²Okwe Rwot me jo yi, kitie kede yomcuny jo kame geni.

Sabuli 85

Kwano Rubanga pi Timo Bero

¹Rwot in kisa omaki i kom lobo nin; idwoko abar me Isirael.

²In isasiro dub me jo ni; in iweko raco gi dedede.

³In ijiko lilo ni dedede; iloko cunyi di iko weko bedo ger.

⁴Dwok kuo wa dok cal bala bin sek, Okwe Rubanga Ngalak wa, di iko weko bedo kede wangcuny i kom wa.

⁵Mam do iyaro bedo ger kede wan nakanaka? Mam do iyaro mino gero nin naparo lwak me kare dedede?

⁶Benyo, likame bobo iyaro dwoko ne wa epone me kuo angoce, me wek jo ni leli pi gikame in itimo?

⁷Nyut ne wa amara ni kalikame lokere, Okwe Rwot, di iko lako wa.

⁸Wek kong awiny gikame Rwot Rubanga bino waco, piento en ebino waco kop me mulem but jo mege, gin jo mege agene, ka gin likame bobo kidok i tim gi me mingomingo.

⁹Ateteni eikere pi lako jo kame lwore, me wek deyo mere bed i lobo wa.

¹⁰Amara kalikame lokere bino riamo kede genere; poore bino motere di kinotere kede mulem.

¹¹Genere kame jo tie kede bino tuno malo di yai ki lobo, di Rubanga ngat kopooore ko bino neno piny ki malo.

¹²Rwot bino mino wa gikame ber, di lobo wa ko bino kelo ne wa amio.

¹³Poore bino telo ne Rwot yongayo di eko iiko ne kabeo.

Sabuli 86

Ilega me Kwano Kony

¹Cik yiti, Okwe Rwot, di iko gamo kwac na, pien ango atie i can doko piny oloa.



- ²Gwok kuo na, pien ango ageni; lak epasoit ni kame geni.
- ³In en Rubanga na; bed kede kisa buta, Okwe Rwot, pien ango akok buti piny yuluyul.
- ⁴Yom cuny epasoit ni, Okwe Rwot, pien ango akelo kwac na buti.
- ⁵Pien in, Okwe Rwot, iber doko isasiro jo, amara ni kalikame lokere dwong but jo dedede kame kok buti.
- ⁶Winy kwac na, Okwe Rwot; winy koko na me ingangai.
- ⁷Kame atie i peko ango alwongi, pien in ibino gamo kwac na.
- ⁸Likame tie rubanga moro kame cal kedi, Okwe Rwot, doko da likame tie tice kame kokaruno poro kede megii.
- ⁹Atekerin dedede kame in icweo bino bino i nyimi di kiko wori, Okwe Rwot; gin kibino mini deyo.
- ¹⁰Pien in idwong doko itimo jamini me aura; in keni en kame ibedo Rubanga.
- ¹¹Pwonya lubo yongayo nin, Okwe Rwot, me wek alub ateni nin; mia awori kede cunya lung.
- ¹²Ango apwoyi kede cunya lung, Okwe Rwot Rubanga na, doko abino mini deyo nakanaka.
- ¹³Pien amara nin kalikame lokere dwong buta; in itieko lako kuo na ki kabedo me jo oto.
- ¹⁴Joewaka tie momoo kop i koma, Okwe Rubanga; ekodet me jogero mito neka, doko likame kiparo piri akadi acel.
- ¹⁵Do in, Okwe Rwot, ibedo Rubanga kame timo jo kisa doko itimo mwolo; in cunyi likame susunyo wang, doko amara nin kalikame lokere kede genere nin dwong twatwal.
- ¹⁶Lokere buta di iko bedo kede kisa i koma; mi epasoit ni teko; lak atin me apasoit ni.
- ¹⁷Mia gianena moro kame nyuto bero ni, me wek jo kame daga neni di lewic ko mako gi, pien in, Rwot, itieko konya di iko kweno cunya.

Sabuli 87

Wer me Pako Yerusalem

- ¹Bomba kame Rwot ogero tie cungo i wi moru kacil;
- ²Rwot maro bomba me Yerusalem kalamo kabedere dedede me Isirael.
- ³En etie waco kope me deyo i komi, Okwe in bomba ka Rubanga:



⁴” Kikom jo kame ngea, Rakab kede Babilon tie iye; doko da abino maro jo me Pilistia, Taya kede Abisinia i kom jo kame konywalo kuno.”

⁵Do kobino waco kop i kom Sion be, konywalo jo dedede kuno; pien Ngamalo Twal en kame bino mino Sion cungo.

⁶Rwot bino wandiko nying jo dedede i yore i yore be, “Man konywalo kuno, man da konywalo kuno.”

⁷Jower kede jomiel da waco be, “Winyo wa dedede wok ki Sion.”

Sabuli 88

Koko me Kwano Kony

¹Okwe Rwot, Rubanga ngalak na, iceng ango akok buti pi konya; iwor da ango akok i nyimi,

²wek ilega na tun buti; cik yiti iwiny koko na.

³Pien peko opong i kuo na, doko kuo na odoko iyapiyapi kede kabedo me jo oto.

⁴Ango komara do i kom jo kame tie ot kabedo me jo oto; teko na otiek.

⁵Acal do bala jo kame kojalo i kom jo kame tie donyo i ates, bala jo kame koneko, kame tie do buto i ates, bala jo kame wii otieko wil kede gi atwal, pien gin do likame kitie i cingi.

⁶In itieko rwaka kakatut i ates, kabedo kame col di tut.

⁷Lilo ni onua, doko ibwona kede ebuka me lilo ni dedede.

⁸In itieko mino joaup na olworo bedo keda; in itieko mina adoko gikame neno rac i but gin. Kotieko cega omio likame akaruno bwot;

⁹wanga odoko mwadamwada pi can kame atie neno. Okwe Rwot, ceng dedede ango alwongere buti; atango cinga buti.

¹⁰Benyo, in itimo giaura ne jo oto? Benyo, gin kiyai malo di kiko paki?

¹¹Benyo, kotatamo amara nin kalikame lokere i ates, arabo kotatamo genere nin i kabedo me amuducar?

¹²Benyo, giaura nin kongeo i kakacol kuno, arabo kotatamo genere nin i kabedo me jo kame wic otieko wil kede gi?

¹³Do ango akok buti, Okwe Rwot; ceng dedede odiko ango akelo kwac na i nyimi.

¹⁴Okwe Rwot, pinyo bo komio iuca tenge? Pinyo komio ikana na wangi?

¹⁵Cako di pwodi ango atitidi, abedo neno can kame abwot abwota kede to, aneno can kame in imia; adoko do goro.

¹⁶Lilo nin otieko bwona; asura nin areco omuducaro ango.



¹⁷Gin kiluka piny yuluyul bala ariram me pii; kibino na di kigurao ango ki bad dedede.

¹⁸In itieko mino adiereson na karacel kede jokio na olworo bedo keda; colpiny en kame do tie bala ngabedo na.

Sabuli 89

Wer me Kare me Peko

¹Okwe Rwot, ango abino wero nakanaka wer me pako amara nin kalikame lokere; abino tatamo genere nin kede dogo but lwak me kare lung.

²Ango angeo be amara nin kalikame lokere tie nakanaka; genere nin tie kingiking bala malo.

³In bin iwaco be, “Ango atieko sikano kede dano na kame ayero, ango atieko lairo but epasoit na Daudi be,

⁴ ‘Abino mino ikwae ni bedo tie nakanaka, di ako bino mino ajakanut ni bedo tie i kare lung.’ “

⁵Wek gi dedede kame tie i malo pak giaura kame in itimo, Okwe Rwot, doko miero pak genere nin i kacokere me tipere kacil.

⁶Pien ngai en kame kokaruno poro kede Rwot i malo? Ngai kikom tipere kacil me i malo en kame cal bala Rwot,

⁷Rubanga kame kolworo kitek i kansulo me tipere kacil, ngat kame pire dwong, doko kame kolworo kalamo gin dedede kame kiluke?

⁸Okwe Rwot, Rubanga me jo yi, ngai kame tek bala in, Okwe Rwot? In igenere i gi dedede.

⁹In ipugo gero me nam; ka ebuka mege tingere, in ikweo gi.

¹⁰In bin inyonyoto Rakab bala gi oto; isarakino jokwor ni kede teko ni.

¹¹Malo obedo meri, piny da meri; piny kede gi dedede kame tie iye in en kame icweo.

¹²Tetu malo kede tetu piny in kame icweo; Tabor kede Kerimon paki kede kilel.

¹³In itie kede twer adwong; teko nin dwong, in itie kede twer amalo twatwal.

¹⁴Poore kede ngolo kop i ateni en kame obedo acakini me ajakanut nin; amara kalikame lokere kede genere en kame telo nyimi.

¹⁵Kitie kede yomcuny gin jo kame kingeo paki kede dwan amalo, jo kame bedo i lero me tie nin, Okwe Rwot.

¹⁶Gin kilelo piri piny yuluyul, di kipaki pi poore nin.

¹⁷Pien in en kame ibedo teko kede deyo gin; bero nin en kame mio wan teko.



¹⁸Pien ebuku wan obedo me ka Rwot, abaka wa obedo me ka Ngat Kacil me Isirael.

Cikere ka Rubanga but Daudi

¹⁹Di do in bin iko waco i gianyuta ne jo ni kame geni be, “Ango atieko keto ocoro me ajakanut i wi dano kame tie kede twer, atieko tingo malo dano kame ango ayero kikom jo.

²⁰Ango atieko udo ngatic na Daudi; atieko wire kede mo na kacil.

²¹Teko na bino bedo kede en nakanaka; twer na bino mine ebedo tek.

²²Likame tie ngakwor kame bino karuno en, jo areco likame bino bwone.

²³Ango abino nyonyoto jokwor mege i nyime, di ako neko jo adage.

²⁴Genere na kede amara na kalikame lokere bino bedo i kome; pi twer nango teko mere bino meede ameda.

²⁵Ango abino mino twer mere meede paka tuno i nam, doko i tetucel, twer mere bino tuno i icileta.

²⁶En ebino koko buta be, ‘In en ibedo papa na, Rubanga na kede lela kame laka.’

²⁷Ango abino mine ebedo bala atin kao na, abaka kame lo abakai dedede me wi lobo.

²⁸Abino bedo kede amara na kalikame lokere i kome nakanaka, doko isikan nango kede en bino cungo di tek.

²⁹Abino mino ikwae mege en kame bedo i ajakanut nakanaka, doko abino mino kom me ajakanut mere bedo nakanaka bala malo.

³⁰” Ka idwe mege odagi lubo iswil nango di kiko dagi bedo bala kame cik nango mito,

³¹ka gin kituro iswil nango di likame kiko lubo cik na,

³²ango abino do dano gi kede ebela pi turo iswil, doko abino dano gi kede iyera pi dub;

³³do likame abino kwanyo amara na kalikame lokere ki kom Daudi, arabo bedo kede angalo i genere na.

³⁴Likame abino turo isikan na, arabo loko kop kame atieko waco ne.

³⁵” Ango atieko lairo kede nyinga kacil tien acel atwal; likame abino ngalo Daudi.

³⁶Ikwae mege bino bedo i ajakanut nakanaka, doko ajakanut mere bino bedo tie i nyima nakanaka bala ceng.

³⁷Ebino bedo tie nakanaka bala duwe, en mujura kame tie malo i edou nakanaka.”

Wer me Iturur ka Kobwono Abaka



³⁸Do nan in itieko jale doko itieko dage; lilo otieko maki kitek i kom abaka kame in iyero.

³⁹In itieko turo isikan kame oudo itimo kede ngatic ni; doko itieko uco ocoro mere me ajakanut piny i apua.

⁴⁰In itieko tuturo apama kame luko bomba mere; itieko mino kateko mere odoko ameje.

⁴¹Jo dedede kame beo i ngete yake; en etieko doko gianyera me jokio mege.

⁴²In itieko mino jokwor mege teko me bwone; in itieko mino jokwor mege dedede olelo.

⁴³Aso di in itieko mino epima mere odoko okuku, doko in likame ikonye yi.

⁴⁴In itieko mano ebela mere me pug doko iremoro kom mere me ajakanut ireto piny.

⁴⁵In itieko mine eti awakawaka; doko imio lewic obwone.

Ilega pi Kwano Alako

⁴⁶Pi kare kame rom amene, Okwe Rwot? Mam do iyaro bedo pwono nakanaka? Lilo nin bino liel bala mac paka tuno awene?

⁴⁷Yutuno ekite kame kuo nango cecek kede; yutuno be in icweo dano pi bedo gikame to.

⁴⁸Ngai kame karuno bedo kuo di likame eko to? Ngai kame karuno bwot ki twer me kabedo me jo oto?

⁴⁹Rwot, amara nin kalikame lokere me kare asek ca do tie tuai, amara kame pi genere nin omio iko kwongere but Daudi.

⁵⁰Yutuno, Okwe Rwot, ekite kame koyeyeto kede epasoit ni; ekite kame ango akanyo kede ayet me atekerin.

⁵¹Ayet kame jokwor ni yeta kede, Okwe Rwot, ayet kame koyeto kede abaka kame in iyero, i kabedo dedede kame en ebeo iye.

⁵²Pak bed but Rwot nakanaka. Amen! Amen!

Sabuli 90

ITABU ME ONGWON

(Sabuli 90–106)

Goro ka Dano kede Teko ka Rubanga

¹Rwot in en kabedo wan i kare dedede.

²Di pwodi likame kocweo mori, arabo di pwodi likame in icweo lobo kede piny, cako sek kede sek kiton tuno ikar kede ikar, in en kame ibedo Rubanga.



- ³In idwoko wan i apua, di iwaco be, “Dokunu, wun idwe ka dano.”
- ⁴Piento i wangin, mwakini tutumia acel iyapiyapi bala nyoro ka etieko kato, arabo erom aroma kede esawa atitidi me iwor.
- ⁵In iwearo kuo gi; gin kical bala lek, kical bala lum kame lot odiko;
- ⁶odiko elot di eko doko nyen, do otieno ener di eko tuo.
- ⁷Pien gero nin otieko wa; lilo ni obwono wa.
- ⁸In itieko keto dub wa i nyimi, dub wa kame otimo i mung in itieko delelo i nyimi.
- ⁹Lilo nin mio kare me kuo wa bedo cecek; kuo wa tiek bala kite kame dano omo kede wei.
- ¹⁰Kare me kuo wa tie mwakini ot kanyaare; arabo ot kanyauni ka otek, akadi bed kamanono da, kare nogo lung obedo me inyinyir kede me peko; doko da kitiek awakawaka di wan oko rwenyo.
- ¹¹Ngai bo kame ngeo twer me gero nin? Ngai kame ngeo lworu kame gero nin kelo?
- ¹²Pwony wa ngeno ceko me kuo wa, tetekeny obed kede cuny me rieko.
- ¹³Lok cunyi, Okwe Rwot! Kara in iyaro lilo kede wa pi kare kame rom amene? Mi kisa maki kede jotic ni!
- ¹⁴Pong kuo wa odiko acelacel kede amara ni kalikame lokere, me wek osobolo bedo kede kilel kede yomcuny pi kare me kuo wa lung.
- ¹⁵Mi wa obed kede yomcuny pi kare kame rom aroma kede kare kame in icano wa kede, doko kame rom aroma kede mwakini kame wan obedo neno kede peko.
- ¹⁶Mi jotic ni nen tice ni, doko idwe gi da nen tice nin adongodongo.
- ¹⁷Okwao bero ka Rwot Rubanga wa bed kede wa, di eko mino winyo i tice me cing wa; Okwe mi winyo i tice me cing wa!

Sabuli 91

Rubanga en Ngagwok wa

- ¹In ngat kame ibedo i gwok me Ngamalo Twal, ngat kame dong bedo i gwok me Won Twer,
- ²ibino waco ne Rwot be, “In en kagwokere nango kede kateko na, Rubanga na kame ageno.”
- ³Piento en ebino laki ki owic kame kociko kede ki tuwo areco dedede;
- ⁴en ebino umi kede bwome, di in iko gwokere i bwome; genere mere en ebuku kame gwoki.



⁵Likame ibino bedo kede lworu moro iwor i kom gimoro arac, akadi lworu emal kame kogweo i dier i ceng,

⁶amoto tuwo areco kame mako jo iwor, arabo can kame muducaro jo i dier i ceng.

⁷Jo tutumia twero popoto piny di kiko to i ngeti, jo tutumia tomon i ngeti tetu cam, do likame tie gimoro kame bino timere ni.

⁸In ibino neno anena kede wangi alola kame komio jo areco.

⁹Pi kite kame in itieko mino kede Rwot odoko kagwokere ni, Won Malo Twal en kabedo nin,

¹⁰likame tie gimoro arac kame bino timere ni, likame can moro bino noko paco ni.

¹¹Piento en ebino ciko imalaikan mege piri, pi gin gwoki i kabedo dedede kame in ioto iye.

¹²Gin kibino tingi i cing gi tetekeny kur itwom tieni i wi engaro.

¹³In ibino nyono engu akadi emosoga kede tieni; in ibino nyonyono inguon atino kede twole.

¹⁴Rubanga owaco be, “Ango abino lako jo kame mara; abino gwoko jo kame ngea.

¹⁵Ka gin kilwongere buta, ango abino gamo dog gi; abino bedo kede gi i kare me peko, ango abino lako gi di ako mino gi kiudo wor.

¹⁶Abino mino gi kare alac me kuo, kame bino romo gi, di ako nyuto negi alako na.”

Sabuli 92

Wer me Pako Rwot

¹Etie gikame ber pi mini pwoc, Okwe Rwot, wero wer me pako nyingi ber, Okwe Ngamalo Twal.

²Etie gikame ber pi rabo odiko acelacel kop me amara nin kalikame lokere, kede iwor acelacel da kop me genere nin,

³di kogoo gita kede adungu, di kogoo wer amit kede arigirigi.

⁴Pien tice nin, Okwe Rwot, otieko minango yomcuny; tice kame in itimo miango awero kede kilel.

⁵Tice kame in itimo tin dongodongo benyo, Okwe Rwot! Tam nin tut twatwal!

⁶Ngat kalikame wie tio likame karuno ngeno, doko ngamingo likame karuno niang be:

⁷bed bala lonyo me jo areco meede bala lum kame lot, kede di kuo aber meede ne jo dedede kame timo gikareco, do gin kobino muducaro gi atwal,

⁸do in, Okwe Rwot, ipugo gi dedede ikar kede ikar.



⁹Pien jokwor nin, Okwe Rwot, bino to; jo dedede kame timo gikareco kobino sarakino.

¹⁰Do in itieko minango adoko tek bala jobi; iwira kede mo.

¹¹Atieko neno kede wanga kite kame jokwor na poto kede; doko awinyo kede yita koko me jo areco kame mito sura.

¹²Jo kopooe bedo kede kuo aber nakanaka bala tugo kame nyak nakanaka, doko kidongo bala yen seda me Lebanon.

¹³Gin kical bala yen kame kopito i ot ka Rwot, yen kame dongo libaliba i diakal ka Rubanga wa,

¹⁴kame pwodi nyak akadi i kare me tio gi; gin kilibaliba di pige tot i kom gi.

¹⁵Manono nyuto be Rwot opooe; en etie lela nango, doko eli kede tim moro arac.

Sabuli 93

Rubanga en Abaka

¹Rwot en abaka, engapo angapito me dwongo me abaka, doko etie kede twer. En etieko sipo piny di tek likame tie gikame bino yange.

²Kotieko cibo kom nin me ajakanut cako sek; in ibedo tie cako sek kede sek.

³Nam omor, Okwe Rwot, dwan nam omor; dwan nam omor kitek.

⁴Rwot tie kede dwongo i malo, dwongo mere kalamo mor me pii atot, edwong kalamo ebuka me nam.

⁵Iswilia nin likame lokere, Okwe Rwot; odi cil adikinicel ikar kede ikar.

Sabuli 94

Rubanga en Ngangolkop me Jo dedede

¹Okwe Rwot, in Rubanga kame culo kwor, in Rubanga kame culo kwor, nyut gero ni!

²Yai, Okwe ngangolkop me lobo; mi joewaka gikame poore kede gi!

³Okwe Rwot, jo areco bino tieko kare kame rom amene, kibino tieko kare kame rom kamene di kilelo?

⁴Gin kiyamo kope me ewaka; jo dedede kame timo gikareco wakere.

⁵Gin kitidilo jo ni, Okwe Rwot, di kiketo can i kom jo nin.

⁶Gin kineko apuserun kede jokumbor, kineko idwe kic da,

⁷di kiwaco be, “Rwot likame neno; Rubanga ka Yakobo likame ngeo.”



- ⁸Miero iniangunu, Okwe wun jo kame tam wu goro; wun jomingo, kara ibinunu doko riek awene?
- ⁹Benyo, en ngat kame ecweo yit jo, likame en ewinyo kop? Benyo, en ngat kame ecweo wang, likame en eneno?
- ¹⁰En ngat kame ebitaro atekerin, en ngat kame epwonyo jo kop me riek, benyo, likame en ebino bitaro gi?
- ¹¹Rwot ngeo par wa, en engeo be kical bala yiro kame duny di eko rwenyo.
- ¹²Kitie kede winyo gin jo kame in ibitaro, Okwe Rwot, kede jo kame in ipwonyo iswil ni.
- ¹³In imio gin kiworaro ki peko, tuno di kotieko kunyo bur me ciko jo areco.
- ¹⁴Piento Rwot likame bino weko jo mege atatai; en likame ebino jalo jo kobedo mege.
- ¹⁵Pien ngolo kop i ateni bino dwogo i twale, di jo dedede kame cuny gi ber ko bino gango kop nono.
- ¹⁶Ngai kame bin okonya yi kede jo areco? Ngai kame bin okonya yi kede jo kame timo gikareco?
- ¹⁷Ka koto oudo Rwot likame oko konya, koto oudo kuo na okato awakawaka ot bedo i piny koling.
- ¹⁸Kakame oudo aparo kede be, “Tiena tie cer,” amara nin kalikame lokere en oko maka, Okwe Rwot.
- ¹⁹Kame par opong i cunya, in ikweo cunya di ako bedo kede yomcuny.
- ²⁰Benyo, in ikaruno bedo awotin kede jongolkop areco, jo kame tio kede iswil pi timo gikarac?
- ²¹Gin kicokere karacel pi dubo kuo me jo abeco, di kiko ngolo kop me to ne jo kame li kede raco moro.
- ²²Do Rwot otieko doko kateko nango, doko en Rubanga na, lela kame ango aringo ot gwokere iye.
- ²³En ebino culo gi kede raco pi dub kame kitimo, di eko tieko gi pitipit pi gikareco gi; Rwot Rubanga wa bino tieko gi pitipit.

Sabuli 95

Wer me Pak

- ¹Okwe bianu owerunu but Rwot; olelemunu kede kilel but lela kame lako wa.
- ²Bianu i nyime kede pwoc; olelemunu kede kilel bute di owerunu were me pak.



³Pien Rwot obedo Rubanga kame dwong, en Abaka kame dwong kalamo rubangan dedede.

⁴Lobo lung tie i cinge, cakere ki piny kakatut tuno malo i wi mori.

⁵Nam obedo mere, piento en kame ecwee, kede lobo kakotuo da obedo mere, en kame cinge ocweo.

⁶Okwe bia owerunu, olurunu wi wa piny, oriondikunu i nyim Rwot ngat Kocweo wa!

⁷ Piento en Rubanga wa, wan obedunu jo kame en egwoko, romini kame kuo i cinge. Okwe koto di tin iwinyunu kop mere be,

⁸ “Kur ibedunu kede tekwic bala bin i Meriba, bala kame bin gin kitimo kede i Masa i ceng ca i wi tim,

⁹i kare kame bin joakwari wu otama kede, di kimito be ami gi anyut, bed bala oudo kitieko neno tic na.

¹⁰Cunya bin oko dagi lwak me i kare nono pi mwakini ot ongwon di awaco be, ‘Gin kibedo jo kame cuny gi parao tenge nakanaka, doko likame kitimo gikame ango amito.’

¹¹ Pi mano, ango bin ako kwongere kede wangcuny be, ‘Gin likame kibino donyo i wei na.’ “

Sabuli 96

Rubanga en Abaka me Abakai

(1 lyutun 16.23-33)

¹Okwe werunu wer anyen but Rwot; werunu but Rwot, wun jo dedede me lobo!

²Werunu but Rwot, pakunu nyinge; tatamunu ceng dedede be en elako wa.

³Tatamunu kop me deyo mere but atekerin, kede tice mege me aura but jo dedede!

⁴Pien Rwot dwong doko miero pake twatwal; en kame miero mie wor kalamo rubangan dedede.

⁵Pien rubangan dedede me atekerin apat obedo caljwogi; do Rwot en ocweo malo.

⁶Wor kede dwongo tie bute; teko kede cilo tie i kabedo mere kacil.

⁷ Okwe wun jo dedede, wacunu be deyo kede teko obedo me ka Rwot.

⁸Miunu Rwot deyo kame poore kede nyinge; kelunu giamia, di ikounu donyo i diakal mere!

⁹Worunu Rwot di ingapunu engape kacil; bedunu kede mielkom i nyime, wun jo me lobo lung!

¹⁰Wacunu ne atekerin be, “Rwot en abaka! Kotieko keto lobo kakare, likame tie gikame karuno yayango en. En ebino ngolo kop ne jo dedede i ateni.”



¹¹Bed kede yomcuny in malo, doko ida lobo leli; miero nam mori, kiton gi dedede kame tie iye;

¹²poto da leli, kiton gi dedede kame tie iye. Di do yen dedede ko bino wer pi kilel

¹³i nyim Rwot; piento en etie bino, etie bino pi ngolo kop ne lobo. En ebino ngolo ne piny kop i yore kopoore, ebino ngolo ne jo kop i ateni.

Sabuli 97

Rubanga en Ngapug Adwong

¹Rwot en abaka; mito jo me wi lobo leli; mito jo kame bedo i dog name da bed kede yomcuny!

²Idoun kede colo kame cucucuc oluke; en epugo i yore kopoore kede me ateni.

³Mac en kame telo ne yongayo, di ewango jokwor mege kame oluke.

⁴Meny mere caro piny; jo me wi lobo neno di kom gi ko miel.

⁵Mori calar bala adipor i nyim Rwot, kicalar i nyim Rwot me lobo lung.

⁶Malo tatamo poore mere; doko jo dedede neno deyo mere.

⁷Jo dedede kame woro caljwogi komio lewic mako gi, jo kame wakere pi caljwogi, gikame kony gi li; rubangan dedede luro wi gi piny i nyime pi mine wor.

⁸Sion winyo di cunye ko doko yom, bomban me Yuda da ko lelo, pi kope kame in ingolo, Okwe Rubanga.

⁹Pien in, Okwe Rwot, in idwong twatwal, in ipugo wi lobo lung; in idwong kalamo rubangan apat dedede.

¹⁰Rwot maro jo kame cuny gi dagi gikarac; en egwoko kuo me jo mege kame gene, en elako gi ki cing jo areco.

¹¹Lero yabere ne jo kopoore, kilel da ne jo kame cuny gi ber.

¹²Lelunu pi gikame Rwot otimo, Okwe wun jo kopoore, di ikounu mine pwoc!

Sabuli 98

Rubanga en Ngapug Piny

¹Okwe werunu wer anyen but Rwot, piento en etieko timo jamini me aura. Twer mere kede teko mere kacil en komie elo.

²Rwot otieko mino twer kame en elako kede jo ongere; enyuto i nyim atekerin ngolo kop me ateni kame lako jo.

³En etieko paro pi amara mere kalikame lokere kede genere mere but jo me Isirael. Jo me lobo lung otieko neno loc ka Rubanga wa.



⁴Lelemunu kede kilel but Rwot, wun jo me lobo lung; dipunu wer me kilel di ipakunu Rwot.

⁵Werunu were me pako Rwot di igounu arigirigi, gounu arigirigi di iwerunu kede dwan amit.

⁶Kutunu agwara kede bilo di ilelemunu kede kilel i nyim Rwot, Abaka.

⁷Miero nam kede gi dedede kame tie iye rurumo; piny kede gi dedede kame tie iye da weri.

⁸Miero icileta bap cing gi; mori da wer karacel pi kilel i nyim Rwot,

⁹piento en etie bino pi ngolo ne lobo kop. En ebino ngolo ne jo me piny kop i ateni bala kame poore ne dano acelacel.

Sabuli 99

Rubanga en Abaka kame Kalamo

¹Rwot en abaka; jo dedede poore bed kede mielkom! En ebedo i kom mere me ajakanut i ngei cerubim; miero lobo yangere.

²Rwot pire dwong i Sion; komie dwongo kame kalamo me jo dedede.

³Wek gin kipak nyingi kame dwong, en nying me alwora. En ngat kacil!

⁴Abaka Won Twer, ngat kame maro gikame kotimo i yore me ateni, in en ikelo ngolo kop me ateni i Isirael; ikelo da kuo kopooore kede timo ne ngat acelacel bala kame poore ne.

⁵Pakunu Rwot Rubanga wa; worenu i nyim abanya mere me teno tiene. En ngat kacil!

⁶Musa kede Aaron bin obedo josaserdoti mege, Samuel da bin ngat acel kikom jo kame oudo lwongo nyinge. Gin bin kikok but Rwot di en eko dwoko kwac gi.

⁷En bin eyamo kede gi i epir me edou; gin kiko lubo iswilia mege kede cik kame en bin emio gi.

⁸Okwe Rwot Rubanga wa, in bin idwoko kwac gin; in bin ibedo Rubanga kame sasiro gin ki dub gi, do oudo itimo onyanga i kom gin pi gikareco kame gin oudo kitimo.

⁹Pakunu Rwot Rubanga wa, doko worenu i wi moru mere kacil, pien Rwot Rubanga wa cil.

Sabuli 100

Wer me Pak

¹Lelemunu kede kilel but Rwot, wun jo dedede me wi lobo.

²Worunu Rwot kede yomcuny; bianu i nyime di iwerunu.



³Ngeunu be Rwot en Rubanga. En kame ecweo wa, doko wan obedunu jo mege; wan obedunu jo mege, romini kame en ekwao.

⁴Donyunu i irutei mege kede pwoc, kede i diakale mege kede pak. Mienu pwoc, pakunu nyinge.

⁵Piento Rwot ber; amara mere kalikame lokere bedo nakanaka, doko egenere but lwak me kare dedede.

Sabuli 101

Cikere ka Abaka

¹Abino wero wer kame mako amara kame genere kede ngolo kop i ateni; abino were butin, Okwe Rwot.

²Abino bedo abongo raco moro i kuo na; awene en kame in ibino bino kede buta? Abino bedo kede cuny aber i oda,

³doko likame abino yei gimoro arac. Cunya dagi tice me jo apoto tenge kibut Rubanga; likame abino bedo tie kede akadi acel moro da.

⁴Cuny kayei timo raco akaa bino bedo bor keda; likame abino timo gimoro arac.

⁵Ango abino muducaro dano moro kame dubo nying ngakio mere i mung. Likame ango abino yei kanyo ikiteso me dano moro kame wakere kede kame deng.

⁶Abino neno kede kisa jo kame bedo i lobo noni di kigenere, tetekeny kibin kibed keda; ngat kame bedo abongo raco moro i kuo mere bino tic nango.

⁷Likame tie ngatamoro kame tie kede angalo kame bino dong i oda; likame tie ngat kame yamo kope me abe kame bino dong i nyima.

⁸Odiko acelacel abino muducaro jo atimo tim areco dedede kame tie i lobo noni; abino riamo tenge jo atimo tim areco dedede ki bomba ka Rwot.

Sabuli 102

Ilega me Dano atie i Peko

¹Winy ilega na, Okwe Rwot, wek koko na tun buti.

²Kur ilok wangi tenge kibuta, i ceng kame atie kede i peko. Cik yiti buta; susunyo gamo dogo i ceng kame alwongi kede.

³Pien ceng me kuo nango bino rwenyo wir bala yiro, doko cogere na mwoda di kiliel aliela bala mac me keno.

⁴Cunya oner bala lum kame kodao piny; anuore omio likame atwero camo cam na.

⁵Acur twatwal, omio ringo koma otuo omakakin i cogere na.

⁶Ango acal do bala etukiri me wi tim, acal do bala atin etukiri kame bedo i ameje.



- ⁷Abuto abongo nino; acal bala winyo kame tie kene i wi ot.
- ⁸Jokwor na bedo yeyeto ango ceng dedede; jo kame nyera tio kede nyinga me lamo jo apat.
- ⁹Ango acamo buru akaka kwon, doko pigewanga mol eko nyale kede giamata na,
- ¹⁰etie kamanoni pi wangcuny kede pi gero nin; pien in itinga malo iko giri uca tenge.
- ¹¹Ceng me kuo nango cal bala tipo me yat timo otieno; acal bala lum oner.
- ¹²Do in, Okwe Rwot, ibedo i kom ni me pug nakanaka, lwak me kare dedede yutuno nyingin.
- ¹³In iyaro yai di kisa ko maki i kom Sion, pien kare inononi me in timo ne bero; kare kame oudo kociko otieko tuno.
- ¹⁴Pien jotic nin mare, doko kisa mako gi i kome akadi di kotieko tiatio gedo mege odoko apua.
- ¹⁵Atekerin dedede bino lworu nying Rwot, doko abakai dedede me wi lobo bino lworu dwongo nin.
- ¹⁶Pien Rwot bino bobo medo gero Sion; kobino nene di etie i deyo mere.
- ¹⁷En ebino winyo ilega me jo kame piny oloo; en likame ebino bedo kede acae i kom ilega gi.
- ¹⁸Miero wandiko kop noni pi lwak me kare me anyim, tetekeny jo kalikame pwodi konywalo da bin pak Rwot,
- ¹⁹di kiwaco be, Rwot oneno piny ki kabedo mere kacil kame bor malo, Rwot oneno piny ki malo.
- ²⁰Etimo kaman tetekeny ewiny cur me jo kame kotweo i otkol, pi gonyo jo kame oudo kongolo negi kop me to;
- ²¹tetekeny kotatamo nying Rwot i Sion, di oko pake i Yerusalem,
- ²²kame jo me atekerin kede ajakanuto apapat ocokere karacel pi woro Rubanga.
- ²³En ekwanyo teko na di pwodi kuo na lac; emio ceng me kuo na odoko nonok.
- ²⁴Okwe Rubanga na, kur ikwanya itera tenge di pwodi kare me kuo na lac, in ngat kame ikuo nakanaka.
- ²⁵Riki sek in icibo acakini me lobo, doko gikame tie i malo obedo tic me cingi.
- ²⁶Gin kibino rwenyo wir, do in ibino dong di itie nakanaka; gin dedede kibino ti bala egoe. In ilokoloko gi bala igoen, di gin kiko rwenyo wir;
- ²⁷do in idong di ical acala, doko mwakini me kuo nin likame jik.
- ²⁸In ibino gwoko idwe me jotic nin; ikwae gi da bino kuo i nyimin.



Sabuli 103

Amara ka Rubanga

- ¹Abino pako Rwot, adulion dedede kame tie i koma miero pak nyinge kacil.
- ²Abino pako Rwot, doko likame wia bino wil i kom bero kame en etimo na.
- ³Piento en esasiro dub na dedede, ecango tuwo na dedede.
- ⁴En elako kuo na ki ates, enyuto na amara kalikame lokere kede cuny me kisa.
- ⁵En emia jamini abeco i kare me kuo na lung, tetekeny abed dano kodoko nyen kede kame tek bala ekom.
- ⁶Rwot ngolo kop kakare, engolo kop kame gonyo jo dedede kame kotie tero kirac.
- ⁷En bin emio Musa ongeo iik mege, doko da bin emio jo me Isirael ongeo tice mege.
- ⁸Rwot mwol doko engakisa, en likame esunyo doko ger, doko epong kede amara kalikame lokere.
- ⁹En likame eburnano jo nakanaka, doko da en likame edong di eger nakanaka.
- ¹⁰En likame emio wa alola pi dub wa bala kame oudo mitere, doko da en likame eculo raco i kom wa pi dub wa.
- ¹¹Pien bala kame malo tie kede kakabor yai ki wi lobo, amara mere kalikame lokere but jo kame lwore da rom kamanono.
- ¹²Bala kame tetu kide bor kede yai ki tetu tim, iepone nono da en ekwanyo dub wa eko jwango gi kakabor kamanono.
- ¹³Bala kame papa me idwe bedo kede kisa i kom gi, kamanono da kisa mako Rwot i kom jo kame lwore.
- ¹⁴Piento en engeo epone kame kocweo wa kede, en engeo kiber be wan obedo apua.
- ¹⁵Kuo me jo kare mere rom aroma bala me lum, kare me kuo gi rom aroma bala me ature me obar.
- ¹⁶Pien yamo buko i kome di eko rwenyo wir, en erwenyo atwal atwala ki kakame oudo etie cungo iye.
- ¹⁷Do amara kalikame lokere ka Rwot tie pi kare dedede but jo kame lwore, doko poore mere kelo alako but ikwae kede ikwae
- ¹⁸me jo kame gwoko isikan mere, di kiyutuno timo gikame en eciko negi.
- ¹⁹Rwot otieko cibo kom mere me ajakanut i malo, doko en epugo jo dedede.
- ²⁰Pakunu Rwot, Okwe wun imalaikan mege, wun weggi twer kame timo gikame en eciko, kede kame lubo kop kame en ewaco.
- ²¹Wun jo yi ka Rwot, pakenu, wun jotie mege kame timo gikame en emitu.



²²Wun gi dedede kame Rwot ocweo, pakenu, i kabedo dedede kame en epugo. Okwe, ango abino pako Rwot!

Sabuli 104

Wer me Pako Ngacwec

- ¹Ango abino pako Rwot, Okwe Rwot Rubanga na, in idwong twatwal. In ingapere kede wor kede dwongo,
- ²in iboore kede lero bala egoe. In iyararo malo bala eema,
- ³in igero kabedo nin i pii kame tie i malo. In imio idoun odoko bala cabala nin, di iko ringo kede ki wi yamo.
- ⁴ In imio yamo bedo ngaor nin, imio mac kede leb mac bedo jotic nin.
- ⁵In isipo lobo di etek i wi acakini mere tetekeny kur etwer yangere.
- ⁶In iume kede pii atut bala egoe, pii oko cungo ikumemei kalamo wi mori.
- ⁷Kakame in icokere kede, pii oko ringo, gin kidipo ringo kakame in icokere kede bala mwoc me kot.
- ⁸Gin kimol malo i wi mori, kiko mol piny i aditoto, kabedo kame in iiko negi.
- ⁹In iko keto ikor kalikame gin kitwero ngolo, tetekeny kur doko kitwer umo wi lobo.
- ¹⁰In imio ataneko olelepo pii ki aditoto; kimol ki dierediere me imukuran,
- ¹¹di kiko mino pii me amata but leini me obar dedede; punda me obar neko orio gi ki kanono.
- ¹²Winy me wi yamo gero ude gi i isamai nogo; gin kiwoo kede koko i ajange me yen.
- ¹³In icwao kot ki malo oko cwei i wi mori, di lobo oko pong kede bero kame in imio.
- ¹⁴In imio lum libano ne doke, kede giapita dongo pi dano tic kede gi, tetekeny ekaruno puro lobo di eko udo cam,
- ¹⁵di eko timo bwini kame yomo cunye, kede mo kame esuto i wange ko meny, kede mugati kame mie teko.
- ¹⁶Yen ka Rwot udo pii atot, gin en seda me Lebanon kame en epito.
- ¹⁷Winy gero ude gi i wi yen nogo, etolut gero ode i wi yen kame kolwongo be pain.
- ¹⁸Amorio bedo i wi mori aboco; lela obedo kakame eles ringo ot gwokere iye.
- ¹⁹In icweo duwe pi poko kare; ceng ngeo esawa mere me donyo.
- ²⁰In icweo colpiny, manono obedo iwor, en esawa kame leini dedede me abum wok kede ooko.



- ²¹Idwe me inguon dware leini me acama di kidorano, di kimoo cam gi kibun Rubanga.
- ²²Kame ceng owok, gin kidok cen di kiko buto i kapwono gi.
- ²³Jo yai kioto i tice gi di kiko tic paka piny yuto.
- ²⁴Okwe Rwot, cwec nin tin tot benyo! In itieko cweno gin dedede kede rieko; lobo opong kede jamini kame in icweo.
- ²⁵Tie twon nam adwong di elac, jamini akuo kalikame marere tie iye, jamini akuo atino kede adongo karacel.
- ²⁶Imerin beo kiye, doko da Lebiatan tuko kiye.
- ²⁷Magi dedede ngio wangin, pi mino gi cam i kare kopoore.
- ²⁸Kame in iko mino gi, gin kicamo; kame in iyaro cingi mino gi cam, gin kiyeng kede jamini abeco.
- ²⁹Kame in ikano negi wangi, manono onyo koyo i kom gi; kame in ikwanyo wei gi, gin kito di kiko dok i apua.
- ³⁰Kame in ikuto wei ni i yi gi, gin kicwere; di in iko mino kuo anyen i wi lobo.
- ³¹Akwao be deyo ka Rwot bed nakanaka; poore Rwot bed kede yomcuny i kom gikame etimo.
- ³²Ka en engoloro lobo, lobo yangere; ka en emulo moru, yiro duny kiye.
- ³³Ango abino wero ne Rwot wer i kare lung me kuo na; abino wero wer me pako Rubanga di pwodi akuo.
- ³⁴Akwao be miero kop kame cunya paro yom cunye, pien ango alelo pi Rwot.
- ³⁵Poore muducaro jodubo ki wi lobo, doko miero jo areco bed li atwal. Okwe, ango abino pako Rubanga. Pak bed but Rwot.

Sabuli 105

Rubanga kede Jo mege

(1 lyutun 16.22)

- ¹Okwe, miunu pwoc but Rwot, lwongunu nyinge, miunu tice mege ngere but jo apat.
- ²Werenu were, werenu were me pak; tatamunu tice mege me aura.
- ³Lelunu pi nyinge kacil; jo kame mo Rwot poore kileli.
- ⁴Mounu Rwot karacel kede teko mere; mounu wange nakanaka.
- ⁵Yutununu gi me isuur kame en etieko timo, gi me isuur mege, kede kop kame etieko ngolo,
- ⁶Okwe wun ikwae ka Aburaam ngatic mere, idwe ka Yakobo, jo kame en eyero.



- ⁷En Rwot Rubanga wa; en engolo kop i wi lobo lung.
- ⁸En egwoko isikan mere nakanaka, ecobo cikere mere but lwak me kare lung,
- ⁹ en isikan kame bin en etimo kede Aburaam, kede cikere mere kame ekwongere kede but Isaka.
- ¹⁰ En bin emoko isikan noni but Yakobo bala cik, kede but jo me Isirael bala isikan kame bedo nakanaka.
- ¹¹En ewaco be, “Ango abino mini lobo me Kanan pi bedo iner kame mako wu.”
- ¹²Kakame gin oudo kinonok kede, gin jo anak anoka kame tie bala jokumbor i lobo nono,
- ¹³jo kame oudo obedo rimo piny arima yai ki piny acel tuno i piny ace, yai ki ajakanut acel tuno but jo apat,
- ¹⁴ Rubanga likame oko yei ne ngatamoro timo negi adiadia; en eronkino abakai pirgi.
- ¹⁵Ewaco be, “Kur imulunu jo na kame ayero, kur itimunu gimoro arac ne inabin na.”
- ¹⁶ Kakame emio kec opoto kede i lobo nono, eko mino mugati odoko li negi,
- ¹⁷ en kong oudo egeo cwano icuo moro telo negi anyim, en Yosepu, ngat kame oudo kocato bala epasoit.
- ¹⁸ Bin kotweo tiene kede irikoi, korwako lilim da i ngute;
- ¹⁹tuno kede kakame gikame oudo en ewaco ocobere kede. Kop ka Rwot oko bedo nyute be en dano me ateni.
- ²⁰ Abaka oko cwano kop emio kogonye; ngapug me atekerin omio koweke.
- ²¹ En eko mine ebedo ngaloc me ode, kede ngat kame pugo jame mege dedede;
- ²²komie twer me pwoyo bala kame cunye mito jotic adongo me ka abaka, kede me pwoyo joadongo mege pi mino gi udo rieko.
- ²³ Di do jo me Isirael oko bino Misiri; jo me Isirael oko bedo i lobo ka Kam bala jokumbor.
- ²⁴ Di Rwot oko mino jo mege onywal twatwal, eko mino gi kidoko tek kalamo jokwor gi,
- ²⁵gin jo kame eloko cuny gi kiko dagi jo mege, di kiko donyo ngolo negi rieko.
- ²⁶ En eko cwano Musa ngatic mere, kede Aaron, jo kame en eyero.
- ²⁷Gin kiko timo gianena mege i diere gi; kitimo gi me isuur i lobo ka Kam.
- ²⁸ En ecwao colpiny eko mino lobo nono odoko col, do gin kiko dagi winyo kop mere.
- ²⁹ En eloko pie gi odoko remo, eko mino deksam dedede oto.



- ³⁰ Igwalogwalon oko bwote i lobo gi, akadi paka i ude me abaka gi da.
- ³¹ En eko yamo, di ekodet me lwangini ager oko bwote i lobo gi dedede, karacel kede onyogo.
- ³² En eko mino akako ocwei negi akaka kot, kede meny me kot kame caro piny gi dedede oko bedo tie.
- ³³ En eko dudubo yen olok kede epigi gi, eko tuturo yen me piny gi.
- ³⁴ En eko yamo, di obonyo oko bino, idwe me obonyo kalikame wel gi marere,
- ³⁵ gin kiko camaro lum kede boke dedede kame tie i lobo gi, di kiko camaro cam dedede kame kopito.
- ³⁶ Di eko neko idwe kao dedede i lobo nono, kame obedo adwogini me agege me teko gi.
- ³⁷ Di do eko woto jo me Isirael di kimako siliba kede saabu, doko da likame tie ngatamoro i diere gi kame kome oko udo peko moro.
- ³⁸ Jo me Misiri oko bedo kede yomcuny kakame kiyai kede, pien oudo kitie kede lworo i kom gi.
- ³⁹ En eko yaro edou pi umo gi, kede eko mino gi mac iwor pi mino gi lero.
- ⁴⁰ Kakame kikwae kede, en eko cwano negi aluru, eko mino gi cam atot kame owok ki malo.
- ⁴¹ Etuco lela di pii oko lelepa, di eko mol i wi tim bala ecilet.
- ⁴² Piento en oudo eyutuno cikere mere kacil but Aburaam ngatic mere.
- ⁴³ Aso en eko woto jo mege di kitie kede kilel, ewoto jo mege kame eyero di kiwero.
- ⁴⁴ En eko mino gi lobo me atekerin apat, kiko lunyo abar me jo apat oko doko mergi,
- ⁴⁵ me wek kigwok cik mege, di kiko lubo iswilia mege. Pakunu Rwot!

Sabuli 106

Bero ka Rwot but Jo mege

- ¹ Pakunu Rwot! Okwe miunu Rwot pwoc piento en eber; pien amara mere kalikame lokere bedo nakanaka.
- ² Ngai kame twero tatamo jamini adongodongo kame Rwot otimo, amoto kame twero pake iepone kame miero pake kede?
- ³ Kitie kede yomcuny jo kame tio i yore me ateni, jo kame timo gikame opoore i kare dedede.
- ⁴ Yutuno ango, Okwe Rwot, kame inyuto amara ni but jo ni; konya kame itie lako gi;



⁵tetekeny ako bino neno bero kame jo ni kame in iyero bino udo, me wek ada ako bino lelo kede ateker ni pi yomcuny gi, kede ako nywako ewaka kame jo nin tie kede.

⁶Wan karacel kede joakwari wa odubo; wan otimo dub, otimo raco.

⁷ Bin di joakwari wa oudo tie Misiri, gin likame kiko paro pi tice nin me aura; gin likame kiko yutuno amara nin adwong kalikame lokere, do gin kiko lunyo jemo ne Ngamalo Twal i Nam Akwar.

⁸Do en eko lako gi pi bero me nyinge, tetekeny emi twer mere adwong ngere.

⁹ En ecokere di Nam Akwar oko tuo; en eko telo gi ngolo pii atat ineno bala kitie beo ki wi tim.

¹⁰ Aso en eko lako gi ki cing jokwor gi; emio gi kibwot kibun jo kame oudo dagi gi.

¹¹ Pii oko mwonyo jokwor gi; likame akadi acel kikom gi oko bwot.

¹² Di do gin kiko yei kop mere; kiko wero wer me pake.

¹³ Do oyotoyot wi gi oko wil kede tice mege, likame gin kiko daro pi winyo tam kame Rubanga mio gi.

¹⁴ Do kiko pong kede mit i cuny gi i wi tim, di kiko tamo Rubanga ki kuno.

¹⁵ En eko mino gi gikame kipenyo, do eko cwano negi tuwo ajonyo gi.

¹⁶ Nyeko oudo omako gi i wi tim i kom Musa, kede Aaron da, dano kacil ka Rwot.

¹⁷ Lobo oko ngamere eko mwonyo Datan, eko pukakino jo ka Abiram.

¹⁸ Mac da oko amotun i kom gi, di eko wango jo areco.

¹⁹ Gin kitimo cal me roya i moru me Sinai di kiko donyo woro cal kame kocweo acwea.

²⁰ Gin kiseso deyo ka Rubanga, kiko lokere mine but cal me twon kame camo lum.

²¹ Wi gi owil kede Rubanga, Ngalak gi, ngat kame oudo otimo gikame dongodongo i Misiri;

²² en etimo tice me aura i lobo ka Kam, kede tice kame kelo lworu i Nam Akwar.

²³ Omio en eko waco be koto emuducaro gi, do Musa ngat kame oudo obedo dano kame en eyero oko galao en, di eko gengo gero ka Rubanga tetekeny kur emuducaro gi.

²⁴ Di do gin kiko dagi donyo i lobo aber, pien likame kiyei cikere ka Rubanga.

²⁵ Gin kibedo kede ingungur i iemai gi, di likame kiko lubo gikame Rwot owaco.

²⁶ Omio Rwot oko tingo cinge malo eko kwongere negi, be oudo eyaro mino gi kito i tim,



- ²⁷ di eko bino sarakino ikwae gi i diere me atekerin apat, eko mino gi kito i lobere ace apat.
- ²⁸ Gin riki kiko donyo woro rubanga kame nyinge Baal i Peor, di kiko camo giayala kame komio but rubanga kame rom aroma kede gi oto.
- ²⁹ Gin kiwango cuny Rubanga kede tice gi di en eko doko ger, omio aumpuli oko potu i diere gi.
- ³⁰ Pinekasi oko yai eko kwano Rubanga pirgi, di aumpuli oko doko li.
- ³¹ Manono oko mino kobedo tere be ngat kopooore i lwak acelacel me kare dedede.
- ³² Gin kimio Rwot odoko ger i dog pii me Meriba, manono oko mino kotero iye Musa kirac pirgi;
- ³³ pien gin kimio Musa wangcuny, di eko waco kope kame oudo likame epoore pi yamo.
- ³⁴ Bin gin likame kineko jo me atekerin apat, bala kame oudo Rwot ociko negi.
- ³⁵ Do gin kiko lunyo nyalere kede jo me atekerin apat, kiko pwonyere timo gikame jo nogo oudo timo.
- ³⁶ Gin kilokere kidonyo woro caljwogi ka jo nogo, manoni oko doko negi bala owic.
- ³⁷ Gin kiyalo awobe gi kede anyira gi ne jwogi nono;
- ³⁸ kionyo remo me jo kame li kede raco moro, remo me awobe kede anyira gi, jo kame bin gin kiyalo ne caljwogi me Kanan; pi manono, lobo gi nono oko munaun kede remo.
- ³⁹ Manoni oko mino gi kidoko jo komunaun pi tice gi, doko kiko doko bala imalayan pi gikame kitimo.
- ⁴⁰ Gi noni oko twaruno gero ka Rwot i kom jo mege, di eko cako neno jo mege bala jo areco i wange.
- ⁴¹ En eko jalo gi i cing jo me atekerin apat, tetekeny jo kame oudo dagi gi dony pugo gi.
- ⁴² Jokwor gi oko donyo tero gi kirac, di kiko mino gi kidoko jo kame lubo kop me apugan gi atwal atwala.
- ⁴³ Tien atot Rwot olako gi, do gin kiko bedo jemo ne me akaa, manoni oko mino gi kidok piny apinya pi dub gi.
- ⁴⁴ Akadi kamanono da, en eko winyo koko gi di eko paro pi can gi.
- ⁴⁵ En eyutuno isikan mere pirgi, di eko nyuto cuny me kisa di lubere kede twon amara mere kalikame lokere.
- ⁴⁶ En emio jo dedede kame oudo omako gi bala mabus obedo kede kisa i kom gi.



⁴⁷ Lak wa, Okwe Rwot Rubanga wa, di iko koko wa ki diere me atekerin apat, me wek opwoi nyingi kacil di oko bedo kede deyo pi paki.

⁴⁸ Pak bed but Rwot Rubanga me Isirael, ikar kede ikar. Poore jo dedede wac be, “Amen.” Pakunu Rwot!

Sabuli 107

ITABU ME KANY

(Sabuli 107–150)

Wer me Pako Bero ka Rubanga

¹ Okwe, miunu Rwot pwoc piento en eber; pien amara mere kalikame lokere bedo nakanaka.

² Poore jo kame Rwot olako wac kamanono, jo kame en lako ki peko,

³ kede kame ecoko ki lobere apat, ki tetu kide kede ki tetu tim, ki tetu malo kede ki tetu piny.

⁴ Mogo kikom gi oudo obedo irim i wi tim abongo udo yongayo moro kame tero gi i bomba kame jo bedo iye.

⁵ Kec kede orio oudo oneko gi, omio cuny gi oko bedo abongo gen dedede.

⁶ Di do gin kiko kok but Rwot i kare kame oudo kitie kede i peko, di en eko lako gi ki can gi.

⁷ En etelo gi lubo yongayo koriere, paka gin tuno i bomba kame jo bedo iye.

⁸ Poore kipwoi Rwot pi amara mere kalikame lokere, pi tice mege me aura kame etimo ne jo.

⁹ Piento en eneko orio me jo kame orio oneko, kede jo kame kec oneko en emio gi kiyeng kede jamini abeco.

¹⁰ Mogo kikom gi oudo obedo kakacol cucucuc, di gin mabus kame tie neno can di kotweo gi kede irikoi,

¹¹ pien gin oudo kijemo kidagi winyo kop ka Rubanga, di kiko dagi gamo tam ka Ngamalo Twal.

¹² Gin oudo kiol pi tic atek; ka oudo kipopoto piny likame oudo tie ngat kame konyo gi.

¹³ Di do gin kiko kok but Rwot i kare kame oudo kitie kede i peko, di en eko lako gi ki can gi;

¹⁴ en ewoto gi ki kakacol cucucuc, eko cocoto irikoi kame oudo kotweo gi kede.

¹⁵ Poore kipwoi Rwot pi amara mere kalikame lokere, pi tice mege me aura kame etimo ne jo.



- ¹⁶Piento en etuturo ikekon kame kotimo kede nyonyo buronsi, eko ngwekakino nyonyo ayon doko adulion are.
- ¹⁷Jo mogo kikom gi oudo obedo jomingo pi tim gi areco, di kiko beo i can pi dub gi.
- ¹⁸Gin kibedo kwero egere dedede me cam, omio kiko noko erute me to.
- ¹⁹Di do gin kiko kok but Rwot i kare kame oudo kitie kede i peko, di en eko lako gi ki can gi;
- ²⁰Rwot oko yamo kop di gin kiko cango, di eko lako gi ki to.
- ²¹Poore kipwoi Rwot pi amara mere kalikame lokere, pi tice mege me aura kame etimo ne jo.
- ²²Doko poore kimi giayala me pwoc, di kiko tatamo tice mege kede were me yomcuny.
- ²³Mogo ooto kede emeri i nam adwong, jo kame oudo timo tic i pii atut pi udo epone me kuo.
- ²⁴Gin kineno tice ka Rwot, kineno tice mege me aura i nam.
- ²⁵Piento en ewaco dwane di yamo atek oko cako buko, di eko cwano ebuka i nam.
- ²⁶Ebuka oko tingo gi kede emeri tuno malo i wi yamo, doko eko dwoko gi paka piny i dud nam; gin likame kiko twero dino cuny gi i can gi nono.
- ²⁷Wi gi oko donyo wirato gi di kigete bala jo omer, di wi gi oko cungo likame kingeo gi me atima.
- ²⁸Di do gin kiko kok but Rwot i kare kame oudo kitie kede i peko, di en eko lako gi ki can gi;
- ²⁹En emio yamo kame oudo tie buko i nam okwei, di ebuka me nam oko ling.
- ³⁰Di do gin kiko bedo kede yomcuny pien nam oudo okwei, di en eko tero gi paka i edoket kame gin oudo kitie mito ot iye.
- ³¹Poore gin kipwoi Rwot pi amara mere kalikame lokere, pi tice mege me aura kame etimo ne jo.
- ³²Poore kimie dwongo i diere me jo mege kocokere, doko kipake i cokere me joadongo.
- ³³En oudo eloko icileta odoko wi tim, kede ataneko odoko kakotuo;
- ³⁴eloko lobo amio odoko lobo amunyomunyo, etimere kamanoni pi raco me jo kame bedo i lobo nono.
- ³⁵En eloko wi tim odoko atapar, doko eloko lobo kotuo odoko ataneko me pii.
- ³⁶En eko mino jo kame kec oneko obedo kuo, di kiko gero bomba kame kibedo iye.



- ³⁷Gin kiko cuno kodi, doko kipuro poti me olok, kodere oko cek kiber.
- ³⁸Wel gi oko nyai pien Rwot omio gi winyo, doko likame eko yei ne wel me doke gi dwogo piny.
- ³⁹I kare kame komio wel gi odok kede piny, di kiko doko goro pi adiadia, peko kede cwercury,
- ⁴⁰Rwot oko kelo acae i kom abakai gi, di eko mino gi irim i wi tim kame li kede yote;
- ⁴¹do en eko woto jocan ki peko gi, di eko mino jo me ude gi onyai bala romini.
- ⁴²Jo opoore neno man di kiko bedo kede yomcuny, do jo areco neno di likame kiko twero yamo gimoro.
- ⁴³Poore jo ariek ket tam gi i kom gi nogi, di kiko paro pi amara kalikame lokere ka Rwot.

Sabuli 108

Ilega me Kwano Rubanga Kony

- ¹Cunya likame kwanyere ki komi, Okwe Rubanga, cunya likame kwanyere ki komi. Abino wer kede dwan amit. Ango abino cei.
- ²Ceunu, wun adungu kede arigirigi! Ango abino cei di pwodi piny obai.
- ³Abino mini pwoc, Okwe Rubanga, i diere me jo apat, doko abino wero wer me paki i diere me atekerin.
- ⁴Pien amara nin kalikame lokere bor kalamo malo, doko genere nin bor tuno i idoun.
- ⁵Nyut dwongo ni i malo, Okwe Rubanga, doko mi deyo ni rom wi lobo lung.
- ⁶Mia aloi yi pi cingi me twer; gam kwac na, tetekeny ilak jo kame in imaro.
- ⁷Rubanga ocikere i kabedo mere kacil be, “Abino popoko Sekem di akuko, abino da popoko aditot me Sukot.
- ⁸Gilead obedo mera; Manase da obedo mera; Epuraimu obedo ocoro atek kame gwoko wia; Yuda en ebela na me pug.
- ⁹Moab tie bala kalaya na me bol; abino uco amuka na i kom Edom pi nyuto be en ebedo mera; abino ikuk i wi Pilistia pi bwone.”
- ¹⁰Okwe Rubanga, ngai kame bino tera i bomba kame kocelo kede apama atek? Ngai bino tela tera Edom?
- ¹¹Ateteni mam in itieko daga? Okwe Rubanga, in likame do iupere kede isirikalen wa ot yi.
- ¹²Okwe kony wa yi kede jokwor wa, pien kony kame dano mio kony mere li.



¹³Ka Rubanga tie kede wa wan obino lono; en ebino nyono jokwor wa piny i tiene.

Sabuli 109

Ingungur me Dano kame tie i Peko

¹Kur ilingi alinga, Okwe Rubanga kame ango apako.

²Pien jo areco kede joangalo tie yamo kirac i koma, leb gi tie yamo kope areco me abe i koma.

³Kilukaro ango kede kope me adagadaga, doko kisura kede kope areco abongo tien kop moro.

⁴Gin kiwaco be ango arac bed bala ango amaro gi, kom akadi di atie lego pirgi da.

⁵Aso gin kiculo bero nango kede raco, doko da kiculo amara nango kede adagadaga.

⁶Gin kiwaco be, “Yer ngat arac en kame pid kede, poore ngat kame pide cungi i bade tetu cam.”

⁷Kame kopide poore tur raco i wie, doko da poore ter ilega mere bala dub.

⁸Mi ceng me kuo mere bed nonok, doko poore ngatamoro luny tic mere.

⁹Mi idwe mege dok idwe kic, kede dako mere dok apuserut.

¹⁰Mi idwe mege bed jorim piny di kikwao jamini akwa; mi koriam gi tenge ki ameje kame kibedo iye.

¹¹Mi ngat kame oudo okope lim mak jamini dedede kame en etie kede, mi jokumbor yak jamini kame en eudo kede kwok mere.

¹²Kur imi ngatamoro bed tie kame bino nyuto ne mwolo, doko da kur ngatamoro bed tie kame bino bedo kede kisa but idwe kic kame en eweko.

¹³Mi ikwae mege dedede totoun, doko da mi nyinge rwenyi atwal atwala kibun lwak me kare me anyim.

¹⁴Akwao Rwot pi yutuno dub me joakwari mege, doko da kur esasiro dub ka toto mere akadi acel.

¹⁵Akwao be Rwot bed yutuno dub gi nakanaka, doko poore wi jo me wi lobo wil kede gi atwal atwala.

¹⁶Piento en likame bin eyutuno pi timo mwolo, do en ebedo tidilo paka neko jocan, jo kame piny oloo kede jo kame par opong i cuny gi.

¹⁷En oudo emaro lamo jo; poore nan ilam bin i wi eda. En oudo likame emaro kwano ne jo winyo; poore nan winyo bed bor kede eda.

¹⁸Ilam oudo tie bala ekoti kame en engapo ceng dedede, mi ilam mere nono nyonyongo kome bala pii, kede kibid cogere mege bala mo.



- ¹⁹Miero ebed bala egoe kame en erwao i kome, bala rakoba kame en engapo ceng dedede.
- ²⁰Akwao be manono bed cul kame Rwot mi jo kame waco na raco, jo kame yamo kirac i kom kuo na.
- ²¹Do in, Okwe Rwot Rubanga na, yi pira pi gwoko nyingi; doko laka pi bero me amara nin kalikame lokere.
- ²²Pien ango angacan doko piny oloa; atie kede cwercuny i kuo na.
- ²³Kuo na do tie ot i rwenyo bala tipo me yat kame rwenyo otieno; acal bala obonyo kame kotie lalako tenge.
- ²⁴Conga do onyonyongun pi kanyo kec; koma do otieko ner.
- ²⁵Ango do atieko doko gi me anyera but jo awaco na raco; ka kinena, kiyayango wi gi ayayang.
- ²⁶Konya, Okwe Rwot Rubanga na! Laka di lubere kede amara nin kalikame lokere.
- ²⁷Mi gi kingei be cingi inononi kolaka; Okwe Rwot, in en kame itimo manoni.
- ²⁸Wek gin kilama, do in mia winyo; mi lewic mak jo kame timo nango kolo; mi ngatic ni bed kede yomcuny.
- ²⁹Mi jo kame waco na raco ngapere kede lewic; mi gi kiboore kede lewic bala egoe kame korwao.
- ³⁰Doga bino mino Rwot pwoc adwong; abino pake i diere me jo kocokere,
- ³¹piento en ecungo i bad tetu cam me jo kame piny oloo, pi lako gi ki cing jo kame ngolo negi kop me to.

Sabuli 110

Rwot kede Abaka mere kame Eyero

- ¹ Rwot Rubanga owaco ne rwot na be, “Bedi i bada tetu cam tuno di ango atieko mini inyono jokwor ni piny i tieni.”
- ² Rwot bino cwano ebela ni me pug wok ki Sion di eko mini ibedo ngapug i diere me jokwor ni.
- ³ I ceng kame in ibino telo kede jo yi ni i wi moru kacil, jo ni bino jalere ken gi me ot yi, awobe ni bino bino buti bala toyo kame bino odiko.
- ⁴ Rwot otieko kwongere doko likame ebino loko tam mere be, “In itie ngasaserdoti ikar kede ikar, ibedo ngaluny ka Melkisedeki i tic mere me ngasaserdoti.”
- ⁵ Rwot tie i badi tetu cam; en ebino nyonyoto abakai i ceng me gero mere.
- ⁶ En ebino ngolo kop ne atekerin, eko mino liele me jo oto rwade kakame yi otimere iye; en ebino nyonyoto abakai i wi lobo lung.



⁷En ebino mato pii ki osamai kame tie i nget yongayo; manono bino mino eudo teko me lono yi.

Sabuli 111

Wer me Pako Rwot

¹Pakunu Rwot! Abino mino Rubanga pwoc kede cunya lung, abino pwone i ekodet me jo kame cuny gi ber, i kacokere me jo mege.

²Tice kame Rwot timo dongodongo, jo dedede kame cuny gi yom i kom tice nogo tie kede mit me udo niang i kom gi.

³Tice kame en etimo kelo wor bute kede dwongo, doko poore mere bedo nakanaka.

⁴En emio wan yutuno tice mege me aura; Rwot mwol doko engakisa.

⁵En emio cam but jo kame lwore; nakanaka en eparo pi isikan mere.

⁶En etieko nyuto ne jo mege twer me tice mege, di emio lobo me atekerin apat doko mergi.

⁷Tice me cinge genere doko kitie me ateni; cik mege dedede genere,

⁸kotieko keto gi pi ikar kede ikar, pi jo lubo gi di kigenere kede di kipoore.

⁹En emio jo mege alako; en etieko timo kede gi isikan kame bedo nakanaka. Nyinge cil doko epoore me alwora.

¹⁰Lworo Rwot en acakini me rieko; jo kame timo kamanono tie kede niang aber. Poore pake nakanaka!

Sabuli 112

Yomcuny me Danu Aber

¹Pakunu Rwot! Etie kede winyo dano kame lworo Rwot, ngat kame cunye yom twatwal pi lubo cik mege.

²Ikwae mege bino bedo jo atek i lobo kame kitie iye; jo me ekeko me dano kopooore nono bino bedo kede winyo.

³Lonyo kede abar tie i ode; doko poore mere bedo nakanaka.

⁴En ecal bala lero kame wok di eko rieny i colo ne jo kopooore; en emwol, engakisa doko epoore.

⁵Gi dedede tie kiber ne ngat kame kopao jo jame kede cunye dedede, ngat kame timo tice mege kede ateni.

⁶Pien likame tie gikame bino bwono ngat kopooore; kobino yutuno en nakanaka.

⁷Rwonge arac likame kelo ne lworo; cunye tek, en egeno Rwot.



⁸En cunye tek, likame ebino bedo lwor; i ajikini en ebino neno di kobwono jokwor mege.

⁹En emio but jocan kede cunye dedede; bero mere bedo nakanaka; en ebino bedo dano atek kame koworo.

¹⁰Jo areco neno di cunye gi ko wang; gin kikakao lak gi pi gero di kiko rwenyo; mit me jo areco kei.

Sabuli 113

Pako Bero ka Rwot

¹Pakunu Rwot! Okwe wun jotic ka Rwot, pakenu; pakunu nying Rwot.

²Pakunu nying Rwot cako nataman tuno ikar kede ikar.

³Cako wok ceng tuno i donyo mere poore bed pako nying Rwot.

⁴Dwongo ka Rwot kalamo atekerin dedede, deyo mere da kalamo malo.

⁵Ngai kame cal bala Rwot Rubanga wa, ngat kame bedo i kabedo me malo,

⁶ngat kame gungo pi neno malo kede lobo?

⁷En ekwanyo jocan ki can gi, doko en ekwanyo ki oduru jo kame piny oloo di eko tingo gi malo,

⁸emio gi kibedo karacel kede jopug, kibedo karacel kede jopug me jo mege.

⁹En emio dako adonge bedo kede paco, en emie idwe di eko bedo kede yomcuny. Pakunu Rwot!

Sabuli 114

Wer me Yutuno Ebagu me Kalamo

¹I kare kame jo me Isirael oyai kede ki Misiri, yai me jo me ot ka Yakobo kikut jo kame yamo leb apat,

²Yuda oko doko kabedo kacil ka Rubanga, Isirael oko doko kakame en epugo.

³Nam bin oneno gi di eko ringo; ecilet me Yorodan da oko lokere mol dok cen.

⁴Mori oko takaro bala romini, kede imukuran da bala idwe me romini.

⁵Pinyo bo, Okwe nam, komio in iko ringo? Okwe Yorodan, pinyo komio in iko lokere mol dok cen?

⁶Okwe wun mori, pinyo komio wun ikounu takaro bala romini? Okwe wuda imukuran, pinyo komio wuda ikounu takaro bala idwe me romini?

⁷Bed kede mielkom, Okwe in lobo, pi bino me Rwot, pi bino ka Rubanga ka Yakobo,

⁸ngat kame loko lela doko atapar me pii, eloko engaro da doko atan me pii amol.



Sabuli 115

Rubanga Acel me Ateni

- ¹Likame but wan, Okwe Rwot, likame but wan, do in en kame miero deyo bed buti, pi amara ni kalikame lokere kede pi genere ni.
- ²Pinyo kame mio atekerin apat waco ne wan be, “Rubanga wu kara tie tuai?”
- ³Rubanga wan tie i malo; en etimo gikame cunye mito.
- ⁴Caljwogi gin kotimo kede siliba kede saabu, gin tic me cing dano.
- ⁵Gin kitie kede dog gi, do likame kikaruno yamo; kitie kede wang gi, do likame kikaruno neno piny.
- ⁶Gin kitie kede yit gi, do likame kikaruno winyo kop; kitie kede um gi, do likame kikaruno ngweno gimoro.
- ⁷Gin kitie kede cing gi, do likame kikaruno mulo gimoro; kitie kede tien gi, do likame kikaruno ot; likame tie mor moro kame dwan gi timo.
- ⁸Jo kame timo gi cal acala kede gi; jo kame keto gen i kom gi da cal kamanono.
- ⁹Okwe wun jo me Isirael, genunu Rwot! En ngakony wu, doko en ebuku wu.
- ¹⁰Okwe wun jo me ot ka Aaron, genunu Rwot! En ngakony wu, doko en ebuku wu.
- ¹¹Wun jo kame lwooro Rwot, genenu! En ngakony wu, doko en ebuku wu.
- ¹²Rwot obedo paro pirwa; en ebino mino wa winyo; en ebino mino winyo but jo me Isirael; ebino da mino winyo but jo me ot ka Aaron;
- ¹³en ebino mino winyo but jo kame lwore, ebino mino winyo but jo me ruom apiny kede da but jo me ruom amalo.
- ¹⁴Akwao Rwot emi wu inywalunu di wel wu ko meede, wun karacel kede idwe wu.
- ¹⁵Akwao Rwot emi wu winyo, en ngat kame ecweo malo kede piny.
- ¹⁶Malo obedo me ka Rwot, do lobo en etieko mino but jo.
- ¹⁷Jo kotieko to likame pako Rwot, akadi jo kame donyo piny i kabedo kame oling kiye alinga.
- ¹⁸Do wan jo kame okuo obinunu pwono Rwot, cako nataman tuno ikar kede ikar. Pak bed but Rwot!

Sabuli 116

Mino Pwoc pi Alako ki To

- ¹Ango amaro Rwot piento en ewinyo dwana; en ewinyo kwac na.



²Pien eciko yite winyo kwac na, pi mano ango abino lwongere bute tek di pwodi ango akuo.

³To oudo ociko owic mere oluka; lito me kabedo me jo oto oudo otuno na; oudo aneno can di atie kede par atek.

⁴Di do ango ako lwongere but Rwot be, “Okwe Rwot, ango akwai ilak kuo na!”

⁵Rwot ngakisa doko epoore; Rubanga wa timo jo kisa.

⁶Rwot gwoko jo kalikame karuno gwokere ken gi; kakame oudo adoko do kede goro, en eko laka.

⁷Okwe kuo na do bino bedo mot, pien Rwot otieko timo na bero adwong.

⁸Rwot otieko lako kuo na ki to, doko elaka ki koko, kede egwoko tiena likame ogete.

⁹Pi mano, ango abedo i nyim Rwot i lobo me jo akuo.

¹⁰Ango ako meede kede yei na kamanono, akadi kakame awaco kede be, “Atie neno can twatwal,”

¹¹akadi kakame lwooro omaka kede di ako waco be, “Jo dedede likame genere.”

¹²Nyo kame ango abino mino but Rwot pi bero dedede kame en etimo na?

¹³Ango abino mino Rwot giamia me bwini pi pwone, di apako nyinge.

¹⁴Ango abino cobo timo gikame akwongere iye but Rwot, i nyim jo mege dedede.

¹⁵To me jo kame geno Rwot tie gikame lit kibute.

¹⁶Okwe Rwot, ango abedo ngatic nin; ango abedo epasoit nin, atin ka nyako kame timo nin tic. In itieko laka ki to.

¹⁷Abino mini giayala pi pwoni di alwongo nyingi.

¹⁸Ango abino cobo gikame akwongere iye but Rwot, i nyim jo mege dedede,

¹⁹i diakal me ot ka Rwot, i diere nin, Okwe Yerusalem. Pakunu Rwot!

Sabuli 117

Lwongo pi Pako Rwot

¹ Pakunu Rwot, wun atekerin dedede! Pakenu kitek, wun jo dedede!

²Pien amara mere kalikame lokere dwong but wa, doko genere mere bedo nakanaka. Pakunu Rwot!

Sabuli 118

Ilega me Pwoc pi Bwono Jokwor



- ¹ Okwe, miunu pwoc but Rwot, piento en eber; amara mere kalikame lokere bedo nakanaka!
- ² Poore jo me Isirael wac be, “Amara mere kalikame lokere bedo nakanaka.”
- ³ Poore jo me ot ka Aaron wac be, “Amara mere kalikame lokere bedo nakanaka.”
- ⁴ Poore jo kame lworu Rwot wac be, “Amara mere kalikame lokere bedo nakanaka.”
- ⁵ Can kame oudo atie iye oko mina alwongere but Rwot; Rwot oko winyo kwac na di eko mina alakanar.
- ⁶ Rwot tie keda, omio ango likame abino bedo lwor; nyo kame dano adana karuno timo na?
- ⁷ Rwot tie keda pi konya; ango abino neno di ebwono jo kame daga.
- ⁸ Ringo ot gwokere but Rwot ber, elo keto gen i kom dano adana.
- ⁹ Ringo ot gwokere but Rwot ber, elo keto gen i kom jotel me jo.
- ¹⁰ Atekerin dedede oudo olukaro ango; do pi twer ka Rwot ango ako muducaro gi!
- ¹¹ Gin kilukaro ango ki bad dedede; do pi twer ka Rwot ango ako muducaro gi!
- ¹² Gin kibwangun i koma lukaro ango bala kic; oko bunyo jiko gero gi bala mac aliel raurau me okuto; ango ako muducaro gi pi twer ka Rwot!
- ¹³ Oudo kosura kitek, omio oudo kotie bwona, do Rwot oko konya.
- ¹⁴ Rwot en kame miango teko kede twer; en etieko doko ngalak na.
- ¹⁵ Were me kilel me bwono jokwor tie i kimere me jo kopoore: “Twer ka Rwot otieko bwono yi;
- ¹⁶ komio twer ka Rwot dwongo; twer ka Rwot timo gi me aura.”
- ¹⁷ Ango likame abino to, do abino bedo kuo, di ako tatamo gikame Rwot otimo.
- ¹⁸ Rwot otieko mina alola atek, do likame eko jala ne to.
- ¹⁹ Yab na irutei me jo kopoore, me wek adony di ako mino pwoc but Rwot.
- ²⁰ Man en erute kame donyo but Rwot, jo kopoore bino donyo di kibeo kiye.
- ²¹ Ango apwoi pien in igamo kwac na di iko doko ngat kame laka.
- ²² Kidi kame jogedo odagi olokere odoko kidi kame pire tek me esonda.
- ²³ Man Rwot en kotimo; i wang wa en etie gi me aura.
- ²⁴ Manoni en ceng kame Rwot otieko iiko; mito olelunu di okounu bedo kede yomcuny iye.
- ²⁵ Okwe Rwot, wan ongangao in, lak wa! Mi gikame otimo cobere, Okwe Rwot!



²⁶ Etie kede winyo ngat kame bino i nying Rwot. Wan olamo ni winyo ki ot ka Rwot.

²⁷ Rwot en Rubanga; en etieko timo ne wa bero. Makunu jange me yen i cingu ikounu cako ebaga, di ikounu ot i esirit rimaro alutari.

²⁸ In en Rubanga nango, ango abino mini pwoc; in en Rubanga nango, ango abino paki.

²⁹ Okwe miunu pwoc but Rwot, piento en eber, pien amara mere kalikame lokere bedo nakanaka.

Sabuli 119

Iswil ka Rwot

¹ Kitie kede yomcuny gin jo kame kili kede raco moro i kuo gi, jo kame lubo iswil ka Rwot.

² Kitie kede yomcuny jo kame gwoko cik mege, jo kame moe kede cuny gi lung,

³ gin kibedo jo kalikame timo gimoro arac, do kilubo yote mege.

⁴ In itieko mino wan cik nin be ogwok gi kiber.

⁵ Okwe koto abedo ngat kame genere i lubo iswilia ni!

⁶ Ka ango aketo cunya lubo cik nin dedede, lewic likame bino maka.

⁷ Ango abino paki kede cuny aber, kame atie pwonyere i kom iswilia nin kopooore.

⁸ Ango abino lubo iswilia nin; kur ijala atwal atwala.

Lubo Iswil ka Rwot

⁹ Epone mene kame dano apwodi dongo adonga karuno gwoko kede kuo mere pi bedo di cil? Ekaruno timo kamanono ka en egwoko kuo mere bala kame cik nin mito.

¹⁰ Ango amoi kede cunya lung; kur iweka aparao tenge ki lubo cik nin.

¹¹ Ango akano kop nin i cunya tetekeny kur atim dub buti.

¹² Pak bed buti, Okwe Rwot; pwonya iswilia ni.

¹³ Abino tatamo cik dedede kame in imio.

¹⁴ Ango cunya yom pi lubo cik nin kalamo yomcuny me abar dedede.

¹⁵ Abino bedo paro cik nin i cunya, di ako keto cunya lubo yote nin.

¹⁶ Ango cunya bino bedo yom i lubo iswilia ni; likame wia bino wil kede kope ni.

Yomcuny pi Lubo Iswilia ka Rwot

¹⁷ Tim bero ne ngatic ni, tetekeny ameede bedo kuo di ako lubo kope nin.

¹⁸ Yab wanga tetekeny anen jamini me aura kame tie i iswil nin.



- ¹⁹Ango atie bedo i piny kan bala welo; kur ikan cik nin kibuta.
- ²⁰Cunya ramere kede par atek pi ngeno iswilia nin.
- ²¹In ibunano jo awakere, jo kame kotieko lamo kirac, jo kame parao tenge ki lubo cik nin;
- ²²kwany tenge ayet kede acae gi ki koma, pien ango agwoko cik nin.
- ²³Akadi bed bala jotel me piny di ko bedo piny poro kop arac i koma, do ango ngatic nin abino bedo paro iswilia nin i cunya.
- ²⁴Cik nin en kame miango yomcuny; gin en kame kimia tam.

Keto Cuny Lubo Iswilia ka Rwot

- ²⁵Ango abuto piny lala i apua; dwok na kuo aber bala kame in iwaco.
- ²⁶Kakame ango atatamo nin kede yote na dedede, in iko gamo kwac na; pwonya iswilia nin.
- ²⁷Mia aniangi i kom iswilia nin, di ango ako bino bedo paro i cunya tice nin me aura.
- ²⁸Iturur obwono kuo na; mia adok tek bala kame in iwaco.
- ²⁹Gwoka abed bor kede yote me angalo; di iko pwonya iswilia nin pi kisa ni.
- ³⁰Ango atieko yero bedo ngat kame genere; atieko keto cunya lubo iswilia nin.
- ³¹Ango amoko i kom lubo cik nin, Okwe Rwot; kur iwek lewic maka.
- ³²Ango cunya mito kitek pi lubo cik nin, pien in imio niang nango doko tut.

Ilega pi Udo Niang

- ³³Pwonya, Okwe Rwot, wek angei yongayo me iswilia nin, di ango ako bino lubo gi tuno i ajikini.
- ³⁴Mia niang tetekeny akaruno gwoko iswilia nin di ako lubo gi kede cunya lung.
- ³⁵Tela alub yongayo kame cik ni mito, pien ango cunya yom iye.
- ³⁶Lok cunya abed kede mit me lubo cik nin, do weko i kom bedo kede mit me ud pira kena.
- ³⁷Lok wanga tenge ki neno jamini kame kony gi li; miango kuo pi lubo yongayo nin.
- ³⁸Cob timo gikame in icikere iye but ngatic ni, gikame in icikere iye but jo kame lwori.
- ³⁹Lok tenge acae kame kelo nango lworo, pien iswilia nin beco.
- ⁴⁰Neni, ango cunya mito lubo cik nin; mia abed kuo pien in ipoore.

Bedo kede Gen i kom Iswilia ka Rwot



⁴¹Nyut na amara ni kalikame lokere, Okwe Rwot, di iko laka bala kame in iwaco be ibino timo.

⁴²Di angoo ako bino bedo kede kop kame adwoko ne jo kame yeyeto angoo, pien angoo ageno kop nin.

⁴³Kur ikwany kop me ateni tenge ki dogaa, pien gen nango tie i kom iswilia nin.

⁴⁴Angoo abino gwoko iswilia nin nakanaka, abino gwoko gi ikar kede ikar.

⁴⁵Abino bedo kede gonyere, pien angoo abedo lubo cik nin.

⁴⁶Abino da yamo kop i kom cik nin i nyim abakai abongo mino lewic maka.

⁴⁷Angoo audo yomcuny pi lubo cik nin, pi angoo amaro gi.

⁴⁸Angoo aworo doko amaro cik nin; abino bedo paro iswilia nin i cunya.

Bedo kede Gen i kom Iswilia ka Rwot

⁴⁹Yutuno kop kame in iwaco ne ngatic nin, kop kame oko mina abedo kede gen.

⁵⁰Gikame kweo cunya i kare kame atie kede i can en ine be, cikere nin mia kuo.

⁵¹Joewaka nyera twatwal, do angoo likame aparao tenge ki iswilia nin.

⁵²Kame angoo ayutuno iswilia nin cako i kare kasek, angoo audo kweicuny, Okwe Rwot.

⁵³Angoo cunya wang twatwal pi jo areco, jo kame daga lubo iswilia nin.

⁵⁴Angoo abedo wero iswilia nin i kabedere dedede kame angoo abedo iye.

⁵⁵Esawa me iwor angoo ayutuno in, Okwe Rwot, doko agwoko iswilia nin.

⁵⁶Angoo atieko udo winyo noni, pien angoo oudo abedo gwoko cik nin.

Keto Cuny Lubo Iswilia ka Rwot

⁵⁷Rwot in ibedo mera; angoo acikere pi lubo kope nin

⁵⁸Angoo akwai kede cunya lung itim na bero; mi kisa maki keda di lubere kede cikere nin.

⁵⁹Kame angoo aparoo kop i kom yote nin, angoo alokere lubo cik nin.

⁶⁰Angoo aonyaro abongo gal pi lubo cik nin.

⁶¹Akadi di jo areco oluka kede owic gi, angoo likame wia wil kede iswil nin.

⁶²I dier iwor angoo ayai paki, pien iswilia nin opoore.

⁶³Angoo abedo ngaupa me jo dedede kame lwori, ngaupa me jo agwoko cik nin.

⁶⁴Okwe Rwot, amara nin kalikame lokere opong i piny; pwonya iswilia nin.

Bero me Iswilia ka Rwot



- ⁶⁵In itieko timo ne ngatic ni bero, Okwe Rwot, di lubere kede kop nin.
- ⁶⁶Pwonya bedo kede rieko kede ngec, pien ango ayei cik ni.
- ⁶⁷Di pwodi oudo in likame iketo can i koma, ango oudo aparao tenge, do nataman alubo do kop nin.
- ⁶⁸In iber doko itimo bero; pwonya iswilia nin.
- ⁶⁹Joewaka yamo kope me abe i koma, do ango agwoko cik nin kede cunya lung.
- ⁷⁰Gin wi gi oding, do ango cunya yom i kom cik nin.
- ⁷¹Alola kame komia oudo obedo gikame ber nango, pien emia ako pwonyere i kom iswilia ni.
- ⁷²Iswil kame wok ki dogi ber nango kalamo saabu kede siliba tutumian kede tutumian.

Iswilia ka Rwot Opoore

- ⁷³In icwea kede cingi di iko keta i ekite kame nan atie kede; mia abed kede niang tetekeny apwonyere i kom cik nin.
- ⁷⁴Jo kame lwori bino nena di kiko bedo kede kilel, pien ango atieko keto gen na i kom kop nin.
- ⁷⁵Okwe Rwot, ango angeo be in ingolo kop i yore kopoore, doko ango ngeo be in igenere en komio imia alola.
- ⁷⁶Mi amara ni kalikame lokere kwei cunya di lubere kede cikere nin but ngatic nin.
- ⁷⁷Nyut na cuny me kisa me wek abed kuo; pien ango cunya yom i kom cik nin.
- ⁷⁸Mi lewic mak joewaka, pien gin kitera kirac kede angalo gi; do ango gira abino bedo paro cik nin i cunya.
- ⁷⁹Mi jo kame lwori lokere buta, me wek kingei cik nin.
- ⁸⁰Mia alub iswilia nin kede cunya lung, tetekeny kur mi lewic maka.

Ilega me Kwano Alako

- ⁸¹Abedo kuri pi bino laka di ako ool; ango aketo gen na i kop nin.
- ⁸²Wanga ojony pi mito neno gikame in icikere iye; ango apenyere be, “Awene en kame in ibino kweno kede cunya?”
- ⁸³Pien ango atieko doko cal bala lau me keto bwini kame koweko i yiro, do ango likame wia owil kede iswilia nin.
- ⁸⁴Miero ngatic nin bed kanyakino pi kare kame rom amene? Awene en kame in ibino ngolo kede kop i wi jo kame tidilo ango?
- ⁸⁵Joewaka okunyo na bure be apot iye; gin likame kilubo iswil nin.



⁸⁶Cik nin dedede tie kakare; kotie tidilo ango abongo kop moro; Okwe konya!

⁸⁷Gin oudo kibuco jiko kuo na i wi lobo; do ango likame aweko lubo iswilia nin.

⁸⁸Pi amara nin kalikame lokere, gwok kuo na, tetekeny amoto akaruno lubo iswilia nin.

Bedo kede Yei i kom Iswilia ka Rwot

⁸⁹Kop nin, Okwe Rwot, bedo nakanaka; en etie kop me ateni ikar kede ikar i malo.

⁹⁰In igenere but jo me kare dedede; in itieko cibo lobo kabedo mere, en ecungo di etek nakanaka.

⁹¹Gi dedede cungo tuno tin pi in iciko kamanono, pien giacwea dedede timo tic piri.

⁹²Ka koto oudo iswil nin likame yomo cunya, oudo koto ango ato pi can kame aneno.

⁹³Ango wia likame bino wil kede iswilia nin, pien in itieko minango kuo pi gin.

⁹⁴Ango abedo meri, laka; pien ango abedo tamo lubo cik nin.

⁹⁵Jo areco obuto piny kipwono kura pi muducaro ango, do ango par na tie i kom cik nin.

⁹⁶Ango atieko neno be gi dedede abeco tie kede ajikini gi, do cik nin likame tie kede ajikini.

Amara i kom Iswilia ka Rwot

⁹⁷Okwe, ango tin amaro iswilia nin benyo! Ango abedo paro gi i cunya piny yuluyul.

⁹⁸Cik nin miango abedo riek kalamo jokwor na, piento en etie keda i kare dedede.

⁹⁹Ango atie kede niang kame kalamo me jopwonye na dedede, pien ango aparao cik nin i cunya nakanaka.

¹⁰⁰Ango aniang kalamo jo oti, pien ango agwoko iswilia nin.

¹⁰¹Ango agengo tiena lubo yote dedede areco, me wek alub kop nin.

¹⁰²Ango likame aparao tenge ki lubo cik nin, pien in itieko pwonya.

¹⁰³Kope nin tin mit benyo i leba, kiwinyiwinyi i dogo kalamo mokic!

¹⁰⁴Ango audo niang ki iswilia nin; pi mano, ango cunya dagi yote dedede me angalo.

Lero Awok ki Iswil ka Rwot

¹⁰⁵Kop nin en etala kame menyoo kakame tiena lubo, doko en lero kame menyoo yongayo nango.

¹⁰⁶Ango atieko kwongere di ako moko kwongere nono, pi lubo iswilia nin kopooore.

¹⁰⁷Ango atie neno can twatwal; Okwe Rwot, mia abed kuo bala kame in iwaco.

¹⁰⁸Gam giamia na me pak, Okwe Rwot, doko pwonya iswilia nin.



109Ango atieko iikere pi jalo kuo na i kare lung, do likame wia wil kede iswilia nin.

110Jo areco otieko cika kede owic, do ango likame aparao tenge ki lubo cik nin.

111Cik nin obedo mega pi kare lung; gin en kame kiyomo cunya.

112Ango aketo cunya lubo iswilia nin; abino timo kamanono tuno i ajikini.

Lubo Iswilia ka Rwot Gwoko Danu

113Ango cunya dagi jo kame tam gi okakarun, do ango amaro iswil nin.

114In en kapwono nango doko in en ebuku na; ango aketo gen na i kom kop nin.

115Orwaunu tenge kibuta, wun jo kame timo gikareco, me wek ango agwok cik ka Rubanga na.

116Ganga di lubere kede cikere nin, tetekeny abed kuo, doko kur imi lewic maka i gen na.

117Konya tetekeny aud gwok aber, di ako bedo paro pi iswilia ni nakanaka.

118In idagi jo dedede kame parao tenge ki lubo iswilia nin; pien rieke gin me angalo kony mere li.

119In itero jo areco dedede me wi lobo bala yugi; pi mano, ango amaro cik nin.

120Koma miel pi lworu, doko ango alworo ngolo kop nin.

Lubo Iswilia ka Rwot

121Ango atieko timo gi me ateni kame poore; kur ijala i cing jo kame tie tera kirac.

122Mok be ngatic ni bino bedo kiber; kur iwek jo kalikame ngei tera kirac.

123Wanga ojony pi kuro neno alako nin, kede pi kuro neno cobere me cikere nin kopoore.

124Tii kede ngatic ni di lubere kede amara ni kalikame lokere, doko pwonya iswilia ni.

125Ango ngatic ni; mia abed kede niang, tetekeny angei cik ni.

126Okwe Rwot, kare do oromo me in timo tic ni, pien kotieko turo iswil ni.

127Ateteni ango amaro cik nin kalamo saabu kame kojililo kiber.

128Ateteni ango amio iswilia nin dedede en kame telo kuo na; cunya dagi yote dedede me angalo.

Mit me Lubo Iswilia ka Rwot

129Iswilia nin beco beco me aura; pi mano, ango alubo gi.

130Yabere me kop nin kelo ne jo lero; ekelo niang ne jo kame kwia piny.

131Ango angamo doga kede imue, pien cunya mito cik nin twatwal.



132 Lokere buta di iko mino kisa maki keda, bala kame in itimo ne kede jo kame mari.

133 Mia aoti abongo riangar di lubere kede cikere nin, doko kur iwek dub puga.

134 Laka kibun jo kame tera kirac, tetekeny akaruno gwoko iswilia ni.

135 Mi kisa maki kede ngatic ni, doko pwonya iswilia ni.

136 Ango akok pigewanga mol loiloi pien jo likame gwoko iswil nin.

Iswilia ka Rwot Opoore

137 Okwe Rwot, in ipoore, doko in ingolo kop i yore kopoore.

138 Iswilia kame in imio beco doko kipoore.

139 Nyeko na piri liel bala mac pien wi jokwor na wil kede kop nin.

140 Kotieko tamo cikere nin kiber, doko ngatic nin mare.

141 Ango likame pira tek doko kocaa, do angu likame wia wil kede iswilia nin.

142 Poore nin bedo nakanaka, doko iswilia nin obedo me ateni.

143 Peko kede par atek omaka, do cik nin kelo nango yomcuny.

144 Iswilia nin opoore nakanaka; mia abed kede niang tetekeny abed kuo.

Ilega me Kwano Alako

145 Ango akok buti kede cunya lung; gam kwac na, Okwe Rwot. Ango abino gwoko iswilia nin.

146 Ango akok buti; laka, di angu ako bino lubo iswilia ni.

147 Ango ayai di obai likame pwodi otuno di ako kok buti pi konya; angu aketo gen na i kom kope nin.

148 Ango abuto di wanga twolo iwor kiakia, me wek abed paro i cunya kope me cikere nin.

149 Pi amara ni kalikame lokere, winy dwana; Okwe Rwot, gwok kuo na, pien in ingolo kop i ateni.

150 Jo kame tidilo angu di kitie kede tam arac i koma tie noka; gin likame kiparo lubo iswil nin.

151 Do in itie iyapiyapi keda, Okwe Rwot, doko cik nin dedede obedo me ateni.

152 Ango bin sek audio niang ki iswilia nin be in itieko keto gi pi bedo nakanaka.

Koko me Kwano Kony

153 Nen can kame angu atie iye di iko laka, pien angu likame wia wil kede iswil nin.

154 Pid pira di iko laka; mia abed kuo di lubere kede cikere nin.

155 Jo areco likame bino udo alako, pien gin likame kilubo iswilia nin.



156 Cuny me kisa nin dwong, Okwe Rwot; mia abed kuo di lubere kede ngolo kop nin me ateni.

157 Jokwor na kede jo kame tidilo ango tot, do ango likame ariangar tenge ki iswilia nin.

158 Ango aneno jo kame li kede yei reco ki wanga, pien gin likame kigwoko cik nin.

159 Okwe Rwot, nen kite kame ango amaro kede iswilia nin. Gwok kuo na di lubere kede amara nin kalikame lokere.

160 Kop nin lung cungo i kom ateni; doko iswilia nin kopooore bedo nakanaka.

Keto Cuny Lubo Iswilia ka Rwot

161 Jotel tidilo ango abongo kop moro, do ango cunya tie kede wor i kom kope nin

162 Ango alelo pi kop nin bala ngat koudo jamini atot kame koyako ki yi.

163 Ango cunya dagi angalo, doko anene erac ki wanga, do ango amaro iswil nin.

164 Ceng acelacel ango apaki tien kanyaare pi iswilia nin kopooore.

165 Jo kame maro iswil nin tie kede mulem adwong; likame tie gimoro kame karuno getaro gi.

166 Ango ageni pi laka, Okwe Rwot, doko ango atimo gikame cik nin mito.

167 Ango agwoko cik nin; cunya maro gi twatwal.

168 Ango agwoko iswilia kede cik nin; pien gi dedede kame ango atimo idelelei i nyimi.

Ilega me Kwano Kony

169 Wek koko na tuni i nyimi, Okwe Rwot; mia abed kede niang di lubere kede kop me cikere nin.

170 Wek kwac na tuni i nyimi; laka di lubere kede cikere nin.

171 Doga bino paki, pien in ipwonya iswilia nin.

172 Leba bino wero kop me cikere nin, pien cik nin dedede opooore.

173 Bed di i iikere pi konya, pien ango atieko yero lubo iswilia nin.

174 Ango akuro alako nin, Okwe Rwot, doko iswilia nin yomo cunya.

175 Mia abed kuo tetekeny apaki, doko mi iswilia nin konya.

176 Ango atieko parao tenge bala oromo korwenyo; moi ngatic ni, pien ango likame wia wil kede cik nin.

Sabuli 120

Ilega me Kwano Kony



¹I kare kame oudo atie kede i can ango ako kok but Rwot, akok be amoto egam koko na di awaco be,

²” Laka, Okwe Rwot, kibus jo kame dog gi opong kede angalo, kibus jo kame leb gi yamo kope me abe.”

³Nyo kara kame kobino mino wu? Nyo ace bobo kame kobino timo ne wu wun jo kame lebu yamo kop me abe?

⁴Kobino gwegweo wu kede imalia abit me ngayi, kobino wango wu kede itonge kobokere me mac.

⁵Can kame atie iye, ineno bala ango ngakumbor i Mesek, ineno bala atie bedo i eema me Kedar.

⁶Ango atieko tero kare alac di atie bedo i diere me jo kame dagi mulem.

⁷Ango gira amaro mulem, do ka awaco kop moro amako mulem, gin kiko cako mito yi.

Sabuli 121

Rwot en Ngagwok Wa

¹Atingo wanga neno mori; kony na bino wok ki tuai?

²Kony na wok kibus Rwot, ngat kocweo malo kede piny.

³En likame ebino weki i poto ipeko, ngat kame gwoki likame bino nino.

⁴Neningo, ngat kame gwoko jo me Isirael likame bino amemerun amoto nino.

⁵Rwot en ngat kame gwoki; Rwot en ngagwok nin bala dud tipo me yat kame tie i ngeti.

⁶Ceng likame bino wangi i dier iceng, akadi duwe da likame bino timo ni gimoro iwor.

⁷Rwot bino gwoki ki raco dedede, en ebino gwoko kuo ni.

⁸Rwot bino gwoki cako in yai ot, tuno in dwogo, ebino konyi kamanoni cako nataman tuno ikar kede ikar.

Sabuli 122

Wer me Pako Yerusalem

¹Ango oudo abedo tie kede yomcuny kakame gin kiwaco na kede be, “Ootunu i ot ka Rwot!”

²Nan do otie cungo i irutei nin, Okwe Yerusalem.

³Yerusalem en bomba kame kogero sikisik,



⁴en kakame atekerin bino iye, gin atekerin ka Rwot, bala kame oudo kociko kede ne jo me Isirael pi mino Rwot pwoc.

⁵Abakai me ekeko ka Daudi obedo i komini gi me ajakanut i kanoni, pi ngolo ne jo kop.

⁶Legunu pi Yerusalem bedo kede mulem: “Okwao be jo kame mari bed kede kuo aber.

⁷Mulem bed tie i diere nin kakame apama ocelo, kede anapakin bed tie i ude ni me abaka!”

⁸Pir imiegu na kede joaup na abino waco be, “Mulem bed tie i diere nin Yerusalem!”

⁹Pir ot ka Rwot Rubanga wa, abino lego ne in Yerusalem pi bedo kede bero.

Sabuli 123

Ilega me Kwano Kisa

¹Ango atingo wanga malo buti, Okwe in ngat kame bedo i kom ni me ajakanut i malo.

²Bala kame wang jotic ngio kede cing ngadwong gi, bala kame wang apasoit ngio kede cing min ot, kamanono da wang wada ngio Rwot Rubanga wa, paka tuno di kisa omake i kom wa.

³Mi kisa maki i kom wa, Okwe Rwot, mi kisa maki i kom wa, pien wan otieko udo acae kame romo.

⁴Anyera me jo kame tie kiber, kede acae me jo kame wakere otieko doko dwong i kuo wa.

Sabuli 124

Rubanga Ngagwok me Jo Mege

¹Poore jo me Isirael nan wac be, “Ka koto oudo likame Rwot tie kede wa,

²ka koto oudo likame Rwot tie kede wa, i kare kame jokwor wa osuro wa kede,

³oudo koto jokwor wa omwonyo wa di okuo, kakame gero gi otwarun kede i kom wa;

⁴di do koto alele oko molo wa, pii adipere mol koto omwonyo wa;

⁵koto pii oboe i kom wa, pii kame kokomar.”

⁶Pak bed but Rwot, ngat kalikame omio wa but gi bala le me amwoda.

⁷Wan obwot bala winyo, winyo kobwot ki owic me ngadwar; owic ococotun di do nan wan oko bwot.



⁸Kony wan wok kibut Rwot, ngat kocweo malo kede piny.

Sabuli 125

Rwot Gwoko Jo Mege

- ¹Jo kame geno Rwot cal bala moru me Sion, en likame eyangere do ebedo nakanaka.
- ²Bala kame mori oluko kede Yerusalem, kamanono da Rwot luko jo mege iepone nono, cako nataman kede i kare dedede.
- ³Jo areco likame bino pugo lobo kame komio jo kopooore, tetekeny kur jo kopooore rwak cing gi i tim areco.
- ⁴Tim bero ne jo kame timo bero, Okwe Rwot, kede ne jo kame cuny gi cil.
- ⁵Do jo kame lokere lubo yote gi areco, Rwot bino tero gi karacel kede jo kame timo tim areco. Mulem bed i Isirael.

Sabuli 126

Ilega me Kwano Alako

- ¹Kakame Rwot odwoko ne kede Sion deyo mere, oudo ecal ne wa do bala lek.
- ²Manono oko mino wa obedo nyero anyera, di olelemo kede yomcuny; di do jo me atekerin apat oko cako yamo i kom wa be, “Rwot otieko timo negi gikame dongodongo.”
- ³Rwot otieko timo ne wa gikame dongodongo, omio wan otie kede kilel.
- ⁴Dwok ne wa bobo deyo kame bin otie kede, Okwe Rwot, bala pii kame dwogi i isamai me Negeb.
- ⁵Mi jo kame cuo kodi di kikok kai kac kede ilelem me yomcuny.
- ⁶Jo kame tie ot di kikok, di kimako kodi me acua, bino dwogo i miere kede ilelem me kilel, di kiyeo kal kame kikao.

Sabuli 127

Wer me Pako Bero ka Rubanga

- ¹Ka likame Rwot en kogero ot, jo kame tie gere cane nono. Ka likame Rwot en kogwoko bomba, jo kame tie gwoke wang gi bedo bit me nono.
- ²Kony mere da li ka in icei obai pi ot i tic, pi mono epone me kuo, di iko dok paco wei i esawa kokato; pien Rwot mio jo kame en emaro cam akadi di gin kitie nino.
- ³Idwe obedo giamia kame wok kibut Rwot, nyige kodi kame wok ki yic obedo winyo kame Rwot mio.
- ⁴Idwe kame dano nywalo di pwodi en eponga tie ne bala imalia kame tie i cing ngayi.



⁵Etie kede yomcuny ngat kame isau mere me mako emal opong kede akodi imalia nogo. Likame kobino mino lewic make kame etie yamo kede jokwor mege i kakame kongolo kiye kop.

Sabuli 128

Gikame Rwot Mio Ngat Alwore

- ¹Etie kede yomcuny ngat kame lworu Rwot, ngat kame lubo yote mege.
- ²In ibino camo anyakini kame kwok ni okelo; in ibino bedo kede yomcuny, doko gi dedede bino bedo ni kiber.
- ³Dako ni bino bedo bala olok kame nyak i odi; idwe ni bino bedo tot bala alibo me olibeti, di kiluko emesa ni.
- ⁴Manoni en winyo me ngat kame lworu Rwot bino udo.
- ⁵Akwao Rwot mi winyo buti ki Sion, akwao be poore inen lonyo me Yerusalem i kare me kuo ni lung.
- ⁶En miero emi inen ikwae kede ikwae ni. Mulem bed i Isirael.

Sabuli 129

Ilega pi Bwono Jokwor me Isirael

- ¹Poore Isirael wac be, “Gin kibedo tidilo ango nakanaka cako di ango pwodi atitidi.
- ²Gin kibedo tidilo ango nakanaka cako di ango pwodi atitidi, do akadi kamanono da, gin likame pwodi kibwona.
- ³Alama kame ebela gi orwarwao i ngea bocoboco, ineno bala bot kame ecuka opuro.”
- ⁴Rwot obedo ngat kopooore, en etieko cocoto tol kame jo areco oudo otwea kede.
- ⁵Miero mi lewic mak jo dedede kame dagi Sion, di oko dwoko wi gi cen.
- ⁶Kibed bala lum kame tui i wi ude, lum kame ner di kiko tuo di likame pwodi kidongo,
- ⁷lum kame ngat atie nyaro lum nyaro likame pongo cinge, kede ngat kame twetweo da gwaro likame pongo kore.
- ⁸Jo kame beo kanono da likame twero waco be, “Winyo kame Rwot mio bed i komu! Wan okwao ne wu winyo i nying Rwot!”

Sabuli 130

Ilega me Kwano Kony

- ¹Akok buti ki kakatut, Okwe Rwot,
- ²Rwot, winy dwana. Cik yiti iko winyo dwan kame amio kede kwac buti.



³Ka koto in ibedo wandiko dub wa, Okwe Rwot, Rwot koto ngai obwot likame kongolo kop oloe?

⁴Do in isasiro jo, me wek jo bed kede wor buti.

⁵Ango akuro Rwot, kuo na kure, doko ango ageno kop kame ewaco.

⁶Kuo nango kuro Rwot kalamo jo kame kuro ru me piny, kalamo jo kame kuro ru me piny.

⁷Okwe jo me Isirael, bedunu kede gen but Rwot! Pien Rwot tie kede amara kalikame lokere, doko en etie kede twer adwong me lako jo.

⁸En nono kame ebino lako jo me Isirael ki dub gi dedede.

Sabuli 131

Ilega me Bedo kede Gen di Imwolere

¹Okwe Rwot, cunya likame tie kede tingere, likame atie kede wang me deng; ango likame aketo tam na i kom gimogo adongodongo, amoto i kom gimogo me aura.

²Do ango atieko didio cunya ako kweno koma, bala atin kame kotwono dot, kame tie i kor toto mere; cunya do cal bala atin kame kotwono dot, kame tie keda.

³Okwe wun jo me Isirael, bedunu kede gen but Rwot, cako nataman tuno kede i kare dedede.

Sabuli 132

Wer me Pako Tempulo

¹Okwe Rwot bed kede iyutun i kom Daudi, pi can dedede kame en ebedo kanyo;

²epone kame bin en elairo kede but Rwot; epone kame ekwongo kede but Won Twer kame Yakobo bin woro, di ewaco be,

³” Ango likame abino donyo i oda arabo yito i kabuto na;

⁴ango likame abino nino, arabo amemerun ako mino wanga,

⁵paka tuno di atieko udo kabedo ne Rwot, tuno di audo kabedo ne Won Twer kame Yakobo bin woro.”

⁶Wan owinyo kop kame mako Sanduku me Isikan i Epurata; wan oude i poti me Yaar.

⁷Wan oko waco be, “Ootunu kakame en ebedo iye; orieberenu pi wore i nyim kom mere me ajakanut.”

⁸Yai, Okwe Rwot, di iko ot kabedo ni me wei, in karacel kede Sanduku me twer nin.

⁹Miero josaseredoti nin ngap poore bala egoe, kede jo kame wori ko ilelem pi yomcuny.



- ¹⁰Pi ngatic ni Daudi, kur idagi dano ni kame itieko yero.
- ¹¹Rwot okwongo but Daudi ikwong me ateni, kalikame doko eromo loko tam mere kiye: “Abino mino ngat acel kikom awobe ni bedo i kom nin me ajakanut.
- ¹²Ka awobe ni bino gwoko isikan na kede gi kede cik kame ango abino pwonyo gi, idwe gi da bino lunyo kom gi me ajakanut nakanaka.”
- ¹³Pien Rwot otieko yero Sion; cunye mito be edok kabedo mere:
- ¹⁴” Man en kawei na pi kare lung, ango abino bedo kanoni, pien cunya otieko mite.
- ¹⁵Abino mino Sion gi dedede kame emito di tot, abino mino jocan kame tie iye yeng kede cam.
- ¹⁶Abino ngapo josaseredoti kame tie iye kede alako, di jo agenere kame tie iye ko bino ilelem pi yomcuny.
- ¹⁷Ki kuno abino mino twon twer me abaka but ngat acel kikom ikwae ka Daudi; ango abino mino apugan me dano na kame ayero bedo nakanaka.
- ¹⁸Abino ngapo jokwor mege kede lewic, do ocoro mere me ajakanut bino medo meny ameda.”

Sabuli 133

Wer me Pak pi Anapakin

- ¹Eber tin benyo, etie gi me yomcuny tin benyo ka jo bedo karacel bala imiegu di kitie kede aribakin!
- ²Ecal bala mo me wel kame oonyo i wic, kame mol bino paka i yer me tik dano, mo kame bin omol i yer me tik Aaron, di eko mol paka i ngut ekanso mere.
- ³Ecal bala toyo kame tie i wi moru me Kerimon, kame epone mere totonun i wi moru me Sion. Pien Rwot omio winyo mere kuno, en kuo kame bedo nakanaka.

Sabuli 134

Lwongo pi Pako Rubanga

- ¹Bianu, pakunu Rwot, wun jotie mege, jo kame cungo i ode iwor kiakia.
- ²Tingunu cingu malo kabedo kacil di ikounu pako Rwot.
- ³Akwao Rwot ngat kocweo malo kede lobo, emi wu winyo i Sion.

Sabuli 135

Wer me Pak

- ¹Pakunu Rwot! Pakunu nying Rwot; miunu pak, Okwe wun jotie ka Rwot,
- ²wun jo kame cungo i ot ka Rwot, jo kame cungo i diakal me ot ka Rubanga wa.



- ³Pakunu Rwot, pien Rwot ber; werunu wer me pako nyinge, piento en engakisa.
- ⁴Pien Rwot otieko yero ikwae ka Yakobo pi bedo mege; eyero jo me Isirael pi bedo jo mege.
- ⁵Pien ango angeo be Rwot dwong; Rwot wa dwong kalamo rubangan dedede.
- ⁶Rwot timo gimoro kenekene kame yomo cunye, i malo kede i lobo, i name kede i pie atat.
- ⁷En kame emio idoun tingere i ajikini me lobo; en kame emio meny me kot timere di kot ko cwei, di eko woto yamo abuko ki ude mege me kano jame.
- ⁸En nono kame bin eneko idwe kao i Misiri, idwe kao me jo karacel kede me leini.
- ⁹En etimo gianena kede gi me isuur i diere ni, Okwe Misiri, etimo gi pi keto can i kom Parao kede jo mege.
- ¹⁰En eneko jo me atekerin atat, di eko neko abakai atek:
- ¹¹Sikon, abaka me jo Amor, kede Og, abaka me Basan, kede ajakanuto dedede me Kanan.
- ¹²En eko mino lobo gi but jo mege, emie but jo me Isirael pi doko mergi.
- ¹³Nyingin bedo nakanaka, Okwe Rwot, in ingere i kare dedede, Okwe Rwot.
- ¹⁴Pien Rwot bino ngolo kop kame gonyo jo mege kiko bedo abongo raco; kisa bino make i kom jotic mege.
- ¹⁵Caljwogi me atekerin apat obedo siliba kede saabu, gin kibedo tic me cing dano.
- ¹⁶Gin kitie kede dog gi do likame kitwero yamo, kitie kede wang gi do likame kineno piny;
- ¹⁷kitie kede yit gi do likame kiwinyo kop, doko da wei likame tie i dog gi.
- ¹⁸Jo kame timo gi, kede jo kame keto gen gi i kom gi, jo nogo dedede bino doko cal bala gin.
- ¹⁹Okwe wun jo me Isirael, pakunu Rwot! Okwe wun josaseredoti, pakunu Rwot!
- ²⁰Okwe wun Jolebi, pakunu Rwot! Wun jo kame ilworunu Rwot, pakunu Rwot.
- ²¹Pakunu Rwot i Sion, en ngat kame ebedo Yerusalem. Pakunu Rwot.

Sabuli 136

Wer me Mino Pwoc

- ¹ Okwe miunu pwoc but Rwot, piento en eber, pien amara mere kalikame lokere bedo nakanaka.
- ²Okwe miunu pwoc but Rubanga ngat kame dwong kalamo rubangan dedede, pien amara mere kalikame lokere bedo nakanaka.



- ³Okwe miunu pwoc but Rwot ngat kame dwong kalamo rwode dedede, pien amara mere kalikame lokere bedo nakanaka.
- ⁴En kene etimo gi me isuur adongodongo, pien amara mere kalikame lokere bedo nakanaka,
- ⁵ en ecweo malo kede rieko mere, pien amara mere kalikame lokere bedo nakanaka,
- ⁶ en epeto lobo i wi pii, pien amara mere kalikame lokere bedo nakanaka.
- ⁷ En ecweo gi adongodongo kame rieny, pien amara mere kalikame lokere bedo nakanaka,
- ⁸eketo ceng pi pugo iceng, pien amara mere kalikame lokere bedo nakanaka,
- ⁹eketo duwe kede acer pi pugo iwor, pien amara mere kalikame lokere bedo nakanaka.
- ¹⁰ En bin eneko idwe kao i Misiri, pien amara mere kalikame lokere bedo nakanaka,
- ¹¹ di eko woto jo me Isirael tenge ki diere gi, pien amara mere kalikame lokere bedo nakanaka,
- ¹²etimo man kede cinge me teko kede bade kame erieo, pien amara mere kalikame lokere bedo nakanaka,
- ¹³ en eko poko Nam Akwar ki diere, pien amara mere kalikame lokere bedo nakanaka,
- ¹⁴di eko mino jo me Isirael oboe ki diere mere, pien amara mere kalikame lokere bedo nakanaka,
- ¹⁵do eko lwinyo Parao kede isirikalen mege i Nam Akwar, pien amara mere kalikame lokere bedo nakanaka.
- ¹⁶En bin etelo jo mege ki tim, pien amara mere kalikame lokere bedo nakanaka,
- ¹⁷en eko neko abakai kame tie kede twon twer, pien amara mere kalikame lokere bedo nakanaka,
- ¹⁸doko da eko neko abakai kame bin singo ngere, pien amara mere kalikame lokere bedo nakanaka,
- ¹⁹ eneko Sikon, abaka me jo Amor, pien amara mere kalikame lokere bedo nakanaka,
- ²⁰ kede Og, abaka me Basan, pien amara mere kalikame lokere bedo nakanaka.
- ²¹En eko mino lobo gi but jo mege, pien amara mere kalikame lokere bedo nakanaka,
- ²²emio but jo me Isirael pi doko mergi, pien amara mere kalikame lokere bedo nakanaka.
- ²³En nono kame bin eyutuno wa i kare kame jokwor obwono wa kede, pien amara mere kalikame lokere bedo nakanaka,



²⁴di eko lako wa kibut jokwor wa, pien amara mere kalikame lokere bedo nakanaka.

²⁵En kame emio gi dedede akuo cam, pien amara mere kalikame lokere bedo nakanaka.

²⁶Okwe miunu pwoc but Rubanga me malo, pien amara mere kalikame lokere bedo nakanaka.

Sabuli 137

Koko me Jo me Isirael i Obukui

¹Wan bin obedo piny i nget ecilet me Babilon, di oko kok kakame oyutuno kede Sion.

²Wan oko weko gono adungu wa oko liero gi malo i kor yen.

³Pien jo kame oudo omako wa openyo wa were mogo; jo kame oudo tidilo wa openyo wa pi yomo cuny gi di kiwaco be, “Werunu ne wa wer acel moro me Sion!”

⁴Epone mene kame wan oudo otwero wero kede wer ka Rwot i lobo me obukui?

⁵Ka wia owil kedi, Okwe Yerusalem, poore bada tetu cam bed di omito!

⁶Leba miero mok i dana ka ango likame ayutuno in, ka likame atamo pi Yerusalem bala gikame yomo cunya kalamo gi dedede.

⁷Yutuno iko maro i wi jo me Edom, Okwe Rwot, ceng kame korereto kede Yerusalem, di gin oudo kiwaco be, “Tiatiaunu en! Tiatiaunu en! Tiatiaunu en tuno piny i acakini me apama mere!”

⁸In nyar ka Babilon, in ngadudubo! Kibino bedo kede yomcuny jo kame bino culo i komi raco kame in itimo ne wa.

⁹Kibino bedo kede yomcuny jo kame bino tero idwe ni di kiko nyinyito gi i lela!

Sabuli 138

Ilega me Mino Pwoc

¹Ango ami pwoc kede cunya lung, Okwe Rwot; ango awero wer me paki i nyim rubangan.

²Ango aluro piny tetu tempulo nin kacil di ako mini pwoc pi amara nin kalikame lokere kede pi genere nin; pien in itieko nyuto be nyingi kede kop nin kalamo gi dedede.

³I ceng kame ango alwongere kede, in iko gamo dogo, di iko medo na teko.

⁴Abakai dedede me wi lobo bino paki, Okwe Rwot, pien gin kitieko winyo kop me dogi.

⁵Gin kibino wero wer amako gikame Rwot otimo, pien deyo ka Rwot dwong.



⁶Pien akadi bed bala Rwot dwong, do en eparo pi jo kalikame pirgi tek; do joewaka en engeo gi cuto ki kakabor.

⁷Akadi di ango abei i diere me peko, in igwoka ki gero me jokwor na; in irieo badi, di cingi me twer ko laka.

⁸Rwot bino cobo iik mere pira; amara nin kalikame lokere bedo nakanaka, Okwe Rwot. Kur ijat tic kame cingi otimo.

Sabuli 139

Rubanga Tie kede Ngec Odocon doko Egwoko Jo dedede

¹Okwe Rwot, in itieko ngingico ango di iko ngena.

²In ingeo ka ango abedo piny kede ka acungo malo; in iniang tam nango akadi di atie kakabor.

³In ingica ka atie ot kede kame atie buto, doko ingeo kiber tice nango dedede.

⁴Akadi di pwodi likame leba oyamo kop moro, Okwe Rwot, udo in itieko ngeno kop nono atwal atwala.

⁵In icela diere, ki cen ngea kede ki nyima, di iko keto cingi i koma pi gwoka.

⁶Akodi ngec nin me aura nono kalamo niang nango; etie ngec amalotwatwal, omio likame ango atwero niang iye.

⁷Atwero ot tuai pi pwono ni? Arabo aring tenge tuai ki wangi?

⁸Ka ango aoto i malo, udo in itie kuno; akadi ka ango apeto kabuto na i kabedo me jo oto, doko udo in itie kuno.

⁹Ka ango apor aoto tetu wok ceng, arabo ka atuno i ajikini me nam tetu poto ceng,

¹⁰akadi ki kuno da cingi bino tela, doko cingi me twer bino lida.

¹¹Ka awaco be, "Colpiny bin uma, kede lero kame oluka dok cal bala iwor,"

¹²akadi colpiny da likame col kibuti; iwor ler alera bala iceng, pien colpiny cal acala kede lero kibuti.

¹³Pien in en kame icweo adulion dedede me koma, in icwea i yi toto na.

¹⁴Ango apaki pien in icwea iepone kame kelo lworokede iepone me aura. Tice nin obedo me aura. Ango angeo manoni kiber.

¹⁵Cogere nango oudo likame opwono ki wangi kakame oudo kotie cwena kede i mung, di kotie cwena kede diru i dud lobo kakatut.

¹⁶Wangin oudo oneno koma di likame pwodi kocwea da. Oudo kowandiko i itabu nin ceng dedede me kuo na di likame pwodi gin kituno da.

¹⁷Niang tam nin tin tek na benyo, Okwe Rubanga! Kitot kibuta tin benyo!



- ¹⁸Ka atamo maro gi, kitot kalamo asinge; ka ango acei, udo pwodi atie kede in.
- ¹⁹Ango oudo amito be koto ineko jo areco, Okwe Rubanga, di jo kame maro onyo remo me jo ko bino rwenyo kibuta,
- ²⁰gin jo kame yamo kope areco i komi, di kitingere yamo nyingi kirac.
- ²¹Okwe Rwot, mam ango likame amito jo kame dagi? Mam cunya dagi jo kame tie kede jemo buti?
- ²²Adagi gi kede cunya lung; atero gi bala jokwor na.
- ²³Ngingico ango, Okwe Rubanga, iko ngeno cunya; kong tama iko ngeno tam na.
- ²⁴Nen ka tim arac moro tie i kuo na, iko tela i yongayo kame in i iiko pi ikar kede ikar.

Sabuli 140

Ilega me Kwano Gwok

- ¹Laka kibut jo kame timo tim areco, Okwe Rwot, gwoka ki cing jogero,
- ²jo kame tam gi tie kede iik areco, doko kibedo cako yi nakanaka.
- ³Gin kimio leb gi bedo bit bala me twole, doko kop kame dog gi waco cal bala kwir me emosoga.
- ⁴Gwoka ki cing jo areco, Okwe Rwot; gwoka ki cing jogero, gin jo kame kitieko timo iik me reta.
- ⁵Joewaka otieko cika kede obek, kiserao na bwoi, kicika kede iwicia i yongayo.
- ⁶Ango awaco ne Rwot be, “In en Rubanga na; cik yiti iko winyo koko na, Okwe Rwot.”
- ⁷Okwe Rwot, Rwot na, ngalak na atek, in ibedo bala ocoro atek kame gwoko wia i ceng me yi.
- ⁸Kur imi jo areco gikame cuny gi mito, Okwe Rwot; kur imi iik gi areco cobere.
- ⁹Kur imi jo kame oluka bwona; mi kope areco kame kiyamo i koma lokere dok ne gin.
- ¹⁰Mi itonge me mac popoto i kom gi! Mi gi kipopoto i bur di likame bobo kiko twero wok.
- ¹¹Kur imi ngat kame dubo nying jo bed kede yoto i lobo; mi gimoro arac ngoole wapo yor jo kame ger.
- ¹²Ango angeo be Rwot ngolo kop kakare ne jo kame piny oloo, engolo kop i yore me ateni ne jocan.
- ¹³Ateteni jo kopoore bino pwoni, jo kame cuny gi cil bino bedo i nyimi.



Sabuli 141

Ilega me Kwano Gwokere ki Gikarac

- ¹Ango alwongi, Okwe Rwot; susunyo bino buta; cik yiti iko winyo dwana kame alwongere buti.
- ²Wek ilega na bed bala giawanga kame ngwe kur i nyimi, kede cinga kame atingo malo i ilega bed bala giayala me otieno.
- ³Ket ngadar me doga, Okwe Rwot; gwok doga kur wac kop arac.
- ⁴Kur ilok cunya i kom mito gimoro arac, pi bedo timo gikareco karacel kede jo kame timo dub; kur imia acam cam amit me ibagai gi.
- ⁵Wek dano kopooore bitaro ango; Mi jo agenere riewa. Kur iwek jo areco wir wia kede mo gi, pien ango alego nakanaka ilega me dagi tim gi areco.
- ⁶Kame kouco jopug gi piny ki wi lela malo, jo bino ngeno be kope nango oudo tie me ateni.
- ⁷Bala kidi kame dano belo di eko ngingidun, kamanono da cogere gi bino sasarun i dog kabedo me jo oto.
- ⁸Do ango aloko wanga buti, Okwe Rubanga, Rwot na; ango aringini gwokere buti; kur iwek koneka.
- ⁹Gwoka ki obek kame gin kitieko cika kede, kede ki owic me jo areco.
- ¹⁰Mi jo areco mok i bwai gi ken gi, di ango kena ako bwot.

Sabuli 142

Ilega me Kwano Kony

- ¹Ango akok but Rwot kede dwan amalo; acwao kwac na but Rwot kede dwan amalo.
- ²Ango atero koko na i nyime; atatamo ne peko na dedede.
- ³Kame cunya okwanyere, en kame engeo gikame ango apoore timo. Jokwor na ociko na obek i yongayo kame ango alubo.
- ⁴Nen bada tetu cam, likame tie ngatamoro kame tamo pira; likame tie ngatamoro kame aromo ringo ot gwokere bute; likame tie ngatamoro kame paro pira.
- ⁵Okwe Rwot, ango akok buti; ango awaco be in karingo nango me ot gwok, iner na i lobo me jo akuo.
- ⁶Winy koko na, pien kotieko mina adoko goro. Laka ki cing jo kame tidilo ango, pien gin kitek twatwal kibwona.
- ⁷Wota ki otkol, tetekenya akaruno pako nyingi. Jo kopooore bino cokere luka, pi bero adwong kame in itimo na.



Sabuli 143

Ilega me Kwano Kony

- ¹Okwe Rwot, winy ilega na, cik yiti iwiny kwac na pien in igenere; gam kwac na pien in ipoore.
- ²Kur ingol ne ngatic ni kop, pien likame tie ngatamoro kame kuo kopooore i nyimi.
- ³Pien ngakwor otieko wapa di eko reta piny. Emia abedo i colo bala jo kotieko to riki sek.
- ⁴Pi mano, cunya do okwanyere; cunya odoko li.
- ⁵Ango ayutuno kare kokato cen, aparo kop i kom gi dedede kame in itieko timo, aparo i cunya tice kame cingi otimo.
- ⁶Ango atingo cinga malo buti i ilega; cunya miti bala kame lobo kotuo mito kede pii.
- ⁷Okwe Rwot, gam kwac na awakawaka; cunya okwanyere. Kur ikan na wangi, ka li, ango abino bedo cal bala jo kame donyo piny i ates.
- ⁸Mia awiny odiko acelacel kop me amara ni kalikame lokere, pien ango aketo gen na buti. Pwonya yongayo kame poore alubi, pien ango acwao kwac na buti.
- ⁹Okwe Rwot, laka ki cing jokwor na; ango atieko ringini gwokere buti.
- ¹⁰Pwonya timo gikame in imito, pien in ibedo Rubanga na. Mi tipo ni aber tela i yongayo apwot di oriere.
- ¹¹Pi nyingi, Okwe Rwot, gwok kuo na. Wota ki peko pien in ipoore.
- ¹²Pi amara ni kalikame lokere, nek jokwor na, doko muducaro jo dedede kame daga, pien ango abedo ngatic ni.

Sabuli 144

Abaka Pwoyo Rubanga pi Bwono Jokwor

- ¹Pak bed but Rwot, en lela na, ngat kame pwonya yi;
- ²en lela na doko en apama atek kame gwoka, kateko na kede ngalak na, ebuku na, en kame ango aringo ot gwokere bute, en kame ebwono atekerin di eko keto gi i twer na.
- ³Okwe Rwot, kara jo obedo nyo en kame mio in iparo pirgi, jo ajoa en kame in iparo pirgi?
- ⁴Gin kical bala wei; kare me kuo gi cal bala tipo me gimoro kame tie nan do nat eli.
- ⁵Okwe Rwot, yab edou di iko bino piny; mul mori tetekeny kiduny yiro.
- ⁶Mi kot meny di eko sasaro gi; gwei imalia ni di iko mino gi kiringi.
- ⁷Riei cingi ki malo kuno; wota di iko laka ki twon pii; laka ki cing jokumbor,



⁸Jo kame dog gi yamo kope me angalo, doko kitingo cing gi tetu cam malo di kiko lairo i kop me abe.

⁹Okwe Rubanga, ango abino wero ni wer anyen; abino gono ni adungu me ausin tomon.

¹⁰In en kame imio abakai lo yi, doko in en kame ilako Daudi ngatic ni.

¹¹Laka ki epima ager, laka ki cing jokumbor, jo kame dog gi yamo kope me angalo, doko kitingo cing gi tetu cam malo di kiko lairo i kop me abe.

¹²Mi idwe awobe wa i kare kame gin pwodi ipongai kede, kibed bala kodi apita kotieko dongo atwal, kede anyira wa da bed cal bala ipirin me esonda, kame kotongo me gero paco me abaka.

¹³Mi dere wa pong kede kodere me epone dedede; mi romini wa nywal kimeede kidok tutumian kede tutumian.

¹⁴Mi doke wa gari. Mi kur kotuturo apama me bomba, kur ooti itasun i piny apat, doko kur koko moro me can winyere i gudo me bomba wa.

¹⁵Kitie kede yomcuny gin jo kame akodi winyo nono bino poto i kom gi; kitie kede yomcuny gin jo kame Rubanga obedo Rwot gi.

Sabuli 145

Wer me Pak

¹Ango abino paki, Rubanga na kede Abaka na, doko abino pako nyingi ikar kede ikar.

²Abino paki ceng dedede, doko abino pako nyingi ikar kede ikar.

³Rwot dwong twatwal doko epoore me apaka; dwongo mere kalamo ngec me jo.

⁴Lwak me kare acelacel bino pako tice kame in itimo but lwak kame lubo, doko kibino tatamo tice nin me aura.

⁵Ango abino bedo paro i cunya kop i kom tice nin me aura, kede kop i kom deyo adwong me angosibib nin.

⁶Jo bino tatamo twer kame in itimo kede tice me alwora, doko ango abino tatamo dwongo ni.

⁷Gin kibino tatamo iruo me twon bero nin, doko kibino wero kop i kom poore nin kede dwan amalo.

⁸Rwot ngakisa doko etimo ne jo mwolo, en likame ebunyo doko ger, doko epong kede amara kalikame lokere.

⁹Rwot ber but jo dedede, doko cuny me kisa mere tie i kom gi dedede kame en ecweo.



- ¹⁰Gi dedede kame in icweo bino pwoni, Okwe Rwot, doko jo ni dedede kame genere bino paki.
- ¹¹Gin kibino waco kop me deyo me ajakanut ni, doko kibino tatamo kop i kom twer nin,
- ¹²pi mino jo dedede ngeno tice nin me twer, kede deyo adwong me ajakanut nin.
- ¹³Ajakanut nin bedo nakanaka, doko apugan nin tie pi lwak me i kare dedede. Rwot genere i kope mege dedede, doko etie kede kisa i gi dedede kame en etimo.
- ¹⁴Rwot konyo jo kame tie poto; en ekiarao jo dedede kame cuny gi odoko goro.
- ¹⁵Wang dedede nenin, doko in imio gin cam i kare kopooore.
- ¹⁶In iyaro cingi, di iko mino gi dedede kame kuo yeng.
- ¹⁷Rwot timo gi dedede i yore kopooore, doko etie kede mwolo i gi dedede kame en etimo
- ¹⁸Rwot tie iyapiyapi but jo dedede kame lwonge, jo dedede kame lwonge i ateni.
- ¹⁹En ecobo mit me jo dedede kame lwore; doko da ewinyo koko gi di eko lako gi.
- ²⁰Rwot gwoko jo dedede kame mare, do jo areco dedede en ebino muducararo.
- ²¹Ango abino pako Rwot nakanaka, doko gi dedede akuo bino pako nyinge kacil ikar kede ikar.

Sabuli 146

Wer me Pako Rubanga Ngalak

- ¹Pakunu Rwot! Pak Rwot, Okwe in kuo na!
- ²Abino pako Rwot tek di pwodi ango atie akuo; abino wero were me pako Rubanga na pi kare me kuo na lung.
- ³Kur iketunu gen wu i kom jotel me piny, i kom jo ajoa kalikame karuno konyo wu.
- ⁴Kame wei gi ojik, gin kidok i lobo; ceng nono di iik gi da jik.
- ⁵Kitie kede yomcuny gin jo kame kony gi wok kibun Rubanga ka Yakobo, jo kame gen gi tie i kom Rwot Rubanga gi,
- ⁶ngat kocweo malo kede piny, nam kede gi dedede kame tie iye. En egendere nakanaka;
- ⁷doko engolo kop kakare ne jo kame koteri kirac; en emio jo kame kec oneko cam. Rwot gonyo jo kame kotweo i otkol;
- ⁸Rwot yabo wang imuduka. Rwot kiarao jo kame cuny gi odoko goro; Rwot maro jo kopooore.



⁹Rwot gwoko jokumbor; en egango idwe kic kede apuserun, do etotolo iik me jo areco.

¹⁰Rwot bino pug nakanaka. Rubanga nin, Okwe Sion, bino pug pi kare lung. Pakunu Rwot!

Sabuli 147

Pako Rubanga Won Twer

¹Pakunu Rwot! Wero were me pako Rubanga wa ber; ekelo yomcuny, doko etie gikame opoore pi mine pak.

²Rwot tie gero Yerusalem; en etie dwoko jo me Isirael kame oudo bin omako di oko tero obukui.

³En ecango jo kame cuny gi cwer, doko etwetweo aporeso gi.

⁴En etieko moko wel me acerin; en etieko mino gin dedede nying gi.

⁵Rwot wa dwong, doko etie kede twon twer; niang mere tut tut kalikame wacere.

⁶Rwot kiarao malo jo kame kodio, do ereto jodubo piny i lobo.

⁷Werunu but Rwot di imienu pwoc; gounu wer amit ne Rubanga wa kede arigirigi.

⁸En eumo malo kede idoun; en emio kot cwei i lobo, di eko mino lum dongo i wi imukuran.

⁹En emio leini cam gi, ka idwe me agak da okok en emio gi cam.

¹⁰Likame teko me asigira en kame yomo cunye, amoto dwiro me ngaringo;

¹¹do Rwot cunye yom i kom jo kame lwore, jo kame gen gi tie i kom amara mere kalikame lokere.

¹²Pak Rwot, Okwe in Yerusalem! Pak Rubanga ni, Okwe in Sion!

¹³Piento en kame emio irutei nin bedo tek; emio winyo but jo ni kame tie i diere ni.

¹⁴En kame egwoko mulem i ikor ni; en epiti di iko yeng kede engano kame konungo kiber.

¹⁵En emio cik mere i lobo, di kop mere ko tuno awakawaka.

¹⁶En epeto akako bala yer atar me oromo; esasaro ekuna piny i lobo bala buru.

¹⁷En elwolwomo akako piny bala kide; ngai en kame karuno kanyakino ngico mere?

¹⁸En ewaco dwan di akako ko loi; emio yamo mere buko di pii ko mol.

¹⁹En emio kop mere but jo mege; en emio jo me Isirael iswilia kede cik mege.

²⁰En pwodi likame etimo kamanono but ateker moro apat; gin likame kingeo iswilia mege. Pakunu Rwot!



Sabuli 148

Lwongo but Cwec Lung pi Pako Rubanga

- ¹Pakunu Rwot! Pakunu Rwot i malo; Pakenu i okwidu!
- ²Pakenu, wun imalaikan mege dedede; pakenu wun jo yi mege dedede!
- ³Pakenu, wun ceng kede duwe; pakenu, wun acer kame rieny dedede!
- ⁴Pakenu wun malo kame tie kakawiriwir, karacel kede wuda pii kame tie kakabor kalamo malo!
- ⁵Mito gin dedede kipak nying Rwot, piento en bin emio cik di gin kiko bedo tie.
- ⁶En bin esipo gi i kadedere gi pi ikar kede ikar; emio cik kalikame gin kikaruno turo.
- ⁷Pakunu Rwot ki piny, wun leini kiyilyili me nam kede pie dedede atat,
- ⁸wun meny me kot kede akako, toyo kede ekuna, yamo atek me kot kame lubo cik mere!
- ⁹Pakenu, wun mori kede imukuran dedede, yen anyak kede yen seda dedede!
- ¹⁰Pakenu wun leini me obar kede doke dedede, jamini aliao alia kede winy apor!
- ¹¹Pakenu, wun abakai me lobo kede jo dedede, jotel kede jopug dedede me piny;
- ¹²awobe kede anyira, jo oti kede joatino karacel!
- ¹³Mito gin kipak nying Rwot, pien nyinge kenekene en kame dwong; deyo mere kalamo gi dedede kame tie i piny kede i malo.
- ¹⁴En etieko mino jo mege odoko tek, tetekeny jo mege dedede agenere pake, gin jo me Isirael kame en emaro. Pakunu Rwot!

Sabuli 149

Wer me Pak

- ¹Pakunu Rwot! Werunu wer anyen but Rwot; pakenu i kacokere me jo mege agenere.
- ²Mito jo me Isirael bed kede yomcuny i kom Ngacwec gi; mito jo me Sion leli pi Abaka gi.
- ³Mito kipak nyinge di kimielo, di kigoo ne wer amit kede ayekeyeke kede arigirigi.
- ⁴Pien Rwot cunye yom i kom jo mege; en etubuso jo amwole i yore me mino gi bwono jokwor gi.
- ⁵Mito jo mege agenere leli pi deyo gi; mito kiwer pi kilel i kabuto gi.
- ⁶Mito kipak Rubanga kede dwan amalalo, di epima kame bit tuni tuni tie i cing gi,
- ⁷pi timo onyanga i kom atekerin kede mino jo alola;



⁸pi tweno abakai gi kede epingo, kede tweno jodongo gi kede irikoi;

⁹pi keto i tic ngolo kop kame komoko i kom gi. Manoni en deyo me jo mege dedede kame genere. Pakunu Rwot!

Sabuli 150

Pakunu Rwot

¹Pakunu Rwot! Pakunu Rwot i kabedo mere kacil; pakenu i kateko mere kopetere i malo!

²Pakenu pi tice me twer kame en etimo; pakenu pi dwongo mere kame kalamo dedede!

³Pakenu di ikutunu agwara; pakenu kede gita kede adungu!

⁴Pakenu kede ayekeyeke di imielunu; pakenu kede adungu kede bilo!

⁵Pakenu kede suanin abatal me goc; pakenu di i gounu kitek suanin abatal me goc!

⁶Mito gi dedede kame tie kede wei pak Rwot! Pakunu Rwot!



Agole

Agole 1

Bero me Agole

- ¹ Agole ka Sulumani, wot ka Daudi abaka me Isirael.
- ² Agole nogi mio dano riekoo kede pwoony abeco, doko kikelo niang i kom kope mogo kame dwong gi tut.
- ³ Doko kipwoonyo dano timo gi dedede i yore me riekoo, kede bedo dano kopooore, kame timo ne jo gikame poore kede kame tero jo dedede di rom aroma.
- ⁴ Kipwoonyo jo kame kwia piny bedo kede riekoo, doko kipwoonyo jo apwodi dongo adonga bedo kede ngec kede tam kopooore.
- ⁵ Jo ariek winyo gi di riekoo gi ko meede, doko kimio jo aniang ngeo gikame kipoore timo,
- ⁶ tetekeny kiko niang kope me agole kede kame dwong gi omungere, kope kame jo ariek yamo.

Acora but Jo Atino

- ⁷ Lworo Rwot en acakini me bedo kede ngec. Jomingo likame paro bedo kede riekoo amoto lubo pwoony kame komio gi.
- ⁸ Atin na, winyo acora kame papa ni mii, doko kur idagi winyo pwoony ka toto ni,
- ⁹ pien pwoony gin twero iiko iponeso ni doko beco, bala egoe acil me umo wic, arabo bala eriko kame dano ngapo i ngute di eko doko cil.
- ¹⁰ Atin na, ka jodubo obitao tam ni, kur iyei kop gi.
- ¹¹ Ka kiwaco ni be, “Bia oupere outunu okiunu jo di okounu neko gi; ootunu okiunu jo ali kede kop okounu suro gi abongo tien kop moro da!
- ¹² Ongolenu neko gi akadi di kom gi pwodi yot.
- ¹³ Wan obinunu udo jame me epone dedede me wel amalo di okounu pongoo ude wa kede gikame oyakunu.
- ¹⁴ Bia idony but wa, di okounu bino nywako gikame oyakunu.”
- ¹⁵ Atin na, kur idonyi i tim gi. Kur ilub iponeso gi.
- ¹⁶ Gin tien gi dwir ot timo gikarac; kom gi miel amiela ot timo nek.
- ¹⁷ Kony li me ciko arama di winyo kame imito mako da tie neno;
- ¹⁸ do akodi jo nogo ciko obek kame lokere mako gin kikom gi; kiciko gikame kwanyo kuo gi.



¹⁹Manoni en gikame timere ne jo kame yako jame me jo tetek; tim nono mio gi kikei kuo gi.

Rieko tie Lwongere

²⁰Rieko tie lwongere i dier yote; en etie lwongere i atalen kede dwan amalo.

²¹En elwongere i kakame jo opong iye kede i kacokere atie i erute me bomba be,

²²” Wun jomingo, imitunu dong bedo jomingo pi kare karom amene? Joacae cuny gi bino bedo yom bedo kede acae i kom ngec pi kare karom amene, kede jomingo da cuny gi bino dagi ngec pi kare karom amene?”

²³Cikunu yitu iwinyunu epone kame abunano wu kede; abino mino wu tam na di ako nywako kede wu kop kame tie i cunya.

²⁴Ango abedo lwongo wu do wun ikounu dagi; arieo cinga gweto wu do likame tie dano oko yei.

²⁵Itiekunu dagi tam dedede kame ango amio wu, di likame ikounu yei lubo epone kame arieo wu kede.

²⁶Aso ango da abino nyero wu kame can opoto i komu; abino yamo anywar anywar kame lworu opoto ne wu,

²⁷i kare kame lworu bino ngoole ne wu kede bala yamo me kot, di can ko poto i komu bala apipiru, kede di itienu kede lito kede cweracuny.

²⁸Di do ikounu bino lwonga, do likame ango abino gamo dogu; ibinunu mona i kabedo dedede, do likame ibinunu wuda.

²⁹Piento cunyu otieko dagi bedo kede ngec, doko da likame iyeunu bedo kede lworu but Rwot.

³⁰Idagunu gamo tam kame acoro wu kede, doko da likame ilubunu epone kame arieo wu kede.

³¹Pi manono, ibinunu udo adwogini me tice wu, di iik wu areco nogo ko bino yengo wu paka wun dagi gi.

³²Jo kame kwia piny to pi rwenyo yongayo, doko da ajajalun me jomingo neko gi;

³³do jo kame yei lubo kope nango bino bedo abongo peko moro. Kibino bedo mulem abongo lworu can moro.”

Agole 2

Bero kame Wok ki Rieko

¹Atin na, ka iyei lubo kope na, di iko kano cik na i cunyi bala gikame pire tek,

²di iciko yiti i kom kope me rieko, kede di iketo cunyi niang i kom gi;

³ka ateteni in ibako dogi pi bedo kede ngec, di ikwao pi bedo kede niang;



- ⁴ka in ibedo mone bala nyonyo siliba, di imoe bala gimoro me wel amalo kame kokano,
- ⁵manono bino mino iniang dwong me lworu Rwot di iko bedo tie kede ngec i kom Rubanga.
- ⁶Pien Rwot en kame mio rieko; kope me doge kelo ngec kede niang.
- ⁷En emio kony but jo kame cuny gi cil, en egwoko jo kame bedo abongo raco moro.
- ⁸En egwoko jo kame timo gi dedede i yore me ateni but jo icegun, doko da egwoko jo mege kame genere.
- ⁹Kame iyei lubo kop na, manono bino mino ingeo gi kopoore, di itimo ne jo gikame poore, kede di itero jo dedede di rom aroma, ibino niang gi dedede aber me atima;
- ¹⁰pien cunyi bino pong kede rieko di ngec ko kelo yomcuny i kuo ni.
- ¹¹Tam kopoore bino gwoki, doko da niang bino dari,
- ¹²di kiko laki likame itimo gimoro arac, kede kibun jokame loloko kope,
- ¹³gin jo kame weko yongayo me kuo kopoore di kiko donyo lubo yongayo acol me dub.
- ¹⁴Gin jo kame lelo pi timo gikarac, doko cuny gi yom pi yote areco;
- ¹⁵gin jo kame tie kede iponeso areco, doko da likame kigenere.
- ¹⁶Rieko bino laki ki cing dako acar, dako angadote kame ngangalo in kede kope mege amit pi wano cunyi;
- ¹⁷dako kame weko cware kame enyomere kede, di wie ko wil kede isikan mere kame etimo i nyim Rubanga.
- ¹⁸Pien ka in ioto i ode udo itie lubo yongayo ateri i to; yongayo mere teri i kabedo me jo oto.
- ¹⁹Ngat aoto bute likame bobo dwogo; likame bobo edwogo i yongayo me kuo.
- ²⁰Pi manono, lubi ekite kuo me jo abeco, dongi adonga lubo yongayo me jo kame timo gi dedede i ateni.
- ²¹Pien jo kame cuny gi cil bino bedo i lobo noni, jo kame li kede raco moro bino bedo iye;
- ²²do kobino kwanyo tenge jo areco ki lobo noni, di oko puputo jodubo kiye bala doi.

Agole 3

Acora but Jo Atino

- ¹Atin na kur imi wii wil kede pwony na, do kan cik na i cunyi.
- ²Pwony na bino mini kuo alac kede mulem.



- ³Bed dano awor kede agenere nakanaka; kom twei gi i nguti; wandiko gi i cunyi.
- ⁴Ka itimo kamanoni, ibino udo nying aber kibut Rubanga kede kibut jo.
- ⁵Gen Rwot kede cunyi dedede. Kur igengere i kom rieke kame in itie kede.
- ⁶Mi Rubanga teli i gi dedede kame in itimo, di en eko bino rieno ni yongayo kame in ilubo.
- ⁷Kur in do inenere keni be iriek; kenekene bed kede lworu but Rwot di iko weko timo gikarac.
- ⁸Ka in itimo kamanono, ebino bedo ni bala yat kame cango komi kede kame kweo aramo ni.
- ⁹Mi Rwot gi dedede kame in itie kede pi mine wor, di imie dul me agege me anyakini kame in ipuro.
- ¹⁰Manono bino mino dere ni pong kede cam, doko iko bedo tie kede bwini atos kalamo.
- ¹¹Atin na, kur icai pwoony kame Rwot mii pi rieni, doko da kur iol kede kop kabunano in kame en ewaco ni,
- ¹²pien Rwot bunano ngat kame en emaro, bala kame papa me atin bunano kede wode kame cunye tie i kome.
- ¹³Etie kede yomcuny ngat kame doko riek, kede da ngat kame udo niang,
- ¹⁴pien ud kame wok ki yi gi tot kalamo kame wok ki siliba; abar kame tie i yi gi kalamo abar kame tie i saabu.
- ¹⁵Rieke obedo gikame pire tek kalamo kide me wel, likame tie gimoro kame in imito kame kotwero poro kede.
- ¹⁶I cinge tetu cam tie iye kuo alac; i cinge tetu ngodal tie iye abar kede wor.
- ¹⁷En eteli bedo kede kuo me yomcuny, doko mulem tie i yote mege dedede kame en eteli iye.
- ¹⁸Rieke tie bala yat kame mio kuo but jo kame lide baba i kome; jo kame moko i kome tie kede yomcuny.
- ¹⁹Rwot ocweo piny kede rieke mere; en ecibo malo kede niang mere;
- ²⁰kede ngec mere en emio pie atie piny i lobo otutucun, di idoun da ko cwei kot.
- ²¹Atin na, kur iwek rieke kede tam kopooore rweny kibuti,
- ²²pien gin kibino mini kuo alac, di ecil bala gikame tubuso ngut dano.
- ²³Manono bino mino kuo ni bedo mulem abongo tieni cetar.
- ²⁴Ka ibedo piny wei, lworu likame bino maki; ka ibuto, ibino nino lejeleje.



- ²⁵Likame ibino bedo kede lworu pi can mogo angoole angola, bala kame ngoole poto i kom jo areco bala yamo me kot;
- ²⁶pien Rwot en kame bino bedo gen nin, en ebino gwoki likame obek mako tieni.
- ²⁷I esawa kame ikaruno timo kede bero, kur idagi timo bero ne jo kame ipoore timo negi.
- ²⁸Kur iwac ne ngawoti be, “Oti iko dwogo adwoga, diki abino mini,” do di esawa nono udo in itie kede gikame en emito.
- ²⁹Kur ibed kede iik moro arac i kom ngakio ni kame bedo di oketo gen mere buti.
- ³⁰Kur ilok kede jo atatai abongo tien kop, di likame tie raco moro kame kitimo ni.
- ³¹Kur ingobelo jame me jo atie kede tim me gero, doko da kur iyei lubo ekite me kuo gi,
- ³²pien jo kotieko bilor tie bala gi me kwer i nyim Rwot; do en egeno jo ekite gi cil.
- ³³Rwot kelo ilam i paco me dano arac, do en emio winyo i kabedo me dano kopoore.
- ³⁴En enywaro jo kame tie kede anywar, do etie kede kisa but jo amwol.
- ³⁵Jo ariek bino bedo jo kame koworo, do jomingo lewic bino mako gi.

Agole 4

Bero kame Wok ki Rieko

- ¹Idwe na, winyunu pwoy kame papa wu tie mino wu. Cikunu yitu tetekeny iudunu niang;
- ²pien kope kame ango atie pwoy wu beco, kur idagunu pwoy na.
- ³I kare kame oudo ango pwodi atitidi kede, di atie kede jonywal na, di oudo toto na mara,
- ⁴papa na oudo pwoya di ewaco na be, “Kan kope na i cunyi; lub gikame aciki timo, di iko bino kuo.”
- ⁵Ud rieko kede niang! Kur imi wi wil kede kope kame awaco ni amoto dagi gi.
- ⁶Kur iwek rieko, en eko bino gwoki; kom mare, di en eko bino dari likame gimoro timi.
- ⁷Gikame pire tek kame ipoore cako udo me agege en rieko; doko da udo niang atat miero tel ne jame dedede kame in iudo yongayo.
- ⁸Mie ebed gikame pire tek twatwal, di en eko bino mini dwongo. Lide kitek, di en eko bino kelo ni wor.
- ⁹Rieko bino bedo ni bala egoe acil me umo wic; en ebino bedo ni bala ocoro acil me angosibib.



- ¹⁰Atin na, cik yiti iwiny kope kame awaco ni di iko yei gi, tetekeny ibed kuo pi mwakini atot.
- ¹¹Ango atieko pwonyi epone me bedo ngat ariek; atieko nyuto ni epone me kuo kopooore.
- ¹²Kame itie ot likame gimoro bino rire i nyimi, doko da ka iringo likame ibino getar.
- ¹³Lide alida baba i kom pwony kame iudo; kur iweke ebwoti; gwoke kiber, piento en ebedo kuo ni.
- ¹⁴Kur idonyi i tim me jo areco; kur ilub ikiteso me jo kame timo gikarac.
- ¹⁵Kom weke; kur idonyi iye; pange di iko giri kato akata.
- ¹⁶Pien jo areco likame nino tuno di kitieko timo gimoro arac; wang gi bedo twolo tuno di kitieko mino ngatamoro ogetar.
- ¹⁷Tim areco tie bala mugati kame gin kicamo, doko da tim me gero tie bala bwini kame gin kimato.
- ¹⁸Do yongayo kame jo kopooore lubo cal bala lero kame bino owal owal, kame meede ameda tuno ceng wok.
- ¹⁹Yongayo kame jo areco lubo cal bala piny acol cucucuc; likame gin kitwero ngeno gikame getaro gi.
- ²⁰Atin na, ket tam ni winyo kope na; cik yiti winyo gikame atie yamo.
- ²¹Kur imi gi kiyai tenge kibuti; kan gi i cunyi.
- ²²Gin kimio kuo but jo kame cane paka udo gi, doko da kikelo cango i kom jo nogo.
- ²³Gwokere i yore dedede i kom gikame cunyi paro, pien cuny dano en atan me kuo.
- ²⁴Wek waco kope me abe; mi kope kalikame obedo me ateni bed bor ki dogi.
- ²⁵Cik wangi neno anyim, kur ilok wangi karamoro ace.
- ²⁶Ket tam ni ngingico yongayo kame itie lubo, di gi dedede kame itimo ko bino cobere kakare.
- ²⁷Kur itagere tuni kede tuca; mi tieni riei ariea yongayo kur iparao timo gimoro arac.

Agole 5

Ikwenyar i kom Tim me Adote

- ¹Atin na, ket tam ni winyo kope na me rieko; cik yiti i kom kope na me niang,
- ²me wek ibed kede tam kopooore, di dogi ko donyo yamo kope me rieko.
- ³Pien kop kame wok ki dog dako acar winyiwinyi bala mokic; yamo mere ber kalamo mo me olibeti;



- ⁴do i ajikini dako nono doko kec bala eusuk, en edoko bit bala epima atie kede lebe tuni tuni.
- ⁵En eteri i to; yongayo me kuo mere teri i kabedo me jo oto.
- ⁶En likame etiro lubo yongayo me kuo; do en enare parao, di likame eko ngeno gikame tie timere da.
- ⁷Nan do, atin na, winy gikame atie waco ni; kur idagi winyo kope me dogo.
- ⁸Mi kuo ni bed bor kede dako nono, kom kur inok ekeko me ode da;
- ⁹aso ka li, in ibino mino jo apat lunyo udo wor kame in itie kede, di jo kame li kede kisa ko bino neki di kare kame oudo pwodi ipoore kuo kede lac,
- ¹⁰di do jo atatai ko bino lak kede abar ni, di gikame icane iye ko ot i ot ka ngatamoro.
- ¹¹I kare me ajikini me kuo ni, ibino cur i kabuto, di komi oroi roc,
- ¹²di iwaco be, “Okwe, bin ango adagi winyo pwony, cunya oudo dagi kop kame riea!
- ¹³Likame ayei winyo kop me jo koudo pwonya, likame aciko yita but gi.
- ¹⁴Nan do atieko tuno kakame lewic bino maka kede i nyim jo kocokere.”
- ¹⁵Mat pii me atan nin kenekene, manono en dako ni; pii kame mol wok ki kulo nin kikomi.
- ¹⁶Benyo, miero pii me atan nin mol atatai, ebed parapara i yote kago?
- ¹⁷Gwoke ebed merin keni, do weko me nywako kede jo atatai.
- ¹⁸Atan nin, manono en dako ni, poore ebed tie kede winyo; doko da ipoore bedo kede kilel pi dako ni kame inyomo di pwodi in eponga,
- ¹⁹en ebedo dako acil di ibus bala amiem. Miero kome yom cunyi i kare dedede; miero amara kame etie kede buti pong kuo ni odocon.
- ²⁰Woda, pinyo kamio ibedo kede amara but dako apat, di iko gwako kor dako angadote?
- ²¹Pien Rwot neno gi dedede kame jo timo, doko en engico kabedo dedede kame jo oto iye.
- ²²Dub me jo areco obedo gikame ciko gi; gin kimoko i bwoi me dub gi.
- ²³Gin kirwenyo di kiko atotoun pi mingo gi, kede pi kite kalikame kitwero didio kede mit gi.

Agole 6

Ikwenyar apat Ace

- ¹Atin na, benyo, itieko cungo ne dano kalikame ingeo di icikere pi culo banya mere?



²Benyo, kope me dogi otieko lokere doko bala owic kame maki, arabo cikere ni otieko maki bala obek?

³Atin na, nan udo in do itie i cing ngat nono, do man en gikame ipoore timo tetekeny ibwoti. Suny yai ioti di iko bako ne dano nono dogi me wek esasiro in.

⁴Kur iyei nino mako wangi; kur inuri;

⁵marao kuo ni bala atil kame marao kuo mere ki cing ngadwar leini, arabo bala winyo kame marao kuo mere ki cing ngadwar winy.

⁶In nganyapo, kong ber oti ineni kite kame cukuno tio kede me wek idok riek.

⁷Gin kili kede ngatel, ejakait amoto ngapug moro,

⁸do kicoko cam i kare me iporo; i kare me kac gin kicoko gikame kipitere kede pi kuo.

⁹In nganyapo iyaro dong buto abuta tuno awene? Kara iyaro cei ki wang nino awene?

¹⁰Iwaco be kong ber imito bilo nino moro acecek, be kong ber imito buto atitidi;

¹¹do can bino poto i komi bala ngayak, bala ngayi kotieko iikere kede jame mege me yi.

¹²Dano akony mere li, dano arac, bedo wire di eyamo kope me abe;

¹³en emimio wange atatai di etimo gianyuta mogo ace kede tiene amoto kede cinge pi umo angalo mere.

¹⁴Akodi dano nono tam mere likame ber doko etimo iik areco, en nakanaka ekelo atwomutwomun.

¹⁵Can bino ngoole poto i kom akodi dano nono; i esawa atitidi kenekene en ebino udo awanon kalikame cango.

¹⁶Tie jame kanyaare kame Rwot dagi, jame kame tie bala gi me kwer bute;

¹⁷gi nogo ige: neeno me ewaka, leb ayamo kope me abe, cing kame onyo remo me dano ali kede raco moro,

¹⁸cuny atie kede iik me tim areco, tien kame onyaro ot timo gikarac,

¹⁹mujura kame mio ijura me abe, kede dano kame kelo atwomutwomun i paco.

Ikwenyar i kom Timo Adote

²⁰Atin na, gwok cik kame papa ni omii, doko da kur idagi pwony ka toto ni.

²¹Kan gi i cunyi nakanaka; twei gi i nguti.

²²Kame in itie ot, gin kibino nyuto ni yongayo; kame in itie buto, gin kibino gwoki; doko da kame in icei, gin kibino yamo kedi.



- ²³Pien cik tie bala etala, pwony tie bala lero, kope kame bunano dano pi riene obedo yongayo me kuo.
- ²⁴Gin kigwoki ki kom mon me cuo, ki kope amit awao cunyi kawok ki dog mon acar.
- ²⁵Kur iyei cilo gi wai cunyi, amoto keto tam ni i kom neeno gi me caro.
- ²⁶Icuo karuno wilo buto kede malaya kede mugati acel, do ngat amito dako me icuo udo ejalo kuo mere kikokome.
- ²⁷Benyo, dano twero keto mac i kore di mac nono likame ko wango igoen mege?
- ²⁸Arabo benyo, dano twero nyono itonge me mac di itonge nono likame ko wango tiene?
- ²⁹Manono da en gikame timere ne dano kame buto kede dako me icuo wad gi; ngat kame buto kede dako ka ngawote bino beo i alola.
- ³⁰Jo likame cao ngakuwo kame kwalo cam pien kec oneke;
- ³¹aso di kame komake, en epoore mino cul akalamo gi nono tien kanyaare; miero en ejal jame dedede kame en etie kede.
- ³²Do icuo kame timo adote udo likame wie tio; ngat atimo kamanono udo etie nekere kene.
- ³³En eudo awanon kede lewic, doko lewic mere likame kwanyere ki wie.
- ³⁴Pien nyeko mio icuo konyomere bedo kede twon gero kalikame wacere; en eli kede kisa atwal atwala kame eyabo culo raco kame kotimo ne.
- ³⁵En likame ebino yei cul moro; en ebino dagi akadi twon giamia karom amene.

Agole 7

- ¹Atin na, kur imi wi wil kede kope na, doko kan cik na i cunyi.
- ²Gwok cik na di iko bino kuo, gwok pwony na bala kame igwoko kede tong wangi.
- ³Mak cik na i cingi baba, wandiko gi i cunyi.
- ⁴Wac ne rieko be, “In ibedo amina,” doko da lwong niang atut be ngawoti me amara,
- ⁵tetekeyn gin kigwoki ki kom dako acar, ki kom dako angadote kame ngangalo in kede kope amit.

Dako Angacaro

- ⁶Ceng moro acel abolo wanga ki dirisa me oda,
- ⁷di ako neno ipongai kame pwodi tie kede niang anak, do twatwal mere ako ngico eponga acel kikom gi kame wie likame tio.
- ⁸En oudo etie ot i yongayo, di etie i akarakara me yongayo kame tie i nget ot kame dako moro bedo iye. En eko donyo lubo yongayo kame oto paco ka dako nono



- ⁹wang otieno di piny otieko doko col.
- ¹⁰Dako nono oko cako bino tetu bute, di oudo engapere bala malaya, di etie kede iik mere i cunye.
- ¹¹En oudo ebedo dako ayamo lelelele, dako kalikame gengere, doko da likame emaro bedo i paco;
- ¹²en oudo tic mere rimo piny esawa dedede i yote kede i atalen kede kabedo dedede mono cuo.
- ¹³Dako nono oko gwake di oko donyo noto leme, di eko waco ne awobi nono di wange tek be,
- ¹⁴” Atieko tin culo kwongere na, pien amio giayala awanga, nan ringo tie i oda.
- ¹⁵Aso nan ango abino pi riamo kedi; oudo atie moni twatwal, do nan ine audi!
- ¹⁶Atieko peto kabuto na kede isukan angwarangwara me Misiri;
- ¹⁷atieko da kikiro moe angwe kur i kabuto na, moe kame kolwongo be mura, aloe kede sinamon.
- ¹⁸Nan do bia ooti ocob mit wa iye tuno odiko; ooti oyom cuny wa kede tim me amara.
- ¹⁹Pien cwara nan likame tie i paco, en etieko ot i sapali abor.
- ²⁰En emako sente atot eoto kede; en ebino dwogo i kor duwe.”
- ²¹Aso dako nono oko wano cunye kede kope mege me esupe; kope mege kame winyo mit oko mino awobi nono oyei.
- ²²Cucuto di do en eko cako lubo dako nono, bala twon kame kotie tero ot ngolo, bala atil kame tie rwako tiene i obek,
- ²³tuno di tong ocobo emany mere. Oudo ecal bala winyo atie ot moko i tol, di oudo likame engeo be ebino culo manono kede kuo mere.
- ²⁴Aso, awobe na, nan winyanu; cikunu yitu i kom kope me dogo.
- ²⁵Kur cunyi yei timo gikame en etimo; kur iparao lubo yote me kuo mere.
- ²⁶Piento en etieko wanakino jo atot, jo atutututu otieko poto i cinge.
- ²⁷Ode en yongayo kame tero dano kabedo me jo oto, ekelo ne dano to.

Agole 8

Pako Bero me Rieko

- ¹ Rieko tie lwongere; niang atut okiarao dwane tetekeny jo winyi.
- ²En ecungo kakimukurur me nget gudo, kede i akarakara me yote.
- ³I kakame jo donyo i bomba kiye, i erute me bomba en etie lwongere be,



- 4” Okweunu, ango atie lwongo wu; ango atie lwongo jo dedede akuo i wi lobo.
- 5Wun jo kame pwodi ikwianu piny, pwonyerenu bedo kede tam kocato; wun jo aming, pwonyerenu bedo jo ariek.
- 6Winyunu, pien ango abino waco kope abeco twatwal, dogo bino waco gikame tie kakare.
- 7Doga bino waco gi me ateni; kope me abe tie bala gi me kwer buta.
- 8Kope dedede kame dogo waco obedo kope me ateni; likame tie moro iye kodwanyere amoto kobedo me abe.
- 9Kibut ngat atie kede niang gin kibedo kope koriere, kibut ngat atie kede ngec gin kibedo kope me ateni.
- 10Yerunu pwony na akaka siliba; yerunu ngec akaka saabu kame kojililo.
- 11” Pien riekoo ber kalamo kide me wel amaloo; likame tie gimoro kame wun imitunu kame kosobolo poro kede.
- 12Ango riekoo, atie kede niang atut; atie kede ngec kede tam kopoo.
- 13Bedo kede wor but Rwot en dagi gikarac; ango cunya dagi ewaka, kede tingere, kede tim areco, kede yamo kope me abe.
- 14Ango amio tam aber doko atimo gi dedede kede riekoo; atie kede niang kede teko.
- 15Ango en kame akonyo abakai i tic gi me pug, ango en kame akonyo gi keto iswilia kopoo.
- 16Jopug dedede pugo kede kony kame ango amio gi, karacel kede jotice adongo, jo dedede kame pugo i yore kopoo.
- 17Ango amaro jo kame mara, doko jo kame cane mona wuda.
- 18Ango atwero mino wu iudunu abar kede wor, atwero mino wu lonyo abedo nakanaka kede mulem i yote dedede.
- 19Gikame ango amio ber kalamo saabu, ekalamo kiton saabu kame kojililo, doko da gikame udere kibuta ber kalamo siliba kame kotwako kiber.
- 20Ango alubo yongayo me kuo kopoo, ekite kuo kame ango alubo en me timo gi dedede i yore me ateni;
- 21amio jo kame mara abar, apongo ude gi kede jame abeco.
- 22 “Rwot omiango abedo tie me agege i acakini me tic mere, ango riekoo abedo tic mere me agege me kare kasek.
- 23Sek kede sek ango oudo koketa, koketango me agege di pwodi likame lobo ocakere.
- 24Konywalango di pwodi name adongo li, di ataneko kopong kede pii pwodi li.



- ²⁵Ango aneeno i lobo ni di pwodi likame kotimo mori, di pwodi likame kotimo imukuran da,
- ²⁶di pwodi likame Rubanga ocweo wi lobo kede ebar kame tie iye, akadi dul moro atitidi me lobo kame tie i piny.
- ²⁷Oudo ango atie i kare kame en ecibo kede malo, i kare kame en egiro kede wi nam adwong lukaro, kariamo me edou kede wi lobo,
- ²⁸kakame en eketo kede idoun malo, kakame en ecibo kede wen pie me name adongo,
- ²⁹di eko cibo ne pie me name adongo ikor kame kijik iye, tetekeny pie kur tur cik mere. Oudo ango atie kakame en ecibo kede acakini me lobo.
- ³⁰Oudo ango atie i ngete bala ngatic atie kede diru, ango oudo amie yomcuny ceng dedede, di alelo i nyime nakanaka,
- ³¹oudo alelo pi piny mere, doko di cunya yom pi jo.
- ³²” Idwe na, nan winyunu gikame ango atie waco ne wu. Kitie kede yomcuny jo kame lubo gikame ango awaco.
- ³³Winyunu gikame kopwonyo wu iye ikounu bino doko jo ariek, kur idagunu gi.
- ³⁴Kitie kede yomcuny jo kame winyo kop na, jo kame bedo ciko wang gi i erute na ceng dedede, jo kame kura i dog ekeko.
- ³⁵Pien ngat kame wuda, udo eudo kuo, doko cuny Rwot bino bedo yom kede;
- ³⁶do jo kalikame wuda, udo kiwanere ken gi; jo dedede kame daga udo kimaro to.”

Agole 9

Rieko Lwongo Jo Bute

- ¹Rieko otieko gero ode, en esisipo ne ipirin kanyaare.
- ²En etieko neko leini me ebaga, etieko nyalo bwini me amata, doko da etieko iiko emesa me cam.
- ³En etieko oro anyira jotic mege, gin kitie lwongo jo ki kakokiar me bomba be,
- ⁴” Wun jo kame ikwianu piny bianu kan!” Rieko waco ne jo kalikame wi gi tio be,
- ⁵” Bianu icamunu cam na kede imatunu bwini kame ango anyalo.
- ⁶Wekunu kwina piny bedi, di ikounu bino kuo. Bedunu i ekite kuo kame nyuto niang.”
- ⁷Ngat kame tamo rieno ngacaipiny riamo kede ayet; ngat kame bunano ngat arac udo awanon.
- ⁸Kame ibunano ngacaipiny, en elokere dagi; do ka ibunano ngat ariek, en ebino mari.



⁹Ka ipwonyo dano ariek, en ebino medo doko riek; ka ipwonyo dano kame ikiteso mege opoore, ngec mere bino meede.

¹⁰Lworo Rwot en acakini me riek. Ka in ingeo Ngat Kacil, udo itie kede niang atut.

¹¹Pien ango riek abino medo ni ceng me kuo; abino medo mwakini me kuo ni.

¹²Ka in iriek, riek nono bino konyi in kikomi; ka in ngacaipiny, in kikomi en kame ibino yeno raco mere.

Lwongo kede Cikere ka Mingo

¹³Mingo cal bala dako kalelelele, dako akwia piny, doko da di eli kede lewic.

¹⁴En ebeto i ekeko mere arabo i kabedo idelelei malo me bomba,

¹⁵di elwongo jo abeo kanono, jo kame tie tiro yote gi atira, di ewaco negi be,

¹⁶” Wun jo kame kwia piny paraunu kan!” Do en ewaco ne jo kalikame wi gi tio be,

¹⁷” Pii kame kokwalo akwala winyiwinyi; mugati kame kokwalo ka icamo i mung eyomo cunyi.”

¹⁸Do gin likame kingeo be to tie kanono; likame kingeo be wele ka dako nono otieko donyo i kabedo me jo oto.

Agole 10

Agole ka Sulumani

¹Magi en agole ka Sulumani. Atin ariek mio papa mere bedo kede yomcuny; aming mere mio toto mere bedo kede wangcuny.

²Abar kame dano udo i yore arac likame tie kede bero moro, do bedo kede ekite kuo kopooore laki ki to.

³Rwot likame weko kec neko dano kopooore, do en egengo dano arac likame udo gikame cunye mito.

⁴Nyapo kelo can, do tic atek kelo abar.

⁵Atin ariek koko cam ki potu i kare me kac, do atin kame buto abuta i kare me kac kelo lewic.

⁶Ngat atie kede ekite kopooore udo winyo, do dog dano arac yamo kope kame umo tim mege me gero.

⁷Ngat aber kobino yutuno en nakanaka, manono obedo winyo; do wi jo bino wil kede nying ngat arac.

⁸Ngat kame wie tio yei lubo tam kame komie, do ngat kame yamo mingomingo bino riamo kede peko.

⁹Dano ali kede raco moro i kuo mere bedo mulem, do dano kame li kede ateni bino ngere.



- 10**Ngat kame maro umo kop kelo peko, do ngat kame yamo ne dano kop obe kelo mulem.
- 11**Kope kame dano kopooore waco obedo atan amio kuo, do kope me dano arac kano tim me gero.
- 12** Adagadaga twaruno lok, do amara umo raco dedede.
- 13**Kop me rieko wok ki dog dano atie kede niang, do ngamingo komie alola.
- 14**Dano ariek koko ngec apapat, do kope kame ngamingo yamo wao peko doko iyapiyapi kede en.
- 15**Lonyo me ngabar tie bala apama atek kame gwoke; can kelo peko i kom ngacan.
- 16**Cul kame dano kopooore udo en kuo, do ud me dano arac tere i dub.
- 17**Ngat kame winyo kop kame kopwonye kede udo etie lubo yongayo me kuo, do ngat kame dagi tam kame komie me riene, udo etieko parao eko rwenyo.
- 18**Ngat kame ngaabe umo adaga kame etie kede i cunye, doko da dano kame dubo nying jo udo en ngamingo.
- 19**Kope kame dano duro adura likame dub bwot kiye, do dano ariek likame duro yamo.
- 20**Kope kame leb dano kopooore yamo cal bala siliba kame kojililo kiber; tam me dano arac kony mere li.
- 21**Kope kawok ki dog dano kopooore pito jo atot, do jomingo to pi mingo gi.
- 22**Winyo ka Rwot en amio dano baro; tic atek likame sobolo mini iudo abar akalamo.
- 23**Kibut ngamingo, timo gikarac cal acala bala tuko, do tim me rieko kelo ne ngat kame niang yomcuny.
- 24**Gikame ngat arac lworo timere ne, do dano kopooore udo gikame cunye mito.
- 25**Ka yamo ager obuko en etero dano arac, do dano me ekite kopooore dong cungo di etek nakanaka.
- 26**Kibut jo kame mio tic, jonyapo tie negi bala bwini awac acamo lak dano, amoto bala yiro kame donyo i wang dano.
- 27**Lworo Rwot medo kuo me dano, do mwakini me dano arac nonok.
- 28**Gen me dano aber kelo ne yomcuny, do dano arac geno buo ngor.
- 29**Rwot gwoko dano kame bedo i ekite kopooore, do en emuducaro jo areco.
- 30**Likame tie gimoro kame bino yangaro jo kopooore, do jo areco likame bino dong i lobo noni.
- 31**Dog dano kopooore yamo kope me rieko, do kobino ngongolo leb jo kame yamo kope me abe.



³²Dog dano me ekite kopooore yamo kope kame kopwoyo, do me dano arac yamo kope kogomugomun.

Agole 11

¹Rwot cunye dagi misani akwalo jo, do cunye yom i kom misani apimo jame kakare.

²Ewaka kelo lewic. Dano ariek bedo ngat amwol.

³Bedo kuo kede ateni en kame telo jo kame ekite gi cil, do angalo me jo kalikame genere muducaro gi.

⁴Ka Rubanga onyuto lilo mere, abar likame twero konyo dano, do bedo kede kuo kopooore lako dano ki to.

⁵Ekite me kuo kopooore me dano ali kede raco moro mie eudo kuo ayoyot, do dano arac pototo i peko pi tim mege areco.

⁶Ekite kuo kopooore lako dano kame ekite mege cil, do ngat kalikame tie kede ateni moko i obek me iik mege.

⁷Kame dano arac oto, gen kame oudo etie kede da to kede en; jo kalikame paro pi Rubanga geno buo ngor.

⁸Rwot lako dano kopooore ki peko, di dano arac en kame ko lokere pototo iye.

⁹Kope awok ki dog dano kalikame paro pi Rubanga dubo ngawote, do bedo tie kede ngec en kame lako ngat kame ekite mere opooore.

¹⁰Kame dano kopooore oudo mulem, jo dedede me bomba cuny gi yom; bobo da kame dano arac oto, jo dedede lelo.

¹¹Bomba udo dwongo kame jo kame ekite gi cil omie winyo, do kope awok ki dog jo areco rete areta.

¹²Dano kame yamo kope me acae i kom ngawote udo wie likame tio, do dano ariek gire ling alinga.

¹³Ngat akwoto jo sarakino mung me jo apat, do dano kame genere kano mung me jo.

¹⁴Ekodet moroni pototo ka likame komie tam, do peko moro likame twero pototo kakame jo amio tam tot iye.

¹⁵Cungo ne dano kame mito kopo banya di in likame ingee kelo ni peko, do ka in idagi timo kamanono udo peko ni moro li.

¹⁶Dako kangakisa jo woro, do dako ali kede iponeso abeco obedo gi me lewic. Dano aluruluru bedo ngacan, do dano awange tek en kame udo abar.

¹⁷Dano amwol timo ne kome kene bero, do dano ager wanere kene.

¹⁸Cul kame dano arac udo kony mere li, do dano atimo gi kopooore udo cul me ateni.



- ¹⁹Dano kame dong moko timo gikame ber bino kuo, do ngat kame moko amoka timo gikareco bino to.
- ²⁰Rwot cunye dagi jo kame tie kede tam areco, do en cunye yom i kom jo kame bedo abongo raco moro.
- ²¹Ngeunu kiber be jo areco bino udo alola, do jo kopooore bino bwot.
- ²²Dako acil do di eli kede tam aber udo cal bala mwola me saabu kame oketo i um epege pi tamakino tubuso en.
- ²³Gikame cuny jo kopooore mito kelo bero, do gen me jo areco wango cuny jo.
- ²⁴Jo mogo mio gikame kitie kede abongo paro da, do di kiko medo baro ameda; do jo ace nwang kede jamini gi, do can doko ko meede negi ameda.
- ²⁵Ngat amio jame mege di cunye ilajara en ebino medo baro, doko da ngat amio jo pii me amata, eda jo bino mine pii me amata.
- ²⁶Jo lamo dano kame kano kodere pi daro kede wel amalo, do kikwao ne ngat kame cato mege winyo.
- ²⁷Kopwoyo dano acane timo gikame ber, do ngat amo peko ude.
- ²⁸Jo kame keto gen gi i abar gi bino bedo bala boke oner, do jo atie kede ekite kopooore bino bedo bala boke alibaliba.
- ²⁹Ngat kame lolo wi jo i diakal gi likame bino sikao gimoro, di ngamingo nono ko bino doko epasoit me ngat awie riek.
- ³⁰Jo kame ekite gi opooore tie bala yat amio kuo but jo apat, do bedo me gero gero kwanyo kuo me jo.
- ³¹Jo kame ekite gi opooore koculo gi i wi lobo kan, pi manono ateteni kobino da mino jo areco kede jodubo alola!

Agole 12

- ¹Dano kame mito be mie pwoony ariee udo emitto medo ngec mere, do ngat kalikame mito be bunano en udo eming.
- ²Rwot cunye yom i kom dano aber, do en engolo kop i wi dano atie kede iik me tim areco.
- ³Tim areco likame twero gwoko dano tetekeny kur peko pot i kome, do dano kopooore cungo di etek bala yat kame alias mere oduony kakatut.
- ⁴Dako aber kelo ne cware wor, do dako akelo ne cware lewic cal bala buge atie camo cogere mege.
- ⁵Dano kopooore tie kede tam kapooore; do tam kame dano arac mio uci i mac.
- ⁶Jo areco yamo kope kame kelo to, do kope kame jo abeco waco lako jo apat.



- ⁷Kame koreto jo areco, manono bedo ajikini gi, do jo kopoore miere gi dong cungo di tek.
- ⁸Ka dano tie kede tam me rieke jo pwoye, do ngat atie kede tam me mingo jo cao.
- ⁹Eber ka in ibedo dano adana moro acane tic pi udo gi me acama, akaka in tingere bedo ngat adwong do di ili kede gi me acama.
- ¹⁰Dano atie kede ekite kopoore gwoko leini mege, do jo areco kisa gi rom aroma kede gero.
- ¹¹Ngapur atek bedo tie kede cam atot, do jo kame cane timo gimogo akony gi li wi gi likame tio.
- ¹²Gikame jo areco paro pi udo en timo gikarac, do jo kopoore cungo di kitek.
- ¹³Jo areco moko i kope me dub kame wok ki dog gi bala moko i owic, do jo abeco bwot ki peko.
- ¹⁴Kop kame wok ki dog dano en amie eudo jamini abeco; tic kame dano tio tie kede cul moro bute.
- ¹⁵Jomingo nakanaka tamo be gikame gin kitimo beco, do jo ariek yei winyo tam kame komio gi.
- ¹⁶Dano aming ka odoko ger, gero mere bunyo ngere, do dano ariek cunye cao ayet kame koyete kede.
- ¹⁷Dano kame yamo kop me ateni mio ngec me gi kotimere kikokome, do mujura me abe yamo kop me angalo.
- ¹⁸Kope kame kobolo abola yamo mio awanon me apore atut bala kame epima ocobo, do kop kame leb dano ariek waco kelo cango.
- ¹⁹Kope me ateni bedo nakanaka, do kope me abe bedo pi kare atitidi.
- ²⁰Jo kame timo iik me timo gikarac likame tie kede tam me ateni, do jo kame mio tam akelo mulem tie kede yomcuny.
- ²¹Likame tie gimoro arac kame timere ne jo kopoore, do jo areco opong aponga kede peko.
- ²²Rwot dagi jo kame dog gi yamo kope me abe, do jo kame genere yomo cunye.
- ²³Dano ariek likame yecakin yamo gikame en engeo, do ngat aming nyuto mingo mere kakaler.
- ²⁴Jo kame timo tic kitek bedo kede twer, do jo nyapo doko ipasoi.
- ²⁵Par dubo tam me dano, do kope abeco mio dano kweicuny.
- ²⁶Dano atie kede ekite kopoore mio ngawote tam aber, do ekite kuo me dano arac rwenyo ngawote arwenya.



²⁷Nganyapo likame udo gikame emito, do dano atek udo abar apire tek.

²⁸Ekite kopooore en yongayo kame tero dano i kuo, en yongayo kame dano lubo abongo riamo kede to.

Agole 13

¹Atin ariek winyo pwony kame kopwonye kede, do ngacaipiny likame yei be core.

²Jo abeco udo adwokini kobedo jamini abeco pi kope kame gin kiwaco, do jo kalikame tie kede ateni mit gin obedo tim me gero.

³Jo kame gwoko dog gi likame yamo kope atatai gwoko kuo gi, do jo kame yamo atatai poto i can.

⁴Dano anyap cunye twero mito gimoro kede teko dedede, do en likame ebino udo. Do dano atek tic udo gi dedede kame cunye mito.

⁵Dano atie kede ekite kopooore dagi kope me abe, do tim me dano arac obedo me lewic.

⁶Ekite kopooore gwoko dano kame ekite mege cil, do dub reto areta dano arac.

⁷Jo mogo sidiko be kibaro, do kili kom kede gimoro; do jo ace mire be gin jocan, do di kitie kom kede twon abar.

⁸Dano kobaro tio kede abar mere me lako kuo mere, do ngacan gire bedo abongo lwooro moro.

⁹Jo kopooore cal bala etala arieny kitek, do jo areco cal bala etala arieny midumidu.

¹⁰Dano atingere di likame ewinyo kop kelo atwomutwomun, do dano kame gamo tam kame komie bedo kede rieko.

¹¹Abar kame dano udo i yore arac dwogo piny momot momot paka tiek, do abar kame dano cane udo atitidi atitidi nyai.

¹²Ka gikame dano geno likame otimere, cunye bedo kede peko, do ka gikame dano mito ocobere, manono bedo ne bala yat amio kuo.

¹³Ngat kame cao kop kame koyamo ne kelo can i kome kene, do dano kame lubo gikame kociko ne udo giamia me pwoc.

¹⁴Pwony me dano ariek obedo gikame mio kuo; en emio dano bwot likame emoko i owic me to.

¹⁵Tam me rieko mio jo neni kiber, do jo kalikame genere tie i yongayo kame mio can poto negi.

¹⁶Dano ariek timo gi dedede i yore me rieko, do ngamingo nyuto mingo mere.

¹⁷Aor arac kelo peko, do ngacungo agenere kelo anapakin.



- ¹⁸Can karacel kede lewic mako dano kalikame yei winyo pwony, do dano kame winyo acora en eudo wor.
- ¹⁹Etie gi me yomcuny ka dano oudo gikame cunye mito; weko tim areco tie gi arac twatwal kibus ngamingo.
- ²⁰Ngat kame upere kede jo ariek eda edoko riek, do ngaupa me jomingo poto i can.
- ²¹Peko nakanaka lubo jodubo, do jo kame ekite gi opoore udo bero.
- ²²Jo abeco weko ne ikwae kede ikwae gi abar pi gin sikao, do jo areco coko abar gi ne jo kame tie kede ekite kopoore.
- ²³Poti koukaro twero ceko ne jocan cam atot, do jo kalikame tie kede tim me ateni karuno mano gi.
- ²⁴Jo kalikame bitaro idwe gi udo likame kimaro gi, do jo kame maro idwe gi dao gi pi rieno gi.
- ²⁵Jo kame tie kede ekite kopoore bedo tie kede cam kame romo gi, do jo areco bedo kec kec.

Agole 14

- ¹Mon ariek dongo miere gi, do mon aming turo miere gi pi mingo gi.
- ²Dano kame ekite me kuo mere ber lworu Rwot, do ngat kame ikiteso mege reco cao Rwot acaa.
- ³Yamo me joewaka tie bala ebela kame bungo gi pi ewaka gi, do kope kame jo ariek yamo gwoko gi.
- ⁴Kakame ecuka li kiye cam da bedo li kiye; ecuka en kame kelo amio.
- ⁵Mujura agenere likame yamo kop me abe, do mujura me abe yamo kope kalikame tie me ateni.
- ⁶Ngaacae cane nono pi doko riek, do udo ngec obedo gikame yot ayota ne dano atie kede niang.
- ⁷Yai tenge kibus ngat aming, pien likame en etwero mini ingeo gimoro.
- ⁸Rieko mio jo ariek ngeo gikame kipoore timo, do mingo rwenyo jomingo arwenya.
- ⁹Jomingo likame paro kame kitimo dub, do Rubanga cunye yom i kom dano kame ekite mege cil.
- ¹⁰Dano acelacel ngeo wangcuny amoto yomcuny kame etie kede, likame dano apat twero nywako kede.
- ¹¹Ot me dano arac kotuturo, do ot me dano kame ekite mege cil dong cungo di etek.
- ¹²Tie ikiteso mogo kame dano twero neno be ber, do di i ajikini mere etero dano i to.



- 13**Akadi ka dano tie nyero, do cengemogo udo likame cunye yom; doko da ka yomcunye kame dano tie kede otiek, cwercunye en ako lubo do.
- 14**Jo areco udo epera kame poore kede ekite me kuo gi, doko da jo abeco udo giamia kame poore kede tice gi.
- 15**Jo akwia piny yei kope dedede, do jo ariek tamo ber di pwodi likame eyei gimoro.
- 16**Jo ariek gwokere likame kiyei donyo i gikarac, do jo areco motar amotar timo gimoro di likame kipenyo wi gi.
- 17**Dano acunye rerep timo tim me mingo, doko da dano atimo iik mege i mung likame jo mito.
- 18**Jo akwia piny gin kiudo mingo bedo iner gi, do jo ariek epera gi obedo ngec.
- 19**Jo atie kede tim areco luro wi gi i nyim jo abeco; jo areco kuro kony ki erute me jo kopoore.
- 20**Jo dedede dagi jocan, akadi paka jokio gi da dagi gi, do jo kame maro jo kobaro tot.
- 21**Jo kame cao jowot gi obedo jodubo, do kitie kede yomcunye jo kame tie kede mwolo but jocan.
- 22**Jo kame tie kede iik areco udo kirwenyo yongayo; jo mio wor but jo kame tie kede iik abeco, doko jo geno gi.
- 23**Tice dedede kame dano cane iye tie kede ameda, do yamo ayama kenekene kelo can.
- 24**Jo ariek epera gi en abar, do jomingo kotubuso gi kede mingo.
- 25**Mujura ayamo kop me ateni lako kuo me jo, do mujura ayamo kop me abe duporo dano.
- 26**Woro Rwot mio dano bedo kede gen adwong, doko idwe mege udo tie kede karingo ot gwokere.
- 27**Lworo Rwot en obedo atan me kuo, manono mio dano bwot i owic me to.
- 28**Dwongo me abaka cungo i wi rom me jo kame en epugo; abongo gin kony mere udo li.
- 29**Dano kalikame susunyo doko ger tie kede niang atut, do dano kame cunye rerep nyuto mingo mere.
- 30**Kweicunye mio kom dano bedo yot, do wangcunye cal bala tuo acamo cogo me dano.
- 31**Jo kame bedo kede adiadia but jocan udo kicao Rubanga ngat kocweo gi, do jo kame tie kede mwolo but jo kame piny oloo nyuto wor but Rubanga.
- 32**Jo areco kelo can i kom gi ken gi pi tim gi areco, do iponeso abeco gwoko dano kopoore.



³³Rieko bedo i cuny jo atie kede niang bala ture, do likame en engere i cuny jomingo.

³⁴Tim kopoore mio atekerin dwongo, do dub kelo ne ateker moroni lewic.

³⁵Ngatic kame timo jame dedede kede rieko yomo cuny abaka, do en eger ne dano kame timo tim me lewic.

Agole 15

¹Kop kame kodwoko kede mwolo kweo gero, do kop kame kodwoko kede dwan agwai twaruno gero.

²Kame jo ariek oyamo, leb gi woto kope me ngec awinyo mit, do jomingo bwoto kop me mingo kenekene.

³Wang Rwot neno kabedo dedede; en eneno gikaber amoto gikarac kame jo timo.

⁴Kope me mwolo mio kuo, do kope areco cobo cuny dano.

⁵Ngamingo cao pwony kame nganywal mere mie, do dano kame yei winyo cor udo eriek.

⁶Abar bedo tie i ot me dano kopoore, do jo areco kei mergi kame peko opoto.

⁷Jo ariek dog gi waco kope amedo ne jo bedo kede ngec, do likame etie kamanono kede jo aming.

⁸Rwot cunye dagi giayala me jo areco, do ilega me dano kame ekite mege cil yomo cunye.

⁹Rwot cunye dagi ekite kuo me jo areco, do en emaro jo kame timo gi kopoore.

¹⁰Ngat kame dagi lubo yongayo aber udo alola agwai; ngat kame dagi be kocore en ebino to.

¹¹Rwot ngeo kiton kabedo me jo oto, do kalamo mano tien adi en kame engeo kede gikame tie i cuny dano!

¹²Joacae likame mito be riei gi; likame kimito ot udo tam kibus jo ariek.

¹³Yomcuny mio nyim dano bedo muremure, do cweruncun dwono cuny dano.

¹⁴Dano ariek cunye opong kede mit me pwonyere, do jomingo tie kede mit me timo tim me mingo.

¹⁵Jocan beo i kuo atek ceng dedede, do ka dano likame tie kede par moro i cunye, ceng acelacel me kuo mere cal bala ceng me ebaga.

¹⁶Ngat kame tie kede lim atitidi di elworo Rwot ber kalamo dano atie kede lim atos di eko bedo kede peko atos da.

¹⁷Eber ne in camo dek apura kede jo kame tie kede amara, akaka camo ringo amio kede jo kame tie kede adagadaga.

¹⁸Jo kame cuny gi rerep kelo atwomutwomun, do jo kame dio gero kelo anapakin.



- ¹⁹Jo anyap riamo kede peko atot i kuo gi, do jo kame ekite gi cil kuo gi yot ayota.
- ²⁰Idwe ariek yomo cuny papi gi, do idwe aming cao toti gi.
- ²¹Mingo yomo cuny dano kalikame wie tio, do dano atie kede niang timo gikame opoore.
- ²²Iik moroni poto ka likame jo omio tam gi iye, do ka jo amio tam iye tot, iik nono cobere.
- ²³Cuny dano bedo yom ka edwoko kop kakare, doko da kop kame dano yamo i kare kopooore me yamo kop nono ber adikinichel.
- ²⁴Jo ariek lubo yongayo kame tero gi i kuo, do weko kame tero gi i to.
- ²⁵Rwot dudubo paco me ngaewaka, do egwoko jame me apuserut.
- ²⁶Rwot dagi tam areco, do kope me kisa beco i bute.
- ²⁷Jo kame tie kede eranga me udo jamini i yore arac kelo peko ne jo me ude gi, do jo kame dagi kop me cemusana bino kuo.
- ²⁸Dano atie kede ekite kopooore tamo kop kame epooore dwoko, do dano arac doge bwoto kope areco abongo en tamo.
- ²⁹Rwot bor kibus jo areco, do en egamo kwac me jo kopooore.
- ³⁰Dano amuremure kelo kilel i cuny jo, doko da rwonge aber mio jo winyo kiber i kuo gi.
- ³¹Dano kame winyo kope dedede kame kowaco ne pi riene bedo dano ariek.
- ³²Dano adagi pwony kame komie udo ecao kuo mere kene, do ngat awinyo kop kame kocore kede en eudo niang.
- ³³Dano kame lworu Rubanga udo etie pwonyere bedo kede rieko, doko da mwolere en akelo ne dano wor.

Agole 16

- ¹Dano bedo kede iik mege i cunye, do Rubanga en kame mio gi kicobere.
- ²Dano twero neno be tice mege dedede beco i wange, do Rwot ngingico gikame tie i cuny dano.
- ³Ket tice ni dedede i cing Rwot, en ebino mino iik ni cobere kakare.
- ⁴Rubanga tie kede iik i kom gi dedede kame en ecweo, iik kame en etie kede i kom jo areco en alola.
- ⁵Rwot cunye dagi jo dedede kame wakere; ngei kiber be akodi jo nogo likame bino bwot udo alola.



- ⁶Rwot sasiro dub me jo awor di kigenere, doko da lworu Rwot mio dano gwokere likame edonyo i tim areco.
- ⁷Kame epone me kuo ka dano moroni yomo cuny Rwot, Rwot mio jokwor me dano nono bedo kede i mulem.
- ⁸Eber bedo kede gi atitidi kame iudo i yore kopooore, akaka bedo kede ud adwong kame iudo i yore arac.
- ⁹Dano bedo kede iik mege, do Rwot en atele cobo gi.
- ¹⁰Kope kame abaka yamo, en eyamo gi kede twer ka Rubanga; en engolo kop kakare.
- ¹¹Rwot mito misani kede latiri kame pimo jame kakare; kide me pimo jame obedo tic mere.
- ¹²Tim areco obedo gikarac kibun abakai, pien tim kopooore en kame mio apugan cungo.
- ¹³Abaka cunye yom winyo kope me ateni, doko da en emaro jo kame yamo kope me ateni.
- ¹⁴Kame abaka odoko ger, manono twero kelo to; ngatamoro ariek tamo kweno gero me abaka nono.
- ¹⁵Kame nyim abaka ler, manono mio jo kuo, doko tim mere anyuto amara but dano cal bala idoun me kot adwogo i kare me agege me iporo.
- ¹⁶Udo rieko ber kalamo udo saabu; doko da yero bedo kede niang ber kalamo yero siliba.
- ¹⁷Jo abeco lubo gudo kame dapo gikarac; dano agwoko ekite me kuo mere daro kuo mere.
- ¹⁸Ewaka kelo ne dano peko, doko da tingere mio dano poto.
- ¹⁹Eber ne dano mwolere di eko bedo ngacan, ekalamo popoko jame kame koyako kede jo awakere.
- ²⁰Jo kame winyo kope kame kopwonyo gi iye, gi dedede bedo negi kiber; ket gen ni i kom Rwot di iko bino bedo kede yomcuny.
- ²¹Dano atie kede tam kocato me rieko en dano atie kede niang, doko da kop awinyo mit di epwot wao tam me jo.
- ²²Rieko obedo atan me kuo but dano ariek, do mingo obedo alola but ngamingo.
- ²³Dano ariek ber tamo kop kame emitto yamo, manono mio kop kame eyamo wao tam me jo.
- ²⁴Kope awinyo mit cal bala mokic, ebilere mit i kuo me dano, doko emio kom dano bedo yot.



- ²⁵ Tie ekite kuo moro kame dano twero neno be ber, do i ajikini mere en ebedo yongayo atero dano i to.
- ²⁶ Mit me cam mio dano timo tic kitek, kec rurupo en meede tic.
- ²⁷ Jo areco tic gi timo iik areco, doko da kope awok ki dog gi cal bala mac awango dano.
- ²⁸ Dano atie kede ikiteso areco kelo ne jo atwomutwomun, doko da ngakwot turo awotin me jo.
- ²⁹ Ngatim tim me gero ngalao jowote, di eko mino gi kidonyo i tim kalikame ber.
- ³⁰ Dano amimio wange amoto aumo doge udo tie kede iik moro me timo gikarac.
- ³¹ Lwar obedo ocoro me dwongo, dano atie kede ekite me kuo kopooore en kame bedo paka ude.
- ³² Dano kalikame susunyo ngoi ber kalamo dano atek, doko dano atwero dino gero mere ber kalamo dano atwero mano bomba.
- ³³ Dano uco alulu, do adwokini mere tie i cing Rwot kene.

Agole 17

- ¹ Eber bango kwon obuto kalamo ot camo ebaga i ot kame lok tie iye.
- ² Epasoit kame timo gi dedede kede rieke bino bedo kede akarunikin i kom wot ka ngadwong mere, doko eda ebino nywako sikao jame me paco nono.
- ³ Kotamo saabu kede siliba kede mac pi ngeno ka kibeco, do cuny dano Rwot en kame tamo.
- ⁴ Dano atimo tim areco ciko yite winyo kope me jo areco; won angalo da ciko yite winyo kope me abe.
- ⁵ Ngat kame nyero ngacan udo eyeto Rubanga ngat kocwee; ngat kame cunye yom ka dano opoto i peko likame bino bwot udo alola.
- ⁶ Jo oti tie kede ewaka pi ikwae gi, doko da idwe tie kede ewaka pi jonywal gi.
- ⁷ Dano me awora likame yamo kope me abe, doko da ngamingo likame twero yamo kope atie kede kony.
- ⁸ Jo kame mio cemusana tere bala yat me apipan; kitero be etwero kelo bero moro.
- ⁹ Dano asasiro ngat otimo ne raco mio awotin meede, do ngat amoko amoka i kop moro arac kotieko kato, turo awotin.
- ¹⁰ Kame kocoro dano atie kede niang tien acel, en epwonyere kalamo ngamingo kame kobungo tien tol acel.
- ¹¹ Jotim tim areco tic gi en jemo, do kobino sweikino i kom gi aor ager.



- ¹²Eber ne in riamo kede edubu kame koneko atin mere kalamo riamo kede ngamingo kocato i tim me mingo.
- ¹³Peko likame weko ot me dano aculo bero kede raco.
- ¹⁴Acakini me lok cal bala pii apwodi cako acaka mol momot, pi manono miero ijike di pwodi likame etany.
- ¹⁵Rwot dagi ngat kame mio dano arac loo pido, amoto ngat kame ngolo kop i wi dano ali kede raco moro.
- ¹⁶Pinyo mio ngamingo dubo sente i isoma pi udo rieko, do di etie kede wic kalikame twero pwonyere?
- ¹⁷Ngawoti nyuto amara i kare dedede; wadu nywako kedi peko ka peko opoto ni.
- ¹⁸Dano awie likame tio cikere pi culo banya ka ngat apat.
- ¹⁹Dano acunye maro timo dub udo emaro peko da, doko da dano awakere lwongo peko i kome kene.
- ²⁰Dano atie kede tam areco likame udo bero moro, doko da dano alebe yamo kope me abe poto i peko.
- ²¹Ngat kame nywalo ngamingo ebeo i peko; nganywal me ngamingo likame tie kede yomcuny.
- ²²Yomcuny tie bala yat aber kame cango dano, do cweracuny jonyo dano ajonya.
- ²³Jo areco gamo cemusana i mung di do likame kiko ngolo ne jo kop kede ateni.
- ²⁴Dano atie kede niang keto tam mere i kom gikame medo ne rieko, do dano aming tam mere bedo kakabor.
- ²⁵Atin aming mio papa mere bedo kede par, doko da emio toto mere bedo kede wangcuny.
- ²⁶Likame eber tango dano ali kede raco moro, doko da likame eber bungo dano me awora pi ekite kuo mere aber.
- ²⁷Dano kalikame duro yamo udo etie kede ngec; ngat kame kweo cunye tie kede niang.
- ²⁸Pien kotwero tero jomingo da bala jo ariek ka kiling alinga di kiumo dog gi.

Agole 18

- ¹Dano apokere bedo kene udo paro pire kenekene; en epiemo kede kope dedede abeco kame jo waco.
- ²Ngamingo likame paro pi udo niang; do en emito kenekene waco kop kame tie i cunye.
- ³Tim arac kelo acae kede lewic.



- ⁴Kop me rieko kame dog dano waco cal bala pii atut, en atan me pii amol nakanaka.
- ⁵Gango tam me dano kame kop lo likame ber. Doko da dagi ngolo kop me ateni ne dano kalikame tie kede raco moro likame ber.
- ⁶Yamo me ngamingo kelo lok, doko da kop kame wok ki doge mio kobunge.
- ⁷Kop kame wok ki dog ngamingo kelo ne peko, doko yamo mere cal bala obek kame lokere make.
- ⁸Kope kame ngakwot waco cal bala dek amit, kame dano mwonyo di eko donyo i yie.
- ⁹Dano anyap rac rom aroma kede dano kame dudubo jamini adudub.
- ¹⁰Rwot cal bala gedo abor malo di etek, dano kopooore ringo iye di eko bwot.
- ¹¹Ngabar geno abar mere pi gwoke, doko i tam mere, abar mere cal bala bomba kame kocelo kede apama atek abor malo.
- ¹²Dano wakere di pwodi can likame opoto ne, do mwolere en ayabo yongayo me udo wor.
- ¹³Ka dano dwoko kop di pwodi likame etieko winyo kop nono dedede, udo enyuto mingo mere doko ekelo lewic i kome.
- ¹⁴Cuny kame dano tie kede pi mito bedo kuo karuno konye i kare me tuwo, do ka cunyi okwanyere, ngai kame karuno konyi?
- ¹⁵Dano atie kede niang twero bedo kede ngec, doko dano ariek ciko yite winyo kop amedo ne ngec.
- ¹⁶Giamia yabo ni yongayo. Emi ikaruno tuno but jo apirgi tek.
- ¹⁷Ngat kame geo pido i nyim ekiko i winyo kop mere ineno bala tie kakare, tuno kede kakame dano kame en etie pido cako pepenyo en kede.
- ¹⁸Uco alulu en kame tieko piem, ka jo atek are tie piem i kom kop moro.
- ¹⁹Dano kame in itimo ne raco dok bute tek kalamo donyo i bomba kame kocelo kede apama atek, doko lok cal bala alorito me cego erute me paco kame kocelo.
- ²⁰Kop kame wok ki dog dano adwokini mere lokere dok bute di ko rome, doko kop kame lebe waco timo gimoro i kuo mere.
- ²¹Kope kame leb dano waco karuno kelo ne kuo arabo to; jo kame maro duro kop bilo adwokini me kop kame gin kiwaco nogo.
- ²²Ngat kame udo dako udo eudo gikame ber, doko udo Rwot otimo ne bero.
- ²³Kame ngacan tie yamo, en eyamo kede mwolo di engangao angangai, do ngabar dwoko kop gero gero.
- ²⁴Tie awotino mogo kalikame tie me ateni, do adieruni me ateni moko i komi kalamo omini.



Agole 19

- ¹Eber bedo ngacan di itie kede ateni, elo bedo dano me angalo kame ngamingo.
- ²Bedo kede mit atek me timo gimoro di likame itie kede ngec iye likame ber; doko ngat kame onyaro timo gimoro donyo i peko.
- ³Mingo me dano mio edudubo kuo mere di eko lokere lilo kede Rwot.
- ⁴Abar kelo awotino atot, do ngacan jowote yai weke.
- ⁵Mujura me angalo likame bino bwot kede udo alola, doko ngat angalo da likame bino bwot.
- ⁶Jo atot mo amara kibus jo kame konyo jo, doko jo dedede mito bedo adiereson kede dano kame mio giamia.
- ⁷Ka do ber joawade me ngacan da dage, kara jowote do bino dage tien adi! En etamo mito yamo kede gi, do gin kidagi.
- ⁸Dano kame cane udo rieko udo emaro kuo mere; ngat kame pwonyere di eko keto kop kame en epwonyere iye i tic udo kuo aber.
- ⁹Mujura me angalo likame bwot kede udo alola, doko ngat angalo udo peko.
- ¹⁰Ngamingo likame poore bedo i kuo ajabajaba, doko erac kalamo ka epasoit en kame pugo jo me awora.
- ¹¹Dano kame wie tio likame susunyo lilo, doko en ecao raco kame kotimo ne di manono ko kelo ne wor.
- ¹²Ka abaka odoko ger, edorano bala engu, do ka cunye yom, eber bala toyo kame bido lum.
- ¹³Atin amiming kelo ne papa mere peko, doko dako kame ngalok cal bala ot kame bedo cwer nakanaka kame kot ocwei.
- ¹⁴Dano karuno sikao ot kede abar kibus jonywal mege, do dako ariek Rwot en kame mio dano.
- ¹⁵Nyapo kelo nino atek; dano ajajalun bedo kede kec.
- ¹⁶Gwok cik ka Rwot di iko bino bedo kuo; ka icao gi, ibino to.
- ¹⁷Ngat kame timo mwolo ne ngacan udo emio banya but Rwot, doko Rwot bino cule iye dedede.
- ¹⁸Bitaro idwe ni pi rieno gi di pwodi itie kede gen i kom gi. Ka likame ibitaro gi udo itie dubo gi.
- ¹⁹Ngat ager kitek gero mere nono bino kelo can i kome. Ka in ilake tien acel, ebino bobo mito be imed lake.



- ²⁰Winy tam kame jo mii, doko gam kop kame kopwonyi kede, tetekeny iud rieko pi kare me anyim.
- ²¹Dano karuno timo iik atot, do iik ka Rwot en kame bino cobere.
- ²²Gikame mitere i kuo me dano en cuny me wor, doko eber bedo ngacan kalamo bedo nyangalo.
- ²³Bedo kede lworu i kom Rwot ateteni mio dano kuo; ngat kame lworu Rwot bedo abongo gimoro kame lole, likame peko moro potu ne.
- ²⁴Nganyapo rwako cinge i bakuli me cam di likame eko karuno kwanje tere i doge.
- ²⁵Mi ngaacae alola, di jo akwia piny ko bino pwonyere ngeno gikame poore atima; rei dano ariek di en eko bino bedo kede ngec.
- ²⁶Atin kame timo ne papa mere tim me gero di eko riamo toto mere tenge, obedo atin kame kelo lewic kede acae but jonywal mege.
- ²⁷Atin na, ka iweko pwonyere, wi bino wil kede gikame ingeo.
- ²⁸Mujura akony mere li nywaro anywara kop kame kongolo i ateni, doko kibut jo areco, gikarac mit negi bala cam.
- ²⁹Kotieko ngolo kop ne jo kame joacae, doko da kobino dano dier ngei jomingo.

Agole 20

- ¹Mato bwini mio dano doko nganywar, kongo mio dano doko ngalok. Ngat kame mato kongo di eko mer likame riek.
- ²Gero me abaka mio jo lworu bala dorano me engu; ngat kame wango cuny abaka udo likame en eparo pi kuo mere.
- ³Dagi donyo i lok tie gi me wor, do jomingo dedede maro lok.
- ⁴Nganyapo likame puro potu mere i kare me ikwar; kare me kac tuno udo en eli kede gimoro.
- ⁵Kope kame tie i cuny dano cal bala pii kame tie i atan atut, do ngat kame tie kede rieko karuno ngeno gi.
- ⁶Jo atot waco ken gi be gin kigenere, do ngai kame karuno udo dano kame en ekaruno geno?
- ⁷Ngat kopore bedo kede iponeso abeco; idwe mege tie kede winyo.
- ⁸Kame abaka obedo i kom mere me ngolo kop, wange yeko gikareco dedede.
- ⁹Benyo, tie ngat kame karuno waco be, “Ango atieko mino cunya odoko cil; ango do ali kede dub moro” ?
- ¹⁰Rwot cunye dagi jo asero jo kede gipimo jamini kalikame tie kakare.



- ¹¹Akadi atin da kongeo kede gikame en etimo; kokaruno ngeno ka en atin aber kame timo gikame opoore.
- ¹²Yit kame dano winyo kede kop kede wang kame dano neno kede piny Rwot en kocweo gin dedede.
- ¹³Kur imaro nino esawa dedede, pien ebino mini idoko ngacan; yab wangi iko timo tic, di iko bino bedo tie kede cam atot.
- ¹⁴Ngawil waco be, “Wel rac, wel rac,” do en eoto tenge di eko donyo wakere di epwore kene.
- ¹⁵Dano kame yamo kop kame etie kede ngec iye, udo etie kede gikame ber kalamo saabu kede kide me wel.
- ¹⁶Dano kame cungo ne ngakumbor i banya poore gam jame mege bala gikame esingao pi banya nono.
- ¹⁷Gikame dano udo i yore me angalo mit ne, do i cen mere elokere eko doko cal ne bala engaro kame kopongo i doge.
- ¹⁸Mono tam kibun jo en kame mio iik ni cobere; kame itie i yi, lub tam me riekeo kame komii.
- ¹⁹Ngakwot likame kano mung; pi mano, kur inai bedo kede ngat kame ngayamo.
- ²⁰Ka in ilamo papa ni arabo toto ni, kuo ni bino jik bala etala kame midicar i kakacol cucucuc.
- ²¹Abar kame dano udo awakawaka i agege, winyo li iye i atiekini.
- ²²Kur iwac be, “Ango abino nyango rac kame kotimo na” ; gen Rwot, di en eko bino konyi.
- ²³Cuny Rwot dagi jo asero jo kede kide me pimo jame kalikame tie kakare, doko da misani kalikame tie kakare likame ber.
- ²⁴Kuo wa Rwot en kame telo; benyo benyo kame dano karuno ngeno kede yongayo me kuo mere?
- ²⁵Ecal bala winyo kame donyo i owic, ka dano susunyo cikere pi mino gimoro but Rubanga, di i cen mere eko yutuno di do etieko kwongere.
- ²⁶Abaka kame riek yeko jo areco tenge di eko mino gi alola abongo kisa.
- ²⁷Ngec me cuny dano cal bala etala ka Rwot; en emenyo kuo me dano lung.
- ²⁸Bedo kede cuny me amara kede bedo dano agenere en kame gwoko abaka, doko bedo dano kopooore en kame mio apugan mere cungo.
- ²⁹Gi me ewaka me dano apwodi titidi en teko mere, do cilo me dano oti en lwar.
- ³⁰Abap kame mio dano lito kwanyo rac mere tenge; tojo dano loko kuo mere doko ber.



Agole 21

- ¹Gikame abaka tamo tie i cing Rwot bala pii kame mol kame Rwot loko mol mere tetu karamoroni kenekene kame en emitu.
- ²Gi dedede kame dano timo en eneno kene bala opoore, do Rwot pimo cuny dano.
- ³Rwot pwoyo dano atimo gikame opoore kede kame timo gi dedede i yore me ateni kalamo ngat kame mio giayala.
- ⁴Ewaka kede tingere obedo dub kame telo kuo me ngat arac.
- ⁵Iik me dano atek i tic ateteni tere i abar, do jo dedede kame timo jame awakawaka likame bino bedo tie kede jamini kame romo gi.
- ⁶Abar kame dano udo i yore me angalo rwenyo awakawaka bala eura me pii aduny, doko ekelo ne dano to.
- ⁷Gero me jo areco bino muducaro gi pien gin kidagi timo gikame poore.
- ⁸Dano kame tie kede raco lubo yongayo kogomugomun, do dano ali kede raco moro timo gikame poore.
- ⁹Eber ot bedo i dud ot kalamo nywako ot kede dako kame ngalok.
- ¹⁰Jo areco cuny gi maro gikarac; gin kili kede cuny me kisa but jowot gi.
- ¹¹Kame komio ngaacae alola, akadi ngat akwia piny da doko riek; kame kopwonyo ngat ariek, en emedo doko riek.
- ¹²Rubanga, Ngat kopooore, ngeo gikame timere i ot me ngat arac; en ebino reto ngat arac di eko muducaro en.
- ¹³Ka in idagi winyo koko me ngacan, ida ibino koko pi mito kony di likame oko bino winyo koko ni.
- ¹⁴Giamia kame komio i mung but ngat kame kowango cunye, kweo cunye; doko cemusana kame komio i mung kweo twon gero.
- ¹⁵Kame kongolo kop i ateni, jo kopooore lelo, do jo atimo gikareco cuny gi dubere.
- ¹⁶Dano kame parao tenge di eko weko lubo tam aber bino udo be en eoto wei karacel kede jo oto.
- ¹⁷Ngat kame maro kuo me yomcuny kenekene, bino bedo ngacan; ngat kame maro amata kede cam amit, likame bino baro.
- ¹⁸Peko kame ngat arac paro pi mito timo ne ngat kopooore lokere potu i kom en.
- ¹⁹Eber ot bedo i wi tim kalamo bedo kede dako kame ngalok doko di emaro ingungur.
- ²⁰Abar dong i ot me dano ariek, do ngamingo dudubo mere adudub.
- ²¹Ngat kame lubo ekite kuo kopooore doko di etimo mwolo bino bedo i wi lobo pi kare alac doko da ebino udo wor.



- ²²Dano acel ariek karuno ot suro bomba kame jo atek i yi tie daro, di eko tuturo apama atek kame gin oudo kiketo gen gi iye.
- ²³Ngat kame gwoko doge kede lebe bwot i peko.
- ²⁴Ngaewaka, ngat kame tingere, obedo ngaacae, en etimo gi dedede ewaka ewaka.
- ²⁵Mit me nganyapo neke, piento en edagi timo tic.
- ²⁶Ngat arac bedo ngobelo jamini me jo icegun piny yuluyul, do jo kopooe mio jo jamini kede cuny gi lung.
- ²⁷Cuny Rwot dagi giamia kame jo areco tero ne, do akalamo mere ka kitero giamia nogo kede tam arac.
- ²⁸Mujura kame ngalo likame ijura mere cobere kiber, do ngat kame ciko yite di eko winyo kop kiber, en ebino ngetakino mino ijura mere kiber.
- ²⁹Ngat arac timo jame kede kwarwang, do dano kame ekite mere cil tamo kong kop i kom gikame en etimo.
- ³⁰Likame tie rieke me dano moro, arabo niang atat moro, amoto tam moro kame komio, kame karuno konyo ka Rwot odagi.
- ³¹Akadi di isirikalen iikere kede asigiran pi ot yi, do Rwot en kame mio gi kibwono jokwor.

Agole 22

- ¹Bedo kede nying aber ber, elo bedo kede abar adwong, doko pwoc kame jo mii ber, ekalamo siliba arabo saabu.
- ²Gikame ribo jocan kede joabar en ine be: Rwot en kocweo gin dedede.
- ³Ngat kame wie tio neno peko di tie bino en eko gaikin, do dano kalikame tamo meede kede ot anyim di eko riamo kede can.
- ⁴Dano kame mwolere di elworo Rwot, bino udo abar kede wor kibun jo, doko ebino bedo kuo pi kare kalac.
- ⁵Okuto kede owic tie i yongayo kame ngat kame ikiteso mege reco lubo; ngat kame gwoko kome dapu gi.
- ⁶Pwonyunu idwe epone kabere kame miero kibed iye, di do kame gin kidongo, likame kibino parao tenge kiye.
- ⁷Joabar pugo jocan, doko ngat kame kopao gimoro edoko epasoit me ngat kame okope gi nono.
- ⁸Ngat kame tero jo kirac, manono en kodi mere kame en ecuwo, en ebino udo peko bala gikame en ekao, doko itidil kame en eketo i kom jo bino jik.



⁹Ngat kame mio jo jame di cunye ilajara tie kede winyo, piento en enywako cam mere kede jocan.

¹⁰Riamunu tenge dano kame ngaacae, di piem, lok kede ayet ko bino jik.

¹¹Ngat kame maro bedo kede cuny aber doko di eyamo kede mwolo bino bedo ngawot abaka.

¹²Rwot bedo neno be jo ogwoko ateni, do iik me jo kalikame genere en etotolo.

¹³Nganyapo bedo waco be, “Engu tie ooko kuno! Ebino neka ka ango adonyo ooko!”

¹⁴Kop kame dako acar waco cal bala bur atut; ngat kame wango cuny Rwot potu iye.

¹⁵Tim me mingo tie i cuny atin apwodi titidi, do ebela me pwony kwanye tenge.

¹⁶Ngat kame tero jocan kirac tetekeny eud abar, kede ngat kame mio giamia but jo kobaro, bino bedo kede kei.

Kope Ot Adek me Rieko

¹⁷Cik yiti iko winyo kope kame jo ariek owaco di iko keto cunyi i kom pwony na,

¹⁸pien ibino bedo kede yomcuny ka imako gi i cunyi, kede ka ikaruno waco gin dedede kede wi.

¹⁹Ango atie mini ngeno gin tin tetekeny in iket gen ni i kom Rwot.

²⁰Ango atieko wandiko nin kope ot adek me acori kede kame mii rieko,

²¹pi mini ngeno gikame poore, kede me ateni. Manono bino mini idwoko kop kakare but jo kocwai.

Kop me Agege me Rieko

²²Kur imai ngacan gire moro be piento en engacan, doko da kur idi ngacan kede tam i ekiko;

²³pien Rwot bino pido pire, di eko timo can i kuo me jo kame timo ne can.

Kop me Are me Rieko

²⁴Kur itim adiereson kede ngat kame ngalilo, doko da kur iupere kede ngat acunye rerep.

²⁵Pien ida ikaruno pwonyere i ekite gi nono di iko moko iye.

Kop me Adek me Rieko

²⁶Kur icikere pi cungo ne dano apat pi banya mere.

²⁷Ka likame in iko karuno culo, kobino tero akadi kiton gibuto ni da.

Kop me Ongwon me Rieko

²⁸Kur inyik gikame nyuto ikor kasek kame bin joakwari ni oketo.

Kop me Kany me Rieko



²⁹In kong nen ngat kame ngadiru i tic mere; en ebino timo tic ne abaka do weko jopiny.

Agole 23

Kop me Kanyape me Rieko

¹Kame in itie cam kede ngadwong, mito iniang be ngai inonono kame tie i nyimi,

²di iko bedo kede dire akadi di in itie kede eranga me cam.

³Kur ibed kede eranga i kom cam amit kame en etoko ni, pien cengemogo udo etie tamo cunyi.

Kop me Kanyaare me Rieko

⁴Kur itiek teko ni pi mito baro; bed dano ariek di iko weko tam nono.

⁵Pien kakame wangi giparo en kede, abar karuno yai kibuti ineno bala etie kede bwome di eko por tenge bala ekokom.

Kop me Kanyauni me Rieko

⁶Kur iyeyi ot camo cam me ngat kame ngaworo; kur ibed kede mit i kom cam amit kame en etoko.

⁷Pien dano kame cal kamanono waco ni be, “Cami doko mat da!” Do kop me cunye udo pat.

⁸Ibino ngoko gikame oudo icamo, di kope dedede amit kame oudo in ipwoye kede ko bino bedo me nono.

Kop me Kanyangon me Rieko

⁹Kur idub kare ni yamo kede ngamingo, piento en ebino cano kope ni me rieko nogo acaa.

Kop me Tomon me Rieko

¹⁰Kur inyik gikame nyuto ikor kasek arabo imai poti me idwe kic,

¹¹pien Rwot ngat kame gwoko gi tek, en ebino pido kede in pirgi.

Kop me Tomon kiwie Acel me Rieko

¹²Ket cunyi mito pwonyere, di iko ciko yiti winyo kope kame kopwonyo.

Kop me Tomon kiwie are me Rieko

¹³Kur iwek pwonyo idwe ni iponeso abeco; ka idao gi kede ebela, likame ebino neko gi.

¹⁴Ateteni ka in idao gi, ibino lako kuo gi.

Kop me Tomon kiwie Adek me Rieko

¹⁵Atin na, ka in idoko riek, ango da cunya bino bedo yom.



¹⁶Ango abino bedo kede kilel adwong kame awinyo di in iyamo kope me ateni.

Kop me Tomon kiwie Ongwon me Rieko

¹⁷Kur nyeko maki kede jodubo, do ket cunyi lworu Rwot.

¹⁸Pien ateteni kare kabere tie anyim, doko gen ni likame bino potu.

Kop me Tomon kiwie Kany me Rieko

¹⁹Winyi, atin na, iko doko riek, di iko bedo kede tam i kom epone me kuo ni.

²⁰Kur ibedo kede jo kame mato kongo kitek, arabo jo kowor camo ringo;

²¹pien joamera kede jocam bino doko jocan, doko bedo me nino esawa dedede bino mino gi kingapo idukun.

Kop me Tomon kiwie Kanyape me Rieko

²²Winy papa ni ngat konywali, doko kur icai toto ni kame etieko ti.

²³Ti kede sente pi udo ateni, rieko, pwoyere kede niang atut, di likame iko uco gi.

²⁴Papa me dano kopoore bedo kede kilel kadwong; ngat kame nywalo awobi kame riek bedo kede yomcuny.

²⁵Mi papa ni kede toto ni bed kede yomcuny; mi toto ni ngat konywali leli.

Kop me Tomon kiwie Kanyaare me Rieko

²⁶Atin na, winy kop na, di iko lubo epone me kuo na.

²⁷Pien malaya cal bala bur atut; dako kame ngadote cal bala kulo adiding kame dano moko iye.

²⁸En ebedo dari bala joyak di eko medo wel me cuo kalikame genere.

Kop me Tomon kiwie Kanyauni me Rieko

²⁹⁻³⁰Nyut nango ngat kame mato kongo tuno i isawan kokato, ngat kame bedo mito mato kongo me epone apapat, di ango ako bino nyuto ni dano kame tie i peko, dano kame bedo tururo aturur, di emaro lok kede ingungur. En aporeso tie i kome me nono nono, doko wange obokere bubu.

³¹Kur inen kongo cil i yi ikopo di iko mine ewai tam ni, akadi di eliuliu benyo, akadi di imate eko donyo i dwani iwinye eber abera.

³²I cen mere en ebino mino iwinyo bala twol en okai; iwinyo lito bala dano kame ipom en otongo.

³³Wangi bino cako neno gimogo apapat, doko cunyi ko donyo paro kope mogo akony gi li.

³⁴Ibino neno bala itie nino i yi yee kame yamo tie puno i dier nam; ineno bala apien tie wire kedi.



³⁵In ibino waco be, “Miero di kojuta, do likame oko mina awanon; kobunga do likame ango atie winyo lito moro. Kongo bino tiek ki wia esawa adi? Ango atie mito kongo ace.”

Agole 24

Kop me Tomon kiwie Kanyangon me Rieko

¹Kur nyeko maki kede jo areco, doko kur itam pi mito timo awotin kede gi;

²pien cuny gin bedo paro kop me gero kenekene, doko kibedo yamo kope amako timo ne jo raco.

Kop me Ot Are me Rieko

³Dano tio kede rieko pi gero ot, doko niang atut en kame mio ot cungo di etek.

⁴En etio kede ngec mere pi pongo agolai me ode kede jamini me wel, jamini kabeco kame yomo cunye.

Kop me Ot Are kiwie Acel me Rieko

⁵Rieko ber kalamo teko, doko da dano kame tie kede ngec ber kalamo dano atek;

⁶pien rieko karuno konyi i esawa me yi, doko kame itie kede jo atot kame mi tam abeco, in ilo yi.

Kop me Ot Are kiwie Are me Rieko

⁷Kope me rieko kalamo niang me ngamingo. En likame engamo doge yamo akadi kop acel i kacokere ka jo tie poro kope kame pirgi tek.

Kop me Ot Are kiwie Adek me Rieko

⁸Ngat kame bedo kede iik me mito timo gikarac kobino lwonge be ngakel peko.

⁹Gikame ngamingo tamo kenekene en dub, doko cuny jo dedede dag dano kame ngaacae.

Kop me Ot Are kiwie Ongwon me Rieko

¹⁰Ka in itie kede goro i kare me peko, udo teko ni nonok ateteni.

Kop me Ot Are kiwie Kany me Rieko

¹¹Kur inen anena jo kame kotie tero i to gi; lak jo kame kotie pere kede gi tero ot neko.

¹²Cengemogo in itwero waco be, “Neningo, wan oudo likame ongeogimoro iye” ; benyo, in iparo be Rubanga ngat kame pimo cuny jo likame romo ngeno? Mam Rubanga ngat kame gwoki ngeogikame in iparo i cunyi? Iparo be en likame ebino culo dano acelacel di lubere kede gikame en etimo?

Kop me Ot Are kiwie Kanyape me Rieko

¹³Atin na, cam mokic, pien eber. Doko bala kame mokic kame ton i apien mere winyiwinyi kede i lebi,



¹⁴mito ingei da be rieko mit kamanono ne kuo nin. Ka in iudo rieko, udo itie kede gen aber me anyim, doko gen ni likame bino poto.

Kop me Ot Are kiwie Kanyaare me Rieko

¹⁵Kur ibed bala dano arac kame kio paco me dano kopooore pi mito suro; kur ibed kede tim me gero kakame dano kopooore bedo iye.

¹⁶Pien akadi dano kopooore pot tien kanyaare, en eyai bobo; do dano arac can ka opoto ne, emuducaro en.

Kop me Ot Are kiwie Kanyauni me Rieko

¹⁷Kur ileli ka can opoto ne ngading ni, doko kur cunyi bed yom kame egete.

¹⁸Pien Rwot bino neno di cunye likame ko bino bedo yom, di likame eko mino ngading ni nono alola.

Kop me Ot Are kiwie Kanyangon me Rieko

¹⁹Kur cunyi poti i kom jo areco, doko kur nyeko maki kede gi;

²⁰pien dano arac likame tie kede kuo aber me anyim; kuo mere me anyim cal bala etala kame koneko.

Kop me ot Adek me Rieko

²¹Atin na, bed kede lworu but Rwot kede but abaka, kur iribere kede jo kame jemo negi;

²²pien jo kame timo kamanono kokaruno ngoole muducaro gi, doko ngai kame ngeo can kame Rubanga arabo abaka karuno timo?

Kope Ace kame Jorieko Owaco

²³Mage da obedo kope kame jorieko owaco: Likame poore ngangolkop bed kede apokapoka i kom jo.

²⁴Ngat kame waco ne dano arac be, “In ili kede raco moro,” jo bino lame, doko atekerin bino dage;

²⁵do jo kame ngolo kop lo jo areco bino bedo kiber, doko kibino udo winyo.

²⁶Ngat kame dwoko ni kop me ateni en ngat kame mari.

²⁷Iik kong poti ni, di iko pito kodere ni, en amio di do iko gero paco.

²⁸Kur imi ijura i kom ngatamoro abongo tien kop, doko dogi kur wac kop moro me angalo.

²⁹Kur iwac be, “Ango abino timo ne bala kame eda etimo na; ango da abino nyango pi gikame en etimo na.”

³⁰Ango ako beno i nget poto me ngat kame nyap, i nget poto olok me ngamingo;



³¹neningo, ako udo di okuto odongo oromo poto lung, doko doi da oume pukupuk. Apama me engaro kame oudo kocele kede oudo otieko poto piny.

³²Ango ako nene, ako paro kop mere i cunya di ako udo pwonyere.

³³ Nini kong atitidi, nin giri ka imito, Dol cingi giri di iko wei,

³⁴di can ko bino ni bala kame ngayak bino ne kede dano, doko rem me jamini ko bino maki bala kame ngayi suro kede dano.

Agole 25

Agole Ace ka Sulumani

¹Mage da en agole ace ka Sulumani kame jotic ka Abaka Esekia me Yuda owandiko.

²Jo woro Rubanga pi mung mere, do abaka jo mio wor piento en engingico di eko mino jo ngeo dwong me gikomungere.

³Bala kame malo tie kede kakabor, kede dud piny da tut tut kalikame kokaruno tuno i ajikini mere, kamanono da tam me abaka likame kokaruno ngeno.

⁴Kwany cete tenge ki siliba di ngatet ko bino udo gi me teto jamini kacil.

⁵Kwany jo areco tenge kikut abaka di apugan mere ko donyo timo gi kopoore.

⁶ Kur imire i nyim abaka, arabo kur icuk bedo dano adwong;

⁷pien ebodo ber ka oko kobi kabedo amalalo, elo ka oko waco ni mino kabedo ni but dano ace adwong kalamo in.

⁸Kur ibunyo tero kop i ekiko. Pien ibino timo benyo i cen mere ka mujura ace obino di eko mini lewic?

⁹Ka in itie kede kop moro kede ngakio ni, ot iko yamo kede en wang i wang, doko kur iko woto mung moro oko.

¹⁰Ka likame iko timo kamanono, ngatamoro kame bino winyo kop ni bino mini lewic, di nyingi ko bino dubere dubere kalikame wacere.

¹¹Kop kame owaco i esawa kibecokina cal bala saabu kame komwono i kom siliba.

¹²Kop kame ngat kariiek bunano kede dano kame yei winyo kop, ber elo mwola kame kotimo kede saabu.

¹³Ngaor kame genere kweo cuny jo kame oore bala kame pii angic kweo kede kom jo i ceng aliet me kare me kac.

¹⁴Dano kame wakere pi giamia kame ecikere pi mino di likame eko kwanyo, ecal bala idoun kede yamo kame bino do likame kikelo kot.

¹⁵Bedo kede dire karuno mino ngapug yei gamo kop nin, doko leb me mwolo karuno mini iloko tam me ngat atek i kom kop moro.



- ¹⁶Ka iudo mokic, cam kame romi kenekene, pien ka iko camo kame kalamo, ibino ngoke.
- ¹⁷Kur ibed lolo paco ka ngakio ni alola, pien ebino ool kedi eko cako dagi.
- ¹⁸Dano kame mio ijura me abe i kom ngawote rac bala akuta me yi, epima arabo tong abit me emal.
- ¹⁹Keto gen i kom dano kalikame genere i kare me peko cal bala tamo nyamo cam kede lak kame lit, arabo ot kede tien kongwalo.
- ²⁰Wero wer ne dano kame cunye odubere cal bala gonyo egoe ki kom dano di piny ngic arabo suto munyo i bur.
- ²¹ Ka kec oneko jokwor ni, mi gi cam kicami; doko ka orio oneko gi, mi gi pii kimati.
- ²²Manono bino mino imio lewic mako gi, doko Rwot bino mini giamia me pwoc.
- ²³Bala kame yamo abuko wok ki tetu malo kelo kede kot, akwot da kelo lilo kamanono.
- ²⁴Eber ot bedo i dud ot kalamo nywako ot kede dako kame ngalok.
- ²⁵Winyo rwonge aber kame wok kibus jo ni kame bedo i piny kabor kedi cal bala pii angic kame dano mato di orio otuo dwane.
- ²⁶Dano aber kame yei tam me dano arac cal bala atan kame pii mere orubere kede cwoto arabo pii kame kobwoto iye yugi.
- ²⁷Camo mokic atot twatwal likame ber, arabo mito be jo di bedo pwoni nakanaka.
- ²⁸Dano kalikame karuno dino wangcuny mere, cal bala bomba kalikame tie kede apama kame gwoke.

Agole 26

- ¹Bala kame akako likame poore bedo tie kede i kare me ooro, arabo kot i kare me kac, kamanono da wor likame poore kede ngamingo.
- ²Bala omobilo kame somo kokobo ki wi yat arabo acilagwec kame por wire ki malo, kamanono da ilam abongo tien kop moro likame mako dano.
- ³Asigira kodaos kede del, punda kotweo doge, en kame mio gin kiko timo gikame komito negi, kamanono da miero kobung ngamingo.
- ⁴Kur idwoko kop me mingo kame ngat kame ming waco, pien manono mio ida ibedo rom aroma kede en.
- ⁵Dwok ne ngamingo kop mere me mingo kede kop me mingo, ka likame itimo kamano en ebino paro kene be eriek.
- ⁶Oro ngamingo kede kop rac; ecal bala dano kame tongo tiene tel en kene, arabo dano kame mo can ki kakame etie iye.



- ⁷Bala kame tien engwalas likame karuno konye kede, kamanono da agole kame ngamingo waco kony mere li.
- ⁸Mino wor but ngamingo kony mere li; ecal bala gweno sipandi di itweo gololo mere i kom sipandi.
- ⁹Agole kame ngamingo waco cal bala ajange me okuto kame ngamera mako i cinge.
- ¹⁰Dano kame mio ngamingo arabo ngamera kame ngole tic, cal bala ngagwei emal kame gweo dano moroni kenekene kame ngole.
- ¹¹Ngamingo kame medo timo gi me mingo cal bala ogwok kame dok nango ngok mere.
- ¹²Benyo, in itieko neno ngat kame nenere kene bala en eriek? Gen me pwonyo ngamingo tie kalamo ngat kame cal kamanono.
- ¹³Nganyapo waco be, “Ango alworo donyo ooko pien engu tie i yongayo! Engu gire tie i gudo!”
- ¹⁴Bala kame ekeko wire kede tuni kede tuca, kamanono da nganyapo lokulokun i apien.
- ¹⁵Nganyapo rwako cinge i bakuli me cam, di eko lolojun likame eko karuno kwanye tere i doge.
- ¹⁶Nganyapo paro bala en eriek ekalamo jo kanyaare kame karuno gango tam kame kitie kede.
- ¹⁷Dano kame donyo i piem kalikame make cal bala ngat kame kapakino yit ogwok kame beo i ngete.
- ¹⁸⁻¹⁹Dano kame ngalo ngatamoro di eko lokere waco be en oudo gire etie iwa, cal bala dano kopoi kame tie tuko kede emal kame neko dano.
- ²⁰Kame yen otiek, mac to; kamanono da, kame akwot li, lok da jik.
- ²¹Bala kame akuk mio kede mac dop, kede yen da mio mac liel, kamanono da ngalok twaruno lok.
- ²²Kope kame ngakwot waco mit bala dek amit kame dano mwonyo di ko donyo i yie kiber.
- ²³Ngat kame yamo me doge mit do di kop kame tie i cunye pat, cal bala agulu kame kocweo kede elupe do di opuco ooko mere kede siliba.
- ²⁴Ngading yamo kop me ecuke do di ekano kop arac i cunye.
- ²⁵Kame ngading ni yamo kede mwolo, kur iyei kop mere, piento en ekano kope atos areco i cunye.
- ²⁶Bed bala en eromo umo adagadaga mere kede kope me angalo, do rac mere bino nyutere i nyim jo dedede.



²⁷Ngat kame kunyo bur me ciko ngat ocelu en ebino lokere poto i bur mere nono, doko dano kame remoro kidi, kidi mere nono bino lokere poto i kome.

²⁸Ngat kame ngalo dano udo cunye dag dano nono, doko yamo amit me angalo kelo peko.

Agole 27

¹Kur iwakere pi gikame bino bedo diki, pien in likame ingeo gikame romo timere diki.

²Wek dano apat en kame wac bero ni; dano ace do weko in kikomi.

³Engaro pek, doko asinge da pek, do alola kame ngat aming kelo pek kalamo gin dedede.

⁴Dano kolilo ger doko etwero timo can, do nganyeko rac kalamo en.

⁵Ngat kame bunano in i wangi ber kalamo ngat kalikame nyuto ni amara mere.

⁶Adieruni paro piri akadi di emi lito, do ngakwor noto lemi tien atot atota, do miero igwoke.

⁷Dano kame oyeng dagi mokic, do ngat kame kec oneko akadi cam akec da mit ne.

⁸Dano koyai oweko paco cal bala winyo koyai oweko ode.

⁹Mo angwe kur yomo cuny dano, do peko dubo cuny dano.

¹⁰Kur wi wil kede adieruni arabo adieru me jonywal ni. Ka in ipoto i peko, kur i ot but wadu; ngakio ni ngat kame tie iyapiyapi kedi karuno konyi kalamo joawade ni kame tie kakabor.

¹¹Atin na, bed dano ariek, di ango ako bino bedo kede yomcuny, tetekeny ango akaruno bedo tie kede kop kame adwoko ne jo kame caa.

¹²Dano kame wie tio neno peko di tie bino en eko gaikin, do dano amiming meede kede ot anyim di en eko riamo kede peko.

¹³Dano kame cungo ne ngakumbor i banya poore gam jame mege bala gikame esingao pi banya nono.

¹⁴Dano kame dilo yai odiko sek eko lamo ne ngawote winyo di eredo areda, kobino tero manono be udo etie lame kirac.

¹⁵Dako kame ngalok cal bala ot kame bedo cwer nakanaka kame kot ocwei;

¹⁶genge tek bala gengo yamo kame tie buko arabo gagao mo i cingi.

¹⁷Lilim kopeno kede lilim, kamanono da dano pwonyere kibus dano wad gi.

¹⁸Dano kame gwoko yat anyak bino camo anyakini mere, kamanono da dano kame gwoko ngadwong mere kobino mine wor.



- ¹⁹Bala kame dano neno kede cal mere i pii, kamanono tam kame dano tie kede nyuto ekite mere.
- ²⁰Likame jo romo kabedo me jo oto, kamanono da likame tie gikame romo wang dano.
- ²¹Siliba kede saabu kotamo teko gi kede mac, kamanono da kongeo ekite ka dano kede kop kame jo waco i kome.
- ²²Akadi in icur ngamingo kede alek bala curo iloya, do likame in ibino kwanyo mingo tenge ki wie.
- ²³Gwok romini kede diegi ni kiber, doko ket cunyi i kom doke ni;
- ²⁴prien abar likame bedo nakanaka. Akadi ajakanut da likame bedo nakanaka.
- ²⁵Kame kotieko nyaro lum me pito leini di amel oko lot, kede kame kotieko nyaro lum me bad mori di oko koko,
- ²⁶in ibino timo igoen ni kede yer me romini, doko ibino cato diegi di iko wilo poto.
- ²⁷Ibino bedo tie kede diegi kame bino mini cak kame romi kede jo me odi karacel kede anyira jotie ni.

Agole 28

- ¹Jo areco poi ringo akadi di ngatamoro likame tie wapo gi, do jo kopoore cuny gi nwang bala engu.
- ²Kame jo me piny moro obedo jojemo, piny nono bedo kede jotel atot atota. Do piny bedo kede anapakin pi kare alac kame ngatel mere obedo dano ariek.
- ³Ngapug kame tidilo jocan cal bala kot kame cwei di eko dudubo cam i poti.
- ⁴Jo kame dagi lubo iswil pwoyo jo areco, do jo kame lubo iswil bedo jokwor gi.
- ⁵Jo areco likame ngeo gimoro i kom tero jo i yore kapoore, do jo kame lubo kop ka Rwot niang iye odocon.
- ⁶Eber bedo ngacan di itie kede ateni, elo bedo ngabar di itimo gi kalikame opoore.
- ⁷Idwe kame lubo iswil obedo idwe ariek, do idwe kame mako aupa kede jo akony gi li mio jonywal gi lewic.
- ⁸Dano kame medo abar mere i yore me medo wel me magoba kame jo poore cule, koko abar nono ne dano ace kame timo mwolo but jocan.
- ⁹Ka dano dagi lubo iswil, ilega mere bedo bala gi me kwer but Rubanga.
- ¹⁰Ngat kame taparo dano kame ikiteso mege beco i timo gikarac bino poto i bur kame en ekunyo nono. Ngat kame li kede raco moro bino udo jamini abeco.
- ¹¹Ngabar nenere kene be en eriek, do ngacan kame wie riek ngeo en kiber.



- ¹²Kame dano kopoore odonyo i kom me ajakanut, jo lelo twatwal, do ka dano arac en kame odonyo i apugan, jo bedo pwono apwona.
- ¹³Ngat kame kano dub mege likame bino udo bero moro, do dano kame tucó dub mege di eko swilaro, Rubanga bino time kisa.
- ¹⁴Etie kede winyo ngat kame lworó Rwot i kare lung, do ngat kame ngaepali, kame dagi winyo kop ka Rubanga bino potó i peko.
- ¹⁵Ngapug arac kame tero jocan kirac, rac bala engu kame tie idoran arabo edubu kame tie diebo kede le me acama.
- ¹⁶Ngapug kame li kede niang ger doko etero jo kirac; do dano kame dagi jamini kame koudo i yore kalikame ber bino bedo kuo pi kare kalac.
- ¹⁷Ka dano moro tie kede raco me neko dano ocelu, mito nganek nono ring tenge tuno to mere; kur ngatamoro konye.
- ¹⁸Dano kame tie kede iponeso abeco bino bwot, do ngat kame tie kede iponeso areco bino ngole potó.
- ¹⁹Ngat kame tek i pur bino bedo kede cam katot, do dano kame dubo kare i timo gimogo kame kony gi li bino bedo ngacan nakanaka.
- ²⁰Dano kame genere bino udo winyo adwong, do ngat kame mito baro awakawaka likame bino bwot udo alola.
- ²¹Bedo kede apokapoka i kom jo likame ber. Do jo mogo karuno timo dub pi sente moro atitidi.
- ²²Dano alit kede jame mege mito be ebar awakawaka, doko en likame engeo be can likame bino bwot potó i kome.
- ²³Ngat kame bunano dano moro pi gikarac kame dano nono otimo bino udo pwoc kibut dano nono i cen mere, elo ngat kame cuko yamo kiber i kom dano kede doge kenekene.
- ²⁴Dano kame kwalo papa mere arabo toto mere di ewaco be, “Manono likame rac,” eda etie ngakuwo.
- ²⁵Ngaeranga kelo lok, do dano kame keto gen mere i kom Rwot bino baro.
- ²⁶Dano kame keto gen mere i kom tam mere kene obedo ngamingo; do ngat kame lubo kop me jo ariek bino bwot ki peko.
- ²⁷Dano kame konyo jocan likame bino bedo kede rem me gimoro, do ngat kalikame ngoloro gi, bino udo ilam atot atota.
- ²⁸Ka jo areco odonyo i apugan, jo bedo pwono apwona; do kame apugan gi oko potó, jo kopoore doko tot.

Agole 29



- ¹Ka ocoki pi epali di in imeede kede nguti, cengemoro ibino udo awanon kalikame cango.
- ²Kame ngat kopooe tie i apugan, jo bedo kede kilel; do kame ngat karac en kame tie pug, jo bedo dinyo adinya.
- ³Atin kame maro riek yomo cuny jonywal mege, do ngat kame mako awotin kede imalayan dudubo abar mere aduba.
- ⁴Piny bedo kiber ka abaka timo gikame opooe, do ka eketo cunye i sente kame komie i pipiny, en ebino dudubo piny mere.
- ⁵Dano kame cuko yamo kiber i kom ngat ocelu udo etie ciko ne bwoi me make.
- ⁶Jo areco moko i owic me dub gi, do jo kopooe wero girgi di kilelo.
- ⁷Ngat kopooe paro pi twero me jocan, do jo areco li kede niang kame cal kamanano.
- ⁸Joacae karuno kelo arubaruba i bomba lung, do jo ariek kweo cuny jo.
- ⁹Ka dano ariek otero ngamingo pide i ekiko, ngamingo nyero nyero me acae di elelemo doko di eyetere abongo ling.
- ¹⁰Jonek cuny gi dagi jo kame li kede raco moro, doko gin kimoo kuo me ngat kame ikiteso mege beco.
- ¹¹Ngamingo nyuto lilo mere kakaler, do jo ariek dio cuny gi eliling.
- ¹²Ka ngapug gamo kop me angalo, jotie mege dedede doko jo areco.
- ¹³Gikame ribo jocan kede jo kame tidilo gi en ine: Rwot en kame mio gin dedede kikuo.
- ¹⁴Ka abaka ngolo kop ne jocan abongo apokapoka, apugan mere bino cungo pi kare alac.
- ¹⁵Bitaro atin kede riene kame etimo gimoro arac mie edoko riek, do atin kame kojalo ajala kelo ne toto mere lewic.
- ¹⁶Ka jo areco tie i apugan, turo iswil meede ameda, do jo kopooe bino neno di apugan gi potu.
- ¹⁷Bitaro idwe ni pi riene gi, di likame gin kiko bino mini ibedo kede par; gin kiko bino yomo cunyi.
- ¹⁸Kakame tel ka Rubanga li iye, atotolun bedo iye, do jo kame gwoko iswil ka Rubanga tie kede yomcuny.
- ¹⁹In likame ikaruno riene iponeso me jotie kede yamo ayama kenekene, pien akadi gin kiniangi, do likame kibino lubo.
- ²⁰Benyo, itieko neno dano kame susunyo yamo abongo kong tamo kop kame etie yamo? Gen me pwonyo ngamingo kalamo gen me pwonyo ngat kame cal kamanono.



²¹Ka in ibedo mino epasoit ni jamini dedede kame en emito cako di en pwodi atin, ceng moro acel en ebino mano jamini nin dedede di kiko bino doko mege.

²²Ngat kame ngalilo maro kelo lok doko ngagero maro tuturo iswilia.

²³Dano kame wakere bino udo lewic, do ngat kame mwolere bino udo wor.

²⁴Ngat kame ribere kede ngakuwo udo en edagi kuo mere kene, piento en ewinyo lamere me ngat kame kokwalo gire, do likame eyei tuco kop moro.

²⁵Bedo kede lworro tie ne dano bala owic, do ngat kame keto gen mere i kom Rwot bedo mulem.

²⁶Jo atot mito be ngapug pwoi gi, do ngolo kop i ateni wok kibus Rwot kenekene.

²⁷Jo kopoore cuny gi dagi jo areco, doko jo areco da cuny gi dagi jo kopoore.

Agole 30

Kope kame Agur Owaco

¹Magi en kope kame Agur wot ka Jake owaco: “Ango aol, Okwe Rubanga, Ango gira aol do, Okwe Rubanga, likame atwero kanyakino.

²Ateteni ango aming doko oudo likame apoore bedo dano; ango likame atie kede niang kame jo poore bedo kede.

³Ango likame atieko doko riek, doko ali kede ngec moro i kom Rubanga.

⁴Benyo, tie dano moro kame otieko ot malo di eko dwogo i piny kan? Ngai kotieko mako yamo di eko bunono en i cinge? Benyo, tie dano moro kotieko bono pii kede egoe? Ngai en koketo ajikini me lobo? Ngai inonono? Nying atin mere ngai? Waca ka ateteni in ingeo!

⁵” Kope dedede kame Rubanga waco timere ateteni; en ecal bala ebuku but jo dedede kame ringo gwokere bute.

⁶Kur imed kop moro i kom kop mere, ka itimo, en ebino bunano in di eko nyuto be in ingalo.”

Agole Ace

⁷Rubanga, ango akwai imia jamini are di pwodi likame ato:

⁸Kwany angalo tenge kibuta, di likame iko mina abed ngacan arabo abed kede abar akalamo; mia kenekene cam kame mitere na.

⁹Pien ka ango ako baro twatwal, cengemogo ako bino dagi, doko ka ako bedo ngacan, cengemogo ako bino timo kuwo di ako dubo nying Rubanga na.

¹⁰Kur idub nying ngatic moro but ngadwong mere, pien ka itimo, en ebino lami, di in iko bino udo peko pi manono.

¹¹Tie jo kame lamo papi gi doko da likame kipwoyo toti gi.



- ¹²Tie jo kame nenere ken gi be gin kili kede raco moro do di gin pwodi kipwokere kede dub.
- ¹³Tie jo kame paro bala gin kibeco twatwal, gin kitie kede neno me acae!
- ¹⁴Tie jo kame tio kede twer gi pi tero kirac jocan kede jo kame piny oloo, ineno bala kimito tieko gi pitipit ki wi lobo.
- ¹⁵Odike tie kede anyira are; gin kikok be, “Mia, mia ba!” Tie jamini ongwon kalikame bilo waco be, “Eromo do” :
- ¹⁶kabedo me jo oto, adonge, lobo kotuo kame mito pii nakanaka, kede mac kalikame waco be, “Eromo do.”
- ¹⁷Ngat kame nyero papa mere arabo kame cao toto mere, agak me aditot bino golo wange, arabo acut bino came.
- ¹⁸Tie jamini ongwon me aura kame niang iye tek nango:
- ¹⁹kite kame ekokom por kede i edou, kite kame twol liao kede i wi lela, kite kame emeri kwango kede i nam, kite kame dako mitere kede icuo.
- ²⁰Dako kame ngadote timo kaman: en etimo adote di eko lwokere, di eko waco be, “Likame tie gimoro arac kame ango atimo.”
- ²¹Tie jamini ongwon kame yango wi lobo, doko jo me piny kan likame karuno kanyakino gi:
- ²²epasoit kame lokere doko abaka, ngamingo kame tie kede cam dedede kame en emito,
- ²³dako kame cuny jo oudo dagi do di eko udo icuo i cen mere, kede dako apasoit kame lunyo wang dako won ot.
- ²⁴Tie giacwea ongwon atitino i lobo kan, do kiriek twatwal:
- ²⁵cukuno li kede teko moro, do gin kicoko cam gi di iko kano i kare me iporo.
- ²⁶Eles da li kede teko moro, do gin kitimo ude gi kakame kide tie iye.
- ²⁷Obonyo li kede abaka, do gin kisirito karacel.
- ²⁸Igwegwe tie gikame in ikaruno mako i cingi, do gida kibedo i miere me abaka.
- ²⁹Tie jamini ongwon aoto kede ewaka:
- ³⁰engu, le kame tek kikom leini dedede me obar doko likame tie le moro kame en elworo;
- ³¹tongweno aoto kede ewaka, ekoroi, kede abaka aoto i nyim jo mege.
- ³²Ka lem in imiming di ibedo wakere, arabo ka lem in ibedo paro timo gikarac, mak do asisa di iko tamo.



³³Pien bala kame kopuo kede cak di mo kowok kiye, kede ka obuo um dano remo cwer kiye, kamanono da tim me kolo kelo lok.

Agole 31

Acora kame komio Abaka Lemuel

¹Magi en kope ka Abaka Lemuel kame toto mere opwonye kede:

²Abin awaci benyo atin na! Okwe, atin me yia! Atin kame ango akwongere pire!

³Kur itiek teko ni kede abar ni i kom mon, jo kame reto abakai.

⁴Lemuel, winyi. Abakai likame poore mato bwini arabo jopug maro mato kongo akec.

⁵Pien gin kikaruno mato kongo di wi gi ko wil kede iswil di do likame kiko paro pi twero me jocan.

⁶Kongo kede bwini poore ne jo kame do tie to arabo jo kame tie kede cwercury atek.

⁷Wek gin kimati di wi gi ko wil kede can gi di likame kiko yutuno peko gi atwal.

⁸Bed dwan jo kame li kede dwan, yam pi twero me jo kame piny oloo.

⁹Yam pirgi doko ngol kop kame poore. Gwok twero me jocan kede jo kame piny oloo.

Dako Aber

¹⁰Udo dako kame ber tin tek benyo! En eber ekalamo kide me wel.

¹¹Cware keto gen mere i kome kede cunye dedede, doko likame tie gimoro kame icuo nono kei.

¹²Pi kare me kuo mere lung, dako nono timo ne cware bero do weko raco.

¹³En kome mit timo igoen me yer me oromo kede igoen acil kame meny.

¹⁴En eomo cam mere ki kakabor bala kame imerin kame yeo jamini timo.

¹⁵Dako nono dilo yai odiko sek di pwodi piny col di eko iiko cam ne jo me ode, kede eko waco ne anyira jotic mege tice me atima.

¹⁶Dako nono neno lobo di eko wilo, doko en epito olok kede sente mere kame en eudo kede teko mere.

¹⁷Dako nono tek i tic, doko etio esawa dedede.

¹⁸Dako nono ngeo jamini me acata kame kelo ne ameda, doko iwor en etio paka esawa kokato di etala mere liel.

¹⁹Dako nono timo ausin mege en kikome di eko cweno igoen mege.

²⁰Dako nono konyo kede cunye lung jocan kede jo kame piny oloo.



- ²¹I kare me ngico me piny en cunye likame poto, pien jo me ode dedede tie kede igoen kame mio kom gi lieto.
- ²²Dako nono timo isukan mege me um, doko engapo igoen akwakwar kame meny.
- ²³Jo mio cware wor i kacokere i erute me bomba, kakame en ebedo iye i diere me joadongo me piny.
- ²⁴Dako nono timo igoen ameny, kede ausin me tweno pier, di eko cato gi but jocat.
- ²⁵Dako nono tek doko jo mie wor, doko eli kede lworu moro pi kare me anyim.
- ²⁶Dako nono yamo kede rieko, doko epwonyo kede mwolo.
- ²⁷Dako nono gwoko jo me ode kiber, doko likame ebedo abeda dubo kare.
- ²⁸Idwe mege pwoye, doko cware da pwoye di epake.
- ²⁹Cware waco ne be, “Mon atot otieko timo jamini abeco twatwal, do in ilo gin dedede.”
- ³⁰Tim me esupe ngalo dano, doko cilo da kony mere li, do dako kame lworu Rwot miero jo pwoi.
- ³¹Miero kopwoye pi gi dedede kame en etimo, doko miero kopwoye i kacokere i erute me bomba pi tice mege.



Ngarab kop

Ngarab kop 1

Kony me Kuo li

- ¹Magonogi en kope me Ngarab kop, wot Daudi abaka me Yerusalem.
- ²Jamini dedede cal bala buongor, kony gi li atwal atwala! Manoni ngarab kop en owaco. Likame tie gimoro kame kony mere tie.
- ³Nyo kara kame dano udo i cane mege me timo tic kede teko i piny kan?
- ⁴Lwak me jo bino di kiko kato, lwak ace di bino lunyo wang gi, do lobo dong kamanono nakanaka.
- ⁵Ceng wok, di eko donyo, di eko susunyo dok kakame ewok kiye.
- ⁶Yamo buko eoto i bad tetu piny, di eko lokere buko eoto i bad tetu malo; en ebuko ewiwirun kamanono, tuno en dok kakame oudo ecakere kiye.
- ⁷Icileta dedede mol kioto i nam adwong, do nam adwong pwodi likame opong. Pii dok i icileta bobo, di kiko cako bobo mol ot i nam adwong.
- ⁸Gi dedede olo dano, kikelo olo kalikame wacere. Wang dano likame yeng kede nen; yit da winyo kope likame rome.
- ⁹Gikame lem tie, en kame bino bedo tie. Doko gikame lem kotimo, en kame bobo kobino timo; likame tie gimoro anyen i piny kan.
- ¹⁰Benyo, tie gimoro anyen kame kokaruno waco be, “Neningo, gini nyen” ? Li kom, pien udo etieko timere sek di pwodi likame konywalo wan.
- ¹¹Likame tie dano moro me kare kasek kame bobo koyutuno, akadi jo kame kobino nywalo da, jo kame bino lunyo cen ngei gi likame bino yutuno gi.

Mono Rieko da Gimoro li

- ¹²Ango Ngarab kop, i kare kame bin angu apugo kede bala abaka me Isirael i Yerusalem,
- ¹³ako tamo kede rieko na dedede pi mito niang gi dedede kame kotimo i piny kan. Rubanga otieko mino jo tic atek me lole, kalikame kelo negi yomcuny.
- ¹⁴Ango atieko neno gi dedede kame jo timo i piny kan, neningo, gin dedede kical bala buongor, arabo riamo yamo.
- ¹⁵Gi kotieko gom, likame kokaruno rieno; gikame li, likame kokaruno maro wel mere.
- ¹⁶Ango ako waco i cunya kena be, “Ango atieko udo twon rieko, kame kalamo me jo dedede kogeo pugo Yerusalem di pwodi angu. Rieko kede ngec likame nyen kibuta.”
- ¹⁷Ango ako keto tam na mito ngeno rieko, poi, kede mingo. Ango ako udo be manoni da cal bala riamo yamo.



¹⁸Pien ka in iriek twatwal, ibedo da kede par atos; ka ngec nin meede, cwercury ni da meede.

Ngarab kop 2

¹Ango ako waco ne koma kena be, “Bia kong, ango amito bilo gikame kolwongo be yomcuny; bed i kuo aber di iko ilel.” Do ako udo be manoni da kony mere li.

²Ango ako waco be, “Nyeru kom obedo tim me mingo, doko bero moro li i yomcuny.”

³Aso, ango ako tamo mino koma udo alakanar kede mato bwini, pi mito ngeno dwong me mingo. Ango oudo amito udo gimoro aber kame dano poore timo i kare me kuo mere acecek i piny kan.

⁴Ango ako timo jamini adongodongo. Agero ude, kede ako puro poti me olok pira.

⁵Apuro poti na, di ako pito yen me anyakini apapat i yi gi.

⁶Akuno ataparin na me pii kame kobwobwongo kede yen na koudo tie dongo.

⁷Ango ako wilo ipasoi acuo kede amon, doko oudo atie kede ipasoi kame konywalo anywala i oda; oudo atie kede twon abar me doke, diegi kede romini, kame kato me jo dedede kotieko bedo Yerusalem.

⁸Ango ako koko da siliba kede saabu kame yai kikut abakai me pinye kame ango oudo apugo. Ango oudo atie da kede cuo kede mon koudo wero nango were me galo wang, kede gi dedede keme yomo cunya.

⁹Aso, ango ako doko twon dano kame nyinge iruo kalamo me jo dedede koge bedo Yerusalem di pwodi ango. Ako dong da di atie kede rieke adwong.

¹⁰Gimoroni kenekene kame oudo wanga okao, ango likame aweko. Gimoroni me yomcuny kame oudo cunya mito, ango atimo, pien ango oudo audo yomcuny i lole na dedede, doko manoni en oko bedo giamia nango me pwoc pi lole na dedede.

¹¹Di ango ako tamo kop i kom tice dedede kame ango oudo atieko timo, kede teko dedede kame ango aketo iye, ango ako udo be, gin dedede oudo kical bala buongor arabo riamo yamo.

¹²Aso, ango ako bedo tamo kop i kom rieke, poi, kede mingo. Pien nyo kame ngat alunyo wang abaka karuno timo apat kede gikame abakai koge pug nen obedo timo?

¹³Di do ango ako neno be, “Rieke ber lo mingo bala kame lero lo kede colpiny.

¹⁴Jo ariek neno kakame kitie ot iye, do jomingo kioto i colo.” Aso di ango ako neno be jo ariek kede jo aming, ajikini gi obedo acel.

¹⁵Ango ako waco i cunya be, “Gikame bino timere ne ngamingo bino timere ne ada; nyo do kame ango ako bino udo pi bedo riek?” Ango ako waco i cunya be manoni da kony mere li.



¹⁶Pien ngat ariek arabo ngamingo likame kobino bedo yutuno nakanaka. I kare me anyim gin dedede wi jo bino wil kede gi. Benyo benyo kame jo ariek to kede bala jomingo?

¹⁷Manono oko mino cunya odagi kuo, pien gikame kotimo i piny kan kelo nango cweracuny; gin dedede kical bala buongor arabo riamo yamo.

¹⁸Manono oko mino cunya oko bedo kec i kom lole kame oudo abedo iye i piny kan, ka aneno be gi dedede kame ango atimo miero awek ne jo kame bino lunyo cen ngea,

¹⁹do ngai nat kame ngeo ka jo nogo bino bedo jo ariek amoto jo amiming? Aso di gin en kame kibino tero jamini dedede kame ango abedo lole iye di atio kede rieko na i piny kan. Manoni da kony mere li.

²⁰Aso ango ako parere twatwal pi lole na dedede kame oudo abedo iye i piny kan.

²¹Pien cengemogo dano romo cane timo tic kede rieko, kede ngec kede diru mere, di eko weko jamini nogo dedede kame en ebedo cane pirgi nogo ne dano apat, kalikame omulo timo gimoro pi udo jamini nogo. Manoni da kony mere li, doko erac twatwal.

²²Kara nyo kame jo udo pi lole kede cane gi kame gin kitimo i piny kan?

²³Pien kare me kuo gin lung opong kede lito, doko tice kame kitimo obedo me abarawic; kiton iwor da wi gi likame wei. Manoni da kony mere li.

²⁴Likame tie gimoro kame ber kame dano poore timo, kame lo en bedo cam kede amata, di eko udo yomcuny pi tice kame en ebedo lole iye. Manoni da ango ako neno be Rubanga en kame mio.

²⁵Pien abongo en, ngai kame twero cam arabo bedo kede yomcuny?

²⁶Rubanga mio rieko kede ngec kede ilel but ngat kame yomo cunye; do ngadubo en emio timo tic me koko abar acoka, di eko mino gi but ngat kame yomo cunye. Manoni da kony mere li. Ecal bala riamo yamo.

Ngarab kop 3

Jamini Dedede tie kede Kare gi

¹Jamini dedede tie kede kare gi, gi dedede kame timere i piny kan tie kede kare mere.

²Tie kare me nywalo dano, kede kare me to mere, kare me pito kodi, kede kare me puto gikame oudo kopito,

³kare me neko, kede kare me cango, kare me reto piny, kede kare me gero.

⁴Tie kare me koko, kede kare me nyero, kare me iturur, kede kare me miel,

⁵kare me lwolwomo kide kede kare me koko kide, kare me gwakere kede kare me likame gwakere.

⁶Tie kare me udo, kede kare me rwenyo, kare me gwoko, kede kare me uco tenge,

⁷kare me nyinyilo, kede kare me kuno, kare me ling alinga, kede kare me yamo.



- ⁸Tie kare me amara, kede kare me dagere, kare me yi, kede kare me mulem.
- ⁹Nyo kame wan oudunu pi tice dedede kame ocanenu iye?
- ¹⁰Ango atieko neno tic kame Rubanga otieko mino jo pi gin bedo lolo kom gi kede.
- ¹¹En etieko timo kare kame poore pi gi dedede. Etieko keto i cuny dano imiela me mito ngeno kare kokato kede kare me anyim, akadi kamanono da, jo likame karuno ngeno gi dedede kame Rubanga timo.
- ¹²Ango ako niang be likame tie gimoro aber kame dano poore timo, kame kalamo en bedo kede yomcuny, di eko timo gikame en ekaruno di pwodi ekuo.
- ¹³Dano poore cam di eko amata di eko yomo cunye kede gikame en ebedo cane iye, pien manono obedo giamia ka Rubanga.
- ¹⁴Ango angeo be gi dedede kame Rubanga timo bedo nakanaka. Likame tie gimoro kame kokaruno medo iye, arabo kwanyo tenge kiye. Rubanga otimo manoni tetekeny jo bed kede lworu bute.
- ¹⁵Gi dedede kame timere nan, arabo kame bino timere, udo otieko timere ngoce sek. Rubanga mio gi kotimere ngoce sek timere bobo.

Ngolo kop kalikame tie Kakare i Wi Lobo

- ¹⁶Medo i wi manono, ango atieko neno be i wi lobo kan, akaka ngolo kop me ateni, tim areco en kame kolunyo timo, doko akaka tim kopooore, gikareco en kame kolunyo timo.
- ¹⁷Ango ako waco i cunya be, “Rubanga bino ngolo kop ne jo kopooore kede jo areco da, piento en etieko iiko kare me gi dedede.”
- ¹⁸I kom kop amako dano, ango ako tamo i cunya kena be Rubanga tie tamo jo pi nyuto negi be gin kirom aroma kede leini.
- ¹⁹Pien gikame timere ne jo, timere ne leini da; jo to, leini da to. Gin dedede kiwei, doko likame tie gimoro kame jo kato kede leini; gin dedede kony gi li.
- ²⁰Gin dedede kioto kabedo acel; gin dedede kiyai ki apua, doko gin dedede kidok i apua.
- ²¹Ngai bo angeo arabo tipo me dano oto malo do me leini oto piny i lobo?
- ²²Aso, ango ako niang be likame tie gimoro aber kalamo jo bedo kede yomcuny pi tic kame gin kitimo, pien manono en kame kopoko negi. Likame tie epone moro kame wan otwero ngeno kede gikame bino timere i cen me wan to.

Ngarab kop 4

- ¹Ango bobo ako neno kite kame kotero kede jo icegun kirac i piny kan. Jo kame kotero kirac oudo tie koko, do likame oudo tie ngatamoro kame kweo cuny gi. Jo koudo tero gi kirac nogo oudo tie kede twon twer, en komio oudo likame tie ngatamoro kame twero kweno cuny gi.



²Manono oko mino ango atamo be jo kotieko to tie kiber kalamo jo kame pwodi tie kuo.

³Do jo kame do tie kiber kalamo jo dedede en jo kame pwodi likame konywalo; pien gin pwodi likame kineno tim areco kame kotimo i piny kan.

⁴Ango ako neno be lole dedede kame jo bedo kede, apiranut dedede kame jo timo kede tice, gin dedede kiyai ki ingobel kame kitie kede but jo icegun. Manoni da cal bala buongor arabo riamo yamo.

⁵Ngamingo dolo cinge di eko kanyo kec paka to.

⁶Eber ne dano bedo kede jamini anonok di etie kede yomcuny, elo bedo lole pi mito jamini atot, kame da cal bala riamo yamo.

⁷Tie bobo gimoro ace kame ango aneno be kony mere li i piny kan.

⁸Manoni en dano kame tie kene, abongo atin moro arabo imiegu mege, do di ebedo lole timo tic kamanono abongo wei, doko da abar kame etie kede likame rome. En kong likame epenyere kene be, “Kara ngai do kame ango atie lole timo tic pire, kame mio ango akei bedo kede yomcuny?” Manoni da kony mere li, doko ebedo kuo kame yomcuny li iye.

⁹Jo are ber lo ngat acel, pien gin kiribo cing gi di kiko udo adwokini aber me tic kame kitimo.

¹⁰Ka ngat acel opoto piny, nget ocelu kiarao malo ngat kopoto. Do ka dano tie kene di eko poto piny, eneno can twatwal, pien likame tie dano ace kame romo konye.

¹¹Bobo da ka piny ngic, jo are ribo buto di kom gi ko bedo liet, do benyo benyo kame dano atie kene obo kede kome kene?

¹²Ngakwor twero bwono dano kame tie kene, do jo are bwone. Auno kame okedo kidek coto tek.

¹³⁻¹⁴Dano twero yai ki bedo ngacan di eko doko ngapug me piny gi, arabo etwero wok ki otkol di eko doko abaka, do ka i kare me tio mere en eko doko miming edagi winyo acora, eponga kame obedo ngacan do di eriek, ber loe.

¹⁵Ango ako neno di jo dedede me piny lubo eponga kobedo ngatel nono, kame oudo olunyo wang abaka.

¹⁶Jo koudo lube likame wel gi marere. Aso di jo kame bino bino ki cen, likame bino bedo kede pwoc bute. Ateteni manoni da cal bala buongor arabo riamo yamo.

Ngarab kop 5

Kur Ibunyo timo Cikere

¹Poore igwokere ka ioto i ot ka Rubanga. Ot kunono pi winyo kop ber lo mino giayala bala kame jomingo timo, pien gin likame kingeo gwokere ki dub.



- ²Kur iyamo atatai abongo paro kop kame iyamo, doko kur cunyi miel timo cikere but Rubanga. Rubanga tie i malo, do in itie i piny, pi mano, kur idur kop.
- ³Ka in ibedo paro kop i kom gimoro, ileke. Ka in iduro yamo, likame iru yamo kop me mingo.
- ⁴ Aso, ka in itimo cikere but Rubanga, cob time awakawaka. En likame cunye yom i kom jomingo. Poore icob timo gikame ikwongere iye.
- ⁵Eber ka in likame itimo kwongere moro, elo in kwongere di likame iko cobo time.
- ⁶Kur kop me dogi mi ipoti i dub, di in iko waco ne ngaor ka Rubanga be dogi oudo obucar abucar. Pinyo kame mio in imito mino Rubanga cunye wang i komi pi kope me dogi, di eko dudubo gikame in ibedo timo.
- ⁷Akadi ibed kede lek atot benyo, arabo itim tice akony gi li, amoto idur kope atot, do in poore ilwor Rubanga.
- ⁸Kur ibed kede ur ka ineno apugan tero jocan kirac di likame kongolo negi kop kakare, doko di otuturo twero gi me dano. Ngapug acelacel tie kede ngapug kame loe, ngat kame umo tice mege areco, bobo da jopug kame lo gi nogo da tie kede jopug kame lo gin dedede.
- ⁹Do i gi dedede, abaka udo kony adwong i poti kame jo puro.
- ¹⁰Ka in cunyi maro sente, sente likame bino romi; akadi ka in cunyi maro abar, abar da likame bino romi. Manoni da kony mere li.
- ¹¹Ka abar ni omeede, wel me jo kame camo gi da meede. Nyo kame in do iudo i abar ni nono, kwanyo kenekene nene anena kede wangi?
- ¹²Epakasit, akadi bed bala cam orome amoto li, enino iwor adikinichel, do ngabar likame nino pi paro abar mere.
- ¹³Tie gimoro arac twatwal kame ango aneno i piny kan: jo kano abar di abar nono ko kelo negi peko.
- ¹⁴Kitamakino timo gimoro kede abar nono di winyo arac ko mako gi, kiko rwenye, di kiko dong abongo gimoro kame kiweko ne idwe gi.
- ¹⁵ Wan obino i piny kan nono abongo gimoro, ka oto, obino bobo dok kamanono, nono bala kite kame oudo obino kede. Likame tie gimoro kame obedo lole pire, kame obino mako oko ot kede.
- ¹⁶Manoni da obedo gikarac twatwal. Wan odok bala kite kame oudo obino kede. Nyo do kame wan oudo ki lole wa riamo yamo?
- ¹⁷Medo i wi manono, pi kare me kuo wa lung, wan ocamo abongo yomcunye, di otie kede par, oli kede yotkom, doko cunye wa kec.



¹⁸Gikame ango atieko neno be ber kame poore atima en cam kede amata, di dano ko bedo kede yomcuny i gi dedede kame en ebedo lole timo i piny kan, pi kare acecek me kuo kame Rubanga omie; pien manono en kame kotieko poko ne wa.

¹⁹Ka Rubanga omio dano abar kede jamini, di eko mine yomcuny i kom gi nogo, poore ebed kede pwoc, di eko bedo kede yomcuny i gikame en ebedo lole pire. Manono obedo giamia ka Rubanga.

²⁰Dano nono likame bino bedo kede par moro pi ceko me kuo mere i wi lobo, pien Rubanga omie epong kede yomcuny.

Ngarab kop 6

¹Tie gimoro arac kame ango atieko neno i piny kan, doko etie peko but jo dedede.

²Rubanga romo mino dano moro abar, jamini, kede wor, di likame eko bedo kede rem i kom gimoro dedede kame cunye mito, do di Rubanga likame ko mine camo abar mere nono, do dano moro apat en kame lunyo camo gi. Manoni da kony mere li, doko etie gikame rac twatwal.

³Dano romo nywalo idwe tol acel, di eko bedo kuo pi kare kalac, do akadi en ebed kuo tieko kare karom amene, ka en likame eko bedo kede yomcuny i kom jamini abeco me kuo noni, arabo di likame oko yike, ango awaco be atin kame onywalo di oto, ber loe.

⁴Pien atin nono obino i kuo akony mere li noni di eko raso i colo, kabedo kalikame koyutuno en iye atwal.

⁵En udo likame eneno wang ceng, doko udo likame engeo gimoro, do en tikatika udo etieko udo wei, elo dano ca.

⁶Dano nono akadi koto bed kuo pi mwakini tutumia are, do di en likame eko camo bero moro, atin kame konywalo di otieko to ber loe. Benyo, likame gin jo are nogo kioto kabedo acel?

⁷Lole kame jo timo dedede tie pi yi gi, do likame tie gikame romo gi.

⁸Nyo kame joariék lo kede jomingo? Bero nyo kame jocan udo pi ngeno epone me bedo kede jo icegun?

⁹Eber ne dano pi mino jamini kame etie kede rome, elo bedo ngobelo jamini apat. Manoni da cal bala buongor arabo riamo yamo.

¹⁰Gimoroni kame timere nan, oudo kotieko moko sek be ebino bedo tie. Wan jo ongeó cal wa, wan likame okaruno piem kede ngat kame tek lo wa.

¹¹Duro kop adura kony mere li. Kara nyo aber twatwal kame dano udo i duro kop?

¹²Ngai kame ngeo gikame ber ne jo pi kare acecek me kuo gi kame kony mere li noni, kuo kame gin kibeó iye abea bala tipo noni? Ngai kame ngeo gikame bino timere i piny kan icen me wan to?



Ngarab kop 7

Par i kom Kuo

- ¹ Nying aber lo mo angwe kur me wel, doko ceng me to ka dano ber lo ceng me nywale.
- ² Ot kabedo kame jo tie koko iye dano oto ber elo ot kabedo kame kotie camo iye ebaga; pien to en ajikini me jo dedede, jo akuo miero kur wi gi wil kede.
- ³ Cwercuny ber elo nyero; ebo, en etwero mino nyim dano rurujun, do eyabo tam mere.
- ⁴ Ngat ariek tamo kop i kom to; do cuny ngamingo paro kop i kom yomcuny.
- ⁵ Eber winyo kop kame jo ariek bunano in kede elo winyo wer kame jomingo paki kede.
- ⁶ Ka ngamingo nyero, ecal bala okuto kame mwomwocun i mac. Nyero nono kony mere li.
- ⁷ Ateteni ngat ariek ka oduonyo tero jo kirac, edoko ngamingo, doko cemusana dubo tam me dano.
- ⁸ Ajikini me gimoroni ber elo acakini mere. Dire ber elo ewaka.
- ⁹ Kur ililo awakawaka, pien jomingo en kame mako lilo i cuny gi.
- ¹⁰ Kur ipenyere be, “Pinyo kara komio kare kokato oudo ber elo kare kanataman?” Peny nono likame obedo peny me ngat ariek.
- ¹¹ Rieko ber bala jamini alunya; en eber ne jo akuo.
- ¹² Pien rieko gwoko dano bala sente. Rieko gwoko kuo me dano kame tie kede, manoni en bero me bedo kede ngec.
- ¹³ Tam kong i kom gikame Rubanga otieko timo; ngai kame twero rieno gikame en etieko mino ogom?
- ¹⁴ I kare kame in itie kede kiber poore ibed kede yomcuny; ka peko obino, poore iyutuno be Rubanga otieko keto ceng me yomcuny kede ceng me peko, tetekeny jo kur ngei gikame bino timere icen.
- ¹⁵ Ango atieko neno gi dedede i kare me kuo na kame kony mere li noni; tie jo mogo abeco kame to i timo gikame poore, doko tie jo kame timo gikareco di kiko bedo kuo pi kare kalac i tim gi areco nogo.
- ¹⁶ Aso, kur ibed dano kame ber bero kokato kare arabo kame riek kitek ateka; pinyo kamio ineko komi?
- ¹⁷ Kur ibed dano kame rac raco kokato kare, doko kur ibed ngamingo; pinyo kamio in ipoore to di pwodi kare ni li oromo?



¹⁸Eber ne in lide i kom acel, abongo weko ocelu da; pien ngat kame lworu Rubanga bino bedo tie kede gin are nogo dedede.

¹⁹Rieko mio ngat ariek teko kame kalamo teko me jopug tomon me bomba.

²⁰Ateteni likame tie ngatamoro kopooore i piny kan, kame timo gi kopooore esawa dedede abongo timo dub moro akadi acel.

²¹Kur iciko yiti i kom kope dedede kame jo waco, cengemogo itwero winyo ngatic ni di etie lami;

²²di ida ingeo i cunyi be tien atot ibedo lamo jo icegun.

²³Ango atio kede rieko na me tamo gi nogi dedede. Ango oudo awaco be abino bedo riek, do rieko oko bedo bor kibuta.

²⁴Ateni me jamini dedede tie kakabor kede wa, kakatut, ngai kame twero niang iye?

²⁵Ango ako lokere keto cunya mito bedo kede ngec kede isoma; oudo amito udo rieko kede adwokini me kope kame oudo anga apenyere iye, kede oudo amito ngeno be tim areco obedo mingo kede da be mingo obedo poi.

²⁶Ango ako udo gimoro kame lit kalamo to. Manono en dako kame cal bala obek. Amara mere buti cal bala owic kede bwoi; ka egwaki, cinge cal bala epingo. Icuo kame yomo cuny Rubanga twero bwot kibute, do ngadubo en ebino mako.

²⁷Nenunu, manoni en gikame anga ako udo, acoko gi mot mot i kare kame oudo atie mono kede adwokini me kope kame oudo abedo penyere i kom gi.

²⁸Anga abedo mono adwokini me peny na nogo do likame anga udo moro. Anga audo icuo acel aber kikom cuo tutumia acel (1,000), do dako aber likame audo akadi acel.

²⁹Manoni en gi acel kenekene kame anga ako niang iye, en be Rubanga ocweo jo di kibeco, do jo en kame oko kelo alokaloka i kom gi ken gi.

Ngarab kop 8

¹Ngai kame cal bala ngarieko? Doko ngai kame ngeo gonyo dwong kop me gi dedede? Rieko mio dano nyero mukemuke, doko emio nyim kame oudo orurujun doko ber.

Lub Kop ka Abaka

²Tim gikame abaka waco piento in ikwongere but Rubanga be ibino timo kamanono.

³Yai tenge ki nyim abaka ka kop nono likame ber ne, kur igali, piento en etimo gimoroni kenekene kame cunye mito.

⁴Kop kame abaka waco obedo kop me ajikini, doko likame tie ngat kame karuno penye be, "Pinyo komio in itie timo kamano?"

⁵Ngat kame lubo cik ka abaka likame udo peko moro, doko ngat ariek ngeo kare kede epone me timo gikame poore.



⁶Bed bala jo tie kede pekini kame dio gi, do gi dedede tie kede kare kede epone me timo gi.

⁷Ateteni jo likame ngeo gikame bino timere i kare me anyim, doko likame tie ngat kame waco negi.

⁸Likame tie dano moro kame tie kede twer me gengo to mere arabo me loko ceng me to mere. Manoni en yi kalikame wan okaruno bwot kiye, akadi jo kame timo tim areco da, tim gi nogo likame twero lako gi.

Jotim Gikareco kede Jo Kopoore

⁹Ango aneno magonogi dedede, di aketo tam na i kom gi dedede kame jo timo i piny kan, piny kame jo mogo tie kede twer i kom jo icegun di kiko mino gi kineno can.

¹⁰Ango atieko neno jo areco di koyiko kede wor, aso di gin en kame oudo kibedo dodonyo i kabedo kacil, di do nan oko pako gi i bomba kame gin oudo kibedo timo iye gikareco nogo. Manoni da kony mere li.

¹¹Ka likame komio jo alola awakawaka pi gikarac kame kitimo, cuny jo bedo i timo gikarac.

¹²Bed bala jodubo tim dub tien tol acel di kiko bedo kuo pi kare kalac, ango angeo be jo kame lworu Rubanga bino bedo kiber pien gin kiwore.

¹³Do jo kame timo gikareco likame bino bedo kiber, doko likame kibino medo kare me kuo gi bala tipo me ot, pien gin likame kilworu Rubanga.

¹⁴Tie gimoro ace kalikame kelo nango niang. Tie jo mogo abeco kame kotero iepone kame kotero kede jo areco, doko tie jo mogo areco kame kotero iepone kame kotero kede jo abeco.

¹⁵Manoni en komio ango awaco be dano miero bed kede yomcuny, pien likame tie gimoro kame ber ne jo i piny kan, kame lo cam, kede amata, di kiko yomo cuny gi. Manoni gin kiromo timo di kilole kede kuo kame Rubanga omio gi i piny kan.

¹⁶Kakame ango atamo kede mito udo rieko, kede mito neno gikame timere i piny kan, ango ako niang be dano twero bedo iwor kede iceng di likame enino,

¹⁷di likame eko karuno udo niang i kom gikame Rubanga tie timo. Akadi bed bala ecane benyo, do likame ebino udo. Jo ariek sidiko be gin kingeo, do likame kingeo gimoro.

Ngarab kop 9

¹Ango ako kano kope nogi dedede i cunya, di ako ngingico gin dedede, kite kame jo ariek kede jo areco, karacel kede tice gi tie kede i cing Rubanga, akadi amara gi kede adagadaga. Likame tie ngat kame ngeo gikame ebino riamo kede.

²Apokapoka moro li. Gi acel nono poto i kom jo dedede, i kom jo kopoore kede i kom jo kame ikiteso gi reco, i kom jo abeco kede i kom jo areco da, i kom jo kalikame opwokere kede i kom jo kopwokere, i kom jo kame mio giayala kede i kom jo



kalikame mio giayala. Jo abeco kotero rom aroma kede jodubo; jo kame kwongere rom aroma kede jo kame dagi kwongere.

³Mano en gikarac kame timere i piny kan, en ine be, gi acel nono poto i kom jo dedede. Bobo da cuny jo dedede opong kede tim areco kede me poi i kare kame gin kikuo kede; ingei manono di do gin kiko to.

⁴Do ngat kame kuo tie kede gen, pien ogwok akuo ber elo engu oto.

⁵Ebo, jo akuo ngeo be gin kibino to, do jo oto likame ngeo gimoro; gin likame bobo kiudo giamia moro me pwoc, doko wi jo da wil kede gi.

⁶Amara gi, adagadaga gi, ingobel gi to karacel kede gi. Gin likame bobo kitie kede gi me atima i kom gimoroni kame timere i piny kan.

⁷Oti icam giri cam ni kede kilel, di iko mato bwini ni kede yomcuny, pien Rubanga oudo otieko yei sek be in ipoore timo kamanono.

⁸Ngap igoen acil di iko sut kede mo.

⁹Cam kuo kede dako kame cunyi maro, pi kare dedede me kuo ni kame kony mere li nono, kame Rubanga omi i piny kan. Manono en kame kopoko ni i kuo noni pi timo, i kare kame ilole kede i piny kan.

¹⁰Gimoroni kenekene kame in itimo, poore itime kede teko ni dedede, pien i kabedo me jo oto, kakame in itie ot iye kunono, likame tie tic moro, tam arabo ngec, amoto rieko.

¹¹Ango bobo ako neno be i piny kan, nakanaka jo adwir en kalikame lo elagano me ringo, doko jo atek en kalikame lo yi. Jo ariek en kame nakanaka li kede gikame kikuo kede, doko jo atie kede adam ariek en kame nakanaka likame baro, akadi jo ipirana da likame komio ruom amalo. Gikame timere but gin lubo kare kede winyo kame poto ne dano.

¹²Likame tie ngat kame ngeo kare kame peko bino poto ne kede. Jo cal bala aporogo kame moko i bwoi, arabo winy kame moko i owic. Peko ngole poto i kom gi bala owic.

Tam i kom Rieko kede Mingo

¹³Ango atieko neno da bobo i piny kan, anyut me rieko kame ango oudo aneno bala ber twatwal.

¹⁴Bomba moro oudo tie kame jo nonok iye. Abaka moro atek oko bino pi sure. Abaka nono oluke di eko iikere pi turo apama me cel mere.

¹⁵I bomba nono oudo tie acan moro ariek, di en eko tic kede rieko mere pi lako bomba nono. Do likame tie ngatamoro oko yutuno en.

¹⁶Ango ako waco be, “Rieko lo teko; aso di rieko me ngacan kocao, doko kope mege likame kowinyo.”



¹⁷Kope kame ngat ariek waco momot poore awinya, eber elo ilelem me ngapug aming.

¹⁸Rieko ber elo jamini me yi, do dub acel dudubo jamini atot abeco.

Ngarab kop 10

¹Lwangini kototoun imo angwe kur mie edoko ngwe tulutul, kamanono da mingo moro atitidi dudubo twon rieko kede wor.

²Cuny dano ariek tie i kom timo gikame poore, do cuny ngamingo tie i kom timo gi kalikame poore.

³Akadi di ngamingo tie ot i yongayo, udo tam mere li, en emio jo dedede ngeo be en eming.

⁴Ka ngapug odoko ger ni, kur iyai di iko weko tic ni; bedo mot bino mino kosasiro dub adongodongo kame oudo itimo.

⁵Tie gikarac kame ango aneno i piny kan, en tim kalikame poore, kame jopug timo.

⁶Jo amiming en kame koketo i ruom amalo, do jo abeco komio ruom apiny.

⁷Ango atieko neno ipasoi di tie ingei asigiran, di jo kame koworo tie ot kede tien gi bala ipasoi.

⁸Ngat kame kunyo bur bino poto i bur kame en ekunyo nono; doko ngat kame belo ki apama, twol bino tonge.

⁹Ngat kame kunyo engaro, engaro bino mine awanon. Ngat kame belo yen, yen bino wanakino en.

¹⁰Ka le okuku, di in likame iko pene, poore iket teko adwong ka iyaro tic kede; do rieko konyo dano cobo timo gimoro kiber.

¹¹Ngeno epone me babango twole likame tie kede konyo moro buti, ka twol okai di pwodi likame ibabango en.

¹²Kope kame ngat ariek waco kelo ne wor, do jomingo kope me dog gin en kame muducaro gi.

¹³Gin kicako kede yamo kope me mingo, di i atiekini mere kope gi nogo ko doko rom aroma kede me ngat kopoi.

¹⁴Ngamingo duro kope adura. Likame tie ngat kame ngeo gikame bino timere i kare me anyim. Ngai kame karuno waco ne wa gikame tie pirwa i kare me anyim?

¹⁵Lole me jomingo mio kom gi ol, pien gin likame kingeo akadi yongayo me aluba.

¹⁶Piny kame abaka mere obedo eponga tie i can, di jotel mege bedo camo ebaga iwor kiakia.



¹⁷Do piny kame abaka mere obedo wot ka ngat kame koworo, tie kede yomcuny, di jopug mege camo ebaga i kare kopooore, pi udo teko, do likame pi amera.

¹⁸Ka dano nyap nyapo kalikame etwero temuno kede wi ode, ot nono bino cwer di eko poto.

¹⁹Ibagai kotimo pi yomo cuny, doko bwini mio cuny dano doko yom, do sente timo gi dedede kame mitere.

²⁰Kur iyamo kirac i kom abaka, akadi eliling i cunyi, arabo i kom ngat kobaro, akadi i agola ni me buto. Winyo moro romo winyo kop nono di eko tero eoto tatamo.

Ngarab kop 11

Gikame Dano Ariek Timo

¹Ket sente ni i cato wil kede pinye apat, pien ingei kare moro ibino ude.

²Popoko gikame itie kede tien kanyaare arabo kanyauni, pien likame ingeo peko kame romo poto i lobo.

³Ka idoun oiyiilo, kot bino cwei. Yat akadi poti i bad tetu piny arabo i bad tetu malo, en ebino dong buto kanono kakame epoto iye.

⁴Ngat kame bedo daro yamo pi loko buko kiber, kede idoun bedo tie iepone kopooore, likame bino cuno kodi arabo kano kac moro.

⁵Bala kite kalikame in ingeo kede epone kame yamo me wei donyo kede i kom atin i yi toto mere, kamanono da in likame ikaruno ngeno gikame Rubanga, ngat kocweo jamini dedede timo.

⁶Cui kodi ni odiko, doko otieno da kur ibed abeda abongo timo tic; pien in likame ingeo mene en kame bino wok kiber, me odiko arabo me otieno, amoto gin dedede kibino bedo ber.

⁷Lero me ceng ber, doko tuno dano neno wang ceng anyen tie gi me yomcuny.

⁸Akadi jo kame bedo kuo pi mwakini atat poore bed kede ilel i mwakini nogo dedede. Do poore kiyutuno be mwakini gi me bedo i piny acol bino bedo tot twatwal. Likame tie gimoro kame gin kigeno pi udo.

Acora but Jo Atino

⁹Wun jo atino, bedunu kede kilel, di ikounu camo kuo di pwodi wun ipongai kede apongai. Timunu gikame cuny wu mito kede kame wangu pwoyo. Do poore ingeunu be Rubanga bino ngolo ne wu kop pi gi nogo dedede.

¹⁰Kwanyunu par tenge ki kuo wu, kede gimogo kame mio komu lito; pien likame ibinunu dong joatino pi kare alac.

Ngarab kop 12



- ¹Yutuno Ngacwec ni di pwodi in eponga, di pwodi kare me peko li otuno, kare kame in ibino waco kede be, “Likame tie gimoro akadi acel kame yomo cunya.”
- ²Manono en kare kame in ibino neno kede ceng, duwe, kede acerin di warawara, do di udo idoun me kot pwodi likame odwogo;
- ³kare kame badi kobedo gwoki bino donyo miel kede teltel, di tieni kame nataman tek, odoko goro. Laki udo odoko nonok likame kikaruno nyamo cam, doko wangi da udo odoko mwadamwada.
- ⁴Kare kame yiti likame bino winyo kede kop kame koyamo i yote, doko likame ibino winyo kiber mor me kidi kame tie riego, arabo wer; do akadi koko me winyo bino cen ki wang nino.
- ⁵Kare kame in ibino lworu kede kabedere kimukurur, doko da ot ki yongayo bino bedo gikame twero kelo ni peko. Yer wi bino doko tar; ibino ware awaa kede ot, doko mit dedede me cunyi bino tiek. Pien jo dedede miero ot i paco gi kame kibino bedo iye nakanaka, di jo akoko jo oto ko bino bedo tie i yote me bomba.
- ⁶Tol kame kotimo kede siliba bino cot, kede bakuli kame kotimo kede saabu bino to, doko jagi me pii kobino bebelo i atan, kede namisiga me wano pii ki atan ko bino tur.
- ⁷Pien kom wa bino dok i apua kakame bin kokwanye kiye, di wei me kuo ko bino dok but Rubanga ngat kame bin omie but wa.
- ⁸Ngarab kop oko waco be, gi dedede kony gi li. Kony gi li atwal atwala.

Kope me Ajikini

- ⁹Do pi kite kame Ngarab kop oudo obedo kede ngat ariek, en eko bedo pwonyo jo gikame en oudo engeo. En ebedo ngingico agole atot, di eko koko gi i yore i yore.
- ¹⁰Ngarab kop oko tamo mono kope kame yomo cuny jo, di eko wandiko kope me ateni iepone kame niangere.
- ¹¹Kope me jo ariek cal bala ebela abit kame jokwai romini leko kede romini, doko kope me agole kame kotieko koko bedo pi kare kalac bala sumalin kame koguro kitek. Rubanga, Ngakwat wa acel, en komio kope nogo.
- ¹²Atin na, gwokere kur ilol komi i kope mogo apat kede magonogi. Wandiko itabun likame jik, doko isoma atek bino olo komi.
- ¹³Ingei magonogi dedede, kop me ajikini ine; bed kede wor but Rubanga, doko lub cik mege, pien manono en gikame jo dedede miero timi.
- ¹⁴Pien Rubanga bino ngolo ne jo kop i kom gi dedede kame gin kitimo, akadi gikame kitimo i mung, abeco arabo areco.



Wer amit

Wer amit 1

¹ Wer amit kalamo were dedede but Sulumani.

Wer me Agege

Dako

² Kong not lema; amara ni ber kalamo bwini.

³ Mo ni me sut ngwe kur; nyingi iruo adikinicel; manono omio mon dedede mari.

⁴ Tera aupere kedi, oring aringa; bed abaka na di iko tera i agola ni. Wan obino kilel karacel piri, obino kilel pi amara ni kalamo bedo kede kilel pi bwini; mon likame mari me nono.

⁵ Mon me Yerusalem, ango acol di acil, acol bala iemai me wi tim me Kedar, do di acil bala isukan me galao agolai me paco ka Abaka Sulumani.

⁶ Kur inenanu kede acae be pien del koma col, pien lieto me ceng omia ayuikino. Imiegu na obedo ger keda di kiko mina tic me gwoko poto me olok, do likame ango ako gwoko poto nango me olok.

⁷ Wac na, in ngat kame cunya mari, tuai kame in ibino ot kwano romini ni iye? Tuai kame ibino mino gi kiurako iye i dier iceng? Pinyo miero ango aum wia di ako rimo piny moni i diere me romini me awotino ni?

Icuo

⁸ Benyo, likame ingeo kanono, in dako me amara i diere me mon? Lub amarin me romini di iko ot kwano diegi ni i nget iemai me jokwai romini.

⁹ In mera me amara, atwero poro cilo ni kede asigiran amon awao cabalan ka Parao.

¹⁰ Lemi cil piento itubuso gi kede mwolere, doko da nguti neno cil piento itubuso en kede bira kame koupo.

¹¹ Do obino timo ni mwolere me saabu di kolilingo gi kede nyonyo siliba.

Dako

¹² Kakame abaka na odedar kede i mamakoe mo kame asut kede oko duny ngwe kur.

¹³ Opa na me amara cal na bala isau me mo mura ka etie buto i tune na.

¹⁴ Opa na me amara cal bala ature angwe mit atuuro i poti me olok me Engedi.

Icuo

¹⁵ In tin icil benyo, apa na me amara; wangi cal bala me awele.

Dako

¹⁶ In icil adikinicel, opa na me amara; in iyomo cunya twatwal. Lum anumu atie dongo en kame bino bedo apien wa.



¹⁷Yen seda en kame bino bedo atekai me ot wa, kede yen pain en kame bino galao wi ot i yie.

Wer amit 2

¹Ango abedo ature me Saron, ature lili me aditot.

Icuo

²Bala ature lili atie i diere me ocokocok, apa na da cal kamanono i diere me mon apat.

Dako

³Bala olemo atie i diere me yen apat i abum; opa na me amara da cal kamanono i diere me awobe. Ango cunya maro bedo i tipo mere, anyakini mere mit nango.

⁴En etera i ode me camo ebaga di eko uma kede amara mere.

⁵Mia acam olok otuo aud kede teko, mia olemo agony kede olo; pien amara otieko cunya.

⁶Cinge tetu ngodal ango ateno iye wia, di cinge tetu cam gwaka.

⁷Akwao wun mon me Yerusalem lairunu i nying atil kede i nying amiem be likame ibinunu totolo amara wa, tuno en romo wa.

Wer me Are

Dako

⁸Atie winyo dwan opa na! Nenunu, etie bino. Etie ringini engolo wi mori, etie kalamo imukuran.

⁹Opa na cal bala atil arabo bala amiem apwodi titidi. En ica etie cungo i nget apama. Etie neno yi ot ki dirisa, etie ngino yi ot ki epiding atwolo.

¹⁰Opa na tie yamo keda.

Icuo

Bia, apa na bia; apa na me amara bia ooti.

¹¹Kare me ngico otieko kato, kot otieko weko cwei.

¹²Ature oromo kabedo dedede, man en kare me wer. Wer me aweleko winyere i lobo wa.

¹³Anyakini me epigi ocalo cek, olok da tie tuuro; ngwece me ature gi kur. Apa na me amara yai, yai ooti.

¹⁴Okwe awele na ipwono kakobarere me lela. Mia anen wangi, mia awiny dwani. Pien winyo dwani mit, doko da wangi cil.

¹⁵Mak ne wa ikween, ikween apwodi tino. Gin kidudubo poto me olok, pien olok wa tie tuuro.



Dako

¹⁶Opa na en mera, ango da en mere. En ekwao romini mege i diere me ature lili

¹⁷tuno di koyo me ru piny okuto di colpiny oko rwenyo. Dwogi, in opa na me amara, bala atil, bala amiem atidi atie i wi mori me Beter.

Wer amit 3

¹Iwor di atie i kabuto na oudo amo ngat kame amaro; amoe do likame ako ude.

²” Nan ango ayaro yai di ako ot i bomba, i yote mege kede kabedo kame jo cokere iye; Abino mono ngat kame cunya maro nono.” Amoe do likame ako ude.

³Jo kame daro bomba oko wuda kakame oudo kitie mamano kede bomba. Ango ako penyo gi be, “Inenunu opa na kame cunya maro?”

⁴Cucuto kakame ango akato gi kede, ango ako udo opa na kame cunya maro. Ango ako lide i kome di ako dagi ne ot paka tuno ako tere i ot ka toto na i agola me ngat koyaca.

⁵Akwao wun mon me Yerusalem lairunu i nying atil kede i nying amiem be likame ibinunu totolo amara wa, tuno en romo wa.

Wer me Adek

Dako

⁶Ngai ine atie bino ki wi tim bala yiro aswiridido duny, di kome ngwe kur bubani kede mura, moe angwe kur kame jocat wil cato?

⁷Nenunu, kotie tingo Sulumani kede itanda me angosibib! Cuo ot kanyape oluke, gin en cuo atek kalamo i Isirael.

⁸Gin dedede kimako ipimai di kitie kede diru me yi. Ngat acelacel kikom gi otweo epima mere i piere pi kuro asura kame twero timere i dier iwor.

⁹Abaka Sulumani otimo gi me yene kede ibaon me yen me Lebanon.

¹⁰Ipirin mege kopuco kede siliba; ngee kotimo kede egoe kame kolilingo kede saabu. Kateno wic mere kotimo kede egoe akwakwar, yie mon me Yerusalem en kotubuso i yore kame nyuto amara.

¹¹Mon me Sion bianu inenunu Sulumani. En etie ngapo ocoro me ajakanut kame toto mere orwako i wie i ceng kame enyomere kede, i ceng kame cunye oudo modomodo kede.

Wer amit 4

Icuo

¹Apa na me amara, in tin icil benyo, in icil twatwal! Wangi meny bala me awele i egoe kame iumo kede wii. Yer me wii ineno bala ekodet me diegi, atie wok piny i aditot me Gilead.



²Laki tar bala romini amon kame pwodi konyaro anyara yer kom gi, di oko lwoko gi. Gin dedede kitie likame tie korwenyo, acelacel kede ngawote.

³Del me dogi cal bala ausi akwar, dogi neno ber adikinicel. Lemi tunituni cal bala dul me anyakini me pomagurunet, di kitie i egoe kame iumo kede wii.

⁴Nguti cal bala gedo ka Daudi abor malo, kame konapo apama mere enyiriri enyiriri. Mwola me ngut liero iye bala ibukui tutumia, gin dedede ibukui me jo yi.

⁵Tune ni cal bala idwe me amiem are, itilio are atie cam i diere me ature lili.

⁶Ango abino dong bedo i wi emukura me mo mura, i wi emukura me odok aduny ngwe kur tuno koyo me ru me piny buko, tuno di colpiny orwenyo.

⁷Apa na, in tin icil benyo; likame tie karamoro arac i komi!

⁸Ateran na, yai ki moru me Lebanon ibin buta, bia buta ki moru me Lebanon. Wok piny ki moru me Amana, ki moru me Senir kede ki moru me Kerimon, kakame inguon kede irisai bedo iye.

⁹Amina, ateran na, neeno ni kede mwole me nguti owao cunya.

¹⁰Amara ni tin mit benyo, in amina, ateran na! Amara ni ber kalamo bwini, doko da moe nin ngwe kur kalamo gi dedede atie kede ngwece amit.

¹¹Ateran na del me dogi winyiwinyi bala mokic; lebi cal nango bala cak kede mokic. Igoen nin ngwe kur bala ngwece me Lebanon.

¹²Amina, ateran na cal bala poto kame kocelo; poto kame kogwao kede apama, atan kame koluko,

¹³kanono yen dongo iye. Gin kidongo bala yen pomagurunet di kiko nyako anyakini abeco kalamo. Ngwece akur me mo kena kede nadi tie kanono,

¹⁴kede me moe sapuron, kalamus, kede sinamon, kede yen me egere dedede me odok angwe kur. Yen me mo mura kede aloe dongo kanono, kede yen ace me moe angwe kur kalamo.

¹⁵In atan abido poti, esamai me pii amol, pii anyete wok ki wi mori me Lebanon.

Dako

¹⁶Yamo abuko me bad tetu malo, cei! Yamo abuko wok ki bad tetu piny, bia! Buki i poto na tetekeny isarakino ngwece akur atie iye. Poore opa na me amara bin i poto mere di eko camo anyakini abeco kalamo atie iye.

Wer amit 5

Icuo

¹Ango atieko donyo i poto na, amina, ateran na. Atie koko mura na kede yen angwe kur; atie camo mokic na kede apien mere; atie mato bwini na kede cak.



Mon

Camunu, wun adiereson, matunu tuno wun mer kede amara.

Wer me Ongwon

Dako

²Ango oudo atie nino do cunya oudo neeno. Ako leko be opa na oudo tie twotwomo ekeko di ewaco be, “Amina, apa na me amara, yab na ekeko, awele na, apa na aber adikinicel. Pien wia odiak kede toyo, yer wia tie cwer pii pi ngico me iwor.”

Dako

³Ango atieko gonyo igoen na; pinyo amio angap gi bobo? Ango atieko lwoko tien; pinyo amio doko apwok gi?

⁴Opa na ocwao cinge i kakatwolo, cunya oko donyo gwere kitek pire,

⁵ango ako yai pi yabo ne opa na ekeko. Mo mura oudo odiako cinga, mo mura oudo tie cwer acwera ki lweta kakame amako kede agilu me yabo ekeko.

⁶Ango ako yabo ne opa na ekeko, do opa na oudo otieko lokere odok. Kuo na kony mere oko doko li pi manono. Ako mone, do likame ako ude; alwonge, do likame egamo dogo.

⁷Jodar koudo tie mamano bomba oko wuda; gin kiko jwata paka luny; jodar apama me bomba nogo oko tero egoe na me um.

⁸Akakasaro but wu wun mon me Yerusalem be, kame iudunu opa na, wacunu ne be par otieko teko na.

Mon

⁹Dako acil kalamo mon apat, nyo kamio in iparo be opa nin do pire tek kalamo jo apat? Nyo kame pire tek kibute, en komio in ikakasaro but wan kamano?

Dako

¹⁰Opa nango kome yot di ecil, en engere akadi kikom cuo tutumia tomon.

¹¹Wie cil bala saabu kame kojililo kiber, yer wie daudau di col bala agak.

¹²Wange cal bala aweleko, aweleko kobam i cak di kiko donyo cungo i dog ataneko.

¹³Leme neno ber bala potu, potu me yen angwece gi mit. Del me doge cal bala ature lili, di eleny kede mo mura aliu.

¹⁴Bade cal bala ikong me saabu kame kodudupo iye kide me wel. Kome cal bala gikame kotimo kede lak liec di oko tubuso en kede kidi sapir.

¹⁵Tiene cal bala ipirin me kidi alabasita, kame dud gi cungo i wi saabu. En ecungo ineno bala mori me Lebanon, kede yen seda gi kame wi gi bocoboco.

¹⁶Noto doge mit gi dedede me kuo mere ber nango. Mon me Yerusalem Manoni en opa nango kede adiera.



Wer amit 6

Mon

¹Dako acil kalamo mon dedede, opa ni me amara ooto tuai? Wac ne wa yongayo kame opa ni olubo, me wek okonyi mone.

Dako

²Opa nango ooto i potu mere i potu me yen angwe kur. En etie kwano romini mege i potu kunono di ecoko ature me lili.

³Opa na en mera, ada abedo mere; en ekwao romini mege i diere me ature lili.

Wer me Kany

Icuo

⁴Apa na me amara, in icil bala bomba me Tirisa neni ber bala Yerusalem, in iwao cuny dano bala neno isirikalen atie sirito kede imendera.

⁵Lok wangi tenge kibuta, pien kisupo cunya i komi adikinichel. Yer me wii cal bala ekodet me diegi atie wok piny ki emukura me Gilead.

⁶Laki tar bala romini amon, kame pwodi kolwoko kom gi nyen. Gin dedede kitie likame kimuk, kiupere are are, me malo kede me piny.

⁷Lemi cal bala anyakini me pomagurunet kame kopoko ki diere, di kitie i egoe kame iumo kede wii.

⁸Abaka bed kede mon ot kanyape kame enyomo, kede ot kanyauni kalikame enyomo, kede anyira ace atot kalikame marere.

⁹Do awele nango, eber adikinichel, en acel kenekene, toto mere mare adikinichel. Konywale abongo karamoro arac i kome. Anyira onene oko cako ne be etie kede yomcuny; mon ka abaka kame enyomo kede kalikame enyomo da kamanono, di gin dedede kiko pake.

¹⁰Ngai ine kame ngibuco neeno bala ru me piny? Ecil bala duwe, erieny bala ceng, ewao cuny dano bala neno isirikalen asirito kede imendera.

¹¹Ango ako ot i potu me anyakini angee tek, pi neno ka yen me aditot otuuro; pi neno ka olok olibo, kede ka pomagurunet oudo otuuro.

¹²Koma tie miel amiela; in imio cunya tie kukudo ango pi amara, bala kame ngat aringo kede cabala cunye kukudo en kede pi yi.

Icuo

¹³Bia, dwogi in nyako kacil me Sulam, tetekeny angii.

Dako

Pinyo komio imito ngina, bala atie miel i diere me jo koriere tuni tuni?

Wer amit 7



Icuo

¹Tieni tin cil i kalabanda benyo, in nyar ka abaka! Amuros ni ongwel di pwot, bala gikame ngatet won diru ocweo kede kidi me wel.

²Peni olukumikin bala awalo kalikame bwini angwe kur tiek kiye. Piny yii cal bala atukit me engano kame ature lili oluko.

³Tune ni are cal bala itilio ibangin, bala amiem are.

⁴Nguti cal bala gedo abor malo kame kotimo kede lak liec. Wangi cal bala ataparin atie i bomba me Kesibon, i nget erute me Bat Rabim. Umi cal bala gedo abor malo me Lebanon, kame neeno kede Damasiko.

⁵Wii odiede bala moru me Kamel. Yer me wii col di kibocoboco di kimeny, cilo mere wao kiton cuny abaka.

⁶In tin icil di ibus benyo; in mera me amara, nyako ayomo cunya!

⁷In ibor di icil bala tugo, tune ni cal bala abunge me anyakini mege.

⁸Ango abino yito i wi tugo nono di ako ngwedo anyakini mege. Kibuta tune ni tie bala abungeta ne anyakini me olok, wei ni tie na bala ngwece amit me olemo.

⁹Noto dogi mit di winyiwinyi bala bwini kame beo i del dog dano kede i lake.

Dako

¹⁰Ango abedo me opa na cunye tie i koma.

¹¹Bia, opa na kame amaro, bia ooti i calo di oko buto kunono.

¹²Obino dilo yai ot neno olok, pi neno ka kicako lot, ka ature gi ocako ngamere, kede pi neno ka pomagurunet da ocako tuuro. Ango abino mini amara na i kunono.

¹³Ature me yen me amara duny ngwe kur, doko anyakini abeco dedede tie i dog ekeko wa. Opa na me amara, ango abedo kano ni amara na cako sek tuno tin.

Wer amit 8

¹Koto di in oudo ibedo omina kodoto tuno ka toto na da! Ka koto ariamo kedi i dier jo, koto amoti amot me notere abongo ngatamoro bedo kede acae buta.

²Koto ateri i ot ka toto na, i agola me ngat konywala. Koto amii bwini angwe kur imato, pige me anyakini me pomagurunet na.

³Cingi tetu ngodal ango ateno iye wia, di cingi tetu cam gwaka.

⁴Akwao wun mon me Yerusalem kur itotolunu amara wa tuno en romo wa.

Wer me Kanyape

Mon

⁵Ngai ica atie wok ki wi tim, di egongere i epepet opa mere?

Dako



Ango acei i dud olemo kakame toto ni oudo onywali iye, kakame ngat konywali oramere kiye.

⁶Mia abed i cunyi nakanaka bala alama, cingi maka, ango kena, di ako bedo bala alama atie iye. Amara tek bala to, amita tie kede twer arom aroma kede ates. En ekiro mac, mac aliel di ger.

⁷Pii likame karuno neko mac me amara, alele da likame mwonye. Ka dano otamo wilo amara kede abar me ode dedede, ebino udo acae atwal atwala.

Imiegu me Dako

⁸Wan otie kede amin wa apwodi titidi pwodi likame eburuno. Nyo kame obino timo ne ka awobi moro obino supe?

⁹Ka koto en oudo ebeto apama, koto ogero siliba i wie malo, ka koto en oudo ebeto ekeko, koto omwone kede ibaon me yen seda.

Dako

¹⁰Ango abedo apama, tune na obedo gedo aboco; nena kelo ne opa na anapakin.

Icuo

¹¹Sulumani tie kede poti me olok i kabedo kame kolwongo be Baal Kamon. Tie jopur kame pango poti nogo kibute, ngat acelacel cule siliba akaya tutumia acel.

¹²Poto nango me olok, mera amaka, obedo mera kena; wek Sulumani gam siliba akaya tutumian, kede da jo kame daro poti ko gamo tol are bala iner gi.

¹³In itie i poti; jowota tie kuro winyo dwani. Wek awiny dwani.

Dako

¹⁴Susunyo bino buta, opa na me amara. Bed dwir bala amiem icuo apwodi iyapakina, pi ot i mori kakame yen angwe kur dongo iye.



Isaya

Isaya 1

¹ Itabu noni obedo kope kame Rubanga omio ongere but Isaya wot ka Amos, kamako Yuda kede Yerusalem, i kare me apugan ka Usia, Yotam, Akas kede Esekia bala abakai me Yuda.

Rubanga Obunano Jo mege

² Rwot owaco be, “Okwe wi lobo kede malo, winyunu gikame atie waco! Ango apito idwe paka dongo di kiko lokere jemo na.

³ Twon ngeo wone, doko punda da ngeo kakame ngadwong mere pite kiye; do jo me Isirael likame ngea. Jo na likame tie kede niang moro.”

⁴ Itie i can, in ateker angadubo, wun jo kame dub onuo, lwak arac, idwe kotieko dubere. Wun itiekunu weko Rwot; itiekunu dagi Ngat Kacil me Isirael, itiekunu loko ne ngei wu.

⁵ Pinyo kara pwodi imeedenu ameda kede dub? Benyo, pwodi itienu mito ebela? Nenunu, aporeso otieko romo wi wu lung, cunyu da tie kede aramo.

⁶ Cako ki tienu pinyo tuno i wi wu malo likame tie karamoro aber; komu dedede opong kede aporeso, kede kakoyure, kede buge acwer. Likame ngatamoro olwoko buge nogo akadi twetweo gi da; likame kowiro gi kede yat.

⁷ Pinyu otieko dong nono, kotieko wango bomban wu kede mac. Jokumbor omao lobo wu di wuda itienu neno di kiko dudubo en; edong nono abongo jo iye.

⁸ Yerusalem odong bala kima kame koweko i potome olok; bala tipokame kotagalo i potome ikwekwer; bala bomba kame jokwor oluko.

⁹ Ka koto Rwot me jo yi likame oudo oweko jo mogo odong kuo, oudo koto Yerusalem odoko cal bala bin Gomora kede Sodoma.

¹⁰ Yerusalem, jopug ni kede jo ni cal acala bala bin jo me Sodoma kede Gomora! Winyo gikame Rwot ni tie waco ni; cik yiti i kom pwony kame Rubanga wa tie mini.

¹¹ En ewaco be, “Twon giayala wu go kony gi nyo kibuta? Romini kame ingolunu me giayala kede kakamio me leini otieko roma; likame doko cunya mito remo me giayala me twonin kede me romini kede me diegi.

¹² Ngai oudo openyo wu pi kelo magonogi dedede ka itienu bino wora? Kur doko tienu kara nyon tempulo na!

¹³ Kony mere li me wun kelo giamia wu. Ngwece me odok angwe kur kame i dunyunu otieko doko gi me kwer buta. Likame doko ango atwero kanyakino gikareco kame itimunu i Ebagame Por Duwe, kede i ceng Sabato, kede i kare ace me cokere wu me edini.



¹⁴Ango cunya dagi Ebagu wu me Por Duwe kede ceng adongo ace; gin kitie nango bala yec kame ango atieko ol yeno.

¹⁵” Akadi bed bala itingunu cingu ilega, ango abino ngoloro tenge; akadi bed bala ilegunu tien adi, do ango likame abino yei winyo kwac wu, pien remo me nek opwoko cingu.

¹⁶Lwokerenu idokunu cil; jikunu timo tim areco i wanga; ebo, jikunu tim areco

¹⁷di ikounu pwonyere timo gikame ber. Nenunu be itimunu gi dedede i yore me ateni di ikounu lako jo kame koteri kirac, kede ikounu gwoko twero me idwe kic, kede ikounu konyo apuserun.”

¹⁸Rwot waco be, “Nan do bianu oporunu kop. Akadi bed bala dub wu opwoko wu ibokerenu bubu, do ango abino lwoko wu ikounu doko tar bala akako, akadi bed bala kikwar bala remo, kibino doko tar bala epamba.

¹⁹Ka iyeunu bedo jo kame lubo kop na, ibinunu camo jamini abeco kame lobo noni ceko.

²⁰Do ka idagunu ikounu lokere jemo na, ibinunu to to me epima. Ango Rwot en awaco.”

Bomba Kopong kede Dub

²¹Bomba kame oudo genere odoko cal bala malaya. Bin sek tice kame kotimo i yore me ateni kede tice kopoore en oudo tie iye, do nan do jonek en olunyo bedo iye!

²²Yerusalem, in oudo ical bala nyonyo siliba, do nan do idoko cete me nyonyo; oudo ical bala bwini aber, do nan ical do bala bwini kame konyalo kede pii.

²³Jotel ni odoko jojemo kede jowot jokuwo. Gin tic gi do gamo giamia kede cemusana. Likame kingolo kop i ateni pi koto konyo idwe kic amoto apuserun.

²⁴Pi manono, nan winyi, Rwot me jo yi, Rubanga atek me Isirael tie waco be, “Twon can! Abino bwoto lilo na i komi, in ngakwor na, di ako culo kwor i komi!

²⁵Ango abino timo ni can. Bala kame kotwako kede nyonyo di oko jililo en pi lonye, ango abino lonyi i yore me kwanyo cete tenge ki komi.

²⁶Abino mino ibedo tie kede jopug kede jo amio tam acal bala kame oudo bin itie kede sek, ingei manono kobino lwongo Yerusalem be bomba me jo kopoore kede kame genere.”

²⁷Pien Rwot timo gi dedede i ateni kede i yore kopoore, en ebino lako Yerusalem kede jo mege dedede koswilaro.

²⁸Do jojemo kede jodubo en ebino muducaro gi karacel; en ebino neko jo kame weke.

²⁹Lewic bino mako wu pi yen kame iworunu kede pi poti kame ikwerunu but rubangan.

³⁰Ibinunu doko cal bala yat oak kame pote mege ner di ony; bala pote ali kede pii iye.



³¹Bala kame ibiriti cwinyo kede lum otuo, kamanono da jo atek tice gi areco bino cwinyo gi kiko amuducar; likame tie ngatamoro kame bino twero konyo gi.

Isaya 2

Anapakin kame Bedo Nakanaka

(Mika 4.1-3)

¹Man en kop kame Rubanga omio Isaya wot ka Amos i kom Yuda kede Yerusalem.

²I kare me anyim, moru kame tempulo cungo i wie bino bedo moru abor malo kalamo mori dedede, ebino bedo bor malo kalamo imukuran dedede. Atekerin dedede bino siriti iye.

³Jo atot bino ot iye di kiko waco be, “Ootunu i wi moru ka Rwot, i tempulo ka Rubanga me Isirael. En ebino pwonyo wa gikame en emito ne wa timo di wan oko lubo kop mere.” Pien pwony ka Rwot bino wok ki Sion; kope mege bino wok ki Yerusalem.

⁴En ebino ngolo kop i diere me atekerin di eko bino poko jo atot atie kede twomere. Gin kibino teto ipimai gi doko leb kwei me dok, kede tongini gi kibino teto doko pale me lwero yen. Atekerin likame bobo bino yi, akadi pwonyere yi bobo.

⁵Okwe, wun ikwae ka Yakobo, nan do bia ootunu ki lero ka Rwot!

Kobino Jiko Ewaka me Jo

⁶Okwe Rubanga, in itieko weko jo ni, gin ikwae ka Yakobo! Pien lobo gi opong kede tim me lamo gagi kede tice me tangu kowok ki bad tetu kide kede ki Pilistia. Gin kitieko moko lubo itok me jokumbor.

⁷Lobo gi opong kede nyonyo siliba kede saabu, ajikini me abar gi likame tie; lobo gi odure kede asigiran, ajikini me cabalan gi likame tie.

⁸Lobo gi odure kede caljwogi; gin kiworo gikame cing gi en otimo.

⁹Pi manono, jo dedede kobino dwoko dwongo gi piny di oko mino lewic mako gi. Rwot, kur itim gi kisa.

¹⁰Jo bino pwono i abo me lela, kede kibino gogoro asinge kipwono iye pi lworo kame bino ka Rwot bino kelo, kede pi ringo deyo me dwongo mere.

¹¹Tingere kame jo tie kede kobino dwoko piny, kede ewaka me jo kobino tieko. Di Rwot kenekene en kame oko bino mino dwongo i ceng nono.

¹²Pien Rwot me jo yi otieko moko ceng kame en ebino dwoko kede piny jo dedede kame wakere kede kame tingere.

¹³En ebino dudubo yen seda aboco me Lebanon. Kamanono da ebino dudubo yen oak me lobo me Basan,

¹⁴mori kede imukuran aboco,



- ¹⁵gedo dedede aboco malo kede apamai kobedo cel.
- ¹⁶Ebino tuturo imerin me Tarusi kede yede kibus.
- ¹⁷Tingere kame jo tie kede kobino dwoko piny, kede ewaka me jo kobino tieko. Di Rwot kenekene en kame oko bino mino dwongo i ceng nono.
- ¹⁸Caljwogi bino rwenyo atwal.
- ¹⁹Jo bino pwono i abo me lela, kede kibino gogoro asinge kipwono iye pi lworu kame bino ka Rwot bino kelo, kede pi ringo deyo me dwongo mere, kakame en ebino yai kede pi kelo twon lworu i wi lobo.
- ²⁰I ceng nono jo bino uco ne inunuk kede ne olikolik caljwogi kame kitimo kede nyonyo siliba kede saabu pi awora.
- ²¹Kame ceng nono otuno, jo bino donyo i abo me lela, kede kakobarere me mori kipwono iye pi lworu kame bino ka Rwot bino kelo, kede pi ringo deyo me dwongo mere, kakame en ebino yai kede pi kelo twon lworu i wi lobo.
- ²²Wekunu keto gen wu i kom dano adana, kame tie kede wei i ume kenekene. Kara kony me dano tie tuai?

Isaya 3

Atotolun i Yerusalem

- ¹Aso, nan Rwot, en Rwot me yi tie kwanyo ki Yerusalem kede ki Yuda kony me gi dedede kede jo dedede kame kuo ka jo cungo iye. En ebino kwanyo cam kede pii,
- ²jo yi kame kouro kede isirikalen, jongolkop kede inabin, jolam gagi kede joadongo,
- ³jotel me isirikalen kede jo kame koworo, jo kame mio tam kede jo kame tie kede diru me timo tangu pi mino gimogo timere.
- ⁴Rwot bino mino awobe apwodi tino kede imukerun en apugo jo.
- ⁵Ngat acelacel bino tero jo ace apat kirac. Joatino likame bino woro joadongo gi, kede da jo me ruom apiny likame bino woro jo kame lo gi.
- ⁶Kare bino tuno kame jo me ekeko moro bino mako kede wad gi moro di kiko waco ne be, “Twaratwara in itie kede egoe agwagwang, aso in do dok ngatel wa di iko pugo kiton atukit me ude kame korereto nogi.”
- ⁷Do en eko bino dwoko be, “Ango likame akaruno cango peko wu; ango ali kede cam amoto igoen. Kur iketanu bedo ngatel wu!”
- ⁸Ebo, Yerusalem ogete, Yuda otieko poto! Pien gi dedede kame gin kiwaco kede kame kitimo likame lubere kede mit ka Rwot; gin kijemo ne Rwot i deyo me tie mere.
- ⁹Neeno me nyim gi da nyuto raco gi; gin kitimo dub obe bala bin jo me Sodoma, likame kipwono kede. Gin kibino neno can! Gin en kikelo peko i kom gi ken gi.



¹⁰Jo kame li kede raco moro tie kede winyo aber, pien gin kibino udo bero pi gikame kitimo.

¹¹Do jo areco tie i peko! Kitie kede winyo arac tin benyo, pien gikame gin kitimo ne jo apat en kame kobino timo ne gida.

¹²Rwot waco be, “Jo na, idwe en kame do tie tero wu kirac; mon en kame do pugo wu. “Okweunu jo na, jotel wu tie rwenyo wu, gin kitie totolo ne wu yongayo kame ipoorenu lubo.”

Rwot bino Ngolo Kop ne Jo mege

¹³Rwot otieko yai pi peto pido mere; en etieko cungo pi ngolo kop ne jo mege.

¹⁴En ebino ngolo kop ne joadongo kede jopug ka jo mege. En epeto pido mere i komu be, “Wun iyakunu poto na me olok. Ude wu opong kede jamini kame iyakunu kibut jocan.

¹⁵Twero nyo kame wun itienu kede me tero jo na kirac di idiunu jocan? Ango Rwot Rubanga me jo yi en awaco.”

Ikwenyar but Mon me Yerusalem

¹⁶Rwot waco be, “Mon me Yerusalem tingere twatwal! Gin kioto di kikiarao wi gi, di kingwengwenyo wang gi kede neeno; gin kicenyo ot acenya di irikoi kame kingapo piny i tien gi kok gwiling gwiling.

¹⁷Do ango abino kiso wi anyira me Yerusalem nogo, di ako weko kom gi me lewic kakaler.”

¹⁸Ceng tie bino kame Rwot bino kwanyo kede kibut mon me Yerusalem mwolere kame gin kingapo i atitinyo gi, kede i wi gi, mwolere kobedo cal me duwe kame kingapo,

¹⁹kede mwolere me ngut aledo aleda, kede alung me ngut cing, kede igoen kame kodwadwalo i ngut,

²⁰kede igoen me wic, kede mwolere me bad, ausin me tweno pier, cupan me moe me sut kede mukisa;

²¹ebino da kwanyo mwolere kame kingapo i lwet gi kede i um gi;

²²igoen abeco me angapa i ceng adongo, igoen aboco, ikotin kede ikapun atino me cing.

²³Ebino kwanyo igoen gi kicararai, igoen aliamaliam, igoen kame kodwadwalo i wic kede me umo wang.

²⁴Akaka sut kede moe angwe kur, ngwece otop bino bedo tie i kom gi; akaka tweno pier gi kede ausin abatal abeco, gin kibino tweno pier gi kede tol; akaka bedo kede yer wic acil, wi gi bino bedo di okisere; akaka ngapo igoen abeco me wel, gin kibino ngapo ipukoi. Cilo kame kitie kede bino lokere doko lewic!



²⁵Cuo me Yerusalem bino to to me epima; jo atek yi bino to i yi.

²⁶Erute me bomba nono bino koko di etururo; bomba nono bino bedo cal bala dako kobedo piny i apua, di udo etieko dong nono abongo jo.

Isaya 4

¹I kare nono, mon kanyaare bino mako icuo acel di kiko waco ne be, “Wan obino pitere ken wa, doko da obino ngapere ken wa, kenekene in yei ne wa lwongi be cwar wa, tetekeny okwany lewic me bedo abongo icuo.”

Yerusalem bino Dok i Deyo mere Kasek

²Kare tie bino kame Rwot bino mino kede yen kede giapita atie i lobo mere dongo libaliba di kicil. Jo me Isirael kame bino dong kuo bino bedo tie kede yomcuny kede ewaka pi kodere kame lobo gi ceko.

³Jo dedede kame bino dong Yerusalem, gin jo kame Rubanga oyero pi dong kuo, kobino lwongo gi be jo kacil.

⁴Rwot bino ngolo kop di eko lonyo ateker me Isirael, di eko lwoko tenge raco me Yerusalem kede remo kame koonyo kunono.

⁵Di do Rwot ko bino umo wi moru me Sion kede jo dedede kocokere kunono kede edou acol cucucuc i isawan me iceng, kede mac alialia i isawan me iwor. Deyo ka Rubanga bino umo bomba nono.

⁶Deyo mere nono bino galao lieto me ceng likame tuno i bomba, doko ebino mine edoko karingo kede kagwokere ki kot acwei kede twon yamo.

Isaya 5

Wer amako Poto Olok

¹Wek kong awer ne wu wer ni, en wer i kom poto olok ka ngawota. Ngawota oudo tie kede poto olok, oudo etie i bad emukura kame lobo mere mio.

²En oudo eboko poto eko depo kiye ingaroi; en eko pito iye nyige olok kame eyero ayera. En eko gero gedo abor malo i dier poto pi dare, di eko kunyo bur me bino pige me olok. En eko donyo kuro olok pi cek, do anyakini dedede me olok oko bedo wac.

³Aso, ngawota nan tie waco be, “Wun jo kame bedo Yerusalem kede Yuda, ngolunu kop i diere nango kede poto na me olok.

⁴Nyo ace kame oudo ango apoore timo ne, do likame ako timo? Do pinyo komio en eko nyako nango anyakini awac akaka anyakini abeco kame ango oudo atie geno udo?

⁵”Nan ango abino waco ne wu gikame ango abino timo ne poto me olok nono. Ango abino kwanyo tenge cel me poto nono; abino turo apama koluke tetekeny leini me obar dony iye di kiko camo olok kede kiko nyonyono gi piny.



⁶Abino jalo poto nono kony mere doko li. Likame abino lwero olok nogo akadi boko dud gi, di okuto kede ocokocok ko bino umo gi. Doko abino gengo kot da likame cwei i kom gi.”

⁷Isirael en poto olok ka Rwot me jo yi; jo me Yuda obedo olok abeco kame en epito. En oudo etie kede gen be gin kibino timo gikame ber, do gin kiko lokere timo nek. En oudo etie kede gen be gin kibino bedo kede tim kopooore but jo icegun, do akaka manono en etie winyo koko me jo kame kotero kirac.

Gikareco kame Jo Timo

⁸Itienu i can! Wun iwilunu ude kede poti medo i wi apat kame itienu kede. Odong kare acecek di do kabedo doko li ne jo apat, di do wun kenu en ikounu dong i lobo noni.

⁹Ango awinyo di Rwot me jo yi kwongere be, “Ateteni ude atot bino doko amejeko; ude adongodongo di cil bino dong abongo jo.

¹⁰Poti me olok eka tomon bino woto bwini aromo lita kanyauni kenekene. Doko da kodi aromo kilo tol acel kede ot kanyauni bino woto nyige atie kilo tomon kiwie kanyauni kenekene.”

¹¹Itienu i can wun jo kame dilo yai odiko mato kongo, di ikounu amata kede mer tuno i dier iwor.

¹²I ibagai wu igounu arigirigi, adungu, bule kede bilo, kede di komato bwini, do likame itamunu pi gikame Rubanga otimo, amoto neno gikame cinge otimo.

¹³Pi manono, wun jo na kobino tero wu i lobo me kumbor bala mabus abongo wun ngeno; jotel wu bino to kec, kede jo atot ace apat ko bino to orio.

¹⁴Pi manono, kabedo me jo oto ongamo doge ngam kalikame wacere kede twon imue; en ebino mwonyo alui jotel me Yerusalem kede twon jo kame celakino iye, karacel kede jo kame wakere pire.

¹⁵Kobino mino lewic mako jo dedede, doko da kobino dwoko piny jo kame tingere.

¹⁶Do Rwot me jo yi nyuto dwongo mere i yore me ngolo kop kakare, doko da enyuto be en ngat kacil i yore me timo gi kopooore.

¹⁷Di do idwe romini kede idwe diegi ko bino camo lum kolot i amejeko me Yerusalem.

¹⁸Itienu i can. Kope me abe kame iyamunu cal bala tol kame wun iwaunu kede gikarac i komu; iwaunu dub i komu bala peno agadigadi kede aunoi.

¹⁹Wun iwacunu be, “Wek Rwot susunyo timo gikame emitimo timo tetekeny wan onen kede wang wa; ber en ebubunyo cobo timo gikame eiko pi timo tetekeny wan ongei gi nono!”

²⁰Itienu i can! Wun ilunyunu lwongo gikarac be gikaber, kede gikaber be gikarac. Wun ilokunu colo be odoko lero kede lero be odoko colo. Ilokunu gikakec be odoko gikamit kede gikamit be odoko gikakec.



- 21**Itienu i can! Wun iparunu be iriekunu, be iriekunu twatwal.
- 22**Itienu i can! Wun ibedunu jo kame kouro i mato bwini, kede kame cuny gi nwang nyalo giamata!
- 23**Wun iyeunu gamo cemusana di ikounu weko aweka jo atie kede raco, di likame ikounu ngolo kop kede ateni ne jo kame li kede raco.
- 24**Pi manono, wuda ibinunu wang bala arienge kame leb mac wango, kede bala lum otuo kame dopokin i mac; ibinunu doko bala yat kame aliasin mege otop di pote wu ko bino lokere doko apua, pien wun itiekunu dagi pwoy ka Rwot me jo yi; idagunu kop ka Ngat Kacil me Isirael.
- 25**Rwot cunye owang kede jo mege omio erieo cinge pi mino gi alola. En ebino rereto gi di mori ko bino yangere, di liele ko bino more i dier yote me bomba bala yugi. Do akadi ingei manono da gero ka Rwot pwodi likame bino tiek, en pwodi ebino meede mino jo mege alola kamanono.
- 26**Rwot otieko kiarao gianena pi lwongo ateker me piny abor; en ewinyao pi lwongo jo kame tie i ajikini me piny. Gin nan kitie onyaro bino awakawaka!
- 27**Likame ngatamoro kibun gi ol; likame ngatamoro gete. Likame kimemerun amoto nino mako gi. Likame tie dano moro kibun gi kame rakoba mere lagalaga, amoto kame ausi me amuka mere ocot.
- 28**Leb imalia gi bit; yen kokude me gweno imalia gi tie cuto. Tien asigiran gi tek bala nyonyo, doko da tien cabalan gi me yi dwir di kiwire bala apipiru.
- 29**Gin kidorano bala engu, bala inguon atino ager; kibino ngur di kiko mako cam gi kiko tere di likame ngatamoro bobo ko twero mano gi nono kibun gi.
- 30**Ka ceng nono otuno, gin kibino dorano i kom jo me Isirael bala mor me nam. Ka ngatamoro oko neno lobo nono, likame tie gikame en ebino neno ace apat kwanyo kenekene colo kede can alit, pien idoun acol bino umo lero me iceng.

Isaya 6

Rubanga Olwongo Isaya pi bedo Enabi

- 1** I mwaka kame abaka Usia oto iye, ango ako neno Rwot di etie bedo i wi kom mere me ajakanut, di ediede malo, di lak ekanso mere oyarere oromo yi tempulo lung.
- 2**Serapim oudo tie cungo i ngete, acelacel kikom gi oudo tie kede bwome kanyape; bwome are oudo eumo kede wange, bwome are oudo eumo kede tiene, kede bwome are oudo epor kede.
- 3** Oudo kitie lwongere ken gi ken gi di kiwaco be, “Ecil, ecil, ecil Rwot me jo yi; wi lobo lung opong kede deyo mere.”
- 4** Gato me dwan gi oko mino dud apama me tempulo oyangere, di yiro oko pongo yi tempulo lung.



⁵Ango ako waco be, “Atie i can! Abino to, pien kope awok ki doga obedo kope areco, doko da ango abedo i diere me jo kame kope awok ki dog gi reco; do di wanga otieko neno Abaka, en Rwot me jo yi.”

⁶Di acel kikom giakuo nogo oko por buta di emako itonge me mac kame oudo ekwanyo ki alutari kede iluma.

⁷Di eko mino itonge me mac omulo doga, eko waco be, “Bala kame nan mac noni otieko mulo kede dogi, raco ni otieko kwanyere, doko da kotieko weno tenge dub ni.”

⁸Di ako winyo di Rwot penyere be, “Abino cwano ngai? Ngai kame bino bedo aor wa?” Ango ako dwoko be, “Ango ine; cwaa!”

⁹En eko waco na be, “Oti iwace jogo be, ‘Akadi imeedenu winyo benyo, do likame ibinunu niang; akadi imeedenu ngino benyo, do likame ibinunu ngeno gikame tie timere.’ “

¹⁰Di eko waco na be, “Mi tam ka jogo dok bangabanga; mi yit gi dingi; kede da imi wang gi totoun, tetekeny likame wang gi ko karuno neno piny, kede yit gi da likame ko twero winyo kop, kede tam gi da likame ko karuno niang gimoro, me wek kur kilokere buta di ako cango gi.”

¹¹Ango ako penyere be, “Rwot, ebino bedo kamanoni tuno awene?” En eko dwoko be, “Tuno di bomban otieko doko amejeko; tuno di ude otieko dong nono abongo jo; tuno di lobo noni otieko dong nono abongo gimoro iye.

¹²Ango abino cwano jo dedede kakabor di lobo noni ko dong kene.

¹³Akadi bed bala acel kikom tomon me jo dong iye, gida kobino wango gi bala isiki me yat oak kame kotieko tongo piny.” Isiki nono bino bedo acakini anyen me jo ka Rubanga.

Isaya 7

Kop kame Isaya Otero ne Abaka Akas

¹I kare kame abaka Akas, wot ka Yotam, akwar Usia oudo pugo kede Yuda, yi oko poto. Resin abaka me Siria, kede Peka wot ka Remalia me Isirael oko ot pi koto suro Yerusalem, do likame kiko twero make.

²Kakame kop oko tuno kede but abaka me Yuda be Siria oudo otieko ribere kede Epuraimu, kom Akas kede jo mege oko donyo miel amiela bala yen me abum kame yamo puo.

³Rwot oko waco ne Isaya be, “Kwany wodi Sear Yasub di iko upere kede pi ot riamo kede Abaka Akas. Ibinunu ude i yongayo kakame jo kame timo igoen tio iye, i ajikini me puleju kame molo pii wok ki atapar me malo.

⁴Wac ne pi bedo di egwokere, di ekweo kome, kede di eli kede lworu moro; doko kur emi cunye nyote pi isikin are kame mac tie camo nogi, pi gero agwai kame Resin kede Aram kede wot ka Remalia tie kede.



⁵Pien Siria, karacel kede Isirael kede abaka mere tie kede iik arac i komi.

⁶Gin kitie mito suro Yuda, di kiko mane edoko mergi, di kiko keto wot ka Tabel doko abaka mere.

⁷” Pi manono, ango Rwot atie waco be, iik nono likame bino cungo; likame ebino timere.

⁸Pien bomba me Damasiko en kame tek lo Siria, doko da Abaka Resin en kame pugo Damasiko. I kom kop amako Isirael, di mwakini ot kanyape kiwie kany likame okato, udo Isirael otieko poto likame doko etwero cungo bala ateker.

⁹Bomba me Samaria en kame tek lo Isirael, doko da wot ka Remalia en kame pugo Samaria. “Ka likame yei ni ocungo di tek, likame ibino twero.”

Gianena me Emanuel

¹⁰Rwot oko bobo cwano ne Akas kop be,

¹¹” Peny Rwot Rubanga ni pi mini gianena moro. Etwero bedo gianena moro atie kakatut i kabedo me jo oto, arabo atie malo kakabor.”

¹²Akas oko dwoko be, “Ango likame abino peny pi gianena moro; likame abino tamo Rwot.”

¹³Isaya oko dwoko be, “Winyunu wun ikwae ka Daudi. Iparunu be ebedo gikame titidi me wun olo jo, omio nan imitunu doko olo Rubanga na da?

¹⁴ Do Rwot pwodi bino mini gianena; tie nyako oyac kame bino nywalo atin awobi di eko cako nyinge Emanuel. ¹⁵Tuno i kare kame atin nono odoko didit kede di engeo poko gikarac kede gikaber, udo jo ocalo mato cak kede camo mokic.

¹⁶Doko da akadi di kare kame en etwero poko kede gikarac kede gikaber likame pwodi otuno, lobo me abakai are kame tie mini lworu no udo otieko dong nono.

¹⁷” Rwot bino kelo i komi kede i kom jo ni kede i kom jo dedede me ekeko ka kwaru ni peko adwong kame epone mere likame lem pwodi otimere cako i kare kame Isirael opokere kede ki kom Yuda; en ebino kelo abaka me Asiria.

¹⁸” Kame kare nono otuno, Rwot bino winyao pi lwongo jo kame bedo i acakini me isamai me Misiri pi bwote bino bala lwangini, kede pi lwongo jo me Asiria bwangere bino ki lobo gi bala kic.

¹⁹Gin kibino bino di kiko donyo bedo i aditoto atut, kede i kakobabarun me mori, kede i okuti koswapo, kede i dud lum kodongo.

²⁰” Kame kare nono otuno, Rwot bino pango abaka me Asiria ki loka tetuca me ecilet me Eupurate pi bino lielo kede liedi yer me tiku, kede yer me wi wu, kede me komu.

²¹” Kame kare nono otuno, akadi ka dano moroni oudo okano diang acel kenekene kede romini are,



²²gin kibino mine cak atos kame romo. Jo anonok kame bino dong i lobo nono bino mato cak kede camo mokic.

²³” I kare nono, poti me olok kame oudo tie kede dud olok tutumia acel, kame romo kelo sente akaya me siliba tutumia acel, bino umere kede ocokocok kede okuti.

²⁴Jo bino donyo ot dwar kunono kede imalia, pien lobo nono dedede bino swapo di eko umere kede ocokocok kede okuti.

²⁵Bad imukuran dedede kame oudo jo puro likame doko ngatamoro bino sobolo tuno iye, pien udo ocokocok kede okuti otieko duko kugonogo; kibino doko kacam me dok kede romini.”

Isaya 8

Wot ka Isaya en Gianena but Jo

¹Di Rwot oko waco na be, “Isaya, kwany gi ibatalal me iwandik iko wandiko iye kede inyukutan kame jo dedede karuno somo be, ‘Maker salal kas bas’ , ²iko udo na jo are agenere kame bino bedo ijurak na, ngasaseredoti Uria kede Sakaria wot ka Yeberekia.”

³Ingei kare moro, ango ako ribere kede dako na koudo obedo anabi, en eko yac di eko nywalo atin awobi. Rwot oko waco na be, “Cak nyinge ‘Maker Salal Kas Bas’ .

⁴Pien di pwodi atin nono likame ongeon lwongere be, ‘Papa’ kede be ‘Toto’ , udo abaka me Asiria otieko tero abar me Damasiko kede jamini kame eyako ki Samaria.”

Abaka me Asiria tie Bino

⁵Rwot oko bobo yamo keda.

⁶En ewaco na be, “Jogi otieko daga pii amol mot me Siloa, di kiko lunyo bedo kede twon lworu but Resin kede wot ka Remalia;

⁷pi manono, ango Rwot abino kelo negi abaka me Asiria kede isirikalen mege dedede pi suro Yuda. Gin kibino bino bala pii me ariram kobelo ecilet me Eupurate di eko donyo mol ki ngete kago.

⁸Isirikalen jokwor bino umo Yuda bala alele kame tuno i ngut dano.” Do Rubanga tie kede wa! En ebino yararo bwome di eko gwoko lobo wa.

⁹Cokerenu karacel, wun jo me atekerin me kumbor, do ikounu bedo kede lworu; winyunu wun pinye dedede me kakaboco; iikerenu yi do ikounu kara bedo kede lworu; ebo, iikerenu do kara ikounu bedo kede lworu!

¹⁰Iikunu tam karacel, do likame kibino cobere; yamunu kope, do kope nogo likame bino cungo, pien Rubanga tie kede wa.

Rwot Okwenyaro Enabi

¹¹Rwot oko kwenyaro ango kede twer mere adwong pi weko lubo tim kame jo oudo tie kede. En ewaco be,



¹² “Kur ilwong be iik me mung, gi dedede kame jogi lwongo be obedo iik me mung, doko da kur ibed kede lworu i kom gi dedede kame gin kitie kede lworu iye.

¹³Do ango Rwot me jo yi ango abedo ngat kacil, ango en kame ipoore lworu.

¹⁴Ango abino doko bala kabedo kacil, kede kidi kame getaro jo; abino doko bala kidi kame getaro jo me Isirael kede jo me Yuda, kede owic kame bino mako jo me Yerusalem.

¹⁵Jo atot bino agetar; kibino popoto di kiko tuturun; kobino mako gi kede owic di oko tero gi.”

Ikwenyar i kom Penyo Kop kibut Jo Oto

¹⁶Wun josiao na ipoorenu daro kede gwoko kope kame Rubanga otieko mina.

¹⁷Rwot otieko pwono ne jo mege me Isirael, do ango abino gene kamanono.

¹⁸Rwot me jo yi, ngat kame bedo i wi moru me Sion otieko keta, ango kede idwe kame emia, pi bedo bala anen akuo but jo me Isirael.

¹⁹Do jo bino waco ne wu be, “Penyunu kope kibut jwogi kede tipere adwilao kede agato; mam ateker moroni poore penyo kop kibut rubangan gi kede kibut jo oto, pi jo akuo,

²⁰pi udo kope kede pwony kibut gi?” Ateteni jo kame yamo kamanoni likame bino kuo tuno neno lero.

Kare me Peko

²¹Jo bino ririmo lobo noni di kitie kede cwercury alit kede kec; kec bino mino cuny gi wang di kiko donyo lamo abaka gi kede rubangan gi. Gin kibino tingo wang gi malo i edou,

²²kede kibino ngino piny i wi lobo, do kibino neno peko kede colpiny kenekene, colpiny akelo cwercury, kame kobino piko gi iye.

Isaya 9

¹Colo doko likame bino bedo tie ne jo kame oudo tie i can alit.

Abaka me Kare me Anyim

I kare kokato en oudo ekelo acae i lobo me Sebulun kede Naputali, do i kare me anyim en ebino kelo deyo i adul noni, cako ki nam me Mediterania dok tetu kide tuno i lobo kame tie loka tetuca me ecilet me Yorodan, akadi da paka tuno Galilaya kakame jokumbor bedo iye.

²Jo kame oudo bedo i colo otieko neno twon lero. Jo kame oudo bedo i lobo acol cucucuc lero otieko caro gi.



³Rwot in itieko nyano ateker ni, imio gi yomcuny. Gin kilelo i nyimi bala kame jo lelo kede i kare me kac, arabo bala kame jo lelo kede kame kitie popoko gikame kiyako.

⁴Pien in itieko tuturo ayoko kame oudo tie negi bala yec, kede lilim kame oudo kobungo kede epepet gi. Itieko bwono ateker kame oudo tero jo ni kirac, bala kame oudo bin ibwono kede isirikalen me Midian.

⁵Amukai me isirikalen kame nyonyono piny burut burut, kede igoen gi kame remo opwoko kobino uco gi i mac.

⁶Konywalo ne wa atin, komio wa atin awobi! En ebino bedo ngapug wa! Kobino lwonge be, “Ngamini tam me Aura, Rubanga Won Twer, Papa kame bedo Nakanaka, Ngapug akelo Mulem.”

⁷Akarinikin mere me pug bino meede ameda dongo; anapakin me nakanaka bino bedo tie i ajakanut mere. En ebino lunyo kom me ajakanut ka Daudi, di eko mino ajakanut nono cungo di etek i yore me pug kede ateni kede i yore kopoore, cako nataman i kare noni tuno i kare me ajikini. Mit kame Rwot me jo yi tie kede pi timo kamanoni bino mino ecobere.

Rwot bino Mino Isirael Alola

⁸Rwot otieko ngolo kop ne jo me Isirael, gin ikwae ka Yakobo.

⁹Jo dedede me Isirael, jo dedede kame bedo i bomba me Samaria bino ngeno gikame en etimo noni. Nan gin kitie kede ewaka kede tingere di kiwaco be,

¹⁰” Ude kame kogero kede matapali otieko popoto, do wan obino lunyo wang gi kede ude kame kogero kede kide kame kopao. Kotieko totongo ipirin me yen cukamori, do obino lunyo kargi kede ipirin me yen seda.”

¹¹Rwot otieko supo jokwor gi pi suro gi.

¹²Siria i bad tetu kide kede Pilistia i bad tetu tim otieko ngamo dog gi pi mwonyo Isirael. Do akadi bed kamanono da, gero ka Rwot pwodi likame ojik, en pwodi erieo bade kamanono pi bitaro gi.

¹³Jo me Isirael likame olokere dok but Rwot me jo yi arabo mone, en ngat komio gi alola.

¹⁴I ceng acel kenekene Rwot bino mino jotel kede jo me Isirael alola; en ebino ngolo wie kede yibe tenge.

¹⁵Joadongo kede jo kame koworo obedo wie; inabin kame pwonyo kop me abe obedo yibe.

¹⁶Pien jo kame telo jo nogi orwenyo gi di jo oko dong di wi gi ototolun.

¹⁷Manono en komio Rwot likame lelo i kom idwe gi, doko da likame ebino bedo kede kisa i kom idwe kic kede apuserun gi. Pien ngat acelacel do likame paro pi Rubanga,



doko gin dedede kidoko jotim tim areco; buli dog dano acelacel yamo kop me mingo. Pi magonogi dedede, gero ka Rwot likame otiek, do en pwodi erieo bade kamanono pi mino alola.

¹⁸Gikareco me jo cal bala mac kame wango okuto kede ocokocok; en egamaro abum di eko wange di yiro mere swiridido malo.

¹⁹Pi kite kame Rwot me jo yi tie kede lilo, alola mere liel bala mac i lobo noni lung; jo odoko gikame liel i mac. Likame ngatamoro bino koono ngawote.

²⁰Jo lokere tuni ngaungau kede cam, do kec pwodi neko gi kamanono; kilokere tetuca da ngaungau kamanono, do likame kiko yeng. Kicamo kiton idwe gi.

²¹Jo me ekeko ka Manase osurere kede jo me ekeko ka Epuraimu, di kiko ribere suro Yuda. Pi magonogi dedede gero ka Rwot likame pwodi otiek, en pwodi erieo bade pi mino jo alola.

Isaya 10

¹Itienu i can! Wun i cibunu iswilia kalikame poore, iwandikunu iswilia kame dio jo.

²Manono en epone kame igengunu kede jocan udo kop kame kongolo i ateni, kede likame kibedo kede twero gi. Manono en epone kame imaunu kede jamini me apuserun kede me idwe kic.

³Nyo kame ibinunu timo i ceng kame Rubanga bino mino wu kede alola? Nyo kame ibinunu timo kame en ekelo can i komu ki piny abor? Ibinunu ringo but ngai pi konyo wu? Doko da ibinunu weko abar wu ne ngai?

⁴Kobino mako wu kotero wu bala mabus arabo kobino neko wu. Pi magonogi dedede Rwot pwodi gero mere likame otiek, en pwodi erieo bade kamanono pi mino alola.

Abaka me Asiria en Ebela ka Rubanga

⁵Rwot owaco be, “Asiria! Ango atio kede Asiria bala akuta me bungo jo kame anga adoko ger negi.

⁶Ango acwae ot suro ateker kalikame wora; acwae ot suro jo kame anga adoko ger negi. En eoto di eko mano jo jame di eko yak, di eko nyonyono jo bala nyono apua me gudo.”

⁷Do manoni likame obedo gikame Asiria oudo oikere pi timo, doko da likame etie i tam mere. Do i cunye, en etieko iikere pi muducaro atekerin atot.

⁸Pien Asiria waco be, “Jodongo me isirikalen nango dedede obedo abakai!

⁹Gin kimao bomban me Kalano, Kacemis, Kamat, kede Arapad, Samaria kede Damasiko.

¹⁰Ango atieko bwono ajakanuto aworo caljwogi atot kalamo caljwogi me Yerusalem kede Samaria.



- 11** Abino bwono Yerusalem kede caljwogi mege bala kame abwono kede Samaria kede caljwogi mege dedede.”
- 12** Do ka Rwot otieko tic mere i wi moru me Sion kede i Yerusalem, en ebino mino abaka me Asiria alola pi ewaka kede tingere mere.
- 13** Piento abaka me Asiria waco be, “Ango atimo manoni kede teko na kede rieko na, pien ango atie kede niang. Bala twon ager ango atieko rereto jo kame oudo bedo i komini me ajakanuto, di ako mano lobere kede abar me atekerin.
- 14** Atekerin me wi lobo oudo cal na bala ot me winyo; koko abar gi oko bedo yoyot na bala kwanyo abeon kame winyo oringo oweko. Likame moro kikom gi opapuko na bwome arabo ngamo na doge akadi kok da.”
- 15** Do Rwot waco be, “Benyo, le twero wakere be en etek kalamo ngat kame tongo kede yen? Arabo benyo, musumeno twero tingere be pire tek kalamo ngat kame tio kede? Akuta likame riongo dano, do dano en ariongo akuta.”
- 16** Pi manono, Ngapug adwong, Rwot me jo yi bino cwano i kom jo yi mege isikit nogo tuwo ajonyo gi; i deyo kame kitie iye kom gi bino liel aliela bala mac.
- 17** Ngat Kacil, en lero me Isirael bino doko bala mac, di eko bino wango gin dedede i ceng acel kenekene, okuto kede ocokocok.
- 18** Abumiok mege me deyo kede lobo mere aceko cam kitek kobino dudubo atwal atwala, bala kame tuwo arac mio dano doko kede goro.
- 19** Yen kame bino dong i abumiok mege bino bedo nonok twatwal, mio akadi atin atina da twero maro gi.

Jo Anonok bino Dwogo

- 20** Kare tie bino kame jo me Isirael odong mege, ikwae ka Yakobo obwot mege, likame bobo bino gengere kede i kom jo koudo obwono gi, do kibino do keto gen gi i ateni i kom Rwot, Ngat Kacil me Isirael.
- 21** Jo mogo anonok, ikwae ka Yakobo, bino dwogo but Rubanga Won Twer.
- 22** Bed bala jo me Isirael nan tot bala asinge me nam, do anonok kenekene en kame bino dwogo. Kotieko iiko amuducar cuto pi jo, manono en gikame poore negi.
- 23** Rwot Rubanga me jo yi bino kelo amuducar i lobo noni bala kame en etieko waco kede be ebino timo.

Rwot bino Mino Asiria Alola

- 24** Pi manono, Rwot Rubanga me jo yi waco ne jo mege abedo Sion be, “Okwe wun jo na, kur ibedunu kede lworu i kom jo me Asiria ka kibungo wu kede lilim, di kitingo ibelai i komu bala kame bin jo me Misiri oudo timo.
- 25** Pien odong kare acecek di ango ako jiko mino wu alola, di do ango ako lokere muducaro gin.



²⁶Ango Rwot me jo yi abino dano jo me Asiria kede ebela, bala kame bin abungo kede jo me Midian i moru me Oreb. Abino tic kede twer na kame bin atio kede i dier nam i Misiri.

²⁷Kame kare nono otuno, kobino kwanyo ki epepet wu yec kame kimio wu, doko da kobino tuturo ayoko gi kame tie i ngutu.”

Ngakwor Otimo Asura

²⁸Jokwor otieko tuno i bomba me Ai! Kibeo ki Migiron di kiko kano jame gi Mikimas.

²⁹Kingolo loka di kiko ot buto Geba. Lworo omako jo me bomba me Rama; jo me Gibeo da otieko ringo, en bomba ka Abaka Saulo.

³⁰Lelemunu kitek wun jo me Galim! Winyunu wun jo me Laisa! Dwokunu kop wun jo me Anatot!

³¹Jo me Mademena tie ringo, jo me Gebim da tie ringo pi laro kuo gi.

³²I ceng atin noni jokwor ber kong oyaro cungo Nob, di kiko lulungo cing gi ne moru me Sion, ne emukura me Yerusalem.

³³Do nenunu, Ngapug adwong, en Rwot me jo yi bino tic kede twer mere akelo lworo pi rereto piny yen abocoboco nogo di eko bino tetelo ajange gi.

³⁴Rwot bino totongo piny jokwor nogo bala kame kotongo kede yen ki dier abum kede le, di yen aboco me Lebanon nogo ko bino popoto.

Isaya 11

Ajakanut Atie kede Anapakin

¹ Bala kame isiki lot kede, kamanono da abaka anyen bino wok ki ekeko ka Yese.

²Tipo ka Rwot bino bedo tie kede en, en tipo amio rieko kede niang, en tipo amio tam kede teko, en tipo amio ngec kede cuny me bedo kede wor but Rubanga.

³En cunye bino bedo yom bedo kede wor but Rubanga. Likame en ebino ngolo kop di egengere i gikame wange oneno, arabo i gikame yite owinyo;

⁴ do en ebino ngolo ne jocan kop i yore me ateni, doko ebino ngolo kop kakare ne jo amwol me wi lobo. Kop kame wok ki doge bino bedo bala ebela me pugo lobo, kede kame bino neko jo areco.

⁵ Ebino bedo kede tim kopooore kede genere bala rakoba kame engapo i piero.

⁶ Epee bino nywako bedo karacel kede atin oromo, erisa bino buto karacel kede atin diel. Roya kede atin me engu bino cam karacel, di atin atitidi en adaro gi.

⁷Diang bino cam karacel kede edubu, idwe gi bino urako karacel; doko da engu bino donyo camo arienge bala twon.



⁸Atin mukeru bino tuko i dog ot me ipom, doko da atin koweko dot bino cwano cinge i kabuto me emosoga abongo gimoro time.

⁹Likame tie awanon arabo gimoro arac kame bino timere i wi moru ka Rubanga. Lobo bino pong kede ngec i kom Rwot bala kame pii pongo kede nam.

Jo kame Komako tie Obukui bino Dwogo

¹⁰Kare tie bino kame abaka kowok ki ekeko ka Yese bino cungo kede bala imendera ne atekerin apat. Gin kibino penyo tam kibute, di kabedo mere ko bino bedo kede deyo.

¹¹Kame kare nono otuno, Rwot bino bobo medo tic kede twer mere pi dwoko jo mege kodong anonok ki Asiria, ki Misiri, ki Paturos, ki Abisinia, ki Elam, ki Sinar, ki Kamat, kede ki lobo atie i dog nam adwong.

¹²En ebino sipo ne atekerin imendera, pi bedo gianyuta me en koko karacel jo kosasarun me Isirael kede Yuda, di eko dwoko gin dedede ki bad ongwon me wi lobo.

¹³Isirael likame bobo bino bedo kede nyeko i kom Yuda, doko da Yuda likame bino bedo kede gero i kom Isirael.

¹⁴Do gin kibino mwomere karacel suro jo me Pilistia i bad tetu tim, di kiko yako jo kame bedo i bad tetu kide. Gin kibino bwono jo me Edom kede Moab, kede jo me Amon bino yei lubo kop gi.

¹⁵Rwot bino mino jang wi Nam Akwar tuo i nget Misiri, di eko mino yamo aliet buko paka mino ecilet me Eupurate dwono, di eko dong kede itaun atitino kanyaare kame pii mol lubo, tetekeny dano twero ngole kede tiene.

¹⁶Aso, yongayo adwong bino bedo tie kame wok ki Asiria, ne jo mege anonok kodong, bala kame oudo bin obedo tie ne kede joakwari gi i kare kame kiyai kede ki Misiri.

Isaya 12

Wer me Mino Pwoc

¹Ka ceng nono otuno, ibinunu waco be, “Amio pwoc buti, Okwe Rwot, pien bed bala oudo idoko ger na, do iko jiko gero ni, di iko kweno cunya.

²Ateteni Rubanga en kame laka; ango abino keto gen na i kome di likame ako bedo kede lworu. Rwot en amia teko kede twer, en kame elaka.

³Bala kame pii angic kelo kede yomcuny but jo kame orio oneko, kamanono da jo ka Rubanga bedo kede kilel kame elako gi.”

⁴I ceng nono wun ibinunu waco be, “Miunu Rwot pwoc, lwongunu nyinge. Wacenu atekerin apat gikame en etimo. Wacenu gi be nyinge dwong.

⁵Werunu ne Rwot were me pak pi jamini adongodongo kame en etimo. Miunu manoni ngere i wi lobo lung.



⁶Poore jo dedede kame bedo Sion lelemo kitek di kiwero kede kilel, pien Rubanga kacil me Isirael dwong; en ebedo i diere me jo mege.”

Isaya 13

Rubanga bino Mino Babilon Alola

- ¹ Man en kop amako Babilon, kame Rubanga owaco ne Isaya wot ka Amos.
- ² Sipi imendera me yi i wi moru agereger. Lelemo ne isirikalen di iko kiarao badi malo bala gianyuta but gi pi gin cako suro irutei me jo kame koworo i Babilon.
- ³ Ango Rwot atieko ciko jo na kame atieko kwero, atieko lwongo jo na atek yi, jo na kame wakere di kingato angata, pi mino gero na cobo tic mere.
- ⁴ Winyunu ber woo atie i wi mori, iwinyo bala icelakin me twon jo atot! Ajakanuto kede atekerin tie cokere karacel! Rwot me jo yi tie coko isirikalen mege pi cako yi.
- ⁵ Gin kiwok ki lobo abor i ajikini me piny. Rwot tie bino kede jamini mege me yi pi dudubo lobo lung pi gero mere.
- ⁶ Wololonu koko, pien ceng ka Rwot otieko noko, ceng kame Won Twer bino kelo kede amuducar.
- ⁷ Cing jo dedede bino doko lojolojo, di lworu ko nyoto cuny gi.
- ⁸ Gin dedede kibino bedo kede lworu adwong kede twon lito, bala aramo me dako atie ramere me nywal. Kibino donyo ngire ken gi ken gi kede lworu di lewic opong i wi gi.
- ⁹ Nenunu, ceng ka Rwot tie bino, en ceng kame Rwot bino nyuto kede lilo kede twon gero mere, di eko bino weko wi lobo dong nono, kede eko muducaro jodubo dedede kame bedo iye.
- ¹⁰ Acer acelacel kede acerin kocokere atie malo likame bino rieny, ceng bino wok di eko dong di ecol acola, doko rieny me duwe da bino doko li.
- ¹¹ Rwot waco be, “Ango abino kelo can i wi lobo di ako mino jo areco alola pi dub gi. Abino jiko ewaka me jo atingere, kede kwarwang me jo ager.
- ¹² Udo jo odong bino bedo tek kalamo udo saabu.
- ¹³ Abino mino malo yangere, di wi lobo da ko yangere eko nyiko tenge ki kabedo mere, i ceng kame angu Rwot me jo yi abino nyuto kede gero na agwai.
- ¹⁴ ” Ngat acelacel bino ringo dok but joe mege arabo i lobo me tur gi, bala atil kame jodwar tie riarmo, amoto bala romini atie ken gi abongo ngatamoro acoko gi.
- ¹⁵ Ngat kame kobino mako kobino cocobo en kede epima tuno to.
- ¹⁶ Kobino nyonyoto idwe gi di gida kitie neno; kobino yako ude gi, kede kobino buto kede mon gi tetek.”



¹⁷Rwot waco be, “Nenunu, ango atie supo cuny jo Mede pi ot suro Babilon, cuny gin likame paro pi siliba amoto saabu.

¹⁸Kibino neko awobe kede emal; likame kibino bedo kede kisa i kom imukerun kede i kom idwe atino.

¹⁹Babilon, ajakanut kame nataman tie kede deyo kalamo ajakanuto apat dedede, kame nataman obedo ewaka me jo Kaldea, ebino doko bala Sodoma kede Gomora i kare kame ango Rwot bin adudubo gi kede.

²⁰Pi kare lung en likame doko jo bino bedo iye. Imuarabun aoto aota likame doko bino kudo kimere gi iye, akadi jokwat da likame bino mino romini gi urako iye.

²¹Do leini me wi tim en kame bino bedo kunono kede winy me isirani; ekululu da bino bedo kunono, kede jwogi me wi tim acal kede diegi bino takaro kiye.

²²Idiekon bino kok i gedo aboco malo atie iye, kede ikween da bino kok i miere abeco me abaka. Ceng me dudubo Babilon otieko tuno, likame doko kobino medo ceng mege anyim.”

Isaya 14

Jo Bino Dwogo ki Obukui

¹Do Rwot bino bedo kede kisa i kom ikwae ka Yakobo di doko eko yero gi pi bedo jo mege. En ebino dwoko gi i lobo gi amako gi di jokumbor ko bino donyo bedo kede gi.

²Atekerin apat bino dwoko jo me Isirael i lobo gi amako gi, di jo me Isirael ko bino mino gi kidoko ipaso kede apaso i lobo ka Rwot. Jo me Isirael bino lokere mako pi bedo mabus jo kame oudo bin omako gi, di kiko donyo pugo jo kame oudo tero gi kirac.

Abaka me Babilon i Piny me Jo Oto

³Rwot bino mino wun jo me Isirael wei ki lito kede ki peko, kede ki tic atek kame kodio wu timo.

⁴Kame manoni otimere, ibinunu nywaro abaka me Babilon di iwerunu ne be, “Ngat alem tero wa kirac otieko robere piny, kwar wange otieko jik!

⁵Rwot otieko tuturo teko me abakai areco,

⁶gin jo kame kibedo tojo jo me atekerin apat kede gero, jo kobedo pugo atekerin apat di kitidilo gi abongo kisa.

⁷Nan do wi lobo lung okwei etie kede anapakin, jo dedede tie wer kede kilel.

⁸Yen saipuras kede seda me Lebanon tie kilel i wi abaka di kiwaco be, ‘Cako i ceng kame koreto kede apugan ni, likame tie ngatamoro adoko oko bino tongo wan piny.’

⁹” Kabedo me jo oto tie iikere pi riamo kede abaka me Babilon ka eoto kunono; etie ruruko tipere me jo oto pi game, gin jo kame oudo bin kibedo jotel me wi lobo. Etie mino tipere me abakai kotieko to yai ki komini gi me ajakanut.



- ¹⁰Gin dedede kibino waco ne be, ‘Ida nan itieko doko goro bala wada!
- ¹¹Deyo ni kede arigirigi kame oudo kogoo ni otieko jik kanoni i kabedo me jo oto. Idwe me kudilinge en gibuto ni, kede kudilinge adongo en esuka ni me um.’ “
- ¹² Abaka me Babilon, kite kame imukere kede ki malo di iko poto piny, in acer me odiko! Ida nan kotieko reti piny, in ngat kame oudo ibedo rereto atekerin apat.
- ¹³ In oudo iwaco i cunyi be, “Abino yito tuno malo, abino cibo kom na me pug i wi acerin. Abino bedo i wi moru atie kakawiriwir i bad tetu malo kakame rubangan cokere iye.
- ¹⁴Abino yito paka i wi edou malo, di ako doko bala Rubanga Ngamalo Twal.”
- ¹⁵Do akaka manono, nan kotieko mini idonyo piny i kabedo me jo oto, kakatut wiriwir.
- ¹⁶Jo oto kame bino neni bino ngamo wang gi i komi di kiurere i komi be, “Kom ateteni man en icuo koudo omio wi lobo oyangere, di eko mino kom atekerin omiel?”
- ¹⁷Benyo, kom ateteni manoni en icuo komao bomban di eko mino wi lobo odoko bala wi tim? Benyo, kom icuo koudo dagi yei ne mabus dok i miere gi inononi?”
- ¹⁸Abakai dedede me wi lobo koyiko gi i atesin me deyo,
- ¹⁹do in ili kede ates, kouco komi bala abwogini kame jo dagi; kokumemo iye kom isirikalen kame koneko kede epima, kame kouco i bur atut di oko donyo nyonyono.
- ²⁰Likame kobino yiki bala abakai apat, pien in i dudubo lobo nin, ineko jo nin. Koto nying ikwae me jo atimo tim areco rweny atwal.
- ²¹Poore nek cakere! Awobe ka abaka noni kobino neko pi raco ka joakwari gi. Likame tie moro kikom gi kame bino pugo lobo amoto gero iye bomban.

Rubanga bino Dudubo Babilon

- ²²Rwot me jo yi waco be, “Ango abino suro Babilon di ako neko jo dedede kame tie iye, tetekeny kur doko nying ngatamoro dong iye. Likame tie ngatamoro kame bino dong iye akadi idwe amoto ikwae.
- ²³Ango abino weno jo ki Babilon kede oweco, di ako loke edoko kabedo me icocia kede ataparin me pii.”

Rubanga bino Muducaro Jo me Asiria

- ²⁴ Rwot me jo yi okwongere be, “Gikame ango atieko iiko bino timere kamanono; gikame ango atieko moko timo bino cobere.
- ²⁵Ango abino muducaro jo me Asiria ki lobo na, di ako nyonyono gi ki wi moru na. Abino gonyo jo me Isirael ki ayoko me jo me Asiria, di ako kwanyo yec ki epepet gi.
- ²⁶Manoni en iik na pi wi lobo lung; doko da arieo cinga i kom atekerin pi mino gi alola.”



²⁷Rwot me jo yi otieko timo iik noni, ngai kame karuno genge? En etieko rieno cinge, ngai kame karuno dole?

Rubanga bino Muducaro Jo me Pilistia

²⁸Man en kop kame bin kowaco i mwaka kame Abaka Akas oto iye.

²⁹Wun jo me Pilistia kur ilelunu be ebela me bungo wu otieko tur. Pien kame twol oto, twol akalamo en kede gero en kame lunyo wange, kede ace kiyiliyili di epor apora.

³⁰Rwot bino bedo ngakwat me jocan bala romini atie camo lum, di eko mino jo kame piny oloo urako abongo peko moro potu negi; do wun ibinunu to kec, kede apat kodong kobino neko aneka.

³¹Goi duru, in erute me bomba. Koki, in bomba. Pien yiro tie duny wok ki bad tetu malo, manono obedo isirikalen katie bino abongo ngatamoro atarasar kikom gi.

³²Kame joor obino ki ateker moro me kakabor, obino waco negi benyo? Obino waco ne gi be Rwot otieko sipakino Sion, doko da jo kame tie neno can bino gwokere kunono.

Isaya 15

Rubanga bino Dudubo Moab

¹Man en kop kame kowaco i kom Moab. Kodudubo bomban me Ar kede Kir iwor acel kenekene, manono omio Moab kop mere otiek.

²Jo me Dibon oyito malo i wi emukura pi ot koko i abila gi. Jo me Dibon tie koko kede cweruncy pi bomban me Nebo kede Medeba; kilielo wi gi kede tik gi pi cweruncy.

³Jo kame tie i yote me bomba ngapo ipukoi pi nyuto iturur; jo kame tie kacokere me bomba kede i wi ude gi kok kitek di pigewang gi mol.

⁴Jo me Kesibon kede Eleale tie kok, koko gi winyere ki kakabor i Yakas. Pi manono, kom isirikalen me Moab tie miel amiela di cuny gi opong kede lworu.

⁵Cunya cwer pi Moab; jo mege tie ringo Soar kede Egelat Selisiya. Mogo kikom gi yito lubo egudo akiar ot Lukit di kikok, apat mege lubo egudo aoto Koronaim di kiboroboro koko.

⁶Pii me Nimirim otieko dwono; lum da otieko tuo, likame ineno gimoro atie lot.

⁷Pi manono, gin kitero jamini dedede kame oudo lem kiudo, kede apat kame oudo kikano, di kiko ngolo kede gi aditot me Wilo.

⁸Pien koko tie winyere i kabedo dedede me Moab; koko tuno kiton i bomban me Egelaim kede Berelim.

⁹Pii me Dibon otieko doko remo, do Rwot pwodi bino kelo i Dibon can arac kalamo mano, pien jo anonok me Moab kame bino bwot di kiko ringo bino riamo kede engu.



Isaya 16

Kuo Atek kame Jo me Moab tie lye

- ¹Jo me Moab ocwao idwe romini but ngat kame pugo lobo nono; kicwao gi yai ki Sela beo i wi tim tuno i moru me Sion.
- ²Gin kiraramun kakame kongolo kiye ecilet me Arunon, di kiwire atatai bala winy kame kotwaruno ki ude gi.
- ³Gin kiwaco ne jo me Yuda be, “Miunu wa tam, timunu ne wa bero; gwokunu wa bala yat agalao ceng aliet di eko bedo kede tipo angic, di wan oko wei i tipo wu esawa kame ceng liet kede; wan obedo jo koringo ayela, kanunu wa, kur irupaunu wa.
- ⁴Wekunu wa obed i diere wu; bedunu jo kame wan oringino gwokere but gi kibus jo kame mito muducaro wa.” Moab, jo kame tero wu kirac bino doko li, doko da tim me asura kede me dudubo lobo wu bino jik, kede tim me yak da bino rwenyo.
- ⁵Di do ngat acel kikom ikwae ka Daudi ko bino doko abaka, di en eko bino pugo jo kede amara kalikame lokere, kede genere. En ebino bedo kede mitkom timo gi kopoore, di eko neno be kotimo gi dedede i yore me ateni.
- ⁶Jo me Yuda waco be, “Wan otieko winyo kop i kom ewaka me Moab kede deng mere, do ewaka mere nono tie gi me nono.”
- ⁷Pi manono, Moab miero koki; jo dedede poore kok pi Moab. Gin miero kikok kede cwercony alit pi mugati abeco me Kir Keres.
- ⁸Poti me olok me Kesibon kede Sibima otieko dubere, poti me olok kame lem kongo gi mero jodongo me atekerin apapat. Poti nogo oudo yarere tuno i bomba me Yaser, di kiko tuno i wi tim i bad tetu kide, kede i bad tetu tim oudo kituno loka tetucel me Nam Oto.
- ⁹Nan akok pi poti me olok me Sibima bala kame akok kede pi Yaser. Pigewanga ony pi Kesibon kede Eleale, pien ilelem me yomcuny kame oudo itienu kede i kare me ngwedo anyakini kede i kare me kac otieko jik.
- ¹⁰Yomcuny kede kilel otieko rwenyo i poti anyako cam kitek nogo; likame doko tie ilelem moro arabo wer kame doko winyere i poti me olok. Likame doko tie dano moro arieco olok kede tiene pi bine i bur me biino bwini; ilelem dedede me kilel kotieko jiko.
- ¹¹Pi manono, cunya dipere kitek bala adungu pi Moab, atie kede par alit i kuo na pi Kir Keres.
- ¹²Jo me Moab lolo kom gi nono pi ot ilega i abila gi atie i wi moru, manono likame sobolo konyo gi.
- ¹³Manoni en oudo kop kame Rwot owaco i kare kokato i kom Moab.



¹⁴Do nan Rwot waco be, “Di mwakini adek likame okato, udo kotieko mino deyo me Moab odoko gi me acae. Jo anonok kenekene en kame bino dong kikom jo atot kame tie iye, doko da jo odong nogo bino bedo jo agoro twatwal.”

Isaya 17

Rubanga bino Mino Siria kede Isirael Alola

¹Man en kop kame Rwot owaco i kom Damasiko. En ewaco be, “Nenunu, Damasiko likame bino pwodi dong di etie bomba kamanono; en ebino do doko atukit me ameje.

²Jo bino weko bomban me Siria atwal. Gin kibino doko kakame romini kede dok camo iye di kiko buto piny urako abongo ngatamoro lolo gi.

³Apama atek kame gwoko Isirael kikut jokwor bino doko li, doko da Damasiko likame bino bedo kede ajakanut; jo me Siria kodong mege can gi bino bedo rom aroma kede me jo me Isirael; ango Rwot me jo yi en awaco.”

⁴Rwot waco be, “Kame kare nono otuno, kobino dwoko deyo me Isirael piny; cwe kame nataman etie kede no bino arutor di kome ko ridingingo.

⁵Isirael bino bedo cal bala poto kame konyaro kiye engano; ebino dong kene bala poto me engano me aditot me Repaim, kame jonyar onyaro kiye engano di oko nyogao depo kiye wit engano kodong pitipit.

⁶Jo anonok kenekene en kame bino dong; Isirael bino bedo cal bala yat olibeti kame kotengo anyakini mege kede ebela, di anyakini are amoto adek mogo en ako dong i wie malo, arabo anyakini ongwon amoto kany mogo en ako dong i jange me pipiny; ango Rwot Rubanga me Isirael en awaco.”

⁷Kame kare nono otuno, jo bino lokere keto gen gi but Ngacwec gi; gin kibino ciko wang gi i kom Ngat Kacil kobedo Rubanga ka jo me Isirael.

⁸Likame doko kibino tamo pi alutarin kame gin kitimo kede cing gi, akadi geno epir kobedo cal me rubanga adako anyinge Asera, amoto alutarin me dunyo ne odok angwe kur.

⁹I ceng nono, bomban gin atek jo bino ringo tenge weko gi kidong nono, bala bin bomban kame jo Kibi kede jo Amor oringo oweko pi ringo jo me Isirael; gin kibino doko amejeke.

¹⁰Pien in Isirael wi otieko wil kede Rubanga ngat kame laki kede kame tie bala lela kame in iringo ot gwokere iye. Wun ipurunu poti me woro rubanga me kumbor.

¹¹Do akadi bed bala gikame ipurunu tui di kiko tuuro odiko me ceng kame ipitunu gi kede, do kac kame iudunu kony mere bino bedo li butu i ceng kame ibinunu bedo kede cweruncy kede aramo kalikame jik.

Kobwono Atekerin me Jokwor

¹²Otukui, dwan jo atot tie woo, kiwoo kitek iwinyo bala mor me nam! Otukui, atekerin tie woo, woo gi iwinyo bala twomere me twon pii.



¹³Atekerin tie woo bala ebuka me twon pii, do Rubanga bino redo negi di kiko awilun ringo dok kakabor. Dok gi cen bino bedo bala cucung kame yamo buko ngolo kede mori, amoto bala apua kame yamo me apipiru tie tero.

¹⁴Wang otieno gin kibino timo asura di kiko kelo ne jo twon lworu, do tuno odiko udo kotieko muducaro gi. Manoni en gikame bino timere ne jo kame yako wa.

Isaya 18

Rubanga bino Mino Abisinia Alola

¹ Itie i can in lobo kame bwom lwangini mor kiye, kame tie loka tetuca me icileta me Abisinia,

² kame cwao joor wok ki ecilet me Nail di kikwango yede kame kotimo kede aladoi. Dokunu cen, wun joor akom gi mit, but ateker me jo abocoboco di kom gi pwot, jo kame kolworu i wi lobo lung, ateker atek kame singo bwono yi, jo kame icileta opoko lobo gi.

³ Wun jo dedede kame tie i piny, wun jo dedede kame bedo i wi lobo, miunu wangu bed bit pi neno imendera kame kobino kiarao i wi moru! Cikunu yitu kiber pi winyo agwara kame kobino kuto!

⁴ Pien Rwot owaco na be, “Ango gira abino ngibuco neeno mot i kabedo na bala ceng kame lieto mere pwolpwol i dier i ceng, bala ekuna kame timere kame piny liet i kare me kac.

⁵ Pien di pwodi kare me ngwedo olok likame otuno, kakame ature otieko ony kede di do anyakini me olok tie cek, Rubanga bino tic kede pala me lwero yen pi totongo tenge cuny gi kede jang gi koyarere.

⁶ Kobino weko liele gi ne winy me wi mori kede ne leini me obar pi camo gi; i kare me iporo winy en kame bino camo kom gi, kede i kare me ngico leini en kame bino donyo camo kom gi.”

⁷ I kare nono, jo odongo di bocoboco nogo bino donyo kelo ne Rwot me jo yi giamia, gin jo kame kolworu i wi lobo lung, ateker atek kame singo bwono yi, jo kame icileta opoko lobo gi. Gin kibino bino i moru me Sion kakame koworo kiye Rwot me jo yi.

Isaya 19

Rwot bino Mino Misiri Alola

¹ Man en kop i kom Misiri. Nenunu, Rwot tie bino Misiri, en etie i wi edou adwir bino. Caljwogi me Misiri kom gi bino miel i nyime, di cuny jo ko bino nyote pi lworu.

² Rwot waco be, “Ango abino twaruno yi i Misiri di jo ko donyo yi ken gi ken gi, ngati kede ngat ca, bomba ni kede bomba ca, ajakanut ni kede ajakanut ca.

³ Ango abino totolo iik kame jo me Misiri tie kede di cuny gi ko kwanyere. Gin kibino pepenyo tam kibut caljwogi, kede kibut tipere me jo oto, kede kibut imuroko atio kede yamere.



- ⁴Ango abino jalakino jo me Misiri i cing ngaloc acunye kec; abaka ager en kame bino pugo gi; ango ngapug adwong, Rwot me jo yi en awaco.”
- ⁵Pii me ecilet me Nail bino dwono di eko tuo edoko tek baba.
- ⁶Wang itaun kame pii mol lubo bino doko ngwe; ajange dedede me ecilet me Nail atie Misiri bino tuo, doko da aladoi kede otol mege bino tuo di kiko nyote.
- ⁷Dog ecilet me Nail bino dong di ler alera; gi dedede kame kopuro bino tuo di yamo ko tero gi tenge.
- ⁸Jo kame ciko i ecilet me Nail bino koko; jo kame ciko bwoini i pii bino kuro kwe di cuny gi ko kwanyere.
- ⁹Jo kame timo ausin me pulak cuny gi bino kwanyere, gin jo kame cweo igoen aliamaliam.
- ¹⁰Jo kame cweo ausin doko igoen cuny gi bino dubere, kede jo dedede kame pakaso bino bedo kede cweracuny.
- ¹¹Jopug me bomba me Soan ming adikinicel; jo ariek kame mio Parao tam, mie tam me mingo kenekene. Benyo benyo kame gin kitwero waco ne kede Parao be gin kibedo jo ariek twatwal, doko da gin kibedo jo me erionget me abakai kariki sek?
- ¹²Parao, jo ni ariek nogo tie tuai? Ber mi gi kiwaci gikame Rwot me jo yi oiko pi timo ne Misiri.
- ¹³Jopug me Soan otieko doko jomingo, doko da kongalaro jopug me Mempi. Jo kame oudo poore bedo jotel i Misiri olokere rwenye arwenya.
- ¹⁴Rwot otieko mino wi gi ototolun; pi manono kitie mino Misiri tagere i gi dedede kame etimo bala kame dano omer cer kede ngok mere.
- ¹⁵Likame tie ngatamoro Misiri me ruom amalo amoto me ruom apiny, dano kobaro amoto angacan, kame twero mino Misiri kony.

Misiri bino Donyo Woro Rwot

- ¹⁶Kare tie bino kame jo me Misiri bino doko luruluru kede bala mon. Kom gi bino miel kede lworu ka kineno di Rwot me jo yi okiarao cinge pi mino gi alola.
- ¹⁷Gin kibino bedo kede twon lworu i kom lobo me Yuda; kame kowaco ne ngatamoro me kunono nying Yuda, en ebino bedo kede lworu pi gikame Rwot me jo yi oiko timo i kom gi.
- ¹⁸Kame kare nono otuno, bomban kany i lobo me Misiri bino donyo yamo leb Eburania. Jo me kunono bino donyo kwongere i nying Rwot me jo yi. Acel kikom bomban nogo kobino lwongo be, “Bomba me Ceng” .
- ¹⁹Kame kare nono otuno, kobino gero alutari ne Rwot i cuny lobo me Misiri, kede kobino sipo epir me kidi kame kokwero bute i ikor mere.



²⁰Magonogi bino bedo anen kame nyuto be Rwot me jo yi tie Misiri. Kame kotie tero jo kirac di kiko kok but Rwot, en ebino cwano negi ngat kame lako gi di en eko bino konyo gi.

²¹Rwot bino nyutere but jo me Misiri di jo me Misiri ko bino ngene i kare nono, di kiko donyo wore di kimie giayala awanga; doko da kibino donyo kwongere but Rwot di kicobo kwongere gi nogo.

²²Ingei Rwot mino jo me Misiri alola, gin kibino dok bute di en eko gamo ilega gi di eko cango gi.

²³Kame kare nono otuno, yongayo adwong bino bedo tie ayai ki Misiri ot Asiria; jo me Asiria bino donyo bino Misiri, kede jo me Misiri da bino donyo ot Asiria, doko da atekerin are nogo bino donyo woro Rubanga karacel.

²⁴Kame kare nono otuno, Isirael bino ribere kede Misiri kede Asiria, di atekerin adek nogi ko doko gikame bino kelo winyo i wi lobo lung.

²⁵Rwot me jo yi bino mino gi winyo di ewaco be, “Winyo bed Misiri, gin jo na; kede Asiria, gin cwec na; kede Isirael, gin jo na kame maka.”

Isaya 20

Gianena me Enabi Aoto Nono

¹Abaka Sagon me Asiria bin oko mino cik but ngadwong me isirikalen me Asiria pi suro bomba me Pilistia kame kolwongo be Asidod.

²Cecen di pwodi manono likame otimere, Rwot oudo owaco ne Isaya wot ka Amos pi gonyo amuka ki tiene kede epuko kame oudo engapo. En oudo eko timo kamanono di eko donyo ot nono abongo egoe, kede tiene da di tie nono.

³Kakame komako kede bomba me Asidod, Rwot oko waco be, “Isaya ngatic na lem obedo ot nono abongo egoe, kede tiene da nono pi mwakini adek, manoni obedo gianena me gikame bino timere ne Misiri kede Abisinia.

⁴Abaka me Asiria bino kolo mabus aoto nono kame emako ki lobere nogi etero gi obukui. Jo atino kede jo adongo bino ot nono abongo ngapo igoen, kede tien gi da nono, di kwon dud gi iparadad ooko; manono bino kelo lewic i kom Misiri.

⁵Jo kame lem oketo gen gi i kom Abisinia di kiwakere pi Misiri, gen gi bino kwanyere di wi gi ko dubere.

⁶Kame kare nono otuno, jo kame bedo i dog nam agongere kede Pilistia bino waco be, ‘Kong nenunu gikotimere ne jo kame wan oudo oketo gen wa i kom gi di oko ringo but gi pi gwoko wa kibun abaka me Asiria! Nan wan obinunu do bwot benyo?’ ”

Isaya 21

Gianyuta me Rete me Babilon



¹Man en kop kame kowaco i kom wi tim kame tie i nget nam adwong. Bala kame apipiru wokun kede ki wi tim me bad tetu piny, tie can moro atie bino kamanono ki lobo me alwora.

²Aneno gianyuta moro aneno rac twatwal, en gianyuta me duporo kede muducaro. Elam, yai iko ot suro! Mede, lukaro bomban me jo Babilon! Rubanga tie jiko cur kame Babilon obedo kelo.

³Gikame aneno nono oko mina aramo i cunya, aramo acal bala me dako atie ramere me nywal. Manono onyonga, doko edubo cunya omio likame atwero winyo akadi neno gimoro.

⁴Wia winga, twon lworu otieko neko koma; mumuso me piny kame oudo abedo kuro olokere odoko gikame kelo na mielkom.

⁵I gianyuta nono, oudo koiko cam me ebagu, di oko peto ikeka me bedo me wele. Gin oudo kitie cam kede amata, di ngatamoro oko ngole redo be, “Yaunu, wun jodongo me isirikalen! Iikunu ibukui wu!”

⁶Di Rwot oko waco na be, “Oti icwai ngat akio piny, di iko waco ne pi mino kop i kom gikame eneno.

⁷Kame eneno jo kame ringo kede asigiran di kitie bino are are, kede jo kame ringo kede pundan, kede jo kame ringo kede aguraguran, poore ecik yite bed bit.”

⁸Di ngat akio piny nono oko redo be, “Rwot, ango abedo cungo iwor kede iceng malo kan i wi gedo abor me ngingio piny.

⁹Nan atie neno gin ika kitie bino jo are are, di kitie ringini kede asigiran!” Di eko waco be, “Epoto, Babilon otieko potu; caljwogi dedede otuturun tie buto piny.”

¹⁰Jo na me Isirael, wun kotieko canyo wu di oko pieto wu bala engano, do nan ango atie waco ne wu rwonge aber kame ango awinyo kibus Rwot me jo yi, Rubanga me Isirael.

Kop i kom Edom

¹¹Man en kop kame kowaco i kom Edom. Ngatamoro tie lwonga ki Edom di epenya be, “Ngakino piny, piny oyapuno ru ya? Wac na ka piny oyapuno ru.”

¹²Ango ako dwoko be, “Piny bo oyaro ru, do ebino bobo yuto. Ka imito, iromo bobo dwogo iko medo penyo.”

Kop i kom Arabia

¹³Man en kop kame kowaco i kom Arabia. Wun jo me Dedan kame tie i sapali, ibinunu cokere buto i dud okuto mogo acegocego me wi tim me Arabia.

¹⁴Miunu jo kame orio oneko pii ka kibino butu. Okwe wun jo kame bedo Tema, kelunu mugati ne jo koringo ayela.



¹⁵Pien gin kiringo aringa ki epima kede ki emal kame kotieko telo pi gweno, kede ki can kame yi kelo.

¹⁶Rwot oko waco na be, “I kare me mwaka acel udo deyo me Kedar otieko jik bala kame tic kame dano opatano pi timo pi mwaka acel jik kede.

¹⁷Jo yi mege anonok kenekene en kame bino dong kede imalia; ango Rwot Rubanga me Isirael atieko waco.”

Isaya 22

Kop i kom Yerusalem

¹Man en kop kame Rubanga owaco i kom Aditot me Gianyuta. En ewaco be, “Pinyo komio wun dedede itienu camo ebaga i wi ude wu?”

²Bomba dedede tie woo, di jo celakino kede yomcuny. Jo wu oto i yi noni likame koneko gi aneka i yi.

³Jopug wu dedede oringo karacel, di oko mako gi abongo gweno emal moro, bed bala oudo kiringo kakabor.”

⁴Pi manono, ango nan awaco be, lokunu wangu tenge kibuta; wekanu akok kede pigewanga pi jo na me amaro oto; kur idiunu cunya.

⁵Pien Rwot Rubanga me jo yi oudo oiko ceng me icelakin kede me nyonyono jo piny kede me atotolun i Aditot me Gianyuta. Kotieko mumuko apama atek koluko bomba, doko da koko me jo akwao kony tie winyere i mori.

⁶Isirikalen kowok ki Elam obino kede cabalan di kiriongo isaun me mako tongini me emal; isirikalen kowok ki Kir omako ibukui gi cuto.

⁷Cabalan me yi oudo oumo aditoto alobo gi mio i Yuda; isirikalen aoto kede tien ocungo i irutei me Yerusalem.

⁸Kotieko tieko teko ka Yuda me gagao ebela ki wie. Kakame manono otimere kede, wun ikounu omo jamini me yi kame oudo ikanunu i Ot me Abum. ⁹Ikounu neno be kabedo tie tot komukumukun ki apama atek koluko bomba me Yerusalem kame poore aika, ikounu weko pii ki atapar me piny.

¹⁰Imarunu wel me ude atie Yerusalem di ikounu tiatiaio mogo pi udo ingaroi me iiko apama me cel aluko bomba.

¹¹Ikounu gero epipa adwong acoko pii i dierediere me apama me yie kede me ooko, pi coko pii kame mol wok ki atapar kacon. Do likame ikounu keto tam wu i kom Rubanga ngat komio gi nogi otimere, arabo ngat koudo oiko cako sek be gi nogi poore timere.

¹²Rwot Rubanga me jo yi oudo owaco ne wu be ikokunu kede di itururunu, be ilielunu wi wu di ikounu ngapo igoen me cola.



¹³ Do akaka manono, wun oudo itienu kilel kede camo ibagai, oudo itienu ngongolo twonin kede romini, camo ringo kede mato bwini, pien oudo iwacunu be, “Ocamunu, doko da omatunu, pien esawa me to li.”

¹⁴ Rwot me jo yi owaco nango kop be, “Likame abino sasiro gi ki gikarac noni tuno to gi, ango Rwot Rubanga me jo yi en awaco.”

Ikwenyar but Sebena

¹⁵ Rwot Rubanga me jo yi oko waco na pi ot but Sebena, en ngat kame lo jame me paco ka abaka, di ako waco ne be,

¹⁶” Twer nyo kame in itie kede kan? Wade ni mege en atie kan komio ikunyo ates ni i bad lela kan?

¹⁷ Akadi di itek benyo, do Rwot oyaro kapakino in di eko kwiti tenge.

¹⁸ En ebino wiwiro in di eko kwiti bala mupira i piny alac. Ibino to kunono, di cabalan ni me deyo nogo ko bino buto i ngeti, Okwe, in ngat kame ikelo lewic i ot ka ngadwong ni.

¹⁹ Rwot bino kwanyi ki wang tic ni di eko dwoki piny.”

²⁰ Rwot owaco ne Sebena be, “I ceng nono, ango abino lwongo ngatic na Eliakim wot ka Kilikia,

²¹ di ako bino ngapo ne angapito nin me ajakanut di ako mine akarunikin kame in oudo itie kede. En ebino bedo bala papa me jo kame bedo Yerusalem kede Yuda.

²² Abino mine isumilito me ot ka Daudi; ka en eyabo likame tie ngat kame bino cego, doko da ka en ecego likame tie ngat kame bino yabo.

²³ Abino mine ecungo di etek i ajakanut mere bala loc kame koguro, di eko bino kelo deyo i ot ka papa mere.

²⁴” Joawade mege kede jo ace apat kame kuo i cinge bino bedo ne bala yec, bala ikopon kede jagin kame liero i iteku kame kotweo i yat atek.

²⁵ Yat kame kotweo iye iteku nono tek nan, do cengemoro ebino doko yagayaga di eko poto, di yec dedede kame oudo okode iye ko bino amuducar.” Rwot en owaco.

Isaya 23

Kop i kom Poenisia

¹ Man en kop kame kowaco i kom Taya. Kokunu wun imerin me Tarusi, pien kotieko dudubo edoket kame iwokunu iye i bomba me Taya. Iwinyunu kop noni kakame oudo itienu dwogo kede ki Sipuro.

² Tururunu wun jocat wil me Sidon, wun jo kame bedo i dog nam adwong. Icwaunu jo wu ngolo name adongo;



- ³Gin kingolo twon pie pi wilo kede cato engano me Sikor, kame kopuro i dog ecilet me Nail; oudo icatunu wil kede atekerin atos.
- ⁴Lewic miero maki, Okwe Sidon, pien nam oyamo, kabedo kame koluko kede cel atek i dog nam adwong owaco be, “Ango likame abilo ramere me nywal, likame ango apito atin awobi moro amoto nyako moro.”
- ⁵Kame kop noni otuno Misiri, kibino bedo kede par alit pi gikame otimere ne Taya.
- ⁶Wun jo kame bedo i dog nam adwong kokunu, ngolunu loka Tarusi.
- ⁷Benyo, kom manoni en bomba wu amalo me kicel kocakere riki sek, bomba kame jo mege mogo osarakin ot bedo i pinye apat?
- ⁸Ngai inonini kotimo iik noni i kom Taya, bomba kamio ocoro me pug, bomba kame jocat wil mege obedo jopug kame koworo ki wi lobo lung?
- ⁹Rwot me jo yi en otimo iik noni, pi jiko wakere gi pi deyo kame kitie kede, kede pi kelo lewic i kom jo kame koworo i wi lobo lung.
- ¹⁰Dokunu i lobo wu, wun imerin me Tarusi; pien edoket kame lem iwokunu iye noni otieko doko li.
- ¹¹Rwot orieo bade i wi nam adwong eko rereto ajakanuto; en emio cik me tuturo kacat kede kawil kame tie kede cel me apamai atek i lobo me Kanan.
- ¹²En ewaco be, “Yomcuny kame lem itie kede otieko jik, in bomba me Sidon, doko da kotieko dino jo ni piny atwal. Akadi ka iyai di iko ngolo loka Sipuro, do i kunono da likame ibino udo wei moro.”
- ¹³Nenunu gikame Asiria otimo ne Babilon! Gin kimie edoko kabedo me leini me obar; kisuro Babilon di kiko kumemo kayito i wi apama mere me cel, di kiko tuturo miere me abaka di eko doko ameje.
- ¹⁴Kokunu wun imerin me Tarusi, pien kotieko dudubo edoket kame iwokunu iye i bomba me Taya.
- ¹⁵Wic bino wil kede bomba me Taya pi mwakini ot kanyaare, manono rom aroma kede kare me kuo me abaka. Ingei mwakini ot kanyaare, Taya bino bedo bala malaya kame kowero be:
- ¹⁶Kwany adungu ni, ririmo bomba, in malaya kame wic owil kedi! Goi goc amit di iwero were amit, tetekeny cuo dwog buti.
- ¹⁷Kame mwakini ot kanyaare otiek, Rwot bino mino Taya dok i tic mere me woro caljwogi bala bin sek, di eko bino doko bala malaya atimo caro kede ajakanuto dedede atie i wi lobo.
- ¹⁸Jamini kede magoba kame en ebino udo ki tic mere me woro caljwogi likame bino bedo i cinge, do ebino mino gi but Rwot, di jo kame woro Rwot ko bino tic kede gi me wilo cam kede igoen aromo gi.



Isaya 24

Rwot bino Mino Wi Lobo Alola

- ¹Rwot bino dudubo wi lobo di eko mine edong nono. En ebino nyonyobo wi lobo di eko sarakino jo kame bedo iye.
- ²Jo dedede bino beo i peko di rom aroma, josaseredoti kede jo ajoa, ipaso kede jodongo gi, nyako ngatic me ot kede min ot, jowil kede jocat, jo kame kopo jo jame kede jo kame kopao kibut gi, wegi abar kede jocan.
- ³Kobino mino wi lobo kony mere doko li atwal atwala di eko dong nono atwal atwala. Manoni en kop kame Rwot owaco.
- ⁴Wi lobo oner di eko tuo, piny lung odoko goro; bero me malo kede wi lobo karacel odok do cen acena.
- ⁵Lobo omunaun pien jo kame bedo iye oturo iswilia ka Rubanga, doko da kiko dagi gwoko isikan kame en etimo kame bedo nakanaka.
- ⁶Pi manono, Rubanga olamo lobo; jo kame bedo iye tie neno can pi raco gi, gin kitie meede ameda doko nok.
- ⁷Olok tie tuo i poti, bwini tie doko nok, jo dedede kame oudo cuny gi yom nan tie cur.
- ⁸Koko me ayekeyeke otieko ling, icelakin me jo atie kede kilel otieko jik, koko me arigirigi da li.
- ⁹Likame doko jo mato bwini di kiwero, bwini bino doko kec kalamo but jo kame mate.
- ¹⁰Bomba do tie atatai; ude duc ocegere likame tie ngat kame twero donyo iye.
- ¹¹Koko tie i dier yote me bomba pi li me bwini; kilel dedede otieko jik, yomcuny likame do tie i wi lobo.
- ¹²Kodudubo bomba, kotiatiao irutei mege piny.
- ¹³Manoni en gikame bino timere ne atekerin dedede atie i wi lobo. Ebino bedo bala i kare me ngwedo olok, bala kame kotieko tenggo anyakini me olok dedede piny, di oko donyo dedepo anyakini acelacel kodong malo.
- ¹⁴Jo kame bino dong bino wer kede kilel; jo me bad tetu tim bino woo kitek di kiwaco dwongo ka Rwot.
- ¹⁵Jo me bad tetu kide bino pako Rwot di kimie dwongo; jo kame bedo i dog nam adwong da bino pako Rwot, en Rubanga me Isirael.
- ¹⁶Wan obino winyo were me pak, me mino Ngat Kopooore dwongo di wok ki ajikini me wi lobo. Do ango atie i can! Atieko ol. Jo tie timo tice kalikame nyuto genere, tice nogo tie meede ameda.
- ¹⁷Wun jo kame bedo i wi lobo, tim akelo lwooro kede buge kede obek tie kuro wu.



¹⁸Ngat kame bino ringo pi gikame kelo lwooro bino poto i bur, kede ngat kame poto i bur di eko wok en ebino moko i obek. Kobino yayabo dirisan me malo di acakini me dud lobo do donyo yangere.

¹⁹Wi lobo bino yangere kirac di eko babarun di eko nyinyilun.

²⁰Wi lobo bino gete di eyangere bala dano omer, ebino pure bala kima kame yamo puo. Dub onuo lobo, en ebino poto di likame eko bobo twero yai.

²¹Kare tie bino kame Rwot bino keto kede alola i kom twer mogo atie i malo kede abakai me wi lobo.

²²Kobino coko gi i bur karacel bala mabus di oko cego gi iye. Ingei kare moro en eko bino mino gi alola.

²³Di do lewic ko bino mako duwe kede ceng; pien Rwot me jo yi bino pug ki Yerusalem, ki wi moru me Sion, di joadongo mege ko bino neno deyo mere.

Isaya 25

Wer me Pak

¹Okwe Rwot, in en Rubanga na; ango abino mini dwongo di apako nyingi. Pien in itieko timo jamini me aura; in ibedo kede genere di iko cobo iik ni kame oudo itimo riki sek.

²In ituturo bomban ka jokwor wa odoko atukit, bomban kame kocelo kede apamai atek opopoto. Miere me abakai kame jokwor wa oudo ogero otieko doko li atwal.

³Pi manono, jo me atekerin atek bino paki; jo me bomban me atekerin ager bino lwori.

⁴In en kakame jocan ringo ot gwokere iye, kakame jo kame piny oloo ringo iye i esawa me peko. Kakame jo ager onyongo wa kede bala kot acwei kede yamo, arabo bala ceng odop pepe i dier i ceng, in iko bedo bala kagwok wa.

⁵Woo me jokumbor amito suro wa otuno ne wa bala lieto me piny kotuo, do in iko bedo bala edou kame galao lieto me ceng di likame eko tuno i kom wa; igengo jokwor wero were me bwono yi.

Rubanga Oiko Ebag

⁶I wi moru me Sion kan, Rwot me jo yi bino iiko ebag pi atekerin dedede, ebag me cam abeco kede bwini ocek di mit. Kobino toko ringo kame isum tie iye kede gabo bwini kame kojililo.

⁷I wi moru kanoni en ebino nyinyilo egoe me aika koumo atekerin dedede.

⁸Rwot me jo yi bino muducaro to atwal. En ebino weno tenge pigewang jo dedede, di eko kwanyo tenge lewic kame jo mege obedo yeno i wi lobo lung. Rwot en owaco!



⁹I kare nono, jo dedede bino waco be, “En ebedo Rubanga wa! Wan oudo obedo kure kede gen pi lako wa. Manoni en Rwot kame wan oudo obedo geno, nan obedunu kede yomcuny kede kilel pien elako wa.”

Rubanga bino Mino Moab Alola

¹⁰Rwot bino gwoko moru me Sion, do kobino nyonyono jo me Moab piny bala gari kame konyono i bur pi timo bolia.

¹¹Gin kibino rierieo bad gi i kanono bala kame jo asanyo rierieo kede bad gi, do Rwot bino tieko ewaka gi bed bala kicane rierieo bad gi.

¹²En ebino tuturo piny apama abor malo kame kocelo kede Moab, di eko rwacakin piny eko doko apua.

Isaya 26

Rubanga bino Mino Jo mege Bwono Yi

¹Kare tie tuno kame jo bino wero kede wer i lobo me Yuda be: Wan otie kede bomba atek! Rwot tie bala apama wan atek me cel, doko da en emio wa obwono yi.

²Yab irutei me bomba, tetekeny ateker kopooore kame gwoko yei gi donyi i yie.

³Rwot, in imio jo kame yei gi osipakin anapakin, pien udo gin kigeni.

⁴Genunu Rwot i kare dedede, piento en etie bala lela kame gwoko wa nakanaka.

⁵En etieko dwoko jo kame oudo tingere piny, ereto bomba acil kame gin oudo kibedo iye, apama mege oko rwacakin piny odoko apua.

⁶Nan do jo koudo obedo jocan beo i wie di kinyonyono en, jo kame piny oudo oloo tien gi dero wie.

⁷Yongayo me jo kopooore pioropior. Rwot, in itimo gi dedede i yore me ateni, in imio yongayo kame jo kopooore lubo bedo di pwot.

⁸Rwot, wan olubo mit ni di oketo gen wa buti, cuny wan tie i komi.

⁹Cunya pari iwor kiakia; ango amoi kede kuo na. Pien ka in ingolo kop ne lobo kede jo kame bedo iye, gin kibino niang dwong me gi kopooore.

¹⁰Akadi bed bala in itim ne jo areco mwolo, do gin likame kipwonyere timo gi kopooore. Akadi i lobo me jo kopooore kan, gin pwodi kitimo gikarac; likame kineno dwongo nin.

¹¹Okwe Rwot, in itingo badi malo pi mino gi alola, do likame gin kitie neno. Mi gi kinen epone kame in imaro kede jo ni, di lewic ko mako gi; mi mac kame in i iiko pi jokwor ni muducaro gi.

¹²Rwot, in ibino kelo ne wa anapakin, pien i ateteni, gi dedede kame wan otieko timo in en itimo ne wa.



¹³Rwot Rubanga wa, rwode ace apat kede in otieko pugo wa, do in keni en ibedo Rwot wa.

¹⁴Nan gin kitieko totoun likame bobo kibino kuo, tipere gi likame doko bino yai, pien in imio gi alola di iko muducaro gi. Likame doko tie ngatamoro kame bino yutuno gi.

¹⁵Rwot, in imio ateker wa odongo, in imio ateker wa odongo; wan omii wor; in inyao ikor me lobo wa.

¹⁶Rwot, in ibitaro jo ni, di gin kiko moni di kiko lego buti.

¹⁷Rwot, in imio wa odwilao koko, bala kame dako atie ramere me nywal dwilao kede kame esawa mere me nywal otuno.

¹⁸Wan obedo bebelo kede aramo me nywal, do oko lokere nywalo yamo kenekene. Likame tie yi moro kame wan otieko bwono i wi lobo, doko da oli kede idwe kame bino lunyo wang wa bedo i piny.

¹⁹Jo wa kotieko to bino kuo bobo! Kom gi bino yaruno. Jo kame buto i apua, yaunu ikounu wero wer me kilel! Bala kame toyo me odiko mio kede lobo kuo anyen, kamanono da Rwot bino dwoko kuo me jo kotieko to sek.

Ngolo Kop kede Dok i Kuo Kasek

²⁰Jo na, donyunu i ude wu di ikounu cego ikekon. Pwonunu pi kare moro acecek tuno di gero ka Rubanga otiek.

²¹Pien Rwot tie bino ki kabedo mere pi mino jo me wi lobo alola pi dub gi. Wi lobo bino nyuto nek kame kotimo iye, doko da likame ebino kano jo kame koneko.

Isaya 27

¹I ceng nono Rwot bino tic kede twon epima mere atek di bit adikinichel, pi mino Lebiatan alola, en twol kame maro pikiro, di en eko bino neko twol kiyiliyili abedo i nam adwong.

²I ceng nono Rwot bino waco be, “Werunu wer i kom poto me olok akelo yomcuny.

³Ango Rwot en kame agwoke; abwongo ne pii nakanaka. Adare iwor kede iceng tetekeny kur ngatamoro dub gimoro kiye.

⁴Ango likame pwodi doko atie kede gero i kom poto olok nono. Ka koto okuto kede ocokocok oko wok iye, koto ango adipo yi kede gi di ako wango gi dopodop.

⁵Do ka jokwor ka jo na mito be ango agwok gi, poore gin kidwog i anapakin kede ango; ebo poore gin kidwog i anapakin kede ango.”

⁶I kare kame tie bino, ikwae ka Yakobo bino bedo bala yat kame cibo aliasin mege, di kiko bino lot di kiko tuuro; anyakini gi bino pongo wi lobo lung.



⁷Likame Rwot omio jo me Isirael alola kitek ateka bala kame emio kede jokwor gi alola, doko da likame eneko gi bala kame eneko kede jokwor gi.

⁸Rwot omio jo mege alola i yore me cwano gi bala mabus obukui. En emio yamo agwai me bad tetu kide ojwango gi kunono.

⁹Do dub me Isirael kobino sasiro kenekene kame konyonyoto kide me alutarin me woro caljwogi paka doko purupuru, di alutarin me dunyo odok angwe kur kede ipirin kame kosipo pir rubanga adako anyinge Asera likame doko odong cungo.

¹⁰Bomba kame oudo kocelo di tek jo otieko weke edong kene bala wi tim; etieko doko kacam me doke, gin kiurako kanono. Dok gwero ajange me yen atie iye.

¹¹Kame ajange me yen kotuturun otuo di kiko popoto piny, mon koko gi me moko mac. Pi kite kame jo nogi likame tie kede niang moro, Rubanga ngat kocweo gi likame bino bedo kede kisa but gi, en likame ebino nyuto negi mwolo.

¹²Kare tie bino kame Rwot bino koko kede jo mege me Isirael acelacel, cako ki ecilet me Eupurate tuno i ikor me Misiri, bala kame koyeko kede kal ki gari.

¹³Kame kare nono otuno, kobino kuto agwara me lwongo jo me Isirael katie bala mabus Asiria kede Misiri. Gin kibino dwogo di kiko donyo woro Rwot i Yerusalem, ki wi moru mere kacil.

Isaya 28

Ikwenyar but Ajakanut kame tie i Bad tetu Malo

¹Etie i can bomba kame tie i aditot kame lobo mere mio, kame deyo mere tie kwanyere bala ature kame komwomwono i ocoro me ewaka, kame tie i wi joamera me Epuraimu, jo kame camo cam abeco di kiko mer kede bwini.

²Nenunu, Rwot tie kede ngat atie kede twer di etek, bala kot kame cwei kede akako, bala yamo agwai me kot kame dudubo jame, bala alele akokomar; en ebino kwito jo piny kede teko kacal kamanono.

³Ocoro me ewaka me joamera me Epuraimu kobino nyono piny kede tien.

⁴Deyo kame tie tiek, kame tie i bomba kame tie i aditot kame lobo mere mio, bino bedo bala anyakini me epigi kame cako cek. Cucuto ka dano ongwede, en ecame abongo gal.

⁵I kare nono, Rwot me jo yi bino bedo but jo mege kodong bala ocoro me deyo kame kotimo kede ature.

⁶En ebino mino jongolkop cuny me ngolo kop i ateni, kede ebino mino jo kame daro erute me bomba teko me gengo jo kame mito suro bomba.

Isaya kede Inabin Amer me Yuda



⁷Josaseredoti kede inabin gete pien kimer, kongo akec wingo wi gi. Bwini omio wi gi likame tio. Wi gi do likame twero niang gianyuta ka Rubanga kede ngolo ne jo kop kiber.

⁸Ngok gi otieko pwoko imesai dedede, likame iudo karamoro acil da.

⁹Gin kiwaco kop i koma be, “En eparo be etie pwonyo ngai? Etie tatamo ne ngai kop mere? Eparo be wan odoko idwe kame pwodi kotwono atwona dot?”

¹⁰Etie pwonyo wa enyukuta kede enyukuta, eroto kede eroto, wi kop kede wi kop.”

¹¹ Ka wun idagunu winyo kop nango, Rubanga bino yamo kede wu i dog jokumbor kame dwalo leb kalikame ingeunu.

¹²En etieko mino wu wei kede anapakin, do wun ikounu dagi winyo kop mere.

¹³Manono en komio Rwot bino pwonyo wu enyukuta kede enyukuta, eroto kede eroto, wi kop kede wi kop. Di do ikounu bino ot di ikounu poto ataru paka wanere, di ikounu moko i owic, di oko bino tero wu.

Kidi me Esonda ne Sion

¹⁴Winyunu kop ka Rwot, wun joewaka kame pugo jogi i Yerusalem.

¹⁵Wun iwakerenu be itiekunu timo isikan kede to, be itiekunu moko winyere wu kede kabedo me jo oto. Igenunu be ka can alit opoto likame ebino mulo wu, pien itiekunu mino kop me abe odoko kakame iringunu ot gwokere iye, kop kalikame ateni odoko ot kame igwokerenu iye.

¹⁶ Pi manono, Rwot owaco be, “Ango atie cibo i Sion kidi me acakini me apama, kidi kame kotieko tamo, kidi me wel amalo, en ebino bedo acakini atek me apama mere. Ngat kame gene likame bino bedo kede mielkom moro.

¹⁷Abino mino ngolo kop i ateni bedo tol me pimo acakini me apama nono, kede tim kopoore ko bedo gi me rieno apama mere.” Kot me akako bino molo kakame iringunu gwokere iye, manono en kop me abe, di pii ko bino pongo kagwokere wu.

¹⁸Isikan kame itimunu kede to kobino kwanyo, winyere kame imokunu kede kabedo me jo oto likame bino cungo; kame can adwong nono obo, en ebino rieco wu piny.

¹⁹Can nono bino ruruco jwato wu; ebino beo ne wu odiko acelacel, iceng kede iwor. Niang dwong me gikame bino timere noni bino kelo ne wu twon lworo.

²⁰Ibinunu bedo bala dano kame itanda mere cecek likame rome, doko da alang mere diding likame ume pukupuk.

²¹ Pien Rwot bino lepun bala kame bin etimo i moru me Perasim kede i aditot me Gibeon, pi timo gikame emitimo, tim apat apata; pi cobo tic mere, tic kalem pwodi kwiire.



²²Pi manono, kur icaunu gikame akwenyaro wu iye, pien ka itimunu manono, bwot wu bino bedo tek. Ango awinyo di Rwot Rubanga me jo yi moko cik me dudubo lobo lung.

Rieko ka Rubanga

²³Winyunu dwana; cikunu yitu i gikame atie waco.

²⁴Benyo, jo kame puro poto pi pito kodi bedo pur apura kamanono nakanaka? Benyo kibedo boko poto di kiloko nakanaka?

²⁵Kame gin kitieko iiko poto, mam gin kicuwo egere me amalakwang kame kolwongo be dili kede cumin; mam kipito engano i irotin kede mawele kakame kopoore pite iye, di kiko pito kodere ace ilak poto?

²⁶Gin kingeo gikame kipoore pi timo, pien Rubanga gi otieko pwonyo gi.

²⁷Kame kotieko nyaro dili kede cumin, likame komio twonin wire di kiwao ebao apek arabo agadigadi pi nginyo gi, do kocanyo gin kede ikong.

²⁸Likame kodudupo engano cutucutu paka bebelo nyige mege, gin kingeo epone me mino twonin rigao en kede ebao abongo bebelo nyige gi.

²⁹Rieko noni dedede wok kibus Rwot me jo yi; en emio tam me aura, doko rieko mere dwong dwong kalikame wacere.

Isaya 29

Yerusalem bino Neno Can

¹Can kame itie iye in Yerusalem! Bomba kame Daudi oudo oguro iye eema tie i can. Ber kong wun imeedenu kwero ibagai wu me buli mwaka pi mwakini are amoto adek anyim.

²Do ango abino kelo can i kom bomba kame kolwongo be “Alutari ka Rubanga” , di koko kede iturur ko bino bedo tie iye, di bomba nono ko bino doko cal bala wi alutari kame remo oumo.

³Abino guro eema na luki; abino luki kede madalan aboco me turo apama, di ako kumemo kayito malo i wi apama nin.

⁴Di do in iko bino yamo i lobo kakatut; ibino yamo i apua. Dwani bino winyere di wok ki piny bala dwan jwogi, ibino weweo i apua.

⁵Do twon jokwor ni kobino kutaro gi bala apua, twon jo ager di kili kede kisa buti bino bedo bala cucung kame yamo tie tero.

⁶Do cucuto i kare nono, Rwot me jo yi bino ngole laki kede mwoc acal bala me kot, kede yangere me piny, kede twon woo, kede yamo atek me apipiru, kede mac ager.

⁷Di jo me atekerin koudo obedo yi kede Yerusalem, jo koudo obedo suro kateko mere di kimie neno can, gin dedede kibino doko bala lek, bala gimoro abino i tam me dano iwor di enino.



⁸Atekerin dedede kame cokere pi suro Yerusalem bino bedo bala dano kame kec onuo kame leko be etie cam, di eko cei eko udo be kec pwodi oneke kamanono; arabo bala dano kame orio odio kame leko be etie mato pii, di eko cei eko udo be teko li ne, orio pwodi oneke kamanono.

Ikwenyar kame Jo Odagi Winyo

⁹Bangerenu ikounu bedo jomingo, tounu wangu ikounu bedo imuduka! Merunu abongo mato bwini, getenu abongo mato kongo moro akec!

¹⁰Pien Rwot otieko coro ne wu cuny me mito nino kitek; inabin poore bedo bala wangu, do en etieko umo wang gin; etieko umo wi joneno.

¹¹Gianyuta dedede but inabin otieko doko ne wu bala baluwa kame komwono i bakasa. Ka komie but jo kame ngeo somo di oko waco negi be kisomi, gin kibino waco be likame kitwero some, pien komwone.

¹²Ka komie but jo kalikame ngeo isoma di oko waco negi pi somo, gin kibino waco be gin likame kingeo somo.

¹³Rwot owaco be, “Jogi sidiko wora kede dog gi kenekene, do cuny gi bor kibuta; epone kame kiwora kede obedo wero kede wic cik kame dano en otimo.

¹⁴Pi manono, ango bobo abino timo i kom jogi gi me aura aneko kom gi. Rieko me jo kame riek bino pirisar, doko da abino kano niang me jo kame ngeo poko gikaber kede gikarac.”

Gen pi Kare me Anyim

¹⁵Kitie i can jo kame tamo kano iik gi kibun Rwot. Gin kitimo tice gi i mung di kiwaco be, “Likame tie ngat kame tie neno wa, doko da likame tie ngat kame ngeo gikame wan otie timo.”

¹⁶Gin kiloko jame oluktuke! Mene kame pire tek, ngacwei agulu arabo agulu? Benyo, gikame dano ocweo twero waco ne be, “In likame icwea” ? Arabo be, “In ili kede niang moro da” ?

¹⁷Odong kare acecek di abum me Lebanon lokere doko poti aceko cam, kede poti aceko cam ko lokere doko abum.

¹⁸Kame ceng nono otuno, jo kame yit gi oudo oding bino twero winyo kop di kosomo i itabu adola, doko da jo kame wang gi oudo oto wang gi bino yabere.

¹⁹Jo amwol bino udo kilel anyen i Rwot, kede jocan da bino lelo pi Ngat Kacil me Isirael.

²⁰Pien jo kame ger di kili kede kisa bino do bedo li, kede jo kame tie kede acae i kom kop ka Rwot likame bino bedo tie. Jo dedede kame tam gi do tie cuto pi timo gikarac bino rwenyo,



²¹gin jo kame mio pido lo dano aber, jo kame ciko obek ne jongolkop kame poko jo katie kede kop i erute me bomba, kede kame gengo abongo tien kop moro ngolo kop me ateni but dano ali kede raco.

²²Pi manono, nan Rwot, Rubanga me Isirael, kame bin olako Aburaam waco be, “Likame doko lewic bino mako ikwae ka Yakobo, likame doko nyim gi bino bedo luruluru.

²³Pien kame gin kibino neno idwe gin kame ango en amio gi di tie i diere gi, gin kibino ngeno be ango abedo Rubanga Ngat Kacil me Isirael. Gin kibino bedo kede wor buta di kiko lwora.

²⁴Jo kame kuo gi oparao bino udo niang, kede jo dedede kame ngunguro bino yei lubo pwoony.”

Isaya 30

Kony li ne Jo me Isirael pi Geno Misiri

¹Rwot owaco be, “Itienu i can wun idwe ajojemo. Wun ilubunu iik wu do likame mera; wun ikoderenu kede ateker apat, do di cunya dagi tim nono, manono omio itienu medo dub i wi dub.

²Wun iyaunu ot mono kony ki Misiri abongo penyoy tam nango. Iringunu but abaka me Misiri pi en gwoko wu, Misiri obedo tipo kame wun igaikinunu i dude.

³Pi manono, gwok kame abaka me Misiri mio bino doko ne wu gi me lewic, di Misiri, kame tie bala tipo wu me agaikin do doko gikame dwoko dwongo wu piny.

⁴Akadi bed bala jo kame kicwao otieko tuno i bomban me Misiri kame kolwongo be Soan kede Kanes,

⁵jo me Yuda lewic bino mako gi pi keto gen gi i kom ateker kalikame twero timo negi bero moro, do kwanyo kenekene kelo negi lewic kede acae.”

⁶Man en kop kame Rubanga owaco i kom leini me Negeb. En ewaco be, “Jo kame kocwao ngolo lobo kame beo iye obedo twon peko kede can alit, lobo kame inguon amon kede inguon acuo adorano, kede imosogan kede twole kiyilyili apor tie iye. Gin kitweo i ngei pundan gi kede aguraguran gi giamia me wel amalo pi tero ne ateker kalikame twero mino gi kony moro.

⁷Kony kame Misiri mio kony mere li, pi manono ango acako ne Misiri nyinge be, “Twol kiyilyili di likame etwero timo gimoro.” “

Jo Ali kede Wor

⁸Rwot oko waco na pi giro iwandik i kom kidi ibatalal, di doko ako wandiko en i itabu da, tetekeny ekaruno bedo bala ijura i kare dedede me anyim.

⁹Pien gin nakanaka kibedo jo kame jojemo, jo kalikame genere, jo kalikame yei winyo pwoony ka Rwot.



¹⁰Gin kiwaco ne joneno kede ne inabin be, “Kur imuraunu ne wan kope me ateni; wun wacunu ne wan gikame cuny wa mito winyo, akadi bed bala gin likame kibedo kope me ateni.

¹¹Wekunu yongayo nono, paraunu tenge kiye, wan likame bobo omito medo winyo kop i kom Ngat Kacil me Isirael.”

¹²Pi manono, Ngat Kacil me Isirael waco be, “Pien wun itiekunu dagi kop nango, di ikounu keto gen wu i kom tim me gero kede kop me abe,

¹³raco wu noni bino doko ne wu bala kakobele me apama abor malo, koyapuno mine ngole poto esawa moroni kenekene.

¹⁴Ibinunu kayamakin di ikounu ngingidun, bala agulu kame ngingidun di likame iko twero udo akadi abalatigo aromo kwanyo mac da, arabo aromo twomo pii ki akong.”

¹⁵Pien Rwot Rubanga, Ngat Kacil me Isirael owaco be, “Ango abino gwoko wu ka idwogunu buta di ikounu bedo mot, abino mino wu teko ka iketunu gen wu buta mot.” Do wun idagunu di iwacunu be,

¹⁶” Li! Wan obino ringo kede asigiran.” Pi manono, ateteni ibinunu ringo! Iwacunu be ibinunu ringo kede asigiran adwir, do jo kame riamo wu bino bedo dwir kalamo wu.

¹⁷Ngakwor acel kenekene bino mino jo tutumia acel kibutu ringo, jokwor kany kenekene bino mino wun dedede iringunu, tuno di idongunu bala yat me sipo imendera kilekekei i wi moru!

¹⁸Akadi bed kamanono da, do Rwot tie kuro wu pi bedo kede kisa butu, pien Rwot nakanaka timo gikame poore. Kitie kede winyo jo kame keto gen gi i kom Rwot.

Rubanga bino Mino Jo mege Winyo

¹⁹Ateteni, wun jo me Sion, jo kame bedo Yerusalem, likame doko ibinunu koko. Rwot bino bedo kede kisa butu ka ikokunu bute, en ebino gamo koko wu.

²⁰Bed bala Rwot bino mino peko kede can alit bedo bala cam wu kede pii me amata, do nan en ngat kame ebeto ngapwony wu ebino yecakin ne wu kakaler di eko bedo tie i wangu.

²¹Ka iwekunu yongayo ikounu parao i bad tetu cam amoto i bad tetu ngodal, ibinunu winyo dwane di ewaco kicen ngei wu be, “Yongayo gire ine, derenu.”

²²Di ikounu bino tero caljwogi kame kotimo kede saabu kede siliba bala gi me jwok, di ikounu bino uco gi tenge bala idukun otop di iredunu be, “Irwaunu tenge!”

²³Kame ipurunu kodere, Rwot bino cwano ne wu kot di kiko bino nyak kitek, doko da doke wu bino bedo tie kede lum atos.

²⁴Twonin kede pundan kame puro ecuka bino camo nyige kame kopieto kiber.

²⁵I ceng kame kobino rereto kede gedo aboco malo di oko neneko jo, pii bino mol wok ki wi mori aboco kede ki wi imukuran.



²⁶Rieny me duwe bino bedo rom bala me ceng, di ceng ko bino rieny kede lero akalamo kite kame lem erieny kede tien kanyaare, bala lero kame emio pi ceng kanyaare ka koriribo gi karacel. Manoni bino timere i ceng kame Rwot bino tweno kede wang aporeso kame en ewanakino kede jo mege di eko cango gi.

Rubanga bino Mino Asiria Alola

²⁷Nenunu, Rwot tie bino ki kakabor kede gero mere aliet bala mac, kede edou apek me yiro; kope kame wok ki doge obedo kope me gero, lebe waco kope kame cal bala mac aliet.

²⁸Wei kame wok ki ume cal bala osamai kame pii obelo di eko donyo mol ariram, ariram kame tut mere tuno i ngut dano. En eyeko atekerin di eko muducaro gi, kede etweo del i dog gi me kolo gi tero gi i to.

²⁹Do wun jo ka Rubanga ibinunu bedo kede yomcuny di iwerunu bala kame itimunu iwor me kwero ebaga kacil. Ibinunu bedo kede yomcuny bala jo kame tie ot i bilo kame kotie kuto, me ot i tempulo i wi moru ka Rwot, en ngagwok me Isirael.

³⁰Rwot bino mino dwane me dwongo winyere but jo dedede, di kiko bino neno cinge kame ekiarao malo pi bungo gi, di etie kede gero acal bala mac ager, karacel kede kot acwei di emwomwocun kede yamo atek kede akako.

³¹Kame jo me Asiria owinyo dwan Rwot di kiko nene di etie nyonyoto jo kede ebela mere me lilim, lworu kede mielkom bino mako gi.

³²En ebino ruruco jujuto gi kede ebela mere me mino alola; napunapun me ebela mere bino upere kede twomere me bule kede arigirigi kame jo mege tie gono. Rwot kikome bino yi kede jo me Asiria.

³³Pien Rwot oudo otieko iiko riki sek kabedo me wango kom abaka me Asiria kede twon mac. En etut di elac, di okumemo iye yen. Wei aliet kame Rwot bino kuto ki ume en kame bino moke paka liel.

Isaya 31

Rubanga bino Gwoko Yerusalem

¹Kitie i can jo aoto Misiri kwano kony. Gin kitie keto gen gi i kom asigiran, kede i kom cabalan me yi pien kitot, kede i kom isirikalen wegi asigiran pien gin kitek yi. Gin kidagi geno Rwot Ngat Kacil me Isirael, arabo penyotam kibute.

²Do Rwot da riek, en ecobo gikame ewaco di eko mino can potu. En ebino yai ne jo areco kede jo kame konyo jo atimo tice areco.

³Jo me Misiri obedo jo ajoa, likame Rubanga; asigiran gi tie kom kobedo ringo aringa, likame tipo. Kame Rwot okiarao bade malo pi mino alola, ngat kame tie mino kony bino gete, di ngat kame kotie konyo ko potu, di do gin dedede kiko bino to karacel.



⁴Rwot owaco na be, “Bala kame engu amoto atin engu ngururo kede i kom le kame emako abongo lworu, akadi di jokwat ocokere redo ne, kamanono da, ango Rwot me jo yi likame tie gimoro kame bino genga yi pi gwoko moru me Sion kede imukuran mege.

⁵Bala kame winyo por wire kede i wi ode pi gwoko idwe mege, kamanono da ada Rwot me jo yi abino gwoko Yerusalem; ango abino gwoke, doko abino lake, abino kone di ako mine ebwot.”

⁶Okwe wun jo me Isirael, dwogunu but ngat kame itiekunu weko kitek ateka.

⁷Kare tie tuno kame wun ibinunu uco kede tenge caljwogi kame itimunu kede siliba kede saabu, gikame obedo dub.

⁸Kobino neko jo me Asiria, likame kede teko ka dano, arabo kede epima kame dano otimo. Gin kibino ringo ki yi di oko bino mako awobe gi kidoko mabus kame kodio timo tic tetek.

⁹Teko gi bino tiek pi lworu, di jodongo me isirikalen ko bino ringo kede mielkom ka kineno imendera me yi. Manoni en gikame Rwot owaco, en ngat kame mac mere liel i Sion, kede kame epipa mere me cwako lilim tie Yerusalem.

Isaya 32

Abaka Atie kede Ekite Kopoore

¹Abaka kame pugo i yore kopoore bino bedo tie, karacel kede jopug mege kame pugo di kitimo gi dedede i yore me ateni.

²Ngat acelacel kibut gi bino bedo bala kakame jo gaikin iye kame yamo tie buko, kede kagwokere ka kot tie bololo. Gin kibino bedo bala pii kame mol i wi tim, kede bala lela abor malo atie kede tipo i piny otuo.

³Gin kibino yabo wang gi kede yit gi i kom peko me jo.

⁴Jo kame core acora timo gimoro kong bino donyo tamo pire di kiko timo gikame ber, doko kibino yamo kope me ateni abongo angalo.

⁵Likame doko kobino tero ngamingo bala dano me awora, kede da dano atie kede ikiteso areco likame kobino tero bala dano adwong.

⁶Pien jomingo yamo kope me mingo, doko tam gin tie kede iik me timo gikareco. Gin kitimo gi kalikame nyuto wor but Rubanga, doko kiyamo kope areco i kome. Gin likame kimio jo akec oneko cam, akadi mino jo kame orio oneko pii.

⁷Jo aming obedo jo areco doko tice gi da reco; gin kitimo iik areco me turo jocan kede kope me abe, akadi bed bala koko me jocan obedo koko me ateni.

⁸Do jo me awora tie kede iik me timo gikame jo woro, doko da gin kicungo di kitek gango gikame jo woro.

Ngolo Kop kede Dok i Kuo Kasek



⁹Yaunu wun mon kame tie i mulem, winyunu dwana; wun anyira kalikame paro gimoro, winyunu kop na.

¹⁰Nan ber kong wun itienu kiber, do ingei kare aromo bala mwaka acel, komu bino cako miel amiela, wun mon kalikame iparunu gimoro, pien anyakini me olok bino bedo li ne wu me angweda.

¹¹Lem wun itienu kede kuo ajabajaba abongo par moro, do nan miunu komu cak miel! Gonyunu igoen wu di ikounu tweno ipukoi i pieru.

¹²Babapunu koru pi paro poti amio kede olok alem nyak kitek;

¹³pi okuto kede ocokocok kolokere do dongo i lobo ka jo na, kede pi ude dedede kame yomcuny oudo tie iye i bomba kame jo oudo lelo kiye.

¹⁴Pien abaka bino weko ture, bomba kame jo opong iye bino dong nono; wi emukura kede gedo abor malo me ngico piny bino doko kabedo me leini atwal. Ebino doko kakame punda me obar rimo iye, kede kacam me romini.

¹⁵Do Rubanga bino cwano ne wa tipo mere, di lobo koudo kony mere li ko bino doko poti aceko cam, di poti aceko cam ko bino mwone bala abum.

¹⁶Tim kopoo kede me ateni en kame bino bedo tie kabedo dedede i lobo noni.

¹⁷Tim kopoo bino kelo anapakin kede bedo abongo alola moro i kare dedede.

¹⁸Wun jo ka Rwot ibinunu bedo i kabedo me anapakin, kakame alola li kiye, kabedo me wei mot.

¹⁹(Do akako bino dano abum, di bomba ko popoto.)

²⁰Jo kame bino pur i dog isamai bino bedo kede yomcuny, doko pundan gi kede doke gi bino cam ken gi di kilatao atatai.

Isaya 33

Ilega me Kwano Kony

¹Itie i can in ngamuducaro, in ngat kalikame ngatamoro omuducaro in; in ngadupuro jo, do di in likame ngatamoro odupuro in! Kame in do ijiko muducaro, kobino muducaro ida; kede kame in do itieko dupuro jo, ida kobino dupuro in.

²Okwe Rwot, kisa maki i kom wa; wan oketo gen wa i komi. Bed teko wa buli piny aru, lak wa i kare me peko.

³Kame in idorano, atekerin apat ringo tenge; kame in ilepun, atekerin keketun.

⁴Di oko yako jamini gi bala kame ekutele camo kede cam i potu, amoto bala kame obonyo jwero kede piny.

⁵Rwot dwong twatwal! En etie malo ebedo iye. En ebino mino jo me Yerusalem donyo ngolo kop i yore me ateni, kede kiko bedo tie kede tim kopoo.



⁶Ebino mino icungunu di itekunu i kare wu. En ebino lako wu, di eko mino wu rieko kede ngec. Gikame pire tek kibut jo me Sion en bedo kede wor but Rwot.

⁷Winyunu, isirikalen atek i yi tie kok i dier yote me bomba kimito kony; jo kame oudo kocwao pi ot nyamo kop me kelo anapakin tie kok kitek.

⁸Jo otieko weko yote adongo, yote dedede otieko dong nono. Jo likame gwoko isikan gi, jo likame lubo kop kame kimoko i winyere gi, likame doko kotie kede wor but jo.

⁹Lobo odong kene, doko kony mere otieko doko li; abum me Lebanon otieko tuo, Saron otieko doko bala wi tim, kede yen me Basan kede Kamel tie onyo pote gi.

Rwot Okwenyaro Jokwor mege

¹⁰Rwot waco be, “Nan ango abino lepun timo gimoro, di oko bino mina dwongo.

¹¹Iik wu cal bala arienge kede cucung kame wei wun kikomu en kame bino cwinyo di kiko wang.

¹²Atekerin bino liel dopodop paka doko buru, bala okuto kame kotongo di eko tuo di oko cwinye.

¹³Wun jo dedede katie kakabor kede kakiyapi winyunu gikame ango atimo di ikounu bino ngeno twer kame ango atie kede.”

¹⁴Lworo omako jodubo me Sion. Jo kalikame woro Rubanga kom gi tie miel amiela di kiwaco be, “Ngai kikom wa karuno bwot ki twon mac ager rom kano? Ngai kikom wa karuno bwot ki mac kame liel nakanaka?”

¹⁵Jo kame bino bwot en jo kame kuo gi opoore kede jo kame yamo kope me ateni, jo kame dagi gikame koudo i yore me adiadia, jo kame dagi tim me cemusana, jo kame dagi nek kede tim areco me gero.

¹⁶Gin kibino bedo malo kakabor; karingo gi ot gwokere bino bedo cel kobedo lela; kobino mino gi cam kede pii.

Deyo me Kare me Anyim

¹⁷Ibinunu neno abaka kede deyo mere, kede lobo mere me ajakanut kopetere wiriwir.

¹⁸Di do ikounu bino yutuno tim akelo lworo kame oudo ibeunu iye di ikounu bino penyere be, “Kitie tuai jo kame giro wel, jo kame oudo pimo rom me jame, kede jo kame oudo maro wel me gedo aboco malo?”

¹⁹Likame doko ibinunu neno jokumbor awakere, jo kame dwalo leb kalikame wun itwerunu niang.

²⁰Kong nenunu Sion, en bomba kame wan okwero iye ibagai me edini wa. Ibinunu neno Yerusalem, en kabedo okwei mot; en ecal bala eema kame loce mege likame kobino puputo, doko da aunoi me twene likame bino cocotun.



²¹Do Rwot kede dwongo mere bino bedo ne wan bala icileta kede isamai adongodongo koluko wa, kame imerin atino amoto adongo me jokwor likame bino kwang lubo.

²²Pien Rwot en ngapug wa, en abaka wa, en ebino lako wa.

²³Do jokwor wa cal bala emeri kame tol me kwange olalagun, likame ekaruno sipo epir kame kotweo iye egoe amio yamo kolo emeri, amoto mino egoe nono bedo di eyarere. Wan obino mako abar me isirikalen kobedo jokwor wa, di gikame oyako ko bino bedo tot, kiton ingwalasa da bino udo iner moro.

²⁴Likame tie ngatamoro kame bedo kunono kame bino doko waco be etuwo, Rwot bino sasiro dub dedede kame jo otimo.

Isaya 34

Rwot bino Mino Jokwor mege Alola

¹Bianu iwinyunu, wun atekerin dedede; Okwe wun jo me atekerin, cikunu yitu. Kong wi lobo lung kede gi koponge, piny dedede kede jo kame bedo iye winyi.

²Pien cuny Rwot owang kede atekerin dedede kede isirikalen gi; en etieko ngolo negi kop be poore nek gi.

³Kobino uco liele gi di kiko top di ngwece gi ko duny; remo gi bino mol piny ki wi mori.

⁴Jamini kame rieny i malo bino nyote. Malo bino rwenyo bala itabu adola kame kotie dolo, di jamini kame rieny i malo ko bino tuo bala boke otuo me olok, arabo bala anyakini kotuo me epigi.

⁵Ingei epima ka Rwot tieko timo gikame emito timo malo i edou, en do ebino dwogo piny i kom Edom, en ateker kame en etieko ngolo ne kop me muducaro gi.

⁶Remo bino pwoko epima mere, kakamio bino mwono lake, bala remo me idwe romini kede diegi kobedo giayala, kede bala kakamio me engalur me emerekek. Rwot bino mino giayala mere i bomba me Bosira, ebino timo twon nek noni i lobo me Edom.

⁷Idongei ager bino popoto, itobai da bino popoto karacel kede twonin atek; lobo gi lung bino diak kede remo, di mo ko mino lobo bedo di mio amia.

⁸Pien Rwot otieko iiko ceng kame en ebino culo kede kwor, mwaka kame en ebino lako kede Sion.

⁹Isamai me Edom bino lokere doko odok, di lobo ko lokere doko salupa. Piny nono dedede bino doko bala emina atie liel.

¹⁰Mac bino liel iceng kede iwor abongo to, yiro mere bino bedo duny nakanaka. Edom bino doko wi tim ikar kede ikar, doko likame tie ngat kame bobo bino beo iye atwal.



- ¹¹Ekeng kede ecoc en kame bino lunyo bedo iye; itukirin kede agak bino bedo iye. Rwot bino dudubo en eko doko ameje.
- ¹²Kobino lwonge be Kakame Ajakanut li iye, jopug da bino bedo li iye.
- ¹³Okuto kede ocokocok bino dongo i miere me abaka kede i bomban kame kocelo kede apama. Ebino doko kakame ikween wire iye kede kabedo me ikululun.
- ¹⁴Igwangia bino riamo kede idiekon kunono. Jwogi adiegi diegi bino donyo lwongere ken gi ken gi ki kunono, kede jwogi adako anyinge Lilit bino donyo ot wei iye.
- ¹⁵Itukirin bino gedo kanono, di kiko nywalo abeon, di abeon ko beko di gin kiko donyo gwoko idwe gi ki kanono. Ikodeta me acut da bino donyo cokere kanono di lubere aluba.
- ¹⁶Kong mounu ikounu somo i itabu ka Rwot kakame waco be: likame tie acel moro kikom giakuo nogi kame bino bedo li, doko likame tie moro kame bino bedo abongo cware amoto dako mere. Rwot otieko ciko be etimere kamanono, en ebino coko gin karacel kede twer mere.
- ¹⁷En ebino uco alulu mere me popoko negi kabedo. Lobo nono bino doko mergi di kiko bino bedo iye ikar kede ikar.

Isaya 35

Dok me Jo kame Kolako Sion

- ¹Wi tim kede kakotuo bino lelo, wi tim bino ilel, doko ature bino bwangun iye.
- ²Ature bino bwangun iye di tot, di ineno bala jo kame tie ilel di kiwero. Wi tim bino bedo kede deyo kame cal bala wi mori me Lebanon, ebino bedo ber bala poti me Kamel kede Saron. Gin kibino neno deyo ka Rwot, kibino neno dwongo kame Rubanga wa tie kede.
- ³Miunu teko but jo kame bad gi odoko goro, kede jo kame cong gi miel pi lworo.
- ⁴Wacenu jogo kame cuny gi lwor be, “Bedunu tek, kur ibedunu kede lworo! Rubanga wu tie bino. En ebino nyango gikame kotimo ne wu, en ebino culo kwor wu. En eyaro bino di eko lako wu.”
- ⁵Di do wang imuduka ko bino yabere, kede yit idingoi da ko bino tuc.
- ⁶Ingwalasa bino sosomo bala atil, di jo kame leb gi oto ko bino wer pi ilel. Pii bino tuc i wi tim di isamai ko mol;
- ⁷Asinge kotuo bino doko atapar, di lobo kotuo ko bino pong kede ataneko. Kabedo kame oudo ikween bedo iye bino doko osamai, otol kede aladoi bino dongo iye.
- ⁸Yongayo adwong bino bedo kunono, yongayo kame kolwongo be, “Yongayo Kacil” . Likame tie ngadubo moro kame bino lubo yongayo nono; en ebino bedo me jo ka Rubanga. Likame tie ngatamoro, akadi ngamingo, kame bino rwenyo yongayo nono.



⁹Engu moro likame bino bedo tie kunono, akadi le moro ager likame bino tuno iye; likame kibino bedo tie kunono, do jo kame Rwot olako kenekene en kame bino lubo yongayo nono.

¹⁰Jo kame Rwot olako bino dwogo, gin kibino donyo Sion di kiwero. Gin kibino bedo kede yomcuny kalikame tiek; kuo gi bino pong kede kilel kede yomcuny, cwercury kede cur bino yai tenge ki kuo gi.

Isaya 36

Jo Asiria Ongato Suro Yerusalem

(2 Abakai 18.13-27; 2 Iyutun 32.1-19)

¹I mwaka me tomon kiwie ongwon me apugan me Abaka Esekia, Abaka Senakerib me Asiria oko ot suro bomban dedede me Yuda, bomban kame oudo kocelo kede apama atek, di en eko mano gi.

²Abaka me Asiria bin oko ciko ngadwong me isirikalen mege pi yai ki Lakis, di eko ot kede twon isirikalen Yerusalem but Abaka Esekia pi waco ne rieno cinge. Ngadwong me isirikalen nono oko ot di eko cungo i yongayo adwong aoto i dukini me jokui igoen, i nget puleju kame kelo pii ki atapar me malo.

³Jo adek me Yuda oko bino pi riamo kede en: Eliakim wot ka Kilikia, ngadwong me tice me paco me abaka; Sebena, ngat kame bin obedo kalani; kede Joa wot ka Asap, ngat kame bin gwoko kope kame kowandiko.

⁴Ngadwong me isirikalen me Asiria oko waco negi be, “Wacenu Esekia be Abaka adwong, en abaka me Asiria penye be, ‘Gen kame in itie kede no cungo i kom nyo?’

⁵Benyo, in iparo be kop me dog kenekene obedo rieke arabo teko me yi? Ngai do en kame in itie keto gen ni i kome, en komio in iko jemo nango?

⁶Neningo, in itie geno Misiri pi konyi. Manono cal acala bala mako magada bala ebela me cing; pien ka icatakino kede ebino tur di eko cobo cingi. Manono en kite kame Parao cal kede but jo dedede kame keto gen gi i kome.’

⁷Do ka wun iwacunu na be, ‘Wan ogeno Rwot Rubanga wa.’ Benyo, mam kabedere kame kowore iye kede alutarin mege en kame Esekia orereto di ewaco ne jo me Yuda kede Yerusalem be, ‘Wun ibinunu woro Rubanga i alutari acel noni kenekene’ ?

⁸Aso, nataman talunu gimoro kede ngadwong na abaka me Asiria. Ango abino mino wu asigiran tutumia are, ka wun ikarununu udo jo kame ringo kede gi.

⁹Benyo benyo kame wun ikarununu bwono kede akadi ngatel me ruom apiny me isirikalen kikom jotic me ngadwong na, ka wun itienu geno Misiri pi cwano ne wu cabalan kede jo kame ringo kede asigiran?

¹⁰Medo i wi manono, benyo, wun iparunu be angu abino suro lobo noni di ako muducaro en abongo Rwot konya? Rwot en kowaco nango be, ot isur lobo noni di iko muducaro en.”



¹¹Di do Eliakim, Sebena, kede Joa oko waco ne ngadwong me isirikalen nono be, “Wan okwai iyam kede wa kede leb Aramaik. Wan owinyo leb nono. Kur iyam kede wa kede leb jo me Yuda, pien jo kame tie bedo i nget apama tie winyo.”

¹²Do en eko gamo dog gin be, “Benyo, iparunu be abaka na ocwa pi waco kope nogi but wun kede abaka wu kenekene? Li ba, ango atie waco kope nogi da but jo nogo kame tie bedo i nget apama, pien gida kibino camo cet gi di kiko mato lac gi, bala wun.”

¹³Di do ngadwong me yi nono oko cungo di eko lelemo kede leb jo me Yuda be, “Winyunu kop me abaka adwong, en abaka me Asiria!

¹⁴Abaka kwenyaro wu be kur imiunu Esekia ngalu, piento en likame ekaruno lako wu.

¹⁵Kur igamunu kop ka Esekia me mino wu keto gen wu i kom Rwot, kop kame en ewaco ne wu kede be ateteni Rwot bino lako wu, doko bomba noni likame kobino mino i cing abaka me Asiria.

¹⁶Kur iwinyunu kop ka Esekia! Abaka me Asiria ciko wu be iwokunu ooko bute di ikounu winyere kede en i kom kop amako anapakin. En ebino weko ngat acelacel camo olok mere kede epigi mere amake, di emato pii me atan mere,

¹⁷tuno en bino tero wu i lobo kame cal bala meru, lobo kame engano me timo mugati kede olok me timo bwini dongo iye.

¹⁸Gwokerenu kur imiunu Esekia ngalu be Rwot bino lako wu. Benyo, tie rubanga me ateker moro kotieko lako piny gi ki cing abaka me Asiria?

¹⁹Rubangan me bomban me Kamat kede Arapad nataman tie tuai? Rubangan me bomba me Separabaim tie tuai? Benyo tie rubanga moro kame bin oko lako Samaria ki cinge?

²⁰Rubanga mene kikom rubangan dedede me pinye nogi en kotieko lako piny gi ki cing abaka wan? Nyo do kame mio wun iparunu be Rwot romo lako Yerusalem?”

²¹Do jo oko ling alinga likame kidwoko ne kop moro, pien Abaka Esekia oudo owaco negi be kur kigam doge.

²²Di do Eliakim, Sebena, kede Joa oko nyinyilo igoen me kom gi pi cweruncy, di kiko ot tatamo ne abaka kop kame ngadwong me isirikalen me Asiria oudo owaco.

Isaya 37

Abaka Openyo Tam kibut Isaya

(2 Abakai 19.1-7)

¹Kakame Abaka Esekia owinyo kede kop kame gin kitero bute, en eko nyinyilo igoen me kome pi cweruncy, eko ngapo epuko, di eko ot i ot ka Rwot.

²Di en eko ooro Eliakim ngadwong me paco me abaka, Sebena kalani, kede josaseredoti adongo but enabi Isaya wot Amos. Gida oudo kitie ngapo ipukoi.



³Gin kiko ot di kiko waco ne Isaya be, “Esekia waco kaman: ‘Tin en ceng me neno can, ceng me cokocoko wa, kede me mino wa lewic. Wan ocalunu bala mon kame esawa me nywal gi otuno, do kili kede teko me dinyo idwe.

⁴Abaka me Asiria otieko cwano ngadwong me isirikalen mege pi bino yeyeto Rubanga akuo. Cengemogo Rwot owinyo kope kame en ewaco, doko ebino timo gimoro iye. Pi mano, legunu pi donge me jo wa kame pwodi odong kuo.’ “

⁵Kakame jotic me Abaka Esekia otieko waco ne kede Isaya kop kame abaka oudo ocwao gi kede,

⁶Isaya oko waco negi be, “Oti iwacunu ne ngadwong wu be, ‘Rwot waco kaman: Kur lwooro maki pi kope me acae kame itieko winyo di ngatic me abaka me Asiria waco i koma.

⁷Ango kikoma abino mine cuny moro, tetekeny en ebino winyo Rwonge moro, di eko dok i lobo mere. Ango abino mino koneke kede epima i lobo mere kunono.’ “

Jo Asiria Omedo Ngato bobo

(2 Abakai 19.8-19)

⁸Ngadwong me isirikalen me Asiria oko winyo be abaka gi oudo otieko yai ki Lakis etie do yi i bomba me Libina. Aso, en eko ot kunono bute.

⁹I kare nono abaka me Asiria oko winyo be Abaka Tiraka me Abisinia oudo tie telo isirikalen me Misiri pi bino yi kede gi. Kakame en bin ewinyo kede kop nono, en eko cwano baluwa but Esekia di ewaco ne be,

¹⁰” Kur imi Rubanga ni kame in itie keto gen ni i kome nono ngalu be Yerusalem likame bino potu i cinga.

¹¹In itieko winyo gikame abaka me Asiria otieko timo ne lobere dedede, di emuducaro gi atwal atwala. Benyo, iparo be wun ikarununu bwot?

¹²Abakai me Asiria kame ango alunyo cen ngei gi bin omuducaro bomban me Gosan, Aran, kede Resep, kede jo me Eden kame oudo tie Telesar. Kony nyo do kame rubangan gi oko timo negi?

¹³Abakai me bomban me Kamat, Arapad, Separabaim, Kena kede Iba tie tuai?”

¹⁴Abaka Esekia oko gamo baluwa ki cing jo kame oudo ooro di eko somo. Di do en eko ot i ot ka Rwot di eko keto baluwa nono i nyim Rwot.

¹⁵Esekia oko lego but Rwot di ewaco be,

¹⁶ “Okwe Rwot me jo yi, Rubanga me jo me Isirael, in ngat kame ibedo i kom ni me ajakanut i wi cerubim, in keni en Rubanga, kame pugo ajakanuto dedede me wi lobo. In icweo lobo kede malo.

¹⁷Cik yiti, Okwe Rwot di iko winyo wa. Yab wangi, Okwe Rwot, di iko neno gikame tie timere. Winy kope dedede kame Senakerib ocwao me yeti, in Rubanga akuo.



¹⁸Okwe Rwot, ateteni wan ongeo be abakai me Asiria otieko muducaro atekerin dedede kede lobere gi,

¹⁹di kiko kwikwito rubangan gi i mac, bed bala gin oudo likame rubangan, do kibedo gikame jo otimo kede cing gi; gin oudo kibedo cal apaa kame kotimo kede yen kede kide. Omio gin kiko muducaro gi.

²⁰Aso nataman, Okwe Rwot Rubanga wa, lak wa ki cinge, tetekeny atekerin dedede me wi lobo ngei be in keni en ibedo Rwot.”

Kop kame Isaya Owaco ne Abaka

²¹Di do Isaya wot ka Amos oko cwano kop but Esekia di ewaco ne be, “Rwot Rubanga me jo me Isirael waco kaman: Piento in ilego buta pi kop kame mako Abaka Senakerib me Asiria,

²²manoni en kop kame ango Rwot atie waco i kome: Jo me bomba me Yerusalem nyeri, doko kicai in Senakerib.

²³Benyo, iparo be ngai en kame in oudo itie yeyeto di icao? Ngai en kame in oudo ilelemo i wie? Ngai en kame in oudo ineno kede ewaka kame cal kamano? Magonogo in oudo itimo i kom ango Rubanga kacil me Isirael!

²⁴In icwao jotic ni wakere na di iwaco be in itieko bwono yi kede cabalan ni dedede kiton malo i wi mori me Lebanon. In iwakere be ki kunono in iko tongo yen seda mege kame bocoboco twatwal kede yen saipuras kame beco kalamo, kede be iko tuno i cuny abum mege kame okodo adikinicel.

²⁵In iwakere be in iko kunyo ataneko di iko mato pii gi, kede be iko nyonyono icileta me Misiri kede tieni paka tuo.

²⁶” Benyo, in pwodi likame iwinyo be ango oudo atieko iiko kamanono sek? Ango oudo atieko iiko i kare kasek gikame nataman amio ocobere. Ango oudo atieko iiko be in ibino mino bomban kame kocelo kede apama atek doko amejeko.

²⁷Pi manono, jo kame oudo bedo i bomban nogo oudo li kede teko; oudo kitie kede inonong atek doko oudo kibedo di wi gi ototolun. Gin oudo kical bala amel arabo lum kame tie dongo i wi ot, lum kame yamo aliet me bad tetu kide kuto di kiko ner di pwodi likame kitieko dongo.

²⁸” Ango angeo kope dedede kame maki, gi dedede kame in itimo kede kabedere dedede kame in ioto iye. Ango angeo gero kame in itie kede i koma.

²⁹Do pien in itie kede gero i koma, doko atieko winyo kite kame in iwakere kede, ango abino kodo umi kede golu na di ako rwako lilim i dogi, di ako wiri idok cen ilubo yongayo kame oudo iwok kiye.”

³⁰Di do Isaya oko waco ne Abaka Esekia be, “Manoni en gianena kame bino nyuto ni gikame bino timere. Mwaka noni wun ibinunu camo kodere kame bwangun tui ken gi, di i mwaka me are ikounu bino camo kodere kame bwangun tui ken gi kakame oudo



ikwanyunu kiye cam me mwaka okato. Do i mwaka me adek wun ibinunu cuno kodere wu di ikounu bedo kede kac, ibinunu puro olok di ikounu camo anyakini gi.

³¹Donge me jo me ot ka Yuda kame bino bwot di kiko dong kuo bino bedo cal bala yat kame rieo aliasin mege i lobo kakatut di eko nyak.

³²Jo kame bino bwot di kiko dong kuo bino bedo tie Yerusalem kede i moru me Sion, pien Rwot me jo yi otieko keto cunye pi mino gi noni timere.

³³” Pi mano, Rwot waco kaman i kom abaka me Asiria: ‘En likame ebino donyo i bomba noni arabo gweno akadi tong me emal acel iye. Likame tie sirikale moro kame mako ebuku, kame bino tuno i nget bomba noni, arabo kame bino mukuro lobo rimaro apama mere pi sure.

³⁴Yongayo kame en oudo elubo me bino, yongayo nono en kame ebino lubo me dok; likame ebino donyo i bomba noni; ango Rwot en awaco.

³⁵Ango abino yi pi bomba noni di ako gwoke pira kede pir ngatic na Daudi.’ “

³⁶Di do malaika ka Rwot oko ot i kimere me isirikalen me Asiria di eko neko isirikalen tutumia tol acel kede ot kanyauni kiwie kany (185,000). Oru mere odiko sek kakame piny oru kede, kom jo oto oudo orade piny.

³⁷Di do Abaka Senakerib me Asiria oko yai edok paco, di eko donyo bedo Ninebe.

³⁸Ceng moro acel di en oudo etie lego i tempulo ka rubanga mere Nisirok, awobe mege are Adaramelek kede Sareser oko neke kede epima, di gin girgi kiko lwi kioto i lobo me Ararat. Esarakadon, wode ace, oko lunyo wange bala abaka.

Isaya 38

Tuwo ka Abaka Esekia kede Cango mere

(2 Abakai 20.1-11; 2 Iyutun 32.24-26)

¹kare nono tuwo oko mako Esekia kame oudo otuno do neke. Enabi Isaya wot Amos oko ot bute di eko waco ne be, “Rwot waco be in likame ibino cango, in iyaro to. Pi manono, poore itemuno epone kame ibino weko kede jo me odi.”

²Esekia oko loko nyime oneno apama di eko lego but Rwot kaman:

³” Okwe Rwot, ango akwai iyutuno epone kame ango abedo timo kede tic ni kede cunya lung kede genere, doko abedo timo gikame poore i wangi.” Esekia oko kok adikinicel.

⁴Di do Rwot oko waco ne Isaya pi

⁵dok but Esekia di eko waco ne be, “Ango Rwot Rubanga ka kwaru ni Daudi atieko winyo ilega ni doko atieko neno pigewangi; ango abino medi mwakini tomon kiwie kany me bedo kuo.

⁶Ango abino laki karacel kede bomba noni ki cing abaka me Asiria, di ango ako bino donyo gwoko bomba noni.”



- ²¹Isaya oko waco ne Esekia pi kwanyo epigi kame konyonyoto di eko keto i akwoti mere di eko bino cango.
- ²²Di do Abaka Esekia oko penyere be, “Gianena nyo kame bino nyuto be angu abino karuno ot i ot ka Rwot?”
- ⁷Isaya oko gamo be, “Man en gianena kame Rwot bino mini, kame bino nyuto nin be en ebino timo gi noni kame en etieko cikere iye pi timo.
- ⁸Neningo, Rwot bino mino tipo kame ceng timo i wi kayito kame Abaka Akas ogero, lokere nyiko cen tien tomon.” Di tipo oko nyiko cen tien tomon.
- ⁹Ingei Esekia cango ki tuwo kame oudo omake, en eko wandiko wer me pak noni be:
- ¹⁰Angu oudo ako paro be kom i diere me mwakini me kuo na en kame oudo atie to iye; angu oudo atie ot bedo i kabedo me jo oto pi kare kodong me kuo na dedede.
- ¹¹Angu oudo ako paro be likame bobo abino neno Rwot i lobo me jo akuo; oudo aparo be likame bobo abino neno dano moro kikom jo kame bedo i wi lobo.
- ¹²Kuo na oudo kokwanyo kibuta bala eema me ngakwai romini kame koputo. Angu oudo aparo be kongolo kuo na bala egoe kame ngacwei igoen ngolo tenge ki ecuma; cako iceng tuno iwor in imio kuo na doko gikame kony mere li.
- ¹³Angu akok pi mito kony iwor kiakia; en oudo etuturo cogo na ineno bala engu; cako iceng tuno iwor in oudo imio kuo nango ojik.
- ¹⁴Angu oudo akok bala acilagwec arabo owalu kame celakino, akok koko me iturur bala awele. Wanga ojony pi ngino malo. Okwe Rwot, angu atie irac, konya.
- ¹⁵Do nat kop nyo kame angu aromo waco? Rwot otieko timo nango kamanoni. Angu atie kede cweruncy atek, likame akaruno nino.
- ¹⁶Okwe Rwot, jo kuo kede kope kede tice nin; doko tipo nango da udo kuo i gi nogi. Okwe, canga di iko mina abed kuo!
- ¹⁷Ateteni cweruncy atek kame oudo angu atie kede oudo tie pi kelo nango bero; in pi amara ni ilako kuo nango ki to, pien itieko sasiro dub nango dedede.
- ¹⁸Jo kame tie i kabedo me jo oto likame karuno paki; jo kame donyo i ates likame tie kede gen moro i kom genere nin.
- ¹⁹Jo akuo kenekene en kame karuno paki, bala kame tin angu atie timo; jonywal tatamo ne idwe gi kite kame in igenere kede.
- ²⁰Rwot in ibino laka, di wan oko bino gono were me paki kede adungu, obino wer i odi pi kare me kuo wa lung.

Isaya 39

Joor Kobino ki Babilon

(2 Abakai 20.12-19)



¹ kare nono abaka me Babilon, Abaka Merodak Baladan wot ka Baladan oko winyo be Abaka Esekia oudo kome obedo lit do oudo etieko do cango. Aso, en eko oro jo bute pi tero ne baluwa kede giamia moro.

²Esekia oko gamo joor nogo di en eko nyuto negi abar mege dedede. En enyuto negi siliba, saabu, jamini angwe kur, moe me sut, kede jamini mege dedede me yi. Likame tie gimoro me ode arabo kame oudo tie karamoro i adul kame en epugo kame en likame eko nyuto negi.

³Di do enabi Isaya oko ot but Abaka Esekia di eko penye be, “Cuo nogi owok ki tuai doko kop nyo kame gin kiwaco ni?” Esekia oko gamo be, “Gin kiyai ki piny abor, kiwok ki Babilon.”

⁴Isaya bobo oko penye be, “Nyo kame gin kineno i odi?” Esekia oko gamo be, “Gin kitieko neno gi dedede kame tie i oda; likame tie gimoro i oda kalikame ango anyuto negi.”

⁵Di do Isaya oko waco ne Esekia be, “Winy kop kame Rwot me jo yi tie waco. En ewaco be,

⁶ Kare tie bino kame jamini dedede me odi kede jamini kame joakwari ni obedo kano tuno tin, kobino tero Babilon. Likame tie gimoro kame kobino weko dong.

⁷ Ikwae ni da, ace kikom gi kobino tero di oko mino gi kidoko abwocin kame timo tice me paco me abaka me Babilon.’ “

⁸Di do Esekia oko waco ne Isaya be, “Kop ka Rwot kame in itieko waco na nono ber.” En ewaco kamanono pien oudo eparo be mulem kede anapakin bino bedo tie i kare me kuo mere.

Isaya 40

Kope me Gen but Jo ka Rubanga

¹Rubanga wa waco be, “Kweunu cuny jo na, kweunu cuny gi!

²Yamunu kede mwolo but jo me Yerusalem, wacunu negi be kare me neno can gi otiek do, doko kotieko sasiro gi ki dub gi. Ango atieko mino gi alola kame romo pi dub gi.”

³ Dwan ngatamoro tie lelemo be, “Iikunu ne Rwot yongayo i wi tim, rieunu yongayo adwong ne Rubanga wa i wi tim.

⁴Torunu aditoto dedede; di ikounu pano mori kede imukuran idwokunu piny. Rieunu yote kogomugomun, kede ikounu iiko yote kame gwai dok pwot.

⁵Di do deyo ka Rwot ko bino neeno kakaler, di jo dedede ko bino nene karacel. Rwot kikome en kotieko waco.”



⁶ Dwan ngatamoro waco be, “Lelemo!” Ango ako penyere be, “Abino lelemo kop nyo?” Eko dwoko be, “Lelemo be jo dedede cal bala lum; likame kitieko kare kalac bala ature me obar.

⁷ Lum ner doko ature da tuwo, ka Rwot ocwao yamo okuto i kom gi. Ateteni jo cal bala lum.

⁸ Ebo, lum ner, ature da tuo, do kop ka Rwot Rubanga wa bedo nakanaka.”

⁹ Okwe wun jo me Yerusalem, yitunu i wi moru kame bor malo di ikounu tatamo kop aber! Wun jo me Sion, lelemunu kede dwan amal; tucunu kop aber! Yamunu abongo lworo. Wacunu ne jo me bomban me Yuda be Rubanga gi tie bino!

¹⁰ Nenunu, Rwot Rubanga tie bino kede twer, en epugo pi teko mere. Giamia mere me pwoc tie bute, en ebino mino jo mege giamia me pwoc.

¹¹ En ebino gwoko romini mege bala ngakwat; en ebino koko idwe me romini karacel di eko tingo gi i kore; en ebino telo toti gi kede mwolo.

Rubanga me Isirael likame Kotwero Porere kede en

¹² Benyo, tie dano moro kotieko pimo rom me pii me nam kede cinge, arabo kotieko pimo rom me idoun kede cinge? Benyo, tie dano moro kotieko koko asinge me wi lobo i gipim, arabo kotieko pimo peko me mori kede me imukuran i misani?

¹³ Ngai kame karuno waco ne Rwot gi me atima, arabo kame romo pwonye bala ngat kame mie tam?

¹⁴ Ngai kame bin Rwot ooto penyo tam kibute, doko ngai en kopwonye timo gikame poore? Ngai kopwonye bedo kede ngec, arabo konyuto ne epone me bedo kede niang?

¹⁵ Kibut Rwot, atekerin dedede rom bala pii kame ton ki agulu, doko kiwekeweke bala apua kame tie i wi misani; neningo, en etwero tingo cula malo bala angwe me apua.

¹⁶ Leini dedede kame tie i wi mori me Lebanon ka komio but Rubanga bala giayala awanga, likame kiromo; doko twon yen me wi mori nogo da nonok likame kiromo wango giayala.

¹⁷ Atekerin dedede likame tie gimoro i nyime; gin dedede likame kitie gimoro akadi acel.

¹⁸ Kokaruno poro Rubanga kede ngai, arabo nyo kame kotwero poro kede cal mere?

¹⁹ En likame ecal bala cal apaa kame jopac timo, gikame jotet mwono kome kede saabu di kiko timo ne eriko me siliba.

²⁰ Ngat kame ngacan, yero yat kalikame piro. Di do en eko mono ngapac kipirana pi timo ne cal apaa kalikame poto twelekeny.



²¹Benyo, mam wun likame ingeunu? Mam likame pwodi iwinyunu? Benyo, cako i ageini mam pwodi likame kowaco ne wu? Mam pwodi likame iniangunu cako i ageini me lobo?

²²En ngat kame ebedo malo me wi lobo, di eneno jo me wi lobo cal ne bala otwongo; en kame bin eyararo edou bala egoe me isenge, arabo bala eema me bedo iye.

²³En etwero dwoko jopug piny, di eko mino gi kidoko gimoro li.

²⁴Gin kical bala olok kame pwodi kopito apita, di pwodi kitie cako keto aliasin aketa. Ka Rwot ocwao yamo ager i kom gi, gin kiner, di yamo ko tero gi tenge bala cucung.

²⁵Rubanga Ngat Kacil penyere be, “Ngai kame itwerunu pora kede arabo ngai kame rom keda?”

²⁶Tingunu wang wu malo di ikounu neno edou! Ngai kocweo acerin kame inenunu nogo? En ngat kame etelo gi bala isirikalen, en engeo wel gi, doko en elwongo gin dedede kede nying gi; pi teko mere adwong kede pi twer mere, likame acel moro kikom gi otieko rwenyo!

²⁷Okwe wun jo me Isirael, pinyo komio iwacunu be Rwot likame ngeo peko kame wun itienyu iye, arabo be likame en eparo kite karac kame kotero wu kede?

²⁸Benyo, wun pwodi likame ingeunu? Mam pwodi likame iwinyunu? Rwot en Rubanga kame bedo nakanaka; en ecweo piny dedede. En likame eol arabo edoko goro. Tam mere tut twatwal, likame tie ngat kame ngeo.

²⁹En emio teko but jo agoro kede but jo kame ool.

³⁰Akadi ipongai da doko goro; jo atino romo ol di kiko poto piny,

³¹do jo kame geno Rwot pi konyo gi bino udo teko kanyen. Gin kibino yararo bwom gi bala ekokom; gin kibino ringo do likame kiol; kibino ot kede tien do likame kidoko goro.

Isaya 41

Rubanga Omoko be ebino Konyo Jo me Isirael

¹Rubanga waco be, “Lingunu di ikounu ciko yitu buta, wun jo kame bedo i lobere atie i dog nam adwong! Mito atekerin ud teko anyen di kiko bino; mito ibinunu di ikounu yamo. Mito wan dedede ocokerenu karacel pi ngolo kop i diere wa.

²” Ngai en kame bin okelo ngapug moro ki bad tetu kide? Ngai kolwonge bino timo tic mere? En emie ebwono atekerin dedede, di eko nyonyono abakai kede tiene; en eneko gi kede epima mere di kiko doko cal bala apua. Emal mere mio gi kisasarun bala cucung kame yamo kuto.

³En eriamere kede gi di eko meede kede ot mere abongo peko moro, edwir ineno bala tiene likame nyono piny.



- ⁴Ngai inonono kame bin otimo manoni? Ngai en komio lwak me kare lung obedo tie cako i ageini? Ango Rwot, riki atie i ageini, doko abino bedo tie i ajikini.
- ⁵” Jo kame tie i lobere atie i dog nam adwong otieko neno gikame ango atieko timo; lworu atek omako gi doko kom gi miel pi lworu; gin kicokere di kiko bino.
- ⁶Ngat acelacel konyo ngat ocelu, di ewaco ne ngawote be, ‘Bed kede nwangcuny!’
- ⁷Ngapac waco ne ngatet me saabu be, ‘Itimo tic aber!’ Ngat kame temuno cal ateta nono kede enyondo dio cuny ngat kame gure kede sumali di ewaco ne be, ‘Komwone kiber’ ; di gin kiko gure kede sumali kabedo mere tetekeny likame epoto.
- ⁸ “Do wun, jo me Isirael, jotic na, wun en jo kame ango atieko yero, wun ikwae ka Aburaam, adieruna.
- ⁹Ango bin akwanyo wu ki atiekini me lobo; alwongo wu ki agolai me kakaboco twatwal, di ako waco ne wu be, ‘Wun jotic na.’ Ango atieko yero wu, likame auco wu tenge.
- ¹⁰Kur ibedunu kede lworu, pien ango atie kede wu, kur ibedunu kede lworu moro, pien ango en Rubanga wu; ango abino mino wu teko, abino konyo wu, ango abino gwoko wu di ako lako wu kede twer na.
- ¹¹” Jo kame cuny gi wang i komu, kobino mino lewic mako gi; jo kame yi kede wu bino doko gimoro li, doko kibino to.
- ¹²Ibinunu mono jo kame yi kede wu nogo, do likame ibinunu udo gi; jo kame yi kede wu nogo bino doko gimoro li atwal.
- ¹³Pien ango Rwot Rubanga wu abino mino wu teko di awaco ne wu be, ‘Kur ibedunu kede lworu, ango abino konyo wu.’ “
- ¹⁴Rwot waco be, “Ateker me Isirael, bed bala in ititidi doko igoro, do kur ibed kede lworu; ango abino konyi. Ango, Ngat Kacil me Isirael, en kame abedo Ngalak nin.
- ¹⁵Ango abino mini ibedo cal bala ikong me canyo, ebao kame lake me canyo nyen di bit. Ibino beo i mori di kiko doko bala alos kame kocanyo; ibino mino imukuran doko apua.
- ¹⁶In ibino pieto gi bala alos di yamo ko tero gi tenge, yamo atek bino sasaro gi. Di do in iko bino kilel pi ango Rwot ni; ibino paka, ango Ngat Kacil me Isirael.
- ¹⁷” Ka jocan kede jo kame piny oloo moo pii do likame kikaruno udo, di orio oneko gi dwan gi otuo, ango Rwot abino gamo kwac gin; ango Rubanga me jo me Isirael likame abino jalo gi.
- ¹⁸Ango abino yabo icileta i wi moru kakaler di kiko mol, doko ataneko bino mol i aditoto. Ango abino loko wi tim doko ataparin me pii, kede lobo kotuo abino loko doko ataneko amol.



¹⁹Ango abino mino yen seda dongo i wi tim, kede yen akasia, yen angwe kur, kede olibeti. Abino mino abum dongo i wi tim, abum me yen pain, saipuras kede yen ace apat.

²⁰Abino timo manoni, tetekeny jo neni di kiko ngeno be angu Rwot en kame atimo gi noni. Gin kibino niang be Ngat Kacil me Isirael en komio gi noni otimere.”

Rwot Oningo Rubangan me Abe

²¹Rwot abaka ka Yakobo waco be, “Wun rubangan me atekerin, kelunu pido wu, miunu kope kame gango pido wu!

²²Bianu kan di ikounu waco ne wa gikame bino timere, tetekeny wan ongei gi nono i kare kame ecobere kede. Wacunu ne wa gikame riki otimere i kare kasek, tetekeny wan otam kop i kom gi, di oko ngeno dwong gi.

²³Wacunu ne wa gikame waru bino timere, di wan oko bino ngeno be wun ateteni rubangan! Timunu kong gimoro aber arabu arak, kame mio wan lworu atek arabu kame neko kom wa.

²⁴Ateteni wun ibedunu gimoro li, doko tice wu da gimoro li; ngat kame woro wu cal bala gi me kwer.

²⁵” Angu Rwot atieko yero icuo moro kame bedo i bad tetu kide; abino kele ewok ki bad tetu malo. En ebino nyonyono abakai bala nyono lobo, bala kame ngacwei agune nyono kede lobo.

²⁶Ngai kikom wun riki omurao be gi noni bino timere, tetekeny wan owac be oudo en emurao kop kakare? Likame tie ngatamoro kikomu kame bin owaco kop moro amako gi noni; likame tie ngatamoro kowinyo di wun iwacunu kop moro akadi acel!

²⁷Angu Rwot en kame ageo waco ne Sion rwonge noni; angu bin aoro jo Yerusalem pi gin ot waco be, ‘ Nenunu jo wu tie bino! Gin kitie dwogo paco! ‘

²⁸Ka angu aneno rubangan nogi, likame tie moro kame tie kede tam akadi acel; likame tie moro kame romo dwoko peny na.

²⁹Gin rubangan nogi dedede gimoro li; likame tie gimoro kame kiharuno timo akadi acel; cal acwea gin obedo gimoro li, kical bala yamo abuko.”

Isaya 42

Ngatic ka Rwot

¹ Rwot waco be, “Ngatic na kame angu akonyo ine, en ngat kame angu atieko yero kame cunya yom i kome. Angu atieko keto tipo na i kome; en ebino kelo tim kame poore but atekerin dedede.

²En likame ebino lelemo arabu redo, amoto yamo kede dwan amalio i dier gudo me bomba.



³En likame ebino turo magada ka ogom arabo neko etala kame liel midumidu. En etie bino kelo tim kopooore.

⁴En likame ekwanyo gen mere arabo ekwanyo cunye, tuno di etieko keto tim kame poore i lobo. Lobere kame tie kakaboco tie kuro pwoony mere.”

⁵Rubanga ocweo malo di eko yararo en; en etimo lobo kede gi dedede kame tie iye; en emio wei kede kuo but jo me wi lobo. Nataman Rwot Rubanga waco ne ngatic mere be,

⁶“Ango Rwot en kame atieko lwongi pi poore na, abino maki kede cingi di ako gwoki; atieko mini bala isikan but jo dedede, pi bedo lero but atekerin.

⁷In ibino yabo wang imuduka, ibino gonyo jo kame kotweo i bur acol cucucuc, kede jo kame bedo i otkol kakacol.

⁸Ango nyinga obedo Rwot; likame anywako deyo na kede rubanga moro, akadi pak kame komia likame anywako kede caljwogi.

⁹Jamini kame riki ango awaco be bino timere nataman otieko cobere. Nataman ango abino tucyo ne wu jamini anyen di pwodi likame kitimere.”

Wer me Pak

¹⁰Werunu wer anyen but Rwot, pakenu wun jo me wi lobo lung! Pakenu wun jo kame kwango nam; pakenu wun giacwea dedede me nam! Pakenu wun jo kame bedo i lobere atie i dog nam adwong!

¹¹Jo kame bedo i wi tim kede i bomban mege miero pak Rubanga; mito jo me Kedar pake! Jo kame bedo i bomba me Sela miero wer kede kilel di kilelemo ki wi mori!

¹²Mito gin kimi deyo but Rwot, kede kipake kiton i lobere kame tie i dog nam adwong!

¹³Rwot tie ot i yi bala sirikale, en edoko ger bala ngayi; en elelemo kede dwan amalo, en enyuto teko mere i kom jokwor mege.

Rubanga Ocikere pi Konyo Jo mege

¹⁴Rubanga waco be, “Ango abedo ling tieko kare kalac; abedo mot di adio cunya. Do nataman abino kok bala dako kame tie ramere me nywal, abino ngamo dogo di aomo wei.

¹⁵Ango abino muducaro mori kede imukuran, di ako mino lum kede yen gi tuo. Abino mino icileta tuo kidoko kakame tek kangakang, di ako mino ataparin da tuo.

¹⁶” Abino telo jo na awang gi oto i yongayo kame gin likame kingeo, abino beo kede gi i yote kame gin lem pwodi likame kibeo iye. Ango abino loko colpiny doko lero i nyim gi, kabedere kame gwai abino mino doko pwot. Magonogi en gikame ango abino timo negi, likame abino jalo gi.



¹⁷Jo dedede kame keto gen gi i kom cal apaa, jo kame waco ne cal ateta be, ‘In en rubanga wan, ‘ Kobino mino lewic mako gi adikinichel.’”

Jo me Isirael likame Opwonyere

¹⁸Rwot waco be, “Winyunu wun jo kame yitu oding; kede wuda jo kame wang wu oto, tingunu wangu malo di ikounu neno!

¹⁹Benyo, tie ngatamoro kame wange oto bala ngatic na, arabo kame yite oding bala ngaor kame ango acwao? Ngai kame wange oto bala dano na komire buta, arabo kame wange oto bala ngatic ka Rwot?

²⁰Jo me Isirael, wun itiekunu neno jamini atot, do likame kitimo gimoro i kuo wu; wun yitu twolo, do likame iwinyunu kop.”

²¹Rwot pi poore mere, oudo cunye obedo yom, pi mino iswilia mege dwongo di kiko bedo gikame ber twatwal.

²²Do nataman kotieko yako jo mege; gin dedede kogoloro gi i bure, kede da kokano gi i udekol. Gin koyako gi abongo ngatamoro kame lako gi, likame tie dano moro akadi acel kame waco be, “Dwok negi jame gi.”

²³Ngai kikomu kame bino ciko yite i gi nogi, ngat kame bino ciko yite di egwokere cako nataman ot anyim?

²⁴Ngai en kojalo jo me Isirael i cing joyak? Rwot kikome en kotimo, en ngat kame wan otimunu dub bute! Wan likame okounu twero bedo i ekite kuo kame en oudo emito ne wa, arabo lubo iswil kame en oudo emio wa.

²⁵Aso, en eko mino wa obilunu eupa me lilo mere, di okounu beno i can me yi. Lilo mere oko wango Isirael dedede bala mac, do wan likame okounu niang gikame oudo tie timere; lilo mere owango wa, do wan likame oko mino kop nono oduyo i cuny wa.

Isaya 43

Rubanga Ocikere pi Lako Jo mege

¹Isirael, Rwot ngat kocwei waco be, “Kur ibed kede lworu, pien ango abino laki. Ango atieko lwongi kede nyingi, in ibedo mera.

²Ka ibinunu beo i pii atut, ango abino bedo tie kede wu; peko kame ibeunu iye likame bino bwono wu. Ka ibinunu beo i mac, likame ebino wango wu; akadi leb mac likame bino reno wu.

³Ango en Rwot Rubanga wu, Ngat Kacil me Isirael, ngat kame lako wu. Ango abino mino Misiri bala gi me cul pi lako wu, abino mino Abisinia kede Seba bala gi me cul piru.



⁴Ango abino mino jo bala gi me cul piru, abino jalo atekerin pi lako kuo wu, pien wun ibedunu gi me wel amalo buta, ango amaro wu, doko amio wu wor.

⁵Kur ibedunu kede lwooro moro, pien ango atie kede wu! “Ango abino coko jo wu di ako dwoko gi paco, kibino yai ki bad tetu kide kede ki bad tetu tim.

⁶Ango abino waco ne jo me bad tetu malo be, ‘Wekunu gi kioti, ‘ kede ne jo me bad tetu piny be, ‘Kur icerenu kede gi’ ; wekunu jo na dok paco yai ki lobere aboco.

⁷Gin en jo na, doko ango acweo gi pi kelo na deyo.”

Ateker me Isirael en Mujura ka Rwot

⁸Rubanga waco be, Lwongunu jo na i ekiko. Gin kitie kede wang gi, do likame kineno piny; kitie kede yit gi, do likame kiwinyo kop!

⁹Miero atekerin dedede cokere karacel. Ngai kikom rubangan gin kame karuno murao kop me anyim kamanoni? Ngai kikom gi kame bin omurao gikame nataman tie timere nogi? Miero rubangan nogi kel jo kame jurao kope gi, wek kiwac ka kope gi nogo tie me ateni.

¹⁰” Jo me Isirael, wun en ijurak nango; ango ayero wu pi bedo jotie na, tetekeny wun ingeanu di ikounu yei ango, kede iniangunu be ango kena en Rubanga. Cako riki sek likame tie rubanga moro ace, doko likame tie moro apat kame bino bedo tie.

¹¹” Ango en Rwot, ango kenekene en kame akaruno lako wu.

¹²Ango riki awaco gikame oudo bino timere, di ango ako lako wu bala kame oudo acikere pi timo. Likame tie rubanga moro me obukui kotieko timo gi noni; wun en ijurak nango.

¹³Ango Rubanga, doko da abino bedo Rubanga nakanaka; likame tie ngatamoro kame karuno mano dano ki cinga; likame tie ngatamoro kame karuno gengo gikame ango atimo.”

Bwot me Jo me Isirael ki Babilon

¹⁴Rubanga kacil me Isirael, Rwot kame lako wu, waco be, “Piru ango abino cwano isirikalen suro Babilon di kiko tuturo irutei me bomba, di icelakin gi me yomcuny ko bino doko koko.

¹⁵Ango en Rwot, Ngat Kacil. Ango acweo wun jo me Isirael, doko ango en abaka wu.

¹⁶” Ango en kame bin atuco yongayo i dier nam, ayabo kabeo i dier twon pii.

¹⁷Ango en kame bin acwao twon isirikalen i to, cabalan kede asigiran; gin dedede kiko popoto piny di likame kiko yai bobo; koneneko gi bala neko mac me etala!

¹⁸Kur imokunu i gikame otimere i kare kokato, arabo ibedunu paro gikame riki otimere i kare kasek.



¹⁹Nenunu, ango ayapuno timo gimoro anyen; nataman etie timere da, benyo, likame itienu nene? Ango abino tucyo yongayo i wi tim kede icileta da kunono.

²⁰Leini me obar bino mina wor, ikween kede ikululun; pien ango atuco pii i wi tim, icileta mol i wi tim kunono, pi mino jo na kame ayero pii me amata.

²¹Gin en jo na kame acweo pira tetekeny kipaka.”

Dub me Jo me Isirael

²²Rwot waco be, “Wun oudo itiekunu ol keda, Okwe wun jo me Isirael; likame oudo iworanu.

²³Wun likame oudo ikelunu na giayala awanga me romini, arabo imianu wor kede giayala ace me leini. Ango oudo likame abedo lolo wu pi mito giayala, arabo olo wu pi odok angwe kur.

²⁴Wun oudo likame iwilunu na lagara atie kede mo angwe mit, arabo imianu ayeng kede kamio me giayala me leini wu. Akaka manono wun ibedunu lola kede dub wu; iolanu kede gikareco wu.

²⁵Aso di ango en Rubanga ngat kame aweo dub wu tenge pira, doko likame abino yutuno dub wu.

²⁶” Bia ootunu pido; kelunu kop kame itienu pida iye! Ketunu pido wu i nyim ekiko, tetekeny inyutunu be itimunu gikame tie kakare!

²⁷Kwaru wu me agege bin odubo; jotel wu da otimo dub buta.

²⁸Manono bin oko mino ango amio jotel wu me kabedo kacil omunaun, amio komuducaro jo me Isirael adikinicel, doko amio koyeyeto gi.”

Isaya 44

Rwot Kene en Rubanga

¹Rwot waco be, “Nataman winyunu, Okwe wun jo me Isirael, jotic na, jo na kame atieko yero!

²Ango en Rwot kocweo wu, ngat kotimo wu i yic, ango abino konyo wu. Kur ibedunu kede lworu, Okwe wun jo me Isirael, jotic na, jo na kame amaro, kame ayero.

³” Ango abino onyo pii i lobo kotuo, doko abino mino icileta mol i lobo kotuo. Ango abino mino tipo na but ikwae wu, kede winyo na but idwe wu.

⁴Gin kibino bedo kiber bala lum kame pii romo kiber, kibino bedo cal bala yen kame dongo i nget isamai amol.

⁵” Ngat acel bino waco be, ‘Ango dano ka Rwot, ‘ ngat apat da kobino lwongo be dano me Isirael, dano ace bino wandiko i bade be, ‘Me ka Rwot, ‘ di gin kiko bino donyo lwongere be jo me Isirael.”



⁶ Rwot, Abaka me Isirael, Ngalak mere, Rwot me jo yi, waco be, “Ango abedo me agege kede me ajikini; likame tie rubanga moro ace kwanyo ango kena.

⁷ Ngai kame cal bala ango? Mito gin kiwaci, miero gin kituc i nyima. Ngai kotieko waco, cako riki sek, gikame bino timere i kare me anyim? Poore gin kiwace wa gikame bino bedo tie i kare me anyim.

⁸ Kur ibedunu kede lworu moro, arabo mielkom; Wun ingeunu be cako riki sek tuno nataman ango atieko waco ne wu gi dedede kame oudo bino timere. Wun en ijurak nango! Benyo, tie bobo rubanga moro ace atek? Likame tie Rubanga moro apat atek kame ango angeo akadi acel.”

Mingo me Woro Caljwogi

⁹ Jo dedede kame timo caljwogi kony gi li, doko rubangan kame pir gi tek negi nogo da likame tie kede kony moro but gi. Jo kame woro rubangan nogo wang gi oto doko kimiming. Kobino mino lewic mako gi.

¹⁰ Kony likame tie me dano timo cal moro kede nyonyo di eko donyo woro bala rubanga.

¹¹ Jo dedede kame woro cal nono kobino mino lewic mako. Jo kame timo caljwogi nogo obedo jo ajoa kenekene. Mito gin dedede kicokere di kiko cungo pido; lworu atek bino mako gi di oko mino lewic mako gi.

¹² Ngatet kwanyo nyonyo di eko timo tic i kome kede mac. En teko me bade mio etingo enyondo di eko nyonyoto nyonyo nono iepone kame en emitu. Di en etie timo tic, kec neke, orio neke, di teko mere ko tiek.

¹³ Ngapac pimo ebao. En egiro kede kalamu cal me gikame en emitu timo, di eko time kiber kede jamini me tic mege; en etime i cal me dano kame cil adikinicel, di oko kete i abila.

¹⁴ En eyero yat seda arabo oak amoto saipuras ki abum di eko tongo pi tic kede. Arabo en eromo pito yat di eko kuro kot cwei pi mine dongo.

¹⁵ Di do oko karuno tic kede me amoka. Yen mogo en emoko kede mac me mino kome lieto, ace en etio kede me tedo. Yen apat di en eko timo kede cal me rubanga di eko donyo woro.

¹⁶ Yen odong mege en eketo i mac, di eko bulo ringo iye eko camo di eko yeng. En eobo kome da kede mac nono di ewaco be, “Bu, koma oobere, mac noni liet kiber!”

¹⁷ Yen apat mege dedede en etimo kede cal me rubanga, caljwogi mere, di eko luro piny wore. En elego bute di ewaco be, “Laka, in rubanga nango!”

¹⁸ Akodi jo nogo miming doko likame kiniang; pien wang gi oumere, tetekeny gin likame kikaruno neno, doko tam gi da omwonere, en amio likame kikaruno niang.

¹⁹ Likame tie ngatamoro kikom jo kame timo caljwogi kame tamo, akadi kame tie kede ngec arabo kame niang di eko waco be, “Dul me yat noni ango oudo awango i



mac; atedo da kede akuk mere, abulo kede ringo da ako camo. Nataman do benyo benyo kame ango atimo kede caljwogi kede adul kodong mere? Benyo, kom ango abino riebere i nyim ebao di ako wore?”

²⁰Ecal acala bala camo buru. Tam mere ongale omio erwenyo, doko likame etwero lakere kene arabo waco be, “Gikame ango amako i cinga tetu cam noni mam obedo gi me angalo?”

Rwot en Ngacwec doko en Ngalak

²¹Rwot waco be, “Okwe wun jo me Isirael, yutununu gi nogi; pien wun ibedunu jotic na. Ango acweo wu pi bedo jotic na, wia likame bino wil kede wu.

²²Ango atieko wearo tim wu areco tenge bala edou kame yamo okuto, kede dub wu da kame ibedunu timo, ango aweo tenge bala ekuna. Dwogunu buta, pien ango atieko lako wu.”

²³Okwe in malo, weri, pien Rwot do otieko timo gi noni; lelemo in piny kakatut, cakunu wer, Okwe wun mori, Okwe abum kede yen dedede kame tie iye! Pien Rwot otieko do lako jo me Isirael, nan jo me Isirael bino mine dwongo.

²⁴” Ango en Rwot, ngalak ni; ngat kocwei i yi toto ni. Ango en Rwot ngat kocweo jamini dedede, ayararo malo ango kena; i kare kame ango acweo kede piny, likame tie ngat kokonya.

²⁵ Ango abino mino jo kame sidiko waco ne jo winyo kame kitie kede doko jo mingo, di ako mino jo apenyo gagi doko jomingo; jo ariek ango adwoko cen, di ako mino ngec gi doko mingo.

²⁶Ango amoko kop kame ngatic na owaco, doko kop kame joor na murao cobere; Ango awaco ne Yerusalem be jo bobo bino bedo iye, kede ne bomban me Yuda be bobo kobino gero gi. Ango abino bobo medo gero bomban nogo i amejeko gi.

²⁷Ango aciko pii i nam pi tuo di eko tuo da.

²⁸ Ango awaco ne Abaka Sairas be, ‘In en ngakwat na; ango abino tic kedi pi timo gikame ango cunya mito timo; in ibino mino cik di oko gero Yerusalem, doko da ibino mino kocibo acakini me Tempulo.’ “

Isaya 45

Rwot Oyero Sairas

¹Rwot otieko yero Sairas pi bedo abaka. En etieko kete pi bwono atekerin; en ecwae eoto tieko teko me abakai; Rwot bino yabo ne irutei me bomban. Rwot waco ne Sairas be,

²Ango abino cako ot ne in di ako papao mori kede imukuran pi mino yongayo bedo ni pwot. Ango abino turo irutei kame kotimo kede nyonyo buronsi di ako ngongolo ari gi me lilime.



³Ango abino mini lim kame kokano kakacol, kede abar kame kokano kabedere me mung; tetekeny in ingei be angu Rwot, Rubanga me jo me Isirael en kame atieko lwongi kede nyingi.

⁴Ango alwongi kede nyingi, pir jo me Isirael, jotic na, jo na kame ayero, amii ruom me wor, bed bala in likame ingea.

⁵” Ango en Rwot, doko likame tie moro ace; rubanga moro apat likame tie. Ango amii teko, bed bala in likame ingea.

⁶Ango atimo manoni tetekeny jo dedede, cako ki tetu kakame ceng wok kiye tuno tetu tim, ngei be likame tie rubanga moro apat; angu en Rwot, doko likame tie moro ace.

⁷Ango atimo lero, doko acweo colpiny, akelo mulem, doko akelo da gikarac; angu Rwot en kame atimo gi nogi dedede.

⁸Okwe in malo, ony tim kopooore piny; mie ecwei piny bala kot; mito lobo yabere tetekeny alako wok malo bala kodi kame tui, doko mito emi tim kopooore da bed tie i wi lobo; Angu Rwot en kame abino timo manoni.”

Rwot en Oketo gi Dedede

⁹ Itie tin ican benyo in ngat kame ipiemo kede ngat kocwei! Benyo, agulu twero piem kede ngat kocwe? Iparunu be elupe twero penyo ngat kame tie tic kede me cwec be, “Nyo kame in itie timo” ? arabo waco ne be, “Gikame itie cweno likame tie kede kakode” ?

¹⁰Etie ican tin benyo en ngat kame epenyo papa mere be, “Nyo kame in itie yaco?” arabo kame waco ne dako be, “Nyo kame in itie ramere me nywalo?”

¹¹Rwot, Ngat Kacil me Isirael, ngat koketo ateker me Isirael waco be, “Wun iliunu kede twer me penya kop kame mako idwe na, arabo me waco na gikame oudo apoore timo!

¹²Angu en atimo wi lobo, di ako cweno jo pi bedo iye. Angu ayararo malo kede teko na; doko angu amio cik but jamini dedede kame tie iye pi gin bedo bala kame angu amito.

¹³Angu atieko keto i cuny Abaka Sairas mit me cobo timo gi kopooore kame angu amito. Angu abino mino yote dedede kame elubo riere. En ebino gero bomba na, di eko gonyo jo na kame komako bala mabus. En ebino timo manono likame pi obino gele arabo mine giamia me pwoc.” Manoni en kop kame Rwot me jo yi otieko waco.

¹⁴Rwot waco ne jo me Isirael be, “Abar me Misiri kede jamini me Abisinia bino doko meru, doko jo me Seba kame bocoboco nogo bino bedo ipaso wu; gin kibino lubo wu di kotweo gi kede irikoi. Gin kibino luro wi gi piny woro wu di kiwaco be, ‘ Wun kenekene kame itienu kede Rubanga, likame bobo tie rubanga moro apat.



- ¹⁵Ateteni in en Rubanga kame pwono, Okwe Rubanga me jo me Isirael, Ngalak.
- ¹⁶Lewic bino mako jo dedede kame timo caljwogi; gin dedede wi gi bino totolun.
- ¹⁷Do jo me Isirael Rwot en kame lako, doko alako kame en elako gi kede bedo nakanaka; gin lewic likame bino mako gi arabo bedo kede atotolun pi kare dedede.’ “
- ¹⁸Rwot en kocweo malo; en kene ebedo Rubanga! En kame bin elulungo lobo di eko time; eko sipe ecungo di etek. En bin likame ecweo lobo di eko weke atatai, en elulungo en pi jo bedo iye. En nono kame etie waco be, “Ango en Rwot, doko likame tie rubanga moro apat.
- ¹⁹Ango oudo likame ayamo kede wu i mung i kakacol; angu oudo likame awaco ne ikwae ka Yakobo be, ‘Ibinunu mona i kabedo kame tie atatai.’ Ango Rwot ayamo kop me ateni, atuco gikame tie kakare.”

Rwot me Wi Lobo kede Caljwogi me Babilon

- ²⁰Rwot waco be, “Cokerenu karacel, bianu iyapiyapi, wun jo me atekerin apapat kobwot! Jo kame bedo tingo caljwogi me yen kame kopao, di kilego but rubangan kalikame karuno lako gi nogo, likame kitie kede ngec moro atwal!
- ²¹Bia iketunu pido wu i nyim ekiko; mito kong jo kame gango pido nono por kop gi me pido! Ngai kowaco kop noni riki sek? Ngai kotuco riki sek be gi noni bino timere? Benyo, likame angu Rwot en kame riki atuco? Likame tie rubanga moro ace kwanyo angu kenekene, Rubanga kame timo gi kopoore, kede kame lako jo.
- ²²” Lokerenu buta di ako lako wu, wun jo dedede me wi lobo! Angu en Rubanga, doko likame tie moro ace.
- ²³ Angu atieko kwongere kede nyinga, atieko waco kop me ateni, kop kalikame bobo abino loko, en be, ‘Cong jo dedede bino riondiko i nyima, di gin dedede kiko kwongere pi lubo kop na.’
- ²⁴” Gin kibino waco be, kuo kopoore kede teko tie but angu Rwot; jo dedede kame cuny gi wang i koma bino bino buta kede lewic.
- ²⁵Ikwae me jo me Isirael dedede bino bedo jo olo di kiko bino mina deyo.”

Isaya 46

- ¹” Rubangan Bel kede Nebo okudo wi gi piny, leini tie yeno cal gi kobedo yen kame kopao; cal apaa nogi odoko peko but leini ool atie yeno gi.
- ²Gin kikudo wi gi piny, kiriondiko karacel; likame kikaruno lako cal gi nogo, do gida komako gi kotero gi bala mabus.
- ³” Winyunu kop na, Okwe wun jo me ot ka Yakobo, donge dedede me jo me ot ka Isirael. Angu abedo tingo wu cako ki yi toti wu, cako i kare kame konywalo wu kede.



⁴Ango en Rubanga wu akadi i kare me tio wu, akadi di do wi wu odoko tar kede lwar anga abino tingo wu. Ango en acweo wu, doko abino gwoko wu; anga abino tingo wu di ako lako wu.

⁵” Ngai kame wun ibinunu pora kede di ikounu mina abedo rom kede? Benyo, tie ngatamoro kame cal bala anga?”

⁶Jo yabo isaun gi di kiko onyo saabu kame oudo tie yi gi, di kiko pimo nyonyo siliba i misani. Gin kiko culo sente but ngatet pi timo negi rubanga; di do gin kiko riebere piny wore!

⁷Gin kirionge i epepet di kiko yene; gin kisipe kabedo mere, di eko dong cungo kanono, likame ekaruno nyiko ki kabedo mere nono. Ka ngatamoro olego bute, likame egamo doge, doko likame elako ngatamoro ki peko.

⁸” Yutununu manoni di ikounu bedo kede tam iye, kur wi wu wil kede, wun jodubo.

⁹Yutununu gikame riki otimere i kare kasek; pien anga en Rubanga, likame bobo tie moro ace; anga en Rubanga, doko likame tie rubanga moro kame cal bala anga.

¹⁰Cako i ageini anga awaco kakaler gikame bino timere i ajikini; cako riki sek anga atuco gikame oudo bino timere di pwodi likame kitimere, di awaco be, ‘Iik na likame pota akadi acel, doko abino cobo timo gikame oudo aiko pi timo.’

¹¹Anga atie lwongo icuo moro ki bad tetu kide; en ebino bino bala ekokom di eko cobo timo gikame anga atieko iiko. Anga atieko waco, doko abino mino ecobere; atieko iiko, doko abino time.

¹²” Winyunu kop na, wun joepali, wun jo kame alako wu pwodi bor.

¹³Anga atie bino lako wu i kare kiyapiyapi, likame alako wu bor. Anga likame abino gal bino lako wu; abino lako bomba me Sion, pien jo me Isirael obedo deyo na.”

Isaya 47

Ngolo kop i kom Babilon

¹ Rwot waco be, “Babilon, wok piny ki wi kom ni me ajakanut, di iko bedo piny i apua. In oudo ical bala nyako kalikame onge icuo, bomba kalikame komulo, do nataman manono bino lokere!

² Kwany nyar kidi icak riego. Kwany egoe me umo wi tenge! Gony ekanso ni tenge! Jung egoe malo wek tieni dong neeno, ngol ecilet.

³ Komi bino dong nono; di jo ko neno komi me lewic. Anga abino timo onyanga, doko likame abino weko ngatamoro.”

⁴ Ngat Kacil me jo me Isirael en Ngalak wa, nyinge Rwot me jo yi.



⁵Rwot waco ne bomba me Babilon be, “Bed di iko ling kakacol; pien likame bobo kobino lwongi be abaka adako me atekerin.

⁶Ango oudo alilo kede jo na; amio gi kidoko cal bala gi me kwer buta. Ango ako mino gi i cingi, di in likame iko nyuto negi cuny me kisa; akadi jo oti da in ibedo kede gero atek i kom gi.

⁷In oudo iparo be ibino bedo abaka adako nakanaka, omio likame iko keto gi nogi i tam ni arabo paro kite kame ajikini gi bino bedo kede.

⁸“Winy kop noni, in ngat kame imaro jamini me yomcuny, in kame itamo be itie kede anapakin. In iwaco i cunyi be likame tie ngatamoro apat kame cal bala in. In itamo be likame ibino bedo apuserut arabo neno can me to me idwe ni.

⁹Do i esawa atitidi, i ceng acel can are nogi dedede bino poto i komi. Idwe ni bino to, doko ibino doko apuserut, akadi di in itie kede twon jwok kede twer adwong me tiet.

¹⁰” In oudo itamo be itie kede anapakin i gikareco kame itimo; in oudo iparo be likame tie ngat kame romo neni. Rieko kede ngec ni oteri i rwenyo, omio in iko waco i cunyi be, ‘Likame tie ngatamoro apat kame cal bala ango.’

¹¹Can bino poto i komi, can kalikame jwok ni karuno gengo. Peko bino ngesi, peko kalikame in ingeo gimoro iye.

¹²Cung kitek i tiet ni kede i jwok ni atot atota nogo; koudo in ibedo cane iye cako di in eponga. Cengemogo kikaruno bedo kede kony buti, amotoko di iko mino lworu mako jokwor ni.

¹³In itieko ol kede tam atot atota kame komii; mito jo kame ngingico ekite kame malo tie kede bin di gin kiko laki, gin jo kame kingio acerin, di buli por duwe kimurao gikame bino timere ne in.

¹⁴” Neningo, jo nogo cal bala arienge, mac wango gi; likame kikaruno lako kom gi ken gi ki mac aliel. Manoni likame obedo mac me ayoa, en likame mac kame kobedo i ngete!

¹⁵Jo kame in ibedo cane kede gi nogo cal kamanono buti, jo kame in ibedo dubo kare ni but gi cako di in eponga. Gin dedede kibino weki di dano acelacel ko mako yongayo mere; likame tie ngatamoro kame bino laki.”

Isaya 48

Rubanga en Rwot me Kare me Anyim

¹Winyunu kop noni, wun jo me ot ka Yakobo, wun jo kame kolwongo kede nying me Isirael, jo kowok kikut Yuda. Wun ikwongerenu i nying Rwot, di iwacunu be iworunu Rubanga me jo me Isirael, do di likame kede ateni, arabo bala kame poore.



²Pien wun ilwongerenu kenu be wun jo me bomba kacil, doko igongerenu i kom Rubanga me jo me Isirael, ngat kame nyinge obedo Rwot me jo yi.

³Rwot waco ne jo me Isirael be, “Riki sek ango awaco gikame oudo bino timere, di ako ngeso timo gi di kiko cobere.

⁴Ango oudo angeo be wun ibedunu joepali, doko wi wu tek bala nyonyo buronsi, doko ngut wu nwang bala nyonyo ayon di tur nyim wu tek baba bala nyonyo buronsi.

⁵En komio ango ako waco ne wu kope nogo riki sek, di pwodi gin likame kitimere, tetekeny kur ngatamoro wac be, ‘Caljwogi na en kotimo gi nogi, kom cal apaa na kede cal atwaka en kociko gi nogi di kiko timere.’

⁶” Wun iwinyunu gikame riki ango awaco be bino timere; nataman nenunu kitieko cobere; benyo, likame ibinunu tatamo kop i kom gi? Cako nataman ot anyim ango abino waco ne wu gi kanyen, gi kopwono kalikame pwodi wun ingeunu.

⁷Ango atie timo gi nogi nataman, likame atimo gi riki sek; di pwodi ceng katin likame oudo otuno, oudo wun likame pwodi iwinyunu gi, tetekeny likame iromunu waco be, ‘Wan oudo ongeog gi sek.’

⁸Wun likame iwinyunu doko likame ingeunu gi, cako riki sek wun yit wu likame oyabere. Ango oudo angeo be wun ibinunu bedo na bala ngat kame cato dano mere, doko cako i kare kame onywalo wu kede wun ibedunu jojemo.

⁹” Pi mino jo pako nyinga, abino mino lilo na kong gal, abino didio en di likame ako muducaro wu.

¹⁰Nenunu, ango atieko jililo wu, bed bala likame bala nyonyo siliba; ango atieko tamo wu kede mac me neno can.

¹¹Ango atieko timo manoni pira, pinyo bo kame mio ango aweko kopwoko nyinga? Ango likame anywako deyo na kede ngatamoro.”


Sairas obedo Ngatel kame Rwot Oyero

¹² Rwot waco be, Okwe wun jo me Isirael, winyunu kop na, wun jo kame ango atieko lwongo! Ango en Rubanga; ango en me agege kede me ajikini.

¹³Ango acweo acakini me lobo kede cinga, di ako yararo malo. Ka ango alwongo lobo kede malo, gin kilubo gikame ango awaco.

¹⁴” Wun dedede cokerenu di ikounu winyo! Mene kikom caljwogi nogo kame bin otuco gi nogi? Mene kotuco be ngat kame ango Rwot amaro en kame bino cobo iik nango i kom Babilon; be en ebino yi kede jo Kaldea.

¹⁵Ango kikoma en kame alwonge, atieko kele, doko gi dedede bino cobere ne kiber.



16” Nyikinonu buta di ikounu winyo kop noni! Cako i ageini ango likame amungo kop moro, doko da nakanaka ango abedo mino kop kame ayamo cobere. Nataman Rwot Rubanga otieko ora kede twer mere.”

lik Ka Rwot pi Jo mege

17Rwot, Ngalak, Ngat Kacil me Isirael waco be, “Ango en Rwot Rubanga wu, ngat kame pwonyo wu pi bero wu, doko atelo wu i yongayo kame poore ilubunu.

18” Okwe koto oudo ilubunu cik na! Koto oudo mulem omol but wu bala pii me ecilet kalikame tuo. Koto oudo ibedunu bwono jokwor wu nakanaka bala ebuka me pii kame dipere i lak nam.

19Ikwae wu koto oudo obedo tot bala asinge, nying gi likame koto orwenyo akadi acel, doko koto likame komuducaro gi.”

20 Yaunu ki Babilon, ringunu tenge ki Kaldea, Gounu mujira pi kop noni, tatamunu en kabedere dedede; wacunu be, “Rwot otieko lako jo me Isirael, jotic mege!”

21I kare kame en bin etelo gi kede di kibeo i wi tim, orio likame oneko gi. En bin emio pii omol negi ki lela; en ebelo lela di pii oko mol.

22 Rwot waco be, “Ngadubo li kede anapakin.”

Isaya 49

Jo me Isirael obedo Lero but Atekerin

1 Winyunu wun jo kame bedo i dog name, cikunu yitu, wun jo kame bedo kakaboco! Rwot olwonga di pwodi oudo likame konywala, eyera pi bedo ngatic mere di pwodi oudo atie i yi toto na.

2 En emio kope me doga obedo bit bala epima, en egwoka kede cinge; emia abedo cal bala tong me emal kame kosuto kiber, kame en ekano i isau mere me mako tongini me emal.

3En ewaco na be, “In en ngatic na, in ical bala Isirael, jo bino paka pi in.”

4Do ango ako waco be, “Ango kom abedo cane timo tic nono, ango atieko teko na nono, doko i gimoro kame li. Do akadi bed kamanono da, ateteni gen nango tie but Rwot, Rubanga na bino mina giamia me pwoc pi gikame ango atimo.”

5Di pwodi oudo likame konywala, Rwot oudo otieko yera; en emia abedo ngatic mere pi dwoko jo mege bute, pi koko jo kosasarun me Isirael dwoko bute, pien Rwot otieko mina wor; en emia teko.

6 Rwot oko waco be, “Ngatic na, ango atie mini tic atek. Likame ibino kenekene dwoko bero ne jo me Isirael kame pwodi odong kuo, do ango abino da mini ibedo lero but atekerin, tetekeny in iter alako na i wi lobo lung.”



⁷Rwot Ngat Kacil, Ngalak me Isirael waco ne ngat kame kocao kitek, ngat kame atekerin dagi doko en ebedo epasoit me jopug be, “Abakai bino neni di gin kiko yai malo cungo pi mini wor, jopug bino neni, di gin kiko riebere piny i nyimi.” Manoni bino timere pien Rwot ngat kame genere, Ngat Kacil me Isirael otieko yeri.

Dwoko Yerusalem Kakare

⁸ Rwot waco be, “I kare me timo bero ango abino gamo kwac ni, i ceng me alako ango abino konyi; ango abino gwoki di ako bino timo isikan kede jo dedede kibuti. In ibino temuno lobo, ibino popoko ne jo lobo kame nataman odong kene.

⁹In ibino waco ne mabus be, ‘Wokunu ooko, ‘ kede but jo kame tie i colo be, ‘ Wokunu i lero! ‘ Gin kibino bedo cal bala romini kame camo i nget yote, i wi imukuran kakame ler, lum me acama bino bedo tie negi.

¹⁰ Kec arabo orio likame bino neko gi. Ceng arabo yamo aliet me wi tim likame bino wango gi, pien ngat kame tie kede kisa i kom gi en kame bino telo gi. En ebino telo gi kibeo i nget ataneko me pii.

¹¹” Ango abino loko mori na dedede doko yongayo, di yote na adongo ko bino kiar malo.

¹²Neningo, jo na bino dwogo ki kakabor, ki bad tetu malo kede tetu tim, kede ki lobo me Siene.”

¹³Wer kede yomcuny, Okwe in malo, leli, Okwe in lobo; dipunu wer, Okwe wun mori! Pien Rwot otieko kweno cuny jo mege, doko en ebino bedo kede kisa i kom jo mege kame tie neno can.

¹⁴Do jo me Sion oko waco be, “Rwot otieko jalo wa! Wie otieko wil kede wa.”

¹⁵Rwot oko gamo be, “Benyo, iparunu be dako wie romo wil kede atin mere kame edoto, arabo be likame etwero bedo kede cuny me kisa i kom atin kame en enywalo? Akadi bed bala toto me atin wie romo wil kede atin mere, do ango likame wia bino wil kede wu.

¹⁶Yerusalem, ango likame wia twero wil kedi! Ango atieko wandiko nyingi i dier cinga.

¹⁷” Jo kame bino geri bobo oyapunu tuno, di jo kotuturo in piny ko bino yai kiweki.

¹⁸Ting wangi malo di iko ngoloro ngeti rimaro; jo ni tie cokere, gin kitie dwogo buti. Ango Rubanga akuo akwongere be, in ibino tubuso komi kede gin bala kame ateran ngapo kede mwolere.

¹⁹” Ateteni kabedere ni kame oudo kodudubo di oko dong nono abongo jo, nataman do bino bedo diding ne jo ni kame tie dwogo bedo iye. Doko jo kame oudo odudubo in bino bedo kakabor kedi.



²⁰Idwe ni kame konywalo i kare kame oudo idong kede nono bino waco di in iwinyo be, ‘ Kabedo noni diding twatwal; nyane wan kabedo.’

²¹Di in iko bino penyere i cunyi keni be, ‘ Ngai konywalo idwe nogi dedede? Ango oudo akei idwe na, doko likame oudo do aromo nywal. Ango oudo kotera tenge bala mabus, kara ngai do kopito idwe nogi? Ango oudo koweka adong kena; kara idwe nogi do owok ki tuai? ’ ”

²²Rwot Rubanga waco be, “Kare oyapuno tuno kame anga abino kiarao kede cinga but atekerin, di ako mino gin gianena, di gin kiko bino kelo awobe wu di kigwako gi i kor gi, kede anyira wu gin kibino yeno gi i epepet.

²³Abakai bino gwoko wu bala papi wu; mon gi bino pito wu bala toti wu. Gin kibino riebere piny i nyimu pi mino wu wor, di kiko nango apua me tien wu. Di do wun ikounu bino ngeno be anga en Rwot; lewic likame bino mako jo kame keto gen gi buta.”

²⁴Benyo, kokaruno mano ngat atek gikame etieko mako i cinge, arabo kokaruno mano mabus ki cing ngat ager?

²⁵Rwot waco be, “Akadi mabus me ngat atek kobino mano, doko gikame ngat atek otieko mako i cinge da kobino mano; pien anga abino yi kede jo kame yi kede wu, di ako bino lako idwe wu.

²⁶Anga abino mino jo kame tero wu kirac nekere ken gi ken gi, di kiko mer kede nek bala kimato bwini. Di do jo dedede ko bino ngeno be anga en Rwot, ngat kalako wu, Rubanga me Isirael Won Twer.”

Isaya 50

¹Rwot penyere be, “Ani bo baluwa kame anga ariamo kede toto wu? Arabo won banya mene kame anga acato wu bute? Nenunu, kocato wun pi dub wu, doko wun iturunu iswil en komio koriamo toto wu.

²” Pinyo bo komio i kare kame bin anga ako bino kede likame audo ngatamoro? Pinyo komio likame tie ngatamoro kogamo doga kakame alwongere kede? Benyo, iparunu be anga agoro likame akaruno lako wu? Arabo iparunu be anga ali kede twer me lako wu? Anga atwero ciko nam di eko tuo, doko anga atwero loko icileta doko wi tim, di aporogon gin ko to pi li me pii di kiko top.

³Anga atwero mino malo doko col cucucuc, bala egoe kame kongapo me iturur pi dano oto.”

Wor kame Ngatic ka Rwot tie kede

⁴Rwot Rubanga otieko pwonya gikame apoore waco, tetekeny anga akaruno mino teko but jo ool. Buli odiko en ecea pi mina winyo gikame en emitto pwonya.



- ⁵Rwot Rubanga otieko yabo yita, doko ango likame oudo ajemo ne, arabo aloko ne ngea.
- ⁶Ango ako jalo ngea ne jo kobunga, kede lema da ajalo ne jo kopuputo yer me tika; likame ako kano wanga kakame oudo koyeta kede di kongungulo lau iye.
- ⁷Rwot Rubanga en kame konya; pi mano, lewic likame bino maka. Ango abino mino wanga bedo tek twatwal. Ango angeo be likame kobino mina lewic,
- ⁸pien ngat kame bino nyuto ateni na tie iyapiyapi. Ngai kame bino pido keda? Mito ecung keda i nyim ekiko. Alu kara en kobedo jokwor na? Mito gin kipida.
- ⁹Rwot Rubanga en kame konya; ngai kame bino ngolo kop loa? Jo dedede kame pida bino ti bala egoe; gin kibino doko li bala egoe kame ajekel ocamo.
- ¹⁰Alu kikomu kame lworu Rwot di kilubo timo gikame ngatic gi waco? Mito wun jo kame iotunu ki piny acol, jo kame lero li ne gi, iketunu gen wu i kom Rwot doko igongerenu but Rubanga wu.
- ¹¹Do wun dedede kame ibedunu jocwiny mac, lubunu lero me mac wu nono! Gikame ango abino timo ne wu ine: ibinunu buto di itienu kede aramo atek.

Isaya 51

Kope me Kweno Cuny Jo me Yerusalem

- ¹Rwot waco be, “Winyunu kop na, wun jo kame imitunu bedo jo kopoore, wun jo kame itienu mono Rwot. Ngolorunu kong lela kame riki okunyo wu kiye, bur me kide kame riki okunyo wu kiye.
- ²Nenunu kong kwaru wu Aburaam, kede Sara ngat kame wun iwokunu kibute. Kakame ango bin alwongo kede Aburaam, en oudo etie dano acel, do ango ako mine winyo di eko nywal enyai.
- ³” Ango abino kweno cuny jo me Sion; abino kweno cuny jo kame tie bedo i ameje mere. Ango abino mino wi tim mere doko cal bala potu me Eden, lobo mere kotuo abino mino doko cal bala potu na. Yomcuny kede kilel bino bedo tie kunono, jo bino wero were me pwoc kede pak.
- ⁴” Winyunu kop na, wun jo na, doko cikunu yitu, wun ateker na; pien ango abino mino pwony na, kede tim kame poore, pi bedo lero but atekerin.
- ⁵Ango abino bino awakawaka di ako lako wu; alako na otieko timere. Ango abino pugo atekerin kede teko na. Lobere kame tie kakaboco tie kura, gin kitie kura kede gen pi lako gi.
- ⁶Tingunu wangu inenunu malo; ngolorunu lobo! Malo bino rwenyo bala yiro; wi lobo da bino ti bala egoe, di jo kame bedo iye ko bino to bala lwangini. Do alako kame ango akelo bino bedo nakanaka; twer nango me alako likame jik.



⁷” Winyunu kop na, wun jo kame ingeunu gikame poore, wun jo kame pwony na tie i cunyu; kur ibedunu kede lworu ka jo cao wu, doko kur cunyu poti ka gin kiyeto wu.

⁸Gin kibino rwenyo bala egoe kame ajekel ocamo, kudiling bino camo gi bala yer me oromo; do twer nango me alako likame jik; alako kame ango akelo tie pi lwak me kare dedede.”

⁹Cei, cei Rwot, dok tek, tii kede twer ni di iko lako wa! Cei bala bin i kare kasek, bala kame bin itimo kede ne lwak me kare kasek! Benyo, mam in en kame riki ingongolo Rakab i adulion, doko icobo twol kiyiliyili?

¹⁰Benyo, likame in en kame bin imio nam otuo, pii me nam atut; di iko yabo yongayo oboe i dier nam tetekeny jo kame in ilako ngol loka tetuca?

¹¹Jo kame Rwot olako bino dwogo, gin kibino donyo Sion di kiwero. Gin kibino bedo kede yomcuny kalikame tiek. Kuo gi bino pong kede kilel kede yomcuny, cweracuny kede cur bino yai tenge ki kuo gi.

¹²Rwot waco be, “Ango en kame akweo cunyu; pinyo kame mio wun ilworunu dano kame miero toi, dano adana kame cal bala lum kame ner di eko to?”

¹³Wun wi wu otieko wil kede Rwot ngat kocweo wu, ngat koyararo malo di eko cibo acakini me lobo. Wun buli ceng ibedunu kede lworu piny yuluyul pi gero me jo kame tero wu kirac, jo kame cuny gi mito muducaro wu. Do ani kara gero gin nono?

¹⁴Jo kame tie mabus kobino gonyo gi oyotoyot; likame kibino to di kiko ot i kabedo me jo oto, arabo bedo li kede cam.

¹⁵” Ango en Rwot Rubanga wu; ango arubo nam di ako mino ebuka mege mor. Nyinga en Rwot me jo yi.

¹⁶Ango en kame ayararo malo di ako cibo acakini me lobo; ango awaco ne jo me Sion be, ‘Wun en jo na! Ango atieko keto kope na i dogu, doko ango agwoko wu kede cinga.’ “

Jik me Neno Can i Yerusalem

¹⁷ Cei, cei ki wang nino! Yai malo, Okwe Yerusalem, Rwot otieko mini imato gikame tie i yi ikopo mere me lilo, in itieko mato kiton cete, di eko mini igete.

¹⁸Likame tie ngatamoro kame romo peni pi teli, likame tie moro akadi acel kikom idwe kame in inywalu; likame tie moro kame romo mako cingi me peni pi teli kikom idwe kame in ipito.

¹⁹Can are dedede otieko poto i komi: yi otieko dudubo in, doko kec agwai opoto ne jo ni. Ngai kame bino kweno cunyi?

²⁰Idwe ni otieko wile, kitie buto i ajikini me yote dedede bala amiem komoko i bwoi. Lilo ka Rwot oromo gi, iretakin ka Rubanga ni.



- ²¹Pi mano, winyunu kop noni wun jo kame kowano, jo komer, do likame kede bwini.
- ²²Rwot Rubanga wu ngat kame pido piru waco be, “Nenunu, ango atieko kwanyo tenge ki cing wu ikopo me lilo na kame oudo wun imatunu di ikounu gete; likame bobo ibinunu mate.
- ²³Ango abino do mine but jo kame oudo tero wu kirac; jo kame oudo waco ne wu be, ‘ Rieberenu piny, tetekeny wan oder ngei wu’ ; di wun ikounu loko ngei wu odoko cal bala piny, arabo yongayo kame gin do kidero kede tien gi.”

Isaya 52

Rubanga bino Lako Yerusalem

- ¹ Cei, cei ki wang nino, Ud teko, Okwe Sion! Ngap igoen ni acil, Okwe Yerusalem, bomba kacil; pien jo kalikame kokepo kede jo komunaun likame bobo bino donyo buti.
- ²Yai malo, teng apua ki komi, Okwe in Yerusalem, in itie bala mabus. Gonyi irikoi ki nguti, Okwe in Sion!
- ³Rwot Won twer waco be, “I kare kame bin wun idokunu kede ipasoi, likame bin koculo sente moro me wilo wu; kamanono da, likame kobino culo gimoro pi lako wu.
- ⁴Riki sek wun iotunu bedo Misiri bala jokumbor; jo Asiria da bin otero wu kirac abongo tien kop moro.
- ⁵ Nataman bobo kotero wu bala mabus abongo tien kop moro. Nyo do kame ango audo iye? Jotel wu kok, doko kocaa nakanaka piny yuluyul.
- ⁶Pi mano, ibinunu ngena; ibinunu ngeno be ango Rubanga inononi kame atie yamo kede wu; ango ine kan.”
- ⁷ Neno ngaor kame bino ki wi mori kede kop aber me mulem tin mit benyo! En ngat kame ekelo kop aber me alako, ngat kame waco ne jo me Sion be, “Rubanga wu en abaka!”
- ⁸Winyunu! Jo kame daro bomba tie lelemo, gin kitie wer karacel pi kilel; pien gin kitie neno kede wang gi dwogo ka Rwot i Sion.
- ⁹Dipunu wer karacel, wun amejeko me Yerusalem; pien Rwot otieko kweno cuny jo mege, etieko lako Yerusalem.
- ¹⁰Rwot otieko nyuto ne atekerin dedede twer mere; doko jo dedede me piny bino neno alako kame Rubanga wa kelo.
- ¹¹ Yaunu, yaunu tenge ki kunono! Wun jo kame yeo jamini me timo tic ka Rwot, kur imulunu gimoroni komunaun; yaunu tenge kiye di ikounu lonyere.



¹²Likame ibinunu yai kede mielkom, doko likame ibinunu ringo aringa; pien Rwot bino telo ne wu yongayo, doko Rubanga me Isirael en kame bino gwoko wu ki cen ngei wu.

Ngatic ka Rwot kame Neno Can

¹³Rwot waco be, “Neningo, ngatic na bino cobo timo tic mere kiber; kobino mine wor adwong di oko tinge malo, di en eko bino bedo malo twal.

¹⁴Jo atos bin onene di kom gi oko to; nyime oudo odubere likame cal bala me dano, doko cal me kome do oudo pat apata kede me jo.

¹⁵Nataman da en ebino cungo wi atekerin atos; Abakai bino bedo li kede kop me ayama pi en. Gin kibino neno gikame lem pwodi gin likame kiwinyo kop i kome, di kiko bedo kede par i kom gikame lem gin pwodi likame kiwinyo kop i kome nono.”

Isaya 53

¹ “Ngai kotieko yei kop kame wan otatamo? Doko ngai en kotieko neno twer ka Rwot i gi noni?

²Oudo ebedo mit ka Rwot pi ngatic mere dongo i nyime bala yat kame pwodi dongo adonga, kede bala alias kame wok kakotuo. En oudo erarac doko eli kede ruom kame koto mi wa opar pi nene, likame tie gimoro kame oudo romo wano tam wa i kome.

³Wan ocaenu di okounu dage; engirikino cwercury eko nao kede neno can. Likame tie dano moro kame oudo mito ngoloro en. Wan ocaenu bala ebedo dano kame kony mere li.

⁴ “Ateteni en etieko ngirikino can wa, di eko yeno tuwo wa; do di wan oudo otamo be en etie neno can kame Rubanga omie.

⁵ Do en bin kocobe pi dub wa, kowane pi tim areco wa. Wan oudo anapakin i kuo wa pi alola kame en ebeo iye, ocangunu pi aporeso mege.

⁶ Wan dedede ocalunu bala romini kame oudo orwenyo, ngat acelacel oudo tie ot tunge kene. Do Rwot oko keto i kome can me dub wan dedede.

⁷ “En oudo kotere kirac, koketo can i kome, do en likame engamo doge yamo akadi kop acel. En oudo eling alinga bala atin oromo kame kotie tero ot ngolo, kede bala oromo kame kotie nyaro yer mere.

⁸En oudo komake di oko ngolo ne kop abongo ateni di oko tere tenge, ngai kame oudo paro pi kite kame anyim mere bino bedo kede? En oudo kotieko kwanye tenge ki lobo me jo akuo, komie eneno can pi dub me jo wa.

⁹ Koribe i yi ates karacel kede jo kotimo gikareco, koyike karacel kede jo kobaro, bed bala en oudo likame ebedo kede tim moro me gero, arabo waco kop moro me angalo.”



¹⁰Rwot waco be, “Manono oudo obedo mit nango pi mine awanon di eko neno can; to mere oudo obedo giayala pi dub. En ebino neno ikwae mege, doko ebino bedo kuo pi kare kalac; En ebino mino mit nango cobere.

¹¹En ebino neno bero kame wok ki lito kame en ebeo iye; ebino ngeno be can kame en eneno likame obedo me nono, di cunye ko bino kwei. Ngatic na kopooore bino mino jo atot doko jo kopooore, en ebino yeno dub gi.

¹²Pi mano, ango abino mine kabedo me wor i dier jo kame pirgi tek, di en eko bino poko kede jo atek jamini kame koyako i yi. En bin ejalo kuo mere doko oudo komare i kom jodubo; aso di en oudo eyeo dub me jo atot, doko elego pi jodubo.”

Isaya 54

Amara ka Rwot but Jo me Isirael

¹Weri, Okwe in ngat kame ical bala adonge ngat kalikame oudo onywal; dip wer di ilelemo pi kilel, in ngat kalikame ibilo aramo me nywal! Pien idwe me dako kame oudo cware oweke bino bedo tot kalamo idwe me dako kame tie kede cware. Manoni Rwot en owaco.

²Nyai eema ni dok lac; med boro me aunon mege di iko guro loc mege di tek!

³In ibino nyiko ikor ni i bad tetu dedede; jo ni bino dwoko lobo kame atekerin apat nataman tie bedo iye. Jo bino donyo bedo i bomban kame nataman jo li iye.

⁴Kur ibed kede lworu, pien likame bobo lewic bino maki; kur imi cunyi dwono, pien likame kobino mini lewic. Wi bino wil kede lewic me kare me aponga ni, doko lewic kame oudo itie kede me bedo apuserut likame ibino yutuno bobo.

⁵Ngat kocwei bino bedo bala cwari; nyinge Rwot me jo yi. Ngat Kacil me Isirael en Ngalak ni; en Rubanga me wi lobo lung.

⁶Isirael, in ical bala nyako kame cware oweke di eko bedo tie kede cwarecuny. Do Rwot tie lwongi pi dok bute di ewaco be,

⁷” Ango oudo ajali pi kare katitidi, do abino dwoki buta kede amara adwong.

⁸Ango oudo akano wanga ki buti, pi kare katitidi pi lilo atek, do ango abino bedo kede cuny me kisa i komi di ako mari nakanaka; manoni en kop kame Rwot Ngalak ni owaco.

⁹“I kare ka Nua bin ango akwongere be likame bobo abino mino pii mwonyo lobo. Kamanono da nataman ango akwongere be likame bobo abino bedo kede wangcuny i komu; likame abino bunano wu.

¹⁰Mori twero kobo, imukuran da kotwero kwanyo tenge, do amara nango kalikame lokere likame bino yai tenge ki buti, doko isikan na me mulem likame kobino



kwanyo tenge.” Manono en kop kame Rwot ngat kame tie kede cuny me kisa i komi owaco.

Yerusalem me Kare me Anyim

¹¹ Rwot waco be, “Okwe in Yerusalem, jo ni tie neno can, kili kede anapakin, doko likame tie ngat kame kweo cuny gi, neningo, ango abino gero acakini ni kede kide me wel.

¹²Ango abino gero ot ni abor malo kede kide kame kolwongo be rubis, irutei ni abino gero kede kide ameny milimili, kede apama ni ako gero kede kide me wel.

¹³ “Ango kikoma abino pwonyo jo ni di gin kiko bino bedo kede mulem me aura.

¹⁴Timo gi kopooore bino mino icungo di itek; ibino bedo bor kede jo kame teri kirac, doko likame ibino bedo kede lworu moro; jo kame teri kirac likame bino noki.

¹⁵Ka dano moro osuri, likame udo ango en kame acwae; dano moroni kame suri bino udo peko pi in.

¹⁶” Neningo, ango en kame acweo ngatet, ngat kame dopo mac di eko teto kede jamini me yi. Ango en kame acweo sirikale da, ngat kame tio kede jamini me yi pi timo nek.

¹⁷Likame tie gi me yi moro kame koiko pi suri kame bino cobo timo tic mere, doko in ibino lono kope me pido dedede kame kokelo i komi. Manoni en gikame jotic ka Rwot udo bala mergi; lono kop gin wok ki buta.” Manoni Rwot en owaco.

Isaya 55

Cuny me Kisa ka Rubanga but Jo

¹ Rwot waco be, “Wun jo dedede kame orio oneko, bia imatunu pii; wun jo kame iliunu kede sente, bia iwilunu cam di ikounu camo! Bianu! Wilunu bwini kede cak abongo sente doko abongo cul moro.

²Pinyo bo kamio wun idubunu sente wu wilo gi kalikame obedo kwon, kede idubunu teko wu i gi kalikame yengo wu? Winyunu kop na, di ikounu camo gikame ber; ikounu bino camo cam kame ber kalamo kede yomcuny.

³ “Cikunu yitu di ikounu bino buta; winyunu, tetekenye ibedunu kuo. Ango abino timo kede wu isikan kame bedo nakanaka, isikan me amara na kalikame lokere, kede kame genere, kame bin amio Daudi.

⁴Nenunu, ango bin akete pi bedo ngatel kede ngapug me atekerin; en oudo ebedo mujura na but gi.

⁵Ibinunu lwongo atekerin kalikame ingeunu, di atekerin kalikame ngeo wu ko ringini butu, pien Rwot Rubanga wu, Ngat Kacil me Isirael otieko mino wu dwongo.”

⁶Mounu Rwot di pwodi etwero udere, kokunu bute di pwodi etie iyapiyapi.



⁷Jo kame timo gikareco miero wek yongayo me kuo gi nono, doko jo kalikame opoore miero wek gikame tie i tam gi; miero gin kidwog but Rwot, tetekeny en kisa make kede gi. Miero kidwog but Rubanga wa, piento en ebino sasiro gi adikinicel.

⁸Rwot waco be, “Tam nango likame cal bala megu, doko yote na da pat kede megu.

⁹Bala kame malo bor kalamo kede piny, kamanono da yote nango kede gikame ango atamo kalamo megu.

¹⁰ “Kop kame ango awaco cal bala akako kede kot kame wok ki malo, di likame kiko dok tuno di kitieko bido lobo. Gin kimio kodere tui di kiko dongo, kimio kodi me acuwa kede cam kame kocamo bedo tie.

¹¹Kop kame ango awaco da bino bedo kamanono; likame ebino dwogo buta abongo timo gikame ango acwae iye, do en ebino cobo timo gikame ango amito ne timo.

¹²” Wun ibinunu yai ki Babilon kede kilel; ibinunu dok paco kede mulem. Mori kede imukuran bino dipo wer di wun ibeunu i nget gi, doko yen dedede bino bapo cing gi.

¹³Yen saipuras bino tui akaka okuto; yen kame ngwece gi kur bino tui akaka ocokocok; manono bino bedo gianena kame bedo nakanaka, gikame poo wi jo i kom gikame ango Rwot atieko timo.”

Isaya 56

Jo ka Rubanga bino Ribo Jo me Atekerin dedede

¹Rwot waco be, “Timunu gikame poore kede kame ber, pien ango ayapuno lako wu.

²Etie kede yomcuny dano kame timo gi noni, ngat kame ketakin iye kitek; dano kame gwoko Sabato di likame emunao en, doko likame etimo gimoro arac.”

³Kur imiunu ngakumbor kame otieko bino but Rwot wac be, “Rwot ateteni bino poka tenge kikom jo mege.” Kur imiunu abwocit wac be, “Ango acal do bala yat kotuo.”

⁴Rwot waco ne abwocin be, “Ka wun igwokunu Sabato na di itimunu gikame yomo cunya kede di iketakinunu kitek i gwoko isikan na,

⁵ango abino mino koyutuno nyingu i tempulo na kede i diere me jo na pi kare kalac kalamo ka koto oudo inywalunu idwe awobe kede anyira. Abino mino wu nying kame bedo nakanaka, nying kalikame bino rwenyo.”

⁶Rwot waco kaman ne jokumbor kame bino bute, jo kame mare di kitimo tic mere, jo kame gwoko Sabato di likame kimunao en, kede kiketakin gwoko isikan mere be,

⁷ “Ango abino kelo wu i moru na kacil di ako mino wu yomcuny i oda me ilega, doko ako bino gamo giayala awanga wu kede giayala apat mege i wi alutari na; pien oda kobino lwongo be ot me ilega pi jo dedede.”



⁸Rwot Rubanga ngat kocoko jo me Isirael kame oudo kotero tenge waco be en ebino coko jo apat da emedo i kom gi.

Owaco ne Jotel me Isirael Raco

⁹Rwot otieko waco ne atekerin apat dedede, pi bino bala leini me obar di gin kiko neko jo mege.

¹⁰En ewaco be, “Jotel dedede kame koketo pi koto kwenyaro jo na, wang gi oto! Likame tie gikame kingeo. Gin kical do bala igwogin kalikame gweo; kibedo buto abuta di kileko. Okwe, kite kame kimaro kede nino!

¹¹Gin kical bala igwogin kame tie kede kiru atek; likame tie gikame romo gi. Jokwat nogi likame tie kede niang; gin dedede kitieko lokere lubo yote kame mako gin. Ngat acelacel timo bala kame cunye mito pi bero kame make.

¹²Gin kilwongere be, ‘Bia ootunu oomunu bwini, di okounu mato akec mere paka romo wa! Ceng adiki bino bedo cal acala bala tin, doko ebino bedo ber kalamo.’ “

Isaya 57

Kowaco ne Jo me Isirael Raco pi Woro Caljwogi

¹Kame jo kopoore oto, likame tie ngatamoro kame paro kop i kom to gi. Kokwanyo jo kame maro Rubanga di oko tero, do likame tie ngatamoro kame niang be kotie tero gi tenge pi kwanyo gi ki can.

²Jo kopoore donyo i kuo me mulem ka gin kito; gin kibino wei i kabuto gi.

³Do wun, bianu kan! Wun jojwogi, joadote kede imalayan.

⁴Ngai kame wun itienu tuko kede? Ngai kame wun ingangamunu ne dogu di iwowotunu ne lebu pi nywaro? Benyo, likame wun ibedunu jodubo kede joangalo?

⁵Gikame wun iparunu kenekene en timo caro i dud yen dedede oduko, kakame koworo kiye caljwogi. Wun ingolunu idwe wu bala giayala i kakame obarere me lela i aditoto.

⁶Wun iyerunu kide apwot me aditot pi bedo rubanga wu; manono meru. Wun ionyunu negi giayala amata doko iterunu negi giayala me alos. Iparunu be cunya yom pi gi nogi?

⁷Wun ipetunu kabuto wu malo i wi mori aboco, di ikounu yito kunono pi mino giayala.

⁸Iketunu caljwogi wu i ngei ikekon kede i ngei ipirin me ikekon. Wun iwekanu; igonyunu igoen wu di ikounu yito i kabuto wu kame lac kede ipalon wu kame ipatanunu kede gi pi buto kede wu.

⁹Wun isutunu kede moe angwe kur di ikounu ot woro rubanga Molek. Wun iorunu jo oto kakame bocoboco, kiton i kabedo me jo oto pi mono ne wu rubangan me awora.



¹⁰Iolunu i wire wu nogo, do likame iwacunu be kony mere li. Mit me cunyu dwong i kom gin omio imeedenu ameda i tim nono.

¹¹Rwot penyere be, “Rubangan mege igonogo kame wun ilworunu, tetekeny wun iwacunu na kope me angalo di wi wu ko wil keda, arabo di likame ikounu tamo pira? Benyo, mam wun likame ilworanu pien ango abedo ling i kom dub wu pi kare kalac?”

¹²Wun itamunu be gikame itimunu opoore, do ango ayaro nyuto kakaler gikame wun itimunu di likame kiko konyo wu.

¹³Ka wun ikokunu pi mito kony, poore caljwogi kame wun icokunu nogo laku! Yamo bino kuto gi etero gi tenge. Do jo kame ringini gwokere buta, lobo bino doko mergi doko gin kibino bedo i moru na kacil.”

Cikere ka Rubanga pi Mino Kony kede Cango

¹⁴Rwot waco be, “Iikunu, iikunu yongayo ne jo na; kwanyunu tenge gi dedede kame romo getaro gi.”

¹⁵” Ango en Rubanga kame tie malo, Rubanga kacil, ngat kame bedo nakanaka. Ango abedo kakame tie malo, kabedo kacil, doko abedo da kede jo kame mwolere di kiswilaro, tetekeny adwok cuny gi kede gen gi.

¹⁶Ango en kame amio kuo but jo na, doko likame abino bedo pido gi nakanaka arabo lilo kede gi atwal.

¹⁷Ango oudo alilo kede gi pi dub gi kede eranga gi, di ako mino gi alola, doko ako pwono negi. Do gin kiko meede dok lubo yote gi.

¹⁸” Ango atieko neno tim gi, do ango abino cango gi. Abino telo gi di ako kweno cuny gi, doko da abino kweno cuny jo kame tururo.

¹⁹ Ango amio mulem but jo dedede, but jo kame tie kakiyapi kede but jo kame tie kakabor! Ango abino cango jo na.

²⁰Do jo kame timo gikareco cal bala nam kalikame kwei; nam kame ebuka mere likame weko kelo cwoto.

²¹ Jo kame timo gikareco li kede mulem.” Manoni en kop kame Rubanga na owaco.

Isaya 58

Kanyo Kec me Ateteni

¹Rwot waco be, “Lelemo kitek, kur iling akadi acel! Lelemo kede dwani amalo bala agwara! Wace jo na jemo gi; tuc ne jo me ot ka Yakobo dub gi.

²Gin kiwora buli ceng, di kiwaco be cuny gi mito kitek ngeno yote na. Gin kom kitimere bala ateker kame timo gi kopooore, ateker kalikame oweko iswilia ka Rubanga gi. Kipenya pi ngolo negi kop kakare, doko cuny gi yom pi wora.”

³Jo penyere be, “Ka Rwot likame neno kanyo kec wa, pinyo kame mio wan okanyo kec? Pinyo kame mio wan omio kom wa neno can ka en likame eparo gimoro iye?”



Rwot waco negi be, “Nenunu, ceng kame wun ikanyunu kede kec nogo en bobo kame wun iparunu kede piru kenekene, di ikounu tero jotic wu kirac.

⁴Kanyo kec wu mio wun ibedunu ger, di ikounu lok kede ikounu yi. Akodi kanyo kec wu nono likame mia awinyo kwac wu.

⁵Iparunu be akodi kanyo kec wu nono en kame anga amito, ceng kame wun imiunu kede komu neno can di ikudunu wi wu piny bala emusala? Arabo iparunu be ngapo igoen me iturur kede bebelo i buru en kame anga amito? Benyo, mam manono en gikame wun ilwongunu be kanyo kec? Iparunu be cunya bino bedo yom iye?

⁶” Epone me kanyo kec kame anga amito en ine: wekunu tero jo kirac, kede gonyunu jo kame kotweo di ikounu weko gi kioti.

⁷ Nywakunu cam wu kede jo kame kec oneko kede iterunu jocan kame li kede miere i ude wu. Miunu igoen but jo kame li kede gi me angapa, doko kur idagunu konyo joawade wu.

⁸” Di do lero na ko yabere butu bala lero me obai, di ikounu cango awakawaka. Anga abino bedo kede wu nakanaka pi gwoko wu; abino telo ne wu yongayo, doko da abino gwoko wu ki cen ngei wu.

⁹Ka ibinunu lego buta, anga abino gamo dog wu. Ka ibinunu koko buta pi konyo wu, anga abino waco ne wu be, ‘Anga ine!’ “Ka wun ijikunu tero jo kirac, cicimo jo, yamo areco;

¹⁰ka wun imiunu cam but jo kame kec oneko kede imiunu jo kame tie kede rem jamini kame mitere ne gi, lero bino rieny butu di colo kame itieny iye ko lokere doko bala lero me i dier iceng.

¹¹Anga abino telo wu nakanaka di ako mino wu gikame mitere ne wu i kabedere kotuo. Abino mino ibedunu tek di itieny kede yotkom. Ibinunu bedo cal bala potu kame pii oromo kiber, bala atan kalikame tuo.

¹²Ibinunu bobo gero kabedere kame oudo obedo amejeko pi kare kalac. Ibinunu gero gi i kom acakini acon. Kobino lwongo wu be joik apama, jo kame odwoko ude kame bin kodudubo.”

Giamia me Pwoc pi Gwoko Sabato

¹³Rwot waco be, “Ka wun iterunu Sabato bala gikacil di likame imounu gikame ber piru kenu i ceng kacil nono; ka wun iterunu Sabato bala ceng me yomcuny, kede bala ceng kacil ka Rwot, ceng me awora kalikame poore lubo iye mit me cunyu kenu, arabu mono gikame mako wu kenu, arabu yamo atatai,

¹⁴ibinunu udo yomcuny i timo tic na. Anga abino mino koworo wu i wi lobo lung, di ikounu bedo kede yomcuny i lobo kame bin anga amio kwaru wu, Yakobo.” Anga Rwot atieko waco.

Isaya 59



Enabi Owaco ne Jo Raco pi Dub gi

- ¹Nenunu, likame be pi Rwot odoko goro en komio likame emito lako wu arabo be yite oding en komio likame ewinyo kwac wu.
- ²Do dub wu en komio en likame ewinyo kwac wu. Dub wu en kotieko poko wu kede Rubanga wu. Dub wu en komio en ekano wange kibut wu, tetekeny kur ewiny kwac wu.
- ³Pien cing wu opwokere kede remo, doko lwet wu da dub opong iye; dog wu waco kope me angalo, leb wu da weweo kope me tim areco.
- ⁴Likame tie dano moro kame pido dano ocelu i kop me ateni. Wun iketunu gen wu i kope me angalo pi lono pido. Ibedunu paro tam me timo can i kom jo icegun di ikounu timo dub.
- ⁵Gikareco kame wun i iikunu pi timo cal bala beko me abeon me ipom, arabo timo egoe kede bwoi me otiemotiem; ngat kame camo abeon nogo to, doko ka koneneko abeon nogo, imosogan wok kiye.
- ⁶Bwoi me otiemotiem likame karuno doko egoe, doko likame kokaruno ngape. Wun itimunu gikareco, doko itienu kede tim me gero.
- ⁷Wun tien wu dwir ot timo gikarac, doko ionyarunu ot neko dano ali kede raco moro; gikame wun iparunu i tam wu obedo tam me timo gikareco. Kadedere dedede kame wun iotunu iye idudubunu en di ikounu weke edong nono.
- ⁸Wun likame ingeunu bedo me mulem, arabo timo ne jo icegun gikame poore. Ilubunu yote kogomugomun, doko jo kame lubo yote nogo likame bino udo mulem.

Jo Otucu Dub gi

- ⁹Jo waco be, “Wan likame kotimo ne wa gikame poore, doko Rubanga likame lako wa ki cing jo kame tero wa kirac. Wan oudo ogeno udo lero, do colpiny kenekene en kame tie.
- ¹⁰Wan orarapo piny bala imuduka kame rarapo apama; orarapo piny bala jo kame wang gi li. Wan ogetenu i dier iceng ineno bala iwor; wan do ocalunu acala bala jo otieko to.
- ¹¹Wan dedede ongururunu bala edubu, doko okokunu kede iturur bala aweleko. Okurunu Rubanga pi lako wa ki cing jo kame tero wa kirac, do likame tie gimoro kame timere.
- ¹²” Rwot, dub wan odure adura i nyimi, doko kipido wa. Wan ongejo dub wa dedede.
- ¹³Wan otieko turo iswilia ni, odagi, doko otieko dagi lubi. Oyamo kenekene kope me tero jo kirac kede jemo ni. Gikame wan otamo en kope me angalo kede yamo kope nogo i cuny wa.
- ¹⁴Ngolo kop me ateni odoko li, doko tim kopooore bor kibut wa. Ateni likame komito winyo i kakame kopido iye, doko tim me ateni likame noko kunono.



¹⁵Ateni li, doko ngat kame weko tim areco kotimo ne can.”

Rwot Oikere pi Lako Jo mege

Rwot oneno manoni di cunye likame oko bedo yom iye, pien ngolo kop me ateni oudo li.

¹⁶En ebedo kede ur pi neno be likame oudo tie dano moro kame romo cungo pir jo kame kotie tero kirac. Manono en komio en eko tic kede twer mere pi lako gi; poore mere en komio en etimo manoni.

¹⁷En engapo kuo kopooore bala ebuku me gagao kor, kede twer me lako jo bala ocoro atek me gwoko wic. En ebino bedo kede cunye me timo onyanga bala egoe mere me angapa, di eko umere kede lilo bala egoe adoka.

¹⁸Rwot bino culo kwor i kom jokwor mege di lubere kede gikame gin kitimo, akadi jokwor kame tie i lobere me dog nam adwong.

¹⁹Cako ki bad tetu kide tuno i bad tetu tim jo dedede bino lwore, gin kibino lwooro twer mere adwong. En eyaro bino bala pii me ecilet kame ringo kitek, pii kame yamo tie kolo.

²⁰Rwot waco be, “Ango ayaro bino Sion di ako lako wun ikwae ka Yakobo; abino lako jo dedede kame lokere tenge ki dub gi.

²¹Isikan kame anga atimo kede wu ine: twer na kame amio wu, kede kop na kame atieko keto i dog wu, likame bino yai tenge kibut wu arabo kibut idwe wu amoto ikwae wu cako nataman tuno ikar kede ikar.”

Isaya 60

Deyo me Yerusalem i kare me Anyim

¹Yai, Yerusalem, di iko rieny bala ceng; deyo ka Rwot tie rieny i komi!

²Colpiny bino umo lobo, doko colpiny kacucuc bino umo atekerin; do lero ka Rwot bino rieny i kom in, doko deyo mere bino neeno buti.

³Atekerin bino bino i lero kame in itie kede, doko abakai da bino bino i lero kame tie yabere buti bala ru me piny.

⁴Ting wangi malo di iko ngoloro ngeti rimaro; jo ni tie cokere, gin kitie dwogo buti; awobe ni bino bino ki kakabor, doko idwe ni anyira kobino tingo atinga bala idwe atitino.

⁵In ibino neno manoni di cunyi ko pong kede ilel; ebino lelepo cunyi di iko ilel, pien kobino kelo ni abar me atekerin; kobino kelo gi di kongolo kede gi i nam.

⁶Aguraguran bino umi, aguraguran kame pwodi dongo adonga me Midian kede Epa. Gin kibino bino ki Seba di kikelo saabu kede odok angwe kur, di kiko bino pako Rwot pi gikame en etimo!



- ⁷Romini dedede me Kedar, kede imerekekin me Nebaiot kobino kelo buti bala giayala; kobino yalo gi i wi alutari pi yomo cuny Rwot, di Rwot ko bino mino ode me deyo dwongo.
- ⁸Alu ige kame por kede imerin bala idoun, arabo kame cal bala امام kame tie dok i ude gi?
- ⁹Jo ni kame tie i lobere atie i dog nam adwong tie kuro Rwot. Imerin me Tarusi en kame bino cako bino, pi kelo idwe ni ki kakaboco. Gin kibino mako siliba kede saabu gi kibino kede, pi woro Rwot Rubanga ni, Rubanga kacil me Isirael, piento en etieko mini dwongo.
- ¹⁰Rwot waco kop i kom Yerusalem be, “Jokumbor bino gero apama ni bobo, doko abakai gi bino timo ni tic. Ango oudo alilo en komio ako mini alola, do nataman pi bero na, ango atieko bedo kede cuny me kisa i komi.
- ¹¹Irutei ni likame kobino cego; iwor kede iceng gin kibino bedo twolo, tetekeny atekerin bed kelo ni abar gi, di kotelo abakai gi i esirit me jo kame kobwono.
- ¹²Atekerin kalikame bino timo nin tic kobino muducaro gi atwal.
- ¹³” Yerusalem, deyo me Lebanon kobino kelo buti; yen mege abeco kobino kelo me tubuso Tempulo na, di kabedo kame ango ateno iye tiena ko bedo ibus.
- ¹⁴Ikwaee me jo kame bin teri kirac bino bino di gin kiko luro wi gi piny buti pi nyuto wor gi. Jo dedede kame bin cai bino rieberere piny i tieni. Gin kibino lwongi be, ‘Sion, Bomba ka Rwot, Ngat Kacil me Isirael.’
- ¹⁵” Bed bala jo otieko weki, doko cuny gi dagi, dano moro kame beo buti da li, do ango abino mini dwongo nakanaka, iko doko kabedo me ilel ikar kede ikar.
- ¹⁶Atekerin adongodongo kede abakai atek me wi lobo bino gwoki, di in iko bino ngeno be ango Rwot en ngalak ni, ango Won Twer me Isirael.
- ¹⁷” Ango abino kelo ni saabu akaka nyonyo buronsi, siliba akaka nyonyo ayon; nyonyo buronsi akaka ebao, nyonyo ayon akaka kide. Abino mino mulem bedo bala ngapug ni, kede tim kopoore ko bedo bala ngatel ni.
- ¹⁸Tim me gero likame bobo bino winyere i lobo ni, peko kame yi kelo arabo amuducar likame bobo bino bedo tie i lobo ni. ‘Alako’ en nying kame in ibino mino apama ni me cel, ‘Pak’ en nying kame in ibino mino irutei ni.
- ¹⁹”Ceng en kalikame bobo bino mini lero i esawa me iceng, akadi duwe da likame en kame bino mini lero iwor; ango Rwot, en kame abino bedo lero ni nakanaka, di ako kelo ni deyo.
- ²⁰Kare ni me iturur bino jik, ango Rwot en kame abino bedo lero ni kame bedo nakanaka. Ceng nin likame bobo bino donyo, duwe ni da likame bino to.



²¹Jo ni dedede bino timo gikame poore; lobo bino doko mergi atwal. Gin en jange kame ango oudo apito, tic me cinga, tetekeny gin kimi deyo na ngere but jo dedede.

²²Akadi jo ni me diakal atitidi, bino doko twon ateker. Ka kare otuno, ango abino mino manoni timere awakawaka. Ango en Rwot!”

Isaya 61

Kop Aber me Alako

¹ Tipo ka Rwot tie i koma. En etieko yera di eko oora pi kelo ne jocan kop aber, pi cango jo kame tie kede cweruncy, pi waco ne jo kame komako kede ne mabus kop kame mako gonyo gi.

² Rwot oora pi bino waco ne jo be kare otieko tuno kame en bino nyuto kede bero mere but jo mege, di eko timo onyanga i kom jokwor gi. En etieko ora pi bino kweno cuny jo dedede kame tururo,

³pi mino jo kame tururo i Sion yomcuny kede ilel akaka cweruncy, wer me pak akaka iturur. Gin kobino lwongo gi be yen oak kame Rwot en kopito. Gin dedede kibino timo gikame poore, di kiko nyuto deyo ka Rwot.

⁴Gin kibino gero bobo bomban kame oudo obedo amejeko pi kare kalac.

⁵Jo na, jokumbor bino bedo jotic wu. Gin kibino gwoko romini wu, kibino puro poti wu di kiko gwoko olok wu.

⁶Do wun kobino lwongo wu be josaseredoti ka Rwot, jotic ka Rubanga wa. Wun ibinunu camo abar me atekerin, di ikounu bedo i mulem pi abar gin.

⁷Wun oudo komio wu lewic adikinicel, oudo likame komio wu wor, pi manono ibinunu udo mulem adwong kalamo, doko ibinunu bedo kede yomcuny nakanaka.

⁸Rwot waco be, “Ango amaro tim kapoore, do cunya dagi tim me yak kede me turo iswil. Ango abino bedo kede genere di ako culo jo na kakare, doko abino timo kede gi isikan kame bedo nakanaka.

⁹Ikwae gi bino ngere i diere me atekerin, jo dedede kame neno gi bino ngeno be gin kibedo jo kame ango atieko mino winyo.”

¹⁰ Ango abino ilel pi gikame Rwot otieko timo. Cunya bino bedo yom i kom Rubanga na; piento en etieko ngapo na alako bala egoe, etieko ngapo na tim kopooore bala ekanso, bala kame eteran ngapo kede ocoro aber pi tubuso kome, kede bala kame ateran tubuso kede kome kede mwolere.

¹¹Ateteni bala kame kodi tui kede di eko dongo, kede bala kame poto mio kede gikame kocuwo iye tui, kamanono da Rwot Rubanga bino mino tim kame poore kede pak wok kibut atekerin dedede.

Isaya 62



- ¹Ango likame abino ling pir Sion, doko likame abino wei pir Yerusalem, tuno di alako otuno ne bala ru me piny, di eko donyo liel bala toc.
- ²Atekerin bino neno tim me laki, doko abakai dedede bino neno deyo ni. Kobino lwongi kede nying anyen, nying kame Rwot kikome en kame bino mino.
- ³In ibino bedo cal bala ocoro acil me ajakanut atie i cing Rwot, ocoro me pug atie i cing Rubanga ni.
- ⁴Likame bobo kobino lwongi be “Bomba kame Koweko,” doko lobo ni da likame bobo kobino lwongo be “Dako kame Koweko,” do kobino lwonge be “Cuny Rubanga Yom i kome.” Lobo ni kobino lwongo be, “Konyome,” pien cuny Rwot yom i komi, doko en ebino bedo cal bala cwar lobo ni.
- ⁵Bala kame awobi nyomo kede nyako, kamanono da ngat kocwei bino nyomi. Bala kame eteran lelo kede pi ateran mere, kamanono da Rubanga bino lelo piri.
- ⁶Ango atieko keto jodar piny i wi apama ni, Okwe Yerusalem; iwor kede iceng gin likame miero kilingi. Gin miero kipoi wi Rwot i kom cikere mege di likame kiweko wie wil.
- ⁷Gin miero kur kimie kare me wei tuno di en etieko sipakino Yerusalem, di eko mine edoko bomba kame nyinge iruo i wi lobo lung.
- ⁸Rwot otieko kwongere kitek, doko pi teko mere, en ebino timo gi nono. En etieko waco be, “Likame bobo abino mino cam wu doko me jokwor wu. Jokumbor likame bobo bino mato bwini kame wun icanenu pi udo.
- ⁹Do wun jo kame ipurunu di ikounu koko cam wu ki poti, en kame ibinunu camo cam wu di ikounu pwono Rwot. Wun jo kame igwokunu olok di ikounu ngwedo, en kame ibinunu mato bwini i diakal me tempulo na.”
- ¹⁰Jo me Yerusalem, donyunu ooko me bomba, iikunu yongayo ne jo wu kame tie dwogo! Iikunu yongayo adwong; depunu kide tenge kiye! Sipunu imendera tetekeny atekerin karuno neno.
- ¹¹Rwot otieko waco ne jo me piny lung pi waco ne jo me Sion be, “Nenunu, Rwot tie bino lako wu; en etie bino kede giamia me pwoc mere.”
- ¹²Wun kobino lwongo wu be “Jokacil” , “Jo kame Rwot Otieko Lako” . Yerusalem kobino lwongo be “Bomba kame Rubanga maro” , “Bomba kalikame Rubanga Oweko” .

Isaya 63

Rwot Obwono Atekerin

- ¹ “Ngai ino kame tie bino di ewok ki bomba me Bosira kame tie i piny me Edom? Ngai inonono kame tie bino kede teko kede twer adwong di engapo igoen kobokere



bubu?” Rwot kom inonono kame tie bino pi waco kop me alako, en ngat kame ekaruno lako jo piento en etek.

²” Pinyo bo komio igoen mege obokere bala me ngat kame nyonyono olok pi bino bwini?”

³ Rwot gamo be, “Ango atieko nyonyono atekerin bala olok abongo ngatamoro konya. Ango anyonyono gi di alilo, omio remo gi opwoko igoen na dedede.

⁴Ango atimo kamanoni pien kare me lako jo na oudo otieko tuno, doko ceng me timo onyanga pirgi oudo tie i cunya.

⁵ Ango angoloro piny, di ako udo be likame oudo tie ngatamoro kame twero konya. Anganyo wanga pi mito neno, do likame oudo tie ngatamoro kame twero mina teko. Aso, anga ako tic kede teko na di ako lako gi, doko lilo na en komia teko me timo manoni.

⁶Ango ako nyonyono atekerin dedede di ako nyinyito gi pien oudo alilo. Ango aonyo remo gi piny i lobo.”

Bero ka Rwot but Jo me Isirael

⁷Ango abino tatamo gikame Rwot otieko timo pi kisa mere, jamini kame mio wan poore opake. En etieko timo bero adwong but jo me Isirael pi cuny me kisa mere kede pi amara mere kalikame lokere.

⁸Rwot owaco be, “Ateteni gin en jo na; likame kibino ngala.” Di en eko lako gi

⁹ki can dedede kame oudo kitie iye. Likame malaika en kame bin olako gi, do Rwot kikome. En elako gi pi amara kede cuny me kisa mere. I kare kasek en oudo egwoko gi nakanaka,

¹⁰do gin kiko jemo ne di kiko wango cuny tipo kacil mere. Pi mano, Rwot oko doko ngakwor gi, di en kikome eko yi kede gi.

¹¹Di do gin kiko yutuno gikame bin otimere i kare kasek, i kare ka Musa, ngatic ka Rwot, di kiko penyere be, “Kara Rwot ngat kame bin olako jo kede jotel gi di kibeo i dier nam, nataman do tie tuai? Rwot kara tie tuai, en ngat kame bin emio Musa tipo kacil mere?”

¹²⁻¹³ Rwot kara tie tuai, en ngat kame pi twer mere bin etimo jamini adongodongo di etio kede Musa? En bin epoko pii me nam i diere di eko telo jo mege beo ki dier nam. Manono en bin etimo pi mino nyinge bedo iruo nakanaka.” Rwot bin otelo gin ngolo nam di kioto bala asigira kame tie ot ki wi tim. Gin bin likame kigete akadi acel.

¹⁴Bala kame kotero kede dok cam i aditot, kamanono da Rwot bin oko mino jo mege wei. En bin etelo jo mege di manono oko kelo ne wor.

Ilega me Kwano Kisa kede Kony



¹⁵Okwe Rwot, ngoloro wa ki malo kabedo ni kacil, en kabedo me deyo, di iko neno gikame tie timere. Cunyi kame paro pirwa do tie tuai? Twer ni kara tie tuai? Ani amara ni kede cunyi me kisa ni? In itieko kwanyo gi kibut wa.

¹⁶In en papa wa. Bed bala joakwari wa Aburaam kede Yakobo kwia wa, do in, Okwe Rwot, ibedo papa wa; cako riki sek in ibedo Ngalak wa.

¹⁷Okwe Rwot, pinyo bo komio in imio wan oparao tenge ki yote nin? Pinyo komio in imio wan obedo joepali, tetekeny likame olwori? Lokere idwog but wa pir jotie ni, kede pir jo me ikekon kobedo megii.

¹⁸Wan jo ni kacil, jokwor wa oudo oriamo wa tenge pi kare katitidi; gin kitieko reto pinyo kabedo ni kacil.

¹⁹Wan otieko kare kalac di obedo bala jo kalikame in en ipugo, ineno do bala wan likame obedo jo ni.

Isaya 64

¹Okwe koto di in iko yabo malo iko bino piny, tetekeny mori neni di gin kiko yayangun!

²Gin koto kiyayangun bala pii kame gugunyo i mac kodop. Bia imi jokwor ni ngei, tetekeny kineni di kiko bedo kede mielkom!

³I kare moro in bin ibino di iko timo jamini kame kelo lworu, gikame wan oudo likame ogeno be twero timere; mori bin oneni di gin kiko yayangun.

⁴Cako riki sek, likame tie ngatamoro kotieko neno arabo winyo kop i kom Rubanga moro apat kame cal bala in, ngat kame timo gikame cal kamagonogo ne jo kame gene.

⁵Nakanaka in igamo jo kame cunyi gi yom i timo gi kopooore, jo kame yutuno bedo iepone kame in imito negi. In oudo cunyi owang kede wa, do wan oko meede kede timo dub; bed bala in ibedo tie kede gero adwong, do wan obedo meede timo dub cako i kare kasek.

⁶Wan dedede otieko doko cal do bala jo kopwokere; akadi tim wan kopooore dedede cal do bala egoe kimodokok. Dub wa otieko mino odoko cal bala boke kame ner di yamo ko kuto gi tero gi tenge.

⁷Likame tie ngatamoro kame lego buti, arabo kame moko i komi pi mito kony. In itieko kano ne wa wangi di iko jalo wa i dub wa.

⁸Do di in, Okwe Rwot, en papa wa. Wan ocal bala elupe, do in ngacwei agune. Wan obedo tic me cingi.

⁹Pi mano, kur cunyi wang kede wa kitek ateka, Okwe Rwot, doko kur ibed yutuno dub wa nakanaka. Neningo, wan dedede obedo jo ni.

¹⁰Bomba ni kacil otieko doko wi tim; Yerusalem do tie ameje kame jo otieko weko.



¹¹Tempulo wa, odi acil, kakame bin joakwari wa paki kiye, kotieko wango. Kabeledere wa dedede kame oudo omaro otieko doko amejeko.

¹²Ingei neno magonogi dedede, Okwe Rwot, benyo, iyaro kanyo kop di likame iko timo gimoro, doko di iko mino wa alola atek ateka?

Isaya 65

Rubanga mio Jojemo Alola

¹ Rwot owaco be, “Ango oudo atieko iikere pi gamo kwac ka jo na, do gin likame kiko kwana. Ango oudo atieko iikere pi gin wuda, do gin likame kiko mona. Bed bala ateker nono likame okwaa, do anga abedo waco negi be, ‘Ango ine, anga ine.’

² Anga abedo tanga cinga piny yuluyul but jojemo, pi kwano gi be kidwog buta, gin jo kame kilubo yongayo kalikame ber di kilubo iik gin ken gi.

³ Gin kibedo wango cunya abongo lewic. Gin kimio giayala but caljwogi i poti, doko kiwango odok angwe kur i wi alutari me caljwogi.

⁴ Gin kioto bedo i atesin, doko iwor gin kioto bedo kabeledere me mung. Gin kicamo ringo me epege, doko kimato cwe me ringo me kwer kame tie i sepulan gi.

⁵ Di do kiko waco ne jo icegun be, ‘Cungunu tenge, kur inokunu wa; wan jokacil twatwal, likame wun ipoorenu mulo wa! ‘Jo nogi cal bala yiro kame kwikwio uma. Lilo na i kom gi cal bala mac kame liel piny yuluyul.

⁶” Neningo, anga atieko wandiko kop piny kamane: Anga likame abino ling alinga, do abino culo gi; abino culo gi cul kame romo gi

⁷ pi dub gi kede me joakwari gi. Gin kitieko wango odok angwe kur i wi mori di kiko yamo kirac i koma. Anga abino mino gi alola kame romo pi dub gi.”

⁸ Rwot waco be, “Bala kame bwini udere kede ki anyakini me olok, jo waco be, ‘Kur idudubo en, pien gikame ber tie iye, ‘anga da abino timo kamanono pir jotie na, di likame ako muducaro gin dedede.

⁹ Anga abino mino jo me Isirael ikwae kame yai ki ekeko ka Yuda, di gin kiko bino mino lobo na kame mori tie iye doko mergi. Jo na kame ayero, jotie na, bino bedo kanono.

¹⁰ Gin kibino wora. Di do elet me Saron i bad tetu tim kede aditot me Akor i bad tetu kide ko bino doko kakwat gin, kakame doke kede romini gi camo iye di kiko urako.

¹¹” Do likame ebino bedo kamanono ne wun jo kame idaganu, wun jo kame wi wu wil kede moru na kacil, di ikounu mino giayala wu me cam kede bwini but rubangan kame wun iwacunu be mio jo winyo.

¹² Anga abino mino koneko wu kede epima, pien kakame anga alwongo wu kede, wun likame ikounu gamo doga, akadi winyo kop na kakame anga oudo ayamo kede. Wun itimunu gikarac i wanga, doko iyerunu timo gikame cunya dagi.



¹³Pi mano, ango awaco ne wu be jotic na bino bedo tie kede giacama kede giamata kame romo gi, do wun ibinunu kanyo kec kede orio. Jotic na bino ilel do wun lewic bino mako wu.

¹⁴Jotic na bino wer pi yomcuny, do wun ibinunu boroboro koko kede aramacuny atek.

¹⁵Jo na kame ayero bino tic kede nyingu me timo ilam. Ango Rwot Rubanga abino neko wu, do abino mino jotic na nying anyen.

¹⁶Di do ngatamoroni kame kwao winyo i lobo ko bino kwano winyo i nyinga, ango Rubanga kame genere. Doko ngat kame kwongere, ko bino kwongere i nyinga, ango Rubanga kame genere. Peko wu me kare kasek udo otiek, doko wia udo otieko wil kede gi.”

Cwec Anyen

¹⁷ Rwot waco be, “Ango atie cweno malo anyen kede lobo anyen. Gikame otimere i kare kasek likame bobo kobino yutuno, doko likame kibino bino i tam ka ngatamoro.

¹⁸Do bedunu kede yomcuny di ikounu ilel nakanaka pi gikame ango atie cweno. Yerusalem anyen kame ango atie cweno ilel dwong iye, doko jo mege yomcuny dwong negi.

¹⁹ Ango abino ilel pi Yerusalem, doko cunya bino bedo yom pi jo mege. Dwan moro me koko likame bino winyere iye, arabo koko moro me can.

²⁰Idwe kame konywalo di ko bedo kuo pi ceng anonok di kiko to likame bino bedo tie iye, akadi dano adwong kalikame bino tieko kare me kuo mere lung. Dano kame bino to di mwakini mege me dongo tie tol acel, kobino tero be en oudo pwodi eponga. Doko ngat kame bino to di pwodi mwakini mege me dongo likame oromo tol acel kobino tero be oudo kolame.

²¹Jo bino gero ude di kiko bedo i yi gi; kibino pito olok di gin kiko camo anyakini gi.

²²Jo likame bino gero ude di jo apat en kame ko bino bedo i yi gi. Doko likame kibino pito olok gi di jo apat en kame ko bino camo. Jo na bino bedo kuo tieko kare kalac bala yen. Jo na kame ayero bino udo bero me tic me cing gi.

²³Likame kibino cane timo tic nono, doko idwe gi likame bino riamo kede peko. Ango abino mino gi winyo karacel kede ikwae gi.

²⁴Di pwodi gin likame kikwaa, ango abino gamo kwac gi, doko di pwodi gin likame kitieko waco gikame kitie kwano, ango abino winyo kwac gi.

²⁵ Ipeon kede idwe me romini bino cam karacel; inguon bino camo arienge bala dok, doko cam me twole bino bedo apua. Gin likame kibino kakao jo arabo mino ngatamoro awanon i wi moru na kacil.”

Isaya 66

Rwot Ongolo Kop ne Atekerin



- ¹ Rwot waco be, “Malo obedo kakame ango apugo kiye, doko wi lobo obedo abanya me teno tiena. Ot kacal kamene en kame wun ikarununu gero nango? Doko kabedo kacal kamene en kame ango aromo wei iye?”
- ² Gi nogi dedede ango en kame acweo. Pi mano, gin dedede kibedo mega. Do jo kame ango cunya yom i kom gi, gin jo kame mwolere kede kame swilaro, jo kame lwora di kitimo gikame ango awaco negi.
- ³” Jo timo bala kame cuny gi mito. Kibut gin, apokapoka moro li ka gin kineko twon bala giayala arabo kineko dano bala giayala; arabo kimio giayala me atin oromo amoto kiminaro ngut ogwok; arabo kimio giayala me alos amoto kimio giayala me remo me epege; arabo kimio giayala me odok angwe kur amoto kilego but caljwogi. Gin kitieko yero timo gikame cuny gi mito, doko cuny gi yom i kom tim gi me kwer nogo.
- ⁴Ango da abino yero timo ne gin can, di ako bino timo negi gikame gin kitie lworonono; pien kakame ango alwongere kede, likame bin tie ngat kame oko gamo dogo; kakame ango ayamo kede gin likame kiko winyo; do gin kiko timo gikarac i wanga, di kiko yero timo gikame oudo cunya dagi.”
- ⁵Winyunu kop kame Rwot tie waco, wun jo kame ilworenu doko itimunu gikame en ewaco. En ewaco be, “Jo wu mogo cuny gi kec i komu, doko kidagi wu pira. Gin kinyero wu di kiwaco be, ‘Ber Rwot nyut twer mere adwong, tetekeny wan onen ilel wu.’ Do gin kikom gi en kame lewic bino mako gi!”
- ⁶Winyunu! Woo tie i bomba, dwan tie wok ki tempulo! Dwan Rwot inonono. En etie culo kwor i kom jokwor mege!
- ⁷ “Bomba na kacil cal bala dako kame ngole nywal abongo winyo aramo me nywal.
- ⁸Ngai kotieko winyo arabo neno gikame cal kamanono? Benyo tie ateker moro kame kotieko nywalo i ceng acel kenekene? Sion cal bala dako konywalo idwe mege oyotoyot kakame en ecako ramere kede me nywal.
- ⁹Iparunu be ango abino mino jo na wok ki auris di likame oko nywalo gi? Ango ngat kame amio jo nywal, benyo benyo kame ango bobo acego kede yic?” Rwot en owaco.
- ¹⁰Lelunu karacel kede Yerusalem; bedunu kede yomcuny pire, wun jo dedede kame imarenu! Nataman lelunu karacel kede en, wun jo dedede kame oudo ibedunu koko pire!
- ¹¹En ebino gwoko wu di eko kweno cunyu, bala kame atin doto kede tuno ka toto mere di cunye ko kwei. Ibinunu bedo i deyo mere me aura, ikounu bedo kede yomcuny.
- ¹²Rwot waco be, “Ango abino kelo ne wu mulem bala ecilet kame mol, kede abar me atekerin bala ecilet kame opong di eko lamar. Ibinunu bedo cal bala atin kame toto mere gwoke di etinge i kore, doko elelepo en i tiene.



13Bala kame toto me atin kweo kede cuny atin mere, kamanono ada abino kweno cuny. Ibinunu udo kweicuny i Yerusalem.

14Ibinunu neno manoni di cuny ko bino bedo yom; komu bino bedo yot bala lum alibaliba. Di do ikounu bino ngeno be twer ka Rwot tie kede jotie mege, do wangcunye tie i kom jokwor mege.”

15Rwot oyaro bino kede mac kede cabalan mege bala apipiru. En ebino bino kede gero atek di eko mino jo kame en cunye wang i kom gi alola i mac kame liel birbir.

16Rwot bino mino jo dedede me wi lobo, jo kame kop bino lono, alola me mac kede epima. Jo kame Rwot bino neko bino bedo tot.

17Rwot waco be, “Jo kame lonyere pi ot i poti woro rubangan, jo kame camo ringo me ipegei, kede gimogo me kwere, kede iyoono, kobino muducaro gi karacel.

18Ango angeo tice gi kede gikame gin kiparo. Ango atie bino pi koko atekerin dedede kede jo me leb dedede. Gin kibino bino di kiko neno deyo na,

19doko ango abino cibo gianena i diere gi. Jo mogo kikom gi kame bino dong kuo, ango abino oro gi but atekerin kede i lobere kame tie kakame bocoboco, lobere kalikame pwodi owinyo kop i koma, doko pwodi likame kineno deyo na. Ango abino oro gi i piny me Sipein, Libiya kede Lidia, gin pinye me jogwei emal, kede i piny me Tubal kede Guris, di gin kiko tuco kop me deyo na kunono.

20Gin kibino kelo imiegu wu dedede kidwoko gi ki lobere dedede bala giamia buta. Gin kibino kelo gi Yerusalem i moru na kacil di kiwanano asigiran, pundan, kede aguraguran, jo ace di tie i wi cabalan. Ebino bedo cal bala kame jo me Isirael kelo kede giayala gi me alos i Tempulo di kiketo gi i gimak acil.

21Ango abino mino jo mogo kikom gi bedo josaseredoti kede Jolebi.

22 “Bala kame malo kanyen kede lobo kanyen kame ango abino timo bino bedo tie kede nakanaka, kamanono da ikwae wu kede nyingu bino bedo tie nakanaka.

23Cako i Ebagame Por Duwe tuno i Ebagame Por Duwe, kede i Sabato tuno i Sabato, jo dedede bino bino i nyima wora.” Rwot en owaco.

24 “Gin kibino donyo ooko di kiko neno liele me jo oto, jo kame oudo ojemo na. Kudilinge kame camo gi likame bino to, doko mac kame wango gi likame kobino neko. Neno liele gi bino bedo rac twatwal but jo dedede.”



Yeremia

Yeremia 1

Yeremia

¹Kope atie i yi itabu ni obedo kope ka Yeremia, wot ka Kilikia, ngat koudo obedo dano acel kikom josaseredoti kame oudo tie Anatot, i lobo me Benjamin.

²Rwot bin oyamo kede Yeremia i kare kame Abaka Yosia wot ka Amon en oudo tie abaka me Yuda, i mwaka me tomon kiwie adek me apugan mere.

³Rwot bobo bin oko medo yamo kede en di Abaka Yekoyakim wot ka Yosia en oudo tie ngapug me Yuda, kede da tuno i ajikini me mwakini tomon kiwie acel me apugan ka Abaka Esedekia wot ka Yosia. I duwe me kany me mwaka me ajikini me apugan ka Esedekia nono, bin oko mako jo me Yerusalem di oko tero gi obukui bala mabus.

Rwot Olwongo Yeremia

⁴Rwot owaco na be,

⁵” Di pwodi oudo likame ango acwei i yi toto ni, oudo ango angei. Doko da di oudo pwodi likame konywali, oudo ango akweri pi timo tic na; oudo ayeri pi bedo enabi but atekerin.”

⁶Ango ako dwoko be, “Okwe, Rwot Rubanga! Ateteni ango likame atwero yamo kede jo, pien ango pwodi atitidi.”

⁷Do Rwot oko waco na be, “Kur iwac be pwodi in ititidi, do in oti but jo kame ango atie cwani but gi di iko waco negi gikame ango abino ciki pi waco.

⁸Kur ibed kede lwooro but gi, do ango abino bedo tie kedi pi gwoki. Ango Rwot en awaco!”

⁹Di Rwot oko cwano cinge di eko mulo doge, di eko waco na be, “Nan ango atieko keto kope na i dogi.

¹⁰Tin ango atieko mini twer i kom atekerin kede ajakanuto, me puputo kede me tuturo piny, me dudubo kede me reto, me gero kede me pito bala yat.”

Gianyuta Are

¹¹Rwot oko penya be, “Yeremia, itie neno nyo?” Ango ako dwoko be, “Atie neno ajange me yat alimon.”

¹²Di Rwot oko waco be, “Ineno kiber, pien ango atie ngino pi neno be kop na ocoberere kakare.”

¹³Rwot oko penya bobo tien me are be, “Itie neno nyo?” Ango ako dwoko ne be, “Atie neno agulu kame pii gugunyo iye atie i bad tetu malo, di doge tie lengere i bad tetu piny i lobo me Yuda.”



¹⁴Di Rwot oko waco na be, “Can alit bino wok ki bad tetu malo di eko poto i kom jo dedede kame bedo i lobo noni.

¹⁵Pien nan ango atie lwongo atekerin dedede kame tie tetu malo pi bino. Abakai gi ko bino cibo komini gi me pug i erute me Yerusalem kede lukaro apama kame kocele kede, kede da lukaro bomban ace me Yuda.

¹⁶Ango abino mino gi alola pi dub kame gin kitimo; pien gin kiweka, kidonyo mino rubangan ace giayala, doko da kidonyo timo caljwogi di kiworo gi.

¹⁷Do in Yeremia, iikere cuto me ot i wang tic; oti iwace gi kope dedede kame ango aciko ni pi waco. Kur nan imi cunyi poti pi gin, aso ka li ango abino mini ibedo kede lworo akalamo i nyim gi.

¹⁸⁻¹⁹Jo dedede me lobo noni bino motun i komi: abakai me Yuda, jopug mere, josaserdoti kede jo me piny bino cako yi i komi. Do ango tin atie mini idoko tek bala bomba kame kocelo kede apama, bala epir me nyonyo ayon, bala apama kame kotimo kede nyonyo buronsi. Gin likame kibino bwoni pien ango abino bedo tie kedi pi gwoki. Ango Rwot en awaco.”

Yeremia 2

Rubanga Gwoko Jo me Isirael

¹Rwot oko waco na pi

²ot rabo ne jo me Yerusalem kop noni tetekeny gin kiwinyi. Rwot owaco be, “Ango ayutuno epone kame oudo imire kede buta i kare ni me eponga, amara kame oudo itie kede buta bala ateran; in oudo ibedo luba i wi tim, i lobo kalikame ocuwo iye kodi.

³Isirael, in oudo ibedo mera kikoma, kibuta in oudo ical bala cam acako cek i poti. Jo dedede kame oudo timo ni raco oudo bedo kede raco, ango oudo acwao negi can; ango Rwot en awaco.”

Dub ka Joakwari me Isirael

⁴Okwe winyunu kop ka Rwot, wun ikwae ka Yakobo, wun jo dedede me ateker me Isirael.

⁵Rwot owaco be, “Raco nyo kame bin joakwari wu oudo i koma en komio kiko lokere tenge kibuta? Gin kiko donyo woro gimogo akony gi li di gida kiko doko jo kame kony gi li.

⁶Gin likame kipenyo wi gi kakame ango Rwot ngat kokwanyo gi ki lobo me Misiri atie iye, ango ngat kame oudo atelo gi ki wi tim: itela koling di opong kede buge, lobo kotuo di opong kede peko, kakame ngatamoro likame beo iye, kakame ngatamoro likame bedo iye.



⁷Ango akelo wu i lobo amio, tetekeny iyomunu cunyu kede jamini dedede abeco kame wok kiye. Do kakame wun idonyunu kede iye, wun ikounu munao lobo na, wun imiunu gira odoko gikame neno rac.

⁸Josaseredoti likame openyere be, ‘Rwot tie tuai?’ Gin jo kame kitie kede niang atat i kom iswil likame kiko ngena. Jotel ojemo na; inabin otimo imurai i nying Baal, di kiko donyo woro gikame kony gi li.”

Pido kame Rwot tie kede i kom Jo mege

Pi manono Rwot waco be,

⁹” Pi manono, ango Rwot amedo bobo pido wu, atie pido wu kiton ikwae wu.

¹⁰Kong otunu i cula me Sipuro di ikounu neno, cwaunu ngatamoro Kedar di en eko ngingico kiber; di ikounu neno ka gikame cal kamanoni otieko timere karamoro.

¹¹Likame tie ateker moro kotieko loco rubanga gi, bed bala likame gin kibedo rubangan me ateni. Do jo na otieko loco ango Rubanga kame gin kitieko neno deyo mere, kede gimoro akony mere li.

¹²In malo, mi kop noni nek komi, mie ebed ni gi me aura, mie eony koyo i komi, Rwot en owaco;

¹³pien jo na otieko timo jamini areco are: gin kitieko weka, ango ngat kame abedo negi bala atan me pii amio kuo, di gin kiko lunyo kukunyo ataneko gi, ataneko kame buge gi obabarun, manono mio pii likame cungo i yi gi.”

Adwogini me Isirael Dagi Lubo Kop ka Rwot

Rwot waco be,

¹⁴” Benyo, Isirael obedo epasoit? Benyo, en ebedo ngatic kame konywalo anywala i paco? Do pinyo kara doko komio en edoko bala le me adwara but jokwor mege?

¹⁵Gin kidorano ne bala inguon, gin kidorano kitek twatwal. Gin kidudubo lobo mere odoko gikame kony mere li; kituturo bomban mege odoko amejeko abongo jo iye.

¹⁶Medo i wi manono, jo me Mempie kede Tapankes bino bebelo wie.

¹⁷Isirael, mam in en ikelo can noni i komi keni pi kite kame iweka kede, ango Rwot Rubanga ni, kakame ango abedo telo wu kede i yongayo?

¹⁸Iparo be nyo aber kame ibino udo kame ioto Misiri, pi mato pii me ecilet me Nail? Arabo iparo be nyo aber kame ibino udo kame ioto Asiria, pi mato pii me ecilet me Eupurate?

¹⁹Dub ni en abino bitaro in, lokere ni tenge kibuta en abino ronkino in. Ngei kiber be ebedo gikame rac doko ekelo lito pi in weko ango Rwot Rubanga ni; in likame itie kede wor buta. Ango Rwot Rubanga me jo yi en awaco.”

Isirael Odagi Woro Rwot



²⁰Rwot waco be, “Isirael, bin sek in ituro ayoko nin, doko di iko coto auno ki tieni, di iko waco be likame ibino tic nango. I wi imukuran aboco, i dud yen oduko in itimo malaya i yore me woro rubangan ace.

²¹Do di oudo ango amio wu ibedunu bala olok aber kame koyero di oko pito, nyige abeco adikinichel en kame kopito. Epone mene kame bobo idwogunu kede piny di ikounu doko bala olok akony mere li?

²²Akadi bed bala ilwokere kede sabuni moro me aura, akadi di ikua sabuni tin benyo, do ango pwodi abino neno raco ni. Ango Rwot Rubanga en awaco.

²³Epone mene kame in itwero waco kede be in likame imunaun, be likame in itieko woro Baal? Nen kong dub kame in itimo i aditot; nen gikame itimo. In ical bala atin aguragura kame taco di eringo i bad dedede;

²⁴ical bala punda me obar adako kotieko nao bedo i wi tim, en eunyo kame etie mito icuo! Ngai kame karuno gengo mit mere me icuo? Cuo kame mite kur lol kom gi di kiko udo olo me riamere kede; gin kibino ude i kare kame etie mito kede icuo.

²⁵Isirael, gwokere kur amuka ni dude camere, doko da kur imi dwani tui orio pi wire mono rubangan ace. Do in iwaco be, ‘Mano kop me nono, ango gira amaro rubangan me kumbor, doko abino lubo gi.’ “

Epoore pi Isirael Udo Alola

²⁶Rwot waco be, “Bala kame lewic mako kede ngakuwo ka komake, kamanono da lewic bino mako wun jo me Isirael. Lewic bino mako abakai, jotic adongo, josaseredoti kede inabin wu.

²⁷Lewic bino mako wun dedede, wun jo kame iwacunu be yat kame kosipo obedo papa wu, kede be engaro kame kopao obedo toto wu. Manoni bino timere pien wun ilokunu nango ngei wu akaka loko nango nyimu. Do ka peko opoto ne wu, wun ikounu kwana pi lako wu.

²⁸” Do rubangan kame oudo itimunu piru tie tuai? Ka itienu i peko ber gin kibin kikonyu ka kitwero! Okwe Yuda, in itie kede rubangan atot rom kede bomban kame itie kede.

²⁹Ingungur nyo en kame itie kede i koma? In ijemo nango. Ango Rwot en awaco.

³⁰Ango abungi pi rieni, do manono likame okonyo; in idagi yei kop nango me rieni. In ineneko inabin ni bala engu kowor.

³¹Wun jo me Isirael me i kare noni, winyunu kop kame ango Rwot atie waco ne wu. Benyo, ango abedo ne wu bala wi tim arabo bala lobo acol cucucuc kopong kede peko? Kara pinyo doko komio wun jo na iwacunu be ibinunu timo bala kame cunyu mito, be likame bobo ibinunu dwogo buta?



³²Benyo, wi nyako twero wil kede mwolere mege, arabo wi ateran twero wil kede egoe mere me nyom? Do jo nango wi gi otieko wil kede ango pi mwakini kalikame marere.

³³Wun itienu kede diru me mono ipalon. Akadi mon areco da itiekunu pwonyo gi i kuo wu nono.

³⁴Doko da lak igoen wu opwokere kede remo me jocan ali kede raco moro, kame wun inekunu; likame inekunu gi be pien gin jokuwo kame iudunu di tie turo ude wu. “Do akadi bed bala magonogi dedede otimere,

³⁵wun iwacunu be iliunu kede raco moro, kede be ango Rwot atieko weko bedo kede gero butu.

³⁶Pinyo komio kara wun iwirenu tuni kede tuca but rubangan apat abongo bedo kede tam? Jo me Misiri bino mino lewic mako wu bala kame jo me Asiria omio wu kede lewic.

³⁷Wun ibinunu dwogo ki kuno di lewic opongi i wi wu. Ango Rwot atieko daga jo kame wun iketunu gen wu i kom gi; likame tie gimoro aber kame ibinunu udo kibut gi.”

Yeremia 3

Isirael likame Lubo Kop ka Rwot

¹Rwot waco be, “Ka icuo oriamo dako mere di dako nono oko ot nyomere kede icuo ace, iparo be cware me agege bobo dwoko dako nono? Tim noni munao lobo atwal atwala. Do in Isirael itieko timo malaya kede cuo atos, iparo be itwero bobo dwogo buta? Ango Rwot en awaco.

²Ngoloro ber malo i wi imukuran iko neno! Tuai kalikame itimo iye malaya ni kede rubangan ace? In ibedo i nget yote daro ipalon ni, bala kame Muarabu pwono kede pi kuro jo atie ot ki wi tim. In imunao lobo noni kede tim ni me malaya.

³Manono en komio ango Rwot agengo kot, kot me oro amoto me iporo do likame cwei; do in pwodi wangi tek ateka bala me malaya, kom likame lewic maki da.

⁴” Nan itie waco na di wangi tek be, ‘In en papa na, in oudo imara di pwodi atitidi.

⁵Likame ibino ngoi keda nakanaka; likame ibino bedo ger keda kare dedede.’ Epone noni en kame in iyamo kede, do in itieko timo gikareco dedede bala kame itwero.”

Isirael kede Yuda miero Swilaro

⁶I kare kame Abaka Yosia oudo pugo kede, Rwot oko waco na be, “Mam ineno gikame Isirael, dako acar no otimo? En etieko ot i wi imukuran dedede aboco, i dud yen dedede oduko, di eko timo malaya mere iye.

⁷Ango oudo ako tamo be, ingei en tieko timo tim mere nono, ebino dwogo buta. Do en likame eko dwogo buta; Yuda, amin mere kalikame genere oneno gi nogo dedede.



⁸Yuda oneno be, pi tim me adote ka Isirael, dako acar nono, ango ako pokere kede di ako riame. Do Yuda da, amin me Isirael kalikame genere, likame oko bedo kede lwo; eda eko gire ot timo malaya.

⁹Kite kame en eko tero kede tim mere me malaya nono bala gi me tukotuko, omio en eko munao lobo nono dedede; en etimo adote mere i yore me woro ingaroi kede yen kame kopao.

¹⁰Bed bala magonogi dedede otimere, Yuda, amin me Isirael kalikame genere, likame oko dwogo buta kede cunya lung, en ecukere acuka. Ango Rwot en awaco.”

¹¹Rwot oko waco na be, bed bala Isirael oudo oweke, do Isirael ber oko nyutere bala dako abeber kalamo amin mere kalikame genere, en Yuda.

¹²En ewaco na pi ot waco ne Isirael be, “Dwog buta, in Isirael dako kalikame genere, ango Rwot en awaco. Ango likame abino bedo kede gero buti, pien ango atie kede cunya me kisa, ango Rwot en awaco. Likame ango abino dong bedo ger nakanaka.

¹³Kenekene in yei raco ni, be in ijemo ne Rwot Rubanga ni, di iko ot gabo amara ni but rubangan me jokumbor i dud yen oduko, di iko dagi winyo dwana, ango Rwot en awaco.

¹⁴” Dwogunu buta, Okwe wun idwe kalikame genere, ango Rwot en awaco. Pien ango abedo ngadwong wu. Abino kwanyo kikomu ngat acel ki buli bomba, kede jo are ki buli ekeko me anywali, di ako dwoko wu i Moru me Sion.

¹⁵” Ango abino mino wu jotel kame cunya oyo; gin kibino telo wu kede rieke kede ngec.

¹⁶Kame itiekunu nywal di ikounu nyai i lobo nono, likame bobo ebino mitere ne wu pi yamo kop i kom Sanduku me Isikan. Manono likame doko bino bedo i tamu amoto wun yutuno en; likame ebino bedo bala gikame li ne wu, doko da likame ibinunu paro pi timo ace.

¹⁷I kare nono, kobino lwongo Yerusalem be ‘Kakame Rwot Pugo kiye’, di atekerin dedede ko bino donyo cokere wora i kunono. Likame doko gin kibino bedo kede ngut gi lubo tam areco atie i cuny gi.

¹⁸I kare nono, wun jo me Yuda ibinunu ribebere kede jo me Isirael, di ikounu bino yai karacel ki lobo atie tetu malo, ikounu dwogo i lobo kame ango amio joakwari wu pi bedo mergi atwal.”

Tim ka Jo ka Rubanga me Woro Caljwogi

¹⁹Rwot waco be, “Isirael, kite kame oudo cunya mito kede mini ruom amalo kikom idwe na, di ako mini lobo kame yomo cunyi, en lobo aber kalamo lobere me atekerin dedede! Oudo ango amito be ilwonga be, ‘Papa na’, di likame iko lokere tenge kibuta.



²⁰Do akaka manono, bala kame dako acar weko kede cware, ida likame ibedo ngat kame genere buta. Manoni ango Rwot en awaco.”

²¹Dwan jo bino winyere wok ki wi imukuran aboco, mano en dwan jo me Isirael atie koko di kikwao kisa, pien gin kiparao lubo yote areco; gin kimio wi gi owil kede Rwot Rubanga gi.

²²Okwe wun idwe kalikame genere, dwogunu but Rwot Rubanga wu, en ebino cango yote wu areco me bedo jo kalikame genere. Wun iwacunu be, “Neningo, wan ige odwogo but Rwot, piento en ebedo Rwot Rubanga wa.

²³Tim me woro rubangan i wi imukuran obedo keto gen i kom gimoro kalikame tio, ebeto icelakin kame kony mere li. Ateteni Rwot en Rubanga wa, en kame etwero lako Isirael.

²⁴” Do cako tino wan, woro rubanga me lewic Baal otiekaro gikame joakwari wa ocane pi udo; emio wa okei romini, diegi kede doke, kiton idwe awobe kede anyira.

²⁵Nan wan opoore buto piny kede lewic, di lewic nono ko umo wa; pien wan kede joakwari wa obedo dubo but Rwot Rubanga wa; likame wan olubo cik mege.”

Yeremia 4

Lwongo But Jo pi Swilaro

¹Rwot waco be, “Wun jo me Isirael, ka ateteni imitunu dwogo buta, kwanyunu tenge caljwogi gikame neno rac ki nyima, di likame ikounu parao weka.

²Doko da ka itienu lairo, lairunu kede ateni i nyinga, di atekerin apat dedede ko bino kwana pi mino gi winyo di gin kiko bino wakere pira.”

³Rwot waco ne jo me Yuda kede Yerusalem be, “Purunu poti wu koukaro, kur ipitunu kodere wu i dier okuto.

⁴Poore ikeperenu pira, ango Rwot, di ikounu mino cunyu buta, wun jo me Yuda kede jo kame bedo Yerusalem. Ka likame itimunu kamanono, abino bedo kede gero i komu bala mac aliel, pi gikareco kame itienu timo; gero kalikame ngatamoro twero kweno.”

Jokwor Bino Suro Yuda

⁵Kutunu agwara kadedere dedede! Lelemunu kitek! Wacenu jo me Yuda kede Yerusalem pi ringo donyo i bomban kame kocelo kede apama.

⁶Cimunu ne jo yongayo kame poore aluba me ot Sion! Ringunu ot gwokere, kur igalunu! Pien Rwot tie kelo ne wu can koyaro wok ki tetu malo; can kame dudubo lobo twatwal tie bino.

⁷Can kame bino dudubo atekerin tie bino, bala engu kame yai ki kapwono mere. En etieko yai ki kakame ebeto iye pi bino dudubo lobo me Yuda. Bomban me Yuda bino doko amejeko kame jo li iye.



⁸Pi manono, ngapunu ipukoi, di ikounu iturur kede koko, pien gero kame Rubanga tie kede i kom wa likame otiek.

⁹Rwot owaco be, “I ceng nono abakai kede jopug bino bedo abongo nwangcuny; josaserdoti kom gi bino to; kede inabin ko bino uro kitek.”

¹⁰Ango ako waco be, “Okwe Rwot Rubanga, kom in ingalo jo me Yerusalem atwal atwala di iwaco be, ‘Ibinunu bedo kede anapakin, ‘do di koyapuno neko gi.’”

¹¹I kare nono Rwot bino waco ne jo me Yerusalem be, “Yamo aliet tie buko wok kibuta ki wi tim, ebino butu jo na. Likame yamo nono obedo yamo apiupiu me kwororo kal,

¹²do en ebedo yamo apek kalamo manono. Ango Rwot en kame atie ngolo kop ne wun jo na.”

Jokwor Olukaro Yuda

¹³Nenunu, ngakwor tie bino bala edou me kot; cabalan mege me yi tie bino bala apipiru. Asigiran mege dwir kalamo ekokom. Otienu tin i can benyo; wan onyonunu!

¹⁴Okwe wun jo me Yerusalem, lwokunu tenge tice areco ki cunyu, tetekeny Rwot ko bino lako wu. Ibinunu kara bedo kede tamu areco nogo tuno awene?

¹⁵Pien jo kame ooro tie yamo i bomba me Dan, kede da i moru me Epuraimu kop me can atie bino.

¹⁶Kitie waco ne atekerin kede ne Yerusalem be jokwor tie bino ki lobo abor. Jokwor nogo bino woo i kom bomban me Yuda.

¹⁷Gin kibino lukaro Yerusalem bala jo kame daro poti, pien jo mege ojemo ne Rwot. Manoni Rwot en owaco.

¹⁸Yuda, in en ikelo manoni i komi keni pi epone me kuo ni, kede pi gikame ibedo timo. Can noni obedo meri; elit tin benyo! Lito mere odonyo paka tuno i dier cunyi.

Cwercuny ka Yeremia pi Jo mege

¹⁹Okwe lito! Atie kede lito kalikame atwero kanyo! Okwe cunya! Cunya tie gwere kirac! Likame atwero ling alinga; atie winyo koko me agwara kede woo me jo atie yi.

²⁰Can alit tie poto di lubere aluba; lobo me Isirael lung kotieko dudubo. Kodudubo iemai wa pi esawa atitidi, konyinyilo isukan apoko isengena gi pi dakika kenekene.

²¹Abino meede neno imendera me yi, kede winyo koko me agwara pi kare arom kamene?

²²Rwot waco be, “Jo na jomingo; likame kingea. Gin kical bala idwe amiming; likame kitie kede niang. Gin kitie kede diru me timo gikarac, do likame kitie kede ngec moro me timo gikame ber.”

Gianyuta kame Yeremia Oneno me Can atie Bino



²³Ango angoloro wi lobo, ako neno be en do etie lobo kodubere abongo gimoro akuo iye; ako ngoloro malo, di likame ako neno gimoro arieny pi kelo lero.

²⁴Angoloro mori, di ako neno gi di kitie yangere wukawuka, di imukuran dedede tie cecero.

²⁵Ako neno be likame oudo tie ngatamoro iye akadi acel, akadi winy da oudo otieko por oringo tenge.

²⁶Lobo koudo mio, oudo otieko doko wi tim, doko bomban mege dedede oudo otieko ngingidun pi gero agwai kame oudo Rubanga tie kede.

²⁷(Rwot owaco be en ebino mino wi lobo doko bala ameje, do likame ebino dudubo en atwal atwala.)

²⁸Manoni bino mino wi lobo tururo di malo ko doko col cucucuc. Rwot en owaco, doko likame ebino loko tam mere. En etieko moko tam mere, likame ebino lokere tenge kiye.

²⁹Jo dedede me bomban bino ringo, ka kiwinyo woo me isirikalen kame ringo kede asigiran kede kame yi kede emal. Jo mogo bino ringo ot pwono i abum, mogo bino yito i wi mori. Jo bino weko bomban dedede dong nono, di likame ngatamoro doko ko donyo bedo i yi gi.

³⁰Okwe, in bomba kodoko ameje, pinyo kara itie ngapo egoe akwar me wel, pinyo kara pwodi itie tubuso komi kede mwolere me saabu di icilo wangi? In itie tubuso komi me nono! Ipalon ni alem mari otieko dagi, gin kitie mito neki.

³¹Ango awinyo koko bala me dako atie ramere me nywal, dwilao bala me dako atie nywalo atin kao. Manono oudo obedo Yerusalem atie omo wei, di eyayaro bade di ewaco be, “Atie i can! Kom kitie bino neka!”

Yeremia 5

Dub me Yerusalem

¹Kong ringunu ririmo yote me bomba me Yerusalem! Ngiunu gi kiber! Mounu kabedo dedede me atalen mege di ikounu neno ka itwerunu udo dano acel kame timo ne jo gikame tie kakare, kede di egenere. Kame iudunu, Rwot bino sasiro Yerusalem.

²Bed bala gin kilairo kede nying Rwot, do ilair gi likame obedo me ateteni.

³Okwe Rwot, mam in imito kuo me ateni? In ibungo gi, do likame gin kiwinyo lito moro; in ibuco muducaro gi atwal atwala, do gin likame kiko pwoyere. Gin kimio wi gi obedo tek kalamo lela; gin kidagi lokere tenge ki dub gi.

⁴Ango ako waco be, “Magi obedo jocan, wi gi likame tamo; pien likame gin kingeo gikame Rwot mito negi timo, likame kingeo iswilia ka Rubanga gi.



⁵Ango abino ot but jo me ruom amalo di ako ber yamo kede gi. Ateteni gin kingeo gikame Rwot mito ne jo timo, kingeo iswilia ka Rubanga gi.” Do gida kical acala kamanono; kitieko jemo ne Rwot di kiko dagi lubo kop mere.

⁶Pi manono, engu kame owok ki abum bino neko gi, epee kame owok ki wi tim bino muducaro gi. Erisa tie kino bomban gi; ka ngatamoro owok ooko me bomban nogo, en ebino nyinyilo en; pien dub gi odoko tot, tim gi me weko Rubanga odoko dwong.

⁷Rwot penyere be, “Yerusalem, benyo benyo kame ango atwero sasiro in kede? Idwe nin otieko weka, di kiko donyo ilair i nying rubangan kalikame obedo me ateni. Ango apito jo na tuno gin yeng, do gin pwodi kiko ot timo adote, gin kidubo kare gi i ude me imalayan, i yore me woro rubangan.

⁸Oudo kical bala asigiran acuo kame kopito kiber, kame tie kede mit me ikwaran; ngat acelacel tie kede mit but dako ka ngawote.

⁹Mam ango apoore mino gi alola pi tim gi noni? Mam ango apoore culo kwor i kom ateker kacal kamanoni?

¹⁰Poore jokwor ot bebeo i diere me irotin me olok gi di kiko dudubo gi, do kur kidudubo gi atwal atwala; kipoore totongo jange gi pien jange nogo likame obedo mega.

¹¹Pien jo me Isirael kede Yuda obedo jo kalikame genere atwal atwala buta, ango Rwot en awaco.”

Rwot Odagi Jo me Isirael

¹²Gin kiwaco kop me abe i kom Rwot di kiwaco be, “Likame en ebino timo gimoro. Likame tie can moro kame bino potu ne wa. Likame wan obino neno yi moro amoto kec.”

¹³Gin kiwaco be kope me inabin waco cal bala yamo abuko, be likame kope gi owok kibut Rwot, doko da manono bino timere ne gin inabin.

¹⁴Pi manono, Rwot Rubanga me jo yi owaco na be, “Pi kite kame gin kiwaco kede kope nogi, ango abino mino kope na kame wok ki dogi bedo bala mac, di gin kiko bedo bala yen otuo, di mac nono ko bino wango gi dopodop.”

¹⁵Rwot waco ne jo me Isirael be, “Wun jo me Isirael, ango abino kelo ateker me kakabor bino suro wu. En ebedo ateker atek kobedo anakacia; en ateker kalikame wun ingeunu leb mere, doko da likame itwerunu niang gikame kiyamo.

¹⁶Isaun gi me mako tongini me emal obedo gikame to wok kiye; gin dedede kibedo jo yi atek.

¹⁷Gin kibino camaro gikame ipurunu kede cam wu; gin kibino neneko awobe kede anyira wu; gin kibino camaro diegi, romini kede doke wu; gin kibino dudubo olok wu kede yen epigi; kibino dudubo kede epima bomban wu kame kocelo kede apama, gin bomban kame wun iketunu iye gen wu.



18” Akadi i kare nono da likame abino muducaro jo na atwal atwala.

19Kame gin kiko penyere be, ‘Pinyo komio Rwot Rubanga wa otimo ne wa gigi dedede?’ Yeremia in ibino waco negi be, bala kame gin kilokere kede tenge kibuta di kiko donyo tic ne rubangan me kumbor i lobo gi, kamanono da gin kibino donyo tic ne jokumbor i lobo kalikame mergi.”

Rubanga Okwenyaro Jo mege

20Rwot waco be, “Wace ikwae ka Yakobo, wace jo me Yuda kaman.

21Winyunu, Okwe wun jomingo kalikame wi wu tio; itienu kede wangu do likame inenunu; itienu kede yitu do likame iwinyunu.

22 Ango Rwot, mam likame wun ilworanu? Mam likame komu miel i nyima? Ango acibo asinge pi bedo ikor ajiko nam adwong, en ebedo apokini abedo nakanaka kalikame nam twero ngolo; akadi bed bala ebuka tingere, do likame etwero kalamo en; akadi bed bala nam gunyao benyo, do likame etwero kate.

23Do wun ibedunu joepali kede jojemo; wun itiekunu lokere tenge iwekanu.

24Likame itwerunu waco i cunyu da be, ‘Ber kong obedunu kede lworu but Rwot Rubanga wa, en ngat kame cwao ne wa kot i kare mere kikokome, kot me iporo kede kot me oro, di eko mino obedo kede kare me kac buli mwaka.’

25Do raco wu otieko gengo magonogi timere; dub wu otieko kwanyo tenge jamini abeco nogi kibutu.

26” Pien jo kame timo tim areco tie i diere me jo na; gin ki kiire bala jo kociko arama me mako winy, do gin kiciko obek gi me mako jo.

27Bala kame ebukit me ngacik winy pong culucul kede winy, kamanono da ude gida opong kede jamini kame kiudo i yore arac. Manono en omio gin kidoko jo me aura kede kobaro,

28di kiko cwe di del me kom gi meny. Tim gi areco likame tie kede ajikini; likame gin kitimo gi me ateni pi konyo idwe kic, doko da likame kigwoko twero me jocan.

29Mam ango apoore mino gi alola pi tim gi noni? Mam ango apoore culo kwor i kom ateker kacal kamanoni?

30Gi me aura aneko kom jo otieko timere i lobo noni:

31Inabin muraoko kope me abe; josaseredoti pugo bala kame inabin ciko negi; jo na da mito be ebed timere kamanono. Do ibinunu timo benyo ka magonogo ojik?”

Yeremia 6

Jokwor Oluko Yerusalem

1Wun jo me ekeko ka Benjamin, ringunu pi laro kuo wu! Ringunu tenge ki Yerusalem! Kutunu agwara i Tekoa. Mokunu mac Bet Kakerem pi dunyo yiro pi bedo



gianyuta me peko; pien can adwong tie wok ki tetu malo kame bino kelo twon amuducar.

²Bomba me Sion cil kotwero poore kede lum kolibano me kwano leini.

³Jokwat, magonogo en jokwor mege, bino ot kwano leini gi iye. Gin kibino gero kimere gi lukaro en, di kiko donyo kwat iye, ngat acelacel kakame cunye mito.

⁴Gin kibino waco be, “Tikerenu ootunu osurunu Sion; yaunu ootunu osurenu i dier iceng!” Do doko di gin kiko bino waco be, “Otienu kede winyo arac, esawa otieko kato, piny otieko yuto, pien tipere me jame otieko doko bocoboco.

⁵Obinunu sure nat iwor di okounu tuturo apama atek kame koele kede.”

⁶Rwot me jo yi ociko jokwor nogo be poore kitotongo yen piny di kiko kumemo kayito i wi apama pi mako bomba. En ewaco be, “Man en bomba kame apoore mino alola. Pien likame tie gimoro apat kame tie iye kwanyo tim me tero jo kirac.

⁷Bala kame atan lelepo kede pii, kamanono da Yerusalem lelepo tim mege areco. Gikame dano winyo kiye en kop amako tim me gero kede me muducaro. Gikame ango aneno iye nakanaka en aramo kede aporeso.

⁸Okwe, wun jo me Yerusalem yeunu winyo ikwenyar noni, aso ka li ango abino dagi wu ako weko wu; abino loko bomba wu doko bala ameje, lobo kame jo likame bedo iye.”

Isirael Ngajemo

⁹Rwot me jo yi owaco na be, “Bala kame ngat kame ngwedo anyakini me olok moo kede jange mege odocon, kamanono ida nyogao mono donge mogo me jo me Isirael tetekeny ilak gi.”

¹⁰Ango ako dwoko be, “Ngai kame bino yei winyo dwana ka ango ayamo kede gi di akwenyaro gi? Neningo, yit gin oture, likame kiwinyo kop. Kope nin gin kicao acaa, likame cunye gi tie iye.

¹¹Rwot, gero kame in itie kede i kom gin nono ada atie kede i kom gi, doko da likame atwero meede didio en.” Di Rwot oko waco na be, “Bwot gero nono i kom idwe kame tie i yote me bomba kede i kom ipongai kocokere da; kobino tero cuo kede mon tenge, kiton jo oti da likame bino bwot.

¹² Abino mino jo apat en alunyo ude gi, kiton poti kede mon gi; ango abino mino jo kame bedo i lobo noni alola.

¹³Jo dedede, cako kibun jo me ruom apiny tuno but jo me ruom amalotie kede eranga me mito ud i yore arac; akadi kiton inabin kede josaseredoti da tie kwalotie jo.

¹⁴ Gin kitero aporeso kame tie i kom jo na tukotuko di kiwaco be, ‘Mulem, mulem, ‘do di mulem moro li.

¹⁵Kibedo timo tim me lewic, kitimo gikame neno rac; do di likame lewic mako gi akadi acel, doko da likame kingeo mino nyim gi bedo luruluru. Pi manono, gida



kibino bedo i kom jo kame komuducaro; ka ango amio gi alola, manono bino bedo ajikini gi. Ango Rwot en awaco.”

Isirael Dagi Lubo Gikame Rubanga Mito

¹⁶Rwot waco ne wun jo mege be, “Cungunu i akarakaran me yote di ikounu ngingio. Penyunu kop i kom yote kasek kede kakame yongayo aber tie iye. Lubunu yongayo nono di ikounu bino udo wei i kuo wu.” Do gin kiko waco be, “Wan likame obino lube.”

¹⁷Di Rwot oko cwano ne wu jodar piny di eko waco be, “Cikunu yitu kiber i kom koko me agwara bala ikwenyar butu.” Do wun ikounu dwoko be, “Wan likame obino ciko yit wa.”

¹⁸Pi manono, Rwot waco be, “Winyunu wun atekerin apat, di ikounu ngeno gikame bino timere negi.

¹⁹Okwe in wi lobo, winyi, ango atie kelo can i kom jogi pi iik gi areco; pien gin kitieko dagi lubo kop na; gin kidagi winyo pwony na.

²⁰Kony mere nyo kibuta, odok adunya angwe kur kame kokelo ki lobo me Seba, arabo lagara kame kokelo ki lobo abor kame tie kede mo angwe mit me wir? Likame ango abino gamo giamia gin, doko da likame cunya bino bedo yom pi giayala gin.

²¹Pi manono, neningo, ango abino cibo ne jo nogi kidi i nyim gi, kidi kame bino getaro gi; jonywal kede idwe, awotino karacel kede jokio bino muducar.”

Yi bino Wok ki tetu Malo

²²Rwot waco be, “Neningo, tie jo atie wok ki lobo atie tetu malo; ateker me aura atie kakabor tie iikere pi bino yi.

²³Gin kimako imalia kede tongini; gin kiger kili kede kisa; buruburu gi winyere bala gunyao me nam, di kiringo kede asigiran. Gin kitieko iikere me cako yi i kom Yerusalem!”

²⁴Jo me Yerusalem waco be, “Wan otieko winyo rwonge i kom gi, doko cing wa otieko doko lojolojo; otie kede aramo i cuny wa bala dako atie ramere me nywal.

²⁵Likame wan otwero bobo ot tenge kugo kugo arabo donyo lubo yote, pien jokwor wa otieko mako ipimai me yi; otie do kede lworu i bad dedede.”

²⁶Rwot waco be, “Okwe wun jo na, ngapunu ipukoi di ikounu bebelo i buru pi iturur. Kokunu kede cweracuny bala dano atie koko wode acel kenekene oto; pien jo kame bino muducaro wu bino suro wu i esawa moroni kenekene.

²⁷In Yeremia, tam jo na bala kame kotwako kede nyonyo pi tame ka etek, di iko ngingico gi pi niang iponeso gi.

²⁸Gin kitie kede epali doko da gin jojemo; wi gi tek bala nyonyo buronsi kede ayon. Gin dedede kitie kede tim kalikame poore, doko da tic gi en dubo nying jo.



²⁹Jo na cal bala nyonyo siliba atie kede cete kame kotie twako pi jililo; akadi bed bala acukut buk yamo kitek di mac ko dop, cete areco likame twero pokere. Kamanono da, raco kame jo na tie kede likame twero kwanyere kibun gi.

³⁰Kobino donyo lwongo gi be ‘siliba akony mere li, ‘pien ango Rwot atieko dagi gi.’

Yeremia 7

Yeremia Oponyo Jo Kop ka Rubanga i Tempulo

¹Rwot oko waco na

²pi ot cungo i ekeko me tempulo di ako donyo rabo ne jo kop be, “Winyunu kop ka Rwot, wun jo dedede me Yuda, wun jo kame tie donyo ki ikekon nogi pi ot woro Rwot.

³Rwot me jo yi, Rubanga me Isirael waco kaman: likunu iponeso wu kede tice wu, di ango ako bino mino wu imeedenu bedo kanoni.

⁴Wekunu ngalere kenu kenu di iwacunu be, ‘Man en tempulo ka Rwot, man en tempulo ka Rwot, man en tempulo ka Rwot, likame tie gimoro kame bino timere ne wa.’

⁵” Pien ka ateteni wun iikunu iponeso wu kede tice wu, ka ateteni wun idonyunu timo ne jo icegun gikame poore;

⁶ka likame iterunu jokumbor, idwe kic kede apuserun kirac; ka likame inekunu dano moro ali kede kop moro i lobo noni, kede ka likame idonyunu woro rubangan apat kame twero kelo ne wu peko,

⁷ka likame itimunu magonogi dedede, ango abino bedo kede wu kanoni, en lobo kame bin sek ango amio joakwari wu pi bedo mergi me atwal.

⁸” Nenunu, wun iketunu gen wu i kom kope me abe kalikame twero konyo wu.

⁹Wun ikwalunu, inekunu, itimunu adote, ilairunu i kom kop me abe, imiunu rubanga Baal giayala, doko da iworunu rubangan mogo kalikame oudo ingeunu.

¹⁰Itimunu gikame cunya dagi nogi di ikounu bino cungo i nyima i tempulo noni, en ot kame kolwongo kede nyinga, di iwacunu be, ‘Likame gimoro arac bino timere ne wa!’

¹¹ Benyo, mam wun iterunu be ot kame kolwongo kede nyinga noni otieko doko kapwono me jokuo? Ango da atie neno gikame wun itienu timo, ango Rwot en awaco.

¹²Kong nan otunu Silo, en kakame bin ango acako yero pi gero iye abila na, di ikounu bino neno gikame atimo iye pi dub me jo me Isirael.

¹³Nan wun itiekunu timo dub nogi dedede; doko da bed bala ango atieko yamo ne wu tien kede tien, do likame wun iyeunu winyo kop na; bed bala ango oudo alwongo wu, do wun idagunu gamo dogo.



14Pi manono, ango abino timo ne ot kame kolwongo kede nyinga nono, en ot kame wun iketunu iye gen wu, kede ne lobo kame bin ango amio joakwari wu, abino timo negi gikame cal bala kame bin atimo Silo.

15Abino riamo wu ki nyima bala kame bin ariamo kede joawade wu, gin ikwae ka Epuraimu.”

Jo Odagi Lubo Kop ka Rwot

16Rwot oko waco be, “Yeremia kur ileg ne jogi. Kur ikok buta arabo ileg buta pirgi, doko da kur ibak na dogi pirgi, pien likame ango abino yei winyo kop nin.

17Benyo, likame itie neno gikame gin kitie timo i bomban me Yuda kede i dier yote me Yerusalem?

18Idwe mwodo yen, papi gi moko mac, di mon nyongo alos me tedo mugati ne rubanga kobedo abaka adako me malo; doko da kionyo piny giayala me giamata but rubangan ace, pi wango cunya.

19Benyo, iparo be ango en kame kitie wango cunya? Mam gin kitie wango cuny gi ken gi, doko da kikelo lewic i kom gi ken gi?

20Pi manono, ango Rwot Rubanga atie waco be: ango abino onyo lilo kede gero na i tempulo noni, kede i kom jo kede leini, i kom yen kede i kom kodere kame jo puro. Gero na bino bedo cal bala mac kalikame kotwero neko.

21” Tie giayala kame ipoorenu wango dedede, kede tie mogo kame itwerunu camo. Do nan ango awaco ne wu be camunu kiton giayala kame ipoorenu wango dedede da, likame abino paro. Ango Rwot me jo yi, Rubanga me Isirael en awaco.

22Pien i kare kame ango akwanyo kede joakwari wu ki lobo me Misiri, likame bin ango ayamo kede gi arabo amio gi cik moro amako giayala kame kopooore wango dedede arabo giayala moro ace.

23Do kenekene ango amio gi cik kame waco be, ‘Lubunu kop na di ango ako bino bedo Rubanga wu, di wun ikounu bino bedo jo na; doko da bedunu i ekite kuo kame ango aciko ne wu, tetekeny gi dedede bed ne wu kiber.’

24Do gin likame kiko lubo kop na arabo ciko yit gi iye. Gin kiko lunyo timo gikame cuny gi mito pi epali kede tam areco kame kitie kede, di do kiko meede ameda doko reco akaka doko beco.

25Cako i ceng kame joakwari wu owok kede ki lobo me Misiri tuno tin, ango abedo cwano jotic na inabin butu wie kiwie.

26Do likame tie ngatamoro oko yei lubo kop na arabo ciko iye yite; jo dedede opongo na ngut gi di do ikounu doko reco kalamo bin joakwari wu.

27” Aso, Yeremia, in ibino waco negi kope nogi dedede, do likame gin kibino yei winyo kop nin. In ibino lwongo gi, do likame gin kibino gamo dogi.



²⁸In ibino waco negi be ateker gi likame wora, ango Rwot Rubanga gi, doko da likame kipwonyere akadi bitaro gi. Ateni otieko doko li, doko da likame tie ngatamoro ayamo kop amake.”

Tice Areco i Aditot me Kinom

Rwot waco be,

²⁹” Wun jo me Yerusalem, tururunu; lielunu yer me wi wu di ikounu uco gi tenge. Werunu i wi imukuran wer me koko, pien ango Rwot atieko dagi wu, doko atieko weko wu, wun lwak kowango cunya.

³⁰” Pien jo me Yuda otimo gikarac i wanga. Gin kiketo caljwogi gi, gikame cunya dagi, i ot kame kolwongo kede nyinga, di kiko munao en.

³¹ Gin kigero i aditot me Kinom alutari gi kame kolwongo be Topet, me wango awobe gi kede anyira gi i mac. Manoni obedo gikame ango likame aciko gi pi timo, doko da likame oudo etie i tam na.

³²Pi manono, kare tie bino kalikame kobino doko lwonge kede be Topet, arabu Aditot me Kinom, do kobino lwonge be Aditot me Nek; kobino yiko jo kunono paka alamar.

³³Liele me jo bino doko giacama me winy kede me leini me obar, doko da likame ngatamoro bino riamo gi tenge kiye.

³⁴ Lobo nono bino doko ameje. I bomban dedede me Yuda kede i yote me Yerusalem, ango abino jiko woo me kilel, kede da yomcuny me ibagai me nyom.

Yeremia 8

¹” I kare nono cogere me abakai kede jopug me Yuda, kede cogere me josaseredoti, inabin kede jo apat dedede abedo Yerusalem kobino woto ooko ki atesin gi.

²Di do oko sasaro gi kimore i wang ceng, duwe kede acerin dedede atie malo, gikame gin oudo kibedo kede amara but gi di kitimo negi tic; gikame gin kibedo lubo kede mono di kiworo gi; likame kobino coko gi akadi yiko gi; gin kibino bedo bala woyo kame tie malo i wi lobo.

³Jo apat kodong me ateker arac noni, jo kame bedo i kabedere kame ango asarakino gi iye, bino paro be koto kitoi girgi akaka bedo kuo, ango Rwot me jo yi en awaco.”

Dub kede Alola

⁴Rwot owaco na pi yamo ne jo be, “Kame dano opoto mam doko eyai malo? Kame dano orwenyo yongayo, mam doko edok cen?”

⁵Do kara pinyo komio wun itienu meede ameda lokere tenge kibuta di iwekanu? Wun imokunu amoka i kom gi me abe, di idagunu dwogo buta.

⁶Ango abedo ciko yita winyo kope wu, do wun likame iyamunu kope me ateni. Likame tie ngatamoro kame swilaro ki dub mege di koto epenyere be, ‘Nyo arac kame



atimo?' Do wun dedede ngat acelacel tie lubo yongayo mere bala asigira atie ringo aringa ot i yi.

⁷Akadi etolut da ngeo kare mere me kobo; akadi aweleko, acilagwec kede owalu da lubo kare gi me bino; do jo na, wun likame ingeunu cik kame ango amio wu.

⁸Benyo benyo kame itwerenu waco kede be wun iriekunu doko ingeunu iswilia na? Nenunu jo kame gonyo iswilia otieko lokoloko gi di kiko wandiko gi me abe.

⁹Kobino mino lewic mako jo ariek; lworu bino mako gi di oko mamako gi; bala kame gin kitieko dagi kede kop ka Rwot, rieko nyo kame gin kitie kede?

¹⁰Pi manono, ango abino mino jo apat mon gi, doko da abino mino poti gi but jo anyen. Pien jo dedede, cako kibun jo me ruom apiny tuno kede but jo me ruom amalo, owor mono lim i yore arac. Akadi inabin kiton josaseredoti da tie kede tim me kuwo.

¹¹Gin kitero aporeso kame tie i kom jo na tukotuko di kiwaco be, 'Mulem, mulem, 'do di mulem moro li.

¹²Gin oudo kibedo timo tim me lewic, kitimo gikame neno rac; do di likame lewic oko mako gi akadi acel, doko da likame kinge mino nyim gi bedo luruluru. Pi manono gida kibino bedo i kom jo kame komuducaro; kame ango amio gi alola, manono bino bedo ajikini gi. Ango Rwot en awaco.

¹³” Ango oudo amito coko jo na bala ngwedo anyakini me olok arabo anyakini me epigi, do gin kiko bedo bala yen ali kede anyakini; akadi pote gi da otieko tuo. Pi manono, ango atieko yei ne jo apat lunyo poto nono.”

¹⁴Jo ka Rubanga penyere be, “Pinyo kara komio wan pwodi otienu bedo okweunu kom wa? Cokerenu ootunu i bomban kame kocelo kede apama atek, tetekeny ootunu otounu kugonogo. Pien Rwot Rubanga wa otieko ngolo ne wa kop me to; etieko mino wan pii atie kede poison iye pi wan mato, pien wan odubunu bute.

¹⁵Wan oudo otienu kede gen me udo mulem, do likame gimoro aber oko timere. Oudo ogeno be kobino cango peko wa, do nenunu, olunyunu bedo kede lworu kenekene.

¹⁶Unyo me asigiran me jokwor wa winyere wok ki Dan; ka asigiran gi odwilao, lobo me Yuda dedede yangere. Jokwor wa tie bino pi dudubo lobo wa lung kede gi dedede kame tie iye, kede pi dudubo bomba wa kede neko jo kame bedo iye.”

¹⁷Rwot waco be, “Nenunu, ango atie cwano jokwor i diere wu bala twole kalikame gengere; gin kibino kakao wu.”

Cwercuny Yeremia pi Jo mege

¹⁸Kilel na otiek, atie do kede cwercuny, cunya tie kede tuwo me par.

¹⁹Winyunu! I kabedo dedede jo na tie koko di kiwaco be, “Benyo, Rwot otieko do weko Sion? Benyo, abaka me Sion do likame tie iye?” Rwot abaka gi oko dwoko be, “Pinyo komio wun iwangunu cunya i yore me woro calini kame kopao, di iworunu rubangan apat?”



²⁰Jo tie koko be, “Kare me iporo otiek, kare me kac okato, do likame tie alako moro kame otieko udo.”

²¹Cunya owanakin pi awanon kame jo na tie kede; ango atie kede iturur doko da koma oto.

²²Benyo, yen me amuket likame tie Gilead? Benyo, imuruko likame tie kuno? Do kara pinyo komio likame kocango tuwo kame jo na tie kede?

Yeremia 9

¹Okwe koto oudo wia obedo atan me pii, kede wanga oko bedo atan me pigewang, koto akok iceng kede iwor pi jo na kame koneko!

²Okwe koto di oudo atie kede karamoro i wi tim, kima kame jo atie i sapali buto iye, koto aweko jo na di ako gira ot bedo iye! Pien gin kidonyo woro rubangan apat, gin kibedo ekodet me jo acumakino jo.

³Leb gi yamo kope me abe bala kame yat kame kokudo gweo kede tong me emal; teko gi omeede i lobo gi pi tim kalikame obedo me ateni, do weko pi tice me ateni. Rwot waco be, “Jo na timo tice areco kame lubere aluba, doko da likame kitera bala Rubanga gi.”

⁴Poore ngat acelacel bed di egwokere i kom ngawote, doko da kur iket gen ni i kom wadu moro; pien wad acelacel mito mano kar ngawote bala bin Yakobo, doko da ngat acelacel tic mere ot dubo nying jowote.

⁵Gin dedede tic gi ngalo jowot gi, doko likame tie dano ayamo kop me ateni. Gin kitieko pwonyo leb gi yamo kope me abe, doko likame kitwero weko dub.

⁶Tim gi me tero jo kirac lubere aluba, doko da tim gi me ngalo jo da lubere aluba. Rwot owaco be jo mege otieko kwine.

⁷Pi manoni, Rwot me jo yi waco be, “Bala kame kotwako kede nyonyo kede mac pi jililo en doko cil, kamanono ada abino keto can alit i kom jo na pi tamo gi kede lonyo gi. Jo na otieko timo dub, nyo apat kame doko ango akaruno timo negi?”

⁸Leb gi cal bala tong me emal me nek; gin tic gi en yamo kop me abe. Gin kiwaco ne jowot gi kope awinyo mit, do cuny gi udo tie kede iik me ngeso dano.

⁹Mam ango apoore mino gi alola pi tim gi noni? Mam ango apoore culo kwor i kom ateker kacal kamanoni? Ango Rwot en awaco.”

¹⁰Ango ako waco be, “Abino tururo pi mori, abino koko pi lum me wi tim kame leini camo, pien gin dedede kitieko tuo, doko likame ngatamoro beo kunono. Koko me dok likame winyere iye; winy kede leini otieko ringo tenge kiye.”

¹¹Rwot waco be, “Abino mino Yerusalem doko atukit me gedo kopopoto, kabuto me ikween; doko abino mino bomban me Yuda doko amejeko, kakame jo li iye.”



¹²Ango ako penyere be, “Rwot, pinyo komio lobo odudubun di kony mere oko doko li bala wi tim, omio likame tie dano moro abeo iye? Ngai kame riek kitek kame twero niang i gi noni? Ngai kame in itieko waco ne kop noni tetekeny eda ewac ne jo apat?”

¹³Rwot oko dwoko be, “Manoni otimere pien jo odagi lubo iswilia kame ango amio gi. Gin likame kilubo gikame ango awaco negi, akadi bedo i ekite kame ango amito negi.

¹⁴Do akaka manono, gin kilunyo bedo kede epali di kiko donyo timo gikame cuny gi mito, di kiko donyo woro Baal, bala kame joakwari gi opwonyo gi kede.

¹⁵Pi manono, ango atie waco be, ango abino mino jogi camo yat akec, abino mino gi kimato pii atie kede poison.

¹⁶Abino sasaro gi i diere me atekerin kame gin akadi joakwari gi likame ngeo. Doko abino cwano negi yi tuno di aneko gi tieko gi atieka.”

Jo me Yerusalem Okok Kimito Kony

¹⁷Rwot me jo yi waco be, “Kong tamunu i kom gikame tie timere, ikounu lwongo mon angeo koko; lwongunu mon atie kede diru me koko jo oto.”

¹⁸Jo oko waco be, “Wacunu negi kisuny bino di kiko wero ne wa wer me koko jo oto, tetekeny pigewang wa moli, di abukewang wa ko diak pi koko.”

¹⁹Koko tie winyere wok ki Sion be, “Kotieko muducaro wa! Lewic omako wa adikinicel, pien kotieko rereto ude wa, miero do oyai owek lobo wa.”

²⁰Ango ako waco be, “Okwe wun mon, winyunu kop ka Rwot, cikunu yitu i kom kope kame wok ki doge. Pwonyunu anyira wu wer me koko jo oto, doko di ngat acelacel kibutu ko pwoonyo ngawote koko nono.

²¹To otieko bino i dirisan wa, etieko donyo i miere wa kame kocelo kede apama atek. En eneko idwe wa kame tie i yote me bomba, kede ipongai wa kame tie i atalen.

²²Rwot owaco na pi yamo be, ‘ Kom jo oto bino sasarun kabedo dedede bala woyo orade obar, bala ijolong me nino apwodi tie i poto, doko da likame dano moro bino coko gi.’ “

²³Rwot waco be, “Jo ariek kur wakere pi rieko gi, akadi jo atek da kur wakere pi teko gi, akadi jo obaro da kur wakere pi abar gi.

²⁴Ka ngatamoro mito wakere, en epoore wakere pi ngena be ango en Rwot; pien ango atie kede amara kalikame lokere, doko da atimo gi dedede i yore me ateni kede kopoore. Magonogi en gikame yomo cunya. Ango Rwot en awaco.”

²⁵Rwot waco be, “Kare tie bino kame ango abino mino kede alola but jo kame kokepo;

²⁶abino mino alola but jo me Misiri, jo me Yuda, jo me Edom, jo me Amon, jo me Moab, kede jo dedede alielo wi gi bedo ler. Pien bed bala jo nogi dedede, ribo kiton jo



me Isirael, timo akepo bala gianyuta me isikan gi keda, do kuo gi cal bala jo kalikame kokepo.”

Yeremia 10

Woro Caljwogi kede Woro Rubanga

- ¹Wun jo me Isirael, winyunu kop kame Rwot tie waco ne wu.
- ²En ewaco be, “Kur ipwonyerenu lubo ekite kuo me atekerin apat; kur ibedunu kede lworu pi gianena mogo atimere i malo, bed bala atekerin apat tie kede lworu i kom gi nogo.
- ³Tim kame gin kitie kede amako edini gi kony mere li. Kitongo yat ki abum di kiko reto, ngapai cal ko pane kede gipac;
- ⁴jo di do ko tubuso en kede siliba kede saabu. Di oko gure kede sumalin piny tetekeny kur epoti.
- ⁵Caljwogi gi nono cal acala kede cal mogo kame jo cicibo i poti pi riamo winy; likame kitwero yamo; kotingo gi atinga pien likame kitwero ot. Kur ilworunu gi, pien likame kitwero timo ne wu gimoro arac, doko da likame tie gimoro aber kame kitwero timo ne wu.”
- ⁶Okwe Rwot, likame tie ngatamoro kame cal bala in, in idwong twatwal, doko nyingi tie kede twer adwong twatwal.
- ⁷Ngai kalikame poore mini wor, Okwe Abaka me atekerin dedede? In ipoore me jo mini wor. Likame tie ngatamoro kame cal bala in kikom jo ariek me atekerin dedede, amoto kikom abakai gi dedede.
- ⁸Gin dedede kiming, doko likame wi gi tio. Likame tie gimoro kame caljwogi twero pwoyo gi, piento en ebedo yat ayata.
- ⁹Komwono i kom caljwogi gi siliba kame kokelo ki Tarusi, kede saabu kame kokelo ki Upas; gin kibedo tic me jopai cal kede jotet. Kongapo negi igoen ebululu ebululu kede akwar, igoen kame jo atie kede diru me kuno igoen kede cing gi en ocweo.
- ¹⁰Do Rwot, in en ibedo Rubanga me ateni; in en Rubanga akuo, kede abaka kame pugo nakanaka. Ka in idoko ger, wi lobo lung yangere; atekerin likame sobolo kanyakino lilo nin.
- ¹¹(Wun jo miero iwacenu negi be rubangan kalikame ocweo malo kede lobo kobino muducaro gi ki wi lobo.)

Wer me Pako Rubanga

- ¹²Rwot en otimo lobo kede twer mere; en esipo piny kede rieko mere, eyararo malo kede niang mere.



¹³Ka en ewaco dwane, pii atie malo kururo; en ekelo idoun ki ajikini me wi lobo. Emio kot meny di eko cwano yamo ki kakame ekano gi iye.

¹⁴Do jo dedede ming, doko kili kede ngec; jo kame timo caljwogi lewic mako gi; pien rubangan kobedo cal kame gin kicweo obedo gi me abe, doko da likame kikuo.

¹⁵Kony gi li, kibedo gikame kopoore bedo kede acae i kom gi; kibino amuducar i kare kame Rwot bino kelo kede alola i kom gi.

¹⁶Rubanga ka Yakobo likame cal bala gin; en ebedo ngat kocweo gi dedede di eko yero ateker me Isirael pi bedo jo mege amake; nyinge en Rwot me jo yi.

Kobino Tero Jo Obukui bala Mabus

¹⁷Wun jo atie Yerusalem, kotieko lukaro wu! Miero icokunu jame wu.

¹⁸Pien Rwot owaco be, “Nan ango atie lwomo tenge bala aporocet jo kame bedo i lobo noni. Abino keto can alit i kom gi di kiko bilo da.”

¹⁹Yerusalem oko kok be, “Atie tin i can benyo pi awanon na! Apore na rac twatwal. Do di oudo ango atamo be ebedo gimoro atitidi kame atwero kanyakino!

²⁰Kotieko dudubo eema na; kococoto aunoi na dedede me twetweo en. Idwe na dedede otieko yai kibuta likame doko kitie. Likame tie ngatamoro abino yararo eema na bobo, kede lieliero isukan mege me isengena.”

²¹Ango ako dwoko be, “Jotel wa ming; gin likame kipenyo tam kikut Rwot. Manono en komio kop ocere negi di oko sarakino jo kame tie i cing gi.

²²Winyunu woo! Winyunu, etie bino! Manono obedo mor me tien gikame tie wok ki lobo atie tetu malo; ebino mino bomban me Yuda doko amejeko, kabuto me ikween.”

²³Okwe Rwot, ango angeo be likame dano twero kuo en kene iepone kame mitere; likame en kene etwero lubo yongayo apoore me aluba.

²⁴Riei jo ni, Okwe Rwot, do kur do ikangasaro, doko da kur itime kede gero pien manono bino mino imuducaro wa atwal atwala.

²⁵Bwot gero ni i kom atekerin kalikame paro piri, kede i kom jo kalikame wori. Pien gin kineko ikwae ka Yakobo; gin kimuducaro gi atwal atwala di kiko mino lobo gi odoko ameje.

Yeremia 11

Yeremia Owaco ne Jo pi Gwoko Isikan

¹Rwot oko waco na be,

²” Winy kope amako isikan noni, di iko waco ne jo me Yuda kede Yerusalem.



³Wace gi be ango, Rwot Rubanga me Isirael, abino keto ilam i kom dano moroni kalikame lubo cikere me isikan noni.

⁴En ebedo isikan kame bin ango atimo kede joakwari gi i kare kame akwanyo gi kede ki Misiri, lobo kame oudo cal negi bala epipa kodop me twako nyonyo. Oudo ango awaco negi pi winyo kop na di kiko timo gi dedede kame ango aciko negi. Awaco negi be kame gin kilubo kop na, gin kibino bedo jo na di ango ako bedo Rubanga gi.

⁵Manono koto ko mino ango acobo kwongere na kame atimo but joakwari gi, me mino gi lobo amio di lac, bala kame nataman kitie iye.” Ango ako dwoko be, “Ebo, Rwot.”

⁶Di Rwot oko waco na be, “Oti i bomban me Yuda kede i yote me Yerusalem di iko waco ne jo pi winyo kope me isikan noni di kiko lubo gi.

⁷Pien cako i kare kame ango akwanyo kede joakwari wu ki lobo me Misiri tuno tin, ango abedo kwenyaro jo nakanaka pi lubo kope na.

⁸Do gin likame kiko lubo kop na arabo ciko yit gi iye. Gin kiko lunyo timo gikame cuny gi mito pi epali kede tam areco kame kitie kede. Kite kame oudo ango aciko gi kede pi gwoko isikan noni di gin kiko dagi, omio ango ako kelo i kom gi alola kame oudo amoko i isikan noni.”

⁹Di Rwot oko waco na be, “Jo me Yuda kede jo me Yerusalem oribere jemo na.

¹⁰Gin kidok bobo i tim areco me joakwari gi me kare kasek, jo kame bin odagi winyo kop na; jo me Isirael kede jo me Yuda oturo isikan kame bin ango atimo kede joakwari gi.

¹¹Pi manono, nataman ango Rwot atie kwenyaro gi be, ateteni ango abino kelo can i kom gi kalikame kibino bwot kiye. Akadi bed bala kikok buta, do ango likame abino winyo koko gi.

¹²Di do jo abedo i bomban me Yuda kede jo kame bedo Yerusalem ko bino ot but rubangan kame lem gin kibedo mino giayala di kiko kok but gi pi koto konyo gi. Do rubangan nogo likame bino konyo gi.

¹³Pien rubangan kame gin kiworo odoko tot rom aroma kede bomban wu, Okwe wun jo me Yuda; doko da jo me Yerusalem ogero alutarin atot rom aroma kede yote me dier bomba gi, me woro gimoro me lewic, en Baal.

¹⁴Yeremia, kur ileg negi. Kur ikok buta arabo ileg buta pirgi, pien likame ango abino yei winyo kop gi ka kikok buta i esawa me peko.

¹⁵” Jo kame ango amaro otimo gikame rac twatwal omio likame kitie kede twero me bedo i tempulo na. Benyo, gin kiparo be cikere gi kede giayala gi me leini twero gengo can kame poore poto negi? Benyo, manono twero mino kibedo kede yomcuny?

¹⁶Ango oudo bin awaco negi be, ‘Wun icalunu bala yat olibeti alibaliba, atie kede anyakini acil.’ Do nan ango abino cwinyo yat nono kede twon idoran di ajange mege ko bino wang dopodop.



¹⁷” Ango Rwot me jo yi en kame apito Yuda kede Yerusalem bala pito yat. Do nan atie waco negi kop me kelo can i kom gi pi raco kame gin kitimo; gin kimio giayala but Baal di kiko wango cunya.”

lik me Neko Yeremia

¹⁸Rwot omia angeo tim areco kame jo oudo tie iiko i koma.

¹⁹Do ango gira oudo acal bala atin oromo amwol kame kotie tero ot neko. Ango gira oudo likame angeo be ango en kame oudo kitie poro kop i koma kakame kiwaco kede be, “Otongunu yat di pwodi kome yot; onekeny tetekeny kur bobo ngatamoro twer yutuno nyinge.”

²⁰Ango ako waco be, “Okwe Rwot me jo yi, ngat kame ngolo kop i ateni, ngat kame tamo cuny jo kede par gi, akwao icul kwor i kom gi di ango aneno, pien ango atieko jalo kope na dedede i cingi.”

²¹Jo me Anatot oudo mito neka, gin kiwaco na be, “Kur itimo imurai kan i nying Rwot, aso ka li, wan obino neki.”

²²Pi manono Rwot me jo yi oko waco be, “Ango abino mino gi alola; awobe gi kobino neko kede epima; idwe gi anyira kede awobe kec en kame bino neko.

²³Likame tie ngatamoro kikut gi kame bino dong. Pien ango abino kelo can i kom jo me Anatot i mwaka kame ango atieko moko me mino gi alola.”

Yeremia 12

Yeremia Opepenyo Rwot

¹Kame ango apido kedi, in Rwot, in ibino lona; do pwodi ango amito kelo pido na buti kamanono. Kara pinyo komio jo areco bedo i mulem? Pinyo komio gi dedede cobere kiber ne jo kalikame genere?

²In isipakino gi bala yat kame kopito, di kiko cweno aliasin; gin kidongo di kiko nyako anyakini. Gin nakanaka kiyamo kop aber i komi, do cuny gi bor kibuti.

³Do Rwot, in ingeo ango; in itieko ngingico ango di iko pimo ka cunya tie i komi. Ware kede jo nogo bala romini kame kotie ot neko, pok gi ken gi kikir ceng me neko gi.

⁴Kara pi kare arom kamene en kame lobo wa bino bedo kede di otuo, kede di lum da oner? Leini kede winy tie totoun pi dub me jo kame bedo iye, jo kame waco be, “Rubanga likame neno gikame wan otie timo.”

⁵Rwot oko waco be, “Yeremia, ka ber iol rom kano pi ringo kede jo, do benyo benyo kame itwero piem kede asigiran? Ka ber in igete iko poto i kakaler, do benyo benyo kame in ibino twero ringo kede i kakoswapo me dog ecilet me Yorodan?

⁶Akadi joawade ni, kiton jo me diakal ni obedo jo kame tie cati; gin kiwaco kope areco i komi. Kur iyei kope gi, bed bala kiyamo ni kope abeco.”



Cwercuny Rwot pi Jo mege

⁷Rwot waco be, “Ango atieko weko oda Isirael, atieko dagi jo na kame ayero pi bedo mega. Atieko mino jo na kame cunya maro i cing jokwor gi.

⁸Jo na kame ayero pi bedo mega olokere i koma bala engu atie i abum; gin kidorano nango; pi manono ango atieko dagi gi.

⁹Jo na cal bala winyo kame ikengia olukaro suro ki bad dedede. Oti icok leini dedede me obar iko kelo gi kibin camo ringo.

¹⁰Jopug atot me kumbor odudubo poto na me olok, gin kinyonyono poto na, kimio poto na koudo ber odoko bala wi tim.

¹¹Gin kitieko mine edoko bala wi tim; etie do lobo akony mere li i nyima. Lobo nono dedede odoko wi tim, do likame tie ngatamoro aparo da.

¹²Joyak obino pi yako kabedere dedede atie i wi imukuran me wi tim; pien ango acwao yi pi dudubo lobo nono dedede, likame tie ngatamoro kame bino bedo kede anapakin.

¹³Gin oudo kicuwo engano do okuto en oko lunyo dongo. Gin kicane tic kede teko, do likame kiko udo gimoro. Pi gero agwai kame ango atie kede, lewic bino mako gi pi kac atitidi kame kiudo.”

Cikere ka Rwot but Jokio me Isirael

¹⁴Rwot waco kop i kom jo atimo tim areco kame kio kede jo mege me Isirael, jo kame odudubo lobo kame en emio jo mege be, “Abino kwanyo jo nogo ki lobo gi bala puto yat, di ako lako Yuda ki cing gi.

¹⁵Do ingei ango kwanyo gi tenge, kisa bobo bino maka kede gi, di ako bino dwoko atekerin nogo dedede acelacel i lobo mere amake.

¹⁶Ka i cen mere gin kiko keto cuny gi lubo edini ka jo na, di kiko pwonyere lairo i nyinga, bala kame gida oudo kipwonyo kede jo na lairo i nying Baal, manono bino mino gi kidonyo i kom jo na di kiko bedo kede mulem.

¹⁷Do ka ateker moroni odagi lubo kop na, ango abino pute atwal atwala bala yat, di ako muducaro en, ango Rwot en awaco.”

Yeremia 13

Egoe Ameny kame Korwao i Pier

¹Rwot oko waco na be, “Oti iwil egoe ameny kame korwao i pier di iko rwane i pieri, do kur irwake i pii.”

²Aso ango ako wilo egoe kame korwao i pier bala kame oudo Rwot owaco na, di ako rwane i piera.

³Rwot bobo oko waco na tien me are be,



⁴” Kwanyi egoe me pier kame nataman itie rwano no, di iko ot i ecilet me Eupurate di iko kane kakobarere me lela.”

⁵Aso, ango ako ot di ako kane i nget ecilet me Eupurate bala kame oudo Rwot ocikona.

⁶Ingei kare moro Rwot oko waco na be, “Nan oti i ecilet me Eupurate di iko omo egoe kame oudo ango aciki be ioti ikan kunono.”

⁷Aso, ango ako dok kunono ako kunyo egoe nono di ako kwanye ki kakame oudo akane iye. Do ako udo be egoe nono oudo otieko dubere, kony mere oudo otieko doko li.

⁸Di Rwot oko bobo yamo keda.

⁹En ewaco na be, “Epone noni en kame ango abino tieko kede ewaka me jo me Yuda kede ewaka adwong me jo me Yerusalem.

¹⁰Jo areco nogi odagi lubo kop nango. Gin kibedo kede epali di kiko donyo timo gikame cuny gi mito, di kiko donyo woro kede tic ne rubangan ace. Aso gida kibino doko cal bala egoe kame korwao i pier noni, egeo kame kony mere otieko doko li.

¹¹Pien bala kame egoe kame korwao i pier lidere kede i pier dano, kamanono da ango oudo amio jo dedede me Isirael kede Yuda olidere i koma, tetekeny kibed jo na, di kiko kelo pak kede dwongo i nyinga. Do gin kiko dagi winyo kop na.”

Agune me Bwini

¹²Rwot oko waco na be, “Yeremia, oti iwac ne jo me Isirael be, ‘Rwot Rubanga me Isirael owaco be poore ipongunu agune wu me bwini dedede lubulub kede bwini.’ Gin kibino waco ni be, ‘Iparo be likame wan ongego be opoore pongo agune me bwini dedede kede bwini?’

¹³Di do in iko bino waco negi be ango Rwot ayapuno pongu wi jo dedede kame bedo i lobo noni kede bwini tuno gin mer: wi abakai ikwae ka Daudi, josaseredoti, inabin kede jo dedede kame bedo Yerusalem.

¹⁴Di do ango ako bino mwomwoco gi bala agune, ngat acelacel i kom ngawote; jonywal kede idwe karacel, ango Rwot en awaco. Likame abino bedo kede cuny me kisa di ako weko neko gi.”

Yeremia Omio Ikwenyar i kom Ewaka

¹⁵Jo me Isirael, Rwot oyamo. Cikunu yitu iwinyunu kop mere; kur ibedunu kede ewaka.

¹⁶Miunu Rwot Rubanga wu dwongo di likame pwodi ekelo colo, di tienu ko gete i kom mori di piny warawara; di pwodi likame eloko lero kame nan wun igenunu odoko col acucucuc.

¹⁷Do ka wun idagunu winyo kop, ango abino koko i mung pi ewaka wu; ango abino koko kitek di pigewanga ko mol, pien jokwor otieko tero jo ka Rwot bala mabus.



- ¹⁸Rwot owaco na be, “Wace abaka kede toto mere kiwok piny ki komini gi me ajakanut, pien icoron gi acil me pug otieko popoto piny ki wi gi.
- ¹⁹Jokwor otieko lukaro bomban kame tie i bad tetu piny me Yuda; likame tie ngatamoro kame twero donyo i yi gi. Kotieko mamako jo dedede me Yuda kotero gi obukui bala ipaso.”
- ²⁰Yerusalem, kong ting wangi di iko neno jo atie bino ki tetu malo. Ani bo romini kame oudo kogeni kede gwoko, gin en jo kame oudo in iwakere pirgi?
- ²¹Ibino waco benyo ka jo kame oudo in itero be obedo jowoti obwoni di kiko donyo pugi? Mam ibino bedo kede aramo i cunyi bala dako atie ramere me nywal?
- ²²Ka in iko penyere be, “Kara pinyo komio gigi dedede tie timere nango?” Etimere kamanono pien dub ni do dwong adikinicel, en oko mino oelaro egoe ni di oko buto kedi tetek.
- ²³Benyo, dano twero loko cal me del me kome, arabo erisa twero kwanyo kakolingulingun me kome? Likame twerere. Kamanono wuda likame itwerunu lokere weko timo gikarac di ikounu donyo timo gikaber.
- ²⁴Rwot bino sasaro wu bala cucung kame yamo me wi tim buku.
- ²⁵En ewaco be manoni obedo iner nin kame en etieko iiko piri, pien in wi owil kede en di iko keto gen ni i kom rubanga me abe.
- ²⁶Rwot kikome en kame bino elaro egoe ni eumo kede wi di komi me lewic ko bino neno kakaler.
- ²⁷En etieko neno tim wu aneno rac, tim wu me donyo woro rubangan apat bala kame dano timo kede adote, amoto bala kame asigira icuo dwilao kede pi mito dako; tim wu me malaya kame itimunu i wi imukuran abongo lewic. Okwe Yerusalem, can i wii! Ibino tero kare arom kamene di pwodi likame iloko tim ni odoko cil?

Yeremia 14

Ceng Orieny pi Kare Alac

- ¹Rwot oko waco na kop i kom rieny me ceng pi kare alac be,
- ²” Yuda tie tururo, bomban mege tie totoun; jo mege buto piny kede cwercury, doko da Yerusalem tie koko be konye.
- ³Jo atie iye kobaro cwao jotic gi omo pii; gin kioto i akong do likame kiko twero udo pii; gin kidwogo kede agune gi abongo pii. Gin kiko umo wang gi pien udo wi gi odubere, doko lewic udo omako gi.
- ⁴Kite kalikame kot ocwei kede di lobo oko tuo, lewic mako jopur di kiko donyo umo wang gi.
- ⁵Akadi atil adako da weko atin mere apwodi titidi pien udo lum li.



⁶Pundan me obar cungo i wi imukuran aler di kiko donyo titingo um gi supo piny bala ikween; wang gi doko mwadamwada pien udo lum kame kicamo li.

⁷Jo na kok buta be, ‘ Bed bala dub wa nyuto raco wa, kony wa, Okwe Rwot, pi nyingi. Wan otieko lokere tenge kibuti tien atot, wan odubo buti.

⁸Okwe in ngat kame ibedo gen me Isirael, ngat kame lake i kare me peko, pinyo komio itie i lobo wa bala ngakumbor, bala dano atie i sapali kobeo pi buto iwor acel kenekene?

⁹Pinyo komio itie bala dano moro kame wie ototolun, bala ngayi atek kalikame twero konyo dano? Do di in, Okwe Rwot, itie i diere wa, doko da kolwongo wan be jo nin; kur iwek wa! ’ ’

¹⁰Rwot owaco kop i kom jo nogi be, “Ateteni cuny gin obedo yom pi yai tenge kibuta, doko da likame kitweo asisa. Pi manono, ango abino yutuno gikarac kame gin kitimo di ako mino gi alola pi dub gi.”

¹¹Rwot owaco na be, “Kur ileg buta pi ango konyo jogi.

¹²Akadi bed bala kilegi ileg me kanyo kec, likame ango abino winyo koko gi; akadi di gin kimia giayala awanga kede giayala me alos, likame ango abino gamo gi; do ango abino muducaro gi kede epima, kede kec, kede aumpuli.”

¹³Di ango ako waco be, “Okwe Rwot! Inabin nogo ige kame oudo waco ne jo be, ‘Wun likame kobino neko wu, doko da likame kec moro bino bedo tie, do Rwot bino mino wu anapakin i lobo noni.’ “

¹⁴Di Rwot oko waco na be, “Inabin tie murao kop me abe i nyinga; likame ango acwao gi, doko da likame ango ayamo kede gi amoto ciko gi. Gin kitie waco ne wu gianyuta kobedo kop me abe; kope kame gin kiwaco be bino timere i kare me anyim obedo gikame kony gi li, gikame gin kiteto kede wi gi ken gi.

¹⁵Pi manono, ango atie waco kop i kom inabin nogo, jo kame yamo i nyinga di likame ango acwao gi, di kiwaco ne jo be yi amoto kec likame bino poto i lobo noni, inabin nogo ango abino neko gi kede epima kede kec.

¹⁶Jo kame gin kiwaco negi kope nogi da bino to iepone acel nono. Kobino lwolwomo kom gi i dier yote me Yerusalem, doko da likame tie ngatamoro kame bino yiko gi. Manoni bino timere i kom gin dedede, kiton i kom mon gi, awobe gi, kede anyira gi. Ango abino mino gi alola pi culo dub gi.”

¹⁷Rwot oko waco na pi ot waco ne jo cweracuny kame atie kede be, “Poore pigewanga cweri iceng kede iwor, miero kur ajik koko; pien jo na kame amaro oudo twon apore, gin kiwanere kirac.

¹⁸Ka aoto obar, aneno kom jo kame koneko kede epima. Ka adonyo i bomba, aneno jo kame kec odio. Inabin kede josaseredoti wire girgi timo tice gi, do likame kingeo gikame kitie timo.”



Jo Obako ne Rwot Dog gi

¹⁹Rwot, benyo, itieko dagi Yuda atwal atwala? Benyo, cunyi dagi Sion? Pinyo komio iwanakino wa kitek ateka, awanon kalikame sobolo cango? Wan oudo otie geno pi udo mulem, do likame oko udo bero moro; oudo otie geno kare me cango peko wa, do oko lokere bedo kede lworu.

²⁰Okwe Rwot, wan oyei be odubo, doko da joakwari wa odubo; wan odubo buti.

²¹Pi gwoko nyingi, kur ibed kede acae i kom wa; kur ikel lewic i kabedo me dwongo, kakame in ipugo kiye, kur itur isikan kame itimo kede wa.

²²Likame tie caljwogi me atekerin apat kame twero cwano kot; doko da likame malo twero mino kot cwei en kene. Rwot mam in en Rubanga wa? Wan oketo gen wa buti, piento in en kame itimo gi nogi dedede.

Yeremia 15

Can bino Poto i kom Jo me Yuda

¹ Rwot oko waco na be, “Akadi koto di oudo Musa kede Samuel obino kan cungo i nyima kwana, koto likame ango abedo kede kisa i kom jogi. Cwai gi tenge ki nyima, mi gi kioti.

² Ka gin kipenyi tuai kame gin kibino ot iye, in ibino waco negi be ango awaco kaman: Jo mogo koiko negi to me aumpuli, manono en kabeo gi! Jo mogo koiko negi to i yi, manono en kabeo gi! Jo mogo koiko negi to kec, manono en kabeo gi! Jo ace koiko be kobino tero gi bala mabus, manono en kabeo gi!

³Ango atieko moko be abino cwano ne jogi jamini areco ongwon: kobino neneko gi kede epima; igwogin bino ware kede kom gi; winy bino camo gi, kede da leini me obar bino camo gi.

⁴ Gikame ango abino timo negi bino mino jo me wi lobo neno gi di kiko bedo kede lworu; abino timo kamanono pi gikame Abaka Manase wot ka Esekia otimo Yerusalem i kare kame en oudo etie kede abaka me Yuda.”

⁵Rwot waco be, “Ngai kame bino bedo kede kisa i komi, Okwe Yerusalem? Arabo ngai kame bino tururo piri? Ngai kame bino cungo kong pi penyo kite kame itie kede?

⁶Wun itiekunu daga, ilokunu na ngei wu itienu ot tenge; manono en komio ango arieo cinga i komu di ako muducaro wu, pien atieko ol kede didio gero na.

⁷I bomban dedede me lobo wu, ango asararo wu bala cucung me kal kame kokwororo. Aneneko idwe wu, amuducaro wun jo na, pien likame iwekunu yote wu areco.



⁸Apuserun tie i lobo wu atot kalamo asinge me dog nam. Aneko awobe wu apwodi tek di ako mino toti gi oneno can. Amio lworu kede cwercuny ongoole angola potu negi.

⁹Dako konywalo idwe kanyaare owile; engamo doge omo wei. Kibute esawa me i dier iceng cal ne bala ceng otieko donyo; komio lewic omake kitek. Doko da abino mino jokwor neko jo apat kodong kibutu, angu Rwot en awaco.”

Yeremia obedo kede Ingungur but Rwot

¹⁰Ango tin atie i can benyo! Pinyo komio toto na onywala i piny kan? Jo tie lok kede piem keda i lobo wa noni dedede. Ango likame akopao gira moro but ngatamoro, doko da likame tie ngatamoro kame angu akopao gire moro, do di jo dedede tie lama.

¹¹Rwot, mi ilam kame gin kilama kede cobere kakare ka likame angu atio ni kiber, ka likame angu abako dogu buti i kare kame jokwor na tie kede i peko kede cwercuny.

¹²(Likame tie ngatamoro kame twero turo lilim me ayon me bad tetu malo, ka konyale kede nyonyo buronsi.)

¹³Rwot oko waco be, “Angu abino mino jokwor wu bino tero abar kede jamini wu apirgi tek, pi dub kame wun itimunu i lobo wu dedede.

¹⁴Abino mino idonyunu timo ne jokwor wu tic i lobo kalikame ingeunu, pien gero nango cal bala mac kame kocwinyo, en ebino liel nakanaka.”

¹⁵Angu ako waco be, “Okwe Rwot, in ingea kiber. Yutuno angu iko konya. Cul kwor i kom jo kame tie tidilo angu. Kur imeede kanyakino kede gi pien manono bino mino kineka; ngei kiber be angu atie kanyo ayet piri.

¹⁶Ka kope nin otuno i yita, kidoko nango bala cam, di kiko kelo na kilel kede yomcuny; pien jo lwonga kede nyingi, Okwe Rwot, Rubanga me jo yi.

¹⁷Angu likame atero kare na kede jo kame tie i bedo aber kede kilel. Pi kite kame kuo nango tie kede i akarunikin nin, angu ako bedo kena di ako bedo kede wangcuny i kom jo.

¹⁸Pinyo komio aramo na likame jik? Pinyo komio bur na likame muketikin, pinyo komio edagi cango? Benyo imito bedo nango bala atan angalo jo angala, bala pii kame tuo i kare me oro?”

¹⁹Rwot oko dwoko be, “Ka ilokere idwogo buta, angu abino gami bobo, di in iko bedo ngatic na. Ka in iyamo kope abeco kame tie kede kony, do weko yamo kope kame kony gi li, in ibino bedo ngat kame yamo akaka angu. Jo en kame bino dwogo buti, do weko in dok but gi.

²⁰Ka kisuri, angu abino mini ibedo tek bala apama me cel kame kotimo kede nyonyo buronsi. Gin kibino yi kedi do likame kibino bwoni, pien angu abino bedo tie kedi pi gwoki kede pi konyi.



²¹Ango abino laki ki cing jo atimo tim areco; abino mini ibwot kibun jo ager, ango Rwot en awaco.”

Yeremia 16

Ekite Kuo kame Rwot Mito ne Yeremia

¹Rwot oko waco na be,

²” Kur inyom dako, doko da kur inywal idwe i kabedo noni.

³Ango atie waco ni gikame bino timere i kom idwe kame konywalo kanoni, kede i kom jonywal gi kaman.

⁴Gin kibino to tuwo areco. Likame kobino koko gi, doko da likame kobino yiko gi. Kom gi bino rade piny kago atatai bala woyo. Kobino neko mogo i yi, kede mogo bino to kec; kom gi bino bedo cam me winy kede me leini me obar.

⁵” Kur idonyi i ot kame jo tie tururo iye pi dano oto, akadi ot kakame koko tie iye; kur ikok pi ngatamoro. Ango atieko kwanyo mulem na, amara na, kede cuny na me kisa kibun jogi.

⁶Jo me ruom amalo kede me ruom apiny gin dedede kibino to i lobo noni; likame kobino yiko gi, doko likame tie ngatamoro kame bino koko gi. Likame tie ngatamoro kame bino teteo kome amoto lielo wie pi nyuto iturur.

⁷Likame tie ngatamoro kame bino nywako cam kede ngat atie i koko, pi kweno cunye pi dano mere oto. Likame tie ngat kame bino kweno cuny dano nono akadi di papa mere amoto toto mere en oto.

⁸” Kur ioti i ot kame jo tie camo iye ebaga. Kur ibed piny iko donyo cam kede amata kede gi.

⁹ Gikame ango Rwot me jo yi, Rubanga me Isirael awaco iye en ine be: ango abino jiko icelakin me yomcuny kede kilel me ibagai me nyom atie kanoni; jo me kanoni bino neno kede wang gi. Abino jiko dwan eteran kede dwan ateran.

¹⁰” Ka in iwaco ne jo kope nogi dedede, gin kibino penyi be, ‘Pinyo komio Rwot owaco kope me can adongodongo nogi dedede i kom wa? Raco wa nyo? Dub nyo kame otimo but Rwot Rubanga wa?’

¹¹In ibino dwoko negi be Rwot owaco be, ‘Etie kamanono pien joakwari wu olokere tenge kibuta di kiko donyo woro rubangan ace di kitio negi. Gin kiweka di kiko dagi lubo iswilia na.

¹²Do wun ikounu do timo gikarac kalamo joakwari wu; ngat acelacel kibutu odoko ngaepali di eko donyo lubo mit areco atie i cunye. Likame doko ilubunu kop na.

¹³Pi manono, ango abino kwito wu tenge ki lobo noni di ikounu ot potu i lobo kame wun akadi joakwari wu likame ingeunu, di do ikounu donyo woro rubangan apat ki kuno iwor kede iceng; likame abino bedo kede cuny me kisa i komu.’ “



Rwot bino Dwoko Jo me Isirael ki Obukui

¹⁴Rwot waco be, “Ateteni kare bino tuno kame jo likame bobo bino lairo kede i nyinga, di kiwaco be Rubanga akuo kokwanyo jo me Isirael ki Misiri.

¹⁵Do kibino lairo i nyinga, di kiwaco be Rubanga akuo kokwanyo jo ki lobo atie tetu malo, kede ki lobere dedede kakame angu oudo ariamo gi iye. Pien angu abino dwoko gi i lobo gi amako gi, lobo kame angu bin amio joakwari gi, angu Rwot en awaco.”

Alola katie Bino

¹⁶Rwot waco be, “Angu atie lwongo jo kame bino mako jogi bala ciko aporogo; doko abino lwongo jodwar atot kame bino dware gi bala dware le i wi mori dedede, kede i wi imukuran kede i aridata me lela.

¹⁷Pien wangango tie neno ekite me kuo gi; likame tie moro kopwono kibuta, dub gi tie kakaler i wanga.

¹⁸Abino mino gi cul tien are pi raco kede dub gi, pien gin kimunao lobo nango i yore me pongu iye caljwogi, gi kalikame kuo, gikame cunyangi dagi neno.”

Ilega ka Yeremia pi Gen mere i kom Rwot

¹⁹Okwe Rwot, in en imia teko, doko in en igwoka, in en karingo na i esawa me peko. In en kame atekerin dedede bino bino buti wok ki ajikini me lobo di kiwaco be, “Joakwari wa oudo tie kede rubangan me abe kenekene, gimogo akony gi li, doko da kili kede bero moro.

²⁰Benyo, dano adana twero timo rubangan pirigi? Ka kitwero timo, udo magonogo likame obedo rubangan!”

²¹Rwot waco be, “Pi manono, ateteni angu abino pwonyo gi, abino mino atekerin ngeu twer kede teko na kicel atwal; gin kibino ngeni be angu en Rwot.”

Yeremia 17

Dub kede Alola me Yuda

¹Rwot waco be, “Jo me Yuda, kowandiko dub wu kede kalamu kame kocweo kede ayon; kogiro gi i cunyu kede i kom iswongen me alutarin wu kede lilim abit kame kocweo kede nyonyo dayamon.

²Wun iworunu rubangan apat i alutarin, kede i ipirin kame kosipo pi bedo rubanga adako anyinge Asera i nget yen dedede koduko, i wi imukuran,

³kede i wi mori atie obar. Abar wu kede jamini wu apirigi tek angu abino mino koyako pi dub kame itimunu i lobo wu dedede.

⁴Pi tim wu, ibinunu kei lobo kame angu amio wu, di ako bino mino wu tic ne jokwor wu i lobo kalikame wun ingeunu; pien gero nango cal bala mac kame kocwinyo, en ebino liel nakanaka.”

Jo kame Rwot bino Mino Winyo kede Ilam



⁵Rwot waco be, “Abino lamo jo kame lokere tenge kibuta, di kiko keto gen gi i kom jo ajoa, di kigengere i kom teko kame jo tie kede.

⁶Jo nogo bino bedo bala yen atie i wi tim, yen kame dongo kakotuo gangagang, i lobo amunyomunyo kakame jo likame bedo iye. Likame tie gimoro aber kame bino timere ne jo nogo.

⁷” Abino mino winyo but jo kame keto gen gi i koma.

⁸ Gin kical bala yen kame kopito i dog osamai; aliasin gi tuno i pii. Gin likame kitie kede lworu ka lieto obino, pien pote gin dong di numu; ka ceng orieny cutucutu gin likame kiparo, pien gin kimeede ameda nyako anyakini.

⁹” Ngai kame karuno niang cuny dano? En ebedo gikame tie kede angalo kalamo gi dedede; ebedo gikame otapar.

¹⁰ Ango Rwot angingico tam me dano, doko atamo cuny dano; ako mino ngat acelacel gikame poore ne di lubere kede ekite me kuo mere, kede di lubere kede gikame etimo.”

¹¹Dano audo sente i yore arac cal bala winyo abeko abeon kalikame obedo mege, di idwe nogo ko ringo weke. I diere me kare me kuo mere dano nono bino kei abar mere, di i ajikini en eko doko ngamingo.

¹²Abila wa kacil cal bala kabedo me pug kopong kede dwongo ka Rwot; en ebedo cungo i wi moru cako i agege.

¹³Rwot, in en ibedo gen me Isirael. Jo dedede koweki kobino mino lewic mako gi. Jo dedede kame lokere tenge kibuti kobino wandiko nying gi i kabedo me jo oto, pien gin kiweki in Rwot ngat kame ibedo atan me pii amio kuo.

Yeremia Okwao Rwot pi Konye

¹⁴Canga, Okwe Rwot, di ako cango; laka di ako bedo dano kame kotieko lako; pien in en ngat kame angu apako.

¹⁵Jo waco na be, “Ani bo can kame Rwot owaco be bino poto ne wa? Kong ebin!”

¹⁶Rwot, do angu gira likame abedo supi pi kelo can i kom gi; likame aparo i cunya be koto cengemoro peko opoto negi. Rwot, in ingeo gikame dogu owaco; in itie kede niang iye.

¹⁷Kur ibed ngat kame kelo na lworu; in en karingo nangu i esawa me peko.

¹⁸Mi lewic mak jo atidilo angu, do kur imi lewic maka. Mi cuny gin poti, do kur imi cunyangu poti. Mi can poti i kom gi ceng moro di iko muducaro gi atwal atwala.

Kop i kom Gwoko Ceng Sabato



¹⁹Rwot owaco na be, “Yeremia, oti icungi i Erute ka Jo, en erute kame abakai me Yuda beo kiye me donyo i bomba kede me wok ki bomba; di bobo iko ot i irutei dedede me Yerusalem

²⁰di iko waco ne abakai, kede jo dedede me Yuda, kede ngat acelacel kame beo ki irutei nogi pi winyo kop kame ango atie waco.

²¹Wace gi be pi gwoko kuo gi, miero kigwokere kur ngatamoro yei mugugu i ceng Sabato; doko da likame kipoore yeno gimoro donyo kede ki irutei me Yerusalem.

²²Doko da likame kipoore yeno gimoro wok kede ki ude gi i ceng Sabato, arabo timo tic moroni; do kipoore gwoko ceng Sabato bed cil bala kame bin ango aciko ne joakwari gi.

²³Do joakwari gi bin likame oko yei winyo kop na amoto ciko iye yit gi; do gin kiko pongo na ngut gi di kiko dagi winyo amoto gamo pwony na.

²⁴” Wace gi be ka gin kiwinyo kop na, di likame kiko yeno mugugu moro donyo kede ki irutei me bomba noni i ceng Sabato, do di kiko gwoko ceng Sabato obedo cil di likame kitimo iye tic moro,

²⁵manono bino mino abakai kame lunyo kom ka Daudi me pug, karacel kede jotel ace kame donyo ki irutei me Yerusalem bedo tie nakanaka. Gin karacel kede jo me Yuda kede Yerusalem kibino ringo kede cabalan kede asigiran. Bomba me Yerusalem bino bedo culucul kede jo nakanaka.

²⁶Jo bino wok ki bomban me Yuda, kede kabedere ace atie i nget Yerusalem; kibino wok ki adul me Benjamin, ki dud mori me bad tetu tim, ki lobo kobedo imukuran imukuran, kede ki bad tetu piny me Yuda. Kibino kelo i ot ka Rwot giamia kede giayala awanga, giamia me alos, odok angwe kur kede giamia me pwoc.

²⁷Do ka gin likame kiyei lubo kop na, me gin gwoko ceng Sabato bedo di cil, kede me weko yeno mugugu moro beo kede ki irutei me Yerusalem i ceng Sabato, manono bino mino acwinyo mac i irutei me Yerusalem. Mac nono bino wango bomba kede apama atek kame kocale kede, doko likame kobino neke.”

Yeremia 18

Yeremia i Ot ka Ngacwei Agune

¹Rwot oko waco na be,

²” Oti ilor piny i ot me ngacwei agune, kakame ango abino mini kiye kop na.”

³Ango ako ot i ot me ngacwei agune di ako ude etie tic kede itatany mege me cwec.

⁴Tek kame agulu kame oudo etie cweno odubere, en oudo enyongo lobo me cwec nono di eko lokere time kede gi apat, bala kame cunye opwoyo.

⁵Di Rwot oko waco na be,



⁶” Mam angó atwero timo ne wun jo me Isirael gikame ngacwei agune otimo ne lobo me cwec? Bala kame lobo me cwec tie kede i akarunikin me ngacwec, kamanono da, wuda jo me Isirael itienu i akarunikin na.

⁷I kare moroni atwero waco kop i kom ateker moroni arabo ajakanut moroni be, abino pute, arabo tuturo en piny, arabo muducaro en;

⁸do ka ateker kame angó awaco kop i kome nono oko weko tim mege areco, angó abino loko tam na di ako weko timo can kame oudo aikere timo i kom gi.

⁹Doko i kare moro angó atwero waco kop i kom ateker arabo ajakanut moro be abino gere arabo pite bala yat,

¹⁰do ka eko timo gikarac i wanga i yore me dagi lubo kop na, angó abino loko tam na di ako weko timo gikaber kame oudo amito timo negi.

¹¹Pi manono, nan wace jo me Yuda kede jo kame bedo Yerusalem be, angó atie cweno iik arac i kom gi, atie iikere me kelo can i kom gi. Wace gi kiwek tice gi areco di kiko temuno kuo gi kede tice gi.

¹²Angó angeo be gin kibino waco be, ‘Mano kony mere li! Wan girwa obino lubo gikame otieko iiko; ngat acelacel bino timo epali di eko timo gikarac bala kame cunye mito.’ “

Jo Odagi Rwot

¹³Rwot waco be, “Kong pepenyunu atekerin apat ka ngatamoro otieko winyo akodi gi noni. Jo me Isirael kame amaro otimo gikame jo neno di lworó ko mako gi.

¹⁴Benyo, tie kare moro kame pii korumakin twero rwenyo kede ki lela me wi moru me Lebanon? Benyo, pii angic kame mol ki wi moru twero tuo?

¹⁵Do jo nango wi gi otieko wil keda, kidonyo dunyo bubani ne rubangan me abe. Gin kigete i yongayo kame kipoore lubo, likame doko kitie lubo ekite me kuo gi ariki sek; gin kitie do lubo isokot mogo atitino, do weko yongayo alac.

¹⁶Gin kitieko mino lobo gi odoko gikame neno mio jo lworó, gikame jo bino yisiro i kare dedede. Jo dedede abeo iye bedo kede lworó pi gikame kineno, kiko uro di kiyayango wi gi.

¹⁷Abino sarakino gi i nyim jokwor gi, bala yamo me bad tetu kide kame buko asinge. I kare kame peko poto negi kede angó abino loko negi ngea do weko nyima.”

lik Arac i kom Yeremia

¹⁸Di jo oko waco be, “Bianu oporunu kop arac i kom Yeremia! Josaserdoti bino bedo tie nakanaka kame pwonyo wan, jo ariek da bino bedo tie kame mio wan tam, kede inabin kame rabo ne wa kop ka Rubanga da bino bedo tie. Bianu oretenu kop moro apek, di okounu dagi winyo kope mege da.”



¹⁹Aso, ango ako lego be, “Okwe Rwot, winy gikame atie yamo, doko da winy gikame jokwor na tie yamo i koma.

²⁰Benyo, gikaber koculo kede gikarac? Aso di gin kitieko kunyo na bur be apot iye. Kong yutuno kite kame ango abako kede dogo i nyimi pirgi, tetekenya ikwany lilo ni tenge kibut gi.

²¹Pi manono, nan in mi idwe gi toi kec; mi konek gi kede epima. Mi mon gi kei idwe gi, kede kiko doko apuserun; mi aumpuli nek cuo gi, kede oko neko awobe gi i yi.

²²Ngole angola cwano negi joyak, di dwilao me lworu ko winyere ki ude gi. Gin kitieko kunyo nango bur be apot iye, doko da kitieko ciko na obek pi maka.

²³Rwot, aso di in ingeo iik gi me neka. Kur isasiro gikareco gi amoto weno tenge dub gi ki nyimi. Bwon gi iret gi piny di iko tic i kom gi i esawa kame itie kede gero.”

Yeremia 19

Jagi Kongingidun

¹Rwot owaco na be, “Oti iwil jagi kame kotimo kede lobo, di iko tero joadongo mogo kede josaseredoti ori i tic.

²Upere kede gi idonyunu ki Erute me Abalatigo di ikounu ot i Aditot me Kinom, di iko rabo kope kame ango abino waco ni kunono.”

³Rwot oko waco na pi waco be, “Abakai me Yuda kede jo kame bedo Yerusalem, winyunu kop kame ango Rwot me jo yi, Rubanga me Isirael atie waco. Ango abino mino peko potu i kabedo noni di ngat acelacel kame bino winyo kome ko bino to.

⁴Abino timo manoni pien jo otieko weka di kiko munao kabedo noni i yore me yalo kiye giayala but rubangan kame gin akadi joakwari gi, akadi abakai me Yuda likame ngeo. Doko da pien gin kineko jo atos kalikame tie kede kop moro kanoni,

⁵di kiko gero ne Baal alutarin me wango idwe gi i mac bala giayala. Ango likame aciko gi pi timo kamanoni, doko oudo eli i tam na da.

⁶Pi manono, ateteni kare tie bino kalikame kobino bobo lwongo kede kabedo noni be Topet arabo Aditot me Kinom; do kobino lwonge be Aditot me Nek.

⁷I kabedo noni ango abino totolo iik dedede me jo me Yuda kede Yerusalem. Abino mino jokwor gi neneko gi; abino mino gi i cing jo kame tie mono kuo gi. Abino mino liele gi but winy kede leini me obar bala giacama.

⁸Ango abino mino bomba gi doko gikame neno mio jo lworu; jo dedede kame beo iye bino nene di kiko bedo kede lworu di kiko uro pi can kopoto ne.

⁹Abino mino jokwor luko bomba di kiko bino kelo ne jo twon peko, di jo ko donyo camo idwe gi kede jokio gi.”

¹⁰Rwot oko waco na pi neko jagi i nyim jo koudo tie upere keda ingei ango waco ne jo kope nogo,



¹¹di awaco negi be Rwot me jo yi owaco be, “Ango abino muducaro jogi kede bomba noni bala jagi kame kocweo kede lobo kame koneko, kalikame doko twero mwonere. Kobino yiko jo Topet paka alamar.

¹²Ango acikere be abino mino bomba noni kede jo kame bedo iye doko bala Topet.

¹³Ude me Yerusalem kede ude me abakai me Yuda, kede ude dedede kame jo dunyo ne acerin bubani ki wi gi, kede kame kionyo kiye bwini piny bala giayala but rubangan, bino munaun bala Topet.”

¹⁴Ango ako yai ki Topet kakame Rwot oudo oora iye yamo kop noni, di ako cungo i diakal me tempulo di ako waco ne jo dedede be

¹⁵Rwot me jo yi, Rubanga me Isirael owaco be, “Nan ango atie kelo i bomba noni kede i bomban atitino kaluke can dedede kame ango atieko waco be bino potu negi, pien gin kipongo ngut gi kidagi winyo kop na.”

Yeremia 20

Atwomutwomun ka Yeremia kede Pasikur Ngasaseredoti

¹Ngasaseredoti Pasikur wot ka Imer, ngat koudo obedo ngadwong me tempulo oko winyo di ango ayamo kope amako alola koyaro potu Yerusalem.

²Pasikur oko mino kobunga di oko ridakino tiena kede alorito i Erute ka Benjamin, katie malo me tempulo.

³Oru mere odiko ingei Pasikur gonya ki alorito, ango ako waco ne be, “Likame Rwot lwongo nyingi be Pasikur, do nying kame en emi en ‘Lworo ki bad dedede.’

⁴Rwot kikome owaco be, ‘Ango abino mino ikelo lworo i komi keni kede but jowoti, doko da jokwor gi bino neko gi di in itie neno. Abino mino jo dedede me Yuda i cing abaka me Babilon, di en eko bino neko gi kede epima.

⁵Ango abino mino abar me bomba noni, ud mege dedede kede jamini mege apirgi tek, kede jamini apirgi tek me abakai me Yuda i cing jokwor gi. Gin kibino mano jamini nogi di kiko tero gi Babilon.

⁶Do in Pasikur kede jo me turi dedede, kobino mako wu di oko tero wu Babilon bala mabus. Ibinunu to di oko yiko wu kunono, karacel kede jowoti kame oudo ibedo muraon negi kope me abe.’ “

Yeremia Obedo kede Ingungur but Rwot

⁷Rwot, in ingala, ango ako yei ngalere. In itek kalamo ango, doko da itieko bwona. Ango atieko doko gikame jo nyero piny yuluyul; jo dedede do nywara anywara.

⁸Kame atie yamo, miero ayam kop kede dwan amalo di aredo be, “Tim me gero kede muducaro!” Ceng dedede jo tie nyera di kicaa pi rabo kop nin.



⁹Ka angwo awaco be, “Likame bobo angwo abino tamo pi Rwot, arabo meede yamo kop i nyinge,” manono ko mino kope ni liel i cunya kede i cogere na bala mac. Atamo be koto agenge kur ewoki, do likame ako twero.

¹⁰Awinyo di jo atot weweo be, “Lworo tie kabedo dedede! Pi manono opidenu!” Akadi jowota kiyapiyapi keda tie daro neno epone kame angwo abino getar kede. Gin kiwaco be, “Cengemogo kobino ngale di do wan oko bwone di oko culo kwor i kome.”

¹¹Do Rwot in itie i bad nango bala ngayi atek kame jo lworo, manono bino mino jo kame tie tidilo angwo iik gi potu. Lewic bino mako gi adikinicel, pien iik gi likame bino cobere. Likame wi jo bino wil kede lewic komako gi.

¹²Do Rwot me jo yi, in itamo jo kopooore, in ineno cuny gi kede tam gi; miango anen kite kame in iculo kede kwor i kom jokwor na, pien angwo atieko jalo kope na dedede i cingi.

¹³Werunu but Rwot; pakunu Rwot! Piento en elako jocan ki cing jo kame timo tim areco.

¹⁴Ilam mak ceng kame konywala iye! Kur ceng kame toto na onywala iye bed kede winyo!

¹⁵Ilam mak ngat kame bin otero rwonge aber but papa na di ewaco ne be, “Konywalo ni atin awobi,” di papa na oko bedo kede yomcuny adwong.

¹⁶Pooore icuo nono bed cal bala bomban kame Rwot omuducaro abongo kisa. Poore dano nono winy koko me lito odiko di eko winyo agwara me yi i dier iceng,

¹⁷piiento en edagi bin nekango di pwodi atie i yi toto na. Manono oudo koto omio toto na obedo ates na, di yie oko bedo dwong nakanaka.

¹⁸Pinyo kara komio angwo awok ki yi toto na? Benyo, pi timo tic atek kede bedo kede cwercury, kede pi bedo kede lewic i kare dedede me kuo na?

Yeremia 21

Yeremia Otuco be kobino Bwono Yerusalem

¹Abaka Esedekia me Yuda oko cwano Pasikur wot ka Malakia kede ngasaseredoti Sepania wot ka Maseya buta kede kop kame waco be,

²” Okwe ber peny Rwot pirwa, pien Abaka Nebukadunesa me Babilon osuro wa; cengemogo Rwot bino timo ne wa gi me aura bala kame lem ebedo timo nakanaka, di eko mino Nebukadunesa dok cen.”

³Angwo ako waco ne jo kame oudo kocwao buta

⁴pi ot waco ne Esedekia gikame Rwot, Rubanga me Isirael oudo owaco be, “Esedekia, jamini me yi atie i cingu, kame itienu tic kede gi me yi kede abaka me Babilon kede jo



Kaludea, gin jo kame nan tie luko wu i ooko me apama me cel, jamini me yi nogo ango abino wiro wi gi neno tetu dier bomba, di ako bino koko gi karacel kunono.

⁵Ango kikoma abino yi kede wu kede teko na dedede, di atie kede twon gero, lilo kede wangcuny.

⁶Abino neko gi dedede atie i bomba, jo karacel kede leini; gin dedede aumpuli bino neko gi.

⁷Ingei manono, in Abaka Esedekia, kede jotie ni, karacel kede jo dedede kobwot ki yi, ki kec, kede ki aumpuli, abino mino wu i cing Abaka Nebukadunesa me Babilon, i cing jokwor wu, jo kame mito neko wu. Nebukadunesa bino neko wu, likame tie ngatamoro kame ebino weko, doko da likame ebino nyuto kisa amoto mwolo; ango Rwot en awaco.”

⁸Rwot oko waco na pi yamo ne jo be, “Nenunu, ango Rwot atie cibo i nyimu yote are: yongayo atero wu i kuo kede yongayo atero wu i to. Yerunu yongayo acel.

⁹Jo dedede kame bino dong i bomba kobino neko, arabo kibino to kec amoto tuo. Do jo kame bino donyo ooko di kiko rieno cing gi but jo me Babilon, gin jo kame nan tie suro bomba, likame kobino neko gi; kuo gi bino bwot.

¹⁰Ango atieko moko tam na pi timo ne bomba noni can do weko bero. Kobino mine i cing abaka me Babilon di en eko bino wange dopodop; ango Rwot en awaco.”

Ngolo Kop ne Jo me Ot ka Abaka me Yuda

¹¹⁻¹²Rwot oko waco na pi waco kaman ne jo me ot ka abaka me Yuda, gin ikwae ka Daudi: “Winyunu gikame ango Rwot atie waco. Buli ceng acelacel nenunu be ingolunu kop kakare. Lakunu jo kame kotie timo negi kuwo ki cing jo kame timo negi adiadia. Aso ka li, gero na bino liel bala mac kalikame nekere pi raco kame itien timo.

¹³Nenunu, ango likame cunya yom i komu, wun jo kame ibedunu malo me aditot, i wi lela kopetere. Wun iwacunu be likame tie ngatamoro kame twero bino suro wu amoto turo apama wu me cel.

¹⁴Do ango abino mino wu alola pi tice wu. Abino cwinyo mac i paco wu me abaka, di eko bino wango gi dedede atie i ngete; ango Rwot en awaco.”

Yeremia 22

Kop ka Yeremia but Jo me Paco ka Abaka me Yuda

¹⁻²Rwot owaco na pi ot lor piny i paco me abaka me Yuda, en ngaluny kom me pug ka Daudi, di ako waco ne abaka, jotie mege adongo, kede ne jo kame donyo di wok ki irutei me paco me abaka kope mege be,

³” Ango Rwot atie waco ne wu be timunu gi me ateni kede kopoore. Lakunu ki cing ngat kame timo adiadia dano kame en etie timo ne kuwo. Doko da kur itimunu gimoro



arac arabo ibedunu kede tim me gero but jokumbor, idwe kic kede apuserun, arabo neko dano moro ali kede kop i kabedo noni.

⁴Ka ateteni wun ilubunu kop kame ango awaco ne wu, manono bino mino abakai kame lunyo kom ka Daudi me pug bedo tie nakanaka; gin karacel kede jotice gi adongo kede jo kame kipugo bino beo ki irutei me paco noni me abaka, di kiringo kede cabalan kede asigiran.

⁵Do ka idagunu winyo kop na, ateteni ango akwongere be paco noni me abaka bino doko ameje; ango Rwot en awaco.

⁶” Kibuta, paco me abaka me Yuda cil bala lobo me Gilead kede bala wi mori me Lebanon; do ango abino mine edoko bala wi tim, bomba kalikame ngatamoro bedo iye.

⁷Ango atie iiko jo pi ot dudubo en; ngat acelacel bino mako le mere, di gin kiko tongotongo piny ipirin me yen seda abeco, di kiko uco gi i mac.

⁸” Jo atot me atekerin apat bino beo kanono di kiko donyo penyere ken gi ken gi be, ‘Pinyo komio Rwot otimo gikame cal kamanoni ne twon bomba noni?’

⁹Gin kiko bino dwoko be, ‘Piento gin likame kigwoko isikan kame Rwot Rubanga gi otimo kede gi, di kiko donyo woro kede tic ne rubangan ace.’ “

Kop kame Yeremia Owaco i kom Yoakas

¹⁰Wun jo me Yuda, kur ikokunu Abaka Yosia; kur ikokunu pi to mere. Do kokunu abaka kame komako kotero tenge, pien likame doko ebino dwogo, likame doko ebino neno lobo kame konywale iye.

¹¹ Rwot waco kop i kom Yoakas wot ka Yosia abaka me Yuda, en ngat kame elunyo kom ka papa mere Yosia, di nan eko yai atwal ki lobo noni, Rwot waco kop i kome be, “En likame bobo ebino dwogo kan,

¹²do en ebino to i piny kame komake kotere iye, likame bobo en ebino neno lobo noni.”

Kop kame Yeremia Owaco i kom Yekoyakim

¹³Etie i can ngat kame timo ne jo tim kalikame poore pi gero ode, di eko timo gi kalikame tie kakare pi ropo goropa i wi ode nono; ngat kame mio dano bungo tic nono di eko dagi mine egelit.

¹⁴Dano nono tie i can piento en ewaco be, “Ango abino gero ot adwong, di isengena mege me goropa lac.” Aso, en eko keto ne ot nono dirisan, di eko peto ebao me yat seda i kor apama i yi ot, di do eko cilo ot kede erangi akwar.

¹⁵Benyo, in itie abaka be pien ude kame igero kede seda beco kalamo ude me jo apat? Papa nin bin camo kiber doko di emato da. En oudo etimo ne jo gikame tie kakare kede kopoore, di gi dedede oko bedo nen kiber.



¹⁶En oudo engolo kop kiber ne jocan kede jo kame piny oloo, di gi dedede oko bedo nen kiber. Mam manono en ngeno Rwot?

¹⁷Do gikame in itie neno kede kame cunyi tie iye en kenekene bedo kede ud piri keni; in ineko jo kame li kede kop, doko itero jo ni i yore karac kede gero.

¹⁸Pi manono, Rwot owaco kop i kom Yekoyakim wot ka Yosia, abaka me Yuda kaman, “Ka eto, likame ngatamoro bino koke di ewaco be, ‘ Okwe can omina! Okwe can! ‘ Ka eto likame ngatamoro bino koke di ewaco be, ‘ Okwe rwot na! Okwe adwong na! ‘

¹⁹Kobino yike bala ogwok; kobino wane tenge, di oko uce ooko me erute me Yerusalem.”

Yeremia Owaco kop me Can abino Poto Yerusalem

²⁰Wun jo me Yerusalem, otunu ikokunu i wi mori me Lebanon, otunu iwololunu dwanu i lobo me Basan; otunu iboroborunu koko i wi mori me Abarim, pien kotieko bwono lobere kame konyo wu.

²¹Rwot oyamo kede wu i kare kame oudo itienu kede i mulem, do wun ikounu dagi winyo kop mere. Manono obedo gikame wun ibedunu timo cako tino wu; likame wun pwodi itiekunu yei lubo kop ka Rwot.

²²Yamo bino buko jotel wu etero gi tenge; kobino tero jo akonyo wu bala mabus kame komako ki yi; di do lewic ko bino mako wu pi tim areco kame itimunu.

²³Okwe in abaka kame kogero turi kede yen seda me Lebanon, ibino cur tin benyo kame lito opoto i komi, lito acal bala me dako atie ramere me nywal!

Kop kame Rubanga Ongolo ne Yekoyakin

²⁴Rwot owaco ne Abaka Yekoyakin, wot ka Abaka Yekoyakim abaka me Yuda be, “Ateteni bala kame ango Rubanga akuo kede, akadi ka koto in oudo ibedo alung kame ango angapo i cinga tetu cam, kame nyuto be ango ngapug, oudo koto aboloco in

²⁵di ako mini but jo apat kame in ilworo, gin jo kame mito neki. Koto ami i cing Abaka Nebukadunesa me Babilon kede i cing jo mege.

²⁶Ango abino kwiti karacel kede toto ni i lobo me obukui; i lobo kalikame konywalo wu iye, di wun dedede ikounu bino to kunono.

²⁷Likame ibinunu bobo dwogo i lobo noni bed bala ibinunu bedo kede mit me dwogo iye.”

²⁸Ango ako penyere be, “Benyo, Abaka Yekoyakin otieko doko cal bala agulu oto kame kouco tenge, kalikame doko ngatamoro mito? Pinyo komio kokwite kede idwe mege i lobo me obukui, lobo kalikame gin oudo kingeo?”

²⁹Okwe lobo, lobo, lobo! Winy gikame Rwot tie waco be,



30” Wandiko nying loni bala ngat kame li kede atin, dano kalikame gi dedede bino cobere ne kiber i kare me kuo mere; pien likame tie akware moro kame bino twero lunyo kom ka Daudi me pug di eko pugo lobo me Yuda; ango Rwot en awaco.”

Yeremia 23

Gen pi Kare me Anyim

1Rwot waco be, “Kitie i can jotel kame muducaro jo na kede kame sarakino gi. Gin kical bala jokwat kame tie sarakino kede muducaro romini na!”

2Pi manono, Rwot Rubanga me Isirael tie waco kop i kom jotel, gin jokwat kame poore gwoko jo mege kaman: “Wun likame inenunu be igwokunu romini na; wun isarakinunu gi di ikounu riamo gi tenge. Pi manono, ango abino neno be aketo can i komu pi gikareco kame itimunu.

3Di do ango kikoma ako koko donge me romini na ki lobere kame ango asarakino gi iye, di ako dwoko gi i anak gi, di gin kiko bino nywal di kiko nyai.

4Ango abino keto negi jokwat kame bino gwoko gi di likame bobo kiko bedo kede lwooro amoto mielkom; doko da likame tie moro kame bino rwenyo; ango Rwot en awaco.”

5 Rwot waco be, “Ateteni kare bino tuno kame ango abino yero kede dano kopooore kobedo akwar Daudi pi bedo abaka; en ebino pug kede rieko, di etimo gikame tie kakare kede me ateni i lobo mere.

6I kare mere me pug, Yuda bino bedo abongo peko moro, doko da Isirael bino bedo kede anapakin. En kobino lwonge be ‘Rwot Timo ne wa Gikame opooore’ .

7” Ateteni kare bino tuno kame jo likame bobo bino lairo kede i nyinga, di kiwaco be Rubanga akuo kokwanyo jo me Isirael ki Misiri.

8Do kibino lairo i nyinga, di kiwaco be Rubanga akuo kokwanyo jo me Isirael ki lobo atie tetu malo, kede ki lobere dedede kakame ango oudo ariamo gi iye. Di do gin kiko bino bedo i lobo gi amako gi.”

Kop kame Yeremia Owaco i kom Inabin

9Cunya onyote, cogere na dedede tie miel amiela; adoko do cal bala dano omer, bala dano kame bwini obwono wie, pi Rwot, pi kope mege kacil.

10Pien lobo noni opong kede jo kame woro rubangan apat; ekite me kuo gi reco, doko da likame kitio kede twer gi i yore kopooore. Lobo tie tururo pien Rwot olame, lum me obar da otuo.

11Rwot waco be, “Inabin kiton josaseredoti likame nyuto wor buta; ango atieko neno gikarac kame gin kitimo kiton i tempulo da.



12Pi manono, yongayo gi bino bedo negi bala yote apwot di piny oyuikino, kame kobino riamo gi kilubo di kiko popoto. Pien ango abino keto can i kom gi i kare kame abino mino gi kede alola; ango Rwot en awaco.

13Ango atieko neno gimoro aneno rac but inabin me Samaria: gin kimurao i nying Baal di kiko rwenyo jo na me Isirael.

14Do atieko neno gikame rac kalamo but inabin me Yerusalem: gin kitimo adote, doko kiyamo kope me abe; gin kikonyo jo meede ameda kede tim areco, manono omio likame tie dano moro aweko timo gikarac. Kibuta, inabin nogo dedede otieko doko reco bala jo me Sodoma, jo kame bedo Yerusalem do cal bala jo me Gomora.

15” Pi manono, ango Rwot me jo yi atie yamo kop i kom inabin nogo kaman: ango abino mino gi kicamo yat akec kede ako mino gi kimato pii atie kede poison iye; pien inabin me Yerusalem otieko mino jo dedede me lobo noni oweko bedo kede wor buta.”

16Rwot me jo yi waco ne jo me Yerusalem be, “Kur iyeunu winyo kope kame inabin tie waco ne wu, gin kitie waco ne wu kope me nono. Gin kiwaco kope kame gin kitamo kede wi gi ken gi, do weko kope kame ango awaco.

17Nakanaka gin kiwaco ne jo kame dagi kop na be gi dedede bino bedo negi kiber. Doko da kiwaco ne joepali kame lubo tam me epali atie i cuny gi be likame tie can moro kame bino pototo negi.”

18Ango ako waco be, “Do ngai kiber inabin nogi otieko bedo i kansulo ka Rwot, pi winyo kede niang kop mere? Ngai kiber gi otieko ciko yite i kop mere tetekeny ekaruno tatamo en?”

19Gero ka Rwot cal bala twon yamo; yamo agwai me kot kame bino buko i wi jo areco.

20Gero mere likame bino jik, tuno di etieko timo kede cobo gikame tie i tam mere. Ibinunu niang manoni kiber di kare otieko kato.”

21Rwot waco be, “Ango likame acwao inabin nogi, do gin kiringini aringin butu. Ango likame awaco negi kop moro, do gin pwodi kibino yamo ne wu kop i nyinga.

22Do ka koto oudo gin kitieko bedo i kansulo nango, koto oudo kitatamo kope na ne jo na, di koto kiko loko gi tenge ki yote areco me kuo gi, kede ki tice gi areco.”

23Rwot waco be, “Mam ango abedo Rwot kame tie i kabedo dedede do weko i kabedo acel kenekene?”

24Ngai kame twero pwono nango i kabedo kalikame ango atwero nene kiye? Mam ango atie i kabedo dedede me i malo kede i wi lobo?

25Ango angeo gikame inabin kame waco kope me abe i nyinga tie waco, di kisidiko be, ‘Aleko, Rubanga omia aleko kop mere!’



- ²⁶Ebino bedo kamanoni pi kare arom kamene? Gin kitamo be kibino meede sarakino kope me abe nogi, kope kame wok ki tam gin ken gi pi kare arom kamene?
- ²⁷Gin kiparo be lek kame gin kiwaco ken gi ken gi bino mino wi jo na wil i koma, bala kame wi joakwari gi owil kede i koma di kiko donyo woro Baal.
- ²⁸Poore enabi koleko wac be manono obedo lek aleka, do enabi kowinyo kop nango poore ebed dano agenere i tatamo kop nono. Likame kotwero poro nyige me kal kede cucung; ango Rwot en awaco.
- ²⁹Mam kop nango cal bala mac, kede bala enyondo kame bebelo lela di eko ngingido en?
- ³⁰Nenunu, pi manono, ango likame cunya yom i kom inabin kame winyo kop kikut jowot gi di kiko donyo tatamo ne jo di kiwaco be kope nango igonogo.
- ³¹Doko da likame cunya yom i kom inabin kame yamo kope gin do di kiko loko be, ‘Rwot en owaco.’
- ³²Ango Rwot atie waco be, ango likame cunya yom i kom jo kame tatamo ne jo lek me abe, di kiko rwenyo jo na kede kope gi me abe nogo kede ewaka gi, do di udo likame ango acwao gi arabo aciko negi be kioti; pi manono, likame tie bero moro kame gin kitwero timo ne jo.”

Yec ka Rwot

- ³³Rwot oko waco na be, “Yeremia, kame ngatamoro kikom jo na, arabo enabi moro, arabo ngasaseredoti moro openyi be, ‘Kop nyo kame Rwot omio wa bala yec?’ In ibino waco ne be, ‘Wun en ibedunu yec but Rwot, doko da en ebino uco wu.’
- ³⁴Ka enabi moro, arabo ngasaseredoti arabo ngatamoro owaco kop kame waco be, ‘Yec kame Rwot omio wa, ‘ango abino mino gi alola kede jo me miere gi.
- ³⁵Akaka manono, ngat acelacel bino yamo ne ngawote amoto ne omin mere be, ‘Rwot odwoko benyo? Rwot owaco benyo?’
- ³⁶Aso, likame gin doko kipoore meede kede yamo kop kame waco be ‘yec kame Rwot omio wa’, pien kop kame dano acelacel waco en kame tie yec bute; pi manono jo totolo kope na, ango Rubanga akuo, Rwot me jo yi, en Rubanga gi.
- ³⁷Pi manono, ka dano ooto but enabi, en etwero penye be, ‘Rwot odwoko benyo? Rwot owaco benyo?’
- ³⁸Do ka gin kiko waco kop kame waco be ‘yec kame Rwot omio wa’, do di ango atieko waco be kur kiwac kamanono,
- ³⁹pi manono, ango abino kwanyo gi di ako uco gi kakabor keda, gin karacel kede bomba kame ango amio gi kede joakwari gi.
- ⁴⁰Ango ako bino kelo i wi gi lewic kame bedo nakanaka, kalikame wi dano moro bino wil iye.”



Yeremia 24

Ibukito Are me Anyakini me Epigi

¹ Rwot oko nyuto na ibukito are me anyakini me epigi di koketo gi i nyim tempulo mere. (Manoni oudo obedo ingei kare kame Abaka Nebukadunesa me Babilon omako kede ki Yerusalem Abaka Yekoyakin me Yuda, en wot ka Yekoyakim, karacel kede jotit adongo me Yuda, jopac kede jotet di eko tero gi Babilon.)

² Ebukit acel oudo tie kede anyakini abeco me epigi, anyakini kogeo cek me agege; do ebukit ocelu oudo tie kede anyakini areco me epigi, oudo kireco likame kitwero camere.

³ Di Rwot oko penya be, “Yeremia itie neno nyo?” Ango ako dwoko be, “Atie neno anyakini me epigi. Anyakini abeco mege, beco adikinicel, do areco mege reco adikinicel, likame kitwero camere da.”

⁴ Di Rwot oko waco na be,

⁵” Ango Rwot Rubanga me Isirael awaco kaman: jo me Yuda kame bin anga acwao tenge ki kan ot Babilon, abino tero gi bala anyakini me epigi abeco nogi.

⁶ Ango abino ciko wanga i kom gi pi gwoko gi, di ako bino dwoko gi i lobo noni. Ango abino gero gi do weko turo gi piny; abino pito gi bala yat do weko puto gi.

⁷ Ango abino mino gi cuny me mito ngeno be anga en Rwot; gin kiko bino bedo jo na di anga ako bedo Rubanga gi, pien gin kibino dwogo buta kede cuny gi dedede.

⁸” Ango Rwot awaco be, do Abaka Esedekia me Yuda, jotit mege adongo, kede jo me Yerusalem kodong i lobo noni, kede jo kame bedo i lobo me Misiri, abino tero gi bala anyakini me epigi nogi areco reco kalikame kitwero camere kede.

⁹ Abino keto can i kom gi di kiko doko gikame neno kelo ne jo lworu, gikarac but atekerin dedede me wi lobo. Gin kibino doko gi me lewic, agole me ayama, gi me acae, kede kobino tic kede nying gi me ilam i kabedo dedede kame anga abino riamo gi iye.

¹⁰ Abino cwano negi yi, kec kede aumpuli, tuno di gin dedede kitieko amuducar i lobo kame anga amio gi kede joakwari gi.”

Yeremia 25

Jokwor me Bad tetu Malo

¹ I mwaka me ongwon me apugan ka Yekoyakim wot ka Yosia, di en oudo abaka me Yuda, Rwot oko waco na kop i kom jo me Yuda. (Manono oudo obedo mwaka me agege me apugan ka Abaka Nebukadunesa me Babilon.)

² Anga ako waco kop nono ne jo dedede me Yuda kede ne jo kame bedo Yerusalem be,



³” Pi mwakini ot are kiwie adek, cako i mwaka me tomon kiwie adek di Abaka Yosia wot ka Amon en apugo Yuda, cako i kare nono tuno tin Rwot obedo yamo keda di ada ako bedo waco ne wu gikame en ewaco na abongo weko, do wun ikounu dagi winyo.

⁴Bed bala Rwot obedo cwano ne wu jotic mege inabin kare kede kare, do wun ikounu dagi winyo kope gi akadi ciko iye yitu.

⁵Gin kibedo waco ne wu be, ‘Nan ngat acelacel kibutu lokere tenge ki yote kede ki tice wu areco, tetekeny ikounu bino meede bedo i lobo kame Rwot omio butu kede joakwari wu pi bedo meru me atwal.

⁶Kur iworunu amoto itiunu ne rubangan apat, doko da kur iwangunu cuny Rwot i yore me woro caljwogi kame itimunu. Manono bino mino likame etimo ne wu can moro.’

⁷Do Rwot kikome waco be wun likame ikounu yei winyo kop mere, do akaka manono wun ikounu lokere wango cunye i yore me wun woro caljwogi kame itimunu, di manoni oko mino ikelunu peko i komu kenu.

⁸” Pi manono, Rwot me jo yi waco be, ‘Pi kite kame idagunu lubo kede kop na,

⁹ango abino lwongo jo me bad tetu malo, kiton ngatic na Abaka Nebukadunesa me Babilon, di ako kelo gi yi kede lobo noni me Yuda kede jo kame bedo iye, kede atekerin kame kio kede. Ango abino muducaro ateker noni kede jokio mege atwal atwala, di ako mino gi kidoko gikame jo neno di kiko bedo kede lworu, kede kame jo winyao pi uro; kibino doko bala gikame kotieko dudubo pi kare lung.

¹⁰ Ango abino jiko woo me kilel, kede da icelakin me yomcuny me ibagai me nyom. Kide me riego alos likame bobo bino winyere, doko da italan likame bino liel i ude otieno.

¹¹ Lobo noni dedede bino doko bala ameje kame neno kelo ne jo lworu, di atekerin nogi dedede ko bino tic ne abaka me Babilon pi mwakini ot kanyaare.

¹²Di do ingei mwakini ot kanyaare, ango ako bino mino jo me Babilon alola karacel kede abaka gi pi dub gi. Ango abino dudubo lobo nono di ako weke di etie gikame kony mere li pi kare lung.

¹³Ango abino kelo i lobo noni can dedede kame ango awaco be bino potu iye; can dedede kame kowandiko i itabu noni, can kame Yeremia owaco be bino potu i kom ateker acelacel.

¹⁴Do abino da culo i kom jo me Babilon raco pi gi dedede kame kitimo; atekerin atos kede abakai adongo bino tero gi kidoko ipaso.’ “

Kop kame Rubanga Ongolo ne Atekerin

¹⁵Rwot Rubanga me Isirael oko waco na be, “Gami ki cinga i kopo noni. Bwini kame tie iye obedo gero na. Tere but atekerin dedede kame ango acwai but gi di iko mino gi kimati.



¹⁶Gin kibino mate di kiko donyo gete di wi gi odubere pi nek kame ango abino cwano i kom gi.”

¹⁷Aso ango ako gamo ikopo ki cing Rwot, di ako mino atekerin dedede kame en ecwa but gi omato gikame tie iye.

¹⁸Ako mino Yerusalem kede bomban dedede me Yuda, karacel kede abakai mege kede jotel mege oko mate, tetekeny kidok amejeko, lobo kame kony mere li, gikame jo neno di kiko winyao pi uro, kede gikame jo tio kede nying gi me ilam, bala kame etie kede tuno tin.

¹⁹Jo apat da kame oudo poore mato gikame tie i ikopo nono gin ige: Parao abaka me Misiri, jotic mege kede jotel adongo, kede jo mege dedede;

²⁰jo konyalere; abakai dedede me lobo me Us; abakai dedede me bomban atie Pilistia, gin en bomban me Asikelon, Gasa, Ekuron, kakodong me Asidod;

²¹jo dedede me Edom, Moab, kede Amon;

²²abakai dedede me Taya kede Sidon, kede abakai me lobere me dog nam adwong me Mediterania;

²³bomban me Dedan, Tema, Bus kede jo dedede kame lielo yer wi gi bedo cego;

²⁴abakai dedede me Arabia kede abakai dedede me atekerin abedo i wi tim;

²⁵abakai dedede me Simiri, abakai dedede me Elam, kede abakai dedede me Media;

²⁶kede abakai dedede me tetu malo. Atekerin dedede kame tie i wi lobo, kame tie kakabor kede kame tie kakiyapi, gin dedede kipoore mato gikame tie i ikopo nono di lubere aluba. Di do ingei gin mato abaka me Sesak da ko mato.

²⁷Rwot oko waco na pi waco negi be Rwot me jo yi, Rubanga me Isirael waco be, “Matunu tuno mer di ikounu ngokere, di ikounu popoto di likame doko ikounu twero yai, pi nek kame ango abino cwano i komu.”

²⁸En eko waco na be, “Ka gin kiko dagi yei gamo ikopo ki cingi pi mato gikame tie iye, in ibino waco negi be Rwot me jo yi owaco be, ‘Miero imatunu!’”

²⁹Neningo ango atie kelo can di acako kede bomba na amaka, do benyo kame gin kiparo kede be kibino bwot likame kiudo alola? Likame gin kibino bwot ki alola, pien ango atie cwano nek i kom jo dedede kame bedo i wi lobo; ango Rwot me jo yi en awaco.

³⁰” Pi manono, Yeremia poore in iwac negi kope nogi dedede. In ibino waco negi be, ‘Rwot bino dorano ki malo, en ebino woto dwane i kabedo mere kacil. En ebino dorano ne jo mege; en ebino lelemo bala jo atie nyonyono anyakini me olok pi bine. Jo dedede me wi lobo bino winye.

³¹Ilelem mere winyere tuno i ajikini me wi lobo, pien Rwot tie kede pido i kom atekerin. En ebino pido jo dedede di eko neneko jo areco; Rwot en owaco.’”



³²Rwot me jo yi waco be can bino poto cako ki ateker acel tuno i apat di nyai anyaa; doko da yamo ager tie cokere kakabor me wi lobo.

³³I ceng nono liele me jo kame Rwot oneko bino rade cako ki ajikini me wi lobo tetucel tuno tetu ocelu. Likame kobino koko gi, akadi coko gi amoto yiko gi. Gin kibino more i wi lobo bala woyo.

³⁴Kokunu, wun jokwat me romini ka Rwot, kokunu kitek. Bebelunu i apua wun jotel me jo mege, pien ceng me neko wu otuno; ibinunu popoto di ikounu ngingidun bala agune.

³⁵Wun jokwat me romini mege likame ibinunu twero ringo tenge, wun jotel likame ibinunu bwot.

³⁶Winyunu koko me jokwai romini mege, winyunu dwilao me jotel gi! Pien Rwot tie dudubo lobo gi,

³⁷Rwot otieko dudubo lobo kame anapakin oudo tie iye pi twon gero kame etie kede.

³⁸Rwot oyai bala engu aweko kapwono mere; lobo gi oko lokere odoko bala wi tim pi yi agwai kede pi twon gero ka Rwot.

Yeremia 26

Kopido Yeremia i Ekiko

¹I kare me agege me apugan ka Abaka Yekoyakim wot ka Yosia bala abaka me Yuda,

²Rwot oko waco na be, “Cungi i diakal me tempulo di iko waco ne jo me bomban dedede me Yuda kame bino kuno pi wora, kop kame ango aciko ni waco. Kur iwek kop moro.

³Pien cengemogo jo bino winyo di kiko weko yote gi areco, di ango ako bino loko tam na aweko iik me kelo can i kom gi pi tice gi areco.”

⁴Rwot owaco na pi waco ne jo be en ewaco be, “Ka wun likame iyeunu winyo kop na di ikounu lubo iswilia kame ango atieko mino wu,

⁵kede ka likame iyeunu winyo kope me jotic na inabin kame ango abedo cwano butu kare i kare, bed bala wun itiekunu dagi winyo kope gi,

⁶manono bino mino atimo ne tempulo noni gikame atimo Silo, di ako bino mino atekerin dedede me wi lobo tio kede nying bomba noni me timo ilam.”

⁷Josaseredoti, inabin kede jo dedede owinyo di ango awaco kope nogi i tempulo.

⁸Cucuto di ango atieko waco gikame Rwot oudo ociko na pi yamo, gin kiko maka di kilemo be, “Ibino to pi kop noni!

⁹Pinyo komio in iwaco i nying Rwot be tempulo noni bino doko bala Silo, kede be bomba noni bino doko ameje abongo ngatamoro abedo iye?” Jo dedede oko cokere oluka i tempulo.



10Kakame jotel me Yuda owinyo kede gikame otimere, gin kiko yai ki ot me abaka di kiko ot i tempulo, kiko bedo i kabedo gi i Erute Anyen pi ekiko.

11Di do josaseredoti kede inabin oko waco ne jotel kede jo dedede be, “Icuo ni kopooore ngolo ne kop me to, piento en etieko waco kop arac i kom bomba wa, bala kame wuda itiekunu winyo kede yitu.”

12Ango ako waco ne jotel nogo kede ne jo dedede be, “Rwot en kocwa waco kope dedede kame wun itiekunu winyo di ango awaco i kom tempulo noni kede i kom bomba noni.

13Pi manono, nan lokunu ekite me kuo wu kede tice wu, di ikounu lubo gikame Rwot Rubanga wu waco ne wu, di Rwot ko bino loko tam mere eweko kelo ne wu can kame oudo ewaco be ebino kelo i komu.

14Do i kom kop amaka, ango gira atie i cingu. Wun timunu nango gikame inenunu be ber kede kopooore.

15Do kenekene ngeunu kiber be, ka inekanu udo wun karacel kede jo me bomba noni itienu kede raco me neko dano ali kede raco moro. Pien i ateteni, Rwot en kocwa butu pi waco ne wu kope nogi.”

16Di jotel kede jo dedede oko waco ne josaseredoti kede inabin be, “Icuo ni owaco ne wa kop i nying Rwot Rubanga wa; likame kopooore neke.”

17Di do joadongo mogo oko cungo di kiko waco ne jo koudo ocokere be,

18 “I kare kame Esekia en oudo obedo abaka me Yuda, enabi Mikaa me Moreset oko waco ne jo dedede me Yuda be Rwot me jo yi oudo owaco be, ‘ Kobino boko Sion bala poto; Yerusalem bino doko atukit me ude kame kodudubo, di emukura kame tempulo tie iye ko doko abum.’

19Abaka Esekia kede jo me Yuda likame oko neko Mikaa. Do akaka manono Esekia oko bedo kede lworu but Rwot di eko tamakino pi mino cuny Rwot bedo yom i kome. Rwot oko loko tam mere i kom can kame oudo ewaco be bino poto negi. Do nan wan oyapununu kelo can adwong i kom wa kenwa.”

20(Oudo tie bobo icuo ace, Uria wot ka Semaya me Kiriat Yearim, kame bin owaco kop me can kame oudo poore poto i bomba noni kede i lobo noni, di cal acala kede kop kame Yerima owaco.

21Kakame Abaka Yekoyakim kede isirikalen mege kede jotic mege dedede owinyo kede kop kame Uria owaco, abaka oko mito neke. Do Uria oko winyo kop nono di lworu oko make di eko ringo eoto Misiri.

22Abaka Yekoyakim oko cwano Elinatan wot ka Acibor karacel kede cuo mogo i lobo me Misiri pi omo Uria.

23Gin kiko kele kidwoke but Abaka Yekoyakim, di abaka oko neke kede epima di oko uco kome kakame koyiko iye jo raya.)



²⁴Do Akikam wot ka Sapan oko bedo gwoka, di likame eko yei pi mina i cing jo pi neka.

Yeremia 27

Yeremia Oketo Ayoko me Twonin i Ngute

¹ I agege me apugan ka Abaka Esedekia wot ka Yosia bala abaka me Yuda, Rwot oko waco na

²pi timo ayoko me yen kame kotwetweo kede dele di ako kete i nguta.

³En eko waco na pi cwano kop ne abakai me Edom, Moab, Amon, Taya kede ne abaka me Sidon, di acwao jocungo negi kame oudo obino Yerusalem pi neno abaka Esedekia me Yuda, pi tero negi kop nono.

⁴Rwot me jo yi, Rubanga me Isirael oko waco na pi ciko negi ot waco ne jodongo gi gikame en ewaco be,

⁵” Ango kede twer na adwong kede teko na en kame acweo lobo, kede jo kede leini kame tie iye; doko da anga atwero mine but ngat kame cunya opwoyo.

⁶Nan anga atieko mino lobere nogi dedede i cing ngatic na Abaka Nebukadunesa me Babilon, anga atieko mine kiton leini me obar da pi timo ne tic.

⁷Atekerin dedede bino tic nen; doko da kibino tic ne wode kiton ne akware, tuno i kare kame ajakanut mere bino poto kede. Di do atekerin atot kede abakai me aura ko bino tero jo me ajakanut mere kidoko ipasoi.

⁸” Do ka ateker moro arabo ajakanut moro oko daga tic ne Nebukadunesa abaka me Babilon, arabo ka edagi jalere i cing abaka me Babilon noni bala twon kame rwako ngute i ayoko, anga abino mino ateker nono alola i yore me yi, kec kede tuwo, tuno di amio Nebukadunesa omuducaro en atwal atwala.

⁹Pi manono, kur iyeunu winyo kope me inabin wu, kede me jo kame ngingico gimoro di kiko sidiko waco kope me anyim, arabo jo kame gonyo lek, arabo kame penyo tipere me jo oto amoto jwogi pi ngeno gikame bino timere. Gin kitie waco ne wu be kur iyeunu jalere i cing abaka me Babilon.

¹⁰Gin kitie ngalo wu, doko manono bino mino jokwor mako wu di kiko tero wu tenge kakabor kede lobo wu. Anga abino riamo wu tenge, di oko bino muducaro wu.

¹¹Do ka ateker moroni oyei jalere i cing Abaka Nebukadunesa di eko donyo tic ne, anga abino weko ateker nono dong bedo i lobo mere, pi pure kede bedo iye; anga Rwot en awaco.”

¹²Anga ako waco ne Esedekia abaka me Yuda kop nono be, “Jalere i cing abaka me Babilon, di iko tic nen kede jo mege di iko bino kuo.

¹³Pinyo kamio in kede jo ni ipoorenu to to me epima, to me kec, kede to me aumpuli? Pien manoni en gikame Rwot owaco be bino timere ne ateker moroni kalikame bino jalere i cing abaka me Babilon.



¹⁴Kur iwiny kop kame inabin tie waco ni be kur ijalere i cing abaka me Babilon, gin kitie waco ni kop me abe.

¹⁵Rwot owaco be en likame ecwao gi, do kenekene gin kitie ngalo wu i nyinge. Pi manono en ebino riamo wu tenge di oko bino neko wu, wun karacel kede inabin atie waco ne wu kope me abe nogo.”

¹⁶Di ako waco ne josaseredoti kede ne jo be Rwot owaco be, “Kur iwinyunu kope me inabin wu kame tie waco be kobino dwoko ki Babilon oyotoyot jamini kame kotio kede i tempulo, pien gin kitie ngalo wu.

¹⁷Kur iwinyunu kop gi; jalerenu i cing abaka me Babilon di ikounu bino kuo! Pinyo kamio miero bomba noni dok ametje?

¹⁸Ka ateteni gin kibedo inabin, kede ka gin kitie kede kope nango, ber kong kikwai Rwot tetekeny jamini anonok kodong i tempulo kede i paco me abaka kur ter gi Babilon.”

¹⁹⁻²⁰Kakame Abaka Nebukadunesa omako kede Abaka Yekoyakin me Yuda, wot ka Yekoyakim, karacel kede jotel ace me Yuda di eko tero gi Babilon, en bin eko weko ipirin are me nyonyo buronsi, epipa adwong me pii, icegeren me cibo kalayan kede jamini ace apat me tempulo kede me paco me abaka.

²¹Do Rwot me jo yi, Rubanga me Isirael waco be, “Jamini kodong i tempulo kede i paco me abaka,

²²kobino tero gida Babilon di kiko dong kunono tuno i ceng kame ango abino keto kede tam na i kom gi, di do ango ako bino kelo gi di ako dwoko gi kanoni.”

Yeremia 28

Yeremia kede Enabi Kanania

¹I duwe me kany me mwaka me ongwon me apugan ka Abaka Esedekia me Yuda, manono en kare me acakini me apugan mere, enabi Kanania wot ka Asur kame bin wok ki Gibeon oko yamo na kop i ot ka Rwot. En ewaco na di josaseredoti kede jo dedede da tie be

²Rwot me jo yi, Rubanga me Isirael owaco be, “Ango atieko tuturo twer kame abaka me Babilon tie kede i komu bala ayoko.

³I kare me mwakini are ango abino dwoko kanoni jamini dedede me tempulo, kame Abaka Nebukadunesa okwanyo ki kanoni di eko tero gi Babilon.

⁴Doko da abino dwoko kanoni Abaka Yekoyakin wot ka Yekoyakim, en abaka me Yuda; abino dwoke en karacel kede jo dedede kame bin komako ki Yuda di oko tero gi Babilon. Ango abino tuturo twer kame abaka me Babilon tie kede i komu bala ayoko.”

⁵Di ango ako waco ne Kanania i nyim josaseredoti kede jo dedede kame oudo tie cungo i tempulo be,



⁶” Okwe koto ya! Akwao be koto Rwot omio gikame iwaco ocobere, di eko dwoko kanoni jamini me tempulo ki Babilon, karacel kede jo dedede kame komako di oko tero obukui kunono.

⁷Do kong winy gikame ango atie waco ni karacel kede ne jo.

⁸Inabin kocako bino nin kede nango bin omurao be yi, kec, kede aumpuli bino poto ne atekerin atot kede ne ajakanuto atek.

⁹Do enabi kame murao kop me anapakin kobino ngeno be Rwot en kocwae ka gikame en ewaco ocobere kakare.”

¹⁰Di enabi Kanania oko kwanyo ayoko ki nguta di eko tuturo en,

¹¹di eko waco i nyim jo dedede be, “Rwot owaco be epone noni en kame en ebino tuturo kede ayoko kame Abaka Nebukadunesa me Babilon oketo i ngut atekerin; en ebino timo manoni i kare me mwakini are.” Di ango ako gira yai aoto.

¹²I ngei kare moro Rwot oko waco nango

¹³pi ot waco ne Kanania be, “Rwot owaco be in ituturo ayoko kame kotimo kede yat, do manono bino mino kolunyo wange kede ayoko kame kotimo kede nyonyo ayon.

¹⁴Pien Rwot me jo yi, Rubanga me Isirael owaco be en ebino keto ayoko me nyonyo ayon i ngut atekerin nogi dedede, di gin kiko bino timo tic ne Abaka Nebukadunesa me Babilon, doko ateteni kibino timo ne tic. Rwot owaco be ebino mino kiton leini be obar da timo tic ne Nebukadunesa.”

¹⁵Ango ako meede waco ne Kanania be, “Winyi, Kanania! Rwot likame ocwai, nan in itieko mino jogi oketo gen gi i kom kop me abe.

¹⁶Pi manono, Rwot owaco be en ebino kwanyo kuo ni ki wi lobo. In ibino to di pwodi mwaka noni likame ongetakin, piento in isupo jo pi jemo ne Rwot.”

¹⁷I mwaka nono i duwe me kanyaare, enabi Kanania oko to.

Yeremia 29

Baluwa ka Yeremia but lyudayan kame Kotero Babilon

¹ Ango bin ako wandiko baluwa ki Yerusalem di ako cwano but joadongo, josaseredoti, inabin, kede but jo dedede kame oudo pwodi odong kikom jo kame bin Nebukadunesa otero Babilon, di ekwanyo gi ki Yerusalem bala mabus.

²Ango bin awandiko baluwa noni i cen di Abaka Yekonia, toto mere, jotic me paco me abaka, jotel me Yuda kede me Yerusalem, jodiru me tice apapat, kede jotet oudo kotieko kwanyo kotero ki Yerusalem bala mabus.

³Bin ango ako cwano baluwa noni kede Elasa wot ka Sapan kede Gemaria wot ka Kilikia, jo kame oudo Abaka Esedekia me Yuda ooro Babilon but Abaka Nebukadunesa me Babilon. Baluwa nono oudo somere kaman:



- 4” Rwot me jo yi, Rubanga me jo me Isirael waco ne jo dedede kame en eyei be kwany gi bala mabus ki Yerusalem di oko tero gi Babilon be,
- 5’ Gerunu ude di ikounu bedo iye. Pitunu cam i poti di ikounu camo gikame ipurunu.
- 6Nyomerenu di ikounu nywalo idwe; nyomunu ne awobe wu mon, doko miunu nyom anyira wu, tetekeny gida kinywal idwe. Miero wel wu meede do kur edok piny.
- 7Timunu tic pi bero me bomba kame ango amio kotero wu iye bala mabus, doko legunu buta pire, pien bero mere en bero wuda.
- 8Pien ango Rwot me jo yi, Rubanga me jo me Isirael, awaco be kur imiunu inabin kame tie kede wu ngalu, arabo jo kame waco be gin kikaruno tucop kop me anyim. Kur iyeunu winyo kop me lek kame gin kileko.
- 9Gin kitie waco ne wu kope me abe i nyinga. Ango likame acwao gi. Ango Rwot en awaco.’
- 10 “Rwot waco be, ‘Ka mwakini ot kanyaare me apugan me Babilon otiek, ango abino paro piru di ako cobo cikere na me dwoko wu paco.
- 11Pien ateteni ango angeo iik kame atieko timo piru, iik me mino wu mulem do weko me kelo ne wu peko, iik me mino wu bedo kede gen aber me kuo me anyim.
- 12Di do wun ikounu bino koko buta. Ibinunu kwana di ango ako winyo kwac wu.
- 13 Ibinunu mona di ikounu wuda; ka imoanu kede cunyu lung,
- 14ibinunu wuda, doko abino dwoko ne wu mulem wu. Abino coko wu ki pinye dedede kede ki kabedere dedede kame asarakino wu iye, di ako dwoko wu kabedo kame oudo akwanyo wu kiye di ako tero wu bedo bala mabus obukui.’
- 15” Pien wun iwacunu be, ‘Rwot otieko mino wan inabin i Babilon, ‘
- 16manono omio Rwot owaco kop i kom abaka kame bedo i wi kom me ajakanut ka Daudi, kede i kom jo dedede kame bedo i bomba noni, gin en joawade wu kalikame bin kotero bala mabus kede wun be,
- 17’ Ango ayaro kelo negi yi, kec kede aumpuli, di ako mino gi kidoko cal bala anyakini me epigi kotop, kalikame dano karuno camo.
- 18Abino tuparo cwano negi yi, kec, kede aumpuli, di ako mino gin kibedo jo kame atekerin me wi lobo lung neno di kiko bedo kede lworopi gi kotimere negi. Atekerin dedede kame ango asarakino gi but gi bino yisiro gi di kicao gi, doko kibino tic kede nying gi me lamo jo.
- 19Manoni bino timere negi pien gin kidagi lubo kop na kame abedo cwano kede inabin jotie na tien kede tien but gi pi waco negi, do gin kidagi winyo.
- 20Do nataman wun jo dedede kame oudo ango akwanyo wu ki Yerusalem di ako cwano wu bala mabus Babilon, winyunu kop kame ango Rwot atie waco.’



²¹” Rwot me jo yi, Rubanga me jo me Isirael, otieko waco kop i kom Akab wot ka Kolaya kede Esedekia wot ka Maseya, jo kame tie waco kop me abe i nyinge. En ewaco be en eyaro mino gi i cing Abaka Nebukadunesa me Babilon di en eko neko gi di wun inenunu.

²²Jo dedede me Yuda kame tie Babilon bala mabus bino tic kede nying gi me lamo jo be, ‘Akwao Rwot tim ni bala Esedekia kede Akab, jo kame abaka me Babilon obulo kede mac di kikuo.’

²³Manoni bino timere negi pien gin kitimo tim me mingo twatwal i Isirael; gin kitimo adote kede mon me jo icegun, doko kitieko yamo kope me abe i nying Rwot di en likame ewaco negi. Rwot ngeo gikame gin kitieko timo, doko en ebino bedo mujura iye. Manono Rwot en owaco.”

Baluwa kame Semaya Owandiko

²⁴Rwot oko waco na pi waco ne Semaya me Nekelam be

²⁵Rwot me jo yi, Rubanga me Isirael owaco be, “In icwao baluwa i nyingi but jo dedede me Yerusalem, kede but ngasaseredoti Sepania wot ka Maseya, kede but josaseredoti dedede di iwaco be

²⁶Rwot kikome otieko keti pi bedo ngasaseredoti akaka Yekoyada, tetekeny in bala ngatic kame lo ot ka Rwot inen be jo kame wi gi dubere di kiko cuko be gin inabin komako gi di oko tweno gi kede irikoi, kede di oko tweno lilim i ngut gi.

²⁷Aso, kara do nyo komio in likame iko timo ne Yeremia wot ka Anatot kamanono, ngat kame tie cuko tatamo ne wu kop bala enabi?

²⁸Pien ateteni etieko cwano ne wan kop i Babilon di ewaco be wan oyaro tieko kare kalac kan; poore oger ude di oko donyo bedo iye, opur poti di oko camo cam kame wok kiye.”

²⁹Ngasaseredoti Sepania oko somo na baluwa noni.

³⁰Di Rwot oko waco na be

³¹acwai kop but jo dedede kame tie Babilon bala mabus di awaco negi be Rwot owaco kop i kom Semaya wot ka Nekelam be, “Pien Semaya otieko waco ne wun kop, bed bala ango oudo likame aore, di eko mino wun iketunu gen wu i kom kop me abe,

³²ango ayaro mine alola en karacel kede ikwae mege. Likame tie dano mere moro kame tie i kom jogi kame bino dong kuo, doko likame en ebino neno jamini abeco kame ango abino timo ne jo na, piento en etieko waco kope kame kelo jemo buta. Ango Rwot en awaco.”

Yeremia 30

Cikere ka Rwot but Jo mege

¹Rwot Rubanga me jo me Isirael



- ²owaco na be, “Wandiko i itabu kope dedede kame angu atieko waco ni,
- ³pien ateteni kare bino tuno kame angu abino dwoko kede winyo ka jo na me Isirael kede Yuda. Angu abino dwoko gi i lobo kame bin angu amio but joakwari gi, di gin bobo kiko bino donyo bedo iye bala mergi.”
- ⁴Magi en kope kame Rwot owaco i kom jo me Isirael kede Yuda.
- ⁵En ewaco be, “Angu atieko winyo dwan jo kame tie kede mielkom atek, manono obedo koko me jo kame lworu omako, likame koko me jo kame tie kede mulem.
- ⁶Kong ipenyere keni di iko paro! Benyo, icuo karuno yac di eko nywalo atin? Pinyo do komio angu atie neno cuo dedede tie mako pier gi bala mon kame tie ramere me nywal? Pinyo komio nyim jo dedede likame nyuto yomcuny?
- ⁷Ceng me neno can tie bino. Likame tie ceng moro ace kame kokaruno poro kede. En ebino bedo ceng kame ikwae ka Yakobo bino neno kede can, do kobino lako gi ki can nono.”
- ⁸Rwot me jo yi waco be, “I ceng nono, angu abino tuturo ayoko kame kotweo i ngut gi, di ako cocoto irikoi kame kotweo gi kede, di likame bobo ngakumbor moro ko bino mino gi kibedo ipasoi.
- ⁹Do gin kibino timo tic ne Rwot Rubanga gi kede ne akwar Daudi, ngat kame angu abino keto pi bedo abaka gi.” En ewaco be,
- ¹⁰ “Do wun jo na, kur ibedunu kede lworu moro; doko kur cuny wu poti, Okwe wun jo na me Isirael. Angu ayaro lako wun kede idwe wu ki lobo kame tie kakabor nono, lobo kame itienyu iye mabus. Wun ibinunu dwogo paco di ikounu bedo mot kede anapakin, doko likame tie ngatamoro kame bino mino wu lworu.
- ¹¹Angu atie kede wu doko abino lako wu. Angu abino muducaro atekerin dedede kame angu asasaro wu i diere gi, do angu likame abino muducaro wun. Angu abino mino wu alola kame poore kede wu, likame abino weko wu aweka abongo mino wu alola moro. Angu Rwot en awaco.”
- ¹²Rwot waco ne jo mege be, “Awanon wun likame cango, apore wu rac twatwal.
- ¹³Likame tie ngatamoro kame pido piru, yat me muketo apore wu likame tie, apore wu likame romo cango.
- ¹⁴Jo dedede kame maro wu wi gi do otieko wil kede wu; gin likame do kiparo piru. Angu atieko mino wu lito bala ngakwor, amio wu alola abongo kisa bala ngakwor, pien dub wu dwong twatwal, doko gikareco wu tot adikinichel.
- ¹⁵Pinyo kame mio wun ikokunu pi awanon kame angu aketo i komu? Aramo wun likame cango. Angu amio wun alola nogi pien dub wun dwong twatwal doko gikareco wu tot adikinichel.



¹⁶Do jo dedede kame muducaro wu kobino muducaro gida, doko jokwor wu dedede kobino tero i piny apat bala mabus. Jo kame yako wu kobino yako gida, doko jo dedede kame mao jamini wu ango abino mino komao jamini gida.

¹⁷Ango abino dwoko ne wu yotkom wu; abino cango apreso me komu, bed bala jokwor wu waco be, ‘Kotieko riamo Sion obar, likame tie ngatamoro kame paro pire.’ Ango Rwot en awaco.”

¹⁸Rwot waco be, “Ango ayaro dwoko winyo me ikwae ka Yakobo, di ako bedo kede kisa i paco acelacel; kobino bobo gero bomba kakame bin ecungo iye, di oko dwoko paco me abaka kakame bin etie iye kikokome.

¹⁹Jo kame bedo kunono bino wero wer me pwono Rubanga; gin kibino wer di kilelemo kede kilel. Ango abino mino gin kidoko tot, doko wel gi likame bino dok piny; abino mino jo woro gi, doko jo likame bino bedo kede acae i kom gi.

²⁰Idwe gi bino bedo i kuo angoce me kare kasek, doko gin kibino bedo ekodet me jo kame wora; ango abino mino alola but jo dedede kame tero gi kirac.

²¹⁻²²Ngapug gin bino bedo dano me ateker gi; ngatel gi bino wok ki diere gin. Ango abino mine ebedo iyapiyapi keda, di en eko bino bino buta; pien ngai kame cunye nwang kame karuno bino buta? Gin kibino bedo jo nango, di ada ako bedo Rubanga gin. Ango Rwot en awaco.”

²³⁻²⁴Nenunu, lilo ka Rwot cal bala yamo abuko me kot, yamo ager kame bino beo i wi jo areco. Lilo ka Rwot likame bino jik tuno di etieko timo gikame en emoko tam mere pi timo. I kare me anyim jo mege bino niang i kom kop noni kiber.

Yeremia 31

Jo me Isirael bino Dok Paco

¹Rwot waco be, “Kare tie bino kame ango abino bedo Rubanga me jo me ikekon me Isirael dedede, doko gida kibino bedo jo na.

²Jo kame bin oko bwot ki lak epima, ango bin abedo kede kisa i kom gi i wi tim. I kare kame bin jo me Isirael paro kede pi udo wei,

³ango ako nyutere but gi ki kakabor. Jo me Isirael, amara nango butu likame lokere; pi mano, ango ameede bedo kede genere butu.

⁴Ango bobo abino gero ateker wu, Okwe wun jo na me Isirael kame amaro! Wun bobo ibinunu gono ayekeyeke ikounu miel di ilelunu.

⁵Ibinunu bobo pito olok i wi mori me Samaria, di jo kame pito olok nogo ko bino camo olok gi kame kipito.

⁶Pien kare tie bino kame jodar piny kobedo mori mori me Epuraimu bino lwongere kede be, ‘Bianu ootunu Sion but Rwot Rubanga wa.’ “



⁷Rwot waco be, “Wer kede dwan amalo di ilelo pi jo me Isirael, lelemo kitek pien gin kibedo ateker adwong kalamo atekerin apat. Pak Rwot di iwaco be, ‘Rwot olako jo mege, donge me jo me Isirael.’

⁸Neningo, ango ayaro kwanyo gin ki lobo kame tie tetu malo di ako kelo gi, ayaro koko gin ki ajikini me piny. Imuduka kede ingwalasa bino dwogo kede gin, karacel kede mon koyac kede kame tie ramere me nywal. Jo kame bino dwogo bino bedo tot twatwal.

⁹Gin kibino dwogo di kikok akoka, kibino ilega di ango atie telo gi dwoko gi. Abino mino gin kibeo kakame ataneko me pii opong iye, di kilubo yongayo apwot kalikame tie gimoro kame getaro gi iye. Ango acal bala papa me jo me Isirael, doko jo Epuraimu cal bala woda kao.”

¹⁰Rwot waco be, “Okwe atekerin, winyunu kop na, di ikounu tatamo en i dog name kame tie kakabor. Wacunu be, ‘En ngat kame bin esasaro jo me Isirael, en nono da kame ebino koko gi, di eko gwoko gi bala kame ngakwai romini gwoko kede romini mege.’

¹¹Pien ango atieko lako jo me Isirael, alako gi ki cing ateker kame tek kalamo gin.

¹²Gin kibino bino di kiko wer i wi moru me Sion kede dwan amalo pi kilel, cuny gi bino bedo yom twatwal pi bero kame Rwot bino timo negi, cuny gi bino bedo yom pi engano, bwini, kede mo me olibeti, kede i kom romini kede doke. Kuo gi bino bedo ber bala pototo kame pii oromo, likame bobo kibino bedo kede cwercury moro.

¹³Di do anyira ko bino miel di kiko bedo kede yomcuny, awobe kede jo oti da bino bedo kede kilel. Ango abino kweno cuny gi di ako mino iturur gi lokere doko kilel, cwercury gi di ako loko doko yomcuny.

¹⁴Abino mino josaseredoti cam abeco, abino mino jo na jamini atos kame romo gi. Ango Rwot en awaco.”

Kisa Omake Rwot i kom Jo me Isirael

¹⁵Rwot waco be, “Dwan tie winyere i bomba me Rama, dwan me koko katek. Lakeri tie koko pi idwe mege; en edagi likame emitto be kwei cunye, pien gin do kitieko doko li.”

¹⁶Rwot waco be, “Wek koko, wei pigewangi; pien kobino culi pi gikame in itimo ne idwe ni; gin kibino dwogo ki lobo me jokwor gi.

¹⁷Gen tie ni pi kare me anyim; idwe ni bino dwogo i piny gi. Ango Rwot en awaco.

¹⁸” Ateteni ango awinyo jo Epuraimu kok kede cwercury di kiwaco be, ‘Wan oudo ocal bala atin twon kalikame pwodi opwonyo i pur, do in iko bitaro wa pi pwonyo wa, di wan oko pwonyere odoko jo abeco. Dwok wa; wek wa odwog buti, pien in en Rwot Rubanga wa.



¹⁹Ingei wan yai tenge kibuti, wan oko swilaro; i kare kame oniang kede, oko bapokor wa. Lewic oudo omako wa twatwal doko kom wa oudo oto pi dub kame wan oudo otimo i kare me tino wa.’

²⁰” Mam Epuraimu obedo woda kame amaro? Mam en atina kame cunya yom i kome? I kare dedede kame ango ayamo kede kop i kome, ango pwodi ayutuno en. Cunya paro pire kitek; ateteni ango abino bedo kede kisa bute. Ango Rwot en awaco.

²¹” Sisipunu anen mogo kame nyuto yongayo; timunu apande kame cimo ne wu yongayo. Ketunu tamu mako yongayo adwong, yongayo kame bin ilubunu me ot kunono. Okwe dwogunu, wun jo na kame amaro me Isirael, dwogunu i bomban wu.

²²Ibinunu bedo parao tuno awene, Okwe wun jo na kalikame genere? Pien atieko timo gikame nyen i wi lobo: mon en kame bino gwoko cuo.”

Jo ka Rubanga bino bedo kede Mulem

²³Rwot me jo yi, Rubanga me jo me Isirael waco be, “I kare kame ango abino dwoko kede mulem me jo me Isirael, jo bobo bino donyo waco i Yuda kede i bomban mege be, ‘ Okwao Rwot mi winyo buti, in kabedo mere kacil, moru kacil me Yerusalem.’

²⁴Jo kame bedo i Yuda kede bomban mege dedede bino bedo karacel, jopur kede jokwai romini.

²⁵Abino mino jo ool udo teko, doko abino mino jo kame kec obwono cam di gin kiko udo teko.

²⁶Manono bino mino jo waco be, ‘Ango ako cei ki wang nino di ako neno be nino na oudo obedo ber na twatwal.’

²⁷” Neningo, kare tie bino kame ango abino mino kede jo kede leini pong i lobo me Isirael kede Yuda.

²⁸Bala kame bin ango amio koputo gin kede di oko tuturo gi, amio koreto gi, komuducaro gi, doko kotimo negi tim areco, kamanono da ango abino gero gi, doko abino pito gi bala yat di gin kiko dongo.

²⁹ Ka kare nono otuno jo likame bobo bino waco be, ‘ Jonywal bin ocamo olok awac, di eko neko lak idwe gi.’

³⁰Do lak jo dedede kame camo olok awac bino to; jo dedede bino to pi dub kame gin kikom gi en kitimo.”

³¹ Rwot waco be, “Kare tie bino kame ango abino timo kede isikan kanyen kede jo me Isirael karacel kede jo me Yuda.

³²Likame ebino bedo cal bala isikan kame bin ango atimo kede joakwari gi i kare kame bin ango akwanyo gi kede ki lobo me Misiri. Bed bala oudo ango acal bala cwar gi, do gin likame kiko gwoko isikan nono.



³³ Isikan kanyen kame ango abino timo kede jo me Isirael ka kare nono otuno bino bedo kaman: ango abino keto iswil na i tam gi, doko ako wandiko gi i cuny gi. Ango abino bedo Rubanga gi, di gida kiko bedo jo na.

³⁴ Likame tie ngatamoro kame bobo bino pwoyo ngat ocelu, arabo kame bino waco ne ngat ocelu be, ‘Ida ngei Rwot, ‘pien gin dedede kibino ngena, cako kibut jo me ruom apiny tuno but jo me ruom amalo. Ango abino sasiro gi ki gikareco gi di likame bobo ako yutuno dub gi. Ango Rwot en awaco.’”

³⁵ Rwot en kame mio ceng caro piny iceng, doko da en kame emio duwe kede acerin rieny iwor. En kame erubo pii i nam di eko mino ebuka mege mor; en nyinge obedo Rwot me jo yi.

³⁶ En ewaco be en etieko moko kite kame piny miero bed kede pi kare lung. Bala kame gikame en etieko moko likame bino jik kede, kamanono da ateker me Isirael bino bedo tie nakanaka.

³⁷ Rwot waco be, ka dano moro otwero pimo idoun kame tie malo, kede ka dano moro otwero ot mamano acakini me dud piny, manono en kame bino mino en edagi jo me Isirael pi gi dedede kame gin kitieko timo.

³⁸ Rwot waco be, “Ateteni kare bino tuno kame kobino bobo gero kede bomba pira, cako ki gedo abor malo kame tie Kananel tuno i erute kame kolwongo be Erute me Kona.

³⁹ Kobino pimo ikor mere yai ki kunono tuno i emukura me Gareb, di eko gonoro ot tuno Goa.

⁴⁰ Aditot lung kakame oudo koyiko iye jo oto kede kame koonyo iye yugi, kiton poti dedede tuno i ecilet me Kideron, kede i bad tetu kide i kona kame kolwongo be Erute me Asigira, kobino mino buta. Likame bobo tie dano moro kame bino tuturo arabo muducaro bomba.”

Yeremia 32

Yeremia Owilo Poto

¹ Rwot bin oko yamo keda i mwaka me tomon me apugan ka Abaka Esedekia me Yuda; mwaka nono da en kame oudo obedo mwaka me tomon kiwie kanyauni me apugan ka Abaka Nebukadunesa me Babilon.

² I kare nono oudo isirikalen me abaka me Babilon tie luko Yerusalem, di ango oudo atie mabus i diakal me paco me abaka me Yuda.

³ Abaka Esedekia oudo otwea kunono pien oudo ango atie waco ne jo kop kame Rwot owaco be, “Ango ayaro mino bomba noni i cing abaka me Babilon di en eko bino mane;

⁴ Abaka Esedekia likame bino bwot, do ateteni kobino mine i cing abaka me Babilon di en eko bino neno abaka nono wang ki wang, di eko yamo kede en kikome.



⁵Kobino tero Esedekia Babilon di eko bino dong kunono tuno ango neno kop mere. Akadi en eyi kede jo Babilon benyo, likame en ebino twero bwono gi. Ango Rwot en awaco.”

⁶Rwot oko waco na be

⁷Kanamel wot ka neru na Salum oyaro bino buta di eko waco be, “Wil poto na kame tie Anatot, pien in en wad na kame tie kede twero me wile.”

⁸Di Kanamel wot neru na oko bino buta i diakal kunono bala kame Rwot oudo owaco, di eko waco na be, “Wil poto na kame tie Anatot i lobo me jo Benjamin, pien in en itie kede twero me wile dwoke di eko doko meri; wile piri.” Manono oko mina angeo be manoni oudo obedo kop ka Rwot.

⁹Ango ako wilo poto nono kibus Kanamel wot neru na, poto kame bin tie Anatot. Apimo ne sekel tomon kiwie kanyaare me siliba.

¹⁰Ango ako keto cinga i papula kame nyuto wil wa di ako mwone kede emina di ako keto iye alama na; ako udo ijurak, di oko pimo sente kede misani.

¹¹Di ango ako tero papula kame oudo omwono nono kede kalikame komwono mere, papulan kame nyuto wil wa nono;

¹²di ako mino gi but Baruk wot ka Neria, en akwar Maseya. Ango amio gi bute di Kanamel wot neru na tie, ijurak kame bin oketo cing gi i papula kame nyuto wil wa nono da oudo tie, karacel kede Iyudayan kame bin tie bedo i diakal kanono.

¹³Ango ako waco ne Baruk di gin dedede kitie be,

¹⁴” Rwot me jo yi, Rubanga me jo me Isirael owaco be iter papulan are nogi kame nyuto wil, papula kame komwono mere kede kalikame komwono, di iko keto gi i agulu, tetekeny kikaruno bedo tieko kare kalac.

¹⁵Pien Rwot me jo yi, Rubanga me jo me Isirael owaco be ude, poti, kede poti me olok kame tie i lobo noni kobino bobo wilo.”

Ilega ka Yeremia

¹⁶Ingei ango mino papulan me wil nogo but Baruk wot ka Neria, ango ako kwano Rwot be,

¹⁷” Okwe Rwot Rubanga, in icweo malo kede piny kede twer nin adwong kede teko ni! Likame tie gimoro kalikame twerere kibuti.

¹⁸In itieko nyuto amara nin kalikame lokere but jo tutumian kede tutumian, doko in imio alola da but jo pi dub kame jonywal gi otimo. In en Rwot Rubanga kame itie kede twer kede teko adwong; in en kame nyingi obedo Rwot me jo yi.

¹⁹Iik kame in itimo obedo me aura twatwal, doko in itimo jamini adongodongo. In ineno gi dedede kame jo timo doko iculo dano acelacel di lubere kede ekite me kuo mere kede tice mege.



²⁰In bin itimo gianena kede jamini me aura i lobo me Misiri, doko in pwodi itie timo gi tuno tin i Isirael kede i diere me jo dedede, manono omio in ingere i kadedere dedede tuno tin.

²¹In bin ikwanyo jo ni me Isirael ki lobo me Misiri di itio kede gianena kede giaura, kede teko kede twer kame oudo kelo lwooro.

²²In iko mino gi lobo noni, kame in bin ikwongere pire but joakwari gi be ibino mino gi, lobo alac di emio.

²³Gin bin kiko donyo i lobo noni di kiko game edoko mergi. Do gin bin likame kiko lubo kop kame in iwaco negi arabo lubo iswilia ni; likame kitimo gimoro akadi acel kikom gi dedede kame bin in iciko negi. Pi mano, in itieko mino can nogi dedede opoto i kom gi.

²⁴Neningo, jo me Babilon otieko luko bomba pi mane. Peko me yi, kec, kede tuwo kame bino bedo tie i bomba bino mino komio bomba i cing gi. Gikame in oudo iwaco otieko timere, bala kame ida kikomi itie neno.

²⁵Aso di in, Okwe Rwot Rubanga, oudo iwaco na be awil pototo kede sente di ako udo ijurak, bed bala jo Babilon oyapuno mako bomba.”

²⁶Di Rwot oko waco na be,

²⁷” Neningo, ango en Rwot, Rubanga me jo dedede. Likame tie gimoro kalikame twerere kibuta.

²⁸Pi mano, ango ayaro mino bomba noni i cing Abaka Nebukadunesa me Babilon kede isirikalen mege di gin kiko mane,

²⁹kiko wange kede mac. Gin kibino wange karacel kede ude kame jo oudo mio iye giayala but Baal i wi gi malo, kede giayala amata but rubangan apat, pi wango cunya.

³⁰Pien jo me Isirael kede jo me Yuda obedo timo gikareco i nyima cako i kare me ageini gi; gin kibedo wango cunya kamanono kede tice gi.

³¹Jo me bomba noni obedo wango cunya di kimio lilo maka kede gi cako i ceng kame kogere kede tuno tin, manono en komio ango abino muducaro en,

³²pi gikareco kame jo me Isirael kede me Yuda obedo timo, gin karacel kede abakai gi, jotel gi, josaseredoti gi kede inabin gi.

³³Gin kitieko loko nango ngei gi; bed bala ango abedo pwoonyo gi di likame adok cen kiye, gin likame kiko lubo pwoonyo nono doko likame kiyei be riei gi.

³⁴ Gin kiketo jamini me kwere i ot kame kowora iye di kiko munao en.

³⁵ Gin kitieko gero ne Baal alutarin i aditot ka wot ka Kinom, me mino idwe awobe gi kede anyira but rubanga Molek. Ango likame oudo aciko gi be kitim kamanono, doko likame oudo gikacal kamanono obino i tam na be gin kibino timo gi me kwere kacal kamano di kiko mino jo me Yuda timo dub.”



Cikere ka Rubanga pi Jo bedo kede Gen

³⁶Rwot Rubanga me jo me Isirael oko waco na be, “Yeremia, jo tie yamo i kom bomba noni be kec kede tuwo en koyaro mino abaka me Babilon mao bomba noni; do ango atie waco kaman:

³⁷ango ateteni ayaro koko gin dedede ki lobere kame oudo ango اساسaro gi iye pi wang cunya, lilo kede gero atek kame oudo atie kede; ango abino dwoko gin kabedo noni di ako mino gin kibedo iye kede anapakin.

³⁸Gin kibino bedo jo na di ada ako bedo Rubanga gin.

³⁹Abino mino gin kiketo cuny gi kede tam gi i gi acel kenekene, en gin bedo kede lwooro buta pi kare dedede, tetekeny kiud bero pirgi kede pi idwe gi kede ikwae gi.

⁴⁰Ango abino timo kede gin isikan kame bedo nakanaka, likame abino weko timo bero but gi; abino mino gin kibedo kede cuny me wor buta, tetekeny kur kilokere tenge kibuta.

⁴¹Cunya bino bedo yom pi timo ne gin bero, doko ateteni abino keto gin i lobo noni kibedo iye atwal, abino timo kamanono kede cunya dedede.

⁴²” Bala kame ango akelo kede can adongodongo nogi i kom jo nogi, kamanono da ango abino kelo ne gin jamini dedede abeco kame ango atieko cikere iye.

⁴³Jo bino bobo wilo poti i lobo noni kame nataman wun itienu yamo i kome be etieko doko ameje, kakame jo akadi leini da li iye, pien kotieko mine i cing jo Babilon.

⁴⁴Jo bino bobo wilo poti kede sente, di gin kiko bino keto cing gi i papulan kame nyuto wil di kiko keto alama gi i papulan nogo di ijurak tie. Manoni bino timere i lobo me jo ka Benjamin, i calere koluko Yerusalem, i bomban me Yuda, i bomban me piny kobedo mori mori, i bomban kame tie piny i dud mori, kede i adul kame tie i bad tetu piny me Yuda; pien ango abino dwoko ne gin mulem gi. Ango Rwot en awaco.”

Yeremia 33

Cikere Ace kame Mio Jo bedo kede Gen

¹Rwot bobo oko yamo keda di pwodi oudo ango atie bala mabus i diakal me paco me abaka.

²Rwot ngat kocweo lobo, ngat kotime di eko kete kare oyamo keda. En ngat kame nyinge obedo Rwot owaco be,

³” Lwongere buta di ango ako bino gamo dogi, di ako bino tatamo ni kope adongodongo komungere, kalikame in pwodi ingeo.

⁴Ango Rwot, Rubanga me jo me Isirael ayamo i kom ude me bomba noni kede i kom ude me abakai me Yuda kame korereto piny pi gengo jo koluko bomba yito ki wi apama me cel.



⁵Jo Babilon tie bino yi di kiko pongo ude nogo kede liele me jo kame ango abino neko pi lilo na atek, pien ango atieko weko bomba noni pi tim dedede areco me jo mege.

⁶Akadi kamanono da, ango abino kelo yotkom kede cango i bomba noni; abino cango jo mege ki peko gi di ako mino gi kibedo kede mulem adwong kede anapakin.

⁷Ango abino dwoko winyo me Yuda kede winyo me Isirael, di ako gero gi adwoko gi i kite kame oudo kitie kede sek.

⁸Abino lwoko tenge dub gi kame oudo kitimo buta, di ako sasiro dub gi dedede kiton jemo gi.

⁹Di bomba noni ko bino bedo gikame kelo nango kilel, pak kede dwongo i nyim atekerin me wi lobo ka gin kiwinyo kop i kom jamini abeco dedede kame ango atimo ne jo mege; gin kibino winyo di lworo ko mako gi pi jamini dedede abeco kede mulem kame ango amie.”

¹⁰Rwot waco be, “Jo tie waco be kabedo noni odoko ameje kame jo akadi leini da li iye. Do i bomban me Yuda kede i yote me Yerusalem kame nataman odong nono nogo, kame jo akadi leini da li iye,

¹¹ bino winyere iye dwan jo kame lelemo kede kilel, dwan jo kame tie i ebaga me nyom, kede dwan jo kame tero giamia gi i ot ka Rwot di kiwero be, ‘ Pwounu Rwot me jo yi, pien Rwot ber, doko amara mere kalikame lokere bedo nakanaka.’ Pien ango ayaro dwoko mulem me lobo noni i kite kame oudo etie kede sek, ango Rwot en awaco.”

¹²Rwot me jo yi waco be, “I kabedo noni kame nataman tie ameje, kame jo akadi leini da li iye, amel kame romini urako iye bino bedo tie iye kede i bomban mege dedede.

¹³Jokwai romini bino bobo maro wel me romini gi i bomban me piny kobedo mori mori, i bomban kame tie piny i dud mori, i bomban kame tie i bad tetu piny me Yuda, i adul me jo ka Benjamin, i calere koluko Yerusalem, kede i bomban me Yuda. Ango Rwot en awaco.”

¹⁴ Rwot waco be, “Kare bino tuno kame ango abino cobo kede cikere na but jo me Isirael kede jo me Yuda.

¹⁵I kare nono ango abino yero akwar Daudi acel kopooore di en eko bino tero jo kiber i yore kopooore i lobo dedede me jo me Isirael.

¹⁶Kobino lako jo me Yuda, doko Yerusalem bino bedo kede anapakin. Nying kame kobino lwongo kede Yerusalem en ine be, ‘Rwot timo ne wa gi kopooore’ .

¹⁷ Pien Rwot waco be likame tie kare moro kame Daudi bino bedo kede abongo akware moro kame lunyo ajakanut mere i Isirael,

¹⁸ doko i kare dedede josaseredoti Jolebi bino bedo tie pi timo tic buta kede pi mino giayala awanga, giayala me alos, kede giayala angola.”

¹⁹Rwot oko waco na be,



²⁰” Ka ngatamoro kikom wu karuno turo isikan kame ango atimo kede iceng arabo isikan kame ango atimo kede iwor di eko gengo gin bedo tie i esawa kame poore negi,

²¹manono udo nyuto be isikan nango kede ngatic na Daudi da romo tur, di Daudi likame ko bino bedo tie kede akware moro kame lunyo ajakanut mere, doko isikan nango kede jotic na Jolebi da romo tur.

²²Ango abino medo wel me ikwae ka ngatic na Daudi kede wel me josaseredoti Jolebi, di maro wel gi likame ko twerere bala kalikame kokaruno maro kede acerin kame tie i edou kede pimo rom me asinge kame tie i dog nam.”

²³Rwot oko waco na be,

²⁴” Benyo, mam in itieko winyo kop kame jo tie waco be ango atieko dagi jo me Yuda kede Isirael, jo me ikekon are kame oudo ango ayero, kede kite kame gin kineno kede jo na kede acae di likame bobo kitero gi bala ateker?

²⁵Do ango Rwot, bala kame atieko timo isikan kede iceng kede iwor, kede atieko timo iswilia amako malo kede lobo,

²⁶kamanono da ango likame abino dagi ikwae ka Yakobo kede me ka ngatic na Daudi. Ango abino yero ngat acel kikom ikwae ka Daudi pi bedo ngapug me ikwae ka Aburaam, Isaka, kede Yakobo. Pien ango abino dwoko mulem gi, di ako bedo kede kisa but gi.”

Yeremia 34

Kop kame Kotero ne Esedekia

¹ Man en kop kame Rwot owaco na i kare kame Abaka Nebukadunesa me Babilon kede isirikalen mege, karacel kede isirikalen me pinye dedede kede jo dedede kame en epugo, oudo tie yi kede jo me Yerusalem kede bomban mege dedede.

²Rwot Rubanga me jo me Isirael owaco na pi ot waco ne Abaka Esedekia me Yuda be, “Ango Rwot, ayaro mino bomba noni i cing abaka me Babilon di en eko wange.

³Ida kikomi likame ibino bwot, do ateteni kobino maki di oko mini i cinge. In ibino neno abaka me Babilon kede wangi di iko yamo kede in kikomi, di iko ot Babilon.

⁴Akadi kamanono da, winy kop kame ango atie waco i komi, Okwe in Abaka Esedekia me Yuda! In likame kobino neki;

⁵in ibino to i mulem. Doko bala kame bin jo owango kede odok angwe kur ne joakwari ni, gin jo koge bedo abakai ne in, kamanono da jo bino wango odok angwe kur ne in di kiko koki di kiwaco be, ‘Okwe, abaka wa oto! ‘Ango Rwot en awaco.”

⁶Di ango ako waco ne Esedekia abaka me Yuda kope nogi dedede i Yerusalem.

⁷Ango awaco ne kope nogi i kare kame oudo isirikalen ka abaka me Babilon tie yi kede jo me bomba me Yerusalem, karacel kede bomban me Yuda kame oudo odong dedede, gin bomban me Lakis kede Aseka. Magonogi en bomban me Yuda kame kocelo kede apama atek kame oudo odong.



Jo Ongalo Gonyo Ipasoi

⁸Rwot oko yamo keda ingei Abaka Esedekia timo isikan kede jo dedede i Yerusalem pi gin gonyo ipasoi.

⁹Jo dedede oudo miero gony ipasoi gi kobedo Joeburania, cuo kede mon; likame tie dano moro kame oudo miero mi dano me Isirael wad gi bed epasoit.

¹⁰Aso, jodongo dedede karacel kede jo dedede kame oudo otimo isikan noni oko yei be gin kibino gonyo ipasoi kede apasoi gi, di likame bobo kiko bino dwoko gi i ipasun. Gin kiko lubo kop me isikan nono di kiko gonyo gi.

¹¹Do i cen mere gin bobo kiko loko tam gi di kiko dwoko ipasoi kede apasoi kame oudo gin kigonyo, di kiko mino gi kibedo ipasoi gi bobo.

¹²Di Rwot,

¹³Rubanga me Isirael oko waco na pi waco ne jo be, “Ango bin atimo isikan kede joakwari wu i kare kame akwanyo gi kede ki lobo me Misiri, ki kuo me ipasun di ako waco negi be,

¹⁴ ‘Buli mwaka me kanyaare poore dano acelacel gony Ngaeburania kame kocato ne di oko bedo timo ne tic pi mwakini kanyape; miero igonyunu gi ki tice kame gin kitimo ne wu.’ Do joakwari wu likame oko winyo kop na arabu lubo timo gikame angu oudo awaco negi.

¹⁵Wun i kare kokato kiyapiyapi iswilarunu di ikounu timo gikame opoore i nyima. Wun dedede oudo iyeunu pi gonyo jo me Isirael wadu, di ikounu timo isikan i nyima i ot kame kolwongo kede nyinga.

¹⁶Do ikounu bobo loko tam wu di ikounu kelo acae i nyinga. Wun dedede idwokunu ipasoi kede apasoi kame oudo itiekunu gonyo bala kame cuny gi oudo mito, di ikounu dino gi tetek bedo ipasoi wu bobo.

¹⁷Pi mano, angu awaco kaman: wun idagunu timo gikame angu awaco; likame igonyunu jo me Isirael wadu. Angu nataman do agonyo ne wu yi, tuwo, kede kec. Angu abino mino ibedunu jo kame atekerin me wi lobo dedede neno di lwooro ko mako gi pi can kame angu abino timo ne wu.

¹⁸⁻¹⁹Jodongo me Yuda kede me Yerusalem, karacel kede jotic me paco ka abaka, josaseredoti, kede jotel dedede oudo otimo isikan keda di kibeo ki diere me twon kame oudo gin kibaro i diere. Do gin kiko turo isikan nono di likame kiko lubo kope mege. Pi mano, angu ayaro timo negi gikame gin oudo kitimo ne twon nono.

²⁰Angu ayaro mino gi i cing jokwor gi, jo kame tie mito kwanyo kuo gi. Liele gi bino doko cam me winyo kede leini me obar.

²¹Angu abino mino Abaka Esedekia me Yuda kede jotic mege i cing jokwor gi, jo kame tie mito kwanyo kuo gi. Angu abino mino gi i cing isirikalen me Babilon, jo kotieko weko yi kede wu.



²²Ango ayaro mino gin cik di gin kiko dwogo i bomba noni. Gin kibino yi di kiko mane, kiko wange. Ango abino mino bomban me Yuda doko amejeko kalikame tie dano moro kame bedo i yi gi. Ango Rwot en awaco.”

Yeremia 35

Yeremia kede Jo Rekab

¹I kare kame Yekoyakim wot ka Yosia oudo en abaka me Yuda, Rwot oko waco na be,

²” Oti but jo Rekab, di iko yamo kede gi iko kelo gi i tempulo i agola acel, di iko mino gi bwini pi mato.”

³Manono oko mino ango ako kwanyo Yasania (wot ka Yeremia apat kobedo wot ka Kabasinia) kede imiegu mege, kede awobe mege dedede, kede jo Rekab dedede.

⁴Ango ako tero gi i ot ka Rwot i agola me josiao ka Aanan wot ka Igidalia, dano ka Rubanga. Agola nono oudo tie malo i wi agola ka Maseya wot ka Salum, ngat kame bin daro ekeko kalac me ot ka Rwot, doko oudo etie i iyapiyapi kede agolai me jodongo apat.

⁵Di ango ako cibo cupan kopong kede bwini, kede ikopon i nyim jo Rekab, di ako waco negi be, “Matunu bwini.”

⁶Do gin kiko gamo be, “Wan likame omato bwini, pien kwaru wa Yonadab wot ka Rekab ociko wa be kur omat bwini, wan kede ikwae wa.

⁷En eciko wa da be kur oger ude arabo opur cam, akadi pito olok, arabo bedo tie kede potu moro me olok, do miero obed i kimere pi kare me kuo wa lung, tetekeny obed i lobo kame otie iye tieko kare kalac.

⁸Wan olubo cik dedede kame kwaru wa Yonadab wot ka Rekab omio wa. Wan karacel kede mon wa, awobe wa kede anyira wa, likame omato bwini,

⁹doko likame ogero ude kame obedo iye. Wan oli kede poti me olok arabo potu moro amoto kodere mogo;

¹⁰do wan obedo i kimere, doko obedo lubo gi dedede kame kwaru wa Yonadab oudo ociko ne wa.

¹¹Do i kare kame Abaka Nebukadunesa me Babilon osuro kede piny wa, wan oudo oko waco be, ‘Bia ootunu Yerusalem tetekeny obwotunu ki cing isirikalen me Babilon kede me Siria.’ Manono en omio wan otie bedo Yerusalem.”

¹²⁻¹³Di Rwot me jo yi, Rubanga me Isirael oko waco na be aoti di ako waco ne jo me Yuda kede jo me Yerusalem be, “Ango Rwot apenyu wu pinyo komio wun likame ikarununu pwonyere di ikounu lubo kope na.

¹⁴Yonadab wot ka Rekab bin omio awobe mege cik be kur kimat bwini di gin kiko lubo cik mere nono. Tuno tin gin likame kimato bwini pi lubo cik kame kwaru gi bin omio. Do ango abedo yamo kede wu nakanaka, do wun likame ilubunu kop na.



¹⁵Ango abedo cwano inabin jotic na dedede but wu pi gin waco ne wu kop me lokere di ikounu weko yote me kuo wu areco di ikounu donyo timo gikame poore. Gin kibedo kwenyaro wu pi weko woro rubangan ace akadi timo negi tic tetekeny imeedenu kede bedo i lobo kame bin ango amio wu kede joakwari wu. Do wun likame ikounu winyo kop na arabo timo gikame ango awaco.

¹⁶Ikwae ka Yonadab wot ka Rekab obedo lubo cik kame kwaru gi bin omio, do wun likame ilubunu kop na.

¹⁷Pi mano, ango Rwot me jo yi, Rubanga me jo me Isirael abino kelo i kom jo me Yuda kede jo kame bedo Yerusalem can me epone dedede kame ango atieko waco i kom gi. Ango abino timo manoni pien ango abedo yamo kede gi do gin likame kiwinyo kop na, ango alwongere but gi do gin likame kigamo dogo.”

¹⁸Di ango ako waco ne jo Rekab be Rwot me jo yi, Rubanga me jo me Isirael owaco be, “Wun ibedunu lubo cik kame kwaru wu Yonadab omio wu; igwokunu kope kame en ewaco dedede di ikounu timo gi dedede kame en oudo eciko ne wu,

¹⁹pi mano, ango Rwot me jo yi, Rubanga me jo me Isirael awaco be, i kare dedede Yonadab wot ka Rekab bino bedo kede akware moro kame timo na tic.”

Yeremia 36

Baruk Osomo Itabu Adola i Tempulo

¹I mwaka me ongwon me apugan ka Abaka Yekoyakim wot ka Yosia me Yuda, Rwot oko waco na be,

²” Yeremia, kwany itabu adola di iko wandiko iye kope dedede kame ango atieko waco ni i kom Isirael kede Yuda kede atekerin dedede, cako i ceng kame ango ayamo kedi i kare ka Yosia tuno tin.

³Cengemogo ka jo me Yuda owinyo kop i kom can kame ango atie mito timo negi, gin dedede kibino lokere di kiko weko yote areco me kuo gi, tetekeny ango asasiro gi ki gikareco gi kede ki dub gi.”

⁴Di ango ako lwongo Baruk wot ka Neria, di ako waco ne kope dedede kame oudo Rwot owaco na, di Baruk oko wandiko gi i itabu adola.

⁵Di do ango ako ciko Baruk di awaco ne be, “Ogenga donyo i ot ka Rwot;

⁶aso, ango amito in kikomi i ot kunono i ceng kame jo tie kanyo kede kec, di in iko somo kope ka Rwot kame oudo ango awaco ni di iko wandiko i itabu adola. In miero isome i ot ka Rwot di jo dedede winyo, kiton jo dedede me Yuda kowok ki bomban gi dedede.

⁷Cengemogo kibino kwano Rwot, di gin dedede kiko lokere kiweko yote areco me kuo gi, pien Rwot otieko waco kop atek me gero kede me lilo mere i kom jo nogi.”

⁸Baruk wot ka Neria oko timo gi dedede kame oudo ango awaco ne i kom kop amako somo kop ka Rwot ki itabu adola i ot ka Rwot.



⁹I duwe me kanyangon i mwaka me kany me apugan ka Abaka Yekoyakim wot ka Yosia me Yuda, jo dedede me Yerusalem kede jo dedede kobino Yerusalem di kiwok ki bomban me Yuda oko bedo kanyo kec i nyim Rwot.

¹⁰Di Baruk oko somo ki itabu adola nono kope kame oudo ango awaco di jo dedede winyo. En esomo kope nogo i ot ka Rwot, i agola ka Gemaria wot ka Sapan, kame oudo obedo kalani. Agola nono oudo tie i diakal kame bin tie malo, i nget Erute Kanyen me tempulo.

Baruk Osomo Itabu Adola but Jodongo

¹¹Kakame Mikaya wot ka Gemaria, en akwar Sapan, oko winyo kede kope ka Rwot dedede kame Baruk oudo osomo ki itabu adola,

¹²en eko ot i ot ka abaka, i agola me kalani, kakame oudo jodongo dedede oudo tie bedo iye. Elisama kalani, Delaya wot ka Semaya, Elinatan wot ka Acibor, Gemaria wot ka Sapan, Esedekia wot ka Kanania, kede jodongo apat dedede oudo tie kunono.

¹³Di Mikaya oko waco ne gin kope dedede kame en oudo ewinyo, kakame Baruk oudo somo kede itabu adola di jo dedede winyo.

¹⁴Di do jodongo oko ooro Yekudi (wot ka Netania, akwar Selemia, doko en akwar me are ka Kusi) pi ot waco ne Baruk kelo itabu adola kame oudo en esomo ne jo. Aso, Baruk wot ka Neria oko kwanyo itabu adola nono di eko tere but gi.

¹⁵Gin kiko waco ne be, “Bed piny di iko somo ne wan itabu adola nono.” Aso, Baruk di oko timo bala kame gin kiwaco.

¹⁶Kakame gin kiwinyo kede kope dedede, lworu oko mako gi di kiko donyo nenere ken gi ken gi, di gin kiko waco ne Baruk be, “Wan miero owac ne abaka kope nogi dedede.”

¹⁷Di do gin kiko penyo Baruk be, “Wace wan, in ituno wandiko kope nogi dedede benyo benyo? Yeremia en kowaco ni di in iwandiko gi, arabo benyo?”

¹⁸Baruk oko gamo be, “Yeremia en owaco nango kope nogi dedede, di ango ako wandiko gi kede bwino i itabu adola noni.”

¹⁹Di do jodongo oko waco ne Baruk be, “Oti iko pwono, in kede Yeremia, doko kur imiunu ngatamoro ngei kakame itienyu iye.”

Abaka Owango Itabu Adola

²⁰Jodongo oko keto itabu adola nono i agola ka Elisama kalani, di gin kiko ot i diakal me abaka, di kiko waco ne abaka kope nogo dedede.

²¹Di do abaka oko ooro Yekudi pi ot kelo itabu adola nono. Yekudi oko kwanyo itabu nono ki agola ka Elisama kalani di eko some ne abaka kede jodongo dedede kame oudo tie cungo i nget abaka.



²²Kare nono oudo obedo kare me ngico me piny (oudo manono obedo duwe me kanyangon); abaka oudo tie bedo paco mere me kare me ngico me piny, di mac kodop tie i nyime.

²³Kikano, ka Yekudi oudo otieko somo adulion adek arabo ongwon, abaka oudo ko ngolo gi tenge kede pala katitidi di eko uco gi i mac. En ebodo timo kamanono tuno tieko wango itabu adola nono dedede.

²⁴Abaka karacel kede jotic mege kame oudo oko winyo kope nogi dedede likame oko bedo kede lworu moro arabo nyinyilo igoen ki kom gi pi nyuto cwercury.

²⁵Bed bala Elinatan, Delaya, kede Gemaria oudo oko ngangao abaka be kur koto ewango itabu adola nono, do en eko dagi winyo kop gin.

²⁶Di abaka oko mino cik but wode Yeramel kede Seraya wot ka Asiriel kede Selemia wot ka Abidel pi gin mako Baruk kalani kede ango. Do Rwot oudo okano wan.

Yeremia Owandiko Itabu Adola Ace

²⁷Ingei Abaka Yekoyakim wango itabu adola kame oudo ango awaco kope mege di Baruk wandiko, Rwot oko waco na

²⁸be akwany itabu adola ace di ako wandiko iye kope dedede kame oudo tie i itabu me agege, kame abaka Yekoyakim me Yuda oudo owango.

²⁹Rwot owaco na be awac ne Abaka Yekoyakim me Yuda be, “In iwango itabu adola nono di ipenyo pinyo komio Yeremia owandiko iye be abaka me Babilon ateteni bino bino di eko muducaro lobo noni, di eko neneko jo mege kede leini da.

³⁰Pi mano, ango Rwot awaco ne in Abaka Yekoyakim me Yuda be, likame tie akwari moro kame bino lunyo kom me ajakanut ka Daudi, doko liel nin kobino uco obar ceng ko donyo wange i iceng, di ngico me piny ko donyo rumakino en iwor.

³¹Ango abino mini alola, in kede ikwae ni, kede jotic ni pi dub wu. Abino kelo i komu, kede i kom jo kame bedo Yerusalem, kede jo me Yuda, can dedede kame oudo awaco be abino keto i komu, pien wun idagunu winyo kope na.”

³²Di ango bobo ako kwanyo itabu adola ace di ako mino but kalani Baruk wot ka Neria, di en eko wandiko kope dedede kame oudo ango awaco. En ewandiko kope dedede kame oudo tie i itabu adola me agege kame oudo Abaka Yekoyakim owango, di oko medo kope ace kame oudo cal bala me agege.

Yeremia 37

Kwac ka Esedekia but Yeremia

¹ Abaka Nebukadunesa me Babilon oko keto Esedekia wot ka Yosia pi bedo abaka me Yuda akaka Yekoyakin wot ka Yekoyakim.

²Do Esedekia akadi jotic mege arabo jo me piny likame oko lubo kope ka Rwot kame oudo ewaco na.



³Abaka Esedekia oko cwano Yekukal wot ka Selemia kede ngasaseredoti Sepania wot ka Maseya buta pi waco na be, “Okwai ileg but Rwot Rubanga wa pirwa.”

⁴I kare nono ango oudo pwodi arimo i dier jo, pien oudo pwodi likame orwaka i otkol.

⁵I kare nono da isirikalen me Babilon oudo oluko Yerusalem kitie sure, do kakame kiko winyo kede be isirikalen me Misiri oudo otieko ngolo ikor me Misiri, gin kiko yai kidok cen.

⁶Di Rwot oko waco na

⁷pi waco ne cuo are nogo pi ot waco ne Esedekia be Rwot Rubanga me Isirael owaco be, “Isirikalen me Misiri kame oudo tie bino pi konyi oyaro dok i lobo gi Misiri.

⁸Di jo me Babilon ko bino dwogo suro bomba noni; gin kibino mane di kiko wange dopodop.

⁹Ango Rwot atie waco ne wu be kur ingalerenu kenu di iwacunu be jo me Babilon likame bino dwogo, pien gin kiyaro dwogo.

¹⁰Akadi koto di wun ikounu bwono isirikalen me Babilon kame tie yi kede wu dedede, di do jo kame owawano kenekene en kame ko dong i iemai gin, do jo kame kowawano nogo pwodi bino yai di gin kiko wango bomba noni dopodop.”

Komako Yeremia di oko Twene i Otkol

¹¹Aso, i kare kame isirikalen me Babilon bin oyai kede di kiko weko suro Yerusalem pien oudo isirikalen me Misiri tie bino,

¹²ango ako yai ki Yerusalem pi ot i lobo me Benjamin pi gamo iner na me jamini kikut jo me kunono.

¹³Kakame ango atuno kede i Erute ka Benjamin, sirikale ngadar erute, kame oudo nyinge Irija ngat kobedo wot ka Selemia kede Kanania, oko maka di eko waco na be, “In itie lwi ot but jo me Babilon.”

¹⁴Di ango ako waco ne be, “Mano likame kop me ateni; ango likame atie lwi ot but jo me Babilon.” Do Irija likame oko yei winyo kop na, di eko maka eko tera but jodongo.

¹⁵Cuny jodongo oko wang i koma, di gin kiko bunga di kiko twena bedo mabus i ot ka Jonasan kalani, pien oudo otieko loko ot nono odoko otkol.

¹⁶Ango bin oko keta i bur me tweno jo di ako dong bedo iye tieko kare kalac.

¹⁷Di do Abaka Esedekia oko mino otera bute. Abaka oko pepenyo ango i mung i ode be, “Benyo, tie kop moro kowok kikut Rwot?” Ango ako gamo be, “Tie!” Di ako meede be, “In kobino mini i cing abaka me Babilon.”

¹⁸Di Ango ako penyo Abaka Esedekia be, “Raco nyo kame ango atimo nin, arabo ne jotie ni, amoto but jo nogi, en komio in iketa i otkol?”



¹⁹Inabin nin kame oudo murao di kiwaco ni be abaka me Babilon likame bino suri akadi suro piny nin, nataman do tie tuai?

²⁰Nataman ango akwai abaka na, tim ber iwiny koko na, di likame iko dwoka ot to i ot ka Jonasan kalani.”

²¹Aso, Abaka Esedekia oko mino cik di oko gona i diakal me paco me abaka. Ango ako bedo kunono di oudo komia mugati acel buli ceng kame oudo kokelo ki kakame kotimo iye mugati, tuno mugati tiek i bomba lung. Aso ango ako dong bedo i diakal me paco me abaka.

Yeremia 38

Kouco Yeremia i Kulo Kotuo

¹Septia wot ka Matan, Gedalia wot ka Pasikur, Yukal wot ka Selemia, kede Pasikur wot ka Malakia oko winyo be ango oudo atie waco ne jo be

²Rwot owaco be, “Jo kame bino dong bedo i bomba noni kobino neko gi i yi, ka likame kito i yi, kibino to kec amoto tuwo. Do jo kame bino ot riengo cing gi but jo me Babilon bino dong kuo; kuo gi bino bwot.”

³Doko da oudo ango atie waco negi be Rwot oudo owaco be, “Ateteni ango abino mino bomba noni i cing isirikalen me abaka me Babilon di gin kiko mane.”

⁴Di do jodongo oko ot but abaka di gin kiko waco ne be, “Icuo noni miero koneke, piento en etie yamo kope akelo lworu i cuny isirikalen kame odong i bomba noni, karacel kede jo dedede. Icuo noni likame tie paro pi konyo jo, do en emitimo tino ne gin raco kenekene.”

⁵Abaka Esedekia oko waco negi be, “En ino; en etie i cingu; ango likame akaruno gengo wun tino gikame imitunu.”

⁶Aso, gin kiko tera di kiko yololo ango piny kede auno i bur atut me pii kame oudo tie i diakal me paco me abaka. Bur nono oudo me ka Malakia wot ka abaka. Pii oudo li i bur nono, kenekene cwoto, di ango ako moko i cwoto nono.

⁷Ebedemelek dano me Abisinia, ngat kame oudo obedo ngatic me paco me abaka, oko winyo be oudo korwaka i bur atut me pii. Esawa nono abaka oudo tie bedo kakame kolwongo be Erute ka Benjamin.

⁸Aso, Ebedemelek oko ot kunono di eko waco ne abaka be,

⁹” Adwong na abaka, gikame cuo gi otimo ne enabi Yeremia tie gikarac. Gin kiuce i bur atut me pii, en ebino to kec kunono, pien cam likame do tie i bomba.”

¹⁰Di abaka oko mino cik but Ebedemelek pi en ot kede cuo adek di gin kiko wota ki bur di pwodi likame oudo ato kec.

¹¹Aso, Ebedemelek oko ot kede cuo nogo kakame okano iye jamini i paco me abaka di en eko kwanyo idukun moggo me igoen oti, di eko yololo gi piny i bur kede auno buta.



¹²En eko waco na pi keto idukun nogo i akirididi na tetekeny aunoi kur yua. Ango ako timo kamanono.

¹³Di gin kiko wana kede aunoi kiwota ooko ki bur nono. Di do anga ako dong i diakal kunono.

Esedekia Openyo Tam kibut Yeremia

¹⁴I ceng moro ace abaka Esedekia oko mino kotera bute i ekeko me adek kame donyo i tempulo. Abaka oko waco na be, “Ango atie kede kop kame amito penyi iye, do kur imung na gimoro.”

¹⁵Ango ako waco ne Esedekia be, “Ka anga awaco nin kop me ateni, in ibino neka; doko ka ami tam, in likame ibino winyo kop na.”

¹⁶Aso, Abaka Esedekia oko kwongere buta i mung be, “Anga alairo i nying Rwot kakuo, ngat komio wan kuo be, anga likame abino neki arabo mini i cing cuo nogi kame mito neki.”

¹⁷Di do anga ako waco ne Esedekia be Rwot me jo yi, Rubanga me jo me Isirael oudo owaco be, “Ka in irieo cingi but jotic adongo me abaka me Babilon, kobino weko kuo ni, doko bomba noni likame kobino wango dopodop; ida kede jo me odi kobino weko wu ibedunu kuo.

¹⁸Do ka in likame irieo cingi but jodongo ka abaka me Babilon, kobino mino bomba noni but jo me Babilon, di gin kiko wange dopodop; ida kikomi likame ibino bwot ki cing gi.”

¹⁹Abaka Esedekia oko waco na be, “Anga atie lworu jo me piny wa kame otieko lwi nataman do kitie but jo me Babilon, pien cengemogo kobino mina i cing gin di gin kiko tidilo anga.”

²⁰Anga ako waco ne be, “Manono likame bino timere. In kenekene lub kop kame Rwot owaco ni, di gi dedede ko bino bedo ni kiber, doko kuo ni di oko bino weko.

²¹Do ka in idagi ot rieno cingi, man en gianyuta kame Rwot onyuto nango:

²²anga aneno mon dedede kame oko dong i paco me abaka me Yuda, di otie tero gi but jotic adongo me abaka me Babilon. Gin oudo kioto di kiyamo kop i komi be, ‘ Jowot abaka orwenye, gin kibwono tam mere. Nataman do tiene otieko moko i cwoto, di jowote oko weke.’

²³” Aso, jo me Babilon bino kwanyo mon wu dedede kede idwe wu di gin kiko tero gi, doko ida kikomi likame ibino bwot ki cing gi. Abaka me Babilon bino maki di eko teri bedo mabus, di oko bino wango bomba noni dopodop.”

²⁴Di do Esedekia oko waco na be, “Kur imi ngatamoro ngei kop kame wan onyimao noni, ka dano moro onge, in ibino to.



²⁵Ka jotic adongo owinyo be ango ayamo kedi, gin kiyaro bino di kiko penyi be iwaco negi kop kame wan oudo oyamo. Gin kibino waco ni be kibino neki kalikame iwaco negi.

²⁶Kenekene in wac negi be in oudo itie ngangao ango be kur adwoki i ot ka Jonasan bala Mabus pi ot to kunono.”

²⁷Jotic adongo dedede oko bino buta di gin kiko pepenyo ango; di ango ako dwoko negi kop bala kame abaka oudo ocika be awaci. Di do gin kiko weko pepenyo ango, pien likame tie ngatamoro kame oudo owinyo inyimai nono.

²⁸Di ango ako dong i diakal me paco me abaka tuno i ceng kame komao kede Yerusalem.

Yeremia 39

Jo me Babilon Omao Yerusalem

¹I duwe me tomon me mwaka me kanyangon me apugan ka Esedekia abaka me Yuda, Abaka Nebukadunesa me Babilon oko bino kede isirikalen mege dedede di gin kiko luko Yerusalem.

²I ceng me kanyangon me duwe me ongwon i mwaka me tomon kiwie acel me apugan ka Esedekia, isirikalen me Babilon oko turo apama aluko bomba.

³(Kakame oudo jo me Babilon otieko mano kede Yerusalem, jotic adongo me abaka me Babilon oko ot di gin kiko bedo i Erute me Diere, jo nogo gin en Neregal Sareser, Samugar Nebo, Sarasekim ngat kobedo Rabasari, kede Neregal Sareser ngat kobedo Rabamag, karacel kede jotic adongo dedede me abaka me Babilon.)

⁴Kakame Abaka Esedekia kede isirikalen mege dedede oneno kede gikame oudo tie timere, gin kiko ringo kilwi ki bomba iwor. Gin kiringo kilubo yongayo me potu me abaka, di kiko donyo ki erute kame oudo tie i dierediere me apamai are, kiko ot tetu Aditot me Yorodan.

⁵Do isirikalen me Babilon oko wapo gi di kiko mako Esedekia i ebar me Jeriko. Gin kiko tere but Abaka Nebukadunesa me Babilon, ngat kame oudo tie Ribula i lobo me Kamat, di abaka oko ngolo ne kop.

⁶Abaka me Babilon oko neko awobe ka Esedekia i Ribula i nyime di eneno; eko neko da bobo jodongo me Yuda.

⁷Ingei manono, eko golo wang Esedekia di eko twene kede irikoi pi tere Babilon.

⁸Jo me Babilon oko wango ot ka abaka kede ude me jo apat, di kiko rereto apama me Yerusalem piny.

⁹Di Nebusaradan ngatel me isirikalen oko tero jo dedede kame bin odong i bomba kede jo kame oudo orieo cing gi bute. En etero gin Babilon bala mabus,

¹⁰di eko weko i lobo me Yuda jo kame oudo obedo jocan atwal atwala, jo kame oudo li kede gimoro akadi acel, di en eko mino gin poti me olok kede poti ace.



Jo me Babilon Ogonyo Yeremia

¹¹Abaka Nebukadunesa oko mino cik amako Yeremia but Nebusaradan, ngatel me isirikalen be,

¹²” Oti di iko mono Yeremia. Ka iko ude, gwoke kiber doko kur itim ne gimoro arac, do in tim ne gi dedede kame en ekwai.”

¹³Aso, Nebusaradan, karacel kede jotic adongo, Nebusasiban ngat koudo obedo Rabasari, kede Neregal Sareser ngat koudo obedo Rabamag, kede jotic apat dedede me abaka me Babilon,

¹⁴oko kwanya ki diakal me paco me abaka. Gin kiko mina i cing Gedalia, ngat kobedo wot ka Akikam kede akwar Sapan, pi gwoka. Gedalia oudo miero nen be ango atuno ture kiber. Aso, ango ako donyo bedo kede jo mege.

Rwot Omio Ebedemelek Kop me Gen

¹⁵Rwot oudo owaco na kop i kare kame oudo pwodi kotwea kede i diakal me paco me abaka be

¹⁶aoti awac ne Ebedemelek dano me Abisinia be Rwot me jo yi, Rubanga me jo me Isirael owaco be, “Ango ayaro mino kope na dedede kame awaco i kom bomba noni cobere. Ango abino timo gikarac i kome, likame gikame ber doko gi nogo bino timere di in itie.

¹⁷Do ango abino gwoki i ceng nono, di likame oko bino mini i cing jo kame in itie lworo nogo.

¹⁸Ango ateteni abino gwoki di likame oko bino neki. Kuo nin bino bwot pien in iketo gen nin buta. Ango Rwot en awaco.”

Yeremia 40

Yeremia Odonyo bedo kede Gedalia

¹Rwot oko yamo keda ingei Nebusaradan ngatel me isirikalen gonya. Oudo kotera Rama di kotwea kede irikoi, ango karacel kede jo icegun dedede me Yerusalem kede Yuda, kame oudo jo me Babilon tie tero Babilon bala mabus.

²Nebusaradan oko tera tenge di eko waco na be, “Rwot Rubanga ni oudo omio ikwenyar be can noni bino poto i bomba noni,

³doko nataman en etieko timo gikame oudo ewaco be ebino timo. En etimo manoni pien wun itimunu dub bute di ikounu dagi lubo kop mere.

⁴Neningo, nataman ango atieko gonyo eriko ki cingi. Ka imito ot keda Babilon, bia ooti, di ango ako bino gwoki kiber. Do ka likame imito, kur ibin. Neningo, in itwero yero karamoroni kenekene kame cunyi mito i lobo noni di in iko ot iye.”

⁵Di pwodi likame adwoko kop moro, Nebusaradan oko medo waco be, “Dok but Gedalia wot ka Akikam akwar Sapan, ngat kame abaka me Babilon oketo pi bedo ngapug me bomban me Yuda, di in iko bedo kede en i dier jo, arabo in iromo ot



karamoroni kenekene kame in ineno be poore ni.” Di do en eko mina giamia moro kede cam mogo, di eko weka aoto.

⁶Ango ako ot Misipa bedo kede Gedalia, di ako donyo bedo i dier jo kame bin oko dong i lobo nono.

Gedalia Ngapug me Yuda

(2 Abakai 25.22-24)

⁷Jotel mogo me isirikalen me Yuda kede isirikalen gi oudo likame orieo cing gi. Gin kiko winyo be abaka me Babilon oudo otieko keto Gedalia pi bedo ngapug me lobo me Yuda, kede da be oudo kotieko mino i cinge cuo, mon, kede idwe, kede jo kame can odio adikinice, gin jo kalikame oudo kotero gi Babilon bala mabus.

⁸Aso, Isimael wot ka Netania, Yokanan wot ka Karea, Seraya wot ka Tanumet, awobe ka Epai dano me Netopa, kede Yesania dano me Maka, gin karacel kede isirikalen gi kiko ot but Gedalia Misipa.

⁹Gedalia oko kwongere but gi karacel kede but isirikalen gi di ewaco negi be, “Kur ibedunu kede lwooro moro pi rieno cing wu but jo me Babilon. Bedunu i lobo noni di ikounu timo tic ne abaka me Babilon, di gi dedede ko bino bedo ne wu kiber.

¹⁰Ango kikoma abino bedo Misipa pi cungo ne wu kame jo me Babilon obino but wa kan. Do wun ikarununu koko cam ki poti di ikounu keto bwini, anyakini me kare me iporo kede mo me olibeti i jamini me kano gi, di wun ikounu bedo i bomban kame wun itiekunu lunyo.”

¹¹Kamanono da, jo me Isirael dedede kame oudo tie Moab, Amon, Edom, kede i lobere ace, oko winyo be abaka me Babilon oudo oweko jo mogo me Isirael odong bedo Yuda kede da be oudo etieko keto Gedalia pi bedo ngapug gi.

¹²Manono oko mino gin dedede kiko yai ki kabedere kame oudo osasaro gi iye di kiko dok Yuda but Gedalia i Misipa. Gin kiko koko bwini kede anyakini me kare me iporo di tot twatwal.

Koneko Gedalia

(2 Abakai 25.25-26)

¹³Aso, Yokanan wot ka Karea karacel kede jotel me isirikalen dedede kalikame oudo orieo cing gi oko ot Misipa but Gedalia

¹⁴di gin kiko waco ne be, “Benyo, in ingeo be Balis abaka me jo Amon otieko cwano Isimael wot ka Netania pi neki?” Do Gedalia likame oko yei kede kop gin nono.

¹⁵Di do Yokanan oko yamo kede Gedalia i mung be, “Ango akwai iyei nango ot neko Isimael, di likame tie dano moro ace kame ko bino ngeno ngat koneke. Pinyo kame mio poore en eneki? Pien manono bino mino jo me Yuda kame nataman ocokere buti nogi sarun, di jo anonok kame odong nogi ko tiek.”

¹⁶Do Gedalia oko waco ne be, “Kur itim gikame cal kamano, pien in itie yamo kop me angalo i kom Isimael.”



Yeremia 41

- ¹ Kikano i mwaka nono i duwe me kanyaare, Isimael wot ka Netania, akwar Elisama, dano me i ot ka abaka, en bin ngat acel kikom jodongo me tic ka Abaka, oko ot Misipa but Gedalia kede cuo tomon. Di bin gin dedede oudo kitie cam karacel,
- ² Isimael karacel kede cuo tomon kame oudo tie kede en oko lepun yai malo di gin kiko neko Gedalia kede ipimai gi, pien abaka me Babilon oudo okete pi bedo ngapug me lobo me Yuda.
- ³ Isimael oko neko da jo me Isirael dedede kame oudo tie Misipa kede Gedalia, kiton isirikalen me Babilon da kame oudo tie kunono.
- ⁴ I ceng kame lubo mere, di pwodi ngatamoro likame oudo onge be koneko Gedalia,
- ⁵ cuo ot kanyauni oko tuno di kiwok ki Sekem, Silo, kede Samaria. Gin oudo kilielo yer me tik gi, kinyinyilo igoen me kom gi, kede kiteteo kom gi pi nyuto be kitie iturur. Gin oudo kikelo giayala me alos kede odok angwe kur pi yalo i tempulo ka Rwot.
- ⁶ Isimael oko yai ki Misipa pi ot riamo kede gi. En oudo eoto di ekok. Kakame en eko riamo kede gin, eko waco negi be, “Bia inenunu Gedalia.”
- ⁷ Cucuto di gin kitieko tuno i dier bomba, Isimael kede cuo kame en oudo etie kede oko neko gi di kiko uco kom gi i bur me pii.
- ⁸ Do tie oudo cuo tomon kikom gi kame oudo owaco ne Isimael be, “Okwai kur inek wa! Wan otie kede engano, mawele, mo me olibeti kede mokic kame okano obar. Manono oko mino en likame eko neko gin.”
- ⁹ Bur me pii kame Isimael oudo ouco iye kom cuo kame en eneko nogo oudo lac twatwal. Manono en bur me pii kame bin Abaka Asa okunyo i kare kame Abaka Basa me Isirael osuro gi kede, tetekeny jo bed tie kede pii. Isimael oko pongo bur me pii nono kede kom jo kame en oudo eneko.
- ¹⁰ Di do en eko mako jo apat dedede kame bin tie Misipa di eko tero gi bala mabus, anyira ka abaka kede jo dedede kame bin koweko odong Misipa, jo kame Nebusaradan ngadwong me isirikalen bin omio i cing Gedalia. Isimael bin omako gi bala mabus di eko tero gi eoto kede gi tetu adul me jo Amon.
- ¹¹ Kakame Yokanan wot ka Karea karacel kede jotel me isirikalen kame bin tie kede en oko winyo kede gikarac kame Isimael oudo otimo,
- ¹² gin kiko tero isirikalen gi dedede di kiko ot pi yi kede Isimael. Gin bin kiko ude i nget atapar adwong me pii kame bin tie Gibeon.
- ¹³ Kakame jo dedede kame Isimael oudo omako bala mabus oneno kede Yokanan karacel kede jotel me isirikalen kame bin tie kede en, cuny gi oko doko yom.
- ¹⁴ Di gin dedede kiko lokere cen, di kiko ringo but Yokanan.
- ¹⁵ Do Isimael karacel kede cuo kanyauni kame bin en etie kede oko lwi di kiko ot i lobo me jo Amon.



¹⁶Di do Yokanan karacel kede jotel me isirikalen kame bin tie kede en oko donyo gwoko jo kame bin Isimael omako di eko tero ki Misipa bala mabus ingei en neko Gedalia. Jo nogo oudo obedo isirikalen, mon, idwe kede jotic me paco me abaka.

¹⁷Aso, gin kiko yai ot. Di gin bin kitie i yongayo me ot, kiko kong bedo Gerut Kimkam kabedo kame oudo iyapiyapi kede Betelem, di oudo tam gin tie pi ot Misiri

¹⁸pi lworu jo me Babilon, pien Isimael oudo oneko Gedalia, ngat kame abaka me Babilon oudo oketo pi bedo ngapug me lobo me Yuda.

Yeremia 42

Jo Okwao Yeremia pi Lego negi

¹Di do jotel dedede me isirikalen, karacel kede Yokanan wot ka Karea kede Asaria wot ka Kosaya, oko bino kede jo me ruom dedede buta,

²di gin kiko waco na be, “Wan okwai itim ber iwiny kwac wa, di iko lego but Rwot Rubanga ni pirwa, wan jo kame do odong nogi. Pien wan bin otot, do odong do nonok bala kame ida nataman ineno.

³Kwai Rwot Rubanga ni wek enyut ne wa kakame wan opoore ot iye kede gikame poore otimi.”

⁴Ango ako dwoko negi be, “Manono ber. Ango ayaro lego but Rwot Rubanga wu bala kame wun ikwaunu, doko kope dedede kame Rwot bino dwoko ango abino waco ne wu; likame tie kop moro kame ango abino mungo ne wu.”

⁵Gida kiko waco na be, “Wan okwao Rwot pi en bedo mujura me ateni kede kame genere kame bino pido wa ka wan likame oko lubo timo gi dedede kame Rwot Rubanga nin omi pi waco ne wa.

⁶Akadi di en kop aber arabo arac, wan obino lubo kop kame Rwot Rubanga wa waco, en ngat kame wan otie kwani pi lego bute. Wan obino timo kamanono pien wan onge be gi dedede bino bedo ne wa kiber ka wan olubo kop mere.”

Rwot Odwoko Ilega ka Yeremia

⁷I ngei ceng tomon Rwot oko yamo keda.

⁸Di do ango ako lwongo karacel Yokanan kede jotel me isirikalen dedede kame bin tie kede en, kede jo me ruom dedede,

⁹di ako waco negi be, “Rwot, Rubanga me Isirael, ngat kame wun ioranu bute pi tero kwac wu bute waco be,

¹⁰’ Ka kenekene wun iyeunu dong bedo i lobo noni, ango abino gero wu ikounu cungo di itekunu doko likame abino rereto wu piny; abino pito wu bala yat, di likame ako puputo wu; pien atie kede cwercury pi can kame ango atieko kelo i komu.

¹¹Kur ibedunu kede lworu moro bobo i kom abaka me Babilon, piento ango atie kede wu pi lako wu ki cinge.



¹²Ango abino timo wu kisa, di eda eko bino bedo kede kisa i komu di eko weko wu idokunu i lobo me turu. Ango Rwot, atieko waco.’

¹³” Do ka wun imeedenu waco be, ‘Wan likame obino dong bedo i lobo noni, ‘manono udo itiekunu dagi lubo kop ka Rwot Rubanga wu,

¹⁴kede ka wun iwacunu be, ‘Li ba, wan girwa obino ot bedo Misiri, kakame wan likame obino neno iye can me yi arabo winyo iye agwara me yi amoto kanyo kec iye,

¹⁵ka wun iwacunu kamano, winyunu do kop kame Rwot tie waco ne wu, Okwe wun donge me jo me Yuda. Rwot me jo yi, Rubanga me jo me Isirael waco be, ‘Ka wun iketunu cuny pi ot bedo Misiri,

¹⁶yi kame itienu lworu nono bino udo wu kunono, kede kec da kame itienu lworu nono bino lubo wu Misiri, di ikounu to kunono.

¹⁷Jo dedede kame otieko keto cuny gi pi ot bedo Misiri bino to, arabo i yi, amoto kec en kame bino neko gi arabo tuwo. Likame tie dano moro kikom gi kame bino dong kuo. Akadi dano moro acel kikom gi likame bino bwot ki can kame ango atie kelo i kom gi.’

¹⁸” Rwot me jo yi, Rubanga me jo me Isirael waco be, ‘Kite kame bin aketo kede lilo na kede gero na i kom jo me Yerusalem, kamanono da abino bedo kede gero i komu ka iotunu Misiri. Jo bino tic kede nyingu me ilam, ibinunu doko gikame jo neno di ko mino gi lworu, kede kame jo nyero kede acae. Likame bobo ibinunu neno kabedo noni atwal.’ “

¹⁹Ango ako meede kede yamo be, “Okwe, wun jo odong me Yuda, Rwot otieko waco ne wun be kur iotunu Misiri. Mito ingeunu be ango atieko tin kwenyaro wu

²⁰be wun itiekunu timo gikarac akelo to. Pien wun kikomu ioranu but Rwot Rubanga wu di iwacunu be, ‘Leg pirwa but Rwot Rubanga wa, iko waco ne wa kope dedede kame en ebino waco, di wan oko bino timo kamanono.’

²¹Aso, nataman ango atieko waco ne wu kope mege, do wun ikounu dagi lubo kope dedede kame en eora pi waco ne wu.

²²Pi mano, poore ingeunu be, ibinunu to i yi, arabo to kec, amoto tuwo, i kabedo kame itienu mito ot bedo iye nono.”

Yeremia 43

Kotero Yeremia Misiri

¹Kakame ango atieko waco ne kede jo kope dedede kame Rwot Rubanga gi oudo oora kede but gi,

²Asaria wot ka Kosaya kede Yokanan wot ka Karea karacel kede jo icegun dedede kame joepali oko waco na be, “In itie waco kop me abe. Rwot Rubanga wa oudo likame oori pi waco ne wan be kur ooti bedo Misiri.



³Baruk wot ka Neria en kame tie supi i kom wa, be tetekeny in imi wa i cing jo me Babilon di gin kiko neko wa, arabo kiko tero wa Babilon bala mabus.”

⁴Aso, Yokanan kede jotel dedede me isirikalen karacel kede jo dedede likame oko lubo kop kame Rwot oudo owaco negi pi dong i lobo me Yuda.

⁵Di do Yokanan kede jotel dedede me isirikalen oko tero jo Misiri, kitero jo dedede me Yuda kame oudo oko dong, jo kame bin oko dok bedo i lobo me Yuda kakame bin kidwogo kede ki lobere dedede kame oudo kosasaro gi iye:

⁶cuo, mon, idwe, kede anyira ka abaka. Gin kitero jo dedede kame oudo Nebusaradan ngadwong me isirikalen oudo oweko i cing Gedalia, ribo kiton Baruk kede ada.

⁷Gin kidagi lubo kop kame Rwot oudo owaco di kiko ot Misiri. Gin kioto kabedo kame kolwongo be Tapankes.

⁸Di do Rwot oko waco na be,

⁹” Kwany kide mogo adongodongo iko mako i cingi di iko ot yiko gi i dud simit me yongayo kame kodonyo kede i paco ka Parao i Tapankes. Tim kamanono di jo me Yuda tie neni,

¹⁰di iko waco negi be Rwot me jo yi, Rubanga me jo me Isirael waco be, ‘Ango ayaro cwano jo oto omo ngatic na Abaka Nebukadunesa me Babilon, di en eko bino cibo kom mere me ajakanut i wi kide kame ango ayiko nogi, di eko yararo eema mere kame epugo kiye i wi gi.

¹¹En eyaro bino di eko suro lobo me Misiri eko bwono, eko mino jo kame kotieko iiko negi be kibino to tuwo, ko bino to tuwo, jo kame kotieko iiko negi be kobino mako gi di oko tero gi bala mabus, di gin oko bino mako gi koterog gi bala mabus da, kede jo kame kotieko iiko negi be kobino neko gi i yi, di oko bino neko gida i yi.

¹²Ango abino cwinyo mac i tempulo me rubangan me Misiri, di abaka me Babilon ko bino wango rubangan gi nogo arabo ekwanyo gi eko tero gi. En ebino depo jamini me Misiri pitipit bala kame jokwai romini depo kede onyogo ki igoen gi, di en gire eko yai eoto abongo gimoro kame kotimo ne.

¹³En ebino mumuko kide kame kosisipo me awora kame tie Keliopolis i lobo me Misiri, di eko wango tempulon me rubangan me Misiri.’ “

Yeremia 44

Kop ka Rwot but Jo me Isirael i Misiri

¹Rwot oko waco na kop kame mako jo me Yuda dedede kame oudo tie bedo Misiri i bomban me Migidol, Tapankes, kede Mempi, kede i lobo me Paturos.

²Rwot me jo yi, Rubanga me jo me Isirael owaco be, “Wun kikomu itiekunu neno can kame ango akelo i kom Yerusalem karacel kede bomban dedede me Yuda. Nenunu kite kame kitie kede; nataman gin kitie amejeko, abongo dano moro kame bedo i yi gi,



³Pi gikareco kame jo kame oudo bedo i yi gi otimo di gin kiko wango cunya. Gin oudo kimio giayala gi but rubangan apat di kiko timo tic ne rubangan kame gin arabo wun amoto joakwari wu likame oworo akadi acel.

⁴Aso di ango abedo ooro inabin jotic na but gi pi ngangao gi wek kur kitim gi me kwer kame ango cunya dagi.

⁵Do gin kiko dagi winyo arabo lubo timo kop kame gin kiwaco negi. Gin likame kiko yei weko tim gi areco me mino giayala but rubangan apat.

⁶Manono oko mina abwoto lilo na kede gero na i kom bomban me Yuda kede i dier yote me Yerusalem, di eko liel i kom gi bala mac. Gin nataman do kidong amejeke abongo jo, bala kame etie kede tuno tin.

⁷” Pi mano, ango Rwot Rubanga me jo yi, Rubanga me Isirael atie penyo wu pinyo komio wun itienu timo gikarac kamano i komu kenu? Benyo, imitunu kelo to ne cuo kede mon, idwe kede imukerun, tetekeny ngatamoro kur dong kuo kikom wu?

⁸Pinyo kame mio wun iwanganu cunya i yore me woro gikame cingu ocweo, di imiunu giayala but rubangan apat i lobo me Misiri kakame itienu bedo iye? Benyo, imitunu muducar di ikounu doko jo kame atekerin dedede me wi lobo tio kede nying gi me lamo jo, kede kame konyero kede acae?

⁹Benyo, wi wu otieko wil kede gikareco kame joakwari wu bin otimo, karacel kede me abakai me Yuda kede mon gi, kede gikareco wuda kede mon wu, gikareco kame bin kotimo i lobo me Yuda kede i yote me Yerusalem.

¹⁰Tuno tin wun likame pwodi inyutunu iswilar moro arabo lworu, doko likame ilubunu iswilia na kede pwony na kame oudo amio wu karacel kede joakwari wu.

¹¹” Pi mano, ango Rwot me jo yi, Rubanga me Isirael atieko moko tam na pi kelo can i komu di ako muducaro Yuda dedede atwal.

¹²Ango abino neno be komuducaro jo dedede kodong me Yuda, jo kotieko keto cuny gi pi ot bedo i lobo me Misiri. Gin dedede kibino to i Misiri, jo me ruom amalokede ruom apiny, kibino to i yi arabo kito kec. Gin kibino doko jo kame kotio kede nying gi me lamo jo, gikame neno mio jo lworu, kede jo kame jo nyero kede acae.

¹³Ango abino mino jo kame bedo i lobo me Misiri alola bala kame bin atimo ne Yerusalem. Abino mino gi alola me yi, kec kede tuwo.

¹⁴Likame tie dano moro me Yuda odong, kame oko ot bedo Misiri, kame bino bwot arabo dong kuo. Likame tie dano moro kikom gi kame bino dwogo Yuda, bed bala cuny gi paro pi gin dwogo bedo iye. Likame gin kibino dwogo Yuda, kwanyo kenekene jo oudo oringo kunono pi ringo ayela.”

¹⁵Di do cuo dedede kame oudo ngeo be mon gi lem tie mino giayala but rubangan apat, karacel kede mon dedede kame oudo tie cungo kunono, kiton jo me Isirael kame oudo bedo Paturos i Misiri kunono, twon ekodet me jo, gin dedede kiko waco na be,

¹⁶” Kop kame in iwaco ne wan i nying Rwot nono, wan likame omito lubo.



¹⁷Wan obino timo gi dedede kame wan otieko kwongere iye. Wan obino mino giayala but abaka adako me i malo doko obino onyo ne giayala amata bala kame wan kede joakwari wa, abakai wa kede jotel wa, bin otimo i bomban me Yuda kede i yote me Yerusalem. I kare nono bin wan obedo tie kede cam kame tot, di olony doko oudo peko moro likame mako wa.

¹⁸Do cako i kare kame wan oweko kede mino giayala but abaka adako me i malo, di oko weko da onyo ne giayala amata, wan oko bedo li kede gi dedede, doko oko donyo neko wa i yi, kede oko donyo to kec da.”

¹⁹Di mon oko medo be, “Ateteni wan obino meede mino giayala but rubanga kobedo abaka adako me i malo, kede onyo ne giayala amata da. Benyo, in iparo be wan otedo mugati kame otimo cal mere iye, kede onyo ne giayala amata abongo cwog wa yei ne wa?”

²⁰Di do ango ako waco ne jo dedede, cuo kede mon, gin jo koudo ogamo doge iepone noni be,

²¹” Giayala kame wun oudo imiunu i bomban me Yuda kede i yote me Yerusalem, wun kede joakwari wu, abakai wu kede jotel wu, karacel kede jo dedede me lobo nono, iparunu be Rwot oudo likame ngeo arabo iparunu be wie oudo owil kede gi?

²²Rwot likame oudo twero meede kanyakino tim wu areco nogo, gi me kwere kame wun oudo itimunu. Manono en komio tuno tin lobo wu tie ameje abongo dano moro kame bedo iye. Etieko doko gikame do jo tio kede nyinge me ilam.

²³Can noni opoto i komu, bala kame etie kede tuno tin, pien wun oudo imiunu giayala awanga but rubangan apat, di ikounu timo dub but Rwot, doko idagunu lubo kop mere arabo timo gikame iswil, pwony kede cik mere mito.”

²⁴Ango ako waco kop but jo dedede, do twatwal mere but mon. Ango awaco negi be, “Winyunu kop kame Rwot owaco, wun jo me Yuda dedede kame itienu i lobo me Misiri.

²⁵Rwot me jo yi Rubanga me jo me Isirael owaco be wun kede mon wu itiekunu cobo timo gikame oudo iwacunu kede dogu be, ‘Wan otieko moko tam wa pi cobo timo gikame oudo okwongere iye, en me mino giayala but rubanga adako me i malo kede onyo ne giayala amata.’ Manono ber, wun gwokunu kwongere wu kiber doko mienu giayala wu amata!

²⁶Pi mano, winyunu kop kame Rwot tie waco, wun jo me Yuda dedede kame itienu bedo i lobo me Misiri. En ewaco be, ‘Nenunu ango atieko kwongere i nyinga adwong be, likame tie dano moro me Yuda kame tie bedo Misiri kame bino bobo kwongere di elwongo nyinga.

²⁷Ango ayaro ciko wanga i kom gi pi timo negi can do likame pi bero. Jo dedede me Yuda kame nataman tie bedo i lobo me Misiri bino to i yi arabo to kec, tuno gin tiek pitipit.



²⁸Do jo anonok kikom wu bino bwot likame koneko gi di gin kiko bino yai ki lobo me Misiri kiko dok i lobo me Yuda. Di do jo kame bino dong kuo nogo ko bino ngeno kop ka ngai en kame oko cobere, mera amoto mergi.

²⁹Ango Rwot abino mino wu gianena kame bino nyuto ne wu be ango ayaro mino wu alola i kabedo noni, tetekeny wun ingeunu be kope kame ango awaco i komu ateteni bino timere.

³⁰Ango abino mino Abaka Kopura me Misiri i cing jokwor mege kame mano neke, bala kame oudo amio kede Abaka Esedekia me Yuda i cing Abaka Nebukadunesa me Babilon, ngakwor mere kame oudo mano neke.’ “

Yeremia 45

Cikere ka Rwot but Baruk

¹Mwaka me ongwon me apugan ka Yekoyakim wot ka Yosia bala abaka me Yuda, en kame Baruk wot ka Neria owandiko kede i yi itabu adola kope nogi kame oudo ango awaco di en ewandiko. Ango oudo owaco ne Baruk be

²Rwot Rubanga me jo me Isirael owaco be,

³” Baruk, in itie waco be, ‘Ango atie i can twatwal! Rwot otieko medo cwercury i wi peko na; cur otieko oola, ali kede kare me wei akadi katitidi.’

⁴” Do ango Rwot abino tuturo gikame atieko gero, doko abino puputo gikame atieko pito. Ango abino timo manoni ne lobo lung.

⁵Benyo, in itie mito be par pirin kalamo? Kur itim kamanono; pien ango ayaro kelo can i kom jo dedede, do ango abino gwoko kuo nin i kabedere dedede kame in ioto iye. Ango Rwot en awaco.”

Yeremia 46

Kobwono Jo me Misiri i Karukemis

¹Man en kop kame Rwot owaco na i kom atekerin icegun.

²I kom Misiri, en ewaco kop kame mako isirikalen ka Parao Neko, abaka me Misiri, kame bin Abaka Nebukadunesa me Babilon obwono i bomba me Karekemis kame oudo tie i nget ecilet me Eupurate, i mwaka me ongwon me apugan ka Yekoyakim bala abaka me Yuda. En ewaco be,

³” Jotel me isirikalen me Misiri tie lelemo be, ‘ Iikunu ibukui wu di ikounu yai ot yi!

⁴Tweunu ne asigiran dele me kodo cabalan, di ikounu yito i yi gi! Ngapunu icoron wu atek di ikounu teere pi yi! Penunu tongini wu! Ngapunu ikotin wu kame kotimo kede lilime pi gwoko komu! ’ ”

⁵Rwot penyere be, “Nyo ine kame ango atie neno noni? Gin kitie lokere dok cen kede lworu adwong. Kotieko bwono jo yi gin atek; lworu obwono gi omio kitie ringo tenge kede teko abongo ngoloro cen.



⁶Jo kame dwir kikom gin likame karuno lanyo, akadi jo atek i yi da likame karuno bwot. I bad tetu malo, i nget ecilet me Eupurate, gin kitie gegetun di kipopoto.

⁷Ngai ine kame tie tingere bala pii me ecilet me Nail, ngat kame tie tingere bala ecilet kame pii mere opong olamar ooko?

⁸Misiri inonono kame tie tingere bala pii me ecilet me Nail, en etie tingere bala ecilet kame pii mere opong olamar ooko. En ewaco be, ‘Ango abino tingere di ako umo lobo lung; ango abino muducaro bomban kede jo kame bedo i bomban nogo.

⁹Miunu asigiran cak ot, di cabalan ko lor ringo kede teko! Jo atek i yi poore ot anyim: cuo me Abisinia kede Libiya kame tie mako ibukui, kede cuo me Lidia kame tie kede diru i gweno emal.’ “

¹⁰Ceng noni obedo ceng ka Rwot Rubanga me jo yi, ceng me timo onyanga i kom jokwor mege. Epima mere bino camo gi tuno tieko gi pitipit, di eko pwokere kede remo gi. Pien Rwot Rubanga me jo yi tie mino giayala mere i lobo kame tie i bad tetu malo, i nget ecilet me Eupurate.

¹¹Wun jo me Misiri, otunu Gilead imounu yat me amuket ki kuno! Wun itiekunu tic kede yen me amuket atot do likame kikonyo wu; Likame tie gimoro kame karuno cango wu.

¹²Atekerin otieko winyo kop me lewic kame wun itienu kede; koko wu oromo lobo lung. Isirikalen wu twomere ken gi ken gi, di gin dedede kiko poto piny karacel.

Nebukadunesa Osuero Misiri

¹³Man en kop kame Rwot owaco na i kom bino me Abaka Nebukadunesa me Babilon pi suro lobo me Misiri. En ewaco be,

¹⁴” Tatamo kop noni i bomban me Misiri, Migidol, Mempi, kede Tapankes be, ‘Iikerenu yi pi gwoko kuo wu, pien yi bino mino komuducaro gi dedede kame itienu kede!

¹⁵Pinyo bo komio Apis rubanga wu oringo tenge? Pinyo komio twon wu likame okaruno cungo? Manono otimere pien ango Rwot areto gin piny! ‘

¹⁶Isirikalen wun otieko twotwomun di gin kiko popoto; ngat acelacel waco ne ngat ocelu be, ‘Susunyo yai! Mito odok paco but jo me tur wa i lobo kame konywalo wa iye, di oko bwot ki epima me jokwor! ‘

¹⁷” Miunu Parao abaka me Misiri nying kame kolwongo be, ‘Ngawoo Kokei Winyo mere’ .

¹⁸Ango Rwot me jo yi, ango en abaka. Ango en Rubanga akuo. Ngat kame tie bino suro wu teko mere kalamo me jo icegun dedede, bala kame moru me Tabor wie bor kede malo kalamo mori icegun, arabo bala kame moru me Kamel cungo kede bor malo kalamo nam adwong.



¹⁹Wun jo me Misiri, tweunu yec wu di ikounu bedo di iikerenu me ot bedo obukui bala mabus! Pien kobino mino bomba me Mempri dong nono, ebino doko ameje kame dano moro likame bedo iye.

²⁰Misiri cal bala atakit aber, kame lwangini kowok ki tetu malo akakao dok otieko kakao.

²¹Isirikalen kame en epango pi konye, kame en egwoko kiber bala roce kame kotie mino cwe; gida kitieko lokere di kiko ringo tenge dedede. Likame kicungo yi, pien ceng me keto can i kom gin otieko tuno, en kare me mino gi alola.

²²Misiri tie ringo tenge di enguroro bala twol; pien jokwor mege obino di kitek adikinicel. Gin kibino i kome pi sure di kimako lee, bala jo kame tie tongo yen.

²³Gin kibino tongo abum mere, bed bala abum nono oduko kitek. Manono bino timere pien gin kitot kalamo obonyo; wel gin likame marere.

²⁴Kobino mino lewic mako jo me Misiri; kobino mino gin i cing jo me bad tetu malo. Ango Rwot en awaco.”

²⁵Rwot me jo yi, Rubanga me jo me Isirael waco be, “Neningo, ango ayaro mino Amon, rubanga me bomba me Tebes alola, en kede Misiri kede rubangan mege kede abakai mege. Ango abino kwanyo abaka me Misiri kede jo dedede kame keto gen gi i kome

²⁶di ako mino gi i cing Abaka Nebukadunesa me Babilon kede jotel me isirikalen mege, gin jo kame mito neko gi. Do i cen mere jo bobo bino donyo bedo Misiri bala bin i kare kasek. Ango Rwot en awaco.”

Rwot bino Lako Jo mege

²⁷ Rwot waco be, “Do wun jotie na ikwae ka Yakobo, kur ibedunu kede lwooro moro; doko kur cuny wu poti, Okwe wun jo me Isirael. Ango ayaro lako wun ki lobo kame tie kakabor nono, ango ayaro lako ikwae wu ki lobo kame gin kitie iye bala mabus. Wun ibinunu dwogo paco di ikounu bedo mot kede mulem, doko likame tie ngatamoro kame bino mino wu lwooro.

²⁸Kur ibedunu kede lwooro moro, wun jotie na ikwae ka Yakobo, pien ango atie kede wu. Ango abino muducaro atekerin dedede kame ango اساسaro wu i diere gi, do ango likame abino muducaro wun. Ango abino mino wu alola kame poore kede wu, likame abino weko wu aweka abongo mino wu alola moro.”

Yeremia 47

Kop kame Rwot Owaco i kom Pilistia

¹ Man en kop kame Rwot owaco na i kom Pilistia di pwodi Parao likame osuro Gasa.

²En ewaco be, “Neningo, jokwor tie cokere i bad tetu malo bala pii me ecilet kame tingere gin kibino dipere bino bala pii atos amol; gin kibino romo lobo me Pilistia



lung kiton jamini dedede kame tie iye, bomban kede jo kame bedo i bomban nogo. Jo bino kok pi mito be kony gi; jo dedede kame bedo i lobo nono bino kok kitek

³ka gin kiwinyo mor me tien asigiran, mor me cabalan, karacel kede kukukuku me tien gi. Jonywal likame bino lokere dok cen ot konyo idwe gi; bad gi bino lolojun.

⁴Pien udo ceng me muducaro jo me Pilistia otieko tuno, ceng me tieko jo dedede kame pwodi odong, jo kame konyo Taya kede Sidon. Pien ango Rwot atie muducaro jo me Pilistia, jo kame oudo obino ki dog nam me Kurete.

⁵Jo me Gasa otieko lielo wi gi pi nyuto cweruny gi, jo me Asikelon oling titi. Okwe wun jo me Pilistia apwodi odong, ibinunu bedo teteo komu pi nyuto cweruny tuno awene?

⁶Wun ikokunu be, ‘Okwe epima ka Rwot! Iyaro tero kare kame rom amene en amio iko do ling? Dok i ekularu ni, bed mot di iko wei! ‘

⁷Do benyo benyo kame en eromo wei kede, di ango atieko mine cik? Ango atieko mine cik me suro bomba me Asikelon kede jo kame bedo i dog nam.”

Yeremia 48

Jokwor bino Muducaro Lobo me Moab

¹ Man en kop kame Rwot me jo yi, Rubanga me jo me Isirael owaco i kom lobo me Moab: “Itienu i can wun jo me Nebo, pien kotieko muducaro bomba wu! Kotieko mino lewic omako jo me bomba me Kiriataim, kotieko mane da; kotieko reto apama atek koluke piny di oko mino lewic omako jo mege;

²pak kame lem opako kede Moab ojik do. Jokwor poro kop i Kesibon pi timo ne Moab gikarac. Gin kiwaco be, ‘Bia ootunu omiunu ateker me jo Moab jiki ki wi lobo! ‘ Ida, bomba me Madumen, kobino mini iling titi; jokwor oyaro bino ni.

³Winy koko kame wok ki Koronaim, ‘ Piny odong nono! Jo oto otiek! ‘

⁴” Kotieko muducaro Moab; idwe mege tie koko.

⁵Gin kioto malo i bomba me Lukit, kioto di kikok; i yongayo kame lor Koronaim koko atek pi can kotimere tie winyere.

⁶Gin kiwaco be, ‘Ringunu tenge pi lako kuo wu! Ringunu bala punda me obar abedo i wi tim! ‘

⁷” Moab, in oudo iketo gen nin i kom teko ni kede abar ni, do nataman oyaro maki di oko teri bala mabus; Kemos rubanga wu kobino tero i piny apat, en karacel kede josaserdoti mege kede jotic mege.

⁸Ngadudubo bino ot i bomban dedede, likame tie bomba moro akadi acel kame bino bwot. En ebino dudubo aditoto, kede ebar da en ebino dudubo. Ango Rwot en awaco.



⁹Cib engaro anyuto wi ailet i lobo me Moab, piento kobino muducaro en; bomban mege bino dong nono, abongo jo kame bedo i yi gi.”

¹⁰(Ilam mak dano kalikame timo tic ka Rwot kede cunye lung! Doko ilam mak dano kame dagi timo nek kede epima mere.)

Komoducaro Bomban me Moab

¹¹Rwot waco be, “Moab lem tie bedo mot cako sek, doko en pwodi likame kotere i piny apat bala mabus. Moab cal bala bwini kame oweko obedo mot abongo gimoro lole, doko likame kobedo lokoloko en i cupan. Likame kodudubo mito mere, doko ngwece mere likame olokere.

¹²” Pi manono, ateteni kare tie bino kame ango abino cwano ne kede jo kame bino onye bala bwini. Gin kibino weko cupan mege dong nono di kiko neneko gi.

¹³Di do cunye jo Moab ko bino kwanyere ki kom Kemos rubanga gi, bala kame bin cunye jo me Isirael okwanyere kede ki kom Betel, kabedo kame gin oudo kiketo gen gi i kome.” Rwot waco be,

¹⁴” Wun cuo me Moab, benyo benyo kame wun iwacunu kede be wun ibedunu jo me aura, jo kame tek i yi?

¹⁵Kotieko muducaro Moab kede bomban mege dedede, doko awobe mege abeco twatwal kotieko neko. Ango abaka Rwot me jo yi en awaco.

¹⁶Can kame tie bino poto i kom jo Moab otieko doko iyapiyapi; kare me muducaro en tie tuno awakawaka.

¹⁷” Kokenu, wun dedede jokio mere, wun jo dedede kame ingeunu en kiber. Wacunu be, ‘Kotieko bwono apugan mere; deyo mere kede teko mere otiek.’

¹⁸Wun jo kame ibedunu i bomba me Dibon, wokunu piny ki kabedo me wor, di ikounu bedo piny i apua. Pien ngadudubo Moab otieko bino ne wu; en etieko tuturo apama wu atek me cel.

¹⁹Wun jo kame ibedunu i bomba me Aroer, cungunu i nget yongayo di ikounu daro; penyunu cuo kede mon kame tie lwi ringo, penyunu gin gikame otimere.

²⁰Gin kibino waco ne wu be, ‘Kotieko mino Moab lewic, kokunu pire! Tatamunu kop noni i nget ecilet me Arunon be kotieko muducaro Moab! ‘

²¹” Ngolo kop otieko tuno i bomban kame tie i lobo kopetere bala emesa, gin en bomban me Kolon, Yasa, Mepat,

²²Dibon, Nebo, Bet Dibilataim,

²³Kiriataim, Betegamul, Betemeon,

²⁴Keriot, kede Bosira, bomban dedede me Moab, kame tie kakabor kede kakiyapi.

²⁵Kotieko teko me jo Moab, doko likame kikaruno yi. Ango Rwot en awaco.”



Rwot bino mino Moab Mwolere

²⁶Rwot waco be, “Mi Moab mer kede bwini, piento en etieko tingere na. Wek ebebelo i ngok mere di eko doko gi me anyera.

²⁷Moab, yutuno kong kite kame in oudo icao kede jo me Isirael! Bed bala gin likame oudo omako gi di kitie karacel kede jokuwo, in oudo iyayango wi kede acae ka itie yamo kop moro i kom gin.

²⁸” Wun jo kame ibedunu Moab, yaunu tenge ki bomban wu di ikounu ot bedo i wi lela. Bedunu bala awele kame gero ode i dog abo.

²⁹Moab wakere twatwal! Ango atieko winyo kop i kom ewaka me jo mege, tingere gi kede woo kame tie i cuny gi.

³⁰Ango Rwot angeo ewaka gi, do ewaka gi nono tie gi me nono. Likame tie gikame ewaka gi nono bino timo.

³¹Pi mano, angok akok pi jo dedede kame tie Moab kede pi jo me Kir Keres.

³²Ango abino kok pi jo me Sibima kalamo kite kame oudo akok kede pi jo me Yaser. Bomba me Sibima, in ical bala olok kame jange mege boco ngolo loka tetuca me Nam Oto naka tuno Yaser. Do nataman ngadudubo otieko dudubo anyakini nin me iporo kiton olok.

³³Yomcuny kede kilel otieko doko li i lobo amio me Moab. Ango atieko mino jo ojiko timo bwini; likame tie ngatamoro kame bio olok di elelemo kede kilel. Ilem kame tie likame obedo me kilel.

³⁴” Jo me Kesibon kede Eleale tie koko kitek; kikok dwan gi winyere ki Yakas. Jo me Soar da tie winyo dwan gi nono, kiton jo me Koronaim kede Egelat Selisiya. Pien akadi pii me Nimirim da otieko tuo.

³⁵Ango abino mino jo me Moab jiko mino giayala awanga i kadedere gi me woro rubangan, kede kiko jiko mino giayala but rubangan gin. Ango Rwot en awaco.

³⁶” Pi mano, cunya cwer pi Moab kede pi jo me Kir Keres, bala dano kame tie kuto wer me koko me to kede bilo, pien gi dedede kame gin oudo kitie kede otieko doko li.

³⁷Jo dedede otieko lielo wi gi kede yer me tik gi. Gin dedede kitieko teteo cing gi, doko jo dedede tie ngapo ipukoi pi nyuto iturur gi.

³⁸Koko tie kadedere dedede me Moab, i wi ude kede kadedere dedede kame jo cokere iye iudo koko kenekene, pien angok atieko ngingido Moab bala agulu kalikame komito.

³⁹Okwe, tin kongingido en benyo! Winyunu koko mere! Lewic tin omake benyo! Moab otieko doko gi me anyera but jokio mege, kede gikame jo neno di lworok mako gi.”

Moab Likame bino Bwot



⁴⁰Rwot waco be, “Nenunu, jokwor bino ngeso ringini suro Moab bala ekokom kame ringini piny di eyaro bwome.

⁴¹Bomban mege kede kabedere kame kocelo kede apama atek kobino mako. I ceng nono cuny jo yi me Moab bino bedo kede lworu bala dako atie ramere me nywal.

⁴²Kobino muducaro Moab di likame bobo eko bedo ateker, piento en etingere na.

⁴³Okwe wun jo me Moab, gikame kelo lworu, bur kame ibinunu popoto iye, kede obek me mako wu tie kuro wu. Ango Rwot en awaco.

⁴⁴Ngat kame bino ringo tenge pi bwot ki gikame kelo lworu, bino potu i bur, doko ngat kame bino wok ki bur bino moko i obek. Ango abino mino gi nogi timere i kom Moab ka mwaka me mine alola otuno. Ango Rwot en awaco.

⁴⁵Jo aringo ayela kame ool teko gi otiek tamo pi mito gwokere Kesibon, bomba kame oudo Abaka Sikon pugo, do en etie liel, doko paco me abaka da tie wang. Mac otieko wango gi dedede, cako ki ikor tuno i wi moru me jo Moab, jo kame maro yi.

⁴⁶Itienu i can tin benyo, Okwe wun jo me Moab! Kotieko muducaro jo kame woro rubanga Kemos, di oko mako awobe kede anyira wu da koteru bala mabus.

⁴⁷” Do i kare me anyim angu abino dwoko mulem me Moab. Ango Rwot en awaco. Man en kop kame angulo i kom Moab.”

Yeremia 49

Kop kame Rwot Ongolo i kom Amon

¹ Man en kop kame Rwot owaco i kom lobo me Amon. En epenyere be, “Benyo, Isirael li kede awobe? Benyo, likame tie jo kodong kame karuno lunyo lobo gin? Pinyo komio gin kiweko jo kame woro rubanga Molek omao lobo me jo me ekeko ka Gad di kiko donyo bedo i bomban mege?

²Do kare tie bino kame angu abino mino kede jo kame bedo i bomba adwong me Raba winyo woo me jo kame tie bino sure, di oko bino dudubo bomba gi nono dong di en ameje, doko calere gi kobino wango dopodop. Di do jo me Isirael ko bino dwoko lobo gi kikut jo kame oudo omao gi. Ango Rwot en awaco.

³Okwe wun jo me Kesibon, kokunu pien kotieko muducaro Ai! Kokunu, wun mon me Raba! Ngapunu ipukoi di ikounu donyo iturur. Teteunu komu pi nyuto iturur, pien kobino tero rubanga wu Molek i lobo apat bala mabus, en karacel kede josaserdoti mege, kede jotie mege.

⁴Wun jo kalikame igenerenu, pinyo kara kame mio iwakerenu pi teko wu? Teko wu nono tie tiek. Wun iketunu gen wu i kom abar wu di iwacunu be likame tie ngatamoro kame bino suro wu.

⁵Ango ayaro mino ibedunu kede lworu i kom jokio wu dedede. Ngat acelacel kikom wu bino ringo kare kene, di likame tie ngatamoro kame ko bino bobo coko wu karacel.



6” Do i cen mere, ango bobo abino dwoko mulem me jo Amon. Ango Rwot en awaco.”

Kop kame Rwot Ongolo i kom Jo Edom

7 Rwot me jo yi penyere be, “Benyo, likame do tie dano moro kame riek i Edom? Benyo, jo kame mio gi tam likame tie do mino gi tam? Benyo, rieke gin do mam otiek?”

8Wun jo me Dedan, lokerenu cen di ikounu ringo! Pwonunu! Ango ayaro kelo can i kom ikwae ka Esau, pien kare me ango mino gin alola otieko tuno.

9Benyo, ka jongwed olok obino buti, mam kingwedo olok di kiko weko mogo dong? Akadi jokuwo da ka obino iwor, gida kiyako jamini kame gin oudo kimito kenekene.

10Do ango atieko ikwae ka Esau pitipit. Atieko da delelo kapwono gi. Manono omio nataman gin likame kikaruno pwono. Kotieko muducaro ikwae ka Esau dedede, joawade mege kiton jokio. Likame tie moro kodong.

11Wekunu idwe kic wu buta, di ango ako bino gwoko kuo gi, doko apuserun wu da karuno keto gen gi i koma.

12” Ka do ber jo kalikame oudo kopooore mino alola oko mato gikame tie i kopo me can, pinyo bo kame mio likame kopooore mino wun alola? Wun likame poore ibwotunu ki alola; miero imatunu gikame tie i ikopo me can nono.

13Ango atieko kwongere be bomba me Bosira bino doko gikame jo neno ko bedo kede lworu, kede gi me anyera, ameje, kede gikame jo tio kede nyinge me lamo jo. Bomban atino me kio mege dedede bino dong di gin kitie amejeke nakanaka.”

14Ango atieko winyo kop kame owok kibus Rwot, kop kame mako Edom. En etieko cwano ngaor but atekerin pi waco negi be, “Cokerenu karacel pi ot yi kede Edom, di ikounu yai yi.”

15Rwot oyaro mino wu idokunu jo agoro i diere me atekerin, di jo likame ko bino mino wu wor.

16Ewaka me cunyu tie mino wun itamunu be jo lworu wu twatwal. Wun ibedunu kakobabarun me moru, kede malo i wi moru; do akadi wun ibedunu malo kakabor bala ekokom, Rwot bino dwoko wu piny ki kunono. Manono Rwot en owaco.

17Rwot owaco be, “Edom bino doko gikame jo neno di lworu ko mako gi; jo dedede kame bino beo i ngete bino bedo kede twon lworu di kiko yisiro en pi can kopoto i kome.

18 Bala kame bin komuducaro kede Sodoma kede Gomora karacel kede jokio gi, likame tie dano moro kame bobo bino bedo Edom. Ango Rwot en awaco.

19Ango ayaro bino ne jo me Edom bala engu kame wok ki abum me Yorodan di ebino i elet me kwat, ayaro ngole riamo gin tenge ki lobo gi, di ako keto ngatel kame ango



en ayero pi pugo lobo nono. Ngai kame kokaruno poro keda? Ngai kame karuno piem keda? Ngatel mene kalikame karuno yei kede kop na?

²⁰Pi mano, winyunu iik kame ango atieko timo i kom jo me Edom, kede gikame ango amito timo i kom jo me bomba me Teman. Ateteni kobino pere kede idwe gi kotero di gin dedede kiko bedo kede lworu atek pi gi kotimere nono.

²¹Edom bino poto poto kame yayango piny; dwane me koko bino winyere i Nam Akwar.

²²Ngakwor bino ngeso suro Bomba me Bosira bala ekokom kame ringini piny di eyaro bwome. I ceng nono cuny jo yi me Edom bino bedo lwor bala cuny dako atie ramere me nywal.”

Kop kame Rwot Ongolo i kom Damasiko

²³Man en kop kame Rwot owaco i kom Damasiko. En ewaco be, “Wi jo kame tie i bomban me Kamat kede Arapad otieko totolun piento gin kitieko winyo rwonge arac. Cuny gi onyote, kirubere bala nam kalikame karuno kwei.

²⁴Jo me Damasiko otieko doko goro, doko lworu atek otieko mako gi omio kilokere ringo tenge di kom gi miel. Kitie winyo lito kede cweracuny arom kede me dako atie ramere me nywal.

²⁵Bomba kame bin nyinge winyere twatwal, bomba kame bin yomcuny dwong iye, kotieko weko.

²⁶Pi mano, kobino neko awobe mege i yote me bomba, kede isirikalen mege da dedede i ceng nono.

²⁷Ango abino cwinyo mac i apama me cel me Damasiko, di mac nono ko wango paco me Abaka Benekadad. Ango Rwot me jo yi en awaco.”

Kop kame Kongolo i kom Kader kede Kasor

²⁸Man en kop kame Rwot owaco i kom jo me ekeko ka Kader kede adulion kame Kasor pugo. Adulion nogo en kame bin Abaka Nebukadunesa me Babilon oyi di eko mako. Rwot bin owaco ne be, “Yai iko ot suro Kedar di iko neko jo kame bedo i bad tetu kide!

²⁹Maunu iemai kede diegi kede romini gi, isukan me iemai, kede jamini gi dedede atie i yi iemai di ikounu tero. Terunu aguraguran gi di ikounu waco ne jo be, ‘Lworu tie i bad dedede! ‘

³⁰” Wun jo me Kasor, ringunu kakabor di ikounu pwono. Abaka Nebukadunesa me Babilon otieko timo iik i komu, doko en etieko iiko gikame en emito timo i komu.

³¹Yaunu di ikounu ot yi kede ateker kame tie i mulem, ateker kame tie bedo abongo gimoro kame en elworu. Ateker kalikame kocego erute me bomba mere, doko en ebedo kene.



³²” Maunu aguraguran kede doke gi dedede di ikounu tero. Jo kame lielo wi gi nogo ango abino sasaro i bad tetu dedede, doko abino kelo can i kom gi ki bad tetu dedede. Ango Rwot en awaco.

³³Kasor bino doko ameje, kabedo kame ikween bedo iye. Likame bobo tie dano moro kame bino bedo kuno.”

Kop kame Rwot Ongolo i kom Jo me Elam

³⁴I kare kame Abaka Esedekia me Yuda pwodi cako kede pug acaka, Rwot oko waco na kop i kom Elam.

³⁵Rwot me jo yi owaco na be, “Yeremia, ango ayaro neko jo me Elam kame gweo emal, gin en jo kame kimio Elam teko.

³⁶Ango abino mino yamo buko i kom Elam ki bad dedede, di ango ako sasaro jo mege kabedere dedede, di likame tie ateker moro i wi lobo kame ko dong abongo jo me Elam kame oringo ot gwokere but gi.

³⁷Ango abino mino jo me Elam bedo kede lworu i nyim jokwor gi amito neko gi. Abino kelo can i kom gi kede gero atek. Abino lubo gi kede yi tuno ango tieko gi.

³⁸Ango abino neko abaka gi kede jotel gi di ango ako donyo pugo kunono.

³⁹Do i kare me anyim ango abino dwoko mulem me Elam. Ango Rwot en awaco.”

Yeremia 50

Kop kame Rwot Owaco i kom Babilon

¹ Man en kop kame Rwot owaco na i kom bomba me Babilon kede jo me lobo nono. En ewaco be,

²” Tuc kop noni ne atekerin doko tatamo en! Sip imendera di iko tatamo kop noni! Kur imungi, do wac be, ‘ Jokwor otieko mano Babilon! Kotieko mino lewic omako rubanga mere Bel, rubanga mere Maraduk cunye otieko dubere! Cal apaa me Babilon kotieko mino lewic omako, caljwogi mege cuny gi otieko dubere! ‘

³” Ateker moro otieko bino ki tetu malo pi suro Babilon; en ebino mino lobo me Babilon dong nono. Likame tie dano moro kame bino bedo iye; jo kede leini bino ringo tenge.”

Jo me Isirael bino Dok i Lobo gi

⁴Rwot waco be, “Ka kare nono otuno jo me Isirael karacel kede jo me Yuda bino ot mona di kikok akoka, ango Rwot Rubanga gi.

⁵Gin kibino penyo yongayo aoto Sion di kiko lubo tetu nono. Gin kibino timo keda isikan kame bedo nakanaka di likame wi gi ko wil kede.

⁶” Jo na cal bala romini korwenyo; romini kame jokwat gi omio gi kiparao tenge di kiko rwenyo i wi mori. Gin kibedo wire bala romini kame kokobo i wi mori, di do wi gi oko wil kede kakame anak gi tie iye.



⁷Jo dedede kame udo gi suro gi, doko jokwor gi otieko waco be, ‘Gin kitimo dub but Rwot ngat kame pito gi, Rwot kame oudo joakwari gi oketo gen gi i kome, pi mano, wan oli kede raco moro.’

⁸“Wun jo me Isirael, ringunu tenge ki Babilon! Yaunu tenge ki piny nono! Bedunu cal bala ikoroi kame telo ne diegi icegun yongayo.

⁹Ango ayaro kelo ki tetu malo ekodet me atekerin atek di ako mino gin kisuro Babilon. Gin kibino teere di kiko yi kede jo me Babilon kiko bwono gi. Gin kigweo emal gin likame oto aise bala jo yi kipirana.

¹⁰Kobino yako Babilon, doko jo kame bino yake bino tero jamini dedede kame gin kimito. Ango Rwot en awaco.”

Kobwono Babilon

¹¹Rwot waco be, “Wun jo me Babilon, jo koyako jo na, bed bala itienu ilel di cuny wu yom isosomunu bala atakit kame tie camo lum arabo asigira kame tie unyo,

¹²do bomba wu adwong nono, kobino mino lewic mako. Lobo kame konywalo wu iye nono kobino mino lewic mako. Babilon bino doko bomba kame titidi twatwal kibut bomban icegun; en ebino doko wi tim, kakotuo kame pii li iye.

¹³Pien ango alilo ne bomba me Babilon, likame tie dano moro kame bino bedo iye; en ebino dong ameje. Jo dedede kame bino beo i nget Babilon bino nene di kom gi ko to; gin kibino yisiro en pi can kame opoto i kome nono.

¹⁴” Wun dedede jo gwei emal, teerenu ilukunu Babilon pi sure. Gweunu imalia dedede tiek i kome, piento en etieko timo dub buta.

¹⁵Wounu i kome ki bad dedede, ‘En etieko rieno cinge. Cel mere otieko poto, kotieko reto apama mere piny.’ Pien ango Rwot en kame atie timo onyanga i kom jo me Babilon. Pi mano, timunu onyanga i kome, timunu ne bala kame en oudo etimo ne jo icegun.

¹⁶Miunu jo kame cuwo kodi bed li i Babilon, kiton jo kame koko cam ki poti. Jokumbor dedede kame bedo kuno bino ringo kidok but joe gi, i lobere me turgi pi yi nono.”

Jo me Isirael bino Dok i Lobo gi

¹⁷Rwot waco be, “Jo me Isirael cal bala romini kame inguon osasaro. Me agege abaka me Asiria en koge suro gi, di do me atiekini Abaka Nebukadunesa en oko koco cogere gi.

¹⁸Pi manono, ango Rwot me jo yi, Rubanga me jo me Isirael, ayaro mino abaka me Babilon kede lobo mere alola, bala kame atimo ne abaka me Asiria.

¹⁹Ango abino dwoko Isirael i lobo gi. Gin kibino camo cam kame dongo i wi moru me Kamel kame tie i adul me Basan. Cam kame dongo i adulion me Epuraimu kede Gilead gin kibino cam di kiko yeng.



²⁰Ka kare nono otuno kobino mono gikareco me jo me Isirael, do likame kobino udo moro; doko likame kobino udo dub moro i Yuda, pien ango abino sasiro jo kame ango aweko odong kuo. Ango Rwot en awaco.”

Kop kame Rubanga Ongolo i kom Babilon

²¹Rwot waco be, “Ot isurunu jo me Marataim kede Pekod. Nekunu gi itiekunu gi pitipit. Timunu gi dedede kame ango atieko ciko ne wu.

²²Icelakin me yi ajoto tie winyere i lobo nono, doko kotieko cako dudubo en kitek.

²³Babilon oudo cal bala enyondo kame nyonyoto wi lobo lung. Do nan twer mere otiek, pien etieko tuturun. En etieko doko gikame atekerin neno di lworu ko mako gi.

²⁴Babilon, ango aciko ni obek me maki di in iko moko iye abongo ngeno. Ango audi di ako maki piento in oudo ipiemo keda.

²⁵Ango atieko yabo kakame akano iye jamini na me yi, di ako kwanyo jamini na me yi kede lilo, pien ango Rwot me jo yi, atie kede tic kame amito timo i Babilon.

²⁶Sure ki bad tetu dedede di iko tuturo dere mege. Cok jamini mege kame iyako bed ikumemei bala atukit me kal. Muducaro en atwal atwala; kur iwek gimoro dongi.

²⁷Nek isirikalen mege dedede. Ngongolo gi. Jo me Babilon tie i can! Kare me mino gin alola otieko tuno!”

²⁸(Winyunu! Jo kame oudo oringo ot gwokere Babilon otieko lwi di kiko bino Sion! Gin kitie tatamo kite kame Rwot Rubanga wa otimo kede onyanga i kom jo me Babilon pi dudubo tempulo mere.)

²⁹“Lwongunu jo kame gweo emal ot sur Babilon. Lwongunu jo dedede kame ngeo gweno emal. Lukunu bomba dedede; kur imiunu ngatamoro bwoti. Timunu ne gikame eda oudo etimo, doko terenu bala kame eda oudo etero kede jo icegun, piento en oudo ewakere di eko dagi winyo kop na, ango Rwot Ngat Kacil me Isirael.

³⁰Pi mano, kobino neko awobe mege i yote me bomba, doko isirikalen mege dedede kobino muducaro i ceng nono. Ango Rwot en awaco.”

³¹Rwot Rubanga me jo yi waco be, “Babilon, in ewaka dwong ni twatwal, pi mano, ango ayaro suri. Kare otieko tuno me ango mini alola.

³²In iwakere do iyaro gete di iko poto, abongo dano moro kame kiarao in malo. Ango abino cwinyo mac i bomba wu di eko muducaro jamini dedede korimaro en.”

³³Rwot me jo yi waco be, “Kotie tero jo me Isirael kede jo me Yuda kirac. Jo komako gi di oko tero gi tie daro gi odie odie; likame kiyei weko gi.

³⁴Do Ngalak gin tek; en nyinge Rwot me jo yi. En kikome ebino pido pirgi, tetekeny ekel mulem i lobo, do en ebino kelo peko i kom jo me Babilon.”

³⁵Rwot waco be, “Nekunu jo me Babilon! Nekunu jo kame bedo i bomba me Babilon, Nekunu jopug kede jorieko kame tie iye.



³⁶Nekunu inabin mege me angalo, tetekeny gin kidok jomingo. Nekunu isirikalen mege, tetekeny gin dedede kided kede lworu adwong.

³⁷Nekunu asigiran mege, dudubunu da cabalan mege! Nekunu isirikalen kame gin kipango kame tie i diere gi, tetekeny kidok goro bala mon! Dudubunu abar kame en etie kede dedede; yakenu!

³⁸Kur kot cwei i lobo nono, tetekeny pie mege tui. Babilon obedo lobo kame caljwogi tot iye kirac, caljwogi kame omio jo otieko doko jomingo.”

³⁹Rwot waco be, “Pi mano, leini apat me obar kede idiekon en kame bino bedo Babilon, karacel kede winy me isirani. Jo likame bobo bino bedo kuno, pi kare lung me anyim.

⁴⁰Bala kame bin angu amuducaro kede Sodoma kede Gomora karacel kede bomban me kio gi, angu abino timo ne Babilon kamanono. Likame tie dano moro kame bino bedo kunono bobo. Angu Rwot en awaco.” Rwot waco be,

⁴¹” Neningo, tie jo atie wok ki lobo atie tetu malo, ateker me aura; abakai atot tie iikere ki kakabor kunono pi bino yi.

⁴²Gin kimako imalia kede tongini; gin kiger kili kede kisa. Buruburu gi winyere bala gunyao me nam, di gin kiringo kede asigiran. Gin kibino di kiteere bala jo kotieko iikere pi yi, gin kitie bino pi yi kede Babilon.

⁴³Abaka me Babilon otieko winyo kop amako gi, di bade oko doko lojolojo. Kop nono tie ramo cunye, etie kede lito kame cal bala me dako kame tie ramere me nywal.

⁴⁴” Angu ayaro bino ne jo me Babilon bala engu kame wok ki abum me Yorodan di ebino i elet me kwat, ayaro ngole riamo gin tenge ki lobo gi di ako keto ngatel kame angu en ayero pi pugo lobo nono. Ngai kame kokaruno poro keda? Ngai kame karuno piem keda? Ngatel mene kalikame karuno yei kede kop na?

⁴⁵Pi mano, winyunu iik kame angu atieko timo i kom bomba me Babilon, kede gikame angu amito timo i kom jo mege. Ateteni kobino pere kede idwe gi kotero di gin dedede kiko bedo kede lworu atek pi gi kotimere nono.

⁴⁶Mor me mako bomba me Babilon bino yayango piny; dwan me koko me jo mege bino winyere i pinye apat.”

Yeremia 51

Kope Ace kame Rwot Ongolo i kom Babilon

¹Rwot waco be, “Angu ayaro mino yamo ager kame dudubo jamini buko i kom Babilon kede jo mege.



²Ango abino cwano jokumbor Babilon di gin kiko dudubo en bala cucung kame kopieta tenge. I ceng me timo can i kom Babilon, gin kibino sure ki bad tetu dedede di kiko weke edong nono.

³Kur imiunu isirikalen me Babilon kare me gweno imalia gi, arabo me ngapo igoen me gano kom gi. Kur iwekunu awobe gi atino. Muducarunu isirikalen gi dedede.

⁴Gin kobino wawano gi di kiko totoun i yote me bomban gi.

⁵Ango Rubanga, Rwot me jo yi, likame atieko jalo Isirael kede Yuda, bed bala i kadedere dedede me lobo gi, gin kitie kede raco me dub i nyima, ango Ngat Kacil me Isirael.

⁶Ringunu tenge ki Babilon! Ngat acelacel marao kuo mere! Kur nek wu pi dub me jo me Babilon. Kare otieko tuno me ango timo onyanga; ango atie mine alola kame poore kede.

⁷Babilon oudo cal bala ikopo me saabu kame tie i cinga; en oudo emio jo me wi lobo lung omer. Atekerin omato bwini mere di wi gi oko dubere.

⁸Babilon oyotoyot otieko poto di eko ngingidun; kokunu pire! Kelunu yat me muketo aporeso mege; cengemogo eromo cango.

⁹Jokumbor kame oudo bedo kunono owaco be, ‘Wan otamo muketo Babilon, do likame eko karuno cango. Owekenu di okounu girwa dok i pinye me tur wa. Alola kame komio Babilon rac twatwal; rwonge mere oromo lobo lung, doko mor me poto mere otieko winyere i idoun.’ “

¹⁰Do jo me Isirael kede Yuda waco be, “Rwot otieko nyuto be wan oli kede kop moro arac; bianu ootunu otatamunu i Sion gikame Rwot Rubanga wa otieko timo.”

¹¹Rwot otieko keto i cuny abakai me Mede mit me yi kede Babilon, piento iik mere tie pi muducaro en. Manono en kite kame en ebino nyango kede tempulo mere. Jotel me isirikalen kame tie sure mio isirikalen cik be, “Penunu imalia wu! Kwanyunu ibukui wu ikounu bedo di iikerenu!

¹²Sipunu imendera kame nyuto ne jo cako suro cel me Babilon! Medunu isirikalen jodar! Cwaunu isirikalen ot dar kadedere apapat me yote! Ketunu isirikalen but di kipwono pi suro gi!” Rwot otieko timo gikame en oudo ewaco be ebino timo ne jo me Babilon.

¹³Wun jo kame ibedunu i nget icileta atot atota, di ibarunu, ajikini wu otieko tuno, kotieko coto atima me kuo wu.

¹⁴Rwot me jo yi otieko kwongere be ateteni en ebino kelo isirikalen kame tot bala obonyo pi suro Babilon, di gin kiko bino ikuk i wi wu.

Wer me Pako Rubanga

¹⁵Rwot en kotimo lobo kede twer mere; en esipo piny kede rieko mere, doko eyararo malo kede niang mere.



¹⁶Ka en ewaco dwane, pii kame tie malo kururo; en ekelo idoun ki ajikini me wi lobo. En emio kot meny, di eko cwano yamo ki ude mege me kano gi.

¹⁷Do jo dedede ming, doko kili kede ngec; jo kame timo caljwogi lewic mako gi; pien rubangan kobedo cal kame gin icweo obedo gi me abe, doko likame kikuo.

¹⁸Kony gi li, kibedo gikame kopooore bedo kede acae i kom gi; kibino amuducar i kare kame Rwot bino kelo kede alola i kom gi.

¹⁹Rubanga ka Yakobo likame cal bala gin; en ebedo ngat kocweo gi dedede, di eko yero ateker me Isirael pi bedo jo mege amake. Nyinge en Rwot me jo yi.

Enyondo ka Rwot

²⁰Rwot waco be, “Babilon, in en enyondo nango, gi me yi na. Ango oudo atio kedi me nyonyoto atekerin kede ajakanuto,

²¹doko atio kedi me neko asigiran kede jo kame oudo ringo kede gi; atio kedi da me dudubo cabalan kede me neko jo kame oudo ringo kede gi;

²²atio kedi me neko mon kede cuo; atio kedi me neko cuo oti kede ipongai; atio kedi me neko awobe kede anyira;

²³atio kedi me neko jokwat kede romini gi; atio kedi me neko jopur kede twonin gi, atio kedi me neko jopug kede jotic adongo.”

Alola kame kobino Mino Babilon

²⁴Rwot waco be, “Ibinunu neno di ango atimo onyanga i kom jo me Babilon pi gikareco dedede kame gin kitimo i Sion.

²⁵Babilon, in ical bala moru amuducaro lobo lung, do ango ayaro maki di ako mini ibebelo lor piny ki wi moru, di ako weki di itieko doko buru.

²⁶Likame tie kidi moro bobo kame kobino kwanyo kibuti kame koromo tic kede me gedo. In ibino bedo gikame do kony mere li nakanaka. Ango Rwot en awaco.

²⁷” Sip imendera i lobo pi nyuto be yi tie. Kut agwara tetekeny atekerin winyi di kiko ngeno be yi tie. Mi atekerin iikere pi yi kede Babilon. Lwong jo me ajakanuto apapat pi bino yi kede; ajakanuto me Ararat, Mini, kede Asukenas. Yer dano kame bino telo isirikalen ot yi kede. Keli asigiran atos bala obonyo.

²⁸Mi atekerin iikere pi yi kede Babilon. Lwong abakai me Mede, karacel kede jopug gi kede jotic adongo, kede isirikalen dedede me pinye kame gin kipugo.

²⁹Lobo tie yangere doko jo mege tie winyo lito, pien Rwot tie cobo timo gikame oudo en eiko pi timo i kom Babilon; iik mere me mino Babilon doko ameje kalikame dano moro bedo iye.

³⁰Isirikalen me Babilon otieko weko yi; gin kidong do bedo kabedo gi kame kocelo di tek. Teko gi otiek; kitieko do doko cal bala mon. Erute me bomba gi kotieko turo, doko ude gi da kocwicwinyo kede mac.



³¹Jo kame tero kop ne abaka me Babilon ringo di kilubere aluba pi ot waco ne be kotieko turo bomba mere ki bad tetu dedede.

³²Jokwor otieko mako kakame jo ngolo kede ecilet, kitieko wango lum da, doko lworo otieko mako isirikalen omio kom gi tie miel.

³³Babilon cal bala diakal me canyo kame kotie toro, pien udo kare me kac onoko; kidong kede kare katitidi di jokwor ngongolo gi. Ango Rwot me jo yi en awaco.”

³⁴Abaka Nebukadunesa me Babilon otieko neko jo me Yerusalem. En etieko mino bomba odong nono bala agulu kame gimoro li i yie; en etieko mwonyaro bomba me Yerusalem bala le kiyiliyili. En etieko tero jamini kame cunye mito, di eko lwomo jamini ace tenge.

³⁵Jo me Sion miero wac be, “Wan okwao be nyang gero kame kotimo i kom wa i wi Babilon!” Poore jo me Yerusalem wac be, “Wan okwao be nyang remo wa i wi jo me Babilon!”

Rwot bino Konyo Jo me Isirael

³⁶Pi mano, Rwot waco be, “Ango abino pido piru di ako timo onyanga i kom jokwor wu. Ango abino mino kakame pii me Babilon wok kiye dwono di icileta mege ko tuo.

³⁷Babilon bino doko atukit me ude kopopoto, kakame ikween bedo iye. Ebino doko gikame jo neno di lworo ko mako gi; likame tie dano moro kame bino bedo iye, doko jo kame nene bino yisiro en.

³⁸Jo me Babilon dedede bino dorano bala inguon, di kingururo bala idwe me inguon.

³⁹I kare kame gin do kiwor kede, anga abino tedo negi ebaga di ako mino gin kimer kiko donyo kilel. Gin kibino ot nino di likame kiko cei.

⁴⁰Ango abino tero gi ot ngongolo gi bala romini kede diegi. Ango Rwot en awaco.”

Gikame bino Timere ne Babilon

⁴¹Rwot waco be, “Bomba kame oudo wi lobo dedede pako kotieko mako! Babilon otieko doko gikame atekerin neno di lworo ko mako gi tin benyo!

⁴²Nam otieko mwonyo Babilon; ebuka mege amor otieko ume.

⁴³Bomban mege otieko doko gikame jo neno di lworo ko mako gi, doko kical do bala wi tim, kabedo kame pii li iye, lobo kalikame dano moro bedo iye arabo beo iye da.

⁴⁴Ango abino mino alola but Bel, rubanga me Babilon, di ako mine engoko gikame etieko mwonyo. Atekerin likame bobo bino mol ot bute. “Apama me bomba me Babilon otieko potu.

⁴⁵Wun jo na yaunu tenge kibute! Dano acelacel poore lak kuo mere ki twon gero na.

⁴⁶Kur idwonunu cunye wu arabo ibedunu kede lworo pi abe kame itienyu winyo. Buli mwaka abe tie bino, abe kame mako tim me gero i lobo kede me yi me abakai ken gi ken gi.



⁴⁷Ateteni kare tie bino kame ango abino mino kede caljwogi me Babilon alola. Lobo me Babilon lung kobino mino lewic mako; jo mege kame koneko bino rade kadedere mege dedede.

⁴⁸Jamini dedede kame tie i wi lobo kede malo i edou bino lelemo kede kilel ka Babilon opoto; pien jo kame bino muducaro en bino wok ki bad tetu malo.

⁴⁹Babilon omio jo oto i wi lobo dedede; eda nataman ebino poto pi kite kame eneko kede jo me Isirael. Ango Rwot en awaco.”

Kop ka Rubanga but Jo me Isirael i Babilon

⁵⁰Rwot waco ne jo mege kame tie Babilon be, “Wun jo kame itiekunu bwot ki to, yaunu iotunu, kur igalunu kare! Bed bala itienu i lobo abor, miero iyutununu ango, doko parunu pi Yerusalem.

⁵¹Wun iwacunu be, ‘Omio lewic omako wa, pien otieko winyo kite kame kocao wa kede; lewic opong i wi wa pien jokumbor otieko donyo i kadedere kacil me ot ka Rwot.’

⁵²Pi mano, ateteni kare tie bino kame ango abino mino kede caljwogi me Babilon alola, di i kadedere dedede me lobo mere jo kame kowawano bino cur pi lito me awanon.

⁵³Akadi koto Babilon di oko yito malo i edou di eko gero apama atek me cele i kunono, ango pwodi koto acwao jo di gin kiko ot muducaro en. Ango Rwot en awaco.”

Medo Dudubo Babilon

⁵⁴Rwot waco be, “Kong winyunu koko kame tie winyere wok ki Babilon, mor adwong kame kotie dudubo kede lobo me jo Kaludea.

⁵⁵Ango ayaro muducaro Babilon di ako mine eling. Jokwor bino core kuno bala ebuka me nam, woo me dwan gi bino mor adikinicel.

⁵⁶Jokwor otieko bino pi muducaro Babilon; kimako isirikalen mege, doko kitieko tuturo imalia gi. Pien ango Rwot Rubanga aketo can i kom jo pi dub gi, ango ayaro culo raco i kom Babilon pi dub kame jo mege otimo.

⁵⁷Ango abino mino jotel mege, jorieko, jopug, jotic adongo, kede isirikalen mege mer. Gin kibino ot nino di likame kiko cei. Ango abaka atieko waco, ango Rwot me jo yi.

⁵⁸Apama me cel atek me Babilon kobino reto piny, di oko wango irutei mege abocoboco nogo. Jo olo kom gi nono, doko atekerin timo teko i gikame mac bino wango. Ango Rwot me jo yi atieko waco.”

Yeremia Ocwao Kop mere Babilon



⁵⁹Seraya wot ka Neria, en akwar Maseya oudo obedo ngat kame gwoko Abaka Esedekia. I mwaka me ongwon me apugan ka Esedekia bala abaka me Yuda, Seraya oudo tie ot Babilon kede abaka, di ango ako mine kop pi tero.

⁶⁰Ango oudo awandiko i itabu adola kop i kom can dedede kame bino poto i kom Babilon. Ango awandiko kope nogi dedede kame mako Babilon.

⁶¹Di ango ako waco ne Seraya be, “Ka ituno Babilon, nen be isomo kope nogi dedede but jo kede dwan amalo.

⁶²Di iko lego be, ‘Okwe Rwot, in kikomi ingato pi muducaro kabedo noni, tetekeny jo akadi leini kur bed tie iye, di en eko bedo ameje nakanaka.’

⁶³ Ka in itieko somo kop me itabu adola nono but jo, twei kidi i kom itabu nono di iko lwome i ecilet me Eupurate.

⁶⁴Di do in iko waco be, ‘Babilon bino lwiny kamanono, di likame bobo eko woto wie ooko atwal, pi can kame Rwot tie kelo i kome.’ “ Kope kame Yeremia owaco jik kan.

Yeremia 52

Komako Yerusalem

(2 Abakai 24.18—25.7)

¹Mwakini me dongo ka Esedekia oudo tie ot are kiwie acel i kare kame en edoko kede abaka me Yuda. En eko bedo i apugan i Yerusalem pi mwakini tomon kiwie acel. Nying toto mere oudo Kamutal, nyar ka Yeremia kame oudo bedo i bomba me Libina.

²Abaka Esedekia oko timo dub but Rwot bala kame bin Abaka Yekoyakim oudo otimo.

³Jo me Yerusalem kede Yuda oko wango cuny Rwot kitek di eko riamo gi tenge ki nyime. Aso, Esedekia oko jemo ne abaka me Babilon,

⁴ di Abaka Nebukadunesa oko bino kede isirikalen mege dedede pi suro Yerusalem. Manono bin otimere i buto duwe tomon me duwe me tomon i mwaka me kanyangon me apugan ka Esedekia. Di gin kiko luko bomba di kiko kumemo kayito.

⁵Bomba me Yerusalem oko bedo di jokwor oluke tuno i mwaka me tomon kiwie acel me apugan ka Esedekia.

⁶I ceng me kanyangon me duwe me ongwon me mwaka nono, kec oko do dop i bomba kitek omio oudo likame tie gimoro kame jo romo camo.

⁷ Di do oko tucyo apama me cel me bomba di isirikalen dedede oko ringo. Gin kilwi ki bomba iwor di kibeo i erute kame oudo tie i dierediere me apamai are kame oudo iyapiyapi kede poto ka abaka, bed bala jo me Babilon oudo oluko bomba. Gin kiko ringo tetu Aditot me Yorodan.

⁸Do Isirikalen me Babilon oko wapo Abaka Esedekia di gin kiko make i elet me Jeriko, di isirikalen mege dedede oko sarakin ringo kiweke.



⁹Isirikalen me Babilon oko mako Esedekia di gin kiko tere Ribula i adul me Kamat, but Abaka Nebukadunesa, di en eko ngolo ne kop.

¹⁰Nebukadunesa oko neko awobe ka Esedekia i nyime di eneno kede wange, doko eko neko da jotic adongo me Yuda i Ribula.

¹¹Di do eko mino ogolo wang Esedekia di oko twene kede irikoi oko tere Babilon, kakame oko kete iye i otkol tuno i ceng me to mere.

Kotuturo Tempulo

(2 Abakai 25.8-17)

¹²I buto duwe tomon me duwe me kany i mwaka me tomon kiwie kanyangon me apugan ka Abaka Nebukadunesa me Babilon, Nebusaradan, ngat kame oudo mio abaka tam, doko di en oudo ngadwong me isirikalen, oko donyo Yerusalem.

¹³En eko wango Tempulo, paco ka abaka, kede ude dedede me jo adongo dongo i Yerusalem. En eko wango da ude apat dedede me Yerusalem.

¹⁴Isirikalen dedede me Babilon kame oudo tie kede Nebusaradan oko rereto apama me cel me bomba me Yerusalem dedede piny.

¹⁵Nebusaradan oko tero Babilon jo mogo kame oudo obedo jocan twatwal kikom jo dedede, kede jo kame oudo oko dong i bomba, kede jo kame oudo ipirana i tic cing, karacel kede isirikalen kame bin oudo orieo cing gi but jo me Babilon.

¹⁶Do Nebusaradan oko weko jocan mogo odong Yuda pi timo tic i poti me olok kede puro poti.

¹⁷Jo me Babilon oko tuturo ipirin me nyonyo buronsi, icegeren me cibo kalayan kame oudo tie i tempulo, karacel kede epipa adwong me pii, di gin kiko tero nyonyo buronsi dedede Babilon.

¹⁸Gin kiko tero da gi me kikiso alutari kede agune me gano buru, jamini me kepo wi ausin me italan, kalayan me gano remo me giayala angola, bakulin me dunyo odok angwe kur, kede jamini apat dedede me nyonyo buronsi kame oudo kotio kede i tempulo.

¹⁹Gin kiko tero jamini dedede kame kotimo kede saabu arabo siliba: bakulin atino, atubai me mako itonge me mac, kalayan me gano remo me giayala angola, agune me gano buru, icegeren me cibo italan, bakulin me dunyo odok angwe kur, kede bakulin me mino giayala amata.

²⁰Jamini me nyonyo buronsi kame oudo Abaka Sulumani otimo pi tempulo oudo pek twatwal likame kotwero pimo gi; gin en ipirin are, icegeren, epipa alac me pii kede cal me twonin me nyonyo buronsi tomon kiwie are kame oudo kocibo i dud epipa nono.

²¹Ipirin are nogo acelacel oudo boro mere malo tie puti ot are kiwie kanyaare kede laco me kore rimaro oudo tie puti tomon kiwie kanyauni. Cuny gi oudo twolo di rom me peko me lak gi tie milimita ot kanyaare kiwie kany.



²²Wi epir acelacel oudo koropo iye nyonyo buronsi kame boro mere romo puti kanyaare kede dul, di kotubuso en kede cal me anyakini me pomagurunet me nyonyo buronsi rimaro.

²³Cal me anyakini me pomagurunet kame oudo tie i kom epir acelacel wel gin dedede oudo tie tol acel, do kikom gi ot kanyangon kiwie kanyape en kame oudo neeno ki piny.

Kotero Jo me Yuda Babilon

(2 Abakai 25.18-21, 27-30)

²⁴Nebusaradan, ngadwong me isirikalen oko tero da bala mabus Seraya Ngatel me Josaseredoti, Sepania ngasaseredoti kame oudo lubo tiene, kede jo adek kame oudo obedo jodar ekeko me tempulo.

²⁵En eko tero bobo da ki bomba ngatic adwong kame oudo telo kop kame mako isirikalen, jo kanyaare kame oudo pwodi tie i bomba, jo kame bin mio tam but abaka, kalani ka ngadwong me isirikalen, ngat kame oudo mako itabu kame mako kop i kom isirikalen, kede cuo apat ot kanyape kame oudo obedo anywali me Yuda, kame gin kiudo tie i bomba.

²⁶Nebusaradan oko tero gi i bomba me Ribula but abaka me Babilon.

²⁷Abaka me Babilon oko mino koneko gi i Ribula kunono, i lobo me Kamat. Manono en kite kame bin kotero kede jo me Yuda ot bedo bala mabus i lobo apat.

²⁸Man en wel me jo kame bin Nebukadunesa oko tero ot bedo bala mabus: i mwaka me kanyaare me apugan mere bin etero jo tutumia adek kede ot are kiwie adek (3,023);

²⁹i mwaka me tomon kiwie kanyauni me apugan mere bin etero ki Yerusalem jo tol kanyauni kede ot adek kiwie are (832);

³⁰kede i mwaka me ot are kiwie adek me apugan mere, Nebusaradan ngadwong me isirikalen mege oko tero jo tol kanyaare kede ot ongwon kiwie kany (745). Jo dedede kame bin gin kiko tero oudo wel gi tie tutumia ongwon kede tol kanyape (4,600).

³¹I mwaka me ot adek kiwie kanyaare me kare kame oudo Abaka Yekoyakin otieko bala mabus, i buto duwe ot are kiwie kany me duwe me tomon kiwie are me mwaka nono, Abaka Ebilimerodak me Babilon oko bedo kede cuny me kisa but Yekoyakin di eko gonye ki otkol, manono en mwaka kame en egeo kede pug bala abaka.

³²Ebilimerodak oko tere kiber, di eko mine ruom me wor kame kalamo me abakai apat dedede kame bin tie Babilon bala mabus.

³³Pi manono, Yekoyakin oko gonyo igoen me mabus di eko ngapo apat, eko donyo cam i emesa me abaka ceng dedede pi kare me kuo mere lung.

³⁴Buli ceng, di en pwodi oudo etie ekuo, abaka me Babilon oudo mie sente me wilo gikame mitere ne.



Koko ka Yeremia

Koko ka Yeremia 1

Cwercuny kame Yerusalem tie kede

- ¹Auro kite kame Yerusalem odong kede nono, bomba kame jo oudo opong iye! Auro kite kame edoko do cal kede apuserut, bomba kame atekerin oudo neno be dwong otieko doko cal bala epasoit.
- ²En ekok iwor kiakia, di pigewange mol loiloi. Kikom jo kame oudo mare likame moro kikom gi bino pi dino cunye. Jowote dedede otieko kwine, gin kitieko doko jokwor mege.
- ³Kotieko tero jo me Yuda obukui kitie neno iye can di kipasuno kitek. Nan kitie bedo i diere me atekerin apat abongo kakame kitwero bedo iye kede kweicuny. Jokwor gi dedede otieko roikino gi kakadiding.
- ⁴Yote aoto Sion i tempulo odong nono, pien likame doko tie ngatamoro aoto ilega i ceng adongo. Irutei mege dedede odong nono, josaseredoti mege cur. Anyira mege jower tie neno can; Sion tie kede lito.
- ⁵Jokwor mege otieko bedo kede loc i kome, jokwor mege tie kede yoto. Pien Rwot otieko mine neno can pi twon dub kame en etimo; jokwor omako idwe mege di kiko tero gi tenge.
- ⁶Angosibib me Yerusalem otieko weke, jotel mege do cal bala atil kame kec ogondao, kame teko gi otiek kakame kitie ringo kede kibun ngadwar.
- ⁷Yerusalem nan yutuno, i kare kanataman etie kede i can, kede irim, jamini dedede abeco koudo obedo mege i kare kasek. Kakame jo mege opoto kede i cing jokwor, di ngat kame konyo gi oko bedo li, jokwor oko donyo nyero gi pi kite kame kipoto kede.
- ⁸Yerusalem odubo kirac adikinicel, omio nan edoko gi me anyera. Jo dedede koudo tie kede wor bute nan cae, pien kitieko ngine di etie nono. En do ecur, di eko loko nyime tenge.
- ⁹Tim mere kopwoke oudo do neno kakaler i egoe mere me yie kame mon ngapo, do en likame eko paro pi kuo mere me anyim. Kite kame epoto kede oudo neko kom dano, abongo ngatamoro kame romo kweno cunye. En ekok be, “Okwe Rwot, nen can kame atie iye, pien ngakwor otieko bwona!”
- ¹⁰Jokwor mege oyako jamini mege abeco dedede; en eneno di atekerin me kumbor donyo i kabedo mere kacil, kakame Rwot ogengo jo kalikame obedo Iyudayan donyo iye.



11Jo mege dedede cur di kimoo gi me acama kiseso jamini gi abeco kede cam me acama pi udo teko moro. Bomba kok be, “Okwe Rwot nen kite kame kony na odoko li kede!”

12En ekok be, “Wun jo kame ibeunu i ngeta, mam likame iparunu? Kong ngolorunu di ikounu neno, ka tie can moro kotieko bedo rom kede mera, can kame Rwot okelo i koma i ceng kame edoko ger kede.

13” En ecwao mac ki malo di mac nono oko donyo ewango kiton diere me cogere na. En eciko tiena kede obek di eko dwoka cen; en eweka kena di atie kede aramo.

14” En etweo dub na bala ayoko di eko lido gi karacel. En eko rwako gi i nguta di teko na oko tiek pi peko gi. Rwot omia i cing jo kalikame ango asobolo yi kede gi.

15” Rwot odagi jo yi na dedede koudo tie i diere na, en ecwao isirikalen bino muducaro awobe na. Enyinyito jo na bala olok kame kotie biino.

16” Kope nogi en komia atie koko di pigewanga mol. Likame tie ngatamoro kame kweo cunya, likame tie ngatamoro kame dwoko cunya. Jo na odong nono abongo gimoro, pien jokwor ocere na.”

17Sion riego bade, do likame tie ngatamoro kame kweo cunye; Rwot otieko mino cik i kom ikwae ka Yakobo, en emio cik be jokio gi poore dok jokwor gi. Kitie tero Yerusalem bala gi me kwer.

18Yerusalem waco be, “Rwot gire otimo gikame tie kakare, pien ango oudo ajemo ne. Winyunu, wun jo dedede, nenunu can kame atie iye; kotieko mako awobe kede anyira na di oko tero gi bala mabus obukui.

19” Alwongo jo kame oudo mara, do kiko ngala angala. Josaseredoti na kede joadongo ototoun i gudi me bomba, di oudo kitie mono cam me acama pi dong kuo.

20” Okwe Rwot nen peko kopoto i koma; yia onyote. Cunya cwer pien ango oudo abedo ngajemo. Nek tie timere i gudi me bomba; akadi i yi ude da jo tie to iye.

21” Winy cur na, likame tie ngatamoro kame sobolo dino cunya. Jokwor na dedede owinyo peko na, gin cuny gi yom be in ikelo can i koma. Cwai ceng kame in icikere pire di iko mino jokwor na da neno can bala ango.

22” Nen tim gi areco dedede di iko tero gi bala kame itera kede pi dub na dedede. Pien ango acur tien kede tien, doko cunya da onyote.”

Koko ka Yeremia 2

Alola kame Rwot Omio Yerusalem

1Rwot pi gero mere omio eko kelo i kom Sion kare alit me colo. En euco ki malo oko potu i wi lobo deyo kame Isirael oudo tie kede. I ceng me gero mere en eweko kiton tempulo mere.



- ²Rwot odudubo abongo kisa kabedere dedede kame ikwae ka Yakobo bedo iye. Kede twon gero en etuturo piny kagwokere atek me jo me Yuda, ekelo lewic i kom ajakanut kede i kom jopug mege.
- ³En etuturo teko me Isirael kede twon gero; edagi konyo gi kakame jokwor obino kede. En eliel i kom ikwae ka Yakobo bala mac obirano, di eko wango gi dedede.
- ⁴En ekudo tir me emal mere bala ngakwor, di cinge tetu cam otelo tol kede tong me emal iye. En etieko neneko jo kame wan oudo owakere pirgi i Yerusalem; en ebwoto gero mere bala mac aliel.
- ⁵Rwot otieko doko bala ngakwor, di eko dudubo Isirael. En edudubo ude mege dedede me abakai, di eko rereto kagwokere mege atek, eko medo ne jo me Yuda iturur kede koko.
- ⁶En etuturo tempulo mere bala kima atie i poto; edudubo taberenakol mere. Rwot ojiko i Sion kwero ceng adongo kede ceng Sabato; kede twon gero eko dagi abaka kede josaseredoti.
- ⁷Rwot otieko dagi alutari mere, etieko weko kabedo mere kacil. Ejalo jokwor orereto apamai mege. Gin kilelemo di kitaco i ot ka Rwot bala kame kotimo i ceng me ebaga.
- ⁸Rwot oudo omoko tam mere pi rereto apamai me Yerusalem; en erieo tol me pimo gi di likame eko mako asisa tuturo gi piny. En emio atukito me lobo koluko bomba otiatiaun; nan gin dedede kingingidun piny karacel.
- ⁹Irutei mege olwiny i atukit me apamai kopopoto, en etuturo lilime kobedo ipirin mege me erute. Abaka mere kede jotel ace komamako kotero i lobere me atekerin apat; likame doko kopwonyo Iswil, doko inabin da likame udo gianyuta kibut Rwot.
- ¹⁰Joadongo me Yerusalem bedo piny i lobo di kiling titi, di kiketo apua i wi gi kede di kingapo ipukoi. Anyira me Yerusalem oriondiko di kiko como nyim gi piny.
- ¹¹Wanga ool koko; yia onyote; atie kede cweracuny pi kite kame koneko kede jo na. Idwe kede imukerun tie gondao i gudi me bomba.
- ¹²Gin kikok but toti gi pi kec kede orio; gin kigondao i gudi me bomba bala jo kame kowawano, di do kuo gi ko yai momot di kitie i kor toti gi.
- ¹³Okwe Yerusalem, awac kop nyo? Apor can ni kede mene tetekeny akwei cunyi? Can ni opepetun atatai bala nam adwong; likame tie ngat kasobolo konyi.
- ¹⁴Inabin ni tie waco ni kope me gianyuta me abe; gin likame kinyuto dub wu kakaler pi koto mino wu dok i kuo wu kasek, do gin kibedo mino wu kope me abe kame rwenyo jo.



¹⁵Jo kame beo i ngeti, Yerusalem, kineni kede acae, kiyisiro in di kiyayango wi gi kede acae di kiwaco be, “Kom ateteni manoni en bomba koudo ber di cil? Kom manoni en bomba koudo yomo cuny jo dedede me wi lobo?”

¹⁶Jokwor ni dedede ngamo ni dog ngam me anywar; kiyisiro in di kijunye di kiwaco be, “Wan otieko dudubo en. Manoni en ceng kame wan oudo obedo kuro!”

¹⁷Rwot otieko timo ne Yerusalem gikame oudo engato pi timo. En edudubo en abongo cuny me kisa bala kame oudo eiko cako sek. Emio jokwor mege olelo i wie, di eko medo teko gi.

¹⁸Okwe apamai me Yerusalem, kokunu kitek but Rwot! Miunu pigewangu mol iwor kede iceng bala pii me ecilet. Kur iolunu kede koko kede bedo kede cweracuny!

¹⁹Yaunu iesawan apapat me iwor pi koko but Rwot; gonyunu ne kop dedede atie i cuny pi kuo me idwe wu, idwe kame kec tie gondao i wi buli gudo me bomba.

²⁰Okwe Rwot, ngoloro di iko neno! Ngai kame in itieko timo ne kamanoni? Benyo, poore mon cam idwe gi kame gin kinywalo? Benyo, poore nek inabin kede josaseredoti i tempulo nin?

²¹Jo atino kede jo adongo buto piny kitotoun i gudi me bomba. Jokwor oneneko anyira kede awobe na. In ineneko gi abongo kisa i ceng me gero ni.

²²In ilwongo jokwor ki kabedere dedede ineno bala manono obedo ceng me ebaga; di likame tie ngatamoro oko bwot i ceng me gero ni nono. Idwe na kame ango anywalo di ako pito, jokwor na oneneko.

Koko ka Yeremia 3

Alola, Iswilar, kede Gen

¹Ango en ngat kotieko bilo neno can, di abeo i ebela me gero ka Rwot.

²En ekola adonyo kakacol cucucuc.

³Ateteni eko cako ruruco jujuto ango pi ceng alutu.

⁴En eweko ringo koma kede del koma di obalacar, di eko tuturo cogere na.

⁵En egoloro ango di eko luka kede can alit kede peko.

⁶En emia bedo kakacol bala jo ariki oto sek.

⁷En eluka kede apama tetekeny likame akaruno bwot; etwea kede eriko apek.

⁸Akadi alwongere di alongolongo koko pi mito kony, en edagi winyo kwac na.

⁹Eculo yote na kede apama me kide, di eko kukudo kabeo na.

¹⁰En oudo ecal bala edubu kobuto piny tie kura pi somo i koma, bala engu kopwono tie kura.



- 11En eko wana tenge ki yongayo na di eko nyinyilo ango i adulion; di eko weka kena di kony na li.
- 12En etelo tol me emal mere di eko pimao ango bala gikame en epimao me pwonyo gweno emal.
- 13En eko gweno emal mere ocoba oduonyo paka i engalur.
- 14Ango adoko do dano me anyera kibus jo na dedede, ngat kame jo golao kede were piny yuluyul.
- 15Emia ayeng kede can alit, amato pige me yat akec paka roma.
- 16Ereta laka okakao engaro di eko mina nywongo i buru.
- 17Etieko mina akei kuo me anapakin; wia da otieko wil kede yomcuny.
- 18Ango ako waco be, “Ango atieko kei kuo abor, kede da gi dedede kame oudo ageno udo kibus Rwot.”
- 19Par kame atie kede i kom can na alit, kede bedo abongo paco kec bala pige me yat akec, kede da bala epiu!
- 20Abedo paro kop nono nakanaka di cunya oko dwono.
- 21Do gen na dwogo ka ayutuno be:
- 22Amara kalikame lokere ka Rwot likame jik, cuny mere me kisa tie nakanaka.
- 23Gin kinyen buli odiko acelacel, genere mere dwong.
- 24Rwot en gi dedede kame ango amito, pi manono ango abino gene.
- 25Rwot timo bero ne jo dedede agene, ne jo dedede kame lokere bute.
- 26Pi manono eber ne dano daro eliling alako ka Rwot.
- 27Eber ka dano opwonyere i dire noni di pwodi etitidi.
- 28Ka Rwot omio dano alola, dano nono poore bedo kene di eko ling;
- 29en epoore mwolere di eko luro wie piny, pien cengemogo gen moro pwodi tie;
- 30akadi kobunge, amoto koyeyeto en, en epoore gamo gin dedede.
- 31Pien Rwot likame bino dagi wa nakanaka.
- 32Akadi bed bala en ekel ne wa cweruncy, en ebino bedo kede cuny me kisa di lubere kede amara mere kalikame lokere.
- 33Rwot likame cunye yom pi mino jo neno can.
- 34Rwot ngeo kame kotie tero mabus kirac;
- 35en engeo ka likame kotie mino jo twero gi;



- 36 en engeo ka likame kongolo ne jo kop kede ateni.
- 37 Ngai kame twero yamo gimoro di gi nono ko cobere ka Rwot likame oyei?
- 38 Gikaber amoto gikarac timere ka en emio cik mere.
- 39 Pinyo kamio dano ngunguro ka Rwot omie alola pi dub mege?
- 40 Ber kong ongingicunu yote wa di okounu dok but Rwot.
- 41 Olegunu kede cuny wa dedede di otingunu cing wa malo but Rwot di owaco be,
- 42” Wan odubo, doko da ojemo ni, di in, Okwe Rwot, likame iko sasiro wa.
- 43” In ingapo gero di iko donyo wapo wa, di iko neneko wa abongo kisa.
- 44 In iumere kede edou tetekeny ilega moroni kur pelao tuno buti.
- 45 In imio wa odoko bala yugi i diere me atekerin.
- 46” Jokwor wa dedede ngamo ne wa dog gi ngam me anywar;
- 47 obeo i can akelo lworo, opopoto i bure atut; kodudubo jamini wa, komuducaro wa.
- 48 Pigewanga mol bala ecilet pi kite kame komuducaro kede jo na.
- 49” Pigewang wa bino mol cutucutu abongo jik,
- 50 paka tuno di Rwot ongoloro piny ki malo di eko neno wa.
- 51 Cunya cwer kame aneno gikame otimere ne anyira me bomba.
- 52” Jo kodoko jo ading na abongo tien kop moro obedo dwara bala winyo.
- 53 Gin kiuca i bur di akuo di kiko lwomolwomo kide i koma.
- 54 Pii oko cako mwonyo wia, di ango ako waco be, ‘Atiek do.’
- 55” Ango ako lwongo nyingi, Okwe Rwot, di oudo atie piny i dud bur.
- 56 In iko winyo koko na be, ‘Kur icul yiti di iko dagi winyo koko na pi mito kony, do kony kora!’
- 57 In iko nyikino buta kakame alwongi kede, di iko waco na be, ‘Kur ibed kede lworo.’
- 58” In ipido pira, Okwe Rwot, in ilako kuo na.
- 59 In itieko neno gikarac kame kotimo na, nan do ngol kop aganga.
- 60 In itieko neno mit gi me timo onyanga i koma, iik areco dedede kame kitie kede i koma.
- 61” In itieko winyo anywar gi i koma, Okwe Rwot, in ingeo iik gi dedede i koma.
- 62 Gin kiweweo di kiyamo ngurunguru kikwota piny yuluyul.



⁶³Akadi di kitie bedo amoto kitie cungo, neningo, ango en kame kigolao kede were.

⁶⁴” Okwe Rwot, mi gi alola pi tice gi, pi gikame cing gi otimo;

⁶⁵Ket ilam i kom gi di iko mino gi kibed kede cweruny!

⁶⁶Wap yorgi di iko tieko gi pitipit ki wi lobo!”

Koko ka Yeremia 4

Yerusalem ingei Poto

¹Saabu koudo meny otieko doko cocol; kide kame kogero kede tempulo do opete i gudi me bomba.

²Awobe me Sion oudo beco ne wa bala saabu, do nan kotero gi bala agune kame kocweo kede elupe.

³Akadi ikween da doto idwe gi, do jo na tie kede gero but idwe gi bala ikululun atie i wi tim.

⁴Leb idwe gi moko i dan gi pi orio, idwe gi kwao cam, do likame tie ngatamoro amio gi.

⁵Jo koudo camo cam abeco tie to kec i gudi me bomba; jo koudo odongo i kuo ajabajaba tie kukuro oduru mono giacama.

⁶Alola kame komio jo na kalamo alola kame komio jo me Sodoma, bomba kame opoto atura abongo cing ngatamoro tuno iye.

⁷Jotel me Yerusalem oudo olony bala akako, oudo kitar bala cak. Kom gi oudo obokere kalamo kidi koral, di yer wi gi meny bala kidi sapir.

⁸Nan cal gi olokere odoko col kalamo atuk, likame doko kotwero ngeno gi i gudi me bomba. Del me kom gi ojung i kom cogere me kom gi; di kituo bala yen.

⁹Jo kame oudo koneko i yi can gi oudo beber kalamo jo kame nataman tie to kec, jo kame kuo gi yai momot pi li me cam.

¹⁰Cing mon atie kede cuny me kisa en kotedo idwe gi kikokome. Gin kidoko cam gi kakame komuducaro kede jo na.

¹¹Rwot ojalakino gero mere dedede, en ecwinyo mac i Sion kowange dopodop paka i dud apama.

¹²Abakai me wi lobo oudo likame romo yei, akadi jo dedede me wi lobo da oudo likame yei be joasura arabo jokwor oudo bino donyo i erute me Yerusalem.

¹³Manoni otimere pi dub me inabin mege kede pi dub me josaseredoti mege, gin jo kame kionyo remo me jo kopoore i dier bomba.

¹⁴Inabin kede josaseredoti nogo oko donyo awiratoi i gudi me bomba, di kipwokere kede remo, omio likame tie ngatamoro koudo twero mulo kiton igoen gida.



¹⁵Jo oko donyo lelemo negi be, “Irwaunu! Wun jo kopwokere! Kur imulanu!” Aso, gin kiko donyo awiratoi i diere me atekerin, di jo waco negi ki kugonogo be, “Likame ibinunu bedo kan.”

¹⁶Rwot kikome en oko sasaro gi, en likame doko ebino paro pirgi. Jo likame onyuto wor kede cuny me kisa but josaseredoti kede joadongo.

¹⁷Wang wa okuro neno kony kwekwe. Obedo kuro kony kibun ateker kalikame oko bino konyo wa.

¹⁸Jokwor obedo wapo yorwa, omio likame oudo otwero ot ki gudi me bomba wa. Ceng wa oudo onoko, ajikini wa oudo otuno.

¹⁹Jokwor awapo wa oudo dwir kalamo ekokom apor i malo, kiriamere kede wa i wi mori, kibuto piny kino wa i wi tim.

²⁰Gin kiko mako atan me kuo wa, en abaka kame Rwot oyeru. En ngat kame wan oudo owaco be bino gwoko wa kibun atekerin apat.

²¹Lelunu kede yomcuny, wun jo me Edom, kede wun jo kame bedo i lobo me Us. Do wuda ibinunu mato ikopo me akodi can nono; ibinunu mer kede, di ikounu gonyo igoen idongunu nono.

²²Sion otieko udo alola pi dub mege; Rwot likame doko bino weko wa omeede bedo obukui. Do in Edom, Rwot bino mini alola pi dub ni; en ebino woto tice ni areco kakaler.

Koko ka Yeremia 5

Ilega me Kwano Kisa

¹Okwe Rwot, yutuno gikame otimere ne wa; ngoloro wa iko neno lewic kame otie iye!

²Lobo wa do tie i cing jokumbor, gin en kame kitie do bedo i miere wa.

³Wan otieko doko idwe kic, pien oli kede papi wa; toti wa odoko do bala apuserun.

⁴Nan wan do miero owil awila pii me amata, doko da miero owil awila yen me tedo.

⁵Kokolo wa tetek kede ayokoi i ngut wa; ool do likame koyei mino wa wei.

⁶Wan oyei jalere i cing Misiri kede Asiria pi udo cam aromo mino wa bedo kuo.

⁷Joakwari wa bin odubo, do nan gin kitieko totoun; nan wan do otie neno can pi dub gin.

⁸Ipasoi en odoko jo kame pugo wa, likame tie dano moro koyaro lako wa ki cing gi.

⁹Ka wan ooto mono cam udo ocato kuo wa but jonek me wi tim.

¹⁰Lieto me kec owango kom wa oko dop bala keno.



- 11**Kobuto tetek kede mon i Sion, kede da anyira kalikame pwodi ongeo cuo i bomban me Yuda.
- 12**Koliero jotel kede bad gi paka to, likame komio joadongo wa wor.
- 13**Kodio awobe wa tetek riego bala ipasoi, kigete kede isikin adongo i ngut gi.
- 14**Jo adongo likame bobo bedo i dog irutei me bomba, doko awobe da ojiko wero were.
- 15**Kilel koudo tie i cuny wa ojik; miel kame oudo otie kede olokere odoko iturur.
- 16**Angosibib wa otieko poto; otie i can, pien wan odubo.
- 17**Cuny wa tie kede tuwo, wang wa da odoko mwadamwada.
- 18**Pien moru me Sion odong kene abongo jo, ikween en kame do cede kiye.
- 19**Do in, Okwe Rwot, in ipugo nakanaka; apugan ni tie pi jo me kare dedede.
- 20**Pinyo komio wi owil kede wa atwal atwala? Pinyo komio iweko wa pi kare alac kaman?
- 21**Dwok wa buti, Okwe Rwot, me wek odwog buti; mi wa odok i kuo kangoce sek.
- 22**Kwanyo ka amoto itieko do dagi wa atwal atwala, arabo ka itieko do doko ger kede wa gero kalikame jik.



Esekeri

Esekeri 1

ESEKERI ONENO RUBANGA TIEN ME AGEGE I GIANYUTA

1.1—7.27

Kom ka Rubanga me Ajakanut

- ¹ I buto duwe kany me duwe me ongwon i mwaka me ot adek, di oudo ango atie kede jo koudo tie obukui bala mabus, i nget ecilet me Kebar, malo oko yabere, di ango ako neno gianyuta ka Rubanga.
- ² Mwaka nono oudo obedo mwaka me kany cako i kare kame bin kotero kede Abaka Yekoyakin obukui bala mabus.
- ³ Rwot bin oko mina kop mere i Babilon i nget ecilet me Kebar, ango Esekeri ngasaseredoti, wot ka Busi, di twer ka Rwot oko bino i koma i kunono.
- ⁴ Ango ako ngoloro di ako neno yamo me kot tie bino ki bad tetu malo. Kot oudo tie memenyun kitek i edou ati di ecaro nget edou nono lung, di gimoro kame cal bala nyonyo ameny tie i diere me kakame kot memenyun iye nono.
- ⁵ I diere me yamo me kot nono gimoro oudo tie iye kame cal bala giakuo ongwon. Gin oudo kitie i cal me jo.
- ⁶ Acelacel kikom gi oudo tie kede nyime ongwon kede bwome da ongwon.
- ⁷ Tien gi oudo oriore, di kitie kede abelekek kame cal bala me twon, doko oudo kimeny bala nyonyo buronsi kame kokiso kiber.
- ⁸ I dud bwom gi ongwon nogo dedede, oudo acelacel tie kede cing dano. Giakuo ongwon nogo oudo tie kede nyim gi kede bwom gi kaman:
- ⁹ bwom giakuo acelacel oudo riamo kede me giakuo are kame kio kede. Ka oudo kitie ot, ngat acelacel oudo tenaro ot anyim abongo lokere.
- ¹⁰ Cal me nyim gi oudo tie kaman: gin ongwon nogo oudo nyim gi cal bala me dano i tetu nyime, nyim engu i bad tetu cam, nyim twon i bad tetu ngodal, kede nyim ekokom kicen ngei gi.
- ¹¹ Nyim gi oudo tie kaman. Bwom gi oudo oyarere malo; bwom are me giakuo acelacel oudo riamo kede me ka ngawote, do are icegun oudo umo kom gi.
- ¹² Giakuo acelacel oudo nyime tie i bad ongwon dedede; oudo kitenaro ot anyim gin dedede karacel tetu moroni kenekene bala kame cuny gi mito, abongo lokere.
- ¹³ I diere me giakuo nogo oudo tie iye gikame cal bala itonge arorano me mac, oudo eliel ineno bala mac me rau awire tuni tuni i diere me giakuo nogo. Mac nono oudo caro piny kiber, doko meny acal bala me kot oudo tie iye.
- ¹⁴ Giakuo nogo oudo dwidwitun tunituni bala meny me kot.



- ¹⁵ Di oudo ango atie neno giakuo nogo, ako neno namisigan ongwon di kitie cungo piny i nget giakuo nogo, namisiga acel i nget giakuo acelacel.
- ¹⁶ Namisigan ongwon nogo oudo cacal, di kimeny bala kidi me wel kame kolwongo be beril, doko oudo kotimo gi di ineno bala namisiga acel orire donyo i yi ocelu.
- ¹⁷ Ka gin oudo kitie ot, gin oudo kioto i bad tetu moroni kenekene abongo lokere.
- ¹⁸ Lak namisigan nogo oudo icogoror malo cogoror kame kelo lworu, di wang tie i kom gi rimaro.
- ¹⁹ Ka giakuo nogo oudo tie ot, namisigan nogo da oudo oto kede gi i nget gi; doko ka giakuo nogo oudo oko por malo, namisigan nogo da por kede gi.
- ²⁰ Giakuo nogo oudo oto karamoroni kenekene kame gin kimito, di namisigan da ko ot karacel kede gin, pien giakuo nogo oudo tie kede twer i kom namisigan nogo.
- ²¹ Aso, i kare dedede kame giakuo nogo oto kede arabo kicungo amoto kipor malo, namisigan da timo kamanono, pien giakuo nogo oudo tie kede twer i kom namisigan nogo.
- ²² Malo me wi giakuo nogo oudo tie iye gikame opetere di emilimili bala akako.
- ²³ Giakuo nogo oudo tie cungo i dud gi kopetere nono di acelacel kikom gi oyararo bwome tetu but ngakio mere i ngete tuni tuni, di eumo kome kede bwome are icegun.
- ²⁴ Kakame gin kitie por kede, ango ako winyo bwom gi mor bala pii me nam. Bwom gi oudo mor winyere bala woo me dwan twon ekodet me isirikalen arabo bala dwan Rubanga Won Twer. Kakame gin kicungo kede, gin kiko dwoko bwom gi piny.
- ²⁵ Kakame gin kicungo kede di kiko dwoko bwom gi piny, dwan moro oko winyere ki gi kopetere kame oudo tie malo me wi gi.
- ²⁶ I wi gi kopetere nono oudo tie iye gikame cal bala kom me ajakanut kame kotimo kede kidi me wel atie ebululu ebululu, di gimoro kame cal bala dano oudo tie bedo i wie.
- ²⁷ Cako ki kakame cal bala piere dok malo ango aneno gimoro kame cal bala nyonyo ameny tie iye, gimoro kame cal bala mac, di erimaro en; doko cako ki piere dok piny ango aneno gimoro kame cal bala mac tie iye; rieny oudo oluke,
- ²⁸ rieny kame erangi mere cal bala me etauloka. Manoni en kite kame deyo ka Rwot oudo oneno kede buta.

Rubanga Olwongo Esekeri pi bedo Enabi

Kakame ango anene kede, ango ako rieberu piny, di ako winyo ngatamoro di tie yamo.

Esekeri 2

¹ En ewaco na be, “Wot ka dano, yai malo iko cungo, di ango ako bino yamo kedi.”



- ²Di en oudo etie yamo, tipo ka Rubanga oko donyo i koma di eko mina acungo, di ango ako winyo di en emeede kede yamo be,
- ³” Wot ka dano, ango atie cwani but jo Isirael. Ango atie cwani but ateker me jojemo kame otieko jemo na. Gin karacel kede joakwari gi kibedo turo cik na tuno tin.
- ⁴Gin jo kame li kede wor doko wi gi tek. Ango atie cwani but gi pi ot waco negi gikame ango Rwot Rubanga atie waco negi.
- ⁵Akadi gin kiwinyi arabo kidagi winyi (pien gin kibedo jojemo), gin kibino ngeno be enabi oudo obedo i diere gi.
- ⁶” Do in wot ka dano, kur ilwor gi, doko kur ilwor kope kame gin kiwaco, bed bala ebino bedo ni ineno bala okuto kede ocokocok oluki, kede bala itie i diere me ekilitona; kur ilwor kope gi, doko kur cunyi nyote pi ekite me neeno gi, pien gin kibedo jojemo.
- ⁷In ibino waco negi kop kame ango awaco, akadi gin kiwinyi arabo kidagi winyo; pien gin kibedo jojemo.
- ⁸” Do in, wot ka dano, poore iwiny gikame ango awaco ni; kur ibed ngajemo bala gin. Ngam dogi di iko camo gikame ango atie mini.”
- ⁹Ango ako ngoloro, di ako neno cing moro di korie buta, di emako itabu adola kame kowandiko.
- ¹⁰En eko yabo itabu adola nono i nyima; oudo kowandiko yie kede ngee, kope nogo oudo obedo me iturur, koko, kede can.

Esekeri 3

- ¹ Rubanga oko waco na be, “Wot ka dano, cam gikame komii; cam itabu adola noni, di iko ot yamo kop ne jo me Isirael.”
- ²Aso, ango ako ngamo doga di en eko mina itabu adola nono pi camo.
- ³En ewaco na be, “Wot ka dano, cam itabu adola noni kame ango atie mini di iko yeng kede.” Di ango ako came, ako ude emit bala mokic.
- ⁴Rubanga oko bobo waco na be, “Wot ka dano, ot but jo Isirael di iko waco negi kope nango kame atie waco ni.
- ⁵Ango likame atie cwani but jo mogo kame yamo leb apat atek, do but jo me Isirael,
- ⁶likame twon jo mogo kame leb gi papat di etek, leb kalikame in iniang. Ateteni ka koto oudo ango acwai but jo kame yamo leb akodi manono, koto gin kiwinyo kop nin.
- ⁷Do jo Isirael likame bino winyo kop kame in iwaco negi, pien gin likame kiyei winyo kop na. Gin dedede kili kede wor doko wi gi tek.
- ⁸Neningo, ango atieko mino wangi odoko tek pi riamo kede mergi, kede wi da atieko mino odoko tek bala mergi.



⁹Ango atieko mino wi odoko tek bala kidi, amie edoko tek kalamo lela; kur ilwor gi arabo cunyi nyote pi ekite me neeno gi, pien gin kibedo jojemo.”

¹⁰Rubanga oko medo waco na be, “Wot ka dano, cik yiti winyo kope nango kame awaco ni dedede di iko keto gi i cunyi.

¹¹Di do in iko ot but jo ni kame tie obukui, di iko waco negi gikame ango Rwot Rubanga atie waco negi, akadi gin kiwinyi arabo kidagi winyo.”

¹²Di do tipo ka Rubanga oko tinga malo, di ango ako winyo dwan moro kame mor i cen ngea waco be, “Pak bed but deyo ka Rwot i kabedo mere!”

¹³Manono oudo obedo mor kame timere pi wawakun me bwom giakuo, kede mor me namisigan kame oudo tie i nget gi. Gin en kame oudo kitimo twon mor nono.

¹⁴Twer ka Rwot oko bino i koma kede teko adwong, di tipo mere oko tinga etera tenge, ango ako ot kede kec cunyi doko di ager.

¹⁵Di ako tuno Tel Abib, i nget ecilet me Kebar, kakame oudo jo atie obukui tie bedo iye, di ango ako bedo kede gin kunono pi ceng kanyaare, di gianyuta kame oudo aneno oneko koma.

Rwot Oyero Esekeri pi bedo Ngakino Piny

(Esekeri 33.1-9)

¹⁶I ngei ceng kanyaare, Rwot oko yamo keda.

¹⁷En ewaco be, “Wot ka dano, ango atieko keti pi bedo ngakino piny pi jo me ot ka Isirael. In ibino winyo kop ki buta di in iko bino mino gin ikwenyar kame wok ki buta.

¹⁸Ka ango awaco ne ngat kame timo gikarac be, ‘Ateteni in ibino to, ‘di in likame iko kwenyaro en pi weko yote areco me kuo mere tetekeny elak kuo mere, en ebino to i dub mere; do ango abino maro to mere i wi.

¹⁹Do ka in ikwenyaro ngat kame timo gikarac, di en eko dagi weko tim mere arac nono, arabo yote areco me kuo mere, en ebino to i dub mere, do udo in itieko lako kuo ni.

²⁰” Bobo ka ngat kopoore oweko kuo mere me poore di eko lokere timo dub, di ango ako cibo i nyime gikame getero en, en ebino to pien in likame ikwenyaro en. En ebino to pi dub mere, doko ango likame abino yutuno gi kabeco kame en oudo ebedo timo. Do ango abino maro to mere i wi.

²¹Aso ka in ikwenyaro ngat kopoore be kur etim dub, di en likame eko timo dub, en ateteni ebino bedo kuo, piento en ewinyo ikwenyar; doko ida udo itieko lako kuo ni.”

Esekeri likame bino Karuno Yamo

²²Di twer ka Rwot oko bino i koma i kunono; di ako winyo di Rwot waco na be, “Yai di iko ot i Aditot. Ango abino yamo kedi i kunono.”



²³Aso, ango ako yai di ako ot i Aditot, di ako neno deyo ka Rwot kunono, deyo kame cal bala kame ango oudo aneno i nget ecilet me Kebar. Ango ako riebere piny.

²⁴Tipo ka Rubanga oko donyo i koma, di eko kiarao ango ako cungo. Rwot oko waco na be, “Oti di iko cegere i odi.

²⁵Do in, wot ka dano, kobino tweni kede aunon, di likame iko karuno ot i dier jo.

²⁶Ango abino mino lebi moko i dani tetekeny likame in ikaruno yamo, di in likame iko bino karuno kwenyaro gin, pien gin kibedo jojemo.

²⁷Do i kare kame ango abino yamo kedi, ango abino yabo dogi, di in iko bino waco negi gikame ango Rwot Rubanga atie waco. Jo kame bino winyo, wek gi kiwinyi; doko jo kame bino dagi winyo, wek gi kibedi; pien gin kibedo jojemo.”

Esekeri 4

Esekeri Oporo Epone kame kobino Luko kede Yerusalem

¹Rubanga oko waco na be, “Wot ka dano, kwany matapali di iko kete i nyimi. Goi cal me bomba me Yerusalem iye.

²Pi nyuto be koluko bomba, tim cal me lobo kame kokumemo me yito i wi apama me bomba, kede kakame kotoro kame koturo kede apama nono. Tim da cal me kimere me isirikalen atie sure, di iko cicibo gi me tuturo apama nono rimaro en.

³Kwany itatany me nyonyo di iko cibe bala apama i dierediere nin kede cal me bomba kame in igo nono. Cung di nyimi oneno bomba, di iko mine ebed bala jokwor oluke, di in en inonono kame itie luke. Manoni en anen me gikame bino timere i kom ateker me Isirael.

⁴⁻⁵” Di do in iko bino buto piny kede ngeti tetu ngodal, di ango ako bino mini ikanyo alola kame koto oudo amio jo me Isirael. In ibino buto kunono pi ceng tol adek kede ot kanyangon (390) di itie kanyo alola nono. Ango atieko ngolo nin kop me kanyo alola gin, ceng acel pi mwaka acelacel kame alola gin bino tero.

⁶Ka itieko gi, ibino bobo buto piny kede ngeti tetu cam, di iko kanyo alola pi jo me Yuda pi ceng ot ongwon; buli ceng acel pi mwaka acel me alola gin.

⁷” Mi nyimi nen bomba me Yerusalem kame jokwor otieko luko nono, di iko murao kop i kome di badi tie nono.

⁸Neningo, ango abino tweni kede tol di likame iko karuno lokere tetu moroni tuno di kare kame koluko kede bomba otiek.

⁹” Aso, kwany engano kede mawele, muranga kede kao, kal kede bel. Nyal gi i sepula acel di iko tedo mugati. Manono en gikame in ibino camo i kare me ceng tol adek kede ot kanyangon (390) kame in ibino tieko di ibuto kede ngeti tetu ngodal.

¹⁰Cam kame in ibino camo kobino pimo apima, mugati kame peko mere tie guram tol are kede ot adek (230) tien acel buli ceng i esawa kame komoko.



¹¹Pii kame ibino mato da kobino pimo apima, ikopon are buli ceng i esawa kame komoko.

¹²Ibino moko mac kede cet me jo, di iko tedo mugati me mawele iye di jo dedede neno, di iko came.”

¹³Rwot oko waco be, “Manono en ekite kame jo me Isirael bino camo kede cam kalikame iswil yei negi camo, i diere me atekerin kame ango abino riamo gi iye.”

¹⁴Di ango ako gamo be, “Likame kamano Rwot Rubanga! Ango lem pwodi likame apwokere. Cako di pwodi ango atitidi ango pwodi likame acamo gi oto atoa arabo kame le moro en oneko. Likame pwodi tie ringo moro me gi kopwokere kotieko tuno i dogo.”

¹⁵Di Rubanga oko waco na be, “Neningo, ango abino mini do itedo mugati ni kede woyo akaka cet me jo.”

¹⁶Di eko meede waco na be, “Wot ka dano, ango ayaro mino mugati rwenyo ki Yerusalem. Jo me Yerusalem bino camo mugati kame kopimo apima di kitie kede lwo; doko kibino mato pii da kame kopimo apima di cuny gi popoto.

¹⁷Mugati kede pii bino tiek negi, di gin kiko donyo neeno ken gi ken gi di cuny gi onyote, doko kibino jony pi dub gi.”

Esekeri 5

Esekeri Olielo Yer Wie

¹Rwot oko waco be, “Wot ka dano, kwany epima abit di iko tic kede me lielo yer wii kede me tiki. Di iko pimo yer nogo i misani, iko popoko gi kabedere adek.

²Dul acel i kom adek me yer nogo in ibino wango i mac i bomba, ka kare me luko bomba otiek. Dul acel ace in ibino kwanyo di iko ngongolo en kede epima ni di irimaro bomba i ooko. Dul acel odong mere in ibino sasaro yamo ko tero gi, di ango ako bino riamo yor gi kede epima.

³In ibino kwanyo yer mogo anonok kikom magonogo, di iko tweno gi ilak ekanso ni.

⁴Di bobo kikom magonogo in iko kwanyo mogo, di iko uco gi i mac, iko weko gi kiwang. Mac bino cakere ki kanono di eko nyai ewang jo me Isirael dedede.”

⁵Rwot Rubanga waco be, “Man en Yerusalem. Ango atieko cibe i diere me atekerin, di pinye oluke rimaro.

⁶Do en etieko jemo edagi lubo cik na kede iswilia na, di tim mere oko doko rac kalamo me atekerin kede pinye koluke. Yerusalem odagi cik na, doko edagi lubo iswilia na.

⁷Pi mano, ango Rwot Rubanga atie waco kaman: Piento in idagi lubo iswilia na akadi gwoko cik na, itieko doko ngaelol kalamo atekerin koluki. In ilubo itok me atekerin koluki nogo.



⁸Manono en komio ango Rwot Rubanga atie waco ni be ango kikoma en ngakwor ni. Ango abino mini alola di atekerin dedede neno.

⁹Ango abino mini alola pi tim ni kame cunya dagi nono, alola kame lem pwodi likame amio doko likame abino medo mino.

¹⁰ Jonywal bino camo idwe gi i diere wu, doko idwe da bino camo jonywal gi. Ango abino mini alola, doko jo ni kame bino bwot dong kuo, ango abino sasaro i bad tetu dedede.

¹¹” Pi mano, ango Rwot Rubanga akwongere be, pien in imunao kabedo na kacil kede jamini kame cunya dagi karacel kede tim ni aneno rac, ango abino tongi piny abongo kisa.

¹²Dul acel i kom adek me jo ni tuwo kede kec bino neko i bomba; acel i kom adek kobino neko kede epima i ooko me bomba; di acel i kom adek ango ako bino sasaro i bad tetu dedede di ako riamo yor gi kede epima.

¹³” Ango abino bwoto lilo na kede gero na lung i komi tuno ango neno be eromi do; di in iko bino ngeno be ango, Rwot, atieko yamo kedi kede gero.

¹⁴Medo i kom manono, ango abino mino in Yerusalem idoko ameje kede gi me anyera i diere me atekerin koluki, kede i wang jo kame beo i ngeti.

¹⁵” I kare kame ango abino lilo kede di ako doko ger ako mini alola alit, ibino doko gi me anyera kede me acae, gi me ikwenyar kede gikame neno rac kame kelo ne jo lwo, but atekerin koluki.

¹⁶Abino cwano ne jo ni kec alit bala emal kame kogweo negi pi muducaro gi. Abino ruruco cwano kec i kom gi tuno cam gi tiek pitipit.

¹⁷ Abino cwano kec kede leini ager i komi, di gin kiko neneko idwe ni. Tuo me aumpuli kede nek bino beo i komi, doko abino kelo yi i komi. Ango Rwot atieko waco.”

Esekeri 6

Rwot Oronkino Tim me Woro Caljwogi

¹Rwot oko yamo keda.

²En ewaco be, “Wot ka dano, lok nyimi nen tetu mori me Isirael di iko murao kop i kom gi.

³Wac negi kaman: Wun mori me Isirael, winyunu kop ka Rwot Rubanga! Rwot Rubanga tie waco ne mori kede imukuran, isamai kede aditoto kaman: ango kikoma abino kelo yi i komu, di oko dudubo kabedere kame jo woro iye caljwogi.

⁴Kobino mumuko alutarin wu, di oko tuturo alutarin me wango odok angwe kur. Jo dedede kame tie kunono kobino neko i nyim caljwogi gi.



⁵Ango abino mino liele me jo me Isirael rade i nyim caljwogi gi; di ako sasaro cogere gi rimaro alutarin.

⁶Kabedere dedede kame jo Isirael bino bedo iye, bomban gi bino dong nono, doko kabedere gi me woro caljwogi kobino muducaro. Caljwogi gi kobino tuturo di oko muducaro, doko alutarin gi me wango odok angwe kur kobino tongotongo piny, di oko bino mino gi dedede kame gin oudo kitimo rwenyo atwal.

⁷Kom jo oto bino rade i diere gi, di gin kiko bino ngeno be angu en Rwot.

⁸” Do angu abino weko jo mogo dong kuo. Jo mogo kikom gi bino bwot di gin kiko sasaru i diere me atekerin i pinye apapat.

⁹Jo kame bino bwot kikom gi bino yutuno angu i diere me atekerin kakame kotero gi iye bala mabus. Gin kibino yutuno kite kame oudo kimia kede twon lewic pi mit me cuny gi kolokere tenge ki buta, kede imiela atie i wang gi oko mino gin kilokere but caljwogi. Di do gin kiko bino nenere ken gi di kiko bedo kede acae i kom gi ken gi pi gikareco kame gin kitimo, kede pi tim gi dedede kame reco.

¹⁰Gin kibino ngeno be angu en Rwot. Angu likame oudo angato negi me nono be abino kelo can i kom gi.”

¹¹Rwot Rubanga waco be, “Dodongunu koru! Didipunu piny kede tien wu! Kokunu pi can, pi tim areco dedede kame jo me Isirael otieko timo. Gin kibino to i yi, kibino to kec kede tuwo me aumpuli.

¹²Jo kame tie kakabor tuwo me aumpuli bino neko gi; jo kame tie kabedere kiyapiyapi bino to i yi; jo kame bino bwot dong kuo bino to kec. Manono en kite kame angu abino bwoto kede gero na i kom gi.

¹³Liele gi bino buto i nget caljwogi gi, i nget alutarin gi, i wi imukuran dedede, i wi mori dedede, i dud yen koduko dedede, i dud yen oak koduko dedede, i kabedere lung kame gin oudo kimio iye giayala angwe kur but caljwogi gi.

¹⁴Angu abino tic i kom gi kede twer na, di ako mino lobo gi doko ameje, kabedo kalikame jo bedo iye. Abino timo manono i kabedere dedede kame gin kibedo iye, cako ki wi tim tuno Ribula. Di do gin kiko bino ngeno be angu en Rwot.”

Esekeri 7

Ajikini iyapiyapi ne Isirael

¹Rwot oko yamo keda.

²En ewaco be, “Wot ka dano, manoni en gikame angu Rwot Rubanga atie waco ne lobo me Isirael: Ajikini otieko tuno! Ajikini me lobo lung!

³” Isirael, ajikini otieko tuno nin. Angu abino bwoto gero na i komi; abino ngolo kop i komi di alubo yote me kuo ni. Angu abino mini alola pi tim areco dedede kame in itimo.



⁴Ango likame abino weki aweka arabo timi kisa. Ango abino mini alola pi tim areco kame in itieko timo. Di do in iko bino ngeno be angu en Rwot.”

⁵Rwot Rubanga tie waco be, “Can tie bino i komi di kilubere aluba.

⁶Ajikini otieko bino, etieko tuno. Neni, etie bino nin!

⁷Can otieko poto ne wu, Okwe wun jo kame bedo i lobo noni. Kare me atotolun otieko tuno, edoko iyapiyapi, likame bobo ilelem me kilel bino bedo tie i wi mori.

⁸” Nataman angu ayapuno bwoto lilo na i komu. Angu abino ngolo kop i komu di lubere kede yote me kuo wu, di ako mino wu alola pi tim wu areco dedede.

⁹Angu likame abino weko wu aweka arabo bedo kede cuny me kisa butu. Angu abino mino wu alola pi tim areco dedede kame wun itiekunu timo. Di do wun ikounu bino ngeno be angu Rwot en kame amio wu alola.”

¹⁰Neningo, ceng nono tie bino. Can otieko tuno ne jo Isirael. Tim me gero oyitiriro. Ewaka otieko doko dwong.

¹¹Tim me gero otieko doko bala ebela me mino jo alola pi gikareco. Likame tie ngatamoro kikom gi kame bino dong, akadi jamini gi arabo abar gi.

¹²Kare otieko tuno, ceng otieko doko iyapiyapi. Ngat kame wilo jamini kur leli, akadi ngacat da kur tururo, pien lilo ka Rubanga bino poto i kom jo dedede.

¹³Pien jocat likame bobo bino dwoko gikame gin kitieko cato, akadi di pwodi gin kikuo. Pien lilo ka Rubanga mako jo dedede, doko likame ebino dok cen. Pi dub gi, gin likame kikaruno gwoko kuo gi.

¹⁴Kotieko kuto agwara di oko iiko jamini dedede me yi. Do likame tie ngatamoro kame yai di eko ot i yi, pien lilo ka Rubanga tie i kom jo dedede.

Alola but Jo Isirael pi Dub gi

¹⁵Yi tie ooko me bomba, tuwo me aumpuli kede kec tie i bomba. Jo kame tie obar bino to i yi; jo kame tie i bomba kec kede tuwo me aumpuli bino neko gi.

¹⁶Ka jo mogo obwot, kobino udo gi i wi mori bala aweleko me aditoto, di gin dedede kitie koko pi dub gi.

¹⁷Bad jo dedede bino doko lojolojo, di cong gi ko bino doko goro.

¹⁸Gin kibino ngapo ipukoi pi cweruny di kitie kede lworu atek. Kobino lielo wi gi di lewic ko mako gi.

¹⁹Gin kibino kwikwito siliba gi i dier gudi bala gikame kony gi li, doko saabu da gin kibino tero bala gi kopwokere, pien akadi siliba arabo saabu likame karuno lako gi i ceng me lilo ka Rwot. Likame kikaruno tic kede gi ka kec oneko gi arabo camo gi di kiko yeng kede gi. Saabu kede siliba en kobedo mino gin timo dub.

²⁰Gin oudo kibedo wakere pi mwolere gi acil, do kiko lokere tic kede gi me timo caljwogi. Manono en komio Rwot omio abar gi olokere odoko gikame rac negi.



²¹Rwot waco be “Ango abino mino jokumbor yako gi, jo kame ikiteso gi reco me wi lobo; gin kibino yako abar gi di kiko munao en.

²²Ango abino jalo jo nogo munao kabedo na kame pire tek. Jogero nogo bino donyo iye, di gin kiko munao en.

²³” Timunu irikoi! Pien tim me nek opong i lobo, doko tim me gero dwong i bomba.

²⁴Ango abino kelo atekerin kame ikiteso gi reco kalamo atekerin apat di gin kiko gamo ude wu. Ango abino jiko ewaka me jo atek, di kabedere wu kacil oko bino munao.

²⁵Ka kare me peko otuno, ibinunu mono mulem do likame ibinunu ude.

²⁶Can bino bedo lubere aluba, rwonge arac da bino ruruco bino. Ibinunu bedo mono gianyuta moro kibut enabi do likame ibinunu udo. Ngasaseredoti da likame bino bedo tie kede kop moro kame epoore pwoyo jo, akadi joadongo da likame bino bedo tie kede tam moro kame kipoore mino.

²⁷Abaka bino tururo, ngapug gen mere bino tiek, di kom jo miel amiela pi lworo. Ango abino keto can i komu di lubere kede yote me kuo wu, doko abino timo ne wu gikame wuda ibedunu timo ne jo apat. Manono bino mino wun ingeunu be angon en Rwot.”

Esekeri 8

ESEKERI ONENO RUBANGA I GIANYUTA TIEN ME ARE

8.1—10.22

Woro Caljwogi i Yerusalem

¹I buto duwe kany me duwe me kanyape i mwaka me kanyape me wan bedo obukui bala mabus, di oudo angon atie bedo i oda karacel kede joadongo me Yuda, cucuto twer ka Rwot oko bino i koma.

²Ango ako ngoloro, di ako neno gimoro kame cal bala dano. Cako ki piero dok piny aneno iye gimoro kame cal bala mac, doko cako ki piero dok malo angon aneno iye gimoro kame cal bala nyonyo ameny.

³En eko riengo gimoro kame cal bala cing dano, di eko mako yer wia. I gianyuta nono tipo ka Rubanga oko tinga malo i yamo di eko tera Yerusalem, i erute kame donyo i diakal me yie, kame oudo tie i bad tetu malo, kakame oudo oketo iye caljwogi kame oudo mio nyeko mako Rubanga kitek.

⁴Ango ako neno rienny me deyo ka Rubanga, bala kame oudo aneno i nget ecilet me Kebar.

⁵Di do Rubanga oko waco na be, “Okwe wot ka dano, kong ting wangi di iko neno bad tetu malo.” Ango ako ngoloro bad tetu malo kunono, di ako neno caljwogi kame oudo mio nyeko mako Rubanga tie i nget erute kame donyo kakame alutari tie iye.



⁶Rubanga oko waco na be, “Wot ka dano, mam ineno gikame gin kitie timo. Manono en gi me kwer kame jo me Isirael tie timo kan, gikame tie riama tenge kakabor ki kabedo na kacil. Do pwodi ibino medo neno gikareco kalamo kano.”

⁷Di en eko tera i dogola kame donyo i diakal; ango ako ngoloro, di ako neno kakotuc i apama.

⁸En eko waco na be, “Wot ka dano, kuny kor apama ituci.” Kakame ango ako kunyo kede kor apama, ako udo ekeko moro tie iye.

⁹En eko waco na be, “Donyi, di iko neno gikareco, tim aneno rac kame gin kitie timo kanoni.”

¹⁰Aso, ango ako donyo di ako neno gikame oudo tie kunono. I kor apama rimaro oudo ogo iye cal me gi dedede kame liao alia, kede me leini mogo kame neno rac, kede cal me caljwogi dedede kame jo Isirael oudo tie woro.

¹¹Joadongo ot kanyaare me Isirael oudo tie cungo i nyim gi, kiton Yasania wot ka Sapan da oudo tie cungo karacel kede gin. Ngat acelacel kikom gi oudo tie mako gi me dunyo odok angwe kur, di yiro angwe kur duny kiye eoto malo.

¹²Rubanga oko waco na be, “Wot ka dano, mam ineno gikame jotel me Isirael tie timo i mung i kakacol, ngat acelacel i agola mere me caljwogi. Gin kitie waco be, ‘Rwot gire likame neno wa! En etieko jalo lobo noni.’ “

¹³Rwot oko waco na be, “In iyaro pwodi neno gikareco kame gin kitie timo, kame kalamo kano.”

¹⁴Aso, en eko tera i erute me bad tetu malo me tempulo. Mon mogo oudo tie bedo kunono di kitie koko rubanga Tamus.

¹⁵Rwot oko waco na be, “Wot ka dano, mam ineno mano. In pwodi iyaro neno twon tim mogo me kwer areco kalamo mago.”

¹⁶Di en eko tera i diakal me yie me tempulo. Ango ako neno cuo kame romo ot are kiwie kany, di kitie i nget ekeko me kabedo kacil, i dierediere me alutari kede agola me kadonyo. Gin oudo kiloko ne tempulo ka Rwot ngei gi, di kiriebere piny nyim gi oneno tetu kide, kitie woro ceng kame tie wok.

¹⁷Rwot oko waco na be, “Wot ka dano, mam ineno mano da. Etie gikarac twatwal pi jo me Yuda timo tim areco kacal kamago kan. Do manono likame pwodi romo gi. Gin bobo da kitieko nyano tim me gero i lobo di kiko medo wango cunya. Neningo kite kame kitie nywara kede nywar kokato kare.

¹⁸Pi manono, ango abino tic kede gi di alilo. Ango likame abino weko gi aweka, akadi bedo kede cuny me kisa but gi. Akadi gin kikok buta kede dwan amalalo, ango likame abino winyo koko gi.”

Esekeri 9

Komio Yerusalem Alola



¹Di do ango ako winyo Rubanga lelemo kede dwan amalo be, “Nyikinonu wun jo kame bino timo nek i bomba, ngat acelacel poore mak gi me yi mere.”

²Cuo kanyape oko wok ki tetu erute me bad tetu malo, ngat acelacel oudo mako gi me yi mere. Icuo moro kongapo igoen apwot di kimeny oudo tie kede gi, di emako jamini me iwandik. Gin dedede kiko donyo i diakal me ot ka Rwot di kiko cungo i nget alutari kame kotimo kede nyonyo buronsi.

³Aso, deyo kame nyuto tie ka Rubanga me Isirael oudo oyai ki kom cerubim kakame oudo ebedo iye, di eko ot i dogola me tempulo. Rwot oko lwongo icuo nono kame oudo ngapo egoe apwot di emeny, icuo kame oudo mako jamini me iwandik,

⁴en eko waco ne be, “Oti ibei i dier bomba me Yerusalem, di iko keto alama i tur nyim jo dedede kame tie kede cweruncy kede di kiramere pi gikareco kame kotie timo i bomba.”

⁵Ango ako winyo di en ewaco ne cuo icegun ka be, “Wuda beunu i bomba ilubenu, di inenekunu jo. Kur iwekunu ngatamoro, doko kur ibedunu kede cuny me kisa but ngatamoro.

⁶Nekunu cuo oti, awobe kede anyira, mon kede idwe atino, do kur imulunu ngatamoro kame tie kede alama i nyime. Cakunu i kabedo na kacil.” Aso, gin kiko cako kede joadongo kame oudo tie i nyim tempulo.

⁷Rubanga oko waco negi be, “Munaununu tempulo. Miunu kom jo kame koneko rade i diakal mere. Otunu!” Aso, gin kiko ot di kiko neneko jo i bomba.

⁸Di gin oudo kitie neneko jo, ango oudo adong kena. Ango ako poto piny ariebacuny di ako kok kede dwan amalo be, “Okwe Rwot Rubanga, benyo, in do itieko lilo kede Yerusalem kitek en komio itie neko jo dedede kodong i Isirael?”

⁹Rubanga oko gamo be, “Raco kame jo me Isirael kede jo me Yuda otimo dwong twatwal. Nek dwong i lobo dedede, doko tim kalikame poore dwong i bomba. Gin kiwaco be, ‘Rwot otieko jalo lobo noni, doko likame eneno wa.’

¹⁰Ango i tetu buta, likame abino weko ngatamoro, akadi bedo kede cuny me kisa but ngatamoro, do abino timo negi gikame gida kitieko timo ne jo icegun.”

¹¹Di do icuo koudo ngapo igoen apwot ameny, di etie kede jamini me iwandik, oko dwogo dwoko kop but Rwot be, “Ango atieko timo bala kame in oudo iciko na.”

Esekeri 10

Deyo ka Rwot Oyai ki tempulo

¹Ango ako ngoloro gi kopetere kame oudo tie malo me wi cerubim di ako neno gikame oudo cal bala kom me ajakanut kame kotimo kede kidi me wel kame nyinge sapir.



- ² Rubanga oko waco ne icuo kame oudo tie ngapo igoen ameny apwot be, “Oti idony i dierediere me namisigan kame tie i dud cerubim di iko juko itonge me mac aliel pong cingi. Di do iko sasaro itonge nogo i bomba.” En eko ot di ango anene.
- ³ Aso, kakame icuo nono oudo tie donyo kede i ot, cerubim oudo tie cungo i bad tetu piny me tempulo, di edou oko bino di eko umo diakal me yie.
- ⁴ Di do deyo me tie ka Rwot oko yai kikom cerubim di eko ot i dogola me tempulo. Edou oko umo yi ot pukupuk, di deyo me tie ka Rwot oko romo diakal lung.
- ⁵ Mor me bwom cerubim oudo winyere kiton i diakal me ooko. Mor gi oudo winyere bala dwan Rubanga Won Twer kame etie yamo.
- ⁶ Kakame Rwot ociko kede icuo koudo ngapo igoen ameny di kipwot pi kwanyo mac ki dierediere me namisigan kame oudo tie i dud cerubim, icuo nono oko ot di eko cungo i nget namisiga acel.
- ⁷ Cerubim acel bin oko cwano cinge i mac kame oudo tie i diere gin, eko kwanyo itonge mogo di eko keto i cing icuo nono koudo ngapo igoen ameny di kipwot. Icuo nono oko gamo itonge nogo di eko yai eoto.
- ⁸ Cerubim nogo oudo tie kede gikame ineno bala cing dano i dud bwom gi.
- ⁹ Ango bobo ako neno namisigan ongwon i nget cerubim nogo, acel i nget cerubim acelacel. Namisigan nogo oudo meny bala kide me wel anyinge beril,
- ¹⁰ di kicacal, doko oudo acelacel kikom gi tie kede namisiga ace korire i yie.
- ¹¹ Cerubim nogo oudo twero ot i bad tetu moroni kenekene abongo lokere. Gin dedede oudo ka kiyaro ot, kioto karacel i bad acel, abongo lokere.
- ¹² Wang oudo oromo kom gi lung, ngei gi, cing gi, bwom gi, kede namisigan gi kede tire me namisigan.
- ¹³ Ango ako winyo di kolwongo namisigan nogo be, “Namisigan kame wiwirun” .
- ¹⁴ Cerubim acelacel oudo tie kede nyime ongwon. Nyime me agege oudo obedo me cerubim, me are obedo me dano, me adek obedo me engu, kede me ongwon oudo obedo me ekokom.
- ¹⁵ Gin en oudo giakuo kame ango aneno i nget ecilet me Kebar. Kame cerubim nogo oudo oyai malo
- ¹⁶ di kiko cako ot, namisigan da oudo upere kede gi karacel; kame gin oudo kiyaro bwom gi pi por, namisigan da oudo upere karacel kede gi kamanono.
- ¹⁷ Ka gin kiko cungo, namisigan da oudo cungo; ka gin kipor, namisigan da oudo oto kede gi, pien gin oudo kitie kede twer i kom namisigan nogo.
- ¹⁸ Di do deyo me tie ka Rwot oko yai ki dogola me tempulo di eko ot cungo malo me wi cerubim.



¹⁹Di Cerubim oko yaro bwom gi di kiko por malo di ango aneno, kede namisigan i nget gi. Gin kiko cungo i erute me bad tetu kide me tempulo, di rieny me deyo ka Rubanga me Isirael tie malo i wi gi.

²⁰Magonogi en giakuo kame ango oudo aneno i nget ecilet me Kebar di Rubanga me Isirael tie malo i wi gi.

²¹Acelacel kikom gi oudo tie kede nyime ongwon, bwome ongwon kame tie kede gimogo kacal bala cing dano i dud gi.

²²Nyim gi oudo cal bala kame ango oudo aneno i nget ecilet me Kebar. Acelacel kikom gi oudo tenaro ot kakame nyime opimo.

Esekeri 11

Koronkino Yerusalem

¹Tipo ka Rubanga oko tinga di eko tera i erute me bad tetu kide me tempulo. Ango ako neno cuo ot are kiwie kany kunono, di Yasanias wot ka Asur kede Pelatia wot ka Benaya da tie i diere gi, gin jotel are me ateker.

²Rubanga oko waco na be, “Wot ka dano, cuo nogi en kame timo iik me timo gikareco, doko gin en kame kimio jo tam areco i bomba noni.

³Gin kiwaco be, ‘Kare pwodi bor me gero ude; bomba noni cal bala agulu me tedo, do wan ocal bala ringo kame tie iye.’

⁴Pi manono, Esekeri, murao kirac i kom gi.”

⁵Di tipo ka Rwot oko bino i koma, di Rwot oko waco na be awace jo be, “Wun jo me Isirael, ango angeo gikame wun itienu tamo.

⁶Wun itiekunu neko jo atos i bomba noni, doko itiekunu mino liele me jo orade i gudi mege.

⁷” Pi mano, ango Rwot Rubanga atie waco ne wu kaman: ateteni jo kame wun inekunu i bomba noni obedo ringo, kede bomba noni da obedo agulu; do kobino kwanyo wu tenge kiye.

⁸Wun ibedunu lworopima, do ango abino kelo jo amako epima suro wu, ango Rwot Rubanga atieko waco.

⁹Ango abino kwanyo wu tenge ki bomba noni ako mino wu i cing jokumbor, di ako mino wu alola.

¹⁰Kobino neneko wu kede epima kiton i ikor me Isirael. Di wun ikounu bino ngeno be ango en Rwot.

¹¹Bomba noni likame bino gwoko wu bala kame agulu gwoko kede ringo kame tie i yie. Ango abino keto can i komu kiton i ikor me Isirael.

¹²Di wun ikounu bino ngeno be ango en Rwot ngat kame wun likame ilubunu iswilia kede cik mege, do ikounu donyo lubo cik me atekerin kame kio kede wu.”



¹³Aso, di pwodi oudo ango atie imurai, inonono di Pelatia wot ka Benaya to. Ango ako poto piny ariebacuny, di ako kok kede dwan amalo di awaco be, “Okwe Rwot Rubanga! Benyo, ibino do tieko donge me jo Isirael pitipit?”

Cikere ka Rubanga but Jo kame tie Obukui bala Mabus

¹⁴Di do Rwot oko yamo keda.

¹⁵En ewaco be, “Wot ka dano, jo kame bedo Yerusalem tie yamo i komi kede i kom jo Isirael wadu kame tie obukui be, ‘Gin kitie kakabor twatwal kede Rwot; Rwot otieko do mino wan lobo noni pi doko merwa.’ “

¹⁶” Pi mano, wace jo wadu kame tie mabus obukui be ango Rwot Rubanga atie waco be, ‘Bed bala ango oudo atero wu kakabor i diere me atekerin apat, doko اساسaro wu i pinye apat, do ango oudo atie kede wu i pinye kame iotunu iye nogo.’

¹⁷” Aso, wace gi gikame ango Rwot Rubanga atie waco. Ango abino koko gi ki atekerin kede pinye kame ango اساسaro gi iye, di ako dwoko negi lobo me Isirael.

¹⁸Ka gin kiko dok kunono, gin kibino kwanyo tenge caljwogi dedede kame neno rac kede tim dedede areco.

¹⁹Ango abino mino gi kibedo kede cuny acel kede tam anyen. Abino kwanyo tenge cuny gi kalikame wor di ako mino gi cuny awor,

²⁰tetekeny kigwok iswilia na kede kiko lubo cik na. Di do gin kiko bino bedo jo na, di ada ako bedo Rubanga gin.

²¹Do jo kame cuny gi tie i kom gikame neno rac kede tim areco ango abino keto can i kom gi pi gikame gin kitimo.” Rwot en awaco.

Deyo ka Rubanga Oyai ki Yerusalem

²²Di do cerubim oko cako por kede namisigan i nget gi. Deyo me tie ka Rubanga me Isirael oudo tie malo i wi gi.

²³Di deyo me tie ka Rubanga oko yai ki dier bomba di eko ot cungo i wi moru kame oudo tie i bad tetu kide me bomba.

²⁴I gianyuta nono, tipo ka Rubanga oko tinga di eko dwoka Babilon but jo kame oudo tie mabus obukui. Di do gianyuta kame ango oudo aneno nono oko rwenyo na.

²⁵Ango ako tatamo ne jo kame oudo tie mabus obukui gi dedede kame oudo Rwot onyuto na.

Esekeri 12

Enabi Esekeri Oporo Ngaring Ayela

¹Rwot oko yamo keda.

²En ewaco be, “Wot ka dano, in itie bedo i diere me jo kame jojemo. Gin kitie kede wang gi do likame kineno piny, kitie kede yit gi do likame kiwinyo kop,



³pien gin kibedo jojemo. Pi manono, wot ka dano, iikere di iko tweno yec ni bala ngaring ayela, di iko yai ot obukui iceng di pwodi piny ler di gin kineno. In ibino yai ot kabedo apat bala ngaring ayela di gin kineno. Manono amoto bino mino gi kiniang, bed bala gin kijojo.

⁴In ibino woto yec ni ooko di pwodi piny ler di gin kineno, yec bala me ngaring ayela; di otieno in iko yai ot bala ngat atie ot obukui di gin kineno.

⁵Tuc kor apama me odi di gin kineno di in iko beo kede yec ni kiye.

⁶In ibino tingo yec ni di iko cibo i epepet ni di gin kineno, di iko yene idonyo kede ooko i piny acol. Ibino bono wangi tetekeny likame ineno kakame itie ot iye. Gikame in ibino timo nono bino bedo gianena me ikwenyar but jo Isirael.”

⁷Ango ako timo bala kame oudo Rwot ociko na. Ango akwanyo yec na di ako kelo ooko i dier i ceng bala ngaring ayela, di otieno ako tuc kor apama kede cinga. Ango ako cibo yec na i epepet di jo dedede neno, di ako donyo ooko cako ot.

⁸Oru mere odiko Rwot bobo oko yamo keda.

⁹En ewaco be, “Wot ka dano, nataman bala kame jojemo me Isirael go tie penyi kede gikame in itie timo,

¹⁰wace gi gikame ango Rwot Rubanga atie waco. Kop noni mako ngapug me Yerusalem kede jo me Isirael dedede kame tie bedo iye.

¹¹Wac negi be gikame in itimo nono nyuto gikame bino timere negi; gin kobino mako gi bala mabus di oko tero gi obukui.

¹²Ngapug gi bino tingo yec mere i epepet i dier iwor di eko lwi edonyo i kakame etuco i kor apama. En ebino bono wange tetekeny likame eneno kakame etie ot iye.

¹³Do ango abino rieno bwoi na cike di ako make; di ako tere Babilon, kakame en ebino to iye abongo neno lobo nono.

¹⁴Ango abino sasaro i bad tetu dedede jo dedede kame oluke, jo kame konye kede isirikalen mege dedede; abino mino jokwor gi wapo gi kede epima.

¹⁵” Gin kibino ngeno be ango en Rwot, i kare kame ango abino sasaro gi kede i diere me atekerin apat kede i pinye me kumbor.

¹⁶Do ango abino weko jo mogo kikom gi bwot ki yi, kec kede tuwo, tetekeny gin kibino tatamo ne atekerin kame gin kioto but gi, kite kame gikareco kame gin kibedo timo rac kede; di do gin kiko bino ngeno be ango en Rwot.”

Gianena me Enabi Akome Miel

¹⁷Rwot oko yamo keda.

¹⁸En ewaco be, “Wot ka dano, cami di komi miel, doko mat pii di komi keto teltel pi lworo.



¹⁹Wac ne jo me lobo nono dedede be Rwot Rubanga tie waco ne jo me Yerusalem kame pwodi tie bedo i lobo me Isirael kaman: ceng moro acel gin kibino cam di kitie kede lworu atek, doko kibino mato pii di kom gi oto pi lworu, pien kobino weno lobo gi dong nono, pi tim me gero me jo dedede kame bedo iye.

²⁰Bomban kame nataman jo opong iye kobino tuturo, di oko mino lobo dong nono. Di do wun ikounu bino ngeno be ango en Rwot.”

Kop kame Cuny Jo Maro kede kame Cuny gi Dagi

²¹Rwot bobo oko yamo keda.

²²En ewaco be, “Wot ka dano, pinyo komio jo me Isirael onare yamo kop noni be, ‘Kare otieko kato akata, di gikame kowaco be bino timere likame cabo ocobere akadi acel?’

²³Aso, nataman in wac negi be ango Rwot Rubanga atie waco kaman: ango abino jiko yamo nono ki dog gi, di gin likame bobo kiko tic kede yamo nono i Isirael. Wac negi be kare otieko tuno me cobere me gikame kowaco.

²⁴” Likame bobo gianyuta moro me abe arabo imurai kame kongalo kede jo bino bedo tie i diere me jo Isirael.

²⁵Do ango Rwot abino waco kop na, di eko bino cobere. Likame bobo ebino gal. Di pwodi wun ikuonu, wun jojemo nogi, ango abino waco kop na di ako mine ecobere.” Rwot Rubanga en owaco.

²⁶Rwot oko bobo waco na be,

²⁷” Wot ka dano, jo me Isirael tie waco be gianyuta kame in ineno tie pi kare me waru, kare mere pwodi bor twatwal.

²⁸Aso, in wace gi be ango Rwot Rubanga atie waco kaman: gikame ango awaco likame bobo bino gal cobere, do ebino timere awakawaka. Ango Rwot Rubanga en awaco.”

Esekeri 13

Kop kame Komurao i kom Inabino me Angalo Acuo

¹Rwot oko yamo keda.

²En ewaco be, “Wot ka dano, murao kirac i kom inabino me Isirael kame murao gikame gin kipwakuno i wi gi ken gi. Wac negi kiwiny kop na.”

³Rwot Rubanga tie waco kaman: “Kitie i can gin inabino amiming kame lubo kop kame gin kipwakuno i wi gi ken gi, do di likame kineno gianyuta moro.

⁴Jo me Isirael, inabino wu rom aroma kede ikuwen kame bedo i amejeko.

⁵Gin likame kidaro kabedere kotutucun me apama, doko likame kiiko gi. Manono mio jo Isirael likame karuno cungo i yi i ceng ka Rwot.



⁶Gianyuta kame gin kiwaco be kineno obedo angalo, doko imurai gi obedo me angalo. Gin kiwaco be, ‘Rwot owaco be, ‘do di Rwot likame ocwao gi, doko di gin kiko bedo kidaro cobere me kope gi nogo!

⁷Wac negi be gianyuta kame gin kineno obedo me angalo, doko da kibedo murao kope me abe. Gin kiwaco be, ‘Rwot owaco be, ‘do di ango likame awaco negi kop moro.”

⁸Pi mano Rwot Rubanga tie waco kaman: “Pien wun iwacunu kope me angalo doko gianyuta kame iwacunu be inenunu da obedo angalo, ango atie kede kop i komu. Ango Rwot Rubanga en awaco.

⁹Ango abino mino alola but wun inabino kame neno gianyuta me angalo di itimunu imurai me angalo. Wun likame ibinunu bedo i kansulo ka jo na, doko likame kobino wandiko nyingu i kom jo me Isirael, arabo wun dok i lobo me Isirael. Di do wun ikounu bino ngeno be ango en Rwot Rubanga.

¹⁰ “Inabino otieko rwenyo jo na kede yamo kame waco be mulem tie, do di mulem moro li. Gikame gin kitimo cal bala ka jo ogero apama ayagayaga, gin kioto di kiko sute kede erangi atar pi umo goro mere.

¹¹Wac ne inabino be apama gi nono bino rwacakin piny. Ango abino mino kot bololo, di twon akako ko cwei iye kede yamo ager.

¹²Apama nono bino rwacakin piny di jo ko bino penyo wu gikaber kame erangi wu nono oko timo.”

¹³Pi mano, Rwot Rubanga tie waco kaman: “Pi lilo na ango abino cwano yamo ager, kot abololo, kede akako di eko dudubo apama nono.

¹⁴Ango abino tuturo apama kame gin kisuto kede erangi atar nono, di ako rete piny di kide me acakini mere ko dong kakaler. En ebino poto di eko neko wun dedede. Di do wun ikounu bino ngeno be ango en Rwot.

¹⁵” Apama kede jo kosute kede erangi atar bino neno can pi lilo na. Di do ango ako bino waco ne wu be apama otieko doko li, akadi kiton jo kame oudo osute kede erangi atar da;

¹⁶gin en inabino me Isirael kame oudo murao kop i kom Yerusalem di kiwaco be kineno gikame nyuto mulem kame bino bedo iye, aso di mulem moro li.” Rwot en owaco.

Kop kame Komurao i kom Inabino me Angalo Amon

¹⁷Rwot oko waco be, “Aso, in wot ka dano, lok wangi di iko neno mon kame tie i diere me jo ni, gin en jo kame pwakuno kop i wi gi ken gi. Murao kirac i kom gi

¹⁸di iko waco negi be ango Rwot atie waco negi kaman: “Itienu i can wun mon kame ikuunu ne jo dedede ilwitia i dele me ngut cing, kede itimunu negi igoen me rom dedede me umo wic, tetekeny kibed kede twer i kom kuo me jo icegun. Wun imitunu be ibedunu kede twer i kom kuo ka jo na di ikounu tic kede pi bero me kuo wu.



¹⁹Wun likame inyutunu na wor i nyim jo na pi mawele mogo anonok kede pi mugati mogo. Wun ikounu neko jo kalikame oudo poore to di ikounu weko jo kalikame oudo poore dong kuo, oko dong kuo. Manono wun itimunu pi kope wu me angalo but jo na kame gamo kope wu me angalo nogo.”

²⁰Pi mano, Rwot Rubanga tie waco kaman: “Ango cunya dagi ilwitia wu me ngut cing nogo, kame wun itiunu kede gi me gwoko kuo. Ango abino cocoto gi ki ngut cingu di ako mino kuo me jo na bedo abongo peko moro, kuo gi kame wun idwarunu bala dwaro winy.

²¹Ango abino nyinyilo igoen wu me umo wic di ako lako jo na ki cing wu. Gin likame bobo kibino bedo i twer wu. Di do wun ikounu bino ngeno be anga en Rwot.

²²” Wun itiekunu dubo cuny jo kopoo kede angalo wu, jo kalikame anga oudo amito dubo cuny gi, doko wun itiekunu mino nwangcuny but jo areco tetekeny kur kilokere tenge ki yote areco me kuo gi di kiko lako kuo gi.

²³Pi mano, likame bobo ibinunu neno gianyuta me angalo arabo imurai me angalo; anga abino lako jo na ki cingu. Di do wun ikounu bino ngeno be anga en Rwot.”

Esekeri 14

Rubanga Oronkino Tim me Woro Caljwogi

¹Ceng moro acel jotel mogo me Isirael oko bino buta pi penya gikame Rwot oudo tie waco.

²Di Rwot oko yamo keda.

³En ewaco be, “Wot ka dano, cuo nogi otieko keto cuny gi woro caljwogi, di gin kiko mino dub orire i nyim gi bala isiki kame getaro gi. Benyo, kom ateteni gin kiparo be anga abino yei negi udo kop kibuta?”

⁴” Pi mano, in wace gi be anga Rwot Rubanga atie waco negi kaman: Dano moroni me Isirael kotieko keto cunye woro caljwogi di eko mino dub mere orire i nyime bala gikame getaro en, di bobo pwodi en ebino penyo tam kibut enabi, anga Rwot kikoma en kame abino dwoko ne kop kame poore kede caljwogi mege atot atota nogo.

⁵Anga abino timo manono tetekeny adwok cuny gi buta, gin jo dedede kame caljwogi otieko taparo gi tenge kibuta.

⁶” Aso, nataman in wac ne jo me Isirael be anga Rwot Rubanga atie waco negi kaman: swilarunu di ikounu weko woro caljwogi; doko poore ilokerenu tenge ki tim wu areco dedede.

⁷” Do jo me Isirael arabo jokumbor kame tie bedo Isirael, kame daga di kiko lokere keto cuny gi woro caljwogi di kiko mino dub gi orire i nyim gi bala gikame getaro gi, do di pwodi bobo kioto but enabi pi penyo tam na kibute, anga Rwot kikoma en kame abino dwoko negi kop.



⁸Ango abino lokere neno gi kirac. Ango abino mino gi kibedo anyut kame jo bedo yamo nakanaka di ako kwanyo gi tenge kikom jo na. Manono bino mino wun ingeunu be angu en Rwot.

⁹” Ka kongalo enabi moro di en eko dwoko kop kalikame tie ateni, udo angu Rwot en kame angale. Ango abino mino enabi nono alola, di ako muducaro en ki diere me jo na me Isirael.

¹⁰Enabi nono kede ngat kobino penyotam kibute, alola gi bino bedo rorom.

¹¹Ango abino timo manoni tetekeny jo me Isirael likame bobo bino medo parao tenge kibuta, arabo bobo medo pwokere kede dub gi. Di do gin kiko bino doko jo na, di ada ako bedo Rubanga gi. Angu Rwot Rubanga en awaco.”

Nua, Danieri, kede Yobu

¹²Rwot oko yamo keda.

¹³En ewaco be, “Ka jo me piny moro likame oko bedo kede genere di gin kiko timo dub buta, angu abino mino cam bedo li negi. Abino cwano negi kec di ako neneko jo kiton leini.

¹⁴Akadi ka koto di oudo cuo adek nogi, Nua, Danieri, kede Yobu, di oudo tie kunono, kuo gi me bedo jo kopoo koto olako gin kenekene.” Rwot Rubanga en awaco.

¹⁵” Arabo ka koto angu acwao leini ager i piny moro pi neneko jo, tetekeny piny nono dong nono abongo jo, di likame tie dano moro kame karuno beo iye da pi leini nogo,

¹⁶akadi di koto oudo cuo adek nogi tie bedo kunono, angu Rwot Rubanga akwongere be, gin likame koto kikaruno lako idwe gin amako gi. Gin kenekene en kame koto kibwot, do lobo koto odong nono.

¹⁷” Arabo ka angu koto ako cwano yi i piny nono di ako mino koneko jo kede leini pitipit iye;

¹⁸akadi di oudo cuo adek nogi tie iye, angu Rwot Rubanga akwongere be gin likame koto kikaruno lako akadi idwe gi, do gin kenekene en kame koto kibwot.

¹⁹” Amoto ka koto angu acwao aumpuli i piny nono, di pi lilo na ako neneko jo kiton leini,

²⁰akadi di koto Nua, Danieri, kede Yobu di oudo tie iye, angu Rwot Rubanga akwongere be gin likame oudo koto kikaruno lako akadi idwe gin amako gi. Pi poore gi, gin koto kilako kuo gin kenekene.”

²¹ Rwot Rubanga tie waco be, “Ebino bedo rac benyo ka angu acwao i kom jo me Yerusalem alola na ongwon areco, gin en yi, kec, leini ager, kede aumpuli, pi neneko jo kede leini kiye!

²²Aso di jo mogo bino bwot di kiko dong kuo iye, idwe awobe kede idwe anyira kame kobino woto ki Yerusalem; gin kibino bino butu. Ka wun ibinunu neno yote me kuo



gi kede tice gi areco, ibinunu yei be can dedede kame ango aketo i kom Yerusalem poore.

²³Ibinunu yei kede gikame ango atimo ka inenunu yote me kuo gi kede tice gi. Di do wun ikounu bino ngeno be gikame ango oudo atimo i kom Yerusalem atimo pi tien kop.” Rwot Rubanga en owaco.

Esekeri 15

Agole i kom Bwini

¹Rwot oko yamo keda.

²En ewaco be, “Wot ka dano, i yore mene en kame yat me olok kato kede yen icegun? Ajange me olok kame tie i diere me yen me abum twero bedo ber kato yen icegun i yore mene?”

³Benyo, itwero tonge di iko timo kede gimoro, arabo itwero gure i kor apama me liero jame?

⁴En eber me moko mac kenekene. Ka mac otieko camo wie tuni tuni di diere oko doko cukumac, benyo, udo pwodi iromo timo kede gimoro?

⁵En oudo kony mere li akadi di pwodi likame kowange. Nataman do di mac otieko came eko doko cukumac, kony mere do udo li atwal atwala.”

⁶Pi mano, Rwot Rubanga tie waco be, “Bala kame kotongo kede yat me olok i diere me yen me abum di oko wange i mac, ada abino timo ne jo kame tie bedo Yerusalem kamanono.

⁷Ango abino ngoi kede gi. Bed bala gin kibwot ki mac acel, do pwodi mac bino wango gi kamanono. Ka ango ako ngoi negi, gin kibino ngeno be ango en Rwot.

⁸Ango abino mino lobo dong nono, pien gin likame kibedo kede genere buta.” Rwot Rubanga en awaco.

Esekeri 16

Yerusalem Bomba kalikame Genere

¹Rwot bobo oko yamo keda.

²En ewaco be, “Wot ka dano, mi Yerusalem ngei gikareco mege.

³Wace be Rwot Rubanga tie waco ne kaman: “In bin onywali i lobo me jo Kanan. Papa ni oudo obedo dano kowok kibus jo Amor, kede toto ni oudo obedo dano kowok kibus jo Kiti.

⁴Kakame bin konywali kede, likame oko ngolo peni, arabo lwoki kede pii, amoto suti kede munyo, akadi boni kede igoen.

⁵Likame bin tie dano moro oko bedo kede cuny me kisa i komi, pi koto timo ni gi nogi; do in bin oko uci obar i ceng kame konywali kede, pien oudo likame komiti.



- 6” Ango ako beno i ngeti, di ako neni di itie gwegweun i remo ni. Ango ako waco nin di itie buto i remo ni be, ‘Bed kuo
- 7di iko dongo bala yat alibaliba me obar.’ In iko dongo bor malo, di iko doko cal bala atin nyako kotieko doko dako. Tune oudo otieko pong i kori, yer wi da oudo odongo, do in oudo itie nono abongo egoe moro i komi.
- 8” Ango bobo ako beo i ngeti di ako neni; in oudo do mwakini ni oromo me mito cuo. Ango ako yaro ekanso na di ako umi kede. Ango bin ako cikere kedi di ako timo kedi isikan me nyom, di do in iko doko mera.” Rwot Rubanga en owaco.
- 9” Di do angu bin ako lwoki kede pii di ako lwoko remo ki komi, di ako wiri kede mo.
- 10Ango bin ami ingapo igoen acil kede amukai aruwa me del aber. Ango ami iboo wii kede egoe ameny di epwot doko aumi kede egoe me wel amalo.
- 11Ami ingapo mwolere: ami alung me bad, eriko me ngut,
- 12mwola me umi, mwolere me yit, kede ami ingapo ocoro acil me ajakanut.
- 13In oudo itie kede jamini me tubuso kom, kame kotimo kede saabu kede siliba, doko igoen kame in oudo ingapo meny, di gin me wel amalo, di kotubuso kuno gi. In oudo icamo kwon me alos kame konungo kiber, mokic kede moo me olibeti. In bin iko doko cil twatwal, di iko doko abaka adako.
- 14In bin nyingi oko doko iruo twatwal i diere me atekerin pi cilo ni, piento in oudo icil adikinicel, pi angu en oudo ami ibedo cil kamanono. Ango Rwot Rubanga en awaco.
- 15” Do in iko keto gen ni i cilo ni kede i iruo me nyingi, di iko timo adote kede ngatamoroni dedede kobeo i ngeti.
- 16In ikwanyo igoen ni mogo di iko tubuso kede abilan ni, di iko donyo timo malaya i abilan nogo. Likame pwodi tie gimoro kotimere kame cal kamanoni, doko likame bino bedo tie atwal.
- 17In bobo ikwanyo da mwolere acil kame kotimo kede saabu kede siliba kame angu oudo ami, di iko tic kede gi me timo caljwogi acuo, di in iko donyo timo adote kede gi.
- 18In ikwanyo igoen acil kame angu oudo ami di iko umo kede cal nogo, di iko cibo moo na kede odok na angwe kur i nyim gi.
- 19Angu oudo ami cam: alos kame konungo kiber, moo me olibeti, kede mokic; do in iko mino cam nogo bala giayala angwe kur but caljwogi.” Rwot Rubanga en owaco.
- 20” Di do in iko kwanyo idwe ni awobe kede anyira, kame oudo in inywalo na, di iko mino gi bala giayala angola but caljwogi. Ineno bala tim ni me malaya oudo likame oromi!
- 21In bobo da iko ngongolo idwe na di iko mino gi bala giayala but caljwogi.



²²I kare kame in oudo itimo kede gikareco nogi kede tim ni me malaya, in oudo likame iko yutuno kare kame oudo in pwodi atin, kare kame oudo in itie kede nono abongo egoe moro, di igwegweun i remo kame konywali kede.”

Kuo ka Yerusalem bala Malaya

²³Rwot Rubanga tie waco be, “Itie tin i can benyo! Medo i wi gikareco ni,

²⁴in itimo kakame imukurur kede abilan piri i kabedere dedede kame jo cokere iye;

²⁵igero kabedere nogo i nget gudi dedede di iko mino cilo ni odoko gi me timo malaya i kabedere nogo. In ibedo timo adote kede jo dedede koudo beo kabedere nogo, di iko meede ameda i tic ni me malaya.

²⁶In itimo malaya kede jo me Misiri, gin jokio ni kame oudo cuny gi mito twatwal buto kedi, di in iko meede ameda i tim ni me malaya pi wango cunya.

²⁷” Pi mano, ango nataman atieko tingo cinga pi keto can i komi. Ango ayaro dwoko piny rom me lobo ni, di ako mino jokwor ni timo kedi gikame cuny gin mito, gin en jo Pilstia, jo kame lewic mako gi pi tim me caro nin.

²⁸” In iko timo malaya kede jo me Asiria, pien jo apat noka likame oudo oromi. In bin iko timo malaya kede gi, do gida likame pwodi kiromi.

²⁹In iko meede kede tim ni me malaya but jo me Babilon, jo me piny kame tic gi en cato wil, do gida likame pwodi kiko romi.”

³⁰Rwot Rubanga waco be, “In tin wi tuwo benyo, en komio itimo gi nogi dedede, tim me malaya kalikame lewic mako.

³¹In igero kabedo ni kimukurur i nget gudi dedede, igero da abilan ni kabedere dedede me cokere! Do in likame iko bedo cal bala malaya, piento in likame iyei be culi.

³²In ical bala dako kame timo adote kede jo apat akaka buto kede cware.

³³Imalayan dedede koculo pi buto kede gi; do in iko mino giamia but jo komiti dedede. In iwilo gi pi gin bino ki kabedere dedede pi buto kedi.

³⁴Tim nin me malaya pat kede me imalayan icegun. Likame tie dano moro kopenyi be ibut kede; doko likame tie ngatamoro koculi; in en kame iculo gi! Ateteni in ipat kede imalayan icegun.”

Kop kame Rubanga Ongolo i kom Yerusalem

³⁵Pi mano, Okwe Yerusalem, in malaya noni winy kop kame Rwot tie waco.

³⁶Manoni en kop kame Rwot tie waco: “In ibedo kede mit atek iko gonyo igoen ni di iko timo malaya kede jo kame oudo miti; ibedo da woro caljwogi gikame neno rac, di iko neko idwe ni iko mino but gi bala giayala.

³⁷Pi mano, ango abino koko karacel jo dedede kame bin omi, jo kobedo yomo cunyi, jo kame in oudo imaro kede kame cunyi dagi. Ango abino koko gi i komi, di ako gonyo igoen tenge ki komi i nyim gi, tetekeny gin kineni di itie nono.



³⁸Ango abino mini alola kame komio mon kame timo adote kede kame neko jo. Abino bedo kede lilo kede nyeko di ako mini alola me to.

³⁹Ango abino mini i cing gi, di gin kiko bino rereto piny kabedere kame in oudo igero me timo malaya ni kede me woro caljwogi. Gin kibino gonyo igoen ni i komi di kiko tero, kede kiko tero da mwolere kame in itubuso kede komi, di gin kiko bino weki di idong nono.

⁴⁰” Gin kibino kelo ekodet me jo i komi, di gin kiko bino didipo in kede kide di kiko ngongolo in i adulion kede ipimai gi.

⁴¹Gin kibino wango ude ni piny di kiko mini alola di mon atot neno. Ango ayaro jiko tim ni me malaya no, di in likame bobo iko bino meede kede mino cul but jo amiti.

⁴²Di do gero na ko bino tiek, di koma ko kwei; likame bobo abino bedo kede gero arabo nyeko moro.

⁴³In wi owil kede kite kame ango bin agwoki kede i kare kame di in pwodi atin, en omio in iwango cunya kede gikame in itimo nogi dedede. Pi mano, ango atieko dwoko ni raco ni i wii. Pinyo komio imedo tim me caro i kom tim kingorijij kame oudo ibedo timo?” Rwot Rubanga en owaco.

Bala Toto kede Nyare kame Ekite gi Acel

⁴⁴Rwot oko waco be, “Yerusalem, neningo, jo bino tic kede yamo noni i komi be, ‘Bala toto kede nyare kame ekite gi acel.’

⁴⁵Ateteni in en nyar ka toto ni. En bin cunye oko dagi cware kede idwe mege da. In ical bala amiegu ni, jo kame bin oko dagi cwog gi kede idwe gi da. Toto ni oudo obedo dano kowok kibus jo Kiti kede papa ni oudo obedo dano kowok kibus jo Amor.

⁴⁶” Amini adwong en Samaria, kame tie i badi tetu malo, en kede calere mege. Amini atidi, kame tie i badi tetu piny, en Sodoma kede calere mege.

⁴⁷Wun likame ikounu lubo yote me kuo gi kede timo gikareco kame gin oudo kitimo kenekene; do pi kare katitidi wun ikounu timo gikareco kalamo kame gin oudo kitimo, i yote lung me kuo wu.

⁴⁸” Ango Rwot Rubanga akuo akwongere be amini Sodoma kede calere mege bin likame otimo gikareco bala kame in kede calere ni itiekunu timo.

⁴⁹Manoni en oudo obedo raco ka amini Sodoma: en kede anyira mege oudo kitie kede ewaka, oudo kitie kede cam kame bwono gi, kede oudo kilony kitie i kuo ajabajaba, do likame oudo kiparo pi konyo jocan kede jo kame piny oloo.

⁵⁰Gin oudo kitie kede tingere, di kiko timo tim areco i nyima, di manono oko mino ango amuducaro gi.

⁵¹” Samaria likame otimo dub kame romo akadi dul me megi. In itieko timo gikame reco kalamo kame gin oudo kitimo. Gikareco nin ka kopooro kede me amiegu ni, mio koneno gin do bala jo kopooro.



⁵²Aso, in poore ikany acae kame komii, in kikomi, pien dub nin rac kalamo me amiegu ni, omio ineno do bala gin likame kitimo dub moro. Poore lewic maki, in kikomi, doko poore ikany acae kame komii, pien in imio koneno do bala amiegu ni opoore.”

Kobino Dwoko Sodoma kede Samaria i Kuo gi Kasek

⁵³Rwot oko waco ne Yerusalem be, “Ango abino dwoko mulem gin, mulem me Sodoma kede calere mege, kede mulem me Samaria kede calere mege, di ango ako bino dwoko mulem nida karacel kede mergi.

⁵⁴Manono ango abino timo tetekeny in ikanyakino acae kame komii, di lewic ko bino maki pi gi dedede kame in itieko timo. Manono bino dwoko cuny gi be gin oudo kigwagwang.

⁵⁵I kom kop amako amiegu ni, ango abino dwoko Sodoma kede calere mege i kuo gi kasek, abino dwoko da Samaria kede calere mege i kuo gi kasek, di ako dwoko ida kede calere ni i ekite kuo kame bin itienu iye.

⁵⁶Benyo, mam bin Sodoma obedo gi me ayama nin i kare kame bin in iwakere kede,

⁵⁷di pwodi likame kodelelo gikareco ni? Nataman ida itieko doko gi me ayama but jo me Siria kede jokio mege dedede, kede but jo me Pilistia, karacel kede jokio ni dedede kame tie kede acae i komi.

⁵⁸In miero inen can pi tim ni me caro kede tim ace aneno rac kame in ibedo timo.”
Rwot en owaco.

Isikan kame Bedo Nakanaka

⁵⁹Rwot Rubanga waco be, “Ango abino teri iepone kame poore kede gikame in itimo, pien in itieko cano kwongere ni, di iko turo isikan.

⁶⁰Do ango abino bedo kede wor i kom isikan kame bin ango atimo kedi i kare kame di pwodi in atin, di ako bino moko kedi isikan kame bedo nakanaka.

⁶¹Di in iko bino yutuno gikame in oudo ibedo timo, di lewic ko bino maki iye ka ango akwanyo amini adwong kede atidi di ako mino gi buti bala anyira ni, do likame pi isikan kame ango oudo atimo kedi.

⁶²Ango abino moko isikan na kedi, di in iko bino ngeno be ango en Rwot.

⁶³Ango abino sasiro in i gi dedede kame in itieko timo, do in ibino yutuno gi di kiko neko komi, nek kalikame ikaruno ngamo kede dogi me yamo kop moro akadi acel pi lewic.” Rwot en owaco.

Esekeri 17

Agole i kom Ekokom kede Olok

¹Rwot oko yamo keda.

²En ewaco be, “Wot ka dano, tatamo ne jo Isirael agole noni



³tetekeny kingei gikame angu Rwot Rubanga atie waco negi: bin tie ekokom moro ati, di etie kede bwome adongodongo adikinicel, kede yer abocoboco di kicil twatwal. En bin eko por eoto Lebanon di eko turo amidi me wi yat seda.

⁴En eturo amidi me yat seda nono di eko tero i lobo me jocat wil, di eko cibe i bomba me jocat.

⁵Di do en eko kwanyo kodi moro acel di eko ot cibe i lobo kame tie kede bolia, kakame pii oudo likame rwenyo kiye pi mine dongo.

⁶Kodi nono bin oko tui di eko dongo edoko yat olok kojanyo, do di ececek. Jange bin oko dongo malo tetu kakame ekokom nono tie iye, do aliasin mege oko dongo odok piny i dude. En eko dongo edoko yat olok ati; etimo jange, di pote oko ume.

⁷” Ekokom ati ace bobo bin tie. En oudo etie kede bwome adongodongo di yer tot i kome. Neningo, olok noni bin oko rieno aliasin mege kede jange da tetu bute. En erieo jange tetu bute be amoto emie pii.

⁸Do olok nono bin oudo kotieko kobe i lobo aber kame pii oudo tie iye kiber, be tetekeny etim jange di eko nyak di eko doko olok aber twatwal.

⁹” Aso, angu Rwot Rubanga apenyere kaman: benyo, iparunu be olok nono bino kuo di eko dongo? Benyo, iparunu be ekokom me agege ca likame bino pute, di eko gwero anyakini mege tenge di pote mege kame oudo libaliba ko ner? Pute likame bino mito dano moro atek arabo jo atot.

¹⁰Ebo, en kotieko kobe di oko pite, do benyo, iparunu be ebino kuo di eko dongo? Benyo, iparunu be likame ebino ner ka yamo kame wok ki bad tetu kide obuko i kome? Iparunu be likame ebino ner i kakame etie dongo iye nono?”

Kogonyo Dwong me Agole nono

¹¹Di Rwot oko waco na be,

¹² “Peny jojemo nogi ka kingeo dwong me agole noni. Wac negi kaman: abaka me Babilon bin obino Yerusalem di eko tero abaka kede jotic mege Babilon.

¹³En etero ngat acel kikom jo me ot abaka, di eko timo kede isikan. En emie ekwongere pi bedo kede wor bute. En etero bala mabus jo kame bin pirgi tek i ateker

¹⁴tetekeny ateker mwolere i dud apugan mere di likame kiko kelo elol, kede pi ka ateker oko gwoko isikan gi kede Babilon etwero cungo.

¹⁵Do abaka me Yuda bin oko jemo ne Babilon di eko cwano jo Misiri pi ot kelo asigiran kede isirikalen atot. Benyo, iparunu be en kom etwero turo isikan mere kede Babilon? Benyo, iparunu be en kom etwero timo kamanono di eko bwot? En likame ekaruno turo isikan nono di eko ot abongo udo alola!

¹⁶” Angu Rwot Rubanga akuo akwongere be, ateteni abaka noni bino to Babilon, piento en eturo kwongere mere kede isikan kame en oudo etimo kede abaka me Babilon, ngat kocibe bedo abaka.



¹⁷Parao kede twon isirikalen mege likame bino konye yi ka jo Babilon osure di kiko kumemo gi me yito i wi apama, kede di kiko kunyo pulejun me beo i dud apama pi ot neko jo atos.

¹⁸En ecao kwongere mere di eko turo isikan kame en oudo etimo. En eketo cinge i isikan noni di bobo en eko lokere timo gi nogi dedede, en likame ebino bwot.”

¹⁹Rwot Rubanga kwongere be, “Ateteni ango Rubanga akuo abino mine alola pi turo isikan kede kwongere kame en oudo etimo i nyinga.

²⁰Ango abino rieno bwoi na di ako make kede. Ango abino tere Babilon di ako mine alola ki kunono piento en likame eko bedo kede genere buta.

²¹Isirikalen mege dedede kame bino ringo ki yi kobino neneko, do kame bino bwot mege bino sasarun i bad tetu dedede. Di wun ikounu bino ngeno be ango Rwot en awaco kope nogi.”

Cikere ka Rubanga pi Mino Jo bedo kede Gen

²²Rwot Rubanga tie waco kaman: “Ango kikoma abino ot i wi yat seda moro abor malo di ako turo kakolibo me ajange mere; abino pite i wi moru moro abor malo.

²³Ango abino pite i wi moru me Isirael abor malo twatwal, tetekeny etim jange di eko nyak, di eko doko yat seda adwong. Winy me epone dedede bino bedo iye; gin kibino gwok i tipo me ajange mege.

²⁴Yen dedede me obar bino ngeno be ango en Rwot. Ango adwoko yen aboco piny, amio yen atino dongo doko boco malo; ango amio yen anumu tuo, di ako mino yen otuo libo di kiko dongo. Ango Rwot en awaco. Ango abino timo gikame atieko waco.”

Esekeri 18

Ngat Acelacel Yeo Peko me Dub mere

¹Rwot oko yamo keda.

² En ewaco be, “Dwong kop nyo komio jo bedo nyogao yamo agole noni kame mako lobo me Isirael be, ‘ Jonywal bin ocamo olok awac, di eko neko lak idwe gi’ ?

³” Ango Rwot Rubanga akuo akwongere be likame bobo wun ibinunu tic kede agole noni i Isirael.

⁴Poore wun ingeunu be kuo me jo dedede obedo mera; kuo me nganywal karacel kede me atin da. Ngat kame timo dub en kame bino to.

⁵” Ka dano moro opoore di etimo gikame iswil mito,

⁶ka en likame ecamo giayala i abilan me wi mori arabo eworo caljwogi me jo Isirael, amoto supo dako me dano ocelu arabo buto kede dako di tie kede tuwo me mon,



⁷ka en likame etero ngatamoro kirac, do edwoko ne ngat kame tie kede banya mere gikame oudo esingao bute pi banya, ka en likame eyako jame me jo, ka emio jo kame kec oneko cam kede di emio jo aoto nono igoen,

⁸ka en likame ekopao jo sente pi mito ameda, ka edagi timo gikarac kede di engolo kop me ateni i dierediere me jo atie kede piem,

⁹ka en elubo cik na kede di egwoko iswilia na, di etie kede genere buta, akodi dano nono en dano kopooore; ateteni en ebino bedo kuo.” Rwot Rubanga en owaco.

¹⁰” Ka dano opooore nono tie kede wode kobedo ngayak kede nganek,

¹¹ngat kame timo gi acel kikom gi nogi (bed bala papa mere likame timo moro kikom gi), ka wode nono camo giayala i abilan me wi mori, doko di esupo dako me dano ocelu,

¹²ka wode nono tero jocan kede jo kame piny oloo kirac, di eyako jamini me jo, kede di likame edwoko gikame ngabanya mere osingao bute, ka en eoto i abilan kede di eworo caljwogi,

¹³ka en ekopao sente but jo pi udo ameda; benyo, ebino bedo kuo? Li, en likame ebino bedo kuo. En etieko timo gikareco nogi dedede; en ateteni ebino to. Remo mere bino dong i wie.

¹⁴” Ka dano arac nono tie kede wode, di wode nono ko neno gikame papa mere obedo timo, di en eko dagi lubo tim ka papa mere nono:

¹⁵ka en likame ecamo i abilan me wi mori arabo woro caljwogi me jo Isirael, ka likame esupo dako me dano ocelu,

¹⁶arabo etero ngatamoro kirac, ka en edwoko gikame ngabanya mere osingao bute, ka en emio cam but ngat kame kec oneko kede emio egoe but ngat kame tie nono,

¹⁷ka en edagi timo gikarac, doko likame ekopao sente but jo pi udo ameda, ka en egwoko iswilia nango doko di elubo cik na, en likame ebino to pi dub ka papa mere; en ateteni ebino bedo kuo.

¹⁸Do papa mere, piento en ebedo ngamao, eyako jo icegun, kede pi ebedo timo gi kalikame ber but jo mege, en ebino to pi dub mege.

¹⁹” Do di wun ipenyereni be, ‘Pinyo bo kamio atin likame poore to pi dub ka papa mere?’ Ka atin obedo timo gikame iswil mito kede gikame poore, di egwoko iswilia na kede elubo cik na dedede, en ateteni ebino kuo.

²⁰Ngat kame timo dub en kame bino to. Atin likame bino neno can pi dub me nganywal mere, akadi nganywal da likame bino neno can pi dub me atin mere. Ngat katimo gi kopooore kobino mino pwoc pi tim mere kopooore, doko ngat katimo gikarac da bino neno can pi gikarac kame en etimo.



21” Do ka dano atimo gikareco oko jiko timo dub mege dedede di eko donyo gwoko iswilia na, di etimo gikame iswil mito kede gikame opoore, en ateteni ebino bedo kuo; en likame ebino to.

22Tim areco dedede kame en oudo ebeto timo likame bobo obino yutuno di oko maro i wie; piento en ebino bedo kuo pi tim me poore kame en eko donyo timo.

23Benyo, iparunu be ango cunya yom pi to me ngat katimo gikareco? Ango Rwot en apenyo. Li ba, ango amito be koto en elokere tenge ki yote areco me kuo mere di eko bedo kuo.

24” Do benyo, iparunu be ka dano kopooore oko lokere tenge eweko kuo mere me poore di eko donyo timo gikareco, gikame jo areco timo, benyo, ebino meede bedo kuo? Li! Likame tie tim mere me poore moro kame kobino yutuno. En ebino to pi raco mere me bedo li kede genere kede pi dub kame en etimo.

25” Do wun iwacunu be, ‘Gikame Rwot timo likame poore.’ Nataman winyunu wun jo me Isirael. Benyo, mam wun iparunu be gikame ango atimo likame poore? Gikame wun itimunu en kalikame poore.

26Ka dano kopooore oweko timo gikaber di eko donyo timo gikarac, en ebino to pi tim mere nono. En eto pi gikareco kame en etimo.

27Kamanono da, ka dano katimo gikareco oko lokere di eko weko tim areco kame en oudo ebeto timo di eko donyo timo gikame iswil mito kede kopooore, en elako kuo mere.

28En ateteni ebino kuo; likame ebino to, piento en eparo i cunye di eko lokere eweko dub mege dedede kame oudo ebeto timo.

29Aso di wun jo Isirael iwacunu be, ‘Rwot timo gi kalikame poore.’ Okwe wun jo Isirael, benyo, iwacunu be gikame ango atimo likame poore? Gikame wun itimunu en kalikame poore.

30” Pi mano, ango Rwot Rubanga, atie waco ne wu be abino ngolo kop i kom wun dedede di lubere kede yongayo me kuo me ngat acelacel. Swilarunu ki gikareco wu dedede; ka li, dub wu bino kelo ne wu to.

31Ucunu tenge gikareco dedede kame wun ibedunu timo buta, di ikounu udo tam anyen kede cuny anyen. Okwe wun jo Isirael pinyo kamio imitunu to?

32Ango Rwot Rubanga, cunya likame yom pi to ka ngatamoro. Lokerenu tenge ki dub wu di ikounu bedo kuo.”

Esekeri 19

Wer me Iturur

1Rwot oko waco na be awer wer me iturur noni ne jotel me Isirael.



²En ewaco na be awer kaman: toto ni oudo cal bala twon engu adako i diere me inguon! En oudo ecal bala engu adako kobuto piny pito idwe mege, i diere me inguon.

³En eko pito atin mere acel; di atin nono oko pwonyere mako le me amwoda; en eko donyo camo jo.

⁴Atekerin oko winyo kop i kome di gin kiko cike kede bur di eko poto iye. Gin kiko pene kede golu di kiko tere Misiri.

⁵Kakame toto mere oneno kede be oudo edubo kare mere kure, gen kame oudo etie kede da otiek, en eko kwanyo atin ace kikom idwe mege di en eko pite edongo edoko engu ager.

⁶Kakame bin en edongo kede, eko donyo irim i diere me inguon icegun. Di eda eko pwonyo mako le me amwoda; eda eko donyo camo jo.

⁷En eko tuturo apama atek me cel gi, di eko dudubo bomban gi; ka en edorano, lworu atek oudo mako jo kede gi dedede kame bin tie i lobo nono.

⁸Atekerin oko iikere pi sure; gin kibino ki adulion dedede. Gin kiko rienu bwoi gi pi cike, di kiko make i bur kame oudo kikunyo.

⁹Gin kiko pene kede golu di kiko twene i gi me yene, di kiko tere but abaka me Babilon. Gin kiko kete kakame kocelo kitek, tetekeny kur bobo kowiny dorano mere i wi mori me Isirael.

¹⁰Toto ni oudo cal bala yat olok kame kopito i nget pii. Pien oudo kopite kakame pii romo kiber, omio eko janyo di eko nyak.

¹¹Jange mege atek oko doko ibelai me jopug. Olok noni bin odongo bor malo twatwal; en oudo wie neno pi boro mere kede janyo mere.

¹²Do jogero mogo bin oko pute di gin kiko rete piny; yamo awok ki bad tetu kide oko mino anyakini mege otuo di kiko ony piny. Jange kame bin tek oko tuwo di mac oko wange.

¹³Nataman okobo pite i wi tim, i lobo kotuo, kakame pii li iye.

¹⁴Mac oko moko i kor olok; di eko wango jange kede anyakini mege. Likame bobo tie jange moro atek kodong, ibelai me pug likame bobo bino bedo tie. Manoni obedo wer me iturur; kotio kede me iturur.

Esekeri 20

Mit ka Rubanga kede Jemo me Jo

¹I buto duwe tomon i duwe me kany i mwaka me kanyaare me wan bedo obukui, jodongo mogo me Isirael oko bino buta pi mito ngeno mit ka Rwot. Gin kibino di kiko bedo piny i nyima.



²Rwot oko yamo keda.

³En ewaco na be, “Wace jodongo me Isirael nogi be ango Rwot Rubanga atie waco kaman: pinyo komio wun ibinunu penyo tam kibuta? Ango akwongere be likame abino yei ne wun penya kop moro. Ango Rwot Rubanga atieko waco.

⁴” Wot ka dano, benyo, in itieko iikere pi ngolo kop ne gin? Aso, poore imi gin kingei gikareco kame joakwari gi bin obedo timo.

⁵ Wac negi gikame ango atie waco. I ceng kame ango bin ayero kede jo Isirael, ango anyutere but gi i lobo me Misiri, di ako lairo but gi be ango Rwot en kame abedo Rubanga gin.

⁶Cenge nono ango ako lairo but gi be abino kwanyo gi ki lobo me Misiri di ako tero gi i lobo kame ango ayero negi, lobo amio, lobo kame ber kalamo lobere dedede.

⁷Ango ako waco negi be ngat acelacel poore lwom tenge caljwogi mere, di likame kiko munaun kede rubangan me Misiri, pien ango en abedo Rwot Rubanga gin.

⁸Do gin kiko jemo na di kiko dagi winyo kop na; likame bin tie ngatamoro kikom gi akadi acel kame oko uco caljwogi mere arabo weko rubangan me Misiri. Di do ango ako tamo be koto abwoto lilo na i kom gi di ako mino gi alola i lobo me Misiri.

⁹Do ango likame ako timo kamanono pi nyinga, tetekeny kur akel acae i nyinga i nyim atekerin kame gin bin kibedo i diere gi; pien ango oudo atieko waco ne jo Isirael i nyim gin be abino kwanyo gi ki Misiri.

¹⁰” Aso, ango bin ako kwanyo gi ki Misiri di ako tero gi i wi tim.

¹¹Ango ako mino gin cik na, kede ako mino gin kingeo iswilia na, gikame mio jo dedede kame lubo gi bedo kuo.

¹² Medo i wi manono, ango ako mino gin gwoko Sabato na bala gianena me winyere nango kede gin, tetekeny gin kibed yutuno be ango Rwot en kame amio gin kibedo jokacil.

¹³Do jo Isirael oko jemo na i wi tim. Gin kiko turo iswilia na di kiko dagi lubo cik na, gikame mio jo dedede kame lubo gi bedo kuo. Gin kiko pwoko Sabato na atwal atwala. Di do ango ako bedo kede tam be koto abwoto lilo na i kom gi i wi tim kunono di ako muducaro gi atwal.

¹⁴Do ango likame ako timo kamanono pi nyinga, tetekeny kur akel acae i nyinga, i nyim atekerin kame bin oneno di ango akwanyo jo Isirael ki Misiri.

¹⁵ Aso, ango bin ako kwongere i wi tim kunono be likame abino tero gi i lobo kame ango oudo amio gi, lobo amio, kame ber kalamo lobere dedede.

¹⁶Ango awaco manono pien gin oudo kidagi lubo cik na, doko kituturo iswilia na, kede kipwoko Sabato na; pien cuny gi oudo tie i kom caljwogi.

¹⁷” Do ango ako neno gi kede cuny me kisa, di likame ako neko gi i wi tim kunono.



- 18**Ango ako kwenyaro idwe gi kaman: kur ilubunu iswilia kame joakwari wu oketo arabo itok gi, doko da kur ipwokerenu kede woro caljwogi gin.
- 19**Ango en Rwot Rubanga wu. Poore ilubunu iswilia na, kede poore igwokerenu di ikounu timo gikame cik na mito.
- 20**Poore imiunu Sabato na bed cil, tetekeny kibed gianena kame tie i dierediere nango kede wu, gianena kame bino bedo pono wi wu be angu en Rwot Rubanga wu.
- 21**” Do lwak nono da oko jemo na. Gin likame kilubo iswilia na, akadi cik na da likame kigwoko, iswilia kede cik kame mio jo dedede kame lubo gi bedo kuo. Gin kipwoko Sabato na. Ango ako tamo be koto abwoto lilo na i kom gi di ako mino gi alola i wi tim.
- 22**Do angu likame ako timo kamanono pi nyinga, tetekeny kur akel lewic i nyinga i nyim atekerin, jo kame bin oneno di angu akwanyo jo me Isirael ki Misiri.
- 23** Aso angu ako kwongere but gi i wi tim be abino sasaro gi i diere me atekerin apat, i pinye dedede.
- 24**Angu atimo manono pien gin kidagi timo gikame cik na mito, kituturo iswilia na, kipwoko Sabato na, kede cuny gi obedo maro caljwogi kame joakwari gi bin woro.
- 25**” Di do angu bin ako mino gin iswilia kalikame beco kede cik kalikame twero mino gi kibedo kuo.
- 26**Angu amio gin kimunaun ken gi kede giayala gi. Angu ajalo gi kimio idwe gi kao bala giayala awanga but caljwogi, tetekeny akel ne gi lworu atek, di gin kiko ngeno be angu en Rwot.
- 27**” Pi mano, wot ka dano, wac ne jo Isirael gikame angu Rwot Rubanga atie waco negi. Manoni bobo en kite kame joakwari gi bin onywaru kede, i yore me gin bedo li kede genere buta.
- 28**I kare kame bin angu atieko tero gi kede i lobo kame angu oudo akwongere pi mino gin, gin kiko lokere wango cunya i yore me mino giayala gi i kabedo moroni kenekene kame gin bin kineno iye emukura moro, arabo yat moro, oudo kitero kagonogo giayala gi angwe kur, kede giayala amata.
- 29**Angu bin ako penyo gi kaman: kabedere nyo igonogo kame wun iotunu iye? Kabedere nogo bin oko donyo lwongo be ‘Kabedere Kimukurur Malo’ tuno tin.
- 30**Pi mano, in nataman wace jo Isirael gikame angu Rwot Rubanga atie waco: pinyo kame mio miero wun imeedenu pwokere kede dub kame joakwari wu bin otimo di ikounu parao lubo caljwogi gi?
- 31**Tuno tin wun pwodi ipwokerenu kede woro caljwogi wu, di imiunu gi giamia kede di imiunu gi idwe wu bala giayala awanga. Okwe wun jo me Isirael, benyo, kom pwodi wun itamunu be ibinunu meede bino penyo tam kibuta? Angu Rwot Rubanga akuo akwongere be likame abino yei ne wu penyo kop moro kibuta.



³²Wun itiekunu moko tam wu be imitunu donyo timo gikame atekerin apat timo. Iwacunu be imitunu bedo cal bala jo me pinye icegun, di ikounu donyo woro yen kede kide. Do manono likame bino timere akadi acel.

Rubanga mio Jo Alola doko Esasiro gi

³³” Ango Rwot Rubanga akwongere be ateteni kede gero na ango abino pugo wu kede twer na kede teko na.

³⁴Ango abino kwanyo wu ki atekerin icegun di acoko wu ki pinye apapat kakame isasarunu iye. Abino kwanyo wu kede twer kede teko na, kede lilo atek.

³⁵Ango abino tero wu i wi tim me atekerin, di ako riamo kede wu kunono wang i wang, di ako ngolo kop i komu.

³⁶Ango abino ngolo kop i komu bala kame riki atimo ne joakwari wu i wi tim me Sinai.” Rwot Rubanga en owaco.

³⁷” Ango abino dino wu tetek lubo iswilia me isikan na.

³⁸Abino kwanyo tenge jojemo kame tie i diere wu, kede jo kame turo cik na. Ango abino kwanyo gi ki lobo kame nataman gin kitie bedo iye bala jokumbor, do gin likame kibino dok i lobo me Isirael. Di do wun ikounu bino ngeno be ango en Rwot.”

³⁹Rwot Rubanga oko waco be, “Aso wun jo Isirael, ka idagunu winyo kop na, cako nataman otunu do itimunu tic ne caljwogi wu. Do i cen mere likame abino yei ne wu pwoko nyinga i yore me wun mino giamia wu but gi.

⁴⁰Pien i wi moru na kacil, moru me Isirael abor malo, wun dedede jo Isirael ibinunu wora i kunono. Ango abino gamo wu i kunono, di ako mito ne wu kelo na jamini wu, giamia abeco kame iyerunu ayera, kede giamia wu dedede kacil.

⁴¹Ingei ango kwanyo wu ki atekerin me pinye kame kosasaro wu iye di ako koko wu karacel, ango abino yei gamo wu bala gikame ngwe kur kame yomo cunya; di ango ako bino nyutere i diere wu i nyim atekerin be ango en Rubanga kacil.

⁴²I kare kame ango abino dwoko wu kede i lobo me Isirael, lobo kame ango bin akwongere pire pi mino joakwari wu, di do wun ikounu bino ngeno be ango en Rwot.

⁴³I kunono wun ibinunu yutuno yote areco me kuo wu kede tim areco dedede kame wun bin imunaununu kede; di wun ikounu bino bedo kede keco cuny i komu kenu pi gikareco dedede kame oudo ibedunu timo.

⁴⁴Wun ibinunu ngeno be ango en Rwot Rubanga, i kare kame ango abino tic kede wu di likame aparo pi yote wu areco, arabo tim wu kodubere, do pi mino nyinga wor.” Rwot Rubanga en owaco.

Mac kame tie i Bad tetu Piny

⁴⁵Rwot oko yamo keda.

⁴⁶En ewaco be, “Wot ka dano, lok nyimi nen bad tetu piny. Yam kop kalikame ber i kome, doko murao kop i kom abum me bad tetu piny kunono.



⁴⁷Wac ne abum nono me bad tetu piny ewiny kop kame ango Rwot Rubanga atie waco: neningo, ango atie cwinyo mac i komi, en ebino wango yen dedede, anumu kede kotuo. Mac nono likame bino nekere. En ebino calar yai ki bad tetu piny di eko nyai ot tetu malo. En ebino reno nyim jo dedede.

⁴⁸Jo dedede bino neno be ango, Rwot en kame acwinye, doko likame enekere.”

⁴⁹Di do ango ako waco be, “Okwe Rwot Rubanga, nen jo dedede tie yamo i koma be, ‘Mam en ngat kame maro yamo agole?’ ”

Esekeri 21

Epima ka Rwot

¹Rwot oko yamo keda.

²En ewaco be, “Wot ka dano, lok nyimi nen tetu Yerusalem di iko ronkino kabedere mege kacil. Kwenyaro jo kame tie i lobo me Isirael

³be ango Rwot Rubanga atie waco kaman: ango atie bino yi kede wu. Abino woto epima na i akularu mere di ako totongo wun dedede, jo kopoo kede jo areco.

⁴Abino tic kede epima na i kom jo dedede cako ki bad tetu piny tuno i bad tetu malo;

⁵di jo dedede ko bino ngeno be ango Rwot atieko woto epima na ki akularu mere; likame abino dwoke bobo iye.

⁶” Wot ka dano, cur bala cunyi mito cot pi cweruncy atek, di gin dedede kitie neni.

⁷Di ka gin kiko penyi pinyo komio in itie cur, in wac negi be pi rwonge kobino. Pi ka kare me timere me gikame kowaco nono otuno, cuny jo dedede bino nyote, doko teko me jo dedede bino tiek pi lworro atek, likame tie dano moro kame bino bedo kede nwangcuny, cong jo bino bedo miel amiela teltel. Neningo, kare nono kom otieko tuno doko etie cobere.” Rwot Rubanga en owaco.

⁸Rwot oko waco na be,

⁹” Wot ka dano, mura. Wac ne jo kop kame ango Rwot atie waco: epima, kotie peno epima di osute.

¹⁰Kotie pene pi timo nek kede, kosute komito emeny bala meny me kot. Benyo benyo kame wan okarununu ilel kede? Wun itiekunu bedo kede acae i kom adao me pwoonyo wu kede i kom ikwenyar dedede.

¹¹Kotie suto epima, pi cako tic kede. Kopene di oko sute, tetekeny komie i cing nganek.

¹²Okwe wot ka dano, dwilao kede koko, pien epima nono koiko pi jo na kede pi jotel dedede me Isirael. Kobino neko gin karacel kede jo na. Bap kori pi paro can!

¹³Ango atie tamo jo na, ka gin kiko dagi swilaro, gi nogi dedede bino timere negi.



14” Aso in, wot ka dano, murao; bap cingi; epima na bino ruruco cob. En epima kame neko jo, epima kame jo lworu doko eneko jo nek atek.

15Manono mio jo na cuny gi nyote di kiko donyo gete pi lworu. Ango atieko ciko epima na i irutei gin dedede. En emeny bala meny me kot, doko kotieko peno lebe pi nek.

16In epima, cak cocobo jo kame tie i badi tetu cam kede i badi tetu ngodal. Cocobo jo me bad tetu moroni kenekene kame lebi lokere iye.

17Ada abino bapo cinga, di ako mino gero na tiek. Ango Rwot en awaco.”

Epima me Abaka me Babilon

18Rwot bobo oko yamo keda.

19En ewaco be, “Wot ka dano, gir yote are kame abaka me Babilon karuno lubo di ebino kede epima mere. Gin are nogo dedede poore di kicakere ki piny acel. Di iko sipo apande kakame yongayo kaoto i bomba okakarun iye.

20Gir yongayo acel kame abaka bino lubo me ot Raba, bomba me jo Amon, do yongayo ocelu ot Yuda, i Yerusalem, bomba kame kocelo.

21Abaka me Babilon cungo i akara me yongayo pi timo ilamus pi ngeno gikame bino timere; en eyayango imalia di eko onyo gi piny, epenyo tam kibut caljwogi mere, engio emany me le. Mago nogo dedede en etimo pi mito ngeno bad kame poore eot iye.

22Alulu me Yerusalem oko poto i bade tetu cam. Manono cimo ne be epoore temuno gi me tiatio bomba piny, elwong jo bin cak nek, eak cocobo erute kede gi me tiatio en, etor kayito i wi apama me bomba, di eko kunyo pulejun.

23Jo me Yerusalem likame bino yei be manono karuno timere, pien gin kitieko timo cikere gi kede abaka me Babilon. Do abaka nono bino yutuno negi raco gi di eko kwenyaro gi be kobino mako gi bala mabus.

24Manoni en gikame angu Rwot Rubanga atie waco be: dub wu kotieko nyuto kakaler, omio kongeo raco wu. Dub wu nyutere i tim wu dedede. Pien kotieko yutuno raco wu, angu abino mino komako wu di oko tero wu bala mabus.

25” Aso in, ngat kame ikiteso ni reco, ngapug karac me Isirael, ceng nin otieko tuno, ceng me alola ni me ajikini.

26Angu Rwot Rubanga atie waco kaman: kwany tenge egoe kame iboo kede wi, kwany da tenge ocoro ni me ajakanut. Likame tie gimoro kame bino dong i kite kame oudo etie kede sek. Kiarao jo kame oudo tie i ruom apiny kikob i ruom amalalo! Dwok i ruom apiny jo kame oudo tie i ruom amalalo!

27Abino dudubo, abino dudubo! Do manoni likame bino timere tuno di ngat kame angu ayero pi mine alola otuno. Di do angu ako bino mine i cinge.

Epima kede Jo Amon



²⁸ “Do in, wot ka dano, murao. Wac gikame ango Rwot Rubanga atie waco ne jo Amon, jo kame tie nyero jo Isirael. Wac negi kaman: kotieko woto epima pi cako nek kede; kopeno lebe pi nek, pi mine meny bala meny me kot.

²⁹ Wun jo Amon, gianyuta kame wun inenunu obedo me angalo, doko imurai wu da obedo me angalo. Wun ikiteso wu reco, doko itimunu gikareco. Ceng wu tie bino, ceng me mino wu alola me ajikini. Kobino ngongolo ngut wu kede epima.

³⁰” Dwokunu ipimai wu i akularu gi! Ango abino ngolo kop i komu i kakame bin kocweo wu iye, i lobo kame konywalo wu iye.

³¹ Ango abino bwoto lilo na i komu, abino beo kede lilo na i komu bala mac. Di ako mino wu i cing jo ager, jo ipirana i nek.

³² Mac bino wango wu. Kobino onyo remo wu i lobo wu, di likame ngatamoro ko bino yutuno wu bobo.” Rwot en owaco.

Esekeri 22

Dub me Yerusalem

¹ Rwot oko yamo keda.

² En ewaco be, “Wot ka dano, benyo, in itieko iikere me ngolo kop ne bomba kame nek dwong iye nono? Mito iwac ne gikareco mege dedede.

³ Wac ne gikame ango Rwot Rubanga atie waco be: Yerusalem, in itieko neko jo ni atot, doko itieko pwokere kede woro caljwogi, kare nin otieko tuno.

⁴ In itie kede raco me onyo remo me jo, doko caljwogi kame in itimo otieko mini ipwokere; in itieko mino ceng ni odoko iyapiyapi, kare kame oudo omoko piri otieko tuno. Manono en komio ango ami lewic i nyim atekerin, doko pinye dedede tie kede nyero i komi.

⁵ Jo me pinye kiyapiyapi kedi kede me kakaboco bino nyeri, in ngat kame nyingi otieko dubere, doko idwong kede atotolun.

⁶ Jotel me Isirael dedede, ngat acelacel geno teko mere kene, di eko tic kede me onyo remo me jo.

⁷ Likame tie ngatamoro kame woro jonywal mege. Jokumbor kame tie bedo kede wu kotie kede adiadia but gi, doko da idwe kic kede apuserun kotero kirac.

⁸ Jo ni li kede wor i kom kabedere na kacil, doko likame kigwoko Sabato na.

⁹ Jo ni mogo dubo nying jo icegun pi mito be konek gi, ace camo i abilan me wi mori, kede ace timo caro.

¹⁰ Cuo ace kikom gi buto kede mon ka papi gi, ace dio mon tetek pi buto kede gi di mon tie kede tuwo duwe.



¹¹Cuo ace buto kede mon me jo icegun, ace buto kede ci wod gi; cuo ace butu kede amiegu gi, anyira ka papi gi kikokome.

¹²Jo ni mogo yei kowilo gi pi neko jo icegun. Jo ace kopo jo Isirael icegun sente pi mito ameda di kiko baro pi sero jo gi. Gin wi gi otieko wil keda.” Rwot Rubanga en owaco.

¹³” Neningo, ango abino bapo cinga pi wangcuny pi ud kalikame poore kame jo ni otimo, kede pi remo kame koonyo.

¹⁴Benyo, iparo be ibino bedo kede nwangcuny moro, arabo teko moro i kare kame ango abino tic kede i komi? Ango Rwot en awaco, doko abino time.

¹⁵Ango abino sasaro jo ni i diere me atekerin dedede, di ikounu sarakin i pinye apapat, di ango ako bino jiko tim ni areco.

¹⁶Manono bino mino atekerin apat likame bedo kede wor butu, di wun ikounu bino ngeno be ango en Rwot.”

Epipa Aliet ka Rubanga me Jililo Nyonyo kame Kotwako

¹⁷Rwot oko waco na be,

¹⁸” Wot ka dano, kony me jo Isirael otieko doko li kibuta bala cete. Gin dedede kical bala cete konyanyalun me nyonyo buronsi, tin, ayon kede led; kical bala cete me nyonyo siliba.

¹⁹Pi mano, ango Rwot Rubanga atie waco kaman: pien kony gin otieko doko li bala cete, ango abino koko gin Yerusalem karacel.

²⁰Bala kame kocoko kede nyonyo siliba, buronsi, ayon, led kede tin i epipa me calaro gi, di oko kuto mac i kom gi pi calaro gi, kamanono ada abino koko gi karacel di ako kuto mac me gero na kede me lilo na i kom gi di ako calaro gi.

²¹Ango abino koko gi karacel Yerusalem, di ako kuto mac me gero na i kom gi ako calaro gi.

²²Bala kame kocalaro kede siliba i epipa, kobino calaro gida kamanono i Yerusalem, di gin kiko bino ngeno be ango Rwot atieko bwoto lilo na i kom gi.”

Dub ka Jotel me Isirael

²³Rwot bobo oko yamo keda.

²⁴En ewaco be, “Wot ka dano, wace jo Isirael be lobo gi likame kokwanyo dub mege. Pi mano, en likame ebino bwot ki alola i ceng me lilo na.

²⁵Jopug mege cal bala engu kame dorano di etie nyinyilo le kame emako. Gin kineko jo di kiko tero sente gi kede jamini gi kabeco. Gin kitieko mino mon atot odoko apuserun.

²⁶Josaserdoti mege turo iswil na doko kili kede wor i kom jamini na kacil. Likame kingeo poko jamini kacil kede kalikame cil. Doko likame kipwonyo jo pi ngeno poko



gi kopwokere kede kalikame opwokere, kede gin likame kiparo Sabato na. Manono omio gin kili kede wor buta.

²⁷Jotel me Isirael cal bala ipeon kame tie nyinyilo le kame kineko. Gin kionyo remo me jo pi mito udo abar i yore kalikame ber.

²⁸Inabin me Isirael umo dub nogi bala jo kame puo apama kede erangi atar. Gin kineno gianyuta me angalo di kiko murao kop me angalo di kiwaco be, ‘Rwot Rubanga owaco be, ‘do di ango Rwot likame awaco negi kop moro.

²⁹Jo me lobo nono lung tie kede tim me adie kede yak. Gin kitero kirac jocan kede jo kame piny oloo gi, doko da kidio jokumbor kame tie i piny gi di likame kiparo pirgi akadi acel.

³⁰Ango ako bedo mono dano moro ki diere gin kame koto temuno apama, dano kame koto cung i nyima i arora pir lobo nono, tetekeny kur ango amuducaro en; do likame ako udo ngatamoro.

³¹Pi mano, ango abino bwoto lilo na i kom gi, di ako muducaro gi pi gikame gin kitimo.” Rwot Rubanga en owaco.

Esekeri 23

Amiegu Are kobedo Jodubo

¹Rwot oko yamo keda.

²En ewaco be, “Wot ka dano, bin tie amiegu mogo are.

³I kare kame gin oudo pwodi kitie kede apongai, cuo oko cako mito gi di gin kiko doko imalayan i Misiri; cuo omamako tune gi.

⁴Nyako adwong bin nyinge Okola, en ecungo pi Samaria, do atidi mere oudo nyinge Okoliba, kame cungo pi Yerusalem. Ango bin ako nyomo gin are nogo dedede di gin kiko nywalo na idwe awobe kede anyira.

⁵Bed bala en oudo mera, Okola oko bedo timo malaya; en oudo mit mere dwong but cuo me Asiria.

⁶Gin en isirikalen kame ngapo igoen akwakwar, jopug, kede jotel me isirikalen, gin dedede awobe abeco, kame ringo kede asigiran.

⁷En eko buto kede gin, cuo abeco kame koyero ayera kikom cuo dedede me Asiria, doko eko munaun kede woro caljwogi me jo Asiria.

⁸En likame eweko tim mere me malaya kame bin ecako timo ki Misiri; pien cuo bin ocako buto kede di pwodi en aponga di kimamako tune mege di gin kiko meede mite kamanono bala malaya.

⁹Pi mano, ango ako mine i cing cuo me Asiria nogo, kame en oudo cunye mito kitek.



¹⁰Gin kiko gonye edong nono; kimako awobe kede anyira mege di gin kiko neke kede epima. Gi kotimere ne nono bin oko doko gi me ayama me mon i kare kame bin kotieko ngolo ne kede kop.

¹¹” Bed bala amin mere Okoliba bin oneno gi kotimere ne, do en eko bedo do kede mit kede tim me malaya kame oko kalamo me amin mere Okola.

¹²Eda eko bedo kede mit atek i kom jopug kede jotel me isirikalen me Asiria, isirikalen kongapo angapito gi me isirikalen, isirikalen kame ringo kede asigiran, gin dedede awobe abeco.

¹³Ango ako neno be en oudo emunaun; gin anyira are nogo ekite gi acel.

¹⁴⁻¹⁵” En eko medo dubere ameda i tim mere me malaya nono. Cunye obedo wane i kom cal me cuo me Babilon, kame kogoro i kor apama di oko suto kede erangi akwar, di kotweo ne gi ausin i pier gi kede kododolo negi igoen i wi gi, cal nogo oudo mie eyutuno jodongo me isirikalen me Babilon.

¹⁶Kakame en eneno kede cal gi nogo, cunye oko mito kitek buto kede gi, di en eko cwano jo but gi Babilon.

¹⁷Jo me Babilon oko bino buto kede. Gin kibedo kede mit atek me buto kede kitek di cunye oko dagi gi.

¹⁸Kakame en eko meede timo kede malaya mere kakaler di etalere nono i nyim jo, ango cunya oko dage, bala kame cunya oudo odagi kede amin mere.

¹⁹Do en pwodi eko meede ameda kede tim mere me malaya nono, bala kame oudo ebedo timo i kare mere me aponga, kare kame en bin etimo kede malaya i Misiri.

²⁰En cunye oko bedo kede mit atek but ipalon mege me kunono, cuo kame kom gi me cuo rom bala me punda, doko kwir gi me cuo cal bala me asigira.

²¹Okoliba, in oudo cunyi mito dok i tim me caro me kare ni me aponga, kare kame cuo me Misiri oudo mumulo tune ni di pwodi kiburuno aburun.

Rubanga Ongolo Kop i kom Okoliba

²²” Pi mano, Okoliba, manoni en kop kame ango Rwot Rubanga atie waco ni. Ango ayaro mino cuo kame in oudo imaro nogo cuny gi wang i komi, cuo kame nataman cunyi otieko dagi nogo. Ango abino kelo gin di kiko luki ki bad dedede.

²³Ango abino kelo jo Babilon kede jo Kaludea, cuo me Pekod, Soa kede Koa, kede jo Asiria dedede; gin dedede awobe abeco, jopug kede jotel me isirikalen dedede, jotic adongo kede isirikalen jo yi, kede jo kame ringo kede asigiran.

²⁴Gin kibino suri di kiwok ki bad tetu malo; kiyaro bino kede cabalan kede gadigadin kame yeo jamini me yi kede twon ekodet me jo. Gin kibino luki i bad tetu dedede di kimako ibukui kede di kingapo icoron atek me galao wic. Ango abino mini i cing gi di gin kiko bino ngolo ni kop di kilubo iswilia gi.



²⁵Ango abino lilo ni, tetekeny gin kitim tic i komi kede gero. Gin kibino ngolo umi kede yiti tenge, do jo ni kame bino bwot kobino neko kede epima. Gin kibino mako awobe kede anyira ni di kiko tero, jo ni kame bino bwot kobino wango kede mac.

²⁶Gin kibino gonyo goen ki komi di kiko tero mwolere ni.

²⁷Manono en kite kame angu abino jiko kede caro ni kede tim ni me malaya kame ikelo ki Misiri. Abino mino cunyi yai ki kom gi di likame bobo iko yutuno gi atwal.”

²⁸Rwot Rubanga waco kaman: “Ango abino mini i cing jo kame cunyi dagi, jo kame in cunyi otieko yai ki kom gi.

²⁹Gin kibino tic i komi kede wangcuny, di kiko tero gi dedede kame in iudo kede teko ni. Gin kibino weki idong nono abongo gimoro, di komi kodong nono kame ibedo timo kede malaya nono tie kakaler. Caro ni kede tim ni me malaya

³⁰en kokelo ni manoni, piento in ibedo timo malaya kede atekerin di iko pwokere kede caljwogi gi.

³¹In ilubo kite ka amini; pi mano, angu abino mini imato lilo na ki ikopo acel nono kame amini da omate kiye.”

³²Rwot Rubanga waco be, “In ibino mato lilo na ki ikopo kame amini omate kiye; en etut di elac. Jo bino cani di kinyeri; pien ikopo nin opong.

³³Ebino meri di eko kelo ni iturur. En ebedo ikopo kame kelo lwooro kede amuducar. Manono en ikopo ka amini Samaria.

³⁴In ibino mate di iko lungaro en, iko neko ikopo nono, di iko ngongolo kede tune ni pi iturur. Angu Rwot Rubanga en awaco.”

³⁵Pi mano, Rwot Rubanga tie waco kaman: “Piento in wi oko wil keda di iko lwoma cen gei, in ibino udo alola pi tim ni me caro kede me malaya.”

Rubanga Ongolo Kop i kom Amiegu Are nogo

³⁶Rwot oko penya be, “Wot ka dano, benyo, in itieko iikere pi ngolo kop ne Okola kede Okoliba? Aso, wac negi gikareco kame gin kitimo.

³⁷Gin kibedo timo adote kede nek; kitimo adote i yore me woro caljwogi, kede kibedo mino idwe gi awobe bala giayala angola but caljwogi nogo, idwe kame gin kinywalo na.

³⁸Likame manono kenekene en kame gin kitimo na. Gin kipwoko kabedo na kacil i ceng acel nono, kede kimunao Sabato na.

³⁹Cenge nono kame gin kingongolo kede idwe gi me woro caljwogi, en kame gin kibino kede kabedo na kacil di kiko pwoke. Manoni en gikame gin kibedo timo i oda.

⁴⁰” Doko da gin kibedo cwano joor pi ot lwongo cuo ki tenge kakabor, di cuo nogo da ko bino. Kakame cuo nogo tuno kede, amiegu nogo oudo bol di kiko cilo abuke wang gi, kede kiko tubuso kom gi kede mwolere.



⁴¹Di kiko bedo i komini acil, di emesa tie i nyim gi kame koketo odok na angwe kur i wie, kede mo na me olibeti.

⁴²Woo me ekodet me jo kame bedo atatai, jo kalikame paro piny oudo winyere kikut gi kunono, ekodet me jo amera kame kokelo ki wi tim. Gin kiketo mwolere i ngut cing mon nogo di kiko ngapo negi icoron acil i wi gi.

⁴³Di ango ako waco i cunya be, gin kiol teko gi otiek, do cuo nogi pwodi tie mito buto kede gi kamanono.

⁴⁴Gin kibedo ruruco buto kede gi bala malaya. Epone nono en kame gin kibedo buto kede Okola kede Okoliba, mon acar.

⁴⁵Jo kopooore bino ngolo raco i wi gi pi adote kede nek; pien gin kibedo joadote doko cing gi opwokere kede remo me jo.”

⁴⁶Rwot Rubanga waco kaman: “Ango abino kelo negi ekodet me jo kame bino mino gi kibedo kede lwooro atek, doko kibino yako gi.

⁴⁷Ekodet me jo nono bino didipo gi kede kide di kiko totongo gi kede ipimai gi. Gin kibino neneko awobe kede anyira gi, kede kiko wawango ude gi.

⁴⁸Epone no en kame ango abino jiko kede tim me caro i lobo noni, tetekeny manono bed gi me ikwenyar but mon di kiko weko timo adote bala kame gin kibedo timo.

⁴⁹Do wun amiegu are nogi, ibinunu udo alola pi caro wu kede pi dub wu me woro caljwogi; di wun ikounu bino ngeno be ango en Rwot Rubanga.”

Esekeri 24

Aguludek kame Yie Opapacun

¹I buto duwe tomon me duwe me tomon i mwaka me kanyangon me wan bedo obukui, Rwot oko yamo keda.

²En ewaco be, “Wot ka dano, wandiko buto duwe me ceng katin, pien tin noni en kame abaka me Babilon ocako luko kede Yerusalem.

³Di iko tatamo ne jojemo nogo agole kame ango Rwot Rubanga amio gi kaman: Ketunu agulu nyonyo i keno onyunu pii pong iye.

⁴Ketunu ringo aber kame kongongolo iye, ringo me amuro kede me akwata; pongunu yie da kede ringo acogocogo.

⁵Kwanyunu oromo aber kame koyero ayera; napunu yen i dud agulu nyonyo nono, cwakunu ringo kame kongongolo me oromo nono, tedunu cogere mege da.”

⁶Pi mano, Rwot Rubanga tie waco kaman: “Itie i can in bomba me jonek! In ical bala agulu nyonyo kame nyal omako yie, agulu nyonyo kalikame kokikiso yie. Kokwanyo ringo kame tie iye acelacel tuno tieko gin dedede.



⁷Pien remo me jo kame koonyo i bomba pwodi tie iye, likame oudo koonyo remo nono piny i lobo kakame koto asinge oume iye, do koonye i wi lela kakatek.

⁸Ango aweko remo nono kunono, kabedo kalikame kokaruno ume kiye, tetekeny etwaruno lilo na di ako timo onyanga.”

⁹Pi mano, Rwot Rubanga tie waco kaman: “Itie i can in bomba me jonek! Ango kikoma en abino kumemo yen.

¹⁰Medunu yen! Mokunu mac! Cwakunu ringo nono kiber paka cwe mere tiek! Nyalunu iye jamini kame mie ebedo ikukuny! Wekunu cogere mege wangi!

¹¹Aso do ketunu agulu me nyonyo buronsi nono kalikame gimoro tie i yie i mac, di ikounu weke edop paka bokere bubu. Nyal kame tie i yie cengemogo bino wang di yie ko were edoko cil.

¹²Ango abedo cane nono, nyal nin mac likame kwanyo. Abino uci i mac kede nyal ni.

¹³Yerusalem, bed bala ango atamo lonyi ki tim ni me caro kame neno rac, do in pwodi iko dong di ipwokere kamanono. In likame bobo ibino doko cil tuno di ango atieko lilo na i komi.

¹⁴Ango Rwot Rubanga en awaco. Kare bino tuno kame ango abino timo kede gi noni. Ango likame abino loko tam na arabo weko dub nin aweka amoto bedo kede cuny me kisa i komi. Ango abino mini alola di lubere kede yote me kuo ni, kede pi gikame in itimo.” Rwot Rubanga en owaco.

To ka Dako ka Esekeri

¹⁵Rwot oko yamo keda.

¹⁶En ewaco be, “Wot ka dano, ango ayaro kwanyo kuo me ngat kame in imaro kitek; do in likame miero ibed kede iturur arabo ikoki, akadi binyo pigewangi.

¹⁷Diny eliling. Kur itim pwola me koko ngat oto. Kur ikwany egoe ni me bono wic tenge arabo amukai ni ki tieni. Kur ium nyimi pi nyuto iturur arabo icam cam me jo atururo pi dano oto.”

¹⁸Aso, ango ako yamo kede jo odiko, di otieno dako na to. Oru mere odiko ango ako timo bala kame oudo ociko na.

¹⁹Jo oko waco na be, “Wac ne wan dwong kop omio in itie timere kamano?”

²⁰Ango ako waco negi be, “Rwot owaco na

²¹be awace wun jo me Isirael kaman: ango abino munao kabedo na kacil, kateko wu kame iwakerenu kede, kabedo kame wun inenunu yomo cunyu nono, kede kame cunyu maro. Di idwe wu awobe kede anyira kame iwekunu odong cen oko bino neko gi kede epima.

²²Di wun ikounu bino timo gikame ango atimo nono. Likame ibinunu umo nyimu arabo camo cam me jo atururo pi dano oto.



²³Likame ibinunu kwanyo tenge igoen wu me bono wic arabo ot abongo amukai i tien wu, amoto tururo arabo koko. Do dub wu bino mino ijonyunu, di dano acelacel ko donyo cur but ngawote.

²⁴Di Esekeri ko bedo anen but wu; ibinunu timo gi dedede bala kame en etieko timo. I kare kame gi noni bino timere kede, wun ibinunu ngeno be ango en Rwot Rubanga.”

²⁵Rwot oko waco be, “Wot ka dano, ango abino kwanyo kateko gi tenge kibut gi, gikame gin kiwakere kede nono kede kame yomo cuny gi, gikame gin kineno yomo cuny gi nono kede kame cuny gi maro. Abino kwanyo da tenge awobe kede anyira gi.

²⁶I ceng kame ango abino timo kede gi noni, ngat kobwot kiye bino kelo ni rwonge mere.

²⁷Cenge nono in ibino karuno cako yamo bobo, di in iko bino yamo kede ngat kobwot nono. Iepone noni in ibino bedo anen but jo, di gin kiko bino ngeno be ango en Rwot.”

Esekeri 25

Kop Arac kame Komurao i kom Jo Amon

¹ Rwot oko yamo keda.

²En ewaco be, “Wot ka dano, lok nyimi nen tetu piny me jo Amon di iko murao kop arac i kom gi.

³Wac negi kiwiny kop kame ango Rwot Rubanga atie waco kaman: wun oudo ilelunu pi neno di komunao kabedo na kacil, kede pi neno di lobo me Isirael odong nono, kede pi neno di koteri jo me Yuda obukui.

⁴Pi mano, ango atie mino wu i cing jo kame wok ki bad tetu kide di gin kiko mano lobo wu doko mergi. Gin kibino gero kimere gi i lobo wu di kiko donyo bedo i diere wu. Gin kibino camo anyakini, kede kiko mato cak kobedo megu.

⁵Ango abino mino bomba me Raba doko kakame aguraguran camo iye, kede ako mino Amon doko awi me romini. Di wun ikounu bino ngeno be ango en Rwot.

⁶” Manoni en kop kame Rwot Rubanga tie waco: wun oudo ibapunu cingu di isosomunu pi ilel, di icaunu jo Isirael.

⁷Pi mano, ango ayaro mino wu i cing atekerin apat di gin kiko bino yako wu. Ango abino mino ateker wu doko li kikom atekerin. Ango abino mino itounu i pinye kame itieniu iye; abino muducaro wu. Di wun ikounu bino ngeno be ango en Rwot.”

Kop Arac kame Komurao i kom Moab

⁸ Rwot Rubanga waco be, “Pien jo Moab otieko waco be jo me Yuda cal bala jo me atekerin apat dedede,

⁹ango abino mino kosuro bomban kame gagao ikor me Moab, bomban mege acil me Bet Jesimot, Baal Meon, kede Kiriataim.



¹⁰Ango abino mino atekerin me bad tetu kide mao Moab karacel kede Amon di kiko doko mergi. Iepone nono wi atekerin bino wil kede Amon atwal.

¹¹Ango abino mino jo Moab alola, di gin kiko bino ngeno be ango en Rwot.”

Kop Arac kame Komurao i kom Edom

¹²Rwot Rubanga waco be, “Jo me Edom oko timo onyanga kede gero arac i kom jo me Yuda, omio onyanga nono oko kelo i wi gi raco kalikame tiek.

¹³Pi mano, ango Rwot Rubanga, abino mino Edom alola. Abino neko jo kede leini dedede kame tie kunono di ako mine edong nono. Kobino neko gi kede epima cako ki Teman tuno Dedan.

¹⁴Jo na me Isirael en kame bino timo onyanga na i kom jo Edom. Gin kibino timo can i kom jo Edom di lubere kede gero na kede lilo na. Di jo Edom ko bino ngeno kite kame onyanga na rac kede.” Rwot Rubanga en owaco.

Kop Arac kame Komurao i kom Pilistia

¹⁵Rwot Rubanga waco be, “Jo Pilistia oko timo onyanga kede gero arac i kom jo kame gin kibedo dingere kede gi pi kare kalac, di kiko muducaro gi kede gero atek.

¹⁶Pi mano, ango Rwot Rubanga atie waco be abino mino jo Pilistia alola; abino neko jo Keret di ako muducaro jo apat dedede kame bedo i dog nam adwong.

¹⁷Ango abino timo onyanga atek i kom gi di amio gi alola kede lilo. Di gin kiko bino ngeno be ango en Rwot, i kare kame ango abino timo kede onyanga i kom gi.”

Esekeri 26

Kop Arac kame Komurao i kom Taya

¹I ceng me agege me duwe, i mwaka me tomon kiwie acel kame oudo otie kede i lobo me obukui bala mabus, Rwot oko waco na be,

²” Wot ka dano, jo me Taya tie lelo pien kobwono Yerusalem. Gin kitie ikuk be, ‘Yerusalem otieko poto; manono oyabo ne wa yongayo, wada obino doko tek, piento en etieko doko ameje.’

³” Pi manono, ango Rwot Rubanga atie waco be, ‘Taya, ango nan atieko doko ngakwor ni; abino mino atekerin kobedo jokwor ni core i komi bala kame pii me ebuka me nam core kede.

⁴Gin kibino rereto apama kame koluki kede, di kiko rereto kiton gedo aboco malo da. Taya, ango abino kiso tenge lobo nin di lela kakatek kenekene en ako bino dong,

⁵kakame jocik bino donyo yararo iye bwoini gi, ango Rwot en awaco. Jo me atekerin bino yaki

⁶di kiko neneko jo kame bedo i bomban atino ace apat kame in ipugo. Manono bino mino ingeo be ango en Rwot.’ “



- ⁷Rwot waco be, “Ango abino cwano Abaka Nebukadunesa me Babilon ot suro Taya, en abaka atek kalamo abakai dedede; en ebino bino kede asigiran, cabalan kede isirikalen atek me tien.
- ⁸Jo kame bedo i bomban atino ace kame in ipugo kobino neneko gi. En ebino luko jo ni kede apama atek agengo gi bwot, di eko mukuro lobo me yito i wi apama koluki.
- ⁹En ebino mino isirikalen mege cik di gin kiko rereto apama ni me cel kede ikongio, doko di kiko tuturo kede lilime ude ni aboco malo me kino piny.
- ¹⁰Asigiran mege bino dunyo apua kame bino umi pukupuk, pien udo asigiran nogo tot. Mor me tien isirikalen kede cabalan mege bino yayango apama ni, kakame gin kitie donyo kede ki erute i bomba kame kotieko dudubo.
- ¹¹Isirikalen mege kame yi ki ngei asigiran bino neneko jo i dier yote ni di ipirin ni atek ko bino popoto piny.
- ¹²Gin kibino yako abar ni kede jamini ni me cato wil. Gin kibino rereto apama ni me cel di kiko dudubo ude ni abeco. Gin kibino kwanyo kide kede ibaon kede angidingidin me ude ni di kiko bwoto gi i nam.
- ¹³ Abino jiko were ni; koko me arigirigi likame doko bino winyere.
- ¹⁴Abino mini idong lela kenekene, kakame jocik yararo iye bwoini gi. Likame doko kobino medo geri. Ango Rwot atieko waco.
- ¹⁵” Jo abedo iyapi kede nam kom gi bino miel kame kotie tuturo in, kakame kibino winyo kede ngururo me jo kame kowanakino i esawa kame nek tie timere kede.
- ¹⁶ Di do jopug dedede kame joe gi tio i yi name adongo ko bino wok tenge ki komini gi me pug. Kibino gonyo ikanson gi me ajakanuto kede igoen kame kotubuso kuno di kiko donyo bedo piny di kom gi miel amiela. Kom gi bino to pi gi kotimere ne in.
- ¹⁷Kibino kok koko me pari di kiwaco be, ‘ Kotieko dudubo in bomba kame lem ingere i dog nam; jo ni oudo pugo nam adwong, di kionyo lworu i kom jo dedede kame bedo tenge me dog nam.
- ¹⁸Nan do i ceng kame kodudubo in kede jo dedede kame bedo i dog nam kom gi tie miel amiela; cal kame kodudubo in kede mio lworu mako gi.’
- ¹⁹” Abino mini idoko ameje, bala bomba kame jo li iye. Abino umi kede pii atat bala me nam adwong.
- ²⁰Abino cwani i kabedo me jo oto pi ot bedo kede jo ariki sek kede bomban me asonya kame bin kodudubo. Pi manono likame doko jo bino bedo i yi in, doko da likame in ibino bedo i lobo me jo akuo.
- ²¹ Abino mini ijik i yore aneno rac adikinicel. Jo bino moni do likame kibino sobolo udi; angu Rwot atieko waco.”

Esekeri 27



Wer me Koko Taya

- ¹Rwot oko waco na be,
- ²” Aso nan in wot ka dano, poore iwer wer me koko Taya,
- ³en bomba kame cungo i dog nam di etimo cato wil kede lobere ace atie i dog name. Wac ne be ango Rwot Rubanga atie waco kaman: Okwe Taya, in iwaco be, ‘ Ango acil twatwal.’
- ⁴Ikor nin tie i yi name; jo koger i ogeri di icil twatwal bala emeri.
- ⁵Kitio kede yen pir me moru me Kerimon me timo ibaon me geri, kede kiko tic kede yen seda me Lebanon me timo ipirin me tweno egoe kame yamo koli kede.
- ⁶Kitio kede yen oak me Basan me timo pole me kwang; kiko timo dier ot ni kede yen pain me Sipuro, di oko tubuso en kede lak liec.
- ⁷Igoen kame yamo koli kede obedo igoen me Misiri kame kotubuso kuno, omio jo neni ki kakabor di kiko ngeni, doko da igoen ebululu kede akwakwar me Sipuro en kame galao dier ot ni ki malo.
- ⁸Jo kame kwangi kede pole oudo owok ki bomban me Sidon kede Arabad; jodiru me Semer en oudo obedo jo kame kwangi.
- ⁹Jo kame in itie kede gi kame tic gi guro emeri oudo obedo joadongo me Gebal, kede jo ace me kunono kame tie kede diru i tic nono; tic gi oudo mwomwono kakatwolo. Jo dedede kame beo ki nam oudo bino cato wil i dukini nin.
- ¹⁰” Isirikalen me Pasia, Lidia kede Libiya oudo obedo isirikalen nin, jo yi nin atek. Oudo kilieliero ibukui kede icoron atek me gagao wic kakame isirikalen nin bedo iye; gin oudo kikelo ni deyo.
- ¹¹Isirikalen kowok ki Arabad kede Kelek oudo daro apama me cel ni rimaro; cuo me Gamad oudo daro ude ni aboco malo me kino piny. Gin oudo kilieliero ibukui i kor apama me cel ni rimaro; oudo kimio neni cil adikinicel.
- ¹²” Jocat wil me Tarusi oudo bino seso jamini kobedo twon abar nin kede nyonyo siliba, ayon, tin, kede led.
- ¹³In oudo itimo cato wil kede Yaban, Tubal, kede Mesek; gin oudo kikelo nin ipasoi kede jamini kame kotimo kede nyonyo buronsi pi seso gi kede jamini nin.
- ¹⁴Bet Togarama oudo kelo nin asigiran me tic, asigiran me yi, kede pundan pi seso gi kede jamini nin.
- ¹⁵Jo me Rodes oudo timo kede in cato wil. Lobere atot me dog name oudo obedo atalen nin. Oudo gin kitio kede lak liece kede yat eboni me seso jamini nin.
- ¹⁶Jo me Siria oudo timo cato wil kede in pi twon jamini kame in oudo itie kede; oudo gin kikelo nin kide ameny me wel kame kolwongo be emeradi, igoen akwakwar,



igoen kame kotubuso kuno, igoen aliamaliam, kide kame kodepo yi name kame nying gi korala, kede kide ameny me wel kame nying gi Rubis.

¹⁷Lobere me Yuda kede Isirael oudo timo kede in cato wil; gin oudo kikelo engano apwot, kal, mokic, mo me olibeti, kede jamini amio cam ngwe ikukuny.

¹⁸Damasiko oudo kelo ni bwini kowok ki Kelebon kede yer atar me romini pi wilo kede gi twon jamini ni atat koudo obedo abar ni me egere dedede.

¹⁹Bedan kede Yaban atie Usal oudo timo kede in cato wil; oudo gin kikelo nin nyonyo ayon, kede jamini amio cam ngwe ikukuny pi seso gi kede jamini nin.

²⁰Dedan oudo kelo igoen me abeno pi seso kede jamini nin.

²¹Imuarabun kede jopug me Kedar oudo kelo idwe romini, imerekekin kede diegi pi wilo gi kede jamini nin.

²²Jocat wil me Seba kede Rama oudo kelo gikame mio cam ngwe kur me epone dedede, kede kide ameny me wel me epone apapat, kede saabu, di kiko seso gi kede jamini nin.

²³Bomban me Aran, Kanek, Eden, jocat wil me Seba, bomban me Asur kede Kilimad oudo timo kede in tic me cato wil.

²⁴Gin oudo kicato ni igoen me wel, igoen ebululu ebululu kede kame kotubuso kuno, kede launi kame kopeto i dier ude kame kolilingo di kokuo gi kiber kede ausi atek.

²⁵Imerin me Tarusi oudo yeo jamini nin me cato wil.

²⁶Aso, in oudo ical bala emeri atie i dier nam kame kopongo iye jame. Yamo me bad tetu kide oko tuturo in i dier nam.

²⁷Abar ni, jamini ni, jamini ni me cato wil, jo kame tie ot kedi kede jo kame kwangi, jo kame guro ibaon ni kede jocat wil kame tie ot kedi, jo yi kame tie ot kedi, kede jo dedede kame in itie kede gi, gin dedede kiko lwiny i dier nam i ceng kame in idudubun kede.

²⁸Koko me jo kame oudo tie kwangi oko yayango dog nam ooko.

²⁹” Nan do jo oko wok ki imerin, jokwang dedede kame mako pole. Jokwang dedede me imerin tie cungo ooko i edoket,

³⁰di kikoki kitek kede dwan amalo. Kikikiro apua i wi gi di kibebelo i buru.

³¹Gin kikiso yer wi gi piri, di kiko ngapo ipukoi, kikoki kede wangcuny.

³²Kiwero wer me koki be, ‘ Ngai kame kotwero tirano kede Taya, Taya kame nataman obuto oling i dud nam?

³³Jamini nin ongolo name di kiko cobo mit me atekerin atat. Abakai me wi lobo oudo abar pi twon lonyo nin.



³⁴Nan do in itie ituturun i nam, ilwiny i dud pii piny; jamini ni me cato wil kede jo kame tio i komi otieko lwiny kedi.’

³⁵” Jo dedede kame bedo ooko i dog nam kom gi oto pi in; lworu atek omako abakai gi, wang gi ococolo pi lworu.

³⁶Jocat wil me atekerin uro aura; ajikini nin obedo rac twatwal; itieko ot atwal.”

Esekeri 28

Kop Arac kame Komurao i kom Abaka me Taya

¹Rwot oko waco na be,

²” Wot ka dano, wac ne ngapug me Taya be ango Rwot Rubanga atie waco kaman: in ipong kede ewaka omio iwaco be in ibedo rubanga. Iwaco be in ibedo i kom me pug ka rubanga, i dier name adongo, do di in ibedo dano adana do likame rubanga, bed bala in itirano tam ni kede me ka rubanga.

³In iparo be iriek kalamo Danel; be likame tie gimoro komungere ne in.

⁴Rieko ni kede niang ni omio icoko abar piri; icoko saabu kede siliba i ude ni me kano jame.

⁵Rieko ni kede diru ni me cat omio abar ni onyai, di do cunyi oko pong kede ewaka pi abar ni nono.

⁶” Aso, nan ango Rwot Rubanga atie waco kaman: pien in iparo be in iriek bala rubanga,

⁷ango abino cwano ni jokumbor, jokwor areco kalamo atekerin dedede. Gin kibino dudubo jamini acil kame in iudo kede rieko ni, di kiko bino munao angosibib nin.

⁸Kibino reti i kabedo me jo oto; ibino to to arac i dier nam.

⁹Benyo, pwodi ibino waco be in rubanga i nyim jo kame obino pi neki? In ibino bedo dano adana do likame rubanga i cing jo kame bino mini awanon.

¹⁰Ibino to i cing jokumbor atatai bala dano kalikame kokepo; ango Rwot Rubanga atieko waco.”

Poto me Abaka me Taya ki Ajakanut

¹¹Rwot bobo oko waco ne be,

¹²” Wot ka dano, poore iwer wer me koko abaka me Taya. Wac ne be ango Rwot Rubanga atie waco kaman: in oudo ibedo anyut me gikaber; oudo iriek di icil adikinicel.

¹³Oudo itie Eden, en poto ka Rubanga, di iwalo komi kede jamini kame kotimo kede kide ameny me wel, gin en rubis kede dayamon; topas, beril, karenelia, kede jesipa, sapaya, emeradi kede garanet. Oudo itie kede mwolere me saabu. Bin kotimo gi piri i ceng kame konywali kede.



¹⁴Ako cibo imalaikan me alwora pi gwoki. In oudo ibedo i wi moru nango kacil di ioto ki diere me kide ameny mac.

¹⁵In oudo ili kede raco moro i kuo ni cako i ceng kame konywali kede tuno i ceng kame idonyo kede i tim karac.

¹⁶In oudo ikukuno i tic me cato wil, di manono oko mini ibedo kede gero, di iko dubo. Aso, ango ako uci tenge ki moru na bala gi komunaun, di malaika kame oudo dari oko riami tenge ki kide ameny mac.

¹⁷In oudo iwakere be icil; deyo ni nono oko mini itotolo rieko ni. Manono oko mina akwiti piny di iko doko gikame abakai apat pito kede wang gi.

¹⁸In itimo twon dub, itimo tic me cato wil i yore kalikame poore, omio iko munao kabedere ni kacil. Aso, ango ako mino mac owokun ki dier bomba di eko wange dopodop. Nan do jo kame nene kineno buru kenekene.

¹⁹Jo me atekerin apat koudo ngei kom gi oto pi manono. Ajikini ni obedo ajikini arac; itieko ot me atwal.”

Kop Arac kame Komurao i kom Sidon

²⁰Rwot Owaco na be,

²¹” Wot ka dano, lok nyimi tetu Sidon di iko murao kop arac i kome.

²²Wac ne be ango Rwot Rubanga atie waco kaman: ango atieko doko ngakwor ni, in Sidon. Jo bino paka pi gikame abino timo ni. Jo bino ngeno be ango abedo Rwot, kakame ango abino mino kede jo ni alola di ako nyuto be ango abedo ngat kacil.

²³Pien ango abino cwano aumpuli neko jo ni, kede da kobino onyo remo me jo i dier yote ni. Jokwor bino suri ki bad dedede di kiko neneko jo ni, di do in iko bino ngeno be ango en Rwot.”

Isirael bino Bedo tie kede Winyo

²⁴Rwot Rubanga owaco be, “Isirael likame doko bino bedo tie kede ateker moro me kio mere koudo obedo kede acae bute, kame bobo bino bedo ne bala okuto amoto ocokocok kame cocobo en. Isirael bino ngeno be ango abedo Rwot Rubanga.”

²⁵Rwot Rubanga owaco be, “Ango abino coko jo me Isirael ki dier atekerin kame kiasarun iye, di manono ko bino nyuto ne jo me atekerin be ango abedo ngat kacil. Gin kibino donyo bedo i lobo gi amako gi, en lobo kame bin ango amio ngatic na Yakobo.

²⁶Gin kibino bedo iye abongo alola moro, di kiko bino gero ude di kiko puro olok. Ango abino mino atekerin kame kio kede gi alola, gin atekerin koudo obedo kede tim me acae but gi. Isirael bino ngeno be ango en Rwot Rubanga gi.”

Esekeri 29

Kop Arac kame Komurao i kom Misiri



- ¹ I ceng me tomon kiwie are me duwe me tomon me mwaka me tomon kame oudo wan otie kede i lobo me obukui, Rwot oko waco na be,
- ²” Wot ka dano, murao kop arac i kom Parao abaka me Misiri kede i kom lobo me Misiri dedede.
- ³Wac ne be ango Rwot Rubanga atie waco kaman: ango atieko doko ngakwor ni, in Parao abaka me Misiri, in twol kiyiliyili kame liao lubo ecilet di iwaco be, ‘Nail obedo mera amaka, ango acwee pira.’
- ⁴Ango abino kodo golu i itinyo ni di ako mino aporogo atie i ecilet ni momoko i abokoya ni. Di ango ako bino ware kedi ooko me Nail di aporogo dedede omomoko i komi.
- ⁵Ango abino kwiti karacel kede aporogo nogo dedede i wi tim. Ibino poto obar di likame ngatamoro ko bino kwanyo komi ot yiko. Abino mine but winy kede leini me obar pi came.
- ⁶ Di do jo dedede me Misiri ko bino ngeno be ango en Rwot. “In kede jo ni oudo itienu but jo me Isirael bala ebela me magada.
- ⁷Kakame gin kikaparo wu kede pi konyo gi, wun ikounu tur di ikounu cobo akirididi gi di ikounu mino ngei gi owilakin.
- ⁸” Pi manono, ango Rwot Rubanga atie waco kaman: abino cwano jokwor bino suri kede ipimai. Gin kibino neneko jo kede leini;
- ⁹di lobo me Misiri ko bino doko ameje kame ngatamoro li kiye. Di ikounu bino ngeno be ango en Rwot. “Pi kite kame in iwaco kede be Nail obedo meri, kede be in en icwee,
- ¹⁰pi manono, nan ango atieko doko ngakwor ni kede ngakwor me Nail. Abino mino Misiri dedede doko ameje kame jo li kiye, cako ki Migidol tuno Asuwan, ape ape tuno i ikor me Abisinia.
- ¹¹Likame tie tien dano moro kame bino nyone, doko da likame tie tien le moro kame bino nyone, en ebino bedo kakoling kene pi mwakini ot ongwon.
- ¹²Abino mino lobo me Misiri dong nono kalamo lobere dedede me wi lobo; doko bomban mege da bino doko amejeke kodong nono kalamo bomban dedede me wi lobo. Abino sarakino jo me Misiri i diere me atekerin; kibino sarkin i pinye apat.
- ¹³” Ingei mwakini ot ongwon nogo, ango abino coko jo me Misiri ki diere me atekerin kame kisarakin iye,
- ¹⁴di ako bino dwoko gi i bero koudo kitie kede sek, di ako mino gi kidok bedo i lobo gi atie i bad tetu piny me Misiri. Ki kunono, gin kibino bedo ajakanut agoro
- ¹⁵kalamo ajakanuto dedede, di likame bobo kiko doko tek kalamo atekerin apat. Abino mino kony gi bedo li atwal atwala, tetekeny likame bobo kiko twero pugo atekerin apat.



¹⁶Isirael likame doko bino gengere i kom Misiri pi konye; gin kibino niang be ateteni gin oudo kitimo gikarac pi gengere i kom Misiri pi mino gi kony. Di do jo me Isirael ko bino ngeno be ateteni ango en Rwot Rubanga.”

Abaka Nebukadunesa bino Mano Misiri

¹⁷I ceng me agege me duwe me agege i mwaka me ot are kiwie kanyaare kame oudo wan otie kede i lobo me obukui, Rwot oko waco na be,

¹⁸” Wot ka dano, Abaka Nebukadunesa me Babilon omio isirikalen mege osuro Taya. En eko mino isirikalen ocane yeno jamini apek, manono oko mino yer wi gi ododoun di epepet gi oko yuyun. Do en abaka akadi kiton isirikalen mege likame kiko udo gimoro kame twero culo kwok gi.

¹⁹Aso, nan ango Rwot Rubanga atie waco kaman: ango abino mino lobo me Misiri but Abaka Nebukadunesa me Babilon. En ebino yako abar mere di eko tero, di manono ko bino bedo cul but isirikalen mege.

²⁰Ango atie mine lobo me Misiri bala cul me tic kame en etimo nango. Ango Rwot Rubanga en awaco.

²¹” Kame manono otimere, ango abino mino jo me Isirael bedo tek, di ako bino mini, in Esekeri, twer me yamo negi kop, di gin kiko bino ngeno be ango en Rwot.”

Esekeri 30

Rwot bino Mino Misiri Alola

¹Rwot oko bobo waco na be,

²” Wot ka dano, mura, wac ne jo be ango Rwot Rubanga atie waco kaman: kokunu pi ceng me neno can.

³Ceng nono iyapiyapi; ceng kame ango Rwot abino mino iye alola onoko. En ebino bedo ceng me colo, ceng kame atekerin bino beo kede i peko.

⁴Yi bino poto Misiri, di par alit ko bino bedo tie Abisinia. Kobino neneko jo atot me Misiri; kobino yako abar mere, di oko bino tuturo en.

⁵” Isirikalen me Abisinia, Lidia, Libiya, Arabia kede Kub, ribo kiton me lobo na da kobino neneko gi i yi nono.”

⁶Rwot waco be, “Jo dedede kame gango Misiri cako ki Migidol tuno Asuwan kobino neneko gi; teko kame Misiri wakere kede bino tiek; ango Rwot Rubanga en awaco.

⁷Lobo me Misiri bino dong nono kalamo lobere apat dedede me wi lobo, kede bomban mege ko doko kakame kodudubo kalamo bomban dedede me wi lobo.

⁸Ango abino cwinyo mac Misiri di oko neneko jo dedede kame gange, di gin kiko bino ngeno be ango en Rwot.



⁹” Kame ceng nono otuno di oko dudubo Misiri, ango abino cwano jo kede imerin ot Abisinia pi onyo lworu i kom jo kopalaro me kunono. Kibino bedo kede par alit i ceng kame Misiri bino beo kede i peko. Ceng nono tie bino!”

¹⁰Rwot Rubanga waco be, “Abino tic kede Abaka Nebukadunesa me Babilon pi jiko abar me Misiri.

¹¹En ebino bino kede jo mege, ateker ager kalamo atekerin dedede, di kiko dudubo lobo me Misiri. Kibino suro Misiri kede ipimai di liele ko bino rade kabedere dedede.

¹²Abino mino ecilet me Nail tuo di ako mino Misiri i cing jo areco. Abino cwano jokumbor kame bino dudubo lobo nono eko doko gikame kony mere li. Ango Rwot en awaco.”

¹³Rwot Rubanga waco be, “Ango abino dudubo caljwogi kede cal ace kame koworo i Mempi. Likame doko ngapug bino bedo tie Misiri, di ako bino mino jo dedede me lobo nono pong kede lworu.

¹⁴Abino dudubo Paturos eko doko bomba kame kony mere li, di ako wango bomba me Soan. Abino kelo alola i bomba me Tebes.

¹⁵Pelusium bino riamo kede twon gero na, en bomba kobedo kateko me Misiri, di ako muducaro alule me isirikalen atie Tebes.

¹⁶Abino cwinyo mac Misiri; Pelusium bino bedo kede par alit; kobino tuturo apama me Tebes di jokwor ko bino ot ne jo me Mempi iceng.

¹⁷Kobino neneko awobe me bomba me On kede Pibeset, di oko bino mako jo apat koteru bala mabus.

¹⁸Colo bino umo Tapankes ka ango atieko teko kame Misiri tie kede di ako jiko ewaka mere. Edou bino umo Misiri di oko bino mamako jo me bomban mege koteru bala mabus.

¹⁹Ango abino mino Misiri alola iepone noni, di gin kiko bino ngeno be ango en Rwot.”

Kotieko Teko me Abaka me Misiri

²⁰I ceng me kanyaare me duwe me agege me mwaka me tomon kiwie acel me wan bedo i lobo me obukui, Rwot oko waco na be,

²¹” Wot ka dano, ango atieko turo bad abaka me Misiri. Likame ngatamoro otweo bade nono akadi bure pi cango, me wek koto ecangi di eko karuno mako epima.

²²Pi manono, ango Rwot Rubanga nan atie waco kaman: ango atieko doko ngakwor me abaka me Misiri. Ango abino tuturo bade, bade aber ribo kiton koudo otur, di epima ko bino poto ki cinge.

²³Ango abino sarakino jo me Misiri i diere me atekerin i lobere lung.



²⁴Ango abino mino bad abaka me Babilon doko tek, di ako bino keto epima na i cing; do abino tuturo bad Parao me Misiri di en eko bino dorano i nyim abaka me Babilon kede idoran me dano kame komio awanon me to.

²⁵Ango abino mino bad abaka me Babilon doko tek, do bad abaka me Misiri bedo lojolojo. Ango abino keto epima na i cing abaka me Babilon di en eko cime kede Misiri, di jo dedede ko bino ngeno be angon en Rwot.

²⁶Ango abino sarakino jo me Misiri i diere me atekerin i pinye dedede. Di gin kiko bino ngeno be angon en Rwot.”

Esekeri 31

Koporo Misiri kede Yat Seda

¹I ceng me agege me duwe me adek me mwaka me tomon kiwie acel me wan bedo i lobo me obukui, Rwot oko waco na be,

²” Wot ka dano, wac ne Parao abaka me Misiri kede ne jo mege dedede kaman: atwero tin poro dwongo ni kede nyo?

³Kotwero pore kede Asiria, yat seda me Lebanon, en etie kede ajange koyarere di oduko, di kiboco malo, gin kituno i idoun.

⁴Pii mie kuo, pii me dud lobo omie edongo bor malo. Pii nono oudo nyonyongo kakame yat nono tie dongo iye, di isamai mege ko beno i kom yen apat da me abum.

⁵Manono bin oko mino yat nono odongo bor malo, kalamo yen apat dedede me abum. Atenin mege oko cwe di kiko doko bocoboco, pi pii atos kame oudo tie i kome.

⁶Winy dedede me obar oko gero ude gi i atenin mege. Leini dedede me obar oko nywalo idwe gi i dud tipo mere; atekerin dedede adongodongo oko bedo i dud tipo mere.


⁷Yat nono oudo cil twatwal, oudo etie kede atenin abocoboco, pien aliasin mege oudo odonyo pinyo tuno i pii atos.

⁸Yen seda me potona oudo likame kotwero poro kede gi, akadi yen pir da oudo likame atenin gi rom kede mege. Likame tie yat moro me epone moro kame aten mege oudo kotwero poro kede magonogo. Likame tie yat moro i potona kame oudo kotwero poro cilo mere kede manono.

⁹Ango atime di ecil di epong kede ajange. Yen dedede me Eden oudo mito bedo bala en, gin yen kame oudo tie i potona.

¹⁰” Aso, nan angon Rwot Rubanga atie waco kaman: pi kite kame en edongo kede paka tuno i idoun, di do cunye oko pong kede ewaka pi boro mere,

¹¹nan angon atieko dage; abino mine i cing ngapug me atekerin apat. En ebino timo ne yat nono gikame poore ne pi raco mere.



¹²Jo kobedo atekerin ager me kumbor bino tonge piny di kiko weke. Ajange mege kede aten mege kotuturun bino popoto i wi mori kede i aditoto dedede me lobo nono. Atekerin dedede kame oudo tie bedo i dude bino yai tenge.

¹³Winy bino gedo i kore kopoto piny, di leini me obar ko donyo bedo i ajange mege.

¹⁴Manoni bino timere tetekey kur bobo yat moro dong bor bala manono, arabo emi wie tun i idoun, akadi bed bala etie kede twon pii i dude piny. Gin dedede miero kitoi bala jo, di kiko ot i lobo me jo oto karacel kede jo kame tie ot kunono.”

¹⁵Rwot Rubanga tie waco be, “I ceng kame yat nono bino ot kede i kabedo me jo oto, abino mino pii me dud lobo ume bala gianena me koke. Abino mino icileta amol wok ki dud lobo jiko molo pii wok ooko. Abino kelo colo i wi mori me Lebanon bala gianyuta me cwercury, di yen me abum mege ko tuo pi manono.

¹⁶Kame ango acwae i kabedo me jo oto, poto mere kunono bino mino kom atekerin miel. Yen dedede me Eden, kede yen me Lebanon abeco kalamo, gin yen kame oudo tie kede pii atot, yen kame nataman otieko ot i piny atie i dud lobo, yen nogo cuny gi bino bedo yom pi poto me yat nono.

¹⁷Gin kibino ot kede en i kabedo me jo oto pi ribakin kede jo kotieko to, en karacel kede jo koudo gange. Di oko bino sarakino jo kame oudo bedo i tipo mere i diere me atekerin apat.

¹⁸” Yat noni en abaka me Misiri kede jo mege. Kiton yen me Eden da oudo likame kotwero pooro kede deyo kede dwongo mere. Do nan ebino ot piny i kabedo me jo oto bala yen me Eden da, di eko ribakin kede jo kalikame wora kede jo kame koneko i yi. Ango Rwot Rubanga en awaco.”

Esekeri 32

Koporo Abaka me Misiri kede Nyang

¹I ceng me agege me duwe me tomon kiwie are me mwaka me tomon kiwie are kame wan oudo otie kede obukui, Rwot oko waco na be,

²” Wot ka dano, cak wer me koko pi Parao abaka me Misiri di iko waco ne kaman: in iparo be in ibedo engu i diere me atekerin, do kom in ical acala bala nyang kame tie i ecilet. In isanyo i pii di tieni ko guro pii di pii ko doko cwoto.

³Kame atekerin atot ocokere, ango abino maki kede bwoi na di gin kiko wani kede bwoi nono ooko.

⁴Abino kwiti obar di ako mino winy me obar cami; abino mino leini me wi lobo dedede rangrango cami.

⁵Abino kikiro ringo komi i wi mori, di ako culo aditoto kede ringo komi nono.

⁶Abino mino remo ni mol paka diako lobo tuno i wi mori, di eko pongo isamai.

⁷ Kakame ango abino muducaro in kede, abino umo malo, abino mino acerin doko col; abino umo wang ceng kede edou di duwe da ko jiko rieny.



⁸Abino mino jamini arieny dedede atie malo doko col, di colo ko bino umo lobo ni; ango Rwot Rubanga en awaco.

⁹” Abino mino cuny jo me atekerin atot dubere kakame ango abino sarakino kede jo ni kame komako i diere me atekerin apat, i pinye kalikame in ingeo.

¹⁰Gikame abino timo ni bino neko kom jo me atekerin atot; abakai gi kom gi bino miel kede lworu. I ceng kame in ibino poto kede, gin dedede kom gi bino miel pi kuo gi, kakame ango atie wiwiro kede epima na i nyim gi.”

¹¹Rwot Rubanga waco ne abaka me Misiri be, “Abaka me Babilon bino yi kedi.

¹²Abino mino isirikalen atek yi kalamo atekerin dedede neneko jo ni. Kibino dudubo jamini dedede kame Misiri wakere pirgi di kiko neneko isirikalen mege dedede.

¹³Abino neneko leini wu i nget pie adongodongo. Tien jo amoto tien leini likame doko bino guro pie nogo.

¹⁴Di do ako bino mino pie nogo piei di isamai ko donyo mol mot bala mo amol. Ango Rwot Rubanga en awaco.

¹⁵Kame ango adudubo Misiri oko doko lobo kame kony mere li, di ako muducaro jo dedede kame tie kunono, gin kibino ngeno be ango en Rwot.

¹⁶Ikwenyar noni bino doko wer me koko. Mon me atekerin bino were pi koko Misiri kede jo mege. Ango Rwot Rubanga en awaco.”

Piny me Jo Oto

¹⁷I ceng me tomon kiwie kany me duwe me agege me mwaka me tomon kiwie are me wan bedo i lobo me obukui, Rwot oko waco na be,

¹⁸” Wot ka dano, kok pi twon jo me Misiri, di iko cwano gi karacel kede jo ace me atekerin atek i kabedo me jo oto, pi ribere kede jo kaoto kunono.

¹⁹Wac negi kaman: Iparunu be wun en ikalamunu kede cilo? Ibinunu ot i kabedo me jo oto pi wei karacel kede jo kalikame wora.

²⁰” Jo me Misiri bino to to me epima kede jo apat; kotieko mino Misiri i cing wegi ipimai pi timo nek; tere karacel kede jo mege i kabedo me jo oto.

²¹Ijakai kabin tek bino yamo ki dier kabedo me jo oto i kom Misiri kede i kom jo kokodere kede en be, ‘Jo kalikame woro Rubanga kame koneneko i yi nan obino piny kan, ige kibuto kinatakin.’

²²” Asiria tie kunono, di atesin me isirikalen mege oluke, isirikalen kame bin koneneko i yi.

²³Atesin gi tie i ajikini me bur katut i lobo me jo oto. Isirikalen mege dedede koneneko i yi, nan atesin gi luko mere. Gin oudo kikelo lworu atek twatwal i lobo me jo akuo.



²⁴” Elam tie kunono, di atesin me isirikalen mege oluke, gin dedede bin koneneko gi i yi. Gin kioto i piny me jo oto di likame kokepo gi. Gin oudo kikelo lworu atek twatwal i lobo me jo akuo, do nan kitie do yeno lewic i wi gi kede jo aoto i piny me jo oto.

²⁵Elam nan buto piny karacel kede jo kame koneneko i yi, di atesin me isirikalen mege oluke, gin dedede jo kalikame kokepo kame koneneko kede epima. Gin oudo kikelo lworu atek twatwal i lobo me jo akuo, do nan kitie do yeno lewic i wi gi kede jo aoto i piny me jo oto; gin do kitie i kom jo kame koneneko.

²⁶” Mesek kede Tubal tie kunono, di twon atesin me isirikalen gi oluko gi, gin dedede jo kalikame kokepo kame koneneko kede epima. Gin oudo kikelo lworu atek twatwal i lobo me jo akuo.

²⁷Gin likame oko yiko gi aika me wor, bala jo yi kariki sek kooto i piny me jo oto kede jamini gi me yi, di kopiello wi gi i kom ipimai gi, kede di ibukui gi buto i kom gi. Jo yi nogi bin okelo lworu atek twatwal i lobo me jo akuo.

²⁸” Manoni en epone kame kobino muducaro kede Misiri di eko buto piny karacel kede jo kalikame kokepo kame koneneko i yi.

²⁹” Edom tie kunono kede abakai kede jopug mege. Gin oudo kibedo isirikalen atek do nan kibuto karacel kede jo kame koneneko kede epima; kitie buto i piny me jo oto karacel kede jo kalikame kokepo.

³⁰” Jopug dedede me bad tetu malo tie kunono karacel kede jo me Sidon. Gin oudo kikelo ne jo lworu pi teko gi, do nan kidonyo piny kede lewic i wi gi karacel kede jo ace kame koneneko; gin jo kalikame kokepo nan kitie buto karacel kede jo kame koneneko kede epima, di kiyee lewic i wi gi kede jo aoto i piny me jo oto.

³¹” Abaka me Misiri kede isirikalen mege bino neno atesin me jo kame koneneko i yi di cuny gi ko dwogo, pien udo likame gin ken gi en kame koneneko gi.

³²Pien Parao obedo kelo lworu i lobo me jo akuo, pi manono en kede isirikalen mege kobino neneko gi di kiko ot wei karacel kede jo kalikame kokepo, jo kame koneneko i yi. Ango Rwot Rubanga en awaco.”

Esekeri 33

Rwot Omio Esekeri Obedo bala Ngakino Piny

(Esekeri 3.16-21)

¹Rwot oko waco na be,

²” Wot ka dano, wac ne jo ni gikame timere ka ango akelo yi i lobo. Jo me lobo nono yero dano acel kikom gi di kiko kete ebedo ngakino piny.

³Kame ngakino piny oneno di jokwor tie bino i lobo nono, en ekuto agwara me kwenyaro jo.

⁴Kame ngatamoro oko winyo agwara nono di en likame eko paro pire, di do jokwor oko bino di kiko neke, raco me to mere dong i wie.



⁵Raco me to mere dong i wie piento en ewinyo koko me agwara do likame eko paro pi ikwenyar nono. Do ka koto oudo eparo pi ikwenyar nono, oudo koto elako kuo mere.

⁶Do ka ngakino piny oneno di jokwor tie bino di likame eko kuto agwara pi kwenyaro jo, di do jokwor oko bino di kiko neneko jodubo nogo, to gi ango abino maro raco mere i wi ngakino piny.

⁷” Aso, in wot ka dano, nan ango atie keti pi bedo bala ngakino piny pi ateker me Isirael. In ipoore mino gi ikwenyar kame ango abino mini.

⁸Kame ango awaco ne jo areco be ateteni kibino to, do di in iko dagi kwenyaro gi pi weko yote gi areco, jo areco nogo bino to i dub gi, do raco me to gin ango abino maro i wi in.

⁹Do ka in ikwenyaro jo areco pi weko yote gi areco, do gin kiko dagi lokere tenge ki yote nogo, jo areco nogo bino to i dub gi, do udo in ilako kuo ni.”

Gikame Dano Acelacel poore Timo

¹⁰Rwot oko waco na be, “Nyogao waco ne jo me Isirael gikame gin kitie waco be, ‘Dub wa kede gikareco kame otimo okelo ne wa peko; manono omio wa ojony do. Benyo benyo kame wan obino twero kuo kede?’

¹¹Wac negi be ateteni ango Rwot Rubanga akuo akwongere be ango likame atie kede yomcuny i kom to me jodubo, do cunyango mito neno di jodubo weko yote gi areco di kiko bedo kuo. Lokerenu, lokerenu tenge ki yote wu areco; kara pinyo komio imitunu to, wun jo me Isirael?

¹²” Aso, in wot ka dano, nan wac ne jo me Isirael be, ka dano moro aber odubo, bero kame en oudo ebedo timo likame lake. Ka ngat arac oweko yote mege areco, likame komie alola; doko da ka ngat aber ocalo timo dub, likame kuo mere bino bwot.

¹³Akadi bed bala ango acikere pi mino kuo but jo abeco, do ka gin kiko cako paro be bero gin me kare kokato twero lako gi, di do kiko cako timo dub, ango likame abino yutuno bero kame gin kitimo, do gin kibino to pi dub kame gin kitimo.

¹⁴Doko da bed bala ango atieko waco ne jo areco be, ‘Ateteni ibinunu to, ‘do ka dano moro arac oko weko dub di eko donyo timo gikaber kame iswil mito,

¹⁵opor bala be, ka dano arac moro odwoko gikame osingao ne pi banya, arabo ka edwoko gikame ekwalo ne wone, ka en eko do donyo lubo iswilia kame mio kuo, en ateteni ebino kuo, likame ebino to.

¹⁶Ango abino sasiro dub dedede kame en etimo, en ebino kuo piento en etimo gi kopooore kame iswil mito.

¹⁷” Do jo nin waco be, ‘Rwot timo gi kalikame opooore, ‘do di yote gin en kalikame opooore.

¹⁸Ka dano kopooore oweko yote mege kopooore di eko timo dub, en ebino to.



¹⁹Ka dano moro arac oweko yote mege areco di eko donyo timo gi kopoore kame iswil mito, en ebino kuo pi manono.

²⁰Do wun jo me Isirael iwacunu be, ‘Rwot timo gi kalikame opoore.’ Ango abino ngolo ne wu kop di lubere kede tice wu.”

Rwonge me Yerusalem Poto

²¹I ceng me kany me duwe me tomon me mwaka me tomon kiwie are me wan bedo i lobo me obukui, ngatamoro koudo obwot ki Yerusalem oko bino buta di eko waco na be, “Bomba otieko poto.”

²²Otieno aru ceng kame icuo kobwot nono obino kede buta, twer ka Rwot oudo odonyo i kuo na. Kakame en do eko tuno kede buta odiko, oudo Rwot otieko mino doga bobo twero yamo.

Dub kame Jo Otimo

²³Rwot oko waco na be,

²⁴” Wot ka dano, jo kame bedo i bomban kame kodudubo me Isirael tie waco be, ‘Aburaam oudo obedo icuo acel do oko mine lobo noni dedede. Do bala kame nataman wan ototunu kede, ateteni kotieko mino wan lobo noni.’

²⁵” Pi manono wac negi be angu Rwot Rubanga atie waco kaman: wun icamunu ringo di pwodi remo tie iye; iworunu caljwogi; inekunu jo. Iparunu be magonogi twero mino lobo noni doko meru?

²⁶Epima obedo gikame wun do iketunu iye gen wu; itimunu tim ingorijij; itimunu tim me adote. Iparunu be magonogi twero mino lobo noni doko meru?

²⁷” Wac negi be angu Rwot Rubanga akwongere but gi be, ateteni jo kame bedo i bomban kame kodudubo kobino neneko gi, do jo kame tie obar abino mino leini me obar en acamo gi; jo kame tie gwokere kakatek kede i abo aumpuli en kame bino neneko gi.

²⁸Abino mino lobo gi doko kakame kodudubo, kame kony mere li, di teko kame kiwakere pire ko tiek. Mori me Isirael da bino dong nono di lwooro ko donyo mako jo beo kugonogo.

²⁹Ango abino mino jo alola pi dub gi di ako mino lobo gi doko kabedo kame kony mere li, di gin kiko bino ngeno be angu en Rwot.”

Adwogini me Kop ka Enabi

³⁰Rwot oko waco na be, “Wot ka dano, jo ni tie yamo i komi ka kiriamo i diere me apamai me bomba kede i nyim ikekon me ude gi. Gin kiyamo ken gi ken gi be, ‘Bianu ootunu owinyunu kop kowok kibus Rwot.’

³¹Aso, gin kiko bino buti di kiko bedo i nyimi bala jo na pi winyo kop ni, do gin likame kiko timo gikame in iwaco negi. Kope kame wok ki dog gi winyo mit, do cuny gi tie i timo aram.



³²Kibut gin in ical bala ngawer kame yomo cuny jo kede were amit me amara di ego adungu. Gin kiciko yit gi winyo kope nin dedede do likame kilubo akadi acel kikom gi.

³³Do ka kope nin ocobere, doko da kibino cobere, gin kibino ngeno be enabi oudo tie i diere gin.”

Esekeri 34

Jokwat me Isirael

¹Rwot oko waco na be,

²” Wot ka dano, ronkino jokwat me Isirael, gin en jopug mege. Bunano jokwat nogo di iwaco negi be ango Rwot Rubanga atie waco kaman: itienu i can wun jokwat me Isirael. Wun ibedunu pito komu di ikounu weko gwoko romini.

³Imatunu cak gi, ingapunu igoen me yer gi, ingolunu kocwe mege, do likame igwokunu gi.

⁴Likame igwokunu agoro mege, likame imuketunu atuwo mege, koudo awanon mege iwekunu likame itwetweunu aporeso gi, koparao likame ilekunu gi pi dwoko gi, kede da likame imounu korwenyo mege. Do akaka manono wun ibedunu kede gero but gi.

⁵ Aso, manono oko mino gin kisarakin, pien oudo kili kede ngakwat, di do leini me obar oko camo gi.

⁶Romini na oko sasarun; kibedo rimo piny i wi mori kede imukuran dedede; romini na osasarun i wi lobo dedede abongo ngatamoro kame tie mono gi.

⁷” Pi manono, wun jokwat winyunu gikame ango Rwot atie waco ne wu:

⁸Ango Rwot Rubanga akuo atie waco be, romini na odoko cam me leini me obar pien kili kede ngakwat. Doko da jokwat na likame obedo mono romini korwenyo, do gin girgi kilokere pito kuo gi di kiweko pito romini na.

⁹Pi manono, wun jokwat winyunu gikame ango Rwot atie waco.

¹⁰Ango Rwot Rubanga atie waco be, ango atieko doko ngakwor wu. Ango abino kwanyo romini na ki cingu di ako gengo wu bedo jo kame gwoko gi. Likame doko ibininunu donyo pito komu. Abino lako romini na ki cingu tetekeny likame doko ibinunu donyo camo gi.”

Ngakwat Aber

¹¹Rwot oko waco be, “Ango kikoma abino mono romini na di ako donyo gwoko gi.

¹²Bala kame jokwat mo kede romini kosasarun di kiko koko gi, kamanono ada abino mono romini na korwenyo. Ango abino dwoko gi ki kabedere dedede kame oudo kisasarun iye i ceng me colo kede me peko.



- 13** Abino dwoko gi kibus atekerin, abino coko gi ki pinye me kumbor di ako dwoko gi i lobo gi amako gi. Abino kwano gi kicamo lum atie i wi mori me Isirael, kede i isamai kede i kabedere dedede kame lum okolomo iye.
- 14** Abino mino gi kicamo lum abeco atie i wi mori me Isirael; gin kibino urako kunono i kakwat aber di kicamo lum okolomo i wi mori.
- 15** Ango kikoma abino bedo ngakwat me romini na; abino mino gi kiurako. Ango Rwot Rubanga en awaco.
- 16**” Abino mono korwenyo mege, di ako dwoko koparao; kowanere abino twetweo apreso gi di ako mino agoro doko tek; do ocwe kede atek mege abino neneko. Ango abino timo negi gikame poore.
- 17**” Aso, nan wun romini kede diegi na, wun jo na me Isirael, angu Rwot Rubanga atie waco ne wu kaman: angu abino ngolo kop ne ngat acelacel kibusu di ako poko diegi kikom romini, jo abeco kikom jo areco.
- 18** Mogo kikom wu camo lum okolomo di kiko lokere nyonyono lum ace kodong kede tien gi; mogo kikom wu mato pii opie di kiko lokere guro pii kodong kede tien gi.
- 19** Manono mio romini na ace camo lum kame konyonyono piny, di kiko mato pii korubere kede cwoto.
- 20**” Pi manono, angu Rwot Rubanga atie waco ne wu kaman: angu abino ngolo kop i dierediere me romini kocwe kede kojony.
- 21** Wun romini atek icwalunu romini agoro tenge di ikounu donyo twotwomo gi kede tung wu paka tuno sarakino gi kakabor.
- 22** Ango abino lako romini na di likame doko oko donyo tidilo gi. Ango abino ngolo kop i diere wu di ako poko abeco kede areco.
- 23** Ango abino mino gi abaka acal bala ngatic na Daudi, di en eko bino donyo gwoko gi; en ebino donyo gwoko gi di eko bedo ngakwat gi.
- 24** Ango Rwot abino bedo Rubanga gi, di abaka acal bala ngatic na Daudi ko bedo ngapug gi. Ango Rwot en awaco.
- 25** Ango abino timo kede gin isikan me mulem, di ako riamo tenge leini ager ki lobo nono, tetekeny kikaruno bedo i itela kede buto i abum abongo gimoro timo gi.
- 26**” Ango abino mino gi kibedo i nget moru na kacil di ako mino gi winyo di acwao negi kot i kare kame mitere.
- 27** Yen bino nyak, poti bino ceko cam, doko dano acelacel ko bino bedo i lobo mere amake abongo lwooro moro. Ango abino lako gi ki cing jo komio gi kibedo ipasoi, di gin kiko bino ngeno be angu en Rwot.
- 28** Likame doko atekerin me kumbor bino donyo yako gi, akadi leini ager da likame doko bino donyo neko gi di camo gi. Gin kibino bedo i mulem abongo ngatamoro mino gi lwori.



²⁹Ango abino mino cam dongo negi di kec ko jik i lobo gi. Atekerin apat doko likame bino donyo yeyeto gi.

³⁰Gin kibino ngeno be angu Rwot Rubanga gi atie kede gi, kede be gin jo me Isirael kibedo jo na. Angu Rwot Rubanga en awaco.

³¹” Wun ibedunu romini na, romini kame angu akwao, doko angu abedo Rubanga wu,” Rwot Rubanga en owaco.

Esekeri 35

Alola kame Rubanga bino Mino Edom

¹ Rwot oko waco na be,

²” Wot ka dano, ronkino jo me Edom

³di iwaco negi be angu Rwot atie waco kaman: Edom in itieko doko ngakwor na; angu abino mini alola di ako mini kabedo atie nono di kony mere li.

⁴Abino mino bomban ni doko atukito me ude kopopoto, di iko doko lobo kodong nono, di in iko bino ngeno be angu en Rwot.

⁵” Anakacia wun ibedunu jokwor me Isirael, doko ikounu jalo koneneko gi i kare kame peko opoto negi kede, en kare kame oudo kitie udo kede alola me ajikini.

⁶Pi manono, nan angu akwongere be, ateteni angu Rubanga akuo abino kelo nek i komu; wun oudo ibedunu onyo remo, nan kobino onyo remo wuda.

⁷Angu abino mino lobo me Edom kony mere doko li, di ako bino neneko jo aoto kiye.

⁸Abino umo wi mori mege kede liele; kom jo kame koneneko bino pongu wi imukuran kede aditoto.

⁹Abino mini in Edom idong abongu jo pi kare lung, di bomban ni ko bino dong nono. Di do in iko bino ngeno be angu en Rwot.

¹⁰” In iwaco be atekerin are me Yuda kede Isirael karacel kede lobere gi obedo meg, doko da be in ibino gamo gi akadi bed bala angu Rwot abedo Rubanga gi.

¹¹Pi manono, nan angu akwongere be, ateteni ibinunu niang keda, angu Rwot Rubanga akuo, pi gero, nyeko, kede adagadaga kame itienu kede i kom jo na.

¹²Ibinunu ngeno be angu Rwot atieko winyo kope me anywar kame ibedunu waco i kom mori me Isirael, di iwacunu be kitieko dong nono, be kotieko mino gi butu.

¹³Doko da wun ibedunu tingere na di iwacunu kope areco atot i koma; angu atieko winyo gi.

¹⁴” Abino mini idong nono di wi lobo lung ko bino lelo iye.



¹⁵Bala kame in ilelo kede kakame kodudubo kede lobo ka jo me Isirael, pien oudo edong nono, pi manono ibino niang keda. Mori me Seir, lobo me Edom bino dong nono. Di do jo dedede ko bino ngeno be ango en Rwot.”

Esekeri 36

Winyo ka Rubanga but Jo me Isirael

¹Rwot oko waco na be, “Wot ka dano, wac ne mori me Isirael be

²ango Rwot Rubanga atie waco kaman: jokwor me Isirael waco be, ‘Ebo, mori me anakacia go otieko doko megwa.’

³” Wac negi kop kame ango Rwot Rubanga atie waco be: ateteni jokwor nogo omio wu idongunu nono, di kiko nyonyoto wu ki bad dedede, di atekerin apat oko mamako wu di kiko donyo kwoto wu di kiyamo kope areco i komu.

⁴Pi manono, winyuni kop kame ango Rwot Rubanga atie waco ne wun mori kede imukuran, wun isamai kede aditoto, wun kadedere kame oudo kodudubo kede bomban kame jo oyai kiye, kame oudo koyako di ikounu doko gi me anyera i diere me atekerin koluko wu.

⁵” Ango Rwot Rubanga atie yamo di atie kede twon gero i kom atekerin apat, twatwal mere i kom Edom. Di kitie kede yomcuny kede acae gin kima lobo na odoko mergi pi lum kame tie iye.

⁶” Aso, wac ne lobo me Isirael, wac ne mori, imukuran, isamai kede aditoto gikame ango Rwot Rubanga atie yamo kede twon gero, pi ekite kame atekerin apat obedo yeyeto gi kede.

⁷Ango Rwot Rubanga akwongere be, atekerin koluko gi rimaro kobino yeyeto gida.

⁸Do i wi mori nin Isirael yen bino lot di kiko nyako anyakini ne jo na me Isirael, pien gin kibino dwogo oyotoyot.

⁹Ango atie i bad nin; ango abino lokere buti, di oko bino puri di oko pito kodere.

¹⁰Ango abino mino wel me jo nin nyai, jo dedede me Isirael; jo bino dok bedo i bomban di oko bino temuno gero kadedere kame oudo kodudubo.

¹¹Abino mino wel me jo kede me leini nin meede. Gin kibino nywal di kiko nyai. Ango abino mino jo dok bedo i lobo nin bala bin sek, di ako timo ni bero kalikame lem pwodi atimo ni. Di do in iko bino ngeno be ango en Rwot.

¹²Abino dwoko jo na me Isirael bedo i lobo nin, di lobo nono ko doko mergi. Likame bobo in ibino mino gi kikei idwe gi.

¹³” Ango Rwot Rubanga atie yamo kaman: ateteni jo tie yamo be in itie tieko jo, doko da itie mino ateker kei idwe gi.

¹⁴Do cako nan likame doko in ibino meede tieko jo, doko da likame ibino mino ateker ni kei idwe mege; ango Rwot Rubanga en awaco.



¹⁵Likame doko abino mini iwinyo ayet awok kibut atekerin; likame doko kibino bedo kede acae i komi. Likame doko in ibino mino ateker ni gete; ango Rwot Rubanga en awaco.”

Isirael i Kuo Kanyen

¹⁶Rwot oko waco na be,

¹⁷” Wot ka dano, kakame jo me Isirael oudo tie bedo kede i lobo gi, yote me kuo gi kede tice gi oko mino lobo nono opwokere. Kibuta yote me kuo gi oudo cal bala pwokere me dako atie kede tuwo duwe.

¹⁸Aso, ango ako jalakino gero na i kom gi pi remo kame oudo kionyo i lobo nono, kede pi caljwogi kame gin kimunao kede lobo nono.

¹⁹Ango ako sasaro gi i diere me atekerin, di kiko sasarun i pinye apapat. Ango oudo angolo negi kop di lubere kede ekite me kuo gi kede tice gi.

²⁰Do i diere me atekerin, kabedere dedede kame gin oudo kibeo iye oudo gin kipwoko nyinga kacil, pien jo oudo waco kop i kom gi be, ‘Magi obedo jo ka Rwot, do gin kiyai kiweko lobo mere.’

²¹Do ango oudo aparo pi nyinga koudo jo me Isirael opwoko i diere me atekerin koudo gin kioto iye.

²²” Pi manono, nan wac ne jo me Isirael be ango Rwot Rubanga atie waco kaman: likame piru en komio nataman ango ayapuno timo gikame abino timo, do pi nyinga kacil kame wun itiekunu pwoko i diere me atekerin kame wun iotunu iye.

²³Ango abino lonyo nyinga adwong, nying kotieko pwokere i diere me atekerin, di atekerin ko bino ngeno be ango en Rwot. Manono bino timere kame ango anyuto negi kibutu be ango abedo ngat kacil.

²⁴Ango abino kwanyo wu ki diere me atekerin, abino koko wu ki pinye dedede di ako dwoko wu i lobo wu amako wu.

²⁵Abino kikiro pii acil i komu di ako bino lonyo wu ki pwokere wu kede ki caljwogi wu.

²⁶Ango abino mino wu cuny anyen kede tam anyen; abino kwanyo ki butu cuny me epali di ako lunyo mino wu cuny awor.

²⁷Ango abino keto tipo na i kuo wu di ako mino wu ilubunu iswilia na di ikounu gwoko cik na.

²⁸Di do ikounu bino donyo bedo i lobo kame oudo ango bin amio joakwari wu; di wun ikounu bino bedo jo na, di ango ako bedo Rubanga wu.

²⁹Ango abino lako wu ki gi dedede kame pwoko wu; abino mino cik di kac ko bedo tot tetekeny kec likame doko bino mako wu.



³⁰Abino mino yen nyak kitek, di poti wu da ko ceko cam atot, tetekeny kur doko lewic me bedo kec kec bed tie ne wu i diere me atekerin.

³¹Di ikounu bino yutuno yote wu areco kede tice wu kalikame ber, di cunyu ko bino wang kenu pi gikareco kame itimunu.

³²Wun jo me Isirael ango amito ingeunu be likame ango abino timo manoni piru. Poore lewic maku pi gikame ibedunu timo; ango Rwot en awaco.

³³” I ceng kame ango abino lonyo wu kede ki dub wu dedede, abino mino wu icakunu doko bedo i bomban wu, di ikounu medo gero ude kopopoto.

³⁴Ibinunu puro lobo kame kony mere oudo odoko li, di likame doko eko bedo lobo kame kony mere li bala kame jo kame oudo beo kanono neno kede.

³⁵Gin kiko bino donyo yamo be, ‘Lobo kame kony mere oudo li noni odoko cal bala potu me Eden; doko da bomban kame kony gi oudo odoko li di kitieko popoto nan do jo bedo i yi gi, doko da kocelo gi.’

³⁶Di do atekerin kodong kio kede wu ko bino ngeno be, ango Rwot atieko medo gero kabedere koudo opopoto, di ako medo pito kodere i poti kame kony gi oudo otieko doko li. Ango Rwot en awaco kop noni, doko da abino time.”

³⁷Rwot Rubanga waco be, “Abino da mino jo me Isirael penya pi timo negi kaman: pi mino wel gi meede bala me romini.

³⁸Di do jo ko bino pong i bomban kame nataman opopoto, bala kame bin Yerusalem opong kede romini kame oudo kopoore yalo i kare me ibagai. Di do gin kiko bino ngeno be ango en Rwot.”

Esekeri 37

Aditot me Cogere Kotuo

¹Twer ka Rwot oko bino i koma di tipo mere oko tera di eko ciba i dier aditot kopong kede cogere.

²En eko tela mamano gi; cogere koudo opepetun kanono oudo tot twatwal, doko oudo kituo twatwal.

³En eko penya be, “Wot ka dano, cogere gi twero bedo kuo bobo?” Ango ako dwoko be, “Rwot Rubanga, in ingeo.”

⁴En eko waco na be, “Wace cogere go be: wun cogere kotuo, winyunu kop kame Rwot tie waco ne wu.

⁵Rwot tie waco ne wu be: ango abino keto ne wu wei di ikounu bino bedo kuo bobo.

⁶Abino keto ne wu amorito akodo cogere, di ako keto ne wu ringo me kom, di ako umo wu kede delkom, di ako keto ne wu wei, di ikounu bino bedo kuo bobo. Di do ikounu bino ngeno be ango en Rwot.”



⁷Ango ako muraŋo bala kame oudo Rwot ociko na. Kakame oudo atie yamo kede, ako winyo gikame timere gogol gogol. Cogere oudo tie dudupun iwangere gi!

⁸Ako neno di amorito ororopo gi, di ringo me kom oko umo gi, di delkom oko umo gi. Do oudo likame kitie kede wei i kom gi.

⁹Di Rubanga oko waco na be, “Muraŋo; wac ne yamo me wei be ango Rwot Rubanga atie waco ne be: wok ki bad ongwon dedede, di iko kuto wei amio kuo i kom jo kame oudo koneko nogi, tetekeny kibed kuo bobo.”

¹⁰Ango ako muraŋo bala kame oudo eciko na, di yamo me wei oko donyo i kom gi, di kiko bedo kuo, di kiko cungo. Oudo gin jo atos twatwal.

¹¹Di Rubanga oko waco na be, “Wot ka dano, jo me Isirael cal bala cogere nogi. Gin kiwaco be kituo gongogong, doko kili kede gen moro me anyim.

¹²Pi manono, muraŋo, wac negi be ango Rwot Rubanga atie waco be: ango abino yabo atesin wu, Okwe wun jo na. Abino woto wu di ako dwoko wu i lobo me Isirael.

¹³Ibinunu ngeno be ango en Rwot, wun jo na, ka ango ayabo atesin wu di ako woto wu ooko.

¹⁴Tipo nango bino mino wu wei di ikounu bedo kuo, di ango ako bino keto wu i lobo wu amako wu, di wun ikounu bino ngeno be ango en Rwot. Ango en acikere timo manoni, doko abino time da, ango Rwot en awaco.”

Yuda kede Isirael i Ajakanut Acel

¹⁵Rwot bobo oko yamo keda be,

¹⁶” Wot ka dano, kwany ebela di iko wandiko i kore be, ‘Ajakanut me Yuda’ . Bobo iko kwanyo ebela ace di iko wandiko i kore be, ‘Ajakanut me Isirael’ .

¹⁷Iko mako ibelai are nogo di wi gi oriamakin, tetekeny kineno bala ebela acel.

¹⁸Ka jo ni oko penyi pi waco negi dwong mere,

¹⁹wac negi be ango Rwot Rubanga atie waco be: ango ayapuno kwanyo ebela acungo pi Isirael di ako ribe i kom ebela acungo pi Yuda, di gin kiko bino doko ebela acel kame ango atie mako i cinga.

²⁰” Mak ibelai are nogo i cingi di iko mino jo nen gi.

²¹Di iko waco negi be ango Rwot atie waco be abino kwanyo jo me Isirael ki diere me atekerin kame gin kioto iye, di ako coko gi ki adulion dedede di ako dwoko gi i lobo gi amako gi.

²²Abino mino gi kibedo ateker acel i lobo nono, i wi mori me Isirael. Kibino bedo kede abaka acel kame pugo gin dedede. Likame doko kibino bedo atekerin are, doko da likame kibino pokere pi bedo ajakanuto are.

²³Likame doko kibino munaun kede tim me woro caljwogi, amoto kede jamini gi ace kame ango adagi, arabo kede dub gi. Ango abino lako gi ki yote dedede kame kitieko



poto kede tenge kibuta, di ako bino lonyo gi. Di do gin kiko bino bedo jo na, di ango ako bedo Rubanga gi.

²⁴ Abaka acal bala bin ngatic na Daudi en kabino bedo abaka gi; gin dedede kibino bedo tie kede ngakwat acel. Gin kibino donyo lubo iswilia na di kigwoko cik na.

²⁵ Gin kibino donyo bedo i lobo kame bin amio ngatic na Yakobo, lobo kame joakwari gi obedo iye. Gin kibino bedo kunono atwal, kiton ikwae gi, kiton ikwae me ikwae gi. Abaka kame cal bala bin Daudi en kame bino bedo ngapug gi atwal.

²⁶ Ango abino timo kede gin isikan me mulem; en ebino bedo isikan kame bedo nakanaka. Ango abino mino gi winyo di kiko nyai, di ako bino cibo tempulo na i diere gi pi bedo iye nakanaka.

²⁷ Ango abino bedo kunono kede gin; ango abino bedo Rubanga gi di gin kiko bedo jo na.

²⁸ Kame ango acibo tempulo na pi bedo kuno i diere gi nakanaka, di do atekerin ko bino ngeno be ango Rwot ayero Isirael pi bedo jo na.”

Esekeri 38

Gog tie bala Ebela me Yi ka Rubanga

¹ Rwot oko waco na be,

² “Wot ka dano, bunano Gog, en ngapug adwong me Mesek kede Tubal, i lobo me Magog. Bunano en

³ di iwaco ne be ango Rwot atie waco be: ango atieko doko ngakwor ni, in Gog, ngapug adwong me Mesek kede Tubal.

⁴ Abino loki iwire, di ako kodo itinyo ni kede golu di ako ware kedi karacel kede twon ekodet adwong me isirikalen ni. Magonogo bino ribo asigiran, jo kame ringo kede asigiran, di gin dedede di kingapere kede jamini me yi, di kimako ibukui kede ipimai i cing gi.

⁵ Isirikalen ni ribo jo me Pasia, Abisinia kede Libiya, di gin dedede kitie kede ibukui kede icoron atek me gwoko wic;

⁶ jo yi me Gomer kede me Bet Togarama atie i bad tetu malo tie kedi, jo atot adikinicel en kame tie kedi.

⁷” Bed di i iikere, in karacel kede isirikalen dedede kocokere luki kame tie i amuri nin.

⁸ Pien ingei mwakini anonok, ango abino ciki pi ot suro lobo kame yi oudo odudubo. Oudo jo oweke pi kare alac, do nataman oko dwoko jo mege nogo ki lobere me obukui kakame oudo bin kibedo iye. Gin nan kibedo i mulem abongo lworu moro i wi mori me lobo gi.



⁹In kede isirikalen ni karacel kede atekerin ace kame tie kedi ibinunu ot suro gi bala yamo ager me kot, di ikounu umo lobo gi bala edou.

¹⁰” I ceng nono tam bino bino i wii di iko timo iik arac.

¹¹Ibino waco be, ‘Ango amito ot suro lobo me jo kame bedo i bomban ali kede cel kede irutei, kede gi me cego irutei, jo kame bedo i mulem abongo lworo moro.’

¹²Ibino yako jamini di iko tero; ibino suro jo kame nan bedo i bomban kame bin oudo otieko doko amejeko, jo kame kocoko ki kom atekerin apat. Nataman gin kipong kede doke kede jamini, di kibedo i kabedo kame pire tek i wi lobo lung.

¹³Jo me Seba kede Dedan kede jocat wil me Tarusi kede isirikalen mege acal bala inguon bino penyi be, ‘Icoko isirikalen ni pi bino yako jamini? Benyo, ibino pi tero siliba kede saabu kede doke kede jamini ace apat?’

¹⁴Pi manono, wot ka dano, wac ne Gog be ango Rwot Rubanga atie waco kaman: i ceng nono ka jo na me Isirael tie bedo i mulem in ibino yai

¹⁵ki kabedo ni atie wiriwir i bad tetu malo, in karacel kede jo atot, gin dedede di kitie ringo kede asigiran, twon ekodet me isirikalen atek.

¹⁶Ibino suro jo na me Isirael bala kame edou me kot me yamo umo kede wi lobo. Abino cwani suro lobo na tetekenya atekerin ko bino ngena, ka ango anyuto negi be ango abedo ngat kacil i gikame ango abino timo kibuti in Gog.

¹⁷In en ngat kame ango bin sek awaco kop i kome ki dog jotic na inabin me Isirael be, i kare me anyim ango oudo abino kelo dano moro suro Isirael.” Rwot Rubanga en owaco.

Alola kame Rubanga Omio Gog

¹⁸Rwot Rubanga owaco be, “I ceng nono kame Gog osuro Isirael, ango abino doko ger.


¹⁹Atie waco kede nyeko kede gero be: i ceng nono lobo me Isirael bino yangere adikinicel.

²⁰Aporogon me nam kede winy dedede, leini dedede me obar kede gikame liao alia i wi lobo, kede jo dedede kame bedo i wi lobo kom gi bino miel pien udo kitie kede lworo i tie nango; di mori kede apamai aboco malo me lelai ko bino popoto, kede apamai me gedo dedede da bino popoto.

²¹Abino cwano ipimai dedede me wi mori na i kom Gog; jo mege bino lokere nekere ken gi ken gi kede ipimai.

²²Abino mine alola me aumpuli kede nek. Kot aony kitek kede akako, karacel kede mac kede salupa bino cwei i kome kede i kom isirikalen mege kede jo dedede kame tie kede en.

²³Iepone noni ango abino nyuto ne atekerin dedede dwongo na, kede da be ango abedo ngat kacil. Gin kiko bino ngeno be ango abedo Rwot.”



Esekeri 39

Kobwono Gog

- ¹Rwot Rubanga oko waco be, “Wot ka dano, bunano Gog di iwaco ne be ango Rwot Rubanga atie waco be: ango atieko doko ngakwor ni, in Gog, ngapug adwong me Mesek kede Tubal!
- ²Abino loki iwire di ako koli anyim kwanyi ki kakawiriwir i bad tetu malo, di ako teri tuno i mori me Isirael.
- ³Abino dipo paka reto ki cingi tetu ngodal yat kokude me emal, di tongini me emal ko popoto ki cingi tetu cam.
- ⁴In kede isirikalen ni kede jo dedede kame tie kedi ibinunu popoto i wi mori me Isirael. Abino mino komu but winy me egere dedede acamo ringo kede leini me obar pi gin camo.
- ⁵Ibinunu popoto di liele wu ko moore obar; ango Rwot Rubanga en awaco.
- ⁶Abino cwinyo mac i lobo me Magog kede i dog name kakame jo bedo iye abongo alola moro, di gin kiko bino ngeno be ango en Rwot.
- ⁷Ango abino mino jo na me Isirael ngea, di likame ako yei be bobo pwok nyinga kacil, di atekerin kobino ngeno be ango en Rwot, Ngat Kacil me Isirael.
- ⁸” Ceng kame ango atie waco kop i kome nono ateteni tie tuno; gi nogi bino timere!
- ⁹Jo kame bedo i bomban me Isirael bino ot koko jamini me yi kame koweko di kiko moko kede gi mac. Gin kibino moko mac kede ibukui, yen kede tongini me imalia, tongini kede akutai, mac nono bino twero liel pi mwakini kanyaare abongo to.
- ¹⁰Gin likame doko kibino donyo ot mwodo yen ki obar, pien gin kibino do donyo moko mac kede jamini me yi. Gin kibino yako jo kame oudo oyako gida, ango Rwot Rubanga en awaco.”

Ayika ka Gog

- ¹¹Rwot owaco be, “I ceng nono ango abino mino Gog kabedo me yiko jo i Isirael, i Aditot me Jo Aoto, katie i bad tetu kide me Nam Oto. Kanono en kame kobino yiko iye Gog kede Isirikalen mege. Limbo nono bino cego ne jo aoto yongayo pien udo edwong. Kobino donyo lwongo aditot nono be Aditot me Isirikalen ka Gog.
- ¹²Ebino tero ne jo me Isirael dwete kanyaare pi yiko gi, tetekeny lobo dong di cil.
- ¹³Jo dedede kame bedo i lobo nono bino yiko gi, di manono ko bino kelo negi wor i ceng kame ango abino nyuto kede deyo na; ango Rwot Rubanga en awaco.
- ¹⁴Ingei dwete kanyaare nogo, gin kibino bobo yero jo mogo di kiko cwano gi mamano lobo gi dedede pi mono kede pi yiko kom jo mogo apwodi odong, tetekeny lobo dong di cil; manoni bino tero negi dwete kanyaare.



¹⁵Kakame jomoc tie mamano kede lobo nono, ngatamoroni kame bino udo cogo me dano bino sipo gianena moro kare, tetekenyo jo kame kunyo ates yike i Aditot me Isirikalen ka Gog.

¹⁶(Bomba bino bedo i ngete kanono kame kolwongo kede nying Isirikalen nogo.) Iepone nono gin kibino mino lobo gi dong cil.”

¹⁷Rwot Rubanga oko waco na be, “Wot ka dano, lwong winy me egere dedede, kede leini dedede me obar pi bino ki kabedere dedede di kiko cokere camo ebaga me giayala kame ango atie iiko negi. En ebino bedo ebaga adwong twatwal i wi mori me Isirael, kakame gin kibino camo kiye ringo di kiko mato remo.

¹⁸Gin kibino camo ringo me jo yi atek, di kiko mato remo me jopug me wi lobo, gin dedede jo kame kobino neko gi bala romini, diegi, kede twonin kocwe me Basan.

¹⁹I ebaga me giayala kame ango atie iiko, gin kibino camo kakamio tuno romo gi, di kiko mato remo tuno mer kede.

²⁰I emesa na gin kibino cam paka cam romo gi; kibino camo asigiran, jo kame ringo kede asigiran, jo yi atek kede isirikalen me epone dedede; ango Rwot Rubanga en awaco.”

Dwoko Isirael i Kuo mere Kasek

²¹Rwot owaco be, “Abino nyuto ne atekerin deyo na; atekerin dedede bino neno alola kame lubere kede kop kame ango angolo, kede cinga koketo lito i kom gi.

²²Cako i ceng nono ot anyim jo me Isirael bino ngeno be ango en Rwot Rubanga gi.

²³Doko atekerin da bino ngeno be oudo komako jo me Isirael di oko tero gi obukui pi dub gi, pien gin likame kibedo jo agenere buta. Ango ako lokere tenge kibut gi di ako jalo gi i cing jokwor gi, di gin kiko donyo neko gi.

²⁴Ango atero gi i yore kame poore kede pwokere gi kede dub gi, manono en komio ango alokere tenge kibut gi.”

²⁵Rwot Rubanga waco be, “Do nan ango abino dwoko ne ikwae ka Yakobo bero kame oudo kitie iye sek; abino bedo kede kisa i kom jo dedede me Isirael. Abino bedo kede nyeko i nyinga kacil pi gwoke.

²⁶Kame gin do kiko donyo bedo i lobo gi kede anapakin abongo ngatamoro amio gi lwooro, gin wi gi do bino wil kede lewic kabin omako gi, kede tim kalikame nyuto genere kame gin kibedo tie kede buta.

²⁷Ango abino dwoko jo na kibut atekerin apat, abino coko gi ki lobere ka jokwor gi, di manono ko bino nyuto ne atekerin atot be ango abedo ngat kacil.

²⁸Di jo na ko bino ngeno be ango en Rwot Rubanga gi, pien oudo amio komako gi di oko tero gi obukui, do nan ako coko gi di ako dwoko gi i lobo gi, abongo weko moro kikom gi dong cen.



²⁹Likame doko ango abino lokere tenge kibut gi, pien ango abino keto tipo na i kom gin jo me Isirael, ango Rwot en awaco.”

Esekeri 40

Gianyuta me Tempulo me kare me Anyim

40.1—48.35
Kotero Esekeri Yerusalem

¹Manono oudo obedo ceng me tomon i agege me mwaka, i mwaka me ot are kiwie kany kame wan obedo kede obukui bala mabus, doko da manono oudo obedo mwaka me tomon kiwie ongwon ingei dudubo bomba me Yerusalem; i ceng nono kikokome twer ka Rwot oko bino i koma di eko tera karamoro.

²Ako neno gianyuta ka Rubanga; i gianyuta nono en etera i lobo me Isirael di eko ciba i wi moru abor. Ako neno gedo kame oudo cal bala bomba i bad tetu piny me wi moru nono.

³Kakame en eko tera kede kunono, ango ako neno di icuo moro tie cungo, di kome meny bala nyonyo buronsi. En oudo etie mako i cinge tol kede magada me pimo boro, di etie cungo i ekeko me erute.

⁴Icuo nono oko waco na be, “Wot ka dano, ngici kiber, doko da cik yiti kiber, di iko keto tam ni i kom gikame ango abino nyuto ni, pien in kokeli kan me wek ango anyut ni gi nogo. Poore iwac ne jo me Isirael gi dedede kame ibino neno.”

Erute me bad tetu Kide

⁵Ako neno tempulo di apama oluke ki ooko. Icuo nono oko kwanyo magada mere me pim, kame boro mere oudo tie mita adek, di eko pimo apama. Apama nono boro mere malo oudo tie mita adek, doko da bimirir mere oudo tie mita adek.

⁶En eko ot i erute kame oudo neno bad tetu kide. En eko yito malo i wi apama di eko pimo ekeko me erute; oudo etie mita adek dwogo piny i lobo.

⁷Yai ki ekeko me erute donyo i yie oudo obedo kabeo alac, kame tie iye agolai adek i bad tetucel, kede doko agolai adek i bad tetu ocelu, gin oudo kibedo agolai me jodar. Buli agola acelacel oudo laco mere ki bad dedede kede boro me apama mere rorom, bad dedede oudo tie mita adek. Apama kame oudo poko buli agola acel kede ocelu oudo bimirir mere tie mita are kede dul. Kalamo agolai nogo oudo doko tie iye yongayo alac kame boro mere tie mita adek, kame oudo donyo i agola alac me kadonyo, kame neeno kede tempulo.

⁸⁻⁹En eko pimo agola nono eko udo boro mere tie mita ongwon. En oudo etie i ajikini me kabeo me erute i yie. Apama mere koudo neeno kede tempulo oudo bimirir mere tie mita acel.

¹⁰(Agolai me jodar kame oudo tie i erute oudo rorom, doko apama kame oudo poko gi da bimirir gi rorom.)



¹¹Di en eko pimo laco me ekeko me erute, eko ude etie mita kany, do kabeo kame oudo kato kiye oudo tie mita kanyape kede dul.

¹²I nyim agola acelacel me jodar oudo tie iye apama moro acecek kame boro mere malo tie sentimita ot kany, kede bimirir mere da kamanono. (Agolai nogo oudo tie mita adek ki bad dedede.)

¹³Di eko pimo boro kame yai ki apama me ngei agola acel, ngolo kabeo tuno i apama me ngei agola ocelu, eko ude etie mita tomon kiwie are kede dul.

¹⁴Agola alac me kadonyo, kame oudo tie i ajikini oudo laco mere tie mita tomon. ¹⁵Boro me kabeo i erute, cako ki apama me ooko me ekeko me donyo, tuno i apama me ooko me ekeko me agola alac me kadonyo oudo tie mita ot are kiwie kany.

¹⁶Dirisan atitino oudo tie i kor apamai me ngei agolai nogo, kede i kor apamai kame poko agolai. Oudo kogoro cal me tugere i kom apamai me yie, kame riere i lak kabeo.

Diakal me Ooko

¹⁷Di eko tera tuno i diakal me ooko. Diakal me ooko oudo tie kede agolai ot adek kame oudo kogero i kom apama me ajikini me ooko ki yie; nyim gi piny oudo koto di tek kede kide

¹⁸rimaro diakal dedede. Diakal me ooko noni oudo tie pipiny kalamo diakal me yie.

¹⁹Erute ace oudo tie kakotingere malo adonyo i diakal me yie. En eko pimo boro kame yai ki apama me yie me erute me ooko, tuno i apama me ooko me erute nono, di boro mere oko bedo mita ot kany.

Erute me bad tetu Malo

²⁰En eko pimo erute me bad tetu malo kame donyo i diakal aoko.

²¹Agolai adek kame tie i bad tetuni kede adek i bad tetuca me kabeo, apamai kame poko gi, kede agola alac me kadonyo i yie, gin dedede oudo kirorom kede me erute me bad tetu kide. Boro me kabeo i erute nono dedede oudo tie mita ot are kiwie kany, kede laco mere oudo tie mita tomon kiwie are kede dul.

²²Agola alac me kadonyo, dirisan mege, kede cal me tugere kame kogoro i kor apama oudo cal acala kede me erute me bad tetu kide. Kayito iye oudo kogero iye kakame konyono me yito enyiriri kanyaare ot malo, di agola mere alac me kadonyo tie i bad me yie kakame neeno kede diakal.

²³Ka ingolo diakal wok ki erute me bad tetu malo noni, oudo ituno bobo i erute ace kame donyo i diakal me yie, bala kame oudo tie i bad tetu kide. En eko pimo dierediere me erute me ooko kede erute me yie nono, di boro mere oko bedo mita ot kany.

Erute me bad tetu Piny

²⁴Di eko tera i bad tetu piny, di ako bobo neno erute ace. En eko pimo apamai me yie kede agola alac me kadonyo, gida kiko bedo rom aroma kede me irutei ace.



²⁵Dirisan oudo tie i agolai me kadonyo noni bala kame oudo tie kede i apat da. Boro me kadonyo nono oudo tie mita ot are kiwie kany, kede laco mere oudo tie mita tomon kiwie are kede dul.

²⁶Kayito iye oudo kogero iye kakame konyono me yito enyiriri kanyaare ot malo i ekeko, di agola mere alac me kadonyo tie i bad me yie kakame neeno kede diakal. Oudo kogoro cal me tugere i apamai mege me yie kame riere i lak kabeo.

²⁷I bad tetu noni da, oudo tie iye erute ace kame donyo i diakal me yie. En eko pimo dierediere me erute me ooko kede erute me yie nono, di boro mere oko bedo mita ot kany.

Diakal me Yie: Erute me bad tetu Piny

²⁸Icuo nono oko tera i diakal me yie di obeo ki erute me bad tetu piny. En eko pimo erute me bad tetu piny nono, eko bedo rom aroma kede irutei apat da.

²⁹⁻³⁰Agolai mege me jodar, agola mere alac me kadonyo, apamai mege me yie oudo rom aroma kede me irutei apat. Dirisan oudo tie i yie rimaro, kede da i agola mere alac me kadonyo. Boro mere dedede oudo tie mita ot are kiwie kany, kede laco mere oudo tie mita tomon kiwie are kede dul.

³¹Agola mere me kadonyo oudo neno diakal aoko, di kogoro cal me tugere i kor apamai mege ariere i lak kabeo tuni tuni. Kayito iye oudo kogero iye kakame konyono me yito enyiriri kanyauni ot malo i ekeko.

Diakal me Yie: Erute me bad tetu Kide

³²Icuo nono oko tera i diakal me yie di obeo ki erute me bad tetu kide. En eko pimo erute me bad tetu kide nono, eko bedo rom aroma kede irutei apat da.

³³Agolai mege me jodar, agola mere alac me kadonyo, apamai mege me yie oudo rom aroma kede me irutei apat da. Oudo dirisan tie i yie rimaro, kede da i agola alac me kadonyo. Boro mere dedede oudo tie mita ot are kiwie kany, kede laco mere oudo tie mita tomon kiwie are kede dul.

³⁴Agola mere alac me kadonyo oudo neno diakal aoko, di kogoro cal me tugere i kor apamai mege ariere i lak kabeo tuni tuni. Kayito iye oudo kogero iye kakame konyono me yito enyiriri kanyauni ot malo i ekeko.

Diakal me Yie: Erute me bad tetu Malo

³⁵Icuo nono oko tera i erute me bad tetu malo. En eko pimo erute nono, eko bedo rom aroma kede irutei apat da.

³⁶Agolai mege me jodar, agola mere alac me kadonyo, apamai mege me yie oudo rom aroma kede me irutei apat da. Oudo dirisan tie iye rimaro. Boro mere dedede oudo tie mita ot are kiwie kany, kede laco mere oudo tie mita tomon kiwie are kede dul.

³⁷Agola mere alac me kadonyo oudo neno diakal aoko, di kogoro cal me tugere i kor apamai mege ariere i lak kabeo tuni tuni. Kayito iye oudo kogero iye kakame konyono me yito enyiriri kanyauni ot malo i ekeko.



Gedo atie i nget Erute me bad tetu Malo

³⁸I diakal aoko oudo tie iye agola moro kame koropo i kom erute me yie me bad tetu malo. Ekeko mere oudo tie i agola alac me kadonyo, kame oudo neeno kede diakal. Kanono oudo kolwoko kiye ringo me leini kame komio bala giayala awanga alutu.

³⁹I agola alac me kadonyo nono oudo tie iye imesai ongwon, are i bad tetuni kede bobo are i bad tetuca. Imesai nogo en kame oudo kongolo iye leini me giayala awanga, giayala me kwanyo dub kede giayala me timo cul.

⁴⁰Oudo imesai ongwon ace tie i diakal nono, are i bad tetucel kede are i bad tetu ocelu me kayito i agola alac me kadonyo me erute nono.

⁴¹Gin dedede oudo kitie imesai kanyauni kame kongolo iye giayala, ongwon i yie kede ongwon ooko i diakal i nget ekeko me erute.

⁴²Oudo doko da tie imesai ace ongwon kobedo kide kame kopao me temuno giayala kame kowango alutu. Oudo boco gi malo tie sentimita ot kany, di wi gi i bad dedede tie sentimita ot kanyaare kiwie kany. Jamini dedede kame oudo kotio kede gi me neko leini me giayala oudo koketo i wi imesai nogo.

⁴³Oudo koguro ibaon atitino kame laco gi oudo tie milimita ot kanyaare kiwie kany i kor apama nono rimaro i yi ot. Ringo koudo obedo giayala oudo koketo i wi imesai nogo.

⁴⁴Di eko tera i diakal me yie, kakame oudo tie iye agolai are kame oudo twolo paka i diakal nono. Acel oudo tie i nget erute me bad tetu malo di doge neno bad tetu piny, kede acel oudo tie i nget erute me bad tetu piny di doge neno bad tetu malo.

⁴⁵En eko waco na be agola kame nyime oudo neno bad tetu piny oudo obedo me ka josaseredoti kame tio i tempulo,

⁴⁶kede agola kame nyime oudo neno bad tetu malo oudo obedo me ka josaseredoti kame oudo tio i alutari. Josaseredoti nogo dedede oudo obedo ikwae ka Sadoki, pien gin kenekene kikom ikwae ka Lebi en kame koyei negi noko Rwot pi timo ne tic.

Diakal me Yie kede Gedo me Tempulo

⁴⁷Icuo nono oko pimo diakal me yie eko bedo mita ot kany ki bad dedede. Tempulo oudo tie i bad tetu tim, di alutari tie i nyime.

⁴⁸Di eko tera i agola me kadonyo i tempulo. En eko pimo ekeko mere eko udo laco mere tie mita kanyaare kede boro mere mita are kede dul, di bimirir me apama mere tie mita acel kede dul i bad tuni tuni.

⁴⁹Kayito i agola me kadonyo i tempulo nono oudo kogero iye enyiriri me jo nyono me yito; oudo laco mere tie mita tomon kede boro mere mita kanyape. Oudo tie i doge kanono ipirin are i bad tetuni kede i bad tetuca.

Esekeri 41



¹Alubo mere icuo nono oko tera i agola me diere me tempulo, en Kabedo Kacil. En eko pimo kakame kodonyo kede iye, oudo boro mere tie mita adek

²kede laco mere mita kany, di bimirir me apama mere i bad tetuni kede tetuca tie mita are kede dul. Boro mere oudo tie mita ot are kede laco mere mita tomon.

³Di eko ot i agola me yie kalamo, di eko pimo kadonyo iye; oudo boro mere tie mita acel kede laco mere mita adek, di bimirir me apama mere i bad tetuni kede tetuca tie mita adek kede dul.

⁴En eko pimo agola nono, eko bedo mita tomon ki bad dedede. Agola nono oudo tie anyim me agola me diere. En eko waco na be, “Man en Kabedo Kacil Kalamo.”

⁵En eko pimo bimirir me apama me tempulo, eko bedo mita adek. I kom apama noni i yie oudo kogero iye agolai rimaro yi tempulo, kame laco gi oudo tie mita are.

⁶Agolai nogi oudo tie goropan adek ot malo, di dier ot acelacel tie kede agolai ot adek. Apama me ooko me tempulo me dier ot acelacel oudo titidi kalamo me dier ot atie piny mere, tetekenye agolai nogo karuno cungo i wi apama abongo ridakino gi iye.

⁷Pi manono, kame oudo ineno apama me tempulo ki ooko, oudo ineno bala bimirir mere rorom paka tuno i wie malo. Ingei agolai nogo i ooko oudo kogero iye kayito are alac, tetekenye dano oudo twero yai ki ude me piny tuno i goropa me diere paka tuno i me malo.

⁸⁻¹¹Apama me ngei agolai nogo oudo bimirir gi tie mita are kede dul. Ekeko oudo tie acel adonyo i agolai kame tie i bad tetu malo me tempulo, kede acel kame donyo i agolai me bad tetu piny. Tie oudo kakame koto atek kame laco mere tie mita are kede dul rimaro tempulo; boro mere malo oudo tie mita adek yai ki wi lobo, en oudo koribe eporere kede acakini me apama me agolai i kom apama me tempulo. Kakatwolo atie i dierediere me apama me ngei agolai me tempulo kede agolai me josaseredoti atie i diakal oudo boro mere romo mita tomon.

Gedo kame tie i bad tetu Tim

¹²I ajikini me kakatwolo i bad tetu tim me tempulo oudo tie iye gedo kame boro mere tie mita ot ongwon kiwie kany, kede laco mere mita ot adek. Apama mere rimaro bimirir mere oudo tie mita are kede dul.

Rom dedede me Gedo me Tempulo

¹³Icuo nono oko pimo boro me tempulo, eko bedo mita ot kany. Cako ki apama me ngei tempulo, ngolo kakatwolo tuno i apama me ngei ot kame tie i bad tetu tim me tempulo oudo da tie mita ot kany.

¹⁴Boro me nyim tempulo i bad tetu kide, ribo kiton kakatwolo kodong i ngete tetuni kede tetuca, oudo da tie mita ot kany.

¹⁵En eko pimo boro me tempulo i bad tetu tim, ribo kiton kakatwolo me ngete tetuni kede tetuca, manono da oko bedo mita ot kany.

Gedo me Tempulo i Yore i Yore



Agola me kadonyo i tempulo, Kabedo Kacil, kede Kabedo Kacil Kalamo

¹⁶oudo konamo iye ibaon paka tuno i dog dirisan. Dirisan nogo oudo kotwero cego.

¹⁷Apama me yi tempulo rimaro lung paka tuno malo kalamo wi ikekon oudo oumere kede cal kame kogoro iye.

¹⁸Magonogo oudo obedo cal me tugere kede cerubim, buli cal me tugo i dierediere me cal are me cerubim. Buli cerubim oudo tie kede nyime are:

¹⁹Nyime tetucel koudo obedo cal me nyim dano oudo neno cal me tugo me bad tetucel, doko nyime tetucel da koudo obedo cal me nyim engu oudo neno cal me tugo me bad tetu ocelu. Oudo etie kamanoni rimaro apama me yi tempulo lung,

²⁰cako ki dier ot piny tuno malo kalamo wi ikekon.

²¹Purem me ekeko adonyo i Kabedo Kacil oudo rorom ki bad dedede.

Alutari me Ebao

I nyim ekeko kame donyo i Kabedo Kacil oudo tie iye gimoro acal bala

²²alutari me ebao. Oudo boro mere malo tie mita acel kede dul, kede laco mere oudo tie mita acel. Ipirin mege me isondana, dude piny kede ngete oudo kotimo kede ibaon. En eko waco na be, “Man en emesa acungo i nyim Rwot.”

Ikekon

²³Ikekon kame donyo i Kabedo Kacil kede i Kabedo Kacil Kalamo, acelacel oudo opokere tien are.

²⁴Gin oudo kibedo ikekon kame yabere ki diere di kiko dole.

²⁵Oudo kogoro cal me tugere kede cerubim i kom ikekon da, bala kame oudo kotimo i kor apamai. Oudo konanamo ibaon piny ooko i nyim agola me kadonyo i tempulo.

²⁶Apamai me agola nono oudo tie kede dirisan, doko oudo cal me tugere tie iye.

Esekeri 42

Gedo Are atie i nget Tempulo

¹Di icuo nono oko tera i diakal aoko adok i bad tetu malo, di eko tera i gedo kame oudo bad tetucel mere neeno kede diakal me yie, kede bad tetucel mere neeno kede gedo atie i bad tetu malo i diakal aoko.

²Ot kame oudo tie i bad tetu malo boro mere oudo tie mita ot kany, kede laco mere mita ot are kiwie kany.

³I bad tetucel en oudo eneeno kede kakatwolo kame laco mere tie mita tomon, kame oudo tie i nget tempulo; kede i bad tetucel en oudo eneeno kede diakal aoko kakame koto kede kide. Oudo kogere goropan adek malo, di goropa acelacel oudo apama mere dok i yie kalamo apama kame en oudo ecungo i wie.



⁴I bad tetu malo me gedo nono oudo tie iye kabeo kame boro mere tie mita ot kany, kede laco mere mita kany, di kadonyo mere tie i bad tetu nono.

⁵Agolai kame oudo tie i goropa me malo oudo diding kalamo me goropa me diere kede me piny, pien oudo komio apama me malo odok i yie, omio manono oko ngongo gi.

⁶Pien agolai me goropan adek nogo oudo kobedo wutakino gi di kicungo i wi icegun abongo keto ipirin kame gango gi bala me gedo ace atie i diakal aoko; goropa me malo oudo komio odonyo i yie kalamo me diere kede me piny.

⁷Oudo apama moro tie koriere aneeno kede agolai nogo i bad adok tetu diakal aoko, di eneeno kede agolai atie i diakal aoko; boro mere oudo tie mita ot are kiwie kany.

⁸Pien agolai kame oudo dok i bad tetu diakal aoko oudo boro gi tie mita ot are kiwie kany, do agolai kame oudo neeno kede tempulo boro gi oudo tie mita ot kany.

⁹⁻¹⁰Piny i dud agolai nogi ki bad tetu kide me ajikini me gedo nono, oudo tie iye ekeko kame donyo i diakal aoko ki kakame apama me diakal me yie cakere kiye. I bad tetu piny me tempulo oudo tie iye da gedo ace kacal kamanono, kakame neeno kede kakatwolo me nget tempulo i bad tetucel, kede i bad tetu ocelu oudo eneeno kede gedo me diakal aoko.

¹¹I nyim agolai nogo oudo tie iye kabeo; oudo gin kical acala bala epone me gedo nono atie i bad tetu malo: boco gi, laco gi, kite kame kotimo gi kede, ikekon gi oudo cal acala.

¹²I dud agolai me gedo me bad tetu piny nono, oudo tie ekeko kame donyo i ajikini mere i bad tetu kide, i dog apama me diakal me yie.

¹³Icuo nono oko waco na be, “Agolai atie i bad tetu malo kede i bad tetu piny, kame neeno kede kakatwolo me nget tempulo obedo agolai kacil, kakame josaseredoti aoto i nyim Rwot camo kiye giayala kacil kalamo. Kanono en kame gin kiketo iye giayala kacil kalamo: giayala me alos kede me kwanyo dub kede me timo cul.

¹⁴Kame josaseredoti oudo tie i tempulo di do kiko mito ot i diakal aoko, gin kipoore weko i agolai nogi igoen kacil kame gin oudo kingapo i esawa me tic ne Rwot. Gin kipoore loko igoen apat di pwodi likame kioto kakame jo ocokere iye.”

Rom me Kabedo Aoko me Tempulo

¹⁵Kakame icuo nono otieko pimo kede tempulo kede diakal me yie, en eko tera oboe ki erute me bad tetu kide, di eko pimo diakal aoko me tempulo rimaro.

¹⁶En eko kwanyo magada me pim di eko pimo boro mere me bad tetu kide, di eko udo etie mita tol are kede ot kany (250).

¹⁷⁻¹⁹En eko bobo pimo bad tetu malo, bad tetu piny, boco gin dedede oudo rom aroma kamanono, mita tol are kede ot kany (250).



²⁰En epimo bad ongwon dedede. Kanono oudo tie kede apama koluke. Apama nono oudo oluko kabedo kame boro mere tie mita tol are kede ot kany (250) ki bad dedede. Apama nono oudo poko gikacil kikom gi kalikame cil.

Esekeri 43

Rwot Odwogo i Tempulo

- ¹Icuo nono oko tera i erute kame neno bad tetu kide.
- ²Ki kanono ako neno rieny me deyo ka Rwot di tie bino ki bad tetu kide. Mor mere oudo winyere bala mor me twon pii, di wi lobo lung oko rieny kede deyo mere.
- ³Gianyuta noni oudo cal bala gianyuta koudo aneno kakame Rubanga oudo obino dudubo kede bomba me Yerusalem, kede da gianyuta koudo aneno i ecilet me Kebar. Ango ako poto ariebacuny.
- ⁴Kakame deyo ka Rwot oudo tie donyo kede i tempulo ki erute me bad tetu kide,
- ⁵tipo ka Rwot oko tinga di eko tera i diakal me yie, di deyo ka Rwot oko pongo yi tempulo dedede.
- ⁶Di oudo icuo nono tie cungo i ngeta, ako winyo dwan kame yamo na ki tempulo be,
- ⁷” Wot ka dano, kanoni en kom na me pug, kakame acibo iye tiena. Ango abino bedo kanoni i diere me jo me Isirael pi kare dedede. Jo me Isirael, akadi abakai gi da, likame doko bino munao nyinga kacil i yore me woro rubangan ace amoto yiko liele me abakai gi kanoni.
- ⁸Abakai me Isirael ogero paco gi me abaka di ekeko me erute mere tie i dog ekeko me erute me tempulo na, omio apama kenekene en oudo poka kede gi. Gin kimunao nyinga kede tice areco kame gin kitimo, manono oko mina amuducaro gi pi gero kame oudo atie kede.
- ⁹Nan poore gin kijik woro caljwogi di kiko kwanyo tenge liele me abakai gi, di ango ako bino bedo i diere gi pi kare dedede.”
- ¹⁰Rwot oko meede be, “Wot ka dano, tatamo ne jo me Isirael cal me tempulo noni; poore kibed kede ngec i kom ekite me cal kame kogere iye. Mi lewic mak gi pi tice gi areco.
- ¹¹Kame lewic otieko mako gi pi gikame kitimo, tatamo negi cal me ekite kame kogero kede tempulo noni, cal mere lung, kadonyo kede kawok, kite kame koketo kede gi dedede atie iye, kede iswilia amake. Wandiko negi gi nogi dedede tetekeny kikaruno ngeno cal me ekite kame kogere kede, di kiko lubo iswilia mege.
- ¹²Man en iswil amako tempulo noni: kakoluke dedede i wi moru obedo kabedo kacil.”

Alutari

- ¹³Man en laco kede boro me alutari, di otio kede gipim kame kopimo kede tempulo. Piny me alutari oudo tie iye puleju rimaro, kame tut mere oudo tie sentimita ot kany,



kede laco mere da kamanono. Puleju nono oudo kotoko lake kede gikame boro mere malo tie sentimita ot are kiwie kany.

¹⁴Dul kopetere me dude piny oudo bor mere malo tie mita acel. Dul kopetere alubo mere me kore oudo komie edonyo i yie kede sentimita ot kany rimaro, di boro mere malo oudo tie mita are. Dul kopetere me wie malo oudo da komio odonyo i yie kede sentimita ot kany rimaro.

¹⁵Dul kopetere me malo noni, kakame oudo kowango iye giayala, boro mere malo oudo tie mita are. Isondana mege oudo tie kede iswongen kokiari malo kalamo cunye.

¹⁶Dul kopetere me malo noni oudo tie mita kanyape ki bad dedede.

¹⁷Dul kopetere me diere da oudo rorom ki bad dedede, buli bad mita kanyaare, di kotweo lake me ooko rimaro kede gikame boro mere malo tie sentimita ot are kiwie kany. (Puleju mere oudo laco mere tie sentimita ot kany.) Kakame kogero me yito i alutari nono oudo tie i bad tetu kide.

Mino Alutari but Rubanga

¹⁸Di Rwot Rubanga oko waco na be, “Wot ka dano, magi en iswilia amako alutari: kame kotieko gero alutari, pi mine buta kopooore wango giayala i wie di oko kikiro remo me giayala nono i kome.

¹⁹Josaseredoti me ekeko ka Lebi, kobedo ikwae ka Sadoki kenekene en kame bino tuno i nyima pi timo na tic, ango Rwot Rubanga en aciko manoni. Aso ipooore mino gi twon pi gin yalo bala giayala me kwanyo dub.

²⁰In ibino kwanyo remo mogo me le nono di iko keto i iswongen atie i isondana me wi alutari, kede i isondana me dul kopetere me diere, kede i gikame kotoko kede lake dedede rimaro. Iepone noni in ibino lonyo alutari di iko mine ebedo gi kopooore me mino giayala buta.

²¹Ibino kwanyo twon nono kobedo giayala me kwanyo dub di iko wango kome kabedo kame koiko i kakame tempulo cungo iye, do i ooko me kakacil koluke.

²²I ceng me are ibino kwanyo ekoro kalikame tie kede peko moro i kome di iko yale bala giayala me kwanyo dub; di oko lonyo alutari kede remo mere bala kame oudo kotimo kede remo me twon.

²³Ka itieko timo kamanono, ibino kwanyo atin twon kede atin emerekek, gin dedede di kili kede peko moro i kom gi,

²⁴di iko kelo gi i nyima. Josaseredoti bino kikiro munyo i kom gi di kiko wango gi bala giayala buta.

²⁵Buli ceng pi ceng kanyaare ibino yalo diel, twon kede emerekek bala giayala me kwanyo dub, gin dedede kipoore bedo abongo peko moro i kom gi.

²⁶Josaseredoti bino lonyo alutari pi ceng kanyaare nogo tetekenyo ango atwero game di eko bedo gikame koromo cako tic kede.



²⁷ Kame ceng nogo okato, josaseredoti bino do donyo yalo i wi alutari nono giayala kame jo kwanyo me kwanyo dub kede me nywak. Di do cunya ko bino bedo yom i kom wun dedede.”

Esekeri 44

Tic me Erute me bad tetu Kide

¹Di icuo nono oko dwoka i erute me ooko me bad tetu kide me tempulo. Oudo erute nono ocegere

²di Rwot oko waco na be, “Erute noni bino dong di ecegere, likame kobino yabe. Likame tie ngatamoro kame bino donyo kiye, piento ango Rwot Rubanga me Isirael atieko donyo kiye; pi manono en epoore dong di ecegere.

³Kenekene ngapug me Isirael, piento en ebedo ngapug, en kame karuno ot bedo kunono di eko camo cam kacil i nyima. En miero edonyi ki agola alac me kadonyo atie i bad me yie, di eko dok da di ebeo ki kanono.”

Iswilia amako Donyo i Tempulo

⁴Icuo nono oko tera i nyim tempulo di obo ki erute me bad tetu malo. Ango aneno yi tempulo ka Rwot di opong kede rieny me deyo mere, di ango ako poto ariebacuny.

⁵Rwot oko waco na be, “Wot ka dano, ngii kiber, doko da cik yiti i kom gi dedede kame ango abino waco ni amakere kede iswilia me tempulo na. Niangi kiber i kom jo kame poore donyo i tempulo kede jo kalikame poore donyo iye.

⁶” Wac ne jojemo me Isirael go be ango Rwot Rubanga atie waco kaman: wun jo me Isirael poore ijikunu tice kingorijij kame ibedunu timo.

⁷Wun ibedunu gamo i tempulo na jokumbor kalikame kokepo kede kalikame winya; igamunu gi i tempulo na i esawa kame kotie mina kede giayala me kakamio kede me remo. Pi manono wun itiekunu turo isikan na kede wu pi tice wu kingorijij kame ibedunu timo.

⁸Wun likame igwokunu cik amako giamia kacil i tempulo na, do ilunyunu keto tic nono i cing jokumbor.

⁹” Ango Rwot Rubanga atie waco kaman: likame tie ngakumbor moro kalikame kokepo kede kalikame winya, kame bino donyo i tempulo na. Manoni ribo kiton jokumbor kame bedo i diere me jo Isirael.”

Kogengo Jolebi bedo Josaseredoti

¹⁰Rwot oko waco na be, “Jolebi mogo oparao tenge kibuta di kiko donyo woro caljwogi karacel kede jo ace me Isirael. Ango atie mino gi alola pi manono.

¹¹Gin kibino bedo jotic me tempulo, jo kame daro irutei mege kede kame timo tic i yie. Gin kitwero neko leini kame jo okelo bala giayala, kede da timo tic me konyo jo atie i tempulo wora.



¹²Do pi kite kame gin kiko telo kede tic kakame jo me Isirael oudo tie kede woro caljwogi, di kiko mino jo me Isirael odonyo i dub, ango Rwot Rubanga akwongere be kibino udo alola.

¹³Likame gin kibino noka pi timo na tic bala josaseredoti, akadi noko giamia kacil kame komio buta, gin giamia kacil kalamo; do miero gin kiyei lewic kede alola pi tim kingorijij kame gin kitimo.

¹⁴Do ango atie mino tice me tempulo i cing gi, pi timo tice atek me ruom apiny dedede kame kopooore timo iye.”

Josaseredoti

¹⁵Rwot Rubanga oko waco be, “Josaseredoti Jolebi kobedo ikwae ka Sadoki oudo oko timo tic i tempulo na kede genere kakame jo me Isirael oparao kede kibuta. Pi manono nan gin en kame kibino noka pi timo na tic; gin kibino donyo yalo na kakamio kede remo me giayala.

¹⁶Gin en kame kibino donyo i tempulo na, di kiko yalo giayala i alutari na, kede telo tic me wora i tempulo.

¹⁷Ka gin kitie donyo ki erute adonyo i diakal me yie me tempulo, gin kipoore ngapo igoen atar liamaliyam. Likame gin kipoore ngapo gimoro kame kotimo kede yer ka kitie tic i diakal me yie amoto i yi tempulo.

¹⁸Igoen kame kidodolo i wi gi kede ipalen gi me yie da poore bedo igoen atar liamaliyam; doko da likame kibino tweno pier gi pi gengo kwok mako gi i esawa me tic.

¹⁹Kame gin kitie ot i diakal aoko but jo, gin kibino gonyo igoen kame oudo kitie tic kede i yi tempulo di kiko weko gi i agolai kacil. Di do gin kiko ngapo igoen apat, tetekeny kur ngatamoro mak egoe kacil di eko udo peko.

²⁰Likame gin kibino lielo wi gi, doko da likame kibino yei ne yer wi gi bedo bocoboco kalamo; gin kibino bedo nyaro yer wi gi jik i rom amitere.

²¹Likame tie ngasaseredoti moro kame poore mato bwini kame etie donyo i diakal me yie me tempulo.

²²Likame gin kibino nyomere kede mon kobedo apuserun, arabo mon kopokere kede cwog gi; kenekene gin kibino nyomere kede anyira me ateker me Isirael kalikame pwodi ongego cuo, arabo kede apuserun koudo obedo mon me josaseredoti.

²³Gin kibino pwonyo jo na apokapoka atie i diere me gikacil kede jamini apat, di kiko nyuto negi epone me poko gikame opwokere kede kalikame opwokere.

²⁴Kame jo tie kede atwomutwomun, gin kibino bedo bala jongolkop, di kiko ngolo kop di lubere kede iswilia na. Gin kibino donyo lubo iswilia na dedede amako ceng adongo kame kotieko moko me edini, doko da kibino gwoko ceng Sabato bedo cil.



²⁵ Likame ngatamoro kibut gi bino munao kome i yore me ot i nget dano oto, kwanyo di dano nono obedo nganywal mere, atin mere, amoto omi mere arabo ami mere kalikame konyomo.

²⁶ Kame en epwokere i yore nono di do ingei manono en eko doko dano kolony, en epoore daro pi ceng kanyaare

²⁷ di eko ot i diakal me yie me tempulo pi mino giayala mere me kwanyo dub; ango Rwot en awaco.

²⁸ “Ango en atie bala iner me josaseredoti; likame gin kibino udo iner me lobo moro i Isirael; ango en girgi amako gi.

²⁹ Gin kibino camo giamia me alos, giayala me kwanyo dub, kede giayala me timo cul; doko da gin kibino tero gi dedede kame kopoko tenge pirango i Isirael.

³⁰ Josaseredoti bino tero kakaber kalamo me kodere dedede acako cek, kede me giamia buta me egere dedede. Kame jo otedo mugati, kipoore mino josaseredoti mugati acako cek, di ango ako bino mino winyo i miere gi.

³¹ Josaseredoti likame bino camo winyo moro arabo le moro oto kene, arabo kame le moro en oneko.”

Esekeri 45

Lobo kame Kopoko ne Rwot

¹ Kame kotie popoko lobo me Isirael ne jo me ikekon apapat, kopoore poko dul moro oko mino Rwot pi bedo adul kacil. Boro mere bino bedo kilomita tomon kiwie are kede dul, kede laco mere kilomita tomon. Dul nono dedede bino bedo lobo kacil.

² I dul noni poore bedo iye dul moro atitidi kame laco kede boro mere tie mita tol are kede ot kany; kanono en kame kobino gero iye tempulo. Kakatwolo kame laco mere tie mita ot are kiwie kany poore luke diere.

³ Dul noni, lobo kame boro mere tie kilomita tomon kiwie are kede dul, kede laco mere kilomita kany, kopoore pimo di oko poko, en kanono en kame kobino gero iye tempulo, kabedo kacil kalamo.

⁴ En ebino bedo dul kacil me lobo nono. Ebino bedo pi josaseredoti kame timo ne Rwot tic i tempulo mere. Kobino gero iye ude gi kede tempulo da.

⁵ Dul ace kodong me lobo nono bino bedo pi Jolebi kame timo tic i tempulo; kanono kobino gero iye bomban kame gin kibedo iye.

⁶ I nget adul kacil nono kopoore poko iye lobo moro kame boro mere tie kilomita tomon kiwie are kede dul, kede laco mere kilomita are kede dul, kanono en kame kobino gero iye bomba kame ngatamoroni kenekene me Isirael twero bedo iye.

Lobo me Ngapug



⁷Kopoore poko lobo moro ne ngapug da. Ki ikor me bad tetu tim me adul kacil ebino ot paka tuno i bad tetu tim ape tuno i nam adwong me Mediterania; kede ki ikor me bad tetu kide me adul kacil epoore ot paka tuno i ikor me bad tetu kide me lobo me Isirael, tetekeny boro mere bed rom aroma kede adulion kame kopopoko ne jo me ikekon apapat me Isirael.

⁸Adul me lobo noni bino bedo iner kame ngapug bino bedo kede i lobo me Isirael, tetekeny likame doko ebino bedo kede adiadia but jo, do ebino weko jo me ekeko acelacel me Isirael tero lobo gi kame kopoko negi.

Iswilia amako Jopug

⁹Rwot Rubanga owaco be, “Eromo do, wun jopug me Isirael! Jikunu tim me gero kede me tero jo kirac, di ikounu donyo timo gi kopoore kede atie kakare. Jikunu riamo jo tenge ki lobere gi, ango Rwot Rubanga en awaco.

¹⁰ “Jo dedede poore tic kede gipim atie kakare; epa kede bat atie kakare.

¹¹” Epa bino bedo gipim me gi otuo, kede bat bino bedo gipim me gi aliu. Gin kibino bedo rorom kame koporo gi kede gipim kame kolwongo be komer. Komer acel bino bedo rom kede epa tomon, doko da ebino bedo rom kede bat da tomon.

¹²Kide wu me pimo jamini bino bedo kaman: sekel acel bino bedo rom kede gera ot are; sekel ot kanyape rom kede mina acel.

¹³⁻¹⁵” Ibinunu mino giamia wu kaman: Engano: acel i kom ot kanyape me kac Mawele: acel i kom ot kanyape me kac Mo me olibeti: acel me tomon me bat acel ki buli kor acelacel. (Kor acel, bala komer, rom kede bat tomon.) Romini: oromo acel i kom romini tol are me anak me romini me Isirael. Magonogi bino bedo giayala me alos, giayala awanga, kede giayala me nywak, tetekeny asasiro dub wu, ango Rwot Rubanga en awaco.

¹⁶” Jo dedede me Isirael poore ter giamia nogi but ngapug me Isirael.

¹⁷Manono bino bedo tic meren pi neno be ekwanyo leini me awanga, giayala me alos, kede giayala amata pi ateker dedede me Isirael i kare me Ebagame Por Duwe, i ceng Sabato, kede i ceng me ibagai ace. En epoore kwanyo giayala me kwanyo dub, giayala me alos, giayala kame kowango alutu, kede giayala me nywak, pi kwanyo dub me jo me Isirael.”

Ceng Adongo me Ibagai

(Yai 12.1-20; Jolebi 23.33-43)

¹⁸Rwot Rubanga owaco be, “I ceng me agege me duwe me agege ibino tero twon etobait kalikame tie kede peko moro i kome di iko tic kede me lonyo tempulo.

¹⁹Ngasaseredoti bino kwanyo remo mogo me giayala noni me kwanyo dub di eko puco i kor ipirin me ekeko me tempulo, kede i wi iswongen ongwon me alutari, kede i kor ipirin me ikekon me irutei adonyo i diakal me yie.



²⁰Ibino da timo kamanoni i ceng me kanyaare me duwe pi jo kame timo dub, amoto pi kwina piny, do likame akaa. Epone noni en kame in ibino mino kede tempulo doko kede kabedo kacil.

²¹ “I duwe me agege i ceng me tomon kiwie ongwon me duwe, ibinunu tedo Ebaga me Kalamo. Jo dedede bino camo mugati kame kotimo abongo arup pi ceng kanyaare.

²²I ceng me agege me ebaga ngat kame tie i pug bino kwanyo twon kame koyalo pi kwanyo dub mege kede me jo dedede.

²³Buli ceng pi ceng kanyaare me ebaga en ebino kwanyo pi bedo giayala buta, itobai kanyaare kede imerekekin da kanyaare kame li kede peko moro i kom gi. Ebino da kwanyo ekoro buli ceng acelacel pi bedo giayala me kwanyo dub.

²⁴Ebino da kwanyo alos kilo kanyangon kede lita adek me mo me olibeti pi yalo karacel kede buli twon acelacel kede emerekek acelacel.

²⁵ “I Ebaga me Kimere kame cakere i ceng me tomon kiwie kany me duwe me kanyaare, ngat atie i pug bino kwanyo epone me leini nogo, di wel gi da rom kanono, pi bedo giayala me kwanyo dub, kede giayala kame kowango alutu; doko da ebino kwanyo giayala me alos kede me mo me olibeti iepone acel nono.”

Esekeri 46

Ngapug kede lbagai

¹Rwot Rubanga waco be, “Erute me bad tetu kide adonyo i diakal me yie bino dong di ocegere pi ceng kanyape kame jo timo iye tice, do kobino donyo yabe i ceng Sabato kede i ceng me Ebaga me Por Duwe.

²Ngat atie i pug bino wok ki diakal aoko di eko donyo i agola me kabeo atie i erute me yie, di eko cungo i nget ipirin me erute, di ngasaseredoti tie mino giayala awanga kede giayala me nywak. Ngapug nono bino dong luro wie i erute kanono pi wora di eko bobo dok ooko, do likame kobino cego erute nono paka tuno otieno.

³I ceng Sabato acelacel kede i ceng me Ebaga me Por Duwe, jo dedede poore luro wi gi piny i nyim erute nono pi wora.

⁴” I ceng Sabato ngapug bino kelo idwe romini kanyape kalikame tie kede peko moro i kom gi, kede emerekek acel kalikame tie kede peko moro i kome, pi yalo gi buta bala giayala awanga.

⁵Giayala me alos kame upere kede emerekek bino bedo kilo kanyangon, do atin romo acelacel bino upere kede alos kame cunye owinyo kwanyo. Epoore da mino mo me olibeti lita adek kame bino upere kede buli kilo kanyangon me alos.

⁶I ceng me Ebaga me Por Duwe en ebino kwanyo giayala me etobait, idwe romini kanyape, kede emerekek acel, gin dedede di likame kitie kede peko moro i kom gi.



⁷Buli twon acelacel kede emerekek en ebino yalo gi kede kilo kanyangon me alos; do atin romo acelacel bino upere kede alos kame cunye owinyo kwanyo. Epoore da mino mo me olibeti lita adek kame bino upere kede buli kilo kanyangon me alos.

⁸Kame ngapug tie donyo, en ebino donyo ki agola me kabeo me erute, doko ka etie wok da ebino dok elubo kanono.

⁹” Kame jo obino pi wora i ceng adwong moro me ebaga, jo kame bino donyo ki erute me bad tetu malo poore wok ooko ki erute me bad tetu piny; doko da jo kame bino donyo ki erute me bad tetu piny poore wok ooko ki erute me bad tetu malo. Likame dano moro poore wok ooko di ebeo ki erute kame edonyo kede i yie, do epoore pororo ki erute kame pimere kede manono.

¹⁰Ngapug bino donyo karacel kede jo kame jo tie donyo, doko da ebino wok karacel kede jo kame jo tie wok.

¹¹I ceng adongo dedede kede i ceng me ibagai kobino yalo buli twon arabo emerekek kede kilo kanyangon me alos. Do atin romo acelacel bino upere kede alos kame cuny dano acelacel owinyo kwanyo. Epoore da mino mo me olibeti lita adek kame bino upere kede buli kilo kanyangon me alos.”

¹²” Kame ngat atie i pug mito mino giayala buta i mit mere kene, cengemogo giayala awanga amoto giayala me nywak, kobino yabo ne erute me bad tetu kide adonyo i diakal me yie. En eko bino mino giayala mere bala kame etimo kede i ceng Sabato, di oko bino bobo cego ekeko me erute ka en etieko wok ooko.”

Giayala me Ceng Dedede

¹³Rwot waco be, “Ceng acelacel ipoore kwanyo atin romo me mwaka acel kame kobino mina bala giayala awanga; likame epoore bedo tie kede peko moro i kome. Kopoore timo giayala noni ceng dedede.

¹⁴Doko da odiko acelacel kopoore mino giayala me kilo are me alos, karacel kede lita acel me mo me olibeti me nyonge. Iswil amako giayala noni buta bino cungo pi kare dedede.

¹⁵Atin romo, giamia me alos, kede mo me olibeti kobino bedo kwanyo buli odiko acelacel pi bedo giayala awanga buta kalikame keng.”

Ngapug kede Lobo

¹⁶Rwot Rubanga waco be, “Ka ngat atie i pug omio lobo mere moro but wode moro bala mic, lobo nono bino doko me ka wode nono kede ikwae mege atwal.

¹⁷ Do ka ngat atie i pug omio lobo mere moro but ngatic mere moro, lobo nono bino doko me ka ngatic nono tuno i mwaka me dwoko jamini but wegii, di oko bino dwoke but ngapug. Lobo nono obedo mere, awobe mege kenekene en kame karuno tere me atwal.

¹⁸Ngat atie i pug likame poore riamo jo ki lobere gi di en eko tero gi; en ebino mino awobe mege lobo ki meren amake, tetekeny kur emai jo lobere gi.”



Pimbiron me Tempulo

¹⁹Di icuo nono oko tera oboe ki kadonyo moro koudo tie i nget erute di oko tuno i agolai kame nyim gi neno bad tetu malo, magonogo obedo agolai kacil me josaseredoti. En eko nyuto na karamoro koudo tie i bad tetu tim me agolai nogo

²⁰di eko waco na be, “Mano en kakame josaseredoti bino donyo tedo kiye ringo me giayala me kwanyo dub, arabo me giayala me timo cul, amoto giayala me alos. Etie kamanono tetekeny kur ter gimoro kobedo gikacil i diakal aoko di cengemogo jo ko udo peko pi mule.”

²¹⁻²²Di eko dwoka i diakal aoko, di eko tela oboe i isondana ongwon me diakal nono; di ako neno i buli esonda acelacel diakal moro atitidi kame boro mere tie mita ot are, kede laco mere mita tomon kiwie kany.

²³Buli acelacel oudo koluko kede apama me kide, di apama nono tie kede kenere me moko mac i dude piny rimaro.

²⁴En eko waco na be, “Mago en pimbiron kakame jotie me tempulo tedo kiye giayala me jo.”

Esekeri 47

Esamai Amol wok ki Tempulo

¹Icuo nono oko tera odok i ekeko adonyo i tempulo. Pii oudo tie mol ki piny i dud ekeko me tempulo edok i bad tetu kide, bad nono en kame nyim tempulo oudo neno. Pii nono oudo mol wok ki piny i bad tetu piny me tempulo di eko beo ki bad tetu piny me alutari.

²En eko tera ooko me diakal me yie koluko tempulo di oboe ki erute me bad tetu malo, di oko ot owire paka tuno i erute me ooko aneno bad tetu kide. Pii oudo tie mol wok ooko ki bad tetu piny me erute nono.

³En eko dok i bad tetu kide kakame pii nono mol dok iye di emako tol me pim i cinge, di eko pimo kakame boro mere tie mita tol kany (500) dok piny kunono. En eko tera opumo pii ot kunono; pii nono oudo jik i atitinyo.

⁴En bobo eko pimo kakame boro mere tie mita tol kany (500), di eko tera opumo pii ot kunono; pii nono oudo jik i conga. En bobo eko pimo kakame boro mere tie mita tol kany (500), di eko tera opumo pii ot kunono; pii nono oudo oko tuno i piera.

⁵En bobo eko medo pimo kakame boro mere tie mita tol kany (500), do kanono pii mere oko bedo tut likame oudo atwero ngole; likame oudo etwero ngolere kwanyo di dano osanyo asanya.

⁶En eko penya be, “Wot ka dano, mam ineno manoni?” En eko dwoka oboe ki ooko oririo dog ecilet nono.

⁷Kakame oudo atie dwogo kede, ako neno yen adongodongo atot di tie i dog ecilet tuni tuni.



⁸En eko waco na be, “Pii noni mol dok i adul atie i bad tetu kide di eko donyo i Aditot me Yorodan di eko kato paka i Nam Oto. Kame edonyo i Nam Oto, en eloko pii amunyumunyo me nam nono doko pii aber.

⁹Kabedo dedede kame pii noni mol iye, ikodeta me gi akuo atot bedo tie kanono, doko da aporogon atot bedo tie iye pien pii noni ka otuno kunono eloko pii amunyumunyo doko ber. Aso kabedo dedede kame pii noni mol iye gi dedede akuo bedo tie iye.

¹⁰Jocik bino teere cungo i dog ecilet noni pi cik; cako ki Engedi tuno Enegilaim bino bedo tie iye karieno bwoini me cik. Bino bedo tie iye aporogon atot me egere apapat bala kame tie i nam adwong me Mediterania.

¹¹Do isamai me Nam Oto atie i lake i lake likame pii gi bino doko ber; gin kibino dong me munyo.

¹²I bad tetuni kede tetuca me ecilet noni bino dongo iye yen me egere dedede anyako anyakini kame kocamo. Pote gin likame bino tuo, doko da likame gin kibino jiko nyako anyakini. Gin kibino nyak buli duwe, pien pii kame bido aliasin gin mol wok ki tempulo. Yen nogo kobino camo anyakini gi, do pote gi kobino tic kede gi me cango jo.”

Ikor me Lobo

¹³Rwot Rubanga owaco be, “Magi en ikor kame ibinunu popoko kede lobo ne jo me ikekon tomon kiwie are me Isirael. Jo me ekeko ka Yosepu bino tero adulion are.

¹⁴Ango bin akwongere but joakwari wu be abino mino gi lobo noni; aso nan pokenu di erorom.

¹⁵” Man en ikor me lobo noni: ikor mere i bad tetu malo cakere ki nam adwong me Mediterania di eko dok i bad tetu kide, beo i bomba me Ketelon, tuno Lebo Kamat, tuno i bomba me Sedad,

¹⁶tuno i bomban me Berota kede Sibiraim (gin kitie i dierediere me ikor me ajakanut me Damasiko kede ikor me ajakanut me Kamat), di eko tuno i bomba me Kasar Katikon (kame tie i ikor me adul me Kauran).

¹⁷Aso ikor me bad tetu malo yai ki nam adwong me Mediterania di eko dok i bad tetu kide tuno i bomba me Enon, di ikor me Damasiko kede Kamat tie i bad tetu malo mere.

¹⁸” Ikor mere me bad tetu kide yai ki dierediere me Kauran kede Damasiko di eko dok i bad tetu piny, di eko ririo ecilet me Yorodan, kobedo ikor me lobo me Isirael i bad tetu tim kede Gilead i bad tetu kide; ikor nono ko ot ape ape tuno Tamar i Nam Oto.

¹⁹” Ikor me bad tetu piny yai ki Tamar tuno i pii me Kades Meriba; ki kanono eko dero aditot kobedo ikor me Misiri tuno i nam adwong me Mediterania.

²⁰” I bad tetu tim nam adwong me Mediterania en kame bino bedo ikor di eko ot ape ape tuno kakame neeno kede Lebo Kamat.



²¹” Aso, popokunu lobo noni di lubere kede ikekon me ateker me Isirael.

²²Ibinunu popoko en pi bedo meru me atwal. Jokumbor abedo i diere wu, kede jokumbor konywalo idwe kanoni da poore gida udo iner gi ka itienu popoko lobo. Ipoorenu tero gi bala jo kobedo anywali me Isirael di oko poko ne gida lobo karacel kede jo me ikekon me Isirael.

²³Jokumbor abedo i diere wu ibinunu poko negi lobo karacel kede jo me ikekon kame gin kibedo i diere gi. Ango Rwot Rubanga en awaco.”

Esekeri 48

Popoko Lobo ne Jo me Ikekon apapat

Rwot owaco be:

¹Magi en nying ikekon me ateker me Isirael: Cako ki ikor me bad tetu malo, jo me ekeko ka Dan bino tero adul acel; en ebino lubo yongayo adwong me Ketelon tuno Lebo Kamat, di eko tuno i bomba me Kasar Enon, tuno i ikor apoko Damasiko kede Kamat. Adul nono dedede yai ki ikor me bad tetu kide dok i bad tetu tim tuno i nam adwong me Mediterania bino bedo me jo me ekeko ka Dan.

²Jo me ekeko ka Aser bino tero adul acel; en ebino gongere kede lobo me jo me ekeko ka Dan cako ki bad tetu kide tuno i bad tetu tim.

³Jo me ekeko ka Naputali bino tero adul acel; en ebino gongere kede lobo me jo me ekeko ka Aser cako ki bad tetu kide tuno i bad tetu tim.

⁴Jo me ekeko ka Manase bino tero adul acel; en ebino gongere kede lobo me jo me ekeko ka Naputali cako ki bad tetu kide tuno i bad tetu tim.

⁵Jo me ekeko ka Epuraimu bino tero adul acel; en ebino gongere kede lobo me jo me ekeko ka Manase cako ki bad tetu kide tuno i bad tetu tim.

⁶Jo me ekeko ka Ruben bino tero adul acel; en ebino gongere kede lobo me jo me ekeko ka Epuraimu cako ki bad tetu kide tuno i bad tetu tim.

⁷Jo me ekeko ka Yuda bino tero adul acel; en ebino gongere kede lobo me jo me ekeko ka Ruben cako ki bad tetu kide tuno i bad tetu tim.

Adul Apire Tek Atie i Diere me Lobo

Rwot owaco be:

⁸Adul agongere kede lobo me jo me ekeko ka Yuda, cako ki bad tetu kide tuno i bad tetu tim, bino bedo lobo kame wun ibinunu poko di ikounu weko. Laco mere yai ki bad tetu malo tuno i bad tetu piny bino bedo kilomita tomon kiwie are kede dul, boro mere da yai ki bad tetu kide tuno i bad tetu tim bino bedo kamanono, di erom aroma kede dul kame komio jo me ekeko acelacel. Kanoni en kame kobino gero iye tempulo.

⁹I adul noni, ibinunu mina lobo kame boro mere tie kilomita tomon kiwie are kede dul, di laco mere tie kilomita tomon.



¹⁰Josaseredoti bino udo dul me lobo i kabedo kacil noni. Cako ki bad tetu kide tuno i bad tetu tim lobo gin boro mere bino bedo kilomita tomon kiwie are kede dul, di laco mere yai ki bad tetu malo tuno i bad tetu piny ko bedo kilomita kany. Tempulo nango bino cungo i cuny lobo noni.

¹¹Kanoni bino bedo pi josaseredoti kobedo ikwae ka Sadoki. Gin bin kidong jo agenere buta kakame Jolebi kede jo ace me Isirael oparao kede tenge kibuta.

¹²Aso, gin kibino tero dul apire tek noni, en agongere kede adul ka Jolebi; en ebino bedo dul kacil kalamo.

¹³Jolebi da bino tero dul moro me lobo apire tek nono. Dul kame gin kibino tero bino bedo i bad tetu piny me dul kame josaseredoti otero. Eda ebino bedo kilomita tomon kiwie are kede dul yai ki bad tetu kide tuno i bad tetu tim, di laco mere ko bedo kilomita kany yai ki bad tetu malo tuno i bad tetu piny.

¹⁴Likame gin kibino cato karamoro kiye arabo seso, arabo mino ngatamoro lobo aber nono, piento en kabedo kacil kobedo mera.

¹⁵Kabedo kodong me adul apire tek nono, kame boro mere tie kilomita tomon kiwie are kede dul, di laco mere tie kilomita are kede dul, likame obedo kabedo kacil. En etie pi jo me Isirael timo iye gikame gin kimito. Gin kitwero donyo bedo kagamogo di kagamogo ko dong nono. Bomba bino bedo tie i cuny dul nono.

¹⁶Bomba nono bino bedo rorom ki bad dedede, bad acelacel kilomita are kede mita tol are kede ot kany (250).

¹⁷Kakatwolo alaco mere tie mita tol acel kede ot are kiwie kany (125) bino luko bomba nono ki bad dedede.

¹⁸Ingei gero bomba, kakame bino dong iriria i bad tetu piny me dul kacil bino bedo kapur me jo abedo i bomba; boro mere bino bedo kilomita kany di laco mere tie kilomita are dok i bad tetu kide, doko da ebino bedo rom kamanono dok i bad tetu tim.

¹⁹Jo dedede kame bedo i bomba, abongo popoko ikekon me anywali gi, bino puro lobo nono.

²⁰Aso, dul me lobo kame kobino poko di oko weko bino bedo kilomita tomon kiwie are kede dul ki bad dedede, di eribo kiton lobo me bomba da.

²¹⁻²²Kakame bino dong i bad tetu kide kede i bad tetu tim me dul kacil kame tempulo tie iye, lobo me josaseredoti, lobo me Jolebi, kede lobo me bomba, bino bedo me ka ngapug. I bad tetu kide en ebino ot paka tuno i ikor me bad tetu kide, kede i bad tetu tim en ebino ot paka tuno i nam adwong me Mediterania. I bad tetu malo en egongere kede adul ka jo me ekeko ka Yuda, kede i bad tetu piny en egongere kede adul ka jo me ekeko ka Benjamin.

Lobo pi Jo me Ikekon Kodong



²³Pi jo me ikekon apat kodong: jo me ekeko ka Benjamin bino tero adul acel; en ebino cakere ki bad tetu kide tuno i bad tetu tim.

²⁴Jo me ekeko ka Simeon bino tero adul acel; en ebino gongere kede lobo me jo me ekeko ka Benjamin cako ki bad tetu kide tuno i bad tetu tim.

²⁵Jo me ekeko ka Isakar bino tero adul acel; en ebino gongere kede lobo me jo me ekeko ka Simeon cako ki bad tetu kide tuno i bad tetu tim.

²⁶Jo me ekeko ka Sebulun bino tero adul acel; en ebino gongere kede lobo me jo me ekeko ka Isakar cako ki bad tetu kide tuno i bad tetu tim.

²⁷Jo me ekeko ka Gad bino tero adul acel; en ebino gongere kede lobo me jo me ekeko ka Sebulun cako ki bad tetu kide tuno i bad tetu tim.

²⁸I bad tetu piny me adul me jo me ekeko ka Gad, ikor yai ki Tamar tuno i pii me Kades Meriba; ki kanono eko dero aditot kobedo ikor me Misiri tuno i nam adwong me Mediterania.

²⁹Manoni en epone kame ibinunu popoko kede lobo i adulion ne jo me ikekon dedede me Isirael, ango Rwot en awaco.

Irutei me Yerusalem

Rwot owaco be:

³⁰⁻³⁴ Bomba me Yerusalem bino bedo tie kede irutei tomon kiwie are. Acelacel kikom apamai ongwon koluke boro mere bino bedo kilomita are kede mita tol are kede ot kany (250), di buli acelacel tie kede irutei adek. Irutei nogo dedede kobino cako negi nying ikekon tomon kiwie are me anywali me ateker me Isirael. Irutei me bad tetu malo kobino cako negi nying Ruben, Yuda, kede Lebi; irutei atie i apama me bad tetu kide kobino cako negi nying Yosepu, Benjamin kede Dan; irutei atie i apama me bad tetu piny kobino cako negi nying Simeon, Isakar kede Sebulun; irutei atie i bad tetu tim kobino cako negi nying Gad, Aser kede Naputali.

³⁵Boro me apamai ongwon koluko bomba nono ka koriribo bino bedo kilomita kanyangon. Nying anyen kame kobino mino bomba nono en, “Rwot Tie Kan!”



Danieri

Danieri 1

Itatam amako Danieri kede Jowote

1.1—6.28

Awobe kame Kotero i Tuale ka Nebukadunesa

- ¹ I mwaka me adek me apugan ka Abaka Yekoyakim me Yuda, Abaka Nebukadunesa me Babilon oko ot suro Yerusalem di eko luke.
- ² Rwot oko mino Abaka Yekoyakim me Yuda opoto i cinge, ribo kiton jamini mogo me tempulo. En eko tero gin dedede Babilon, di eko keto jamini nogo i agola me kano jamini me tempulo ka rubangan mege.
- ³ Abaka oko mino Asepenas en ngatic kame lo ture, pi yero kikom jo me Isirael awobe mogo me paco ka abaka me Yuda kede ace me miere adongodongo.
- ⁴ Oudo kipoore bedo awobe ali kede angwal moro i kom gi, di kicil, di kiriek, di kitie kede ngec atut, kede di kitwero tic i paco me abaka. Asepenas oudo poore pwoyo gi somo kede wandiko leb me Babilonia.
- ⁵ Abaka oko mino cik be cam gi kede bwini gi poore bedo acel kede me paco mere me abaka. Oudo kopoore pwoyo gi pi mwakini adek, tetekeny ingei kare nono gin kiko doko jotie me abaka.
- ⁶ Jo kame oko yero bin ribo Danieri, Kanania, Misael, kede Asaria, gin dedede bin kibedo jo me ekeko ka Yuda.
- ⁷ Jotie adongo bin oko mino gi nying kanyen kaman: Danieri kocako ne be Beletesasar, Kanania kocako ne be Sadurak, Misael oko cako ne be Mesak, kede Asaria oko cako ne be Abedenego.
- ⁸ Danieri bin oko moko tam mere pi dagi munaun kede cam kede bwini me paco ka abaka, aso en eko kwano Asepenas pi konye kede kop nono,
- ⁹ di Rubanga oko mino Asepenas obedo kede cuny aber but Danieri.
- ¹⁰ Do Asepenas oudo da tie lwooro abaka, aso en eko waco ne Danieri be, “Ango atie lwooro adwong na abaka, piento en etieko yero ne wu gikame ipoorenu camo kede kame ipoorenu mato. Ka en eko neno komi likame yot bala jowoti ace, cengemogo ebino neka.”
- ¹¹ Aso Danieri oko ot but ngadar kame Asepenas oudo omio tic me dare karacel kede jowote adek ace, di eko waco ne be,
- ¹² ” Akwai itam wa pi ceng tomon. Mi wa ocam dek apura kede pii kenekene.
- ¹³ Di do in iko bino pooro cal wa kede cal me awobe apat kame camo cam kame abaka camo, di in iko bino moko gikame ibino timo di lubere kede cal wa.”



- ¹⁴En eko yei pi tamo gi pi ceng tomon.
- ¹⁵Ingei ceng tomon oko udo be Danieri kede jowote oudo kom gi yot di kicwe kalamo awobe apat koudo camo cam kame abaka camo.
- ¹⁶Aso ngadar gi oko do jiko mino gi cam kame abaka camo kede bwini kame emato, di do eko donyo mino gi camo dek apura kenekene.
- ¹⁷Rubanga oko mino awobe ongwon nogo ngec kede niang i kom epone dedede me wandiko leb, kede kope me rieko. Medo i wi manono, Danieri oudo twero gonyo dwong me lek kede gianyuta.
- ¹⁸I atiekini me mwakini adek kame abaka oudo ongolo, Asepenas oko tero awobe dedede but Nebukadunesa.
- ¹⁹Abaka oko yamo kede gin dedede, di likame abaka oko udo ngatamoro kikom gi kame kotwero pooro kede Danieri, Kanania, Misael, kede Asaria. Aso bin oko tero gin tic i tuale me abaka.
- ²⁰I kom kope dedede amako rieko kede niang kame abaka openyo gi iye, abaka oko udo gi kibeco tien tomon kalamo wegi tangu kede jotiet atie i ajakanut mere lung.
- ²¹Danieri oko dong tic kunono tuno i mwaka me agege me apugan ka Abaka Sairas.

Danieri 2

Lek ka Nebukadunesa

- ¹I mwaka me are me apugan ka Nebukadunesa bala abaka, en eko leko lek akelo lworo i cunye, omio likame eko donyo nino.
- ² Aso en eko mino cik me lwongo jotim tangu, jotiet, jojwogi, kede jo Kaludea, pi gin bino gonyo ne dwong me lek mege. Kakame gin kibino kede di kiko cungo i nyim abaka,
- ³en eko waco negi be, “Ango aleko, do cunya tie rama pi mito ngeno dwong mere.”
- ⁴Jo Kaludea oko waco ne abaka (kede leb Aramaik) be, “Okwe abaka bed kuo nakanaka! Wac ne wa lek ni di wan oko gonyo ni dwong mere.”
- ⁵Abaka oko waco ne jo Kaludea be, “Ango nan atieko moko be, ka likame iwaconanu lek na kede dwong mere, kobino nyinyilo wu i adulion, di oko bino rereto ude wu.
- ⁶Do ka iwacunu na lek nono kede dwong mere, ibinunu udo cul me giamia kibuta, kede wor adwong. Aso, nan wacanu lek nono kede dwong mere.”
- ⁷Gin kiko waco ne abaka be, “Adwong, in wac ne wa lek ni di wan oko gonyo ni dwong mere.”
- ⁸Abaka oko dwoko be, “Ango angeo kiber be wun itienu kede rieko me mino esawa ot, pien itiekunu neno be ango atieko moko tam na



⁹pi mino wun dedede alola acel nono, ka likame iwacunu na lek nono. Wun itiekunu winyere pi waco nango kop me angalo, pien wun igenunu be ingei kare moro ango abino loko tam na. Pi manono wacunu nango lek nono di ango ako bino ngeno be wun itwerunu gonyo na dwong mere.”

¹⁰Jo Kaludea nogo oko dwoko ne abaka be, “Likame tie ngatamoro i wi lobo kan kame twero waco nin gikame itie mito. Ateteni, pwodi likame tie abaka moro akadi di edwong amoto di etek benyo, kotieko penyo kop kacal kamano kibun jotim tangu, amoto kibun jotiet, arabo kibun jo Kaludea.

¹¹Gikame in adwong itie penyo tek adikinicele, doko da likame tie ngatamoro kame twero tucuni, kwanyo kenekene rubangan; aso gin likame kibedo kede wan jo.”

¹²Manono oko mino abaka odoko ger di eko golo cik be poore nek jorieko dedede kame mie tam i Babilon.

¹³Oko woto cik nono, di do oko cako mono Danieri kede jowote pi neko gi.

Rubanga Onyuto ne Danieri Dwong me Lek nono

¹⁴Di Danieri oko ot but Ariok, ngadwong me jonek kame abaka oudo ogolo ne cik me neko jorieko me Babilon. En eko yamo kede rieko bute,

¹⁵eko penyo Ariok pinyo komio abaka ogolo cik agwai kamano. Ariok oko tatamo ne Danieri tien kop nono.

¹⁶Cucuto Danieri oko ot kwano abaka pi kong mine kare moro di en eko bino gonyo ne abaka dwong me lek mere nono.

¹⁷Danieri oko ot paco di eko waco ne jowote, Kanania, Misael, kede Asaria gikame otimere,

¹⁸di eko waco negi pi kwano kisa kibun Rubanga me malo tetekenye enyut negi dwong me gikomungere nono, me wek gin karacel kede jorieko ace me Babilon kur konek gi.

¹⁹Iwor me ceng nono Rubanga oko mino Danieri gianyuta me gikame omungere nono, di Danieri oko pako Rubanga me malo be,

²⁰” Rubanga riek, doko etie kede twer! Pak bed i nyinge nakanaka.

²¹En etie kede loc i kom gikame timere kede i kom kare; en eketo, doko en ekwanyo abakai; en kame emio rieko kede niang.

²²En enyuto gikame tut di omungere, en engeo gikame tie kakacol, piento en ebedo lero.

²³Ango apwoi di apaki, in Rubanga ka joakwari na. Pien in imia rieko kede twer, di nan iko nyuto na gikame wan oudo okwai; inyuto ne wa gikame abaka ogolo cik pire.”

Danieri Owaco ne Abaka Lek mere kede Dwong mere



- 24**Aso Danieri oko ot but Ariok, ngat kame abaka oudo otieko mino cik pi neko jorieko me Babilon, di eko waco ne be, “Kur inek gi. Terango but abaka di anggo ako bino gonyo ne dwong me lek mere.”
- 25**Ariok oko susunyo tero Danieri i nyim abaka di eko waco ne be, “Ango atieko udo kikom Iyudayan kame komako di oko kelo kan, dano kame twero gonyo nin dwong me lek nin.”
- 26**Abaka oko penyo Danieri (bin kolwonge da be Beletesasar) be, “Itwero waco nango lek kame anggo aleko kede dwong mere?”
- 27**Danieri oko dwoko be, “Adwong, likame tie ngarieko moro, amoto ngatiet, amoto ngatim tangu, amoto emuron moro kame twero waco nin gikame itie penyo.
- 28**Do tie Rubanga atie malo, kame tucio gikame omungere. En etieko tucio nin, abaka, gikame waru bino timere. Aso lek kede gianyuta kame in ineno di oudo itie nino tie kaman:
- 29**Adwong, kakame in oudo itie nino kede, in iko leko kop me kare me anyim, di Rubanga ngat kame nyuto gikame omungere oko nyuto ni gikame bino timere.
- 30**Aso, nan konyuto nango gikame omungere noni, likame be pien anggo ariek kalamo jo icegun, do tetekenyo in Adwong ingei dwong mere di iko niang i kom tam koudo obino i wii.
- 31**” Adwong, i gianyuta nono in ineno di twon cal kame kocweo tie cungo i nyimi. Oudo edwong twatwal di emeny amenya. Cal mere oudo kelo lworu.
- 32**Wie oudo kotimo kede saabu kame kojililo kiber; kore kede bade oudo kotimo kede siliba; piere kede etul mege oudo kotimo kede buronsi;
- 33**iloton mege oudo kotimo kede ayon, kede tiene piny oudo kotimo kagamogo kede ayon kede kagamogo kede elupe.
- 34**Kakame in oudo itie nene kede, oko muko kidi, likame cing dano en komuke, di kidi nono oko dipo tien cal nono kame oudo kotimo kede ayon kede elupe, di eko ngingido tiene ngidingid.
- 35**Di ayon, elupe, buronsi, siliba, kede saabu oko nyinyitun di kiko doko bala apua me diakal me canyo i kare me oro; di yamo oko buko gi otero gi tenge, abongo yonge moro dong. Do kidi kodipo cal nono oko dongo eko doko twon moru di eko umu wi lobo lung.
- 36**” Adwong, manoni en lek kame in oudo ileko, nan amito gonyo ni dwong mere.
- 37**Adwong abaka, in ibedo abaka kame kalamo abakai dedede. Rubanga me malo omii ajakanut, twer, kede deyo.
- 38**En emii pugo jo dedede me wi lobo, leini kede winy. In en wi cal kame oudo kotimo kede saabu.



³⁹Ingei apugan nin, bino bobo wokun ajakanut ace, do likame ebino bedo tek bala meri; di ingei manono ko bino wokun ajakanut me adek, en me buronsi, kame bino da pugo wi lobo lung.

⁴⁰Di ajakanut me ongwon ko bino bedo tie, kame tek bala ayon, kame tuturo kede kame bebelo jamini dedede, en ebino tuturo ajakanuto dedede me agege.

⁴¹Oudo in ineno da be, tiene piny kede lwete oudo kagamogo kotimo kede elupe kede kagamogo kotimo kede ayon. Manoni nyuto be en ebino bedo ajakanut kopokere; do ebino bedo tie kede teko moro bala me ayon, bala kame ineno kede ayon kame konyalo kede elupe.

⁴²Lwete kobedo ayon kede elupe nyuto be ajakanut nono bino bedo tek, do ebino da bedo kede goro.

⁴³Bala kame ineno kede be konyalo ayon kede elupe, manoni nyuto be jotel kame cuny gi opopokun me ajakanut nono bino tamo kelo aribakin i yore me gin ribo nyomere, do manono likame bino twerere, bala kame ayon likame nyalere kede elupe di kiko moko.

⁴⁴I kare me apugan nogo Rubanga me malo bino cibo ajakanut kalikame kobino jiko, doko da likame jo apat bino puge. En ebino tuturo ajakanuto nogo, di en eko bedo tie nakanaka.

⁴⁵In ineno kite kame kidi omukere kede ki moru abongo cing ngatamoro mule, di eko ot dipo paka nyinyito ayon, buronsi, elupe, kede siliba, kede saabu. Adwong, i ilek ni Rubanga adwong otieko waco ni gikame bino timere, doko da kite kame ango agonye kede tie kakare.”

Komio Danieri kede Jowote Ruom Amalo

⁴⁶Di Abaka Nebukadunesa oko riebere piny di eko mino Danieri wor. Di eko mino cik be poore mi giamia me alos kede me odok angwe kur but Danieri pi mine wor.

⁴⁷Abaka owaco be, “Ateteni Rubanga nin dwong kalamo rubangan dedede, en etie Rwot me abakai, doko enyuto gikame omungere, pien in iko twero gonyo nango mung noni.”

⁴⁸Di eko mino Danieri tic me ruom amalo, di eko mine giamia abeco, di eko cibe ebedo ngapug me adul me Babilon kede ngadwong me jorieko koudo mio abaka tam koudo tie Babilon.

⁴⁹Di lubere kede kwac ka Danieri, abaka oko cibo Sadurak, Mesak, kede Abedenego i wang tice adongo i adul me Babilon; do Danieri oko dong i tuale me abaka.

Danieri 3

Cal kame Kotimo kede Saabu



¹Abaka Nebukadunesa oko timo cal kede saabu; oudo boro mere malo tie bala mita ot are kiwie kanyaare, kede laco mere bala mita adek, di eko mino kocibe i ebar me Dura i adul me Babilon.

²Abaka oko cwano kop lwongo jotic mege adongo pi bino karacel, magonogo bin ribo jopug, jo abedo i kansulo mere, jokan lim, jongolkop, kede jotic ace dedede. Gin oudo kipoore cokere pi kwero cal kame Abaka Nebukadunesa oudo ocibo.

³Kakame jonogi dedede oko cokere kede di kiko cungo i nyim cal nono pi kwere,

⁴eraban ka abaka oko cungo malo di eko waco kede dwan amalo be, “Wun jo me atekerin, abilere, kede leb apapat,

⁵ka iwinyunu koko me agwara, di ko lubo koko me bilo, adungu, arigirigi, kede dwan jamini ace me goc, wun dedede ipoorenu riebere piny di ikounu donyo woro cal kame Abaka Nebukadunesa ocibo.

⁶Ngat kalikame bino riebere piny eko wore, kobino cucuto uce i epipa adwong me mac kosorano.”

⁷Aso, cucuto di jo dedede owinyo koko me agwara kede dwan jamini ace me goc, jo me atekerin dedede, abilere dedede, kede leb dedede oko riebere piny di kiko donyo woro cal kame Abaka Nebukadunesa oudo ocibo.

Kopido Jowot Danieri Adek be Kijongut gi

⁸Manoni oko mino jo mogo me Babilon oudo kare me pido Iyudayan.

⁹Gin kiwaco ne Abaka Nebukadunesa be, “Okwe koto abaka bed kuo nakanaka!

¹⁰Adwong, in oudo imio cik be kame kokuto agwara di oko gono jamini ace me goc, jo dedede poore riebere piny di kiko woro cal kame kotimo kede saabu.

¹¹Doko da iko waco be ngatamoroni kalikame bino riebere piny di eko woro cal nono kobino uce i epipa adwong me mac kosorano.

¹²Tie Iyudayan mogo kame in imio tice adongo i adul me Babilon, kame dagi winyo kop nin. Jo nogo obedo Sadurak, Mesak, kede Abedenego; gin likame kiworo rubangan nin, akadi riebere woro cal kame in isipo.”

¹³Kop nono oko mino abaka odoko ger, di eko mino cik me tero cuo adek nogo i nyime.

¹⁴En eko penyo gi be, “Sadurak, Mesak, kede Abedenego, benyo etie kop me ateteni be wun likame iworunu rubangan nango, kede da be wun likame iworunu cal kame kotimo kede saabu kame ango acibo?

¹⁵Aso, nan kame wun i iikerenu riebere di ikounu woro cal kame ango acibo, ingei winyo agwara, bilo, adungu, arigirigi, bul, kede jamini ace me goc, manono bino bedo ber; do ka likame ikounu wore, cucuto kobino uco wu i epipa me mac kosorano. Iparunu be tie rubanga moro kame bino lako wu kikuno?”



¹⁶Sadurak, Mesak, kede Abedenego oko dwoko ne abaka be, “Okwe Adwong Nebukadunesa, wan likame otie kede kop kame oromo dwoko iye.

¹⁷Ka Rubanga kame wan oworo twero lako wa ki epipa me mac kosorano kede ki twer nin, en ebino lako wa.

¹⁸Do akadi ka likame ebino lako wa da, adwong abaka ngei kiber be wan likame obino woro rubangan ni, akadi woro cal kame kotimo kede saabu kame in icibo.”

Epipa Kosorano Mac

¹⁹Di Nebukadunesa oko doko ger ne Sadurak, Mesak, kede Abedenego, di wange oko bokere. Eko mino cik be dop epipa tien kanyaare kalamo kite kame lem kodope kede.

²⁰Eko golo cik ne isirikalen mege atek pi twetweo cuo adek nogo di oko uco gi i epipa kame mac osorano iye.

²¹Aso, oko twetweo cuo adek nogo, di kingapo isatin gi, idabudan, icoron kede igoen ace, di oko uco gi i epipa kame mac osorano iye.

²²Pi kite kame abaka oudo ogolo kede cik awakawaka be mi epipa dop kalamo lem sek, manono oko mino eura me mac oko neko isirikalen koudo otingo cuo adek nogo pi uco gi i epipa.

²³Di Sadurak, Mesak, kede Abedenego oko popoto i cuny mac kosorano i yi epipa di kitie i cal kame kotweo gi iye.

²⁴Cucuto abaka oko lepun ki kabedo mere di elelemo kede ur. En epenyere be, “Mam oudo wan otwetweunu cuo adek nogo di oko uco gi i mac kosorano me epipa?” Gin kiko dwoko ne be, “Adwong abaka, wan oudo otimo kamanono.”

²⁵En eko penyere be, “Do pinyo doko komio ango atie neno cuo ongwon tie ot i cuny mac di likame kitwere, doko di mac da likame owango gi? Dano me ongwon mere cal bala rubanga moro.”

Kogonyo Cuo Adek nogo di oko Medo gi Ruom me Tic

²⁶Nebukadunesa oko noko ekeko me epipa kodop nono di eko lwongere be, “Sadurak! Mesak! Abedenego! Jotic ka Rubanga Ngamalo Twal, wokunu, bianu kan!” Di cuo nogo oko wok ooko ki epipa.

²⁷Di jopug dedede, jotel, jo kame bedo i kansulo ka abaka oko cokere karacel di kiko neno be mac obedo li kede twer moro i kom cuo adek nogo; yer me wi gi oudo likame orere, igoen me kom gi da likame owang, doko ngwece me mac oudo li ki kom gi da.

²⁸Abaka oko waco be, “Pak bed but Rubanga ka Sadurak, Mesak, kede Abedenego. En ecwao malaika mere di eko lako jotic mege kagene. Gin kidagi lubo cik kame ango amio di kiko yei jalo kuo gi akaka woro rubanga moro ace apat, kwanyo kenekene Rubanga gi.

²⁹” Aso, nan ango atie mino cik kaman: ka ngatamoro me ateker moro, abila moro, arabo leb moro owaco kop moro arac i kom Rubanga ka Sadurak, Mesak kede



Abedenego, kobino nyinyilo en di oko rereto ode; pien likame doko tie rubanga moro kame twero lako jo i epone noni.”

³⁰Di abaka oko kobo Sadurak, Mesak, kede Abedenego i tic me ruom amalo i adul me Babilon.

Danieri 4

Lek me Are ka Nebukadunesa

¹Abaka Nebukadunesa cwao kop noni but jo me atekerin dedede, erangi dedede, abilere dedede, kede leb dedede atie i wi lobo be, “Amoto wu!

²Cunya yom pi tatamo gianena kede giaura kame Rubanga Ngamalo Twal otimo nango.

³” Gianena kame en enyuto dongodongo! Giaura mege obedo me twer! Ajakanut mere bedo nakanaka; en ebino pug ikar dedede.

⁴” Ango Nebukadunesa oudo atie bedo i paco na di atie kede anapakin kede kuo ajabajaba.

⁵Do ako bedo kede lek akelo lworu, di ako neno gianyuta kame oko neko koma.

⁶Ango ako woto cik be kel i nyima jorieko dedede kame mia tam i Babilon, tetekeny amoto kigony na dwong me lek nono.

⁷Di jotim tangu, jotiet, jo Kaludea, kede imuroko oko bino, angu ako waco negi lek na, do gin likame kiko twero gonyo dwong mere.

⁸Di Danieri oko bino (en kolwonge da be Beletesasar, en nying rubanga na); en ebedo dano kame rubangan kacil omio twer. Angu ako tatamo ne lek na. Man en gikame angu ako waco ne:

⁹Beletesasar, ngatel me jotim tangu, angu angeo be in itie kede twer me rubangan kacil, manono mio in ingeo gikame omungere dedede. Aso, winyi lek kame angu aleko di iko gonyo na dwong mere.

¹⁰” Kakame oudo angu atie nino kede, angu ako neno gianyuta me twon yat koudo tie i cuny lobo.

¹¹En eko meede ameda dongu paka tuno i edou, manono omio jo dedede me wi lobo oudo twero nene.

¹²Pote mege oudo cil di epong kede anyakini kame oudo twero romo jo dedede. Leini me obar oudo urako i dude, winyi oudo gedo i ajange mege, giakuo dedede oudo kuo kede camo anyakini mere.

¹³” Kakame angu oudo atie kede i kabuto di atie neno gianyuta nono, angu ako neno malaika kacil kame wange bit di etie bino ki malo.



¹⁴En eko ilelem di ewaco be, ‘Tong yat nono piny di iko lwero ajange mege; gwer pote mege di iko sasaro anyakini mege. Mi leini kame tie i dude kede winy kame tie i ajange mege ring tenge.

¹⁵Do mi isiki kede aliasin mege dong i lobo, di etwere kede irikoi me ayon kede buronsi, di etie cungo i lum obar kunono. “ ‘Mi toyo diak kom icuo noni, di eko donyo bedo obar kede leini kede lum.

¹⁶Mie ebed kede tam me le akaka me dano pi mwakini kanyaare.

¹⁷Kop me alola noni imalaikan awang gi bit en omio; tam noni komio di lubere kede cik kame imalaikan kacil omio, tetekeny jo dedede akuo ngei be Rubanga Ngamalo Twal tie kede twer i kom ajakanut me jo; en emie but ngat kame cunye omito, akadi di ebedo dano me ruom apiny adikinichel.’

¹⁸” Manoni en lek kame ango, Abaka Nebukadunesa, aneno. Aso, nan in Beletesasar, gony na dwong mere, pien jorieko dedede me ajakanut na likame twero gonyo na dwong mere. Do ango angeo be in itwero, pien rubangan kacil omi twer.”

Danieri Ogonyo Dwong me Lek me Are

¹⁹Di Danieri, ngat kame oudo kolwongo da be Beletesasar oko bedo kede par alit di likame eko twero waco kop moro. Tam kame oudo tie i wie omie lworo. Abaka oko waco ne be, “Beletesasar, kur ibed kede lworo pi lek nono arabo pi dwong mere.” Beletesasar oko dwoko be, “Adwong, koto lek nono kede dwong mere obedo pi jokwor nin, do weko in.”

²⁰In ineno yat adwong di tek, di edongo bor malo wie tuno i edou; jo dedede me wi lobo sobolo nene.

²¹Pote mege oudo cil, doko oudo etie kede anyakini asobolo pito jo me wi lobo lung. Leini me obar oudo wei i dud tipo mere, kede winy da oudo ogedo i ajange mege.

²²” Adwong abaka, manono obedo in! In idoko dwong di itek. Dwongo ni otieko meede etuno i edou, doko twer ni otieko nyai i wi lobo lung.

²³Kakame in oudo itie ngire kede, malaika oko wok ki malo di eko waco be, ‘Tong yat nono piny iko dudubo en, do wek isiki mere dong cungo i lobo. Twee kede irikoi me nyonyo ayon kede buronsi, di iko weke obar i lum koswapo. Poore toyo diak kom icuo noni, di en eko dong bedo kunono karacel kede leini pi mwakini kanyaare.’

²⁴” Adwong abaka, dwong mere en ine, doko da manoni obedo gikame Rubanga Ngamalo Twal owaco be bino timere i komi:

²⁵In kobino riami tenge kikom lwak di iko donyo bino bedo kede leini me obar. Ibino donyo camo lum bala twon pi mwakini kanyaare, di ibuto ooko kakame toyo bino diako kiye komi. Di do in iko bino ngeno be Rubanga Ngamalo Twal tie kede twer i kom ajakanuto dedede me jo, doko esobolo mino gi but jo kame cunye oyerero.



²⁶Malaika nono oko mino cik be wek isiki me yat nono dong cungo i lobo. Manono nyuto be in ibino bobo doko abaka cako i kare kame in ibino yei kede be Rubanga pugo wi lobo lung.

²⁷Pi manono, abaka, lub kop kame atie waco ni. Wek timo dub di iko donyo timo gikame opoore, di iko bedo kede cuny me kisa but jocan, di oko bino medo kare me mulem ni.”

²⁸Bin magonogi dedede oko timere ne abaka Nebukadunesa.

²⁹Ingei dwete tomon kiwie are, di oudo en etie latoa i malo i wi ode me abaka koudo tie Babilon,

³⁰en bin eko waco be, “Nen ca bomba adwong me Babilon! Ango agere kede twer na pi bedo bomba na me abaka, pi nyuto deyo kede dwongo na.”

³¹Di pwodi likame etieko waco kop noni, dwan oko winyere di yamo ki malo be, “Abaka Nebukadunesa, winy gikame atie waco ni: kotieko kwanyo ajakanut ki cingi!

³²Kobino riami tenge kikom lwak, di iko donyo bino bedo kede leini me obar. Kobino mini idonyo camo lum bala twon pi mwakini kanyaare. Di in iko bino ngeno be Rubanga Ngamalo Twal tie kede twer i kom ajakanuto me jo, doko da en esobolo mino gi but jo kame cunye oyeru.”

³³Kop nono oko cobere oyotoyot. Bin oko riamo Nebukadunesa kikom lwak di eko donyo camo lum bala twon. Toyo oko bedo diako kome, di yer me wie oko dongo bocoboco bala yer me ekokom, di lwete oko wito bala lwet winyo.

Nebukadunesa Opako Rubanga

³⁴Ingei mwakini kanyaare, ango Nebukadunesa ako tingo wanga neno malo, di wia oko yabare. Ango ako pako Ngamalo Twal; amio wor kede dwongo but en ngat kame ebedo nakanaka. En ebino pug nakanaka, doko ajakanut mere bino bedo ikar kede ikar.

³⁵Kibute jo dedede me wi lobo obedo gimoro li; imalaikan dedede me malo kede jo me wi lobo dedede tie i twer mere. Likame tie ngatamoro kame twero gengo mit mere, arabo penye gikame etie timo.

³⁶Kakame wia oyabere kede, wor na, dwongo na, kede deyo me ajakanut na bin oko dwoko na. Jotic na amia tam kede jotel me ajakanut na oko gama, di oko dwoko na twer na me abaka, kede dwongo akalamo kasek.

³⁷Nan ango Nebukadunesa apako, amio wor, kede amio dwongo but Abaka me malo. Gi dedede kame en etimo tie kakare doko kipoore. En etwero dwoko piny jo kame wakere.

Danieri 5

Ebaga ka Belesasar



¹Abaka Belesasar oko tedo ebaga ati ne jotel mege tutumian, di eko donyo mato bwini karacel kede gi.

²Kakame bwini odonyo kede i wie, Belesasar oko golo cik be kel ikopon kame kotimo kede saabu kede siliba, kame papa mere Nebukadunesa bin okelo ki tempulo atie Yerusalem, tetekeny en kede jotic mege adongo, kede mon mege, kede mon amake ace kalikame oudo enyomo mat kede gi bwini.

³Cucuto di oko kelo ikopon nogo di gin kiko donyo mato kede gi bwini.

⁴Gin kiko mato bwini di kiko donyo pako rubangan kame kocweo kede saabu, siliba, buronsi, ayon, yen kame kopao, kede kide.

⁵Cucuto cing dano oko neeno di eko cako iwandik i kor apama me ot ka abaka kakame kopuo, i nget gicibo etala. Abaka oudo tie neno kite kame etie iwandik kede.

⁶Abaka oko cako jul di tam kame etie kede oko mine lworu, di conge oko cako miel teltel.

⁷En eko lwongere kitek pi ngatamoro kelo ne jotiet, jo Kaludea, kede imuroko. En eko waco ne jorieko me Babilon nogo be, “Ngat kame bino sobolo somo iwandik no di eko gonyo dwong mere kobino ngapo ne igoen akwakwar me angosibib, kede eriko me ngut kame kotimo kede saabu, di eko tero ruom me adek me apugan i ajakanut na.”

⁸Jo kame mio abaka tam oko ot anyim, do likame tie ngatamoro kikom gi kame oko twero somo iwandik nono amoto gonyo ne abaka dwong mere.

⁹Abaka Belesasar lworu adwong oko mako di eko medo jul kitek, di jotic mege adongo wi gi oko cungo.

¹⁰Toto me abaka oko winyo di abaka kede jotic mege adongo tie celano, di en eko donyo i ot kakame oudo gin kitie camo iye ebaga. En eko waco be, “Akwao koto abaka obedo kuo nakanaka! Kur ibed kede par atek, doko da kur ijuli.

¹¹Tie icuo moro i ajakanut ni kame tie kede tipo me rubangan kacil. Di bin papa ni tie abaka, bin oko udo be en etie kede ngec, niang, kede rieke arom bala rieke me rubangan. Di papa ni abaka oko cibe ebedo ngadwong me jotim tangu, jotiet, jo Kaludea, kede imuroko.

¹²En etie kede twer akalamo, ngec, kede niang me gonyo dwong me lek, kede gonyo dwong me kope komungere, kede me tieko pekini. Aso cwai dano ot lwong ni icuo nono, en Danieri, en ngat kame bin papa ni ocako ne nyinge be Beletesasar, di en eko bino gonyo ni dwong me gi noni.”

Danieri Ogonyo Dwong me Iwandik nono

¹³Bin oko tero Danieri but abaka. Abaka oko waco ne Danieri be, “Mam in en Danieri, Eyudayat kame tie bedo obukui kan, kame papa na abaka bin okelo kan ki Yuda?



- 14**Ango awinyo kop i komi be in itie kede tipo me rubangan, kede be in itie kede ngec, niang, kede rieko amalo.
- 15**Aso nan kotieko kelo jorieko kede jotiet i nyima pi somo iwandik noni kede gonyo dwong mere, do likame kiko twero.
- 16**Do ango atieko winyo be in isobolo gonyo dwong me kope komungere, kede da tieko peko atie. Aso ka nan in iko sobolo somo iwandik noni kede gonyo dwong mere, kobino ngapo ni igoen akwakwar me angosibib, kede eriko me ngut kame kotimo kede saabu, kede iko bino bedo won ruom me adek i apugan me ajakanut noni.”
- 17**Danieri oko dwoko be, “Wek giamia nogo dong meggi, arabo imi gi but dano moro apat. Adwong abaka ango abino somo ni gikame kowandiko di ako gonyo ni dwong mere.
- 18**” Rubanga Ngamalo Twal bin omio papa ni Nebukadunesa obedo abaka adwong, di eko mine deyo kede angosibib.
- 19**Pi dwongo kame komie, omio jo dedede, atekerin dedede, kede jo me leb dedede oudo tie kede lworu bute di kom gi miel amiela. Ngat kame cunye oudo mito neko, en bin etwero neko; ngat kame cunye oudo mito weko bed kuo, en bin eweko bedo kuo; ngat kame en bin emito mino wor, en oudo emio wor; ngat kame en oudo emito dwoko i ruom apiny, en oudo etimo da kamanono.
- 20**Do kakame cunye oko pong kede ewaka di eko doko ngangute, bin oko kwanye ki kom mere me abaka, di oko kwanyo deyo mere.
- 21**Oko bin riame tenge kikom lwak, di oko mino tam mere odoko cal bala me le. En bin eko donyo bedo kede pundan me obar, di ecamo lum bala twon, di ebuto ooko i koyo abongo gikame galao kome ki toyo. I cen mere en eko do yei be Rubanga Ngamalo Twal tie kede twer i kom ajakanuto dedede me jo, doko en etwero mino gi but jo kame cunye oyero pi pugo gi.
- 22**” Do in Belesasar wode, likame iko yei mino cunyi mwolere, bed bala in ingeo gikame oudo otimere nono dedede.
- 23**In itingere kalamo Rwot kame tie malo. In ikelo ikopon me tempulo mere, di in kede jotie ni adongo, kede mon ni, karacel kede mon ni ace kalikame inyomo, ikounu donyo ikounu donyo tic kede gi me bwini, di do ikounu donyo pako rubangan kame kotimo kede siliba, saabu, buronsi, ayon, yen kame kopao, kede kide, rubangan kalikame neno piny, akadi winyo amoto ngeno kop moroni. Do likame iko mino wor but Rubanga kame kuo nin tie i cinge, kede kame tie kede akarunikin i kom gi dedede kame in itimo.
- 24**” Aso en eko cwano cing, di cing nono oko wandiko kope nogo.
- 25**” Gikame ewandiko ine: MENE MENE TEKEL PARSIN. **26**Dwong mere en ine: *MENE*, Rubanga otieko maro wel me ceng kame ebino jiko kede ajakanut ni abongo koso;



²⁷*TEKEL*, in kotieko pimi i misani di oko udi iwekeweke twatwal;

²⁸*PARSIN* kotieko poko ajakanut nin, kobino mine but jo Mede kede Pasia.”

²⁹ Cucuto Belesasar oko golo ne jotie mege cik pi ngapo ne Danieri egoe akwakwar me angosibib di oko liero i ngute eriko kame kotimo kede saabu. En eko mine ebedo dano me ruom me adek i apugan me ajakanut mere.

³⁰Iwor me cenge nono bin oko neko Belesasar, en abaka me jo Kaludea;

³¹di Darias, dano me Mede kame mwaka me dongo mere oudo tie ot kanyape kiwie are oko gamo apugan.

Danieri 6

Danieri i Bur kame Inguon tie iye

¹Darias oko yero jopug tol acel kede ot are (120) kame pugo adulion apapat, di eko poko negi tic i ajakanut mere dedede.

²Medo i wi magonogo, en bobo eko yero Danieri kede jo are ace pi ngingico tice me jopug me adulion, tetekeny gi dedede timere bala kame abaka mito.

³Ingei kare acecek, Danieri oko nyuto tic aber kalamo jowote ace kame etimo kede gi tic me ngingico jopug, doko da tic mere oudo ber kalamo me jopug dedede me adulion; manono oko mino abaka oko bedo kede tam me kete bedo ngat atelo wi jotie dedede i ajakanut mere.

⁴Di jo ace kame ngingico tic me jopug me adulion, karacel kede gin jopug me adulion oko mono kop moro arac kame kitwero pido iye Danieri, kame makere kede apugan arac i ajakanut. Do gin likame kiko twero udo tien kop moro kame kitwero cungo iye pi pide, akadi kop moro amakere kede kuwo me lim amoto ajajalun i dog tic, piento en oudo egenere.

⁵Gin kiko poro kop ken gi ken gi be, “Wan likame obinunu udo tien kop moro kame otwerunu pido iye Danieri, kwanyo kenekene i kop amakere kede edini mere.”

⁶Aso gin kiko ot but abaka di kiko waco ne be, “Abaka Darias, okwao be koto ibed kuo nakanaka!

⁷Wan dedede jo kame opugo ajakanut noni, manoni riribo jo kame ngingico tice me jopug me adulion, jo kame lubo tien gi, kede jotie ace, wan oyei be abaka in ipoore keto iswil di iko ridakino en di etek. Poore imi cik be ngatamoroni kame bino lego but dano moro amoto but rubanga moro pi ceng ot adek, kwanyo kenekene buti, kobino uce i bur kame inguon tie iye.

⁸Aso, adwong abaka, wot cik noni di in iko keto iye cingi, tetekeny likame doko kokaruno loke; ebino bedo iswil kalikame lokere me jo me Mede kede me Pasia.”

⁹Aso Abaka Darias oko keto cinge i cik nono.



10Bed bala Danieri oudo ngeo be abaka oudo otieko keto cinge i iswil nono, en pwodi eko gire meede donyo ot ilega i ode, kame oudo dirisan mege me agola me malo oudo yabere pimere kede Yerusalem. En oudo eoto kunono di eko riondiko piny di dirisan twolo, di eko donyo lego but Rubanga mere di epake; oudo etimo kamanono tien adek buli ceng.

11Jokwor ka Danieri nogo oko ot di kiko ude di etie lego di ekwao kisa kibut Rubanga mere.

12Gin kiko ot but abaka di kiko waco ne kop amako iswil kame oudo koketo; gin kiwaco be, “Abaka, mam in oudo iketo cingi i iswil kame waco be, ngatamoro kame bino lego but dano amoto rubanga moroni, pi kare me ceng ot adek alubo, kwanyo ka elego buti, kobino uce i bur kame inguon tie iye?” Abaka oko dwoko be, “Ebo, manono obedo iswil atek me jo Mede kede Pasia, iswil kalikame kotwero loko.”

13Gin kiko waco ne abaka be, “Danieri, dano acel kikom jo me Yuda atie obukui kan, likame winyo kop nin, doko da edagi lubo iswil kame in iketo iye cingi, do en gire elego tien adek buli ceng.”

14Kakame abaka owinyo kede pido gi nono, en eko bedo kede par alit. En eko moko tam mere pi koto lako Danieri, di eko cane pi koto lake tuno ceng donyo.

15Di jokwor ka Danieri oko dok but abaka di kiko waco ne be, “Adwong abaka, ngei be di lubere kede iswilia me jo Mede kede Pasia, cik kame abaka otieko cibo likame kotwero loko.”

16Di abaka oko golo cik di oko mako Danieri di oko uce i bur kame inguon opong iye. Abaka oko waco ne Danieri be, “Akwao be Rubanga ni kame in ibedo woro di itie kede genere bute laki.”

17Bin oko tero kidi ati di oko gasakino en i dog bur nono, di abaka oko mwono iye alama mere kede alama me jopug mege, tetekeny kur ngatamoro tim gimoro amakere kede lako Danieri.

18Abaka oko dok i paco mere di eko bedo iwor kiakia abongo camo gimoro, doko da likame oko tero ne gimoroni kame sobolo yomo cunye, kede da abongo nino i wange.

19Di do kakame piny tie ru kede, abaka oko yai di eko onyaro ot i bur kame inguon tie iye.

20Kakame en etuno kede i bur nono kame Danieri oudo tie iye, en eko lwongere kitek kede dwan me lito be, “Danieri ngatic ka Rubanga akuo, benyo, Rubanga ni kame in itio ne kede genere otwero laki kibut inguon?”

21Danieri oko dwoko be, “Adwong abaka, bed kuo nakanaka!”

22Rubanga na ocwao malaika mere di eko umo dog inguon tetekeny kur kitim na can moro. En etimo manoni piento en eudo be ango ali kede raco moro i nyime, kede i nyimi da, in abaka.”



²³Abaka cunye oko doko yom adikinicel di eko mino cik be wot Danieri ki bur me inguon nono. Gin kiko wote ooko di likame kiko udo akadi apore moro i kome, piento en oudo eketo gen mere but Rubanga.

²⁴Abaka oko mino cik di oko mamako jo dedede koudo orupao Danieri, di koko lwolwomo gi i bur me inguon nono, gin karacel kede mon gi kede idwe gi. Di pwodi likame kipopoto kituno i dud bur nono, inguon oko bwono gi di oko ngingido cogere gi.

²⁵Di Abaka Darias oko wandiko baluwa but jo me atekerin dedede, kede but jo me leb dedede i wi lobo lung be, “Akwao ibedunu kede mulem adwong.

²⁶Ango atie mino cik be, i ajakanut na dedede kame ango apugo jo poore bedo kede lwooro kede wor but Rubanga ka Danieri.” En eko meede kede yamo be, “Piento ebedo Rubanga akuo, doko da epugo nakanaka. Likame kobino twero dudubo ajakanut mere, doko apugan mere likame tie kede ajikini.

²⁷En elako, doko emio dano bwot; en etimo giaura kede gianena i malo kede i wi lobo. Piento en elako Danieri ki lak inguon.”

²⁸Danieri oko meede ameda dongo i wang tic i kare me apugan ka Darias kede me ka Sairas me Pasia.

Danieri 7

Danieri Otatamo Gianyuta mege

7.1—12.13

Gianyuta me Leini Ongwon kame Danieri Oneno

¹I mwaka me agege me apugan ka Belesasar bala abaka me Babilonia, ango Danieri ako neno gianyuta i lek di oudo atie buto iwor. Ango ako wandiko lek nono kaman:

²Ango Danieri aneno i gianyuta kotimere na, yamere me malo di tie buko ki bad dedede, di kitie rubo pii me nam adwong.

³Di leini ongwon adongodongo oko wokun ki nam adwong nono, gin dedede cal gi papat.

⁴Me agege oudo cal bala engu di etie kede bwome acal bala me ekokom. Kakame ango oudo atie ngine kede, oko puputo bwome, di oko kiarao en ki lobo di oko mine ecungo kede tiene are bala dano; oko mine ebedo kede tam acal bala me dano.

⁵Le ace bobo oko neeno, en le me are. En oudo ecal bala edubu. En oudo etie cungo kede tiene me cen di ekiarao me anyim, di etie kede isepon adek i lake. Dwan oko winyere di waco be, “Yai, cam ringo atot bala kame itwero.”

⁶Kakame oudo pwodi ango atie ngire kede, le ace oko bobo neeno. En oudo ecal bala erisa, do oudo etie kede bwome ongwon ingee, kede wie da oudo tie ongwon. Bin oko mine twer me pug.



⁷ Di pwodi oudo atie ngire, le me ongwon oko neeno. En oudo etek adikinichel di nene rac; cal mere oudo mio dano lworu. En oudo etie kede lake me nyonyo ayon kame oudo etie nyanyato kede ringo di enyamo, di enyonyono angidingidin kodong kede tiene. En oudo cal mere pat kede leini ace apat kocako neeno; oudo etie kede tunge tomon.

⁸ Kakame ango oudo atie ngino kede tunge nogo, tunge atitidi oko cako gulo i diere me magonogo. Pi weko ne tunge nono kare, oko puputo tunge adek kikom tunge me agege. Tunge nono oudo tie kede wange kame cal bala wang dano, kede doge koudo tie yamo ewaka ewaka.

Gianyuta me Ngat Kobedo tie Ikar kede Ikar

⁹ Kakame ango oudo atie ngire kede, oko cibo komini me ngolo kop. Ngat kobedo tie ikar kede ikar oko bedo i kom acel. Igoen mege oudo tar bala akako, kede yer me wie oudo cal bala yer me oromo atar di pwot. Kom mere nono oudo liel mac, namusigan mege da oudo obokere mac.

¹⁰ Esamai amol mac oudo tie mol wok kibute. Jo tutumian kede tutumian oudo tie kanono pi tic ne, kede jo milion kede milion oudo tie cungo i nyime. Tuale oko cako tic me ngolo kop, di oko yabo itabun.

¹¹ Ango ako meede kede ngire, di ako winyo di tung le me ongwon, tunge atitidi ca, di tie pwodi yamo ewaka ewaka. Di pwodi oudo atie ngire, oko neko le me ongwon nono di oko dudubo kome di oko uce i mac.

¹² Do leini apat bin koko kwanyo twer gi me pug, do oko weko gi kidong kuo pi kare moro.

¹³ I gianyuta nono kame aneno iwor, aneno gimoro acal bala dano, di etie bino kede idoun. En eko bino paka but ngat kobedo tie ikar kede ikar, di oko tere i nyime.

¹⁴ Oko mine twer me pug, deyo, kede ruom me abaka, tetekeny jo me atekerin dedede kede leb dedede tim nen tic. Loc mere tie pi kare lung, ajakanut mere likame kobino dudubo.

Kogonyo Dwong me Gianyuta nogo

¹⁵ Gianyuta kame ango Danieri aneno opoto cunya di eko mina lworu.

¹⁶ Ango ako ot but dano acel koudo tie cungo kunono di ako penye pi gonyo na ateni mere dedede. En eko gonyo na dwong me gianyuta nono kaman:

¹⁷” Leini ongwon adongodongo cungo pi abakai ongwon kame bino wokun i wi lobo.

¹⁸ Di jo ka Ngamalo Twal ko bino gamo ajakanut di kiko dong kede pi ikar kede ikar.”

¹⁹ Ango ako mito ngeno ateni me le me ongwon, le koudo pat kede leini ace; en oudo emio dano bedo kede lworu kokalamo, di lake obedo nyonyo ayon, kede lwete me tiene obedo nyonyo buronsi, kame en nyanyato kede gi ringo di eko donyo popoo gi i adulion atitino, di eko nyonyono angidingidin kodong kede tiene.



²⁰Doko da oudo amito ngeno ateni me tunge tomon koudo tie i wie, kede tunge kame oko gulo kicen di eko mino tunge adek oko popoto pi weko nen kabedo. Tunge nono oudo tie kede wange kede doge, di eyamo ewaka ewaka. Le nono oudo mio dano bedo kede lwordo kalamo leini icegun ka.

²¹Di pwodi oudo ango atie ngire, tunge nono oko cako yi kede jo ka Rubanga di eko bwono gi.

²²Di ngat kobedo tie ikar kede ikar oko bino di eko ngolo kop agango jo ka Ngamalo Twal. Kare oudo otuno ne jo ka Rubanga pi gamo ajakanut.

²³Gikame en eko waco na ine: “Le me ongwon obedo ajakanut me ongwon kame bino bedo tie i wi lobo, en ebino bedo pat kede ajakanuto apat dedede. En ebino nyinyito wi lobo di eko nyonyono en.

²⁴Tunge tomon obedo abakai tomon kame bino pugo ajakanut nono. Di abaka ace ko bino wokun, en ebino bedo pat kede abakai me agege nogo, di en eko bino bwono abakai adek kikom gi.

²⁵En ebino yamo kope areco i kom Ngamalo Twal di eko tidilo jo mege. En ebino tamakino loko ceng adongo kede iswilia me edini gi. Jo ka Rubanga bino bedo i twer mere pi mwakini adek kede dul.

²⁶Di tuale me malo ko bino bedo pi ngolo kop, di oko bino kwanyo twer mere di oko muducaro en atwal atwala.

²⁷Twer me pug, loc, kede dwongo me ajakanuto dedede me wi lobo kobino mino but jo ka Rubanga Ngamalo Twal. Ajakanut gi bino bedo nakanaka, doko wegi loc dedede me wi lobo bino tic negi di mio gi wor.”

²⁸Man en ajikini me kop nono. Do ango Danieri tam kame abedo kede oko mina lwordo atek di ako donyo jul ajula; do ango ako kano kop nono i cunya.

Danieri 8

Gianyuta me Emerekek kede Diel

¹I mwaka me adek me apugan ka Belesasar, ango Danieri ako bobo neno gianyuta ace.

²I gianyuta nono, apoi audo be oudo atie i bomba me Susa, i adul me Elam, di atie cungo i dog ecilet me Ulai.

³I kanono ako neno emerekek koudo tie kede tunge are abocoboco, do acel oudo bor kalamo ocelu; abor twatwal mere owok kicen.

⁴Ako neno di emerekek nono ociko tunge pi yi, di eko dok i bad tetu tim, i bad tetu malo, kede i bad tetu piny. Leini dedede oudo likame tie kede teko me yi kede en, doko oudo likame tie le moro kame twero lako ocelu kibute; en oudo etimo gikame cunye mito, di eko doko tek.



⁵Di ango oudo pwodi atie ngire, ekoro i oko wokun ki bad tetu tim eko ngolo wi lobo abongo tiene mulo piny. Ekoro nono oudo tie kede tunge i dierediere me wange.

⁶En eko ot tetu but emerekek koudo tie kede tunge are, kame oudo ango aneno di tie cungo i dog ecilet. En eko motar kede gero i kom emerekek nono.

⁷Ango anene di etie ot i kom emerekek nono. En oudo emotar i kome kede gero di eko dipe paka tuturo tunge are. Emerekek nono oudo li kede teko me yi kede en; en eko uco emerekek nono piny di eko donyo nyonyono en. Likame oudo tie ngatamoro kame twero lako emerekek nono kibute.

⁸Diel nono oko meede ameda woo pi teko mere, do kakame teko mere otuno kede malo adikinicel, oko bin turo tunge. Di kawang manono, tunge ongwon kame idelelei oko tui, di acelacel kikom gi tie cimo bad apat.

⁹Tunge moro atitidi oko bobo tui i kom tunge acel kikom ongwon nogo, di twer mere oko dok i bad tetu piny, i bad tetu kide, kede tetu lobo kame neno cil.

¹⁰En eko doko tek teko kame rom kede isirikalen me malo. En eko rereto i wi lobo mogo kikom isirikalen nogo, kede acerin mogo, di eko nyonyono gi.

¹¹En eko donyo woo kiton ne ngadwong me isirikalen me malo, di eko gengo giayala awanga me buli ceng kame komio bute, di eko munao tempulo mere.

¹²Jo oko donyo timo dub kunono akaka mino giayala me buli ceng, di eko mino wor me ateni ojik. Gi dedede kame en oudo etimo cobere ne kiber.

¹³Ango ako winyo di malaika acel penyo ocelu be, “Gikame oneeno i gianyuta noni bino meede pi kare karom amene? Dub arac noni bino dong di elunyo kawang giayala me buli ceng pi kare karom kamene? Kobino dong di kotie nyonyono isirikalen me malo kede me tempulo pi kare karom kamene?”

¹⁴Ako winyo di malaika ocelu dwoko be, “Ebino meede pi otieno kede odiko tutumia are kede tol adek (2,300), di do oko bino mino tempulo bedo di epoore bobo.”

Malaika Gabulieri Ogonyo Dwong me Gianyuta nono

¹⁵Kakame ango Danieri oudo atie tamo pi niang kede dwong me gianyuta nono, cucuto ngatamoro oko bino cungo i nyima, en oudo ecal bala icuo.

¹⁶Ako winyo di dwan dano yamo ki ecilet me Ulai be, “Gabulieri, mie eniang dwong me gianyuta kame eneno.”

¹⁷Gabulieri oko bino di eko cungo i ngeta, di lwooro oko maka di ango ako riebere piny. En eko waco na be, “Wot dano, niang be gianyuta noni nyuto kare me ajikini.”

¹⁸Kakame en oudo etie yamo keda, wia oko witar di ako poto, do en eko maka di eko kiarao ango acungo,

¹⁹di eko waco na be, “Ango atie nyuto ni gikame gero ka Rubanga bino kelo. Gianyuta nono nyuto kare me ajikini.



²⁰” Emerekek kame in ineno koudo tie kede tunge are cungo pi abakai me Media kede Pasia.

²¹Ekoroi cungo pi ajakanut me Guris; tunge kidelelei atie i dierediere me wange are cungo pi abaka mere me agege.

²²Tunge ongwon kame oko wok ingei tunge me agege tur cungo pi ajakanuto ongwon kame bino popokun ki ajakanut nono, kame teko gi karacel likame bino tuno i me ajakanut me agege.

²³” Kame kare me ajikini me ajakanuto nogo onoko, di do dub gi oyitiriro, abaka awange tek bino wokun, kame tie kede diru me angalo.

²⁴” En ebino doko tek, do likame kede twer mere kene. En ebino dudubo jamini i yore arac kalamo, doko iik mege dedede bino cobere ne kiber. En ebino muducaro jo atek kede jo ka Rubanga.

²⁵Pi kite kame etie kede diru me angalo, angalo mege likame bino meede ameda. En ebino bedo kede twon ewaka pire kene di eko bino muducaro jo atot abongo kwenyaro gi. En ebino da ngangar i kom Abaka me abakai; do kobino muducaro en, likame kede twer me dano.

²⁶Gianyuta noni amako kop me giayala awanga me odiko kede otieno kame kogonyo ni dwong mere bino cobere. Do nan ber kong mie ebed mung, pien ebino tero kare alac di pwodi likame ecobere.”

²⁷Aso, ango Danieri kop noni oko ninga di ako bedo tuwo pi ceng atot atota. Di do ako doko momot di ako dok i wang tic kame abaka oudo omia. Do gianyuta nono oneko koma, doko da likame ako niang dwong mere.

Danieri 9

Danieri Olego pi Jo mege

¹Darias dano me Mede, wot ka Sereses, oko pugo Babilonia.

² I mwaka me agege me apugan mere, ango oudo atie siyao itabun kacil di aparo kop i kom mwakini ot kanyaare kame Yerusalem bino dong kede di etie ameje, di lubere kede kop kame Rwot oudo owaco ne enabi Yeremia.

³Ango ako lego kede cunya dedede but Rwot, di angangao en, di akanyo kec, di angapo epuko, kede di abedo i buru.

⁴Ango alego but Rwot Rubanga di atuco dub ka jo na. Ango awaco be, “Rwot Rubanga, in idwong twatwal, wan omi wor. In igwoko isikan ni, doko inyuto amara abedo nakanaka but jo kame mari kede kame gwoko cik nin.

⁵” Wan odubo, wan otimo gikarac, obedo kede tim kalikame ber, wan ojemo ni, oweko lubo cik kede iswilia ni.

⁶Wan likame oyei winyo kop me inabin jotic nin, gin jo kame kiyamo i nyingi but abakai wa, jopug wa, joakwari wa, kede but jo dedede me ateker wa.



⁷” Rwot in nakanaka itimo gikame opoore. Do tuno tin wan otie kede lewic i wi wa, wan jo kame obedo Yuda, Yerusalem, kede jo dedede me Isirael kame bedo kabedo kiyapiyapi, kede kakabor i lobere dedede kame in isasaro gi iye pi kite kalikame kigenere kede buti.

⁸Rwot, lewic nan do tie i wi wa, i wi abakai wa, i wi jotel wa, kede i wi joakwari wa, pien wan odubo buti.

⁹Rwot Rubanga wa, in itie kede cuny me kisa kede me sasiro jo, bed bala wan obedo kede tim me jemo buti.

¹⁰Wan likame oyei winyo kop ni, in Rwot Rubanga wa, kakame iwaco ne wa kede pi lubo iswilia kame imio wa kibun inabin jotie ni.

¹¹Jo dedede me Isirael oturo iswilia ni di kiko daga lubo gikame in iwaco. Wan odubo buti en omio in iko kelo ne wa ilam kame kowandiko i Iswil ka Musa ngatic ni.

¹²In icobo timo gikame oudo iwaco be ibino timo ne wa kede jopug wa. In imio Yerusalem alola alit kalamo bomban dedede me wi lobo.

¹³Bala kame kowandiko kede i Iswil ka Musa, in itieko mino wa alola nogo dedede. Do akadi nan da, Rwot Rubanga wa, wan likame otamakino lokere tenge ki gikareco wa arabo tamo pi ateni nin.

¹⁴Aso, Rwot in iko bedo di iikere pi kelo ne wa alola paka tuno in kele i kom wa. Ateni Rwot Rubanga, gi dedede kame in itieko timo opoore, pien wan odagi winyo kop nin.

¹⁵” Rwot Rubanga, in bin iwoto jo ni ki lobo me Misiri kede twer nin, manono oko mino nyingi odong di ngere tuno tin; wan odubo, wan otimo gikarac.

¹⁶Okwe Rwot, di lubere kede tice ni kopooore, wan okwai be, kwany gero ni tenge ki bomba me Yerusalem, en moru ni kacil; pien pi dub wan kede me ka joakwari wa, Yerusalem kede jo ni dedede otieko doko gi me acae but atekerin me kio.

¹⁷Okwe Rwot Rubanga wa, winy kwac kede ingangai na, ango ngatic ni. Pir bero nin, Rwot akwai nen kede mwolo tempulo ni kame kodudubo.

¹⁸Okwe Rubanga na, cik yiti di iko winyo koko wa. Yab wangi di iko neno can kame otie iye, kede bomba kame kolwongo kede nyingi. Wan otie lego buti pien in itie kede cuny me kisa, do likame be pien wan otimo gikame opoore.

¹⁹Okwe Rwot winy wa. Rwot sasiro wa. Rwot winy wa di iko timo gikame mitere abongo gal, pien bomba ni kede jo ni kolwongo kede nyingi.”

Gabulieri Ogonyo Dwong me Imurai

²⁰Ango ako meede kede ilega, di atuco gikareco na kede gikareco ka jo me Isirael, di angangao Rwot Rubanga na pi temuno tempulo mere kacil.



²¹ Kakame oudo ango atie kede ilega, malaika Gabulieri, en icuo kame ango oudo acako neno i gianyuta kokato, oko por bino kakame ango oudo atie iye. Manono oudo obedo esawa me mino giayala me otieno.

²²En ebino di eko waco na be, “Danieri, ango nan atieko bino pi mini rieke kede niang i kom imurai nono.

²³Kakame in icako kede ingangai but Rwot, en eko gamo kwac ni. En emari twatwal, aso nan ango abino pi waco ni adwokini mere. Nan cik yiti di ango agonyo ni dwong me gianyuta nono.

²⁴” Mwakini kanyaare tien ot kanyaare en kare kame Rubanga omoko pi jo ni kede bomba nin kacil, pi jiko dub kede gikarac, pi udo isasir, kede pi en kelo poore abedo nakanaka, tetekeny gianyuta kede imurai nono cobere kakare, di oko bino medo kwero tempulo.

²⁵Ngei kiber doko niang be, cako i kare kame kobino mino kede cik me temuno gero Yerusalem tuno i kare kame ngatel kame Rubanga oyero bino bino kede, manono bino tero mwakini kanyaare tien kanyaare. Kobino gero Yerusalem di etie kede gudi kede apamai atek me cel, di eko bino cungo pi mwakini kanyaare tien ot kanyape kiwie are, do manono bino bedo kare me peko.

²⁶Ingei ajikini me kare nono kobino neko ngatel kame Rubanga oyero abongo tien kop moro. Di isirikalen me ngapug atie bino ko bino dudubo bomba kede tempulo. Ajikini bino bino bala pii me alele, di ekelo yi. Rubanga omoko be dudubo.

²⁷ Ngapug nono bino timo isikan atek kede jo pi mwakini kanyaare, do di dul me kare nono okato, en ebino jiko kop me mino giayala kede giamia, di oko bino lunyo kawang gi kede gikame munao kabedo kacil, tuno di ngat komunao kanono oriamo kede ajikini kame Rubanga otieko iiko ne.”

Danieri 10

Gianyuta kame Danieri Oneno i Ecilet me Tigris

¹(I mwaka me adek me apugan ka Sairas bala abaka me Pasia, bin Rubanga oko mino kop mere ongere but Danieri, en ngat kame oudo kolwonge da be Beletesasar. Kop nono oudo obedo me ateni do niang iye oudo obedo cane adwong. Bin oko niange kop nono i gianyuta.)

²I kare nono, ango Danieri oudo abedo kede iturur pi sabitin adek.

³Likame oudo acamo cam moro aber, akadi ringo, akadi bwini moro donyo i dog, doko da likame oudo abilo sut kede mo moro akadi acel.

⁴I ceng me ot are kiwie ongwon me duwe me agege me mwaka, ango oudo atie cungo i dog ecilet adwong me Tigris.

⁵ Ango ako ngoloro malo ako neno icuo moro koudo tie ngapo igoen ameny, di etweo piere kede rakoba kame kotimo kede saabu kame kojililo kiber.



⁶Kome oudo meny bala kidi beril, di nyime meny bala meny me kot; wange oudo meny bala toc, bade kede tiene oudo meny bala nyonyo buronsi kame kosuto, di dwane mor bala woo me twon ekodet me jo.

⁷Ango kena en kame aneno gianyuta nono; jo apat koudo tie keda likame onene, bed bala kom gi oko cako miel pi lworu di kiko ringo pwonu.

⁸Aso, ango ako dong kunono kena neno gianyuta me aura nono. Teko na oko tiek, di nyima oko lokere i cal me to.

⁹Ango ako winyo dwane, kakame ango awinyo kede dwane ango ako poto piny ariebacuny, di wia oko witar.

¹⁰Di cing dano oko mula di eko kiarao ango ariondiko di acato piny kede cinga. Do koma oudo pwodi tie miel.

¹¹En eko waco na be, “Danieri, in Rubanga mari twatwal, cik yiti iwiny kope kame ango ayaro waco ni. Yai icungi, pien ango kocwaa buti.” Kakame ewaco kede kamanoni, ango ako cungo, do koma oudo pwodi tie miel.

¹²En eko waco na be, “Danieri, kur ibed kede lworu. Rubanga owinyo kwac nin cako i ceng me agege kame in iketo kede tam ni pi udo niang di imwolere i nyim Rubanga ni. Ango nan abino pi kelo ni adwokini me ilega ni.

¹³Do malaika apugo ajakanut me Pasia oguro na pi ceng ot are kiwie acel, di Emikairi, en malaika acel adwong, oko bino konya, pien oudo ango adong kena Pasia kunono.

¹⁴Ango nan abino pi mini niang gikame bino timere ne jo ni i kare me ajikini. Tie bobo gianyuta ace kame mako kare nono.”

¹⁵Kakame en ewaco kede kop noni, ango ako luro ngino piny di likame atwero yamo kop moro.

¹⁶Di malaika, kame oudo tie i cal me dano, oko mulo del me dogu, di ango ako yabo dogu cako yamo, di ako waco ne be, “Adwong na, gianyuta noni omia lito kotieko teko ki koma.

¹⁷Ango acal bala epasoit atie cungo i nyim ngadwong mere; koma tie miel, ali kede teko, cunya da otiek.”

¹⁸En bobo eko medo mula di eko mina teko.

¹⁹En ewaco na be, “Kur ibed kede lworu, Rubanga mari twatwal, likame tie gimoro arac koyaro timere ni. Bed kede teko kede cuny anwang.” Kakame en eyamo na kede kamano, ango ako udo teko di ako waco be, “Adwong na, yam do gikame imito waco, pien nataman itieko mina teko.”

²⁰⁻²¹En eko penya be, “Ingeo gikame omio ango abino buti? Ango abino pi mini ngeno gikame kowandiko i Itabu me Ateni. Nan ango amito dok yi kede malaika ngadar me Pasia. Ingei manono, malaika ngadar me Guris da bino bino. Likame tie



ngatamoro kame tie pi konya yi kede gi kwanyo Emikairi, malaika ngadar wu me Isirael.

Danieri 11

¹I mwaka me agege me apugan ka Darias me Mede, ango kikoma acungo konye di ako mine teko.

²” Nan ango amito waco ni kop me ateni.”

Ajakanuto me Misiri kede Siria

Malaika nono oko waco be, “Abakai adek ace bino pugo Pasia. Abaka me ongwon mere bino bedo ngat kobaro kalamo gin dedede, di do kakame ebino tieko doko tek kede pi abar mare, en eko bino supo jo dedede i kom ajakanut me Guris.

³” Di abaka kobedo ngayi ko bino bino, di eko pug kede loc adwong di etimo gi dedede bala kame cunye mito.

⁴Do kakame twer mere pwodi tie meede dongo kede, ajakanut mere bino tur di eko popokun i adulion ongwon. Abakai kalikame obedo nywal me ode en kame bino pug kawange, do likame kibino bedo kede twer kame en oudo etie kede. Kobino kwanyo ajakanut ki cinge di oko mino jo apat.

⁵” Abaka me Misiri bino doko tek. Do akadi kamanono da, ngat acel kikom jodongo mege me isirikalen bino doko tek kalamo di en eko pugo ajakanut adwong kalamo mere.

⁶Ingei mwakini mogo gin kiko bino winyere pi aribakin, di abaka me Misiri ko bino mino abaka me Siria nyare me anyoma pi moko winyere gi nono. Do winyere gi nono likame bino bedo pi kare alac, di dako nono, kede cware, kede atin mere, kede jotic mege koupere kede, oko bino neko.

⁷I kare nogo, dano moro kobedo anywali me ot ka papa me dako nono bino doko abaka. En ebino suro isirikalen ka abaka me Siria di eko donyo i apama kame kigero atek me gwokere di eko bwono gi.

⁸En eko bino yako cal me rubangan gi, kede jamini abeco kame kotimo kede siliba kede saabu eko tero gi Misiri. Pi mwakini mogo, abaka me Misiri bino kong weko suro Siria,

⁹di do icen mere abaka me Siria ko bino ot suro Misiri, do kobino dwoko wie.

¹⁰” Awobe ka abaka me Siria ko bino iikere pi yi di kiko coko twon ekodet me isirikalen, di kiko ot bala alele, di kiko ngolo ot suro ngakwor gi akadi paka tuno i apama atek me gwokere koluko gi.

¹¹Abaka me Misiri bino ot kede gero di eko yi kede abaka me Siria di eko bwono twon isirikalen kame ecoko.



¹²Kakame etieko bwono kede twon isirikalen jokwor mege, cunye bino pong kede ewaka pi tutumian me isirikalen kame erwaco, do likame ebino meede bwono yi nakanaka.

¹³” Abaka me Siria bino dok di eko koko twon isirikalen akalamo koudo ebedo tie kede sek. Ingei kare moro en eko bino dok kede twon isirikalen kede jamini koromo amakere kede yi.

¹⁴I kare nono jo atos bino jemo ne abaka me Misiri. Jogero mogo kikom jo nin kikokome bino dipo yi kede en pi cobo gianyuta kame ineno, do kobino bwono gi.

¹⁵Di do abaka me Siria ko bino bino di eko luko bomba kame kocelo kede apama atek di eko make. Isirikalen me Misiri likame bino twero meede yi, akadi atek kikom gi likame bino bedo tie kede teko me bwono yi.

¹⁶Abaka me Siria bino timo negi gikame cunye omioto, abongo ngatamoro galao en. En ebino sipakin i lobo kame neno cil, di lobo nono dedede ko bino bedo i twer mere.

¹⁷” Abaka me Siria bino moko tam mere pi bino kede teko duc kame ajakanut mere tie kede. Di do pi mito muducaro ajakanut ka ngakwor mere, en ebino winyere kede en i kom kop amako mulem, di eko bino mino abaka nono nyare me anyoma; do iik mere nono bino poto.

¹⁸Ingei manono en ebino loko wie i kom lobere atie i dog name, di eko bino bwono atekerin atos. Do tie ngatel me isirikalen kame bino tieko anywar mere; ateteni en ebino dwoko anywar me abaka me Siria i wie.

¹⁹Di do eko bino dok i bomba me lobo mere kame kocelo kede apama atek, do kobino bwone di manono ko bino bedo ajikini mere.

²⁰” Abaka ace bino lunyo wange, kame bino cwano ngatic mere bedo kede adie i kom jo i kom kop amako culo esolo pi medo abar me ajakanut mere; ingei kare acecek kobino neko abaka nono, do likame obe i dier jo, amoto i yi.”

Abaka Arac me Asiria

²¹Malaika oko meede kede yamo be, “Abaka me Asiria kame bino lunyo wange bino bedo dano won acae kalikame jo omio twer me bedo abaka. En ebino ngole angola gamo apugan i yore me rieko.

²²Isirikalen dedede kame bino piem kede en, akadi kiton Ngatel me Josaseredoti da, en ebino weno gi di eko muducaro gi.

²³En ebino timo winyere me aribakin kede atekerin apat, di eko donyo ngolo negi rieko di en eko medo doko tek ameda, bed bala en epugo jo anonok.

²⁴En ebino ngole suro adul kobaru di eko timo gikame abakai kame en elubo ngei gi likame otimo. Di do en eko bino popoko ne jo kame lubo kop mere jamini kede abar kame eyako. En ebino timo iik me tuturo kabedere atek me gwokere, do manono bino bedo pi kare moro acecek.



- 25” En ebino coko twon ekodet me isirikalen di wange tek pi ot suro abaka me Misiri, en ngat kame bino da iikere kede twon isirikalen atos di tek kalamo pi yi kede en. Do abaka me Misiri likame bino twero, pien jo bino ngolo ne rieko,
- 26gin en jo kiyapiyapi kede en. Gin kibino rete, di oko bino bwono isirikalen mege, di oko neko atos kikom gi.
- 27Di abakai are nogo ko bino bedo cam karacel i emesa acel, di ngat acelacel tie kede tam arac i kom ngawote, doko di kingalere ken gi ken gi. Do likame kibino cobo mit gi pien kare mere udo pwodi likame otuno.
- 28Abaka me Asiria bino yai dok i lobo mere kede twon abar kame eyako, do udo pwodi cunye tie mito dudubo edini amakere kede isikan kacil. En ebino timo gikame cunye mito di eko dok i lobo mere.
- 29” Ingei kare moro en ebino doko suro Misiri, do i manoni kop bino lokere.
- 30Imerin bino wok ki Kitim pi yi kede en di lworu ko make di eko dok. En ebino dok kede gero di eko tamakino dudubo edini amakere kede isikan kacil. En ebino lubo tam me jo kotieko weko edini nono.
- 31Isirikalen kame ebino cwano bino luko tempulo kede apama atek koluke di kiko munao en. Gin kibino gengo giayala awanga me ceng dedede di kiko cibo kanono gikame munao kabedo kacil.
- 32En ebino ngalao cuny jo kotieko weko edini gi, do jo kame lubo kop ka Rubanga gi bino cungo di kitek di kiko timo gimoro.
- 33Jo ariek i diere me jo bino nywako rieko gi kede jo atos. Do pi kare moro kobino neko ace kikom gi i yi, kede apat mege kobino wango awanga kede mac paka to. Ace kobino yako kede ace kobino mako otero gi kumbor bala mabus.
- 34Kakame nek tie meede kede, jo ka Rubanga bino udo kony moro atitidi, bed bala jo atos kame bino donyo i kom gi likame bino timo kamanono kede cuny me ateni.
- 35Kobino neko jo ariek nogo mogo, di jo ko bino udo lonyere pi manono. Manono bino meede paka tuno i kare me ajikini, en kare kame Rubanga otieko moko.
- 36 “Abaka me Asiria bino timo gikame cunye mito; en ebino tingere di eko tero be en edwong ekalamo rubangan dedede, di eko donyo waco kope awinyo rac i kom Rubanga Ngamalo Twal. En ebino meede kede tim mege tuno i kare kame Rubanga bino nyuto kede gero mere. Rubanga bino timo gikame en etieko iiko.
- 37En likame ebino mino wor but rubangan ka joakwari mege, arabo but rubanga kame mon singo maro; en likame ebino mino wor but rubanga moroni dedede, piento en ebino terere be en edwong kalamo gin dedede.
- 38Akaka magonogi en ebino bedo kede wor but rubanga kame gwoko kabedere atek me gwokere, kabedere kame kocelo. Pi nyuto wor bute, en ebino mino saabu, siliba, kide me wel, kede giamia ace me wel but rubanga kame joakwari mege oudo likame ngeo.



³⁹Pi gwoko bomban mege kame koluko kede apama atek, en ebino tic kede jo kame woro rubanga me kumbor. Ebino mino wor adwong but jo kogame bala ngapug, di eko mino gi tice me ruom amalo, kede eko mino gi lobo bala giamia me pwoc.

Kare me Ajikini

⁴⁰” I kare me ajikini me abaka me Siria, abaka me Misiri bino sure, di abaka me Siria ko bino mwomar i kome bala apipiru, di etio kede cabalan, jo kame ringo kede asigiran, kede imerin atot atota. En ebino suro pinye atot bala core me pii me alele.

⁴¹En ebino suro kiton lobo kacil me isikan di eko neko jo tutumian kede tutumian, do lobo me Edom, Moab, kede kakodong me Amon bino bwot.

⁴²Kame en esuro lobere nogo dedede, akadi Misiri da likame bino bwot.

⁴³En ebino tero saabu, siliba, kede abar dedede me Misiri. Ebino da bwono Libiya kede Abisinia.

⁴⁴Di rwonge kowok ki bad tetu kide kede ki bad tetu tim ko bino dubo cunye, di eko bino yi kede twon gero di eko neko jo atot.

⁴⁵En ebino sipo iemai mege adongodongo me abaka i dierediere me nam adwong kede moru kame tempulo cungo i wie. Do en ebino to, abongo ngatamoro akonye.”

Danieri 12

Kare me Ajikini

¹ Malaika koudo tie ngapo igoen aliamaliam nono oko waco be, “I kare nono Emikairi malaika adwong, en ngat kame daro jo ni, bino neeno. Di kare ko bino bedo tie me twon peko, kame epone mere lem pwodi likame otimere cako atekerin bedo tie. Ka kare nono otuno, jo me ateker ni kame kowandiko nying gi i itabu ka Rubanga kobino lako.


² Jo atot kikom jo kotieko to bino kuo bobo; mogo bino bedo kede kuo abedo nakanaka, kede mogo bino bedo kede lewic kede acae kame bedo nakanaka.

³Jo ariek bino rieny rieny kacal bala me edou me malo; kede jo koudo opwonyo jo timo gikame opoore bino rieny bala acerin pi ikar kede ikar.

⁴ “Do in Danieri mwon itabu noni iko mino kope nogi bed mung paka tuno i kare me ajikini. Jo atot bino bino donyo wire tuni kede tuca, di ngec ko meede.”

⁵Di ako neno di cuo are tie cungo i nget ecilet, ngat acel i doge tetuni kede ngat ocelu i doge tetuca.

⁶Ngat acel kikom gi oko penyo malaika kongapo igoen aliamaliam koudo tie malo i bad kame ecilet mol wok kiye be, “Ebino tero kare karom nadi di pwodi giaura nogi likame ojik?”



⁷ Malaika nono oko kiarao bade are dedede malo, di ako winye di elairo i nying Ngat Abedo Nakanaka be, “Ebino tero mwakini adek kede dul. Kame tidilo jo ka Rubanga ojik, udo gi nogi dedede otieko timere.”

⁸Ango awinyo gikame ewaco do likame ako karuno niang iye. Omio ango ako penye be, “Adwong na, do nyo kame bino bedo adwogini me timere me gi nogi?”

⁹En eko dwoko na be, “Danieri in nan do oti, pien kope nogi kopoore kano gi kibed me mung tuno i kare me ajikini.

¹⁰Jo atot kobino lonyo, do jodubo bino meede kede tim gi me dub; likame tie ngadubo moro kame bino niang iye, do jo kame riek bino niang iye.

¹¹“Cako i kare kame kobino gengo kede giayala awanga me ceng dedede di oko lunyo keto gikame munao kabedo kacil, ceng tutumia acel kede tol are kede ot kanyangon (1,290) bino kato.

¹²Kitie kede yomcuny jo kame bino kanyakino tuno ceng tutumia acel i tol adek kede ot adek kiwie kany (1,335) okato!

¹³” Do in Danieri lub yongayo ni nono tuno i ajikini. Kuo ni bino kwanyere, do iko bino yai gamo giamia ni me pwoc i kare me ajikini.”



Kosea

Kosea 1

¹ Manoni en kop kame bin Rwot omio Kosea wot ka Beeri i kare kame bin Usia, Yotam, Akas, kede Esekia en oudo obedo abakai me Yuda, di Yeroboam wot ka Yekoyasi en kame oudo tie abaka me Isirael.

Dako kede Idwe ka Kosea

² I kare kame bin Rwot ogeo yamo kede jo Isirael di ebeo kibus Kosea, en ewaco ne Kosea be, “Oti di iko nyomo dako kame obedo malaya di iko nywalo kede idwe kame tie kede ekite nono, pien lobo tie timo tim me malaya kitek i yore me weka di gin kiko lokere woro rubangan apat.”

³ Aso, Kosea oko ot di en eko nyomo Gomer nyar ka Dibalaim, di dako nono oko yac eko nywalo ne atin awobi.

⁴ Di Rwot oko waco ne Kosea be, “Cak nyinge Jeserel pien odong kare katitidi di ango ako bino mino alola but jo me ot ka Abaka Yeku me Isirael pi nek kame en bin etimo i aditot me Jeserel. Ango abino jiko ajakanut me ode.

⁵ Cenge nono ango abino jiko teko me yi me jo Isirael i aditot me Jeserel.”

⁶ Gomer bobo oko yac di eko nywalo atin nyako. Di Rwot oko waco ne Kosea be, “Cak nyinge Lorukama, pien ango likame bobo abino bedo kede kisa i kom jo Isirael arabo sasiro gi.

⁷ Do ango abino bedo kede cuny me kisa i kom jo Yuda. Ango Rwot Rubanga gi, abino lako gi do likame kede yi me emal arabo epima, amoto yi me isirikalen kame ringo kede asigiran.”

⁸ Kakame Gomer otieko kwanyo kede Lorukama ki dot, eko bobo yac di eko nywalo atin awobi.

⁹ Di Rwot oko waco ne Kosea be, “Cak nyinge Lo Ami, pien jo Isirael likame obedo jo na doko ango likame abedo Rubanga gi.”

Dwoko Bero me Isirael

¹⁰ Kare bino tuno kalikame kobino twero maro kede wel me jo Isirael, pien kibino bedo tot bala asinge me dog nam. Nataman kolwongo gi be, “Likame Jo Na” , do i kare me anyim kobino lwongo gi be, “Idwe ka Rubanga Akuo.”

¹¹ Jo me Yuda kede me Isirael bino ribere di gin kiko yero ngatel gi acel. Di gin kiko bino gamo lobo gi kidwoko; ceng me Jeserel bino bedo ceng adwong.

Kosea 2

¹ Aso, lwong jo Isirael wadu be “Jo ka Rubanga” kede ne amiegu wu be “Konyuto negi Cuny me Kisa” .

Gomer likame Genere doko Isirael da likame Genere



²Idwe na, ngangaunu toto wu. Bed bala en bobo likame etie dako na, doko ada likame abedo cware, ngangaunu en tetekeny ewek adote kede tim mere me malaya.

³Ka likame eweko, ango abino gonyo igoen mege di eko dong nono bala kite kame oudo etie kede i ceng kame konywale kede. Abino mine edoko cal bala wi tim kakotuo di orio pii ko bino neke.

⁴Ango likame abino nyuto ne wun idwe mege cuny me kisa, pien wun ibedunu idwe kame onywalo i tim me malaya.

⁵Toto wu obedo timo malaya; en ngat kame eyaco wu etimo gi me lewic. En ewaco be, “Ango abino ot but ipalon na; gin en kame kimia cam kede giamata, igoen me yer kede igoen aliamaliam, mo me olibeti kede bwini.”

⁶Pi mano, ango abino cego yongayo mere kede okuto di ako gero cel me apama luke, tetekeny kur eud kabeo.

⁷En ebino ringo wapo ipalon mege do likame ebino mako gi. En ebino mono gi do likame ebino udo gi. Di en eko bino waco be, “Ango abino yai di ako dok but cwara me agege, pien i kare kame ango oudo atie kede bute, ango oudo atie i kuo aber lono nataman.”

⁸En likame oudo engeo be ango en kame oudo amie alos, bwini, kede mo me olibeti, kiton siliba kede saabu kame en oudo etio kede me woro Baal.

⁹Pi mano, ango abino twone alos kede bwini na ka kare gi otuno, doko abino gamo egoe na me yer kede egoe na aliamaliam kame oudo amie me umo kome.

¹⁰Ango abino gonye di eko dong nono i nyim ipalon mege. Likame tie ngatamoro kame bino twero lake ki cinga.

¹¹Ango abino jiko ilel mege dedede, ibagai mege me buli mwaka, Ibagai me Por Duwe, kede me Sabato, kede ibagai kame kociko apat dedede.

¹²Ango abino dudubo olok kede epigi mege kame en ewaco be ipalon mege ocule kede pi gikame en etimo negi. Ango abino mino gi kidoko abum di leini me obar ko donyo camo gi.

¹³Ango abino mine alola pi kare dedede kame en bin wie owil keda, kare kame en ebedo woro kede Baal di ewango odok angwe kur bute, kede kare kame en bin engapo kede mwolere mege di eko yai ot lubo ipalon mege. Rwot en owaco.

Amara ka Rwot pi Jo mege

¹⁴Pi mano, ango nataman abino bitao cunye di ako tere i wi tim di ako yamo kede ki kunono kede mwolo.

¹⁵Ki kunono ango abino dwoko ne olok mege di ako mino Aditot me Peko doko ekeko me gen. En ebino yei kop na kikuno bala bin i kare mere me aponga, kare kame bin en eyai kede ki lobo me Misiri.



¹⁶Cako i ceng nono en ebino lwonga be, “Cwara,” do likame bobo be “Baal na.” ¹⁷Pien angò abino kwanyo nying me Baal tenge ki doge di likame bobo eko bino lwongo nying nono atwal.

¹⁸I kare nono angò abino timo isikan kede leini me obar, winy kame por i malo, kede jamini kame liao alia i piny, tetekeny gin likame kibino timo ne jo na gimoro arac. Angò abino kwanyo tenge ki lobo jamini dedede me yi, di ako mino jo na bedo kede mulem kede anapakin.

¹⁹Di angò ako bino teri, in Isirael, iko bedo dako na atwal; angò abino nyuto ni kuo kopoo kede me ateni; abino nyuto ni amara kalikame lokere kede cuny me kisa di ako mini ibedo mera atwal.

²⁰Angò abino bedo kede genere di ako teri ibedo dako na, di in iko bino ngena bala Rwot.

²¹I kare nono angò abino gamo kwac me jo na di ako mino kot cwei i lobo,

²²di lobo ko bino ceko engano, olok, kede olibeti i aditot me Jeserel.

²³ Angò abino cuno kodi di ako nyuto cuny me kisa but Lo Rukama. Abino waco ne Lo Ami be, “Wun en jo na,” di gin kiko bino gamo be, “In en Rubanga wa.”

Kosea 3

Kosea kede Dako kalikame Genere

¹Rwot bobo oko waco na be, “Oti di iko mito dako kame tie kede apa mere do di dako nono ngadote, bala kame angò Rwot amaro kede jo Isirael, bed bala gin kilokere but rubangan apat di kimaro tero negi giayala me mugati abeco.”

²Aso, angò ako culo sente akaya me siliba tomon kiwie kany kede kilo tol acel kede ot kany (150) me mawele pi wile.

³Angò ako waco ne be en miero edara pi kare kalac abongo en timo malaya arabo timo adote; di ada ako bino dare kamanono.

⁴Iepone noni jo Isirael bino tieko kare kalac abongo bedo kede abaka arabo ngatel moro, kibino bedo abongo mino giayala i tempulo arabo bedo tie kede ipirin me kide kame koworo, amoto epod arabo terapim, gin jamini me ngeno mit ka Rubanga.

⁵Do icen mere jo Isirael bino bobo lokere but Rwot Rubanga gi, kede but akwar Daudi abaka gi. I kare nono gin kibino bino but Rwot di kitie kede lwo kede mielkom, di en eko bino timo negi bero.

Kosea 4

Raco kame Rubanga Owaco ne Jo Isirael

¹Winyunu kop ka Rwot, Okwe wun jo Isirael! Rwot tie waco ne wu raco be, “Genere likame tie i lobo noni, akadi amara, amoto ngec i koma, angò Rubanga.



²Gikame tie i lobo noni en lamo jo, angalo, nek, kuwo kede adote. Nek lubere aluba.

³Manono en komio lobo wu otuo, doko gi dedede akuo kame tie iye bino to: jo, leini, winy, kiton aporogon.”

Rwot Owaco ne Josaseredoti Raco

⁴Rwot waco be, “Kur dano moro ronkino ngat ocelu, pien wun josaseredoti en kame ango atie kede kop i komu.

⁵Ibinunu gete i dier iceng, inabin da bino gete kede wu i dier iwor. Ango abino muducaro Isirael, toto wu.

⁶Jo na tie to pien gin likame kingea. Manono obedo raco wun josaseredoti, pien wun itiekunu dagi ngena. Pi mano, ango da atieko dagi ne wu bedo josaseredoti na. Aso, bala kame wun wi wu otieko wil kede iswil na, ango Rubanga wu, ango da wia bino wil kede idwe wu.

⁷” Wun josaseredoti ka wel wu omeede, dub wu da buta meede. Ango nataman abino loko gikame wun iwakerenu kede doko gikame kelo ne wu lewic.

⁸Wun icamunu kede dub ka jo na, en komio wun imitunu negi meede ameda kede dub.

⁹Ango abino mino wun alola arom aroma kede me jo. Ango abino mino wu alola di lubere kede yote me kuo wu, di ako mino wu alola pi rac kame wun itimunu.

¹⁰Ibinunu cam do likame iyengunu. Ibinunu buto kede imalayan i abilan me rubangan, do likame ibinunu nywalo idwe, pien wun itiekunu weka di ikounu lokere woro rubangan apat.”

Rwot Oronkino tim me Woro Caljwogi

¹¹Rwot waco be, “Bwini oti kede bwini anyen tie kwanyo tenge niang me jo na.

¹²Gin kioto penyo tam kibus eba! Ebela en kame waco ne gin gikame kimito ngeno! Bala dako kame timo malaya, gin kiparao tenge woro rubangan apat, di kiko weka ango Rubanga gi.

¹³Gin kingolo leini me giayala i wi mori, kede kioto i wi imukuran pi wango odok angwe kur i dud yen oak, kede i dud yen apat dedede koduko, pien kitie kede tipo aber. “Manono en komio anyira wu timo tic me malaya, kede mon me awobe wu timo adote.

¹⁴Ango likame abino mino gin alola pi tim gin noni, pien wuda kikomu iotunu kede imalayan me tempulo, di ikounu mino giayala karacel kede gin i abilan me caljwogi. Bala kame agole noni waco kede be, ‘Jo kame li kede niang muducar.’

¹⁵” Okwe Isirael, bed bala in iko timo tim me malaya kede rubangan apat, mito kur Yuda bed kede raco me tim acel nono. Kur iotunu wora Giligal arabo Bet Aben, doko kur ikwongerenu i nyinga ango Rwot kakuo i kabedere nogo.



¹⁶Jo Isirael obedo joepali bala atakito. Benyo benyo kame ango nataman atwero pito wu kede bala idwe romini kame kotie kwano kakalac?

¹⁷Caljwogi otieko pipao jo me Isirael, wekunu gi ken gi.

¹⁸Ka gin kiko tieko amata, gin di do kiko donyo buto kede imalayan. Gin kimaro gikame kelo negi lewic lono gikame kelo negi wor.

¹⁹Kobino tero gi tenge bala gikame yamo okuto, di lewic ko bino mako gi pi leini kame gin kiko ngolo me yalo caljwogi.”

Kosea 5

¹Rwot waco be, “Winyunu kop noni, Okwe wun josaseredoti! Cikunu yitu, Okwe wun jo Isirael! Winyunu, Okwe wun jo me ot ka abaka! Pien ngolo kop noni mako wun. Wun icalunu bala obek me ciko jo i Misipa, kede bwoi kame korieo i moru me Tabor.

²Wun icalunu bala bur atut kame kokunyo me ciko jo i Bomba me Akasia, do ango abino mino wun dedede alola.

³Isirael, ango angei, in likame ipwono kibuta. In itimo malaya; in ipwokere.”

Kosea Okwenyaro Jo i kom Woro Caljwogi

⁴Tim areco kame jo obedo timo gengo gi dok but Rubanga gi. Cuny me mito timo malaya tie negi, omio gin likame kingeo Rwot.

⁵Ewaka me Isirael mio ijura i kom raco mere. Jo me Isirael gete pi raco gi; jo me Yuda da gete karacel kede gi.

⁶Gin kibino tero romini kede doke me angola pi yalo but Rwot, do gin likame kibino ude, piento en etieko yai eweko gi.

⁷Gin likame kibedo kede genere but Rwot; gin kiko nywalo idwe kede imalayan, idwe kalikame obedo me ka Rwot. Aso, i kare me Ebaga me Por Duwe, gin karacel kede cam gi kame tie i poti kobino muducaro gi.

Yi i dierediere me Yuda kede Isirael

⁸Kutunu esos me tung le i Gibeia pi lwongo jo i yi! Kutunu agwara i Rama! Gounu duru i Bet Aben! Copunu yi, wun jo ka Benjamin!

⁹Epuraimu bino doko ameje ka ceng me mine alola otuno. Ango atuco but jo me ikekon me Isirael gikame ateteni bino timere.

¹⁰Rwot waco be, “Jotel me Yuda otieko doko cal bala jo kame nyiko gikame poko ikor. Pi mano, ango abino bwoto lilo na i kom gi bala alele.

¹¹Kotie tero jo Isirael kirac, alola kame komio gi otieko teko gi; pien gin oudo kiketo cuny gi lubo gi kalikame karuno konyo gi.

¹²Pi mano, ango abino dudubo Isirael bala egoe kame ajekel ocamo, di ako bino dudubo Yuda bala gi kotop.



13” Kakame Isirael oneno kede kite kame etuwo kede, di Yuda da oko neno buge mege, di do Isirael oko ot Asiria pi kwano kony kibun abaka adwong, do abaka nono likame oko karuno cango gi akadi cango buge gi.

14Ango abino suro jo Isirael kede Yuda bala engu. Ango kikoma abino nyinyilo gi di ako yai aoto tenge. Ango abino kwanyo gi di ako tero gi tenge. Likame tie dano moro kame bino twero lako gi.

15” Ango abino dok bobo kabedo na, tuno di jo na oyei raco gi di gin kiko bino mona. I kare kame can bino poto negi kede, gin kibino mona kede cuny gi dedede.”

Kosea 6

Jo Cuko Swilaro

1Jo waco be, “Bia odokunu but Rwot. En etieko nyinyilo wa i adulion, do ebino cango wa; etieko mino wa awanon, do en ebino twetweo apreso wa.

2Ingei ceng are arabo adek en ebino mino wa okwaraunu, di okounu bobo bino bedo i nyime.

3Mito oketunu teko ngeno Rwot. En ateteni ebino bino but wa bala ru me piny kame miero timere; bino mere bino dwoko cuny wa bala kot me agege kame bino di eko bido piny.”

4Do Rwot waco be, “Okwe wun jo Isirael kede Yuda, abino timo wu benyo? Amara wu buta yai awakawaka bala ekuna me odiko; ecal bala toyo kame bunyo rwenyo odiko sek.

5Manono en komio ango ako ooro inabin na bala epima pi gin bino ngolongolo wu kede kop na, doko gikame ango amito kibutu ngere kakaler.

6 Ango amito amara wu kalikame lokere do weko leini me giayala. Ango amito jo na ngea akaka mino giayala buta.

7” Do i kabedo kame kolwongo be Adam, gin kiko turo isikan kame ango oudo atimo kede gi.

8Gilead en bomba kopong kede jo areco kede jonek.

9Josaseredoti cal bala ekodet me joyak kame kio jo i yongayo. Akadi i yongayo kame oto kabedo kacil kame tie Sekem, gin kineko jo doko kitimo jamini ace areco adongodongo.

10Ango atieko neno gikarac twatwal kame tie timere i Isirael: jo na otieko munaun kede woro caljwogi.

11” Wuda jo Yuda, ango atieko moko kare me mino wuda alola pi gikame itienu timo.

Kosea 7



¹” I kare dedede ka ango amito be koto acango jo na me Isirael di ako mino gi bobo kibedo kiber, gikame ango aneno i but gi kenekene en gikareco kame gin kitimo. Gin kiserere ken gi ken gi; kituro ude di kiko kwalo jamini; kiyako jo i yote.

²Gin likame kiparo be ango abino yutuno gikareco nogi dedede; dub gin oluko gi, doko kitie i nyima nakanaka.”

lik Arac me Mung i Paco ka Abaka

³Rwot waco be, “Jo cuko yomo cuny abaka kede jotie mege kede iik gi areco.

⁴Gin dedede kitie kede iik arac doko likame kiwor. Adagadaga gi rorano bala mac me keno, kalikame ngated mugati iiko, cako esawa me rubo mugati tuno esawa me tede.

⁵I ceng kame abaka wa oudo tie tedo kede ebaga, gin kiko mino abaka kede jotie mege omer kede bwini di kiko doko miming.

⁶Ebo, cuny gi oudo liel aliela bala mac kede kope areco kame gin oudo kiiko. Iwor kiakia lilo gi cal bala mac alieli midumidu di odiko eko calar kede liel.

⁷” Gin dedede lilo gi liet bala mac me keno, en komio gin kineko jopug gi. Abakai gi kotieko neneko di lubere aluba, do likame tie ngatamoro kame kwao kony kibuta.”

Isirael kede Atekerin Apat

⁸Rwot waco be, “Jo Isirael otieko nyalere kede atekerin apat. Gin kical bala mugati kame kotedo ngete tetucel kenekene.

⁹Atekerin apat otieko teko gi do gin likame kingeo. Gin kical bala dano kame lwar osisimo i wie do en likame engeo.

¹⁰Ewaka me jo Isirael mio ijura i kom gi. Akadi bed bala peko nogi dedede obeo negi, gin likame kiko dwogo buta, ango Rubanga gi.

¹¹Jo Isirael cal bala awele amiming, doko wie likame tio; gin kong ber kigeo lwongo jo Misiri pi konyo gi, di bobo kiko ringo but jo Asiria!

¹²Ango abino ciko bwoi na di gin kitie ot, di ako mako gi bala winy. Ango abino mino gi alola pi gikareco dedede kame gin kitimo.

¹³” Gin kibino neno can, pien gin kiweka. Kobino muducaro gi pien gin kijemo na. Ango koto oudo alako gi, do gin kiyamo kope me angalo i koma.

¹⁴Gin likame kikwaa kede cuny me ateni, do akaka manono gin kiboroboro koko i wi itandana gi. Ka gin kilego pi engano kede bwini, kingongolo kom gi bala jo kame lego but rubangan me obukui; gin kijemo na.

¹⁵Ango en kame oudo apwonyo gi di ako mino gi kidoko tek, do di gin kiiko tam arac i koma.

¹⁶Gin kilokere but gi kalikame twero konyo gi. Gin kony gi li bala emal kodubere. Jotel gi bino to i yi, di jo me Misiri ko bino nyero gi, pien gin kitie kede yamo me ewaka.”



Kosea 8

Rwot Ongolo ne Isirael Kop pi Woro Caljwogi

- ¹Rwot waco be, “Cak kuto agwara! Jokwor tie mwomere bino i lobo na bala acut amwomere ringino piny! Pien jo na oturo isikan kame ango atimo kede gi di kiko daga lubo iswilia na.
- ²Jo me Isirael waco na be, ‘In en Rubanga wa! Wan jo me Isirael ongei! ‘
- ³Do kede acae gin kitieko daga gikame ber. Jokwor bino wapo yor gi.
- ⁴” Gin kiyero abakai i mit gin ken gi; kiyero jotel abongo ngec nango. Kikwanyo siliba kede saabu di kiko cweno gi kidoko caljwogi, di manono en oko kelo negi amuducar i kom gi ken gi.
- ⁵Ango cunya daga cal me roya kame jo me Samaria woro. Ango atie kede gero i kom gi. Awene en kame kibino twero bedo kede abongo raco?
- ⁶Dano me Isirael en kotimo caljwogi nono; en likame ebeto Rubanga akadi acel. Kobino ngingido cal me roya kame jo me Samaria woro.
- ⁷Kame kicuwo yamo abuko, gin kibino ngwedo apipiru; engano kame cungo i potu abongo wit gi mio kwon bedo li. Do akadi ka koto wit gi oko bedo tie, koto jokumbor en kocamo gi.
- ⁸Isirael otieko doko cal bala atekerin apat, nan do ecal bala agulu akony mere li.
- ⁹En ecal bala punda me obar arimo piny kene; en etieko ringo ot kwano kony kibut Asiria, etieko patano kede atekerin apat pi konye.
- ¹⁰Do akadi bed bala gin kitieko patano kede atekerin apat, nan ango abino coco gi. Ingei kare acecek gin kibino mwodo lak gi pi lito kame abakai kede jopug bino mino gi.
- ¹¹” Jo me Isirael ogero alutarin atos me kwanyo dub, do kiko lokere kidoko negi alutarin me timo dub.
- ¹²Akadi awandiko negi pwoony atos benyo, do gin kitero gi be kibedo pwoony apat me kumbor.
- ¹³Gin kiyalo na leini abeco, di kiko camo ringo me giayala nogo. Do ango Rwot likame abino gamo giayala nogo. Nan ango abino yutuno dub gi di ako mino gi alola iye; abino dwoko gi Misiri.
- ¹⁴” Jo me Isirael ogero ude me abakai, do wi gi owil kede Ngacwec gi. Jo me Yuda ogero bomban atie kede cel atek, do ango abino cwano mac i bomban gi nogo, di mac nono ko bino wango kateko gi.”

Kosea 9

Kosea Okwenyaro pi Alola me Isirael



¹Jikunu kilel, Okwe wun jo me Isirael! Kur itacunu bala kame atekerin apat timo. Wun itimunu tim me malaya di ikounu weko Rubanga wu. Icatereu but rubanga Baal bala imalayan, di cunyu oko maro engano kame en eculo wu kede.

²Do oyotoyot ibinunu doko li kede engano kede mo me olibeti, doko da bwini anyen bino bedo li.

³Jo me Isirael likame bino dong bedo i lobo ka Rwot, do gin kibino dok Misiri, doko da kibino camo cam kobedo me kwer i Asiria.

⁴I lobere me kumbor gin likame kibino twero mino Rwot giamia me bwini, doko da giayala gi likame bino yomo cunye. Giayala gi nogo bino bedo bala cam me kakame okoko kiye dano oto; gin kibino came kenekene pi udo yengo, do likame kobino tero moro kiye i tempulo ka Rwot bala giamia.

⁵Nyo kame gin kibino timo i ceng kame komoko me ebaga, kede i ceng me ebaga ka Rwot?

⁶Kame can opoto di jo oko sasarun, jo me Misiri bino coko gi pi yiko gi Mempi kunono. Okuto kede doi bino mwono abar gi me siliba kede kakame miere gi oudo cungo iye.

⁷Ceng me alola otieko tuno, ceng kame jo bino udo kede gikame kipoore udo; Isirael bino niang da! Wun iwacunu be, “Enabi noni ngamingo. Icuo kame twer me tipo tie i kome noni otieko poi.” Wun idaganu adikinicel pien dub wu tot twatwal.

⁸Rubanga ocwa bala enabi pi kwenyaro jo mege me Isirael. Do kabedere dedede kame ango aoto iye itienu cika bala ciko winyo. Doko da akadi i tempulo jo tie dagi enabi.

⁹Wun itiekunu dubere atwal atwala pi tice wu areco, bala bin cuo me Gibeaa. Rubanga bino yutuno dub wu di eko mino wu alola.

Dub me Jo me Isirael kede Peko kame Ekelo

¹⁰Rwot waco be, “Kakame ango audo kede Isirael, oudo ecal bala udo olok i wi tim. Kakame ango aneno kede joakwari wu, oudo ecal bala neno anyakini me epigi acako cek me agege. Do kakame itununu kede i moru me Peor, wun i ikounu donyo i tim me lewic me woro Baal, di do ikounu doko rac i wanga bala rubanga kame cunyu oudo maro nono.

¹¹Deyo me Isirael bino por tenge bala winyo; gamo yic, yac kede nywal bino bedo li.

¹²Do akadi koto ibedunu tie kede idwe, ango koto akwanyo gin dedede di ako weko wu koko. Kame ango ajalo wu, ateteni ibinunu bedo tie i can!”

¹³Bin ango oudo aneno Isirael bala tugo kame kopito i lobo amio; do nan Isirael miero tel idwe mege eter gi ot nek gi.

¹⁴Okwe Rwot, nyo kame poore akwai pi timo ne jogi? Mi mon gi bed kede wok yic, doko da mi cak bed li i tune gi.

Rwot Ongolo Kop ne Isirael



¹⁵Rwot waco be, “Tim gin areco dedede bin ocakere i Giligal; ango ako cako dagi gi i kunono. Doko pi tice gi areco, ango abino riamo gi tenge ki oda. Likame doko abino meede maro gi. Jotel gi dedede obedo kede tim me epali buta.

¹⁶Jo me Isirael cal bala yat kame aliasin mege otuo, likame etwero nyak. Do akadi bed bala koto kibed tie kede idwe, ango koto aneneko idwe kame kimaro nogo dedede.”

Enabi Owaco Kop i kom Isirael

¹⁷Isirael odagi winyo kop ka Rubanga na. Nan eda ebino dagi gi; kibino ot rimo piny i diere me atekerin apat.

Kosea 10

¹Jo me Isirael oudo cal bala jang olok alibaliba anyako anyakini atot. Kakame anyakini omeede negi kede, gin kiko medo gero alutarin; kakame piny gi olony kede, gin kiko gero di cil ipirin kame kiworo bala rubangan.

²Jo kame ateni li i cuny gi miero nan bei i alola pi dub gi. Rwot bino tuturo alutarin gi, di eko dudubo ipirin me kide kame gin kiworo.

³Gin kibino waco be, “Wan oli kede abaka pien likame wan obedo kede lworu but Rubanga. Do akadi da, nyo kame abaka koto otwero timo ne wa?”

⁴Gin kiwaco kope kame li kede ateni; gin kitimo isikan kede ikwong me abe. Pi manono ngolo kop i ateni odoko do bala doi atie kede kwir akec kame donyo i bot kame kopuro.

⁵Jo kame bedo i bomba me Samaria lworu bino mako gi di kiko tururo pi kei rubanga gi kobedo cal me twon kame kotimo kede saabu, kame tie Betaben. Josaseredoti ka caljwogi nono bino kok pire ka kokwanyo deyo mere.

⁶Kobino tero gi nono Asiria bala giamia but abaka adwong. Kobino mino lewic mako Isirael pi tam kame ebedo lubo nono.

⁷Kobino tero abaka me Samaria tenge bala apoke kame lemo i wi pii.

⁸Abilan me wi imukuran kame tie Aben, kakame jo me Isirael woro kiye caljwogi, kobino dudubo. Okuto kede ocokocok bino dongo i wi alutari gi. Jo bino waco ne mori be, “Okwe kanunu wa,” kede ne imukuran be, “Okwe potunu iumunu wa!”

Rwot Ongolo ne Isirael Kop

⁹Rwot waco be, “Wun jo me Isirael idagunu jiko dub cako i kare kame idubunu kede i Gibe. Pi manono yi bino poto i komu i Gibe.

¹⁰Ango ayaro bino suro wun jo koparao nogi di ako mino wu alola. Atekerin bino kodere i komu di kiko mino wu alola pi dub wu koyitiro.

¹¹” Isirael oudo obedo atakit kame kopwonyo timo tic, en oudo emaro tic me wano ebao me nginyo engano. Do ango ako keto ne ayoko i ngute acil nono di ako twene pi cako timo tic atek. Amio Isirael boko poto di Yuda oko loko bot.



¹² Ango awaco ne be, ‘Cui kodi kobedo tim kopooore, di kac ni ko bino bedo amara kalikame lokere. Bok poto ni, pien kare me mona inononi, ango Rwot wu, di ango ako bino mino winyo na cwei ne wu bala kot.’

¹³Do akaka manono wun ikounu cuno tim areco, di ikounu udo kac kame wok kiye. Icamunu anyakini me angalo wu. “Pi kite kame iketunu kede genu i kom teko wu kede i kom twon isirikalen wu,

¹⁴pi manono yi bino poto ne wu di oko bino dudubo bomban wu dedede kame tie kede cel. Emino bedo cal bala ceng kame bin Abaka Salaman odudubo kede bomba me Betabel i ceng me yi, di oko neneko mon kede idwe gi.

¹⁵Manono en gikame kobino timo ne wuda jo me Betel pi tim wu areco adongodongo. Cucuto di yi ocakere, kobino neko abaka me Isirael.”

Kosea 11

Amara ka Rubanga but Jo mege kobedo Jojemo

¹ Rwot waco be, “Di bin Isirael oudo pwodi titidi, ango oudo amare, di ako lwonge pi yai ki Misiri bala woda.

²Do kakame ango ako meede ameda lwonge kede, eda eko meede ameda ot tenge kibuta. Jo na omeede mino Baal giayala, kede dunyo ne caljwogi odok angwe kur.

³Do di ango en kame oudo apwonyo Isirael teteo ot. Ango atingo gi i cinga, do gin likame kingeo be ango en kame acango gi.

⁴Ango awao gi dwogo buta kede mwolo kede amara. Kibut gi oudo ango acal bala ngat kame tingo atin di eko gonge i leme; ango agungo but gi di ako pito gi.

⁵” Gin kitieko dagi dwogo buta, pi manono kibino dok i lobo me Misiri; Asiria bino pugo gi.

⁶Yi bino poto i bomban gi di oko tuturo irutei me bomban gi. Yi bino muducaro gi pi iik gi areco.

⁷Jo na otieko moko tam gi pi lokere tenge kibuta. Gin kibino koko buta Ngamalo Twal, do likame ango abino kiarao gi.

⁸ “Isirael, epone mene kame ango asobolo weki kede? Epone mene kame ango asobolo jali kede? Benyo benyo kame ango asobolo dudubo in kede bala kame bin atimo ne bomba me Adama, arabo teri iepone acel bala kame bin atero kede Seboim? Cunya likame yei na timo kamanono; amara na buti dwong twatwal.

⁹Ango likame abino mini alola pi gero adwong kame atie kede i komi; ango likame doko abino dudubo Isirael. Pien ango abedo Rubanga do likame dano. Ango Ngat Kacil atie i diere wu. Likame abino bino butu kede gero.

¹⁰” Ango Rwot abino dorano bala engu i kom jokwor gi, di jo na ko bino dwogo ki bad tetu tim di kom gi miel amiela.



¹¹Gin kibino dwogo ki Misiri bala winy apor kitek, kede ki Asiria bala aweleko. Ango abino bobo dwoko gi i miere gi. Ango Rwot en awaco.”

Kongolo ne Isirael kede Yuda Kop

¹²Rwot waco be, “Jo me Isirael oluka kede kope me abe kede angalo; jo me Yuda pwodi tie jemo na, anga Rubanga kame genere kede kacil.

Kosea 12

¹Gi dedede kame jo me Isirael timo piny yuluyul cal bala riamere kede yamo kame buko wok ki bad tetu kide. Tim me angalo kede me gero tie nyai anyaa i diere gi. Gin kitimo isikan kede Asiria, doko kicato ne Misiri mo.”

²Rwot tie pido jo me Yuda; en ebino mino jo me Isirael alola pi yote areco me kuo gi. En ebino mino gi cul kame poore kede tice gi.

³ Kwaru gi Yakobo bin oute kede omin mere Esau i kare kame gin ibangin oudo kitie kede i yi toto gi; kakame Yakobo oko dongo kede, en eko ute kede Rubanga;

⁴ en eyi kede malaika di eko bwone. En eko kok di ekwao be lam ne winyo. Di Rubanga oko bino bute i Betel di oko yamo kede.

⁵Manono oudo obedo Rwot Rubanga me jo yi; nyinge en Rwot!

⁶Aso nan wun ikwae ka Yakobo dwogunu but Rubanga wu; bedunu kede amara kede tim atie kakare, di ikounu bedo kede gen bute nakanaka.

Ngolo Kop Ace

⁷Rwot waco be, “Jo me Isirael kwalo jo kede misanin kalikame kide gi tie kakare, di kiko udo bero i wi jo icegun.

⁸Gin kiwaco be, ‘Wan obaro; wan otieko diato abar. Likame tie ngatamoro kame twero waco be wan odubo be pien oudo abar i yore karac.’

⁹ Do anga Rubanga wu ngat kokwanyo wu ki Misiri abino bobo mino wu idonyunu bedo i iemai, bala kame oudo itimunu i kare kame anga abino kede butu i wi tim.

¹⁰” Ango bin ayamo kede inabin di ako mino gi kineno gianyuta atot. Abino da cwano inabin kelo ne jo rwonge me amuducar.

¹¹Kotie timo dub me woro caljwogi i Gilead, do jo kame tie timo manono bino to. Koyalo twonin i wi alutarin i Giligal, do alutarin nogo bino doko cal bala atukito me ingaroi kame kocoko i poti.”

¹² Kwaru wa Yakobo bin oringo i lobo me Aram kakame eko donyo kwano kiye romini pi udo dako.

¹³ Rwot bin ocwao enabi pi kwanyo jo me Isirael ki Misiri, di enabi nono oko donyo gwoko gi.



¹⁴Jo me Isirael otieko timo raco kame wango cuny Rwot kitek; pi manono Rwot bino keto raco gi i wi gi di eko mino gi alola kame poore kede acae kame kibedo kede bute.

Kosea 13

Ngolo Kop me Ajikini i kom Isirael

¹I kare kasek, ka jo me ekeko ka Epuraimu oudo oyamo, lworu oudo mako jo me ikekon apat; gin en kame oudo koworo gi i Isirael. Do gin kiko timo dub i yore me woro Baal; aso pi manono, gin kibino to.

²Nan gin pwodi kitie meede kede dub i yore me twako nyonyo di oko timo kede cal kame koworo, gin caljwogi kame jo otamo kede wi gi di jotet oko timo gi kede siliba. Di kiko waco be, “Miunu gi giayala!” Auro, kom jo do tie noto lem cal me roce!

³Pi manono jo nogi bino rwenyo bala ekuna kame duny odiko, arabo bala toyo kame tiek di pwodi ceng tie nyango. Gin kibino bedo bala cucung kame yamo tero tenge ki diakal me canyo, arabo bala yiro kame duny ki wi jokoni.

⁴Rwot waco be, “Ango en Rwot Rubanga wu, ngat kame bin owoto wu ki Misiri. Likame itienu doko kede Rubanga ace kwanyo ango kenekene. Ango kena en kame abedo ngalak wu.

⁵Ango en kame oudo agwoko wu i wi tim, en lobo kotuo.

⁶Kakame idonyunu kede i lobo aber ango ako pito wu di ikounu yeng, di ikounu doko joewaka di wi wu oko wil keda.

⁷Pi manono, ango abino suro wu bala engu. Abino donyo kino wu i yongayo bala erisa.

⁸Abino somo i komu bala edubu kokei idwe mege, di ako nyinyilo itaun wu. Abino camo wu ki kanono bala engu, di ako bino nyinyilo wu bala le moro ager me obar.

⁹” Abino muducaro wu, wun jo me Isirael! Ngai kame bino konyo wu?

¹⁰ Wun oudo iwacunu be, ‘Mi wa abaka kede jopug.’ Nan abaka wu tie tuai me wek elak wu? Tuai kame jopug tie iye i bomban wu?

¹¹ Ango amio wu abaka di atie kede gero, di ako kwanye pi lilo koudo omaka.

¹²” Dub me jo me Isirael kowandiko di oko kano iwandik nono kiber.

¹³Isirael cal bala atin kame kotie ramere me nywalo, do pi mingo mere, en eko dagi wok ki yi toto mere iesawa kopooore me nywale.

¹⁴ Benyo, kom ateteni ango abino lako jogi ki kabedo me jo oto arabo ki twer me to? Okwe to, kel negi aumpuli ni! Okwe kabedo me jo oto, kel negi amuducar! Ango likame doko abino bedo kede cuny me kisa i kom gi.

¹⁵Akadi bed bala Isirael ud mulem kalamo atekerin ace do ango abino cwano yamo aliet me bad tetu kide ki wi tim, di eko bino mino ataneko mege tuo. Ebino tero jamini mege dedede me wel amalo.



¹⁶Samaria bino udo alola pi en jemo nango. Kobino neko jo mege i yi; kobino nyonyoto idwe gi piny, di oko babaro kede pale yi mon koyac.”

Kosea 14

Kosea Obako Doge ne Jo me Isirael pi gin Swilaro

¹Okwe wun jo me Isirael dokunu but Rwot Rubanga wu. Dub wu omio igetenu.

²Dokunu but Rwot di ikounu lego be, “Sasiro dub wa dedede di iko gamo ilega wa, di wan oko bino mini giayala me pak.

³Asiria likame bino lako wa; doko asigiran me yi da likame bino konyo wa. Wan likame doko obino meede waco ne caljwogi kame cing wa ocweo be gin kibedo Rubanga wa. Okwe Rwot itie kede cuny me kisa i kom jo kame tie bala idwe kic abongo ngatamoro kame kitwero ringo bute.”

Rwot Ocikere pi mino Isirael Kuo Anyen

⁴Rwot waco be, “Ango abino cango epali kame jo me Isirael tie kede. Ango abino maro gi kede cunya dedede; ango atieko kwanyo gero na kibut gi.

⁵Abino bedo ne jo me Isirael bala toyo abido piny. Gin kibino tuuro bala ature kame kolwongo be lili; aliasin gi bino donyo kakatut bala yen me abum me Lebanon.

⁶Ajange gi bino yarere, di kicil bala yat me olibeti. Kibino bedo kede ngwece amit bala ngwece me abum me Lebanon.

⁷Gin kibino bobo gwok i dud tipo nango. Kibino bedo libaliba bala kodi atie dongo i potu; kibino tuuro bala olok di nying gi ko bedo iruo bala bwini me Lebanon.

⁸Jo me Isirael, bedunu li kede kop moro amakere kede caljwogi. Ango abino winyo ilega wu di ako gwoko wu. Abino bedo ne wu bala tipo me yat Saipuras kalikame pote mege ony; bero dedede kame wun itienu kede wok kibuta.”

⁹Jo dedede ariek poore niang gi nogi; jo kame ngeo poko gikaber kede arac poore ngei gi. Pien yote ka Rwot tie kakare, jo kopoore lubo gi, do kigetaro jodubo.



Yoweri

Yoweri 1

¹Manoni en kop ka Rwot but Yoweri wot ka Petuel.

Jo Okok pi Cam kame Komuducaro i Poti

²Winyunu kop noni, Okwe wun joadongo, cikunu yitu, wun jo dedede me Yuda. Benyo, cako sek lem gikame cal kamanoni otieko timere, i kare wun arabo i kare ka joakwari wu?

³Tatamunu kop mere but idwe wu, doko mito idwe wu da tatamo kop mere ne idwe gi, di idwe nogo da ko tatamo ne lwak kame lubo.

⁴Ikodeta me obonyo oraramun i kom cam me poti di lubere aluba, gikame ekodet acel oweko, ekodet alubo mere ocamo.

⁵Ceunu di ikounu koko, wun joamera; boroborunu dwan wu kede koko, wun jomat bwini, pien olok me timo bwini anyen otieko doko li.

⁶Twon ekodet me obonyo otieko suro lobo wa, gin kitek doko wel gi likame marere; lak gi cal bala me engu, kikitobito bala me engu adako.

⁷Gin kitieko muducaro olok wa, doko kitieko koko epigi wa. Kitieko pacaro poke me kor gi, paka jange gi dong tar atara.

⁸Kokunu bala nyako kame kok pi to me icuo kame oudo oyaro nyome.

⁹Giamia me alos kede me amata kame komio i ot ka Rwot otieko doko li. Josaseredoti kok, jotic ka Rwot kok pien gin kili kede giayala.

¹⁰Poti ler alera; lobo do cal bala dano kame tururo pien kotieko muducaro cam, olok otieko tuo, yen me olibeti oner.

¹¹Cuny wu poore poti, wun jopur; kokunu, wun jo kame igwokunu olok, pien engano kede mawele, kede cam dedede me poti kotieko muducaro.

¹²Olok kede epigi otieko ner; pomagurunet, tugere kede yen apat kame nyak dedede otieko ner di kiko tuo. Ateteni ilel otiek kikut jo.

¹³Ngapunu ipukoi di ikounu kok, wun josaseredoti; boroborunu koko, wun jo kame timo tic i alutari. Donyunu i ot ka Rwot di ikounu kok iwor kiakia! Giayala me alos kede giayala amata otieko doko li i ot ka Rwot Rubanga wu.

¹⁴Cikunu kare me kanyo kec; lwongunu cokere! Cokunu joadongo kede jo dedede me Yuda i ot ka Rwot Rubanga wu, di ikounu kok bute.

¹⁵Ceng ka Rwot iyapiyapi, ceng kame Rwot bino kelo iye can. Okwe lworokame ceng no bino kelo!



¹⁶Komoducaro cam wa di onenunu. Iel kede yomcuny otieko do doko li i ot ka Rwot Rubanga wa.

¹⁷Kodere to i dog lobo kotuo, dere tie nono; doko kitieko dubere pien cam kame kokano i yi gi li.

¹⁸Leini tie dinyo adinya! Doke bedo wire awira pien lum me acama li negi; akadi romini da tie neno can.

¹⁹Okwe Rwot, ango akok buti, pien mac otieko wango lum kame doke camo, kede yen dedede.

²⁰Akadi leini me obar da kok buti pien isamai otieko tuo.

Yoweri 2

Obonyo tie bala lkwenyar me bino me Ceng ka Rwot

¹Kutunu agwara; gounu duru i moru me Sion, moru kacil ka Rubanga! Mito jo me Yuda dedede bed kede mielkom, pien ceng ka Rwot tie bino, etieko doko iyapiyapi.

²Ebino bedo ceng kame colpiny mere cucucuc, ceng kame col cucucuc, di eumere kede idoun. Bala kame piny walar kede obai di lero ko nyai romo wi mori, kamanono twon isirikalen atek tie bino. Cako lem sek likame pwodi tie gikame cal kamanono, bobo likame bino bedo tie.

³Kakame gin kibeo iye cal bala kakame mac owango. I tetu nyim gi, lobo cal bala potu me Eden, do ingei gin beo kanono, lobo doko ler bala wi tim. Likame tie gimoro kame gin kiweko.

⁴Gin kical kede asigiran, doko kiringo bala asigiran me yi.

⁵Gin kisosomo i wi mori, di kimor bala cabalan; gin kimor bala leb mac kame tie camo arienge. Gin kical bala twon isirikalen koteere pi yi.

⁶Tetu kakame gin kiloko iye nyim gi, jo dedede bedo ramere arama, nyim jo dedede lokere.

⁷Gin kiringo bala jo yi; kiyito i wi apama bala isirikalen. Ngat acelacel lubo kakame nyime opimo, gin likame kilengere tenge ki yongayo gi.

⁸Likame tie ngat kame rio nyim ngawote, dano acelacel lubo yongayo mere; gin kimwomere kibwono jamini me yi kede gi, doko likame tie gikame karuno gengo gi.

⁹Gin kimwomere i bomba; gin kiringo i wi apama; gin kiyito i ude, kidonyo ki dirisan bala jokuwo.

¹⁰Ka gin kitie ot piny yangere, idoun da yayangun i malo. Ceng kede duwe doko col cucucuc, doko acer da weko rieny.



11 Rwot mio cik kede cokere i anyim me isirikalen mege; Isirikalen mege tin tot benyo! Jo kame lubo cik mere likame marere. Ateteni ceng ka Rwot dwong; etie ceng me can atek; ngai kame karuno kanyakino en!

Lwongo Jo pi Iswilar

12Rwot waco be, “Akadi nataman da, lokerenu di ikounu dwogo buta kede cuny wu lung, di ikanyunu kec, di ikokunu, kede di itururunu.

13Turerenu i cunyu do weko nyinyilo igoen wu.” Dwogunu but Rwot Rubanga wu, piento en engakisa doko emwol, en likame esunyo doko ger, doko epong kede amara kalikame lokere, en egonyo cunye di likame eko mino jo alola.

14Ngai nat kame ngeo ka en likame ebino lokere di eko gonyo cunye, di eko mino wu winyo, me bedo tie kede alos kede giamata kame romo, di do wun ikounu bino mino giayala but Rwot Rubanga wu.

15Kutunu agwara i wi moru me Sion; cikunu kare me kanyo kec; lwongunu cokere!

16Cokunu jo karacel. Miunu jo lonyere; cokunu jo oti karacel; cokunu idwe, akadi imukerun kame pwodi otingo i kor. Eteran kede ateran da miero wek agola gi di gida kiko bino.

17Josaserdoti jotic ka Rwot poore leg di kikok, i dierediere me alutari kede kakame kodonyo kede i tempulo be, “Okwe Rwot, bed kede cuny me kisa i kom jo ni. Kur imi jo ni kame maki dok gime acae, kede me anyera i diere me atekerin apat. Pinyo kame mio atekerin apat poore waco be, ‘ Rubanga gin kara tie tuai? ’ ”

Rubanga Odwoko Amio i Lobo

18Di do Rwot oko paro pi lobo mere, di eko bedo kede cuny me kisa i kom jo mege.

19Rwot oko waco ne jo mege be, “Nenunu, ango ayaro mino wu kal, bwini, kede mo, di ikounu bino yeng. Likame bobo abino mino wu ibedunu jo kame kocao i diere me atekerin apat.

20” Ango abino kwanyo jokwor nogo kowok ki bad tetu malo di ako tero gi kakabor kede wu, abino riamo gi kioto i wi tim kakotuo. Jokwor kotelo anyim bino donyo i Nam Oto, odong cen mege bino donyo i nam me Mediterania. Liele gi bino top di kiko doko ngwe. Ateteni gin kitieko timo ne wu jamini areco adongodongo!

21” Okwe wun poti, kur ibedunu kede lworu, do bedunu kede yomcuny kede kilel, pien Rwot otieko timo jamini adongodongo!

22Wun leini, kur ibedunu kede lworu, pien lum tie libaliba; yen da tie nyak, doko epigi kede olok onyak adikinicel.

23” Okwe wun jo me Sion, bedunu kede yomcuny, di ikounu ilel pi gikame Rwot otieko timo ne wu. En etieko mino wu kot me iporo ocwei ne wu kiber, en etieko mino kot ocwei ne wu di tot, kot me iporo kede me oro ocwei ne wu bala lem sek.



²⁴Alos bino pong i diakale me canyo, Bure me biino bwini kede me bino mo bino pong di kiko alamar.

²⁵” Ango abino culo wu pi mwakini kame obonyo ocamo kede cam wu. Gin en twon isirikalen kame oudo ango acwao pi suro wu.

²⁶” Nataman do ibinunu bedo tie kede cam atot kame ibinunu camo di ikounu yeng. Di do ikounu paka, ango Rwot Rubanga wu, ngat kame otieko timo ne wu jamini me aura. Jo na likame bobo kobino mino lewic mako.

²⁷Di wun ikounu bino ngeno be ango atie i diere wun jo me Isirael, kede be ango Rwot, en Rubanga wun doko likame tie moro apat. Jo na likame bobo kobino mino lewic mako wu.”

Ceng ka Rwot

²⁸ “Di do icen mere ango ako bino mino tipo na but jo dedede; idwe wu awobe kede anyira bino murao kop na, jo wu oti bino lek, kede jo wu atino da bino neno gianyuta.

²⁹I kare nono ango abino mino tipo na kiton but ipasoi kede apasoi.

³⁰” Ango abino mino gianena mogo me ceng nono nyutere i malo kede i lobo; onyo remo bino bedo tie, kede mac kede yiro kame duny swiridido malo.

³¹ Ceng bino lokere doko col cucucuc, di duwe ko lokere edoko kwar bala remo di pwodi ceng ka Rwot likame otuno, en ceng adwong me can atek.

³² Di do oko bino lako jo dedede kame bino kwano Rwot pi konyo gi. Bala kame Rwot otieko waco kede be, ‘ I moru me Sion kede i Yerusalem tie jo mogo kame bino bwot; jo kame ango Rwot alwongo bino bwot.’ “

Yoweri 3

Rubanga bino Ngolo Kop ne Atekerin

¹Rwot waco be, “I kare nono ango abino dwoko mulem ne jo me Yuda kede Yerusalem.

²Ango abino koko atekerin dedede di ako kelo gi i aditot me Yekosapat. Ango abino pido kede gi i kunono pi jo na me Isirael. Gin kitieko sarakino gi i diere me atekerin di gin kiko popoko lobo na.

³Gin kiuco alulu me popoko jo na. Awobe gin kiseso kede imalayan, do anyira kiko seso kede bwini abwina di kiko mato.

⁴ “Okwe wun jo me Taya, Sidon kede jo me adulion dedede me Pilistia, nyo ine kame wun itimunu nango? Benyo, tie gimoro kame itienu nyango? Ka itienu timo onyanga, ango abino dwoko i wi wu oyotoyot gikame itimunu.



⁵Wun itiekunu kwanyo siliba kede saabu na, jamini na kame pirgi tek di ikounu tero gi i tempulon wu.

⁶Wun itiekunu tero jo me Yuda kede me Yerusalem kakame bor kede piny gi, di ikounu cato gi but jo Gurik.

⁷Do nataman ango abino mino gin kiyai kiweko kabedere kame wun oudo icatunu gi iye, di ango ako bino timo ne wun gikame wun itiekunu timo ne gin.

⁸Ango abino mino kocato idwe wu ne jo me Yuda, di gida kiko bino cato gi ne jo Seba, ateker kame tie i piny abor. Ango Rwot atieko waco.

⁹” Tatamunu kop noni i diere me atekerin be, ‘ Iikerenu pi yi; supunu cuny isirikalen. Miunu isirikalen bin di gin iyapiyapi kan.

¹⁰ Tetunu leb kwei me doke wu dok ipimai, kede pale wu me lwero olok dok tongini. Akadi ngat agoro da poore wac be en ebedo ngayi atek.

¹¹Susunyunu bino, wun atekerin dedede kame oluko kanoni, cokerenu i aditot kunono.’ “ Okwe Rwot, cwai isirikalen ni sur gi!

¹²” Mito atekerin iikere, di gin kiko bino i aditot me Yekosapat. Ango abino bedo piny kunono pi ngolo kop ne atekerin dedede kame kio kede kanoni.

¹³ Gin kireco twatwal; miunu pala cak tic i kom gi, pien gin kical bala kal kotieko cek. Donyunu ikounu nyonyono gi bala olok kame konyonyono i bur kopong me biino bwini, paka bwini atie iye alamar.”

¹⁴Jo tutumian kede tutumian ocokere i Aditot me Ngolo kop. Pien ceng ka Rwot iyapiyapi kede Aditot me Ngolo kop.

¹⁵Ceng kede duwe odoko col cucucuc, doko acer da oweko rieny.

Rubanga bino Mino Jo mege Winyo

¹⁶ Rwot dorano bala engu ki Sion; en ewoto dwane ki Yerusalem, di lobo kede malo ko yayangun. Do Rwot en ngat kame jo mege ringo gwokere bute; en ecal bala kakatek me gwokere but jo me Isirael.

¹⁷” Di do wun jo me Isirael ikounu bino ngeno be ango Rwot Rubanga wu, abedo Sion, moru na kacil. Yerusalem bino bedo bomba kacil; jokumbor likame bobo bino mane.

¹⁸” I kare nono olok bino dure i wi mori, doko doke kame mio cak atos bino bedo tie i wi imukuran; pii bino bedo mol ki i isamai dedede me Yuda pi kare lung. Atan me pii bino lelepa i ot ka Rwot, di eko bido aditot me Sitim.

¹⁹” Misiri bino doko kabedo kalikame jo bedo iye, di Edom ko doko wi tim kakame gimoro li iye, pi tim me gero kame gin kitimo i lobo me Yuda, di kiko onyo remo me jo mege abongo raco moro.



20-21 Ango abino nyango remo gi; ango likame abino weko aweka jo kotimo raco. Do Yuda jo bino bedo tie iye nakanaka, kede Yerusalem da jo bino bedo tie iye pi kare dedede, pien ango Rwot abedo i moru me Sion.”



Amosi

Amosi 1

¹ Magonogi en kop ka Amosi ngat acel kikom jokwai romini me bomba me Tekoa. Rubanga bin onyuto ne kop amako Isirael, mwakini are di pwodi piny likame oyangere. I kare nono Usia en kame oudo tie abaka me Yuda di Yeroboam wot ka Yowasi en kame oudo tie abaka me Isirael.

² Amosi owaco be, “Dwan Rwot dorano ki moru me Sion; dwane dorano ki Yerusalem. Di elet me jokwai romini ko ner, di lum me wi moru me Kamel ko tuo.”

Kop kame Rubanga Ongolo i kom Jokio me Isirael

Siria

³ Rwot waco be, “Jo me Damasiko obedo timo dub tien atot atota. Ango ateteni abino mino gin alola; likame abino loko tam na. Gin kimio jo me Gilead oneno can alit.

⁴ Pi manono, angu abino cwano mac wango paco ka Abaka Kasael, doko abino wango kagwokere atek kame Abaka Benekadad ogero.

⁵ Angu abino tuturo irutei me Damasiko di ako muducaro jo me Aditot me Aben kede ngapug me Beteden. Jo me Siria kobino tero i lobo me Kir bala mabus.”

Pilistia

⁶ Rwot waco be, “Jo me Gasa obedo timo dub tien atot atota. Ango ateteni abino mino gin alola; likame abino loko tam na. Gin kimako ateker lung di kiko tero gi kioto cato gi bala ipasoi but jo Edom.

⁷ Pi manono, angu abino cwano mac i kom apama me cel me Gasa di mac nono ko bino wango kagwokere mege atek.

⁸ Angu abino muducaro jo kame bedo Asidod di ako neko abaka me Asikelon. Angu abino mino jo me bomba me Ekuron alola, di jo dedede me Pilistia kame pwodi odong ko bino to.”

Taya

⁹ Rwot waco be, “Jo me Taya obedo timo dub tien atot atota. Ango ateteni abino mino gin alola; likame abino loko tam na. Gin kimako ateker lung di kiko tero gi ne jo Edom. Gin kituro cikere gi me imiegu kame oudo kitimo.

¹⁰ Pi manono, angu abino cwano mac i kom apama me Taya di mac nono ko bino wango kagwokere mege atek.”

Edom

¹¹ Rwot waco be, “Jo me Edom obedo timo dub tien atot atota. Ango ateteni abino mino gin alola; likame abino loko tam na. Gin kilubo imiegu gi, jo Isirael, di kiko neneko gi abongo kisa. Lilo gin oudo likame tiek, doko gin oudo kimito be ebed kamanono nakanaka.



¹²Aso, ango abino cwano mac i bomba me Teman di mac nono ko bino wango kagwokere atek me Bosira.”

Amon

¹³Rwot waco be, “Jo me Amon obedo timo dub tien atot atota. Ango ateteni abino mino gin alola; likame abino loko tam na, pien i Gilead gin kibabaro yi mon koyac i kare me yi pi mito nyano ikor me lobo gi.

¹⁴Aso, ango abino cwano mac i kom apama me bomba me Raba di mac nono ko bino wango kagwokere mege atek. Gono duru bino bedo tie i ceng me yi, doko yi nono bino bedo gwai bala yamo me kot ager.

¹⁵Abaka gi kede jotic mege kobino tero gi obukui bala mabus.”

Amosi 2

Moab

¹Rwot waco be, “Jo me Moab obedo timo dub tien atot atota. Ango ateteni abino mino gin alola; likame abino loko tam na, pien gin kiko wango cogere me abaka me Edom paka doko buru.

²Ango abino cwano mac i lobo me Moab, di mac nono ko bino wango kagwokere atek me Keriot. Woo me yi kede koko me agwarai bino winyere di kotie neneko jo Moab.

³Ango abino neko ngapug me Moab karacel kede jotel dedede me lobo nono.”

Yuda

⁴Rwot waco be, “Jo me Yuda obedo timo dub tien atot atota. Ango ateteni abino mino gin alola; likame abino loko tam na, pien gin kitieko dagi iswil na, doko likame kigwoko pwony na. Caljwogi kame bin joakwari oko donyo woro otieko mino gida kiparao tenge.

⁵Aso, ango abino cwano mac Yuda di mac nono ko bino wango kagwokere atek me Yerusalem.”

Kop kame Rubanga Ongolo i kom Jo Isirael

⁶Rwot waco be, “Jo me Isirael obedo timo dub tien atot atota. Ango ateteni abino mino gin alola; likame abino loko tam na, pien gin kicato jo kame ekite gi opoore, jo kalikame karuno culo banyi gi. Jo kame piny oloo gin kicato i wel me amuka.

⁷Gin kinyonyono jocan piny i apua, doko jo agoro gin kiremoro tenge ki yote. Awobi kede papa mere ribo nyako acel di gin kiko munao nyinga kacil.

⁸Gin kibuto i nget alutari i igoen kame jocan osingao. Gin kimato bwini i tempulo nango, bwini kame gin kiwilo kede sente me jo kame gin kitango.



⁹ “Isirael, jo Amor bin tie Kanan i kare kame wun bin idonyunu kede iye. Gin oudo kibocoboco bala yen seda, doko oudo kitek bala yen oak. Do angu bin ako muducaro gin atieko gi pitipit.

¹⁰ Angu bin akwanyo wu ki lobo me Misiri di ako bedo telo wu i wi tim pi mwakini ot ongwon, di ako mino wu lobo me jo Amor oko doko meru.

¹¹ Angu bin ako yero awobe wu mogo pi bedo inabin, ipongai wu mogo bin amio obedo jo kokwerere buta. Benyo, likame etie kamanono, Okwe wun jo me Isirael? Angu Rwot atieko waco.

¹² Do wun ikounu mino jo kotieko kwerere buta omato bwini, di ikounu mino cik but inabin di iwacunu negi be, ‘Likame ibinunu yamo kop ka Rubanga.’

¹³ Aso, angu nataman abino dino wu piny i kabedo wu, bala kame engano kame opongo i gadigadi die kede.

¹⁴ Jo adwir i ringo likame bino bwot; jo atek da teko gi bino doko li, akadi dano atek i yi likame bino karuno lako kuo mere.

¹⁵ Jo agweo emal likame bino karuno cungo yi, doko jo adwir i ringo da likame bino karuno bwot, akadi jo aringo kede asigiran likame bino bwot.

¹⁶ I cenge nono akadi ngayi atek kame cunye nwang bino jalakino gi me yi mere di eko ringo tenge pi lako kuo mere. Angu Rwot en awaco.”

Amosi 3

¹ Jo me Isirael winyunu kop noni kame Rwot otieko waco i komu, wun ateker lung kame bin en ekwanyo ki Misiri:

²” Kikom atekerin dedede me wi lobo, wun kenekene en kame angu atieko ngeno wu. Manono en kame mio angu miero ami wu alola pi dub wu dedede.”

Tic me Enabi

³ Benyo, jo are twero upere karacel abongo gin cikere pi riamo?

⁴ Benyo, engu dorano i abum di eli kede le kame emako? Benyo, atin engu ngururo i ode abongo le moro kame en emako me amwoda?

⁵ Benyo, winyo moko i owic kalikame kociko? Benyo, owic gwere di eko ridakin abongo gimoro gwetakino en?

⁶ Benyo, kotwero kuto agwara me yi i bomba di lworu likame ko mako jo? Benyo, peko twero potu i bomba ka Rwot likame ocwae?

⁷ Ateteni Rwot likame timo gimoro di likame en enyuto ne inabin jotie mege mung mere nono.

⁸ Engu otieko dorano, ngai kalikame bino bedo lwor? Rwot Rubanga otieko waco kop mere, ngai kame twero dagi rabo kop mere?



Can kame Koketo i kom Samaria

⁹Rab kop but jo kame bedo i miere me abakai me Misiri kede Asidod be, “Cokerenu karacel i mori me Samaria di ikounu neno twon atotolun, kede epone kame kotero kede jo kirac.”

¹⁰Rwot waco be, “Gin likame kingeo akadi timo gikame poore. Gin kipongo i miere gi kame kocelo kitek, jamini kame kiudo i yore me tim me gero kede yak.

¹¹Aso, jokwor bino luko lobo gi di kiko bwono teko gi, di kiko yako miere gi kame kicelo kitek nogo.”

¹²Rwot waco be, “Bala kame ngakwai romini kame tamo mano oromo ki dog engu mao kede iloton are arabo yit acel kenekene me oromo, lako jo Isirael kame bedo Samaria da bino bedo kamanono. Kuo me jo anak kenekene en kame bino bwot, kede adulion me itandana kede me komini.

¹³Nataman winyunu kop noni, di ikounu kwenyaro ikwae ka Yakobo, ango Rwot Rubanga me jo yi en awaco.

¹⁴I ceng kame ango abino mino kede jo Isirael alola pi dub gi, ango abino dudubo alutarin me Betel. Kobino pakaro iswongen me alutari poto piny.

¹⁵Ango abino reto piny ude me kare me ngico me piny kede me kare me lieto me piny. Ude kame kotubuso kede lak liec bino doko atukito me lobo; ude adongo dedede kobino dudubo.”

Amosi 4

¹Winyunu kop noni wun mon me Samaria, jo kocwe bala doke kame kopito kiber me Basan, wun jo kame iterunu jocan kede jo kame piny oloo kirac, di iwacunu ne cwogu be, “Kelunu kongo ace!”

²Rwot Rubanga otieko kwongere i nyinge kacil kene be, “Kare bino tuno kame kobino kodo kede um wu kede golu di oko peno wu kotero wu tenge. Likame tie ngatamoro kikomu kame bino dong; wun dedede kobino peno wu kede golu bala rec.

³Kobino peno wu kobeo kede wu ki kakame apama opopoto kiye, di oko uco wu tetu Karamon.”

Jo Isirael likame Pwonyere

⁴Rwot Rubanga waco be, “Jo Isirael, otunu Betel di ikounu timo dub! Otunu Giligal di ikounu meede ameda kede timo dub! Terunu giayala wu buli odiko, kede acel me tomon me jame wu ingei buli ceng me adek.

⁵Terunu giamia wu me pwoc me mugati kame arup tie iye. Rabunu kop me giamia kame imiunu me bercuny tetekeny jo winyi; pien manono en kame wun imarunu timo, Okwe wun jo me Isirael!

⁶” Ango en kame oudo akelo kec i bomban wu, do wun ikounu dagi dwogo buta.



⁷Ango bin agengo kot cwei i kare kame do cam wu kame bin tie i poti oudo mito kede kot kitek. Ango bin amio kot cwei i bomba acel di eko weko bomba ocelu. Kot oudo cwei i poto acel, di eko weko poto ocelu dong di etuo baba.

⁸Jo me bomban are arabo adek bin yai di kiko ot i bomba acel pi mato pii, do likame kiko udo pii aromo gi. Akadi kamanono da, wun likame ikounu dwogo buta.

⁹” Ango bin amio engano wu oner di eko mwato; adudubo poti wu kede olok wu da. Obonyo ocamo yen epigi wu kede yen me olibeti wu. Do wun likame ikounu dwogo buta.

¹⁰” Ango bin acwao ne wu aumpuli kame cal bala kame bin acwao ne jo Misiri. Aneko awobe wu i yi di ako tero asigiran wu. Amio ngwece me kom jo oto i kimere wu oduny i umu. Do wun likame ikounu dwogo buta.

¹¹ “Ango bin amuducaro jo atot kikom wu bala kame bin atimo i Sodoma kede Gomora. Jo kame bin oko dong kuo kikom wu oudo cal bala yen kame kowariso ki mac. Do wun likame ikounu dwogo buta. Ango Rwot en awaco.

¹²” Pi manono, wun jo Isirael, ango abino timo ne wu kamanono. Aso, pien ango ayaro timo gi noni, iikerenu pi riamo keda, ango Rubanga wu!”

¹³Nenunu, Rubanga en kocweo mori kede yamo abuko. En emio tam mere ngere but jo; en eloko iceng doko iwor. En eoto i wi mori. Nyinge obedo, Rwot Rubanga Won Twer!

Amosi 5

Lwongo but Jo Isirael pi Swilaro

¹Winyunu wun jo Isirael, wer me koko noni kame ango ayaro wero wu kede:

²Isirael nyako kalikame pwodi ongego icuo otieko poto, likame ebino yai malo bobo; kojale etie buto piny, abongo ngatamoro kame kiarao en.

³Rwot Rubanga waco be, “Ka bomba moro me Isirael bino cwano jo tutumia acel ot yi, jo tol acel kenekene en kame bino dwogo. Ka bomba moro bino cwano jo tol acel, jo tomon kenekene en kame bino dwogo.”

⁴Rwot waco ne jo Isirael be, “Dwogunu buta di ikounu bino kuo.

⁵Kur iotunu woro caljwogi Betel, Giligal, arabo Beereseba. Jo me Giligal kobino tero obukui bala mabus, aso Betel bino doko gimoro li.”

⁶Dokunu but Rwot di ikounu bino bedo kuo. Ka li, en ebino kokomar i kom jo me ot ka Yosepu bala mac. Mac nono bino wango Betel dopodop, abongo ngatamoro kame romo neke.

⁷Itienu i can, wun jo kame ilokunu ateni di ikounu mine edoko kec bala yat, doko icaunu tim kopooore!



- ⁸ Rwot en kocweo acerin, acerin kocokere apimere i wi wa malo kede me bad tetu malo. En eloko piny acol cucucuc doko ler, doko en eloko iceng doko iwor. En elwongo pii me nam di eko bwoto gi i wi lobo. En nyinge Rwot.
- ⁹En emuducaro jo atek kede kabedere gi kame kocelo kitek.
- ¹⁰Wun cunyu dagi jo angolo kop i ateni kede ijurak me ateni.
- ¹¹Wun iterunu jocan kirac di igamunu alos kibus gi me esolo tetek. Wun igerunu ude me wel amalo, do likame ibinunu bedo i yi gi. Wun ipitunu olok kame yomo cunyu, do likame ibinunu mato bwini gi.
- ¹²Ango angeo kite kame dub wu tot kede, doko angeo kite kame kidongodongo kede. Wun iterunu jo kame ikiteso gi beco kirac, igamunu cemusana, doko likame imiunu kongolo kop kakare ne jocan.
- ¹³Kare noni do otieko doko rac kitek, omio jo ariek girgi do ling alinga.
- ¹⁴Ketunu cunyu timo gikame ber do weko gikame rac, tetekeny ibedunu kuo. Manono bino mino Rwot Rubanga ateteni bino bedo kede wu bala kame wun iwacunu.
- ¹⁵Dagunu gikarac di ikounu maro gikame ber, di ikounu neno be ngolo kop me ateni obedo tie i irutei me bomban; cengemogo manono twero mino Rwot, Rubanga me jo yi, bedo kede cunyu me kisa i kom jo me ateker noni kame pwodi odong kuo.
- ¹⁶Pi mano, Rwot Rubanga me jo yi waco be, “Koko alit bino bedo tie kacokere dedede me bomba, kede i gudi dedede me bomba jo bino koko be, ‘Okwe! Okwe! ‘Kobino lwongo jopur pi bino koko jo oto, gin karacel kede jo kame kopango pi koko.
- ¹⁷Koko bino bedo tie i poti dedede me olok, pien angu abino mino wu alola. Angu Rwot Rubanga atieko waco.”
- ¹⁸Ibinunu neno can benyo wun jo kame iparunu tuno me ceng ka Rwot! Pinyo komio imitunu ceng ka Rwot? En ebedo ceng me colpiny do likame ceng me lero.
- ¹⁹I ceng nono wun ibinunu bedo cal bala ngat kame ringo tenge kibus engu di eko riamo kede edubu! Arabo bala ngat kame bwot di eko ringo ture di eko gongere i kor apama di twol ko kane!
- ²⁰Ceng ka Rwot bino kelo colpiny do likame lero; ebino bedo ceng me peko abongo lero moro.
- ²¹ Rwot waco be, “Angu cunya dagi ibagai wu; cokere wu me wora likame yomo cunya.
- ²²Akadi imianu giayala wu awanga kede me alos, angu likame abino gamo gi, doko giayala wu me nywak, giayala me leini kame ipitunu oko cwe, angu likame abino ngoloro.
- ²³Terunu tenge were wu; angu likame amito winyo adungun wu, akadi di were gi mit benyo.



²⁴Do akaka manono, miunu ngolo kop me ateni mol bala pii, kede tim me poore miero mol bala pii me ecilet kalikame tuo.

²⁵“Okwe wun jo me Isirael, benyo, bin ikelunu na giayala kede giamia i kare me mwakini ot ongwon kame itiekunu i wi tim?”

²⁶Wun bin iworunu Sakut, caljwogi kame wun ilwongunu be abaka kede Kaiwan, caljwogi kame wun itimunu i cal me acer.

²⁷Pi mano, ango abino tero wu obukui bala mabus, kakabor kalamo Damasiko,” manoni en kop kame Rwot kame nyinge Rwot me jo yi owaco.

Amosi 6

Dudubo Isirael

¹Ibinunu bedo kede can adwong wun jo kame itienu kede kuo ayoyot i Sion, wun jo kame itienu i moru me Samaria kakame iparunu be gimoro likame karuno mulo wu kiye, wun jo kame ngere twatwal i ateker adwong me Isirael noni, wun jo kame jo bino butu mono kony!

²Wun iwacunu ne jo be, “Otunu ber inenunu bomba me Kalane, di ikounu yai ki kunono ikounu ot i bomba adwong me Kamat, di ikounu lor piny i bomba me Gat, en bomba me jo Pilistia. Benyo, tie moro i kom gi kame kalamo ajakanuto me Isirael kede Yuda? Tie moro kikom gi kame lac kalamo meru?”

³Okwe wun idagunu yei be ceng me can tie bino, do gikame itimunu tie mino ceng me apugan me gero tie doko iyapiyapi.

⁴Itienu i can wun jo kame ibutunu i mamakoe kame kotubuso kede lak liece, di icamunu ringo me itobai kede me romini apwodi bwong.

⁵Wun imarunu teto were anyen bala bin Daudi, di ikounu donyo wero gi di igounu adungu.

⁶Imatunu bwini pong awale, di isutunu kede moe abeco kalamo, do likame itururunu pi potu me ikwae ka Yosepu.

⁷Pi manono, wun en ibinunu bedo jo me agege kame kobino tero obukui bala mabus, di yomcuny me jo kame dedar i mamakoe ko bino jik.

⁸Rwot Rubanga me jo yi okwongere be, “Cunya dagi ewaka me ikwae ka Yakobo; doko da cunya dagi bomban gi kame kocelo; ango abino jalo bomba gi adwong kede gi dedede kame tie iye i cing jokwor.”

⁹Ka jo tomon odong i ot acel, gin kibino to.

¹⁰Wad me dano oto, en ngat kame wango kom ngat oto, bino woto liel ooko. En ebino lwongo dano moro apwodi odong tie i ot be, “Benyo, tie pwodi ngatamoro kodong kedi kuno?” Dwan ko bino winyere adwoko be, “Li!” Di wad me ngat oto ko bino waco be, “Lingi! Ogwokere kara kur owac nying Rwot.”



¹¹Kame Rwot omio cik, ude adongodongo bino ngingidun, di ude atitino ko bino nyinyitun.

¹²Benyo, asigiran twero ringo ki wi moru? Benyo dano twero puro nam kede ecuka? Do wun itiekunu loko ngolo kop me ateni odoko kwir akec, kede anyakini me tice kopoore oko doko bala yat kame kec.

¹³Wun ilelunu pi mako bomba me Lodebar. Iwakerenu be, “Wan omao Karanaim kede teko wa.”

¹⁴Rwot Rubanga me jo yi tie waco be, “Wun jo me Isirael, ango abino cwano ne wu ateker me kumbor pi bino bedo i lobo wu. Gin kibino bedo tero wu kirac cako ki Lebo Kamat i bad tetu malo tuno i esamai me Araba i bad tetu piny.”

Amosi 7

Gianyuta me Obonyo

¹Man en gikame Rwot Rubanga onyuto na: Ango anene di etie cweno ekodet me obonyo ingei nyaro ne abaka iner mere me lum me pito dok, di do lum anyen oudo tie cako lot.

²Kakame obonyo nogo otieko camo kede lum dedede me lobo nono, ango ako waco be, “Okwe Rwot Rubanga, ango akwai isasiro jo ni. Ikwae ka Yakobo bino twero kuo benyo? Gin kigoro twatwal!”

³Rwot oko loko tam mere di eko waco be, “Gikame ineno likame bino timere.”

Gianyuta me Mac

⁴Man en gianyuta ace bobo kame Rubanga onyuto na: Rwot oudo tie lwongo mac pi cwei, di mac oko cwei di eko tieko wango nam adwong atie piny i dud lobo, di do eko cako wango wi lobo malo.

⁵Ango ako waco be, “Okwe Rwot Rubanga, ango akwai, jike! Ikwae ka Yakobo bino twero kuo benyo? Gin kigoro twatwal!”

⁶Rwot oko loko tam mere di eko waco be, “Gikame ineno likame bino timere.”

Gianyuta me Tol atie kede Kidi me rieno Apama Malo

⁷Man en bobo gianyuta kame Rwot bobo oko nyuto na: Rwot oudo tie cungo i nget apama kame kogero di kotio kede tol kame tie kede kidi me rieno apama malo, di en oudo etie mako i cinge epone me tol atie kede kidi nono.

⁸En eko penya be, “Amosi, nyo kame itie neno?” Ango ako dwoko be, “Tol atie kede kidi me rieno apama malo.” En eko waco be, “Ango abino tic kede en me nyuto be jo na cal bala apama kogom. Ango likame doko abino loko tam na me mino gi alola.

⁹Kobino dudubo kabedere kame ikwae ka Isaka wora kiye; kabedere kacil me Isirael bino doko amejeko. Ango abino jiko apugan ka Yeroboam.”

Amosi kede Amasia



¹⁰Di Amasia, en ngasaseredoti me Betel, oko cwano ne Abaka Yeroboam me Isirael kop be, “Amosi tie timo iik arac i komi i diere me jo me Isirael kanoni. Jo likame doko twero meede kede kanyakino kop mere.

¹¹Kop kame en etie waco en ine be, ‘Yeroboam bino to i yi, di oko bino mako jo me Isirael ki lobo gi di oko tero gi obukui.’ “

¹²Amasia oko waco ne Amosi be, “Okwe in nganeno, yai tenge, dok do i lobo me Yuda di iko ot murao kope ni kunono di gin kiculi iye;

¹³kur doko imeede murao kope ni Betel kan, pien kan en kame abaka woro kiye Rwot, en tempulo adwong me ajakanut wa.”

¹⁴Amosi oko dwoko ne Amasia be, “Ango oudo likame abedo enabi, do nan da likame ango atie i ekodet moroni me inabin; do ango oudo abedo ngakwat kede ngat kame gwoko yen cukamori.

¹⁵Do Rwot oko kwanya ki tic na me kwat di eko waco na pi bino murao kop mere but jo mege me Isirael.

¹⁶Aso nan winy gikame Rwot tie waco. In iwaco na be ajik imurai i kom Isirael, doko da be awek pwoyong kop kame dio ikwae ka Isaka.

¹⁷Pi manono, Amasia, Rwot tie waco ni kaman: ‘Dako ni bino doko malaya i bomba, di oko bino neneko awobe ni kede anyira ni. Lobo ni kobino popoko ne jo apat, di in kikomi iko bino to i piny me jo kalikame wora. Doko ateteni kobino kwanyo jo me Isirael ki lobo gi di oko tero gi obukui bala mabus.’ “

Amosi 8

Gianyuta me Ebukit Atie kede Anyakini Pong

¹Di Rwot oko bobo mina gianyuta ace kaman: Ango aneno ebukit kame anyakini tie iye pong.

²Di Rwot oko penya be, “Amosi, itie neno nyo?” Ango ako dwoko be, “Ebukit kame anyakini tie iye pong.” Di Rwot oko waco na be, “Ajikini otieko tuno ne jo na me Isirael. Ango likame doko abino loko tam na me mino gi alola.

³I ceng nono were kame kowero i paco me abaka bino lokere doko were me koko. Kom jo oto bino rade kadedere dedede. Pi manono ling titi!”

Can kame Kobino Mino Isirael bala Alola

⁴Winyunu gikame atie yamo, wun jo kame inyonyonunu jo kame piny oloo, di ikounu tamakino muducaro jocan atie i lobo noni.

⁵Wun iwacunu kenu kenu be, “Awene kame ceng kacil me Ebagga me Por Duwe bino jik kede, tetekeny wan ocak cato engano wa? Awene kame piny bino yuto kede i ceng Sabato, tetekeny wan ocak bobo cat? Di do wan oko bino sero jo; obino tic kede gipim me aram kede misani kame kolalago pi kwalo jo kame wilo jame kibut wa.



⁶Wan obino cato engano akony mere li i wel amalo. Obino udo ngacan kalikame twero culo banya mere, akadi banya atitidi arom kede wel me wilo kalabanda, di wan oko wile bala epasoit.”

⁷Rwot kame ikwae ka Yakobo wakere pire okwongere be, “Likame wia bino wil kede tice gi areco.

⁸Pi manoni abino mino lobo noni yangere, di jo dedede kame bedo iye ko bedo kede iturur. Lobo noni dedede bino tingere di epoto bala ecilet me Nail atie Misiri.

⁹I ceng nono abino mino ceng donyo di piny ko doko col i dier iceng, ango Rwot Rubanga en awaco.

¹⁰Abino loko ibagai wu doko iturur, di were wu dedede ko doko koko. Abino mino jo dedede ngapo ipukoi di kiko kiso wi gi. Ibinunu bedo cal bala jonywal atie koko pi to me atin gi acel kenekene. Gi dedede kame bino timere bino jik di ekelo twon lito.

¹¹” Kare ateteni tie bino kame ango abino cwano kede kec i lobo; likame kec me cam amoto orio me pii. Kec kede orio me winyo kop na en kame jo bino bedo tie kede, ango Rwot Rubanga en awaco.

¹²Gin kibino wiratoi cako ki Nam Oto tuno i nam adwong me Mediterania, kede cako ki bad tetu malo tuno i bad tetu kide; gin kibino donyo ringo tuni tuni mono kop na, do likame kibino ude.

¹³I ceng nono akadi anyira kede awobe apwodi tek bino popoto di kiwile pi orio me pii.

¹⁴Jo kame kwongere i nying rubangan me Samaria di kiwaco be, ‘I nying rubanga me Dan, ‘amoto be, ‘I nying rubanga me Beereseba’, jo nogo bino popoto di likame kiko bino doko yai.”

Amosi 9

Ngolo Kop ka Rwot

¹Ango aneno Rwot di tie cungo i nget alutari, di eko waco be, “Dip wi ipirin me tempulo paka dud apama piny yangere. Tuturo gi di kiko popoto i wi jo. Jo kodong mege ango abino neko gi i yi, likame tie ngatamoro kikom gi kame bino lanyo, likame tie ngatamoro kame bino bwot.

²Akadi bed bala kikuny piny di kiko donyo i kabedo me jo oto, ango abino woto gi ki kunono. Akadi bed bala kiyiti i kabedo me i malo, pwodi ango abino mako gi di ako dwoko gi piny.

³Akadi bed bala kipwoni i wi moru me Kamel, ango pwodi abino mono gi di ako mako gi. Ka kipwono na piny i dud nam adwong, ango abino golo cik ne twol me nam di en eko totongo gi.



⁴Akadi bed bala jokwor gi mak gi di oko donyo kolo gi pi koto tero gi ot bedo mabus obukui, do ango abino golo cik di oko neneko gin dedede. Ango abino ciko wanga i kom gi pi kelo negi can do weko bero.”

⁵Rwot Rubanga me jo yi mulo wi lobo, di en eko yangere, di jo dedede kame bedo iye ko bedo kede iturur. Wi lobo lung donyo tingere di epoto bala ecilet me Nail i Misiri.

⁶Rwot gero agolai mege i kabedo me i malo, di eko peto edou koyarere malo i wi lobo. En elwongo pii me nam adwong, di eko onyo gi i wi lobo. En nyinge Rwot!

⁷Rwot waco be, “Okwe wun jo me Isirael, kur iterunu be wun ipatunu kede jo me Abisinia. Ango en kame akwanyo jo Pilistia ki Kurete, doko da ango en kame akwanyo jo me Aram ki Kir bala kame akwanyo wuda kede ki Misiri.

⁸Ango Rwot Rubanga wanga tie i kom ajakanut kopong kede dub me Isirael noni, doko abino muducaro en ki wi lobo. Do likame abino muducaro jo dedede me Isirael.

⁹” Ango abino golo cik di ako yayango jo me Isirael i diere me atekerin apat, bala kame koyayango kede alos atie i kekei, di likame tie ngat arac moro kame ko bino bwot.

¹⁰Kobino neneko jodubo duc i yi, gin jo kame kiwaco be, ‘Likame tie gikarac moro kame bino timere ne wa.’ “

Dwoko Isirael i Kuo mere Kasek i Kare me Anyim

¹¹ Rwot waco be, “Ceng tie bino kame ango abino kiarao kede ajakanut ka Daudi kame nataman cal bala ot kopopoto. Ango abino gere di bobo eko dok i cal mere kariki sek.

¹²Di jo me Isirael ko bino mano bobo donge me lobo me Edom, kede me atekerin ace koudo obedo mega. Ango Rwot en awaco, doko gikame awaco bino cobere.

¹³” Kare tie bino,” Rwot en owaco, “kame kare me cuno kodi me engano bino tuno di udo pwodi likame kotieko nyaro ace ki poti; doko da kobino puro olok anyen di eko cek di pwodi likame kotwero tieko bino anyakini me olok me dwete kokato. Bwini awinyiwinyi bino totonun ki wi mori, ebino mol piny ki wi imukuran.

¹⁴Ango abino dwoko ne jo na me Isirael mulem gi me kare kasek. Gin kibino temuno gero bomban gi di kiko donyo bedo iye; gin kibino puro poti me olok di kiko mato bwini mere; kibino puro poti di kiko camo gikame kipuro.

¹⁵Ango abino sipakino jo na i lobo kame oudo amio gi bala yat kame kopito, di likame oko doko bino puto gi kiye.” Rwot Rubanga wu en kowaco.



Obadia

Obadia 1

¹ Manoni en kop amako Edom, kame Rwot Rubanga bin omio Obadia.

Rwot bino mino Jo Edom Alola

Rwot otieko cwano ngaor mere but atekerin, kop mere kame wan owinyo ine be, “Ikerenu! Mito iotunu yi kede Edom!”

² Rwot waco ne jo Edom be, “Ango ateteni abino mino idokunu jo agoro twatwal i diere me atekerin; jo dedede bino bedo kede acae but wu adikinicel.

³ Ewaka me cunyu ongalo wu. Bomba wu adwong tie kakobabarun me mori; paco wu tie malo i wi moru, manono en komio wun iwacunu i cunyu be, ‘ Likame tie dano moro akadi acel kame twero wano wan piny.’

⁴ Do akadi iporunu i malo bala ekokom i kakame wiriwir, akadi igerunu ude wu i diere me acerin, ango abino wano wu piny ki kunono.

⁵ ” Ka jokuwo oko bino iwor di gin kiko yak, gin kitero gikame gin oudo kimito kenekene. Ka jo ngwedo olok, mam kiweko mogo? Do wun jokwor wu bino tieko wu pitipit.

⁶ Ikwaē ka Esau, kobino pekeso kabedere wu dedede di oko yako jamini wu kabeco.

⁷ Jo kame wun ikoderenu kede gi bino ngalo wu, gin kibino riamo wu tenge ki piny wu. Jo kame wun oudo iwinyerenu kede gi bino lokere yi kede wu di kiko bwono wu. Jo kame wun oudo icamunu kede gi karacel bino lokere ciko ne wu obek, di wun likame ingeunu gimoro iye.

⁸ ” I ceng kame ango abino mino kede jo Edom alola, ango abino muducaro jo ariek kikom gi di ako tieko rieke gi dedede.

⁹ Jo yi me bomba me Teman lworō atek bino mako, di oko bino neneko isirikalen me Edom dedede.”

Gi komio Edom bino oudo Alola

¹⁰ Rwot waco be, “Ango abino timo manoni piento wun ikounu yako imiegu wu di ikounu neneko gi, gin ikwaē ka Yakobo; kobino muducaro wu di oko bedo mino wu lewic nakanaka.

¹¹ I ceng nono wun bin ikounu cungo tenge, di jokwor turo irutei me Yerusalem. Wuda oudo iracunu bala jokumbor nogo, jo koterō abar me Yerusalem di kiko popoko kede uco alulu.

¹² Wun oudo koto bin likame ilelunu i wi imiegu wu me Yuda i ceng kame winyo arac opoto negi kede. Likame wun oudo ipoorenu lelebo i wi jo me Yuda i ceng kame



peko opoto negi kede. Likame wun bin ipoorenu nyero gi i kare kame kitie neno kede can.

¹³Likame wun bin ipoorenu donyo i bomba ka jo na i ceng kame gin bin kitie kede i peko. Wun likame bin ipoorenu konyo jo lelebo i wi jo Yuda, i ceng kame bin kitie neno kede can. Wun likame koto bin iyakunu abar gi i ceng kame gin oudo kitie kede i peko.

¹⁴Wun likame oudo ipoorenu cungo i akarakara me yote pi mamako jo kame oudo tie bwot. Likame wun oudo ipoorenu mino gi i cing jokwor i ceng kame oudo kitie kede i peko.”

Rubanga bino Ngolo Kop ne Atekerin

¹⁵Rwot waco be, “Ceng odoko iyapiyapi kame angu Rwot, abino ngolo kede kop ne atekerin dedede. Edom, gikame in itieko timo nono en kame kobino timo ne ida. Gikame in itimo nono bino dwogo i wii.

¹⁶Jo na otieko mato ikopo me lilo na, ki wi moru na kacil. Aso, atekerin dedede kame kio kede gi bino gida mato gikame romo gi; di kiko doko li atwal.”

Jo Isirael bino Bwono Jokwor gi

¹⁷” Do i wi moru me Sion, jo kame bino bwot bino bedo tie, di en eko bino doko kabedo kacil. Ikwae ka Yakobo bino riamo tenge jo koudo omao lobo gi.

¹⁸Ikwae ka Yakobo kede me ka Yosepu bino bedo cal bala mac; di ikwae ka Esau kobedo bala arienge; gin kibino muducaro ikwae ka Esau bala kame mac wango kede arienge. Likame tie akwar Esau moro kame bino dong kuo. Angu Rwot, en awaco.

¹⁹” Jo me bad tetu piny me Yuda bino bedo Edom; jo me bad mori me tetu tim bino mako Pilistia; Adulion me Epuraimu kede Samaria bino doko me jo Isirael; jo ka Benjamin bino tero Gilead.

²⁰Jo Isirael kame tie Kala bala mabus bino dwogo di gin kiko mano lobo me Poenisia ape tuno Sarepat i bad tetu malo. Jo me Yerusalem kame tie Separad bala mabus bino mano bomban me bad tetu piny me Yuda.

²¹Jo kame Rwot olako bino ot i moru me Sion di gin kiko pugo jo Edom. Di Rwot kikome en kame ko bino bedo Abaka.”



Yona

Yona 1

Yona Odagi Winyo Kop ka Rubanga

- ¹ Bin Rubanga oyamo kede Yona wot ka Amitai.
- ²En ewaco ne be, “In oti i bomba adwong me Ninebe di iko waco ne raco mere; pien ango angeo dub me jo mege.”
- ³Do Yona oko gire lokere ot Tarusi pi ringo tenge kibus Rwot. En eoto paka Jopa di eko donyo i emeri koudo tie ot Tarusi. En eko culo sente mere me yongayo di eko donyo i emeri kede jokwang pi ot kede gi Tarusi, me wek ering tenge kibus Rwot.
- ⁴Do Rwot oko cwano yamo atek i nam; yamo nono oudo ger twatwal omio lworu oudo tie be emeri nono oudo twero atuturun.
- ⁵Jokwang emeri oko doko lwor, di ngat acelacel kikom gi oko donyo koko but rubanga mere. Gin kiko donyo lwomolwomo yec koudo tie i emeri i pii pi mine doko wekeweke. Esawa nono Yona oudo odonyo piny i yi emeri eko nino elelejun.
- ⁶Ngadwong me jokwang oko ude kuno di oko penye be, “Kom in itie nino? Yai malo ileg but Rubanga ni, cengemogo etwero konyo wa likame otounu.”
- ⁷Jokwang oko donyo yamo ken gi ken gi be, “Bianu olamunu gagi tetekeny ongeunu ngat komio can noni opoto i kom wa.” Gin kiko lamo gagi di gagi oko nyuto Yona.
- ⁸Gin kiko waco ne Yona be, “Wace wa gikomio can ni opoto i kom wa. Tic nin nyo? In iwok ki tuai? Turu tie tuai? In dano me ateker mene?”
- ⁹Yona oko dwoko be, “Ango abedo Ngaeburania. Ango aworo Rwot Rubanga me malo, ngat kocweo nam kede lobo.”
- ¹⁰Yona oko tuno kiton waco negi be en oudo etie ringo tenge kibus Rubanga. Cuo nogo oko medo ameda doko lwor, di kiko waco ne be, “Pinyo komio itimo kamano?”
- ¹¹Di do gin kiko penye be, “Nan wan do otim ni nyo, tetekeny nam kwei ne wan?” Pien buko me yamo oudo tie meede ameda.
- ¹²En eko waco negi be, “Kwanyanu ikounu uca i pii, di nam ko bino kwei ne wu; pien ango angeo be yamo ager noni obino ne wu pi ango.”
- ¹³Bed bala kamanono da, cuo ka oko cane kwango emeri ot i dog nam, do likame kiko twero, pien yamo oudo tie meede ameda buko kitek.
- ¹⁴Gin kiko kok but Rwot be, “Okwe Rwot, wan okwai, kur imi wa otoi pi dano noni. Kur imar i wi wa raco me onyo remo ali kede raco moro; pien in, Okwe Rwot, itieko timo bala kame yomo cunyi.”
- ¹⁵Aso gin kiko tingo Yona di kiko uce i pii; di do nam oko kwei.



¹⁶Cuo nogo oko medo ameda bedo kede lworu but Rwot, di kiko mino giayala but Rubanga di kikwongere.

¹⁷Do Rwot oko mino eputa adwong omwonyo Yona; Yona oko tieko iceng adek kede iwor adek i yi eputa.

Yona 2

Ilega ka Yona

¹Di Yona oko lego but Rwot Rubanga mere di oudo etie i yi eputa di ewaco be,

²”Ango alwongere but Rubanga kakame oudo atie kede i peko, di en eko gamo dogo. Ango akok kakame oudo atie kede i kabedo me jo oto, di in iko winyo dwana.

³In iuca i pii atut, i dier nam, di pii oko luka ouma, di ebuka ni apek dedede oko mol beo ki malo i koma.

⁴Di ango ako waco be kotieko riana tenge ki nyimi, bobo likame abino twero neno tempulo nin kacil.

⁵Pii omwonya; nam olwinya; egira otutuko wia.

⁶Adonyo piny paka i dud moru, i kabedo kame kogoo ekeko me erute mere atwal; do in, Okwe Rwot Rubanga na, iko wota ki kakatut di akuo.

⁷Kakame kuo na oudo tie yai kede, ango ako yutuno in Rwot; ako cwano kwac na buti, di oudo in itie i tempulo ni kacil.

⁸Jo kaworo caljwogi gikame kony gi li otieko weko winyo kop nin.

⁹Do ango abino mini pwoc, abino mini giayala di ako timo gikame akwongere iye. Alako wok kibut Rubanga.”

¹⁰Di Rwot oko waco ne eputa pi nyeto Yona i lobo kakatek, eputa oko timo kamanono.

Yona 3

Yona Oyei Winyo Kop ka Rwot

¹Rwot bobo oko medo yamo kede Yona.

²En ewaco be, “Yai ioti i bomba adwong me Ninebe iko tatamo iye kop kame ango atieko waco ni.”

³Aso Yona oko yai eoto Ninebe di lubere kede kop kame Rwot owaco ne. Ninebe oudo obedo bomba alac twatwal, manono omio rimaro en oudo tero ceng adek.

⁴Yona oko cako rimaro bomba; ingei ot pi ceng acel, en eko cako redo di ewaco be, “Odong ceng ot ongwon di oko bino dudubo Ninebe.”

⁵Jo me Ninebe oko yei Rubanga; kiko moko be gin dedede kipoore kanyo kec, di do gin dedede, joadongo kede joatino, kiko ngapo ipukoi pi nyuto be kiswilaro.



⁶Kakame abaka me Ninebe owinyo kede kop nono, en eko yai ki kom mere me ajakanut, eko gonyo ekanso mere di eko ngapo epuko, eko ot bedo i buru.

⁷En eko mino kosarakino kop i Ninebe be, “Abaka kede jodongo mege me awora mio cik be: camo gimoro amoto mato gimoro likame tie. Kop noni mako jo dedede, leini dedede, dok kede romini dedede.

⁸Jo dedede poore ngapo ipukoi, doko kopoore rwano ne leini dedede da ipukoi. Ngat acelacel poore bedo kede koko adwong but Rubanga. Jo dedede poore weko iponeso areco kede tim gi me gero.

⁹Ngai ngeo? Cengemogo Rubanga twero dwodwoko cunye di eko loko tam mere; cengemogo eromo weko gero kame etie kede di okounu bino bwot.”

¹⁰Kakame Rubanga oneno kede gikame kitimo, kite kame kilokere kede ki yote gi areco, en eko loko tam mere i kom can kame en oudo ewaco be bino potu i kom gi; likame eko timo gimoro.

Yona 4

Gero ka Yona kede Cuny me Kisa ka Rubanga

¹Kite kame Rubanga oloko kede tam mere oko wango cuny Yona twatwal, di eko doko ger.

²En eko lego but Rwot di ewaco be, “Okwe Rwot, mam oudo awaco ni manoni di oudo pwodi atie i piny wa? Manoni en komio oudo ango aringo Tarusi i agege. Pien ango angeo be in ibedo Rubanga angakisa kede atimo jo mwol; likame isunyo doko ger, ipong kede amara kalikame lokere, doko da nakanaka in itieko iikere pi gonyo cunyi di likame iko mino alola.

³Nan do, Okwe Rwot, kwany kuo na, pien eber nango to akaka bedo kuo.”

⁴Rwot oko dwoko be, “Benyo, epoore pi in doko ger?”

⁵Yona oko ot tetu kide di eko bedo piny. En eko tagalo goga moro di eko donyo bedo i tipo mere di edaro neno gikame oudo oyaro timere Ninebe.

⁶Rubanga oko mino yat odongo pi mino Yona tipo me kweno lieto me kome. Cuny Yona oko bedo yom twatwal pi yat nono.

⁷Do ceng alubo obai di piny tie ru, Rwot oko mino kudiling opiro yat nono di eko tuo.

⁸Kakame ceng owok kede, Rubanga oko mino yamo abuko di eliet owok ki tetu kide, di ceng oko rieny kitek i wi Yona paka en wile. Manono oko mino Yona oparo to. En ewaco be, “Eber nango to akaka bedo kuo.”

⁹Do Rubanga oko penyo Yona be, “Benyo, epoore ne in doko ger pi kop amako yat no?” Yona oko dwoko be, “Eebo epoore, akadi doko ger paka gero neka da!”

¹⁰Rwot oko waco ne be, “In itie keto cunyi i kom yat kalikame icane iye, doko kalikame in en ipito da; en edongo iwor acel di eko to da iwor acel.



11Benyo, mam ango do kur atam pi Ninebe, twon bomba adwong twatwal, kame tie iye idwe akalamo tutumia tol acel kede ot are kalikame ngeo gimoro, kede leini atot da?”



Mika

Mika 1

¹ Man en kop kame bin Rwot owaco ne Mika, dano me Moreset, i kom Samaria kede Yerusalem, i kare ka Yotam, Akas, kede Esekia, gin abakai me Yuda.

Wer me Koko Samaria kede Yerusalem

²Winyunu, wun atekerin dedede; winyunu, Okwe wun gi dedede kame tie i wi lobo! Rwot Rubanga bino mino ijura i komu ki tempulo mere kacil me malo.

³Nenunu! Rwot tie wok piny ki kabedo mere kacil; en eyaro bino piny di eko dero wi mori me wi lobo.

⁴Di mori ko bino calar i kakame en enyono, kibino calar bala adipor kame koketo i mac; gin kibino mol ot i aditoto, bala pii kame mol piny wok ki wi emukura.

⁵Manoni bino timere pi dub me jo Isirael. Ngai komio jo Isirael odubo? Jo me bomba me Samaria en kotero jo Isirael i dub! Kabedo mene en kame koworo kiye caljwogi i Yuda? Mam Yerusalem inonono?

⁶Pi manono, Rwot waco be, “Ango abino mino Samaria doko ameje kame tie obar, kakame kopuro iye olok. Abino bwoto kide mege i aditot di ako delelo acakini me apama mere ooko.

⁷Cal acwea mege dedede kobino ngingido, cul dedede kame komio but imalayan mege me tempulo kobino wango kede mac, doko caljwogi mege dedede ango abino dudubo. Samaria obedo coko gi nogi ki cul kame komio but imalayan. Nataman kobino yeno gi kotero gi me culo imalayan i kabedo kapat.”

⁸Di do Mika oko waco be, “Ango abino tururo di akok pi kop noni. Abino ot nono abongo egoe moro i koma, kede abongo amuka i tiena, pi nyuto cwer cunya. Abino delaro kede koko bala ekwee, di atururo bala ekululu.

⁹Apore ka Samaria likame cango, doko can nono otieko tuno Yuda da; amuducar nono otieko tuno i erute me Yerusalem, kakame jo na bedo iye.”

Jokwor Onoko Yerusalem

¹⁰Kur iwacenu jokwor wa i Gat gikame tie timere ne wa; kur ikokunu atwal atwala. Wun jo me Bet Leopera, bebelunu i apua pi nyuto cwer cunyu!

¹¹Wun jo me Sapir, katunu i piny me obukui bala mabus, di itien nono doko di lewic omako wu. Jo me Sanan likame twero donyo ooko me bomba gi. Jo me Betesel tie koko kitek, manono nyuto be gin likame bobo kikaruno konyo wu.

¹²Jo me Marot tie kuro gikame ber pi timere, di kitie kede par, pien Rwot otieko kelo can otuno i erute me Yerusalem.

¹³Wun jo me Lakis, tweunu ne asigiran cabalan. Wun en kame bin icakunu kelo dub Yerusalem, pien wun ilubunu dub me Isirael.



¹⁴Pi mano, wun jo me Yuda, miunu giamia me twaro wele but jo me bomba me Moreset Gat. Abakai me Isirael bino mito kony kibun jo me bomba me Akisib, do likame kibino udo.

¹⁵Wun jo me Maresa, Rwot bino kelo ne wu ngakwor kame bino bwono wu. Jotel, gin en jo kame kelo ne Isirael deyo, kibino ot pwno i abo me Adulam.

¹⁶Wun jo me Yuda, lielunu wi wu pi koko idwe wu kame imarunu. Lielunu wi wu dong ler bala me acut, pien kobino tero gi bala mabus i piny me obukui.

Mika 2

Gikame bino Timere ne Jo kame Tero Jocan Kirac

¹Jo kame buto di kineeno iwor kiakia pi iiko tam me timo gikarac tin tie i can benyo! Ka piny oru, gin di do kiko timo gikarac kame oudo kiiko nono, pien twer tie i cing gi.

²Ka gin kingobelo poti, kimaog gi ki cing wegi; ka kingobelo ude, kitero gi. Gin kitero won ot kirac di kiko mano ode kitero, doko kitero jo kirac di kiko mano gi iner me lobo kame kilunyo kibut joakwari gi.

³Manono en komio Rwot tie waco be, “Nenunu, ango nataman atie iikere pi kelo can i komu, can kalikame ibinunu bwot kiye; likame bobo ibinunu ot kede ewaka, pien kare nono bino bedo kare me peko.”

⁴I kare nono jo bino wero wer me agecan i komu. Gin kibino wer kaman: “Wan do otiek girwa! Rwot otieko tero lobo wa, en ekwanye kibut wa, di eko popoko en ne jo komako wa bala mabus.”

⁵Pi mano, kame kare otuno me dwoko ne jo ka Rwot lobo, likame tie ngatamoro kikom ikwae wu kame bino udo iner moro.

⁶Jo rabo na kop di kiwaco be, “Kur irabo ne wan kop kame cal kamago. Rubanga likame bino mino wan lewic.

⁷Benyo, wun iparunu be kolamo jo Isirael? Benyo, iparunu be Rwot likame romo dire? Benyo, magonogi obedo tice mege? Mam wun iparunu be en likame eromo yamo kede mwolo but jo kame timo gi kopoo?”

⁸Rwot gamo be, “Wun isurunu jo na bala jokwor; igonyunu igoen ki kom jo kame li kede gero moro, ki kom jo kame tie beo abea di kigeno be likame tie gimoro arac kame bino timere negi, doko di likame kitie kede tam moro me yi da.

⁹Wun ibedunu riamo tenge mon me jo na ki miere gi kame yomo cuny gi, doko igengunu idwe gi udo winyo na atwal.

¹⁰Yai iotunu, pien kan likame obedo kabedo me wei. Wun itiekunu pwoke kede dub wu di ikounu dudubo en atwal.

¹¹” Wun cunyu mito enabi kame bino di eko donyo waco ne wu kope me angalo be, ‘Ango amurao ne wu be, bwini kede kongo akec bino mol ne wu bala pii.’



¹²” Ango ateteni abino koko wun jo ka Yakobo, wun jo dedede me Isirael kodong. Ango abino koko wu karacel bala romini kame tie i anak. Lobo wu bobo bino pong kede jo bala romini kame tie cam i ebar.”

¹³Rubanga bino yabo negi yongayo di eko telo gi yai ki lobo me obukui. Gin kibino turo erute me bomba di kiko yai ot. Abaka gin, Rwot kikome, bino telo gi.

Mika 3

Mika Oronkino Jotel me Isirael

¹Winyunu, wun jotel me Isirael! Wun en kame tic wu obedo ngeno poko gikame opoore me atima, kede kalikame opoore me atima,

²aso di wun idagunu gikaber di ikounu maro gikarac. Wun iyangu nu jo na bala leini, di ikounu koko ringo ki cogere gi.

³Wun icamunu ringokom jo na. Ipacunu delkom gi, ituturu nu cogere gi, di ikounu totongo gi bala ringo me ateda.

⁴Kare tie bino kame wun jotel, ibinunu kok but Rwot pi konyo wu, do en likame ebino gamo dog wu. I kare nono en ebino kano wange kibut wu, pien udo wun itiekunu timo gikarac.

⁵Rwot waco kaman i kom inabin me angalo: “Wun inabin me angalo itienu rwenyo jo na! Wun iwacunu be mulem bino bedo tie ka komio wu gimoro me acama, do but jo kalikame mio wu gimoro, wun iwacunu be yi bino bedo tie.

⁶Wun kare wu otiek; piny tie do yuto ne wu. Pien wun irwenyunu jo na, likame bobo ibinunu udo gianyuta moro kibuta, doko likame ibinunu tuco kop moro me anyim.”

⁷Jo amurao kede jo kame lamuso kobino mino lewic mako gi. Gin kibino umo dog gi, pien Rubanga likame gamo dog gi.

⁸Do Rwot otieko pongo twer kede tipo mere i kuo na. En emia nwangcuny me yamo i kom ngolo kop me ateni, kede tuco ne jo Isirael dub gi.


⁹Winyunu kop noni, wun jopug me Isirael, wun jo kame idagunu ngolo kop me ateni, doko idwadwanyunu kop kame tie kakaler.

¹⁰Wun itienu gero Yerusalem, bomba ka Rubanga, kede sente me remo me jo, kede kame iudunu i yore karac.

¹¹Jotel me bomba ngolo kop pi cemusana, josaseredoti mio koculo gi pi pwonyo jo Iswil, inabino likame murao kwanyo di koculo gi. Aso di gin dedede kigengere but Rwot di kiwaco be, “Ateteni Rwot tie kede wa, likame tie gimoro arac kame bino timere ne wa.”

¹² Aso, pi wun, kobino puro Sion bala poto, Yerusalem bino doko atukit me ameye, di wi moru kame nataman tempulo cungo iye ko bino doko abum.

Mika 4



Rwot bino Kelo Anapakin i Wi Lobo Lung

(Isaya 2.2-4)

¹I kare me anyim moru kame tempulo cungo i wie bino bedo moru abor malo kalamo mori dedede, ebino bedo bor malo kalamo imukuran dedede. Atekerin dedede bino sirito iye,

²Jo atos bino ot iye di kiwaco be, “Ootunu i wi moru ka Rwot, i tempulo ka Rubanga me Isirael. En ebino pwoyo wa gikame en emito ne wa timo, di wan oko lubo kop mere.” Pien pwoyo ka Rwot bino wok ki Sion; kope mege bino wok ki Yerusalem.

³En ebino ngolo kop i diere me atekerin, i diere me atekerin atek kame iyapiyapi kede kame tie kakabor. Gin kibino teto ipimai gi doko leb kwei me dok, kede tongini gi kibino teto doko pale me lwero yen. Atekerin likame bobo bino yi, akadi pwoyere i yi bobo.

⁴Ngat acelacel bino bedo kede anapakin di ebedo i dud olok kede i dud yen epigi mege, di likame tie ngatamoro kame mie lworo. Manoni Rwot me jo yi en owaco.

⁵Ateker acelacel lubo rubanga mere, do wan obino lubo Rwot Rubanga wa nakanaka.

Jo Isirael bino Dwogo ki Obukui

⁶Rwot waco be, “I kare nono ango abino koko karacel ingwalasa, kede jo koudo ango amio oneno can ki obukui.

⁷Ingwalasa bino bedo donge me jo na, kede jo kame koudo koriamo tenge, bino doko ateker atek. Di ango Rwot en kame ako bino bedo pugo gi i moru me Sion nakanaka.”

⁸Aso in, Yerusalem, kabedo kame Rubanga, bala ngakwat, neno kiye jo mege, ibino bobo bedo bomba adwong kame abaka ni pugo kiye bala bin sek.

⁹Yerusalem, pinyo kara komio in itie boroboro koko? Pinyo komio in itie winyo lito bala dako kame tie ramere me nywal? Benyo, mam nat in itie kamanono pien in ili kede abaka, doko jo kame mii tam otieko to?

¹⁰Wun jo me Yerusalem, kwekwetanu di icurunu bala dako kame tie ramere me nywal, pien nataman wun miero iwekunu bomba di ikounu ot bedo obar i kimere. Wun ibinunu ot Babilon, do Rwot bino lako wu ki cing jokwor wu ki kunono.

¹¹Aso, nataman atekerin atos otieko cokere pi suri. Gin kiwaco be, “Miero komunao Yerusalem! Wan obino nene kede wang wa di kotieko dudubo en.”

¹²Do atekerin nogi likame ngeo tam ka Rwot. Gin likame kingeo be en ecoko gi karacel bala engano kame kocoko pi canyo, pi mino gi alola.

¹³Rwot waco be, “Wun jo me Yerusalem, yaunu di ikounu ot canyo atekerin nogo! Ango abino mino wu ibedunu tek bala twon kame tunge tie lilim, doko abelekek mege obedo me nyonyo buronsi. Ibinunu nyinyito atekerin atos, di abar kame gin kitie kede, kame oudo kiudo i yore me gero, wun ikounu bino kelo buta, ango Rwot me wi lobo lung.”



Mika 5

¹Yerusalem, jokwor otieko luki! Gin kitieko juto lem ngatel me Isirael kede ebela me lilim.

Rubanga Ocikere pi Mino Ngapug Kawok ki Betelem

²Rwot waco be, “In Betelem Epurata, in en bomba acel kikom bomban atitino twatwal me Yuda, do ango abino yero ngapug me Isirael kibuti, ngapug kame diakal kame kobino nywale iye wapere paka tuno i kare kasek.”

³Pi mano, Rwot bino jalo jo mege atatai tuno i kare nono, kare kame dako kame tie ramere me nywal bino nywalo kede wode. Di do jo Isirael kame tie obukui bala mabus ko bino dwogo ribere kede jo Isirael wad gi.

⁴Ka ngapug nono obino, en ebino gwoko jo mege bala kame ngakwat gwoko kede romini. En ebino pugo gi kede teko kame Rwot mie, kede angosibib ka Rwot Rubanga mere. Jo mege bino bedo kede anapakin, piento en ebino bedo dano adwong i wi lobo lung.

⁵En ebino kelo anapakin.

Alako kede Alola

Ka jo Asiria oko bino suro lobo wa, di gin kiko turo apama me cel wa, wan obino yero jotel kame romo di oko cwano gi ot yi kede gi.

⁶Gin kibino bwono jo Asiria di kiko donyo pugo gi, en lobo ka Nimurod. Gin kibino lako wa ki cing jo Asiria ka jo Asiria nogo oko suro lobo wa.

⁷Di do donge me jo Isirael kame osasarun i diere me atekerin apat, ko bino bedo cal bala toyo kame Rwot ocwao pi bido lobo, arabo bala kot kame cwei i kom lum, kalikame dano twero timo iye gimoro kwanyo kenekene Rubanga.

⁸Donge me jo Isirael kosasarun i diere me atekerin apat bino bedo cal bala engu kame tie i diere me leini me abum, arabo bala engu owor kame tie i diere me esipan me romini. Ka en ebeo i kom romini esosomo i kom gi di eko nyinyilo gi, abongo ngatamoro kame lako gi.

⁹Jo Isirael bino bwono jokwor gi di kiko muducaro gin dedede.

¹⁰Rwot waco be, “I kare nono ango abino neneko asigiran wu di ako dudubo cabalan wu.

¹¹Ango abino muducaro bomban me lobo wu di ako rereto piny kadedere wu dedede kame kocelo di tek.

¹²Abino jiko tim me jwok kibutu, doko likame ibinunu bedo tie kede jo kame lamuso gagi.

¹³Ango abino muducaro caljwogi wu kede kide kame kosipo kame koworo; likame ibinunu bobo woro jamini kame itimunu kede cingu.



¹⁴Abino puputo cal me rubanga Asera ki diere wu di ako muducaro bomban wu.

¹⁵Ango abino timo onyanga kede twon gero, i kom atekerin dedede kalikame oko lubo kop na.”

Mika 6

Pido kame Rwot tie kede i kom Jo Isirael

¹Winyunu kop kame Rwot tie waco. En ewaco be, “Yaunu malo di ikounu mino pido wu; mito imukuran kede mori winy kop kame wun iwacunu.”

²Wun mori kede acakini me lobo kame bedo nakanaka, winyunu pido kame Rwot tie kede i kom jo mege! En etie pido jo Isirael.

³Rwot penyere be, “Okwe wun jo na, nyo kara kame ango atimo ne wu? Nyo kame ango aolo wu kede? Wacanu!

⁴Ango akwanyo wu ki lobo me Misiri, di ako lako wu ki ipasun. Ango ako cwano Musa, Aaron kede Miriamu pi telo wu.

⁵Okwe wun jo na, kong yutununu gikame Abaka Balak me Moab bin oiko pi timo i komu, kede epone kame Balaam wot ka Beor oko gamo kede doge. Yutununu da gikame bin oko timere i yongayo, cako ki Akasia tuno Giligal. Yutununu gi nogi tetekeny iniangunu i kom gikame bin ango Rwot ako timo pi lako wu.”

Gikame Rwot Mito

⁶Kara nyo kame ango abino tero but Rwot, Rubanga me malo, kame aoto wore? Benyo, abin aot i nyime di atero giayala awanga me roya me mwaka acel?

⁷Benyo, cuny Rwot bino bedo yom ka ango atero bute romini tutumian kede tutumian, arabo icileta kame bedo mol mo me olibeti nakanaka? Benyo, abin amie atin kao na bala giayala pi gikareco na?

⁸Okwe in wot dano, Rwot otieko waco ni gikame ber. Gikame en emitto ki buti en ine: in bedo timo gime ateni, nyuto amara kalikame lokere, kede mwolere bedo timo gikame Rubanga ni mito.

⁹Lworo Rwot obedo tim me riekko. En elwongere but jo kame tie i bomba be, “Winyunu, wun jo kocokere i bomba!

¹⁰Benyo, iparunu be wia twero wil kede jamini kame koudo i yore kalikame ber, jamini kame tie i ude me jotim gikareco, kede gipim kame kokwalo kede jo, gikame cunya dagi?

¹¹Benyo benyo kame ango atwero sasiro kede jo kame tio kede misanin areco, kede kame tio kede kide me misani kame sero jo?

¹²Jo ni kobaro tero jocan kirac, doko gin dedede kiyamo kope me angalo kenekene.

¹³Pi mano, ango atieko cako tojo wu, abino mino wu idongunu nono pi dub wu.



¹⁴Ibinunu cam, do likame ibinunu yeng, ibinunu dong di iwinyunu kec kamanono. Ibinunu kano jamini do likame ibinunu twero gwoko gi, doko gikame ibinunu gwoko, ango abino kelo yi muducaro gi.

¹⁵Ibinunu cuno kodi, do likame ibinunu kano gikame icuwunu nogo. Ibinunu biino anyakini me olibeti do likame ibinunu tic kede mo nono. Ibinunu biino anyakini me olok do likame ibinunu mato bwini nono.

¹⁶Manoni bino timere pien in Yerusalem ibedo lubo iswilia ka Abaka Omiri, kede tim dedede me ot ka Abaka Akab, doko in ibedo lubo tam gi. Pi mano, ango abino mini idong nono, di jo ni ko bino doko jo kame koyisiro kede acae. Aso, in ibino kanyakino anyera me atekerin dedede.”

Mika 7

Iponeso me Jo Isirael Odubere

¹Okwe can! Ango atieko doko cal bala dano kame kec oneko di eko ot mono anyakini i wi yat, di likame eko udo moro, pien jo otieko raro olok koudo odong. Likame tie abunge moro me olok arabo anyakini moro me epigi kame cunya oudo mito ngwedo.

²Jo kame genere otieko doko li i lobo, likame tie ngatamoro kodong kame timo gi kopoore. Jo dedede maro kino jowot gi pi neko. Ngat acelacel tie dwaro ngat ocelu emitto make.

³Gin dedede kitie jo ipirana i timo gikarac. Jotel kede jongolkop penyo cemusana. Jo kame koworo waco ne jotel gikame gin kimito, di gin kiko iiko tam pi ngolo kop kalikame tie me ateni.

⁴Akadi ngat aber twatwal kikom gi da kony mere li bala okuto me ocokocok. Kare me mino gi alola otieko tuno, bala kame inabin jo akio piny bin okwenyaro kede. Nataman gin kitieko babangun.

⁵Kur iket geni i kom adieri moro, arabo ngatamoro kame imaro. Gwok kop kame iwaco akadi but dako ni.

⁶Pien i kare nogi awobe tero papi gi bala jomingo, anyira piemo kede toti gi, mon kame konyomo da cuny gi lagi toti ka cwog gi. Ngakwor ka dano obedo jo me ode.

⁷Do ango gira abino geno Rwot; abino kuro Rubanga pi laka. Rubanga na bino winyo kwac na.

Rwot en kame Kelo Alako

⁸Okwe wun jokwor na, kur ilelunu i wia. Ka ango apoto, ango abino bobo yai. Ka ango ako bedo kakacol, Rwot en kame bino mina lero.

⁹Ango atimo dub but Rwot, pi manono, ango miero akany lilo mere, tuno en gango kop na di eko ngolo kop me ateni, pi gi dedede kame kotimo i koma. En ebino kela ooko i lero; ango abino neno ngolo kop me ateni mere.



¹⁰Di do jokwor na kobino neno manoni di lewic ko mako, gin jo kame oudo kipenya be, “Kara ani Rwot Rubanga ni nono?” Ango abino neno kede wanga di kobwono gi, di konyonyono gi piny bala cwoto me yongayo.

¹¹Wun jo me Yerusalem, kare me gero apama me bomba wu tie bino. I kare nono kobino nyano ikor wu.

¹²Joe wu bino bino butu yai ki Asiria, Misiri ape tuno i ecilet me Eupurate, kibino yai ki name kede ki mori me kakaboco.

¹³Lobere nogo bino dong nono pi gikareco me jo kame bedo i yi gi.

Cuny me Kisa ka Rwot i kom Jo Isirael

¹⁴Okwe Rwot, kwai jo ni bala romini kede ebela ni me kwat, jo kobedo meggi kame iyero. Bed bala gin kitie bedo ken gi i abum, do lobo amio orimaro gi. Mito gin kiot cam Basan kede Gilead bala i kare kasek.

¹⁵Tim ne wan giaura mogo, bala kame bin itimo i kare kame bin ikwanyo wa kede ki Misiri.

¹⁶Atekerin bino neno manoni di lewic ko mako gi pi kony me teko gi li. Kom gi bino to di likame kiko twero yamo arabo winyo kop.

¹⁷Gin kibino liao alia i lobo bala twole di kimoko apua; gin kibino wok ki kapwono gi kame kocelo di tek di kom gi miel pi lworu. Gin kibino bedo kede lworu atek but in Rwot Rubanga wa.

¹⁸Okwe Rwot, likame tie rubanga moro kame cal bala in; in isasiro dub me donge me jo ni. In likame idong di ililo nakanaka, pien in cunyi yom pi nyuto amara ni kalikame lokere.

¹⁹In bobo ibino bedo kede cuny me kisa i kom wa. In ibino nyono dub wa i tieni piny di iko lwomo gi i dud nam kakatut.

²⁰In ibino nyuto genere ni kalikame yangere but ikwae ka Yakobo kede Aburam, bala kame riki ikwongere kede but joakwari wa i kare kasek.



Nakum

Nakum 1

¹ Manoni en kop kame kowaco i kom Ninebe, kop kame mako gianyuta kame Nakum, dano me Elikosi bin oneno.

Lilo ka Rwot i kom Ninebe

²Rwot obedo Rubanga kame nganyeko, doko en etimo onyanga; Rwot timo onyanga doko en elilo. En etimo onyanga i kom jo kame dage doko en ebedo ger ne jokwor mege.

³Rwot likame susunyo lilo do etie kede twon twer, doko en likame eweko jo kame tie kede raco abongo mino gi alola. Kakame Rwot beo iye apipiru kede yamo atek me kot cakere iye; idoun obedo apua kame tiene dunyo!

⁴En emio nam cik, di nam ko tuo! En emio icileta tuo. Poti amio me Basan kede me moru me Kamel en emio ner, kede ature me moru me Lebanon da en emio ner.

⁵Kabedo kame Rwot tie iye mori yangere, doko imukuran calar. Kabedo kame Rwot tie iye piny yayangun, piny kede jo dedede kame tie iye bedo kede mielkom.

⁶Ka en elilo, ngai kame twero cungo i nyime? Ngai kame twero kanyakino gero mere? En ebwoto lilo mere bala mac, di eko bebelo kide.

⁷Rwot ber, en etie bala apama me cel atek kame gwoko jo mege i kare me peko; En egwoko jo kame ringo gwokere bute,

⁸akadi ki twon ariram kame dipere ringo kitek. En ebino tieko jokwor mege, ebino wapo gi paka kakacol.

⁹Pinyo bo kamio wun itimunu iik arac i kom Rwot? En ebino muducaro wu. Likame tie dano moro kame rucakino piem kede en.

¹⁰Gin kical bala okuto kokodo, doko kical bala joamera omer kede bwini; kobino muducaro gi atwal atwala bala arienge kotuo.

¹¹Kibut in Ninebe, tie dano ni moro kame tie kede iik arac i kom Rwot, dano kame kelo tam me timo gikarac.

¹²Manoni en kop kame Rwot tie waco ne jo mege be, “Bed bala jo Asiria tek di kitot, kobino tieko gi di kiko doko li atwal. Jo na, bed bala ango ako mino wu inenunu can, likame bobo abino medo timo kamanono.

¹³Ango nataman abino jiko twer me Asiria i kom wu, di ako cocoto irikoi kotweo wu nogo.”

¹⁴Jo Asiria, manoni en gikame Rwot otieko ciko i komu: “Wun likame ibinunu bedo tie kede idwe kame bino mino nying wu meede bedo tie. Ango abino muducaro



caljwogi wu kame tie i tempulo me rubangan wu. Ango abino kunyo ates wu, pien wun kony wu li.”

¹⁵ Nenunu wun jo me Yuda! Ngaor moro tie bino ki wi mori kede kop aber. En etie kelo kop me mulem! Tedunu ebaga wu di ikounu mino Rubanga gikame oudo icikerenu pi mine. Jo areco likame bobo bino suro lobo wu. Kotieko muducaro gi atwal.

Nakum 2

Ninebe Opoto

¹Ninebe, ngat kame ngingido in otieko bino pi suri. Ket isirikalen ni dar wi apama ni me cel! Darunu yongayo! Cok teko ni lung di iko iikere pi yi!

²(Rwot oyapuno dwoko deyo me jo Yuda, karacel kede me jo Isirael, bed bala joyak otieko yako gi pitipit.)

³Isirikalen me jokwor mako ibukui akwar, doko kingapo igoen akwar. Cabalan gi meny bala mac i ceng kame gin kitie iiko gi kede me yi; asigiran gi cuny gi lelepa di kidaro ot yi.

⁴Cabalan ringo i yote bala kipoi, kiringo tuni tuni di kibeo i yote alac. Gin kimeny bala mac me rau, kiketo wil wil bala meny me kot.

⁵Kolwongo jotel me isirikalen; gin kigete di kioto anyim. Gin kionyarot ot i apama me cel di kiko gero gikame galao gi ki kide kame kouco piny ki wi apama me bomba.

⁶Irutei kame tie i bad me ecilet oyabere; lworot atek omako paco ka abaka.

⁷Komako dako ka abaka di oko tero bala mabus; mon jotie mege kok bala aweleko di kibapo kor gi pi paro can.

⁸Ninebe cal bala atapar kodipere mol. Jo tie onyaro tenge kiye! Ngatamoro lelemo be, “Cungunu! Cungunu!” Do likame tie ngatamoro kame ngoloro cen.

⁹Yakunu siliba! Yakunu saabu! Jamini me wel, me epone dedede opong i bomba!

¹⁰Kotieko muducaro Ninebe, kotieko weke edong nono! Cuny jo onyote piris pi lworot; cong gi miel teltel, teko gi otiek; nyim jo dedede olokere.

¹¹Kara bomba noni kame oudo cal bala abo me inguon tie tuai? En oudo ecal bala kabedo kame inguon pito kiye idwe gi, kabedo kame engu adako kede engu icuo oto iye di idwe gi ko bedo abongo peko moro.

¹²Engu otieko neko le mere me acama doko etieko nyinyilo en ne dako mere kede idwe mege; en etieko pongo ringo kame enyinyilo i abo mere.

¹³Rwot me jo yi waco be, “Ninebe, angon en ngakwor ni! Ango abino wango cabalan ni. Kobino neko isirikalen ni i yi. In likame bobo ibino yako ateker moro i wi lobo, doko likame ibino cwano joor ni ot titimo ateker moro.”



Nakum 3

- ¹In tin itie i can benyo! In bomba kame nganek, bomba kopong kede angalo, kede jamini kame koyako; bomba kame yak mere likame jik.
- ²Winyi! Koko me ebela me del, mor me namisigan, itakar me asigiran, kede mor me cabalan kame tie ringini!
- ³Isirikalen kame ringo kede asigiran tie bino yi, ipimai milimilun, tongini meny! Kokumemo liele, kom jo oto kalikame marere, kame jo do gete i kom gi!
- ⁴Kotie mino Ninebe alola pi tim mere me malaya. En ecil doko etie kede yen atek me apipan, en epipao atekerin di eko mino gi kidoko ipasoi.
- ⁵Rwot Ngakaruno waco be, “Ninebe, ango en ngakwor ni! Ango abino elaro egoe ni malo i wii; di ako mino atekerin kede ajakanuto neni di itie nono, lewic bino maki di gin kineni.
- ⁶Ango abino bwoto yugi i komi di ako timo ni tim me acae. Abino mini idoko gikame jo neno kede acae.
- ⁷Jo dedede kame bino neni bino lokere dok cen di kiwaco be, ‘ Kotieko tiatiao bomba me Ninebe piny! Ngai kame bino koke? Ngai kame bino mito kweno cunye? ’ ”
- ⁸Ninebe, benyo, iparo be in iber ilo bomba me Tebes? En oudo etie i nget ecilet me Nail, di pii oluke diere bala apama me cel mere.
- ⁹Teko mere oudo cungo i kom Abisinia kede Misiri, doko oudo likame ejik; Put kede Libiya en koudo konye.
- ¹⁰Akadi kamanono da, bin oko tero jo me Tebes i piny me obukui bala mabus. Idwe gi bin koneneko i buli kona me gudo me bomba. Cuo kame bin koworo kibut gi, bin kotero di kotweo kede irikoi. Jo komako gi bin uco alulu me popoko gi.
- ¹¹Ninebe, ida ibino mer! Ibino tamo mito bwot ki cing jokwor ni.
- ¹²Bomban ni kame kocelo kede apama atek dedede bino doko cal bala yen me epigi kame tie kede anyakini kocek. Ka koyayango yen, anyakini kocek me acama popoto i dog jokwor.
- ¹³Nen kong isirikalen ni! Gin kical bala mon, doko piny ni tie twolo ne jokwor ni. Mac bino wango alorito kame kocego kede irutei ni.
- ¹⁴Twomunu pii cuto, pien jokwor bino luko bomba, iikunu apama bed tek! Nyonunu lobo me timo matapali, di ikounu mako atubai me gono matapali.
- ¹⁵Akadi itimunu benyo, pwodi kobino wango wu paka to, doko kobino neko wu i yi. Kobino weno wu pitipit bala pototo kame obonyo ocamo. Wun oudo inywalunu bala obonyo!



16 Wel me jocat wil wu oudo omeede kalamo wel me acerin kame tie i edou. Do nataman gin kitieko yai bala obonyo kame camo jamini dedede di girgi kiko por ot tenge.

17 Jodar wu cal bala obonyo kame oony i wi apama i ceng kame piny ngic kede. Do ka ceng oko neeno, gin kipor di kiko ot tenge, di likame tie dano moro kame ngeo kakame gin kioto iye.

18 Okwe in abaka me Asiria, jo kame konyi pug oto, doko jo ni kame koworo otieko nino atwal! Jo ni osasarun i wi mori abongo ngatamoro kame bino bobo dwoko gi paco.

19 Awanon nin likame muketikin, doko aporeso nin likame cango. Jo dedede kame winyo rwonge me amuducar nin bapo cing gi pi kilel. Pien ngai kame oko bwot ki tim nin me gero kalikame jik nono?



Abakuk

Abakuk 1

¹Man en kop ka Rubanga kame enyuto but enabi Abakuk.

Abakuk obedo kede Koko pi Tim me Tero Jo Kirac

²Okwe Rwot kara abino tero kare kame rom amene di akok buti pi mito kony, en kame mio iko winyo di iko lako wa i tim me gero noni?

³Pinyo bo komio in imia aneno peko kame cal kaman? Pinyo komio in ineno anena tim arac kamano? Amuducar kede tim me gero odure i nyima, doko yi kede lok tie kabedere dedede.

⁴Iswil otieko doko goro, doko likame kongolo kop kakare. Jo areco nakanaka lo jo kopooore i pido, pi manono ngolo kop me ateni likame tie.

Kop kame Rwot Odwoko

⁵Di do Rwot oko dwoko ne jo mege be, “Bedunu ngico atekerin koluko wu, di ikounu bino bedo kede ur i kom gikame ibinunu neno. Ango ayaro timo gimoro kalikame ibinunu yei ka kowaco ne wu kop i kome.

⁶Ango atie mino jo Babilon doko tek, gin jogero kame kom gi mit. Gin kibino siritto ot kabedere dedede me wi lobo di kiko bwono jo me lobere apat.

⁷Gin kikelo ne jo lwooro atek; kiwakere di kitamo be gi dedede kame gin kitimo opooore, doko likame turo iswil moro.

⁸” Asigiran gin dwir kato irisai, doko kiger kato ipeon kame kec oneko. Joe gi kame ringo kede asigiran ringini kibino ki kakabor; asigiran gin takaro. Gin kipor kede ringo bala ekokom kame mwomere i kom gikame emitto mako me acama.

⁹” Gin dedede kibino kede tim me gero, di kiko koko jo kame kimako di tot bala asinge.

¹⁰Gin kicao abakai, doko kinyero jopug anyera. Kineno apama me cel me bomba di kiko nyero anyera, di kiko toro lobo i ngete di kiko mane.

¹¹Di do gin kiko beo awakawaka bala yamo di kiko kato, gin jodubo kame teko gi en kobedo rubanga gi.”

Abakuk bobo Obedo kede Koko but Rubanga

¹²Okwe Rwot Rubanga na, Ngat Kacil, in en ibedo Rubanga cako i kare kasek, in ibedo nakanaka. Rwot, Rubanga na kede ngagwok na, in itieko yero jo Babilon di iko mino gi teko me mino wan alola.

¹³In ibedo ngat kacil, pi manono likame iromo kanyakino neno gikarac, doko in likame iromo neno anena tim arac. Pinyo kara komio in itie ling alinga di jo areco tie muducaro jo kopooore kato gin?



¹⁴Benyo benyo kame in itero kede jo bala odoko dek me nam, arabo bala gimogo kame liao alia i piny, gikame li kede ngatel?

¹⁵Jo Babilon kodo jo kede golu, ineno bala jo odoko aporogo. Gin kiwao gi kede bwoi, kigalalo gi i kokoto, di kiko tero gi di kilelebo.

¹⁶Pi mano, gin kimio giayala but bwoini kede kokoto gi, pien magonogo mio gi abar kede cam abeco.

¹⁷Benyo, gin do mam poore kibed gonyo aporogon ki bwoini gi kamanono, di kimuducaro atekerin abongo kisa moro i cuny gi?

Abakuk 2

Kop kame Rwot Odwoko ne Abakuk

¹Ango abino cungo i gedo na abor malo me kino piny, di ako kuro winyo gikame Rwot bino waco na, kede gikame en ebino dwoko i kom koko na bute.

²Rwot oko waco na be, “Wandiko gikame ango abino nyuto ni, wandiko en kiber i kom kide abatal, tetekeny some bed yoyot.

³Wandiko en, pien kare mere me cobere pwodi. Do kare nono tie bino oyotoyot, di gikame ango anyuto ni noni ko bino timere. In itwero neno bala kare nono tie gal, do kure; pien ateteni gi noni bino timere abongo gal.

⁴Neningo joewaka! Gin likame cuny gi opoore, pi mano gin likame kibino bwot, do jo kopooore bino bedo kuo pi genere gi but Rubanga.”

Jo kalikame Opoore bino beo i Can

⁵Abar likame genere, doko joewaka likame bedo mot. Gin kibedo jo kowor bala kabedo me jo oto; kical bala to, gin likame tie gimoro kame romo gi. Manono en komio gin kicoko atekerin dedede but gi di kiko mino jo nogo doko mergi.

⁶Jo kame gin kimako nogo bino lokere golao gi kede yamo kame waco be, “Itienu i can, wun jo kame icokunu jamini kalikame obedo megu!” Kara ibinunu tero kare kame rom kamene di icokunu piru abar me jamini kame imakunu pi banyi?

⁷Do abongo mino ikwenyar, jo kame wun itienu kede banyi gi bino bino di kiko mito be iculunu gi. Kom wu bino miel teltel di gin kiyako wu.

⁸Wun itiekunu yako jo me atekerin atot, do nataman jo kodong kuo kikom gi bino yako wuda pi nek kame wun ibedunu timo, kede pi tim me gero kame wun itimunu i kom jo me wi lobo kede bomban gi.

⁹Itienu i can wun jo kame imiunu jo me ude wu oudo abar i yore arac. Wun itamunu gero miere wu kakame gimoro arac likame romo tuno iye, bala winyo kame gero ode malo!

¹⁰Do iik wu nono otieko kelo lewic ne jo me ude wu. Wun itiekunu kelo peko i komu kenu pi muducaro atekerin atot.



- ¹¹Akadi kide me kor apama me miere wu bino kok ki kor apama di kipido wu, di atekai me wi ude da ko bino gamo koko gi.
- ¹²Itienu i can! Wun igerunu bomba kede onyo remo me jo, kede tim me gero.
- ¹³Jo me atekerin kame wun imakunu obedo cane timo tic nono, pien gi dedede kame gin kigero bino wang i mac. Rwot me jo yi en kotimo manoni.
- ¹⁴Do lobo bino pong kede ngec i kom deyo ka Rwot, bala kame pii opongo kede nam adwong.
- ¹⁵Itienu i can, wun jo kame imiunu jo me atekerin me kio wu mato gero wu tuno gin doko cal bala jo komer, pi wun mito neno gin di kitie nono!
- ¹⁶Wuda kobino mino lewic pong i wi wu akaka wor. Ikopo me alola kame Rwot mako i cinge tetu cam kobino mino butu. Wun kikomu ibinunu mato ki ikopo nono. Ibinunu mer di jo ko bino neno wu di itienu nono. Lewic bino mako wu akaka wor kame koto jo mio wu.
- ¹⁷Wun itongunu piny yen me abum me Lebanon; nataman wuda kobino tongo wu piny. Wun inenekunu leini mege; nataman leini bino kelo ne wu lwooro atek. Manoni bino timere pi nek kame wun itimunu, kede pi tim me gero kame wun itimunu i kom jo me wi lobo kede bomban gi.
- ¹⁸Caljwogi kony mere nyo? En kenekene etie gikame dano en kotimo, doko likame tie gimoro kame en ewaco ni, kwanyo kenekene kope me angalo. Kony nyo me wone ngat kotime keto gen mere i kome di en ebedo rubanga kalikame karuno akadi yamo!
- ¹⁹Itienu i can wun jo kame iwacunu ne ebao be, “Ce!” Arabo ne kidi be, “Yai malo!” Benyo, iparunu be caljwogi karuno pwonyo wu? Neningo, en komwono kome kede saabu kede siliba, do likame etie kede wei me kuo.
- ²⁰Rwot tie i tempulo mere kacil; mito jo dedede me wi lobo ling titi i nyime.

Abakuk 3

Ilega ka Abakuk

- ¹Manoni en ilega kame enabi Abakuk oko lego:
- ²Okwe Rwot, ango atieko winyo kop i kom gikame in itieko timo. Ango atie kede lwooro atek i kom tice nin. Nataman med timo i kare wada; jamini adongodongo kame in bin ibedo timo. Ka iko lilo, yutuno cuny me kisa ni.
- ³Rubanga tie bino ki Teman; Ngat Kacil tie bino ki wi imukuran me Paran. Meny me deyo mere oumo malo; jo me wi lobo lung pake.
- ⁴En ebino kede meny kame cal bala meny me kot; asara yai ki cinge, kanono kakame en ekano iye teko mere.
- ⁵En ecwao tuwo telo ne yongayo di aumpuli ko lubo ki cen.



- ⁶Ka en ecungo, lobo yangere; ka en engoloro jo, kom atekerin miel. Mori kobedo tie cako riki sek ko bebelun; imukuran koudo tie cako i kare kasek ko lwiny piny, i yote kame en bin elubo i kare kasek.
- ⁷Ango ako neno jo Kusan di kitie neno can, kede jo Midian di kom gi tie miel.
- ⁸Okwe Rwot, benyo, icileta en kame bin oko wango cunyi? Benyo, nam adwong en komio in bin iko doko ger? In bin iringo kede idoun ineno bala itie ringo kede cabalan, di iko mino jo ni obwono jokwor gi.
- ⁹In oudo itieko iikere pi gweno emal ni. In bin imio icileta opoko lobo.
- ¹⁰Mori bin oneni di kiko yangere; twon pii oko bwote ki idoun. Pii me nam oko mor, di ebuka gi oko tingere malo.
- ¹¹Ceng kede duwe oko cungo kargi, pi meny me emal nin kame igweo tie ringo, kede pi milimilun me tongini nin.
- ¹²In iko beo i wi lobo di ililo; di iko nyonyono atekerin kede gero.
- ¹³In oudo ibino pi lako jo ni, ibino pi lako ateker ni kame iyero. In iko neko ngatel me jo areco, di iko muducaro atwal jo kame bin lube.
- ¹⁴In bin icocobo ngatel me isirikalen mege kede imalia mege, kakame gin kibino kede bala apipiru pi sasaro wan, di kilelo bala kimito nyinyilo jocan kame tie pwono.
- ¹⁵In iko beo i nam kede asigiran ni, di twon pii nono oko rubere.
- ¹⁶Ango awinyo mor noni di koma ko donyo miel; del dogo da ko donyo miel pi lwor. Koma ko keto nyonyok, di tiena ko mamanyun. Ango abino bedo mot di akuro ceng kame peko bino poto kede i kom jo kame suro wa.
- ¹⁷Akadi bed bala yen me epigi likame oko tuuro, di olok da likame oko nyak; akadi bed bala kodi me olibeti likame ko nyak, di poti likame ko woto cam moro; akadi bed bala romini di oko to dedede, di likame tie diang moro oko dong i awi,
- ¹⁸ango gira pwodi abino ilel pi Rwot; ango abino ilel pi Rubanga ngalak na.
- ¹⁹Rwot Rubanga en kame mia teko. En emio tiena bedo tek bala me atil, emia aringo i wi moru abongo gete.



Sepania

Sepania 1

¹ Manoni en kop kame Rwot bin omio Sepania i kare kame Yosia wot ka Amon en koudo tie abaka me Yuda. (Sepania oudo obedo wot ka Kusi, Kusi wot ka Gedalia, Gedalia wot ka Amaria, Amaria wot ka Abaka Esekia.)

Ceng ka Rwot me Ngolo Kop

²Rwot oko waco be, “Ango abino weno jamini dedede kame tie i wi lobo,

³jo kede leini, winy kede dek nam. Jo dedede kame timo gikareco ango abino mino kobwono gi. Abino tieko jo dedede i wi lobo, di likame tie dano moro kame ko bino dong. Ango Rwot atieko waco.

⁴” Ango abino mino jo me Yerusalem kede jo me Yuda dedede alola. Abino tieko jo kame woro Baal kame pwodi odong kabedo noni, di likame tie ngatamoro kame ko bino yutuno nying josaseredoti mege.

⁵Likame bobo kobino udo akadi dano moro acel kame yito i wi ot woro ceng, duwe, kede acerin, arabo jo kame wora di kikwongere pi lubo kop na, do di bobo kikwongere i nying rubanga Molek da.

⁶Ango abino muducaro jo kotieko lokere dok cen di kiko weko luba, gin jo kalikame bobo kibino buta, doko da likame kikwaa pi mino gi tam.”

⁷Lingunu titi i nyim Rwot Rubanga, pien ceng kame Rwot bino ngolo kede kop ne jo oyapuno tuno. Rwot tie iiko leini kame kobino ngolo bala giayala, doko etieko lwongo jokwor pi bino yako Yuda.

⁸Rwot waco be, “I ceng me nek nono, ango abino mino jotel kede idwe ka abaka alola, karacel kede jo dedede kame lubo itok me atekerin me obukui.

⁹I ceng nono ango abino mino jo dedede kame woro caljwogi alola, karacel kede jo kame pongo ot ka ngadwong gi kede jamini kame kiudo i yore me gero kede pi tim me angalo.”

¹⁰Rwot waco be, “Ceng nono ibinunu winyo di jo kok ki Erute me Aporogo i Yerusalem. Ibinunu winyo di jo wololo koko i adul anyen me bomba, kede mor me ude apopoto piny ki wi imukuran.

¹¹Wololonu koko wun jo kame bedo i adul kame tie pipiny me bomba, pien jocat wil dedede kobino neko.

¹²” I kare nono ango abino pekeso Yerusalem di atio kede etala. Abino mino alola but jo kame tie bedo mot abongo paro kop moro, jo kame waco i cuny gi be, ‘Rwot likame bino timo gimoro aber, doko da likame ebino timo gimoro arac.’

¹³Kobino yako abar gi, di oko dudubo ude gi. Akadi kiger ude, do likame kibino bedo i yi gi. Akadi kipur olok, do likame kibino mato bwini gi.”



Ceng Adwong ka Rwot

¹⁴Ceng adwong ka Rwot odoko iyapiyapi, etie tuno awakawaka. Ceng nono bino bedo ceng me lito, akadi sirikale atek i yi da bino boroboro koko.

¹⁵Ceng nono bino bedo ceng me gero ka Rubanga, ceng me peko kede me mwodo lak, ceng me dudubo kede me muducaro, ceng kame colpiny mere cucucuc, ceng kame col cucucuc di eumere kede idoun,

¹⁶ceng me kuto agwara me yi kede me ilelem me isirikalen kame tie suro bomba kame kocelo, kede gedo aboco malo.

¹⁷Rwot waco be, “Ango abino mino jo neno can kame bino mino jo dedede rarapo piny bala imuduka. Gin kitieko timo dub buta, aso nataman kobino onyo remo gin bala pii, doko liele gi bino top bala woyo.”

¹⁸I ceng me gero ka Rwot, akadi siliba gi arabo saabu gi likame bino lako gi. Mac me gero ka Rwot bino muducaro wi lobo lung. En ebino ngeso jiko kuo me jo dedede kame bedo i wi lobo.

Sepania 2

Enabi Ongangao Jo pi Swilaro

¹Cokerenu karacel, Okwe wun ateker kalikame lewic mako, cokerenu

²di pwodi likame kotero wu tenge bala cucung kame yamo kuto, di pwodi lilo agwai ka Rwot likame obino i komu, di pwodi ceng me gero mere likame otuno.

³Lokerenu but Rwot, wun jo dedede kame mwolere, jo kame bedo i lobo noni, wun jo kame ilubunu cik mege. Timunu gikame poore, di ikounu mwolere i nyim Rwot. Cengemogo ibinunu bwot ki alola i ceng me gero mere.

Rwot bino Mino Atekerin Koluko Isirael Alola

⁴Likame tie dano moro kame bino dong i bomba me Gasa. Asikelon bino doko ameje. Kobino riamo tenge jo me Asidod i dier iceng, di oko bino riamo jo Ekuron ki bomba gi.

⁵Ibinunu neno can wun jo Pilistia, jo kame bedo i dog nam. Rwot tie kede kop i komu. En ebino tieko wu di likame tie ngatamoro kame ko bino dong akadi acel.

⁶Lobo wu kame tie i nget nam bino doko elet kame kimere me jokwat kede anak me romini tie iye.

⁷Jo me Yuda kame bino dong kuo bino donyo bedo i lobo wu. Gin kibino kwano romini gi kanono, di ka piny oko yuto, kibuto i ude kame tie Asikelon. Rwot Rubanga gi bino paro pir gi di eko dwoko negi lonyo gi.

⁸Rwot Rubanga Won Twer waco be, “Ango atieko winyo ayet kede anywar kame jo Moab kede jo Amon tie kede i kom jo na, di kiwakere be gin kibino mano lobo gi.



⁹ Pi mano, ango Rubanga akuo, Rubanga me Isirael, akwongere be Moab kede Amon kobino muducaro bala Sodoma kede Gomora. Gin kibino doko kabedo kame bure me munyo odure iye, kabedo kodubere atwal, doko okuto oduko iye. Jo na kame bino dong kuo bino yako gi di kiko mano lobo gi.”

¹⁰Manoni en epone kame kobino mino kede jo Moab kede Amon alola pi tim gi me ewaka kede acae, kede pi ayet gi but jo ka Rwot me jo yi.

¹¹Rwot bino kelo negi lworro atek. En ebino mino rubangan me wi lobo lung doko gimoro li, di do atekerin dedede ko bino wore, ateker acelacel i lobo gi.

¹² Wuda jo me Abisinia, Rwot bino mino koneko wu i yi.

¹³ Rwot bino tic kede twer mere i bad tetu malo, di eko muducaro Asiria. En ebino mino bomba me Ninebe doko kabedo kame jo li iye, kakotuo bala wi tim.

¹⁴En ebino doko kabedo kame romini, doke kede leini me epone dedede bedo iye. Itukirin bino bedo i ameje mere, di kikok ki dirisan mege. Agak bino kok ki nyim ikekon. Jo bino tako di kiko tero tenge ibaon me seda kame koudo kogere kede.

¹⁵Manoni en gikame bino timere ne bomba kame wakere pi teko mere di eparo be likame tie gimoro arac kame romo timere ne. Jo mege tamo be likame bobo tie bomba moro ace i wi lobo, kame kato mergi. Kong nen kite kame en etieko doko kede ameje, kabedo kame leini me obar bino wei iye! Jo dedede kame beo i ngete bino yisiro en di kiyayango wi gi.

Sepania 3

Dub me Jo Yerusalem kede Alako gi

¹Itie ican, in bomba kame ikiteso me jo ni odubere, di kibedo jojemo, kede di kitero jo icegun kirac.

²Likame gin kiwinyo kop ka ngatamoroni, doko likame kiyei be iik gi. Gin likame kiketo gen gi i kom Rwot, doko likame kikwae pi konyo gi.

³Jotel mege cal bala inguon kame dorano; jongolkop mege cal bala ipeon kame tie dwar wang otieno, kalikame weko cogo moro dong tuno odiko.

⁴Inabin me Yerusalem yamo atatai, likame kigenere; josaseredoti munao gikacil, di kiko loloko iswil ka Rubanga pi gin timo gikame kimito.

⁵Do Rwot pwodi tie i bomba me Yerusalem; en etimo gikame poore do weko gikarac. Buli odiko en enyuto ngolo kop me ateni mere but jo mege abongo keng. Do di jo areco kame tie i bomba kanono meede ameda kede timo gikarac abongo lewic.

⁶Rwot waco be, “Ango atieko muducaro atekerin atot; amuducaro bomban gi di ako weko apama me cel gi kede gedo gi abocoboco malo di opopoto. Jo otieko yai oweko bomban gi; gudi me bomban gi da odong nono abongo jo.

⁷Ango oudo atamo be manono ateteni bino mino jo me Yerusalem lwora, di kiko yei lubo pwony na, doko da be wi gi koto likame oko wil kede gi dedede kame ango oudo



atimo negi. Do gin di do kiko meede ameda kede mitkom, i timo gikareco kame oudo kibedo timo.”

⁸Rwot waco be, “Kong kurunu. Kurunu ceng kame ango abino pido kede atekerin. Ango atieko moko tam na pi koko atekerin kede ajakanuto dedede karacel, tetekeny abwot lilo na i kom gi. Ango abino doko ger di ako muducaro wi lobo lung.

⁹” I kare nono ango abino loko kope kame wok ki dog jo me atekerin, tetekeny jo dedede wora di kitimo tic na kede cuny acel.

¹⁰Akadi ki loka tetuca me icileta me Abisinia, jo na kame osasarun bino kelo giayala buta.

¹¹I kare nono likame kobino mino lewic mako wu pi tim wu me jemo na. Ango abino kwanyo tenge ki diere wu jo kame wakere di kingato kitek, di wun likame bobo ikounu bino jemo na i wi moru na kacil.

¹²Ango abino weko dong i diere wu jo kame mwolere di kijocan. Gin kibino bino buta mono kony.

¹³Jo Isirael kame bino dong kuo likame bino timo gimoro arac, likame kibino waco kop moro me angalo, doko likame kibino tamo ngalo dano moro. Gin kibino cam di kiko buto wei abongo ngatamoro mino gi lworu.”

Wer me Kilel

¹⁴Werunu di igounu mujira pi kilel, Okwe wun jo Isirael! Lelunu kede cuny wu lung, Okwe wun jo me Yerusalem!

¹⁵Rwot otieko jiko alola wu; en etieko riamo jokwor wu tenge. Rwot, abaka me Isirael tie kede wu; likame bobo ibinunu lworu peko moro.

¹⁶Kare tie bino kame kobino waco ne kede Yerusalem be, “Kur ibed kede lworu moro, Okwe bomba me Sion! Kur lworu mi ibed goro!

¹⁷Rwot Rubanga wu tie kede wu; ibinunu bwono jokwor wu pi teko mere. Cunye bino bedo yom kede wu, en ebino mino wu kuo anyen pi amara mere; ebino wer di elelo piru

¹⁸bala i ceng me ebaga.” Rwot waco be, “Ango likame bobo abino mino kotimo ne wu can moro, doko atieko kwanyo tenge lewic wu.

¹⁹I kare nono ango abino mino jo kame tero wu kirac alola. Abino lako ingwalasa dedede di ako dwoko i paco jo koudo tie obukui. Ango abino loko kuo gi me lewic doko me wor, di jo me wi lobo lung ko bino pako gi.

²⁰I kare nono ango abino dwoko paco jo wu kame nataman osasarun; ango abino mino nying wu bedo iruo i wi lobo lung di bobo ako mino wu abar; ango Rwot atieko waco.”



Agai

Agai 1

Cik ka Rwot pi bobo Gero Tempulo

- ¹ I mwaka me are me Abaka Darias bedo ngapug me Pasia, i buto duwe acel me duwe me kanyape, Rwot oko mino Agai kop kame poore ewac ne ngapug me Yuda, Serubabel wot ka Selatiel, kede ne Ngatel me Josaseredoti, Yosua wot ka Yekosadoki.
- ² Rwot me jo yi oko waco ne Agai be, “Jo nogi tie waco be kare pwodi likame oromo me bobo gero tempulo.”
- ³ Rwot oko waco ne enabi Agai be ewace jo be,
- ⁴” Wun jo na, pinyo kame mio wun miero ibedunu i ude kame kogero kiber do di tempulo na bedo di epopoto?”
- ⁵ Nenunu kong gikame tie timere ne wu!
- ⁶ Wun icuunu kodi atot, do iudunu kac anonok; icamunu, do likame iyengunu; imatunu bwini do likame eromo wu; ingapunu igoen do likame kiobo komu; doko jo kame camo musala kikom wu, ineno bala kirwako sente gi i yi isaun kotutucun.
- ⁷ Nenunu kong gikame tie timere ne wu!
- ⁸ Aso, nataman yitunu i wi emukura di ikounu kelo yen, di ikounu gero tempulo; di do ango cunya ko bino bedo yom, di jo ko bino wora iepone kame poore keda.
- ⁹” Wun oudo itienu kede gen me kano kac adwong, do ikounu udo gikame titidi. Kakame ikounu tero kede gikame ikaunu nono paco, ango ako mine edubere. Pinyo bo komio ango ako timo kamanono? Ango atimo manono pien oda odong di edubere, do di wun ngat acelacel kome mit gero ode.
- ¹⁰ Manono en komio kot li, doko lobo da likame ceko cam.
- ¹¹ Ango atieko mino piny dedede otuo; wi imukuran, poti me engano, poti me olok kede me olibeti. Tuo me piny noni bino kelo peko i kom jamini apura dedede, jo kede leini. Ebino mino cane wu bedo me nono.”
- ¹² Di do Serubabel kede Yosua, kede jo dedede koudo odwogo ki Babilon, kakame oudo kitie iye bala mabus, oko timo gikame oudo Rwot Rubanga gi owaco negi. Lworo bin omako jo di gin kiko lubo kop kame Agai, ngaor ka Rwot owaco negi.
- ¹³ Di do Agai oko waco ne jo be Rwot oudo otieko cikere pi bedo tie kede gi.
- ¹⁴ Rwot oko mino jo obedo kede cuny me timo tic me tempulo: Serubabel, ngapug me Yuda; Yosua, Ngatel me Josaseredoti, kede jo dedede koudo odwogo ki obukui. Gin bin kiko cako tic me tempulo ka Rwot me jo yi, Rubanga gi,
- ¹⁵ i buto duwe ot are kiwie ongwon me duwe me kanyape, i mwaka me are me apugan ka Darias.



Agai 2

Tempulo Anyen bino Bedo Cil Twatwal

- ¹I mwaka nono i duwe me kanyaare i buto duwe ot are kiwie acel, Rwot oko mino enabi Agai kop kame miero eot di eko waco.
- ²En ewaco ne Agai be epeny Serubabel, ngapug me Yuda, kede Yosua, Ngatel me Josaseredoti, kede jo dedede be,
- ³“Benyo, tie ngatamoro kikomu kame pwodi yutuno kite kame tempulo oudo cil kede? Nataman ecal benyo? Mam eneeno bala gimoro kame kony mere li?”
- ⁴Akadi kamanono da, nataman bedunu kede nwangcuny. Timunu tic, pien ango atie kede wu,
- ⁵bala kame bin acikere kede but joakwari wu i kare kame kiyai kede ki Misiri. Kur ibedunu kede lworu moro. Ango atie kede wu.
- ⁶“Odong kare anonok di ango bobo ako bino yayango malo kede piny, lobo kede nam.
- ⁷Ango abino yayango atekerin dedede, di oko bino kelo jamini gi me wel kan, di ango ako bino mino tempulo pong kede deyo na.
- ⁸Siliba kede saabu dedede obedo mera.
- ⁹Tempulo kanyen bino bedo cil kalamo tempulo kacon. Ango abino kelo mulem kabedo noni. Ango Rwot me jo yi en awaco.”

Agai Okwao Josaseredoti pi Mine Tam

- ¹⁰I buto duwe ot are kiwie ongwon me duwe me kanyangon, i mwaka me are me apugan ka Darias, Rwot bobo oko yamo kede Agai.
- ¹¹En ewaco ne be, “Peny tam me josaseredoti i kom kop noni be:
- ¹²Ka ngatamoro oko kwanyo angol me ringo kame koyalo but Rwot di en eko bone i lak ekanso mere, ka en eko mino ekanso mere omulo mugati, cam kame kotedo, bwini, mo me olibeti, arabo giacama moroni kenekene, benyo, gi nono da bino doko gikacil?” Josaseredoti oko gamo be, “Li.”
- ¹³Di Agai bobo oko penyere be, “Ka ngatamoro oko pwokere pien emulo kom dano oto, ka en eko mulo jamini nogi, benyo, gida kidoko jamini kopwokere?” Josaseredoti oko gamo be, “Ebo, gin kidoko jamini kopwokere.”
- ¹⁴Di Agai oko waco be, “Rwot waco be etie kamanono kede jo me ateker noni, kiton tice dedede kame gin kitimo, akadi jamini kame gin kimio bala giayala, gin dedede kipwokere.”

Rwot Ocikere pi Mino Jo mege Winyo

- ¹⁵Rwot waco be, “Kong tamunu i kom gikame bino timere cako nataman ot kede anyim. Di pwodi wun oudo likame icakunu gero tempulo,



¹⁶kuo wu oudo tie benyo? Wun oudo igenunu udo kilo tol are (200) ki atukit me engano, do ikounu lokere udo kilo tol acel (100) kenekene. Ka dano oudo geno udo lita tol acel (100) me bwini, lita ot ongwon kenekene en kame oudo eudo.

¹⁷Ango bin acwao yamo aliet kede akako, di ako mino kodere kame oudo ipurunu omwato, do wun pwodi likame ikounu swilaro.

¹⁸Tin obedo buto duwe ot are kiwie ongwon me duwe me kanyangon, ceng kame kotieko gero kede acakini me tempulo. Kong nenunu gikame bino timere cako nataman.

¹⁹Bed bala likame tie engano moro kodong i dero, doko olok, epigi, pomagurunet kede olibeti pwodi likame onyako gimoro, do cako nataman ango abino mino wu winyo.”

Cikere ka Rwot but Serubabel

²⁰Ceng acel nono, me buto duwe ot are kiwie ongwon, Rwot bobo oko waco ne Agai be

²¹poore ewace Serubabel, ngapug me Yuda kaman: “Ango ayapuno yayango malo kede piny

²²di ako rereto ajakanuto di ako jiko teko gi. Abino rereto cabalan kede jo kame ringo kede gi; asigiran bino to, di jo kame ringo kede gi ko lokere nekere ken gi ken gi.

²³Cenge nono ango abino kwanyo in Serubabel, ngatic na, di ako cibi pi pug i nyinga. Ango atieko yeri. Ango Rwot me jo yi en awaco.”



Sakaria

Sakaria 1

Rwot Olwongo Jo mege pi Dok bute

- ¹ I duwe me kanyauni me mwaka me are me apugan ka Darias bala abaka me Pasia, Rwot oko mino kop mere but Sakaria wot ka Berekia, en bin akwar Ido.
- ² En ewaco ne Sakaria pi waco ne jo be, “Ango Rwot cunya oudo owang twatwal kede joakwari wu,
- ³ do nan atie waco ne wu be, ‘Dwogunu buta di ada ako bino dwogo butu, ango Rwot me jo yi en awaco.
- ⁴ Kur ibedunu bala joakwari wu, kame bin inabin owaco negi kop na, pi weko yote kede tice gi areco, do gin kiko dagi winyo kop na.
- ⁵ Joakwari wu kede inabin nogo otieko totoun.
- ⁶ Ango bin ako mino joakwari wu cik kede ikwenyar kibus inabin, do gin likame kiko lubo gi, di kiko beo i can pi manono. Di do gin kiko swilaro, di kiyei be ango Rwot amio gi alola pi yote kede tice gi areco, bala kame oudo atieko iiko.’ “

Gianyuta me Agege: Jo kame Ringo kede Asigiran

- ⁷ I ceng me ot are kiwie ongwon me duwe me tomon kiwie acel, en duwe me Sebat, i mwaka me are me apugan ka Darias, Rwot oko mina, ango Sakaria kop mere i gianyuta kotimere iwor.
- ⁸ Ango aneno ngatamoro di etie ringo kede asigira akwar. En eko cungo i diere me yen maitol kame oudo tie i aditot; cen ngee oudo tie iye asigiran ace akwar, eleli eleli kede atar.
- ⁹ Ango ako penyere be, “Adwong, asigiran gi nyuto nyo?” Malaika koyamo keda oko dwoko na be, “Ango abino nyuto ni dwong gi.”
- ¹⁰ Aso icuo nono koudo tie cungo i diere me yen maitol oko waco be, “Gin en kame Rwot ocwao gi ot mamano wi lobo.”
- ¹¹ Asigiran nogo oko waco ne malaika nono kame oudo tie cungo i diere me yen maitol be, “Wan otieko mamano wi lobo dedede di oko udo be wi lobo dedede tie okwei, di etie kede anapakin.”
- ¹² Malaika ka Rwot oko waco be, “Rwot me jo yi, in nan cunyi obedo wang kede Yerusalem kede bomban me Yuda pi mwakini ot kanyaare. Ibino meede kamanono pi kare arom kamene di pwodi likame inyuto negi cuny me kisa?”
- ¹³ Rwot oko dwoko kop ne malaika koyamo keda nono kop me kisa kede kame dio cuny.
- ¹⁴ Aso malaika nono oko waco na pi ot rabo kop kame Rwot me jo yi oudo owaco be, “Ango atie kede nyeko pi Yerusalem kede Sion.



¹⁵Gero omaka kitek twatwal i kom atekerin kame bedo di ilajara kede anapakin. Pien kakame gero nango oudo titidi kede, gin kiko mino can kame jo tie iye omeede ameda.

¹⁶Pi manono, ango Rwot atie waco be, ango nan atieko dwogo Yerusalem kede cuny me kisa. Kobino gero tempulo na, di oko temuno gero bomba.”

¹⁷Malaika oko doko waco na pi rabo ne jo kop awaco be, “Rwot me jo yi waco be bomban mege bino bobo pong kede abar, kede be en ebino bobo kweno cuny Sion di eko yero Yerusalem bedo bomba mere.”

Gianyuta me Tung Leini

¹⁸I gianyuta ace ango ako bobo neno tung leini ongwon.

¹⁹Ango ako penyo malaika koudo tie yamo keda be, “Magi obedo nyo?” En eko dwoko na be, “Magi obedo tung leini kosarakino jo me Yuda, Isirael kede Yerusalem.”

²⁰Di Rwot oko nyuto na jotet ongwon.

²¹Ango ako penyere be, “Jogo tie bino timo nyo?” En eko dwoko na be, “Gin kibino pi mino lworu kede pi bwono atekerin kopudao lobo me Yuda atwal atwala di kiko sasaro jo mege.”

Sakaria 2

Gianyuta me Tol me Pimo Boro

¹I gianyuta ace bobo, ango ako neno icuo koudo tie kede tol me pimo boro i cinge.

²Ango ako penye be, “In itie ot tuai?” En eko dwoko na be, “Atie ot Yerusalem pi pimo laco mere kede boro mere.”

³Di ango ako neno malaika koudo oyamo keda oko bino anyim, di ace da bobo oko bino pi riamo kede.

⁴Malaika me agege oko waco ne ocelu be, “Ringi ioti iwac ne awobi atie mako tol me pimo boro ca be, jo kede leini bino garo apama me cel me Yerusalem, pi manono en ebino bedo bala calere kame li kede apama.

⁵Rwot owaco be en ebino bedo apama me mac koluko Yerusalem, doko da ebino bedo deyo kame tie iye.”

Kolwongo Jo kame tie bala Mabus Obukui pi Dwogo

⁶⁻⁷Rwot owaco ne jo mege be, “Ango اساسaro wu obukui bala yamere kame buko i bad ongwon. Do nan yaunu! Lwiunu ki Babilon ikounu dwogo Yerusalem.

⁸Ngatamoro kame bino suro wu rom aroma bala ecobo wanga.” Aso Rwot me jo yi oko cwana kede kop but jo koudo oyako jo mege be,



⁹” Rwot kikome en kame bino yi kede wu, di jo koudo obedo ipasoi wu en kame ko bino yako wu.” Kame manoni otimere, jo dedede bino ngeno be Rwot me jo yi en kocwaa.

¹⁰Rwot waco be, “Werunu pi kilel, wun jo me Yerusalem, pien ango atie bino bedo i diere wu.”

¹¹I kare nono atekerin atos bino bino but Rwot di kiko doko jo mege. En ebino bedo i diere wu di wun ikounu bino ngeno be Rwot me jo yi en kocwaa butu.

¹²Rwot bino doko mino Yuda doko mere, i lobo kacil, di eko bobo yero Yerusalem pi bedo bomba mere.

¹³Lingunu titi i nyim Rwot, wun jo dedede; piento en etieko yai ki kabedo mere kacil etie bino.

Sakaria 3

Enabi Oneno Gianyuta me Ngatel me Josaseredoti

¹ I gianyuta ace Rwot oko nyuto na Ngatel me Josaseredoti Yosua, di etie cungo i nyim malaika ka Rwot; Sitani oudo tie cungo i nget Yosua i bade tetu cam pi pide.

² Malaika ka Rwot oko waco ne Sitani be, “Sitani, in Rwot bunano in! Rwot kame maro Yerusalem bunano in! Benyo, likame ingeo be icuo ni cal bala yat kotuo kame kowariso ki mac?”

³Yosua oudo tie cungo kunono i nyim malaika di engapo igoen komodo.

⁴Malaika oko waco ne jo koudo tie cungo i nyime be, “Gonyunu igoen mege komodo go.” Di eko waco ne Yosua be, “Neningo, ango atieko kwanyo raco ni tenge, nan abino ngapo ni igoen me angosibib.”

⁵En eko waco ne jo nogo pi keto egoe kacil me bono wic i wi Yosua di kiko ngape kede igoen me angosibib, di en malaika ka Rwot nono etie cungo kanono.

⁶Di malaika oko waco ne Yosua be,

⁷” Rwot me jo yi tie waco kaman: ka in ilubo yote nango di iko timo gikame ango amito ni timo, in ibino bedo ngaloc me tempulo na kede diakal mere, doko da ako bino mini twero me tuno but imalaikan kame nan tie cungo kan.

⁸ “Nan winyi, in Yosua Ngatel me Josaseredoti, in karacel kede josaseredoti jowoti kame tie bedo i nyimi, kame tie anen me gikame bino timere. Ango abino kelo ngatic na en Ajange.

⁹Kidi kame ango aketo i nyim Yosua kame tie kede nyime kanyaare, ango abino goro iye iwandik di ako bino kwanyo raco me lobo noni i ceng acel kenekene, ango Rwot me jo yi en awaco.

¹⁰ Ka ceng nono otuno, ngat acelacel bino lwongo ngawote pi ot bedo i dud yat epigi kede olok mere, kede anapakin.”



Sakaria 4

Gianyuta me Gicibo Etala

- ¹Malaika koudo oyamo keda oko bobo dwogo, di eko cena, bala kame koceo kede ngat atie nino.
- ²En eko penya be, “Nyo kame itie neno?” Ango ako dwoko be, “Atie neno gicibo etala kame kotimo kome lung kede saabu. I wie tie iye bakuli. Italan kanyaare tie i wie, di buli etala tie kede doge kanyaare me upo ausin.
- ³I nget gicibo etala nono tie iye yen olibeti are, acel i bad tetucel kede acel da i bad tetu ocelu.”
- ⁴Ango ako penyo malaika nono be, “Adwong, gi nogi nyuto nyo?”
- ⁵En eko penya be, “Likame ingeo?” Ango ako dwoko be, “Adwong, likame angeo.”
- ^{10^b}Malaika oko waco na be, “Italan kanyaare obedo wang Rwot, kame eneno kede wi lobo lung.”
- ¹¹Ango ako penye be, “Do yen are me olibeti atie i bad tetuni kede tetuca me gicibo etala cungo pi nyo?”
- ¹²Doko da ajange are me olibeti kame onyo mo beo ki paipo me saabu dwong gi nyo?”
- ¹³En eko penya be, “Likame ingeo?” Ango ako dwoko be, “Adwong, likame angeo.”
- ¹⁴En eko waco be, “Magonogi obedo jo are kame Rubanga oyeru di eko wiro pi tic nen, en Rwot me wi lobo lung.”

Cikere ka Rubanga but Serubabel

- ⁶Malaika oko waco na pi waco ne Serubabel kop kowok kikut Rwot be, “In ibino karuno, likame kede teko amoto kede twer ni, do kede tipo nango, ango Rwot me jo yi en awaco.
- ⁷Moru kame tie i nyimi no bino doko kakagereger. In ibino temuno gero tempulo; kakame itie keto kede kidi mere me ajikini me apama, jo bino ilelem be, ‘Ecil, Ecil!’ ”
- ⁸Rwot oko bobo mina kop ace.
- ⁹En ewaco be, “Serubabel ocibo acakini me apama me tempulo, en da kame ebino tieko gere. Kame manoni otimere, jo na bino ngeno be ango en kame acwai but gi.
- ^{10^a}Jo kobedo kede acae pi tic atitidi i agege bino bedo kede kilel kame kineno Serubabel di etie kede gi me gedo i cinge.”

Sakaria 5

Gianyuta me Itabu Adola atie Por

- ¹Ango bobo ako ngoloro malo di ako neno itabu adola kame tie por ki wi yamo.



²Malaika oko penya be, “Nyo kame itie neno?” Ango ako dwoko be, “Atie neno itabu adola atie por; boro mere tie mita kanyangon, kede laco mere tie mita ongwon kede dul.”

³En eko waco na be, “Kowandiko iye ilam kame bino bedo tie i lobo noni dedede. Tetucel me itabu adola nono kowandiko iye be ngat kame kwalo kobino kwanye tenge ki lobo noni; kede tetucel mere da kowandiko be ngat kame kwongere i kop me abe eda kobino kwanye ki lobo noni.

⁴Rwot me jo yi waco be en etieko cwane, ebino donyo i buli ot me ngakuwo acelacel kede i buli ot me ngat acelacel akwongere i kop me abe. En ebino dong bedo i ude gi di eko dudubo gi.”

Gianyuta me Kanyaare: Dako atie i Ebukit

⁵Malaika koudo oyamo keda oko bobo bino di eko waco na be, “Ngoloro malo di iko neno gikame tie bino kiye.”

⁶Ango ako penye be, “Nyo inonono?” En eko dwoko be, “Manono obedo ebukit; ecungo pi dub me lobo noni dedede.”

⁷Oko yabo gikame oudo koumo kede dog ebukit nono, di ako neno dako di tie bedo iye.

⁸Malaika oko waco be, “Dako noni cungo pi tim areco.” En eko dino dako nono i yi ebukit nono, di eko dwoko gi me umo dog ebukit nono di eko dino.

⁹Ango ako ngoloro malo di ako neno di mon are tie bino. Yamo oudo tie i bwom gi; bwom gi oudo cal bala me etolut, di gin kiko tingo ebukit nono malo i dierediere me wi lobo kede idoun.

¹⁰Ango ako penyo malaika koudo oyamo keda be, “Kitie tero ebukit nono tuai?”

¹¹En eko dwoko na be, “Kitie tere Babilon pi ot gero ne ot kunono. Kame kotieko gero ot nono kobino cibo ebukit nono i yie.”

Sakaria 6

Gianyuta me Kanyauni: Cabalan Ongwon

¹Ango ako bobo ngoloro malo di ako neno di cabalan ongwon tie wok ki dierediere me mori are me nyonyo buronsi.

² Cabala me agege asigiran akwar en kame oudo wao, me are mere asigiran acol en kame oudo wao,

³ me adek mere asigiran atar en koudo wao, me ongwon mere asigiran eleli eleli en koudo wao.

⁴Ango ako penyo malaika koudo oyamo keda be, “Adwong, cabalan nogi dwong gi nyo?”



⁵ Malaika oko dwoko na be, “Magonogi obedo yamere ongwon me malo atie ot; gin kiwok ki nyim Rwot me wi lobo lung.

⁶ Cabala kame tie kede asigiran acol tie ot i piny atie i bad tetu malo, atie kede asigiran atar tie ot i piny atie i bad tetu tim, kede eleli eleli tie ot i piny atie i bad tetu piny.”

⁷ Kakame asigiran eleli eleli owok kede, kom gi oudo tie miel amiela pi cako yai ot mamano wi lobo. Malaika oko waco negi be, “Otunu imamanunu wi lobo!” Gin kiko ot mamano wi lobo dedede.

⁸ Di malaika oko lelemo na be, “Asigiran kodok i bad tetu malo okweo gero ka Rwot.”

Cik me Ngapo ne Yosua Ocoro me Angosibib

⁹ Rwot oko mina kop kame waco be,

¹⁰” Keledai, Tobija, kede Yedaya nan odwogo ki Babilon. Cok nyonyo siliba kede saabu kibus gi, di iko ot i paco ka Yosia wot ka Sepania.

¹¹ Ter nyonyo siliba kede saabu nogo di iko timo kede gi ocoro me angosibib, di iko ngape i wi Yosua Ngatel me Josaserdoti, en wot ka Yekosadoki.

¹² Wac ne be Rwot me jo yi owaco be, ‘Icuo kame kolwongo be Ajange bino janyo i kakame etie iye di eko temuno gero tempulo ka Rwot.

¹³ En nono kame ebino gero tempulo ka Rwot, di eko bino udo wor kame komio abaka, di eko bedo i kom mere me ajakanut di eko pug. Ebino bedo tie kede ngasaserdoti i nget kom mere me pug, di gin are nogo kiko bino tic kede mulem kede anapakin.’

¹⁴ Ocoro me angosibib nono kobino keto i cing Keledai, Tobija, Yedaya, kede Yosia wot ka Sepania, di oko cibe i tempulo ka Rwot pi bedo gi me iyutun.”

¹⁵ Jo kame bedo tenge kakabor bino bino konyo tic me gero tempulo ka Rwot. Kame kotieko gere, ibino ngeno be Rwot me jo yi en ocwaa buti. Manoni bino timere ka in ilubo cik ka Rwot Rubanga ni.

Sakaria 7

Rwot Ocao Kanyo Kec kalikame Ateni

¹ I mwaka me ongwon me apugan ka Abaka Darias, i ceng me ongwon me duwe me kanyangon (en duwe me Kisileb), Rwot oko mina kop mere.

² Jo me Betel oudo ocwao Sareser kede Regem Melek, karacel kede joe gi ace pi kwano Rwot,

³ kede pi penyosaserdoti me tempulo ka Rwot me jo yi kede inabin kop kame waco be, “Benyo, poore omedere tururo di okanyo kec i duwe me kany pi kite kame bin kodudubo kede Yerusalem, bala kame obedo timo pi mwakini atos?”

⁴ Rwot oko mina kop mere be,



⁵” Wac ne jo dedede me lobo noni kede ne josaseredoti be, iturur kede kanyo kec kame gin kibedo timo i duwe me kany pi mwakini ot kanyaare kokato, oudo likame kibedo timo pi wora.

⁶Doko da ka icamunu di imatunu, mam udo itienu timo manono pi komu?”

⁷Magonogi da obedo kope kame Rwot bin owaco ki dog inabin kasek i kare kame Yerusalem oudo obaro kede di jo opong iye, kede da di jo opong i bomban koluke, kede i adul me bad tetu piny, kede i bad imukuran me bad tetu tim.

Dagi Lubo Kop ka Rwot en Komio Kotero Jo Obukui

⁸Rwot oko bobo mino Sakaria kop mere awaco be,

⁹” Ango Rwot me jo yi bin awaco ne jo na kop kaman: Ngolunu kop kede ateni, nyutunu mwolo kede cuny me kisa but dano acelacel.

¹⁰Kur iterunu kirac apuserun, idwe kic, jokumbor kame bedo i diere wu, kede jocan. Kur cunyu bed kede iik areco i kom jo icegun.

¹¹” Do jo na oko dagi winyo, di kiko loka na ngei gi kede di kiko culo na yit gi.

¹²Gin kimio cuny gi obedo tek gangagang bala lela tetekeny kur kiyei lubo iswilia kede pwoony kame ango acwao kede tipo na kibun inabin kasek. Manono oko bin mina, ango Rwot me jo yi, adoko ger negi adikinicel.

¹³Pi kite kalikame gin kiyei winyo kede kop na kakame ango ayamo kede, ada likame ako gamo kwac gi kakame kilego kede.

¹⁴Ango ako sasaro gi bala apipiru i diere me atekerin kalikame gin oudo kingeo. Di do lobo aber noni bin oko dong nono abongo ngatamoro abedo iye.”

Sakaria 8

Rwot Ocikere pi Dwoko Yerusalem i Kuo mere Kasek

¹Rwot oko bobo mina kop mere.

²Rwot me jo yi owaco be, “Amara na pi Yerusalem omio atie kede twon nyeko pire, nyeko na pire mia abedo kede gero.

³Ango abino dok Yerusalem di ako donyo bedo i diere. Kobino donyo lwongo Yerusalem be bomba kame genere, kede moru ka Rwot me jo yi kobino donyo lwongo be moru kacil.

⁴Cuo kede mon koti twatwal bino donyo doko bedo i gudi me Yerusalem, ngat acelacel kede ebela mere me komo pi tio gi.

⁵Gudi me bomba doko bino pong kede anyira kede awobe atie tuko.

⁶” Manoni twero neeno bala gi kalikame sobolokin kibut yonge me jo na kodong, do kibuta etie gikame sobolokin.



- ⁷Ango abino lako jo na ki lobere kame kotero gi iye i bad tetu kide kede i bad tetu tim,
- ⁸di ako bino kelo gi bedo Yerusalem. Gin kibino bedo jo na di ada ako bino bedo Rubanga gi; abino pugo gi i yore kopooore di agenere but gi.”
- ⁹Rwot me jo yi tie waco be, “Wun jo kame nataman itiekunu winyo kope nogo kame bin inabin owaco i kare kame bin kocako cibo kede acakini me apama me gedo me tempulo, miunu cingu bed tek i tic me gero tempulo.
- ¹⁰Di pwodi kare nono, oudo likame koculo jo amoto leini pi tic kame kitimo, doko da oudo likame dano twero ot karamoroni dedede i mulem, pien ango oudo amio jo dedede odagere.
- ¹¹Do nataman likame ango abino tero donge me jo nogi iepone kame bin atero kede jo i kare kasek.
- ¹²Gin kibino cuno kodere gi kede mulem; olok gi bino nyak, lobo bino ceko cam, kede kot bino bedo tot. Ango abino mino donge me jo nogi gi nogi dedede.
- ¹³Jo me Yuda kede Isirael, jo me atekerin oudo tio kede nyingu bala anen me ilam, do nan ango abino lako wu di gin kiko donyo tic kede nyingu bala anen me mino winyo. Aso bedunu abongo lworu di itienu kede nwangcuny.”
- ¹⁴Rwot me jo yi waco be, “Bala kame bin joakwari wu owango kede cunya, ango ako iikere pi keto can i komu, di likame ako loko tam na, do ako cobo timo gikame oudo aikere iye,
- ¹⁵kamanono da nataman ango atieko iikere pi timo bero ne jo me Yerusalem kede Yuda. Kur ibedunu kede lworu.
- ¹⁶Magi en gikame ipoorenu timo: wekunu yamo kope me abe but jowotu, ngolunu kope i ateni i ekiko wu pi kelo mulem,
- ¹⁷kur cunyu bed kede iik areco i kom jo icegun. Kur ikwongerenu i kope me abe, magonogi dedede cunya dagi.”
- ¹⁸Rwot me jo yi oko mino Sakaria kop kaman:
- ¹⁹” Kanyo kec kame kotimo i duwe me ongwon, me kany kede me kanyaare, kede kanyo kec me duwe me tomon bino doko kare me kilel kede me yomcuny, kede ebaga me yomcuny pi jo me Yuda. Pi manono, marunu ateni kede mulem.”
- ²⁰Rwot me jo yi waco be, “Kare tie bino kame jo me bomban atot bino bino Yerusalem kan.
- ²¹Jo me bomba acel bino ot waco ne jo me bomba ace be, ‘Bia ootunu oworunu Rwot me jo yi, di okwaenu. Wan otie ot.’
- ²²Jo atot kede atekerin atek bino bino Yerusalem wora, ango Rwot me jo yi, kede pi kwana.



²³I kare nono jokumbor tomon bino makakin i egoe me Eyudayat acel di kiwaco ne be, ‘Wan omito ot kedi, pien wan owinyo be Rubanga tie kede wun.’ “

Sakaria 9

Ngolo Kop ne Atekerin me Kio

¹ Man en kop kowok kibus Rwot: En etieko ngolo kop ne lobo me Kadarak kede ne bomba me Damasiko. Pien likame jo me ikekon me Isirael kenekene en kobedo mege, do kiton jo me bomba adwong me Siria da.

²Kamat, kame tie i ikor me Kadarak da obedo mere, kiton bomban me Taya kede Sidon kede diru dedede kame kitie kede obedo mege.

³Taya ogero apama atek me gwokere; ekumemo nyonyo siliba bala asinge kede saabu bala apua me atie i gudi me bomba.

⁴Do nataman Rwot bino kwanyo tenge gi dedede kame etie kede, di eko uco abar nono i dier nam adwong, di mac ko bino wango bomba nono.

⁵Bomba me Asikelon bino neno manoni di lwordo ko make. Gasa da bino neno manoni kede lito. Ekuron da cunye bino kwanyere. Abaka me Gasa bino to, di Asikelon ko bino dong nono abongo jo.

⁶Icotaran en kame bino bedo Asidod. Rwot waco be, “Ango abino tieko ewaka me Pilistia.

⁷Likame doko kibino donyo camo ringo kame remo tie iye, arabo cam me kwer. Jo kame bino bwot bino doko jo na, di kiko bedo bala jo me ot acel me ekeko ka Yuda. Jo me Ekuron bino doko jo na bala jo Yebu.

⁸Ango abino kudo kima me daro oda tetekeny kur doko ngatamoro sure; likame tie doko ngatamoro kame bino mane di eko donyo tero jo kirac, pien ango aneno kede wanga epone kame jo na oneno kede can.”

Abaka me Kare me Anyim

⁹Lelunu kitek wun jo me Sion! Lelemunu kitek wun jo me Yerusalem! Nenunu, abaka wu tie bino butu! En epoore, etie kelo alako; en ewanano punda, atin me punda.

¹⁰Rwot waco be, “Ango abino kwanyo tenge cabalan ki Isirael, kede asigiran me yi ki Yerusalem; imalia me yi kobino dudubo. Abaka wu bino kelo anapakin i atekerin; ajakanut mere bino cakere ki nam adwong tuno i nam ocelu adwong, cako ki ecilet me Eupurate tuno i ajikini me wi lobo.”

¹¹Rwot waco be, “Pi isikan na kedi, kame bin komoko kede remo me giayala, ango abino gonyo jo ni, abino gonyo gi ki bur ali kede pii, me bedo obukui.

¹²Mabus kame tie obukui di itienu kede gen, dokunu i kagwokere wu atek. Awaco ne wu be abino mino wu winyo akalamo angoce itienu kede tien are.



¹³Ango abino tic kede Yuda bala tir me gweno emal, kede Isirael bala tongini me emal. Abino tic kede cuo me Sion bala ipimai, pi yi kede cuo me Guris.”

¹⁴Rwot bino neeno i wi jo mege; en ebino gwegweo imalia mege bala meny me kot. Rwot bino kuto agwara mere, di eko ot kede apipiru me bad tetu piny timo asura.

¹⁵Rwot me jo yi bino gwoko jo mege, di gin kiko bino muducaro wegi aporocet. Gin kibino mato remo gi bala bwini, di eko pongo wi gi lubulub bala awalo me remo kame kokikiro i isondana me alutari.

¹⁶I ceng nono, Rwot Rubanga bino lako jo mege, pien gin kitie bala romini mege. Gin kibino rieny i lobo mere bala kidi me wel atie i ocoro me angosibib.

¹⁷Gin kibino bedo ibus di kicil tin benyo! Engano bino mino ipongai kom gi bedo yot kede apongai da kom gi bino bedo yot pi bwini.

Sakaria 10

Rwot Ocikere pi kelo Alako

¹Penyunu Rwot kot i kare me iporo, pien Rwot en kame cwao idoun me kot; en kame emio wu kot di eko mino kodere dongo i poti me jo dedede.

²Jo penyo caljwogi kede imuroko, do gin kiwaco ne gi kope me abe kede kame kony gi li. Jo mogo gonyo lek me abe di kiko mino kweicuny akony mere li. Pi manono jo tiang ot atatai bala romini korwenyo; ki li kede ngakwat.

³Rwot waco be, “Ango atie kede gero but jokumbor kame pugo jo na; angu abino mino gi alola. Jo me Yuda obedo mega, angu Rwot me jo yi abino gwoko gi; abino mino gi kibedo bala asigiran atek me yi.

⁴Kibut gi bino wok kiye ngatel kame tek bala kidi me esonda me ot, kede bala loc kame koguro me gero eema, kede bala tir me emal, kede da bino wok kibut gi jodongo dedede me Isirikalen.

⁵Jo me Yuda dedede karacel bino bedo cal bala jo yi kame nyonyono jokwor gi i cwoto me gudi me bomba. Gin kibino yi pien Rwot udo tie kede gi, di kiko bino mino lewic mako jokwor gi aringo kede asigiran.” En ewaco be,

⁶” Ango abino mino jo me Yuda bedo tek di ako bino lako jo me Isirael. Ango kisa bino maka kede gi di ako bino dwoko gi paco. Gin kibino bedo bala jo kalikame angu oudo adagi, pien angu en Rwot Rubanga gi; abino gamo ilega gi.

⁷Di jo me Isirael ko bino doko bala jo yi, di cuny gi ko bedo yom bala kimato bwini. Idwe gi bino neno manoni di cuny gi ko kilel, cuny gi bino bedo yom pi gikame angu Rwot atimo.

⁸” Ango abino gweto gi di gin kiko cokere karacel, pien angu atieko lako gi; doko kibino bedo tot kalamo wel gi angoce sek.



⁹Bed bala ango asasaro gi i diere me atekerin, do gin kibino yutuno ango akadi ki kakaboco kugonogo; Gin kibino pito idwe gi di kiko bino dwogo paco karacel.

¹⁰Ango abino dwoko gi paco ki lobo me Misiri, abino coko gi ki lobo me Asiria. Abino kelo gi i lobo me Gilead kede Lebanon da, tuno di kitieko pong kiculo kabedere dedede.

¹¹Gin kibino beo i peko bala ngolo nam adwong, ango Rwot abino juto ebuka di eko kwei, di pii atat me ecilet me Nail ko bino tuo. Kobino dwoko piny ewaka me Asiria, di twer kame Misiri tie kede ko bino tiek.

¹²Ango abino mino jo na bedo tek, di gin kiko bino donyo lubo kop na. Ango Rwot en awaco!”

Sakaria 11

Ajikini me Wegi Apugan Arac

¹Lebanon, yab ikekon ni tetekeny mac wang yen seda ni.

²Kokunu kitek wun yen saipuras, pien seda otieko popoto, kotieko dudubo yen me deyo nogo! Kokunu kitek wun yen oak me Basan, pien kotieko tongo piny abum koudo oduko.

³Winy koko me jokwat; pien deyo gi otiek! Winy dorano me inguon; pien kotieko dudubo abumiok me Yorodan, en paco gi.

Jokwat Are

⁴Rwot Rubanga owaco na be, “Porere bedo ngakwat me romini kame koyaro ngongolo.

⁵Jo kame wilo gi neko gi di likame kiko udo alola moro. Jo kame cato gi waco be, ‘Pak bed but Rwot, pien atieko baro! ‘Akadi jo kame kwao gi da likame tie kede cuny me kisa i kom gi.”

⁶(Rwot owaco be, “Likame doko ango abino bedo kede cuny me kisa i kom jo kame bedo i wi lobo. Abino jalo ngat acelacel i cing ngakio mere kede i cing abaka; gin kibino dudubo wi lobo di likame ango ako bino lako ngatamoro ki cing gi.”)

⁷Kawang jo kame wilo kede kame cato romini, ango ako doko ngakwat me romini kame oudo koyaro ngongolo. Ango ako kwanyo ibelai are: acel acako ne nyinge be “Kisa” , ocelu ako lwongo be “Ariba” . Di ango ako donyo kwano romini nogo.

⁸Ango likame ako twero kanyakino kede jokwat adek ace koudo daga, di ango ako weko gin dedede i duwe acel.

⁹Ango ako waco ne romini be, “Ango doko likame abino bedo ngakwat wu. Oromo amito to, etoi; kede kame komito muducaro, muducaro en. Di romini kame bino dong ko camere ken gi.”



¹⁰Ango ako kwanyo ebela na kame alwongo be “Kisa” di ako ture, pi jiko isikan kame Rwot oudo otimo kede atekerin dedede.

¹¹Aso oko bin jiko isikan nono i ceng nono. Jo koudo tie cato kede wilo romini oudo tie nena, di gin kiko ngeno be Rwot oudo tie yamo i gikame angou oudo atie timo.

¹²Ango ako waco negi be, “Ka inenunu be eber, mianu cul na; do ka li, dongunu kede.” Aso gin kiko cula siliba akaya ot adek.

¹³Di Rwot oko waco na be, “Ket sente nono i sanduku me kano lim me tempulo.” Aso, angou ako kwanyo siliba akaya ot adek nogo, twon sente kame oudo opoore kede cul na, di ako keto gi i sanduku me kano lim me tempulo.

¹⁴Ango ako turo ebela me are kame nyinge “Ariba” di ariba me Yuda kede Isirael okotur.

¹⁵Di Rwot oko waco na be, “Porere bedo bala ngakwat akony mere li.

¹⁶Pien angou nan abino keto ngatel i lobo noni kame tie bala ngakwat kalikame paro pi romini kiyapi to; doko da likame emo romini korwenyo akadi pito akom gi yot. Do akaka manono, en ebino donyo camo ringo me romini kocwe, di ebuturo kiton abelekek gi.

¹⁷Okwe ngakwat akony mere li, kame weko romini! Poore epima cob bade kede wange tetu cam! Poore bade twili di wange tetu cam ko to atwal atwala.”

Sakaria 12

Alako me Yerusalem i Kare me Anyim

¹Man en kop kame Rwot owaco i kom Isirael, en Rwot ngat koyararo malo, ngat kosipo lobo kacungo mere, di eko mino dano tipo me kuo. En ewaco be,

²” Abino mino Yerusalem doko bala ikopo me bwini kame bino mero atekerin me kio. Ka jokwor oluko Yerusalem, kobino luko kiton bomban ace me Yuda da.

³Kame kare nono otuno, angou abino mino Yerusalem doko bala kidi apek; ateker moroni kame bino tamakino tinge bino wanare. Atekerin dedede me wi lobo bino ribakin pi sure.

⁴I kare nono angou abino mino asigiran gin dedede bedo kede lworu di jo kame ringo kede gi ko poi. Abino ciko wanga gwoko Yuda, do abino mino asigiran ka jokwor gi wang gi totoun.

⁵Di jo me ude apapat me ekeko ka Yuda ko bino donyo yamo ken gi be, ‘Jo me Yerusalem tie kede teko kame kiudo kibut Rwot me jo yi, en Rubanga gi.’

⁶” I kare nono angou abino mino jo me ude dedede me ekeko ka Yuda doko bala itonge me mac atie i atukit me yen otuo, bala rau aliel i diere me ijolong kotuo. Gin kibino muducaro atekerin dedede koluko gi, do Yerusalem jo bino dong iye bala lem sek.



⁷” Ango Rwot, me agege abino kong mino isirikalen me Yuda bwono yi, tetekeny wor kame ikwae ka Daudi kede kame jo me Yerusalem bino udo likame bino kato wor kame jo me Yuda bino udo.

⁸I kare nono angu Rwot abino gwoko jo kame bedo Yerusalem, tetekeny akadi dano agoro kalamo kibut gi bino doko tek bala bin Daudi. Ikwae ka Daudi bino telo gi, bala malaika na, bala angu kikoma.

⁹I kare nono angu abino muducaro atekerin dedede kame bino suro Yerusalem.

¹⁰ “Abino cibo i kom ikwae ka Daudi kede i kom jo ace me Yerusalem, tipo me cuny me kisa kede me ilega. Gin kibino neno ngat kame kicobo paka neko di kiko bino koke bala koko atin acel kenekene, arabo bala koko atin awobi kao.

¹¹I kare nono koko atie Yerusalem bino bedo rom aroma bala bin koko Kadad Rimon i ebar me Megido.

¹²⁻¹⁴Jo me lobo noni bino koko i ot i ot: ikwae me ot ka Daudi, ikwae me ot ka Natan, ikwae me ot ka Lebi, ikwae me ot ka Simej, kede jo me ude apat dedede. Ot acelacel bino koko kene, cuo bino pokere kargi ken gi, kede mon da kamanono.

Sakaria 13

¹” I kare nono kobino yabo atan me lonyo ikwae ka Daudi kede jo me Yerusalem ki dub kede ki pwokere.

²I kare nono angu abino weno tenge nying caljwogi ki lobo noni, tetekeny kur doko yutuno gi. Abino da kwanyo tenge jo kame sidiko be gin inabin, karacel kede cuny me pwokere.

³Ka enabi moro ace oko doko neeno, papa mere kede toto mere kikome bino waco ne be, ‘In kobino neki, pien itie waco kop me abe i nying Rwot.’ Ka en eko timo imurai, papa mere kikokome kede toto mere bino cobe paka neke.

⁴” Kame kare nono otuno, inabin nogo dedede lewic bino mako gi pi gianyuta me imurai kame kisidiko be kinenno. Doko da likame kibino ngapo igoen ayer yer me inabin pi gin ngalo jo,

⁵do ngat acelacel kibut gi bino waco be, ‘Angu likame abedo enabi. Angu ngapur; angu abedo puro lobo cako angu dongo.’

⁶Ka ngatamoro oko penyo acel kikom gi be, ‘Aporeso me nyo igo atie i kori go?’ En ebino dwoko be, ‘Audo gi ki ot ka ngawota.’ “

Cik me Neko Ngakwat ka Rubanga

⁷ Rwot me jo yi waco be, “Cej in epima di iko suro ngakwat na kobedo da ngawota! Neke di romini ko sasarun. Angu abino suro jo na

⁸di i lobo noni dedede are i kom adek me jo ko bino totoun, di acel i kom adek me jo ko bino dong kuo.



⁹Acel i kom adek odong kuo nogo abino keto gi i mac di ako lonyo gi bala jililo nyonyo siliba, di ako tamo gi bala tamo saabu kede mac. Di do gin kiko bino lego buta di ango ako gamo kwac gi. Ango abino waco negi be gin kibedo jo na, di gida kiko bino tucyo kede dog gi be ango abedo Rubanga gi.”

Sakaria 14

Yerusalem kede Atekerin Apat

¹Nenunu, ceng kame Rwot bino ngolo iye kop onoko. Di oko bino yako Yerusalem di oko popoko i nyimu jamini kame koyako.

²Rwot bino coko atekerin dedede karacel pi bino yi kede Yerusalem, di kiko bino mano bomba, di kiko yako ude, kede kiko buto kede mon tetek. Dul me jo kobino mako di oko tero gi obukui, do jo ace ko bino dong i bomba.

³Di Rwot ko bino ot di eko yi kede atekerin nogo, bala etie yi i ceng me yi.

⁴I kare nono en ebino cungo i wi moru me Olibeti, i bad tetu kide me Yerusalem; di aditot alac ko bino poko moru me Olibeti ki diere cako ki bad tetu kide tuno i bad tetu tim. Dul me moru nono ko bino nyiko i bad tetu malo, di dul acel da ko bino nyiko i bad tetu piny.

⁵Di wun ikounu bino ringo pi bwot di ilubunu aditot me moru ka Rwot nono, pien aditot nono bino ot paka tuno Asal. Ibinunu ringo bala kame bin joakwari oringo kede pi yangere me piny i kare me apugan ka Abaka Usia me Yuda. Di Rwot Rubanga na ko bino bino, karacel kede imalaikan mege kacil.

⁶Kame kare nono otuno, ngico amoto akako likame bino bedo tie,

⁷akadi kiton colo da. Ceng bino rieny nakanaka akadi kiton iwor da. Ceng nono Rwot en kame ngeo.

⁸ Kame ceng nono otuno, pii amio kuo bino mol wok ki Yerusalem, dul mere bino mol ot i Nam Oto, kede dul mere ko bino mol ot i nam me Mediterania. En ebino mol i kare me oro di rom aroma bala kare me iporo.

⁹Di do Rwot ko bino doko abaka me wi lobo lung; Rwot bino bedo acel nono kame koworo i kadedere dedede me wi lobo.

¹⁰Lobo nono dedede, cako ki Geba i bad tetu malo tuno Rimon i bad tetu piny me Yerusalem bino doko lobo kame wie oporere abongo imukuran. Yerusalem bino bedo idelelei malo kalamo kadedere icegun koluke; bomba nono bino cakere ki Erute ka Benjamin tuno i Erute me Kona, kakame oudo bin erute me agege tie iye; kede da cako ki Gedo Abor me Kananel tuno i kabedo me biino bwini ka abaka.

¹¹ Jo bino donyo bedo kuno, likame kobino doko dudubo en; Yerusalem bino bedo kede mulem abongo alola moro.



- ¹²Aumpuli kame Rwot bino kelo i kom jo dedede kame bino yi kede Yerusalem gin ige: ringo me kom gi bino cako top di gin pwodi kitie cungo, tong wang gi bino top, kede leb gi da bino top i dog gi.
- ¹³I kare nono Rwot bino mino gi mielkom di wi gi ko atotolun di kiko donyo yi ken gi ken gi.
- ¹⁴Akadi Yuda da bino cako yi i Yerusalem. Abar me atekerin me kio kobino coko karacel, magonogo ribo saabu, siliba kede igoen atot adikinicel.
- ¹⁵Aumpuli acel nono da bino poto i kom asigiran, leini mogo acal bala asigiran, aguraguran, pundan, kede i kom leini ace dedede kame tie kede gi.
- ¹⁶Di jo dedede kobwot kikom atekerin kosuro Yerusalem nogo ko bino donyo ot kunono buli mwaka pi woro Rwot me jo yi, en Abaka, kede pi tedo Ebagame Kimere.
- ¹⁷Ka ateker moroni oko dagi ot Yerusalem pi woro Rwot me jo yi bala abaka, kot likame bino cwei i lobo gi.
- ¹⁸Doko da ka jo me Misiri oko dagi ot kunono, Rwot bino cwano negi aumpuli kame en eketo i kom atekerin kame dagi ot tedo Ebagame Kimere.
- ¹⁹Manono bino bedo alola kame bino poto i kom jo me Misiri kede i kom atekerin apat kame dagi ot tedo Ebagame Kimere.
- ²⁰I kare nono akadi kiton acwirin kame kongapo ne asigiran da kobino goro iwandik i kom gi kame somere be “Komio but Rwot” . Doko da agune me tedo atie i tempulo bino bedo jamini kacil bala bakulin kame kotio kede gi i alutari.
- ²¹Agune dedede me tedo atie Yerusalem kede Yuda kobino mino gi i tic me woro Rwot me jo yi, tetekenyo jo dedede kame mio giayala bino tic kede gi me tedo ringo me giayala. Doko da i kare nono likame bobo jocat kede jowil bino bedo tie i ot ka Rwot me jo yi.



Malaki

Malaki 1

¹Manoni en kop kame Rwot bin omio Malaki pi waco ne jo me Isirael.

Amara ka Rwot pi Jo Isirael

²Rwot waco ne jo Isirael be, “Ango abedo maro wu nakanaka. Do wun ipenyere nu be, ‘Imaro wa i yore mene?’ Benyo, mam Esau obedo omin me Yakobo? Do ango ako maro Yakobo

³di ako dagi Esau. Ango adudubo lobo ka Esau kobedo imukuran imukuran di ako mine edoko kabedo me ikween.”

⁴Ka ikwae ka Esau, gin jo Edom, oko waco be, “Kotieko dudubo bomban wa, do wan bobo obino gero gi.” Rwot bino gamo be, “Wek gin kigeri. Ango bobo abino rereto gi piny, tuno jo donyo lwongo piny gi be, ‘Piny me gikareco’ kede be, ‘Ateker kame Rwot otieko lilo kede atwal.’ “

⁵Wun ibinunu neno manoni kede wangu di ikounu waco be, “Rwot dwong akadi kiton i lobere apat kalikame obedo me Isirael!”

Rwot Obunano Josaseredoti

⁶Rwot waco ne josaseredoti be, “Atin mio wor but papa mere, ngatic da mio wor but ngadwong mere. Ka ango en papa wu, pinyo kamio likame imianu wor? Doko ka ango en ngadwong wu, pinyo kamio likame imianu wor? Wun icaanu, do di doko ipenyere nu be, ‘Kara wan ocai i yore mene?’

⁷Wun icaanu i yore me mino giayala kopwokere i wi alutari na. Di wun ipenyere nu be, ‘Wan opwoke i yore mene?’ Wun ipwokenu i yore me bedo kede acae i kom alutari na.

⁸Ka wun ikelunu leini kame wang gi oto arabo atuwo, amoto kongwalo pi mino bala giayala buta, benyo, iparunu be manono ber? Kong tamunu mino le kame cal kamanono but ngapug! Iparunu be cunye bino bedo yom kede wu arabo ebino pwno wu?”

⁹Aso nataman wun josaseredoti, kong tamunu kwano Rubanga pi timo ne wa bero. En likame ebino gamo ilega ka ngatamoro kikom wu. Manono obedo raco wun.

¹⁰Rwot Rubanga waco be, “Ango oudo amito be koto ngatamoro kikom wu ocego ikekon me tempulo, tetekeny geng wu cwinyo mace kame kony gi li i alutari na. Ango cunya likame yom kede wu, doko likame abino gamo giayala moro kame wun ikelunu buta.

¹¹Cako ki bad tetu kide tuno i bad tetu poto ceng, atekerin dedede mia wor. I kabedere dedede gin kiwango odok angwe kur me yala, kede giayala apat kame poore. Gin dedede kimia wor!



¹²Do wun likame inyutunu na wor ka iwacunu be alutari na kony mere li, kede ka imiunu i wie giayala kame kony mere li.

¹³Wun iwacunu be, ‘Kite kame tic noni do otieko olo wa kede! ‘Di ikounu junye na. Wun ikelunu na bala giayala le kame oyako tetek, arabo le kame tuwo. Benyo, iparunu be ango miero agam gi kibut wu?’

¹⁴Ilam poore mak ngat kame mio bala giayala, le kame tie kede peko moro i kome, do di en etie kede le ace aber kame en oudo ecikere pi mina! Pien ango en Abaka adwong, doko jo me atekerin dedede lwora.”

Malaki 2

¹Aso nataman Rwot me jo yi waco be, “Okwe wun Josaseredoti, cik noni mako wun.

²Ka wun likame ibinunu winyo kop na, ka likame ibinunu keto cunyu wora, ango abino cwano ne wu ilam nono, doko abino mino winyo kame koto iudunu lokere doko ilam. Ateteni ango atieko keto ilam i kom gi, pien wun likame iketunu cunyu i cik na.

³Ango abino mino idwe wu alola, di ako suto we me leini me giayala wu i nyim wu, di ako riamo wu tenge ki nyima.

⁴Di do wun ikounu bino ngeno be ango atieko mino wu cik noni, tetekeny isikan na kede kwaru wu Lebi kur turi.

⁵“Cikere nango kede gin oudo obedo cikere me mino gi kuo kede mulem, di ango bin ako mino gin gi nogi, tetekeny kibed kede wor buta. I kare nono gin bin kiko bedo kede wor buta, doko oudo kilwora.

⁶Gin kiko pwonyo kop me ateni, abongo angalo moro. Gin kiko bedo lubo kuo kame ango oudo amito, di kitimo gi kopoore. Manono bin oko mino gin kiko mino jo atos oweko timo dub.

⁷Pien josaseredoti en kame miero gwok ngec me ateni amako Rubanga. Jo poore ot pwonyere but gin, pien gin en kibedo joor ka Rwot me jo yi.

⁸” Do nataman wun josaseredoti itiekunu weko lubo yongayo nono. Pwony wun otieko mino jo atos odonyo timo gi kalikame poore. Wun itiekunu turo isikan kame bin ango atimo kede kwaru wu Lebi.

⁹Manono en komio ango ako mino jo dedede obedo kede acae but wu, pien wun likame ilubunu yote na, do ibedunu kede apokapoka i kom jo kame itienu pwony.”

Jo likame Genere but Rubanga

¹⁰Benyo, likame wanunu dedede papa wa acel? Likame Rubanga acel en kocweo wa? Pinyo do komio wan likame ogenerenu ken wa ken wa, doko pinyo komio wan ocaunu isikan kame Rubanga bin otimo kede joakwari wa?

¹¹Jo me Yuda likame obedo kede genere but Rubanga, doko kitieko timo gikame neno rac i Isirael kede Yerusalem. Gin kitieko timo gi me emuna i tempulo ka Rwot, kabedo kame en emaro. Cuo otieko nyomo mon kame woro rubangan apat.



¹²Ango akwao Rwot ekwany tenge kikom jo Isirael jo kotimo gi noni, di likame eko yei negi mino giayala kame ateker wa tero but Rwot me jo yi.

¹³Manoni en bobo gi ace kame wun itimunu: wun idwilaunu kede koko di ikounu mino pigewang wu mol romo wi alutari ka Rwot, piento en likame do egamo giayala kame wun iterunu ne.

¹⁴Wun ipenyunu pinyo komio en nataman likame do egamo giayala nogo. Etie kamanono pien ngat acelacel kikomu otieko turo cikere kame oudo etimo kede dako kame en enyomo di pwodi en awobi, bed bala dako nono pwodi tie ngawote, dako mere kame esikano kede.

¹⁵Benyo, likame Rubanga oudo omio idokunu kom acel kede cuny acel? Dwong kop nyo en komio oudo en etimo manoni? En etimo manoni piento en oudo emito be wun inywalunu idwe kame ateteni obedo jo mege. Pi manono, miero igwokerenu, di likame dano moro ko turo cikere mere but dako mere.

¹⁶Rwot Rubanga me Isirael waco be, “Ango adagi kop me riamo mon. Ango adagi neno di dano moro kikom wu timo tim me gero kacal kamano but dako mere. Aso, poore igwokerenu di likame ikounu turo cikere wu me wun bedo di igenerenu but mon wu.”

Ceng me Ngolo kop Oyapuno Tuno

¹⁷Wun itiekunu mino Rwot ool kede kop wu. Do di wun ipenyereu be, “Omie eol iepone mene?” Wun imienu eol kede yamo wu kame waco be, “Jo dedede kame timo gikareco beco i nyim Rwot, doko en cunye yom i kom gi.” Arabo pi penyere be, “Rubanga kame ngolo kop kakare nono kara tie tuai?”

Malaki 3

¹ Rwot me jo yi gamo be, “Ango abino cwano ngaor na pi iiko na yongayo. Di do Rwot kame wun itienu mono nono ko bino ngeso bino i tempulo mere. Ngaor kame cunyu mito neno nono bino bino di eko tatamo kop me isikan na.”

² Do ngai kame bino twero kanyakino ceng me bino mere? Ngai kame bino dong cungo ka en eko neeno? En ebino bedo cal bala mac kame calaro nyonyo ka kotie jililo en, arabo bala sabuni kame bolocar ogoen.

³En ebino bedo di eko ngolo kop bala ngat kame jililo siliba. Bala kame ngatet jililo kede siliba kede saabu, kamanono da ngaor ka Rwot bino jililo josaseredoti, tetekeny gin kiko bino tero but Rwot giayala kame poore.

⁴Di do giayala kame jo me Yuda kede Yerusalem ko bino kelo but Rwot ko bino bedo gikame yomo cuny Rwot bala bin i kare kasek.

⁵Rwot me jo yi waco be, “Ango abino bino i diere wu pi ngolo ne wu kop. Ango koma bino bedo mit pi mino ijura i kom jo kame timo tim me jwok, joadote, jo kame mio ijura me abe, jo kame sero jotic i musala gi, kede jo kame tero apuserun kirac, idwe kic, kede jokumbor, karacel kede jo dedede kalikame mia wor.



Mino Acel i kom Tomon

⁶” Ango en Rwot, doko angu likame alokere. Manono en komio pwodi likame itiekunu, wun ikwae ka Yakobo.

⁷Cako i kare ka joakwari wu, wun ibedunu parao tenge ki iswilia na di likame ikounu gwoko gi. Dwogunu buta, di ada ako bino dwogo butu. Do wun ipenyereu be, ‘Odwog buti i yore mene?’

⁸Benyo, dano twero yako Rubanga? Aso di wun itienyu yaka! Do wun ipenyereu be, ‘Epone mene kame wan otie yaki kede?’ Wun iyakanu i mino acel me tomon kede i mino giayala.

⁹Ilam nono tie i kom wun dedede, pien ateker lung tie yaka.

¹⁰Kelunu acel me tomon wu dedede i tempulo, tetekeny cam bed tie i oda. Tamanu, di ikounu bino neno ka angu likame ako yabo ne wu dirisan me malo, di ako bwoto ne wu winyo kame tot lamar.

¹¹Ango abino gengu obonyo likame dudubo cam wu ki poti, doko olok wu bino nyak adikinicel.

¹²Di do atekerin dedede ko bino lwongo wu be jo kame tie kede yomcuny, pien lobo wu bino bedo lobo kame bedo iye ber.”

Rubanga Ocikere pi Timo Kisa

¹³Rwot waco be, “Wun itiekunu yamo kirac i koma. Do di pwodi ipenyereu be, ‘Kop nyo kame wan oyamo i komi?’

¹⁴Wun itiekunu waco be, ‘Kony li me timo ne Rubanga tic. Nyo kame wan oudunu pi gwoko cik mere, arabo pi tururo i nyim Rwot me jo yi bala jo kame tie koko ngat oto.

¹⁵Nataman wan onenunu joewaka en kame tie kede yomcuny. Jo kame timo gikareco likame gi dedede bedo negi kiber kenekene, do gin ka kitamo Rubanga, kibwot likame tie gimoro atimere negi.’ “

¹⁶Di do jo koudo lworu Rwot oko donyo yamo ken gi ken gi. Rwot oko ciko yite winyo gikame gin oudo kitie yamo, di oko wandiko i yi itabu, i nyim Rwot, nying jo koudo lworu Rwot, kede aparo pire.

¹⁷Rwot me jo yi waco be, “Gin kibino bedo jo na. I ceng kame angu abino timo iye gikame aiko pi timo, gin kibino bedo jo na amaka. Angu abino gwoko gi bala kame nganywal gwoko kede atin mere kame lubo kop mere.

¹⁸Manono bino mino jo bobo bino neno apokapoka kame tie i kom gikame timere i kom jo kopoore kede i kom jo kame timo gikareco, i kom jo kame tio pira kede i kom jo kalikame tio pira.”

Malaki 4

Ceng ka Rwot tie Bino



¹Rwot me jo yi waco be, “Nenunu, ceng tie bino kame jo dedede awakere, kede jo kame timo gikareco bino wang kede bala arienge. Cenge nono gin kibino wang dopodop, di likame gimoro ko dong.

²Do pi wun jo kame wora, twer me alako na bino rieny i komu bala ceng, di ebino kede cango bala asara me ceng. Ibinunu sosomo pi yomcuny bala roce kame kogonyo ki awi.

³I ceng kame ango abino timo iye gikame ango aiko pi timo nono, wun ibinunu nyonyono jo kame timo gikareco, kede tienu bala apua.

⁴” Yutununu pwony ka ngatic na Musa, iswilia kede cik kame ango bin amie i moru me Sinai pi jo dedede me Isirael.

⁵ “Nenunu, ango abino cwano ne wu enabi Elia di pwodi ceng na likame otuno, en ceng adwong kede me twon peko.

⁶En ebino bobo ribakino papi kede idwe gi, tetekeny ka ango abino, kur amuducaro pinyu.”



Kumam - All Bible

Matayo

Matayo 1

Joakwari ka Yesu Kirisito

(Luka 3.23-38)

- ¹Man en nying joakwari ka Yesu Kirisito, ngat kobedo akwar Daudi kede Aburaam.
- ²Aburaam onywalo Isaka, Isaka oko nywalo Yakobo, Yakobo oko nywalo Yuda kede imiegu mege,
- ³Yuda kede cege Tamar oko nywalo Peresi kede Seera, Peresi oko nywalo Keseroni, Keseroni oko nywalo Aram,
- ⁴Aram oko nywalo Aminadab papa me Nakason, Nakason oko nywalo Salamoni,
- ⁵Salamoni kede cege Rakab oko nywalo Boasi, Boasi kede cege Lusi oko nywalo Obed, Obed oko nywalo Yese,
- ⁶Yese oko nywalo Abaka Daudi. Daudi kede dako ka Uria oko nywalo Sulumani,
- ⁷Sulumani oko nywalo Rekobuamu, Rekobuamu oko nywalo Abija, Abija di oko nywalo Asap,
- ⁸Asap oko nywalo Yekosapati, Yekosapati oko nywalo Yoram, Yoram oko nywalo Usia,
- ⁹Usia oko nywalo Yotam, Yotam oko nywalo Akas, Akas oko nywalo Esekia,
- ¹⁰Esekia oko nywalo Manase, Manase oko nywalo Amosi, Amosi oko nywalo Yosia,
- ¹¹Yosia oko nywalo Yekonia kede imiegu mege i kare kame otero gi kede Babilon.
- ¹²Ingei kare kame kotero gi kede Babilon: Yekonia oko nywalo Salatiel, Salatiel oko nywalo Serubabel,
- ¹³Serubabel oko nywalo Abiuda, Abiuda oko onywalo Eliakim, Eliakim oko nywalo Asora,
- ¹⁴Asora oko nywalo Sadoki, Sadoki oko nywalo Akim, Akim oko nywalo Eliud,
- ¹⁵Eliud oko nywalo Eriesa, Eriesa oko nywalo Matani papa me Yakobo,
- ¹⁶Yakobo oko nywalo Yosepu cwar Maria, kame oko nywalo Yesu kame kolwongo be Kirisito.
- ¹⁷Aso, oudo tie joakwari tomon kiwie ongwon cako kibut Aburaam tuno but Daudi. Do cakere kibut Daudi tuno kede i kare kame kotero gi kede Babilon, oudo tie



joakwari tomon kiwie ongwon; kede da oudo tie joakwari tomon kiwie ongwon cako i kare kame koteri gi kede i ipasun i Babilon tuno but Kirisito.

Nywalo Yesu Kirisito

(Luka 2.1-7)

¹⁸ Nywalo Yesu Kirisito riki obedo iepone ni. I kare kame Maria toto mere bin Yosepu onero nyomo, oko ngere be Maria oudo oyac pi twer me Tipo Kacil di pwodi likame kiribo kabuto.

¹⁹ Kite kame Yosepu oudo obedo kede ngat kame timo gi kopoore kede kalikame mito mine lewic, en gire eko moko tam mere pi wekere kede Maria i mung.

²⁰ Do bin di etie paro kop noni, malaika ka Rwot oko nyutere bute i wang lek di oko waco ne be, “In Yosepu akwar Daudi, kur ibed kede lworu pi tero Maria doko dako ni, pien en eyac pi twer me Tipo Kacil.

²¹ En ebino nywalo atin awobi di iko cako nyinge Yesu, piento en ebino lako jo ki dub gi.”

²² Magi dedede bin otimere pi mino cobere kakare kop ka Rwot, kame bin ewaco i dog enabi be,

²³ “Neni, nyako kame pwodi likame ngeo icuo bino yac di en eko nywalo atin awobi, di oko bino cako nyinge Emanuel,” kame dwong mere be, “Rubanga tie karacel kede wa.”

²⁴ Kakame bin Yosepu opei kede ki nino, en eko timo bala kite kame bin malaika ka Rwot ocike kede; en eko tero Maria oko doko dako mere.

²⁵ Do Yosepu likame oko ngere kede Maria, tuno kede Maria nywalo atin awobi, di en eko cako nyinge Yesu.

Matayo 2

Jorieko Kowok ki tetu Kide

¹ Di do kotieko nywalo Yesu i bomba me Betelem i piny me Yudea, i kare kame oudo Erode tie kede abaka, cucuto jorieko mogo oko bino Yerusalem di kiwok ki tetu kide. Gin kiko penyere be,

² “Ani bo atin kame konywalo pi bedo abaka me Iyudayan? Pien wan oneno acer kame nyuto nywale di wok ki tetu kide, nan wan obino pi wore.”

³ Kakame Erode owinyo kede kop noni, wie oko dubere, en karacel kede jo dedede kame oudo tie Yerusalem.

⁴ En eko lwongo jodongo me josaserdoti kede jopwony me Iswil karacel, di en eko penyo gi be, “Kara ber koyaro nywalo Kirisito tuai?”

⁵ Gin kiko dwoko ne be, “Koyaro nywale i bomba me Betelem i piny me Yudea; pien enabi bin owandiko be,



⁶ ‘Wun jo me Betelem, i piny me Yuda, bomba wu pire dwong i dier bomban apat kame tie i piny me Yuda; pien ngatel bino wokun ki diere wu, kame bino bedo ngakwat me jo na me Isirael.’ “

⁷Erode oko lwongo jorieko kame bin owok ki tetu kide en eko bedo kede gi i cokere i mung, di en eko udo niang kibun gi i kom esawa kame acer oudo oneeno iye kikokome.

⁸En eko cwano gi Betelem di ewaco ne gi be, “Otunu imounu atin no kiber, do ka iudenu, bianu iwacanu, tetekeny ada aot awore.”

⁹Di do gin kitieko winyo kop me abaka, kiko yai. Kikano acer kame bin kineno ki tetu kide nono oko telo ne gi anyim tuno kakame atin oudo tie iye, di en eko cungo.

¹⁰Kakame kineno kede acer, kiko bedo kede yomcuny kede kilel adwong adikinicel.

¹¹Gin kiko donyo i ot, kiko neno atin di tie kede toto mere Maria, di kiko riondiko piny kiko wore. Kakame kitieko gonyo kede jame gi, kiko kwanyo giamia gi me saabu, bubani kede mura kiko mine.

¹²Di do gin kiko lubo yongayo apat me dok i piny me tur gi, pien Rubanga oudo okwenyaro gi i wang lek di ewaco ne gi be kur kidoki but Erode.

Lwi Ot Misiri

¹³Kakame do gin kitieko yai kede, malaika ka Rwot di do oko nyutere but Yosepu i wang lek di eko waco ne be, “Yai ikwany atin kede toto mere ikounu ringo Misiri, di ikounu dong kuno tuno di ango awaco ne wu be idwogunu; pien Erode oyapuno cako mono atin no pi neko.”

¹⁴Di Yosepu oko yai en eko kwanyo atin kede toto mere iwor, kiko ot Misiri,

¹⁵ kiko dong kuno tuno kakame Erode oto kede. Man otimere pi mino cobere kakare gikame Rwot owaco i dog enabi be, “Alwongo Woda ki Misiri.”

Koneko Idwe

¹⁶I kare kame bin Erode oniang kede be jorieko kame bin oyai ki tetu kide oudo ongolo ne rieko, cunye oko wang twatwal, di en eko cwano jo pi neko idwe awobe me mwaka are dok piny i Betelem kede i adulion kame kio kede dedede, di lubere kede kare kame oudo jorieko oniang kede.

¹⁷Man oko mino gikame bin enabi Yereimia owaco ocobere kakare be,

¹⁸ “Dwan bin owinyere ki Rama, di etie kok koko me to, Lakeri inonono kame oudo tie koko idwe mege; likame tie ngatamoro kame oudo twero dino cunye, pien gin do kitieko doko li.”

Dwogo ki Misiri

¹⁹Ingei to Erode, malaika ka Rwot oko nyutere but Yosepu i wang lek di etie Misiri,



²⁰di eko waco ne be, “Yai ikwany atin kede toto mere ikounu dok i piny me Isirael, pien jo kame oudo mito neko atin otieko do to.”

²¹Yosepu oko yai en eko kwanyo atin kede toto mere kiko dok i piny me Isirael.

²²Do kakame doko Yosepu owinyo kede be Arekelau olunyo wang papa mere Erobe bala abaka me Yudea, lworoko make ot kuno. Malaika ka Rwot oko medo kwenyaro en i wang lek be kur eot kuno. En eko do ot Galilaya.

²³En eko ot bedo i bomba kame kolwongo be Nasaret, tetekeny kop kame bin enabi owaco cobere kakare be, “Kobino lwonge be dano me Nasaret.”

Matayo 3

Kop kame Yokana Ngaibatis Opwonyo

(Marako 1.1-8; Luka 3.1-18; Yokana 1.19-28)

¹kare nono, Yokana Ngaibatis oko neeno i tim me Yudea di epwonyo be,

²“Swilarunu, pien Ajakanut me malo odoko iyapiyapi.”

³Yokana en oudo ngat kame bin enabi Isaya owaco kop i kome be, “Dwan ngatamoro tie lelemo i tim be, ‘Iikunu ne Rwot yongayo, rieunu ne yote.’”

⁴Yokana oudo ngapo egoe kame kotimo kede yer me aguragura, di etweo piere kede rakoba me lau, cam mere oudo obedo obonyo kede mokic.

⁵Jo atos me Yerusalem kede Yudea kede adulon dedede koluko Yorodan oko ot but Yokana.

⁶Gin kiko tucodub gi, di Yokana oko batiso gi i ecilet me Yorodan.

⁷Do kakame bin Yokana oneno kede Iparisayon kede Isadukayon atos di kitie bino pi udo batisimu, en eko waco ne gi be, “Wun idwe me twole! Ngai ber kokwenyaro wu be iringunu tenge ki lilo ka Rubanga kame tie bino?”

⁸Timunu tice kame nyuto be itiekunu swilaro.

⁹Doko da kur itamunu be, ‘Aburaam en kwaru wa.’ Awaco ne wu be Rubanga twero kwanyo kide gi di eko loko gi kidoko ikwae ka Aburaam.

¹⁰Akadi ber nan da, kotieko keto le cuto i dud yen; yat acelacel kalikame nyako anyakini abeco kobino tonge piny di oko uce i mac.

¹¹Ango abatiso wu kede pii pi nyuto be wun itiekunu swilaro, do ngat kame tie bino i cen ngea oyaro batiso wu kede Tipo Kacil kede mac. En etie kede twer kame loa, doko ango likame apoore pi mako amuka mere.

¹²En etie kede oderu mere i cinge cuto, doko ebino weno diakal mere me canyo, di en eko coko engano mere eonyo i dero, do cucung ebino wango i mac kalikame to.”

Kobatiso Yesu

(Marako 1.9-11; Luka 3.21-22)



¹³Di Yesu oko yai ki Galilaya en eko ot Yorodan but Yokana me wek Yokana batiso en.

¹⁴Yokana oudo mito genge di ewaco be, “In en kame miero ibatiso ango, do benyo bobo komio in ibino buta?”

¹⁵Do Yesu oko dwoko ne be, “Wek do ber etimere kamanono nan, pien eber ne wan cobo poore dedede iepone noni.” Di do Yokana oko yei.

¹⁶Ingei batiso Yesu, en eko wok ki dud pii, cucuto di malo oko yabere ne, di eko neno Tipo ka Rubanga di bino oko potu i kome bala awele.

¹⁷Dwan oko wok ki malo di waco be, “Man en Woda kame amaro, cunya yom i kome.”

Matayo 4

Atama ka Yesu

(Marako 1.12-13; Luka 4.1-13)

¹ Di do Tipo Kacil oko telo Yesu ot i tim pi Sitani tame.

²Ingei Yesu kanyo kec pi ceng ot ongwon kede iwor da ot ongwon, kec oko neke.

³Di ngatam jo oko bino di oko waco ne be, “Ka in Wot ka Rubanga, wac ne kide gi lokere dok mugati.”

⁴ Do Yesu oko dwoko ne be, “Iwandik kacil waco be, ‘Dano likame kuo kede cam kenekene, do kede kop acelacel kame wok ki dog Rubanga.’ “

⁵Di Sitani oko tero Yesu i Bomba Kacil, di eko kete i amidu me tempulo,

⁶ di en eko waco ne be, “Ka in Wot ka Rubanga, som piny ki kan, pien iwandik kacil waco be, ‘ Rubanga bino ciko imalaikan mege piri, di gin kiko gwoki; gin kibino gagao in i cing gi, tetekeny kur itwom tieni i wi engaro.’ “

⁷ Yesu oko waco ne be, “Bobo da iwandik kacil waco be, ‘ Kur itam Rwot Rubanga ni.’ “

⁸Sitani bobo oko tero Yesu i wi moru abor twatwal di eko nyuto ne ajakanuto dedede me piny kede deyo gi,

⁹en eko waco ne Yesu be, “Abino mini mago dedede ka iriondiko piny di iko wora.”

¹⁰ Yesu oko waco ne be, “Orwa tenge, in Sitani! Pien iwandik kacil waco be, ‘Wor Rwot Rubanga ni di itio ne en kene.’ “

¹¹Di Sitani oko weko Yesu, di do imalaikan oko bino konye.

Yesu Ocaho Tic mere i Galilaya

(Marako 1.14-15; Luka 4.14-15)

¹² Kakame bin Yesu owinyo kede be koketo Yokana i otkol, en eko dok Galilaya.



¹³ En eweko Nasaret di eko kato ot bedo i Kaperanaum, bomba kame tie i dog nam me Galilaya, i adulion me Sebulun kede Naputali.

¹⁴Man otimere pi mino cobere kakare gikame bin enabi Isaya owaco be,

¹⁵ “Lobo me Sebulun kede me Naputali, kame tie tetu nam adwong, ki loka tetuca me Yorodan, Galilaya, lobo me jo kalikame Iyudayan.

¹⁶Jo kame oudo bin bedo i colo oneno lero adwong, doko jo kame bin bedo i piny acol me to, lero otieko tuno ne gi.”

¹⁷ Cako i kare nono, Yesu oko cako pwonyo kope mege di ewaco be, “Swilarunu, pien Ajakanut me malo odoko iyapiyapi.”

Yesu Olwongo Jocik Ongwon

(Marako 1.16-20; Luka 5.1-11)

¹⁸Di bin Yesu oudo tie ririto dog nam me Galilaya, en eko neno imiegu are, Simoni (kame kolwongo be Petero), kede omin mere Anderia. Gin oudo kitie uco bwoi i nam pien gin oudo jocik.

¹⁹Yesu oko waco ne gi be, “Lubanu, di ako bino loko wu idokunu jo kame coko jo buta akaka cik.”

²⁰Cucuto nono, gin kiko weko bwoini gi di kiko lube.

²¹Di pwodi oudo en etie meede kede ot, eko neno bobo imiegu icegun are, Yakobo kede Yokana, awobe ka Sebedayo, di kitie iiko bwoini gi i yi yee, gin kede papa gi Sebedayo. Yesu oko lwongo gi,

²²cucuto gin kiko weko papa gi kede yee kiko lubo Yesu.

Yesu Opwonyo Jo, Etatamo Kop Aber doko Ecango Jotuwu

(Luka 6.17-19)

²³ Yesu oko ririmo Galilaya dedede di epwonyo jo i sinagogan gi, bobo di etuco Kop Aber me Ajakanut me malo kede di ecango jo kame tie kede iponeso me tuwo dedede apapat kede goro dedede me kom.

²⁴Rwonge mere oko sarakin i piny lung me Siria, omio di oko kelo ne jo dedede kame oudo tie kede tuwo me iponeso apapat, kiton jo kame oudo tie kede jwogi, jo kame oudo tie kede tuwo me ikwikwing kede tuwo kame neko kom dano lung. En eko cango gi.

²⁵Ekodet adwong me jo oko lube, gin bin kiyai ki Galilaya, Dekapoli, Yerusalem, ki Yudea, kede ki loka tetuca me nam me Yorodan.

Matayo 5

Pwony ka Yesu ki wi Moru

(5.1—7.29)

¹Di Yesu oneno ekodet me jo, en eko yito i wi moru di eko bedo piny. Josiao mege oko cokere oluke.



²En eko cako pwonyo gi di ewaco be:

Jo kame tie kede Winyo

(Luka 6.20-23)

³ Kitie kede winyo jocan i cuny gi, pien Ajakanut me malo tie mergi.

⁴ Kitie kede winyo jo kame tururo, pien kobino dino cuny gi.

⁵ Kitie kede winyo jo kame mwolere, pien lobo lung bino doko mergi.

⁶ Kitie kede winyo jo kame cuny gi mito timo gikame opoore, pien kobino mino gi gikame kimito.

⁷ Kitie kede winyo jo kame tie kede cuny me kisa, pien kobino timo ne gida kisa.

⁸ Kitie kede winyo jo kame cuny gi cil, pien kibino neno Rubanga.

⁹ Kitie kede winyo jo kame kelo mulem, pien kobino lwongo gi be idwe ka Rubanga.

¹⁰ Kitie kede winyo jo kame kotidilo pi timo gi kopoore, pien Ajakanut me malo tie mergi.

¹¹ “Itienu kede winyo ka jo cao wu di kitidilo wu, kede di kiwaco epone me kope areco dedede me abe i komu pira.

¹² Lelunu di ikounu bedo kede yomcuny, pien giamia wu me pwoc tie dwong i malo. Epone nono da en kame bin jo otidilo kede inabin kame ogeo bino ne wu.

Kado kede Lero

(Marako 9.50; Luka 14.34-35)

¹³” Wun itienu bala kado me lobo. Do ka tuto odoko bot, kotwero mine bobo edoko kec benyo? Kony mere udo odoko li, pi mano kobwote tenge, di jo ko nyonyono en.

¹⁴ “Wun itienu bala lero ne jo me piny. Bomba kame kogero i wi emukura likame kanere.

¹⁵ Likame tie dano moro kame cwinyo etala di eko umo kede ebukit, do eketo kakame idelelei pi mino jo dedede kame tie i ot lero.

¹⁶ Iepone nono da miunu lero wu rieny ne jo dedede, tetekeny kinen tice wu kabeco di kiko pako Papa wu kame tie i malo.

Pwony kame mako Iswil

¹⁷” Kur iparunu be ango abino pi kwanyo Iswil ka Musa kede pwony me inabin. Ango likame abino pi kwanyo gi, do pi mino gi cobere kakare.

¹⁸ Ateteni awaco ne wu be, tek di malo kede lobo pwodi tie, likame tie enyukuta moro akadi acel, akadi dul moro atitidi me gikame kowandiko i Iswil, kame kobino kwanyo di pwodi likame gi dedede kame tie iye ocobere kakare.

¹⁹ Pi mano, ngat kame yayago akadi cik atitidi ki kom magi di en eko pwonyo jo apat da pi timo kamanono, en ebino bedo dano kalikame pire tek i Ajakanut me malo. Do



ngat kame lubo cik di epwonyo jo apat da pi lubo gi, pire bino bedo tek i Ajakanut me malo.

²⁰Pien ango awaco ne wu be, likame ibinunu karuno donyo i Ajakanut me malo, kwanyo ka itimunu gi kopooore ne Rubanga kalamo jopwony me Iswil kede Iparisayon.

Pwony kame mako bedo Ger

(Luka 12.57-59)

²¹“Wun iwinyunu be bin kowaco ne jo ariki sek be, ‘Kur ineko; ngat kame neko kobino ngolo kop loe.’

²²Do awaco ne wu be, ngat kame doko ger ne dano ocelu, kobino pide; doko ngat kame yeto dano ocelu kobino tere i nyim kansulo; kede ngat kame lwongo dano ocelu be, ‘Ngamingo, ‘ebino ot i mac kalikame to.

²³Pi mano, ka oudo itie tero irabu ni ne Rubanga i alutari, di iko yutuno ki kuno be omini tie kede ingungur moro i komi pi raco kame in itimo ne,

²⁴wek irabu ni kuno i nyim alutari, di iko ot dwoko nywak kede omini, i cen mere iko dok mino Rubanga irabu ni.

²⁵” Por kop susunyo kede dano kame mito pidi di pwodi itienu i yongayo, tetekeny kur eteri but ngangolkop, di ngangolkop ko mini i cing sirikale di oko bino tweni i otkol.

²⁶Ateteni awaco ni be, likame ibino wok ki kuno tuno kede di iculo sente dedede kame kotangi kede.

Pwony kame mako Adote

²⁷“Wun itiekunu winyo be bin kowaco be, ‘Kur itim adote.’

²⁸Do ango awaco ne wu be ngat kame neno dako di cunye ko paro buto kede, udo etieko timo adote kede dako nono i cunye.

²⁹ Ka wangi tetu cam en kame mi idubo, gole ooko iko uce tenge; eber ne in kei adul moro me komi akaka uco komi dedede i mac kalikame to.

³⁰ Doko ka cingi tetu cam en kame mi idubo, ngole di iko uce tenge; eber ne in kei adul moro me komi akaka uco komi dedede i mac kalikame to.

Pwony kame mako Gonyo Nyom

(Matayo 19.9; Marako 10.11-12; Luka 16.18)

³¹“Doko bin kowaco da be, ‘Ngat kame riamo dako mere, poore emi dako nono baluwa me gonyo nyom.’

³² Do ango awaco ne wu be, ngat kame riamo dako mere, kwanyo ka pi kop me caro, udo en etimo raco me mino dako mere doko ngadote ka enyomere bobo; doko ngat kame nyomo dako kopokere kede cware udo etimo adote.

Pwony kame mako Ilair



³³ “Doko itiekunu winyo be bin kowaco ne jo ariki sek be, ‘Kur ilairo pi kop me abe, do poore itim ne Rwot gikame in itieko cikere iye.’

³⁴ Do ango awaco ne wu be, kur ilairo atwal di iwaco nying malo, piento en ebedo kakame Rubanga pugo kiye,

³⁵ arabo di iwaco nying lobo, piento en ebedo abanya kame en eteno iye tiene; amoto di iwaco nying Yerusalem, piento en ebedo bomba me abaka adwong.

³⁶ Kame itie lairo, kur ilairo kede wi, pien likame in ikaruno mino yer me wi acel moro bedo col amotoko tar.

³⁷ Wek kop kame in iwaco bed be, ‘Ee’ arabo be, ‘Li’ ; pien kop akalamo magi udo owok kibut Ngarac.

Pwony kame mako Culo Kwor

(Luka 6.29-30)

³⁸ “Wun itiekunu winyo be bin kowaco be, ‘Wang koculo kede wang, doko lak da koculo kede lak.’

³⁹ Do ango awaco ne wu be, kur inyang raco kame dano otimo ni. Ka ngatamoro obapo lemi tetu cam, lok ne tetu ngodal da.

⁴⁰ Doko kame ngatamoro opidi pi mito gamo ekoti ni, mie eter kiton esati da.

⁴¹ Doko kame ngatamoro odii tetek be iotunu kede pi mairo acel, in do meede ot kede en pi mairo are.

⁴² Ka ngatamoro okwai gimoro, mie. Doko ka ngatamoro mito kopao gimoro kibuti, kur itwone.

Maro Jloading wa

(Luka 6.27-28, 32-36)

⁴³ “Wun itiekunu winyo be bin kowaco be, ‘Mar jowoti di iko dagi jo kame dingere kedi.’

⁴⁴ Do ango awaco ne wu be, marunu jo kame dingere kede wu, doko da ikounu lego ne jo kame tidilo wu,

⁴⁵ tetekeny idokunu idwe ka Papa wu kame tie i malo. Piento en emio ceng rieny ne jo kabeco kede jo kareco da, doko en ecwao kot ne jo atimo gikame beco kede jo kame timo gikareco da.

⁴⁶ Ka imarunu jo kame maro wu kenekene, kara ibinunu udo giamia nyo me pwoc kiye? Pien akadi jo kame raro esolo da timo kamanono.

⁴⁷ Doko kame in inywako kede jowoti kenekene, udo itimo nyo aber kalamo jo icegun? Pien akadi jo kalikame Iyudayan da timo kamanono.

⁴⁸ Pi mano, poore ibedunu jo kopoore bala kite kame Papa wu me i malo opoore kede.

Matayo 6



Pwony kame mako Konyo Jocan

¹ “Gwokerenu kur itimunu tice wu kabeco i nyim jo be tetekeny gin kinen wu, pien mano bino mino likame iudunu giamia me pwoc kibus Papa wu kame tie i malo.

²” Pi mano, kame itie mino ngacan gimoro, kur imi jo ngeno, bala kite kame joecuke timo kede i sinagogan kede i dier yote me bomban, be tetekeny jo pak gi. Ateteni awaco ne wu be, gin kitieko gamo giamia gi me pwoc.

³Do ka itie mino ngacan gimoro, kur imi cingi tetu ngodal ngei gikame cingi tetu cam tie timo,

⁴tetekeny wek ebed gi me mung, di Papa ni kame neno gikame in itimo i mung ko bino mini giamia me pwoc.

Pwony kame mako Ilega

(Luka 11.2-4)

⁵ “Doko ka iyaro ilega, kur ibed bala joecuke. Pien gin kimaro lego acungo i sinagogan, kede i dier yote me bomban be tetekeny jo nen gi. Ateteni awaco ne wu be gin kitieko udo giamia gi me pwoc.

⁶Do kame in iyaro lego, dony i agola ni di iko cego ekeko iko kwac but Papa ni kalikame neeno. Di Papa ni kame neno gi dedede kame in itimo i mung ko bino culi.

⁷” Doko da ka itie ilega, kur iduro kope kame dwong gi li, bala kame jo kalikame Iyudayan timo kede, pien gin kigeno be Rubanga bino winyo gi pi kope kame kiduro.

⁸Kur ibedunu bala gin, pien Papa wu ngeo cuto gikame wun imitunu di pwodi likame ikwaenu.

⁹Pi mano, ka iyarunu ilega, kwaunu kaman; Papa wa kame tie i malo, nyingi bed me awora.

¹⁰Ajakanut ni bin; wek tim i lobo gikame in imito, bala kite kame kotimo kede i malo.

¹¹Miwa tin cam wa me buli ceng.

¹²Sasiro wa ki dub wa, bala kite kame wada osasiro kede jo kame timo ne wa kirac.

¹³Kur iwek wa opot i atama, do gwok wa ki gikarac.

¹⁴ “Pien ka in isasiro jo ki dub gi, Papa ni kame tie i malo da bino sasiro in.

¹⁵Do ka in likame isasiro jo apat ki dub gi, Papa ni kame tie i malo da likame bino sasiro in ki dub ni.

Pwony kame mako Kanyo Kec

¹⁶” Doko ka itieny kanyo kec, kur imiunu nyimu bedo di pek bala kite kame joecuke timo kede. Pien gin kiloko cal me nyim gi be tetekeny jo apat ngei be gin kitie kanyo kec. Ateteni awaco ne wu be, gin kitieko udo giamia gi.

¹⁷Do ka itie kanyo kec, wir wii kede mo, doko di iko lwoko wangi da,



¹⁸tetekeny jo apat kur ngei be in itie kanyo kec, do Papa ni kalikame neeno en kame ko bino neno. Di do Papa ni kame neno gi dedede kame in itimo i mung ko bino mini giamia me pwoc.

Abar kame tie i Malo

(Luka 12.33-34)

¹⁹“Kur ikanunu abar wu i wi lobo kan, kakame ajekel kede nyal dubo gi kiye, kede kakame jokuwo turo di kiko kwalo.

²⁰Do kanunu abar wu i malo kakame ajekel kede nyal likame dubo gi kiye, kede jokuwo da likame twero turo di kiko kwalo.

²¹Pien kakame abar ni tie iye en kame cunyi da bino bedo iye.

Lero me Kom

(Luka 11.34-36)

²²” Wang dano tie bala etala me kome. Ka wangi tie kiber, komi dedede bino bedo kede lero,

²³do ka wangi odubere, komi dedede bedo i colo. Ka gikame mi lero odoko colo, colo mere do tin bino bedo rom nadi!

Timo Tic ne Jodongo Are

(Luka 16.13; 12.22-31)

²⁴” Likame tie ngatamoro kame twero timo tic ne jodongo are, pien ebino maro ngat acel di eko dagi ngat ocelu; aso ka li, ebino moko i kom ngat acel di eko weko ocelu. In likame ikaruno tic ne Rubanga kede bobo ne abar da.

²⁵” Pi mano, ango awaco ne wu be, kur ibedunu kede par pi gikame ibinunu camo, arabo gikame ibinunu mato pi bedo kuo, amotoko pi gikame ibinunu ngapo. Mam kuo pire tek kalamo cam, doko kom da mam pire tek kalamo giangapa?

²⁶Nenunu ber winy me obar; gin likame kicuo kodi, akadi kac, akadi coco cam i dere, do Papa wu kame tie i malo mio gi cam. Mam wun piru tek kalamo winy?

²⁷Doko ngai kikom wu kame twero medo ceng me kuo mere ka ebedo kede par iye?

²⁸” Do pinyo komio itienu kede par pi giangapa? Nenunu kong epone kame ature me obar dongo kede; gin likame kitimo tic moro, doko likame kitimo igoen gi ken gi.

²⁹ Do awaco ne wu be, akadi bin Abaka Sulumani da kede deyo mere dedede, likame oudo tie kede angapito acil bala acel kikom ature nogi.

³⁰Do ka Rubanga tubuso lum me obar, lum kame tin kuo, diki di oko wango gi i mac, iparunu be likame ebino ngapo wun kalamo? Okwecunu wun jo kame yei wu nonok!

³¹Pi mano, kur ibedunu kede par di iwacunu be, ‘Obinunu camo nyo?’ Arabo be, ‘Obinunu mato nyo?’ Amoto be, ‘Obinunu ngapo nyo?’

³²Pien magi en jame kame jo kalikame Iyudayan tam gi tie pi mono; ateteni Papa wu kame tie i malo ngeo be gigi dedede mitere ne wu.



³³Do geunu ber mono Ajakanut ka Rubanga kede poore mere, di en eko bino mino wu gi nogi dedede.

³⁴” Pi mano, kur iparunu kop me diki, pien diki da bino bedo kede par mege kame make. Wek ceng acelacel bed kede peko mege kame make.

Matayo 7

Ngolo kop ne Jo Icegun

(Luka 6.37-38, 41-42)

¹” Kur ingolunu kop ne jo icegun me wek kur ngol kop ne wuda.

²Pien Rubanga bino ngolo ne wu kop iepone acel nono kame wun ingolunu ne kede jo apat, doko ebino ngolo ne wu kop di epimo rom mere kede kop kame wuda ingolunu ne jo apat.

³Pinyo kame mio in ineno apoke kame tie i wang ngawoti, do di likame iko twero neno isiki kame tie i wangi?

⁴Arabo benyo benyo kame in isobolo waco ne kede ngawoti be, ‘Wek akwany apoke kame tie i wangi, ‘do di ida kikomi isiki orire i wangi?’

⁵In ngaecuke, gei ber kwanyo isiki kame tie i wangi di do wangi ko doko bit me kwanyo apoke kame tie i wang ngawoti.

⁶” Kur imiunu igwogin gikacil i nyim Rubanga, pien kibino lokere suro wu. Doko kur iucunu ne ipegei bira me wel adwong, pien kibino donyo nyonyono gi kede tien gi.

Kwai, Moi, Kukungo

(Luka 11.9-13)

⁷” Kwaunu, kobino mino wu; mounu, ibinunu udo; kukungunu ekeko, kobino yabo ne wu.

⁸Pien ngat acelacel kame kwao komie, doko ngat kame mo eudo, kede dano kame kukungo ekeko koyabo ne.

⁹Ngai kikom wu ka atin mere openye mugati en emio engaro?

¹⁰Arabo ka epenyo deknam, en emio twol?

¹¹Ka do ber wun jo areco ingeunu mino idwe wu giamia kame beco, do kalamo mano tien adi en kame Papa wu me i malo bino mino jamini kame beco but jo kame kwae!

¹² “Pi mano, tim ne jo apat da gikame in imito be koto gida kitimo ne ida, pien man en Iswil ka Musa kede pwony me inabin.

Ekeko Adiding

(Luka 13.24)

¹³” Donyunu ki erute adiding, pien erute kame tero jo i to me nakanaka lac, doko yongayo mere lubo yoyot; jo kame donyo ki erute nono tot.



¹⁴Pien erute kame donyo i kuo kame bedo nakanaka diding, doko lubo yongayo mere tek; jo kame ude nonok.

Yat kede Anyakini mere

(Luka 6.43-44)

¹⁵” Gwokerenu i kom inabin me angalo, kame bino butu di kicuko be kimwol bala romini, do di i ateni kical bala ipeon ager.

¹⁶Ibinunu ngeno gi kede tice gi kame kitimo. Benyo, kokaruno ngwedo anyakini me olok ki kom okuto, amoto anyakini me epigi kokaruno ngwedo kikom ocokocok?

¹⁷Yat kame kome yot nyako anyakini abeco, do yat kodubere nyako anyakini areco.

¹⁸Yat kame kome yot likame karuno nyako anyakini areco, doko yat kodubere da likame karuno nyako anyakini abeco.

¹⁹ Yat acelacel kalikame nyako anyakini abeco kotonge piny di oko uce i mac.

²⁰ Pi mano, ibinunu ngeno inabin me angalo kede tice gi.

Ango Likame oudo Angei

(Luka 13.25-27)

²¹” Likame ngat acelacel kame lwonga be, ‘Rwot, Rwot, ‘bino donyo i Ajakanut me malo, do kenekene ngat kame timo gikame Papa na me i malo mito ne timo en kame bino donyo iye.

²²I ceng me ngolo kop jo atot bino waco na be, ‘Rwot, Rwot, wan bin otatamo kop ka Rubanga i nyingi bobo di oriamo jwogi, kede di otimo tice me twer atot i nyingi!’

²³ Do anga ako bino waco ne gi be, ‘Ango gira akwia wu, irwaunu tenge ki nyima, wun jo kame timo gikareco.’

Jogedo Are

(Luka 6.47-49)

²⁴” Aso, ngat acelacel kame winyo kope na gi, di eko timo gikame anga awaco, udo ecal kede ngarieko kame ogero ode i wi lela.

²⁵Kot di oko cwei, ariram oko bino, di yamo atek oko buko i kom ot nono, do likame en eko poto, pien oudo kogere i wi lela.

²⁶” Do ngat acelacel kame winyo kope na nogi di likame en eko timo gikame awaco, udo ecal kede ngamingo kame ogero ode i asinge.

²⁷Kot di oko cwei, ariram oko bino, kede yamo atek oko buko i kom ot nono, di en eko arwacakin piny, doko arwacakin mere obedo dwong adikinicel.”

²⁸ I kare kame Yesu otieko waco kede kope go, ekodet kame oudo tie kuno oko uro epone kame epwonyo kede,

²⁹pien oudo epwonyo kede akarunikin, weko bala bin jopwony me Iswil.

Matayo 8



Yesu Ocango Adobo
(Marako 1.40-45; Luka 5.12-16)

- ¹kakame Yesu owok kede piny ki wi moru, ekodet ati me jo oko lube.
- ²Kikano icuo moro kame tie kede tuwo me dobo oko bino bute di oko riondiko piny i nyime di ewaco be, “Rwot, ka cunyi mito, ikaruno canga.”
- ³Yesu oko rienu cinge di oko mule di ewaco be, “Amito, cangi!” Cucuto nono dobo mere oko cango.
- ⁴Yesu oko waco ne be, “Nen be likame iwaco ne ngatamoro gi kotimere, do ot inyutere but ngasaseredoti di iko mino giayala kame bin Musa ociko, pi nyuto ne jo be in itieko cango.”

Yesu Ocango Ngatic me Ngadwong me Isirikalen me Roma
(Luka 7.1-10)

- ⁵kakame Yesu odonyo kede Kaperanaum, ngadwong me isirikalen me Roma bin oko bino bute oko donyo bako ne doge
- ⁶di ewaco be, “Rwot, ngatic na tie i apien, etie kede aramo alit, doko tuwo oneko kome lung.”
- ⁷Yesu oko waco ne be, “Ango ayaro bino di ako cange.”
- ⁸Do ngadwong me isirikalen nono oko dwoko ne Yesu be, “Rwot, ango likame apoore me in bino i oda, do in kenekene wac kop nono, di ngatic nango ko bino cango.
- ⁹Pien ada atie i akarunikin me jo kame loa, doko ada atie kede isirikalen kame tie i akarunikin na; ka aciko acel kikom gi be, ‘Oti, ‘en eko ot; doko ka awaco ne ace da be, ‘Bia, ‘en ebino; kede ka awaco ne epasoit na be, ‘Tim gini, ‘di en eko timo.”
- ¹⁰Kakame Yesu owinyo kede kop mere, en eko uro di eko waco ne jo kame bin lube be, “Ango pwodi likame audio epone me yei ni, akadi i piny me Isirael da.
- ¹¹Awaco ne wu be, jo atot oyaro bino ki tetu kide kede ki tetu potoceng di gin kiko bino camo ebaga kede Aburaam, Isaka kede Yakobo i Ajakanut me malo.
- ¹²Do jo kame poore bedo i Ajakanut kobino uco gi ooko i kabedo me colo, kakame kibino koko kede mwodo lak gi kiye.”
- ¹³Yesu oko waco ne ngadwong me isirikalen nono be, “Ot do, wek etimere ni di lubere kede yei ni.” Ngatic me ngadwong me isirikalen nono oko cango esawa nono.

Yesu Ocango Jo Atot
(Marako 1.29-34; Luka 4.38-41)

- ¹⁴Kakame Yesu odonyo kede i ot ka Petero, en eko neno toto me dako ka Petero di tie buto, pien musuja oudo omake.
- ¹⁵Yesu oko mako cinge, di musuja oko weke, en eko yai malo eko cako tedo gi.
- ¹⁶Otieno nono jo oko kelo ne Yesu jo atot kame jwogi omako, en eko riamo tipere areco kede twer me kop mere, doko di en eko cango jo dedede kame oudo tuwo.



¹⁷ Etimo man pi mino cobere kakare gikame bin enabi Isaya owaco be, “En ekwanyo goro me kom wa di eko yeno tuwo wa.”

Jo mogo kame oudo mito Lubo Yesu

(Luka 9.57-62)

¹⁸ Aso, kakame Yesu oneno kede ekodet me jo di oluke, en eko waco ne josiao mege be, “Ongolunu loka tetuca.”

¹⁹ Ngapwony moro me Iswil oko bino bute di oko waco ne be, “Apwony ango ayaro lubi kabedo dedede kame in ibino ot iye.”

²⁰ Yesu oko waco ne be, “Ekwee tie kede bur me buto, kede winy da tie kede ude gi, do Wot ka dano likame tie kede kakame epielo iye wie.”

²¹ Ngasiao mere ocelu da oko waco ne be, “Rwot wek ber aoti ayik Papa na.”

²² Do Yesu oko waco ne be, “In luba, wek jo oto en kame yik joe gi oto.”

Yesu Okweo Yamo Atek i Nam

(Marako 4.35-41; Luka 8.22-25)

²³ Kakame Yesu odonyo kede i yi yee, josiao mege da oko lube iye.

²⁴ Kikano yamo atek oko ngoole i yi nam, omio ebuka oko donyo lepulepun i yi yee, do Yesu oudo onino.

²⁵ Gin kiko ot cene di kiwaco ne be, “Rwot lak wa, otienu do to.”

²⁶ En eko waco ne gi be, “Pinyo komio itienu kede lworu, okwecunu wun jo kame yei wu nonok?” En eko yai di eko koko yamo kede nam, di kiko kwei cuu.

²⁷ Josiao oko uro di kiwaco be, “Epone me dano kacal nadi tin ine, kame akadi yamo kede nam da winyo dwane?”

Yesu Ocango Cuo Are kame tie kede Jwogi

(Marako 5.1-20; Luka 8.26-39)

²⁸ Di do Yesu bin ongolo loka nam i piny me Gerasene, en eko riamo kede cuo are kame owok ki wi atesin. Gin oudo kitie kede jwogi, doko oudo kiger twatwal, omio jo oudo lworu lubo yongayo nono.

²⁹ Kikano gin kiko lelemo kitek be, “Okwe Wot ka Rubanga, nyo kame itie mito timo ne wan? Mam in ibino kan pi mino wa alola di kare kopoore pwodi likame otuno?”

³⁰ Esawa nono, oudo tie esipan me ipegei kame tie cam i kakabobor kede gi.

³¹ Jwogi nogo oko ngangao Yesu be, “Ka iriamo wa tenge kikom jogi, cwai wa ooti i kom esipan me ipegei ka.”

³² En eko waco ne gi be, “Otunu.” Gin kiko wokun kiko ot donyo i kom ipegei. Esipan me ipegei lung oko dipere ringo piny lor ki wi emukura, kiko donyo i nam, gin dedede kiko mwony kiko to i pii.



³³Jo kame oudo tie kwano ipegei nogo oko ringo, kiko ot i bomba, di do kiko tatamo ne jo gi dedede kame otimere, kiton gi kotimere ne jo kame oudo tie kede jwogi.

³⁴Di jo dedede me bomba oko wok pi riamo kede Yesu. Esawa kame kinene kede, kiko donyo ngangao en be eyai tenge ki adul gi.

Matayo 9

Yesu Ocango Icuo kame Tuwo Oneko Kome lung

(Marako 2.1-12; Luka 5.17-26)

¹Yesu di do oko donyo i yee, eko ngolo loka, di eko tuno i bomba me tur gi.

²Kikano jo mogo oko kelo ne icuo moro kame oudo tuwo oneko kome lung, di etie buto i apien. Kakame Yesu oneno kede yei gi, en eko waco ne icuo kame tuwo oudo oneko kome lung nono be, “Dii cunyi, woda. Kotieko sasiro in ki dub ni.”

³Kikano jopwony mogo me Iswil oko donyo yamo ken gi ken gi be, “Icuo ni tie porere kede Rubanga.”

⁴Do Yesu oko ngeno gikame gin oudo kitie paro, en eko waco ne gi be, “Pinyo komio ibedunu kede par areco i cunyu?”

⁵Mene en kame yoyot, waco be, ‘Kotieko sasiro dub ni, ‘arabo waco be, ‘Yai malo ioti?’

⁶Do abino mino wu ngeno be Wot ka dano tie kede akarunikin me sasiro jo ki dub gi di en etie i wi lobo kan.” En eko waco ne icuo kame tuwo oudo oneko kome lung nono be, “Yai malo, kwany gibuto ni di iko ot paco.”

⁷Icuo nono oko yai di eko ot paco.

⁸Kakame ekodet oneno kede gi kotimere, lworu omako gi di kiko pako Rubanga pi mino jo akarunikin acal kamano.

Yesu Olwongo Matayo

(Marako 2.13-17; Luka 5.27-32)

⁹kakame Yesu oyai kede ki kuno di do etie ot, en eko neno icuo kame nyinge Matayo di etie bedo i ot me culo esolo. Yesu oko waco ne be, “Luba.” Matayo oko yai di en eko lubo Yesu.

¹⁰ Kakame Yesu do obedo kede kacam i ot ka Matayo, jo atos kame raro esolo kede jodubo oko bino di kiko donyo cam kede Yesu karacel kede josiao mege.

¹¹Do kakame Iparisayon mogo oneno kede gini, gin kiko penyo josiao ka Yesu be, “Pinyo komio apwony wu camo kede jo kame raro esolo kede jodubo?”

¹²Do kakame Yesu owinyo kede peny gi, en eko waco be, “Jo kame kom gi yot likame mito emuron, do kenekene jo kame tuwo.



¹³ Otunu ipwonyerenu i dwong me kop kame Rubanga owaco be, ‘Ango amito cuny me kisa, do likame giayala, ‘pien angu abino pi lwongo jodubo do likame jo kopoore.’”

Peny i kom Kanyo Kec

(Marako 2.18-22; Luka 5.33-39)

¹⁴Di do josiao ka Yokana oko bino but Yesu di kipenyere be, “Pinyo komio wan kede Iparisayon okanyo kec, do josiao nin likame kanyo kec?”

¹⁵Yesu oko dwoko ne gi be, “Wun iparunu be wele kame tie i ebagu me nyom twero tururo i kare kame eteran pwodi tie kede gi? Ceng bino tuno kame kobino tero kede eteran tenge kibun gi di do gin kiko bino kanyo kec.

¹⁶” Doko likame tie dano kame dapo egoe anyen i kom egoe oti, pien ka etimo kamanono, egoe anyen bino nyil tenge di eko weko apore adwong kalamo.

¹⁷Akadi da, likame tie dano moro kame keto bwini anyen i isau me lau oti, pien ka etimo kamanono, lau bino mwoc di bwini ko ony, di lau ko dubere; do bwini anyen koketo da i isau me lau anyen, di gin dedede likame kiko dubere.”

Nyar ka Ngapug kede Dako Komulo Egoe ka Yesu

(Marako 5.21-43; Luka 8.40-56)

¹⁸Di pwodi Yesu oudo tie waco ne gi kop noni, ngapug oko ot di eko riondiko i nyim Yesu di ewaco be, “Nyara kom otieko to nan noni, do bia i ot iket cingi i kome, me wek en ebed kuo bobo.”

¹⁹Yesu oko yai oko lube karacel kede josiao mege.

²⁰Kikano, dako moro kame oudo tie kede tuwo kame omio remo obedo ony ki kome pi mwakini tomon kiwie are oko bino cen ngei Yesu, di en eko mulo lak egoe mere,

²¹pien oudo ewaco kene be, “Do kom koto amulo egoe mere kenekene, koto acango.”

²²Yesu oko lokere oko nene di oko waco ne be, “Dii cunyi, nyara, yei ni ocangi.” Esawa nono di do dako nono oko cango.

²³Kakame Yesu do ooto kede i ot me ngapug, en eko neno jo kame kuto bilo me koko ngat oto, kede ekodet me jo di ocelakino kede koko.

²⁴En eko waco ne gi be, “Irwaunu tenge, pien nyako ni likame oto do en enino anina.” Gin kiko nyere.

²⁵Do kakame kotieko mino jo oduonyo kede ooko, Yesu oko donyo kakame nyako nono oudo buto iye di en eko kiarao en kede cinge, nyako nono oko yai.

²⁶Rwonge me kop noni oko sarakin i adul me piny nono dedede.

Yesu Ocango Imuduka Are

²⁷Kakame Yesu oyai kede ki kuno di etie ot, imuduka are oko donyo lube ki cen di kilemo be, “Wot ka Daudi, mi kisa maki kede wa.”



²⁸Kakame Yesu odonyo kede i ot, imuduka are nogo oko bino bute; Yesu oko penyo gi be, “Wun iyeunu be ango atwero cango wu?” Gin kiko dwoko ne be, “Ebo, Rwot.”

²⁹Yesu oko mulo wang gi di ewaco be, “Di lubere kede yei wu, wek etimere ne wu kamanono.”

³⁰Wang gi oko yabere. Yesu oko ciko gi kede dwan atek be, “Miero inenunu be likame imiunu ngatamoro ongeo kop noni.”

³¹Do gin kiko ot di kiko sarakino rwonge me gikame en etimo i adul nono dedede.

Yesu Ocango Icuo kame Lebe Oto

³²Kakame kitie ot do kede tenge, oko kelo ne Yesu icuo kame oudo tie kede jwogi kame lebe oto.

³³Do kakame Yesu otieko riamo kede jwogi tenge ki kome, dano kame oudo bin lebe oto nono oko cako yamo. Ekodet oko uro di kiwaco be, “Lem pwodi likame tie gi koneeno i piny me Isirael kame cal kaman.”

³⁴Do Iparisayon oko waco be, “En eriamo jwogi kede twer kowok kibus ngadwong me jwogi.”

Kisa omako Yesu Kede Jo

³⁵Yesu oko ririmo bomban kede calere dedede me kuno, di epwonyo jo i sinagogan kede di etuco ejiri me Ajakanut ka Rubanga. Bobo da oudo etie cango jo kame tie kede epone me tuwo apapat kede goro me kom.

³⁶Kakame bin eneno kede ekodet me jo, kisa oko make kede gi, pien oudo kitie kede par, doko di kidong atatai abongo kony, bala romini kame li kede ngakwat.

³⁷En eko waco ne josiao mege be, “Kac tie dwong, do jotic nonok.

³⁸Pi mano, legunu me wek Rwot won kac cwai jotic i kac mere.”

Matayo 10

Joor Tomon kiwie Are

(Marako 3.13-19; Luka 6.12-16)

¹Yesu oko lwongo josiao mege tomon kiwie are bute, en eko mino gi akarunikin me lono tipere areco kede riamo gi; kede me cango epone me tuwo dedede.

²Nying joor tomon kiwie are nogo ige: me agege Simoni kame kolwongo be Petero, kede omin mere Anderia; Yakobo wot ka Sebedayo kede omin mere Yokana;

³Pilipo kede Batulumayo, Tomasi kede Matayo ngarar esolo, Yakobo wot ka Alipayo, kede Tadeo.

⁴Simoni me Kanan kede Yuda Isikariot, ngat kame bin orupao Yesu.

Yesu Ooro Josiao mege Tomon kiwie Are

(Marako 6.7-13; Luka 9.1-6)



- ⁵Yesu oko oro cuo tomon kiwie are nogi di eciko gi be, “Kur iotunu kakame jo kalikame Iyudayan tie iye, doko da kur idonyunu i bomba moro me Josamaria,
- ⁶do otunu but jo me Isirael kame tie bala romini korwenyo.
- ⁷Doko kame itienu ot, tucunu ne jo be, ‘Ajakanut me malo do iyapiyapi.’
- ⁸Cangunu jotuwo, yaranunu jo oto, cangunu jo kame tie kede dobo, doko ikounu riamo jwogi da. Wun igamunu abongo cul, wuda miunu abongo cul.
- ⁹Kur imakunu saabu arabo siliba amoto kopa i isaun wu.
- ¹⁰Kur imakunu ikapu me ot sapali wu, akadi esati ace da, arabo amuka amoto ebela, pien kopooore mino ngatic cam mere.
- ¹¹” Ka idonyunu i bomba arabo i calo moro, mounu ngatamoro kiye kame cunye ber, di ikounu bedo kede en tuno wun yai.
- ¹²Ka itienu donyo i ot, miunu jo kame tie iye amot me mulem.
- ¹³Ka jo me ot nono obedo jo kame cuny gi ber, wek mulem wu dong but gi; do kame jo nogo likame cuny gi ber, wek mulem wu dwog butu.
- ¹⁴Doko ka ngatamoro likame ogamo wu arabo edagi winyo kop wu, tetengunu adae ki tienu kame itienu yai ki ot amotoko ki bomba nono, pi bedo bala ijura kame pido gi.
- ¹⁵Ateteni awaco ne wu be i ceng me ngolo kop, Rubanga bino bedo kede kisa i kom jo me Sodoma kede Gomora kalamo jo me bomba nono.

Itidil kame tie Bino

(Marako 13.9-13; Luka 21.12-17)

- ¹⁶“Nenunu, ango atie cwano wu bala romini i dier ipeon. Pi mano, bedunu di iriekunu bala twole, doko di imwolunu bala aweleko.
- ¹⁷Gwokerenu ki kom jo kame bino tero wu i nyim ekiko di kiko bino dano wu i sinagogan gi.
- ¹⁸Doko kibino mako wu kiko tero wu i nyim wegii apugan kede abakai pira, pi mino ijura i koma i nyim gi kede i nyim jo kalikame Iyudayan.
- ¹⁹Ka kitero wu i nyim ekiko, kur ibedunu kede par i kom gikame ibinunu waco arabo epone kame ibinunu yamo kede, pien gikame ibinunu waco kobino mino wu esawa nono.
- ²⁰Pien likame wun en kame ibinunu yamo, do Tipo ka Papa en kame bino yamo i dogu.
- ²¹“Dano bino mino kotero omin mere di oko neko, papa me atin da bino timo ne atin mere kamanono, kede idwe bino dagi jonywal gi di kiko mino koneko gi.
- ²²Jo dedede bino dagi wu pira, do ngat kame bino kanyakino tuno i ajikini bino udo alako.



²³Ka kitidilo wu i bomba acel, ringunu i bomba ocelu. Ateteni awaco ne wu be Wot ka dano oyaro dwogo di pwodi wun likame itiekunu rimaro bomban dedede me Isirael.

²⁴“Likame tie ngasiao moro kame pire dwong kalamo ngapwony mere kede ruom, iepone nono da ngatic likame pire dwong kalamo ngadwong mere.

²⁵Etie gikaber ka ngat kame somo odoko bala ngapwony mere, kede ka ngatic da odoko bala ngadwong mere. Ka gin kilwongo won ot be Belsebul, kibino do waco kope areco me angalo kalamo i kom jo mege me ot nono.

Ngat kame poore Alwora

(Luka 12.2-7)

²⁶“Pi mano, kur ilworunu gi, pien likame tie gimoro kame koumo kalikame kobino nyuto kakaler, doko likame tie gimoro kame kokano kalikame bino ngere.

²⁷Gikame ango awaco ne wu i kakacol wun wacunu i lero, kede kop kame iwinyunu di oweweo, wun tatamunu en ki wi ude.

²⁸Kur ilworunu jo kame neko kom dano do di likame kiko karuno neko tipo mere. Do lworunu ngat kame neko kom dano karacel kede tipo mere i mac kalikame to.

²⁹Mam omobilo are kocato pi siringi acel? Do di likame tie acel moro kikom gi kame potu piny abongo Papa wu yei ne.

³⁰Do kiton yer me wi wu da kotieko maro.

³¹Pi mano, kur ibedunu kede lwooro moro, pien wun piru tek kalamo omobilo atos.

Tuco Yei i kom Kirisito kede Dage

(Luka 12.8-9)

³²” Ngat acelacel kame tuco be en eyei ango i nyim jo, ada abino tuco be angeo en i nyim Papa na kame tie i malo,

³³ do ngat kame bino daga i nyim jo, ango da abino dage i nyim Papa na kame tie i malo.

Yesu okelo Apokapoka do Likame Mulem

(Luka 12.51-53; 14.26-27)

³⁴” Kur iparunu be ango abino pi kelo mulem i lobo, ango likame abino pi kelo mulem, do abino pi kelo epima.

³⁵ Ango abino pi kelo kwor i diere me awobi kede papa mere, i diere me nyako kede toto mere, i diere me dako kede daa mere,

³⁶doko jokwor ka dano bino bedo jo me i ode kikokome.

³⁷” Ngat kame maro toto mere arabo papa mere kalamo ango, udo likame epoore pi bedo mera. Doko ngat kame maro wode arabo nyare kalamo ango, udo likame epoore bedo mera.



³⁸ Doko ngat kalikame riongo musalaba mere di eko donyo luba, udo likame epoore pi bedo mera.

³⁹ Ngat kame gwoko kuo mere bino kei en, kede ngat kame rwenyo kuo mere pira ebino udo.

Giamia me pwoc

(Marako 9.41)

⁴⁰ “Ngat kame gamo wu, udo egama, kede ngat kame gama udo egamo Rubanga ngat kame oora.

⁴¹ Ngat kame gamo enabi i nying me enabi, bino udo giamia me pwoc me enabi, kede ngat kame gamo dano kopooore i nying me dano kopooore, ebino udo giamia me pwoc me dano kopooore.

⁴² Doko dano kame mio ngat acel kikom jo kalikame pirgi tek gi akadi ikopo me pii me amata i nying me ngasiao na, ateteni awaco ne wu be, likame ebino kei giamia mere me pwoc.”

Matayo 11

Jo kame Yokana Ngaibatis Ooro

(Luka 7.18-35)

¹ Di do Yesu oudo otieko pwoonyo josiao mege tomon kiwie are, en eko pororo ki kuno pi ot tucu kede pwoonyo jo kop mere i bomban gi.

² Kakame Yokana owinyo kede di etie i otkol gikame Yesu otimo, en eko cwano josiao mege but Yesu

³ pi penye be, “In en ibedo ngat kame oudo kowaco be oyaro bino, arabo wan omeede daro dano ace?”

⁴ Yesu oko dwoko ne gi be, “Dokunu ikounu waco ne Yokana gikame wun iwinyunu kede kame inenunu:

⁵ wang imuduka oyabere, ingwalasa do twero ot, jo kame tie kede dobo ocango, idingoi da yit gi oyabere, koyaruno jo oto kede kotuco Kop Aber ne jocan.

⁶ Etie kede winyo ngat kalikame tie kede gung i koma.”

⁷ Kakame do josiao ka Yokana tie ot kede tenge, Yesu oko cako yamo ne ekodet kop i kom Yokana be, “I kare kame wun bin iotunu kede but Yokana i tim, oudo iotunu neno nyo? Benyo, oudo iotunu neno lagara kame yamo yayango?”

⁸ Nyo kara ber kame wun oudo iotunu kuno pi neno? Benyo, iotunu neno ngat kame ngapo i goen acil? Li, pien jo kame ngapo igoen acil bedo i miere me abakai.

⁹ Do nyo kara ber kame wun oudo iotunu kuno neno? Benyo, oudo iotunu neno enabi? Ebo, doko awaco ne wu be ngat kame kalamo enabi en kame wun oudo iotunu neno.

¹⁰ Piento Yokana en kame iwandik kacil bin owaco kop i kome be, ‘Neni, atie cwano ngaor na geo ot nin anyim, kame bino iiko yongayo nin.’



¹¹Ateteni awaco ne wu be, kikom jo dedede kame kotieko nywalo, likame tie ngatamoro kame pire dwong kalamo Yokana Ngaibatis. Do ngat kame titidi twatwal i Ajakanut me malo pire dwong kalamo Yokana.

¹²Cako i kare ka Yokana Ngaibatis tuno tin, Ajakanut me malo oudo kobedo kelo tetek, doko jo gero obedo game tetek.

¹³Pien inabin dedede kede Iswil ka Musa bin omurao kop i kom Ajakanut tuno i kare ka Yokana;

¹⁴aso ka itwerunu yei, Yokana inonono kame enabi bin owaco kop i kome i kare kame ewaco kede be Elia oyaro bino.

¹⁵Ngat kame tie kede yite, wek ewinyi.

¹⁶” Do abino poro jo me i kare ni kede nyo? Gin kical bala idwe kame tie bedo i atale, kame lwongo jo tuko wad gi di kiwaco ne gi be,

¹⁷’ Wan ogo ne wu tum do likame imielunu, wan owololo ne wu koko kame okoko kede ngat oto, do ikounu dagi tururo.’

¹⁸Pien Yokana bin obino di likame ecamo, kede di likame emato gimoro kame mero jo, do jo oko waco be etie kede jwogi.

¹⁹Do Wot ka dano obino di ecamo kede di emato, doko jo oko waco be, ‘Nenunu icuo ni, en ebedo ngacam kede ngamera, doko en adieru me jorar esolo kede jodubo! ‘Do di rieko ka Rubanga nyutere be etie kakare i tice mege.’”

Bomban kame Dagi Yei

(Luka 10.13-15)

²⁰Yesu oko cako bunano bomban kame bin esingo timo iye tice me twer, pien jo kame tie i yi gi oudo bin odagi swilaro. En ewaco be,

²¹ “Ibino neno can in Korasin! Ibino neno can ida Betesaida! Pien koto tice me twer kame kotimo i diere wun oudo bin kotimo i bomban me Taya kede Sidon, jo kame tie i yi gi oudo koto otieko swilaro sek di kingapo giangapa me iturur.

²²Do ango awaco ne wu be, i ceng me ngolo kop Rubanga bino nyuto kisa ne jo me Taya kede Sidon kalamo wun.

²³ Aso, in Kaperanaum, iparo be kobino tingi malo? Kobino dwoki piny i kabedo me jo oto. Pien koto tice me twer kame kotimo i diere nin oudo kotimo Sodoma, oudo koto pwodi etie cungo tuno tin.

²⁴ Do awaco ni be, i ceng me ngolo kop Rubanga bino bedo kede kisa i kom jo me Sodoma kalamo in.”

Bianu Buta ikounu Udo Wei

(Luka 10.21-22)

²⁵Iesawa nono Yesu oko waco be, “Apwoyi, Papa, Rwot me malo kede me lobo, pien in ikano gigi kibut jorieko kede jo aniang, di iko nyuto gi ne idwe atino.



²⁶Ebo Papa, manono en epone kame in oudo imito be etimere kede.

²⁷ “Papa na otieko mina gi dedede i cinga; likame tie ngatamoro kame ngeo Wod, kwanyo kenekene Papa, doko likame tie ngatamoro kame ngeo Papa, kwanyo kenekene Wod, kede jo kame Wod oyero pi nyuto ne gi Papa.

²⁸” Bianu buta wun jo dedede kame ool kede kame yec odio, ango abino mino koru wei.

²⁹ Riongunu ayoko na ikounu pwonyere kibuta, pien ango awor doko amwol i cunya, di ikounu bino udo wei.

³⁰Pien ayoko nango yoyot doko yec na wekeweke.”

Matayo 12

Peny kame mako Ceng Sabato

(Marako 2.23-28; Luka 6.1-5)

¹ I kare nono Yesu oko ot di ebeo ki poti me engano Ceng Sabato moro acel; kec oudo oneko josiao mege, omio kiko cako gigitu wit engano di kimwodo nyige mege.

²Do kakame Iparisayon oneno kede gi noni, gin kiko waco ne Yesu be, “Neningo, josiao ni tie timo gikame Iswil wa gengo jo timo Ceng Sabato.”

³ Yesu oko dwoko ne gi be, “Benyo, wun likame pwodi isomunu gikame riki Daudi otimo di bin kec oneke, en karacel kede jo kame oudo tie kede?”

⁴ En bin edonyo i ot ka Rubanga di eko camo mugati kame oudo tie giamia but Rubanga, kame en akadi jo kame oudo tie kede en da oudo likame poore pi camo, do josaserdoti kenekene en kame oudo poore camo.

⁵ Benyo, arabo likame isomunu i Iswil ka Musa, epone kame josaserdoti kame tie i tempulo oturo kede Iswil me Sabato, do di likame kobino ngolo ne gi kop iye?

⁶Awaco ne wu be, gimoro kame pire tek kalamo tempulo tie kan.

⁷ Koto oudo ingeunu dwong me kop kame waco be, ‘Ango amito cuny me kisa do weko giayala, ‘koto oudo likame ingolunu raco i wi jo kame li kede kop moro.

⁸Pien Wot ka dano en Rwot me Sabato.”

Icuo kame Bade Omito

(Marako 3.1-6; Luka 6.6-11)

⁹Yesu oko yai ki kuno, di eko ot donyo i sinagoga.

¹⁰Kikano icuo kame bade omito oudo tie kuno. Jo mogo oko penye be, “Iswil wa yei cango dano Ceng Sabato?” Gin kipenye kamano tetekenye kiud kop moro kame kiromo pide iye.

¹¹ Yesu oko penyog gi be, “Ngai kikom wu, ka etie kede oromo mere acel di oko potu i bur i Ceng Sabato, likame ebino mako di eko woto ooko?”



¹²Dano pire tek kalamo oromo tien adi? Pi mano, Iswil yei ne wa timo bero i Ceng Sabato.”

¹³Di en eko waco ne icuo nono be, “Riei badi.” Icuo nono oko rienu bade, di bade oko doko ber bala bade ocelu.

¹⁴Do Iparisayon oko ot tenge, kiko poro kop me neke.

Ngatic kame Rubanga Oyero

¹⁵Kakame Yesu ongego kede gikame oudo kitie tamo i kome, en eko yai tenge ki kuno. Jo atot oko lube, di en eko cango gin dedede,

¹⁶di eko ciko gi be kur kimie engere.

¹⁷En etimo man pi mino cobere kakare gikame bin Rubanga owaco i dog enabi Isaya be,

¹⁸“Man en ngatic na kame ayero, en kame cunya maro, doko cunya yom i kome. Abino mine Tipo na Kacil, di en eko bino tuco ne jo kalikame Iyudayan be ango angolo kop kede ateni.

¹⁹En likame ebino piem kitek kede jo, arabo bedo ngat kame ngaredo, doko likame kobino winyo dwane di etie yamo i dier gudo me bomba.

²⁰En likame ebino turo magada ka ogom, doko likame ebino neko etala kame liel midumidu tuno di etieko mino ngolo kop me ateni ka Rubanga oudo loc;

²¹di jo kalikame Iyudayan ko bino keto gen gi i kome.”

Yesu kede Belsebul

(Marako 3.20-30; Luka 11.14-23)

²²Di jo oko kelo ne Yesu icuo kame oudo tie kede jwogi kame omio wange kede lebe oto. Yesu oko cange, di do en eko cako yamo kede neno piny.

²³Jo dedede kame oudo tie kuno oko uro di kipenyere be, “Dano ni karuno bedo akwar Daudi?”

²⁴Do kakame Iparisayon owinyo kede gikame Yesu otimo, gin kiko waco be, “Dano ni riamo jwogi kede twer kowok kibus Belsebul, ngadwong me jwogi.”

²⁵Yesu oudo ngeo tam gi, omio en eko waco ne gi be, “Ajakanut acelacel kame pokere, di kiko donyo dagere udo kony mere otieko doko li, doko bomba arabo paco kame tie kede apokapoka iye likame karuno cungo.

²⁶Aso, ka Sitani bobo riamo Sitani wad gi, udo ajakanut mere opokere; nan do ajakanut mere nono bino cungo benyo?

²⁷Aso, kame ango ariamo jwogi pi twer kame Belsebul en komia, do idwe wu riamo jwogi kede twer kame wok kibus ngai do? Pi mano, gin kibino bedo jongolkop wu.

²⁸Do ka ango ariamo jwogi pi twer me Tipo ka Rubanga, udo Ajakanut ka Rubanga otieko do tuno butu.



29” Arabo dano karuno donyo i ot me ngat atek di eko yako jame mege benyo benyo di pwodi likame kong egeo tweno dano atek nono? Ka egeo timo kamano en kamio ekaruno yako jame mege.

30 “Ngat kalikame tie pira udo edaga, kede dano kame likame koko kede ango udo en esasaro.

31Pi mano, awaco ne wu be, kobino sasiro jo ki dub dedede kede acae i kom Rubanga, do dano kame waco kop me acae i kom Tipo Kacil likame kobino sasiro en.

32 Doko ngat kame waco kop arac i kom Wot ka dano, kobino sasiro en; do ngat kame waco kop arac i kom Tipo Kacil, likame kobino sasiro en i kare kanataman akadi i kare kame bino bino.

Yat kede Anyakini mere

(Luka 6.43-45)

33 “Ka imito udo anyakini abeco, poore imi yat kome bed yot, do ka kom yat likame yot, en enyako anyakini areco. Pien yat ngere kede anyakini mere.

34 Wun idwe me twole! Ikarununu yamo kope abeco benyo benyo do di wun ibedunu jo areco? Pien dog dano waco gikame opong i cunye.

35Dano aber kelo gi aber ki jamini abeco kame en ekano, kede dano arac da kelo gikarac ki jamini areco kame en ekano.

36” Awaco ne wu be i ceng me ngolo kop ngat acelacel bino tatamo pinyo komio en oudo ebedo daco yamo kop acelacel kame bin en ewaco.

37Pien kop kame wok ki dogi en kame bino mini ilo pido, doko kop kame wok ki dogi da en kame bino mino kongolo kop loi.”

Kopenyo Yesu pi Timo Giaura

(Marako 8.11-12; Luka 11.29-32)

38 Di do mogo kikom jopwony me Iswil kede Iparisayon oko waco ne Yesu be, “Apwony, wan omito neni di itimo gianena moro.”

39 Do Yesu oko dwoko ne gi be, “Jo me i kare ni kame timo tim areco kede kalikame yei Rubanga penyo pi mito neno gianena moro, do likame tie gianena moro kame kobino mino gi, kwanyo kenekene gianena kame bin otimere ne enabi Yona.

40 Pien bala kite kame bin Yona otieko kede ceng adek kede iwor adek i yi eputa, kamanono da Wot ka dano bino bedo piny i yi lobo pi ceng adek kede iwor adek.

41 I ceng me ngolo kop jo me bomba me Ninebe bino cungo di kiko mino kop lo jo me i kare ni, pien bin gin kiwinyo kop kame Yona opwonyo kiko swilaro ki dub gi; do nenunu, otienu kan kede gikame pire tek kalamo Yona.

42 I ceng me ngolo kop abaka adako me tetu piny bino cungo kede jo me i kare ni di en eko pido gi, piento en bin eyai ki ajikini me lobo kakabor pi ot winyo kop me rieko kibus abaka Sulumani, do nenunu, otienu kan kede ngat kame pire tek kalamo Sulumani.



Dwogo me Tipo arac i kom Dano

(Luka 11.24-26)

⁴³” Ka tipo arac oyai ki kom dano, ebeo i adulion otuo di emo kakame eromo wei iye, do likame en eko karuno udo.

⁴⁴En eko bino waco be, ‘Abino dok i oda kame awok kiye.’ Kame en edwogo, ebino udo ode no di koweo yie doko di koike kiber.

⁴⁵Di do en eko ot eko kelo tipere kanyaare icegun areco kalamo en, gin kiko donyo di kiko bedo kuno; di kuo me dano no ko doko rac kalamo kite kame oudo etie kede i agege. Aso, ebino timere kamanono da ne jo areco me i kare noni.”

Imiegu ka Yesu kede Toto mere

(Marako 3.31-35; Luka 8.19-21)

⁴⁶Kakame Yesu oudo pwodi tie yamo kede jo, toto mere, kede imiegu mege oko cungo ooko, di oudo kimito yamo kede Yesu.

⁴⁷Ngatamoro oko waco ne Yesu be, “Toto ni kede imiegu ni tie cungo ooko di kimito yamo kedi.”

⁴⁸Do en eko dwoko ne ngat kame kocwao be, “Ngai en kame toto na, doko alu en kame imiegu na?”

⁴⁹En eko cimo josiao mege di ewaco be, “Toto na kede imiegu na gin ige!

⁵⁰Pien ngat kame timo gikame Papa na kame tie i malo mito, en kobedo omina, amina kede toto na.”

Matayo 13

Agole me Ngacuc

(Marako 4.1-9; Luka 8.4-8)

¹Cenge nono Yesu oko yai ki ot di eko ot bedo piny i dog nam.

²Ikodeta adongo me jo oko cokere bute, omio en eko donyo i yi yee di eko bedo iye; jo dedede oko dong cungo i dog nam.

³En eko waco ne gi kope atot i agole. En ewaco be, “Bin tie dano moro kame ooto i potu cuno kodi.

⁴Kakame oudo etie cuc kede, kodi mogo oko popoto i yongayo, winy oko bino di oko camo gi pit.

⁵Kodi mogo oko popoto i lobo kobedo lela lela, kakame lobo oudo rerep kiye, kiko susunyo tui pien lobo oudo nonok.

⁶Do kakame ceng orieny kede, ceng oko wango gi kiko ner, pien aliasin gi oudo likame odonyo piny kiber.

⁷Kodi mogo oko popoto kakame okuto oudo tie iye, mago okuto oko susunyo dongo di oko twilo gi.



⁸Apat oko popoto i lobo aber kiko nyak, mogo olingo wi gi kame wit gi tie kede nyige tol acel, mogo ot kanyape, kede mogo ot adek.

⁹” Ngat kame tie kede yite wek ewinyi.”

Gikame omio Yesu Pwonyo i Agole

(Marako 4.10-12; Luka 8.9-10)

¹⁰Kikano josiao oko bino but Yesu di kiko penye be, “Pinyo komio in iyamo kede gi i agole?”

¹¹En eko dwoko be, “Pien kotieko mino wun ngeno mung me Ajakanut me malo, do Rubanga likame omio jo apat ngec nono.

¹² Pien ngat kame tie kede gimoro kobino medo ne ace, tetekeny en eko bedo kede atot; do ngat kame li kede gimoro, akadi atitidi kame etie kede da kobino kwanyo kibute.

¹³Ango ayamo kede gi i agole pien gin kingio do likame kineno, kiciko yit gi do likame kitwero winyo amoto niang.

¹⁴ Gikame bin Isaya omurao ocobere kakare kikut gi, kame waco be, ‘ Ateteni jogi bino winyo kop do likame kiko niang, kede kibino ngino do likame kiko neno.

¹⁵Pien wi gi odoko pek, kede kiculo yit gi da kur winy kop, doko kimio wang gi da; ka koto oudo likame kamanono, koto wang gi okaruno neno, doko yit gi koto owinyo, kede koto wi gi da oniang, di kiko lokere buta di ango ako cango gi.’

¹⁶ “Do wun itienu kede winyo pien wangun neno, doko yitu winyo.

¹⁷Ateteni ango awaco ne wu be, bin inabin kede jo kopoore atot oudo tie kede mit me neno gikame wun inenunu, do likame kiko neno, doko oudo kimito winyo gikame wun iwinyunu, do likame kiko winyo.

Yesu Ogonyo dwong me Agole me Ngacuc

(Marako 4.13-20; Luka 8.11-15)

¹⁸” Pi mano, winyunu gikame agole me ngacuc pwonyo.

¹⁹Ka ngatamoro owinyo kop me Ajakanut ka Rubanga di likame en eko keto i kuo mere, Ngarac bino di eko waraso kop kame kocuo i cunye. Ngat nono cal bala kodi kopopoto i yongayo.

²⁰Kodi kopopoto i lobo kobedo lela lela cungo pi dano kame winyo kop ka Rubanga, cucuto en eko game kede kilel;

²¹do kop nono likame ko keto aliasin i kuo mere, mio en eko kanyakino pi kare acecek. Aso, ka peko arabo itidil moro oko bino pi kop nono, en epoto cucuto.

²²Kodi kopopoto i dier okuto cungo pi dano kame winyo kop ka Rubanga, do pi paro kuo me piny kan kede mito abar ko twilo kop nono di ko mine likame enyako anyakini me yei i kuo mere.



²³Kodi kopopoto i lobo aber cungo pi dano kame winyo kop ka Rubanga di eko mino edonyo i kuo mere, en eko timo anyakini me yei bala kodi kame wie nyako nyige tol acel i wite acel, ace ot kanyape kede apat ot adek.”

Agole me Doi

²⁴Yesu oko bobo waco ne jo agole ace be, “Kokaruno poro Ajakanut me malo kede ngat kocuo kodi abeco i potu mere.

²⁵Do iwor acel di oudo jo dedede tie nino, ngakwor mere oko ot di eko cuno nyige me okitu i potu me kal nono, eko gire ot tenge.

²⁶I kare kame kal odongo kede di kiko suro, okitu da oko neeno.

²⁷Jotic me won paco nono oko ot bute kiko waco ne be, ‘Adwong, mam bin in oudo icuo kodi abeco i potu nin? Doko okitu otuno iye benyo?’

²⁸En eko dwoko ne gi be, ‘Miero di ngakwor na moro en kotimo gino.’ Jotic oko penye be, ‘Do nan imito be wan ooti opuputo gi?’

²⁹Di en eko waco be, ‘Li, pien kame ipuputunu okitu, ibinunu puputo kiton kal da karacel kede gi.

³⁰Wekunu gin kimeede dongo karacel tuno i kare me kac, di ango ako bino waco ne jokac pi ber cako puputo okitu, di kiko twetweo gi i abungeta pi wango gi, i cen mere gin kiko bino koko kal kiko keto i dero na.’ “

Agole me Nyige me Karadali

(Marako 4.30-32; Luka 13.18-19)

³¹Yesu bobo oko waco ne gi agole ace be, “Ajakanut me malo cal bala nyige me karadali kame dano kwanyo di en eko cuno i potu mere.

³²En etitidi kalamo kodere dedede, do kame etui eko dongo, edoko dwong kalamo deke dedede kame jo pito i poti, di en eko doko yat ojanyo, kame mio winy bino ko gero ude gi i ajange mege.”

Agole me Arup

(Luka 13.20-21)

³³Yesu bobo oko tatamo ne gi agole ace be, “Ajakanut me malo cal bala arup kame dako kwanyo di eko nyalo kede alos aromo gipim adek, tuno kede di en eko mino moko alos lung buuno.”

Pwony i Agole

(Marako 4.33-34)

³⁴Magi dedede bin Yesu owaco ne ekodet i agole, ateteni mere likame tie gimoro kame en epwonyo gi abongo tic kede agole.

³⁵En etimo kaman pi mino cobere kakare gikame enabi bin owaco be, “Abino yamo kede gi i agole; abino tuco gi komungere cako i kare kame kocweo kede piny.”

Yesu Ogonyo dwong me Agole me Doi



³⁶Yesu oko yai eweko ekodet me jo, en eko ot di eko donyo i ot, josiao mege oko bino bute di kiwaco be, “Gony ne wa dwong me agole me doi kame tie i potu.”

³⁷En eko dwoko be, “Ngat kame ocuo kodi abeco en Wot ka dano;

³⁸poto en piny, kodi abeco en jo kame tie i Ajakanut ka Rubanga, doi en jo ka Ngarac.

³⁹Ngakwor kame ocuo doi en Sitani, kac en ajikini me piny, kede jokac en imalaikan.

⁴⁰Bala kite kame kocoko kede doi di oko wango i mac, ebino timere kamanono da i ajikini me piny.

⁴¹Wot ka dano bino oro imalaikan mege, gin kiko bino coko jo dedede kame tao ne jo apat dubo, kede jo kame timo gikareco kiye Ajakanut mere,

⁴²di kiko uco gi i mac kodop kakame jo bino koko kede mwodo lak gi kiye.

⁴³Di do jo opoore ko bino rieny bala ceng i Ajakanut ka Papa gi. Ngat kame tie kede yite wek ewinyi.

Agole me Abar kame Kokano

⁴⁴” Ajakanut me malo cal bala abar kame kokano i potu, kame dano oudo di eko umo pi yomcuny adwong kame etie kede, en eko ot di eko cato gi dedede kame etie kede, di eko wilo kede potu nono.

Agole me Kidi me Wel

⁴⁵” Doko Ajakanut me malo cal bala ngacat kame mo kide me wel;

⁴⁶i kare kame eudo kede kidi acel me wel, en eko ot cato gi dedede kame oudo etie kede pi wilo kede kidi nono.

Agole me Bwoi

⁴⁷” Doko da Ajakanut me malo cal bala bwoi kame oudo kouco i nam di eko mako deknam me epone dedede.

⁴⁸Kakame oudo bwoi otieko pong kede, jo oko wane i dog nam, kiko bedo piny yero deknam abeco di kiketo i yi ebukit, do kiko uco areco mege tenge.

⁴⁹Ebino timere kamanono da i ajikini me piny; imalaikan bino wok di kiko poko jokareco kikom jo kopoore,

⁵⁰di kiko uco gi i mac kodop, kakame jo bino koko kede mwodo lak gi kiye.”

Pwony Anyen kede Acon

⁵¹Yesu oko penyo gi be, “Itiekunu mam do niang gigi dedede?” Gin kiko dwoko ne be, “Ebo, oniang.”

⁵²En eko waco ne gi be, “Pi mano, ngaiwandik acelacel kame kotieko pwonyo kop i kom Ajakanut me malo cal bala won pacu kame woto gi anyen kede acon ki kakame ekano iye jame mege.”

Jo me Nasaret Odagi Yesu



(Marako 6.1-6; Luka 4.16-30)

- ⁵³Kakame Yesu otieko kede mino pwoony i agole, en eko yai tenge ki kuno,
⁵⁴di eko ot i bomba me tur gi, en eko cako pwoonyo jo me kuno i sinagoga gi. Gin kiko uro di kiwaco be, “Icuo ni oudo rieke kede tice me twer gi ki tuai?”
⁵⁵Mam wot ka ngapac ine? Mam nying toto mere Maria? Imiegu mege en Yakobo, Yosepu, Simoni kede Yuda.
⁵⁶Mam amiegu mege dedede tie karacel kede wa? Do do en eudo gigi dedede ki tuai?”
⁵⁷Gin di do cuny gi oko dage. Do Yesu oko waco ne gi be, “Jo me kabedo dedede woro enabi, kwanyo jo me adul me tur gi kede jo me i ode.”
⁵⁸En likame eko timo tice me twer kuno pien oudo gin ki li kede yei.

Matayo 14

To ka Yokana Ngaibatis

(Marako 6.14-29; Luka 9.7-9)

- ¹kare no Erode ngapug me Galilaya oko winyo epone kame oudo nying Yesu iruo kede,
²en eko waco ne jotic mege be, “Yokana Ngaibatis en ine kame oyaruno kikom jo oto, en komio etie kede twer acal kamano.”
³Pien Erode oudo omio komako Yokana di oko tweno i otkol pi kop Erodia, dako ka omin mere kame nyinge Pilipo;
⁴pien Yokana oudo owaco ne be, “Iswil likame yei ni nyomo Erodia.”
⁵Bed bala Erode oudo mito neko Yokana, do en eko lworu jo, pien jo oudo tero be Yokana obedo enabi.
⁶Di bin ceng kame koyutuno kede nywalo Erode otuno, nyar ka Erodia oko miel i nyim wele kame oudo obino i ebaga, di cuny Erode oko bedo yom adikinicel,
⁷omio en eko cikere di elairo pi mino nyako nono gimoroni kenekene kame en ebino penyo be mie.
⁸Nyako nono oko lubo acora ka toto mere, di en eko waco be, “Mia wi Yokana Ngaibatis i sinia kan.”
⁹Gini oko cobo cuny abaka, do pi kite kame oudo etieko kwongere kede i nyim wele mege, en eko ciko be miero mi nyako nono gikame epenyo.
¹⁰En eko cwano jo ooto ngolo ngut Yokana i otkol,
¹¹oko kelo wi Yokana di tie i sinia di oko mine, di en eko tero ne toto mere.
¹²Josiao ka Yokana oko bino kiko kwanyo kome kiko ot yiko, di do kiko ot waco ne Yesu.

Yesu Opito Jo Tutumia Kany



(Marako 6.30-44; Luka 9.10-17; Yokana 6.1-14)

¹³Kakame Yesu owinyo kede kop me to ka Yokana, en eko donyo i yi yee di eko yai ki kuno eko ot kakoling. Do kakame jo owinyo kede kamano, kiko yai ki bomban kede tien gi di kiko lube.

¹⁴I kare kame Yesu oudo tie wok kede i dog nam, en eko neno ekodet me jo, eko bedo kede par pirgi, en eko cango joe gi kame oudo tuwo.

¹⁵Kakame piny oyuto kede, josiao mege oko bino bute di kiko waco ne be, “Kan oling, doko esawa okato, peruno jo ot wil cam i calere kiyapiyapi kan.”

¹⁶Yesu oko dwoko ne gi be, “Likame kipoore ot tenge, wun nogo miunu gi gimoro kicami.”

¹⁷Gin kiko waco ne be, “Wan otie kan kede mugati kany kede deknam are kenekene.”

¹⁸Yesu oko waco ne gi be, “Kelunu gi buta kan.”

¹⁹En eko waco ne ekodet pi bedo piny i wi lum. En eko kwanyo mugati kany kede deknam are nogo, di eko ngino malo, eko pwono Rubanga di en eko tuturo mugati, eko mino josiao mege, di josiao oko popoko ne jo.

²⁰Gin dedede kiko cam kiko yeng. Di josiao oko koko cam kame odong oko pongo ibukito tomon kiwie are.

²¹Cuo kame ocamo wel gi oudo romo tutumia kany, di likame komaro iye mon kede idwe.

Yesu Ooto ki wi Pii kede Tiene

(Marako 6.45-52; Yokana 6.15-21)

²²Yesu oko mino josiao mege odonyo i yi yee pi telo ne yongayo me ot loka, di en ber edong cen peruno jo.

²³Ingei peruno jo, en eko ot i wi moru kene pi lego. Kakame piny oyuto kede, en oudo etie do kuno kene.

²⁴Esawa no yee oudo otieko do tuno kakabor kede itela, di ebuka tie napunapun i kome, pien yamo oudo tie buko di wok ki tetu nyim gi.

²⁵Do di piny bin otuno obai, Yesu oko bino but gi di eoto ki wi pii kede tiene.

²⁶Do kakame josiao onene kede di eoto ki wi pii kede tiene, lworu atek oko mako gi, kiko waco be, “Kom jwogi inonono.” Kiko cako dwilao pi lworu.

²⁷Cucuto di Yesu oko waco ne gi be, “Bedunu kede nwangcuny, ango inononi, kur lworu maku.”

²⁸Petero oko dwoko be, “Rwot, ka in inonono, wac ne ada abin buti ki wi pii.”

²⁹Yesu oko waco ne be, “Bia.” Petero oko wok ki yee di eko ot but Yesu kede tiene ki wi pii.



³⁰Do kakame eneno kede yamo, lworoko make, eko cako lwinyi yi pii. En eko kok be, “Rwot laka.”

³¹Cucuto Yesu oko rieno cinge oko make, di eko waco ne Petero be, “In ngat kame yei ni nonok, pinyo komio cunyi gung?”

³²Kakame kidonyo kede i yi yee, yamo oko kwei.

³³Jo kame oudo tie i yi yee oko mine wor di kiwaco be, “Ateteni in ibedo Wot ka Rubanga.”

Yesu Ocango Jotuwu i Genesaret

(Marako 6.53-56)

³⁴Kakame kitieko do ngolo kede nam, kiko wok itela i Genesaret.

³⁵Kakame jo me kuno oneno kede Yesu di kiko ngene, gin kiko cwano jo i adulon me kuno dedede, di jo oko kelo ne Yesu jo dedede kame oudo tuwo.

³⁶Di gin kiko donyo bako dog gi ne Yesu be eyei ne jotuwu mulo lak egoe mere. Jo dedede kame oko mulo egoe mere oko cango.

Matayo 15

Pwony me Joakwari

(Marako 7.1-13)

¹kikano Iparisayon mogo kede jopwony me Iswil oko wok ki Yerusalem di kiko bino but Yesu kiko waco ne be,

²” Pinyo komio josiao nin likame lubo itok me joakwari wa? Pien gin likame kilwoko cing gi kame kiyaro cam.”

³Yesu oko dwoko ne gi be “Do pinyo komio wuda iturunu cik ka Rubanga me wek ilubunu itok wu?”

⁴Pien Rubanga bin owaco be, ‘Wor Papa ni kede toto ni, ‘kede be, ‘Miero nek dano kame waco kop arac i kom papa mere arabo toto mere.’

⁵Do wun ipwonyunu be, ka dano moro owaco ne Papa mere amoto toto mere be, ‘Gikame koto oudo iudo kibuta, ango atieko mino Rubanga, ‘likame epoore do timo ne papa mere amoto toto mere gikame nyuto wor.

⁶Aso, wun itiekunu mino kop ka Rubanga kony mere odoko li pi wun lubo itok wu.

⁷Wun joecuke! Isaya bin omurao kop me ateni i komu di ewaco be,

⁸‘Jogi wora kede dog gi, do cunyi gi bor kibuta.

⁹Kiwora wor me nono, pien gin kipwonyo iswilia ka dano ineno bala kidoko mega.’
“

Gikame Pwoko Dano

(Marako 7.14-23)

¹⁰Yesu oko lwongo jo bute, en eko waco ne gi be, “Winyunu di ikounu niang.



- ¹¹Likame gikame donyo i dog dano en kame munao en, do gikame wok ki dog dano en kame munao en.”
- ¹²Josiao oko ot but Yesu kiko penye be, “Ingeo be cuny Iparisayon oudo owang kakame kiwinyo kede kop kame in iwaco?”
- ¹³Yesu oko dwoko be, “Giapita moroni kame Papa na me malo en kalikame opito kobino puto.
- ¹⁴Wun wekunu gin ken gi, gin kibedo imuduka kame telo jo, pien ka emuduk opeo emuduk wad gi, gin duc kibino poto i bur.”
- ¹⁵Do Petero oko waco ne be, “Gony ne wa dwong me agole nono.”
- ¹⁶Yesu oko waco ne gi be, “Mere wuda kom likame pwodi itienu kede niang?”
- ¹⁷Mam inenunu be gikame donyo i dog dano kato i yie di do eko pelao ooko me kome?
- ¹⁸Do gikame wok ki dog dano udo owok ki cunye, gi nono en kame munao dano.
- ¹⁹Pien ki cuny dano wok kiye par areco, nek, adote, caro, kuwo, ijura me angalo kede dubo nying jo.
- ²⁰Magi en gikame munao dano i nyim Rubanga, do camo cam kede cing kalikame kolwoko likame munao dano.”

Yei me Dako me Kanan

(Marako 7.24-30)

- ²¹Yesu oko yai tenge ki kuno di eko ot i adul me bomban me Taya kede Sidon.
- ²²Dako moro me Kanan kame oudo bedo i adul me kuno oko bino but Yesu di eko lelemo be, “Okwe Rwot, Wot ka Daudi, mi kisa maki i koma, jwogi omako nyara nan etie kirac twatwal.”
- ²³Do Yesu likame oko dwoko ne kop moro. Josiao ka Yesu oko ot bute kiko donyo bako ne dog gi be, “Koto iwaco ne dako no eot tenge, pien etie lubo wa di elelemo.”
- ²⁴Yesu oko dwoko be, “Ango oudo oora but jo me Isirael kenekene, jo kame orwenyo bala romini.”
- ²⁵Do dako nono oko ot oko riondiko i nyime di ewaco be, “Rwot konya.”
- ²⁶Yesu oko dwoko be, “Likame eber cako kwanyo cam me idwe di iko uco ne igwogin.”
- ²⁷Dako nono oko dwoko be, “Ebo Rwot, do igwogin da camo angidingidin me cam kame popoto ki wi emesa me ngadwong gi.”
- ²⁸Yesu oko dwoko ne be, “Dako ni, yei ni dwong twatwal! Wek etimere ni bala kite kame in imito kede.” Kikano nyare oko cango esawa nono.

Yesu Ocango Jo Atot



²⁹Yesu oko yai ki kuno di eko ririto dog nam me Galilaya. En eko ot i wi moru di eko bedo piny.

³⁰Ikodeta me jo atos adikinichel oko ot bute di kitero ingwalasa, jo kame bad gi kede tien gi owanere, imuduka, jo kame leb gi oto kede apat atos. Gin kiko pielo gi piny i nyim Yesu di en eko cango gi.

³¹Ikodeta me jo oko uro kakame kineno kede di jo kame leb gi oudo oto tie do yamo, jo kame bad gi kede tien gi oudo owawanun di do odoko ber, di ingwalasa ogeo ot kede di imuduka ogeo neno piny. Gin kiko pako Rubanga me Isirael.

Yesu Opito Jo Tutumia Ongwon

(Marako 8.1-10)

³²Yesu oko lwongo josiao mege bute, di eko waco ne gi be, “Kisa omaka kede jogi, pien kibedo kan keda nan oromo ceng adek, doko nan likame kitie kede gi me acama. Cunha likame mito peruno gi kede kec, pien kibino nure i yongayo.”

³³Josiao oko penye be, “Tuai en kame obino udo kiye cam kame romo pito lwak jo kame rom kan i tim kan?”

³⁴Yesu oko penyoy gi be, “Itienu kede mugati adi?” Gin kiko dwoko be, “Kanyaare, kede deksam mogo atitino anonok.”

³⁵Yesu oko waco ne jo be bed piny.

³⁶En eko kwanyo mugati kanyaare kede deksam nogo, en eko mino pwoc but Rubanga di eko tuturo gi eko mino josiao; di josiao oko popoko ne jo.

³⁷Gin dedede kiko cam di kiko yeng, di josiao oko koko angidingidin me cam kame odong oko pongo ibukito kanyaare.

³⁸Jo kame ocamo oudo romo cuo tutumia ongwon di likame komaro iye mon kede idwe.

³⁹Yesu oko peruno jo pi ot i miere gi, di en eko donyo i yi yee, di eko ot i adul me Magadan.

Matayo 16

Iparisayon Openyo Giaura kibun Yesu

(Marako 8.11-13; Luka 12.54-56)

¹Iparisayon kede Isadukayon oko bino but Yesu pi kino doge. Kiko penye pi timo ne gi gianena moro kame yai ki malo.

²En eko dwoko ne gi be, “Kame piny oyuto, wun ikounu waco be, ‘Malo obokere, diki piny bino bedo ler.’”

³Doko odiko ikounu waco be, ‘Tin kot bino cwei pien malo obokere, doko idoun oliero.’ Wun ingeunu ngino malo di ikounu tuco ka kot oyaro cwei arabo li, do likame itwerunu niang dwong me gikame tie timere i kare ni.



⁴ Jo me i kare ni kame timo tim areco kede kalikame yei Rubanga mito be mi gi gianena, do likame tie gianena moro kame koyaro mino gi, kwanyo kenekene gianena kame otimere ne Yona.” En eko yai eoto tenge eweko gi.

Arup me Iparisayon kede Isadukayon

(Marako 8.14-21)

⁵ Kakame josiao otuno kede loka tetuca, wi gi oudo owil mako mugati.

⁶ Yesu oko waco ne gi be, “Gwokerenu ki arup me Iparisayon kede me Isadukayon.”

⁷ Gin kiko donyo yamo ken gi ken gi be, “En eyamo kamano pien wan likame okelunu mugati.”

⁸ Do kite kame Yesu oudo ngeo kede gikame gin kitie yamo, omio en eko penyo gi be, “Wun jo kame yei wu nonok, pinyo komio itieny yamo kop me bedo li kede mugati wun kenu kenu?”

⁹ Mam likame pwodi iniangunu? Mam likame iyutununu epone kame apito kede jo tutumia kany kede mugati kany? Bin ikounu koko cam kame odong opongo ibukito adi?

¹⁰ Arabo, mam likame iyutununu kite kame apito kede jo tutumia ongwon kede mugati kanyaare? Ikounu bin koko cam kame odong opongo ibukito adi?

¹¹ Benyo benyo komio likame iniangunu be angoo oudo likame atie waco kop kame mako mugati? Gwokerenu ki arup me Iparisayon kede me Isadukayon.”

¹² Di do josiao oko niang be en oudo likame etie waco ne gi be kigwokere ki arup kame konyalo me timo mugati, do pi gwokere ki pwony me Iparisayon kede me Isadukayon.

Kop kame Petero Otuco i kom Yesu

(Marako 8.27-30; Luka 9.18-21)

¹³ I kare kame Yesu ooto kede i adul me Sisiria Pilipi, en eko penyo josiao mege be, “Kara ber jo waco be Wot ka dano en ngai?”

¹⁴ Gin kiko dwoko be, “Mogo waco be Yokana Ngaibatis, mogo be Elia kede jo apat waco be en Yeremia arabo ngat acel kikom inabin.”

¹⁵ En eko penyo gi be, “Do wun iwacunu be angoo en ngai?”

¹⁶ Simoni Petero oko dwoko be, “In en Kirisito, Wot ka Rubanga kakuo.”

¹⁷ Yesu oko dwoko ne be, “Simoni wot ka Yokana, in itie kede winyo! Pien likame dano adana en kame omi ingeo kop noni, do Papa na kame tie malo.

¹⁸ Nataman awaco ni be, in en Petero. Ango abino gero ekodet me jo koyei angoo i wi lela noni, doko akadi twer me to likame bino twero bwone.

¹⁹ Abino mini isumilito me Ajakanut me malo. Gi dedede kame in ibino tweno i piny, kobino tweno i malo da, doko gi dedede kame in ibino gonyo i piny kobino gonyo i malo da.”



²⁰Di do en eko ciko josiao mege kitek be kur kiwac ne ngatamoro be en ebedo Kirisito.

Yesu Owaco Kop kame mako Can kede To Mere

(Marako 8.31—9.1; Luka 9.22-27)

²¹Cako i kare no, Yesu oko cako niango josiao mege be, miero en eot Yerusalem di eko beo i can atot kikut joadongo me piny, jodongo me josaseredoti, kede jopwony me Iswil, di kiko neke, do di oko bino yaruno en i ceng me adek.

²²Di Petero oko kwanye otere tenge di oko donyo bunano en di ewaco be, “Rubanga geng gini, Rwot! Gini likame miero timere ne in.”

²³Do Yesu oko lokere oko waco ne Petero be, “Irwa tenge ki nyima, in Sitani! In itie gengo ango timo gikame amito pien likame tam nin owok kikut Rubanga, do ebedo me ka dano.”

²⁴Yesu oko waco ne josiao mege be, “Ka ngatamoro mito luba, ber kong edagere kene di en eko riongo musalaba mere eko luba.

²⁵Pien ngat kame mito lako kuo mere bino rwenye, kede ngat kame rwenyo kuo mere pira bino ude.

²⁶Bero nyo kame dano bino udo ka eudo gi dedede kame cunye mito i piny kan do di eko kei kuo mere? Arabo nyo kame dano bino mino pi dwoko kuo mere?

²⁷Pien Wot ka dano oyaro bino kede imalaikan mege di etie i deyo ka Papa mere, di en eko bino culo ngat acelacel pi gikame etimo.

²⁸Ateteni awaco ne wu be, tie jo mogo kame nataman tie kan, kalikame bino bilo to tuno di kineno Wot ka dano di etie bino di etie i Ajakanut mere.”

Matayo 17

Cal ka Yesu Olokere

(Marako 9.2-13; Luka 9.28-36)

¹Ingei ceng kanyape, Yesu oko kwanyo Petero, Yakobo kede omin mere Yokana, di en eko tero gi malo i wi moru kargi ken gi.

²Kom Yesu oko lokere i wang gi kanono, di nyime oko rieny bala ceng, kede igoen mege oko doko tar liamaliam.

³Gin kiko neno Musa kede Elia di tie yamo kede Yesu.

⁴Petero oko waco ne Yesu be, “Rwot, eber pi wan bedo tie kan. Ka imito, abino gero kimere adek kan, acel ne in, acel ne Musa kede acel ne Elia.”

⁵Di oudo pwodi etie yamo, edou atar oko umo gi pukupuk, di dwan oko wok ki edou di waco be, “Man en Woda kame amaro, cunya yom i kome; winyenu.”

⁶Kakame josiao owinyo kede kop noni, gin kiko popoto kiriebo nyim gi piny, di kiko bedo kede lworu karacel kede wor.



- ⁷Do Yesu oko ot oko mulo gi di ewaco be, “Yaunu, doko kur ibedunu kede lworu.”
- ⁸Do kakame kitingo kede wang gi malo, likame tie ngatamoro kame kiko neno kwanyo Yesu kenekene.
- ⁹Kakame Yesu kede josiao mege oudo tie wok kede ki wi moru, en eko ciko gi be, “Kur iwacenu ngatamoro gikame inenunu, tuno kame koyaruno Wot ka dano kikom jo oto.”
- ¹⁰Josiao oko penyo Yesu be, “Do pinyo komio doko jopwony me Iswil waco be Elia en kame miero gei bino?”
- ¹¹Yesu oko dwoko be, “Ebo Elia en kame miero gei bino di en eko temuno gi dedede;
- ¹² do awaco ne wu be, Elia otieko bino, do jo likame oko ngene, di gin kiko timo ne gikame cuny gi oudo mito. Wot ka dano da bino neno can i cing gi iepone acel nono.”
- ¹³Josiao di do oko niang be Yesu oudo tie yamo ne gi kop i kom Yokana Ngaibatis.

Yesu Ocango Awobi kame tie kede Jwogi

(Marako 9.14-29; Luka 9.37-43a)

- ¹⁴Kakame Yesu kede josiao mege odwogo kede but ekodet, icuo moro oko bino but Yesu di eko riondiko piny i nyime, di eko waco ne be,
- ¹⁵” Rwot, mi kisa maki i kom woda. En etie kede tuwo me ikwikwing, kame tie mine neno can twatwal, pien maro rereto en i mac kede i pii.
- ¹⁶Oudo akele but josiao ni, do gin likame kiko twero cange.”
- ¹⁷Yesu oko dwoko be, “Wun lwak koparao me i kare ni, kame li kede yei, miero abed kede wu pi kare kame rom amene? Apoore kanyakino kope wu tuno awene? Kelenu buta kan.”
- ¹⁸Yesu oko koko jwogi, di jwogi oko wok ki kom awobi nono, di do eko cango esawa nono.
- ¹⁹Josiao oko lwidar ot but Yesu kiko penye be, “Pinyo komio wan likame oudo otwero riamo jwogi nono?”
- ²⁰ Yesu oko dwoko ne gi be, “Pien yei wu titidi. Pi ateteni awaco ne wu be, ka itie kede yei kame rom kede nyige me karadali, ikaruno waco ne moru ni be, ‘Yai ki kane i ot kuca, ‘di eko bino yai da. Doko likame tie gimoro kame karuno loni.
- ²¹(Do ilega kede kanyo kec kenekene en kame mio gikame cal kamanoni yai, likame bobo tie gimoro ace.)”

Yesu Bobo Owaco Kop kame mako To mere

(Marako 9.30-32; Luka 9.43b-45)

- ²²Kakame josiao oudo ocokere kede i Galilaya, Yesu oko waco ne gi be, “Kobino mino Wot ka dano i cing jo,



²³gin kiko bino neke, do oko bino yaruno en i ceng me adek.” Josiao oko bedo kede cwercony adwong.

Culo Esolo me Tempulo

²⁴ Kakame Yesu kede josiao mege ooto kede Kaperanaum, jorar esolo me tempulo oko ot but Petero di kiko penye be, “Apwony wu mam culo esolo me tempulo?”

²⁵En eko dwoko be, “Ebo, eculo.” Kakame Petero odok kede paco, Yesu oko cako yamo kede, di ewaco be, “Simoni, in iparo benyo? Abakai me piny kan gamo esolo me jame kede esolo me apugan kibus anywali me piny arabo kibus jokumbor?”

²⁶Petero oko dwoko be, “Kigamo kibus jokumbor.” Yesu oko dwoko ne be, “Dwong mere be anywali me piny likame culo esolo.

²⁷Do wan likame omito wango cuny gi, in ot i nam iko uco iliket, iko kwanyo deknam kame bino cako moko. Ka iyabo doge ibino udo ogap kame romo culo esolo nin kede mera me tempulo; kwany iko mino gi.”

Matayo 18

Ngai en kame Pire Dwong Kalamo?

(Marako 9.33-37; Luka 9.46-48)

¹ Esawa nono josiao oko bino but Yesu kiko penye be, “Ngai en kame pire dwong kalamo i Ajakanut me malo?”

²Yesu oko lwongo atin, en eko mine ecungo i diere gi,

³ di eko waco be, “Ateteni awaco ne wu be, kalikame ilokerenu ikounu doko bala idwe, likame ibinunu donyo i Ajakanut me malo.

⁴Ngat kame mwolere bala atin ni, en kame pire dwong kalamo i Ajakanut me malo.

⁵Ngat kame gamo atin bala man i nyinga udo egama.

Atama kame mio Dano Dubo

(Marako 9.42-48; Luka 17.1-2)

⁶ Do ngat kame mio acel i kom jo atino kame oyei ango gi dubo, oudo koto bedo ber ka kotweo ne kidi me riego i ngute di oko lwinye kede i nam.

⁷Can kame lobo tie iye pi bedo tie kede atama kame mio jo dubo! Atama poore bedo tie, do etie i can ngat kame kelo atama!

⁸ “Ka cingi arabo tieni en kame mi idubo, ngole iko uce tenge; eber ne in donyo i kuo me ateni abongo cingi arabo tieni, amotoko di ingwalo, akaka in bedo kede cingi are kede tieni are di oko uci i mac kalikame to.

⁹ Doko ka wangi en kame mi idubo, gole iuce tenge; eber ne in donyo i kuo me ateni kede wangi acel, akaka in bedo kede wangi are dedede di oko uci i mac kalikame to.

Agole me Oromo Korwenyo

(Luka 15.3-7)



¹⁰” Miero inenunu be likame icaunu acel kikom jo atino gi, pien awaco ne wu be, imalaikan gin tie nakanaka i nyim Papa na kame tie i malo.

¹¹(Pien Wot ka dano obino pi lako jo korwenyo.)

¹²” Wun iparunu benyo? Ka dano tie kede romini tol acel, di acel kikom gi oko parao tenge, mam eweko ot kanyangon kiwie kanyangon i bad moru di eko ot mono koparao tenge nono?

¹³Ka eude, ateteni awaco ne wu be, en ebino lelo pire kalamo pi icegun ot kanyangon kiwie kanyangon kalikame oparao tenge ka.

¹⁴Iepone acel nono, Papa na kame tie i malo likame mito be acel moro kikom jo atino gi rweny tenge kibute.

Gikame ipoore Timo ka Ngat ocelu Odubo

¹⁵ “Ka dano acel i ekodet wu otimo dub, ot imie engei raco mere di in itie kede en wun jo are. Ka ewinyo kop nin, udo itieko dwoko omini.

¹⁶Do ka edagi winyo kop nin, kwany dano acel moro arabo jo are apat iko ot kede gi, tetekey tie me ijurak are arabo adek karuno moko kope kame wun iyamunu.

¹⁷Ka edagi winyo dwan gi, tatamo kop mere i dier ekodet me jokirisito. Do ka edagi winyo akadi kop me ekodet me jokirisito, tere bala ngat kalikame oyei amotoko bala ngarar esolo.

Tweno kede Gonyo

¹⁸ “Ateteni ango awaco ne wu be, gi dedede kame wun itweunu i piny, kobino tweno i malo da, doko gi dedede kame wun igonyunu i piny kan kobino gonyo i malo da.

¹⁹” Doko awaco ne wu be, i wi lobo kan, ka jo are kikom wu owinyere i kom gimoro kame gin kikwao, Papa na kame tie i malo bino timo ne gi.

²⁰Pien kakame jo are arabo adek ocokere iye i nyinga, udo ada atie i diere gi.”

Agole me Ngatic kalikame Sasiro Jo

²¹ Petero oko nyiko but Yesu di eko penye be, “Rwot, ka omina otimo na dub, apoore sasiro en tien adi? Benyo, tien kanyaare?”

²² Yesu oko waco ne be, “Likame ango awaco ni be tien kanyaare, do ot kanyaare tien kanyaare.

²³Pi mano, koporo Ajakanut me malo kede abaka kame mito ngingico epone kame jotic mege otio kede sente.

²⁴I kare kame egeo ngingico kede epone kame kotio kede sente, oko kelo ne ngatic acel kame oudo eburao talente tutumia tomon.

²⁵Do kite kame oudo likame etwero culo kede, ngadwong mere oko waco be cate ribo kede cege, karacel kede idwe mege, kede jame dedede kame etie kede di oko culo kede banya.



²⁶Kikano ngatic nono oko riondiko piny, di eko donyo ngangao ngadwong mere nono be, ‘Adwong dire ber imia kare moro, ango abino culi gi dedede.’

²⁷Kisa oko mako abaka kede ngatic nono, en eko gonye di en eko sasiro en kur ecul banya nono.

²⁸” Do kakame ngatic nono oudo tie ot kede, en eko ngoole i kom ngatic wad gi kame oudo ebura denari tol acel. En eko deno dwan icuo nono di ewaco ne be, ‘Amito icula banya na.’

²⁹Ngatic wad gi oko riondiko piny di eko donyo bako ne doge kede mwolo be, ‘Dire ber kong pi kare moro, ango abino culi.’

³⁰Do en eko dagi, di eko tero icuo nono rwako i otkol tuno kede di etieko culo banya mere.

³¹Kakame jotic wad gi oneno kede gi kotimere, gin kiko bedo kede cwercury, kiko ot but ngadwong gi kiko tatamo ne gi kotimere dedede.

³²Ngadwong mere oko lwonge di oko waco ne be, ‘In ngatic arac! Ango asasiro in be kur icula banya ca lung pien in ibako na dogi,

³³do oudo ida mam ipoore timo kisa ne ngatic wadu, bala kame ada atimi kede kisa?’

³⁴Abaka oko bedo kede wangcuny di eko keto ngatic nono i cing jo kame daro otkol pi mine alola tuno kede ka eculo banya mere dedede.

³⁵Aso, manono da en gikame Papa na me i malo bino timo ne dano acelacel kibutu, ka likame isasiro dano wadu i cunyi.”

Matayo 19

Yesu Opwonyo kop kame mako Gonyo Nyom

(Marako 10.1-12)

¹kakame Yesu otieko waco kede kope nogi, en eko yai ki Galilaya i adul me Yudea, kame tie loka tetuca me ecilet me Yorodan.

²Ikodeta adongodongo me jo oko lube di en eko cango jotuwo ki kuno.

³Iparisayon mogo oko bino bute pi kino doge di ki penye be, “Iswil wa yei ne dano riamo dako mere pi tien kop moroni kenekene?”

⁴ Yesu oko dwoko ne gi be, “Mam itiekunu somo iwandik kacil kame waco be, ngat kame bin ocweo jo i kare me agege ocweo gi icuo kede dako,

⁵ di en eko waco be, ‘Pi manoni, icuo bino weko papa mere kede toto mere, di en eko ribere kede dako mere, gin jo are go kiko doko kom acel’ ?

⁶Aso, udo doko likame kitie jo are, do udo gin kidoko kom acel. Pi mano, gikame Rubanga otieko ribo karacel, kur ngatamoro poki.”



⁷ Iparisayon oko penye be, “Do pinyo komio Musa bin oko mino cik kame waco be, dano karuno mino cege baluwa me gonyo nyom di en eko riame?”

⁸ Yesu oko dwoko ne gi be, “Musa bin oyei ne wu pokere kede mon wu pi tek wi wu. Do oudo likame etie kamanono cako ki agege me cweno piny.

⁹ Pi mano, ango awaco ne wu be, tek ngat kame riamo dako mere pi kop ace apat kede kop me caro, di en eko nyomo dako ace, udo etimo adote.”

¹⁰ Josiao oko waco ne be, “Ka mano en gikame tie i dier icuo kede dako mere, tikatika jo oudo wek do nyomere.”

¹¹ Do Yesu oko dwoko ne gi be, “Likame jo dedede bino yei gamo kop noni, do kenekene jo kame Rubanga omio kop noni but gi.

¹² Pien tie jo kame konywalo di gin kibedo abwocin, kede tie da jo mogo kame jo en komio gi kibedo abwocin, kede tie jo komito bedo abwocin ken gi pi Ajakanut me malo. Ngat kame twero yei gamo kop noni wek egami.”

Yesu Omio Idwe atino Winyo

(Marako 10.13-16; Luka 18.15-17)

¹³ Jo mogo oko kelo idwe atino but Yesu me wek eket cinge i wi gi di eko lego ne gi. Do josiao oko donyo cokocoko gi be kiweki.

¹⁴ Do Yesu oko waco be, “Wekunu idwe atino bin buta, kur igengunu gi; pien Ajakanut me malo tie pi jo kame cal bala gin.”

¹⁵ En eko keto cinge i wi gi di eko yai eoto tenge.

Awobi Kobar

(Marako 10.17-31; Luka 18.18-30)

¹⁶ Kikano awobi moro kame oudo obaro oko bino but Yesu di oko penye be, “Apwony, nyo aber kame poore na timo pi udo kuo kame bedo nakanaka?”

¹⁷ Yesu oko penye be, “Pinyo bo komio ipenya i kom kop kame mako gikaber? Ngat acel kenekene en kame ber. Ka imito donyo i kuo kame bedo nakanaka, poore igwok cik ka Rubanga.”

¹⁸ En eko penyo Yesu be, “Cik mege?” Yesu oko dwoko ne be, “Kur ineko; Kur itimo adote; Kur ikwalo; Kur imio ijura me angalo;

¹⁹ Wor papa ni kede toto ni; Imar ngakio ni bala kite kame imaro kede komi keni.”

²⁰ Awobi nono oko dwoko ne be, “Ango atieko gwoko cik go dedede; nyo kame pwodi arem kede?”

²¹ Yesu oko waco ne be, “Ka imito bedo ngat kame ber, ot iko cato jame kame itie kede, di iko mino jocan sente kame iudo di iko bino bedo kede abar i malo, di do iko bino luba.”

²² Kakame awobi nono owinyo kede kop no, en eko ot tenge di cunye owang, pien oudo ebaro twatwal.



²³Yesu oko waco ne josiao mege be, “Ateteni awaco ne wu be, ebino bedo tek twatwal ne ngabar donyo i Ajakanut me malo.

²⁴Doko awaco ne wu be, eyoyot ne aguragura donyo ki wang piso kalamo ngabar donyo i Ajakanut ka Rubanga.”

²⁵Kakame josiao owinyo kede kop noni, gin kiko bedo kede lworu adwong di kipenyere be, “Ngai do kame twero udo alako?”

²⁶Do Yesu oko ngino gi di eko waco be, “Man likame twerere kibut dano, do kibut Rubanga gi dedede twerere.”

²⁷Di Petero oko dwoko be, “Neningo, wan oweko gi dedede di oko lubi. Nyo kame wan obino do udo?”

²⁸Yesu oko waco ne gi be, “Ateteni awaco ne wu be, i kare kame Wot ka dano bino bedo kede i kom mere me deyo i piny kanyen, wun jo kame ibedunu luba i ibinunu bedo i kabedo me pug tomon kiwie are pi pugo atekerin tomon kiwie are me Isirael.

²⁹Doko ngat acelacel kame oweko ude mege, imiegu arabo amiegu mege, papa mere arabo toto mere, idwe mege arabo lobo mere pira, ebino udo gikame kalamo magonogi tien tol acel, doko en eko bino udo kuo kame bedo nakanaka.

³⁰Do jo atot kame nataman tie me agege bino bedo me ajikini, kede jo kame nataman tie me ajikini bino bedo me agege.

Matayo 20

Agole me Jotic me Poto me Olok

¹” Pien Ajakanut me malo cal bala won poto kame bin odilo yai ot mono jotic pi bino tic i poto mere me olok.

²Ingei winyere kede jotic pi culo gi ngat acelacel denari acel pi ceng acel, en eko cwano gi i poto me olok.

³Tetu esawa adek me odiko en eko yai ot, di eko neno jo mogo da di tie cungo acunga i atale abongo timo tic moro.

⁴En eko waco ne gi be, ‘Wuda otunu i poto me olok, ango abino mino wu cul aber.’ Gin kiko ot.

⁵En eko ot timo bobo kamanono esawa kanyape kede doko esawa kanyangon.

⁶Do tetu esawa tomon kiwie acel, en bin eko ot di eko udo jo ace di tie cungo; en eko penyo gi be, ‘Pinyo komio wun icungunu acunga kan abongo tic piny yuluyul?’

⁷Gin kiko waco ne be, ‘Piento likame ngatamoro omio wa tic.’ En eko waco ne gi be, ‘Aso, wuda otunu i poto me olok.’

⁸“Di do otieno otuno, won poto oko waco ne ngat kame telo wi jotic be, ‘Lwong jotic iko gelo gi, igei kede jo kame komio tic i cen tuno kede but jo kame kogeio mino tic.’



⁹Kakame jo kame oudo komio tic esawa tomon kiwie acel obino kede, oko culo ngat acelacel denari acel.

¹⁰Esawa kame jo kame oudo ogeo tic obino kede, oudo kiparo be gin kibino udo gikame kalamo; do oko culo gida ngat acelacel denari acel.

¹¹Do Kakame kigamo kede cul gi, kiko donyo piem kede won poto

¹²di kiwaco be, ‘Jo kame obino i cen gi otio pi esawa acel kenekene, di in iko culo gi rom aroma kede wan, do di wan otio i dier ceng aliet piny yuluyul.’

¹³” Do en eko dwoko ne ngat acel kikom gi be, ‘Diera, likame tie gimoro arac kame ango atimo ni; mam oudo awinyere kedi pi tic ceng acel lung di ako culi denari acel?’

¹⁴In gam cul kame maki di iko ot. Ango ayei pi culo jo kame obino i cen gi di rom aroma kede wu.

¹⁵Iparo be oudo ango ali kede akarunikin me tic kede lim na bala kame cunya mito? Arabo nyeko omaki i koma pi bercunya? ’ ’ ”

¹⁶“Iepone nono jo me ajikini bino bedo me agege, kede jo me agege bino bedo me ajikini.”

Yesu Owaco Kop me To mere Tien me Adek

(Marako 10.32-34; Luka 18.31-34)

¹⁷Bin di Yesu tie ot Yerusalem, etero josiao tomon kiwie are kargi ken gi, eko waco ne gi di oudo kitie ot i yongayo be,

¹⁸” Winyunu, wan otienyu ot Yerusalem, di oko bino mino Wot ka dano i cing jodongo me josaseredoti kede jopwony me Iswil. Gin kibino ngolo ne kop me to,

¹⁹kiko mine i cing jo kalikame Iyudayan, kame bino timo ne tim me anywar kede dane, di kiko gure i kom musalaba, do oko bino yaruno en i ceng me adek.”

Gikame Toto me Josiao Are Okwao kikut Yesu

(Marako 10.35-45)

²⁰Di do toto me awobe ka Sebedayo oko ot but Yesu kede awobe mege, di eko riondiko i nyime eko kwane pi mine gimoro.

²¹Yesu oko penye be, “Nyo en kame in imito?” En eko waco ne Yesu be, “Sikano be kikom awobe na are gi, acel bino bedo i badi tetu cam kede ocelu i badi tetu ngodal i Ajakanut nin.”

²²Do Yesu oko dwoko ne gi be, “Wun likame ingeunu gikame itienyu kwano. Benyo, itwerunu wuda mato ikopo me can kame ango ayapuno mato?” Gin kiko dwoko ne be, “Wan otwero.”

²³Yesu oko waco ne gi be, “Ateteni ibinunu mato ikopo na me can, do ango likame atie kede akarunikin me mino ngatamoro bedo i bada tetu cam kede tetu ngodal. Do kabedo nogi tie pi jo kame Papa na otieko iiko ne gi.”

²⁴Kakame josiao icegun tomon owinyo kede kop noni, kiko lilo kede imiegu are nogo.



²⁵ Do Yesu oko lwongo gin dedede bute, di eko waco ne gi be, “Wun ingeunu be jo kame pugo jo kalikame Iyudayan pugo gi tetek, doko da jodongo gi tie kede akarunikin i kom gi.

²⁶ Man likame epone kame miero ebed kede i diere wu, do ngat kame mito bedo dano kame pire dwong kikom wu, miero ebed ngatic wu.

²⁷ Doko ngat kame mito bedo me agege i diere wu, miero ebed epasoit wu,

²⁸ bala kite kame Wot ka dano da likame obino kede pi jo timo ne tic, do en ebino pi timo tic ne jo icegun, kede pi jalo kuo mere pi lako jo atos.”

Yesu Ocango Imuduka Are

(Marako 10.46-52; Luka 18.35-43)

²⁹ Bin di Yesu kede josiao mege oudo tie yai ki bomba me Jeriko, ekodet me jo oko lube.

³⁰ Kikano, imuduka are kame oudo tie bedo i nget yongayo oko winyo be Yesu oudo tie beo kanono, kiko cako ilelem be, “Wot ka Daudi, Okwe mi kisa maki kede wa!”

³¹ Ekodet me jo oko donyo cokocoko gi di waco ne gi be kilingi. Do gin kiko medo ilelem ameda be, “Rwot, Wot ka Daudi, Okwe mi kisa maki kede wa.”

³² Yesu oko cungo di eko lwongo gi di ewaco be, “Imitunu be ango atim ne wu nyo?”

³³ Gin kiko waco ne be, “Rwot, mi wang wa yabere.”

³⁴ Kisa oko mako Yesu kede gi, en eko mulo wang gi, cucuto di do wang gi oko cako neno piny, di do kiko lube.

Matayo 21

Yesu Odonyo Yerusalem bala Abaka

(Marako 11.1-11; Luka 19.28-40; Yokana 12.12-19)

¹ Kakame bin Yesu kede josiao mege onoko kede Yerusalem, di kituno i calo me Betepage, i wi moru me Olibeti, Yesu oko cwano josiao are

² di ewaco ne gi be, “Otunu i calo kame tie anyim ca, cucuto ibinunu udo punda kame otweo di etie kede atin mere i ngete. Gonyunu gi di ikounu kelo gi buta.

³ Ka ngatamoro owaco ne wu kop moro, wun wacenu be, ‘Rwot en kame mito gi’ ; cucuto en ebino yei ne wu kelo gi.”

⁴ Man otimere pi mino cobere kakare gikame bin enabi owaco be,

⁵ “Wacenu nyar ka Sion be, neningo abaka ni tie bino buti. En emwol, etie wanano punda, kede atin me punda nono.”

⁶ Josiao oko ot di kiko timo bala kame Yesu oudo owaco ne gi,

⁷ kiko kelo punda kede atin mere. Gin kiko peto igoen gi ingei punda nogo di Yesu oko bedo iye.



⁸Jo atot i ekodet oko peto igoen gi i yongayo, apat mege oko tongo ajange me yen kiko peto i yongayo.

⁹Ekodet me jo kame oudo bin telo anyim kede kame oudo lubo Yesu ki cen oko cako ilelem be, “Osana but wot ka Daudi! Etie kede winyo, ngat kame bino i nying Rwot! Osana i malo twal.”

¹⁰Kakame Yesu oko donyo kede Yerusalem, bomba lung oko rubere, di jo penyere be, “Ngai ine?”

¹¹Ekodet kame oudo upere kede Yesu oko dwoko be, “Man en Yesu enabi kame owok ki bomba me Nasaret, i adul me Galilaya.”

Yesu Ooto i Tempulo

(Marako 11.15-19; Luka 19.45-48; Yokana 2.13-22)

¹²Yesu oko donyo i tempulo, di eko riamo jo dedede kame oudo tie cato kede wilo jame ooko. En eko rereto imesai me jo kame oudo seso sente, kede gibedo me jo kame oudo cato amam.

¹³En eko waco ne gi be, “Kowandiko i iwandik kacil be, ‘Kobino lwongo oda be ot me ilega’ ; do wun ilokenu edoko kapwono me joyak.”

¹⁴Imuduka kede ingwalasa oko bino but Yesu i tempulo, en eko cango gi.

¹⁵Do kakame jodongo me josaseredoti kede jopwony me Iswil oneno kede gi me aura kame en etimo, kede di idwe tie ilelem i tempulo be, “Osana but Wot ka Daudi,” cuny gi oko wang.

¹⁶Gin kiko penyo Yesu be, “Mam itie winyo gikame jogi tie waco?” Yesu oko dwoko ne gi be, “Ebo; do mam itiekunu somo iwandik kacil be, ‘In imio imukerun kede idwe adot opaki kakare’ ?”

¹⁷Yesu oko yai oweko gi, en eko wok ki bomba eoto Betania, di eko buto kuno.

Yesu Olamo Yat Epigi

(Marako 11.12-14, 20-24)

¹⁸Odiko kakame Yesu oudo tie dwogo kede i bomba, kec oudo oneke.

¹⁹En eko neno yat epigi ilak yongayo. En eko ot i dude, do likame eko udo anyakini moro iye kwanyo pote erume. Di do en eko waco ne yat nono be, “Likame ibino nyak bobo.” Esawa nono di yat nono oko tuo.

²⁰Kakame josiao oneno kede gikame oudo otimere, kiko uro twatwal di kipenyere be, “Benyo benyo komio yat ni osusunyo tuo?”

²¹Yesu oko dwoko ne gi be, “Ateteni awaco ne wu be, ka itienu kede yei abongo gung i cunyu, likame ibinunu timo gikame kotimo ne yat noni kenekene, do akadi iwacenu moru ni be, ‘Putere iot ipoti i nam’ , ebino timere da.

²²Doko ka ilegunu di itienu kede yei, ibinunu udo gi dedede kame ikwaunu.”

Peny i kom Akarunikin ka Yesu



(Marako 11.27-33; Luka 20.1-8)

²³Kakame Yesu oduyo kede i tempulo, jodongo me josaserdoti kede joadongo me piny oko ot bute di oudo etie pwoy. Gin kiko penye be, “Akarunikin mene en kame in itimo kede gigi? Ngai en komii akarunikin nono?”

²⁴Yesu oko dwoko ne gi be, “Ango da ayaro penyo wu peny acel, ka imianu adwokini mere, ada ako bino waco ne wu akarunikin kame ango audo me timo gigi.

²⁵Akarunikin kame bin Yokana batiso kede jo oudo owok ki malo arabo kibun jo?” Gin kiko cako piem ken gi ken gi be, “Ka owacunu be, ‘Ewok ki malo, ‘en ebino waco ne wa be, ‘Do pinyo komio likame ikounu yei en?’

²⁶Do ka owacunu be, ‘Ewok kibut jo, ‘otienu kede lworu i kom ekodet me jo, pien jo dedede ngeo kiber be Yokana obedo enabi.”

²⁷Di do gin kiko dwoko be, “Wan girwa okwia.” Yesu oko waco ne gi be, “Akadi ada likame abino waco ne wu akarunikin kame ango atie timo kede gi nogi.”

Agole me Awobe Are kede Papa gi

²⁸Yesu oko meede kede yamo be, “Wun iparunu benyo? Icuo moro oudo bin tie kede awobe mege are; en eko ot but awobi mere me agege di eko waco ne be, ‘Woda, ape ber tin itim tic i potu me olok.’

²⁹Do en eko dwoko be, ‘Ango likame ayaro ot’ ; do i cen mere en eko loko tam mere di eko ot.

³⁰Papa gi oko ot but awobi me are da di eko waco bobo kop acel nono; di awobi nono oko waco ne be, ‘Adwong ayaro ot’ ; do likame en eko gire ot.

³¹Awobi mene kikom awobe are go en kotimo gikame papa mere mito?” Gin kiko dwoko be, “Awobi me agege.” Yesu oko waco ne gi be, “Ateteni awaco ne wu be, jorar esolo kede imalayan bino cako ot ne wu i Ajakanut me malo.

³²Pien Yokana bin obino butu pi nyuto ne wu yongayo me ateni, do wun likame ikounu yei en, do jorar esolo kede imalayan oko yei en. Akadi i kare kame bin itiekunu neno kede gikame gin kitimo da, wun likame ikounu loko tam wu di ikounu yei en.”

Agole me Jodar Poto me Olok

(Marako 12.1-12; Luka 20.9-19)

³³Yesu oko meede kede yamo be, “Winyunu bobo agole ace. Bin tie icuo moro kopuro potu me olok, di eko luke kede awas. En eko kunyo bur me bino bwini iye, di eko gero esipet me daro potu. Di do en eko keto jo mogo daro ne potu nono, di en eko ot i piny apat.

³⁴Kakame kare me ngwedo anyakini otuno kede, en eko cwano jotit mege but jodar potu pi omo ne anyakini kame make.

³⁵Jodar potu oko daruno jotit mege nogo kiko bungo acel abunga, kiko neko acel, kede ocelu di kiko didipo kede kide.



- ³⁶En bobo eko cwano jotic ace kame tot kalamo me agege noka; do jodar poto doko oko timo ne gi tim acel nono.
- ³⁷Me ajikini mere, en eko cwano wode but gi di ewaco be, ‘Kibino bedo kede wor but woda.’
- ³⁸Do kakame jodar poto oneno kede wode nono, kiko donyo yamo ken gi ken gi be, ‘Man en musika mere, bia onekeno, me wek jame kame en epoore sikao dok megwa.’
- ³⁹Gin kiko make, di kiko uce ooko me poto di kiko neke.
- ⁴⁰” Nan do ka won poto me olok no obino, iparunu be nyo kame en ebino timo ne jodar poto go?”
- ⁴¹Gin kiko dwoko ne be, “Ebino neko jo areco go iepone me to arac adikinicel, di en eko bino keto poto me olok i cing jodar ace, kame bino mine anyakini kame make i kare me ngwedo gi.”
- ⁴²Yesu oko waco ne gi be, “Mam itiekunu somo iwandik kacil be, ‘ Kidi kame jogedo odagi en kame olokere oko doko kidi me esonda kame pire tek; man Rwot en kotimo, doko i wang wa etie gi me aura’ ?
- ⁴³” Pi mano, awaco ne wu be, kobino kwanyo Ajakanut ka Rubanga kibutu di oko mino atekerin kame nyako anyakini kabeco.
- ⁴⁴Ngat kame poto i wi kidi noni bino ngingidun, do ka kidi noni opoto i kom dano moro, ebino nyinyito dano nono.”
- ⁴⁵I kare kame jodongo me josaseredoti kede Iparisayon owinyo kede agole noni, gin kiko ngeno be Yesu oudo tie waco kop i kom gi.
- ⁴⁶Di gin kiko tamo make, do oudo kilworo ekodet me jo, pien jo oudo niang be Yesu en enabi.

Matayo 22

Agole me Ebagame Nyom

(Luka 14.15-24)

- ¹Yesu bobo oko yamo kede gi i agole be,
- ²” Okaruno poro Ajakanut me malo kede abaka kame otimo ebagame nyom ka wode.
- ³En eko cwano jotic mege pi ot lwongo jo kame bin kolwongo i nyom, do likame gin kiko bino.
- ⁴Bobo en eko cwano jotic ace di ewaco ne gi be, ‘Otunu iwacenu wele kame alwongo i ebagame ango atieko iiko cam; aneko twonin kede itobai na kame ocwe. Gi dedede do tie cuto; bianu do i ebagame nyom.’
- ⁵Do jo kame oudo kolwongo likame oko paro pi lwongo nono, di kiko ot tenge. Ngat acel ooto i poto mere, ocelu oko ot timo cat mere,



- ⁶di jo icegun oko mako jotic mege, kiko timo ne gi tim me lewic di kiko neko gi.
- ⁷Abaka nono oko doko ger di eko cwano isirikalen mege pi ot neko jonek nogo kede wango bomba gi.
- ⁸En eko waco ne jotic mege be, ‘Kotieko do iiko ebaga me nyom, do jo kame ango alwongo oudo likame obedo jo apoore me alwonga.
- ⁹Pi mano, otunu i akarakara me yote, di ikounu lwongo jo kame iudunu di tot bala kame itwerunu, wek kibin i ebaga me nyom.’
- ¹⁰Jotic ka oko ot i yote di kiko koko jo dedede kame kiudo, jo areco kede abeco karacel, di do wele oko pongo goga me nyom.
- ¹¹” Do esawa kame abaka oduyo kede pi neno wele, en eko neno icuo moro kuno kame oudo likame tie kede engape me nyom.
- ¹²Abaka oko penye be, ‘Diera, in idonyo kan benyo abongo engape me nyom?’ Kop kame edwok oko bwone.
- ¹³ Abaka di do oko waco ne jotic mege be, ‘Tweunu cinge kede tiene ikounu uce ooko kakacol, kakame jo bino koko kede mwodo lak gi kiye.’
- ¹⁴” Pien kolwongo jo atot do koyero anonok.”

Peny kame mako Culo Esolo

(Marako 12.13-17; Luka 20.20-26)

- ¹⁵Kikano Iparisayon oko ot iiko tam pi udo epone me mako kop moro arac ki dog Yesu.
- ¹⁶Gin kiko cwano josiao gin, karacel kede jo me ekodet ka Erode pi ot but Yesu kede peny kame waco be, “Apwony, wan ongebe in itie dano me ateni, doko in ipwonyo jo i yongayo ka Rubanga i ateni. In likame ilworo ngatamoro, pien in likame ineno dano kede cal mere me ooko.
- ¹⁷Nan do wac ne wa tam nin; benyo, iswil yei ne wa culo esolo but Kaisari arabo li?”
- ¹⁸Do Yesu oudo ngeo tam arac kame gin oudo kitieko iiko, en eko peny gi be, “Wun joecuke, pinyo komio itienu tama?”
- ¹⁹Nyutanu sente kame koculo kede esolo.” Gin kiko kelo ne sente akaya acel.
- ²⁰Yesu oko peny gi be, “Cal kede nying ngai ine kame tie iye ni?”
- ²¹Gin kiko dwoko be, “Me ka Kaisari.” Di do en eko waco ne gi be, “Pi mano, miunu jame ka Kaisari but Kaisari, ikounu mino me ka Rubanga da but Rubanga.”
- ²²Kakame kiwinyo kede kop mere, kiko uro, di do kiko yai kioto tenge kiweke kene.

Peny kame mako Iyarun

(Marako 12.18-27; Luka 20.27-40)

- ²³ I ceng acel nono, Isadukayon, jo kame waco be iyarun me jo oto li, oko ot but Yesu di kiko penye be,



²⁴ “Apwony, Iswil ka Musa bin waco be, ‘Ka icuo moro oto abongo nywalo idwe, omin mere miero mak apuserut me wek enywal kede idwe ne omin mere kame oto nono.’

²⁵ Aso, bin tie imiegu kanyaare kede wa kan. Me agege onyomere di en eko to eweko dako abongo atin. Omin mere ace oko sikao apuserut nono.

²⁶ Gi acel nono oko timere ne awobi me are, me adek tuno kede i me kanyaare.

²⁷ Ingei gin dedede to, dako nono da oko to.

²⁸ Nan do i kare me iyarun, en ebino bedo dako ka ngai? Pien cuo kanyaare nogo dedede oudo obedo kede en bala dako gi.”

²⁹ Do Yesu oko dwoko ne gi be, “Wun ipotunu, pien wun ikwianu iwandik kacil akadi twer ka Rubanga da.

³⁰ Pien i kare me iyarun cuo kede mon likame bobo bino nyomere, do kibino bedo cal bala imalaikan kame tie i malo.

³¹ Aso, i kom kop kame mako iyarun me jo oto, mam wun itiekunu somo gikame oudo Rubanga owaco ne wu be,

³² ‘Ango en Rubanga ka Aburaam, Rubanga ka Isaka kede Rubanga ka Yakobo?’ En likame Rubanga me jo oto, do Rubanga me jo kakuo.”

³³ Kakame bin ekodet owinyo kede kop noni, gin kiko uro pwony mere adikinichel.

Cik kame Pire tek Kalamo
(Marako 12.28-34; Luka 10.25-28)

³⁴ Do kakame Iparisayon owinyo kede be Yesu omio kop otiek i dog Isadukayon, gin kiko cokere karacel.

³⁵ Ngat acel kibun gi, kame tie kede isoma amalo i kom kop kame mako Iswil, oko penyo Yesu di ekio kop ki doge be,

³⁶” Cik mene en kame pire tek kalamo i Iswil wa?”

³⁷ Yesu oko dwoko ne be, “ ‘Mar Rubanga ni kede cunyi dedede, kede kuo ni dedede kede tam ni dedede.’

³⁸ Man en cik me agege kame pire tek kalamo.

³⁹ Cik me are da cal acala kede manoni: ‘Mar dano wadu bala kite kame imarere kede keni.’

⁴⁰ Iswil ka Musa kede pwony me inabin dedede cungo i wi cik are nogi.”

Peny i kom Kirisito
(Marako 12.35-37; Luka 20.41-44)

⁴¹ Kakame bin Iparisayon oudo ocokere kede karacel, Yesu oko penyo gi



⁴²di ewaco be, “Nyo kame wun iparunu i kom Kirisito? En wot ka ngai?” Gin kiko dwoko ne be, “En Wot ka Daudi.”

⁴³Yesu oko penyo gi be, “Do pinyo doko komio bin Tipo Kacil omio Daudi oko lwonge be Rwot, di ewaco be,

⁴⁴ ‘Rwot Rubanga owaco ne Rwot na be: Bed i bada tetu cam, tuno di ango atieko mini inyono jokwor ni piny i tieni.’

⁴⁵Ka Daudi da bin olwonge be Rwot, Kirisito doko karuno bedo Wot ka Daudi benyo?”

⁴⁶Di do likame tie ngatamoro kame oko karuno dwoko ne kop moro, doko da cako ceng nono likame tie ngatamoro oko dino cunye penye kop moro bobo.

Matayo 23

Yesu Okwenyaro Jo i kom Jopwony me Iswil kede Iparisayon

(Marako 12.38-39; Luka 11.43, 46; 20.45-46)

¹Yesu oko waco ne ekodet me jo karacel kede josiao mege be,

²” Jopwony me Iswil kede Iparisayon olunyo akarunikin kame bin Musa tie kede;

³pi mano, lubunu kop dedede kame gin kipwonyo wu, do likame gikame gin kitimo; pien gin likame kilubo gikame kipwonyo.

⁴Gin kiketo i epepet me jo icegun yec apek kalikame kitwero yeno, do di gin likame kitwero cwano akadi lwet gi acel pi konyo gi tingo.

⁵Kitimo tice dedede be tetekeny jo nen gi, pien gin kitimo pulakateria gi di dongodongo kalamo. Doko ausin me lak ikanson kame bin jo ngapo pi nyuto mire gi but Rubanga, mergin oudo bocoboco twatwal.

⁶Doko gin kimaro kabedo me wor i ibagai kede komini kabeco kalamo i sinagogan.

⁷Kimito be di jo moto gi kede wor i atalen kede di kolwongo gi be ‘Apwony.’

⁸Do likame poore lwongo ngatamoro kikom wu be ‘Apwony’ , pien wun dedede itienu imiegu, doko itienu kede ngapwony acel kenekene.

⁹Doko kur ilwongunu ngatamoro be papa wu i wi lobo kan, pien itienu kede Papa wu acel kenekene kame tie i malo.

¹⁰Kur da lwongu be jotel, pien itienu kede ngatel acel kenekene, en Kirisito.

¹¹ Ngat kame pire dwong kalamo jo icegun i diere wu miero bed ngatic wu.

¹² Ngat kame tingere kene kobino dwoke piny, kede ngat kame mwolere kobino tinge malo.

Yesu Ongolo negi Kop pi Ecuke

(Marako 12.40; Luka 11.39-42, 44, 52; 20.47)



13” Itienu i can wun jopwony me Iswil kede Iparisayon, wun joecuke! Pien wun icegunu ne jo ekeko me Ajakanut me malo. Pien likame idonyunu iye, doko da likame iyeunu ne jo kame mito donyo pi donyo iye.

14(Ibinunu neno can wun jopwony me Iswil kede Iparisayon, wun joecuke! Pien wun icamunu jame me apuserun di do ikounu lego ilega aboco me ecuke. Pi mano, kobino ngolo ne wu kop kame pek kalamo.)

15” Itienu i can wun jopwony me Iswil kede Iparisayon, wun joecuke! Pien wun ingolunu name kede itelai pi loko dano moro acel i edini wu, do ka itiekunu loke, ikounu mine edoko ngat kame poore ot i mac kalikame to kalamo wun tien are.

16” Ibinunu neno can wun imuduka kame telo ne jo yote, pien wun ipwonyunu jo be, ‘Ka ngatamoro olairo i nying tempulo, likame eromo timo gikame elairo iye. Do ka ngatamoro olairo i nying saabu kame tie i tempulo, poore ecob gikame elairo iye nono.’

17Wun jomingo kame wangu oto! Mene en kame pire dwong, saabu arabo tempulo kame mio saabu bedo gikacil?

18Wun ipwonyunu be, ‘Ka ngatamoro olairo i nying alutari, likame eromo cobo gikame elairo iye, do ka ngatamoro olairo i nying giamia kame tie i alutari, epoore cobo gikame elairo iye.’

19Wun jo kame wangu oto, mene en kame pire tek, giamia arabo alutari kame loko giamia doko gikacil?

20Aso, ngat kame lairo i nying alutari udo etie lairo i nying alutari kede gi dedede kame tie i wie;

21doko dano kame lairo kede nying tempulo, udo elairo kede nying tempulo karacel kede Rubanga, ngat kame bedo kuno.

22 Do ngat kame lairo i nying malo udo elairo i nying kom me Ajakanut ka Rubanga, kede ngat kame bedo iye.

23 “Ibinunu neno can wun jopwony me Iswil kede Iparisayon, wun joecuke! Pien wun imiunu Rubanga acel ki kom tomon me yen kame jo nyalo kede cam pi mino cam doko mit, kame kolwongo be minit, dili kede cumin, do di iwekunu cuny pwony me Iswil, en tero jo i yore kopooore me ateni, bedo kede cuny me kisa kede bedo kede yei. Magi en gikame oudo wun ipoorenu timo abongo weko apat.

24Wun jo kame wangu oto, kame telo ne jo yote, icanenu jililo ojur gi kidikirir tenge ki gikame imatunu, do di ikounu mwonyo aguragura gikame ti!

25” Ibinunu neno can wun jopwony me Iswil kede Iparisayon, wun joecuke! Wun ilwokunu ngei ikopo kede ngei suani, do di gikame ipongunu i yi gi iudunu i yore me eranga kede mit kalikame dire.

26Wun Iparisayon kame wangu oto, geunu ber lwoko i yi ikopo kede i yi suani en kamio ngei gi da ko bino bedo cil.



²⁷ “Itienu i can, wun jopwony me Iswil kede Iparisayon! Wun joecuke! Pien wun icalunu bala atesin kame kopuo kede erangi atar, kame ngei gi cil do di yi gi opong kede cogere me jo oto kede gi kotop.

²⁸ Aso, wuda i ooko koneno wu bala jo abeco, do di yi wu opong kede ecuke kede dub.

Yesu Otuco Alola kame Kibino Udo

(Luka 11.47-51)

²⁹” Itienu i can, wun Iparisayon kede jopwony me Iswil! Wun joecuke! Pien wun igerunu atesin me inabin di cil doko ikounu tubuso gikame kogero pi yutuno jo kame bin kuo gi opoore i nyim Rubanga;

³⁰di iwacunu be, ‘Ka koto bin wan otienu di okuo i kare me joakwari wa, koto bin likame oyei ribere kede gin pi onyo remo me inabin.

³¹Iepone noni wun ipiderenu kenu be, wun ibedunu ikwae me jo kame bin oneko inabin.’

³²Pi mano, imiunu do gikame bin joakwari wu ogeo ongetakin.

³³ Wun twole, wun idwe me twole, ikarununu bwot benyo benyo di likame kongolo ne wu kop me ot i mac kalikame to?

³⁴Pi mano, ango awaco ne wu be abino cwano ne wu inabin, kede jorieko kede jopwony me Iswil; mogo kikom gi ibinunu neko di igurunu gi i kom musalaba, kede mogo ibinunu dano gi i sinagogan wu di itidilunu gi ki bomba acelacel.

³⁵ Pi mano, remo me jo kopooore, remo kame bin koonyo bino dwogo i wi wu; cako ki remo ka Abel, ngat kame bin li kede kop moro, tuno kede i remo ka Sakaria wot ka Barakia, kame bin inekunu i dierediere me gedo me kabedo kacil kede alutari.

³⁶Ateteni awaco ne wu be, gigi dedede bino timere ne jo kame nan tie i kare ni.

Amara ka Yesu pi Yerusalem

(Luka 13.34-35)

³⁷” Okwe in Yerusalem, Yerusalem, in bomba kame neko inabin doko ididipo jo kame Rubanga ooro buti! Tien atat ango oudo amito be koto acoko idwe ni karacel bala kite kame gweno rukumo kede imion mege i bwome, do in iko dagi na!

³⁸ Neningo, Rubanga otieko weko ni odi odong nono.

³⁹ En komio awaco ni be, likame bobo ibino nena tuno kede kakame ibino waco kede be, ‘Etie kede winyo ngat kame bino i nying Rwot.’ “

Matayo 24

Yesu Owaco Kop me Reto Tempulo

(Marako 13.1-2; Luka 21.5-6)

¹kakame Yesu oyai kede ki tempulo di do oudo etie ot, josiao mege oko bino pi nyuto ne gedo me tempulo.



²Do en eko dwoko ne gi be, “Mam inenunu gigi dedede? Ateteni awaco ne wu be, likame tie engaro moro kame bino dong cungo i wi kidi ocelu; kobino rereto gin dedede piny.”

Peko kede ltidil

(Marako 13.3-13; Luka 21.7-19)

³kakame Yesu oudo tie bedo kede i wi moru me Olibeti, josiao oko lwidar ot bute, di kiko penye be, “Wac ne wa, awene en kame gini bino timere kede, doko da gianena nyo kame bino nyuto dwogo nin, kede ajikini me piny?”

⁴Yesu oko dwoko ne gi be, “Gwokerenu me wek kur ngatamoro rweny wu.

⁵Pien jo atot oyaro bino i nyinga di kiwaco be, ‘Ango en Kirisito, ‘di gin kiko bino rwenyo jo atot.

⁶Doko ibinunu winyo kop me yi kede rwonge me yi, do nenunu be likame imiunu cunyu opoto; pien manono miero timere di ajikini pwodi likame otuno.

⁷Atekerin bino yi, ajakanut acel bino yi kede ajakanut ocelu, doko kec kede yangere me piny bino bedo tie kabedere atot.

⁸Magi dedede tie bala agege me aramo me nywal.

⁹“Gin kiko bino mino wu i cing jo kame bino tidilo wu, kiko bino neko wu da. Piny lung bino dagi wu pira.

¹⁰Jo atot bino poto ki yei gi, doko kiko donyo timo erupe di kidagere ken gi ken gi.

¹¹Doko inabin me angalo bino neeno, di kiko rwenyo jo atot.

¹²Pi kite kame tim areco udo onyai kede, amara me jo atot bino dok piny.

¹³Do ngat kame bino kanyakino tuno i ajikini bino udo alako.

¹⁴Koyaro bino tucio ejiri noni me Ajakanut ka Rubanga i piny lung, bala gi me ijura ne atekerin dedede; di do ajikini me piny ko bino tuno.

Gikame Kelo Lworo Adwong

(Marako 13.14-23; Luka 21.20-24)

¹⁵“Aso, kame inenunu gikame munao kabedo kacil ka Rubanga, kame bin enabi Danieri owaco kop i kome, di etie cungo i kabedo kacil (ngat kame tie somo poore niang dwong mere)

¹⁶jo kame tie Yudea miero do ringi i wi mori;

¹⁷ kede ngat kame tie i wi ot miero kur bobo wok piny pi kwanyo gikame tie i yi ot.

¹⁸Doko dano kame tie i poto miero kur dok i paco pi omo egoe.

¹⁹Can tin bino bedo dwong benyo ne mon oyac kede kame doto idwe i ceng nogo!

²⁰Kwaunu Rubanga me wek kur ringo timere ne wu i kare me ngico arabo i Ceng Sabato.



²¹ I kare no can adwong bino bedo tie, kame epone mere likame pwodi lem otimere geno piny cakere tuno tin, doko da likame ebino medo timere.

²² Doko koto Rubanga likame odwoko wel me ceng nogo odoko nonok, koto likame ngatamoro obwot; do pi jo mege kame en eyero, Rubanga bino dwodwoko ceng nogo doko nonok.

²³” Pi mano, ka ngatamoro owaco ne wu be, ‘Neni, Kirisito ine! ‘Arabo be, ‘En ica! ‘Kur iyeunu kop mere.

²⁴ Pien jo kame cuko be gin Kirisito, kede inabin me angalo oyaro bino di kiko timo gianena kede gi me isuur, tetekeny ka twerere, kirweny kiton jo kame Rubanga oyero da.

²⁵ Winyunu, ango atieko waco ne wu gigi di kare pwodi likame otuno.

²⁶ “Aso, ka ngatamoro owaco ne wu be, ‘Nenunu, en etie i wi tim, ‘kur iotunu kuno. Arabo be, ‘Nenunu, en etie i agola, ‘kur iyeunu kop mere.

²⁷ Pien bino me Wot ka dano bino bedo cal bala kot kame meny cako ki tetu kide tuno tetu potoceng.

²⁸ Kakame gi oto tie iye, kunono en kame acut da cokere iye.

Dwogo ka Wot ka Dano

(Marako 13.24-27; Luka 21.25-28)

²⁹ “Cucuto di can me ceng nogo otieko timere, wang ceng bino doko col, duwe likame doko bino rieny, acerin da bino popoto ki malo, kede twer kame tie i malo bino yayangun.

³⁰ Di gikame nyuto bino me Wot ka dano ko bino neeno i malo; atekerin dedede me wi lobo ko bino bedo kede iturur, di do kiko neno Wot ka dano di tie bino kede idoun me malo kede twer kede twon deyo.

³¹ Di en eko bino cwano imalaikan mege kede koko atek me agwara, di gin kiko coko jo mege kame eyero ki tetu bad ongwon dedede, cako ki agege me piny tuno i ajikini mere.

Pwony kame Yai ki kom Yat Epigi

(Marako 13.28-31; Luka 21.29-33)

³²” Siaonu pwony kame yai ki kom yat epigi. Cucuto kame ajange mege odoko yoyom di pote gi oko cako lot, wun ingeunu be kare me iporo do oyapuno.

³³ Iepone nono da kame inenunu gigi dedede tie timere, ngeunu be en etieko doko iyapiyapi, kom etuno i erute.

³⁴ Ateteni ango awaco ne wu be, gigi dedede bino timere di pwodi jo kame nan tie di kuo likame oto.

³⁵ Malo kede lobo bino rwenyo, do kope nango likame bino rwenyo.

Likame tie Ngat kame Ngeo Ceng amoto Esawa nono



(Marako 13.32-37; Luka 17.26-30, 34-36)

³⁶” Do likame tie ngat kame ngeo awene kame ceng amotoko esawa nono bino tuno kede. Akadi imalaikan me i malo da likame ngeo, akadi Wot ka Rubanga da likame ngeo, do Papa kenekene en kame ngeo.

³⁷ Bino me Wot ka dano bino bedo bala gikame bin otimere i kare ka Nua.

³⁸Pien i kare nono, di pwodi alele likame oumo piny, jo oudo tie cam kede amata di kinyomere, doko di kimio anyira gi me anyoma, paka tuno i ceng kame Nua oduyo kede i yi yee;

³⁹ doko oudo gin likame kingeo gikame tie timere tuno kede alele oko bino di oko neko gi. Bino me Wot ka dano da bino bedo kamanono.

⁴⁰Cenge no, ka jo are tie pur i poto, kobino kwanyo dano acel oko tero di oweko ngat ocelu.

⁴¹Kobino tero dako acel ki kom mon are kame tie riego karacel di oweko ngat acel dong.

⁴²” Pi mano, gwokerenu, pien likame ingeunu ceng kame Rwot wu oyaro bino kede.

⁴³ Do ngeunu kiber be, koto di oudo won ot ngeo esawa me iwor kame ngakuwo tie bino iye, oudo koto egwokere di likame eko weko koturo ode.

⁴⁴Pi mano, wuda bedunu di itiekunu iikere, pien Wot ka dano bino ngoole dwogo iesawa kame wun likame ingeunu.

Ngatic kame Genere amoto kalikame Genere

(Luka 12.41-48)

⁴⁵” Ngai do en ngatic kame genere di eriek, kame ngadwong mere kete daro ode kede jame dedede kame tie iye, pi mino jotic icegun cam iesawa kopooe?

⁴⁶Etie kede winyo ngatic nono ka ngadwong mere bino dwogo ko ude di etie timo kamanono.

⁴⁷Ateteni awaco ne wu be, en ebino keto ngatic nono pi lono jame mege dedede.

⁴⁸Do ka en ebedo ngatic arac, en ebino waco kene be, ‘Ngadwong na ogal, ‘

⁴⁹di do en eko gire cako bungo jotic wad gi, di eko donyo cam di emato karacel kede joamera.

⁵⁰Ngadwong me ngatic nono bino ngoole dwogo i ceng kalikame en egeno be eromo dwogo iye kede iesawa kame en ekwia,

⁵¹di eko bino mine alola atek, di eko kete karacel kede joecuke, kakame koko kede mwodo lak bino bedo tie iye.

Matayo 25

Agole me Anyira Tomon



- ¹ “I kare nono kobino poro Ajakanut me malo kede anyira tomon kame okwanyo italan gi kiko ot pi riamo kede eteran.
- ² Kany kikom gi oudo jomingo, do kany oudo riek.
- ³ Pien kame ming mege bin otero italan gi, do likame oudo kimako motala,
- ⁴ do anyira kame riek mege oko mako mo ace i cupan kede i yi italan gi.
- ⁵ Kite kame eteran oudo oko gal kede, omio nino oko bwono gi di kiko nino.
- ⁶” I dier iwor ilelem oko winyere be, ‘Nenunu, eteran otieko tuno! Bianu igamenu.’
- ⁷ Anyira nogo dedede oko yai kiko donyo iiko ausin me italan gi.
- ⁸ Di anyira aming mege ka oko waco ne anyira ariek be, ‘Miunu wada motala wu mogo, pien italan wa tie mito to.’
- ⁹ Do anyira ariek oko dwoko be, ‘Cengemogo motala likame bino romo wa karacel kede wu, tikatika iotunu but jocat ikounu wuda wilo meru.’
- ¹⁰ Kakame gin kioto kede pi wilo motala, eteran nono oko tuno, di anyira kany kame oudo otieko iikere oko donyo kede en i ot i ebaga me nyom, di do oko cego ekeko.
- ¹¹ “I cen mere, anyira kany icegun ka da oko bino di kilwongere be, ‘Adwong, adwong yab ne wada ekeko.’
- ¹² Do en eko dwoko ne gi be, ‘Ateteni awaco ne wu be, ango gira akwia wu.’
- ¹³” Pi mano, bedunu di igwokerenu, pien likame ingeunu ceng amotoko esawa kame Wot ka dano bino dwogo kede.

Agole me Jotic Adek

(Luka 19.11-27)

- ¹⁴” Pien Ajakanut me malo bino bedo cal bala dano kame bin tie ot i sapali mere, en eko lwongo jotic mege di eko keto jame mege i cing gi.
- ¹⁵ Bin emio ngat acel talente kany, dano ace di eko mino talente are, kede ocelu da en eko mino talente acel. Emio dano acelacel gikame rom kede teko mere. En di do eko ot.
- ¹⁶ Ngat kame oudo ogamo talente kany oko ot, cucuto di en eko donyo timo kede gi tic me cat. En eko udo ameda ace me talente kany.
- ¹⁷ Ngat kame oudo ogamo talente are da oko timo kamanono, eda eko bobo udo ameda me talente are.
- ¹⁸ Do ngat kame oudo ogamo talente acel oko ot di eko kunyo piny di en eko kano iye sente me ngadwong mere.
- ¹⁹” Ingei kare alac ngadwong me jotic nogo oko dwogo di eko donyo ngingico epone kame gin kitio kede sente.



²⁰Di do ngatic kame oudo ogamo talente kany nono oko bino di ekelo talente ace kany medo bobo i wi kame bin egamo. En eko waco be, ‘Adwong, in oudo imia talente kany, do talente ace kany ige bobo amedo udo.’

²¹Ngadwong mere oko waco ne be, ‘Itimo kiber, in ngatic aber, doko igenere. Itieko bedo ngat kame genere kede gi atitidi, abino do keto gi atos i cingi, pi mano dony do i kilel na.’

²²” Ngat kame oudo ogamo talente are da oko bino di ewaco be, ‘Adwong, oudo imia talente are, do talente ace are ige bobo amedo udo.’

²³Ngadwong mere oko waco ne be, ‘Itimo kiber, in ngatic aber, doko igenere. Itieko bedo ngat kame genere kede gi atitidi, abino do keto atos i cingi, pi mano dony do i kilel na.’

²⁴” Di do dano kame oudo ogamo talente acel nono da oko bino di ewaco be, ‘Adwong, ango oudo angeo be in ibedo dano kame ekite mere tek, ikao ki kakalikame i cuo iye, doko icoko ki kaka likame ipieto iye;

²⁵pi mano, ango ako bedo kede lworu, di ako ot kano talente ni piny i lobo. Nan do gam giri ine.’

²⁶” Do ngadwong mere oko dwoko ne be, ‘In ngatic arac, doko inyap. Mam in oudo ingeo be ango akao ki kakalikame acuo iye, doko acoko ki kakalikame apieto iye?’

²⁷Pi mano, oudo ipoore kopo sente na ne jo kame bin kano lim, di do i kare me dwogo na koto ako gamo sente na kede ameda i wie.

²⁸Pi mano, gamunu do talente no kibute di ikounu mino ngat kame tie kede talente tomon.

²⁹ Pien ngat acelacel kame tie kede gimoro, kobino mine ace bobo, di en eko bino bedo kede atos kalamo; do ngat kame li kede gimoro, akadi atitidi kame etie kede da kobino kwanyo tenge kibute.

³⁰ Pi mano, ucunu ngatic kame kony mere li no ooko kakacol, kakame jo bino koko kede mwodo lak gi kiye.’

Ngolo Kop me Ajikini

³¹ “I kare kame Wot ka dano bino dwogo kede di etie i deyo mere karacel kede imalaikan dedede, en ebino bedo i kom mere me deyo.

³²Di do jo me atekerin dedede ko bino cokere i nyime. En eko bino poko jo kopoore kikom jo apat, bala kite kame ngakwat poko kede romini kikom diegi.

³³En ebino keto jo kopoore i bade tetu cam, di eko keto jo areco i bade tetu ngodal.

³⁴Di do Abaka ko bino waco ne jo kame tie i bade tetu cam be, ‘Bianu wun jo kame Papa na omio wu winyo, bia igamunu winyo me ajakanut kame Rubanga oiko ne wu cako ki agege me cweno piny;



³⁵pien bin kec oneka di ikounu mina cam; bin orio oneka di ikounu mina pii amato; bin ango ngakumbor di ikounu gama;

³⁶bin atie nono di ikounu mina giangapa; bin atuwo di ikounu bino nena; bin atie i otkol di ikounu welao ango.’

³⁷” Di do jo kopoore ko bino dwoko ne be, ‘Rwot awene en kame wan oneni kede di kec oneki di oko mini cam, arabo di orio oneki oko mini pii imato?’

³⁸Doko awene en kame wan oneni kede di in ngakumbor di oko gami, arabo di itie nono oko mini egoe ingapo?’

³⁹Doko awene kame wan oneni kede di itie i otkol arabo di ituwo di wan oko welao in?’

⁴⁰Di Abaka ko bino dwoko ne gi be, ‘Ateteni awaco ne wu be, bala kite kame bin itimunu kede kamanoni ne ngat acel kalikame pire dwong kikom imiegu kede amiegu na gi, udo bin itimunu nango.’

⁴¹” Di do en eko bino waco ne jo kame tie i bade tetu ngodal be, ‘Irwaunu tenge kibuta, wun jo kame kolamo. Otunu i mac kalikame to, kame Rubanga oiko pi Sitani kede imalaikan mege.

⁴²Pien oudo bin kec oneka likame ikounu mina cam, doko orio oudo oneka likame ikounu mina gi me amata;

⁴³Ango bin ngakumbor do likame ikounu gama; oudo atie nono do likame ikounu mina egoe me angapa; oudo bin atuwo kede oudo atie i otkol do likame ikounu welao ango.’

⁴⁴” Di gin kiko bino dwoko ne be, ‘Rwot, awene en kame wan oneni kede di kec oneki, arabo di orio oneki, arabo di in ngakumbor, arabo di itie nono, arabo di ituwo, amotoko di itie i otkol di wan oko dagi konyi?’

⁴⁵Di en eko bino dwoko ne gi be, ‘Ateteni awaco ne wu be, bala kame bin likame itimunu kede kamanoni ne ngat acel kalikame pire tek kikom jogi, udo bin likame itimunu ne ango.’

⁴⁶ Di do gin kiko bino ot i alola me nakanaka, do jo kopoore ko bino ot i kuo kame bedo nakanaka.”

Matayo 26

Jo Oporo Kop me Neko Yesu

(Marako 14.1-2; Luka 22.1-2; Yokana 11.45-53)

¹Kakame Yesu otieko yamo kede kope nogi, en eko waco ne josiao mege be,

² “Wun ingeunu be odong ceng are tuno i Ebaga me Kalamo, di oko bino mino Wot ka dano pi gure i kom musalaba.”



³Di do jodongo me josaseredoti kede joadongo me piny oko cokere i ot me Ngatel Josaseredoti, kame oudo nyinge Kayapa,

⁴di kiko donyo iiko tam me mako Yesu i yore me mung kede neke.

⁵Do kiko waco be, “Kur omakenu i kare me ebaga, pien jo bino tany ne wa.”

Kowiwo Yesu i Betania

(Marako 14.3-9; Yokana 12.1-8)

⁶Bin di Yesu oudo tie Betania i ot me adobo kame nyinge Simoni,

⁷dako moro oko bino bute di emako mo kame wel mere tek adikinichel di tie i cupa kame kolwongo be alabasita, kame kotimo kede engaro. En eko onyo mo nono i wi Yesu di oudo etie cam.

⁸Do kakame bin josiao mege oneno kede gikame dako nono otimo, cuny gi oko wang di kiko donyo penyere be, “Pinyo komio kodubo mo ni aduba kaman?”

⁹Pien oudo koromo cato mo ni i wel me sente alac di oko mino jocan.”

¹⁰Do Yesu oudo ngeo tam gi, omio eko penyo gi be, “Pinyo komio itienulu lolo dako no? En etieko timo nango gikaber twatwal.

¹¹Pien wun itienulu kede jocan nakanaka, do likame ango abino bedo kede wu nakanaka.

¹²En eonyo mo noni i koma pi temuno koma pi ayika.

¹³Ateteni awaco ne wu be, kabedo dedede kame kobino tuco ejiri noni iye i wi lobo lung, kobino tatamo gikame dako noni otimo di koyutuno en kede.”

Yuda Oyei pi Rupao Yesu

(Marako 14.10-11; Luka 22.3-6)

¹⁴Kikano ngat acel kikom josiao tomon kiwie are, kame bin nyinge Yuda Isikariot oko ot but jodongo me josaseredoti,

¹⁵di eko penyo gi be, “Nyo kame ibinunu mina ka amie i cingu?” Gin kiko yei cule siringi akaya ot adek.

¹⁶Cako esawa no Yuda oko cako mono kare aber me mino Yesu i cing gi.

Yesu Ocamo Ebaga me Kalamo kede Josiao mege

(Marako 14.12-21; Luka 22.7-13, 21-23; Yokana 13.21-30)

¹⁷Kikano i ceng me agege me ebaga me Mugati kame Arup li kiye, josiao oko ot but Yesu di kiko penye be, “Tuai en kame in imito be wan ooti oik ni iye Ebaga me Kalamo?”

¹⁸Yesu oko dwoko ne gi be, “Otunu i bomba but icuo moro, ikounu waco ne be, ‘Apwony owaco be, esawa na otuno; abino camo Ebaga me Kalamo kede josiao na i odi.’ “



¹⁹Josiao da oko timo bala kite kame Yesu oudo owaco ne gi kede, di do gin kiko iiko cam me Ebagame Kalamo.

²⁰Di do piny oyuto, Yesu kede josiao mege tomon kiwie are oko bedo piny kacam.

²¹Esawa kame oudo kitie kede cam, Yesu oko waco ne gi be, “Ateteni awaco ne wu be, ngat acel kikom wu bino rupao ango.”

²²Josiao oko bedo kede par adikinichel, ngat acelacel oko cako penye be, “Rwot, mam nat ango inonono?”

²³Yesu oko dwoko ne gi be, “Ngat kame tie nywako suani acel kede ango en kame bino rupao ango.

²⁴Wot ka dano bino to bala kame iwandik kacil waco, do ngat kame bino rupao Wot ka dano bino neno can tin benyo! Tikatika koto oudo likame konywale da.”

²⁵Yuda ngat kame bin orupao en oko penye be, “Apwony, mam ango do inonono?” Yesu oko dwoko ne be, “In en iwaco kamanono.”

Cam ka Rwot me Otieno

(Marako 14.22-26; Luka 22.14-20; 1 Jokorinti 11.23-25)

²⁶Kakame oudo kitie cam kede, Yesu oko kwanyo mugati, eko kwano winyo iye, eko popoko, di eko mino josiao mege di ewaco be, “Gamunu icamunu; man en koma.”

²⁷En eko kwanyo ikopo me bwini, eko pwono Rubanga, di eko mino gi di ewaco be, “Matunu wun dedede;

²⁸pi man en remo na kame moko isikan ka Rubanga, remo na kame kobino onyo pi jo atot pi sasiro dub.

²⁹Awaco ne wu be, likame abino bobo mato pige me anyakini noni tuno i ceng kame abino mato kede wu bwini anyen i Ajakanut ka Papa na.”

³⁰Kakame kitieko kede wer gin kiko yai ot i moru me Olibeti.

Yesu Otuco be Petero bino Dage

(Marako 14.27-31; Luka 22.31-34; Yokana 13.36-38)

³¹Di Yesu oko waco ne gi be, “Iwor me tin wun dedede iyarunu ringo ikounu weka, pien kowandiko be, ‘Abino neko ngakwat di romini me anak ko bino sarakin.’

³²Do ingei yaruno ango, abino cako ot ne wun Galilaya.”

³³Petero oko waco ne be, “Akadi bed bala jogi dedede weki, do ango likame abino weki.”

³⁴Yesu oko waco ne be, “Ateteni awaco ni be, iwor me tin noni di pwodi tongweno likame okok, in ibino daga tien adek.”

³⁵Petero oko dwoko ne Yesu be, “Ango likame ayaro weki, akadi di komito neka kedi.” Josiao apat da dedede oko waco kop acel nono.

Yesu Olego i Poto me Getesemani



(Marako 14.32-42; Luka 22.39-46)

³⁶Yesu kede josiao mege oko ot kabedo kame kolwongo be Getesemani, di en eko waco ne josiao mege be, “Wun bedunu kan ango ber aoti alegi.”

³⁷En eko tero Petero kede awobe ka Sebedayo are, cwercuny kede par adwong oko make.

³⁸En eko waco ne gi be, “Par atek tie i cunya, kame romo neka, wun ber dongunu kan, do ikounu bedo di ikiunu piny karacel keda.”

³⁹En eko nyiko anyim anonok eko riebere piny, di eko lego be, “Papa na, ka koto twerere, wek ikopo me can noni bei tenge kibuta, do likame bala kite kame ango amito kede, do bala kame in imito.”

⁴⁰En eko dok but josiao eko udo gi di kitie nino, di en eko waco ne Petero be, “Benyo, oudo likame itwerunu bedo di ineenunu karacel keda pi esawa acel?”

⁴¹Bedunu di ineenunu kede di ilegunu tetekeny kur ipotunu i atama. Cuny mito, do kom nyap.”

⁴²En eko bobo ot tenge tien me are di eko lego be, “Papa na, ka ikopo noni likame karuno kato di likame amate, wek etimere bala kite kame in imito kede.”

⁴³En eko bobo dwogo but gi di eko udo gi kitie nino, pien oudo nino obwono wang gi.

⁴⁴Yesu oko weko gi bobo, eko ot tenge di eko lego tien me adek di ewaco kope kame oudo etieko kwano nogo.

⁴⁵En eko do dwogo but josiao mege di eko waco ne gi be, “Mam wun pwodi itienu nino kede wei? Nataman esawa do otuno kame kobino mino kede Wot ka dano i cing jodubo.

⁴⁶Yaunu ootunu; nenunu ngat kame tie rupao ango ine otieko tuno.”

Komako Yesu

(Marako 14.43-50; Luka 22.47-53; Yokana 18.3-12)

⁴⁷Di Yesu oudo pwodi tie yamo, Yuda kame oudo obedo ngat acel kikom josiao tomon kiwie are oko tuno. Oudo eupere kede ekodet ati me jo kame mako ipimai kede akutai, di oudo kiwok kikut jodongo me josaserdoti kede kikut joadongo me piny.

⁴⁸Ngaerupe oudo otieko mino gi gianena di ewaco be, “Ngat kame ango abino moto di anoto, udo en inonono. Makenu.”

⁴⁹Oyotoyot en eko bino paka tuno but Yesu di eko waco be, “Yoga ngapwony!” En eko noto leme.

⁵⁰Yesu oko waco ne be, “Ngawota, in tim gikame ibino iye.” Di do isirikalen oko bino di kiko mako Yesu.

⁵¹Kikano dano acel kame oudo tie kede Yesu oko kwanyo epima mere eko tongo kede yit epasoit me Ngatel Josaserdoti.



⁵²Yesu oko waco ne be, “Dwok epima nin i akularu mere; pien jo dedede kame tio kede epima, kobino neko gida kede epima.

⁵³Iparo be ango likame akaruno kwano Papa na di en eko cwano na ikodeta kame kalamo tomon kiwie are me imalaikan oyotoyot?

⁵⁴Do ka atimo kamano, iwandik kacil kame waco be miero etimere kamanoni bino cobere kakare benyo?”

⁵⁵ Esawa nono Yesu oko waco ne ekodet me jo be, “Mam ibinunu do kede ipimai kede akutai pi maka ineno bala ango abedo ngayak? Ceng dedede ango oudo abedo i tempulo di apwonyo, do likame ikounu maka cabo.

⁵⁶Magi dedede otimere pi mino gikame bin inabin owandiko i iwandik kacil cobere kakare.” Di do josiao mege dedede oko ringo tenge oweke.

Kopido Yesu i nyim Kansulo

(Marako 14.53-65; Luka 22.54-55, 63-71; Yokana 18.13-14, 19-24)

⁵⁷Di do jo kame oudo omako Yesu oko tere i nyim Kayapa, ngatel josaseredoti, kakame jopwony me Iswil kede joadongo me piny oudo ocokere iye.

⁵⁸Do Petero oko donyo lubo Yesu ki cen kakabobor tuno kede i diakal me Ngatel Josaseredoti. En eko donyo bedo kede isirikalen kame daro paco pi neno kakame kop noni oudo bino jik iye.

⁵⁹Jodongo me josaseredoti kede kansulo lung oko donyo mono kop moro me abe, kame koromo pido Yesu iye, tetekeny neke;

⁶⁰do likame kiko udo, bed bala jo atot kame oudo tie kede pido me abe oudo owokun di kiko pide. I cen mere, jo mogo are oko wokun i nyim kansulo

⁶¹ kiko waco be, “Icuo ni owaco be, ‘Ango akaruno reto tempulo ka Rubanga di ako gere pi ceng adek.’ “

⁶²Ngatel Josaseredoti oko cungo malo di eko waco ne Yesu be, “Benyo, in ili kede kop moro kame iromo dwoko? Nyo ber ine kame jogi tie pidi iye ni?”

⁶³Do Yesu oko ling alinga. Ngatel Josaseredoti oko waco ne be, “Apenyi i nying Rubanga kakuo, wac ne wa ka in Kirisito Wot ka Rubanga.”

⁶⁴ Yesu oko dwoko ne be, “In en iwaco kamanono. Do awaco ne wu be, cako tin ibinunu neno Wot ka dano di bedo i bad tetu cam me Twer, kede di ebino kede idoun me malo.”

⁶⁵ Ngatel Josaseredoti oko yeco igoen mege di ewaco be, “Etioko cano Rubanga, pinyo bobo pwodi imitunu ijurak? Wuda nan itiekunu winyo di ecao Rubanga.

⁶⁶Nan itamunu benyo?” Gin kiko dwoko be, “Epoore to.”

⁶⁷ Gin kiko donyo ngungulo lau i wange kede dongodongo en, doko jo ace oko donyo babapo en



⁶⁸di kiwaco be, “In Kirisito, murao ne wa! Ngai kobapi?”

Petero Odagi Yesu

(Marako 14.66-72; Luka 22.56-62; Yokana 18.15-18, 25-27)

⁶⁹Petero oudo tie bedo ooko i diakal. Nyako ngatic acel oko ot bute di oko waco ne be, “Ida oudo itie kede Yesu Ngagalilaya.”

⁷⁰Do en eko dagi kop nono i nyim gin dedede di ewaco be, “Ango akwia gikame itie waco.”

⁷¹Petero oko wok ooko i dog erute. Nyako ngatic ace bobo oko nene di oko waco ne jo kame oudo tie cungo kuno be, “Icuo no da oudo tie kede Yesu me Nasaret.”

⁷²Petero bobo oko dagi kop nono di elairo be, “Ango akwia lono.”

⁷³Ingei esawa acecek, jo kame oudo tie cungo kuno oko ot but Petero di kiko waco ne be, “Ateteni ida ngat acel kikom gi, pien epone kame in iyamo kede nyuti.”

⁷⁴Petero oko cako lamere kene di elairo be, “Ango akwia icuo no.” Cucuto nono di do tongweno oko kok.

⁷⁵Petero di oko yutuno kop kame Yesu oudo owaco ne be, “Di pwodi tongweno likame okok, in ibino daga tien adek.” En eko ot ooko di eko donyo koko kitek.

Matayo 27

Kotero Yesu i nyim Pilato

(Marako 15.1; Luka 23.1-2; Yokana 18.28-32)

¹Kakame piny oru kede, jodongo me josaseredoti dedede karacel kede joadongo me piny oko cokere pi moko tam me neko Yesu.

²Gin kiko twene di kiko tere kikete i cing Pilato ngapug.

To ka Yuda

(Tice 1.18-19)

³Kakame Yuda, ngat kame orupao Yesu, bin oneno kede be kotieko ngolo ne Yesu kop me to, en eko swilaro, di eko dwoko siringi akaya ot adek nogo but jodongo me josaseredoti kede joadongo me piny,

⁴di ewaco be, “Ango adubo pi rupao dano kame li kede kop, pi mine onyo remo mere.” Gin kiko dwoko be, “Mano likame mako wan; mano makin.”

⁵Yuda oko kiro sente piny i tempulo di eko yai eoto tenge di eko dere.

⁶Jodongo me josaseredoti oko depo sente ka di kiwaco be, “Iswil likame yei ne wa keto magi i isau kame okano iye sente me tempulo, pien gin kibedo sente kame koonyo kede remo.”

⁷Kikano gin kiko poro kop karacel di kiko wilo poto me ngacwei agune kede sente nogo, pi bedo kakame koyiko iye jokumbor.

⁸Gino en komio kolwongo poto nono be Poto me Remo tuno tin.



⁹ Di do gikame bin enabi Yeremia owaco oko cobere kakare, kame yamo be, “Kiko kwanyo siringi ot adek akaya, en wel kame jo mogo me Isirael oudo oyei culo i kome.

¹⁰ Kiko wilo poto me ngacwei agune kede sente nogo, bala kame Rwot onyuto na.”

Pilato Opepenyo Yesu

(Marako 15.2-5; Luka 23.3-5; Yokana 18.33-38)

¹¹ Yesu oko cungo i nyim ngapug me Roma, kame oko penye be, “In ibedo abaka me Iyudayan?” Yesu oko dwoko be, “In en iwaco kamanono.”

¹² Do kakame jodongo me josaseredoti kede joadongo me piny opide kede, en likame eko dwoko kop moro.

¹³ Di do Pilato oko penye be, “Mam itie winyo kope atot kame kitie pidi iye?”

¹⁴ Do Yesu likame oko dwoko ne kop moro akadi acel i kom gi dedede kame kopide iye. Ngapug oko uro adikinichel.

Kongolo ne Yesu Kop me To

(Marako 15.6-15; Luka 23.13-25; Yokana 18.39—19.16)

¹⁵ Bin i kare dedede me Ebagame me Kalamo, ngapug me Roma oudo onare gonyo ne jo mabus acel kame gin kimito be gony ne gi.

¹⁶ I kare nono oudo tie mabus acel kame wie rac, kame nyinge Baraba.

¹⁷ Kakame jo oudo otieko cokere kede karacel, Pilato oko penyo gi be, “Imitunu be agony ne wu ngai? Baraba arabo Yesu kame kolwongo be Kirisito?”

¹⁸ Pien oudo en engeo be jotel me Iyudayan kede joadongo me piny bin omio Yesu i cinge pi nyeko gi.

¹⁹ Kakame Pilato oudo tie bedo kede i kom me ngolo kop, dako mere oko cwano ne kop be, “Kur itim gimoro i kom dano no, en eli kede kop moro, pien oki iwor ango oudo abedo i peko adikinichel pi lek kame abedo tie kede i kome.”

²⁰ Jodongo me josaseredoti kede joadongo me piny oko supo jo pi penyo be gony ne gi Baraba, di oko neko Yesu.

²¹ Ngapug bobo oko penyo gi be, “Ngai kikom jo are gi en kame wun imitunu be ango agony ne wu?” Gin kiko dwoko be, “Baraba.”

²² Pilato oko penyo gi be, “Nyo do kame poore atim ne Yesu kame kolwongo be Kirisito?” Gin dedede kiko dwoko be, “Wek gure i kom musalaba.”

²³ Do Pilato oko penyo gi be, “Pinyo, oudo etimo nyo arac?” Do gin kiko medo lelemo kitek be, “Wek gure i kom musalaba.”

²⁴ Kakame Pilato oneno kede be likame ekaruno bobo timo gimoro, doko jo tie mito cako doko ger, en eko kwanyo pii di eko lwoko kede cinge i nyim ekodet me jo di ewaco be, “Ango gira ali kede raco moro i kom onyo remo me dano ni! Kop no mako wun.”



²⁵Jo dedede oko dwoko be, “Wek remo mere bed i wi wan kede i wi idwe wa.”

²⁶Pilato di oko gonyo ne gi Baraba, en eko mino kodao Yesu di eko mine i cing gi pi ot gure i kom musalaba.

Isirikalen Otimo ne Yesu Tim me Anywar

(Marako 15.16-20; Yokana 19.2-3)

²⁷Kikano, isirikalen me ngapug oko tero Yesu i ot me ngapug gi, di kiko koko isirikalen apat dedede me kuno i nyime.

²⁸Kiko gonyo igoen mege di kiko ngapo ne ekanso akwakwar.

²⁹Kiko cweno okuto aluka di kiko rwako ne i wie, di kiko keto magada i cinge tetu cam, kiko donyo riondiko piny i nyime pi nyware di kiwaco be, “Yoga, abaka me Iyudayan!”

³⁰Kiko ngungulo lau i kome, di do kiko kwanyo magada kiko jwato kede wie.

³¹Kakame kitieko do timo ne kede tim me anywar, kiko gonyo ekanso nono di kiko ngapo ne igoen mege, di do kiko tere tenge pi ot gure i kom musalaba.

Koguro Yesu i kom Musalaba

(Marako 15.21-32; Luka 23.26-43; Yokana 19.17-27)

³²Kakame oudo kitie wok kede ki bomba, kiko ngoole i kom icuo moro me Sirene, kame nyinge Simoni, di kiko dine tetek yeno musalaba ka Yesu.

³³I kare kame kituno kede kakame kolwongo be Gologota (kame dwong mere be, kabedo me cogowic),

³⁴gin kiko mino Yesu bwini kame konyalo kede gi akec; do kakame ebilo kede, likame en eko mato.

³⁵Di do kitieko gure, kiko uco alulu pi udo epone me pokopoko igoen mege.

³⁶Di do gin kiko donyo bedo kuno pi dare.

³⁷I wie malo oudo koketo iye iwandik me kop kame pide, kame somere be, “Man en Yesu, Abaka me Iyudayan.”

³⁸Kiko guro joyak are da karacel kede Yesu, acel i bade tetu cam kede ocelu i bade tetu ngodal.

³⁹Jo kame oudo beo kuno oudo yayango wi gi di kiwaco ne kop me anywar be,

⁴⁰“In ngat kame oudo iyaro turo tempulo di iko gere pi ceng adek, lakere keni! Ka in Wot ka Rubanga, wok piny ki musalaba.”

⁴¹Kamanono da jodongo me josaseredoti, jopwony me Iswil karacel kede joadongo me piny oko donyo nyware di kiwaco be,

⁴²” En elako jo apat, do likame etwero lakere kene. En abaka me Isirael, wek en nan ewok piny ki musalaba, di wan oko bino yei en.



⁴³ En oudo eketo gen mere i kom Rubanga, wek Rubanga nan lake, ka cunye mito. Piento en oudo ewaco be, ‘Ango Wot ka Rubanga.’ “

⁴⁴Joyak are kame oudo kogure kede da oko donyo yeyeto en iepone acel nono.

To ka Yesu

(Marako 15.33-41; Luka 23.44-49; Yokana 19.28-30)

⁴⁵Cako esawa kanyape me iceng, piny lung oko doko col paka tuno esawa kanyangon me otieno.

⁴⁶Tetu esawa kanyangon, Yesu oko kok kede dwane amalo be, “Eli, Eli lama sabaktani?” Kame dwong mere be, “Rubanga na, Rubanga na, pinyo komio ijala?”

⁴⁷Jo kame oudo tie cungo kuno owinyo di kiko waco be, “Icuo ni tie lwongo Elia.”

⁴⁸Ngat acel kikom gi oko ringo ot kwanyo ecango, en eko keto iye bwini awac, di eko rwako i wi magada eko mino Yesu be ejwijwio.

⁴⁹Do jo apat oko waco be, “Odarunu ber, omito neno ka Elia oyaro bino lake.”

⁵⁰Yesu bobo oko kok kede dwan amalo di do eko omo cunye di eko to.

⁵¹Kikano, egoe kame bin poko isenge me tempulo oko yec cako ki malo tuno piny, piny oko yangere, di lela oko belubelun.

⁵²Atesin da oko yabere, di oko yaruno jokacil atot kame bin oto.

⁵³Kakame kiwok kede ki atesin ingei Yesu yaruno, kiko ot i bomba kacil di kiko nyutere but jo katot.

⁵⁴Bin di ngadwong me isirikalen kede jo apat kame oudo tie karacel kede en pi daro Yesu oneno yangere me piny kede gikame otimere, lworu oko mako gi di kiko waco be, “Ateteni dano ni oudo Wot ka Rubanga.”

⁵⁵Mon atot da oudo tie kuno, mon kame bin lubo Yesu i Galilaya di kikonye. Gin oudo kitie neno gikame oudo tie timere i kakabobor.

⁵⁶Kikom gi oudo tie iye Maria Magadalina, Maria toto me Yakobo kede Yosepu, kede dako ka Sebedayo.

Koyiko Yesu

(Marako 15.42-47; Luka 23.50-56; Yokana 19.38-42)

⁵⁷Di piny oyuto, icuo kobaro me Arimatea, kame nyinge Yosepu oko ot kuno. Eda oudo bin ebedo ngasiao ka Yesu.

⁵⁸En bin eoto but Pilato di eko penye kom Yesu; Pilato oko waco be mie.

⁵⁹Yosepu oko kwanyo kom Yesu eko bono kede esuka acil;

⁶⁰di eko kete i ates mere kame oudo pwodi eroko nyen i lela, eko loro kidi ati i dog ates di en eko ot tenge.

⁶¹Maria Magadalina kede Maria ocelu oudo tie bedo kuno i nyim ates.



Koketo Jo pi Daro Ates

⁶²Oru mere, di do ceng me iikere oudo otiek, jodongo me josaseredoti karacel kede Iparisayon oko ot cokere karacel i nyim Pilato

⁶³kiko waco ne be, “Adwong, wan oyutuno be di pwodi ngaangalo no kuo, oudo ewaco be, ‘Ingei ceng adek abino yaruno bobo.’”

⁶⁴Pi mano, mi cik me wek dar ates tuno kede di ceng me adek okato, tetekeny kur josiao mege kwal kome di kiko waco ne jo be, ‘En etieko yaruno kikom jo oto, ‘kop me angalo noni bino bedo rac kalamo me agege ca.’”

⁶⁵Pilato oko waco ne gi be, “Terunu isirikalen iotunu idarunu kuno kiber bala kame itwerunu.”

⁶⁶Gin kiko ot di kiko mwono engaro me dog ates kiber, di kiko keto jodar pi neno be kodaro ates kiber.

Matayo 28

Iyarun ka Yesu

(Marako 16.1-10; Luka 24.1-12; Yokana 20.1-10)

¹Ingei Ceng Sabato, tetu obai kame ru ceng Sande, Maria Magadalina kede Maria ocelu oko ot pi neno ates.

²Kikano, piny oko yangere kitek; pien malaika ka Rwot oudo obino ki malo di eko loro kidi tenge ki dog ates, en eko bedo i wie.

³Cal mere oudo ineno bala meny me kot, kede egoe mere oudo tar bala akako.

⁴Mielkom oko mako jodar pi lworu, di kiko anatakin bala jo kotieko to.

⁵Do Malaika nono oko waco ne mon ka be, “Kur ibedunu kede lworu, pien ango angeo be wun itienu mono Yesu kame oudo koguro i kom musalaba.

⁶En eli ki kan pien etieko yaruno bala kame bin ewaco. Bianu inenunu kakame oudo kopiello iye kome.

⁷Aso, otunu awakawaka iwacunu ne josiao mege be, en etieko yaruno kikom jo oto, en do etieko cako ot ne wu Galilaya; ibinunu nene ki kuno. Gikame ango awaco ne wu en ino.”

⁸Gin kiko yai awakawaka ki ates kede lworu, do di kipong kede yomcuny, di kiko ringo pi ot waco ne josiao mege.

⁹Yesu oko riamo kede gi, di en eko waco ne gi be, “Yoganu.” Gin kiko ot bute, kiko mulo tiene di kiko wore.

¹⁰Yesu oko waco ne gi be, “Kur ibedunu kede lworu; otunu iwacunu ne imiegu na pi ot Galilaya di kiko bino nena ki kuno.”

Kop kame Jodar Ates Otero



¹¹Kakame mon nogo oudo tie ot kede, jo kame oudo tie daro ates oko ot i bomba kiko waco ne jodongo me josaseredoti gikame oudo otimere dedede.

¹²Kakame jodongo me josaseredoti kede joadongo me piny ocokere kede karacel, kiko iiko tam, di kiko mino isirikalen sente atot

¹³di kiwaco ne gi be, “Wacunu ne jo be, ‘Josiao mege obino iwor di wan onino kiko kwalo kome.’

¹⁴Ka kop noni otuno i yit ngapug, wan obino cungo iye di likame ikounu udo peko moro.”

¹⁵Isirikalen jodar oko gamo sente di kiko timo bala kame oudo kowaco ne gi. Kop noni oko sarakin i dier Iyudayan tuno tin.

Yesu Oneeno ne Josiao mege

(Marako 16.14-18; Luka 24.36-49; Yokana 20.19-23; Tice 1.6-8)

¹⁶ Josiao tomon kiwie acel oko ot Galilaya i moru kame bin Yesu owaco be kioti iye.

¹⁷Kakame kinene kede, gin kiko wore, do jo mogo kikom gi oko bedo kede gungcuny.

¹⁸Yesu oko ot but gi di en eko waco ne gi be, “Kotieko mina akarunikin dedede me i malo kede me lobo.

¹⁹ Pi mano, otunu ilokunu jo me atekerin dedede dok jo kame luba, batisonu gi i nying Papa kede Wod kede Tipo Kacil,

²⁰doko di ipwonyunu gi gwoko gikame aciko ne wu pi lubo. Doko nenunu, ango atie kede wu nakanaka tuno i ajikini me piny.”



Marako

Marako 1

Kop kame Yokana Ngaibatis Opwonyo

(Matayo 3.1-12; Luka 3.1-18; Yokana 1.19-28)

- ¹Man en agege me ejiri ka Yesu Kirisito Wot ka Rubanga.
- ²En egere bala kite kame bin enabi Isaya owandiko kede kop kame Rubanga owaco be, “Neni, atie cwano ngaor na geo ot nin anyim, kame bino iiko yongayo nin.
- ³Dwan ngatamoro tie ilelem i tim be, ‘ Iikunu ne Rwot yongayo, rieunu ne yote.’ “
- ⁴Yokana Ngaibatis oko neeno i tim di ewaco ne jo be kiswilaro, di oko bino batiso gi pi udo isasir ki dub gi.
- ⁵Jo oko yai ki piny me Yudea bekebek kede ki bomba me Yerusalem, kiko ot but Yokana. Gin kiko tucu dub gi, di Yokana oko batiso gi i ecilet me Yorodan.
- ⁶Yokana oudo ngapo egoe kame kotimo kede yer me aguragura, di etweo piere kede rakoba me lau. En oudo ecamo obonyo kede mokic.
- ⁷Bin en ewaco ne jo be, “Tie ngat kame tie bino i cen ngea kame tie kede twer kame loa. Ango likame apoore gungo pi gonyo ausi me amuka mere.
- ⁸Ango abatiso wu kede pii, do en ebino batiso wu kede Tipo Kacil.”

Batisimu kede Atama ka Yesu

(Matayo 3.13—4.11; Luka 3.21-22; 4.1-13)

- ⁹I kare nono Yesu oko yai ki Nasaret kame tie i piny me Galilaya, en eko bino di Yokana oko batiso en i ecilet me Yorodan.
- ¹⁰Cucuto di Yesu owok ki dud pii, en eko neno malo di oyabere, di Tipo Kacil oko bino i kome bala awele.
- ¹¹Dwan oko wok ki malo di waco be, “In en Woda kame amaro, cunya yom i komi.”
- ¹²Cucuto Tipo Kacil oko tele ot i tim,
- ¹³en eko bedo kuno pi ceng ot ongwon di Sitani tame. En oudo ebedo kuno kede leini me obar, di imalaikan gwoke.

Yesu Olwongo Jocik Ongwon

(Matayo 4.12-22; Luka 4.14-15; 5.1-11)

- ¹⁴Di bin kotieko tweno Yokana i otkol, Yesu oko ot Galilaya di eko tucu ejiri ka Rubanga
- ¹⁵di ewaco be, “Kare do otieko romo, doko Ajakanut ka Rubanga otieko doko iyapiyapi. Swilarunu ki dub wu di ikounu yei kop me ejiri!”
- ¹⁶Di Yesu oudo tie ririto dog nam me Galilaya, en eko neno Simoni kede omin mere Anderia di kitie uco bwoi i nam, pien gin oudo jocik.



¹⁷Yesu oko waco ne gi be, “Lubanu di ako bino loko wu idokunu jo kame koko jo buta akaka cik.”

¹⁸Cucuto gin kiko weko bwoini gi di kiko lube.

¹⁹En eko meede ot anyim anonok, di eko bobo neno Yakobo kede omin mere Yokana, awobe ka Sebedayo, di kitie i yi yee iiko bwoini gi.

²⁰Cucuto di Yesu oko lwongo gi pi bino lube. Gin kiko weko papa gi Sebedayo i yi yee karacel kede jotie kame oudo kopango, gin di kiko lubo Yesu.

Icuo kame tie kede Tipo Arac

(Luka 4.31-37)

²¹Yesu kede josiao mege oko tuno i bomba me Kaperanaum. Cucuto di Ceng Sabato otuno, en eko ot i sinagoga di eko pwoiny.

²²Jo oko uro pwoiny mere piento en oudo epwoinyo kede akarunikin, weko bala bin jopwoiny me Iswil.

²³Cucuto icuo moro kame oudo tie kede tipo arac oko bino i sinagoga gi nono di eko lelemo be,

²⁴” Yesu me Nasaret, nyo kame imito kibut wa? Mam ibino do pi tieko wa? Ango angei, in ibedo Dano Kacil ka Rubanga!”

²⁵Do Yesu oko coke di ewaco be, “Lingi, doko wok tenge ki kome!”

²⁶Tipo arac nono oko mino kom icuo nono odonyo miel teltel, eko dwilao di do eko wok tenge ki kome.

²⁷Gin dedede kiko uro kitek di kiko donyo penyere ken gi ken gi be, “Nyo ine? Man bobo pwoiny anyen! Kom icuo ni tie kede akarunikin me ciko tipere areco di gin kiko timo gikame en ewaco.”

²⁸Rwonge i kom Yesu oko sarakin awakawaka i aduilion dedede kame oluko Galilaya.

Yesu Ocango Jo Atot

(Matayo 8.14-17; Luka 4.38-41)

²⁹Kakame Yesu oyai kede ki sinagoga, cucuto en eko donyo i ot ka Simoni kede Anderia, en karacel kede Yakobo kede Yokana.

³⁰Musuja oudo omako toto me dako ka Simoni tie i apien. Cucuto di Yesu otuno, oko waco ne kop me aramo nono.

³¹En eko ot but ngatuwo, eko mako cinge di eko kiarao en. Musuja oko weke di eko cako tedo gi.

³²Otieno nono di do ceng otieko donyo, jo oko kelo ne Yesu jotuwo dedede kiton jo koudo tie kede jwogi.

³³Jo dedede me bomba oko cokere i nyim ot.



³⁴Yesu oko cango jo atos kame oudo tie kede tuwo me iponeso apapat, eko riamo jwogi atos, doko oudo likame eyei ne jwogi yamo, pien gin oudo kingee.

Yesu Opwonyo Jo i Galilaya

(Luka 4.42-44)

³⁵Odiko sek di pwodi pinyocol, Yesu oko dilo yai eko ot kakoling eko donyo ilega.

³⁶Do Simoni karacel kede jo kame oudo tie kede oko wape.

³⁷Di bin kiude, kiko waco ne be, "Jo dedede tie moni."

³⁸Yesu oko dwoko ne gi be, "Wek ootunu i bomban ace da tetekeny apwony gida kope na, pien kop nono en komio ango abino."

³⁹Yesu oko ririmo Galilaya dedede, di epwonyo kop ka Rubanga i sinagoga gi kede di eriamo jwogi.

Yesu Ocango Adobo

(Matayo 8.1-4; Luka 5.12-16)

⁴⁰Adobo moro oko bino, eko riondiko piny i nyim Yesu di ebako doge be, "Kame cunyi mito, ikaruno canga."

⁴¹Kisa oko mako Yesu i kome eko riengo cinge di eko mule, eko waco ne be, "Amito; cangi."

⁴²Cucuto dobo oko weke di eko cango.

⁴³Yesu oko cike kede dwan atek di oko mine eoto

⁴⁴di ewaco ne be, "Miero inen be likame iwaco ne ngatamoro gi kotimere; do ot inyutere but ngasaseredoti, di iko mino giayala me lonyere ni bala kite kame bin Musa ociko kede, pi nyuto ne jo be in do itieko cango."

⁴⁵Do icuo nono oko ot, en eko cako yamo kop nono abongo lwooro di eko mino kop nono osarakin; man oko mino Yesu likame oko twero bobo donyo i bomba moroni obe, do en gire eko donyo bedo i calo, di jo oko donyo bino bute di kiwok ki adulion dedede.

Marako 2

Yesu Ocango Icuo kame Tuwo Oneko Kome lung

(Matayo 9.1-8; Luka 5.17-26)

¹Ingei ceng mogo, Yesu oko dok Kaperanaum, di jo oko winyo rwonge mere be oudo etie i paco.

²Jo atos oko cokere, omio ot oko pong kiton i ekeko da. Yesu oko donyo pwonyo gi kop ka Rubanga.

³Jo ongwon kame oudo tie yeno icuo kame tuwo oudo oneko kome lung pi kele bute oko tuno.



⁴Kite kame jo oudo opong kede, omio likame kiko karuno tuno but Yesu. Pi mano, kiko tako wi ot ki tetu kakame Yesu oudo tie iye. Kakame kitieko yabo kede kakatwolo, kiko rwako ngatuwo kede gibuto mere, di kiko yololo en piny tuno but Yesu.

⁵Kakame Yesu oneno kede yei gi, en eko waco ne icuo kame tuwo oneko kome nono be, “Woda, kotieko sasiro in ki dub ni.”

⁶Jopwony me Iswil mogo kame oudo tie bedo kuno oko cako penyere i cuny gi be,

⁷” Pinyo komio icuo ni yamo kaman? Man tie gi me acae but Rubanga. Pien likame tie dano kame twero sasiro jo ki dub gi, kwanyo Rubanga kene.”

⁸Cucuto Yesu oko ngeno i cunye be gin oudo kitie penyere i cuny gi ken gi ken gi i kom kop noni. En eko penyo gi be, “Pinyo komio itienu kede peny acal kamago i cunyu?”

⁹Mene en kame yoyot, waco ne dano kame tuwo oneko kome ni be, ‘Kotieko sasiro in ki dub ni, ‘arabo waco ne be, ‘Yai malo ikwany gibuto ni iko ot?’

¹⁰Do pi mino wu ngeno be Wot ka dano tie kede akarunikin me sasiro jo ki dub gi i wi lobo” , en eko waco ne icuo kame tuwo oneko kome nono be,

¹¹” Ango awaco ni be, yai malo ikwany gibuto ni iko ot paco!”

¹²Loca oko yai i nyim gi kanono, cucuto en eko kwanyo gibuto mere di eko ot ooko. Man oko mino gi kibedo kede ur di kiko cako pako Rubanga di kiwaco be, “Cako lem wan likame pwodi oneno gikame cal kaman.”

Yesu Olwongo Lebi

(Matayo 9.9-13; Luka 5.27-32)

¹³Yesu bobo oko dok i dog nam me Galilaya, ekodet me jo oko cokere oluke, en eko pwoonyo gi.

¹⁴Kakame do oudo etie ot kede, en eko neno Lebi wot ka Alipayo di tie bedo i ot me culo esolo. Yesu oko waco ne be, “Luba.” En eko yai di eko lubo Yesu.

¹⁵Kakame Yesu obedo kede kacam i ot ka Lebi, jorar esolo atos kede jodubo oudo tie bedo kede karacel kede josiao mege, pien jo atos oudo olube.

¹⁶Kakame jopwony me Iswil kame oudo bin tie i ekodet me Iparisayon oneno kede di Yesu camo kede jorar esolo kede jodubo, kiko penyo josiao mege be, “Pinyo komio en ecamo kede jorar esolo kede jodubo?”

¹⁷Kakame Yesu owinyo kede kop kame kiwaco, en eko waco ne gi be, “Jo kame kom gi yot likame mo emuron, do jo kame tuwo en kame moe. Ango likame abino pi lwongo jo kopooore do pi lwongo jodubo.”

Peny kame mako Kanyo Kec

(Matayo 9.14-17; Luka 5.33-39)



¹⁸I kare no josiao ka Yokana Ngaibatis kede Iparisayon oudo tie kanyo kec. Jo mogo oko ot but Yesu di kiko penye be, “Pinyo komio josiao ka Yokana Ngaibatis kede me Iparisayon kanyo kec, do josiao nin likame timo kamanono?”

¹⁹Yesu oko dwoko ne gi be, “Iparunu be wele kame tie i ebaga me nyom karuno kanyo kec di pwodi eteran tie kede gi? Tek kame eteran tie karacel kede gi, likame kikaruno kanyo kec.

²⁰Do ceng bino tuno kame kobino tero kede eteran tenge kibun gi, di do gin kiko bino kanyo kec i ceng nono.

²¹” Likame tie ngatamoro kame dapu egoe anyen i kom egoe oti. Ka etimo kamanono, ecapa nyil tenge, egoe anyen bino nyil kikom oti, di apore kame tie iye ko medo doko lac.

²²Doko da likame tie dano moro kame keto bwini anyen i isau me lau oti, pien bwini anyen bino mwoco isau me lau oti nono, di bwini karacel kede isau nono ko bino kei. Do bwini anyen miero ket i yi isau me lau anyen.”

Peny kame mako Ceng Sabato

(Matayo 12.1-8; Luka 6.1-5)

²³ Ceng Sabato moro acel, Yesu oudo tie lubo yongayo abeo i potu moro me engano. Josiao mege kame oudo tie upere kede oko cako gigitu wit engano.

²⁴Iparisayon mogo oko yamo ne Yesu be, “Neningo, pinyo komio josiao ni tie timo gikame Iswil daga i Ceng Sabato?”

²⁵ Yesu oko dwoko ne gi be, “Benyo, wun likame isomunu gikame Daudi riki otimo di bin kec oneke, en karacel kede jo kame oudo etie kede?”

²⁶ En bin edonyo i ot ka Rubanga di eko camo mugati kame bin tie giayala but Rubanga, kame Iswil likame yei ne ngatamoro camo, kwanyo josaseredoti kenekene. Daudi bin ocamo di eko mino jo kame oudo etie kede da. Man bin otimere di Abiata en kame oudo tie Ngatel Josaseredoti.”

²⁷Yesu oko waco ne gi be, “Koketo Ceng Sabato pi dano, do likame kocweo dano pi Ceng Sabato.

²⁸Pi mano, Wot ka dano en Rwot kiton me Sabato da.”

Marako 3

Icuo kame Bade Omito

(Matayo 12.9-14; Luka 6.6-11)

¹Yesu oko donyo bobo i sinagoga, icuo kame bade omito oudo tie kuno.

²Jo kame oudo tie kuno oko ciko wang gi kitek i kom Yesu, di kimito neno ka eyaro cange i Ceng Sabato tetekenya kiud gikame kiromo pide iye.

³Di Yesu oko waco ne icuo kame bade omito nono be, “Bia kan.”



⁴En eko penyo jo kame oudo tie kuno be, “Iswil wa yei ne wa timo bero Ceng Sabato arabo timo raco? Marao kuo me dano arabo neko aneka?” Do likame kiko dwoko kop moro.

⁵Yesu oko ngoloro gi kede wangcuny, di eko bedo kede cweruncy pi tek wi gi. En eko waco ne icuo nono be, “Riei badi!” Lonono oko rieno bade, di bade oko doko ber bobo.

⁶Iparisayon oko donyo ooko, awakawaka di kiko cako poro kop kede jo me ekodet ka Erode, pi mito udo epone me neke.

Ekodet me Jo Obino i dog Nam

⁷Yesu kede josiao mege oko ot i nam me Galilaya, ekodet adwong me jo oko lube kuno. Jo mogo kikom gi oudo oyai ki Galilaya, mogo oyai ki Yudea,

⁸mogo ki Yerusalem, mogo ki adul me Idumea, kede mogo oudo owok ki adul kame tie tetuca me Yorodan kede ki adulon koluko bomban me Taya kede Sidon; gin dedede oudo kibino but Yesu, pien oudo kiwinyo rwonge me gikame etimo.

⁹Yesu oko waco ne josiao mege be kimoi ne yee moro cuto wek ebin edony iye, tetekeny kur jo bin dire i kome, pien ekodet oudo dwong adikinicel.

¹⁰En oudo ecango jo atot, oko mino jo dedede kame oudo tuwo oko donyo dire kede teko pi mito mule.

¹¹Oudo tek kame jo kame tie kede tipere areco onene, kipopoto piny i nyime kiko donyo dwilao di kiwaco be, “In en Wot ka Rubanga.”

¹²Do Yesu oko ciko tipere areco nogo be kur kimie engere.

Yesu Oyero Joor Tomon kiwie Are

(Matayo 10.1-4; Luka 6.12-16)

¹³Yesu oko yito kakimukurur, di eko lwongo jo mogo kame cunye omito, di kiko bino bute.

¹⁴Di en eko yero cuo tomon kiwie are kikom gi, kame eko lwongo be joor, pi bedo kede en,

¹⁵doko pi oro gi ot pwoonyo jo, kede pi mino gi akarunikin me riamo jwogi.

¹⁶Cuo tomon kiwie are kame koyero nogo gin ige: Simoni kame oudo Yesu ocako nyinge be Petero,

¹⁷Yakobo kede omin mere Yokana, awobe ka Sebedayo kame Yesu oudo ocako nying gi be Boanagis, kame dwong mere be, idwe me mor me kot; ¹⁸kede Anderia, Pilipo, Batulumayo, Matayo, Tomasi, Yakobo wot ka Alipayo, Tadeo, kede Simoni kame oudo tie i ekodet kalikame mito apugan me kare nono,

¹⁹kede Yuda Isikariot kame oko rupao Yesu.

Yesu kede Belsebul

(Matayo 12.22-32; Luka 11.14-23; 12.10)



²⁰Di do Yesu oko donyo i ot. Do ekodet me jo bobo oko cokere, omio Yesu kede josiao mege likame oko udo kare akadi me cam.

²¹Kakame jo me paco gi owinyo kede kop noni, gin kiko ot pi make pien oudo jo tie waco be epoi.

²²Jopwony me Iswil kame oudo owok ki Yerusalem oko waco be, “Belsebul odonyo i wie, doko en eriamo jwogi kede twer kowok kibut ngadwong me jwogi.”

²³Di Yesu oko lwongo gi bute, eko cako yamo kede gi i agole be, “Sitani twero riamo Sitani wad gi benyo benyo?”

²⁴Ka ajakanut moroni opokere di eko donyo yi kene, ajakanut nono likame cungo.

²⁵Doko ot kame jo mege opokere di kiko donyo yi ken gi ken gi, ot nono likame cungo.

²⁶Aso, ka Sitani da odonyo yi kene, udo epokere, man mio likame eromo cungo, do udo etie tuno do i ajikini mere.

²⁷” Doko likame tie ngat kame twero donyo i yi ot me ngat atek di eko yako jame mege, abongo ber kong tweno dano atek nono, en kame mio eko do yako jame mege.

²⁸” Ateteni awaco ne wu be, kobino sasiro jo ki dub gi dedede kede acae da dedede kame kiyamo i kom Rubanga;

²⁹ do ngat kame waco kop me acae i kom Tipo Kacil, likame kobino sasiro en akadi acel, pien udo etimo dub kame bedo nakanaka.”

³⁰Yesu oyamo kaman pien gin oudo kitie waco be, “En etie kede tipo arac.”

Imiegu ka Yesu kede Toto mere

(Matayo 12.46-50; Luka 8.19-21)

³¹Di do imiegu ka Yesu kede toto mere oko bino. Kiko cungo ooko di kiko cwano ne kop di kilwonge.

³²Ekodet kame oudo obedo di oluko Yesu diere oko waco ne be, “Toto ni kede imiegu ni tie ooko, kimito neni.”

³³Yesu oko dwoko di epenyo gi be, “Toto na kede imiegu na en alu?”

³⁴En eko ngoloro jo kame oudo obedo oluke nogo, eko waco ne gi be, “Toto na kede imiegu na gin ige!”

³⁵Ngat kame timo gikame Rubanga mito en kame obedo omina, amina kede toto na.”

Marako 4

Agole me Ngacuc

(Matayo 13.1-9; Luka 8.4-8)

¹ Di Yesu bobo oko cako pwony i dog nam me Galilaya. Ekodet adwong me jo oko cokere oluke, omio en eko donyo i yi yee kame oudo tie i dog nam di eko bedo iye; di jo dedede oko dong ooko kakatek.



²En eko pwonyo gi kope atot i agole di ewaco ne gi be,

³” Winyunu! Oudo tie dano moro kame ooto i pototo cuno kodi.

⁴Kakame oudo etie cuc kede, kodi mogo oko popoto i dier yongayo, winy oko bino di oko camo gi pit.

⁵Kodi mogo oko popoto i lobo kobedo lela lela, kakame lobo oudo rerep kiye. Kodi nogo oko susunyo tui pien lobo kame oudo oumo gi nonok.

⁶Kakame ceng oriény kede, eko wango gi di kiko ner, pien aliasin gi oudo likame odonyo piny kiber.

⁷Kodi mogo oko popoto i dier okuto di okuto oko dongo otwilo gi, omio likame kiko nyak.

⁸Do kodi mogo oko popoto i lobo aber, kiko tui di kiko dongo, mogo oko lingo wit gi kame tie kede nyige ot adek, mogo ot kanyape, kede mogo tol acel.”

⁹Yesu oko waco ne gi be, “Ngat kame tie kede yite wek ewinyi.”

Gikame omio Yesu Pwonyo i Agole

(Matayo 13.10-17; Luka 8.9-10)

¹⁰Di do bin Yesu odong kene, jo kame oudo ocokere bute, karacel kede josiao mege tomon kiwie are oko penye kop kame mako agole.

¹¹En eko waco ne gi be, “Wun kotieko mino wu ngeno mung me Ajakanut ka Rubanga. Do jo apat kalikame tie i Ajakanut bino winyo kop dedede i agole;

¹² tetekeny, ‘ Akadi kineni, do likame kitwero ngeno; doko akadi kiwinyi, do likame kitwero niang. Pien ka koto di li, oudo koto kilokere but Rubanga, di en eko sasiro gi.’ “

Yesu Ogonyo Dwong me Agole me Ngacuc

(Matayo 13.18-23; Luka 8.11-15)

¹³Yesu oko penyoy gi be, “Wun likame iniangunu agole ni? Ibinunu do niang agole apat dedede benyo?”

¹⁴Ngacuc cuo kop ka Rubanga.

¹⁵Kodi kopopoto i dier yongayo cungo pi jo kame ka kocuo kop ka Rubanga di kiko winyo, Sitani bino awakawaka di eko kwanyo kop nono tenge ki cuny gi.

¹⁶Iepone acel nono da, kodi kopopoto i lobo kobedo lela lela cungo pi jo kame ka kiwinyo kop ka Rubanga, kigamo awakawaka kede kilel;

¹⁷kop nono likame ko twero keto aliasin i kuo gi, mio ebedo i kuo gi pi kare acecek. Aso, ka peko moro amoto itidil oko pototo pi kop nono, gin kipoto cucuto.

¹⁸Jo ace cal bala kodi kopopoto i dier okuto. Gin en jo kame winyo kop,

¹⁹do paro kuo me piny kan, mit me abar kede jame ace ko donyo i cuny gi, ko twilo kop nono di likame eko twero nyak.



²⁰Do kodi kame kocuo i lobo aber cungo pi jo kame winyo kop ka Rubanga di kiko gamo, di kop nono ko keto wite kame tie kede nyige ot adek, mogo ot kanyape kede mogo tol acel.”

Etala kame Koumo kede Ebukit

(Luka 8.16-18)

²¹Yesu oko penyo gi be, “Tie dano moro kame kelo etala di eko umo kede ebukit, arabo eko kano i dud itanda? Mam ekete kakame idelelei pi mino lero?”

²²Pien gi dedede kokanere kobino woto kakaler, doko gi dedede komungere kobino mino ngere.

²³Ngat kame tie kede yite, wek ewinyi!”

²⁴En eko waco ne gi be, “Ketunu tam wu i kom gikame iwinyunu. Pien epone kame wun ipimunu ne kede jo en kame kobino pimo ne wuda kede, di doko oko medo ne wu kame kalamo da.

²⁵Pien ngat kame tie kede gimoro kobino medo ne ace, do ngat kame li kede gimoro, akadi atitidi kame etie kede da kobino kwanyo kibute.”

Agole me Kodi kame tie Dongo

²⁶Yesu oko meede di ewaco ne gi be, “Ajakanut ka Rubanga cal bala dano kocuo kodi i lobo mere.

²⁷En eko donyo buto di eyai iwor kede iceng. Kodi mege nogo ko tui di kiko donyo dongo di en ekwia kite kame etimere kede.

²⁸Lobo kene en kame mio kodi tui ko dongo; en egeo keto pote, di eko keto wite, di do eko keto nyige.

²⁹Kame kal do ocek, oyotoyot dano nono mako pala di eko cako kac, pien udo kare me kac do otuno.”

Agole me Nyige me Karadali

(Matayo 13.31-32, 34; Luka 13.18-19)

³⁰Yesu oko penyere be, “Nyo kame wan otwerunu poro kede Ajakanut ka Rubanga? Arabo oporenu kede agole mene?”

³¹En ecal kede nyige me karadali; ka kotie pite piny i lobo, etitidi kalamo kodere dedede me wi lobo.

³²Do ka kotieko pite, etui di eko dongo edoko dwong kalamo yen apita dedede. En eko keto ajange kiyayara, kame mio winy me obar bino ko gedo iye.”

³³Yesu bin owaco ne jo kope mege di etio kede agole atot apapat bala magi, bala kame oudo kiromo niang kede.

³⁴En bin emaro waco ne gi kope dedede i agole, do ka oudo edong kene kede josiao mege, en oudo eko donyo niango gi i gi dedede.

Yesu Okweo Yamo atek i Nam



(Matayo 8.23-27; Luka 8.22-25)

- ³⁵Otieno me cenge nono, Yesu oko waco ne josiao mege be, “Ongolunu ber nam ootunu loka tetuca.”
- ³⁶Di do gin kiko weko ekodet, kiko donyo i yi yee kiko tero Yesu da karacel kede gi. Yede apat da oko upere kede gi.
- ³⁷Yamo atek oko cako buko, ebuka oko cako napunapun i kom yee di pii mogo lepar i yi yee, kame oko mino yee oudo tie pong kede pii.
- ³⁸Yesu oudo tie nino i yi yee cen i ojwiny, di ebuto eteno wie. Josiao oko cene di kiwaco ne be, “Apwony, mam likame itie neno be oyapununu to?”
- ³⁹Yesu oko cei, en eko coko yamo di eko waco ne nam da be, “Kwei! Cungi!” Yamo oko cungo, nam da oko kwei cuu.
- ⁴⁰Yesu oko penyo josiao mege be, “Wun ilworunu kamano pinyo? Mam wun pwodi iliunu kede yei?”
- ⁴¹Do gin kiko bedo kede lworu kede ur atek, di do kiko donyo penyere ken gi ken gi be, “Man do ngai, kame kiton yamo kede nam da winyo dwane?”

Marako 5

Yesu Ocango Icuo kame tie kede Jwogi

(Matayo 8.28-34; Luka 8.26-39)

- ¹Yesu kede josiao mege oko ngolo loka me nam me Galilaya i piny me Gerasene.
- ²Di do Yesu otieko wok ki yee, en eko riamo kede icuo kowok ki wi atesin, kame oudo tie kede tipo arac.
- ³Icuo nono oudo maro bedo i wi atesin, doko oudo likame tie ngatamoro kame twero twene akadi kede eriko.
- ⁴I kare atot oudo kosingo twene kede irikoi i tiene kede i cinge, do oudo ecocoto gi acocot. Likame oudo tie ngat kame tie kede teko kame bwono mere.
- ⁵Iwor kede iceng icuo noni oudo kok i wi atesin kede i wi mori, doko di engongolo kome kede kide.
- ⁶Kakame eneno kede Yesu i kakabor, en eko ringo bute di eko riondiko i nyime pi mine wor,
- ⁷di ekok kede dwan amalo be, “Yesu, Wot ka Rubanga Ngamalo Twal! Nyo ber kame in imito timo nango? Akwai i nying Rubanga, kur icana.”
- ⁸En eyamo kaman pien Yesu oudo owaco ne be, “In tipo arac, wok kikom icuo no!”
- ⁹Di Yesu oko penye be, “In nyingi ngai?” En eko dwoko be, “Ango nyinga Ekodet me isirikalen; pien wan otot.”
- ¹⁰En eko donyo bako doge kitek but Yesu be kur eriam gi tenge ki piny nono.



- ¹¹Esipan me ipegei oudo tie kuno cam i bad moru.
- ¹²Di do tipo areco nogo oko donyo bako dog gi but Yesu be, “Cwai wan i kom ipegei ka, wek ooti odony i kom gi.”
- ¹³Yesu oko yei ne gi, di gin kiko wok tenge kikom icuo nono kiko donyo i kom ipegei nogo. Wel me ipegei dedede kame oudo tie kuno oudo romo tutumia are. Gin dedede kiko lor piny kiko donyo i yi nam, di kiko mwony i pii.
- ¹⁴Jo kame oudo kwao ipegei nogo oko ringo ot tatamo ne jo kame oudo tie i bomba kede i calo gikame otimere. Jo oko bino neno gikame oudo otimere.
- ¹⁵Kakame gin kituno kede but Yesu, kiko udo icuo kame oudo jwogi opong i kome nono di bedo kuno, di engapo igoen, di wie odoko ber; lworo oko mako gi.
- ¹⁶Jo kame bin oneno gini oko tatamo ne jo apat epone kame oudo kocango kede icuo kame oudo tie kede jwogi nono, kede gikame otimere ne ipegei da.
- ¹⁷Di do gin kiko donyo ngangao Yesu pi yai tenge ki adul gi.
- ¹⁸Kakame Yesu oudo tie donyo kede i yi yee, icuo kame oudo jwogi omako nono oko kwane be eyei ne eda upere kede.
- ¹⁹Do Yesu likame oko yei. En eko waco ne be, “In dok paco di iko tatamo ne jowoti gikame Rwot otieko timo ni, kede epone kame kisa omake kede i komi.”
- ²⁰Di do icuo nono oko yai en eko ot Dekapoli, di eko cako tatamo ne jo twon gikame Yesu otimo ne. Di jo dedede oko uro gikame otimere.

Nyar ka Yairo kede Dako kame Omulo Egoe ka Yesu

(Matayo 9.18-26; Luka 8.40-56)

- ²¹Kakame Yesu bobo ongolo kede nam loka tetuca kede yee, ekodet me jo oko cokere oluke i dog nam kuno.
- ²²Icuo kame nyinge Yairo, kame oudo obedo ngatel me sinagoga oko tuno. Kakame eneno kede Yesu, en eko potu piny i tiene,
- ²³di eko donyo bako doge be, “Nyara atitidi tuwo mito to. Okwe bia iket cingi i kome me wek ecang di eko kuo.”
- ²⁴Di Yesu oko upere kede en. Ekodet me jo da oko lube di kidire i kome ki bad dedede.
- ²⁵Oudo tie dako moro kame oudo tie kede tuwo kame omio remo obedo ony ki kome pi mwakini tomon kiwie are.
- ²⁶En ebedo neno can twatwal i cing imuroko, doko edudubo lim mere dedede i amuket; do akaka cango, aramo bobo oudo medo doko rac ameda.
- ²⁷En oudo ewinyo kop i kom Yesu, di eko bino cen ngei Yesu i dier ekodet di eko mulo egoe ka Yesu.



- ²⁸Pien oudo eyamo i cunye be, “Ka koto kom amulo akadi egoe mere kenekene da, koto acango.”
- ²⁹Cucuto di emulo egoe ka Yesu, mol me remo mere nono oko cungo, di do en eko winyo i kome kene be etieko do cango ki tuwo mere.
- ³⁰Yesu oko ngeno be twer oudo oyai ki kome, cucuto en eko lokere di eko penyo ekodet be, “Ngai komulo egoe na?”
- ³¹Josiao mege oko dwoko be, “In ineno ekite kame jo tie dire kede i komi di in pwodi bobo ipenyere be, ‘Ngai komula?’ ”
- ³²Do Yesu oko donyo neno jo rimaro, pi mito ngeno ngat kame otimo gi nono.
- ³³Do kite kame dako nono oudo ongego kede gikame otimere ne, en eko bino kede lworu di kome miel, eko riebere piny i nyim Yesu, di eko tatamo nen gi dedede me ateni kotimere.
- ³⁴Yesu oko waco ne be, “Nyara, yei ni ocangi. Ot kede mulem iko cango ki tuwo ni.”
- ³⁵Di pwodi Yesu tie yamo kamano, jo mogo oko bino, kame owok ki paco ka Yairo di kiko waco ne Yairo be, “Nyari otieko to, pinyo bobo komio itie meede lolo Apwony?”
- ³⁶Do Yesu likame oko keto tam mere i yamo gi nono, en eko waco ne ngatel me sinagoga nono be, “In kur ibed kede lworu, do kenekene bed kede yei.”
- ³⁷En likame eko yei ne ngatamoro lube kwanyo Petero, Yakobo, kede omin mere Yokana.
- ³⁸Kakame kituno kede i paco ka Yairo, Yesu oko neno twon atotolun kede koko atek kame oudo tie kuno,
- ³⁹en eko donyo i yi ot di eko penyo jo kame oudo tie kuno be, “Wun itienu icelakin kede koko kitek kaman pinyo? Atin ni likame oto do enino anina.”
- ⁴⁰Gin kiko bedo kede acae i kom kop mere di kinyero. En eko mino gin dedede kidonyo ooko. Di en eko kwanyo papa kede toto me atin kede josiao mege adek noka kiko donyo i agola kame kom atin oudo tie buto iye.
- ⁴¹En eko mako cing atin nono di eko waco ne be, “Talita kumi” ; kame dwong mere be, “Atin nyako, awaco ni be, yai malo.”
- ⁴²Esawa nono atin nyako nono oko yai malo di en eko cako ot (oudo mwakini mege tie tomon kiwie are). Kakame gini otimere kede, jo oko uro adikinicel.
- ⁴³Yesu oko ciko gi be miero kur kimi ngatamoro ngei kop noni. Di do en eko waco ne gi be kimi atin nono gimoro ecami.

Marako 6

Jo me Nasaret Odagi Yesu
(Matayo 13.53-58; Luka 4.16-30)



- ¹Yesu oko yai ki kuno di eko dok i bomba me tur gi, josiao mege da oko lube.
- ²I Ceng Sabato en eko cako pwonyo jo i sinagoga. Jo kame bin owinyo pwony mere oko uro di kipenyere be, “Icuo ni ongego gigi dedede ki tuai? Rieko kame komio icuo ni tin cal nadi? Cinge kom timo tice me twer!”
- ³En mam ebedo ngapac, wot ka Maria, kede omin me Yakobo, Jose, Yuda kede Simoni? Mam amiegu mege da tie kede wa kan?” Di do cuny gi oko dage.
- ⁴Yesu oko waco ne gi be, “Jo me kabedo dedede woro enabi, kwanyo kenekene jo me bomba me tur gi, joawade mege kede jo me diakal mere.”
- ⁵En likame eko timo tice me twer i kuno, do kenekene eketo cinge i wi jotuwu mogo anonok di en eko cango gi.
- ⁶Yesu oko uro twatwal ekite kame jo oudo likame tie kede yei.

Yesu Ooro Josiao mege Tomon kiwie Are

(Matayo 10.5-15; Luka 9.1-6)

Yesu oko ririmo calere di epwonyo jo.

- ⁷En eko lwongo josiao mege tomon kiwie are bute en eko cako oro gi are are di emio gi akarunikin me lono tipere areco.
- ⁸En eko ciko gi be kur kimak gimoro kame kitie ot, kwanyo kenekene ebela; kioti abongo mako cam, abongo ikapu kede abongo sente i isaun gi,
- ⁹do kingap amuka di likame kiko dooko egoe ace.
- ¹⁰Doko en eko waco ne gi be, “Kame kogamo wu i paco moro, bedunu wele me paco nono kenekene tuno wun yai ki kuno.
- ¹¹Do ka jo me kabedo moro oko dagi gamo wu arabo winyo kope wu, kame itienu yai ki kuno, tetengunu adae ki tienu dong kuno bala ijura kame pido gi.”
- ¹²Kikano, gin kiko ot cako pwonyo jo be kipoore swilaro.
- ¹³Kiko riamo jwogi atot, doko kiko wirotuwo atot kede mo di kiko cango gi.

To ka Yokana Ngaibatis

(Matayo 14.1-12; Luka 9.7-9)

- ¹⁴Abaka Erode bin oko winyo gi kotimere, pien nying Yesu oudo odoko iruo. Jo mogo oudo waco be koyaruno Yokana Ngaibatis kikom jo oto, en komio etie kede twer acal kamano.
- ¹⁵Do jo mogo oudo waco be, “Elia inonono.” Jo icegun oudo waco be, “En ebedo enabi, bala acel kikom inabin kariki sek.”
- ¹⁶Do kakame Erode owinyo kede kop nono, en eko waco be, “Mano en Yokana Ngaibatis kame ngoce ango amio kongolo ngute, en kame bobo koyaruno!”
- ¹⁷Pien Erode oudo omio komako Yokana di oko twene i otkol pi kop Erodia, dako komimere kame nyinge Pilipo, pien Erode oudo onyome.



¹⁸Yokana Ngaibatis oudo owaco ne Erode be, “Iswil likame yei ni bedo kede dako ka omini di en pwodi ekuo.”

¹⁹Pi mano, Erodia oko mako ading kede Yokana, di cunye mito neke. Do likame en eko karuno,

²⁰prien Erode oudo lwooro Yokana, en oudo engeo be Yokana obedo dano kacil doko epoore; pi mano en eko gwoko kuo mere kiber. En oudo cunye maro winyo kop ka Yokana, bed bala kop nogo oudo dubo wie tek kame ewinyo gi.

²¹Do winyo oko mako Erodia i ceng kame Erode oudo tie tedo kede ebaga me yutuno ceng me nywale, kame oudo elwongo iye jotel me apugan, jodongo me isirikalen kede joadongo me piny me Galilaya.

²²Kikano, nyar ka Erodia oko donyo i ot me ebaga di eko miel adikinicel, en eko yomo cunye Erode kede wele mege; abaka oko waco ne be, “Penya gimoroni kenekene kame in imito di ako bino mini.”

²³En eko kwongere di ewaco ne be, “Ateteni gimoroni dedede kame in ipenya abino mini, akadi dul me piny kame ango apugo.”

²⁴Nyako nono oko donyo ooko, eko penyo toto mere be, “Apenye emia nyo?” Toto mere oko dwoko ne be, “Penye emi wi Yokana Ngaibatis.”

²⁵Kikano nyako nono oko onyaro dok but abaka di eko waco ne be, “Amito imia wi Yokana Ngaibatis di tie i sinia abongo gal.”

²⁶Gini oko cobo cunye abaka, do pi kite kame oudo etieko kwongere kede i nyim wele mege, omio likame doko oudo etwero twone.

²⁷Cucuto abaka oko cwano sirikale acel kame dare, en eko mine dwan be eoti ekel wi Yokana Ngaibatis. Sirikale nono oko ot i otkol di eko ngolo ngut Yokana.

²⁸En eko kelo wi Yokana di tie i sinia, eko mino i cing nyako nono, di do en eko tero ne toto mere.

²⁹Kakame josiao ka Yokana bin owinyo kede kop noni, gin kiko ot kwanyo kome di kiko yiko.

Yesu Opito Ekodet Adwong me Jo
(Matayo 14.13-21; Luka 9.10-17; Yokana 6.1-14)

³⁰Joor oko dwogo but Yesu di kiko tatamo ne gikame kitimo dedede kede kame kipwonyo.

³¹Jo oudo tot kame bino di yai, omio Yesu kede josiao mege oudo likame tie kede kare me cam. Pi mano, en eko waco ne josiao mege be, “Ootunu karamoro kakame oromunu bedo iye kenwa di ikounu karuno wei pi kare moro acecek.”

³²Kikano gin kiko donyo i yi yee di kiko yai kioto kargi ken gi.



³³Kakame oudo kitie yai kede, jo atos oko neno gi kiko ngeno gi, di kiko yai ki bomban dedede kame kio kede kuno, kiko ringo anyim. Di do gin en kame kiko cako tuno kakame Yesu kede josiao mege oudo tie ot iye.

³⁴Di bin Yesu owok ooko, en eko neno ekodet me jo di eko bedo kede kisa i kom gi, pien oudo kical bala romini kame ngakwat gi li. En eko donyo pwoyo gi kope atos.

³⁵Di do bin piny oyuto, josiao mege oko bino bute kiko waco ne be, “Neni, esawa okato, doko da kan oling,

³⁶wac ne jo ot i miere kede i calere mogo kiyapiyapi kede kan, tetekeny kikaruno wilo gimoro me acama.”

³⁷Do Yesu oko dwoko ne gi be, “Wun nogo miunu gi gimoro kicami.” Gin kiko penye be, “Mam imito be ooti owil cam kede denari tol are area gi, oko bino mino gi kicami?”

³⁸Yesu oko penyo gi be, “Itienu kede mugati adi? Otunu ber inenunu.” Di do kitieko ngeno rom gi, kiko waco ne be, “Otie kede mugati kany kede deknam are.”

³⁹Yesu oko waco ne jo pi bedo piny i wi lum i ikodeta.

⁴⁰Gin kiko bedo piny i ikodeta me tol acel tol acel kede mogo me ot kany ot kany.

⁴¹Yesu oko kwanyo mugati kany kede deknam are nogo, en eko neno malo di eko pwoyo Rubanga, eko tuturo mugati di eko mino josiao mege pi gabo jo. En eko bobo popoko deknam are nogo da ne jo dedede.

⁴²Gin dedede kiko cam di kiko yeng.

⁴³Di josiao oko coko cam kame odong oko pongo ibukito tomon kiwie are.

⁴⁴Cuo kame oudo tie i kom jo kocamo oudo romo tutumia kany.

Yesu Ooto ki wi Pii kede Tiene

(Matayo 14.22-33; Yokana 6.15-21)

⁴⁵Cucuto nono, Yesu oko mino josiao mege odonyo i yi yee, di kiko telo ne yongayo pi ot loka Betesaida, di en ber edong cen pi peruno jo.

⁴⁶Ingei en moto gi, Yesu oko do ot yito i wi moru pi lego.

⁴⁷Kakame piny oyuto kede, josiao oudo tie i dier nam kede yee, di Yesu odong kene ooko i itela.

⁴⁸En eko neno josiao mege di tie cane kwango yee, pien yamo oudo tie buko di wok ki tetu nyim gi. Tetu esawa me obai Yesu oko bino but gi di eoto ki wi pii kede tiene. En oudo etie mito kato gi akata.

⁴⁹Do kakame gin kiko nene kede di eoto ki wi pii kede tiene, gin kiko paro be jwogi oudo inonono, omio kiko dwilao,

⁵⁰pien gin dedede kinene di lwoyo oko mako gi. Cucuto Yesu oko waco ne gi be, “Bedunu kede nwangcuny, angoy inonony, kur lwoyo maku.”



⁵¹En eko donyo i yi yee but gi, yamo oko kwei. Josiao oko uro adikinichel,

⁵²pien gin oudo likame kiniang odocon gikame dwong me pito jo tutumia kany kede mugati nyuto i kom Yesu, pien wi gi oudo tek.

Yesu Ocango Jotuwu i Genesaret

(Matayo 14.34-36)

⁵³Kakame kitieko do ngolo kede nam, kiko wok itela i Genesaret, di kiko wano yee ooko.

⁵⁴Kakame kiwok kede ki yee, jo oko susunyo ngeno Yesu;

⁵⁵gin kiko ringo i adulion me kio, di kiko donyo diedielo jotuwu kede elago di kitero bute kakame gin oudo kiwinyo be etie iye.

⁵⁶Kabedo dedede kame bin Yesu otuno iye, bala i calere, i bomban kede i miere, jo oudo kelo joe gi kame oudo tuwo di kiko keto gi i atalen, kiko donyo bako dog gi ne Yesu pi yei ne jotuwu mulo lak egoe mere. Jo dedede kame oko mulo egoe mere oko cango.

Marako 7

Pwony me Joakwari

(Matayo 15.1-9)

¹Iparisayon kede jopwony me Iswil mogo kame oudo owok ki Yerusalem oko cokere karacel but Yesu.

²Gin kiko neno di josiao ka Yesu mogo camo kede cing gi komunaun, dwong mere be gin oudo likame kilwoko cing gi bala kame bin itok gi mito.

³(Pien Iparisayon karacel kede Iyudayan dedede oudo lubo pwony kame bin kigamo kibus joadongo gi. Gin bin likame kigeo cam kwanyo di kilwoko cing gi iepone kame bin itok gi mito kede.

⁴Doko da kame kidwogo ki atale, oudo likame kicamo gimoro di pwodi likame kilonyere. Doko oudo kilubo itok apat atos bala me lwoko ikopon, agune kede bakulin.)

⁵Di Iparisayon kede jopwony me Iswil oko penyo Yesu be, “Pinyo komio josiao nin likame lubo itok me joakwari wa, do kicamo kede cing gi komunaun?”

⁶Yesu oko dwoko ne gi be, “Isaya bin omurao kop me ateni i kom wun joecuke, bala kite kame kowandiko kede be, ‘ Jogi wora kede dog gi, do cuny gi bor kibuta;

⁷kiwora wor me nono, pien gin kipwonyo iswilia ka dano ineno bala kidoko mega.’

⁸” Wun iwekunu gwoko cik ka Rubanga, di ikounu lokere lubo itok me jo.”

⁹Doko Yesu oko meede waco ne gi be, “Wun itienu kede yore me rieko me dagi lubo cik ka Rubanga tetekeny ilubunu itok wu.



¹⁰ Pien Musa bin owaco be, ‘Wor papa ni kede toto ni’ ; kede be, ‘Miero nek dano kame waco kop arac i kom papa mere arabo toto mere.’

¹¹ Do wun ipwonyunu be ka dano owaco ne papa mere amoto toto mere be, ‘Gikame oudo koto iudo kibuta obedo Koroban’ (kame dwong mere be, giamia but Rubanga),

¹² wun do ikounu yei ne weko konyo papa mere amoto toto mere.

¹³ Manono mio kop ka Rubanga kony mere doko li pi itok kame wun ipwonyunu. Doko da tie jame apat atot acal kamanoni kame wun itimunu.”

Gikame Pwoko Dano

(Matayo 15.10-20)

¹⁴ Yesu bobo oko lwongo jo bute di eko waco ne gi be, “Winyunu wun dedede gikame atie waco ne wu di ikounu niang iye.

¹⁵ Likame tie gimoro kame dano mwonyo i yie kame mie emunaun, do gikame wok ki cuny dano en kame munao en.”

¹⁶ (Ngat kame tie kede yite, wek ewinyi.)

¹⁷ Di bin Yesu oyai oweko jo, en eko dok paco; josiao mege oko penye pi gonyo dwong me agole noni.

¹⁸ Yesu oko dwoko ne gi be, “Mam wuda iliunu kede niang? Likame inenunu be gikame donyo i yi dano likame karuno munao en,

¹⁹ pien udo likame edonyo i cunye, do edonyo i yie di en eko pelao ooko.” (Pi mano, Yesu otuco kakaler be cam dedede beco, likame kimunao dano.)

²⁰ Di bobo en eko waco ne gi be, “Gikame wok ki yi dano en kame munao en.

²¹ Pien ki cuny dano, en kame wok kiye par areco me caro, kuwo, nek,

²² adote, ingobel, kede timo gikareco dedede apat bala angalo, mit me lewic, nyeko, dubo nying jo, ewaka kede tim me mingomingo.

²³ Gikareco nogi dedede wok ki cuny dano di kiko munao en.”

Yei me Dako me Poenisia

(Matayo 15.21-28)

²⁴ Di Yesu oko yai eko ot i adulion kame bomban me Taya kede Sidon tie iye, en eko udo ot kuno di eko donyo bedo iye. En oudo likame emito be ngatamoro ngei be etie kuno, do di oudo likame ekaruno mungere.

²⁵ Dako moro kame nyare oudo tie kede tipo arac oko winyo kop i kom Yesu, cucuto dako nono oko ot bute di oko riebere piny i tiene.

²⁶ Dako nono oudo likame obedo Ayudayat, do en oudo ebedo anywali me Poenisia, kame tie i piny me Siria. En eko bako ne Yesu doge pi riamo jwogi tenge ki kom nyare.



²⁷Do Yesu oko dwoko ne be, “Wek ber kong mi idwe cam, pien likame eber cako kwanyo cam me idwe iko uco ne igwogin.”

²⁸Do en eko dwoko ne be, “Ebo Rwot, do igwogin kame buto i dud emesa da camo angidingidin me cam kame idwe rereto ki wi emesa.”

²⁹Yesu oko waco ne be, “Pi kop kame idwoko na no, dok do paco, ibino udo di jwogi otieko weko nyari.”

³⁰Dako nono oko dok paco en eko udo nyare tie buto i apien di jwogi otieko yai oweke.

Yesu Ocango Edingo kame Lebe Oto

³¹Yesu oko yai ki adul me Taya eko beo ki Sidon, di en eko pelao ki Dekapoli tuno i nam me Galilaya.

³²Jo mogo oko kelo lomoro bute kame yite oding, doko di likame etwero yamo da, di kiko bako ne Yesu dog gi be eket cinge i wie di en eko cange.

³³Yesu oko tero icuo nono tenge me ekodet eko rwako lwete i yi yite, di eko ngulo lau eko mulo kede lebe.

³⁴Di do Yesu oko neno malo en eko oomo wei di en eko waco ne be, “Epata” , dwong mere be, “Yabere.”

³⁵Cucuto yit icuo nono oko tuc, lebe da oko gonyere, di en eko cako yamo kiber.

³⁶Yesu oko waco ne jo be kur kiwac ne ngatamoro kop nono. Do akadi bed bala en eciko gi kamanono, gin kiko meede ameda sarakino kop nono.

³⁷Jo dedede kame bin owinyo kop noni oko bedo kede ur kalikame wacere di kiwaco be, “En etieko timo gi dedede kiber, etie mino idingoi winyo kop, kede jo kame leb gi oto da geo yamo.”

Marako 8

Yesu Opito Jo Tutumia Ongwon

(Matayo 15.32-39)

¹ kare nono di ekodet adwong oudo ocokere karacel, doko di oudo kili kede gi me acama, Yesu oko lwongo josiao mege bute di eko waco ne gi be,

²” Kisa omaka kede jogi twatwal, pien kibedo kan keda nan oromo ceng adek, doko nan likame kitie kede gi me acama.

³Ka nan aperuno gi be kioti i miere gi, kec bino nuono gi i yongayo, pien mogo kikom gi owok ki kakabor.”

⁴Josiao mege oko penye be, “Ngai en kame karuno pito jogi kede mugati i tim kan?”

⁵Di Yesu oko penyo gi be, “Itienu kede mugati adi?” Gin kiko dwoko be, “Kanyaare.”



⁶En eko waco ne ekodet be bed piny. En eko kwanyo mugati kanyaare nogo, eko mino pwoc but Rubanga, eko tuturo gi di eko mino josiao mege pi popoko ne jo. Di gin kiko timo kamanono.

⁷Oudo gin kitie kede deknam atitino anonok. Yesu oko mino pwoc pirgi, di en eko waco ne josiao mege pi popoko gida ne jo.

⁸Jo dedede oko cam, di kiko yeng, di josiao oko koko angidingidin me cam kame odong oko pongo ibukito kanyaare.

⁹Jo kame oudo tie kuno oudo romo tutumia ongwon. Yesu oko do peruno jo.

¹⁰Esawa nono en eko donyo i yi yee kede josiao mege kiko ot i adul me Dalamanutu.

Iparisayon Openyo Giaura kibun Yesu

(Matayo 12.38-42; 16.1-4)

¹¹Iparisayon oko ot but Yesu kiko cako piem kede en, di kimito be etim gianena moro kame yai ki malo; gin oudo kitie tame.

¹²Yesu oko oomo cunye di eko waco be, “Pinyo komio jo me i kare ni penyo gianena? Ateteni awaco ne wu be, likame tie gianena moro kame kobino mino jo me i kare ni.”

¹³En eko yai eweko gi kuno, eko dok i yi yee, di eko ngolo nam loka tetuca.

Arup me Iparisayon kede me ka Erode

(Matayo 16.5-12)

¹⁴Josiao ka Yesu oudo wi gi owil mako mugati. Oudo kitie kede mugati acel kenekene i yi yee.

¹⁵Di Yesu oko kwenyaro gi pi gwokere kikom arup me Iparisayon kede arup ka Erode.

¹⁶Gin di kiko cako yamo ken gi ken gi be, “En eyamo kamano pien wan oliunu kede mugati.”

¹⁷Do Yesu oudo ngeo gikame gin kitie yamo, en eko penyo gi be, “Pinyo komio wun itienyu yamo kop kame mako wun bedo li kede mugati? Mam pwodi wun likame ingeunu gigi arabo iniangunu i kom gi? Mam wun wi wu tek?”

¹⁸Itienyu kede wangu, pinyo komio likame inenunu? Itienyu kede yitu, pinyo komio likame iwinyunu? Likame iyutununu

¹⁹kare kame bin atuturo kede mugati kany ako pito kede jo tutumia kany? Ikounu bin koko ibukito adi me angidingidin kame odong?” Gin kiko dwoko be, “Ibukito tomon kiwie are.”

²⁰Yesu oko penyo gi be, “Do i kare kame apopoko kede mugati kanyaare ne jo tutumia ongwon, ikounu bin koko angidingidin kame odong opongong ibukito adi?” Kiko dwoko be, “Kanyaare.”

²¹Yesu oko penyo gi be, “Do nan likame pwodi iniangunu?”



Yesu Ocango Emuduk i Betesaida

²²Yesu kede josiao mege oko bino Betesaida. Jo mogo oko kelo icuo kame wange oto bute di kiko kwane be eket cinge i kome.

²³Yesu oko mako cing emuduk nono eko pene tere tenge me calo nono. En eko ngulo lau i wange, eko keto cinge i wie di eko penye be, “Tie gikame itwero neno?”

²⁴Loca oko tingo wange malo eko waco be, “Ebo, atie neno jo, do kical bala yen kame tie ot.”

²⁵Yesu bobo oko mulo wang icuo nono, lo nono oko temuno nganyo wange di wange oko doko ber, en eko do donyo neno jame dedede kiber.

²⁶Yesu oko cwane dok paco di ewaco ne be, “Kur idoki i calo.”

Kop kame Petero Otuco i kom Yesu

(Matayo 16.13-20; Luka 9.18-21)

²⁷Yesu kede josiao mege oko ot i calere kame tie Sisiria Pilipi. I kare kame kitie ot kede, Yesu oko penyog gi be, “Kara ber jo waco be ango en ngai?”

²⁸Gin kiko dwoko ne be, “Jo mogo waco be in en Yokana Ngaibatis, mogo waco be in Elia, doko mogo da waco be in ibedo ngat acel kikom inabin.”

²⁹En eko penyog gi be, “Do wun iwacunu be ango en ngai?” Petero oko dwoko ne be, “In en Kirisito.”

³⁰Yesu oko ciko gi kitek be kur kiwac ne ngatamoro kop i kome.

Yesu Owaco Kop kame mako Can kede To mere

(Matayo 16.21-28; Luka 9.22-27)

³¹Yesu oko cako pwoonyo gi di ewaco be, Wot ka dano miero bei i can atos; di joadongo me piny, jodongo me josaseredoti kede jopwoonyo me Iswil ko bino dage, di kiko neke da. Do ingei ceng me adek en ebino yaruno.

³²En ewaco kop noni kakaler. Di Petero oko kwanye otere tenge di oko donyo bunano en be koto kur di eyamo kamanono.

³³Do Yesu oko lokere oneno josiao icegun eko coko Petero be, “Dok cen ngea, in Sitani! Pien likame tam nin owok kibut Rubanga do ebodo me ka dano.”

³⁴Di do Yesu oko lwongo ekodet dedede karacel kede josiao mege bute, en eko waco ne gi be, “Ka ngatamoro mito luba, poore kong edagere kene, di en eko riongo musalaba mere eko luba.

³⁵Pien dano kame mito lako kuo mere, ebino rwenye; do ngat kame rwenyo kuo mere pira kede pi ejiri bino lake.

³⁶Bero nyo kame dano udo ka eudo gi dedede kame cunye mito i piny kan di eko kei kuo mere?

³⁷Pien nyo kame dano twero mino pi dwoko kuo mere?



³⁸Ngat kame nan lewic make i koma kede pi kop na i kare kanataman me kwina Rubanga kede me dub, Wot ka dano da lewic bino make i kome i kare kame ebino dwogo kede di etie i deyo ka Papa mere, karacel kede imalaikan kacil.”

Marako 9

¹Di en eko waco ne gi be, “Ateteni awaco ne wu be, tie jo mogo kame nataman tie kan, kalikame bino bilo to tuno di kineno Ajakanut ka Rubanga obino kede twer.”

Cal ka Yesu Olokere (Matayo 17.1-13; Luka 9.28-36)

²Ingei ceng kanyape, Yesu oko kwanyo Petero, Yakobo kede Yokana, di eko tero gi malo i wi moru kargi ken gi. Kom Yesu oko lokere i wang gi kanono;

³igoen mege oko doko tar liamaliam, kame ngatamoro i wi lobo kan likame twero lwoko gi di kiko lony kamanono.

⁴Di gin kiko neno Elia kede Musa di tie yamo kede Yesu.

⁵Petero oko waco ne Yesu be, “Apwony, eber pi wan bedo tie kan. Nan do wek oger kimere adek kan; acel ne in, acel ne Musa kede acel ne Elia.”

⁶Petero oudo kwia gikame eyami, pien lwordo oudo otieko mako gi kitek.

⁷Edou oko umo gi pukupuk, di dwan oko wok ki edou di waco be, “Man en Woda kame amaro, winyenu.”

⁸Kiko loko wang gi awakawaka di kingongolo piny, do likame kiko neno bobo ngatamoro ace, kwanyo Yesu kenekene.

⁹Kakame oudo kitie wok kede ki wi moru, Yesu oko ciko gi be kur kiwac ne ngatamoro gikame kineno tuno di Wot ka dano oyaruno kikom jo oto.

¹⁰Gin kiko yei mungo kop nono di kipenyere ken gi ken gi dwong me kop me yaruno kikom jo oto.

¹¹Kiko penyo Yesu be, “Pinyo ber komio jopwony me Iswil waco be, miero Elia kong cak dwogo di pwodi gini likame otimere?”

¹²En eko dwoko ne gi be, “Ebo, ateteni Elia miero cak bino me wek eik gi dedede bobo. Do kara pinyo komio iwandik kacil waco be Wot ka dano bino neno can kitek di oko timo ne tim me lewic?”

¹³Do awaco ne wu be Elia otieko bino, di gin kiko timo ne gikame cuny gin oudo mito, bala kame iwandik kacil da waco i kome.”

Yesu Ocango Awobi kame tie kede Tipo Arac (Matayo 17.14-21; Luka 9.37-43a)

¹⁴Kakame kituno kede but josiao icegun, kiko neno ekodet me jo di oluko gi, di jopwony me Iswil tie piem kede gi.



- ¹⁵Cucuto nono di ekodet dedede oneno Yesu, kiko uro twatwal di kiko ringo bute kiko mote.
- ¹⁶Yesu oko penyo josiao mege be, “Kop nyo kame wun itienu piem iye kede gi?”
- ¹⁷Ngat acel kikom ekodet oko dwoko ne be, “Apwony, ango akelo woda buti pien etie kede tipo arac kame genge yamo.
- ¹⁸Ka tipo arac nono obino ne, rete piny di buo ko donyo wok ki doge, en eko donyo ngururo di emwodo lake, di do eko teregego. Ango oudo akwao josiao ni be koto kiriamenge, do likame kiko twero.”
- ¹⁹Yesu oko waco ne gi be, “Wun lwak kame li kede yei, miero abed kede wu pi kare arom amene? Abino kanyakino kede wu tuno awene? Kelenu buta kan.”
- ²⁰Gin kiko tere but Yesu. Cucuto kakame tipo arac nono oneno kede Yesu, en eko mino kom awobi nono odonyo miel teltel di eko rete piny, di eko mine edonyo bebelo di buo mol ki doge.
- ²¹Yesu oko penyo papa mere be, “Etieko nan kare arom amene di gini time kaman?” En eko dwoko be, “Kom cako di pwodi en atin.
- ²²Tien atot etieko rereto en i mac kede i pii di emitto neke. Do ka itwero timo gimoro iye, tim wa kisa ikony wa.”
- ²³Yesu oko dwoko ne be, “Pinyo komio iwaco na be, ka itwero? Jame dedede twerere ne ngat kame tie kede yei.”
- ²⁴Cucuto papa me awobi nono oko kok be, “Ango atie kede yei; Okwe konya ikwany gungcuny tenge ki buta!”
- ²⁵Kakame Yesu oneno kede be ekodet me jo oudo tie ringini cokere bute, en eko ciko tipo arac nono be, “In tipo kame dingo yit jo kede kame neko leb jo, aciki, wok tenge ki kome di kur iko dok bute bobo.”
- ²⁶Tipo arac nono oko redo di eko mino kom awobi nono odonyo miel teltel, en eko wok. Awobi nono oko dong bala ngat otieko to; omio jo atot oko waco be, “Etieko do to!”
- ²⁷Do Yesu oko mako cinge oko kiarao en, di eko yai malo.
- ²⁸Di do Yesu otieko donyo i yi ot, josiao mege oko penye i mung be, “Pinyo komio wan likame oudo otwero riamo tipo arac nono?”
- ²⁹Yesu oko dwoko ne gi be, “Likame tie gi ace kame twero riamo epone me tipo arac no, kwanyo ilega kenekene.”

Yesu Bobo Owaco kop kame mako To mere

(Matayo 17.22-23; Luka 9.43b-45)

- ³⁰Yesu oko yai ki kuno kede josiao mege, kiko ot di kibeo ki Galilaya. Oudo likame emitto be ngatamoro ngei kakame en etie iye,



³¹pien oudo etie pwonyo josiao mege di ewaco ne gi be, “Kobino mino Wot ka dano i cing jo, di gin kiko bino neke. Do kame koneke, ingei ceng me adek en ebino yaruno.”

³²Do gin likame kiko niang kop mere nono, doko oudo kilworo penye.

Ngai en kame Pire Dwong Kalamo?

(Matayo 18.1-5; Luka 9.46-48)

³³Di do Yesu kede josiao mege oko tuno Kaperanaum. Kakame oudo kitie kede i ot, Yesu oko penyo josiao mege be, “Kara ber nyo kame oki wun itienu piem iye i yongayo?”

³⁴Do gin likame kiko dwoko ne kop moro, pien gin oudo kibedo piem ken gi ken gi di kioto i yongayo, be ngai en kame pire dwong kalamo kikom gi.

³⁵Yesu oko bedo piny, en eko lwongo josiao mege tomon kiwie are di eko waco ne gi be, “Ka ngatamoro mito bedo dano me agege, miero kong emwolere ebed dano me ajikini di en eko donyo tic ne jo dedede.”

³⁶En eko kwanyo atin atitidi di eko mino ocungo i nyim gi, di eko tingo i kore di ewaco ne gi be,

³⁷“Ngat kame gamo atin atitidi bala man i nyinga, udo egama, doko ngat kame gama, udo likame egamango, do udo egamo ngat kame oora.”

Ngat kalikame Dagi Wa udo en Merwa

(Luka 9.49-50)

³⁸Yokana oko waco ne Yesu be, “Apwony, wan oko udo ngatamoro da di tie riamo jwogi i nyingi, do wan oko genge, piento en likame ebedo ngat acel kikom wa.”

³⁹Yesu oko dwoko ne gi be, “Kur igengenu, pien likame tie ngatamoro kame timo tic me twer i nyinga, kame bino lokere awakawaka waco kope areco i koma.

⁴⁰Pien ngat kalikame dagi wa udo en merwa.

⁴¹Ateteni awaco ne wu be, ngat kame mio wu pii me amata pien wun ibedunu jo ka Kirisito, likame ebino kei giamia mere me pwoc kibus Rubanga.

Atama kame mio Dano Dubo

(Matayo 18.6-9; Luka 17.1-2)

⁴²” Ngat kame mio acel kikom jo atino kame oyei ango gi dubo, oudo koto bedo ber ka kotweo ne kidi me riego i ngute di oko uce i nam.

⁴³ Aso, ka cingi en kame mi idubo, ngole tenge; pien eber ne in donyo i kuo kame bedo nakanaka abongo cingi acel, akaka bedo kede gin are dedede di iko ot i mac kalikame to, i mac kalikame nekere.

⁴⁴(Pien kudilinge kame camo gi ki kuno likame to, doko mac mere bedo nakanaka.)

⁴⁵Doko ka tieni en kame mi idubo, ngole tenge, pien eber ne in donyo i kuo kame bedo nakanaka abongo tieni acel, akaka bedo kede tieni are dedede di oko uci i mac kalikame to.



- ⁴⁶(Pien kudilinge kame camo gi ki kuno likame to, doko mac mere bedo nakanaka.)
- ⁴⁷ Doko ka wangi en kame mi idubo, gole ooko, pien eber ne in donyo i Ajakanut ka Rubanga abongo wangi acel, akaka bedo kede wangi are dedede di oko uci i mac kalikame to.
- ⁴⁸Pien kudilinge kame camo gi ki kuno likame to, doko mac mere bedo nakanaka.
- ⁴⁹” Pien kobino lonyo ngat acelacel kede mac bala kite kame koketo kede kado i cam.
- ⁵⁰ “Kado ber, do ka tuto odoko bot, kotwero bobo mine edoko kec benyo? “Bedunu bala kado, di itienu kede mulem i diere wu kenu kenu.”

Marako 10

Yesu Opwonyo kop kame mako Gonyo Nyom

(Matayo 19.1-12; Luka 16.18)

- ¹Di Yesu oko yai ki kuno eko ot i adul me Yudea, en eko ngolo ecilet me Yorodan. Jo atot bobo oko cokere bute, en eko pwonyo gi bala kite kame lem oudo enare timo kede sek.
- ²Iparisayon mogo oko bino bute pi kino doge di kiko penye be, “Iswil wa yei ne dano riamo dako mere?”
- ³Yesu oko lunyo penyo gi be, “Nyo kame bin Musa ociko ne wu?”
- ⁴ Gin kiko dwoko be, “Musa bin oyei ne icuo wandiko baluwa me gonyo nyom di en eko riamo dako mere.”
- ⁵Yesu oko dwoko ne gi be, “Musa bin owandiko Iswil gi piru pien pwonyo wun tek.
- ⁶ Do i agege, i kare me cwec, i wandik kacil waco be, ‘Rubanga ocweo gi icuo kede dako.
- ⁷ Pi manoni, icuo bino weko papa mere kede toto mere, di en eko ribere kede dako mere,
- ⁸gin jo are go kiko doko kom acel.’ Aso, udo likame doko kitie jo are.
- ⁹Pi mano, gikame Rubanga otieko ribo karacel, kur ngatamoro poki.”
- ¹⁰Di do kidok i ot, josiao oko bobo penyo Yesu i kom kop noni.
- ¹¹ En eko waco ne gi be, “Icuo kame riamo dako mere di eko nyomo dako ace, udo etimo adote.
- ¹²Iepone nono da, dako kame pokere kede cware di en eko ot nyomere kede icuo ace, udo eda etimo adote.”

Yesu Omio Idwe Atino Winyo

(Matayo 19.13-15; Luka 18.15-17)

- ¹³Jo oko donyo kelo idwe atino but Yesu me wek eket cinge i kom gi, do josiao oko donyo cokocoko gi be kiweki.



¹⁴Do kakame Yesu oneno kede kamano, cunye oko wang, di en eko waco ne josiao mege be, “Wekunu idwe atino bin buta, kur igengunu gi, pien Ajakanut ka Rubanga tie pir jo kame cal bala gin.

¹⁵Ateteni awaco ne wu be, ngat kalikame gamo Ajakanut ka Rubanga bala atin atitidi, likame ebino donyo iye.”

¹⁶En eko tingo gi i kore, eko keto cinge i wi gi, di eko mino gi winyo.

Icuo Kobaru

(Matayo 19.16-30; Luka 18.18-30)

¹⁷Di Yesu oudo tie yai ot, icuo moro oko ringini oko riondiko i nyime, di oko penye be, “Apwony aber, atim nyo me wek aud kuo kame bedo nakanaka?”

¹⁸Yesu oko penye be, “Pinyo komio in ilwonga be ngat aber? Likame tie ngat aber kwanyo Rubanga kenekene.

¹⁹Mam in ingeo cik gi: ‘Kur ineko, Kur itimo adote, Kur ikwalo, Kur imio ijura me abe, Kur isero, Wor papa ni kede toto ni?’ ”

²⁰Loca oko dwoko be, “Apwony, ango abedo gwoko cik go dedede cako di pwodi ango eponga.”

²¹Yesu oko ngine di oko bedo kede amara bute, di oko waco ne be, “In idong kede gi acel kame ipoore timo; oti icat jame dedede kame itie kede, di iko mino jocan sente kame iudo, di iko bino bedo kede abar i malo, di do iko bino luba.”

²²Kakame icuo nono owinyo kede kop no, en eko jul di eko ot tenge di cunye owang, pien oudo ebaro twatwal.

²³Yesu oko ngoloro josiao mege di en eko waco ne gi be, “Ebino tin bedo tek benyo ne jo kobaro donyo i Ajakanut ka Rubanga.”

²⁴Kop noni oko neko kom josiao. Do Yesu bobo oko waco ne gi be, “Idwe na, donyo i Ajakanut ka Rubanga tin tek benyo!

²⁵Eyoyot ne aguragura donyo ki wang piso kalamo ngabar donyo i Ajakanut ka Rubanga.”

²⁶Man oko medo neko kom josiao, kiko penyo Yesu be, “Ngai do kame twero udo alako?”

²⁷Yesu oko ngino gi di eko waco be, “Man likame twerere kibus dano, do weko kibus Rubanga, pien kibus Rubanga gi dedede twerere.”

²⁸Di Petero oko cako waco ne be, “Neningo, wan oweko gi dedede di oko lubi.”

²⁹Yesu oko waco ne gi be, “Ateteni awaco ne wu be, ngat kame weko paco mere, imiegu kede amiegu mege, amotoko toto kede papa mere, idwe mege kiton poti mege pira kede pi ejiri,



³⁰ebino udo gi nogi dedede tien tol acel i kare kanataman; ebino udo ude, imiegu kede amiegu mege, joatoti, idwe kede poti karacel kede itidil da, di en eko bino udo kuo kame bedo nakanaka i kare koyaro bino.

³¹Do jo atot kame nataman tie me agege bino bedo me ajikini, kede jo kame nataman tie me ajikini bino bedo me agege.”

Yesu Owaco kop me To mere Tien me Adek

(Matayo 20.17-19; Luka 18.31-34)

³²Yesu kede josiao mege oudo tie i yongayo me ot Yerusalem, en oudo etelo ne gi yongayo. Josiao mege oko uro adikinicel, kede jo koudo lubo gi da oko bedo kede lworu. En doko eko tero josiao tomon kiwie are tenge kargi ken gi, di en eko cako tatamo ne gi kop i kom gikame oudo oyaro timere ne

³³di ewaco ne gi be, “Winyunu, wan otienu ot Yerusalem, di jo ko bino mino Wot ka dano i cing jodongo me josaseredoti kede jopwony me Iswil. Gin kibino ngolo ne kop me to, di kiko mine i cing jo kalikame Iyudayan,

³⁴di gin kiko bino timo ne tim me anywar; kibino ngulo lau i kome di kiko dane di kiko neke da, do ingei ceng me adek en ebino yaruno.”

Gikame Yakobo kede Yokana Okwao kibut Yesu

(Matayo 20.20-28)

³⁵Yakobo kede Yokana, kame oudo obedo awobe ka Sebedayo oko bino but Yesu di kiko waco ne be, “Apwony, wan omito be itim ne wa gikame oyaro kwani.”

³⁶Yesu oko penyo gi be, “Nyo inonono kame imitunu be ango atim ne wu?”

³⁷Gin kiko waco ne be, “Kame idonyo i deyo ni, mi ngat acel kikom wa bed i badi tetu cam kede ngat ocelu i badi tetu ngodal.”

³⁸Do Yesu oko waco ne gi be, “Wun likame ingeunu gikame itienu kwano. Benyo, itwerunu wuda mato ikopo me can kame miero ango amati? Arabo, itwerunu yei udo batisimu kame miero batiso ango kede?”

³⁹Gin kiko dwoko ne be, “Wan otwero.” Yesu oko waco ne gi be, “Ateteni ibinunu mato ikopo me can kame miero ango amati, doko da kobino batiso wu kede batisimu kame miero batiso ango kede.

⁴⁰Do ango likame atie kede akarunikin me mino ngatamoro bedo i bada tetu cam amotoko tetu ngodal. Do kabedo nogi tie pi jo kame kotieko iiko ne gi.”

⁴¹Kakame josiao icegun tomon owinyo kede kop noni, kiko lilo kede Yakobo kede Yokana.

⁴²Yesu oko lwongo gin dedede bute, di eko waco ne gi be, “Wun ingeunu be jo kame poore pugo jo kalikame Iyudayan pugo gi tetek, doko da jodongo gi tie kede akarunikin i kom gi.

⁴³Do man likame epone kame miero ebed kede i diere wu. Do ngat kame mito bedo dano kame pire dwong kikom wu, miero ebed ngatic wu,



⁴⁴doko ngat kame mito bedo dano me agege i diere wu, miero ebed epasoit me jo icegun.

⁴⁵Pien Wot ka dano da likame obino pi jo timo ne tic, do en ebino pi timo tic ne jo icegun kede pi jalo kuo mere pi lako jo atos.”

Yesu Ocango Emuduk kame Nyinge Batulumayo

(Matayo 20.29-34; Luka 18.35-43)

⁴⁶Gin kiko tuno Jeriko. Esawa kame Yesu kede josiao mege oudo tie yai kede ki Jeriko karacel kede ekodet adwong me jo, emuduk moro kame oudo maro kwac kame nyinge Batulumayo wot ka Timayo oudo tie bedo i nget yongayo.

⁴⁷Kakame ewinyo kede be Yesu me Nasaret oudo inonono, en eko cako lelemo be, “Okwe Yesu Wot ka Daudi, mi kisa maki keda!”

⁴⁸Jo atos oko donyo cococoko en di kiwaco ne be elingi, do en eko meede ameda ilelem di ewaco be, “Okwe Wot ka Daudi, mi kisa maki keda!”

⁴⁹Yesu oko cungo di eko waco be, “Lwongenu ebin.” Kikano gin kiko lwongo emuduk nono di kiwaco ne be, “Dii cunyi, yai malo, en etie lwongi.”

⁵⁰En eko uco egoe mere me adoka, eko lepun malo di eko ot but Yesu.

⁵¹Yesu oko penye be, “Imito be atim ni nyo?” Emuduk nono oko dwoko be, “Apwony, mi wanga nen piny.”

⁵²Yesu oko waco ne be, “Ot do; yei ni ocangi.” Cucuto wange oko cako neno piny di do en eko cako lubo Yesu.

Marako 11

Yesu Odonyo Yerusalem bala Abaka

(Matayo 21.1-11; Luka 19.28-40; Yokana 12.12-19)

¹kakame kinoko kede Yerusalem, di pwodi kitie tetu bomban me Betepage kede Betania, i moru me Olibeti, Yesu oko cwano josiao mege are anyim,

²di ewaco ne gi be, “Wun otunu i calo kame tie anyim ca. Cucuto di itienu donyo iye, ibinunu udo atin me punda di kotweo, kalikame pwodi ngatamoro owanano; gonyenu di ikounu kele.

³Ka ngatamoro openyo wu be, ‘Pinyo komio itienu timo kamano?’ , wacenu be, ‘Rwot en kame mite, doko da eyaro mino kodwoke susunyo.’ “

⁴Gin kiko ot di kiko udo atin me punda di kotweo i nget ekeko i dog egudo, di kiko gonye.

⁵Jo kame oudo cungo kuno oko penyo gi be, “Wun itienu timo nyo, kom gonyo atin me punda no?”

⁶Gin kiko dwoko ne gi kop kame Yesu oudo owaco, di jo nogo oko yei ne gi ot.



⁷Gin kiko kelo atin me punda nono but Yesu, kiko peto igoen gi ingee, di Yesu oko bedo iye.

⁸Jo atot oko peto igoen gi i yongayo, apat mege opeto boke kame kitongo ki poti.

⁹Jo kame oudo telo anyim kede jo kame oudo lube ki cen oko cako lelemo be, “Osana! Etie kede winyo, ngat kame bino i nying Rwot!”

¹⁰Etie kede winyo Ajakanut kame tie bino, en ajakanut ka papa wa Daudi! Osana i malo twal!”

¹¹Yesu oko donyo Yerusalem, di eko ot donyo i tempulo eko donyo ngingio jame dedede rimaro. Do kite kame piny oudo oyuto kede, omio en eko ot Betania kede josiao mege tomon kiwie are.

Yesu Olamo Yat Epigi

(Matayo 21.18-19)

¹²Oru mere di kitie dwogo ki Betania, kec oudo oneko Yesu.

¹³Di pwodi etie tenge, en eko neno yat epigi kame pote oumo, eko ot kuno pi neno ka oudo etwero udo anyakini mogo iye. Do kakame etuno kede i dude, en eko udo yat nono di tie kede pote kenekene, pien kare me nyak gi oudo pwodi likame otuno.

¹⁴En eko waco ne yat nono be, “Likame ngatamoro bobo bino camo anyakini ni!” Josiao mege owinyo di ewaco kop noni.

Yesu Ooto i Tempulo

(Matayo 21.12-17; Luka 19.45-48; Yokana 2.13-22)

¹⁵Kakame kituno kede Yerusalem, Yesu oko donyo i tempulo di eko cako riamo jo kame oudo tie cato kede wilo jame ooko; eko rereto imesai me jo kame oudo seso sente, kede gibedo me jo kame oudo cato amam.

¹⁶Likame en eko yei ne ngatamoro tero gimoro ngolo kede tempulo.

¹⁷Di do en eko pwonyo gi be, “Mam kowandiko i iwandik kacil be, ‘Kobino lwongo oda be ot me ilega me atekerin dedede?’ Do wun itiekunu loke edoko kapwono me joyak!”

¹⁸Kakame jodongo me josaserdoti kede jopwony me Iswil owinyo kede kop noni, kiko cako mono epone me neko Yesu; gin oudo kitie kede lworu i kome, pien ekodet lung oudo ouro pwony mere.

¹⁹Di piny oyuto, Yesu kede josiao mege oko yai ki bomba.

Pwony kame oyai ki kom Yat Epigi

(Matayo 21.20-22)

²⁰Oru mere odiko di kitie ot i yongayo, kiko neno yat epigi nono di etieko tuo cako ki wie tuno kiton i aliasin.

²¹Petero oko yutuno gikame oudo otimere, en eko waco ne Yesu be, “Apwony, neningo yat kame ilamo nono otieko tuo!”



²²Yesu oko dwoko ne gi be, “Bedunu kede yei i kom Rubanga.

²³Ateteni awaco ne wu be, ngat kame waco ne moru ni be emukere di eko ot poto i nam abongo gung i cunye, do di eyei be gikame ewaco nono bino timere, kobino timo ne.

²⁴Pi mano, awaco ne wu be, gi dedede kame ikwaunu i ilega, bedunu kede yei be itiekunu udo gi, di en eko bino bedo meru.

²⁵Doko kame itie ilega, di oudo itie kede kop moro arac kede ngatamoro, ber isasiro en, tetekeny Papa ni kame tie malo da ko sasiro in ki gikareco.”

²⁶(“Do kalikame wun isasirunu jo apat, Papa wu me i malo da likame bino sasiro wu.”)

Peny i kom Akarunikin ka Yesu

(Matayo 21.23-27; Luka 20.1-8)

²⁷Gin bobo kiko dok Yerusalem. Kakame oudo Yesu tie ot kede i tempulo, jodongo me josaseredoti, jopwony me Iswil, karacel kede joadongo me piny oko ot bute.

²⁸Gin kiko penye be, “Akarunikin mene en kame in itimo kede gigi? Ngai en komi akarunikin me timo gi?”

²⁹Yesu oko dwoko ne gi be, “Ango ayaro peny wu peny acel, do ka imianu adwokini mere, ada ako bino waco ne wu akarunikin kame ango atimo kede gi nogi.

³⁰Ber wacanu; akarunikin kame bin Yokana batiso kede jo oudo owok kibut Rubanga, arabo kibut dano?”

³¹Gin kiko cako piem ken gi ken gi be, “Odwokenu benyo? Ka owacunu be, ‘Ewok ki malo’ , en ebino peny wa be, ‘Do pinyo komio likame ikounu yei en?’

³²Do owacenu benyo, be ewok kibut jo?” Gin oudo kilworo ekodet me jo, pien jo dedede oudo ngeo kiber be Yokana obedo enabi.

³³Di do gin kiko dwoko ne Yesu be, “Wan girwa okwia.” Yesu oko waco ne gi be, “Akadi ada likame abino waco ne wu akarunikin kame ango atie timo kede gi nogi.”

Marako 12

Agole me Jodar Poto me Olok

(Matayo 21.33-46; Luka 20.9-19)

¹ Di Yesu oko cako yamo kede gi i agole be, “Bin icuo moro opuro poto me olok di eko luke kede awas, di en eko kunyo bur iye me bino bwini, eko gero esipet me daro poto. Di do en eko keto jo mogo daro ne poto nono, di en eko ot i piny apat.

²Kakame kare me ngwedo olok otuno kede, won poto oko cwano ngatic mere acel but jodar poto pi ot gamo ne anyakini mogo kowok ki poto mere.

³Gin kiko make kiko bunge, di kiko riame edok kede cinge nono.



⁴Won poto bobo oko cwano ngatic mere ace, gin kiko daruno mano da kiko tuco wie kede kiko timo ne tim me lewic.

⁵Di bobo en eko cwano ngatic ace, do mano kiko neko. Kitimo kamanono da ne jotic apat atot, mogo kibungo, kede mogo kiko neko.

⁶Oudo pwodi edong kede dano acel kobedo wode kame emaro. Me ajikini mere en eko do cwano wode nono di ewaco be, ‘Angeo be kiyaro do bedo kede wor but woda.’

⁷Do jodar poto ka oko donyo yamo ken gi ken gi be, ‘Man en musika mere, bia onekenu me wek jame kame en epoore sikao dok megwa.’

⁸Gin kiko make, kiko neke di kiko uce ooko me poto me olok.

⁹” Nyo do kame won poto me olok no bino timo? En eyaro bino di eko neko jodar poto me olok nogo di do eko mino poto mere me olok i cing jodar apat.

¹⁰ Mam itiekunu somo iwandik kacil kame waco be, ‘ Kidi kame jogedo odagi, en kame olokere oko doko kidi me esonda kame pire tek;

¹¹man Rwot en kotimo, doko i wang wa, etie gi me aura? ’ ”

¹²Jotel me Iyudayan oko tamo make, pien gin oudo kitieko niang kiber be Yesu oudo oyamo agole noni i kom gin. Do pien oudo kilworo ekodet, oko mino kioto tenge kiweke.

Peny kame mako kop me Culo Esolo

(Matayo 22.15-22; Luka 20.20-26)

¹³Jotel me Iyudayan oko cwano Iparisayon mogo kede jo me ekodet ka Erode but Yesu pi ot kino doge.

¹⁴Kiko bino but Yesu di kiko waco ne be, “Apwony, wan ongeo be in dano me ateni. Doko in likame ilworo ngatamoro, pien in likame ineno dano kede cal mere me ooko, do in ipwonyo jo yongayo ka Rubanga i ateni. Benyo, Iswil yei ne jo culo esolo but Kaisari arabo li? Ocul gi arabo li?”

¹⁵Do kite kame oudo Yesu ngeo kede ecuke gi, omio en eko waco ne gi be, “Pinyo komio itienu tama? Kelanu ber sente akaya acel aneni.”

¹⁶Gin kiko kelo ne. En eko penyo gi be, “Cal kede nying ngai ine kame tie iye ni?” Gin kiko dwoko ne be, “Me ka Kaisari.”

¹⁷Yesu oko waco ne gi be, “Aso, miunu Kaisari jame ka Kaisari, ikounu mino me ka Rubanga da but Rubanga.” Gin kiko uro kite kame edwoko kede.

Peny kame mako Iyarun

(Matayo 22.23-33; Luka 20.27-40)

¹⁸ Isadukayon, jo kalikame oudo yei kede kop me iyarun, oko bino but Yesu di kiko penye be,



¹⁹ “Apwony, Musa bin owandiko ne wan Iswil kame waco be, ka icuo moroni oto eko weko dako mere di likame enywal kede, omin mere miero do mak apuserut kame en eto eweko me wek enywal kede idwe ne omin mere kame oto nono.

²⁰ Aso, bin tie imiegu kanyaare, me agege oko nyomo dako, do en eko to eweko dako nono abongo idwe.

²¹ Omin mere me are oko mako apuserut nono eko bedo kede. Manono da bobo oko to oweko dako nono abongo idwe. Gi acel nono oko timere ne omin gi me adek da,

²² tuno i me kanyaare. Gin dedede kiko to abongo nywal. Ki cen mere di do dako nono da oko to.

²³ Nan do i ceng me iyarun en ebino bedo dako ka ngai? Pien cuo kanyaare nogo dedede oudo obedo kede en bala dako gi.”

²⁴ Yesu oko waco ne gi be, “Gini en komio wun ipotunu, pien wun ikwianu iwandik kacil akadi twer ka Rubanga.

²⁵ Pien kame jo oyaruno, cuo kede mon likame bobo bino nyomere, do kibino bedo cal bala imalaikan kame tie i malo.

²⁶ Aso, do i kom kop kame mako yaruno jo oto, mam itiekunu somo kiye itabu ka Musa kop i kom abum, epone kame Rubanga owaco ne kede be, ‘Ango en Rubanga ka Aburaam, Rubanga ka Isaka kede Rubanga ka Yakobo’ ?

²⁷ En likame Rubanga me jo oto, do en Rubanga me jo akuo. Wun kom ipotunu.”

Cik kame Pire Tek Kalamo

(Matayo 22.34-40; Luka 10.25-28)

²⁸ Ngat acel kikom jopwony me Iswil oko bino en eko winyo di kitie piem. Kakame eneno kede be Yesu odwoko peny gi kiber, en eko peny be, “Kara ber cik mene en kame pire tek kalamo?”

²⁹ Yesu oko dwoko ne be, “Cik kame pire tek kalamo en ine be, ‘Winyi in Isirael! Rwot Rubanga wa en Rwot acel.

³⁰ Poore imar Rwot Rubanga ni kede cunyi dedede, kede kuo ni dedede kede tam ni dedede, kede teko ni dedede.’

³¹ Me are en ine be, ‘Mar ngakio ni bala kite kame imaro kede komi keni.’ Likame doko tie cik moro kame pire tek kalamo magi.”

³² Ngapwony me Iswil nono oko waco ne Yesu be, “Apwony, idwoko kop kiber, iwaco be Rwot Rubanga en acel, doko likame tie rubanga moro ace, kwanyo en kene, mano tie kop me ateni;

³³ kede doko be, mar Rwot Rubanga ni kede cunyi dedede, kede tam ni dedede kede teko ni dedede, di iko maro ngakio ni bala kite kame imaro kede komi keni, man en kame kalamo giamia kame kowango alutu kede giayala.”



³⁴Kakame Yesu oneno kede be icuo nono odwoko peny mere kede rieke, en eko waco ne be, “In kom likame ibor do kede Ajakanut ka Rubanga.” Ingei mano, likame tie ngatamoro kame oko dino cunye penye kop moro.

Peny i kom Kirisito

(Matayo 22.41-46; Luka 20.41-44)

³⁵Di bin Yesu tie pwony i tempulo, en eko peny jo be, “Benyo benyo kame jopwony me Iswil waco kede be Kirisito en wot ka Daudi?”

³⁶Daudi da kikome bin Tipo Kacil otelo di en eko waco be, ‘Rwot Rubanga owaco ne Rwot na be: Bed i bada tetu cam, tuno di ango atieko mini inyono jokwor ni piny i tieni.’

³⁷Ka Daudi da kikome bin olwonge be ‘Rwot’, Kirisito doko twero bedo wot ka Daudi benyo?”

Yesu Okwenyaro Jo i kom Jopwony me Iswil

(Matayo 23.1-36; Luka 20.45-47)

Ekodet adwong oudo tie winyo pwony ka Yesu kede kilel.

³⁸I pwony mere, Yesu owaco ne gi be, “Gwokerenu i kom jopwony me Iswil, kame maro latao di kingapo ikanson aboco di kimito be di jo moto gi kede wor i atalen.

³⁹Doko kimaro bedo i komini abeco i sinagoga, kede kabedo me wor i ibagai.

⁴⁰Gin kicamo jame me apuserun, di kiko donyo ngangalo lego ilega aboco me ecuke. Kobino ngolo ne gi kop kame kalamo.”

Irabu me Apuserut

(Luka 21.1-4)

⁴¹Yesu oko bedo di epimere kede adita me irabu, en eko donyo neno epone kame oudo ekodet me jo tie mino kede irabu gi. Jo kobaro atot oudo mio sente atot twatwal;

⁴²di apuserut moro kame ngacan da oko bino, en eko kwanyo abolai are kenekene.

⁴³En eko lwongo josiao mege di eko waco ne gi be, “Ateteni awaco ne wu be, apuserut kame ngacan ni en komio irabu atot kalamo jo apat go dedede.

⁴⁴Pien jo kobaro omio gikolamar ki abar gi, do apuserut ni, i can mere, en ekwanyo gi dedede kame oudo etie kede, kame epoore kuo kede.”

Marako 13

Yesu Owaco Kop me Reto Tempulo

(Matayo 24.1-2; Luka 21.5-6)

¹Di bin Yesu tie wok ki tempulo, ngasiao mere acel oko waco ne be, “Apwony, neningo twon kide kede twon gedo go!”

²Yesu oko waco ne be, “Mam ineno twon gedo go? Likame tie kidi acel moro koyaro dong cungo i wi kidi ocelu; kobino rereto gin dedede piny.”

Peko kede Itidil



(Matayo 24.3-14; Luka 21.7-19)

- ³Di bin Yesu tie bedo i wi moru me Olibeti, kame oudo pimere kede tempulo, Petero, Yakobo, Yokana kede Anderia oko bino bute. Di kiko penyé i mung be,
- ⁴” Wac ne wa, awene en kame gini bino timere kede, doko gianena nyo kame bino bedo tie pi nyuto be kare do oyapuno tuno me gi nogi dedede timere?”
- ⁵Yesu oko cako waco ne gi be, “Gwokerenu me wek kur ngatamoro rweny wu.
- ⁶Jo atot oyaro bino i nyinga di kiwaco be, ‘Ango en Kirisito! ‘Di gin kiko bino rwenyo jo atot.
- ⁷Doko kame iwinyunu kop me yi kame tie timere, kede rwonge me yi, kur cunyu poti, pien manono miero timere, do likame udo ajikini otuno.
- ⁸Pien atekerin bino yi, doko ajakanut acel da bino yi kede ajakanut ocelu. Yangere me piny bino bedo tie kabedere atot doko kec bino bedo tie. Do magi dedede tie bala agege me aramo me nywal.
- ⁹“Do gwokerenu; pien koyaro pido wu i nyim kansulo, kede kobino bungo wu i sinagoga. Ibinunu cungo i nyim jopug kede i nyim abakai pira, pi mino ijura.
- ¹⁰Do me agege miero ber tuc ejiri ne atekerin dedede.
- ¹¹Do ka komako wu di oko tero wu pido wu i nyim kansulo, kur igeunu bedo kede par pi kop kame iyarunu waco; do kame esawa oromo, wacunu kop kame kobino keto i dogu. Pien kop kame ibinunu yamo likame bino bedo megu do kibino wok kibus Tipo Kacil.
- ¹²Dano bino mino kotero omin mere di oko neko, papa me atin da bino timo ne atin mere kamanono, kede idwe bino daga jonywal gi, di kiko mino koneko gi.
- ¹³Jo dedede bino daga wu pira. Do ngat kame bino kanyakino tuno i ajikini bino udo alako.

Gikame Kelo Lworo Adwong

(Matayo 24.15-28; Luka 21.20-24)

- ¹⁴“Do kame inenunu gikame munao kabedo kacil ka Rubanga di kosipo kakame oudo likame epoore bedo iye (ngat kame tie somo poore niang dwong mere), jo kame tie Yudea miero do ringi i wi mori.
- ¹⁵Dano kame tie i wi ot kur doko wok piny amotoko edonyi i ot pi kwanyo gimoro.
- ¹⁶Doko ngat kame tie i poto kur doko dok i paco pi omo egoe.
- ¹⁷Can tin bino bedo dwong benyo ne mon oyac kede kame doto idwe i ceng nogo!
- ¹⁸Kwaunu Rubanga, me wek gigi kur timere i kare me ngico.
- ¹⁹I ceng go can adwong bino bedo tie kame epone mere lem pwodi likame otimere cako Rubanga cweno piny tuno nan, doko da likame ebino medo timere.



²⁰Doko koto Rwot likame odwodwoko wel me ceng nogo, koto likame ngatamoro obwot. Do pi jo mege kame en eyero, omio Rwot odwodwoko ceng nogo odoko nonok.

²¹” I kare nono ka ngatamoro owaco ne wu be, ‘Neni, Kirisito ine! ‘arabo be, ‘Neni, en ica! ‘kur iyeunu kop mere.

²²Pien jo kame cuko be gin kibedo Kirisito, kede inabin me angalo oyaro bino. Kiyaro timo gianena kede gi me isuur pi ngalo jo kame Rubanga oyero, ka twerere.

²³Do gwokerenu, ango atieko waco ne wu gigi dedede di pwodi likame kare otuno.

Dwogo ka Wot ka Dano

(Matayo 24.29-31; Luka 21.25-28)

²⁴“I kare nono di do peko nono otieko timere, wang ceng bino doko col, duwe likame doko bino rieny,

²⁵ acerin da bino popoto ki malo, kede twer kame tie malo bino yayangun.

²⁶ Di do jo ko bino neno Wot ka dano di bino kede idoun kede twer adwong kede deyo.

²⁷En ebino cwano imalaikan tetu bad ongwon dedede me wi lobo pi coko jo kame Rubanga oyero, cako ki agege me lobo tuno i ajikini me malo.

Pwony kame Yai ki kom Yat Epigi

(Matayo 24.32-35; Luka 21.29-33)

²⁸” Siaonu pwony kame yai ki kom yat epigi; cucuto kame ajange mege odoko yoyom di pote gi oko cako lot, wun ingeunu be kare me iporo do oyapuno tuno.

²⁹Iepone nono da kame inenunu gigi tie timere, ngeunu be en do etieko doko iyapiyapi, kom etuno i erute.

³⁰Ateteni ango awaco ne wu be, gigi dedede bino timere di pwodi jo kame nan tie di kuo likame oto.

³¹Malo kede lobo bino rwenyo, do kope nango likame bino rwenyo.

Likame tie Ngat kame Ngeo Ceng amoto Esawa nono

(Matayo 24.36-44)

³²“Do likame tie ngat kame ngeo awene kame ceng amotoko esawa nono bino tuno kede, akadi imalaikan kame tie i malo, akadi Wot ka Rubanga da likame ngeo, do Papa kenekene en kame ngeo.

³³Gwokerenu, bedunu di ikiunu piny, pien likame ingeunu awene en kame kare no bino tuno kede.

³⁴ Ebino bedo cal bala dano moro kame tie ot i piny abor. Do di pwodi likame eyai, emio jotic mege tic kame ngat acelacel poore timo, di en eko ciko ngadar ekeko pi bedo di wange bit.



³⁵Pi mano, wuda kiunu piny, pien likame ingeunu awene kame won ot oyaro bino kede, cengemogo eyaro bino otieno, arabo i dier iwor, arabo tetu obai di tongwen tie koko amotoko odiko.

³⁶Aso ka li, en ebino ngoole angola di eko udo wu di ininunu.

³⁷Gikame ango atie waco ne wu en kame atie waco ne jo dedede da be: kiunu piny!”

Marako 14

Koporo Kop me Neko Yesu

(Matayo 26.1-5; Luka 22.1-2; Yokana 11.45-53)

¹ Oudo pwodi odong ceng are me tuno i Ebagga me Kalamo, kede ebagga kame kocamo iye Mugati kame Arup li kiye. Jodongo me josaseredoti kede jopwony me Iswil oudo tie mono epone me mako Yesu i mung me wek kineke.

²Kiko waco be, “Kur omakenu i kare me ebagga, pien jo bino tany ne wa.”

Kowiro Yesu i Betania

(Matayo 26.6-13; Yokana 12.1-8)

³ Di bin Yesu oudo tie Betania i ot me adobo kame nyinge Simoni, esawa kame oudo kitie kede cam, dako moro oko bino di emako mo kame wel mere tek adikinicel i cupa kame kolwongo be alabasita. En eko gonyo wi cupa di eko onyo mo nono i wi Yesu.

⁴Do jo mogo kame oudo tie kuno cuny gi likame oko bedo yom, kiko donyo penyere ken gi ken gi be, “Pinyo komio kodubo mo no aduba kamano?”

⁵Oudo koromo cato mo ni i wel me denari kame kalamo tol adek di oko mino jocan.” Gin kiko bunano dako nono kitek.

⁶Do Yesu oko waco ne gi be, “Wekunu dako no bedi; itienu kara lole pinyo? En etimo nango gikaber twatwal.

⁷ Wun itienu kede jocan nakanaka, i kare moroni kenekene kame wun imitunu konyo gi kede, iromunu konyo gi. Do ango likame abino bedo kede wu nakanaka.

⁸En etimo gikame oudo esobolo; ewira kede mo pi temuno koma pi ayika.

⁹Ateteni awaco ne wu be, kabedo dedede kame kobino tucu ejiri iye i wi lobo lung, kobino tatamo gikame dako noni otimo di koyutuno en kede.”

Yuda Oyei pi Rupao Yesu

(Matayo 26.14-16; Luka 22.3-6)

¹⁰Di do Yuda Isikariot kame oudo obedo ngat acel kikom josiao tomon kiwie are, oko ot but jodongo me josaseredoti pi iiko epone kame eromo mino kede Yesu i cing gi.

¹¹Kakame kiwinyo kede kop ni, cuny gi oko bedo yom twatwal, di do kiko cikere pi mine sente. Di do Yuda oko cako mono kare aber me mino Yesu i cing gi.

Yesu Ocamo Ebagga me Kalamo kede Josiao mege

(Matayo 26.17-25; Luka 22.7-14, 21-23; Yokana 13.21-30)



¹²I ceng me agege me Ebagame Mugati kame Arup li kiye, kame koneko kede romini me camo Ebagame Kalamo, josiao ka Yesu oko penye be, “Tuai en kame in imito be wan ooti oik ni iye Ebagame Kalamo?”

¹³Di en eko cwano josiao mege are di ewaco ne gi be, “Otunu i bomba, ibinunu riamo kede icuo kame yeo pii kede agulu, lubenu

¹⁴tuno i ot kame en eyaro donyo iye, ikounu waco ne won ot nono be, ‘Apwony ocwao wa be inyute wa agola me wele kame en karacel kede josiao mege eyaro bino camo iye Ebagame Kalamo.’

¹⁵En ebino nyuto ne wu agola alac me malo, kame kotieko iiko kiber, ikounu iiko ne wa ebagakanono.”

¹⁶Josiao nogo oko ot i bomba, kiko udo gi dedede di tie bala kite kame Yesu oudo owaco ne gi kede, di do gin kiko iiko cam me Ebagame Kalamo.

¹⁷Di do piny oyuto, Yesu oko bino kede josiao mege tomon kiwie are.

¹⁸Kakame kitie do kede cam, Yesu oko waco ne gi be, “Ateteni awaco ne wu be, ngat acel kikom wu bino rupao ango, ngat nono nan tie cam keda karacel.”

¹⁹Josiao mege oko cako ning, di ngat acelacel kikom gi oko donyo penye be, “Mam nat ango inonono?”

²⁰Yesu oko dwoko ne gi be, “En ebedo ngat acel kikom wun jo tomon kiwie are, en ngat kame nan tie nywako keda suani acel.

²¹Pien Wot ka dano bino to bala kame iwandik kacil waco; do ngat kame bino rupao Wot ka dano bino neno can tin benyo! Tikatika koto oudo likame konywale da.”

Cam ka Rwot me Otieno

(Matayo 26.26-30; Luka 22.14-20; 1 Jokorinti 11.23-25)

²²Kakame oudo kitie cam kede, Yesu oko kwanyo mugati, eko kwano winyo iye, eko popoko, di eko mino josiao mege di ewaco be, “Gamunu icamunu; man en koma.”

²³En eko kwanyo ikopo me bwini, eko mino pwoc but Rubanga, en eko mino gi, di gin dedede kiko mato.

²⁴Yesu oko waco ne gi be, “Man en remo na kame moko isikan ka Rubanga, remo na kame kobino onyo pi jo atos.

²⁵Ateteni awaco ne wu be, likame bobo abino mato pige me anyakini me olok tuno kede ceng kame abino mato kede bwini anyen i Ajakanut ka Rubanga.”

²⁶Kakame kitieko kede wer, gin kiko yai ot i moru me Olibeti.

Yesu Otucu be Petero bino Dage

(Matayo 26.31-35; Luka 22.31-34; Yokana 13.36-38)

²⁷Yesu oko waco ne gi be, “Wun dedede iyarunu ringo ikounu weka, pien kowandiko be, ‘Abino neko ngakwat di romini ko bino sarakin.’



²⁸Do ingei yaruno ango, abino cako ot ne wun Galilaya.”

²⁹Petero oko dwoko ne be, “Akadi jogi dedede weki, do ango likame abino weki.”

³⁰Yesu oko waco ne Petero be, “Ateteni awaco ni be, iwor me tin, di pwodi likame tongweno me are okok, udo in itieko daga tien adek.”

³¹Petero oko dwoko kede dwan atek di ewaco be, “Ango likame ayaro weki, akadi di komito neka kedi.” Josiao icegun da di oko waco kamanono.

Yesu Olego i Poto me Getesemani

(Matayo 26.36-46; Luka 22.39-46)

³²Yesu oko yai karacel kede josiao mege, kiko ot kabedo kame kolwongo be Getesemani, di en eko waco ne gi be, “Wun bedunu kan, ango ber aoti alegi.”

³³En eko tero Petero, Yakobo kede Yokana, par atek kede cwercury oko make,

³⁴en eko waco ne gi be, “Par atek tie i cunya kame romo neka. Wun ber dongunu kan, do bedunu di ikiunu piny.”

³⁵En eko nyiko anyim anonok eko riebere piny, di eko lego be ka koto oudo twerere, koto likame ebeo i can.

³⁶En eko waco be, “Okwe Papa, gi dedede twerere kibuti. Kwany ikopo me can noni kibuta tenge, likame pi mit nango, do pi mit nin.”

³⁷En eko dwogo eudo josiao nogo onino, di en eko waco ne Petero be, “Simoni, mam in kom itie nino? Benyo, oudo likame itwero bedo di ineeno pi esawa acel kenekene?”

³⁸En eko waco ne gi be, “Bedunu di ineenunu, kede di ilegunu, tetekeny kur ipotunu i atama. Pien cuny mito, do kom nyap.”

³⁹Di en eko bobo ot tenge, eko lego di enyogao kope nogo.

⁴⁰Di bobo en eko dwogo but gi di eko udo gi kitie nino, pien nino oudo obwono wang gi, doko oudo likame kingeo kop kame kipoore dwoko ne.

⁴¹Kakame edwogo kede tien me adek mere, en eko penyo gi be, “Mam wun pwodi itien nino, kede wei? Mano do romo! Esawa otuno do; kobino mino Wot ka dano i cing jodubo.

⁴²Yaunu ootunu. Nenunu ngat koyaro rupao ango ine otieko tuno.”

Komako Yesu

(Matayo 26.47-56; Luka 22.47-53; Yokana 18.3-12)

⁴³Cucuto nono di pwodi Yesu tie yamo, Yuda kame oudo obedo ngat acel kikom josiao tomon kiwie are di tuno. Oudo etie upere kede ekodet me jo kame mako ipimai kede akutai, kame oudo jodongo me josaseredoti, jopwony me Iswil kede joadongo me piny ocwao.

⁴⁴Ngaerupe oudo otieko mino gi gianena di ewaco be, “Ngat kame ango abino moto di anoto, udo en inonono; makenu di ikounu tere, do di idarenu kitek.”



⁴⁵Cucuto di Yuda otuno, en eko ot but Yesu, di eko waco be, “Apwony!” En eko noto leme.

⁴⁶Di gin kiko mako Yesu.

⁴⁷Do ngat acel kikom jo koudo tie cungo kuno oko woto epima mere, en eko tongo yit epasoit me Ngatel Josaseredoti eko ngolo tel.

⁴⁸Di Yesu oko penyo gi be, “Mam ibinunu kede ipimai kede akutai pi maka ineno bala ango abedo ngayak?”

⁴⁹Ango abedo kede wu di apwonyo i tempulo ceng dedede, do likame ikounu maka cabo. Do iwandik kacil miero cobere kakare.”

⁵⁰Di do josiao mege dedede oko ringo oweke.

⁵¹Atin awobi moro kame oudo orwao esuka atar oko lube, joka oko make,

⁵²do en eko bulucar di eko ringo nono eweko esuka.

Kopido Yesu i nyim Kansulo

(Matayo 26.57-68; Luka 22.54-55, 63-71; Yokana 18.13-14, 19-24)

⁵³Di kiko tero Yesu but Ngatel Josaseredoti, kakame jodongo me josaseredoti, joadongo me piny kede jopwony me Iswil oudo ocokere iye.

⁵⁴Petero da oudo tie lubo gi ki cen ki kakabobor tuno i diakal me Ngatel Josaseredoti. En eko donyo bedo kede isirikalen jodar paco di eyo mac.

⁵⁵Jodongo me josaseredoti kede kansulo lung oko cako mono kop moro kame koromo pido iye Yesu tetekeney neke. Do likame kiko udo kop moro.

⁵⁶Jo atot oko tamo kelo pido i kom Yesu, do pido gi nogo oudo likame riamo.

⁵⁷Jo mogo di do oko cungo kede pido me abe i kom Yesu di kiwaco be,

⁵⁸“Wan owinyo di ewaco be en eyaro reto tempulo kame kogero kede cing ni, di en eko bino gero kalikame kogero kede cing pi ceng adek.”

⁵⁹Do akadi ber i pido gi noni da, kope gi oudo likame riamo.

⁶⁰Ngatel Josaseredoti oko cungo i diere gi, en eko penyo Yesu be, “Benyo, in ili kede kop moro kame iromo dwoko? Nyo ber ine kame jogi tie pidi iye ni?”

⁶¹Do Yesu oko ling alinga, likame en eko dwoko kop moro. Bobo Ngatel Josaseredoti oko medo penye be, “In en kame ibedo Kirisito Wot ka Rubanga kame koworo?”

⁶²Yesu oko dwoko be, “Ango inononi, doko ibinunu neno Wot ka dano di tie bedo i bad tetu cam me twer ka Rubanga, di etie bino kede idoun me i malo.”

⁶³Ngatel Josaseredoti oko yeco ekanso mere, di eko waco be, “Pinyo bobo pwodi omitunu ijurak?”

⁶⁴Wuda itiekunu winyo epone kame ecao kede Rubanga. Wun do nan iparunu benyo?” Gin dedede kiko ngolo ne kop be poore neke.



⁶⁵Di do jo mogo oko cako ngulo lau i kome, di kiumo wange kede di kibabapo en di kiwaco ne be, “Aso tuc bala enabi ngat kobapi.” Isirikalen jodar da oko game kede abap.

Petero Odagi Yesu

(Matayo 26.69-75; Luka 22.56-62; Yokana 18.15-18, 25-27)

⁶⁶Di Petero oudo pwodi tie piny i diakal, dako moro kame obedo ngatic i paco ka Ngatel Josaseredoti oko bino kuno.

⁶⁷Kakame eneno kede Petero di tie yono mac, en eko ngine kitek di eko waco be, “Kom ida oudo itie kede Yesu me Nasaret.”

⁶⁸Do Petero oko dagi di ewaco be, “Ango akwia doko likame aniang gikame itie waco da.” Petero oko ot cungo orute.

⁶⁹Dako nono oko bobo nene, en eko bobo waco ne jo kame oudo tie cungo kuno be, “Kom lono da tie ngat acel kikom jo nogo.”

⁷⁰Do Petero oko bobo dagi. Do di pwodi likame otero kare, jo kame oudo cungo kuno oko bobo waco ne Petero be, “Ateteni ida ngat acel kikom gi, pien in ibedo Ngagalilaya.”

⁷¹Petero oko cako lamere kene di elairo be, “Ango akwia icuo kame wun itien yamo kop i kome no.”

⁷²Cucuto di do tongweno me are kok. Petero oko yutuno kop kame Yesu oudo owaco ne be, “Di pwodi tongweno me are likame okok, in ibino daga tien adek.” Gino oko cobo cunye di en eko donyo koko.

Marako 15

Kotero Yesu i nyim Pilato

(Matayo 27.1-2, 11-14; Luka 23.1-5; Yokana 18.28-38)

¹Odiko sek di piny oru, jodongo me josaseredoti oko ariamakin kede joadongo me piny, jopwony me Iswil karacel kede kansulo lung, kiko poro kop i kom Yesu. Gin kiko tweno Yesu di kiko tere ot mine i cing Pilato.

²Pilato oko penye be, “In en ibedo abaka me Iyudayan?” Yesu oko dwoko ne be, “In en iwaco kamanono.”

³Jodongo me josaseredoti oko pide pi kope atos.

⁴Pilato bobo oko penye be, “Likame tie kop kame iromo dwoko? Winy ber twon kope kame kitie pidi iye.”

⁵Do Yesu likame oko medo dwoko kop moro, omio Pilato oko uro.

Kongolo ne Yesu Kop me To

(Matayo 27.15-26; Luka 23.13-25; Yokana 18.39—19.16)

⁶Bin i kare dedede me Ebaga me Kalamo, Pilato oudo maro gonyo mabus acel kame jo penye be egonyi.



⁷I kare nono, oudo tie icuo moro kame nyinge Baraba, kame oudo tie i otkol karacel kede jojemo kame oudo otimo nek i kare kame logologo oudo tie kede.

⁸Ekodet me jo oko cokere, kiko cako penyo Pilato pi timo ne gi bala kite kame lem enare timo kede.

⁹En eko penyo gi be, “Imitunu be agony ne wu Abaka me Iyudayan?”

¹⁰En oudo engeo be jodongo me josaseredoti oudo omio Yesu i cinge pi nyeko gi.

¹¹Do jodongo me josaseredoti oko supo ekodet pi waco ne Pilato pi gonyo ne gi Baraba akaka Yesu.

¹²Pilato bobo oko penyo ekodet be, “Di do ako timo nyo ne icuo kame wun ilwongunu be abaka me Iyudayan?”

¹³Gin kiko dwoko di kilelemo be, “Gure i kom musalaba.”

¹⁴Pilato doko oko penyo gi be, “Pinyo, nyo arac kame en etimo?” Do gin kiko medo lelemo kitek be, “Gure i kom musalaba.”

¹⁵Do pi kite kame Pilato oudo mito yomo kede cuny jo, omio en eko gonyo ne gi Baraba, di eko mino kodao Yesu, di eko mine i cing isirikalen pi ot gure i kom musalaba.

Isirikalen Otimo ne Yesu Tim me Anywar

(Matayo 27.27-31; Yokana 19.2-3)

¹⁶Isirikalen oko tero Yesu i ot me ngapug adwong, kiko lwongo isirikalen icegun dedede.

¹⁷Kiko ngapo ne Yesu ekanso akwakwar di kiko cweno okuto aluka kiko rwako ne i wie.

¹⁸Kiko cako mote be, “Yoga abaka me Iyudayan.”

¹⁹Gin kiko jwato wie kede ebela, di kingungulo lau i kome, di ki riondiko piny i nyime di kiluro ne wi gi di kicuko mine wor.

²⁰Kakame kitieko timo ne kede tim me anywar go, kiko gonyo egoe akwakwar nono, di kiko ngapo ne igoen mege di do kiko tere ot gure i kom musalaba.

Koguro Yesu i kom Musalaba

(Matayo 27.32-44; Luka 23.26-43; Yokana 19.17-27)

²¹Kiko dino icuo moro me Sirene kame nyinge Simoni pi yeno musalaba ka Yesu. En oudo eyai ki paco etie ot i bomba. Simoni oudo obedo papa me Alekesanda kede Ropus.

²²Kiko tero Yesu kabedo kame kolwongo be Gologota, kame dwong mere be, “Kabedo me cogowic.”

²³Kiko mine bwini kame konyalo kede yat kame nyinge maya, do en gire likame eko mato.



- ²⁴ Gin kiko gure i kom musalaba di kiko popoko igoen mege di kiuco alulu pi neno gikame ngat acelacel poore tero.
- ²⁵ Kiko gure i kom musalaba esawa adek me odiko.
- ²⁶ Iwandik kame oudo koketo malo i wie kame nyuto kop kame kopide iye oudo somere be, “Abaka me Iyudayan.”
- ²⁷ Doko kiko guro joyak are da kede Yesu; acel i bade tetu cam kede acel i bade tetu ngodal.
- ²⁸ (Di iwandik kacil kame waco be, “Komare koribe i kom jotur iswil,” oko cobere kakare.)
- ²⁹ Jo kame oudo beo kuno oudo yayango wi gi di kiwaco ne kop me anywar be, “Ee! In oudo iyaro turo tempulo di bobo iko gere pi ceng adek,
- ³⁰ nan do ber lakere keni di iko wok piny ki musalaba!”
- ³¹ Iepone acel nono da jodongo me josaseredoti karacel kede jopwony me Iswil oudo yamo kop me anywar i kom Yesu be, “En elako jo apat do doko likame etwero lakere kene.
- ³² Ber kong Kirisito abaka me Isirael wok piny ki musalaba nan, tetekeny wan oneni di oko yei en.” Jo kame bin koguro kede Yesu da oko donyo yeyeto en.

To ka Yesu

(Matayo 27.45-56; Luka 23.44-49; Yokana 19.28-30)

- ³³ Piny lung oko doko col cako esawa kanyape me iceng tuno esawa kanyangon.
- ³⁴ Iesawa kanyangon, Yesu oko kok kede dwan amalo be, “Eli, Eli, lama sabaktani?” kame dwong mere be, “Rubanga na, Rubanga na, pinyo komio ijala?”
- ³⁵ Jo kame oudo tie cungo kuno owinyo kop mere kiko waco be, “Winyunu, etie lwongo Elia!”
- ³⁶ Dano acel kikom gi oko ringo di eko rwako ecango i bwini awac, eko rwako i wi tir di eko keto i dog Yesu be ejwijwio. En etimo kaman di ewaco be, “Odarunu ber, omito neno ka Elia oyaro bino kwanye tenge ki kom musalaba.”
- ³⁷ Yesu oko kok kede dwan amalo eko omo cunye di eko to.
- ³⁸ Di egoe kame bin poko isenge me tempulo oko yec cako ki malo tuno piny.
- ³⁹ Kakame ngadwong me isirikalen me Roma, kame oudo tie cungo kuno i nyim musalaba oneno kede kite kame Yesu oto kede, en eko waco be, “Ateteni icuo ni oudo obedo Wot ka Rubanga!”
- ⁴⁰ Oudo mon mogo da tie kuno kame tie nene ki tenge. Kikom gi oudo tie iye Maria Magadalina, Maria toto me Yakobo atidi kede Jose, kede Salume.
- ⁴¹ Gin oudo kibedo mon kame bin lubo Yesu di pwodi oudo etie Galilaya di kikonye, karacel kede mon ace atot kame oudo oupere kede en tuno Yerusalem.



Koyiko Yesu

(Matayo 27.57-61; Luka 23.50-56; Yokana 19.38-42)

⁴²⁻⁴³Di piny oyuto, Yosepu me Arimatea oko tuno. En oudo ebedo dano me kansulo kame koworo, kame oudo tie kuro bino me Ajakanut ka Rubanga. Kite kame ceng nono oudo obedo kede ceng me iikere, ceng kame Sabato lubo, en eko bedo kede nwangcuny di eko ot but Pilato pi penyo kom Yesu.

⁴⁴Pilato oko uro ka ateteni Yesu oudo otieko to. En eko lwongo ngadwong me isirikalen di eko penye ka Yesu oudo otieko to.

⁴⁵Kakame etieko udo kede niang kibus ngadwong me isirikalen be Yesu oudo otieko to, en eko mino Yosepu akarunikin me kwanyo kome.

⁴⁶Yosepu oko do wilo esuka acil, di eko tako kom Yesu ki musalaba, eko bone kede esuka nono di en eko piele i ates kame oudo koroko i lela. En eko loro kidi di eko umo kede dog ates.

⁴⁷Maria Magadalina kede Maria toto me Jose oko neno kakame koketo iye kom Yesu.

Marako 16

Iyarun ka Yesu

(Matayo 28.1-8; Luka 24.1-12; Yokana 20.1-10)

¹Di Ceng Sabato okato, Maria Magadalina, Salume kede Maria toto me Yakobo oko wilo mo angwe kur pi ot wiro kede kom Yesu.

²Ceng Sande odiko sek di ceng otieko wok, gin kiko ot i ates.

³Oudo kipenyere ken gi ken gi be, “Ngai kame bino loro ne wa kidi tenge ki dog ates?”

⁴Kiko tingo wang gi malo di kiko neno be oudo kotieko loro kidi nono tenge; kidi nono oudo dwong adikinichel.

⁵Kakame kidonyo kede i ates, kiko neno awobi moro di bedo i bad tetu cam, oudo engapo ekanso atar, lworu oko mako gi.

⁶En eko waco ne gi be, “Kur ibedunu kede lworu, ango angeo be wun itienu mono Yesu me Nasaret, kame oudo koguro i kom musalaba. Do en eli ki kan, en etieko yaruno, nenunu kakame oudo kopiele iye ine.

⁷Nan otunu iwacenu Petero kede josiao icegun be, en eyaro cako ot ne wu Galilaya; ibinunu nene ki kuno bala kite kame oudo ewaco ne wu kede.”

⁸Kikano gin kiko wok ooko ki ates kiko ringo pien oudo kom gi tie miel, doko lworu adwong oudo omako gi; di likame kiko waco ne ngatamoro kop nono, pien oudo kitie kede lworu.

Yesu Oneeno ne Maria Magadalina

(Matayo 28.9-10; Yokana 20.11-18)



⁹Ceng Sabiti odiko sek di Yesu otieko yaruno, egeo nyutere ne Maria Magadalina, kame bin eriamo jwogi kanyaare ki kome.

¹⁰En eko ot tatamo gikame otimere ne jo kame bin Yesu oudo bedo kede, gin oudo kitie iturur kede koko.

¹¹Kakame kiwinyo kede be Yesu kuo, kede da be Maria Magadalina onene, gin likame kiko yei.

Yesu Oneeno ne Josiao Are

(Luka 24.13-35)

¹²Ingei man, Yesu bobo oko neeno iepone apat ne jo are kikom gi di oudo kitie ot i calo.

¹³Gin kiko dok kiko tatamo ne jo icegun, do joka likame oko yei kop gi.

Yesu Oneeno ne Josiao Tomon kiwie Acel

(Matayo 28.16-20; Luka 24.36-49; Yokana 20.19-23; Tice 1.6-8)

¹⁴I cen mere Yesu oko nyutere but josiao tomon kiwie acel di oudo kitie cam. En eko bunano gi pien gin oudo likame kitie kede yei, doko wi gi tek, pien kidagi yei kop me jo kame oudo onene ingei en yaruno.

¹⁵En eko waco ne gi be, “Otunu i piny dedede ikounu tucó ejiri ne jo dedede.

¹⁶Ngat kame yei di oko batiso en, ebino udo alako, do ngat kalikame yei kobino ngolo kop loe.

¹⁷Jo kame yei kobino mino gi akarunikin me timo gianena bala magi: kibino riamo jwogi i nyinga, kibino yamo i leb anyen,

¹⁸ka kimako twol amoto kimato gimoro kame neko dano, likame tie gimoro kame bino timo gi; gin kibino keto cing gi i wi jo kame tuwo di kiko cango.”

Kotero Yesu i Malo

(Luka 24.50-53; Tice 1.9-11)

¹⁹Di do bin Yesu Kirisito otieko yamo kede josiao mege, oko do tere malo di en eko bedo i bad tetu cam ka Rubanga.

²⁰Josiao oko ot di kiko tucó ejiri kabedo dedede di Rwot tio kede gi, doko di i gianena kame bin kitimo en emoko kope kame gin kitatamo. Amen.



Luka

Luka 1

- ¹Baluwa but Teopilo. Bed bala jo atot oudo otamakino kede teko gi pi koko kede wandiko kop i kom gikame otimere i diere wa,
- ²di kilubo kop kame jo mogo bin otatamo ne wa, gin jo kame bin kineno kede wang gi cako ki agege, doko di gin nogo jotic me kop nono.
- ³Omio oudo eko neeno ber ne ada, pi wandiko ni gi nogi i yore i yore, in adwong me awora Teopilo, ingei ango ngico gi dedede kiber.
- ⁴Ango atimo kamano tetekeyi in ingei ateni i kom gi dedede kame bin kopwonyi.

Kokwenyaro pi Nywalo Yokana Ngaibatis

- ⁵I kare ka Erode abaka me Yudea, oudo ngasaseredoti tie kuno kame nyinge Sakaria, kame oudo tie i ekodet me jo ka Abija. Dako mere oudo nyinge Alisabeti, kame oudo obedo nyako me ot ka Aroni.
- ⁶Gin jo are nogo oudo kibedo jo kopooore i nyim Rubanga, doko da di kilubo cik dedede kede iswilia ka Rubanga kiber abongo raco moro.
- ⁷Gin oudo likame kitie kede atin moro, pien Alisabeti oudo obedo adonge, doko oudo gin kitii da.
- ⁸I kare kame Sakaria oudo tie timo kede tic mere bala ngasaseredoti i nyim Rubanga, di oudo tic wang mergin jo me ekodet ka Abija,
- ⁹di lubere kede itok me josaseredoti; alulu oko mako en pi ot donyo i kabedo kacil me tempulo ka Rwot pi wango bubani.
- ¹⁰Ekodet dedede kame oudo odong ooko di do oko donyo ilega esawa me wango bubani.
- ¹¹Malaika ka Rwot oko nyutere bute, di cungo i bad tetu cam me alutari, kakame kowango kiye bubani.
- ¹²Kakame Sakaria onene kede, kome oko to, lworoo oko make adikinicel.
- ¹³Do Malaika nono oko waco ne be, “Sakaria, kur ilwori, Rubanga otieko winyo kwac ni, Alisabeti dako ni oyaro nywalo ni atin awobi, di iko cako nyinge Yokana.
- ¹⁴Ibino bedo kede kilel kede yomcuny adwong twatwal, doko jo atot da bino lelo pi nywale.
- ¹⁵Piento en ebino bedo dano adwong adikinicel i nyim Rwot. En likame ebino mato bwini arabo gimoro akec kame mero jo. Doko ebino pong kede Tipo Kacil, cako ki yi toto mere.
- ¹⁶Doko en ebino dwoko idwe atot me Isirael but Rwot Rubanga gi.



17 En ebino telo yongayo ne Rwot, di etie kede Tipo Kacil kede twer bala me ka enabi Elia, pi loko cuny jonywal di eko ribo gi kede idwe gi, bobo ebino loko jo kalikame wor edwoko gi i yongayo me rieko me jo kopooore, doko da ebino iiko ne Rwot jo mege.”

18Sakaria oko penyo malaika nono be, “Kara abino ngeno kop noni benyo? Pien ango gira do atieko ti, doko dako na da mwakini mege otieko kato.”

19 Di malaika oko dwoko ne be, “Ango en Gabulieri kame acungo i nyim Rubanga, en kame eora pi bino yamo kedi kede pi kelo ni kop aber noni.

20Do pien in likame iyei kop nango kame bino cobere kame kare otuno, omio in do ber ibino dong di iling alinga di likame itwero yamo tuno kede i ceng kame gigi bino cobere kede.”

21Kakame gigi tie timere kede, jo oudo tie daro Sakaria di kiuro gikame omio en egal kamano i tempulo.

22Kakame ewok kede ooko, likame oudo etwero do yamo kede jo. Di jo oko niang kiber be, poore di gianyuta ka Rubanga oneeno bute i tempulo. En do eko donyo poro ne gi kop apora kede cinge, di do likame etwero yamo.

23Kakame etieko kede wang tic mere i tempulo, Sakaria oko dok do ture.

24Ingei ceng nogo di do dako mere Alisabeti gamo yie. Di eko tieko dwete kanyape abongo donyo ooko, di eyamo be,

25” Bu! Okwe! Nan do Rwot otieko paro pira. Pien elaka do ki nyero me jo.”

Malaika Okwenyaro pi Nywalo Yesu

26Rubanga di do oko cwano malaika Gabulieri i bomba kame kolwongo be Nasaret, kame tie Galilaya. I kare no Alisabeti oudo tie kede yie me dwete kanyape.

27 En oudo ekelo kop ne nyako moro kalikame pwodi ongeio icuo, kame icuo moro kame nyinge Yosepu akwar Abaka Daudi oudo onero pi nyomo; nyako nono oudo nyinge Maria.

28Malaika oko bino but Maria, di eko mote di ewaco be, “Yoga in nyawinyo, Rwot tie kedi!”

29Do kop noni oko neko kom Maria twatwal, en eko donyo do paro dwong me amot noni i cunye.

30Do malaika oko waco ne be, “Maria, kur ibed lwor, pien in itieko do udo kisa ka Rubanga!

31 In ibino yac iko nywalo atin awobi, di iko cako nyinge Yesu.

32 En ebino bedo dwong adikinicel, kobino lwonge be Wot ka Ngamalo Twal. Rwot Rubanga bino mine ebedo i kom me ajakanut ka kwaru mere Daudi,

33doko ebino pugo jo me ot ka Yakobo ikar kede ikar; ajakanut mere likame bino jik.”



³⁴Maria oko penyo malaika be, “Man bino timere benyo benyo di likame pwodi ango atie kede icuo?”

³⁵Di malaika oko dwoko ne be, “Tipo Kacil oyaro bino i komi, di twer ka Ngamalo Twal ko bino umi; pi mano, atin kacil kame koyaro nywalo nono kobino lwonge be Wot ka Rubanga.

³⁶Neningo ber wadu Alisabeti. En oudo kotieko cako ne be adonge, do nan etieko yac, yie do nan tie dwete kanyape, bed bala etieko do ti adikinicel.

³⁷ Pien likame tie gi kalikame twerere kikut Rubanga.”

³⁸Di do Maria oko dwoko be, “Ango abedo ngatic ka Rwot; wek etimere bala kite kame in iwaco kede.” Di malaika oko do yai eoto tenge kibute.

Maria Owelao Alisabeti

³⁹I kare nono, Maria oko yai di eko onyaro i bomba kame tie i piny me Yudea, piny kobedo mori mori.

⁴⁰En eko donyo i ot ka Sakaria, eko moto Alisabeti.

⁴¹Kakame Alisabeti owinyo kede amot ka Maria, atin kame oudo tie i yie oko tingere. Alisabeti oko pong kede Tipo Kacil,

⁴²di eko lelemo kede dwan amalo di ewaco be, “In itie kede winyo kikom mon dedede, doko kodi me yi no tie kede winyo!

⁴³Nyo ber komio gini otimere nango, komio toto me Rwot na obino welao ango?

⁴⁴Pien kakame do awinyo kede amot nin, atin kame tie i yia oko tingere kede kilel adwong adikinicel.

⁴⁵Etie kede winyo dako kame yei be gikame Rwot waco ne bino cobere.”

Wer ka Maria me Pak

⁴⁶ Maria oko waco be, “Cunya pako Rwot;

⁴⁷kuo na lelo pi Rubanga Ngalak na,

⁴⁸ piento en eneno kede kisa ruom apiny kame ango apasoit mere oudo atie iye. Pi mano, cako tin jo me kare dedede bino lwonga be ngawinyo;

⁴⁹pien Won Twer otieko timo nango gikame dongodongo. Nyinge cil.

⁵⁰Doko cuny mere me kisa tie but lwak me i kare dedede kame wore.

⁵¹En etieko nyuto teko mere; en esarakino jo kame wakere i cuny gi.

⁵² En edwoko wegi twer piny ki komini gi me ajakanut, di eko kiarao jo kame pirgi likame tek.

⁵³En emio jo kame kec oudo oneko oyeng kede jamini abeco, di eko cwano jo kobaro tenge abongo gimoro.



- ⁵⁴En etieko konyo ngatic mere Isirael, pien eyutuno pi nyuto cuny mere me kisa,
⁵⁵bala kite kame bin ecikere kede but joakwari wa, but Aburaam kede ikwae mege,
 pi ikar kede ikar.”
- ⁵⁶Maria oko bedo kede Alisabeti pi dwete kame romo bala adek, di do en eko dok ture.

Nywalo Yokana Ngaibatis

- ⁵⁷Kare do oko romo ne Alisabeti me nywal, en eko nywalo atin awobi.
- ⁵⁸I kare kame jokio kede joawade mege owinyo kede be Rwot do onyuto cuny mere me kisa but Alisabeti, gin kiko lelo kede en karacel.
- ⁵⁹I ceng me kanyauni, di do gin kiko tero atin ot kepo; oudo bin komito cako nying atin be Sakaria bala papa mere,
- ⁶⁰do toto mere oko dagi di ewaco be, “Likame kamano; atin no kobino lwonge be Yokana.”
- ⁶¹Di gin kiko dwoko ne be, “Do likame tie wadu moro kame tie kede nying no.”
- ⁶²Gin kiko donyo poro ne Sakaria kop apora di kipenye nying kame poore cak ne atin.
- ⁶³Sakaria oko penyo gi ebao moro me iwandik; en eko wandiko iye be, “Nyinge Yokana.” Gin dedede kiko uro adikinicel.
- ⁶⁴Cucuto nono di do leb Sakaria oko gony di eko cako yamo bobo. Kikano di do en eko donyo pako Rubanga.
- ⁶⁵Lworo oko mako jokio gi dedede. Di do kope go oko sarakin i piny kobedo mori mori me Yudea dedede;
- ⁶⁶jo dedede kame bin owinyo oko kano kope nogi i cuny gi, di kipenyere be, “Atin noni kara do ber oyaro bino bedo nyo?” Pien ateteni twer ka Rwot oudo tie i kome.

Imurai ka Sakaria

- ⁶⁷Sakaria papa me Yokana oko pong kede Tipo Kacil, di eko murao be,
- ⁶⁸” Pak bed but Rwot Rubanga me Isirael, piento en ebino but jo mege di eko lako gi.
- ⁶⁹En etieko woto ne wa Ngalak kame tie kede twer, ki ot ka ngatic mere Daudi.
- ⁷⁰Bala kite kame bin eyamo kede i dog inabin kacil me kare asek
- ⁷¹be en ebino lako wa kibus jokwor wa, kede ki cing jo dedede kame dagi wa.
- ⁷²Pi mano, en enyuto cuny me kisa kame bin komio cikere mere but joakwari wa, kede etieko yutuno isikan mere kacil,
- ⁷³kame obedo ilair kame bin Rwot olairo but kwaru wa Aburaam,
- ⁷⁴pi mino wa timo ne tic abongo lworo moro, ingei lako wa ki cing jokwor wa,



⁷⁵di otienu jokacil kede di opoorenu i nyime i kare dedede me kuo wa.

⁷⁶“Doko in atin na, kobino lwongi be enabi ka Ngamalo Twal; pien in ibino telo ne Rwot yongayo pi ot iiko ne yote mege,

⁷⁷pi mino jo mege ngec be kobino sasiro dub gi di kiko udo alako,

⁷⁸pi cuny me kisa ka Rubanga wa, kame bino ki malo but wa bala ru me piny,

⁷⁹pi mino lero but jo kame bedo kakacol kede i tipo me to, pi nyuto ne wa yote kabeco kame kelo ne wa mulem.”

⁸⁰Di atin oko dongo, en eko doko tek i kuo mere me cuny. En eko bedo i wi tim tuno kede i ceng kame en do eko wokun kede kakaler i dier jo me Isirael.

Luka 2

Nywalo Yesu

(Matayo 1.18-25)

¹I kare no Kaisari Agusito oudo owoto iswil be poore wandiko nying jo dedede kame tie i piny kame en epugo.

²Man oudo obedo wandiko nying jo kotimere tien me agege di Kwirino en oudo obedo ngapug me Siria.

³Di do jo dedede oko ot pi wandiko nying gi, ngat acelacel i bomba me tur gi.

⁴Yosepu da oko yai ki bomba me Nasaret kame tie i piny me Galilaya, en eko ot i Bomba ka Daudi kame kolwongo be Betelem, kame tie i piny me Yudea, en kakame oudo bin konywalo iye Abaka Daudi. En bin eoto kuno pien oudo eda ebedo akwar Daudi.

⁵En oudo eoto pi wandiko nyinge kede Maria, ngat kame oudo onero pi nyomere kede en. Maria oudo oyac.

⁶I kare kame do gin oudo kitie kede Betelem, esawa mere me nywal oko tuno.

⁷En eko nywalo atin awobi kao mere, di en eko ume kede igoen me mukeru kiber, di eko piele i atuba me cam me dok, pien gin do oudo likame kisobolo udo kabedo i ot me wele.

Jokwat kede Imalaikan

⁸Bin jokwat oudo tie i piny nono kame oudo tie i ebar iwor nono gwoko romini gi.

⁹Malaika ka Rwot oko neeno but gi, di deyo ka Rwot oko rieny oluko gi, lworu oko mako gi.

¹⁰Di do malaika oko waco ne gi be, “Kur ibedunu kede lworu, pien akelo ne wu kop aber me kilel adwong, kame oyaro bino but jo dedede;

¹¹pien tin konywalo ne wu Ngalak i Bomba ka Daudi, en Kirisito Rwot.



¹²Gikame bino nyuto ne wu en ine: ibinunu ot ikounu udo atin di koumo kede igoen me mukeru di etie buto i atuba me cam me dok.”

¹³Cucuto nono di ekodet kame oyai ki malo oko neeno karacel kede malaika nono, kiko donyo pako Rubanga di kiwaco be,

¹⁴” Deyo bed but Rubanga kame tie i malo twal, kede mulem bed i lobo but jo dedede kame cunye yom i kom gi!”

¹⁵Kakame bin imalaikan nogo oyai kede tenge kikut gi pi dok malo, jokwat oko donyo yamo ken gi ken gi be, “Ootunu wada ber Betelem onenunu gikame otimere noni, kame tin Rubanga omio wa ongeo.”

¹⁶Gin kiko ot awakawaka, di kiko udo Maria kede Yosepu, di atin tie buto i atuba me cam me dok.

¹⁷Kakame kineno kede atin, kiko tatamo gi dedede kame oudo malaika owaco ne gi i kom atin nono.

¹⁸Jo dedede kame bin owinyo kope go oko uro twatwal gikame jokwat owaco ne gi.

¹⁹Do Maria oko mako kope nogi dedede di eparo gi i cunye.

²⁰Jokwat oko dok di kimio deyo but Rubanga, di kipake pi gi dedede kame oudo kiwinyo kede kame kineno, bala kite kame imalaikan oudo owaco ne gi kede.

Kocako ne Yesu Nyinge

²¹Di do ceng kanyauni oromo, oko kepo atin, di oko cako nyinge Yesu, nying kame oudo malaika bin ociko di pwodi likame koyace be cak ne.

Komio Yesu but Rwot i Tempulo

²²Di do kare me lonyere gi oromo bala kite kame Iswil ka Musa oudo mito kede, Maria kede Yosepu da oko tero atin Yerusalem pi mine i cing Rwot,

²³(bala kite kame bin kowandiko kede i iswil ka Rwot be, “Idwe awobe kao dedede kobino mino gi bala gikacil but Rwot”),

²⁴di gida kiko mino giayala bala kite kame oudo iswil ka Rwot waco kede be, “Amam are arabo ilukei atitino are.”

²⁵I kare no oudo tie icuo moro Yerusalem kame nyinge Esimioni. En oudo icuo kopoore, kame keto cunye woro Rubanga, kame oudo tie kuro neno epone kame Rubanga bino kweno kede cuny jo me Isirael; en oudo epong kede Tipo Kacil.

²⁶Doko Tipo Kacil oudo otieko mine ngeno be, likame ebino to tuno kede di eneno Kirisito ka Rwot.

²⁷Typo Kacil oko telo Esimioni, en eko bino i tempulo. Kakame jonywal me atin Yesu okele kede i tempulo pi timo ne gikame Iswil mito,

²⁸Esimioni oko tingo atin, di eko mino pwoc but Rubanga di ewaco be,



- ²⁹” Rwot, nan do in itie peruno ngatic ni eot kede mulem, bala kame bin iwaco kede;
- ³⁰pien wanga otieko do neno alako ni,
- ³¹kame in itieko iiko di jo dedede neno,
- ³² en lero kame nyuto mit nin but jo kalikame Iyudayan, kede kame kelo deyo but jo ni me Isirael.”
- ³³Papa me atin kede toto mere oko bedo kede ur adikinichel pi gikame Esimioni owaco i kom atin.
- ³⁴Esimioni oko kwano ne gi winyo di ewaco ne Maria toto me atin be, “Neningo, Rubanga oketo atin noni pi kelo poto kede akiar me jo atos i Isirael; kede pi bedo gianena ka Rubanga kame jo atos bino dagi,
- ³⁵doko ida epima bino cobo cunyi pelao, tetekeny par me cunyi jo atos ko bino nyutere kakaler.”
- ³⁶Bin tie enabi moro adako, kame nyinge Aana, en oudo nyar ka Panueli, me ateker me Aser. En oudo etieko ti adikinichel, ingei bedo kede cware pi mwakini kanyaare cako i kare kalikame oudo pwodi engere kede icuo.
- ³⁷En eko bedo apuserut tuno mwakini mege me dongo romo ot kanyauni kiwie ongwon. En oudo likame eyai tenge ki tempulo, doko da di epako Rubanga iceng kede iwor, di ekanyo kec kede ilega.
- ³⁸Esawa nono en eko bino di eko mino pwoc but Rubanga, di eko donyo yamo kop i kom atin but jo dedede kame oudo tie daro kare kame Rubanga bino lako kede Yerusalem.

Dwogo Nasaret

- ³⁹ Di do kitieko timo gi dedede bala kame iswil ka Rwot mito, Yosepu kede Maria oko dok kede Yesu i bomba me tur gi, kame kolwongo be Nasaret, i piny me Galilaya.
- ⁴⁰Atin oko dongo di etek, di epong kede rieko, doko kisa ka Rubanga oudo tie kede en.

Yesu i Tempulo

- ⁴¹ Mwaka acelacel jonywal ka Yesu oudo bedo ot Yerusalem i kare me ebaga me Bwot.
- ⁴²I kare kame oudo mwakini me dongo ka Yesu oromo kede tomon kiwie are, kiko ot i ebaga bala kite kame lem kinare timo kede.
- ⁴³Kakame ebaga otiek kede, Yosepu kede Maria oko cako dok do paco; Yesu oudo odong cen Yerusalem di jonywal mege likame ngeo,
- ⁴⁴gin oudo kiparo be Yesu da tie i dier jo kame oudo tie upere kede gi. Kiko ot pi ceng acel lung di kiko cako mone i dier joawade gi kede jo kame kinao kede.
- ⁴⁵Do likame kiko ude. Di do gin kiko bobo dok cen Yerusalem di kimoe.



⁴⁶Ingei ceng me adek kiko do ude i tempulo, di etie bedo kede jopwony me Iswil di ewinyo kope gi kede di epepenyo gi.

⁴⁷Jo dedede kame oudo owinyo yamo mere oko uro epone me niang mere kede epone kame edwoko kede peny.

⁴⁸Kakame jonywal mege onene kede, kiko uro adikinicel. Di toto mere oko waco ne be, “Woda, itimo wa kamano pinyo? Neningo, ango kede papa ni otie moni kede par atek.”

⁴⁹En eko dwoko ne gi be, “Pinyo komio wun oudo itienu mona? Mam oudo likame ingeunu be ango poore abed i ot ka Papa na?”

⁵⁰Do gin likame kiko niang kop kame en ewaco ne gi nono.

⁵¹Di do en eko upere kede gi, kiko dok Nasaret, di en eko donyo bedo kede wor but gi. Do toto mere oko kano kope nogi lung i cunye.

⁵²Di do Yesu oko meede dongo i rieko kede i kome di etie kede kisa ka Rubanga doko di jo mare.

Luka 3

Kop kame Yokana Ngaibatis Opwonyo

(Matayo 3.1-12; Marako 1.1-8; Yokana 1.19-28)

¹I mwaka me tomon kiwie kany me apugan ka Kaisari Tiberio, di Pontio Pilato en kame oudo pugo Yudea, di Erode en kame oudo pugo Galilaya, omin mere Pilipo en kame oudo pugo adul me Iturea kede Turakoniti; Lusania en kame oudo pugo Abilene.

²I kare nono Anas gin kede Kayapa en kame oudo obedo jotel josaseredoti. Kop ka Rubanga oko bino but Yokana wot ka Sakaria i tim.

³En eko ririmo adulion dedede kame oudo iyapiyapi kede ecilet me Yorodan, di ewaco ne jo be kiswilaro di oko bino batiso gi pi udo isasir ki dub gi.

⁴Bala kame kowandiko kede i itabu ka enabi Isaya be, “Dwan ngatamoro tie ilelem i tim be: ‘Iikunu ne Rwot yongayo, rieunu ne yote.

⁵Wek tor aditot dedede, kede pai mori kede imukuran dedede dwok piny. Wek riei yote kogomugomun, kede iik yote kame gwai dok pwot;

⁶di jo dedede ko bino neno alako ka Rubanga.’ “

⁷Di do en eko waco ne ikodeta me jo kame oudo obino bute pi udo batisimu be, “Wun idwe me twole! Ngai kokwenyaro wu pi ringo tenge ki lilo ka Rubanga kame tie bino?

⁸Timunu gikame bino nyuto iswilar wu, do kur icakunu yamo kenu kenu be, ‘Aburaam en kwaru wa’ ; awaco ne wu be, Rubanga twero kwanyo kide gi di eko loko gi kidoko ikwae ka Aburaam.



⁹ Akadi ber nan da, kotieko keto le cuto i dud yen; yat acelacel kalikame nyako anyakini abeco, kobino tonge piny di oko uce i mac.”

¹⁰ Ikodeta me jo oko penye be, “Do nan wan do otim nyo?”

¹¹ En eko dwoko ne gi be, “Ngat kame tie kede ikotin are, poore emi ngat kame li kede da; doko ngat kame tie kede cam da poore tim kamanono.”

¹² Jorar esolo da oko bino pi udo batisimu, di kiko penye be, “Apwony, wan do opoore timo nyo?”

¹³ En eko dwoko ne gi be, “Kur irarunu gikame kalamo kame kowaco ne wu.”

¹⁴ Isirikalen da oko penye be, “Do wan kono?” En eko waco ne gi be, “Kur ititimunu jo arabo mino pido me abe i kom gi, pi wun udo sente kibun gi tetek. Miunu musala wu rom wu.”

¹⁵ Bala kite kame jo oudo obedo kuro kede gen, di ngat acelacel penyere i cunye kene i kom Yokana, ka amoto di en kame ebedo Kirisito,

¹⁶ omio Yokana oko dwoko ne gin dedede be, “Ango abatiso wu kede pii, do tie ngat kame tie bino, kame tie kede twer loa, kame ango da likame apoore pi gonyo ausi me amuka mere; en ebino batiso wu kede Tipo Kacil kede mac.

¹⁷ Oderu mere tie i cinge cuto, en eyaro pieto kede i diakal mere me canyo, di eko bino coko engano mere eonyo i dero, do cucung ebino wango i mac kalikame to.”

¹⁸ Di do Yokana oko tuco ne jo Kop Aber, di esupo cuny gi kede kope apat atot pi loko iponeso gi.

¹⁹ Do Erode ngapug, kame bin Yokana obunano pi nyomo Erodia dako ka omin mere, kede pi tim apat areco dedede kame oudo etimo,

²⁰ oko bobo medo timo gikarac ace me keto Yokana i mabus.

Kobatiso Yesu

(Matayo 3.13-17; Marako 1.9-11)

²¹ Di do Yokana oudo otieko batiso jo dedede, oko batiso Yesu da. Kakame oudo Yesu tie kede ilega, malo oko yabere,

²² di Tipo Kacil oko bino piny i kome bala awele. Dwan oko wok ki malo di waco be, “In en Woda kame amaro, cunya yom i komi.”

Joakwari ka Yesu

(Matayo 1.1-17)

²³ I kare kame Yesu ocake kede tic mere, oudo mwakini me dongo mere romo bala ot adek. En oudo ebedo wot ka Yosepu (bala kite kame oudo koteru kede), kame oudo obedo wot ka Keli,

²⁴ wot ka Matat, wot ka Lebi, wot ka Meliki, wot ka Yanai, wot ka Yosepu,

²⁵ wot ka Matatia, wot ka Amosi, wot ka Nakum, wot ka Esili, wot ka Nagai,



- ²⁶wot ka Mat, wot ka Matatia, wot ka Semein, wot ka Yosek, wot ka Yoda,
²⁷wot ka Yoanan, wot ka Resa, wot ka Serubabel, wot ka Selatiel, wot ka Neri,
²⁸wot ka Meliki, wot ka Adi, wot ka Kosam, wot ka Elamadam, wot ka Er,
²⁹wot ka Yosua, wot ka Eliesa, wot ka Yorim, wot ka Matat, wot ka Lebi,
³⁰wot ka Esimioni, wot ka Yuda, wot ka Yosepu, wot ka Yonam, wot ka Eliakim,
³¹wot ka Melea, wot ka Mena, wot ka Matata, wot ka Nasan, wot ka Daudi,
³²wot ka Yese, wot ka Obed, wot ka Boasi, wot ka Salamoni, wot ka Nakason,
³³wot ka Aminadab, wot ka Admin, wot ka Arani, wot ka Keseroni, wot ka Peresi,
wot ka Yuda,
³⁴wot ka Yakobo, wot ka Isaka, wot ka Aburaam, wot ka Tera, wot ka Nakor,
³⁵wot ka Serugu, wot ka Reu, wot ka Peleg, wot ka Eber, wot ka Sela,
³⁶wot ka Kainan, wot ka Arupakasad, wot ka Sem, wot ka Nua, wot ka Lamek,
³⁷wot ka Metusela, wot ka Enoka, wot ka Yared, wot ka Makalalel, wot ka Kainan,
³⁸wot ka Enosi, wot ka Set, wot ka Adamu, wot ka Rubanga.

Luka 4

Atama ka Yesu

(Matayo 4.1-11; Marako 1.12, 13)

- ¹Di do Yesu oko dwogo ki Yorodan di epong kede Tipo Kacil, di Tipo Kacil oko tele ot i tim,
²kakame Sitani oko tame kiye pi ceng ot ongwon. En likame oudo ecamo gimoro pi kare go dedede. Di do ceng go otiek, kec oko neke.
³Sitani oko waco ne be, “Ka in Wot ka Rubanga, wac ne kidi ni lokere dok mugati.”
⁴Do Yesu oko dwoko ne be, “Iwandik kacil waco be, ‘Dano likame kuo kede cam kenekene.’ “
⁵Di Sitani oko tere malo oko nyuto ne ajakanuto dedede me piny iesawa atitidi, di eko waco ne Yesu be,
⁶” Abino mini akarunikin no dedede kede deyo gi da; pien kotieko mino gi i cinga, doko ada atwero mino gi but ngatamoroni kenekene kame cunya mito.
⁷Aso, ka in iyei wora, mago dedede bino bedo megii.”
⁸Yesu oko dwoko ne be, “Iwandik kacil waco be, ‘Wor Rwot Rubanga ni di itio nen kene.’ “
⁹Di bobo Sitani oko tero Yesu Yerusalem di eko kete i amidu me tempulo, en eko waco ne be, “Ka in Wot ka Rubanga, som piny ki kan,



¹⁰ pien iwandik kacil waco be, ‘Rubanga bino ciko imalaikan mege piri, di gin kiko gwoki;

¹¹ gin kibino gagao in i cing gi, tetekeny kur itwom tieni i wi engaro.’ “

¹² Yesu oko dwoko ne be, “Iwandik kacil waco be, ‘Kur itam Rwot Rubanga ni.’ “

¹³Di do Sitani otieko tamo Yesu i yote dedede, en eko do yai eweke ber pi kare moro acecek.

Yesu Ocaho Tic mere i Galilaya

(Matayo 4.12-17; Marako 1.14-15)

¹⁴Yesu oko dok Galilaya kede twer me Tipo Kacil, rwonge mere oko sarakin oromo pinye dedede kame oudo kio kede Galilaya.

¹⁵En eko donyo pwoy i sinagogan gi, di jo dedede oko donyo pake.

Jo me Nasaret Odagi Yesu

(Matayo 13.53-58; Marako 6.1-6)

¹⁶Di Yesu oko ot Nasaret, kakame oudo edongo iye. Ceng Sabato en eko ot i sinagoga bala epone kame oudo en enare timo kede. En eko yai malo pi somo iwandik kacil;

¹⁷di oko mine itabu kame enabi Isaya owandiko. En eko yabo itabu, di eko udo kakame kowandiko be,

¹⁸ “Tipo ka Rwot tie i koma, piento en etieko yera pi kelo ne jocan kop aber. En eora pi bino tuco ne jo kame kotweo kop kame mako gonyo gi, kede but imuduka kop kame mako yabere me wang. En eora pi gonyo jo kame kodio,

¹⁹kede pi kwenyaro be kare do otieko tuno me kisa ka Rwot.”

²⁰Kakame Yesu otieko somo kede itabu, en eko umo, di eko dwoko ne ngadar sinagoga, di en eko bedo piny. Jo dedede kame bin tie i sinagoga oko ciko wang gi i kome kitek.

²¹Di do en eko cako waco ne gi be, “Tin iwandik kacil noni otieko cobere di wuda iwinyunu.”

²²Jo dedede oko donyo yamo kop aber i kome, di kiuro twatwal kope me kisa kame oudo wok ki doge; di kiko donyo penyere be, “Mam wot ka Yosepu ine?”

²³En eko dwoko ne gi be, “Ango angeo kiber be wun iyarunu waco nango agole ni be, ‘Emuron, cangere keni; gikame wan owinyo be ngoce in itimo i Kaperanaum, poore itimi i pinyu kan da.’ “

²⁴ Yesu doko oko medo waco ne gi be, “Ateteni awaco ne wu be, likame tie enabi moro kame jo gamo i bomba me tur gi.

²⁵ “Doko i ateni, awaco ne wu be, apuserun oudo bin tot i piny me Isirael i kare ka Elia, kakame kot bin likame oko cwei kede pi mwakini adek kede dwete kanyape, di kec atek oko mako piny nono dedede.



²⁶Do Rubanga likame oko cwano Elia but ngatamoro kikom gi, kwanyo kenekene but apuserut kame oudo bedo i adul me Serapeta i piny me Sidon.

²⁷Doko bin jo atuwo dobo oudo tot twatwal i piny me Isirael i kare ka enabi Elisa, do likame oko cango ngatamoro kikom gi, kwanyo kenekene Naman dano me Siria.”

²⁸Kakame jo kame bin tie i sinagoga owinyo kede kop noni, kiko doko ger.

²⁹Di kiko yai, kiko koporo en kitere ooko me bomba, di kiko tere i wi emukura kame bin oudo gedo me bomba gi cungo iye. Bin gin oudo kimito be koto kiremoro en ki kuno epot piny adule,

³⁰do Yesu oko lwi oboe i diere gi kanono, en eko gire ot.

Icuo kame tie kede Tipo Arac

(Marako 1.21-28)

³¹Di Yesu oko ot Kaperanaum, kame oudo obedo bomba kame tie Galilaya. En eko donyo pwoy ki kuno Ceng Sabato.

³²Jo oko uro pwoy mere, piento en oudo eyamo kede akarunikin.

³³Icuo moro kame oudo tipo arac tie i kome oudo tie i sinagoga; di en eko kok kitek di ewaco be,

³⁴” Yesu me Nasaret, nyo kame in imito kibun wan? In do mam ibino pi tieko wan? Ango angei, in ibedo Dano Kacil ka Rubanga.”

³⁵Do Yesu oko coke di waco ne be, “Lingi, wok tenge ki kome!” Di jwogi nono oko lakakino icuo nono piny i nyim gi kanono, di eko yai tenge ki kome abongo mine awanon.

³⁶Jo dedede oko uro, di kiko donyo yamo ken gi ken gi be, “Epone me kop nyo ine? Piento en etie kede akarunikin kede twer me ciko tipere areco di kiko wok tenge.”

³⁷Rwonge i kom Yesu oko sarakin i piny dedede me kio.

Yesu Ocango Jo Atot

(Matayo 8.14-17; Marako 1.29-34)

³⁸Yesu bin oko yai ki sinagoga, en eko ot di eko donyo i ot ka Simoni. Toto me dako ka Simoni oudo tie kede tuwo me musuja, di gin kiko kwano Yesu pi konye.

³⁹Yesu oko bino di eko cungo i ngete di eko coko musuja be weke, di musuja oko weke. Cucuto nono dako nono oko yai malo, eko cako tedo gi.

⁴⁰Otieno di do ceng tie donyo, jo dedede kame oudo tie kede joe gi kame oudo tie kede iponeso me tuwo apapat, oko kelo gi but Yesu; en eko donyo keto cinge i kom ngat acelacel kikom gi, di eko cango gin dedede.

⁴¹Kiton jwogi da oko yai tenge ki kom jo atot di kikok be, “In en Wot ka Rubanga!” Do Yesu oko coko gi di likame en eko yei ne gi yamo, pien oudo gin kingeo be Yesu obedo Kirisito.



Yesu Opwonyo i Sinagoga

(Marako 1.35-39)

⁴²Di do piny oru, Yesu oko yai ki Kaperanaum, en eko ot kakoling. Do jo oko cako mone kitek. Kakame kiude kede, kiko donyo tamo genge be koto kur eyai tenge kibut gi.

⁴³Do en eko waco ne gi be, “Ango apoore tucō Kop Aber me Ajakanut ka Rubanga i bomban apat da, pien gikame Rubanga oudo oora timo inonono.”

⁴⁴En eko donyo pwoy i sinagogan dedede kame tie Yudea.

Luka 5

Yesu Olwongo Josiao me Agege

(Matayo 4.18-22; Marako 1.16-20)

¹Cenge moro acel, Yesu oudo tie cungo i dog nam me Genesaret, di jo tie dire kitek pi mito tuno bute, pi winyo kop ka Rubanga.

²En eko neno yede are di tie i dog nam. Jocik oudo otieko do wok tenge ki yede nogo kitie do lwoko bwoini gi.

³Yesu oko donyo yi yee acel kikom gi, kame oudo obedo yee ka Simoni, di en eko kwano Simoni be remoro en ber anonok i pii. En eko donyo pwoyio ekodet di ebedo i yi yee.

⁴Di do bin etieko yamo, en eko waco ne Simoni be, “Kwangunu ber kong yee ootunu i dier nam kakatut, di ikounu uco bwoini wu iye me wek imakunu deknam mogo.”

⁵Do Simoni oko dwoko ne be, “Adwong, do wan kom tin ocane iwor kiakia, do likame oko mako gimoro akadi acel. Do bala kite kame in en iwaco kede, abino do ber uco bwoini nogi kamanono.”

⁶I kare kame bin do kituno kede i dier nam kakatut, kiko uco bwoini di kiko mako deknam atot adikinichel, oko mino bwoini gi do oudo mito cocotun.

⁷Di do kiko gweto jowot gi kame oudo tie i yi yee apat pi bino konyo gi. Jo nogo oko bino di kiko pongo yede are nogo dedede kede deknam, omio kiko cako lwiny.

⁸Do kakame bin Simoni Petero oneno kede gikame otimere, en eko riondiko piny i tien Yesu di ewaco be, “Okwe Rwot ot tenge kibuta, pien ango ngadubo!”

⁹Pien Simoni Petero karacel kede jowote nogo oudo obedo kede ur atek twatwal pi twon deknam kame oudo kimako.

¹⁰Akadi Yakobo kede Yokana da, kame obedo awobe ka Sebedayo, oko bedo kede ur, pien gin oudo kitie karacel kede Simoni. Di Yesu oko waco ne Simoni be, “Kur ibed kede lworo, cako tin ibinunu donyo coko jo buta.”

¹¹Kakame kitieko wano kede yede ooko i dog nam, gin kiko do weko tice dedede kame oudo lem kibedo timo, di kiko donyo lubo Yesu.

Yesu Ocango Adobo



(Matayo 8.1-4; Marako 1.40-45)

¹²I kare moro di Yesu oudo tie i bomba moro acel, icuo moro kame dobo oudo otatapo i kome oko bino kuno. Kakame bin eneno kede Yesu, en eko potu eriebere piny i tiene, di ebako doge be, “Rwot, ka cunyi mito, ikaruno canga.”

¹³Yesu oko rieno cinge oko mule di ewaco be, “Amito, cangi!” Cucuto nono di dobo mere oko cango.

¹⁴Yesu oko cike di waco ne be kur eoti ewac ne ngatamoro, do be, “Oti iko nyutere but ngasaseredoti, di iko mino giayala ni me pwoc pi in cango, bala kame Musa bin ociko. Mano bino bedo gikame nyuto be in icango.”

¹⁵Do rwonge i kom Yesu oko medo sarkin ameda, di ekodet me jo oko donyo bino di kicokere pi winyo kop mere kede pi udo cango ki tuwo gi me iponeso apapat.

¹⁶Do Yesu oudo pokere kene eko ot kakoling di eko donyo ilega.

Yesu Ocango Icuo kame Tuwo Oneko Kome lung

(Matayo 9.1-8; Marako 2.1-12)

¹⁷Ceng moro acel di bin Yesu oudo tie pwony, Iparisayon mogo kede jopwony me Iswil oudo tie bedo kuno, kame bin oyai ki calere dedede kame tie Galilaya kede Yudea, kede mogo kame bin wok ki Yerusalem. Twer ka Rwot me cango jotuwo oudo tie i kom Yesu.

¹⁸Cuo mogo oko bino di kiyeo dano kede gibuto mere, dano kame oudo tuwo oneko kome lung. Di kiko tamakino bala koto kiudo epone me cwane i ot, me wek kipiele i nyim Yesu.

¹⁹Do pi kite kame jo oudo opong kede i ot, omio likame kiko karuno tuno kede but Yesu. Di do gin kiko yito malo i wi ot, di kiko yabo wi ot, kiko rwako icuo nono kede gibuto mere, kiko yololo en piny i dier jo i nyim Yesu.

²⁰Kakame Yesu bin oneno kede yei gi, en eko yamo ne icuo nono be, “Ngawota, kotieko do sasiro in ki dub ni.”

²¹Jopwony me Iswil karacel kede Iparisayon oko cako penyere ken gi ken gi be, “Ngai ber ine kame yamo kope me acae i kom Rubanga? Ngai kame twero sasiro jo ki dub gi, kwanyo Rubanga kene?”

²²Yesu oudo ngeo gikame gin kitie paro i cunyi gi, omio en eko penyo gi be, “Pinyo ber komio wun itienu kede peny kame cal kamago i cunyi?”

²³Mene en kame do yot, waco ne dano noni be, ‘Kosasiro in ki dub ni, ‘arabo waco ne be, ‘Yai malo ioti?’

²⁴Do pi mino wu ngeno be Wot ka dano tie kede akarunikin me sasiro jo ki dub gi i wi lobo”, en eko waco ne icuo nono be, “Ango awaco ni be, yai malo ikwany gibuto ni iko ot paco.”

²⁵Cucuto nono, icuo nono oko yai malo ki nyim gi kanono, di en eko tingo gikame oudo ebuto iye, di eko do ot paco di epako Rubanga.



²⁶Gin dedede kiko bedo kede ur atek; kiko donyo pako Rubanga kede lworu adwong twatwal di kiwaco be, “Tin doko oneno gikame nyen.”

Yesu Olwongo Lebi

(Matayo 9.9-13; Marako 2.13-17)

²⁷Ki cen mere, Yesu oko donyo ooko, en eko neno ngarar esolo moro kame oudo nyinge Lebi, di etie bedo i ot me culo esolo. Yesu oko waco ne be, “Luba.”

²⁸Lebi oko yai, eko weko jame dedede, di en eko lubo Yesu.

²⁹Di do Lebi oko tedo ne Yesu ebaga adwong adikinichel i ode. Jorar esolo atot kede jo apat da oudo tie kede gi kuno kacam.

³⁰Iparisayon kede joe gi kame pwonyo Iswil oko cako ingungur di ki penyo josiao mege be, “Pinyo ber komio wun icamunu, doko imatunu da kede jorar esolo kede jodubo?”

³¹Yesu oko dwoko ne gi be, “Jo kame kom gi yot likame mo emuron, do jo kame tuwo en kame moe.

³²Ango likame abino pi lwongo jo kopoore, do pi lwongo jodubo me wek kiswilaro.”

Peny kame mako Kanyo Kec

(Matayo 9.14-17; Marako 2.18-22)

³³Jo mogo oko waco ne Yesu be, “Josiao ka Yokana kanyo kec kede kilego dikdik, doko josiao me Iparisayon da timo kamanono; do megin camo di mato.”

³⁴Yesu oko penyo gi be, “In itwero mino wele kame tie i ebaga me nyom kanyo kec di pwodi eteran tie kede gi?

³⁵Do ceng bino tuno kame kobino tero kede eteran tenge kibus gi, di gin kiko donyo kanyo kec.”

³⁶Yesu oko tatamo ne gi agole moro da bobo be, “Likame tie ngat kame nyilo egoe anyen di eko dapo i kom egoe oti; ka etimo kamanono, egoe anyen bino nyil tenge, doko ecapa me egoe anyen nono udo likame riamakin kede egoe oti.

³⁷Doko da likame tie dano moro kame keto bwini anyen i isau me lau oti, pien ka etimo kamanono, bwini anyen bino mwoco isau me lau oti nono, di bwini mere ko ony, di lau nono ko dubere.

³⁸Pi mano, poore onyo bwini anyen i isau me lau anyen da.

³⁹Doko likame tie ngatamoro kame mito bwini anyen ka etieko mato bwini acon, pien ebino waco be bwini acon ber.”

Luka 6

Peny kame mako Ceng Sabato

(Matayo 12.1-8; Marako 2.23-28)

¹Ceng Sabato moro acel, Yesu kede josiao mege oudo tie ot di kibeo ki potu me engano. Josiao mege oko cako gigitu wit engano di kinginginyo i cing gi, di kimwodo.



²Iparisayon mogo oko penye be, “Pinyo komio wun itienu timo gikame Iswil daga i Ceng Sabato?”

³Yesu oko dwoko ne gi be, “Benyo, wun likame pwodi isomunu gikame Daudi riki otimo di bin kec oneke, en karacel kede jo kame oudo etie kede?”

⁴En bin edonyo i ot ka Rubanga, di eko camo mugati kame oudo tie giayala but Rubanga, di eko mino jo mege da, do di Iswil wa likame yei ne ngatamoro camo mugati no, kwanyo kenekene josaseredoti.”

⁵Di do Yesu oko waco ne gi be, “Wot ka dano en Rwot me Sabato.”

Icuo kame Bade Omito
(Matayo 12.9-14; Marako 3.1-6)

⁶Ceng Sabato ace, Yesu oko donyo i sinagoga, di eko donyo pwonyi iye. Icuo moro oudo tie kuno kame bade tetu cam omito.

⁷Jopwony me Iswil kede Iparisayon oko donyo ngine pi mito neno ka oudo eyaro cango dano Ceng Sabato, tetekeny kiud gikame kiromo pide iye.

⁸Do Yesu oudo ngeo tam gi, en eko waco ne icuo nono be, “Bia icung kan.” Icuo kame bade omito nono da oko yai di eko ot cungo anyim kuno.

⁹Yesu oko waco ne gi be, “Ber kong apenyu, Iswil wa yei ne wa timo bero Ceng Sabato arabo timo raco? Marao kuo me dano arabo neke aneka?”

¹⁰En eko neno gin dedede rimaro, di eko waco ne icuo nono be, “Riei badi!” Loca da oko timo kamanono, di bade oko doko ber bobo.

¹¹Do gin kiko doko ger adikinicel, di kiko cako poro kop ken gi ken gi pi gikame kipoore timo ne Yesu.

Yesu Oyero Joor Tomon kiwie Are
(Matayo 10.1-4; Marako 3.13-19)

¹²I kare nono, Yesu oko ot di eko yito malo i wi moru pi lego, en eko bedo lego but Rubanga iwor kiakia.

¹³Odiko di piny oru, en eko lwongo josiao mege bute, di eko yero jo tomon kiwie are kikom gi, kame en eko lwongo be joor mege:

¹⁴Simoni (kame en eko cako ne nyinge be Petero), kede omin mere Anderia, kede Yakobo kede Yokana, kede Pilipo kede Batulumayo,

¹⁵kede Matayo kede Tomasi; Yakobo wot ka Alipayo kede Simoni (kame oudo obedo ngat kalikame mito apugan me kare nono),

¹⁶kede Yuda wot ka Yakobo, kede do Yuda Isikariot, kame bin oko rupao Yesu.

Yesu Opwonyo kede Ecango Jo
(Matayo 4.23-25)

¹⁷Di do bin Yesu otieko wok piny kede joor mege ki wi moru, en karacel kede josiao mege atot ace da, kiko cungo kakame tie bala elet. Ekodet adwong me jo oudo tie



kuno kame bin oyai ki piny me Yudea dedede, ki Yerusalem kede ki bomban me Taya kede Sidon, kame gongere kede nam adwong;

¹⁸gin oudo kibino pi winyo kop mere kede pi udo cango; di jo dedede kame tipo areco oudo lolo oko cango.

¹⁹Jo dedede oko donyo mono epone me mule, pien twer me cango oudo tie wok kibute di cango jo dedede.

Kilel kede Cwercuny

(Matayo 5.1-12)

²⁰Yesu oko tingo wange malo di eko neno josiao mege, en eko waco ne gi be, “Itienu kede winyo wun jocan; pien Ajakanut ka Rubanga obedo meru.

²¹Itienu kede winyo wun jo kame kec oneko wu nan; pien ibinunu yeng. Itienu kede winyo wun jo kame nan kok; pien ibinunu nyero.

²²“Itienu kede winyo ka jo dagi wu, di kipoko wu tenge kikom gi, di kiyeyeto wu, di kidubo nying wu pi Wot ka dano.

²³Lelunu i ceng nono di isosomunu pi yomcuny, pien giamia wu me pwoc tie dwong i malo. Pien kiton joakwari gi da bin otimo kamanono ne inabin.

²⁴” Do itienu i can wun wegi abar; pien wun itiekunu udo gikame kweo cunyu.

²⁵Itienu i can wun jo kame nan iyengunu; pien kec bino neko wu. Itienu i can wun jo kame nan nyero; pien ibinunu iturur kede koko.

²⁶” Itienu i can ka jo dedede pwoyo wu be iberunu; pien riki joakwari gi da otimo kamanono ne inabin me angalo.

Opoore Maro Jokwor wa

(Matayo 5.38-48; 7.12a)

²⁷” Do ango awaco ne wun dedede jo kame tie winya be, marunu jokwor wu, di ikounu timo bero but jo kame dagi wu.

²⁸Miunu jo kame lamo wu winyo, di ikounu lego ne jo kame yeyeto wu.

²⁹Ka ngatamoro obapo lemi, loke bobo tetucel da ebapi; ka ngatamoro otero ekoti ni, mie kiton esati da.

³⁰Ngat acelacel kame kwai gimoro mie, doko ka ngatamoro otero gimoro kibuti, kur bobo iburao en.

³¹Tim ne jo apat da gikame in imito be koto gida kitimo nin.

³²” Ka wun imarunu jo kame maro wu kenekene, mano konyo wu kede nyo? Pien kiton jodubo da maro jo kame maro gi.

³³Doko da ka wun itimunu bero ne jo kame timo ne wu bero erume, mano konyo wu kede nyo? Pien kiton jodubo da timo kamanono.



³⁴Doko ka imiunu but jo kame wun itienu kede gen me udo kibun gi kenekene, mano konyo wu kede nyo? Pien jodubo da mio but jodubo wad gi, pi mito udo arom kamanono bobo.

³⁵Do marunu jokwor wu, di itimunu ne gi bero, di imiunu da abongo geno be culu. Di do ikounu bino udo giamia me pwoc adwong adikinicel, di ikounu doko idwe ka Ngamalo Twal; piento en etimo bero ne jo kame li kede pwoc kede ne jo areco da.

³⁶Bedunu kede cuny me kisa bala kame Papa wu da tie kede cuny me kisa.

Ngolo Kop ne Jo icegun

(Matayo 7.1-5)

³⁷” Kur ingolunu kop ne jo icegun, me wek kur ngol kop ne wuda. Kur iwacunu ne jo raco, me wek kur wac ne wuda raco; sasirunu jo, tetekeny oko bino sasiro wuda.

³⁸Miunu di oko bino mino wuda; kobino pimo ne wu i gi me pim aber kopong, kame kodio di koyayango, di ony, di oko bino mino wu. Pien epone kame wun ipimunu ne kede jo, en kame kobino pimo ne wuda kede.”

³⁹ Di do Yesu oko waco ne gi agole be, “Emuduk twero peno emuduk wad gi benyo benyo? Pien ka etimo kamano, mam gin are nogo kibino potu i bur?”

⁴⁰ Likame tie ngasiao moro kame pire dwong kalamo ngapwony mere, do ngasiao acelacel ka ongetakino isoma mere, en kame mio eko doko rom kede apwony mere.

⁴¹” Pinyo komio in ineno apoke kame tie i wang ngawoti, do di likame iko twero neno isiki kame tie i wangi?”

⁴²Benyo benyo kame in isobolo waco ne kede ngawoti be, ‘Diera, wek akwanyi apoke ki wangi, ‘do di in likame itwero neno isiki kame tie i wangi? In ngaecuke, cak ber kwanyo isiki kame orire i wangi, en kame mio di do wangi ko doko bit pi kwanyo apoke kame tie i wang ngawoti da.

Yat kede Anyakini mere

(Matayo 7.16-20; 12.33-35)

⁴³” Yat aber likame nyako anyakini areco, doko yat arac da likame nyako anyakini abeco.

⁴⁴ Yat acelacel ngere kede anyakini mere; pien likame kotwero ngwedo anyakini me epigi kikom okuto, doko likame kotwero ngwedo olok kikom ocokocok.

⁴⁵ Dano aber woto bero kikom gikame beco kame en ekano i cunye. Dano arac da woto raco kikom jame areco kame en ekano i cunye. Pien dog dano yamo gikame opong i cunye.

Jogedo Are

(Matayo 7.24-27)

⁴⁶” Pinyo bo komio ilwonganu be Rwot, Rwot, do di likame itimunu gikame ango awaco ne wu?”



⁴⁷Ngatamoro kame bino buta di eko winyo kop na, di eko timo gi, ango abino nyuto ne wu gikame dano nono cal kede.

⁴⁸En ecal kede icuo moro kame bin tie gero ot; en ekunyo bur atut di eko keto acakini me ot nono i wi lela. I kare kame alele oko bino kede, pii oko dipo ot nono, do likame eko yangere, pien oudo kogere kiber.

⁴⁹Do dano acelacel kame winyo kop nango di likame eko timo, en ecal kede ngagedo moro kame bin ogero ot i lobo abongo kunyo apama mere donyo piny; i kare kame do alele oko bino kede di oko dipere i kom ot nono, en eko atyaikin piny ngidingid.”

Luka 7

Yesu Ocango Ngatic me Ngadwong me Isirikalen me Roma

(Matayo 8.5-13)

¹I kare kame do Yesu otieko waco ne kede ekodet kop dedede, en eko yai eoto Kaperanaum.

²Bin tie ngadwong me isirikalen kuno, kame oudo tie kede ngatic mere kame emaro twatwal, kame oudo tuwo omako iyapiyapi to.

³Kakame ewinyo kede kop i kom Yesu, en eko cwano joadongo mogo me Iyudayan pi ot kwane pi bino cango ngatic mere.

⁴Kakame jo nogo otuno kede but Yesu, kiko donyo ngangao en kitek di kiwaco be, “En dano aber, poore itim ne kamanono,

⁵pianto en emaro jo me ateker wa, doko etieko gero ne wa sinagoga.”

⁶Kikano di do Yesu oko upere kede gi. Kakame enoko kede paco, ngadwong me isirikalen nono oko cwano jowote pi ot siramo en pi waco ne be, “Rwot kur do ilol komi, pien ango likame apoore me in bino donyo i oda;

⁷en komio ango ako tamo be likame apoore pi tuno buti. Do in kenekene wac kop nono, di ngatic nango ko bino cango.

⁸Pien akadi ango da kikoma, atie i akarunikin me jo kame loa, doko da atie kede isirikalen kame tie i akarunikin na. Ka aciko acel kikom gi be, ‘Oti, ‘en eoto; doko ka awaco ne ace da be, ‘Bia, ‘en ebino; kede ka awaco ne epasoit na be, ‘Tim gini, ‘en etimo.”

⁹Kakame Yesu owinyo kede kop noni, en eko bedo kede ur twatwal i kome, omio en eko lokere di eko waco ne jo kame oudo lube be, “Amito waco ne wu be, ango pwodi likame lem audo epone me yei kame cal kaman, akadi kiton i Isirael.”

¹⁰Kakame jo kame bin kocwao nogo odok kede paco, kiko udo epasoit mere nono di otieko cango.

Yesu Oyaruno Wot ka Apuserut

¹¹Oyotoyot ingei mano, Yesu oko ot i bomba me Nain, di eupere kede josiao mege kede twon ekodet me jo.



¹²Di do bin enoko dog orute me bomba nono, oudo kotie diedielo icuo moro oto, kame oudo obedo atin awobi acel kenekene, kame toto mere oudo obedo apuserut. Ekodet adwong kowok ki bomba oudo tie upere kede en.

¹³Kakame Rwot oneno kede apuserut nono, kisa oko make i kome di en eko waco ne be, “Kur ikoki.”

¹⁴En eko ot di eko mulo elago; jo kame oudo tie diedielo liel oko cungo. Di Yesu oko waco be, “Awobi, awaco ni be, yai malo.”

¹⁵Icuo kame oudo oto nono oko lepun malo di eko bedo, di eko cako yamo da, di do Yesu oko mine i cing toto mere.

¹⁶Lworo atek oko mako gin dedede, kiko do donyo pako Rubanga di kiwaco be, “Enabi adwong do otieko wokun i diere wa!” kede be, “Rubanga do otieko bino pi lako jo mege!”

¹⁷Rwonge mere nono oko sarakin i Yudea dedede, kede i pinye kame kio kede.

Jo kame Yokana Ngaibatis Ooro

(Matayo 11.2-19)

¹⁸Josiao ka Yokana Ngaibatis oko tatamo ne Yokana gikame otimere dedede; di do en eko lwongo jo are kikom gi,

¹⁹di eko cwano gi but Rwot pi ot penye be, “Mam in en kame ibedo ngat kame oudo kowaco be oyaro bino, arabo wan omeede daro dano ace?”

²⁰Kakame gin do bin kituno kede but Yesu, kiko waco ne be, “Yokana Ngaibatis ocwao wa be obin openyi be, ‘In en ibedo ngat kame oudo kowaco be oyaro bino arabo wan omeede daro dano ace?’ ”

²¹Esawa nono di Yesu oko donyo cango jo atos kame oudo tie kede tuwo apapat, aumpuli, kiton tipere areco, doko en eko yabo wang jo atos kame bin oudo obedo imuduka.

²²Di do Yesu oko dwoko ne josiao ka Yokana nogo be, “Dokunu ikounu waco ne Yokana gikame wun inenunu kede kame iwinyunu: wang imuduka oyabere, ingwalasa do twero ot, komio jo kame tie kede dobo ocango, idingoi da yit gi oyabere, koyaruno jo oto, kede kotuco Kop Aber ne jocan.

²³Etie kede winyo ngat kalikame cunye wang pi ango.”

²⁴Kakame jo kame bin Yokana ooro otieko kato kede, Yesu oko cako yamo ne ekodet kop i kom Yokana be, “I kare kame wun bin iotunu kede but Yokana i tim, oudo iotunu neno nyo? Benyo, oudo iotunu neno lagara kame yamo yayango?”

²⁵Nyo kara ber kame wun oudo iotunu pi neno? Mam icuo kongapere kiber? Jo kame ngapere kiber di kitie kede kuo amalo bedo i miere me abakai.

²⁶Do nyo kara ber kame wun oudo iotunu pi neno? Benyo, oudo iotunu neno enabi? Ebo, doko awaco ne wu be, ngat kame kalamo enabi en kame wun oudo iotunu neno.



- ²⁷ Piento Yokana en kame iwandik kacil waco kop i kome be, ‘ Neni, atie cwano ngaor na geo ot nin anyim, kame bino iiko yongayo nin.’ “
- ²⁸Di bobo Yesu oko meede be, “Amito waco ne wu be, kikom jo dedede kame kotieko nywalo, likame tie ngatamoro kame pire dwong kalamo Yokana. Do ngat kame titidi twatwal i Ajakanut ka Rubanga en kame pire dwong kalamo en.”
- ²⁹ Kakame kiwinyo kede kop noni, jo dedede kiton jorar esolo oko yei be Rubanga opoore; pien kiyei ne Yokana batiso gi.
- ³⁰Do Iparisayon kede jopwony me Iswil oko dagi lubo mit ka Rubanga pirgin, pien likame kiyei ne Yokana batiso gi.
- ³¹Yesu oko meede di ewaco be, “Abino poro jo me i kare ni kede nyo? Gin ber kical kede nyo?”
- ³²Gin kical kede idwe kame tie bedo i atale, di do ekodet acel lwongo ocelu di kiwaco be, ‘Wan okuto ne wu bilo, ikounu dagi miel! Doko owero ne wu wer me to da ikounu dagi koko!’
- ³³Pien Yokana Ngaibatis bin obino di likame ecamo, doko di likame emato akadi bwini da, wun ikounu waco be, ‘Icuo ni tie kede jwogi.’
- ³⁴Nan Wot ka dano obino di ecamo, doko di emato da, bobo ilokerenu waco be, ‘Nenunu icuo ni obedo ngacam kede ngamera, doko en ngawot jorar esolo kede jodubo!’
- ³⁵Do ateni me riekko ka Rubanga nyutere kibut idwe mege dedede.”

Yesu Obedo i Paco ka Simoni Ngaparisayo

- ³⁶Ngaparisayo acel oko waco ne Yesu pi ot nywako kede en cam, Yesu oko ot i ot me Ngaparisayo nono di eko bedo piny, di eko donyo cam.
- ³⁷Oudo dako moro tie i bomba nono kame obedo ngadubo. Kakame ewinyo kede be Yesu oudo tie cam i ot me Ngaparisayo nono, eda eko ot kuno kede cupa mere me mo angwe kur.
- ³⁸Di en eko luro piny di eko donyo koko di pige wange ton i tien Yesu. En eko donyo weweo tien Yesu kede yer wie, di enoto, doko en eko donyo wiwo gi kede mo nono.
- ³⁹Kakame do Ngaparisayo nono oneno kede gino, en eko donyo yamo i cunye kene be, “Ka koto icuo ni oudo obedo enabi, koto engeo epone me dako kame tie mumulo en noni, pien dako noni obedo ngadubo.”
- ⁴⁰Yesu oko dwoko di ewaco be, “Simoni, atie kede kop moro kame amito waco ni.” Simoni oko dwoko be, “Apwony kop nyo inonono?”
- ⁴¹Yesu oko cako yamo be, “Oudo tie ngat kame kopo jo lim, kame tie kede jobanyi mege are; ngat acel oudo tie kede banya mere me denari tol kany, ngat ocelu oudo tie kede banya me denari ot kany.



⁴²Do kakame culo olo gi kede, en eko sasiro gin dedede. Nan do ngai kikom gi en kame poore mare kalamo?”

⁴³Simoni oko dwoko be, “Ango aparo be ngat kame koweko ne banya adwong.” Yesu oko waco ne be, “Idwoko kakare.”

⁴⁴Yesu oko lokere kakame dako nono tie iye, di eko waco ne Simoni be, “Mam ineno dako noni? Ango adonyo i odi, do in likame iko mina pii me lwoko tiena, do en elwoko tiena kede pige wange, doko en eko weweo gi kede yer wie.

⁴⁵In likame igama di inota, do en likame eweko noto tiena cako oki angu bino kan.

⁴⁶In likame iwiro wia kede mo, do en nan etieko wiwo tiena kede mo.

⁴⁷En komio nan angu awaco ni be, dub mege kame oudo tot kotieko sasiro, en komio etie kede amara adwong. Do ngat kame kosasiro dub mege kame oudo nonok, tie da kede amara atitidi.”

⁴⁸Di do Yesu oko waco ne dako nono be, “Kotieko do sasiro in ki dub ni.”

⁴⁹Jo kame oudo tie nywako kede cam oko cako penyere ken gi ken gi be, “Kara do ber ngai ine kame twero kiton sasiro jo ki dub gi?”

⁵⁰Do Yesu oko waco ne dako nono be, “Yei ni olaki, ot kede mulem.”

Luka 8

Mon kame oudo Upere kede Yesu

¹Oyotoyot ingei mano Yesu oko donyo ririmo bomban kede calere, di etuco Kop Aber kame ekelo, kame mako Ajakanut ka Rubanga. Josiao mege tomon kiwie are da oudo tie upere kede,

²karacel kede mon mogo da kame bin eriamo tipere areco kikom gi, kede cango gi ki iponeso me tuwo apapat. Gin oudo kibedo Maria kame kolwongo be Magadalina, kame bin Yesu oriamo jwogi kanyaare ki kome,

³kede Joana dako ka Cusa ngagwok jamini ka Erode, kede Susana, kede do jo atot ace kame bin omio kony me gikame kitie kede but Yesu karacel kede josiao mege.

Agole me Ngacuc

(Matayo 13.1-9; Marako 4.1-9)

⁴kakame bin ekodet me jo kowok ki bomban apapat ocokere kede karacel, Yesu oko cako yamo kede gi i agole di ewaco be:

⁵” Bin tie ngacuc moro kame ooto i potu mere cuno kodi; kakame oudo etie cuc kede, kodi mogo oko popoto i dier yongayo, tien jo oko nyonyono mago, di winy oko camo gi pit.

⁶Mogo bin oko popoto i lobo kobedo lela lela, i kare kame bin kodi nogo otui kede, kiko susunyo ner, piento lobo nono oudo otuo.



⁷Mogo bin oko popoto i dier okuto; i kare kame kodi nogo otui kede, okuto oko dongo kede gi oko twilo gi.

⁸Do kodi mogo bin oko popoto i lobo aber; kiko tui di kiko dongo, kiko lingo wit gi kame tie kede nyige tol acel.” Ingei yamo kop noni, Yesu oko yamo kede dwan amalo be, “Ngat kame tie kede yite, wek ewinyi.”

Gi komio Yesu Yamo i Angole

(Matayo 13.10-17; Marako 4.10-12)

⁹kakame josiao mege openye kede dwong me agole noni,

¹⁰en eko waco ne gi be, “Wun kotieko mino wu ngeno mung me Ajakanut ka Rubanga, do jo apat kobino yamo kede gi i agole, tetekeny akadi kineni, do likame kibino neno, doko akadi kiwinyi, do likame kiromo niang.”

Yesu Ogonyo Dwong me Agole me Ngacuc

(Matayo 13.18-23; Marako 4.13-20)

¹¹Yesu oko waco be, “Dwong me agole no en ine ta: kodi en kop ka Rubanga.

¹²Kodi kopopoto i dier yongayo cungo pi jo kame winyo kop ka Rubanga, do Sitani bino ko kwanyo kop nono tenge ki cuny gi, tetekeny kur kiyei di kiko udo alako.

¹³Kodi kopopoto i lobo kame obedo lela lela cungo pi jo kame ka kiwinyo kop ka Rubanga, kigamo kede kilel; do kop nono likame ko keto aliasin i kuo gi, mio gi kiyei pi kare acecek, do kame atama moro obino, kiko poto ki yei gi.

¹⁴Do kodi kopopoto i dier okuto, cungo pi jo kame winyo kop ka Rubanga, do pi paro kede mito abar, kede kilel me kuo me i kare ni dio gi, di do anyakini gi likame ko twero cato.

¹⁵Aso, kodi kopopoto i lobo aber cungo pi jo kame ka kiwinyo kop ka Rubanga, kimako kitek i cuny gi, cuny kame tie kede ateni kede bero, doko kidio cuny gi tuno nyako nyige atot.

Etala kame Koumo kede Ebukit

(Marako 4.21-25)

¹⁶“Likame tie dano moro kame cwinyo etala di bobo en eko umo kede ebukit, arabo di eko kano i dud itanda; do eketo kakame idelelei tetekeny jo kame donyo i ot twer neno lero.

¹⁷“Pien likame tie gimoro kame kokano kalikame kobino woto kakaler, doko likame tie gimoro me mung kalikame bino ngere di eko wok i lero.

¹⁸“Pi mano, ketunu tam wu i kom epone kame iwinyunu kede; pien ngat kame tie kede gimoro, kobino medo ne ace; do ngat kame li kede gimoro, kiton atitidi kame en etie kede da kobino kwanyo kibute.”

Imiegu ka Yesu kede Toto mere

(Matayo 12.46-50; Marako 3.31-35)

¹⁹Di do Toto me Yesu, kede imiegu mege oko bino bute, do likame kiko sobolo tuno kakame en oudo etie iye, pien ekodet oudo dwong.



²⁰Di ngatamoro oko waco ne Yesu be, “Toto ni kede imiegu ni tie cungo ooko, kimito neni.”

²¹Do Yesu oko dwoko ne gi be, “Toto na kede imiegu na en jo kame winyo kop ka Rubanga di kiko lubo.”

Yesu Okweo Yamo Atek i Nam

(Matayo 8.23-27; Marako 4.35-41)

²²Ceng moro acel Yesu oko donyo i yi yee karacel kede josiao mege, di en eko waco ne gi be, “Ongolunu nam ootunu ber loka tetuca.” Di do gin kiko cako ot.

²³Do kakame oudo gin kitie kede kwang, Yesu oko donyo nino. Yamo atek oko cako buko i dier nam, di pii oko cako pong i yi yee, omio oudo kitie kede peko adwong.

²⁴Josiao mege oko ot bute di kiko cene di kiwaco be, “Apwony, Apwony, kara otienuto.” Yesu oko cei, di en eko coko yamo karacel kede ebuka, di yamo kede ebuka oko cungo, nam oko kwei.

²⁵Yesu oko penyo josiao mege be, “Wun do ber yei wu tie tuai?” Lworo oko mako gi di kiko bedo kede ur di kiyamo ken gi ken gi be, “Ngai ine kame coko kiton yamo kede ebuka da di kiko winyo dwane?”

Yesu Ocango Icuo kame tie kede Jwogi

(Matayo 8.28-34; Marako 5.1-20)

²⁶Di Yesu karacel kede josiao mege oko kwang, kingolo loka di kiko tuno i lobo me jo Gerasene, kame oudo pimere kede Galilaya.

²⁷Kakame Yesu owok kede ooko i dog nam, en eko riamo kede icuo me bomba, dano kame oudo tie kede jwogi. Icuo nono oudo obedo pi kare alac di likame engapo igoen, doko likame oudo en ebedo i paco, do en oudo emaro bedo i wi atesin.

²⁸Kakame eneno kede Yesu, en eko kok di eko poto piny i nyime kanono, di eko lelemo di ewaco be, “Nyo ber kame in imito timo nango, in Yesu Wot ka Rubanga Ngamalo Twal? Akwai kede mwolo kur icana.”

²⁹En ewaco kamano pien oudo Yesu ociko tipo arac nono be wok tenge ki kome. (Pien i kare atos, oudo tipo arac nono make, di oko donyo dare adara di kotwee kede eriko kede epingo, do en oudo ecocoto gi di tipo nono ko mine eoto bedo i tim.)

³⁰Yesu oko penye be, “In nyingi ngai?” En eko dwoko be, “Ango nyinga Ekodet me isirikalen,” pien jwogi atos oudo otieko donyo i kome.

³¹Di kiko donyo bako ne Yesu dog gi be kur eriam gi kioti kidony i bur atos wiriwir.

³²Oudo bin esipan me ipegei mogo tie kuno cam i bad moru; di kiko donyo bako ne Yesu dog gi be ewek gi kioti kidonyi i kom ipegei nogo; en eko yei ne gi.

³³Di do kiko wokun ki kom icuo nono, di kiko ot donyo i kom ipegei nogo. Di do esipan me ipegei oko bwangere ringo lor piny i nam di kiko lwiny iye.



³⁴Kakame jo kame oudo kwao ipegei oneno kede gikame otimere, kiko ringo ot tatamo kop nono i bomba kede i calo da.

³⁵Jo bin oko ot neno gikame otimere, di do kiko bino but Yesu, kiko udo icuo kame jwogi oudo oyai ki kome nono di bedo piny i nget Yesu, di engapo igoen, di wie da odoko ber; lworu oko mako gi.

³⁶Jo kame bin oneno gikame otimere oko tatamo ne gi epone kame kocango kede icuo kame jwogi oudo bin tie i kome nono.

³⁷Di do jo dedede me adulion kame bin oluko piny me Gerasene oko waco ne Yesu be eyai eot tenge kibut gi; piento lworu atek oudo otieko do mako gi. Di do Yesu oko donyo i yi yee eko dok.

³⁸Icuo kame oudo koriamo jwogi ki kome nono oko kwano Yesu be eyei ne eda upere kede. Do Yesu oko dagi ne di ewaco ne be,

³⁹” In dok paco di iko tatamo ne jo gikaber kame Rubanga otimo ni.” Di do icuo nono oko ot i kabedere dedede me bomba di etatamo ne jo twon gikame Yesu otimo ne.

Nyar ka Yairo kede Dako Komulo Egoe ka Yesu

(Matayo 9.18-26; Marako 5.21-43)

⁴⁰Kakame bin Yesu odwogo kede, ekodet oko game, pien gin dedede oudo kitie dare.

⁴¹Icuo moro kame nyinge Yairo oko bino kuno, en oudo obedo ngatel me sinagoga; en eko poto piny i tien Yesu, di eko donyo bako doge ne Yesu be ot ture,

⁴²pien oudo etie kede nyare acel kenekene, kame mwaka mere romo tomon kiwie are, kame oudo iyapiyapi to. Kakame Yesu oudo tie ot kede, ekodet me jo oko donyo dire i kome ki bad dedede.

⁴³Oudo dako moro da tie i kom gi kame oudo tie kede tuwo kame omio remo obedo ony ki kome pi mwakini tomon kiwie are, do di ngatamoro likame oko twero cange, bed bala oudo edudubo lim mere dedede but imuroko.

⁴⁴En eko bino ki cen ngei Yesu, di eko mulo lak egoe ka Yesu, cucuto di mol me remo mere nono oko cungo.

⁴⁵Yesu oko penyere be, “Ngai komula?” Di bin jo dedede odagi, Petero oko waco ne be, “Adwong, ekodet me jo opong kan oluki, gin en kame kitie didio in!”

⁴⁶Do Yesu oko waco be, “Tie ngat komula; pien ango aniang be twer oyai tenge ki koma.”

⁴⁷Kakame dako nono oniang kede kiber be kotieko ngene, en eko bino kede mielkom, eko poto piny i nyim Yesu. Di do en eko cako tatamo i nyim jo dedede gikame omio en emulo Yesu, kede epone kame en eko cango kede cucuto nono.

⁴⁸Yesu oko waco ne be, “Nyara, yei ni ocangi, ot kede mulem.”



⁴⁹Do di pwodi oudo etie yamo, icuo moro kowok ki paco me ngatel nono oko bino di eko waco be, “Nyari otieko to, kur bobo imeede lolo apwony.”

⁵⁰Do kakame Yesu owinyo kede kop nono, en eko waco ne Yairo be, “In kur ibed kede lworo; kenekene bed kede yei, di en eko bino doko ber.”

⁵¹Kakame Yesu otuno kede i ot, likame eko yei ne ngatamoro donyo kede en i ot, kwanyo kenekene Petero, Yokana, kede Yakobo, karacel kede papa kede toto me atin.

⁵²Jo dedede oudo tie koko atin kitek; do Yesu oko waco ne gi be, “Kur ikokunu, en gire likame eto, do enino anina.”

⁵³Gin kiko donyo nyere, pien oudo kingeo be atin otieko to.

⁵⁴Do Yesu oko mako cing atin nono di eko waco ne be, “Atin, yai.”

⁵⁵Di cuny atin oko dwogo, esawa nono en eko yai malo; di Yesu oko waco be mi atin nono gimoro ecami.

⁵⁶Jonywal mege oko bedo kede ur atek; do en eko ciko gi be miero kur kiyami ne ngatamoro gikame otimere.

Luka 9

Yesu Ooro Josiao mege Tomon kiwie Are

(Matayo 10.5-15; Marako 6.7-13)

¹Yesu oko lwongo josiao mege tomon kiwie are dedede karacel, di en eko mino gi twer kede akarunikin me riamo jwogi dedede kede cango tuwo.

²Di do en eko oro gi pi ot tucop i kom Ajakanut ka Rubanga kede cango jotuwo.

³En eko waco ne gi be, “Kur imakunu gimoro ka itienu ot, kur imakunu ebela, amotoko ikapu, arabo cam moro, amotoko sente; doko ngatamoro kur mak esati ace.

⁴Kame kogamo wu i paco moro, bedunu iye tuno yai.

⁵Do karamoroni kalikame kogamo wu iye, kame itienu yai ki bomba nono, tetengunu adae ki tienu pi bedo bala ijura kame pido gi.”

⁶Josiao oko yai, kiko ot di kibeo i calo acelacel, di kitero Kop Aber kede di kicango jotuwo i kabedo dedede.

Erode Ototolun

(Matayo 14.1-12; Marako 6.14-29)

⁷Erode, kame bin obedo ngatel oko winyo kop i kom gikame oudo otimere dedede, di wie oko dubere, pien oudo doko jo mogo tie waco be Yokana Ngaibatis en kame bin koyaruno kikom jo oto;

⁸do mogo oudo waco be Elia en kame oneeno, kede icegun oudo waco be ngat acel kikom inabin kariki sek en kame oyaruno.



⁹Di Erode oko waco be, “Ango bin atieko mino kongolo ngut Yokana; do ngai bobo ine kame ango atie winyo di jo yamo kop i kome noni?” En eko donyo mono epone me nene.

Yesu Opito Jo Tutumia Kany

(Matayo 14.13-21; Marako 6.30-44; Yokana 6.1-14)

¹⁰Joor oko dwogo di kiko tatamo ne Yesu gi dedede kame gin kitimo. Yesu di do oko tero gi kargi ken gi i bomba kame kolwongo be Betesaida.

¹¹Kakame jo ongeo kede be Yesu oudo tie ot Betesaida, gin kiko lube kuno, di en eko gamo gi, di eko donyo yamo ne gi kop i kom Ajakanut ka Rubanga, doko di ecango jo kame oudo tuwo.

¹²Kakame oudo piny do tie yuto kede, josiao mege tomon kiwie are oko bino bute di kiko waco ne be, “Peruno jo ot i calere kede i miere kiyapiyapi, me wek kitwer udo kabuto kede gimoro me acama, pien wan otienu kakoling.”

¹³Do Yesu oko waco ne gi be, “Wun miunu gi gimoro kicami.” Di gin kiko dwoko ne be, “Wan otie kede mugati kany kede deknam are kenekene. Kwanyo ka imito be ooti owil ne jogi dedede cam.”

¹⁴Cuo kame bin tie kuno dedede oudo buco romo tutumia kany. Di do Yesu oko waco ne josiao mege be, “Aso miunu jo bed piny i ikodeta me ot kany ot kany.”

¹⁵Di gin kiko timo kamanono, kiko mino jo dedede obedo piny.

¹⁶Yesu oko kwanyo mugati kany kede deknam are nogo, en eko neno malo, di eko pwono Rubanga, eko tuturo gi, di eko mino gi but josiao mege pi popoko ne ekodet me jo.

¹⁷Jo dedede oko cam di kiko yeng. Josiao oko koko cam kame oudo odong oko pongo ibukito tomon kiwie are.

Kop kame Petero Otuco i kom Yesu

(Matayo 16.13-19; Marako 8.27-29)

¹⁸Ceng moro acel di Yesu oudo tie ilega en kene, josiao mege da oudo tie kede kanono, en eko penyo gi be, “Kara ber jo waco be ango en ngai?”

¹⁹Gin kiko dwoko ne be, “Mogo waco be in en Yokana Ngaibatis, mogo be Elia, kede mogo waco be in ibedo ngat acel kikom inabin kasek kame nan oyaruno.”

²⁰En eko penyo gi be, “Do wun iwacunu be ango en ngai?” Petero oko dwoko ne be, “In en Kirisito ka Rubanga.”

Yesu Owaco Kop kame mako Can kede To mere

(Matayo 16.20-28; Marako 8.30—9.1)

²¹Yesu oko ciko gi kitek be kur kiwac ne ngatamoro kop noni.

²²En eko waco ne gi be, “Wot ka dano miero bei i can atos; di joadongo me piny, jodongo me josaserodoti kede jopwony me Iswil ko bino dage, di kiko neke da. Ingei ceng me adek, di oko bino yaruno en.”



²³ Kikano di do en eko waco ne gin dedede be, “Ka dano moro mito luba, poore kong en edagere kene, di eko riongo musalaba mere ceng dedede, di do en eko luba.

²⁴ Pien ngat kame mito lako kuo mere, ebino rwenye, do ngat kame rwenyo kuo mere pi bedo ngat kame luba, ebino lake.

²⁵ Kara bero nyo kame dano twero udo ka eudo gi dedede kame cunye mito i piny kan, do di eko kei kuo mere?

²⁶ Pien ngat kame nan lewic make i koma, kede pi kop na, Wot ka dano da lewic bino make i kome i kare kame ebino dwogo kede di etie i deyo mere, kede i deyo ka Papa mere, kede me imalaikan kacil.

²⁷ Ateteni ango awaco ne wu be, tie jo mogo kame nan tie kan, kalikame bino bilo to tuno di kineno Ajakanut ka Rubanga.”

Cal ka Yesu Olokere

(Matayo 17.1-8; Marako 9.2-8)

²⁸ Di do oromo bala ceng kanyauni ingei en waco kope nogi, Yesu oko kwanyo Petero, kede Yokana, kede Yakobo, di kiko ot yito malo i wi moru pi lego.

²⁹ Kakame en oudo etie kede ilega, cal me nyime oko lokere. Di igoen mege oko doko tar liamaliam.

³⁰ Gin kiko neno cuo mogo are, Elia kede Musa di tie yamo kede Yesu.

³¹ Gin bin kinyutere kede deyo, di kiyamo kede Yesu kop me to mere kame miero oudo ecobi i Yerusalem.

³² Petero kede jowote oudo nino obwono, omio kiko nino. Do kakame kicei kede, kiko neno deyo ka Yesu, kede cuo are kame oudo tie cungo kede en.

³³ Esawa kame cuo nogo do oudo tie yai kede kibus Yesu, Petero oko waco ne Yesu be, “Adwong, eber pi wan bedo tie kan; wek do wan oger kimere adek kan, acel ne in, acel ne Musa, kede ace ne Elia.” Oudo Petero likame ngeo gikame etie waco.

³⁴ Di pwodi oudo etie yamo, edou oko bino di oko umo gi pukupuk; lworu oko mako josiao kakame oudo edou tie umo gi kede.

³⁵ Dwan oko wok ki edou di waco be, “Man en Woda, mera kame ayero; winyenu!”

³⁶ Kakame do dwan otieko winyere kede, Yesu do oko dong kene. Josiao oko ling kede kop noni di likame kiko waco ne ngatamoro i kare nono gikame oudo kineno.

Yesu Ocango Awobi kame tie kede Tipo Arac

(Matayo 17.14-18; Marako 9.14-27)

³⁷ Oru mere, di Yesu otieko wok do piny ki wi moru nono karacel kede josiao mege nogo, en eko riamo kede ekodet adwong me jo.

³⁸ Icuo acel oko redo kitek i dier ekodet di ewaco be, “Apwony, akwai ipar pi woda, piento en ebedo atin na acel kenekene.



³⁹Tipo arac make di ko donyo mine koko kitek, di ko rete piny, di ko mine edonyo akwekwetun di buo kuaa ki doge. Tipo nono ko tieko teko ki kom atin di likame eko bunyo weke.

⁴⁰Ango oudo akwao josiao ni be koto kiriamе tenge, do likame kiko twero.”

⁴¹Yesu oko dwoko ne gi be, “Wun lwak koparao me i kare ni, jo kame li kede yei, miero abed kede wu pi kare kame rom amene di akanyakino kede wu?” En eko waco ne icuo nono be, “Kel wodi nono kan.”

⁴²Do di pwodi awobi nono oudo tie bino, jwogi nono oko rete piny, di oko mine edonyo akwekwetun. Do Yesu oko coko tipo arac nono, di eko cango awobi nono, di do eko dwoke i cing papa mere.

⁴³Jo dedede oko bedo kede ur atek i kom twer ka Rubanga.

Yesu Bobo Owaco Kop kame mako To mere

(Matayo 17.22-23; Marako 9.30-32)

Do di pwodi jo dedede oudo tie uro gi dedede kame Yesu otimo, en eko waco ne josiao mege be,

⁴⁴” Miunu kope nogi dony i yitu, pien kobino mino Wot ka dano i cing jo.”

⁴⁵Do josiao mege likame oko niang kop noni; pien oudo kokano dwong mere kibun gi tetekey kur kingei; doko da lworu oudo omako gi penyо Yesu kop noni.

Ngai en kame Pire Dwong Kalamo?

(Matayo 18.1-5; Marako 9.33-37)

⁴⁶Piem oko cakere i dierediere me josiao pi mito ngeno ngai en kame pire dwong kalamo kikom gi.

⁴⁷Kakame Yesu oniang kede gikame gin oudo kitie paro i cuny gi, en eko kwanyo atin atitidi, di eko mino ocungo i ngete.

⁴⁸En eko waco ne gi be, “Ngat kame gamo atin atitidi kaman i nyinga, udo en egama; doko ngat kame gama, udo egamo ngat kame oora, pien ngat kalikame pire tek i diere wun dedede en kame pire dwong kalamo.”

Ngat kalikame Ngakwor Wu udo en Meru

(Marako 9.38-40)

⁴⁹Yokana oko waco ne be, “Adwong, wan oko neno icuo moro da di tie riamo jwogi i nyingi, do wan oko genge, piento en oudo likame ebedo ngat acel kikom wan jo kame olubi.”

⁵⁰Do Yesu oko dwoko ne gi be, “Kur igengenu, pien ngat kalikame ngakwor wu, udo en meru.”

Jo me Calo me Samaria Odagi Gamo Yesu

⁵¹Di do bin kare onoko me tere malo, Yesu oko do moko tam mere pi ot Yerusalem.



⁵²En eko oro jo okato anyim. Jo nogo bin oko ot kiko donyo i calo moro me Samaria pi koto iiko ne Yesu gi dedede cuto.

⁵³Do jo me kuno oko daga game, pien oudo gin kitieko ngeno be Yesu oudo tie i yongayo mere me ot Yerusalem.

⁵⁴I kare kame josiao mege, Yakobo kede Yokana, oneno kede gi noni, kiko waco ne be, “Rwot, benyo, imito be olwong mac ki malo bin piny kan wang jo nogi?”

⁵⁵Do Yesu oko lokere oko koko gi. (En ewaco be, “Wun likame ingeunu epone me Tipu kame itienu kede, pien Wot ka dano likame obino pi tieko kuo me jo, do pi lako gi.”)

⁵⁶Di do Yesu karacel kede josiao mege oko ot i calo apat.

Jo kame Oudo Poore Lubo Yesu

(Matayo 8.19-22)

⁵⁷Di do bin Yesu kede josiao mege tie ot, icuo moro oko waco ne be, “Ango abino lubi kabedo dedede kame in ibino ot iye.”

⁵⁸Do Yesu oko waco ne be, “Ekwee tie kede bur me buto, winy me itela da tie kede ude gi, do Wot ka dano li kede kakame eromo pielo iye wie.”

⁵⁹Doko en eko waco ne dano ocelu da be, “Luba.” Do icuo nono oko waco ne be, “Rwot, weka ber aoti ayik papa na.”

⁶⁰Do Yesu oko dwoko ne be, “Wek jo oto en kame yik joe gi oto; do in ot itatamo kop i kom Ajakanut ka Rubanga.”

⁶¹Bobo ngat acel da oko waco ne be, “Ango ayaro lubi Rwot; do weka ber kong aoti amot jo me tura.”

⁶²Yesu oko waco ne be, “Likame tie ngat kame mako kwerudiang di bobo engoloro cen, kame opoore pi donyo i Ajakanut ka Rubanga.”

Luka 10

Yesu Ooro Jo Ot Kanyaare kiwie Are

¹Ingei mano, Rwot oko yero jo ace ot kanyaare kiwie are di eko oro gi are are pi kato anyim i bomban kede i adulion acelacel kame en oudo eyaro ot iye.

²En eko waco ne gi be, “Kac tie dwong, do jotic nonok; pi mano legunu me wek Rwot won kac cwai jotic i kac mere.

³Do wun otunu, ango atie oro wu bala romini i diere me ipeon.

⁴Kur imakunu isau moro me sente, akadi ikapu moro, amotoko amuka; doko kur imotunu ngatamoro i yongayo.

⁵Doko kame iyarunu donyo i ot moroni, cakunu kong waco be, ‘Mulem bed i ot ni.’



⁶Ka dano kame maro mulem tie i ot nono, mulem wu bino dong i kome; aso ka li, mulem wu bino dwogo butu.

⁷ Doko bedunu i ot nono erume, di icamunu doko di imatunu gikame komio wu kiye; pien kopooore culo ngatic pi tic mere. Do kur idonyunu kokobo akokob ki ude.

⁸Doko kame itiekunu donyo i bomba moroni di kiko gamo wu, camunu gikame koketo i nyimu;

⁹cangunu jotuwu kame tie kuno, di ikounu waco ne jo kame tie kuno be, ‘Ajakanut ka Rubanga do otieko doko iyapiyapi kede wu.’

¹⁰ Do kame idonyunu i bomba moroni di likame oko gamo wu, otunu i yote mege di ikounu waco be,

¹¹’ Kiton apua me bomba wu da kame oudo omoko i tien wa, wan otengo gi pi bedo bala ijura kame pido wu; doko da poore ingeunu be, Ajakanut ka Rubanga do otieko doko iyapiyapi.’

¹² Awaco ne wu ateteni be, i ceng me ngolo kop, can me Sodoma bino bedo twaratwara kalamo can me bomba nono.

Bomban kame Odagi Yei

(Matayo 11.20-24)

¹³ “Can nin bino bedo dwong benyo in Korasin! Doko can nida bino bedo dwong benyo in Betesaida! Pien ka koto tice me twer kame bin kotimo i diere wu oudo kotimo Taya kede Sidon, oudo koto jo me kuno bin otieko swilaro sek, di kingapo giangapa me iturur.

¹⁴Do i ceng me ngolo kop Rubanga bino bedo kede kisa but jo me Taya kede Sidon kalamo butun.

¹⁵ Aso in Kaperanaum, mam in oudo iparo be kobino tingi malo? In kobino dwoki piny i kabedo me jo oto!”

¹⁶ Yesu oko waco ne joor mege be, “Ngat kame yei winyo kop wu, udo ewinyo kop nango, doko ngat kame dagi wu, udo edagi ango, kede ngat kame dagi ango, udo en edagi ngat kame oora.”

Dwogo me Jo Ot Kanyaare kiwie Are

¹⁷Jo ot kanyaare kiwie are nogo oko dwogo kede kilel adwong di kiwaco be, “Rwot, kiton jwogi da oudo winyo wa pi nyingi.”

¹⁸Yesu oko waco ne gi be, “Ango aneno Sitani di poto ki malo bala meny me kot.

¹⁹ Winyunu ber! Ango atieko mino wu twer me nyono twole kede ikilitona, kede me lono twer dedede me ngakwor, di likame gimoro ko twero mino wu awanon.

²⁰Do akadi kamano da, kur ilelunu pi man, be pien tipere areco owinyo wu, do lelunu pien kotieko wandiko nying wu i malo.”

Yesu Olelo



(Matayo 11.25-27; 13.16, 17)

²¹Iesawa nono, Yesu oko lelo i Tipo Kacil di eko waco be, “Apwoyi, Papa, Rwot me malo kede lobo, pien in ikano gigi kibus jorieko kede joaniang, do iko nyuto gi ne idwe atino. Ebo, Papa, manono en epone kame in oudo imito be etimere kede.

²² “Papa na otieko mina gi dedede i cinga; likame tie ngatamoro kame ngeo Wod, kwanyo kenekene Papa; doko likame tie ngat kame ngeo Papa, kwanyo kenekene Wod, kede jo kame Wod yero pi nyuto ne gi Papa.”

²³Yesu oko lokere but josiao mege, di eko waco ne gi i mung be, “Etie kede winyo ngat kame wange neno gikame wun inenunu.

²⁴Pien awaco ne wu be, inabin atot kede abakai da oudo bin mito neno gikame wun inenunu, do likame kiko neno; doko oudo kimito winyo gikame wun iwinyunu, do likame kiko winyo.”

Agole me Ngasamaria Aber

²⁵ Ngapwony me Iswil oko yai malo pi tamo Yesu di ewaco be, “Apwony, nyo kame apoore timo pi udo kuo kame bedo nakanaka?”

²⁶Yesu oko penye be, “Nyo kame kowandiko i Iswil? Esomere benyo?”

²⁷ En eko dwoko be, “Mar Rwot Rubanga ni kede cunyi dedede, kede kuo ni dedede, kede teko ni dedede, kede tam ni dedede; di iko maro ngakio ni bala kite kame imaro kede komi keni.”

²⁸ Yesu oko dwoko ne be, “Idwoko kiber; nan ida do tim kamanono di iko bino kuo.”

²⁹Do ngapwony me Iswil nono, pi mito nyuto be en eber, en eko bobo penyo Yesu be, “Do ngakio na en ngai?”

³⁰Yesu oko dwoko ne be, “Oudo bin tie icuo moro kame owok ki Yerusalem etie ot Jeriko, en eko riamo kede joyak. Jo nogo oko tako igoen ki kome di kiko bunge, di kiko ot kiweke di ewile.

³¹Kikano Ngasaseredoti oko ngoole di elubo yongayo acel nono, do kakame eneno kede icuo nono, en eko dapu ki tenge.

³²Ngalebi da oko bino iepone acel nono, do kakame etuno kede kuno, en eko neno icuo nono, eda eko dapu ki tenge.

³³ Do Ngasamaria moro oko bino, di eda oudo etie i sapali mere; kakame etuno kede i nget icuo nono, en enene di eko bedo kede cuny me kisa i kome,

³⁴en eko ot bute di eko donyo twetweo aporeso mege, di eonyo iye mo kede bwini. En eko do tingo icuo nono eketo i wi asigira mere, di eko tere i ot kame kodaro kiye wele, en eko donyo gwoke ki kuno.

³⁵Oru mere en eko kwanyo denari mege are, di eko mino ngat kame daro ot me wele di ewaco ne be, ‘In gwok dano no kiber, do ka cul mere okalamo, ango abino dwogo ako culi sente korem.’ “



³⁶Yesu oko penye be, “Nan do in iparo be ngai kikom jo adek go en kame obedo ngakio me ngat kame joyak obungo nono?”

³⁷Ngapwony me Iswil nono oko dwoko be, “Ngat konyuto cuny me kisa bute.” Yesu oko waco ne be, “Ida oti itim kamanono.”

Yesu Owelao Marita kede Maria

³⁸Di oudo kitie ot, Yesu oko donyo i calo moro, di dako moro kame nyinge Marita oko game i ode.

³⁹Marita oudo tie kede amin mere kame nyinge Maria, kame oudo tie bedo piny i tien Yesu di ewinyo pwony mere.

⁴⁰En oudo tic me gwoko wele odie; omio eko ot but Yesu di eko waco ne be, “Rwot, mam in likame iparo be amina ni oweka timo tice kena? Wac ne ber ebin ekonya.”

⁴¹Do Rwot oko dwoko ne be, “Marita, Marita, in kom itie kede par kede lole pi gi atot;

⁴²do gi acel kenekene en kame mitere; Maria otieko yero gikaber kalikame kobino kwanyo tenge kibute.”

Luka 11

Yesu Omio Pwony kame mako Ilega

(Matayo 6.9-13; 7.7-11)

¹Ceng moro acel Yesu oudo tie lego i karamoro. Kakame etieko kede lego, ngat acel kikom josiao mege oko waco ne be, “Rwot, pwony wa epone kame opoore lego kede, bala kite kame bin Yokana da opwonyo kede josiao mege.”

²En eko waco ne gi be, “Kame itienu ilega, wacunu be, ‘ Papa, nyingi bed me awora. Wek Ajakanut ni bin.

³Mi wa ceng acelacel cam wa me buli ceng.

⁴Sasiro wa ki dub wa, bala kame wada osasiro kede jo dedede kame timo ne wa kirac. Kur iwek wa opot i atama.’ “

⁵Yesu oko waco ne josiao mege be, “Ka koto itie kede ngawoti di iko yai ot bute i dier iwor, di iko waco ne be, ‘Diera, akwai ber imia mugati adek,

⁶pien ngawota moro nan ongoole na, do ali kede giacama moro kame aromo mine.’

⁷Di do dieri nono ko dwoko ni di etie i ode be, ‘Kur ilola! Ango atieko cego ekeko, doko ango karacel kede idwe na otieko buto. Ango likame bobo atwero yai pi mini gimoro! ‘

⁸Amito waco ni be, akadi kono lono dagi yai pi mini gikame in imito be pi in ibedo adieru mere, do en eyaro yai di eko mini gikame in imito, pien udo icobuno en.



⁹” En komio ango awaco ne wu be: kwaunu, kobino mino wu; mounu, ibinunu udo; kukungunu ekeko, kobino yabo ne wu.

¹⁰Pien ngat kame kwao, komie; ngat kame mo, eudo; doko ngat kame kukungo ekeko, kobino yabo ne.

¹¹Ngai kikom wu ka atin mere openye deknam en emio twol?

¹²Arabo ka atin mere okwae abe, en emio ekiliton?

¹³Aso, ka do ber wun jo areco ingeunu mino idwe wu giamia abeco, do kalamo mano tien adi en kame Papa wu kame tie i malo bino mino kede Tipo Kacil but jo kame kwae?”

Yesu kede Belsebul

(Matayo 12.22-30; Marako 3.20-27)

¹⁴Yesu oudo tie riamo jwogi kame lebe oto; kakame jwogi nono oyai kede tenge, icuo kame oudo lebe oto nono oko do cako yamo, di ekodet oko uro twatwal.

¹⁵ Do jo mogo kikom gi oko waco be, “Kom eriamo jwogi kede twer kowok kibut Belsebul, ngadwong me jwogi.”

¹⁶ Do jo mogo kikom gi oudo mito tamo Yesu, omio kiko penye be emi gi gianena moro kame yai ki malo.

¹⁷Do pien Yesu oudo ngeo tam gi, omio en eko waco ne gi be, “Ajakanut acelacel kame pokere, di kiko donyo dagere, likame karuno cungo; doko da, paco kame jo opokere kiye di kiko donyo dagere, paco nono tur.

¹⁸Doko ka Sitani dagere kede Sitani, ajakanut mere twero cungo benyo? Pien wun iwacunu be Belsebul en kame mio ango twer me riamo jwogi.

¹⁹Do nan ka Belsebul en kame mio ango twer me riamo jwogi, idwe wun do udo twer me riamo gi kibut ngai? Pi mano, idwe wun en kame bino do ngolo ne wu kop.

²⁰Do ka twer ka Rubanga en kame mio ango ariamo jwogi, udo do Ajakanut ka Rubanga otieko tuno butu.

²¹” Aso, ka dano atek, kame tie kede jame me yi kame romo odaro ode kiber, jame mege bedo i mulem.

²²Do ka ngat atek loe osure di oko bwone, en etero jame me yi kame oudo en egeno nogo dedede, di eko popoko jame kame eyako nogo.

²³ “Ngat kalikame tie keda, udo edaga; doko ngat kalikame koko keda, udo en esasaro.

Dwogo me Tipo Arac i kom Dano

(Matayo 12.43-45)

²⁴” Kame tipo arac otieko do yai ki kom dano, ebeo i adulion otuo di emo kakame eromo wei iye. Do ka likame eudo, en ewaco be, ‘Ango ayaro dok i oda kame awok kiye.’



²⁵Kame en edwogo, ebino udo ode no di koweo yie, doko di koike kiber.

²⁶Di do en eko ot di eko kelo tipere kanyaare icegun areco kalamo en, gin kiko donyo di kiko bedo kuno; di kuo me dano no ko bino doko rac kalamo kite kame oudo etie kede i agege.”

Yomcuny me Ateni

²⁷Ingei tieko yamo mere, dako moro bin oko woto dwane ki dier ekodet di ewaco be, “Etie kede winyo dako konywali kede kodoti.”

²⁸Do Yesu oko dwoko be, “Do kame kalamo mere, kitie kede winyo jo kame winyo kop ka Rubanga di kiko lubo!”

Kopenyo Yesu pi Timo Giaura

(Matayo 12.38-42)

²⁹Di oudo ekodet tie meede doko dwong, Yesu oko cako waco ne gi be, “Jo me i kare ni obedo jo kame timo tim areco; gin kimito gianena, do likame tie gianena moro kame koyaro mino gi, kwanyo kenekene gianena kotimere ne Yona.

³⁰Pien bala kite kame riki Yona obedo kede gianena but jo me Ninebe, Wot ka dano da bino bedo kamanono ne jo me i kare ni.

³¹I ceng me ngolo kop, abaka adako me tetu piny bino cungo kede jo me i kare ni di en eko pido gi, piento en bin eyai ki ajikini me lobo kakabor, pi bino winyo kop me rieko kibut Abaka Sulumani; do nenunu otienu kan kede ngat kame pire tek kalamo Sulumani.

³²I ceng me ngolo kop, jo me Ninebe bino cungo di kipido jo me i kare ni; pien gin bin kiko swilaro i kare kame kiwinyo kede kop kame Yona otatamo; aso di nan ngat kame pire dwong kalamo Yona tie kan.

Lero me Kom

(Matayo 5.15; 6.22-23)

³³“Likame tie dano moro kame cwinyo etala di eko kano, arabo eko umo kede ebukit; do eketo kakame idelelei tetekeny jo kame donyo i ot twer neno lero.

³⁴Wangi tie bala etala me komi. Ka wangi tie kiber, komi dedede do udo tie i lero; do ka wangi odubere, komi dedede udo do tie i colo.

³⁵Pi mano, poore igwokerenu, wek lero kame tie i komu kur lokere dok colo.

³⁶Ka komi dedede tie kede lero, di likame tie karamoro kiye kame tie i colo, en dedede ebino rieny bala kite kame etala kede asara mere rieny kede eko mini lero.”

Yesu Owaco Raco me Iparisayon kede Jopwony me Iswil

(Matayo 23.1-36; Marako 12.38-40)

³⁷I kare kame Yesu otieko kede yamo mere, Ngaparisayo moro oko lwonge cam; di do eda eko donyo i ot di eko bedo piny kacam.

³⁸Do Ngaparisayo nono oko uro twatwal pi neno Yesu di ocako cam abongo lwoko cinge.



³⁹Di Rwot oko waco ne be, “Wun Iparisayon ilwokunu ngei ikopo kede ngei bakuli, do di cunyu opong kede amao kede gikareco.

⁴⁰Wun jomingo! Mam ngat kotimo ooko en kotimo kiton yie da?

⁴¹Do miunu gikame tie i ikopon kede i bakulin bala giamia but jocan, di gi dedede ko doko cil di lubere kede kwer wu.

⁴² “Do itienu i can wun Iparisayon! Piento wun imiunu acel me tomon me otigo kede amalakwang, kede epone me deke angweda dedede, do di likame iparunu pi ateni kede amara ka Rubanga; magi en gikame oudo wun koto ipoorenu timo abongo weko apat.

⁴³” Itienu i can wun Iparisayon; pien wun imarunu bedo i komini me wor i sinagogan, kede be di jo moto wu kede wor i atalen.

⁴⁴Itienu i can! Pien icalunu bala atesin kalikame neeno, kame jo beo ki wi gi di likame kingeo.”

⁴⁵Ngat acel kikom jopwony me Iswil oko dwoko ne be, “Apwony, kame iyamo kamano, udo inywaro wada.”

⁴⁶Di Yesu oko dwoko be, “Itienu i can wuda jopwony me Iswil! Pien wun idiunu jo yeno yec apek kalikame kitwero yeno, do di likame tie ngatamoro kikom wu kame rieo akadi lwete acel me mulo yec nogo.

⁴⁷Itienu i can pien wun igerunu atesin me inabin kame joakwari wu bin oneko.

⁴⁸Pi mano, wun kikomu itienu ijurak, doko iyeunu kede tice kame bin joakwari wu otimo; pien gin bin kineko inabin, di nan wun ikounu gero atesin gi.

⁴⁹Pi mano, rieko ka Rubanga da bin owaco be, ‘Abino cwano ne gi inabin kede joor, mogo kikom gi gin kibino tidilo di kiko neko da, ‘

⁵⁰tetekeny remo me inabin dedede kame bin oony cako ki agege me cweno piny, wek mari i wi jo me i kare ni,

⁵¹ cako ki remo ka Abel, tuno kede i remo ka Sakaria, kame bin koneko i dierediere me alutari kede kabedo kacil me tempulo. Ebo, ateteni awaco ne wu be, kobino culo kwor nono i kom jo me i kare noni.

⁵²” Itienu i can wun jopwony me Iswil! Pien wun ikanunu isumilito kame yabo ekeko me ngec, do wuda kikomu likame ikounu donyo iye, doko ikounu gengo jo kame oudo tie donyo iye da.”

⁵³Kakame Yesu oyai kede ki kuno di do etie ot, jopwony me Iswil kede Iparisayon oko cako dine kitek di kipepenyo en kope atot,

⁵⁴di oudo kimomoo kope me doge pi mito make kede.

Luka 12

Yesu Omio Ikwenyar i kom Ecuke



(Matayo 10.26-27)

¹ I kare no di ekodet me jo kame oudo romo tutumian kede tutumian ocokere karacel, kame oko mino oudo do kitie nyonyono jo icegun; me agege mere, Yesu oko cako waco ne josiao mege be, “Gwokerenu kikom arup me Iparisayon, kame obedo ecuke gi.

² Likame tie gimoro kame koumo, kalikame kobino nyuto kakaler, doko likame tie gimoro kame kokano kalikame bino ngere.

³ Pi mano, gimoroni kame iyamunu i kakacol, kobino winye i lero, doko kope kame iweweunu i mung i agola, kobino tatamo gi ki wi ude.

Ngat kame Poore Alwora

(Matayo 10.28-31)

⁴ Jowota, awaco ne wu be, kur ibedunu kede lworu i kom jo kame neko kom, di likame kiko twero doko timo gimoro ingei mano.

⁵ Do ango ayaro kwenyaro wu i kom ngat kame poore ilworunu: lworunu Rubanga, ngat kame ingei neko etie kede twer me uco i mac kalikame to. Ebo, awaco ne wu be lworenu!

⁶ Mam omobilo kany kocato pi siringi are? Do di likame tie acel moro kikom gi kame wi Rubanga wil kede.

⁷ Kiton yer me wi wu da kotieko maro. Kur ibedunu kede lworu moro; pien wun piru tek kalamo omobilo atos.

Tuco Yei i kom Kirisito kede Dage

(Matayo 10.32-33; 12.32; 10.19-20)

⁸ Aniango wu be, ngat acelacel kame tuco i nyim jo be en ebedo ngat kame luba, Wot ka dano da bino tuco be en engee i nyim imalaikan ka Rubanga;

⁹ do ngat kame bino daga i nyim jo, Wot ka dano da bino dage i nyim imalaikan ka Rubanga.

¹⁰ “Doko ngat acelacel kame yamo kop arac i kom Wot ka dano, kobino sasiro en, do ngat kame yamo kop me anywar i kom Tipo Kacil, likame kobino sasiro en.

¹¹ “Doko kame kikelu wu pi pido wu i sinagogan, arabo i nyim jotel, amotoko i nyim wegii twer, kur ibedunu kede par i kom gikame ibinunu dwoko, arabo epone me dwoko, amoto gikame ibinunu waco;

¹² pien Tipo Kacil bino pwonyo wu iesawa nono gikame ipoorenu waco.”

Agole me Ngabar Aming

¹³ Icuo acel oko waco ki dier ekodet be, “Apwony, wac ne omina pok keda jame kame wan osikao.”

¹⁴ Do Yesu oko dwoko ne be, “Ngawota, ngai en komia twer me bedo ngangolkop arabo ngat kame poko ne wu jame?”



¹⁵Di en eko waco ne gi be, “Gwokerenu ki kom par dedede pi jame; pien likame kuo me dano cungo i kom rom me jame kame en etie kede.”

¹⁶Di Yesu oko tatamo ne gi agole moro be, “Lobo me icuo ngabar moro bin oceko ne cam atot adikinicel;

¹⁷en eko donyo do paro i cunye kene be, ‘Abino timo benyo? Pien likame tie karamoro kame aromo keto iye cam na gi dedede.’

¹⁸Di do en eko waco be, ‘Ango nan do abino timo kaman, ayaro tuturo dere na gi, di ako gero adongodongo mege, en kame ako do koko iye cam na kede jame na dedede.

¹⁹Di do ako waco i cunya kena be, nen atie do kede jame dedede abeco kame amito pi mwakini atot. Wek do aud alakanar, acami, doko amati, di ako bedo kede yomcuny.’

²⁰Do Rubanga oko waco ne be, ‘Ngamingo, iwor me tin noni komito kwanyo kuo ni; nan do jame kame in idiato go bino bedo me ka ngai? ’ ”

²¹Di do Yesu oko ngetakino yamo mere di ewaco be, “Gi noni en kame bino timere ne dano kame diato abar mere pire kene, do di likame ebaro i nyim Rubanga.”

Bedo kede Gen i kom Rubanga

(Matayo 6.25-34)

²²Di Yesu oko waco ne josiao mege be, “Pi mano, ango awaco ne wu be, kur ibedunu kede par pi kuo wu, pi gikame ibinunu camo, arabo pi komu, pi gikame ibinunu ngapo.

²³Pien kuo pire tek kalamo cam, doko kom pire tek kalamo giangapa.

²⁴Nenunu ber agak, gin likame kicuo kodi, doko likame kikao da; gin ki li kede ude me kano cam arabo dere, do Rubanga pito gi. Do wun piru tek kalamo winy tien adi!

²⁵Ngai ber kikom wu, pi bedo kede par atot, etwero medo ceng mege me kuo? ²⁶Ka ber in likame itwero timo gikame titidi no, pinyo kame mio ibedo kede par pi jame ace?

²⁷Neningo ber kite kame ature me itela dongo kede; gin likame kipuro, doko likame kiwio ausi. Do awaco ne wu be, akadi Abaka Sulumani kede deyo mere dedede oudo likame ngapere bala ature nogo.

²⁸Aso, ka Rubanga ngapo lum kame kuo i itela tin, diki di doko oko wango gi i mac, nan do ebino ngapo wu kalamo gin tien adi. Yei wu tin nok benyo!

²⁹” Pi mano, kur ibedunu mono giacama kede giamata, doko kur ibedunu kede par i cunyu.

³⁰Pien atekerin me piny mo gi nogi, doko Papa wu ngeo be wun imitunu gi nogi.

³¹Do akaka mano, mounu kong Ajakanut ka Rubanga, di do gigi da ko bino bedo megu.

Abar kame tie i Malo

(Matayo 6.19-21)



³²” Kur ibedunu kede Iworo, in ekodet atitidi, pien Papa wu tie kede yomcuny pi mino wu Ajakanut.

³³Catunu jame wu di ikounu konyo kede jocan; bedunu kede isaun kalikame twero ti me sente, di ikounu kano abar wu malo kakame kei li kiye, kakame ngakuwo likame twero tuno iye, akadi ajekel da likame twero dubo gi kiye.

³⁴Pien kakame abar ni tie iye, en kame cunyi da bino bedo iye.

Jotic kame Kio Piny

³⁵ “Bedunu di itiekunu iikere pi tic, doko di italan wu tie liel,

³⁶ di itienu bala jo kame tie kuro dwogo me ngadwong gi ki ebaga me nyom, tetekeyn kame edwogo di eko kukungo ekeko, kitwero yabe oyotoyot.

³⁷Kitie kede winyo jotic kame ngadwong gi bino dwogo di eko udo gi di kineeno; ateteni awaco ne wu be, en ebino dolo egoe mere etweo i piero di eko mino gi kibedo piny kacam, di eko poko ne gi cam.

³⁸Jotic nogo tie kede winyo ka ngadwong gi nono bino udo gi di kitieko iikere, akadi edwog i dier iwor amotoko obai.

³⁹ Do miero ingeunu be, koto di oudo won ot ngeo esawa kame ngakuwo oyaro bino kede, oudo koto egwokere di likame eko weko koturo ode.

⁴⁰En komio wuda miero ibedunu di itiekunu iikere, pien Wot ka dano bino ngoole dwogo iesawa kame wun likame ingeunu.”

Ngatic Agenere amoto kalikame Genere

(Matayo 24.45-51)

⁴¹Petero oko penyo Yesu be, “Rwot itie yamo agole noni pi wan kenwa, arabo pi jo dedede?”

⁴²Rwot oko dwoko ne be, “Ngai ber en kame ngagwok kame genere doko di eriek, kame ngadwong mere kete daro ode kede jame dedede kame tie iye, pi mino jotic icegun cam iesawa kopooore?”

⁴³Etie kede winyo ngatic nono ka ngadwong mere bino dwogo ko ude di etie timo kamanono.

⁴⁴Ateteni awaco ne wu be, en ebino keto ngatic nono pi lono jame mege dedede.

⁴⁵Do ka ngatic nono oko cako yamo i cunye kene be, ‘Ngadwong na likame oyaro dwogo sek, ‘di do en eko cako bungo jotic icegun acuo kede amon, di eko donyo gire cam kede amata di emer,

⁴⁶ngadwong me ngatic nono bino ngoole dwogo i ceng kalikame en egeno be eromo dwogo iye kede iesawa kame en ekwia, di eko bino mine alola atek di eko ribe i kom jo kalikame genere.

⁴⁷” Doko ngatic kame oudo ngeo gikame ngadwong mere mito, do di likame en eko iikere arabo timo, kobino bunge adikinicel.



⁴⁸Do ngatic kalikame oudo ngeo gikame ngadwong mere mito, di en eko donyo timo gikame romo mino kobunge, kobino bunge momot. Pien ngat kame komio atos, kobino penyoto atos da kibute; doko ngat kame kogeno kede atos, kobino da penyoto atos kalamo kibute.”

Yesu Okelo Apokapoka

(Matayo 10.34-36)

⁴⁹Di Yesu oko waco be, “Ango abino pi kelo mac i lobo, do oudo amito be koto nan di etieko cako liel.

⁵⁰Ango atie kede batisimu kame kopooore batiso ango kede, do cunya li kede anapakin tuno kede di etieko cobere!

⁵¹Iparunu be ango abino pi kelo mulem i lobo? Awaco ne wu be li gire, kom ango akelo apokapoka.

⁵²Pien cako nan, paco kame jo tie iye kany bino pokere, jo adek bino dago jo are, di jo are da ko bino dago jo adek.

⁵³Papa bino dago wode, doko awobi da bino dago papa mere; toto bino dago nyare, di nyako da ko dago toto mere. Toto me awobi bino dago dako ka wode, doko dako me awobi da bino dago toto me cware.”

Ngeno Kare

(Matayo 16.2-3)

⁵⁴Doko Yesu oko waco ne ekodet me jo be, “Ka wun inenunu idoun di tingere malo ki tetu potoceng, esawa nono di icakunu waco be, ‘Kot oyaro cwei’ ; doko di eko cwei da.

⁵⁵Doko ka inenunu yamo kame buko di wok ki tetu piny, iwacunu be, ‘Piny do oyaro doko liet’ ; doko di eko timere da.

⁵⁶Wun joecuke! Ingeunu gonyo dwong me gikame tie timere ka inenunu cal me malo kede me piny, do pinyo ber komio likame itwerunu neno kare noni di ikounu ngeno gonyo dwong me gikame tie timere?”

Poro Kop kede Ngat kame tie Pidi

(Matayo 5.25-26)

⁵⁷Yesu doko oko waco be, “Pinyo ber komio likame wun itwerunu ngeno poko gikaber?”

⁵⁸Ka itie ot i nyim ngangolkop di itie upere kede ngat kame tie pidi, tamakino kede teko pi ber poro kede kop i yongayo me wek kur eteri i nyim ngangolkop, di ngangolkop ko mini i cing sirikale kame ko bino rwaki i otkol.

⁵⁹Awaco ni ateteni be, likame ibino wok ki kuno tuno kede di iculo sente dedede kame kotangi kede.”

Luka 13

Ka likame Iswilarunu ibinunu To



¹I kare nono oudo jo mogo tie kuno, gin kiko waco ne Yesu kop i kom Jogonalilaya mogo kame bin Pilato oudo omio koneko, di oko nyalo remo gi kede giayala gi.

²Di Yesu oko penyo gi be, “Iparunu be Jogonalilaya nogi oudo obedo jodubo twatwal kalamo Jogonalilaya icegun, komio kineno can kamano?”

³Ango awaco ne wu be, likame kamano; pi mano ka likame iswilarunu, wuda dedede ibinunu to kamanono.

⁴Arabo jo tomon kiwie kanyauni kame bin gedo abor malo me Siloam opoto i kom gi oko neko gi; iparunu be mano bin otimere pien gin do oudo kibedo jodubo areco kalamo jo dedede kame bin bedo Yerusalem?

⁵Ango awaco ne wu be, likame kamano; aso ka likame iswilarunu, wuda dedede ibinunu to kamanono.”

Agole me Yat Epigi kalikame Nyak

⁶Di Yesu oko tatamo ne gi agole ni be, “Oudo tie icuo moro kame opito yat epigi i potu mere; en eko bino mono anyakini mogo kiye, do likame eko udo moro.

⁷En eko waco ne ngatic me potu mere nono be, ‘Neningo, oromo nan mwakini adek di ango abino mono anyakini ki yat epigi no, do likame audo moro. Nan do tonge piny; pinyo komio edong dubo lobo.’

⁸Do ngatic me potu nono oko dwoko ne be, ‘Adwong, likame kamano, weke ber bobo ebed pi mwaka ni do kenekene, ango ber kong abok lobo mogo i dude kede aony bolia moro i dude.

⁹Ka en eko nyak mwaka no, udo ber; do ka li, iko bino do tonge piny.’ “

Yesu Ocango Angwalas Ceng Sabato

¹⁰Ceng Sabato moro acel, Yesu oudo tie pwony i sinagoga.

¹¹Dako moro oudo tie kuno kame tipo areco oudo omio angwal pi mwakini tomon kiwie kanyauni; en oudo ekude di likame bobo etwero cungo di eriere da.

¹²Kakame Yesu bin onene kede, eko lwonge di eko waco ne be, “Dako ni, in do kotieko gonyi ki angwal ni.”

¹³Yesu oko keto cinge i wi dako nono, cucuto di eko cungo malo di eriere, di do en eko donyo pako Rubanga.

¹⁴Do ngadwong me sinagoga cunye oko wang, pien oudo Yesu ocango dano Ceng Sabato. En eko waco ne jo be, “Tie ceng kanyape kame jo poore timo kede tice; bianu i ceng nogo di oko cango wu, do weko bino Ceng Sabato.”

¹⁵Di Rwot oko dwoko be, “Wun joecuke, ngai kikom wu kalikame gonyo twon arabo asigira mere di eko tero ot mato pii Ceng Sabato?”

¹⁶Do dako no, akwar Aburaam, kame Sitani oudo otweo pi mwakini tomon kiwie kanyauni, pinyo kame mio likame kogonye Ceng Sabato?”



¹⁷Kop mere kame edwoko nono oko mino lewic omako jokwor mege; jo dedede di do oko bedo kede kilel pi gi dedede me deyo kame Yesu oudo otimo.

Agole me Nyige me Karadali

(Matayo 13.31-32; Marako 4.30-32)

¹⁸Di do Yesu oko penyere be, “Ajakanut ka Rubanga ber cal bala nyo? Doko da, abin apore kede nyo?”

¹⁹En ecal bala nyige me karadali, kame dano moro otero di eko ot cuno i potu mere; en eko dongo di eko doko yat adwong kame winy apor oko bino gero ude gi i ajange mege.”

Agole me Arup

(Matayo 13.33)

²⁰Di bobo Yesu oko penyere be, “Abino poro Ajakanut ka Rubanga kede nyo?”

²¹En ecal bala arup kame dako juko di eko nyalo kede moko alos me gipim adek, tuno kede di en eko mino moko alos lung buuno.”

Ekeko Adiding

(Matayo 7.13-14, 21-23)

²²Yesu oudo tie ot tetu Yerusalem; en eko donyo bebo i bomban kede i calere di epwonyo jo.

²³Di ngatamoro oko penye be, “Rwot, mam jo anonok en kame bino udo alako?” Yesu oko dwoko ne gi be,

²⁴” Timunu teko twatwal pi donyo kiye ekeko adiding; pien awaco ne wu be, jo atos bino mito donyo i Ajakanut ka Rubanga, do likame kibino karuno.

²⁵Pien kame won ot otieko yai malo di eko cego ekeko mere, wun ibinunu dong cungo ooko di ikukungunu ekeko di iwacunu be, ‘Rwot, Okwe yab wada, ‘do en ebino dwoko ne wu be, ‘Ango akwia kakame wun iwokunu kiye.’

²⁶Di do wun ikounu donyo waco be, ‘Wan ocamo di omato da karacel kede in, doko in ipwonyo i miere wa.’

²⁷ Do en ebino waco ne wu be, ‘Awaco ne wu be, ango akwia kakame wun iwokunu kiye; orwaunu tenge kibuta, wun jo kame timo tim areco! ‘

²⁸ Di wun ikounu bino koko kitek kede mwodo lak ka inenunu Aburaam, Isaka, Yakobo kede inabin dedede di kitie i Ajakanut ka Rubanga, do di wun kouco wu ooko.

²⁹Jo bino wok ki tetu kide, kede ki tetu potoceng, ki tetu malo kede ki tetu piny, di kiko bedo kacam i Ajakanut ka Rubanga.

³⁰ Di do jo mogo kame nan tie me ajikini ko bino bedo me agege; jo mogo kame nan tie me agege ko bino bedo me ajikini.”

Amara ka Yesu pi Yerusalem

(Matayo 23.37-39)



³¹Esawa nono, Iparisayon mogo oko bino, kiko waco ne Yesu be, “In poore iyai iko ot tenge ki kan, pien Erode mito neki.”

³²Do en eko dwoko ne gi be, “Otunu iwacenu ekwee no be, ‘Ango atie riamo jwogi kede cango jo tin kede diki, do i ceng me adek, ango ako bino tieko tic na.

³³Do ango miero ameede kede ot na tin kede diki, kede ceng alubo mere; pien likame poore enabi to ooko me Yerusalem.’

³⁴” Okwe in Yerusalem, Yerusalem! In bomba kame neko inabin, doko ididipo jo kame Rubanga ooro buti! Tien atot ango oudo amito be koto arukumo idwe ni bala kite kame gweno rukumo kede idwe mege i bwome, do in iko dagi na!

³⁵ Pi mano, Rubanga otieko weko ni odi. Doko nan awaco ni be, likame ibino nena bobo tuno kede i kare kame in ibino waco kede be, ‘Etie kede winyo ngat kame bino i nying Rwot.’ “

Luka 14

Yesu Ocango Icuo kame Tuwo

¹Ceng Sabato moro acel, di Yesu oudo ooto cam i ot me ngapug moro kame oudo obedo Ngaparisayo, jo oko donyo ngine pi mito ngeno gikame en eyaro timo.

²Icuo moro kame oudo tie kede tuwo me aurakom oko bino but Yesu.

³Di Yesu oko penyo jopwony me Iswil kede Iparisayon be, “Iswil yei ne wa cango jo Ceng Sabato arabo li?”

⁴Do likame kiko dwoko ne kop moro. Di do Yesu oko mako icuo nono, di eko cange, eko waco ne be eoti.

⁵ Yesu bobo oko penyo gi be, “Ngai kikom wu ka etie kede atin, arabo twon mere, di eko poto i kulo moro atut, likame eoto cucuto eko wane ooko Ceng Sabato?”

⁶Do likame kiko twero dwoko ne kop moro.

Mwolere kede Gamo Jo

⁷Yesu oko neno epone kame wele oudo tie yero kede kabedere me wor, di en eko waco ne jo kame bin kolwongo agole be,

⁸ “Ka olwongi i ebagame nyom, kur i ot bedo i kabedo me wor, pien cengemogo udo kolwongo ngatamoro kame pire tek kalamo in,

⁹di ngat kolwongo wu nono ko bino di eko waco ni be, ‘Yai iwek kom no ne dano ni’ ; di do in iko bino udo lewic adwong me cako dak bobo ot kabedo apiny.

¹⁰Do ka kolwongi, oti iko bedo kabedo apiny, tetekeny kame ngat kolwongi obino, etwero waco ni be, ‘Diera, yai ikob kabedo amalo.’ Mano bino mini wor i nyim wele wadu kame tie kedi kacam.



¹¹ Pien ngat kame tingere kene, kobino dwoke piny, do ngat kame mwolere, kobino tinge malo.”

¹²Di bobo Yesu oko waco ne icuo kame bin olwonge i ode nono be, “Kame iyaro lwongo jo pi cam me iceng arabo me otieno, kur ilwong jowoti arabo imiegu ni, amotoko wade ni, arabo jokio ni kobaro, pien cengemogo gida kibino lunyo lwongi, iepone noni udo gin kitieko culi pi gikame in itimo.

¹³Do kame iyaro tedo ebaga, lwong jocan, ingwalasa karacel kede imuduka,

¹⁴di oko bino mini winyo, pien gin likame kikaruno culi. In kobino culi i kare me iyarun me jo opoore.”

Agole me Ebaga Adwong

(Matayo 22.1-10)

¹⁵Kakame ngat acel kikom jo kame oudo tie bedo karacel kede Yesu kacam owinyo kede kope nogi, en eko waco ne Yesu be, “Etie kede winyo ngat kame bino camo mugati i Ajakanut ka Rubanga!”

¹⁶Do Yesu oko waco ne be, “Icuo moro oudo oiko ebaga adwong, en eko lwongo jo atot iye;

¹⁷kakame esawa me camo ebaga do otuno kede, won ebaga nono oko cwano ngatic mere acel pi ot kwenyaro jo kame bin kolwongo be, ‘Bianu do, pien gi dedede do tie cuto.’

¹⁸Do gin dedede kiko cako kwano be sasiro gi. Dano me agege owaco ne be, ‘Ango awilo lobo, kame poore aoti aneni; pi mano akwai isasiro ango.’

¹⁹Ngat acel da bobo oko waco ne be, ‘Ango awilo twonin kame romo ayokon kany; miero aoti atam tweno gi kong; akwai isasiro ango.’

²⁰Di ngat acel da bobo oko waco be, ‘Ango pwodi anyomo dako anyoma, pi mano nan likame atwero bino.’

²¹” Kikano ngatic nono oko dwogo, di eko dwoko ne ngadwong mere kope nogi dedede. Di do wangcuny oko mako won paco, en eko waco ne ngatic mere nono be, ‘Aso oti awakawaka i yote adongo kede i yote atitino me bomba, iko kelo jocan, ingwalasa, karacel kede imuduka.’

²²Ngatic nono oko dwoko be, ‘Adwong, gi dedede kame iwaco kotieko timo, do pwodi kabedo tie.’

²³Di ngadwong oko waco ne ngatic mere nono be, ‘Oti i gudi adongo kede i yote lango iko dino jo tetek pi bino, me wek oda pongi.

²⁴Pien amito waco ni be, likame bobo tie ngatamoro kikom jo kame bin kolwongo go, kame bino bilo cam me ebaga na.’ “

Gikame Dano Jalo pi bedo Ngasio ka Yesu

(Matayo 10.37-38)



²⁵Ikodeta adongodongo me jo oudo tie upere kede Yesu; en eko lokere but gi di eko waco ne gi be,

²⁶ “Ngat kame bino buta likame karuno bedo ngasiao na, kwanyo kenekene ka emara kalamo epone kame emaro kede papa kede toto mere, dako kede idwe mege, imiegu kede amiegu mege, ebo, kiton kuo mere da kikokome.

²⁷ Ngat kalikame riongo musalaba mere di eko donyo luba, likame etwero bedo ngasiao na.

²⁸” Ngai kikom wu ka emito gero ot abor malo, likame ber ebedo piny di eko maro wel sente kame gedo mere no mito, me wek engei ka sente kame en etie kede romo tieko gedo?

²⁹Pien ka likame etimo kamanono, di en eko cako gedo di likame eko karuno tieko, jo dedede kame neno gedo nono bino nyere,

³⁰di kiwaco be, ‘Kom icuo ni ocalo gedo da kiber, do bobo tieko oko bwone.’

³¹” Arabo abaka mene, ka etie ot i yi kede abaka ocelu, likame ber ebedo piny di eko tamo ka en kede isirikalen mege tutumia tomon, etwero ot yi kede abaka ocelu kame tie kede isirikalen tutumia ot are?

³²Aso ka li, ebino oro jo mege pi ot riamo kede abaka ocelu nono di pwodi etie kakabor, pi kwane kop me mulem.

³³Pi mano, likame tie ngatamoro kikom wu kame twero bedo ngasiao na tuno kede di ejalo gi dedede kame etie kede.

Kado Akony mere li (Matayo 5.13; Marako 9.50)

³⁴” Kado ber; do ka tuto odoko bot, kotwero mine bobo edoko kec benyo?

³⁵En do udo likame bobo eber akadi ne lobo da, akadi me aketa i atukit me bolia; do en do kobwote obar. Ngat kame tie kede yite, wek ewinyi.”

Luka 15

Oromo Korwenyo (Matayo 18.12-14)

¹ Kikano jorar esolo kede jodubo dedede oudo tie nyiko but Yesu pi mito winyo kop mere.

²Iparisayon kede jopwony me Iswil oko donyo ingungur di kiwaco be, “Icuo ni kom gamo jodubo, doko di ecamo kede gi.”

³Di do Yesu oko yamo ne gi agole ni be,

⁴” Ngai kikom wu, ka etie kede romini tol acel, di acel kikom gi oko rwenyo, likame eweko romini ot kanyangon kiwie kanyangon icegun ka i itela, di eko ot mono acel korwenyo nono tuno ude?



⁵Kame eude, en erionge i ngute kede kilel.

⁶Ka etuno i paco, en elwongo jowote, karacel kede jokio mege dedede, di eko waco ne gi be, ‘Lelunu karacel keda, pien audio oromo na kame oudo orwenyo.’

⁷Iepone nono da, awaco ne wu be, kilel bino bedo dwong i malo pi ngadubo acel kame swilaro, kalamo pi jo ot kanyangon kiwie kanyangon kopoore, kame li kede gikame kipoore swilaro kiye.

Ogap Korwenyo

⁸” Arabo dako mene ka etie kede ogap tomon, di ogap acel kikom gi oko rwenyo, likame ecwinyo etala, di eko weno ot di emo kiber tuno kede di eude?

⁹Aso, kame etieko ude, elwongo jowote kede jokio mege dedede karacel, di en eko waco ne gi be, ‘Lelunu karacel keda, pien audio ogap na kame oudo orwenyo ca.’

¹⁰Iepone nono da, ango awaco ne wu be, imalaikan ka Rubanga bino bedo kede kilel adwong adikinichel pi ngadubo acel kame swilaro.”

Awobi Korwenyo

¹¹Di Yesu oko waco be, “Oudo tie icuo moro acel kame tie kede awobe mege are.

¹²Awobi atidi oko waco ne papa mere be, ‘Papa, mia iner na me jame nin.’ Di do icuo nono oko popoko jame mege ne awobe mege nogo.

¹³Ingei ceng anonok, awobi atidi oko coko jame mege dedede, di eko yai ot i piny abor kakame en eko dudubo kiye jame mege dedede i kuo me atatai.

¹⁴Kakame bin etieko dudubo kede gi dedede kame oudo etie kede, kec atek oko poto i piny nono, di do kuo oko cako doko tek ne.

¹⁵Di en eko ot but icuo moro kame oudo obedo anywali me piny nono, icuo nono oko cwane pi ot gwoko ipegei mege.

¹⁶En oudo cunye romo bedo yom pi camo aligo me muranga kame bin ipegei camo; do likame tie ngatamoro kame oko mine gimoro.

¹⁷Do kakame wie oko yabere kede, en eko waco be, ‘Jotic ka papa na adi en kame camo cam di ko bwono gi, di ango ine atie kan ayaro to kec!

¹⁸Ayaro yai ako ot but papa na, di ako waco ne be, Papa, ango atieko dubo i nyim Rubanga kede i nyimi;

¹⁹ango do likame apoore pi in lwonga be wodi; tera do bala ngat acel kikom jotic ni.’

²⁰Di do en eko yai, di eko ot but papa mere. “Do di pwodi oudo etie kakabor, papa mere oko nene di oko bedo kede cuny me kisa i kome, di eko ringo bute, eko gwake i kore, di eko note.

²¹Di wode oko waco ne be, ‘Papa, ango atieko dubo i nyim Rubanga kede i nyimi da; ango do likame apoore pi in lwonga be wodi.’



²²Do papa mere oko waco ne jotic mege be, ‘Susunyunu kelo ekanso aber ingapunu ne, di ikounu rwako epeta i lwete, kede ikounu ngapo ne amuka.

²³Di ikounu kelo etobait kame mio ingolunu, me wek ocamunu kede kilel;

²⁴pien woda ni oudo oto, do nan ekuo bobo; oudo erwenyo, do nan eudere.’ Di do jo oko cako camo ebaga.

²⁵” I kare kame gigo oudo tie timere kede, wode adwong oudo pwodi tie i poto; kakame oudo do etie dwogo kede di do enoko paco, en eko winyo wer kede miel me jo.

²⁶En eko lwongo ngatic acel, eko penye gikame oudo tie timere.

²⁷Ngatic nono oko dwoko ne be, ‘Omini atidi en kame odwogo, di papa ni oko neko ne etobait amio; pien eude di ekuo, doko di kome yot.’

²⁸” Do awobi adwong cunye oko wang, di eko dagi donyo i ot. Papa mere oko wok ooko di oko donyo ngangao en.

²⁹Do en eko waco ne papa mere be, ‘Neningo, mwakini gi dedede ango abedo timo ni tic, doko likame adagi winyo cik ni moro akadi acel; do in likame pwodi imia akadi atin diel moro da me wek acam ebaga kede jowota.

³⁰Do wodi ni, kame ocamo jame nin kede imalayan nan odwogo, di in iko ngolo ne etobait amio! ‘

³¹Do papa mere oko dwoko ne be, ‘Okwe woda, in itie keda nakanaka, doko gi dedede kame ango atie kede obedo meg.

³²Oudo epoore ne wan tedo ebaga kede kilel, pien omini ni oudo oto, do nan ekuo; oudo erwenyo, do nan eudere.’ “

Luka 16

Ngagwok Jame kame Wie Tio

¹Di Yesu oko waco ne josiao mege be, “Oudo tie icuo moro kobaro kame tie kede ngagwok jame mege. Bin oko kelo ne kop me pido, be icuo nono oudo tie dudubo jame mege.

²En eko lwonge di eko penye be, ‘Nyo ine kame ango awinyo jo tie yamo i komi? Nyut na epone kame in itie gwoko kede jame na, pien in likame bobo itwero meede bedo ngagwok jame nango.’

³Di ngagwok jame nono oko waco i cunye kene be, ‘Nan do abino timo benyo, bala kame nan ngadwong na tie kwanya kede ki tic? Ango ali kede teko me pur, doko lewic maka kwac.

⁴Nan ango atieko ngeno gikame abino timo tetekeny kame kokwanya ki tic, jo bino gama i miere gi.’



⁵” En eko lwongo jo kame tie kede banyi me ngadwong mere acelacel, di eko cako penyo won banya me agege be, ‘Ngadwong na burao in banya kame rom amene?’

⁶En eko dwoko be, ‘Galanin tol acel me mo.’ Di ngagwok oko waco ne be, ‘Kwany itabu ni me banya, di iko bedo piny awakawaka, iko wandiko be ot kany kenekene.’

⁷Bobo en eko penyo ngat ocelu da be, ‘Do in kono, nyo kame koburao in?’ Loca oko dwoko ne be, ‘Ipukoi tol acel me engano.’ En eko waco ne be, ‘Kwany itabu ni me banya di iko wandiko be ot kanyauni erume.’

⁸” Ngadwong nono oko pako ngagwok jame mege kalikame genere nono pi rieke kame engolo; pien jo me i kare kanataman tie kede rieke me tic kede joe gi me i kare noni kalamo jo kame tie i lero.

⁹” Doko awaco ne wu be, tiunu kede abar kame iudunu i yore kalikame opoore pi mako awotino, tetekeny ka etiek, gin kikaruno gamo wu i miere kame bedo nakanaka.

¹⁰Ngat kame genere kede gikame titidi twatwal, udo egenre kede gikame dwong da; doko ngat kalikame genere kede gikame titidi twatwal, udo likame egenre kede gikame dwong da.

¹¹Ka do ber wun likame igenerenu kede abar me piny kan kalikame genere, ngai do kame bino geno wu kede abar me ateni?

¹²Doko ka likame igenerenu kede jame ka ngat apat, ngai do kame bino mino wu kame mako wu?

¹³ “Likame tie ngatic moro kame romo tic ne jodongo are; pien ebino dagi ngat acel di eko maro ocelu, arabo ebino mire tic ne ngat acel di eko cano ngat ocelu. In likame ikaruno tic ne Rubanga kede bobo ne abar da.”

Pwony Mogo kame Yesu Omio

(Matayo 11.12-13; 5.31-32; Marako 10.11-12)

¹⁴Iparisayon, jo kame cuny gi oudo maro sente, bin owinyo kope nogi dedede di kiko bedo kede acae but Yesu.

¹⁵Do en eko waco ne gi be, “Wun en jo kame nyutere i nyim jo be ipoorenu, do Rubanga ngeo cunyu; pien gikame jo tero bala gikaber, obedo gikame neno rac i nyim Rubanga.

¹⁶ “Iswil ka Musa kede kop me inabin bin otio tuno i kare kame Yokana obino kede; cako i kare no Kop Aber me Ajakanut ka Rubanga en kame kobedo tatamo, di ngat acelacel donyo iye tetek.

¹⁷ Do eyoyot ne malo kede lobo tiek kalamo dul moro me Iswil doko li.

¹⁸ “Ngatamoroni kame riamo dako mere di eko nyomo ace, udo etimo adote. Doko ngat kame nyomo dako kopokere kede cware, udo etimo adote.

Ngabar kede Lasaro



- ¹⁹” Bin tie icuo moro kobaro, kame oudo ngapo igoen akwakwar kede kame meny, doko di etie kede kuo ajabajaba ceng dedede.
- ²⁰Oudo tie icuo ngacan moro kame nyinge Lasaro, kame buge oudo otatapo i kome. En oudo esingo buto i dog erute me ngabar nono.
- ²¹En bin eparo camo angidingidin me cam kame popoto ki wi emesa me ngabar nono; igwogin da oudo bino ko donyo nango buge mege.
- ²²” Ngacan nono oko to di imalaikan oko tere okete i kor Aburaam. Ngabar nono da bin oko to, di oko yike.
- ²³Bin di ngabar nono oudo tie winyo lito i kabedo me jo oto, en eko tingo wange malo di eko neno Aburaam di tie kakabor, di Lasaro tie i kore.
- ²⁴En eko lwongere be, ‘Papa Aburaam, Okwe bed kede cuny me kisa i koma di iko cwano Lasaro eoti erwak wi lwete i pii di eko kweno kede leba, pien atie kede lito atek i mac kan.’
- ²⁵” Do Aburaam oko waco be, ‘Woda, yutuno ber i kare kame pwodi in oudo i kuo kede, in bin iudo jamini abeco, di Lasaro da iepone nono oko udo jamini areco; do nan eda kokweo cunye ki kan, di ida iudo lito.
- ²⁶Doko medo i wi mano, i dierediere wan kede wun, koketo iye bur atut twatwal, tetekeny likame tie ngatamoro kikom wan kan kame twero ngolo tuno butu kuno, doko likame tie ngatamoro kibutu kuno kame twero ngolo bino but wan kan.’
- ²⁷Di do ngabar nono oko waco be, ‘Nan do papa Aburaam, atie kwani icwae eoti i ot ka papa na,
- ²⁸pien atie kede imiegu na kany; wek eoti ekwenyaro gi, tetekeny kur gida doko kibin i kabedo me can noni.’
- ²⁹” Do Aburaam oko dwoko ne be, ‘Gin kitie kuno kede Musa kede inabin, poore gin kiwiny kope kame gin kiwaco.’
- ³⁰Ngabar nono oko dwoko be, ‘Likame kamano papa Aburaam; do ka ngatamoro kikom jo oto ooto but gi, kibino swilaro.’
- ³¹Do Aburaam oko waco ne be, ‘Ka gin likame kiyei kop ka Musa kede me inabin, likame kibino da yei akadi ka ngatamoro oyaruno kikom jo oto.’ “

Luka 17

Dub

(Matayo 18.6-7, 21-22; Marako 9.42)

- ¹Yesu oko waco ne josiao mege be, “Atama me poto i dub ateteni oyaro bino; do etie i can ngat kame bino mino gi kibino.
- ²Oudo koto bedo ber ka kotweo ne kidi me riego i ngute di oko uce kede i nam, akaka en mino jo kame titino gi poto i dub.



³ Pi mano, gwokerenu! “Ka omini odubo, ronkino en, doko ka eswilaro, sasiro en.

⁴ Ka dano acel nono odubo buti tien kanyaare i ceng acel, di tien acelacel kame edubo kede ebino buti di ewaco be, ‘Aswilaro, ‘in miero isasiro en.’”

Yei

⁵ Joor oko waco ne Rwot be, “Med yei wa.”

⁶ Di Rwot oko waco ne gi be, “Ka koto di oudo itienu kede yei kame rom kede nyige me karadali, oudo koto itwerunu waco ne cukamori ni be, ‘Putere ki kan iko ot pitere i nam, ‘di koto en eko winyo dwanu.

Gikame Ngatic Timo

⁷” Ngai kikom wu ka etie kede ngatic mere kame puro ne ecuka arabo kwao ne romini mege, di en eko dwogo paco ingei tic, ewaco ne ngatic nono be, ‘Susunyo do ber bino cam’ ?

⁸ Mam elunyo waco ne be, ‘In do ber iik nango cam me otieno, iko ngapere iko kelo na cam, iko donyo dara di ango acamo kede di amato, di do kame ango atieko, ida iko do cam kede mato.’

⁹ Iparunu be en emio pwoc but ngatic mere be pien etimo gikame en ewaco ne pi timo?

¹⁰ Kamanono da, ka wuda itimunu gi dedede kame kowaco ne wu pi timo, poore iwacunu be, ‘Wan kom jotic kenekene; wan otieko timo tic kame oudo mako wa.’ “

Yesu Ocango Jodobo Tomon

¹¹ Bin di Yesu oudo tie ot Yerusalem, en oudo etie beo ki adul kame tie dierediere me Samaria kede Galilaya.

¹² Kakame oudo etie donyo kede i calo moro, en eko riamo kede jodobo tomon. Gin kiko cungo kakabor,

¹³ di kiko lwongere be, “Adwong, Yesu, mi kisa maki i kom wa.”

¹⁴ Kakame Yesu oneno gi kede, en eko waco ne gi be, “Otunu imiunu ngasaseredoti ngic wu.” Kakame oudo kitie ot kede, kom gi oko cango.

¹⁵ Di bin ngat acel kikom gi oneno be etieko do cango, en eko lokere edok but Yesu di epako Rubanga kede dwan amalo.

¹⁶ En eko riebere i tien Yesu di epwoye. Oudo en ebedo Ngasamaria.

¹⁷ Yesu oko penyere be, “Mam oudo jo tomon en kame kocango? Do jo kanyangon icegun tie tuai?

¹⁸ Pinyo komio jo icegun likame oko dwogo mino Rubanga pwoc, kwanyo ngakumbor ni kenekene?”

¹⁹ Di do Yesu oko waco ne icuo nono be, “Yai ioti; yei ni ocangi.”



Bino me Ajakanut ka Rubanga

(Matayo 24.23-28, 37-41)

- ²⁰Bin i kare moro Iparisayon openyo Yesu awene en kame Ajakanut ka Rubanga oyaro bino kede, en eko dwoko ne gi be, “Ajakanut ka Rubanga likame oyaro bino kede gianena mogo kame neeno.
- ²¹Doko likame tie jo mogo kame bino waco be, ‘Neningo, en ine! ‘arabo be, ‘En ica! ‘Pien Ajakanut ka Rubanga tie i diere wu.”
- ²²Di do en eko waco ne josiao mege be, “Kare tie bino kame ibinunu mito neno kede acel kikom ceng ka Wot ka dano, do likame ibinunu neno.
- ²³Jo bino waco ne wu be, ‘Nenunu, en ica! ‘arabo be, ‘En ine kan! ‘Do kur iyeunu ot, akadi lubo gi da.
- ²⁴Pien bala kite kame kot meny kede di eko caro malo cako ki tetu cel tuno kede tetu ocelu, ebino bedo kamanono da kede Wot ka dano i ceng mere.
- ²⁵Do miero ber en ebei i can atot, di jo me i kare ni ko dage.
- ²⁶Bala kite kame riki etimere kede i kare ka Nua, en epone nono da kame ebino timere kede i kare me dwogo ka Wot ka dano.
- ²⁷Jo oudo tie cam kede amata, di kinyomere doko di kimio anyira gi me anyoma, paka tuno i ceng kame Nua oduyo kede i yi yee, di alele oko bino oko neko gin dedede.
- ²⁸Kamanono da, bala kite kame riki etimere kede i kare ka Lot; jo dedede oudo tie cam kede amata, mogo di tie cat kede wil, doko mogo di tie pito jame, di mogo gedo,
- ²⁹do ceng kame Lot oyai kede ki Sodoma, mac kede salupa kame tie liel oko cwei di oko neko gin dedede.
- ³⁰Ebino bedo kamanono da i ceng kame Wot ka dano da bino nyutere kede.
- ³¹“Cenge no, ngat kame tie i wi ot, di jame mege tie i ot miero kur doko wok piny pi kwanyo gi; iepone nono da, ngat kame oudo tie i poto kur doko dok paco.
- ³²Yutununu gikame otimere ne dako ka Lot.
- ³³Pien ngat kame mito gwoko kuo mere, ebino rwenye, do ngat kame rwenyo kuo mere ebino gwoke.
- ³⁴Awaco ne wu be, iwor me cenge no, kikom jo are kame tie ribo apien kobino kwanyo dano acel oko tero di oweko ngat ocelu.
- ³⁵Doko kikom mon are kame tie riego karacel, kobino kwanyo ngat acel oko tero di oweko ngat acel dong.”
- ³⁶(Kikom jo are kame tie pur i poto, kobino tero ngat acel di ngat acel dong.)
- ³⁷Josiao mege oko penye be, “Rwot, tuai inonono?” Di Yesu oko dwoko ne gi be, “Kakame gi oto tie iye, kunono en kame acut da cokere iye.”



Luka 18

Agole me Apuserut kede Ngangolkop

¹Yesu di do oko tatamo ne josiao mege agole kame pwonyo gi be poore di kilego nakanaka abongo weko.

²En ewaco ne gi be, “Bin tie i bomba moro ngangolkop kalikame woro Rubanga, doko di likame eparo pi dano moro da.

³Apuserut moro bin tie i bomba nono, kame oudo wire but ngangolkop nono di ebako ne doge be, ‘Okwe konya kede ngat kame ango atie pido kede.’

⁴Pi kare moro, ngangolkop nono oudo dagi winyo kop me apuserut nono; do i cen mere, en eko do yamo i cunye kene be, ‘Bed bala ango likame alworo Rubanga arabo aparo pi dano moro,

⁵do pi kite kame apuserut ni ocobuno ango kede, abino konye i pido mere. Pien ka li, wire mere buta bino oola.’ “

⁶Di Rwot oko waco be, “Winyunu gikame ngangolkop kame li kede ateni waco.

⁷Wun iparunu be likame Rubanga bino ngolo kop kiber pi konyo jo mege kame en eyero, jo kame kok bute iceng kede iwor? Iparunu be eyaro gal kede konyo gi?

⁸Awaco ne wu be, eyaro ngolo kop kiber pi konyo gi awakawaka. Bed bala kamanono da, iparunu be ka Wot ka dano odwogo ebino udo yei tie i lobo?”

Agole me Ngaparisayo kede Ngarar Esolo

⁹Yesu di bobo oko waco agole ni ne jo kame bin genere ken gi be gin kipoore, di kicao jo icegun.

¹⁰En ewaco be, “Cuo are bin ooto i tempulo ilega, ngat acel kikom gi oudo Ngaparisayo, do ngat acel oudo ngarar esolo.

¹¹” Ngaparisayo bin oyai malo di eko cungo, eko cako ilega eliling di ewaco be, ‘Rubanga, ango apwoyi, pien ango likame acal kede jo apat, bala joyak, jo kalikame timo gi me ateni, joadote, akadi bala ngarar esolo moroni.

¹²Ango akanyo kec tien are i sabiti acel, doko akwanyo irabu me acel me tomon me gi dedede kame ango audo.’

¹³” Do ngarar esolo nono oko gire cungo i tenge, di likame etingo akadi wange malo, en eko bapo kore di ewaco be, ‘Rubanga, Okwe kisa maki i koma, ango ngadubo! ‘

¹⁴ “Awaco ne wu be, icuo noni ooto ture di kotere be epoore i nyim Rubanga do weko Ngaparisayo nono; pien ngat kame tingere kene kobino dwoke piny, do ngat kame mwolere kobino tinge malo.”

Yesu Omio Idwe Atino Winyo
(Matayo 19.13-15; Marako 10.13-16)



¹⁵Jo oko donyo kelo kiton imukerun but Yesu me wek eket cinge i kom gi. Kakame josiao oneno kede kamano, gin kiko cokocoko gi be kiweki.

¹⁶Do Yesu oko lwongo gi bute di eko waco be, “Wekunu idwe atino bin buta, kur igengunu gi; pien Ajakanut ka Rubanga tie pi jo kame cal bala gin.

¹⁷Ateteni awaco ne wu be, ngat kalikame gamo Ajakanut ka Rubanga bala atin atitidi, likame ebino donyo iye.”

Icuo Kobar

(Matayo 19.16-30; Marako 10.17-31)

¹⁸Ngatel moro me Iyudayan oko penyo Yesu be, “Apwony Aber, atim nyo me wek aud kuo kame bedo nakanaka?”

¹⁹Yesu oko penye be, “Pinyo komio in ilwonga be ngat aber? Likame tie ngat aber kwanyo Rubanga kenekene.

²⁰Mam in ingeo cik gi: ‘Kur itimo adote, Kur ineko, Kur ikwalo, Kur imio ijura me abe, Wor papa ni kede toto ni? ’ ”

²¹En eko dwoko be, “Gigi dedede ango abedo lubo cako di pwodi ango atin awobi.”

²²Kakame Yesu owinyo kede kamano, en eko waco ne be, “Tie pwodi gi acel korem ni; oti icat gi dedede kame in itie kede, iko popoko ne jocan sente kame iudo, di iko bino bedo kede abar i malo, di do iko bino luba.”

²³Do kakame icuo nono owinyo kede kope nogi, cunye oko dubere; pien oudo ebaro twatwal.

²⁴Yesu oko ngine di oko waco be, “Donyo i Ajakanut ka Rubanga tin tek benyo ne jo kobaro!

²⁵Eyoyot ne aguragura donyo ki wang piso kalamo ngabar donyo i Ajakanut ka Rubanga.”

²⁶Jo kame bin owinyo kope nogi oko penyo Yesu be, “Ngai do kame twero udo alako?”

²⁷Do Yesu oko dwoko ne gi be, “Gi kalikame twerere kibun dano, twerere kibun Rubanga.”

²⁸Di Petero oko waco ne be, “Neningo, wan otieko weko miere wa di oko lubi.”

²⁹Di Yesu oko waco ne gi be, “Ateteni awaco ne wu be, likame tie ngat kame oweko ture, amotoko dako mere, arabo imiegu mege, arabo jonywal mege, akadi idwe mege da, pi Ajakanut ka Rubanga,

³⁰kalikame bino udo atot kibun Rubanga i kare noni, kede eko bino udo kuo kame bedo nakanaka i kare koyaro bino.”

Yesu Owaco Kop me To mere Tien me Adek

(Matayo 20.17-19; Marako 10.32-34)



³¹Yesu oko tero josiao tomon kiwie are tenge kargi ken gi, di en eko waco ne gi be, “Winyunu, wan otienu ot Yerusalem, di gi dedede kame bin inabin owandiko i kom Wot ka dano ko bino cobere.

³²Kobino jale i cing jo kalikame Iyudayan; di oko bino nyware, di oko timo ne tim me lewic, kede oko ngungulo lau i kome.

³³Gin kibino dane di kiko neke da, do ingei ceng me adek, en ebino yaruno.”

³⁴Do josiao mege likame oko niang gikame en ewaco akadi acel; pien oudo kokano dwong me kope nogi kibun gi, omio gin likame kiko niang gikame en ewaco.

Yesu Oyabo Wang Emuduk koudo Kware

(Matayo 20.29-34; Marako 10.46-52)

³⁵Kakame Yesu onoko kede Jeriko, oudo icuo moro tie kuno kame wange oto, kame oudo tie bedo i nget yongayo di ekware.

³⁶Kakame ewinyo kede ekodet di tie beo, en eko penyere pi mito ngeno gikame oudo tie timere.

³⁷Gin kiko waco ne be, “Yesu me Nasaret en ino kame tie beo no.”

³⁸En eko lwongere kede dwan amalo be, “Okwe Yesu Wot ka Daudi, mi kisa maki i koma!”

³⁹Jo kame bin otelo yongayo oko retakino en be elingi; do en eko meede ameda kede lwongere di ewaco be, “Okwe Wot ka Daudi, mi kisa maki keda!”

⁴⁰Yesu oko cungo di eko waco ne gi be kikel emuduk nono bute; kakame lonono onoke kede, en eko penye be,

⁴¹” Imito be atim ni nyo?” En eko waco be, “Rwot, amito be wanga gei bobo neno.”

⁴²Yesu oko waco ne be, “Wek wangi yabere, yei ni ocangi.”

⁴³Cucuto nono di do ecao neno piny di eko lubo Yesu, di emio Rubanga deyo. Kakame ekodet oneno kede gino, kiko pako Rubanga.

Luka 19

Yesu kede Sakayo

¹Yesu oko donyo Jeriko di oudo etie beo abea ki kuno.

²Icuo moro oudo tie kuno kame nyinge Sakayo, kame oudo obedo ngadwong me jorar esolo, doko di ebaro.

³En eko mono epone me neno Yesu pi mito ngene, do likame eko twero, pien ekodet oudo dwong, aso di en oudo ebedo dano acecek.

⁴Di do Sakayo oko ringo anyim, di eko yito i wi cukamori, me wek etwer neno Yesu, pien Yesu oudo oyaro beo ki kanono.



⁵Kakame bin do Yesu otuno kede kanono, eko ngoloro malo di eko waco ne be, “Sakayo, wok piny awakawaka, pien ango tin ayaro bedo welo me turi.”

⁶Sakayo oko susunyo wok piny di cunye oko bedo yom pi gamo Yesu.

⁷Do kakame jo oneno kede kamano, kiko donyo ngunguro di kiwaco be, “Neni, kom eoto bedo welo me ngadubo.”

⁸Di Sakayo oko yai malo, di eko waco ne Rwot be, “Neningo, Rwot, ango ayaro mino dul me jame na but jocan; doko ka lem oudo arodo gi ka ngatamoro, ayaro cule kame rom kamanono tien ongwon.”

⁹Yesu oko waco ne be, “Alako tin do otieko bino i ot noni, pien eda ebedo akwar Aburaam.

¹⁰ Pien Wot ka dano obino pi mono kede pi lako jo korwenyo.”

Agole me Siringi Tutumia Tomon

(Matayo 25.14-30)

¹¹Di oudo pwodi jo tie winyo kop nono, Yesu oko meede waco ne gi agole moro, pien oudo eyapuno do tuno Yerusalem, doko da pien jo oudo tamo be Ajakanut ka Rubanga do oudo iyapiyapi neeno.

¹²Aso, Yesu oko waco ne gi be, “Bin won ajakanut moro oyai di eko ot i piny abor pi kwere pi doko abaka, di do eko bino dwogo.”

¹³En ber eko lwongo jotic mege tomon, di eko mino gi siringi tutumia tomon di ewaco negi be, ‘Timunu tic me cat kede sente gi tuno ango dwogo.’

¹⁴Do jo me piny mere oudo dage, omio kiko oro jo olube pi ot waco be, ‘Wan likame omi to be icuo ni pug wa.’

¹⁵” Do kakame edwogo kede ingei en camo ajakanut; en eko waco be lwong ne jotic mege kame ngoce epoko ne gi sente, me wek engei ameda kame kiudo ki tic me cat.

¹⁶Dano me agege obino bute di oko waco ne be, ‘Adwong, siringi ni tutumia acel nono okelo ameda me siringi tutumia tomon.’

¹⁷Ngadwong mere oko waco ne be, ‘Itimo kiber, in ngatic aber! Aso, pi kite kame ibedo kede ngat kame genere kede gikame titidi, in ibino pugo bomban tomon.’

¹⁸Dano me are da oko bino di eko waco be, ‘Adwong, siringi ni tutumia acel okelo ameda me siringi tutumia kany.’

¹⁹Ngadwong mere oko waco ne be, ‘Ida ibino pugo bomban kany.’

²⁰” Di bobo dano ace oko bino di oko waco be, ‘Adwong, sente ni ine; ango bin ako bone kede itambala di ako kane,

²¹pien ango oudo alwori, pien in ibedo dano kame ekite mere tek, in ikwanyo gi kalikame in iketo, doko ikao gi kalikame in icuo.’



²²Ngadwong mere oko waco ne be, ‘In ibedo ngatic arac! Ayaro tic kede kop kowok ki dogi me ngolo ni kop! Mam oudo ingeo be ango abedo dano kame ekite mere tek, akwanyo gi kalikame aketo, doko akao gi kalikame ango acuo?’

²³Pinyo bo komio in likame iko kano sente nango go i bangki, me wek koto nan adwogo ako gamo gi kede ameda moro?’

²⁴” Di en eko waco ne jo kame oudo tie cungo kuno be, ‘Gamunu do sente go kibute ikounu mino ngat kame tie kede siringi tutumia tomon.’

²⁵(Di gin kiko waco ne be, ‘Adwong, do en etie kede siringi tutumia tomon! ‘)

²⁶’ Ango awaco ne wu be, ngat kame tie kede gimoro, kobino medo ne ace; do ngat kame li kede gimoro, akadi atitidi kame etie kede da, kobino kwanyo tenge kibute.

²⁷Aso, do jokwor nango gi, kalikame oudo mito be ango apug gi, kelunu gi kan inekunu gi i nyima.’ “

Yesu Odonyo Yerusalem bala Abaka

(Matayo 21.1-11; Marako 11.1-11; Yokana 12.12-19)

²⁸Di bin Yesu otieko yamo kope nogi, en eko meede ot paka Yerusalem.

²⁹Kakame enoko kede Betepage kede Betania, i moru me Olibeti, en eko cwano josiao mege are,

³⁰di ewaco ne gi be, “Otunu i calo kame tie anyim ca, di itienu donyo iye, ibinunu udo atin me punda di kotweo, kalikame pwodi ngatamoro owanano; gonyenu di ikounu kele kan.

³¹Ka ngatamoro openyo wu be, ‘Pinyo komio itienu gonye?’ , wacenu be, ‘Rwot en kame mite.’ “

³²Jo kame bin kocwao oko ot di kiko udo gi dedede di tie bala kite kame Yesu oudo owaco ne gi kede.

³³Kakame bin josiao tie gonyo kede atin me punda, wone oko penyo gi be, “Pinyo komio wun itienu gonyo atin me punda no?”

³⁴Gin kiko dwoko ne be, “Adwong en kame mite.”

³⁵Di gin kiko kele but Yesu. Di do kiko donyo peto igoen gi ingei atin me punda nono, di kiko mino Yesu obedo iye.

³⁶Kakame bin en etie ot kede, jo oko donyo peto igoen gi i yongayo.

³⁷Di do bin eyapuno donyo Yerusalem, di etie i aserengete me moru me Olibeti, ekodet me josiao mege dedede oko cako kilel di kipako Rubanga kede dwan amalo, pi tice adongodongo me twer kame gin oudo kineno.

³⁸ Gin oudo kipake di kiwaco be, “Etie kede winyo abaka kame bino i nying Rwot! Mulem bed i malo kede deyo bed but Rubanga i malo twal.”



³⁹Iparisayon mogo kame bin tie i dier ekodet oko waco ne be, “Apwony, wac ne josiao ni lingi.”

⁴⁰En eko dwoko ne gi be, “Awaco ne wu be, ka jogi oling, kide bino donyo lelemo.”

Yesu Okok pi Yerusalem

⁴¹Kakame Yesu onoko kede bomba me Yerusalem di eko nene, en eko kok pire,

⁴²di ewaco be, “Koto di oudo tin in ingeo gikame romo kelo ni mulem da! Do nataman kokano gi kibuti.

⁴³Pien kare oyaro bino, kame jokwor ni bino gero kede apama di kiko luki kede, di kiko goloro in ki bad dedede.

⁴⁴Gin kibino tyaikino in piny di kiko nyinyito jo ni dedede kame bedo kanono; doko likame kibino weko kidi moro di odokakin i wi kidi ocelu, pien in likame oudo ingeo esawa me alako ni.”

Yesu Ooto i Tempulo

(Matayo 21.12-17; Marako 11.15-19; Yokana 2.13-22)

⁴⁵Di Yesu oko donyo i tempulo, eko cako riamo jo kame bin oudo tie cat kuno ooko,

⁴⁶ di ewaco ne gi be, “Kowandiko i iwandik kacil be, ‘Oda bino bedo ot me ilega’ ; do wun itiekunu loke edoko kapwono me joyak.”

⁴⁷ En oudo epwonyo i tempulo ceng dedede. Di jodongo me josaseredoti, jopwony me Iswil, kede joadongo me piny oko donyo mono epone me neke;

⁴⁸do likame kiko karuno udo epone me timo, pien jo dedede oudo tie ciko yit gi pi winyo kop mere.

Luka 20

Peny i kom Akarunikin ka Yesu

(Matayo 21.23-27; Marako 11.27-33)

¹Ceng moro acel di Yesu oudo tie pwony i tempulo, di etuco ejiri, jodongo me josaseredoti kede jopwony me Iswil karacel kede joadongo me piny oko bino bute,

²di kiko waco ne be, “Wac ne wa, in iudo akarunikin me timo gigi ki tuai? Ngai komii akarunikin nono?”

³Yesu oko dwoko ne gi be, “Ango da ayaro peny wu; wacanu ber,

⁴akarunikin kame bin Yokana batiso kede jo oudo owok kikut Rubanga arabo kikut dano?”

⁵Di gin kiko donyo poro kop nono ken gi ken gi di kiwaco be, “Ka owacunu be, ‘Ewok ki malo, ‘en ebino peny wa be, ‘Do pinyo komio likame ikounu yei en?’

⁶Aso ka wan owacunu be, ‘Ewok kikut jo, ‘jo dedede oyaro didipo wa kede kide. Pien gin kiyei kiber be Yokana oudo obedo enabi.”



⁷Di do gin kiko dwoko ne be gin likame kingeo kakame akarunikin mere owok kiye.

⁸Di Yesu oko waco ne gi be, “Akadi ada likame abino waco ne wu akarunikin kame ango atie timo kede gi nogi.”

Agole me Jodar Poto me Olok

(Matayo 21.33-46; Marako 12.1-12)

⁹Di Yesu oko cako tatamo ne jo agole moro be, “Bin tie icuo moro kopuro poto me olok, di en eko keto jo mogo daro ne poto nono, di do en eko ot i piny apat pi kare alac.

¹⁰Kakame kare otuno kede me ngwedo olok, en eko cwano ngatic mere acel but jodar poto mere nono, me wek kimi eda anyakini mogo. Do jodar poto oko daruno ngatic nono di kiko bunge, kiko riame edok kede cinge nono.

¹¹Di en bobo eko cwano ngatic mere ace; mano da kidaruno di kiko bungo, kede kiko timo ne tim me lewic, di kiko dwoko eda abongo gimoro.

¹²Di doko en eko cwano ngatic mere me adek; do mano kiko mino awanon di kiko uce tenge me poto me olok.

¹³Won poto me olok nono di do oko waco be, ‘Nan do abino timo benyo? Abino cwano woda kame amaro; cengemogo kibino mine wor.’

¹⁴Do kakame jodar poto me olok onene kede, gin kiko donyo yamo ken gi ken gi be, ‘Man en musika mere, bia onekenu me wek jame kame epoore sikao dok megwa.’

¹⁵Gin kiko make di kiko uce ooko me poto me olok, kiko neke. Nyo do kame won poto me olok no bino timo ne jodar poto go?

¹⁶En eyaro bino di eko neko jodar poto me olok nogo dedede, di eko bino mino poto mere me olok i cing jodar apat.” Kakame jo bin owinyo kede kop noni, kiko waco be, “Mano likame timere.”

¹⁷Do en eko ngoloro gi, di eko penyo gi be, “Nan do dwong me iwandik noni en nyo, iwandik kame waco be, ‘Kidi kame jogedo odagi, en kame olokere oko doko kidi kame pire tek me esonda’ ?

¹⁸Jo dedede kame poto i wi kidi nono bino ngingidun; do ka kidi nono opoto i kom ngatamoro, ebino nyinyito dano nono.”

Peny kame mako Culo Esolo

(Matayo 22.15-22; Marako 12.13-17)

¹⁹Jopwony me Iswil kede jodongo me josaseredoti oko tamo mako Yesu iesawa nono, do kiko lworu jo; pien gin oudo kitieko niang kiber be en oudo eyamo agole noni i kom gin.

²⁰Di do gin kiko cako kine, kiko cwano jo kame begao kop, jo kame oudo cuko be gin jo me ateni, tetekeny kimak kop moro ki dog Yesu, me wek kitwer make di kiko mine i loc kede i akarunikin me ngapug.



²¹Gin kiko penye be, “Apwony, wan ongeo be pwony nin kede yamo nin tie me ateni. Doko in likame itie kede apokapoka but jo, do in ipwonyo gikame Rubanga mito be jo lubi, di lubere kede ateni.

²²Benyo, Iswil yei ne wa pi culo esolo but Kaisari arabo li?”

²³Do Yesu oko mako rieke gi di en eko penyo gi be,

²⁴” Aso, nyutanu ber sente akaya acel; cal kede nying ngai en kame tie iye?” Gin kiko waco be, “Me ka Kaisari.”

²⁵Di do Yesu oko waco ne gi be, “Miunu jame ka Kaisari but Kaisari, ikounu mino me ka Rubanga da but Rubanga.”

²⁶Do oudo likame kitwero make pi kope mege i nyim jo kanono; gin do kiko lunyo bedo kede ur twatwal i kom kop kame en edwoko ne gi, di do kiko ling.

Peny kame mako lyarun

(Matayo 22.23-33; Marako 12.18-27)

²⁷ Isadukayon mogo oko bino but Yesu, gin jo kame waco be jo oto likame bino yaruno.

²⁸ Di kiko penyo Yesu be, “Apwony, Musa bin owandiko ne wan Iswil kame waco be, ‘Ka icuo moroni oto di en eko weko dako mere abongo idwe, omin mere miero do mak apuserut nono, me wek enywal kede idwe ne omin mere kame bin oto nono.’

²⁹Aso, bin tie imiegu kanyaare. Awobi me agege oko nyomo dako, di en eko to eweko dako abongo idwe.

³⁰Omin mere me are,

³¹kede me adek da di bin oko bedo kede dako nono; iepone nono, awobe kanyaare nogo dedede oko to di likame kiweko dako nono kede atin moro akadi acel.

³²Ki cen mere, di do dako nono da oko to.

³³Nan do i ceng me iyarun, dako noni bino bedo me ka ngai? Pien cuo kanyaare nogo dedede oudo obedo kede en bala dako gi.”

³⁴Yesu oko waco ne gi be, “Jo me i kare ni nyomere, doko komio gi me anyoma;

³⁵do jo kame poore yaruno ki to di kiko bedo i kuo me kare kame bino bino likame nyomere arabo komio gi me anyoma.

³⁶Pien udo gin likame bobo kitwero to, pien gin kical bala imalaikan, doko kibedo idwe ka Rubanga, bala kame gin do udo kitieko yaruno kede.

³⁷ I kom kop kame waco be jo oto bino yaruno, akadi Musa da bin onyuto be koyaruno jo oto, enyuto manoni i iwandik mere i kom abum kame oudo tie liel, kakame bin en elwongo kiye Rwot be Rubanga ka Aburaam, Rubanga ka Isaka kede Rubanga ka Yakobo.



³⁸En ebeto Rubanga me jo kakuo, likame Rubanga me jo oto; pien jo dedede kuo pire.”

³⁹Jopwony me Iswil mogo oko dwoko be, “Apwony, in kom iyamo kiber.”

⁴⁰Likame doko gin kiko dino cuny gi penye peny moro akadi acel.

Peny i kom Kirisito

(Matayo 22.41-46; Marako 12.35-37)

⁴¹Do Yesu oko peny gi be, “Benyo benyo kame gin kitwero waco kede be Kirisito en wot ka Daudi?

⁴²Pien Daudi da kikome bin owaco i itabu me Sabuli be, ‘Rwot Rubanga bin owaco ne Rwot na kaman: Bed i bada tetu cam,

⁴³tuno di ango atieko mini inyono jokwor ni piny i tieni bala abanya me teno tien.’

⁴⁴Ka Daudi da bin olwonge be ‘Rwot’ , Kirisito doko twero bedo wot ka Daudi benyo?”

Yesu Okwenyaro Jo i kom Jopwony me Iswil

(Matayo 23.1-36; Marako 12.38-40)

⁴⁵Di do bin jo ociko yit gi pi winyo yamo ka Yesu, en eko waco ne josiao mege be,

⁴⁶” Gwokerenu kara i kom jopwony me Iswil, kame maro ilat di kingapo ikanson aboco, di kimito be di jo moto gi kede wor i atalen, doko kimaro bedo i komini abeco i sinagoga, kede kabedo me wor i ibagai.

⁴⁷Gin jo kame camo jame me apuserun, di kilego ilega aboco me ecuke. Rubanga bino ngolo ne gi kop adwong kalamo.”

Luka 21

Irabu me Apuserut

(Marako 12.41-44)

¹Yesu bin oko tingo wange di eko neno jo ka obaro di tie keto giamia gi i adita me irabu me tempulo;

²doko en eko neno apuserut moro kame ngacan da di keto abolai mege are.

³En eko waco be, “Ateteni awaco ne wu be, apuserut ngacan ni en kokwanyo irabu kalamo jo apat dedede;

⁴pien gin kikwanyo gikame olamar ki abar gi, do i can mere, en ekwanyo gi dedede kame oudo epoore kuo kede.”

Yesu Owaco Kop me Reto Tempulo

(Matayo 24.1-2; Marako 13.1-2)

⁵Jo mogo oko donyo yamo kop kame mako tempulo, epone kame oudo kotubuso en kede kide kabeco kede giamia kame oudo komio but Rubanga; en eko waco ne gi be,



⁶” Gikame wun inenunu nogi, kare oyaro tuno kalikame tie kidi moro akadi acel ki kan kame bino dong cungo i wi kidi ocelu; kobino rereto gin dedede piny.”

Peko kede Itidil

(Matayo 24.3-14; Marako 13.3-13)

⁷Di gin kiko penye be, “Apwony, awene en kame gini bino timere kede, doko gianena nyo kame bino bedo tie pi nyuto be gi noni do oyapuno timere?”

⁸Yesu oko waco ne gi be, “Gwokerenu me wek kur rweny wu. Pien jo atos oyaro bino i nyinga di kiwaco be, ‘Ango en Kirisito! ‘kede da be, ‘Kare otieko do tuno! ‘Do kur iyeunu lubo gi.

⁹Doko kame iwinyunu rwonge me yi kede arubaruba, kur ibedunu kede lworu, pien gigi miero kong gei timere, do ajikini likame bino tuno cucuto.”

¹⁰Di do en eko waco ne gi be, “Atekerin bino yi, ajakanut acel da bino yi kede ajakanut ocelu.

¹¹Piny bino donyo yangere kitek, doko kec kede aumpuli bino bedo tie i kabedere apapat, doko gikame kelo lworu kede gianena adongodongo bino neeno i malo.

¹²Do di pwodi likame gigi dedede otimere, kibino mako wu di kiko tidilo wu, di kiko tero wu i nyim kansulo me sinagogan kede i otkol. Kobino tero wu i nyim abakai kede i nyim wegi apugan pira.

¹³Man bino mino wu kare aber me mino ijura i koma.

¹⁴Pi mano, mokunu tam wu pi weko cako paro epone kame ibinunu dwoko kede peny;

¹⁵pien ango abino mino wu kope me ayama, kede rieke da kalikame tie ngakwor wu moro kame bino twero kanyakino arabo piem kede.

¹⁶Kiton jonywal wu, imiegu wu, joawade wu, karacel kede joawotino wu da bino rupao wu, di oko bino neko mogo kikom wu da.

¹⁷Jo dedede bino dagi wu pira.

¹⁸Do akadi yer acel me wi wu likame bino rwenyo.

¹⁹Ibinunu udo kuo me ateni pi ikanyakin wu.

Yesu Owaco Kop i kom Tuturo Yerusalem

(Matayo 24.15-21; Marako 13.14-19)

²⁰” Do kame inenunu isirikalen oluko Yerusalem, ngeunu do be kare me poto mere do otieko tuno.

²¹Di do jo kame tie Yudea miero ringi i wi mori, doko jo kame tie i bomba noni do miero yai tenge, kede jo kame tie ooko me bomba noni kur doko dony iye;

²²pien ceng nogi obedo ceng me culo kwor, pi mino gikame riki kowandiko cobere kakare.



²³Can tin bino bedo dwong benyo ne mon oyac kede kame doto idwe i ceng nogo! Pien can adwong bino bedo tie i wi lobo, kede lilo ka Rubanga bino bedo i kom jo nogi.

²⁴Mogo kobino neko kede epima, doko kobino mako mogo di oko tero gi bala mabus i pinye dedede; di jo kalikame Iyudayan ko bino tuturo Yerusalem piny tuno kede kame kare gi otiek.

Dwogo ka Wot ka Dano

(Matayo 24.29-31; Marako 13.24-27)

²⁵“Ceng kede duwe kede acer bino bedo kede gianena mogo, doko atekerin dedede me piny da ko bino bedo kede iturur pi mor kede ebuka me nam.

²⁶Jo bino wile pi lworu kede pi paro gikame oyaro timere i wi lobo; pien twer dedede kame tie i malo bino yayangun.

²⁷Di do kiko bino neno Wot ka dano di tie bino kede edou, kede twer kede twon deyo.

²⁸I kare kame gigi bino cako timere kede, miero iyabunu wangu di ikounu tingo wi wu malo, pien alako wu do udo oyapuno tuno.”

Pwony kame Yai ki kom Yat Epigi

(Matayo 24.32-35; Marako 13.28-31)

²⁹Di Yesu oko tatamo ne gi agole moro be, “Nenunu ber yat epigi, kede yen apat dedede;

³⁰cucuto kame pote gi ogeo lot, wun inenunu di ikounu ngeno be iporo do oyapuno tuno.

³¹Iepone nono da, kame inenunu gigi do tie timere, ngeunu be Ajakanut ka Rubanga do oyapuno tuno.

³²Ateteni ango awaco ne wu be, gigi dedede bino timere di pwodi jo kame nan tie di kuo likame oto.

³³Malo kede lobo bino rwenyo, do kope nango likame bino rwenyo.

Bedunu di Ikiunu Piny

³⁴” Do poore igwokerenu, me wek kur doko idonyunu keto cunyu itek i kom cam kede amera kede par pi kuo me i kare ni, di ceng no ko bino ngoole mako wu

³⁵bala owic. Pien ceng no bino tuno ne jo dedede kame bedo i wi lobo lung.

³⁶Do bedunu di ikiunu piny i kare dedede, di ilegunu, me wek iudunu teko me bwot ki gikame oyaro timere nogi dedede, kede me cungo i nyim Wot ka dano.”

³⁷ Ceng dedede Yesu oudo pwonyo i tempulo, do iwor en oudo eoto buto i wi moru me Olibeti.

³⁸Doko odiko sek jo dedede oudo bino bute i tempulo pi winyo kop mere.



Luka 22

Koporo Kop me Neko Yesu

(Matayo 26.1-5; Marako 14.1-2; Yokana 11.45-53)

¹ Ebaga me Mugati kame Arup li kiye oudo oyapuno tuno, kame oudo kolwongo be ebaga me Bwot.

² Jodongo me josaseredoti kede jopwony me Iswil oudo tie mono epone me neko Yesu, pien oudo kilworo jo.

Yuda Oyei Rupao Yesu

(Matayo 26.14-16; Marako 14.10-11)

³ Di Sitani oko donyo i cuny Yuda, kame bin kolwongo be Isikariot, kame oudo obedo ngat acel kikom josiao tomon kiwie are.

⁴ Di do Yuda oko yai eko ot tenge poro kop kede jodongo me josaseredoti kede jodongo me isirikalen kame daro tempulo pi udo epone kame etwero mino kede Yesu i cing gi.

⁵ Gin kiko bedo kede yomcuny, di kiko cikere pi mine sente.

⁶ Yuda di do oko yei, en eko cako mono kare aber me mino Yesu i cing gi di ekodet me jo li.

Yesu Oikere pi Camo Ebaga me Kalamo

(Matayo 26.17-25; Marako 14.12-21; Yokana 13.21-30)

⁷ Ceng me ebaga me Mugati kame Arup li kiye di do oko tuno, en oudo ebedo ceng me mino giayala me atin romo me Ebaga me Kalamo.

⁸ Di do Yesu oko cwano Petero kede Yokana di ewaco ne gi be, “Wun otunu ikounu iiko ne wa cam me Ebaga me Kalamo, me wek ocamenu.”

⁹ Gin kiko penye be, “Tuai en kame in imito be wan ooti oik iye ebaga?”

¹⁰ En eko dwoko ne gi be, “Di do wun itiekunu donyo i bomba, ibinunu riamo kede icuo moro kame yeo agulu me pii; lubenu paka tuno i ot kame en ebino donyo iye,

¹¹ di ikounu waco ne won ot nono be, ‘Apwony penyere be: Agola me wele tie tuai, kame ango aromo camo iye Ebaga me Kalamo karacel kede josiao na?’

¹² En ebino nyuto ne wu agola alac me malo, kame kotieko iiko kiber. Iikunu ne wa ebaga kanono.”

¹³ Gin di kiko ot, kiko udo gi dedede di tie bala kite kame Yesu oudo owaco ne gi kede; di do gin kiko iiko cam me Ebaga me Kalamo.

Cam ka Rwot me Otieno

(Matayo 26.26-30; Marako 14.22-26; 1 Jokorinti 11.23-25)

¹⁴ Kakame do esawa me cam oromo kede, en eko bedo piny kaca karacel kede joor mege.



- ¹⁵Di en eko waco ne gi be, “Cunya omito twatwal camo kede wu Ebagame Kalamo noni di pwodi likame abeo i can.
- ¹⁶Ango awaco ne wu kamano pien likame bobo abino camo cam no tuno kede kame dwong mere ocobere i Ajakanut ka Rubanga.”
- ¹⁷Yesu oko kwanyo ikopo, di eko mino pwoc, eko waco be, “Gamunu inywakunu wun dedede;
- ¹⁸ango awaco ne wu kamano pien cako nan, likame bobo abino mato pige me anyakini me olok, tuno kede di do Ajakanut ka Rubanga obino.”
- ¹⁹En eko kwanyo mugati, kakame etieko mino kede pwoc, eko tuturo, di eko mino gi di ewaco be, “Man en koma kame komio piru. Timunu kamanoni pi yutuno ango.”
- ²⁰Iepone nono da, ingei cam, en eko kwanyo i kopo me bwini, di eko mino gi di ewaco be, “Ikopo ni en isikan kanyen me remo na, kame kobino onyo piru.
- ²¹ “Do nenunu, ngat koyaro rupao ango tie cam keda kanoni.
- ²²Pien Wot ka dano bino to bala kame Rubanga oudo oiko, do ngat kame rupao en bino neno can tin benyo!”
- ²³Josiao di do oko cako penyere ken gi ken gi, be ngai kikom gi inonono kame bino timo kamanoni.

Piem me Marao Dwongo

- ²⁴ Piem bobo oko cakere i dierediere me josiao, pi mito ngeno ngai kikom gi en kame kopooore tero be pire dwong kalamo jo icegun.
- ²⁵Yesu oko waco ne gi be, “Abakai me jo kalikame Iyudayan pugo gi tetek, doko jo kame tie kede akarunikin i kom gi kolwongo gi be jo kame timo bero.
- ²⁶ Do likame etie kamano kede wun; akaka mano, miero ngat kame pire dwong kikom wu bed bala dano atitidi twatwal, kede ngat kame telo jo miero bed bala ngat kame tio ne jo.
- ²⁷ Pien ngai kong en kame pire dwong kalamo, ngat kame bedo piny cam arabo ngat kame timo tic me poko cam? Mam ngat kame bedo piny cam? Do ango atie i diere wu kan bala ngatic wu.
- ²⁸” Wun en jo kame ocungo keda i atama na dedede;
- ²⁹bala kite kame Papa omia kede twero me pug, ango da amio wu twero acel nono,
- ³⁰tetekeyen icamunu kede imatunu i emesa na i Ajakanut na, di ikounu bedo i komini me Ajakanut, ikounu ngolo kop ne atekerin tomon kiwie are me Isirael.”

Yesu Otuco be Petero bino Dage

(Matayo 26.31-35; Marako 14.27-31; Yokana 13.36-38)



³¹Di Yesu oko waco be, “Simoni, Simoni, neningo, Sitani otieko udo twer kibut Rubanga me tamo wun dedede, me wek eyek wu bala kame koyeko kede kal ki kom cucung.

³²Do ango atieko lego nin be kur yei ni poti; doko kame ilokere idwogo buta, poore inen be isupo cuny imiegu ni.”

³³Petero oko dwoko be, “Rwot, ango atieko yei ot kede in i otkol, akadi tuno i to da!”

³⁴Yesu oko waco ne be, “Petero, amito waco ni be, iwor me tin di pwodi tongweno likame okok, in ibino daga tien adek.”

Isau, Ikapu, kede Epima

³⁵ Di Yesu oko penyo josiao mege be, “I kare kame bin aoro wu kede abongo isau me sente, arabo ikapu, amoto amuka, bin nyo en oko rem ne wu?” Gin kiko dwoko ne be, “Likame tie.”

³⁶Yesu oko waco ne gi be, “Nan do ngat kame tie kede isau me sente, emaki, doko emak ikapu da. Doko ngat kame li kede epima, poore ecat ekoti mere ewil kede.

³⁷ Pi mano, awaco ne wu be, iwandik miero cobere i koma kame waco be, ‘En bin kotere bala ngat acel kikom jotur Iswil’ ; pien gikame bin kowandiko i koma tie cobere kakare.”

³⁸Di gin kiko waco be, “Neningo, Rwot, ipimai are ige.” En eko dwoko be, “Mago romo.”

Yesu Olego i wi Moru me Olibeti

(Matayo 26.36-46; Marako 14.32-42)

³⁹Yesu oko wok ki bomba di eko ot i wi moru me Olibeti bala kite kame lem etimo kede sek, josiao mege da oko lube.

⁴⁰Kakame etuno kede kuno, en eko waco ne gi be, “Kwaunu Rubanga me wek kur ipotunu i atama.”

⁴¹Di en eko yai kibut gi, eko ot tenge kakame boro mere dano romo lwomo engaro ko tuno iye; di eko riondiko piny eko lego be,

⁴²” Papa, ka imito, kwany ikopo me can noni tenge ki buta; akadi kamano da, wek kur etimere pi mit nango do pi mit nin.”

⁴³(Malaika oko wok ki malo, di oko neeno bute, di oko dino cunye.

⁴⁴Kite kame oudo etie kede cweruncy atek, en eko lego kede cunye dedede, kwok oko make di oko donyo ton piny bala remo.)

⁴⁵Kakame eyai kede kiye ilega, en eko dok but josiao mege, di eko udo gi kitie nino pien par oudo otieko teko gi.

⁴⁶En eko waco ne gi be, “Pinyo komio itienu nino? Yaunu ilegunu, me wek kur ipotunu i atama.”



Komako Yesu

(Matayo 26.47-56; Marako 14.43-50; Yokana 18.3-11)

⁴⁷Di pwodi oudo Yesu tie yamo, ekodet me jo di tuno; icuo kame kolwongo be Yuda, kame bin eda oudo etie ngat acel kikom josiao tomon kiwie are, en kame oudo tie telo gi. En eko noko Yesu pi mote di enoto leme.

⁴⁸Do Yesu oko waco ne be, “Yuda, mam do notere en kame in inyuto kede Wot ka dano but jokwor mege?”

⁴⁹Kakame do bin josiao mege oniang kede gikame oudo oyaro timere, gin kiko penye be, “Rwot, ototongo gi kede epima?”

⁵⁰Ngat acel kikom gi oko tongo yit epasoit me Ngatel Josaseredoti paka ngolo yite tetu cam tel.

⁵¹Do Yesu oko waco ne gi be, “Wekunu do kamano.”

⁵²Di do Yesu oko waco ne jodongo me josaseredoti kede isirikalen adongo me tempulo karacel kede joadongo me piny, kame bin oudo obino pi make be, “Mam ibinunu kede ipimai kede akutai bala itienu bino mako ngayak?”

⁵³I kare kame oudo atie kede wu i tempulo ceng dedede, cabo likame ikounu maka. Do man en esawa wu, kede esawa me twer me colo.”

Petero Odagi Yesu

(Matayo 26.57-58, 69-75; Marako 14.53-54, 66-72; Yokana 18.12-18, 25-27)

⁵⁴Gin kiko mako Yesu di kiko tere i ot me Ngatel Josaseredoti. Petero oko donyo lubo gi ki kakabobor.

⁵⁵Kakame kimoko kede mac i diakal, kiko bedo piny karacel, Petero da oko bedo i diere gi kanono.

⁵⁶Di do nyako apasoit moro oko neno Petero di tie bedo i dog mac, en eko donyo ngino Petero, di eko waco be, “Kom icuo ni da oudo tie kede Yesu.”

⁵⁷Do Petero oko dagi di ewaco be, “Dako ni, ango gira akwia lono.”

⁵⁸Di likame pwodi ocwao esawa, dano moro ace da doko oko neno Petero, en eko waco be, “Ida ibedo ngat acel kikom gi.” Do Petero oko dwoko ne be, “Icuo ni, likame ango gira inonono.”

⁵⁹Do di pwodi okato bala esawa acel kenekene, dano ace bobo oko ketakin di ewaco be, “Ateteni icuo ni da oudo tie kede Yesu; pien eda ebedo Ngagalilaya.”

⁶⁰Do Petero oko dwoko ne be, “Icuo ni, ango akwia gikame in itie yamo.” Cucuto nono di likame pwodi Petero otieko yamo, tongweno di oko kok.

⁶¹Rwot oko ngoloro Petero. Di Petero oko yutuno kop kame Rwot oudo owaco ne be, “Tin di pwodi tongweno likame okok, in ibino daga tien adek.”

⁶²Petero oko donyo ooko di eko koko kitek.

Konywaro Yesu di Kobunge



(Matayo 26.67-68; Marako 14.65)

⁶³Cuo kame bin komio daro Yesu oko donyo nyware di kibunge.

⁶⁴Kiko donyo umo wange di kiwaco ne be, “Tuci! Ngai kobapi?”

⁶⁵Di kiko donyo yamo kope atot me anywar i kome.

Kotero Yesu i nyim Kansulo

(Matayo 26.59-66; Marako 14.55-64; Yokana 18.19-24)

⁶⁶Kakame piny oru kede, joadongo me piny, kede jodongo me josaserdoti, karacel kede jopwony me Iswil oko cokere karacel, di kiko tero Yesu i nyim kansulo gi.

⁶⁷Di kiko waco ne be, “Ka in en Kirisito, wac ne wa.” Do en eko dwoko ne gi be, “Ka ayamo ne wu, likame ibinunu yei;

⁶⁸doko ka apenyo wu, likame iyarunu twero dwoko.

⁶⁹Do cako nan, Wot ka dano bino bedo i bad tetu cam me twer ka Rubanga.”

⁷⁰Gin lung kiko do penye karacel be, “Mam in do en kame Wot ka Rubanga?” En eko dwoko ne gi be, “Wun iwacunu be ango inonono.”

⁷¹Di do kiko waco be, “Ijura nyo kame wan pwodi bobo omitunu? Wan otiekunu winyo kop ki doge kikokome!”

Luka 23

Kotero Yesu i nyim Pilato

(Matayo 27.1-2, 11-14; Marako 15.1-5; Yokana 18.28-38)

¹Di do ekodet dedede kame bin tie i kansulo oko yai malo, di kiko tero Yesu i nyim Pilato.

²Kiko cako pide di kiwaco be, “Wan oudo icuo ni di tie rwenyo ateker wa, di egengo wa culo esolo but Kaisari, doko di ewaco be en kikome ebedo Kirisito abaka.”

³Pilato oko penye be, “In en ibedo abaka me Iyudayan?” Yesu oko dwoko ne be, “In en iwaco kamanono.”

⁴Di do Pilato oko waco ne jodongo me josaserdoti karacel kede ekodet be, “Ango likame audio raco moro i kom icuo ni.”

⁵Do gin kiko cerededo kitek di kiwaco be, “Lono tie rubo wi jo dedede me Yudea kede pwony mere. En eako ki Galilaya nan do etuno kede kiton kan da.”

Kotero Yesu i nyim Erode

⁶Di bin Pilato owinyo kop noni, en eko penyo ka Yesu oudo obedo Ngagalilaya.

⁷Kakame eniang kede kiber be Yesu oudo owok ki adul kame Erode pugo, en eko cwane but Erode, ngat kame oudo da tie Yerusalem i kare nono.



⁸Cuny Erode oko bedo yom adikinichel pi neno Yesu, pien oudo lem cunye mito nene. En oudo etieko winyo kop i kom Yesu, doko oudo etie kede gen me nene di etimo gianena moro.

⁹Pi mano, en eko pepenyo Yesu pi esawa alac twatwal; do Yesu likame oko dwoko kop moro.

¹⁰Jodongo me josaseredoti karacel kede jopwony me Iswil oudo tie cungo kuno di kipide kede gero adikinichel.

¹¹Di do Erode kede isirikalen mege oko timo ne Yesu tim me acae di kinyere; kakame kotieko ngapo ne kede igoen kabeco me angosibib, Erode oko mino kodwoke but Pilato.

¹²Pilato kede Erode oudo dingere, do cako cenge nono di do kiko doko awotino.

Kongolo ne Yesu Kop me To

(Matayo 27.15-26; Marako 15.6-15; Yokana 18.39—19.16)

¹³Di do Pilato oko lwongo jodongo me josaseredoti kede jopug kede ekodet dedede karacel,

¹⁴di eko waco ne gi be, “Wun ikelunu icuo ni buta kan be etie rwenyo jo kede pwony mege; do ingei pepenyo en i nyimu kan, ango likame aude kede raco moro i kom kope kame wun ipidenu iye.

¹⁵Akadi Erode da likame oudo gimoro arac i kome, en komio eko dwoke but wa. Ateteni, likame tie gimoro arac kame en etimo kame romo mino kongolo ne kop me to.

¹⁶Pi mano, ango ayaro mino kodae di ako weke eoti.”

¹⁷(Oudo Pilato miero bin gony ne gi mabus acel i kare me Ebagga me Kalamo.)

¹⁸Do ekodet oko redo kede dwan amalo di kiwaco be, “Nek icuo ni! Gony ne wan Baraba!”

¹⁹Baraba oudo obedo icuo kame kotweo i otkol pi kop me nek, kede pi kop me logologo kame bin otimere i bomba me Yerusalem.

²⁰Pilato bin tie kede mit me gonyo Yesu, omio en eko bobo yamo kede gi;

²¹do gin kiko ilelem kitek be, “Gure i kom musalaba, gure i kom musalaba!”

²²Pilato oko bobo waco ne gi tien me adek mere be, “Pinyo kara, raco nyo kame en etimo? Ango likame aude raco moro i kome kame romo mino kongolo ne kop me to. Pi mano, ango ayaro mino kodae di ako weke eoti.”

²³Do gin kiko cerededo kede ilelem atek, di kiwaco be poore gur Yesu i kom musalaba. Koko gi oko cobere.

²⁴Di do Pilato oko ngolo ne Yesu kop bala kite kame oudo gin kimito kede.



²⁵En eko gonyo ne gi icuo kame bin kotweo i otkol pi kelo logologo kede pi timo nek, kame gin oudo kikwao be gony ne gi; do eko jalo Yesu i cing gi pi gin timo ne gikame gin kimito.

Koguro Yesu i kom Musalaba

(Matayo 27.32-44; Marako 15.21-32; Yokana 19.17-27)

²⁶Esawa kame isirikalen oudo tie tero kede Yesu tenge, kiko mako icuo moro me Sirene, kame nyinge Simoni, kame oudo tie wok ki ooko me bomba. Gin kiko riongo ne musalaba i ngute tetek, di eko donyo yeno di elubo Yesu ki cen.

²⁷Ekodet me jo oko donyo lube ki cen karacel kede mon kame oudo tie paro pire di kikok kitek.

²⁸Do Yesu oko lokere oneno gi, di eko waco ne gi be, “Anyira me Yerusalem, kur ikokunu pira, do kokunu piru kede pi idwe wu.

²⁹Pien ateteni awaco ne wu be, ceng tie bino kame jo bino waco kede be, ‘Kitie kede winyo mon kame obedo adongei, kede auris kalikame onywal, kede tune kalikame kodoto! ‘

³⁰Di do kiko bino cako waco ne mori be, ‘Pot i kom wa’ ; kede ne imukuran da be, ‘Um wa.’

³¹Pien ka kitimo kaman di yat pwodi numu, nyo do kame bino timere kame yat otuo?”

³²Di do kiko tero cuo mogo are da kame bin obedo jo kame oudo timo tim areco, pi ot guro gi i kom musalaba karacel kede Yesu.

³³Kakame do bin kituno kede i kabedo kame kolwongo be “Cogowic” , kiko guro Yesu i kom musalaba ki kuno karacel kede jo nogo kame oudo timo tim areco, ngat acel i bade tetu cam, kede ngat acel i bade tetu ngodal.

³⁴Di Yesu oko waco be, “Papa, sasiro gi, pien kikwia gikame kitie timo.” Di kiko donyo uco alulu pi popoko igoen mege.

³⁵Jo oko donyo cungo kanono di kingie. Do jopug oko donyo junye ne di kiwaco be, “En etieko lako jo apat, ber kong eda elakere kene, ka di en ebedo Kirisito ka Rubanga, ngat kame Rubanga oyer!”

³⁶Isirikalen da oko donyo nyere kede acae; oudo kibino bute di kimie bwini awac,

³⁷di kiwaco be, “Ka in en abaka me Iyudayan, lakere keni!”

³⁸Oudo tie iwandik moro kame koguro i wi musalaba mere kame waco be, “Man en abaka me Iyudayan.”

³⁹Ngat acel kikom jo nogo kame oudo timo tim areco, kame bin koguro, oko cako cotoro Yesu di ewaco be, “Mam in ibedo Kirisito? Lakere keni di iko lako wada!”

⁴⁰Do ngat ocelu oko coke di ewaco be, “Mam in likame ilworo Rubanga? Aso di kongolo nin kop kame rom aroma kede mere.



⁴¹Do ateteni kongolo ne wan kop kakare, pien wan otie udo adwokini me tice wa, do likame tie gimoro arac kame dano ni otimo.”

⁴²Di do eko waco be, “Yesu, yutuno ango kame idonyo i Ajakanut ni.”

⁴³Yesu oko waco ne be, “Ateteni awaco ni be, tin noni iyaro bedo keda i paradisi.”

Yesu Oto

(Matayo 27.45-56; Marako 15.33-41; Yokana 19.28-30)

⁴⁴Oudo esawa kanyape me iceng do oyapuno romo; piny lung oko doko col tuno esawa kanyangon me otieno

⁴⁵di likame wang ceng oneeno. Egoe kame bin poko isenge i tempulo oko yec odoko are.

⁴⁶ Di do Yesu oko koko kede dwan amalo di ewaco be, “Papa, ajalo tipo na i cingi!” Ingei waco kamano, en eko oomo cunye, di do eko to.

⁴⁷Kakame bin ngadwong me isirikalen oneno kede gikame otimere, en eko pako Rubanga di ewaco be, “Ateteni dano ni kom oudo li kede raco moro!”

⁴⁸Kakame ekodet me jo dedede kame bin ocokere kuno oneno kede gikame otimere, gin kiko dok paco di kibapo kor gi.

⁴⁹ Jo dedede kame bin onao kede Yesu, karacel kede mon kame oudo olube cako ki Galilaya oko cungo ki tenge pi neno gikame oudo tie timere nogi.

Koyiko Yesu

(Matayo 27.57-61; Marako 15.42-47; Yokana 19.38-42)

⁵⁰Bin tie icuo moro kame nyinge Yosepu, me bomba me Iyudayan kame kolwongo be Arimatea. En oudo ebedo dano acel kikom jo kame bedo i kansulo me Iyudayan, en oudo ebedo dano kopoo doko di eber.

⁵¹En bin likame eyei kede tam gi, akadi kede tim gi da. En oudo etie daro bino me Ajakanut ka Rubanga.

⁵²Icuo noni bin oko ot but Pilato, di eko kwano be mie kom Yesu.

⁵³En eko tako kom Yesu ki musalaba, di eko bono kede esuka, di eko cibe i ates kame oudo bin koroko i lela, ates kalikame pwodi oudo koyiko iye ngatamoro.

⁵⁴Ceng no oudo obedo ceng me iikere, pien Ceng Sabato do oudo tie gere.

⁵⁵Mon kame oudo oupere kede Yesu wok ki Galilaya oko lubo Yosepu, kiko neno ates kede epone kame kopiello kede kome;

⁵⁶ di do gin kiko dok, kiko iiko mo kede gikame ngwece gi kur. I Ceng Sabato, gin kiko wei bala kite kame cik oudo mito kede.

Luka 24

Iyarun ka Yesu

(Matayo 28.1-10; Marako 16.1-8; Yokana 20.1-10)



¹Ceng Sande odiko sek, mon nogo oko ot i ates, pi tero gikame ngwece gi kur, kame oudo gin kitieko iiko.

²Di kiko udo koloro kidi tenge ki dog ates,

³do kakame kidonyo kede i yie, kiko udo kom Yesu li.

⁴Kakame pwodi oudo wi gi ocungo kede pi gikame oudo otimere, cuo are oko cungo i nget gi di kingapo igoen atar liamaliam.

⁵Pi kite kame inonong oudo omako gi kede, omio kiko luro wi gi piny, do cuo nogo oko waco ne gi be, “Pinyo komio imounu ngat kame kuo kikom jo oto? En likame etie kan, do etieko yaruno.

⁶Yutununu gikame bin ewaco ne wu di pwodi oudo etie Galilaya,

⁷be miero mi Wot ka dano i cing jodubo, di kiko gure i kom musalaba, do ingei ceng me adek en eko bino yaruno.”

⁸Di do gin kiko yutuno kope mege.

⁹Di bin kidok ki ates, kiko tatamo ne joor tomon kiwie acel ka kope go dedede kede ne jo apat da dedede.

¹⁰Maria Magadalina, Joana kede Maria toto me Yakobo, kede mon mogo ace kame bin oudo oupere kede gi, en kame owaco ne joor kope nogi.

¹¹Do joor oko tero kop noni bala kop me itatam moro kame tiene li, di likame kiko yei.

¹²Do Petero oko yai, di eko ringo i ates; kakame egungo kede pi neno yi ates, en eko neno isukan ken gi abongo gimoro; di eko dok paco di euro gikame otimere.

Ot tuno Emaus (Marako 16.12-13)

¹³Ceng acel nono jo are kikom jo kame bin lubo Yesu oudo tie ot i calo kame kolwongo be Emaus, kame oudo tie mairo kanyaare yai ki Yerusalem,

¹⁴gin oudo kitie ot di kiyamo ken gi ken gi kop i kom gikame oudo otimere.

¹⁵Kakame oudo pwodi kitie yamo kede di kinywako tam, Yesu kikome oko noko gi, di eko donyo upere kede gi.

¹⁶Do oudo koumo wang gi, omio likame kiko twero ngene.

¹⁷Di Yesu oko penyo gi be, “Kop nyo ino kame wun itienu yamo kenu kenu di itienu ot?” Gin kiko cungo, di kili kede yomcuny.

¹⁸Di ngat acel kikom jo nogo, kame bin oudo kolwongo be Keleopa, oko dwoko ne be, “Mam in keni en kame do ibedo welo i Yerusalem, kame kwia gikame otimere kuno i ceng nogi?”



- ¹⁹Di en eko penyo gi be, “Nyo igonogo?” Gin kiko dwoko ne be, “Kop i kom Yesu me Nasaret, kame oudo obedo enabi kame tie kede twer i tice kede i yamo mege, i nyim Rubanga kede i nyim jo dedede.
- ²⁰Do jodongo me josaseredoti kede jopug wa oko mine i cing wegi apugan me wek ngol ne kop me to, di do kiko gure i kom musalaba.
- ²¹Do wan oudo otie kede gen be en nono kame oudo eyaro bino lako jo me Isirael. Doko medo i wi mano, tin do oromo ceng me adek cako ceng kame gino otimere kede.
- ²²Do mon mogo kame oudo tie i ekodet wa oko mino wi wa ocungo. Gin oudo kiyai obai sek di kiko ot i ates,
- ²³do likame kiko udo kome. Di do kiko dwogo di kiwaco be imalaikan oneeno but gi di waco ne gi be en ekuo.
- ²⁴Jo mogo me ekodet wa oko ot i ates, di kiko udo tie kamanono bala kite kame mon nogo oudo owaco kede, do gida likame kiko nene.”
- ²⁵En eko waco ne gi be, “Wun tin imingunu benyo, doko cunyu tin nyap benyo pi gal yei kope dedede kame bin inabin otuco!
- ²⁶Mam oudo poore Kirisito nen can nogi dedede, di do en eko donyo i deyo mere?”
- ²⁷Di Yesu oko cako gonyo ne gi kop dedede kame bin oudo koyamo i kome i iwandik kacil dedede, cako ki itabun ka Musa tuno kede i iwandik me inabin.
- ²⁸Kakame kinoko kede calo kame oudo kitie ot iye, Yesu oko meede kede ot ineno bala oudo etie kato akata,
- ²⁹do gin kiko dine di kiwaco ne be, “Bed ber kede wa, pien piny oyapuno yuto, doko isawan da okato.” Di do en eko ot bedo kede gi.
- ³⁰Kakame ebedo kede gi kacam, en eko kwanyo mugati di eko kwano winyo iye, di eko tuturo, eko mino gi.
- ³¹Di wang gi oko yabere, kiko ngene; do en eko rwenyo ki wang gi.
- ³²Gin kiko donyo yamo ken gi ken gi be, “Mam cuny wa oki oko pukpuka pi kilel iesawa kame en oudo etie yamo kede wa i yongayo, kakame egonyo ne wa kede dwong me iwandik kacil?”
- ³³Di gin kiko yai esawa nono kiko dok Yerusalem, kiko udo joor tomon kiwie acel di ocokere karacel kede jo kame bin oudo tie kede gi.
- ³⁴Gin oudo kitie waco be, “Rwot oyaruno ateteni, doko etieko neeno but Simoni!”
- ³⁵Di do gin kiko tatamo gikame oudo otimere i yongayo, kede epone kame en eko ngere kede but gi iesawa kame etuturo kede mugati.

Yesu Oneeno ne Josiao mege

(Matayo 28.16-20; Marako 16.14-18; Yokana 20.19-23; Tice 1.6-8)



³⁶Di oudo pwodi gin kitie yamo kop noni, Yesu kikome oko cungo i diere gi di eko waco ne gi be, “Mulem bed butu.”

³⁷Lworo kede mielkom oko mako gi, di oudo kiparo be kineno tipo moro.

³⁸Di en eko penyo gi be, “Pinyo komio komu oto kamano, doko pinyo komio gung tie i cunyu?”

³⁹Nenunu cinga kede tiena, ango inononi; mulanu ikounu bino ngeno; pien tipo likame tie kede ringokome kede cogo bala kite kame nan wun inenunu ango atie kede.”

⁴⁰Kakame etieko yamo kede kamano, en eko nyuto ne gi cinge kede tiene.

⁴¹Di pwodi yomcuny atek omio gi likame kitwero yei, doko di kitie kede ur, en eko penyo gi be, “Itienu kede gimoro kan me acama?”

⁴²Gin kiko mine deksam kame kobulo,

⁴³en eko gamo di eko camo i nyim gi kanono.

⁴⁴Di do en eko waco ne gi be, “Magi en kope nango kame bin awaco ne wu i kare kame oudo pwodi atie kede wu be, gi dedede kame kowandiko i koma i itabu ka Musa kede me inabin kede i Sabuli miero cobere kakare.”

⁴⁵Di en eko yabo wi gi pi mino gi niang iwandik kacil,

⁴⁶di eko waco ne gi be, “Kowandiko be, Kirisito miero bei i can, di oko yaruno en kikom jo oto ingei ceng me adek;

⁴⁷kede da be poore pwonyo kop i kom iswilar kede sasiro jo ki dub gi i nyinge, ne atekerin dedede cako ki Yerusalem.

⁴⁸Wun en ibedunu ijurak me kope nogi.

⁴⁹ Doko nenunu, abino cwano ne wu gikame Papa na ocikere iye. Pi mano, bedunu i bomba kan, tuno kede kame kongapo wu kede twer kame yai ki malo.”

Kotero Yesu i Malo

(Marako 16.19-20; Tice 1.9-11)

⁵⁰ Di do en eko telo gi etero gi Betania, eko tingo cinge malo, di eko mino gi winyo.

⁵¹Kakame oudo etie mino gi kede winyo, en eko pokere kede gi di oko tinge kotere i malo.

⁵²Gin di do kiko dok Yerusalem kede kilel adwong adikinicel,

⁵³kiko donyo pako Rubanga i tempulo nakanaka.



Yokana

Yokana 1

Kop me Kuo

- ¹I agege, Kop oudo tie. Kop oudo tie kede Rubanga, doko Kop oudo en Rubanga.
- ²En oudo etie kede Rubanga cako ki agege.
- ³Jame dedede riki kocweo pi en, doko likame tie gimoro i cwec kame bin kocweo abongo en.
- ⁴Kuo oudo tie i en, doko kuo nono en kame oudo obedo lero me jo.
- ⁵Lero nono rieny i colo, do likame colo obwone.
- ⁶Riki tie icuo kame nyinge Yokana, kame Rubanga ooro.
- ⁷En oudo ebino pi bedo ijura me kop i kom lero nono, tetekeny jo dedede yei pi kop mere.
- ⁸En oudo likame ebedo lero, do en bin ebino pi mino ijura i kom lero.
- ⁹Lero me ateni kame caro jo dedede oudo tie bino i piny.
- ¹⁰En oudo etie i piny, doko oko cweno piny pi en, di jo me piny likame oko ngene.
- ¹¹En oudo ebino ture kikokome, do jo mege likame oko game.
- ¹²Do jo dedede kame bin ogame, di oko yei nyinge, en bin emio gi twer me doko idwe ka Rubanga,
- ¹³kalikame konywalo kede remo, doko likame pi mit me kom arabo mit ka dano, do pi mit ka Rubanga.
- ¹⁴Kop oko doko dano di eko bedo i diere wa di epong kede kisa ka Rubanga kede ateni. Wan oneno deyo mere, deyo ka Wod acel kenekene kame owok kikut Papa.
- ¹⁵Yokana bin omio ijura i kome di elelemo be, “Man en ngat kame bin awaco kop i kome be, ‘Ngat kame tie bino i cen ngea pire dwong loa, pien oudo en etie sek di pwodi ango ali.’ “
- ¹⁶Wan dedede otieko udo kisa i wi kisa, kame wok ki kisa mere kopong.
- ¹⁷Pien bin komio Iswil di beo kikut Musa, do kisa kede ateni bin obino di beo kikut Yesu Kirisito.
- ¹⁸Likame tie dano kame otieko neno Rubanga, do kwanyo Rubanga Wod acel kenekene, kame bedo iyapiyapi kede Papa, en ngat kame omie engere.

Kop ka Yokana Ngaibatis

(Matayo 3.1-12; Marako 1.1-8; Luka 3.1-18)

- ¹⁹Man en kop me ijura kame Yokana bin omio i kare kame Iyudayan ocwao kede josaseredoti kede Jolebi ki Yerusalem pi penye be, “In en ngai?”



²⁰En likame eko dagi dwoko ne gi kop, do en eko tucó kakaler di ewaco be, “Ango likame Kirisito.”

²¹Gin kiko penye be, “In do ngai? Benyo, in en Elia?” En eko dwoko be, “Li.” Kiko bobo penye be, “In do enabi?” En eko dwoko be, “Li.”

²²Gin kiko penye be, “In do ngai? Niang wa wek oud kop kame otwero dwoko ne jo kame ooro wa. Kop nyo kame makin kame in iromo waco?”

²³En eko waco be, “Ango en dwan ngat kame lelemo i tim be, ‘ Rieunu yongayo ka Rwot, ’ ” bala kame bin enabi Isaya owaco.

²⁴Iparisayon en kame oudo bin ooro gi.

²⁵Gin kiko penye be, “Do pinyo komio in ibatiso jo ka in likame ibedo Kirisito, amoto Elia, arabo enabi?”

²⁶Yokana oko dwoko ne gi be, “Ango abatiso jo kede pii, do tie ngat kame nan tie cungo i diere wu, kame wun likame ingeunu,

²⁷en nono en kame etie bino ki cen ngea; ango likame apoore pi gonyo ausi me amuka mere.”

²⁸Man bin otimere i Betania, i loka tetuca me Yorodan, kakame Yokana oudo bin tie batiso kiye jo.

Katin Romo ka Rubanga

²⁹Oru mere, Yokana oko neno Yesu di tie bino tetu bute, di eko waco be, “Nenunu Katin Romo ka Rubanga kame kwanyo dub me piny!

³⁰Man en dano kame bin ango awaco kop i kome be, ‘Tie ngat kame tie bino ki cen ngea, kame pire dwong loa, piento en oudo etie sek di pwodi ango ali.’

³¹Ango da kikoma oudo likame angee, doko gi nono en komio ango abino di abatiso jo kede pii, tetekeny en engere but jo me Isirael.”

³²Yokana oko mino ijura be, “Ango aneno Tipo Kacil di bino piny ki malo bala awele di eko dong i kome.

³³Ango da kikoma oudo likame angee; do ngat kame oora pi batiso jo kede pii oko waco na be, ‘Ngat kame inenunu Tipo Kacil obino piny di oko dong i kome, manono en ngat kame batiso jo kede Tipo Kacil.’

³⁴Ango atieko neno doko ajurao be, man en Wot ka Rubanga.”

Josiao me Agege ka Yesu

³⁵Oru mere, Yokana oudo bobo tie cungo kede jo are kikom josiao mege.

³⁶En eko neno Yesu di tie ot, di eko waco be, “Nenunu Katin Romo ka Rubanga!”

³⁷Josiao are nogo bin owinyo di en ewaco kop noni, di do gin kiko lubo Yesu.



³⁸Yesu oko lokere di eko neno gi di kitie lube, en eko penyo gi be, “Imounu nyo?” Gin kiko dwoko ne be, “Rabi” (kame dwong mere be ngapwony), “In ibedo tuai?”

³⁹En eko waco ne gi be, “Bianu inenunu.” Gin kiko ot neno kakame oudo Yesu bedo iye; cenge no gin kiko bedo kede en, pien esawa oudo iyapiyapi romo tomon.

⁴⁰Ngat acel kikom jo are kame bin owinyo yamo ka Yokana di eko lubo Yesu, oudo obedo Anderia omin me Simoni Petero.

⁴¹Me agege, en egeo udo omin mere Simoni, di eko waco ne be, “Wan otieko udo Mesia” (kame dwong mere be Kirisito).

⁴²En eko tere but Yesu. Yesu oko nene di oko waco ne be, “In en Simoni wot ka Yokana. Kobino donyo lwongi do be Kepa” (kame dwong mere be Petero).

Yesu Olwongo Pilipo kede Natanael

⁴³Oru mere Yesu oko moko tam mere pi ot Galilaya. En eko udo Pilipo di eko waco ne be, “Luba.”

⁴⁴Pilipo oudo obedo dano me Betesaida, bomba kame Anderia kede Petero oudo bedo iye.

⁴⁵Pilipo oko udo Natanael di eko waco ne be, “Wan otieko udo ngat kame bin Musa owandiko kop i kome i itabu me Iswil, kede kame inabin da owandiko kop i kome, en Yesu me Nasaret, wot ka Yosepu.”

⁴⁶Natanael oko penye be, “Gimoro aber twero wok ki Nasaret da?” Pilipo oko dwoko ne be, “Bia ineni.”

⁴⁷Yesu oko neno Natanael di tie bino bute, en eko waco kop i kome be, “Ateteni man en dano me Isirael kame li kede angalo.”

⁴⁸Natanael oko penye be, “In iko ngena benyo?” Yesu oko dwoko ne be, “Ango aneni di itie i dud yat epigi di pwodi Pilipo likame olwongi da.”

⁴⁹Natanael oko dwoko ne be, “Apwony, in en Wot ka Rubanga! In en abaka me Isirael!”

⁵⁰Yesu oko dwoko ne be, “Mam in iyei pi kop kame ango awaco ni be ango oudo aneni di itie i dud yat epigi? Ibino neno gi adongodongo kalamo magi.”

⁵¹Yesu oko waco ne be, “Ateteni, ateteni awaco ni be, ibino neno malo di oyabere, kede imalaikan ka Rubanga di tie ot malo kede di kitie bino piny i kom Wot ka dano.”

Yokana 2

Nyom i Kana

¹Ceng me adek nyom oudo tie i bomba atidi me Kana, i piny me Galilaya. Toto me Yesu da oudo tie kuno.

²Oudo kolwongo Yesu da karacel kede josiao mege i nyom nono.



- ³Kakame bwini otiek kede, toto me Yesu oko waco ne be, “Bwini do li ne gi.”
- ⁴Yesu oko waco ne be, “Dako, Itie lola pinyo? Esawa nango pwodi likame otuno.”
- ⁵Toto mere oko waco ne jotic be, “Wun timunu gi dedede kame ewaco ne wu.”
- ⁶Aso, agune kanyape kame kotimo kede engaro oudo tie cungo kuno di lubere kede itok me lonyere me Iyudayan. Agulu acelacel oudo tero galanin ot are arabo ot adek me pii.
- ⁷Yesu oko waco ne gi be, “Pongunu agune go kede pii.” Gin kiko pongo gi lubulub.
- ⁸Yesu oko waco ne gi be, “Aso twomunu mogo iterunu ne ngadwong me ebaga me nyom.” Gin kiko tero.
- ⁹Kakame do ngadwong me ebaga me nyom obilo kede pii, en eko ude elokere edoko bwini, likame en eko ngeno kakame oudo ewok kiye (bed bala jotic kame bin otwomo pii nono oudo ngeo). Ngadwong me ebaga me nyom oko lwongo eteran,
- ¹⁰di eko waco ne be, “Jo dedede geo ber poko bwini amit, do ka jo omato oko romo gi, kiko poko do bwini abot; do in iko kano bwini amit tuno nan.”
- ¹¹Man en gianena mere me agege kame Yesu otimo i Kana kame tie Galilaya, di eko mino deyo mere ongere, di josiao mege oko yei en.
- ¹²Ingei man, Yesu oko ot Kaperanaum kede toto mere, kede imiegu kede amiegu mege, di kiko bedo kuno pi ceng mogo anonok.

Yesu Ooto i Tempulo

(Matayo 21.12-13; Marako 11.15-17; Luka 19.45-46)

- ¹³Ebaga me Kalamo me Iyudayan oudo onoko, di Yesu oko ot paka Yerusalem.
- ¹⁴En eko udo jo kame cato twonin kede romini kede amam, karacel kede jo kame seso sente di kitie bedo i nyim imesai gi me cat i tempulo.
- ¹⁵En oko timo ebela me iyera, di eko riamo gi kede ooko dedede, karacel kede romini kede kiton doke da, di eko kikiro siringi me jo kame oudo seso sente, di erereto imesai gi.
- ¹⁶En eko waco ne jo kame oudo cato amam be, “Terunu gigi tengge. Kur ilokunu ot ka Papa na dok atale.”
- ¹⁷Josiao mege oko yutuno be oudo kowandiko be, “Nyeko na me amara pi odi liel i cunya bala mac.”
- ¹⁸Iyudayan oko waco ne be, “Gianena nyo kame iyaro timo pi nyuto ne wa be in itie kede akarunikin me timo gini?”
- ¹⁹Yesu oko dwoko ne gi be, “Retunu tempulo ni, di ango ako bino gere pi ceng adek kenekene.”
- ²⁰Iyudayan oko waco be, “Gero tempulo ni otero mwakini ot ongwon kiwie kanyape, in iparo be iromo gere pi ceng adek kenekene?”



²¹Do Yesu oudo tie yamo kop i kom tempulo kame obedo kome.

²²Pi mano, i kare kame koyaruno en kede kikom jo oto, josiao mege oko yutuno be oudo bin ewaco kop noni; kiko yei iwandik kacil kede kop kame oudo bin Yesu owaco.

Ngec ka Yesu i kom Ekite ka Danu

²³I kare kame bin Yesu tie kede Yerusalem i Ebagu me Kalamo, jo atos oko yei en kakame kineno kede gianena kame en etimo.

²⁴Do Yesu likame oko keto gen mere i kom gi,

²⁵pien en oudo engeo gikame tie i cuny jo dedede. Omio oudo likame emitere pi dano moro mino ijura i kom ngatamoro, piento en kikome oudo engeo gikame tie i cuny jo.

Yokana 3

Yesu Oyamo kede Nikodemu

¹Oudo bin tie icuo moro kame nyinge Nikodemu, kame oudo obedo ngat acel kikom Iparisayon, en oudo ngapug me Iyudayan.

²Icuo noni bin obino but Yesu iwor di eko waco ne be, “Rabi, wan ongeo be in ngapwony kame owok kikut Rubanga, pien likame tie dano moro kame twero timo gianena kame in itimo gi, kwanyo kame di Rubanga tie kede en.”

³Yesu oko dwoko ne be, “Ateteni, ateteni ango awaco ni be, likame tie ngat kame twero neno Ajakanut ka Rubanga, kwanyo ka konywale tien me are.”

⁴Nikodemu oko penye be, “Ka dano otieko doko dwong, kotwero nywale bobo benyo? Etwero bobo donyo i yi toto mere tien me are di oko nywale benyo?”

⁵Yesu oko dwoko be, “Ateteni, ateteni awaco ni be, likame tie ngat kame twero donyo i Ajakanut ka Rubanga kwanyo di konywale nywal me pii kede me Tipo Kacil.

⁶Gikame kom nywalo udo en kom, doko gikame Tipo nywalo udo en tipo.

⁷Kur ibed kede ur be pien ango awaco ni be, kopoore nywali tien me are.

⁸Yamo buko kakame en emitu; in itwero winyo buko mere, do likame ingeo kakame ewok kiye, akadi kakame etie ot iye; etie kamanono da kede dano acelacel kame konywalo nywal me Tipo Kacil.”

⁹Nikodemu oko penye be, “Man karuno timere benyo?”

¹⁰Yesu oko dwoko ne be, “In kom ibedo ngapwony me Isirael do di likame iniang gini?”

¹¹Ateteni, ateteni awaco ni be, wan oyamo kop i kom gikame ongeo, kede gikame oneno; do in idagi yei ijura kame wan omio.

¹²Ka awaco ni kop i kom gi me piny di iko dagi yei, ikaruno do yei benyo ka ayamo ni kop i kom jame me malo?



¹³Likame tie ngatamoro kotieko ot malo, kwanyo kenekene ngat koyai ki malo bino piny, en Wot ka dano.

¹⁴“Bala kite kame bin Musa okiarao kede twol i tim, kobino kiarao Wot ka dano da malo kamanono,

¹⁵tetekeny ngat kame yei en ud kuo kame bedo nakanaka.

¹⁶Pien Rubanga bin omaro piny, omio eko cwano iye Wode acel kenekene, tetekeny ngat kame yei en kur toi, do eud kuo kame bedo nakanaka.

¹⁷Pien Rubanga likame ocwao wode i piny pi ngolo ne piny kop, do en ecwae tetekeny piny ud alako pi en.

¹⁸” Ngat kame yei en likame kobino ngolo kop loe; do ngat kalikame yei en kotieko ngolo kop oloe cuto, pien likame eyei nying Wot ka Rubanga acel kenekene.

¹⁹Ngolo kop en ine be, lero otieko bino i piny, do jo oko maro colo akaka lero, pien tice gi oudo reco.

²⁰Pien ngat acelacel kame timo gikarac dagi lero, doko likame ebino i lero, tetekeny tice mege kur ngere.

²¹Do ngat kame timo gi me ateni bino i lero, tetekeny enyutere kakaler be tice mege obedo tice me woro Rubanga.”

Yokana Owaco Kop i kom Yesu

²²Ingei man, Yesu kede josiao mege oko ot i piny me Yudea, di en eko dong kede gi kuno di ebatiso jo.

²³Yokana da oudo tie batiso jo i adul me Aenon, i nget Salim, pien oudo pii tie tot kuno. Oudo bin jo bino kuno di oko batiso gi,

²⁴ pien oudo pwodi likame koketo Yokana i otkol.

²⁵Piem oko gere i dierediere me josiao ka Yokana kede Ngayudaya acel i kom kop kame mako lonyere.

²⁶Gin kiko bino but Yokana di kiko waco ne be, “Apwony, ngat kame oudo in itie kede loka tetuca me Yorodan, kame in bin imio ijura i kome nono, en ine etie batiso jo; doko jo dedede tie ot bute.”

²⁷Yokana oko dwoko ne gi be, “Likame tie dano kame twero udo gimoro kwanyo di komie ki malo.

²⁸ Wuda kikomu ijuraunu ango be awaco be, ango likame Kirisito, do kocwao ango pi telo ne en yongayo.

²⁹Icuo eteran en kame won ateran; do adieru me eteran, kame cungo i ngete di ewinyo yamo mere lelo twatwal pi winyo dwan eteran. Pi mano, ango nan atie kede yomcuny adwong.



³⁰En miero emeede, do ango miero adok piny.”

Ngat kame Obino ki Malo

³¹” Ngat kame obino ki malo kalamo jo dedede. Ngat kame tie i piny udo en me piny, doko da eyamo kope kame mako jamini me piny; ngat kame obino ki malo kalamo jo dedede.

³²En ejurao gikame eneno kede kame ewinyo, do likame tie ngatamoro kame yei ijura kame en emio.

³³Ngat kame yei kop me ijura mere, udo ngat nono otieko moko be Rubanga en ateni.

³⁴Pien ngat kame Rubanga ocwao, en eyamo kop ka Rubanga, pien likame Rubanga mio Tipo Kacil di epimo apima;

³⁵ Papa maro Wod, doko etieko mino jame dedede i cinge.

³⁶Ngat kame yei Wod tie kede kuo kame bedo nakanaka; ngat kalikame yei Wod likame ebino udo kuo, do lilo ka Rubanga bino potu i kome.”

Yokana 4

Yesu kede Dako me Samaria

¹Kakame Yesu ongego kede be Iparisayon oudo owinyo be en etie batiso kede loko jo doko josiao mege lono Yokana

²(bed bala Yesu kikome likame obatiso ngatamoro, kwanyo josiao mege en kame oudo batiso jo),

³en eko yai ki Yudea di eko dok Galilaya.

⁴Oudo miero ebei ki Samaria.

⁵ En eko tuno i bomba me Samaria kame kolwongo be Saikar, kame iyapiyapi kede potu kame bin Yakobo omio wode Yosepu.

⁶Atan ka Yakobo oudo tie kunono. Aso, kite kame Yesu oudo ool kede ot, omio en eko bedo piny i nget atan nono. Oudo esawa do oyapuno romo kanyape me i ceng.

⁷Dako moro me Samaria oko bino pi twomo pii. Yesu oko waco ne be, “Mia pii amati.”

⁸Josiao mege oudo ooto wilo cam i bomba.

⁹ Dako Ngasamaria nono oko penye be, “Twerere benyo in Ngayudaya penyoo pii me amata kikut ango dako me Samaria?” Pien bin Iyudayan likame nywako kede Josamaria.

¹⁰Yesu oko dwoko ne be, “Koto oudo ingeo giamia ka Rubanga kede ngat kame tie waco ni be, ‘Mia pi amati, ‘oudo koto ipenye di en eko mini pii me kuo.”



- 11**Dako nono oko dwoko ne Yesu be, “Adwong, in ili kede gi me twomo pii, doko atan noni tut, in ibino udo pii me kuo nono ki tuai?”
- 12**Iparo be in idwong kalamo kwaru wan Yakobo, kame bin omio wan atan noni, doko di eda bin emato pii mere karacel kede awobe mege, kiton doke mege da?”
- 13**Yesu oko waco ne be, “Ngat acelacel kame mato pii ni, orio bobo pwodi bino neke;
- 14**do ngat kame mato pii kame ango abino mine, likame orio bino neke; pii kame ango abino mine bino doko ne atan me pii kame mol tuno i kuo kame bedo nakanaka.”
- 15**Dako nono oko kwano Yesu be, “Adwong, mia pii nono wek kur orio neka bobo, di do ako weko bino kan twomo pii.”
- 16**Yesu oko dwoko ne be, “Ot ilwong cwari, ibinunu kede kan.”
- 17**Dako nono oko dwoko ne be, “Ango ali kede cwara.” Yesu oko waco ne be, “Idwoko kakare be ili kede cwari;
- 18**pien in itieko bedo kede cuo kany, mano kame nan itie bedo kede no likame en cwari, iwaco kop me ateni.”
- 19**Dako nono oko waco ne be, “Adwong, atieko neno be in enabi.
- 20**Joakwari wan bin woro Rubanga ki wi moru noni, do wun iwacunu be Yerusalem en kakame jo poore woro kiye Rubanga.”
- 21**Yesu oko waco ne be, “Dako ni, yei gikame ango atie waco ni, kare tie bino kalikame ibinunu woro kede Rubanga ki wi moru noni akadi ki Yerusalem da.
- 22**Wun iworunu ngat kalikame ingeunu; do wan oworo ngat kame ongeo, pien alako owok kibus Iyudayan.
- 23**Do esawa tie bino, doko nataman en inononi da, kame jo kame woro Rubanga i ateni bino woro Papa i twer me Tipo Kacil kede ateni. Pien epone me jo nogi en kame Papa mo pi mine wor.
- 24**Rubanga en Tipo, doko jo kame wore miero wore i twer me Tipo kede ateni.”
- 25**Dako nono oko dwoko ne be, “Ango angeo be Mesia tie bino” (en ngat kame kolwongo be Kirisito). “Ka en etuno, ebino nyuto ne wa gi dedede.”
- 26**Yesu oko waco ne be, “Ango inononi kame atie yamo kedi.”
- 27**Esawa nono josiao ka Yesu oko tuno. Gin kiko uro pien Yesu oudo tie yamo kede dako, do likame tie da ngatamoro kame oko penyo dako nono be, “Imito nyo?” Arabo kame oko penyo Yesu be, “Pinyo komio itie yamo kede dako no?”
- 28**Di do dako nono oko weko agulu mere me pii, en eko ot i bomba, di eko waco ne jo be,
- 29**” Bianu inenunu icuo kame otuco na gi dedede kame ango atimo cako. Benyo, iparunu be ekaruno bedo Kirisito?”



- 30 Gin kiko yai ki bomba di kiko bino but Yesu.
- 31 Iesawa nono da, josiao oudo tie ngangao Yesu di kiwaco ne be, “Apwony, cami.”
- 32 Do Yesu oko dwoko ne gi be, “Ango atie kede cam na me acama, kame wun likame ingeunu.”
- 33 Josiao oko donyo penyere ken gi ken gi be, “Amoto ngatamoro okelo ne cam?”
- 34 Yesu oko waco ne gi be, “Cam nango en timo gikame ngat kame oora mito, kede pi cobo tic mere kakare.
- 35 Mam wun itienu kede kop kame waco be, ‘Odong pwodi dwete ongwon tuno i kac?’ Awaco ne wu be, tingunu wangu malo ikounu neno poti, cam otieko cek mito do kac.
- 36 Ngat kame kao udo egelit, doko ecoko anyakini pi kuo kame bedo nakanaka, tetekeny ngacuc kede ngakac bed kede kilel karacel.
- 37 Kop kame waco be, ‘Ngat acel cuo di ngat ace ko kac, ‘tie kop me ateni.
- 38 Ango acwao wu ot timo tic me kac me gi kalikame wun icanenu iye; jo apat ocane iye, do wun ikounu udo gikaber ki kwok gin.”
- 39 Jo me Samaria atot kame oudo tie i bomba nono oko yei Yesu pi ijura kame dako nono omio i kome be, “Etucu na gi dedede kame ango oudo atimo cako.”
- 40 Kakame Josamaria obino kede, kiko kwano Yesu be bed kede gi; di Yesu oko bedo kuno pi ceng are.
- 41 Jo ace atot oko yei Yesu pi kope kame epwonyo.
- 42 Gin kiko waco ne dako nono be, “Likame wan oyei pi yamo nin, do pien wan ikom wa otieko winyo, doko ongeo be ateteni man en Ngalak me piny.”

Yesu Ocango Wot ka Ngadwong me Tic

- 43 Di ceng are okato, Yesu oko yai di eko ot Galilaya.
- 44 Pien Yesu kikome oudo owaco be, “Likame koworo enabi i piny me tur gi.”
- 45 Pi mano, kakame Yesu obino kede Galilaya, Jogalilaya oko game, pien gin kineno gi dedede kame oudo Yesu otimo ki Yerusalem i kare me ebaga, pien gida oudo kioto i ebaga nono.
- 46 Aso, Yesu oko bobo dwogo Kana i Galilaya, kakame oudo eloko kiye pii oko doko bwini. Oudo tie ngatel moro kame oudo wode tuwo i Kaperanaum.
- 47 Kakame ewinyo kede be Yesu oudo obino Galilaya di ewok ki Yudea, en eko ot kwano Yesu pi ot cango wode, piento en oudo iyapiyapi to.
- 48 Pi mano, Yesu oko waco ne icuo nono be, “In likame ibino yei, tuno di ineno gianena kede gi me isuur.”
- 49 Ngatel oko waco ne Yesu be, “Adwong, bia ooti di pwodi atin na likame oto.”



⁵⁰Yesu oko waco ne be, “In oti, wodi bino kuo.” Icuo nono oko yei kop kame Yesu owaco ne, en eko ot.

⁵¹Kakame oudo etie lor kede i aserengete, jotie mege oko riamo kede en di kiko waco ne be wode oudo kuo;

⁵²en eko penyo gi esawa kame kome ogeo doko ber kede. Gin kiko dwoko ne be, “Nyoro en kame musuja oko weke kede iesawa kanyaare.”

⁵³Kikano papa me awobi nono oko niang be, manono en oudo esawa kame Yesu owaco ne kede be, “Wodi bino kuo.” Di do en eko yei karacel kede jo me ode dedede.

⁵⁴Man en oudo gianena me are kame Yesu otimo kakame en ebino kede Galilaya di ewok ki Yudea.

Yokana 5

Yesu Ocango Icuo i Atapar

¹Ingei man, ebaga me Iyudayan oko bedo, Yesu oko ot paka Yerusalem.

²Oudo bin atapar tie Yerusalem i nget Erute me Romini, kame oudo tie kede ikekon kany kame kogero wi gi. Oudo kolwongo atapar nono kede leb Eburania be Betesaida.

³Ekodet me jo kame bin tuwo obwono oudo buto i dog ikekon nogo. Oudo gin kibedo imuduka, ingwalasa, kede jo kame tuwo oneko adulion me kom gi. Gin bin oudo kidaro rubere me pii;

⁴pien malaika ka Rwot oudo bino kuno i kare mogo di eko rubo pii. Ngat kame oudo geo donyo i yi pii ingei rubere mere, oudo cango ki tuwo kame etie kede.

⁵Icuo acel bin tie kuno kame oudo obedo kede tuwo pi mwakini ot adek kiwie kanyauni.

⁶Kakame Yesu oneno kede icuo nono di eko ngeno be oudo etieko kare alac di ebuto kuno, en eko penye be, “Imito be icangi?”

⁷Icuo kame oudo tuwo nono oko dwoko ne Yesu be, “Adwong, ango ali kede ngat kame keta i pii kame korubo pii. Doko kame ango atie ot iye, dano ace en kame geo donyo na iye.”

⁸Yesu oko waco ne be, “Yai malo, kwany gibuto ni ioti.”

⁹Cucuto icuo nono oko cango, en eko kwanyo gibuto mere di eko ot. Ceng nono oudo obedo Ceng Sabato.

¹⁰Iyudayan oko waco ne icuo kame kocango nono be, “Tin Ceng Sabato, Iswil wa likame yei ni yeno gibuto ni.”

¹¹Do icuo nono oko dwoko ne gi be, “Icuo kame omia acango en kame owaco na be, ‘Kwany gibuto ni ioti.’ ”

¹²Gin kiko penye be, “Icuo mene en kame owaco ni be, ‘Kwany gibuto ni ioti?’ ”



¹³Icuo kame oudo kocango nono likame oudo ngeo be ngai inonono, Yesu oudo orwenyo ne pien jo oudo tot kuno.

¹⁴I cen mere, Yesu oko ude i tempulo di oko waco ne be, “Neni, itieko do doko ber! Kur imed bobo dubo, tetekeny gimoro arac kalamo mano kur doko timere ni.”

¹⁵Icuo nono oko ot di eko waco ne Iyudayan be Yesu en kocange.

¹⁶Man en gikomio Iyudayan oko tidilo Yesu, piento oudo etimo gini i Ceng Sabato.

¹⁷Do Yesu oko dwoko ne gi be, “Papa na pwodi tie tic, ango da atie tic.”

¹⁸Man en gikame omio Iyudayan oko meede mono neke, pien likame eturo Iswil me Sabato kenekene, do doko da elwongo Rubanga be Papa mere kikokome, iepone noni en udo eporere kede Rubanga.

Akarunikin kame Wod tie kede

¹⁹Yesu oko waco ne gi be, “Ateteni, ateteni ango awaco ne wu be, Wod likame timo gimoro kede mit mere kene, do etimo gikame eneno di Papa mere timo kenekene; pien gikame Papa timo dedede, etimo tetekeny Wode da tim kamanono.

²⁰Pien Papa maro Wod, bobo enyuto ne gi dedede kame en kikome etie timo. Doko da ebino nyuto ne tice adongodongo kalamo magi, di wun ikounu bino uro.

²¹Pien bala kite kame Papa yaruno kede jo oto di eko mino gi kuo, kamanono da Wod mio kuo but jo kame cunye mito.

²²Papa likame ngolo ne ngatamoro kop, do etieko mino ngolo kop i cing Wod,

²³tetekeny jo dedede bed kede wor but Wod bala kite kame kibedo kede wor but Papa. Ngat kalikame tie kede wor but Wod, udo likame etie kede wor but Papa ngat kocwao Wod.

²⁴” Ateteni, ateteni awaco ne wu be, ngat kame winyo kop na di eko yei ngat kame oora, etie kede kuo kame bedo nakanaka; likame kobino ngolo ne kop, do etieko yai ki to etuno i kuo

²⁵Ateteni, ateteni awaco ne wu be, esawa oyaro tuno, doko nataman en inononi da, kame jo oto bino winyo kede dwan Wot ka Rubanga, di jo kame winyo ko bino bedo kuo.

²⁶Pien bala kite kame Papa kikome en kame kuo wok kibute, kamanono da etieko mino Wod bedo ngat kame kuo wok kibute.

²⁷Doko etieko mino Wod akarunikin me ngolo ne jo kop, piento en ebedo Wot ka dano.

²⁸Kur iurunu kop noni; pien esawa bino tuno kame jo dedede kame tie i atesin bino winyo kede dwane,

²⁹ di kiko wok. Jo kotimo gikame beco bino yaruno i kuo, do jo kame otimo gikareco bino yaruno di oko ngolo ne gi kop.



Ijurak ka Yesu

- 30**” Likame tie gikame atwero timo i akarunikin nango kena. Ango angolo kop bala kame kowaco na kede; ngolo kop nango tie me ateni; pien likame udo angu alubo mit na, do angu alubo mit me ngat kame oora.
- 31**” Ka angu amio ijura i koma kena, udo kop me ijura na likame tie me ateni;
- 32**do tie dano ace kame mio ijura akaka angu, doko angu angeo be ijura kame en emio i koma tie me ateni.
- 33** Wun icwaunu jo but Yokana di en eko mino ijura me ateni.
- 34**Likame pien angu audo ijura noni kibu dano, do angu ayamo kamano me wek iudunu alako.
- 35**Yokana oudo tie bala etala kame liel di erieny, doko wuda oudo itieny kede mit me kilel tunutunu i lero mere.
- 36**Do kop me ijura kame angu atie kede pire tek kalamo me ka Yokana; pien tice kame Papa omia pi timo, tice nogo en kame nataman atie timo, gin en kame kijurao angu be Papa en kame oora.
- 37** Doko Papa da ngat kame oora otieko mino kop kame jurao angu. Pwodi likame iwinyunu dwane akadi neno cal mere da.
- 38**Doko likame kop mere odong i cunyu, pien likame iyeunu ngat kame en eoro.
- 39**Wun imounu gikame tie i iwandik kacil, pien iparunu be ibinunu udo kuo kame bedo nakanaka ki yi gi, do di gin nogo en kame kimio kop kame jurao angu.
- 40**Do di idagunu bino buta tetekeny ibedunu kede kuo kame bedo nakanaka.
- 41**” Angu likame amo deyo kibu jo.
- 42**Do angeo be cunyu likame tie kede amara i kom Rubanga.
- 43**Angu nan abino i nying Papa na di ikounu daga gama; do ka ngatamoro obino i akarunikin mere kene, ibinunu game.
- 44**Itwerunu yei benyo benyo wun jo kame iudunu deyo kibu jo icegun, do di likame imounu deyo kame wok kibu Rubanga acel kenekene?
- 45**Kur iparunu be angu abino pido wu but Papa; Musa en kame pido wu, en ngat kame wun iketunu gen wu i kome.
- 46**Ka koto oudo iyeunu Musa, koto oudo iyeunu ada, pien Musa oudo owandiko kop i koma.
- 47**Do ka likame iyeunu kop kame ewandiko, ibinunu yei kop na benyo benyo?”

Yokana 6

Yesu Opito Jo Tutumia Kany
(Matayo 14.13-21; Marako 6.30-44; Luka 9.10-17)



- ¹Ingei man, Yesu oko ngolo loka tetuca me nam me Galilaya, kame kolwongo da be nam me Tiberia.
- ²Ekodet adwong me jo oko lube, pien oudo gin kineno gianena kame en etimo ne jo kame oudo tuwo.
- ³Yesu oko yito malo i wi moru, en eko bedo piny kuno kede josiao mege.
- ⁴Ebaga me Kalamo, kame obedo ebaga me Iyudayan, oudo onoko.
- ⁵Kakame Yesu otingo kede wange malo, en eko neno ekodet me jo di kitie bino bute, di eko waco ne Pilipo be, “Obino wilo mugati kituai, tetekeny omi jogi cami?”
- ⁶En ewaco man pi tamo Pilipo, pien Yesu kikome oudo ngeo gikame en ebino timo.
- ⁷Pilipo oko dwoko ne be, “Denari tol are likame twero wilo mugati kame romo gi di ngat acelacel kikom gi ko twero udo atitidi moro.”
- ⁸Ngat acel kikom josiao mege kame nyinge Anderia, omin me Simoni Petero, oko waco ne Yesu be,
- ⁹” Awobi tie kan kame tie kede mugati kany kede deksam are; do mago kenekene timo ne twon jogi nyo?”
- ¹⁰Yesu oko waco be, “Miunu jo bed piny.” Oudo lum tot kanono; di jo kame wel gi romo cuo tutumia kany oko bedo piny.
- ¹¹Yesu oko kwanyo mugati; kakame etieko mino kede pwoc, en eko popoko gi ne jo kame oudo obedo piny. En eko timo kamanono da kede deksam, gin dedede kiko udo gikame romo gi.
- ¹²Kakame kitieko do yeng kede, Yesu oko waco ne josiao mege be, “Cokunu angidingidin kame odong tetekeny kur gimoro dubere aduba.”
- ¹³Gin kiko koko angidingidin me mugati kany me mawele, kame jo bin ocamo oko weko, di oko pongo ibukito tomon kiwie are.
- ¹⁴Kakame jo oneno kede gianena kame Yesu otimo, gin kiko waco be, “Ateteni man en enabi kame oudo poore bino i piny!”
- ¹⁵Di Yesu ongeko be oudo kiyapuno bino make tetek pi mine doko abaka, en bobo eko yai eoto tenge i moru en kene.

Yesu Ooto ki wi Pii kede Tiene

(Matayo 14.22-33; Marako 6.45-52)

- ¹⁶Di bin piny oyuto, josiao mege oko ot i nam,
- ¹⁷kiko donyo i yi yee di kiko ngolo nam pi ot loka Kaperanaum. Piny oudo odoko col, do Yesu oudo pwodi likame obino but gi.
- ¹⁸Yamo atek oudo tie buko, oko mino nam otingere.



¹⁹Kakame kitieko kwang kede pi mairo kame romo bala adek arabo ongwon, gin kiko neno Yesu di etie ot ki wi pii kede tiene, di oudo etie nyiko doko iyapiyapi kede yee. Lworo atek oko mako gi,

²⁰do Yesu oko waco ne gi be, “Ango inononi, kur lworo maku.”

²¹Cuny gi oko bedo yom pi mine donyo i yi yee. Cucuto yee oko tuno ooko kakame oudo kitie ot iye.

Jo Omoo Yesu

²²Oru mere, jo kame oudo odong loka tetuca oko niang be yee oudo tie kuno acel kenekene; doko da be Yesu oudo likame odonyo iye kede josiao mege, do be josiao mege oudo ooto tenge gin ken gi.

²³Bed bala kamanono da, yede kame bin owok ki Tiberia oko bino tuno i nget kakame oudo gin kicamo kiye mugati ingei Rwot mino pwoc.

²⁴Kakame do jo oneno kede be Yesu oudo li ki kuno, akadi kiton josiao mege da, gida kiko donyo i yi yede kiko ot Kaperanaum di kimoo Yesu.

Yesu en Mugati me Kuo

²⁵Kakame kiudo kede Yesu loka tetuca me nam, kiko waco ne be, “Apwony, in ibino kan awene?”

²⁶Yesu oko dwoko ne gi be, “Ateteni, ateteni awaco ne wu be, wun likame itienu mona pien inenunu gianena, do pien icamunu mugati ikounu yeng.

²⁷Kur icanenu pi cam kame dubere, do canenu pi cam kame kanyakino tuno i kuo kame bedo nakanaka, kame Wot ka dano bino mino wu, pien Rubanga Papa otieko keto alama mere i kome.”

²⁸Gin kiko penye be, “Otim nyo, en kame mio udo otie timo tic ka Rubanga?”

²⁹Yesu oko dwoko ne gi be, “Tic ka Rubanga en ine be, wun miero iyeunu ngat kame en eoro.”

³⁰Aso gin kiko waco ne Yesu be, “Gianena nyo kame ikaruno timo, me wek wan onen di oko yei in? Ibino timo nyo?”

³¹Joakwari wa bin ocamo emana i tim; bala kite kame bin kowandiko kede be, ‘Emio gi mugati kowok ki malo pi camo.’ “

³²Yesu di do oko waco ne gi be, “Ateteni, ateteni awaco ne wu be, likame Musa en kame bin omio wu mugati kame owok ki malo; Papa na en kame bin omio wu mugati me ateni kame owok ki malo.

³³Pien mugati ka Rubanga en maca kame wok ki malo di eko mino kuo i piny.”

³⁴Gin kiko waco ne be, “Rwot, dony mino wa do mugati nono nakanaka.”

³⁵Yesu oko waco ne gi be, “Ango en mugati me kuo; ngat kame bino buta kec likame bino neke, doko ngat kame yei angu orio likame bino neke.



- ³⁶Do ango atieko waco ne wu be wun itiekunu nena, do pwodi likame iyeunu.
- ³⁷Jo dedede kame Papa mia oyaro bino buta; doko ngat kame bino buta, likame abino riame tenge.
- ³⁸Pien ango abino ki malo, likame pi timo gikame ango amito, do pi timo gikame ngat kame oora mito.
- ³⁹Gikame ngat oora mito en ine be, likame apoore rwenyo ngatamoro kikom jo dedede kame en emia, do miero ayaruno gi i ceng me ajikini.
- ⁴⁰Pien gikame Papa na mito en ine be, ngat acelacel kame neno Wod di ko yei en poore udo kuo kame bedo nakanaka; doko ango ako bino yaruno en i ceng me ajikini.”
- ⁴¹Iyudayan oko cako ngunguro i kom Yesu pien oudo ewaco be, “Ango en mugati kame obino piny yai ki malo.”
- ⁴²Gin kiko waco be, “Mam icuo noni en Yesu wot ka Yosepu? Wan ongeopapa mere kede toto mere da. Benyo benyo doko komio en nan ewaco be, ‘Ango ayai ki malo abino piny?’ ”
- ⁴³Yesu oko dwoko ne gi be, “Kur ingunguru kenu kenu.
- ⁴⁴Likame tie ngatamoro kame twero bino buta kwanyo kenekene ka Papa ngat kame oora en okele; doko abino yaruno en i ceng me ajikini.
- ⁴⁵ Kowandiko i itabu me inabin be, ‘Doko Rubanga bino pwonyo gin dedede.’ Ngat acelacel kame winyo kop ka Papa na di eko udo pwonyere kibute, en ebino udo alako.
- ⁴⁶Likame dwong mere be tie ngatamoro kotieko neno Papa, do kwanyo ngat kowok kibut Rubanga en kame otieko neno Papa.
- ⁴⁷Ateteni, ateteni awaco ne wu be, ngat kame yei tie kede kuo kame bedo nakanaka.
- ⁴⁸Ango en mugati me kuo.
- ⁴⁹Joakwari wu bin ocamo emana i tim do kiko to.
- ⁵⁰Man en mugati kowok ki malo, tetekeny dano came di likame eko to.
- ⁵¹Ango en mugati me kuo kame owook ki malo; ngat kame camo mugati noni bino kuo ikar kede ikar. Mugati kame ango abino mino pi kuo me piny en ringokoma.”
- ⁵²Iyudayan oko donyo piem ken gi ken gi be, “Icuo ni karuno mino wan ocamo ringokome benyo benyo?”
- ⁵³Yesu oko waco ne gi be, “Ateteni, ateteni awaco ne wu be, ka likame icamo ringokom Wot ka dano kede imato remo mere, likame ibino bedo kuo.
- ⁵⁴Ngat kame camo ringokoma kede kame mato remo na, en etie kede kuo kame bedo nakanaka, doko abino yaruno en i ceng me ajikini,
- ⁵⁵pien ringokoma en cam me ateni, doko remo na da en giamata me ateni.



- ⁵⁶Ngat kame camo ringokoma kede mato remo na bedo i ango doko ada abedo i en.
- ⁵⁷Bala kame Papa kakuo oora kede, doko di ango akuo pi Papa, kamanono da ngat kame camo ringokoma bino bedo kuo pi ango.
- ⁵⁸Man en mugati kame bin owok piny ki malo, likame bala maca kame bin joakwari ocamo di kiko to; ngat kame camo mugati noni bino kuo ikar kede ikar.”
- ⁵⁹Yesu owaco kope nogi di oudo etie pwoy i sinagoga i Kaperanaum.

Kope me Kuo kame Bedo Nakanaka

- ⁶⁰Kakame josiao ka Yesu atos owinyo kede kop mere, gin kiko waco be, “Man kop atek; ngai kame karuno yei lube?”
- ⁶¹Do Yesu oko ngeno i cunye kene be josiao mege oudo tie ngunguro pi gikame en ewaco, omio en eko penyo gi be, “Mam kop noni owango cunyu?”
- ⁶²Do benyo ka koto oudo inenunu Wot ka dano di etie ot malo kakame oudo bin egeo bedo iye sek?
- ⁶³Tipo ka Rubanga en kame mio kuo, do kom dano likame tie kede kony moro; kope kame ango atieko waco ne wu tie Tipo ka Rubanga kede kuo da.
- ⁶⁴Do tie jo mogo ki komu kalikame yei.” Pien Yesu oudo ngeo cako ki agege jo kalikame yei kede da ngat kame oudo oyaro rupao en.
- ⁶⁵En eko waco be, “Gini en komio ango awaco ne wu be, likame tie ngatamoro kame sobolo bino buta, kwanyo di Papa na en oyei ne.”
- ⁶⁶Ingei man, jo atos kikom jo kame bin oudo lubo Yesu oko dok cen, likame bobo kiko meede upere kede.
- ⁶⁷Yesu oko penyo josiao mege tomon kiwie are be, “Wuda nan do imitunu weko luba?”
- ⁶⁸Simoni Petero oko dwoko ne be, “Rwot, wan bobo otwero ot but ngai? In en kame itie kede kope kame mio kuo kame bedo nakanaka;
- ⁶⁹doko wan otieko yei di oko ngeno da be in en Ngat Kacil ka Rubanga.”
- ⁷⁰Yesu oko dwoko ne gi be, “Mam ango en kame ayero wu, wun jo tomon kiwie are? Do di ngat acel kikom wu obedo Sitani.”
- ⁷¹Yesu oudo tie waco kop i kom Yuda wot ka Simoni Isikariot, pien bed bala en oudo ebedo ngat acel kikom josiao tomon kiwie are, en oudo eyaro rupao Yesu.

Yokana 7

Yesu kede Imiegu mege

- ¹Ingei man, Yesu oko ririmo Galilaya, likame oudo ekaruno ririmo Yudea pien Iyudayan oudo mito neke.



² Kare me ebaga me kimere oudo iyapiyapi.

³Di do imiegu mege oko waco ne be, “Yai ki kan ioti i Yudea, tetekeny jo kame lubi nen tice kame itie timo.

⁴Pien likame tie dano kame timo tice mege i mung ka emito be engere kakaler. Ka itie timo gigi, nyutere wek piny lung ngei.”

⁵Pien akadi imiegu ka Yesu da oudo likame oyei en.

⁶Yesu oko waco ne gi be, “Kare nango pwodi likame otuno, do wun itienu kede kare nakanaka.

⁷Jo me piny likame sobolo dagi wun, do kidagi ango pien ango abedo waco ne gi be tice gi reco.

⁸Wun otunu i ebaga; ango likame ayaro ot i ebaga no, pien kare na pwodi likame otuno.”

⁹Ewaco kaman di eko dong Galilaya.

Yesu Ooto i Ebaga me Kimere

¹⁰Do i cen mere di imiegu mege oudo otieko ot i ebaga, Yesu da oko kwalere ooto kuno i mung.

¹¹Iyudayan oudo tie mone ki kakame ebaga oudo tie iye di kipenyere be, “Ani en?”

¹²Jo oudo tie kede ingungur adwong i kome. Jo mogo oudo waco be, “En dano aber,” do jo ace waco be, “Li, en kom etie rwenyo jo.”

¹³Do likame tie ngatamoro oko yamo kop obe i kome, pien oudo kilworo Iyudayan.

¹⁴Kakame ebaga otuno kede diere, Yesu oko ot i tempulo di eko pwonyo jo.

¹⁵Iyudayan oko uro di kiwaco be, “Benyo benyo komio icuo ni tie kede rieke kame rom kaman do di likame esomo?”

¹⁶Yesu oko dwoko ne gi be, “Pwony na likame mega kikoma, do me ka ngat kame oora.

¹⁷Ka ngatamoro tie kede mit me timo gikame Rubanga mito, ebino ngeno ka pwony na owok kibut Rubanga arabo ka ango atie yamo i akarunikin nango kena.

¹⁸Ngat kame yamo i akarunikin mere kene mo deyo mere kene; do ngat kame mo deyo pi ngat kame oore, en dano me ateni, bobo eli kede angalo moro i kuo mere.

¹⁹Mam bin Musa omio wu Iswilia? Do likame tie ngatamoro kibutu kame gwoko Iswilia nogo. Pinyo bo komio imounu neka?”

²⁰Jo oko dwoko be, “In itie kede jwogi! Ngai kame tie mono neki?”

²¹Yesu oko dwoko ne gi be, “Ango bin atimo gi acel di wun dedede ikounu uro.



²² Musa bin ociko wu pi kepere (likame pien kop noni oudo wok kibut Musa, do oudo ewok kibut joakwari), di wun ikounu donyo kepo awobe i Ceng Sabato.

²³ Ka wun ikepunu dano Ceng Sabato be tetekeny kur iturunu Iswil ka Musa, pinyo komio idokunu ger keda, be pien ango amio kom dano lung ocango Ceng Sabato?

²⁴ Kur ingolunu kop di lubere kede gikame wangu neno, do ngolunu kop kede ateni.”

Jo Openyere ka Yesu en Kirisito

²⁵ Pi mano, jo mogo me Yerusalem oko waco be, “Mam icuo kame kitie mono neko nono ine?

²⁶ Aso en ine etie yamo obe i dier jo, do di likame kiromo yamo ne kop moro da! Benyo, karuno bedo di jotel ngeo ateteni be Kirisito en ine?

²⁷ Wan ongego kakame icuo ni owok kiye; do kame Kirisito obino, likame tie dano kame bino ngeno kakame ewok kiye.”

²⁸ Yesu oko waco ne gi bala kite kame oudo epwonyo gi kede i tempulo be, “Benyo, ateteni iparunu be ingeanu, doko ingeunu kakame ango awok kiye? Do ango likame abino pi mit na kena; ngat kame oora tie kede ateni, doko wun likame ingeenu.

²⁹ Ango angee, pien awok kibute, doko en kame eora.”

³⁰ Kikano, gin kiko mono make; do likame tie ngatamoro kame oko keto cinge i kome, pien esawa mere oudo pwodi likame otuno.

³¹ Do jo atot i ekodet oko yei en di kiwaco be, “Kame Kirisito obino, iparunu be ebino timo gianena kame kalamo kame icuo ni otimo?”

Kocwao Isirikalen pi Ot Mako Yesu

³² Iparisayon oko winyo di ekodet ngunguro i kom Yesu. Jodongo me josaseredoti kede Iparisayon oko cwano isirikalen me tempulo pi make.

³³ Yesu oko waco be, “Abino medo bedo kede wu pi kare moro acecek, di do ako ot but ngat kame oora.

³⁴ Ibinunu mona do likame ikounu wuda; pien kakame ango ayaro bedo iye, wun likame itwerunu bino iye.”

³⁵ Iyudayan oko donyo yamo ken gi ken gi be, “Tuai inonono kame icuo ni mito ot iye, kame mio wan likame otwero ude? Mam nat emito ot but joe wa kame osarakin i dier Jogurik di eko donyo pwonyo Jogurik?

³⁶ Pinyo komio en ewaco be, ‘Ibinunu mona do likame ikounu wuda, ‘kede be, ‘Kakame ango abino bedo iye, wun likame itwerunu bino iye’ ?”

Icileta me Pii me Kuo

³⁷ I ceng kame jiko ebaga, en ceng kame pire dwong, Yesu oko cungo di eko waco kede dwane amalo be, “Ngat kame orio oneko, ebin buta,



³⁸doko ngat kame yei ango wek emat pii. Bala kite kame iwandik kacil waco kede be, 'Icileta me pii me kuo bino mol wok ki cuny ngat kame yei ango.' "

³⁹Yesu bin owaco kop noni i kom Tipo Kacil kame jo kame yei en bino udo. I kare nono oudo pwodi likame komio Tipo Kacil, pien oudo pwodi likame komio Yesu deyo.

Apokapoka i diere me Jo

⁴⁰Kakame kiwinyo kede kope go, jo mogo oko waco be, "Ateteni dano ni obedo enabi."

⁴¹Jo mogo oko waco be, "Man en Kirisito." Do jo mogo oko waco be, "Kirisito likame bino wok ki Galilaya.

⁴² Mam iwandik kacil waco be Kirisito en akwar Daudi, doko ebino wok ki Betelem, en paco kame Daudi bin bedo iye?"

⁴³Jo oko bedo kede tam opopokun i kom Yesu.

⁴⁴Jo mogo kikom gi oudo mito make, do likame tie ngatamoro kame oko keto cinge i kome.

Jotel me Iyudayan Odagi Yei Yesu

⁴⁵Isirikalen me tempulo oko dok, di jodongo me josaseredoti kede Iparisayon oko penyo gi be, "Pinyo komio likame ikelenu?"

⁴⁶Isirikalen oko dwoko be, "Cako lem pwodi likame tie ngatamoro kame oyamo bala icuo ni!"

⁴⁷Iparisayon oko penyo gi be, "Mam kotieko rwenyo wuda?"

⁴⁸Itiekunu neno ngat acel moro kikom jotel arabo kikom Iparisayon kame oyei en?

⁴⁹Do ekodet ni kalikame ngeo Iswil ka Musa, Rubanga olamo gi."

⁵⁰ Nikodemu, ngat kame oudo obedo ngat acel kikom Iparisayon, kame bin oudo ocako ot but Yesu, oko waco ne gi be,

⁵¹" Iswil wa likame yei ngolo ne dano kop di pwodi likame ber kogeo winyo yamo mere, di oko niang gikame etimo."

⁵²Gin kiko penye be, "Ida iwok ki Galilaya? Aso somi iwandik kacil di iko bino ngeno be, likame tie enabi moro kame bino wok ki Galilaya."

⁵³Di do ngat acelacel kikom gi oko dok paco.

Yokana 8

Dako kame Komako di tie Timo Adote

¹Do Yesu oko ot i moru me Olibeti.



- ²Odiko sek Yesu bobo oko ot i tempulo; jo dedede oko bino bute, di en eko bedo piny eko pwoonyo gi.
- ³Jopwoony me Iswil kede Iparisayon oko kelo dako kame oudo komako di tie timo adote, di kiko kete i dier jo.
- ⁴Gin kiko waco ne Yesu be, “Apwoony, wan omako dako noni di tie timo adote.
- ⁵I Iswil wan, Musa ociko wa be poore odidipo epone me mon kame timo kamano kede kide tuno to. Nan in iwaco kop nyo iye?”
- ⁶Gin bin kiwaco kop noni pi kino kop ki dog Yesu, tetekeny kiud kop moro kame kiromo pide iye. Yesu oko luro piny di eko wandiko kop piny kede lwete.
- ⁷Kakame gin kimeede kede pepenyo Yesu, en eko kiar di eko waco ne gi be, “Wek ngatamoro kikom wu kalikame tie kede dub moro bed dano me agege me uco kidi i kom dako no.”
- ⁸Yesu bobo oko luro di eko wandiko kop piny kede lwete.
- ⁹Do kakame kiwinyo kede kop mere, kiko cako ot tenge acelacel, cako kibut joadongo. Yesu oko dong kene di dako nono cungo i nyime.
- ¹⁰Yesu oko tingo wange di eko waco ne dako nono be, “Ani gin? Benyo, likame tie ngatamoro kongolo ni kop?”
- ¹¹Dako nono oko dwoko be, “Rwot, likame tie.” Yesu oko waco ne be, “Akadi ada likame abino ngolo ni kop; oti, do kur bobo itim dub.”

Yesu en Lero me Piny

- ¹²Yesu bobo oko waco ne gi be, “Ango en lero me piny; ngat kame luba likame bino ot di etie i colo, do ebino bedo kede lero me kuo.”
- ¹³Di do Iparisayon oko waco ne be, “In itie jurere keni, do ijura nin likame tie kop me ateni.”
- ¹⁴Yesu oko dwoko be, “Akadi bed bala ango ajurere kena, do ijura na tie kop me ateni, pien ango angeo kakame ango awok kiye kede kakame atie ot iye. Do wun likame ingeunu kakame ango awok kiye arabo kakame atie ot iye.
- ¹⁵Wun ingolunu kop iekite me dano, do ango likame angolo ne ngatamoro kop.
- ¹⁶Do akadi bed bala ango angolo kop, ngolo kop nango tie me ateni, pien udo likame ango kena en kame atie ngolo kop, do ango karacel kede ngat kame oora.
- ¹⁷Kowandiko i Iswil wu be ijura me jo are tie me ateni.
- ¹⁸Ango amio ijura i koma kena, doko da Papa ngat kame oora mio ijura i koma.”
- ¹⁹Pi mano, gin kiko waco ne Yesu be, “Ani bo Papa ni?” Yesu oko dwoko ne gi be, “Wun likame ingeanu, akadi ngeno kiton Papa na da. Koto di oudo ingeanu, oudo koto ingeunu kiton Papa na da.”



²⁰En ewaco kope nogi di oudo etie pwony i agola me kano lim i tempulo; do likame ngatamoro oko make, pien esawa mere oudo pwodi likame otuno.

Likame Itwerunu Ot kakame Ango atie Ot iye

²¹Yesu bobo oko waco ne gi be, “Ango ayaro ot tenge di wun ikounu donyo mona, do ibinunu to i dub wu, pien kakame anga atie ot iye wun likame itwerunu bino iye.”

²²Di do Iyudayan oko waco be, “Icuo ni mam bino nekere kene komio ewaco be, ‘Kakame anga atie ot iye wun likame itwerunu bino iye’ ?”

²³En eko waco ne gi be, “Wun iwokunu ki piny, do anga awok ki malo; wun ibedunu jo me piny kan, do anga likame dano me piny kan.

²⁴Anga oudo awaco ne wu be ibinunu to i dub wu, doko ibinunu to i dub wu, kwanyo ka iyeunu be anga inononi.”

²⁵Gin kiko penye be, “In en ngai?” Yesu oko waco ne gi be, “Man en gikame atieko waco ne wu cako ki agege.

²⁶Atie kede kope atot me ayama i komu, kede gi atot kame apoore waco ne wu raco iye; do ngat kame oora tie kede ateni, doko anga atie waco ne jo me piny gikame anga awinyo kibute.”

²⁷Gin oudo likame kiko niang be Yesu oudo owaco ne gi kop kame mako Papa.

²⁸Di do Yesu oko waco ne gi be, “Ka itiekunu kiarao Wot ka dano i kom musalaba, ibinunu ngeno be anga inononi, kede be likame anga atimo gimoro i akarunikin nango kena, do ayamo gikame Papa opwonya iye.

²⁹Doko ngat kame oora tie keda; likame eweka kena; pien anga nakanaka atimo gikame yomo cunye.”

³⁰Kakame ewaco kede kope nogi, jo atot oko yei en.

Ateni bino Gonyo Wu

³¹Yesu oko waco ne Iyudayan kame oyei en be, “Ka imeedenu kede lubo kop na, udo wun ibedunu jo kame luba me ateni,

³²doko ibinunu ngeno ateni, di ateni ko bino gonyo wu.”

³³ Gin kiko dwoko ne be, “Wan ikwae ka Aburaam, doko pwodi wan likame obedo ipasoi ka ngatamoro. Dwong kop nyo komio in iwaco be, ‘Kobino gonyo wu’ ?”

³⁴Yesu oko dwoko ne gi be, “Ateteni, ateteni awaco ne wu be, ngat acelacel kame dubo, en edoko epasoit me dub.

³⁵Epasoit likame dong bedo i paco atwal, do awobi kame konywalo i paco dong bedo i paco atwal.

³⁶Aso, ka Wod gonyo wu, ibinunu bedo jo kogonyere ateteni.



³⁷Ango angeo be wun ibedunu ikwae ka Aburaam, do di doko imounu neka, pien idagunu kop na.

³⁸Ango awaco ne wu gikame aneno kibun Papa na, do wun itimunu gikame iwinyunu kibun papa wu.”

³⁹Gin kiko dwoko ne be, “Papa wan en Aburaam.” Yesu oko waco ne gi be, “Koto wun idwe ka Aburaam, oudo koto itimunu gikame Aburaam bin otimo.

⁴⁰Do wun nan itienu mono neka, ango dano kame awaco ne wu kop me ateni kame awinyo kibun Rubanga; likame man en gikame bin Aburaam otimo.

⁴¹Wun itienu timo gikame papa wu bin otimo.” Gin kiko waco ne be, “Wan likame nywal me epae; wan otie kede Papa wa acel, en Rubanga.”

⁴²Yesu oko waco ne gi be, “Koto Rubanga en Papa wu, oudo koto imaranu, pien ango awok kibun Rubanga; likame ango abino i mit na kena, do en kame eora.

⁴³Pinyo komio likame itienu niang gikame ango awaco? Etie kamanoni pien wun likame iyeunu kop na.

⁴⁴Papa wu en Sitani, doko cunyu mito timo gikame papa wu mito. Cako i kare me agege en ebedo nganek, doko likame ecungo i ateni, piento en eli kede ateni. Kame etie ngalo, udo etie waco gikame enao timo, piento en ebedo ngat kame ngaangalo, doko en won angalo.

⁴⁵Do wun idagunu yei ango, pien ango atie waco ne wu gi me ateni.

⁴⁶Ngai kikom wu kame karuno nyuto dub kame ango atimo? Do pinyo komio ka ango awaco ne wu kop me ateni likame iromunu yei ango?

⁴⁷Ngat kowok kibun Rubanga winyo kope ka Rubanga; wun likame iwinyunu kope kame ango awaco ne wu, pien wun likame iwokunu kibun Rubanga.”

Yesu kede Aburaam

⁴⁸Iyudayan oko dwoko ne Yesu be, “Mam etie gi me ateni ka wan owaco be in Ngasamaria, doko itie kede jwogi?”

⁴⁹Yesu oko dwoko be, “Ango ali kede jwogi; ango aworo Papa na, do wun likame iworanu.

⁵⁰Do di ango likame amo deyo pira kena, do tie ngat kame tie mono, doko en kame ebino bedo ngangolkop.

⁵¹Ateteni, ateteni awaco ne wu be, ngat kame yei kop na likame ebino bilo to atwal.”

⁵²Iyudayan oko waco ne be, “Nan wan otieko ngeno do be, ateteni in itie kede jwogi. Aburaam oto bala bin inabin da, do doko di in itie waco be, ‘Ngat kame yei kop na likame ebino bilo to.’

⁵³Iparo be in piri dwong kalamo Aburaam, kame da bin oto? Akadi inabin da oto. Iparo be in do ngai?”



⁵⁴Yesu oko dwoko be, “Ka angò amio deyo i koma kena, deyo na udo kony mere li. Ngat kame miango deyo en Papa na, en nono kame wun iwacunu be Rubanga wu.

⁵⁵Wun likame ingeunu en, do angò angee. Ka koto oudo awaco be likame angee, koto abedo ngat kame ngalo bala wun. Do angò angee doko alubo kop mere da.

⁵⁶Papa wun Aburaam bin olelo be ebino neno kare me bino na; da en eko neno di cunye oko bedo yom.”

⁵⁷Iyudayan oko waco ne be, “Pwodi likame ber mwaka nin oromo ot kany da, in do kong ineno Aburaam ki tuai?”

⁵⁸Yesu oko waco ne gi be, “Ateteni, ateteni awaco ne wu be, di pwodi Aburaam oudo li, angò oudo atie.”

⁵⁹Kikano, gin kiko kwanyo kide di kimito didipo en kede; do Yesu gire oko pwono, di eko yai tenge ki tempulo.

Yokana 9

Yesu Ocango Icuo kame Konywalo di Wange Oto

¹Kakame Yesu oudo tie ot kede, en eko neno icuo kame wange oudo oto cako nywale.

²Josiao mege oko penye be, “Apwony, ngai en kame oudo odubo komio oko nywalo icuo ni di wange oto, en noni arabo jonywal mege?”

³Yesu oko dwoko be, “Likame pien icuo ni arabo jonywal mege oudo odubo, do etimere kaman tetekeny tice ka Rubanga nyutere i kome.

⁴Wan miero otimunu tice me ngat oora di pwodi ceng tie, iwor bino tuno di ngatamoro likame ko twero tic.

⁵ Kame angò pwodi atie i piny, udo angò abedo lero me piny.”

⁶Kakame etieko waco kede kop no, en eko ngulo lau piny eko nyongo kede lobo, di eko puco i wang icuo nono,

⁷di eko waco ne be, “Oti ilwok wangi i atapar me Siloam” (kame dwong mere be Kocwao). En eko ot di eko lwoko wange iye, eko dwogo di eneno piny.

⁸Jokio kede jo apat kame oudo onene lem sek bala ngakwac oko waco be, “Mam icuo kame lem nare bedo di ekware ine?”

⁹Jo mogo oko waco be, “En inononi; “ mogo oko waco be, “Likame en, do kical acala.” Icuo nono oko waco be, “Angò kom inononi.”

¹⁰Gin kiko penye be, “Wangi do ber oko yabere benyo?”

¹¹En eko dwoko be, “Icuo kame kolwongo be Yesu en okwanyo lobo eko puco i wanga, di eko waco na be aoti alwok wanga i Siloam. Di do angò da ako ot lwoke, di ako cako neno piny.”

¹²Gin kiko penye be, “En etie tuai?” En eko waco be, “Angò likame angeo.”



Iparisayon Ongingico epone kame Kocango kede Emuduk

- ¹³Gin kiko tero icuo kame wange oudo oto nono but Iparisayon.
- ¹⁴Yesu oudo onyongo lobo di eko cango kede wang icuo nono i Ceng Sabato.
- ¹⁵Iparisayon bobo oko penye epone kame wange oyabere kede. En eko waco ne gi be, “En eketo lobo kame konyongo i wanga, ako lwoke di ako cako neno piny.”
- ¹⁶Iparisayon mogo oko waco be, “Icuo ni likame owok kibut Rubanga, pien likame eworo Iswil me Sabato.” Do jo mogo oko waco be, “Ngat kame tie ngadubo karuno timo epone me gianena gi benyo benyo?” Tam gi oko popokun.
- ¹⁷Aso, gin bobo kiko penyo icuo kame wange oudo oto nono be, “Bala kite kame etieko yabo kede wangi, kop nyo kame in iromo do nan yamo i kome?” En eko waco be, “En ebedo enabi.”
- ¹⁸Iyudayan oudo likame yei be wang icuo nono oudo oto lem sek di nan do oko yabe. Tuno kede gin kiko lwongo jonywal me icuo kame wange oudo oto nono,
- ¹⁹kiko penyo gi be, “Mam wod wu ine kame wun iwacunu be oudo konywalo di wange oto? Nan egeo do neno piny benyo?”
- ²⁰Jonywal mege oko waco be, “Wan ongeo be wod wa ine, doko da be, oudo konywale di wange oto;
- ²¹do kite kame nan egeo neno kede piny wan likame ongeo, akadi ngat koyabo wange da wan girwa okwia. Wun penyenu, eda do etieko doko dwong, ebino yamo pire kene.”
- ²²Jonywal mege owaco kaman pien oudo kilworo Iyudayan; pien Iyudayan oudo otieko yei be ka ngatamoro otuco be Yesu en Kirisito, kobino riame ooko ki sinagoga.
- ²³Pi mano, jonywal mege oko waco be, “En etieko doko dwong, penyenu.”
- ²⁴Gin kiko lwongo icuo kame oudo bin wange oto nono tien me are, di kiko waco ne be, “Yam kop me ateni i nyim Rubanga, wan ongeo be icuo no obedo ngadubo.”
- ²⁵En eko dwoko be, “Ango akwia ka en ngadubo; do gi acel kame ango angeo en ine be, bed bala wangango oudo oto, do nan do ango aneno piny.”
- ²⁶Gin kiko waco ne be, “Nyo kame en etimo ni? Eyabo wangi benyo?”
- ²⁷En eko dwoko ne gi be, “Ango atieko waco ne wu kop, do ikounu dagi winyo. Pinyo komio imitunu bobo winyo kop nono tien ace? Wuda imitunu lokere doko josiao mege?”
- ²⁸Gin kiko bunano en di kiwaco ne be, “In en ibedo ngasiao mere, do wan obedo josiao ka Musa.
- ²⁹Wan ongeo be Rubanga bin oyamo kede Musa, do likame wan ongeo kakame dano no owok kiye.”



³⁰Loca oko dwoko be, “Pinyo, man tie gi me aura! Likame ingeunu kakame ewok kiye, do di en kame eyabo wanga!

³¹Wan ongeo be Rubanga likame winyo jodubo, do ka ngatamoro woro Rubanga, doko di etimo gikame Rubanga mito, Rubanga winye.

³²Cako cweno piny likame lem pwodi owinyere be ngatamoro oyabo wang ngat kame konywalo di wange oto.

³³Koto oudo dano ni likame owok kibus Rubanga, koto likame etwero timo gimoro.”

³⁴Gin kiko dwoko ne be, “Kom ida ngat kame konywali i dub atwal atwala en kame itie pwonyo wan?” Kiko riame tenge ki sinagoga.

To Wang me Cuny

³⁵Yesu oko winyo be Iyudayan oriamo icuo nono ooko ki sinagoga. Kakame Yesu oriamo kede, eko penye be, “In iyei Wot ka dano?”

³⁶En eko dwoko be, “Adwong, waca ngat nono tetekeny ada ayei en.”

³⁷Yesu oko waco ne be, “In itieko nene, doko en inononi kame nan etie yamo kedi.”

³⁸En eko waco be, “Rwot, ayei do; “ di eko mine wor.

³⁹Yesu oko waco be, “Ango abino i piny, me wek jo kalikame neno kineni, kede be, jo kame neno wek wang gi toi.”

⁴⁰Iparisayon mogo kame oudo tie i ngete owinyo kop noni di kiko penye be, “Wada nan mam wang wa oto?”

⁴¹Yesu oko waco ne gi be, “Koto oudo wangu oto, koto iliunu kede dub; do kite kame nan iyamunu kede be, ‘Wan oneno piny, ‘dwong mere be raco wu pwodi odong i komu.”

Yokana 10

Agole me Ngakwai Romini

¹” Ateteni, ateteni awaco ne wu be, ngat kalikame donyo i anak me romini di ebeo ki erute, do eko lokere yito i kakame pat, ngat nono udo obedo ngakuwo, doko en ngayak.

²Do ngat kame donyo di ebeo ki erute, udo en ngakwai romini;

³ngadar erute yabo ne erute, doko romini winyo dwane. En elwongo romini mege kede nying gi, di eko telo gi wok ooko.

⁴Ka etieko woto romini mege dedede ooko, en eoto i nyim gi, di romini ko lube, pien gin kingeo dwane.

⁵Ka ngat apat, gin likame kiyei lubo, do kiringo tenge kibute, pien likame gin kingeo dwan jo apat.”



⁶Yesu oyamo ne gi agole noni, do gin likame kiko niang gikame en oudo etie waco ne gi.

Yesu en Ngakwat Aber

⁷Yesu bobo oko waco ne gi be, “Ateteni, ateteni awaco ne wu be, ango en erute kame romini donyo kiye.

⁸Jo dedede kame bin ogeo bino nango oudo obedo jokuwo kede joyak; do romini likame oko winyo dwan gi.

⁹Ango en erute, ka ngatamoro oduonyo ki buta ebino udo alako, doko ebino donyo kede wok ooko, di eko udo lum kolot.

¹⁰Ngakuwo bino kenekene pi kwalo, neko kede pi dudubo. Do ango abino tetekeny jo ud kuo, kuo kopong.

¹¹” Ango ngakwat aber, ngakwat aber yei rwenyo kuo mere pi romini mege.

¹²Do dano kame kopango apanga, kalikame obedo ngakwat kikome, kalikame obedo won romini, ka oneno ipeon di tie bino, en eweko romini di eko ringo tenge; ipeon ko mako romini, di romini apat ko sarakin.

¹³En eringo piento en dano kame kopango apanga, doko likame eparo pi romini.

¹⁴Ango en ngakwat aber; ango angeo romini na, doko romini na da ngea,

¹⁵bala kite kame Papa ngea kede, doko ada angeo Papa. Ango ayei rwenyo kuo na pi romini.

¹⁶Doko atie kede romini ace kame li ki anak noni; miero akel gida, di gin kiko bino winyo dwana. Gin kiko bino bedo romini me anak acel kame tie kede ngakwat acel.

¹⁷” Pi mano, Papa mara pien ango ayei rwenyo kuo na, di bobo ako bino ude.

¹⁸Likame tie ngat kame bino kwanyo kuo nango, do ango abino mino kuo na i mit na. Ango atie kede twer me yei rwenyo kuo na kede me ude; Papa na en kame omia cik noni.”

¹⁹Kope nogi bobo oko mino tam me Iyudayan opokere.

²⁰Jo atot kikom gi owaco be, “Lono tie kede jwogi, doko epoi da; pinyo komio iwinyunu kop mere?”

²¹Apat mege oko waco be, “Mage likame kope me dano kame tie kede jwogi. Jwogi twero yabo wang emuduk benyo?”

Iyudayan Odagi Yesu

²²Oudo manono obedo kare me ebaga me kwero ceng kame komio kede tempulo but Rubanga i Yerusalem; kare me ngico oudo inonono.

²³Yesu oudo tie ot ki balasa ka Sulumani kame oudo tie i tempulo.



- ²⁴Iyudayan oko cokere oluke di kiko waco ne be, “Ibino mino tam wa bedo abongo kacungo pi kare arom amene? Ka in en kame Kirisito, wac ne wa kakaler.”
- ²⁵Yesu oko dwoko ne gi be, “Ango atieko waco ne wu, do wun ikounu dagi yei. Tice kame ango atimo i nying Papa na jura,
- ²⁶do wun likame iyeunu pien likame wun itienu i kom romini na.
- ²⁷Romini na winyo dwana, ango da angeo gi, doko gida kiluba.
- ²⁸Ango atieko mino gi kuo kame bedo nakanaka, doko likame kibino to. Likame tie ngat kame bino waraso gi ki cinga.
- ²⁹Papa na ngat kame omio gi buta pire dwong kalamo jo dedede, doko likame tie ngat kame sobolo waraso gi ki cing Papa.
- ³⁰Ango kede Papa otie acel.”
- ³¹Iyudayan bobo oko kwanyo kide pi mito didipo en kede.
- ³²Yesu oko waco ne gi be, “Ango atieko nyuto ne wu tice atot adongodongo kame owok kikut Papa; mene kikom gi en kame imitunu didipo ango pire?”
- ³³ Iyudayan oko dwoko ne be, “Likame wan omito didipo in pi tic aber, do pi acae; pien in dano adana imito be idok Rubanga.”
- ³⁴ Yesu oko dwoko ne gi be, “Mam kowandiko i Iswil wu be Rubanga owaco be, ‘Wun ibedunu rubangan?’
- ³⁵Do ka Rubanga olwongo jo kame bin komio kop mere be rubangan (doko di iwandik kacil likame kotwero turo),
- ³⁶benyo, itwerunu waco ne ngat kame Rubanga opoko tenge di eko ooro i piny be, ‘In itie cano Rubanga, ‘be pien ango awaco be, ‘Ango Wot ka Rubanga?’
- ³⁷Ka likame atie timo tice ka Papa na, kur do iyeunu ango.
- ³⁸Do ka atimo gi, akadi bed bala idagunu yei ango, yeunu do tice nogo, tetekenye ingeunu di ikounu niang be Papa tie i ango, doko ada atie i en.”
- ³⁹Gin bobo kiko mono mako Yesu, do en eko lwi ne gi.
- ⁴⁰ Yesu oko bobo ngolo nam me Yorodan tuno kakame bin Yokana ogeo batiso kiye jo, di eko dong bedo kuno.
- ⁴¹Jo atot oko ot bute di kiko waco ne be, “Yokana bin likame otimo gianena moro, do kope dedede kame Yokana owaco i kom icuo ni tie gi me ateni.”
- ⁴²Jo atot kame oudo tie kuno oko yei en.

Yokana 11

To ka Lasaro



- ¹ Oudo bin tie icuo kame nyinge Lasaro, kame bedo Betania, tuwo oko make. Betania oudo obedo bomba kame Maria kede amin mere Marita bedo iye.
- ² Maria nono en kame bin oudo owiro Rwot kede mo angwe kur, di eko weweo tiene kede yer me wie; en nono kame omin mere Lasaro oudo tuwo.
- ³ Amiegu nogo oko cwano kop but Yesu di kiwaco ne be, “Rwot, ngawoti kame imaro tuwo twatwal.”
- ⁴ Do kakame Yesu owinyo kede kop noni, en eko waco be, “Tuwo no likame obino pi neko Lasaro, do pi kelo deyo kakame Rubanga tie iye, tetekeny mi deyo but Wot ka Rubanga pire.”
- ⁵ Yesu oudo maro Marita kede amin mere Maria karacel kede Lasaro.
- ⁶ Aso, kakame ewinyo kede be Lasaro oudo tuwo, en eko meede bedo kakame oudo etie iye pi ceng are.
- ⁷ I cen mere, Yesu oko waco ne josiao mege be, “Odokunu ber bobo Yudea.”
- ⁸ Josiao mege oko dwoko ne be, “Apwony, kom in nyoronyoro ni Iyudayan oudo mito didipo in kede kide, pinyo komio in imito bobo dok kuno?”
- ⁹ Yesu oko dwoko be, “Mam ceng acelacel tie kede isawan tomon kiwie are? Jo kame tie ot iceng likame buo tien gi, pien udo kineno lero me piny kan.
- ¹⁰ Do jo kame tie ot iwor di piny col, kitwomo tien gi, pien udo lero li.”
- ¹¹ Yesu bin owaco kop noni di eko meede kede yamo be, “Ngawot wa Lasaro do otieko nino, do ango ayaro ot cene.”
- ¹² Josiao mege oko waco ne be, “Rwot, ka enino ebino cei.”
- ¹³ Aso Yesu oudo tie waco kop i kom to ka Lasaro. Lasaro oudo otieko to, do josiao oudo paro be amoto etie yamo nino me wei.
- ¹⁴ Di do Yesu oko kenyakino ne gi be, “Lasaro otieko to,
- ¹⁵ do ango cunya yom piru, pien ango likame oudo atie kuno, manoni otimere tetekeny iyeunu. Do wan ootunu bute.”
- ¹⁶ Tomasi (kame bin kolwongo be Bangi) oko waco ne josiao wad gi be, “Ootunu wada wek otounu karacel kede en.”

Yesu en Iyarun kede Kuo

- ¹⁷ Kakame Yesu otuno kede, en eko udo be Lasaro oudo otieko ceng ongwon i ates.
- ¹⁸ Betania oudo iyapiyapi kede Yerusalem, bala mairo are.
- ¹⁹ Iyudayan atos oudo obino pi cungo ne Marita kede Maria, pi kweno cuny gi pi to me omin gi.



²⁰Kakame Marita owinyo kede be Yesu oudo tie bino, en eko ot pi riamo kede en i yongayo; do Maria oko dong bedo i ot.

²¹Marita oko waco ne Yesu be, “Rwot, koto oudo in itie kan, kom koto omina likame oto.

²²Do ango angeo be akadi nan da, gimoroni dedede kame in ikwao kibut Rubanga, en ebino mini.”

²³Yesu oko dwoko ne be, “Omini bino kuo bobo.”

²⁴Marita oko dwoko ne be, “Ango angeo be en ebino yaruno i kuo bobo i ceng me ajikini.”

²⁵Do Yesu oko waco ne be, “Ango en iyarun kede kuo, ngat kame yei ango bino kuo akadi di eto;

²⁶doko ngatamoroni kame nan kuo di eyei ango, likame ebino to. Benyo, iyei kop noni?”

²⁷Marita oko dwoko be, “Ebo Rwot, ango ayei be in en kame Kirisito, Wot ka Rubanga, kame oudo poore bino i piny.”

Yesu Okok

²⁸Ingei Marita yamo kamano, en eko ot lwongo amin mere Maria di eko weweo ne be, “Apwony kara tie kan, etie lwongi.”

²⁹Kakame Maria owinyo kede kamano, en eko yai eonyaro ot pi riamo kede.

³⁰(Yesu oudo pwodi likame otuno i paco nono, do oudo pwodi etie kakame Marita oriamo kede iye noca.)

³¹Iyudayan kame bin tie bedo kede Maria i ot di kidio cunye oko neno Maria oyai malo awakawaka di eko donyo ooko; gida kiko lube di kiparo be oudo etie ot koko i ates.

³²Di bin Maria otuno kakame Yesu oudo tie iye, eneno Yesu di eko riebere piny i tiene kanono di eko waco ne be, “Rwot, koto oudo ibino kan sek, koto omina likame oto!”

³³Kakame Yesu onene kede di etie koko, karacel kede Iyudayan kame bin en eupere kede da di tie koko, apil oko make, cunye oko dubere adikinicel.

³⁴En eko penyo gi be, “Iyikenu tuai?” Gin kiko dwoko ne be, “Rwot bia ineni.”

³⁵Yesu oko kok.

³⁶Di Iyudayan oko waco be, “Nenunu kite kame oudo emaro kede Lasaro.”

³⁷Do mogo kikom gi oko donyo yamo ken gi ken gi be, “En ngat kame bin eyabo wang emuduk, mam oudo etwero gengo icuo ni kur toi?”

Yesu Oyaruno Lasaro



³⁸Cwercuny atek bobo oko mako Yesu, di eko ot i ates kame oudo tie i abo kame koumo doge kede kidi ati.

³⁹Yesu oko waco be, “Kwanyunu kidi no tenge.” Do Marita, amin me icuo kame oudo oto oko dwoko ne be, “Rwot, nan eromo do doko ngwe, pien etieko do nan ceng ongwon i ates.”

⁴⁰Yesu oko dwoko ne be, “Mam oudo awaco ni be ka iyei ibino neno deyo ka Rubanga?”

⁴¹Jo mogo kikom gi oko kwanyo kidi tenge ki dog ates, Yesu oko neno malo di eko waco be, “Apwoyi Papa, pien in itieko winya.

⁴²Ango oudo angeo be in nakanaka iwinya, do ango atie yamo man pi jo kame nan tie cungo kan gi, tetekeny gin kiyei be in en kame iora.”

⁴³Ingei waco kope nogi, en eko redo kede dwane amalo be, “Lasaro, wok ooko.”

⁴⁴Lasaro oko wok ooko di kotweo cinge kede tiene kede egoe kame koyiko kede jo oto, di koboo kiton wange da kede egoe. Yesu oko waco ne gi be, “Gonyenu iwekenu eoti.”

Koporo Kop me Neko Yesu

(Matayo 26.1-5; Marako 14.1-2; Luka 22.1-2)

⁴⁵Iyudayan atot kame oudo obino kede Maria oko neno gikame Yesu oudo otimo, di do kiko yei en.

⁴⁶Do mogo kikom gi oko ot but Iparisayon, di kiko tatamo ne gi gikame Yesu otimo.

⁴⁷Di do Iparisayon kede jodongo me josaseredoti oko lwongo kansulo, di kiko waco be, “Nyo kame wan poore otimunu? Nenunu do twon gianena kame icuo ni tie timo.

⁴⁸Ka wan oyei ne meede anyim kede timo gigi, jo dedede bino yei en, di do Joroma ko bino tuturo tempulo wa kede ateker wa da!”

⁴⁹Do ngat acel kikom gi, kame oudo nyinge Kayapa, kame bin oudo obedo Ngatel Josaseredoti i mwaka nono, oko waco be, “Wun kom likame ingeunu gimoro akadi acel.

⁵⁰Benyo, likame iniangunu be eber ne dano acel to pi jo akaka weko piny dedede to?”

⁵¹En likame oudo etie yamo kamano pi wie kene; do bala kite kame en oudo etie Ngatel Josaseredoti i mwaka nono, oudo en etie do murao be Yesu oyaro to pi Iyudayan,

⁵²do likame pi gin kenekene, do pi koko idwe ka Rubanga kame osarakin obukui pi doko jo acel.

⁵³Cako cenge no, di do jotel me Iyudayan oko donyo mono epone me neko Yesu.



⁵⁴Pi mano, Yesu likame oko meede ot i kakaler i dier Iyudayan, do en eyai eko ot i adul moro kame bin iyapiyapi kede tim, i bomba kame kolwongo be Epuraimu, kakame en eko bedo iye kede josiao mege.

⁵⁵Ceng me camo Ebaga me Kalamo oudo odoko do iyapiyapi, jo atos oudo oyai ki miere ooto Yerusalem pi lonyere di ebaga pwodi likame otuno.

⁵⁶Gin oudo kitie mono Yesu. Kakame bin gin kicokere kede i tempulo, kiko donyo penyere ken gi ken gi be, “Nan wun iparunu benyo, ateteni icuo ni oyaro bino i ebaga noni?”

⁵⁷Jodongo me josaseredoti karacel kede Iparisayon oudo otieko ciko jo be, ka ngatamoro ongeo kakame Yesu tie iye, poore eter kop but gi awakawaka, tetekeny kimake.

Yokana 12

Maria Owiro Yesu kede Mo i Betania

(Matayo 26.6-13; Marako 14.3-9)

¹Di oudo odong ceng kanyape tuno i Ebaga me Kalamo, Yesu oko ot Betania kakame oudo Lasaro bedo iye. Lasaro en oudo icuo kame Yesu oyaruno kikom jo oto.

²Gin kiko iiko ne Yesu cam me otieno, di Marita oko toko; Lasaro da oudo ngat acel kikom jo kame oudo tie kacam kede Yesu.

³Maria oko kwanyo cupa acel lung me mo kame kolwongo be nardi, kame wel mere tie malo adikinicel, en eko onyo i tien Yesu, di eko donyo weweo kede yer wie. Ngwece me mo nono oko wosun oromo ot dedede.

⁴Yuda Isikariot kame oudo obedo ngat acel kikom josiao ka Yesu, ngat kame oudo oyaro rupao en, oko penyere be,

⁵” Pinyo bo komio oudo likame kocato mo kikukuny noni i wel me denari tol adek di oko mino jocan?”

⁶En eyamo kamano likame piento en oudo eparo pi jocan, do piento en oudo ngakuwo. En oudo bin edaro isau me sente di elwidaro gikame koketo iye.

⁷Do Yesu oko waco be, “Wun wekunu dako no bedi, wekenu ekan mo no tuno kede ceng me yika.

⁸ Wun itienu kede jocan nakanaka, do ango likame abino bedo kede wu nakanaka.”

Jo Oporo Kop me Neko Lasaro

⁹Kakame ekodet adwong me Iyudayan owinyo kede be Yesu oudo tie Betania, gin kiko ot kuno, likame pi neno Yesu kenekene, do pi neno Lasaro da, ngat kame Yesu oudo oyaruno kikom jo oto.

¹⁰Di do jodongo me josaseredoti oko cako iiko tam me neko Lasaro da,

¹¹pien Iyudayan atos oudo tie weko gin pire di kidonyo yei Yesu.



Yesu Odonyo Yerusalem bala Abaka
(Matayo 21.1-11; Marako 11.1-11; Luka 19.28-40)

- ¹²Oru mere, ekodet adwong kame oudo obino i ebaga oko winyo be Yesu oudo tie bino Yerusalem.
- ¹³Kikano jo oko jako jange me otit, kiko ot pi riamo kede en di kilelemo be, “Osana! Etie kede winyo ngat kame bino i nying Rwot; Rubanga mi winyo but abaka me Isirael!”
- ¹⁴Yesu oko udo atin me punda, en eko yito ingee, bala kame iwandik kacil waco kede be,
- ¹⁵“Kur ibedunu lwor wun jo me Sion. Nenunu, abaka wu ine tie bino, di ewanano atin me punda!”
- ¹⁶Josiao mege bin likame oko niang dwong me gigi i agege; do i kare kame oko yaruno kede Yesu i deyo ka Rubanga, gin kiko yutuno be oudo kowandiko gi nogi be bino timere i kom en, doko da di jo oko timo ne.
- ¹⁷Ekodet me jo kame oudo tie kede Yesu kakame oudo elwongo kede Lasaro ooko ki ates di eko yaruno en kikom jo oto, oko mino ijura i kom gi dedede kame oudo otimere.
- ¹⁸Gikomio ekodet oko ot pi riamo kede Yesu en ine be, gin oudo kiwinyo be en kame bin etimo gianena nogi.
- ¹⁹Iparisayon oko donyo waco ken gi ken gi be, “Nenunu, wan nan likame obinunu twero timo gimoro akadi acel, pien piny dedede do tie lube!”

Jogurik mogo Omoo Yesu

- ²⁰Jogurik mogo da oudo tie i kom jo kame oudo ooto Yerusalem pi woro Rubanga i kare me ebaga.
- ²¹Gin kiko ot but Pilipo ngat kame oudo owok ki Betesaida, kame tie Galilaya, di kiko waco ne be, “Adwong, wan omito neno Yesu.”
- ²²Pilipo oko ot di eko waco ne Anderia, di Anderia oko upere kede, di kiko ot waco ne Yesu gikame Jogurik oudo owaco.
- ²³Yesu oko dwoko negi be, “Esawa do nan otieko tuno kame koyaro mino kede deyo i kom Wot ka dano.
- ²⁴Ateteni awaco ne wu be, ka likame nyige me kal opoto i lobo di eko to, en ebino dong di etie acel kamanono; do ka eto, ebino nyako nyige atot.
- ²⁵Ngat kame maro kuo mere bino kei, do ngat kame dagi kuo mere i piny kan, udo en ekane pi kuo kame bedo nakanaka.
- ²⁶Ka ngatamoro mito tic pira, poore en eluba, tetekeny kakame ango abedo iye, en kakame ngatic na da bino bedo iye. Di do Papa na ko bino nyuto wor i kom ngat nono.



Yesu Owaco Kop kame mako To Mere

- ²⁷” Nan cunya tie kede peko. Nan do awac benyo? Benyo, awac be, ‘Papa, laka ki esawa me can noni?’ Li, pien kop noni en komio ango atuno iesawa ni.
- ²⁸Papa, mi deyo bed i nyingi.” Dwan oko winyere di waco ki malo be, “Ango atieko mine deyo, doko abino medo timo kamanono.”
- ²⁹Ekodet kame oudo tie cungo kuno oko winyo dwan nono, di kiko waco be manono oudo mwoc me kot, do mogo oko waco be, “Malaika en oyamo kede!”
- ³⁰Do Yesu oko dwoko ne gi di ewaco be, “Dwan ni likame oyamo pira, do piru.
- ³¹Nan do en esawa me ngolo kop ne piny kan. Rubanga oyaro riamo ngat kame lem pugo piny kan tenge.
- ³²Doko kame kotinga malo ki piny kan, abino coko jo dedede buta.”
- ³³En eyamo kaman pi nyuto epone kame oudo eyaro to kede.
- ³⁴ Ekodet oko dwoko ne be, “I Iswil wa, wan owinyo be Kirisito bino bedo kede wan nakanaka. Epone nyo do komio in iwaco be poore ting Wot ka dano malo? Wot ka dano noni do en ngai?”
- ³⁵Kikano Yesu oko waco negi be, “Lero pwodi tie kede wu pi kare moro acecek, miero iotunu di pwodi lero tie kede wu, tetekeny kur colo nguk wu; pien dano kame tie ot i colo likame ngeo kakame etie ot iye.
- ³⁶Wun miero do iyeunu lero, di nan pwodi etie kede wu, tetekeny ibedunu idwe me lero.”

Jo Odagi Yei Yesu

Ingei yamo kope go, Yesu oko yai di eko ot pwono ne gi.

- ³⁷Bed bala Yesu oudo otimo gianena atot i nyim gi, do likame gin kiko yei en;
- ³⁸manono en komio kop kame enabi Isaya bin owaco ocobere kakare be, “Rwot, ngai en koyei kop kame wan owaco? Doko ngai en kame Rubanga onyuto twer mere bute?”
- ³⁹Pi mano, omio gin likame kiko yei, pien Isaya oudo bobo oko waco be,
- ⁴⁰ “Rubanga otieko umo wang gi, doko etieko cego tam gi, ka koto oudo likame kamanono, koto wang gi okaruno neno, doko koto wi gi da oniang, di kiko lokere buta di ango ako cango gi.”
- ⁴¹Isaya bin oyamo kope nogi pien oudo etieko neno deyo ka Yesu di eko yamo kope kame make.
- ⁴²Bed bala kamanono da, jotel me Iyudayan atot oko yei en, do pi lworu Iparisayon oko mino likame kiko tuco yei gi nono, tetekeny kur riam gi tenge ki sinagoga.
- ⁴³Pien oudo gin kimaro pak me dano kalamo pak kame yai kibut Rubanga.



Kope ka Yesu bino Ngolo ne Jo Kop

- ⁴⁴Yesu oko yamo kede dwan amalo di ewaco be, “Ngat kame yei ango, udo likame eyei ango do udo eyei ngat kame oora.
- ⁴⁵Doko ngat kame nenango, udo eneno ngat kame oora.
- ⁴⁶Ango abino i piny bala lero, tetekeny ngat kame yei ango kur dong di etie i colo.
- ⁴⁷Ka ngatamoro owinyo kope na di likame eko lubo gi, ango likame angolo ne kop, pien ango likame abino pi ngolo kop ne piny, do pi lako piny.
- ⁴⁸Ngat kame daga di likame emito gamo kop na, en etie kede ngat kame bino ngolo ne kop; doko kop kame ango ayamo en kame bino ngolo nen kop i ceng me ajikini.
- ⁴⁹Pien likame ango ayamo man kede wia kena, do Papa ngat kame oora en kociko na, di emia gikame poore atatamo kede gikame poore awaci.
- ⁵⁰Doko ango angeo be cik mere mio jo udo kuo kame bedo nakanaka. Pi mano, ango awaco gikame Papa ocika be ayami.”

Yokana 13

Yesu Olwoko Tien Josiao mege

- ¹Manoni en oudo ceng kame ru ceng me camo Ebagga me Kalamo. Yesu oudo ngeo be esawa mere do otieko tuno me yai ki piny kan pi ot but Papa. En oudo emaro jo mege kame tie i piny kan, doko da eko maro gi tuno i ajikini.
- ²Yesu kede josiao mege oudo tie camo cam me otieno. Sitani oudo otieko mino Yuda Isikariot wot ka Simoni tam me rupao en.
- ³Yesu oudo ngeo be Papa otieko mino jame dedede i cinge, kede da be en ewok kibut Rubanga doko etie dok but Rubanga.
- ⁴En eko yai malo i kacang, eko gonyo igoen mege kame oudo edoko, di eko tweno taulo i piere.
- ⁵En eko onyo pii i kalaya di eko cako lwoko tien josiao mege, eko donyo weweo tien gi kede taulo kame oudo etweo i piere nono.
- ⁶En eko tuno but Simoni Petero; Petero oko penye be, “Rwot, in kom iyaro lwoko tiena?”
- ⁷Yesu oko dwoko ne be, “In nan pwodi likame ingeo gikame ango atie timo, do ibino niang i cen mere.”
- ⁸Petero oko dwoko ne Yesu be, “In likame iyaro lwoko tiena akadi acel.” Yesu oko dwoko ne be, “Ka likame alwoko tieni, likame bobo abino nywako kedi.”
- ⁹Simoni Petero di do oko dwoko be, “Rwot kur ilwok tiena kenekene, lwok do cinga kiton wia da!”



¹⁰Yesu oko waco ne be, “Ngat kotieko bol likame doko lwoko kome dedede, elwoko do tiene kenekene, pien udo kome dedede do cil; aso in icil, do likame wun dedede.”

¹¹Yesu oudo ngeo ngat koyaro bino rupao en; kop no en komio ewaco be, “Likame wun dedede icilunu.”

¹²Ingei lwoko tien gi, Yesu oko bobo ngapo igoen mege, di eko dok i kabedo mere kacam di eko penyo gi be, “Wun iniangunu gikame ango nan atimo ne wu no?”

¹³Wun ilwonganu be Apwony kede be Rwot; ebo, mano tie kakare, pien ango inonono.

¹⁴Aso, ka do ber ango Rwot kede Apwony wu alwoko tienu, wuda do poore ilwokunu tien jowot wu.

¹⁵Pien ango atieko mino wu anyut, tetekeny wuda itimunu ne jo apat bala kite kame ango atimo ne wu kede.

¹⁶Ateteni, ateteni awaco ne wu be, likame tie ngatic moro kame pire dwong kalamo ngadwong mere, arabo ngaor kame pire dwong kalamo ngat oore.

¹⁷Ka ingeunu gigi di ikounu lubo gi, itienu kede winyo.

¹⁸“Ango likame atie waco wun dedede; ango angeo jo na kame ayero. Do iwandik kacil miero cobere kakare be, ‘Ngat kame onywako keda cam en kame bobo oloko ebela i wia.’”

¹⁹Nataman ango awaco ne wu di pwodi likame etimere, tetekeny ka etimere do, wun ibinunu yei be ango en inonono.

²⁰Ateteni, ateteni awaco ne wu be, ngat kame gamo dano kame ango aoro, udo egama; doko ngat kame gama udo egamo ngat kame oora.”

Yesu Otuco be Kobino Rupao en

(Matayo 26.20-25; Marako 14.17-21; Luka 22.21-23)

²¹Kakame Yesu otieko waco kede kop noni, cunye oko winyo lito adikinicel, di eko waco kakaler be, “Ateteni awaco ne wu be, ngat acel kikom wu bino rupao ango.”

²²Josiao oko donyo ngire ken gi ken gi di likame kiniang ngat kame en oudo etie waco.

²³Ngat acel kikom josiao, kame Yesu oudo bin singo maro, oudo tie gongere di iyapiyapi kede kor Yesu;

²⁴Simoni Petero oko gwete di oko waco ne be, “Penye ber ngat kame en etie waco.”

²⁵Di pwodi egongo wie i kor Yesu kamanono, en eko penyo Yesu be, “Rwot ngai inonono?”

²⁶Yesu oko dwoko be, “Ngat kame ango ayaro odo dek ako mino en inonono.” Kikano en eko odo dek di eko mino Yuda Isikariot wot ka Simoni.



²⁷Ingei gamo dek kame koodo nono, Sitani di do oko donyo ne Yuda. Yesu oko waco ne be, “Susunyo do timo gikame imito timo nono.”

²⁸Likame tie ngatamoro kikom jo kame oudo tie kacam kuno kame oko niang gikame omio Yesu owaco ne Yuda kamanono.

²⁹Mogo oudo paro be, pi kite kame Yuda oudo mako kede isau me sente, Yesu oudo tie waco ne be eoti ewil jame kame mitere ne gi me ebaga, arabo be emi jocan da gimoro.

³⁰Kikano, ingei gamo dek kame koodo, cucuto di do Yuda yai donyo ooko. Piny da do oudo otieko doko col.

Cik Kanyen

³¹Di do Yuda otieko yai ooto, Yesu oko waco be, “Nan do kotieko mino Wot ka dano deyo, doko kotieko mino Rubanga deyo pi en.

³²Ka kotieko mino Rubanga deyo pi en, Rubanga da bino mino Wot ka dano deyo i en Rubanga, doko ebino mine deyo susunyo.

³³Idwe na, ango likame abino bedo kede wu pi kare alac. Ibinunu mona, do bala kite kame oudo awaco ne kede Iyudayan, iepone nono da, nan ango awaco ne wuda be, ‘Wun likame itwerunu bino kakame ango ayaro ot iye.’

³⁴Ango nan amio wu cik anyen be, marerenu kenu kenu; bala kite kame ango amaro wu kede, wuda poore imarerenu kenu kenu.

³⁵Iepone nono, jo dedede bino ngeno be wun ateteni ibedunu josiao nango, ka imarerenu kenu kenu.”

Yesu Otuco be Petero bino Dage

(Matayo 26.31-35; Marako 14.27-31; Luka 22.31-34)

³⁶Simoni Petero oko penye be, “Rwot, in itie ot tuai?” Yesu oko dwoko ne be, “Kakame ango atie ot iye in likame itwero luba iye nan, do ibino luba i cen mere.”

³⁷Petero oko penye be, “Rwot, pinyo komio ango likame atwero lubi nan? Ango abino jalo kuo na piri!”

³⁸Yesu oko penye be, “In ibino jalo kuo ni pira? Ateteni, ateteni awaco ni be, di pwodi likame tongweno okok, udo in itieko daga tien adek.”

Yokana 14

Yesu en Yongayo me Ot but Papa

¹Yesu oko waco ne josiao mege be, “Cunyu kur poti, yeunu Rubanga, di ikounu yei ango da.

²I ot ka Papa na, tie iye agolai atos; ka koto di oudo likame kamanono, koto likame awaco ne wu be atie ot iiko ne wu kabedo.



³Ka ango aoto ako iiko ne wu kabedo, abino dwogo ako omo wu atero wu kakame ango atie iye, di wuda ikounu bedo kuno.

⁴Wun ingeunu yongayo me kakame ango atie ot iye.”

⁵Tomasi oko waco ne be, “Rwot, ka do ber wan likame ongego kakame in itie ot iye, otwero do ngeno yongayo mere benyo?”

⁶Yesu oko dwoko ne gi be, “Ango en yongayo, ateni kede kuo; likame tie ngatamoro kame bino but Papa di likame ebeo kibuta.

⁷Koto di ingeanu, oudo koto ingeunu kiton Papa da; cako nan itiekunu do ngene, doko itiekunu nene da.”

⁸Pilipo oko waco ne be, “Rwot, nyut ne wa Papa, gikame wan omito inonono erume.”

⁹Yesu oko dwoko ne be, “Pilipo, ango abedo kede wu kan pi kare go dedede, benyo, ida likame ingea? Ngat konenango udo eneno Papa; pinyo doko komio iwacunu be anyut ne wu Papa?

¹⁰Benyo, in likame iyei be ango atie i Papa doko Papa da tie i ango? Kope kame ango awaco ne wu likame ango awaco ne wu i akarunikin nango kena, do Papa kame tie i ango en kame timo tice mege.

¹¹Wun poore iyeunu kop kame ango awaco ne wu be, ango atie i Papa, doko Papa da tie i ango; aso ka li, yeunu ango pi tice kame ango atie timo.

¹²” Ateteni, ateteni awaco ne wu be, ngat kame yei ango ebino eda timo tice kame ango atimo; doko en ebino timo tice kame dongodongo kalamo mago, piento ango ayaro ot but Papa na.

¹³Gimoroni kame ibinunu kwano i nyinga, ango abino timo tetekenyo jo mi Papa deyo pi Wode.

¹⁴Ka ikwaunu gimoro i nyinga, abino timo.

Cikere me Cwano Tipo Kacil

¹⁵” Ka imaranu, ibinunu gwoko cik na.

¹⁶Ango abino kwano Papa, di en eko mino wu ngakony ace, kame bino bedo kede wu nakanaka.

¹⁷En ebedo Tipo me ateni, kame jo me piny ni likame twero udo, pien likame kitwero nene arabo ngene. Do wun ingeunu en, piento en etie i diere wu.

¹⁸” Ango likame abino weko wu kenu, do abino dwogo butu.

¹⁹Odong kare acecek di jo me piny ni likame bobo ko bino nena, do wun ibinunu nena; pi kite kame ango akuo kede, wuda ibinunu bedo kuo.

²⁰Ka ceng no otuno, wun ibinunu ngeno be ango atie i Papa na, doko wuda itienyo i ango, kede ango da atie i wun.



- 21**” Ngat kame mako cik na di eko lubo, en ngat kame mara. Ngat kame mara, Papa na da bino mare, ango da kikoma abino mare di ako bino nyutere bute.”
- 22**Yuda (weko Isikariot) oko waco ne be, “Rwot, in ibino nyutere but wan kenwa benyo benyo di likame iko nyutere ne jo me piny?”
- 23**Yesu oko dwoko ne be, “Jo kame mara bino lubo kop na. Papa na bino maro gi, di ango kede Papa oko bino but gi, di oko bedo kede gi.
- 24**Ngat kalikame mara, udo likame elubo kope na; doko kope kame wun iwinyunu go likame gin mega, do gin kiwok kikut Papa ngat kame oora.
- 25**” Ango awaco ne wu kope gi di pwodi atie kede wu.
- 26**Do Ngakony, kame obedo Tipo Kacil kame Papa bino cwano i nyinga, bino pwonyo wu i gi dedede di eko mino wu iyutununu gi dedede kame ango atieko waco ne wu.
- 27**” Ango atie weko wu kede mulem, amio wu mulem na, likame bala kite kame piny mio kede. Cunyu kur poti, doko kur ibedunu kede lworu.
- 28**Pien wun itiekunu winyo di ango awaco ne wu be, ‘Ango atie ot, do abino dwogo butu.’ Ka koto oudo imaranu, koto nan wun itienu kilel pi kite kame ango atie ot kede but Papa; pien Papa dwong loa.
- 29**Ango nan awaco ne wu gi nogi di pwodi likame kitimere, tetekeny kame kitimere, ibinunu yei.
- 30**Ango likame doko nan abino duro kope, pien ngapug piny ni do tie bino. En eli kede twer moro i koma,
- 31**do ango gira atimo gikame Papa na ocika be atimi, tetekeny jo me piny ni ngei be ango amaro Papa. “Aso yaunu do ootunu.

Yokana 15

Yesu en Olok me Ateni

- 1**” Ango en olok me ateni, doko Papa na en kame ngapur.
- 2**Ajange dedede kame tie i koma di likame kinyako anyakini, en elwero gi tenge; ajange dedede kame tie di kinyako anyakini, en etemuno gi, tetekeny kinyak nyige atot kalamo.
- 3**Kope kame ango awaco ne wu otieko lonyo wu.
- 4**Dongunu i ango, ada ako dong i wun. Bala kite kame ajange likame twero nyako kede anyakini en kene, kwanyo ka edong i kom olok, kamanono da, wuda likame itwerunu nyako anyakini wun kenu, kwanyo ka idongunu i ango.
- 5**” Ango en olok; wun en ajange mege. Ngat kame dong i ango di ada ako dong i en, ngat nono en kame bino nyako anyakini atot. Pien likame itwerunu timo gimoro abongo ango.



⁶Ka dano moro likame odong i ango, kouce bala ajange di eko tuo; di oko coko ajange nogo oko uco gi i mac kiko wang.

⁷Ka idongunu i ango, di kop na da oko dong i wun, ibinunu kwano gikame imitunu di ikounu udo.

⁸Papa udo deyo ka wun inyakunu anyakini atot di ikounu doko josiao na.

⁹Bala kite kame Papa omara kede, kamanono ada amaro wu; dongunu i amara na.

¹⁰Ka igwokunu cik na, ibinunu dong i amara na, bala kite kame ada agwoko kede cik ka Papa na di ako dong i amara mere.

¹¹” Ango awaco ne wu gi nogi tetekeny kilel na bed i wun, kede tetekeny ibedunu kede kilel kame romo.

¹² Cik na en ine be, marerenu kenu kenu bala kite kame ango amaro wu kede.

¹³Likame tie amara kame dano moro tie kede kame dwong kalamo man, kame dano yei jalo kede kuo mere pi jowote.

¹⁴Ka itimunu gikame aciko wu iye, udo wun jowota.

¹⁵Likame abino bobo lwongo wu be ipasoi, pien epasoit likame ngeo gikame ngadwong mere tie timo; do ango atie lwongo wu be jowota, pien amio wu ingeunu gi dedede kame ango awinyo kibut Papa na.

¹⁶Wun likame iyeranu, do ango ayero wu ako cwano wu be poore iotunu di ikounu nyako anyakini, doko da be, anyakini wu poore bedo nakanaka, tetekeny Papa mi wu gimoroni kame ikwaenu i nyinga.

¹⁷Gikame ango aciko wu iye en ine be, marerenu kenu kenu.

Adagadaga me Piny

¹⁸” Ka piny odagi wu, ngeunu be egeo kong dagi ango di pwodi likame edagi wun.

¹⁹Ka koto di oudo wun ibedunu jo me piny, koto piny omaro wu bala jo mege, do pien wun likame ibedunu jo me piny, do ango ayero wu ki piny, manono en komio piny ni dagi wu.

²⁰ Yutununu kop kame oudo awaco ne wu be, ‘Epassoit likame pire dwong kalamo ngadwong mere.’ Ka kitidilo ango, kibino tidilo wuda; ka kiwinyo kop na, kibino winyo kop wuda.

²¹Do kibino timo ne wu gi nogi dedede pi ango, pien likame gin kingeo ngat kame oora.

²²Koto oudo likame ango abino ako yamo kede gi, koto ki li kede dub, doko nan ki li kede kagengere me pido pi dub gi.

²³Ngat kame daga, udo edagi Papa na da.



²⁴Koto oudo likame ango atimo i diere gi tice kalikame tie ngatamoro kotimo, koto oudo ki li kede dub; do nan kitieko neno gikame ango atimo, doko kiko daga karacel kede Papa na.

²⁵Man otimere pi mino cobere kakare kop kame kowandiko i Iswil gin be, ‘Gin kidaga abongo tien kop moro.’

²⁶” Do ka Ngakony obino, kame ango abino cwano ne wu kibus Papa, en Tipo me ateni ka Rubanga, kame wok kibus Papa, en ebino jurao ango.

²⁷Doko wuda ijurak na, pien wun oudo itienu keda cako ki agege.

Yokana 16

¹” Ango atieko waco ne wu gi nogi dedede pi mino kur ipotunu ki yei wu.

²Kibino riamo wu tenge ki sinagogan. Ateteni esawa bino tuno kame ngat kame neko wu bino paro kede be etie timo ne Rubanga tic.

³Kibino timo man pien likame kingeo Papa arabo ango.

⁴Do ango atieko waco ne wu gi nogi, tetekeny kame esawa gin otuno, wek iyutununu gikame atieko waco ne wu i kom gi.

Tic me Tipo Kacil

“Likame oudo awaco ne wu gi nogi cako ki agege, pien oudo ango atie kede wu.

⁵Ango nan atie ot but ngat kame bin oora, do di likame tie ngatamoro kikom wu kame penya be, ‘Itie ot tuai?’

⁶Wun nan itienu kede cweruny pien ango awaco ne wu kope nogi.

⁷Bed bala kamano da, atie waco ne wu kop me ateni be, eber ne wu ka ango aoto; pien ka likame aoto, Ngakony likame oyaro bino butu, do ka ango aoto, abino cwane butu.

⁸Kame etuno, en ebino mino jo me piny kan bedo kede niang aber i kom kop kame mako dub kede poore kede ngolo kop:

⁹i kom kop kame mako dub, pien gin likame kiyei ango;

¹⁰i kom kop kame mako poore, pien ango atie ot but Papa, doko likame ibinunu medo nena;

¹¹i kom kop kame mako ngolo kop, pien kotieko ngolo ne ngapug me piny ni kop.

¹²” Ango oudo pwodi atie kede kope atot kame apoore waco ne wu, do nan likame itwerunu mako gi.

¹³Kame Tipo kame nyuto ateni obino, en ebino telo wu i gi dedede me ateni, pien likame ebino yamo kede akarunikin mere kene, do en ebino tuc ne wu kop me anyim.

¹⁴En ebino mina deyo, pien ebino kwanyo kop na di eko waco ne wu.



¹⁵Gi dedede kame Papa tie kede gin mega; en komio ango awaco ne wu be, ebino kwanyo kop na di eko waco ne wu.

Cwercuny kede Yomcuny

¹⁶” Odong kare acecek di likame ikounu nena bobo, doko ikounu bino nena ingei kare acecek.”

¹⁷Mogo kikom josiao mege oko donyo waco ken gi ken gi be, “Dwong me kop ni en nyo, kame en ewaco ne wa be, ‘Odong kare acecek di likame ikounu bino nena, di bobo ikounu bino nena ingei kare acecek’ ; kede bobo be, ‘Pien ango atie ot but Papa’ ?”

¹⁸Gin kiko penyere be, “Dwong me ‘Ingei kare acecek’ en nyo? Wan likame ongeodwong kop kame en etie waco.”

¹⁹Yesu oudo ngeo be gin kimito penye, omio en eko penyo gi be, “Mam itienupenyere kenu kenu pi dwong me gikame oudo ango awaco be, ‘Odong kare acecek di likame ikounu bino nena, doko ikounu bino nena ingei kare acecek’ ?

²⁰Ateteni, awaco ne wu be, ibinunu koko kede iturur, do piny bino lelo; ibinunu bedokede cwercuny, do cwercunyu bino lokere doko kilel.

²¹Kame dako tie ramere me nywal, ebedo kede cwercuny, pien esawa mere udo otuno; do kame etieko nywalo atin, likame eyutuno bobo can kame ebeo iye nono, pien udo etie kede yomcuny pi nywalo atin i piny.

²²Aso nan wuda itienu kede cwercuny, do ango abino bobo neno wu di cunyu ko bino doko yom; doko likame tie ngatamoro kame bino kwanyo kilel wu kibutu.

²³” Kame ceng nono otuno, likame ibinunu penya gimoro. Ateteni awaco ne wu be, ka ikwaunu gimoroni kibut Papa i nyinga, en ebino mino wu.

²⁴Tuno nan pwodi likame ikwaunu gimoro i nyinga; kwaunu, ibinunu udo, me wek ibedunu kede kilel kame romo.

Yesu Olo Piny

²⁵” Ango nan atieko waco ne wu gi nogi i agole; do esawa bino tuno kalikame doko ango abino yamo kede wu i agole, do abino yamo ne wu gi dedede i kom Papa kakaler.

²⁶I ceng nono ibinunu kwano Papa i nyinga; do likame awaco ne wu be abino kwano Papa akaka wun;

²⁷pien Papa kikome maro wu gire, en emaro wu pien wun imaranu, doko iyeunu da be ango awok kibut Papa.

²⁸Ango bin awok kibut Papa di ako bino i piny; nan bobo atie weko piny di ako dok but Papa.”

²⁹Josiao mege oko waco be, “Neni, nan itie do waco gi dedede kakaler, likame i agole moro.



³⁰Wan nan ongeo be in do ingeo gi dedede, doko likame emitere ne ngatamoro pi penyi, man mio wan oyei be in iwok kibut Rubanga.”

³¹Yesu oko penyo gi be, “Nan iyeunu do?”

³²Esawa tie bino, doko etieko tuno da, kame kobino sasaro wu kede, ngat acelacel tunge kene, di ikounu weka kena. Do di likame udo ango adong kena, pien Papa udo tie keda.

³³Ango atieko waco ne wu kop noni tetekeny ibedunu tie kede mulem i ango. Ibinunu bedo kede peko i piny kan, do diunu cunyu; ango atieko lono piny.”

Yokana 17

Yesu Olego ne Josiao mege

¹Kakame Yesu otieko waco kede kope gi, en eko tingo wange malo di eko lego be, “Papa, esawa otuno do, mi Wodi deyo, me wek Wodi da mi deyo buti.

²Pien in itieko mine akarunikin i kom jo dedede, me wek emi jo dedede kame in imio bute kuo kame bedo nakanaka.

³Kuo kame bedo nakanaka en ine be, wek gin kingei in Rubanga acel keni me ateni, kede Yesu Kirisito ngat kame in ioro.

⁴Ango atieko mini deyo i piny kan, pien atieko tic kame oudo imia pi timo.

⁵Papa, nan mia deyo i nyimi; epone me deyo kame bin atie kede i nyimi di pwodi likame kocweo piny.

⁶” Ango atieko mino nyingi ongere but jo kame in imia i piny. Gin oudo kibedo jo nin, in iko mino gi buta, doko gin kiko lubo kop nin.

⁷Nan gin kingeo be gi dedede kame in imia owok kibuti;

⁸pien ango atieko mino gi kop kame in bin imia, doko gin kiko yei gamo. Doko nan kingeo i ateni be, ango awok ki buti, doko kitieko yei da be in en kame iora.

⁹” Ango nan atie lego ne gi; likame atie lego ne piny, do atie lego ne jo kame in imia; pien gin kibedo megi.

¹⁰Jo nango dedede obedo megin, doko jo nin dedede obedo mega; ango audio deyo pirgin.

¹¹Do nan ango likame bobo abino meede bedo i piny; gin en kame kitie dong i piny; ango atie bino but in. Papa Kacil, gwok gin kede twer me nyingi, en nying kame in itieko mina, tetekeny kibed jo acel, bala kite kame ango kede in otie acel.

¹² I kare kame oudo atie karacel kede gin, ango bin agwoko gin kede twer me nyingi, en nying kame imia. Ango atieko gwoko gi, doko likame tie ngatamoro kame orwenyo kikom gi, kenekene dano kame oudo poore rwenyo, me wek iwandik kacil cobere kakare.



- ¹³Do nan ango atie bino buti, ango awaco kope nogi di pwodi atie i piny, tetekeny gin kibed kede kilel na di opong i cuny gi.
- ¹⁴Ango atieko mino gi kope ni; do piny oko dagi gin, pien likame gin kibedo jo me piny, bala kite kame ango da likame abedo kede dano me piny.
- ¹⁵Ango likame akwao be ikwany gi ki piny, do be igwok gi kibut Ngarac.
- ¹⁶Likame gin kibedo jo me piny, bala kite kame ada likame abedo kede dano me piny.
- ¹⁷Lony gi kede ateni; kop nin en ateni.
- ¹⁸Bala kite kame in iora kede bino i piny, kamanono ada aoro gi ot i piny.
- ¹⁹Ango amio kuo na buti pirgin, me wek gida kimi kuo gi buti i ateni.
- ²⁰” Ango likame akwao ne gin kenekene, do akwao da ne jo kame bino yei ango pi kope gin.
- ²¹Wek gin dedede kibed jo acel, bala kite kame in Papa itie kede i ango, doko ada atie i in. Mi gida kibed i wan, en kame mi piny yei be, in en kame iora.
- ²²Deyo kame itieko mina, ada atieko mino gin, me wek kibed jo acel, bala kite kame wada otie kede acel;
- ²³ango i gin, kede in i ango, me wek kibed jo acel atwal atwala, tetekeny piny ngei be in en kame iora, doko in imaro gi bala kite kame imara kede.
- ²⁴” Papa, cunya mito be jo kame imia bed keda kakame ango ayaro bedo iye, pi neno deyo na kame imia, pien in imara cako di likame pwodi koketo acakini me piny.
- ²⁵Okwe Papa kopooore, piny likame ongei, do ango angei, doko jogi ngeo be in en kame iora.
- ²⁶Ango atieko mino gi kingeo nyingi, doko abino mino nyingi medo ngere, tetekeny amara kame in imara kede bed i gin, kede ada i gin.”

Yokana 18

Komako Yesu

(Matayo 26.47-56; Marako 14.43-50; Luka 22.47-53)

- ¹Di Yesu otieko waco kope nogi, en eko ot kede josiao mege, di kiko ngolo aditot me Kideron, kakame oudo pototie iye, di en eko donyo iye karacel kede gi.
- ²Yuda ngat kame bin orupao en da oudo ngeo kuno, pien Yesu oudo maro ot riamo karacel kede josiao mege kuno.
- ³Di do Yuda oko tero ekodet me isirikalen kede jotit mogo adongodongo kuno, kame owok kibut jodongo me josaserdoti kede kibut Iparisayon. Gin kioto kunono di oudo kimako italan kede mac acal bala me rau kede jame me yi.
- ⁴Yesu oudo ngeo gi dedede kame bino timere i kome, omio en eko wokun anyim di eko penyo gi be, “Imounu ngai?”



⁵Gin kiko dwoko ne be, “Yesu me Nasaret.” Yesu oko waco ne gi be, “Ango inononi.” Yuda, ngat kame oudo orupao en, oudo tie cungo kede gi.

⁶Kakame Yesu owaco ne gi kede be, “Ango inononi,” gin kiko riangar cen, di kiko popoto piny.

⁷Yesu oko bobo penyo gi be, “Kara ber wun imounu ngai?” Gin kiko dwoko be, “Yesu me Nasaret.”

⁸Yesu oko dwoko ne gi be, “Atieko waco ne wu be angu inononi. Pi mano ka itienu mona, wekunu jogi oti.”

⁹Man otimere pi cobo kop kame oudo Yesu owaco be, “Likame tie ngatamoro korwenyo kikom jo kame oudo imia.”

¹⁰Di do Simoni Petero, bala kame oudo etie kede epima, oko kwanyo epima mere di eko tongo kede yit epasoit me Ngatel Josaseredoti teletel. Nying epasoit nono oudo Maliko.

¹¹Yesu oko waco ne Petero be, “Dwok epima ni i akularu mere. Mam angu apoore pi mato ikopo me can kame Papa na otieko mina?”

Kotero Yesu i nyim Anas

¹²Kikano, ekodet me isirikalen kede ngadwong gi, kede ipolisin me Iyudayan oko mako Yesu di kiko twene.

¹³Gin kiko ber cako tere but Anas, ngat kame oudo obedo papa me dako ka Kayapa, kame oudo obedo Ngatel Josaseredoti i mwaka nono.

¹⁴Kayapa nono en kame oudo bin omio Iyudayan tam be, eber ka dano acel oto pi jo.

Petero Odagi Yesu

(Matayo 26.69-70; Marako 14.66-68; Luka 22.55-57)

¹⁵Simoni Petero kede ngasiao ace oko lubo Yesu. Kite kame ngasiao nono oudo ngere kede but Ngatel Josaseredoti, omio en eko donyo i diakal me Ngatel Josaseredoti karacel kede Yesu,

¹⁶do Petero oko dong cungo i dog erute. Ngasiao nono, kame oudo ngere but Ngatel Josaseredoti, oko dok ooko, di eko yamo kede nyako kame oudo daro dog erute, di eko kelo Petero da i diakal.

¹⁷Nyako kame oudo daro dog erute oko penyo Petero be, “Mam ida ibedo ngat acel kikom josiao me icuo noni?” Petero oko dwoko be, “Likame angu.”

¹⁸Ipasoi kede isirikalen oudo odopo mac kitie cungo di kiyo, pien piny oudo ngic. Petero da oudo tie cungo kede gi di eyo mac.

Ngatel Josaseredoti Opepenyo Yesu

(Matayo 26.59-66; Marako 14.55-64; Luka 22.66-71)

¹⁹Ngatel Josaseredoti oko penyo Yesu kop i kom josiao mege kede pwoony mere.



²⁰Yesu oko dwoko ne be, “Ango atieko waco ne piny kop kakaler; doko abedo pwonyo jo i sinagogan kede i tempulo, kakame Iyudayan dedede cokere iye. Likame tie gimoro kame ango awaco i mung.

²¹Pinyo komio ipenyanu? Penyunu jo kame oudo owinyo kop kame awaco ne gi; gin kingeo gikame ango oudo awaco.”

²²Kakame Yesu otieko waco kede kop noni, sirikale acel kame oudo tie cungo kuno oko bape di waco ne be, “Mam epone kame in idwoko kede kop ne Ngatel Josaseredoti ino?”

²³Yesu oko dwoko be, “Ka awaco kop arac, nyut gikarac nono, do ka awaco kop aber, pinyo komio ibapa?”

²⁴Anas oko mino kotere but Kayapa di kotwee, ngat kame oudo obedo Ngatel Josaseredoti.

Petero bobo Odagi Yesu

(Matayo 26.71-75; Marako 14.69-72; Luka 22.58-62)

²⁵Simoni Petero oudo tie cungo di eyo mac. Gin kiko waco ne be, “Mam ida ngat acel kikom josiao mege?” En eko dagi di ewaco be, “Likame ango.”

²⁶Ngat acel kikom ipasoi me Ngatel Josaseredoti, wad gi icuo kame Petero oudo otongo yite, oko penye be, “Mam oudo aneni di itienu kede Yesu i pota?”

²⁷Petero oko bobo dagi; cucuto di do tongweno oko kok.

Kotero Yesu i nyim Pilato

(Matayo 27.1-2, 11-14; Marako 15.1-5; Luka 23.1-5)

²⁸Di do kiko kwanyo Yesu ki ot ka Kayapa kiko tere i ot me ngapug. Piny oudo pwodi odiko sek. Gin likame kiko donyo i ot me ngapug, pien likame oudo kimito be kimunaun, me wek kitwer camo ebaga me Bwot.

²⁹Pilato oko donyo ooko but gi, di eko waco ne gi be, “Kop nyo kame itienu pido iye dano ni?”

³⁰Gin kiko dwoko ne be, “Koto oudo dano ni likame obedo ngatim tim areco, koto wan likame okele buti.”

³¹Pilato oko waco ne gi be, “Wun terenu kikomu, ikounu ngolo ne kop di lubere kede Iswil wu.” Iyudayan oko waco ne be, “Iswil likame yei ne wan neko ngatamoro.”

³²(Man otimere pi mino kop kame Yesu oudo owaco cobere kakare, pi nyuto epone kame eyaro to kede.)

³³Pilato oko bobo donyo i ot me ngapug, di eko lwongo Yesu, eko penye be, “In en abaka me Iyudayan?”

³⁴Yesu oko dwoko ne kede penye be, “Kop no owok kibuti, arabo jo apat en kame owaco ni i koma?”



³⁵Pilato oko penye be, “Do oudo ango abedo Ngayudaya? Ateker ni kede jodongo me josaseredoti en kame okeli buta; nyo kame oudo in itimo?”

³⁶Yesu oko dwoko be, “Ajakanut na likame obedo me piny kan, ka koto di ajakanut na obedo me piny kan, oudo koto jotic na oyi tetekeny kur mia i cing Iyudayan; do ajakanut na likame wok ki piny kan.”

³⁷Pilato oko penye be, “Mam in do abaka?” Yesu oko dwoko be, “In iwaco be ango abaka, ango oudo konywala pi kop noni, doko kop noni da en komio ango abino i piny, me wek abed ijura i kom gi me ateni. Ngat acelacel kame tie i ateni winyo dwana.”

³⁸Pilato oko penye be, “Ateni en nyo?”

Kongolo ne Yesu Kop me To

(Matayo 27.15-31; Marako 15.6-20; Luka 23.13-25)

Di do Pilato bobo oko donyo ooko but Iyudayan, eko waco ne gi be, “Likame ango audo raco moro kame en etimo.

³⁹Do wun itienu kede itok wu be miero agony ne wu mabus acel i kare me Ebagame Kalamo; benyo, imitunu be agony ne wu Abakame Iyudayan?”

⁴⁰Gin kiko lelemo be, “Likame icuo no, do gony ne wan Baraba!” Baraba oudo obedo ngayak.

Yokana 19

¹Di do Pilato oko tero Yesu di eko mino kodae.

²Isirikalen oko cweno okuto aluka kiko keto i wi Yesu, di kiko rwako ne ekanso akwakwar.

³Kiko donyo bino bute di kiwaco ne be, “Yoga, Abakame Iyudayan,” di kibape.

⁴Pilato bobo oko dok ooko, di eko waco ne gi be, “Nenunu, ango atie kele ooko butu, wek ingeunu be ango likame audo raco moro i kome.”

⁵Yesu oko wok ooko, di engapo okuto aluka nono i wie kede di engapo ekanso akwakwar. Pilato oko waco ne gi be, “Nenunu, icuo nono ine.”

⁶Kakame jodongo me josaseredoti kede isirikalen onene kede, gin kiko lelemo be, “Gure i kom musalaba, gure i kom musalaba!” Pilato oko waco ne gi be, “Terenu igurenu wun kikomu, pien ango gira likame audo raco moro i kome.”

⁷Iyudayan oko dwoko ne be, “Wan otie kede iswil wa, iswil nono yei be neke, pien emire be en Wot ka Rubanga.”

⁸Kakame Pilato owinyo kede kope go, lworoko medo make.

⁹En eko bobo donyo i ot mere me ngapug, di eko penyo Yesu be, “In iwok ki tuai?” Do Yesu likame oko dwoko ne kop moro.



¹⁰Omio Pilato oko penye be, “Idagi yamo keda? Benyo, likame ingeo be ango atie kede akarunikin me gonyi kede me guri i kom musalaba da?”

¹¹Yesu oko dwoko ne be, “Oudo likame iromo bedo tie kede akarunikin i koma, ka koto di oudo likame komii ki malo; pi mano, ngat omia i cingi en kame tie kede dub kame kalamo.”

¹²Man oko mino Pilato omoo epone me gonyo Yesu, do Iyudayan oko lelemo be, “Ka in igonyo icuo ni, udo likame in ngawot Kaisari; pien ngat acelacel kame waco be en ebedo abaka udo piemo kede Kaisari.”

¹³Kakame Pilato owinyo kede kope go, en eko kelo Yesu ooko, di eko bedo i kom mere me ngolo kop, i kabedo kame kolwongo be “Kide kame Konapo.” (I leb Eburania nying nono en Gabata.)

¹⁴Ceng nono oudo obedo ceng me iikere me camo Ebagame Kalamo; esawa oudo romo bala kanyape me iceng. En eko waco ne Iyudayan be, “Nenunu abaka wu ine!”

¹⁵Do gin kiko lelemo be, “Rweny kede, rweny kede, gure i kom musalaba!” Pilato oko penyo gi be, “Agur abaka wu i kom musalaba?” Jodongo me josaseredoti oko dwoko be, “Wan oli kede abaka, kwanyo kenekene Kaisari.”

¹⁶Pilato oko mino gi Yesu i cing gi pi ot gure.

Koguro Yesu i kom Musalaba

(Matayo 27.32-44; Marako 15.21-32; Luka 23.26-43)

Di do gin kiko tero Yesu.

¹⁷En eko donyo ooko di eyeo musalaba mere, di eko ot kakame kolwongo be Kabedo me Cogowic, kame kolwongo kede leb Eburania be Gologota.

¹⁸Gin kiko gure kuno i kom musalaba karacel kede jo are apat; ngat acel tetucel kede ocelu da tetucel, di Yesu oko bedo i diere gi.

¹⁹Di Pilato oko wandiko kop di eko keto i wi musalaba kame somere be, “Yesu me Nasaret, Abaka me Iyudayan.”

²⁰Iyudayan atot oko somo kop noni, pien kakame koguro iye Yesu oudo tie i nget bomba; doko oudo kowandiko kop noni i leb Eburania, Latin kede Gurik.

²¹Jodongo me josaseredoti, jo kame oudo obedo Iyudayan, oko waco ne Pilato be, “Kur iwandiko be ‘Abaka me Iyudayan’ do wandiko be, ‘Icuo ni owaco be, ango en Abaka me Iyudayan.’ “

²²Pilato oko dwoko be, “Gikame ango awandiko, atieko wandiko.”

²³Kakame isirikalen otieko guro kede Yesu i kom musalaba, kiko tero igoen mege di kiko popoko tien ongwon, dul acelacel pi sirikale acel. Kiko tero kiton ekanso mere da. Do ekanso mere oudo likame kororopo, oudo en etie acel abor kame kokedo ausin mege cako ki malo tuno piny.



²⁴Omio kiko waco ken gi ken gi be, “Kur onyinyilunu en, do oucunu alulu pi neno ngat kame winyo bino mako di en eko tero.” Man otimere pi mino iwandik kacil cobere kakare be, “Kipopoko giangapa na, di kiko uco alulu pi ekanso na.”

²⁵Man en gikame isirikalen otimo. Do toto me Yesu, kede amin me toto mere, kede Maria dako ka Kulopas kede Maria Magadalina, oudo tie cungo i nget musalaba mere.

²⁶Kakame Yesu oneno kede toto mere karacel kede ngasiao kame bin en emaro nono di kitie cungo i ngete, en eko waco ne toto mere be, “Neni, wodi ino!”

²⁷Di en eko waco ne ngasiao nono da be, “Neni, toto ni ino.” Cako ceng no ngasiao nono oko tero toto me Yesu ture.

Yesu Oto

(Matayo 27.45-56; Marako 15.33-41; Luka 23.44-49)

²⁸Ingei mano, Yesu oko waco (pi cobo kakare iwandik kacil) be, “Orio oneka,” pien oudo engeo be gi dedede do otiek.

²⁹Jagi oudo tie kuno kame oudo bwini awac tie iye pong. Gin kiko keto ecango kame korwako i bwini awac i wi tir, di kiko cwano ne i doge.

³⁰Kakame Yesu otieko jwijwio kede bwini awac nono, en eko waco be, “Otieki do.” Di do eko luro wie, eko to.

Kocobo Nget Yesu

³¹Kite kame ceng no oudo obedo kede ceng me iikere, Iyudayan oko kwano Pilato be tuturo tien jo kame oudo koguro nogo, di oko tero gi tenge pi gengo kom gi kur dong i kom musalaba i Ceng Sabato, pien Ceng Sabato nono oudo obedo ceng adwong.

³²Isirikalen oko bino di kiko tuturo tien dano me agege kede me dano ocelu, gin jo kame oudo koguro kede Yesu i kom musalaba.

³³Do kakame kituno kede but Yesu, kiko neno be oudo etieki to, gin likame kiko turo tiene.

³⁴Do sirikale acel oko cobo ngete kede tong; cucuto di remo kede pii oko wok kiye.

³⁵(Ngat koneno gi kotimere en komio ijura, doko ijura mere tie me ateni, doko eda engeo be ewaco kop me ateni, me wek wuda iyeunu.)

³⁶Pien gigi otimere tetekeny iwandik kacil cobere kakare, kame waco be, “Likame kobino turo cogo mere moro.”

³⁷Bobo iwandik ace waco be, “Gin kibino ngino ngat kame kicobo.”

Koyiko kom Yesu i Ates

(Matayo 27.57-61; Marako 15.42-47; Luka 23.50-56)

³⁸Ingei mano, Yosepu me Arimatea, kame oudo obedo ngalub Yesu, oko penyoo Pilato i mung pi lwooro Iyudayan, be mie eter kom Yesu. Pilato oko mine akarunikin; di do en eko bino di eko kwanyoo kom Yesu.



³⁹Nikodemu da, dano kame oudo ber bin ogeo bino but Yesu iwor, oko bino di ekelo yat kame ngwe kur me gwoko kom ngat oto, yat no en maya kame konyalo kede aloe, kame romo bala kilo ot adek.

⁴⁰Gin kiko kwanyo kom Yesu di kiko bone kede esuka kede yat angwe kur nono, bala kite kame itok me Iyudayan oudo tie kede.

⁴¹Poto oudo tie kakame koguro iye Yesu; ates anyen kame likame pwodi oudo koyiko iye ngatamoro oudo tie i poto nono.

⁴²Kite kame ceng no oudo obedo kede ceng kame Iyudayan iikere kede, doko da pien ates oudo tie kakame iyapiyapi, gin kiko yiko Yesu kuno.

Yokana 20

Yesu Oyaruno

(Matayo 28.1-8; Marako 16.1-8; Luka 24.1-12)

¹Ceng Sande odiko sek, Maria Magadalina oko dilo di pwodi piny col, di eko ot i ates. En eko neno be oudo kokwanyo kidi tenge ki dog ates.

²Di do en eko ringo eoto but Simoni Petero gini kede ngasiao ocelu kame bin Yesu maro nono, di eko waco ne gi be, “Kikwanyo kom Rwot tenge ki ates, likame ongego kakame kikete iye.”

³Di Petero oko yai, en karacel kede ngasiao ocelu nono pi ot i ates.

⁴Kiko donyo ringo aringa, do ngasiao ocelu nono oko ringo olanyo Petero, di en eko cako tuno i ates.

⁵En eko gungo pi neno yi ates, di eko neno isukan kenekene di tie kuno, do likame eko donyo i yie.

⁶Di do Simoni Petero da oko tuno di lube ki cen, di eko pororo aporor edonyo i yi ates; en eko neno isukan di tie kuno,

⁷kede itambala kame bin tie i wie, di likame oudo etie karacel kede isukan nogo, do oudo kodole etie kare kene.

⁸Di do ngasiao ocelu kame oudo ogeo tuno i ates nono oko eda donyo i yie, en eko neno di eko yei;

⁹pien pwodi gin oudo likame kiniang iwandik kacil kame waco be poore eyaruno kikom jo oto.

¹⁰Di do josiao oko dok i miere gi.

Yesu Oneeno ne Maria Magadalina

(Matayo 28.9-10; Marako 16.9-11)

¹¹Do Maria oko dong koko ooko me ates. Di pwodi oudo etie koko, en eko gungo pi neno yi ates;



¹²di en eko neno imalaikan are kame angapito gi tar, di kibedo kakame oudo kopiello kom Yesu iye, acel i katiene kede ocelu i kawie.

¹³Gin kiko waco ne be, “Dako ni, itie kok pinyo?” En eko dwoko ne gi be, “Pien kitero kom Rwot na tenge, likame angeo kakame kikete iye.”

¹⁴Ingei waco kamano, en eko lokere di eko neno Yesu di tie cungo, do oudo likame engeo be Yesu inonono.

¹⁵Yesu oko penye be, “Itie kok pinyo? Imo ngai?” Maria oko paro be amoto nat ngat koudo tie puro poto oudo inonono, omio en eko waco ne be, “Adwong, ka in en itere tenge, nyuta kakame ikete iye, me wek aot akwanye atere.”

¹⁶Yesu oko lwonge be, “Maria!” Di Maria oko lokere oko waco ne kede leb Eburania be, “Raboni!” (Man dwong mere be Apwony).

¹⁷Yesu oko waco ne be, “Kur imaka, pien pwodi likame aoto malo but Papa; do ot but imiegu na iko waco ne gi be ango atie ot malo but Papa na, en Papa wu da; but Rubanga na, en Rubanga wu da.”

¹⁸Maria Magadalina oko ot di eko waco ne josiao be, “Ango aneno Rwot” ; di eko tatamo ne gi gikame Rwot owaco ne.

Yesu Oneeno ne Josiao mege

(Matayo 28.16-20; Marako 16.14-18; Luka 24.36-49)

¹⁹Otieno me Ceng Sabiti nono, josiao oudo tie i ot, di kicego ikekon pi lworu Iyudayan. Yesu oko bino di eko cungo i diere gi di ewaco be, “Mulem bed butu.”

²⁰Ingei waco kamano, en eko nyuto ne gi cinge kede ngete. Di do cuny josiao oko bedo yom kakame kineno kede Rwot.

²¹Yesu bobo oko medo waco ne gi be, “Mulem bed butu. Bala kite kame Papa na oora kede, kamanono ada aoro wu.”

²²Di etieko waco kamano, en eko kuto wei mere i kom gi di ewaco ne gi be, “Gamunu Tipo Kacil.

²³Ka isasirunu ngatamoro ki dub mege, kobino sasiro en; ka idagunu sasiro ngatamoro ki dub mege, likame kobino sasiro en.”

Yesu kede Tomasi

²⁴Kakame Yesu obino kede, Tomasi (kame oudo kolwongo be Bangi), kame bin obedo ngat acel kikom josiao tomon kiwie are oudo likame tie kede gi.

²⁵Josiao apat oko waco ne be, “Wan oneno Rwot.” Do en eko waco ne gi be, “Likame abino yei tuno kede di aneno aporeso me sumalin i cinge, di ako keto iye lweta, doko di ako keto cinga i ngete.”

²⁶Ingei ceng kanyauni, josiao mege oudo bobo tie i ot, Tomasi da oudo tie kede gi, ikekon oudo ocegere, do Yesu oko bino di eko cungo i diere gi, di eko waco be, “Mulem bed butu.”



²⁷En eko waco ne Tomasi be, “Ket lweti kan, doko iko neno cinga; riei cingi iko keto i ngeta, kur ibed abongo yei, do bed ngat kame tie kede yei.”

²⁸Tomasi oko dwoko ne be, “In Rwot na kede Rubanga na!”

²⁹Yesu oko waco ne be, “Mam in iyei pien inena? Kitie kede winyo jo kame yei di likame kineno.”

Gikame omio Kowandiko Itabu noni

³⁰Yesu bin otimo gianena atot i nyim josiao mege, kalikame kowandiko i itabu noni.

³¹Do kowandiko magi tetekeny iyeunu be Yesu en Kirisito, Wot ka Rubanga, kede da be wek iudunu kuo i nyinge pi yei kame itienu kede i kome.

Yokana 21

Yesu Oneeno ne Josiao Kanyaare

¹Ingei mano, Yesu oko bobo neeno ne josiao mege i dog nam me Tiberia. En enyutere but gi iepone ni:

²Simoni Petero, Tomasi kame kolwongo be Bangi, Natanael me Kana i Galilaya, awobe ka Sebedayo, kede josiao mege are apat oudo tie karacel.

³ Simoni Petero oko waco ne gi be, “Ango atie ot cik.” Gin kiko waco ne be, “Wada oyaro ot kedi.” Gin kiko donyo i yi yee; do likame kiko mako deknam moro iwor nono.

⁴Kakame piny oudo tie do ru kede, Yesu oko cungo i dog nam, do josiao oudo likame ngeo be en inonono.

⁵Yesu oko penyo gi be, “Idwe, iudunu deknam moro?” Gin kiko dwoko ne be, “Li.”

⁶ En eko waco ne gi be, “Ucunu ber bwoi i bad tetu cam me yee; ibinunu udo mogo.” Gin kiko uco bwoi, do wano bwoi i yi yee oko bwono gi, pien oudo emako deknam atot adikinicel.

⁷Ngasiao kame Yesu maro nono oko waco ne Petero be, “Rwot kom inonono!” Kakame Simoni Petero owinyo kede be Rwot inonono, en eko ngapo igoen mege pien oudo egonyo gi pi tic, di eko somo edonyo i yi pii.

⁸Do josiao icegun ka oko bino i dog nam kede yee, di kitie wano bwoi kame opong kede deknam, pien likame oudo kitie kakabor kede dog nam, do oudo kitie kakame boro mere romo bala tien tol acel.

⁹Kakame kiwok kede i wi itela, kiko neno mac odop kuno di deknam tie i wie, kede mugati da oudo tie.

¹⁰Yesu oko waco ne gi be, “Kelunu ber deknam mogo kame nan imakunu kan.”



¹¹Simoni Petero oko donyo i yi yee di eko wano bwoi kame deklam adongo oudo opong iye nono ooko i dog nam. Wel me dek nam kame tie iye oudo romo tol acel kede ot kany kiwie adek. Bed bala deklam oudo tot, do bwoi likame oko nyil.

¹²Yesu oko waco ne gi be, “Bianu ocamunu.” Do likame tie ngasiao moro kame oko bedo kede nwangcuny me penye be, “In ngai!” Gin oudo kingeo be Rwot inonono.

¹³Yesu oko bino di eko kwanyo mugati, eko mino gi, di bobo eko kwanyo deklam da eko mino gi.

¹⁴Man oudo nan do tien me adek kame Yesu onyutere ne kede josiao ingei yaruno en kikom jo oto.

Yesu kede Petero

¹⁵Ingei gin tieko cam me odiko, Yesu oko penyo Simoni Petero be, “Simoni wot ka Yokana, in imara kalamo jo icegun gi?” Simoni oko dwoko be, “Ebo Rwot; in ingeo be anga amari.” Yesu oko waco ne be, “Pit idwe me romini na.”

¹⁶En eko bobo penye tien me are be, “Simoni wot ka Yokana, in imara?” Simoni oko dwoko ne be, “Ebo Rwot, in ingeo be anga amari.” En eko waco ne Simoni be, “Gwok romini na.”

¹⁷Yesu bobo oko penye tien me adek be, “Simoni wot ka Yokana, in imara?” Petero likame oko bedo kede yomcuny, pien Yesu openye tien me adek be, “In imara?” En eko dwoko ne Yesu be, “Rwot, in ingeo gi dedede; in ingeo be anga amari.” Yesu oko waco ne be, “Pit romini na.

¹⁸Ateteni, ateteni awaco ni be, di oudo bin pwodi in atin awobi, oudo in itweo rakoba nin keni di iko ot kakame in imito. Do ka iti, ibino rieno badi malo di ngat apat en kame ko tweno ni rakoba, di en eko teri kakame likame in oudo imito ot iye.”

¹⁹(Yesu bin owaco man pi nyuto epone kame Petero oudo oyaro to kede di eko mino Rubanga deyo.) Ingei mano, en eko waco ne Petero be, “Luba.”

Yesu kede Ngasiao kame oudo Emaro

²⁰Petero oko lokere di eko neno ngasiao kame Yesu oudo maro nono di tie lubo gi, en ngat kame oudo ogongere di iyapiyapi kede kor Yesu i kacam me otieno, en ngat kame oko penyo Yesu be, “Rwot, ngai inonono kame bino rupao in?”

²¹Kakame Petero onene kede, en eko penyo Yesu be, “Rwot, do en kono?”

²²Yesu oko waco ne be, “Ka mit nango tie be edong di ekuo tuno anga dwogo, nyo kame tie loli iye? In luba!”

²³Kop noni oko sarkin obukui but imiegu be ngasiao noni likame bino to, do di oudo likame kowaco ne be likame ebino to; do Yesu oudo owaco be, “Ka mit nango tie be edong di ekuo tuno anga dwogo, nyo kame tie loli iye?”

²⁴Ngasiao noni en kame nan tie mino ijura i kom gi nogi, doko en kame ewandiko gi nogi. Wan ongego be ijura kame emio tie me ateni.



²⁵Do tie da jame apat atot kame Yesu otimo, kame ka koto kowandiko gin dedede, aparo be itabun kame kowandiko oudo koto opongo piny di oko alamar.



Tice

Tice 1

- ¹ Adwong Teopilo, i itabu na me agege, ango awandiko kop kame mako gi dedede kame bin Yesu ocako timo, kede pwonyo,
- ² tuno i ceng kame kotere kede malo, ingei en ciko joor mege i twer me Tipo Kacil, joor mege kame oudo en eyero.
- ³ Ingei can kede to mere, en eko nyutere but gi i yote apapat kame moko be, en oudo ekuo ateteni, di epwonyo kop kame mako Ajakanut ka Rubanga.
- ⁴ I kare kame oudo pwodi etie kede gi karacel, en oudo eciko gi be miero kur kiyai ki Yerusalem, do kidar ki kuno gikame Papa ocikere pi mino. En ewaco ne gi be, “Wun bin iwinyunu kibuta be,
- ⁵ Yokana bin batiso jo kede pii, do di pwodi likame ceng atot okato, wun kobino batiso wu kede Tipo Kacil.”

Kotero Yesu i Malo

(Marako 16.19-20; Luka 24.50-53)

- ⁶ I kare kame joor oriamakin karacel kede Yesu, gin kiko penye be, “Rwot, mam kare noni en kame iyaro dwoko kede Ajakanut but jo me Isirael?”
- ⁷ Yesu oko waco ne gi be, “Likame tic wun obedo me ngeno ceng arabo kare kame Papa otieko moko kede akarunikin mere.
- ⁸ Do kame Tipo Kacil obino i komu, ibinunu udo twer di ikounu bino bedo ijurak na i Yerusalem kede i Yudea dedede, kede i Samaria da, tuno kede i ajikini me lobo.”
- ⁹ Ingei en yamo kope nogi, Rubanga oko tinge otere malo di gida kitie neno; di en eko rwenyo i edou.
- ¹⁰ Di pwodi oudo wang gi omoko ngino malo kakame en oudo etie ot kede, cuo mogo are oko cungo i nget gi di kingapo ikanson atar,
- ¹¹ di kiko waco ne gi be, “Wun cuo me Galilaya, pinyo komio itienu cungo di ingiunu malo? Yesu noni kame kokwanyo kibutu di oko tero malo, oyaro bobo dwogo iepone acel nono bala kite kame inenenu kede di eoto malo.”

Koyero Ngaluny wang Yuda

(Matayo 27.3-10)

- ¹² Joor oko yai ki moru kame kolwongo be Olibeti, kame iyapiyapi kede Yerusalem, kame buco romo bala mairo acel, di kiko dok Yerusalem.
- ¹³ Kakame kituno kede i bomba, kiko ot donyo i agola me malo kakame oudo kibedo iye; gin oudo Petero, Yokana, Yakobo kede Anderia, Pilipo kede Tomasi, Batulumayo kede Matayo, Yakobo wot ka Alipayo, Simoni kame bin tie i ekodet me jo kalikame mito apugan me kare nono, karacel kede Yuda wot ka Yakobo.



- ¹⁴Jogi dedede oko bedo kede cuny acel me ilega nakanaka, karacel kede mon kede Maria toto me Yesu kede imiegu mege da.
- ¹⁵I ceng nogo, Petero oko cungo i nyim ekodet me jokirisito, kame oudo ocokere, wel gi oudo romo tol acel kede ot are; en eko waco ne gi be,
- ¹⁶” Jowota, iwandik kacil oudo miero cobere kakare, kame bin Tipo Kacil owaco i dog Daudi i kom Yuda, ngat kame bin otelo jo pi ot mako Yesu.
- ¹⁷Yuda oudo obedo ngat acel kikom wa; doko bin kopoko ne tic i epelu wa noni.”
- ¹⁸ (Icuo ni oko wilo poto kede sente kame bin kocule kede pi tim mere arac nono; en eko poto adule, di eko mwoc i diere, di jamini me yie oko bwote ooko dedede.
- ¹⁹Jo kame bin bedo Yerusalem dedede oko ngeno kop noni, di kiko lwongo poto nono kede leb gi be Akeldama, kame dwong mere be, Poto me Remo.)
- ²⁰ “Pien kowandiko i Sabuli be, ‘ Wek kabedo mere dong nono, doko kur ngatamoro bed iye da.’ Doko kowandiko da be, ‘ Poore ngatamoro luny tic mere me nganeno.’
- ²¹” Pi mano, ngat acel kikom cuo kame lem obedo upere kede wa i kare dedede kame bin Rwot Yesu obedo wire kede i diere wa,
- ²²cako i kare me batisimu ka Yokana, tuno kede ceng kame kotere kede i malo kibut wa, miero do bed mujura karacel kede wa i kom yaruno ka Yesu.”
- ²³Gin kiko kelo nying jo are: Yosepu kame oudo kolwongo be Barasaba, kame bin oudo nyinge me pene Yusito, en kede Matiya.
- ²⁴Joor oko lego di kiwaco be, “Rwot, in en kame ingeo cuny jo dedede; nyut ne wa kikom jo are gi ngat kame in iyero
- ²⁵pi lunyo wang tic kede or kame Yuda oweko, pi ot i kabedo mere.”
- ²⁶Gin kiko uco alulu pirgi di alulu oko mako Matiya. Di do oko ribe i kom joor tomon kiwie acel noka.

Tice 2

Bino me Tipo Kacil

- ¹ Di do bin ceng me Pentekoti otuno, jo koyei Kirisito dedede oudo ocokere karacel.
- ²Cucuto di mor moro oko wokun ki malo bala buko me yamo atek, di eko romo yi ot dedede kakame gin oudo kitie bedo iye.
- ³Gimoro oko neeno but gi i cal me leb mac, di eko popokun eko cungo i kom ngat acelacel.
- ⁴Gin dedede kiko pong kede Tipo Kacil, di kiko cako yamo i leb kanyen, bala kame Tipo nono oudo mio gi kede.



⁵Oudo tie Iyudayan mogo kame bedo i bomba me Yerusalem, gin oudo kibedo jo kame oudo woro Rubanga twatwal, kame oudo oyai ki adulion dedede kame tie i piny.

⁶Mor nono oko mino jo atos ocokere karacel, di wi gi oko cungo, pien ngat acelacel kikom gi oudo winyo di koyamo leb mere.

⁷Gin dedede kiko uro twatwal, di kipenyere be, “Mam jo kame tie yamo gi dedede obedo Jogonalilaya?”

⁸Do pinyo komio ngat acelacel kikom wan kan tie winyo di koyamo leb me tur gi?

⁹Wan jo me Pasia kede Mede, jo me Elam kede jo kame bedo Mesopotamia, jo me Yudea kede Kapadosia, jo me Pontu kede Esia,

¹⁰jo me Purigia kede Pampulia, jo me Misiri kede adulion me Libiya, kame kopugo Sirene, karacel kede wele kame owok ki Roma, Iyudayan karacel kede jo kame olokere i edini wa,

¹¹Jokurete kede Imwarabun, wan dedede owinyo di gin kiwaco tice me twer ka Rubanga i leb wa.”

¹²Gin dedede wi gi oko cungo di kiuro twatwal, di kipenyere ken gi ken gi be, “Man do ber dwong mere nyo?”

¹³Do jo apat oko donyo nyero di kiwaco be, “Jogo omer kede bwini anyen.”

Kop kame Petero Owaco

¹⁴Do Petero oko cungo kede joor tomon kiwie acel, di eko cako yamo kede jo kede dwan amalo be, “Jo na me Yudea, karacel kede wun jo dedede kame bedo Yerusalem, poore ingeunu kop ni kiber, doko cikunu yitu i kom gikame angoyaro waco ne wu.

¹⁵Jogi likame omer bala kite kame wun itamunu kede, pien esawa kom pwodi adek kenekene me odiko,

¹⁶do man en gikame enabi Yoweri bin owaco be,

¹⁷‘Rubanga owaco be, i kare me ajikini, angoyarabino mino Tipo na but jo dedede, di idwe wu awobe kede anyira ko bino muraos, kede awobe wu ko bino neno gianyuta, di jo oti ko bino leko lek atos.

¹⁸Akadi kiton but cuo kede mon kame obedo jotoc na, angoyarabino mino gi Tipo na i ceng nogo, di gin kiko bino muraos.

¹⁹Angoyarabino timo gi me isuur i malo, kede gianena i piny. Remo kede mac kede yiro apek bino bedo tie;

²⁰kobino mino wang ceng doko col, kede wang duwe da bino doko bala remo, di pwodi Ceng adwong kede Ceng me deyo ka Rwot likame otuno.

²¹Di do ngat acelacel kame bino lwongo nying Rwot ko bino udo alako.’



- 22” Wun jo me Isirael, winyunu kope gi: Yesu me Nasaret en icuo kame Rubanga bin oyeru, di eko nyuto ne wu i tice me twer, kede i gi me isuur, kede i gianena kame Rubanga bin otimo kibute i diere wu, bala kite kame wuda ingeunu kede.
- 23 Yesu noni, ngat kame bin komio i akarunikin wu di lubere kede ngec ka Rubanga kede iik mere, bin wun ikounu mine i cing jodubo kame oko gure i kom musalaba di kiko neke.
- 24 Do Rubanga bin oko gonye kikom kwir me to, di oko yaruno en, pien to oudo likame twero twene.
- 25 Pien Daudi oudo owaco kop i kome be, ‘ Ango aneno Rwot di etie i nyima nakanaka; en etie i bada tetu cam, tetekeny kur gimoro yayango angu.
- 26Pi mano, cunya oko bedo yom, doko leba da oko yamo kop me kilel; koma da bino bedo kede gen.
- 27Pien in Rubanga likame ibino jalo kuo na i kabedo me jo oto, akadi weko kom Dano ni Kacil top.
- 28In itieko nyuto na yongayo me kuo; tie ni keda bino mina apong kede kilel.’
- 29” Jo me Isirael jowota, angu amito yamo ne wu kede tekcury kop kame angu angeo kiber i kom kwaru wa Daudi. En bin eto di oko yike, doko ates mere da pwodi tie but wa kan tuno tin.
- 30 Pi kite kame oudo Daudi bin obedo kede enabi, doko di oudo engeo be Rubanga bin olairo bute di esikano be ebino keto ngat acel kikom ikwae mege pi lunyo kom mere me ajakanut,
- 31en eko cako neno iyarun ka Kirisito sek, di en eko yamo kop mere. En ewaco be, ‘ Likame kojalo ringokome i kabedo me jo oto, doko kome da likame obilo top.’
- 32Yesu noni en kame Rubanga oyaruno, doko kop noni en kame wan dedede obedunu ijura mere.
- 33Pi kite kame kotieko kiarao en kede i bad tetu cam ka Rubanga, kede piento en etieko gamo Tipo Kacil kame bin Papa ocikere pire, en eko nan onyo gikame inenunu kede iwinyunu no.
- 34 Pien Daudi oudo bin likame ooto malo, do en kikome ewaco be, ‘ Rwot Rubanga owaco ne Rwot na be, bed i bada tetu cam,
- 35tuno di angu atieko mini inyono jokwor ni i tieni bala abanya me teno tien.’
- 36” Pi mano, jo dedede me Isirael poore ngei ateteni be, Yesu noni, kame wun bin igurunu i musalaba, Rubanga otieko mine edoko Rwot kede Kirisito.”
- 37Kop noni oko cobo cuny jo, di kiko penyo Petero karacel kede joor icegun be, “Imiegu, nan wan do otim nyo?”



³⁸Petero oko dwoko ne gi be, “Swilarunu di oko batiso ngat acelacel kikom wu i nying Yesu Kirisito, di Rubanga ko bino sasiro wu ki dub wu, di ikounu bino udo giamia me Tipo Kacil.

³⁹Pien cikere noni tie piru kede pi idwe wu, kede pi jo dedede kame tie kakame boco da, jo dedede kame Rwot Rubanga wa lwongo bute.”

⁴⁰Petero oko mino ijura but gi kede kope ace atot, di ebako ne gi doge be, “Wuda lakerenu ki alola kame oyaro bino i kom lwak kodubere me i kare ni.”

⁴¹Ceng nono, oko batiso jo kame bin owinyo kop mere di kiko yei, di wel me jokirisito ceng nono oko meede kede jo aromo tutumia adek.

⁴²Gin kiko keto cuny gi winyo pwony me joor, bedo i nywak kede gi, camo mugati karacel kede lego kede gi.

Epone me Bedo me Jo Koyei Kirisito

⁴³Jo dedede oko bedo kede lworu, pien joor oudo oduyo timo gi me isuor kede gianena atot.

⁴⁴Jo dedede koyei Kirisito oudo bedo karacel, di kinywako jame gi.

⁴⁵Oudo kicato jame gi di kipopoko lim kame kiudo ne jo dedede, di lubere kede rem kame ngat acelacel oudo tie kede.

⁴⁶Doko ceng dedede oudo gin kilego i tempulo karacel, di kinywako mugati karacel i miere gi. Oudo kinywako cam kede cuny ayom kilajara,

⁴⁷di kipako Rubanga, doko jo dedede oudo pwoyo gi. Ceng acelacel Rwot oko donyo medo i kom gi wel me jo kame oudo otieko udo alako.

Tice 3

Kocango Engwalas

¹Kikano, Petero kede Yokana oudo tie ot i tempulo esawa kanyangon me otieno, kame oudo obedo esawa me ilega.

²Bin tie icuo moro kongwalo cako nywale, kame oudo kotie tingo. En oudo jo tinge ceng dedede di kiko kete i dog erute me tempulo, kame bin kolwongo be Erute Acil, pi kwano sente kibus jo kame donyo i tempulo.

³Kakame eneno kede Petero kede Yokana di kitie mito donyo i tempulo, en eko kwano kony kibus gi.

⁴Petero kede Yokana oko ngine kitek, di kiko waco ne be, “Nen wa.”

⁵Engwalas nono oko keto tam mere i kom gi, di oudo etie kede gen me udo gimoro kibus gi.



⁶Do Petero oko waco ne be, “Ango ali kede sente siliba arabo saabu kame ayaro mini, do ango ayaro mini gikame atie kede. I nying Yesu Kirisito me Nasaret, yai malo iko cako ot.”

⁷Kikano Petero oko mako cinge tetu cam di oko kiarao en malo; cucuto nono tiene oko doko tek.

⁸En eko somo malo eko cungo, di eko cako ot. En eko donyo i tempulo karacel kede gi di esosomo, di epako Rubanga.

⁹Jo dedede oko nene di etie ot doko di epako Rubanga.

¹⁰Gin kiko niang be icuo kame oudo lem bedo i dog Erute Acil me tempulo di ekwao sente inonono; kiko uro twatwal gi kotimere ne.

Kop kame Petero Owaco i Tempulo

¹¹Di pwodi icuo nono omoko i kom Petero kede Yokana i balasa kame kogero wie, kame bin kolwongo be Balasa ka Sulumani, jo dedede oko ringo karacel but gi kunono, di kom gi oto adikinicel.

¹²Kakame Petero oneno kede kamano, en eko waco ne jo be, “Jo me Isirael, pinyo komio itienu uro gini, arabo pinyo komio itienu ngino wa ineno bala wan omio icuo ni ooto pi twer wa, arabo be pien wan oworo Rubanga adikinicel?”

¹³Rubanga ka Aburaam, Rubanga ka Isaka, Rubanga ka Yakobo kede Rubanga me joakwari wa bin otieko mino deyo but ngatic mere Yesu, kame wun ikounu mino i cing wegi apugan. Doko ikounu dage i nyim Pilato, do di oudo Pilato mito gonye.

¹⁴Do wun ikounu dagi Ngat Kacil kede Kopoore, di ikounu penyo be gony ne wu nganek,

¹⁵ikounu mino koneko ngat kame mio kuo, kame Rubanga oko yaruno kikom jo oto. Wan en ijurak me kop noni.

¹⁶Aso, twer kame tie i nyinge, kede yei nyinge nono, en komio dano kame nan inenunu kede kame ingeunu noni odoko tek; doko yei i kom Yesu en komio i cuo noni ocango, di wun dedede inenunu.

¹⁷” Do pi mano, jowota, ango angeo be wun itimunu mano pi kwina piny, bala kite kame jotel wu da otimo kede.

¹⁸Do gikame Rubanga bin ogeo waco sek i dog inabin dedede be, Kirisito mere poore nen can, en inonono kame emio oko cobere.

¹⁹Pi mano, wun miero iswilarunu, di ikounu lokere but Rubanga, tetekeny elwok dub wu tenge, me wek Rwot mi wu kare me wei.

²⁰Di do Rubanga ko bino cwano ne wu Kirisito kame bin en etieko yero, en Yesu,

²¹en ngat kame miero edong malo ebed iye tuno kede i kare kame kobino mino kede gi dedede doko nyen, gikame Rubanga bin owaco i dog inabin mege kacil.



²² Musa bin owaco be, ‘Rwot Rubanga bino cwano ne wu enabi kikom imiegu wu bala kite kame ecwa kede. Wun miero ilubunu gi dedede kame en ebino waco ne wu be itimunu.

²³ Do ngat kalikame bino lubo gikame enabi no bino waco, kobino poke tenge kikom jo di oko neke.’

²⁴ Doko inabin dedede kame bin oyamo cako i kare ka Samuel, kede kame oko bino i cen da, bin oyamo kope kame mako ceng nogi.

²⁵ Wun ibedunu ikwae me inabin kede me isikan kame bin Rubanga osikano but joakwari wu, di ewaco ne Aburaam be, ‘Kobino mino winyo but atekerin dedede me lobo kibus ikwae ni.’

²⁶ En komio ingei Rubanga yero ngatic mere, ber kong en eko cako cwane butu, pi mino wu winyo me en loko ngat acelacel kibusu ki tim wu areco.”

Tice 4

Petero kede Yokana i nyim Kansulo

¹ Kakame Petero kede Yokana oudo tie yamo kede jo, josaseredoti kede ngadwong me isirikalen me tempulo kede Isadukayon oko bino but gi.

² Gin oudo kitie kede wangcuny, pien Petero kede Yokana oudo tie pwoony be jo yaruno, di kiyamo be Yesu oyaruno kikom jo oto.

³ Di do gin kiko mako Petero kede Yokana kiko rwako gi i otkol tuno oru mere, pien piny da do oudo oyuto.

⁴ Do jo atat oko yei ingei winyo kop kame Petero kede Yokana opwoonyo, di wel me cuo koyei oko romo bala tutumia kany.

⁵ Oru mere, jo kame pugo Iyudayan, joadongo me piny kede jopwoony me Iswil oko cokere Yerusalem,

⁶ karacel kede Anas kame oudo obedo Ngatel Josaseredoti, kede Kayapa kede Yokana, kede Alekesanda kede jo dedede kame wok ki ekeko me Ngatel Josaseredoti.

⁷ Gin kiko kelo Petero kede Yokana i diere gi, di kiko penyo gi be, “Wun itimunu gini kede twer mene, arabo i nying ngai?”

⁸ Kikano Petero oko pong kede Tipo Kacil, di eko waco ne gi be, “Wun wegii apugan karacel kede joadongo me piny,

⁹ ka tin kotie pepenyo wa kop i kom gi aber kame kotimo ne engwalas, epone kame kocange kede,

¹⁰ wek wun dedede kede jo me Isirael dedede ingeunu be, icuo ni nan tie cungo i nyimu kan di eber, pi nying Yesu Kirisito me Nasaret. Yesu nono en kame wun bin igurunu i kom musalaba, di Rubanga oko yaruno en kikom jo oto.



- 11** Man en kidi kame bin wun jogedo idagunu, kame nan oko lokere odoko kidi kame pire tek me esonda.
- 12**Doko likame tie ngatamoro kame wan otwero udo alako kibute, pien likame tie nying moro i piny kan kame kotieko mino jo, kame mio wa alako.”
- 13**Kakame kineno kede nwangcuny ka Petero kede Yokana, kede bobo di oudo kiniang be gin kibedo jo atatai kalikame osomo, kiko uro; di kiko ngeno be Petero kede Yokana oudo obedo kede Yesu.
- 14**Do bin di kineno icuo kame kocango nono di cungo i nget gi, likame tie gimoro arac kame oudo kiromo yamo.
- 15**Di do gin bin kitieko cwano Petero kede Yokana ooko me kansulo, kiko donyo ber poro kop di kipenyere be,
- 16**” Otimunu ne jogi nyo? Pien kitieko timo gianena kame tie kakaler but jo dedede kame bedo Yerusalem, kame wada likame otwerunu dagi.
- 17**Do pi mino kop ni kur med sarakin, wan poore omiunu gi dwan atek kame gengo gi bobo yamo nying Yesu but ngatamoro.”
- 18**Di do gin kiko lwongo Petero kede Yokana, di kiciko gi kitek be miero kiwek atwal yamo nying Yesu arabo pwonyo jo kop amake.
- 19**Do Petero kede Yokana oko dwoko ne gi be, “Wun en kame miero iyerunu, arabo epoore i nyim Rubanga pi wan winyo dwanu, amoto dwan Rubanga;
- 20**pien wan likame otwero weko yamo kop i kom gikame oneno, kede kame owinyo.”
- 21**Kakame bin kitieko kede medo wowono gi, kiko weko gi kioto, pien oudo likame tie epone moro kame gin kitwero mino gi kede alola moro. Gin oudo kilworo jo, pien jo dedede oudo tie pako Rubanga pi gikame otimere.
- 22**Icuo kame bin gianena me cango otimere i kome nono oudo mwakini mege me dongo kalamo ot ongwon.

Jo Koyei Kirisito Okwao Rubanga pi Mino gi Nwangcuny

- 23**Kakame kogonyo kede Petero kede Yokana, gin kiko dok but jowot gi, di kiko tatamo ne gi gikame jodongo me josaseredoti, kede joadongo me piny owaco ne gi.
- 24** Kakame kiwinyo kede kop nono, gin dedede kiko kwano Rubanga kede dwan acel di kiwaco be, “Okwe Rwot Won twer, ngat kocweo malo kede lobo kede nam kede jame dedede kame tie i yi gi.
- 25**In en kame bin iwaco i dog ngatic ni kwaru wa Daudi kede twer me Tipo Kacil be, ‘ Pinyo komio jo kalikame Iyudayan odoko ger; pinyo komio jo odonyo bedo kede tam i kom gikame kony gi li?’
- 26**Abakai me lobo ni otieko iikere kiteere cungo, kede jotel da otieko cokere karacel, pi yi kede Rwot kede Kirisito mere.’



²⁷ Pien ateteni bin Erode kede Pontio Pilato, kede jo kalikame Iyudayan, karacel kede jo me Isirael bin ocokere i bomba noni pi suro Yesu Ngatic nin kacil, kame in iwiro.

²⁸ Gin kitimo man pi cobo gi dedede kame cingi kede tam ni bin otieko iiko sek be bino timere.

²⁹ Okwe Rwot, nan do nen ber epone kame gin kitie wowono wa kede, di iko mino jotie ni nwangcuny me yamo abongo lworu moro.

³⁰ Riei cingi iko cango jo, doko wek kotim gi me isuur kede gianena pi nying Yesu Ngatic nin kacil.”

³¹ Kakame kitieko kede ilega, kabedo kame gin oudo kicokere iye nono oko yangere, di gin dedede kiko pong kede Tipo Kacil, kiko donyo yamo kop ka Rubanga kede nwangcuny.

Jo Koyei Kirisito Onywako Jame gi

³² Ekodet me jokoyei Kirisito oudo tie kede tam acel kede cuny da acel. Likame tie ngatamoro kikom gi kame oudo waco be gikame en etie kede obedo mere kene, do gin oudo kinywako jamini dedede karacel.

³³ Joor oko mino ijura i kom yaruno ka Rwot Yesu kede twer adwong. Doko kisa ka Rubanga oudo tie kede gin dedede.

³⁴ Likame tie ngatamoro kikom gi, kame gimoro oudo oremo, pien ngat acelacel kikom gi, kame oudo tie kede lobo arabo ode moro, bin ecato di eko tero sente kame eudo,

³⁵ di eko keto i cing joor. Bin sente nogo kopopoko ne ngat acelacel di lubo kony kame mitere ne.

³⁶ En komio Yosepu kame oudo joor ocalo ne nyinge be Baranaba (kame dwong mere be ngasup cuny jo), kame oudo obedo Ngalebi, anywali me piny me Sipuro,

³⁷ oko eda cato poto mere di eko tero sente kame eudo but joor.

Tice 5

Anania kede Sapira

¹ Do icuo moro kame nyinge Anania kede dako mere kame nyinge Sapira, oko gida cato gikame mako gi,

² do en eko nywako tam kede dako mere di eko poko sente mogo kame oudo ecato kede lobo nono, di do eko kelo dul mere kenekene, eko mino i cing joor.

³ Do Petero oko penye be, “Anania, pinyo komio iyei ne Sitani oduonyo i cunyi pi mini ngalo Tipo Kacil, di iko kano dul me sente kame in oudo icato kede lobo?”

⁴ Di oudo pwodi likame icate, mam oudo en meri? Doko akadi di oudo itieko cate da, sente mere mam oudo tie i akarunikin ni? Kara nyo do ber komio cunyi oyei timo gikame cal kamano? Aso neni, in likame ingalo dano do ingalo Rubanga.”



⁵Kakame Anania owinyo kede kope go, eko poto piny di eko to. Jo ace kame bin owinyo kop nono oko bedo kede lworu atek.

⁶Awobe oko bino, kiko bono kome di kiko tere ot yike.

⁷Di oudo pwodi okato bala isawan adek kenekene, dako mere da oko bino, en oudo likame engeo gikame otimere.

⁸Petero oko waco ne be, “Waca ka erume sente kame icatunu kede poto ine.” Sapira oko dwoko be, “Ebo, erume mere inonono.”

⁹Di Petero oko penye be, “Benyo benyo komio wun iyeunu ngalo Tipo ka Rwot? Aso neni, tien jo koteru cwari ot yiko igo tie i ekeko, nan ida kiyaro teri.”

¹⁰Cucuto nono di Sapira poto piny i tien Petero, di eko to. Kakame awobe owok kede i yi ot kiko ude etieko to, di kiko tere kioto yike i nget cware.

¹¹Jokirisito dedede kede jo kowinyo kope nogi oko bedo kede lworu adwong.

Joor Otimo Giaura kede gi me Isuur

¹²Joor oudo otimo gianena kede gi me isuur atot i dier jo. Gin dedede oudo kitie karacel i Balasa ka Sulumani, kame kogero wie.

¹³Likame tie ngatamoro ace kalikame oyei Kirisito, kame oko kanyakino bino bedo kede gi, do jo oko mino gi wor adwong.

¹⁴Di jo atot, cuo kede mon koyei Yesu oko meede ameda bino but Rwot kalamo lem sek.

¹⁵Man oko mino jo oko donyo tingo jotuwo kame oudo tie i miere di kikelo pielo i lak yongayo, i pualisin kede i pare tetekeny kame Petero tie beo, amotoko tipo mere bei i kom jo mogo kikom gi.

¹⁶Jo oko yai ki bomban koluko Yerusalem kiko cokere, di kikelo jotuwo kede jo kame tipo areco oudo omako, di gin dedede kiko cango.

Kotidilo Joor

¹⁷Ngatel Josaseredoti oko yai malo karacel kede jo dedede kame oudo tie kede, kame oudo obedo ekodet me Isadukayon.

¹⁸Pi nyeko omio kiko mako joor di kiko rwako gi i otkol kame bin kotweo iye jo dedede.

¹⁹Do iwor nono malaika ka Rwot oko yabo ekeko me otkol, di eko woto gi ooko, eko waco ne gi be,

²⁰” Otunu icungunu i tempulo di ikounu tatamo ne jo kope dedede me Kuo noni.”

²¹Kakame kiwinyo kede kop noni, gin kiko ot i tempulo odiko di kiko pwony. Kikano Ngatel Josaseredoti karacel kede jo kame en oudo etie kede oko bino, kiko lwongo kansulo karacel kede joadongo, di kiko cwano kop i otkol pi kelo gi i nyim kansulo.



- 22**Do kakame jo kame lo mabus otuno kede, kiko udo joor li i otkol, di do kiko dwoko ne jodongo gi kop i kansulo be,
- 23**” Wan otuno kuno oko udo ikekon me otkol ogoore dedede kiber di isirikalen jodar tie cungo kanono, do kakame oyabo kede ekeko, likame oko udo ngatamoro i ot.”
- 24**Kakame ngadwong me isirikalen kame bin daro tempulo, karacel kede jodongo me josaseredoti owinyo kede kope go, kom gi oko to kiko donyo parere pi gikame do oyaro timere.
- 25**Ngatamoro oko bino di oko waco ne gi be, “Jo kame wun oudo itweunu i otkol ka tie cungo i tempulo di kipwonyo jo.”
- 26**Di do ngadwong me isirikalen me tempulo karacel kede jodongo icegun oko ot, di kiko kelo gi, do likame kede gero, pien oudo kitie kede lworu be jo bino didipo gi kede kide.
- 27**Kakame kikelo kede joor nogo, kiko mino gi kicungo i nyim kansulo. Ngatel Josaseredoti oko cako bunano gi di ewaco be,
- 28** “Wan oudo ociko wu kitek be miero kur ipwonyunu jo i nying Yesu, do di nan bobo wun itiekunu sarakino pwony wu i Yerusalem dedede. Wun itienu mito be remo me icuo ni dwog i wi wan.”
- 29**Petero karacel kede joor icegun oko dwoko be, “Wan miero olub gikame Rubanga mito ne wa timo, do weko me ka dano.
- 30**Pien Rubanga ka joakwari wa oyaruno Yesu kame wun bin inekunu di ilierenu i kom yat.
- 31**Rubanga oko tinge malo oko kete i bade tetu cam, bala Ngapug, kede Ngalak, tetekeny idwe me Isirael ud winyo me swilaro kede kiud isasir ki dub gi.
- 32**Wan karacel kede Tipo Kacil, kame Rubanga omio but jo kame wore, obedo ijurak me kope nogi.”
- 33**Kakame jo kame bin tie i kansulo owinyo kede kope go, cuny gi oko doko kec di kiko mito neko gi.
- 34**Do Ngaparisayo acel kame oudo tie i kansulo, kame nyinge Gamaliel, ngapwony me Iswil, kame jo dedede oudo woro, oko yai malo di eko mino dwan be ber kong ter joor nogo ooko pi esawa moro atitidi.
- 35**Di en eko waco ne gi be, “Jo na me Isirael, gwokerenu i kom gikame itienu mito timo ne cuo gi.
- 36**Pien icuo kame nyinge Teyuda bin owokun i kare okato di emire bala dano moro kame pire dwong, di cuo kame romo bala tol ongwon oko donyo bute; do bin oko neke di jo kame lube dedede oko sarakin, kop gi nono oko jik.



³⁷Ingei mano, icuo acel Ngagalilaya kame nyinge Yuda oko eda wokun i kare me maro jo, di eko loko tam me jo atot oko donyo lube; do eda eko to. Jo kame bin lube da oko sarakin.

³⁸Aso, i kom kop me tin noni da, ango awaco ne wu be, wekunu jogi, kur itimunu ne gi gimoro; pien ka tim gi no obedo iik ka dano, ebino poto;

³⁹do ka ebedo iik ka Rubanga, wun likame iyarunu twero lono gi. Doko ibinunu udo be, cengemogo itienyu yi kede Rubanga!”

⁴⁰Kansulo oko yei lubo gikame Gamaliel owaco. Di do kiko lwongo joor i ot, kiko mino kodao gi, di kiko ciko gi be miero kur doko kitatamo ne jo nying Yesu, di do kiko weko gi kioto.

⁴¹Kikano di do joor oko yai ki nyim kansulo di kilelo pien kotero gin bala jo kame poore neno can pi nying Yesu.

⁴²Di do gin kiko donyo pwony ceng dedede i tempulo kede i miere, di kituco kop i kom Yesu be en kame ebedo Kirisito.

Tice 6

Koyero Jo Kanyaare pi Konyo Joor

¹I kare nono di bin wel me jo kame lubo Yesu oudo tie meede, Iyudayan kame yamo leb Gurik oko cako ingungur i kom Iburanian, pien oudo likame koparo pi apuserun gin ceng dedede kame kotie poko jame.

²Joor tomon kiwie are oko lwongo ekodet me jo kame lubo Yesu dedede karacel, di kiko waco ne gi be, “Likame poore ne wan weko tuco kop ka Rubanga, di do oko donyo i tic me poko jame.

³Pi mano, imiegu i Kirisito, wun yerunu kikom wu cuo kanyaare kame tie kede nying aber, kame opong kede Tipo Kacil kede rieko, kame wan otwero mino timo tic noni.

⁴Do wan obino jalere i ilega kede tuco kop ka Rwot.”

⁵Gikame joor owaco oko yomo cuny jo dedede, di do gin kiko yero Sitepano, icuo kame oudo tie kede yei atek, doko di epong kede Tipo Kacil, kede Pilipo, Porukulo, Nikanori, Timoni, Parmena, Nikolau, ngat kame oudo obedo dano me Antiokia do en eko lokere i edini me Iyudayan.

⁶Di do kiko keto jo nogi i nyim joor, di joor oko lego di kiketo cing gi i wi gi.

⁷Kop ka Rubanga oko nyai, di wel me jo kame lubo Yesu oko meede kitek i Yerusalem, di josaserdoti atot oko donyo lubo kop me yei.

Komako Sitepano

⁸Di do Sitepano oko timo gianena kede gi me isuur atot i dier jo, pien oudo epong kede kisa kede twer ka Rubanga.



⁹Jo mogo kame bin owok ki sinagoga me Jo Kogonyere (bala kame oudo kolwonge kede), kede jo me Sirene, kede jo me Alekesanda, kede mogo kame oudo owok ki Kilikia kede Esia, oko yai di kiko cako piem kede Sitepano.

¹⁰Do pi Tipo Kacil kede rieke kame oudo Sitepano tie kede, oko mino gin likame kiko karuno piem kede en.

¹¹Di do gin kiko supo jo mogo i mung pi pido be, “Wan owinyo di en etie yamo kop me acae i kom Musa kede Rubanga.”

¹²Manono oko twaruno jo kede joadongo me piny karacel kede jopwony me Iswil. Gin kiko mako Sitepano di kiko tere i nyim kansulo.

¹³Kiko keto ijurak me abe kame waco be, “Icuo ni likame weko yamo kope areco i kom tempulo kede i kom Iswilia ka Musa;

¹⁴pien wan owinyo di ewaco be Yesu noni me Nasaret oyaro tuturo tempulo, di eko loko itok kame bin Musa omio wa.”

¹⁵Jo kame bin tie i kansulo dedede oko ciko wang gi i kom Sitepano, di gin dedede kiko neno nyime di cal bala me malaika.

Tice 7

Kop kame Sitepano Owaco i nyim Kansulo

¹Ngatel Josaseredoti oko penyo Sitepano be, “Kope go tie me ateni?”

² Sitepano oko dwoko be, “Imiegu kede joapapi na, winyunu gikame ayaro waco; Rubanga me deyo bin oneeno but kwaru wa Aburaam i kare no di en oudo etie i piny me Mesopotamia, di pwodi likame edak bedo i piny me Aran,

³di eko waco ne be, ‘Yai tenge ki pinyu kede kibus joawade ni, iko ot i piny kame ango abino nyuto ni.’

⁴ Kikano Aburaam oko yai ki piny me jo Kaludaya, di eko ot bedo i piny me Aran. Ingei to ka papa mere, Rubanga oko kwanye ki kuno oko kele i piny kame nan wun ibedunu iye noni.

⁵ Do Rubanga likame oko mine gimoro kiye pi doko mere, akadi kakame rom kede boro me tien dano, do en ecikere pi mine piny nono doko mere, en karacel kede ikwae mege, bed bala oudo eli kede atin.

⁶Rubanga oko waco ne be ikwae mege bino bedo jokumbor i piny me jo apat, kame bino mino gi kidoko ipasoi di kotisilaro gi ki kuno pi mwakini tol ongwon.

⁷ Do Rubanga oko waco be, ‘Ango abino ngolo kop ne ateker kame gin kitio ne, i cen mere di gin kiko bino wok kiko wora ki kane.’

⁸ Di do Rubanga oko timo kede Aburaam isikan kame akepo obedo gianena mere. Kikano Aburaam oko nywalo Isaka di eko kepe i ceng me kanyauni, Isaka oko nywalo Yakobo, di Yakobo oko nywalo joakwari wa tomon kiwie are.



- 9 “Nyeko bin oko mako joakwari wa kede omin gi Yosepu, di kiko cate i piny me Misiri, do Rubanga oudo tie kede,
- 10 di Rubanga oko wote ki peko mege dedede. Di Rubanga oko mine winyo kede rieko i nyim Parao, abaka me Misiri. Parao bin oko mino Yosepu bedo ngapug me Misiri dedede, kede bedo ngat kame lo jame mege.
- 11 Kec atek bin oko poto i piny me Misiri dedede karacel kede i piny me Kanan da, kame oko kelo can adwong, oko mino joakwari wa obedo li kede cam.
- 12 Do i kare kame bin Yakobo owinyo kede be cam oudo tie Misiri, en eko cwano joakwari wa pi ot kuno tien me agege.
- 13 Kakame kioto kede kuno tien me are, Yosepu oko nyutere but imiegu mege di Parao oko ngeno joe ka Yosepu.
- 14 Di do Yosepu oko lwongo Papa mere Yakobo kede joawade mege dedede pi bino bute, gin jo ot kanyaare kiwie kany.
- 15 Yakobo oko yai eoto i piny me Misiri. En eko to kuno karacel kede joakwari wa,
- 16 di oko dwoko kom gi Sekem, oko yiko gi i ates kame bin Aburaam owilo kede sente kibun awobe ka Kamor i Sekem.
- 17 “Do kakame bin kare me cobere me cikere kame Rubanga oudo omio Aburaam oyapuno tuno kede, wel me jo oko nyai i piny me Misiri,
- 18 tuno kede i kare kame abaka kalikame oudo ngeo Yosepu ogeo kede pug.
- 19 En eko ngolo rieko ne ateker wa, di en eko dino joakwari wa uco imukerun gi, tetekeny kitoi.
- 20 Kare nono en kame oudo konywalo iye Musa; en oudo atin acil i nyim Rubanga. En bin oko pite i ot ka papa mere pi dwete adek,
- 21 do i kare kame kouce kede, nyar ka Parao oko tere, di eko donyo gwoke bala wode kikokome.
- 22 Di oko pwonyo Musa i rieko dedede me jo me Misiri, di eko doko dano kame tek i yamo kop kede i tice mege.
- 23 “Kakame mwakini mege me dongo oromo kede ot ongwon, cunye oko paro pi ot welao imiegu mege, idwe me Isirael.
- 24 Di bin eudo di dano me Misiri tie timo raco ne dano mere acel, en eko konye di eko nyango kede juto dano me Misiri nono paka to.
- 25 Musa oudo tamo be imiegu mege oudo niang be Rubanga oyaro tic kede en pi lako gi, do kara gin likame oudo kiniang.
- 26 Oru mere en eko ngoole i kom gi, di eko udo jo are di tie lok. En eko mito ribo cuny gi di ewaco ne gi be, ‘Jogi, wun itienu imiegu, pinyo bo komio itienu lok kenu kenu?’



- 27** Do ngat nono kame oudo tie timo ne ngawote raco oko remoro en tenge di ewaco ne be, ‘Ngai koketi bedo ngapug kede ngangolkop wa?’
- 28** Mam imito neka bala kite kame nyoro ineko kede dano me Misiri?’
- 29** Kop kame edwoko nono oko mino Musa oringo eoto gwokere i piny me Midian, kakame en eko nywalo kiye awobe are.
- 30** ‘Ingei Musa bedo i piny me Midian pi mwakini ot ongwon, malaika oko neeno bute i tim i moru me Sinai, i leb mac kame oudo tie liel i amwonin.
- 31** Kakame Musa oneno kede gino, en eko uro di eko nyiko kuno pi mito neno kiber; do en eko winyo dwan Rwot di waco be,
- 32**’ Ango en Rubanga ka joakwari ni, Rubanga ka Aburaam, me ka Isaka kede me ka Yakobo.’ Kom Musa oko miel di likame doko eko kanyakino neno kuno.
- 33** Di Rwot oko waco ne be, ‘Gonyi amuka ki tieni tenge, pien kakame in itie cungo iye noni en kabedo kacil.
- 34** Ango atieko neno epone kame kotie tisilaro kede jo na i Misiri, doko atieko winyo cur gi. Ango nan atieko bino pi lako gi. Nan do bia, amito cwani Misiri.’
- 35** ‘Musa noni, ngat kame gin bin kidagi, di kiwaco be, ‘Ngai koketi bedo ngapug kede ngangolkop wa?’ en nono kame Rubanga oko cwano pi bedo ngapug kede pi lako gi pi twer me malaika kame bin oneeno bute i amwonin.
- 36** En etelo gi woto gi di eko kelo gi di etimo gi me isuur kede gianena i piny me Misiri, kede i Nam Akwar, kede i tim pi mwakini ot ongwon.
- 37** Musa nono en kame bin owaco ne jo me Isirael be, ‘Rubanga bino cwano ne wu enabi kikom imiegu wu, bala kite kame ecwao angokede.’
- 38** En noni kame bin etie kede jo me Isirael kocokere i tim; en oudo etie kuno kede joakwari wa karacel kede malaika koyamo kede en i moru me Sinai, di en eko gamo kop ka Rubanga ekelo ne wa.
- 39** Joakwari wa oko dagi winyo kop mere; kiweke di cuny gi oko donyo paro Misiri,
- 40** di kiwaco ne Aroni be, ‘In tim ne wa cal mogo bed rubangan, kame bino telo ne wa yongayo; pien wan likame ongeogikame otieko timere ne Musa, ngat kame bin okwanyo wa ki piny me Misiri.’
- 41** Di kiko cweno gimoro kame tie i cal me roya, kiko donyo yalo cal jwogi nono di kilelo pi tic me cing gi.
- 42** Do Rubanga bin oko lokere, di en eko jalo gi woro acerin me malo, bala kite kame kowandiko kede i itabu me inabin be, ‘ Wun jo me Isirael, likame angokede en kame bin ingolonanu leini di ikounu mina giayala pi mwakini ot ongwon i tim.



⁴³Riki wun iterunu kima me eema ka rubanga kame nyinge Molok, kede acer me rubanga wu kame nyinge Repan, gin oudo kibedo cal kame wun oudo itimunu me awora. Pi mano, ango abino mino kotero wu kakabor kalamo Babilon.’

⁴⁴ “Joakwari wa bin tie kede kima me eema i tim, kame nyuto tie ka Rubanga. Oudo bin kotime iepone kame Rubanga ngat koyamo kede Musa oudo ociko kede be time.

⁴⁵ I cen mere joakwari wa da bin oko game kibus papi gi, di gin karacel kede Yosua kiko donyo kede i piny kame Rubanga oriamo kiye atekerin apat i wang joakwari wa. Man otimere tuno i kare ka Daudi,

⁴⁶ ngat kame bin oko udo winyo kibus Rubanga, di eko penyo akarunikin pi gero ot ne Rubanga ka Yakobo.

⁴⁷ Do Sulumani en kame bin oko gero ne Rubanga ot.

⁴⁸” Aso di Ngamalo Twal likame bedo i ude kame kogero kede cing, bala kite kame bin enabi owaco kede be,

⁴⁹ ‘Malo en obedo kapug nango, doko lobo en abanya me teno tiena. Rwot owaco be, nan do ot acal nadi en kame iyarunu gero nango? Tuai en kame kawei nango?’

⁵⁰Mam cinga en kotimo gigi dedede?’

⁵¹ “Wun jo kame wi wu tek, jo kame cunyu kwia Rubanga, doko yitu likame winyo kop mere, wun nakanaka ijemunu ne Tipo Kacil. Itienu timo bala kite kame riki papi wu otimo kede.

⁵²Enabi mene kame bin joakwari wu likame otidilo? Gin kineko jo kame bin ogeo tuco sek bino me Ngat Kopoore, kame wun irupaunu di ikounu neko.

⁵³Wun nogi en kame bin igamunu Iswil kame malaika okelo di likame ikounu lube.”

To ka Sitepano

⁵⁴Kakame jo me kansulo owinyo kede yamo ka Sitepano, kiko doko ger di kom gi miel i kome.

⁵⁵Do Sitepano oudo opong kede Tipo Kacil, di eko ngoloro malo di eko neno deyo ka Rubanga, di Yesu tie cungo iye i bad tetu cam ka Rubanga.

⁵⁶En eko waco be, “Nenunu, ango atie neno malo di oyabere, di Wot ka dano tie cungo i bad tetu cam ka Rubanga.”

⁵⁷Do gin kiko donyo ilelem di kiculo yit gi, kiko onyaro i kome.

⁵⁸Di do kiko tere ooko me bomba, kiko donyo didipo en kede kide, di ijurak oko gonyo igoen gi kiketo katien awobi moro kame nyinge Saulo.

⁵⁹Kakame oudo kitie didipo en kede, Sitepano oko ilega be, “Rwot Yesu, gam tipo na.”



⁶⁰Di do eko riondiko piny, eko yamo kede dwan amalo be, “Rwot, kur imar dub noni i wi gi.” Ingei waco kamano di do eko to.

Tice 8

¹Saulo da oudo oyei be nek Sitepano.

Saulo Otidilo Ekodet me Jokirisito

Ceng nono oko cako tidilo jo koyei Kirisito i Yerusalem, di gin kiko sarakin i adulion dedede me Yudea kede Samaria, joor kenekene en oko dong.

²Jo mogo kame bin keto cuny gi woro Rubanga en kame oko yiko Sitepano, di kiko koke kitek.

³Do Saulo oudo tie tisilaro jo koyei Kirisito. En oudo ebedo donyo iot acelacel di epéo cuo kede mon kame bin oyei Yesu ooko, di emio korwako gi i otkol.

Pilipo Otucu Ejiri i Samaria

⁴Di do jo koyei Kirisito, gin jo kame bin osarakin, oko donyo ot di kipwonyo kop ka Rubanga.

⁵Pilipo bin oko ot i bomba me Samaria di eko tuco ne gi kop i kom Kirisito.

⁶Ekodet oko keto tam gi i kom kop kame Pilipo owaco, pien oudo kiwinyo doko kineno gianena mogo kame en oudo etimo.

⁷Pien tipo areco bin oko wok tenge kikom jo atot di kidwilao. Jo atot da kame bin tuwo oneko adulion me kom gi kede jo kongwalo oko cango.

⁸Manoni oko mino jo kame bin tie i bomba me Samaria oko bedo kede kilel adwong.

⁹Do oudo tie icuo moro kame nyinge Simoni, kame oudo ber ogeo bedo i bomba nono di etimo tangu me jwok. En eko mino Josamaria oure. En oudo ewaco ne gi be en dano moro kame pire tek.

¹⁰Jo dedede cako kibus jo me ruom apiny tuno kede but jo me ruom amalo, oko keto tam gi i yamo mere, di kiwaco be, “Icuo ni en twer ka Rubanga, kame kolwongo be Twer Adwong.”

¹¹Di gin kiko keto tam gi i kome, pien pi kare alac gin kibedo uro tangu mere me jwok.

¹²Do kakame kiwinyo kede kop aber me Ajakanut ka Rubanga kede nying Kirisito kame Pilipo oudo tatamo, gin kiko yei di oko batiso gi, cuo karacel kede mon.

¹³Kiton Simoni da kikome oko yei Yesu Kirisito; ingei batiso en, en eko donyo upere kede Pilipo. Kakame eneno kede gianena kede giaura adongodongo kame Pilipo otimo, Simoni oko uro.

¹⁴Kakame joor kame oudo tie Yerusalem owinyo kede be Josamaria otieko gamo kop ka Rubanga, gin kiko cwano Petero kede Yokana but gi.



- ¹⁵Petero gini oko ot di kiko lego ne gi tetekeny kiud Tipo Kacil,
- ¹⁶pien cako lem likame pwodi oudo ebino i kom ngatamoro kikom gi, do kenekene oudo kobatiso gi i nying Rwot Yesu.
- ¹⁷Petero kede Yokana oko keto cing gi i wi gi, di do kiko pong kede Tipo Kacil.
- ¹⁸Kakame Simoni oneno kede be Tipo Kacil obino i kom joka, pien joor oudo oketo cing gi i wi gi, en eko kwanyo sente ne Petero kede Yokana,
- ¹⁹di ewaco be, “Okwe miunu ada twer noni, tetekeny ngat acelacel kame ada aketo cinga i wie, eud Tipo Kacil.”
- ²⁰Do Petero oko waco ne be, “Sente ni rweny karacel kede kuo ni, pien in iparo be giamia ka Rubanga kowilo awila kede sente!
- ²¹In ili kede gikame ipoore timo arabo dul kame kopoko ni i tic wan noni, pien cunyi likame opoore i nyim Rubanga.
- ²²Pi mano, swilaro ki gikarac no, di iko kwano Rubanga wek amoto esasiro in ki tam kame tie i cunyi.
- ²³Pien ango nan atieko neno be in itie kede raco me ingobel, doko itieko doko epasoit me dub.”
- ²⁴Di do Simoni oko dwoko be, “Legunu Rwot pira, tetekeny kur gimoro kikom kope kame wun iwacunu go timere i koma.”
- ²⁵Ingei mino ijura kede pwonyo kop ka Rwot, Petero kede Yokana oko dok Yerusalem, di kiko donyo tucó ejiri i calere atot me Samaria.

Pilipo kede Ngatic Adwong me Abisinia

- ²⁶Malaika ka Rwot oko waco ne Pilipo be, “Yai di iko ot tetu piny, i yongayo kame yai ki Yerusalem ot Gasa.” Yongayo noni oudo beo i tim.
- ²⁷Pilipo oko yai di eko ot. Kikano, oudo tie ebwocit moro me Abisinia, kame bin obedo ngatic adwong kame lo kakame kokano iye lim ka Kandese.
- ²⁸En oudo eoto Yerusalem pi woro Rubanga, nan oudo do etie dok di ebedo i wi cabala mere di esomo itabu ka enabi Isaya.
- ²⁹Tipo Kacil oko waco ne Pilipo be, “Oti inok nget cabala no.”
- ³⁰Pilipo oko ringo bute, en eko winyo di esomo itabu ka enabi Isaya. Pilipo oko penye be, “In iniang gikame itie somo no?”
- ³¹En eko dwoko ne Pilipo be, “Kara atwero niang benyo ka ngatamoro likame okonya?” En eko lwongo Pilipo pi yito malo bedo kede en i wi cabala.
- ³²Adul me iwandik kacil kame en oudo etie somo noca somere be, “Bala oromo kame kotie tero ot ngolo, bala atin oromo kame ling alinga kame kotie nyaro yer mere, en bin likame eyabo doge akadi acel.



³³En bin kodwoko dwongo mere piny, di oko dagi ngolo ne kop me ateni. Ngai kame twero mino ngec i kom ikwae mege? Pien kotieko kwanyo kuo mere ki wi lobo.”

³⁴Di do ebwocit nono oko penyo Pilipo be, “Waca, enabi ber tie yamo kope go i kom ngai, i kom en, arabo i kom ngat apat?”

³⁵Pilipo oko cako yamo, di eko tatamo ne kop Aber i kom Yesu, di kong egeo kede iwandik kacil noni.

³⁶Di bin gin kitie pwodi ot, kiko tuno i pii moro, di ebwocit nono oko waco ne Pilipo be, “Neningo, pii ine kan, nyo kara do kame genga udo batisimu?”

³⁷(Pilipo oko waco ne be, “Man gire twerere, ka in iyei Yesu kede cunyi dedede.” Icuo nono oko dwoko ne be, “Ango atieko yei be Yesu Kirisito en Wot ka Rubanga.”)

³⁸Di ebwocit nono oko waco be mi cabala ber cungi. En karacel kede Pilipo kiko ot donyo i yi pii, di Pilipo oko batiso en.

³⁹Kakame do kiwok kede ki pii, Tipo ka Rwot oko rwenyo kede Pilipo, di ebwocit nono likame bobo oko nene, di eko meede kede ot mere di elelo.

⁴⁰Do Pilipo oko udo be etieko tuno Asota. En eko bebeo i bomban dedede di etuco ejiri tuno en donyo Sisiria.

Tice 9

Lokere ka Saulo but Yesu

(Tice 22.6-16; 26.12-18)

¹Do kakame Saulo oudo pwodi tie meede wowono kede neko jo kame lubo Rwot, en eko ot but Ngatel Josaseredoti,

²di eko penye baluwan me ot nyutere i sinagogan kame tie Damasiko, tetekeny kame eudo jo kame lubo Yongayo ka Rwot, cuo arabo mon, wek emak gi di eko kelo gi Yerusalem.

³Di do bin Saulo onoko bomba me Damasiko, cucuto di asara kame rieny yai ki malo oko care.

⁴En eko poto piny di eko winyo dwan kame waco ne be, “Saulo, Saulo, pinyo komio in itie tidilo ango?”

⁵Saulo oko penye be, “In ngai, Rwot?” Dwan nono oko dwoko be, “Ango en Yesu kame in itie tidilo;

⁶do yai malo di iko ot donyo i bomba, oko bino yamo ni gikame ipoore timo.”

⁷Jo kame en bin eupere kede oko cungo di likame kitwero yamo, pien oudo kiwinyo dwan, do likame kineno ngatamoro.

⁸Saulo oko yai ki piny, do kakame eyabo kede wange, likame eko sobolo neno gimoro. Di do gin kiko mako cinge, kiko pene kitere Damasiko.



⁹En eko tieko ceng adek di likame eneno piny, doko da di likame ecamo akadi mato gimoro.

¹⁰Ngasiao moro oudo tie Damasiko, kame nyinge Anania. Rwot oko lwonge i gianyuta be, “Anania.” Di en eko dwoko be, “Rwot, ango ine.”

¹¹Rwot oko waco ne be, “Yai iko ot i gudo kame kolwongo be, Gudo Koriere, di iko penyo ki ot me icuo kame nyinge Yuda kakame icuo moro kame nyinge Saulo me Taruso tie iye; pien neningo, en etie ilega,

¹²doko en etieko neno dano moro kame nyinge Anania di ebino eko keto cinge i wie, tetekeny wange nen bobo.”

¹³Do Anania oko dwoko ne be, “Rwot, ango atieko winyo kop i kom icuo no kibun jo atot, twon raco kame en etieko timo ne jo ni i Yerusalem.

¹⁴Doko ki kane da, en etieko udo twer kibut jodongo me josaseredoti pi tweno jo dedede kame lwongo nyingi.”

¹⁵Do Rwot oko waco ne be, “In oti, piento en etie ngatic nango kame ango ayero pi mino nyinga ngere but jo kalikame Iyudayan, kede abakai, karacel kede idwe me Isirael.

¹⁶Ango ayaro nyuto ne epone kame miero enen kede can pi nyinga.”

¹⁷Anania di do oko yai eko ot edonyo i ot nono. En eko keto cinge i wi Saulo di ewaco ne be, “Omina Saulo, Rwot Yesu ngat kame bin oneeno buti i yongayo di oudo itie bino Damasiko kane, oora buti tetekeny wangi nen piny bobo di iko pong kede Tipo Kacil.”

¹⁸Cucuto nono di do gimoro kame cal kede abokoya me aporogo oko poto ki wange di wange oko cako neno piny bobo, di do en eko yai oko batiso en;

¹⁹eko cam di eko doko tek.

Saulo Otuco Ejiri i Damasiko

Saulo oko tieko ceng atot Damasiko di ebedo kede josiao.

²⁰Cucuto nono en eko ot cako tatamo nying Kirisito i sinagogan di ewaco be, “En nono kame ebedo Wot ka Rubanga.”

²¹Jo dedede kame bin owinyo kop mere oko uro di kiwaco be, “Mam icuo noni en kame oudo neko jo kame lwongo nying Yesu i Yerusalem? Kop acel noni en komio ebino kan da, pi mako jo di etero gi i nyim jodongo me josaseredoti di etweo gi.”

²²Do Saulo oko meede ameda doko tek, di eko cungo wi Iyudayan kame oudo bedo Damasiko, di enyuto ne gi be Yesu en Kirisito.

²³Ingei ceng atot, Iyudayan oko iiko tam me neke,

²⁴do Saulo oko ngeno tam gi nono. Gin oudo kidaro dog erute iwor kede iceng pi mito neke,



²⁵do iwor acel josiao mege oko tere di kiko kete i yi ebukit, kiko yololo en piny ki wi apama.

Saulo i Yerusalem

²⁶Kakame bin Saulo otuno kede Yerusalem, en eko tamo ribere kede josiao, do gin dedede kiko bedo kede lworu i kome, pien gin oudo likame kiyei be ebedo ngasiao.

²⁷Do Baranaba oko kwanye, di eko tere but joor, di en eko tatamo ne gi epone kame Saulo oneno kede Rwot i yongayo, kede ekite kame Rwot oko yamo kede en. Doko da en eko waco ne gi epone kame Saulo otuco kede ejiri i nying Yesu i Damasiko abongo lworu.

²⁸Di do Saulo oko bedo kede gi, di elologo Yerusalem dedede,

²⁹di etuco ejiri i nying Rwot abongo lworu. En bin eko donyo yamo di epiemo kede Iyudayan kame bin yamo leb Gurik, do gin oudo kitie mito neke.

³⁰Do kakame jo koyei Kirisito oko ngeno kede tam gi nono, gin kiko tere Sisiria di kiko cwane eoto Taruso.

³¹Pi mano, ekodet me jokirisito i Yudea, i Galilaya kede i Samaria dedede oko bedo kede mulem, di kiko doko tek. Doko kiko bedo kede wor but Rwot di kiko meede nyai pi kony me Tipo Kacil.

Petero Ooto Luda kede Jopa

³²I kare kame Petero oudo tie ririmo kede adulion dedede kame jo koyei Kirisito oudo tie iye, en eko ot but jokacil kame oudo tie Luda.

³³En eko udo icuo moro kame nyinge Aenia kuno, kame oudo tuwo oneko kome di likame etwero yai ki apien pi mwakini kanyauni.

³⁴Di Petero oko waco ne be, “Aenia, Yesu Kirisito ocangi, aso yai malo ipet kabuto ni.” Cucuto nono di en eko yai malo.

³⁵Jo dedede me Luda kede Saron oko nene, di kiko lokere but Rwot.

³⁶Oudo ngasiao moro tie Jopa, kame nyinge Tabisa, kame kolwongo i leb Gurik be Dorika. En oudo etimo tice kabeco doko di ekonyo jo.

³⁷I kare nono tuwo oko make di eko to. Jo oko lwoko kome di kiko piele i agola me malo.

³⁸Kite kame Luda oudo iyapiyapi kede Jopa, josiao oko winyo be Petero oudo tie kuno, di gin kiko cwano jo are bute pi ngangao en be, “Okwe bia but wa abongo gal.”

³⁹Petero oko yai, en eko upere kede gi. Kakame etuno kede, kiko tere i agola me malo nono. Apuserun lung oko cungo i ngete di kikok, di kinyuto ne ikotin kame Dorika oudo lem cweo di pwodi oudo etie kede gi di ekuo.



⁴⁰Do Petero oko cwano gin dedede ooko, di en eko riondiko piny, di eko lego. Ingei ilega, en eko lokere kakame kom ngat oto oudo tie iye, di eko waco be, “Tabisa, yai malo.” Tabisa oko yabo wange. Kakame eneno kede Petero, en eko yai di eko bedo.

⁴¹Petero oko cwano ne cinge, di eko kiarao en malo. Di Petero oko lwongo jokacil karacel kede apuserun ka, di eko mino gi Tabisa di kuo.

⁴²Jo kame bin tie Jopa dedede oko winyo kop i kom gikame otimere, di jo atot oko yei Rwot.

⁴³Di Petero oko dong bedo Jopa pi ceng mogo atotot, di ebedo i paco me icuo kame nyinge Simoni, nganyong launi.

Tice 10

Petero kede Kolonerio

¹Oudo icuo moro tie Sisiria kame nyinge Kolonerio, en oudo ebedo ngadwong me ekodet me isirikalen me Itali.

²En oudo ebedo icuo kame keto cunye woro Rubanga kede jo me i ode dedede. Doko en oudo emio jo kony kede cunye lung di elego Rubanga nakanaka.

³Ceng moro acel iesawa kanyangon me otieno, en eko neno i gianyuta di malaika ka Rubanga bino bute di oko lwonge be, “Kolonerio.”

⁴En eko ngino malaika nono kede lworu, di eko waco be, “Benyo bo Rwot?” Malaika nono oko waco ne be, “Ilega kede mic nin me konyo jocan otieko tuno but Rubanga, omio en eyutuno in.

⁵Nan do cwai jo mogo Jopa pi ot omo Simoni, kame kolwongo be Petero.

⁶En etie bedo paco ka Simoni nganyong launi, kame paco mere tie i dog nam.”

⁷Kakame malaika kame bin yamo kede nono oyai kede kibute, Kolonerio oko lwongo jotie mege are, kede sirikale mere acel kame genere kikom isirikalen mege kame dare.

⁸En eko tatamo ne gi gikame malaika nono owaco ne dedede, di eko cwano gi Jopa.

⁹Oru mere di pwodi kitie i yongayo, di do kinoko bomba me Jopa, Petero oko yai tetu esawa kanyape, di eko yito malo i wi ot pi lego.

¹⁰Kec bin oko neke di eko mito gimoro me acama; do di pwodi oudo kotie iiko ne cam, en eko neno gianyuta,

¹¹eneno malo di oyabere, di gimoro tie bino piny kame cal bala esuka alac kame komako lake ongwon di kotie yololo en piny.

¹²Egere me leini dedede, kede jame kame liao alia, kede winyo kame por oudo tie i esuka nono.

¹³Dwan oko winyere di waco be, “Petero, yai, neki di iko camo.”



- 14**Do Petero oko dwoko be, “Rwot, likame kamano; pien cako anga pwodi likame acamo gimoro me kwer arabo gikame omunaun.”
- 15**Petero bobo oko winyo dwan nono tien me are di ewaco ne be, “Gikame Rubanga otieko lonyo, kur bobo in ilwongo be gi me kwer.”
- 16**Man otimere tien adek, cucuto nono di oko tingo esuka nono kotero malo.
- 17**Di pwodi Petero oudo wie ocungo pi dwong kop me gianyuta koneeno ne, cuo kame bin Kolonerio ocwao nogo oudo tie cungo i dog erute, pien oudo kitieko pepenyo tuai kame ot ka Simoni tie iye.
- 18**Gin kiko lwongere di kipenyo ka Simoni kame kolwongo be Petero oudo bedo kanono.
- 19**Di pwodi Petero oudo tie mito ngeno dwong me gianyuta nono, Tipo ka Rubanga oko waco ne be, “Neningo, cuo adek tie moni.
- 20**Yai iwok piny di iko upere kede gi, kur idagi, pien anga en kame aoro gi.”
- 21**Petero oko wok piny but jo nogo, di en eko waco ne gi be, “Anga inononi kame wun itienyo mono. Kop nyo kokelo wu kan?”
- 22**Gin kiko dwoko ne be, “Kolonerio en kame ooro wa; malaika kacil oudo owaco ne be ecwai jo buti pi lwongi ioti i ode, me wek ewiny kop kame iyaro waco ne. En ebeto ngadwong me isirikalen, dano me ateni kame lwooro Rubanga, kame ateker me Iyudayan yamo kope abeco i kome.”
- 23**Di Petero oko lwongo gi i ode pi gin bedo wele mege. Oru mere en eko yai di eko ot kede gi. Imiegu mogo i Kirisito, kame oudo tie Jopa oko upere kede gi.
- 24**Ceng kame lubo mere kiko tuno Sisiria. Kolonerio oudo tie kuro gi, doko en oudo elwongo joawade kede awotino mege karacel.
- 25**Kakame Petero oudo tie donyo kede i ot, Kolonerio oko yai pi game, di eko riebere piny i tien Petero, di eko mine wor.
- 26**Do Petero oko kiarao en di waco ne be, “Yai malo, anga da abedo dano bala in.”
- 27**Petero oko meede yamo kede Kolonerio di kitie donyo i ot. Kakame kidonyo kede i ot, kiko udo jo kame oudo ocokere kuno tot.
- 28**Petero oko waco ne gi be, “Wun kikomu ingeunu be Iswil likame yei ne Ngayudaya moro welao arabo nywako kede dano me ateker apat. Do Rubanga otieko nyuto nango be kur alwong ngatamoro be dano komunaun arabo kalikame cil.
- 29**Pi mano, i kare kame in icwao kede jo pi lwonga, anga ako bino abongo iyalongong. Nan do atie penyi gikame omio ilwonga.”
- 30**Kolonerio oko waco be, “Okato nan ceng ongwon, bala iesawa noni, anga oudo atie i oda ilega me esawa kanyangon me otieno. Kikano di icuo moro oko cungo i nyima di engapo igoen kame meny,



³¹di eko waco be, ‘Kolonerio, Rubanga otieko winyo ilega ni, doko etieko yutuno in pi kony kame in ibedo mino but jocan.

³²Pi mano, cwai jo mogo Jopa, kioti kilwong Simoni kame kolwongo be Petero. En etie ebeto i ot me icuo moro kame nyinge Simoni nganyong launi, kame ture tie i dog nam.’

³³Cucuto nono di do ango ako cwano jo pi lwongi. Aso ida iko timo ber iko nan bino. Nataman wan dedede otieniu kan i nyim Rubanga, pi winyo gi dedede kame Rwot owaco ni.”

Yamo ka Petero i Ot ka Kolonerio

³⁴Petero oko cako yamo di ewaco be, “Atieko do nan niang kiber ateteni be Rubanga li kede apokapoka but jo.

³⁵Do i atekerin dedede, en egamo jo dedede kame wore kede kame timo gi kopooore.

³⁶Wun ingeunu kop kame riki en ecwao ne jo me Isirael, en Kop Aber me mulem, kame bin Yesu Kirisito, ngat kame obedo Rwot kame lo jo dedede en kokelo.

³⁷Kop nono en kame bin kopwonyo i piny me Yudea lung, cako ki Galilaya, ingei batisimu kame Yokana oudo owaco kop mere:

³⁸epone kame Rubanga bin oyero kede Yesu me Nasaret, di eko mine Tipo Kacil kede twer, kede da epone kame en eko ririmo kede piny di etimo bero ne jo, doko da di ecango jo dedede kame bin Sitani otweo, pien Rubanga oudo tie kede en.

³⁹Doko wan dedede otieniu ijurak me gi dedede kame bin en etimo i piny me Iyudayan kede i Yerusalem. Gin bin kiko gure i kom yat di eko to.

⁴⁰Do Rubanga oko yaruno en ingei ceng adek di oko mine eneeno;

⁴¹likame but jo dedede, do but wan jo kame Rubanga oudo otieko yero pi bedo ijurak, wan jo kame bin ocamo di okounu mato kede en ingei en yaruno kikom jo oto.

⁴²Doko Yesu bin oko ciko wan pi ot tucio ejiri but jo, kede mino ijura i kome be, en nono kame riki Rubanga oyere pi bedo ngangolkop me jo akuo kede jo oto.

⁴³Inabin dedede bin omio ijura i kome be ngat acelacel kame yei en, kobino sasiro en ki dub mege pi nyinge.”

Jo Kalikame Iyudayan Ogamo Tipo Kacil

⁴⁴Di pwodi Petero oudo tie yamo, Tipo Kacil oko bino i kom jo dedede kame oudo tie winyo kop mere.

⁴⁵Jo kame kokepo, kame oudo oyei Yesu, kame oudo oupere kede Petero yai ki Jopa oko uro twatwal, pien oudo komio jo kalikame Iyudayan da giamia me Tipo Kacil.

⁴⁶Pien oudo kiwinyo di jo nogo tie yamo i leb anyen, di kimio dwongo but Rubanga.

⁴⁷Di do Petero oko waco be, “Ngai kame twero gengo jogi udo batisimu me pii, do di gida kitieko udo Tipo Kacil bala wan?”



⁴⁸Petero oko ciko be poore batiso gi i nying Yesu Kirisito. Di do kiko kwane be ber ebed kede gi pi kare moro acecek.

Tice 11

Kop kame Petero Odwoko but Ekodet me Jokirisito i Yerusalem

¹Joor karacel kede jokirisito kame oudo tie Yudea, oko winyo be jo kalikame Iyudayan da oudo oyei kop ka Rubanga.

²Kakame Petero ooto kede Yerusalem, jo kame bin tie i ekodet kame gango kop me akepo oko bunano en di kiwaco be,

³” Pinyo ber komio in iko ot bedo kede jo kalikame kokepo, di bobo iribo kede gi cam?”

⁴Do Petero oko cako tatamo ne gi gikame otimere dedede i yore i yore di ewaco be,

⁵” Ango oudo atie ilega i bomba me Jopa, gianyuta oko neeno na, di ako neno gimoro kame cal bala esuka kame lac, di kotie yololo en piny kede lake ongwon, di eko tuno piny buta.

⁶Ango ako ngice kiber ako neno leini apapat kame kopito i paco kede me obar, kede leini kame liao alia, kede winy kame por da di tie iye.

⁷Di ako winyo dwan di waco na be, ‘Petero, yai; neki iko camo.’

⁸Do anga ako waco be, ‘Rwot, likame kamano; pien cako anga gira likame pwodi acamo gimoro me kwer arabo gikame omunaun.’

⁹Do dwan nono oko dwoko nango tien me are ki malo be, ‘Gikame Rubanga otieko lonyo kur bobo ilwongo be gi me kwer.’

¹⁰Man otimere tien adek, di bobo oko dwoko ginogo dedede malo.

¹¹Iesawa nono cuo adek kame bin kocwao buta ki Sisiria oko tuno i ot kame wan oudo obedo iye.

¹²Di Tipo ka Rubanga oko waco na be aupere kede gi abongo cuny me apokapoka. Jo kanyape kame obedo jo koyei Kirisito nogi da oko upere keda, di oko ot oko donyo i ot ka Kolonerio.

¹³En eko tatamo ne wa epone kame en oudo eneno kede malaika di tie cungo i ode di ewaco be, ‘Cwai ngatamoro Jopa, eoti ekel Simoni kame kolwongo be Petero;

¹⁴en ebino waco ni kop kame bino mini iudo alako, in karacel kede jo me i odi.’

¹⁵Kakame anga ako cako kede yamo, Tipo Kacil oko bino i kom gida bala kite kame bin ebino kede i kom wada i agege.

¹⁶ Anga di do ako yutuno kop kame bin Rwot owaco be, ‘Yokana bin batiso jo kede pii, do wun kobino batiso wu kede Tipo Kacil.’



¹⁷Aso, ka Rubanga oko mino giamia acel nono but jo kalikame Iyudayan, bala kite kame bin emio kede but wada i kare kame wan bin oyei kede Rwot Yesu Kirisito, angdo do oudo abedo ngai kame koto ako twero gengo Rubanga?”

¹⁸Kakame kiwinyo kede kop no, kiko do ling atwal. Di kiko donyo do pako Rubanga di kiwaco be, “Rubanga do otieko mino iswilar me donyo i kuo kiton but jo kalikame Iyudayan da.”

Ekodet me Jokirisito kame tie Antiokia

¹⁹Kikano jo kame bin osarakin pi itidil kame oudo otimere i kare kame koneko kede Sitepano oko ot paka Poenisia, Sipuro kede Antiokia; di kitatamo kop i kom Rwot Yesu ne Iyudayan kenekene.

²⁰Do oudo tie jo mogo kikom gi kame bin oyai ki Sipuro kede ki Sirene, kame oko yamo kede Jogurik da, di kitatamo kop i kom Rwot Yesu i kare kame kituno kede Antiokia.

²¹Twer ka Rwot oudo tie kede gi, di jo atot oko yei di kiko lokere but Rwot.

²²Rwonge me gikame otimere noni oko winyere but ekodet me jokirisito i Yerusalem, di gin kiko cwano Baranaba Antiokia kunono.

²³Kakame bin Baranaba otuno kede kuno di eko neno epone kame Rubanga onyuto kede kisa mere but jo, cunye oko bedo yom di eko kwano cunye gi pi gin dong jo kame genere i Rwot kede tam kosipakin.

²⁴Pien Baranaba oudo obedo dano aber, kame opong kede Tipo Kacil doko di etie kede yei. Jo atot oko meede i kom jo koyei Rwot.

²⁵Di do Baranaba oko yai ot Taruso pi mono Saulo;

²⁶kakame eude kede, en eko kele Antiokia. Saulo kede Baranaba oko bedo kuno pi mwaka acel lung, di kiriamakin kede ekodet me jokirisito, kiko pwoonyo ekodet me jo atot. Antiokia kanono en kame oko cako lwongo kiye josiao be jokirisito.

²⁷I kare nono, inabin oko wok ki Yerusalem oko bino Antiokia.

²⁸Ngat acel kikom gi, kame oudo nyinge Agaba oko yai malo, Tipo Kacil oko tele, di eko tucob be kec adwong bino poto i piny lung; man oko timere i kare ka Kulaudio.

²⁹Di do ngat acelacel kikom josiao oko keto cunye cwano giamia me kony but jo koyei Kirisito kame oudo tie Yudea, di lubo kede kite kame ngat acelacel oudo twero kede.

³⁰Gin bin kiko timo kamanono, kiko cwano kony but joadongo di beo i cing Baranaba kede Saulo.

Tice 12

Tidilo Jokirisito Omeede

¹Tetu kare nono, Abaka Erode oko cako tidilo jo mogo kikom ekodet me jokirisito.



²En eko neko Yakobo omin me Yokana kede epima.

³Kakame eneno kede be gi nono oyomo cuny Iyudayan, en eko mino komako Petero da. (Mano bin otimere i kare me ebagame Mugati kame Arup li kiye.)

⁴Kakame bin etieko mako kede Petero, en eko rwake i otkol, di eko mine i cing ikodeta ongwon me isirikalen pi dare, di oudo etie kede tam me kele i nyim jo pi pide ingei Ebagame Kalamo.

⁵Di do oko mino Petero obedo i otkol, do ekodet me jokirisito oko donyo ilega but Rubanga pire kede cuny gi lung.

Kogonyo Petero ki Otkol

⁶Iwor kame ru ceng kame Erode oudo oyaro do woto kede Petero pi pide i nyim jo, Petero oudo tie nino i diere me isirikalen are di kotwee kede irikoi are, doko di isirikalen ace are da tie daro ekeko me dog erute me otkol.

⁷Kikano, malaika ka Rwot oko neeno, di asara oko caro agola me otkol, en eko babapo nget Petero, eko cene di ewaco ne be, “Yai malo awakawaka.” Cucuto nono di irikoi popoto ki cing Petero.

⁸Di malaika oko waco ne be, “Aso ngap igoen ni iko ngapo amuka da.” Petero oko timo kamanono. Di malaika nono oko waco ne be, “Aso rwai egoe ni me adoka di iko luba.”

⁹Petero oko donyo ooko di oko lube. Petero oudo likame ngeo be gikame malaika nono otimo oudo tie me ateni; oudo eparo be etie neno gianyuta.

¹⁰Kakame kikalamo kede isirikalen jodar me agege kede me are da, kiko do tuno i ekeko me lilim me dog erute me bomba. Di ekeko nono oko yabere ne gi en kene, di gin kiko donyo ooko, kiko cako lubo yongayo moro acel; cucuto di do malaika nono oko rwenyo oweke.

¹¹Di do wi Petero oko yabere di eko waco be, “Nan do atieko ngeno kiber be Rwot en kame oudo ocwao malaika mere pi laka ki cing Erode kede ki gi dedede kame Iyudayan oudo oikere pi timo i koma.”

¹²Kakame Petero oniang kede gikame otimere noni, en eko ot paco ka Maria toto me Yokana, kame nyinge ace oudo Marako; jo atat oudo ocokere tie ilega kuno.

¹³Kakame bin Petero okukungo kede ekeko me dog erute, nyako moro ngatic me ot, kame nyinge Roda oko bino pi yabo ne ekeko.

¹⁴Do kakame ewinyo kede di eko niang be dwan Petero inonono, en eko ringo edok cen abongo yabo ekeko pi yomcuny, di eko waco ne jo be Petero oudo tie cungo i dog ekeko me erute.

¹⁵Do gin kiko waco ne be, “In ipoi.” Do en eko cere ne gi di ewaco be Petero oudo tie cungo ooko. Gin di do kiko waco be, “Mano malaika mere!”



¹⁶Do Petero oko meede kukungo ekeko. Kakame kiyabo kede ekeko, kiko nene di kiko uro.

¹⁷Do en eko poro ne gi kop kede cinge be kilingi, di eko tatamo ne gi i yore i yore epone kame Rwot owote kede ki otkol. En eko waco ne gi be, “Tatamunu kop ni ne Yakobo karacel kede imiegu i Kirisito.” En eko yai eoto kabedo ace.

¹⁸Kakame do piny oru kede, wi isirikalen jodar oko dubere pi gikame oudo otimere ne Petero.

¹⁹Di bin Erode omoo Petero di likame eko twero udo, en eko donyo pepenyo isirikalen jodar, di eko mino cik be poore nek gi. Erode di do oko yai ki Yudea eoto bedo Sisiria.

Erode Oto

²⁰Kikano, Erode oudo olilo kede jo me Taya kede Sidon. Gin kiko ot bute di kitie i ekodet acel; kiko ber cako kede loko tam ka Bulasito, kame bin oudo gwoko paco me abaka, di kikwae pi konyo gi yamo kede abaka kop me mulem, pien cam me piny gi oudo wok ki piny kame abaka pugo.

²¹I ceng kame koiko, Erode oko ngapo engape mere me abaka, eko bedo i kom mere me ajakanut, di eko cako yamo kede gi.

²²Di jo oko lelemo be, “Etie yamo kede dwan rubanga, do likame dwan dano!”

²³Cucuto nono di malaika ka Rwot oko mino tuwo odipo Erode, pien oudo likame emio Rubanga deyo. Kudiling oko came di eko to.

²⁴Do kop ka Rubanga oko meede nyai, di jo atat oko yei.

²⁵Baranaba kede Saulo oko yai do ki Yerusalem ingei ngetakino tic gi, di kiko tero Yokana kame kolwongo be Marako kidok kede.

Tice 13

Koyero Baranaba kede Saulo oko Ooro gi

¹Kikom ekodet me jokirisito kame tie Antiokia, oudo tie iye inabin kede jopwony. Gin en Baranaba, Esimioni kame bin kolwongo be Naiga, Lukio me Sirene, Manea kame bin obedo ngat acel kikom jo me paco ka Abaka Erode, kede do Saulo.

²Di bin gin kitie timo tic me woro Rwot kede kanyo kec, Tipo Kacil oko waco ne gi be, “Pokunu na Baranaba kede Saulo tenge pi tic kame ango alwongo gi iye.”

³Di do ingei kanyo kec kede ilega, gin kiko keto cing gi i wi Baranaba kede Saulo, di kiko cwano gi.

Baranaba kede Saulo i Sipuro

⁴Kakame Tipo Kacil ooro gi kede, Baranaba kede Saulo oko ot kiko lor Selukia; ki kuno di kiko kwang kioto Sipuro.



- ⁵Kakame kituno kede Salamis, kiko donyo pwonyo kop ka Rubanga i sinagogan. Yokana kame kolwongo be Marako oko donyo konyo gi.
- ⁶Kakame kitieko ririmo kede cula lung tuno Papo, kiko ngoole i kom ngatamoro kame timo tangu me jwok. En oudo ebedo enabi me angalo, Ngayudaya kame nyinge Bar-Yesu.
- ⁷En oudo ebedo kede ngapug me cula nono kame nyinge Serugio Paulu, kame oudo obedo icuo ariek kame oko lwongo Baranaba kede Saulo pi mito winyo kop ka Rubanga kibut gi.
- ⁸Do Elimasi ngatim tangu me jwok (dwong me nyinge inonono i leb Gurik) oko donyo piem kede gi di emitu lengo ngapug nono tenge ki yei.
- ⁹Do Saulo kame nyinge da Paulo, oko pong kede Tipo Kacil, di eko ciko wange i kome,
- ¹⁰di eko waco ne be, “In nywal me Sitani, in ngakwor me gi kopooore dedede, ipong kede angalo kede tim areco, mam in likame ibino weko gogomo yongayo korie ka Rwot?”
- ¹¹Neningo, twer ka Rwot nan opoto i komi, wangi bino to di likame iko twero neno wang ceng pi kare moro.” Cucuto nono di ekuna kede colo oko umo wange, di do ecako ot di emo jo kame romo pene kede cinge.
- ¹²Kakame ngapug nono oneno kede gikame otimere, en eko bedo kede ur i kom gikame kopwonyo i kom Rwot, di eko do yei.

Baranaba kede Paulo i Antiokia me Pisidia

- ¹³Di do Paulo kede jowote oko kwang yai ki Papo tuno i bomba me Perega, kame tie Pampulia. Yokana kame kolwongo be Marako oko weko gin kuno, di en eko dok Yerusalem.
- ¹⁴Do Paulo gini oko meede kede ot, yai ki Perega tuno Antiokia me Pisidia. Ceng Sabato gida kiko ot i sinagoga, di kiko bedo piny.
- ¹⁵Ingei somo itabu me Iswil kede me inabin, jotel me sinagoga oko cwano ne gi kop di kiwaco be, “Imiegu, ka itienu kede kop moro me supo cuny jo, yamenu.”
- ¹⁶Di do Paulo oko yai malo, eko poro kop kede cinge be jo lingi, di eko cako yamo kaman: “Jo me Isirael, kede wun jo kame woro Rubanga, winyunu.
- ¹⁷Rubanga me jo Isirael nogi, riki oyero joakwari wa, di en eko mino gi kibedo ateker adwong i kare kame kitie kede i piny me Misiri. En eko woto gi tenge ki Misiri pi twer mere,
- ¹⁸ di eko ngirkino gwoko gi i tim pi mwakini kame romo bala ot ongwon.
- ¹⁹ Kakame Rubanga bin oneko kede atekerin kanyaare i lobo me Kanan, en eko mino lobo gi but ateker me Isirael pi sikao en pi mwakini aromo tol ongwon kede ot kany.



- 20 “Ingei mano, en eko mino gi jongolkop pi bedo jotel tuno kede i kare ka enabi Samuel.
- 21 Di do gin kiko kwano be mi gi abaka, Rubanga oko mino gi Saulo wot ka Kisi, dano me ateker ka Benjamin, pi bedo abaka gi pi mwakini ot ongwon.
- 22 Kakame Rubanga okwanyo kede Saulo, en eko yero Daudi pi bedo abaka gi. En eko yamo kop i kome be, ‘Ango audo be, Daudi wot ka Yese en kame obedo dano kame yomo cunya, kame bino timo gikame ango amito dedede.’
- 23 Kikom ikwae ka Daudi noni, Rubanga oko yero ne jo me Isirael Ngalak, en Yesu, bala kite kame oudo ecikere kede.
- 24 Di pwodi likame Yesu obino, Yokana oudo otieko pwoyo jo dedede me Isirael be miero kilokere kiwek dub gi di oko batiso gi.
- 25 Kakame Yokana oudo tie tieko kede tic mere, en eko waco be, ‘Wun iparunu be ango en ngai? Ango likame ngat kame wun itien daro, do i cen ngea, tie ngat kame tie bino, kame ango likame apoore pi gonyo amuka mere.’
- 26” Imiegu na wun ikwae ka Aburaam, kede jo ace kikom wu kame woro Rubanga, kop me alako noni kotieko cwano but wa.
- 27 Kite kame jo kame oudo bedo Yerusalem kede jotel gi likame ongee kede, arabo oniang kope me inabin kame oudo kosomo Ceng Sabato dedede, omio kiko mino kope nogi ocobere kakare di kingolo ne Yesu kop.
- 28 Bed bala gin oudo likame kiudo kop moro kame romo mino kongolo ne kop me to, do gin kiko kwano Pilato be emi neke.
- 29 Kakame gin kitieko kede timo gi dedede kame cobo kop kame kowandiko i kome, gin kiko do kwanye tenge kikom yat, di kiko ot yike i ates.
- 30 Do Rubanga oko yaruno en kikom jo oto.
- 31 Di en eko neeno tien atot but jo kame bin en ewok kede gi ki Galilaya bino Yerusalem. En jo nogo kame nan tie ijurak mege but jo.
- 32 Wan nan okelo ne wu Kop Aber be, gikame Rubanga bin ocikere pi timo ne joakwari wa,
- 33 en nan etieko mino ocobere but wan ikwae gin, di eyaruno Yesu; bala kite kame kowandiko kede i Sabuli me are be, ‘ In en Woda, tin ango adoko Papa ni.’
- 34 I kom kop kame mako Rubanga yaruno en kikom jo oto, di likame bobo eko top, Rubanga oko yamo kaman, ‘ Ango abino mino wu cikere kacil kame bin ango acikere pi mino Daudi.’
- 35 Pi mano, en eyamo bobo i Sabuli ace be, ‘ In likame ibino weko Dano nin Kacil top.’



³⁶Pien Daudi riki ingei mino iik ka Rubanga ocobere i kare mere, en eko to di oko yike i nget joakwari mege di kome oko top.

³⁷Do ngat kame bin Rubanga oyaruno likame obilo top.

³⁸Pi mano, imiegu na, mito wun ingeunu kiber be, kotie pwonyo wu kop i kom isasir me dub pi icuo noni,

³⁹doko da pi en nono, ngat acelacel kame yei, kogonye ki dub dedede kame Iswil ka Musa oudo likame twero gonye kiye.

⁴⁰Pi mano, gwokerenu tetekeny gikame riki inabin owaco kur timere i komu, kame waco be,

⁴¹ ‘Nenunu ber, wun jo kame cao kop ka Rubanga! Urunu ikounu to! Pien gikame ango atie timo i kare wu, obedo gi kalikame ibinunu yei, akadi di ngatamoro oniango wu iye.’ “

⁴²Kakame Paulo kede Baranaba oudo tie donyo kede ooko, jo oko kwano gi be koto kimedo tatamo kope nogi i Ceng Sabato kame lubo.

⁴³Kakame cokere kame oudo tie i sinagoga oko jik kede, Iyudayan atot karacel kede jo kame bin olokere i edini gi di kiko keto cuny gi iye, oko lubo Paulo kede Baranaba. Gin kiko donyo yamo kede gi di kikwao cuny gi pi gin dong di kigeno bero ka Rubanga.

⁴⁴Ceng Sabato kame lubo, jo oko buco bino dedede ki bomba di kiko cokere karacel pi winyo kop ka Rubanga.

⁴⁵Do kakame Iyudayan oneno kede twon ekodet me jo, nyeko oko mako gi kitek, omio kiko donyo piem kede Paulo di kiyeyeto en.

⁴⁶Di do Paulo kede Baranaba oko donyo yamo abongo lworu di kiwaco be, “Oudo etie gikame mitere, be oudo miero ber gei tucop kop ka Rubanga butu. Do pien wun idagunu kope nogi, di ingolunu kop i komu kenu be likame ipoorenu donyo i kuo kame bedo nakanaka, omio wan nan oyaro lokere but jo kalikame Iyudayan.

⁴⁷ Kop noni en komio Rwot ociko wan di ewaco be, ‘ Ango atieko yero wu pi bedo lero but jo kalikame Iyudayan, tetekeny imiunu alako tuni i ajikini me lobo.’ “

⁴⁸Kakame jo kalikame Iyudayan owinyo kede kop noni, cuny gi oko doko yom di kiko mino kop ka Rubanga deyo. Di jo dedede kame Rubanga oudo otieko yero pi donyo i kuo kame bedo nakanaka oko yei Yesu Kirisito.

⁴⁹Kop ka Rwot oko nyai oromo piny nono dedede.

⁵⁰Do Iyudayan oko supo cuny mon kame ngere, kame oudo keto cuny gi woro Rubanga, karacel kede cuo kame jo oudo woro i bomba. Gin kiko mino jo ogeo tidilo Paulo kede Baranaba, di kiko riamo gi ki piny gi.



⁵¹ Do Paulo kede Baranaba oko tengo adae me tien gi ne jo me bomba nono, di kiko yai kioto Ikoniam.

⁵² Josiao oko bedo kede kilel adwong, doko kiko pong kede Tipo Kacil.

Tice 14

Paulo kede Baranaba i Bomba me Ikoniam

¹ Kikano, di bin Paulo kede Baranaba oudo tie Ikoniam, kiko donyo karacel i sinagoga me Iyudayan, kop kame kiko yamo oko mino ekodet me Iyudayan karacel kede Jogurik oko yei Yesu.

² Do Iyudayan kalikame bin yei Yesu oko supo jo kalikame Iyudayan, di kimio gi tam arac i kom jo koyei Kirisito.

³ Do Paulo kede Baranaba oko bedo kuno pi kare alac, di kiyamo pi Rwot abongo lworu, Rwot di mio ijura i kom kisa mere i gianena kede i gi me isuur kame emio gi twer me timo.

⁴ Jo me bomba nono bin oko pokere: mogo opokere but Iyudayan, mogo but joor.

⁵ Kakame jo kalikame obedo Iyudayan, kede Iyudayan, karacel kede jotel gi bin otamakino kede mino joor aroma, di kimito didipo gi kede kide,

⁶ gin kiko ngeno di kiko ringo Lisitura kede Derube, kame obedo bomban kame tie Likaonia, kede i adulion ace da kame bin oluke;

⁷ di gin kiko tuco ejiri kuno.

Paulo kede Baranaba i Lisitura kede Derube

⁸ Oudo bin icuo moro tie Lisitura kame oudo tie bedo, en oudo likame etwero ot kede tiene; oudo konywale di engwalo, doko cako likame ebilo ot kede tiene.

⁹ En eko winyo Paulo di tie yamo; Paulo oko ngine kitek, di eko neno be oudo etie kede yei kame romo mine ecango.

¹⁰ Paulo oko yamo kede dwan amalo be, “Yai malo iko cungo kede tieni.” Engwalas nono oko yai malo di eko ot.

¹¹ Kakame ekodet bin oneno kede gikame Paulo otimo, gin kiko cako yamo kede dwan amalo i leb gi me Likaonia be, “Rubangan otieko wok piny but wa i cal me jo!”

¹² Kiko donyo lwongo Baranaba be Seus, kede Paulo be Kereme, piento en oudo ebeto ngayamo adwong.

¹³ Ngasaseredoti ka Seus, kame bin tempulo mere cungo ooko i nyim bomba oko kelo twonin kede ature acil i dog erute di oudo emitu mino giayala karacel kede jo.

¹⁴ Do kakame Paulo kede Baranaba, kame obedo joor, owinyo kede kop no, gin kiko yeyeco igoen gi di kiko motar ooko i dier ekodet di kiwaco be,



¹⁵ “Jogi, pinyo komio itienu timo kamano? Wada obedo jo bala wun. Wan okelo ne wu Kop Aber, tetekeny iwekunu jamini kame kony gi li go, di ikounu lokere but Rubanga kakuo, ngat kocweo malo, kede lobo, kede nam, kede jame dedede kame tie i yi gi.

¹⁶I kare kokato, Rubanga oudo oweko atekerin timo gikame cuny gi mito.

¹⁷Do akadi kamano da, en likame eko weko jo abongo gikame nyute. Piento en etimo ne wu bero; emio kot ocwei ne wu ki malo, kede kare kame kelo amio; emio wu cam kede yomcuny.”

¹⁸Bed bala joor bin otatamo kope go kamano, do likame kiko karuno gengo jo pi mino gi giayala.

¹⁹Do Iyudayan mogo kame oudo owo ki Antiokia kede Ikoniam oko bino; gin kiko supo cuny jo, kiko didipo Paulo kede kide di kiko wane ooko me bomba di oudo kiparo be etieko to.

²⁰Do kakame josiao ocokere kede bute oluke, en eko yai malo di eko donyo i bomba. Oru mere, en kede Baranaba kiko yai kioto Derube.

Paulo kede Baranaba Odok Antiokia i Piny me Siria

²¹Kakame Paulo kede Baranaba otieko tucio kede ejiri i bomba me Derube di kiko loko jo atos oko yei Yesu, gin kiko dok Lisitura kede Ikoniam kede Antiokia.

²²Gin oudo kimio tekuny but jo koyei Kirisito di kikwao gi pi dong di kitek i yei. Doko di kiwaco ne gi be, “Wan miero obeunu i peko atos pi donyo i Ajakanut ka Rubanga.”

²³Kakame kitieko yero ne gi kede joadongo ki ikodeta dedede me jokirisito, di kilego kede kanyo kec, kiko mino gi i cing Rwot kame gin oudo kiyei.

²⁴Di do kiko beo ki Pisidia kiko tuno Pampulia.

²⁵Ingei tatamo kop i Peruga, kiko ot kilor Atalia;

²⁶ki kuno, kiko kwang tuno Antiokia, kakame bin kokwao ne gi kiye kisa ka Rubanga pi tic aber kame oudo kicobo.

²⁷Di bin kituno Antiokia, gin kiko coko ekodet me jokirisito dedede karacel, di kiko tatamo ne jo gi dedede kame Rubanga oudo otio kede gin pi timo, kede epone kame eyabo kede ekeko me yei ne jo kalikame Iyudayan.

²⁸Di do Paulo kede Baranaba oko bedo kede gi kuno pi kare moro alalac.

Tice 15

Cokere kobedo Yerusalem

¹ Do jo mogo bin oko wok ki Yudea kiko donyo pwonyo jo koyei Kirisito di kiwaco be, “Likame itwerunu udo alako kwanyo di kokepo wu bala kite kame itok ka Musa mito kede.”



- ²Paulo kede Baranaba oko piem kede jo nogo kitek, omio apokapoka oko bedo i diere gi, di do oko yero Paulo kede Baranaba, kede jo ace apat, di oko cwano gi Yerusalem but joor kede joadongo pi niang kop noni.
- ³Di do ekodet me jokirisito oko cwano gi kioto, kiko beno ki Poenike kede Samaria, di kitatamo epone kame jo kalikame Iyudayan olokere kede but Rwot. Kop nono oko yomo cuny jo koyei Kirisito dedede.
- ⁴Kakame kituno kede Yerusalem, ekodet me jokirisito dedede, karacel kede joor kede joadongo, oko gamo gi. Gin kiko waco ne jo nogo gi dedede kame Rubanga otio kede gin pi timo.
- ⁵Do jo mogo koyei, kame oudo bin tie i ekodet me Iparisayon oko yai malo di kiko waco be, “Miero kep gi di oko ciko gi pi lubo Iswilia ka Musa.”
- ⁶Joor karacel kede joadongo oko cokere karacel pi nyamo kop noni.
- ⁷Ingei nyamo kop pi esawa alac, Petero oko yai malo di eko waco ne gi be, “Imiegu kede amiegu na, wun ingeunu be i kare aseki Rubanga oudo oyera ki diere wu tetekeny jo kalikame Iyudayan da winy kop me ejiri ki dogo, di kiko yei.
- ⁸Rubanga ngat kame ngeo cuny jo bin oko mino ijura mere i kom gi, di emio gi Tipo Kacil bala kite kame bin emio kede wada.
- ⁹Doko likame en eko keto apokapoka moro i diere gi kede wan, do en elonyo cuny gi pi yei.
- ¹⁰Pi mano, pinyo komio wun nan itienu tamo Rubanga di iketunu iswilia atek ne jo kame lubo Yesu, kame joakwari wa akadi wada likame otwerunu lubo?
- ¹¹Do wan oyei be, wan obinunu udo alako pi kisa ka Rwot Yesu bala gida.”
- ¹²Ekodet lung oko ling titi, kiko donyo winyo Paulo kede Baranaba di tie tatamo epone kame Rubanga otimo kede gianena kede gi me isuur but jo kalikame Iyudayan di etio kede gin.
- ¹³Ingei gin tieko yamo, Yakobo oko dwoko be, “Imiegu na, winyunu.
- ¹⁴Esimioni otieko tatamo ne wa epone kame Rubanga bin ocako paro kede pi jo kalikame Iyudayan, di en eko yero kikom gi jo kame kolwongo kede nyinge.
- ¹⁵Doko da kope nogi upere kede kope me inabin, bala kite kame bin kowandiko kede be,
- ¹⁶‘Ingei man ango abino dwogo, di ako bino bobo gero ot ka Daudi kame otieko poto; ango abino bobo gero ameye mere, di ako bino mine ecungo,
- ¹⁷tetekeny jo icegun dedede moi Rwot, akadi kiton jo dedede kalikame obedo Iyudayan, jo kame kolwongo kede nyinga.
- ¹⁸Mane en gikame Rwot owaco, en ngat kame emio gi nogi ongere cako sek.’



¹⁹Pi mano, ango aneno be, wan likame opoore lolo jo kalikame Iyudayan, kame lokere but Rubanga.

²⁰Do poore owandiko ne gi kop kame gengo gi camo gikame koyalo kede cal jwogi, kede da kiwek timo caro, doko kiwek camo gikame kodeo adea, kede kiwek camo remo.

²¹Piento cako kibun jo ariki sek, Musa obedo tie kede jo kame tatamo kop mere i bomba acelacel, pien oudo kosomo kop mere Ceng Sabato acelacel i sinagogan.”

Baluwa kame Kocwao but Jo Koyei kalikame obedo Iyudayan

²²Di do joor kede joadongo karacel kede ekodet lung me jokirisito oko yei yero jo mogo kikom gi, di kiko cwano gi Antiokia karacel kede Paulo kede Baranaba. Gin kiko oro Yuda kame bin kolwongo be Barasaba kede Sila, kame oudo obedo jotel i dier jo koyei Kirisito,

²³kede baluwa kame waco kaman: “But jo kalikame Iyudayan koyei Kirisito, kame bedo Antiokia, Siria kede Kilikia. Wan imiegu wu joor karacel kede joadongo omoto wu.

²⁴Wan otieko winyo be jo mogo oyai kibut wan kan di kiko bino lolo wu kede kope mogo kame oko dubo tam wu, bed bala wan likame owaco ne gi.

²⁵Omio nan eneeni gikaber ne wan, ingei moko tam acel, pi yero cuo mogo di oko oro gi butu karacel kede imiegu wa me amara, Paulo kede Baranaba,

²⁶cuo kame ojalo kuo gi pi Rwot wa Yesu Kirisito.

²⁷Pi mano, wan nan ocwao Yuda kede Sila butu, gin kibino tatamo ne wu kop acel nono kede dog gi.

²⁸Pien wan karacel kede Tipo kacil, otamo be miero kur bobo omed keto yec moro apek i wi wu, do kwanyo gikame mitere ige:

²⁹miero iwekunu camo gikame koyalo kede cal jwogi, doko iwekunu camo remo kede gikame kodeo adea, kede timo caro. Ka iwekunu timo gigi, udo itimunu gikaber. Asounu do.”

³⁰Kakame kiyai kede, kiko ot kilor Antiokia. Di do bin kitieko coko ekodet me jo koyei Kirisito karacel, gin kiko mino gi baluwa nono.

³¹Kakame jo osomo kede baluwa nono, kiko bedo kede kilel pi supo cuny gi.

³²Yuda kede Sila, kame oudo obedo inabin, oko bedo kwano cuny jo koyei Kirisito kede kope atot, di kiko mino gi tekcury.

³³Ingei tieko kare moro kuno, jo koyei Kirisito oko twaro gi pi dok but jo kocwao gi, di kikwao ne gi mulem.

³⁴(Do Sila oko neno be oudo ber ne en pi dong kuno.)



³⁵Paulo kede Baranaba oko dong Antiokia pi pwoyo kede tuco kop ka Rwot ne jo, gin karacel kede jo atot apat da.

Paulo Opokere kede Baranaba

³⁶Ingei ceng mogo, Paulo oko waco ne Baranaba be, “Bia odok owelao imiegu kame tie i bomba acelacel kame bin opwoyo kop ka Rwot iye, di oko neno epone kame kitie kede.”

³⁷Baranaba oudo mito be koto kitero Yokana kame oudo kolwongo be Marako upere kede gi.

³⁸Do Paulo oko tamo be likame oudo poore ne gin tero dano kame bin opokere oweko gi i Pampulia di likame eko upere kede gi ot i tic.

³⁹Kop no oko kelo piem atek i diere gi, kame oko mino gi kipokere; Baranaba otero Yokana Marako oupere kede, kiko kwang kioto Sipuro,

⁴⁰do Paulo oko yero Sila, di gida kiko yai ingei jo koyei Kirisito kwano ne gi kisa ka Rwot.

⁴¹Paulo oko ot ebeo i Siria kede i Kilikia di emio ikodeta me jokirisito tekcury.

Tice 16

Temeseo Oupere kede Paulo kede Sila

¹Paulo oko ot Derube kede Lisitura. Ngat acel kame oudo lubo pwoyo ka Yesu, kame nyinge Temeseo, oudo tie kuno. Toto me Temeseo oudo obedo Ayudayat koyei Kirisito; do papa mere oudo obedo Ngagurik.

²Imiegu kede amiegu i Kirisito, kame oudo tie Lisitura kede Ikoniam oudo pwoyo be en eber.

³Paulo oudo mito upere kede Temeseo, omio en eko tere eko mino kokepe; pien Iyudayan kame tie i kabedo nogo oudo ngeo be papa me Temeseo obedo Ngagurik.

⁴I kare kame gin bin kioto kede di kibebeo i bomban, oudo kimio jo koyei Kirisito ngeno kope kame joor kede joadongo kame bin tie Yerusalem omoko, kame poore ne gi lubo.

⁵Mano oko mino ikodeta me jokirisito oko doko tek i yei, di wel gi oko donyo meede ceng acelacel.

Paulo Oneno Gianyuta ka Rubanga i Turoa

⁶Paulo gini oko ot di kibeo i adul me Purigia kede Galatia, pien Tipo Kacil oudo likame oyei ne gi tuco ejiri i Esia.

⁷Kakame kituno kede kabedo kame pimaun kede Musia, kiko tamo bala koto kioto Bisinia, do Tipo ka Yesu oko gengo gi.

⁸Omio kiko beo ki Musia, di kiko lor Turoa.



⁹Di do gianyuta ka Rubanga oko nyutere ne Paulo iwor: en eko neno dano me Makedonia di cungo, di bako ne doge be, “Okwe bia Makedonia i kony wa.”

¹⁰Kakame Paulo otieko neno kede gianyuta ka Rubanga, cucuto nono wan oko mito meede kede ot Makedonia, pien wan oudo otieko niang kiber be Rubanga olwongo wa pi tuco ne gi ejiri.

Lidia Olokere but Yesu Kirisito

¹¹Wan oko kwang yai ki Turoa, di oko tenaro yongayo ooto Samoturoke; oru mere di oko ot Neapoli.

¹²Oko yai ki kuno oko ot Pilipi, kame oudo obedo bomba adwong i Makedonia, kame bin Joroma oudo pugo. Wan ber oko do bedo kuno pi ceng mogo.

¹³Di do oko yai Ceng Sabato, oko donyo ooko me erute me bomba, di oko tuno i dog ecilet kakame wan oudo oparo be jo lego iye; oko bedo piny di oko donyo yamo kede mon mogo kame oudo ocokere kuno.

¹⁴Ngat acel kikom jo kame oudo tie winyo kop wa en dako kame nyinge Lidia. En oudo eyai ki bomba me Tuatira, tic mere bin obedo cato igoen akwakwar; en oudo eworo Rubanga. Rwot oko yabo cunye pi winyo gikame Paulo oudo owaco.

¹⁵Ingei batiso en karacel kede jo me i ode dedede, Lidia oko ngangao wa di ewaco be, “Ka wun itiekunu neno be ango atie kede yei i kom Rwot, bia ibedunu i oda.” Tam mere oko bwono merwa.

Kotweo Paulo kede Sila i Otkol i Pilipi

¹⁶Ceng moro acel di wan oudo otie ot kakame jo lego iye, oko riamo kede nyako apasoit moro kame oudo tie kede tipo kame mie tuco kop komungere, doko en oudo ekelo ne jodongo mege lim alac pi tic mere me tuco ne jo gikame bino timere ne gi.

¹⁷En eko donyo lubo Paulo karacel kede wan di elelemo be, “Jogi en jotie ka Rubanga Ngamalo Twal, kame tie tatamo ne wu epone me udo alako.”

¹⁸Etimo kaman pi ceng atot. Do Paulo cunye oko wang, eko lokere but nyako nono di eko waco ne tipo nono be, “Aciki i nying Yesu Kirisito, yai tenge ki kom nyako no.” Esawa nono di tipo nono yai ki kome.

¹⁹Do kakame bin jodongo mege oneno kede be gen gi me udo lim otieko jik, kiko mako Paulo kede Sila di kiko peno gi kitero gi i nyim jopug i atale.

²⁰Kakame kitieko tuno kede gi i nyim jongolkop, gin kiko waco be, “Cuo gi obedo Iyudayan, doko kitie lolo jo i bomba wa.

²¹Gin kikelo pwony kame mako itok mogo kame wan Joroma iswil dagi ne wa gamo arabo lubo.”

²²Ekodet da oko donyo i kop me suro gi, di do jongolkop oko nyinyilo igoen ki kom Paulo kede Sila, di kiko mino kobungo gi kede lilime.



- ²³Ingei bungo gi kitek, kiko rwako gi i otkol, di kiciko sirikale kame daro mabus pi daro gi kiber.
- ²⁴Kakame sirikale kame daro mabus owinyo kede cik noni, en eko rwako gi i agola me diere me otkol, di eko tweno tien gi i kom gikame pek.
- ²⁵Do i dier iwor me ceng nono, Paulo kede Sila oudo tie ilega kede wero were me pako Rubanga, di mabus icegun winyo.
- ²⁶Cucuto nono piny oko yangere, di otkol oko yangere kiton i dude piny; di do ikekon dedede oko yabere. Irikoi oko gony ki tien mabus dedede.
- ²⁷Kakame ngadar mabus ocei kede di eko neno be ikekon dedede me otkol oyabere, en eko woto epima mere be koto ecobere kede kene me wek etoi, pien oudo eparo be mabus otieko lwi.
- ²⁸Do Paulo oko redo kede dwan amalo be, “Kur icobere keni pien wan dedede otie kan.”
- ²⁹En eko lwongere be kel mac, di eko onyaro i yi ot di kome tie miel pi lworu, eko riebere piny i nyim Paulo kede Sila.
- ³⁰En eko kelo gi ooko di eko penyo gi be, “Jodongo na, atim nyo me wek aud alako?”
- ³¹Gin kiko dwoko ne be, “Yei Rwot Yesu, di iko bino udo alako, in karacel kede jo me i odi.”
- ³²Di kiko donyo tucó ne kop ka Rwot, en karacel kede jo dedede kame oudo tie i ode.
- ³³En eko tero gi iesawa me iwor nono, di eko donyo lwoko wang aporeso gi, di do oko batiso en esawa nono, en karacel kede jo me i ode dedede.
- ³⁴Kikano en eko tero Paulo kede Sila i ode, di eko mino gi cam. En karacel kede jo me i ode kiko bedo kede kilel adwong piento en eyei Rubanga.
- ³⁵Do kakame piny oru kede, jongolkop oko cwano isirikalen di kiwaco be, “Wekunu jogo oti.”
- ³⁶Di ngadar mabus oko tero ne Paulo kop be, “Jongolkop ocwao kop be wek wu iotunu; pi mano nan wokunu iotunu kede mulem.”
- ³⁷Do Paulo oko dwoko ne gi be, “Gin kibungo wan i dier jo abongo kop kame ongolo ne wa, wan Joroma, di kiko rwako wa i otkol; benyo, nan do kimito be gonyo wa i mung? Likame twerere! Wek gin ikom gi kibin igony wa.”
- ³⁸Isirikalen ka oko tero kope nogi ne jongolkop. Jongolkop oko bedo kede lworu kakame kiwinyo kede be Paulo gini obedo Joroma.
- ³⁹Omio kiko bino but Paulo gini di kiko kwano be sasiro gi. Kiko woto gi ooko ki otkol, di kiko waco ne gi be kiyai kiwek bomba.
- ⁴⁰Gin kiko wok ki otkol di kiko ot welao Lidia. Kakame kiriamo kede imiegu kede amiegu i Kirisito, kiko dino cuny gi, di do kiko yai.



Tice 17

Paulo kede Sila i Tesalonika

¹Paulo gini oko ot di kibeo ki Amipipoli kede Apolonia, kiko tuno i bomba me Tesalonika, kakame oudo sinagoga tie iye.

²Paulo oko donyo i ot bala kite kame lem oudo enare timo kede, en eko piem kede gi pi Sabato adek di esomo ne gi iwandik kacil.

³En oudo egonyo ne gi dwong kop me iwandik kacil, di enyuto ne gi be Kirisito oudo miero nen can di eko yaruno kikom jo oto. Doko ewaco be, “Yesu kame ango apwonyo wu kop i kome noni en kame obedo Kirisito.”

⁴Jo mogo kikom gi oko yei kop noni, di kiko donyo but Paulo kede Sila, bala kite kame Jogurik atos kame bin woro Rubanga, karacel kede mon atos kame bin koworo otimo kede.

⁵Do nyeko oko mako Iyudayan, omio kiko ot raro jo kame kite gi reco, di kiko coko gi i ekodet. Di do kiko kelo woo atek i dier bomba. Kiko ot suro paco ka Yasoni di oudo kimito be kiwot Paulo kede Sila ooko but jo.

⁶Kakame likame kitwero udo gi kede, gin kiko pere kede Yasoni karacel kede jo mogo koyei, kiko tero gi i nyim jotel me bomba di kiwaco be, “Cuo kototolo piny ige, doko nan kibino kan da,

⁷di Yasoni oko gamo gi. Gin dedede kitie timo gi kalikame upere kede iswil ka Kaisari, pien gin kiwaco be abaka ace tie kame nyinge Yesu.”

⁸Jo karacel kede jotel me bomba wi gi oko dubere kakame kiwinyo kede kop no.

⁹Kiko mino Yasoni kede jo icegun oculo sente kame mitere pi gonyo gi, di kiko weko gi kioto.

Paulo kede Sila i Berea

¹⁰Iwor nono, jo koyei Kirisito oko cwano Paulo kede Sila Berea. Kakame kituno kede kuno, gin kiko ot kidonyo i sinagoga me Iyudayan.

¹¹Iyudayan me Berea nogi oudo obedo jo kame beco kalamo Iyudayan me Tesalonika, pien gin oudo kigamo kop ka Rwot kede cuny gi lung, di kingingico iwandik kacil ceng dedede pi mito neno ka gigi tie kop me ateni.

¹²Manono oko mino jo atos kikom gi oko yei, karacel kede mon atos me Jogurik kame pirgi tek kede cuo da.

¹³Do kakame bin Iyudayan me Tesalonika owinyo kede be Paulo doko oudo oduonyo tucop kop ka Rubanga i Berea, kiko ot kuno da di kiko rubo wi jo di kisupo gi i kom gi.

¹⁴Cucuto nono di do jo koyei Kirisito oko cwano Paulo ooto i dog nam, do Sila kede Temeseo oko ber dong Berea.



15Jo kame bin onyamaro Paulo oko upere kede en paka tuno Asene. Paulo oko ciko gi be miero Sila kede Temeseo bin bute awakawaka, gin di do kiko dok.

Paulo i Asene

16Kakame Paulo oudo tie kuro kede Sila kede Temeseo i Asene, cunye oko dubere pi neno be cal jwogi oudo opong i bomba nono.

17Omio Paulo oko donyo piem kede Iyudayan i sinagoga gi karacel kede jo ace kame oudo woro Rubanga. Doko ceng dedede en oudo epiemo i atale kede jo kame oudo tie kuno.

18Jorieko amalo kame bin tie i ekodet me Epikuria kede Sitoik oko riamo kede Paulo, mogo kikom gi oko penyere be, “Icuo kame yamo mingomingo ni da twero yamo kop nyo?” Jo icegun oko waco be, “Ineno bala etie tatamo kop i kom rubangan mogo me kumbor.” Gin kiyamo kamano pien Paulo oudo tie pwonyo kop i kom Yesu kede iyarun.

19Gin kiko make di kiko tere i nyim kansulo me Areopaga, di kiko waco ne be, “Mi wa ongei dwong me pwony anyen kame in ikelo noni.

20Pien in ikelo gimogo anyen kame wan lem pwodi likame owinyo. Pi mano, wan omi to be ongei dwong gi.”

21Oudo jo me bomba me Asene karacel kede jokumbor kame bin bedo kuno, tero kare gi i tatamo kede winyo kope mogo anyen kenekene.

22Kikano Paulo di do oko cungo i dier kansulo me Areopaga di eko waco be, “Wun jo me Asene, ango atieko neno be wun ibedunu joedini i yote dedede.

23Pien kakame ango abedo bebeo kede di angingico jame kame wun iworunu, ako da udo alutari moro kame tie kede iwandik kame waco be, ‘But rubanga kalikame ngere.’ Pi mano, gikame wun iworunu kalikame kongeo nono en ine kame ango atie tuc ne wu kop i kome.

24En ebeto Rubanga kame ocweo piny kede jame dedede kame tie iye. Bala kite kame en Rwot me malo kede piny, likame ebeto i iroro kame dano en kogero.

25Doko likame emito giamia kame cing dano mie, ineno bala en oudo emito gimoro; piento en nono kame emio jo dedede kuo, kede wei, kede gi dedede.

26En bin ecweo atekerin dedede pi bedo i wi lobo lung di kiyai kibun dano acel, ingei en poko ne gi kare me kuo gi kede ikor me kabedo gi.

27En etimo kaman tetekeny kimoe kede gen be amoto kibino rarapo en di kiko ude. Do akadi da, Rubanga likame bor kede ngat acelacel kibut wa.

28Pien kowandiko be, ‘Wan okuo, doko ooto, kede otie pi en’ ; bala kame jotet were wu mogo owaco kede be, ‘Pien wada obedo nywal mege.’

29Bala kite kame wan obedo kede anywali mege, miero kur opar be Rubanga cal kede Saabu, arabo Siliba, amotoko engaro, cal kame dano oluro i tam mere.



³⁰Rubanga otieko weko kop me kare kame bin jo kwie kede nono, do nan eciko jo dedede me kabedo dedede pi swilaro,

³¹piente en etieko cibo ceng kame en ebino ngolo ne kede jo me piny kop kede ateni. Dano kame en etieko yero en kame bino timo man, doko en etieko moko kop noni but jo dedede di eyaruno dano nono kikom jo oto.”

³²Kakame kiwinyo kede Paulo di yamo kop i kom iyarun, mogo kikom gi oko donyo nyero nyero me anywar, do mogo oko waco be, “Wan obino medo winyo kope nogi kibuti bobo.”

³³Di do Paulo oko yai kibut gi di eko ot.

³⁴Do jo mogo oko donyo bute kiko yei Yesu. Kikom gi oudo tie iye Dionisio dano me Areopaga, karacel kede dako kame oudo nyinge Damari, kede jo apat da.

Tice 18

Paulo i Korinti

¹Ingei mano, Paulo oko yai ki Asene di eko ot Korinti.

²Kakame etuno kede kuno, en eko udo Ngayudaya moro kame nyinge Akwila, kame oudo obedo anywali me Pontu. Akwila oudo pwodi obino abina ki Itali, en kede cege kame nyinge Purisila, pien Kulaudio oudo owoto cik be Iyudayan dedede yai tenge ki Roma. Paulo oko ot neno gi.

³Bala kite kame eda oudo etimo kede tic acel nono me timo kima me eema, omio en eko bedo timo tic kede Akwila gini, pien tic kame kelo ne gi sente oudo inonono.

⁴Paulo oudo piemo i sinagoga Ceng Sabato acelacel, di eloko tam me Iyudayan kede Jogurik.

⁵Kakame Sila kede Temeseo otuno kede Makedonia, kiko udo Paulo ojalo kare mere lung tucu ejiri, di emio ijura but Iyudayan be Yesu en Kirisito.

⁶Do kakame gin kijemo ne kede di kiyeyeto en, Paulo oko tetengo igoen mege di ewaco ne gi be, “Remo wu dong i wi wu! Ango ali kede raco moro. Doko cako nan ango abino do ot but jo kalikame Iyudayan.”

⁷En eko yai ki kuno di eko ot i ot me icuo kame nyinge Tito Yusito, icuo kame bin woro Rubanga, kame ode oudo iyapiyapi kede sinagoga.

⁸Kirisipo, kame bin obedo ngatel me sinagoga, oko yei Rwot karacel kede jo me i ode dedede. Doko jo atot me Korinti kame bin owinyo pwony ka Paulo oko gida yei, di oko batiso gi.

⁹Di Rubanga oko yamo ne Paulo iwor acel i gianyuta be, “Kur ibed kede lworu, do yami, doko kur ilingi,

¹⁰pien ango atie kedi. Likame tie ngatamoro kame bino suri di eko mini awanon, pien ango atie kede jo na tot i bomba noni.”



¹¹Paulo oko bedo kuno pi mwaka acel kede dwete kanyape, di epwonyo gi kop ka Rubanga.

¹²Do i kare kame Galio oudo tie kede ngapug adwong me Akaya, Iyudayan oko ribere karacel suro Paulo, kiko make di kiko tere pide i nyim ekiko

¹³di kiwaco be, “Icuo ni tie loko tam me jo pi woro Rubanga, iepone kame iswil likame yei.”

¹⁴Do kakame Paulo oudo mito cako kede yamo, Galio oko waco ne Iyudayan be, “Okwecunu Iyudayan, ka koto di oudo man kop kame mako tim moro arac arabo turo iswil, koto nan ango ayei kanyakino winyo pido wu di atie kede kacungo.

¹⁵Do bala kite kame pido wu mako kede piem i kom kope mogo kede nying, kede iswilia wu, wun tiekenu kenu. Ango adagi ngolo kop iye.”

¹⁶En eko riamo gi tenge ki nyim ekiko.

¹⁷Gin dedede kiko mako icuo kame nyinge Sosetene, kame oudo telo sinagoga, di kiko bunge i nyim ekiko kanono. Do Galio likame oko keto tam mere iye.

Paulo Odok Antiokia

¹⁸Ingei mano, Paulo oko ber bedo kede jo koyei Kirisito pi ceng atotot, di eko yai eweko gi, kiko kwang kioto Siria, gin karacel kede Akwila kede Purisila. I kare kame kituno kede Kenkerea, Paulo oko lielo wie, piento en bin ekwongo. ¹⁹Di bin kituno Epeso, en eko weko Akwila kede Purisila kuno, eko ot i sinagoga, di eko donyo piem kede Iyudayan.

²⁰Gin kiko kwane be ber ebebedo kede gi, do en eko dagi.

²¹Do esawa kame oudo etie yai kede, en eko waco ne gi be, “Ango abino dwogo butu ka Rubanga oyei.” Di do en eko kwang eyai ki Epeso.

²²Kakame etuno kede Sisiria, en eko ot moto ekodet me jokirisito, di do eko ot elor Antiokia.

²³Ingei tieko kare moro acecek kuno, en eko yai di eko donyo ririmo adulion me Galatia kede Purigia, di emio jo kame lubo Kirisito tekcury.

Apolo i Epeso kede i Korinti

²⁴Kikano Ngayudaya kame nyinge Apolo, kame oudo bin obedo anywali me Alekesanderia, oko bino Epeso. En oudo ebedo icuo kame ngeo yamo kiber doko di engeo kope me iwandik kacil twatwal.

²⁵En oudo kopwonye kiber i kom kop kame mako Yongayo ka Rwot. Doko pi kite kame en oudo eketo kede cunye kitek, omio en eko yamo kop i kom Yesu doko di epwonyo i yore i yore, bed bala oudo en engeo batisimu ka Yokana kenekene.



²⁶En bin eko cako yamo i sinagoga abongo lworu. Do kakame Akwila kede Purisila owinyo kede kop mere, gin kiko tere di kiko tatamo ne kop kame mako Yongayo ka Rubanga odocon.

²⁷Kakame en eko bedo kede mit me ot Akaya, jo koyei Kirisito oko mine tekuny, di kiko wandiko baluwa kuno ne jo kame lubo Kirisito pi game. Kakame Apolo otuno kede kuno, en eko konyo adikinicel jo kame bin oyei Kirisito pi kisa ka Rubanga.

²⁸Piento en oudo epiemo kede Iyudayan kitek di eko bwono gi i nyim jo, di enyuto ne gi i iwandik kacil be Yesu en Kirisito.

Tice 19

Paulo i Epeso

¹Kakame Apolo oudo tie kede Korinti, Paulo oko wok ki tetu malo me piny nono, di eko tuno Epeso. En bin eko udo jo mogo kame lubo Kirisito tie kuno

²di eko penyoy gi be, “Bin ikounu pong kede Tipo Kacil i kare kame iyeunu kede Kirisito?” Gin kiko dwoko ne be, “Li, doko cako wan lem likame pwodi owinyo be Tipo Kacil tie da.”

³Paulo di oko penyoy gi be, “Bin kobatiso wu batisimu mene?” Gin kiko dwoko be, “Batisimu kame Yokana opwonyo kop mere.”

⁴En eko waco ne gi be, “Batisimu kame Yokana opwonyo kop mere bin tie pi jo kame oswilaro ki dub gi; en oudo ewaco ne jo be kiyei ngat kame oudo oyaro bino ki cen ngee, ngat nono en Yesu.”

⁵Kakame kiwinyo kede kop noni, oko do batiso gi i nying Rwot Yesu.

⁶Kakame Paulo oketo kede cinge i wi gi, Tipo Kacil oko bino i kom gi, di kiko donyoy yamo i leb kanyen kede kiko donyoy murao.

⁷Gin dedede oudo kiromo jo tomon kiwie are.

⁸Pi dwete adek, Paulo oko bedo ot i sinagoga di eyamo abongo lworu, en oudo epiemo kede gi di ekwao cuny gi i kom kop kame mako Ajakanut ka Rubanga.

⁹Do mogo kikom gi oudo wi gi tek, doko di kiko dagi yei kop ka Paulo, di kiko donyoy yamo kope areco i kom Yongayo ka Rwot i dier jo. Paulo oko yai kibut gi, di eko tero jo kame bin lubo Yesu eoto kede gi, di eko donyoy piem kede jo ceng dedede i ot me pwony ka Taruno.

¹⁰Man oko meede timere pi mwakini are, oko mino jo dedede kame bedo Esia, Iyudayan karacel kede Jogurik, oko winyoy kop ka Rwot.

Awoke ka Sikeba

¹¹Rubanga oko tic kede cing Paulo me timo giaura adongodongo,

¹²omio oudo koteroy kiton itambalan kede igoen mege ne jotuwo, di tuwo gi ko cango, doko tipo areco kame tie i kom gi da ko yai.



¹³Iyudayan mogo kame bin rimo arima di kiriamo jwogi oko gida donyo lwongo nying Rwot Yesu pi riamo tipo areco kikom jo di kiwaco be, “Aciki i nying Yesu kame Paulo pwonyo kop i kome.”

¹⁴Awobe kanyaare, idwe ka Sikeba kame oudo obedo Ngatel Josaseredoti me Iyudayan oudo tie gida timo kamanoni.

¹⁵Do tipo arac oko dwoko ne gi be, “Ango angeo Yesu, doko angeo Paulo da, do wun alu?”

¹⁶Di icuo kame bin tie kede tipo arac nono oko lepun di eko somo i kom gi kede gero atek, di teko mere oko bwono mergi, omio kiko wokun ki ot di kiko ringo nono abongo igoen kede aporeso i kom gi.

¹⁷Jo dedede kame bin bedo Epeso oko winyo kop noni, Iyudayan karacel kede Jogurik; lworu oko mako gin dedede, di jo oko tingo nying Rwot Yesu malo.

¹⁸Jo atot da kikom jo kame oudo oyei Kirisito oko bino di kituco tim gi kakaler.

¹⁹Di jo mogo kame oudo timo tangu me jwok, oko koko itabun gi dedede karacel, di kiko wango gi i nyim jo dedede; di do kiko maro wel sente me itabun kame kiwango oko romo ogap me siliba tutumia otkany.

²⁰Mano oko mino kop ka Rubanga oko meede kede nyai, doko di etek adikinicel.

Atugatuga i Epeso

²¹Ingei gigi timere, Paulo oko moko tam mere pi ot beo ki Makedonia kede Akaya, di eko kato Yerusalem. En oudo ewaco be, “Ingei bedo kuno, miero anen be atuno Roma da.”

²²Di do ingei en oro cuo mogo are kame oudo konye, Temeseo kede Erasito, pi ot Makedonia, en ber eko dong bedo Esia pi kare moro acecek.

²³Tetu kare nono, arubaruba adwong oko bedo tie i kom kop kame mako Yongayo ka Rwot.

²⁴Pien oudo icuo moro kame obedo ngatet mwola, kame nyinge Demeterio, oudo bin timo iroro me siliba ne rubanga adako kame nyinge Atemi. Doko tic mere nono oudo kelo sente atot ne jotet.

²⁵En eko koko jo nogi dedede karacel kede jo icegun kame oudo timo gida tic acel nono, di eko waco ne gi be, “Jo na, wun ingeunu kiber be tic wa ni en kame wan oudunu kiye lim.

²⁶Aso nan wuda iwinyunu, doko inenunu be Paulo noni otieko supo cuny jo di eko loko jo atot tenge di ewaco be rubangan kame kotimo kede cing likame obedo rubangan. En etimo man likame i Epeso kenekene, do ebuco tieko Esia lung.

²⁷Aso, gikame rac en ine be, likame cat wa noni kenekene en kame nyinge bino dubere, do kiton tempulo me rubanga adwong adako kame nyinge Atemi da kony



mere bino bedo li, doko da cengemogo kobino kwanye tenge ki deyo mere da, en kame koworo i Esia kede i piny lung.”

²⁸Kakame kiwinyo kede kamano, cuny gi oko wang, di kiko cako woo di kiwaco be, “Atemi me Joepeso en kame dwong!”

²⁹Man oko mino atotolun oko bedo i bomba lung, di kiko mako Gayo kede Arisitaku kame oudo obedo jo me Makedonia, kame bin upere kede Paulo, di kiko ware kede gi kionyarokaracel i ot me cokere me bomba.

³⁰Paulo oudo mito donyo kakame ekodet tie iye, do jo kame bin lubo Kirisito oko dagi ne.

³¹Jodongo jowote mogo me adul me Esia da bin oko cwano ne kop, di kingangao en be kur ejal kome pi ot kacokere me bomba.

³²Jo oko donyo woo; mogo woo pi gini, apat mege pi gica, pien oudo cokere do ototolun, doko jo atot kikom gi oudo kwia gikame omio gi kicokere karacel.

³³Jo mogo i ekodet oko tamo be Alekesanda ngat kame bin Iyudayan opeo okelo i nyim gi en kame oudo won kop. Di Alekesanda oko tingo cinge malo di edidio gi be ber kilingi, pien oudo emitto ber eda mino pido mere i nyim ekodet.

³⁴Do kakame ekodet oniang kede be Alekesanda oudo obedo Ngayudaya, gin dedede kiko donyo lelemo kede dwan amalo pi isawan aromo bala are be, “Atemi me Joepeso en kame dwong!”

³⁵Kakame kalani kame pugo bomba otieko mino kede jo oling, en eko waco ne gi be, “Joepeso jowota, ngai kikom wu kalikame ngeo be bomba me jo me Epeso en kame kogwoko iye tempulo ka Atemi, rubanga adwong, doko da di kogwoko iye kidi kame koworo, kame bin opoto ki malo?”

³⁶Bala kite kame inenunu kede be gigi likame ngatamoro karuno dagi, wuda poore do ilingunu, di ikounu weko timo jame kede mielkom.

³⁷Nen nan wun ikelunu jogi kan, jo kalikame oyako gimoro ki tempulo wa, doko likame kicao rubanga wa da.

³⁸Aso, ka Demeterio kede jotet mege en kame tie kede ingungur i kom ngatamoro, kapido tie, doko jopug da tie; wek gin kipidere.

³⁹Do ka kop ace en kame wun itienunono, mano wan obinunu tieko i cokere wa me nakanaka.

⁴⁰Wan nan otienunono i peko, pien koromo pido wa pi kelo logologo i ceng me tin, do di likame otienunono kede tien kop moro kame oromo cungo iye pi kelo logologo noni.”

⁴¹Ingei yamo kope nogi, en eko do peruno jo.

Tice 20

Paulo Owelao Makedonia kede Akaya



¹Ingei logologo jik, Paulo oko lwongo jo kame bin lubo Yesu di eko dino cuny gi kede kope mogo, eko moto gi di do en eko yai eoto Makedonia.

²Kakame etieko bebeo kede i adulon me kuno, di emio gi tekcury, en eko do kato Guris,

³eko bedo kuno pi dwete adek. Do kakame Iyudayan otimo kede iik me mito neke i kare kame oudo eyapuno yai kede pi ot Siria, en eko moko tam mere pi dok di ebeo ki Makedonia.

⁴En bin eko upere kede Sopata me Beroa wot ka Puro, karacel kede Arisitaku kede Sekundo, kame oudo obedo jo me Tesalonika, kede Gayo me Derube, kede Temeseo, karacel kede Tukiko kede Toropimu, gin jo me Esia.

⁵Jo nogi oko telo ne wa yongayo di kiko donyo daro wa ki Turoa.

⁶Ingei ceng me ebaga me Mugati kame Arup li kiye, wan oko yai ki Pilipi, oko kwang pi ceng kany di do oko tuno but gi i Turoa, kakame wan oko bedo iye pi ceng kanyaare.

Ajikini me Paulo Welao Turoa

⁷Ceng Sabiti di wan oudo ocokere karacel pi turo mugati me anywaka, Paulo oko yamo kede gi di oudo etie kede tam me yai oru mere; en eko meede kede yamo mere nono tuno i dier iwor.

⁸Italan atot oudo tie liel i agola me malo kakame wan oudo ocokere iye.

⁹Atin awobi moro kame nyinge Eutiko oudo tie bedo i dirisa kunono. Di Paulo oudo pwodi tie meede kede yamo mere, nino oko cako kwalo awobi nono, tuno kede di do en eko nino atwal, di eko bulucar epoto piny yai ki malo ki ot me adek me goropa; jo oko ot pi kwanye di kiko ude etieko to.

¹⁰Do Paulo oko wok piny eko gungo bute, di eko gwake di ewaco be, “Kur ibedunu kede par, pien pwodi ekuo.”

¹¹Paulo oko dok malo i goropa, eko turo mugati eko camo, di eko donyo yamo kede gi tuno piny ru, di do eko yai ot.

¹²Gin di do kiko tero awobi nono di ekuo, di cuny gi okwei adikinicel.

Paulo Oyai ki Turoa Eoto Miletu

¹³Do wan oko cako ot anyim i emeri, di oko kwang ooto Asos, di oudo otie kede gen me kwanyo Paulo ki kuno, piento en oudo eiko kamanono pi en beno i ooko ki itela.

¹⁴Kakame eriamo kede wa i Asos kuno, wan oko mine edonyo i emeri, di oko ot tuno Mitilene.

¹⁵Kikano, oko kwang oyai ki kuno di oko tuno kakame pimere kede Kios ceng alubo mere. Oru mere oko tuno Samos; ceng alubo mere di do oko tuno Miletu.



¹⁶Pien Paulo oudo omoko tam mere pi kwang naco Epeso, tetekeny kur eter kare alac Esia. Pien oudo etie susunyo ot Yerusalem, ka twerere wek koto ceng me Pentekoti ude kuno.

Yamo ka Paulo me Peruno Joadongo me Epeso

¹⁷I kare kame Paulo oudo pwodi tie kede Miletu, en eko cwano kop Epeso, di elwongo joadongo me ekodet me jokirisito pi bino bute.

¹⁸Kakame kituno kede bute, en eko waco ne gi be, “Wuda kikomu ingeunu epone kame ango abedo kede wu kare go dedede, cako i ceng kame ango atuno kede Esia.

¹⁹Ango oudo atio ne Rwot kede mwolo adwong kede di akok akoka, doko di abeo i atama kame oudo opoto na pi kite kame Iyudayan oiko kede tam me neka.

²⁰Doko da wun ingeunu ekite kalikame ango alworo tucu ne wu kede gi dedede kame romo konyo wu, di apwonyo wu obe i dier jo kede ot i ot.

²¹Ango oudo apwonyo Iyudayan karacel kede Jogurik be miero gin kiswilaro i nyim Rubanga, doko di kiko yei Rwot wa Yesu Kirisito.

²²Doko nenunu, ango nan Tipo Kacil tie dina ot Yerusalem, do di likame angeo gikame bino timere na ki kuno.

²³Kenekene gikame Tipo Kacil otieko kwenyaro ango iye i bomba acelacel en ine be, kobino rwaka i otkol kede mina neno can adwong adikinicel.

²⁴Do ango likame atero kuo na bala gikame tie kede kony, arabo gikame pire dwong kibuta, kwanyo kenekene ka koto ango angetakino tic kame Rwot Yesu bin omia, me tucu ejiri me kisa ka Rubanga.

²⁵” Doko nan nenunu, ango atieko ngeno be wun dedede jo kame ango abedo tucu ne wu kop me Ajakanut ka Rubanga, likame ibinunu neno wanga bobo.

²⁶Pi mano, ango tin awaco ne wu be, remo wu likame bino dwogo i wia,

²⁷pien ango likame bin alworo tucu ne wu gi dedede kame Rubanga oudo oiko pi timo.

²⁸Gwokerenu kenu kede igwokunu romini ka Rubanga, kame Tipo Kacil oketo wu pi bedo jogwok gi, pi gwoko jo koyei Rubanga, jo kame en eloko odoko mege kede remo ka mere kikome.

²⁹Ango angeo be ingei ango yai, ipeon ager oyaro bino i diere wu, gin likame kibino weko aweka romini ka Rubanga.

³⁰Doko jo mogo bino wokun kibutu, kame bino yamo kop me angalo pi loko tam me jokirisito but gin.

³¹Pi mano, bedunu di igwokerenu, di iyutununu be, ango atieko mwakini adek di acoro wu iceng kede iwor, di pige wanga cwer.



³²” Doko nan ango aweko wu i cing Rubanga, kede i kop me kisa mere, kop kame twero gero wu di eko mino iudunu kabedo i dier jo dedede kame Rubanga otieko lonyo.

³³Ango bin likame angobelo siliba, saabu arabo igoen ka ngatamoro.

³⁴Wuda kikomu ingeunu be cinga gi en kame omia audo jame kame oudo amito, karacel kede jo kame oudo bedo keda.

³⁵Ango atieko nyuto ne wu i gi dedede be, miero itimunu tic kamanoni, me wek ikonyunu jo agoro, di iyutununu kop kame bin Rwot Yesu owaco be, ‘Mino tie kede winyo kalamo gamo.’ “

³⁶Ingei en waco kamano, Paulo oko riondiko piny, di eko lego kede gin dedede.

³⁷Gin dedede kiko kok, di kiko donyo agwakugwakun kede Paulo di kinote.

³⁸Gin oudo kitie kede cwercury, twatwal mere pi kop kame Paulo oudo owaco be gin likame kibino medo neno wange bobo. Di do kiko nyamaro en i emeri.

Tice 21

Paulo Ooto Yerusalem

¹Ingei wan pokere kede gi di oko kwang, oko rieno yongayo tuno Kosi. Oru mere di oko tuno Rode, oko yai ki kano oko tuno Patara.

²Kikano oko udo emeri kame oudo tie ngolo loka Poenisia, oko donyo iye di oko ot.

³Kakame oudo oneno do kede Sipuro, oko bapar oweke i bad tetu ngodal, di oko kwang tuno Siria, oko cungo i edoket me Taya, pien oudo koyaro tako jame kame tie i emeri kuno.

⁴Wan oko mono jo koyei Kirisito, oko bedo kede gi pi ceng kanyaare. Tipo Kacil oko telo gi di kiko waco ne Paulo be kur eoti Yerusalem.

⁵Bin di do kare wan me bedo kuno otiek, wan do oko yai pi meede kede ot wa. Di gin dedede kede mon karacel kede idwe gi kiko nyamaro wa tuno ooko me bomba. Wan dedede oko riondiko piny i dog nam oko lego, di do oko motere me pokere.

⁶Wan oko donyo i emeri di do gida kiko dok paco.

⁷Kakame oyai kede ki Taya, oko tuno Potolemai, di oko motere kede jo koyei Kirisito di do ber oko bedo kede gi pi ceng acel.

⁸Oru mere oko pokere kede gi, di oko ot tuno Sisiria, oko donyo i ot ka Pilipo, ngatuc ejiri, kame oudo bin obedo ngat acel kikom jo kanyaare ka, di do wan oko bedo kede en.

⁹Pilipo oudo tie kede idwe anyira mege ongwon kalikame pwodi onyomere, kame bin tie kede giamia me imurai.



¹⁰ Di oudo wan pwodi otie meede bedo kuno pi ceng mogo, enabi moro kame nyinge Agaba bin oko bino ki Yudea.

¹¹En eko bino but wa, di eko kwanyo ausi kame bin Paulo tweo kede egoe i piere, eko tweno kede cing Paulo kede tiene, di eko waco be, “Tipo Kacil owaco be, ‘Epone noni en kame Iyudayan me Yerusalem bino tweno kede won ausi noni, di kiko mine i cing jo kalikame Iyudayan.’ “

¹²Kakame wan owinyo kede kamano, wan karacel kede jo kame oudo tie kuno di oko ngangao Paulo be kur eot Yerusalem.

¹³Paulo oko dwoko be, “Nyo kame wun itienu timo, mam itienu koko kede dubo cunya? Ango kom atieko iikere me bedo i otkol, akadi kiton to i Yerusalem pi nying Rwot Yesu.”

¹⁴Kakame do edagi yei kede kop wan, wada di do oko ling, di oko waco be, “Wek do gikame Rubanga mito timere.”

¹⁵Ingei ceng nogo, wan oko iikere di oko ot Yerusalem.

¹⁶Jo mogo me Sisiria kame oyei Kirisito oko upere kede wa, di kiko tero wa paka i ot ka Minasoni me Sipuro, ngat kame bin ogeo lubo Yesu sek. En nono kame wan oudo miero obed ture.

Paulo Owelao Yakobo

¹⁷I kare kame otuno kede Yerusalem, jo koyei Kirisito oko gamo wa kede kilel.

¹⁸Oru mere Paulo oko upere kede wa oko ot but Yakobo; joadongo dedede oudo tie kuno.

¹⁹Ingei moto gi, Paulo oko cako tatamo ne gi kop dedede i yore i yore, i kom gikame Rubanga bin otimo i dier jo kalikame Iyudayan i tic kame en etimo.

²⁰Kakame kiwinyo kede kop nono, kiko mino deyo but Rubanga. Gin di kiko waco ne Paulo be, “Omin wa i Kirisito, neningo ber Iyudayan jo tutumian kede tutumian kame otieko yei Kirisito, doko gin dedede kiketo cuny gi lubo Iswilia wa.

²¹Kotieko waco ne gi kop i komi, be in itie pwonyo Iyudayan dedede kame bedo i dier jo kalikame Iyudayan pi weko lubo Iswilia ka Musa, di iwaco ne gi pi weko kepo idwe gi kede pi weko lubo itok wa.

²²Nan do nyo kame poore atima? Pien ateteni gin kiyaro winyo be in itieko bino.

²³Pi mano, in do miero itim gikame wan oyaro waco ni. Wan otie kede cuo ongwon kame otieko ikwong pi weko lielo wi gi;

²⁴ter jo nogo i ot di iko lonyere karacel kede gi, di in iko mino cul pi lonyere gi, tetekeny kiliel wi gi. Mano bino mino jo dedede ngeo be kop dedede kame oudo kotatamo ne gi i komi likame tie kop me ateni, do in gire ilubo Iswilia wa.



²⁵ Do i kom kop kame mako jo kalikame Iyudayan kame oyei Kirisito, wan otieko cwano ne gi baluwa kede tam kame wan omoko be miero kiwek camo gikame koyalo ne cal jwogi, kede camo remo, kede camo gikame kodeo adea, doko poore kiwek timo tim me caro.”

²⁶Oru mere Paulo oko tero cuo nogo, di eko lonyere kede gi. Di do en eko ot i tempulo di eko mino ngec i kom awene kame lonyere bino cobere kede, di oko bino mino giayala pi ngat acelacel kikom gi.

Komako Paulo i Tempulo

²⁷Di do bin ceng kanyaare oyapuno tiek, Iyudayan mogo kame bin oyai ki Esia, kame bin oneno Paulo i tempulo, oko supo jo i kome di kiko make

²⁸di kilelemo be, “Okwecunu jo me Isirael, konyunu wa! Icuo ni en kame tie pwoyo jo i kabedo dedede pi dagi jo me Isirael, kede Iswilia wa, kede kiton tempulo kan da. Doko medo i wi mano, etieko kelo Jogurik i tempulo, di eko do munao kabedo kacil noni.”

²⁹ Pien gin oudo kineno Toropimu Ngaepeso di upere kede Paulo i bomba, omio kiko paro be Paulo oudo okele i tempulo.

³⁰Di do bomba lung oko rubere, di jo oko bele ringo karacel, kiko mako Paulo, di kiko wane kitere ooko me tempulo, esawa nono di kiko cego ikekon me tempulo.

³¹Kakame oudo kitie mito neke kede, kop oko tuno ne ngadwong me isirikalen me Roma be Yerusalem lung oudo otieko rubere.

³²Cucuto nono en eko kwanyo isirikalen kede jodongo gi, di kiko ringo kunono but gi. Kakame kineno kede ngadwong me isirikalen nono, kiko weko bungo Paulo.

³³Di ngadwong me isirikalen nono oko ot mako Paulo, di eko waco ne isirikalen mege pi twene kede irikoi are. En eko penyere be ngai inonono kede nyo kame oudo etimo.

³⁴Jo mogo kame tie i ekodet oko donyo yamo kope kalikame riamo. Kite kame oudo likame etwero ngeno kede kop me ateni pi woo me jo, omio en eko waco ne isirikalen mege be kiter Paulo i paco gi me isirikalen.

³⁵Kakame etuno kede kayito i ot, isirikalen oko tinge atinga pi gero me jo;

³⁶pien ekodet oudo tie lubo gi di kilelemo be, “Nekenu!”

Paulo Omio Pido mere

³⁷Kakame oudo kiyapuno tuno kede i paco me isirikalen, Paulo oko penyo ngadwong me isirikalen be, “Itwero yei na waco ni kop moro?” En eko penyo Paulo be, “Benyo, ingeo leb Gurik?”

³⁸Benyo, likame in en kame dano me Misiri kame nyoronyoro ni okelo arubaruba di iko telo cuo tutumia ongwon kame jonek iko tero i tim?”



³⁹Paulo oko dwoko ne be, “Ango abedo Ngayudaya me Taruso, anywali me bomba kame pire dwong i Kilikia. Ango akwai iyei na yamo kede jo.”

⁴⁰Kakame koyei ne kede yamo, Paulo oko cungo kayito i ot, di eko didio jo kede cinge be ber kilingi. Kakame kiling kede, en eko yamo kede gi i leb Eburania di ewaco be:

Tice 22

¹” Imiegu na kede joapapi na, winyunu ber pido kame nan akelo i nyimu.”

²Kakame kiwinyo kede Paulo di tie yamo kede gi i leb Eburania, kiko do temuno ling kiber. Di Paulo oko waco be,

³ “Ango Ngayudaya, konywala i Taruso, bomba kame tie Kilikia, di Gamaliel en kame oko pwonya i bomba noni me Yerusalem. Apwonyere iepone me daro Iswilia ka joakwari wa kiber, di aketo cunya i kom Rubanga bala kite kame wuda dedede itimunu kede i kare kanataman.

⁴Ango atidilo jo kame bin lubo Yongayo noni, tuno kede neko gi da. Atweo cuo kede mon di arwako gi i otkol.

⁵Ngatel Josaserdoti kede kansulo me joadongo me piny twero jurao ango. Bin ango agamo baluwa kibus gin, kame kowandiko but imiegu kame tie Damasiko, di ango ako ot kuno pi mako jo kame lubo Yongayo noni, di ako tweno gi ako kelo gi Yerusalem me wek mi gi alola.

Paulo Otatamo Epone me Lokere mere but Yesu

(Tice 9.1-19; 26.12-18)

⁶ Kakame ango oudo atie ot kede di do anoko Damasiko, tetu esawa kanyape me iceng, asara moro atek kame owok ki malo oko ngoole cara.

⁷Ango ako poto piny di ako winyo dwan kame waco na be, ‘Saulo, Saulo, pinyo komio in itie tidilo ango?’

⁸Ango ako dwoko ne be, ‘In ngai, Rwot?’ En eko waco na be, ‘Ango en Yesu me Nasaret kame in itie tidilo.’

⁹Jo kame bin upere keda oneno asara nono, do likame kiko winyo dwan ngat kame oudo tie yamo keda.

¹⁰Ango di ako penye be, ‘Rwot, nan do atim nyo?’ Di Rwot oko dwoko na be, ‘Yai iko ot Damasiko di oko bino waco ni gi dedede kame koiko pi in timo.’

¹¹Kite kame oudo likame akaruno neno kede piny pi rieny me asara nono, jo kame bin upere keda nogo oko mako cinga di kiko pena kikela tuno Damasiko.

¹²” Icuo moro kame nyinge Anania, dano kame bin woro Rubanga, doko di elubo Iswilia wa oudo tie kuno. Iyudayan dedede kame bin bedo Damasiko oudo pwoye be eber.



¹³En eko bino buta eko cungo i ngeta di eko waco na be, ‘Omina Saulo, cak bobo neno piny.’ Esawa nono di wanga yabere, di ako nene.

¹⁴Anania oko waco na be, ‘Rubanga ka joakwari wa otieko yeri pi ngeno gikame en emito, pi neno Dano Kopoo kede pi winyo kop kame wok ki doge.

¹⁵Pien in ibino bedo ijura mere but jo dedede i kom gikame ineno kede kame iwinyo.

¹⁶Nan do itie daro nyo? Yai batiso in, di ilwongo nying Rwot me wek lwok dub ni.’

Ooro Paulo but Jo kalikame Iyudayan

¹⁷” I kare kame angu bin adwogo kede Yerusalem, ako neno gianyuta di oudo atie ilega i tempulo.

¹⁸Aneno Rwot di waco na be, ‘Susunyo yai tenge ki Yerusalem, pien jogi likame oyaro yei kop kame in itie yamo i koma.’

¹⁹Angu ako dwoko ne be, ‘Rwot, gin ikom gi kingeo be angu bin abungo jo koyei in i sinagoga acelacel, doko di arwako gi i otokol.

²⁰Doko i kare kame koonyo kede remo ka Sitepano, ngat kame oudo obedo mujura ni, angu da oudo atie cungo kanono di apwoyo tim gi nono, doko di adaro igoen me jo koneke.’

²¹Di en eko waco na be, ‘Yai ioti, pien angu ayaro cwani kakabor but jo kalikame Iyudayan.’ “

²²Jo oudo obedo ciko yit gi winyo yamo ka Paulo tuno kede i kop me ajikini noni. Di do kiko donyo redo di kiwaco be, “Poore rweny kede epone me dano ni ki lobo kan! Pien likame poore ne kuo.”

²³Kakame oudo gin kicelakino kede di kikwito igoen gi malo, doko di kidunyo apua,

²⁴ngadwong me isirikalen oko ciko be ter Paulo i paco me isirikalen. En eko mino dwan be dae di kopepenyo en pi udo niang i kom gikomio jo oudo tie woo i kome kamano.

²⁵Do kakame gin oudo kitieko twene kede auno, Paulo oko penyo ngadwong me isirikalen kame oudo tie cungo kuno be, “Iswil yei ne wu dano ngat kobedo Ngaroma i anywali mere, doko da di pwodi likame kongolo ne kop?”

²⁶Kakame ngadwong me isirikalen owinyo kede kop noni, en eko ot but ngadwong kame lo isirikalen dedede di eko penye be, “Nyo kame in imito timo? Icuo ni obedo anywali me Roma.”

²⁷Ngadwong kame lo isirikalen dedede oko bino but Paulo di oko penye be, “Waca ber, in ibedo anywali me Roma?”

²⁸Paulo oko dwoko ne be, “Ebo.” Ngadwong kame lo isirikalen oko dwoko ne be, “Angu aculo sente alac pi bedo anywali me Roma.” Paulo oko waco ne be, “Do angu konywala iye anywala.”



²⁹Cucuto jo kame bin tie mito pepenyo en oko sarakin oweke; kiton ngadwong kame lo isirikalen da oko doko lwor, pien oudo eniang be oudo etweo Paulo, dano kame obedo anywali me Roma.

Kotero Paulo i nyim Kansulo

³⁰Oru mere, ngadwong kame lo isirikalen dedede oudo mito ngeno nyo kikokome komio Iyudayan opido Paulo. En eko gonyo Paulo di eko ciko jodongo me josaseredoti kede kansulo lung pi ariamakin. Di do en eko tero Paulo di eko keto i nyim gi.

Tice 23

¹Paulo oko ngino jo kame oudo tie i kansulo, di eko waco ne gi be, “Imiegu na, ango cunya ngeo kakaler be, ango abedo kede kuo aber i nyim Rubanga tuno tin.”

²Di Anania Ngatel Josaseredoti oko waco ne jo kame oudo tie cungo i nget Paulo be bap doge.

³Di Paulo oko waco ne be, “Ida Rubanga bino bapi, in apama kame kopuo kede erangi atar. Mam in itie bedo pi ngolo nango kop di ilubo Iswil? Do bobo di in ngat acel nono imio jo bapo doge, gikame Iswil dagi.”

⁴Jo kame oudo tie cungo kuno oko waco be, “Mam in itie nywaro Ngatel Josaseredoti ka Rubanga?”

⁵Di Paulo oko dwoko be, “Imiegu, ango oudo likame angeo be en ebedo Ngatel Josaseredoti; pien bin kowandiko be, ‘Likame ipoore yamo kop arac i kom ngat kame telo jo ni.’ “

⁶Do kakame Paulo oniang kede be jo oudo tie i ikodeta are, ekodet me Isadukayon kede me Iparisayon, en eko yamo kede dwan amalo i kansulo be, “Imiegu na, ango abedo Ngaparisayo, anywali me Iparisayon; kotie pida pi bedo kede gen i iyarun me jo oto.”

⁷Kakame eyamo kede kamano, piem oko yabere i dier Iparisayon kede Isadukayon, di do kansulo oko pokere ire.

⁸Pien Isadukayon yamo be iyarun likame tie, doko akadi imalaikan arabo tipere da likame tie; do Iparisayon yei be gigo dedede tie.

⁹Di do icelakin atek oko cakere; di jopwony me Iswil mogo me ekodet me Iparisayon oko cungo malo di kimoko be, “Wan likame oudo kop moro arac i kom icuo ni. Kara ber ka malaika amotoko tipo en koyamo kede, udo raco mere nyo?”

¹⁰Kakame gero odonyo kede i piem nono, ngadwong kame lo isirikalen dedede oko bedo kede lworo di eparo be cengemogo oudo kitwero nyinyilo Paulo. Omio en eko ciko isirikalen mege be poore kiwok piny di kiko kwanyo Paulo kibut gi tetek, di kiko tere i paco me isirikalen.



¹¹Iwor kame lubo mere Rwot oko cungo i nget Paulo di oko waco ne be, “Bed kede nwangcuny, pien bala kite kame itieko mino kede ijura i koma i Yerusalem, miero itim kamanono da i Roma.”

Koiko Kop me Neko Paulo

¹²Kakame piny oru kede, Iyudayan oko iiko tam di kikwongere be likame kiyaro camo arabo mato gimoro tuno di kineko Paulo.

¹³Jo kame bin oiko tam noni, oudo kalamo ot ongwon.

¹⁴Gin kiko ot but jodongo me josaserdoti kede joadongo me piny di kiko waco ne gi be, “Wan otieko kwongere kitek be likame oyaro bilo gimoro tuno di oneko Paulo.

¹⁵Pi mano, wun karacel kede kansulo, cwaunu kop but ngadwong kame lo isirikalen dedede me wek kel Paulo piny butu, di ineno bala wun iyarunu ngingico tien kop mere kiber. Wan otieko iikere pi neke di pwodi likame enoko wu.”

¹⁶Wot amin me Paulo oko winyo kop gi me ot daro Paulo ki yongayo; en eko ot di eko donyo paco me isirikalen di eko waco ne Paulo kop nono.

¹⁷Paulo oko lwongo ngadwong me isirikalen acel, di eko waco ne be, “Ter atin awobi ni but ngadwong kame lo isirikalen dedede, pien etie kede kop kame emito waco ne.”

¹⁸Kikano en eko kwanyo atin awobi nono etero but ngadwong kame lo isirikalen dedede, di eko waco ne be, “Mabus kame nyinge Paulo nono olwonga, di eko kwana be akel atin awobi noni buti, pien etie kede kop kame emito waco ni.”

¹⁹Ngadwong kame lo isirikalen nono oko mako cing awobi nono eko nyiko kede tenge, di eko penye i mung be, “Kop nyo inonono kame in imito waco na?”

²⁰Atin awobi nono oko waco ne be, “Iyudayan otieko yei kwani pi kelo Paulo i nyim kansulo diki di ineno bala gin kimito pepenyo kop i kome odocon.

²¹Do in kur iyei kop gi; pien cuo kame kalamo ot ongwon kikom gi bino kine i yongayo. Gin kitieko kwongere be likame kiyaro camo akadi mato gimoro, tuno kede di kineko Paulo. Nan gin kitieko iikere kitie do kuro kop kame yai kibuti.”

²²Ngadwong kame lo isirikalen dedede nono oko ciko awobi nono be, “Kur iwac ne ngatamoro be in itieko kwenyaro ango i kom kop noni.” Di do en eko weke eoto.

Kocwao Paulo but Pelik Ngapug

²³Di do ngadwong kame lo isirikalen dedede oko lwongo jodongo are me isirikalen, di eko waco ne gi be, “Nat esawa adek me iwor, iikunu isirikalen tol are, kede ace kame ringo kede asigiran da ot kanyaare, karacel kede wegi tongini tol are, di ikounu mino gi kioti tuno Sisiria.

²⁴Iikunu ne Paulo da asigira me ot, di ikounu tere tuno but Pelik ngapug abongo peko moro.”

²⁵Di en eko wandiko baluwa kame mako kop noni be,



- ²⁶” But Adwong me awora Pelik ngapug, ango Kulaudio Lusua, amoti.
- ²⁷Iyudayan oudo omako icuo ni, doko oudo kiyapuno neke da. Ango kede isirikalen oko ngoole i kom gi, di oko mane ki cing gi, pien oudo atieko niang be en ebodo anywali me Roma.
- ²⁸Ango ako mino kokele i nyim kansulo gi, pien oudo amito ngeno tien kop kame gin kitie pide iye.
- ²⁹Ango ako udo be gin oudo kitie pide i tien kop moro kame mako iswil gin, do likame tie gimoro kame romo mino kongolo ne kop me to arabo twene.
- ³⁰Aso, kakame kowaco nango kede be oudo kotie iiko tam me neke, cucuto ango ako cwane buti, di aciko jo kame tie pide pi tatamo nin gikame kitie pide iye.”
- ³¹Kikano isirikalen oko kwanyo Paulo iwor bala kite kame oudo kociko gi kede, di kiko tere tuno Antipaturi.
- ³²Oru mere gin kiko dok paco me isirikalen kiweco wegi asigiran pi meede ot kede Paulo.
- ³³Kakame kituno kede Sisiria di kiko mino ngapug baluwa nono, kiko nyuto Paulo da bute.
- ³⁴Ingei somo baluwa nono, en eko penyo Paulo nying adul me tur gi. Kakame eniang kede be Paulo obedo dano me Kilikia,
- ³⁵en eko waco ne be, “Ango abino winyo kop nin kame jo kame tie pidi otuno.” Di en eko ciko be isirikalen dar Paulo i ot ka Abaka Erode.

Tice 24

Kopido Paulo

- ¹Di ceng okato kany, Anania kame oudo obedo Ngatel Josaseredoti oko bino kede joadongo mogo me piny, karacel kede won iswil kame nyinge Teretulo. Di kiko mino kop kame kipido kede Paulo i nyim ngapug.
- ²Kakame kolwongo kede Paulo i nyim ngapug, Teretulo oko cako pide kaman: “Adwong me awora Pelik, wan otie kede mulem adwong pi in, doko in en kame imio kokelo alokaloka abeco i piny wa kan.
- ³Wan otieko gamo gi nogi kede pwoc adwong i yore dedede kede i kabedo dedede.
- ⁴Do di likame ameede dubo kare ni, akwai itim mwol iwiny kwac wa pi esawa moro atitidi.
- ⁵Wan otieko udo be icuo ni tie kede elol, doko tic mere en cako arubaruba i dier Iyudayan i piny lung. En ebodo ngatel me ekodet moro me jo me Nasaret.
- ⁶En etamo munao tempulo da, do wan oko make,



⁷(do Lusia, kame obedo ngadwong kame lo isirikalen dedede oko bino kede gero adwong, di eko mane ki cing wan, di ewaco ne jo kame oudo pide pi bino buti.)

⁸Ida i komi ka ipepenyo en, ibino niang kibute gi dedede kame wan otie pide iye.”

⁹Iyudayan oko donyo i pido nono di kimoko be kope nogo tie kamanono.

Pido ka Paulo i nyim Pelik

¹⁰Kakame ngapug oporo kop kede cinge ne Paulo be egei yamo, Paulo oko waco kaman: “Kite kame ango angeo kede be in itieko bedo ngangolkop i piny wa kan pi mwakini atot, ango ayaro nan pido di atie kede yomcuny.

¹¹Bala kite kame ida ibino udo kede ateni mere, pwodi likame ceng tomon kiwie are okato cako i ceng kame ango aoto kede Yerusalem pi woro Rubanga,

¹²di likame gin kiko wuda di atie piem kede ngatamoro arabo supo ekodet moro i tempulo arabo i sinagoga, amotoko i bomba.

¹³Doko da likame kitwero nyuto ni be, gikame gin kipida iye tie me ateni.

¹⁴Do ango ayei i nyimi be, ango aworo Rubanga ka joakwari wa di alubo Yongayo kame gin kitero be obedo ajange moro, doko ango ayei gi dedede kame tie i Iswil arabo kame inabin owandiko.

¹⁵Atie kede gen i kom Rubanga, kame gida nogi ikom gi kiyei, be yaruno me jo opoore kede kalikame opoore bino bedo tie.

¹⁶En komio ango nakanaka atamakino kede teko na dedede pi neno i cunya be, ali kede raco moro i nyim Rubanga kede i nyim jo da.

¹⁷“Aso, ingei mwakini mogo ango nan ako bino pi kelo ne ateker na kony mogo kede kelo giamia na me woro Rubanga.

¹⁸Kakame ango oudo atie timo kede gini, gin kiko wuda i tempulo di atieko lonyere abongo ekodet moro arabo woo. Do Iyudayan mogo kame oyai ki Esia da oudo tie kuno;

¹⁹oudo koto gida kipoore bino i nyimi kan di kiko pida ka kitie kede kop moro i koma.

²⁰Aso ka li, wek jogi ikom gi wac tim arac kame gin kiudo i koma i kare kame ango acungo kede i nyim kansulo,

²¹kwanyo kenekene gikame ango bin awaco di acungo i diere gi be, ‘Tin kotie pida i nyimu kan pi kop kame mako yaruno me jo oto.’ “

²²Do pi kite kame Pelik oudo tie kede ngec odocon i kom Yongayo nono, omio en eko ber peruno gi di ewaco ne gi be, “Ango ayaro ngolo kop wu noni ka Lusia ngadwong kame lo isirikalen dedede obino.”

²³Di en eko ciko ngadwong me isirikalen be gwok Paulo, do di koweko ne kare moro me alakanar, doko kur geng ngawote moro mine kony.



Paulo i nyim Pelik kede Durusila

²⁴Ingei ceng mogo, Pelik oko bino kede dako mere Durusila, kame oudo obedo Ayudayat. En eko cwano kolwongo Paulo obino bute, di kiko donyo winyo kop kame epwonyo i kom yei Yesu Kirisito.

²⁵Kakame Paulo otatamo kede kop kame mako ngolo kop me ateni, dino mit me kom, kede ngolo kop me ajikini waru, lwooro oko mako Pelik di eko waco ne Paulo be, “Ber kong ot tenge, ka audo kare abino bobo lwongi.”

²⁶Bobo da Pelik oudo tie kede gen be Paulo romo mine sente moro, omio en eko donyo lwongo Paulo bute dikdik di kinywako yamo.

²⁷Do ingei mwakini are, Porukio Pesito oko lunyo wang Pelik; do pi mito yomo cuny Iyudayan, Pelik oko weko Paulo odong i otkol.

Tice 25

Paulo Ojuro Pido but Kaisari

¹Kakame Pesito otuno kede i adul mere kame epugo, en eko tieko ceng adek di do eko yai ki Sisiria eoto Yerusalem.

²Jodongo me josaseredoti karacel kede joadongo me Iyudayan oko tatamo ne raco ka Paulo, di kiko kwano cunye

³pi timo ne gi bero, emi ter Paulo Yerusalem do di gin oudo kitieko iikere pi ot kine i yongayo pi neke.

⁴Do Pesito oko dwoko ne gi be kotie gwoko Paulo i otkol i Sisiria, doko eda kikome etie mito ot kuno i kare iyapiyapi.

⁵En eko waco be, “Pi mano, wek joadongo wu upere keda kuno, di gin kiko pide, ka tie gimoro arac i kome.”

⁶Ingei bedo kede gi pi kare kalikame kalamo bala ceng kanyauni arabo tomon, Pesito oko yai eoto Sisiria. Oru mere en eko bedo i kom mere me ngolo kop, di eko ciko be kel Paulo.

⁷Kakame Paulo otuno kede, Iyudayan kame bin owok ki Yerusalem oko cungo oluke, di kiko cako kelo pido mogo atot adongodongo i kome, pido kalikame kitwero nyuto ateni gi.

⁸Paulo oko pido be, “Ango likame aturo Iswil me Iyudayan arabo timo raco moro i tempulo amoto ne Kaisari akadi acel.”

⁹Do pien Pesito oudo mito timo bero ne Iyudayan, omio en eko penyo Paulo be, “In imito be teri ot pidi i kope nogi i nyima i Yerusalem?”

¹⁰Do Paulo oko dwoko be, “Ango atie cungo i nyim kom me ngolo kop ka Kaisari, kakame kopooore pida iye; doko da in kikomi ingeo kiber be angu gira likame atimo ne Iyudayan gimoro arac.



¹¹Aso, ka ang'o abedo ngat arac di atimo gimoro arac kame poore mino koneka, ang'o likame ayaro mito be abwot ki to; do ka gikame kitie pida iye tiene li, likame tie ngatamoro kame tie kede twer me jala i cing gi. Ang'o ajuro pido na but Kaisari."

¹²Ingei winyere kede kansulo mere, Pesito oko dwoko ne Paulo be, "In ijuro pido ni be ter but Kaisari; ibino ot but Kaisari."

Kotero Paulo i nyim Aguripa kede Berenike

¹³Ingei ceng mogo, Abaka Aguripa kede Berenike oko bino Sisiria pi gamo Pesito.

¹⁴Di kitieko ceng atot kuno, Pesito oko tero kop kame kopido iye Paulo i nyim abaka di ewaco be, "Tie icuo kame Pelik oweko i otkol.

¹⁵I kare kame ang'o oudo atie kede Yerusalem, jodongo me josaseredoti karacel kede joadongo me Iyudayan oko mina ngec i kom kop mere, di kikwao be ngol ne kop.

¹⁶Do ang'o ako dwoko ne gi be, likame obedo ekite me Joroma pi jalo ngatamoro i cing jo di pwodi likame eriamakin kede jo kame tie pide wang i wang, me wek eda eud kare me pido i kom kope kame kopide iye.

¹⁷Pi mano, kakame gin kicokere kede kan, ang'o likame ako gal, do oru mere ang'o ako bedo i kom na me ngolo kop, di ako ciko be kel icuo nono.

¹⁸Kakame jo kame oudo pide oyai kede malo, likame kiko kelo pido moro arac i kome bala kite kame ang'o audo apar'o be romo timere kede.

¹⁹Do gin oudo kitie kede kope mogo kame kipiemo iye i kom edini gi, kede i kom icuo moro kame nyinge Yesu kame bin oto, do Paulo yamo be ekuo.

²⁰Wia oko cung'o epone kame amoi kede tien kop noni, omio ang'o ako penye ka oudo emito ot Yerusalem me wek ot pide ki kuno pi kope nogo.

²¹Do kakame Paulo okwao kede be ber gwoke i otkol di kodaro kede kite kame ngapug adwong bino ngolo kede kop nono, ang'o di do ako ciko be ber gwoke tuno kede ka ang'o acwae but Kaisari."

²²Aguripa oko waco ne Pesito be, "Ang'o kikoma amito winyo yamo me icuo nono." Pesito oko dwoko ne be, "Ibino winyo yamo mere diki."

²³Oru mere Aguripa kede Berenike oko bino kede angosibib adwong, kiko donyo i ot me winyo kop, di kiupere kede jodongo me isirikalen karacel kede jo kame koworo i bomba. Pesito oko mino kokelo Paulo kanono,

²⁴di eko waco be, "Abaka Aguripa karacel kede jo dedede kame tie kede wa kan, inenunu icuo kame Iyudayan dedede obako dog gi buta pire i Yerusalem kede i kan da, di kilelemo be kuo mere poore jiki.

²⁵Do ang'o ako udo be likame etimo gimoro arac kame romo mino koneke. Aso kite kame en kikome eko juro kede pido mere but ngapug adwong, omio ang'o ako cwane.



²⁶Do ango likame atie kede kop moro kibecokina i kom icuo noni, kame aromo wandiko ne ngadwong na. Pi mano, ango akele i nyimu, do singo twatwal i nyim in Abaka Aguripa, me tetekenya ka wan otieko pepenyo en, ango aromo udo kop moro kame make kame abino wandiko.

²⁷Pien kibuta, eneeni gikame kony mere li pi cwano mabus i nyim ngapug adwong abongo nyuto gikame kopide iye.”

Tice 26

Paulo Opido i nyim Aguripa

¹Aguripa oko waco ne Paulo be, “Nan koyei ni yamo piri keni.” Paulo oko rieno cinge di eko pido kaman:

²” Ango aparo be man obedo winyo na me pido i nyimi, in Abaka Aguripa, i kom kope dedede kame Iyudayan opida iye.

³Pien in iniang kiber itok kede piem mogo kame Iyudayan tie kede. Pi mano, ango akwai idire iwiny pido na.

⁴” Iyudayan dedede ngeo epone me kuo nango, cako i tino na, ekite kame abedo kede i dier jo me ateker na kede i Yerusalem cako ki agege.

⁵ Ka cabo kiyei tucio, gin kibedo ngeno pi kare alac epone kame ango abedo kede bala Ngaparisayo, kame obedo ajange me edini wa kame lubo iswilia wa odocon.

⁶Nan ango acungo kan di kopida pi gen i kom cikere kame bin Rubanga omio but joakwari wa,

⁷kame atekerin wa tomon kiwie are tie kede gen me udo, di kiketo cuny gi woro Rubanga iwor kede iceng. Okwe abaka, gen noni en kame Iyudayan tie pida iye.

⁸Pinyo kara komio wun likame iyeunu be Rubanga yaruno jo oto?

⁹”Ango da kikoma oudo ayei kiber be miero atim gi dedede pi yi pi gengo nying Yesu me Nasaret.


¹⁰Doko da ako timo kamanono i Yerusalem. Jodongo me josaseredoti bin omia twer di ako rwako jo kame yei Kirisito i otkol; doko i kare kame koneko gi kede, ango da oudo agango tam nono.

¹¹Oudo abedo mino gi alola dikdik i sinagogan dedede di atamo dino gi tetek pi bedo kede acae i nying Yesu. Kite kame oudo ango ager kede gi, omio oudo awapo gi kiton i bomban me obukui pi ot tidilo gi.

Paulo Otatamo epone me Lokere mere

(Tice 9.1-19; 22.6-16)

¹²” Kop nono en komio oudo jodongo me josaseredoti oora Damasiko kede akarunikin.



¹³Adwong abaka, kakame oudo atie kede i egudo i dier iceng, ako neno asara kame oudo rieny kalamo ceng di wok ki malo, di etie cara luka karacel kede jo kame oudo upere keda.

¹⁴Kakame wan dedede otieko popoto kede piny, ako winyo dwan moro di penya kede leb Eburania be, ‘Saulo, Saulo, pinyo komio in itie tidilo ango? Iudo lito kame igwere bala diang kame gweo ebela.’

¹⁵Ango ako penyere be, ‘In ngai Rwot?’ Di Rwot oko waco be, ‘Ango en Yesu kame in itie tidilo.’

¹⁶Do yai icungi, pien ango anyutere buti pi yeri bedo ngatic na. Ibino mino ijura i kom gikame otimere, gikame in inena kiye, kede i ace kame abino nyutere kede buti.

¹⁷Ango abino laki ki cing jo me Isirael kede ki cing jo kalikame Iyudayan, jo kame ango atie oori but gi

¹⁸pi yabo wang gi, me wek kilokere tenge ki colo kiko dok i lero, kede ki twer ka Sitani kiko dok but Rubanga. Man bino mino kiudo isasir ki dub kede da kiko udo kabedo i dier jo kolonyere pien kiyei ango.’

Paulo Otatamo Kop i kom Tic mere

¹⁹” Pi mano, Abaka Aguripa, ango likame ako dagi lubo kop me gianyuta kowok ki malo.

²⁰ Do ako cako tero kop ne jo me Damasiko, di do ako tero ne jo me Yerusalem, tuno kede i piny me Yudea dedede, kede da but jo kalikame Iyudayan. Oudo awaco ne gi be miero kiswilaro di kiko lokere but Rubanga, di kiko cako timo tice kame nyuto be kitieko swilaro.

²¹Kop noni en komio Iyudayan omaka i tempulo di kiko mito neka.

²²Cako i kare nono tuno tin, ango Rubanga en kame konya, pi mano, ango acungo kan di amio ijura but jo atino kede jo kame koworo. Likame tie kop moro apat kame ango awaco ne gi, do kwanyo gikame inabin kede Musa bin owaco be bino timere.

²³ Gin oudo kiwaco be Kirisito miero bei i can, kede be, kite kame en ebedo kede dano me agege me yaruno kikom jo oto, ebino pwonyo kop me lero ne Iyudayan kede ne jo kalikame Iyudayan.”

²⁴Kakame Paulo opido kede kamano, Pesito oko waco kede dwan amalo be, “Paulo, in ipoi; isoma atek tie mini idoko amang.”

²⁵Do Paulo oko dwoko ne be, “Adwong kame koworo Pesito, ango likame apoi, do ango atie yamo kop me ateni.

²⁶Abaka ngeo gigi dedede, doko ango ayamo kede en abongo lworu moro; pien ango angeo kiber be en likame ebwot ngeno gi nogi, pien likame kopwono kede timo gi.

²⁷Abaka Aguripa, mam in iyei kop me inabin? Ango angeo be in iyei.”



²⁸Aguripa oko waco ne Paulo be, “In kom iparo be itwero lokango adoko ngakirisito i kare acecek ni!”

²⁹Paulo oko waco be, “Akadi pi kare acecek arabo abor, ango akwao Rubanga be, koto likame in kenekene, do koto jo dedede da kame tin tie winyo kop na odoko bala ango, do likame i epingo.”

³⁰Di do abaka oko yai malo karacel kede ngapug adwong, kede Berenike kede jo kame oudo tie bedo kede gi.

³¹Kakame kitioko yai kede malo, kiko donyo yamo ken gi ken gi be, “Icuo ni likame tie timo gimoro kame poore mino koneke, arabo kotwee i otkol.”

³²Di Aguripa oko waco ne Pesito be, “Oudo icuo ni poore agonya ki otkol ka koto oudo likame ejuro pido mere but Kaisari.”

Tice 27

Kotero Paulo Roma

¹Kakame komoko kede be wan poore okwang ooti Itali, oko mino Paulo kede mabus ace i cing ngadwong me isirikalen me ekodet ka Agusito, kame oudo nyinge Julias.

²Wan oko donyo i emeri moro me Aduramatio, kame oudo oyaro ot tuno i idoketa me Esia. Wan oko kwang oupere kede Arisitaku kame obedo dano me Makedonia, kame oudo wok ki Tesalonika.

³Oru mere oko tuno Sidon. Julias oko timo Paulo ber, en eko weke eoto but jowote pi gin gwoke.

⁴Oko yai ki kuno, do pi kite kame oudo yamo buko kede wok ki nyim wa, wan oko kwang oririo ki nget cula me Sipuro pi dapu yamo.

⁵Kakame okwango kede di oko ngolo nam ki nget Kilikia kede Pampulia, oko tuno Mura kame tie i piny me Lisia.

⁶Ki kuno, ngadwong me isirikalen oko udo Emeri moro kame bin owok ki Alekesanderia di eoto Itali, en eko rwako wa iye.

⁷Di oko kwang momot pi ceng atot, oko tuno Kinido peko peko. Kite kame yamo oudo likame yei ne wa meede kede ot, omio oko kwang oririo Kurete di odapo Salamone pi lwoyo yamo.

⁸Oririo kane kede peko adwong di oko tuno kabedo kame kolwongo be Edoket Aber, kame oudo iyapiyapi kede bomba me Lasea.

⁹Bala kite kame oudo otieko tero kede kare alac, doko oudo beo ki nam otieko doko rac, pien kare me kanyo kec otieko kato. Di do Paulo oko mino gi ikwenyar be,

¹⁰” Jodongo na, ango atieko ngeno be ot wa ni oyaro kelo awanon kede kei adwong, likame i jame kede i emeri kenekene, do kiton i kuo wa da.”



¹¹Do ngadwong me isirikalen likame oko paro gikame Paulo owaco, do en eko keto tam mere i kom ngadwong me jokwang emeri kede won emeri erume.

¹²Kite kame oudo likame eber pi bedo i edoket nono i kare me ngico me piny, jo atos oko mino tam be oyai ki kuno di oko dok i nam, me wek amotoko winyo mak wa otun Poenike, kame obedo edoket kame tie Kurete, tetu malo me tetu kide kede tetu piny me tetu kide, di oko bedo kuno i kare me ngico me piny.

Yamo Atek Obuko i Nam

¹³Kakame yamo me tetu piny ocako buko kede momot, gin kiko paro be kiudo do gikame oudo kimito, kiko kwanyo nangari ki pii, di kiko kwang kiririo cula me Kurete.

¹⁴Oyotoyot yamo atek kame wok ki tetu malo me kide oko buko di ewok kiye itela;

¹⁵kakame yamo ocere ne kede emeri, wan do oko jalakino emeri omol kede wa.

¹⁶Kakame oringo obeo kede i nget cula moro atitidi kame kolwongo be Kauda, kame oudo ogalao ne wa yamo, oko cane di oko mako yee kame bedo cen me emeri;

¹⁷ingei wane malo i emeri, gin kiko tweno tol rimaro di beo ki piny i dud emeri. Oudo kitie kede lworu be cengemogo kiromo pororo i asinge me dog nam, omio kiko didio mac me emeri, di do yamo oko molo emeri.

¹⁸Kite kame oudo yamo tie puno wa kede kitek, oru mere gin kiko cako uco yec kame oudo tie i emeri i yi pii.

¹⁹I ceng me adek mere, gin kiko donyo kwanyo jame mogo me tic me emeri di kiucu i pii.

²⁰Kakame ceng kede acer likame oneeno kede pi ceng atos, doko di yamo atek oudo tie buko i kom wa, gen wa me bwot di do oko kwanyere atwal.

²¹Kite kame oudo kitieko kede ceng atos abongo cam, Paulo oko yai ecungo i nyim gi di eko waco ne gi be, "Jo na, koto bin wun iwinyunu kop na di likame ikounu yai cako kwang ki Kurete, koto awanon kede kei likame obedo tie.

²²Do ango nan akwao wu imiunu cunyu bed nwang, pien likame tie ngatamoro kikom wa kame kuo mere bino rwenyo, kenekene emeri en koyaro kei.

²³Pien iwor aoki, malaika ka Rubanga na kame ango aworo ocungo i ngeta,

²⁴di eko waco na be, 'Paulo, kur ibed kede lworu; in miero icung i nyim Kaisari. Doko neni, Rubanga otimi ber, eyaro mino jo dedede kame tie kedi i emeri bwot.'

²⁵Pi mano, jo na, bedunu kede nwangcunyu, pien ango atie kede yei i kom Rubanga be gi dedede bino bedo bala kite kame kowaco na kede kikokome.

²⁶Do yamo kong oyaro cwano wa omotar i cula moro."

²⁷Iwor me ceng me tomon kiwie ongwon, di oudo otie mol ngolo nam adwong me Aduria, tetu esawa kanyape me iwor, jokwang emeri oko paro be oudo kinoko itela.



²⁸Kiko uco tol i pii pi pimo tuto mere, di kiko udo tuto me pii oudo tie puti tol acel kede ot are; kiko nyiko momot bobo kiko pimo, di kiko udo tuto me pii tie puti ot kanyangon.

²⁹Kite kame oudo kilwor kede be cengemogo emeri romo ot dipere i mori, omio kiko jalakino nangari ongwon ki dud emeri cen, di do kiko donyo lego be piny suny ru.

³⁰Jo kame oudo kwango emeri oudo mito lwi, omio kiko yololo yee i nam, di kiko cuko be oudo kitie uco nangari ki nyim emeri.

³¹Paulo oko waco ne ngadwong me isirikalen karacel kede isirikalen be, “Kwanyo di cuo gi odong i emeri, likame ibinunu bwot.”

³²Di do isirikalen oko ngolo tol kame oudo kotweo kede yee, di kiko jalakino en eoto.

³³Di bin piny oyapuno ru, Paulo oko donyo ngangao gin dedede pi ber camo gimoro, di ewaco be, “Tin en ceng me tomon kiwie ongwon, kame wun itiekunu di tam wu tie atatai abongo camo gimoro.

³⁴Pi mano, ango nan akwao cunyu be ber icamunu gimoro; ebino mino wu teko, pien likame tie ngatamoro kikom wu kame bino kei akadi yer wie acel.”

³⁵Ingei yamo kamano, en eko kwanyo mugati, eko pwono Rubanga pire i nyim jo dedede, di eko tuturo eko cako camo.

³⁶Di do gin dedede cunyu gi oko dwogo, di kiko cam.

³⁷(Wan dedede jo kame oudo tie i emeri oudo oromo jo tol are kede ot kanyaare kiwie kanyape.)

³⁸Kakame do kitieko kede cam kiko yeng, gin kiko donyo uco ipukoi me engano i pii pi mino emeri doko yoyot.

Emeri Otuturun

³⁹Kakame piny oru kede, jo kame bin kwango emeri likame oko twero ngeno itela kakatek kame oudo kituno iye, do kiko neno kakoguraun i dog nam, kame kiko tamo be ka koto twerere, koto kiwoto emeri iye.

⁴⁰Gin kiko ngolongolo tol me nangari di kiko weko gi kilwiny i nam. Esawa nono da oudo kitie jajaro tol kame oudo kotweo kede gikame wiro nyim emeri; di do kiko wano esuka malo me nyim emeri, esuka kame yamo buke kede, kiko do mol ot i dog nam.

⁴¹Do emeri oko dipere i asinge kame ebuka ocoko i dog nam di eko moko iye; ume oko moko dangadang, di ebuka oko turo dud emeri cen.

⁴²Isirikalen oko iiko tam me neko mabus tetekeny kur moro kikom gi sanyi di eko bwot.



⁴³Do ngadwong me isirikalen oudo mito be Paulo bwoti, omio en eko gengo gi timo iik gi nono. En eko waco ne jo kame twero isany pi ber cako somo i pii di kiko isany ot itela kakatek.

⁴⁴Do jo icegun ko bino mako ibaon kede adulion kotuturun me emeri. Manono oko mino jo dedede obwot oko tuno itela kakatek.

Tice 28

Paulo i Cula me Melita

¹Ingei wan bwot, oko niang be cula nono oudo kolwongo be Melita.

²Jo me kuno oko timo ne wa bero moro kalikame wacere; gin kimoko mac di kiko lwongo wa iye, pien oudo kot ogeo cwei piny oko doko ngic.

³Paulo oudo oraro rido mogo me yen di eko keto gi i mac, cucuto nono di emosoga oko wokun ki rido nogo pi lworu lieto me mac, di eko tukere i cing Paulo.

⁴Kakame anywali me kuno oneno kede twol nono di ledi i cing Paulo, kiko donyo yamo ken gi ken gi be, “Ateteni icuo ni obedo nganek. Bed bala ebwot ki nam do ngolo kop me ateni otieko dagi ne kuo.”

⁵Do Paulo oko lakaro twol nono i mac abongo awanon moro.

⁶Gin kiko donyo daro neno di kigeno be kom Paulo oyaro amumurun, arabo oudo eyaro poto piny di eko to. Do kakame kikuro kede kwe, di likame kineno gimoro arac kotimere ne, kiko loko tam gi, di kiko waco be Paulo obedo rubanga.

⁷I ngete i ngete kanono, oudo tie iye lobo me icuo moro kame nyinge Pubulio, kame oudo obedo ngapug me cula nono. En egamo wa di eko gwoko wa kiber pi ceng adek.

⁸I kare kame wan oudo otie kede kuno, papa me Pubulio oudo tie i apien, pien musuja kede cado oudo omake. Paulo oko ot bute pi nene di eko lego ne, di eketo cinge i wie; en eko cango.

⁹Kakame gini otimere kede, jo icegun kame oudo tuwo i cula nono oko gida bino di Paulo oko cango gi.

¹⁰Kiko mino wa giamia atot. Kakame wan oyai kede pi kwang, gin kiko keto gi dedede kame wan oudo omito i emeri.

Yai ki Melita tuno Roma

¹¹Ingei dwete adek, oko yai ot kede emeri moro me Alekesanderia kame nyinge Imiegu Ibangin, kame oudo odong i cula nono i kare me ngico me piny.

¹²Kakame otuno kede Sirakuse, oko bedo kuno pi ceng adek.

¹³Di do oko yai ki kuno oko kwang ooto Regio. Ingei ceng acel, yamo me tetu piny oko donyo buko, di wan oko tuno Puteoli i ceng me are.



¹⁴Ki kuno, oko udo jo koyei Kirisito, di gin kiko kwano wa be ber obed kede gi pi sabiti acel. Wan di do oko tuno Roma.

¹⁵Kakame jo koyei Kirisito i Roma owinyo kede kop i kom wa, gin kiko bino tuno i atale me Apaya kede kabedo kame kolwongo be Ude Adek me gamo wele, pi riamo kede wa. Kakame Paulo oneno gi kede, en eko mino pwoc but Rubanga di do eko bedo kede nwangcuny.

Paulo i Roma

¹⁶I kare kame wan do otuno kede Roma, jotel oko yei ne Paulo bedo kene di sirikale acel erume en kame do dare.

¹⁷Ingei ceng adek, Paulo oko lwongo jotel me Iyudayan kame tie Roma karacel. Kakame kicokere kede, en eko waco ne gi be, “Imiegu na, bed bala likame ango atimo gimoro arac but jo wa, akadi i kom itok me joakwari wa, do komia abedo mabus i Yerusalem, di oko jala i cing Joroma.

¹⁸Kakame kitieko ngingico kede kop na, kiko bedo kede mit me gonya, pien likame oudo kiudo kop moro arac i koma, kame romo mino kongolo na kop me to.

¹⁹Do kakame Iyudayan ocere kede, manono oko dina juro pido na but Kaisari, bed bala ango oudo likame atie kede kop moro kame aromo pido ateker na iye.

²⁰Kop noni en komio ango akwao be, ber anen wu di ako yamo kede wu. Pien gen me jo Isirael en komio ango nan atie i epingo noni.”

²¹Gin kiko waco ne be, “Wan likame oudo baluwa moro kame wok ki Yudea kame waco kop i komi, doko likame tie ngatamoro i kom imiegu wa kame obino kan kede rwonge moro arabo kame owaco kop moro arac i komi.

²²Do wan omito winyo tam nin, pien i kom kop kame mako ajange noni, wan ongeo be jo yamo kop arac i kome i kabedo dedede.”

²³Kakame kitieko moko kede ceng kede Paulo, cenge nono gin kiko bino di kitot kakame en oudo ebedo iye. Di Paulo oko yeko ne gi kop dedede i yore i yore, cako me odiko tuno piny yuto, di etatamo ne gi kop kame mako Ajakanut ka Rubanga, di etamakino loko tam gi i kom Yesu, di ejuro kop me Iswil ka Musa kede iwandik me inabin.

²⁴Jo mogo oko yei kede kop kame oudo ewaco, do mogo oko dagi.

²⁵Aso kite kame tam gi oudo opokere kede, kiko sarakin ingei Paulo waco be, “Tipo Kacil oudo oyamo ne joakwari wu kop me ateni i dog enabi Isaya be,

²⁶‘Oti but jogo di iko waco ne gi kaman: Ateteni jogi bino winyo kop do likame kiko niang, kede kibino ngino do likame kiko neno.

²⁷Pien wi gi odoko pek, kede kiculo yit gi da kur winy kop, doko kimio wang gi da; ka koto oudo likame kamanono, koto wang gi okaruno neno, doko yit gi da koto owinyo, kede koto wi gi da oniang, di kiko lokere buta di ango ako cango gi.’ “



28” Poore ingeunu be, kop me alako noni kotieko cwano ne jo kalikame Iyudayan; gin kibino winyo di kiko yei.”

29(Kakame etieko yamo kede kope nogi, Iyudayan oko asarkin di kitie kede piem atek i diere gi.)

30Paulo oko bedo kuno pi mwakini are di eculo garama mere en kikome, di egamo jo dedede kame bino bute.

31En oudo epwonyo gi kop kame mako Ajakanut ka Rubanga di ewaco kop i kom Rwot Yesu Kirisito obe abongo gikame genge.



Joroma

Joroma 1

Amot

¹7Baluwa kowok kibut Paulo ngatic ka Yesu Kirisito, ngat kame kolwongo pi bedo ngaor, di oko poke pi tuco ejiri ka Rubanga.

²Bin Rubanga ocikere i dog inabin mege i iwandik kacil pi mino ejiri noni,

³en ejiri kame mako kop i kom Wode, kame obedo akwar Daudi i anywali me kom.

⁴I kom kop kame mako en bedo dano kacil kowok kibut Rubanga, konyute kede twon twer be en Wot ka Rubanga pi yaruno mere ki to.

⁵Ango atieko udo kisa kede or ka Rubanga di beo kibute, pi mino atekerin dedede bedo kede wor pi yei nyinge.

⁶Man ribo kiton wuda jo kame kolwongo wu pi doko jo ka Yesu Kirisito.

⁷Butun jo dedede kame Rubanga maro, wun jo kame itienu Roma, jo kame kolwongo pi bedo jokacil, wek Rubanga Papa kede Rwot wa Yesu Kirisito mi wu kisa kede mulem.

Ilega me pwoc

⁸Ango ageo ber pwono Rubanga na i Yesu Kirisito pi wun dedede, pien jo tie tatamo kop me yei wu i piny lung.

⁹Rubanga, ngat kame ango atio ne kede cunya lung di atuco ejiri ka Wode, en kame obedo mujura na be, ango nakanaka ayutuno wu i ilega na.

¹⁰Akwao abongo keng be, ka twerere, wek Rubanga nan do mia akaruno bino butu pi mit mere.

¹¹Pien cunya paro neno wu me wek ami wu iudunu giamia mogo me cuny, pi mino yei wu doko tek.

¹²Dwong mere be, wan otwerunu udo teko me cuny ki yei wa wan kenwa kenwa, ki meru kede ki mera da.

¹³Imiegu kede amiegu na, amito ingeunu be, tien atot cunya obedo mito bino butu tetekeny alok cuny jo i diere wu bala kame atimo kede i dier jo icegun kalikame Iyudayan (do tuno nan tie gikame genga).

¹⁴Pien atie kede banya, but Jogurik kede but jo kame tie kede tim me asonya, but jo kame riek kede but jo kame ming.

¹⁵Pi mano, cunya mito tuco ne wuda ejiri, wun jo kame ibedunu Roma.

Twer me Ejiri



¹⁶Ango lewic likame maka pi ejiri; en ebedo twer kame Rubanga lako kede jo dedede kame tie kede yei, me agege twer me alako but Iyudayan, kede da but Jogurik.

¹⁷Pien ejiri nyuto kite kame Rubanga mio dano doko kede ngat kopooore, en egere kede yei eko jik da kede yei; bala kame kowandiko kede be, “Ngat kame opooore pi yei bino kuo.”

Raco ka Dano

¹⁸Pien lilo ka Rubanga onyutere di yai ki malo bino piny i kom jo dedede kalikame woro Rubanga, kede kame timo tim areco, kame i tim gi areco nogo, kigengo jo ngeno ateni i kom Rubanga.

¹⁹Pi gikame karuno ngere i kom Rubanga tie ne gi kakaler, pien Rubanga otieko nyuto ne gi.

²⁰Cako Rubanga cweno piny, epone mere kalikame neeno, en twer mere kame bedo nakanaka, kede epone me kuo mere bala Rubanga, otieko ngere i jame kame en ecweo. Pi mano, gin likame kitie kede kacungo me pido;

²¹pien akadi bed bala oudo kingeo Rubanga, do likame kiko wore bala Rubanga, akadi mine pwoc da. Do par gi oko doko gikame kony mere li, kede wi gi kalikame tamo oko umere odoko col.

²²Gin oudo kitero be gin jorieko, do kiko doko jomingo,

²³di kiko seso deyo ka Rubanga kalikame to kede cal me dano kame to, kede me winy, kede me leini, kede me gikame liao alia.

²⁴Pi mano, Rubanga oko jalo gi i mit kareco me cuny gi, i timo caro kede bedo abongo wor i kom gi ken gi i diere gi.

²⁵Etimo kaman pien gin kiseso ateni i kom Rubanga kede gi me angalo, di kiko donyo woro kede tic ne giacwea akaka Ngacwec, en ngat kame jo poore pako ikar kede ikar! Amen.

²⁶Pi mano, Rubanga oko jalo gi i mit me lewic. Mon gi oloko ekite gi me anywali me mito cuo oko doko do ekite kalikame anywali ka dano me mito buto kede mon wad gi.

²⁷Iepone nono da, cuo oweko ekite gi me anywali me mito mon, di kiko bedo kede mit aliet i kom gin ken gi. Cuo timo gi me lewic kede cuo wad gi, di kiko udo adwokini me tim gi areco nogo i kom gi.

²⁸Do bala kite kalikame kineno kede be epooore pi keto Rubanga i tam gi, omio Rubanga oko jalo gi i tam otop kede i tim gi kalikame opooore.

²⁹Gin oudo kipong kede epone me tim areco dedede, raco, paro jame me jo, kede tam areco i kom jo. Oudo kipong kede nyeko, nek, lok, angalo, cuny acol, kede akwot,

³⁰di kidubo nying jowot gi, kidagi Rubanga, kinywaro jo, kitingere ken gi, kiwakere, ki iiko tam me timo tice areco, kede di likame kiworo jonywal gi.



³¹Kimiming, kili kede yei, kili kede amara kede cuny me kisa.

³²Akadi bed bala kingeo iswil ka Rubanga kame waco be jo kame timo akodi gi nogi poore to, gin kimeede ameda timo gi nogi, doko da kipwoyo jo apat kame timo gi nogi.

Joroma 2

Ngolo Kop ka Rubanga

¹ Pi mano, kame in ingolo kop ne ngawoti, ili kede kacungo me pido akadi di in ngai; pien kame ingolo kop udo ingolo kop i komi keni, pien in ngangolkop ida itie timo gi acel nono.

²Wan onge be kame Rubanga ongolo kop ne jo kame timo akodi gi nogi, udo engolo kop kakare.

³Ngawota, ka ingolo kop ne jo kame timo akodi gi nogi, do di ida kikomi itimo gi, iparo be ibino bwot ki ngolo kop ka Rubanga?

⁴Benyo, arabo in icao abar me bero ka Rubanga, kanyakino kede dire mere? Mam ingeo be bero ka Rubanga teri iye iswilar?

⁵Do pi tekwic kede cuny kalikame swilaro kame in itie kede no, omio itie kano piri keni lilo ka Rubanga i ceng kame lilo kede ngolo kop mere kopoo bino neeno kede.

⁶ Pien Rubanga bino culo ngat acelacel di lubere kede tice kame ebedo timo.

⁷Jo kame dio cuny gi timo gikaber di kimoo deyo kede wor kede kuo kalikame tiek, ebino mino gi kuo kame bedo nakanaka.

⁸Do jo kame paro pirgi kenekene, di kidagi lubo gi me ateni, do di kilubo ekite areco, kibino udo lilo kede gero ka Rubanga.

⁹Jo dedede kame timo gikarac bino neno can kede kibino udo lito, me agege Iyudayan, di do Jogurik da.

¹⁰Do jo dedede kame timo gikaber, Rubanga bino mino gi deyo, wor kede mulem, me agege Iyudayan, di do Jogurik da.

¹¹ Pien Rubanga likame tie kede apokapoka.

¹²Jo dedede kame odubo di kili kede Iswil ka Musa bino to da abongo Iswil, kede jo dedede kame odubo do di kitie kede Iswil kobino ngolo ne gi kop di kolubo Iswil da.

¹³Pien likame jo kame winyo Iswil awinya en kame obedo jo kopoo i nyim Rubanga, do jo kame timo gikame Iswil mito en kopoo.

¹⁴Kame jo kalikame Iyudayan, jo kalikame tie kede Iswil, otimo gikame Iswil mito pi ekite gi me anywali, gin kilokere kidoko Iswil but gin ken gi, akadi bed bala kili kede Iswil.



¹⁵Ekite gi nyuto be kowandiko gikame Iswil mito i cuny gi. Ngec me cuny gi i kom gikaber kede gikame rac da jurao be man tie gi me ateni, pien tam gi lokolokun; esawa moro tam gi waco ne gi be kitimo gikame rac kede esawa moro be kitimo gikaber.

¹⁶Aso manoni en gikame bino timere, i ceng kame Rubanga bino ngolo kede kop i kom mung me jo di etio kibus Yesu Kirisito, di lubere kede ejiri kame ango atuco.

Iyudayan kede Iswil

¹⁷Do ka in ilwongere be Ngayudaya, di igengere i kom Iswil kede di iwakere pi awotin nin kede Rubanga,

¹⁸di ingeo gikame Rubanga mito, kede di igango tam i kom gikaber twatwal, pien kotieko pwoyoni i kom kop me Iswil;

¹⁹kede ka ingeo kiber be in itie bala ngat kame telo imuduka, kede itie bala lero ne jo kame tie i colo;

²⁰in irieo jomingo kede ipwoyoni jo kame ngec gi pwodi nonok bala idwe, pien itie kede ngec lung kede ateni me Iswil,

²¹aso in ngat kame ipwoyoni jo apat, mam ber ipwoyere keni? Ipwoyoni jo be kur kikwali, do benyo, mam in ikwali?

²²In ngat kame iwaco ne jo be kur kitimo adote, do benyo, mam in itimi? In ngat kame cunyi dagi cal jwogi, do benyo, mam in iyak tempulo?

²³In ngat kame iwakere pi bedo tie kede iswil, do benyo, mam in ibed ngat kalikame woro Rubanga, ngat kame turo iswil mere?

²⁴ Etie bala kame kowandiko be, “Jo kalikame Iyudayan cao nying Rubanga pi wun.”

²⁵Keperere kony mere tie ka ilubo Iswil, do ka ituro Iswil, akadi di kokepi da idoko bala ngat kalikame kokepo.

²⁶Aso ka icuo kalikame kokepo ogwoko cik me Iswil, iparo be Rubanga likame bino tere bala kokepe, bed bala likame kokepe?

²⁷Pi mano, jo kalikame kokepo del me kom gi, do di kigwoko Iswil bino ngolo kop i wi wu, pien akadi bed bala itienu kede Iswil kame kowandiko doko di kokepo wu, do iturunu Iswil nono.

²⁸Pien dano kame obedo Ngayudaya i ooko me kome udo likame en Ngayudaya kikokome; doko keperere me ateni likame tie gimoro kame neeno kame kotimo i kom dano ooko.

²⁹ Ngat kobedo Ngayudaya kikokome en dano kobedo Ngayudaya i cunye, doko keperere me ateni tie kop kame mako cuny, en gi me Tipo, do weko gikame kowandiko. Ngat kame cal kamano udo pwoc mere kibus Rubanga do weko kibus dano.

Joroma 3



- ¹Pi mano, bero nyo do kame Ngayudaya tie kede? Arabo kony me kepere en nyo?
- ²Ateteni tie tot atota i yore dedede. Me agege, Rubanga ogeno Iyudayan kede kope mege.
- ³Do ka mogo kikom gi obedo jo kalikame genere, iparo be pi gin bedo jo kalikame genere kwanyo genere ka Rubanga?
- ⁴Likame kamano. Rubanga bino bedo kede ateni akadi bed bala jo dedede dok joangalo, bala kame kowandiko kede be, “Me wek kop kame in iwaco nyut ateni nin; kede iloi pido kame kotie pidi.”
- ⁵Do ka tim wa kalikame tie kede ateni tie pi nyuto ateni ka Rubanga, owac do benyo? Mam do be Rubanga likame tie kede ateni be pien eketo lilo mere i kom wa? (Ango gira atie yamo bala dano adana.)
- ⁶Likame kamano. Pien ka koto tie kamanono, koto Rubanga ngolo kop ne jo me pinyo benyo?
- ⁷Do ka angalo nango mio ateni ka Rubanga meede di ko kelo ne en deyo, pinyo komio pwodi kongolo na kop bala ango ngadubo?
- ⁸Doko pinyo kame mio likame otimunu gikame rac tetekeny oudunu gikaber? Pien jo mogo odubo nyinga be ango awaco kamanono. Ka kongolo kop olo gi, udo ongolo i ateni.

Likame tie Danu Opoore

- ⁹Nan do benyo? Mam do wan Iyudayan obeco kato jo kalikame Iyudayan? Li akadi acel; pien ango atieko nyuto be, jo dedede, Iyudayan karacel kede Jogurik tie i twer me dub,
- ¹⁰bala kame kowandiko be, “Likame tie ngat kopoore, likame tie akadi acel moro da;
- ¹¹likame tie ngat kame niang, arabo kame mo Rubanga.
- ¹²Jo dedede otieko parao tenge, gin dedede kony gi otieko doko li; likame tie ngat kame timo gikaber, likame tie akadi acel.
- ¹³Dog gi cal bala ates kame twolo; kitio kede leb gi me yamo kope me angalo, kope kame wok ki dog gi cal bala kwir me twol.
- ¹⁴Dog gi opong kede ilam kede kope me cuny akec.
- ¹⁵Tien gi dwir pi ot onyo remo me jo;
- ¹⁶kakame kibeo iye kidudubo, doko kikelo iye can.
- ¹⁷Pwodi likame kingeo yongayo kame kelo mulem,
- ¹⁸doko da likame kilworo Rubanga i kuo gi.”



¹⁹Nan do wan ongeo be, gi dedede kame Iswil waco udo etie waco ne jo kame Iswil nono mako, tetekeny jo dedede bed abongo kacungo me pido, di Rubanga ko bino ngolo kop ne jo dedede.

²⁰Pien likame dano moro bino bedo ngat kopooore i nyim Rubanga be pien etimo gikame Iswil mito; Iswil tic mere en mino jo ngeno dub gi.

Epone kame Rubanga mio kede Jo doko Jo Kopooore

²¹Do nan kotieko nyuto epone kame Rubanga mio kede jo doko jo kopooore abongo Iswil; Iswil ka Musa kede inabin da ojura kop noni.

²²Rubanga mio jo bedo di kipoore pi yei Yesu Kirisito. Etimo man ne jo dedede kame yei Yesu Kirisito, abongo apokapoka.

²³Bala kame jo dedede otieko dubo kede di likame kiko twero udo deyo ka Rubanga,

²⁴nan gin do kidoko jo kopooore pi kisa mere kame obedo giamia, i alako kame tie i Yesu Kirisito.

²⁵Rubanga bin oyeru Yesu Kirisito tetekeny pi to mere, edok giayala kame remo mere mio kosasiro jo ki dub gi kame kiyei en. Rubanga otimo kaman pi nyuto poore mere, pien i kare asek, pi dire mere, likame en eko timo gimoro i kom dub kame jo oudo timo;

²⁶doko Rubanga otimo kaman da pi nyuto i kare kanataman be, en kikome epooore, kede be, en emio ngat kame yei Yesu Kirisito doko ngat kopooore.

²⁷Nan do nyo kame wan owakerenu iye? Likame tie gimoro. Nan do owakerenu pi tien kop nyo? Pinyo, mam pi timo gikame Iswil mito? Li, do pi bedo kede yei.

²⁸Pien wan ongeo be dano bedo ngat kopooore pi yei, do weko pi timo gikame Iswil mito.

²⁹Arabo iparunu be Rubanga obedo Rubanga me Iyudayan kenekene? Mam ebedo Rubanga me jo kalikame Iyudayan da? Ebo, en Rubanga me jo kalikame Iyudayan da.

³⁰Bala kame Rubanga tie acel, ebino mino jo kame kokepo bedo jo kopooore pi yei, kede jo kalikame kokepo ebino mino gida kibedo jo kopooore pi yei acel nono.

³¹Pi mano, mam udo owekunu do lubo Iswil ka Musa pi yei noni? Li gire, wan omio Iswil bedo kakare.

Joroma 4

Apor i kom Aburaam

¹Nan do owac kop nyo i kom Aburaam, ngat kame obedo kwaru wa?

²Pien ka koto Aburaam oudo odoko ngat kopooore pi tice mege, koto oudo etie kede gikame mie ewakere, do likame i nyim Rubanga.



³ Pien iwandik kacil waco be, “Aburaam oyei Rubanga di oko tere be epoore pi yei mere nono.”

⁴ Nan do dano kame timo tic, egelit mere likame otero bala giamia, do bala gikame poore cule.

⁵ Do ngat kalikame timo tic, do di eko keto gen mere i kom Rubanga, ngat kame mio jo kalikame wore doko jo kopoore, kobino tere bala ngat kopoore pi yei mere.

⁶ Kamanono da, Daudi owaco kop i kom winyo kame dano tie kede ka Rubanga otere bala ngat kopoore, akadi di likame pi tice mege, bala kame bin kowandiko be,

⁷ “Kitie kede winyo jo kame kosasiro gi ki raco gi, jo kame koumo dub gi.

⁸ Etie kede winyo ngat kame Rwot likame bino maro dub mere i wie.”

⁹ Benyo, bin Daudi owaco kop me winyo noni pi jo kame kokepo kenekene arabo kiton pi jo kalikame kokepo da? Iwandik kacil waco be, “Rubanga otero Aburaam bala ngat kopoore pi yei mere.”

¹⁰ Awene en kame bin Rubanga otero kede be Aburaam opoore? Benyo etimere di pwodi likame kokepe arabo di kotieko kepe? Likame etimere di kotieko kepe, do di pwodi likame kokepe.

¹¹ En eyei kepere tetekeny kepere mere bed gianena kame moko be en ebedo ngat kopoore pi yei kame oudo etie kede di pwodi likame kokepe. Man otimere pi mino Aburaam bedo bala papa me jo dedede kame yei, do di likame kokepo gi, di Rubanga ko tero be kipoore.

¹² Iepone acel nono, en etie da bala papa me jo kame kokepo, jo kalikame okepere akepa kenekene, do da gin kilubo anyut me yei kame kwaru wa Aburaam oudo tie kede di pwodi likame kokepe.

Cikere ka Rubanga Udere pi Yei

¹³ Cikere kame Rubanga bin omio Aburaam kede ikwae mege, be piny noni bino doko mergi, likame emio be pien Aburaam ogwoko Iswil, do emio piento en oudo ebedo ngat kopoore pi yei.

¹⁴ Ka jo kame gwoko Iswil en kame piny noni bino doko mergi, udo kony me yei do li, doko cikere ka Rubanga da udo kony mere li.

¹⁵ Pien Iswil kelo lilo ka Rubanga, do kakame Iswil li kiye, udo turo Iswil da li.

¹⁶ Pi mano, cikere kame Rubanga omio Aburaam oudo cungo i yei, tetekeny cikere mere bed gi me kisa, di eko bedo gikame komoko ne ikwae ka Aburaam dedede, likame ne jo kame gwoko Iswil kenekene, do da ne jo kame tie kede yei bala bin Aburaam. Pien Aburaam tie kwaru wan dedede,

¹⁷ bala kame kowandiko be, “Atieko mini idoko papa me atekerin atot.” Komoko cikere noni i nyim Rubanga kame en eyei, ngat kame mio jo oto udo kuo, kede kame mio gikame li bedo tie.



- ¹⁸ Aburaam bin obedo kede gen di eko yei, bed bala gikame oudo egeno oudo neeno bala likame twerere. En oudo eyei be ebino doko papa me atekerin atos, bala kame bin Rubanga owaco ne kede be, “Ikwaee ni bino bedo tot rom kano.”
- ¹⁹ Yei mere likame odok cen pi tio me kome, bala kite kame oudo ecal acala do bala gikame otieko to; pien mwaka me dongo mere oudo romo bala tol acel. Doko yei mere likame oko dok cen da be pien Sara oudo obedo adonge.
- ²⁰ Aburaam bin likame obedo abongo yei, omio likame en eko bedo kede gung i kom cikere ka Rubanga, do yei mere omedo doko tek ameda di emio Rubanga deyo.
- ²¹ En oudo engeo kiber be Rubanga oudo twero timo gikame ecikere iye.
- ²² Man en komio pi yei mere, “oko tere bala ngat kopooore.”
- ²³ Do kop kame waco be, “oko tere bala ngat kopooore,” likame bin kowandiko piren kene,
- ²⁴ do pir wada. Kobino tero wada bala jo kopooore, wan jo kame oyei Rubanga ngat koyaruno Yesu Rwot wa ki to.
- ²⁵ Bin koneke pi dub wa, di oko yaruno en pi mino wa doko jo kopooore.

Joroma 5

Bedo Jo Opoore i nyim Rubanga

- ¹ Pi mano, bala kite kame otiekunu doko kede jo kopooore pi yei, otienu do kede anapakin kede Rubanga pi Rwot wa Yesu Kirisito.
- ² En etieko mino wa oudo epone me tuno i kisa ka Rubanga kame nan wan otienu iye, di olelunu pi gen wa kame otienu kede me nywako deyo ka Rubanga.
- ³ Do akalamo mere, obedunu kede kilel pi neno can, di ongeunu be neno can kelo ikanyakin,
- ⁴ kede ikanyakin mio Rubanga pwoyo ikiteso wa, kede ikiteso kame Rubanga pwoyo kelo gen.
- ⁵ Gen likame ngalo wa, pien kotieko onyo amara ka Rubanga i cuny wa di beo kikut Tipo Kacil kame kotieko mino wa.
- ⁶ Di pwodi oudo otienu jo agoro, Kirisito oko to i kare kopooore pi jo kalikame woro Rubanga.
- ⁷ Pien etek ne dano to pi ngat kopooore, bed bala cengemogo dano romo yei to pi ngat aber.
- ⁸ Do Rubanga onyuto amara mere pirwa, pien di oudo wan pwodi jodubo, Kirisito oko to pirwa.
- ⁹ Pi mano, bala kame nan remo mere otieko mino wa odoko kede jo kopooore, akalamo mere, obinunu udo bwot ki lilo ka Rubanga pi en nono.



¹⁰Pien ka i kare kame wan oudo pwodi otienu kede jokwor ka Rubanga, en eko dwoko wa i nywak kede en pi to ka wode, do akalamo mano, bala kame nan do otiekunu dok i nywak kede en, Kirisito bino do lako wa kede kuo mere.

¹¹Likame mano kenekene, do wan olelo da i Rubanga pi Rwot wa Yesu Kirisito, ngat kame odwoko wa i nywak kede Rubanga.

Adamu kede Kirisito

¹²Pi mano, bala kame dub obino kede i piny pi dano acel, to da obino i piny pi dub. Kikano, to oko sarakin ne jo dedede, pien jo dedede odubo.

¹³Ateteni dub oudo tie i piny di bin pwodi likame komio Iswil, do kakame Iswil li kiye, likame komaro dub i wi ngatamoro.

¹⁴Do to obedo kede loc cako i kare ka Adamu tuno i kare ka Musa, akadi kiton but jo kame turo iswil gi oudo likame cal kede me ka Adamu. Adamu bin tie apor me ngat kame oudo oyaro bino.

¹⁵Do giamia me nono ka Rubanga likame rorom kede dub ka Adamu, pien ka jo atos bin oto pi dub me dano acel, do akalamo mano, kisa ka Rubanga kede giamia mere me nono opong ne jo atos pi kisa me dano acel, en Yesu Kirisito.

¹⁶Doko giamia me nono noni likame cal bala adwokini me dub me dano acel nono, pien dub acel omio kongolo kop i wi jo, do giamia me nono kame oko lubo dub atos, kelo ne jo poore.

¹⁷Ka pi dub me ngat acel, to oko bedo kede loc pi ngat acel nono, do akalamo mano, ateteni jo kame ogamo twon kisa kede giamia me nono kame mio gi kibedo jo kopooore, bino bedo kede kuo kede loc pi dano acel, en Yesu Kirisito.

¹⁸Pi mano, bala kite kame dub me dano acel omio oko ngolo kop i wi jo dedede, kamanono da tic kopooore me dano acel kelo agonya kede kuo ne jo dedede.

¹⁹Pien bala kame pi dano acel bedo abongo wor oko mino jo atos odoko jodubo, kamanono da, pi bedo me dano acel kede wor bino mino jo atos doko jo kopooore.

²⁰Kokelo Iswil di dub oko meede; do kakame dub meede nyai iye, kisa ka Rubanga medo doko dwong iye kalamo.

²¹Etie kamano tetekeny bala kame dub obedo kede loc di ebeo ki to, wek kisa da bed kede loc di ebeo ki poore, di eko kelo kuo kame bedo nakanaka pi Rwot wa Yesu Kirisito.

Joroma 6

To ki Dub kede Yaruno kede Kirisito

¹Nan do owac benyo? Mam omeedenu kede dub tetekeny kisa ka Rubanga meede nyai ne wa?



- ²Likame kamano. Wan jo kame otiekunu to ki dub okarununu bobo meede bedo kede dub i kuo wa benyo benyo?
- ³Mam ingeunu be wan dedede jo kame kotieko batiso wa i Kirisito Yesu, kobatiso wa da i to mere?
- ⁴Pi mano, di bin kobatiso wa, koyiko wa karacel kede Kirisito i to, tetekeny bala kame Papa oyaruno en kede kikom jo oto pi twer me deyo mere, wek wada obedunu kede kuo anyen.
- ⁵Pien ka wan oriberenu kede en i to kame cal bala mere, ateteni obinunu ribere kede en da i yaruno kame cal bala mere.
- ⁶Wan ongeunu be, bin koguro kuo wa acon i kom musalaba karacel kede Kirisito, tetekeny kuo me dub jiki, di okounu jiko bedo ipasoi me dub.
- ⁷Pien ngat kotieko to udo etieko gonyere ki dub.
- ⁸Do ka wan otounu kede Kirisito, oyei da be obinunu bedo kuo karacel kede en.
- ⁹Pien wan ongeunu be, bala kame kotieko yaruno kede Kirisito kikom jo oto, likame ebino bobo to; likame bobo to tie kede loc i kome.
- ¹⁰I to mere, en eto ki dub tien acel atwal; do kuo kame nan en etie kede, ekuo pir Rubanga.
- ¹¹Aso wuda miero iterunu be, itiekunu do to ki dub, nan do i kuounu pir Rubanga i Kirisito Yesu.
- ¹²Pi mano, kur dub bobo bed kede loc i komu kame to, pi mino wu lubo mit me komu.
- ¹³Kur imiunu adul moro me komu i dub, pi bedo gi me timo raco, do jalerenu but Rubanga bala jo kame kokwanyo ki to di oko kelo gi i kuo, doko da miunu adulion dedede me komu but Rubanga pi bedo gi me timo gikame opoore.
- ¹⁴Pien dub miero kur bed kede loc i wi wu, bala kame nan likame itienu kede i twer me Iswil, do itienu i twer me kisa ka Rubanga.

Ipasoi me Tim Kopoore

- ¹⁵Nan do benyo? Mam oduyunu dub be pien likame otienu i twer me iswil, do pien otienu i twer me kisa ka Rubanga? Likame kamano.
- ¹⁶Mam ingeunu be ka ijalerenu but ngatamoro bala ipasoi kame mie wor, idokunu da ipasoi me ngat kame imiunu wor nono, cengemogo ipasoi me dub, gikame tero wu i to, arabo ipasoi me bedo kede wor, gikame mio wu idokunu jo kopoore.
- ¹⁷Do opwounu Rubanga, pien wun jo kame oudo bin itienu ipasoi me dub, itiekunu doko jo kame lubo kede cunyu dedede gi dedede kame tie i pwony kame bin komio wu.
- ¹⁸Bala kame kotieko gonyo wu kede ki dub, nan itiekunu do doko ipasoi me ekite kopoore.



¹⁹Ango atie yamo bala dano adana pi goro wu me ekite me anywali wu. Pien bala kame bin ijalunu kede komu lung i timo caro kede i tim kame iswil dagi, kame meede ameda, aso nan do jalunu komu lung pi bedo ipaso me ekite kopoo, pi bedo jo kolonyere.

²⁰I kare kame oudo itienu kede ipaso me dub, oudo igonyerenu kikom kop kame mako poore.

²¹Do bero nyo kame ikounu udo ki gikame nan lewic mako wu iye nogo? Adwokini me ginogo en to.

²²Do bala kame nan kotieko gonyo wu kede ki dub di ikounu doko ipaso ka Rubanga, gikame ibinunu udo en bedo jo kolonyere, kede adwokini mere en kuo kame bedo nakanaka.

²³Pien egelit me dub en to; do giamia ka Rubanga me nono en kuo kame bedo nakanaka i Kirisito Yesu Rwot wa.

Joroma 7

Apor kame yai ki Nyom

¹Imiegu kede amiegu na, mam ingeunu be iswil mako dano i kare me kuo mere kenekene? Pien atie yamo kede jo kame ngeo iswil.

²Pi mano, Iswil tweo dako kame konyomo but cware tek ka pwodi cware kuo, do ka cware oto, en udo egonyere kiye iswil nono.

³Mano mio ka en eoto bedo kede icuo ace di pwodi cware kuo, kobino lwonge be ngadote. Do ka cware oto, udo egonyere kiye iswil no, mio ka enyomere kede icuo ace, likame kolwonge be ngadote.

⁴Imiegu kede amiegu na, etie kamanono kede wuda, wun itiekunu to kiye Iswil pi kom Kirisito, me wek ibedunu jo mege, en ngat kame koyaruno ki to, tetekeny onyakunu anyakini abeco ne Rubanga.

⁵I kare kame bin wan otienu di okuounu i ekite me kuo me kom, mit wa me dub kame oudo Iswil mio wa obedo kede, oudo tie tic i adulon me kom wa, pi mino wa bedo kede kuo kame nyako anyakini kame kelo to.

⁶Do nan kotieko gonyo wa kiye Iswil, otiekunu jiko kuo i gikame bin otweo wa, tetekeny likame bobo otienu di olubunu Iswil kame bin kowandiko, do di olubunu kuo anyen me Tipo.

Iswil kede Dub

⁷Nan do owacunu benyo? Be Iswil en dub? Likame kamano. Pien ka koto Iswil oudo li, koto ango likame angeo dub. Oudo koto likame angeo be ingobel en nyo ka koto Iswil oudo likame owaco be, “Kur ingobelo jame me jo.”

⁸Do pi cik nono, dub oko udo winyo me mina bedo kede epone dedede me paro jame me jo. Abongo Iswil, dub udo tie bala gikame oto.



⁹Di bin Iswil oudo li, ango oudo akuo, do i kare kame cik obino kede, dub oko catuno di ango ako to.

¹⁰Cik nono kame oudo poore kelo kuo oko doko gikame kelo nango to.

¹¹Pien dub oudo kare me bedo tie pi cik, en eko ngala, di eko tic i cik eko neka.

¹²Aso, Iswil tie gikame cil kede cik da obedo gikame cil, en etie gi me ateni, doko eber.

¹³Pi mano, mam do gikaber en oko kelo nango to? Likame kamano! Dub en okelo nango to di etio i gikaber, tetekeny amoto dub neeno be en dub, di pi cik en eko doko dub kalikame wacere.

Piem kame tie i Cuny Wa

¹⁴Wan ongeunu be Iswil mako kop me cuny; do ango atie kom kame kocato pi bedo epasoit me dub.

¹⁵Ango likame aniang tim na; pien nakanaka likame atimo gikame amito, do alunyo timo gikame adagi.

¹⁶Nan do ka nakanaka ango atimo gi kalikame ango amito, udo ayei do be Iswil ber.

¹⁷Pi mano, likame ango en kame atimo gini, do dub kame tie i ango en kame time.

¹⁸Pien ango angeo be likame tie gimoro kame ber kame tie i ango i kite me kuo me kom. Cunya mito timo gikaber, do likame atwero timo.

¹⁹Pien likame atimo gikame amito kame ber, do alunyo timo gikarac kame cunya dagi.

²⁰Aso ka ango atimo gikame cunya dagi, udo doko likame ango en kame atime, do dub kame tie i ango en kame time.

²¹Aso, omio ango audo etie bala iswil be, tek ka amito timo gimoro aber, dub bedo iyapiyapi keda.

²²Pien ango i kuo na cunya yom pi iswil ka Rubanga,

²³do aneno iswil ace tie yi i adulion me koma kede Iswil kame tie i tam na, di eko mina abedo mabus me iswil me dub, kame tie i adulion me koma.

²⁴Ango atie dano kame li kede yomcuny. Ngai kame bino laka ki koma kame bino kelo na to noni?

²⁵Do ango apwoyo Rubanga pi Yesu Kirisito Rwot wa. Aso etie kaman, ango tam na tie epasoit me iswil ka Rubanga, do kite na me anywali me kom tie epasoit me iswil kame kelo dub.

Joroma 8

Kuo i Tipo



- ¹Pi mano, nan do likame kobino ngolo kop i wi jo kame tie i Kirisito Yesu.
- ²Pien iswil me Tipo, kame mio jo kuo i Kirisito Yesu otieko gonyo wa kiye iswil kame kelo dub kede to.
- ³Rubanga otieko timo gikame oudo Iswil likame twero timo, pien kite me kuo me anywali otieko mine edoko goro. En eoro Wode kikokome pi bino i cal me kuo me kom kame opong kede dub, di en eko ngolo kop me raco i wi dub.
- ⁴Rubanga otimo kaman tetekeny gikame opoore, gikame Iswil mito miero cobere kakare i kom wa, wan jo kalikame obedo i kite me kuo me kom, do obedo bala kame Tipo mito.
- ⁵Pien jo kame bedo i kite me kuo me kom keto tam gi i kom gikame kom mito, do jo kame bedo bala kame Tipo mito, keto tam gi i kom gikame Tipo mito.
- ⁶Keto tam i kom gikame kom mito kelo to, do keto tam i kom gikame Tipo mito kelo kuo kede mulem.
- ⁷Pien tam kame koketo i kom gikame kom mito tie kwor kede Rubanga, pien likame elubo iswil ka Rubanga, ateteni likame ekaruno lubo.
- ⁸Doko jo kame bedo i kite me kuo me kom likame karuno yomo cuny Rubanga.
- ⁹Do wun likame ibedunu i kite me kuo me kom, do ibedunu bala kame Tipo mito, pien Tipo ka Rubanga bedo i komu. Ngat kame li kede Tipo ka Kirisito, udo likame en me ka Kirisito.
- ¹⁰Do ka Kirisito tie i kuo wu, akadi bed bala komu oto pi dub, do tipo wu kuo pien itiekunu doko jo kopoore.
- ¹¹ Ka Tipo me ngat koyaruno Yesu kikom jo oto bedo i kuo wu, ngat nono koyaruno Kirisito Yesu kikom jo oto bino mino komu da kame to kuo, pi Tipo mere kame tie i kuo wu.
- ¹²Pi mano, imiegu kede amiegu na, wan otienu kede gimoro kame miero otimunu, kame tie banya, do likame ne kuo me kom amoto pi bedo bala kame kom mito,
- ¹³pien ka ibedunu i ekite me kuo me kom, ibinunu to, do ka ijikunu tice me kom pi Tipo, ibinunu kuo.
- ¹⁴Pien jo dedede kame Tipo ka Rubanga telo, gin idwe ka Rubanga.
- ¹⁵ Pien likame igamunu Tipo kame loko wu idokunu ipasoi di eko mino wu bedo kede lworu, do igamunu Tipo kame mio wu ibedunu idwe ka Rubanga. Kame okokunu but Rubanga be, “Aba! Papa!”
- ¹⁶udo Tipo nono kikome en kame tie mino ijura karacel kede tipo wa be wan obedunu idwe ka Rubanga.



¹⁷Aso ka wan idwe ka Rubanga, udo otienu jo kame bino udo winyo mere, di onywakunu udo winyo nono karacel kede Kirisito, ka di ateteni wan otienu neno can kede en me wek mi wa deyo karacel kede en.

Deyo kame Obinunu Udo

¹⁸Ango angeo be can kame nataman wan otienu neno i kare ni likame romo porere kede deyo kame kobino nyuto ne wa.

¹⁹Pien cwec lung tie daro kede mit adwong pi Rubanga nyuto idwe mege.

²⁰Pien oudo koketo cwec lung i twer me gikame dwong mere li, likame pi mit mere, do pi mit me ngat kame bin okete i twer nono, di egeno be

²¹kobino gonyo cwec lung ki bedo mabus me gikame top, di eko donyo i deyo me bedo idwe kogonyere ka Rubanga.

²²Wan ongeo be cwec lung obedo cur kede aramo alit tuno nan.

²³Do likame cwec kenekene, wada kikom wa, wan jo kame otienu kede giamia ka Rubanga me Tipo bala anyakini me agege, ocurunu eliling di odaro Rubanga loko wa doko idwe mege, gikame obedo alako me kom wa.

²⁴Pien pi bedo kede gen noni en komio kolako wa. Gen kame neeno udo likame en gen, pien ngai kame geno gikame en etie neno?

²⁵Do ka ogenunu gi kalikame otienu neno, odiunu cuny wa pi dare.

²⁶Kamanono da, Tipo konyo wa i goro wa; pien likame wan ongeunu epone me lego bala kame opoorenu timo kede, do Tipo nono bako doge pirwa kede cur kalikame wacere.

²⁷Doko ngat kame neno cuny jo ngeo tam me Tipo, pien Tipo bako doge pi jokacil bala kame Rubanga mito kede.

²⁸Wan ongeunu be, i gi dedede, Rubanga tio pi kelo bero ne jo kame mare, jo kame en elwongo di lubere kede iik mere.

²⁹Pien Rubanga oudo ogeo moko sek pi loko doko cal kede Wode jo kame en oudo egeo ngeno, tetekeny Wode bed kao kikom imiegu atot.

³⁰Jo kame en oudo egeo moko kop gi sek bin en eko lwongo da; jo kame elwongo, en eko da mino gi kidoko jo kopoore; jo kame emio odoko jo kopoore, en eko da mino gi deyo.

Amara ka Rubanga i Kirisito Yesu

³¹Nan owac do benyo? Ka Rubanga tie kede wa, ngai kame twero mon kede wa?

³²En ngat kalikame bin ecere kede Wode kikome, do ejale pirwa dedede, mam ebino da mino wa gi dedede karacel kede en?

³³Ngai kame karuno kelo pido moro i kom jo kame Rubanga otieko yero? Rubanga en kame mio jo bedo di kipoore.



³⁴Ngai kame bino ngolo kop i wi gi? Kirisito Yesu en kame bino timo, en bin eto, ebo, oko yaruno en kikom jo oto, nan etie i bad tetu cam ka Rubanga, ateteni en kame nan ebako doge pirwa.

³⁵Ngai kame bino poko wa ki amara ka Kirisito? Iparunu be peko bino poko wa, amoto cwercury, amoto itidil, amoto kec, amoto bedo li kede giangapa, amoto gimoro arac kame karuno timere ne wa, amoto epima?

³⁶Bala kite kame kowandiko kede be, “Kotie neko wa piny yuluyul piri; kotero wa bala romini kame koyaro ngongolo.”

³⁷Li, i gigi dedede, wan olounu adikinichel pi ngat kame omaro wa.

³⁸Pien ango angeo kiber be, akadi to amoto kuo, imalaikan amoto jopug me malo, jame me kare kanataman amoto me waru, twer,

³⁹boro malo amoto tuto piny, arabo gimoroni kenekene kame kocweo, likame bino twero poko wa ki amara ka Rubanga kame tie i Kirisito Yesu Rwot wa.

Joroma 9

Rubanga kede Jo mege

¹Ango atie waco kop me ateni i Kirisito, likame atie ngalo, ngec me cunya da, pi twer me Tipo Kacil, jurao ango

²be ango atie kede par adwong kede cwercury kalikame jik i cunya.

³Pien oudo amito be ka koto twerere, ango kikoma koto kolama di oko poka kede Kirisito pi imiegu na, kame obedo joawade na.

⁴Gin jo me Isirael, jo kame Rubanga omio odoko idwe mege. Komio gi deyo, isikan, Iswil, woro Rubanga, kede cikere.

⁵Joakwari me agege me Isirael obedo mergi, doko i kom kop kame mako anywali me kom, Kirisito owok ki ateker gi. Pak bed but Rubanga ngat kame lo jame dedede ikar kede ikar. Amen.

⁶Do likame etie bala kop ka Rubanga do oudo likame ocobere kakare. Pien likame anywali dedede me Isirael obedo jo me Isirael,

⁷doko likame ikwae ka Aburaam dedede obedo idwe ka Rubanga; do Rubanga bin owaco ne Aburaam be, “Ikwae ni bino wok kibut Isaka.”

⁸Man dwong mere be likame idwe me anywali me kom en kame idwe ka Rubanga, do idwe kame kocikere pirgi en kame kotero be ikwae mege.

⁹Pien cikere nono bin waco be, “Abino dwogo tetu kare noni di ako bino udo Sara tie kede atin awobi.”

¹⁰Do likame man kenekene, do doko da i kare kame bin Rebeka oyaco kede idwe kede icuo acel, en kwaru wa Isaka.



11 Akadi di oudo pwodi likame konywalo gi, arabo di pwodi likame kitimo gimoro aber amoto arac, do pi mino iik me yer ka Rubanga meede,

12 likame pi tice do pi lwongo mere, omio en eko waco ne Rebeka be, “Awobi adwong bino tic ne awobi atidi.”

13 Bala kame kowandiko be, “Amaro Yakobo, do adagi Esau.”

14 Nan do owacunu benyo? Mam be Rubanga likame timo gi dedede i yore me ateni? Likame kamano.

15 Pien bin Rubanga owaco ne Musa be, “Cunya bino bedo kede kisa i kom jo kame kisa maka kede gi, doko cunya bino bedo kede isasir i kom jo kame cunya bino mito bedo kede isasir i kom gi.”

16 Pi mano, likame etimere pi mit ka dano arabo cane mere, do pi Rubanga ngat kame nyuto cuny me kisa.

17 Pien iwandik kacil bin owaco ne Parao be, “Ango atingi malo pi nyuto twer na di beo kibuti, tetekeny bin tatamo nyinga i wi lobo lung.”

18 Pi mano, en kisa make kede ngat kame cunye oyeru, doko ngat kame en emito be bed ngaepali emio bedo ngaepali da.

Lilo ka Rubanga kede Cuny me Kisa mere

19 Wun ibinunu waco na be, “Pinyo komio pwodi Rubanga waco be odubo? Pien ngai kame karuno dagi gikame en emito?”

20 Do in ngai, in kom dano adana dwoko dog Rubanga? Iparo be gikame kocweo bino waco ne ngat kocwee be, “Pinyo komio icwea kaman?”

21 Mam ngacwei agune tie kede akarunikin i kom elupe, pi cweno tabo acel kame cil kede doko cweno acel ararac kede atukit acel me elupe kame onyongo nono?

22 Etie kamanono da kede Rubanga, pien di bin emito nyuto lilo mere kede mino twer mere ngere, di do en eko kanyakino kede dire adwong, pi jo kame etie kede lilo i kom gi, kame epoore dudubo.

23 En etimo kaman pi nyuto abar me deyo mere ne jo kame ebino bedo kede cuny me kisa i kom gi, jo kame egeo iiko sek pi udo deyo mere,

24 akadi kiton wada jo kame elwongo wa, likame kikut Iyudayan kenekene, do kikut jo kalikame Iyudayan da.

25 Bala kite kame ewaco kede i itabu ka Kosia be, “Jo kalikame oudo obedo jo na abino lwongo gi be ‘jo na, ‘ kede ngat kalikame oudo atie kede amara bute, abino lwonge be ‘me amaro.’

26 Doko i kabedo kame oudo owaco ne gi kiye be, ‘Wun likame jo na, ‘ kobino lwongo gi kiye be idwe ka Rubanga kakuo.”



²⁷ Isaya oko yamo kop i kom Isirael be, “Akadi bed bala wel me idwe me Isirael rom kede asinge me nam adwong, donge gi mogo anonok en kame bino bwot;

²⁸ pien Rwot bino mino kop kame engolo ne lobo timere iepone kame en emito abongo gal.”

²⁹ Doko etie bala kame Isaya bin omurao kede be, “Ka koto Rwot me yi likame oweko ne wa idwe mogo, koto odoko cal bala Sodoma kede bala Gomora.”

Ilega ka Paulo pi Jo me Isirael

³⁰ Nan owac do benyo? Owac kaman be, jo kalikame obedo Iyudayan, gin jo kalikame oudo cane pi bedo jo kopooore, odoko jo kopooore pien kibedo kede yei.

³¹ Do jo me Isirael kame oudo ocane lubo iswil pi bedo jo kopooore, likame oko twero cobo gikame iswil nono mito.

³² Pinyo? Pien gin likame kicane bedo jo kopooore pi yei, do pi timo tice kame Iswil mito. Pi mano, gin kiko gete ki wi engaro kame getaro jo,

³³ bala kame kowandiko be, “Neningo, ango atie keto engaro i Sion kame bino getaro jo, lela kame bino mino gi kipopoto. Do ngat kame yei en likame kobino mino lewic mako.”

Joroma 10

¹ Imiegu kede amiegu na, gikame cunya mito kede kame akwao Rubanga iye pi jo me Isirael en ine be, wek kiud alako.

² Ango ajurao gin be, gin kiketo cuny gi tic ne Rubanga, do keto cuny gi nono likame ocungo i ngec.

³ Pien gin oudo likame kingeo epone kame Rubanga mio kede jo doko jo kopooore, omio gin kiko mono mergi ken gi, di likame kiko jalere i poore kame Rubanga mio.

⁴ Pien bino ka Kirisito omio Iswil ojik, tetekeny jo dedede kame yei en bed jo kopooore.

Alako Tie pi Jo Dedede

⁵ Musa owandiko be, dano kame doko ngat kopooore pien etimo gikame Iswil mito, bino kuo pi Iswil.

⁶ Do poore pi yei waco kaman be, “Kur iwac i cunyi be, ‘Ngai kame bino yito i malo?’ ” (mano en pi kelo Kirisito piny)

⁷ ” arabo be, ‘Ngai kame bino donyo i kabedo me jo oto?’ ” (mano en pi oomo Kirisito ki kabedo me jo oto).

⁸ Do ewaco benyo? En ewaco be, “Kop ka Rubanga tie iyapiyapi kedi, etie i dogi kede i cunyi” (mano en kop me yei kame wan opwonyo);

⁹ pien ka ituco kede dogi be Yesu en Rwot, di iko yei i cunyi be Rubanga oyaruno en kikom jo oto, ibino udo alako.



- ¹⁰Pien dano yei i cunye di eko doko ngat kopooore; kede etuco kede doge di eko udo alako.
- ¹¹Iwandik kacil waco be, “Likame tie ngatamoro kame yei en, kame kobino mino lewic mako.”
- ¹²Pien apokapoka likame tie i dier Iyudayan kede Jogurik; Rwot acel nono en Rwot me jo dedede, doko en emio abar mere but jo dedede kame kwae.
- ¹³Pien kowandiko be, “Jo dedede kame lwongo nying Rwot bino udo alako.”
- ¹⁴Epone mene kame gin kikaruno lwongo kede nying ngat kalikame kiyei? Doko gin kikaruno yei ngat kalikame kiwinyo kop i kome benyo? Doko kitwero winyo kop i kome benyo abongo ngat kame tatamo ne gi?
- ¹⁵Doko jo karuno tatamo kop mere benyo ka likame ooro gi? Bala kame kowandiko be, “Tien jo kame kelo kop aber tin cil benyo!”
- ¹⁶Do likame gin dedede kiyei lubo kop me ejiri; pien Isaya owaco be, “Rwot, ngai koyei kop kame ewinyo kibus wa?”
- ¹⁷Aso yei wok kame jo owinyo kop, kede kop kame jo winyo wok kame kopwonyo kop i kom Kirisito.
- ¹⁸Do ango apenyere be, kara gin do likame kiwinyo? Ateteni gin kiwinyo, pien kowandiko be, “Dwan gin otieko romo wi lobo lung, kede kope kame kiwaco otieko tuno i ajikini me piny.”
- ¹⁹Bobo ango apenyere be, bin jo me Isirael likame oniang? Me agege Musa bin owaco be, “Abino mino nyeko mako wu kede ateker kame kony mere li; abino mino ibedunu ger kede ateker aming.”
- ²⁰Isaya bin obedo kede tekcury di eko waco be, “Jo kalikame oudo moa otieko wuda; ango atieko nyutere ne jo kalikame oudo penyo pira.”
- ²¹Do en eko waco kop i kom Isirael be, “Arieo cinga piny yuluyul but jo kalikame winyo kop na, kede kame piemmo keda.”

Joroma 11

Rubanga Obedo kede Cuny me Kisa but Jo me Isirael

- ¹Ango nan do apenyere be, Rubanga do otieko daga jo mege? Likame kamano! Ango da kikoma abedo dano me Isirael, akwar Aburaam, ngat acel kikom jo me ateker ka Benjamin.
- ²Likame Rubanga odagi jo mege kame oudo engeo cako sek. Mam ingeunu gikame iwandik kacil waco i kom Elia, kite kame ebako kede doge but Rubanga di edadangun pi jo me Isirael?
- ³En ewaco be, “Rwot, kineko inabin nin, kirereto alutari nin, ango en kame adong kena, doko da nan kitie mono kuo na.”



⁴ Do Rubanga oko dwoko ne benyo? Be, “Ango aweko cuo tutumia kanyaare pira, kalikame oriondiko i nyim Baal.”

⁵ Aso, etie kamanono i kare kanataman da, tie donge anonok me jo kame Rubanga oyero pi kisa mere.

⁶ Do ka koyero gi pi kisa, udo likame koyero gi be pien kitimo gikame Iswil mito, pien ka koto kamanono, koto kisa do likame en kisa.

⁷ Benyo do nan? Jo me Isirael likame oko twero udo gikame oudo kimoo. Jo kame koyero en koude, do jo apat bin komio gi kibedo jokany kop,

⁸ bala kame kowandiko be, “Rubanga omio gi cuny kodil, wang kalikame neno, kede yit kalikame winyo kop, etie kamanoni tuno tin.”

⁹ Daudi da owaco be, “Wek ibagai gin dok ne gi bala owic kede obek, kibed bala bur kame kipopoto iye kede alola pi dub gi.

¹⁰ Wek mi wang gi dok col tetekeny likame kikaruno neno piny, di oko mino ngei gi gomi atwal.”

¹¹ Ango ako do penyere be, oudo kigete pi poto? Likame kamano! Do pi dub gi omio jo kalikame Iyudayan da oko udo alako, tetekeny nyeko mak jo me Isirael.

¹² Nan do ka dub gi kelo abar i piny, kede ka poto gi kelo abar ne jo kalikame Iyudayan, bero mere bino bedo rom amene ka gin dedede do kidwogo!

Lakere me Jo kalikame Iyudayan

¹³ Nan ango atie yamo kede wun jo kalikame Iyudayan. Bala kite kame ango atie kede ngaor but jo kalikame Iyudayan,

¹⁴ amio tic na dwongo tetekeny nyeko mak Iyudayan wad wa, di ako bino mino mogo kibus gi udo alako.

¹⁵ Pien ka pi kite kame kodagi gi kede omio Rubanga kede piny odok i nywak, gamo gi bino kelo nyo do? Mam ebino kelo kuo ne jo oto?

¹⁶ Ka dul me alos kame konyongo di oko mino Rubanga bala giamia me anyakini me agege obedo gikacil, udo en dedede do ebedo gikacil, doko ka alias me yat obedo gikacil, udo ajange mege da obedo gikacil.

¹⁷ Do ka koturo ajange mogo me yat, di in alibo me olibeti me obar oko ropi kargi pi nywako abar me aliasin mege,

¹⁸ kur iwakere ne ajange apat. Aso nan ka in iwakere, ngei kiber be in en kalikame itie pito aliasin kede cam, do aliasin en kame tie pitin.

¹⁹ In ibino waco be, “Kotieko turo ajange apat tetekeny ropa kargi.”

²⁰ Mano tie ateni. Bin koturo gin tenge pien oudo likame gin kiyei, do in icungo di itek pi yei kenekene. Pi mano, kur idok ngaewaka, do bed kede lworu.



²¹Pien ka Rubanga likame oweko Iyudayan, jo kame obedo bala ajange me olibeti kikokome, akadi wuda likame ebino weko wu.

²²Nan do nenunu ber mwolo kede gero ka Rubanga. En eger kede jo kame opoto, do emwol kede wun ka idongunu di icungunu i mwolo mere; do ka li, wuda kobino tongo wu tenge.

²³Akadi Iyudayan da, ka likame kimoko i kom bedo abongo yei, kobino ropo gi i kom yat, pien Rubanga tie kede twer me ropo gi i kom yat bobo.

²⁴Pien ka in kotongi kikom yat kame i cwec mere ebedo olibeti me obar, di oko ropi i kom olibeti kikokome, gi kalikame upere kede ekite me cwec, mam ebino bedo do yot kalamo pi Rubanga ropo jange nogi me olibeti kikokome dok i kom yat kame koturo gi kiye?

Cuny me Kisa ka Rubanga but Jo Dedede

²⁵Imiegu kede amiegu na, pi mino wu kur itamunu kenu be iriekunu kalamo kite kame itienu kede, ango amito ingeunu gikame omungere noni be, jo mogo me Isirael nan tie kede epali, ebino bedo kamanono tuno di wel me jo kalikame Iyudayan kame bino but Rubanga oromo,

²⁶ di do oko bino lako jo dedede me Isirael, bala kame kowandiko be, “Ngalak bino wok ki Sion; en ebino kwanyo tenge kibus Yakobo tam me dagi woro Rubanga.

²⁷ Manoni bino bedo isikan na kede gi, kame akwanyo dub gi.”

²⁸I kom kop kame mako ejiri, gin kitie jokwor ka Rubanga piru; do i kom kop kame mako ayero, Rubanga maro gin pi joakwari gi.

²⁹Pien giamia kede lwongo ka Rubanga likame lokere.

³⁰Bala kite kame i kare moro bin wuda oudo idagunu kede winyo kop ka Rubanga, do nan Rubanga oko timo wu kisa pi kite kame gin kidagi winye kede,

³¹kamanono da, gida nan kidagi winyo dwan Rubanga tetekeny Rubanga tim gi kisa, pi kisa kame kotieko nyuto ne wu.

³²Pien Rubanga otieko jalo jo dedede i tim me dagi winyo kop mere, tetekeny ebed kede cuny me kisa but jo dedede.

³³ Abar ka Rubanga tin dwong benyo! Rieko kede ngec mere tin tut benyo! Mono epone kame en engolo kede kop kede niang yote mege tin tek benyo!

³⁴ Bala kame kowandiko be, “Pien ngai kotieko ngeno tam ka Rubanga, arabo ngai kobedo ngat kame mie tam?

³⁵ Arabo ngai kotieko mino Rubanga giamia me wek Rubanga da cul eda kede giamia?”

³⁶ Pien jame dedede owok kibute, kitie pi en, doko kidok bute. Deyo bed bute ikar kede ikar. Amen.



Joroma 12

Epone me Kuo i Tic ka Rubanga

- ¹Pi mano, imiegu kede amiegu na, akwao wu pi cuny me kisa ka Rubanga be, miunu komu bala giayala kame kuo, gikacil kame yomo cuny Rubanga. Manoni en woro Rubanga i ateni.
- ²Kur ilubunu kuo me piny ni, do miunu kuo wu lokere pi tam anyen kame itienu kede, me wek ingeunu gikame Rubanga mito, gikaber, kame yomo cunye kede kopooe.
- ³Pi kisa kame komia, ango awaco ne ngat acelacel kibutu pi weko paro pi dwongo mere i yore amalo kalamo kite kame mitere ne kede, do pi bedo kede tam aber, ngat acelacel di lubere kede rom me yei kame Rubanga omie.
- ⁴Pien bala kame otienu kede adulion atot i kom wa acel, doko adulion nogo dedede likame timo tic acel,
- ⁵wada otienu kamanono, bed bala ototunu, otienu kom acel i Kirisito, do di ngat acelacel bedo bala adul me kom ngat ocelu.
- ⁶Bala kame otienu kede giamia apapat kame lubere kede kisa kame Rubanga omio wa, wek otienu kede gi. Ka giamia wa obedo me imurai, otienu kede di lubere kede rom me yei wa;
- ⁷ka giamia wa obedo me tic ne jo, otienu kede ne jo; ngapwony pwony jo;
- ⁸ngat kame supo cuny jo sup cuny gi; ngat kame mio, emi kede cunye dedede; ngat kame telo jo, etel gi di eketo cunye iye; ngakisa, etim kisa kede yomcuny.
- ⁹Miunu amara wu bed me ateni, dagunu gikame rac di ikounu moko i kom gikaber.
- ¹⁰Marerenu kenu kenu, ikounu woro jo icegun kalamo.
- ¹¹Ketunu cunyu nakanaka, tiunu ne Rwot kede cunyu dedede.
- ¹²Lelunu pi gen wu, diunu cunyu i can kame itienu iye, bedunu di ilegunu nakanaka.
- ¹³Miunu jokacil gikame mitere ne gi, bedunu jo kame gamo jo.
- ¹⁴Kwaunu winyo ne jo kame tidilo wu; kwaunu ne gi winyo do kur ilamunu gi.
- ¹⁵Lelunu karacel kede jo kame lelo, kokunu karacel kede jo kame kok.
- ¹⁶Bedunu i anapakin kede ngat acelacel, kur itingerenu do riberenu kede jo kame pirgi likame tek; kur iwakerenu be iriekunu kalamo kite kame itienu kede.
- ¹⁷Kur iculunu raco moro kede raco, do tamunu pi gikaber i wang jo dedede.
- ¹⁸I tetu butu ka twerere, bedunu i mulem kede jo dedede.
- ¹⁹Jo na kame amaro, kur iculunu kwor, do wekunu kare ne lilo ka Rubanga; pien kowandiko be, “Tic me culo kwor en mera, abino culo kwor, Rwot en kowaco.”



²⁰ Do tim bala kame kowandiko be, “Ka kec oneko ngakwor ni, mie cam; ka orio oneke, mie pii emati; pien ka itimo kamanono ibino mino lewic make.”

²¹ Kur imiunu gikarac loi wu, do tiunu kede gikaber pi lono gikarac.

Joroma 13

Bedo kede Wor but Apugan

¹ Poore ngat acelacel wor apugan, pien likame tie akarunikin me apugan moro kalikame owok kibut Rubanga; akarunikin me apugan kame nataman tie go, Rubanga en koketo.

² Pi mano, ngat kame piemo kede akarunikin me apugan udo etie piem kede gikame Rubanga oyeru. Jo kame piemo kede nogo kobino ngolo ne gi kop.

³ Pien jo kame timo gikame beco likame lworu jopug, do jo kame timo gikame reco en kame lworu gi. Mam imitunu be kur ibedunu kede lworu i kom ngat kame tie kede akarunikin me apugan? Aso timunu gikame ber di en eko bino pwono wu,

⁴ piento en etie ngatic ka Rubanga pi bero wu. Do ka itimunu gikame rac, bedunu kede lworu, pien likame en emako epima me nono; en ngatic kame kelo lilo ka Rubanga i kom jo kame timo gikarac.

⁵ Pi mano, ngat acelacel poore bedo kede wor, likame pi gengo lilo ka Rubanga kenekene, do da pi ngec me cunye.

⁶ Pi kop acel nono en omio i gelunu esolo, pien weggi apugan, jo kame timo tic noni obedo jotic ka Rubanga.

⁷ Culunu gin dedede gikame ipoorenu pi culo ne ngat acelacel; gelunu esolo but jo kame kopoore culo esolo but gi, culunu esolo me jame ne jo kame kopoore culo ne gi, worunu ngat kame poore awora.

Amara but Jo Icegun

⁸ Kur ibedunu kede banya ka ngatamoro, do kenekene marerenu kenu kenu, pien ngat kame maro dano ocelu udo ecobo iswil kakare.

⁹ Cik kame waco be, “Kur itimo adote; Kur ineko; Kur ikwalo; Kur ingobelo jame me jo” ; kede cik ace apat dedede, oribere i kop kame waco be, “Mar dano wadu bala kite kame imarere kede keni.”

¹⁰ Amara likame timo ne dano wadu raco; pi mano, amara en kame cobo Iswil kakare.

¹¹ Medo i wi mano, wun ingeunu kare kame otienyu iye, esawa oromo do me wun cei ki wang nino, pien alako otieko do doko iyapiyapi kede wa lono i kare kame bin ocalo kede yei;

¹² iwor otieko kato sek, iceng otieko tuno. Wek do oucunu tenge tice me colo, di okounu ngapo jame me yi i lero.



¹³Obedunu kede tim kame kelo wor bala otienu i dier iceng, likame bedo kede yomcuny arac kede amera, likame timo caro arabo mit me lewic, likame lok arabo timo nyeko.

¹⁴Do ngapunu Rwot Yesu Kirisito bala egoe, di likame ikounu tamo pi kuo me kom kede pi cobo mit mege.

Joroma 14

Kur Ingolunu Kop ne Jo Icegun

¹ Gamunu dano kame yei mere goro, do likame pi piem kede en i kom tam mere.

²Dano moro karuno bedo kede yei kame mie ecamo gi dedede, di dano kame yei mere goro camo dek apura kenekene.

³Kur ngat kame camo cai ngat kame kwero. Doko kur ngat kame kwero da ngol kop ne ngat kame camo, pien Rubanga otieko game.

⁴In ngai kame mio ingolo kop ne ngatic me dano ace? Ngadwong mere en kame poore ngolo ne kop be epoto amoto be etimo kiber. Kobino kiarao en, pien ngadwong mere karuno mine ecungo.

⁵Dano moro romo tero ceng acel bala pire dwong kalamo apat, di dano ace ko tero ceng dedede be pirgi rom aroma. Wek dano acelacel yei i tam mere kene be, gikame en eparo tie gi me ateni.

⁶Ngat kame paro pi ceng moro, eparo pire pi woro Rwot. Ngat kame camo da, eda ecamo pi woro Rwot, piento en epwoyo Rwot; ngat kame kwero cam da, ekwero pi woro Rwot, piento en epwoyo Rubanga.

⁷Likame tie ngatamoro kame kuo pire kene, doko likame tie ngatamoro kame to pire kene.

⁸Ka okuounu, udo okuounu pi Rwot, ka otounu da, udo otounu pire; pi mano, akadi ka okuounu amoto ka otounu, wan obedunu me ka Rwot.

⁹Pien kop noni en komio Kirisito bin oto di eko kuo bobo, me wek ebed Rwot me jo oto kede me jo akuo.

¹⁰Pinyo mio ingolo kop ne omini arabo amini? Arabo pinyo mio icao omini arabo amini? Pien wan dedede obinunu cungo i nyim kom ka Rubanga me ngolo kop.

¹¹Pien kowandiko be, “Rwot owaco be, bala kame ango akuo kede, cong jo dedede bino riondiko i nyima, doko leb jo dedede bino pako Rubanga.”

¹²Pi mano, ngat acelacel kibun wa bino tatamo gikame etimo i nyim Rubanga.

Kur Imiunu Jo Icegun Poto i Dub

¹³Pi mano, owekunu ngolo ne jo icegun kop, do akaka manono, oyeunu pi weko keto ne ngat ocelu gikame getaro en amoto kame dwoke cen ki yei mere.



- ¹⁴Ango angeo doko aniang kiber i Rwot Yesu be, likame tie gimoro kame tie gi me kwer pire kene; do en etie gi me kwer ne ngat kame paro kamanono.
- ¹⁵Ka gikame in icamo wango cuny omini arabo amini, udo likame in itie timo gikame nyuto amara. Wek gikame icamo kur dub ngat kame Kirisito oto pire.
- ¹⁶Aso, kur imi yam bero ni bala gikarac.
- ¹⁷Pien Ajakanut ka Rubanga likame obedo cam kede giamata, do en ebedo poore, kede mulem, kede yomcuny i Tipo Kacil.
- ¹⁸Pi mano, ngat kame tio ne Kirisito, Rubanga game, doko jo da pwoye.
- ¹⁹Wek do olubunu yor gikame kelo mulem kede kame mio wa ogero yei wa wan kenwa kenwa.
- ²⁰Kur idudubunu tic ka Rubanga pi kop kame mako cam. Ateteni gi dedede olonyere me acama, do likame eber pi ngatamoro mino jo apat poto i dub pi gikame en ecamo.
- ²¹Eber ne in weko camo ringo, arabo mato bwini, arabo timo gimoroni kenekene kame mio dano ace getar.
- ²²Wek yei kame itie kede bed i diere ni kede Rubanga nin. Kitie kede yomcuny jo kalikame ngolo kop i kom gi ken gi pi gikame gin kipwoyo be ber.
- ²³Do ngat kame tie kede gungcuny i gikame ecamo, kongolo kop loe ka ecamo gi nono, pien udo likame etie timo kede yei; pien gi dedede kalikame wok ki yei obedo dub.

Joroma 15

Yom Cuny Jo Apat do Weko Meri keni

- ¹Wan jo kame yei wa tek opoorenu kanyakino popoto me jo kame yei gi goro, di likame otimo gikame yomo cuny wa kenwa.
- ²Wek dano acelacel yomcuny dano ocelu, pi gero yei mere.
- ³ Pien Kirisito bin likame oyomo cunye kene, bala kite kame kowandiko kede be, “Ayet kame jo oyeti kede opoto i koma.”
- ⁴Pien gi dedede kame oudo kowandiko i kare okato, oudo kowandiko pi pwonyo wa, tetekeny obedunu kede gen pi ikanyakin kede nwangcuny kame iwandik kacil mio wa.
- ⁵Ango akwao Rubanga ngat kame mio jo ikanyakin kede nwangcuny pi mino wu bedo kede tam acel, wun kenu kenu, di lubere kede anyut kame Kirisito Yesu omio,
- ⁶tetekeny wun dedede, kede dwan acel, ipakunu Rubanga, en Papa me Rwot wa Yesu Kirisito.

Kop Aber ne Jo kalikame lyudayan



⁷Pi mano, gamunu jo icegun bala kame Kirisito da ogamo wu kede, tetekeny imiunu Rubanga deyo.

⁸Pien awaco ne wu be, Kirisito odoko ngat kame tio ne jo kame kokepo pi nyuto ateni ka Rubanga, tetekeny emi cikere mere but joakwari me agege me Isirael cobere,

⁹ kede me wek jo kalikame Iyudayan pak Rubanga pi cuny me kisa mere, bala kame kowandiko kede be, “Pi mano, ango abino paki i dier jo kalikame Iyudayan, di ako wero were me pako nyingi.”

¹⁰ Bobo be, “Lelunu karacel kede jo mege, wun jo kalikame Iyudayan.”

¹¹ Bobo ewaco be, “Pakunu Rwot, wun jo dedede kalikame Iyudayan, doko wek jo dedede pake.”

¹² Isaya bobo oko meede kede yamo be, “Akwar Yese oyaro bino, en eyaro bino pi pugo jo kalikame Iyudayan; jo kalikame Iyudayan bino bedo kede gen i kome.”

¹³Wek Rubanga ngat kame mio gen, pong kuo wu kede yomcuny kede mulem pi yei wu i kome, tetekeny ibedunu kede gen adwong pi twer me Tipo Kacil.

Gikame Omio Paulo Owandiko Baluwa kede Nwangcuny

¹⁴Imiegu kede amiegu na, ango kikoma atie kede niang aber i komu, be wun ipongunu kede bero, doko itienu kede ngec dedede, doko itwerunu pwoyere kenu kenu.

¹⁵Do kope mogo tie kame awandiko kede nwangcuny pi mino wu iyutun. Atimo manoni pi kisa kame Rubanga omia,

¹⁶pi bedo ngatic ka Kirisito Yesu but jo kalikame Iyudayan, di atio bala ngasaseredoti kame tucio ejiri ka Rubanga, tetekeny jo kalikame Iyudayan dok giamia kame Rubanga karuno gamo, kame Tipo Kacil olonyo.

¹⁷Pi mano, atie kede tien kop kame mia awakere i Kirisito Yesu pi tic kame atimo ne Rubanga.

¹⁸Likame abino waco kop i kom gimoro ace, kwanyo gikame Kirisito omio otimere kibuta, pi mino jo kalikame Iyudayan lubo kop ka Rubanga. En etimo manoni i kope kede tice na,

¹⁹i gianena kede i gi me isuur, kede i twer me Tipo ka Rubanga. Manoni en komio atieko tucio ejiri ka Kirisito kakare, cako ki Yerusalem tuno Iluriku.

²⁰Man oko mina bedo kede mit me tucio ejiri kakame pwodi likame kolwongo kiye nying Kirisito, tetekeny kur arop gedo i wi tic ka ngatamoro apat.

²¹ Bala kame kowandiko be, “Jo kalikame kowaco ne gi kop i kome bino nene, kede jo kalikame pwodi owinyo kop i kome bino niang kop i kome.”

lik ka Paulo pi Welao Roma

²² Man en kop komio nakanaka likame atwero bino butu.



- ²³Do nan bala kite kalikame doko atie kede tic moro i adulon me kan, bala kame abedo paro kede sek, cunya mito do bino butu
- ²⁴di atie ot Sipania. Pien ageno be abino neno wu i kare kame atie ot kede kuno di ikounu bino mina kony pi mina meede kede ot na, ingei ango bedo kede wu pi kare moro acecek.
- ²⁵ Bed bala kamano da, nataman ango atie ot Yerusalem pi tero kony ne jokacil.
- ²⁶Pien jo me Makedonia kede jo me Akaya cuny gi obedo yom pi nywako jame gi kede jocan kikom jokacil kame tie Yerusalem.
- ²⁷Cuny gi oudo yom pi timo kamanono, doko i ateteni etie banya but gi. Pien ka Iyudayan onywako winyo gin me cuny kede jo kalikame Iyudayan, jo kalikame Iyudayan da poore mino Iyudayan kony me jame.
- ²⁸Pi mano, kame atieko timo tic noni, kede kame atieko mino gi gikame kocoko, abino beo butu di atie ot Sipania.
- ²⁹Doko angeo be, kame atuno butu, abino kelo winyo adwong kame oyai kibut Kirisito.
- ³⁰Imiegu kede amiegu na, akwao wu i Rwot wa Yesu Kirisito kede i amara me Tipo Kacil be, ribereku keda i timo teko ilega karacel keda but Rubanga pira,
- ³¹me wek amotoko kolaka ki cing jo kalikame oyei kame tie Yudea, kede me wek jokacil pwoi tic na kame atieko timo Yerusalem.
- ³²Manono bino mina adwogo butu kede yomcuny, di ako bino udo alakanar kame atie karacel kede wu, ka Rubanga oyei.
- ³³Rubanga won mulem bed kede wu dedede. Amen.

Joroma 16

Amot kame Paulo Ocwao

- ¹Anyuto amin wa Paibe butu, ngakony tic ka Rubanga i ekodet me jokirisito i Kenkerea, bala dano aber, me
- ²wek igamenu i Rwot bala kame poore ne jokacil timo, di ikounu mine kony dedede kame eromo mito kibutu. Pien lem en ebedo kony jo atos akadi kiton ada.
- ³ Motanu Purisila kede Akwila, kame obedo jotit jowota i Kirisito Yesu,
- ⁴jo kame oudo oyei to pi kuo na. Likame ango kena en kame apwoyo gi, do kiton ekodet me jokirisito kalikame obedo Iyudayan.
- ⁵Motanu ekodet me jokirisito kame cokere i ot gi. Motanu ngawota kame amaro Epaenato, kame oudo obedo dano me agege me lokere but Kirisito i Esia.
- ⁶Motanu Maria, ngat kobedo timo tic atek i diere wu.



- ⁷Motanu Anduroniko kede Yunia, kame obedo joawade na kame bin kotwea kede gi i otkol. Gin kitie jo angere kikom joor, doko gin kigeo nango doko jokirisito.
- ⁸Motanu Ampuliato, ngawota kame amaro i Kirisito.
- ⁹Motanu Urbano da, ngatic wad wa i Kirisito, kede ngawota kame amaro Sitaku.
- ¹⁰Motanu Apele ngat kame kopwoyo i Kirisito. Motanu jo me i ot ka Arisitobulo.
- ¹¹Motanu wad wa Erodion. Motanu jo kame tie i Rwot, kame obedo jo me ot ka Narisisa.
- ¹²Motanu jogo kame timo tic ka Rwot, Teropaina kede Teroposa. Motanu ngawota me amaro Peresi, kame obedo timo tic atek i Rwot.
- ¹³ Motanu Rupus dano kame koyero i Rwot, kede toto mere kame obedo toto nada.
- ¹⁴Motanu Asinkerito, Pelegon, Kereme, Patroba, Kerema kede imiegu kede amiegu kame tie karacel kede gi.
- ¹⁵Motanu Pilologa, Julia, Nereu kede amin mere, kede Olimpasi, kede jokacil dedede kame tie karacel kede gi.
- ¹⁶Moterenu kenu kenu kede amot kacil me notere. Ikodeta dedede me jokirisito moto wu.

Cor me Ajikini kame Paulo Omio

- ¹⁷Imiegu kede amiegu na, akwao wu pi gwokere ki kom jo kame kelo apokapoka kede kame totolo yei me jo, jo kame dagi lubo kop kame kopwonyo wu; kur ibedunu kede gi.
- ¹⁸Pien epone me jo nogo likame tio ne Rwot wa Kirisito, do kitio pi cobo mit gi. Gin kingalo jo kame tam gi likame tut kede kope gi amit, kame winyo ber.
- ¹⁹Jo dedede otieko winyo be wun ilubunu kop me ejiri, en komio ango cunya yom i komu. Amito ibedunu jo kame tie kede rieko me ngeno gikaber, kede jo kame li kede kop moro kame makere kede gikarac;
- ²⁰di do Rubanga won mulem ko bino nyonyoto Sitani di eko kete i loc wu i kare kiyapiyapi. Kisa ka Rwot wa Yesu Kirisito bed kede wu.
- ²¹ Temeseo, ngatic ngawota moto wu. Lukio kede Jason kede Sosipata kame obedo joawade na da, moto wu.
- ²²Ango Teritio, ngat kowandiko baluwa noni, amoto wu i Rwot.
- ²³ Gayo ngat kame tie gwoka i ture, karacel kede jo me kan dedede koyei Kirisito moto wu. Erasito, ngakan lim me bomba, kede omin wa Kuato moto wu.
- ²⁴Kisa ka Rwot wa Yesu Kirisito bed kede wu dedede. Amen.

Ilega me Pak kame Jiko



²⁵Omiunu Rubanga deyo, en ngat kame karuno mino wu icungunu di itekunu i yei, di upere kede ejiri kame ango atuco kede kop kame apwonyo i kom Yesu Kirisito, di lubere kede nyutere me gikame omungere, kame oudo kokano pi kare alac.

²⁶Do nan kotieko nyute, di oko mine engere but jo kalikame Iyudayan dedede i iwandik kacil me inabin, di lubere kede cik kame Rubanga ngat kame bedo nakanaka omio, pi mino jo yei kop mere di kiko lubo.

²⁷Deyo bed but Rubanga acel kenekene won rieko, pi Yesu Kirisito, ikar kede ikar. Amen.



1 Jokorinti

1 Jokorinti 1

Amot

¹Baluwa kowok kibut Paulo, ngat kame bin Rubanga olwongo i mit mere pi bedo ngaor ka Kirisito Yesu, kede kibut omin wa Sosetene.

²But jo koyei Rubanga i Korinti, jo kame kolonyo i Kirisito Yesu, gin jo kame Rubanga olwongo pi bedo jo mege kacil, karacel kede jo dedede i kabedo dedede kame lwongo nying Rwot Yesu Kirisito, en Rwot gi kede merwa da.

³Kisa kede mulem kame yai kibut Rubanga Papa wa kede Rwot wa Yesu Kirisito bed kede wu.

Winyo kame tie i Kirisito

⁴Ceng dedede ango apwoyo Rubanga piru, pi winyo kame en emio wu i Kirisito Yesu.

⁵Pien i ribere wu kede Kirisito, omio wun do itiekunu baro i yore dedede, i yamo wu dedede, kede i ngec wu da dedede.

⁶Pien kop i kom Kirisito do otieko donyo i diere wu di tek adikinicel.

⁷Manoni omio likame tie giamia moro kame Tipo Kacil mio, kame nan wun ikeunu di pwodi ikurunu kare kame Rubanga bino nyuto kede Rwot wa Yesu Kirisito.

⁸Yesu bino mino wu icungunu di itekunu i yei wu tuno i ajikini, tetekeny ibedunu abongo raco moro i ceng me dwogo mere.

⁹Rubanga genere, en kame elwongo wu pi bedo i nywak kede Wode Yesu Kirisito, en Rwot wa.

Apokapoka i dier Ekodet me Jokirisito

¹⁰Imiegu kede amiegu na, ango abako dogo butu i nying Rwot wa Yesu Kirisito be, wun dedede bedunu kede winyere i kope wu, kede kur apokapoka bed i diere wu. Do ribere nu i cuny acel kede i tam acel.

¹¹Pien jo ka Koloe mogo otieko nianga be lok tie i diere wun imiegu kede amiegu na.

¹²Gikame ango atie yamo en ine be, ngat acelacel kibutu yamo be, “Ango dano ka Paulo,” mogo be, “Ango gira dano ka Apolo,” ace bobo be, “Ango dano ka Kepa,” kede apat be, “Ango dano ka Kirisito.”

¹³Mam kotieko popoko Kirisito? Benyo, Paulo en kame bin koguro i kom musalaba piru? Arabo oudo kobatiso wu i nying Paulo?

¹⁴Ango apwoyo Rubanga pien likame ango abatiso ngatamoro kikom wu, kwanyo Kirisipo kede Gayo.

¹⁵Omio likame tie ngatamoro kame twero yamo be kobatiso en i nyinga.



¹⁶ (Ee, abatiso da bobo jo me ot ka Sitepana, do likame atwero yutuno ka bobo ako batiso ngatamoro ace.)

¹⁷Pien Kirisito likame oora pi batiso jo, do pi tucó ejiri, do likame kede leb amit me rieko ka dano, tetekeny kur kop me to ka Kirisito i kom musalaba bed abongo twer mere.

Kirisito en Twer kede Rieko ka Rubanga

¹⁸Pien kop me to ka Kirisito i kom musalaba tie gi me mingo but jo kame tie rwenyo, do ne wan jo kame kotie lako wa, etie twer ka Rubanga.

¹⁹Pien Kowandiko be, “Abino dudubo rieko me jorieko, di ako totolo ngec me jo kame ngeo piny.”

²⁰Nan do ngarieko tie tuai? Ani do kara ngapwony me Iswil? Ani ngat kame piemo kitek me kare noni? Mam Rubanga otieko mino rieko me piny odoko mingo?

²¹Pien Rubanga i rieko mere, emio jo likame otwero ngene i rieko gi ken gi, do en eko lunyo lako jo kame yei en pi kop kame jo tero be me mingo, kame wan opwonyo.

²²Iyudayan mito gianena, kede Jogurik mo rieko.

²³Do wan girwa opwonyo kop i kom Kirisito kame koguro, kop kame winyo rac ne Iyudayan, kede ne jo kalikame Iyudayan etie gi me mingo,

²⁴do ne jo kame Rubanga olwongo, Iyudayan kede jo kalikame Iyudayan, kop noni en Kirisito, kame obedo twer kede rieko ka Rubanga.

²⁵Pien gikame neeno bala mingo ka Rubanga en rieko kame kalamo me ka dano, doko gikame neeno bala goro ka Rubanga en teko kame kalamo me ka dano.

²⁶Imiegu kede amiegu na, yutununu kong lwongo wu; iekite kame jo neno kede, jo atos kibutu oudo likame riek, doko jo atos kibutu oudo likame obedo wegi twer, doko jo atos oudo da likame yai ki miere kame koworo.

²⁷Do Rubanga oko yero gikame jo neno bala gi me mingo i piny pi mino lewic mako jorieko, bobo eyero gikame jo neno bala gikame goro pi mino lewic mako jo kame tek.

²⁸Rubanga oyero gikame jo cao, gikame kony gi li, pi dudubo gikame jo tero bala pirgi tek,

²⁹tetekeny ngatamoro kur wakere i nyim Rubanga.

³⁰Rubanga en kame mio wu kuo i Kirisito Yesu, ngat kame en emio odoko ne wa rieko kame wok kibut Rubanga. En kame emio wa odoko jo kopooore, kolonyere, kede kame kotieko lako.

³¹Pi mano, kowandiko be, “Ngat kame wakere, wek ewakere pi Rwot.”

1 Jokorinti 2



Kop i kom Kirisito kame Koguro i kom Musalaba

- ¹ Imiegu kede amiegu na, kakame oudo abino kede butu pi tatamo ne wu mung me ateni ka Rubanga, likame oudo abino kede yamo amit, arabo kede rieko.
- ² Pien oudo bin amoko tam na pi weko ngeno gi dedede i diere wu, kwanyo kenekene Yesu Kirisito, ngat kame koguro i kom musalaba.
- ³ Ango ako bedo kede wu di agoro, di atie kede lworu kede mielkom;
- ⁴ doko yamo na kede kop kame oudo apwonyo likame bin amio kede rieko kame wao tam wu, do amio kede gikame nyuto twer me Tipo ka Rubanga,
- ⁵ tetekeny yei wu kur cungi i rieko ka dano do ecungi i kom twer ka Rubanga.

Rieko ka Rubanga

- ⁶ Akadi kamanono da, wan opwonyo kop me rieko but jo ocato i yei, bed bala en likame ebedo rieko me piny kan, arabo rieko me jopug me piny kan, rieko kame bino doko li.
- ⁷ Do wan opwonyo rieko ka Rubanga, rieko komungere kede kokanere, kame Rubanga omoko riki sek di pwodi likame ecweo piny pi mino wa udo deyo.
- ⁸ Likame tie ngapug moro me piny kan kame oko niang iye: pien ka koto oudo kiniang, koto likame kiguro Rwot me deyo.
- ⁹ Do bala kame kowandiko be, “Gikame wang moro likame pwodi oneno, akadi yit moro da likame pwodi owinyo, akadi ngatamoro da pwodi likame otamo pire, gi nono en kame Rubanga otieko iiko ne jo kame mare.”
- ¹⁰ Rubanga omio Tipo Kacil onyuto ne wa gi nono. Pien Tipo Kacil mo gi dedede, akadi kakatut me tam ka Rubanga.
- ¹¹ Ngai kame ngeo tam me dano kwanyo tipo mere kame tie i en? Kamanono da likame tie ngat kame ngeo tam ka Rubanga kwanyo Tipo ka Rubanga.
- ¹² Wan likame ogamunu tipo me piny kan do wan ogamunu Tipo kame wok kikut Rubanga, me wek oniangunu i kom giamia kame Rubanga omio wa.
- ¹³ Manoni en gikame wan opwonyo, likame kede kope kame kopwonyo kede rieko ka dano, do kede kope kame Tipo en kame opwonyo, di ogonyo kope me cuny but jo kame tie kede Tipo.
- ¹⁴ Dano kame li kede Tipo ka Rubanga likame twero udo giamia me Tipo ka Rubanga, pien gin kitie gi me mingo kibute, doko likame etwero niang i kom gi, pien dano kame tie kede Tipo ka Rubanga en kame twero poko bero gi.
- ¹⁵ Dano kame tie kede Tipo ka Rubanga, en kame twero ngeno poko bero me gi dedede, do likame tie ngat kame twero ngeno poko bero arabo raco meren.
- ¹⁶ Bala kame iwandik kacil waco be, “Ngai kame ngeo tam ka Rwot? Ngai kame twero mine tam?” Do wan otie kede tam ka Kirisito.



1 Jokorinti 3

Jotic ka Rubanga

- ¹Imiegu kede amiegu na, oudo likame atwero yamo kede wu bala jo kame tie kede Tipo ka Rubanga, do bala jo kame tie iekite me kom, bala imukerun i Kirisito.
- ²Ango oudo apito wu kede cak, likame kede cam anwang; pien oudo likame itwerunu camo cam anwang; akadi nataman da pwodi likame itwerunu,
- ³pien wun pwodi itienu iekite me kom. Pien ka nyeko kede lok tie i diere wu, mam udo pwodi itienu bedo iekite me kom, di tim wu cal bala me dano adana?
- ⁴Pien ka ngat acel yamo be, “Ango dano ka Paulo,” kede ace be, “Ango dano ka Apolo,” mam udo itienu timere bala jo ajoa me piny?
- ⁵Kara Apolo do en ngai? Paulo en ngai? Wan obedo jotic ka Rubanga, jo kame otelo wu yei Yesu Kirisito iekite kame Rwot opoko ne kede ngat acelacel.
- ⁶Ango en kame oudo apito kodi, Apolo oko onyo pii iye, do Rubanga en oko mine edongo.
- ⁷Pi mano, akadi ngat kopito, arabo ngat koonyo pii, gin dedede pirgi likame tek, do ngat kame pire tek en Rubanga, piento en kame emio kodi odongo.
- ⁸Ngat kame pito kede ngat kame onyo pii, gin kirorom, ngat acelacel bino udo cul kame rom kede tic kame en etimo.
- ⁹Pien wan obedo jotic karacel kede Rubanga; wun ibedunu pota ka Rubanga, doko da ibedunu gedo mere.
- ¹⁰Ango atio kede giamia kame Rubanga opoko na bala ngagedo kipirana; ango agero acakini me ot, dano ace tie rope. Mito dano acelacel gwok ekite kame eropo kede gere.
- ¹¹Pien likame bobo tie acakini moro ace kame ngatamoro romo cako gero apat kede kame kotieko cako, en Yesu Kirisito.
- ¹²Nan ka ngatamoro oropo gedo i wi acakini noni kede saabu, siliba, ingaroi me wel, yen, rido, arabo lum,
- ¹³tic me ngagedo acelacel bino nyutere kakaler; Ceng ka Kirisito me ngolo kop bino nyute, pien mac bino nyute; mac bino yeko tice kame ngat acelacel otimo.
- ¹⁴Ka gikame dano oropo gero i wi acakini nono likame owang, ngagedo nono bino udo giamia me pwoc.
- ¹⁵Do ka tic me dano moro owang, en ebino kei giamia mere me pwoc, do en ebino bwot, bwot kame cal bala ngat kame obelo abela ki mac.
- ¹⁶Mam ingeunu be wun en kame tempulo ka Rubanga, bobo da be Tipo ka Rubanga bedo i wun?



¹⁷Ka ngatamoro oko dudubo tempulo ka Rubanga, Rubanga da bino dudubo en. Pien tempulo ka Rubanga en kabedo kacil, doko wun en kame ibedunu tempulo nono.

¹⁸Kur ngatamoro ngalere kene. Ka ngatamoro kikom wu tamo be en eriek i piny kan, mito kong edok ngamingo tetekeny edok riek.

¹⁹Pien riek me piny kan obedo gi me mingo i nyim Rubanga. Pien kowandiko be, “Rubanga mako jorieko i riek gi,”

²⁰kede bobo be, “Rwot ngeo be tam me jorieko gimoro li.”

²¹Pi mano, kur ngatamoro wakere pi dano, pien gi dedede obedo megu,

²²akadi Paulo arabo Apolo, amoto Kepa arabo piny kan, arabo kuo arabo to, arabo kare kanataman amoto kare me anyim, gin dedede megu,

²³doko wuda ibedunu me ka Kirisito, kede Kirisito da obedo me ka Rubanga.

1 Jokorinti 4

Joor ka Kirisito

¹Poore iterunu wa bala jotik ka Kirisito kede jogwok me mung ka Rubanga.

²Gikame mitere kibun jogwok en ine be, gin kipoore bedo jo kame genere.

³Do kibuta, ango likame aparo ka wun amoto ekiko moro me jo ongolo na kop; akadi ango da likame angolo kop i koma kena.

⁴Cunya likame ngeo gimoro arac kame atimo, cite likame do be ango ali kede kop moro. Rwot en kame ngolo nango kop.

⁵Pi mano, kur ingolunu kop ne ngatamoro di pwodi likame kare otuno, di pwodi Rwot likame odwogo. En ebino woto i lero gikame nan kokano i colo, doko ebino mino iik kame tie i cuny jo ngere. Di do dano acelacel ko bino udo pwoc kibut Rubanga.

⁶Imiegu kede amiegu na, kope nogi ango ayamo di adwoko i koma kede i kom Apolo pi bero wu, tetekeny isiaonu kibut wan dwong me kop kame kowandiko be, “Kur ikalamo gikame kowandiko,” tetekeny ngatamoro kibutu kur wakere pi ngat acel di eko cano ngat ocelu.

⁷Kara ngai komii ibedo pat kede jo icegun? Nyo kame in itie kede kalikame komii amia? Aso ka komii amia, pinyo komio iwakere bala oudo likame ebedo giamia?

⁸Wun itiekunu udo gi dedede kame imitunu! Itiekunu baro! Itiekunu doko abakai abongo kony kame yai kibut wa. Cunya oudo mito be koto idokunu abakai, tetekeny koto wada obedo abakai kede wu.

⁹Pien ango atamo be Rubanga onyuto wan joor bala jo kocoko, bala jo kame kongolo ne gi kop me to; pien wan otieko doko gikame piny lung ngio, ne imalaikan kede ne jo da.



- ¹⁰Wan obedo jomingo pir Kirisito, do i Kirisito wun iriekunu. Wan ogoro, do wun itekunu. Jo mio wun wor do wan kocao wa.
- ¹¹Tuno iesawa noni, kec kede orio neko wa, likame otie kede igoen abeco, jo bungo wa doko likame otie kede miere,
- ¹²wan ocane kitek, di otio kede cing wa. Kame koyeto wa, wan omio winyo; kame kotidilo wa, wan okanyakino;
- ¹³kame kodubo nying wa, wan oyamo kede dwan me mwolo. Tuno tin wan otieko doko bala yugi me piny, cete kame kojililo kede gi dedede.
- ¹⁴Ango likame atie wandiko man pi mino wu lewic, do pi pwoyonyo wu bala idwe na kame amaro.
- ¹⁵Pien bed bala wun itienu kede jo kalikame marere, kame telo wu i Kirisito, likame itienu kede papi wu kame tot. Pien ango oudo adoko papa wu i Kirisito Yesu, pien akelo ne wu ejiri.
- ¹⁶Pi mano, ango abako doga butu be, lubunu ekite na.
- ¹⁷Nan ango atie cwano Temeseo butu pi kop noni, en ebedo atin na kame amaro, kede kame genere i Rwot. En ebino mino wu iyutununu yote na i Kirisito Yesu, bala kame ango abedo pwoyonyo gi kede i kabedo dedede i ikodeta dedede me jokirisito.
- ¹⁸Do jo mogo kibutu otieko doko joewaka, pien oudo kiparo be ango likame ayaro bino butu.
- ¹⁹Do ka Rwot oyei, ango ayaro bino butu i kare iyapiyapi, likame pi niang kop kame jo kame wakere nogo yamo kenekene, do amito da ngenyo twer kame kitie kede.
- ²⁰Pien Ajakanut ka Rubanga likame obedo yamo kenekene, do ebedo da gikame tie kede twer.
- ²¹Imitunu mene? Abin butu kede popo, arabo kede amara kede cuny me mwolo?

1 Jokorinti 5

Caro i Ekodet me Jokirisito

- ¹Ateteni kop owinyere be tim me caro tie i diere wu, epone me caro kame jo kalikame ngeo Rubanga da likame timo. Pien tie icuo kame odonyo buto kede dako ka papa mere.
- ²Do di pwodi wun iwakerenu. Akaka manono, mam oudo ipoorenu bedo kede iturur? Riamunu tenge ki diere wu ngat kotimo gi noni.
- ³Pien akadi bed bala koma li kibutu, do ango atie kede wu i cuny; aso di cal bala atie kede wu, ango atieko ngolo kop
- ⁴i nying Rwot Yesu ne ngat kame otimo akodi gi noni. Kame icokerenu, di ango atie kede wu i cuny kede i twer ka Rwot Yesu,



- ⁵Wun miero imiunu icuo noni i cing Sitani, me wek nek kome, tetekeny tipo mere amoto ud alako i ceng me dwogo ka Rwot.
- ⁶Ewaka wu nono likame ber. Mam ingeunu be arup atitidi mio engano lung kame konyongo buuno?
- ⁷Kwanyunu tenge arup acon me dub di ikounu doko bala engano kame konyongo anyen, bala kame ateteni itienu kede abongo arup. Pien kotieko neko bala giayala, Atin Romo wa me Ebagu me Kalamo, en Kirisito.
- ⁸Pi mano, wek ocamunu ebagu abongo cuny acol kede tim areco, kame tie bala mugati me arup acon, do ocamenu kede tam korie kede ateni, kame tie bala mugati kame arup li kiye.
- ⁹Ango oudo awandiko ne wu i baluwa na be, kur inywakunu kede jocar.
- ¹⁰Ango likame atie yamo jocar me piny kan, arabo joeranga kede joyak, amoto jo kame woro cal jwogi, pien mano do mito in iyai tenge ki piny kan atwal atwala.
- ¹¹Gikame oudo awandiko en ine be, kur inywakunu kede dano kame lwongere be en omin wa arabo amin wa i Kirisito, do di ecar, arabo en ngaeranga, arabo eworo cal jwogi, arabo en ngadub nying jo, arabo ngamera, amoto en ngayak. Kur inywakunu akadi cam kede akodi dano nono.
- ¹²Pien likame tic nango obedo me ngolo kop ne jo kalikame lubo Kirisito. Mam jo kame tie i ekodet me jokirisito en kame ipoorenu ngolo ne gi kop?
- ¹³Rubanga en kame bino ngolo kop ne jo kalikame oyei Kirisito. Pien kowandiko be, “Riamunu tenge ki diere wu dano kame tie kede tim areco.”

1 Jokorinti 6

Pido Ngakirisito Wadu

- ¹Kame ngatamoro kikom wu tie kede kop moro arac kede ngakirisito ocelu, pinyo kame mio en edire ot pide i nyim jo kalikame woro Rubanga, akaka ot pide i nyim jokacil?
- ²Mam ingeunu be jokacil bino ngolo kop ne piny? Aso ka wun ibinunu ngolo kop ne piny, benyo, likame do itwerunu ngolo kope atitino i ekiko?
- ³Mam ingeunu be wan obinunu ngolo kop ne imalaikan? Aso ka tie kamanono, wan otwerunu ngolo kop kame makere kede kuo me i kare ni kalamo.
- ⁴Pi mano, ka itienu kede pido, pinyo kame mio iterunu gi but jo kame ekodet me jokirisito likame mio dwongo?
- ⁵Awaco man me wek lewic maku. Iparunu be likame tie ngatamoro kame riek kikom wu, kame twero poko jokirisito are kame tie kede atwomutwomun?
- ⁶Do kibun, ngakirisito acel pido ocelu i nyim jo kalikame oyei Kirisito.



⁷Bedo kede pido i diere wu kenu kenu nyuto be kop do otieko bwono wu. Pinyo kame mio likame ikanyakinunu raco kame kotimo ne wu? Pinyo kame mio likame ijalunu kokwalo wu?

⁸Do wun kikomu itimunu raco, doko ikwalunu, itimunu kamanono kiton ne jokirisito wadu da.

⁹Mam ingeunu be jo kame timo gikareco, Ajakanut ka Rubanga likame bino doko mergi? Kur ngalu! Pien jocaró, arabo jo kame woro cal jwogi, joadote, cuo kame buto kede cuo wad gi,

¹⁰jokuwo, arabo joeranga, joamera, jo kame dubo nying jo, amoto joyak, Ajakanut ka Rubanga likame bino doko mergi.

¹¹Jo mogo kikom wu oudo cal kamagonogo. Do wun kotieko lwoko dub wu, kotieko lonyo wu, kotieko mino wu idokunu jo kopooore pi nying Rwot Yesu Kirisito kede pi Tipo ka Rubanga wa.

Tiunu kede Komu pi Mino Rubanga Deyo

¹² “Koyei na timo gi dedede,” do likame gi dedede konya. Arabo, “Koyei na timo gi dedede,” do likame gimoro bino mina abedo epasoit mere.

¹³” Cam tie pi yic, yic da tie pi cam,” ebo, do Rubanga bino jiko gin dedede. Kom wa likame tie pi timo caro, do pi tic ne Rwot, doko Rwot en kame tie kede loc i kom wa.

¹⁴Rubanga oyaruno Rwot, doko ebino yaruno wada kede twer mere.

¹⁵Mam ingeunu be komu obedo adulion me kom Kirisito? Pi mano, iparunu be ango akwany adul me kom Kirisito di ako mine edoki adul me kom malaya? Likame twerere!

¹⁶ Mam ingeunu be ngat kame ribere kede malaya edoko kom acel kede en? Pien kowandiko be, “Gin jo are nogo kibino doko kom acel.”

¹⁷Do ngat kame ribakin kede Rwot, en edoko acel kede en i cunye.

¹⁸Wekunu caro. Dub dedede kame dano timo likame timere i kome; do ngat kame timo caro dubo i kome kene.

¹⁹ Mam ingeunu be komu obedo tempulo me Tipo Kacil kame tie i komu, Tipo kame Rubanga omio wu? Wun likame megu kenu.

²⁰Pien wun kowilo wu kede wel adwong; pi mano, tiunu kede komu pi mino Rubanga deyo.

1 Jokorinti 7

Kop kame mako Nyom

¹Nan do i kom kop kame mako gikame iwandikunu, eber ne icuo weko buto kede dako.



- ²Do pi gengo atama me caro, poore icuo acelacel bed tie kede dako mere kame make, bobo dako acelacel da poore bed tie kede cware kame make.
- ³Icuo poore tieko mit me buto ka dako mere, doko dako da poore timo kamanono ne cware.
- ⁴Pien dako likame tie kede akarunikin i kome kene, do cware en kame tie kede akarunikin iye; kamanono da icuo likame tie kede akarunikin i kome kene, do dako mere en kame tie kede akarunikin iye.
- ⁵Kur itwon ngawoti komi, kwanyo amoto ka iwinyerenu pi timo kamanono pi kare moro acecek, me wek imiunu kare wu i ilega; do i cen mere di bobo ikounu dok iye. Mano bino mino itwerunu dino mit me komu di Sitani likame ko karuno tamo wu.
- ⁶Ango atie waco ne wu man bala gikame ango ayei ne wu timo, do likame bala cik.
- ⁷Ango oudo amito be koto jo dedede bed bala ango. Do dano acelacel tie kede giamia mere kame Rubanga omie, ngat acelacel tie kede giamia me epone apat.
- ⁸Aso ango awaco ne jo kalikame onyomere kede ne apuserun be, eber ne gin dong di likame kinyomere bala kite kame ango atie kede.
- ⁹Do ka likame gin kitwero dino mit me kom gi, poore kinyomere. Pien eber nyomere kalamo dire kanyo mit me kom.
- ¹⁰Amio cik but jo konyomere, likame ango en kame aciko gi, do Rwot en kame ciko gi be, dako kur pokere kede cware
- ¹¹(Do ka en eko pokere kede cware, miero edong di likame enyomere, aso ka li, edok but cware), kede icuo da miero kur pokere kede dako mere.
- ¹²But jo icegun ango ayamo kaman, ango i koma likame Rwot, be, ka ngakirisito moro tie kede dako mere kalikame oyei Kirisito, di dako no oko yei bedo kede, miero kur epokere kede.
- ¹³Ka dako ngakirisito moro tie kede icuo kalikame oyei Kirisito, di icuo nono oko yei bedo kede, miero kur epokere kede.
- ¹⁴Pien icuo kalikame oyei Kirisito doko dano kolonyere pi dako mere, doko da dako kalikame oyei Kirisito doko dano kolonyere pi cware. Ka koto likame kamanono, koto idwe gi oudo likame bedo jo kolonyere, do bala kame etie kede, gin kitie jokacil.
- ¹⁵Do ka ngat acel kalikame oyei Kirisito mito pokere, weke epokere; iepone me kop kame cal kamanono, ngakirisito, icuo arabo dako, likame tie kede adia moro i nyom gi, pien Rubanga olwongo wa pi bedo i mulem.
- ¹⁶Dako, ngei kiber be cengemogo ibino lako cwari. Icuo, ngei kiber be cengemogo ibino lako dako ni.

Lub ekite me Kuo kame Rubanga Olwongi kiye



¹⁷Kenekene wek ngat acelacel meede lubo ekite me kuo kame Rwot Yesu omie, kuo kame Rubanga bin olwonge di etie iye. Man en gikame ango aciko ne ikodeta dedede me jokirisito.

¹⁸Benyo, tie ngatamoro kame oudo kokepo i kare kame kolwonge kede? Kur emoi kwanyo tenge alama me kepere. Benyo, tie ngatamoro kame oudo likame kokepo i kare kame kolwonge kede? Kur emit kepere.

¹⁹Pien kepere arabo bedo abongo kepere kony mere likame tie; gikame pire tek en lubo cik ka Rubanga.

²⁰Poore dano acelacel dong iekite me kuo kame bin kolwonge di etie iye.

²¹Benyo, oudo in itie epasoit i kare kame kolwongi kede? Kur ipari. Do ka itwero udo epone me gonyere, tim kamanono.

²²Pien epasoit kame Rwot olwongo obedo dano kogonyere ka Rwot. Kamanono da, dano kame oudo tie i akarunikin mere kene i kare kame kolwonge kede obedo epasoit ka Kirisito.

²³Wun kowilo wu kede wel adwong; pi mano, kur idokunu ipasoi me jo.

²⁴Aso imiegu kede amiegu na, ngat acelacel poore dong i nyim Rubanga i kite me kuo kame bin kolwonge di etie iye.

Kop i kom Jo kalikame Onyomere kede i kom Apuserun

²⁵Nan do kop kame mako jo kalikame pwodi onyomere, ango likame atie kede cik kame Rwot omio, do ango amio tam na bala ngat kame genere pi cuny me kisa ka Rwot.

²⁶Ango atamo be, pi peko kame tie bino, eber ne in dong bedo bala kite kame itie kede.

²⁷Mam in itie kede dako? Kur do iriame. Mam in likame inyomere? Kur do inyomere.

²⁸Do ka inyomere, udo likame idubo, kede ka dako kalikame pwodi konyomo oko yei nyomere, udo likame edubo. Do jo kame onyomere bino bedo kede peko me piny kan, kame ango amito gwoko wu kur ibeunu iye.

²⁹Imiegu kede amiegu na, gikame ango atie waco en ine be, kare kame koiko otieko doko iyapiyapi; cako nan, wek jo kame tie kede mon kibed bala kili kede.

³⁰Doko jo kame tie koko kibed bala likame kitie koko, kede jo kame tie kilel, kibed bala likame kitie kilel. Doko jo kame wilo jame, kibed bala kili kede gimoro,

³¹kede jo kame tio kede jame me piny kan, kibed bala likame ginogo omao kare gi. Pien piny, i kite kame nan etie kede noni, oyapuno jik.

³²Ango amito ibedunu abongo par moro. Icuo kalikame onyomere keto par mere i kom kop ka Rwot, iepone me yomo cuny Rwot;



³³do icuo konyomere keto par mere i kom kope me piny kan, iepone me yomo cuny dako mere,

³⁴tam mere udo opokere. Dako kalikame pwodi onyomere, arabo nyako kalikame pwodi ngeo icuo, keto par mere i kop ka Rwot, emito mino kome kede cunye lung but Rwot; do dako konyomere keto par mere i kom kop me piny kan, iepone me yomo cuny cware.

³⁵Ango awaco man pi bero wu, likame pi gengo wu i yore moro, do pien ango amito ibedunu iepone aber kede imiunu kuo wu lung but Rwot.

³⁶Ka ngatamoro paro be en etie kwina bedo kede nyako kame en enero, ka mit mere tek, bala kite kame epoore bedo kede kamanono da, wek enyomere bala kite kame emito kede, pien mano likame obedo dub.

³⁷Do ka ngatamoro otieko moko tam mere abongo adiadia moro, di edio mit mere, doko di etieko moko tam mere daro nyako mere kame enero, udo etimo gikaber.

³⁸Aso ngat kame nyomo nyako kame enero udo etimo ber; do ngat kalikame onyomere udo otimo gikaber kalamo.

³⁹Dako kame konyomo likame doko romo nyomere di pwodi cware kuo; do ka cware oto, en etwero nyomere kede ngatamoro kame cunye mito, kenekene miero ebed dano koyei Kirisito.

⁴⁰Do iekite kame ango aneno kede, dako no bino bedo kede yomcuny kame kalamo ka edong bala kite kame etie kede. Doko atamo be ango da atie kede Tipo ka Rubanga.

1 Jokorinti 8

Cam kame Koyalo ne Cal jwogi

¹Nan do, i kom kop kame mako gikame koyalo ne cal jwogi, wan ongeunu be “wan dedede otienu kede ngec.” Ngec kacal kamanono kelo ewaka, do amara gero yei.

²Ka ngatamoro tamo be en engeo gimoro, likame udo engeo bala kite kame oudo epoore ngeno kede.

³Do ka dano maro Rubanga, dano nono Rubanga ngeo.

⁴Aso i kom kop kame mako camo cam kame koyalo ne cal jwogi, wan ongeunu be “cal jwogi cungo pi gikame li,” kede be “likame tie Rubanga moro ace kwanyo Rubanga acel kenekene.”

⁵Pien bed bala tie gimogo kame kolwongo be rubangan i malo arabo i lobo, bala kame i ateteni rubangan tie kede, karacel kede rwode atot,

⁶do kibus wan Rubanga tie acel, en Papa, ngat kame ocweo gi dedede doko wan okuo pire, kede Rwot acel, en Yesu Kirisito, kame mio jamini dedede bedo tie, doko wan okuo pi en.



⁷Do likame jo dedede tie kede ngec noni. Do jo mogo otieko nao kede kop me cal jwogi, omio tuno tin ka gin kicamo cam kame cal kamanono, pwodi kitamo be ebedo cam me cal jwogi; pien kite kame ngec me cuny gi goro kede, mio gin kiparo be cam nono munao gi.

⁸Cam likame bino mino wa odoko jo kame beco i nyim Rubanga. Ka likame ocamo, likame tie gimoro kame okei, doko ka ocamo, likame tie gimoro aber kame oudo.

⁹Do gwokerenu me wek kur twero wu noni lokere dok gikame reto jo kame yei gi goro.

¹⁰Pien ka ngatamoro kame ngec me cunye goro, oneno in dano kame itie kede ngec di icamo i tempulo me cal jwogi, iparo be likame etwero udo nwangcuny di eko camo cam kame koyalo ne rubangan?

¹¹Aso, ngec nin ko bino dubo dano kame yei mere goro, ngakirisito wadu kame Kirisito oto pire.

¹²Iepone acel noni da, ka idubo but jokirisito wadu, di iko mino awanon i kom ngec agoro me cuny gi, udo idubo but Kirisito.

¹³Pi mano, ka cam en kame mio gin kipoto, likame abino camo ringo, tetekeny kur ami ngatamoro kikom gi poti.

1 Jokorinti 9

Twero kede Tice me Ngaor

¹Mam ango abedo dano kogonyere? Mam ango abedo ngaor? Mam ango aneno Yesu Rwot wa? Mam wun ibedunu adwokini me tic kame ango atimo i Rwot?

²Ka jo ace likame yei be ango ngaor, ateteni kikutun ango abedo ngaor; pien kuo wu i Rwot obedo gikame moko be ango abedo ngaor.

³Man en gikame ango ajuro ne jo kame momoo kop i koma.

⁴Mam wan otie kede twero me gamo cam kede giamata?

⁵Mam wan otie kede twero me upere kede mon wa koyei Kirisito, bala kame joor icegun kede imiegu ka Rwot kede Kepa timo?

⁶Arabo iparunu be ango kede Baranaba kenekene en kame miero otim tic pi udo epone me kuo?

⁷Ngai kame timo tic me sirikale di eculere kene? Ngai kame puro olok di likame eko camo anyakini mere? Arabo ngai kame kwao dok di likame emato cak gi?

⁸Iparunu be ango atie yamo man iye ekite kame dano neno kede? Mam Iswil ka Musa da waco kop acel noni?

⁹Pien kowandiko iye Iswil ka Musa be, “Kur itwei dog twon kame itie tic kede pi canyo.” Iparunu be Rubanga tie paro pi twonin?



- 10** Mam etie yamo kop noni pirwa? Ateteni kop noni kowandiko pirwa, pien ngat kame kwaro kodi, kede ngakac poore bedo kede gen me udo iner gi me gikame kipuro.
- 11** Ka wan ocuo bero me Tipo ka Rubanga i cunyu, benyo, ebedo pek ne wu ka wada oko udo bero me jamini me kom kibutu?
- 12** Ka jo icegun tie kede twero me burao gi nogi kibutu, mam wan do otie kede kame kalamo mergi? Bed bala tie kamanono, wan likame otie tic kede twero noni, do wan okanyakino gi dedede tetekeny kur otm gimoro kame gengo tucio ejiri ka Kirisito.
- 13** Mam wun ingeunu be jo kame komio timo tic me tempulo udo cam gi ki tempulo, kede jo kame tio i alutari udo iner gi me gikame koyalo?
- 14** Kamanono da, Rwot ociko be, jo kame tucio ejiri poore udo gikame kikuo kede kiye.
- 15** Do ango likame atio kede twero nogi akadi acel, doko ango likame atie wandiko kop noni nan pi mito be igeunu timo na kamanoni. Tikatika ango do atio akaka mino ngatamoro kwanyo tenge gikame ango awakere iye.
- 16** Ka ango atucio ejiri, mano mio likame atie kede gimoro kame awakere iye. Pien etie bala ekatala kame kotieko mina. Do can kame abino neno kalikame atucio ejiri!
- 17** Pien ka ango atie timo man i mit na, abino udo giamia me pwoc; do ka likame i mit na, udo atie cobo tic kame kogena kede.
- 18** Nan do giamia na me pwoc en nyo? Giamia na me pwoc en yomcunyu kame ango audo pi tucio ejiri abongo penyoo cul moro, di likame atio kede twero na i tic na me tucio ejiri.
- 19** Pien bed bala ango likame atie epasoit ka ngatamoro, ango atieko yei bedo epasoit me jo dedede, me wek amotoko amed loko cunyu jo atot but Kirisito.
- 20** Kame ango atie kede Iyudayan, ango abedo bala Ngayudaya, me wek alok gi but Kirisito. Kame atie kede jo kame Iswil mako, ango adoko bala ngat kame Iswil mako, akadi bed bala ango likame Iswil maka, tetekeny amoto atwer loko jo kame Iswil mako but Kirisito.
- 21** Kame atie kede jo kalikame Iswil mako, ango abedo bala ngat kalikame Iswil mako, tetekeny amoto alok cunyu jo kalikame Iswil mako but Kirisito. Man likame dwong mere be ango likame alubo Iswil ka Rubanga; do i ateteni ango alubo Iswil ka Kirisito.
- 22** Kame ango atie kede jo kame yei gi goro, ango da adoko goro ineno bala ango da abedo ngat acel kikom gi, tetekeny alok cunyu gi but Kirisito. Ango atieko doko gimoroni kenekene but jo dedede, tetekeny amoto ami mogo kikom gi ud alako i yore moro dedede kame twerere.
- 23** Ango atimo magi dedede pi ejiri, tetekeny ada anywak winyo kame tie iye.



²⁴Mam wun ingeunu be i piem me ringo, jo kame ringo dedede piem, do ngat acel kenekene en kame udo giamia me pwoc? Pi mano, ringi tetekeny i ud giamia me pwoc.

²⁵Ngaringo acelacel me piem lubo iswilia me ringo. Gin kitimo kamano pi udo ocoro me angosibib kame dubere mere, do wan otimo tic wa pi udo kalikame dubere mere.

²⁶En komio ango likame aringo atatai; doko likame ango adongo gum bala ngat kame tie dodongo wi yamo.

²⁷Do ango atojjo koma pi mine bedo tek di ako kete i loc na, me wek ingei ango tuc ejiri ne jo apat, kur Rubanga wota tenge ki piem.

1 Jokorinti 10

Ikwenyar i kom Cal jwogi

¹ Imiegu kede amiegu na, ango amito ingeunu be bin edou en kame ogwoko joakwari wa di gin dedede kiko ngolo nam adwong,

²di oko batiso gi pi doko jo kame lubo Musa, di kitie i nam kede i edou.

³ Gin dedede bin kiko camo cam acel me cuny;

⁴ gin dedede kiko mato giamata acel me cuny. Pien gin kimato pii kowok ki lela ka Rubanga, kame bin lubo gi; lela nono en bin Kirisito.

⁵ Bed bala kamanono, Rubanga bin cunye likame obedo yom kede jo atot kikom gi, omio en di eko sasaro liele gin i tim.

⁶ Aso, gi nogi otimere pi kwenyaro wa weko paro timo gikareco bala bin gin.

⁷ Kur ibedunu jo kame woro cal jwogi bala kame bin jo mogo kikom gi otimo kede; bala kame kowandiko be, “Jo obedo piny cam kede amata, di kiko yai malo miel.”

⁸ Wan miero kur odonyunu timo caro bala kame jo mogo bin otimo kikom gi, di jo tutumia ot are kiwie adek oko to i ceng acel.

⁹ Wan miero kur otamunu Rwot, bala kite kame mogo kikom gi riki otimo, di twole oko neko gi.

¹⁰ Doko kur ibedunu kede ingungur bala kame mogo kikom gi bin otimo, di Malaika kame Neko oko neko gi.

¹¹ Aso, gigi otimere ne gi pi kwenyaro wa, do oko wandiko gi pi pwonyo wa, wan jo kame otien i kare me ajikini.

¹² Pi mano, ngat kame tamo be en ecungo di etek i yei mere, poore egwokere tetekeny kur epoti.

¹³ Likame tie atama moro kame in ibeo iye kame jo apat likame pwodi obeo iye. Rubanga genere, doko likame ebino jali i atama kame bwono teko ni. Do i kare me atama en ebino mini teko me kanyakino di iko udo yongayo me bwot.



- 14** Pi mano, jo na kame amaro, wekunu woro cal jwogi.
- 15** Ango ayamo kede wu bala jo kame wi gi tio; tamunu i kom gikame angu ayamo wun kenu.
- 16** Mam udo otienu nywako remo ka Kirisito ka omatunu ki ikopo kame wan olegunu iye winyo? Doko kame otienu tuturo mugati, mam udo otienu nywako kom Kirisito?
- 17** Kite kame mugati tie kede acel, bed bala wada ototunu, otienu kom acel, pien wan dedede onywakunu mugati acel nono.
- 18** Nenunu kong jo me Isirael; mam jo kame camo gikame koyalo ne Rubanga nywako i tic me alutari?
- 19** Nyo kame angu atie yamo? Iparunu be angu atie yamo be ringo kame koyalo ne cal jwogi obedo gimoro, arabo be cal jwogi obedo gimoro?
- 20** Li, angu atie yamo be, gikame jo kame kwia Rubanga yalo, gin kiyalo ne jwogi, likame ne Rubanga. Angu likame amito be ibedunu jo kame nywako kede jwogi.
- 21** Likame itwerunu mato ki ikopo ka Rwot di bobo imatunu ki ikopo me jwogi da; likame itwerunu cam ki emesa ka Rwot di bobo icamunu ki emesa ka jwogi da.
- 22** Mam omitunu mino Rwot dok nganyeko? Iparunu be otekunu lone?
- 23** “Iswil yei ne wa timo gi dedede,” do likame gi dedede konyo. “Iswil yei ne wa timo gi dedede,” do likame gi dedede dongo yei wa.
- 24** Kur imoi bero pirin keni, do moi bero ne jo apat.
- 25** Camunu ringo dedede kame kocato i atale abongo bedo kede peny mogo pi ngec me cunyu.
- 26** Pien iwandik kacil waco be, “Lobo kede jame dedede kame tie iye, gin me ka Rwot.”
- 27** Ka ngatamoro kalikame oyei Kirisito olwongi cam di iko ot, cam gimoroni dedede kame koketo i nyimi abongo bedo kede peny moro pi ngec me cunyi.
- 28** Do ka ngatamoro owaco ni be, “Ringo noni obedo giayala but caljwogi,” do pi paro pi ngat kokwenyaro in kede pi ngec me cuny, kur icame,
- 29** angu ayamo ngec me cuny en, likame meri. Pien pinyo kame mio ngec me cuny dano ace gengo twero nango me timo gimoro?
- 30** Ka angu apwoyo Rubanga pi cam kame acamo, pinyo kame mio ngatamoro bedo kede acae buta pi cam kame angu atieko mino pwoc iye.
- 31** Aso, gi dedede kame itimo, akadi icami arabo imati, tim gin dedede pi mino Rubanga deyo.
- 32** Kur idub cuny Iyudayan, arabo Jogurik, arabo ekodet me jo koyei Rubanga,



³³bala kite kame ango atamakino kede yomo cuny jo dedede i gi dedede kame ango atimo, di likame amo bero pira kena, do pi jo atot, be amotoko gida kiud alako.

1 Jokorinti 11

¹ Lubunu ekite nango, bala kame ango da alubo kede ekite ka Kirisito.

Umo Wic Esawa me Ilega

²Ango apwoyo wu pien wun nakanaka iyutununu ango i gi dedede, doko ilubunu pwony kame bin komio wu.

³Do ango amito ingeunu be, wi icuo acelacel en Kirisito, doko da wi dako en cware, wi Kirisito en Rubanga.

⁴Aso icuo kame lego arabo kame murao di eumo wie udo likame mio wor but Kirisito ngat kame obedo wie.

⁵Do dako kame lego arabo murao di likame eumo wie, likame mio cware wor, ngat kame obedo wie. Erom aroma bala oudo kolielo wie.

⁶Pien ka dako likame mito umo wie, poore do eliel wie; do ka etie gi me lewic ne dako lielo wie, poore eum wie.

⁷Icuo likame poore umo wie, piento en etie cal ka Rubanga, doko en deyo mere; do dako tie deyo me icuo.

⁸ Pien likame bin kocweo icuo kikom dako, do dako en kame kocweo kikom icuo.

⁹Doko da likame bin kocweo i cuo pir dako, do kocweo dako pir icuo.

¹⁰En komio dako miero um wie pi imalaikan.

¹¹Akadi bed kamanono da, i Rwot dako likame cungo kene abongo icuo, doko icuo da likame cungo kene abongo dako.

¹²Pien bala kame dako owok kede kikom icuo, aso, dako en kame nywalo icuo. Do gi dedede wok kikut Rubanga.

¹³Wun ber pokunu; iparunu be eber ne dako lego Rubanga di likame eumo wie?

¹⁴Mam ekite me cwec ka Rubanga pwonyo wu be etie gi me lewic ka icuo oweko yer wie odongo,

¹⁵do ka dako oweko yer wie odongo etie gi me deyo mere? Pien komie yer pi umo wie.

¹⁶Do ka ngatamoro tie kede piem i kom kop noni, wan bobo likame otie kede itok moro ace, akadi paka ikodeta me jokirisito da.

Cam ka Rwot me Otieno

(Matayo 26.26-29; Marako 14.22-25; Luka 22.14-20)

¹⁷Do i acora kame lubo nogi, ango likame apwoyo wu, pien kame wun icokerenu likame tie bero moro iye, do kwanyo raco kenekene.



- ¹⁸Pien me agege mere, kame icokerenu bala ekodet me jokirisito, ango awinyo be apokapoka tie i diere wu; ango da amo yei kop nono.
- ¹⁹Pien apokapoka miero bed tie i diere wu, tetekeny jo kame tie kede ateni bin ngere.
- ²⁰Kame icokerenu karacel, likame Cam ka Rwot me otieno en kame icamunu.
- ²¹Pien kame itienu cam, ngat acelacel pokere camo cam mere kene, mio jo mogo dong kede kec, di mogo mer.
- ²²Benyo, iliunu kede miere kame iromunu cam kede amata kiye? Arabo, mam icaunu ekodet me jo koyei Rubanga di ikounu mino jo kame li kede gimoro lewic? Ayam ne wu benyo, apwoi wu pi tim noni? Li, ango likame abino pwono wu.
- ²³Pien ango agamo kibus Rwot pwony kame ango da ako mino wu, be iwor kame bin korupao iye Rwot, en bin ekwanyo mugati,
- ²⁴kakame etieko pwono kede Rubanga, eko tuturo en, di eko waco be, “Man en koma kame tie piru. Timunu kamanoni pi yutuno ango.”
- ²⁵ Kamanono da, ingei cam, en eko kwanyo ikopo me bwini di eko waco be, “Man en ikopo me isikan kanyen kame remo na moko. Timunu kamanoni pi yutuno ango i kare dedede kame imatenu kede.”
- ²⁶Pien i kare dedede kame icamunu kede mugati noni kede di imatenu kiye ikopo noni, udo itienu tuco kop me to ka Rwot tuno en dwogo.
- ²⁷Pi mano, ngatamoro kame camo mugati ka Rwot arabo mato kiye ikopo mere i yore kalikame poore, en ebino kelo ngolo kop i kome kene pi timo dub i kom Rwot kede i remo mere.
- ²⁸Miero dano kong ngingico kuo mere, en kame mio di eko camo mugati kede mato kiye ikopo nono.
- ²⁹Pien ngat kame camo kom Rwot kede kame mato kiye ikopo mere abongo niang dwong mere, en ekelo ngolo kop i kome kene.
- ³⁰Manoni en komio jo atot kikom wu tie kede goro doko kituo, kede mogo otieko to da.
- ³¹Do ka koto ber ogeunu ngingico kuo wa, koto likame kongolo ne wa kop.
- ³²Do kame Rwot ongolo ne wa kop, udo epwonyo wa tetekeny kur bin ngol kop loi wa karacel kede piny.
- ³³Pi mano, imiegu kede amiegu na, kame icokerenu karacel pi camo Cam ka Rwot me otieno, poore di idarunu jo icegun.
- ³⁴Ka ngatamoro kec oneko, wek ecam i ture, tetekeny kur ngol ne wu kop kame icokerenu. I kom kope apat abino mino wu gikame poore aluba kame abino.

1 Jokorinti 12



Giamia me Tipo Kacil

- ¹Imiegu kede amiegu na, ango nan amito be ingeunu kop kame mako giamia me Tipo Kacil.
- ²Wun ingeunu be, di bin itienu jo kalikame woro Rubanga, oudo kobitao wu di oko rwenyo wu i woro cal jwogi, gi kalikame yamo.
- ³Pi mano, ango amito iniangunu be likame tie ngatamoro kame Tipo ka Rubanga telo di eko waco be, “Ilam mak Yesu!” Doko likame tie ngatamoro kame twero waco be “Yesu en Rwot” kwanyo di Tipo Kacil en kame otele.
- ⁴ Aso, giamia tie me epone apapat, do Tipo acel nono en kame mio gi;
- ⁵doko da tice tie me epone apapat, do Rwot acel nono en kame kotio ne;
- ⁶kede gikame jo timo tie papat, do Rubanga acel nono en kame mio teko but ngat acelacel me timo gi.
- ⁷Rubanga nyuto tie me Tipo but dano acelacel pi bero me jo dedede.
- ⁸Tipo acel nono mio ngat acel yamo kop me rieko, kede dano ace emio yamo kop me ngec.
- ⁹Tipo nono mio but dano acel yei, kede but dano ace emio giamia me cango jo,
- ¹⁰but dano ace emio twer me timo giaura, but dano ace emio giamia me imurai, but dano ace emio twer me popoko tipere, but dano ace emio twer me yamo i leb anyen, kede but dano ace emio twer me gonyo leb anyen.
- ¹¹Magi dedede Tipo acel nono en kame timo, en kame epoko gi but ngat acelacel bala kame emito.

Kom Dano tie Acel do Adulion mege Tot

- ¹² Kirisito cal bala kom dano, en etie acel do adulion mege tot; gin dedede kitie kom acel bed bala kitot.
- ¹³Pien i Tipo acel, wanunu dedede kobatiso wa okounu doko kom acel, Iyudayan arabo Jogurik, ipasoi arabo jo kogonyere, wanunu dedede Rubanga otieko keto Tipo acel nono i cuny wa.
- ¹⁴Pien kom dano likame tie kede adul acel kenekene, do etie kede adulion atos.
- ¹⁵Ka koto tien di oko waco be, “Pien ango likame atie cing, likame ango atie adul me kom,” mano likame genge bedo adul me kom.
- ¹⁶Doko ka koto yit oko waco be, “Pien ango likame atie wang, omio likame ango atie adul me kom,” mano likame genge bedo adul me kom.
- ¹⁷Ka koto kom dano lung oudo obedo wang, koto ewinyo kop kede nyo? Ka koto kom dano lung oudo obedo yit, koto engweo kede nyo?



- ¹⁸Do bala kite kame etie kede, Rubanga oketo adulion apapat i kom dano, acelacel kikom gi bala kame eyero.
- ¹⁹Ka koto gin dedede oudo kibedo adul acel kenekene, koto kom dano tie tuai?
- ²⁰Bala kame etie kede, adulion tie tot, do kom acel.
- ²¹Pi mano, wang likame twero waco ne cing be, “Ango likame amiti,” bobo wic da likame twero waco ne tien be, “ango likame amiti.”
- ²²Akaka manono, wan likame otwerunu bedo abongo adulion me kom kame neeno bala goro,
- ²³doko adulion me kom kame wan oparo be likame poore awora, en kame wan oworo twatwal. Kede adulion kalikame beco me anena en kame wan ogwoko i yore amalo,
- ²⁴gikame adulion me kom wa kame beco me anena likame mito. Do Rubanga otieko cweno kom dano iepone kame mio wor adwong but adulion kalikame pirgi tek.
- ²⁵En etimo kaman tetekeny kur apokapoka bed i kom, do me wek adul acelacel gwok adulion icegun iepone kame rom aroma.
- ²⁶Ka adul acel tie i can, adulion apat dedede neno can karacel kede en; ka komio adul acel wor, adulion apat dedede lelo kede en karacel.
- ²⁷Aso, wun itienu kom Kirisito, doko ngat acelacel tie adul me kome.
- ²⁸Rubanga otieko keto i ekodet me jokirisito, me agege joor, me are inabin, me adek jopwony; di do jo kame timo giaura, di do jo kame cango jotuwo, jo kame konyo jo, jotel tice, kede jo kame yamo i leb anyen.
- ²⁹Benyo, iparunu be gin dedede kibedo joor, arabo inabin, arabo jopwony amoto jo kame timo tice me twer?
- ³⁰Benyo, iparunu be gin dedede kitie kede giamia me cango jotuwo, arabo gin dedede kiyamo i leb anyen amoto kitie kede giamia me gonyo leb anyen?
- ³¹Ketunu cunyu pi udo giamia kame pirgi tek. Nan ango amito nyuto ne wu yongayo kame ber kalamo.

1 Jokorinti 13

Amara

- ¹Akadi ka ango ayamo leb jo kede me imalaikan, do di ali kede amara, udo acal bala olang kame kok arabo tum kame kotie gono.
- ²Akadi ka ango atie kede twer me imurai, di aniang gi dedede komungere kede ngec dedede, kede ka atie kede yei kame mitere dedede kame twero kobo mori, do di ali kede amara, kony na udo li.
- ³Akadi ka ango agabo jo jame dedede kame ango atie kede, kede ka amio koma me awanga, do di ali kede amara, likame tie gimoro kame audo kiye.



- ⁴Amara dire, doko emwol; eli kede nyeko arabo ewaka;
- ⁵eli kede deng arabo gero. Amara likame paro pire kenekene; likame cunye wang arabo emako kop arac i cunye;
- ⁶amara likame lelo pi gikarac, do elelo pi ateni.
- ⁷Amara likame kwanyo cunye, eyei gi dedede, egeno gi dedede, ekanyakino gi dedede.
- ⁸Amara likame jik; do imurai bino jik; giamia me yamo i leb anyen bino jik; ngec da bino jik.
- ⁹Pien giamia wa me ngec kede me imurai tie kede rem;
- ¹⁰do kame gikame li kede rem obino, gikame tie kede rem bino jik.
- ¹¹Di bin ango atin, oudo ayamo bala atin, atamo bala atin; do kakame adoko kede dano adwong, ako weko tim me tino.
- ¹²Pien nataman wan onenunu cal kame warawara i ilabura, do obinunu neeno wang kede wang. Gikame nan ango angeo tie dul kenekene; do abino ngeno odocon, bala kame Rubanga ngea kede odocon.
- ¹³Aso, yei, gen kede amara, gin adek gi kidong atwal; do kame pire dwong kalamo gin dedede en amara.

1 Jokorinti 14

Kope Ace i kom Giamia me Tipo Kacil

- ¹Aso, canenu pi bedo kede amara, doko ketunu cunyu pi udo giamia me Tipo, singo twatwal giamia me imurai.
- ²Pien ngat kame tie kede giamia me yamo i leb anyen likame yamo kede jo, do eyamo kede Rubanga; pien likame tie ngat kame niang kop mere; en eyamo gi komungere pi twer me Tipo.
- ³Do ngat kame murao, yamo kede jo pi mino yei gi doko tek, kede supo cuny gi, kede kweno cuny gi.
- ⁴Ngat kame tie kede giamia me yamo i leb anyen gero yei mere kene, do ngat kame murao gero yei me ekodet me jokirisito.
- ⁵Aso, ango amito ne wun dedede yamo i leb anyen, do akalamo mere, ango amito ne wun murao. Ngat kame murao pire tek kalamo ngat kame yamo i leb anyen, kwanyo ka ngatamoro ogonyo dwong me kop kame en eyamo, tetekeny eger ekodet me jokirisito.
- ⁶Aso, imiegu kede amiegu na, likame tie bero moro kame iudunu kibuta ka abino butu di ayamo i leb anyen, kwanyo kenekene ka akelo ne wu kop kame Rubanga onyuto na, arabo ngec, arabo imurai, amoto pwony moro.



- ⁷Ka tum, gi kalikame kuo, bala nat bilo arabo adungu, di likame kiko kok kede dwan kame pokere, dano twero ngeno gikame kotie gono arabo kuto benyo?
- ⁸Kede ka agwara me yi likame okok kede dwan kame niangere, ngai kame bino iikere pi ot i yi?
- ⁹Etie kamanono kede wuda; ka itiuu kede giamia me yamo i leb anyen di ikounu waco kop moro kalikame niangere, dano bino ngeno gikame itienu waco benyo? Pien kop kame iyamo udo kei i wi yamo.
- ¹⁰Ateteni leb atot tie i piny, do likame tie acel moro kame li kede dwong mere.
- ¹¹Do ka ango likame angeo leb kame kotie yamo, udo ango atie ngakumbor but ngat kame tie yamo nono, doko eda etie ngakumbor buta.
- ¹²Etie kamanono kede wuda; bala kame cunyu mito kede giamia me Tipo, akalamo mere canenu pi tic kede giamia kame gero ekodet me jokirisito.
- ¹³Pi mano, ngat kame tie kede giamia me yamo i leb anyen poore kwano Rubanga pi mino twer me gonyo dwong mere.
- ¹⁴Pien ka ango alego di ayamo i leb anyen, tipo na en kame lego do tam na li kiye.
- ¹⁵Nan do atim benyo? Abino lego i tipo na, do abino lego kede tam na da; abino wero wer me pako Rubanga i tipo na, doko abino wer kede tam na da.
- ¹⁶Aso ka likame kamano, ka in imio pwoc but Rubanga i tipo ni kenekene, dano apat kame tie i cokere kede wu, kame li kede giamia me niang kede me gonyo leb anyen, bino waco be “Amen” benyo do di likame en engeo gikame in itie waco i ilega ni me pwoc nono?
- ¹⁷Pien in iromo mino pwoc kiber, do udo likame ikonyo kuo me cunyu dano ocelu.
- ¹⁸Ango apwoyo Rubanga pien ango ayamo i leb anyen kalamo wun dedede;
- ¹⁹do i cokere me jokirisito, tikatika ayam kope kany kame tam na niang, pi pwonyo jo icegun, akaka yamo kope tutumia tomon i leb anyen.
- ²⁰Imiegu kede amiegu na, kur ibedunu bala idwe i tam wu, akaka manono bedunu bala imukerun kame tie abongo gikarac moro, kede bedunu jo kocato i tam wu.
- ²¹ Kowandiko iwandik kacil be, “Kibut jo kame yamo leb anyen, kede i dog jokumbor abino yamo kede jo na, doko akadi atim kamano da, likame kibino winya.”
- ²²Aso, yamo i leb anyen obedo gianena but jo kalikame oyei Kirisito, likame ne jokirisito. Do giamia me imurai likame tie pi jo kalikame oyei Kirisito, do pi jokirisito.
- ²³Aso, ka ekodet me jokirisito lung ocokere karacel, di jo dedede oko donyo yamo i leb anyen, di do jo apat arabo jo kalikame yei Kirisito oko bino kanono, mam kibino waco be wun ipounu?



²⁴Do ka jo dedede omurao, di ngatamoro kalikame yei Kirisito arabo dano apat oko bino, jo dedede bino mine engeo dub mere, kede kope dedede kame ewinyo bino ngolo ne kop,

²⁵di oko bino woto mung me cunye kakaler. Mano bino mine eriondiko piny pi woro Rubanga, di etuco be, “Ateteni Rubanga tie i diere wu kan.”

Gikame Poore aluba i Diere me Ekodet me Jokirisito

²⁶Jokirisito jowota, nyo do kame poore atima? Kame icokerenu karacel, dano acelacel tie kede gimoro; moro tie kede wer, moro tie kede pwoy, moro tie kede kop kame Rubanga onyuto ne, moro yamo i leb anyen amoto egonyo kop kame koyamo i leb anyen. Miero itimunu gi dedede pi gero ekodet me jokirisito.

²⁷Ka dano moro yamo i leb anyen, wek jo are, arabo jo kalikame kalamo adek en kame yami, doko kiyami di kilubere aluba, di ngatamoro gonyo.

²⁸Do ka ngat kame gonyo likame tie, poore gin kilingi di kiko yamo but gi ken gi kede but Rubanga.

²⁹Wek inabin are arabo adek en kame yami, di jo icegun pimo kop kame gin kiyamo.

³⁰Do ka gianyuta moro oneeno ne ngatamoro kame tie bedo kanono, wek dano me agege kame oudo tie yamo ber kong lingi.

³¹Pien wun dedede itwerunu mino ikwenyar me kop ka Rubanga, di itimunu acelacel, tetekeny jo dedede ud niang di gin dedede kiko udo asupacuny.

³²Giamia me imurai tie i loc me inabin,

³³pien Rubanga likame obedo Rubanga me atotolun, do en Rubanga me mulem. Bala kame etie kede i ikodeta dedede me jokacil,

³⁴mon poore ling i kacokere. Pien likame koyei ne gi yamo, do miero kibed i dud loc bala kame Iswil da waco.

³⁵Ka tie gimoro kame kimito ngeno, wek kidok penyo cuog gi i miere. Pien etie gi me lewic pi dako yamo i cokere me jokirisito.

³⁶Benyo, iparunu be kop ka Rubanga owok kibutu arabo etuno butun kenekene?

³⁷Ka ngatamoro paro be en ebedo enabi arabo etie kede twer me Tipo, miero en engei be gikame ango atie wandiko butu Rwot en kame ociko.

³⁸Ka ngatamoro likame oketo tam mere iye, kur iketunu tam wu i kome.

³⁹Aso, imiegu kede amiegu na, bedunu kede cuny me mito imurai, do kur igengunu yamo i leb anyen;

⁴⁰do miero itimunu gi dedede kiber di ilubunu yore kame poore.

1 Jokorinti 15

Iyarun ka Kirisito



- ¹ Imiegu kede amiegu na, nan ango amito yutuno ne wu ejiri kame ngoce atuco ne wu, kame ikounu gamo, doko en kame yei wu cungo iye.
- ² Ejiri nono en kame kelo ne wu alako ka imokunu iye kitek, kwanyo ka yei wu tie me nono.
- ³ Pien ango ako mino wu kop kame bin komio ada, bala gikame pire tek kalamo, en ine be; Kirisito oto pi dub wa di lubere kede iwandik kacil,
- ⁴ di oko yike, di oko yaruno en i ceng me adek di lubere kede iwandik kacil;
- ⁵ kede be, en eko nyutere but Kepa, kede i cen mere ne joor tomon kiwie are.
- ⁶ I kare ace en bobo eko nyutere but imiegu kede amiegu kame kalamo tol kany, jo atot kikom gi pwodi tie kuo, bed bala mogo otieko to.
- ⁷ Di do en eko nyutere but Yakobo, kede do ne joor dedede.
- ⁸ Me ajikini mere, en eko nyutere but ada, akadi di ango acal bala atin abwogini.
- ⁹ Pien kikom joor, ango en kalikame pira tek, oudo likame poore lwonga be ngaor, pien ango bin atidilo ekodet me jo koyei Rubanga.
- ¹⁰ Do pi kisa ka Rubanga, ango atie iekite kame nan atie iye noni, doko kisa mere buta likame oko bedo me nono. Pien ango atio kitek kalamo joor icegun dedede, bed bala likame ango en kame oudo atimo, do kisa ka Rubanga kame tie keda en kame oudo timo.
- ¹¹ Aso, akadi di ango arabo gin, man en kop kame wan dedede opwonyo, doko en kop kame wun iyeunu.

Iyarun me Jo Oto

- ¹² Aso, ka kotatamo be koyaruno Kirisito kikom jo oto, benyo benyo kame doko mogo kikom wu waco kede be iyarun me jo oto bino bedo li?
- ¹³ Ka iyarun me jo oto bino bedo li, dwong mere be likame koyaruno Kirisito da.
- ¹⁴ Aso, kalikame koyaruno Kirisito, dwong mere be kop kame wan opwonyo kony mere li, doko yei wu da kony mere li.
- ¹⁵ Doko da, mano nyuto be wan otie waco kop me abe i kom Rubanga, pien wan ojurae be Rubanga oyaruno Kirisito ngat kalikame en eyaruno, ka di ateteni likame kobino yaruno jo oto.
- ¹⁶ Pien ka yaruno jo oto likame tie, dwong mere be likame koyaruno Kirisito da.
- ¹⁷ Ka likame koyaruno Kirisito, dwong mere be yei wu kony mere li, doko pwodi itienu i dub wu.
- ¹⁸ Enyuto da be jo oto di kiyei Kirisito otieko rwenyo atwal.
- ¹⁹ Ka gen wa i kom Kirisito tie pi kuo me i kare ni kenekene, udo wan en kame do jo poore bedo kede kisa i kom wa twatwal kalamo jo apat.



²⁰Do ateteni koyaruno Kirisito kikom jo oto, en ebedo bala anyakini me agege me jo oto.

²¹Pien bala kame to obino kede di beo kibut dano, kamanono da iyarun me jo oto obino di beo kibut dano.

²²Pien bala kame jo dedede to kede pi Adamu, kamanono da kobino mino jo dedede bedo kuo pi Kirisito.

²³Do ngat acelacel kobino yaruno en i kare mere kopoore: me agege Kirisito ngat kame tie bala anyakini me agege, di do oko bino yaruno jo kame obedo mege i kare me dwogo mere.

²⁴Di do ajikini ko bino tuno, kame Kirisito bino mino kede Ajakanut i cing Rubanga Papa, ingei en bwono apugan kede akarunikin kede twer dedede.

²⁵ Pien miero epug tuno en nyono jokwor mege dedede i tiene.

²⁶Ngakwor me ajikini kame en epoore tieko en to.

²⁷ Pien kowandiko be, “Rubanga oketo gi dedede i loc mere.” Do kop kame waco be, “koketo gi dedede i loc mere,” neeno kakaler be mane likame ribo kiton ngat kame keto gi dedede i loc mere.

²⁸Kame kotieko keto gi dedede i loc ka Kirisito, di do Wod da ko bino bedo i loc ka Rubanga, ngat kame oketo gi dedede i loc mere, tetekeny Rubanga bed ngat kame tie gi dedede ne jo dedede.

²⁹Aso, dwong kop nyo kame mio jo udo batisimu akaka jo oto? Ka likame kobino yaruno jo oto, pinyo kame mio kobatiso jo akaka gin?

³⁰Pinyo kame mio wan ojala kom wa i peko esawa dedede?

³¹Imiegu kede amiegu na, pi ewaka kame ango atie kede piru i Kirisito Yesu Rwot wa, ango atuco be ango ariamo kede to ceng dedede.

³² Ka ango bin ayi kede leini ager i Epeso pi mit me dano adana, nyo aber kame audo kiye? Ka likame jo oto yaruno, otimunu bala kame jo waco kede be, “Wek ocamunu kede omatunu pien diki obinunu to.”

³³Kur ngalu: “Jo aupa kame reco dubo ikiteso kame beco.”

³⁴Miunu wi wu cei di ikounu jiko dubo, pien jo mogo kikom wu likame tie kede ngec i kom Rubanga. Lewic poore mako wu kame awaco kamanoni.

Kom kame Jo bino Yaruno kede

³⁵Do ngatamoro bino penyo be, “Epone mene kame koyaruno kede jo oto? Kibino wok kede kom kame cal nadi?”

³⁶Ngamingo ni! Kodi kame in ipito likame tui eko kuo kwanyo di ber egeo to.



- ³⁷Doko gikame in ipito likame obedo kom giapita kame dongo, do ebedo nyige kenekene, cengemogo nyige me engano arabo kodi moro ace.
- ³⁸Do Rubanga mie kome kame eyero ne; en emio kodi acelacel kome kame make.
- ³⁹Pien likame ringokom dedede cacal, do jo tie kede ringokom me epone acel, leini da tie kede ace, winy da tie kede ace, kede deksam da tie kede me epone ace.
- ⁴⁰Jame me malo tie kede kom kame mako gi, kede jame me lobo da tie kede kom kame mako gi; deyo me kom jame me malo pat kede deyo me kom jame me wi lobo.
- ⁴¹Ceng tie kede deyo mere kene, duwe da tie kede deyo mere kene, kede acer da tie kede deyo gi ken gi; doko akadi acer ken gi da deyo gi papat.
- ⁴²Etie kamanono da kede iyarun me jo oto. Gikame koyiko top, do gikame koyaruno likame top.
- ⁴³Koyike di erarac, do koyaruno en di etie kede deyo. Koyike di etie kede goro, do koyaruno en di etie kede twer.
- ⁴⁴Koyike di etie ringokom, koyaruno en di etie tipo. Ka kom kame tie kede ringo tie, udo kom kame tie tipo da tie.
- ⁴⁵En komio kowandiko be, “Adamu, dano me agege, odoko gikame kuo” ; do Adamu me ajikini oko doko Tipo kame mio kuo.
- ⁴⁶Do likame kom me tipo en kame geo, do kom kame tie kede ringo, di do kom me tipo ko lubo.
- ⁴⁷Dano me agege owok ki lobo, otime kede apua; dano me are owok ki malo.
- ⁴⁸Jo me lobo cal kede ngat kame kotimo kede apua; jo me i malo cal kede ngat kame owok ki malo.
- ⁴⁹Bala kame wan ongapo kede cal me dano kame otimo kede apua, obinunu da ngapo cal me dano kowok ki malo.
- ⁵⁰Imiegu kede amiegu na, gikame ango atie yamo ne wu en ine be, ringo kede remo likame karuno nywako Ajakanut ka Rubanga, doko da gikame top likame karuno doko gi kalikame top.
- ⁵¹Winyunu gi me ateni komungere kame amito yamo ne wu. Wan likame obinunu to dedede, do kobino loko wa.
- ⁵²Kame agwara okok, kobino loko wa oyotoyot bala kame wang dano timo kede rwakak. Pien agwara bino kok, di oko bino yaruno jo oto kede kom kalikame top, di oko bino loko wanunu dedede.
- ⁵³Pien kom kame top ni miero ngap kom kalikame top, kede kom kame to ni miero ngap kom kalikame to.



⁵⁴ Kame kom kame top noni ongapo kom kalikame top, kede kom kame to noni ongapo kom kalikame to, di do kop ko bino cobere kakare kame kowandiko be, “Kotieko lono to atwal.”

⁵⁵ “In to, loc ni tie tuai? In to, kwir ni tie tuai?”

⁵⁶ Kwir me to en dub, kede twer me dub en Iswil.

⁵⁷ Do opwounu Rubanga, ngat kame mio wa otwero lono pi Rwot wa Yesu Kirisito.

⁵⁸ Pi mano, imiegu kede amiegu na kame amaro, cungunu kitek abongo yangere, di imeedenu ameda nakanaka timo tic ka Rwot, bala kame ingeunu kede be, likame tie tic moro kame wun itimunu ne Rwot, kame kony mere li.

1 Jokorinti 16

Giamia me Konyo Jokacil

¹ Aso, i kom kop kame mako koko giamia me konyo jokacil, ipoorenu lubo gikame awaco ne ikodeta me jokirisito i Galatia.

² Buli Ceng Sabiti, poore ngat acelacel kibutu pok gimoro di eko kano, di lubere kede ud mere, tetekeny kame ango abino kur doko icokunu gimoro.

³ Kame ango atuno, abino cwano jo kame wun iyerunu Yerusalem kede baluwa, pi tero giamia wu.

⁴ Ka eneeno gikaber ne ango da pi ot kuno, gin kibino upere keda.

Gikame Paulo Oiko pi Timo

⁵ Abino welao wu ingei beno Makedonia, pien ango atie kede tam me beo ki Makedonia.

⁶ Abino bedo kede wu pi kare moro, cengemogo abino tieko kare me ngico me piny kede wu, tetekeny wun ikonyanu pi meede kede ot na kakame abino ot iye.

⁷ Pien ango likame amito beo neno wu malomalo; ageno be abino bedo kede wu pi kare moro, ka Rwot oyei.

⁸ Do ango abino bedo Epeso tuno i ceng me Pentekoti,

⁹ pien ekeko alac otieko yabere na me timo tic kitek, bed bala jo kame genge tie tot.

¹⁰ Ka Temeseo obino, nenunu be ebedo kede wu abongo lworu moro, pien eda etie timo tic ka Rwot bala ango da.

¹¹ Aso, kur ngatamoro cae. Konyenu emeede kede ot mere i mulem, tetekeny ekaruno dwogo buta; pien ango atie kure karacel kede imiegu kede amiegu.

¹² Aso, i kom kop kame mako omin wa Apolo, ango abedo ngangao en twatwal pi bino welao wu kede imiegu ace, do en oudo eli kede mit me bino nan. En ebino bino kame eudo winyo me bino.



Kope me Ajikini

- ¹³Kiunu piny, cungunu kitek i yei wu, bedunu kede nwangcuny, bedunu kede yei atek.
- ¹⁴Timunu gi dedede kede amara.
- ¹⁵ Imiegu kede amiegu na, wun ingeunu be jo me ot ka Sitepana en kame bin obedo jo me agege me lokere doko jokirisito i Akaya, doko kitieko keto cuny gi timo tic ne jokacil;
- ¹⁶ango akwao wu pi winyo akodi jo nogo, kede ngatamoro ace da kame timo tic karacel kede gi.
- ¹⁷Ango cunya yom pi bino ka Sitepana kede Potunata kede Akaiku, pien gin kicungo akaka wun;
- ¹⁸pien gin kidwoko cunya karacel kede meru da. Pwounu akodi jo nogo.
- ¹⁹ Ikodeta me jokirisito i piny me Esia omoto wu. Akwila kede Purisika, karacel kede ekodet me jokirisito kame cokere i ot gi, moto wu twatwal i Rwot.
- ²⁰Imiegu kede amiegu dedede omoto wu. Moterenu kede amot kacil me notere.
- ²¹Ango, Paulo, awandiko butu amot noni kede cinga kikoma.
- ²²Ka ngatamoro likame maro Rwot, wek ilam make. Rwot wa, bia!
- ²³Kisa ka Rwot Yesu bed kede wu.
- ²⁴Amara na bed kede wun dedede i Kirisito Yesu. Amen.



2 Jokorinti

2 Jokorinti 1

Amot

¹Baluwa kowok kibut Paulo ngat kobedo ngaor ka Kirisito Yesu pi mit ka Rubanga, kede kibut omin wa Temeseo. But ekodet me jo koyei Rubanga i Korinti karacel kede jokacil dedede kame tie Akaya.

²Kisa kede mulem kame wok kibut Rubanga Papa wa kede Rwot Yesu Kirisito bed butu.

Paulo Opwoyo Rubanga

³Opwounu Rubanga Papa me Rwot wa Yesu Kirisito, Papa kame ngakisa, ngakwei cuny jo iepone dedede.

⁴En ekweo cuny wa i can dedede, tetekeny wada otwerunu kweno cuny jo icegun kame tie kede peko, di okweo cuny gi iekite acel nono kame Rubanga okweo kede cuny wada.

⁵Pien bala kame can ka Kirisito kame wan onywakunu dwong ne wa kede, kamanono da wan onywakunu kweno cuny adwong kame Rubanga mio pi Kirisito.

⁶Ka wan otie i peko, mano kelo ne wun kweicuny kede alako; doko ka kokweo cuny wan, wuda iudunu kweicuny kame mio wu idirenu kanyakino akodi can acel nono kame wada otie kanyakino.

⁷Wan otie kede gen atek butu; pien wan onge be, bala kame inywakunu kede wa can, kamanono da inywakunu kede wa kweicuny.

⁸Imiegu kede amiegu na, wan likame omite be ibedunu abongo ngec i kom peko kame wan oboe iye i Esia; pien oudo komio wa peko kalikame kanyere, omio oko bedo li kede gen me kuo.

⁹Ateteni wan do oudo owinyo i kuo wa bala kotieko ngolo ne wa kop me to; do manoni otimere tetekeny wan kur oket gen wa i kom wa kenwa, do me wek ogen Rubanga ngat kame yaruno jo oto.

¹⁰En ngat kame eko mino wa obwot ki can kame oudo romo kelo to, ebino meede mino wa bwot; wan otieko keto gen wa i kome be en ebino mino wa obwot bobo.

¹¹Wuda miero ilegunu karacel kede wa, tetekeny Rubanga winy ilega me jo atos pirwa, di en eko mino wa winyo, di jo atos ko bino pwone pirwa.

Paulo Oloko lik mere

¹²Gikame wan owakere iye en ine be, ngec me cuny wa juro be, epone me kuo wan i piny kan, kede twatwal mere epone kame wan otie bedo kede wu, tie i yore me lero kede ateni kame wok kibut Rubanga, likame kede rieke me lobo kan, do kede kisa ka Rubanga.



- ¹³Wan owandiko ne wu gikame wun itwerunu somo di ikounu niang iye kenekene. Ango atie kede gen be ibinunu niang gi dedede kiber,
- ¹⁴akadi bed bala nan iniangunu dul kenekene. Manono bino mino i ceng me dwogo ka Rwot Yesu, ikarununu bino wakere pirwa, di wada oko karuno wakere piru.
- ¹⁵Ango oudo angeo man kiber, en omio bin aiko pi cako kong bino butu, tetekeny iudunu winyo tien are.
- ¹⁶Pien ango amito be abei welao wu di atie ot Makedonia, di doko ako beo butu di adwogo ki kuno, me wek imianu kony me meede kede ot na Yudea.
- ¹⁷Mam oudo ango atie lokoloko tam na i kare kame oudo ango aiko kede kamano? Benyo, ango do mam atimo iik na bala dano me piny kan, kame kong yei gimoro di doko eko lokere dagi i cen mere?
- ¹⁸Ateteni bala kame Rubanga genere kede, likame tie kop moro kame wan oyei ne wu di doko oko lokere dagi.
- ¹⁹Pien Yesu Kirisito, Wot ka Rubanga kame ango kede Sila kede Temeseo opwonyo kop mere butu, likame obedo ngat kame kong yei gimoro di doko eko lokere dagi; do en eyei gimoro kicel atwal.
- ²⁰Piento en kame emio gi dedede kame Rubanga ocikere timo cobere. En komio wan omio Rubanga deyo i Yesu Kirisito di oyamo be “Amen.”
- ²¹Do Rubanga en kame mio wan karacel kede wun ocungunu itek i Kirisito, doko etieko kwero wa.
- ²²En etieko keto alama mere i kom wa, di eko mino wa Tipo i cuny wa pi bedo bala gikame moko iik mere.
- ²³Rubanga en mujura na; ango likame adwogo Korinti pien ango oudo likame amito mino wu peko.
- ²⁴Likame pien wan otie dino wu i gikame poore iyeunu; do wan otio karacel kede wu pi yomo cunyu, pien wun icungunu itek i yei wu.

2 Jokorinti 2

- ¹Pi mano, ango ako moko tam na be likame bobo abino dwogo welao wu, tetekeny kur awang cunyu.
- ²Pien ka ango awango cunyu, alu apat kede jo kame ango awango cuny gi nogo kame bobo bino mina yomcuny?
- ³Manono en komio ango awandiko baluwa kamano, me wek ka ango abino, kur aud wangcuny kibun jo kame koto omia kilel. Pien ango ageno kitek be yomcuny nango kelo ne wun dedede yomcuny.



⁴Pien ango awandiko ne wu baluwa kede iturur kede cwercury di pige wanga cwer; likame pi wango cunyu, do pi mino wu ngeno amara adwong kame ango atie kede butu.

Poore Sasiro Ngat Kotimo Raco

⁵Do ka ngatamoro owango cuny dano moro, udo likame ewango cuny ango, do abongo medo iye munyo, twatwal mere udo etimo ne wun dedede.

⁶Alola kame jo atot kikom wu omio akodi dano nono rome.

⁷Aso, nan do akaka manono, poore isasirunu en di ikounu kweno cunye tetekeny kur cwercury bwone.

⁸Aso, ango akwao wu pi medo nyuto ne be wun imarenu.

⁹Kop noni en komio oudo awandiko ne wu baluwa, pien oudo amito tamo wu, kede ngeno ka ilubunu gi dedede kame awaco ne wu.

¹⁰Kame wun isasirunu ngatamoro, ango da asasiro en. Gikame ango atieko sasiro dano iye, ka di ateteni atieko sasiro ngatamoro pi gimoro, udo atimo piru i nyim Kirisito.

¹¹Wan otimo kaman tetekeny kur Sitani ud yongayo me ngalo wa; pien likame wan okwianu iik mege.

Paulo Obedo kede Par i Teroa

¹²I kare kame oudo abino kede Teroa pi tucu ejiri ka Kirisito, Rwot oudo oyabo na yongayo me timo tic;

¹³do wia oko dubere pien oudo likame audo omina Tito kuno. Aso ango ako moto gi di ako yai aoto Makedonia.

Wan Olo pi Kirisito

¹⁴Do opwounu Rubanga ngat kame nakanaka telo wa i Kirisito di osiritunu pi nyuto be en elo. Rubanga tio kede wan pi nyano ngec i kom Kirisito kabedo dedede bala ngwece kame kur.

¹⁵Pien wan ocal bala giayala kame ngwe kur kame Kirisito mio but Rubanga, kame ngwece mere sarakin but jo kame Rubanga tie lako, kede but jo kame tie rwenyo.

¹⁶But jo kame tie rwenyo, en ebedo ngwece atulutul kame kelo to; do but jo kame Rubanga tie lako, en ebedo ngwece akur kame kelo kuo. Ngai kame twero timo gi nogi?

¹⁷Pien wan likame ocal bala jo ace atot, jo kame tero kop ka Rubanga pi ot cato; do pien Rubanga en ooro wa, wan oyamo kop me ateni i Kirisito i nyim Rubanga.

2 Jokorinti 3

Jotic me Isikan Kanyen



- ¹Benyo, wan bobo do otie pwore ken wa? Arabo, iparunu be wan omito baluwa kame kowandiko butu kame pwoyo wa, amoto ogam baluwa kibutu kame pwoyo wa, bala kame jo mogo timo?
- ²Wun kikomu ibedunu baluwa kame pwoyo wan, kame kowandiko i cuny wa, me wek jo dedede ngei, doko kisomi.
- ³Doko wun inyutunu be wun ibedunu baluwa ka Kirisito kame ecwao wan kede, baluwa kalikame kowandiko kede bwino, do kede Tipo ka Rubanga kakuo, doko likame kowandiko en i kidi, do kowandiko en i cuny jo.
- ⁴Manono en gen atek kame wan otie kede but Rubanga pi Kirisito.
- ⁵Likame wan otie kede gimoro kame romo mino wan owaco be otwero timo gini kede twer wa; twer kame wan otie kede owok kibun Rubanga.
- ⁶En ngat kame emio wan twer me bedo jotie me isikan kanyen, kalikame owok pi Iswil kame kowandiko awandik, do pi Tipo; pien Iswil kame kowandiko neko, do Tipo mio kuo.
- ⁷Ka riki inyukutan me Iswil kame kowandiko i kidi, kame kelo to, obino kede deyo kame rom kano, kame oko mino jo me Isirael likame oko twero ngino wang Musa pi rieny mere, bed bala oudo etie pi kare acecek,
- ⁸mam do tie me Tipo bino bino kede deyo kame kalamo?
- ⁹Pien ka gikame mio ongolo kop i wi jo oudo tie kede deyo; mam do gikame kelo poore tie kede deyo kame kalamo?
- ¹⁰Ateteni pi kop noni, gikame oudo tie kede deyo, odoko li kede deyo atwal pi deyo kame kalamo en.
- ¹¹Pien ka gikame oudo tie pi kare acecek obino kede deyo, gikame bedo nakanaka miero do bed kede deyo kame kalamo.
- ¹²Aso, pi kite kame otienu kede gen kame cal kamano, wan oyamunu abongo lworo,
- ¹³likame bala Musa ngat kame bin oumo nyime tetekeny kur jo me Isirael nen ekite kame meny mere rwenyo kede.
- ¹⁴Do oudo koumo tam gi. Ateteni tuno tin kame kitie somo itabun me isikan kacon, udo gikame umo tam gi nono pwodi tie, pien gikame umo tam gi nono twero kwanyere kenekene kame gin kitie i Kirisito.
- ¹⁵Ateteni, kiton tuno tin kame kotie somo Iswil ka Musa, gikame umo nono pwodi ogalao tam gi;
- ¹⁶do kame dano olokere but Rwot, kokwanyo gikame umo tam mere.
- ¹⁷Aso Rwot en Tipo; doko kakame Tipo ka Rwot tie iye, gonyere udo tie iye.



¹⁸Doko wanunu dedede kame kotieko kwanyo gikame galao nyim wa, wan jo kame onyutunu deyo ka Rwot, kotie loko wa i cal mere yai ki deyo tuno i deyo kame meede ameda, man Rwot kame obedo Tipo en kame timo.

2 Jokorinti 4

Abar kame Kokano i Agune

¹Pi mano, wan likame okwanyo cuny wa ki tic noni, pien Rubanga en komio wa time pi kisa mere.

²Wan otieko dagi gi dedede me lewic kame kotimo i mung; wan odagi tim me angalo arabo dwadwanyo kop ka Rubanga. Do wan opwonyo kop me ateni i lero i nyim Rubanga, di dano acelacel ko ngeno i cunye be wan jo kame beco.

³Doko akadi ka ejiri kame wan otuco oumere, en eumere ne jo kame tie rwenyo atwal.

⁴Gin jo kalikame kiyei Kirisito, pien rubanga me piny kan otieko umo tam gi tetekeny kur kinen lero kame wok kiye ejiri me deyo ka Kirisito, ngat kame cal acala kede Rubanga.

⁵Pien likame wan otatamo kop kame mako wan, do wan opwonyo be, Yesu Kirisito en Rwot; wan obedo jotic wun pire.

⁶Pien Rubanga kame owaco be, “Wek lero rieny ki colo,” Rubanga nono en kame orieny i cuny wa pi mino wa lero me ngec be deyo mere neeno i Yesu Kirisito.

⁷Do wan jo kame otie kede abar noni, ocal bala agune kame kocweo kede elupe. Manoni nyuto be Rubanga en kame tie kede twer kame kalamo dedede, do likame wan.

⁸Wan nakanaka komio wa oneno can iepone dedede do likame koridakino wa atwal atwala; wi wa cungo, do gen wa likame kwanyere;

⁹kotidilo wa, do Rubanga likame jalo wa; korereto wa, do wan oko yai bobo;

¹⁰wan nakanaka ooto kede to ka Yesu i kom wa, tetekeny kuo ka Yesu nyutere ki kom wa.

¹¹Pien i kare dedede me kuo wa, wan ojalere i to pi Yesu, tetekeny kuo mere nyutere i kom wa kame to nogi.

¹²Aso, to tie tic i kom wan, do kuo tie tic i kom wun.

¹³Do bala kame otieny kede cuny acel me yei, bala kame kowandiko be, “Ango oudo ayei omio ako yamo,” kamanono da wada oyei di oko yamo.

¹⁴Pien wan ongebe, ngat koyaruno Rwot Yesu bino yaruno wada karacel kede Yesu, di eko bino tero wan karacel kede wu i nyime.

¹⁵Magi dedede tie piru, tetekeny bala kite kame kisa ka Rubanga tie meede ameda kede nyai but jo, wek emi pwoc kame jo mio meede di ko kelo ne Rubanga deyo.



Bedo Kuo di Otienu kede Yei

¹⁶Aso wan likame okwanyo cuny wa. Akadi bed bala kom wa tie dubere momot, do ceng dedede kotie mino kuo wa me cuny doko nyen bobo.

¹⁷Pien can kame nataman wan otie neno tunutunu noni, tie iiko ne wa deyo adwong kalikame wacere, kame bedo nakanaka.

¹⁸Pien wan likame oketo tam wa i kom gikame neeno, do i kom gi kalikame neeno. Pien gikame neeno tie pi kare acecek, do gi kalikame neeno bedo nakanaka.

2 Jokorinti 5

¹Pien wan ongeo be, kame kima kame wan obedo iye i lobo kan odubere, otie kede ot kame Rubanga ogero, ot kalikame kogero kede cing, en ot kame bedo nakanaka i malo.

²Pien wan ocur i kima noni di odaro Rubanga pi ngapo ne wa kabedo wa me i malo;

³tetekeny ka ongape, likame kobino udo wa di otie nono.

⁴Pien di pwodi otieniu i kima noni, wan ocurunu kede par; likame pien omitunu gonyo kom wa me lobo kan tenge, do pi wan omitunu be med ngapo ne wa kabedo me malo, tetekeny kom wa kame to lokere dok kalikame to.

⁵Ngat koiko wa pi lokere noni en Rubanga, en kame emio wa Tipo pi bedo bala gikame moko kop mere.

⁶Pi mano, wan nakanaka odio cuny wa, pien wan ongeo be kame pwodi otieniu i paco me kom wa noni, udo otieniu kakabor kede Rwot.

⁷Pien kuo wan cungo i yei, likame i neno kede wang.

⁸Wan odio cuny wa kitek di otamo be, tikitika oyai owek kom wa noni di oko ot bedo i paco wa kede Rwot.

⁹Aso, akadi di wan otie i paco arabo tenge, wan oketo cuny wa i yomo cunye.

¹⁰ Pien wan dedede miero ocungunu i nyim kom ka Kirisito me ngolo kop, tetekeny ngat acelacel ud bero arabo raco, di lubere kede gikame etimo i kuo me kom.

Dok i Nywak kede Rubanga i Kirisito

¹¹Pi mano, kite kame wan ongeo kede be Rwot poore alwora, wan otamakino wano tam me jo ace; do Rubanga ngeu wan, doko ageno be wuda ingeunu wa i cuny.

¹²Wan likame bobo otie pwore kenwa i nyimu, do wan otie mino wu gikame iromunu wakere iye pirwa, me wek itwerunu bedo kede kop kame iromunu dwoko ne jo kame wakere pi gikame neeno i ooko, do weko pi gikame tie i cuny dano.

¹³Pien ka wi wan odubere, udo kidubere pi Rubanga; arabo ka wi wa tie kiber, udo kitie kiber piru.



- ¹⁴Amara ka Kirisito but wa telo wa, pien wan otieko niang kiber be dano acel bin oto pi jo dedede; pi mano, jo dedede otieko to.
- ¹⁵Aso, en eto pi jo dedede, tetekeny jo kame kuo kur doko meede bedo kuo pirgi ken gi, do kibed kuo pi ngat kame bin oto pirgi di oko yaruno en.
- ¹⁶Pi mano, cako nataman wan likame oneno ngatamoro iekite kame dano neno kede; bed bala oudo i kare okato oudo obedunu neno Kirisito iepone kame dano neno kede, do likame bobo nan onene iepone nono.
- ¹⁷Aso, ka ngatamoro tie i Kirisito, udo en etie giacwea anyen; gikacon okato, nan do gikame nyen otieko bino.
- ¹⁸Magi dedede Rubanga en kotimo, ngat kame odwoko nywak wa kede en i Kirisito, di eko mino wan tic me dwoko jo apat i nywak kede en.
- ¹⁹Dwong mere be, i Kirisito, Rubanga oudo tie dwoko nywak mere kede jo dedede me piny di likame emaro dub gi i wi gi, kede di emio wa kop kame nyuto epone kame jo romo dok bobo i nywak kede en.
- ²⁰Aso, wan obedunu jo kame cungo akaka Kirisito, pien Rubanga tie kwano wu di ebeo kibut wan. Wan ongangao wu akaka Kirisito, dokunu bobo i nywak kede Rubanga.
- ²¹Rubanga omio Kirisito ngat kame oudo li kede dub onywako dub wa pirwa, tetekeny odokunu jo kopooore i nyim Rubanga pi Kirisito.

2 Jokorinti 6

- ¹I tic wa karacel kede Rubanga, wan obako dog wa butu be, kur imiunu kisa kame iudunu kibut Rubanga bed gi me nono.
- ²Pien Rubanga owaco be, “I kare me timo bero ango ako winyo kwac ni; i ceng me alako, ango ako konyi.” Neni, nataman en esawa me Rubanga timo bero; tin en ceng me alako!
- ³Wan likame otie rire i yongayo ka ngatamoro, tetekeny kur ud raco moro i tic wa.
- ⁴Do bala jotic ka Rubanga, wan onyuto bero wa i yote dedede: di okanyakino can, peko, kede kuo atek.
- ⁵Wan kobungo wa, kotweo wa i otkol, ekodet me jo suro wa, otimo tic atek, likame onino, doko kec da neko wa.
- ⁶Doko da wan onyuto bero wa bala jotic ka Rubanga i cuny wa kame ber, i ngec, i dire, i mwolo, i bedo tie kede Tipo Kacil, kede i amara me ateni,
- ⁷i kope kame oyamo me ateni, kede i twer ka Rubanga. Wan otie kede poore bala gi me yi, me suro jokwor kede me gwoko kom wa ka kosuro wa.
- ⁸Cengemogo koworo wa arabo komio wa lewic; cengemogo koyeto wa arabo kopwoyo wa. Kotero wa bala joangalo do di wan oyamo kop me ateni;



⁹kotero wa bala jo kalikame kongeo do di kongeo wa kiber; kotero wa bala jo oto, do nenunu wan okuo. Bed bala komio wa alola, do likame koneko wa;

¹⁰akadi di cuny wa cwer, do wan olelo nakanaka; akadi di wan obedo jocan, do wan otie mino jo atot baro; akadi di wan oneeno bala oli kede gimoro, do wan otie kede gi dedede.

¹¹Wun Jokorinti, wan oyamo kede wu abongo mungo ne wu kop moro; cuny wa maro wu.

¹²Wan likame cuny wa weko maro wu, do wun en kame cunyu nonok i kom wan.

¹³Pi mano, ango ayamo kede wu bala idwe na; yabunu cunyu but wada.

Tempulo ka Rubanga Kakuo

¹⁴Kur inywakunu kede jo kalikame oyei Kirisito. Pien kite kopooore nywako kede turo iswil benyo? Arabo lero kede colo nywako benyo benyo?

¹⁵Winyere nyo kame tie i dierediere ka Kirisito kede Sitani? Arabo nyo kame dano koyei Kirisito nywako kede dano kalikame oyei Kirisito?

¹⁶Winyere nyo kame tie i dierediere me tempulo ka Rubanga kede cal jwogi? Pien wan otienu tempulo ka Rubanga kakuo; bala kame Rubanga owaco kede be, “Ango abino bedo i diere gi di aoto kiye, di ako bino bedo Rubanga gi, di gin kiko bino bedo jo na.”

¹⁷ Pi mano, Rwot owaco be, “Yaunu tenge kikut gi, di ikounu pokere kede gi, doko kur imulunu gimoro kalikame cil; di ango ako bino gamo wu.

¹⁸ Ango abino bedo Papa wu, di wun ikounu bino bedo awobe kede anyira na, man Rwot won Twer en kowaco.”

2 Jokorinti 7

¹Wun jo na kame amaro, bala kame otienu kede cikere nogi, wek olonyerenu ki gi dedede kame munao kom wa kede cuny wa, di okounu bedo jo kame lworu Rubanga, tetekeny odokunu jokacil atwal.

Kilel ka Paulo

²Yabunu cunyu but wa; wan likame otieko timo ne ngatamoro raco, likame odubo ngatamoro, likame obedo kede adiadia but ngatamoro i gire.

³Likame atie yamo man pi ngolo kop i wi wu, pien ango oudo atieko waco sek be wan omaro wu, obinunu to arabu kuo karacel.

⁴Ango ageno wu kitek; ango awakere piru twatwal; wun ikweunu cunya; ango atie kede yomcuny i can dedede kame wan obeo iye.



⁵ Pien akadi kakame otuno kede Makedonia, likame kom wa oudo wei moro, do oneno can i yote dedede, atwomutwomun oudo wok ki bad dedede, doko lworu oudo dwong i cuny wa.

⁶Do Rubanga, ngat kame kweo cuny jo kame tie kede par, oko kweno cuny wa pi bino ka Tito,

⁷doko likame pi bino mere kenekene, do pi ekite kame wun ikweunu kede cunye da. En ewaco ne wa ekite kame cunyu oudo paro nena kede, iturur wu, kede ekite kame iparunu kede pira, en omio nan ango atie kede kilel kame kalamo.

⁸Pien bed bala baluwa na oudo owango cunyu, ango likame atie kede par moro iye (bed bala oudo abedo kede par iye, pien ango aneno be baluwa nono oudo owango cunyu, bed bala pi kare acecek kenekene).

⁹Do nan ango alelo, likame alelo pi oudo awango cunyu, do pien wangcuny wu omio ikounu swilaro; pien ibedunu kede wangcuny kame Rubanga mito, omio likame tie raco moro kame wan otimo ne wu.

¹⁰Pien wangcuny kame Rubanga mito kelo iswilar kame tero dano i alako, doko likame ekelo paro gikame okato, do wangcuny me piny kan kelo to.

¹¹Nenunu ber gikame Rubanga oko timo kede wangcuny wu: epone kame mit me cunyu tie kede, epone kame imitunu nyuto kede be iliunu kede raco moro, epone me gero wu, lworu wu, epone kame iparunu kede pira, kede epone kame imiunu kede alola pi tim arac! Wun itiekunu nyuto be wun iliunu kede raco moro i kop nono dedede.

¹²Aso, bed bala ango oudo awandiko ne wu baluwa nono, likame oudo ango awandiko en pi ngat kotimo rac, arabo pi ngat kame kotimo ne raco, do ango oudo awandiko baluwa nono pi nyuto ne wu i nyim Rubanga epone kame iparunu kede pirwa.

¹³Manono en kame kweo cuny wa. Medo i wi kweicuny wa, wan olelo kalamo pi kilel kame Tito tie kede, pien wun dedede itiekunu kweno tam mere.

¹⁴Pien ka ango oudo awakere ne piru, likame imiunu lewic omaka; do bala kite kame gi dedede kame wan owaco ne wu oudo obedo kede gi me ateni, kamanono da ewaka wa i nyim Tito odoko gi me ateni.

¹⁵Aso, ka en eyutuno epone kame wun dedede oudo ilubunu kede pwony mere, kede epone kame igamenu kede lworu kede mielkom, amara mere butu meede ameda.

¹⁶Ango alelo pien ageno wu kitek.

2 Jokorinti 8

Mino Kony bala Jokirisito

¹ Imiegu kede amiegu na, wan omito be ingeunu kop i kom kisa ka Rubanga kame enyuto ne ikodeta me jokirisito i Makedonia.



²Gin kibeo i atama atek me peko; do kilel gi oudo dwong twatwal, omio kiko mino kony kede cuny gi lung, bed bala oudo gin kibedo jocan.

³Ango amio ijura be gin kimio kony i mit gi ken gi di lubere kede ud gi, kede kalamo ud gi da.

⁴Oudo gin kingangao wa be otim ber omi gi winyo me nywako tic me konyo jokacil.

⁵Kitimo kaman kalamo kite kame wan oudo ogeno kede. Me agege, gin kong kijalere ken gi but Rwot, di do i mit ka Rubanga, kiko jalere but wada.

⁶Aso wan otieko kwano cuny Tito be, bala kame en oudo etieko cako kede tic noni, poore do etiek tic aber noni i diere wu.

⁷Nan do bala kite kame itienu kede timo kiber i gigi dedede: i yei, i yamo, i ngec, i keto cunyu i gi dedede, kede i amara wu pirwa, nenunu be itimunu kiber i tic kame nyuto amara noni da.

⁸Ango likame atie yamo kop noni bala cik, do ango anyuto ne wu epone kame jo apat keto kede cuny gi, tetekeny angei ateni me amara wu.

⁹Pien wun ingeunu kisa ka Rwot wa Yesu Kirisito; bed bala oudo en ebaro, do en eko doko ngacan piru, tetekeny pi can mere wun idokunu jo kobaro.

¹⁰Ango amio tam na i kom kop noni be, eber ne wun nan cobo gikame oudo igeunu timo mwaka acel cen, likame pi time kenekene, do da pi bedo kede mit iye.

¹¹Nan do tiekunu time. Wekunu mit wu me cobe bed rom aroma kede mit kame icakenu kede, doko timenu di lubere kede gikame itienu kede.

¹²Ka mit me mino tie, Rubanga gamo giamia, di lubere kede gikame dano tie kede, do weko gikame eli kede.

¹³Ango likame atie yamo be miero peko do dii wun pi mino jo icegun alakanar. Ango amito be gi dedede bed rorom.

¹⁴Kite kame nataman jame tot ne wun kede, ipoorenu mino gi gikame mitere ne gi, tetekeny i kare moro ka gida kitie kede jame atot, kibino mino wuda gikame mitere ne wu. Manoni bino mino ibedunu rorom.

¹⁵ Bala kame kowandiko be, “Ngat kame oudo tie kede atot, likame oko bedo kede atot kalamo, doko ngat kame oudo anonok, likame oko bedo kede anonok kalamo.”

Tito kede Joaupa mege

¹⁶Wan opwoyo Rubanga pi keto i cuny Tito epone me mit acel nono me paro piru bala kame ango da atie kede.

¹⁷Pien likame eyei kwac wa kenekene, do pi kite kame cunye mito kede kitek, en eyaro bino butu i mit mere kene.

¹⁸Wan otie cwane karacel kede omin wa kame ngere i ikodeta dedede me jokirisito pi tic mere me tuco ejiri.



¹⁹Doko likame mano kenekene, do ikodeta me jokirisito oyere pi upere kede wa i tic kame nyuto amara kame wan otie timo noni, pi mino deyo but Rwot kede pi nyuto mit aber kame wan otie kede.

²⁰Wan likame omio be ngatamoro yam ne wa raco i kom twon giamia kame jo omio, kame wan nataman otie poko.

²¹Pien wan otie kede tam me timo gi kopoore, likame i nyim Rwot kenekene, do i nyim jo da.

²²Aso, wan otie cwano omin wa ace kede gin, omin wa kame wan otieko tamo tien atot di oko udo be en etie kede mit me timo tice atot. En nataman etie kede mit akalamo me timo tic, piento en egeno wu kitek.

²³Aso, i kom kop kame mako Tito, en ebedo ngawota kame otio kede karacel pi konyo wu; aso i kom kop kame mako imiegu wa icegun, gin kibedo jo kame ikodeta me jokirisito ooro, jo kame kelo ne Kirisito deyo.

²⁴Pi mano, nyutunu ne jo nogi, i nyim ikodeta me jokirisito, amara wu kede gi komio wan owakere piru.

2 Jokorinti 9

Mino Kony but Jokirisito Wad wa

¹Aso kony li nango me wandiko ne wu kop kame mako konyo jokacil.

²Pien ango angeo mit wu me mino kony, gikame ango awakere iye ne jo me Makedonia, di awaco ne gi be jo me Akaya otieko iikere cako mwaka okato; doko mit wu me mino kony osupo cuny jo atot kikom gi.

³Aso ango atie cwano imiegu nogi, me wek kur wakere wa piru i kop noni lokere dok gi me nono, tetekeny ibedunu jo koikere bala kame oudo atieko waco.

⁴Aso, ka do jo mogo me Makedonia oko upere keda di kiko udo be, wun likame itiekunu iikere, lewic bino mako wa pi geno wu kitek, di ber aweko lewic kame bino mako wuda.

⁵En omio ango atamo be miero akwai cuny imiegu nogi pi cako bino butu di pwodi likame ango abino, di gin kiko iiko cuto kony kame wun icikerenu pi kwanyo, tetekeny ebed gikame tie cuto bala kony kame ikwanyunu i mit wu, do weko i adiadia.

⁶Gikame ango atie yamo en ine be, ngat kame cuo kodi anonok bino da kano kac anonok, kede ngat kame cuo atot bino da kano kac atot.

⁷Ngat acelacel miero kwany mic bala kame cunye mito, abongo gung arabo adiadia, pien Rubanga maro ngat kame mio kede yomcuny.

⁸Doko Rubanga twero pi mino wu winyo me gi dedede di tot, tetekeny ibedunu tie kede gi dedede kame romo wu nakanaka, di ikounu mino atot da pi konyo tice dedede kabeco.



⁹ Bala kame kowandiko be, “En emio kede cunye lung but jocan; bero mere bedo nakanaka.”

¹⁰ Rubanga ngat kame mio ngacuc kodi kede mugati me acama, bino mino wu kodi me acua di en eko mino gi kinyai, di eko medo ne wu gikame yai ki bero wu.

¹¹ En ebino mino wu ibarunu i yote dedede di ikounu bedo jo kame mio gikame tot kede cunyu lung, tetekenya ka wan otero gi, jo bino pwono Rubanga.

¹² Pien tic noni, likame bino cobo gikame mitere ne jokacil kenekene, do da ebino kelo pwoc atot but Rubanga.

¹³ Tic me mino kony noni bino mino jo atot mio deyo but Rubanga pi kite kame wun ilubunu kede ejiri ka Kirisito kame wun itucunu, kede pi kony kame wun imiunu kede cunyu lung pi nywako kede gi kede jo apat da.

¹⁴ Aso gin kibino kwano Rubanga piru di cunyu gi paro piru pi kisa adwong kame Rubanga omio wu.

¹⁵ Pwoc bed but Rubanga pi giamia mere, giamia kame bero mere likame wacere!

2 Jokorinti 10

Paulo Omio Pido kame Jurao Tic mere

¹ Ango kikoma Paulo, angangao wu kede mwolo kede bero ka Kirisito, anga ngat kame jo waco be amwol kame atie karacel kede wu, do ager kede wu kame atie tenge.

² Ango akwao wu be, kame abino butu kur imianu abed kede gero bala kame aromo nyuto kede but jo mogo kame paro be wan olubo ekite me kom.

³ Pien bed bala wan otie i piny, do likame otie i yi me kom.

⁴ Jame me yi wa likame me piny kan, do kitie kede twer ka Rubanga pi tuturo kateko me ngakwor. Wan otuturo piem me abe,

⁵ kede tingere dedede kame gengo jo ngeno Rubanga, di oko mako tam dedede bala mabus, oko mino gi kilubo mit ka Kirisito.

⁶ Kame wun itiekunu do doko jo kame wor atwal, wan do oko bino mino jo kalikame wor alola.

⁷ Nenunu gikame tie kakaler. Ka ngatamoro geno be en me ka Kirisito, mito eyutuno be, bala kame en ebeto kede me ka Kirisito, kamanono wada otie me ka Kirisito.

⁸ Pien akadi di anga atie kede ewaka adwong pi akarunikin kame Rwot omio wa, pi gero yei wu do likame pi rete, anga lewic likame bino maka iye.

⁹ Anga likame amito be eneeno bala amoto anga atie mito mino wu lworu kede baluwan na.

¹⁰ Pien gin kiyamo be, “Baluwan mege tek di gwai, do kame en etie kede wa, en egoro, doko yamo mere da kony mere li.”



¹¹Wek akodi jo nogo niang be, gikame wan owandiko i baluwan di otie tenge, ginogo da en kame obino timo kame otie kede wu.

¹²Likame pien wan otamo ketere i ruom acel arabo porere kede jo mogo kame pwore ken gi. Do ka gin kiyerere i ikodeta ken gi ken gi, kede di kiporere ken gi ken gi, udo kili kede niang.

¹³Wan likame obino wakere pi gikame tie ooko me tic kame komio wa, do obino mino ewaka wa jik i kom tic kame Rubanga omio wa, manoni ribo kiton tic wa i diere wu.

¹⁴Wan likame otie kede ewaka kame kalamo, bala kame oudo koto otie kede ka oudo likame otuno butu; wan en kame bin ogeo tuno butu kede ejiri ka Kirisito.

¹⁵Wan likame owakere kato kare pi tic me jo icegun; do gen wan tie be, kame yei wu meede, tic wan i diere wu da bino nyai kitek.

¹⁶En kame mio di do wan oko karuno tucio ejiri i adulation ace apat, abongo wakere pi tic kame ngatamoro otieko timo i kabedo kame etio iye.

¹⁷ Do, “Wek ngat kame wakere, ewakere pi Rwot.”

¹⁸Pien likame jo kame pwore ken gi en kame kopwoyo, do jo kame udo pwoc me ateni en jo kame Rwot pwoyo.

2 Jokorinti 11

Paulo kede Joor me Angalo

¹Oudo amito be koto ikanyakinunu mingo na moro anonok. Okwe kanyakinunu kamanono keda!

²Ango atie kede nyeko ka Rubanga piru, pien ango anero wu pi nyomere kede Kirisito, pi mino wu bute bala kame komio kede ateran kalikame pwodi ngeo icuo but cware acel kenekene.

³ Do ango atie kede lworu be, bala kame twol riki ongalo kede Keba kede riekere mere, wuda kobino pacaro tam wu tenge di ikounu weko keto cunyu i maro Kirisito i ateni.

⁴Pien ka ngatamoro obino di eko donyo pwonyo kop i kom Yesu ace kame pat kede kame wan otieko tatamo kop i kome, arabo ka igamunu tipo apat kede Tipo kame itiekunu gamo, amoto ka igamunu ejiri apat kede kame itiekunu gamo, dwong mere be udo wun iyeunu gin dedede cucuto.

⁵Ango atamo be likame ango abedo ngat kocoko dud jo kame kolwongo be joor adongo nogi.

⁶Akadi bed bala ango ali kede diru me yamo kiber, do ango atie kede ngec; wan otieko nyuto ne wu manoni i yore dedede kede i gi dedede.



⁷Ango bin amwolere tetekeny koting wu malo, pien angu likame amio wu ikwanyunu gimoro pi ejiri ka Rubanga kame kotuco ne wu. Benyo, mam adubo pi timo kamanono?

⁸Ecal do bala oudo angu ayako ikodeta ace me jokirisito pi kite kame agamo kede kony kikut gi tetekeny atim tic i diere wu.

⁹Doko i kare kame oudo atie kede wu, di oudo tie jame kame mitere na, likame ako mino ngatamoro yeno peko na, pien imiegu kame bin owok ki Makedonia en kame omia gikame oudo mitere na. Aso, angu ako wutakino, doko abino meede wutakino pi weko mino wu yeno peko na i yore dedede.

¹⁰Bala kame ateni ka Kirisito tie kede i cunya, likame kobino gengo ewaka na noni i adulion me Akaya.

¹¹Pinyo? Iparunu be pien likame angu amaro wu? Rubanga ngeo be angu amaro wu.

¹²Do gikame angu nataman atie timo, abino meede timo, tetekeny kur ami kare but jo kame mito udo winyo me jo neno gida bala kirom aroma kede wan i gikame kiwakere iye.

¹³Akodi jo nogo obedo joor me angalo, jotic kame tie kede angalo, di kiumere pi doko cal bala joor ka Kirisito.

¹⁴Kur ngatamoro uri, pien akadi Sitani da umere pi doko cal bala malaika me lero.

¹⁵Aso, likame etie gikame nyen ka jotic mege da oumere pi doko cal bala jotic me gi kopooe. I ajikini, gin kibino udo gikame poore kede tic kame kitimo.

Can kame Paulo Oeno bala Ngaor

¹⁶Angu bobo amedo yamo be, kur ngatamoro tam be angu aming; do akadi di itamunu kamanono da, gamanu do kong bala ngamingo, tetekeny ada awakere atitidi moro.

¹⁷Gikame angu atie yamo kame makere kede wakere abongo lworu noni, likame atie yamo i akarunikin ka Rwot, do atie yamo bala ngamingo.

¹⁸Do bala kame jo atot wakere kede pi jame me kom, angu da abino wakere.

¹⁹Pien bala kame wun iriekunu kede, omio wun ikanyakinunu kede yomcuny bedo kede jomingo!

²⁰Wun ikanyakinunu ka dano moro oloko wu idokunu ipasoi, arabo ecamo jame wu, arabo etingere ne wu, arabo etero wu ter me anywar.

²¹Lewic maka waco be wan oudo ogoro twatwal pi timo ginogo! Do ka tie gimoro kame ngatamoro wange tek pi wakere iye, angu atie yamo bala ngamingo, angu da wanga tek wakere pi gi nono.

²²Mam gin Iburanian? Angu da abedo kamanono. Mam gin jo me Isirael? Angu da abedo kamanono. Mam gin kibedo ikwae ka Aburaam? Angu da abedo akwar Aburaam.



- ²³ Mam gin jotie ka Kirisito? Ango atie yamo bala ngat opoi, ango ngatic aber kalamo gin! Ango atio kitek kalamo gin, kotwea i otkol tien atot kalamo, kobunga tien kalikame marere, doko abuco to tien atot.
- ²⁴ Iyudayan obedo dana ibelai ot adek kiwie kanyangon tien kany.
- ²⁵ Kobunga tien adek kede ebela. Kodidipo ango kede ingaroi tien acel. Imerin apapat adek obedo tuturun di ango oudo atie ot kede gi; tien acel koma oudo tie i yi pii me nam iwor kede iceng.
- ²⁶ Tien atot di atie ot, abeo i peko kame oyai ki icileta, i peko me joyak, kede i peko kame owok kibus jo na kikokome, peko kame owok kibus jo kalikame Iyudayan, peko i bomba, peko i tim, peko i nam adwong, kede peko kame owok kibus imiegu kede amiegu me angalo.
- ²⁷ Atio kitek kede abeo i kuo atek; iwor atot oudo likame anino, kec kede orio oneka, i kare atot abedo li kede giacama, i kare atot akanyo koyo di ali kede giangapa.
- ²⁸ Doko, di ber aweko gi ace, ceng dedede par pi ikodeta dedede me jokirisito dia.
- ²⁹ Ngai kame bedo tie kede goro, di likame ango ako bedo kede goro? Ngai kame komio poto i dub, di ango cunya likame ko wang?
- ³⁰ Ka miero ango awakere, abino wakere pi gikame nyuto goro na.
- ³¹ Rubanga Papa ka Rwot Yesu, en ngat kame kopako nyinge nakanaka, ngeo be ango likame atie ngalo.
- ³² Kakame oudo atie kede Damasiko, ngapug kame oudo tie i dud loc me Abaka Aretas oko mino isirikalen daro bomba me Damasiko pi mito maka.
- ³³ Do oko yololo ango piny beno ki dirisa kede ebukit, di ako bwot ki cinge.

2 Jokorinti 12

Gianyuta ka Rwot

- ¹ Miero ango awakere; likame tie gimoro aber kame udere kiye, do ango abino meede di awaco kop i kom gikame Rwot onyuto na.
- ² Ango angeo icuo moro kame tie i Kirisito, kame oudo kotingo oko tero i malo me adek, mwakini tomon kiwie ongwon cen, ango likame angeo arabo etimere i kome amoto likame i kome, Rubanga en kame ngeo.
- ³ Doko ango angeo be koteri icuo noni, arabo kede kome amoto likame kede kome, ango likame angeo, do Rubanga en kame ngeo,
- ⁴ kotere i paradisi di en eko winyo kop kalikame kopoore waco, kalikame koyei ne ngatamoro nyogao yamo.
- ⁵ Aso ango abino wakere pi dano noni, do likame pira, kwanyo abino wakere pi goro na.



⁶Akadi koto di ango amito wakere, likame abino bedo ngamingo, pien udo atie yamo kop me ateni. Do likame ango abino timo kamanono, tetekeny kur ngatamoro bed kede tam amalo i koma kalamo gikame eneno kede kame ewinyo kibuta.

⁷Do pi mino kur abed kede tingere pi gianyuta atot ka Rubanga kame aneno, oko mino koma lito adwong, kame obedo bala aor ka Sitani, pi tidilo ango di eko genga tingere.

⁸Ango oudo abedo ngangao Rwot tien adek pi kwanyo gi noni ki koma.

⁹Do en eko dwoko na be, “Kisa nango romi, pien kame in igoro, twer nango dwong kalamo.” Ango do abino meede ameda wakere kede yomcuny pi goro na, tetekeny twer ka Kirisito bed i koma.

¹⁰Aso pi Kirisito, ango apwoyo goro dedede, ayet, kuo atek, itidil kede peko; pien kame ango agoro, udo atek.

Paulo Paro pi Jokorinti

¹¹Ango angamingo! Wun en idianu iye, pien wun en kame oudo ipoorenu nyuto pwoc wu pira. Pien likame ango atie piny me jo kame wun ilwongunu be joor adongodongo nogo, akadi di ango gimoro li.

¹²Bin kotimo gikame nyuto ngaor me ateni i diere wu kede dire atek, kede gianena, kede gi me isuur, kede tice me twer.

¹³Pien nyo kame oudo kotero wu iye kirac kalamo ikodeta apat me jokirisito, kwanyo kenekene be ango likame amio wu yeno peko na? Sasirunu ango pi raco na noni!

¹⁴Nan ango ine, atieko iikere me bino butu tien me adek. Likame abino mino wu yeno peko na, pien likame ango amo gikame itienu kede, do ango amo wun nogo; pien idwe likame poore kano mono pi jonywal gi, do jonywal en kame poore timo kamanono pi idwe gi.

¹⁵Cunya bino bedo yom twatwal pi mino gi dedede kame atie kede, kiton ango kikoma da, pi kuo me cunyu. Ka ango amaro wu kalamo, benyo, amara wu buta do bed titidi?

¹⁶Aso oterunu kamano be, ango likame bin amio wu yeno peko na. Do akadi kamanono da, wun iwacunu be oudo ango atio kede rieko di ako ngangalo wu pi dino wu.

¹⁷Benyo, tie ngatamoro kikom jo kame oudo aoro butu kame oko mina adio wu?

¹⁸Ango oudo akwao cuny Tito pi ot, di ako cwano omin wa i Kirisito oupere kede. Benyo, bin Tito oko dino wu? Mam wan oudo otio kede cuny acel? Mam wan oudo otio iepone acel?

¹⁹Benyo, oudo wun ibedunu paro pi kare go dedede be wan otie jurere kenwa i nyimu? Wan obedo yamo i nyim Rubanga i Kirisito. Jo na kame amaro, gi dedede kame wan otimo, otimo gi pi gero yei wu.



²⁰Pien ango atie kede lworu be cengemogo aromo bino di ako udo itienu iekite kalikame ango amito, kede da be cengemogo wuda iromunu udo di ango atie iekite kalikame wuda imitunu. Ango atie kede lworu be cengemogo itienu kede lok, nyeko, gero, woro, dubo nying jo, akwot, ewaka, kede anyonyobun.

²¹Ango atie kede lworu be, kame adwogo butu, Rubanga na romo dwoka piny i nyimu, di ako romo tururo pi jo atos kame otimo dub i kare okato, kalikame pwodi oswilero ki tim gi me emuna, caro, kede mit me lewic.

2 Jokorinti 13

Ikwenyar me Ajikini

¹Man en tien me adek kame ango atie bino kede butu. “Pido moroni miero ijurak are arabo adek en kame poore gango.”

²Ango oudo akwenyaro jo kame ngoce odubo, kede da jo dedede apat, doko nan akwenyaro gi di likame atie kede gi, bala kame oudo atimo di atie kede gi i kare kame oudo awelao gi kede tien me are, be, ka ango abino bobo, likame abino weko gi abongo alola,

³pien wun imitunu gikame nyuto be Kirisito tie yamo kibuta. Likame en egoro kame etie tic kede wu, do en etie kede twer i diere wu.

⁴Pien riki pi goro mere omio kogure i kom musalaba, do nataman ekuo pi twer ka Rubanga. Wan ogoro i Kirisito, do i tic kede wu wan obino kuo karacel kede en pi twer ka Rubanga.

⁵Ngingicunu kuo wu kenu, di ikounu neno ka pwodi itienu i yei wu. Benyo, likame iromunu niang be Yesu Kirisito tie i kuo wu? Kwanyo do ka amoto ipotunu!

⁶Ango ageno be ibinunu udo be, wan likame opoto.

⁷Do wan okwao Rubanga be wun kur itimunu gimoro arac, likame pi nyuto be wan en kame do otieko timo kiber, do pi wek wun iromunu timo gikame opoore, bed bala eneeno bala wan otieko poto.

⁸Pien wan likame otwero timo gimoro kalikame upere kede ateni, do kenekene wan otimo gikame upere kede ateni.

⁹Wan olelo kame wan ogoro do di wun itekunu. Gikame wan okwao Rubanga en ine be, wek idokunu jo kame beco.

¹⁰Ango awandiko ne wu kop noni di atie tenge, tetekeny kame abino, kur abed ger kede wu kame atie tic kede akarunikin kame Rwot otieko mina, pi gero yei wu do likame pi rete.

Amot

¹¹Di do ajiko, imiegu kede amiegu na, asounu do; iikunu ekite wu, lubunu gikame akwao wu pi timo, winyerenu, bedunu kede mulem, di Rubanga me amara kede me mulem ko bino bedo kede wu.



¹²Moterenu kenu kenu kede amot kacil me notere. Jokacil dedede moto wu.

¹³Kisa ka Rwot Yesu Kirisito, amara ka Rubanga kede nywak me Tipo Kacil bed kede wu dedede.



Jogalattia

Jogalattia 1

Amot

¹Baluwa kowok kibut Paulo ngaor, kame or mere likame owok kibut jo amoto oboe kibut dano moro, do ngat kame or mere owok kibut Yesu Kirisito kede kibut Rubanga Papa, ngat koyaruno en kikom jo oto.

²Ango acwao baluwa noni karacel kede imiegu kede amiegu dedede kame tie keda. But ikodeta dedede me jokirisito i Galatia.

³Kisa kede mulem kame wok kibut Rubanga Papa wa, kede kibut Rwot Yesu Kirisito bed butu.

⁴Kirisito ojalere pi dub wa, pi lako wa ki kare kanataman me dub noni, di lubere kede mit ka Rubanga wa, en Papa wa.

⁵Deyo bed but Rubanga ikar kede ikar! Amen.

Ejiri tie Acel Kenekene

⁶Ango auro twatwal, pien itienu susunyo weko Rubanga ngat kolwongo wu pi kisa ka Kirisito di ikounu lokere i ejiri apat.

⁷Likame pien ejiri moro ace bobo tie, do tie jo mogo kame lolo wu di kimito loko ejiri ka Kirisito.

⁸Do akadi bed bala wada, amoto malaika moro kowok ki malo tuc ne wu ejiri kalikame upere kede maca kame wan oudo otuco ne wu, miero lame.

⁹Bala kite kame wan oudo otieko waco kede, omedo doko waco kamanono be, ka ngatamoro tie tuc ne wu ejiri kalikame upere kede ejiri kame bin igamunu, miero lame.

¹⁰Iparunu be ango do atie mono pwoc kibut jo arabo kibut Rubanga? Arabo iparunu be ango atie tamo yomo cuny jo? Ka koto di oudo pwodi ango atie yomo cuny jo, koto likame ango abedo ngatic ka Kirisito.

Epone kame Paulo Odoko kede Ngaor

¹¹Imiegu kede amiegu na, ango amito ingeunu be, ejiri kame oudo ango atuco likame owok kibut dano.

¹²Pien likame ango agame kibut dano amoto dano en kopwonya iye, do ango aude ki nyutere ka Yesu Kirisito.

¹³ Pien wun itiekunu winyo epone me kuo kame oudo ango atie kede pi lubo edini me Iyudayan, epone kame atidilo kede ekodet me jo koyei Rubanga di atie kede gero, di atamo dudubo en.



- ¹⁴ I edini me Iyudayan, ango en kame oudo atie anyim kalamo jo atot me lwak na. Oudo aketo cunya twatwal i itok me joakwari wa.
- ¹⁵ Do Rubanga ngat kame bin opoka di pwodi likame konywala, di en eko lwonga pi kisa mere,
- ¹⁶ cunye oko bedo yom pi nyuto Wode buta, tetekeny apwony kop i kome ne jo kalikame Iyudayan. Ango likame ako ot pi udo tam kibut ngatamoro,
- ¹⁷ amoto ot Yerusalem but jo kame ogeo nango bedo joor. Do bin ango ako ot Arabia, di ako dwogo Damasiko.
- ¹⁸ Ingei mwakini adek ango ako ot Yerusalem pi welao Kepa, ako dong bedo kede en pi ceng tomon kiwie kany.
- ¹⁹ Do likame bobo ako neno ngaor moro ace, kwanyo kenekene Yakobo omin me Rwot.
- ²⁰ I nyim Rubanga, ateteni likame ango atie ngalo i gikame awandiko ne wu!
- ²¹ Di do ango ako ot i adulion me Siria kede Kilikia.
- ²² Oudo pwodi likame tie ngatamoro i ikodeta me jokirisito kame tie Yudea kame oudo otieko nena,
- ²³ kenekene oudo kiwinyo di kowaco be, “Ngat kame bin tidilo wa nan do tie pwonyo kop i kom yei kame bin etamo dudubo.”
- ²⁴ Gin kiko mino Rubanga deyo pi ango.

Jogalattia 2

Paulo kede Joor Icegun

- ¹ Di do ingei mwakini tomon kiwie ongwon, ango bobo ako dok Yerusalem karacel kede Baranaba, oudo atero Tito da oupere keda.
- ² Ango aoto bala kite kame Rubanga onyuto na kede. Ango ako nyuto i nyim gi ejiri kame ango oudo atuco ne jo kalikame Iyudayan (do atimo manoni i cokere me mung kede jotel kame koworo), tetekeny gikame atie timo arabo kame atieko timo kur bed tic me nono.
- ³ Do likame oko dino akadi Tito da ngat kame oudo tie upere keda pi kepere, bed bala en oudo ebedo Ngagurik.
- ⁴ Do man otimere pi jo mogo kame oudo kokelo, kame oudo cukere be gin kiyei, jo kame olwidar but wa pi begao gonyere kame wan otie kede i Kirisito Yesu, tetekeny kimi wa odok bala ipasoi.
- ⁵ Do wan likame oko yei gamo kop gi akadi kicel moro, tetekeny ogwok ne wu ateni me ejiri.



⁶ Do jotel kame oudo kopooore woro (ki tetu buta, epone kame gin oudo kitie kede likame nyuto apokapoka moro; Rubanga likame tie kede apokapoka but jo), jotel nogo, ango awaco be, likame kimeddo na gimoro.

⁷ Do akaka mano, gin kineno be Rubanga oudo ogena kede tic me tucdo ejiri ne jo kalikame kokepo, bala kite kame oudo emio kede Petero da tucdo ejiri ne jo kame kokepo.

⁸ (Pien ngat kotio kibut Petero di emie ebedo ngaor but jo kame kokepo, en kame bin otio kibut ada di eora pi ot but jo kalikame Iyudayan.)

⁹ Kakame kiniang kede i kom kisa kame komia, Yakobo kede Kepa kede Yokana, jo kame oudo koworo bala jotel, oko yango cinga kede cing Baranaba i nywak, di kiyei be wan opooore ot but jo kalikame Iyudayan, di gin kiko ot but jo kame kokepo.

¹⁰ Gin kikwao wa gi acel kenekene be, poore di wan oyutuno jocan, gikame cunya da oudo mito timo ateteni.

Paulo Oronkino Petero i Antiokia

¹¹ Do kakame Kepa obino kede Antiokia, ango ako ronkino en obe, pien kop oudo loe kakaler.

¹² Pien di oudo pwodi cuo mogo kame Yakobo ocwao likame otuno, Kepa oudo nywako cam kede jo kalikame Iyudayan. Do kakame cuo nogo otuno kede, en eko wutakino, di eko pokere tenge kikom gi pi lwooro ekodet kame bin gango tam me kepere.

¹³ Iyudayan ace da oko donyo i tim mere me ecuke noni. Man oko mino akadi Baranaba da odonyo i tim gi me ecuke nono.

¹⁴ Do kakame ango aneno kede be gikame gin oudo kitie timo likame upere kede ateni me ejiri, ango ako waco ne Kepa i nyim gin dedede be, “Ka kong in Ngayudaya lem ibedo bala jo kalikame Iyudayan, do weko bala Ngayudaya, epone mene kame in ikaruno dino kede jo kalikame Iyudayan pi bedo bala Iyudayan?”

Iyudayan kede Jo kalikame Iyudayan Udo Alako pi Yei

¹⁵ Wan ikom wa obedo Iyudayan i anywali wa, do weko jo kalikame Iyudayan kame obedo jodubo.

¹⁶ Do wan ongeunu be dano likame bedo ngat kopooore i nyim Rubanga be pien etimo gikame Iswil mito, do ebedo ngat kopooore i nyim Rubanga ka etie kede yei i kom Yesu Kirisito. Akadi wada oyeunu Kirisito Yesu tetekenyo obedunu jo kopooore i nyim Rubanga pi yei wa i kom Kirisito, do weko pi timo gikame Iswil mito. Pien timo gikame Iswil mito likame mio dano moro bedo ngat kopooore i nyim Rubanga.

¹⁷ Do ka i cane wa pi bedo jo kopooore i Kirisito, di oko udo be wan ikom wa otienyo jodubo, mam udo Kirisito do tie ngatic kame mio jo dubo? Ateteni likame kamanono!

¹⁸ Do ka ango agero bobo gikame ngoce areto piny nogo, udo atie nyuto be ango ngatur Iswil.



¹⁹Pien i kom kop kame mako Iswil, ango atieko to, tetekeny abed kuo ne Rubanga. Ango kogura karacel kede Kirisito,

²⁰omio likame doko ango en kame pwodi akuo, do Kirisito en kame kuo i ango. Doko kuo kame nan ango atie kede, akuo pien atie kede yei i kom Wot ka Rubanga, ngat kame omara di eko jalo kuo mere pira.

²¹Likame ango adagi kisa ka Rubanga, pien ka kono dano bedo ngat kopooore pi Iswil, koto to ka Kirisito do obedo me nono.

Jogalattia 3

Iswil arabo Yei

¹Wun Jogalattia imingunu! Ngai kologo wu? Bin koporo ne wu kiber kite kame koguro kede Kirisito i kom musalaba.

²Wek apenyu kaman kenekene be: bin iudunu Tipo pien oudo itimunu gikame Iswil mito arabo pien iwinyunu ejiri di ikounu yei?

³Mam wun imingunu adikinichel? Oudo igeunu kede Tipo, nan do mam imitunu jiko kede kom?

⁴Gi dedede atot kame ibeunu iye mam do oudo otimere me nono? Ateteni likame kibedo me nono.

⁵Benyo, Rubanga mio wu Tipo kede etimo giaura i diere wu be pien itimunu gikame Iswil mito, arabo pien iwinyunu ejiri di ikounu yei?

⁶Bala kite kame Aburaam “bin oyei kede Rubanga omio oko tere be ngat kopooore,”

⁷aso miero ingeunu be jo kame tie kede yei en kame obedo ikwae ka Aburaam.

⁸Doko da di bin iwandik kacil ogeo neno sek be Rubanga bino mino jo kalikame Iyudayan bedo jo opooore pi yei, en eko cako tuco ne Aburaam ejiri di pwodi likame kare otuno, di ewaco be, “Kibuti kobino mino atekerin dedede winyo.”

⁹Pi mano, jo kame tie kede yei komio gi winyo karacel kede Aburaam ngat kame bin oyei.

¹⁰Pien jo dedede kame gengere i timo gikame Iswil mito tie kede ilam; pien kowandiko be, “Ilam mak ngat acelacel kalikame lubo gikame kowandiko i itabu me Iswil, kede di likame etimo gi.”

¹¹Nan etie do kakaler be likame tie dano kame bedo ngat kopooore i nyim Rubanga pi Iswil; pien kowandiko be, “Ngat kobedo dano kopooore pi yei bino kuo.”

¹²Do Iswil likame cungo i yei, pien kowandiko be, “Ngat kame timo gi dedede kame Iswil mito bino kuo pirgi.”

¹³Kirisito olako wa ki ilam kame Iswil kelo, ingei en doko ilam pirwa. Pien kowandiko be, “Ilam mak ngat acelacel kame koliero i kom yat.”



¹⁴Man otimere tetekeny i Kirisito Yesu, winyo kame bin komio Aburaam bin i kom jo kalikame Iyudayan, me wek pi yei, oudunu Tipu kame kocikere pi mino wa.

Iswil kede Cikere

¹⁵Imiegu kede amiegu na, ber ami wu apor me kuo me ceng dedede: ka kotieko moko isikan ka ngatamoro, likame tie dano moro kame turo isikan nono, arabo medo iye gimoro.

¹⁶ Aso, cikere nogo oudo komio Aburaam kede akware. Likame ewaco be, “Kede ikwae,” pi nyuto be kitot; do enyuto dano acel kenekene be, “Kede akware,” en Kirisito.

¹⁷ Dwong me gikame ango atie waco en ine be: Iswil kame bin obino ingei mwakini 430 likame karuno turo isikan kame Rubanga oudo otieko moko, pi mino cikere mere bedo gikame kony mere li.

¹⁸ Pien ka giamia ka Rubanga cungo i Iswil, udo likame etie do pi cikere; do Rubanga bin omio giamia mere but Aburaam kede cikere.

¹⁹Iswil do tie pinyo? Oudo komede pi nyuto be turo Iswil en nyo, tuno kede ka akwar Aburaam obino, en ngat kame bin komio cikere pire; doko imalaikan en okele di ebeo kibut ngairucakin.

²⁰Aso ngairucakin likame tie pi dano acel, do Rubanga en acel.

Tic me Iswil

²¹Mam do Iswil likame nywako kede cikere ka Rubanga? Ateteni likame kamano; pien ka Iswil kame komio oudo mio kuo, ateteni udo Iswil mio dano doko ngat kopoore pi lube.

²²Do iwandik kacil oketo gi dedede i loc me dub, me wek mi jo kame tie kede yei gikame oudo kocikere pi mino, di lubere kede yei gi i kom Yesu Kirisito.

²³Aso, di pwodi likame oudo yei obino, wan oudo oguraun i twer me Iswil, di kocego wa daro yei kame oudo kobino nyuto.

²⁴Pi mano, Iswil oudo obedo ngadar wa tuno Kirisito bino, me wek odokunu jo kopoore pi yei.

²⁵Do nataman bala kite kame yei nono otieko bino kede, likame pwodi bobo otienu i cing ngadar.

²⁶Pien i Kirisito Yesu, wun dedede itienu idwe ka Rubanga pi yei.

²⁷Jo kame kobatiso i Kirisito kibutu otieko ngapo Kirisito.

²⁸Likame bobo tie Ngayudaya amoto Ngagurik, likame bobo tie epasoit arabo ngat kogonyere, likame bobo tie icuo arabo dako; pien wun dedede itienu acel i Kirisito Yesu.



²⁹ Aso ka wun ibedunu me ka Kirisito, udo do itienu kodi kowok kibut Aburaam, jo kame bino udo gikame Rubanga ocikere pi mino.

Jogalattia 4

¹Gikame ango atie waco en ine be, ngat kame poore lunyo jame ka papa mere, ka en pwodi atin udo erom aroma kede epasoit akadi bed bala en won jame dedede.

²Do en edong i cing jo kame gwoke kede jo kame lo jame mege tuno kede i ceng kame papa mere ociko.

³Etie kamanono kede wada; i kare kame wan oudo pwodi otienu idwe, oudo wan ipasoi me tipere kame pugo wi lobo.

⁴Do kakame kare oromo kede kiber, Rubanga oko cwano Wode, kame dako onywalo, kame konywalo di eko bedo i loc me Iswil,

⁵ me wek elak jo kame oudo tie i loc me Iswil, tetekeny Rubanga mi wa odok idwe mege.

⁶Doko pi wun ibedunu idwe mege, Rubanga otieko cwano Tipo ka Wode i cuny wa, Tipo kame kok but Rubanga be, “Aba! Papa!”

⁷Aso, pi Rubanga, likame in pwodi itie epasoit, do in atin mere, doko ka in atin mere udo in ibedo ngat kame en ebino mino winyo mere.

Paulo Paro pi Jogalattia

⁸I kare kokato di oudo pwodi likame ingeunu Rubanga, oudo ibedunu ipasoi me tipere mogo, kame iekite me cwec gi likame kibedo rubangan.

⁹Do bala kite kame nataman itiekunu ngeno kede Rubanga, arabo awac be Rubanga otieko ngeno wu, benyo benyo kame idokunu kede bobo but tipere kame goro kede kame jocan, kame pugo piny? Benyo bo komio imitunu bobo bedo ipasoi gin?

¹⁰Wun igwokunu ceng kede dwete kede kare, kede mwakini!

¹¹Ango atie kede lworro be abungo timo tic me nono piru.

¹²Imiegu kede amiegu na, ango akwao wu be, dokunu cal bala ango, pien ada atieko doko cal bala wun. Likame wun itimunu na raco moro.

¹³Wun ingeunu be aramo kame omako koma en kame bin omio ango atuco ne wu ejiri tien me agege.

¹⁴Doko bed bala aramo na oudo obedo atama butu, likame ibedunu kede acae buta arabo idaganu, do igamanu bala malaika ka Rubanga, bala kite kame oudo koto igamunu kede Kirisito Yesu.

¹⁵Nyo doko oko timere i kom yomcuny kame oudo itienu kede? Ango ajurao wu be ka koto oudo twerere, oudo koto iromunu golo wangu di ikounu mina.

¹⁶Benyo, nan do mam ango adoko ngakwor wu pi waco ne wu kop me ateni?



¹⁷Jo mogo mire ken gi kitek butu, likame pi tien kop moro, do kenekene pien gin kimito gengo wu kibuta, tetekeny wuda imirenu kenu kitek but gi.

¹⁸Eber mire kitek pi tien kop kopooore i kare dedede, do weko i kare kame ango atie kede wu kenekene.

¹⁹Idwe na, ango aramere bobo piru tuno kede kame idokunu cal kede Kirisito i kuo wu.

²⁰Oudo cunya mito be koto abed kede wu nataman tetekeny alok epone me yamo kede wu, pien kop wu ocungo wia.

Apor i kom Agar kede Sara

²¹Wacanu, wun jo kame imitunu bedo i loc me Iswil, benyo, likame iwinyunu gikame Iswil waco?

²²Pien kowandiko be Aburaam oudo bin tie kede awobe are, acel enywalo kede dako kame oudo obedo apasoit, kede ocelu en eko nywalo kede dako kalikame oudo obedo apasoit.

²³Wot ka dako kame oudo obedo apasoit riki konywalo di lubere kede ekite me kom, do wot ka dako kalikame oudo obedo apasoit oudo konywalo pi cikere kame bin Rubanga omio.

²⁴Aso, man tie apor kaman: mon are gi cungo pi isikan are. Dako kame cungo pi isikan kame kotimo i moru me Sinai en Agar, kame nywalo idwe mege pi pasuno.

²⁵Aso Agar en kame cungo pi moru me Sinai kame tie Arabia; en ecal acala kede Yerusalem kame nataman tie, piento en etie pasuno kede idwe mege.

²⁶Do dako ocelu ca cungo pi Yerusalem me i malo, en ebedo ngat kame tie kede gonyere, doko en toto wa.

²⁷Pien kowandiko be, “Leli, in ngat kame ili kede atin, in ngat kalikame inywal! Mwoc wer di ilelemo, in ngat kalikame ikanyo aramo me nywal. Pien idwe me dako kame koweko tot kalamo idwe me dako kalikame koweko.”

²⁸Aso imiegu kede amiegu na, wan otien idwe me cikere ka Rubanga bala bin Isaka.

²⁹Do bala kame i kare nono atin kame oudo konywalo di lubere kede ekite me kom oko tidilo atin kame konywalo pi Tipo ka Rubanga, nataman da tie kamanono.

³⁰Do iwandik kacil waco benyo? En ewaco be, “Riam apasoit kede atin mere, pien atin me apasoit likame bino nywako sikao jame karacel kede atin me dako kame tie kede gonyere.”

³¹Pi mano, imiegu kede amiegu na, wan likame obedunu idwe me apasoit, do me ka dako kame tie kede gonyere.

Jogalattia 5

Gwokunu Gonyere wu



¹Kirisito ogonyo wa me wek obed jo kogonyere; pi mano, cungunu di itekunu di likame ikounu bobo yei ayoko me ipasun.

²Winyunu! Ango Paulo, awaco ne wu be, ka iyeunu kepere, udo Kirisito do kony mere odoko li kibutu atwal.

³Ango bobo akwenyaro ngatamoro kame yei kepere be, en do etie kede banya me lubo Iswil lung.

⁴Wun ipokerenu tenge kikom Kirisito, wun jo kame imitunu bedo jo kopoore pi lubo Iswil; likame itienu i kisa ka Rubanga.

⁵Pien pi twer me Tipo, kame tio i yei wa, wan otienu daro kede gen bedo jo kopoore.

⁶Pien i Kirisito Yesu, akepo arabo bedo abongo akepo likame timo gimoro, do gikame pire tek en yei kame tio di ebeo i amara.

⁷Oudo itienu timo kiber; ngai bobo kogengo wu lubo kop me ateni?

⁸Epone me esupe nono likame owok kikut Rubanga ngat kolwongo wu.

⁹ Arup atitidi me mugati romo mino alos lung kame konyongo buuno.

¹⁰Ango atie kede niang aber i Rwot be, wun likame ibinunu bedo kede tam apat kede mera; doko da ngat kame tie lolo wi wu kobino ngolo ne kop, akadi di en ebedo ngai.

¹¹Imiegu kede amiegu na, do ka ango pwodi atie pwoyo be kepere mitere, pinyo kara komio pwodi kotie tidilo ango? Ka etie kamanono, udo kotieko kwanyo kop kame koto wango cuny jo ki pwoyo kame mako to ka Kirisito i kom musalaba.

¹²Oudo cunya mito be koto jo kame tie rubo wi wu nogo miero gelemekin da.

¹³Pien, imiegu kede amiegu na, wun oudo kolwongo wu pi bedo jo kogonyere; kenekene kur doko itienu kede gonyere wu bala gikame mio wu kare me cobo mit me komu, do pi amara bedunu bala ipasoi but ngat acelacel.

¹⁴ Pien Iswil lung ribere i cik acel be, “Mar ngakio ni bala kame imaro kede komi keni.”

¹⁵Do ka isurerenu di iwanerenu bala leini ager, gwokerenu me wek kur itiekerenu.

Tipo kede Kuo me Anywali ka Danu

¹⁶Do ango awaco ne wu be, miunu Tipo tel wu di likame ikounu cobo mit me kom.

¹⁷ Pien mit me kom likame riamo kede gikame Tipo mito, doko gikame Tipo mito likame riamo kede mit me kom; pien gin are nogi, ngat acelacel piemmo kede ocelu, pi gengo wu timo gikame imitunu timo.

¹⁸Do ka Tipo en kame telo wu, udo likame itienu i loc me Iswil.

¹⁹Tice me kom neeno kakaler, gin ige: caro, tim me emuna, mit me lewic,



²⁰woro cal jwogi, jwok, ading, piem me lilo, nyeko, gero, lok, apokapoka, pokere i ikodeta,

²¹ingobel arac, amera, ebaga me yomcuny arac, kede apat mege kame cal kamagonogi. Akwenyaro wu, bala kame oudo atieko kwenyaro wu kede sek be, jo kame timo epone me gi nogi likame bino donyo i ajakanut ka Rubanga.

²²Do anyakini me Tipo en amara, kilel, mulem, dire, mwolo, bero, genere,

²³bedo mot, kede dino mit me kom. Likame tie iswil moro kame dagi gi nogi.

²⁴Jo kame obedo me ka Kirisito Yesu otieko guro kuo me anywali karacel kede par mege kede mit mege i kom musalaba.

²⁵Ka Tipo en kame mio wa okuo, wek Tipo da en kame tel wa.

²⁶Owekunu deng, mono kolo, kede bedo kede nyeko wan kenwa kenwa.

Jogalattia 6

Konyerenu Kenu Kenu

¹Imiegu kede amiegu na, ka ngatamoro otimo gikarac, wun jo kame Tipo telo wu ipoorenu dwoke kakare kede cuny me mwolo. Gwokerenu kenu tetekeny kur wuda ipotunu i atama.

²Konyerenu kenu kenu, pien iepone noni udo icobunu gikame iswil ka Kirisito mito.

³Pien ka ngatamoro paro be pire tek do di en kony mere li, udo engalere kene.

⁴Ngat acelacel poore ngingico tice mege, di do gikame mie epoore wakere ko bedo bute kene, do likame but ngakio mere.

⁵Pien ngat acelacel poore yeno yec mere.

⁶Jo kame kotie pwoyo kop ka Rubanga poore nywako kede ngapwony gikame beco dedede.

⁷Kur ngalu; Rubanga likame konywaro, pien gikame dano cuo en kame ekao da.

⁸Pien ngat kame cuo i kome, gikame ekao ki kome en to; do ngat kame cuo i Tipo, gikame ekao ki Tipo en kuo kame bedo nakanaka.

⁹Doko kur oolunu timo gikaber, pien ka kare otuno obinunu kac ka likame okwanyunu cuny wa.

¹⁰Aso, tek ka otienu kede kare, otimunu gikaber ne jo dedede, twatwal mere ne jo kame tie i ekodet me jo koyei Kirisito.

Ikwenyar me Ajikini kede Amot

¹¹Nenunu inyukutan adongodongo kame atie iwandik kede butu kede cinga kikoma.

¹²Jo kame dio wu kepere gin jo kame mito nyutere twatwal i kuo me kom gi. Gin kitimo kamano tetekeny kur kotidilo gi pi kop me to ka Kirisito i kom musalaba.



- 13**Pien akadi jo kame kokepo da likame lubo Iswil. Gin kimito be kep wu me wek kiwakere pi komu.
- 14**Do ewaka nono miero bed bor keda, kwanyo ango abino wakere kenekene pi musalaba ka Rwot wa Yesu Kirisito. Pi musalaba mere, ki tetu buta kotieko guro piny di eko to, doko kibun piny da kotieko guro ada di ako to.
- 15**Pien akepo arabo bedo abongo akepo likame tie gikame pire tek, do bedo giacwea kanyen en kame pire tek.
- 16**Mulem kede kisa bed but jo dedede kame lubo iswil noni, kede but Isirael ka Rubanga.
- 17**Cako nan kur ngatamoro bobo lola; pien ango atie kede alama ka Yesu i koma.
- 18**Imiegu kede amiegu na, kisa ka Rwot wa Yesu Kirisito bed i cunyu. Amen.



Joepeso

Joepeso 1

Amot

¹ Baluwa kowok kibut Paulo, ngat kame Rubanga olwongo i mit mere pi bedo ngaor ka Kirisito Yesu. But jokacil kame tie Epeso, kame genere i Kirisito Yesu.

² Kisa kede mulem kame yai kibut Rubanga Papa wa kede Rwot Yesu Kirisito bed butu.

Winyo me Cuny kame wan Oudo i Kirisito

³ Pak bed but Rubanga, ngat kame obedo Papa me Rwot wa Yesu Kirisito, en ngat kame emio wa i Kirisito winyo dedede me cuny kame tie i malo.

⁴ En riki eyero wa i Kirisito pi amara mere di pwodi likame kogege cweno piny, pi wan bedo jokacil kame li kede raco moro i nyime.

⁵ Rubanga oudo otieko yero wan sek pi doko idwe mege pi Yesu Kirisito, di lubere kede bero me mit mere,

⁶ tetekeny wan opak kisa mere me deyo kame en emio wa abongo cul moro i Wode kame en emaro.

⁷ I remo mere, wan oudunu alako kede isasir ki dub, di lubere kede abar me kisa mere

⁸ kame en emio wa di dwong. I rieko kede i ngec mere dedede,

⁹ Rubanga otieko mino wa ongege mung me mit mere, di lubere kede iik mere aber kame yomo cunye, kame en oudo egege moko sek i Kirisito.

¹⁰ Aso, iik noni, kame en ebino cobo kame kare kopoo otuno, en iik me coko giacwea dedede kame tie i malo kede i wi lobo karacel i Kirisito.

¹¹ Doko da wan otieko doko jokacil pi Kirisito, bala kame en oudo egege moko kede sek di lubere kede iik mere, en ngat kame emio gi dedede cobere bala kame en emio,

¹² tetekeny wanunu jo me agege me bedo kede gen i Kirisito, wek opakunu deyo ka Rubanga.

¹³ Wuda i Kirisito itiekunu winyo kop me ateni, kame obedo ejiri me alako wu, di ingei wun yei Kirisito oko mino wu alama kame obedo Tipo Kacil, kame oudo kocikere pi mino.

¹⁴ Manoni moko be wan obinunu udo gikame Rubanga ocikere iye, en lako wa di okounu doko jo mege, pi pako deyo mere.

Ilega ka Paulo

¹⁵ Ango atieko winyo yei wu i kom Rwot Yesu kede amara wu but jokacil dedede. Pi mano,



¹⁶ango likame aweko mino Rubanga pwoc piru, doko ango ayutuno wu kame atie ilega.

¹⁷Ango akwao be, Rubanga ka Rwot wa Yesu Kirisito, Papa won deyo mi wu Tipo me rieke kede me nyutere ka Rubanga, pi mino wu ngene odocon,

¹⁸tetekeny pi bedo kede tam kame niang, wek ingeunu gen kame itienu kede pi lwongo mere, kede abar me deyo kame en eciko pi mino jo mege,

¹⁹kede twer mere kame dwong dwongo kalikame wacere kame tie tic i but wan jo kame oyei, di lubere kede tic me twer mere kame dwong.

²⁰ Rubanga bin oketo twer noni i tic i Kirisito, kakame eyaruno en kede kikom jo oto, di eko mine ebedo i bade tetu cam i kabedo kame tie i malo.

²¹En etie malo kalamo apugan dedede, akarunikin dedede, twer dedede, kede loc dedede, doko en etie malo kalamo nying dedede kame kocako, likame i kare kanataman kenekene, do kiton i kare kame bino bino da.

²² Rubanga otieko mino Kirisito twer i kom gi dedede, di oko mine telo wi jame dedede pi ekodet me jokirisito,

²³kame obedo kome, kame pongo en ngat kame pongo gi dedede i kabedo dedede.

Joepeso 2

Yai ki To tuno i Kuo

¹ Oudo wun itounu pi turo iswil kede pi dub,

²gikame oudo obedo ekite me kuo wu, di ilubunu ekite me kuo me piny kan, kede di ilubunu ngapug kame lo tipere kame tie i wi yamo, en tipo kame nataman pugo jo kame dagi winyo kop ka Rubanga.

³Wada i kare moro oudo ocalunu kede gin i mit me kom wa, di olubunu mit me kom wa kede tam wa. Pi mano, iekite me kuo me kom, wan oudo obedunu jo kame poore pi udo lilo ka Rubanga bala jo apat dedede.

⁴Do Rubanga, ngat kame opong kede cuny me kisa, pi amara mere adwong but wa,

⁵omio bed bala wan oudo bin otounu pien oudo oturunu iswil mere, en eko mino wa obedunu kuo karacel kede Kirisito. Wun kolako wu pi kisa ka Rubanga.

⁶En eyaruno wa karacel kede en di eko mino wa obedunu karacel kede en i kabedo kame tie i malo i Kirisito Yesu,

⁷tetekeny i kare kame bino bino, en enyut ne wa abar kalikame wacere me kisa mere pi bero kame enyuto ne wa i Kirisito Yesu.

⁸Pien kisa ka Rubanga en komio kolako wu pi bedo kede yei. Man likame wun en kame itimunu, do etie giamia ka Rubanga;

⁹likame etimere pi tice wu me wek ngatamoro wakere iye.



¹⁰Kite kame nataman wan otienu iye noni obedo tic me cing Rubanga. En ecweo wa kamanoni i Kirisito Yesu pi timo tice kabeco kame en oudo egeo iiko sek pi wan timo.

Bedo Jo Acel i Kirisito

¹¹Aso, yutununu ekite kame oudo itienu kede, wun jo kalikame ibedunu Iyudayan i anywali wu, wun jo kame jo kame lwongere be “kokepo” lwongo wu be “jo kalikame kokepo”, kepere kame obedo gikame neeno kame cing dano timo i ringokom.

¹²I kare nono kuo wu oudo opokere kede Kirisito, oudo itienu ooko me ateker me Isirael, doko oudo likame koribo wu i isikan kame cungo i cikere ka Rubanga, kede oudo ibedunu i piny kan abongo gen kede abongo ngeno Rubanga.

¹³Do nan i Kirisito Yesu, wun jo kame oudo ngoce iborunu kede Rubanga, remo ka Kirisito nan otieko mino wu idokunu iyapiyapi kede en.

¹⁴Pien Kirisito en kame okelo ne wa mulem; pi kome kame koguro, en eribo wan jo me ikodeta are odoko jo acel, doko etieko turo gikame oudo poko wa, en ading kame oudo tie i diere wa.

¹⁵En etieko kwanyo Iswil kede cik kame oudo tie iye, tetekenye ecwei ateker acel kanyen kame oribere karacel i en, akaka atekerin are, iepone noni, en ekelo mulem.

¹⁶Pi to mere i kom musalaba, en edwoko wan atekerin are dedede i nywak bobo kede Rubanga i kom acel, man oko mino ading ojik.

¹⁷Aso, Kirisito oko bino di eko pwoonyo kop kame kelo mulem butun jo kame oudo iborunu kede Rubanga, kede da but jo kame oudo iyapiyapi kede Rubanga;

¹⁸pien i Kirisito, wanunu dedede okarununu tuno but Papa i Tipo acel.

¹⁹Pi mano, wun doko likame pwodi itienu jo kame kokwia, kame obedo jokumbor, do wun itienu jo me ateker acel kede jokacil, doko da ibedunu jo me i ot ka Rubanga,

²⁰kame kogero i wi acakini kobedo joor kede inabin, di Kirisito Yesu en kame obedo kidi kame pire tek i gedo nono.

²¹Gedo lung cungo ribakin karacel i Kirisito, di en eko dongo edoko tempulo kacil i Rwot.

²²Wuda i Kirisito kotie gero wu pi doko kakame Rubanga bedo iye i Tipo mere.

Joepeso 3

Tic ka Paulo but Jo kalikame Iyudayan

¹Kop noni en komio ango Paulo abedo mabus ka Kirisito Yesu piru jo kalikame Iyudayan.

²Pien ateteni wun itiekunu winyo be Rubanga pi kisa mere otieko mina timo tic pi bero wu,



³kede da epone kame konyuto na kede gikame omungere, bala kame atieko wandiko kede malo kano kede kope anonok go.

⁴Kame wun isomunu kop noni, ibinunu niang epone kame ango angeo kede gikame omungere i kom Kirisito.

⁵I kare asek, oudo likame komio jo ongeo gikame omungere noni, do nan Tipo otieko mino joor kede inabin kacil ongee.

⁶Mung noni en ine be, pi kop me ejiri, jo kalikame Iyudayan otieko doko jo kame nywako winyo ka Rubanga karacel kede Iyudayan, jo me kom acel, doko kinywako cikere acel i Kirisito Yesu.

⁷Ango komia adoko ngatic me ejiri noni di lubere kede giamia me kisa ka Rubanga kame emia di beo i tic me twer mere.

⁸Bed bala ango abedo dano me ajikini kalikame pire tek kikom jokacil dedede, do Rubanga oko mina kisa noni, pi kelo ne jo kalikame Iyudayan Kop Aber i kom abar kalikame wacere ka Kirisito,

⁹kede pi mino jo dedede ngeno iik me mung ka Rubanga kame oudo ekano pi kare alac, en ngat kame ecweo jame dedede.

¹⁰Etimere kaman tetekeny ekodet me jokirisito nyut epone atot apapat me rieko ka Rubanga ne tipere kame pugo i wi yamo, kede ne akarunikin kame tie i kadedere me i malo.

¹¹En etimo man di lubere kede iik mere kame bedo nakanaka, kame en etieko timo i Kirisito Yesu Rwot wa.

¹²I Kirisito, wan otwerunu ot i nyim Rubanga abongo lworu, doko di otienu kede gen atek pi yei wa i kom en Kirisito.

¹³Pi mano, ango akwao wu kur ikwanyunu cunyu pi can kame ango atie neno piru; gin kitie pi bero wu.

Amara ka Kirisito

¹⁴Kop noni en komio ango ariondiko i nyim Papa,

¹⁵ngat kame ikodeta dedede kame tie i malo kede i lobo udo nying gi kibute.

¹⁶Ango akwao be, di lubere kede abar me deyo mere, wek Rubanga i Tipo mere emi wu twer kame mio wu idokunu tek i cunyu,

¹⁷kede be wek Kirisito bed i cunyu pi yei wu. Aso, cungunu kitek di ikounu moko i amara.

¹⁸Akwao be, wek wun karacel kede jokacil dedede itwerunu niang gikame obedo laco, boro atena, boro malo kede tuto,

¹⁹kede da ingeunu amara ka Kirisito kame kalamo ngec, tetekeny ipongunu kede gi dedede me ekite me kuo ka Rubanga.



²⁰Nan do deyo bed but Rubanga, en ngat kame pi twer mere kame tie tic kibut wa, etwero timo gikame tot kalamo kame wan okwao amoto otamo.

²¹Deyo bed bute i ekodet me jokirisito kede i Kirisito Yesu i kare lung, ikar kede ikar. Amen.

Joepeso 4

Ribere me Kom i Kirisito

¹Pi mano, ango ngat kame abedo mabus pi Rwot, angangao wu pi bedo iepone me kuo kame upere kede lwongo kame kolwongo wu iye.

²Mwolerenu di ikounu bedo jo kame dire, kede jo kame kanyakino kop me jo icegun kede amara,

³di iketunu cunyu pi gwoko aribakin kame Tipo mio i mulem kame ribo wu karacel.

⁴Kom tie acel doko Tipo da tie acel, bala kame gen kame Rubanga olwongo wu iye da tie acel.

⁵Rwot tie acel, yei tie acel, batisimu tie acel,

⁶Rubanga da tie acel, en ngat kame ebedo Papa me jo dedede, en Rwot me jo dedede, etio i jo dedede, doko etie i jo dedede.

⁷Do komio ngat acelacel kikom wa winyo di lubere kede rom me giamia ka Kirisito.

⁸Pi mano, iwandik kacil waco be, “Kakame eoto kede okwidu, etero ekodet me mabus; en eko mino giamia but jo.”

⁹Nan do kop kame waco be “en eoto malo” dwong mere nyo? Mano dwong mere be, en ber kong oudo egeo bino piny.

¹⁰Ngat acel kame obino piny nono en kame ooto kakabor kalamo malo, tetekeny ebed tie i gi dedede.

¹¹Giamia kame emio gin ige be, emio jo mogo odoko joor, mogo inabin, mogo jo kame tucio ejiri, mogo jokwat, kede mogo jopwony.

¹²En etimo man pi iiko jokacil pi timo tic mere, pi gero ekodet me jokirisito, kame obedo kom Kirisito.

¹³Man bino timere paka tuno di wan odokunu jo acel i yei kede i ngec wa i kom Wot ka Rubanga, di do wan okounu doko jo kocato kame cal acala kede Kirisito.

¹⁴Pi mano, kur doko wan obedunu idwe kame buko me yamo me pwoy dedede wirowi wa tetuni kede tetuca, pi kite kame jo ngolo ne wa kede riekio, kede pi diru gi me angalo.

¹⁵Do akaka manono, pi yamo kop me ateni kede amara, wan miero obedunu jo kame tie dongo i yore dedede i Kirisito, en ngat kame ebedo wi wa.



¹⁶ Adulion dedede me kom oribakin karacel i kom en, doko gin kitude karacel pi amorito kame en etie kede. Kame adul acelacel tie tic kiber, kimio kom dongo di eko doko tek pi amara.

Kuo Anyen i Kirisito

¹⁷ Nan ango amoko kitek i Rwot be, miero wun doko kur ibedunu bala jo kalikame Iyudayan, pien tam gi kony mere li.

¹⁸ Gin kili kede niang, doko gin kibedo jo kalikame nywako kuo kame wok kibun Rubanga pi kwina piny kede pi epali gi.

¹⁹ Gin do lewic likame mako gi, omio kijalere i mit me lewic, doko kitie kede eranga me timo epone me tim areco dedede.

²⁰ Manono likame gikame wun isiaonu i kom Kirisito.

²¹ Pien ateteni iwinyunu kop i kome, doko kopwonyo wu ateni kame tie i Kirisito.

²² Wun do miero ikwanyunu tenge ekite wu acon, en kuo wu acon kame oudo odubere pi angalo me mit mere.

²³ Miunu tam wu kede cunyu lokere dok nyen,

²⁴ di ikounu ngapere kede ekite me kuo anyen, kame kocweo di lubere kede cal ka Rubanga, i kuo me ateni kopooore kede kacil.

²⁵ Pi mano, miero ikwanyunu angalo tenge, di wan dedede okounu donyo yamo kop me ateni kede jokio wa, pien wan dedede obedunu adulion me kom acel.

²⁶ Ka ililo, kur lilo ni teri i dub, doko kur imako lilo i cunyi piny yuluyul.

²⁷ Kur imi Sitani kare.

²⁸ Jokuwo miero wek kuwo; do akaka manono wek kitim tic kede cing gi i yore aber, tetekeny kiko twero kwanyo giamia me konyo jocan.

²⁹ Kur di dogu yamo kop moro arac, do kwanyo kenekene kop kame gero jo bala kame mitere, tetekeny kop kame iyamunu mi winyo but jo kame tie winyo.

³⁰ Kur imiunu Tipo Kacil ka Rubanga ud wangcuny; piento en nono kame ebedo alama kame moko be ceng me alako wu bino tuno.

³¹ Kwanyunu tenge cuny akec dedede, kede lilo, kede gero, kede lok, kede dubo nying jo, karacel kede cuny arac dedede.

³² Do bedunu jo kame mwol kede jo icegun, kame cuny gi ber, kame sasiro jo icegun bala kite kame Rubanga osasiro wuda kede i Yesu Kirisito.

Joepeso 5

Bedo i Lero



- ¹Pi mano, bala kame wun itienu kede idwe ka Rubanga kame emaro, lubunu ekite mere.
- ² Bedunu kede amara, bala kame Kirisito omaro wa kede di eko jalo kuo mere pirwa bala giamia kame ngwe kur, kede giayala but Rubanga.
- ³Do tim me caro kede tim me emuna me epone dedede, amoto eranga, kur winyere i komu, bala kame poore ne jokacil.
- ⁴Wekunu nyoto yamo, yamo me mingomingo kede yamo areco kalikame poore kede wu, do akaka manono bedunu kede pwoc but Rubanga.
- ⁵Ngeunu kiber be, likame tie ngacaro, arabo dano moro kame tie kede tim me emuna, amoto ngaeranga (pien eranga obedo epone acel kame jo woro kede cal jwogi), kame bino donyo i Ajakanut ka Kirisito kede me ka Rubanga.
- ⁶Kur ngatamoro ngalu kede kope me abe, pien gi nogi en kame mio lilo ka Rubanga potu i kom jo kalikame winye.
- ⁷Pi mano, kur ibedunu kede gi.
- ⁸Pien i kare moro bin wun itienu i colo, do nataman itienu i lero i Rwot. Pi mano, bedunu bala jo kame tie i lero.
- ⁹Pien anyakini me lero tie i gi dedede kame ber, kopoore, kede me ateni.
- ¹⁰Tamakinunu mono gikame yomo cuny Rwot.
- ¹¹Kur idonyunu i tice me colo kame anyakini gi kony gi li, do akaka manono nyutunu gi kakaler.
- ¹²Pien etie gi me lewic akadi pi waco gikame akodi jo nogo timo i mung.
- ¹³Do gi dedede kame lero nyuto, kidoko gikame neeno kakaler.
- ¹⁴Pien gi dedede kame doko gikame neeno kakaler obedo lero. En komio kowaco be, “Nganino, cei! Yaruno kikom jo oto, di Kirisito ko bino mini lero.”
- ¹⁵Pi mano, gwokerenu iepone kame ibedunu kede, kur ibedunu bala jo kalikame riek, do bedunu bala jo kame tie kede riek,
- ¹⁶ di itiunu kiber kede kare kame winyo omako wu iudunu, pien ceng nogi obedo ceng kalikame beco.
- ¹⁷Pi mano, kur ibedunu jo amiming, do tamakinunu niang gikame Rwot mito ne wu timo.
- ¹⁸Kur idonyunu mer kede bwini, pien mano bino dubo kuo wu; do akaka manono, miunu Tipo pong i cunyu,
- ¹⁹ di iyamunu kenu kenu i sabuli, kede i were apat, karacel kede i were kame Tipo Kacil mio wu; werunu di ipakunu Rwot kede cunyu lung,



²⁰di imiunu pwoc nakanaka but Rubanga Papa pi gi dedede i nying Rwot wa Yesu Kirisito.

Cuo kede Mon gi

²¹Pi kite kame iworunu kede Kirisito, bedunu jo kame mwolere i loc wu kenu kenu.

²²Wun mon, mwolerenu i loc ka cuog wu bala kite kame imwolerenu kede i loc ka Rwot.

²³Pien icuo en kame obedo wi dako mere bala kame Kirisito da obedo kede wi ekodet me jokirisito, manoni en kome kame en ebedo Ngalak mere.

²⁴Bala kame ekodet me jokirisito mwolere kede i loc ka Kirisito, kamanono da poore mon mwolere i loc ka cuog gi i gi dedede.

²⁵Wun cuo, marunu mon wu bala kame Kirisito da omaro kede ekodet me jokirisito di eko jalo kuo mere pire.

²⁶En etimo man tetekeny emie edok gikacil pi kop mere, ingei lwoke i pii kame lonye,

²⁷me wek emi ekodet me jokirisito bute kene di etie gi me deyo, abongo karamoro kopwokere arabo karamoro korurujun, amoto gimoro ace kame cal kamanono, tetekeny ebed gikacil abongo raco moro.

²⁸Kamanono da, cuo poore maro mon gi bala kite kame kimaro kede kom gi ken gi. Ngat kame maro dako mere, udo emaro kome kene.

²⁹Pien likame tie dano kame dagi kome kene, do epite di egwoke kiber, bala kite kame Kirisito timo ne kede ekodet me jokirisito,

³⁰pien wan obedunu adulion me kome.

³¹Pien iwandik kacil waco be, “Kop noni en komio icuo bino weko papa mere kede toto mere, eko ribere kede dako mere, di gin jo are nogo kiko doko kom acel.”

³²Kop noni obedo mung adwong, do ango atie yame i kom Kirisito kede i kom ekodet me jokirisito.

³³Aso, ngat acelacel kikom wu poore maro dako mere bala kame emaro kede kome kene, doko dako da poore neno be eworo cware.

Joepeso 6

Idwe kede Jonywal gi

¹Idwe, worunu jonywal wu i Rwot, pien manoni tie gikame opoore.

²“Wor papa ni kede toto ni” en kame obedo cik me agege kame Rubanga ocikere iye be,

³” tetekeny gi dedede bed ni kiber di iko romo bedo i wi lobo pi kare alac.”



⁴ Wun joapapi, kur iwangunu cuny idwe wu, do gwokunu gi kidongi kede iponeso abeco kede pwony ka Rwot.

Ipasoi kede Jodongo gi

⁵ Ipasoi, worunu jodongo wu me piny kan di itienu kede lworo, kede mielkom, kede cuny acel, bala kame iworunu kede Kirisito.

⁶ Kur itimunu kamano i kare kame jo tie neno wu kede kenekene be tetekeny iyomunu cuny gi, do bala ipasoi ka Kirisito timunu gikame Rubanga mito.

⁷ Timunu tic di cunyu tie iye bala itienu timo ne Rwot do likame ne jo,

⁸ di ingeunu be gi dedede kabeco kame ngatamoro timo, ebino da udo gikame cal kamanono kibun Rwot, bed bala etie epasoit arabo li.

⁹ Wuda jodongo, timunu kamanono ne ipasoi wu. Wekunu mino gi lworo di ingeunu be, wun dedede itienu kede Ngadwong acel kenekene i malo, ngat kame li kede apokapoka.

Angapito me Ngakirisito me Yi kede Gikarac

¹⁰ Me ajikini, bedunu di itekunu i Rwot, doko di itienu i teko me twer mere.

¹¹ Ngapunu angapito ka Rubanga me yi, tetekeny itwerunu cungo di itekunu pi yi kede Sitani i angalo mere me rieko.

¹² Pien wan likame otienu yi kede jo, do wan otienu yi kede jopug kede akarunikin mogo apat, kede tipere kame nataman pugo wi lobo kan i kare me colo noni, kede tipere me twer kareco kame pugo i wi yamo.

¹³ Pi mano, ngapunu angapito ka Rubanga me yi, tetekeny kame ceng arac otuno, ibinunu karuno yi kede ngakwor, di kame yi otiek, ikounu dong cungo di itekunu.

¹⁴ Pi mano, cungunu di itiekunu iikere, di itienu kede ateni bala rakoba me tweno pieru, kede di itienu kede poore bala ebuku me gano koru.

¹⁵ Bala amuka kame ingapunu i tienu, ngapunu gi dedede kame mitere me tuco ejiri kame kelo mulem.

¹⁶ Medo i wi magi dedede, bedunu kede yei bala ebuku kame mio wu itwerunu kweno emal kame Ngarac gweo.

¹⁷ Di ikounu mino alako bed bala ocoro atek kame gwoko wi wu, kede kop ka Rubanga di ko bedo epima kame Tipo mio.

¹⁸ Legunu i kare dedede bala kame Tipo telo wu kede i ilega kede kwac acelacel but Rubanga. Pi mano, bedunu di wangu bit di ikanyakinunu i ilega pi jokacil dedede.

¹⁹ Doko da kwaunu Rubanga pira, tetekeny kame atie yamo wek emia kop kame abino yamo, di ako mino jo ngei gikame omungere me ejiri di ali kede lworo moro.



²⁰Ejiri noni en kame ango abino pi timo tic mere, doko da en kame emio kotwea kede irikoi i otkol. Aso, kwaunu Rubanga tetekeny atuc ejiri noni kede nwangcuny bala kame apoore timo.

Amot me Ajikini

²¹ Tukiko, kame obedo omin wa me amara kame genere i tic ka Rwot, bino waco ne wu gi dedede tetekeny wuda ingeunu kop i koma kede i kom gikame atie timo.

²²Ango acwae butu pi kop noni, pi mino wu ngeno kite kame wan otie kede, doko pi dino cunyu.

²³Mulem kede amara karacel kede yei kame wok kikut Rubanga Papa, kede kikut Rwot wa Yesu Kirisito, bed but imiegu kede amiegu dedede i Kirisito.

²⁴Kisa ka Rubanga bed but jo dedede kame amara gi i kom Rwot wa Yesu Kirisito likame jik.



Jopilipi

Jopilipi 1

Amot

¹Baluwa kowok kibut Paulo kede Temeseo, jotic ka Kirisito Yesu. But jokacil dedede kame tie Pilipi, kame tie i Kirisito Yesu, karacel kede bisop kede dikonin.

²Kisa kede mulem kame wok kibut Rubanga Papa wa kede Rwot wa Yesu Kirisito bed butu.

Ilega ka Paulo ne Jo kame Somo Baluwa mere

³Ango apwoyo Rubanga na i kare dedede kame ayutuno wu kede,

⁴di alego kede yomcuny piru dedede nakanaka i ilega na acelacel,

⁵pi epone kame inywakunu keda timo tic me ejiri, cako i ceng me agege tuno nan.

⁶Doko ango angeo kiber be, ngat kogeo tic aber i diere wu bino mine ecobere i ceng me dwogo ka Yesu Kirisito.

⁷Etie gi opoore pi ango paro piru iepone noni, pien wun itienu i cunya, bala kame wun dedede inywakunu karacel keda kisa kame komia di nan ango atie mabus, kede i kare me jurao kede mino ejiri cungo di etek.

⁸Rubanga en mujura na kame ngeo be, ango aparo wun dedede kede amara ka Kirisito Yesu.

⁹Ango alego be, wek amara wu meede ameda kede dongo, di epong kede ngec kede niang atut,

¹⁰tetekeney ikarununu ngeno yero gikaber. Manono bino mino ibedunu jo kame li kede raco moro, kede abongo gimoro kame koromo bunano wu iye i ceng me dwogo ka Kirisito,

¹¹di kuo wu opong kede anyakini me kuo kopoore, kame wok kibut Yesu Kirisito, pi mino Rubanga deyo kede pi pake.

Bedo Kuo en Kirisito

¹²Imiegu kede amiegu na, ango amito ingeunu be, gikame otimere na ateteni okonyo pi sarakino ejiri.

¹³Manoni omio isirikalen kame daro paco me abaka kede jo apat ongeo be kotwea i mabus pi Kirisito.

¹⁴Omio imiegu kede amiegu atot obedo kede gen i kom Rwot pi kite kame otwea kede i otkol, di kitie kede nwangcuny adwong pi pwoyo kop ka Rubanga abongo lworu.

¹⁵Ateteni jo mogo pwoyo kop i kom Kirisito pien kitie kede nyeko kede lok, do apat mege pi cuny aber.



- ¹⁶Jo kame tatamo kop i kome kede cuny aber timo pi amara di kingeo be ango koketa kan pien ajurao ejiri;
- ¹⁷do jo apat timo pi mit gi kede pi cuny me apokapoka, do weko kede ateni, di kiparo pi medo na can di atie i otkol.
- ¹⁸Nan do nyo? Gikame pire tek en ine be, i yore moroni kenekene kotie tatamo kop i kom Kirisito bed bala me ecuke arabo me ateni; pi man ango alelo. Ebo, doko abino meede kede kilel,
- ¹⁹pien ango angeo be, pi ilega wu kede pi kony me Tipo ka Yesu Kirisito, man bino doko alako nango.
- ²⁰Ki mit kede gen na, likame lewic bino maka atwal, do nataman kede tekuncy adwong koma bino mino Kirisito wor bala lem nakanaka, akadi bed bala akuo amoto ato.
- ²¹Pien kibuta, bedo kuo en Kirisito, to en ameda.
- ²²Do ka bedo nango kuo i koma bino mino tic na nyai, likame angeo be ayer do mene.
- ²³Kope are gi dia twatwal. Mit nango tie be koto atoi di ako ot bedo kede Kirisito, pien mano ber kalamo.
- ²⁴Do ango dong di akuo i koma mitere twatwal piru.
- ²⁵Bala kame angeo kede kiber, ango angeo be abino dong kuo di ako meede kede wu dedede, pi wun meede anyim kede pi kilel i yei.
- ²⁶Mano bino mina anywako kede wu wakere i Kirisito Yesu ka adwogo bobo butu.
- ²⁷Kenekene miunu ekite me kuo wu bed bala kame ejiri ka Kirisito mito, tetekeny akadi ka ango abino pi neno wu arabo li, abino winyo kop i komu be icungunu di itekunu kede cuny acel, kede tam acel, di itienu cane karacel pi yei kame ejiri okelo,
- ²⁸doko di likame jokwor wu kelo ne wu lworu. Man tie gikame nyuto kakaler be gin kibino rwenyo, do wun ibinunu udo alako. Man Rubanga en kame bino timo.
- ²⁹Piento en etieko mino wu winyo pi kisa mere, likame winyo me yei Kirisito kenekene, do da me neno can pire,
- ³⁰ bala kame nataman itienu kede auta kame oudo inenunu doko nan iwinyunu be ango atie iye.

Jopilipi 2

Mwolere kede Dwongo ka Kirisito

- ¹Aso, ka tie supo cuny moro i Kirisito, ka tie kweno cuny moro kame yai ki amara, ka tie nywak moro i Tipo, ka tie cuny me isasir kede me kisa,
- ²mianu apong kede yomcuny pi wun bedo kede tam kame cacal, amara acel, kede winyere di itienu kede tam acel.



³Kur itimunu gimoro kede ewaka arabo kede cuny me woro, do bedunu kede cuny me mwolo, di ikounu tero bala jo apat beco kato wun.

⁴Wek kur ngat acelacel kibutu par pi mit mere kenekene, do epoore paro pi mit me jo apat da.

⁵Bedunu kede tam noni i diere wu bala kame Kirisito Yesu da oudo tie kede:

⁶Pien akadi di bin en etie Rubanga, do likame eko paro pi porere kede Rubanga.

⁷En emwolere, di eko bedo bala ngatic kame konywalo i cal me dano.

⁸Di do oudo etie i cal me dano, en emwolere di eko bedo kede wor tuno to, to mere i kom musalaba.

⁹Pi mano, Rubanga otinge malo twal di oko mine nying kame kato nying dedede.

¹⁰Man en omio cong dedede kame tie i malo kede i piny kede i dud lobo kukakino pi woro nying Yesu,

¹¹kede leb jo dedede tuco be Yesu Kirisito en Rwot, pi mino Rubanga Papa deyo.

Rieny bala Lero i Piny

¹²Pi mano, jo na kame amaro, bala kite kame lem iwinyanu kede nakanaka, nan da winyanu, likame i kare kame atie kede wu kenekene, do singo twatwal i kare kame nataman ali kede kibutu. Timunu tic kede lworu kede mielkom pi alako wu kenu;

¹³pien Rubanga tie tic kibutu, pi mino wu bedo tie kede mit kede teko me tic pi yomo cunye.

¹⁴Timunu gi dedede abongo ingungur arabo piem,

¹⁵tetekeny ibedunu abongo gimoro kame koromo bunano wu iye, kede abongo raco moro, idwe ka Rubanga kame li kede dub moro i dier lwak kotieko dubere kede kobilor, lwak kame wun irienyunu i dier gi bala acer kame rieny eko caro piny,

¹⁶di ilidenu i kop me kuo. Mano bino mino awakere i ceng me dwogo ka Kirisito be, likame aringo ringo me nono, arabo atimo tic me nono.

¹⁷Akadi bed bala ony remo na bala pwola i kom giamia kame koyalo pi yei wu, cunya yom, doko alelo kede wu dedede.

¹⁸Iepone acel nono wuda cunyu miero bed yom di ikounu lelo keda.

Temeseo kede Epaporodito

¹⁹Ango atie kede gen i Rwot Yesu pi cwano Temeseo butu oyotoyot, tetekeny kop kame awinyo i komu bin sup cunya.

²⁰Likame atie kede dano ace kame cal bala en, kame ateteni bino paro piru.

²¹Jo apat dedede paro pi mit gi kenekene do weko mit ka Yesu Kirisito.



- ²²Do wun ingeunu bero ka Temeseo, epone kame etimo keda tic me ejiri bala awobi kede papa mere.
- ²³Pi mano, ageno be abino cwane oyotoyot kame atieko neno gikame bino timere na;
- ²⁴doko atie kede gen i Rwot be ingei kare acecek ango da kikoma abino bino.
- ²⁵Ango atamo be ebedo gikaber pi ango cwano butu Epaporodito, ngat kame obedo omina, ngatic wad wa, sirikale wad wa, ngaor wu kede ngat kame okonya i peko na.
- ²⁶Pien wun imuenu, doko ebedo parere pien wun oudo iwinyunu be etuwo.
- ²⁷Ateteni oudo etuwo, doko ebuco to da. Do Rubanga oko bedo kede cuny me kisa bute, do likame but en kenekene do paka but ada, tetekeny kur abed kede cwercuny i wi cwercuny.
- ²⁸Cunya mito cwane butu kalamo, tetekeny ilelunu pi nene, bobo me wek cunya dwogi.
- ²⁹Aso gamenu i Rwot kede kilel wu lung; doko worunu akodi jo nogo,
- ³⁰piento en ebuco to pi tic ka Kirisito, di ecao kuo mere pi tieko timo na tic kame wun do oudo likame itwerunu timo na.

Jopilipi 3

Poore me Ateni

- ¹Kop me ajikini mere, imiegu kede amiegu na, lelunu i Rwot. Likame ango abino ool kede nyogao wandiko ne wu gikame oudo atieko wandiko, pien kibutu etie gikame bino konyo wu.
- ²Gwokerenu ki kom igwogin, gwokerenu ki kom jo kame timo gikarac, gwokerenu ki kom jo kame ngolo dul kom gi.
- ³Pien wan en kame oudunu kepere me ateni, wan jo kame oworo Rubanga i Tipo mere, jo kame bedo kede deyo i Kirisito Yesu di likame kiketo gen gi atek i gi me kom.
- ⁴Akadi da, ada kikoma atie kede tien kop kame mia aketo gen atek i gi me kom. Ka ngatamoro tamo be etie kede tien kop kame mie eketo gen mere atek i gi me kom, ango atie kede kame loe.
- ⁵Kokepa di oudo atie kede ceng kanyauni, ango abedo dano me Isirael, awok ki ateker ka Benjamin, ango abedo Ngaeburania anywali me Iburanian. I kom kop kame mako Iswil, ango abedo Ngaparisayo;
- ⁶i kom kop kame mako keto cuny, riki ango atidilo ekodet me jokirisito; i kom kop adok i kom bedo ngat kopooore pi lubo Iswil, ango ali kede raco moro.
- ⁷Do gi dedede kame oudo tie bero kibuta, nan atero do be kony gi li pi Kirisito.



⁸Ateteni atero be gi dedede kony gi li pi bero kame kalamo, en ngeno Kirisito Yesu Rwot na. Ango akei gi dedede pire, doko atero gi bala yugi, me wek aud Kirisito,

⁹di oko bino wuda di atie i en. Likame pwodi doko ango atie kede poore amaka kikoma, kame bino pi lubo Iswil, do atie kede maca kame yei Kirisito en kame kelo, en poore kame wok kibus Rubanga pi yei.

¹⁰Ango amito ngeno Kirisito kede twer me iyarun mere, di ako nywako kede en can mere, ako doko cal kede en i to mere,

¹¹me wek ka twerere, ada abin ayaruno kikom jo oto.

Ringo tuno i Tol

¹²Likame ayamo kaman be pien mane en gikame ango atieko udo, arabo be ango atieko tuno i tol, do ango atie cane pi ude eko doko mera, pien Kirisito Yesu otieko mina adoko mere.

¹³Imiegu kede amiegu na, likame ango atero be etieko do tuno i cinga, do gi acel kame ango atimo di ber wia owil kede gi kokato cen di ako catakino pi gi me anyim,

¹⁴en ine be, ango acane ringo i tol pi udo giamia me pwoc, kame obedo kuo me malo kame Rubanga lwongo wa iye i Kirisito Yesu.

¹⁵Wek obedunu kede tam kame cal kamanono wan jo kame otiekunu cato i cuny wa; do ka itienu kede tam apat kede man i gimoroni, Rubanga bino mino ingeunu manono da.

¹⁶Kenekene miero wan omokunu kitek i kom gikame otiekunu udo.

¹⁷ Imiegu kede amiegu na, lubunu ekite me kuo na. Cikunu wangu i kom jo kame lubo kuo kame wan onyuto ne wu.

¹⁸Pien jo atot, kame oudo ango atieko waco ne wu kop i kom gi, doko nan awaco ne wu kop i kom gi kede pige wanga, tie bedo bala jokwor me to ka Kirisito i kom musalaba.

¹⁹Gin ajikini gi en to, rubanga gi en yic, doko gin kitie kede yomcuny i gikame poore pi mino gi lewic. Gin tam gi tie i kom jame me piny.

²⁰Do tur wan tie i malo, kakame wan otie daro Ngalak pi wok kiye, en Rwot Yesu Kirisito.

²¹En ebino loko kom wa agoro gi di ko doko cal bala mere me deyo, di etio kede twer kame mie ekaruno keto jame dedede i loc mere.

Jopilipi 4

Acora

¹Pi mano, imiegu kede amiegu na kame amaro, doko kame omua, jo kame yomo cunya doko kame cal bala ocoro na me angosibib, cungunu di itekunu i Rwot kamanoni, wun jo na kame amaro.



- ²Ango akwao Eudia kede Sunutuke pi bedo kede tam acel i Rwot.
- ³Doko akwao ida ngatic ngawota me ateni, kony mon nogi, pien gin kicane karacel keda i tic me ejiri, karacel kede Kelementi kede jotic jowota apat dedede, gin jo kame nying gi tie i itabu me kuo.
- ⁴Lelunu i Rwot i kare lung. Amedo doko waco be lelunu.
- ⁵Wek jo dedede ngei mwolo wu. Rwot otieko doko iyapiyapi.
- ⁶Kur ibedunu kede par i kom gimoro, do i gi dedede miunu Rubanga ngei gikame imitunu i ilega kede i kwac, di imiunu pwoc.
- ⁷Di mulem ka Rubanga, kame kalamo niang dedede me dano, ko bino gwoko cunyu kede tam wu i Kirisito Yesu.
- ⁸Me ajikini mere, imiegu kede amiegu na, ketunu tam wu i gi dedede me ateni kame poore awora, i gi dedede kame opoore, i gi dedede kacil, i gi dedede kame jo maro, i gi dedede kame pirgi tek, i gi dedede kame ber adikinicel kede i gi dedede kame poore apaka.
- ⁹Timunu gikame isiaonu, kede kame igamunu, kede kame iwinyunu, kede kame inenunu kibuta, di Rubanga won mulem ko bino bedo kede wu.

Pwoc pi Giamia

- ¹⁰Ango alelo twatwal i Rwot, pien ingei kare alac nan igeunu doko paro pira; ateteni wun bo oudo iparunu pira, do kenekene oudo likame itienu kede kare me nyuto.
- ¹¹Likame ango atie ngunguro pi jame kame amito; pien ango atieko pwonyere pi mino gikame atie kede pi roma iepone me kuo dedede kame atie iye.
- ¹²Ango angeo bedo me can, doko angeo epone me bedo me abar. Ango atieko pwonyere i kom mung me bedo kede yengo amoto me bedo kede kec, me bedo kede gikame oboro amoto me bedo i can iesawa moroni kenekene kede i karamoroni kenekene.
- ¹³Ango akaruno timo gi dedede i Kirisito ngat kame mia adoko tek.
- ¹⁴Do wun itimunu gikaber pi nywako keda peko kame oudo dia.
- ¹⁵Doko wun Jopilipi ingeunu kenu be, i kare kame ango ageo tucio kede ejiri, di ayai ki Makedonia, likame tie jo mogo koyei Kirisito kame onywako keda timo tic me gin mino kede ango gamo, do kwanyo wun kenekene.
- ¹⁶Pien akadi di oudo ango atie i Tesalonika da, bin wun icwaunu na kony kalamo tien acel.
- ¹⁷Likame be pien tam nango tie i kom giamia, do ango atie mono gikame nyai pi kelo ne wu bero.



¹⁸ Ango atieko gamo cul na dedede kede kalamo. Ango atieko udo gikame oroma, pien Epaporodito omia giamia kame icwaunu na. En ebedo giamia kame ngwe kur, giayala kame Rubanga gamo, doko kame yomo cunye.

¹⁹ Rubanga na bino mino wu gi dedede kame imitunu di lubere kede abar mere me deyo kame tie i Kirisito Yesu.

²⁰ Deyo bed but Rubanga Papa wa ikar kede ikar. Amen.

Amot me Ajikini

²¹ Motanu jokacil dedede i Kirisito Yesu. Imiegu kede amiegu kame tie keda moto wu.

²² Jokacil dedede moto wu, twatwal mere jo me ot ka Kaisari.

²³ Kisa ka Rwot wa Yesu Kirisito bed kede cunyu.



Jokolosai

Jokolosai 1

Amot

¹Baluwa kowok kibut Paulo, ngat kame odoko ngaor ka Kirisito Yesu pi mit ka Rubanga, kede kibut omin wa Temeseo.

²But jokacil kede imiegu kede amiegu kame genere i Kirisito, kame tie Kolosai. Kisa kede mulem ka Rubanga Papa wa bed butu.

Ilega me Pwoc

³Wan opwoyo Rubanga papa me Rwot wa Yesu Kirisito nakanaka kame otie lego ne wu.

⁴Pien wan otieko winyo kop i kom yei kame itienu kede i Kirisito Yesu, kede amara kame itienu kede but jokacil dedede,

⁵pi gen kame kokano piru i malo. Wun oudo igeunu winyo kop i kom gen noni sek, i kop me ateni kame obedo ejiri

⁶kame otieko tuno butu. Ateteni kop noni tie nyako anyakini di enyai i piny lung; etie timere kamanono da i diere wu cako i ceng kame iwinyenu kede di ikounu niang i kom kisa ka Rubanga i ateni.

⁷Itiekunu ngeno kop noni kibut Epapura, ngat kame obedo ngatic wad wa kame omaro. En etie ngatic agenere ka Kirisito. En etie pi konyo wa.

⁸Doko en etieko mino wa ongeo amara kame itienu kede i Tipo.

⁹Pi mano, cako i ceng kame owinyo kede kop noni, likame oweko lego ne wu. Wan okwao be wek ipongunu kede ngec me gikame Rubanga mito pi rieko kede niang dedede kame Tipo mio.

¹⁰Man bino mino ibedunu kede kuo kopoore i nyim Rwot, kame yomo cunye atwal, di inyakunu anyakini i tice dedede kame beco kede di ngec wu i kom Rubanga meede.

¹¹Wek emi wu idokunu tek kede twer dedede, di lubere kede twer me deyo mere, tetekeny itwerunu kanyakino gi dedede di idiunu cunyu kede kilel,

¹²di imiunu pwoc but Rubanga Papa, ngat kame mio wa odoko jo apoore pi nywako gikame Rubanga oiko ne jo mege i ajakanut me lero.

¹³En etieko lako wa ki twer me colo di eko kobo wa i ajakanut ka Wode kame emaro,

¹⁴ ngat kame alako kede isasir wa ki dub wok kibute.

Kirisito kede Tic mere

¹⁵Kirisito en cal ka Rubanga ngat kalikame neeno, en kao me cwec dedede.



¹⁶Pien kocweo gi dedede i en, gikame tie i malo kede i wi lobo, gikame neeno kede kalikame neeno, kiton ajakanuto, amoto loc, tipere kame pugo, kede akarunikin, kocweo gi dedede di beo kibute, doko pire.

¹⁷En egeo bedo tie ne jame dedede, doko gi dedede ribere karacel i en.

¹⁸En kame ebedo wi ekodet me jo koyei en, kame obedo kome. En agege, en kao kikom jo oto, tetekeny en ebed ngat kame telo i gi dedede.

¹⁹Pien Rubanga i tie mere lung oudo mito bedo i en,

²⁰doko i en Rubanga oudo cunye yom pi dwoko jame dedede bobo inywak kede en, jame kame tie i wi lobo amoto i malo, di ekelo mulem pi remo me to ka Kirisito i kom musalaba.

²¹Wun bin jo koparao di itienu kede tam me gero, di itimunu tim areco,

²²do nan Rubanga otieko dwoko wu inywak kede en pi to me kom kame Kirisito oboe iye, tetekeny ekel wu i nyime di itienu jokacil kame li kede raco moro, abongo gimoro kame obunano wu iye i nyime.

²³Ipoorenu meede i yei, di icungunu di itekunu iye abongo yangere, abongo yai tenge ki gen kame wok ki ejiri kame wun itiekunu winyo, kame kotieko tuco ne giacwea dedede kame tie i piny. Ango Paulo atieko doko ngatic me ejiri noni.

Tic ka Paulo bala Ngatic me Ekodet me Jokirisito

²⁴Ango nan alelo pi can kame atie neno piru, doko can kame anga atie beo iye i koma ponga kakorem i can kame Kirisito oneno pi kome, kame obedo ekodet me jokirisito.

²⁵Ango adoko ngat kame tio ne ekodet noni di lubere kede tic kame Rubanga omia pi timo ne wu, pi mino kop ka Rubanga ngere atwal.

²⁶Manoni en mung kame oudo kokano pi kare alac, kede kibut lwak me kare atot, do nan etieko mino engere ne jo mege.

²⁷Rubanga oyei pi mino gi ngeno epone kame abar me deyo me mung noni pire dwong kede i dier jo kalikame Iyudayan. Manoni obedo Kirisito kame tie i wun, en gen me udo deyo.

²⁸Wan opwonyo kop i kome di okwenyaro ngat acelacel, doko di opwonyo jo dedede epone me rieko dedede, tetekeny okel ngat acelacel i nyim Rubanga di etieko cato i Kirisito.

²⁹Man en komio anga atio di acane kede teko dedede kame Kirisito mia

Jokolosai 2

¹Ango amito be ingeunu kite kame anga atie cane kede kitek piru kede pi jo kame tie Laodikia, kede da pi jo dedede kalikame pwodi oneno wanga.



²Atimo kaman pi mino gi tekcury, kede pi mino gi ribere karacel i amara di kiko bino udo abar dedede me niang kede ngec me gi komungere ka Rubanga, kame obedo Kirisito.

³Kokano abar dedede me rieko kede me ngec bute.

⁴Ango awaco man tetekeny kur ngatamoro ngalu kede kope me abe kame winyo mit.

⁵Pien akadi bed bala koma likame tie kede wu, do cunya tie kede wu, di alelo pi neno kite kame gi dedede tie kede i yore aber kibutu, kede kite kame yei wu ocungo kede di tek i Kirisito.

Bedo kede Kuo Kopong i Kirisito

⁶Pi mano, bala kite kame igamunu kede Rwot Kirisito Yesu, aso bedunu i en.

⁷Miunu aliasin me kuo wu donyi i en di ikounu gero kuo wu i kome, di icungunu di itekunu i yei wu bala kame oudo kopwonyo wu kede, di ipongunu kede pwoc.

⁸Kur imiunu ngatamoro bwonu kede tam me rieko kede kop me abe, kame lubere kede itok me dano kede me tipere kame pugo piny, tam kede kope kalikame wok kibut Kirisito.

⁹Pien Rubanga i tie mere lung bedo i en i cal me kom,

¹⁰doko wuda itienu kede kuo kopong i en. En elo apugan kede akarunikin dedede.

¹¹Bobo da i en bin kokepo wu kede akepo kalikame cing dano en kotimo, di igonyunu tenge kuo me kom, manono en kepere ka Kirisito.

¹² Pien di bin kobatiso wu, koyiko wu karacel kede Kirisito, di oko yaruno wu karacel kede en pi bedo kede yei i kom twer ka Rubanga, en ngat kame bin oyaruno en ki kom jo oto.

¹³ Wun jo kame bin itounu pi dub wu kede pien likame kokepo ringokomu, nan Rubanga omio wu kuo karacel kede Kirisito. Rubanga osasiro wa ki dub wa dedede,

¹⁴ en eweko banya kame wan oudo otie kede karacel kede iswilia kame make, en ejwango man tenge di eko gure i kom musalaba.

¹⁵En eturo twer me tipere kame pugo kede me weg i akarunikin, di eko mino gi kidoko gikame jo neno, di etelo gi i esirit bala mabus kame komako, pi en nyuto be elo.

¹⁶ Pi mano, kur imiunu ngatamoro ngol ne wu kop i kom cam amoto i kom giamata, akadi pi ceng adongo, arabo pi por duwe amoto Sabato.

¹⁷Magi dedede obedo bala cal kenekene me gikame oyaro bino; do Kirisito en cuny kop kikokome.

¹⁸Kur imiunu ngatamoro ngol kop loi wu, di ecerededo imwolere me ecuke kede woro imalaikan, di ecungo i gianyuta ka Rubanga. Akodi ngat nono wakere pi tam mere me dano adana abongo tien kop moro.



¹⁹ En likame emoko i kom Kirisito, ngat kame obedo wi kome. Kirisito mio kom lung pitere kibute, kom lung ribere karacel pi kariamo me cogere mege, kede pi amorito mege, di eko dongo iepone kame Rubanga mie edongo kede.

To kede Bedo Kuo kede Kirisito

²⁰ Ka itiekunu to karacel kede Kirisito ikounu gonyere kikom tipere kame pugo piny, pinyo komio pwodi doko itienu bedo bala jo me piny kan? Pinyo komio iyeunu lubo iswilia bala be,

²¹ ” Kur imaki, kur ibili, kur imuli” ?

²² Magi dedede mako jamini kame dubere kame kotio kede gi. Gin kibedo iswilia kede pwony ka dano adana.

²³ Ateteni magi neeno bala gi me riekko pi mino wu dire woro imalaikan tetek i mit wu kenu, pi mino wu cuko mwolere kede tidilo komu kenu, do gin likame kikonyo pi gengo mit me kom.

Jokolosai 3

¹ Bala kame kotieko yaruno wu karacel kede Kirisito, mounu do jamini me malo kakame Kirisito tie iye, di ebedo i bad tetu cam ka Rubanga.

² Ketunu tam wu i kom jamini me malo do weko i kom jamini kame tie i wi lobo.

³ Pien wun itiekunu to, nan do kuo wu okanere karacel kede Kirisito i Rubanga.

⁴ Ka Kirisito ngat kame obedo kuo wu bino neeno, wuda ibinunu neeno karacel kede en i deyo.

Kuo Kacon kede Kanyen

⁵ Pi mano, jikunu atwal mit me lobo kame itienu kede, bala caro, tim me emuna, bedo jomit, kede mit areco, kede eranga (gikame rom aroma kede mino cal jwogi wor).

⁶ Tim nogi omio lilo ka Rubanga tie bino i kom jo kalikame lubo kop mere.

⁷ Wuda bin ibedunu kede tim nogi i kare kame oudo pwodi itienu kede i kuo nono.

⁸ Do nan ketunu gigi dedede tenge: gero, lilo, cuny me nyeko, dubo nying jo kede kope areco kame wok ki dogu.

⁹ Kur ingalerenu kenu kenu, pien wun itiekunu gonyo kuo kacon kede tice mege,

¹⁰ di ikounu ngapo kuo kanyen, kame kotie mino doko nyen i ngec pi doko cal kede ngat kame ocwee.

¹¹ Pi mano, likame tie doko apokapoka moro i diere me Jogurik kede Iyudayan, jo kame kokepo kede kalikame kokepo, jogero kede wegi asonya, ipaso kede jo kogonyere; do Kirisito en gi dedede, doko etie i gi dedede.

¹² Aso, bala kame wun jo kame Rubanga oyeru, jokacil kame en emaro, bedunu kede cuny me isasir, mwolo, mwolere, bedo mot, kede dire.



¹³ Kanyakinunu kede dano acelacel, doko ka ngatamoro tie kede kop moro arac kede dano ocelu, ngat acelacel poore sasiro dano ocelu; bala kame Rwot osasiro wu kede, wuda ipoorenu sasiro jo icegun.

¹⁴Do akalamo magi dedede, bedunu kede amara. Amara en kame tweo gi dedede karacel di kiko bedo kiber.

¹⁵Miunu mulem ka Kirisito pug cunyu, mulem noni en kame bin kolwongo wu iye i kom acel, doko bedunu kede pwoc.

¹⁶Wekunu kop ka Kirisito pong i cunyu. Pwonyerenu di icorakinunu kenu kenu kede rieko me epone dedede. Werunu Sabuli kede were me ilega karacel kede were kame Tipio mio, di cunyu pwoyo Rubanga.

¹⁷Doko gi dedede kame itimunu, i kop amoto i tic, timunu i nying Rwot Yesu, di imiunu Rubanga Papa pwoc i en.

Epone me Bedo karacel i Kuo Kanyen

¹⁸ Mon, jalerenu i loc ka cuog wu, bala kame etie kede gikame opoore i Rwot.

¹⁹ Cuo, marunu mon wu, doko kur ibedunu ger kede gi.

²⁰ Idwe, winyunu jonywal wu i gi dedede, pien man yomo cuny Rwot.

²¹ Wun joapapi, kur iwanganu cuny idwe wu, man mio cuny gi kwanyere.

²² Ipasoi, winyunu joadongo wu me wi lobo kan, likame pi timo gikaber kame gin kitie neno wu, arabo pi yomo cuny gi, do timunu kede cunyu dedede di itienu kede lworu but Rwot.

²³Gi dedede kame itimunu, timunu gi kede cunyu dedede bala itienu tic ne Rwot do weko ne jo.

²⁴Ngeunu be Rwot bino mino wu bala giamia wu me pwoc winyo kame en ekano pi jo mege, pien wun itienu tic ne Rwot Yesu Kirisito.

²⁵ Ngat kame timo raco kobino cule da pi raco kame etimo, pien Rubanga likame tie kede apokapoka.

Jokolosai 4

¹ Wun wegi ipasoi, terunu ipasoi wu i yore aber, di ingeunu be wuda itienu kede Ngadwong wu i malo.

Acora

²Meedenu ilega nakanaka, di iketunu tam wu iye kede di imiunu pwoc.

³Doko legunu ne wada, me wek Rubanga yab ne wa ekeko me pwonyo kop mere, tetekeny otuc mung i kom Kirisito, gikame kotwea i otkol pire,

⁴di ako mine engere kiber bala kame apoore timo.



⁵ Timunu gi dedede i yore me rieko i nyim jo apat, di itunu kiber kede kare dedede kame iudunu.

⁶Wek kope wu bed mit nakanaka, bala gikame koketo iye munyo, tetekeye ingeunu epone kame ipoorenu dwoko kede kop ne ngat acelacel.

Amot me ajikini

⁷ Tukiko bino waco ne wu kope dedede i koma. En ebedo omin wa kame amaro, egenere i tic, doko en ngatic wad wa.

⁸Ango acwae butu pi kop noni, me wek ingeunu epone kame wan otie kede, kede da wek en emi wu nwangcuny.

⁹ Ango acwae kede Onesimo, omin wa me amara kame genere, kame obedo dano acel kikom wu. Gin kibino waco ne wu gi dedede kame otimere kan.

¹⁰ Arisitaku ngat kame tie keda i otkol moto wu, kede Marako ocen ka Baranaba (ngat kame kotieko waco ne wu kop i kome, ka ebino butu gamenu),

¹¹karacel kede Yesu kame kolwongo be Yusito da omoto wu. Magi kenekene en jo kame kokepo kikom jotic jowota, gin jo kame otimo kede gi tic me Ajakanut ka Rubanga. Gin kibedo kweno cunya.

¹² Eapura, ngat kame obedo dano acel kikom wu, ngatic ka Kirisito Yesu moto wu. En eyutuno wu nakanaka i ilega mere, me wek ibedunu kede yei kocato kede di gen wu likame kwanyere ki kom gikame Rubanga mito.

¹³Ango ajurao en be, en etimo ne wu tic atek kede ne jo kame tie Laodikia kede Kerapoli.

¹⁴ Luka, emuron kame jo maro, kede Dema omoto wu.

¹⁵Motanu imiegu kede amiegu kame tie Laodikia, kede motanu Nampa kede jokirisito me ode dedede.

¹⁶Kame kotieko somo ne wu baluwa noni, nenunu be kosome ne ekodet me jokirisito kame tie Laodikia da; doko nenunu be isomunu baluwa kowok ki Laodikia da.

¹⁷ Wacenu Arakipu be miero enen be ecobo tic kame etieko gamo i Rwot.

¹⁸Ango Paulo, awandiko amot noni kede cinga kikoma. Yutununu be ango pwodi atie i otkol. Kisa ka Rubanga bed kede wu.



1 Jotesalonika

1 Jotesalonika 1

Amot

¹ Baluwa kowok kibut Paulo, Sila kede Temeseo. But jokirisito kame tie Tesalonika, jo kame tie i Rubanga Papa kede i Rwot Yesu Kirisito. Kisa kede mulem ka Rubanga bed butu.

Kuo kede Yei me Jotesalonika

² Wan nakanaka opwoyo Rubanga piru dedede, di olwongo nying wu nakanaka kame otie ilega.

³ Doko i nyim Rubanga ngat kame obedo Papa wa, wan oyutuno tice wu me yei, kede cane wu me amara, kede asipakin me gen wu i Rwot wa Yesu Kirisito.

⁴ Imiegu kede amiegu na kame Rubanga maro, wan ongeon be en eyero wu,

⁵ pien ejiri wan likame obino butu i kop kenekene, do ebino da kede twer, kede Tipo Kacil, doko di eko donyo i cunyu atwal. Wun ingeunu epone me kuo kame wan oudo otie kede i kare kame oudo otie kede wu, manoni oudo tie pi kelo ne wu bero.

⁶ Wun ikounu doko jo kame lubo ekite wa kede me ka Rwot, pien igamunu kop mere kede kilel kame Tipo Kacil omio wu, bed bala inenunu can iye.

⁷ Man omio ikounu doko anyut aber ne jo dedede kame tie Makedonia kede Akaya, jo kame oyei Kirisito.

⁸ Pien likame itiekunu tuco kop ka Rwot Makedonia kede Akaya kenekene, do yei wu da i kom Rubanga otieko sarakin kadedere dedede. Pi mano, likame bobo tie gimoro kame wan opoore waco.

⁹ Pien gin ikom gi kiwaco kop i kom epone kame igamunu wa kede, kede epone kame ilokerenu kede but Rubanga di ikounu weko woro cal jwogi, pi tic ne Rubanga kakuo kede me ateni,

¹⁰ kede pi daro bino ka Wode ki malo, kame bin en eyaruno kikom jo oto, en Yesu, ngat kame lako wa ki lilo kame tie bino.

1 Jotesalonika 2

Tic ka Paulo i Tesalonika

¹ Imiegu kede amiegu na, wuda kikomu ingeunu be, bino wan pi welao wu likame obedo gi me nono.

² Do bed bala oudo oneno can di kotimo ne wa tim me lewic i Pilipi, bala kame wuda ingeunu, wan oko bedo kede nwangcuny i Rubanga wa pi tuco ne wu ejiri mere, bed bala piem adwong oudo tie.

³ Pien kwac wa likame owok ki angalo amoto ki tam areco arabo ki ngolo riekoo.



- ⁴Do bala kame Rubanga opwoyo kede pi keto ejiri i cing wa, pi manono likame wan oyamo pi yomo cuny dano, do pi yomo cuny Rubanga, ngat kame tamo cuny wa.
- ⁵Pien bala kame wuda ingeunu kede, wan likame obino butu kede kope kame winyo mit, amoto kame umo eranga wa, Rubanga en mujura wa.
- ⁶Doko wan oudo likame omoo bero kikut jo, arabo kikutu amoto kikut jo ace,
- ⁷bed bala wan oudo opoore penyoo jame mogo kikutu bala joor ka Kirisito. Do wan oudo obedo kede mwolo i diere wu bala dako kame tie gwoko idwe mege.
- ⁸Aso, kite kame wan oparo kede piru, omio oudo oikere pi nywako kede wu, likame ejiri ka Rubanga kenekene, do kiton kuo wa da, pien oudo idokunu lit ne wa adikinicel.
- ⁹Imiegu kede amiegu na, yutununu tic kame wan otimo, kede cane wa. Wan oudo otio iwor kede iceng me wek kur odii ngatamoro kikom wu kede peko i kare kame otie tuc ne wu kede ejiri ka Rubanga.
- ¹⁰Wun karacel kede Rubanga da ibedunu ijurak wan, i kom epone kame tim wa oudo obedo kede gikacil, kopooore, kede abongo raco moro i nyimun jo koyei Kirisito.
- ¹¹Pien wun ingeunu be wan oudo otero wu bala papa kede idwe mege.
- ¹²Wan oudo obako dog wa ne ngat acelacel kikutu, omio wu nwangcuny kede owaco ne wu lubo epone me kuo kame poore i nyim Rubanga, ngat kame lwongo wu i Ajakanut kede i deyo mere.
- ¹³Doko da wan opwoyo Rubanga nakanaka, pien bin di wan otuno kede kop ka Rubanga butu, wun iwinyenu di ikounu game, likame bala kop ka dano, do bala kop ka Rubanga, bala kame en etie kede ateteni. Doko da kop nono tie tic kikutun jo kame iyeunu Kirisito.
- ¹⁴ Imiegu kede amiegu na, wun idokunu jo kame lubo epone me kuo me ekodet me jo ka Rubanga, jo koyei Kirisito Yesu i Yudea, pien wuda inenunu can kikut jo me pinyu pi gi acel nono, bala kame gida kineno kede can kikut Iyudayan,
- ¹⁵ jo kame bin oneko Rwot Yesu karacel kede inabin, di kiko riamo wada. Gin kiwango cuny Rubanga, doko kidingere kede jo dedede,
- ¹⁶pien kitie gengo wa tuc ejiri ne jo kalikame Iyudayan, gikame romo mino gi kiudo alako. Man omio gi kimeddo rom me dub gi ameda. Do nan lilo ka Rubanga otieko do tuno i kom gi.

Mit ka Paulo pi medo Welao Jotesalonika

- ¹⁷Imiegu kede amiegu na, kakame bin kopoko wa kede wu pi kare moro acecek i kom wa do weko i cuny wa, di wan oko doko bala idwe kic, wan oko tamo kitek kede mit adwong pi neno wu wang i wang.
- ¹⁸Wan oudo omio bino butu, do Sitani oko totolo wa. Ango Paulo atamakino tien atot.



¹⁹Pien nyo kara kame obedo gen wa, amoto kilel wa, arabo ocoro wa me angosibib kame obino wakere iye i nyim Rwot Yesu i ceng me dwogo mere? Mam wun igonogo?

²⁰Ateteni wun ibedunu deyo kede kilel wan.

1 Jotesalonika 3

¹ Pi mano, kakame wan oneno kede be, likame bobo wan oromo meede kanyakino, wan oko do yei dong Asene kenwa,

²di oko cwano ne wu Temeseo, ngat kame obedo omin wa kede ngatic ka Rubanga i tuco ejiri ka Kirisito, pi mino wu teko kede nwangcuny i yei wu,

³tetekeny ngatamoro kur yei mere dok cen pi itidil nogi. Wuda kikomu ingeunu be wan miero obeunu iye itidil nogi.

⁴Pien i kare kame bin otie kede wu, wan oudo owaco ne wu sek be kobino tidilo wa, manoni oko timere da bala kame wuda ingeunu kede.

⁵Pi mano, kakame aneno kede be likame doko oudo aromo kanyakino, ako cwano dano butu tetekeny aud niang i kom yei wu, pien oudo atie kede lworu be cengemogo Sitani otamo wu di eko mino tic wa obedo me nono.

⁶ Do Temeseo nan otieko dwogo but wan kan, en ekelo ne wa kop amit kame mako yei kede amara wu. Doko en eko niango wa be wun nakanaka iyutununu wa kede yomcuny, di itienyu kede imue me neno wa, bala kame wada otie kede imue me neno wu.

⁷Imiegu kede amiegu na, man en komio i peko kede i can dedede kame wan oboe iye, otie kede kweicuny pi yei wu;

⁸pien nan wan okuo ka wun imeedenu cungo di itekunu i Rwot.

⁹Pwoc nyo kame wan nan okaruno mino Rubanga piru, pi kilel dedede kame wan otie kede i nyim Rubanga piru?

¹⁰Iwor kede iceng wan olego kede cuny wa dedede be amoto onen wu wang i wang di oko mino wu gikame orem i yei wu.

¹¹Akwao Rubanga Papa wa en i kome, kede Rwot wa Yesu, pi iiko ne wa epone me bino butu.

¹²Doko akwao Rwot mi amara wu meede i diere wu kenu kenu, kede but jo dedede, bala kame wan omaro wu kede.

¹³Doko akwao da be, emi wu tekuny i kom kop kame mako bedo jokacil, di ikounu bedo abongo raco moro i nyim Rubanga Papa wa i kare me dwogo ka Rwot wa Yesu kede jokacil mege dedede.

1 Jotesalonika 4



Kuo kame Yomo Cuny Rubanga

- ¹Me ajikini mere, imiegu kede amiegu na, wan okwao wu, doko obako dog wa butu i Rwot Yesu be, bala kame isiaonu kede kibus wan epone kame ipoorenu bedo kede di iyomunu cuny Rubanga, bala kame nan itienu timo, meedenu ameda timo kamanono.
- ²Pien wun ingeunu cik kame wan omio wu i akarunikin ka Rwot Yesu.
- ³Pien gikame Rubanga mito, gikame obedo lonyere wu gin ige be: wekunu caro,
- ⁴ngat acelacel kikom wu ngei gwoko kome kene iepone kacil kede i yore me wor,
- ⁵likame kede mit arac me kom bala kame atekerin kalikame ngeo Rubanga timo.
- ⁶I kop noni, likame poore dano moro ngangalo arabo timo ne ngakirisito ngawote raco, pien Rwot culo kwor i gigi dedede, bala kame wan oudo otieko waco ne wu kede di okwenyaro wu kitek.
- ⁷Likame Rubanga olwongo wa pi bedo kede tim me caro, do pi bedo jokacil.
- ⁸Pi mano, ngat kame dagi kop noni udo likame edagi akarunikin me dano, do udo edagi Rubanga ngat kame mio Tipo Kacil mere butu.
- ⁹Aso, i kom kop kame mako maro imiegu kede amiegu wu, kony me wandiko ne wu kop iye likame tie, pien wun kikomu Rubanga otieko pwnyo wu pi marere kenu kenu.
- ¹⁰Pien i ateni, wun imarunu imiegu kede amiegu dedede kame tie Makedonia lung. Do wan obako dog wa butu, jo wa kame omaro, pi meede ameda timo kamanono.
- ¹¹Tamakinunu bedo mot, ngat acelacel par pi tic kame make, di itimunu tic kede cingu bala kame wan oudo ociko wu kede.
- ¹²Man bino mino iudunu wor kibus jo kalikame tie i ekodet me jokirisito, di ikounu bino cungo kenu abongo mono kony kibus ngatamoro.

Dwogo ka Rwot

- ¹³Imiegu kede amiegu na, likame omito be ibedunu abongo ngec i kom jo kame otieko nino, tetekenye kur ibedunu kede cweracuny bala jo ace kame li kede gen.
- ¹⁴Pien bala kame wan oyei kede be Yesu oto di doko eko yaruno, kamanono da pi Yesu, Rubanga bino kelo karacel kede en jo kame onino.
- ¹⁵ Pi mano, wan owaco ne wu kop kame Rwot owaco be, wan jo kame nan okuounu, ka odongunu kuo paka tuno i dwogo ka Rwot, likame obinunu telo yongayo ne jo kame nan otieko nino.
- ¹⁶Pien Rwot kikome oyaro bino piny yai ki malo kede redo me akarunikin, kede lwongo me malaika adwong, kede koko me agwara ka Rubanga. Di do jo oto i Kirisito en kame ko bino cako yaruno;
- ¹⁷di oko bino gwaro wanunu jo kame odongunu di okuounu karacel kede gin i idoun pi riamo kede Rwot i dier yamo; di okounu bino bedo kede Rwot nakanaka.



¹⁸Pi mano, diunu cuny ngat acelacel kede kope nogi.

1 Jotesalonika 5

likerenu pi Dwogo ka Rwot

¹Imiegu kede amiegu na, kony likame tie me wandiko ne wu kop kame mako ceng kede kare kame gigi bino timere iye,

²pien wuda ingeunu kiber be ceng me dwogo ka Rwot oyaro ngoole bala ngakuwo kame bino iwor.

³I kare kame jo waco kede be, “Mulem tie, piny okwei,” en kame peko ngoole ne gi kede bala aramo me nywal, di likame tie dano kame ko bino bwot kiye.

⁴Imiegu kede amiegu na, wun likame itienu i colo, me wek ceng nono bin ngoole ne wu angola bala ngakuwo.

⁵Pien wun dedede ibedunu idwe me lero kede idwe me iceng; wan likame idwe me iwor amoto me colo.

⁶Pi mano, wan kur oninunu bala kame jo apat timo, do obedunu di oneenunu, kede di wi wa riek.

⁷Pien jo kame nino, gin kinino iwor, kede jo kame mer da, gida kimer iwor.

⁸Do bala kame wan otienu idwe me iceng, poore obedunu di wi wa riek, di okounu ngapo yei kede amara pi bedo bala ebuku kame gwoko kor wa, kede okounu ngapo gen me alako pi bedo bala ocoro atek kame gwoko wi wa.

⁹Do likame Rubanga oiko be lilo mere poti i kom wan, do eiko pi wan udo alako pi Rwot wa Yesu Kirisito,

¹⁰en ngat kame oto pirwa, tetekeny akadi di oneenunu amoto oninunu, wek obedunu karacel kede en.

¹¹Pi mano, diunu cuny ngat acelacel, doko gerunu kuo me cunyu kenu kenu bala kame nan itienu timo.

Acora kede Amot me Ajikini

¹²Wan obako dog wa butu, imiegu kede amiegu, pi bedo kede wor but jo kame tie timo tic i diere wu, di kitelo wu i Rwot kede di kicoro wu.

¹³Miunu gi wor amalo twatwal kede amara pi tic kame gin kitie timo. Bedunu kede mulem i diere wu.

¹⁴Doko wan okwao wu, imiegu kede amiegu, corakinunu jo kame bedo abeda, dwokunu cuny jo kame cuny gi odoko nyap, konyunu jo agoro, bedunu kede dire i kom gin dedede.

¹⁵Nenunu be likame ngatamoro kibutu oculo raco kede raco, do tamakinunu timo bero i kare lung, ngat acelacel ne ngawote kede ne jo dedede.



- ¹⁶Lelunu nakanaka.
- ¹⁷Legunu i kare dedede,
- ¹⁸pwounu Rubanga i gi dedede, pien manoni en gikame Rubanga mito ne wu i Kirisito Yesu.
- ¹⁹Kur igengunu tice me Tipo Kacil.
- ²⁰Kur icaunu kope me inabin,
- ²¹do pimunu kope nogo dedede; mokunu i kom gikaber,
- ²²wekunu epone dedede me gikareco.
- ²³Ango akwao Rubanga won mulem, en kikome elony wu atwal atwala; egwok tipo wu kede cunyu kede komu kiber, di ikounu bino bedo abongo kop moro kame kobunano wu iye i ceng me dwogo ka Rwot wa Yesu Kirisito.
- ²⁴Ngat kolwongo wu bino timo manoni, piento en egenere.
- ²⁵Imiegu kede amiegu na, legunu pirwa.
- ²⁶Motunu imiegu kede amiegu dedede kede amot me notere kacil.
- ²⁷Ango aciko wu kitek i nying Rwot be, somunu baluwa noni ne imiegu kede amiegu dedede.
- ²⁸Kisa ka Rwot wa Yesu Kirisito bed butu.



2 Jotesalonika

2 Jotesalonika 1

Amot

¹Baluwa kowok kibut Paulo, Sila kede Temeseo. But ekodet me jokirisito i Tesalonika, jo kame tie i Rubanga Papa wa kede i Rwot Yesu Kirisito.

²Kisa kede mulem kame wok kibut Rubanga Papa kede Rwot Yesu Kirisito bed butu.

Ngolo Kop i Ceng me Dwogo ka Kirisito

³Imiegu kede amiegu na, wan miero opwoi Rubanga nakanaka piru bala kame poore, pien yei wu tie dongo, doko amara kame ngat acelacel kibutu tie kede pi jo icegun da tie meede.

⁴Pi mano, wan ikom wa owakere piru i dier ikodeta me jo koyei Rubanga, pi kite kame icungunu kede kitek, kede pi bedo kede yei i kare me itidil wu dedede, kede pi can dedede kame nan itienu kanyakino.

⁵Man nyuto be Rubanga ngolo kop i yore me ateni, me wek mi wu idokunu jo kame poore pi Ajakanut mere, kame nataman itienu neno can pire.

⁶Pien kibut Rubanga, etie gikame opoore pi culo jo kame mio wu neno can kede mino gida can,

⁷kede pi mino wu wei karacel kede wan, wun jo kame nan kotie mino wu neno can. En ebino timo man i kare kame Rwot Yesu bino neeno kede di ewok ki malo karacel kede imalaikan mege wegi twer.

⁸En ebino bino di etie i dier mac kame liel, di eko bino culo kwor i kom jo kalikame ngeo Rubanga kede jo kame dagi lubo ejiri ka Rwot wa Yesu.

⁹Gin kibino neno can me alola me to me nakanaka, di koriamo gi tenge ki nyim Rwot kede ki deyo me twer mere.

¹⁰Man bino timere i Ceng kame en ebino bino kede pi jo mege mine deyo, kede pi jo dedede kame yei en ure i Ceng nono; pien wun iyeunu ijura kame bin wan omio.

¹¹Manono en komio wan olego ne wu nakanaka, be wek Rubanga wa kede twer mere, emi wu ibedunu jo kame poore pi lwongo mere, di en eko cobo mit wu dedede me tic aber kede da gikame i timunu pi yei wu.

¹²Mano bino mino nying Rwot wa Yesu Kirisito udo deyo kibutu, di wuda ikounu udo deyo kibute, di lubere kede kisa ka Rubanga wa kede me ka Rwot Yesu Kirisito.

2 Jotesalonika 2

Ngarac

¹I kom kop kame mako dwogo ka Rwot wa Yesu Kirisito kede cokere wa karacel bute, wan obako dog wa butu, imiegu kede amiegu,



²kur imiunu tam wu totalun arabo igeunu bedo kede lworu pi kop kame jo waco. Gin cengemogo kiwaco be kiwinyo kop nono kibut Tipo Kacil, kibut ngatamoro, arabo be kisome ki baluwa moro kame kotero be wan en kowandiko, kame waco be Ceng me dwogo ka Rwot otieko tuno.

³Kur ngatamoro ngalu iepone moroni; pien Ceng nono likame bino tuno, tuno kede kame jo ojemo ne Rubanga, di Ngarac ko neeno, ngat kame kotieko iiko ne pi rwenyo atwal.

⁴En ebino piem kede gi dedede kame kotero be rubanga arabo gimoro dedede kame koworo, tetekeny en eko bino bedo i tempulo ka Rubanga, di eko waco be en ebedo Rubanga.

⁵Mam iyutununu be bin awaco ne wu kope nogi di oudo pwodi atie kede wu?

⁶Doko da wun ingeunu gikame nan tie genge, tetekeny ebin eneeno kame kare mere oromo.

⁷Pien gikomungere ka Ngarac nan do tie tic, do ngat kame nan genge oyaro meede kede genge tuno i kare kame kobino kwanyo kede ngat nono,

⁸di do oko bino nyuto Ngarac. Do ka Rwot Yesu obino, en ebino neke kede wei kame wok ki doge, di eko tieke kede nyutere me bino mere.

⁹Bino me Ngarac bino nyutere i tice ka Sitani, ngat kame bino tic kede epone me twer dedede, kede gianena kede gi me isuur me angalo.

¹⁰Doko ebino tic kede angalo arac but jo kame tie rwenyo atwal, pien gin kidagi maro kop me ateni kame oudo koto lako gi.

¹¹Pi mano, Rubanga bino cwano ne gi twer kame bilaro gi di ko mino gi kiyei kop me abe,

¹²me wek ngol kop loi jo dedede kalikame oyei kop me ateni, do di cuny gi oko bedo yom i gikarac.

Koyero Wu pi Udo Alako

¹³Imiegu kede amiegu na kame Rwot maro, wan miero opwoi Rubanga nakanaka piru, pien Rubanga oyero wu cako i agege pi bedo jo kolakere pi lonyere kame Tipo Kacil mio wu, kede pi bedo kede yei i kom kop me ateni.

¹⁴En elwongo wu i ejiri kame wan otuco pi kop noni, tetekeny iudunu deyo ka Rwot wa Yesu Kirisito.

¹⁵Pi mano, imiegu kede amiegu na, cungunu di itekunu, ikounu rikito kope kame wan opwonyo wu, arabo kede dog wa amoto kede baluwa.

¹⁶Wek Rwot wa Yesu Kirisito kikome, kede Rubanga Papa wa, ngat kame omaro wa di eko mino wa kweicuny kame bedo nakanaka kede gen aber pi kisa mere,

¹⁷ekwei cunyu di eko mino wu idokunu tek i tice kede i kope dedede kame beco.



2 Jotesalonika 3

Legunu ne Wa

¹Me ajikini mere, imiegu kede amiegu na, legunu ne wa, tetekeny kop ka Rwot meede sarakin oyotoyot, di jo ko game kede wor bala kame etie timere kede i diere wu.

²Doko da kwaunu emi wa obwotunu kibun jo kame reco, jo kame ekite gi odubere; pien likame jo dedede tie kede yei.

³Do Rwot genere, en ebino mino cunyu teko di eko gwoko wu kibun Ngarac.

⁴Doko wan otie kede gen atek butu i Rwot be, wun itienu timo gikame wan ociko ne wu, doko ibinunu meede timo gi.

⁵Okwao Rwot eseikino cunyu maro Rubanga kede emi wu isipakinunu i Kirisito.

Miero di Otimunu Tic

⁶Imiegu kede amiegu na, wan nan ociko wu i nying Rwot wa Yesu Kirisito be, wekunu bedo kede omin wu arabo amin wu moro kame bedo abeda abongo timo tic, di likame elubo epone me kuo kame wan opwonyo wu iye.

⁷Pien wuda kikomu ingeunu epone kame ipoorenu lubo kede ekite me kuo wan; wan oudo likame obedo abeda abongo timo tic di bin otie kede wu.

⁸Wan likame ocamo cam ka ngatamoro abongo culo, do ocane tic kede teko iwor kede iceng, tetekeny kur omi peko dino ngatamoro kibutu.

⁹Likame man otimere be pien wan oli kede twero no, do pi mino wu anyut i kuo wan kame ipoorenu lubo.

¹⁰Pien akadi i kare kame wan oudo otie kede wu da, bin wan omio wu cik kame waco be, "Kame ngatamoro dagi timo tic, miero kur ecami."

¹¹Pien wan nan owinyo be jo mogo kikom wu tie bedo abeda, gin jo kame totolo tice me jo apat abongo gin timo tic moro.

¹²Aso, wan ociko akodi jo nogo, doko okwao cunyu gi i Rwot Yesu Kirisito be, wek gin kitim tice gi mot di kiko twero pitere ken gi.

¹³Imiegu kede amiegu na, kur iolunu kede timo gikaber.

¹⁴Ka ngatamoro odagi lubo gikame wan owaco i baluwa noni, niangunu i kome kiber. Kur iriberenu kede tetekeny lewic make.

¹⁵Kur iterenu bala ngakwor, do kwenyarunu en bala omin wu arabo amin wu.

Kope me Ajikini

¹⁶Akwao Rwot won mulem, en kikome emi wu mulem i kare lung kede da i yore lung. Rwot bed kede wu dedede.

¹⁷Ango Paulo, awandiko amot noni kede cinga kikoma. Manoni en epone kame ango aketo kede cinga i baluwan nango dedede; ango awandiko iepone noni.



¹⁸Kisa ka Rwot wa Yesu Kirisito bed butu dedede.



1 Temeseo

1 Temeseo 1

Amot

¹Baluwa kowok kibut Paulo, ngat kame odoko ngaor ka Kirisito Yesu pi akarunikin ka Rubanga Ngalak wa, kede me ka Kirisito Yesu ngat kame obedo gen wa.

²But Temeseo atin na me ateteni i yei. Akwao be wek kisa, mwolo, kede mulem ka Rubanga Papa kede me ka Kirisito Yesu Rwot wa bed buti.

Ikwenyar i kom Pwony me Angalo

³Bala kame oudo akwai kede i kare kame oudo atie ot kede Makedonia, nan doko atie kwani be, in dongi Epeso, me wek igeng jo mogo kame tie pwonyo pwony mogo kame pat i kuno.

⁴Doko wac ne gi kiwek dubo kare gi i itatam, kede wapo nying joakwari, gikame kelo piem; mage likame dongo tic ka Rubanga, gikame cungo i yei.

⁵Gikame omio wan ociko gi kamano en amara kame wok ki cuny acil, kede ngec aber me cuny, kede yei me ateni.

⁶Jo mogo otieko apaar tenge ki gi nogi di kiko atarasar donyo yamo kope kame kony gi li.

⁷Gin kimito bedo jopwony me iswil ka Rubanga, di likame kiniang akadi gikame kitie yamo, arabo gikame gin kimoko be me ateni.

⁸Wan ongeunu be iswil ber ka ngatamoro otio kede iepone kame mitere.

⁹Man kelo niang be, likame koketo iswil pi jo abeco, do pi jo kame turo iswil kede pi jo kame dagi winyo kop, pi jo kalikame woro Rubanga kede pi jodubo, pi jo kame li kede cuny me edini kede jo kame cao Rubanga, pi jo kame neko papi gi kede jo kame neko toti gi, pi jonek,

¹⁰pi jocar, pi cuo kame buto kede cuo wad gi, pi jo kame mako jo di kiko cato, pi joangalo, pi jo kame kwongo atatai, pi jo kame mio ijura me angalo kede gi dedede ace kalikame upere kede pwony me ateni.

¹¹Pwony me ateni nono upere kede ejiri me deyo, en ejiri kame Rubanga kame koworo ogena kede.

Pwoc pi Cuny me Kisa ka Rubanga

¹²Ango apwoyo Kirisito Yesu Rwot wa, ngat komia teko me timo tic noni, piento en eneno be anga agenere di eko yera timo tic mere,

¹³akadi bed bala oudo anga ber kong acae, atidilo en, kede abedo kede gero i kome. Do Rubanga oko tima kisa pien oudo anga likame ayei, omio oudo atie timo gikame akwia.



- ¹⁴Rwot wa di oko mina twon kisa mere karacel kede yei kede amara kame tie i Kirisito Yesu.
- ¹⁵Man kop me ateni, kame poore agama di iko yei, be Kirisito Yesu obino i piny pi lako jodubo. Ango en kame abedo ngadubo kalamo gin dedede,
- ¹⁶do Rubanga oko tima kisa tetekeny kibus angot kame adubo kalamo, wek Kirisito Yesu nyut dire mere adwong, pi mino angot bedo anyut ne jo kame bino yei en di kiko udo kuo kame bedo nakanaka.
- ¹⁷Wor kede deyo bed but Abaka kame pugo nakanaka, kalikame to, kalikame neeno, en Rubanga acel kenekene, ikar kede ikar. Amen.
- ¹⁸Temeseo atin na, angot atie mini cik noni, di lubere kede kope kame komurao i komi, tetekeny kimii itwer yi kiber,
- ¹⁹di itie kede yei kede ngec aber me cuny. Jo mogo pi dago lubo ngec me cuny gi, omio kiko reto yei gi.
- ²⁰Mogo kikom gi obedo Kumenayo kede Alekesanda, jo kame angot atieko jalo i cing Sitani, tetekeny manono pwony gi kiwek bedo kede acae but Rubanga.

1 Temeseo 2

Pwony kame mako Ilega

- ¹Aso me agege mere, angot akwao be kwac, ilega, ngangao Rubanga pi jo icegun, kede mino pwoc, poore tim pi jo dedede;
- ²pi abakai kede jo dedede kame tie i ruom amalo, tetekeny obedunu kede kuo me anapakin kede me mulem, di oworunu Rubanga kede di otienu kede tim abeco i yore dedede.
- ³Man tie gikaber, kame yomo cuny Rubanga Ngalak wa,
- ⁴ngat kame mito ne jo dedede udo alako, di kiko udo ngec i kom ateni.
- ⁵Pien Rubanga tie acel, doko ngat kame rucakino Rubanga kede jo da tie acel, dano nono en Kirisito Yesu,
- ⁶ngat kame bin ojalo kuo mere pi lako jo dedede. Manoni oudo obedo gikame moko kop, kame komio i kare kopoore.
- ⁷Kop noni en komio oudo koyera pi bedo ngatuc ejiri kede ngaor, ngapwony me jo kalikame Iyudayan i yei kede i ateni (angot atie yamo kop me ateni, likame atie ngalo).
- ⁸Ango amito be, i kabedere dedede, cuo poore lego di kikiarao cing gi kacil malo, abongo cuny me gero arabo piem.
- ⁹Doko mon da poore ngapere iepone kame ber, kibus, kede engape kopoore. Likame kipoore kedo yer wi gi arabo ngapo mwola me saabu, arabo bira amoto engape me wel,



¹⁰do kibed kede tice kabeco bala kame poore kede ne mon kame waco be gin kiworo Rubanga.

¹¹Dako miero pwoyere eliling di emwolere.

¹²Ango likame ayei ne dako moro pwoyo arabo bedo kede akarunikin i kom cuo; dako miero ling titi.

¹³Pien Adamu en kame bin kogeo cweno, di do oko cweno Keba;

¹⁴doko likame bin kongalo Adamu, do kongalo dako, di en eko turo iswil.

¹⁵Do dako bino udo alako pi nywalo idwe, ka di emeede kede yei kede amara kede kuo kacil, doko di ebedo mot.

1 Temeseo 3

Jotel me Ekodet me Jokirisito

¹Man obedo kop me ateni be, ka ngatamoro winyo i cunye pi bedo bisop, udo emitic kame ber.

²Bisop miero bed abongo gimoro kame kokaruno bunano en iye; icuo kame tie kede dako acel, dano kame mwolere, kame gwokere, ngat kame jo woro, kame gamo jo, ngat kame twero pwoyo jo,

³ngat kalikame ngamera, ngat kalikame ger do emwol, ngat kalikame ngalok, doko di likame cunye maro sente.

⁴En miero ebed dano kame gwoko jo me ture kiber, di emio idwe mege winye di kiwore i yore dedede.

⁵Pien ka dano likame ngeo gwoko jo me i ode, etwero gwoko ekodet me jo koyei Rubanga benyo?

⁶En miero kur ebed dano kame pwodi nyen i yei, tetekeny kur epong kede ewaka di oko ngolo ne kop bala Sitani.

⁷Doko miero ebed dano kame jo kalikame oyei Kirisito pwoyo, tetekeny kur ekel lewic i kome di eko donyo i owic ka Sitani.

Gikame mitere ne Dikonin

⁸Kamanono da, dikonin miero bed jo kame ekite gi beco, jo kalikame lokoloko dud gi, jo kalikame mato bwini atot, doko di likame kitie kede eranga me mito ud;

⁹gin miero kimok i gikame oudo omungere me yei kede ngec aber me cunye gi.

¹⁰Poore kong ngic kuo gi; kame koudo gi di kili kede raco moro, poore wek gi kitim tic bala dikonin.

¹¹Kamanono da, mon gi miero bed jo kame ekite gi beco, jo kalikame dubo nying jo, do miero kibed kede ayapakin, di kigenere i gi dedede.



¹²Dikonin miero bed wegi mon acel acel, di kitwero gwoko idwe gi kede miere gi kiber;

¹³pien ka dikonin otimo tic kiber, kiudo nying aber, doko kiyamo abongo lworu i kom yei gi i kom Kirisito Yesu.

Mung Adwong

¹⁴Ango atie kede gen me bino buti oyotoyot, do atie wandiko ni kope nogi tetekeyn

¹⁵ka ango agal, in iromo ngeno epone kame dano miero bed kede bala ngat acel kikom jo me ot ka Rubanga, jo kame obedo ekodet me jo koyei Rubanga kakuo, gikame obedo bala epir kede acakini kame gango ateni.

¹⁶Ateteni mung me edini wa dwong twatwal: Konyute i cal me kom dano, Tipu oko nyuto be en etimo gikame opoore, imalaikan oko nene. Kotuco kop i kome i dier jo kalikame Iyudayan, piny lung oko yei en, di oko tere malo kede deyo.

1 Temeseo 4

Jopwony me Angalo

¹Tipu waco kakaler be i kare me ajikini jo mogo bino weko yei; gin kibino winyo kope me tipere kame tie kede angalo kede pwony me jwogi.

²Akodi pwony nogo wok ki ecuke me joangalo, jo kame ngec me cuny gi onyunyuun bala kocwinyo kede lilim kodop.

³Gin kigengo jo nyomere, doko kimito be jo kwer cam mogo kame Rubanga ocweo ne jo kame yei kede kame ngeo ateni pi camo ingei mino pwoc.

⁴Pien gi dedede kame Rubanga ocweo beco, likame tie gimoro kame dano poore dagi camo tek di etieko mino pwoc pire;

⁵pien udo kop ka Rubanga kede ilega otieko lonye.

Ngatic Aber me ka Kirisito Yesu

⁶Ka imio imiegu kede amiegu pwony nogi, ibino bedo ngatic aber me ka Kirisito Yesu, di ipito cunyi kede kop me yei kede pwony aber kame ibedo lubo.

⁷Kur igam kop mogo me itatam me mingomingo, kalikame nyuto wor but Rubanga. Pwonyere pi bedo kede wor but Rubanga.

⁸Pien akadi bed bala rierieo kom wa tie kede kony moro, do bedo kede wor but Rubanga konyo i yore dedede, piento en ecikere pi mino wa kuo i kare kanataman kede i kare kame bino bino.

⁹Man kop me ateni kame poore oyeunu odocon.

¹⁰Pi mano, wan ocane doko otimo tic kitek pien wan otieko keto gen wa i kom Rubanga kakuo, kame obedo Ngalak me jo dedede, do singo twatwal jo kame tie kede yei.



- ¹¹Mage en gikame in miero inyikakino yamo di ipwonyo jo iye.
- ¹²Kur ngatamoro bed kede acae buti be pien in pwodi ititidi, do bed anyut me aluba but jo koyei Kirisito; i yamo kede i ikiteso, i amara, i yei kede pi bedo abongo raco moro.
- ¹³Jal kare ni pi somo ne jo iwandik kacil, tucó ejiri, kede pwonyo jo tuno ango bino.
- ¹⁴Kur iwek tic kede giamia me Tipo Kacil kame itie kede, giamia kame komii i imurai kakame bin joadongo oketo kede cing gi i wi.
- ¹⁵Ket gi nogi i tic, ket cunyi i kom gi, tetekený jo dedede nen ekite kame in itie meede kede anyim.
- ¹⁶Gwokere keni, doko gwok pwony ni da; meede timo gi nogi, pien ka itimo kamanoni ibino lakere keni, kede ibino lako jo kame winyo kope ni da.

1 Temeseo 5

Tice kame Poore Atima but Jo Koyei

- ¹Kur iyamo kede dano adwong kede dwan me gero, do yam kede bala ebedo papa ni. Ter awobe atino bala imiegu ni,
- ²mon adongo bala joatoti ni, kede mon atino bala amiegu ni, abongo bedo kede tam moro arac i kom gi.
- ³Nyut wor but apuserun kame obedo apuserun kikokome.
- ⁴Ka apuserut moroni tie kede idwe mege arabo ikwae, me agege gin ber kong kipoore pwonyere timo tic kame edini mito ne gi timo ne jo me miere gi, di kiko culo gikame jonywal gi otimo ne gi; pien man yomo cuny Rubanga.
- ⁵Dako kame obedo apuserut me ateni, kame koweko kene, en eketo gen mere i kom Rubanga, doko emeede kwano Rubanga di elego iwor kede iceng.
- ⁶Do apuserut kame maro kuo me yomcuny otieko gire to, akadi bed bala pwodi ekuo.
- ⁷Mi gi cik nogi, me wek kur kibed kede gimoro kame kobunano gi iye.
- ⁸Ka ngatamoro likame gwoko joawade mege, do singo twatwal jo me i ode, udo etieko weko yei, doko udo erac kalamo ngat kame li kede yei.
- ⁹Kur wandiko nying apuserut moro i ekodet me apuserun, kwanyo ka mwaka me dongo mere oromo ot kanyape, doko mito di oudo enyomere kede icuo acel kenekene.
- ¹⁰Miero ebed dako kame jo jurao be etimo tice kabeco: dako kopito idwe mege kiber, dako kame oudo gamo wele, kame oudo mwolere timo tice ne jokirisito icegun, dako kame okonyo jo kame oudo tie i peko, kede kame jalere timo bero i yore dedede.
- ¹¹Do kur irwak nying apuserun atino i ekodet me apuserun, pien ka mit me kom gi omio gi kimito nyomere, kiweko Kirisito,
- ¹²aso man ko bino mino kongolo ne gi kop pi turo cikere gi me agege.



¹³Medo i wi mano, gin kipwonyere bedo abeda abongo tic, di kirimo miere. Doko likame mano kenekene, do kidoko da jo kame kwoto jo, kede jo kame donyo i kope kalikame mako gi, di kiyamo kope kalikame kipoore waco.

¹⁴Aso, ango atamo be apuserun kame pwodi tino poore nyomere, kinywal idwe, kipug miere gi, di likame kiko mino ngakwor kare me yamo kop moro arac i kom wa.

¹⁵Pien mogo kikom gi otieko apaar tenge lubo Sitani.

¹⁶Ka dako ngakirisito moro tie kede joawade mege kame obedo apuserun, poore ekony gi; kur jal peko noni ne ekodet me jokirisito, me wek ekodet noni twer konyo apuserun me ateni.

¹⁷Kopoore mino wor adikinicel but joadongo kame telo kiber, do singo twatwal jo kame cane tucu ejiri kede pwonyo jo.

¹⁸ Pien iwandik kacil waco be, “Kur itwei dog twon ka itie tic kede pi canyo alos” , kede be, “Kopoore culo ngatic pi tic kame etimo.”

¹⁹ Kur i yei gamo kop me pido moro kame kokelo i kom ngat adwong, kwanyo ka jo are amoto adek ojura kop nono.

²⁰I kom kop kame mako jo kame meede kede dub, bunano gi i nyim jo dedede tetekeny jo icegun dok lwor.

²¹Ango aciki i nyim Rubanga kede i nyim Kirisito Yesu kede imalaikan kame koyero be, poore ilub cik nogi abongo yero obwol ki dek, di ili kede apokapoka i gi dedede kame itimo.

²²Kur isunyo dokakino bad i wi ngatamoro pi bedo ngatel, doko da kur idonyi i dub ka ngat apat; bed abongo raco moro.

²³Kur i meede mato pii kenekene, do mat da bwini moro anonok pi yii kede pi aramo kame loli kare i kare.

²⁴Dub me jo mogo idelelei, di kinyuto kakaler be kobino ngolo ne gi kop, do dub me jo ace neeno i cen.

²⁵Kamanono da, tice kabeco idelelei; doko akadi likame kineeno da, likame kikaruno dong di kikanere.

1 Temeseo 6

¹Jo dedede kame obedo ipasoi miero ter jodongo gi bala jo kame poore awora i yore dedede, me wek kur kocai nying Rubanga karacel kede pwony wa.

²Kur ipasoi kame jodongo gi oyei Kirisito dagi woro gi be pien gin kibedo imiegu i Kirisito; do akaka manono, gin miero kitim ne gi tic kame ber kato, pien jo kame gin kitie konyo obedo jo kame oyei Kirisito, jo kame gin kimaro.

Pwony me Angalo kede Abar me Ateni

Pwony kope nogi, doko kwai cuny jo pi lubo gi.



- ³Ka ngatamoro tie kede pwony apat kalikame upere kede pwony me ateni me ka Rwot wa Yesu Kirisito, kede pwony kame kelo wor but Rubanga,
- ⁴udo epong kede ewaka doko likame engeo gimoro. En udo etie kede cuny arac me piem kede me lok i kom kope kenekene. Manoni kelo nyeko, apokapoka, dubo nying jo, potocuny,
- ⁵kede atwomutwomun arac i dier jo kame tam gi otieko dubere doko kili kede ateni. Gin kiparo be kop kame makere kede woro Rubanga obedo gikame kelo ud.
- ⁶Ebo, ud tie i kuo me woro Rubanga ka in imio gikame itie kede oromi.
- ⁷Pien wan likame okelunu gimoro i piny kan, kamanono da likame okarununu kwanyo gimoro ki piny kan okounu tero.
- ⁸Pi mano, ka wan otienu kede cam kede giangapa, magi poore romo wa.
- ⁹Do jo kame mito abar donyo i atama di kiko moko i owic me mit atot me mingomingo, kame kelo awanon kame tero jo i rwenyo kede i dubere atwal.
- ¹⁰Pien bedo kede cuny kame maro sente en agege me epone dedede me gikareco. Jo mogo oko bedo kede mit atek ateka me sente omio gi kiko parao tenge ki yei, di kiko kelo cweracuny adwong i kuo gi.

Paulo Ocoro Temeseo

- ¹¹Do in dano ka Rubanga, kur idony i tim nogi akadi acel. Ket cunyi i bedo kede ekite kopooore, i woro Rubanga, i yei, i amara, i ikanyakin kede i bedo mot.
- ¹²Yi kiber i yi me yei, di iko bino udo kuo kame bedo nakanaka, kame riki kolwongi iye i kare kame ituco kede yei ni i nyim ijurak atot.
- ¹³I nyim Rubanga ngat kame mio gi dedede kuo, kede i nyim Kirisito Yesu ngat kame riki otuco kiber kop me ateni i nyim Pontio Pilato, ango aciki be,
- ¹⁴Iub cik kame komii di iko bino bedo di icil abongo gikame kobunano in iye, tuno i Ceng kame Rwot wa Yesu Kirisito bino neeno kede.
- ¹⁵Rubanga kame kopako, kame en kene Won twer, Abaka me abakai kede Rwot me rwode, en kame bino nyute i kare kopooore.
- ¹⁶En kene kalikame eto, doko ebedo i lero kalikame ngatamoro twero noko. Likame tie ngatamoro kotieko nene arabo kame twero nene. Wor kede twer kame bedo nakanaka bed bute. Amen.
- ¹⁷Cik jo kame nataman obaro i piny kan kur kitingere, doko kur kiket gen gi i kom abar kalikame genere, do kipoore keto gen gi i kom Rubanga ngat kame mio wa jame dedede kede cunye lung pi kelo ne wa yomcuny.
- ¹⁸Gin kipoore timo bero, kibed jo kobaro kede tim kabeco, jo kame mio kede cuny gi lung, di kitie kede cuny me nywako kede jo icegun.



¹⁹Ka kitimo kamano, udo kikano abar kame bino bedo bala acakini atek pirgi pi kare me anyim, tetekeny kiko bino udo kuo kame tie kuo me ateni.

²⁰Okwe Temeseo, gwok gikame kotieko geni kede. Kur idonyi i yamo kalikame nyuto wor but Rubanga kede piem mogo kame jo lwongo i yore me abe be “Ngec” .

²¹Pien jo mogo pi yamo be gin kitie kede akodi ngec nono, omio gin kiko rwenyo i kom kop kame mako yei. Kisa ka Rubanga bed kede wu.



2 Temeseo

2 Temeseo 1

Amot

¹Baluwa kowok kibut Paulo, kame odoko ngaor ka Kirisito Yesu pi mit ka Rubanga, pi kop me cikere me kuo kame tie i Kirisito Yesu.

²But Temeseo atin na kame amaro. Kisa, mwolo, kede mulem ka Rubanga Papa kede Rwot wa Kirisito Yesu bed buti.

Pwoc kede Supocuny

³Ango apwoyo Rubanga ngat kame anga atimo ne tic kede ngec aber me cunya, bala kame bin joakwari na da otimo kede. Ango apwoye di ayutuno in nakanaka kame atie ilega iwor kede iceng.

⁴Kame ayutuno koko ni, aparo neni tetekey cunya pong kede kilel.

⁵Manoni mia ayutuno yei me ateni kame in itie kede, akodi yei kame da ni Loisi kede toto ni Yunia oudo tie kede, en kame anga angeo kiber be ida nan itie kede.

⁶Pi mano, anga apoo wi be, cei giamia ka Rubanga kame emi i kare kame bin anga adokakino kede cinga i wi.

⁷Pien likame Rubanga omio wa Tipo kame mio wa lwo, do emio wa Tipo kame mio wa twer, amara, kede dino mit me kom.

⁸Pi mano, kur lewic maki mino ijura i kom Rwot wa, arabo i kom anga ngat kame adoko mabus pire. Do nywak keda neno can pi ejiri, di icungo i twer ka Rubanga.

⁹En elako wa di eko lwongo wa pi bedo jo mege kacil, likame pi tice wa, do pi iik kede kisa mere. En emio wa kisa noni i Kirisito Yesu di likame pwodi ikar ogere,

¹⁰do nataman eko nyute but wa i bino me Ngalak wa Kirisito Yesu, ngat kotieko kwanyaro twer me to, di eko kelo kuo kame bedo nakanaka pi ejiri.

¹¹Rubanga oyera pi bedo ngat kame tuco kop mere, ngaor kede ngapwony me ejiri noni;

¹²doko kop noni en komio anga atie neno can kaman. Do anga lewic likame maka, pien anga angeo ngat kame atieko keto gen na i kome, doko anga angeo kiber be en ekaruno gwoko gikame etieko gena kede paka tuno i Ceng nono.

¹³Mok i kom pwony me ateni kame itieko winyo kibuta, di iko dong i yei kede amara kame tie i Kirisito Yesu.

¹⁴Gwok jamini kabeco kame kotieko geni kede pi kony me Tipo Kacil kame wan otie kede.

¹⁵In ingeo be jo dedede kame tie Esia, ribo kiton Pugelo kede Keremugene otieko jala.



¹⁶Akwao Rwot pi timo kisa ne jo me ot ka Onesiporu, piento en oudo esingo dwoko cunya, doko lewic oudo likame make pi kite kame kotwea kede i otkol;

¹⁷do kakame en etuno kede Roma, emoa kede teko di eko wuda.

¹⁸Akwao Rwot pi timo ne kisa i Ceng nono! Doko in ingeo kiber tice dedede kame en etimo i Epeso.

2 Temeseo 2

Sirikale Awor me ka Kirisito Yesu

¹Pi mano, in atin na, bed di itek pi kisa kame tie i Kirisito Yesu.

²Doko gikame iwinyo kibuta i nyim ijurak atot, mi but jo kame genere, kame bino gida karuno pwonyo jo icegun.

³Nywak neno can kede jo icegun bala sirikale aber me ka Kirisito Yesu.

⁴Likame tie sirikale moro kame tie i wang tic, kame doko mio kope ace apat bodo wie, pien mit mere tie pi yomo cuny ngadwong mere.

⁵Likame tie ngaringo moro kame udo giamia me loc kwanyo di elubo iswilia me elagano.

⁶Ngapur atek en kame poore cako udo iner me gikame kopuro.

⁷Bed di itamo i kom gikame ango awaco, pien Rwot bino mini iniang gi dedede.

⁸Yutuno kop i kom Yesu, akwar Daudi, ngat kame bin koyaruno kikom jo oto, bala kame tie i ejiri kame ango apwonyo.

⁹Ejiri noni en kame ango atie neno can pire, di kotwea kede irikoi bala ngatur iswil. Do likame kotweo kop ka Rubanga.

¹⁰Pi mano, ango akanyakino gi dedede pi jo kame Rubanga oyeru, tetekeny gida kiud alako kame tie i Kirisito Yesu, kede deyo mere kame bedo nakanaka.

¹¹Man kop me ateni kame waco be, “Ka wan otiekunu to karacel kede en, obinunu da kuo karacel kede en.

¹² Ka wan okanyakinunu, obinunu da pug karacel kede en. Ka wan odagenu, eda ebino dagi wa.

¹³Ka wan likame ogenerenu, en gire edong di egenre kamanono, piento en likame ekaruno dagere kene.”

Ngatic kame Kopwoyo

¹⁴Poi wi jo i gi nogi, doko kwenyaro gi i nyim Rubanga pi weko piem i kom kope mogu, gikame li kede kony moro, do kenekene edudubo jo kame tie winyo.



- ¹⁵Tamakino kede teko ni dedede pi nyuto i nyim Rubanga be in ngatic kame en epwoyo, ngatic kame li kede gimoro kame lewic make iye, kame pwoyo kiber kop me ateni.
- ¹⁶Kur idonyi i yamo mogo kame kony gi li, yamo kalikame nyuto wor but Rubanga, pien kibino mino jo meede ameda weko bedo kede wor but Rubanga.
- ¹⁷Doko yamo gi nogo cal bala adola kame wange nyai. Kumenayo kede Pileto obedo jo are kikom jo kame pwoyo akodi gi nogi.
- ¹⁸Gin kipwoyo be iyarun otieko timere; man omio gin kiparao tenge kiweko ateni. Gin kitie totolo yei me jo mogo.
- ¹⁹Do acakini atek kame Rubanga osipo tie cungo, di etie kede iwandik kame waco be, “Rwot ngeo jo mege,” kede be, “Mito ngat acelacel kame lwongo nying Rwot wek tim areco.”
- ²⁰I ot adwong, likame iudo iye ikopon kede bakulin kame kotimo kede saabu kede siliba kenekene, do iudo iye mogo kobedo yen kame kopao, kede apat me elupe da; mogo kotio kede gi i ceng kame pirgi tek, kede mogo kotio kede gi i ceng atatai.
- ²¹Jo dedede kame lonyere ki gikame ango awaco nogi, gin kibino doko bala bakulin kede ikopon kame kotio kede gi i ceng kame pirgi tek, jo kame kony gi tie, jo kame omire but Rubanga, en Won ot; gin jo kotieko iikere pi timo tice dedede kabeco.
- ²²Kur idonyi i mit me tino; do cane pi bedo ngat kopooore, pi bedo kede yei, amara, kede mulem, di itimo kamanoni karacel kede jo kame bako dog gi but Rwot di cuny gi cil.
- ²³Bed bor ki piem me mingomingo me kwina piny; in ingeo be magonogo kelo lok.
- ²⁴Doko ngatic ka Rwot likame poore bedo ngalok, do epoore bedo ngat kame mwol kede jo dedede, ngapwony aber kame dire,
- ²⁵kame riego niang me jo kame piem kede en, do di etimo kamanono kede cuny me mwolo. Pien cengemogo Rubanga bino mino gi kare me swilaro, di kiko ngeno ateni.
- ²⁶Di do kiko bino bwot ki owic ka Sitani, ingei en mako gi bala mabus pi timo gikame en emitto.

2 Temeseo 3

Kare me Ajikini

- ¹Ngei be, peko bino bedo tie i kare me ajikini.
- ²Pien jo bino paro pirgi kenekene, kibino bedo jo kame cuny gi maro sente, joewaka, joadeng, joayet, jo kalikame winyo jonywal gi, jo kalikame tie kede pwoc, jo kalikame paro pi Rubanga,
- ³kibino bedo jo kalikame paro jo, jo kalikame mito dok i nywak kede jo apat, jo kame dubo nying jo, jo kame cuny gi rep, jogero, jo kame dagi gikaber,



⁴joerupe, jo kalikame paro piny, jo kame tingere nono, jo kame maro yomcuny akaka maro Rubanga,

⁵jo kame nyutere bala kiworo Rubanga, do di i ateni kidagi twer mere. Kur ibedo kede akodi jo nogo.

⁶Pien tie mogo kikom gi kame lwidar donyo i ude di kiko bwono tam me mon amiming, mon kame dub otieko bwono teko gi kede kame mit me epone dedede pugo,

⁷gin mon kame kopwonyo nakanaka do likame kikaruno pi bedo kede ngec me ateni.

⁸Bala kame bin Yane kede Yambure opiemo kede tam ka Musa, kamanono jo nogi da kame li kede tam, jo kame yei gi otieko poto, gida kipiemo kede ateni.

⁹Do gin likame kibino kato kakabor, pien mingo gi bino neno kakaler but jo dedede, bala me ka Yane kede Yambure.

Acora me Ajikini

¹⁰Do in itieko lubo i yore i yore pwony na, ekite na, gikame ango amito cobo i kuo na, yei na, dire na, amara na, ikanyakin na,

¹¹itidil kame komia kede can kame aneno i Antiokia, Ikoniam, kede i Lisitura, itidil alit kame akanyakino! Do Rwot oko laka ki kom gi nogi dedede.

¹²Ateteni, kobino tidilo jo dedede kame mito bedo kede kuo me woro Rubanga i Kirisito Yesu.

¹³Do jo areco kede joangalo bino meede ameda dubere, di kingalo jo, doko di kongalo gida.

¹⁴Do in meede kitek i gikame itieko pwonyere iye kede kame itieko yei. Pien in ingeo ngat kame opwonyi ginogo,

¹⁵kede epone kame in itieko ngeno kede iwandik kacil, kame karuno mini rieke kame kelo ni alako pi yei Kirisito Yesu cako di in pwodi atin.

¹⁶Iwandik kacil dedede owok kikut Rubanga, doko kibeco me pwonyo jo, me bunano jo, me riemo jo, kede me pwonyo jo bedo di kipoore,

¹⁷tetekeny ngat acelacel kame obedo dano ka Rubanga miero bed dano kocwiny kiber, kame otieko iikere pi timo tice dedede kabeco.

2 Temeseo 4

¹I nyim Rubanga kede i nyim Kirisito Yesu, en ngat kame bino ngolo kop ne jo akuo kede ne jo oto, doko pi dwogo mere kede Ajakanut mere, ango akwai kitek be,

²pwony kop ka Rubanga, meede ameda tatamo en akadi i kare aber amoto i kare arac; lok tam me jo, bunano gi, dii cuny gi, di ipwonyo gi kede dire adwong.

³Pien kare tie bino kame jo bino dagi gamo kede pwony aber, do kibino lubo mit gi di kiko koko jopwony kame bino pwonyo gi gikame cuny gi mito.



- ⁴Gin kibino daga winyo kop me ateni di kiko apaar donyo winyo itatam mogo.
- ⁵Do in bed di wi tamo, kanyakino can, tim tic me tuco ejiri, cob tic nin.
- ⁶Ango gira kare na otieko tuno kame kobino mino kede kuo na bala giayala; kare na me yai ki kuo me piny kan otieko tuno.
- ⁷Ango atieko yi kiber, atieko ringo paka i tol, atieko gwoko yei.
- ⁸Cako nataman, kotieko iiko na giamia me loc pi bedo ngat kopooore, kame Rwot ngangolkop kopooore bino mina i Ceng nono, doko likame ebino mino ango kenekene, do ebino da mino jo dedede kame daro dwogo mere kede imue.
- ⁹Tamakino kede teko ni dedede pi bino buta i kare kiyapiyapi.
- ¹⁰Pien Dema otieko weka di eko gire ot Tesalonika pi kite kame emaro kede kuo me piny kan; Kuresene da ooto Galatia kede Tito da otieko ot Dalamatia.
- ¹¹Luka kenekene en kame tie keda. Moi Marako iko upere kede ibinunu buta, pien ebedo dano kame tie kede kony buta i tic na.
- ¹²Ango atieko oro Tukiko Epeso.
- ¹³Kame itie bino, kel na egoe abor apek kame oudo aweko Teroa but Karapo. Kel kiton itabun da, do twatwal mere itabun kame kotimo kede launi.
- ¹⁴Alekesanda ngatet otimo na gikarac twatwal; Rwot bino culo raco kame etimo.
- ¹⁵Ida bed di i gwoke, pien bin en epiemo kede kop wa kitek.
- ¹⁶I pido na me agege pira, likame tie ngatamoro kokonya, do jo dedede ojala. Akwao Rubanga kur mar raco nono i wi gi.
- ¹⁷Do Rwot oko bedo tie keda, di eko mina teko me pwoyo kop mere odocon, tetekeny jo kalikame Iyudayan winyi. Manoni oko mino kolaka ki lak engu.
- ¹⁸Rwot bino laka ki raco dedede di eko gwoka tuno i Ajakanut mere me malo. Deyo bed bute ikar kede ikar. Amen.

Amot me Ajikini

- ¹⁹Mota Purisila kede Akwila kede jo me ot ka Onesiporu.
- ²⁰Erasito odong Korinti; aweko Toropimu odong Miletu di etuwo.
- ²¹Tamakino kede teko ni dedede pi bino di kare me ngico me piny pwodi likame otuno. Eubulu omoti. Pudon, Linu kede Kulaudia karacel kede imiegu kede amiegu dedede i Kirisito da omoti.
- ²²Akwao Rwot bed i cunyi. Kisa ka Rubanga bed butu dedede.



Tito

Tito 1

Amot

¹Baluwa kowok kibut Paulo ngatic ka Rubanga kede ngaor ka Yesu Kirisito, kame ooro pi medo yei me jo kame Rubanga oyeru, kede pi medo ngec gin me gi me ateni, di lubere kede kuo kame nyuto wor but Rubanga,

²kede pi mino gi gen me kuo kame bedo nakanaka. Rubanga, ngat kalikame ngalo, riki sek ocikere pire,

³di i kare kopoore en eko nyute i kop mere kame kogena kede, kame ango ako pwoonyo pi cik kame Rubanga Ngalak wa omia.

⁴But Tito, atin na obe i yei kame onywako. Kisa kede mulem ka Rubanga Papa kede Kirisito Yesu Rwot wa bed buti.

Tic ka Tito i Kurete

⁵Ango oudo aweki i cula me Kurete tetekeny itemuno gikame pwodi mito aika, di iko yero joadongo i bomba acelacel bala kame oudo atieko waco ni.

⁶Joadongo nogo miero bed jo kame li kede raco moro, ngat acelacel kikom gi miero bed kede dako acel, kede di idwe mege oyei Kirisito di likame kitie atatai arabo kitie kede ngut gi.

⁷Pien bisop, bala ngagwok ka Rubanga, miero bed abongo raco moro, kur ebed ngaewaka, arabo ngangoi, arabo ngamera, arabo ngagero, amoto bedo kede eranga me mito ud,

⁸do en miero ebed ngat kame gamo jo, kame maro gikaber, ngat kame wie tamo, kame ekite mege beco, ngat kame mire i yei kede kame dio mit mege.

⁹Miero emok kitek i kom kop kame kotwero geno, kame riamo kede kop kame kopwoonyo, tetekeny ekaruno mino pwoonyo kame tie kakare, kede da eko bwono tam me jo kame tie kede piem iye.

¹⁰Pien joepali tie tot, jo kame yamo atatai, kede joangalo, twatwal mere jo kame kokepo di kiko lokere kidoko jokirisito;

¹¹miero geng yamo gi nogo, pien kitie kelo atotolun i miere atot pi pwoonyo gi kalikame poore apwoonya, kame gin kipwoonyo pi mono ud kalikame ber.

¹²Ngat acel kikom gi, enabi gi kikome, owaco be, “Jo me Kurete nakanaka obedo joangalo, kical bala leini kame ger, jocam kame nyap.”

¹³Kop kame kowaco no tie kakare. Pi mano, bunano gi kitek, me wek amoto kibed kede yei me ateni,

¹⁴akaka amakakin winyo kop me itatam me Iyudayan arabo cik me jo kame dagi ateni.



¹⁵Gi dedede cil ne jo kame tam gi cil, do ne jo kame tam gi opwokere, jo kame li kede yei, likame tie gimoro kame cil, pien tam gi kede ngec me cuny gi otieko munaun.

¹⁶Gin kiwaco be kingeo Rubanga, do gikame kitimo nyuto be kikwie. Rubanga dagi epone me jo nogo, jo kalikame winyo kop, jo kalikame romo timo gimoro aber.

Tito 2

Pwony me Ateni

¹Do in miero ipwony gikame upere kede pwony me ateni.

²Wac ne cuo adongo pi bedo jo kame dio mit me kom gi, jo kame keto cuny gi, jo kame wi gi tamo, kede kame tie kede yei me ateni, amara, kede ikanyakin.

³Kamanono da, wac ne mon kame odoko dongo pi bedo jo kame koworo pi iponeso gi, weko bedo jo kame dubo nying jo arabo ipasoi me amata. Mito kibed kede pwony me ateni,

⁴tetekeny kikaruno pwonyo mon kame pwodi tino pi maro cuog gi kede idwe gi,

⁵kibed mon kame wi gi tio, abongo tam me caro, jo kame gwoko ude gi kiber, jo kame mwol doko kame jalere i loc ka cuog gi tetekeny kur kimi jo cai kop ka Rubanga.

⁶Kamanono da, wac ne cuo atino pi bedo jo kame dio mit me kom gi.

⁷I gi dedede bed anyut me tice kame beco, kede i pwony ni nyut ateni ni kede keto cuny.

⁸Pwony kop kakare, kop kalikame ngatamoro twero bedo kede acae iye; di do lewic ko bino mako ngat kame piemone kede wa, pien udo likame etie kede gimoro arac kame etwero waco i kom wa.

⁹Wace ipasoi pi jalere i loc me jodongo gi kede kiyom cuny gi i yore dedede, kur kidwoko dog gi,

¹⁰arabo timo kuwo, do kinyut atwal be gin kigenere kitek, tetekeny i gi dedede kikel deyo i kom pwony ka Rubanga Ngalak wa.

¹¹Pien kisa ka Rubanga otieko neeno, di eko kelo ne jo dedede alako.

¹²Kisa nono pwonyo wa weko kuo me dagi Rubanga kede mit me piny, kede pi bedo jo kame dio mit me kom, jo kame tie kede ekite koriere kede kuo me woro Rubanga i piny kan,

¹³di okurunu kede gen winyo kame bino bino, i Ceng kame deyo ka Rubanga wa adwong Ngalak Yesu Kirisito bino neeno kede.

¹⁴En nono kame ejalere pirwa, pi lako wa ki tim areco dedede, kede pi lonyo jo kame poore bedo mege, jo kame keto cuny gi timo tice kabeco.



¹⁵Pwony gi kope nogi, kwai cuny gi, doko retakino gi kede akarunikin lung. Kur ngatamoro cai.

Tito 3

Kuo me Ngakirisito

¹Poore ipoi wi jo pi bedo jo kame jalere i loc me jopug kede wegi akarunikin, pi bedo jo kame wor, kede jo kame oikere pi timo bero i yore dedede.

²Likame kipoore yamo kop arac i kom ngatamoro, likame kipoore lok, do kipoore bedo jo kame mwol kede kame nyuto wor but jo dedede.

³Pien wan ikom wa bin omingunu, oudo likame owinyunu kop, oudo korwenyo wa. Oudo obedo ipasoi me mit kede yomcuny apapat, di odubo kare wa i tim me cuny arac kede nyeko, jo oudo dagi wa doko wada oudo odagere wan kenwa kenwa.

⁴Do kakame bero kede mwolo me amara ka Rubanga Ngalak wa oneeno kede,

⁵en eko lako wa, likame pi tice kame wan otimo be pien wan opoore, do pi kisa mere. En etimo manoni i Tipo Kacil, ngat kame mio wa nywal me pii, en nywal me are, di okounu doko jo anyen.

⁶Rubanga omio wa Tipo Kacil kede cunye lung i Yesu Kirisito Ngalak wa,

⁷tetekeny pi kisa mere wek odok jo kopoore kame bino udo kuo kame bedo nakanaka kame gen wa tie iye.

⁸Man kop me ateni. Ango amito in inyikakino yamo kope nogi tetekeny jo kame yei Rubanga par pi jalo kare gi i timo tice kabeco, kame beco twatwal doko di kikonyo jo dedede.

⁹Do kur idony i piem me mingomingo, wapo nying joakwari, apokapoka, kede lok kame mako Iswil, pien gin kili kede bero moro doko kony gi li.

¹⁰Do kame ngatamoro tie kede apokapoka, core tien me agege kede me are di do iko weke.

¹¹In ingeo be dano kame cal kamano udo etieko abilor, doko udo en ngadubo; kop loe kene.

Acora kame Jiko

¹²Kame aoro Atema arabo Tukiko buti, tamakino kede teko ni dedede pi bino Nikopoli buta, pien ango atieko moko tam na pi bedo kuno i kare me ngico me piny.

¹³Tamakino kede teko ni dedede konyo Sena ngat kame osiao kop me iswil, en kede Apolo, pi meede kede ot gi, doko nen be likame kirem kede gimoro.

¹⁴Doko wek jo wa pwonyere jalo kare gi timo tice kabeco, tetekeny kikaruno mino kony mogo kame mitere susunyo; likame kipoore bedo kede kuo kalikame konyo.



15Jo dedede kame tie keda omoti. Mot jo koyei dedede kame maro wa. Kisa ka Rubanga bed butu dedede.



Epirimoni

Epirimoni 1

Amot

- ¹Baluwa kowok kibut Paulo, ngat kame obedo mabus pi Kirisito Yesu, kede kibut omin wa Temeseo. But Epirimoni ngatic ngawot wa kame omaro,
- ² kede amin wa Apia, kede Arakipu kame obedo sirikale wad wa, karacel kede ekodet me jokirisito kame cokere i odi.
- ³Okwao ne wu kisa kede mulem ka Rubanga Papa wa kede Rwot wa Yesu Kirisito.

Amara kede Yei kame Epirimoni Tie kede

- ⁴Ango apwoyo Rubanga na i kare dedede kame atamo kede piri i ilega na.
- ⁵Pien ango awinyo kop i kom amara kame in itie kede but jokacil dedede kede yei ni i kom Rwot Yesu.
- ⁶Ango akwao be nywak wa pi yei nin dok tek di eko kelo ne wa niang i kom gikabeco dedede kame wan otimo ne Kirisito.
- ⁷Omina, ateteni ango atieko udo kilel kede nwangcuny pi amara ni, pien in itieko kweno cuny jokacil.

Kwac ka Paulo pi Onesimo

- ⁸Pi mano, bed bala ango atie kede tekuny i Kirisito pi waco ni timo gikame mitere,
- ⁹do pi amara na piri, ango akwai akwa, ango Paulo ngat kame acungo ne Kirisito Yesu doko nan atie da i otkol pire.
- ¹⁰ Ango akwai pi atin na Onesimo, kame ango adoko papa mere i kare kame ango oudo atie kede i otkol.
- ¹¹Pien i kare okato en oudo kony mere li kibuti, do ateteni nan do etie kede kony buti kede but ada.
- ¹²Ango atie cwane dwogo buti, en ebedo cunya me diere.
- ¹³Oudo amito be koto edong keda kan, tetekeny koto ekonya akaka in i kare kame kotwea kede i otkol pi kop me ejiri.
- ¹⁴Do ako paro be miero kur atim gimoro abongo in yei, tetekeny tic ni aber kur bed pi adiadia, do wek ebed mit nin.
- ¹⁵Amotoko kop noni en komio bin kopoke kede in pi kare moro, me wek edwog buti me atwal,
- ¹⁶do likame bobo bala epasoit, do di do pire dwong kalamo epasoit, bala omin wa kame omaro i Kirisito, kame pire tek singo twatwal buta, do akalamo mere buti, i kom karacel kede i Rwot.



¹⁷Aso ka in itero bala ango abedo ngatic ngawoti, game bala kite kame oudo koto igamango kede.

¹⁸Doko ka oudo etimo ni raco moro, amotoko etie kede banya ni moro, in do mar gi i wi ango.

¹⁹Ango Paulo awandiko kop noni kede cinga kikoma be, ango abino culo banya no. Likame tie gimoro kame doko awaco i kom kop kame mako kiton ida kikomi bedo bala banya nango.

²⁰Ebo, omina, akwai itim na bero noni i Rwot. Kwei cunya i Kirisito.

²¹Pi kite kame ango ageni kede pien itie kede wor, omio atie wandiko ni kop noni di angeo be in ibino timo gikame kalamo kame ango awaco ni.

²²Doko medo i wi mano, mito itemuno na agola me wele, pien atie kede gen be Rubanga bino winyo ilega wu di eko dwoka butu.

Amot me Ajikini

²³Epapura kame obedo mabus wad wa pi Kirisito Yesu, cwao ni amot.

²⁴Marako da, Arisitaku, Dema kede Luka kame obedo jotic jowota moti.

²⁵Akwao kisa ka Rwot wa Yesu Kirisito bed kede wu.



Iburanian

Iburanian 1

Rubanga Yamo kede wa i Wode

- ¹I kare kasek Rubanga oyamo kede joakwari wa tien atot i yote apapat kibut inabin.
- ²Do i kare kanataman me ajikini, en eko yamo kede wa kibut Wode, ngat kame en eyero pi jame dedede doko mege, doko en nono da kame bin Rubanga ocweo gi dedede di beo kibute.
- ³En kame enyuto deyo ka Rubanga, doko da en kame ebedo cal me kuo ka Rubanga kikokome. Kop mere kame tie kede twer en kame mio gi dedede bedo tie iepone kame nataman kitie kede. Kakame etieko lonyo kede jo ki dub, en eko bedo i bad tetu cam ka Rubanga won Twer Adwong.

Wot ka Rubanga Dwong Adikinicel

- ⁴Aso, Wod oko doko dwong kalamo imalaikan dedede, bala kite kame nying kame en eudo kalamo kede mergi kede bero.
- ⁵Pien malaika mene kame Rubanga otieko waco ne be, “In en Woda tin ango atieko doko Papa ni” ? Arabo bobo be, “Ango abino bedo Papa mere, di en eko bino bedo Woda” ?
- ⁶Doko da, kakame ecwao kede Wode kao i piny, en ewaco be, “Poore imalaikan ka Rubanga dedede wore.”
- ⁷En eko waco kop i kom imalaikan be, “En emio imalaikan mege doko bala yamo, kede jotie mege doko bala leb mac.”
- ⁸Do i kom Wode, en eko waco be, “Okwe Rubanga, Ajakanut ni tie pi ikar kede ikar! In ipugo jo ni i yore me ateni.
- ⁹In imaro gikame opoore, do idagi gikarac. Manono en komio Rubanga, Rubanga ni, owiri kede mo me kilel kalamo jowoti.”
- ¹⁰Doko ewaco be, “Rwot, i agege in icweo lobo, doko malo obedo tic me cingi.
- ¹¹Gin kibino rwenyo wir, do in ibino dong di itie; gin dedede kibino ti bala egoe.
- ¹²In ibino dolo gi bala ekoti, di iko lokoloko gi bala igoen. Do in ibino dong di ical kamanono, doko kuo ni da likame bino jik.”
- ¹³Do malaika mene kame en etieko waco ne be, “Bed i bada tetu cam, tuno kede kame ami inyono jokwor ni i tieni bala abanya me teno tien” ?
- ¹⁴Mam imalaikan obedo tipere kame timo tic ka Rubanga, kame en eoro pi timo tic me konyo jo kame bino udo alako?

Iburanian 2



Alako me Aura

¹Pi mano, wan miero oketunu tam wa kitek i kom gikame otiekunu winyo, tetekeny kur oparaunu tenge kiye.

²Pien ka kop kame bin imalaikan otuco oudo tie me ateni, di jo kame bin odagi winye oko udo alola kame poore ne gi,

³wan do obinunu bwot benyo benyo ka odagunu twon alako kame cal kamano? Rwot en kame bin ogeo tuco kop me alako noni, di jo kame bin owinyo kibute oko moko ne wa be en gi me ateni.

⁴Rubanga da di oko mino ijura mere ki gianena kede ki gi me isuur kede ki giaura apapat kede ki giamia me Tipo Kacil, kame bin en epopoko di lubere kede mit mere.

Ngat kame Mio wa Oudunu Alako

⁵Pien likame Rubanga oketo piny anyen kame oyaro bino i loc me imalaikan, piny kame wan otie yamo kop i kome.

⁶Do ngatamoro omoko i iwandik kacil be, “Dano obedo nyo en kame mio in iparo pire; kom dano adana en kame in iparo pire?”

⁷In imie ruom kame tie piny me ruom me imalaikan pi kare moro acecek; in ingape kede deyo kede wor,

⁸di iko keto jame dedede i loc mere.” Nan do kite kame Rubanga oketo kede jame dedede i loc ka dano, likame tie gimoro kame eweko ooko me loc nono. Bala kame nataman etie kede, likame pwodi wan oneno gi dedede di tie i loc ka dano.

⁹Do wan oneno Yesu, ngat kame oudo komio ruom apiny me imalaikan pi kare moro acecek, nataman komie deyo kede wor pi can me to kame ebeo iye, tetekeny pi kisa ka Rubanga, en ebil to pi jo dedede.

¹⁰Pien oudo etie gikame opoore pi Rubanga, ngat kame ocweo jame dedede, kede kame jame dedede tie pire, pi mino ngat kame ocako alako beno i can me to, kame oko mine edoko ngat kame oudo epoore bedo. Rubanga otimo kaman tetekeny emi jo atot nywak deyo mere.

¹¹Pien ngat kame lonyo jo, kede jo kame kotieko lonyo, gin dedede kitie kede Papa gi acel. Manoni en komio lewic likame mako Yesu pi lwongo gi be imiegu kede amiegu mege.

¹²Pien ewaco ne Rubanga be, “Ango abino tuco nyingi but imiegu kede amiegu na; abino paki i dier ekodet me jo kocokere.”

¹³Bobo ewaco be, “Ango abino keto gen na i kome.” Kede bobo be, “Neni, ango ine kede jo kame Rubanga omia.”

¹⁴Bala kame jo obedo giacwea kame tie kede remo kede ringo, Yesu da kikome oko nywako cal gi nono, tetekeny pi to mere wek eloi Sitani ngat kame tie kede twer me kelo to,



- ¹⁵di eko gonyo jo dedede kame oudo tie ipaso i pi kare me kuo gi lung pi lwooro to.
- ¹⁶Pien ateteni en likame etie paro pi imalaikan, do en etie paro pi ikwae ka Aburaam.
- ¹⁷Pi mano, en miero oudo edok cal bala imiegu kede amiegu mege i yore dedede, tetekeny ebed Ngatel Josaseredoti, kame ngakisa kede kame genere i tic ka Rubanga, me wek ebed giayala kame kwanyo dub me jo.
- ¹⁸Pien bala kame eda kikome eneno kede can doko ebeo i aomacuny, en ekaruno konyo jo kame beo i aomacuny.

Iburanian 3

Yesu Pire Dwong kalamo Musa

- ¹Pi mano, imiegu kede amiegu na, wun jokacil kame nywako lwongo ka Rubanga, tamunu ber kong i kom Yesu, ngaor kede Ngatel Josaseredoti me yei kame wan otuco.
- ²En oudo egenere but ngat kame oyere, bala kame Musa da oudo genere kede i ot ka Rubanga.
- ³Aso di Yesu poore bedo kede deyo kame kalamo me ka Musa, bala kite kame ngager ot udo kede wor kame kalamo ot kikome.
- ⁴(Pien ot acelacel ngatamoro en kame gero, do Rubanga en kame gero jame dedede.)
- ⁵Aso Musa oudo genere i ot ka Rubanga bala ngatic, pi mino ijura i kom kop kame oudo Rubanga bino yamo i kare me anyim.
- ⁶Do Kirisito genere i tic me lono ot ka Rubanga bala Wode. Wan otienyu ode ka omokunu kitek i kom nwangcuny kede i kom ngec aber i kom gen wa.

Jo ka Rubanga bino Wei

- ⁷Pi mano, bala kame Tipu Kacil waco kede be, “Kame iwinyunu dwan Rubanga tin,
- ⁸kur ibedunu kede tekwic bala kame bin joakwari wu ojemo kede, i ceng kame kitama kede i tim.
- ⁹Gin kitama ki kuno, bed bala oudo kineno tice kame ango abedo timo pi mwakini ot ongwon.
- ¹⁰Pi mano, lwak nono oko wango cunya di ako waco be, ‘Gin nakanaka tam gi parao tenge kibuta, gin kidagi lubo yote na.’
- ¹¹Ango oudo alilo ako kwongere be, ‘Gin likame kibino donyo i wei na.’ “
- ¹²Imiegu kede amiegu na, gwokerenu tetekeny kur ngatamoro kikom wu bed kede cuny arac, cuny kalikame yei, kame parao tenge kibut Rubanga kakuo.
- ¹³Do konyerenu kenu kenu ceng dedede, tek ka kolwonge be “Tin”, tetekeny kur ngatamoro kikom wu bed ngaepali pi angalo me dub.



¹⁴Pien wan dedede onywakunu kede Kirisito ka omokunu kitek tuno i ajikini i kom gen atek kame bin otienu kede i agege.

¹⁵ Pien iwandik kacil waco be, “Ka iwinyunu dwan Rubanga tin, kur ibedunu kede tekwic bala kame bin joakwari wu ojemo kede.”

¹⁶ Aso, alu igonogo kame bin owinyo dwan Rubanga di kiko jemo ne? Mam gin oudo kibedo jo kame bin oyai ki Misiri di Musa en kame telo gi?

¹⁷Do alu en kame bin owango cunye pi mwakini ot ongwon? Mam jo kame bin odubo igonogo, kame oko to i tim?

¹⁸Doko alu en kame bin Rubanga okwongere i kom gi be likame kibino donyo i wei mere? Mam jo kame bin odagi winyo kop mere igonogo?

¹⁹Aso wan oneno be gin likame kiko twero donyo i piny nono pien oudo likame kiyei.

Iburanian 4

¹Pi mano, bala kame cikere ka Rubanga pi donyo i wei mere pwodi tie meede kede, poore ogwokerenu tetekeny kur tuno iye loi ngatamoro kibutu.

²Pien wada otiekunu winyo Kop Aber bala gida; do kop kame gin kiwinyo likame oko konyo gi, pien likame gin kigame kede yei.

³ Pien wan jo kame otiekunu yei, obinunu donyo i wei nono, bala kame Rubanga owaco be, “Bala kame bin akwongere kede wangcuny be, ‘ Likame kibino donyo i wei na.’ “ En ewaco kaman bed bala tice mege bin otiek i kare kame ecweo kede piny.

⁴ Pien karamoro i iwandik kacil waco kop i kom ceng me kanyaare be, “Di i ceng me kanyaare Rubanga oko wei ki tice mege dedede.”

⁵ Doko i kanono da, ewaco be, “Likame kibino donyo i wei na.”

⁶Aso bala kame yongayo pwodi oyabere kede ne jo mogo pi donyo iye, kede da pi kite kame jo kame bin ogeo winyo kede Kop Aber likame oko twero donyo kede iye, pien gin kidagi yei kop nono,

⁷ omio Rubanga bobo oko cibo ceng ace, en “Tin” . Ingei kare kalac en eko waco kope kame kotieko wandiko cen kano ki dog Daudi be, “Ka iwinyunu dwan Rubanga tin, kur ibedunu kede tekwic.”

⁸ Pien ka koto oudo Yosua omio gi wei, koto Rubanga likame bobo oyamo i cen mere kop i kom ceng ace.

⁹Pi mano, bala kame etie kede, jo ka Rubanga pwodi odong di kitie kede wei me Ceng Sabato.

¹⁰ Pien ngat kame donyo i wei ka Rubanga woraro ki tice mege bala kame Rubanga da owe kede ki tice mege.



¹¹Pi mano, otamakinunu kede teko dedede pi donyo i wei nono, tetekeny kur donyo iye loi ngatamoro pi bedo abongo wor bala bin gin.

¹²Ateteni kop ka Rubanga kuo doko etio kitek, en ebit kalamo epima kame bit tuni tuni. En ecobo paka tuno i apokini me cuny kede tipo, kede me kariamo me cogere kede isum, doko epoko par kede mit abeco kede areco me cuny jo.

¹³Doko likame tie giacwea moro kame okanere ki nyim Rubanga, do en eneno gi dedede di tie ilererei i nyime. En nono en kame miero wan dedede onyut tice wa i nyime.

Yesu en Ngatel Josaseredoti kame Dwong Kalamo

¹⁴Pi mano, bala kame otienu kede Ngatel Josaseredoti kame dwong kalamo, en Yesu Wot ka Rubanga, kame otieko ot paka i nyim Rubanga, poore do omokunu kitek i kom yei wa kame otucunu.

¹⁵Pien likame wan otienu kede Ngatel Josaseredoti kalikame kisa twero mako i kom wa pi goro wa, do en etie ngat kame kotamo i yote dedede bala wada, do di likame en eko dubo.

¹⁶Pi mano, poore onyikunu iyapiyapi kede kom me kisa ka Rubanga kede nwangcuny, tetekeny etim ne wa mwol di okounu udo kisa kame bino konyo wa i kare kame emitere ne wa kede.

Iburanian 5

¹Ngatel Josaseredoti acelacel koyere kikom jo di oko kete timo tic akaka gin i nyim Rubanga, pi mino giamia kede giayala pi dub.

²Bala kame eda udo etie kede goro i nyim Rubanga, en etwero bedo kede mwolo but jo kame kwia piny kede kame tarasar.

³ Pi manoni, en miero emi giayala pi dub mege kame make, karacel kede pi dub me jo da.

⁴ Doko likame tie ngatamoro kame yerere kene pi bedo Ngatel Josaseredoti, do Rubanga en kame lwonge bala bin Aroni.

⁵ Iepone acel nono da, Kirisito likame bin otingere kene pi bedo Ngatel Josaseredoti, do Rubanga en kame bin oyere, ngat kame bin owaco ne be, “In en Woda, tin ango adoko Papa ni.”

⁶ En bobo ewaco i karamoro ace be, “In itie ngasaseredoti ikar kede ikar, kame tie ngaluny ka Melkisedeki i tic mere me ngasaseredoti.”

⁷ I kare kame oudo ekuo kede kome i piny kan, Yesu olego kede dwan amalo kede pige wange, di ekwao Rubanga ngat kame oudo twero lake ki to. Rubanga oko winye pi mwolere mere bute.



⁸Bed bala en oudo ebedo Wot ka Rubanga, en epwonyere bedo ngat kame wor pi can kame ebeo iye.

⁹Kakame omie edoko kede ngat kame oudo en epoore pi bedo, en eko doko ngat kame alako kame bedo nakanaka ne jo dedede kame yei kop mere wok kibute,

¹⁰ingei Rubanga mine bedo Ngatel Josaseredoti kame tie ngaluny ka Melkisedeki i tic mere me ngasaseredoti.

Ikwenyar i kom Weko Yei

¹¹Wan otie kede kope atot kame miero oyam i kom kop noni, do gonyo gi tek pien niang wun odoko titidi.

¹²Pien bed bala i kare kanataman oudo wun ipoorenu do bedo jopwony, do pwodi emitere ne wu pi ngatamoro mino wu pwony me agege me kop ka Rubanga. Pwodi emitere ne wun pi pito wu kede cak, do likame kede cam anwang.

¹³Pien ngat kame kuo kede cak udo en pwodi mukeru, doko eli kede ngec i kom gikaber kede gikarac.

¹⁴Do cam anwang tie pi jo kocato, jo kame tam gi otieko pwonyere di kiko nao poko gikaber kede gikarac.

Iburanian 6

¹Pi mano, omeedenu anyim pi bedo jo kocato, do weko dong i kom pwony me agege kenekene kame mako Kirisito. Kur bobo odokunu nyogao pwony me agege kame mako iswilar ki tice kame kony gi li, kede kame mako bedo kede yei i kom Rubanga;

²i kom kop kame mako batisimu, dokakino bad, iyarun me jo oto kede ngolo kop kame bedo nakanaka.

³Ka Rubanga oyei, obinunu timo manoni.

⁴Pien dwoko jo opoto ki yei gi pi mino gi swilaro tek, jo kame oudo kong otieko bedo i lero, jo kame obilo udo giamia kame wok ki malo kede jo kame bin oudo Tipo Kacil.

⁵Gin jo kame bin obilo bero me kop ka Rubanga kede twer me kare kame bino bino.

⁶Dwoko gi bobo pi mino gi swilaro tek pien gin kitie guro Wot ka Rubanga i kom musalaba di kimie lewic i nyim jo.

⁷Pien Rubanga mio winyo i lobo kame mato kot kacwei iye nakanaka, di en eko ceko giapita kame tie kede kony but jo kame kotie pure pirgi.

⁸Do ka okuto kede ocokocok en kame maro tui iye, kony mere udo li, doko udo Rubanga oyapuno lame; ajikini mere en wange kede mac.

⁹Jo na kame amaro, akadi bed bala wan oyamo kaman, do ki tetu butu, wan ongego kiber be wun itienu kede gikame beco kalamo, gikame makere kede alako wu.



¹⁰Pien Rubanga timo gi dedede i yore me ateni; man bino mino likame wie wil kede tic kede amara kame wun inyutunu pire, i tic me konyo jo mege, bala kame pwodi itienu timo.

¹¹Wan cuny wa mito be ngat acelacel kikom wu poore meede keto cunye iepone noni tuno i ajikini, tetekeny iudunu gikame iketunu iye gen wu.

¹²Man bino mino likame ibedunu kede wackom, do ibinunu bedo jo kame lubo ekite me jo kame udo gikame Rubanga ocikere mino pi yei kede pi dire gi.

Cikere me Ateni me ka Rubanga

¹³Kakame bin Rubanga omio kede cikere mere but Aburaam, kite kame oudo eli kede ngat kame dwong kalamo en kame koto oudo ekwongere i nyinge, omio en eko kwongere kene

¹⁴ di ewaco be, “Ateteni ango abino mini winyo, di ako mini ikwae atos.”

¹⁵Kikano, Aburaam oko bedo kede dire di eko udo gikame Rubanga oudo ocikere pi mine.

¹⁶Jo kwongere di kilwongo nying ngat kame pire tek kalamo gin, doko ikwong gi tie gikame moko kop, kede kame jiko piem dedede.

¹⁷Iepone nono da, kakame bin Rubanga mito nyuto kede kiber ne jo kame oudo poore udo gikame en ecikere iye be, likame en oudo ebino loko iik mere, omio en eko moko cikere mere kede ikwong,

¹⁸tetekeny i jamini are kalikame lokere, kede kalikame Rubanga romo bedo kede angalo iye, en cikere kede ikwong mere, wek oudunu nwangcuny, wanunu jo kame otiekunu ringo bute gwokere iye.

¹⁹ Wan otienu kede gen noni bala gikame gwoko kuo wa. En etie gen me ateni doko likame eyangere, en gen kame pororo kalamo egoe kame poko yi tempulo di eko tuno kabedo kacil,

²⁰ kakame Yesu otieko ot iye bala ngat kame otelo ne wa yongayo, di en eko doko Ngatel Josaseredoti me ikar kede ikar, kame lunyo wang Melkisedeki i tic mere me ngasaseredoti.

Iburanian 7

Ngasaseredoti Melkisedeki

¹ Melkisedeki oudo obedo abaka me Salem, doko oudo etie ngasaseredoti ka Rubanga Ngamalo Twal. En bin eriamo kede Aburaam di tie dwogo ki yi kame ebwono kiye abakai, di eko mino Aburaam winyo.

²Aburaam di oko poko ne acel me tomon me jame dedede kame oudo ekelo ki yi. Me agege mere nying Melkisedeki dwong mere be “abaka kame timo gikame opoore” ; doko da pi kite kame en oudo etie kede abaka me Salem, dwong me nyinge da bobo en “abaka kame kelo mulem.”



³Likame tie gimoro kame mio ngec i kom papa arabo toto amoto joakwari ka Melkisedeki; likame tie ngec moro i kom ceng me nywale arabo ceng me to mere, do en edong di etie ngasaseredoti ikar kede ikar, bala Wot ka Rubanga.

⁴Nenunu kite kame pire dwong kede. Aburaam kwaru wa me agege bin omie acel me tomon me jamini dedede kame bin ekelo ki yi.

⁵Doko ikwae ka Lebi kame obedo josaseredoti, Iswil ciko gi pi gamo acel me tomon kikut jo me Isirael, kame obedo imiegu kede amiegu gi, bed bala jo nogi da obedo ikwae ka Aburaam.

⁶Do Melkisedeki ngat kalikame oudo obedo akwar Lebi ogamo acel me tomon kikut Aburaam di en eko mino Aburaam winyo, ngat kame bin Rubanga omio cikere mere bute.

⁷Likame tie bobo piem moro i kom kop kame waco be, ngat kame pire dwong en kame mio ngat kame pire titidi winyo.

⁸Ki bad me Jolebi, jo ajoa kame to en kame gamo acel me tomon, do i me ka Melkisedeki, ngat kame kuo en kame gamo acel me tomon.

⁹Aso, koromo tero be, i kare kame bin Aburaam okwanyo kede acel me tomon, Lebi da, ngat kame gamo acel me tomon, bin oculo acel me tomon,

¹⁰pien oudo pwodi en etie i remo ka kwaru mere Aburaam, kakame Melkisedeki oriamo kede Aburaam.

¹¹Aso, ka josaseredoti me Jolebi bin otimo gi dedede kakare (pien bin komio jo me Isirael Iswil i wang tic gin), nyo ace kame oudo doko pwodi mitere pi ngasaseredoti ace apat bobo bedo tie, kame tie ngaluny ka Melkisedeki i tic mere me ngasaseredoti, do weko ngaluny me tic ka Aroni me ngasaseredoti?

¹²Pien ka alokaloka obedo tie i tic me josaseredoti, poore Iswil da bed tie kede alokaloka.

¹³Pien ngat kame kotie yamo kope nogi i kome obedo dano me ateker apat, kalikame pwodi tie ngatamoro kame owok kiye pi timo tic i alutari bala ngasaseredoti.

¹⁴Pien etie kakaler be Rwot wa owok kiye ateker ka Yuda, do Musa likame oyamo kop moro i kom ateker noni, kame makere kede kop me josaseredoti.

Ngasaseredoti Ace kame cal bala Melkisedeki

¹⁵Kop noni nan do medo ngere kiber. Ngasaseredoti ace apat kame cal bala Melkisedeki otieko bino.

¹⁶Likame en edoko ngasaseredoti di lubere kede ateker mere, bala kame iswil mito, do en edoko ngasaseredoti pi twer me kuo kame bedo nakanaka.

¹⁷Pien iwandik kacil waco kop i kome be, “In itie ngasaseredoti me ikar kede ikar, ngaluny ka Melkisedeki i tic mere me ngasaseredoti.”



- ¹⁸Pi mano, koweko cik kasek pien oudo egoro, doko kony mere oudo li;
- ¹⁹pien likame tie gimoro kame Iswil omio obedo kakare. Do nan komio wa gen aber, kame mio wa onyiko odoko iyapiyapi kede Rubanga.
- ²⁰Medo i wi mano, Rubanga bin okwongere i kome. Jo kame bin ogeo doko josaseredoti odonyo i wang tic gi abongo ikwong moro,
- ²¹do Rubanga okwongere i kom Yesu pi doko ngasaseredoti di ewaco be, “Rwot otieko kwongere doko likame ebino loko tam mere be, ‘ In ibino bedo ngasaseredoti ikar kede ikar.’ “
- ²²Manoni mio isikan kame Yesu obedo ngat kame moko kalamo kede bero.
- ²³Josaseredoti me agege oudo tot pien oudo to gengo gi meede kede tic gi nakanaka.
- ²⁴Do Yesu tie ngasaseredoti me ikar kede ikar, piento en ekuo nakanaka.
- ²⁵Pi mano, i kare dedede en etwero lako jo kame nyiko bedo iyapiyapi kede Rubanga di kibeo kibute, piento en ekuo nakanaka pi ngangao Rubanga pirgin.
- ²⁶Pien oudo etie gikame poore, pi wan bedo kede Ngatel Josaseredoti kacal kamanoni, en ebedo ngat kacil, kame li kede raco moro arabo dub moro, kame kopoko tenge kibut jodubo di oko tinge kotere malo.
- ²⁷En likame ecal bala Jotel Josaseredoti apat, pien likame emitere ne en pi mino giayala ceng dedede, me agege pi dub mege, kede da pi dub me jo. En bin emio giayala tien acel atwal, kakame emio kede kuo mere bala giayala.
- ²⁸Ateteni Iswil keto jo kame tie kede goro pi bedo Jotel Josaseredoti, do kope me kwongere ka Rubanga, gikame obino ingei bino me Iswil, oketo Wode pi bedo Ngatel Josaseredoti, en ngat kame komie ebedo ngat kame timo gi dedede kakare ikar kede ikar.

Iburanian 8

Yesu en Ngatel wa me Josaseredoti

- ¹Gikame pire tek i kop kame wan otie waco en ine be, wan otienu kede Ngatel Josaseredoti kame cal kamano, kame tie bedo i bad tetu cam me kom me ajakanut ka Rubanga i malo.
- ²En etimo tic mere i kabedo kacil kede i taberenakol me ateni, kame Rwot en kogero do weko dano.
- ³Pien Ngatel Josaseredoti acelacel koyere pi mino giamia kede giayala but Rubanga, en komio ngasaseredoti noni da poore bedo kede gikame emio but Rubanga.
- ⁴Aso, ka koto oudo en etie i lobo kan, koto likame ebedo ngasaseredoti atwal atwala, pien tie josaseredoti kame mio giamia bala kame Iswil mito.



⁵ Gin kitimo tic i kabedo kacil kame obedo apor kede cal me kabedo kacil me i malo; pien bin di oudo Musa mito gero taberenakol, Rubanga oko waco ne be, “Nen be itimo gi dedede di cal bala kame konyuto ni i wi moru.”

⁶Do nan Yesu tie kede tic kame ber kalamo mergin, bala kame isikan kame en ecungo pire i dierediere ka Rubanga kede jo en kame ber twatwal, pien isikan nono cungo i cikere me gikame beco kato.

⁷Pien ka koto di isikan me agege oudo li kede raco moro, koto oudo likame emitere pi mono isikan me are mere.

⁸Do Rubanga udo raco i kom jo mege, en omio ewaco be: “Rwot owaco be, ceng tie bino, kame ango abino timo kede isikan kanyen kede jo me Isirael karacel kede jo me Yuda.

⁹Likame ebino bedo cal bala isikan kame bin atimo kede joakwari gi, i ceng kame ango oudo amako kede cing gi di ako telo gi wok ki piny me Misiri. Gin bin likame kiko bedo jo kame genere i gwoko isikan kame ango atimo kede gi nono, omio ango likame ako paro pirgi.

¹⁰Rwot owaco be, isikan kame ango abino timo kede jo me Isirael i kare kame bino bino en ine: Ango abino keto iswilia na i tam gi kede ako wandiko gi i cuny gi, di ango ako bino bedo Rubanga gi, kede gida kiko bino bedo jo na.

¹¹Di likame tie ngatamoro kame ko bobo bino pwonyo dano ngawote, arabo pwonyo omin mere di ewaco ne be, ‘ Ida ngei Rwot.’ Pien gin dedede kibino ngena, cako kibun jo me ruom apiny tuno kede but jo me ruom amalo.

¹²Pien abino bedo kede cuny me kisa but gi pi gikareco gi; di ako bino mino wia wil kede dub gi.”

¹³Pi kite kame eyamo kede kop i kom isikan kanyen, Rubanga otero isikan kasek bala gikame kare mere do okato. Doko gikame kare mere okato di etie ti udo eyapuno do rwenyo.

Iburanian 9

Kabedo Kacil me wi Lobo kede me i Malo

¹Aso, akadi isikan me agege da oudo tie kede iswilia mogo kame mako epone me woro Rubanga, doko da oudo etie kede kabedo kacil me wi lobo kan.

²Pien bin kogero taberenakol, manoni en kame tie i ooko, kame kolwongo be Kabedo Kacil. Oudo tie iye gi me cibo italan, emesa kede mugati kame komio Rubanga.

³Ingei egoe me are mere kame poko isenge, oudo tie iye taberenakol kame kolwongo be Kabedo Kacil Kalamo.

⁴Kanono oudo tie iye alutari kame kotimo kede saabu, me wango bubani kede da oudo tie iye Sanduku me Isikan, kame kome dedede oudo obedo saabu. I sanduku



noni oudo tie iye jagi kame koketo iye emanu, ebela ka Aroni kame oudo olot, kede kide me isikan kame oudo kowandiko iye cik.

⁵ Malo i wi sanduku nono oudo tie iye Cerubim me deyo, kame oudo umo kabedo me kisa. Do wan nataman likame otwero tatamo kop i kom gi nogi i yore i yore.

⁶ Manoni en epone kame bin koiko kede gi nogi. Bin josaseredoti donyo i taberenakol kame tie ooko ceng dedede pi timo tice gi,

⁷ do Ngatel Josaseredoti en kame donyo i me are me yie tien acel mwaka. En etero iye remo kame eyalo ne Rubanga pire kede pi dub me jo.

⁸ I gi nogi, Tipo Kacil nyuto kakaler be, pwodi likame koyabo yongayo kame donyo kabedo kacil, tek kame taberenakol me ooko pwodi tie cungo.

⁹ Manoni en gikame oudo tie cal kame nyuto kare kanataman. Di lubere kede iik noni, giamia kede giayala kame komio but Rubanga, likame karuno temuno cuny ngat kame tie woro Rubanga,

¹⁰ pien gin kimako kop i kom cam kede giamata, kede itok apapat me lonyere. Magi obedo iswilia kame makere kede kom, kame tie tic paka tuno i kare kame Rubanga bino timo kede alokaloka anyen.

¹¹ Do nataman Kirisito otieko bino bala Ngatel Josaseredoti kame okelo bero kame wan otiekunu neno, en etieko beo ki taberenakol kame pire tek, kame tie kakare (kalikame kotimo kede cing, dwong mere be likame en ebedo giacwea me piny kan),

¹² di en eko donyo Kabedo Kacil Kalamo tien acel atwal. En likame etero iye remo me diegi kede me itobai, do en etero remo mere kikome, di eko kelo alako kame bedo nakanaka.

¹³ Pien ka kikiro remo me diegi kede me twonin kede buru me atakito i kom jo komunaun, mio kom gi lonyere,

¹⁴ remo ka Kirisito do bino lonyo cunyu ki tice kame kony gi li kalamo mano tien adi, tetekeny itimunu tic ne Rubanga kakuo, en ngat kame etieko mino kuo mere but Rubanga abongo pwokere moro pi Tipo kame bedo nakanaka!

¹⁵ Pi mano, en ebedo ngat kame rucakino Rubanga kede jo i isikan kanyen, tetekeny jo kame Rubanga olwongo ud winyo kame bedo nakanaka kame en ecikere pi mino. Man twerere pien to otieko timere kame lako jo ki turo iswil kame oudo kitimo i kare me isikan kacon.

¹⁶ Pien i kom kop kame mako iwandik kame nyuto epone me tic kede jame me ngat oto, mito ber kong mok be dano komio iwandik nono otieko to.

¹⁷ Pien epone me iwandik nono geo tic ingei to, en likame etwero cako tic di pwodi ngat kowandiko en tie kuo.

¹⁸ Pi mano, akadi isikan me agege da bin komoko kede remo.



¹⁹ Pien bin kakame Musa otieko waco ne kede jo dedede cik me Iswil, en bin eko kwanyo remo me itobai kede me diegi, kede pii kede ausi akwar me yer kede yat kame cal bala emompir, di eko kikiro remo nono i kom itabu me Iswil kede i kom jo dedede,

²⁰ di ewaco be, “Man en remo me isikan kame Rubanga ociko wu pi lubo.”

²¹ Iepone acel nono da, en eko kikiro remo i kom taberenakol kede i kom jame dedede kame kotio kede i woro Rubanga.

²² Ateteni, bala kame Iswil mito, jame dedede kolonyo kede remo, doko sasiro dub likame timere abongo ony me remo.

Kirisito en Giayala kame Kwanyo Dub

²³ Aso, jamini nogo kame obedo cal me jamini me malo, oudo miero lony gi iepone nono, do jamini me malo miero lony gi kede giayala kame beco kalamo magi.

²⁴ Pien likame Kirisito otieko donyo i Kabedo Kacil kame cing dano en kotimo, kame obedo cal me maca me ateni, do en edonyo malo kikokome, kakame nataman etie iye i nyim Rubanga pirwa.

²⁵ Likame en etie kuno pi yalere but Rubanga nakanaka, bala kame Ngatel Josaseredoti donyo kede Kabedo Kacil Kalamo mwaka acelacel kede remo kalikame obedo mere;

²⁶ pien ka koto oudo tie kamanono, koto oudo ebedo neno can kare i kare cako ki agege me piny. Do bala kite kame etie kede, en etieko nyutere kicel atwal i kare noni me ajikini, pi yalere tetekeny ekwany dub.

²⁷ Doko bala kame kotieko iiko ne kede jo pi to kicel atwal, di do ngolo kop ko lubo,

²⁸ kamanono da, ingei yalo Kirisito kicel pi kwanyo dub me jo atot, en ebino bobo neeno tien me are, likame pi kop kame mako dub, do pi lako jo kame tie kure kede imue.

Iburanian 10

¹ Bala kame iswil obedo kede cal me gikame beco kame bino bino, do weko ginogo kikokome, likame etwero temuno jo kame bino but Rubanga pi giamia kame koyalo bute mwaka i mwaka nogo.

² Pien ka koto tie kamanono, mam koto do kotieko jiko yalo gi? Pien ka koto di oudo kotieko lonyo jo kame woro Rubanga tien acel atwal, koto likame bobo gin kimeede ngeno i cuny gi be gin kidubo.

³ Do bala kame etie kede, giayala nogi poo wi jo i kom dub gi mwaka acelacel.

⁴ Pien remo me twonin kede me diegi likame twero kwanyo dub.

⁵ Pi mano, kakame Kirisito obino kede i piny, en eko waco be, “In likame imito giayala kede giamia, do in iketo na koma.



- ⁶Giamia me awanga kede giamia pi dub likame yomo cunyi.
- ⁷Di do ango ako waco be, ‘Neningo, Rubanga, ango atieko bino pi timo mit nin, bala kame kowandiko kede kop i koma i itabu me Iswil.’ “
- ⁸Me agege en ewaco i malo kano be, “In likame cunyi mito giayala, kede giamia, kede giawanga, kede giamia pi dub, doko likame kiyomo cunyi” (magi dedede komio but Rubanga bala kame Iswil mito).
- ⁹Di en eko meede be, “Neningo ango atieko bino pi timo mit nin.” Pi mano, en ekwanyo tenge giayala me agege, di eko lunyo gi kede me are.
- ¹⁰Doko pi mit mere nono, wan kotieko lonyo wa pi giamia me kom Yesu Kirisito kame kotieko yalo tien acel atwal.
- ¹¹Ngasaseredoti acelacel cungo timo tic mere ceng acelacel di eruruco mino giayala acel nono kalikame twero kwanyo dub.
- ¹²Do kakame Kirisito otieko mino kede giayala acel kenekene pi dub tien acel atwal, en eko bedo i bad tetu cam ka Rubanga.
- ¹³Cako i kare nono, en etie daro Rubanga pi mine nyono jokwor mege i tiene bala abanya me teno tien.
- ¹⁴Piento en emio giayala kicel kenekene di eko temuno pi kare lung jo kame kotieko lonyo.
- ¹⁵Doko Tipo Kacil da mio wa ijura i kom kop noni, pien me agege en ewaco be,
- ¹⁶“Man en isikan kame ango abino timo kede gi kame kare nono otuno, Rwot en owaco: Ango abino keto iswilia na i cunyi gi, di ako wandiko gi i tam gi.”
- ¹⁷Doko en eko medo be, “Likame bobo abino yutuno dub gi kede tim gi areco.”
- ¹⁸Aso, kame kotieko sasiro dub nogi, likame bobo pwodi komio giayala moro pi dub.

Poore Onyikunu but Rubanga

- ¹⁹Pi mano, imiegu kede amiegu na, bala kame otienu kede gen atek me donyo i Kabedo Kacil Kalamo pi remo ka Yesu,
- ²⁰piento en etieko yabo ne wa yongayo anyen kakuo, kame pelao egoe kame poko isenge, manono en kome;
- ²¹kede bala kame otienu kede ngasaseredoti kame pire dwong, kame lo ot ka Rubanga,
- ²²wek do onyikunu but Rubanga kede cunyi me ateni kede yei kame genere, di otienu kede cunyi kotieko lonyere ki ngec me timo gikarac kede di kotieko lwoko kom wa kede pii acil.
- ²³Poore olidunu kitek gen kame otucunu abongo riarianga; pien Rubanga ngat kame ocikere genere.



- ²⁴Doko poore omounu epone me mino ngat acelacel bedo kede amara kede tice abeco,
- ²⁵di likame owekunu ariamakin karacel, bala kame jo mogo onao timo. Do poore idiunu cuny ngat acelacel, twatwal mere pi kite kame nan inenunu kede Ceng nono tie do noko.
- ²⁶Pien ka wan omeedenu timo dub akaa ingei wan ngeno ateni, likame tie giayala moro kame odong kame bino kwanyo dub wa,
- ²⁷ do gikame odong do en lworu me ngolo kop kede mac ager kame bino wango jo kame dagi Rubanga.
- ²⁸ Ngatamoro kame turo Iswil ka Musa, koneke abongo kisa, ka jo are arabo adek omio ijura be etimo kamanono.
- ²⁹ Iparunu be ngat kame cao Wot ka Rubanga, kede kame pwoko remo me isikan kame kolonye kede, doko kame yeto Tipo me kisa, alola mere bino do bedo dwong benyo?
- ³⁰ Pien wan ongeu ngat kame bin owaco be, “Tic me culo kwor en mera; ango abino culo” ; kede doko be, “Rwot bino ngolo ne jo mege kop.”
- ³¹Etie gi me lworu pi poto i cing Rubanga kakuo.
- ³²Yutununu kong kare kokato, i kare kame bin iutenu kede can di ikanyakinunu, ingei wun bedo kede lero ka Rubanga.
- ³³I kare mogo oudo koyeyeto wu di kotidilo wu i nyim jo; kede i kare mogo inywakunu can kede jo kame kotimo ne gi kamanoni.
- ³⁴Pien wun oudo itienu kede cuny me isasir i kom jo kame oudo kotweo i otkol, doko kede yomcuny iyeunu koyako jame wu, pien wun oudo ingeunu be wun kikomu oudo itienu kede gimoro kame ber kalamo, kame bedo nakanaka.
- ³⁵Pi mano, kur iucunu tenge gen atek kame itienu kede, kame tie giamia me pwoc adwong.
- ³⁶Pien emitere ne wu pi kanyakino, tetekeny itwerunu timo gikame Rubanga mito di ikounu udo gikame ecikere pi mino.
- ³⁷ Pien iwandik kacil waco be, “Odong kare acecek di ngat koyaro bino ko bino bino; en likame ebino gal.
- ³⁸Do jo na kopooore bino bedo kede yei di kiko kuo; do ka ngatamoro kikom gi yei mere odok cen, cunya likame bino bedo yom i kome.”
- ³⁹Wan likame obedunu jo kame dok cen di kiko rwenyo atwal, do wan obedunu jo kame kotieko lako pi yei.

Iburanian 11

Dwong Kop me Yei



- ¹Bedo kede yei en kame moko gikame wan ogenunu pi udo, en ngeno kiber be gikame wan likame onenunu tie ateteni.
- ²Pien Rubanga bin opwoyo joakwari wa pi yei gi.
- ³Yei en kame mio wa oniang be bin Rubanga ocweo piny kede kop mere, tetekeny gikame nan neeno bin kotimo ki gi kalikame neeno.
- ⁴Yei en kame bin omio Abel omio Rubanga giayala kame ber kalamo me ka Kain. Manono oko mino kopwoye be epoore, pien Rubanga kikome opwoyo giamia mere. Bed bala en eto, do nan pwodi en eyamo pi yei.
- ⁵Yei en kame bin omio kotero Enoka malo tetekeny kur ebil to. Bin likame en eko udere pien Rubanga oudo otieko tere. Di bin pwodi likame kotere, oudo komio ijura i kome be oudo en eyomo cuny Rubanga.
- ⁶Doko abongo yei likame tie ngatamoro kame twero yomo cuny Rubanga. Pien ngat kame bino but Rubanga, miero bed kede yei be Rubanga tie, kede be en emio giamia me pwoc but jo kame moe.
- ⁷Bin Rubanga okwenyaro Nua i kom gikame oudo pwodi likame eneno, do pi yei en eko winyo kop ka Rubanga, di eko guro yee pi lako kuo me jo me i ode. Pi yei mere noni, en eko mino kongolo kop olo piny lung di eko udo poore kame yei kelo.
- ⁸Pi Yei, Aburaam bin oyei kop ka Rubanga kakame oudo Rubanga olwonge kede pi ot i kabedo kame oudo Rubanga bino mine. En bin eko yai ot di likame engeo kakame oudo etie ot iye.
- ⁹Pi yei, bin en ebedo bala ngakumbor i lobo kame oudo Rubanga ociko pi mine, ineno bala oudo etie obukui. Bin en ebedo i kimere me eema karacel kede Isaka kede Yakobo, jo kame oudo nywako kede en cikere acel nono kame Rubanga oudo omio.
- ¹⁰Pien Aburaam oudo tie kuro bomba kame oudo tie kede acakini atek me gedo mere, kame Rubanga en opimo di eko gero.
- ¹¹Pi yei, Sara oudo twer me yac, bed bala kare mere me nywal oudo okato. Man otimere piento en oudo etero ngat kame bin omio cikere be genere.
- ¹²Pi mano, kibus dano acel, dano kame oudo rom aroma bala ngat kotieko to, ikwae owok kibus kame tot bala acerin me malo kede bala asinge kalikame marere me dog nam.
- ¹³Jo nogi dedede bin oto di oudo kitie kede yei, di likame kiudo gikame bin Rubanga ocikere pi mino, do oudo kinene anena ki kakabor di kiko pwore pire, ingei gin yei be gin kibedo jokumbor kede wele i piny kan.
- ¹⁴Pien jo kame yamo kamano nyuto kakaler be gin kitie mono piny kame obedo mergi.
- ¹⁵Ka koto oudo gin kitie paro pi lobo kame kiwok kiye, koto oudo kitwero udo kare me dok kuno.



- ¹⁶Do bala kame etie kede, gin oudo kimito piny kame ber kalamo, manono en me i malo. Pi mano, likame lewic mako Rubanga kame kolwonge be en Rubanga gi, piento en etieko iiko ne gi bomba.
- ¹⁷Pi yei, Aburaam bin oyei mino Isaka bala giayala, kakame bin kotame kede. En ngat kame bin Rubanga ocikere bute, oudo eyei pi mino wode acel kenekene bala giayala,
- ¹⁸en ngat kame bin Rubanga owaco kop i kome be, “Ikwae ni bino wok kibut Isaka.”
- ¹⁹Aburaam oudo tero be Rubanga karuno yaruno jo kikom jo oto. Pi mano, ka oporo apora, ecal bala Isaka oyaruno ki to di Aburaam oko game.
- ²⁰Pi yei, Isaka okwao ne Yakobo kede Esau winyo pi kare me anyim.
- ²¹Pi yei, bin di Yakobo tie to, en eko mino winyo but awobe ka Yosepu dedede, di ekudo wie egongo i wi ebela mere me komo di eworo Rubanga.
- ²²Pi yei, Yosepu i kare me ajikini me kuo mere oko yamo kop i kom yai me jo me Isirael ki Misiri, kede en eko yamo kop kame makere kede epone me ayika mere.
- ²³Pi yei, kakame bin konywalo kede Musa, jonywal mege oko kane pi dwete adek, pien oudo kineno be atin gi nono cil, omio gin likame kiko bedo kede lworu i kom cik kame oudo abaka omio.
- ²⁴Pi yei, i kare kame Musa odongo kede, en eko dagi be kur lwonge be wot ka nyar Parao.
- ²⁵En eko yei nywako itisilar karacel kede jo ka Rubanga akaka camo mulem pi kare moro acecek, mulem kame dub kelo.
- ²⁶En oudo etero be can kame en eneno pi Kirisito oudo obedo abar adwong kame kalamo abar me Misiri, piento en oudo eketo gen mere i kom giamia me pwoc kame ebino udo.
- ²⁷Pi yei, Musa oyai ki Misiri di likame etie kede lworu i kom gero me abaka. En ekanyakino ineno bala oudo eneno ngat kalikame neeno.
- ²⁸Pi yei, Musa otimo Ebagu me Kalamo di eko kikiro remo i wi ikekon, tetekeny Malaika kame Neko, kame oudo poore neko idwe kao kur nek idwe kao me jo me Isirael.
- ²⁹Pi yei, bin jo ongolo Nam Akwar di ineno bala kitie lubo lobo kakatek. Do bin di jo me Misiri da otamo ngolo, gin kiko mwony i pii.
- ³⁰Pi yei, apama me Jeriko bin opoto ingei jo me Isirael mamano bomba pi ceng kanyaare.
- ³¹Pi yei, Rakab, ngat kame bin obedo malaya, likame oko to karacel kede jo kame oudo dagi winyo Rubanga, piento en oudo egamo kiber jo kame oudo obino begao kuno.



- ³² Nan do amed waco benyo? Pien likame kare yei na tatamo kop i kom Gidioni, Barak, Samuson, Yeputa, Daudi, Samuel kede inabin.
- ³³ Gin jo kame bin pi yei, kiko yi kede pinye apapat di kiko lono gi, kitimo gikame opoore di kiko udo gikame oudo Rubanga ocikere pi mino. Gin kiumo dog inguon,
- ³⁴ kineko mac aliet, kibwot ki lak epima, kibedo kede teko bed bala gin oudo kigoro, kidoko joatek i yi, kimio isirikalen me kumbor oringo.
- ³⁵ Pi yei, bin komio mon joe gi kame oudo otieko to, di koyaruno gi. Bin kobungo jo ace, di kidagi be gony gi, tetekeny kitoi di kiko yaruno i kuo kame ber kalamo.
- ³⁶ Bin jo ace oneno can me anyero kede adao, kede mogo kotweo kede irikoi di oko tero gi i otkol.
- ³⁷ Kodidipo gi kede kide, mogo kobaro yi gi kede musumeno, koneko gi kede epima. Gin oudo kiririmo piny di kingapo launi me romini kede me diegi, di can omako gi. Bin kotidilo gi kede kotisilaro gi.
- ³⁸ Piny oudo likame obedo kakame poore ne gi! Gin bin kikokobo akokob i wi tim kede i mori, di kibedo i abo kede i bure kame tie i lobo.
- ³⁹ Jo nogi dedede likame oko udo gikame oudo Rubanga ocikere pi mino, bed bala kopwoyo yei gi,
- ⁴⁰ pien Rubanga oudo otieko iiko sek gimoro kame ber kalamo pirwa. En oudo emitto be kur gin kidok jo kame tie kakare bala kame poore kede, abongo wan iye.

Iburanian 12

Rubanga Papa Wa

- ¹ Pi mano, bala kame otienu kede ijurak atot rom kano kame oluko wa, poore wada owekunu gi dedede kame dio wa, kede dub kame omakakin i kom wa, di okounu kanyakino piem me ringo kame kocibo i nyim wa.
- ² Ocikunu wang wa i kom Yesu ngat kame obedo acakini me yei wa, doko en ngat kame mie ecato. En bin ekanyakino can me musalaba di lewic likame make pi kilel kame oudo kocibo i nyime, doko nan etie bedo i bad tetu cam me kom me ajakanut ka Rubanga.
- ³ Tamunu kong ekite kame en ekanyakino kede twon gero kame jodubo oudo tie kede i kome, tetekeny kur iolunu arabo cunyu kwanyere.
- ⁴ I auta wu kede dub, likame pwodi iutenu tuno ngatamoro onyo remo mere.
- ⁵ Mam wi wu otieko wil i kom kop me dino cuny kame Rubanga oyamo ne wu bala idwe mege? En ewaco be, “Atin na, kame Rwot obitaro in, kur iter bala gi me tuko, doko kur cunyi kwanyere kame emi alola.
- ⁶ Pien Rwot bitaro jo dedede kame en emaro, doko en emio atin acelacel kame en egamo bala mere alola.”



⁷Kanyakinunu can kame inenunu pien gin kitie pi bitaro wu. Rubanga tie tero wu bala idwe mege; pien atin mene en kame papa mere likame bitaro en pi pwonye?

⁸Ka eweko wu abongo bitaro wu, bala kame ebitaro kede idwe mege apat dedede, dwong mere be wun likame idwe mege kikokome, do ibedunu nywal me epae.

⁹Aso, joapapi wa me piny kan oudo bitaro wa di wan okounu bedo kede wor but gi. Mam akalamo mere miero do ojalerenu i loc ka Papa wa me cuny di okounu kuo?

¹⁰Pien joapapi wa me piny kan oudo bitaro wa pi pwonyo wa pi kare moro acecek bala kame gin oudo kineno kede be eber, do Rubanga bitaro wa pi bero wa, tetekeny onywak kede en bedo jokacil.

¹¹Pien kame kobitaro wa, wan oneno bala ebedo gikame lit do weko kame yomo cuny wa, do i cen mere en eko kelo anyakini me mulem kede kuo kopoore ne jo kame beo iye.

Pwony kede Ikwenyar

¹²Pi mano, kiaraonu bad wu alojolojo kede ikounu mino cong wu agoro dok tek,

¹³ kede irieunu yote kame tienu lubo, tetekeny gikame ongwalo kur doko wilakin, do miero do ecangi.

¹⁴Tamakinunu bedo kede anapakin kede jo dedede, kede da pi bedo jokacil, pien abongo en likame tie ngatamoro kame twero neno Rwot.

¹⁵Poore inenunu be likame tie ngatamoro kame okei udo kisa ka Rubanga, doko kur ngatamoro bed bala yat kame alias mere kec, kame ka edongo ekelo peko di eko munao jo atot.

¹⁶Nenunu be likame ngatamoro odoko ngacaro amoto ngat kame dagi woro Rubanga bala bin Esau, ngat kame bin ocato twero mere me anywali pi cam kame camere kicel.

¹⁷Pien wun ingeunu be, i cen mere di bin cunye oko mito udo winyo kibus papa mere, bin oko dagi mine, pien likame en eko twero udo kare me swilaro, bed bala oudo ekok akoka kede pige wange pi mito udo winyo nono.

¹⁸Wun likame ibinunu i gikame twero mulere, i mac kame liel birbir, kede i colo kame cucucuc, kede i buko me yamo ager,

¹⁹kede i koko me agwara, kede i dwan kame redo kitek kame omio jo kame oudo tie winye okwao be kur med yamo kede gi.

²⁰Pien likame gin bin kikaruno kanyakino cik kame oudo komio be, “Akadi ka le moro kome omulo moru, miero didipo en kede kide paka to.”

²¹Ateteni, gikame Musa bin oneno oudo tie gi me lworu, omio Musa oko waco be, “Koma tie miel kede lworu.”



²²Do wun itiekunu bino i moru me Sion kede i bomba ka Rubanga kakuo, Yerusalem kame tie i malo, kede but imalaikan kame tot tot kalikame marere, kame ocokere kede kilel.

²³Wun ibinunu i cokere me kilel me idwe kao ka Rubanga, kame kowandiko nying gi i malo. Ibinunu but Rubanga ngat kame obedo ngangolkop me jo dedede, kede but tipere me jo kopooore kame kotieko mino obedo kakare bala kame poore.

²⁴Wun ibinunu but Yesu ngat kame rucakino jo kede Rubanga i isikan kanyen, kede ibinunu i remo kame kokikiro, kame yamo kop aber kalamo remo ka Abel.

²⁵Nenunu be iwinyunu kop me ngat kame tie yamo. Pien ka gin bin likame kitwero bwot i kare kame kidagi kede ngat kame oudo okwenyaro gi ki lobo kan, wan do obinunu bwot benyo ka odagunu ngat kame kwenyaro wa ki malo?

²⁶I kare nono bin dwane oyayango lobo, do en nataman ecikere be, “Tien ace bobo ango likame abino yayango lobo kenekene do abino yayango kiton malo da.”

²⁷Kop kame waco be, “Tien ace bobo,” nyuto kakaler be kobino kwanyo gikame oyayangun, magonogo en giacwea, tetekeny gi kalikame twero yangere ko bino dong.

²⁸Pi mano, bala kame wan otienu gamo kede ajakanut kalikame yangere, poore omiunu pwoc, di okounu mino Rubanga wor kame yomo cunye di omwolerenu, kede di otienu kede lworu,

²⁹pien Rubanga wa tie bala mac kame wango piny.

Iburanian 13

Epone me Yomo Cuny Rubanga

¹Meedenu bedo kede amara kenu kenu.

²Kur iwekunu gamo jokumbor i miere wu, pien pi timo kamanono omio jo mogo bin ogamo imalaikan i miere gi abongo ngeno.

³Yutununu jo kame tie i otkol, di ineno bala wuda itienu karacel kede gi i otkol. Yutununu jo kame kotie tisilaro, di ineno bala wuda kotie tisilaro wu.

⁴Jo dedede poore mino wor i nyom, doko kur tim me emuna bed tie i apien me jo konyomere; pien Rubanga bino ngolo kop ne jocar kede joadote.

⁵Kur ibedunu kede amara atek i kom sente, do miunu gikame itienu kede rom wu, pien Rubanga owaco be, “Ango likame abino weki amoto jali.”

⁶Pi mano, wan okarununu yamo abongo lworu be, “Rubanga en ngakony na; ango likame abino bedo lwor. Nyo kame ngatamoro karuno timo na?”

⁷Yutununu jotel wu, jo kame bin owaco ne wu kop ka Rubanga; kong parunu i kom gikame epone me kuo gi okelo, di ikounu lubo epone me yei gin.

⁸Yesu Kirisito dong di cal acala, nyoro kede tin kede ikar kede ikar.



⁹Kur iyeunu pwony mogo apapat kame ikwianu rweny wu. Pien eber ka kisa ka Rubanga en kame omio cuny wa teko, do weko iswilia kame mako cam mogo, gi kalikame pwodi obedo kede kony moro but jo kame lubo gi.

¹⁰Wan otienu kede alutari kame jo kame timo tic i taberenakol likame tie kede twero me cam kiye.

¹¹Pien kom leini kame Ngatel Josaseredoti kelo remo gi Kabedo Kacil bala giayala pi dub, kowango gi ki tenge me kakame jo bedo iye.

¹²Iepone nono da Yesu da bin oneno can i ooko me bomba me wek elony jo kede remo mere.

¹³Pi mano, wada ootunu bute ooko kunono di okounu nywako kede en ayet kame en ekanyakino.

¹⁴Pien wan likame otienu kede bomba kame bedo nakanaka i lobo kan, do wan otienu mono bomba kame tie bino.

¹⁵Pi mano, omiunu Rubanga pak nakanaka bala giayala di obeunu kibut Yesu, manono tie bala anyakini me dog jo kame tucyo nyinge.

¹⁶Kur wi wu wil kede timo bero, kede nywako jame kame itienu kede; pien giayala kame cal kamagonogi yomo cuny Rubanga.

¹⁷Winyunu jotel wu di ikounu jalere i loc gi, pien gin kigwoko cunyu bala jo kame bino tatamo i nyim Rubanga epone kame kitimo kede tic noni. Poore kitim manoni kede kilel do weko kede wangcuny, pien mano likame romo konyo wu.

¹⁸Legunu pirwa, pien wan ongeyo kiber be ngec me cuny wa nyuto ne wa be, likame otie kede raco moro, doko cuny wa mito be otim gi dedede i yore aber.

¹⁹Ango akwao cunyu kitek pi timo kamanoni, tetekeny Rubanga susunyo dwoka butu.

Ilega me Ajikini

²⁰Nan ango akwao Rubanga won mulem, ngat kame bin oyaruno Rwot wa Yesu ki to, en etie Ngakwat Adwong me romini pi remo mere kame moko isikan kame bedo nakanaka.

²¹Ango akwao Rubanga won mulem emi wu gi dedede kame beco, tetekeny itimunu gikame en emitto. Akwae emi wa timo gikame yomo cunye, pi Yesu Kirisito, ngat kame deyo bed bute ikar kede ikar. Amen.

Kope me Ajikini

²²Imiegu kede amiegu na, ango akwao wu pi kanyakino winyo kope na kame supo cunyu, pien ango awandiko ne wu baluwa acecek.

²³Ango amito ingeunu be kotieko gonyo omin wa Temeseo. Ka en esusunyo bino, ango abino bino karacel kede en pi neno wu.

²⁴Motunu jotel wu kede jokacil dedede. Jo kowok ki Itali cwao ne wu amot.



²⁵Kisa ka Rubanga bed butu dedede. Amen.



Yakobo

Yakobo 1

Amot

¹ Baluwa kowok kibut Yakobo ngatic ka Rubanga kede me ka Yesu Kirisito. But atekerin tomon kiwie are kame osarakin obukui. Amoto wu.

Yei kede Rieko

² Imiegu kede amiegu na, ka ibeunu i atama moroni, terenu bala gi me kilel,

³ pien wun ingeunu be atama i kom yei wu kelo ne wu ikanyakin.

⁴ Doko wek ikanyakin wu cob tic mere kakare, me wek ibedunu jo kame tie kede iponeso kocato atwal, di likame iremunu kede gimoro.

⁵ Ka ngatamoro kibutu li kede rieko, poore ekwai Rubanga ngat kame mio jo dedede kede cunye lung abongo ingungur, di oko bino mine.

⁶ Do poore ekwai kede yei abongo gungcuny, pien dano kame tie kede gungcuny cal bala ebuka me nam kame yamo buko di tero tuni kede tuca.

^{7-8P} ien dano kame cunye gung, dano kame tie kede tam are di etagere i gi dedede kame etimo, kur egen be ebino udo gimoro kibut Rwot.

Abar kede Can

⁹ Wek ngakirisito ngacan wakere kame kotinge malo,

¹⁰ doko wek ngabar da wakere kame kodwoke piny, pien ngat kobaro bino rwenyo wir bala ature me lum.

¹¹ Pien ceng wok di eko rieny kede lieto mere atek di eko nero lum, ature mere ko ony piny, di cilo mere ko rwenyo, kamanono da, ngat kobaro bino rwenyo wir i gikame etie wapo yore.

Atama kede Aomacuny

¹² Etie kede winyo dano kame kanyakino atama, pien kame ebwono atama, Rubanga bino mine giamia me pwoc, en kuo kame bedo nakanaka kame en ecikere pi mino jo kame mare.

¹³ Ka ngatamoro obedo kede aomacuny, kur ewac be, “Rubanga en kame tie mina aomacuny” ; pien likame gikarac karuno mino Rubanga aomacuny, doko eda kikome likame emio ngatamoro aomacuny.

¹⁴ Do dano acelacel bedo kede aomacuny kame mit mege owao cunye.

¹⁵ Di do kame mit me cuny ocato, en eko nywalo dub, kede ka dub da ocato en eko do kelo to.

¹⁶ Imiegu kede amiegu na kame amaro, kur iyeunu ngalu.



¹⁷Gi dedede abeco kame komio wa, kede giamia dedede kopoore, wok ki malo kikut Papa won lero, ngat kalikame tie kede alokaloka arabo colo moro kame timere pi lokere mere.

¹⁸Pi cobo iik mere, en eko mino kop mere me ateni okelo wa i kuo, me wek wan obed bala anyakini me agege me giacwea mege.

Winyo Kop kede Timo

¹⁹Imiegu kede amiegu na kame amaro, poore dano acelacel bed ngat kame bunyo winyo kop, do weko kame bunyo yamo amoto kame bunyo doko ger.

²⁰Pien gero me dano likame kelo gikame opoore kame Rubanga mito.

²¹Pi mano, gonyunu tenge tim me emuna kede tim areco kame nataman otany i diere wu, di ikounu gamo kede mwolo kop ka Rubanga kame koketo i cunyu, en kop kame karuno lako wu.

²²Do bedunu jo kame keto kop kame kiwinyo i tic, likame jo kame winyo awinya di kiko ngalere ken gi.

²³Pien ka ngatamoro obedo dano kame winyo kop awinya di likame eko keto i tic, en ecal bala dano kame neno cal mere i ilabura;

²⁴piento en eneno cal mere eko ot tenge di wie ko wil i kom cal mere.

²⁵Do dano kame ngico iswil kame tie kakare, iswil kame gonyo jo, di eko meede iye nakanaka, di likame eko bedo ngat kame winyo awinya kop di wie ko wil iye, do ngat kame keto kop i tic, kobino mine winyo i gikame etie timo.

²⁶Ka ngatamoro paro be en ebedo dano me edini, di likame eko tweno lebe, do di engalere kene i cunye, edini mere udo kony mere li.

²⁷Edini kacil, kalikame opwokere i nyim Rubanga Papa en ine: konyo idwe kic kede apuserun ki can gi, kede gwokere keni weko mino piny dubi.

Yakobo 2

Ikwenyar i kom Bedo kede Apokapoka

¹Imiegu kede amiegu na, bala kame itiekunu yei kede Rwot wa Yesu Kirisito, en Rwot me deyo, kur doko ibedunu kede apokapoka moro but jo.

²Pien ka dano moro kame ongapo mwola kame meny me saabu, kede igoen abeco obino i kacokere wu, di ngacan da kongapo igoen arecoreco da oko bino,

³di do wun ikounu paro pi won igoen abeco nono, di ikounu waco ne be, “Bia ibed kan,” do di ikounu waco ne ngacan be, “Cung kuno,” arabo be, “Bed piny katiena,”

⁴mam mano udo ikelunu apokapoka i diere wu kenu, di ikounu doko jongolkop kame tie kede tam areco?



⁵Winyunu, imiegu kede amiegu na kame amaro, mam Rubanga oyeru jo kame jocan i piny kan pi bedo jo kame obaro i kop me yei kede jo kame bino donyo i Ajakanut kame en ecikere pi mino jo kame mare?

⁶Do wun likame imiunu jocan wor. Mam jo kobaro en kame tie timo ne wu adiadia? Mam gin en kame kitero wu tetek ot pido wu?

⁷Mam gin en kame kicao nying me awora kame oudo komio wu?

⁸Ka ilubunu iswilia me Ajakanut ka Rubanga kame kowandiko i iwandik kacil be, “Mar ngakio ni bala kame imarere kede keni”, udo itimunu gikaber.

⁹Do ka inyutunu apokapoka udo itimunu dub, doko iswil ngolo ne wu kop be wun jotur iswil.

¹⁰Pien ngat kame gwoko iswilia dedede di eko turo acel, udo etieko turo gin dedede.

¹¹Pien ngat kowaco be, “Kur itimo adote,” en kame doko owaco da be, “Kur ineko.” Aso ka in likame itimo adote do di ineko, udo ituro iswilia dedede.

¹²Aso yamunu, doko tiunu bala jo kame kobino ngolo ne gi kop di lubere kede iswil kame gonyo jo.

¹³Pien Rubanga bino ngolo kop abongo cuny me kisa ne ngat kalikame nyuto ne jo apat cuny me kisa; do cuny me kisa dwong kalamo ngolo kop.

Yei abongo Tice udo Oto

¹⁴Imiegu kede amiegu na, kony mere nyo ka dano waco be etie kede yei, do di likame etie kede tice kame nyuto yei nono? Iparunu be yei nono twero lake?

¹⁵Ka omin wa amoto amin wa moro li kede egoe, doko di eli kede cam ceng dedede,

¹⁶di do ngat acel kibutu ko waco ne be, “Ot kede mulem, kur koyo neki, kede cami iyengi,” abongo mine gikame mitere i kuo mere, udo kony mere nyo?

¹⁷Pi mano, ka yei tie kene abongo tice mege, udo eto.

¹⁸Do ngatamoro bino waco be, “In itie kede yei, do ango atie kede tice.” Aso nyut na yei ni abongo tice ni, di ada tice na ko bino nyuto ni yei na.

¹⁹In iyei be Rubanga tie acel; mano itimo ber. Akadi jwogi da yei kamanono, doko di kom gi miel amiela.

²⁰In ngamingo ni, imito nyut ni be yei abongo tice kony mere li?

²¹Mam bin Rubanga otero Aburaam kwaru wa be ngat opoore pi tice mege, kakame bin eyalo kede wode Isaka i wi alutari?

²²Aso mam ineno be yei mere bin oupere karacel kede tice mege, doko tice mege en kame bin omio yei mere ocobere.

²³Man oko mino iwandik kacil ocobere, kame waco be, “Aburaam oyei Rubanga di oko tero be epoore.” Manoni oko mino kolwonge be adieru me Rubanga.



²⁴Aso, mam ineno be kotero dano be epoore pi tice mege, do likame pi yei kenekene.

²⁵Iepone acel nono da, mam bin kotero Rakab, dako kame bin obedo malaya bala ngat kopooore pi tice mege, kakame egamo kede jo kame bin ooro di eko mino gi kilwi kilubo yongayo ace apat?

²⁶Pien bala kame kom dano kame tie abongo tipo udo oto, kamanono da yei abongo tice udo oto.

Yakobo 3

Opoorenu Gwoko Leb wa

¹Imiegu kede amiegu na, kur jo atot kibutu dok jopwony, pien wun ingeunu be, wan jopwony kobino ngolo ne wa kop odocon kalamo jo icegun.

²Pien wan dedede ocetar, do ka tie ngat kalikame cetar i yamo mere, udo en etie dano aber kame da twero gwoko kome lung.

³Ka wan oketo mwola moro atitidi i dog asigiran tetekeny kikaruno timo gikame wan omito, wan okarununu do wiro kom gin lung ot tetu kakame wan omitunu.

⁴Ber kong nenunu emeri da: akadi bed bala en edwong twatwal doko emito yamo atek en kame kole, do ngakwang karuno wire kede tunge atitidi di eko ot kakame ngakwang mito.

⁵Aso, etie kamanono kede leb dano da, en etie dul moro atitidi do ewakere pi jamini adongodongo. Nenunu epone kame mac moro atitidi wango kede twon itela!

⁶Leb dano da cal bala mac. En ecal bala piny arac kame tie adul me kom wa, en epwoko kom wa lung, ecwinyo kuo wa lung kede mac kame wok ki mac kalikame to.

⁷Pien dano twero pugo egere me leini kede me winy dedede, kede jamini aliao alia, kede jamini abedo i pii, doko etie pugo gi da.

⁸Do likame tie dano moro kame twero pugo lebe. Leb dano obedo gimoro arac kalikame pugere, epong kede kwir kame kelo to.

⁹Wan otio kede leb wa pi pwono Rwot Papa wa, do doko otio kede da me lamo jo kame Rubanga ocweo i cal mere.

¹⁰Ilam kede winyo wok ki dog acel nono. Imiegu kede amiegu na, likame epoore bedo kamanoni.

¹¹Iparunu be wang atan acel twero molo pii aber kede pii arac?

¹²Imiegu kede amiegu na, benyo, iparunu be yat epigi karuno nyako olibeti, arabo olok karuno nyako epigi? Kamanono da atan kame molo pii arac likame twero molo pii aber.

Rieko kame Wok ki Malo



¹³Ngai kibutu en kame riek doko di etie kede niang? Ka tie ngat kame riek, poore kuo mere aber nyut tice mege kame etimo kede cuny me mwolere kame wok ki riek mere.

¹⁴Do ka itienu kede twon nyeko kede di iparunu pi kuo wu kenekene, kur iwakerenu ikounu bedo kede angalo i kom kop me ateni.

¹⁵Epone me riek noni likame wok ki malo do ebodo riek me lobo kan, weko kame Tipo mio, do kame wok kikut Sitani.

¹⁶Pien kakame nyeko kede cuny kame dano paro kede pire kene tie iye, kanono da atotolun kede tim dedede me ikiteso areco tie iye.

¹⁷Do me agege, riek kame wok ki malo cil, doko da ekelo mulem, ebodo mot, egamo tam, etie kede cuny me kisa kede anyakini me tice kabeco, eli kede apokapoka amoto ecuke akadi atitidi moro.

¹⁸Kame jo kame kelo mulem ocuo kodi me mulem, gin kibino udo anyakini me kite kopoore.

Yakobo 4

Bedo Awotin kede Piny

¹Nyo kame kelo yi kede lok i diere wu? Mam ebodo mit me kom kame tie atwomutwomun i adulion me komu?

²Wun imitunu gimoro do likame ikounu ude, di do ikounu timo nek. Doko iparunu jame me jo apat do likame itwerunu udo gi, di do ikounu cako lok kede yi. Iliunu kede gikame imitunu pien likame ikwaunu.

³Ikwaunu di likame ikounu udo pien ikwaunu i yore arac, ikwaunu gi pi tic kede gi me yomo cunyu kenu.

⁴Wun jo kalikame genere! Benyo, likame ingeunu be bedo awotin kede piny en bedo ading kede Rubanga? Pi mano, ngat kame mito bedo awotin kede piny udo edoko ngading ka Rubanga.

⁵Arabo iparunu be iwandik kacil obedo kop me nono, kame waco be, “Rubanga tie kuro kede nyeko tipo kame en eketo i kuo wa.” ⁶Do Rubanga mio wan kisa kame kalamo; bala kame iwandik kacil waco kede be, “Rubanga dagi tam me jo kame wakere, do emio jo kame mwolere kisa mere.”

⁷Pi mano, jalerenu but Rubanga. Dagunu tam ka Sitani di en eko bino ringo tenge kibutu.

⁸Nyikunu iyapiyapi kede Rubanga di eda eko bino nyikini iyapiyapi kede wu. Lonyunu cingu wun jodubo, di ikounu mino cunyu bed di cil wun jo kame tam wu okakarun.



⁹Bedunu kede cwercury, di itururunu kede di ikokunu. Wek nyero wu lokere dok iturur, kede kilel wu da lokere dok ibutur.

¹⁰Mwolerenu i nyim Rwot di en eko bino tingo wu malo.

Ikwenyar i kom Ngolo kop ne Ngakirisito Ngawoti

¹¹Imiegu kede amiegu na, kur iyamunu kop arac i kom jowot wu. Ngat kame yamo kop arac i kom ngawote, arabo ngolo ne kop, udo ewaco kop arac i kom iswil, doko da udo engolo kop ne iswil. Aso ka in ingolo kop ne iswil, udo do in itie ngat kalikame lubo iswil, do udo in do ngangolkop.

¹²Ngat kame mio iswil kede ngangolkop tie acel kenekene, en ngat kame twero lako kede neko. Do in ibedo ngai komio ingolo kop ne dano wadu?

Ikwenyar i kom Ewaka

¹³Winyunu kong ber, wun jo kame iwacunu be, “Tin amoto diki obino ot i bomba acal kaman, di oko bino tieko mwaka kuno di osubulo, oko bino udo sente,”

¹⁴do di likame ingeunu kop me diki. Kuo wu en nyo? Wun kom icalunu bala ekuna kame neeno pi esawa atitidi di eko rwenyo wir.

¹⁵Do akaka manono, ipoorenu waco be, “Ka Rubanga oyei, wan obino bedo kuo di oko bino timo gini amoto gica.”

¹⁶Do bala kite kame etie timere kede, wun iwakerenu pi tingere wu, ewaka acal kamanono kom rac.

¹⁷Pi mano, ngat kame ngeo gikaber kame poore atima do di likame en eko timo, udo edubo.

Yakobo 5

Ikwenyar but Jo Kobaru

¹Winyunu kong ber wun jo kobaru. Boroborunu koko pi can kame tie bino potu i komu.

²Abar wu otieko top, doko ajekel da otieko camo igoen wu.

³Nyal otieko mako saabu kede siliba wu. Nyal nono en kame bino bedo gikame nyuto raco wu, doko ebino camo komu bala mac. Wun itiekunu koko abar i kare kanataman me ajikini.

⁴Winyunu, jo kame otimo tic i poti wu tie koko pi egelit gi kame ingalunu gi ikounu dagi mino gi, doko koko me jo kame otimo tic me kac otieko tuno i yit Rwot me yi.

⁵Wun ibedunu i kuo ajabajaba kede yomcuny i lobo kan; itiekunu do pito komu ikounu cwe, itienu do daro ceng me ngolo wu.

⁶Wun ingolunu raco i wi dano kopooore ikounu giru neke; en likame ecere ne wu da.

Dire kede Ilega



- ⁷Imiegu kede amiegu na kame amaro, direnu tuno i dwogo ka Rwot. Nenunu epone kame ngapur daro kede kodi mere kame epito i lobo, kodi kame cunye maro. En edire tuno kede di kot me agege kede kot me cen ocwei iye.
- ⁸Wuda miero idirenu. Jinguu cunyu, pien dwogo ka Rwot odoko do iyapiyapi.
- ⁹Jo na kame amaro, kur ibedunu kede ingungur i kom jowot wu, tetekeny kur ngol ne wu kop. Nenunu ngangolkop do tie cungo i dog ekeko!
- ¹⁰Jo na kame amaro, terunu inabin kame bin oyamo i nying Rwot bala anyut me neno can kede me dire.
- ¹¹Ateteni wan olwongo jo kame bin onyuto ikanyakin gi be jowinyo. Wun itiekunu winyo epone kame bin Yobu okanyakino kede, doko itiekunu neno adwokini me gikame Rwot oko timo ne, epone me mwolo kede cunye me kisa ka Rwot.
- ¹²Do akalamo mere, imiegu kede amiegu na, kur ilaironu di ikwongunu kede nying malo amoto kede nying lobo, arabo iepone me ikwong moro ace. Do ka iyeunu be “Ebo” wek da ebed ebo i ateteni, arabo ka iyamunu be “Li” wek da ebed li i ateteni, tetekeny kur ngol raco i wi wu.
- ¹³Benyo, tie ngatamoro i diere wu kame tie neno can? Miero en ekwai Rubanga. Benyo, tie ngatamoro kame cunye yom? Poore ewer wer me pako Rubanga.
- ¹⁴Benyo, tie ngatamoro i diere wu kame tuwo? Poore elwong joadongo me ekodet me jokirisito, di gin kiko lego ne di kiwire kede mo i nying Rwot.
- ¹⁵Ilega kame kolego kede yei cango ngatuwo di Rwot ko mine eyai; doko kame oudo edubo, Rubanga bino sasiro en.
- ¹⁶Pi mano, tucunu dub wu ngat acelacel but ngawote, doko ngat acelacel poore lego ne ngawote, me wek icangunu. Ilega me ngat kopoore tie kede twer doko etio.
- ¹⁷Elia oudo obedo dano adana bala wan. En bin elego kitek be kur kot cwei, da di kot likame oko cwei i wi lobo pi mwakini adek kede dwete kanyape.
- ¹⁸Di doko en eko lego di kot oko disaun ki malo, kodere kame oudo tie i wi lobo di oko cek.
- ¹⁹Imiegu kede amiegu na, kame ngatamoro kikom wu oparao tenge ki kop me ateni, di dano ace oko dwoke,
- ²⁰miero ingeunu be dano kame dwoko ngadubo ki yongayo arac bino lako kuo me ngadubo nono ki to, doko ebino umo dub mege atutututu.



1 Petero

1 Petero 1

¹Baluwa kowok kibus Petero, ngat kame obedo ngaor ka Yesu Kirisito. But jo koringo ayela kame osasarun i adulon me Pontu, Galatia, Kapadosia, Esia kede Bisinia,

²jo kame Rubanga Papa oyero bala kame en oudo eiko kede cako sek, di eko lonyo gi kede Tipo pi bedo jo kame winyo Yesu, kede di oko bino kiro gi kede remo mere pi gin doko cil. Okwao kisa kede mulem ka Rubanga bed dwong ne wu.

Gen Kakuo

³Opwounu Rubanga Papa me Rwot wa Yesu Kirisito. Pi kisa mere kadwong, en emio konywalo wa i kuo kanyen me gen kakuo, pi iyarun ka Yesu Kirisito kikom jo oto,

⁴kede da me wek obed jo kame bino udo gi kalikame top, kalikame pwokere kede kalikame rwenyo. Manoni en gikame kokano ne wu i malo,

⁵wun jo kame Rubanga tie gwoko kede twer mere pi yei wu, tetekeny iudunu alako kame Rubanga otieko iikere pi nyuto i kare me ajikini.

⁶Lelunu pi manoni, akadi bed bala nan itienu neno can me atama apapat pi kare moro acecek.

⁷Magonogi tie timere pi nyuto ateni me yei wu. Akadi saabu da gikame karuno dubere kotame kede mac; pi mano, akadi yei wu da, gikame pire tek kalamo saabu, miero kotame kede mac, tetekeny ekaruno kanyakino. Di do ikounu bino udo pwoc, kede deyo, kede wor i Ceng kame kobino nyuto kede Yesu Kirisito.

⁸Wun imarenu akadi bed bala likame itiekunu nene, doko iyeunu en akadi bed bala nan likame inenenu. Pi mano, itienu kede kilel kalikame wacere, kilel me deyo.

⁹Pien itienu udo adwokini me yei wu, en alako me cunyu.

¹⁰Inabin kame bin omurao kop i kom kisa ka Rubanga kame oudo kobino mino wu, omoo di kipepenyo kop i kom alako noni.

¹¹Gin oudo kitamo mito ngeno ngat nono, amoto kare kame Tipo ka Kirisito kame oudo gin kitie kede tie nyuto, kakame etuco kede can kame Kirisito oudo bino kanyo, kede deyo kame bino lubo.

¹²Oudo konyuto ne gi be likame oudo kitie timo tic pirgi ken gi do piru, di lubere kede gikame nataman jo kame tuco Kop Aber owaco ne wu pi twer me Tipo Kacil kame kocwao ki malo. Gi nogi en gikame imalaikan paro pi neno.

Lwongo pi Bedo kede Kuo Kacil

¹³Pi mano, bedunu di tam wu otieko iikere cuto, kede di wi wu tio. Ketunu gen wu atwal i kom winyo kame Yesu Kirisito bino kelo ne wu i kare kame kobino nyute iye.



- ¹⁴Bala idwe kame wor, kur imiunu kuo wu lub mit kame oudo kong igeunu bedo kede pi kwina piny.
- ¹⁵Do bala kame ngat kolwongo wu tie ngat kacil, wuda kikomu bedunu jokacil iekite wu lung.
- ¹⁶Pien kowandiko be, “Bedunu jokacil, pien ango atie ngat kacil.”
- ¹⁷Aso ka ilwongunu ngat kame ngolo kop ne dano acelacel abongo apokapoka di elubo tice mege be Papa wu, miero do ibedunu kede lworu kede wor i nyime i kare lung kame itienu kede i lobo kan, kame rom bala bedo obukui.
- ¹⁸Wun ingeunu be kotimo cul me lako wu ki ikiteso kame kony gi li, kame igamunu kibut joakwari wu. Man kotimo likame kede gikame top bala siliba amoto saabu,
- ¹⁹do kotime kede remo ka Kirisito, remo kame wel mere dwong, kame cal bala me katin romo kalikame tie kede gimoro arac arabo pwokere moro i kome.
- ²⁰En oudo koyere sek di pwodi likame kocako cweno piny, do oko nyute piru i kare me ajikini noni.
- ²¹En emio wu idokunu jo kame geno Rubanga, ngat koyaruno en kikom jo oto, di oko mine deyo tetekeny wun ibedunu kede yei kede gen i kom Rubanga.
- ²²Bala kame pi wun bedo kede wor i kop me ateni, omio nataman ilonyunu cunyu ikounu bedo kede amara but imiegu kede amiegu wu i Kirisito, mito do imarerenu kenu kenu kede cunyu lung.
- ²³Pi kop ka Rubanga, kop kame kuo kede kame bedo nakanaka, wun kotieko nywalo wu idokunu jo kanyen, bala idwe kame nganywal gi likame to do weko kame nganywal gi to.
- ²⁴Pien kowandiko be, “Kom dano cal bala lum, doko deyo mere lung cal bala ature me lum. Lum ner, di ature mege ko ony,
- ²⁵do kop ka Rubanga bedo nakanaka.” Kop nono en Kop Aber kame oudo kotuco ne wu.

1 Petero 2

Kidi kame Kuo kede Ateker Kacil

- ¹Pi mano, wekunu bedo kede epone dedede me cunyu arac, kede ecuke, nyeko, kede dubo nying jo.
- ²Bala atin mukeru kame pwodi konywalo anywala, bedunu kede imue me cak kame Tipo mio, me wek emi wu idongunu ikounu udo alako,
- ³ ka ateteni wun itiekunu bilo bero ka Rwot.
- ⁴Bianu bute, en kidi kakuo, kame jo odagi, do i nyim Rubanga ebedo kidi me wel kame en eyero.



⁵Doko bala kide kakuo, wek kogeru kede ot me Tipo ka Rubanga, pi bedo josaseredoti kacil, pi mino giayala i twer me Tipo, giayala kame Rubanga yei gamo pi Yesu Kirisito.

⁶Pien kowandiko i iwandik kacil be, “Nenunu, ango atie keto kidi i Sion, kidi kame pire tek me esonda, kidi me wel kame ango ayero, likame kobino mino lewic mako ngat kame yei en.”

⁷Kibutun jo kame yei, en ebedo gi me wel; do kibun jo kalikame yei, ebino timere bala kame kowandiko be, “Kidi kame jogedo odagi olokere odoko kidi kame pire tek me esonda,”

⁸kede doko be, “En kidi kame bino getaro jo, kidi kame bino mino gi kipopoto.” Gin kigetar pien kidagi winyo kop ka Rubanga, bala kame oudo kotieko iiko ne gi kede cako sek pi timo kamanono.

⁹Do wun ibedunu ateker kame koyero, josaseredoti me Abaka, ateker kacil, jokacil kikome, me wek itucunu tice me aura me ngat kolwongo wu ki colo pi bino i lero mere me aura.

¹⁰Bin i kare moro oudo likame ibedunu jokacil, do nan wun jo mege; bin oudo likame kotimo ne wu kisa, do nan kotieko timo ne wu kisa.

Bedo bala Ipasoi ka Rubanga

¹¹Jo na kame amaro, abako doga butu bala kame nan itienu bedo i piny kan acalo wele me kumbor kame oringini kagwok, kur iyeunu donyo i mit me kom, kame nakanaka yi kede kuo me cunyu.

¹²Bedunu kede iponeso abeco i dier jo kalikame Iyudayan, tetekeny bed bala gin kiwaco kop moro i komu be wun jo kame timo tim areco, wek kikaruno neno tice wu kabeco di kiko mino Rubanga deyo i Ceng me bino mere pi ngolo kop.

¹³Pi Rwot, jalerenu i akarunikin dedede kame jo oketo, me ngapug adwong,

¹⁴amoto me jopug ace kame en eoro pi mino jo kame timo gikareco can, kede pi mino pwoc but jo kame timo gikaber.

¹⁵Pien Rubanga mito be itimunu gikaber me wek imiunu jo aming kame kwia piny lingi.

¹⁶Bedunu bala jo kotieko gonyere, do di kur imiunu gonyere wu bed gikame umo raco wu; do bedunu bala jotic ka Rubanga.

¹⁷Worunu jo dedede. Marunu imiegu kede amiegu wu i Kirisito. Lworunu Rubanga kede worunu ngapug adwong.

Gikame Can ka Kirisito Nyuto ne wa Timo

¹⁸Wun jotic, winyunu jodongo wu kede wor lung; weko jodongo kame jokisa kede kame mwol mege kenekene, do ager mege da.



- ¹⁹Pien kopwoyo dano ka ekanyo lito, di eneno can abongo gimoro arac kame etimo, pi kite kame cunye tie kede i kom Rubanga.
- ²⁰Pien bero nyo kame in iudo ka in itimo gimoro arac di oko bungu iye, di do iko kanyakino en di idio cunyi? Do ka in idio cunyi kanyakino can pi gikaber kame in itimo, mano Rubanga pwoyo.
- ²¹Kolwongo wu pi kop noni, pien Kirisito da oneno can piru, di eko weko ne wu anyut me aluba, me wek ilubunu tiene.
- ²² En bin likame etimo dub moro; kop moro me abe da likame owok ki doge.
- ²³ Di bin koyeyeto en, likame en eculo kede ayet; di bin eneno can, likame etitimo jo kame oudo tie mine neno can; do en eketo gen mere i kom ngat kame ngolo kop i ateni.
- ²⁴ En eyeo dub wa i kome i wi musalaba, tetekeny wan ojikunu dubo di okounu bedo kede kuo kopooore. Itiekunu cango pi aporeso mege.
- ²⁵ Pien oudo wun iparaonu tenge bala romini, do nan itiekunu dwogo but ngakwat, en ngat kame egwoko cunyu.

1 Petero 3

Mon kede Cwog gi

- ¹ Kamanono da, wun mon, iwinyunu cuog wu, tetekeny ka mogo kikom gi likame lubo kop ka Rubanga, kitwero lokere pi iponeso wu abongo wun yamo ne gi kop moro,
- ² pien gin kibino neno iponeso wu acil kede kuo wu me wor.
- ³ Kur itubusonu komu ki ooko i yore me kedo wic, ngapo mwolere me saabu, amoto i yore me ngapo igoen kabeco.
- ⁴ Do wek gikame tubuso wu bed kuo kokanere me cunyu, gikame cil doko kame bedo nakanaka, en kuo me mwolo kede me bedo mot, gikame obedo gi me wel i nyim Rubanga.
- ⁵ Pien mon kame bin obedo jokacil, kame oudo oketo gen gi i kom Rubanga oudo nare tubuso kom gi kamanoni, i yore me winyo cuog gi,
- ⁶ bala kame Sara oudo winyo kede Aburaam di elwonge be adwong mere. Wun itiekunu doko anyira ka Sara ka itienu timo gikaber, kede ka gimoro likame mio wu lwor.
- ⁷ Kamanono da, wun cuo, bedunu karacel kede mon wu di iparunu pirgi, di imiunu gi wor bala jo agoro, pien gin kinywako kede wu kuo kobedo giamia ka Rubanga. Manoni bino mino likame gimoro totolo ilega wu.

Neno Can pi Timo Gikame Poore



⁸Me ajikini mere, wun dedede bedunu kede cuny acel, kede da cuny me isasir but jo kame tie i peko. Marerenu bala imiegu kede amiegu i Kirisito, di itienu kede cuny me kisa kede tam me mwolo.

⁹Kur iculunu raco kede raco, arabo ayet kede ayet; do akaka manono, kwaunu winyo ne jo kame timo ne wu kamanono, pien kolwongo wu pi manoni me wek iudunu winyo.

¹⁰Pien kowandiko be, “Jo kame maro kuo aber di kimito neno kare me bero, poore kigwok leb gi ki yamo gikarac kede dog gi wek yamo kop me abe;

¹¹poore kiwek timo gikarac, di kiko donyo timo gikaber, poore kimoi anapakin di kiko wapo yore.

¹²pien wang Rwot bit i kom jo kopoore, doko ewinyo kwac gi. Do Rubanga dagi jo kame timo gikareco.”

¹³Nan do ngai kame bino timo ne wu raco ka itienu kede mit me timo gikaber?

¹⁴Do akadi bed bala itienu neno can pi timo gikame opoore, kobino mino wu winyo. Kur ilworunu gi, doko da kur cunyu poti.

¹⁵Do worunu Kirisito i cunyu bala Rwot. Bedunu di itiekunu iikere i kare dedede pi dwoko kop ne ngatamoroni kame penyo wu pi tatamo i yore i yore gen kame itienu kede;

¹⁶do di itimunu kamanono kede mwolo kede wor. Bedunu kede ngec aber me cuny, tetekeny kame koyeyeto wu, lewic bin mak jo kame yeto tice wu kabeco i Kirisito.

¹⁷Pien eber neno can pi timo gikaber, ka Rubanga mito kamanono, akaka neno can pi timo gikarac.

¹⁸Pien Kirisito da bin oneno can pi dub tien acel pi kare lung, ngat kopoore oneno can pi jo kalikame opoore, me wek ekel wa but Rubanga. En bin koneko kome do oko mine ebedo kuo i tipo.

¹⁹I kuo mere me tipo, en riki eko ot tatamo kop ka Rubanga ne tipere kame oudo kotweo bala mabus,

²⁰tipere me jo kalikame bin oyei lubo kop ka Rubanga i kare kame en bin edio kede cunye daro gi, kakame Nua oudo tie gero kede yee. Jo anonok, jo kanyauni kenekene en kame oko donyo i yee di pii oko mino gi kibwot.

²¹Manoni cimo batisimu, gikame nan lako wu, likame pien elwoko tenge cilokom, do ebedo bala kwac but Rubanga pi ngec aber me cuny. En ebedo gikame lako wu pi iyarun ka Yesu Kirisito,

²²ngat kame otieko ot i malo, nan etie i bad tetu cam ka Rubanga, di imalaikan, kede akarunikin, kede twer dedede tie i loc mere.

1 Petero 4



Kuo Kolokere

- ¹Bala kame Kirisito oneno kede can, wuda bedunu kede tam kame cal kamanono, pien ngat kame kome neno can udo ejiko timo dub,
- ²me wek itiekunu kare me kuo wu kame odong i wi lobo kan di likame bobo ilubunu mit me kom, do di ilubunu mit ka Rubanga.
- ³Wun itiekunu tero kare kame romo i timo gikame jo kalikame Iyudayan cuny gi mito timo. Oudo itimunu tim me caro, cobo mit me kom, amera, bedo i ebaga me yomcuny arac, bedo i akiba me amata, kede woro cal jwogi.
- ⁴Gin kitie kede ur pi neno be likame nan bobo wun iriberenu kede gi i tim otany me ekite me kuo arac, omio gin kiyeyeto wu.
- ⁵Do gin kibino tucu i nyim ngat kame otieko iikere pi ngolo kop ne jo kame kuo kede jo oto pinyo komio kitimo kamanono.
- ⁶Manoni en komio bin kotuco ne jo oto da ejiri, tetekeny akadi bed bala bin kongolo ne gi kop di oudo kitie kede kuo me kom bala jo dedede, wek kikaruno bedo bala Rubanga i kuo gi me tipo.

Tic kede Giamia ka Rubanga i Yore Aber

- ⁷Ajikini me gi dedede do iyapiyapi; pi mano, bedunu di igwokunu tam wu kede di wi wu tio, tetekeny ikarununu lego.
- ⁸Do akato mere, bedunu kede amara atek kenu kenu, pien amara umo dub atot.
- ⁹Bedunu jo kame gamo jo icegun i miere wu abongo ingungur.
- ¹⁰Bala kame ngat acelacel otieko udo kede giamia ka Rubanga, tiunu kede gi pi bero me jo dedede, bala jo kame tie gwoko kiber giamia apapat kame Rubanga mio.
- ¹¹Ngat kame yamo, eyam bala dano kame yamo kop ka Rubanga; ngat kame mio kony, emi bala ngat kame konyo kede teko kame Rubanga mio, tetekeny mi Rubanga deyo i gi dedede pi Yesu Kirisito. Deyo kede twer bed but Yesu Kirisito ikar kede ikar. Amen.

Neno Can bala Ngakirisito

- ¹²Jo na kame amaro, kur ibedunu kede ur pi can alit kame potu i komu pi tamo wu, ineno do bala gimoro kalikame ngere en kame tie timere ne wu.
- ¹³Do lelunu kame itienyu nywako can ka Kirisito, me wek bobo ibin ilelunu di itienyu kede yomcuny i kare kame kobino nyuto kede deyo mere.
- ¹⁴Ka koronkino wu pi nying Kirisito, udo itienyu kede winyo, pien udo Tipo me deyo, kame obedo Tipo ka Rubanga tie kede wu.
- ¹⁵Kur ngatamoro kikom wu nen can pi nek, arabo pi kuwo, arabo pi timo gimoro arac, amoto pi donyo i kop kalikame make.



¹⁶Do ka ngatamoro neno can pien ebedo ngakirisito, kur lewic make, do poore emi Rubanga deyo pi jo cako ne nying nono.

¹⁷Pien kare otieko tuno me ngolo kop, kobino cako kede jo me ot ka Rubanga. Ka etie gere kede wan, nyo kame do bino bedo ajikini me jo kame odagi lubo ejiri ka Rubanga?

¹⁸Bala kame kowandiko be, “Ka udo alako tek ne jo kopoore; nyo do kame bino timere ne jo kalikame paro pi Rubanga kede jodubo?”

¹⁹Pi mano, jo kame neno can di lubere kede mit ka Rubanga poore meede timo gikaber di kimio kuo gi i cing Ngacwec, ngat kame genere.

1 Petero 5

Romini ka Rubanga

¹Ango abako dogo but joadongo kame tie i diere wu, bala adwong wad gi kame obedo mujura me can kame Kirisito oneno, doko da bala ngat kame nywako deyo kame kobino nyuto.

²Kwaunu romini ka Rubanga kame tie i cingu abongo adiadia moro, do kede mit wu kenu; likame pi mito ud moro, do pi mit me cunyu.

³Kur ipugunu kirac jo kame koketo i cingu, do bedunu anyut aber me aluba but romini,

⁴mio kame Ngakwat Adwong obino, ibinunu udo ocoro kalikame dubere me deyo.

⁵Kamanono da, wun jo atino, iwinyunu joadongo. Wun dedede bedunu jo kame mwolere, ngat acelacel but ngawote, pien kowandiko be, “Rubanga dagi jo kame wakere, do emio jo kame mwolere winyo.”

⁶Pi mano, mwolere nu i twer ka Rubanga, me wek eting wu malo kame kare oromo.

⁷Ketunu par wu dedede i kome, piento en eparo piru.

⁸Bedunu di wi wu riek kede di ikiunu piny. Ngakwor wu Sitani tie wire bala engu kame dorano, di emo ngatamoro ecamaro.

⁹Wun cerededunu ne, di icungunu kitek i yei wu, doko di ingeunu be imiegu kede amiegu wu i piny lung tie beo iepone me can nogo.

¹⁰Do ingei wun neno can pi kare moro acecek, Rubanga won kisa lung, ngat kolwongo wu i deyo mere kame bedo nakanaka i Kirisito, en kikome ebino dwoko kuo wu kakare, ebino konyo wu, ebino mino wu teko di eko sipakino wu.

¹¹Twer bed bute ikar kede ikar. Amen.

Amot me Ajikini



¹² Ango awandiko ne wu baluwa acecek noni kede kony kame Sila omia, en ngat kame ango atero be omin wa kame genere i Kirisito. Ango adio cunyu doko di amio wu ijura be, man en kisa ka Rubanga me ateni; cungunu iye kitek.

¹³ Jokirisito jowot wu kame tie Babilon, kame Rubanga oyero karacel kede wu omoto wu. Marako woda omoto wu da.

¹⁴ Moterenu kenu kenu kede amot me amara. Mulem bed butu dedede, wun jo kame itienu i Kirisito.



2 Petero

2 Petero 1

Amot

¹Baluwa kowok kibut Simoni Petero, ngat kame obedo ngatic kede ngaor ka Yesu Kirisito. But jo kotieko udo yei arom aroma kede merwa pi poore ka Rubanga wa en Ngalak wa Yesu Kirisito.

²Ango akwao be, Rubanga med ne wu kisa kede mulem mere pi ngec kame itienu kede i kome kede i kom Rwot wa Yesu Kirisito.

Lwongo kede Ayera ka Rubanga

³Rubanga i twer mere otieko mino wa gi dedede kame wan omioto pi bedo kede kuo, kede pi bedo jo kame wore, pien wan otie kede ngec i kome, en ngat kame elwongo wa i deyo kede i bero mere.

⁴Pi deyo kede bero mere, en emio wa cikere me wel amalo kame pirgi tek, me wek ikarununu bwot ki dubere kame tie i piny pi mit arac me kom, di ikounu doko jo kame nywako kite me kuo ka Rubanga.

⁵Pi kop acel noni, tamakinunu medo bero i kom yei wu, di ikounu medo ngec i kom bero wu,

⁶ikounu medo dino mit me kom i kom ngec wu, ikounu medo dino cuny i kom dino mit me kom, ikounu medo cuny me woro Rubanga i kom dino cuny,

⁷ikounu medo amara pi imiegu kede amiegu i kom cuny me woro Rubanga, kede ikounu medo amara pi jo dedede i kom amara me imiegu kede amiegu.

⁸Pien kame itienu kede gigi dedede, di kitie nyai i kuo wu, kibino gengo wu bedo abongo teko, arabo bedo jo kame li kede kony moro i kom kop kame mako ngeno Rwot wa Yesu Kirisito.

⁹Pien ngat kame li kede gi nogi wange neno kakacecek, doko udo wange oto, udo wie otieko wil be oudo kotieko lonye ki dub mege me kare kokato.

¹⁰Pi mano, imiegu kede amiegu na, meedenu bedo kede mit me moko lwongo kede ayera wu, pien ka itimunu kamanoni likame ibinunu agetar.

¹¹Manoni bino mino koyabo ne wu odocon yongayo kame donyo i Ajakanut kame bedo nakanaka, en Ajakanut ka Rwot Ngalak wa Yesu Kirisito.

¹²Pi mano, ango amito bedo di apoo wi wu nakanaka i kom gi nogi, akadi bed bala ingeunu gi, doko di itiekunu asipakin kitek i kop me ateni kame kokelo ne wu.

¹³Ango aparo be eber nango poono wi wu, tek di ango pwodi atie akuo i piny kan;

¹⁴pien ango angeo be kare me to na do oyapuno tuno bala kame Rwot wa Yesu Kirisito otieko mina ngeno kede.



¹⁵Ango abino tamakino neno be ibinunu karuno yutuno gigi esawa moroni kenekene ingei to na.

Jo kame Oneno Deyo ka Kirisito kede Wang gi

¹⁶Bin wan likame otio kede itatam kame dano oteto kede rieke me wie pi mino wu ngeno dwogo ka Rwot Yesu Kirisito kede twer, do wan oneno dwongo mere kede wang wa.

¹⁷Pien kakame eudo kede wor kede deyo kikut Rubanga Papa, dwan oko winyere kame owok kikut won Deyo Adwong di waco be, “Man en Woda kame amaro, cunya yom i kome.”

¹⁸Wan ikom wa owinyo dwan noni di wok ki malo, pien wan oudo otie kede en i wi moru kacil.

¹⁹Manoni oko do moko odocon kop kame bin inabin owaco. Ebino bedo ber ka iketunu tam wu i kom kop noni, pien ecal bala etala kame liel i kakacol, tuno kame piny oru di acer me odiko oko caro cunyu.

²⁰Me agege mere, ipoorenu niang be, likame tie kop moro me imurai kame enabi owaco i iwandik kacil kame dano moro twero gonyo dwong mere en kene;

²¹pien likame tie imurai me enabi moro kame otieko bino pi mit ka dano, do jo oudo yamo kop ka Rubanga pi twer me Tipo Kacil.

2 Petero 2

Jopwony me Angalo

¹Inabin me angalo da bin oneeno i dier jo, epone nono da en kame jopwony me angalo bino bedo tie kede i diere wu. Gin kibino kelo i mung pwony mogo apat kame rwenyo jo, di kidagi kiton ngadwong gi, ngat kame oculo cul me lako gi. Manoni bino mino gin kikelo i kuo gi awakawaka gikame dudubo gi.

²Jo atot bino lubo epone me caro gi, di kiko bedo kede acae i kom Yongayo me ateni pirgi.

³Pi eranga gi, gin kiyaro kwalo tam wu kede kope me angalo. Kop kame kongolo ne gi cako sek likame omungere, doko gikame bino dudubo gi da tie cuto.

⁴Pien Rubanga bin likame oweko aweka imalaikan i kare kame bin kidubo kede, do euco gi i mac kalikame to di eko dilo gi i bur acol cucucuc, pi daro gi ki kuno tuno i ceng me ngolo kop.

⁵Rubanga bin likame oweko aweka lobo i kare asek. En bin ekelo ariram oko pongo lobo me jo kame bin dagi wore, bed bala elako kuo ka Nua, ngat kame opwonyo kop kame mako kite kopoore, en karacel kede jo kanyaare apat.

⁶Doko di bin ewango bomban me Sodoma kede Gomora paka doko buru, oudo en engolo ne gi kop me tieko gi, di eko mino gi kibedo anyut me gikame bino timere ne jo kame oudo oyaro dagi wore.



- ⁷ Doko en bin emio Lot ngat kame kite mere opoore obwot; Lot riki cunye cwer pi caro me jo kame ekite gi reco.
- ⁸(Pien kope areco kame dano kopoore nono obedo winyo kede neno buli ceng di oudo ebedo i diere gi owango cunye.)
- ⁹Pi mano, Rwot ngeo epone me lako ki atama jo kame wore, kede epone me mino jo kalikame opoore alola paka tuno i ceng me ngolo kop,
- ¹⁰twatwal mere jo kame donyo i mit me emuna, kede jo kame cao akarunikin ka Rubanga. Jopwony me angalo nogi cuny gi nwang, doko kitie kede mit me yeyeto wegide deyo abongo bedo kede lworo.
- ¹¹Akadi imalaikan, bed bala kitie kede dwongo kede twer kame kalamo, likame yamo kope areco i kom gi i nyim Rwot.
- ¹²Do jogi cal kede leini kalikame tamo, kame lubo ekite me cwec gi, kame konywalo pi mako me aneka; gin kitie kede yamo areco i kom kope kame kikwia. Kobino neko gi bala leini nogo.
- ¹³Gin kibino neno can pi tim gi areco. Cuny gi yom timo gikame cobo mit gi karac iceng. Gin kitie bala kakocukukao kede kopwokere kame kelo ne wu lewic. Kame gin kinywako kede wu ebaga, gin kitie kede yomcuny i ekite gi karac nono.
- ¹⁴Gin kitie kede wang me adote, timo dub likame romo gi, kiyodao tam me jo kame cuny gi goro. Kitie kede cuny kotieko pwoyere bedo kede eranga. Gin jo kame kolamo.
- ¹⁵ Gin kitieko weko yongayo kopoore di kiko rwenyo; kitie lubo yongayo ka Balaam wot ka Beor, kame riki cunye omaro lim kame eudo pi tim areco,
- ¹⁶omio oko ronkino en pi raco mege. Asigira gimoro kalikame yamo oko yamo kede dwan dano, di eko gengo tim me poi ka enabi nono.
- ¹⁷Jo nogi cal bala ataneko kotuo, kede ekuna kame yamo buko; kotieko iiko ne gi kabedo acol cucucuc.
- ¹⁸Gin kiyamo kope me ewaka kame kony gi li, di kiko tic kede mit kalikame beco me kom pi yodao tam me jo kame pwodi obwot abwota kibus jo kame bedo iekite me kuo arac.
- ¹⁹Gin kimio jo nogo cikere kame waco be kibino bedo jo kogonyere, do di gin ikom gi kibedo ipasoi me gikame dudubo gi; pien ka gimoro bwono teko me dano, udo dano nono odoko epasoi me gi nono.
- ²⁰Pien ingei gin bwot ki emuna me lobo kan pi ngec gi i kom Rwot kame obedo Ngalak wa Yesu Kirisito, kiko bobo alogorokin i ginogo, di ginogo oko bwono teko gi. Man omio nan kitie do iepone me kuo arac kalamo bin i agege.
- ²¹Oudo koto ebedo ber kato ka oudo likame gin kingeo yongayo me poore, akaka gin ngenyo yongayo me poore di bobo kiko lokere tenge ki cik kacil kame komio gi.



²² Man otimere ne gi bala kame agole me ateni waco kede be, “Ogwok dok nango ngok mere,” kede doko be, “Epege kame kolwoko dok bobo bam i cwoto.”

2 Petero 3

Cikere me Dwogo ka Rwot

¹Jo na kame amaro, man nan do en baluwa me are kame atie wandiko butu. I baluwan nogi dedede, ango abedo tamakino supo cunyu di apoo wi wu be,

²poore iyutununu kope kame inabin kacil riki owaco sek, kede da ipoorenu yutuno cik ka Rwot Ngalak wa, en cik kowok kibut joor.

³Me agege mere, miero iniangunu be, i kare me ajikini jo acae oyaro bino di kicaare, di kilubo mit me kom gi,

⁴di kiwaco be, “Ani bo dwogo mere kame riki kocikere pire? Pien geno anakacene, joakwari wa otieko to, do gi dedede tie meede ameda bala kame oudo kitie kede cako cweno piny!”

⁵Gin kipelakino bedo kede acae i kom kop kame waco be, riki sek kop kame Rubanga owaco en kame omio malo kede lobo ocwere. Kocweo lobo wok ki pii kede pii.

⁶Doko da pii en kame bin omwonyo piny kame oudo tie i kare nono, di oko tieke.

⁷Do kop acel nono en kame nan tie gwoko malo kede lobo kame nan tie nogi pi kuro mac. Kotie gwoko gi paka tuno i ceng me ngolo kop, en ceng kame kobino dudubo kede jo kalikame woro Rubanga.

⁸Jo na kame amaro, kur icaunu kop acel noni be, kibut Rwot, ceng acel rom aroma kede mwakini tutumia acel, doko da mwakini tutumia acel rom aroma kede ceng acel.

⁹Rwot likame ogal kede cobo cikere mere bala kite kame jo mogo tamo kede, do en etie pwodi dire piru, pien likame emitto be ngatamoro toi, do emitto be jo dedede swilaro.

¹⁰Do Ceng ka Rwot oyaro bino bala ngakuwo, di malo ko bino rwenyo kede mor adwong, di mac ko bino calaro jamini kame tie iye, di do lobo kede tice kame tie iye ko bino wang dopodop.

¹¹Bala kame kobino tieko kede jamini nogi iepone noni, wun do miero ibedunu jo acal nadi? Miero ibedunu kede kuo kacil me woro Rubanga,

¹²di ikurunu Ceng ka Rubanga; doko di iketunu cunyu iye me wek esusunyo tuno. Ceng nono en kame malo bino liel kede di eko dudubun, jamini kame tie iye ko bino acalar i mac.

¹³Do bala kame en ecikere kede, wan otienu kuro malo kede lobo anyen kame kuo me poore tie iye.

¹⁴Pi mano, jo na kame amaro, bala kame itienu daro kede gi nogi, ketunu cunyu i kom gi, me wek ud wu di itienu i mulem abongo kakocukukao arabo kakopwokere.



¹⁵Doko terunu dire ka Rwot wa bala alako wu. Omin wa me amara Paulo da owandiko baluwa butu pi rieko kame komie,

¹⁶di eda eyamo kop acel noni bala kame etimo i baluwan mege dedede. Tie gimogo i baluwan nogo kame niang tek, kame jo kame kwia piny kede jo kame yei gi yagayaga dwadwanyo di ko kelo ne gi rwenyo, bala kame kitimo kede i iwandik kacil ace.

¹⁷Pi mano, wun jo na kame amaro, bala kame itiekunu cako ngeno kede man sek, gwokerenu kur acetar me jo kalikame woro iswil rweny wu, di kiko mino wu ipotunu ki kakame nataman icungunu iye kitek.

¹⁸Do meedenu dongo i kisa kede i ngec ka Rwot, ngat kame obedo Ngalak wa Yesu Kirisito. Deyo bed bute nan kede ikar kede ikar. Amen.



1 Yokana

1 Yokana 1

Kop me Kuo

- ¹ Wan otie tucó ne wu gikame oudo tie cako ki agege, gikame wan owinyo, gikame wan oneno kede wang wa; wan kom onene doko omule kede cing wa, en Kop me kuo.
- ² Konyuto kuo noni di wan oko nene, nataman wan omio ijura i kome, di owaco ne wu kop i kom kuo kame bedo nakanaka kame oudo tie kede Papa di oko nyute but wan.
- ³ Gikame wan oneno kede kame owinyo wada otuco ne wu tetekeny ibedunu i nywak kede wa; doko i nywak noni, wan onywako karacel kede Papa kede Wode Yesu Kirisito.
- ⁴ Wan otie wandiko gi nogi tetekeny obedunu kede kilel kopong.

Rubanga en Lero

- ⁵ Kop kame wan owinyo kibute doko kame wan opwonyo wu iye en ine be, Rubanga en lero doko eli kede colo moro atwal.
- ⁶ Aso ka wan owacunu be wan onywakunu kede en, do di otienú i colo udo ongalunu, doko udo likame otienú timo gi me ateni.
- ⁷ Do ka wan otienú i lero bala kame en kikome etie kede i lero, udo otienú kede nywak wan kenwa kenwa, doko remo ka Yesu Wode lonyo wa ki dub wa dedede.
- ⁸ Ka wan owacunu be oliunu kede dub, udo wan ongalerenu kenwa, doko udo oliunu kede ateni.
- ⁹ Do ka wan otucunu dub wa, Rubanga ngat kame genere kede kame timo gi dedede kakare bino sasiro wa ki dub wa, di eko lonyo wa ki gi dedede kalikame opoore.
- ¹⁰ Ka wan owacunu be likame odubunu, udo omiunu Rubanga odoko ngaangalo, doko udo likame otienú kede kop mere.

1 Yokana 2

Kirisito Ngakony wa

- ¹ Idwe na, ango atie wandiko ne wu kope nogi tetekeny kur ipotunu i dub. Do ka ngatamoro odubo, wan otienú kede ngat kame pido pirwa i nyim Papa, en Yesu Kirisito ngat kopooore.
- ² En ebeto giayala kame kwanyo dub wa, do likame dub wan kenekene, do da dub me jo dedede.
- ³ Ka wan olubunu cik ka Rubanga, udo wan oniangunu kiber be wan ongeunu en.
- ⁴ Ngat kame waco be, “Ango atieko ngene,” do di likame elubo cik mege, udo en enga angalo, doko udo eli kede ateni.



⁵Do ngat kame lubo kop mere, ateteni udo amara mere i kom Rubanga otieko tuno kakare. Epone kame wan ongeunu kede be wan oriberenu kede en ine:

⁶ngat kame waco be, “Ango atie i en,” poore ebed iepone kame en oudo ebedo kede.

Cik Kanyen

⁷Jo na kame amaro, ango likame atie wandiko ne wu cik kanyen, do cik acon kame oudo wun itienu kede cako ki agege. Cik acon nono en kop kame wun itiekunu winyo.

⁸Akadi kamanono da, ango atie wandiko ne wu cik kanyen kame ateni mere neeno kikut Kirisito kede kikut wuda, pien colo tie awaar doko lero me ateni tie do rieny.

⁹Ngat kame waco be en etie i lero do di edagi omin mere amoto amin mere udo pwodi etie i colo.

¹⁰Ngat kame maro omin mere amoto amin mere udo etie i lero, doko likame udo etie kede gimoro kame mio jo poto i dub.

¹¹Do ngat kame dagi omin mere amoto amin mere udo etie i colo, en eoto i kakacol, doko likame engeo kakame etie lubo, pien udo colo oumo wange.

¹²Idwe na, ango atie wandiko manoni butu, pien kotieko sasiro dub wu pi Kirisito.

¹³Atie wandiko manoni butun joapapi, pien wun ingeunu en ngat kame oudo etie cako ki agege. Atie wandiko man butu, wun jo atino pien itiekunu lono Ngarac.

¹⁴Idwe na, atie wandiko manoni butu pien wun ingeunu Papa. Atie wandiko manoni butun joapapi, pien wun ingeunu en ngat kame ebedo tie cako i agege. Atie wandiko ne wun jo atino pien wun itekunu, doko kop ka Rubanga tie i cunyu, doko itiekunu lono Ngarac.

¹⁵Kur imarunu piny amoto jamini kame tie i piny. Ka imarunu piny udo likame imarunu Papa.

¹⁶Pien gi dedede kame tie i piny: mit me kom, mit me wang, ewaka me abar, likame wok kikut Papa, do gin kiwok ki piny kan.

¹⁷Piny kede gikame jo mito kiye tie jik, do jo kame timo gikame Rubanga mito bino bedo ikar kede ikar.

Ngakwor ka Kirisito

¹⁸Idwe na, ajikini otieko do tuno. Bala kame itiekunu winyo kede be Ngakwor ka Kirisito tie bino, nan do jokwor ka Kirisito otieko bino. Manoni mio wa ongeunu be kare me ajikini do otieko tuno.

¹⁹Jo nogo oyai tenge kikut wan, oudo likame gin kibedo jo wa; pien ka koto oudo gin kibedo jo wa, koto oudo kidong but wa. Do yai gi onyuto kakaler be likame tie ngatamoro kikom gi kame obedo dano wa.

²⁰Do Ngat Kacil otieko wiro wu kede Tipo Kacil, omio wun dedede itienu kede ngec.



- ²¹Ango awandiko man butu, likame pien wun ikwianu ateni, do pien wun ingeunu ateni, doko ingeunu be likame tie angalo moro kame wok ki ateni.
- ²²Ngai en kame ngaangalo? Mam en ngat kame dagi be Yesu en Kirisito? Manoni en Ngakwor ka Kirisito, ngat kame dagi Papa kede Wode.
- ²³Likame tie ngatamoro kame dagi Wod di en eko mito Papa; jo dedede kame yei Wod mito Papa da.
- ²⁴Wek gikame ibedunu winyo anakacene dong i cunyu. Ka gikame genere anakacene odong i cunyu, ibinunu bedo di itienu kede kuo i Wod kede i Papa.
- ²⁵Gikame en ecikere pi mino wa en kuo kame bedo nakanaka.
- ²⁶Ango awandiko ne wu kop nogi i kom jo kame mito ngangalo wu.
- ²⁷Do wun Tipo kame Kirisito omio wu tie i kuo wu, omio likame bobo emitere ne ngatamoro pi pwoyo wu. Pien Tipo mere pwoyo wun i kom gi dedede, gikame tie me ateni do weko me angalo. Bala kame en etieko pwoyo wu kede, bedunu i Kirisito.
- ²⁸Aso nataman, idwe na, bedunu i en, tetekeny kame en eneeno, wan obedunu kede nwangcuny di likame lewic ko bino mako wa i nyime i Ceng me dwogo mere.
- ²⁹Ka ingeunu be Kirisito opoore, udo ingeunu da be jo dedede kame timo gikame opoore obedo idwe ka Rubanga.

1 Yokana 3

Idwe ka Rubanga

- ¹Nenunu ber epone kame Papa maro wa kede, manoni en komio kolwongo wa be idwe ka Rubanga; doko da ateteni wan idwe mege. Piny likame ngeo wa pien ekwie.
- ²Jo na kame amaro, wan nan otienu idwe ka Rubanga, do likame pwodi ngere epone kame wan oyarunu bedo cal kede. Gikame wan ongeon kenekene en ine be, kame Kirisito oneeno, wan obinunu nene i ekite kame en etie kede kikokome.
- ³Jo dedede kame tie kede gen noni i kom Kirisito lonyere ken gi, bala kame en ecil kede.
- ⁴Jo dedede kame dubo udo tie kede raco me turo iswil, pien dub en turo iswil.
- ⁵Wun ingeunu be bin en eneeno pi kwanyo dub, do en eli kede dub moro i kome.
- ⁶Likame tie ngatamoro kame tie i en kame dubo; likame tie ngatamoro kame dubo kame otieko nene, amoto kame ngeo en.
- ⁷Idwe na, kur iyeunu ne ngatamoro ngalo wu. Jo dedede kame timo gikame opoore obedo da jo kopoore bala kame en epoore kede.
- ⁸Jo dedede kame dubo obedo idwe ka Sitani; pien Sitani obedo timo dub cako ki agege. Kop komio Wot ka dano oneeno en pi dudubo tice ka Sitani.



⁹Jo kame obedo idwe ka Rubanga likame dubo, pien kitie kede ekite me kuo mere. Likame gin kidubo pien kibedo idwe ka Rubanga.

¹⁰Idwe ka Rubanga kede idwe ka Sitani nyutere iepone kacal kaman: jo dedede kalikame timo gikame opoore, amoto kalikame maro imiegu kede amiegu gi, likame obedo idwe ka Rubanga.

Marerenu Kenu Kenu

¹¹Pien kop kame wun iwinyunu cako ki agege en ine be, opoorenu marere wan kenwa kenwa.

¹²Miero wan kur obedunu bala Kain ngat kame bin obedo atin me Ngarac, di en eko neko omin mere. Pinyo komio bin en eneko omin mere? Pien tice mege oudo reco do tice ka omin mere oudo opoore.

¹³Imiegu kede amiegu na, kur ibedunu kede ur be pien pinyo dagi wu.

¹⁴Wan ongeunu be wan otiekunu yai ki to di okounu dokaro i kuo, pien wan omarerenu wan kenwa kenwa. Ngat kalikame tie kede amara udo etie i twer me to.

¹⁵Jo dedede kame dagi imiegu kede amiegu gi obedo jonek, doko da wun ingeunu be jonek likame tie kede kuo kame bedo nakanaka i kuo gi.

¹⁶Epone kame wan ongeu kede amara en ine: Kirisito ojala kuo mere pirwa. Pi mano, poore wada ojalunu kuo wa pirwa kenwa kenwa.

¹⁷Ka ngatamoro tie kede jame me pinyo kan di en eko dagi konyo amin mere amoto omin mere kame tie kede rem me gimoro, benyo benyo kame etwero waco kede be en emaro Rubanga?

¹⁸Idwe na, obedunu kede amara, likame i kop amoto i yamo kenekene, do i ateni kede i tic.

Bedo kede Nwangcuny i nyim Rubanga

¹⁹Manoni bino mino wan ongeunu be wan obedunu jo me ateni, di okounu bino jingo cuny wa i nyim Rubanga

²⁰akadi di ngec me cuny wa waco be oreunu; pien Rubanga dwong kalamo ngec me cuny wa, doko engeo gi dedede.

²¹Jo na kame amaro, ka ngec me cuny wa likame waco be oreunu, emio wan obedunu kede nwangcuny i nyim Rubanga.

²²Manoni mio wan oudunu gi dedede kame wan okwaunu kibute, pien wan olubunu cik mege doko otimunu gikame yomo cunye.

²³Cik mere en ine be, wan poore oyeunu nying Wode Yesu Kirisito di okounu marere wan kenwa kenwa, bala kame en eciko wa kede.

²⁴Jo dedede kame lubo cik mege bedo i en kede eda etie i kuo gi. Doko pi Tipo kame en emio wa, wan ongeu be en etie i kuo wa.



1 Yokana 4

Tipo me Ateni kede Tipo me Angalo

¹Jo na kame amaro, kur iyeunu jo dedede kame waco be kitie kede Tipo ka Rubanga, do tamunu gin dedede pi niang kame tipo kame kitie kede wok kibus Rubanga, pien inabin atot me angalo otieko sarakin i piny.

²Epone kame ibinunu ngeno kede Tipo ka Rubanga en ine: tipo kame waco be Yesu Kirisito obino bala dano, udo Tipo nono owok kibus Rubanga,

³do tipo dedede kalikame tucyo nying Kirisito likame owok kibus Rubanga. Manono en tipo ka Ngakwor ka Kirisito, kame oudo wun iwinyunu be tie bino, doko nan etieko tuno i piny da.

⁴Idwe na, wun ibedunu me ka Rubanga, doko itiekunu bwono inabin me angalo, pien ngat kame tie i kuo wu tie kede twer adwong kalamo ngat kame tie i piny.

⁵Inabin me angalo nogo owok ki piny kan, pi mano, gin kiyamo kope kame mako piny kan, di jo me piny da ko winyo gi.

⁶Wan owokunu kibus Rubanga. Jo dedede kame ngeo Rubanga winyo kope wa, do jo dedede kalikame owok kibus Rubanga likame winyo kope wa. Manoni en epone kame wan ongeyo kede Tipo me ateni kede tipo me angalo.

Rubanga en Amara

⁷Jo na kame amaro, omarerenu kenwa kenwa, pien amara wok kibus Rubanga. Ngat kame nyuto amara udo obedo atin ka Rubanga doko udo engeo Rubanga.

⁸Ngat kalikame nyuto amara likame obedo atin ka Rubanga, pien Rubanga en amara.

⁹Rubanga onyuto amara mere but wa iepone kame cal kaman: en ecwao Wode acel kenekene i piny tetekeny wan obedunu kede kuo pi en.

¹⁰Amara en ine: likame be wan omarunu Rubanga, do be en emaro wa di eko cwano Wode pi bedo giayala kame kwanyo dub wa.

¹¹Jo na kame amaro, bala kame Rubanga omaro wa kede kitek, wada poore omarerenu kenwa kenwa.

¹²Likame pwodi tie ngatamoro kotieko neno Rubanga, do ka wan omarerenu kenwa kenwa, Rubanga bedo i kuo wa, doko amara mere ko tuno kakare kibus wa.

¹³Manoni en epone kame wan ongeunu kede be wan otienyu i en doko eda etie i kuo wa, piento en etieko mino wa Tipo mere.

¹⁴Wan otiekunu neno, doko omiunu ijura be Papa otieko cwano Wode bala Ngalak me piny.

¹⁵Ngat kame tucyo be Yesu en Wot ka Rubanga, Rubanga bedo i kuo mere doko eda ekuo i Rubanga.



¹⁶Aso wan otiekunu ngeno doko oyeunu amara kame Rubanga tie kede pirwa. Rubanga en amara, doko ngat kame tie kede amara kuo i Rubanga doko Rubanga da tie i kuo mere.

¹⁷Kotieko mino amara obedo kakare i kuo wa tetekeny obedunu kede nwangcuny i Ceng me Ngolo kop, pien bala kame kuo mere tie kede, wada kuo wa cal kamanono i piny kan.

¹⁸Lworo likame tie i amara, do amara kame tie kakare riamo lworo tenge, pien lworo tie gikame makere kede alola, doko ngat kame tie kede lworo udo amara mere likame otuno kakare.

¹⁹Wan otienu kede amara pien Rubanga en kogeo maro wa.

²⁰Ngat kame waco be, “Ango amaro Rubanga,” do di edagi omin mere amoto amin mere udo engalo; pien ngat kalikame maro omin mere amoto amin mere kame en eneno, likame ekaruno maro Rubanga ngat kalikame pwodi en eneno.

²¹Cik kame Kirisito omio wa en ine be: jo kame maro Rubanga miero mar imiegu kede amiegu gi da.

1 Yokana 5

Wan Olo Piny pi Yei

¹Ngat acelacel kame yei be Yesu en Kirisito udo ebedo atin ka Rubanga, doko ngat acelacel kame maro nganywal moro udo emaro atin me nganywal nono da.

²Epone kame wan ongeunu kede be wan omarunu idwe ka Rubanga en ine be, wan omarunu Rubanga doko olubunu cik mege.

³Pien maro Rubanga en ine be, wan olubunu cik mege. Doko cik mege likame dio wa,

⁴pien ngat kame obedo anywali ka Rubanga lo piny. Doko yei wa en kame mio wa olounu piny.

⁵Ngai en kame karuno lono piny? Mam en ngat kame yei be Yesu en Wot ka Rubanga?

Ijura i kom Yesu Kirisito

⁶Yesu Kirisito en ngat kame obino kede pii kede remo. Likame ebino kede pii kenekene, do ebino kede pii kede remo. Tipo en kame mio ijura i kom kop noni, pien Tipo en ateni.

⁷Ijurak tie adek kame mio ijura: ⁸Tipo, pii kede remo; ijurak adek nogi kope gi riamo.

⁹Wan oyeunu ijura kame jo mio, do Rubanga mio ijura kame kalamo; pien manoni obedo ijura kame Rubanga omio i kom Wode.

¹⁰Jo kame yei Wot ka Rubanga tie kede ijura nono i cuny gi. Jo kalikame yei Rubanga otieko mine edoko ngaangalo, pien likame kiyei ijura kame Rubanga otieko mino i kom Wode.



¹¹Caden nono en ine be, Rubanga otieko mino wa kuo kame bedo nakanaka, doko kuo noni tie i Wode.

¹²Ngat kame tie kede Wod udo etie kede kuo; do ngat kalikame tie kede Wot ka Rubanga likame tie kede kuo kame bedo nakanaka.

Kuo kame Bedo Nakanaka

¹³Ango awandiko ne wu gi nogi, wun jo kame iyeunu nying Wot ka Rubanga, tetekeny ingeunu be wun itienu kede kuo kame bedo nakanaka.

¹⁴Nwangcuny kame wan otienu kede i nyime en ine be, ka wan okwaunu gimoro di lubere kede mit mere, en ewinyo kwac wa.

¹⁵Doko ka wan ongeunu be en ewinyo wa i gi dedede kame wan okwae, udo ongeunu da be otiekunu udo gi dedede kame okwaunu kibute.

¹⁶Ka ineno omini amoto amini moro di tie timo dub kalikame tere i to, in kwai Rubanga pire di Rubanga ko bino mine kuo. Man tie pi jo kame dub gi likame tero gi i to. Tie dub kame tero dano i to, ango likame awaco be ilegunu pi manono.

¹⁷Tim areco dedede obedo dub, do tie dub kalikame tero dano i to.

¹⁸Wan ongeunu be jo kame obedo idwe ka Rubanga likame dubo, pien Wot ka Rubanga gwoko gi, di likame Ngarac ko karuno mulo gi.

¹⁹Wan ongeunu be wan obedunu idwe ka Rubanga, kede be, piny lung tie i twer me Ngarac.

²⁰Wan ongeunu be Wot ka Rubanga otieko bino, doko etieko mino wa niang, tetekeny ongeunu en ngat kame etie me ateni; doko wan otienu i en ngat kame tie me ateni, en Wode Yesu Kirisito. En ebedo Rubanga me ateni, doko en ebedo kuo kame bedo nakanaka.

²¹Idwe na, gwokerenu kikom cal jwogi.



2 Yokana

2 Yokana 1

Amot

- ¹Baluwa kowok kibut Adwong. But dako kame koyero, kede idwe mege, jo kame amaro ateteni, do likame ango kenekene do paka jo dedede kame ngeo ateni,
- ²pien wan otie kede ateni i cuny wa, doko da ebino bedo kede wa nakanaka.
- ³Akwao kisa, mwolo kede mulem kame wok kibut Rubanga Papa kede kibut Yesu Kirisito Wot ka Papa, bed but wa, i ateni kede i amara.

Ateni kede Amara

- ⁴Ango ako bedo kede kilel kame kalamo pi udo be idwe nin mogo tie lubo kuo me ateni, bala kame Papa otieko ciko ne wa kede.
- ⁵In dako kame koyero, ango nan atie kwani, likame etie bala ango atie wandiko ni cik anyen, do en etie cik kame wan oudo obedunu tie kede cako i agege, en ine be, omarerenu kenwa kenwa.
- ⁶Amara nono en ine be, wan poore olubunu cik ka Rubanga. Cik nono, bala kame ibedunu winyo kede cako i agege, en ine be, miero ibedunu kede amara.
- ⁷Joangalo atot otieko sarakin i piny, jo kalikame yei be Yesu Kirisito obino bala dano. Dano moro kame cal kamanono obedo ngaangalo, doko en Ngakwor ka Kirisito.
- ⁸Gwokerenu tetekeny kur ikeunu gikame itiekunu timo tic pire, do me wek ibin iudunu giamia me pwoc wu lung.
- ⁹Ngatamoro kalikame dong i pwony ka Kirisito, do en etarasar kede mere kalamo, udo likame etie kede Rubanga i cunye. Do ngat kame dong i pwony nono udo Papa kede Wod tie i cunye.
- ¹⁰Ka ngatamoro obino butu abongo pwony nono, kur igamenu i miere wu akadi mote da.
- ¹¹Pien ngat kame mote udo nywako kede en timo tice mege areco nogo.

Kope me Ajikini

- ¹²Bed bala ango atie kede kope atot kame apoore wandiko ne wu, do aparo be miero kur doko awandiko gi awandik, do ango atie kede gen me bino neno wu wang i wang di ako yamo kede wu, tetekeny opongunu kede kilel.
- ¹³Idwe ka amini kame koyero cwao ni amot.



3 Yokana

3 Yokana 1

Amot

- ¹ Baluwa kowok kibut Adwong. But ngawota Gayo kame amaro i ateni.
- ² Ngawota kame amaro, ango alego be gi dedede bed ni kiber, kede be ibed kede yotkom, bala kame kuo me cunyi tie kede kiber.
- ³ Oudo abedo kede yomcuny adwong kakame imiegu mogo obino kede di kiko mino ijura i kom epone kame in igenere kede i kop me ateni, manono en epone kame in ilubo kede kop me ateni.
- ⁴ Likame tie yomcuny moro kame ango akaruno bedo kede kame kalamo man, en yomcuny me winyo be idwe na tie lubo ateni.

Kopwoyo Gayo

- ⁵ Ngawota kame amaro, in igenere i tic dedede kame i timo ne imiegu kede amiegu, bed bala gin kibedo jokumbor kibuti.
- ⁶ Gin kitioko mino ijura i kom amara ni but ekodet me jokirisito kame tie kan. Ebino bedo ber ka in ikonyo gi pi gin meede kede ot gi bala kame poore i tic ka Rubanga.
- ⁷ Pien gin oudo kicako yai ot sapali gi pi tic ka Kirisito, di likame kiyei gamo konyo moro kibut jo kalikame oyei.
- ⁸ Pi mano, wan opoorenu konyo jo kame cal kamanono, tetekeny odokunu jo kame nywako tic me pwoyo kop me ateni.

Dioterepe kede Demeterio

- ⁹ Ango atieko wandiko baluwa moro but ekodet me jokirisito; do Dioterepe, ngat kame nakanaka mito be en etel jo apat, odagi winyo kop na.
- ¹⁰ Aso ka ango abino, abino nyuto gi dedede kame en etie timo pi sarakino kope me abe i koma. Likame mago kenekene, do en edagi da gamo imiegu kede amiegu, doko egengo jo kame mito gamo gi di eriamo gi tenge ki ekodet me jokirisito.
- ¹¹ Ngawota kame amaro, kur ilub timo gikarac do lub timo gikaber. Ngat kame timo gikaber obedo dano ka Rubanga, do ngat kame timo gikarac likame pwodi oneno Rubanga.
- ¹² Jo dedede waco kop aber i kom Demeterio, akadi gi me ateni kame en etimo da mio ijura i kome. Wada ojura en, doko wun ingeunu be ijura kame wan omio tie me ateni.

Amot me Ajikini

- ¹³ Ango atie kede kope atot kame amito waco ni, do likame amito wandiko gi awandik.



14Do akaka manono, ango atie kede gen me bino neni awakawaka, di oko bino yamo karacel wang i wang.

15Mulem bed buti. Jowoti omoti. Mot awotino wa kame tie kuno, ngat acelacel kede nyinge.



Yuda

Yuda 1

Amot

¹ Baluwa kowok kibut Yuda ngatic ka Yesu Kirisito, kame obedo omin me Yakobo. But jo kame kolwongo, jo kame tie i amara ka Rubanga Papa, jo kame kotie gwoko di kodaro kede Yesu Kirisito.

² Okwao cuny me kisa, mulem, kede amara nyai ne wu.

Jopwony me Angalo

³ Jo na kame amaro, bala kame atie kede mit adwong me wandiko ne wu kop i kom alako kame wan onywakunu, omio aneno be emitere pi ango wandiko ne wu baluwa kame supo cunyu pi yi pi yei kame Rubanga omio jo mege tien acel atwal.

⁴ Pien jo mogo otieko lwidar odonyo i diere wu, jo kame bin kotieko iiko sek pi ngolo ne gi kop noni bala jo kame dagi woro Rubanga, gin jo kame dwadwanyo kop me kisa ka Rubanga pi gin timo tim me caro. Gin kidagi Ngadwong wa acel kenekene kame obedo Rwot wa, en Yesu Kirisito.

⁵ Nan amito medo niango wu, bed bala oudo kotieko niango wu iye kiber, be, Rwot ngat kame bin olako jo ki piny me Misiri tien acel atwal, bin i cen mere eko neko jo kalikame oyei.

⁶ Doko imalaikan kame bin okalamo wang loc gi, di kiko weko kabedo gi, Rubanga otweo gi kede irikoi pi ikar kede ikar kakacol cucucuc, pi kuro Ceng adwong kame kobino ngolo iye kop.

⁷ Iepone nono da, bala bin imalaikan nogo, Sodoma kede Gomora karacel kede bomban koluko gi, kame bin odonyo gida i tim me caro kede i mit kalikame upere kede anywali ka dano, oko udo alola me mac kalikame to di kiko doko anyut me anena.

⁸ Doko iepone acel nono da, jo nogi udo lek mogo kame mio gi kitimo tim me emuna i kom gi ken gi, kede dagi akarunikin ka Rubanga, kede waco kope areco i kom wegi deyo kame tie i malo.

⁹ Do kakame Emikairi malaika adwong opiemo kede Sitani pi kom Musa, Emikairi likame oko mito ngolo ne Sitani kop di eyamo ne kope areco, do en ewaco ne be, “Rwot bunano in!”

¹⁰ Do jogi tie kede anywar i gi dedede kalikame gin kiniang, di gikame gin kitimo pi ekite me cwec gi, bala leini gi kalikame tamo, ko kelo ne gi to.

¹¹ Kitie i can tin benyo! Pien kilubo ekite me kuo ka Kain, doko gin kidonyo i tim me angalo bala Balaam pi mito bedo kede ud, di kiko to bala bin Kora pi tim me jemo.

¹² Gin kitie bala kakocukukao i ibagai wu me amara, di kicamo kede wu ibagai abongo lworo, kede di kilelemo abongo lewic. Gin kiparo pirgi kenekene; kical bala idoun



kame yamo tero do di likame kicwei; kical bala yen kame li kede anyakini i atiekini me kare me oro, yen kame koputo aliasin gi; pi mano gin kitieko to tien are.

¹³Kical bala ebuka ager me nam, kinyuto lewic gi kakaler bala buo. Gin kical bala acer kame rimo, kame Rubanga otieko iiko ne gi kabedo me nakanaka kakacol cucucuc.

¹⁴Enoka, ngat kame obedo akwar me kanyaare cako kibut Adamu, oko mino ikwenyar di ewaco be, “Nenunu, Rwot tie bino kede imalaikan mege kacil tutumian kede tutumian,

¹⁵pi ngolo kop ne jo dedede, kede pi ngolo rac i wi jo dedede pi tim dedede me dagi woro Rubanga, kame gin kitimo iepone nono kalikame nyuto wor but Rubanga, kede pi kop dedede me gero kame jodubo kalikame woro Rubanga oyamo i kome.”

¹⁶Gin kibedo joingungur kame mito turo raco i wi jo apat; gin jo kame paro pi mit gi kenekene; jo kame bwoto kop kede ewaka, jo kame waco ne jo kope me abe kame winyo mit pi mito udo bero moro kibut gi.

Ikwenyar kede Pwony

¹⁷Do wun jo na kame amaro, miero iyutununu gikame bin joor ka Rwot wa Yesu Kirisito oudo ogeo waco sek.

¹⁸Gin bin kiwaco ne wu be, “I kare me ajikini jo acae bino bino, di kilubo mit gi kalikame nyuto wor but Rubanga.”

¹⁹Jo nogi kame lubo mit me kom, jo kalikame Tipo telo, en kame tie kelo apokapoka.

²⁰Do wun, jo na kame amaro, meedenu kede dongo di icungunu i yei wu kacil. Legunu kede twer me Tipo Kacil.

²¹Meedenu maro Rubanga; bedunu di idarunu cuny me kisa ka Rwot wa Yesu Kirisito kame mio wu i udunu kuo kame bedo nakanaka.

²²Bedunu kede kisa but jo kame cuny gi gung;

²³warasonu jo icegun tenge ki mac di ikounu lako gi; bedunu kede cuny me kisa but jo apat do di itimunu kamanono kede lworu, di idagunu kiton igoen kame kom gi opwoko.

Ilega me Pak

²⁴But Rubanga ngat kame karuno gwoki kur ipoti ki yei ni, doko etwero mini icungo abongo raco moro di itie kede kilel i nyim kom me deyo mere,

²⁵but Rubanga acel kenekene, ngat kobedo Ngalak wa, deyo bed bute, kede dwongo, kede twer, kede akarunikin pi Yesu Kirisito Rwot wa, bala lem sek, nataman kede ikar kede ikar! Amen.



Gianyuta

Gianyuta 1

¹Man en gikame Yesu Kirisito onyuto, kame Rubanga omie pi nyuto ne jotic mege, en gikame miero timere i kare kiyapiyapi. Kirisito oko cwano malaika mere but ngatic mere Yokana pi mine ngeno gi noni.

²Yokana bin oko mino ijura i kom kop ka Rubanga kede i kom ijura kame bin Yesu Kirisito omio, kiton i kom gi dedede kame en eneno.

³Etie kede winyo ngat kame somo kop me imurai noni kede dwan amalo, kede kitie kede winyo jo kame winye kede kame lubo gikame kowandiko iye; pien kare odoko iyapiyapi.

Amot but Ikodeta Kanyaare me Jokirisito

⁴ Kop kowok kibus Yokana, but ikodeta kanyaare me jokirisito kame tie Esia. Kisa kede mulem bed butu, kame wok kibus ngat kame nan tie, kame oudo tie sek, kede kame bino bino, kede kibus tipere kanyaare kame tie i nyim kom mere me ajakanut,

⁵ kede kibus Yesu Kirisito mujura kame genere, atin kao me iyarun kikom jo oto, doko ngat kame pugo abakai me lobo kan. En emaro wa, doko remo mere otieko gonyo wa ki dub wa

⁶ di eko loko wa odoko jo me ajakanut, josaseredoti pi tic ne Rubanga mere doko Papa mere. Deyo kede loc bed bute ikar kede ikar! Amen.

⁷ Nenunu, en etie bino kede idoun! Wang jo dedede bino nene, kiton jo kame bin ocobe; jo dedede me wi lobo bino koko pire. Ebino bedo kamanoni! Amen.

⁸ Rwot Rubanga owaco be, “Ango en Alpa kede Omega,” ngat kame tie nan, kame oudo tie sek kede kame bino bino, en Won Twer.

Kirisito Onyutere

⁹Ango Yokana omin wu, kame pi yei Yesu, anywako kede wu itidil, Ajakanut kede ikanyakin di otienu kede dire. Ango oudo atie i cula kame kolwongo be Patimos, pi kop ka Rubanga kede pi ijura kame Yesu omio.

¹⁰I ceng ka Rwot, twer me Tipo oko uma, di ako winyo ki cen ngea dwan amalo bala me agwara.

¹¹En ewaco be, “Wandiko i itabu gikame ineno di iko cwano ne ikodeta kanyaare me jokirisito kame tie Epeso, Simuna, Peregamu, Tuatira, Saradisi, Piladelpia kede Laodikia.”

¹²Di do ango ako lokere pi neno ngat kame oudo tie yamo keda, di ako neno gi me cibo italan, kame kotimo kede saabu, gin kanyaare.

¹³ Ako neno ngatamoro kame cal bala Wot ka dano i diere me gi cibo italan nogo, di engapo ekanso abor, kede di erwao ausi i kore kame kotimo kede saabu.



- ¹⁴ Wie kede yer me wie oudo tar bala epamba arabo bala akako, di wange oudo cal bala leb mac.
- ¹⁵ Tiene oudo meny bala nyonyo burons kame kocalaro oko jililo, di oko rudo, kede dwane oudo mor winyere bala mor me pii atos kame mol di ony.
- ¹⁶ Oudo emako acerin kanyaare i cinge tetu cam, kede epima kame bit tuni tuni oudo opelao ooko ki doge, kede nyime oudo cal bala ceng kame tie rieny kitek.
- ¹⁷ Kakame ango anene kede, ako poto piny i tiene di ako dong bala ngat kotieko to. Do en eko keto cinge tetu cam i koma, di ewaco be, “Kur ibed lwor; ango en agege kede ajikini.
- ¹⁸ Ango ngat kame kuo. Oudo ato, do neni, nataman atie akuo ikar kede ikar. Ango atie kede twer i kom to kede i kom kabedo me jo oto.
- ¹⁹ Aso wandiko gikame ineno, gikame nataman tie timere kede gikame bino timere i cen mere.
- ²⁰ Dwong me mung me acerin kanyaare kame in ineno i cinga tetu cam, kede jame kanyaare kame kotimo kede saabu, me cibo italan en ine: acerin kanyaare obedo imalaikan me ikodeta kanyaare me jokirisito, kede jamini kanyaare me cibo italan obedo ikodeta kanyaare me jokirisito.

Gianyuta 2

Kop kame Kocwao Epeso

- ¹” Wandiko but malaika me ekodet me jokirisito kame tie Epeso be: “Magi en kop me ngat kame mako acerin kanyaare i cinge tetu cam, en ngat kame eoto ki diere me jamini kanyaare me cibo italan, kame kotimo kede saabu.
- ² Ango angeo tice wu, cane wu, kite kame idiunu kede cunyu, ikanyakin kede epone kalikame wun ikarununu kanyo kede tim me jo areco, do wun itiekunu tamo jo kame lwongere ken gi be joor do di li, di ikounu udo be gin kingalo.
- ³ Ango bobo angeo da be wun itienu dino cunyu, itienu kanyo can pi nyinga, doko likame pwodi iolunu.
- ⁴ Do ango atie kede kop i komu be, wun itiekunu weko amara kame oudo itienu kede i agege.
- ⁵ Pi mano, yutununu kong kite kame oudo itienu kede di pwodi likame ipotunu. Swilaronu ki dub wu di ikounu timo gikame oudo itimunu i agege. Aso ka li, ango ayaro bino di ako kwanyo gi me cibo etala wu ki kabedo mere, kwanyo ka iswilarunu.
- ⁶ Do gikaber kibusu en ine be, wun idagunu tice me jo ka Nikolau, bala ada.
- ⁷ “Ngat kame tie kede yite, wek ewinyi gikame Tipo tie waco ne ikodeta me jokirisito. “Ngat kame bino lono, abino mine ecamo anyakini me yat me kuo, kame tie i paradis ka Rubanga.



Kop kame Kocwao Simuna

⁸ “Wandiko but malaika me ekodet me jokirisito kame tie Simuna be: “Magi en kop me ngat kobedo me agege kede me ajikini, ngat kame oudo oto di eko kuo bobo.

⁹Ango angeo peko wu, doko angeo be wun ibedunu jocan (do ateteni wun ibarunu). Ango angeo kope areco kame jo kame waco be gin Iyudayan, do di li, yamo i komu; gin kitie jo me sinagoga ka Sitani.

¹⁰Kur ilworunu can kame iyapununu beo iye. Nenunu, Sitani oyapuno mino korwako jo mogo kikom wu i otkol, tetekenye kotamu di ikounu bedo kede peko pi ceng tomon. Bedunu jo kame genere tuno i to, di ango ako bino mino wu kuo bala giamia pi lono.

¹¹ “Ngat kame tie kede yite, wek ewinyi gikame Tipo tie waco ne ikodeta me jokirisito. “Ngat kame lo, bino bwot ki to me are.

Kop kame Kocwao Peregamu

¹²” Wandiko but malaika me ekodet me jokirisito kame tie Peregamu be: “Magi en kop me ngat kame tie kede epima kame bit tuni tuni.

¹³Ango angeo kakame wun itienu bedo iye, en kakame kom me ajakanut ka Sitani tie iye. Wun imokunu i nyinga, doko likame iwekunu yei ango akadi i kare ka Antipa mujura na, dano na kame genere, kame bin koneko i diere wu, kakame Sitani bedo iye.

¹⁴ Do ango atie kede kope mogo anonok i komu: wun itienu kede jo mogo kuno kame lubo pwoony ka Balaam, ngat kame bin opwoonyo Balak keto gikame getaro jo me Isirael, me wek kicam cam kame koyalo ne cal jwogi, kede kitim caro.

¹⁵Iepone acel nono da wuda itienu kede jo mogo kame lubo pwoony me jo ka Nikolau.

¹⁶Pi mano, swilaronu. Aso ka li, ango ayaro bino butu i kare kiyapiyapi di ako yi kede gin kede epima kame tie i dogo.

¹⁷ “Ngat kame tie kede yite, wek ewinyi gikame Tipo tie waco ne ikodeta me jokirisito. “Ngat kame bino lono, ango abino mine emana mogo kame kokano. Abino mine kidi atar, kame kowandiko iye nying kanyen kalikame tie ngatamoro kame ngeo, kwanyo kenekene ngat kame tie game.

Kop kame Kocwao Tuatira

¹⁸” Wandiko but malaika me ekodet me jokirisito kame tie Tuatira be: “Magi en kop kowok kibus Wot ka Rubanga, ngat kame wange cal bala leb mac, kede kame tiene cal bala nyonyo burons kame korudo.

¹⁹Ango angeo tice wu, amara wu, yei wu, gikame itimunu pi konyo jo, kede epone kame idiunu kede cunyu kanyakino. Ango angeo be tice wu kame itimunu i cen beco kalamo kame igeunu timo.



- ²⁰ Do ango atie kede kop i komu: wun kom iwekunu aweka dako kame nyinge Jesebel no, ngat kame lwongere kene be enabi, doko etie pwoonyo kede ngangalo jotie na pi timo caro, kede camo cam kame koyalo ne cal jwogi.
- ²¹ Ango oudo amie kare me swilaro, do en edagi swilaro ki tim mege me caro.
- ²² Nenunu, ango ayaro mino aramo rete i apien, di ako mino jo kame timo kede en adote can alit, kwanyo ka kiswilaro ki tim mege.
- ²³ Ango abino neko idwe mege, gin en jo kame lube, di ikodeta dedede me jokirisito ko bino ngeno be ango en ngat kame angeo tam me jo kede gikame tie i cuny jo, doko abino mino ngat acelacel gikame poore kede tice mege.
- ²⁴” Do wun jo apat kame itienu Tuatira, jo kalikame lubo pwoony noni, wun jo kalikame ipwoonyerenu i kom gikame jo mogo lwongo be mung atut ka Sitani, ango awaco ne wu be, ango likame amio wu gimoro ace kame dio wu;
- ²⁵kenekene makunu kitek gikame itienu kede, tuno ango bino.
- ²⁶⁻²⁷Ngat kame bino lono kede kame meede timo tic na tuno i ajikini, ango abino mine akarunikin i kom atekerin, bala kame ada agamo kede akarunikin kibut Papa na. Di en eko bino pugo gi kede ebela me lilim, di eko ngingido gi bala agulu kame ongingidun.
- ²⁸Doko ango abino mine acer me odiko.
- ²⁹” Ngat kame tie kede yite, wek ewinyi gikame Tipu tie waco ne ikodeta me jokirisito.

Gianyuta 3

Kop kame Kocwao Saradisi

- ¹” Wandiko but malaika me ekodet me jokirisito kame tie Saradisi be: “Magi en kop me ngat kame tie kede loc i kom tipere kanyaare ka Rubanga, kede kame tie kede acerin kanyaare. Ango angeo tice wu; wun itienu kede nying kame nyuto bala ikuounu, bed bala itounu.
- ²Ceunu, di ikounu medo teko i gikame pwodi odong, kame nan do iyapiyapi to, pien ango likame audo tice wu tie kakare i nyim Rubanga na.
- ³ Yutununu gikame oudo kopwoonyo wu, kede kame iwinyunu; lubunu gi, kede ikounu swilaro. Aso ka likame iceunu, ango ayaro bino bala ngakuwo, likame ibinunu ngeno esawa kame ango ayaro bino kede butu.
- ⁴Do pwodi tie jo mogo anonok Saradisi, jo kalikame opwoko igoen gi; gin kibedo jo kame poore ot karacel kede ango di kingapo igoen atar.
- ⁵ Ngat kame lo, kobino ngapo ne igoen atar kamanono da, doko ango likame abino weno nyinge tenge kiye itabu me kuo. Ango abino tuco nyinge i nyim Papa na kede i nyim imalaikan mege, be en mera.



6” Ngat kame tie kede yite, wek ewinyi gikame Tipo tie waco ne ikodeta me jokirisito.

Kop kame Kocwao Piladelpia

7 “Wandiko but malaika me ekodet me jokirisito kame tie Piladelpia be: “Magi kop me ngat kacil, ngat kame tie kede ateni, kame tie kede sumilito ka Daudi. Ka en eyabo ekeko, likame tie ngatamoro kame karuno cego; doko ka en ecego, likame tie ngatamoro kame karuno yabo.

8Ango angeo tice wu. Nenunu, ango atieko yabo ne wu ekeko tie twolo, kalikame tie ngatamoro kame karuno cego. Ango angeo be akadi bed bala itienu kede teko anonok, do wun ibedunu lubo kop na, doko likame ikounu daga.

9Nenunu, ango ayaro mino jo kame obedo jo me sinagoga ka Sitani, jo kame ngalo be gin Iyudayan do di li, ango abino mino gi kibino di kiko riondiko piny i tienu, di kiko bino ngeno be ango amaro wu.

10Pi kite kame ilubunu kede kop na me dire kanyakino, ango abino gwoko wu i kare me atama kame oyaro bino i piny lung, pi tamo jo kame bedo i wi lobo.

11Ango atie bino i kare kiyapiyapi; makunu kitek gikame itienu kede, tetekeny kur ngatamoro mai giamia me pwoc kame komio wu pien ilounu.

12 Ngat kame bino lono, ango abino mine ebedo epir i tempulo ka Rubanga na, doko likame ebino yai kiye. Ango abino wandiko nying Rubanga na i kome, kede da nying bomba ka Rubanga na, en Yerusalem kanyen kame bino bino piny yai ki malo kibut Rubanga na. Doko abino da wandiko nyinga anyen i kome.

13” Ngat kame tie kede yite, wek ewinyi gikame Tipo tie waco ne ikodeta me jokirisito.

Kop kame Kocwao but Jo me Laodikia

14 “Wandiko but malaika me ekodet me jokirisito kame tie Laodikia be: “Magi en kop kowok kibut Amen, mujura me ateni kame genere, ngat kame gi dedede kame Rubanga ocweo ocakere kibute.

15Ango angeo tice wu; wun likame ibedunu jo angic amoto aliet. Oudo cunya mito be koto ibedunu jo angic amoto aliet!

16Do pien wun ibedunu jo kame momor, jo kalikame ngic amoto liet, abino ngulo wu tenge ki dogo.

17Pien wun iyamunu be, ango abaro, atieko lony, doko likame tie gimoro kame ango pwodi amito. Do likame ingeunu be wun iliunu kede yomcuny. Itienu jo kame jo poore bedo kede kisa i kom gi, ibedunu jocan, itienu imuduka, doko itienu nono abongo giangapa.

18Pi mano, ango atie mino wu tam me wilo kibuta saabu kame kojililo kede mac, tetekeny ibarunu. Doko da iwilunu igoen atar me angapa, me wek iumunu komu ikounu bedo abongo lewic me ot nono. Wilunu da yat me wang pi keto i wangu, tetekeny inenunu piny.



¹⁹ Ango abunano jo kame amaro, doko abitaro gi; pi mano, miero iketunu cunyu di ikounu swilaro.

²⁰ Nenunu, ango atie cungo i dog ekeko di akukungo; ka ngatamoro owinyo dwana di eko yabo ekeko, ango abino donyo i ode di ako cam kede en, di eda eko cam keda.

²¹ Ngat kame bino lono, ango abino mine ebedo keda i kom na me ajakanut, bala kame ango da alo kede di ako bedo kede Papa na i kom me ajakanut mere.

²²” Ngat kame tie kede yite, wek ewinyi gikame Tipo tie waco ne ikodeta me jokirisito.”

Gianyuta 4

Woro Rubanga i Malo

¹ Di man otieko timere, ako neno ekeko koyabere i malo. Di dwan me agege kame oudo ageo winyo di yamo keda bala koko me agwara oko waco na be, “Bia malo kan di ako bino nyuto ni gikame miero timere ingei man.”

² Cucuto nono di twer me Tipo oko uma, di ako neno kom me ajakanut i malo di ngatamoro tie bedo iye.

³ Ngat kame oudo bedo iye nono oudo meny bala kidere kame kolwongo be jesipa kede karenelia, doko etauloka kame oudo erangi mere cal bala kidi kame kolwongo be emeradi oudo oluko kom me ajakanut nono.

⁴ Komini ot are kiwie ongwon me ajakanuto oudo oluko kom me ajakanut nono, di joadongo ot are kiwie ongwon, kame ongapo igoen atar, kede di kingapo i wi gi icoron me angosibib kame kotimo kede saabu, oudo tie bedo i komini nogo.

⁵ Meny acal bala me kot, icelakin kede amwocumwocun kame winyere bala me kot oudo wok ki kom me ajakanut nono. Mace kanyaare kame liel di mio asara, kame obedo tipere kanyaare ka Rubanga oudo tie i nyim kom me ajakanut nono.

⁶ I nyim kom nono da oudo tie iye gikame cal bala nam adwong me gilasi, kame milimili bala akako. Giacwea ongwon kame kuo, kame wang gi tot atota i nyim gi kede ingei gi oudo oluko kom me ajakanut nono ki bad dedede.

⁷ Giacwea akuo me agege oudo cal bala engu, me are oudo cal bala twon, me adek oudo nyime cal bala me dano, kede me ongwon mere oudo cal bala ekokom kame tie por.

⁸ Giacwea ongwon kame kuo nogo, acelacel kikom gi oudo tie kede bwome kanyape, di wang gi opong rimaro kom gi lung, i ooko kede i yie. Iceng kede iwor gin likame kiweko wer be, “En cil, en cil, en cil Rwot Rubanga Won Twer, en kame oudo etie sek, nataman etie, doko ebino bino.”

⁹ I kare dedede kame giacwea ongwon akuo nogo mio kede deyo, wor kede pwoc but ngat kame bedo i kom me ajakanut nono, en ngat kame ebedo ikar kede ikar,



¹⁰Joadongo ot are kiwie ongwon nogo riebere i nyim ngat kame bedo i kom me ajakanut nono, di kiko mine wor, en ngat kame bedo ikar kede ikar. Gin kiko donyo uco icoron gi me angosibib i nyim kom me ajakanut nono di kiwero be,

¹¹”Rwot Rubanga wa, epoore pi in udo deyo, wor kede twer, pien in en kame icweo jame dedede, doko pi mit nin en komio gin kitie, doko en komio kocweo gi.”

Gianyuta 5

Itabu Adola kede Katin Romo

¹ Di ako neno itabu adola, kame kowandiko yie kiton ngee di tie i cing tetu cam me ngat kame oudo bedo i kom me ajakanut nono; oudo kododoko mwone tien kanyaare.

²Di ako neno malaika kame tie kede twer adwong di epenyere kede dwan amalo be, “Ngai en kame opoore pi tako gikame kododoko mwono kede itabu di eko yabo yie?”

³Likame tie ngatamoro i malo arabo i wi lobo amoto piny i dud lobo, kame oko karuno yabo itabu nono arabo neno yie.

⁴Ango di ako kok kitek pien likame tie ngatamoro kame oko udere kame oudo opoore pi yabo itabu nono arabo neno yie.

⁵ Di ngat acel kikom joadongo oko waco na be, “Kur ikoki; neningo, Engu me ateker ka Yuda, Alias ka Daudi, otieko lono, omio en ekaruno tako gikame kododoko tien kanyaare mwono kede itabu adola nono, di eko yabo yie.”

⁶ Di ako neno i dierediere me kom me ajakanut kede giacwea akuo ongwon, kede i dier joadongo di cungo iye Katin Romo kame ineno bala koneko. Oudo etie kede tunge kanyaare kede wange kanyaare, kame obedo tipere kanyaare ka Rubanga kame ecwao i wi lobo lung.

⁷Katin Romo nono oko ot di en eko gamo itabu adola nono ki cing tetu cam me ngat kame oudo obedo i kom me ajakanut.

⁸ Kakame en etieko gamo kede itabu adola nono, giacwea akuo ongwon kede joadongo ot are kiwie ongwon nogo oko riebere i nyim Katin Romo, ngat acelacel kikom gi oudo tie kede adungu kede bakulin kame kotimo kede saabu di oketo i yi gi bubani pong, kame obedo ilega me jokacil.

⁹ Gin kiko wero wer anyen di kiwaco be, “In en ngat kame opoore pi gamo itabu adola kede tako gikame kododoko mwone kede. Pien in oudo koneki, doko ilako ne Rubanga jo kede remo ni, jo me abilere dedede, leb dedede, jo me erangi dedede kede atekerin dedede.

¹⁰ In imio gi kidoko jo me ajakanut, josaseredoti pi tic ne Rubanga wa, doko gin kibino pugo lobo.”

¹¹ Di ango bobo ako neno, doko ako winyo dwan imalaikan atot kame romo tutumian kede tutumian, kame oudo oluko kom me ajakanut nono, kede dwan giacwea akuo ongwon kede me joadongo,



¹²di kiwero kede dwan amalo be, “Katin Romo kame oudo koneko en kame opoore pi udo twer, abar, rieko, teko, wor, deyo, kede pak!”

¹³Di ako winyo giacwea dedede kame tie i malo kede i wi lobo kede piny i dud lobo kede i nam, giacwea dedede kame tie i piny, di kiwero be, “Pak, wor, deyo kede twer bed nakanaka but ngat kame bedo i kom me ajakanut kede but Katin Romo ikar kede ikar!”

¹⁴Giacwea ongwon kame kuo nogo oko gamo be, “Amen!” Di joadongo nogo oko riebere piny di kiko mino wor.

Gianyuta 6

Gikame Kododoko Mwono kede Itabu

¹Di ako neno Katin Romo di yabo acel i kom amwon kame kododoko tien kanyaare nogo. Ako winyo acel kikom giacwea akuo ongwon di waco kede dwan kame mor bala mwoc me kot be, “Bia!”

²Di ako neno asigira atar, ngat kame wanano en oudo mako emal; di oko mine ocoro me angosibib. En eko ot di elo yi, doko me wek edony lono yi.

³Kakame eyabo kede amwon me are mere, ako winyo di giacwea akuo me are mere waco be, “Bia!”

⁴Di asigira ace kame kwar oko wok. Di oko yei ne ngat kame wanano en kwanyo mulem ki wi lobo, tetekeny jo nekere ken gi ken gi; di oko mine twon epima.

⁵Kakame eyabo kede amwon me adek, ako winyo giacwea akuo me adek mere di waco be, “Bia!” Ango di ako neno asigira kame col, di ngat kame wanano en oudo tie kede misani i cinge.

⁶Ako winyo dwan kame cal bala me dano, di wok ki diere me giacwea akuo ongwon di waco be, “Kilo acel me engano pi denari acel, kede kilo adek me mawele pi denari acel. Do kur idudubo mo me olibeti kede bwini.”

⁷Kakame en eko yabo kede amwon me ongwon mere, ako winyo dwan giacwea akuo me ongwon mere di waco be, “Bia!”

⁸Ango di ako neno asigira kame kome oudo odubere; ngat kame wanano en oudo nyinge To, di kabedo me jo oto oudo tie lube. Oudo komio gi twer i wi acel i kom ongwon me wel me jo me wi lobo, pi neko gi kede epima, kec, aumpuli, kede leini ager me obar.

⁹Kakame eyabo kede amwon me kany mere, ako neno tipere me jo kame oudo koneko pi kop ka Rubanga, kede pi ijura kame oudo gin kimio, di kitie i dud alutari.

¹⁰Gin kiko redo kede dwan amalo be, “Rwot won Twer, in ngat kacil kede me ateni, ibino tero kare kame rom amene di likame pwodi ingolo kop ne jo me wi lobo, di iko culo kwor me remo wa?”



- ¹¹Di do oko mino ngat acelacel kikom gi ekanso atar, di oko yamo ne gi pi wei pi kare moro acecek, tuno di wel oromo, wel me jotic jowot gi, kede me imiegu kede amiegu gi kame kobino neko bala gin.
- ¹²Kakame eyabo kede anwon me kanyape mere, ango ako neno yangere atek me piny, wang ceng oko doko col bala giangapa me iturur, di duwe oko doko kwar bala remo.
- ¹³Acerin oko popoto piny bala anyakini me yat epigi kame ony piny i kare me ngico me piny kame yamo atek oyayango gi.
- ¹⁴Edou da oko rwenyo bala itabu adola kame kodolo, di oko kwanyo mori kede cula dedede ki kadedere gi.
- ¹⁵Di abakai me wi lobo, jo kame pirgi tek, jodongo me isirikalen, joabar, joatek kede jo dedede, ipasoi kede jo kalikame ipasoi, di oko pwono i abo kede i kide me mori.
- ¹⁶Gin udo kitie lwongo mori kede kide be, “Potunu i kom wa di ikounu kano wa me wek kur ngat kame bedo i kom me ajakanut nen wa, kede da ikounu kano wa ki lilo me Katin Romo.
- ¹⁷Pien ceng me lieto me lilo gin otieko tuno, ngai kame karuno kanyakino en?”

Gianyuta 7

Jo 144,000 me Isirael

- ¹Ingei man ako neno imalaikan ongwon di kitie cungo i bad ongwon me lobo, di kigengo yamere ongwon me lobo buko, tetekeny kur yamo moro buki i lobo arabo i nam amoto i kom yat moro.
- ²Di ako neno malaika ace di tie ot malo ki tetu wok ceng, di etie kede alama ka Rubanga, di en eko lwongo kede dwan amalo imalaikan ongwon kame oudo komio twer me dudubo lobo kede nam.
- ³En ewaco be, “Kur idudubunu lobo arabo nam amoto yen, tuno di wan otieko keto alama i tur nyim jotic ka Rubanga wa.”
- ⁴Di ako winyo wel me jo kame koketo alama i tur nyim gi, oudo kitie tutumia tol acel kede ot ongwon kiwie ongwon, gin jo kame owok kiye atekerin dedede me Isirael.
- ⁵Koketo alama i tur nyim jo tutumia tomon kiwie are me ateker ka Yuda, jo tutumia tomon kiwie are me ateker ka Ruben, jo tutumia tomon kiwie are me ateker ka Gad.
- ⁶Doko koketo alama i tur nyim jo tutumia tomon kiwie are me ateker ka Aser, jo tutumia tomon kiwie are me ateker ka Naputali, jo tutumia tomon kiwie are me ateker ka Manase.
- ⁷Doko koketo alama i tur nyim jo tutumia tomon kiwie are me ateker ka Esimioni, jo tutumia tomon kiwie are me ateker ka Lebi, jo tutumia tomon kiwie are me ateker ka Isakari.



⁸Doko koketo alama i tur nyim jo tutumia tomon kiwie are me ateker ka Sebulun, jo tutumia tomon kiwie are me ateker ka Yosepu, kede jo tutumia tomon kiwie are me ateker ka Benjamin.

Twon Ekodet me Jo

⁹Ingei man, ango ako neno twon ekodet me jo kalikame ngatamoro karuno maro wel gi. Jo kame owok kiye atekerin dedede, abilere dedede, jo me erangi dedede kede leb dedede, di kitie cungo i nyim kom me ajakanut kede i nyim Katin Romo, di kingapo ikanson atar kede di kimako jange me otit i cing gi.

¹⁰Oudo gin kitie lelemo be, “Alako wok kibus Rubanga wa, ngat kame bedo i kom me ajakanut, kede kibus Katin Romo!”

¹¹Imalaikan dedede kame oudo tie cungo luko kom me ajakanut, joadongo kede giacwea akuo ongwon, oko riebere piny i nyim kom me ajakanut di kiko woro Rubanga,

¹²di kiwaco be, “Amen! Pak, deyo, rieko, pwoc, wor, twer, kede teko bed but Rubanga wa ikar kede ikar! Amen.”

¹³Di ngat adwong acel oko penya be, “Alu ige kame ongapo ikanson atar, doko kiwok kituai?”

¹⁴Ango ako dwoko ne be, “Adwong, in en kame ingeo.” Di en eko waco na be, “Magi en jo kame owok ki can alit. Gin kilwoko ikanson gi kede remo me Katin Romo oko doko tar.

¹⁵Pi mano, gin do kitie i nyim kom me ajakanut ka Rubanga, di kiwore iceng kede iwor i tempulo mere; doko ngat kame bedo i kom me ajakanut bino gwoko gi.

¹⁶Kec likame bobo bino neko gi, akadi orio me pii da likame bino neko gi; ceng likame bino wango gi akadi lieto moroni.

¹⁷Pien Katin Romo kame tie i nyim kom me ajakanut bino bedo ngakwat gi, en ebino telo gi etero gi i atan me pii me kuo di Rubanga ko bino weno pige wang gi dedede.”

Gianyuta 8

Amwon me Kanyaare

¹Kakame Katin Romo oyabo kede amwon me kanyaare, ling oko bedo tie malo pi kare kame romo bala dul esawa.

²Di ako neno imalaikan kanyaare, kame cungo i nyim Rubanga, di kotie mino gi agwara kanyaare.

³Di malaika ace oko bino di eko cungo i nyim alutari di emako gi me dunyo bubani. Di oko mine bubani atos pi yalo karacel kede ilega me jokacil i alutari kame kotimo kede saabu, kame cungo i nyim kom me ajakanut.



⁴Yiro me bubani di oko duny malo karacel kede ilega me jokacil ki cing malaika kame tie i nyim Rubanga.

⁵Di malaika nono oko kwanyo gi me dunyo bubani, eko pongo iye mac kame kokwanyo ki alutari, di eko lwomo gi nono piny i lobo. Di amwocumwocun kame cal bala me kot, icelakin, meny atot acal bala me kot, kede yangere me piny oko timere.

Agwara Kanyaare

⁶Di imalaikan kanyaare kame oudo mako agwara kanyaare di oko iikere pi kuto gi.

⁷Malaika me agege oko kuto agwara mere, di akako kede mac konyale kede remo oko cwei i lobo. Acel i kom adek me wi lobo oko wang, acel i kom adek me yen dedede da oko wang, kede lum dedede oko wang.

⁸Malaika me are oko kuto agwara mere, di eko lwomo i nam adwong gimoro kame cal bala moru ati kame oudo tie liel mac.

⁹Di acel i kom adek me nam oko lokere odoko remo, acel i kom adek me giakuo kame bedo i nam oko to, kede acel i kom adek me imerin oko dudubun.

¹⁰Malaika me adek oko kuto agwara mere, di acer ati oko potu ki malo di eliel bala toc, en epoto eko umo acel i kom adek me icileta kede ataneko me pii.

¹¹Nying acer nono en “Ekec.” Acel i kom adek me pii oko doko kec, di jo atot kame omato pii nono oko to, pien oudo edoko kec.

¹²Malaika me ongwon oko kuto agwara mere, di gimoro oko dipo dul acel i kom adek me wang ceng, acel i kom adek me wang duwe, kede acel i kom adek me acerin, omio acel i kom adek me lero kame gin kimio oko doko colo, acel i kom adek me iceng oko bedo abongo lero kede acel i kom adek me iwor da oko bedo kamanono.

¹³Di ango ako tingo wanga, ako winyo ekokom kame oudo tie por i malo okwidu di ekok kede dwan amalo be, “Otukwi can, otukwi can, otukwi can kame jo abedo i wi lobo bino neno ka kokuto agwara kame imalaikan adek oyapuno kuto!”

Gianyuta 9

¹Di malaika me kany oko kuto agwara mere, di ako neno acer kame oudo opoto ki malo, di oko mine sumilito me dog bur atut wiriwir.

²Acer nono oko yabo dog bur atut wiriwir nono, di yiro kame cal bala yiro kame wok kiye epipa adwong me calaro mwola oko duny kiye, kame oko umo wang ceng kede malo dedede.

³Di obonyo oko wok ki yiro nono bino i lobo, di oko mino gi twer acal bala me ekiliton.

⁴Oudo koyamo ne gi be kur kidudubo lum me lobo arabo gikame tui amoto yen, do kenekene kimi jo kalikame tie kede alama ka Rubanga i tur nyim gi lito.



- ⁵Oudo likame koyei ne gi neko jo, do oudo koyei ne gi mino gi lito pi dwete kany. Lito kame kimio jo oudo cal bala lito kame ekilton mio kame ekao dano.
- ⁶I kare nono jo bino mono to, do likame kibino ude; kibino mito be koto kitoi, do to bino ringo tenge kibun gi.
- ⁷Obonyo nogo oudo cal bala asigiran kame kotieko iiko pi ot yi. Gikame cal bala ocoro me angosibib kame otimo kede saabu oudo tie i wi gi, kede nyim gi oudo cal bala nyim jo.
- ⁸Yer me wi gi oudo cal bala yer me wi mon, kede lak gi oudo cal bala lak engu.
- ⁹Abokoya me kom gi oudo cal bala ebuku me nyonyo kame jo ngapo i kor gi, kede mor me bwom gi oudo winyere bala mor me cabalan atot me yi, kame asigiran tie wano ringo kede i yi.
- ¹⁰Oudo gin kitie kede yib gi kame lak gi me kakao jo tie iye bala ekilton. Twer gi me kakao jo pi dwete kany oudo tie i yib gi.
- ¹¹Malaika kame lo bur atat wiriwir en kame oudo obedo abaka gi. Nyinge i leb Eburania en Abadon, do i leb Gurik kolwonge be Apolion.
- ¹²Can me agege otieko kato, do nenunu, can are pwodi odong tie bino.
- ¹³Di malaika me kanyape oko kuto agwara mere, di ako winyo dwan moro wok ki isondana ongwon kame cal bala tung le, isondana me alutari kame kotimo kede saabu, alutari kame tie i nyim Rubanga.
- ¹⁴Dwan nono oudo waco ne malaika me kanyape kame oudo tie kede agwara be, “Gony imalaikan ongwon kame kotweo i ecilet adwong me Eupurate.”
- ¹⁵Aso, di oko gonyo imalaikan ongwon nogo, gin oudo kotieko iiko gi cuto kitie daro esawa nono, ceng nono, duwe nono kede mwaka nono, pi neko acel i kom adek me jo dedede.
- ¹⁶Ango ako winyo wel me isirikalen kame oudo wanano asigiran oudo tie milion tol are.
- ¹⁷Epone kame ango oudo aneno kede asigiran nogo i gianyuta en ine: jo kame wanano gi oudo ongapo i kor gi ibukui kame kwar bala mac, kame tie ebululu ebululu bala sapir, kede kame tie bisali bisali bala salupa. Wi asigiran nogo oudo cal bala wi inguon, di mac kede yiro kede salupa wok ki dog gi.
- ¹⁸Can adek nogi me mac, yiro kede salupa kame oudo wok ki dog gi oko neko acel i kom adek me jo dedede.
- ¹⁹Pien twer me asigiran nogo tie i dog gi kede i yib gi. Yib gi cal bala twole, di kitie kede wi gi kame kimio kede jo awanon.
- ²⁰Jo icegun dedede kame can nogi likame oneko, likame oko swilaro ki gikame cing gi otimo, amoto weko woro jwogi, cal jwogi kame kotimo kede saabu, siliba, nyonyo



burons, kidi kede yat kame kopao, gi kalikame neno piny amoto winyo kop arabo twero ot.

²¹Doko da likame gin kiko swilaro ki nek, ki tim gi me jwok, ki caro kede ki tim gi me kuwo.

Gianyuta 10

Malaika kede Itabu Adola Atitidi

¹Di bobo ako neno malaika ace kame tek twatwal di ewok ki malo ebino piny. Oudo eumere kede edou, di etauloka tie i wie, nyime oudo cal bala ceng, kede tiene oudo cal bala mac kosipere.

²En oudo emako i cinge itabu adola atitidi kame koyabo. Oudo enyono nam adwong kede tiene tetu cam, do tiene tetu ngodal oudo onyono lobo kakatek,

³di en eko lwongere kede dwan amalo bala dorano me engu. Kakame elwongere kede, mor oko timere tien kanyaare kame cal bala me kot.

⁴Kakame mor otieko timere kede tien kanyaare kame cal bala me kot, oudo ango amito do cako iwandik, do ako winyo dwan kame wok ki malo di waco be, “Mung gikame mor kanyaare kame cal bala me kot owaco, kur iwandiko en.”

⁵ Di malaika kame oudo ango aneno di tie cungo i nam adwong kede i lobo kakatek oko tingo cinge tetu cam malo,

⁶di en eko lairo i nying ngat kame bedo ikar kede ikar, ngat kocweo malo kede gikame tie iye, kocweo lobo kede gikame tie iye, kede kocweo nam kede gikame tie iye. En ewaco be, “Likame doko gal bino bedo tie.

⁷Do i ceng kame malaika me kanyaare bino kuto kede agwara mere, iik komungere ka Rubanga bino cobere, bala kame en ewaco ne kede inabin jotic mege.”

⁸ Di ako winyo dwan kame oudo ageo winyo di wok ki malo nono bobo di waco na be, “Oti igam itabu adola koyabere nono ki cing malaika kame tie cungo i nam kede i lobo kakatek.”

⁹Ango ako ot but malaika nono ako waco ne pi mina itabu adola atitidi nono. En eko waco na be, “Tere di iko came; ebino bedo kec i yi, do emit bala mokic i dogi.”

¹⁰Ango ako gamo itabu adola atitidi nono ki cing malaika di ako came; oudo emit i doga bala mokic, do kakame atieko came kede, en eko mino yia odoko kec.

¹¹Di oko yamo na be, “Miero bobo imurao kop ka Rubanga i kom jo atot, i kom atekerin, i kom leb apapat kede i kom abakai.”

Gianyuta 11

Ijurak Are



- ¹ Di oko mina magada kame cal bala gikame opimo kede boro, di oko waco na be, “Ot ipim rom me tempulo ka Rubanga, alutari, kede imar wel me jo kame woro Rubanga iye.
- ² Do kur ipim diakal kame tie ooko me tempulo, weke, pien kotieko mine i cing jo kalikame woro Rubanga, doko gin kibino nyonyono Bomba Kacil pi dwete ot ongwon kiwie are.
- ³ Doko ango abino mino ijurak na are akarunikin me imurai pi ceng tutumia acel kede tol are kede ot kanyape, di kingapo giangapa me iturur.”
- ⁴ Magi en olibeti are kede jamini are me cibo italan, kame cungo i nyim Rwot me lobo.
- ⁵ Ka ngatamoro mito timo ne gin raco, mac bwote ki dog gi di ko wango jokwor gi; ngatamoro kame mito timo ne gi raco, miero neke iepone noni.
- ⁶ Gin kitie kede twer me cego malo, tetekeney kot likame cwei i kare kame gin kimurao kede. Doko gin kitie da kede akarunikin i kom pii, me loke doko remo, kede akarunikin me kelo peko apapat i wi lobo, di kiruruco bala kame cuny gi mito.
- ⁷ Kame gin kitieko mino ijura gi me kop ka Rubanga, le nono kame wok ki bur atat wiriwir bino yi kede gi eko bwono gi, di eko neko gi.
- ⁸ Liele gi bino buto i dier gudo me bomba adwong, kakame koguro kiye Rwot gi. Kame oporo apora, bomba nono kolwongo be Sodoma kede Misiri.
- ⁹ Jo dedede, abilere dedede, leb dedede kede atekerin dedede bino neno liele gi pi ceng adek kede dul, di kidagi be yik gi i ates.
- ¹⁰ Jo kame bedo i wi lobo bino bedo kede kilel di kitedo ibagai kede di kimio giamia but jowot gi ken gi ken gi pi to me inabin are nogi, pien gin oudo kikelo can adwong ne jo kame bedo i wi lobo.
- ¹¹ Do ingei ceng adek kede dul, wei me kuo kame wok kikut Rubanga oko donyo i kom gi, di kiko yai malo kicungo, di lworu adwong oko mako jo koneno gi.
- ¹² Di jo are nogo oko winyo dwan amalo kowok ki malo di waco ne gi be, “Bianu malo kan!” Gin kiko ot malo kede edou di jokwor gi neno.
- ¹³ Iesawa nono piny oko yangere kitek, di acel me tomon me bomba nono oko popoto piny; jo tutumia kanyaare oko to pi yangere me piny nono. Lworu adwong oko mako jo icegun dedede kame oudo odong, di kiko mino deyo but Rubanga me malo.
- ¹⁴ Can me are otieko kato, do nenunu, can me adek oyapuno tuno.

Agwara me Kanyaare

- ¹⁵ Malaika me kanyaare di oko kuto agwara mere, di dwan atat amalo oko winyere di yamo i malo be, “Ajakanut me piny otieko doko me ka Rwot wa kede me ka Kirisito mere, doko en ebino pug ikar kede ikar.”



¹⁶Di joadongo ot are kiwie ongwon kame oudo tie bedo i komini gi me ajakanut i nyim Rubanga oko riebere piny di kiko woro Rubanga,

¹⁷di kiwaco be, “Wan opwoi, Rwot Rubanga won Twer, in en kame nan itie doko oudo itie sek, pien in inyuto twer ni adwong di iko cako pug.

¹⁸ Atekerin bin oko doko ger, di lilo ni oko bino, kede kare me ngolo kop ne jo oto da oko tuno. Kare otuno me mino giamia me pwoc but jotie ni, inabin, kede jo ni, kede but jo kame woro nyingi, jo kame obedo jo me ruom apiny kede me ruom amalo, kede kare otuno me dudubo jo kame dudubo wi lobo!”

¹⁹ Di oko yabo tempulo ka Rubanga i malo, Sanduku me Isikan mere oko neeno di tie iye. Di asara kame cal bala meny me kot, dwan atot, amwocumwocun bala me kot, yangere me piny, kede cwei atek me akako oko timere.

Gianyuta 12

Dako kede Twol Kiyiliyili

¹Twon gianena me aura oko neeno i malo. Dako moro oko neeno kame ongapo ceng, di duwe tie i dud tiene, kede di engapo i wie ocoro me angosibib kame tie kede acerin tomon kiwie are.

²En oudo eyac eyapuno nywal; di eko kok pi aramo kede acanitoi me nywal.

³ Di bobo gianena me aura ace oko neeno i malo. Twon twol kiyiliyili akwar oko neeno, kame tie kede wie kanyaare kede tunge tomon, di icoron kanyaare me angosibib oudo tie i wie nogo.

⁴ En eko wano acel i kom adek me acerin dedede ki malo kede yibe, di eko uco gi piny i lobo. Di twol kiyiliyili nono oko cungo i nyim dako kame oudo oyapuno nywal nono, me wek ka enywal ecamaro atin mere cucuto.

⁵ En eko nywalo atin awobi, kame bino pugo atekerin dedede kede ebela me lilim. Do oko waraso atin nono di oko tere but Rubanga i kom meren me ajakanut.

⁶Dako nono oko ringo i tim, kabedo kame Rubanga oudo oiko ne, kakame kobino pite kiye pi ceng tutumia acel kede tol are kede ot kanyape.

⁷ Kikano yi oko cakere i malo. Emikairi kede imalaikan mege oko yi kede twol kiyiliyili nono, di twol kiyiliyili nono kede imalaikan mege oko yi kede gi,

⁸do oko bwono gi di kiko doko li kede kabedo i malo.

⁹ Di oko uco twon twol kiyiliyili nono piny, twol me anakacia nono, kame kolwongo be Sitani, ngat kame ngalo jo dedede me piny. Bin oko uce piny i lobo, en karacel kede imalaikan mege.

¹⁰ Di ango ako winyo dwan amalo di yamo i malo be, “Nan do alako, twer kede Ajakanut ka Rubanga wa, kede akarunikin ka Kirisito mere otieko bino. Pien kotieko



uco ngat kame pido imiegu kede amiegu wa piny, ngat kame pido gi i nyim Rubanga wa iwor kede iceng.

¹¹Gin kibwone pi remo me Katin Romo kede pi kop me ijura kame gin kimio, pien gin oudo likame kiparo pi kuo gi akadi paka tuno i to.

¹²Pi mano, lel do, in malo kede wun dedede kame ibedunu iye! Do itienu i can, wun lobo kede nam, pien Sitani otieko bino butu kede twon lilo, piento en engeo be kare mere cecek!”

¹³Kakame twol kiyiliyili nono oneno kede be kotieko uce piny i lobo, en eko cako diebere kede dako kame oudo onywalo atin awobi nono.

¹⁴Do oko mino dako nono bwome are me ekokom adwong, me wek epor tenge kibut twol nono di eko ot i tim, kakame kobino pite kiye pi mwakini adek kede dul.

¹⁵Twol nono oko nyeto pii ki doge, kame ineno bala ecilet, pi koto molo dako nono.

¹⁶Do lobo oko konyo dako nono; lobo ongamo doge di eko mwonyo ecilet me pii kame twol kiyiliyili nono oudo onyeto ki doge.

¹⁷Di cuny twol kiyiliyili nono oko wang i kom dako nono di eko ot yi kede ikwae mege, gin jo kame lubo cik ka Rubanga kede kame mio ijura i kom Yesu.

¹⁸Di twol nono oko ot cungo i asinge me dog nam.

Gianyuta 13

Leini Are

¹Di ango ako neno le moro di wok ki nam adwong. Oudo etie kede tunge tomon, kede wie kanyaare. Oudo etie kede icoron tomon me angosibib i tunge nogo, kede i wie acelacel oudo tie iye nying kame nyuto acae i kom Rubanga.

²Le kame ango aneno nono oudo cal bala erisa, tiene oudo cal bala me edubu, di doge cal bala me engu. Twol kiyiliyili oko mine twer mere, kom mere me ajakanut, kede akarunikin adwong.

³Wi le nono acel oudo tie kede apore kame koto oudo romo neke, do apore nono oko cango, di jo dedede me wi lobo oko lubo le nono di kiuro.

⁴Jo oko woro twol kiyiliyili nono piento en oudo emio akarunikin mere but le nono. Di gin kiko woro le nono di kiwaco be, “Ngai kame cal bala le noni, doko ngai kame karuno yi kede?”

⁵Di oko mino le nono twer me yamo kope me ewaka kame cao Rubanga, doko oko yei ne bedo kede akarunikin pi dwete ot ongwon kiwie are.

⁶En eko cako yamo kope areco me acae i kom Rubanga, ecao nyinge, kabedo mere, kede jo dedede kame tie i malo.

⁷Oudo da koyei ne pi yi kede jokacil di eko bwono gi. Doko da oko mine akarunikin i kom abilere dedede, jo dedede, leb dedede kede atekerin dedede.



⁸ Jo dedede kame bedo i wi lobo bino wore, gin en jo dedede kame cako di likame pwodi kocweo piny, likame kowandiko nying gi i itabu me kuo me Katin Romo kame oudo koneko.

⁹” Ka ngatamoro tie kede yite, wek ewinyi.

¹⁰ Ka oudo koiko ne ngatamoro be kobino make kotere, kobino make kotere da; ka oudo koiko ne ngatamoro to me epima, kobino neke kede epima da. Manoni tie lwongo but jokacil pi bedo kede ikanyakin kede yei.”

¹¹Di bobo ako neno le ace kame owok ki wi lobo. En oudo etie kede tunge are kame cal bala me katin romo, oudo eyamo bala twol kiyilyili.

¹²En eko tic kede akarunikin dedede me le me agege nono di le nono da tie kanono, di eko mino lobo kede jo kame bedo iye woro le me agege nono, kame oudo apore mere kame romo neke otieko cango.

¹³En etimo gianena adongodongo, kiton mino mac wok ki malo bino piny i wi lobo di jo dedede neno.

¹⁴Di en eko ngalo jo kame bedo i wi lobo kede gianena kame oudo koyei ne timo i nyim le me agege nono; en ewaco ne gi timo cal kame nyuto wor but le nono, le kame oudo kowano kede epima do en eko dong di ekuo.

¹⁵Doko oko yei ne mino cal me le nono wei kame mie kuo, tetekeny cal nono karuno kiton yamo di eko mino koneko jo kame dagi wore.

¹⁶Le nono oko mino koketo ne jo dedede alama i cing gi tetu cam arabo i tur nyim gi, jo kalikame pirgi tek kede jo kame pirgi tek, jo kobaro kede jocan, jo kalikame ipasoi kede ipasoi.

¹⁷Oudo likame tie ngatamoro kame karuno wilo arabo cato gimoro kwanyo di etie kede alama noni, manono en nying le nono arabo namba me nyinge.

¹⁸Manoni mito rieko. Ngat kame tie kede niang emar namba me le nono, pien ecungo pi nying dano. Namba mere tie 666.

Gianyuta 14

Katin Romo kede Jo mege

¹ Di ango ako neno Katin Romo di etie cungo i wi moru me Sion. Oudo etie karacel kede jo tutumia tol acel kede ot ongwon kiwie ongwon, jo kame kowandiko nyinge kede nying Papa mere i tur nyim gi.

²Ango di ako winyo dwan moro kame wok ki malo, kame mor bala pii atot kame mol di ony, kede bala mwoc atek me kot. Dwan kame ango awinyo nono oudo cal bala me adungu kame jogoc tie gono.

³Jo nogo oudo tie wero wer anyen i nyim kom me ajakanut, i nyim giacwea akuo ongwon kede i nyim joadongo. Oudo likame tie ngatamoro kame karuno mako wer



nono kwanyo kenekene jo tutumia tol acel kede ot ongwon kiwie ongwon, kame oudo kotieko lako ki lobo.

⁴Gin en cuo kalikame omunaun kede mito mon, pien gin kigwokere likame kibilo timo mit. Gin nakanaka kilubo Katin Romo kabedere dedede kame en eoto iye. Jo nogi en kame kolako kikom jo dedede, pi bedo bala dul me agege me kac kame komio but Rubanga kede but Katin Romo.

⁵ Likame tie kop moro me angalo kame owok ki dog gi, pien gin kili kede raco moro.

Imalaikan Adek

⁶Di ako neno malaika ace di tie por i malo i dier yamo, di etie kede ejiri kame bedo nakanaka, pi tuco ne jo kame bedo i wi lobo, ne jo me atekerin dedede, abilere dedede, leb dedede kede jo me erangi dedede.

⁷Di en eko waco kede dwan amalo be, “Lworunu Rubanga di ikounu mine deyo, pien esawa mere me ngolo kop otieko tuno. Worenu, en ngat kame ecweo malo kede lobo, nam kede ataneko me pii.”

⁸ Malaika ace, me are mere, di oko lubo di ewaco be, “Epoto, Babilon adwong otieko pototo! En emio atekerin dedede omato bwini mere, en tim mere me caro kame kelo lilo ka Rubanga.”

⁹Malaika ace me adek mere oko lubo di ewaco kede dwan amalo be, “Ka ngatamoro oworo le kede cal mere, di oko keto ne alama i tur nyime arabo i cinge,

¹⁰ eda ebino mato bwini ka Rubanga, en lilo mere, kame eonyo di kec i ikopo me gero mere. Doko kobino mine acana kede mac kede salupa i nyim imalaikan kacil kede Katin Romo.

¹¹ Yiro me mac kame kocano gi kede duny eoto malo ikar kede ikar. Jo kame woro le nono kede cal mere, kede jo kame koketo ne gi alama me nyinge, gin kibino neno can iwor kede iceng abongo wei.”

¹²Man tie lwongo but jokacil pi kanyakino, jo kame gwoko cik ka Rubanga kede kame moko i yei gi i kom Yesu.

¹³Di ako winyo dwan moro kame wok ki malo di waco be, “Wandiko kop ni: cako nan, kitie kede winyo jo kame to di kitie i Rwot.” Tipo oko dwoko be, “Ateteni kitie kede winyo. Gin kibino wei ki lole gi, pien tice gi upere kede gi.”

Kac me Wi Lobo

¹⁴ Di ako neno edou atar, di ngat kame tie bedo i wie cal bala Wot ka dano. Oudo engapo ocoro me ajakanut i wie kame kotimo kede saabu, di pala abit me kac tie i cinge.

¹⁵ Di malaika ace oko wok ki tempulo di elwongo ngat kame oudo tie bedo i wi edou atar nono kede dwan amalo be, “Cak do tic kede pala ni, pien esawa me kac do otieko romo; gikame poore kai i wi lobo otieko cek kiber.”



¹⁶Aso, ngat kame oudo bedo i wi edou oko kiarao pala mere me kac i wi lobo, di en eko kano kac kame tie i wi lobo.

¹⁷Di malaika ace bobo oko wok ki tempulo kame tie malo, eda oudo emako pala abit me kac.

¹⁸Di malaika ace, kame tie kede twer i kom mac, oko wok ki alutari. En eko lwongo ngat kame oudo mako pala abit me kac kede dwan amalo be, “Cak do tic kede pala ni, di iko koko abungeta me olok me wi lobo, pien anyakini mege otieko cek.”

¹⁹Di malaika nono oko kiarao pala mere me kac i wi lobo, di eko nyaro anyakini me olok me wi lobo di eko uco gi i bur me bino bwini, kame obedo gero ka Rubanga.

²⁰Di oko nyonyono olok pi bine i ooko me bomba, di remo oko mol ki bur me bino olok nono kame rom mere ibamurur puti kany, kede kame alele mere bor romo mairo tol are.

Gianyuta 15

Imalaikan kede Alola Kanyaare me Ajikini

¹Di ako neno twon gianena me aura ace i malo. Aneno imalaikan kanyaare kame tie kede alola kanyaare, kame obedo alola me ajikini, pien gin en kame kibedo ajikini me lilo ka Rubanga.

²Di ako neno gikame oudo cal bala nam me gilasi kame onyalere kede mac. Aneno da jo kame bin obwono le nono karacel kede cal mere kede namba me nyinge, di kitie cungo i nget nam me gilasi, di kimako adungu ka Rubanga i cing gi.

³Oudo gin kitie wero wer ka Musa ngatic ka Rubanga, kede wer me Katin Romo be, “In Rwot Rubanga Won Twer, tice ni dongodongo doko kibedo me aura. In Abaka me atekerin dedede, in itimo gi dedede i yore kopoore kede me ateni.

⁴Rwot, ngai kalikame bino lworu nyingi kede mine deyo? Pien in keni en ngat kacil. Atekerin dedede bino bino di kiko wori, pien tice ni me ateni otieko nyutere.”

⁵Ingei man, di ako neno tempulo kame tie i malo di oyabere, kame kima me eema me isikan tie iye.

⁶Imalaikan kanyaare kame oudo tie kede alola kanyaare di oko wok ki tempulo. Oudo kingapo igoen acil kame meny, di kitweo ausin me saabu i kor gi.

⁷Di acel kikom giacwea akuo ongwon oko mino imalaikan kanyaare nogo bakulin kanyaare kame kotimo kede saabu, kame opongo i yi gi lilo ka Rubanga, ngat kame bedo ikar kede ikar.

⁸Yiro kame wok ki deyo ka Rubanga kede ki twer mere oko pong i yi tempulo, doko oudo likame tie ngatamoro kame karuno donyo iye tuno kede di alola kanyaare kame imalaikan kanyaare ka oudo okelo otiek.

Gianyuta 16



Bakulin me Lilo ka Rubanga

- ¹Di ango ako winyo dwan amalo kame owok ki tempulo di waco ne imalaikan kanyaare nogo be, “Otunu ionyunu lilo ka Rubanga kame tie i bakulin kanyaare go i wi lobo.”
- ²Malaika me agege oko ot di eko onyo gikame oudo tie i bakuli mere i wi lobo, di tuo arac me buge alit oko mako jo kame oudo tie kede alama me le, kede jo kame oudo oworo cal mere.
- ³Malaika me are oko onyo gikame oudo tie i bakuli mere i nam adwong, di pii me nam oko lokere odoko cal bala remo me dano oto, di gi dedede kame kuo i nam oko to.
- ⁴Malaika me adek oko onyo gikame oudo tie i bakuli mere i icileta kede i ataneko me pii, di gin dedede kiko doko cal bala remo.
- ⁵Di ako winyo malaika kame lo pii di waco be, “In itimo gikame poore pi cwano alola nogi, in Ngat Kacil, ngat kame tie nataman kede kame oudo tie sek.
- ⁶Pien jo oonyo remo me jokacil kede me inabin, di in nan iko mino gi remo pi mato. Manono poore kede gi!”
- ⁷Di ako winyo alutari di waco be, “Ebo, Rwot Rubanga Won Twer, ngolo kop kame in imio tie me ateni doko etie kakare!”
- ⁸Malaika me ongwon oko onyo gikame oudo tie i bakuli mere i kom ceng, di oko yei ne ceng wango jo kede lieto mere kame rom kede me mac.
- ⁹Lieto kodop me ceng oko wango jo, di gin kiko bedo kede acae i nying Rubanga ngat kame oudo tie kede twer i kom alola nogi, doko likame kiko swilaro ki dub gi, akadi mine deyo.
- ¹⁰Malaika me kany oko onyo gikame oudo tie i bakuli mere i wi kom me ajakanut me le nono, di piny kame en oudo epugo oko doko col. Jo oko kakao leb gi pi lito,
- ¹¹di kicao Rubanga me malo pi aramo kede buge gi, do likame kiko swilaro ki tice gi areco.
- ¹²Malaika me kanyape oko onyo gikame oudo tie i bakuli mere i ecilet adwong me Eupurate. Ecilet nono oko tuo pi iiko yongayo ne abakai kame wok ki tetu kide.
- ¹³Di ako neno tipere areco adek, kame cal bala igwalogwalon, di kitie wok ki dog twol kiyilyili, ki dog le noca, kede ki dog enabi me angalo.
- ¹⁴Gin tipere kame obedo jwogi, kame timo gianena; gin kioto but abakai dedede me piny lung pi coko gi karacel pi yi i Ceng adwong ka Rubanga Won Twer.
- ¹⁵“Nenunu, ango atie bino bala ngakuwo! Etie kede winyo ngat kame bedo di eneeno, ngat kame ongapo igoen mege tetekenye kur eot nono di lewic ko make.”



- ¹⁶ Di tipere nogo oko koko abakai karacel i kabedo kame kolwongo i leb Eburania be Amagedon.
- ¹⁷ Malaika me kanyaare oko do onyo gikame oudo tie i bakuli mere i wi yamo, di dwan amalo oko wok ki kom me ajakanut kame tie i tempulo di waco be, “Kotieko time!”
- ¹⁸ Di asara me meny kame cal bala me kot, icelakin, amwocumwocun kede yangere atek me piny, kame lem pwodi likame otimere cako jo bedo i wi lobo oko timere. Yangere me piny nono oudo rac adikinichel.
- ¹⁹ Bomba kame dwong nono oko barere kidek, di bomban me pinye dedede oko popoto piny. Di Rubanga oko yutuno Babilon adwong, di eko mine mato bwini ki ikopo mere, bwini kame obedo lilo mere.
- ²⁰ Cula dedede oko rwenyo, doko likame tie moru moro kame oko dong.
- ²¹ Akako adongodongo, kame peko gi romo kilo ot kany oko popoto ki malo i kom jo, di jo oko bedo kede acae i kom Rubanga pi alola me akako noni, pien oudo ebedo alola kame rac adikinichel.

Gianyuta 17

Twon Malaya

- ¹ Di malaika acel kikom imalaikan kanyaare kame oudo mako bakulin kanyaare ka oko bino di eko waco na be, “Bia anyut ni alola kame koyaro mino twon malaya no, kame obedo bomba kame tie i nget icileta atot.
- ² Abakai me wi lobo otieko timo kede en tim me caro, doko jo kame bedo i wi lobo otieko mer kede bwini mere, en tim mere me caro.”
- ³ Twer me Tipo oko uma di malaika nono oko tinga etera i tim, di ako neno dako moro di etie bedo ingei le akwar kame oudo kowandiko i kome lung nying kame nyuto acae i kom Rubanga. Le nono oudo tie kede wie kanyaare kede tunge tomon.
- ⁴ Dako nono oudo ngapo igoen akwakwar kede kame kwar bubu, di etubuso kome kede saabu, mwolere kede bira me wel. Oudo emako ikopo kame otimo kede saabu i cinge, di gikame neno rac kede gi me emuna kame nyuto caro mere opong iye.
- ⁵ Oudo kowandiko i tur nyime nying kame obedo gi komungere be, “Babilon adwong, toto me imalayan kede me jo me wi lobo kame timo tim me emuna.”
- ⁶ Di ako neno dako nono di emer kede remo me jokacil kede remo me ijurak ka Yesu. Kakame anene kede, ako uro twatwal.
- ⁷ Do malaika oko penya be, “Pinyo komio iuro? Ango ayaro yamo ni dwong me gi komungere kame mako dako no, kede kame mako le kame biele, le kame tie kede wie kanyaare kede tunge tomon.



⁸ Le kame oudo ineno nono oudo kuo, do nataman likame ekuo, do eyapuno wok ki bur kame tut wiriwir pi ot di oko dudubo en. Jo kame bedo i wi lobo, jo kalikame kowandiko nying gi i itabu me kuo cako di pwodi likame kocweo piny bino bedo kede ur ka kineno le nono, pien bin oudo ekuo, do nataman likame ekuo, doko ebino bino.

⁹” Manoni mito tam atek kede rieko. Wic kanyaare obedo mori kanyaare kame dako nono tie bedo i wi gi, gin nogo da kibedo abakai kanyaare.

¹⁰ Kany kikom gi otieko doko li, acel pwodi tie, do ocelu mere likame pwodi obino; kame en ebino, miero ebed pi kare moro acecek.

¹¹ Do le kame oudo bin kuo do nataman likame ekuo, obedo abaka me kanyauni mere, do en ngat acel kikom abakai kanyaare nogo, en etie ot di oko bino dudubo en.

¹² “Tung le tomon kame oudo in ineno, obedo abakai tomon kalikame pwodi komio twer me pug, do kobino mino gi akarunikin bala abakai pi esawa acel, karacel kede le nono.

¹³ Abakai tomon nogi dedede oribo tam acel me mino twer kede akarunikin gi but le.

¹⁴ Gin kibino yi kede Katin Romo. Do Katin Romo karacel kede jo mege kame elwongo, jo kame en eyero, kame genere, bino bwono gi, piento en ebedo Rwot me rwode kede Abaka me abakai.”

¹⁵ Malaika nono oko waco na be, “Pii kame oudo ineno, kakame malaya nono tie bedo iye, obedo jo apapat, jo me erangi apapat, atekerin kede leb apapat dedede.

¹⁶ Tung le tomon kame in oudo ineno, gin karacel kede le kibino dagi malaya nono; gin kibino tero jame dedede kame en etie kede di kiko weke nono abongo gimoro; kibino camo ringokome di kiko wange kede mac.

¹⁷ Pien Rubanga otieko keto i cuny gi mit me cobo iik mere, en emio gi kibedo kede tam acel me mino le twer gi me pug, tuno di kop ka Rubanga ocoberere.

¹⁸” Dako kame in oudo ineno nono en bomba adwong kame pugo abakai me wi lobo lung.”

Gianyuta 18

Rete me Babilon

¹ Ingei man ango ako neno malaika ace di tie wok ki malo ebino piny di etie kede akarunikin adwong, deyo mere oko caro lobo lung.

² En di eko redo kede dwan amalo be, “Epoto, Babilon adwong otieko potu! Etieko lokere edoko kabedo me jwogi kede kapwono me tipere areco dedede; kapwono me winy dedede areco kame jo dagi.

³ Atekerin dedede omato bwini mere me caro mere. Abakai me wi lobo otieko timo kede tim me caro, doko jocat me wi lobo otieko baro i wi caro mere kalikame dire.”



- ⁴ Di ako winyo dwan moro ace kame wok ki malo di waco be, “Jo na, yaunu tenge kibute, me wek kur idonyunu i dub mege, kede me wek kur inywakunu alola mege.
- ⁵ Pien dub mege ocokere ikumemei tuno i malo, doko Rubanga otieko yutuno tim mege areco.
- ⁶ Terenu iepone kame eda etero wu kede, doko culenu tien are pi gikame etimo. Nyalunu ne giamata i ikopo kame en oudo enyalo ne jo iye, kame kec kalamo meren tien are.
- ⁷ Bala kame en oudo emio kede kome deyo di etie kede kuo ajabajaba, aso wuda mienu can kede iturur kame rom kede magonogo. Bala kame en ewaco kede i cunye kene be, ‘ Ango abedo abaka adako! Ango likame apuserut, likame abino bilo iturur, ‘
- ⁸pi mano, alola nogi bino bino ne i ceng acel: tuo, iturur kede kec. Doko kobino wange kede mac, pien Rwot Rubanga ngat kame ngolo ne kop tie kede twer adwong.”
- ⁹ Abakai me wi lobo, kame bin otimo kede tim me caro, kede kame olubo mit mege, bino kok di kibebelo pire ka kineno yiro me wang mere di duny.
- ¹⁰Gin kibino cungo tenge kakabor pi lworu can kame komie, di kiwaco be, “Otukwi can! Otukwi can! In bomba adwong! In Babilon bomba atek! Kop kame ongolo ni opoto i komi iesawa acel kenekene!”
- ¹¹ Jocat me wi lobo ko bino kok di kitururo pire, pien likame bobo tie ngatamoro kame bino wilo jame gi,
- ¹² jame kame obedo saabu, siliba, mwolere, bira me wel, igoen ameny, igoen akwakwar, silik kede igoen akwar bubu, egere dedede me yen angwe kur kame kotimo ebao, jame dedede kame kotimo kede lak lyec, kede yen me wel amalo me timo ibaon, nyonyo burons, nyonyo ayon kede kidi mabol,
- ¹³sinamon, gikame ngwe kur, bubani, mura, odok me adunya angwe kur, bwini, mo, alos kame konungo kede engano, doke kede romini, asigiran kede cabalan, kede ipasoi, gin en kuo me jo.
- ¹⁴Gin kibino waco ne be, “Gi dedede kame oudo cunyi paro otieko yai kibuti, doko abar kede deyo nin dedede otieko yai, likame bobo ibino udo gi!”
- ¹⁵ Jo kame cato jame nogi, jo kame oudo abar gi ki bomba noni, bino cungo tenge kakabor pi lworu can kame komie. Gin kibino kok kitek di kitururo,
- ¹⁶di kiwaco be, “Otukwi can, otukwi can! Bomba adwong, kame oudo ngapo egoe ameny, egoe akwakwar kede egoe akwar bubu, di etubuso kome kede saabu, mwolere kede bira me wel!



¹⁷Komio lonyo noni kony mere odoko li iesawa acel kenekene.” Jodongo dedede me jokwang emeri kede jo dedede kame emeri tero, jokwang karacel kede jo dedede kame udo sente ki tice kame makere kede ngolo nam, oko cungo tenge kakabor.

¹⁸ Kakame kineno kede yiro me wang mere di tie duny, kiko kok di kiwaco be, “Bomba mene en kame oudo cal bala bomba adwong noni?”

¹⁹ Di kiko donyo kiro asinge i wi gi di kikok kede di kitururo, di kiwaco be, “Otukwi can, otukwi can me bomba adwong! Jo dedede kame oudo tie kede imerin i nam oudo abar pi lonyo mere! Iesawa acel kenekene kotieko mino kony mere odoko li.”

²⁰ Leli i wie in malo, lelunu wun jokacil, kede joor kede inabin, pien Rubanga otieko ngolo ne kop piru.

²¹ Di malaika kame tek oko tingo kidi moro kame rom kede kidi me riego, di eko lwome i nam adwong di ewaco be, “Kobino reto Babilon bomba adwong piny iepone noni kede twon teko, di likame oko bobo bino nene atwal.

²² Koko me adungu kede dwan jo kame tie kede diru me wer, kede koko me bilo, kede koko me agwara, likame bobo kobino winyo i yi in. Likame bobo tie ngadiru me tic moro kame kobino udo i yi in, doko mor me kidi me riego bobo likame bino winyere i yi in.

²³ Likame bobo kobino neno liel me etala moro i yi in, akadi dwan ateran kede eteran likame bobo kobino winyo i yi in. Pien jocat ni oudo obedo jo kame pirgi tek i wi lobo, doko in oudo ingalo atekerin dedede kede tim ni me jwok.

²⁴ Remo me inabin kede me jokacil, kede remo me jo dedede kame oudo koneko i wi lobo, bin koudo i yi in.”

Gianyuta 19

¹Ingei man, ango di ako winyo gikame oudo winyere bala wo me dwan ekodet me jo i malo, di kiwaco be, “Aleluya! Alako, deyo kede twer obedo me ka Rubanga wa.

² Piento en engolo kop i ateni kede kakare. En etieko ngolo kop ne twon malaya kame oudo odubo lobo kede tim mege me caro. Rubanga otieko culo kwor i kome pi remo me jotic mege.”

³ Gin bobo kiko medo waco be, “Aleluya! Yiro me wang mere duny malo ikar kede ikar.”

⁴Di joadongo ot are kiwie ongwon kede giacwea ongwon kame kuo, oko riebere piny di kiko woro Rubanga ngat kame oudo tie bedo i kom me ajakanut, di kiwaco be, “Amen. Aleluya!”

Ebaga me Nyom me Katin Romo

⁵ Di dwan oko wok ki kom me ajakanut di waco be, “Pakunu Rubanga wa, wun jotic mege dedede, wun jo kame itienu kede wor bute, jo me ruom apiny kede me ruom amalo.”



⁶ Di ako winyo gikame oudo winyere bala dwan jo atot, bala mor me pii atot kame mol di ony, kede bala mor me kot, di waco be, “Aleluya! Pien Rwot Rubanga wa Won Twer tie i loc.

⁷ Mito obedunu kede kilel kede yomcuny di okounu mine deyo, pien kare me nyom me Katin Romo otieko tuno. Doko ateran mere otieko iikere,

⁸ kotieko mine egoe acil kame meny pi ngapo.” (Egoe ameny nono en tim kopooore me jokacil.)

⁹ Di malaika nono oko waco na be, “Wandiko kop ni be: kitie kede winyo gin jo kame kolwongo gi i ebaga me nyom me Katin Romo.” Doko en eko waco na be, “Magi obedo kope me ateni kame owok kibus Rubanga.”

¹⁰ Di ango ako riebere piny i tiene pi wore, do en eko waco na be, “Kur itim kamano! Ango atie ngatic bala in karacel kede imiegu kede amiegu kame lubo ijura kame Yesu omio. Wor Rubanga.” Pien ijura kame Yesu omio en mio inabin murao.

Ngat kame Wanano Asigira Atar

¹¹ Di ako neno malo oyabere, ako neno asigira atar di tie iye. Ngat kame oudo tie wanano asigira nono oudo kolwongo be Egenere, kede Ateni; en engolo kop doko eyi i yore kopooore.

¹² Wange cal bala leb mac, di etie kede icoron atot me angosibib i wie. Doko oudo etie kede nying kame kowandiko i kome, kalikame ngatamoro ngeo do kwanyo en kenekene.

¹³ Oudo engapo ekanso kame korwako i remo, kede nying kame kolwonge kede en “Kop ka Rubanga” .

¹⁴ Di isirikalen me malo, kame oudo ngapo igoen ameny, atar di cil, oudo lube di kiwanano asigiran atar.

¹⁵ Epima abit oudo opelao ooko ki doge, kame en ebino bwono kede atekerin. En ebino pugo gi kede ebela me lilim, doko ebino nyonyono olok kame tie i bur kame obio kede bwini me lilo ka Rubanga Won Twer.

¹⁶ I ekanso mere kede i amuro mere oudo kowandiko iye nying be, “Abaka me abakai kede Rwot me rwode.”

¹⁷ Di ako neno malaika moro di tie cungo i wi ceng, di eko lwongo winy dedede kame por i wi yamo malo kede dwan amalo be, “Bianu, cokerenu pi ebaga adwong ka Rubanga,

¹⁸ pi camo ringokom abakai, me kom jodongo me isirikalen, me kom joatek yi, me kom asigiran kede me jo kame wanano gi, ringokom jo dedede, jo kalikame ipasoi kede ipasoi, jo me ruom apiny kede me ruom amalo.”

¹⁹ Di ako neno le kede abakai me wi lobo karacel kede isirikalen gi, di kicokere pi yi kede ngat kame oudo bedo i wi asigira kede isirikalen mege.



²⁰ Di oko mako le nono di oko tere bala mabus, karacel kede enabi me angalo kame oudo otimo gianena i nyime, kame engalo kede jo kame oudo tie kede alama me le nono, kede jo kame oudo oworo cal mere. Di oko uco gin are nogi di kikuo i nam me salupa kame liel.

²¹ Di oko neko jo apat kede epima me ngat kame bedo ingei asigira, epima kame oudo opelao ki doge. Di winy dedede oko pece kede ringokom gi.

Gianyuta 20

Mwakini Tutumia Acel

¹ Di ako neno malaika moro di tie wok ki malo bino piny, di emako i cinge sumilito me bur atat wiriwir kede twon eriko.

² En eko mako twol kiyiliyili, twol me anakacia, en Sitani, di eko twene pi mwakini tutumia acel.

³ Malaika oko uce i bur atat wiriwir nono, eko cego doge, di eko mwone iye, tetekeny kur bobo engal atekerin, paka tuno di mwakini tutumia acel otiek. Ingei mano miero gonye pi kare acecek.

⁴ Di ako neno komini me ajakanuto; jo kame bedo i wi gi oudo komio gi twer me ngolo kop. Di ako neno tipere me jo kame oudo kongolo ngut gi pi mino ijura i kom Yesu kede pi kop ka Rubanga. Oudo gin likame kiworo le akadi cal mere, doko da oudo gin likame kiyei keto alama i tur nyim gi amoto i cing gi. Gin kiko dwogo i kuo di kiko pug karacel kede Kirisito pi mwakini tutumia acel.

⁵ Jo oto apat likame oko dwogo i kuo tuno di mwakini tutumia acel otiek. Manoni en iyarun me agege.

⁶ Kitie kede winyo doko kicil, gin jo kame kibino nywako iyarun me agege. To me are likame tie kede twer i kom akodi jo nogo, do gin kiyaro bedo josaseredoti ka Rubanga kede me ka Kirisito, di gin kiko bino pug karacel kede en pi mwakini tutumia acel.

Bwono Sitani

⁷ Di mwakini tutumia acel otiek, kobino gonyo Sitani ki otkol mere,

⁸ di en eko wok ot ngalo jo me atekerin kame tie i bad ongwon me lobo, en Gog kede Magog, pi koko gi ot yi. Gin kitot bala asinge me dog nam.

⁹ Gin kiko jwiao kioto i wi lobo lung, kiko luko kabedo me jokacil, bomba kame Rubanga maro. Do mac oko cwei ki malo oko neko gin dedede.

¹⁰ Di oko uco Sitani kame oudo ongalo gi i nam me mac kede me salupa, kakame le kede enabi me angalo oudo tie iye. Gin kibino neno can iwor kede iceng ikar kede ikar.

Ngolo Kop me Ajikini

¹¹ Di ako neno twon kom moro atar me ajakanut kede ngat kame oudo bedo iye. Lobo kede malo oko rwenyo wir ki nyime, di kargi oko doko li.



¹²Di ako neno jo oto, me ruom amalo kede me ruom apiny, di kitie cungo i nyim kom me ajakanut nono. Oko yabo itabun, doko di oko yabo itabu moro ace, kame obedo itabu me kuo. Di oko ngolo ne jo oto kop di lubere kede gikame oudo kitimo, kame oudo kowandiko i itabun nogo.

¹³Di nam adwong oko cwano jo oto kame oudo tie iye. To kede kabedo me jo oto da oko cwano jo oto kame oudo tie i yi gi, di oko ngolo ne gin dedede kop di lubere kede gikame oudo kitimo.

¹⁴Di oko uco to kede kabedo me jo oto i nam me mac. Nam me mac noni en to me are.

¹⁵Ngatamoro kalikame bin koudo be kowandiko nyinge i itabu me kuo, oudo kouce i nam me mac.

Gianyuta 21

Malo Anyen kede Lobo Anyen

¹ Di ako neno malo anyen kede lobo anyen; malo me agege kede lobo me agege oudo otieko rwenyo, doko nam da do oudo li.

² Ako neno bomba kacil, Yerusalem anyen, di tie wok ki malo but Rubanga bino piny, di kotubuso en bala ateran kame kotubuso pi riamo kede cware.

³ Di ako winyo dwan amalo di eyamo ki kom me ajakanut be, “Neningo, paco ka Rubanga tie i diere me jo. En ebino bedo kede gi di gin kiko bino bedo jo mege. Rubanga kikome bino bedo kede gi.

⁴ En ebino weno pige wang gi dedede. To bino bedo li, akadi iturur, akadi koko, akadi aramo, pien udo gi me agege otieko kato.”

⁵Di ngat kame oudo bedo i kom me ajakanut oko waco be, “Neningo, ango atie mino jame dedede doko nyen.” Doko da ewaco be, “Wandiko man, pien kope nogi genere doko kitie me ateni.”

⁶ Di en eko waco na be, “Kotieko timo gi! Ango en Alpa kede Omega, agege kede ajikini. Ngat kame orio oneko abino mine emato pi me atan me kuo abongo cul moro.

⁷ Jo kame bino lono bino udo gi nogi, di ango ako bino bedo Rubanga gi kede gida kiko bino bedo idwe na.

⁸Do jo kame lwor, jo kame yei gi opoto, jo kame omunaun, jonek, jocar, jojwogi, jo kame woro cal jwogi, kede joangalo dedede, kabedo gi bino bedo nam kame liel mac kede salupa, en to me are.”

Yerusalem Anyen

⁹Di malaika acel kikom imalaikan kanyaare nogo, kame oudo tie kede bakulin kanyaare me egere me can kanyaare me ajikini, oko bino buta di eko waco na be, “Bia, abino nyuto ni Ateran, dako me Katin Romo.”



- 10**Twer me Tipo oko uma di malaika nono oko tera i wi moru abor. En eko nyuto na Yerusalem bomba kacil di tie bino piny wok ki malo but Rubanga,
- 11**di erieny kede deyo ka Rubanga. Rieny mere oudo cal bala kidi me wel kalikame neeno atatai, bala kidi kame kolwongo be jesipa, di emilimili bala akako.
- 12** Oudo etie kede twon apama kame bor malo, kame oudo tie kede irutei tomon kiwie are, kame imalaikan tomon kiwie are lo. Oudo kowandiko nying atekerin tomon kiwie are me jo me Isirael i wi irutei nogo;
- 13**tetu kide oudo tie iye irutei adek, tetu malo oudo tie iye irutei adek, tetu piny oudo tie iye irutei adek, kede tetu potoceng oudo tie iye irutei adek.
- 14**Apama me bomba nono oudo kogero i wi ingaroi tomon kiwie are me acakini me gedo, kame oudo kowandiko i kom gi nying joor tomon kiwie are me Katin Romo.
- 15** Malaika kame oyamo keda oudo tie kede lilim kame kotimo kede saabu me pimo boro, pi pimo kede bomba kede irutei mege, kede apamai mege.
- 16**Bad ongwon dedede me bomba nono oudo rorom; nyime oudo rom kede ngete. Malaika nono oko pimo bomba kede lilim mere me pim, en eko udo boro mere tie mairo tutumia acel kede tol kany; laco kede boro mere malo da rom kamanono.
- 17**En eko da pimo apama mere, di eko udo boro mere malo tie puti tol are kede tomon kiwie kanyape, manono oudo upere kede epone kame jo pimo kede.
- 18** Oudo kogero apama mere kede kidi kame kolwongo be jesipa, do bomba oudo kogero kede saabu kame milimili bala gilasi.
- 19**Kotubuso acakini me apama me bomba nono kede kide me wel amalo; me agege oudo obedo kidi kame kolwongo be jesipa, me are sapir, me adek agate, me ongwon emeradi,
- 20**me kany mere onik, me kanyape karenelia, me kanyaare kirisolit, me kanyauni beril, me kanyangon topas, me tomon kirisopures, me tomon kiwie acel jasinti, me tomon kiwie are ametisit.
- 21**Irutei tomon kiwie are nogo oudo obedo kide tomon kiwie are me wel amalo. Erute acelacel kikom gi oudo kotimo kede kidi me wel amalo. Gudo me bomba nono oudo kotimo kede saabu kicararai bala gilasi.
- 22**Likame aneno tempulo moro i bomba nono, pien tempulo mere en Rwot Rubanga Won Twer kede Katin Romo.
- 23** Doko rieny me ceng amoto duwe likame mitere i bomba nono, pien deyo ka Rubanga en obedo lero mere, kede etala mere en Katin Romo.
- 24** Atekerin dedede bino bedo i lero mere, kede abakai me wi lobo bino tero deyo gi iye.
- 25** Likame kobino cego irutei mege iceng, doko iwor likame bino bedo tie kuno.



²⁶Jo bino tero iye deyo kede abar me atekerin.

²⁷Do likame tie gi kalikame cil kame bino donyo iye, akadi ngatamoro kame timo tim me emuna arabo kame yamo kop me abe, do kenekene jo kame kowandiko nying gi i itabu me kuo, itabu me Katin Romo, en kame bino donyo iye.

Gianyuta 22

¹Di malaika nono oko nyuto na ecilet me pi me kuo, kame milimili bala akako, di etie mol wok ki kom me Ajakanut ka Rubanga, kede ki me Katin Romo,

²di elubo cuny gudo me bomba. Tuni kede tuni me ecilet nono oudo tie iye yat me kuo, kame nyak tien tomon kiwie are i mwaka acel; kicel buli duwe. Pote me yat nono tie pi cango me atekerin.

³Likame tie gimoro kame kolamo kame doko bino udere kuno. Kom me Ajakanut ka Rubanga kede me Katin Romo bino bedo tie i bomba nono; jotic mege bino wore.

⁴Gin kibino neno wange, doko kobino wandiko nyinge i tur nyim gi.

⁵Iwor likame bobo bino bedo tie, doko likame kibino mito lero me etala amoto ceng, pien Rwot Rubanga bino bedo lero gi, di gin kiko bino pug ikar kede ikar.

⁶Di en eko waco na be, “Kope nogi genere doko kitie me ateni, pien Rwot Rubanga ngat kame mio inabin Tipo mere, otieko cwano malaika mere pi nyuto ne jotic mege gikame miero timere i kare kiyapiyapi.”

⁷”Neningo, ango atie bino awakawaka! Etie kede winyo ngat kame lubo imurai kame tie i itabu noni.”

⁸Ango Yokana en kame awinyo doko aneno gi nogi. Kakame awinyo gi kede doko di ako neno gi, ako riebie piny i tien malaika pi wore.

⁹Do en eko waco na be, “Miero kur itim kamano! Ango da abedo ngatic bala in, karacel kede imiegu ni inabin, kede jo dedede kame lubo kop me itabu noni. Wor Rubanga!”

¹⁰Di en eko waco na be, “Kur imung kop me imurai me itabu noni, pien kare otieko doko iyapiyapi.

¹¹Ngat kame timo gikarac poore emeede timo gikarac, ngat kame tam mere omunaun wek emeede bedo kede tam komunaun, kede ngat kopoore wek emeede timo gi kopoore, kede ngat kacil meede bedo ngat kacil.”

¹²Yesu owaco be, “Neningo, ango atie bino awakawaka, atie kelo giamia na me pwoc, pi culo ngat acelacel pi gikame etimo.

¹³Ango en Alpa kede Omega, me agege kede me ajikini, acakini kede atiekini.”

¹⁴Kitie kede winyo jo kame lwoko ikanson gi di cil tetekeny kibed kede twero me camo anyakini me yat me kuo, kede me donyo i bomba di kibeo kiye irutei.



¹⁵Ooko me bomba tie iye jo kame cal bala igwogin kede jojwogi, jocar, jonek kede jo kame woro cal jwogi, kede jo dedede kame maro kede kame timo tim me angalo.

¹⁶“Ango Yesu, acwao malaika na buti kede kope nogi pi mino but ikodeta me jokirisito. Ango en alias ka Daudi kede akware, acer arieny me odiko.”

¹⁷Tipo kede Ateran waco be, “Bia.” Jo dedede kame winyo kop noni miero wac be, “Bia.” Ngat kame orio oneko, ebin; wek ngat kame cunye mito, egam pii me kuo abongo cul.

Kop kame Cego

¹⁸Ango akwenyaro jo dedede kame winyo kop me imurai me itabu noni be: ka ngatamoro omedo kop moro iye, Rubanga bino medo ne can kame kotatamo i itabu noni.

¹⁹Doko ka ngatamoro okwanyo gimoro ki kop kame komurao i itabu noni, Rubanga bino kwanyo iner ka ngat nono ki yat me kuo kede ki Bomba Kacil, kame kotatamo i itabu noni.

²⁰Ngat kame omio ijura me gi nogi waco be, “Ateteni ango atie bino awakawaka.” Amen. Bia, Rwot Yesu!

²¹Kisa ka Rwot Yesu bed kede jo ka Rubanga dedede. Amen.



Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil